

Holy Bible

Aionian Edition®

**Kisin Kiraan Kitabuna
Yalunka Bible**

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ®
Kisin Kiraan Kitabuna
Yalunka Bible
Language: Yalunka
Guinea, Sierra Leone, Mali, Senegal

Creative Commons Attribution ShareAlike 4.0 International, 2018-2026

Source text: eBible.org

Source version: 8/8/2026

Source copyright: Creative Commons Attribution ShareAlike 4.0

Pioneer Bible Translators, 2012

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>
Volunteer help and comments are welcome and appreciated!

Celebrate Jesus Christ's victory of grace!

Preface

Jalonke at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Jalonke at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

OLD TESTAMENT

Dunuḡa Fəlonə	11
Xəɾəyana	51
Saraxaraline	82
Yatene	104
Sariyane	136
Yosuwe	162
Kitisane	181
Ruti	200
Samuyəli Singena	203
Samuyəli Firindena	227
Mangane Singena	248
Mangane Firindena	274
Taruxune Singena	298
Taruxune Firindena	322
Esirasi	350
Neyemi	359
Esita	371
Yuba	377
Yaburina	397
Sandane	443
Karaməxəna	461
Marafanna Falane	467
Esayi	471
Yeremi	512
Mawuga Xuine	557
Esekiyəli	561
Daniyəli	603
Hose	615
Yowəli	621
Amosi	624
Abadi	629
Yunusa	630
Mike	632
Nahun	636
Xabakuki	638
Sofoni	640
Xage	642
Sakari	644
Malaki	651

NEW TESTAMENT

Matiyu	657
Maraka	684
Luka	701
Yoni	730
Kəwanle	752
Romi Kaane	780
Kərənti Singena	792
Kərənti Firindena	804
Galati Kaane	812
Efəsi Kaane	816
Filipi Kaane	820
Kələsi Kaane	823
Tesaloniki Singena	826
Tesaloniki Firindena	829
Timote Singena	831
Timote Firindena	835
Tito	838
Filemən	840
Heburune	841
Yaki	850
Piyəri Singena	853
Piyəri Firindena	857
Yoni Singena	859
Yoni Firindena	862
Yoni Saxandena	863
Yudi	864
Lankenəmayana	865

APPENDIX

Reader's Guide

Glossary

Maps

Destiny

Illustrations, Doré

OLD TESTAMENT



A to Adama kedi, Ala yi maleka gubugubu kanne ti Eden sogeteden binna ra.
A mən yi silanfanna tɛɛ daxin lu mɛnni naxan a firifirima na longonni
kiraan kantan xinla ma siga siimaya wudin yireni.
Genesis 3:24

Dunuja Fəlonə

1 A fəloni, Ala yi kore xonna nun bəxo xonna da.
2 Dunuja mi yi yitonxi nun. A magenla nan yi a ra. Dimin nan yi na fufaan xun ma, koni Alaa Nii Sarjıanxin yi a masigama igen xun ma. **3** Ala yi a fala, a naxa, “Kenenna xa mini.” Kenenna yi mini. **4** Ala yi a mato, na kenenna fanxi. Ala yi kenenna nun dimini taxun. **5** Ala yi kenenna xili sa “yanyina.” A yi dimin xili sa “kəna.” Kəe yi so, kuye yi yiba, ləxo singen nan na ra. **6** Ala yi a fala, a naxa, “Kore walaxan xa lu bəxo igen nun kore igen tagi.” **7** Na yi findi naninna ra bəxo igen nun kore igen tagi. A liga na kii nin. **8** Ala yi naninni ito xili sa “kore xonna.” Kəe yi so, kuye yi yiba, ləxo firinden nan na ra. **9** Ala yi a fala, a naxa, “Bəxo igen xa a malan yire kedenni. Xaren xa maba.” A liga na kii nin. **10** Ala yi na xaren xili sa “bəxəna.” A yi na bəxo igen xili sa “baana.” Ala yi a mato, na fanxi. **11** Ala yi a fala, a naxa, “Soli seene xa mini bəxo ma. Sansiin birin xa soli, naxan yo naxan, bənsən kedenni. Sansi xonna naxan na sansi bogin kui, a solima nən birin nun a bənsənnə.” A liga na kii nin. **12** Ala yi sansiin birin nasoli bəxo fari. Sansi xonna naxan na sansi bogin kui, a yi soli e nun a bənsənnə. Ala yi a mato, na fanxi. **13** Kəe yi so, kuye yi yiba, ləxo saxanden nan na ra. **14** Ala yi a fala, a naxa, “Yanban seene xa lu kore ma, yanyin nun kəen taxun feen na. Waxatin birin kolonma yanban seene sabun nan na. Xii yo xii, jee yo jee a kolonma yanban seene sabun nan na. **15** E xa dege kore ma, e bəxəni yalan.” A liga na kii nin. **16** Ala yi nayiyalanse xungbe firin nafala. Naxan xungbo han, na xa yanyin yamarin naba. Naxan xurun, na xa kəen yamarin naba. A yi sarene fan nafala. **17** Ala yi yanban seene sa kore ma alogo e xa bəxəni yalan, **18** e yi yanyin nun kəen yamarin naba, e yi dimin nun kəenni taxun. Ala yi a mato, a fanxi. **19** Kəe yi so, kuye yi yiba, ləxo naaninden nan na ra. **20** Ala yi a fala, a naxa, “Igen xa yimaxa niimaseene ra. Xəline xa tujan kore.” **21** Ala yi yexe xungbene da e nun niimaseen birin igeni, naxan yo naxan bənsən kedenni. A yi xəline fan da, naxan yo naxan bənsən keden. Ala yi a mato, a fanxi. **22** Ala yi barakan sa e fe yi, a yi a fala e xa, a naxa, “E xa wuya, e yi yiriwa alogo yexene xa baan nafe. Xəline fan xa gbo bəxo ma.” **23** Kəe yi so, kuye yi yiba, ləxo suulunden nan na ra. **24** Ala yi a fala, a naxa, “Niimaseene xa lu bəxo ma. Birin xa lu

e nun a bənsənnə. Xuruseene nun bubuseene nun burunna subene, e birin xa lu e nun e bənsənnə.” A liga na kii nin. **25** Ala yi burunna subene da naxan yo naxan bənsən keden. A yi xuruseene da naxan yo naxan bənsən keden. A yi bubuseene da naxan yo naxan bənsən keden. Ala yi a mato, a fanxi. **26** Ala yi a fala, a naxa, “En xa adaman da en yete misaala ra en maligan na. A xa senben soto yexene nun xəline nun xuruseene nun bəxo nun bubuseene xun na.” **27** Ala yi adaman da a yete misaala ra. A e daxi Ala misaala nan na, a e da xemen nun jaxanla. **28** Ala yi barakan sa e fe yi, a yi a fala e xa, a naxa, “E wuya ayi, e yi yiriwa alogo bəxo xa rafe. E senben soto bəxo nun yexene nun xəline nun bubuseene xun na.” **29** Ala yi a fala, a naxa, “N bata sansiin birin nun sansi bogin birin fi e ma balon na. **30** N bata sansiin birin fi subene ma naxanye bəxo ma, e nun xəline nun bubuseene nun niimaseene, naxan yo yengima. Sansiin birin bata findi e balon na.” A liga na kii nin. **31** Ala yi a daliseene birin mato, a fanxi han! Kəe yi so, kuye yi yiba, ləxo senninden nan na ra.

2 Kore xonna nun bəxo xonna daxi na kiini e nun e kui seen birin. **2** Ləxo soloferedeni Ala wanla yi kamali. A yi a matabu. **3** Ala yi barakan sa na ləxo soloferedena fe yi, a xa findi ləxo sarjıanxin na bayo a matabuxi na ləxo nin. A wanla kamalixi na ləxo nin. **4** Kore xonna nun bəxo xonna taruxun ni i ra, e daxi waxatin naxan yi. Marigina Alatala bəxo nun kore nafala waxatin naxan yi, **5** soli se yo mi yi na. Sansi yo mi yi na naxan solixi bəxo ma bayo Marigina Alatala munma yi tule igen nagodo singen. Adaman fan mi yi na naxan bəxo nawalima. **6** Koni xuyexuyenna yi minima bəxo fari, a bəxəni kun. **7** Marigina Alatala yi adaman nafala bendən na. Na xanbi ra, a yi niin fe a jəni, adaman yi findi dajəxo na. **8** Na xanbi Marigina Alatala yi nako fajin nafala sogeteden mabinni. Na yiren xili Eden. A yi adaman doxo mənni. **9** Marigina Alatala yi wudin siyaan birin nasoli mənni, wudin naxan tofan, wudin naxan bogi donma a fajin na. Na yiren tagi, wudi firin yi na yi. Kedenna xili siimaya wudina. A firinden xili fe fajin nun fe jaxin kolon wudina. **10** Xuden yi mini Eden nakəni soli seene xa, a yi taxun, a findi xude naaninna ra. **11** Na xude singen xili Pison. A danguma Xawila bəxo birin ma, xəmaan dənaxan yi. **12** Na xəmaan fan. Wudi igen xiri jaxumen fan na, e nun

geme tofajin naxan xili onixin. **13** Na xude firinden xili Gihon. A danguma Kusi bōxōn birin ma. **14** Na xude saxanden xili Tigiri. A danguma Asuri bōxōn ma a sogeteden binna ra. Na xude naaninden xili Efirati. **15** Marigina Alatala yi adaman dōxō Edēn nakōni nēn alogo a xa na yiren nawali, a yi a kantan. **16** Marigina Alatala yi yamarin so Adama yii, a naxa, “I nōē wudini itoe bogin birin donjē naxan Edēn nakōni, **17** koni i nama fe fajin nun fe jaxin kolon wudin bogin don, bayo i na a don, i faxama nēn.” **18** Marigina Alatala yi a fala, a naxa, “A mi lan xēmen xa lu be a kedenna. N na a mali muxu fajin dama nēn a xa.” **19** Burunna subene birin e nun xoline birin Marigina Alatala naxanye rafalaxi benden na, a yi e xali adaman fēma a xa e xili sa. Adaman e xili sa kii naxan yi, na yi findi e xinle ra. **20** A yi xuruseene birin nun xoline birin nun burunna subene birin xili sa. Koni na waxatini Adaman munma yi a mali muxu fajin soto singen. **21** Marigina Alatala yi xixōnla radangu a ma. A yi a raxi ki fajni. A to xi, Marigina Alatala yi a jnēsen xōri keden ba. A yi na ragali. **22** Na xanbi, na jnēsen xōnna naxan kelixi adaman yi, Marigina Alatala yi na findi jaxanla ra, a yi fa a ra adama xōn. **23** Adama yi a fala, a naxa, “Iki, ito fataxi n xōnna nan na. A mōn fataxi n fatin nin. A xinla falama nēn ‘jaxanla,’ bayo a minixi xēmeni nēn.” **24** Nanara, xēmena a nga nun a fafe bejinma, a yi a maso a jaxanla ra, e findi fati bēndē kedenna ra. **25** Xēmen nun a jaxanla magenla nan yi a ra nun, koni e mi yi yagima na ra.

3 Sajin nan yi kōta Marigina Alatalaa daliseene birin xa. A yi jaxanla maxōdin, a naxa, “Nōndin na a ra ba, Ala bata a fala, fa fala wudi binla naxanye birin Edēn nakōni, ē nama e bogin don?” **2** Jaxanla yi a yabi, a naxa, “Wudin naxanye Edēn nakōni, nxu nōē e bogin donjē nēn, **3** koni wudin naxan Edēn nakōn tagiyani, nxu mi nōē na bogin donjē, nxu mi nōē nxu yiin dinjē a ra. Xa na liga nxu faxama nēn.” **4** Sajin yi a fala jaxanla xa, a naxa, “En-en del I mi faxama. **5** Ala a kolon, i na a don, i yēen nabima nēn. I fama fe fajin nun fe jaxin kolondeni nēn alo Ala yetena.” **6** Jaxanla to wudi bogin mato, a tofan, a fan donseen na, a fan xaxili soto seen na, a yi a tongo. A yi a don. A yi nde tongo, a sa a so a xēmen yii, naxan yi a fēma. A fan yi a don. **7** Na waxatini e yēen yi rabi. E yi a kolon, a e magenla nan yi a ra. E yi xōdē dēene gira, e yi e dēge dugin na. **8** Na xanbi ra, xēmen nun a

jaxanla yi Marigina Alatala sigati xuiin mē nakōni jinbaridēen foye fajini. E yi e luxun wudine tagi. **9** Marigina Alatala yi a xili, a naxa, “Adama, i minen yi?” **10** Adaman yi a ratin, a naxa, “N bata i xuiin mē Edēn nakōni, koni n bata gaxu, bayo n magenla na a ra. Awa, n bata n luxun.” **11** Ala yi a maxōdin, a naxa, “Nde a yitaxi i ra a i magenla na a ra? I bata na wudi bogin don ba, n na i yamarixi naxan ma fe ra a i nama a don?” **12** Adaman yi a yabi, a naxa, “Na jaxanla i naxan soxi n yii, na bata na wudi bogin so n yii, n yi a don.” **13** Na xanbi, Marigina Alatala yi jaxanla maxōdin, a naxa, “I nanse ligaxi?” Jaxanla yi a yabi, a naxa, “Sajin nan n mayendenxi han n na a don.” **14** Awa, Marigina Alatala yi a fala sapin xa, a naxa, “I to bata ito liga, awa, n fan bata i danga xuruseene nun burunna subene birin tagi. I findima bubuseen nan na i kuiin xun na. I gbangbanna nan donma i ya dunuja yi gidini. **15** N bata yaxuyaana so i tan nun jaxanla tagi. N bata a raso i ya diine nun a diine fan tagi. Na jaxanla diina i xunni wuruma nēn, i fan yi a sanna maxolo.” **16** Ala yi a fala jaxanla xa, a naxa, “I fan, i tōrōma nēn i ya dii barideni. Na tōrōn gboma ayi nēn. I birama nēn i ya xēmen fōxō ra. A i yamarima nēn.” **17** Ala yi a fala Adama xa, a naxa, “I bata bira i ya jaxanla fōxō ra. I bata na wudin bogin don, n na i yamarixi wudin naxan ma fe ra, a i nama na don. Iki n bata bōxōn danga i ya fe ra. I tōrōma nēn balo sōtōdeni i ya dunuja yi gidini. **18** N jnanle nun tansinne raminima nēn bōxōn ma, koni i baloma siseene nan xōn xēen ma. **19** I balon sōtōma i kuye wolonna nin han i xetema bōxōni waxatin naxan yi, bayo i kelixi na bōxōn nin. Benden ni i ra, i mōn xetema na benden nin.” **20** Adaman yi a jaxanla xili sa Nmahawa bayo a findima muxun birin nga nan na. **21** Marigina Alatala yi dugin kidi daxina nde dēge Adama nun a jaxanla xa. A yi na ragodo e ma. **22** Marigina Alatala yi a fala, a naxa, “Adaman bata findi alo en tan, bayo a bata fe fajin nun fe jaxin kolon. A mi daxa a xa siimaya wudi bogin don, xa na mi a ra a mi faxama nun.” **23** Marigina Alatala yi e ramini Edēn nakōni, a e xa sa bōxōn nawali e fataxi naxan na. **24** A to Adama kedi, Ala yi maleka gubugubu kanne ti Edēn sogeteden binna ra. A mōn yi silanfanna tēē daxin lu menni naxan a firifirima na longonni kiraan kantan xinla ma siga siimaya wudin yireni.

4 Adama yi Nmahawa kolon jaxanla ra. Nmahawa yi fudikan. E yi diin soto naxan xili Kayini. Nmahawa yi a fala, a naxa, “Alatala bata n mali dii xemen soto feen na.” **2** Na xanbi, Nmahawa yi Kayini raburunna soto dii xemena, naxan yi xili Habila. Habila, xuruse rabaan nan yi a ra. Kayini, xee biin nan yi a ra. **3** Na waxatin to dangu, Kayini yi fa sansi bogina ndee ra, a ne ba saraxan na Alatala xa. **4** Koni Habila yi fa xuruse dii singen na e nun a turena. Alatala yi Habila nun a saraxan nasuxu, **5** koni a mi Kayini nun a saraxan nasuxu. Awa, Kayini yi xolo. A yetagin yi masara. **6** Na xanbi, Alatala yi Kayini maxodin, a naxa, “Nanfera i xoloxi? Nanfera i yetagin masaraxi? **7** Xa i fe fapin liga, n na rasuxuma nen, koni xa i fe jaxin liga, yulubina i ya deen na, a i mamelenma. I kata, i yi a no.” **8** Kayini yi a fala a xunyen xa, a naxa, “En siga xeen ma.” E to so xeen ma, Kayini yi a xunyen Habila suxu. A yi a faxesa. **9** Na xanbi Alatala yi Kayini maxodin, a naxa, “I xunyen Habila minen yi?” A yi a yabi, a naxa, “N mi a kolon. N tan nan n xunyen kantan muxun na ba?” **10** Ala yi a fala, a naxa, “I nanse ligaxi? I tuli mati. I xunyen wunla n gbelegbelema boxoni. **11** N bata i danga bayo i bata i xunyen faxesa. N na i kedima nen boxoni ito ma i xunyen wunla denaxan yi. **12** I na boxon nawali, i mi balon sotoma. I findima sigatiin nan na.” **13** Kayini yi a fala Alatala xa, a naxa, “Na haken goronna gbo n tan xun ma. **14** Xa i bata n kedi to, n mi i toma sonon. N findima sigatiin nan na. Muxun naxan sa n toma, a n faxama nen.” **15** Alatala yi a yabi, a naxa, “En-en, xa muxu yo i faxesa, n na i gbeen jaxoma nen daxona ma solofere.” Alatala yi taxamasenna sa Kayini ma alogo xa naxan sa a to, a nama a faxesa. **16** Awa, Kayini yi a makuya Alatala ra. A sa dexo Nodi boxoni Eden nakoon sogetede binna ra. **17** Kayini yi a jaxanla kolon jaxanla ra. A jaxanla yi fudikan. A yi diin soto naxan xili Xanoki. Kayini yi taan ti na yi. A yi a diin xili sa na taan xun ma. **18** Xanoki nan Yiradi soto. Yiradi yi Mehuyayeli soto. Mehuyayeli yi Metusayeli soto. Metusayeli yi Lameki soto. **19** Lameki yi jaxalan firin tongo. Kedenna xili Ada. Boden xili Sila. **20** Ada yi Yabali soto. Yabali, xuruse rabane nun bubu kanne baba nan yi a ra. **21** Yabali xunyen xili Yubali. Yubali, kondan maxane nun xulen fene baba nan yi a ra. **22** Sila fan yi diin soto. A xili Tubali-Kayini. A tan, xabun nan yi a ra. A yi waliseen sifan birin nafalama sulan na, e nun wurena. Tubali-Kayini xunyen jaxalanmaan yi xili Nama. **23**

Lameki yi a fala a jaxanle xa, a naxa, “Ada nun Sila, e tuli mati. Lameki a jaxanle, e e tuli mati n ma falan na. N bata xemena nde faxesa n gbeen jaxon na. N bata na banxulanna faxesa bayo a bata n maxolo. **24** Xa Kayini daxesa a gbeen jaxo daxonja ma solofere, Lameki a gbeen jaxoma nen daxonja ma tonge solofere e nun solofere.” **25** Adama yi a jaxanla kolon jaxanla ra. A yi diin soto naxan yi xili Seti. A na xili sa bayo Ala bata a diin Habila jaxo so a yii Kayini naxan faxesa. **26** Seti fan yi diin soto naxan xili Enosi. Na waxatini, muxune yi Alatala xinla binya folo.

5 Adama bomsonna taruxun ni ito ra. Ala to Adama da, a a findi a yete maligan na, **2** a e da xemen nun jaxanla. A e baraka. A e xili sa “Adamana.” **3** Adama to fori jee keme jee tonge saxon, a yi diin soto a yete maligan na naxan maso a ra. A yi a xili sa Seti. **4** Seti bari xanbini, Adama yi bu jee keme solomasexe. A mon yi dii xemen nun dii teme gbeteye soto. **5** Adama a siimayaan yi siga jee keme solomanaanin jee tonge saxon. Na xanbi ra, a yi faxesa. **6** Seti to bu jee keme jee suulun, a yi Enosi bari. **7** Enosi bari xanbini, Seti yi bu jee keme solomasexe jee solofere. A mon yi dii xemen nun dii teme gbeteye soto. **8** Seti a siimayaan yi siga jee keme solomanaanin jee fu nun firin. Na xanbi ra, a yi faxesa. **9** Enosi to bu jee tonge solomanaanin, a yi Kenan bari. **10** Kenan bari xanbini, Enosi yi bu jee keme solomasexe jee fu nun suulun. A mon yi dii xemen nun dii teme gbeteye soto. **11** Enosi a siimayaan yi siga jee keme solomanaanin jee suulun. Na xanbi ra, a yi faxesa. **12** Kenan to bu jee tonge solofere, a yi Mahalaleli bari. **13** Mahalaleli bari xanbini, Kenan yi bu jee keme solomasexe jee tonge naanin. A mon yi dii xemen nun dii teme gbeteye soto. **14** Kenan ma siimayaan yi siga jee keme solomanaanin jee fu. Na xanbi ra, a yi faxesa. **15** Mahalaleli to bu jee tonge sennin e nun suulun, a yi Yaredi bari. **16** Yaredi bari xanbini, Mahalaleli yi bu jee keme solomasexe jee tonge saxon. A mon yi dii xemen nun dii teme gbeteye soto. **17** Mahalaleli a siimayaan yi siga jee keme solomasexe jee tonge solomanaanin jee suulun. Na xanbi ra, a yi faxesa. **18** Yaredi to bu jee keme jee tonge sennin e nun firin, a yi Xanoki bari. **19** Xanoki bari xanbini, Yaredi yi bu jee keme solomasexe. A mon yi dii xemen nun dii teme gbeteye soto. **20** Yaredi a siimayaan yi siga jee keme solomanaanin jee tonge sennin e nun firin. Na xanbi ra, a yi faxesa. **21** Xanoki to

bu jee tonge sennin jee suulun, a yi Matusela bari. **22** Matusela bari xanbini, Xenoki yi bira Ala foxo ra jee keme saxan. A mon yi dii xemen nun dii teme gbete ye soto. **23** Xenoki a siimayaan yi siga jee keme saxan jee tonge sennin e nun suulun. **24** Xenoki yi sigan tima e nun Ala. Na xanbi ra, a mi lu na sonon, bayo Ala bata a xali, a mi faxesa. **25** Matusela to bu jee keme jee tonge solomasexe jee solofere, a yi Lameki bari. **26** Lameki bari xanbini, Matusela yi bu jee keme solofere jee tonge solomasexe e nun firin. A mon yi dii xemen nun dii teme gbete ye soto. **27** Matusela a siimayaan yi siga jee keme solomanaanin jee tonge sennin e nun solomanaanin. Na xanbi ra, a yi faxesa. **28** Lameki to bu jee keme jee tonge solomasexe e nun firin, a yi diin soto. **29** A yi a xili sa Nuhan. A yi a fala, a naxa, “A tan nan a ligama en jinan en ma toron nun en ma wanla ra, bayo Alatala bata boxon danga.” **30** Nuhan bari xanbini, Lameki yi bu jee keme suulun jee tonge solomanaanin jee suulun. A mon yi dii xemen nun dii teme gbete ye soto. **31** Lameki a siimayaan yi siga jee keme solofere jee tonge solofere e nun solofere. Na xanbi ra, a yi faxesa. **32** Nuhan to bu jee keme suulun, a yi Semi nun Xami nun Yepeti soto.

6 Muxune wuya folo boxon fari waxatin naxan yi, e yi dii temene bari. **2** Dajoxon naxanye fata Ala konna ra, na ndee yi yabu dii temene ra, bayo e tofan. E yi ndee ye matongo, e yi e findi e naxanle ra. **3** Na xanbi ra, Alatala yi a fala, a naxa, “N mi tinje n ma Niin xa bu adaman fatini habadan, bayo daliseen na a ra. A mi danguma jee keme jee moxojen na.” **4** Na waxatini, e nun waxatin naxan fa na xanbi ra, Nefilimi muxu magaxuxine nan yi na dunuja yi. Na dajoxone nun na dii temene nan ne barixi. E findi sofa magaxuxine nan na na waxatine yi e nun xili kanne. **5** Alatala yi a to adamadina jaxuyaana bata gbo ayi boxon fari. A miriyane findixi fe kobin nan na waxatin birin. **6** Na yi Alatala toro han a yi nimisa adaman da feen na. Na yi a bojen toro. **7** Alatala yi a fala, a naxa, “Adaman birin n naxan daxi, n na birin janma nen dunuja yi. Muxu ba, sube ba, bubuse ba, xoliin naxan tunganma kore ba, n na birin naxorima nen dunuja yi, bayo n bata nimisa adaman da feen na.” **8** Koni, Nuhan yi rafan Alatala ma. **9** Nuhan bonsonna taruxun ni ito ra. Muxu tinxinxin nan yi Nuhan na na waxatini. Fe yo mi yi a ra. A yi biraxi Ala foxo ra. **10** Nuhan dii saxan nan soto: Semi nun Xami

nun Yepeti. **11** Dunuja bata yi kala Ala yee ra yi. A bata yi rafe fe jaxin na. **12** Ala yi dunuja to, a kalaxi, muxun birin fe jaxin foxo ra. **13** Awa, Ala yi a fala Nuhan xa, a naxa, “N waxi adaman birin naxori feni dunuja yi, bayo dunuja bata rafe fe kobin na. N waxi adaman birin nun boxon birin kala feni. **14** Awa, i xa Goferi wudin nafala kunkin na. Konkone xa lu a kui. I dolen sa a kuiin nun a fanna ma. **15** I xa a rafala i kiini: A kuyan xa findi nongonna ye keme saxan na, a yigbona tonge suulun, a yitena tonge saxan. **16** I a xunna soon nafala. A xa dangu nongonna yena ma keden na. I a deen ti a dexon ma. I xa kunkin kuini taxun dajoxa ma saxan.” **17** “N tan igen nadinma nen dunuja yi. A muxun birin halagi. Niimaseen birin faxama nen. **18** Koni n bata layirin tongo i xa. I so kunkini ito kui, i tan nun i ya diine nun i ya naxanla, e nun i ya diine naxanle. **19** I xa fa daliseen sifan birin firin firinna ra, a xemen nun a gilena alogo e xa kisi. **20** Xoliin bonsonna birin firin firin, suben bonsonna birin firin firin, bubuseen bonsonna birin firin firin, e fama i xon, i yi e rakisi. **21** I xa donseen sifan birin xali kunkin kui. I xa sa a mara i tan xa e nun e fan xa.” **22** Nuhan yi a birin liga alo Ala a yamarixi kii naxan yi.

7 Alatala yi a fala Nuhan xa, a naxa, “So kunkin kui, i tan nun i ya denbayaan birin, bayo tinxin muxun nan i ra waxatini ito yi. **2** Sube radaxaxi yo sube radaxaxi, i xa na solofere raso kunkin kui, a xemen nun a gilena. Sube raharamuxi yo sube raharamuxi i xa na firin naso, a xemen nun a gilena. **3** Xoliin fan sifan birin, solofere tongo, a xemen nun a gilena, alogo daliseen sifan birin xa lu dunuja yi. **4** Xi solofere na dangu, n tulen nagodoma boxon ma nen, soge tonge naanin, koe tonge naanin. N niimaseen naxan birin daxi, na birin halagima nen.” **5** Nuhan yi na birin liga Alatala a yamari naxan na. **6** Fufaan mini waxatin naxan yi, Nuhan ma siimayaan jee keme sennin nan yi a ra. **7** Nuhan nun a diine nun a naxanla nun a diine naxanle yi keli igen yee ra, e yi so kunkin kui. **8** Sube radaxaxine nun sube raharamuxine, xoline nun bubuseene, **9** a xemen nun a gilena, e yi siga Nuhan fema firin firin. E yi so kunkin kui alo Ala a yamari Nuhan ma kii naxan yi. **10** Xii solofere dangu xanbini, na fufaan yi din dunuja ra. **11** Nuhan ma siimayaan yi jee keme sennin, kike firin, xi fu nun solofere. Igen naxan boxoni, na yi te folo, e nun igen naxan kore, na fan yi godo folo. **12** Tulen yi fa boxon ma soge

tonge naanin, kœ tonge naanin. **13** Na lœxo yeteni, Nuhan nun a diine, Semi nun Xami nun Yepeti e nun a naxanla nun a dii saxanne naxanle, ne birin yi so kunkin kui. **14** Burunna suben bœnsœnna birin nun xuruseen bœnsœnna birin nun bubuseen bœnsœnna birin nun xœliin bœnsœnna birin, e yi so kunkin kui. **15** Daliseen birin naxan yengima, a firin firin, e yi fa Nuhan fœma. E yi so kunkin kui. **16** Niimaseen birin, a xœmen nun a gilœna, e yi so kunkin kui alo Ala a yamari Nuhan ma kii naxan yi. Na xanbi ra, Alatala yi dœen balan. **17** Xi tonge naanin fufaan yi mini. A yi kunkini te. **18** Igen to gbo bœxœn ma, kunkin yi dœxo igen fari. **19** Igen yi te han a yi sa geyaan birin xun ma dunuƣa yi. **20** Igen yi sa geyane xun ma han nœngœnna yœ fu nun naanin. **21** Niimaseen naxanye birin yi dunuƣa yi, ne birin yi halagi: xœli yo, xuruse yo, burunna sube yo, bubuse yo, e nun adamadiin birin. **22** Niimaseen naxanye birin yi xaren na, naxanye yengima, ne birin yi halagi. **23** Niimaseen naxanye yi bœxo xœnna ma, na birin yi raxœri: adamadiine nun subene nun bubuseene e nun xœline, fœ Nuhan kedenna, e nun naxanye yi a fœma kunkin kui. **24** Fufaan yi din dunuƣa ra xii kœmœ xii tonge suulun.

8 Koni Ala yi a xaxili lu Nuhan xœn ma, e nun burunna subene, e nun xuruseen naxanye yi a fœma kunkin kui. Ala yi foyen nafa dunuƣa yi. Igen yi godo fœlœ. **2** Igen naxan yi kelima bœxœn bun ma, na yi dan. Igen naxan yi kelima kœre, na fan yi dan. **3** Lœxo yo lœxo fœ nde ba igen na. Xii kœmœ xii tongo suulunna bun ma, igen yi yelin gode. **4** Kike soloferen xii fu nun soloferedeni, kunkin yi dœxo geyaan fari, naxan xili Ararati. **5** Igen yi lu gode han kike fudeni. Kike fuden xii singe lœxœni, geyane xunne yi mini kenœnni. **6** Xii tonge naanin dangu xanbini, Nuhan yi kunkin foye soden nabi, a bata yi naxan nafala a ma. **7** A yi xaxaan bejin. Na yi a firifiri, han igen yi yelin gode. **8** Nuhan mœn yi ganban bejin, a xa sa igen mato xa a bata godo. **9** Koni na ganban mi san tide to, bayo igen yi dinxi dunuƣa birin na. A yi xetœ Nuhan ma kunkin kui. Nuhan yi ganban suxu a yiin na, a a raso kunkin kui. **10** A yi a mame han xii solofere. A mœn yi ganban bejin a firinden. **11** Ninbanna ra ganban yi xetœ Nuhan ma, oliwi wudi binla jœxœnde xinden suxi a dœœ ra. Awa, Nuhan yi a kolon a igen bata ba dunuƣa xun ma. **12** A mœn yi a mame xi solofere. A mœn yi ganban bejin, koni ganban mi xetœ a ma. **13** Nuhan

ma siimayaan to siga jœœ kœmœ sennin jœœ keden, kike keden, xi keden, fufaan yi jœan dunuƣa yi. Nuhan to kunkin xunna ba, a yi a to bœxœn maxaraxi. **14** Kike firin xi mœxœjœn nun solofere to dangu, bœxœn yi xara gben! **15** Ala yi a fala Nuhan xa, a naxa, **16** “œ mini kunkin kui, i tan nun i ya naxanla nun i ya diine, e nun i ya diine naxanle. **17** I xa niimaseen birin namini kunkin kui: xœline nun subene e nun bubuseene, alogo e xa wuya, e xa yiriwa dunuƣa yi.” **18** Awa, Nuhan yi mini, e nun a diine nun a naxanla nun a diine naxanle. **19** Subene fan yi mini e nun bubuseene nun xœline. Niimaseen birin, bœnsœn yo bœnsœn, e mini e danna. **20** Na xanbi ra, Nuhan yi saraxa ganden nafala Alatala xinli. A yi sube radaxaxina ndœœ tongo e nun xœli radaxaxina ndœœ. A yi ne ba saraxan na, ne yi sa tœœni. **21** Tutun to te, Alatala yi na gan xirin mœ. A yi rafan a ma. A yi a fala a bœjœni, a naxa, “N mi bœxœn dangama sœnœn adamana fe ra, bayo n na a kolon adama bœjœn mi fan xabu a dii jœœrya waxatini. N mi niimaseen birin halagima sœnœn alo n na singen liga kii naxan yi. **22** Fanni bœxœn daxi, xœœ bi waxatin nun se xaba waxatina, xunbenla nun kuye wolœnna, soœœ furen nun jœœmœna, yanyin nun kœœna, ne waxatine mi fa bama e kiini sœnœn.”

9 Na xanbi ra, Ala yi barakan sa Nuhan nun a diine fe yi. A yi a fala e xa, a naxa, “œ xa diin bari, œ xa wuya, œ xa bœxœn nafe. **2** Suben birin gaxuma œ yœœ ra nœn naxanye bœxœn ma, xœliin naxanye birin kœre, bubuseen birin, yœxœn naxan birin baani, œ luma nœn ne birin xun na. **3** Niimaseen naxan birin yengima e findima nœn œ balon na. N sansine so œ yii kii naxan yi a singeni, iki n bata niimaseen birin fan so œ yii na kiini.” **4** “Koni œ nama sube yifaxin don bayo a niin wunla a yi. **5** œ dentegen sama n xa niin wunla nan ma fe ra. Suben fan dentegen sama n xa niin wunla nan ma fe ra. Adaman dentegen sama n xa nœn a adaman boden niin wunla a fe ra. **6** Muxun naxan muxun niin bama, muxun nan a fan niin bama, bayo Ala bata adaman da a misaala ra. **7** œ xa diin bari, œ xa wuya, œ xa bœxœn nafe œ yi yiriwa ayi.” **8** Na xanbi ra, Ala yi a fala Nuhan xa e nun a diine, **9** a naxa, “N yetœen bata layirin tongo œ xa e nun œ mamandenne, **10** e nun niimaseen naxan birin yi œ fœma kunkin kui: xœline nun xuruseene nun burunna subene e nun niimaseen naxan birin dunuƣa yi. **11** N bata layirin tongo œ xa: fufaan mi niin birin bama sœnœn. Fufaan

mi dunuɲa birin kalama sɔnɔn.” 12 Ala yi a fala, a naxa, “N bata layirin tongo ε nun ε mamandenne xa e nun niimaseen birin xa. 13 N sengunna yitama nen koren ma, naxan findima layirin taxamasenna ra n tan nun bɔxɔn tagi. 14 N na tulen sa koren ma, sengunna minima nen. 15 Na waxatini na layirina fe rabirama n ma nen, n layirin naxan tongoxi ε xa e nun niimaseen birin xa. N mi niin birin bama dunuɲa yi fufaan na sɔnɔn. 16 Sengunna na mini koren ma, n na a to, na layirina fe rabirama n ma nen, layirin naxan luma habadan, n layirin naxan tongoxi ε xa e nun niimaseen birin xa naxanye dunuɲa yi.” 17 Awa, Ala yi a fala Nuhan xa, a naxa, “Sengunni ito findixi layiri taxamasenna nan na, n nun niimaseen birin tagi dunuɲa yi.” 18 Nuhan ma diin naxanye mini kunkin kui, e xili Semi nun Xami nun Yepeti. Kanan kaane baba nan yi Xami ra. 19 Muxun naxan birin wuyaxi dunuɲa yi, a kelixi Nuhan ma dii saxanne nin. 20 Nuhan xεε rawanla nan yi a ra. A yi manpa binla sansiin si langan kui. 21 Na sansiin to bogi, Nuhan yi manpaan nafala, a yi a min, a xunna yi keli. A yi a sa bubun kui a magenla ra. 22 Xami, Kanan kaane baba yi a baba magenla to. A yi na fala a tadane xa. 23 Semi nun Yepeti yi dugin tongo, e yi siga e xanbiraamaan na. E yi dugin sa e baba fari, koni e mi e baba magenla to. 24 Nuhan xunna to dɔxɔ, a keli, a yi a kolon a bolokada naxan ligaxi a ra. 25 Nuhan yi a fala, a naxa, “N bata Kanan danga. A findima konyi dɔnxɛn nan na a tadane xa.” 26 A mɔn yi a fala, a naxa, “N bata barikan bira Alatala xa, Semi a Ala. Kanan xa findi Semi a konyin na. 27 Ala xa Yepeti a bɔxɔn gbo ayi. Yepeti xa lu Semi a bubun kui. Kanan xa findi Yepeti a konyin na.” 28 Fufaan ɲan xanbini, Nuhan yi ɲεε keme saxan ɲεε tonge suulun sɔtɔ. 29 Nuhan ma siimayaan yi siga ɲεε keme solomanaanin ɲεε tonge suulun. Na xanbi ra, a yi faxa. Nuhan ma diine, Semi nun Xami nun Yepeti a taruxun nan na ra.

10 Nuhan ma diine bɔnsɔnne taruxun ni i ra, Semi nun Xami nun Yepeti naxanye diine bari fufaan dangu xanbini. 2 Yepeti a diine xinle ni itoe ra: Gomεre nun Magogo nun Madayi nun Yawani nun Tubali nun Meseki e nun Tirasi. 3 Gomεre a diine xinle ni itoe ra: Asikenasi nun Rifati nun Togarama. 4 Yawani a diine xinle ni itoe ra: Elisaha nun Tarasisi nun Sipiri nun Rodanimi. 5 Muxuni itoe diine yi dɔxɔ fɔxɔ igen dε. E na siga denaxan yi, e xabilayaan folo

menni. Na xabilane yi findi siya gbɛtene ra, birin nun e kon xuina. 6 Xami a diine xinle ni itoe ra: Kusi nun Misiran nun Puti nun Kanan. 7 Kusi a diine xinle ni itoe ra: Seba nun Xawila nun Sabata nun Raama nun Sabiteka. Raama a diine xinle ni itoe ra: Saba e nun Dedan. 8 Kusi fan diin sɔtɔ nen naxan xili Nimirodi. Na findi yengeso gbɛen nan na dunuɲa yi. 9 Nimirodi fan, donso gbɛen nan yi a ra Alatala yεε ra yi. Nanara, muxune a falama, e naxa, “I luxi alo Nimirodi, donso gbɛen nan yi a ra Alatala yεε ra yi.” 10 A mangayaan liga nen taani itoe ma singen: Babilɔn nun Ereki nun Akadi nun Kalene taan naxan Sinari bɔxɔni. 11 A yi keli Sinari yi, a yi siga Asiriya bɔxɔni. Menni, a yi taane ti naxanye xili Niniwa nun Rehoboti nun Iri nun Kala 12 e nun Resen, taa gbɛen naxan Niniwa nun Kala tagi. 13 Misiran yi findi muxuni itoe benban na: Ludu kaane nun Anami kaane nun Lehaba kaane nun Nafatu kaane 14 nun Patirusu kaane nun Kasaluxu kaane, Filisidine keli denaxan yi, e nun Kafatoro kaane. 15 Kanan yi findi muxuni itoe baba ra: Sidɔn, a dii singena, e nun Xitine 16 nun Yebusune nun Amorine nun Girigasane 17 nun Xiwine nun Arakane nun Sini kaane 18 nun Arawada kaane nun Semara kaane nun Xamata kaane. Na xanbi ra, Kanan bɔnsɔnne birin yi xuya ayi. 19 Kanan bɔxɔn naninna yi kelixi Sidɔn han sa dɔxɔ Gerari taan na, a yi siga han Gasa, a yi dangu Sodoma nun Gomora nun Adamaha nun Seboyimi yi, han sa dɔxɔ Lasa ra. 20 Xami a muxune ni itoe ra, fata e bɔnsɔnna nun e xuiin na e nun e bɔxɔne, e nun e siyane. 21 Semi, Yepeti tada fan yi diine sɔtɔ. Semi findi Eberi a diine benban nan na. 22 Semi a diine xinle ni itoe ra: Elan nun Asuri nun Arapaxadi nun Ludu e nun Arami. 23 Arami a diine xinle ni itoe ra: Yusu nun Xulu nun Geteri e nun Meseki. 24 Arapaxadi yi Selaxa sɔtɔ. Selaxa yi Eberi sɔtɔ. 25 Eberi yi dii firin sɔtɔ. Keden xili Pelegi bayo dunuɲa yitaxun a waxatin nin. A xunyen xili Yokatan. 26 Yokatan ma diine xinle ni itoe ra: Alomodadi nun Selefa nun Xasaramaweti nun Yera 27 nun Hadoran nun Yusali nun Dikila 28 nun Obala nun Abimayeale nun Saba 29 nun Ofiri nun Xawila nun Yobabo. Ne birin baba nan yi Yokatan na. 30 E bɔxɔn yi kelixi Mesa sa dɔxɔ han Sefare, naxan geyaan sogeteden binni. 31 Semi a diine ni i ra, fata e bɔnsɔnne nun e xuine nun e bɔxɔne nun e siyane ra. 32 Nuhan ma diine bɔnsɔnne nan ne ra e siyane yεen ma. Fufaan dangu xanbini, bɔnsɔnni itoe yi findi siyane birin na dunuɲa yi.

11 Na waxatini, dunuḡa birin yi xui keden nan falama. **2** Muxuna ndee to siga sogeteden binni, e yi dɔxɔ Sinari lanbanni. **3** E yi a fala e bode xa, e naxa, “En siga, en xa bitikidin bɔnbɔ, en xa a gan.” E yi bitikidine dɔxɔ gemene jɔxɔni. E yi dolen findi bitikidi dɔxɔ seen na. **4** Na xanbi ra, e yi a fala, e naxa, “En siga, en xa taan ti en yete xa, e nun sanganso gbeen naxan tema han kore, alogo en xinla xa gbo ayi. Nanara, en nama xuya ayi dunuḡa xun xɔn.” **5** Koni Alatala yi godo na taan nun sanganso gbeen matodeni muxune naxan ti. **6** Alatala yi a fala, a naxa, “Muxuni itoe, naxanye siya keden, xui keden a ra, xa ne bata wanli ito folɔ, wanla birin e waxi naxan ke feni sɔnɔn, e na ligama nɛn. **7** En siga, en godo e xuiin basandeni alogo e nama e bode xuiin me.” **8** Alatala yi e raxuya ayi. Na taan ti feen yi dan. **9** Na yiren yi xili Babeli, bayo Alatala bata dunuḡa xuine basan e bode ra na yi. Folɔ menni, Alatala yi e raxuya ayi dunuḡa birin ma. **10** Semi bɔnsɔnna taruxun ni i ra. Fufaan dangu jɛɛn firinna, Semi a siimayaan yi jɛɛ keme sɔtɔ. A yi a diin sɔtɔ naxan xili Arapaxadi. **11** Arapaxadi bari xanbini, Semi mɔn yi jɛɛ keme suulun sɔtɔ. A yi dii xemene nun dii teme gbetene sɔtɔ. **12** Arapaxadi to jɛɛ tonge suulun nun suulun sɔtɔ, a yi Selaxa bari. **13** A to Selaxa sɔtɔ, Arapaxadi yi bu jɛɛ keme naanin jɛɛ saxan. A yi dii xemene nun dii teme gbetene sɔtɔ. **14** Selaxa to jɛɛ tonge saxan sɔtɔ, a yi Eberi bari. **15** A to Eberi sɔtɔ, Selaxa yi bu jɛɛ keme naanin jɛɛ saxan. A yi dii xemen nun dii teme gbetene sɔtɔ. **16** Eberi to jɛɛ tonge saxan e nun naanin sɔtɔ, a yi Pelegi bari. **17** A to Pelegi sɔtɔ, Eberi yi bu jɛɛ keme naanin jɛɛ tonge saxan. A yi dii xemen nun dii teme gbetene sɔtɔ. **18** Pelegi to jɛɛ tonge saxan sɔtɔ, a yi Rewu bari. **19** A to Rewu sɔtɔ, Pelegi yi bu jɛɛ keme firin jɛɛ solomanaanin. A yi dii xemen nun dii teme gbetene sɔtɔ. **20** Rewu to jɛɛ tonge saxan nun firin sɔtɔ, a yi Serugu bari. **21** A to Serugu sɔtɔ, Rewu yi bu jɛɛ keme firin jɛɛ solofere. A yi dii xemen nun dii teme gbetene sɔtɔ. **22** Serugu to jɛɛ tonge saxan sɔtɔ, a yi Nahori bari. **23** A to Nahori sɔtɔ, Serugu yi bu jɛɛ keme firin. A yi dii xemen nun dii teme gbetene sɔtɔ. **24** Nahori to jɛɛ mɔxɔjɛn nun solomanaanin sɔtɔ, a yi Tera bari. **25** A to Tera sɔtɔ, Nahori yi bu jɛɛ keme jɛɛ fu nun solomanaanin. A yi dii xemen nun dii teme gbetene sɔtɔ. **26** Tera to jɛɛ tonge solofere sɔtɔ, a yi Iburama nun Nahori nun Haran bari. **27** Tera bɔnsɔnna taruxun ni i ra. Tera yi Iburama nun Nahori

nun Haran bari. Haran yi Loti bari. **28** Benun Tera xa faxa, a diin Haran yi faxa Yuru taani Babilɔn bɔxɔni, a barixi denaxan yi. **29** Iburama nun Nahori yi jaxanle futu. Iburama jaxanla yi xili Sarayi. Nahori a jaxanla xili Milika. Milika baba nan yi Haran na. Haran dii firin nan sɔtɔ, Milika nun Isika. **30** Gbantana nan yi Sarayi ra. Dii yo mi yi a yii. **31** Tera yi a denbayaan xali, a dii Iburama, e nun a mamandenna Loti, Haran ma diina, e nun a mamandenna Sarayi, Iburamaa jaxanla. E birin yi keli Yuru taani Babilɔn bɔxɔni alogo e xa siga Kanan bɔxɔni. Koni e to Xarani taan li, e yi dɔxɔ menni. **32** Tera yi bu jɛɛ keme firin jɛɛ suulun. A yi faxa Xarani yi.

12 Alatala yi a fala Iburama xa, a naxa, “Keli i ya yamanan nun i xabilan nun i babaa genli. I siga na yamanani n naxan yitama i ra. **2** N ni i findima siya gbeen na nɛn. N na i barakama nɛn, n ni i findi xili kanna ra. Muxune fan duban sɔtɔma nɛn i tan barakani. **3** Naxan na duba i xa, n fan na kanna barakama nɛn. Naxan na i danga, n fan dangan nagidima na kanna ma nɛn. Dunuḡa xabilane birin duban sɔtɔma nɛn i tan barakani.” **4** Awa, a siin jɛɛ tonge solofere e nun suulunna sɔtɔ waxatin naxan yi, Iburama yi keli Xarani yi alo Alatala a yitaxi a ra kii naxan yi. Loti fan yi siga Iburama fɔxɔ ra. **5** A yi a jaxanla Sarayi nun a xunyena dii Loti nun a sɔtɔ seen birin, e nun muxune a naxanye sɔtɔxi Xarani yi, a yi ne birin xali. E yi siga Kanan bɔxɔni. **6** Iburama yi dangu bɔxɔn na han a sa wudi bili gbeen li denaxan yi xili More, Siken bɔxɔni. Na waxatini, Kanan kaane yi dɔxi menni nun. **7** Koni Alatala yi a yete yita Iburama ra. A yi a fala, a naxa, “N bɔxɔni ito nan fima i yixetene ma.” Awa, Iburama yi saraxa ganden nafala Alatala xa naxan a yete yitaxi a ra. **8** A yi keli menni, a siga geyaan ma, geyaan naxan Beteli sogeteden binni. A yi bubun ti menni. Beteli taan yi lu a sogegododeni. Ayi taan yi lu a sogetedeni. A yi saraxa ganden nafala Alatala xa menni. A yi Alatala maxandi a xinla ra. **9** Na xanbi ra, a yi siga Negewi tonbonna binni. **10** Na waxatini, fitina kamen yi so bɔxɔni. Awa, Iburama yi siga Misiran bɔxɔni bayo donse yo mi yi na. **11** Benun e xa so Misiran bɔxɔni, Iburama yi a fala a jaxanla Sarayi xa, a naxa, “A kolon, jaxalan tofajin nan i tan na. **12** Misiran kaane na i to waxatin naxan yi, e a falama nɛn a n ma jaxanla nan i ra. Na xanbi ra, e n faxama nɛn, koni e mi i tan faxe.

13 I xa a fala e xa a n xunyen nan i tan na, alogo e xa kininkinin n ma i sabun na. Nayi, e mi n faxama i tan ma fe ra.” **14** Iburama to Misiran li, Misiran kaane yi a to, a Sarayi naxalan tofapin nan a ra. **15** Misiran Mangana kuntigine yi naxanla ito matɔxɔ Misiran Mangan xa. Misiran Mangan yi a xali a konni. **16** A yi hinan Iburama ra a naxanla fe ra. Iburama yi xuruse xunxurine nun jingene nun sofanle nun konyine nun nɔgɔmene sɔtɔ. **17** Koni Alatala yi fure naxin sa Misiran Mangan nun a denbayaan ma Sarayi a fe ra, Iburama naxanla. **18** Nanara, Misiran Mangan yi Iburama xili. A yi a fala, a naxa, “I nanse ligaxi n na? Nanfera i mi a falaxi n xa i ya naxanla nan a ra. **19** Nanfera i ya falaxi a i xunyen nan a ra han n tan bata a findi n ma naxanla ra? Awa, hɔn, i ya naxanla ni i ra. E sigal!” **20** Na xanbi, Misiran Mangan yi yamarin fi a sofane ma lan Iburama a fe ma. E yi a ragbengben e nun a naxanla, e nun a yii seen birin.

13 Awa, Iburama yi keli Misiran yamanani. A yi siga Negewi tonbonna mabinni e nun a naxanla nun a seen birin, e nun Loti. **2** Iburama bata yi findi nafulu kannna ra nun. Xuruseene nun gbetin nun xɛmaan yi a yii. **3** A keli Negewi yi, a yi a masiga han Beteli taani. Yirena nde yi Beteli taan nun Ayi taan longonna ra, Iburama bubun yi tixi mɛnna nan singe yi. **4** A saraxa gande singen fan yi mɛnna nin nun. Iburama yi Alatala maxandi a xinla ra mɛnni. **5** Loti yi biraxi Iburama fɔxɔ ra, xuruseene nun bubune yi a fan yii nun. **6** Iburama a xuruse ganla nun Loti a xuruse ganla yi gbo na bɔxɔn xa. E mi yi nɔɛ luye yire kedenni sɔnɔn. **7** Sɔnxɔ sɔnxɔn yi mini Iburama xuruse rabane nun Loti a xuruse rabane tagi. Kanan kaane nun Perisi kaane fan yi mɛnni na waxatini. **8** Nanara, Iburama yi a fala Loti xa, a naxa, “Sɔnxɔ sɔnxɔn nama bira en tagi e nun en ma xuruse rabane tagi, bayo en tan ngaxakedenmane nan en na. **9** Bɔxɔni ito birin i yɛɛ ra. Awa, en xa fata. Xa i siga kɔmɛnna ma, n tan yi siga yiifanna ma. Xa i siga yiifanna ma, n tan yi siga kɔmɛnna ma.” **10** Loti yi a yɛɛ nasiga, a yi sa Yuruden mɛren to. Igen yi na nun a fapin na. Benun Alatala xa Sodoma nun Gomora halagi, na bɔxɔne yi fan han Soyari binni, alo Misiran bɔxɔna, alo Alatala a nako rafalaxina. **11** Awa, Loti yi Yuruden mɛren sugandi a yete xa. A yi siga sogeteden mabinni. E yi fata. **12** Iburama yi lu Kanan bɔxɔni. Loti yi lu Yuruden mɛren taane tagini. A yi bubun ti Sodoma fema. **13** Sodoma

kaane bata yi kobi ayi a gbegbe, e bata yi findi yulubi kan belebelen na Alatala yɛɛ ra yi. **14** Iburama nun Loti to fata, Alatala yi a fala Iburama xa, a naxa, “I yɛɛn ti sogeteden na, e nun sogegododen na, e nun yiifanna nun kɔmɛnna ma. **15** I bɔxɔn naxan birin toxi, n na a fima i ma nen e nun i bɔnsɔnna ma han habadan. **16** N ni i bɔnsɔnna rawuyama ayi nen alo gbangbanna naxan bɔxɔn ma. Xa muxun nɔɛ mɛnɛnsinna tenge, awa, a nɔɛ nen i bɔnsɔnna yaten kolonje. **17** Keli, i bɔxɔni siga, a kuye yɛɛn nun a yigbo yɛɛna, i xa a birin mato bayo n na a fima i tan nan ma.” **18** Awa, Iburama yi bubun yiren masara. A yi dɔxɔ wudi belebelena nde mabinna ra Mamire nun Xebiron fema. A yi saraxa ganden nafala mɛnni Alatala xa.

14 Na waxatini, Manga Amirofeli naxan Babilɔn bɔxɔn ma yo, Manga Ariyoki naxan Elasari bɔxɔn ma yo, Manga Kɛdolama naxan Elan bɔxɔn ma yo, Manga Tidali naxan Goyin bɔxɔn ma yo, manga naaninni itoe yi layirin tongo e bode xa manga suulun ni itoe yenge feen na. **2** Na manga suulunne nan itoe ra: Bera Sodoma mangan nun Birisa Gomora mangan nun Sinabu Adamaha mangan nun Sɛmɛberi Seboyimi mangana e nun Bela mangana. Bela mɔn xili Soyari. **3** Manga suulunni itoe yi e malan Sidimi lanbanni, Fɔxɔ Daraan denaxan yi. **4** Xabu jɛɛ fu nun firin manga suulunni itoe yi Manga Kɛdolama bun ma, koni a jɛɛ fu nun saxanden na, e yi murute. **5** A jɛɛ fu nun naanindena, Manga Kɛdolama nun mangan naxanye yi a fema, e yi siga yenge sodeni. E yi siyani itoe birin nɔ yengeni: Refa kaan naxanye yi Asatarɔti-Karinayin yi, Susi kaan naxanye yi Xami yi, Emi kaan naxanye yi Sihawe-Kiriyatayimi yi, **6** e nun Xori kaan naxanye yi geyaan ma Seyiri binni han Eli-Paran tonbonna fema. **7** Na xanbi e yi xɛɛɛ, e yi siga En-Misapati, naxan xili Kadesi. E yi Amalekine nɔ e nun Amarin naxanye yi dɔxi Xasasɔn-Tamari yi. **8** Na waxatini, Sodoma mangan nun Gomora mangan nun Adamaha mangan nun Seboyimi mangan nun Bela mangan denaxan mɔn xili Soyari, na mangane yi e malan Sidimi lanbanni manga naaninni itoe yengedeni: **9** Kɛdolama Elan mangan nun Tidali Goyin mangan nun Amirofeli Babilɔn mangan nun Ariyoki Elasari mangana. Na manga naaninna yi manga suulunna yenge. **10** Awa, yinle yi Sidimi lanbanni, dolena e kui. Sodoma mangan nun Gomora mangan yi e gi. Yengesonaa ndee yi bira yinle ra. Ndee yi e gi siga

geyaan fari. **11** Na manga naanin naxanye noon sotoxi, ne yi nafunla nun donseene birin tongo Sodoma taan nun Gomora taani. E yi siga. **12** E yi Iburama xunyena dii Loti fan suxu e nun a herisigen birin, bayo a yi doxi Sodoma taan kui. **13** Muxuna nde yi a gi, a sa na feen birin yebe Iburama Heburu kaan xa. Na waxatini, Iburama yi doxi wudi bili belebelen bun ma Mamire Amarin konni. Mamire nun a ngaxakedenne, Esikoli nun Aneri, ne bata yi layirin tongo Iburama xa. **14** Iburama to a me, muxune bata a xunyena dii xeme Loti suxu, a yi yengesone tongo, muxu keme saxon muxu fu nun solomasexe naxanye barixi a sariyan kui, naxanye fatan yenge sodeni. E yi siga na mangane foxo ra han taan naxan xili Dan. **15** Koeen na, Iburama yi a yengesone yitaxun, e yi na mangane raterena yengen na. E nun a yengesone yi no na mangane matuntunye han Xoba, Damasi taan komenna ma. **16** A yi fa e herisigen birin na, a yi fa a xunyena diin Loti fan na, e nun a soto seen birin, sa naxanle fari e nun yamaan birin. **17** Iburama to xete xunna kenla kui, keli Manga Kedolama yengedeni e nun mangan naxanye yi a fema, Sodoma mangan yi siga Iburama ralandeni Sihawe lanbanni. Menna xili "Mangana Lanbanna." **18** Na xanbi, Melikisedeki, Salemi mangan yi fa burun nun wudi bogi igen na Iburama xa alo manpana. Kore Xonna Ala a saraxaraliin nan yi Melikisedeki ra. **19** A yi duba Iburama xa, a naxa, "Kore Xonna Ala naxan koren nun boxon daxi, na xa Iburama barayi. **20** Tantunna Kore Xonna Ala xa, naxan i yaxune rayarabixi i xa." Na waxatini, Iburama yi a se tongoxine birin yaganna fi Melikisedeki ma. **21** Sodoma mangan yi a fala Iburama xa, a naxa, "N ma muxune raxete n ma, koni nafunla xa lu i tan xa." **22** Koni Iburama yi a fala Sodoma mangan xa, a naxa, "N bata n kolo Alatala yi, Kore Xonna Ala naxan koren nun boxon daxi, **23** n mi sese tonge naxan findixi i gbeen na, hali lutidina, xa na mi a ra sankidi lutina, alogo i nama a fala sonon fa fala 'N tan nan Iburama findi nafulu kanna ra.' **24** N mi sese tonge, fo n ma yengesone naxan donxi e nun naxan findixi e gbeen na. Aneri nun Esikoli nun Mamire e gbeen tongoma nen."

15 Na xanbi, Iburama yi fe toon ti alo xiyena, Alatala yi fa a ma, a yi a fala a xa, a naxa, "Iburama i nama gaxu, n tan nan i kantanma. I saran gbeen sotoma nen." **2** Iburama yi a yabi, a naxa, "Marigina

Alatala, i nanse jenigexi i naxan soma n yii? Bayo dii yo mi n yii. N mi dii sotoxi naxan n keen tongoma fo n ma walikena, Eliyeseri Damasi kaana. **3** I mi dii yo fixi n tan ma. Nanara, n ma walikkeen naxan barixi n konni, na nan findima n kee tongon na." **4** Alatala yi a yabi, a naxa, "En-en, i ya walikkeen mi findima i kee tongon na de! I bari diin yatin nan fama findideni i kee tongon na." **5** Ala yi Iburama ramini a bubun bun ma, a yi a fala a xa, a naxa, "I yeen nate kore. I sarene tenge xa i noe a yaten kolonje." A mon yi a fala a xa, a naxa, "I ne toxi kii naxan yi kuyen ma, i bonsonna fan wuyama ayi na kiini nen, i mi noe a yaten kolonje." **6** Iburama yi denkeleya Alatala ma, Ala fan yi na yate tinxinna ra a xa. **7** Ala yi a fala a xa, a naxa, "N tan nan Alatala ra naxan i raminixi Yuru taani Babilon boxoni. N na i xali boxon ma n denaxan fima i ma." **8** Iburama yi a maxodin, a naxa, "Marigina Alatala, n na a kolonma di, fa fala n fama na boxon sotodeni nen?" **9** Ala yi a fala a xa, a naxa, "Fa jinge gilen nun sii gilen na, e nun yexee kontonna naxanye bata jee saxon saxon ti, e nun ganba gilen nun kolokonde diina. I yi e fi n ma." **10** Iburama yi fa na subene ra. A yi jingen nun sii gilen nun yexee kontonni sensen a tagi. A yi na sube dungine sa e dan na, koni a mi xoline tan yixaba. **11** Segene yi fa, e godo na sube faxaxine ma. Iburama yi e birin kedi. **12** Sogen godomatona, xixonla yi Iburama suxu kati! Kuyen yi yidimi, dimi magaxuxin yi so. **13** Ala yi a fala a xa, a naxa, "A kolon yati, i bonsonna doxoma nen yamana gbete yi, e konna mi denaxan na. E findima nen konyin na na boxoni. E fe xolen siyaan birin sotoma nen jee keme naaninna bun ma muxu yiini. **14** Koni e na lu siyaan naxan bun konyiyani, n na makitima nen. Na xanbi ra, e neen minima na yamanani, e se fajin gbege xalima nen. **15** I tan fama nen boje xunbenla sotodeni, i mon siimaya xunkuyen sotoma nen, han i sa laxiraya waxatin naxan yi. **16** I yixeten naaninden xetema nen na boxoni, bayo fo Amarine e haken na gbo ayi waxatin naxan yi." **17** Sogen to godo, dimin yi so. Na waxatini tee ko seen naxan yi tutin naminima e nun tee degena, a yi dangu sube dungine saden tagi. **18** Taxamasenna nan na ra, Alatala yi layirin naxan tongoxi a tan nun Iburama tagi na loko yeteni. A yi a fala a xa, a naxa, "N bata yamanani ito fi i bonsonna ma, keli Misiran baan ma han sa doxo Efirati baa belebelen na." **19** Siya doxo wuyaxin nan yi na: Kenine nun Kenisine nun Kadimonne **20** nun Xitine nun Perisine nun Refane **21**

nun Amorine nun Kanan kaane nun Girigasane e nun Yebusu kaane.

16 Sarayi, Iburama a naxanla munma yi dii yo bari a xa. Konyi gile Misiran kaana nde yi walima a yii naxan yi xili Hagara. **2** Sarayi yi a fala a xemen xa, a naxa, “I bata a to, Alatala mi dii bari feen nagidixi n tan ma. Koni yanyina nde n nœ diin sote i xa nen n ma konyi gilen sabun na. E birin nan lan e xa xi to.” Iburama yi tin Sarayi a falan ma a naxan falaxi a xa. **3** Sarayi yi a konyi gilen Hagara Misiran kaan tongo, a yi a so a xemena Iburama yii, a xa findi a naxanla ra. Iburama bata yi jœe fu ti Kanan bœxœn ma. **4** Iburama nun Hagara yi xi yire kedenni, Hagara yi fudikan. Hagara to la a ra fa fala a bata fudikan, a yi yo a kanna ma, a yi a mato a kobin na. **5** Sarayi yi a fala Iburama xa, a naxa, “Konbini ito, n na raxetema i tan nan ma Hagara naxan saxi n fari! Bayo, n tan nan n ma konyi gilen fixi i ma a xa findi i ya naxanla ra. Xabu a la a ra a fudikanna na a ra, a fa fe kobin nan tun yilanma n na. Alatala xa en tan firinna makiti.” **6** Iburama yi a naxanla yabi, a naxa, “I ya konyi gilen nan a ra. A walima i tan nan yii. I waxi feen naxan birin xœn ma, a birin liga a ra.” Na waxatini, Sarayi fe kobin birin naxan nafan a ma, a yi a liga Hagara ra. Hagara yi a gi a bun. **7** Alatalaa malekan yi naralan Hagara ra xude xunna fema Suru kiraan xœn ma tonbon yireni. **8** Malekan yi Hagara maxœdin, a naxa, “Sarayi a konyi gilen Hagara, i kelixi minen yi? I sigama minen yi?” Hagara yi malekan yabi, a naxa, “N nan n gixi n kanna nan bun ma.” **9** Alatalaa malekan yi a fala Hagara xa, a naxa, “I mœn xa xete i kelixi denaxan yi. I mœn xa i xuru a ma.” **10** Alatala a malekan yi a fala a xa, a naxa, “N fama bœnsœn wuyaxi fideni nen i ma, i mi nœ naxan yaten kolonje.” **11** Alatalaa malekan mœn yi a fala a xa, a naxa, “I fudikanna na a ra iki. I fama diin sœtœdeni. I na diin xili sama nen Sumayila. Bayo Ala bata i ya tœrœ xuiin me marayarabin naxan sama i fari. **12** I ya diin luma nen alo burunna sofanla. A birin yengema nen, birin a fan yengema nen. E nun a xunyene birin luma nen fataxi.” **13** Hagara yi xili sa Alatala xœn, naxan falan tixi a xa, a naxa, “Ala Naxan N Toma.” A yi a fala, a naxa, “N bata na kanna to, naxan n toma.” **14** Na nan a toxi e na xœjinna xinla falama, e naxa, “Niin Kanna Naxan N Toxi.” Na xœjinna Kadesi nun Bereda nan tagi. **15** Hagara yi diin sœto Iburama xa. Iburama yi a xili sa Sumayila.

16 Iburama bata yi jœe tonge solomasexe e nun jœe sennin ti siimayaan na, Hagara yi fa na diin sœto a xa.

17 Iburama to jœe tonge solomanaanin jœe solomanaanin ti siimayaan na, Alatala yi mini a xa, a fa ito fala a xa, a naxa, “Ala Senbe Kanna nan n tan na. I sigati kiin xa kamali n yœe ra yi. **2** N fama layirin tongodeni i tan nun n tan tagi. N mœn fama nen bœnsœn gbeen fideni i ma.” **3** Iburama yi bira, a a yetagin lan bœxœn ma. **4** Ala yi a fala a xa, a naxa, “N ma layirin ni i ra n naxan tongoxi i tan nun n tan tagi. I findima nen siya wuyaxine benban na. **5** I xinla mi falama sœnœn Iburama, i xinla falama nen fa fala Iburahima, bayo n na i findima nen siya wuyaxine benban na. **6** N na i findima nen yama gbeen benban na. I diine sœtœma nen naxanye findima siya wuyaxine ra. Mangane fan minima nen i ya diine tagi. **7** N nan n ma layirin nakamalima nen i tan nun n tan tagi, hali i dangu xanbini, e nun i bœnsœnne fan yixeten fan bœnsœn bœnsœn. A findima habadan layirin nan na. Nayi, n tan nan i ya Ala ra, e nun i bœnsœnna hali i dangu xanbini. **8** I tan nun i bœnsœnna, n fama nen bœxœn fideni e ma, i findixi xœjen na denaxan yi iki. Kanan bœxœn birin findima nen e gbeen na habadan! N tan nan e Ala ra.” **9** Ala mœn yi a fala Iburahima xa, a naxa, “I tan nun i bœnsœnna fan yixeten bœnsœn bœnsœnna, e lan nen e xa n ma layirin nakamali. **10** En ma layirin ni i ra, n naxan saxi e ma, e lan e xa naxan nakamali, i tan nun i bœnsœnne: Naxan birin findixi xemen na e tagi, e birin lan nen e xa banxulan. **11** E xa na banxulan na findi layiri taxamasenna ra e tan nun n tan tagi. **12** Keli e tan ma, sa dœxœ e bœnsœn bœnsœnna ra, a birin lan nen, naxan yo barin nema fa xii solomasexe ti, a xa banxulan. Na sariyan lan nen a xa sa e konyine fan ma naxanye e yii, naxanye barixi e konni, e nun konyin naxanye saraxi bœxœ gbeteni, hali a mi fa i bœnsœnni. **13** Na kui, konyin naxanye barixi i konni e nun i naxan fan saraxi, e birin lan nen e xa banxulan, alogo n ma layirin taxamasenna xa lu e fatin ma habadan! **14** Xemen naxan na lu a fatin mi banxulanxi, a fama nen naminideni e bœnsœnni, bayo a mi layirin nakamalixi.” **15** Na xanbi, Ala yi a fala Iburahima xa, a naxa, “I nama i ya naxanla xinla fala sœnœn de, ‘Sarayi,’ a fa xili nen ‘Saran.’ **16** N na a barakama nen, a fama dii xemen barideni nen i xa. N na a barakama nen, a fama findideni nen siya gbeen benban na. Yamana wuyaxin mangane fama minideni

nen a diine yi.” 17 Iburahima yi bira, a yi a yetagin lan bəxən ma, a yi gele. A yi a fala a bəjəni, a naxa, “N tan naxan bata jɛɛ kɛmɛ ti siimayaan na, n mən nɔɛ diin sɔtɛ ba? Saran naxan fan bata jɛɛ tonge solomanaanin ti siimayaan na, a fa nɔɛ diin barɛ ba?” 18 A yi a fala Ala xa, a naxa, “I jəxɔn lu Sumayila xən ma tun!” 19 Ala yi a fala, a naxa, “En-en! I ya jaxanla Saran fama dii xɛmɛn barideni nən i xa, i naxan xili sama Isiyaga. N nan n ma layirin nakamalima nən n tan nun a tan tagi e nun a bənsɔnna hali a faxa xanbini. Layirin naxan mi kalama habadan! 20 Na xanbi, n bata i ya maxandin nasuxu Sumayila fe ra. N na barakama nən, n mən dii gbegbe bari feen nagidima a ma nən, n bənsɔn wuyaxin fima nən a ma. A findima nən manga dii fu nun firinne baba ra, e nun siya xungbe kanna ra. 21 Koni, naxan findixi n ma layirin na, n fama na rakamalideni n tan nun Isiyaga nan tagi. Saran fama nən dii xɛmɛn barideni i xa i jəxɔn waxati faraxi.” 22 Ala to yelin na fale, a yi keli Iburahima xun ma. 23 Iburahima yi a diin Sumayila tongo e nun a konyin naxanye barixi a konni, e nun a naxanye saraxi. Xɛmɛn naxanye birin a banxini, a yi e birin banxulan na lɔxɔni alo Ala a yamari kii naxan yi. 24 Iburahima siin jɛɛ tonge solomanaanin jɛɛ solomanaanin nan yi a ra, 25 a dii Sumayila tan bata yi jɛɛ fu nun saxan ti, e banxulanxi waxatin naxan yi. 26 E yi e birin banxulan lɔxɔ keden 27 e nun xɛmɛn naxanye birin yi Iburahimaa banxini, konyin naxanye barixi a konni, e nun a naxanye fan saraxi keli yamana gbete yi.

18 Alatala yi mini Iburahima xa Mamire wudi bili gbeen denaxan yi. Na waxatini, Iburahima yi dɔxi a bubun so dɛɛn na, kuye wolon waxatini yanyin na. 2 A yi xɛmɛ saxan to tixi a yetagi. A yi keli bubun so dɛɛn na, a siga mafuren, a sa na xɛmɛ saxanna ralan. A yi a xinbi sin. 3 A yi a fala muxu keden xa e tagi, a naxa, “N kanna, yandi ɛ nama dangu singe, ɛ xa ɛ madigan n konni. 4 N xa fa igen na ɛ xa alogo ɛ xa ɛ sanne maxa. ɛ mən xa ɛ matabu wudini ito bun ma. 5 N xa fa donseen na ɛ xa alogo ɛ xa fangan sɔtɔ. Na xanbi, ɛ fa siga ɛ sigatini. Amasɔtɔ, ɛ danguma ɛ walikɛɛn konna nin.” Na xɔjɛne yi a yabi, e naxa, “Awa, i naxan falaxi, a raba.” 6 Nanara, Iburahima yi xete a mafuraxin na a bubun kui. A yi a fala a jaxanla Saran xa, a naxa, “I xɔdɔxɔ. I murutu fuɲi fajnin debedin yɛ saxan nafala burun na.” 7 Na xanbi,

a yi a gi, a siga jɛnge sansanni, a sa jɛnge dii turaxi keden tongo. A yi na jɛnge diin so a walikɛɛn yii alogo a xa a faxa, a xa a rafala donseen na. 8 Na suben to yelin jɛnjɛ, Iburahima yi a tongo, a a so xɔjɛne yii, e nun nɔnɔ kendena sa nɔnɔ xixin fari. E na donseen donma, Iburahima yi ti e fɛma wudin bun ma. 9 Na xɔjɛne yi Iburahima maxodin, e naxa, “I ya jaxanla Saran minen yi?” A yi e yabi, a naxa, “A na yi bubun bun ma.” 10 Na xɔjɛn muxu keden yi a fala Iburahima xa, a naxa, “N mən xetema be i jəxɔn waxati faraxi. Na waxatini i ya jaxanla dii xɛmɛn barima nən i xa.” Saran yi tixi Iburahima xanbi ra bubun so dɛɛn na, a tuli matixi e falan ti xuiin na. 11 Iburahima nun Saran bata yi yelin forideni nun. Saran mi yi nɔɛ diin barɛ. 12 A yi gele a yetɛ ma, a naxa, “N tan na sɔtɛ, n bata yelin forɛ? N kanna fan bata findi xɛmɛ fonna ra. N fan sewama nən dii sɔtɔdeni ba?” 13 Alatala yi a fala Iburahima xa, a naxa, “Nanfera Saran gelexi? Nanfera a a falaxi, a tan mi nɔɛ diin barɛ sɔnɔn, bayo a bata fori? 14 Nanse na Alatala mi nɔɛ naxan lige? N fama nən waxati saxini faraxi, Saran yi dii xɛmɛn bari.” 15 Saran yi gaxu, a yi wulen fala, a naxa, “N mi gelexi del!” A yi a fala a xa, a naxa, “Di! I gelexi nən.” 16 Na xɔjɛne yi ti kiraan xən ma, e yi e xun sa Sodoma taan ma. Iburahima yi siga e tideni kira yi. 17 Alatala yi a fala, a naxa, “N naxan ligama, n nama na luxun Iburahima ma. 18 A fama nən findideni siya belebele senbemaan na. Dunuya siyane birin duban sɔtɔma nən a tan barakani. 19 N na a sugandixi nən, alogo a xa a diine nun a bənsɔnna muxune birin yamari a e xa kiti kenden sa tinxinni. Na waxatini, n tan Alatala, n fama nən n ma layirin nakamalideni n naxan tongoxi Iburahima xa.” 20 Alatala yi a fala Iburahima xa, a naxa, “Feen naxan falaxi Sodoma kaane nun Gomora kaane xun ma, fe magaxuxin na a ra. E yulubin bata gbo ayi han, 21 n fama gododeni nən, n sa a mato feen naxanye birin falaxi e xun ma, xa a na kiini. Xa e birin na feene fari, n fama a kolondeni nən na waxatini.” 22 Xɔjɛ firin yi keli e yi denaxan yi, e yi siga Sodoma taani. Koni Alatala nun Iburahima yi lu yire kedenni. 23 Iburahima yi a maso a ra, a yi a fala a xa, a naxa, “I muxu jaxine nun tinxin muxune halage e bode xən ba? 24 Yanyina nde tinxin muxu tonge suulun Sodoma kaane tagi. I na taan kalama nən? I mi dijnama Sodoma yamaan ma na tinxin muxu tonge suulunna fe ra ba? 25 En-en, a mi lanma i xa na liga! A mi lan i xa muxu jaxin nun tinxin muxun

faxa kii kedenni. A mi lan kiti kedenna xa sa muxu jnaxin nun tinxin muxun ma. A mi lan i xa na liga. Naxan dunuja birin makitima, a mi a ligama tinxinna kiraan xon ma ba?” 26 Alatala yi yabin ti, a naxa, “Xa n tinxin muxu tonge suulun li Sodoma taan kui, n dijama nen Sodoma kaane birin ma na muxu tonge suulunna fe ra.” 27 Iburahima mon yi falan tongo, a naxa, “Marigina, n bata i maxandi i xa dija n xa, n xa falani ito ti i xa, bayo n tan kelixi gbangbanna nun benden nin. 28 Xa i sa a li, tinxin muxu tonge suulun mi na yi, yanyina nde fo muxu tonge naanin e nun suulun nan na. I na taan kale bayo muxu suulun bata dasa a ra?” Ala yi a fala, a naxa, “N mi a kalama xa n tinxin muxu tonge naanin e nun suulun li na.” 29 Iburahima mon yi a fala a xa, a naxa, “Yanyina nde, i muxu tonge naanin nan lima na yi.” A yi a fala, a naxa, “N mi na kalama na muxu tonge naaninna fe ra.” 30 Iburahima yi a fala, a naxa, “Marigina, n bata i maxandi, i nama xolo xa n mon falana nde ti i xa. Yanyina nde, i muxu tonge saxan nan lima na yi.” Ala yi a fala a xa, a naxa, “N mi na kalama xa n tinxin muxu tonge saxan li na yi.” 31 Iburahima yi a fala, a naxa, “Marigina, i hake lu n xa. Yanyina nde, i muxu moxoxe nan lima na.” Ala yi a fala, a naxa, “N mi na taan kalama na muxu moxoxena fe ra.” 32 Iburahima mon yi a fala, a naxa, “Marigina, yandi, i nama xolo. N ma maxodin donxen ni ito ra. Yanyina nde, i muxu fu nan lima na.” Ala yi a fala Iburahima xa, a naxa, “N mi na taan kalama na muxu fuuna fe ra.” 33 A to yelin falan tiye e nun Iburahima, Alatala yi siga, Iburahima fan yi xete a konni.

19 Ninbari waxatini, maleka firin yi so Sodoma taani. Na waxatini, Loti yi dxi na taan so deen na. A to malekane to fe, a yi keli, a sa e ralan kiraan xon ma. A yi a xinbi sin, a yetagin yi lan boxon ma. 2 Loti yi a fala e xa, a naxa, “N kanne, yandi, e xa so n konni. E xa e sanne maxa, e mon xa xi be to. Na xanbi, tila xotanni e noe sig e sigatini.” Malekane yi a fala, e naxa, “En-en! Fo nxu xa xi taan tagini to koeen na.” 3 Koni Loti yi a yixodxo han e yi siga a konni. A yi donse fajin nafala e xa, a yi buru ratetaren gan e xa. E yi e dege. 4 Sa waxatin mi yi a lixi nun, Sodoma kaane yi Loti a banxin nabilin. Keli banxulanne ma, sa dxxo xeme fonne ra, e birin yi na nun. 5 E yi Loti xili, e a maxodin, e naxa, “Na muxune minen yi, naxanye soxi i konni to jinbanna ra. E ramini nxu ma, nxu xa

nxu makoon naba e ra alo jaxanla.” 6 Loti yi mini a banxin kui a ti deen na, a yi na deen nagali. 7 A yi a fala e xa, a naxa, “En-en! Ngaxakedenne, e nama fe jnaxin liga. 8 N ma dii teme firin be naxanye mi xeme feen kolon. N bata tin a ma, n xa ne sa e sagoni, e xa feen birin liga e ra e waxi naxan xon ma, alogo e nama sese liga n ma xopene ra, bayo n tan bata findi e yatigin na.” 9 Na muxune yi a fala Loti xa, e naxa, “Mini i ya xopene nan na nxu yetagi. I mi noe kitin se nxu konni. Xa i mi i kata, nxu fama fe xolen dxxodeni i ra nen dangu e tan na.” E yi sonson Loti ra, alogo e xa deen kala. 10 Na maleka firinna yi Loti suxu, e yi a raso banxin kui, e deen balan e xun ma. 11 Malekan yi ganla xunna kala, naxanye yi tixi deen na, e birin yi findi danxutone ra, keli banxulanne ma sa dxxo xeme fonne ra han e mi yi sese toma fa. Kiraan yi yifu e ma. 12 Na maleka firinna yi Loti maxodin, e naxa, “Muxuna nde i xa be? Hali a findixi i bitanna nan na, i ya dii xemene nun i ya dii temene, e nun i ya muxune birin, i xa e birin namini taani ito kui 13 bayo nxu fama a halagideni. Alatala bata maxandi xui gbegbe me taa yi kaani itoe wali kobine fe ra. Alatala yi nxu rafa, a nxu xa fa taani ito halagi.” 14 Loti yi siga, a a fala a bitanne xa, a naxa, “E keli be mafuren! Alatala fama be kaladeni iki sa.” E yi a miri a sabaan nan na. 15 Na subaxan ma, malekane yi digi Loti ra, e yi a fala a xa, e naxa, “Keli! I ya jaxanla tongo, e nun i ya dii teme firinna naxanye be. E xa keli be alogo e nama halagi e nun taani ito hake kanne.” 16 A to wa a madigan feni nun, malekan yi Loti suxu a yiin ma, e nun a jaxanla, sa a dii teme firinna fari. E yi e ramini taan kui, bayo Alatala bata yi kininkinin e ma. 17 Malekan to e ramini, keden yi a fala Loti xa, a naxa, “I gi, alogo i niin xa ratanga. I nama i xanbi rato de! I nama i mati taani ito rabilinna yire yo yi. Xa i mi waxi a xon i xa halagi, siga na geyane yireni.” 18 Loti yi a fala, a naxa, “En-en, n Marigina, n bata i maxandi, n mi noe na lige. 19 N na a kolon, i bata hinan n tan i ya walikeen na. I bata kininkinin n ma han! I bata n niin natanga. Koni, n tan mi noe n giye han geyaan ma, xa na mi a ra n faxama nen. 20 Yandi, i bata taa xurudini ito to? Na nan masoxi n na. Tin, n xa siga, n xa sa lu na. A lu, n xa siga menni, taa xurudidin na a ra! N niin xa ratanga!” 21 Malekan yi a fala, a naxa, “N bata tin na birin ma. N mi na taan kale. 22 Siga mafuren, bayo han i sa soma waxatin naxan yi, n mi noe fefe lige.” Na nan a toxi, na taan xili saxi Soyari. 23 Sogen yi

tema waxatin naxan yi, Loti yi so Soyari taan kui. **24** Na waxatini, Alatala yi dole teen nagodo Sodoma taan nun Gomora taan ma. **25** A yi na taane halagi e nun na lanbanna birin, fɔlɔ sansine ma, sa dɔxɔ muxune ra naxanye birin dɔxi na taane kui. **26** Loti a jaxanla yi a yeen naxete a xanbi ra, a yi findi fɔxɔ gɛmɛ tixin na. **27** Na subaxan ma, Iburahima yi keli, a a xunsa na yiren ma e nun Alatala e bode to denaxan yi. **28** A to a yeen nasiga Sodoma taan nun Gomora taan ma, e nun na taane rabilinna birin, a yi tuti gbeen to, a tema na yi alo sulun teen tutina. **29** Ala to yi na taane kalama nun, a yi mirixi Iburahimaa fe ma. Na nan a toxi, Ala yi Loti ratanga na gbalon ma, a yi na taane kalama waxatin naxan yi, Loti yi dɔxi denaxan yi. **30** Loti bata yi gaxu lu feen na Soyari taan kui. A yi keli na, a siga geyaan fari a sa dɔxɔ menni e nun a dii teme firinna faran yinla kui. **31** Lɔxɔna nde, a dii teme singen yi a fala a xunyen xa, a naxa, “En baba bata fori. En denaxan yi, xeme yo mi be en dɔxɔma naxan xɔn ma alo adaman darixi kii naxan yi. **32** Fa be, en xa dɔlɔn so en baba yii han a xunna yi keli alogo en xa xi a xɔn ma, alogo en xa diin sɔtɔ. Na xa findi a bɔnsɔnna ra.” **33** Na kɔɛen na, e yi dɔlɔn fi e baba ma, a dii teme singen yi xi a baba xɔn ma. A mi a xun ma fe yo kolon, a diin sa waxatina hanma a keli waxatina. **34** Kuye to yiba, a dii teme singen yi a fala a xunyen xa, a naxa, “A bata jan, n tan nun n baba bata xi yire kedenni to. To kɔɛen na, i tan nan nun n baba xima yire kedenni. Na yanyini en nɔɛ bɔnsɔnna fiye a ma.” **35** Na kɔɛen mɔn na, e yi dɔlɔn fi e baba ma, a xunyen fan yi xi a baba xɔn ma. A mi a xun ma fe yo kolon, a diin sa waxatina, e nun a keli waxatina. **36** Loti a dii teme firinna yi fudikan e baba a diin na. **37** Na dii teme singen to diin bari, a a xili sa “Moyaba.” Na nan findi Moyaba kaane birin benban na. Han iki e na yi. **38** A dii teme firinden fan yi diin bari, a a xili sa “Ben-Ami.” Na nan findi Amonine birin benban na. Han iki e na yi.

20 Iburahima yi siga Negewi yamanani. A yi dɔxɔ Kadesi nun Suru tagi. Na xanbi ra, a yi siga Gerari taani, a yi waxati ti menni. **2** Iburahima yi a jaxanla Saran ma fe fala, a naxa, “N xunyen jaxalanmaan nan a ra.” Abimeleki, Gerari mangan yi Saran tongo. **3** Kɔɛen to so, Abimeleki xima, Ala yi a yete yita a ra xiyeni, a naxa, “I faxama nen jaxanli ito a fe ra, i naxan tongoxi, bayo xeme taa ra dɔxɔn na a ra.” **4** Na

waxatini, Abimeleki munma yi a maso a ra. A yi a yabi, a naxa, “N Marigina, i bɔnsɔn tinxinxin kalama nen?” **5** Iburahima a fala nen n xa, fa fala jaxanli ito a xunyen jaxalanmaan nan a ra. Naxanla fan yi a fala n xa, a tada nan Iburahima ra. N naxan ligaxi, n na ligaxi n bɔɲɛ fixen nan na.” **6** Na xiyeni Ala mɔn yi a fala a xa, a naxa, “N tan yati, n na a kolon i feen naxan ligaxi, fe kobi xa mi a ra. N tan nan a ligaxi, i mi nɔxi yulubi lige n na. Na nan a toxi n mi a luxi i xa a findi i ya jaxanla ra. **7** Iki, jaxanli ito raxete a xemen ma. Nabiin nan a ra. A Ala maxandima i xa nen alogo i niin xa ratanga. Koni xa i mi a raxete a xemen ma, a kolon, i faxama nen i tan nun i ya muxune birin.” **8** Abimeleki yi keli sinma, a yi a kuntigine birin malan. Feen naxan birin danguxi, a yi a yeɓa e xa. E yi gaxu han a dangu ayi. **9** Abimeleki yi Iburahima xili a konni. A yi a maxɔdin, a naxa, “N haken mundun ligaxi i ra, i xa n tan nun n ma yamaan findi yulubi kanne ra? I bata fe liga n na, feen naxan mi lan a xa liga. **10** Nanfe a ligaxi i xa na raba?” **11** Iburahima yi a fala, a naxa, “N na falaxi nen, a be kaane mi gaxuxi Ala yee ra. E n faxama nen n ma jaxanla fe ra. **12** Nɔndin nan a ra, n xunyen na a ra. Nxu birin baba keden, koni nxu nga keden mi a ra. A mɔn findixi n ma jaxanla ra. **13** Ala to n namini n baba konni, n yi a fala n ma jaxanla xa, n naxa, “I hinanna yitama n na ikiini: En na siga dede, i xa a fala a n xunyen nan i tan na.” **14** Abimeleki yi yexɛene nun siine nun jingene nun konyi xemene nun konyi gilene tongo, a yi e birin so Iburahima yii. A mɔn yi a jaxanla Saran naxete a ma. **15** A yi a fala Iburahima xa, a naxa, “N ma bɔxɔn deen bata rabi i xa. I na wa lu feni dede bɔxɔni ito ma, lu menni.” **16** A yi a fala Saran xa, a naxa, “N bata gbeti gbanan wuli keden so i tada yii i solona seen na i tan nun i sigati boden birin yee xori alogo i xa xunna kenla sɔtɔ.” **17** Iburahima yi Ala maxandi, na waxatini Ala yi Abimeleki rakendeya alogo a jaxanla nun a konyi gilene xa no diin barideni. **18** Alatala bata yi dii baritareyaan nagidi nun Abimeleki a muxune ma Iburahima a jaxanla Saran ma fe ra.

21 Alatala yi hinan Saran na, a a falan nakamali. **2** Saran yi fudikan. A yi diin bari Iburahima xa a foriyani Ala waxatin naxan fala a xa. **3** Iburahima yi a diin xili sa Isiyaga, Saran naxan sɔtɔxi a xa. **4** A yi a dii Isiyaga banxulan a xii solomasexede lɔxɔni alo Ala a yamari kii naxan yi. **5** Iburahima bata yi jɛɛ

keme soto siimayaan na, Isiyaga bari waxatin naxan yi. 6 Saran yi a fala, a naxa, “Ala bata n nagele sewani. Muxun naxanye na n ma dii Isiyaga bari feen me, en birin sewama nen.” 7 A mon yi a fala, a naxa, “Nde yi noe a fale Ibrahima xa a loxona nde fama a lideni, Saran findima nen dii ngan na? Koni n tan bata diin bari a xa a xeme foriyani.” 8 Diin to gbo, e yi a deen ba xijen na. Ibrahima yi sewa sumunna belebele yiton, a dii Isiyaga dee ba loxoni. 9 Misiran kaan Hagara diin naxan barixi Ibrahima xa, Saran yi na diin to gele. 10 A yi a fala Ibrahima xa, a naxa, “Konyi jaxanli ito nun a diin kedi. E nun n ma dii Isiyaga nama lu kee kedenni.” 11 Na falan mi rafan Ibrahima ma a diina fe ra. 12 Koni Ala yi a fala Ibrahima xa, a naxa, “I nama xolo i ya diina fe ra e nun i ya konyi jaxanla. Saran na feen naxan birin maxodin i ma, a birin liga a xa, bayo naxanye yatema i bomsonna ra, ne minima Isiyaga bomsonna nin. 13 N siyana nde fan naminima nen i ya konyi jaxanla diini, bayo i ya diin nan a fan na.” 14 Ibrahima yi keli subaxan ma. A yi burun nun kidi sagbaan tongo igen yi naxan kui. A yi na birin nate Hagara xun ma, a yi diin so a yii, a yi e birin kedi. Hagara yi a xun ti tonbon yiren na denaxan xili “Beriseba.” 15 Igen to jnan a kidi sagbaan kui, a yi a diin sa wudidin bun ma. 16 A yi siga, a sa dexo a danna xalimakuli wolide keden joxondon yi. A yi a fala, a naxa, “N mi noe n yeen tiye n ma diin faxamatson na.” A yi siga, a sa dexo a danna, a yi lu te a ma, a wuga. 17 Ala yi diin wuga xuiin me kore. Alaa malekan yi Hagara xili, a yi a maxodin, a naxa, “Hagara nanse i sotoxi? I nama gaxu bayo Ala bata diin wuga xuiin me kore. 18 Keli i ti! I ya diin tongo i yii firinna ra, i xa a suxu, bayo n na a findima siya gbee kannan na.” 19 Ala yi Hagara yeen nabi, a yi xojinna to, igena a kui. A yi na kidi sagbaan tongo, a sa igen sa a kui. A yi igen fi a diin ma. 20 Ala yi a yengi lu diin xon ma han a yi gbo. A yi siga a sa dexo tonbonni. A yi findi xalimakuli wonla ra. 21 A yi dexo Paran tonbonni. A nga yi Misiran kaa jaxalan keden fen a xa. 22 Na waxatini, Abimeleki nun a sofa mangana Pikoli, ne yi fa Ibrahima li, e a fala a xa, e naxa, “Ala luxi i xon ma i ya feen birin yi. 23 I kolo n xa Ala xinli, fa fala i mi n yanfe, i mi n ma diine yanfe, i mi n mamandenne fan yanfe. I xa hinan n na e nun boxoni ito muxune, i denaxan yi, alo n na a liga i xa kii naxan yi.” 24 Ibrahima yi a yabi, a naxa, “N bata n kolo Ala yi.” 25 Ibrahima yi a mawuga Abimeleki

xa, a walikene bata a xojinna ba a yii. 26 Abimeleki yi a yabi, a naxa, “N ma kolon naxan na feen ligaxi i ra. I mi dentegeni ito saxi n xa, fo to n tan yi fa a kolon.” 27 Ibrahima yi yexene nun siine nun jingene tongo, a yi e so Abimeleki yii. E yi layirin tongo e bode xa. 28 Ibrahima yi yexee dii solofere tongo, a yi e sa e danna. 29 Abimeleki yi a maxodin, a naxa, “Nanfera, i na yexee dii soloferene saxi e danna?” 30 Ibrahima yi a yabi, a naxa, “N ne soma nen i yii, alogo i xa a kolon, a n tan nan xojinni ito gexi.” 31 Nanara, menna xili saxi Beriseba, bayo e firinna birin e kolo menna nin. 32 E yi layirin tongo e bode xa Beriseba. Na dangu xanbini, Abimeleki nun a sofa mangana Pikoli, e yi ti kiraan xon ma xete Filisiti boxoni. 33 Ibrahima yi tamaro wudi bili keden si Beriseba boxon ma. A yi Alatala maxandi a xinla ra, Habadan Ala. 34 Ibrahima jee wuyaxi ti nen Filisiti boxoni.

22 Na feene dangu xanbini, Ala yi Ibrahima kejaan fesefese. A yi a xili, a naxa, “Ibrahima.” Ibrahima yi a ratin, a naxa, “N tan ni i ra.” 2 Ala yi a fala a xa, a naxa, “I ya diin tongo, Isiyaga, i ya dii keden peena, naxan nafan i ma, i xa a xali Moriya yamanani geyaan fari, n na denaxan yita i ra. I xa a ba n xa saraxa gan daxon na.” 3 Subaxan ma, Ibrahima yi keli, a yi dexo seni ton a sofana fari. A yi a walike firin tongo e nun Isiyaga, a diina. Ibrahima yi yegeni bo naxan findima tee yiton seen na saraxa badeni. A yi siga yireni Ala denaxan yitaxi a ra. 4 Na xii saxande loxoni, Ibrahima yeen yi ti na yire makuyen na, a sigama denaxan yi. 5 A yi a fala a walike firinna xa, a naxa, “E tan nun sofana xa lu be. Nxu nun n ma diin sigama geyaan fari Ala batudeni. Na waxatini nxu mon xetema han be.” 6 Ibrahima yi na yegen dexo Isiyaga xun ma, a diina. A mon yi tee wolonna nun filen xali. E sigan tima e firinna. 7 Isiyaga yi a baba Ibrahima xili, a naxa, “N baba.” A yi a ratin, a naxa, “N tan ni i ra, n ma diina.” Isiyaga yi a baba maxodin, a naxa, “N bata a to yegen nun tee wolonna en yii, koni yexee diin minen yi en naxan bama saraxan na?” 8 Ibrahima yi a yabi, a naxa, “N ma diina, Ala yatin nan yexee diin fima en ma, en naxan bama saraxa gan daxon na.” E sigan tima e firinna. 9 E to e soden li, Ala denaxan yitaxi a ra, Ibrahima yi saraxa ganden nafala menni, a yi yegen sa na. A yi a diin xidi, Isiyaga. A yi a rate na saraxa ganden fari, a yi a dexo yegen fari. 10 Na xanbi ra, a yi filen tongo, a yi a yiini bandun, a xa a diin kee

raxaba, **11** koni Alatalaa malekan yi a xili kore, a naxa, “Iburahima he, Iburahima he!” Iburahima yi a ratin, a naxa, “N tan ni i ra.” **12** Malekan yi a fala, a naxa, “Banxulanni ito lu na. I nama fe jaxi yo liga a ra. N bata a kolon i gaxuxi Ala yee ra. N mon bata la a ra, i mi tondixi i ya dii kedenna fideni n ma saraxan na.” **13** Iburahima yi a yeen naxete a xanbi ra, a yi yexee kontonna to fotonna yii ra, a feri firinna kankanxi jansanni. A yi sa na yexee kontonna tongo, a fa a ra. A yi na ba saraxan na a diin jaxon na. **14** Iburahima yi na yiren xili sa “Alatala nan fama a ra.” Nanara, han iki a falama “Alatala nan fama a ra a geyaan fari.” **15** Alatalaa malekan mon yi Iburahima xili kore. **16** A yi a fala a xa, a naxa, “N bata n kolo n yeteni, Alatalaa falan ni ito ra. Bayo i bata ito liga, i mi tondi i ya dii kedenna ma n xa, **17** n na i barakama nen han! I bonsonna wuyama ayi nen alo saren naxanye koren ma, xa na mi a ra e wuyama ayi nen alo mejensinna naxan malanxi baa deen na. I bonsonna e yaxune noma nen. **18** Dunuja siyane birin duban sotoma nen i tan bonsonna barakani, bayo i bata n xuiin suxu.” **19** Iburahima yi xete a walikene yireni. E birin yi siga Beriseba, bayo Iburahima yi doxi menma nin. **20** Na feene birin to dangu, Iburahima yi a me, a Milika bata diini itoe bari a xunyen Nahori xa: **21** A dii singena Yusu nun na xanbiratona Busi nun Arami baba Kemuyeli **22** nun Kesede nun Xaso nun Pilidasi nun Yidilafi e nun Betuyeli. **23** Betuyeli Rebeka nan soto. Milika nan na dii solomasexen bari Iburahima xunye Nahori xa. **24** Nahori a konyi jaxanla, na yi xili nen Reyuma. A yi diine bari. Na diine yi xili nen: Teba nun Gaxami nun Tahaka e nun Maka.

23 Saran jee keme jee moxonen nun solofere nan soto siimayaan na. **2** A yi faxa Kiriyati-Aruba yi, naxan mon xili “Xebiron,” Kanan boxoni. Iburahima yi a jaxanla saya feen liga, a yi a wuga. **3** Iburahima yi keli, a jaxalan binbin saxi denaxan yi, a yi siga Xitine fema. A yi sa falani ito ti e xa, a naxa, **4** “Xonen nan n tan na e tagi be. N bata e maxandi, e gaburu yiren fi n ma, n noe n ma jaxanla maluxunye denaxan yi.” **5** Xitine yi a yabi, **6** e naxa, “Nxu kannna, i tuli mati nxu ra a fajin na! Alaa muxu gbeen nan i ra nxu tagi. I na wa i ya jaxanla maluxun feni nxo gaburu yire yo yi, i sagoon na a ra. Nxu tan tagi be, muxu yo mi na naxan noe tonde i xa, i ya jaxanla maluxundeni a gaburu yireni.” **7** Iburahima yi keli. A yi a xinbi sin men kaane

xa, Xiti bonsonna. **8** A yi a fala e xa, a naxa, “Xa e bata tin, n xa no n ma jaxanla maluxundeni e gaburu yireni, n fan bata e maxandi e xa no n ma maxandin nadangudeni, Soxara a dii Eferon ma **9** alogo a xa Makipela faranna so n yii. Bayo, n na a kolon a tan nan gbee menma ra, na mon a xeen nan dexon. A xa na sara n ma e yee xori, alogo birin xa a kolon, na boxon bata findi n ma muxu maluxunden na.” **10** Eferon Xiti kaan yi tixi a yamaan tagi. A yi Iburahima yabi a xuini texin na alogo Xitine nun muxun naxanye birin yi malanxi taan so deen na, e xa no a falan namedeni. **11** “Nba, n bata i maxandi, n kannna, i tuli mati n na. En-en, n bata xeen nun faranni ito fi i ma n bonsonna yee xori. I ya jaxanla maluxun menni.” **12** Iburahima mon yi a xinbi sin, yamaan birin yee xori. **13** A yi falan ti Eferon xa, a naxa, “I fan xa i tuli mati n na. N ni i ya xeen saren fima nen. A rasuxu, yandi, n gbetin naxan soma i yii alogo n xa no n ma jaxanla maluxundeni menni.” **14** Eferon mon yi falan tongo, **15** a naxa, “Nba, i tuli mati n na a fajin na. Boxon naxan saren lanma gbeti gbanan keme naanin ma, sese mi na ra, i tan nun n tan tagi. I ya jaxanla maluxun na.” **16** Iburahima yi tin Eferon ma falan ma. A yi gbetin tenge, a naxan ma fe fala a bodene yee xori, Xitine, na gbeti gbanan keme naanin yi maliga alo yulane yi darixi a lige kii naxan yi na waxatini. **17** Eferon ma xeen naxan yi Makipela yi, Mamire sogetede binna e nun faranna naxan na, e nun wudi binla naxanye birin sixi xeen danne ra, **18** ne birin yi findi Iburahima gbeen na. Na Xitine nun muxun naxanye birin yi malanxi taan so deen na, e birin yi findi na fe serene ra. **19** Na birin dangu xanbini, Iburahima yi a jaxanla Saran maluxun na faranna ra Makipela xeen ma, naxan Mamire yetagi, Xebiron yi, Kanan boxoni. **20** Na xeen nun na faranna yi ba Xitine gbeeyani, a findi Iburahima gbeen na alogo a xa no a muxu faxaxine maluxundeni menni.

24 Iburahima bata yi fori. Alatala yi Iburahima baraka kirayaan sifan birin xon ma. **2** A walikeen naxan fori dangu a walikeen birin na, naxan yengi luxi a yii seen birin xon ma, Iburahima yi a fala na xa, a naxa, “I yiin naso n danban bun ma. **3** N fama i rakolodeni Alatala yi, kore xonna nun boxo xonna Ala, alogo i nama jaxanla fen n ma diin xa naxan finde Kanan kaan na n doxi denaxan yi. **4** I sigama n bari boxon nan ma, n bonsonni, i menma jaxalan keden fen Isiyaga xa, n ma diina.” **5** A walikeen yi

a yabi, a naxa, “Yanyina nde, na jaxanla mi bire n fɔxɔ ra fa bɔxɔni ito yi. Fɔ n xa i ya diin xali menni, i ya bɔxɔni, i kelixi denaxan yi ba?” 6 Iburahima yi a yabi, a naxa, “I nama n ma diin naxete n kelideni de! 7 Alatala, Ala Naxan Kore, naxan n tongoxi n bari muxune tagi e nun n bɔnsɔnni, naxan falan tixi n xa, naxan a kolɔxi a bɔxɔni ito soma nen n bɔnsɔnna yii, a tan yatina a malekan nasigama i ye ra nen alogo i xa nɔ jaxanla sɔtɔdeni n ma diin xa menni. 8 Xa jaxanla mi fa sa tin bire i fɔxɔ ra, i fama nen natangadeni n ma kolɔn ma, i naxan tongoxi n xa. Koni i nama xete n ma diin na menni.” 9 Walikeen yi a yiin naso a kanna Iburahima danban bun ma, a yi a kolɔ na ma. 10 Walikeen yi jɔgɔme fu tongo Iburahima a jɔgɔmene tagi e nun se fɔni gbegbe. A yi keli, a yi siga Nahori a taani, Mesopotamiya yamanan kɔmen fɔxɔni. 11 Ninbari waxatini, a yi xɔpinna li naxan gexi taan fari ma. A yi jɔgɔmene rafelen menni. Naxanle yi fama ige badeni na xɔpinna nan na. 12 A yi Ala maxandi, a naxa, “Alatala, n kanna Iburahimaa Ala, n bata i maxandi alogo n ma sigatiin xa findi xunna kenla ra n xa to. I xa hinan n kanna Iburahima ra. 13 I bata n to xɔpinna dexɔn ma, taan sungutunne fama ige badeni denaxan yi. 14 N sungutunna nde maxɔdinma nen, a xa a ige ba seen so n yii, n yi igen min. Xa a li, a n yabi iki, a naxa, ‘I xa igen min, n mɔn xa igen so i ya jɔgɔmene fan yii,’ n na a kolonma nen na waxatini, i ya jaxalan sugandixin yatin nan na ra Isiyaga xa, i ya walikɛna. Na waxatini n na a kolonma nen, a i bata hinan n kanna ra.” 15 Benun a xa yelin na falan tiye, Rebeka yi fa, Betuyeli a dii temena, Nahori nun Milika mamandenna. Nahori, Iburahima xunyen nan a ra. A fejen yi dɔxi a tungunna fari. 16 Sungutun tofajin nan yi a ra, naxan mi yi xeme feen kolon. A yi godo xɔpin deen na, a yi a fejen nafe igen na, a mɔn yi te. 17 Iburahimaa walikeen yi a gi, a sa a ralan. A yi a fala a xa, a naxa, “Yandi, a lu n xa igena nde min, naxan i ya fejen kui.” 18 A yi a yabi, a naxa, “Nba, igen min.” A yi a fejen nagodo a tungunna fari, a yi igen so a yii. 19 A to yelin igen soe a yii, a yi a fala a xa, a naxa, “N ni igen bama nen i ya jɔgɔmene fan xa alogo e birin xa wasa igen na.” 20 A yi igen sa xuruse mindeni, a mɔn yi siga a giye a sa ige gbete sege. Jɔgɔmene birin yi wasa igen na. 21 Xemeni ito yi a dundu, a yi a miri, yanyina nde, Alatala bata n ma sigatiin nasɔɔya n xa. 22 Jɔgɔmene to yelin igen minje, xemeni ito yi xema wuredin so sungutunna yii

naxan sama jɔeen na, na garamu sennin liye, e nun xema yiikɛeraso firin, naxan garamu keme liye. 23 A yi a maxɔdin, a naxa, “Nde a dii i tan na? Yandi, a fala n xa, xa yigiyana nde i baba konni, nxu xa xi na to kɛen na?” 24 A yi a fala a xa, a naxa, “Betuyeli a diin nan n na, Milika nun Nahori mamandenna nan n na.” 25 Naxanli ito mɔn yi a fala, a naxa, “Nxu konni sexen nun jɔxɔndede gbegbeen na, yigiyaden fan na e luma denaxan yi.” 26 Xemeni ito yi a xinbi sin Alatala yetagi. 27 A yi a fala, a naxa, “Alatala, n kanna Iburahimaa Ala, n bata i tantun. I hinanma n kanna Iburahima ra waxatin birin. I ya lannayaan mi kale. N ma sigatini, Alatala, n xunna tixi yiren nan na, denaxan findixi n kanna Iburahima xunyen konna ra.” 28 Sungutunni ito yi a gi siga a konni, a sa xɔjeni ito a fe fala a nga xa. 29 Rebeka tadana nde yi na naxan xili Laban. A yi mini mafuren, a yi siga xɔpin deen na xemen tixi denaxan yi. 30 A bata yi jɔerasoon nun yiikɛerasoon to a xunyen jaxalanmaan yii. A mɔn bata yi a xunyen dentege xuiin me xemena falana fe ra. A yi siga xemeni ito yireni a tixi xɔpinna fema e nun jɔgɔmene. 31 A yi a fala a xa, a naxa, “Fa be, Alatala barakan fixi naxan ma. Nanfera i tixi tandeni? N bata banxini tɔn i yigiyadena e nun jɔgɔmene lan e xa lu denaxan yi.” 32 Xemeni ito yi so Laban konni. Laban yi goronna ragodo jɔgɔmene fari. A sexen so e yii e nun jɔxɔndedena e naxan donma. A yi igen fan so xemeni ito yii, e nun muxun naxanye birin biraxi a fɔxɔ ra, alogo e xa e sanne maxa. 33 A yi fa donseen na e xa, koni a yi a fala, a naxa, “N mi n degema singe, fɔ n xa falan ti e xa, n lanma n xa naxan yita e ra.” Laban yi a fala a xa, a naxa, “Falan ti xe.” 34 Xemeni ito yi a fala, a naxa, “N tan Iburahimaa walikeen nan n na. 35 Alatala bata baraka gbegbeen nagidi n kanna Iburahima ma. A bata findi nafulu kanna ra, bayo Ala bata xuruseen sifan birin fi a ma e nun gbetin nun xemaan nun walike xemene nun walike jaxanle nun jɔgɔmene nun sofanle. Ala bata na birin fi a ma. 36 N kanna Iburahima a jaxanla Saran, hali a to yi forixi, a yi diin bari a ma. A keen birin soxi diini ito nan yii.” 37 “Iburahima n nakolɔxi nen, a naxa, ‘I nama jaxanla tongo n ma diin xa naxan finde Kanan kaan na n dɔxi denaxan yi. 38 I xa siga n baba denbayani n bɔnsɔnni alogo i xa jaxanla fen n ma diin xa menni.’ 39 Na waxatini, n yi n kanna maxɔdin, n naxa, ‘Xa na jaxanla fa tondi biradeni n fɔxɔ ra go?’ 40 A yi n yabi, a naxa, ‘N sigan tima Alatala naxan yetagi, na fama

nen a malekan biradeni i fəxo ra alogo i ya sigatiin xa sənəya. I fama nen naxanla tongodeni n ma diin xa n bənsənni, n baba denbayani. **41** Na waxatini i na siga n bənsənna tagi, xa e mi fa sa sungutunna so i yii, i bata ratanga n ma marakəlon ma.” **42** “N to xəninna yiren li, n yi maxandin ti, n naxa, ‘Alatala, n kanna Ibrahima Ala, xa i bata a jənige n xa, i xa n ma sigatiin nasənəya, **43** i yeen ti n na xəninna dəxən ma. N fama nen sungutunna nde maxədindeni naxan fama ige badeni, a a xa igen so n yii naxan a fəjən kui alogo n xa n min. **44** Xa a n yabi, a naxa, ‘Igen min, n na igen bama nen i ya jəgəməne fan xa, e min,’ n na a kolonma nen na waxatini, Alatalaa sungutun sugandixin yatin nan na ra n kanna Ibrahima a diin xa.” **45** “Benun n xa yelin na falan tiyə n yete ma, Rebeka yi fa, fəjən dəxi a tungunna fari. A yi godo xəjin deen na, a yi igen ba. N yi a maxədin, n naxa, ‘Yandi igen so n yii, n xa n min.’ **46** A yi a fəjən nagodo mafuren a tungunna fari, a yi a fala n xa, a naxa, ‘Igen min, i na yelin igen minjə, n na igen soma nen i ya jəgəməne fan yii.’ N yi n min, a mən yi igen so jəgəməne yii. **47** N yi a maxədin, n naxa, ‘Nde a dii i tan na?’ A yi n yabi, a naxa, ‘Betuyeli a diin nan n na, Nahori nun Milika mamandenna nan n na.’ N yi xema wuredin so a jəeen na, n mən yi xema yiirasone so a yii kəeen na. **48** N yi n xinbi sin Alatala yetagi. N yi Alatala tantun, n kanna Ibrahima Ala, bayo a bata n ti kira fajin xən ma alogo n xa n kanna xunyena dii jaxalanmaan tongo a diin xa. **49** Iki, a fala n xa, xa i hinanma n kanna ra lannayani. Xa na mi a ra, n sigama nen yire gbete yi.” **50** Laban nun Betuyeli yi a yabi, a naxa, “Alatala nan feni itoe ragidixi. Nxu mi na matande. **51** Rebeka nan tixi i yetagi ito ra. A xali i yii, alogo a xa findi i kanna diina naxanla ra, alo Alatala a fala kii naxan yi.” **52** Ibrahima walikeen to na fala xuine mə, a yi a xinbi sin Alatala yetagi. **53** Na xanbi ra, a yi muran gbete dixin nun xema dixin nun duginə ramini a goronne yə, a e so Rebeka yii. A yi Rebeka nga nun a tada fan ki. **54** Ibrahima a walikeen nun a fəxorəbirane, e birin yi e dege, e igen min, e yi so e sadeni. E to keli xətənni, Ibrahima walikeen yi a fala Rebeka nga nun a tada xa, a naxa, “Ə a lu fa n xa xete n kanna konni.” **55** E yi a fala, e naxa, “Sungutunni ito xa lu be singen, a xa xii fu jəxən liga be waxatini ito yi, na xanbi ra, i siga.” **56** Walikeen mən yi e yabi, a naxa, “Ə nama n makankan be. Alatala bata n ma sigatiin findi n ma xunna kenla

ra. Ə a lu fa n xa xete n kanna konni.” **57** E yi a fala, e naxa, “En sungutunni ito xili ba, en na a maxədin, en xa a jənigen kolon.” **58** E yi Rebeka xili, e yi a maxədin, e naxa, “I waxi siga feni ba, e nun xəmənəni ito?” Rebeka yi a yabi, a naxa, “Ən, n waxi siga feni.” **59** E yi e xunyen Rebeka so e yii e nun naxanla naxan yi a maxuruma. E nun Ibrahima walikeen nun a muxune yi siga. **60** E yi duba Rebeka xa, e naxa, “I tan nxu xunyena. Ala xa i yixetene rawuya ayi han wuli wuli wuyaxi, e nəon sətə e yaxune xun na.” **61** Rebeka nun a walike naxanle yi dəxo jəgəməne fari, e yi bira Ibrahima a walikeen fəxo ra, e birin yi siga. **62** Isiyaga bata yi keli Lahayi Royi xəninna yireni. A yi siga Negewi bəxəni, a sa dəxo na. **63** Ninbanna nde ra, a minixi a masigadeni, a yi jəgəməne to fə. **64** Rebeka to Isiyaga to, a yi tугan jəgəməne fari, a godo bəxəni. **65** A yi walikeen maxədin, a naxa, “Muxun mundun ito ra naxan fama en nalandeni xeen ma?” **66** Ibrahima a walikeen yi a yabi, a naxa, “N kanna nan na ra.” Nayi, a yi dugin so a yetagin xun na. Walikeni ito yi a fala Isiyaga xa, a feen naxanye birin ligaxi. **67** Na xanbi ra, Isiyaga yi Rebeka tongo, a yi a xali bubuna nde kui, a nga Saran yi dəxi denaxan yi nun. Rebeka yi findi a naxanla ra. A yi a xanu. Isiyaga nga faxa sunun yi ba a ma Rebekaa fe ra.

25 Ibrahima mən yi jaxalan gbeten tongo naxan xili Ketura. **2** Na naxanla yi diine bari a xa. Na diine yi xili: Simiran nun Yokan nun Medan nun Midiyan nun Yisebaki e nun Suwa. **3** Yokan yi Saba nun Dedan bari. Dedan yixetene findixi Asuri kaane nan na, e nun Letusin kaane nun Leyumin kaane. **4** Midiyan ma diine nan Efa nun Efere nun Xənəki nun Abida nun Elida ra. Keturaa diine nan e birin na. **5** Seen naxan birin findi Ibrahima gbeen na, a yi a birin so Isiyaga yii. **6** Naxanye findi a konyi naxanle diine ra, a yi e ki a siimayani. A yi e rasiga yireni, denaxan makuya a dii Isiyaga ra sogetede mabinni. **7** Ibrahima a siimayaan yi siga han jəe kəmə jəe tonge solofere e nun suulun. **8** A to siimaya xunkuyen sətə, a fori ki fajni, a yi faxa, a yi siga laxira yi. **9** A diine Isiyaga nun Sumayila yi a maluxun faranna ra, Makipela, denaxan yi Eferon ma xeen ma, Soxara a diina, Xiti kaana, Mamire fema. **10** Ibrahima na xeen sara Xitine bənsənna nan ma. E nun a naxanla Saran, e birin maluxunxi menna nin. **11** Ibrahima to faxa, Ala yi a dii Isiyaga baraka naxan dəxo Lahayi

Royi xəjinnə fəma. **12** Sumayila bənsənnə xinlə nan itoe ra. Saran bata yi a konyi jaxanla Misiran kaa Hagara fi Iburahima ma. Hagara yi Sumayila sətə. **13** Sumayilaa diine xinlə ni itoe ra: Nebayoti Sumayilaa dii singen nun Kedari nun Adibeli nun Mibisan nun **14** Misema nun Duma nun Masa nun **15** Xadada nun Tema nun Yeturi nun Nafisi e nun Kedema. Na dii fu nun firinna findi Sumayilaa diine nan na. **16** Na muxu keden kedenna, ne findi bəxə mangane nan na. E yi e xinlə sa e taane xun ma e nun e muxune. **17** Sumayilaa siimayaan yi dan jɛɛ kɛmɛ jɛɛ tonge saxan nun solofere nin. A yi faxa, a siga laxira yi. **18** Sumayila bənsənnə yi dəxə na bəxəni dənaxan yi Xawila nun Suru tagi. Suru yɛɛn nafindixi Misiran nan ma Asuri kiraan na. E yi dəxi e ngaxakedenne nan dɛxən ma. **19** Isiyaga bənsənnə taruxun ni i ra. Isiyaga findi Iburahima a diin nan na. **20** Isiyaga to jɛɛ tonge naanin sətə siimayaan na, a yi Rebeka dəxə, Laban xunye jaxalanmana, Betuyeli a dii temena. Arami kaane nan e ra, e kelixi Padan-Arami nən. **21** Koni Rebeka mi nə diin bare a xa. Isiyaga yi Alatala maxandi a jaxanla fe ra a xa nə dii barideni. Alatala yi a maxandin nasuxu, Rebeka yi fudikan. **22** Na diine yi lu yenge e nga kui. A yi a fala, a naxa, “Nanfera n kuina n tərəma?” A yi Alatala maxodin. **23** Alatala yi a yabi, a naxa, “Siya dəxədə firin nan i kuini. Kedenna senben gboma nən boden xa. Tadan luma nən a xunyena nən bun ma.” **24** A diin bari waxatin to a li, e yi a to a gulunne nan yi Rebeka kui. **25** Diin naxan singe bari muxu gbeela nan yi a ra. Fati ma xabe gbege kanna nan yi a ra. E yi a xili sa Esayu. **26** Na xanbi ra, a xunyen fan yi bari. A yiin naxutuxi a tada Esayu santinban ma. E yi a xili sa Yaxuba. Rebeka na diine barima waxatin naxan yi, Isiyaga jɛɛ tonge sennin nan yi a ra. **27** Na dii xeme firinna yi gbo. Esayu yi findi donso fajin na naxan yi wulani sigama. Yaxuba findi muxu maxunbelixin nan na, a tan yi luma bubun nan bun ma. **28** Esayu nan yi rafan Isiyaga ma, a sube faxaxine fe ra, koni Yaxuba nan yi rafan Rebeka ma. **29** Ləxəna nde Yaxuba yi pərin nafala. Esayu to so, a xadanxi keli donsoyani. **30** A yi a fala Yaxuba xa, a naxa, “N mi nə fefe ra iki. A lu n xa pəri gbeeli ito nde kən.” Na nan a toxi a yi xili sa, Edən. **31** Yaxuba yi a yabi, a naxa, “I ya foriyaan tiden fi n ma singen.” **32** Esayu yi a fala, a naxa, “N faxa feni kamen nan ma iki. Na foriya tiden nanse fanma n ma?” **33** Yaxuba mən yi a fala, a naxa, “Fə i xa i kələ.” Esayu yi a kələ, a bata a

foriya tiden fi a ma. **34** Yaxuba yi burun nun pərin toge daxi so a yii. Esayu yi ne don, a yi a min. A yi siga. Nanara, Esayu mi a foriya tiden yatə sese ra.

26 Kamen yi so bəxəni, ba a singen na naxan so Iburahima waxatini. Isiyaga yi siga Gerari yi, Filisiti manga Abimeleki konni. **2** Alatala yi mini Isiyaga xa. A yi a fala a xa, a naxa, “I nama siga Misiran bəxəni de! Lu na bəxəni n na dənaxan yita i ra. **3** I lu na. En birin na a ra. N ni i barakama nən, bayo n fama bəxəni ito fideni i tan nun i bənsənnə nan ma. N layirin naxan tongo i baba Iburahima xa, n na rakamalima nən. **4** N na i bənsənnə rawuyama ayi nən alo saren naxanye kore. N bəxəni ito fima nən i bənsənnə ma. Dunuya siyane birin duban sətəma nən i tan bənsənnə barakan nin, **5** bayo Iburahima n xuiin name nən, a yi n gelene nun n ma yamarine nun n ma tənne nun n ma sariyane suxu.” **6** Isiyaga yi dəxə Gerari yi. **7** Muxun naxanye dəxi mənni, ne yi a maxədin a jaxanla fe ma. A yi e yabi, a xunyen jaxalanmaan nan a ra. A mi yi susue a fale e xa, a jaxanla nan Rebeka ra alogo mən kaane nama a faxa. A gaxu a fale a jaxanla na a ra bayo Rebeka jaxalan tofajin nan yi a ra. **8** Isiyaga to bu na, ləxəna nde Abimeleki, Filisitine mangana, na yi a yɛɛn namini banxin foye soden na. A yi a to Isiyaga Rebeka masugusuguma. **9** Abimeleki yi a xili a konni. A yi a fala a xa, a naxa, “I ya jaxanla yatin nan ito ra! Nanfera i a falaxi nxu xa, a i xunye jaxalanmaan nan a ra?” Isiyaga yi a yabi, a naxa, “N yi gaxuxi nən alogo e nama n faxa. Na nan a to, n yi na fala.” **10** Abimeleki mən yi a fala, a naxa, “I nanse ligaxi nxu ra? Xa muxuna nde fa mini n ma yamaan tagi go, a yi i ya jaxanla kolon jaxanla ra? Na waxatini i bata nxu findi yulubi tongone ra.” **11** Abimeleki yi yamarin fi a yamaan birin ma, a naxa, “Muxu yo na maxa xeməni ito nun jaxanla ito ra, n na kanna faxama nən.” **12** Na jɛɛn na, Isiyaga yi xɛɛn bi bəxəni ito ma. A to na xɛɛn xaba, a yi na jəxəndən keme sətə, bayo Alatala bata a baraka. **13** A herin yi lu xun mase, a yi findi nafulu kanna ra. **14** A yi findi yɛxɛɛ gbege kanna ra e nun siine nun jingene nun konyi wuyaxi kanna. Filisitine yi Isiyaga maxəxələn. **15** Filisitine yi xəjinnə birin nafe benden na, Isiyaga baba Iburahimaa konyine naxanye ge Iburahima waxatini. **16** Abimeleki yi a fala Isiyaga xa, a naxa, “I bata senben sətə be dangu nxu tan na. Fə i xa keli be.” **17** Isiyaga

xa i masuxu, n ma diina alogo n xa la a ra a Esayu nan yati i ra, n ma diina.” 22 Yaxuba yi a maso a baba ra. Isiyaga yi a fatin masuxu. A yi a fala, a naxa, “I xuiin maliga Yaxuba xuiin na, koni i yiine tan Esayu yiine nan e ra.” 23 A mi yi nœ Yaxuba kolonje bayo a yiine xaben yi e ma, alo a tada Esayu yi kii naxan yi. A yi duba a xa. 24 A mon yi a maxodin, a naxa, “N ma diina Esayu yatin nan i ra?” Yaxuba yi a yabi, a naxa, “Ōn.” 25 Isiyaga yi a fala, a naxa, “Fa donseen na, i naxan nafalaxi, n xa a don. N yi duba i xa.” Yaxuba yi donseen so a baba yii. Isiyaga yi a don. A yi wudi bogi igen fan so a yii alo manpana, a yi na fan min. 26 Na xanbi ra, a baba Isiyaga yi a fala a xa, a naxa, “I maso n na, i n sunbu, n ma diina.” 27 Yaxuba yi a maso a ra, a yi a sunbu. Isiyaga yi a dugine xirin me. Awa, na xanbi ra, a yi duba a xa, a naxa, “Yo! N ma diin xirin luxi nen alo xœna Alatala barakan saxi naxan yi. 28 Ala xa xiila fi i ma naxan kelima kore. Ala xa dahamu bœxon fi i ma. Ala xa barakan sa i ya xœeni. Ala xa wudi bogi igen fi i ma. 29 Ala xa i dœxo siyane xun na. Ala xa siyane magodo i xa. I xa findi i ngaxakedenne yœeratiin na. E birin xa e magodo i bun ma. Muxu yo na i danga, na dangan xa xete a kannna ma. Muxu yo na duba i xa, na kannna fan xa duban soto.” 30 Isiyaga to yelin dubadeni Yaxuba xa, a yi mini. A mi bu, Yaxuba tada Esayu fan yi so, sa keli sube bundeni. 31 A fan yi na suben nafala ki fapi alo a baba waxi a xœn ma kii naxan yi. A yi fa a ra a baba xa. A yi a fala a baba xa, a naxa, “N baba, keli, i dœxo, i suben don n naxan nafalaxi i xa alogo i xa duba n xa.” 32 A baba Isiyaga yi a maxodin, a naxa, “Nde i tan na?” Esayu yi a yabi, a naxa, “Esayu nan n na, i ya diin forimana.” 33 Na feen yi Isiyaga yifu ki fapi. A fatin birin yi xuruxurun a ma. A yi maxodinna ti, a naxa, “Koni nde tan faxi suben nafalaxin na n xa, n naxan donxi iki benun i tan xa fa? N bata duba na kannna xa. A tan nan fama duba sœtœdeni.” 34 Esayu to a baba falan me, a bœnen yi mini, a yi sœnxœ gbegebeen nate. A yi a baba mafan, a naxa, “Duba n fan xa, n baba.” 35 Isiyaga yi a yabi, a naxa, “I xunyen bata n mayenden. A tan bata i ya duban soto.” 36 Esayu yi a fala, a naxa, “A xinla yatina a xun ma, Yaxuba. A sanja yi firinden ni i ra a n yanfama. A bata n ma foriya tiden tongo. Iki a bata n ma duban fan tongo.” Esayu mon yi a fala, a naxa, “Duba yo mi fa i yii sœnœn, i lan i xa naxan ti n tan xa?” 37 Isiyaga yi Esayu yabi, a naxa, “N bata a tan findi i xunna ra, n mon bata a ngaxakedenne

fan birin so a yii e xa lu a bun ma. N bata baraka gbegebeen fi a ma, e nun wudi bogi ige fajina. N nœ nanfe lige i tan xa, n ma diina?” 38 Esayu yi a fala a baba xa, a naxa, “N ba, duba keden peen nan i yii ba? N baba, duba n fan xa.” A yi wuga a xuini texin na. 39 A baba Isiyaga yi a yabi, a naxa, “A kolon, i mi fama bœxo fapi sœtœdeni, hanma xiila naxan kelima kore. 40 I ya silanfanna nan fama i balodeni. I fama walideni i xunyen nan bun ma, koni i fama nen i yete sœtœdeni. A nœœn naxan sama i ma, i murutema nen na bun.” 41 Esayu yi a xunyen Yaxuba rafen yengen na a duban soto feen na e baba ra. Esayu yi a fala a bœneni, a naxa, “N baba na faxa waxatin naxan yi, n Yaxuba faxama nen.” 42 Rebeka to a dii singen Esayu a natan kolon, a yi a dii firinden Yaxuba xili. A yi a fala a xa, a naxa, “I bata a to, i tada Esayu waxi a gbeen jœxo feni i ma, a i faxa. 43 Iki i tuli mati n na ki fapi, n ma diina. Keli be, i siga Xarani yi, n tada Laban konni. 44 I sa lu a konni waxatini ito yi han i tada bœnen yi godo. 45 I tada bœnen na godo i ya fe ra waxatin naxan yi, a na jinan i liga fœxon na, n na n jœngœ, i fa. N mi waxi fula feni e firinna birin na lœxo kedenni.” 46 Rebeka yi a fala Isiyaga xa, a naxa, “N niin bata yijaxu n ma Xiti kaa jaxanle fe ra. Xa a sa a li, Yaxuba fan jaxanla tongo bœxœni ito ma, na waxatini n ma siimayaan tœnœn nanse ra?”

28 Isiyaga yi Yaxuba xili. A yi duba a xa. A yi yamarini ito so a yii, a naxa, “I nama jaxanla dœxo naxan findixi Kanan kaan na de! 2 Keli, i siga Padan-Arami yi, i nga baba Betuyeli konni. I sa mœnna jaxanla nde dœxo naxan finde Laban ma dii temen na, i nga tada xœmemana. 3 Ala Senbe Kanna xa i baraka, Ala xa dii gbegebe fi i ma, alogo i xa findi siya gbegebeen benban na. 4 Ala xa Iburahima a duban yabi i ma e nun i bœnsœnna, alogo bœxœni ito xa findi i gbeen na i waxati rabe denaxan yi, Ala bœxon naxan fi Iburahima ma.” 5 Isiyaga yi Yaxuba rasiga Padan-Arami yi, Laban konni, Betuyeli a diina Arami kaana. Laban, Rebeka tada xœmœmaan nan yi a ra. Yaxuba nun Esayu nga nan yi Rebeka ra. 6 Esayu yi a kolon a baba bata duba Yaxuba xa, a a rasiga Padan-Arami yi, a xa sa mœnna jaxanla dœxo. A mon yi a me, a baba Isiyaga bata a yamari, a nama jaxanla dœxo naxan finde Kanan kaan na. 7 Yaxuba yi a baba nun a nga xuiin binya. A yi siga Padan-Arami yi. 8 Esayu yi a kolon na waxatini Kanan kaa jaxanle mi rafan a baba Isiyaga ma. 9

Awa, Esayu yi siga Sumayila konni, Iburahima diina. A yi Sumayilaa dii temen Mahalati dɔxɔ, Nebayoti xunyɛ naxalanmana. **10** Yaxuba to keli Beriseba yi, siga Xarani yi, **11** kɛna a li denaxan yi, a yi xi menni. A yi gɛmɛ keden tongo, a yi a raso a xunna bun ma. A yi a sa menni. **12** A yi xiye sa, sangalanna tixi bɔxɔn fari a xunna texi han kore. Alaa malekane yi teen nun godoni sangalanna ma. **13** Alatala yi tixi e xun ma. A yi a fala a xa, a naxa, “N tan nan Alatala ra, i tajɛ Iburahima nun Isiyagaa Ala. I saxi bɔxɔn naxan fari ito ra, n ni ito fima i ma nɛn ɛ nun i bɔnsɔnna. **14** I bɔnsɔnna fama wuyadeni nɛn alo gbangbanna. ɛ bɔxɔn fama nɛn gbodeni ayi keli sogeteden ma han sa dɔxɔ sogegododen na, keli kɔmɛnna ma sa dɔxɔ yiifanna ra. Dunuja siyane birin duban sɔtɔma i tan nun i bɔnsɔnna sabun nan na. **15** En birin na a ra i na siga dɛdɛ. N ni i kantanma nɛn i na siga denaxan yi, n ni i raxetema nɛn bɔxɔni ito ma. N mi i rabɛjinjɛ. N feen naxan birin layiri tongoxi i xa, n na a birin ligama nɛn.” **16** Yaxuba yi xulun xixɔnli, a yi a fala, a naxa, “N bata yelin a kolonjɛ yati, Alatala be yi, koni n mi yi a kolon.” **17** A yi gaxu, a yi a fala, a naxa, “Yire magaxuxin nan be ra. Sese mi a ra fɔ Alaa banxina, e nun kore xɔnna so dɛɛna.” **18** A yi keli xɔtɔn xɔtɔn, a gɛmɛn tongo naxan yi rasoxi a xunna bun ma. A yi a ti taxamasenna ra, a yi turen maso gɛmɛn xunna ma. **19** A yi na yiren xili sa Beteli. Benun na xa liga, na yiren yi xili nɛn Lusi. **20** Yaxuba yi a dɛ ti Ala xa, a naxa, “Xa nxu nun Ala na a ra, a tan nan mɔn n kantanma kiraan xɔn ma n sigama denaxan yi, a yi donseen so n yii n naxan donma, a mɔn yi maxidi seen so n yii n naxan soma n ma, **21** xa n xɛtɛ bɔjɛ xunbenli n baba konni, nayi Alatala findima nɛn n ma Ala ra. **22** Gɛmɛni ito, n naxan tixi taxamasenna ra, a findima Alaa banxin nan na. I seen naxan birin fima n ma, n na a yaganna bama nɛn, n na fi i ma.”

29 Yaxuba to ti kiraan xɔn ma siga sogeteden bɔxɔn mabinni, **2** a yi xɔjinna to burunna ra. Yɛxɛɛn nun sii kuru saxan yi saxi na xɔjinna fɛma e igen minma denaxan yi. Gɛmɛ xungbeen nan yi saxi xɔjinna dɛ ra. **3** Na waxatini, e yi darixi xuruseene malanjɛ na yiren nin. E malanxina, xuruse rabane yi gɛmɛn makutukutu naxan yi saxi xɔjinna dɛ ra. Xuruseene to yelin ige mindeni, e mɔn yi gɛmɛn naxɛtɛ xɔjinna dɛ ra. **4** Yaxuba yi xuruse rabane maxɔdin, a naxa, “Ngaxakedenne, ɛ kelixi minen yi?”

E yi a yabi, e naxa, “Nxu kelixi Xarani taan nin.” **5** A mɔn yi e maxɔdin, a naxa, “ɛ Laban kolon, Nahori a dii xɛmɛna?” E yi a yabi, e naxa, “ɔn, nxu a kolon.” **6** A yi e maxɔdin, a naxa, “A di na?” E yi a yabi, e naxa, “Sese mi a toxi. A dii temena Rakeli nan fama na ra e nun xuruseene.” **7** A yi a fala e xa, a naxa, “En yanyin nin iki. Xuruseene malan waxatin xa mi a ra iki ba? ɛ igen fi xuruseene ma mafurɛn, ɛ mɔn yi xɛtɛ e ra e rabadeni.” **8** E yi a fala, e naxa, “Nxu mi nɔɛ fefe lige iki, fɔ xuruseene birin na malan. Na waxatini, nxu fa gɛmɛn ba xɔjinna dɛ ra a dɛɛn yi balanxi naxan na, nxu fa igen fi xuruseene birin ma.” **9** Yaxuba to yi na falama e xa, Rakeli fan yi fa a babaa xuruseene ra, bayo xuruse rabaan nan yi a ra. **10** Yaxuba to Rakeli to fɛ, Yaxuba nga tada dii temena, e nun Laban ma xuruseene, a yi a maso xɔjinna dɛxɔn. A yi gɛmɛn ba xɔjinna dɛ ra, a yi igen fi Laban ma xuruseene ma. **11** Yaxuba yi Rakeli sunbu, a yi wuga, a gbelegbele. **12** A yi a fala Rakeli xa, a a baba bari boden nan a ra, Rebekaa dii xɛmɛna. Rakeli yi giin nako ayi, a sa na yɛba a baba xa. **13** Laban to Yaxuba fɛ mɛ a xunyen naxalanmana diina, a yi siga, a sa a ralan. A yi a sunbu, a a xali banxini. Feen naxan birin Yaxuba sɔtɔ, a yi na yɛba Laban xa. **14** Laban yi a fala a xa, a naxa, “En birin wuli keden fasa keden.” Yaxuba yi kike keden naba Laban konni. **15** Lɔxɔna nde, Laban yi a fala Yaxuba xa, a naxa, “N bari boden nan i ra, koni sariya yo mi a falaxi i xa wali n xa, a fa lu n mi i saren fi. A fala n xa, a lan n xa i saren fi naxan na.” **16** Awa, dii temɛ firin nan yi Laban yii. A dii temɛ singen xili nɛn Leya, a firindena Rakeli. **17** Leya yɛɛne mi yi rayabu, koni Rakeli tan naxalan tofajin nan yi a ra. **18** Rakeli nan yi rafan Yaxuba ma ki fajni. A yi a fala Laban xa, a naxa, “N jɛɛ solofere nan walima i xa, alogo i xa i ya dii temɛn firinden Rakeli fi n ma.” **19** Laban yi a fala, a naxa, “Benun n xa n ma diin fi muxu gbɛtɛn ma, n lan n xa a fi i tan nan ma. Lu n konni be.” **20** Yaxuba yi jɛɛ solofere wanla kɛ Laban yii Rakeli a fɛ ra. Koni na jɛɛ soloferen lu nɛn a xa alo xii dando gbansan, bayo a bata yi a xanu. **21** Na xanbi ra, Yaxuba yi a fala Laban xa, a naxa, “N ma waxatin bata jan. N ma naxanla so n yii fa, n xa a findi n yɛtɛ gbeen na.” **22** Laban yi mɛn kaane birin xili, a e xa fa e dɛgedeni, e sewa sumunna raba. **23** Ninbanna ra, a yi Leya tongo, a dii temɛ singena, a yi a so Yaxuba yii. Yaxuba yi a findi a yɛtɛ gbeen na. **24** Laban yi Silipa so a diin Leya yii, a xa findi a konyin

na. **25** Kuye to yiba, Yaxuba yi a to Leya na a ra. A yi a fala Laban xa, a naxa, “I nanse ligaxi n na ito ra? N mi walixi i xa Rakeli xan ma fe ra ba? Nanfera i n mayendenxi?” **26** Laban yi a yabi, a naxa, “Nxu tan ma namunna mi tinɛ dii tɛmɛ firinden xa dɔxɔ xɛmɛ taa ra, a singen mi xɛmɛ sɔtɔxi. **27** Xunsagini ito liga singen ɛ nun Leya. Xa i tin i mɔn xa jɛɛ solofere wanla kɛ n xa, n nan n ma dii tɛmɛ firinden fan fima nen i ma, a findi i ya jaxanla ra.” **28** Yaxuba yi na liga. E nun Leya to xunsagin naba yire kedenni, Laban yi Rakeli fan fi a ma. **29** A yi Bila tongo a a so Rakeli yii a xa findi a konyin na. **30** Yaxuba mɔn yi Rakeli findi a gbeen na, a yi Rakeli xanu dangu Leya ra. A mɔn yi jɛɛ solofere wanla kɛ Laban yii. **31** Alatala to a to Leya mi rafanxi Yaxuba ma alo Rakeli, a yi a findi dii barin na. Na waxatini Rakeli tan yi findi gbantan na. **32** Leya to fudikan, a yi diin bari. Na diin yi xili sa Ruben. A yi a fala, a naxa, “Alatala bata n ma marayarabin to. Iki n fa rafanma nen n ma xɛmɛn ma.” **33** A mɔn yi fudikan dii firinden na. A to na diin bari, a yi a fala, a naxa, “Alatala fan yatina a kolon, a n mi rafan n ma xɛmɛn ma. Na nan a toxi a dii firinden ito fan fixi n ma.” A yi na diin xili sa Simeyon. **34** A mɔn yi fudikan dii saxanden na. A to a bari, a mɔn yi a fala, a naxa, “Awa, iki, fɔ n ma xɛmɛn xa kankan nen n ma sɔnɔn, bayo n bata dii saxan sɔtɔ a xa.” Na na a to, e yi a xili sa Lewi. **35** A yi fudikan dii naaninden na. A to na fan bari, a yi a fala, a naxa, “Awa, iki n na Alatala tantunma nen.” A yi na diin xili sa Yuda. A dii barin yi dan na dii muxu naaninna ma.

30 Rakeli to a to, a mi dii barima, a yi a tada maxɔxolon. A yi a fala Yaxuba xa, a naxa, “Diin fi n fan ma, xa na mi a ra n faxama nen.” **2** Yaxuba yi xolo a falan na. A yi a fala, a naxa, “I a mirixi nen a Ala nan n tan na? Ala nan a ligaxi i mi dii barimal!” **3** Rakeli yi a yabi, a naxa, “N ma konyi jaxanla Bila tongo alogo a xa diine bari n xa. Na waxatini na tan finde n xa sabun na n diin sɔtɔ i xa.” **4** A yi a konyi jaxanla Bila tongo, a a so a xɛmɛn Yaxuba yii. Yaxuba yi na kolon jaxanla ra. **5** Bila yi fudikan, a yi dii xɛmɛn bari Yaxuba xa. **6** Rakeli yi a fala, a naxa, “Ala bata n ma kitin sa. A bata n ma falan mɛ. Na nan a toxi a diin fixi n ma.” A yi na diin xili sa Dan. **7** Rakeli a konyi jaxanla Bila mɔn yi fudikan. A yi dii xɛmɛ firinden bari Yaxuba xa. **8** Rakeli yi a fala, a naxa, “N bata n tada yengɛ n sɔbɛɛn birin na, n yi nɔɔn sɔtɔ.” A

yi a diin xili sa Nafatali. **9** Leya to a kolon a mi fa dii barima, a yi a konyi jaxanla Silipa tongo, a yi a so Yaxuba yii, a xa findi a jaxanla ra. **10** Leyaa konyin Silipa yi dii xɛmɛn bari Yaxuba xa. **11** Leya yi a fala, a naxa, “Herin bata fa n ma.” A yi na diin xili sa Gadi. **12** Leyaa konyin Silipa yi dii firinden sɔtɔ Yaxuba xa. **13** Leya yi a fala, a naxa, “N bata sewa. Iki, jaxanle birin a falama nen a n bata sewa.” A yi a xili sa Aseri. **14** Murutu xaba waxatin to a li, Ruben yi siga xɛɛn ma. A yi bogisena nde li na, naxan xili marafanna bogisena. A yi fa a ra a nga xa. Nanara, Rakeli yi a fala Leya xa, a naxa, “N bata i maxandi, i ya diina marafan bogisena nde so n yii.” **15** Leya yi a yabi, a naxa, “I bata n ma xɛmɛn ba n yii. Na mi i wasaxi? I mɔn waxi n ma diina marafan bogiseen nan tongo fe yi?” Rakeli yi a fala, a naxa, “To kɛɛn na, ɛ nun Yaxuba nan fama xideni i ya diina marafan bogiseen jɔxɔn na.” **16** Yaxuba to so jinbanna, sa keli xɛɛn ma, Leya yi a ralan. A yi a fala a xa, a naxa, “I xima n tan nan xɔn ma to kɛɛn na. N bata to kɛɛn saren fi n ma diina marafan bogiseen na.” Yaxuba mɔn yi Leya kolon jaxanla ra na kɛɛn na. **17** Ala yi tin Leyaa maxandin ma, a yi fudikan. Na yi findi a dii suulunden na Yaxuba xa. **18** Leya yi a fala, a naxa, “Ala bata n saren fi n ma konyi jaxanla so feen na n ma xɛmɛn yii.” A yi a diin xili sa Isakari. **19** Leya mɔn yi fudikan dii senninden na. A yi na diin bari Yaxuba xa. **20** Leya yi a fala, a naxa, “Ala bata n ki. Awa, iki n ma xɛmɛna n binyama nen, bayo n bata dii sennin bari a xa.” A yi na diin xili sa Sabulon. **21** Na xanbi ra, a mɔn yi dii temen bari. A yi a xili sa Dina. **22** Ala yi a yengin nasiga Rakeli ma. A yi a maxandi xuiin name, a yi a findi dii barin na. **23** A yi fudikan, a yi diin bari. A yi a fala, a naxa, “Ala bata n namini yagini ito yi.” **24** A yi na diin xili sa Yusufu. A yi falani ito ti, a naxa, “Alatala mɔn xa dii xɛmɛ gbɛtɛ fan fi n ma.” **25** Yusufu to bari, Yaxuba yi a fala Laban xa, a naxa, “A lu n xa xɛtɛ n kon bɔxɔn ma. **26** A lu n xa n ma jaxanle xali e nun n ma diine, n walixi i xa naxanye fe ra. I a kolon n wanla naxan yaten ligaxi i xa.” **27** Laban yi a fala a xa, a naxa, “Dijna. N bata a kolon yiimatooon xɔn, Alatala barakan saxi n ma fe yi i tan nan sabu ra. **28** A fala n xa n lan n xa i saren fi naxan na. N na a soma i yii nen.” **29** Yaxuba yi a fala a xa, a naxa, “I tan yatina a kolon n walixi i xa kii naxan yi han i ya xuruseene bata wuya ayi n tan barakani. **30** Ndedi nan yi i yii nun benun n xa fa, koni iki, a gbegbe bata sa na fari. Alatala bata barakan sa i ya fe yi xabu n so i konni. N

fa wanla nde kema n ma denbayaan fan xa waxatin mundun yi?" **31** Laban yi a fala, a naxa, "A lan n xa yoli fi i ma?" Yaxuba yi a yabi, a naxa, "I nama sese fi n ma. Xa i bata tin n feen naxan falaxi i xa, na liga, n fan bata tin n yengi se i ya xuruseene xon ma. **32** N sigama nen to, n sa i ya xuruseene birin mato. Yexeen nun sii makatunxin birin ti e danna e nun naxanye birin foro makenenxi. N saren findima ne nan na. **33** N ma tinxinna fama makenendeni nen i na fa xuruse matodeni waxatin naxan yi. Siin naxanye birin mi makatunxi e nun yexee diin birin foro makenenxi mi naxanye ma, na bata findi mujan na n mabinni." **34** Laban yi a fala, a naxa, "N bata tin na ma. I naxan falaxi, en bata lan na ma." **35** Na loxon yeteni Laban yi sii koto maringixinen nun a makatunxine yebe. Sii gilene fore foreline naxanye ma e nun fore xungbene yi naxanye ma e nun yexee fixe makadanxine, a mon yi ne birin yebe. A yi na xuruseene birin taxu a diine ra. **36** Na xanbi ra, a yi ne xali yirena nde yi xii saxan sigatiin tiye denaxan yi e nun Yaxuba tagi. Yaxuba yi fa Laban ma xuruse donxene raba. **37** Yaxuba yi wudi bili sifa saxan yii xindene gira. A yi e lutine ba e ma alogo maringi fixen xa makenen. **38** A yi wudi yiine sa xuruseene mindeni xuruseene yetagi bayo e tema e bode ra nen e na fa ige mindeni. **39** Xuruseene yi te e bode ma wudi yiine yireni, e yi diine xali maringi fixen nun fore foreline nun fore xungbene saxi e ma. **40** Yaxuba yi xuruse diine yitaxun alogo e xa ti Laban ma xuruseene yetagi maringin nun jingin makenenxin naxanye ma. Nayi, a yi xuruseene malan a yete xa a mi naxanye basan Laban gbeene ra. **41** Waxatin birin xuruse senbemanen nema te a gilene ra, Yaxuba yi wudi yiine sama nen xuruse mindeni alogo e xa te a gilene ra wudi yiine yireni. **42** Yaxuba mi yi na ligama xuruse xunxurine ra. Na nan a liga xuruse xurine yi findi Laban gbeen na, a senbemanen yi findi Yaxuba gbeen na. **43** Yaxuba yi findi nafulu kan gbeen na. A yi xuruse gbegbe soto. Konyi xemene nun konyi gilene nun jagomene nun sofanle yi lu a yii.

31 Na waxatini Yaxuba bata yi Laban ma diine xuiin me e yi naxan falama, e naxa, "Seen naxan birin findixi en baba gbeen na, Yaxuba bata e birin tongo. Na nan a toxi a bata findi nafulu kanna ra." **2** Yaxuba yatin yi a kolon, a a marafanna mi fa Laban yi sonon alo a foloni. **3** Alatala yi a fala Yaxuba xa, a naxa, "Xete i baba nun i bari bodene boxoni i kelixi denaxan

yi. N luma nen i xon." **4** Yaxuba yi Rakeli nun Leya xili. E yi a xuruseene rabama. **5** A yi a fala e xa, a naxa, "N bata a kolon n ma marafanna mi fa e baba yi sonon alo a foloni, koni n babaa Ala bata lu n xon. **6** E a kolon yati, n bata wali e baba xa n fangan birin na. **7** A bata n mayenden a n saranna maxete sanja yi fu, koni Ala mi tin a fe jaxin liga n na. **8** Xa e baba fa a fala, a naxa, 'Fore forene xuruseen naxanye ma, ne nan findima i gbeen na,' xuruseene birin yi diin xalima nen fore forene naxanye ma. Xa e baba fa a fala, a naxa, 'Maringin xuruseen naxanye ma, ne nan findima i gbeen na,' xuruseene birin yi dii maringixin nan xalima. **9** Ala bata e babaa xuruseene ba a yii, a yi e fi n tan ma." **10** "Xuruseene yi tema e bode ra waxatin naxan yi, n bata a to xiyeni, xuruse xemnen naxanye texi xuruse gilene ra, ne maringixi, e maforo foroxi e nun e makatun katunxi. **11** N ma xiyeni, Ala a malekan yi n xili, a naxa, 'Yaxuba.' N yi a ratin, n naxa, 'N tan ni i ra.' **12** A yi a fala, a naxa, 'I xunna rakeli, a mato. Xuruse xemnen naxanye birin texi xuruse gilene ra, ne maringixi, e maforo foroxi e nun e makatun katunxi, bayo Laban naxan birin ligaxi i ra, n na toxi. **13** N tan nan Ala ra naxan fa i ma Beteli yi, i gemen tixi taxamasenna ra denaxan yi i layirin tongoxi n xa denaxan yi. Iki, keli boxoni ito ma. I siga na boxoni i barixi denaxan yi.'" **14** Rakeli nun Leya yi Yaxuba yabi, e naxa, "N xu baba mi kee yo luxi nxu tan xa! **15** Xojen xa mi nxu ra nxu baba konni? A bata nxu mati, a mon bata nxo gbetin fan don. **16** Ala herisigen naxan birin baxi nxu baba yii, a xetema nen nxu ma e nun nxo diine. Iki Ala feen naxan birin falaxi i xa, na birin liga." **17** Yaxuba yi a jaxanle nun a diine rate jagomene fari. **18** A xuruseen nun herisigen naxan birin soto Padan-Arami yi, a yi keli, a yi e birin xali a baba Isiyaga konni Kanan boxoni. **19** Laban yi a xuruseene xabene maxabama e ma waxatin naxan yi, Rakeli yi a babaa suxurene muja. **20** Yaxuba yi Arami kaan Laban mayenden. A siga a mi sese fala a xa. **21** A yi a gi, e nun seen naxan birin findi a gbeen na. A yi Efirati baani gidi. Na xanbi ra, a yi siga Galadi गयाan mabinni. **22** A xii saxande loxoni, muxuna nde yi a fala Laban xa fa fala Yaxuba bata a gi. **23** Laban yi a ngaxakedenne tongo, e yi mini Yaxuba fendeni xii solofere bun ma. E yi e li Galadi geyane binna ra. **24** Koni kosen na, Ala yi a yete yita Arami kaan Laban na xiyeni. A yi a fala a xa, a naxa, "I yete ratanga feen sifan birin fala feen na Yaxuba ma." **25** Laban

yi Yaxuba li. A bubun tixi geyaan fari. Laban nun a ngaxakedenne fan yi e gbeen ti Galadi geyaan fari. 26 Laban yi a fala Yaxuba xa, a naxa, "I nanse ligaxi ito ra? Nanfera i n mayendenxi? I bata n ma diine xali alo muxu suxine yengeni. 27 Nanfera i gixi luxunni? I bata yanfantenyaan liga n na. I mi sese falaxi n xa. Xa i yi n nakolon nun, n yi i matima nen sewa sigine yi, tanbanna nun kondan xuiin na. 28 Koni i mi a lu yati n xa n ma diine nun n mamandenne sunbu, n yi n jungu e ma. I bata feen liga alo xaxilitarena. 29 N yi nœ fe kobin lige ε ra nen, koni i babaa Ala bata a fala n xa to kœen na, a naxa, 'I yete ratanga feen sifan birin fala feen na Yaxuba ma.' 30 Na bata lan, i sigaxi nen bayo i yi kunfahi siga feen na i baba konni, koni nanfera i n ma suxurene mujaxi n ma?" 31 Yaxuba yi Laban yabi, a naxa, "N gaxu nen n miriyani alogo i nama i ya diine rasuxu n na. 32 Koni i na i ya suxurene to n ma muxu yo yii, n na kanna faxama nen. Ngaxakedenne birin yee xori, n ma goronna birin mato. Naxan birin findixi i gbeen na, i xa a xali." Na waxatini Yaxuba mi yi a kolon xa Rakeli a babaa suxurene tongoxi. 33 Laban yi Yaxubaa bubune kui to e nun Leya konni e nun konyi firinne konni, koni a mi sese to. A to mini Leyaa bubuni, a yi so Rakeli fan konni. 34 Rakeli nan yati suxureni itoe tongoxi. A yi e luxun kirixan bun ma naxan sama jɔgɔmen fari, a fa dɔxɔ a fari. Laban yi bubun kui to, a mi sese to na kui. 35 Rakeli yi a fala a baba xa, a naxa, "N baba i nama xolo n ma xa n mi fa keli i yetagi. N kike wanla nin." Laban fenna sifan birin ti nen, koni a mi suxurene to. 36 Yaxuba yi xolo, a yi fala xolen ti Laban ma, a naxa, "N gbalon mundun ligaxi, n haken mundun ligaxi naxan a ligama i xa mini n fendeni kiini ito yi? 37 I bata n ma goronna birin kui to. I gbee seen mundun toxi e kui? A yita n na ngaxakedenne yee xori e nun i fan ngaxakedenne yee xori alogo e xa kitin sa en tagi. 38 N jœe mɔxɔjœe nan tixi i konni, koni i ya yexœen nun sii dii keden mi diin xalixi a faxa n yii. N mɔn mi i ya xuruse yo donxi. 39 N mi faxi xuruse ra i fema burunna subene naxan faxaxi. Naxanye yi mujama kœen nun yanyin na, ne bɔnɔn yi luma n tan nan xa bayo i yi e jɔxɔn maxilima n na. 40 Lɔxɔ yo lɔxɔ kuye wolonna yi n tɔrɔma nen yanyin na, xunbenla yi n tɔrɔ kœen na, n yetœen mi yi nœ xiye. 41 N bata jœe mɔxɔjœe ti i yii. N jœe fu nun naanin wanla kexi nen alogo n xa i ya dii temε firinne dɔxɔ. N mɔn yi jœe sennin fan sa a fari i ya xuruseene kantandeni. Koni i

bata n saranna maxete dɔxɔjɔna ma fu. 42 Xa n taje Ibrahima a Ala, n baba Isiyaga gaxun naxan yee ra, xa na mi yi a ra nun, n yi kelima nen be n yii genla. Koni Ala bata n ma marayarabin to, e nun n yi wali xɔdexen naxanye ligama, kœe danguxini ito yi, a bata n ma kitin sa." 43 Laban yi Yaxuba yabi, a naxa, "I ya jaxanle, n ma diine nan ne ra. E diine, n gbeen nan ne ra. Xuruseni itoe n gbeen nan e ra, n naxan birin toma ito ra, n tan nan gbee e ra. Koni to xanbi ra, n nœ nanse lige n ma diine nun n mamandenne xa? 44 Iki, en xa layiri tongo. Sereyaan xa lu en tagi." 45 Yaxuba yi gemen tongo, a yi a ti taxamasenna ra. 46 Na xanbi ra, Yaxuba yi a fala a ngaxakedenne xa, a e xa gemene matongo. E yi e matongo, e e malan yire kedenni. E yi e dege na gemε malanxine fari. 47 Laban yi na menna xili sa Yegara-Sahaduta. Yaxuba yi mɛn xili sa Galadi. 48 Laban yi a fala, a naxa, "Gemε malanxini itoe findixi seren nan na i tan nun n tan tagi." Na nan a toxi menna xili saxi Galadi. 49 Mɛn mɔn xili nen "Misipa." Laban mɔn yi a fala, a naxa, "Alatala xa a yengi dɔxɔ en tan firinna a fe xɔn ma, hali en fata xanbini. 50 Xa i n ma diine tɔrɔ, xa na mi a ra i jaxalan gbete dɔxɔ, i lanma i xa xaxinla sɔtɔ, bayo muxun xa mi en tagi seren na. Ala nan yati en firinna seren na." 51 Na xanbi ra, Laban yi a fala Yaxuba xa, a naxa, "I yœen ti gemε malanxini itoe ra. Taxamaseri gemeni ito mato n naxan tixi en tagi. 52 Gemε malanxini itoe nun taxamaseri gemeni ito findixi serene nan na. N mi lan n xa dangu be ra i ya fe jaxina n kui. I fan mi lan i xa dangu gemε malanxini itoe nun taxamaseri gemeni ito ra n ma fe jaxina i kui. 53 Ibrahima a Ala nun Nahori a Ala xa findi en tan firinna makitimaan na." Na waxatini Yaxuba yi a kolo Ala yi a baba Isiyaga gaxun naxan yee ra. 54 Yaxuba yi saraxan ba geyaan fari. A yi a ngaxakedenne birin xili, e xa sa e dege. E to yelin e dege, e yi xi geyaan fari. 55 Laban to keli subaxan ma, a yi a jungu a diine ma, e nun a mamandenne. A yi duba e xa. Na xanbi, Laban yi xete a konni.

32 Yaxuba yi sigama kiraan xɔn waxatin naxan yi, Alaa malekane yi fa a ma. 2 Yaxuba to e to, a naxa, "Alaa ganla daaxaden nan ito ra." A yi na yiren xili sa Maxanayin. 3 Yaxuba yi xerane rasiga a tada Esayu ma Edɔn banxideen na, Seyiri bɔxɔni. 4 A yi yamarin fi e ma, a naxa, "E ito nan falama n kanna Esayu xa, ε naxa, 'I ya konyi Yaxuba naxa, n bata lu

Laban konni. N bata bu gbeen ti na yi. **5** Ninge gbegebe nan n yii e nun sofanle nun yexeeene nun siine. Konyi xemeene nun konyi gilene n yii. Iki, n xerane rasigama i ma alogo i xa marasene fajin fi n ma.” **6** Xerane yi xete, e yi a fala Yaxuba xa, e naxa, “Nxu bata siga. Nxu sa i tada Esayu li na. A fama i ralandeni e nun a banxulan muxu keme naanin.” **7** Gaxu gbeen yi Yaxuba suxu, a kuisan. Yamaan naxan yi a foxo ra, a yi e taxun doxode firin. A yi yexeeene nun siine yitaxun doxo firin, e nun jingene, e nun jogomeene. **8** A yi a fala, a naxa, “Xa Esayu yama keden yenge, yamaan boden xa a gi.” **9** Na xanbi Yaxuba yi Ala maxandi, a naxa, “N taje Ibrahima a Ala nun n baba Isiyagaa Ala, i bata a fala n xa, i tan Alatala, i naxa ‘Xete i ya boxoni, i kon kaane denaxan yi. I na siga, n fe fajin ligama nen i xa.’ **10** N tan xurun. N mi daxe n hinanna nun lannayaan birin soto, i naxan nagidixi n ma, i ya walikena. N ma dunganna gbansanna nan yi suxi n yii n Yuruden baani gidi waxatin naxan yi, koni iki nxu nun yama firin nan xetema. **11** N natanga n tada Esayu ma, bayo n bata gaxu a yee ra. N sikexi, a nama fa n faxe, e nun jaxanle nun diine. **12** I bata a fala n xa, i naxa, ‘N fe fajin ligama nen i xa. N ni i bomsanna rawuyama ayi nen alo foxo igen mejensinna naxan mi yate.’” **13** Yaxuba yi koeen nadangu na. Seen naxan birin yi a yii, a yi sanba seen ye mato a naxan soma a tada Esayu yii: **14** Sii keme firin nun koto maxoje e nun yexee keme firin nun konton maxoje e nun **15** jogome gile tonge saxan nun e diine nun jinge tonge naanin nun tura fu nun sofali gile maxoje e nun sofali xeme fu. **16** A yi xuruseni itoe yitaxun kuru keden keden yeen ma, a nde so a konyine yii. A yi a fala e xa, a naxa, “E dangu yeen na. E xa sagaran lu kurune tagi.” **17** A yi a konyi singen yamari, a naxa, “E nun n tada Esayu na naralan, a fama i maxodindenin nen, a naxa, ‘E nun nde a ra? I sigan minen yi? Nde gbee xuruseni itoe ra naxanye tixi i yee ra?’ **18** I ya a yabima nen, i naxa, ‘I ya konyin Yaxuba nan gbee e ra. A i sanbaxi itoe nan na, n kanna Esayu. A fan nxu foxo ra.’” **19** A yi na yamarin fi a firinde fan ma, e nun a saxandena, e nun muxun naxanye biraxi xuruseene foxo ra, a naxa, “Xa e nun Esayu naralan waxatin naxan yi, e na nan falama a xa. **20** E ito nan sama a fari, e naxa, ‘I ya konyina Yaxuba fama nxu xanbi ra.’” Yaxuba yi a fala, a naxa, “Iki n na a bojen magodoma seni itoe nan na. Na xanbi n na fa a ma, yanyina nde a n nasenema nen a fajin na.” **21** Yaxubaa sanba seene

yi ti a yee ra, a tan yi koeen nadangu daaxadeni. **22** Koeen na, Yaxuba yi keli. A yi a jaxalan firinne tongo e nun e konyi firinne nun a dii fu nun kedenna. E yi Yaboko xuden gidi. **23** A yi e ragidi Yaboko xuden na e nun a yii seen birin. **24** A keden peen yi lu. Na waxatini, xemena nde yi mini a ma, e yi gerenna so han kuye yiba waxatini. **25** A to a to, a mi no sotoma Yaxuba ma e gerenni, a yi a garin a wotegelen ma. A wotegelen yi te a kui. **26** Xemen yi a fala, a naxa, “A lu n xa siga, bayo kuye bata yiba.” Yaxuba yi a yabi, a naxa, “N mi i bejinma, fo i duba n xa.” **27** Xemen yi a maxodin, a naxa, “I xili di?” Yaxuba yi a yabi, a naxa, “Yaxuba.” **28** Xemen yi a fala, a naxa, “I xili mi falama sonon Yaxuba. A fa falama nen Isirayila, bayo e nun Ala nan gerenna soxi, e nun muxune, i yi noon soto.” **29** Yaxuba yi maxodinna ti, a naxa, “I xili di?” Boden yi a fala, a naxa, “Nanfera i n maxodinma n xinla ma?” Na xanbi, a yi duba Yaxuba xa. **30** Yaxuba yi na yiren xili sa Penuyeli, bayo Yaxuba a fala nen, a naxa, “N bata Ala to yee nun yee, a tin n niin yi kisi.” **31** Sogen tema waxatin naxan yi, Yaxuba bata yi dangu Penuyeli ra. A godoma a wotegelen ma. **32** Na nan a toxi han iki Isirayila kaane mi fasan donma naxan wotegelen ma, bayo Ala Yaxuba masotaxi a wotegelen fasan nan ma.

33 Yaxuba yi Esayu to fe e nun banxulanna muxu keme naanin. A yi diine yitaxun Leya nun Rakeli ra e nun konyi gile firinne. **2** A yi konyi gile firinne ti yeen na, e nun e diine. Leya fan yi ti ne xanbi ra e nun a diine. Rakeli nun Yusufu yi lu donxen na. **3** A tan yi dangu ne yee ra, a xinbi sin sanja ma solofere benun a xa a tada li. **4** Koni Esayu yi a gi a sa Yaxuba ralan. A yi dutun a ma, a fa a sunbu. E birin yi wuga. **5** Esayu to jaxanle nun diine to, a yi maxodinna ti, a naxa, “Nde ne ra naxanye biraxi i foxo ra?” Yaxuba yi a yabi, a naxa, “Ala diin naxanye fixi i ya konyin ma a nemaan xon ma.” **6** Konyi gilene yi e maso e nun e diine, e yi e xinbi sin. **7** Leya fan nun a diine yi e maso, e fan yi e xinbi sin. Na xanbi Yusufu fan nun Rakeli yi na liga. **8** Esayu yi maxodinna ti, a naxa, “I nanse ligama xuruseni ito birin na, n naralanxi naxanye ra?” Yaxuba yi a yabi, a naxa, “N waxi nen, n kanna xa n nafan.” **9** Esayu yi a fala, a naxa, “N xunyena, herisige gbegebe n fan yii. I gbeen mara.” **10** Yaxuba yi a fala, a naxa, “En-en, n bata i maxandi, xa i bata n nafan, n na i sanbaxi seen naxanye birin yi, i

xa ne rasuxu. N bata i yetagin to. Na luxi nen n yi alo n na Ala yetagi nan toma, bayo i bata n nasene ki fajni. **11** N seen naxanye sanbaxi i ma, e rasuxu. Ala bata hinan n na, a n makoon birin fan.” Yaxuba yi a yixodoxo han Esayu yi tin. **12** Esayu yi a fala, a naxa, “En siga kiraan xon ma, n xa sa i mati.” **13** Yaxuba yi a yabi, a naxa, “N kanna, a kolon diine fe xodoxo. Yexee gilene nun jinge gilene xijen fima e diine ma. Xa en gbeten e ra loxo kedenni, ne birin faxama nen. **14** N kanna, i tan xa ti yeen na. N tan xa bira n ma xuruseene foxo ra ndedi ndedi. N xa siga n yeren ma, nxu nun n ma diine han nxu soma i konni waxatin naxan yi Seyiri boxoni.” **15** Esayu yi a fala, a naxa, “N xa n ma muxuna nde lu i yii be.” Yaxuba yi a fala, a naxa, “Nanfera? N kanna, n tan waxi naxan xon, n xa rafan i ma gbansan.” **16** Na loxoni, Esayu yi ti Seyiri kiraan xon ma. **17** Yaxuba tan yi siga Sukoti yi. A yi banxi keden ti a yete xa, a kulane ti a xuruseene xa. Nanara na yiren xili nen Sukoti. **18** Yaxuba to keli Padan-Arami yi, a yi so kendeanyi Siken taani Kanan boxoni. A yi daaxadeni tan taan xanbi ra. **19** A bubun yi tixi denaxan yi, a yi boxon sara Xamori a diine ma, Siken Baba, naxanye singe doxo Siken yi. A yi na sara gbeti gbanan keme ra. **20** A yi saraxa ganden nafala menni. A yi na xili sa “Isirayilaa Ala.”

34 Yaxubaa dii temen Dina, Leya naxan barixi Yaxuba xa, na yi siga Siken jaxanle xontondeni. **2** Xamori a dii xemen Siken, Xiwin naxan findixi na yamanan mangan na, na to Dina to, a yi fu a ma a yi a rayagi. **3** Yaxubaa dii temen Dinaa xanuntenyaan yi lu Siken fatini. A yi fala jaxumene ti a xa. **4** A yi a fala a baba Xamori xa, a naxa, “Dii temeni ito maxandi n xa alogo n xa a doxo.” **5** Yaxuba yi a me, a bata a dii temen Dina rayagi. Na waxatini, a diine yi sa xeen ma xuruseene foxo ra. A mi sese fala han ne so waxatini. **6** Siken baba Xamori yi siga Yaxuba konni a xa sa falan ti a xa. **7** Yaxuba a diine to keli xeen ma, e yi na feen me naxan danguxi. E yi e yomayaan to, e bopen yi te ki fajni bayo Siken bata yi fu Yaxuba a dii temen ma, a mi lan a xa naxan liga Isirayila boxoni. **8** Xamori yi a fala e xa, a naxa, “Dii temeni ito rafanxi n ma dii xemen Siken nan ma a sondamen birin na. Yandi, e xa a fi a ma, a xa findi a jaxanla ra. **9** En findi bitanmane ra. E xa e dii temene fi nxu ma alogo nxu xa e doxo. Nayi, e fan noe nen nxu gbeene doxe. **10** E fama nen ludeni nxu dexon ma, boxoni ito yi rabi e xa. E noe

doxe nen be, e yulayaan liga alogo e xa herisigen soto.” **11** Siken yi a fala Dina baba nun a tada xa, a naxa, “E dija n ma, e jeniye fajni ti n xa. E wama seen naxan xon, e xa na fala n xa, n xa a so e yii. **12** E noe futu se gbegbe maxodinje nen n ma e nun kiseene. E na seen naxan birin maxodin n ma, n noe a birin soe e yii nen alogo n xa dii temeni ito doxo.” **13** Yaxubaa diine yi yanfa falan ti Siken nun a baba Xamori xa, bayo Siken bata yi e xunyen Dina rayagi. **14** E yi a fala e xa, e naxa, “Nxu mi noe nxu xunye jaxalanmaan fiye muxun ma naxan mi banxulanxi. A findima yagin nan na nxu xa. **15** Xa nxu fa nxu xuiin soma e yii, fo en lan ito ma. Xemen naxan birin e konni, e lan nen e xa banxulan alo nxu tan. **16** Na waxatini nxu noe nxo dii temene fiye e ma nen, e yi e doxo. Nxu fan e gbeene doxoma nen, nxu luma e dexon ma na waxatini, en birin yi findi yama kedenna ra. **17** Koni xa e mi fa sa tin e banxulandeni, nxu nxu xunye jaxalanmaan nasuxuma nen, nxu fa keli be.” **18** Xamori nun a dii Siken yi tin falani ito ma. **19** Na xemen mi bu a na feen liga, bayo Yaxuba a dii temen bata rafan a ma. A tan nan yi binyaxi dangu a ngaxakedenne birin na. **20** Xamori nun Siken yi siga yamaan malandeni taan so deen na. E yi a fala e yamaan xa, e naxa, **21** “Muxuni itoe, en ma fe fajina e kui. E xa lu boxoni ito ma, e yulayaan liga, bayo en ma boxon gbo. En noe nen e dii temene doxe, en fan en ma dii temene fima e ma nen. **22** Muxuni itoe mi doxoma be, en xa findi yama kedenna ra, fo xemen naxan birin en konni be yi, ne xa banxulan alo e kiinde. **23** Xa en bata tin e falan ma, na waxatini e doxoma en konni nen. E xuruseene nun e yii seen birin findima en birin gbeen na nen.” **24** Muxun naxan birin yi na taan so deen na na loxoni, e birin yi tin Xamori nun a dii Siken ma falan ma. Xemen naxan birin yi na taan kui, e birin yi banxulan. **25** A xii saxande loxoni, xemene fatine to yi e xoloma, Yaxubaa dii xeme firinna Simeyon nun Lewi, Dina tada xememane, e yi e degemane tongo. E yi fu taan ma muxu yo mi sogin e ma, e yi xemen birin faxa. **26** E yi Xamori nun a dii Siken fan faxa. E yi Dina tongo Siken konni, e yi fa a ra. **27** Yaxubaa diine yi seen birin tongo faxa muxune xun ma, bayo e bata yi e xunye jaxalanmaan nayagi. **28** E yi e yexene tongo e nun e siine nun e jingene nun e sofanle, naxanye yi taan kui e nun xeen ma. **29** Nafunla naxan birin yi na, e yi a birin xali. E yi dii temene nun jaxanle xali. E banxin birin kui geli. **30** Yaxuba yi a

fala Simeyɔn nun Lewi xa, a naxa, “Ɛ bata lanbaranna ti n ma. Ɛ bata en naɲaxu Kanan kaane nun Perisi kaane ma alo se kunxin xirina. Muxu wuyaxi mi n yii. E e malanma nen n xili ma, e n yenge, n xabilan birin yi halagi.” **31** E yi a yabi, e naxa, “A mi lan a xa en xunye ɲaxalanmaan findi yalunden na.”

35 Ala yi a fala Yaxuba xa, a naxa, “Keli, i sa dɔxo Beteli yi. I saraxa ganden nafala n xa mɛnni, n bata yi n yete yita i ra denaxan yi, i yi i gima i tada Esayu bun ma waxatin naxan yi.” **2** Yaxuba yi a fala a denbayaan xa e nun muxun naxanye yi a fema, a naxa, “Ɛ xɔɲene suxurene yiba, Ɛ Ɛ yete sarɲan, Ɛ Ɛ dugine fan masara Ɛ ma. **3** Ɛ fa, en siga Beteli yi. N xa saraxa ganden nafala Ala xa, naxan n malixi n yi lanbaranni waxatin naxan yi. A yi a yengi lu n xon ma n ma sigatini.” **4** Na waxatini e yi e suxurene birin so Yaxuba yii e nun e tunla soone. Yaxuba yi e birin bitin kondan bun ma naxan Siken dɛxɔn ma. **5** Yaxuba nun a diine to keli sigadeni, Ala yi gaxun lu e rabilin taane birin muxune bɔɲeni, muxu yo mi susu birɛ e fɔxo ra. **6** Yaxuba nun a fɔxɔrabirane yi siga Lusi yi, naxan mɔn xili Beteli, Kanan bɔxɔni. **7** A yi saraxa ganden nafala mɛnni. A yi na saraxa ganden xili sa “Beteli a Ala,” bayo Ala a yete yita a ra mɛnni nen, a yi a gima a tada bun waxatin naxan yi. **8** Rebeka a dii masuxun Debora to faxa, e yi a maluxun Beteli mabinni wariin denaxan yi. Na wariin xili nen “wugadena.” **9** Ala mɔn yi mini Yaxuba xa, a xete xanbini Padan-Arami yi. A yi barakan nagidi a ma. **10** Ala yi a fala a xa, a naxa, “I xili nen Yaxuba, koni a mi falama na kiini sɔnɔn. To xanbi ra, i xinla fa falama nen Isirayila.” Awa, Ala yi a xili sa Isirayila. **11** A mɔn yi a fala a xa, a naxa, “Ala Senbe Kanna nan n na. I xa wuya, i yiriwa alogo i xa findi siyana nde benban na. I mɔn findima nen siya wuyaxine benban na. Mangane minima nen i bɔnsɔnni. **12** N bɔxɔn naxan fi Iburahima nun Isiyaga ma, n na a fi i fan ma. Na dangu xanbini, n na a fima i bɔnsɔnna fan ma nen.” **13** Ala yi keli na, a falan ti Yaxuba xa denaxan yi. **14** Yaxuba yi geme taxamasenna ti na, a yi turen nun min seen bɔxɔn a ma saraxan na. **15** A yi yireni ito xili sa Beteli, Ala falan ti a xa denaxan yi. **16** Yaxuba nun a denbayaan to keli Beteli yi, e mɔn makuya Efarata ra, Rakeli yi diin sɔto. Na dii bari feen yi xɔdɔxo ayi. **17** Rakeli yi diin barima waxatin naxan yi xɔleni, dii rasuxun yi a fala a xa, a naxa, “Hali i mi

gaxu, i mɔn xɛmɛn nan barixi.” **18** Rakeli bata yi lu alo faxa muxuna. A yi a niin makakama waxatin naxan yi, a yi a diin xili sa Benoni. Koni a baba tan yi a xili sa Bunyamin. **19** Rakeli to faxa, e yi a maluxun Efarata kiraan dɛxɔn ma. Na yiren xili nen iki Betelemi. **20** Yaxuba yi gɛmɛn sa taxamasenna ra a gaburun fari. Han to na gɛmɛn na Rakeli gaburun taxamasenna ra. **21** Isirayila yi sa a bubun ti Migidali-Ederi xanbi ra. **22** Isirayila to yi dɔxi na taani, Ruben nun Bila yi sa e sa, a baba konyi ɲaxanla. Isirayila yi a kolon. Isirayila dii xɛmɛn fu nun firinna naxanye sɔto: **23** Leya yi Ruben bari dii saran na, na xanbi ra Simeyɔn nun Lewi nun Yuda nun Isakari nun Sabulon. **24** Rakeli yi Yusufu nun Bunyamin bari. **25** Rakeli a konyin Bila yi Nafatali nun Dan bari. **26** Leyaa konyin Silipa yi Gadi nun Aseri bari. Ne birin findixi Yaxubaa diine nan na, a naxanye sɔto Padan-Arami yi. **27** Yaxuba yi siga a baba Isiyaga konni Mamire, Kiriyaṭi-Aruba mabinni. Mɛn xili nen Xebiron, Iburahima nun Isiyaga dɔxɔde fonna. **28** Isiyaga a siimayaan yi siga ɲɛɛ kɛmɛ ɲɛɛ tonge solomasɛxe. **29** A to faxa, a bata yi siimaya xunkuye sɔto, a yi faxa, a siga laxira yi. A dii Esayu nun Yaxuba yi a maluxun.

36 Esayu, naxan mɔn xili Edɔn, a bɔnsɔnna taruxun ni i ra. **2** Esayu Kanan ɲaxanle dɔxo nen: Ada findi Elon ma diin nan na, Xiti kaana, e nun Yoholibama, Anaa dii temena, Sibeyon Xiwin mamandenna nan a ra. **3** A yi Sumayila a dii temen Basamati fan dɔxo, Nebayoti xunye ɲaxalanmana. **4** Ada nan Elifasi sɔto Esayu xa. Reyuli findi Basamati a diin nan na. **5** Yoholibama dii xɛmɛ saxan nan bari: Yewusi nun Yalami e nun Kora. Ne birin findi Esayu a diine nan na naxanye barixi Kanan bɔxɔni. **6** Esayu yi a ɲaxanle nun a dii temene nun a dii xɛmɛne nun a muxune birin tongo, e nun a xuruseene birin e nun a herisigen naxan birin sɔto Kanan bɔxɔni. A yi a birin xali bɔxo gbɛten ma denaxan makuya a xunye Yaxuba ra, **7** bayo e herisigen bata yi gbo ayi. E mi yi nɔɛ luyɛ e bode dɛxɔn ma. E yi denaxan yi e xuruseene birin mi yi nɔɛ balo sɔte mɛnni. **8** Na nan a to Esayu, naxan mɔn xili Edɔn, na yi siga a sa dɔxo Seyiri geya yireni. **9** Edɔn kaane benba Esayu bɔnsɔnna xinle ni itoe ra naxanye yi dɔxi Seyiri geya yireni: **10** Esayu a diine ni i ra: Elifasi, Ada a dii xɛmɛna, Reyuli, Basamati a dii xɛmɛna. **11** Elifasi a diine ni ito ra: Teman nun Omaru nun Sefo nun Gatami e nun Kenasi. **12** Timina nan

yi Elifasi a konyi naxanla ra. Na Amaleki bari nen Elifasi xa. Esayu nun a naxanla Ada mamandenne ni ito ra. **13** Reyuli a diine ni i ra: Naxati nun Sera nun Sama e nun Misa. Ne findi Esayu nun a naxanla Basamati mamandenne nan na. **14** Esayu a naxanla Yoholibama a diine ni i ra: Yewusi nun Yalami e nun Kora. Yoholibama findi Anaa dii temen nan na. Ana findi Sibeyon ma dii temen nan na. **15** Mangan naxanye keli Esayu bõnsõnni, ne ni i ra: Elifasi, Esayu a dii singena, na diine ni itoe ra: Manga Teman nun Manga Omaru nun Manga Sefo nun Manga Kenasi **16** nun Manga Kora nun Manga Gatami nun Manga Amaleki. Mangane nan yi ne ra naxanye fataxi Elifasi ra Edõn yamanani, Ada mamandenne nan e ra. **17** Reyuli, Esayu a diina, a diine ni i ra: Manga Naxati nun Manga Sera nun Manga Sama e nun Manga Misa. Mangane nan yi ne ra naxanye fataxi Reyuli ra Edõn yamanani, Basamati mamandenne nan e ra. **18** Yoholibama, Esayu a naxanla, a diine ni itoe ra: Manga Yewusi nun Manga Yalami nun Manga Kora. Mangane ni itoe ra naxanye fataxi Yoholibama ra, Esayu a naxanla: Yoholibama findi Anaa diin nan na. **19** Esayu, naxan mõn xili Edõn, na a diine nan ne ra. Mangan naxanye keli Esayu bõnsõnni, ne nan ne ra. **20** Seyiri Xori kaana diine ni itoe ra naxanye yi dõxi na yamanani: Lotan nun Sobali nun Sibeyon nun Ana **21** nun Dison nun Eseri e nun Disan. Seyiri a diine yi findi Xori mangane ra Edõn yamanani. **22** Lotan ma dii xemene ni itoe ra: Xori nun Heman. Timina findi Lotan xunye dii temen nan na. **23** Sobali a dii xemene ni itoe ra: Aliban nun Manaxati nun Ebali nun Sefo e nun Onan. **24** Sibeyon ma dii xemene ni ito ra: Aya nun Ana, Ana nan tigi wolonxine to tonbon yireni a to yi Sibeyon ma sofanle rabama. **25** Ana a diine ni itoe ra: Dison nun Yoholibama, Ana a dii temena. **26** Dison ma dii xemene ni itoe ra: Xemadan nun Eseban nun Itiran e nun Keran. **27** Eseri a dii xemene ni itoe ra: Bilihan nun Saawan e nun Akan. **28** Disan ma dii xemene ni itoe ra: Yusu nun Aran. **29** Xori kaane mangane ni i ra: Manga Lotan nun Manga Sobali nun Manga Sibeyon nun Manga Ana **30** nun Manga Dison nun Manga Eseri e nun Manga Disan. Xori kaane Mangane findi ne nan na e bõnsõn yeen ma Seyiri bõxõni. **31** Mangane nan itoe ra naxanye yi Edõn yamanan xun na benun Isirayila kaane xa mangan dõxõ waxatin naxan yi: **32** Beyori a diin Bela yi findi Edõn manga singen na, naxan ma taan yi xili Dinhaba. **33** Bela to

faxa, Seraa diin Yobabo, Bosara kaan yi findi mangan na. **34** Yobabo to faxa, Xusama, naxan yi kelixi Teman yamanani, na yi findi mangan na. **35** Xusama to faxa, Bedadaa diin Xadada yi findi mangan na. A tan nan Midiyan kaane nõ Moyaba bõxõni. A taan yi xili nen Abiti. **36** Xadada to faxa, Samala Masareka kaan yi findi mangan na. **37** Samala to faxa, Sayuli naxan yi kelixi Rehoboti taani baan de, na yi findi mangan na. **38** Sayuli to faxa, Akibori a diin Baali-Xanan yi findi mangan na. **39** Baali-Xanan, Akibori a diin to faxa, Xadada yi findi mangan na. A taan yi xili nen Pawu. A naxanla yi xili nen Mehetabeli, Matiredi a dii temena, Mesahabi mamandenna. **40** Mangane ni i ra naxanye kelixi Esayu bõnsõnni, e bõnsõnna nun e yamanan yeen ma. Manga Timina nun Manga Aliwa nun Manga Yeteti **41** nun Manga Yoholibama nun Manga Ela nun Manga Pinon **42** nun Manga Kenasi nun Manga Teman nun Manga Mibisari **43** nun Manga Magadiyeli nun Manga Irami. Ne nan yi Edõn mangane ra e nun e bõxõna e yi dõxi denaxan yi. Esayu a feen nan na ra naxan findixi Edõn kaane benban na.

37 Yaxuba dõxõ nen Kanan yamanani, a baba yi denaxan yi. **2** Yaxuba bõnsõnne taruxun ni ito ra. Yusufu a dii jorɛyaan jɛɛ fu nun solofere nan yi a ra. A tan nun a tadane yi xuruseene nan kantanma, naxanye nga yi Bila nun Silipa ra, a babaa naxanle. A yi e fe jaxine dentegen sama a baba xa. **3** Yusufu nan yi rafan Isirayila ma dangu a diine birin na, bayo a tan nan soto a xeme foriyani. A yi doma kuye tofajin so a yii. **4** Yusufu tadane to na feen to, a a tan nan nafan e baba ma dangu e birin na, e yi a rapaxu. Fala fapi yo mi yi e tagi sõnõn. **5** Yusufu yi xiye sa, a yi a yebe a tadane xa. E yi a rapaxu dangu a fõlõn na. **6** A yi a fala e xa, a naxa, “E tuli mati n ma xiyeen na, n naxan saxi. **7** En birin yi xeen ma malo raxidideni. Nanunna, n ma malo xidin yi keli, a ti. E gbee malo xidine yi lu bilinxi n gbee xidin na, e birin yi e xinbi sin n ma malo xidin bun.” **8** A tadane yi a maxodin, e naxa, “Ee! I waxi findi feni nxõ mangan nan na alogo i xa nxu yamari?” E yi a rapaxu dangu a fõlõn na a xiyena fe ra e nun a falana. **9** Yusufu mõn yi xiye gbete sa, a yi na fan yebe a tadane xa. A yi a fala, a naxa, “E e tuli mati, n mõn bata xiye sa. Sogen nun kiken nun sare fu nun keden yi e xinbi sinma n bun ma.” **10** A yi xiyeni ito yebe a baba nun a tadane xa. A baba yi a kõnkõ a ma, a fa a fala a xa, a naxa, “I xiyeen naxan saxi iki, nanse na ra? I

nga nun i tadane nun n tan, nxu birin fama nxu xinbi sindeni i yetagi?" **11** A tadane yi lu a maxɔxolɔɲɛ, koni a baba yi a yengi lu a xiyen xɔn ma. **12** Yusufu tadane yi siga Siken yi e babaa xurusene rabadeni. **13** Isirayila yi a fala Yusufu xa, a naxa, "I tadane bata siga xuruse rabadeni Siken yi. Fa be, n xa i xɛ e ma." A yi a yabi, a naxa, "Awa." **14** Isirayila yi a fala a xa, a naxa, "Siga mafuren, i sa a mato xa i tadane kende, xa se mi xuruseene fan toxi, i yi fa na dentegen sa n xa." A yi a xɛ keli Xebiron lanbanni siga Siken yi. **15** Xɛmɛna nde yi a to xɛene xun xɔn. Xɛmɛn yi a maxɔdin, a naxa, "I nanse fenma?" **16** A yi a yabi, a naxa, "N na n tadane nan fenma. A fala n xa, yandi, e xurusene rabama denaxan yi." **17** Xɛmɛn yi a fala a xa, a naxa, "E bata keli be, bayo n na e xuiin mɛ nɛn, e yi a falama, a e xa siga Dotan yi." Yusufu yi bira a tadane funfu xɔn han a sa a tadane li Dotan yi. **18** E to a to wulani, benun a xa maso e ra, e lan a ma, a e xa a faxa. **19** E yi a fala e bode xa, e naxa, "Na xiye saan nan fama iki. **20** E fa be, en na a faxa, en na a woli xɔɲinna ra. Nayi, en na keli, en na a falama nɛn, a sube ɲaxin bata a don. Na waxatini en fama a kolondeni nɛn a xiyen findima a xa feen naxan na." **21** Rubɛn yi na feen mɛ. A yi kata a xa a xunba, a naxa, "En nama a faxa." **22** Rubɛn mɔn yi a fala, a naxa, "E nama a wunla ramini del E a woli xɔɲinni ito ra naxan tonbon yireni ito yi. Muxu yo nama a yiin din a ra." A yi wama a xunba feni alogo a xa nɔ a xalideni a baba fɛma. **23** Yusufu to so a tadane yireni, a doma kuye tofajin naxan yi ragodoxi a ma, e yi na rate a ma. **24** E yi Yusufu tongo, e a woli xɔɲinna ra, ige mi naxan kui. **25** Na xanbi, e yi dɔxɔ donse dondeni. E to e yɛɛn nakeli, e yi Sumayila bɔnsɔnna yulane to fɛ. E yi kelixi Galadi yi, wusulanna nun senna nun latikɔnɔnna yi e ɲɔɲɔmɛne fari siga Misiran yi. **26** Yuda yi a fala a xunyene xa, a naxa, "Xa en na en xunyen faxa, en yi a wunla luxun, na tɔnɔn mundun en tan ma? **27** E fa, en na a mati Sumayila bɔnsɔnna muxune ma, koni en nama en yiin din a ra del Bayo en xunyen na a ra, en wuli keden fasa keden." A xunyene birin yi tin a falan ma. **28** Na xanbi, Midiyan yulane danguma, e yi Yusufu rate xɔɲinna ra. E yi Yusufu mati gbeti gbanan mɔxɔɲɛ ra Sumayila bɔnsɔnna muxune ma. E yi a xali Misiran yi. **29** Rubɛn to xɛtɛ xɔɲinna yireni, a mi Yusufu li na sɔnɔn. A yi a domaan birin yibo sununi. **30** A yi xɛtɛ a xunyene fɛma, a yi a fala, a naxa, "Diidin mi fa na! N tan fa nanse ligama sɔnɔn?" **31** E yi kɔtɔ keden faxa, e

yi Yusufu a doma kuye tofajin maturuxun na sube wunli. **32** Na xanbi, e yi na doma kuye tofajin xali e baba fɛma. E yi a fala a xa, e naxa, "Nxu bata ito to. Domani ito mato ba, xa i ya diin gbeen na a ra." **33** Yaxuba yi domaan kolon. A yi a fala, a naxa, "N ma diina domaan na a ra! Sube xajɛna nde bata a faxa! A bata Yusufu yibo!" **34** Yaxuba yi a dugine yibo sununi, a mɔn yi kasa dugin nagodo a ma. A yi a diin ɲan feen liga xii wuyaxi. **35** A dii xɛmɛne nun dii tɛmɛne yi siga a madɛndɛndeni, koni a mi tin na ma. A yi a fala, a naxa, "N nan n ma diin saya feen ligama nɛn han n sa a li laxira yi." A yi lu wugɛ a diina fe ra. (Sheol h7585) **36** Midiyan kaane yi Yusufu mati Potifari ma Misiran yi, Misiran Mangana kuntigina nde naxan a kantani tiine xunna.

38 Na waxatini, Yuda yi keli a ngaxakedenne xun ma, a siga Adulan kaana nde konni naxan xili Xira. **2** Yuda yi Suya Kanan kaana dii tɛmɛn to mɛnni. A yi a findi a ɲaxanla ra. E yi lu e bode xɔn. **3** A yi fudikan, a yi dii xɛmɛn bari. E yi na diin xili sa Eri. **4** A mɔn yi fudikan dii firinden na, a yi dii xɛmɛn bari. E yi na diin xili sa Onan. **5** Na xanbi, a mɔn yi dii xɛmɛ gbɛtɛ bari, a yi na xili sa Selaxa. Yuda yi Kesibe taan nin a ɲaxanla yi diin barima waxatin naxan yi. **6** Yuda yi ɲaxanla fen, a a so a dii singen Eri yii. Na ɲaxanla xili Tamari. **7** Muxu ɲaxin nan yi Yudaa dii singen Eri ra Alatala yɛɛ ra yi. Alatala yi a faxa. **8** Na xanbi Yuda yi a fala Onan xa, a naxa, "I tadaa ɲaxanla tongo, a xa findi i ya ɲaxanla ra. I a xɛmɛ xuriya wanla liga alogo i xa diin fi i tada faxa muxun ma." **9** Koni Onan yi a kolon, a na diin mi yi finde a gbeen na. Na nan a liga, a to yi a tada ɲaxanla kolonma ɲaxanla ra, igen naxan minima a fatini, a yi na makala bɔxɔn ma alogo a nama diin bari a tada xa. **10** A yi naxan ligama, na mi yi rafan Alatala ma. Nanara, a yi a faxa. **11** Awa, Yuda yi a fala a mamuxun Tamari xa, a naxa, "Lu kaɲayani i baba konni benun n ma dii Selaxa xa gbo waxatin naxan yi." A yi mirixi nɛn yanyina nde Selaxa fan faxama nɛn alo a tadane faxaxi kii naxan yi. Tamari yi siga a sa lu a baba konni. **12** A mi bu Suya a dii tɛmɛna, Yudaa ɲaxanla yi faxa. Nan feen to ba a ra, Yuda yi siga Timana yi e nun a lanfaan Xira Adulan kaana. E yi siga Yuda xuruse yireni, e yi e xabene maxabama denaxan yi. **13** Muxuna nde yi a fala Tamari xa, a naxa, "I taɲɛ sigama Timana taani a xurusene xabene maxabadeni." **14** A yi a kaɲa

dugine ba a ma, a yi dugin so a yetagin xun na, a sa dɔxɔ Enayin taan so dɛɛn na Timana kiraan xɔn. A bata yi a to Selaxa bata findi banxulanna ra, koni e mi a fi a ma a xa findi a jaxanla ra. **15** Yuda to a to a dugin soxi a yetagin xun na, a yi a miri a yalunden na a ra. **16** A yi a fala a xa kiraan na, a naxa, “En siga, en sa kafu.” A mi yi a kolon a mamuxun na a ra. Koni, Tamari yi Yuda maxɔdin, a naxa, “I nanse fima n ma en na kafu?” **17** A yi a yabi, a naxa, “N sii keden nan tongoma n ma xuruseene tagi, n fa a ra i yɛɛ ra.” A yi a yabi, a naxa, “Awa, tolimana nde lu n yii be singe benun i xa fa siin na waxatin naxan yi.” **18** A yi a maxɔdin, a naxa, “I wama n xa nanse so i yii tolimaan na?” Tamari yi a yabi, a naxa, “I ya taxamasenna nun a lutin nun i ya dunganna so n yii.” A yi na seene so a yii, e fa kafu. Tamari yi fudikan a diin na. **19** A yi xete a konni. A yi dugin ba a yetagin xun na, a mɔn yi a kaɲa domaan nagodo a ma. **20** Yuda yi a lanfa Adulan kaan xɛ sii diin tideni jaxanla ma alogo a xa fa seene ra a naxanye so jaxanla yii tolimaan na. Koni a mi jaxanla to. **21** A yi men kaane maxɔdin, a naxa, “Yalunde jaxanla naxan yi kiraan dɛ Enayin taani, na minen yi?” E yi a yabi, e naxa, “Yalunde yo mi be.” **22** A yi xete Yuda yireni, a fa a fala, a naxa, “N mi a lixi na. Mɛn kaane mɔn bata a fala n xa a yalunde yo mi na e tan konni.” **23** Yuda yi a fala, a naxa, “A xa na seene mara. En fan nama en yete rayagi. N bata sii diin nasamba a ma, koni i mi a lixi na.” **24** Kike saxon dangu xanbi, muxuna nde yi a fala Yuda xa, a naxa, “I mamuxun Tamari bata findi yalunden na, a bata fudikan a yalunyani.” Yuda yi a fala, a naxa, “ɛ a ramini, a gan.” **25** E yi fama a ra waxatin naxan yi, a yi xeraan nasiga a taje ma, a naxa, “Seni itoe mato naxanye n yii. Taxamasenni ito nun a lutin nun dunganni ito na findi muxun naxan gbee ra na nan n nafudikanxi. I lan nen i xa a kanna kolon.” **26** Yuda yi na feene kolon. A yi a fala, a naxa, “A tinxin dangu n tan na bayo n mi a fixi n ma dii Selaxa ma.” Na xanbi ra, e mi fa kafu. **27** A yi diin barima waxatin naxan yi, e yi a kolon a gulunne nan a kui. **28** Diin bari waxatini, keden yi a yiin namini. Dii rasuxun yi a yiin suxu, a gari gbeela xidi a yiin na. A fa a fala, a naxa, “Ito nan singe barixi.” **29** Koni na diin yi a yiin naso, a xunyen yi bari. Dii rasuxun yi a fala, a naxa, “I yete raminixi fangan mundun na iki?” A yi a xili sa Peresi. **30** Na xanbi boden fan yi bari gari gbeela xidixi a yiin na. Yuda yi a xili sa Sera.

39 Sumayila bɔnsɔnna muxune yi siga Yusufu ra Misiran yamanani. Potifari, Misiran Mangan kantan tiine xunna yi a sara. **2** Alatala yi Yusufu xɔn. A yi feen naxanye birin suxuma, ayi birin gasama. A yi lu a kanna Misiran kaan konni. **3** A kanna yi a kolon, a Alatala yi Yusufu xɔn, bayo Alatala bata yi a feen birin nasɔnya. **4** Yusufu yi rafan a kanna ma, a yi a findi a banxi xunna ra. A yi a herisigen birin taxu a ra. **5** Na xanbi Yusufu to findi a banxi xunna ra e nun a yii seene birin, Alatala yi barakan sa Misiran kaana denbayani Yusufu a fe ra. Alatala yi barakan sa a yii seene birin yi, e nun a banxin nun a xɛɛne. **6** Nanara, seen naxanye birin yi Potifari yii, a yi a birin nabepin Yusufu yii. A tan mi yi fa a yengi saxi fefe xɔn ma fɔ a yi donseen naxan donma. Yusufu yi tofan han. **7** Na feene danguxina, a kanna jaxanla yi a yɛɛn ti Yusufu ra. A yi a fala a xa, a naxa, “Fa be, en fa kafu.” **8** Yusufu yi tondi, a a fala a kanna jaxanla xa, a naxa, “Xabu n fa n kanna konni a mi a yengi luxi fefe xɔn ma sɔnɔn a banxini. A bata a yii seene birin taxu n na. **9** A banxin kui be, n tan nan dangu muxun birin na. A mi sese rafisaxi n xa, fɔ i kedenna, bayo i tan bata findi a jaxanla ra. Iki, n fe jaxi gbee sifani ito ligama nanfera naxan finde yulubi feen na Ala yii?” **10** Na jaxanla yi na falama Yusufu xa lɔxɔ yo lɔxɔ. Koni hali na, Yusufu mi yi a tuli matima e kafu feen miriyaan na. **11** Lɔxɔna nde, Yusufu yi so banxini wali kedeni. Banxi kui konyi yo mi yi na na waxatini. **12** Na jaxanla yi dutun a domaan ma. A yi a fala a xa, a naxa, “En kafu!” Yusufu yi a ba a domani, a yi a lu jaxanla yii. A yi mini a giye tandeni. **13** Jaxanla to a to a bata a gi, a a domaan lu a yii, a mini tanden ma, **14** a yi a banxi kui konyine xili, a fa a fala e xa, a naxa, “ɛ ito mato, n ma xemen faxi Heburu nan na a xa fa sabaan so en na. A faxi nen n fema a nxu xa kafu, koni n yi sɔnxɔn nate. **15** A to n sɔnxɔ xuiin mɛ, a yi a gi, a a domaan lu n dɛxɔn ma. A yi mini a giye tandeni.” **16** A yi Yusufu a domaan namara han a kanna fa waxatin naxan yi. **17** A yi feni ito yeba a xa, a naxa, “I faxi Heburu konyi xemen naxan na, a faxi nen a xa sabaan so n na. **18** Koni n to sɔnxɔn nate, a yi a domaan lu n yii, a yi mini a giye tandeni.” **19** Yusufu kanna to a jaxanla falan mɛ, a yi naxan falama a xa iki, a naxa, “A mato, i ya konyin naxan nabaxi n na,” **20** a bɔɲɛn yi te, a xɔlɔ. A yi Yusufu balan mangana kasorasane yi dɛnaxan yi. Koni kasoon na, **21** Alatala yi lu Yusufu xɔn ma, a hinan a ra. A yi a ragidi Yusufu ma e nun

kasu mangan yi de fan. 22 Kasu mangan yi kasorasaan birin taxu Yusufu ra. Feen naxan birin yi ligama a yi danguma a tan nan yii. 23 Kasu mangan mi yi Yusufu a wanla xun matoma a ra, bayo Alatala yi Yusufu xon ma. A bata yi a feen birin nasɔɔya.

40 Na xanbi, Misiran Mangana muxun naxan yengi dɔxi a minseen xon ma, na nun a buru ganna yi e kanna Misiran Mangan haken tongo. 2 Misiran Mangan yi xolo a banxi kui konyin firinne ma, naxan yengi saxi a minseen xon ma e nun naxan a burun ganma. 3 A yi e suxu, a e balan sofane mangana kasu banxini, Yusufu yi denaxan yi. 4 Sofane mangan yi e taxu Yusufu ra, naxan yi walima e yii. E to waxati ti kasoon na, 5 naxan yengi saxi mangana minseen xon ma, e nun naxan burun ganma Misiran mangan xa, e yi xiye sa kasoni kɛna nde ra. Na xiye firinna birin nun a bun. 6 Yusufu yi fa e matodeni xɔtɔnni, a yi e li kuisanxi. 7 A yi Misiran Mangana banxi kui konyini itoe maxodin naxanye fan yi kasoni, a naxa, “Nanfera e kuisanxi to?” 8 E yi a yabi, e naxa, “Nxu bata xiylene nde nan sa, koni muxu yo mi be naxan nɛ na yebe.” Yusufu yi a fala e xa, a naxa, “E mi a kolon Ala nan xiylene bunne kanna ra? E e xiylene fala n xa.” 9 Naxan yengi yi saxi mangana minseen xon ma, na yi a xiye fala Yusufu xa, a naxa, “N tan ma xiye ni, n manpa binla nan to, a tixi n yetagi alo jaxundan binla, 10 a yii saxan tixi a ma. A to fuga, a fugen yi bogi maxine ramini alo jaxundan tɔnsɔnne. 11 Misiran Mangana igelengenna suxi n yii. N yi manpa bogi maxine ba, n yi e bundu Misiran Mangana igelengenna kui, n fa a so a yii.” 12 Yusufu yi a fala a xa, a naxa, “A bunna ni ito ra: Na yii saxanna naxanye na kiini a xii saxan nan yitaxi. 13 Xii saxan na dangu, Misiran Mangana i xunnakelima nen, a mon yi i raxete i ya walide fonni. I mon fama nen igelengenna sodeni Misiran Mangan yii alo i darixi a ra kii naxan yi. 14 Koni i jaxɔ lu n xon ma i na herin sɔto waxatin naxan yi. I xa hinan n na, i xa n ma fe fala Misiran Mangan xa alogo n xa mini kasoni. 15 Bayo e n tongoxi fangan nan na Heburu bɔxɔni. Be fan, n mi fefe ligaxi naxan a lige n xa kasoon sɔto.” 16 Naxan burun ganma mangan xa, a to a to fa fala xiye bunna fan, a yi a fala Yusufu xa, a naxa, “N tan fan xiye saxi nen. Debe saxan dɔxi n xun ma buru fixena e kui. 17 Deben naxan dɔxi a fari, buru ganna donseen naxan birin nafalama Misiran Mangan xa, ne a kui. Koni xoline yi fa na donseen

donye naxan dɔxi n xun ma.” 18 Yusufu yi a fala a xa, a naxa, “Xiye bunna ni ito ra: Na debe saxanna naxan na kiini, e xii saxan nan yitaxi. 19 Xii saxan na dangu, Misiran Mangana i xunna segema nen i de. A i singanma nen wudin na, xoline yi i suben don.” 20 Xii saxande lɔxɔni, Misiran Mangan bari lɔxɔni, a yi sumun belebele yiton a kuntigine xa. Naxan yengi saxi mangana minseen xon ma, e nun a buru ganna, Misiran Mangan yi e ramini kasoon na, a fa e ra kuntigine yetagi. 21 Naxan yengi saxi minseen xon ma, a yi na raxete a walide fonni alogo a mon xa minseen so a yii. 22 Koni a yi a buru ganna singan wudin na alo Yusufu bata yi a yebe kii naxan yi. 23 Naxan yengi saxi minse feen xon ma, Yusufu a fe mi rabira na ma. A yi jinan a xon ma.

41 Nɛ firin dangu xanbi, Misiran Mangan yi xiye sa. A tixi xude deni. 2 A yi jinge to fapi tuyanxi solofere to kele xuden kui, e e degema mereni. 3 Na xanbi, jinge solofere gbete, naxanye to jaxu, e doyenxi, ne fan yi keli xuden kui jingen bonne dɔxon ma. 4 Jinge to jaxi doyenxi solofereni itoe yi jinge to fapi tuyanxi solofereni itoe don. Nayi, Misiran Mangan yi xulun. 5 A mon yi xi, a xiye gbete sa. 6 Tɔnsɔn solofere fapi rafexine tixi bili kedenna ma. 7 Na xanbi, tɔnsɔn solofere gbete, naxanye xurun, foyen bata e rafoto ayi, ne tixi tɔnsɔnna bodene dɔxon ma. Tɔnsɔn xurunni itoe yi tɔnsɔn nafexi fapine gerun. Nayi, Misiran Mangan yi xulun. Xiye nan yi a ra. 8 Xɔtɔnni Misiran Mangan bɔnen yi mini. A yi woyimene nun fekolonne birin xili naxanye Misiran yi. A yi xiye ni itoe fala e xa, koni muxu yo mi no xiylene yebe a xa. 9 Na waxatini, naxan yengi saxi mangana minseen xon ma, na yi a fala Misiran Mangan xa, a naxa, “N ma kala fonne bata rabira n ma to. 10 Misiran Mangan xolo nen a konyine ma waxatina nde yi. A yi n suxu, a n balan sofa mangana kasoon na, nxu nun naxan yi burun ganma mangan xa. 11 A tan nun n tan, nxu birin xiye sa nen kɛ kedenna ra, xiye firinna birin nun a bun. 12 Kasoni, nxu nun sofa mangana konyina, Heburu banxulanna nan yi na yi. Nxu yi xiye ni itoe fala a xa, a yi e birin bunna fala nxu xa. Nxu xiye naxanye saxi, a yi e bunne fala nxu xa. 13 A xiye yebe nxu xa kii naxan yi, a mon birin ligaxi na kiini nen. Misiran Mangan bata n naxete n walide fonni. A yi boden fan singan wudin na.” 14 Misiran Mangan yi Yusufu xili. E yi a ramini kasoni mafuren! A yi a

xunna bi, a maraberi baane yi masara a ma. A fa siga Misiran Mangan fema. **15** Misiran Mangan yi a fala Yusufu xa, a naxa, “N bata xiye sa. Muxu yo mi nɔxi a yebadeni, koni n bata a me a i tan nɔe xiye bunna fale, naxan na fala i xa.” **16** Yusufu yi Misiran Mangan yabi, a naxa, “N tan mi a ra, Ala nan Misiran Mangana a xiye bun faɲin fima a ma.” **17** Misiran Mangan yi a fala Yusufu xa, a naxa, “N xiye ni, n yi tixi xude deen nin. **18** N yi jinge to faɲi tuyanxi solofere to kele xuden kui, e e degema mereni. **19** Nayi, jinge solofere gbete yi te e xanbi ra, e doyenxi, e to jaxu, e xosixi. Han to n munma yi na jinge to jaxi sifan to Misiran bɔxɔn birin ma singen. **20** Ninge xosixi to jaxine yi jinge tuyanxi solofere singene don. **21** Koni na xanbi, muxu yo mi nɔe a kolonje xa e bata e don, masoto e doyen kiin ma mɔn. Nayi, n yi xulun.” **22** “N mɔn yi xiye gbete sa. Tɔnsɔn nafexi faɲi solofere tixi bili kedenna ma. **23** Na xanbi tɔnsɔn solofere gbete yi naxanye xurun, foyen naxanye rafofoxi ayi, ne yi te bodene dexɔn ma. **24** Tɔnsɔn fofone yi tɔnsɔn faɲi solofere gerun. N bata a fala woyimene xa, koni muxu yo mi nɔxi a yebadeni n xa.” **25** Yusufu yi a fala Misiran Mangan xa, a naxa, “I ya xiye firinna birin fe kedenna nan yitaxi. Ala bata i rakolon feen ma a fama naxan ligadeni. **26** Na jinge to faɲi solofere nun tɔnsɔn faɲi solofere, ne jee solofere nan yitaxi na kiini. Xiye keden nan a ra. **27** Ninge xosixi to jaxi solofere nun tɔnsɔn fofa solofere foyen naxanye rafofoxi ayi, ne fan jee solofere fitina kamen nan yitaxi. **28** N na a falaxi i xa kii naxan yi, Ala bata na feene yita Misiran Mangan na a fama naxanye ligadeni. **29** Jee solofere naxanye fama iki, a findima lugo jee nan na Misiran bɔxɔn xa. **30** Na xanbi, jee solofere kamen fama nen, en jinanma nen na lugon birin na. Kamen Misiran bɔxɔn halagima nen. **31** Fitina kamen findima fe magaxuxin nan na, han muxune birin yi jinan lugo jee xɔn bɔxɔni ito yi.” **32** “I xiye ito saxi nen dɔxɔna yi firin bayo Ala bata a feen nagidi, a mɔn mi buma a ligadeni. **33** Iki mangana, xaxilimaan fen, fe kolonna, i yi a dɔxɔ Misiran bɔxɔn xun na. **34** Mangana, i xa muxune sugandi naxanye dɔxɔma na wanla xun na lugo jee solofere bun ma. Se xaba waxatin na a li, naxan yo na maala xidi naanin xaba, a suulundena, a xa fa na ra, a ramara. **35** E xa donseene birin malan lugo jee solofere famatɔn bun, e xa a ramara taane kui, Misiran Mangana nɔn bun ma. **36** Donse maraxini ito fama Misiran bɔxɔn

natangadeni kamen ma nen naxan fama jee solofere bun ma.” **37** Falani ito yi rafan Misiran Mangan nun a kuntigine birin ma. **38** Misiran Mangan yi a fala e xa, a naxa, “En nɔe muxuna nde sote naxan ligaxi alo ito, Alaa Nii Saripanxin naxan yi?” **39** Misiran Mangan yi a fala Yusufu xa, a naxa, “Bayo Ala bata na feen birin yita i ra, muxu yo mi na naxan xaxili fan alo i tan, naxan fe kolon dangu i ra. **40** I tan nan fama findideni n ma banxi xunna ra. N ma yamaan fama biradeni i ya yamarin nan fɔxɔ ra. N ma manga gbeden nan tun luma i xun na.” **41** Misiran Mangan mɔn yi a fala Yusufu xa, a naxa, “A mato, n bata nɔn so i yii Misiran bɔxɔn birin xunna.” **42** A yi a gbete wuredin ba a yiin na, a yi a so Yusufu yiin na. A yi a maraberi ba taa dugi faɲin na. A yi xema jee bira a kɔe ra. **43** A yi a rate sofa wontoron kui, naxan Misiran Mangan wontoron xanbi ra. E yi lu sarinje a yee ra, e naxa, “E xinbi sin!” Misiran mangana a mangayaan taxu a ra na kii nin. **44** Misiran Mangan mɔn yi a fala Yusufu xa, a naxa, “N tan nan mangan na. Xa i mi yamarin fi naxan ma, fefe mi lige Misiran bɔxɔ yo ma.” **45** Misiran Mangan yi Yusufu xili sa Safanati-Paniya. A yi Potifari a dii temena Asenati fi a ma a jaxanla ra. Hon taana saraxaraliin nan yi Potifari ra. Yusufu yi xun matoon folo Misiran bɔxɔn ma. **46** Yusufu barin bata yi jee tonge saxan ti nun a fa Misiran Mangan yetagi waxatin naxan yi, Misiran mangana. A yi keli Misiran Mangan fema, a yi bɔxɔn birin yisiga. **47** Lugo jee solofere bun ma, bɔxɔn birin yi rawali ki faɲi. **48** Yusufu yi donseen birin malan naxan sɔtɔxi jee solofere ito bun ma Misiran bɔxɔn ma. Donseen naxanye sɔtɔxi banxidene yi, a yi ne ramara taa gbeene kui. **49** Yusufu yi donse xori gbegbe malan alo baa xɔn meɲensinna. A yi gbo ayi, han e fata a tengen ma bayo a mi yi gase. **50** Benun kamen jee singen xa a li, Yusufu a jaxanla Asenati, Hon taana saraxaraliin Potifari a dii temena, na yi dii firin bari. **51** Yusufu yi dii singen xili sa Manase, a naxa, “Bayo Ala bata a liga n jinan n ma tɔrɔyaan birin xɔn, e nun n baba a denbayana.” **52** A yi dii firinden xili sa Efirami, a naxa, “Bayo Ala bata n findi wuyalaan na n nayarabi bɔxɔn ma.” **53** Lugo jee solofere dangu Misiran bɔxɔn ma. **54** Kame jee solofere yi a li folo alo Yusufu a ye ba kii naxan yi. Kamen yi so bɔxɔne birin yi, koni burun yi na Misiran bɔxɔn birin ma. **55** Kamen to Misiran bɔxɔn birin suxu, yamaan yi sɔnxɔn nate Misiran Mangan ma donse feen na.

Misiran Mangan yi a fala Misiran kaane birin xa, a naxa, “E sa a fala Yusufu xa, a na feen naxan fala e xa, e na liga.” 56 Kamen yi din bōxōn birin na. Yusufu yi donse ramaradene rabi, a yi donseen sara Misiran kaane ma. Kamen yi senben sōtō Misiran bōxōn birin ma. 57 Muxune yi fa, sa keli yamanane birin yi, e fa donseen sara Yusufu ma Misiran bōxōni, bayo kamen bata yi senben sōtō yamanane birin yi.

42 Yaxuba to a mē a murutun Misiran yi, a yi a fala a diine xa, a naxa, “Nanfera e dōxi tun? 2 N bata a mē a murutun Misiran yi. E siga, e sa murutun sara en xa alogo en xa balo, en nama faxa.” 3 Yusufu tadan muxu fu yi siga donse xōri saradeni Misiran yi. 4 Yaxuba mi tin Bunyamin xa bira e fōxō ra, Yusufu xunyena. A yi a fala, a naxa, “N bata gaxu fe jaxin nama fa a sōtō.” 5 Isirayilaa diine yi siga murutu saradeni, e nun muxu gbeten naxanye yi waxi murutun xōn, bayo kamen bata yi din Kanan bōxōn birin na. 6 Yusufu nan yi yamana kanna ra bōxōn xun na. A tan nan yi murutun matima yamaan birin ma yamanani. Yusufu tadane yi fa e xinbi sin a bun, e e yetagine lan bōxōn ma. 7 Yusufu to a tadane to, a yi e kolon, koni a yi a yete rasan e ma. A yi falan ti e xa a xōdēxēn na, a fala e xa, a naxa, “E kelixi minen yi?” E yi a yabi, e naxa, “Nxu kelixi Kanan bōxōn nan ma fa donse saradeni.” 8 Yusufu yi a tadane kolon, koni e tan mi a kolon. 9 Yusufu a xiyene fe yi rabira a ma a naxanye sa e fe yi. A yi a fala e xa, a naxa, “Yaxune nan e ra. E faxi yamanan fangatare yirene nan kolonde yi.” 10 E yi a yabi, e naxa, “En-en, nxu kanna, nxu tan i ya konyine faxi donse saraden nin. 11 Xeme kedenna diine nan nxu ra. Nxu tinxin. Nxu tan i ya konyine, yire mato mi nxu ra.” 12 A yi a fala e xa, a naxa, “E wule. E faxi yamanan fangatare yirene nan kolonde yi.” 13 E yi a yabi, e naxa, “Nxu tan, i ya konyine, xeme kedenna dii muxu fu nun firin nan nxu ra Kanan bōxōni. Iki nxu birin ma bolokada nxu baba dēxōn. Keden mi fa na.” 14 Yusufu yi a fala e xa, a naxa, “N yi na nan falama e xa, a yire matone nan e ra. 15 N na e kejaan fesefesema ito nan na. N bata n kōlō Misiran Mangan siini, e mi minima be xa e bolokadaan mi fa. 16 E muxu keden nasiga e yē, a xa sa fa e bolokadaan na. E tan dōnxene sigama kasoon nin. E falane matoma nen, n na a kolonjē xa e jōndin falama, xanamu n bata n kōlō Misiran Mangan siini, yire matone nan e ra.” 17 A yi e birin suxu han xii

saxan. 18 Xii saxande lōxōni, Yusufu yi a fala e xa, a naxa, “E ito liga alogo e xa kisi. N gaxuma Ala yēe ra. 19 Xa tinxin muxun nan e ra, e muxu keden lu kasoon na. Bodene xa donseen xali e denbaya kamētōne xa. 20 E sa fa e bolokadaan na n xōn alogo n xa a kolon xa jōndi falan nan e ra, alogo e nama faxa.” 21 E yi tin na falan ma, koni e bode tagi e naxa, “En tan nan yati findixi sōnmaan na en xunyena a fe ra, bayo en bata a niina a tōrōyaan to, a to yi en mafanma kininkininni koni en mi en tuli mati a ra. Na nan a toxi tōrōyani ito en lixi.” 22 Ruben yi ito sa a fari, a naxa, “N mi yi a fala e xa, e nama fe jaxin naba diidini ito ra. Koni e mi e tuli ti. Iki en fa a faxan saren nan fima.” 23 E mi yi a kolon xa Yusufu a mēma, bayo xui maxeten yi e tagi. 24 Yusufu yi a makuya e ra, a wuga. Na xanbi, a yi fa falan tiye e xa. A yi Simeyon tongo e tagi, a yi a sa kasoon na e yēe xōri. 25 Yusufu yi yamarin fi, a muxune xa a tadane benbenle rafe donse xōnna ra, e mōn xa e keden kedenna birin ma gbeti sa a benbenla kui sa fandana ndee fari e naxanye donjē kira yi. Na yi liga e xa. 26 E yi e murutu goronne sa e sofanle fari, e yi siga. 27 E kōēēn nadangu dēnaxan yi, keden yi a benbenla rabi alogo a xa balon so a sofanla yii. A yi a gbetin to a benbenla dēe ra. 28 A yi a fala a ngaxakedenne xa, a naxa, “N ma gbetin bata xete n ma. I mi a to n ma benbenla kui mōn?” E bōjēne yi mini. Birin yi a kuisan feen fala a boden xa e naxa, “Ala nanfe ligaxi en na?” 29 E to so e baba Yaxuba konni Kanan bōxōni, feen naxanye birin e li, e yi a birin yebe a xa. 30 E yi a fala, e naxa, “Xemen naxan na yamana kanna ra, a falan tixi nxu xa a xōdēxēn nan na, a nxu kansun a yire mato nan nxu ra. 31 Nxu yi a fala a xa, nxu naxa, ‘Nxu tinxin, yire matone mi nxu ra. 32 Nxu dii fu nun firin na a ra, nxu birin baba keden. Keden mi fa na, nxō bolokadana nxu baba fēma Kanan bōxōni.’ 33 Xemeni ito naxan yamana kanna ra, na yi a fala nxu xa, a naxa, ‘E mi a to, a kolonma kii naxan yi a e tinxin. E muxu keden lu n fēma. Naxan daxa e denbaya kamētōn xa, e na xali. 34 E siga, e sa fa e bolokada ra n xa. N na a kolonma nen nayi fa fala yire mato mi e ra, e tinxin. Na waxatini, n na e xunyen soma e yii nen, e yulayaan liga bōxōni ito ma.’” 35 E to yi e benbenle yixelēma, birin ma sare so gbetin yi a benbenla kui. E tan nun e baba yi gbete to, e birin yi gaxu. 36 E baba Yaxuba yi a fala e xa, a naxa, “E bata n nafula n ma diine ra. Yusufu mi fa na, Simeyon fan mi na. E mōn waxi Bunyamin nan fan tongo fe yi iki. Na

goronna ngaan sama n tan nan xun ma.” 37 Ruben yi a fala a baba xa, a naxa, “Xa n mi fa Bunyamin na, i xa n ma dii firinne faxa. A so n yii, n fama a ra nen i xa.”

38 Yaxuba yi a yabi, a naxa, “N ma diin mi sigama ε fɔxɔ ra, bayo a tada bata faxa, a kedenna nan fa luxi. Xa fena nde fa a soto ε sigatini, ε n nagodoma nen soxɔleni laxira yi, nxu nun n fuge fixene.” (Sheol h7585)

43 Kamen yi fa gbo ayi bɔxɔni. 2 E to yelin na murutun birin donjɛ e fa naxan na sa keli Misiran yi, Yaxuba yi a fala a diine xa, a naxa, “E mɔn xa siga ε sa donsena nde sara en xa.” 3 Yuda yi a yabi, a naxa, “Na xemena nxu rakolonxi nen a fajin na, a naxa, ‘E mi fa n yetagin toma nen sɔnɔn fɔ ε bolokadaan na taran ε yɛ.’ 4 Xa i bata tin nxu nun Bunyamin birin xa siga, nxu sigɛ, nxu sa donseen sara i xa. 5 Koni xa i mi tin na ma, nxu mi sigɛ, bayo na xemena a fala nen nxu xa, a naxa, ‘E mi fa n yetagin toma fɔ ε bolokadaan taran ε yɛ.’” 6 Na waxatini Isirayila yi a fala, a naxa, “Nanfera ε fe jaxini ito ligaxi n na, ε a fala na xemen xa a ε ngaxakedenna nde mɔn na yi?” 7 E yi a yabi, e naxa, “Xemeni ito nxu maxɔdinxi nen a gbengbenna ra e nun nxu bari kiin ma. A yi fa a fala, a naxa, ‘E baba mɔn barixi? E xunyɛna nde na?’ Nxu fan yi a maxɔdinna birin yabi. Nxu yi a kolonjɛ ba, a a fale, a naxa, ‘E fa ε xunyen na?’” 8 Yuda yi a fala a baba Isirayila xa, a naxa, “A lu nxu nun diin xa siga. Nxu kelima nen, nxu siga, nayi en balon sɔtoma nen en mi faxɛ, i tan nun nxɔ diine, e nun nxu tan. 9 N tan nan findixi tolimaan na a funfuni. I fama a maxɔdindeni n tan nan na. Xa n mi fa a ra, n fa a ti i yetagi, n bata findi sɔnmaan na i mabinni. 10 Anu, xa en mi yi buxi, nxu bata yi siga nun dɔxɔna yi firin.” 11 E baba Isirayila yi a fala e xa, a naxa, “Bayo na kiin na a ra, ε ito liga: E yamanan wali xɔnna nde sa ε benbenle kui sanban na xemeni ito xa, wudi dole senna nde nun kumin nun ture xiri jaxumene nun latikɔnɔnne nun wudi kesene nun a tinna nde. 12 E xa gbetin dɔxɔde firin tongo. E siga na gbetin na e naxan sa ε benbenle de ra. Yanyina nde tantanna na a ra. 13 E ε xunyen tongo, ε xete xemeni ito fema. 14 Ala Senbe Kanna xa a liga, xemeni ito yi kininkinin ε ma, a ε xunyen so ε yii e nun Bunyamin. N tan fan, xa n fulama n ma diine ra nen, n xa fula.” 15 Xemeni itoe yi sanbane yitɔn, e yi gbetin dɔxɔde firin tongo e nun Bunyamin. E yi keli e siga Misiran yi, e sa e yetɛ yita Yusufu ra. 16 Yusufu to

e to e nun Bunyamin, a yi a fala a banxi xunna xa, a naxa, “Xemeni itoe raso banxini. Suben faxa, i yi a yitɔn bayo nxu nun xemeni itoe nan nxu degema to yanyin na.” 17 Yusufu feen naxanye fala a banxi xunna xa, a ne liga. A yi xemeni itoe mati Yusufu a banxini. 18 Gaxun yi e suxu e sa e mati Yusufu a banxini waxatin naxan yi. E yi fa a fala, e naxa, “E faxi en na gbetin nan ma fe ra e naxan sa en ma benbenle kui a fɔlɔni. E fama sodeni en xunna, e fa en suxu, e yi en findi konyine ra en nun en ma sofanle.” 19 E yi e maso Yusufu a banxi xunna ra, e yi falan ti a xa banxin so dɛɛn na. 20 E yi a fala, e naxa, “Yandi n kanna, nxu bata yi siga a singeni donse saradeni. 21 Na xanbi, nxu to ti kɔɛɛn na, nxu yi benbenle rafulun. Nxu keden kedenna ngaan yi gbetin to nxɔ benbenle kui, nxɔ balon saraxi gbetin naxanye yetɛ ra. Iki nxu mɔn bata fa na ra. 22 Nxu mɔn bata fa gbeti gbete ra alogo nxu xa donse gbete sara. Nxu mi a kolon naxan gbetin sa nxɔ benbenle kui.” 23 A yi e yabi, a naxa, “E bɔnjɛn xa xunbeli, ε nama gaxu. E Ala na a ra, ε babaa Ala nan herisigen fixi ε ma ε benbenle kui. E gbetin soxi n yii nen.” A yi Simeyɔn namini e ma. 24 Xemeni ito yi e raso Yusufu a banxin kui. A yi igen so e yii, e yi e sanne maxa, a yi balon so e sofanle yii. 25 E yi sanba seni tɔn benun Yusufu xa so waxatin naxan yi yanyi tagini, bayo e bata yi a mɛ e e degema menna nin. 26 Yusufu to so banxini, e yi sanba seene so a yii, e e xinbi sin a yetagi. 27 Yusufu yi e maxɔdin e kendeyaan ma. A yi a fala, a naxa, “E ε baba forixin naxan ma fe fala, tana mi a ma? A mɔn barixi?” 28 E yi a yabi, e naxa, “I ya konyina, nxu baba, tana yo mi a ma. A mɔn barixi.” E mɔn yi e xinbi sin a bun. 29 Yusufu yi a yɛɛn nakeli, a yi a xunyen Bunyamin to, a nga a diina. A yi a fala, a naxa, “Ito nan ε xunyen na ε naxan ma fe fala n xa?” A mɔn yi a fala, a naxa, “Ala xa hinan i ra, n ma diina.” 30 A xunyen hinanna yi so Yusufu yi, a yi wa wuga feni. A yi keli, a so a xideni, a wuga. 31 A to a yɛɛn naxa, a yi mini. A yi a yixɔdɔxɔ alogo a xa a yetɛ nɔ. A yi a fala, a naxa, “E donsɛni taxun.” 32 E yi a gbɛɛn sa a danna, a tadane fan yi dɔxɔ e danna. Misiran kaan naxanye yi e degema a xɔn ma ne fan yi lu e danna, bayo Misiran kaane nun Heburu muxune mi yi e dege yire kedenni. Misiran kaane e namunna mi yi tinjɛ na ma feu. 33 Yusufu tadane yi radɔxɔ a yetagi e bari yɛɛn ma, fɔlɔ saran ma han bolokadana. E lu e bode matɔɛ xaminxin na. 34 Yusufu yi e donseene so e yii. Bunyamin ma donseen

yi dangu a tadane gbeen na doxɔŋa ma suulun. E birin yi e dege, e e min, han e yi wasa.

44 Yusufu yi yamarini ito so a banxi xunna yii, a naxa, “Muxuni itoe e benbenle rafe donseen na han e nɔɛ yaten naxan xale. I mɔn xa e gbetin sa e benbenle de ra. **2** I n ma igelengenna gbeti daxin fan sa e bolokadana benbenla de ra, e nun a murutu sara gbetina.” Yusufu feen naxan birin fala a banxi xunna xa, a yi na birin liga. **3** Kuye to yiba e yi muxuni itoe yiiba. E yi siga e nun e sofanle. **4** E yi mini taani. Koni e mi yi makuyaxi, Yusufu yi a fala a banxi xunna xa, a naxa, “Keli, i siga muxuni itoe fɔxɔ ra, i yi e suxu, i yi a fala e xa, i naxa, ‘Nanfera ɛ fe faɲin ɲɔxɔxi fe kobin na? **5** Nanfera ɛ n kanna igelengenna muɲaxi a a minma naxan yi, a yiimato sena? E bata fe ɲaxin liga na yi!’” **6** Banxi xunna to e yiren li, a yi xete falani ito ma e xa. **7** E yi a yabi, e naxa, “Nanfera nxu kanna fala sifani itoe tima? Nxu tan, i ya konyine mi nɔɛ na fe sifan lige. **8** Nxu gbetin naxan to benbenle kui Kanan yi, nxu bata fa a ra. Nayi, nxu gbetin nun xɛmaan muɲama i kanna banxini di? **9** I na se keden peen to i ya konyi kedenna naxan yii, a xa faxa. Nxu tan fan yi findi mangana konyine ra.” **10** Mangana a banxi xunna yi a fala, a naxa, “Na bata fan, ɛ naxan falaxi na ra, n fan bata tin na ma. N na se keden peen to muxun naxan yii, na tan bata findi n ma konyin na, ɛ tan dɔnxene yi yiiba.” **11** E birin yi e benbenle ragodo mafuren, e yi e rafulun. **12** Banxi xunna yi e kui to, fɔlɔ dii saran ma sa doxɔ bolokadaan na. Igelengenna yi to Bunyamin ma benbenla kui. **13** E yi e domane yibo. E birin yi e goronne rate sofanle fari, e mɔn yi xete taani. **14** Yuda nun a xunyene yi xete Yusufu a banxini, a mɔn yi denaxan yi. E bira bɔxɔni a yetagi, e yetagin yi lan bɔxɔn ma. **15** Yusufu yi a fala e xa, a naxa, “Nanfera ɛ ito ligaxi? E mi a kolon, a n tan muxu sifan nɔɛ feene kolonɲe nen yiimatoon xɔn?” **16** Yuda yi a yabi, a naxa, “N nanse falama n kanna xa? N lan n xa nanse fala? Nxu nɔɛ fixe di? Ala bata nxu tan i ya konyine to haken xun ma. Nxu bata findi n kanna konyine ra, nxu nun igelengenna toxi muxun naxan yii.” **17** Yusufu yi a fala, a naxa, “N mi nɔɛ na fe sifan lige! Igelengenna toxi muxun naxan yii, na nan n ma konyin na, koni ɛ tan, ɛ xete bɔɲe xunbenli ɛ baba fema.” **18** Na xanbi ra, Yuda yi a maso a ra, a yi a fala a xa, a naxa, “N bata i mafan n kanna, a lu n tan i ya konyin xa falan ti n kanna xa. I bɔɲɛn nama te i ya

konyin xili ma, bayo i luxi nen alo Misiran Mangana. **19** N kanna bata yi nxu tan i ya konyine maxɔdin, a a fala, a naxa, ‘E baba na yi, xanamu ɛ xunyena?’” **20** Nxu yi n kanna yabi, nxu naxa, ‘Nxu baba forixin na yi, e nun nxu xunyena, a naxan sɔtɔxi xeme foriyani. A tada bata faxa, a kedenna nan fa luxi a nga a diin na, a rafan a baba ma.’” **21** “I bata a fala i ya konyine xa, i naxa, ‘E fa a ra n fema alogo n xa a to n yeen na.’” **22** Nxu yi n kanna yabi, nxu naxa, ‘Dii ɲɔreni ito mi kele a baba dɔxɔn ma, xa a keli na, a baba faxama nen.’” **23** Koni, i yi a fala i ya konyine xa, i naxa, ‘Xa ɛ nun ɛ xunyen birin mi fa, ɛ mi n yetagin toɛ sɔnɔn.’” **24** Nxu to siga n baba konni, i ya konyina, nxu yi i tan n kanna dentegen sa a xa.” **25** “Nxu baba yi a fala, a naxa, ‘E siga ɛ sa donsena nde sara en xa.’” **26** Nxu yi a yabi, nxu naxa, ‘Nxu mi nɔɛ sigɛ xa nxu nun nxu xunyen birin mi a ra. Nxu sigɛ nen xa nxu birin na a ra. Xa na mi a ra nxu mi nɔɛ xemɛni ito yetagin toɛ.’” **27** I ya konyina, nxu baba a fala nen nxu xa, a naxa, ‘E a kolon n ma ɲaxanla dii xeme firin nan barixi n xa. **28** Kedenna kelixi nen n xun ma, n mirixi a ma yanyina nde suben bata a yibo, bayo han iki n munma a to. **29** Xa ɛ ito fan tongo n xun ma, fe ɲaxina nde yi a sɔtɔ, ɛ n nagodoma sɔxɔleni nen laxira yi nxu nun n ma fuge fixene.” (Sheol h7585) **30** “Iki xa n xete n baba yireni, i ya konyina, xa nxu nun diidini ito mi a ra, **31** n baba faxama nen bayo a nii lutin nan a diin na, Bunyamin. A na a to diidini ito mi faxi, i ya konyine bata e baba ragodo nayi sɔxɔleni laxira yi e nun a fuge fixene. (Sheol h7585) **32** Bayo, n tan, i ya konyina a yete dɔxi nen tolimani diidini ito a fe ra. N bata yi a fala n baba xa, n naxa, ‘Xa n mi xete a ra i yireni, n findima sɔnmaan nan na n baba mabinni habadan.’” **33** “Iki n bata i mafan, i ya konyin xa lu diidini ito ɲɔxɔni alo n kanna a konyina, alogo diidini ito nun a tadane birin xa siga. **34** N nɔɛ sigɛ n baba yireni di, xa nxu nun diidini ito birin mi a ra? N mi nɔɛ n yeen tiye na sunun na naxan n baba suxe.”

45 Yusufu mi yi nɔɛ a yete yisuxe a walikene yetagi. A yi sɔnxɔ, a naxa, “E birin xa mini n xun mal” Yusufu a yete yitama a tadane ra waxatin naxan yi, muxu yo mi yi a fema. **2** A yi wuga sɔbeen na. Misiran kaane yi a xuiin mɛ, Misiran Mangana banxin muxune yi a feen mɛ. **3** Yusufu yi a fala a tadane xa, a naxa, “N tan nan Yusufu ra! N baba mɔn na?” Koni a tadane mi nɔ a yabideni bayo e bata de xara, e yigitege a

yee ra. 4 Yusufu yi a fala a tadane xa, a naxa, “N bata e maxandi, e e maso n na.” E yi e maso a ra. A yi a fala, a naxa, “N tan nan Yusufu ra, e xunyena, e naxan mati Misiran kaane ma konyin na. 5 Iki, e bɔnen nama mini, e mɔn nama gaxu n mati feen ma, bayo Ala n xexi nen e yee ra alogo n xa e nii ratanga. 6 E bata a to, xabu jee firin kamen waraxi bɔxɔni, jee suulun mɔn luxi, bɔxɔn mi nɔe rawale, sansiin mi nɔe xabe. 7 Ala n nasanbaxi nen e yee ra alogo e nun e yixetene xa kisi dunɔɔra yi, maratanga gbeen barakani. 8 Nayi, e tan xa mi faxi n na be, koni Ala na a ra. A yi n findi Misiran Mangan baba ra, a banxi mangana, e nun Misiran bɔxɔn birin yamana kannna.” 9 “E xulun, e siga n baba yireni. E a fala a xa, e naxa, ‘I ya diin Yusufu ito nan falaxi, Ala bata n findi Misiran bɔxɔn birin mangan na. Fa n fema, i nama bu. 10 I luma Gosen bɔxɔn nan ma. I luma n fema nen, i tan nun i ya diine nun i mamandenne nun i ya xuruse kurun birin, e nun i yii seen birin. 11 Menni n ni i makoon birin fanma nen, bayo jee suulun kamen mɔn luxi. Xa na mi a ra i fama nen halagideni e nun i ya denbayana, e nun i yii seen birin.” 12 “E bata a to e yeen na, n xunyen Bunyamin fan bata a to a yeen na, a n tan nan falan tixi e xa. 13 E xa n ma mangaya nɔrɔn yeba n baba xa n naxan yi Misiran bɔxɔni, e nun e feen naxan birin toxi. E xulun, e fa n baba ra han be.” 14 A yi dutun a xunyen Bunyamin ma, a yi wuga. Bunyamin fan yi wuga. 15 A yi a tadane birin sunbu, a wugama. Na birin to jan, e nun a tadane yi batu. 16 Na feen xibarun yi Misiran Mangana banxin li, a Yusufu tadane bata fa. Na yi rafan Misiran Mangan ma e nun a kuntigine birin. 17 Misiran Mangan yi a fala Yusufu xa, a naxa, “A fala i tadane xa, i naxa, ‘E goronne rate e sofanle fari. E keli, e siga Kanan bɔxɔni. 18 E sa e baba tongo e nun e denbayane, e fa n fema. Se fajin naxan birin Misiran bɔxɔni, n na a soe e yii, e mɔn yi bɔxɔn donse fajine don.’ 19 N bata i yamari, a fala i tadane xa, i naxa, ‘E wontorone tongo Misiran bɔxɔni, e diine nun e naxanle xa. E e baba fan nate, e birin yi fa. 20 Hali e nama mone e yii seene fe ra, bayo se fajin naxanye birin Misiran bɔxɔni, a findima nen e gbeen na.” 21 Isirayila a diine yi na liga. Yusufu yi wontorone so e yii alo Misiran Mangana a fala a xa kii naxan yi. E yi fandan so e yii e naxan donma kira yi. 22 A yi domane so e birin yii. A gbeti gbananna keme saxon fan so Bunyamin yii e nun doma suulun. 23 Se fajin naxan birin Misiran

bɔxɔni, a na ndee rate sofali fu fari, a e sanba a baba ma e nun donse xɔnna nun burun nun fandan birin a baba naxan donje kira yi, na yi rate sofali gile fu fari. 24 Na xanbi ra, a yi a tadane yiiba, e yi siga. A yi a fala e xa, a naxa, “E nama sɔnxo kira yi de!” 25 E yi keli Misiran yi, e te Kanan bɔxɔn ma e baba Yaxuba yireni. 26 E yi a fala a xa, e naxa, “Yusufu mɔn barixi, a tan nan Misiran bɔxɔn birin yamarima.” Koni Yaxuba bɔnen mi sewa, bayo a mi laxi e ra. 27 Yusufu falan naxanye birin ti e xa, e yi na birin yeba a xa. Yaxuba yi wontorone to Yusufu naxanye rasanbaxi a ma a xali feen na. Na yi a liga e baba Yaxuba niin yi sewa. 28 Isirayila yi a fala, a naxa, “N bata sewa, n ma diin Yusufu mɔn na. Benun n xa faxa, n sa a toma nen.”

46 Seen naxan birin yi findixi Isirayila gbeen na, a yi na birin xali a yii. A to Beriseba li, a yi saraxan ba a baba Isiyagaa Ala xa. 2 Isirayila yi fe toon ti kɔeen na alo xiyena, Ala yi a fala a xa, a naxa, “Yaxuba, Yaxuba!” Isirayila yi a ratin, a naxa, “N tan ni i ra!” 3 Ala yi a fala, a naxa, “N tan nan Ala ra, i babaa Ala. Hali i nama gaxu siga feen na Misiran yi, bayo n ni i findima siya gbeen nan na menni. 4 En birin nan sigama Misiran yi, n tan nan mɔn fama i raxetedeni. Yusufu nan i yeene raxima, i na faxa waxatin naxan yi.” 5 Yaxuba yi keli Beriseba yi. Isirayilaa diine yi e baba Yaxuba nun e diine nun e naxanle xali wontorone kui Misiran Mangan naxanye rasanba e ma. 6 E yi e xuruseene tongo e nun e seen naxanye birin soto Kanan bɔxɔn ma. Yaxuba yi siga Misiran yi e nun a bɔnsɔnna birin. 7 A yi a dii xemene xali a yii Misiran yamanani e nun a mamanden xemene nun a dii temene nun a mamanden naxalanmane, e nun a bɔnsɔnna birin. 8 Isirayilaa diine xinle ni itoe ra naxanye siga Misiran yi Yaxuba nun a dii xemene: Yaxuba a dii singen nan Ruben na. 9 Ruben ma diine: Xanaki nun Palu nun Xesirɔn e nun Karimi. 10 Simeyɔn ma diine: Yemuyeli nun Yamin nun Ohadi nun Yakini nun Soxara, e nun Sayuli. Sayuli findi Kanan naxanla diin nan na. 11 Lewi a diine: Gerisɔn nun Kehati e nun Merari. 12 Yudaa diine: Eri nun Onan nun Selaxa nun Peresi e nun Sera. Koni Eri nun Onan faxa Kanan bɔxɔn nin. Peresi a diine findi Xesirɔn nun Xamuli nan na. 13 Isakari a diine: Tola nun Puwa nun Yobo e nun Simiron. 14 Sabulon ma diine: Seredi nun Elon e nun Yalele. 15 Diine nan ne ra, Leya naxanye bari Yaxuba xa Padan-Arami yi, e nun a

dii temen Dina. A dii xemene nun dii temene yaten birin malanxina, muxu tonge saxan muxu saxan. **16** Gadi a diine: Sifiyon nun Xagi nun Suni nun Esibon nun Eriya nun Arodi e nun Areli. **17** Aseri a diine: Yimina nun Yisiwa nun Yisiwi nun Beriya e nun e magilen Sera. Beriya a diine findi Xeberi nun Malikili nan na. **18** Silipa, Laban naxan so a dii temen Leya yii, na diin naxanye bari Yaxuba xa, na diine nan ne ra. E birin malanxi muxu fu nun sennin. **19** Rakeli a diine, Yaxuba a jaxanla: Yusufu nun Bunyamin. **20** Asenati yi dii firin soto Yusufu xa Misiran boxoni: Manase nun Efirami. Asenati findi Hon taan saraxaralina dii temen nan na, naxan xili Potifari. **21** Bunyamin ma diine: Bela nun Bekeri nun Asibeli nun Gera nun Naman nun Exi nun Roxi nun Mupin nun Xupimi e nun Arade. **22** Rakeli diin naxanye bari Yaxuba xa, na diine nan ne ra. E birin malanxina, muxu fu nun naanin. **23** Dan ma diina: Xusimi. **24** Nafatali a diine: Yaseli nun Guni nun Yeseri e nun Silen. **25** Bila, Laban naxan so a dii temen Rakeli yii, a diin naxanye bari Yaxuba xa ne ni itoe ra. E birin malanxina, muxu solofere. **26** Yaxuba nun muxun naxanye birin siga Misiran yi, a bomsonna birin malanxina, muxu tonge sennin e nun sennin, ba a diine e jaxanle ra. **27** Yusufu dii xem firin nan bari Misiran yi. Yaxuba xabilan muxune yaten birin malanxina, naxanye siga Misiran boxon ma, e muxu tonge solofere nan yi a ra. **28** Yaxuba yi Yuda xe a yee ra Yusufu fema alogo e birin xa siga Gosen yi. E yi so Gosen boxon ma. **29** Yusufu yi a yengeso wontoron tongo, a yi siga Gosen yi a baba Isirayila ralandeni. A to a li, a yi filinfilin a ma, a yi bu wuge a koeen xon. **30** Isirayila yi a fala Yusufu xa, a naxa, "Hali n faxa fa, bayo n bata i yetagin to, i mon yengima!" **31** Yusufu yi a fala a tadane xa, e nun a babaa denbayana, a naxa, "N xa siga, n xa sa a fala Misiran Mangan xa, n naxa, 'N tadane nun n babaa denbayaan naxanye yi dxi Kanan boxoni, e birin bata fa n fema. **32** Muxuni itoe xuruse kantanne nan ne ra. E xuruseene rabama. E bata fa e xuruse kurune ra, siine nun yexeeene nun jingene e nun e yii seen birin.' **33** Misiran Mangan na e xili waxatin naxan yi, a e maxodinma nen a e wanla nanse a ra. **34** E a yabima nen, e naxa, 'N xu tan i ya konyine xuruse rabaan nan nxu ra, xabu nxu dii jorene han iki, alo nxu baba yi a ma kii naxan yi.' Na kiini, e fama ludeni Gosen boxon nan ma, bayo xuruse rabane rapaxu Misiran kaane ma."

47 Yusufu yi siga, a sa a fala Misiran Mangan xa, a naxa, "N baba nun n fafaxakedenne bata fa sa keli Kanan boxon ma, e nun e xuruseene birin nun e yii seene birin. E na yi iki Gosen boxoni." **2** A yi a tada suulun yita Misiran Mangan na. **3** Misiran Mangan yi Yusufu tadane maxodin, a naxa, "E wanla mundun maxaranxi?" E yi Misiran Mangan yabi, e naxa, "N xu tan i ya konyine xuruse rabane nan nxu ra alo nxu benbane yi a ma kii naxan yi." **4** E mon yi a fala Misiran Mangan xa, e naxa, "N xu faxi nen nxu xa lu boxoni ito ma singen, bayo xuruseene rabade mi i ya konyine yii sonon. Kamen bata gbo ayi Kanan boxon ma. I ya konyine sago sa e xa lu Gosen boxoni." **5** Misiran Mangan yi a fala Yusufu xa, a naxa, "I baba nun i tadane bata fa i foxo ra. **6** Misiran boxona i sagoni. Yire fajin fen boxoni ito ma, i baba nun i fafaxakedenne luye denaxan yi. E xa lu Gosen boxoni. Xa i muxu fajine kolon e ye, e findi n ma xuruse kantanne ra." **7** Yusufu yi fa a baba ra, a yi a yita Misiran Mangan na. Yaxuba yi duba Misiran Mangan xa. **8** Misiran Mangan yi Yaxuba maxodin, a naxa, "I ya siimayaan jee yoli a ra iki?" **9** Yaxuba yi Misiran Mangan yabi, a naxa, "N ma siimayaan jee keme jee tonge saxan na a ra iki. N siimaya dungi naxasixin nan sotoxi. A yete mi masoxi n benbane siimayaan yaten na." **10** Yaxuba mon yi duba Misiran Mangan xa, a fa siga. **11** Yusufu yi boxo fajin fi a baba nun a tadane ma alo Misiran Mangana a yamari kii naxan yi. E boxon naxan soto, na fan Misiran boxon birin xa. A xili Ramisesi. **12** A yi ti a baba nun a tadane nun a babaa denbayaan birin bun ma. **13** Kamen yi jaxu ayi, donseen mi yi toma boxo yo yi, keli Misiran ma doto Kanan na. Yamaan yi doyen kamen ma. **14** Gbetin naxan birin yi na Misiran nun Kanan boxoni, e yi a birin sara murutun na. Yusufu yi na gbetin namara Misiran Mangana banxini. **15** Misiran boxon gbetin nun Kanan boxon gbetin to jan, Misiran kaane yi fa Yusufu fema, e yi a fala, e naxa, "Burun so nxu yii! Fo nxu faxa i yee xori bayo gbeti mi fa nxu yii sonon?" **16** Yusufu yi a fala, a naxa, "E fa e xuruseene ra, en ja a masara burun na bayo gbeti mi fa e yii." **17** E yi fa e xuruseene ra Yusufu ma. A fan yi donseen so e yii e soone nun siine nun yexeeene nun jingene nun sofanle joxon na. A yi burun taxun e ra e xuruseene masaran na. **18** Na jeen to dangu, e yi fa a fema. E yi a fala a xa, e naxa, "N xu mi noe a luxunje nxo mangan ma. Gbeti yo mi nxu yii. Nxo xuruseen fan birin nxo mangan yii."

Nxu gbindine nun nxo boxone gbansanna nan luxi nxo mangan xa. 19 Fo nxu xa faxa i yee xori, nxu tan nun nxo boxone? Nxu tan nun nxo boxone masara burun na, nxu xa findi Misiran Mangana konyine ra, nxu nun nxo boxone. Sansiin so nxu yii, nxu xa a rawali, nxu xa balo alogo nxu nama faxa, boxon nama rabepin.” 20 Yusufu yi Misiran boxon birin sara Misiran Mangan xa, bayo Misiran kaane birin e boxone mati nen. Kamen bata yi dexo e yi. Boxon yi findi Misiran Mangan gbeen na. 21 A yi yamaan findi konyine ra, keli Misiran yamanan bode foxon ma sa dexo a naninna boden na. 22 Hali na birin to liga, a mi saraxaraline boxon sara bayo Misiran Mangan bata yi sariya fajin tongo e fe ra. E mi e boxone mati bayo Misiran Mangan yi burun taxunma e ra. 23 Yusufu yi a fala yamaan xa, a naxa, “N bata e sara to. E nun e boxone luma nen Misiran Mangan xa. E sansine ni itoe ra, e xa boxone rawali. 24 Se xaba waxatini, naxan yo na maala xaba xidi naanin, a suulunden nan soma Misiran Mangan yii. Xidi naaninna, na xa findi sansiin na e nun e balona, e tan nun e diine nun muxun naxanye birin e yii banxine kui.” 25 E yi a fala, e naxa, “I bata nxu ratanga! Nxu bata nxo mangana a fe fajin to a naxan ligaxi nxu xa. Nxu findima Misiran Mangana konyine nan na.” 26 Yusufu yi na findi sariyan na, na nan nakamalixi han to. Misiran boxoni, se xabaxine xidi suulunden findin Misiran Mangan nan gbee ra, fo saraxaraline boxone. Ne mi findixi Misiran Mangan gbeen na. 27 Isirayila yi dexo Misiran boxoni Gosen binni. Na boxon yi findi e gbeen na. E yi findi dii barine ra, e yi wuya ayi. 28 Yaxuba jee fu nun solofere nan liga Misiran boxoni. Yaxuba a siimayaan jee keme jee tonge naanin e nun solofere nan soto. 29 Isirayilaa siimayaan fa jan feni, a yi a dii Yusufu xili, a yi a fala a xa, a naxa, “Xa i wama n nafan feen liga feni, n bata i mafan i yiin naso n danban bun ma, i xa i kolo n xa. I xa hinar n na lannayani. N bata i maxandi i nama n maluxun Misiran boxoni. 30 N na laxiraya waxatin naxan yi, i n naminima nen Misiran yi, i sa n maluxun n baba gaburun yireni.” Yusufu yi a yabi, a naxa, “I naxan falaxi n xa, n na a ligama nen.” 31 Isirayila yi a fala, a naxa, “I kolo n xa.” Yusufu yi a kolo a xa. Na xanbi, Isirayila yi a xinbi sin Ala yetagi a saden xunsaden na.

48 Na feen birin to dangu, e yi a fala Yusufu xa, e naxa, “I bata a to, i baba mi yalan.” A yi siga e

nun a dii xeme firinna, Manase nun Efirami. 2 E yi a fala Yaxuba xa, e naxa, “I ya diin Yusufu fama i fema.” Isirayila yi fangan soto, a keli, a dexo a saden ma. 3 Yaxuba yi a fala Yusufu xa, a naxa, “Ala Senbe Kanna fa nen n ma Lusi yi, Kanan boxoni. A yi barakan nagidi n ma. 4 A yi a fala n xa, a naxa, ‘N tan ni i ra. I findima dii barin na nen. N na i rawuyama ayi nen, siya wuyaxi yi mini i yi. N boxoni ito fima nen i bonsonna ma, hali i dangu xanbini. A findi e gbeen na habadan.’” 5 “Dii firinni itoe i naxanye barixi Misiran yi benun n tan xa fa, n bata e findi n ma diine ra. Efirami nun Manase findima n tan nan gbee ra, alo Ruben nun Simeyon. 6 Koni i diin naxanye barixi ne xanbi ra, i gbeen nan ne ra. E fama nen ludeni e tadane bun ma e keena a fe ra. 7 N to keli Padan yi, Rakeli yi faxa n yii kira yi Kanan boxoni. Na mi yi makuya Efarata ra. N yi a maluxun menni Efarata kiraan na, denaxan xili Betelemi.” 8 Isirayila yi Yusufu a diine mato, a a fala, a naxa, “Nde ne ra?” 9 Yusufu yi a baba yabi, a naxa, “N ma dii xemene nan e ra Ala naxanye fixi n ma be.” Isirayila naxa, “N bata i mafan, e maso n na alogo n xa duba e xa.” 10 Yaxuba bata yi yelin fore, a yee mi yi seni gbema. A mi yi seen toma ki fajni. Yusufu yi a diine maso a ra. Isirayila yi a yiin filinfilin e ma, a e sunbu. 11 Isirayila yi a fala Yusufu xa, a naxa, “N mi yi laxi a ra xa n ni i yetagin toe sonon, koni Ala bata a ragidi n bata i ya diine fan to.” 12 Yusufu yi a diine tongo a baba sanna fari, a a xinbi sin a bun ma, a yetagin yi lan boxon ma. 13 Na xanbi ra, Yusufu yi a dii firinna suxu e yiine ma. A yi Efirami suxu a yiifanna ra, Isirayila komenna mabinni. A yi Manase suxu a komenna ra, Isirayila yiifanna mabinni. A yi e maso a ra. 14 Koni Yaxuba yi a yiifanna sa Efirami xunna fari naxan yi dii joreni na. A yi a komenna sa Manase xunna fari naxan yi dii singen na. A a yiine gindingalan. 15 A yi duba Yusufu xa, a naxa, “Ala, n fafane Iburahima nun Isiyaga sigan ti naxan yee xori, Ala naxan n kantanma xabu n bari loxoni han to, 16 malekan naxan n natangaxi fe xodexen ma, na xa dii joreni itoe baraka. N xinla xa fala e xun ma, e nun n baba Iburahima nun Isiyaga. E xa wuya ayi boxoni.” 17 Yusufu yi a to a baba bata a yiifanna sa Efirami xun ma. Na feen yi rajaxu a ma. A yi a baba yiin suxu, a a ba Efirami xun ma a yi a sa Manase xun ma. 18 Yusufu yi a fala a baba xa, a naxa, “Na kiin xa mi a ra, baba, bayo ito nan fonna ra. I yiifanna sa ito nan xun ma.” 19 A baba yi tondi, a a fala, a naxa, “N na a kolon, n

ma diina, n na a kolon. A fan findima nen siya gbeen na, koni a xunyen nan fama wuyadeni dangu a ra. A xunyen bõnsõnna findima nen siya wuyaxin na.” 20 A yi duba e xa na lõxõni, a a fala, a naxa, “Isirayila kaane Ala maxandin ligama ε xinle ra nen. E fama a faladeni nen, e naxa, ‘Ala xa i lu alo Efirami nun Manase.’” Na kiini, a yi Efirami rafisa Manase xa. 21 Isirayila yi a fala Yusufu xa, a naxa, “I bata a to, n fa faxama nen, koni Ala luma nen ε xõn, a fama i raxetedeni nen i benbane bõxõn ma. 22 N kεε keden fima nen i ma dangu i tadane ra, n Siken yamanan nan fima i ma n naxan tongo Amorine yii n ma silanfanna nun n ma xanla ra.”

49 Yaxuba yi a diine xili, a yi a fala e xa, a naxa, “ε malan, n xa feene fala naxanye fama ligadeni ε xa waxati famatõne yi. 2 ε maso, ε tuli mati n na Yaxubaa diine. ε tuli mati ε baba Isirayila ra.” 3 “Ruben, i tan, n ma dii singena, i tan nan n fangan na, naxan singe n senben mayitaxi. I xunnayeren dangu bodene ra i senben gbo. 4 I ye yifuxi alo fufana, i mi fisamantenyaan sõtõma bayo i bata i sa i baba a saden ma, i yi a xõsi.” 5 “Simeyõn nun Lewi ngaxakedenmaan nan e ra. E silanfanna nan e yengeso seen na. 6 N xaxinla nama lu e maxadini, n miriyaan nama lu e malanni, bayo e bata muxune faxa e bõjε teeni, e bata turane fasane bolon e jaxuni. 7 N bata e xõlõn danga, bayo e yengen gidima. N bata e fitinaxin danga, bayo e yεene yixara. N na e raxuyama ayi nen Yaxuba bõnsõnne ye, n mõn yi e rayensen Isirayila yi.” 8 “Yuda, i xunylene i tan nan tantunma. I nõõn sõtõma nen i yaxune xun na. I babaa dii xεmene e xinbi sinma nen i xa. 9 Yuda, yata senbemaan nan i ra. N ma diina, i baloma suben nan na. I xinbine yidõxõma nen, i sa alo yatana, alo yata gilena, nde susue i rakele? 10 Manga dunganna mi bama Yuda yii. Muxu yo mi manga taxamasenna bama a yii. Han taxamaseri kanna fa waxatin naxan yi, siyane yi xuru a xa. 11 A a sofanel xidima manpa binla nan na, a a sofali diin xidima manpa bili fajin yiin nan na. A a domain xama wudi bogi igen nan na alo manpana, a a doma gbeen fan xama bogi se ige gbeela nan na alo wunla. 12 A yεene fõrõ wudi bogi ige gbeela xa, A jinna fixa nõnõn xa.” 13 “Sabulon fama dõxõdeni baan nan dε. A bõxõn findima kunki yigiyaden nan na. A naninna Sidõn dẽxõnna nan na.” 14 “Isakari senben luxi nen alo sofanel, naxan a sama

a goron benbeli firinna tagi. 15 A saxi bõxõn naxan ma, a na yire fajiyaan to, a tungunni godoma nen goronna bun ma, a xuru konyiya wanla bun.” 16 “Dan, a a yamaan makitima nen, alo Isirayila bõnsõnna bonne. 17 Dan luma nen alo sapina kiraan xõn ma, alo kosona san ma kiraan dε. A yi soon santinban xin, soo ragiin yi bira a fari. 18 Alatala, n xaxili tixi i ya kisin na!” 19 “Gadi, yengesone a yengema nen, koni a tan nan e rabodonma ayi e san xanbi ra.” 20 “Aseri findima donse xõri kanna nan na naxan kamalixi mangan dεge seen na.” 21 “Nafatali luma nen alo xeli gilen naxan a gima, a fala fajine tima.” 22 “Yusufu luma nen alo wudi bogilana naxan tixi xuden dε. A yiine yibandunxi taan nabilinna yinna nan xun ma. 23 Xalimakuli wonle yi yengen gidi a ma xõleni, e xalimakunle woli a ma xõnnantenyani. 24 Koni a fan yi a xanla suxu ken, a yii rafan Yaxubaa Ala Senbemaan barakani, Isirayila kantanmana, a kantan fanyena, 25 naxan findixi i fafe a Ala ra, naxan i ratangama, Ala Senbe Kanna, naxan i barakama, naxan koren dubane fima i ma, naxan bõxõn dubane fima i ma, naxan dii bari dubane ragidima i ma. 26 I babaa dubane baraka dangubaraka feene ra naxanye sõtõma geya fõnne xεene ma, e dangubaraka geyane se fajine ra. Ala xa na birin lu Yusufu xun ma, naxan findima a fafaxakedenne yεeratiin na.” 27 “Bunjamin luma nen alo kankona. Xõtõn yo xõtõn fõ a subena nde suxu, a a don, jinbanna ra a a se suxine yitaxun.” 28 Isirayila bõnsõn fu nun firinne nan ne ra. E babaa duban nan na ra a naxan fala e xa. A duba birin xa, birin nun a duba. 29 Na xanbi, a yi a jungu a diine ma, a naxa, “N fa sigama nen laxira yi. N na faxa, ε n maluxun n baba yireni, gaburun naxan Eferon Xiti kaana xεen ma, 30 Makipelaa xεen faranna ra, Mamire fema, Kanan bõxõni. Iburahima na xεen saraxi Eferon Xiti kaan nan ma alogo na xa findi a muxu maluxunden na. 31 Iburahima maluxunxi menna nin, e nun a jaxanla Saran. Isiyaga fan maluxunxi menni e nun a jaxanla Rebeka. N tan fan Leya maluxunxi menni. 32 Na xεen nun na faran yinla naxan na yi, e saraxi Xitine nan ma.” 33 Yaxuba to yelin yamarine fiye a diine ma, a yi a sa saden ma. A yi faxa, a siga laxira yi.

50 Yusufu yi a yiin bira a baba kõε, a a sunbu, a wuga. 2 Na xanbi Yusufu yi yamarin fi seribane ma a e xa senna raso a baba fatini alogo a nama kun. E yi na liga Isirayila ra 3 xii tonge naanin e

namunna kiini. Misiran kaane yi a saya feen liga xii tonge solofere bun. **4** Saya feen to ba a ra, Yusufu yi a fala Misiran Mangana yamaan xa, a naxa, “Xa n nœ maxandini ito sɔtɔdeni ε sabun na, n bata ε maxandi ε n ma falan nadangu Misiran Mangan ma. **5** N baba n nakɔɔ nœn, a yi a fala, a naxa, ‘N fa faxama nœn. I n maluxunma gaburun nan na n naxan gexi Kanan bɔxɔni.’ N waxi siga feni n xa sa n baba maluxun. Na waxatini n fama.” **6** Misiran Mangan yi a yabi, a naxa, “Siga, i sa i baba maluxun alo a i rakɔɔxi kii naxan yi.” **7** Yusufu yi siga a baba maluxundeni e nun Misiran Mangan bundɔxɔne nun Misiran kuntigine **8** nun Yusufu a denbayaan nun a fafaxakedenne nun a babaa denbayana. Dii jɔrœne nun xuruseene gbansan yi lu Gosen bɔxɔni. **9** Yusufu nun wontorone nun e ragi muxune birin yi siga. Na yamaan yi gbo han! **10** E to Atadi lonna yiren li, Yuruden xuden kidi ma, e yi wuga gbeen ti e yi saya feene raba sɔxɔleni. Yusufu yi sunu a baba jan feen na han xii solofere. **11** Kanan kaane yi na saya feen to naxan ligaxi Atadi lonna ma. E yi a fala, e naxa, “Misiran kaane saya fe gbeen nan ligama.” Nanara, e yi na yiren xili sa “Misiran Saya Fena” Yuruden baan kidi ma. **12** Yaxuba feen naxan yamari a diine ma, e yi na liga. **13** A diine yi a xali Kanan bɔxɔni, e sa a maluxun Makipelaa xœen faran yinla ra, Iburahima xœen naxan sara Eferon Xiti kaan ma alogo na xa findi muxu maluxunden na Mamire dœxɔn ma. **14** E to yelin a baba maluxunjœ, Yusufu nun a tadane nun muxun naxanye birin siga a matideni a baba maluxundeni, ne yi xœte Misiran bɔxɔn ma. **15** Yusufu tadane to a to e baba bata faxa, e yi a fala, e naxa, “Xa Yusufu fa keli en xili ma, en fe jaxin naxan birin ligaxi a ra, a a gbeen jɔxɔma nœn en na.” **16** Na waxatini e yi siga a faladeni Yusufu xa, e naxa, “I baba yamarini ito nan fi nxu ma benun a xa faxa, **17** a naxa, ‘E ito fala Yusufu xa: N bata i maxandi, dija i tadane gbalo feen ma e nun e hakœna, bayo e bata fe jaxin liga i ra. N bata i maxandi, iki nxu tan i fafe a Ala a walikene hakœne mafelu.’” E to na falane ti Yusufu xa, a yi wuga. **18** A tadane yi bira a bun ma, e a fala, e naxa, “Nxu tan ni i ra i ya konyine.” **19** Yusufu yi a fala e xa, a naxa, “Hali ε nama gaxu. N tan xa mi Ala ra. **20** E lanxi a ma nœn ε xa fe jaxin liga n na, koni Ala yi a maxœte fe fajin na alogo feene xa rakamali, nii wuyaxin yi ratanga. **21** Iki hali ε mi gaxu. N na ε makoon birin fanma nœn e nun ε diine.” A fala kendene yi e bɔjœn sa. **22** Yusufu yi dɔxɔ

Misiran yi, a tan nun a denbayana. A yi jœœ kœme jœœ fu sɔtɔ siimayaan na. **23** Yusufu Efirami a diine to nœn. A yi a yixœtœn naaninden to. Manase a dii Makiri a diine, ne birin yi sa a sanna fari e bari waxatin naxan yi. **24** Yusufu yi a fala a tadane xa, a naxa, “N fan fa faxama nœn, koni Ala ε malima nœn yati! A fama nœn ε tongodeni Misiran yi, a ε xali na bɔxɔni a denaxan layirin tongo Iburahima nun Isiyaga nun Yaxuba xa.” **25** Yusufu yi Isirayila a diine rakɔɔ, a a fala, a naxa, “Ala ε malima nœn yati! Na waxatini, ε nœma keœ be, ε n xœnne xali.” **26** Yusufu faxa a jœœ kœme jœœ fuun nan ma. E yi a senna raso a fatini alogo a nama kun, e yi a binbin sa gœme kankiraan kui Misiran yamanani.

Xoroyana

1 Isirayilaa diin naxanye fa Yaxuba foxo ra Misiran yi, ne xinle ni itoe ra e nun e denbayane: **2** Ruben nun Simeyon nun Lewi nun Yuda **3** nun Isakari nun Sabulon nun Bunyamin **4** nun Dan nun Nafatali nun Gadi e nun Aseri. **5** Muxu tonge solofere nan mini Yaxuba yi. Yusufu tan yi Misiran yi nun. **6** Yusufu yi faxa, e nun a ngaxakedenne nun na waxatin muxune birin. **7** Isirayilaa diine yi diine bari, e wuya ayi, e yi yamanan nafe. **8** Manga nenena nde yi doxo Misiran yi, naxan mi yi Yusufu a fe kolon. **9** A yi a fala a yamaan xa, a naxa, “E a mato, Isirayila yamaan wuyama ayi, e senben gboma ayi en xa. **10** En xa a liga xaxinla ra, alogo e nama wuya jaxi ra, alogo xa yengen keli, e nama sa en yaxune fari, e yi en yenge, e e gi yamanani.” **11** Nayi, e yi walike kuntigine doxo e xunna, e xa e xunna kala wanla toron bun ma. E Pitomi nun Ramisesi taane ti, alogo e xa findi se ramaradene ra Misiran mangan xa. **12** Koni e nema e jaxankatama, e wuyama ayi, e gbo ayi. Nayi, Misiran kaane yi gaxu Isirayila bonsonne yee ra, **13** e yi e jaxankata wanle yi. **14** E yi e xunna kala konyiya wanle ra boro yibodonna nun bitikidi bonbona. **15** Misiran Mangan yi falan ti Sifira nun Puwa xa, Heburune dii rasuxune, **16** a naxa, “E na Heburu jaxanle mali dii barideni, xa xemen nan a ra, e xa a faxa. Xa jaxanla nan a ra, e yi a lu a nii ra.” **17** Koni dii rasuxune yi gaxu Ala yee ra. Misiran Mangan naxan falaxi e xa, e mi tin na lige, e yi dii xemene lu e nii ra. **18** Misiran Mangan yi dii rasuxune xili, a yi a fala e xa, a naxa, “Nanfera e ito ligaxi, e yi dii xemene lu e nii ra?” **19** Dii rasuxune yi Misiran mangan yabi, e naxa, “Heburu jaxanle mi liga alo Misiran kaane, e yixodoxo, e diin barima nen benun dii rasuxune xa fa.” **20** Ala yi hinan dii rasuxune ra, yamaan yi wuya ayi, a gbo ayi. **21** Amasoto dii rasuxune gaxu nen Ala yee ra, Ala yi e denbayane rawuya ayi. **22** Nayi, Misiran mangan yi yamarini ito fi a yamaan birin ma: Xemen naxan birin barima, e e woli Nila baani. E jaxanle lu e nii ra.

2 Xemena nde yi Lewi bonsinni, na yi Lewi bonsinna nde tongo a jaxanla ra. **2** Na yi fudikan, a yi dii xemene bari. A to a to, a diin tofan, a yi a luxun kike saxan. **3** A mi yi fa noe a luxunje, a yi tanbin deben tongo, a dolen so a ma, a yi a diin sa a kui, a yi sa a doxo Nila baa igen xun ma gbalan xore ra. **4** Diin tadan

jaxalanmaan yi sa ti wulani, a lu diin matoe alogo a xa a kolon feen naxan a sotoma. **5** Misiran mangana dii temen yi godo baani a maxadeni, a foxorabirane yi e masiga tima Nila baan de. A yi deben to gbalan xore ra, a yi a konyi gilen nasiga a tongodeni. **6** Misiran mangana dii temen yi a rabi, a yi a to a dii xemene nan yi a ra. A wugama. A yi kininkinin a ma. A yi a fala, a naxa, “Heburu kaane diina nde ni ito ra!” **7** Nayi, diin tadan jaxalanmaan yi a fala Misiran mangana dii temen xa, a naxa, “I waxi n xa sa dii ngana nde fen i xa Heburu jaxanle ye, alogo a xa xijen fi diini ito ma?” **8** Misiran mangana dii temen yi a yabi, a naxa, “Awa, siga.” Diin tada yi sa diina nga yeteen xili. **9** Misiran mangana dii temen yi a fala a xa, a naxa, “Diini ito xali, i xijen fi a ma n xa, n ni i saranna fiye.” Naxanla yi diin tongo, a xijen fi a ma. **10** Diin to gbo, a yi a xali Misiran mangana dii temen xon, a yi findi a diin na. A yi a xili sa, “Musa” bayo a naxa, “N na a tongoxi igen nan xun ma.” **11** Loxona nde, Musa bata yi koxo, a siga a ngaxakedenne fema, a yi e wali xodexen to. A yi Misiran kaana nde to Heburu kaana nde bonbe a ngaxakedenne ye. **12** A yi a yee rakojnin a rabilinni. A to a to muxu yo mi yi na, a yi Misiran kaan faxa. A yi a maluxun jemensinni. **13** Na xoton bode, a yi mini, a yi Heburu kaa firin to yenge. Yoo mi yi naxan xa, a a fala na xa, a naxa, “Nanfera i i lanfaan yengema?” **14** Na yi a yabi, a naxa, “Nde i findixi mangan nun kitisaan na nxu xun na? I mirixi n faxa feen nan ma, alo i Misiran kaan faxaxi kii naxan yi ba?” Musa yi gaxu, a naxa, “Muxune bata n ma faxa ti feen kolon!” **15** Misiran mangan to na feen me, a yi kata Musa faxa feen na. Koni Musa yi a gi mangan bun, a siga Midiyan yamanani, a sa a matabu xojinna dexon. **16** Dii teme solofere yi Midiyan saraxaraliin yii. Ne yi fa ige badeni, e yi goronne rafe alogo e xa sa e babaa xuruse kurune ramin. **17** Xuruse raba gbeteeye yi fa, ne yi e kedi. Nayi, Musa yi keli, a e xun mayenge, a yi igen fi e xuruseene ma. **18** E to xete e baba Reyuli konni, a yi e maxodin, a naxa, “Nanfera e xetexi sinma to?” **19** E yi a yabi, e naxa, “Misiran kaana nde nan nxu ratangaxi xuruse rabane ma, a yeteen yi igen ba nxu xa, a xuruseene ramin.” **20** A yi a fala a dii temene xa, a naxa, “A sa minen yi? Nanfera e xemene na luxi na yi? E sa a xili alogo a xa fa a dege.” **21** Musa yi tin, a xa lu na xemene konni. Na yi a dii Sefora fi Musa ma a jaxanla ra. **22** A dii xeme keden bari a xa, a yi a xili sa Gerisomi, bayo a naxa, “N bata findi xojnen

na yamana gbeteni.” 23 Waxati xunkuye to dangu, Misiran Mangan yi faxa. Isirayila bõnsõnne mɔn yi wugama konyiyaan bun ma, e yi gbelegbelema malina fe ra. E mawuga xuiin yi Ala li. 24 Ala yi e wuga xuiin me, a yi a xaxili ti a layirin na a naxan xidi Iburahima nun Isiyaga nun Yaxuba xa. 25 Ala yi Isirayila kaane mato, a a ɲɔxɔ lu e xɔn.

3 Musa yi findi a bitanna Midiyan saraxarali Yetiro a xuruse rabaan na. A yi xuruseene xali tonbon yiren xanbi ra, a fa Alaa geyaan ma, Horebe yi. 2 Alatala malekan yi mini a xa tɛɛn yiyani, fɔtɔndin tagi. Musa yi a mato, tɛɛn yi fɔtɔnni yiren birin yi, koni a mi yi a ganma mum! 3 Musa yi a fala, a naxa, “N xa siga menni alogo n xa kabanako feen mato, feen naxan a ligama fɔtɔndin mi ganma.” 4 Alatala to a to, a a sigama a yigbedeni, Ala yi a xili fɔtɔnni, a naxa, “Musa! Musa!” Musa yi a ratin, a naxa, “N tan ni i ra!” 5 Ala yi a fala, a naxa, “I nama i maso be ra, i ya sankidine ba i sanni, amasɔto i tixi denaxan yi, bɔxɔ sarɲanxin na a ra.” 6 A mɔn yi a fala, a naxa, “I benbane Ala nan n na, Iburahimaa Ala nun Isiyagaa Ala nun Yaxubaa Ala.” Musa yi a yetagin luxun, bayo a yi gaxuxi Ala to feen na. 7 Alatala yi a fala, a naxa, “N bata n ma yamana tɔrɔn to naxan Misiran yi. N bata e wuga xuiin me, e nun muxune e ɲaxankatama kii naxan yi, amasɔto n na e sɔxɔlɛne kolon. 8 Nayi, n bata godo alogo n xa e ba Misiran kaane yii. N yi e ba na yamanani, n yi e xali bɔxɔ fɔɲina nde yi naxan gbo, nɔnɔn nun kumin gbo bɔxɔn naxan yi, Kanan kaane dɔxi denaxan yi, Xitine nun Amorine nun Perisine nun Xiwine e nun Yebusune. 9 Iki Isirayila wuga xuiin bata n li, n bata a to Misiran kaane e tɔrɔn kii naxan yi. 10 Nanara, iki, siga! N bata i xe Firawona ma alogo i xa Isirayila bõnsõnne ramini Misiran yi, n ma yamana.” 11 Koni, Musa yi a fala Ala xa, a naxa, “Nde n tan na? N xa siga Firawona fema di, alogo n xa Isirayila bõnsõnne ramini Misiran yi?” 12 Ala yi a fala, a naxa, “N luma nen i xɔn. Ito findima nen taxamasenna ra alogo i xa a kolon, a n tan nan i rasigaxi. I na yamaan namini Misiran yi, e fama n batudeni geyani ito nan fari.” 13 Musa yi a fala Ala xa, a naxa, “Awa, n sigɛ Isirayila kaane fema, koni n na a fale e xa, n naxa, ‘E benbane Ala nan n nafaxi e fema,’ xa e n maxɔdin fa fala, ‘A xili di?’ n na e yabima di na yi?” 14 Ala yi a fala Musa xa, a naxa, “N tan na a ra, Ala naxan na yi. I xa Isirayila kaane

yabi na kii nin, i naxa, ‘Naxan xili “N Na Yi,” na nan n nafaxi e fema.”” 15 Ala mɔn yi a fala Musa xa, a naxa, “A fala Isirayila kaane xa, a n tan, Alatala, e benbane Ala, e nun Iburahimaa Ala, e nun Isiyagaa Ala e nun Yaxubaa Ala, n nan i rafaxi e fema. N xinla ni ito ra habadan! E n xili bama ikii nin waxati famatɔne birin yi. 16 Siga, i sa Isirayila fonne malan, i yi a fala e xa, a n tan, Alatala, e benbane Ala, Iburahimaa Ala nun Isiyagaa Ala nun Yaxubaa Ala, n tan bata mini i xa. N naxa, ‘N bata n ɲɔxɔ lu e xɔn yati! N bata a to e naxan ligaxi e ra Misiran yi. 17 N bata a ragidi, n na e ramini nɛn Misiran yi, e tɔrɔma denaxan yi. N yi e xali Kanan kaane bɔxɔni, Xitine nun Amorine nun Perisine nun Xiwine e nun Yebusune. Bɔxɔn nan na ra nɔnɔn nun kumin gbo denaxan yi.’ 18 E i xuiin namema nen. Nayi, e nun Isirayila fonne sigama nen Misiran Mangan fema, e yi a fala a xa, e naxa, ‘Alatala, Heburu kaane Ala, na bata mini nxu xa. Tin, nxu xa xii saxan siga ti tonbonni, alogo nxu xa saraxane ba Alatala xa, nxɔ Ala.’ 19 N na a kolon Misiran Mangan mi tinɲe e yi siga, fɔ senbemaan na a karahan. 20 Nanara, n na n yiini bandunma nen, n Misiran yamanan tɔrɔ kabanakone ra n naxanye ligama e ra. Na xanbi ra, a tinma nen e yi siga. 21 N na a ligama nen e yi rafan Misiran kaane ma alogo e yii genla nama siga. 22 Isirayila ɲaxanle birin e dɔxɔ bode Misiran kaane maxɔdinma nen e nun Misiran ɲaxanla naxanye banxin kui a e xa gbeti nun xema muranne so e yii, e nun dugine, e naxanye ragodoma e diine ma. Nayi, e Misiran kaane yii gelima nen.”

4 Musa yi a yabi, a naxa, “Waxatina nde, e mi lama n na, e mi n xuiin suxuma. E a falama n xa nen, e naxa, ‘Alatala mi minixi i xa.”” 2 Alatala yi a fala a xa, a naxa, “Nanse i yii?” A yi a yabi, a naxa, “Dunganna.” 3 Ala yi a fala, a naxa, “A bira bɔxɔni.” A yi a bira bɔxɔni, a yi findi sapin na. Musa yi a gi a bun. 4 Alatala yi a fala Musa xa, a naxa, “I yiini bandun, i yi a suxu a xunla ma.” A yi a yiini bandun, a yi a suxu a xunla ma. A mɔn yi findi dunganna ra a yii. 5 Alatala yi a fala, a naxa, “I na nan ligama, alogo e xa la a ra a Alatala e benbane Ala bata mini i xa Iburahimaa Ala nun Isiyagaa Ala e nun Yaxubaa Ala.” 6 Alatala mɔn yi a fala, a naxa, “I yiin naso i ya domain bun.” A yi a yiin naso a domain bun, a mɔn yi a ba na. A to a ba, a yi a to fure ɲaxin bata mini a yiin ma, a yi fixaxi alo balanbalan kesena. 7 Ala yi a fala, a naxa, “I

møn xa i yiin naso i ya domaan bun.” A yi a yiin naso a domaan bun. A to a ba, a yiin mōn yi xete a kiini. **8** Ala yi a fala, a naxa, “Xa e mi la i ra, e mi i xuiin name taxamaseri singena fe ra, e lama nen taxamaseri firinden na. **9** Xa e mi la taxamaseri firinne ra, e mi i xuiin name, i igen sege Nila baani, i yi a bōxōn. I igen naxan tongoma Nila baani, na findima wunla nan na bōxōn ma.” **10** Musa yi a fala Alatala xa, a naxa, “Marigina, n mi de bolon. N mi yi de bolon benun i xa falan ti n xa, hali iki n deen mi falan tima ki fajni. N mi de mafura falan tiye muxune xa.” **11** Alatala yi a fala a xa, a naxa, “Nde muxun deen nafalaxi? Nde muxun findima bobon na, hanma tuli xōrina? Nde a findima ye kanna ra, hanma danxutōna? N tan Alatala mi a ra ba? **12** Nayi, siga, n na i malima nen fala tideni. I naxan falama, n ni xaran na ma.” **13** Musa yi a fala, a naxa, “Marigina, i muxu gbete rasiga.” **14** Nayi, Alatala yi xolo Musa ma han! A yi a fala, a naxa, “I tada mi na ba, Haruna, Lewi bōnsōnna muxuna? N na a kolon, a fatan falan tiye. A tan yeteen kira yi, a fama i ralandeni. A na i to, a sewama nen. **15** I falan tima nen a xa, a fan yi a rali yamaan ma. N tan e firinna birin malima nen falatideni. E lan e xa naxan liga, n yi e xaran na ma. **16** A i ya falan nalima nen yamaan ma. A tan yi findi i deen na, i tan yi lu Ala funfuni a tan xa. **17** Koni dunganni ito suxu i yii, alogo i xa kabanako feene liga a xōn.” **18** Musa yi xete Yetiro fema, a bitanna, a yi a fala a xa, a naxa, “A lu n xa siga ngaxakedenne fema naxanye Misiran yi, alogo n xa a to xa e mōn e nii ra.” Yetiro yi a fala Musa xa, a naxa, “Siga bōne xunbenli.” **19** Alatala yi a fala Musa xa Midiyan yi, a naxa, “Siga, xete Misiran yi, amasoto naxanye birin yi wama i faxes feni, e bata faxes.” **20** Musa yi a naxanla nun a diine rate sofanle fari, a xete Misiran yamanani. Alaa dunganna yi suxi a yii. **21** Alatala yi a fala Musa xa, a naxa, “I na xete Misiran yi, n kabanako feen naxanye birin soxi i yii, i xa e liga Firawona yetagi. Koni, n tan Firawona bōneni xōdōxōma nen, a mi tinma yamaan yi siga mume! **22** I yi a fala Firawona xa, i naxa, ‘Alatala ito nan falaxi, a naxa: N ma diin nan Isirayila bōnsōnna ra, n ma dii singena. **23** N na a falama i xa, n ma diine yiiba, e xa siga, alogo e xa sa n batu. Xa i tondi, n na i ya dii singen faxama nen.” **24** E yi sigatini, e yi yigiya yirena nde yi. Alatala yi fa Musa ralan. A yi wama a faxes feni. **25** Sefora yi gēme xēnxēn tongo, a yi a diin banxulan, a yi a kidin din Musa sanna ra, a naxa,

“Wunla ito bata i makantan, n ma xēmēna!” **26** Nayi, Ala yi a lu na. A a fala na banxulan feen nan ma, fa fala “Wunla ito bata i makantan, n ma xēmēna.” **27** Alatala yi a fala Haruna xa, a naxa, “Siga tonbonni Musa ralandeni.” Haruna yi siga, a yi naralan Musa ra Alaa geyaan ma, a yi a sunbu. **28** Alatala Musa xexi falan naxan birin nalideni, a na birin ma fe fala Haruna xa, e nun kabanako feen naxanye yi yamarixi. **29** Musa nun Haruna yi siga, e yi Isirayila fonne birin malan. **30** Alatala falan naxan ti Musa xa Haruna yi na birin yeba, a yi kabanakone liga yamaan yetagi. **31** Yamaan yi la a ra. E to a me a Alatala bata a jōxō lu Isirayila kaane xōn, a bata yi e tōrōn to, e yi e xinbi sin, e Ala batu.

5 Na xanbi ra, Musa nun Haruna yi siga Firawona fema, e a fala a xa, e naxa, “Alatala, Isirayila Ala ito nan falaxi, a naxa, ‘N ma yamaan yiiba, e xa siga, alogo e xa sa sanla raba n batu xinla ma tonbonni.’” **2** Firawona yi e yabi, a naxa, “Nde Alatala ra, n naxan xui suxuma, n yi Isirayila yamaan lu e siga? N mi Alatala kolon. N mi Isirayila yamaan yiibe e siga mume!” **3** E yi a fala, e naxa, “Heburune Ala bata mini nxu xa. Tin nxu xa xii saxan siga ti tonbonni. Nxu xa saraxane ba Alatala nxō Ala xa, alogo a nama nxu faxes furen na hanma silanfanna ra.” **4** Misiran Mangan yi a fala e xa, a naxa, “Musa nun Haruna, nanfera e yamaan bama e wanla ra? E siga e wanle ra! **5** Iki yamani ito bata gbo ayi yamanani, e a wanli kalama a mal!” **6** Na lōxōn yeteni Firawona yi yamarini ito fi konyi rawanle nun kuntigine ma, a naxa, **7** “E nama fa sexen so yamaan yii alo a fōlōni e yi bitikidin bōnbo, koni e tan yeteen xa siga sexe fendeni. **8** E mōn yi bitikidin xasabin naxan bōnbōma a fōlōni, e nama tin e nde ba na ra. Bayo salantenne nan e ra, nanara e sōnxōma, e naxa, ‘Tin, nxu xa sa saraxane ba nxō Ala xa!’ **9** Wanla xa fari sa muxuni itoe yii, alogo e xa lu wale. Nayi, e mi fa wule falani itoe xuiin namēma.” **10** Konyi rawanle nun kuntigine yi a fala yamaan xa, e naxa, “Firawona naxa, ‘Nxu mi fa sexe soma e yii. **11** E yeteen xa sa sexen fen e a tōe denaxan yi, koni sese mi bama e wanla ra.’” **12** Yamaan yi xuya ayi Misiran yamanan birin yi se gbaxa fendeni naxan se sexen jōxōni. **13** Konyi rawanle yi gbetenxi e ra, e naxa, “E xa e soge keden wanla rānan, alo e yi a ligama kii naxan yi nxu yi fama sexen na waxatin naxan yi.” **14** Firawona konyi rawanle yi Isirayila kuntigine bōnbo, e

naxanye dæxi, e naxa, “Nanfera ε mi bitikidin xasabin bõnbõxi xoro nun to yi, alo a fõlõni?” **15** Isirayila kuntigine yi sa e mawuga Firawona xa, e a fala a xa, e naxa, “Nanfera i ya walikene suxuma iki? **16** E mi fa sexen soma i ya walikene yii, koni e a falama nxu xa, e naxa, ‘E bitikidine bõnbõl’ Muxune nxu tan bulanma i ya walikene, anu ε muxune nan kalan tima.” **17** Firawona yi e yabi, a naxa, “Salayana! Salantenne nan ε ra! Nanara, ε a falama, ‘Tin, nxu xa sa saraxane ba Alatala xa!’ **18** Awa iki, ε sa wali, e mi fa sexe soma ε yii, anu se mi bama bitikidi xasabi falaxin na.” **19** Isirayila kuntigine yi a kolon nayi, a e tõrõma nen, e to a me fa fala, “E mi sese bama ε soge keden bitikidin xasabin na.” **20** E minimatõõn Firawona konni, e yi naralan Musa nun Haruna ra naxanye yi e mamema. **21** E yi a fala e xa, e naxa, “Alatala xa ε kewanle mato, a ε makiti! E bata nxu rapaxu Firawona ma e nun a kuntigine alo se kunxin xirina. E bata silanfanna so e yii e xa nxu faxa.” **22** Musa yi xete Alatala fema, a yi a fala a xa, a naxa, “Marigina, nanfera i fe jaxin ligaxi yamani ito ra? Nanfera i n nafaxi? **23** Xabu n siga Firawona fema fala tideni i xinla ra, a yamani ito tõrõma. I munma i ya yamaan xunba, han to!”

6 Alatala yi a fala Musa xa, a naxa, “I ya a toma nen sõnõn n naxan ligama Firawona ra. N na a karahan, a e yibama nen alogo e xa siga. N na a karahan, a e kedima nen a yamanani.” **2** Ala mõn yi falan ti Musa xa, a naxa, “Alatala nan n tan na. **3** N mini nen Iburahima nun Yaxuba nun Isiyaga xa, n yi n xinla falama e xa nen, n naxa, ‘Ala Senbe Kanna,’ koni n mi yi n xinla falama e xa, a ‘Alatala.’ **4** N mõn yi layirin xidi nxu tagi, alogo n xa Kanan yamanan so e yii, e yi xõjeyani denaxan yi. **5** N bata Isirayila kaane wuga xuiin me, Misiran kaane naxanye suxi konyiyani, n bata n xaxili lu n ma layirin xõn ma. **6** Nanara, a fala Isirayila kaane xa, fa fala, ‘Alatala nan n tan na, n na ε ramini n n Misiran kaane yamarin bun. N na ε xõrõyama nen e konyiyaan ma, n yi ε xunba n senbe gbeen i jaxankata magaxuxine xõn Misiran kaane xili ma. **7** N na ε findima nen n ma yamaan na. N findi ε Ala ra, ε yi a kolon a Alatala nan n tan na, ε Ala, naxan ε ramini Misiran kaane yamarin bun ma. **8** N na ε xalima nen na bõxõni, n yi a so ε yii ε gbeen na, n na n kõlõ bõxõn naxan ma fe ra, a n na a soma nen Iburahima nun Isiyaga nun Yaxuba yii, n tan Alatala.” **9** Musa yi na falan nali Isirayila

kaane ma, koni tõrõn nun konyiya xõdexen mi tin e Musa xuiin name. **10** Alatala yi a fala Musa xa, a naxa, **11** “Siga, i sa falan ti Firawona xa, Misiran mangana, alogo a xa Isirayila kaane bepin, e mini a yamanani.” **12** Musa yi Alatala yabi, a naxa, “Xa Isirayila kaane mi n xuiin namexi, Firawona n xuiin namema di, n tan naxan mi de bolon?” **13** Alatala yi falan ti Musa nun Haruna xa, a yi yamarine so e yii Isirayila kaane fe yi e nun Firawona fe yi, Misiran mangana, alogo e xa Isirayila kaane ramini Misiran yamanani. **14** Isirayila denbaya kanne xinle ni itoe ra: Isirayilaa dii singena Ruben, a tan ma diine ni i ra: Xanõki, Palu, Xesirõn e nun Karimi. Ne findixi Ruben xabila naaninne benbane nan na. **15** Simeyõn ma diine ni i ra: Yemuyeli, Yamin, Ohadi, Yakini, Soxara, e nun Kanan kaa gilena dii xeme Sayuli. Ne findixi Simeyõn xabila senninne benbane nan na. **16** Lewi a diine xinle ni itoe ra e nun e yixetene: Gerisõn, Kehati e nun Merari. Lewi jee keme tonge saxan e nun solofere soto nen siimayaan na. **17** Gerisõn ma diine yi findi xabila firin benbane ra: Libini nun Simeyi. **18** Kehati a diine ni i ra: Amirama, Yisehari, Xebiron e nun Yusiyele. Kehati jee keme jee tonge saxan e nun saxan soto nen siimayaan na. **19** Merari a diine ni i ra: Maxali nun Musi. Lewi xabilane benbane nan ne ra mayixete yeen ma. **20** Amirama yi a baba magile Yokebedi tongo a jaxanla ra, a yi Haruna nun Musa bari a xa. Amirama yi jee keme tonge saxan e nun saxan soto siimayaan na. **21** Yisehari a diine ni i ra: Kora, Nefegi e nun Sikiri. **22** Yusiyele a diine ni i ra: Mikayeli, Elisafan e nun Sitiri. **23** Haruna yi Aminadabo a dii teme Eliseba tongo a jaxanla ra. Naxason magilen nan yi Eliseba ra. A yi Nadaba nun Abihu nun Eleyasari nun Itamara bari a xa. **24** Kora diine ni i ra: Asiri, Elikana e nun Abiyasafa. Kora xabila saxanne benbane nan ne ra. **25** Harunaa dii Eleyasari yi Putiyeli a dii temen tongo a jaxanla ra, a yi Finexasi bari a xa. Lewi bõsõnna denbaya xunne nan ne ra, e xabila yeen ma. **26** E tan ni i ra Haruna nun Musa, Alatala a fala ne nan xa, a naxa, “E Isirayila kaane ganle ramini Misiran yi.” **27** E tan nan falan ti Firawona xa, Misiran Mangana, alogo e xa Isirayila kaane ramini Misiran yi. Na Musa nun Haruna nan itoe ra. **28** Alatala falan ti nen Musa xa Misiran yamanani, **29** a naxa, “N tan nan Alatala ra. A fala Firawona xa, Misiran Mangana, n naxan birin falama i xa.” **30** Koni Musa yi a fala Alatala xa, a naxa,

“Bayo n deen mi fatan fala fajine tiye a xa, Firawona n xuiin namema di?”

7 Alatala yi a fala Musa xa, a naxa, “A mato, n ni i findima nen Ala ra Firawona xa, i tada Haruna luma nen alo i ya nabina. **2** N na i yamari naxan na, i na fala, i tada Haruna yi falan ti Firawona xa, alogo a xa tin Isirayila kaane yi mini a yamanani. **3** Koni, n tan Firawona bojen i xodoxoma nen, n yi n ma taxamasenne nun kabanakone rawuya ayi Misiran yamanani. **4** Firawona mi e xuiin namema mumel! N na n senben yitama nen Misiran na jaxankata magaxuxine yi, n yi n ma ganla ramini Misiran yamanani, Isirayila, n ma yamana. **5** Misiran kaane a kolonma nen a n tan nan Alatala ra, n na n yiini bandun Misiran kaane xili ma, n yi Isirayila kaane ramini na yi.” **6** Alatala naxan yamari, Musa nun Haruna yi na birin liga. **7** Musa siimayaan yi jee tonge solomasexe, Haruna siimayaan yi jee tonge solomasexe e nun saxon, e falan ti Firawona xa waxatin naxan yi. **8** Alatala yi a fala Musa nun Haruna xa, a naxa, **9** “Xa Firawona a fala e xa, a naxa, ‘E kabanako fena nde liga!’ Nayi, i yi a fala Haruna xa, i naxa, ‘I ya dunganna tongo, i yi a bira Firawona yetagi.’ A findima nen sajin na.” **10** Musa nun Haruna yi siga Firawona fema, Alatala yamarin naxan soxi e yii, e na liga. Haruna yi a dunganna bira Firawona nun a kuntigine yetagi, a findi sajin na. **11** Koni Firawona fan yi fekolonne nun seri kanne nun Misiran woyimene xili, ne fan yi na fe sifan liga e dalili feene xon. **12** E birin yi e dunganne bira, e findi sajin ra. Koni Harunaa dunganna yi e dunganne gerun. **13** Firawona bojen yi xodoxo, a mi Musa nun Harunaa falan name alo Alatala a falaxi kii naxan yi. **14** Alatala yi a fala Musa xa, a naxa, “Firawona bojen i xodoxoxi, a tondixi yamaan bejindeni e siga. **15** Siga Firawona fema xotanni. A na siga Nila baan de, i siga a ralandeni. Dunganna naxan maxete sajin na i na suxu i yii. **16** I xa a fala Firawona xa, i naxa, ‘Alatala, Heburune Ala, na bata n nafa i fema a n xa a fala, a i xa a yamaan yiiba, e xa siga, alogo e xa sa a batu tonbonni koni han to i munma i tuli mati. **17** Alatala ito nan falaxi, a naxa, ‘I fama a kolondeni n ma wanla nan xon a Alatala nan n tan na.’ Dunganna naxan n yii, n Nila baa igen garinma nen na ra, a maxete wunla ra. **18** Yexen naxanye Nila baani, ne faxama nen. Igeni loxoma nen. Misiran kaane mi fa noe a igen minje.”

19 Alatala yi a fala Musa xa, a naxa, “A fala Haruna xa: i ya dunganna tongo, i yi i yiini bandun Misiran igene xun ma: Baane, xudene, darane, e nun tigine birin. E findima nen wunla ra. Wunla luma nen Misiran yamanan yiren birin yi, hali ige sase wudi daxine nun fejene kui.” **20** Alatala yamarin naxan fi Musa nun Haruna ma, e yi na liga. Haruna yi a dunganni te Nila baan xun ma, a yi igen garin Firawona nun a kuntigine yetagi. Igen birin yi maxete wunla ra. **21** Yexen naxanye yi Nila baani, ne yi faxa. Igen yi loxo han Misiran kaane mi yi fa noe baa igen minje. Wunla yi lu Misiran yamanan yiren birin yi. **22** Koni Misiran woyimene fan yi na fe sifane liga e dalili feene xon. Firawona bojen yi xodoxo, a mi Musa nun Haruna xuiin name alo Alatala a fala kii naxan yi. **23** Firawona yi xete, a siga a banxini, a mi a yengi lu na feene xon. **24** Misiran kaane birin yi yinle ge Nila baan dexonni alogo e xa e min, amasoto e mi yi noe baa igen minje. **25** Alatala yelin Nila baan finde wunla ra waxatin naxan yi, xii solofere yi dangu na xanbi ra.

8 Alatala yi a fala Musa xa, a naxa, “Siga Firawona fema, i yi a fala a xa, i naxa, ‘Alatala falani ito nan tixi, a naxa: N ma yamaan yiiba, a xa siga alogo e xa sa n batu. **2** Xa i tondi e bejinje, n na i ya yamanan birin jaxankatama nen, n xunjene radin a ma. **3** Nila baan nafema nen xunjene ra. E tema nen, e so i ya manga banxin kui, i xideni, i ya sadeni, i ya kuntigine banxine kui, i ya yamana banxine kui, i ya buru gandene yi, e nun i ya buru bonbodene kui. **4** Xunjene tema nen i tan nun i ya yamaan nun i ya kuntigine ma.” **5** Alatala yi a fala Musa xa, a naxa, “A fala Haruna xa, i naxa, ‘I ya dunganni bandun baane nun xudene nun darane xun ma, i yi xunjene rate Misiran yamanani.’” **6** Haruna yi a yiini bandun Misiran igene xun ma, xunjene yi te Misiran yamanan birin yi. **7** Koni Misiran woyimene fan yi na fe sifane liga e dalili feene xon. E fan yi xunjene rate Misiran yamanani. **8** Firawona yi Musa nun Haruna xili, a naxa, “E Alatala maxandi n xa alogo a xa xunjene masiga n na, e nun n ma yamaan na. N na i ya yamaan bejinje, e siga, alogo e xa sa saraxane ba Alatala xa.” **9** Musa yi a fala Firawona xa, a naxa, “Na binyen xa lu i tan xa, i yi a fala, n lan n xa maxandin ti e nun i ya kuntigine xa waxatin naxan yi, e nun i ya yamaan xa, alogo Ala xa xunjene masiga e nun e banxine ra. E yi siga Nila baa igeni.” **10** A yi yabin

ti, a naxa, “Tila.” Musa yi a fala, a naxa, “A ligama nen na kiini alogo i xa a kolon a muxu yo mi maliga Alatala ra, nxo Ala. 11 Xunɲene e masigama nen i ra e nun i ya banxine nun i ya kuntigine nun i ya yamana. E yi lu Nila baani.” 12 Musa nun Haruna yi mini Firawona fema. Musa yi a xuini te Alatala ma xunɲene fe ra, Ala naxanye rafa Firawona ma. 13 Musa yi naxan maxodinma, Alatala yi na liga. Xunɲene yi faxa banxine kui e nun tandene nun xene ma. 14 E yi e makɔ, e e sa e bode fari, yamanan xirin yi mini e fe ra. 15 Firawona to a to a feene bata mafisa, a bɔɲen mɔn yi xɔdɔxɔ. A mi Musa nun Haruna xuiin name, alo Alatala a falaxi kii naxan yi. 16 Alatala yi a fala Musa xa, a naxa, “A fala Haruna xa, i naxa, ‘I ya dunganni bandun, i bɔxɔni garin. Gbangbanna maxetema nen sosone ra Misiran yamanan birin yi.’” 17 E yi na liga. Haruna yi a dunganni bandun a yii, a bɔxɔn gbangbanni garin, sosone yi fa muxune nun subene xili ma. Bɔxɔn gbangbanna birin yi maxete sosone ra Misiran yamanan birin yi. 18 Koni, woyimene to kata e xa sosone ramini e dalili feene xɔn, e mi nɔ. Sosone yi muxune nun subene ma. 19 Woyimene yi a fala Firawona xa, e naxa, “Ala senben nan ito ra!” Koni Firawona bɔɲen yi xɔdɔxɔ, a mi a tuli mati Musa nun Haruna ra, alo Alatala a fala kii naxan yi. 20 Alatala yi a fala Musa xa, a naxa, “Keli xɔtɔn, i siga Firawona ralandeni. A sigama nen xude deni. I yi a fala a xa, i naxa, ‘Alatala falani ito nan tixi, a naxa: N ma yamaan beɲin, e xa siga alogo e xa sa n batu. 21 Xa i mi tin n ma yamaan yiibe e siga, n xenne rafama nen i tan nun i ya kuntigine nun i ya yamaan xili ma, e nun i ya banxine kui. Misiran kaane banxine rafema nen xenne ra, bɔxɔn yi rafe. 22 Koni na lɔxɔni, n Gosen yamanan luma nen a danna n ma yamaan denaxan yi. Xenne mi fama menni, alogo i xa a kolon a n tan Alatala walima yamanan ito yi. 23 N tagi rabaan luma nen n ma yamaan nun i ya yamaan tagi. Na kabanako fe taxamasenna ligama nen tila.’” 24 Alatala yi na liga. Xeri wuyaxi yi so Firawona banxini e nun a kuntigine banxine yi. Misiran yamanan birin yi kala xenne ra. 25 Firawona yi Musa nun Haruna xili, a naxa, “E siga, e sa saraxane ba e Ala xa yamanan ito yi.” 26 Musa yi a yabi, a naxa, “A mi lan a xa liga na ki. Amasɔto nxu saraxan naxanye bama Alatala xa, nxo Ala, ne finde fe haramuxin na Misiran kaane yee ra yi. Xa nxu saraxa haramuxin ba Misiran kaane yee xɔri, e mi nxu magolɔɲe ba? 27 Nxu xii saxan sigan nan

tima tonbonni, nxu yi saraxane ba Alatala xa, nxo Ala, alo a nxu yamari kii naxan yi.” 28 Firawona yi a fala, a naxa, “N na e yiibama nen alogo e xa siga, e yi saraxane ba Alatala xa, e Ala, tonbonni. Koni e nama e makuya. Awa, e xa Ala maxandi n xa.” 29 Musa yi a yabi, a naxa, “N kelima nen i fema, n na Alatala maxandi. Tila, xenne masigama nen Firawona nun a kuntigine nun a yamaan na. Koni Firawona nama fa yanfan ti, a tondi yamaan yiibe siga saraxane badeni Alatala xa.” 30 Musa yi keli Firawona fema, a yi Alatala maxandi. 31 Musa naxan maxodin, Alatala yi na liga. Xenne yi e masiga Firawona ra e nun a kuntigine nun a yamaan na. Keden mi lu. 32 Koni Firawona mɔn yi a bɔɲeni xɔdɔxɔ, a mi tin yamaan yiibe.

9 Alatala yi a fala Musa xa, a naxa, “Siga Firawona fema, i yi a fala a xa, i naxa, ‘Alatala, Heburune Ala ito nan falaxi, a naxa, “N ma yamaan yiiba, e xa siga, alogo e xa sa n batu.” 2 Xa i tondi e beɲinɲe e xa siga, xa i lu tondɛ, 3 Alatala fitina furen nafama nen i ya xuruseene ma naxanye xene ma, soone, sofanle, ɲɔgɔmɛne, ɲingene, yexene e nun siine. 4 Koni Alatala Isirayila xuruseene nun Misiran xuruseene tagi rabama nen, alogo Isirayila kaane gbeene sese nama faxa.” 5 Alatala bata yi waxatin sa, a naxa, “N na ligama nen yamanan ito yi tila.” 6 Na xɔtɔn bode Alatala yi na liga. Misiran kaane xuruseene birin yi faxa. Koni, Isirayila kaane xuruse keden mi faxa. 7 Firawona yi xerane rasiga, e fa a to a Isirayila xuruse yo mi faxaxi. Koni Firawona bɔɲen yi siga xɔdɔxe, a mi yamaan yiiba mume, e siga. 8 Alatala yi a fala Musa nun Haruna xa, a naxa, “E yiine rafe sulun teen xubeni, Musa xa a woli kore Firawona yetagi. 9 A xuyama ayi nen Misiran yamanan birin xun ma, a findi sete furen na Misiran yamanan muxune nun a subene birin ma.” 10 E yi sulun teen xuben tongo, e siga Firawona fema. Musa yi a woli kore, sete furen yi fa yamanan muxune nun a subene birin ma. 11 Koni woyimene mi yi nɔe tiye Musa yetagi, bayo setene yi e ma alo Misiran kaane birin. 12 Koni, Alatala yi Firawona bɔɲeni xɔdɔxɔ, a mi Musa nun Haruna xuiin name mume, alo Alatala naxan fala Musa xa. 13 Alatala yi a fala Musa xa, a naxa, “Keli xɔtɔn, i siga Firawona fema. I yi a fala a xa fa fala Alatala Heburune Ala ito nan falaxi, a naxa, ‘N ma yamaan yiiba, e xa siga alogo e xa sa n batu. 14 Xanam, n nan n ma fitina feene senbe soma nen i tan nun i ya kuntigine nun i

ya yamaan xili ma, alogo i xa a kolon a n jaxɔn mi na bɔxɔn fari. **15** Xa n yi n yiini bandun i ma nun, n yi fitina furen nasigama nen i ma nun, i tan nun i ya yamaan birin yi raxɔrima nen bɔxɔ xɔnna fari. **16** Koni n bata i lu i nii ra, alogo i xa n senben to, n xinla yi rali dunuɲa yiren birin yi. **17** Xa i mɔn n ma yamaan makankan, i mi tin e siga, **18** i yanyi tila n balabalan kesen nagodoma nen, naxan jaxɔn munma fa Misiran yi xabu a masege lɔxɔni han to. **19** Nayi, i ya xuruseene nun i yii seene birin naxanye xɛen ma, i xa ne ramara. Bayo balabalan kesen fama nen muxune nun subene birin ma naxanye xɛen ma. Naxanye mi rasoxi banxine yi, ne faxama nen.” **20** Firawona kuntigin naxanye gaxu Alatalaa falan yɛe ra, ne yi e konyine nun e xuruseene raso banxine kui. **21** Koni naxanye mi e yengi lu Alatalaa falan xɔn, ne yi e walikene nun e xuruseene lu xɛene ma. **22** Alatala yi a fala Musa xa, a naxa, “I yiini te kore, balabalan kesen xa godo Misiran yamanan yiren birin yi muxune nun subene ma, e nun siseene birin ma Misiran xɛene birin yi.” **23** Musa yi a dunganni te kore, Alatala yi galanna nun balabalan kesen nafa, kuye sarinna yi bɔxɔn li. Awa, Alatala yi balabalan kesen nafa Misiran yamanani. **24** Balabalan kesen yi fa, kuyen yi sarin, a senben yi gbo ayi, a jaxɔn munma yi fa Misiran yi xabu a findi yamanan na. **25** Balabalan kesene yi muxune nun subene birin magolɔn xɛene ma, a yi siseene birin kala, a wudine birin yi gira Misiran yamanan birin yi. **26** Gosen yamanani, Isirayila kaane yi denaxan yi, balabalan kese mi fa menni. **27** Firawona yi Musa nun Haruna xili, a naxa, “Iki, n bata yulubin liga, Alatala nan tinxin, n tan nun n ma yamaan sɔnna na a ra. **28** E Alatala maxandi, nxu bata wasa galanna nun balabalan kesen na. N na e yiibe e siga. E mi fa makankanma mumel!” **29** Musa yi a fala a xa, a naxa, “N na mini taani, n nan n yiine tiye Alatala xa, galanna nun balabalan kesen yi dan, alogo i xa a kolon a Alatala nan gbee bɔxɔn na. **30** Koni n na a kolon i tan nun i ya kuntigine, e mɔn mi gaxuma Marigina Alatala yɛe ra.” **31** Gesen nun fundenna nan kala, bayo fundenna yi sabatixi, gesen yi fugaxi. **32** Maala nun murutun mi kala bayo e mi a liin sinma. **33** Musa yi keli Firawona fema, a mini taani, a a yiine ti Alatala xa. Galanna nun balabalan kesen yi dan, tulen mi fa fa bɔxɔn fari. **34** Firawona to a to a tulen nun balabalan kesen nun galanna bata dan, a mɔn yi yulubin liga. A yi a bɔjɛni xɔdɔxɔ, e nun a kuntigine. **35** Firawona

bɔjɛn yi xɔdɔxɔ, a mi tin Isirayila kaane yi siga, alo Alatala a fala yamaan xa kii naxan yi fata Musa ra.

10 Alatala yi a fala Musa xa, a naxa, “Siga Firawona fema, amasɔto n na a bɔjɛn xɔdɔxɔma e nun a kuntigine, alogo n xa n ma kabanako feene liga e tagi, **2** alogo i xa a fala i ya diine nun mamandenne xa n Misiran kaane jaxankata kii naxan yi, n kabanako feene liga e tagi. E yi a kolon a Alatala nan n tan na.” **3** Musa nun Haruna yi siga Firawona fema, e yi a fala a xa, e naxa, “Alatala Heburune Ala ito nan falaxi, a naxa, ‘I tonde i magode n yetagi han waxatin mundun yi? N ma yamaan yiiba, e xa siga, alogo e xa sa n batu. **4** Xa i tondi n ma yamaan bejinɲe e xa siga, tila n tuguminne rafama nen i ya yamanan yiren birin yi. **5** E dɔxɔma nen bɔxɔn birin fari, bɔxɔn mi fa nɔe toɛ. Balabalan kesen naxan luxi e yii, e na nan donma hali wudin naxanye birin xɛene ma. **6** E i ya banxine rafema nen, e nun i ya kuntigine banxine, e nun Misiran kaane birin ma banxine. I fafane nun ne benbane munma a jaxɔn to xabu e dɔxɔ yamanani ito yi han to.” Musa yi siga, a keli Firawona fema. **7** Firawona kuntigine yi a fala a xa, e naxa, “Xɛmeni ito luye alo luti ratixina en yɛe ra han waxatin mundun yi? Muxuni itoe yiiba, e xa siga, e xa sa Alatala batu, e Ala. I mɔn mi a to Misiran kala feni?” **8** E yi Musa nun Haruna xili Firawona fema. A yi a fala, a naxa, “E siga Alatala batudeni, e Ala. Koni, nde sigama?” **9** Musa yi a yabi, a naxa, “Nxu nun nxɔ diine nun nxɔ fonne nan sigama, dii xɛmene nun dii tɛmɛne, xuruse xunxurine nun a xungbene, amasɔto nxu sa sanla nan nabama Alatalaa binyeni.” **10** Firawona yi a fala e xa, a naxa, “Xa n tin, e nun e diine yi siga, fɔ n xa n jɲungu e ma jɛ? Bayo e mi fa fama. E fe jɲaxin nan fɔxɔ ra yati! **11** En-en de! E tan xɛmene gbansanna xa siga, e Alatala batu, bayo e na nan maxɔdinxi.” E yi e kedi Firawona yetagi. **12** Alatala yi a fala Musa xa, a naxa, “I yiini bandun Misiran yamanan xun ma alogo tuguminne xa te Misiran yamanani, e yi siseene birin don xɛene ma, balabalan kesen naxanye birin luxi.” **13** Musa yi a dunganni bandun Misiran yamanan xun ma. Alatala yi foyen nafa na yanyin nun kɔɛɛn birin na keli sogeteden binni. Benun xɔtɔnni, foyen bata fa tuguminne ra. **14** Tuguminne yi te Misiran yamanan birin yi, e wara ayi yiren birin yi. A jaxɔn munma yi liga nun, a mɔn mi fa ligama sɔnɔn! **15** E yi lu bɔxɔn birin ma han e na yifɔrɔ. E siseene nun se bogine birin

don xεene ma, balabalan kesen naxanye lu. Ningi yo mi lu wudine nun siseene ma Misiran yamanan birin yi. **16** Firawona yi Musa nun Haruna xili mafuren! A yi a fala e xa, a naxa, “N bata yulubin liga Alatala ra, ε Ala, e nun ε tan. **17** Iki, ε mɔn xa n mafelu yulubini ito a fe ra, ε Alatala maxandi, ε Ala alogo a xa jaxankata faxa tiini ito masiga n na.” **18** Musa yi mini Firawona konni, a Alatala maxandi. **19** Alatala yi foye gbeen nafa keli sogegododen binni, naxan tuguminne xali, a e woli Gbala Baani, hali tugumin keden mi lu Misiran bɔxɔn ma. **20** Alatala yi Firawona bɔjɛn xɔdɔxɔ, a mi tin Isirayila kaane bejinjɛ. **21** Alatala yi a fala Musa xa, a naxa, “I yiini te kore, dimi gbeen xa sin Misiran yamanan birin yi, han muxune yεene yi rafɔrɔ ayi.” **22** Musa yi a yiini te kore, dimi gbeen yi so Misiran yamanan birin yi, xii saxan. **23** Muxu yo mi yi fa a bode toma, muxu yo mi yi kelima a konni na xii saxanna bun ma. Koni kenenna yi Isirayila kaane konne yi. **24** Firawona yi Musa xili, a yi a fala a xa, a naxa, “E siga ε Alatala batu. E diine xa siga ε fɔxɔ ra. Xuruseene nan tun luma be.” **25** Musa yi a yabi, a naxa, “Na mi a ra! Nxu naxan bama saraxan nun saraxa gan daxin na Alatala xa, nxɔ Ala, fɔ i xa na xuruseene so nxu yii. **26** Nxɔ xuruseene fan sigama nen, keden mi luun be, amasɔtɔ nxu makoon ne nan ma nxu nema Alatala batue, nxɔ Ala. Benun nxu xa so, nxu mi a kolon nxu naxan nawalima Alatala batudeni.” **27** Alatala yi Firawona bɔjɛn xɔdɔxɔ, a mi tin e bejinjɛ e yi siga. **28** Firawona yi a fala Musa xa, a naxa, “Mini n konni! I yete ratanga i fa feen ma n yetagi sɔnɔn! I na fa n yetagi lɔxɔn naxan yi, i faxama nen.” **29** Musa yi a yabi, a naxa, “I bata a fala! N mi fa fama i yetagi sɔnɔn!”

11 Awa, Alatala bata yi a fala Musa xa, a naxa, “N mɔn fitina fe keden nafama nen Firawona ma e nun Misiran yamananana. Na xanbi ra, a ε yilbama nen alogo ε xa keli be. A na tin fa, a yetena ε kedima nen be. **2** Falan ti yamaan xa alogo xemene nun jaxanle birin xa e dɔxɔ bodene xandi gbeti nun xema muranne yi.” **3** Alatala bata yi a liga a Isirayila yamaan yi rafan Misiran kaane ma. Firawona kuntigine nun a yamaan bata yi Musa yeteen binya Misiran yamanani. **4** Musa yi a fala Firawona xa, a naxa, “Alatala ito nan falaxi, a naxa, ‘Kɔe tagini, n danguma nen Misiran birin yi. **5** Dii singene birin faxama nen Misiran yamanani, keli Firawona dii singen ma naxan dɔxi

mangayani, han konyi gilena dii singen naxan seen dinma, e nun subene birin ma dii singene. **6** Wuga xui gbeen tema nen Misiran yamanan birin yi, a jɔxɔn munma yi liga nun, a mɔn mi fa ligama sɔnɔn. **7** Koni Isirayila kaane ye, hali baren mi wonwonjɛ muxun ma hanma suben ma.’ Nayi, ε a kolonma nen a Alatala Misiran nun Isirayila tagi rabaxi. **8** Nayi, i ya kuntigini itoe birin fama nen n fema, e xinbi sin n yetagi, e yi a fala, e naxa, ‘Siga, i tan nun yamaan naxan biraxi i fɔxɔ ra!’ Na xanbi ra, n sigama nen.” Musa xɔlɔxi gbeen yi keli Firawona fema. **9** Alatala yi a fala Musa xa, a naxa, “Firawona mi i xuiin namema, alogo n ma kabanako feene xa wuya ayi Misiran yamanani.” **10** Musa nun Haruna yi kabanakoni itoe birin liga Firawona yetagi, koni Alatala yi Firawona bɔjɛn xɔdɔxɔ a mi tin Isirayila kaane bejinjɛ e xa mini a yamanani.

12 Alatala yi a fala Musa nun Haruna xa Misiran yamanani, a naxa, **2** “Kikeni ito findima ε xa jɛɛn kike singen nan na. **3** E xa a fala Isirayila yamaan xa, a kiken i to xii fude lɔxɔni, denbaya kanna birin xa yεxεε dii keden tongo a denbayaan xa, denbaya yo denbaya yεxεε dii keden. **4** Denbayaan naxan muxuye mi wuya, e mi nɔe yεxεε dii kedenna janyɛ, e nun e dɔxɔ boden xa yεxεε diina nde yitaxun alogo yamaan naxan donjɛ, birin ma denbayaan xa na sɔtɔ. **5** E xa kontonna jɛε kedenna sugandi fe mi naxan na hanma kɔtɔna. **6** E xa a ramara han kiken i to xii fu nun naaninde lɔxɔni, Isirayila kaan birin xa a gbee xuruseen kɔe raxaba jinbanna ra. **7** E yi a wunla tongo, e yi a susan banxine dεene xun ma wudin ma e nun dεen wudi firinne ma e a donma banxin naxan kui. **8** Na kɔe yeteen na, e xa a suben gan, e yi a don e nun jɔxɔnde dε xɔlene nun burun natetarena. **9** E nama a suben don a xinden na hanma a jinxina, koni a xa gan e nun a xunna nun a sanne nun a kui seene. **10** E nama sese lu han xɔtɔnni. Xa nde lu, xɔtɔnni ε xa a donxen sa tɛɛni. **11** E xa a don ikiini: ε xa ε maxidi, ε yi ε sankidine so ε sanni, ε dunganna suxu ε yii, ε yi a don mafuren! Halagi Tiin Dangu Lɔxɔn Sanla na a ra Alatala xa. **12** Na kɔεen na, n danguma nen Misiran yamanani, n dii singene birin faxama nen, muxun nun subena. N Misiran kaane gbee alane birin jaxankatama nen. Alatala nan n tan na. **13** Wunla naxan banxin ma, na findima taxamasenna nan na ε xa. N na wunla to, n danguma nen ε xun ma. Fitina fe

mi e liye, n na Misiran yamanan naxankata waxatin naxan yi.” 14 “Nee yo jee sanli ito na feene rabirama e ma nen waxati famatone yi. E na sanla rabama nen Alatala xa alo habadan sariyana. 15 Xii soloferen bun ma, e buru ratetaren donma nen. Xii singen na a li, e buru rate seen bama nen e banxine kui. Amasoto naxan na seen don burun nate seen naxan yi, keli xii singen ma han xii soloferede loxoni, n na a kedima nen Isirayila yamaan ye. 16 Loxo singeni, e malan sarijanxin tima nen. E nde fan tima nen a xii soloferede loxoni. E nama wali yo ke loxoni itoe ma fo kudi soona yamaan xa, alogo e xa e dege. E noe na nan tun lige. 17 E xa Buru Ratetaren Sanla raba, amasoto n na e ganle raminixi Misiran yi na loxon yeteni. E xa na loxon sanla raba alo habadan sariyana e yixetene birin xa waxati famatone yi. 18 Nee kike singeni, e burun natetaren donma nen kiken xii fu nun naaninde loxon jinbanna ra, han xii moxojen nun kedende loxon jinbanna ra. 19 Buru rate seen mi luma e banxine kui xii solofere bun ma. Naxan na seen don buru rate seen naxan yi, na kedima nen Isirayila yamaan ye, xa a findi xojen na hanma Isirayila kaana. 20 E nama sese don buru rate seen naxan yi. E banxine yi, e buru ratetaren nan donma.” 21 Musa yi Isirayila fonne birin xili, a a fala e xa, a naxa, “E siga, e yexeen hanma siin tongo e denbayane xa, e a faxa Halagi Tiin Dangu Loxon Sanla fe ra. 22 Na xanbi ra, e hisopi wudi yiin tongo, e a sin wunli, e a susan deen xun ma wudin nun deen wudi firinne ma. E sese nama mini e banxine kui han xotanni. 23 Alatala na dangu yamanani Misiran kaane faxadeni, xa a wunla to deen xun ma nun a dexonne ma, Alatala danguma nen na banxin xun ma. A mi tinma halagi tiin yi so e banxini e faxadeni.” 24 “E yamarini itoe suxuma nen alo habadan sariyana e yete xa e nun e yixetene. 25 Alatala boxon naxan soma e yii, a naxan falaxi, e na so menni, e sanli ito raba. 26 E diine na e maxodin, e naxa, ‘Sariyani ito bunna nanse ra e tan xa?’ 27 E xa e yabi, e naxa, ‘Halagi Tiin Dangu Loxon Sanla saraxan na a ra Alatala xa, naxan dangu Isirayila kaane banxine xun ma Misiran yi. A to yi Misiran kaane faxama, a yi nxo banxine ratanga.’” Na xanbi ra, yamaan yi e xinbi sin, e Ala batu. 28 Isirayila kaane yi a liga alo Alatala Musa nun Haruna yamari kii naxan yi. 29 Ke tagini, Alatala yi dii singene birin faxa Misiran yi, keli Firawona dii singen ma naxan doxi mangayani han kasorasane dii singene kaso banxini, e nun subene dii singene. 30

Firawona nun a kuntigine birin yi keli koee na, e nun Misiran kaane birin. Wuga xui gbeen yi te Misiran yi, bayo faxan bata yi ti banxin birin yi. 31 Na koee yeteen na, Firawona yi Musa nun Haruna xili, a fala e xa, a naxa, “E keli, e mini n ma yamanani, e tan nun Isirayila kaane! E siga, e Alatala batu, alo e a falaxi kii naxan yi. 32 E xuruse xunxurine nun a xungbene tongo, alo e a falaxi kii naxan yi. E siga. E duba n fan xa.” 33 Misiran kaane yi Isirayila yamaan nagbengben, e yi e kedi yamanani mafuren, bayo e yi a falama nen, e naxa, “Nxu birin faxama.” 34 Isirayila yamaan yi e burun xali benun a xa gan, benun a rate seen xa sa. E buru bonbo seene mafilin e dugine yi, e e sa e ke ma, e siga a xalc. 35 Musa naxan fala, Isirayila kaane yi na liga, e yi Misiran kaane xandi gbetin nun xema muranne yi e nun dugine. 36 Alatala yi a liga Isirayila yamaan yi rafan Misiran kaane ma, e naxan maxodin e na so e yii. E yi Misiran kaane yii geli. 37 Isirayila xeme wuli keme sennin yi keli e sanna ma Ramisesi taani, siga Sukoti taani, ba naxanle nun diidine ra. 38 Siya gbete wuyaxi fan yi siga e foxo ra. Xuruse kuru gbeen yi e yii a xunxurin nun a xungbene. 39 E yi burudine gan buru ratese mi yi naxanye yi, e keli naxan na Misiran yi, bayo e kedi nen Misiran yi. E mi feren soto, e fandane tongo e yete xa. 40 Isirayila kaane jee keme naanin jee tonge saxan nan ti Misiran yi. 41 Nee keme naanin jee tonge saxanden to a li, na loxo yeteni, Alatala yamaan birin yi mini Misiran yamanani. 42 Koeni ito ra waxati famatone yi, Isirayila kaane birin xa xi Alatala batu, bayo a e raminixi Misiran yamanani koee nan na. 43 Alatala yi a fala Musa nun Haruna xa, a naxa, “Tonne ni i ra Halagi Tiin Dangu Loxon Sanla fe yi: Xoje yo nama a don. 44 Konyin naxan saraxi, i na na banxulan, e nun na a donje nen. 45 I ya walikeen naxan sare fixi hanma xojena, ne nama a don. 46 A donma banxi kedenna nan kui. E nama a suben namini banxini. E nama a xori yo gira. 47 Isirayila yamaan birin xa sanli ito liga. 48 Xa xojena nde i konni naxan wama Halagi Tiin Dangu Loxon Sanla raba feni Alatala xa, a denbayaan xemene birin xa banxulan. Nayi, a noe a lige nen alo Isirayila kaana. Koni banxulantare yo nama a don. 49 A tan sariya kedenna na a ra Isirayila kaan nun xojen xa e tagi.” 50 Alatala naxan yamari Musa nun Haruna ma, Isirayila kaane birin yi na liga na kiini. 51 Na loxon yeteni Alatala yi Isirayila ganla ramini Misiran yamanani e bonson yeen ma.

13 Alatala yi a fala Musa xa, a naxa, **2** “Dii xeme singene birin nasarijan n xa. N gbeen nan dii singene birin na Isirayila kaane ye, muxune nun subene.” **3** Musa yi a fala yamaan xa, a naxa, “Loxoni ito xa rabira e ma, e mini loxoni Misiran yi konyiyani! Amasoto Alatala e ramini a senben nan na. E nama buru ratexin don. **4** E minima nen to, Abiba kiken na. **5** Alatala na e rafa Kanan kaane boxon ma, Xitine nun Amorine nun Xiwine e nun Yebusune yamanana, a bata yi a kolo boxon naxan ma fe ra e benbane xa, a xa a so e yii, kumin nun nonon gbo boxon naxan yi, e na so menni, e sanli ito rabama nen Alatala xa kiken ito ra. **6** Buru ratetaren donma nen xii solofere bun ma, xii soloferede loxoni, sanla yi raba Alatala xa. **7** E buru ratetaren donma nen xii solofere bun ma, donse nama taran e yii buru rate seen naxan yi. Buru rate se yo nama taran e yamanani mum!” **8** “E na yebama nen e diine xa na loxoni, e naxa, ‘Alatala naxan ligaxi en xa, a en namini Misiran yamanani, na nan ma fe a ra.’ **9** Sanli ito na nan ma fe rabirama e ma, alo e na taxamasenna xidi e yiin na hanma e sa e tigi ra, alogo Alatala sariyan xa lu e de. Bayo Alatala nan e ramini Misiran yi a senbeni. **10** E xa yamarini ito suxu a waxatini jee yo jee.” **11** “Alatala na e raso Kanan boxoni, a a so e yii alo a kolo e xa kii naxan yi e nun e benbane, **12** e xa dii singene birin nasarijan Alatala xa saraxana nde ra. Xuruseene dii xeme singene birin, Alatala nan gbeen ne ra. **13** Xa sofanla dii xeme singen na a ra, e xa a xunba yexee diin na hanma sii diina. Koni, xa e mi a xunba, e xa a koeen gira, e a faxes. E mon xa e dii xeme singene birin xunba saraxana nde ra. **14** E diine na e maxodin waxati famatone yi, e naxa, ‘Ito bunna nanse ra?’ E xa e yabi, e naxa, ‘Alatala senben nan en naminixi Misiran yi konyiyani. **15** Bayo Firawona yi tondixi en bejinje en siga, koni Alatala yi dii singene birin faxes Misiran yamanani, muxun nun subena. Nanara, en xuruse dii xeme singene birin bama saraxan na Alatala xa, en yi en ma dii xeme singene birin xunba.’ **16** A luma nen alo i na taxamasenna xidi i yiin na hanma i tigi ra, amasoto Alatala senben nan en naminixi Misiran yi.” **17** Firawona to tin yamaan xa siga, Ala mi e ramini Filisistine yamanan kira yisoxin xon, bayo Ala a fala nen, a naxa, “E na yengen to, e na e miriyane maxete nen, e xete Misiran yi.” **18** Koni Ala yi ti yamaan yee ra tonbon yi kiraan xon, Gbala Baan binni. Isirayila kaane yi keli Misiran yi, e yitonxi yenge so xinla ma.

19 Musa yi Yusufu xonne tongo, bayo Yusufu bata yi Isirayila kaane rakolo, a naxa, “Ala a joxo luma e xon nen yati! E na keli be, e n xonne xali.” **20** E yi keli Sukoti taani, e yi sa daaxadeni ton Etama yi tonbonna danna ra. **21** Alatala yi tima nen e yee ra yanyin na kunda yiyani naxan yi kiraan yitama e ra. Koeen na, a ti e yee ra tee degen yiyani a e kirani yalan, alogo e xa sigan ti koeen nun yanyin na. **22** Kundana, xanamu, tee degen mi yi kelima yamaan yee ra yanyin nun koeen na.

14 Alatala yi a fala Musa xa, a naxa, **2** “A fala Isirayila kaane xa, e xa xete, e daaxadeni ton Pihahiroti dexon, Migidoli nun baan tagi. E xa daaxadeni ton baan de Baali-Sefon yetagi. **3** Nayi, Firawona a falama nen lan Isirayila kaane ma, a naxa, ‘E bata lo ayi yamanani, tonbonna e rabilinxi.’ **4** N Firawona bejneni xodoxoma nen, a bira e foxo ra. Koni n binyen sotoma Firawona nun a ganla birin xon ma nen, Misiran kaane yi a kolon a n tan nan Alatala ra.” Isirayila kaane yi na liga. **5** Misiran Mangan to a me a yamaan bata a gi. Nayi, Firawona nun a bundoxone miriyaan yi maxete. E yi a fala, e naxa, “En nanse ligaxi? En bata Isirayila kaane bejin e xa siga, e mi fa walima en xa sonon!” **6** Firawona yi a yenge so wontoroni ton, a ganla yi bira a foxo ra. **7** A yi a yenge so wontoro yebaxi keme sennin tongo, e nun Misiran wontorone birin. Sofa kuntigine yi ne birin kui. **8** Alatala yi Firawona bejneni xodoxo, Misiran Mangana. A yi Isirayila kaane sagatan naxanye yi minima xunna kenli. **9** Misiran kaane yi e sagatan, Firawona soone birin nun yenge so wontorone nun soo ragine, e nun a ganla, e yi Isirayila kaane li malanxi baan de, Pihahiroti binni, Baali-Sefon yetagi. **10** Firawona yi a masoma, Isirayila kaane yi e yeen nasiga, e Misiran kaane to fe e foxo ra. E yi gaxu han! E e xuini te Alatala ma. **11** E a fala Musa xa, e naxa, “Nanfera i faxi nxu ra tonbonni, nxu xa fa faxes be? Gaburu mi yi Misiran yi ba? I nanse doxi nxu ra i to nxu baxi Misiran yi? **12** Nxu mi ito xan falaxi i xa Misiran yi, ‘A lu nxu xa wali Misiran kaane xa?’ A yi fisa nun nxu xa wali Misiran kaane xa benun nxu xa fa faxes tonbonni.” **13** Musa yi yamaan yabi, a naxa, “E nama gaxu. E e raxara, e yi a to Alatala e xunbama kii naxan yi to. Amasoto e Misiran kaan naxanye toma to, e mi fa ne toma sonon! **14** Alatala yengen soma nen e xa, e e raxara tun!” **15** Alatala yi a fala Musa xa, a naxa, “E mon n maxandima be nanfera? A fala

Isirayila kaane xa, a e xa siga. **16** I tan xa i ya dunganni te, i yiini bandun baan xun ma, a xa yitaxun firinna ra, alogo Isirayila kaane xa baani gidi a yixaraxina. **17** N tan Misiran kaane bəjəni xədxəma nən, alogo e xa godo ε fəxə ra. N binyen sətəma nən Firawona nun a ganla birin xən ma, e nun a wontorone nun a soo ragine. **18** Misiran kaane a kolonma nən a n tan nan Alatala ra. N na nə Firawona nun a wontorone nun a soo ragine ra, n binyen sətəma nən.” **19** Ala malekan naxan yi tixi Isirayila ganla yee ra, na yi siga e xanbi ra. Kundaan naxan yi tixi e yee ra, na yi sa ti e xanbi ra. **20** A yi ti Misiran nun Isirayila ganle tagi. Kundaan fəxə kedenna yi dimixi, a fəxə kedenna yi kəeni yalanma. Nanara, gali firinne mi yi masoma e bode ra kəen birin kui. **21** Musa yi a yiini bandun baan xun ma. Na kəen birin na, Alatala yi baa igen naxete foye gbeen na keli sogetedeni, a yi baani xara. Igen yi bolon. **22** Isirayila kaane yi gidi baani xare yireni. Igen yi malanxi alo banxi tunbulunna e yiifanna nun e komenna ma. **23** Misiran kaane yi e sagatan. Firawona soone birin nun a yenge so wontorone nun a soo ragine yi bira e fəxə ra baani. **24** Subaxa, Alatala yi Misiran ganla mato keli kundaan nun tee degen xun ma, a yi e yifu han! **25** A yi e wontorone sanne ba e bun ma, a yi e sigati raxələ ayi. Nayi, Misiran kaane yi a fala, e naxa, “En na en gi Isirayila kaane yee ra, amasəto Alatala Misiran yengema e xa.” **26** Alatala yi a fala Musa xa, a naxa, “I yiini bandun baan xun ma alogo igen xa sa Misiran kaane xun ma, e nun e wontorone nun e soo ragine.” **27** Musa yi a yiini bandun baan xun ma. Kuye yibani, baan mən yi xete a kiini. Misiran kaane yi e gima a famatəon yee ra, koni Alatala yi e radin baani. **28** Igen yi xete, a sa wontorone nun soo ragine nun Firawona ganla birin xun ma, naxanye godo baani Isirayila kaane fəxə ra. Hali keden mi lu. **29** Koni Isirayila kaane sigan ti nən igen xare yireni, igen yi malanxi e yiifanna nun e komenna ma. **30** Na ləxəni, Alatala yi Isirayila xunba Misiran kaane yii. Isirayila yi Misiran kaane binbine to baan de. **31** Isirayila kaane to Alatala senbe gbeen to Misiran kaane xili ma, yamaan yi gaxu Alatala yee ra, e la a ra, e nun Musa a walikena.

15 Nayi, Musa nun Isirayila kaane yi betini ito ba Alatala xa. E naxa: N betin bama Alatala xa, amasəto a gbo mume! A bata soone nun soo ragine radin baani. **2** Alatala nan n fangan na, n betin bama

naxan xa, a mən bata findi n nakisimaan na. N ma Ala nan a ra, n na a tantunma nən, n fafe a Ala nan a ra, n na a matəxəma nən. **3** Yenge soon nan Alatala ra, a xili nən “Alatala.” **4** A bata Firawona wontorone nun a ganla woli baani, Firawona sofa yebaxine bata e mamin Gbala Baani. **5** E bata godo tilinna ma alo gemene. Fufaan yi sa e xun ma. **6** Alatala! I bata i senben yita! Alatala! I yiifanna bata yaxune faxa. **7** I bata yaxune rabira i ya gboon nun nərəni. I bata i ya xələ gbeen nagodo alo teeəna a yi e gan alo sexe xarena. **8** I jəe foyen bata igene malan, walanne yi raxara alo banxi kankena. Igene yi raxara baan tilinna xənna ma. **9** Yaxune yi a falama, e naxa, “N sagatanna tima nən, n yi e suxu. N se tongoxine yitaxun, han n wasa e ra, han a dangu ayi. N silanfanna botinma nən ayi, n yiin yi e halagi.” **10** Koni, i bata i de foyen nafa baa igen bata sa e xun ma. E bata godo ige gbeen bun ma alo wure binyena. **11** Alane ye, nde luxi alo i tan, Alatala? Nde luxi alo i tan? I gbee nərən sarijan! I magaxu! Tantunna i tan nan xa! I kabanakone ligamal! **12** I bata i yiini bandun, bəxən yi nxu yaxune gerun. **13** I bata ti i ya yama xunbaxin yee ra i ya hinanni. I e rasigama nən i dəxəde sarijanxini i senbeni. **14** Siyane a mema nən, e xuruxurun. Kuisanna Filisitine suxuma nən. **15** Edən kuntigine gaxuma nən. Gaxun Moyaba muxu gbeene suxuma nən. Kanan kaane birin senben bata jan. **16** Gaxun nun kuisanna e suxuma nən, e e raxara alo gemena i senben bun, han i ya yamaan yi dangu, Alatala! Han i ya muxune yi dangu. **17** I e xalima nən, i yi e dəxə geyaan fari i naxan findima e keen na, i tan Alatala luma denaxan yi, i tan Marigin denaxan nafalaxi yire sarijanxin na. **18** Alatala luma nən mangayani habadan han habadan! **19** Firawona soone nun a wontorone nun a soo ragine to godo baani, Alatala baa igen naxete nən e xun ma, koni Isirayila kaane yi sigan ti, e baani gidi a yixarena. **20** Nayi, Haruna xunyen Mariyama, nabi jaxalanmana, na yi tanbanna suxu a yii. Naxanle birin yi bira a fəxə ra, tanbanne e yii, e bodonma. **21** Mariyama yi betini ito bama Isirayila jaxanle xa, ε betin ba Alatala xa, amasəto a gbo han! A bata soone nun soo ragine woli baani! **22** Musa yi ti Isirayila kaane yee ra keli Gbala Baani siga Suru tonbonni. Xii saxanna bun ma, e sigan tima tonbonni, e mi ige to. **23** E yi so Mara yi, koni e mi nə Mara igen minjə, amasəto a yi xələ. Nanara, na yiren yi xili sa “Mara.” **24** Yamaan yi lu Musa mafale, e naxa, “Nxu xa nanse min?” **25** Musa yi

Alatala maxandi, Alatala yi wudina nde yita a ra, a naxan woli igeni. Igen yi naxunɲe ayi. Alatala tɔnna nun sariyan soxi yamaan yii menna nin, a e keɲaan fɛsefɛse. **26** A yi a fala, a naxa, “Xa ɛ Alatala xuiin name ki faɲi, ɛ Ala, ɛ yi tinxinna liga a yɛ ra yi, xa ɛ a yamarine nun tɔnne birin suxu, n mi fitina fe yo rafe ɛ ma, n Misiran kaane naxankataxi naxanye ra, amasɔto Alatala nan n tan na, naxan ɛ rakendeyama.” **27** E yi so Elimi yi, tigi fu nun firin yi denaxan yi e nun tugu bili tonge solofere. E yi daaxadeni tɔn mɛnni, igen dɛxɔn.

16 Isirayila yamaan birin yi keli Elimi yi, e minin kike firinden xii fu nun suulunde lɔxɔni Misiran yamanani, e fa Sin tonbonni, denaxan Elimi nun Sinayi tagi. **2** Isirayila yamaan birin yi lu Musa nun Haruna mafale tonbonni. **3** Isirayila kaane yi a fala e xa, e naxa, “Hali Alatala yi nxu faxa Misiran yi nun! Nxu yi dɔxɔma sube tundene fema nxu yi donseene don han nxu lugo! Koni ɛ bata fa nxu ra tonbonni be alogo nxu birin xa faxa kamen ma.” **4** Alatala yi a fala Musa xa, a naxa, “Awa, n na a ligama nen donseen yi godo ɛ ma keli kore. Yamaan yi mini lɔxɔ yo lɔxɔ. E naxan donɲe lɔxɔn kui, e na yaten matongo. N na e keɲaan fɛsefɛsema na kii nin, n xa a to xa e n ma sariyane suxɛ. **5** Xii senninde lɔxɔni, e xa a matongo e naxan donɲe xii firinna kui, e na rafala burun na.” **6** Musa nun Haruna yi a fala Isirayila yamaan birin xa, e naxa, “To jinbanna ra, ɛ a kolonma nen a Alatala nan ɛ raminixi Misiran yamanani. **7** Xɔtɔnni, ɛ Alatala binyen toma nen, amasɔto a bata ɛ xuiin mɛ, ɛ Alatala nan mafalama. Nanse nxu tan na ɛ to nxu mafalama?” **8** Musa yi a fala, a naxa, “Alatala suben don daxin soma ɛ yii nen to jinbanna ra. Xɔtɔnni, a burun so ɛ yii han ɛ lugo. Amasɔto Alatala bata a mafala xuiin mɛ ɛ xɔn ma. Nanse nxu tan na? ɛ mi nxu tan gbansanna mafalama, fɔ Alatala.” **9** Musa yi a fala Haruna xa, a naxa, “A fala Isirayila yamaan birin xa, i naxa, ‘ɛ fa Alatala yetagi, amasɔto a bata a mafala xuiin mɛ ɛ xɔn ma.’” **10** Haruna to yi falan tima Isirayila yamaan birin xa, e yi e firifiri tonbonna binni, Alatalaa nɔrɔn yi mini kenenni kundani. **11** Alatala yi a fala Musa xa, a naxa, **12** “N bata Isirayila kaane xuiin mɛ. E n mafalama. A fala e xa, i naxa, ‘Ninbanna ra, ɛ suben donma nen. Xɔtɔnni ɛ lugo burun na. Nayi, ɛ a kolonɲe a Alatala nan n tan na, ɛ Ala.’” **13** Ninbanna ra, dɔmɛne yi fa e dɔxɔ yamaan daaxaden yiren birin yi. Xɔtɔnni, xiila

yi saxi yamaan daaxaden nabilinna birin yi. **14** Xiila to yolon, sena nde yi lu malanxi bɔxɔn fari alo bogi seen xɔnna. **15** Isirayila kaane to a mato, e a fala e bode xa, e naxa, “Nanse ito ra?” Bayo, e mi yi a kolon naxan a ra. Musa yi a fala e xa, a naxa, “Donseen na a ra Alatala naxan soxi ɛ yii ɛ xa a don.” **16** Alatala ito nan yamarixi, a naxa, “Birin nɔɛ naxan donɲe a xa na nan matongo. ɛ xa ligase ye keden keden matongo muxune xa naxanye ɛ konne yi.” **17** Isirayila kaane yi a liga na kiini, nde yi a gbegbe matongo, nde yi ndedi matongo. **18** E yi a maliga liga seen kui. Naxanye a gbegbe matongo, ne mi a gboxi ayi. Naxanye ndedi matongo, a mi dasa ne fan ma. Birin yi a matongoma a makoon naxan ma. **19** Musa yi a fala e xa, a naxa, “Muxu yo nama a dɔnxɛn namara han xɔtɔnni.” **20** Koni, ndee mi e tuli mati Musa ra. Ne yi a ramara han xɔtɔnni. Koni kunle yi bira a birin yi, a xirin yi mini fɔlɔ. Nanara, Musa yi xɔlɔ ne ma. **21** Xɔtɔn yo xɔtɔn birin yi a matongoma naxan e makoon liyɛ. Sogen na xɔlɔ, donseen yi xulunɲe ayi. **22** Xii senninde lɔxɔni, e yi lɔxɔ firin daxi matongo, birin liga seen ye firin. Yamaan kuntigine birin yi na feen dentege Musa xa. **23** Musa yi a fala e xa, a naxa, “Alatala ito nan yamarixi. Matabu lɔxɔn nan tila ra. Matabu sarijanxin na a ra Alatala xa. Nanara, ɛ lan ɛ xa donseen naxan gan, ɛ na gan. ɛ lan ɛ xa naxan jin, ɛ na jin. Naxanye na lu ɛ ne ramara han xɔtɔnni.” **24** E yi a ramara han xɔtɔnni, alo Musa a yamari kii naxan yi. A xirin mi mini, kuli mi bira a yi. **25** Musa yi a fala, a naxa, “ɛ ito don to, amasɔto Alatalaa Matabu lɔxɔn nan to ra. To ɛ mi se toma a matongo daxin na. **26** ɛ a matongoma nen xii sennin, koni xii soloferede lɔxɔni, naxan findin Matabu lɔxɔn na, se mi taranma na mume!” **27** Xii soloferede lɔxɔni, yamaan muxuna ndee yi mini a matongodeni, e mi sese to. **28** Nayi, Alatala yi a fala Musa xa, a naxa, “ɛ tondima n ma yamarine nun sariyane suxɛ han waxatin mundun yi? **29** ɛ a kolon a Alatala bata Matabu lɔxɔn so ɛ yii. Nanara, xii senninde lɔxɔni, a donse lɔxɔ firin daxin soma ɛ yii. Birin xa a raxara xii soloferede lɔxɔna fe ra. Muxu yo nama mini a konni.” **30** Yamaan yi a matabu xii soloferede lɔxɔni. **31** Isirayila kaane yi na donseen xili sa “Manna donsena.” A yi luxi alo se xɔri fixɛna. A yi naxun alo kumina. **32** Musa yi a fala, a naxa, “Alatala ito nan yamarixi. Manna donseen ligase ye keden xa ramara ɛ yixɛtene xa, alogo e xa a to n na ɛ baloxi burun naxan na tonbonni, n na

ε ramini xanbini Misiran yamanani.” **33** Musa yi a fala Haruna xa, a naxa, “Goron keden tongo, i yi a rafe Manna donseen ligase keden na, i yi a sa Alatala yetagi, alogo a xa ramara ε yixetene xa.” **34** Haruna yi na Manna donseen sa Layiri Kankiraan yetagi alo Alatala a yamari Musa ma kii naxan yi, alogo a xa ramara. **35** Isirayila kaane yi Manna donseen don jɛɛ tonge naanin, han e yi so yamanani muxune yi dɔxi denaxan yi. E yi Manna donseen don han e yi Kanan yamanan danna li. **36** Na waxatin liga seen yɛ fu yi lanxi Efa liga seen yɛ kedenna nan ma.

17 Isirayila kaane yamaan birin yi keli Sin tonbonni, e sigan ti yirene yi alo Alatala e yamari kii naxan yi. E yi daaxadeni tɔn Refidimi yi, koni yamaan mi iɛe min daxi to na yi. **2** Nanara, yamaan yi yengen fen Musa ra. E yi a fala, e naxa, “Iɛe min daxin so nxu yii!” Musa yi e yabi, a naxa, “Nanfera ε n nafenma yengen na? Nanfera ε Alatala matoma bunbani?” **3** Min xɔnla nan yi yamaan na menni, e yi lu Musa mafale. E naxa, “Nanfera i nxu raminixi Misiran yi, alogo nxu nun nxɔ diine nun nxɔ xuruseene xa fa faxa be min xɔnla ra?” **4** Musa yi a xuini te Alatala ma, a naxa, “N nanse ligama yamani ito xa? A luxi ndedi, e xa n magolon.” **5** Alatala yi a fala Musa xa, a naxa, “Dangu yamaan yɛɛ ra. E nun Isirayila fonna ndee xa siga. I xa dunganna suxu i yii i Nila baan garin naxan na. **6** N tima nen i yɛɛ ra Horebe fanyen ma. I xa fanyen garin, igen minima nen, yamaan yi a min.” Musa yi na liga, Isirayila fonne yɛɛ xori. **7** A yi men xili sa “Masa” e nun “Meriba.” Amasoto Isirayila kaane bata yi matandina ti, e bata yi Alatala mato bunbani, e naxa, “Alatala en yɛ ba? Xa a mi en yɛ?” **8** Amalekine yi fa Isirayila yengedeni Refidimi yi. **9** Nayi, Musa yi a fala Yosuwe xa, a naxa, “Xemena ndee sugandi, i sa Amalekine yenge. Tila, n tima nen geyaan xuntagi, Alaa dunganna n yii.” **10** Yosuwe yi Amalekine yenge alo Musa a fala kii naxan yi. Musa, Haruna, e nun Xuru yi te geyaan xuntagi. **11** Musa nema a yiini tema, Isirayila yi nɔɔn tima. Koni xa a a yiini godo, Amalekine yi nɔɔn ti. **12** Musa yiine bata yi xadan. E yi gɛmɛn tongo, e na dɔxɔ. Musa yi dɔxɔ a fari. Haruna nun Xuru yi a yiine bun tima, boden fɔxɔ kedenni, boden bode fɔxɔni. A yiine yi kore han kɔɛ yi so. **13** Yosuwe yi Amalekine ganla nɔ silanfanna ra. **14** Alatala yi a fala Musa xa, a naxa, “Ito seɓɛ kedin kui, alogo jinan nama ti a xɔn. I yi a yɛba Yosuwe xa, bayo

n Amalekine bama nen dunuja yi fefe! Ninan yi ti e xɔn.” **15** Musa yi saraxa ganden nafala, a yi a xili sa, “Alatala nan n ma yenge so taxamaseri dugin na.” **16** A mɔn yi a fala, a naxa, “Amasoto muxune kelixi nen Alatala manga gbɛden xili ma, Alatala luma Amalekine yenge nen, han mayixeten nun mayixetene.”

18 Musa bitanna Yetiro, Midiyan saraxaralina, na yi a mɛ Ala naxan birin ligaxi Musa nun Isirayila xa, a yamana. A a mɛ a Alatala bata yi Isirayila ramini Misiran yi. **2** Musa bitanna Yetiro yi fa Musaa jaxanla Sefora ra, a bata yi naxan lu a yii **3** e nun a dii firinne. Kedenna xili Gerisomi, bayo Musa bata yi a fala, a naxa, “N bata findi xɔjɛn na yamana gbete yi.” **4** Boden yi xili Eliyeseri, bayo a bata yi a fala, a naxa, “N babaa Ala bata n mali, a n natanga Firawonaa silanfanna ma.” **5** Musa bitanna Yetiro nun Musaa diine nun a jaxanla yi fa Musa fema tonbonni, a yi dɔxi denaxan yi Alaa geyaan dexɔn ma. **6** A bata yi a fe xibarun nasiga Musa ma, a naxa, “N tan, i bitanna Yetiro, n fama i fema, nxu nun i ya jaxanla nun a dii firinne.” **7** Musa yi mini a bitanna ralandeni, a yi a xinbi sin, a yi a sunbu. E yi e bode xɔntɔn, e so Musaa bubun kui. **8** Musa yi a yɛba a bitanna xa Alatala naxan ligaxi Firawona nun Misiran kaane ra Isirayila fe ra, e nun tɔrɔn naxan birin e soto kira yi, e nun Alatala e xunba kii naxan yi. **9** Alatala naxan birin ligaxi Isirayila xa a to a xunba Misiran kaane yii, Yetiro yi sewa ne ra. **10** Yetiro yi a fala, a naxa, “N bata barika bira Alatala xa, naxan ε xunbaxi Misiran kaane nun Firawona yii, naxan yamaan baxi Misiran kaane senben bun! **11** Iki, n bata a kolon a Alatala senben gbo alane birin xa, amasoto a bata ito liga ne ra naxanye yi wasoxi Isirayila xili ma.” **12** Musa bitanna Yetiro yi saraxa gan daxin nun saraxa gbetene ba Ala xa. Haruna nun Isirayila fonne birin yi fa buru dondeni Musa bitanna fema, Ala yetagi. **13** Na xɔtɔn bode, Musa yi dɔxɔ yamaan makitideni. Yamaan yi ti a yetagi keli xɔtɔnna ma han jinbanna ra. **14** Musa yi naxan birin ligama yamaan xa, a bitanna to na to, a yi a fala, a naxa, “Nanfe ito ra, i naxan ligama yamaan xa? Nanfera i kedenna kitin sama, yamaan birin yi ti i yetagi, keli xɔtɔnni han jinbanna ra?” **15** Musa yi a bitanna yabi, a naxa, “Bayo yamaan fama n fema Ala sagoon nan maxɔdinde yi. **16** Xa fena nde e tagi, e fama nen n fema, n yi kitin sa, n Alaa tɔnne nun a sariyane yɛba e xa.” **17** Musa bitanna yi a fala a xa, a

naxa, “I naxan ligama, na mi fan. 18 E nun yamani ito e bode raxadanma nen, bayo goronni ito gbo i senben xa, i kedenna mi a gase. 19 Iki, i tuli mati n xuiin na, n xa i kawandi. Ala xa lu i xon! A lan i xa ti Ala yetagi yamaan funfuni, i yi Ala maxodin e bode matandine fe ra. 20 I xa e xaran tonne nun sariyane ma. I kiraan yita e ra e biran naxan foxo ra, e nun wanle e naxan ke. 21 Koni i xa muxu kendene sugandi yamaan ye, naxanye gaxuma Ala yee ra, lannaya muxune, mayifu mi naxanye yi. I yi e findi muxu wuli keden kuntigine ra, hanma muxu keme kuntigine, e nun muxu tonge suulun kuntigine, e nun muxu fu kuntigine. 22 E xa yamaan makiti waxatin birin, e yi fa fe xodexene ra i fema. Koni feen naxanye mi xodoxo, e tan xa ne makiti. Na nde bama nen i ya goronna ra, bayo e fan nde tongoma nen. 23 Xa i na liga, Alaa tinni, i noe a gase nen. Yamani ito birin sigama nen e konne yi boje xunbenli.” 24 Musa yi a bitanna xuiin name, a naxan fala, a na liga. 25 A muxu kendene sugandi Isirayila yi, a yi e findi yama xunne ra, muxu wuli keden kuntigine, muxu keme kuntigine, muxu tonge suulun kuntigine, e nun muxu fu kuntigine. 26 E yi yamaan makitima waxatin birin. E yi fama fe xodexene ra Musa fema, koni naxanye mi yi xodoxo, e tan yeteen yi ne makitima nen. 27 Musa yi tin, a bitanna yi siga a konni.

19 Kike saxan to dangu, xabu e mini Misiran yi, na loxo yeteni, Isirayila kaane yi Sinayi tonbonna li. 2 E to keli Refidimi yi, e yi fa Sinayi tonbonni. Isirayila kaane yi daaxadeni ton tonbonni, geyaan san bun. 3 Musa yi te Ala fema. Alatala yi Musa xili geyaan xuntagi, a naxa, “Ito fala Yaxuba bonsonne xa, Isirayila kaane, 4 ‘E yeteen bata a to n naxan ligaxi Misiran na, n yi e xali n fema alo singbinna soma a diine bun kii naxan yi. 5 Iki, xa e n xuiin suxu ki faji, xa e n ma layirin suxu, e findima nen n ma yamaan na siyane birin ye. N gbeen nan boxon birin na, 6 koni e findima n xa saraxarali yamaan nan na e nun siya sarijanxina.’ I falani itoe nan tima Isirayila kaane xa.” 7 Musa yi xete, a fonne birin xili, a falani itoe birin yeba e xa, alo Alatala a yamari kii naxan yi. 8 Yamaan birin yi a fala, e naxa, “Alatala naxan birin falaxi nxu na ligama nen.” Musa yi sa e falane rali Alatala ma. 9 Alatala yi a fala Musa xa, a naxa, “N fama nen i ma kunda yiyani, alogo n nema falan naxan tiye i xa, yamaan xa a me. Nanara, e le i ra waxatin birin

yi.” Musa yi yamana falane radangu Alatala ma. 10 Alatala yi a fala Musa xa, a naxa, “Siga yamaan fema, e rasarijan to nun tila yi. E xa e dugine xa. 11 E xa e yiton xii saxandena fe ra, bayo na loxoni Alatala godoma nen Sinayi geyaan fari, yamaan birin yee xori. 12 I xa danne sa yamaan xa geyaan nabilinni, i yi a fala, i naxa, ‘E yete masuxu te feen na geyaan fari, e nama maso a san bunna ra. Naxan yo na a sanna ti geyaan ma, e xa na kanna faxesa. 13 E nama e yiin din a ra, koni e a magolonma nen, hanma e a bun xalimakunle ra. Muxu ba, sube ba, a mi kisima.’ Xotaan xuiin na mini, muxune yi te geyaan fari.” 14 Musa yi godo yamaan fema keli geyaan fari, a yi yamaan nasarijan, e yi e dugine xa. 15 A yi a fala yamaan xa, a naxa, “E yiton xii saxandena fe ra. E nama e maso jaxalan yo ra.” 16 Xii saxande loxon xotonni, kuye sarinne yi mini, galanne yi godo, kundaan yi sa geyaan xun ma. Xotaan xuiin yi mini han! Yamaan birin yi gaxu. 17 Musa yi yamaan namini e daaxadeni Ala ralandeni, e yi e malan geyaan san bun ma. 18 Tutun yi Sinayi geyaan birin xun ma, amasoto Alatala bata yi godo a ma tee degeni. Na tutin yi tema alo sulun teen tutina, geyaan birin yi xuruxurunma a jaxin na. 19 Xotaan xuiin yi gboma ayi tun! Musa yi falan ti, Ala yi a yabi a xuiini texin na. 20 Alatala yi godo Sinayi geyaan fari, a yi Musa xili geyaan xuntagi. Musa yi te. 21 Alatala yi a fala Musa xa, a naxa, “Godo, a fala yamaan xa e nama kata fa feen na n matodeni, xa na mi a ra e wuyaxi faxama nen. 22 Hali saraxaraliin naxanye e masoma Alatala ra, ne xa e yete rasarijan, alogo Alatala nama e faxesa.” 23 Musa yi a fala Alatala xa, a naxa, “Yamaan mi noe te Sinayi geyaan fari. Amasoto i bata nxu rakolon, i yi a fala, i naxa, ‘E danne sa geyaan nabilinni, e xa a rasarijan.’” 24 Alatala yi a fala a xa, a naxa, “Godo, i mon yi te e nun Haruna. Koni saraxaraline nun yamaan nama kata te feen na Alatala fema, alogo n nama e faxesa.” 25 Musa yi godo yamaan fema, a feni itoe fala e xa.

20 Ala yi falani itoe birin ti, a naxa, 2 “Alatala nan n tan na, i ya Ala, naxan i raminixi konyiyani Misiran yi.” 3 “I nama ala gbete batu fo n tan.” 4 “I nama suxuren nafala hanma sena nde sawurana, seen naxan kore, naxan boxon ma hanma naxan igeni. 5 I nama i xinbi sin e xa. I nama e batu. Amasoto n tan, Alatala, i ya Ala, n xoxolon. Naxanye na n najaxu, n ne haken saranma e diine ra nen han mayixete saxan

hanma naanin. 6 Koni naxanye na n xanu, e n ma yamarine suxu, n hinanma ne ra nen han mayixete wuli keden.” 7 “I nama Alatala i ya Ala xinla fala fuuni, amasoto Alatala na kanna jaxankatama nen.” 8 “I xa Matabu Loxon binya, i yi a rasarijan. 9 I xa wali xii sennin bun ma, i yi i ya wanle birin ke. 10 Koni xii soloferede loxoni, Alatala i ya Alaa Matabu Loxon nan na ra. I nama wali yo ke, i tan ba, i ya dii xemen ba, i ya dii temen ba, i ya konyin ba, i ya xuruse ba, hanma hali xojen naxan i konni. 11 Amasoto Alatala koren nun boxon nun igen daxi xii sennin nan bun, e nun naxan birin e yi. Koni a a matabu nen xii soloferedeni. Nanara, Alatala yi barakan sa Matabu Loxona fe yi, a yi a rasarijan.” 12 “I baba nun i nga binya, alogo i xa siimaya xunkuyen soto boxoni, Alatala i ya Ala naxan fima i ma.” 13 “I nama faxan ti.” 14 “I nama yalunyaan liga.” 15 “I nama mupjan ti.” 16 “I nama wule seren ba i adamadi boden xili ma.” 17 “I nama mila i bodena banxin xon hanma i bodena jaxanla, hanma a konyina, a jingena, a sofanla, hanma i adamadi boden gbee seen naxan birin na.” 18 Yamaan birin yi galanna nun xotaan xuiin mema, e yi tutin toma te. Yamaan yi gaxu e xuruxurun, e yi e makuya. 19 E yi a fala Musa xa, e naxa, “I tan yeteen xa falan ti nxu xa, nxu nxu tuli matima nen i ra, koni Ala nama falan ti nxu xa alogo nxu nama faxesa.” 20 Musa yi a fala yamaan xa, a naxa, “E nama gaxu. Ala bata fa e kepaan fefesedeni, alogo e xa gaxu a yee ra, alogo e nama yulubin liga.” 21 Yamaan yi lu tixi yire makuyeni, koni Musa yi a maso kundaan na Ala yi denaxan yi. 22 Alatala yi a fala Musa xa, a a xa a fala Isirayila kaane xa, a naxa, “E bata a to a n bata falan ti e xa keli kore. 23 E nama suxurene rafala, e yi nxu nun ne batu nxu bode xon. E nama gbetin nun xema suxurene rafala. 24 I xa saraxa gande bende daxini ton n xa, i yi saraxa gan daxine nun boje xunbeli saraxane nun xuruse xunxurine nun a xungbene ba a fari. N na denaxan findi n xinla binyaden na, n fama nen i ma menni, n yi i baraka. 25 Xa i saraxa gande geme daxini ton n xa, i nama a yiton geme masolixin na. Amasoto i ya a masolima waliseen naxan na, na saraxa ganden naxosima nen. 26 I nama saraxa gande matexin nafala n xa, i yi te te seene ma, alogo i ragenla nama to.”

21 “I sariyani itoe nan yebama e xa. 2 Xa i Heburu konyina nde sara, a walima nen jee sennin. Koni

jee soloferedeni, a xoro yama nen, a mi sese fima. 3 Xa a kedenna nan soxi i konni, a kedenna nan sigama. Xa jaxanla yi a yii a so waxatini, e nun a jaxanla yi siga. 4 Xa a kanna nan jaxanla so a yii, xa a bata dii xemene bari hanma dii temene, a kanna nan gbee a jaxanla nun a diine ra. A kedenna yi siga. 5 Xa konyina a fala, a naxa, ‘N kanna rafan n ma, e nun n ma jaxanla nun n ma diine, n mi waxi xoro ya feni,’ 6 nayi a kanna xa a xali Alaa kitisane yetagi. A yi a maso deen na hanma senbetenna. A kanna yi a tunla soxon wuren na. Konyin yi lu a wanla ra tolon!” 7 “Xa muxuna nde a dii temen mati alo konyina, a mi xoro yama alo konyi xemene. 8 Xa a rajaxu a kanna ma, naxan yi waxi a tongo feni a jaxanla ra, a kanna xa tin a baba xa a xunba. A kanna nama a yanfa, a a mati xojene ma. 9 Xa a fixi a dii xemen nan ma a jaxanla ra, a kanna a suxuma nen alo a gbee dii temene. 10 Xa a jaxalan gbete tongo, a nama sese ba a singe ra xiina donseen na, hanma a dugin na, hanma xeme taa sariyana. 11 Xa a mi na fe saxanne liga a xa, a nae sigi nen, a mi gbete yo fi.” 12 “Naxan na muxuna nde bonbo, a a faxesa, e xa na kanna faxesa. 13 Xa a mi yi kataxi a faxesa feen na, koni Ala yi a ragidi na kiini, a xa a gi han n yiren naxan yite i ra a nae luye denaxan yi. 14 Koni xa muxuna nde a boden faxesa feni ton a yi a faxesa, hali a sa a singan n ma saraxa ganden na, e xa a ba na, e yi a faxesa.” 15 “Naxan na a baba bonbo hanma a nga, e xa na kanna faxesa.” 16 “Naxan na muxuna nde suxu, a sa a mati hanma muxune yi a to a yii, e xa na kanna faxesa.” 17 “Naxan na a baba danga hanma a nga, e xa na kanna faxesa.” 18 “Xa muxune yenge, keden yi gemen sin a boden ma hanma walisena nde, a mi a faxesa, koni a yi a rasa, 19 nayi naxan bonbon tixi, na mi jaxankatama xa boden keli, a yi a masiga ti dunganna ra. Koni a xa a walitarefa yikalan saren fi. A yi a dandan han a yi yalan.” 20 “Xa muxuna nde a konyi xemen hanma a konyi gilen bonbo wudin na, konyin yi faxesa a yii, a kanna haken saranma a ra nen. 21 Koni xa a konyin bata keli xii keden hanma firin na xanbi ra, a kanna haken mi fa saranma a ra. A bata a yete nan bono.” 22 “Xa muxune yenge, e jaxalan fudikanna li, a diin bari benun a waxatin xa a li, koni fe jaxi gbete mi bira ayi, nayi na jaxanla xemen na seen naxan maxodin, kitisane na tin naxan ma, fe kalan xa na fi. 23 Koni xa jaxanla maxoloxi, niin joxon xa fi niin na, 24 yeen yi joxo yeen na, jinna yi joxo jinna ra, yiin yi joxo yiin na, sanna yi

ᵐᵓᵔᵔ sanna ra, **25** ganna yi ᵐᵓᵔᵔ ganna ra, maxolɔn yi ᵐᵓᵔᵔ maxolɔn na, bɔnbɔn yi ᵐᵓᵔᵔ bɔnbɔn na.” **26** “Xa muxuna nde a konyi xɛmɛn hanma a konyi gilen yɛɛn garin, a yi a kala, a xɔɔyama nɛn a yɛɛn saren na. **27** Xa a konyi xɛmɛna hanma a konyi gilen jin keden gira, a xɔɔyama nɛn a jinna saren na.” **28** “Xa jingena nde xɛmɛna hanma jɔxanla sɔxɔn a fenna ra, a yi faxa, jingen magolɔnma nɛn han a faxa, a suben nama don. Koni jinge kanna haken mi saranma a ra. **29** Koni xa jingen dari feen nan yi a ra, a kanna bata yi rakolon, koni a mi a xidi, jingen yi xɛmɛn hanma jɔxanla faxa, nayi jingen magolɔnma nɛn, ɛ yi a kanna fan faxa. **30** Koni, xa muxune tinxi a ma, jinge kanna xa a niin xunbaan fi, e na naxan yo maxɔdin. **31** Sariya keden mɔn sama xa jingen bata banxulanma hanma sungutunna faxa. **32** Koni xa jingen bata konyi xɛmɛn hanma konyi gilen faxa, jinge kanna xa gbɛti gbanan tonge saxan nan so konyi kanna yii, jingen yi magolɔn.” **33** “Xa muxuna nde xɔjinna dɛ raba, hanma a nde ge, a mi a dɛ ragali, xa jingena nde bira na ra hanma sofanla, **34** xɔjin kanna xa jingen saren fi, a jinge faxaxin tongo.” **35** “Xa muxu jingen jinge gbɛtɛ sɔxɔn, a yi faxa, e xa jinge jɛjɛn mati e a saren taxun, e jinge faxaxin fan taxun. **36** Koni xa a kolonxi a a jingen dari feen nan yi a ra, a kanna mi a xidi, na kanna xa jingen jɔxɔn fi jingen na, a jinge faxaxin tongo a gbeen na.”

22 “Xa muxuna nde jingen muja hanma yɛxɛɛna, a a kɔɛ raxaba hanma a a mati, a jinge suulun nan fima jingen jɔxɔn na, a yɛxɛɛ naanin fi yɛxɛɛn jɔxɔn na.” **2** “Xa mujaden naterɛna muja tideni, e yi a bɔnbɔ, a yi faxa, na mi yatɛma faxa tiin na. **3** Koni xa kuyen bata yiba, na yatɛma faxa tiin nan na.” “Mujaden xa a se mujaxine jɔxɔ, xa sese mi a yii, a yetɛɛn xa mati konyin na. **4** A naxan mujaxi, jingena, yɛxɛɛna, hanma sofanla, xa muxune na li a yii, a xa a jɔxɔn naxɛtɛ dɔxɔdɛ firin.” **5** “Xa muxuna nde a xuruseene lu e kalan ti xɛna nde ma hanma manpa bili nakɔna nde kui, a xa se kalaxine jɔxɔ a gbee se xabaxi fajine ra.” **6** “Xa tɛɛn keli, a sɛxɛn li, a sa malo xidine hanma a tixin gan, hanma xɛɛn birin yi gan, naxan tɛɛn soxi a xa se kalaxine jɔxɔn fi.” **7** “Xa muxuna nde gbetina hanma a yii sena nde taxu a lanfaan na a xa ramara, e yi a muja na kanna ma, mujaden xa a jɔxɔn naxɛtɛ dɔxɔ firin, xa a to. **8** Xa mujade mi to, banxi kanna xa siga Ala batu yireni,

a a kolo fa fala a mi a lanfaan yii seen tongoxi.” **9** “Matandin naxan keli jinge feen ma, sofali fena, yɛxɛɛ fena, dugi fena, hanma seen naxan lɔxi ayi, muxune a falama naxan ma fe yi, e naxa, ‘N gbeen na a ra!’ Se kari dɔxɔ firinne xa siga han Ala batudena. Ala na naxan yalagi, na xa a lanfaan gbeen jɔxɔn naxɛtɛ dɔxɔ firin.” **10** “Xa muxuna nde sofanla, jingena, yɛxɛɛna, hanma suben siya gbɛtɛ taxu a lanfaan na, na suben yi faxa, hanma a maxolo, hanma a muja, muxu yo mi a to, **11** marakolɔn xa ti Alatala yi na muxu firinne tagi. Naxan suben namaraxi, na xa a kolo fa fala a mi a lanfaan yii seen tongoxi. Sube kanna xa tin na kolɔn ma, hali boden mi a jɔxɔn fi. **12** Koni xa suben mujaxi a konna nin, a lanma nɛn a yi a kanna gbeen jɔxɔn naxɛtɛ a ma. **13** Xa burunna subene bata a subeni bɔ, a xa fa a dɔnxɛn na seren na, naxan faxaxi na jɔxɔn nama raxɛtɛ. **14** Xa muxuna nde suben xandi a lanfaan ma, suben yi maxolo hanma a faxa a kanna xanbi, a jɔxɔn naxɛtɛma nɛn. **15** Xa a kanna yi a dɛxɔn na waxatini, a mi a jɔxɔ raxɛtɛma. Xa a a yii toliman nin, naxan a xun yi, a saren nan na ra.” **16** “Xa muxuna nde sungutun nasolɔnxin nakunfa naxan mi futuxi, a yi a kolon jɔxanla ra, a xa a futu seen fi a yi a tongo a jɔxanla ra. **17** Xa a baba tondi a soɛ a yii, a xa sungutun nasolɔnxine futu seen xasabin fi gbetin na a baba ma.” **18** “I nama yiimatoon lu a nii ra.” **19** “Naxan yo nun suben na kafu i xa a faxa.” **20** “Naxan yo na saraxan ba ala gbetɛne xa, ba Alatala kedenna ra, i xa a faxa.” **21** “I nama xɔjɛn tɔɔ, i nama jɔxɔ a ra, amasɔtɔ xɔjɛn nan yi ɛ ra Misiran yamanani.” **22** “I nama jɔxɔ kaja gilen na, hanma kiridina. **23** Xa i jɔxɔ e ra, e yi e xuini te n ma, n na e xuiin namɛma nɛn yati! **24** N xolɔma nɛn, n yi i faxa silanfanna ra, i ya jɔxanle yi findi kaja gilene ra, ɛ diine yi findi kiridine ra.” **25** “Xa i gbetin doli yiigelitɔna nde ma n ma yamani, i nama findi doli maxinla ra, i nama tɔnɔ yo fen a ra. **26** Xa i i bodena domaan suxu tolimani, i xa a raxɛtɛ a ma benun sogen xa bira. **27** Amasɔtɔ xa a sa li, a domaan nan a bitinganna ra, a naxan felenma a ma xunbenli, a xa a sa nanse ma? Xa a n maxandi, n na a xuiin namɛma nɛn. Amasɔtɔ n tan kininkinin.” **28** “I nama Ala rayelefu, i nama i ya yamaan mangan danga.” **29** “N gbee naxan i ya se xabaxine nun i ya turen fari i nama bu na fidɛni n ma. I xa i ya dii xɛmɛ singen so n yii. **30** I mɔn yi i ya jingen dii singen so n yii e nun i ya yɛxɛɛna. A xa lu a nga bun xii sennin, a xii soloferɛdeni, i yi a so n yii.” **31** “N ma muxu

sarijanxine nan ε tan na. Nanara, ε nama sube yo don burunna subene naxan faxaxi. Ε xa a woli barene bun.”

23 “I nama wule falane rali muxune ma. I nama kafu fe jaxi rabane ma wule seren badeni. **2** I nama bira yamaan fɔxɔ ra fe jaxi rabadeni. I nama sa yamaan fari, i wule seren ba alogo kitin nama sa tinxinni. **3** I nama yiigelitɔɔn nafisa bonne xa kitini.” **4** “Xa i naralan i yaxuna jinge tununxin na hanma a sofanla, i xa fa a ra a ye ra. **5** Xa i i yaxuna sofanla to, a biraxi a goronna bun, i nama a lu na kiini. I xa a mali.” **6** “I nama tondi kiti kenden se tɔɔ muxun xa a kitini. **7** I xa fata wulen birin ma. I nama sɔntaren hanma tinxin muxun yalagi, a yi faxa. Amasɔtɔ n muxu jaxine yalagima nen. **8** I nama dimi yi seene rasuxu mayifuni, amasɔtɔ finmase sifani itoe muxune yeene raxima, e tinxin muxune falane maxete.” **9** “I nama jaxu xɔjene ra, bayo i ya a kolon xɔjene tɔɔyaan naxan yi, amasɔtɔ i findi nen xɔjen na Misiran yamanani.” **10** “I ya xeene bi jee sennin bun ma, i yi sii seene xaba. **11** Koni i nama xeen bi i ya bɔxɔni jee solofereden ma. A xa lu a yete ma. Tɔɔ muxune yi seen sɔtɔ a xɔnni nayi, naxan na lu burunna subene yi na don. I xa na fan liga i ya manpa bili nakone nun Oliwi binle ra.” **12** “I ya wanla ke xii sennin bun. Koni i xa i matabu xii soloferedeni, alogo i ya jingen nun i ya sofanla xa e matabu, alogo i ya konyin nun i ya xɔjen xa e matabu.” **13** “N naxan birin falaxi, i xa ne suxu ki fajil! I nama ala gbete xinxla fala. A nama mini i de mume!” **14** “Dɔxɔ saxan jee bun, i xa sanle liga n xa. **15** I xa Buru Tetaren Sanla raba. I xa burun tetaren don xii solofere bun, alo n ni i yamari kii naxan yi. Ito liga a waxatini Abiba kiken na, amasɔtɔ i minixi Misiran yi na kiken nan na. Muxu yo nama fa n yetagi n kise mi a yii.” **16** “I xa Se Xaba Singen sanla raba, i na i ya se bixine xaban fɔlɔ xeen ma waxatin naxan yi. I mɔn xa Se Xaba Dɔnxen sanla raba jee rajanni, i ya bogiseene malanma waxatin naxan yi keli xeen ma. **17** Muxune birin fama nen Marigina Alatala yetagi dɔxɔja ma saxan jee bun.” **18** “I na saraxan wunla rali n ma, i nama donse gbete sa a fari burun nate seen naxan yi. I nama n ma sanla saraxa subene turen namara han xɔtɔnni. **19** I xa fa i ya xeen bogise singe fajine ra Alatalaa banxini, i ya Ala.” “I nama sii diin jin a nga xije igen na.” **20** “N malekan xema nen i yeε ra, a i

kantan kira yi, a i rafa na yireni n denaxan yitɔnxi. **21** A liga i yeren ma, i yi a xuiin suxu. I nama murute a ma, amasɔtɔ a mi dijama i ya matandine ma, bayo n na a xexi n xinla nin. **22** Koni xa i ya a xuiin name, n naxan birin falama i xa i na liga, n findima nen i yaxune yaxun na, e nun i yengefane yengefana. **23** N ma malekan tima nen i yeε ra, a i xali Amorine nun Xitine nun Perisine nun Kanan kaane nun Xiwine nun Yebusune bɔxɔn ma, n yi e raxori.” **24** “I nama i xinbi sin e alane bun ma, i nama e batu, i nama bira e namunne fɔxɔ ra. Koni i xa e kala, i yi e kide gemene yibo. **25** Ε xa Alatala batu, ε Ala. A barakan sama ε donseene nun ε igene yi nen. N furen masiga ε ra. **26** Naxalan yo kui mi kalama i ya yamanani, jaxalan yo mi finde gbantan na. N ni i ya siimayaan xɔnkuyama ayi nen.” **27** “N na n ma yeεragaxun nasigama nen ε yeε ra. I na so yamanan naxan yi, n na muxune yifuma nen. N na ε yaxune birin xun xanbi soma nen ε yetagi, e yi e gi ε bun. **28** N jurune rasigama nen, e yi Xiwine, Kanan kaane, nun Xitine kedi i yeε ra pon! **29** N mi e birin kedima ε yeε ra jee kedenni, xanamu, yamanani gelima nen, burunna subene yi wuya ε xa. **30** N na e kedima nen ε yetagi ndedi ndedi, han ε wuya ayi, yamanan yi findi ε gbeen na.” **31** “N na ε yamanan danne sama nen keli Gbala Baani han Filisitine baani, keli tonbonni han Efirati baani. Amasɔtɔ n yamanan muxune sama nen i sagoni alogo i xa e kedi i ye ra. **32** Ε nun ne nama layirin xidi, e nun e alane fan. **33** E nama dɔxɔ i ya bɔxɔni, alogo e nama i ti yulubin ma. Amasɔtɔ i ye e suxurene batuma nen, e suxurene yi lu alo luti ratixina i yeε ra.”

24 Alatala yi a fala Musa xa, a naxa, “Te n fema, i tan nun Haruna, Nadaba, Abihu nun Isirayila fonna tonge solofere, ε yi ε xinbi sin wulani. **2** Musa kedenna nan a masoma Alatala ra, bonne nama e maso, yamaan nama te a fɔxɔ ra.” **3** Musa yi Alatalaa falane birin yeεba yamaan xa e nun a sariyane birin. Yamaan birin yi a yabi fala kedenna xɔn, e naxa, “Alatala naxan birin falaxi nxu a lige.” **4** Musa yi Alatalaa falane birin sebe. Na xanbi ra, a keli xɔtɔn, a yi saraxa gandena nde rafala geyaan san bun, a yi geme fu nun firin dɔxɔ Isirayila bɔnsɔn fu nun firinne taxamasenna ra. **5** A yi Isirayila banxulanndee rasiga, e xa saraxa gan daxine ba, e yi tura bulanne ba bɔje xunbeli saraxan na Alatala xa. **6** Musa yi wunla fɔxɔ kedenna sa goronne kui, a fɔxɔ kedenna xuya

saraxa ganden ma. 7 A yi Layiri Kedin tongo, a a xaran Isirayila birin yeɛ x̄ori. E yi a fala, e naxa, “Alatala naxan birin falaxi nxu a lige, nxu yi a suxu.” 8 Musa yi wunla tongo, a a xuya yamaan ma, a naxa, “Wunli ito nan layiri xidi seen na, Alatala to yamarini itoe fi.” 9 Musa nun Haruna nun Nadaba nun Abihu nun Isirayila fori tonge soloferene yi te. 10 E yi Isirayilaa Ala to tixi gẽme walaxan fari, naxan yi rafalaxi safiri gẽmene ra, naxan yi sarinjan alo kore x̄onna. 11 Koni, Ala mi fe liga Isirayila yeɛratini itoe ra. E yi Ala mato, e yi e dege, e yi e min. 12 Alatala yi a fala Musa xa, a naxa, “Te geyaan fari, i lu n fẽma. N gẽme walaxane soma i yii nẽn, n sariyane nun yamarine seɓe e ma yamaan xaran feen na.” 13 Musa yi keli, e nun a mali muxun Yosuwe, e yi te Alaa geyaan fari. 14 A yi a fala fonne xa, a naxa, “E nxu mame be han nxu yi fa e fẽma. Haruna nun Xuru luma nẽn e fẽma. Xa fenda sa bira ayi, e a fala e xa.” 15 Musa yi te geyaan fari, kundaan yi so geyaan xun na. 16 Alaa n̄or̄on yi godo Sinayi geyaan ma. Kundaan yi so geyaan xun na xii sennin. Xi soloferede l̄ox̄oni, Alatala yi Musa xili kundani. 17 Alatalaa n̄or̄on yi lu Isirayila kaane yeɛ ra yi alo halagi ti t̄een nan degeɛma geyaan fari. 18 Musa yi so kundani, a te geyaan fari. Musa yi lu geyaan fari xii tonge naanin k̄eɛ tonge naanin.

25 Alatala yi a fala Musa xa, a naxa, 2 “A fala Isirayila kaane xa a e xa fa yii malan seene ra n x̄on. Muxune birin xa fa a ra e j̄enige fajin nan na, i yi a rasuxu n xa. 3 I kiseni itoe nan nasuxuma e ra: X̄emana, gbetina, sulana, 4 gari mamiloxin nun a gbeela, taa dugi fajin nun sii xabe dugine, 5 konton kidi magbelixine, sube kidine, kasiya wudina, 6 lenpu turena, e nun se xiri j̄axumen naxanye sama se masusan tureni, e nun wusulanna, 7 onixin gẽme tofajine nun gẽme tofaji gbet̄eye saraxarali domaan nun a kanke masaan nayabuxi naxanye ra. 8 E xa yire sarinjanxin nafala n xa, n luma nẽn e tagi. 9 E xa Ala Batu Bubun nafala e nun a waliseene birin alo n na a yitama i ra kii naxan yi.” 10 “E xa kasiya wudi kankiraan nafala: A kuyana n̄onḡonna ye firin e nun a tagi, a yigbona n̄onḡonna ye keden e nun a tagi, a yitena n̄onḡonna ye keden e nun a tagi. 11 I x̄ema fajin sa a ma. I xa a sa a kuiin nun a fanna ma. I xa a de kinkin nabilin x̄emaan na. 12 I xa a tongo tamine so yili naaninne rafala x̄emaan na a san naaninne ma, firin f̄ox̄o kedenni, firin bode f̄ox̄oni.

13 I xa kasiya tamine rafala, i x̄emaan sa e ma. 14 I tamine raso x̄ema yinle ra kankiraan d̄ex̄onne yi, alogo e xa findi kankiraan xali seen na. 15 Tamine xa lu kankiraan so yinle ra, e nama ba na. 16 I xa Layiri Sereyaan sa kankiraan kui, n naxan soma i yii. 17 I xa x̄ema deraganla rafala kankiraan ma n solonaden na, a kuyana n̄onḡonna ye firin e nun a tagi, a yigbona n̄onḡonna ye keden e nun a tagi. 18 I xa maleka gubugubu kan sawura firin nafala x̄ema b̄onb̄oxin na, e xa ti kankiraan deraganla f̄ox̄o firinne ma. 19 I xa maleka sawura keden ti f̄ox̄o kedenni, i yi a firinden ti bode f̄ox̄oni. Maleka sawurane nun kankiraan deraganla xa findi se kedenna ra. 20 Maleka sawurane xa e gubugubune yibandun e xun ma, e yi e felen kankiraan deraganla ma. Maleka sawurane xa e yeɛ rafindi e bode ma e xun sinxina kankiraan deraganla ma. 21 I na Layiri Sereyaan sa kankiraan kui, i xa a deraganla sa a de ra. 22 N na n yitama i ra menna nin, Layiri Sereya Kankiraan deraganla xun ma, maleka gubugubu kan firinne sawurane lonḡonna ra. N na n ma yamarine birin soma i yii menna nin Isirayila kaane xa.” 23 “I xa kasiya wudin tabanla rafala: a kuyana n̄onḡonna ye firin, a yigbona n̄onḡonna ye keden, a yitena n̄onḡonna ye keden e nun a tagi. 24 I xa x̄ema fajin sa a ma, i yi a de kinkin nabilin x̄emaan na. 25 I xa farinna sa tabanla j̄ninḡinna ma a rabilinni. Farinni gboon xa lan muxun yii kuiin ma. I yi x̄emaan sa farinna de kinkine ra. 26 I xa a tongo tamine so yili naaninne rafala x̄emaan na tabanla tongon naaninne ma a sanne ma. 27 Tamine so yinle luma a de kinkine nan ma, tamine soon naxanye ra tabanla maxali seen na. 28 I xa kasiya tamine rafala, i yi x̄emaan sa e ma, e findi tabanla xali seen na. 29 I xa a goronne nun muranne rafala x̄ema fajin na, e nun a igelengenne, saraxa ige rab̄ox̄on goronne. 30 Buru Ralixine xa lu tabanli ito fari n yetagi waxatin birin.” 31 “I xa lenpu d̄ox̄o seen nafala x̄ema b̄onb̄oxi fajin na. A sanna nun a yiine xa rayabu se fuge sawurane ra e birin yi findi se kedenna ra. 32 Yii sennin xa ti a f̄ox̄o firinne ma, lenpu d̄ox̄oden yire saxan yi lu a f̄ox̄o kedenni, a yire saxan a f̄ox̄o bodeni. 33 Amandi wudi fuge sawura saxan saxan xa lu a yii senninna birin ma a rayabu seen na. 34 Se fuge sawura naanin xa lu a binla fan ma. 35 Keden xa lu a tangbaxi singen bun ma. Keden yi lu a firinden bun ma, keden yi lu a saxanden bun ma. 36 A fugene, a yiine, nun a binla birin xa findi se kedenna ra. A

birin xa rafala xema bonboxi fajin na. 37 I xa lenpu solofere rafala, i yi ne dɔxo e dɔxodene yi alogo e xa a yetagini yalan. 38 A waliseene nun xube kɔ seene fan xa rafala xema fajin na. 39 I xa lenpu dɔxo seen nun a waliseene rafala xema fajin kilo tonge saxan na.” 40 “A liga i yeren ma, i yi e rafala alo n na misaala yitaxi i ra geyaan fari kii naxan yi.”

26 “I xa Ala Batu Bubun nafala taa dugi kuye fajin fu ra, dugi mamiloxin nun a gbeela. E yi rayabu Maleka gubugubu kan sawura sɔxɔnxine ra. 2 Dugine birin kuyan nun a yigboon xa lan: a kuyana nɔngɔnna ye mɔxɔɲɛn nun solomasexe, a yigbona nɔngɔnna ye naanin. 3 I xa dugi suulun dege e bode ra, dugi suulunna bonne fan dege e bode ra. 4 I xa luti mamiloxine ti dugi ratugunxine singe ra xiin de kinkin na. I mɔn yi na liga a ratugunxin dɔnxɛ ra xiin na. 5 I xa luti tonge suulun ti dugi ratugunxine singe ra xiin na, i mɔn yi luti tonge suulun ti dugi ratugunxin bonne dɔnxɛ ra xiin fan na. Lutine xa lan e bode ma. 6 I xa suxu se xema daxin tonge suulun nafala i yi dugi ratugunxi firinne xidi e bode ra suxu seene ra. Nayi, Ala Batu Bubun yi findi se kedenna ra.” 7 “I xa dugi fu nun keden nafala sii xabene ra, e findi Ala Batu Bubun xunna soon na. 8 Dugi fu nun kedenne birin xa lan: e kuyan xa findi nɔngɔnna ye tonge saxan na, e yigbona nɔngɔnna ye naanin. 9 I xa dugi suulun dege e bode ra e danna, i senninna bonne fan dege e bode ra. I xa a senninden i sa firinna ra bubun yetagi. 10 I xa luti tonge suulun ti dugi ratugunxine singe ra xiin de kinkine ra, i mɔn yi luti tonge suulun ti dugi ratugunxin bonne fan dɔnxɛ ra xiin de kinkine ra. 11 I xa suxu se sula daxi tonge suulun nafala, i yi lutine ti suxu seene ra. Nayi, i yi bubun findi kedenna ra. 12 Na dugin tagin naxan minixi bonne xa, na xa singan Ala Batu Bubun xanbi ra. 13 Dugi nɔngɔnna ye keden naxan minixi Ala Batu Bubun dɛxɔnne yi, na xa singan a dɛxɔnne ra a xunna soon na.” 14 “I xa konton kidi magbelixine dege e bode ra, i yi e sa bubun birin fari. I mɔn yi sube kidi fajin gbete ye fan sa na fari.” 15 “I xa bubun xunna soon bun tiine rafala kasiya wudine ra. 16 Bun tiine xa kuya ayi nɔngɔnna ye fu, e yi gbo ayi nɔngɔnna ye keden e nun a tagi. 17 Bun ti kedenna kui, a xa ti farin firinna ra e bode yetagi. I xa bubun bun tiine birin ti na kiini. 18 I xa bun ti mɔxɔɲɛ rafala bubun yiifari fɔxɔn ma. 19 I xa bundɔxo gbeti daxi tonge naanin nafala. Bun ti yo

bun ti, bundɔxo firin. Farin firinne xa sɔti bundɔxɔne kui. 20 I xa bun ti mɔxɔɲɛ ti bubun kɔmɛn fɔxɔni, 21 e nun bundɔxo gbeti daxi tonge naanin, bun ti yo bun ti, bundɔxo firin. 22 I xa bun ti sennin ti bubun xanbi binni, sogegododen binni. 23 I xa bun ti firin sa a fari bubun xanbi ra tongonne ma. 24 Bun ti firin xa ti e bode xɔn menni. E xidi e bode ra keli laben na han e xun tagi. Bubun tongon firinne birin xa ti na kiini. 25 E birin malanxina, bun ti solomasexe e nun bundɔxo fu nun sennin. Bun dɔxo firin bun tiine birin bun. 26 I xa kasiya wudi gaalane rafala. Suulun xa lu bubun fɔxo kedenna bun tiine suxu seen na, 27 suulun xa lu bode fɔxɔn ma, suulun xa lu bubun xanbi binna ra, sogegododen binni. 28 Gaalan tagi xiin bun tiine ma, na xa keli bubun fɔxo kedenni siga han bubun bode fɔxɔna. 29 I xa xemaan sa bun tiine ma. I xa gaalane so yinle rafala xemaan na. I xemaan sa gaalane ma.” 30 “I xa Ala Batu Bubun ti alo a yitaxi i ra kii naxan yi geyaan fari.” 31 “I xa kankiraan ye masansan taa dugin nafala gari mamiloxin nun a gbeela ra, a xa rayabu maleka gubugubu kan sawura sɔxɔnxine ra. 32 I xa a singan kasiya senbeten naanin na xema yilenlɛnxine saxi naxanye ma, singan se xema daxi naxanye ma. E xa ti bundɔxo gbeti daxi naanin kui. 33 I xa ye masansan dugin singan, i Layiri Sereya Kankiraan nasoon menma nin. Ye masansan dugin findima tagi saan nan na yire sarijanxin nun yire sarijanxi fisamantenna tagi.” 34 “I xa deraganla sa Layiri Sereya Kankiraan de ra n solonaden na yire sarijanxi fisamantenna kui. 35 I xa tabanla ti ye masansan dugin yetagi, bubun kɔmɛn fɔxɔni. Lenpu dɔxo seen xa ti tabanla yetagi, bubun yiifari fɔxɔn ma.” 36 “Dugi sɔxɔnna xa taa dugi mamiloxin nun a gbeela sɔxɔn, i yi a singan Ala batu bubun de ra. 37 I xa singan se xema daxin nafala dugini ito xa e nun kasiya senbeten suulun, i xema yilenlɛnxine sa e ma, i yi bundɔxo sula daxin suulun naxulun e xa.”

27 “I xa saraxa ganden nafala kasiya wudin na, a kuyan xa lan nɔngɔnna ye suulun ma, a yigbona nɔngɔnna ye suulun, a yitena nɔngɔnna ye saxan. 2 I xa feri keden keden nafala a tongon naaninne ma, e nun a fenne xa findi se kedenna ra i yi sulan sa e ma. 3 I xa a waliseene rafala sulan na: xube sa seene nun xube kɔ seene nun wuli xuya goronne nun sube tongo seene e nun tɛɛ kɔ seene. 4 I xa wure masɔxɔnxin nafala, xuben minin naxan na. I yi tamin so yili naanin

nafala sulan na wure masoƙoƙin tongon naaninne ma. 5 I xa wure masoƙoƙin sa saraxa ganden de kinkine bun ma a yiteen tagini. 6 I xa kasiya tamine rafala saraxa ganden xa, i yi sulan sa e ma. 7 I xa tamine raso sula yinle ra alogo tamine xa lu saraxa ganden foƙo firinne ma, a xali seen na. 8 I xa saraxa ganden nafala farinne ra, a kui genla yi lu. A xa rafala alo n na a yitaxi i ra kii naxan yi geyaan fari.” 9 “I xa Ala Batu Bubun nabilin sansanna ra. Sansanna yiifari foƙo xa kuya han nongoƙna ye keme, a ti taa dugi fajine ra. 10 Sula senbeten moƙoƙe xa ti sula bundoƙo moƙoƙe kui, e nun dugi singan se gbeti daxine xa singan gbeti gaalane ra senbetenne longonne ra. 11 Koƙen foƙo sansanna fan xa kuya ayi han nongoƙna ye keme, a fan yi ti taa dugi fajine ra e nun sula senbeten moƙoƙe, sula bundoƙo moƙoƙe e nun dugi singan se gbeti daxine nun gbeti gaalane senbetenne longonne ra. 12 Sogegododen binni, sansanna xa kuya ayi han nongoƙna ye tonge suulun, a xa ti dugine ra e nun senbeten fu, e nun bundoƙo fu. 13 A sogeteden binni, soden denaxan yi, sansanna moƙo xa kuya ayi han nongoƙna ye tonge suulun. 14 Koni dugine xa singan soden foƙo kedenni, e nun senbeten saxan nun bundoƙo saxan han nongoƙna ye fu nun suulun. 15 Dugine xa singan soden foƙo bodeni, e nun senbeten saxan e nun e bundoƙo saxan han nongoƙna fu nun suulun. 16 I xa de raxidi dugin singan sansanna so deen na, naxan kuya han nongoƙna ye moƙoƙe. Dugi soƙonne xa a rafala gari mamiloxin nun a gbeela ra, e nun taa dugi fajina. Senbeten naanin nun bundoƙo naanin fan xa ti menni. 17 Sansanna senbetenne birin xa ti sula bundoƙone kui, e xa tugun e bode ra gaalan gbeti daxine ra dugi singan se gbeti daxine yi singan ne ra. 18 Sansanna kuyan xa findi nongoƙna ye keme, a yigbona nongoƙna ye tonge suulun, a taa dugi fajine yitena nongoƙna ye suulun. Sansanna bundoƙone findima sulan nan na.” 19 “Se yo naxan nawalima Ala Batu Bubun wanle yi, e nun tamin naxanye gbangbanma boƙoni bubun bun tiine xidi seen na, hanma sansanna xidi seen na, ne birin xa rafala sulan na.” 20 “I xa Isirayila kaane yamari e xa fa oliwi ture fajin na i xon, alogo lenpune xa dege waxatin birin. 21 Haruna nun a diine xa lenpune doƙo Layiri Kankiraan ye masansan dugin yetagi Naralan Bubun kui. A xa dege jinbanna ra han xotoƙni Alatala yetagi. Habadan sariyan nan na ra Isirayila yixeten muxune birin xa.”

28 “I xa i tada Haruna xili e nun a diine Nadaba nun Abihu nun Eleyasari e nun Itamara, e xa wali n xa Isirayila kaane tagi alo saraxaraline. 2 I xa dugi sarijanxine dege i tada Haruna xa alogo a xa binyen nun xunnayerenna soƙo. 3 I xa falan ti walikeen birin xa naxanye fatan, n bata xaxili fajin fi naxanye ma fe sifani itoe fe ra. E xa Harunaa dugine dege, alogo a xa sarijan, a yi saraxarali wanle ke n xa. 4 E xa maraberiba sifani itoe nan dege: Kanke masaan nun saraxarali domain nun gubaan nun a doma bun bira fajin nun namuna e nun tagixidina. E xa maraberiba sarijanxini itoe dege i tada Haruna nun a diine xa, alogo e xa saraxarali wanle ke n xa. 5 Dugi soƙonne xa xemaan nawali, e nun gari mamiloxin nun a gbeela nun taa dugi fajina.” 6 “E xa saraxarali domain xema daxin dege gari mamiloxin nun a gbeela ra, e nun taa dugi fajina, a findi wali fajin na. 7 E xa a tungunne dege, e lutine ti e xun firinne ma a xidi seen na. 8 A tagixidi fajin fan degema na kii nin: E nun saraxarali domain xa findi kedenna ra. A rafalama xemaan nun gari mamiloxin nun a gbeela nun taa dugi fajin nan na. 9 I xa onixi geme firin tongo, i yi Isirayilaa diine xinle kerenden e ma. 10 Xili sennin xa lu geme kedenna ma, xili sennin yi lu gemen boden ma, fata e bari yeƙen ma. 11 I xa Isirayila kaane xinle kerenden geme firinne ma, alo taxamasenna kerendenma kii naxan yi, i yi e sa geme suxu se xema daxine kui. 12 I xa na geme firinne ti saraxarali domain tungunne ma, alo joƙo lu gemene Isirayilaa diine xon. Haruna e xinle xalima nen a tungunne ma Alatala fema joƙo lu feen na e xon. 13 I xa gemene suxu seene rafala xemaan na, 14 i yi xema fajin yolonxondi firin singan e ra, naxanye denbexi alo luti firin.” 15 “I xa kanke masaan dege, kitisa sena. A xa findi wali fajin na. I xa a rafala alo saraxarali domain. A rafala xemaan nun gari mamiloxin nun a gbeela nun taa dugi fajin na. 16 A xa rafala tongon naaninna ra. A xa yisa firinna ra, a kuyan nun a yigbona nongoƙna tagi. 17 I xa a rayabu geme fajin kira naanin na. I xa gemeni itoe nan sa a kira singen ma: saridon gemen nun topasi gemen nun emerodi gemena. 18 A kira firindena: esikaribukili gemen nun safiri gemen nun dayimu gemena. 19 Kira saxandena: opali gemen nun agati gemen nun ametisi gemena. 20 Kira naanindena: kirisoliti gemen nun onixi gemen nun yasipi gemena. Gemeni itoe xa sa geme suxu se xema daxine kui. 21 Geme fu nun firinne luma Isirayilaa diine nan xili yi. Geme

yo gema, i xa Isirayila bõnsõn keden xinla kerenden a ma taxamasenna ra. 22 I xa xema yõlõnxõndine rafala kanke masaan xa, naxanye denbexi alo lutina. 23 I xa wuredi digilinxi xema daxin firin nafala i yi e so kanke masaan xunne ra. 24 I xa yõlõnxõndine xidi wuredine ra kanke masaan xunne ma, 25 i yi e so suxu se xema daxine ra, e yi singan saraxarali domaan tungun firinne ra a kanke ra. 26 I mõn xa xema wuredi digilinxi firin nafala i naxanye singanma kanke masaan sanna bun ma a kui. 27 I mõn xa xema wuredi digilinxi firin nafala i yi e singan saraxarali domaan tungun firinne laben na, a tagixidin faxa ra. 28 I xa kanke masaan wuredine nun saraxarali domaan wuredine xidi e bode ra luti mamiloxin na, alogo kanke masaan nama saraxarali domaan bepin. 29 Haruna na so yire sarijanxini waxatin naxan yi, a Isirayila diine xinle xalima nen a kanke ra kitisa seen ma, kanke masana. Nõxõ lu feen nan na ra Alatala yetagi Isirayila diine xõn waxatin birin. 30 I xa masensen ti seene, Yurima nun Tumin sa kanke masaan yibaan kui. E xa lu Haruna kanke ra a na fa Alatala yetagi waxatin naxan yi. Nayi, Haruna Ala sagoon kolon seene xalima nen a kanke ra Isirayila kaane xa waxatin birin Alatala yetagi.” 31 “I xa dugi mamiloxin dege gubaan na naxan soma saraxarali domaan fari. 32 A kõeen xa lu a tagini, i yi dugina nde dege a rabilinni alogo a nama bõ. 33 I xa girenada wudi bogi sawurane dege gari mamiloxin nun a gbeela ra a lenbene ma, i yi xema talandine singan e longori ra. 34 Xema talanne xa singan girenada wudi bogi sawurane longori ra gubaan lenben nabilinna birin yi. 35 Haruna xa gubaan so a nema wale waxatin naxan yi alogo a nama faxa. Talanne xuiin minima nen a na so yire sarijanxini waxatin naxan yi Alatala yetagi hanma a na mini.” 36 “I xa xema walaxadin nafala, i yi taxamasenni ito kerenden a ma fa fala, ‘Muxu Sarijanxina Alatala Xa.’ 37 I yi a xidi luti mamiloxin na namun ma a tigi ra. 38 A luma nen Haruna tigi ra, Isirayila kaane hake goronne yi lu Haruna xun ma e naxanye tongoxi saraxa sarijanxine badeni. A luma nen a tigi ra waxatin birin yi alogo e xa rafan Alatala ma.” 39 “I xa taa dugi fajni dege doma bun biran na. I yi taa dugi fajin nafala namun na. Dugi sõxõnna xa tagixidin nafala.” 40 “I xa dugine dege Harunaa diine xa, i yi tagixidine rafala e xa, i yi xun tagixidine rafala e xa alogo e xa binyen nun xunnayerenna sõtõ. 41 I xa i tada Haruna maxidi e nun a diine. I xa e xunne

masusan turen na, i yi e findi saraxaraline ra, i yi e rasarijan alogo e xa saraxarali wanla ke n xa. 42 I xa wantanne dege e xa, e ragenla nama lu, keli e tagiin ma han e danbane. 43 Haruna nun a diine xa e so benun e xa siga Naralan Bubun kui, hanma e nema maso saraxa ganden na walideni yire sarijanxini. Nayi, e mi yulubin tongoma e faxa. Habadan sariyan na a ra Haruna xa e nun a yixetene birin.”

29 “I xa saraxaraline rasarijan ikii nin alogo e xa wanla ke n xa: Tura bulan keden tongo e nun konton firin fe mi naxanye ra. 2 I xa burun gan murutu fupji fajin na, buru rate se mi naxan yi, i mõn yi nde gan turen naxan yi e nun buru yilenlennine turen saxi naxanye ma. 3 I xa e sa deben kui i yi e rali n ma, e nun turaan nun kontonne. 4 I xa Haruna nun a diine ti Naralan Bubun de ra, i yi e maxa. 5 I xa dugine tongo, i yi doma bun biran nun gubaan nun saraxarali domaan nun kanke masaan nagodo Haruna ma. Saraxarali domaan xidi a tagi, a tagixidi fajin na. 6 I xa namun so a xun na, i yi taxamaseri sarijanxin xidi namun na. 7 I xa masusan turen tongo, i yi a sa Haruna xunni, a sugandi feen na. 8 I yi a diine fan nafa, i yi dugine ragodo e ma. 9 I xa e tagi xidi tagixidin na, i yi e xun tagixidine xidi. Habadan sariyan na a ra, saraxaraliyaan bata findi e gbeen na. Na kiini, i xa Haruna nun a diine dõxõ saraxaraliyani.” 10 “I xa turaan ti Naralan Bubun yetagi, Haruna nun a diine xa e yiine sa turaan xunna fari. 11 I xa turaan kõe raxaba Alatala yetagi Naralan Bubun so deen na. 12 I xa turaan wunla tongo, i yi a sa saraxa ganden tongonne fenne ma i yii sonla ra. I xa wuli dõnxen nabõxõn saraxa ganden dõxõn ma. 13 Ningen turen naxan birin a fatini e nun farafaran naxan a bõjen ma e nun a gbingi ra xe le firinne nun e turene, i yi ne sa tẽeni saraxa ganden fari.” 14 “Koni i xa turaan suben nun a kidin nun a gbiin woli tẽeni yamaan daaxaden fari ma. Yulubi xafari saraxan na a ra. 15 I xa konton keden tongo. Haruna nun a diine xa e yiine sa kontonna xunna ma. 16 I xa a kõe raxaba, i yi a wunla tongo, i yi a so saraxa ganden dõxõnne birin ma. 17 I xa kontonni bolon dungi dungin na, i yi a kui seene nun a sanne maxa, i ne sa a sube dungine nun a xunna fari. 18 I xa kontonna birin sa tẽeni saraxa ganden fari. Saraxa gan daxin na a ra Alatala xa, naxan xiri rafan Alatala ma. A ralima Alatala ma tẽen nan na.” 19 “I xa kontonna firinden tongo, Haruna

nun a diine xa e yiine sa kontonna xunna ma. 20 I xa a kœ raxaba, i yi a wunla tongo, i yi a sa Haruna nun a diine yiifari ma tunle ra, e nun e yiifari ma yii konkoribane ra e nun e yiifari ma san konkoribane ra. I yi wunla so saraxa ganden dexonne birin ma. 21 I xa wunla nde tongo saraxa ganden fari, e nun masusan turena, i yi a xuya Haruna nun a dugine ma, e nun a diine nun e dugine ma. Nayi, Haruna nun a diine nun e dugine sarijanma nen. 22 I xa kontonna turen tongo, e nun a xunla nun turen naxan a kui seene ma e nun farafaran naxan a bojen ma e nun a gbingi ra xele firinne nun e turena, e nun a yiifari ma danbana. Amasoto saraxaraliin doxo kontonna na a ra. 23 I mon xa burun natetarena ndee tongo deben kui naxan Alatala yetagi: buru xun keden, buru keden naxan nafalaxi turen na e nun burudi keden. 24 I xa ne birin so Haruna nun a diine yii, e yi e mayita Alatala ra kise ralixin na. 25 Na xanbi ra, i yi e ba e yii, i yi e sa teeni saraxa ganden fari, e nun saraxa gan daxina. A xirin yi rafan Alatala ma. A ralima Alatala ma teen nan na. 26 I xa na kontonna firinden kanken tongo i yi a mayita Alatala ra kise ralixin na. Na yi findi i gbeen na. 27 I xa kontonna kanken nun a danban nasarijan Haruna nun a diine xa, i naxanye ralixi n ma. 28 Nanara, Isirayila kaane sube dungini itoe nan soma Haruna nun a yixetene yii, e na boje xunbeli saraxan ba waxatin naxan yi. Na nan luma Alatala xa.” 29 “Haruna na faxa, a dugi rasarijanxine findima a diine nan gbee ra, alogo ne fan xa e so, e fan yi masusan, e doxo saraxaraliyani. 30 Saraxaraliin naxan fama Haruna dangu xanbini, na a dugine soma nen xii solofere, benun a xa so Naralan Bubun kui walideni yire sarijanxini.” 31 “I xa saraxaraliin doxo kontonna tongo, i yi a suben jin yire sarijanxina nde yi. 32 Haruna nun a diine yi a don Naralan Bubun so deen na, e nun burun naxan deben kui. 33 E tan nan se ralixini itoe donma naxanye bata rawali Ala solona feen nun e doxo feen nun e rasarijan feen na. Muxu gbete nama e don, amasoto e sarijan. 34 Xa sube donxen lu hanma buruna han xotonna, i xa a woli teeni. A mi donma, amasoto a sarijan. 35 I xa a liga Haruna nun a diine xa alo n ni i yamarixi kii naxan yi. I xa xii solofere ti e doxo feen na. 36 I xa tura keden ba Ala solona seen na loxo yo loxo. Na nan saraxa ganden nasarijanma, i mon yi a masusan turen na alogo i xa a rasarijan. 37 I xa Ala solona xii solofere bun ma. Na xanbi ra, saraxa ganden sarijanma nen

fefe! Naxan yo nema a yiin dinye saraxa ganden na fo na xa sarijan.” 38 “Ito nan bama saraxa ganden fari loxo yo loxo waxatin birin: yexee dii firin, jee keden kedenna. 39 Kedenna xa ba xotonna, bonna jinbanna ra. 40 Yexee singen xa ba e nun murutu fuji fajin kilo saxan naxan basanxi oliwi ture faji litiri keden nun a tagi ra. Wudi bogi igena alo manpana, na litiri keden nun a tagi fan xa boxon saraxan na. 41 Yexeen firinden xa ba jinbanna ra e nun bogise saraxan nun minse saraxana alo a bama xotonna kii naxan yi. A xirin yi rafan Ala ma. A ralima Alatala ma teen nan na. 42 Mayixete famatone xa saraxa gan daxini ito ba waxatin birin Naralan Bubun so deen na Alatala yetagi. N naralanma e ra menna nin n yi falan ti e xa. 43 N naralanma Isirayila kaane ra menna nin, na yiren yi sarijan n ma noron xon. 44 N Naralan Bubun nasarijanma nen e nun saraxa gandena. N yi Haruna nun a diine rasarijan alogo e xa saraxarali wanla ke n xa. 45 N luma nen Isirayila kaane tagi, n findi e tan ma Ala ra. 46 E a kolonma nen a Alatala nan n tan na, e Ala, naxan e raminixi Misiran yi, alogo n xa lu e tagi. Alatala nan n tan na, e Ala.”

30 “I xa wusulan ganden nafala kasiya wudin na.

2 A xa kuya yi nongonna ye keden, a yigbona nongonna ye keden, a yitena nongonna ye firin. I xa feri keden nafala a tongon naaninne ma, e nun wusulan ganden yi findi se kedenna ra. 3 I xa xema fajin sa a fanna nun a dexonne nun a fenne ma, i yi xemaan sa a rabilinni a jinginne ma. 4 I xa tami raso yinla xema daxon firin nafala wusulan ganden jinginne bun ma alogo a tongo tamine xa raso a foxo firinne ra. 5 I xa kasiya wudin nafala tamine ra, i yi xemaan sa e ma. 6 I xa wusulan ganden ti dugin yetagi Layiri Sereya Kankiraan ye masansanxi naxan na, n solonama denaxan yi, n naralanma i ra denaxan yi. 7 Haruna xa wusulanna gan xoton yo xoton, a nema lenpune yitonje waxatin naxan yi. 8 A mon xa a gan jinbari yo jinbari, a nema lenpune radege waxatin naxan yi. Nayi, wusulanna ganma nen Alatala yetagi waxati famatone birin yi. 9 E nama wusulanna radaxataren gan saraxa ganden fari, hanma e saraxa gan daxon ba, hanma bogise saraxana, hanma e minse saraxan naboxon a fari. 10 Sanja yi keden jee bun ma, Haruna xa yulubi xafari saraxan wunla xuya a fenne ma. Nayi, a a rasarijan jee yo jee waxati famatone yi. A sarijan

Alatala yee ra yi han!” **11** Alatala yi falan ti Musa xa, a naxa, **12** “I na Isirayila kaane matenge waxatin naxan yi, birin xa a niin xunba saren fi Alatala ma, a nema tenge waxatin naxan yi. Nayi, fitina furen mi yamaan suxe. **13** Naxan yo na tenge, na xa gbeti gbanan keden fi naxan lanxi sekele tagiin ma, wure gbeti fixeni ligaseen naxan nawalima yire sarijanxini, naxan lanxi garamu suulun ma. Gbeti gbananni itoe luma Alatala nan xa. **14** Isirayila kaan naxanye bata jee maxone soto, ne birin xa ito fi Alatala ma. **15** Se kanna nama nde sa a fari, yiigelitoon nama nde ba gbeti gbanan kedenna ra, bayo e niin xunba saren nan fima Alatala ma. **16** I xa xunba gbetini itoe rasuxu Isirayila kaane yii, i yi a rawali Naralan Bubun wanli. Na findima joxo lu seen nan na Isirayila kaane xon Alatala yetagi, a yi e niin xunba.” **17** Alatala yi a fala Musa xa, a naxa, **18** “Ige ramara se sula daxin nafala maxaden na e nun a bundoxon sula daxin naxan tima a bun. I xa a ti Naralan Bubun nun saraxa ganden tagi, i yi igen sa a kui. **19** Haruna nun a diine e yiine nun e sanne maxama na igen nan na. **20** E na so Naralan Bubun kui waxatin naxan yi, e xa e maxa, alogo e nama faxa. E na e maso saraxa ganden na saraxa ralideni Alatala ma teen na, **21** e xa e yiine nun e sanne maxa, alogo e nama faxa. Habadan sariyan na a ra Haruna nun a yixetene xa waxati famatone yi.” **22** Alatala yi a fala Musa xa, a naxa, **23** “Wudi se xiri jaxumeni itoe tongo: mirihi latikononna kilo suulun, sinamon wudi xiri jaxumen kilo firin e nun a tagi, xaye xiri jaxumen kilo firin e nun a tagi, **24** sinamon fuge xaren kilo suulun, e nun oliwi turen litiri sennin. E xa ne maliga liga seene ra naxanye rawalima yire sarijanxini. **25** E itoe birin basan latikononna rafala fena, e findi masusan ture sarijanxin na naxan xirin jaxun.” **26** “I xa Naralan Bubun nun Layiri Sereya Kankiraan masusan na ra, **27** e nun tabanla nun a waliseene, e nun lenpu dexo seen nun a waliseene e nun wusulan gandena, **28** e nun saraxa gan daxin baden nun a waliseene, e nun ige ramara seen nun a bundoxona. **29** I xa ne rasarijan alogo e xa sarijan fefe! Naxan yo nema a yiin dinje e ra, fo a xa sarijan nen. **30** I xa Haruna nun a diine masusan, i yi e rasarijan alogo e xa saraxarali wanla ke n xa.” **31** I xa a fala Isirayila kaane xa, i naxa, “A findima n ma masusan ture sarijanxin nan na waxati famatone birin yi. **32** Muxu yo nama a sugusugu a fatin ma. Muxu yo nama a sifan nafala. A sarijan, e xa a yate se

sarijanxin na. **33** Naxan yo na a sifan nafala hanma a a sa muxu gbete ma ba saraxaraline ra, a kedima nen yamaan tagi.” **34** Alatala yi a fala Musa xa, a naxa, “Se xiri jaxumene tongo: mirihi latikonon xaraxin nun onixi geme fujina e nun galibanun salenna. I mon yi wusulan fajin sa a fari. **35** Latikonon nafalan xa e basan, a findi wusulan xiri jaxumen na. Foxon xa sa ayi alogo a xa ramara, a lu sarijanxi. **36** I xa na nde findi a fujin na, i yi a sa Layiri Kankiraan yetagi Naralan Bubuni, n naralanma i ra denaxan yi. A findima e xa se sarijanxin nan na naxan sarijan han! **37** E nama wusulanni ito joxon nafala e yete xa. E xa a yate se sarijanxin na Alatala xa. **38** Xa muxuna nde wusulan sifani ito rafala alogo a xa a xirin me, a kedima nen yamaan tagi.”

31 Alatala yi a fala Musa xa, a naxa, **2** “A mato, n bata Yuri a diin Besaleli sugandi, Xuru mamandenna Yuda bonsenni. **3** N bata a ralugo Alaa Nii Sarijanxin nun xaxilimayaan nun kolonna ra alogo a xa fatan wali wuyaxi ke, **4** alogo a xa no wali gbeene rakamalideni, a xemaan nawali, e nun gbetin nun sulana, **5** a geme fajine masoli a yi e suxu seene yiton, a wudin nawali, alogo a xa wali tofajine ke. **6** N mon bata Dan bonsonna Axisamaki a dii Oholiyabi so a yii a mali muxun na. N mon bata a ragidi walikene birin xa fatan wanle ra n bata e yamari naxan ma: **7** Naralan Bubuna, Layiri Sereya Kankirana Ala solonama denaxan yi, e nun bubun kui seene birin, **8** tabanla nun a waliseene, lenpu dexo se xema daxin nun a waliseene birin, wusulan gandena, **9** saraxa gan daxin baden nun a waliseene birin, ige ramara seen nun a bundoxona, **10** taa dugine, dugi rasarijanxine saraxarali Haruna xa, e nun dugine a diine xa saraxarali wanli, **11** masusan turena, e nun wusulan xiri jaxumena yire sarijanxin xa. E xa ne birin nafala alo n na e yamarixi i ma kii naxan yi.” **12** Alatala yi a fala Musa xa, a naxa, **13** “A fala Isirayila kaane xa, i naxa, ‘E Matabu Loxone suxu. E findima nen taxamasenna ra n tan nun e tan tagi waxati famatone muxune xa, alogo e xa a kolon a n tan Alatala nan e rasarijanma. **14** E xa Matabu Loxon suxu, amasoto a sarijan e tan yii. Xa naxan mi a suxu, a wali na loxoni, a kedima nen a yamani, e yi a faxa. **15** I walima nen xii sennin, koni xii soloferede loxon findima Matabu Loxon nan na, naxan sarijan Alatala yetagi. Muxu yo na wali Matabu Loxoni e xa a faxa. **16** Isirayila kaane xa Matabu Loxon suxu, e yixetene

birin xa Matabu Loxon sanla raba. Habadan layirin na a ra. 17 A findima taxamasenna nan na n tan nun Isirayila tagi habadan! Amasoto Alatala boxon nun koren daxi xii senninna bun, xii soloferede loxoni a yi wanla dan, a yi a matabu.” 18 Ala to yelin falan tiye Musa xa Sinayi geyaan fari, a yi Layirin Sereya walaxa firinne so a yii, geme walaxane Ala naxanye kerendenxi a yiin na.

32 Yamaan to a to a Musa yi buma gododeni geyaan fari, e yi e malan Haruna fema. E yi a fala a xa, e naxa, “Keli! I yi ala gbetene rafala en xa naxanye tima en yee ra! Musa ito, xemen naxan en naminixi Misiran yamanani, en mi a kolon naxan a sotoxi.” 2 Haruna yi a fala e xa, a naxa, “E xemaan tunla soone ba e tunle ra, e nun e jaxanle tunle ra, e nun e dii xemene nun e dii temene, e fa e ra n fema.” 3 E yi e xemaan tunla soone birin ba, e fa e ra Haruna fema. 4 A yi e rasuxu e ra, a xemane raxulun, a yi e igen nafala jinge dii sawuran na kulunden na. E yi a fala, e naxa, “Isirayila! E gbee alane ni i ra, naxan i raminixi Misiran yamanani!” 5 Haruna to na to, a yi saraxa ganden nafala jinge dii sawuran yetagi. A a rali e ma, a naxa, “Tila, sanla rabama nen Alatala xa!” 6 Na xoton bode, e keli sinma, e yi saraxa gan daxine nun boje xunbeli saraxane ba. Yamaan yi doxo e dgeden nun e mindeni, e lu kele, e sabaan so. 7 Alatala yi a fala Musa xa, a naxa, “Siga! Godo! Amasoto i ya yamana, i naxan naminixi Misiran yamanani, e bata kala. 8 E bata kiraan fata xulen, n na e yamarixi naxan ma! E bata xema raxulunxin nafala jinge dii sawura suxuren na, e yi e xinbi sin a bun. E bata saraxane ba a xa, e yi a fala, e naxa, “Isirayila! E gbee alane ni i ra, naxanye i raminixi Misiran yamanani.” 9 Alatala yi a fala Musa xa, a naxa, “N bata yamani ito to, yama murutexin na a ra. 10 Iki i xa i masiga n na. N ma xolon xa keli e xili ma, n xa e raxori. N ni i tan nan bonson findima siya gbeen na.” 11 Musa yi Alatala mafan, a Ala, a naxa, “Ee! Alatala! I ya xolon kelima i ya yamaan xili ma nanfera, i naxan naminixi Misiran yamanani i senbe gbeen nun i yii barakaxin na? 12 Xa i ito liga, Misiran kaane a fale nen, e naxa, ‘A e raminixi Misiran yi miriya jaxin nan ma, alogo a xa sa e faxa geyane ma, a yi e jan boxon fari.’ I ya xolo gbeen lu! I dija! I nama yihadin nagodo i ya yamaan ma! 13 Iburahima fe xa rabira i ma, e nun Isiyaga nun Isirayila, i ya walikene. I kolo nen i yete yi,

i naxa, ‘N na e bonsonna rawuyama ayi nen alo saren naxanye kore. N boxoni ito birin soma i bonsonna yii nen n ni i tuli saxi naxan na, a findi e keen na habadan!’” 14 Alatala yi dija, a mi yihadin nagodo a yamaan ma, a feen naxan falaxi. 15 Musa yi xete keli geyaan fari, Layirin Sereya walaxa firinne suxi a yii. Walaxane foxo firinne birin yi sebexi. 16 Ala nan na walaxane rafala. Ala nan yi sebenla ne tixi, naxanye yi kerendenxi walaxane ma. 17 Yosuwe to yamaan sonxo xuiin me, a yi a fala Musa xa, a naxa, “Yenge so sonxon tema yamaan daaxadeni!” 18 Musa yi a yabi, “No tiine sonxo xui mi ito ra. Muxu bonboxine sonxo xui mi ito ra. N tan sigi sa xuiin nan mema.” 19 E to maso yamaan daaxaden na, e yi jinge dii sawuran to e nun bodonlane. Musa yi xolo han! Walaxan naxanye yi a yii, a yi ne woli ayi, a yi e yibo geyaan san bun. 20 E jinge diin naxan nafala, a na tongo, a yi a gan. A yi a findi a fujin na, a yi a xuya igen xun ma, a yi Isirayila kaane karahan, e yi a min. 21 Musa yi a fala Haruna xa, a naxa, “Yamani ito nanse ligaxi i ra, alogo i xa ti e yee ra yulubi gbeen ito ligadeni?” 22 Haruna yi a yabi, a naxa, “N kanna nama xolo! I tan yetena a kolon, yamani ito jiaxu. 23 E a falaxi n xa nen, e naxa, ‘Alane rafala en xa naxanye tima en yee ra. Musa ito, xemen naxan en naminixi Misiran yamanani, en mi a kolon naxan a sotoxi.’ 24 N yi a fala e xa, n naxa, ‘Maxidi se xemaan naxanye yii, ne xa e ba!’ E yi e so n yii, n yi e woli teeni, jinge diini ito yi mini!” 25 Musa yi a to a yamaan mi yi yagima, a Haruna bata yi tin yamana yete suxutareyaan ma, e yi findi magele seen na e yaxune xa. 26 Musa yi ti yamaan daaxaden so deen na, a naxa, “Naxanye Alatala xa, ne xa fa n fema!” Lewi bonsonna birin yi e malan a fema. 27 A yi a fala e xa, a naxa, “Alatala, Isirayilaa Ala ito nan falaxi, a naxa, ‘Birin xa a silanfanna xidi a tagi. E yamaan daaxadeni siga, keli foxo boden ma han bodena, birin xa a ngaxakedenna faxa e nun a lanfaan nun a doxo bodena.’” 28 Lewi bonsonna yi Musaa yamarin suxu, na loxoni muxu wuli saxan yi faxa yamaan na. 29 Musa yi a fala, a naxa, “E bata rasarijan Alatala xa to, bayo e kelixi e diine nun e ngaxakedenne nan xili ma. A bata e baraka to.” 30 Na xoton bode, Musa yi a fala yamaan xa, a naxa, “E bata yulubi gbeen liga. Iki n xa te Alatala fema. Waxatina nde n na solonama e xa nen e yulubine fe ra.” 31 Musa yi xete Alatala fema, a naxa, “Yamani ito bata yulubi gbeen liga! E bata xemaan nafala suxurene ra. 32 Diya e yulubine ma! Xa na mi a

ra, i xa n tan fan xinla ba i ya kitabu sebexin kui.”
33 Alatala yi a fala Musa xa, a naxa, “Naxan yulubin ligaxi n na, n na nan xili bama n ma kitabun kui. **34** Iki siga, i yamaan xali menni n denaxan falaxi. N ma malekan tima nen i yee ra. Koni a waxatin na a li, n na e naxankatama nen e yulubine fe ra.” **35** Alatala yi yamaan naxankata fitina furen na, amasoto e bata yi jinge dii sawuran nafala, Haruna naxan nafala.

33 Alatala yi a fala Musa xa, a naxa, “Siga, keli be, i tan nun yamani ito, i naxan naminixi Misiran yamanani. E te na boxoni n na n de ti naxan ma fe ra, a n na a soma nen Ibrahima nun Isiyaga nun Yaxuba yii. N naxa, ‘N na a soma nen i bonsonna yii.’ **2** N malekan nasigama nen i yee ra, alogo a xa Kanan kaane nun Amorine nun Xitine nun Perisine nun Xiwine nun Yebusune kedi i yee ra. **3** E xa te na boxoni kumin nun nonon gbo denaxan yi. Koni n mi sigama e foxo ra alogo n nama e faxesi kira yi. Amasoto yama murutexin nan e ra.” **4** Yamaan to fala xodexeni itoe me, e yi sunu, muxu yo mi a maxidi seene so. **5** Alatala bata yi a fala Musa xa, a naxa, “A fala Isirayila yamaan xa, i naxa, ‘Yama murutexin nan e ra! Xa en birin siga waxatidi tun, n na e raxorima nen. Iki, e e maxidi seene ba, n xa a ragidi n naxan ligama e ra.” **6** Isirayila kaane to yi kelima Horebe geyaan ma, e yi e maxidi seene ba. **7** Musa yi darixi bubun tiye yamaan daaxaden nan fari ma wulani, a yi a xili sa “Naralan Bubuna.” Naxanye birin yi wama Alatala maxodin feni, ne yi sigama Naralan bubun nin, naxan yi yamaan daaxaden fari ma. **8** Musa nema yi sigi bubuni, yamaan birin yi kelima nen, e ti e bubune de ra, e yeen bira Musa foxo ra han a so bubuni. **9** Musa nema yi soe bubuni, kundaan yi godoma nen, a ti bubun so deen na Ala nema yi falan tiye Musa xa waxatin naxan yi. **10** Yamaan na yi kundaan to bubun so deen na, e yi kelima nen, e Ala batu e bubune so deen na. **11** Alatala yi falan tima Musa xa nen yee nun yee, alo muxun falan tima a lanfaan xa kii naxan yi. Na xanbi ra, Musa yi xetema nen yamaan daaxadeni, koni Nunu a dii banxulanna naxan yi Musa malima, Yosuwe, na mi yi kelima bubun kui. **12** Musa yi a fala Alatala xa, a naxa, “I a falama n xa, i naxa, ‘Ti yamani ito yee ra!’ Koni i munma a yita n na i naxan nasigama n foxo ra. I bata a fala, i naxa, ‘N ni i xinla kolon, i bata n kenene.’ **13** Iki, xa n bata i kenene, i xa n xaran i ya kirane ma. Nayi, n ni i kolonje, n yi lu i

kenenje. A mato, i gbee siyaan nan yamani ito ra.” **14** Ala yi a yabi, a naxa, “N tan yeteen nan i matima, n yi boje xunbenla fi i ma.” **15** Musa yi a fala a xa, a naxa, “Xa en birin mi sigama, i nama nxu rakeli be. **16** A kolonma di nayi, a nxu nun i ya yamaan bata i kenene, xa en birin mi sigama? I ya yamaan nun bonne tagi rabama di, naxanye birin boxon fari?” **17** Alatala yi a fala Musa xa, a naxa, “I naxan maxodinxi n ma, n na a ligama nen, amasoto i bata n kenene, e nun n ni i xinla kolon.” **18** Musa yi a fala, a naxa, “Awa, i ya nonon yita n na!” **19** Alatala yi a yabi, a naxa, “N na n ma nemaan birin nadanguma nen i yetagi, n yi n xinla fala, ‘Alatala.’ N hinanje naxan na, n hinanma nen na ra, n kininkinije naxan ma, n kininkinima nen na ma. **20** Koni, i mi noe n yetagin toe, amasoto muxun mi noe a toe, a lu a nii ra.” **21** Alatala yi a fala, a naxa, “I tima nen gemen fari yirena nde yi be. **22** N nonon nema dangue, n na i rasoma nen geme yinla ra, n yi n yin sansan i ma han n dangue. **23** N na n yin ba na, i n xanbin toma nen, koni n yetagin mi noe toe.”

34 Alatala yi a fala Musa xa, a naxa, “Geme walaxa firin masoli alo a singene, i naxanye yiboxi. N falane sebema e ma nen naxanye yi bonne ma. **2** I xa i yiton xotonni. I te Sinayi geyaan fari. I fa n nalan menni geyaan xuntagi. **3** Muxu yo nama bira i foxo ra. Muxu yo nama lu geyaan mumee fari. Hali xuruse kurune nama dangue geyaan san bun.” **4** Musa yi geme walaxa firin masoli alo a singene, a kurun te Sinayi geyaan fari, alo Alatala a yamari kii naxan yi. Geme walaxa firinne yi suxi a yii. **5** Alatala yi godo kunda yiyani, a ti menni a fema, a yi a xinla fala, Alatala. **6** A yi dangue Musa yetagi, a naxa, “Alatala! Alatala! Ala naxan kininkinin, a mon dija. A mi xolon xulen, a hinanna nun a tinxinna gbo. **7** A hinanma nen han mayixete wuli keden, a dija haken nun matandin nun yulubin ma. Koni, a mi yulubi kanna yatema tinxinden na mumee! A fafane haken saranma nen e diine ra han mayixete saxon hanma naanin.” **8** Musa yi a xinbi sin boxoni mafuren! A Ala batu. **9** A yi a fala, a naxa, “Marigina, xa n bata i kenene, en birin xa siga. Hali yama murutexin na a ra, i xa nxu mafelu nxo hakene nun yulubine ra, i nxu findi i gbeen na.” **10** Alatala yi a yabi, a naxa, “N layirin xidima nen en tagi. N kabanakone ligama nen Isirayila yamaan birin yee xori naxanye munma liga yamana yo yi dunu ya yi. Siyaan naxanye

birin i rabilinxi, ne n ma kabanako wanla toma nen n naxan ligama ε xa.” **11** “N na i yamarima naxan ma to, i xa na suxu. N Amorine nun Kanan kaane nun Xitine nun Perisine nun Xiwine nun Yebusune kedima nen i yεε ra. **12** Ε soma yamanan naxan yi, ε nun men kaane nama layiri yo xidi alogo e nama ε raso tantanni. **13** Ε xa e saraxa gandene nun e kide gemene birin kala. Ε yi e Asera kide gbindonne sege, ε yi e suxurene birin gan.” **14** Ε nama ala gbete batu, amasoto Alatala xoxolon, a xili nen “Ala xoxolonxina.” **15** Ε nun yamanani ito muxune nama layiri yo xidi, alogo e nema e yete xosima e alane fema, e saraxane ba e xa, e nama ε xili. Ε nama e saraxane don. **16** Ε nama e dii temene tongo ε dii xemene xa e jaxanle ra, alogo e dii temene nema e yete raxosima e alane fema, e nama ε diine maxaran e yi bira e foxo ra. **17** I nama suxurene rafala wure raxulunxin na. **18** I xa Buru Tetaren Sanla raba. Xii solofere bun ma, i xa buru ratetaren don alo n ni i yamari kii naxan yi. Ito liga a waxatini Abiba kiken na, amasoto i minixi Misiran yi na kiken nan na. **19** N gbeen nan dii singene birin na e nun xuruseene dii xemε singene birin, yεxεene nun siine nun jingene. **20** Xa sofali dii xemε singen na a ra, i xa a xunba yεxεε diin na hanma sii diina. Koni, xa i mi a xunba, i xa a kœen gira, i yi a faxa. I mon xa i ya dii xemε singene birin xunba. Muxu yo nama fa n yetagi n kise mi a yii. **21** I walima nen xii sennin, i yi i matabu xii soloferede loxoni. I xa i matabu, hali xεε bi waxatin nun se xaba waxatini. **22** I xa Xunsagine Sanla raba, i na se xaban folo waxatin naxan yi. I xa Se Xaba Donxen sanla raba jεε rajanni. **23** Yamaan birin xa fa Marigina Alatala yetagi doxo saxan jεen bun ma, Isirayilaa Ala. **24** Amasoto n siyane kedima nen i yεε ra, n yi i ya boxon nagbo ayi alogo muxu yo nama i ya yamanan yenge, i nema sigε Alatala i ya Ala yetagi waxatin naxan yi, han doxo saxan jεen bun ma. **25** I nama buru ratexin sa saraxa yo fari i naxan bama n xa. I mon nama Halagi Tiin Dangu Loxon Sanla saraxan namara han xotonni. **26** I xa fa i ya xœen bogise singe fajine ra Alatalaa banxini, i ya Ala. I nama sii diin jin a nga xijε igen na. **27** Alatala yi a fala Musa xa, a naxa, “Falani itoe sebe, amasoto n layirin xidima en tagi falani itoe nan xon e nun Isirayila kaane.” **28** Musa yi lu Alatala fema sogε tonge naanin nun kœε tonge naanin. A mi donse don, a mi igε min. Alatala yi layirin falane sebe walaxane ma, Yamari Fu. **29** Musa to godo Sinayi geyaan fari, Layirin

Sereya walaxa firinne suxi a yii, a mi yi a kolon xa a yetagin mayilenma, amasoto a bata yi falan ti Ala xa. **30** Haruna nun Isirayila kaane birin yi Musa toma, a yetagin yi mayilenma. E yi gaxu e masoe a ra. **31** Musa yi e xili. Nanara, Haruna nun yamaan kuntigine birin yi fa a fema, a falan ti e xa. **32** Na xanbi ra, Isirayila kaane birin yi e maso Musa ra, a yamarine birin so e yii Alatala naxanye fixi a ma Sinayi geyaan fari. **33** Musa to yelin falan tiye e xa, a yi dugi yalanxin so a yetagin xun na. **34** Musa nema yi fe Alatala yetagi falatideni a xa, a yi dugin bama nen han a yi mini. A to yi minima, a yi a falama nen Isirayila kaane xa naxan yi yamarixi. **35** Isirayila kaane yi a toma a a yetagin mayilenma. Musa yi dugi yalanxin sama nen a yetagin ma han a yi so falatideni Ala xa.

35 Musa yi Isirayila yamaan birin malan, a yi a fala e xa, a naxa, “Alatalaa yamarine nan itoe ra: **2** Xii sennin bun ma, ε xa wanla ke, koni xii soloferede loxon sarijan. Matabu Loxon na a ra naxan nasarijanxi Alatala xa. Muxu yo na wali na loxoni ε xa a faxa. **3** Ε nama teen nadege ε konne yi Matabu Loxoni.” **4** Musa yi a fala Isirayila kaane xa, a naxa, “Alatala ito nan yamarixi: **5** Ε xa fa yii malan seene ra Alatala xa ε jεnige fajin na: xemana, gbetina, sulana, **6** gari mamiloxin nun a gbeela, taa dugi fajina, e nun sii xabe dugine, **7** konton kidi magbelixine, sube kidine, kasiya wudina, **8** lenpu turena, se xiri jaxumene naxan sama se masusan tureni, e nun wusulan xiri jaxumena, **9** onixi gemε tofajine, e nun gemε tofajin gbetene saraxarali domaan nun a kanke masaan nayabu seen na.” **10** “Naxanye birin fatan walideni ε ye, ne xa fa seni itoe rafaladeni Alatala naxanye yamarixi: **11** Ala Batu Bubun nun a xunna sona, a suxu seene, a bun tiine, a gaalane, a senbetenne, e nun a bundoxone; **12** Layiri Kankirana, a tongo tamine, a deraganla, e nun a ye masansan dugina; **13** tabanla nun a tongo tamine, a waliseene birin, e nun buru ralixina; **14** lenpu doxo seen nun a waliseene, a lenpune, e nun a turen naxan bubuni yalanma; **15** wusulan ganden nun a tongo tamine, masusan turena, wusulan xiri jaxumena, dugin naxan singanxi Ala Batu bubun so deen na; **16** saraxa gan daxi baden nun a wure masoxonxina, a tongo tamine, e nun a waliseene birin; igε sa se sula daxin nun a bundoxona; **17** sansan dugine, a senbetenne, e bundoxone, e nun dugin naxan singanxi sansanna

so deen na; **18** tamin naxanye gbangbanma boxoni Ala Batu Bubun xidi seen na, e nun sansanna gbeene nun e lutine; **19** taa dugi naxan soma walideni yire sarijanxini, dugi rasarijanxine saraxarali Haruna xa, e nun a diine gbeen naxanye soma saraxa ralideni.” **20** Isirayila yamaan birin yi keli Musa fema. **21** Naxanye birin a jenige, ne yi fa kiseene ra Alatala xa, Naralan Bubun wanla fe ra, e nun dugi rasarijanxine rafala fena. **22** Xemen nun jaxanla, naxanye jenigen yi fan, ne yi fa xema maxidi seen sifan birin na, tunla soone, wuredine, jere, e yi e fi Alatala ma kise ralixin na. **23** Gari mamiloxin nun a gbeela, taa dugi fajina, sii xabe dugine, konton kidi magbelixine e nun sube kidine yi naxanye yii, e yi fa ne ra. **24** Naxanye yi fama gbetin nun sulan na, ne yi na findi kiseen na Alatala xa. Kasiya wudin yi naxanye yii, ne yi fa ne ra walideni. **25** Naxalan walikene birin yi garini ton e fa a ra, a mamiloxin nun a gbeela, hanma taa dugina, e naxanye wurundun. **26** Naxalan walike gbete yi sii xabe dugin wurundun naxanye yi wama a liga feni e nun naxanye fatan. **27** Yamaan kuntigine yi fa onixi gemene ra e nun geme tofani gbete saraxarali domain nun kanke masaan nayabu seene ra. **28** E yi fa se xiri jaxumene nun oliwi turen na lenpun nun masusan turena fe ra e nun wusulan xiri jaxumena. **29** Isirayila kaa jenige fajine birin, xemen nun jaxanla, e birin yi fa e kiseen na Alatala xon wanle ke feen na Alatala naxanye yamarixi e ma fata Musa ra. **30** Musa yi a fala Isirayila kaane xa, a naxa, “E a mato, Alatala bata Yuri a dii Besaleli sugandi, Xuru mamandenna, Yuda bonsanni. **31** A bata a ralugo Alaa Nii Sarijanxin nun xaxilimayaan nun kolonna ra, alogo a xa fatan wali wuyaxi ke, **32** alogo a xa no wali gbeene rakamalideni, a xemaan nawali, e nun gbetin nun sulana, **33** a geme fajine masoli, a yi e suxu seene yiton, a wudin nawali, alogo a xa wali tofajine ke. **34** Ala mon bata tin a xa fatan xaranna tiye, e nun Axisamaki a dii Oholiyabi, Dan bonsanni. **35** Ala bata tin e fatan wanla sifan birin na, e gemene masoli, e wanle yebe, e dugine soxon, a mamiloxin nun a gbeela, e nun taa dugi fajina. E fatan wanla sifan birin yebadeni.”

36 “Besaleli nun Oholiyabi, e nun walikene birin, Alatala xaxilimayaan nun kolonna fi naxanye ma alogo e xa no yire sarijanxin wanle birin kedeni, e xa wanla folo alo Alatala a yamarixi kii naxan yi.” **2** Musa

yi Besaleli nun Oholiyabi xili, e nun walikene birin Alatala xaxilimayaan fi naxanye ma, e nun naxanye yi waxi wanle ke feni. **3** Isirayila kaane fa kiseen naxanye ra yire sarijanxin ti feen na, Musa yi ne birin taxu walikene ra. Muxune mon yi fama kiseene ra Musa fema xoton yo xoton. **4** Nayi, muxun naxanye birin yi yire sarijanxin wanla kema, ne birin yi e wanle bejin e siga, **5** e fa a fala Musa xa, e naxa, “Yamaan fama se wuyaxi ra. E bata a radangu ayi. Alatala naxan yamarixi wanla ke feen na, a bata gbo na xa.” **6** Musa yi yamarin fi mafuren, a xa fala yamaan daaxaden birin yi, a naxa, “Xemen nun jaxanla, muxu yo nama fa kiseene ra yire sarijanxin wali feen na.” Nayi, e yi ba fe kiseene ra. **7** Amasoto kiseen naxanye bata yi soto ne yi wanla rajanye nen. **8** Walike xaxilimane yi Ala Batu Bubun nafala taa dugi kuye fani fu ra, a mamiloxin nun a gbeela. E yi a rayabu maleka gubugubu kan sawura soxonxine ra. **9** Dugine birin yi lan: a kuyan nongonna ye moxonjen nun solomasexe, a yigbona nongonna ye naanin. **10** E yi dugi suulun dege e bode ra, dugi suulunna bonne fan yi dege e bode ra. **11** E yi luti mamiloxine ti dugi ratugunxine singe ra xiin de kinkin na. E mon yi na liga a ratugunxin bonne donxe ra xiin na. **12** E yi luti tonge suulun ti taa dugi ratugunxine singe ra xiin na, e mon yi luti tonge suulun ti taa dugi ratugunxine firinden donxe ra xiin na, lutine yi lanxi e bode ma. **13** E yi a suxu seen xema daxon tonge suulun nafala, e yi dugi ratugunxi firinne xidi e bode ra suxu seene ra. Ala Batu Bubun yi findi se kedenna ra. **14** E yi dugi fu nun keden nafala sii xabene ra, e findi Ala Batu Bubun xunna soon na. **15** Dugi fu nun kedenne birin yi lan. Keden kuya yi nongonna ye tonge saxon. Keden yi gbo nongonna ye naanin. **16** E yi dugi suulun dege e bode ra e danna, e dugi senninna bonne fan dege e bode ra. **17** E yi luti tonge suulun ti dugi ratugunxine singe ra xiin de kinkine ra, e mon yi luti tonge suulun ti dugi ratugunxin bonne fan donxe ra xiin de kinkine ra. **18** E yi suxu se sula daxon tonge suulun nafala alogo e xa bubun xidi, a findi kedenna ra. **19** E yi konton kidi magbelixine dege e bode ra, e yi e sa bubun birin fari. E mon yi sube kidi fani gbete fan sa na fari. **20** E yi bubun xunna soon bun tiine rafala kasiya wudin na. **21** Bun tiine yi kuya nongonna ye fu, e yigbona nongonna ye keden e nun a tagi. **22** Bun tiin yi findi farin firinna ra e bode yetagi. E yi bubun bun tiine birin ti na kiini. **23** E yi bun ti moxonje rafala bubun

yiifari fəxən ma. **24** E yi bundəxo gbeti daxin tonge naanin nafala bun tiine xa. Bun ti yo bun ti, bundəxo firin. Farin firinne yi soti bundəxone kui. **25** E yi bun ti məxəne ti Ala Batu Bubun kəmen fəxəni, **26** e nun bundəxo gbeti daxin tonge naanin, bun ti yo bun ti, bundəxo firin. **27** E yi bun ti sennin ti bubun xanbin na sogegododen binni. **28** E mən yi bun ti firin sa a fari bubun xanbi ra tongonne ma. **29** Bun ti firin yi ti e bode xən mənni. E yi xidi e bode ra keli laben na han e xun tagi. Tongon firinne birin yi ti na kiini. **30** Nayi, bun ti solomasexe yi ti na e nun bundəxo fu nun sennin. Bun dəxo firin yi lu bun tiine birin bun. **31** E yi kasiya wudi gaalane rafala: suulun yi lu bubun fəxo kedenna bun tiine suxu seen na, **32** suulun yi lu bode fəxən ma, suulun yi lu bubun xanbi binna ma sogegododen binni. **33** Gaalan tagi xiin bun tiine ma, na yi rafala gaalan kedenna ra alogo a xa keli bubun fəxo kedenni siga han bubun bode fəxəna. **34** E yi xema yilenlənxiine sa bun tiine ma. E yi gaalane so yinle rafala xəmaan na. E yi xema yilenlənxiine sa gaalane ma. **35** E yi kankiraan ye masansan taa dugin nafala gari mamiloxin nun a gbeela ra, e yi a rayabu maleka sawura səxənxine ra. **36** E yi a singan kasiya senbeten naanin na xema yilenlənxiine yi saxi naxanye ma. E yi xema singan seene ti e ma. E yi senbetenne ti bundəxo gbeti daxi naanin kui. **37** Dugi səxənxine yi de raxidi taa dugin nafala bubun so deen na gari mamiloxin nun a gbeela ra. **38** E yi senbeten suulun gbete ye rafala dugin xa e nun a singan seene. E yi xema yilenlənxiine sa senbetenne xuntagine ma, e bundəxo sula daxi suulun nafala e xa.

37 Besaleli yi kasiya wudi kankiraan nafala: A kuyana nongonna ye firin e nun a tagi, a yigbona nongonna ye keden e nun a tagi, a yitena nongonna ye keden e nun a tagi. **2** A yi xema fəji yilenlənxiine sa a fanna nun a kuiin ma, a yi a de kinkin fan nabilin xəmaan na. **3** A yi a tongo tamine so yili naaninne rafala xəmaan na a san naaninne ma, firin fəxo kedenni, firin bode fəxəni. **4** A yi kasiya tami firin nafala, a yi xema yilenlənxiine sa e ma. **5** A yi tamine raso xema yinle ra kankiraan de xənxine yi, alogo e xa findi kankiraan xali seen na. **6** A yi xema deraganla rafala kankiraan ma, Ala solonadena. A yi kuya nongonna ye firin e nun a tagi, a yi gbo nongonna ye keden e nun a tagi. **7** A yi maleka gubugubu kan sawura firin nafala xema bənbəxiin na,

e ti kankiraan deraganla fəxo firinne ma. **8** A maleka sawura keden ti fəxo kedenni, a yi a firinden ti bode fəxəni. Maleka sawurane nun kankiraan deraganla yi findi se kedenna ra. **9** Maleka sawurane gubugubune yi bandunxi e xun ma, e yi felenxi kankiraan deraganla ma. Maleka sawurane ye rafindixi e bode ma, e xun sinxi kankiraan deraganla ma. **10** E yi kasiya wudin tabanla rafala: a kuyana nongonna ye firin, a yigbona nongonna ye keden, a yitena nongonna ye keden e nun a tagi. **11** E yi xema fəji yilenlənxiine sa a ma, e a de kinkin nabilin xəmaan na. **12** E yi farinna sa tabanla jinginna ma a rabilinni. Farinni gboon yi lanxi muxun yii kuiin nan ma. E yi xəmaan sa farinna de kinkine ma. **13** E yi a tongo tamine so yili naaninne rafala xəmaan na tabanla tongon naaninne ma a sanne ma. **14** Tamine so yinle yi lu a de kinkine ra, tamine soon naxanye ra tabanla xali seen na. **15** E yi kasiya tamine rafala, e yi xema yilenlənxiine sa e ma, e findi tabanla xali seen na. **16** E yi a goronne nun waliseene rafala xema fəjin na, e nun a igelengenne minse saraxane rabəxənxine naxanye ra. **17** E yi lenpun dəxo seen nafala xema bənbəxi fəjin na. A sanna nun a yiine yi rayabu se fuge sawurane ra. Se kedenna nan yi e birin na. **18** Yii sennin nan yi tixi a fəxo firinne ma: lenpu dəxəde yire saxan yi lu a fəxo kedenni, yire saxan a fəxo bodeni. **19** Amandi wudi fuge sawura saxan saxan yi rafala a yii senninna birin ma a rayabu seen na. **20** Amandi wudi fuge sawura naanin yi rafala a binla fan ma. **21** Keden yi rafala a tangbaxi singen bun ma, keden a firinden fan bun ma, e nun keden a saxanden bun. E birin malənxina yii sennin. **22** Se kedenna nan yi a se fuge sawurane nun a yiine ra, e birin yi rafalaxi xema fəji bənbəxiin nan na. **23** E yi lenpu solofere rafala xema fəjin na, e nun e waliseene nun xube kə seene. **24** E lenpun dəxo seen nun a waliseene rafala xema fəjin kilo tonge saxan nan na. **25** E yi wusulan ganden nafala kasiya wudin na. A kuyana nongonna ye keden, a yigbona nongonna ye keden, a yitena nongonna ye firin. E yi fenne rafala a tongon naaninne ma. E yi findi se kedenna ra. **26** E yi xema fəji yilenlənxiine sa a fanna nun a de xənxine nun a fenne ma. E yi xəmaan sa a rabilinni a jinginne ma. **27** E yi tami raso yinla xema daxin firin firin nafala wusulan ganden jinginne bun ma alogo a tongo tamine xa raso a fəxo firinne ra. **28** E yi kasiya wudin nafala tamine ra, e yi xema yilenlənxiine sa e

ma. **29** Wusulan nafalane yi masusan ture sarijanxin nun wusulan xiri naxumen nafala.

38 E yi saraxa ganden nafala kasiya wudin na, a kuyana nongonna ye suulun, a yigbona nongonna ye suulun, a yitena nongonna ye saxan. **2** E yi fenne rafala a tongon naaninne ma. Saraxa ganden nun a fenne yi findi se kedenna ra, e sula yilenlenixine sa e ma. **3** E yi a waliseene rafala sulan na: xube sa seene nun xube ko seene nun wuli xuya goronne nun sube tongo seene, e nun tɛɛ ko seene. **4** E yi wure masoxonxin nafala xuben minin naxan na. A yi lu saraxa ganden de kinkine bun ma saraxa gandeni teen tagini. **5** E yi tamin so yili naanin nafala sulan na a wure masoxonxin tongon naaninne ma. **6** E yi kasiya tamine rafala saraxa ganden xa, e sula yilenlenixine sa e ma. **7** E yi tamine raso sula yinle ra alogo tamine xa lu saraxa ganden foxo firinne ma a xali seen na. E yi a rafala farinne ra, a kui genla yi lu. **8** Walike naxanla naxanye yi Naralan Bubun so deen na, ne yi e mato kikene so e yii, e yi ige ramara seen nun a bundoxon nafala ne sulan na. **9** E yi Ala Batu Bubun nabilin sansanna ra. Sansanna yiifari foxon yi kuya ayi han nongonna ye keme, a ti taa dugi fajine ra. **10** Sula senbeten moxoje yi ti sula bundoxo moxoje kui. Dugi singan se gbeti daxine yi singan gbeti gaalane ra senbetenne longonne ra. **11** Komɛn foxon sansanna fan yi kuya ayi han nongonna ye keme, a fan yi ti sula senbeten moxoje ra e nun sula bundoxo moxojen e nun dugi singan se gbeti daxine nun gbeti gaalane senbetenne longonne ra. **12** Sansanna yi kuya ayi sogegododen binni han nongonna ye tonge suulun. A yi ti dugine ra e nun senbeten fu nun bundoxo fu nun dugi singan se gbeti daxine nun gbeti gaalane. **13** Sansanna yi kuya ayi a sogeteden binni soden denaxan yi, han nongonna ye tonge suulun. **14** Dugine yi singan soden foxo kedenni, e nun senbeten saxan nun e bundoxo saxan han nongonna ye fu nun suulun. **15** Dugine yi singan soden bode foxoni, e nun senbeten saxan e nun bundoxo saxan han nongonna ye fu nun suulun. **16** Bubun sansanna dugine birin yi rafalaxi taa dugi fajin nan na. **17** Senbetenne bundoxone birin yi rafalaxi sulan nan na. E dugi singan seene nun gaalane yi rafalaxi gbetin nan na. Gbeti yilenlenixine yi saxi senbetenne fan xuntagine ma. Sansanna senbetenne birin yi tugunxi e bode ra gbeti gaalane nan na. **18** Dugi soxonne yi so deen de raxidi dugin nafala gari

mamiloxin nun a gbeela ra, e nun taa dugi fajina. A yi kuya han nongonna ye moxoje. A yi mate han nongonna ye suulun alo sansanna dugin bonne. **19** Senbeten naanin nun bundoxo naanin fan yi ti menni. E dugi singan seene nun gaalane yi rafalaxi gbetin nan na. Gbeti yilenlenixine yi saxi e xuntagine ma. **20** Tami dungin naxanye yi gbangbanma boxoni bubun bun tiine nun sansanna senbetenne xidi seene ra, ne birin yi rafalaxi sulan nan na. **21** Waliseene yatene nan itoe ra naxanye rawali Ala Bubun tideni, Layirin Sereyaan bubun naxan kui. Musa nan Lewi bonsonna muxune yamari, e yi e sebe saraxarali Harunaa dii Itamara xun matoon bun ma. **22** Yuri a dii Besaleli, Xuru mamandenna Yuda bonsonni, na yi seen birin nafala Alatala Musa yamari naxanye ma. **23** E nun Oholiyabi nan yi a ra, Axisamaki a diina, Dan bonsonni. Walikɛɛn nan yi a ra naxan fatan wanle yebadeni. Dugi soxonna nan mon yi a ra naxan yi gari mamiloxin nun a gbeela rawalima e nun taa dugi fajina. **24** Xema kise ralixin naxanye birin yi rawalima yire sarijanxin tideni, ne yi lanxi kilo keme solomasexe kilo tonge solofere kilo solofere garamu keme saxan nan ma. A maliga yire sarijanxin ligaseen nan na. **25** Yamaan fa gbetin naxan na, na to tɛnge, na lan kilo wuli saxan kilo fu nun solofere garamu keme solofere nun tonge suulun nan ma. A maliga yire sarijanxin ligaseen nan na. **26** Xɛmɛn naxanye barin bata yi jɛɛ moxoje ti, ne to tɛnge, e birin gbeti gbanan keden keden nan fi gbeti gbanan naxan lan garamu suulun ma. A maliga yire sarijanxin ligaseen nan na. Xeme wuli keme sennin wuli saxan keme suulun tonge suulun nan tɛnge. **27** E gbetin kilo wuli saxan nan naxulun gbeti bundoxo kemene rafala seen na yire sarijanxin nun a ye masansan dugin xa, kilo tonge saxan saxan. **28** Na gbeti kilo fu nun solofere garamu keme solofere tonge suulunna naxan lu, e dugi singan seene nun gaalane rafala na ra, e mon yi gbetin sa senbetenne xuntagine ma. **29** Sula kise ralixine lan kilo wuli firin keme moxojen nun naanin nan ma. **30** E yi bundoxone rafala na ra Naralan Bubun soden xa e nun sula saraxa ganden nun a wure masoxonxin nun a goronne birin, **31** sansanna bundoxone, a soden fan gbeene, e nun bubun nun sansanna xidi seen gbangban daxine.

39 E gari mamiloxin nun a gbeela naxanye soto, e dugine rafala ne nan na wali ke seen na yire sarijanxini. E mon yi doma rasarijanxine rafala

Haruna xa alo Alatala a yamari Musa ma kii naxan yi. 2 E yi saraxarali doma xema daxin nafala gari mamiloxin nun a gbeela ra, e nun taa dugi fajina. 3 E yi xemaan bonbo han a denfeten. E yi a yibolon luti xunxurine ra alogo a xa basan gari mamiloxin nun a gbeela ra, e nun taa dugi fajina, a findi wali tofajin na. 4 E yi a tungunne dege, e lutine ti e xun firinne ra a xidi seen na. 5 A tagixidi fajin fan yi dege na kiini. E nun saraxarali domain yi findi se kedenna ra. A rafala xemaan na, e nun gari mamiloxin nun a gbeela, e nun taa dugi fajina alo Alatala a yamari Musa ma kii naxan yi. 6 E yi onixi gemene ti geme suxu seen xema daxine ra, e Isirayilaa diine xinle kerenden onixi gemene ma a fajin na. 7 E yi na gemene ti saraxarali domain tungunne ma joxo lu feen na Isirayilaa diine xon alo Alatala a yamari Musa ma kii naxan yi. 8 E yi kanke masaan dege, kitisa sena. A yi findi wali fajin na. E yi a dege alo saraxarali domana, e a rafala xemaan nun gari mamiloxin nun a gbeela nun taa dugi fajin na. 9 A rafalaxi tongon naaninna ra, alogo a xa yisa firinna ra, a kuyan nun a yigbona nongonna tagi. 10 E yi a rayabu geme fajin kira naanin na. E gemeni itoe nan sa a kira singen ma: saridon gemen nun topasi gemen nun emerodi gemena. 11 A kiraan firindena: esikaribukili gemen nun safiri gemen nun dayimu gemena. 12 Kiraan saxandena: opali gemen nun agati gemen nun ametisi gemena. 13 Kiraan naanindena: kirisoliti gemen nun onixi gemen nun yasipi gemena. Gemeni itoe xa sa suxu se xema daxine kui. 14 Na geme fu nun firinne luma Isirayilaa diine nan xili yi. Geme yo geme, Isirayila bonson keden xinla yi kerenden a ma taxamasenna ra. 15 E yi xema yoloxondine rafala kanke masaan na, naxanye denbexi alo lutina. 16 E yi xidi se xema daxi firin nun xema wuredi digilinxir firin nafala, e yi wuredine so kanke masaan xunne ra. 17 E yi yoloxondine xidi wuredine ra kanke masaan tungunne ma, 18 yoloxondine yi ti xidi se firinne ra alogo e xa tugun saraxarali domain tungunne ra a kanke ra. 19 E mon yi xema wuredi digilinxir firin nafala e naxanye singan kanke masaan san bun ma, kanke masaan de kinkin kui. 20 E yi xema wuredi firin nafala, e yi e xidi saraxarali domain tungun firinne laben na, a tagixidin faxesa ra. 21 E yi kanke masaan wuredine nun saraxarali domain wuredine xidi e bode ra luti mamiloxin na, alogo kanke masaan nama saraxarali domain bejin alo Alatala a yamari Musa ma kii naxan yi. 22 Dugi soxonna nde yi saraxarali

domain gubaan dege dugi mamiloxin na. 23 A koxen yi lu a tagi, e yi dugina nde dege a koxen nabilinni alogo a nama bo. 24 E yi girenada wudi bogi sawurane dege a lenbene ma gari mamiloxin nun a gbeela ra, e nun taa dugi fajina. 25 E yi xema talandine rafala, e yi e xidi a lenbene ma girenada wudi bogine longori ra. 26 Xema talanne yi xidi girenada bogi sawurane longori ra gubaan lenben nabilinni. A yi na nan soma a nema yi wale waxatin naxan yi alo Alatala a yamari Musa ma kii naxan yi. 27 Dugi soxonna nde yi domain bunbirane dege taa dugi fajin na Haruna nun a diine xa, 28 e nun taa dugi namu fajin nun taa dugi xuntagi xidine nun taa dugi wantan fajine. 29 Dugi soxonna nde yi taa dugi fajin nafala tagi xidin na e nun gari mamiloxin nun a gbeela alo Alatala a yamari Musa ma kii naxan yi. 30 E yi xema walaxa xurudin nafala taxamaseri rasarijanxin na, e yi a sebe a fari alo taxamasenna fa fala, "Muxu Sarijanxina Alatala Xa." 31 E yi a xidi luti mamiloxin na namun tigi ra alo Alatala a yamari Musa ma kii naxan yi. 32 Naralan Bubuna Ala batuma denaxan yi, na wanla birin yi kamali. Isirayila kaane yi a birin ke alo Alatala a yamari Musa ma kii naxan yi. 33 E yi fa bubun na Musa fema: bubun nun a waliseene birin, a dugi singan seene nun a bun tiine nun a gaalane nun a senbetenne nun a bundoxone 34 nun a xunna soon naxan nafala konton sube kidi magbelixine ra, e nun na fan xunna soon naxan nafala kidi fajine ra nun a ye masansan dugin 35 nun Layiri Sereya Kankiraan nun a tongo tamine nun a deraganla Ala solonama denaxan yi 36 nun tabanla nun a goronne birin nun Buru Ralixin 37 nun xema lenpu dexo seen nun a lenpune nun a waliseene nun turen naxan sama a kui 38 nun saraxa gande xema daxin nun masusan turen nun wusulan xiri jaxumen nun bubun soden de raxidi dugin 39 nun saraxa gande sula daxin nun a wure masoxonxin nun a tongo tamine nun a goronne nun ige ramaraden nun a bundoxon 40 nun sansan dugine nun a senbetenne nun bundoxone nun a soden de raxidi dugin nun sansanna lutine nun xidi seen gbangban tamine nun Naralan Bubuna waliseene birin Ala batuma denaxan yi 41 e nun taa dugi domane saraxaraline xa e nema wale yire sarijanxini waxatin naxan yi, saraxarali Harunaa doma rasarijanxine, e nun a diine gbeene e naxanye soma e nema wale waxatin naxan yi. 42 Isirayila kaane bata yi wanla birin ke alo Alatala a yamari Musa ma kii naxan yi. 43 Musa yi na wanla

mato, a yi a to fa fala e a kexi nen alo Alatala a yamari kii naxan yi. Nanara, Musa yi duba e xa.

40 Alatala yi falan ti Musa xa, a naxa, 2 “Kike singen xii singena, i xa Ala Batu Bubun ti, Naralan Bubuna. 3 I xa Layiri Sereya Kankiraan dɔxɔ a kui, e yi a yɛ masansan dugin na. 4 I xa tabanla xali i yi a dɔxɔ. I xa lenpu dɔxɔ seen xali, i yi a lenpune yiton. 5 I xa wusulan saraxa gande xɛma daxin dɔxɔ Layiri Sereya Kankiraan yetagi, i yi dugin singan Ala Batu Bubun soden dɛ ra. 6 I xa saraxa gan daxin baden lu Ala Batu Bubun soden yetagi, Naralan Bubuna. 7 I xa ige ramaraden dɔxɔ saraxa ganden nun Naralan Bubun tagi, i yi igen sa a kui. 8 I xa bubun nabilin sansanna ra, i yi dugin singan sansanna soden dɛen na. 9 I xa masusan turen tongo, i yi Ala Batu Bubun masusan e nun a yi seen birin. I xa a rasarijan e nun a waliseene birin, nayi a sarijanma nen. 10 I xa saraxa gan daxin baden masusan e nun a waliseene birin. I xa saraxa ganden nasarijan, nayi a sarijanma nen fefe! 11 I xa ige ramaraden masusan e nun a bundɔxɔna, i yi a rasarijan. 12 I xa fa Haruna nun a dii xɛmene ra Naralan Bubun dɛen na, i yi e maxa. 13 I dugi rasarijanxine ragodo Haruna ma, i yi a masusan, i yi a rasarijan, alogo a xa saraxarali wanla kɛ. 14 I yi fa a dii xɛmene ra, i yi e maxidi dagine yi. 15 I yi e masusan alo i e baba masusan kii naxan yi, alogo e xa saraxarali wanla kɛ n xa. Ne masusanma e so feen nan na saraxaraliyani naxan luma e yixetene birin xa habadan.” 16 Musa yi Alatalaa yamarine birin liga. 17 Nɛɛ firinden kike singena, kiken xii singena, Ala Batu Bubun yi ti. 18 Musa to Ala Batu Bubun ti, a yi a bundɔxɔne dɔxɔ, a yi a buntine ti e kui, a yi gaalane so e yinle ra, a yi a senbetenne ti. 19 A yi kidine sa bubun fari a xunna soon na. A na fan xunna soon so a xun na alo Alatala Musa yamari kii naxan yi. 20 A yi Layiri Sereya gɛmɛ walaxane tongo a e sa Layiri Kankiraan kui. A yi a tongo tamine so yinle ra Layiri Kankiraan ma. A yi kankiraan deraganla sa a dɛ ra Ala solonama denaxan yi. 21 A yi Layiri Sereya Kankiraan xali Ala Batu Bubun kui, a yi a yɛ masansan dugin singan, alo Alatala a yamari Musa ma kii naxan yi. 22 A yi tabanla ti Naralan Bubun kui, Ala Batu Bubun kɔmen fɔxɔni, kankiraan yɛ masansan dugin fari ma. 23 A yi burune sa tabanla fari Alatala yetagi, alo Alatala a yamari Musa ma kii naxan yi. 24 A yi lenpu dɔxɔ seen dɔxɔ Naralan Bubun kui tabanla yetagi Ala Batu

Bubun yiifari fɔxɔn ma. 25 A yi lenpune yiton Alatala yetagi, alo Alatala a yamari Musa ma kii naxan yi. 26 A yi wusulan gande xɛma daxin dɔxɔ Naralan Bubun kui, dugin yetagi. 27 A yi wusulan xiri naxumen gan a fari alo Alatala a yamari Musa ma kii naxan yi. 28 A yi dugin singan Ala Batu Bubun dɛen na. 29 A yi saraxa gan daxin baden dɔxɔ Ala Batu Bubun soden dɛxɔn, Naralan Bubuna. A saraxa gan daxine ba na fari, e nun bogise saraxane, alo Alatala a yamari Musa ma kii naxan yi. 30 A yi ige sa seen dɔxɔ Naralan Bubun nun saraxa ganden tagi, a yi maxa igen sa a kui. 31 Musa nun Haruna nun a dii xɛmene yi e yiine nun e sanne maxama na igen nan na. 32 E nɛma yi soɛ Naralan Bubun kui, hanma e nɛma e masoɛ saraxa ganden na, e yi e maxama nen, alo Alatala a yamari Musa ma kii naxan yi. 33 A yi sansanna ti Ala Batu Bubun nun saraxa ganden nabilinni, a yi dugin singan sansanna dɛen na. Musa yi wanla rajan na kiini. 34 Nayi, kundaan yi so Naralan Bubun xun na, Alatalaa nɔrɔn yi Ala Batu Bubun nafe. 35 Musa mi yi nɔɛ soɛ Naralan Bubuni, bayo kundaan yi a fari, e nun Alatalaa nɔrɔn yi Ala Batu Bubun nafexi. 36 Na kundaan nɛma yi keɛ Ala Batu Bubun xun ma waxati yo yi, Isirayila kaane birin yi sigama nen a fɔxɔ ra. 37 Koni xa kundaan mi yi bama na, e fan mi yi sigama han a yi ba lɔxɔn naxan yi. 38 Alatalaa kundaan nan yi Ala Batu Bubun xun ma yanyin na, tɛɛn nan yi basanxi a ra kɔɛen na. Isirayila yamaan birin yi a to e sigatiin birin yi.

Saraxaraline

1 Alatala yi Musa xili Naralan Bubuni, a yi a fala a xa **2** a a xa falani ito rali Isirayila kaane ma, a naxa, “Xa ε tan nde fama saraxan na Alatala xa, a xa findi jingen na hanma yexεena hanma siina.” **3** “Xa a jingen nan bama saraxa gan daxin na, a xa turaan nan ba fe mi naxan na. Na kanna xa fa a ra Naralan Bubun so deen na alogo Alatala xa a rasuxu. **4** A xa a yiin sa saraxa jingen xunna ma. Ala a rasuxuma nen, a findi a solona seen na na kanna xa. **5** A xa tura bulanna kœ raxaba Alatala yetagi. Saraxaraline xa fa a wunla ra, Harunaa diine. Ne yi a so saraxa ganden dεxœnne ma Naralan Bubun so deen na. **6** Na kanna xa jingen budo, a yi a yisege dungi dungin na. **7** Saraxarali Harunaa diine xa teen sa saraxa ganden fari, e yegen sa teen na. **8** Saraxaraline, Harunaa diine, ne xa a dungine nun a xunna nun a turene sa yegene fari teeni saraxa ganden fari. **9** Na kanna xa jingen kui seene nun a sanne yixa, saraxaraliin yi e birin sa teeni saraxa ganden fari. Saraxa gan daxin na a ra naxan nalima teen na. A xirin nafan Alatala ma.” **10** “Xa na kanna saraxan findixi yexεen nan na hanma siina, a xa kontonna ba fe mi naxan na hanma kœtœna. **11** A xa a kœ raxaba saraxa ganden kœmen fœxœni Alatala yetagi. Saraxaraline, Harunaa diine, ne xa a wunla so saraxa ganden dεxœnne ma. **12** Na kanna xa a yisege a dungi dungin na. Saraxaraliin xa a dungine nun a xunna nun a turene sa yegene fari teeni, saraxa ganden fari. **13** Na kanna xa a kui seene nun a sanne maxa, saraxaraliin yi a birin xali, a e sa teeni saraxa ganden fari. Saraxa gan daxin na a ra naxan nalima teen na. A xirin nafan Alatala ma.” **14** “Xa na kanna saraxan findixi xœliin nan na naxan bama saraxa gan daxin na Alatala xa, a xa ganban nan ba hanma kolokonde diina. **15** Saraxaraliin xa xœliin xali saraxa ganden fari, a xa a xunna bolonje a ra, a yi a sa teeni saraxa ganden fari. A yi a wunla rabœxœn saraxa ganden dεxœnna ma. **16** A xa a xœœn ba e nun a yi seene, a yi e woli saraxa ganden dœxœn, sogeteden binni, xube bœxœndeni. **17** A xa a yibo a gabutene tagi, hali a mi e ba e bode ra. Saraxaraliin yi a sa yegene fari teeni saraxa ganden fari. Saraxa gan daxin na a ra naxan nalima teen na. A xirin nafan Alatala ma.”

2 “Xa muxuna nde waxi bogise saraxan fi feni Alatala ma, a xa fa murutu fujin nan na. A yi turen sa a yi,

a wusulanna sa a fari. **2** A xa a xali saraxaraline fema, Harunaa diine. A yi a yiin ye keden tongo murutu fujini, turen saxi naxan yi e nun wusulanna birin. Saraxaraliin xa na sa teeni saraxa ganden fari jœxœ lu seen na Ala xœn. Bogise saraxan nan na ra naxan nalima teen na. A xirin nafan Alatala ma. **3** Haruna nun a diine nan gbee bogise saraxan dœnxœn na. A sarijan han! Amasœto a baxi saraxane nan na naxanye ralixi teen na Alatala ma.” **4** “Xa bogise saraxan na a ra naxan ganxi buru gandeni, a xa findi murutu fujni fajin nan na, a rafala buru xunne ra naxanye bœnbœxi turen na hanma buru yilenlœnxœne turen saxi naxanye ma. Buru rate seen nama sa ne yi.” **5** “Xa bogise saraxan na a ra naxan ganxi tunde dutunna ma, a lan a xa findi murutu fujni fajin nan na naxan bœnbœxi turen na. Buru rate seen nama sa a yi. **6** I xa a yibolon, i turen sa a yi. Bogise saraxan na a ra.” **7** “Xa i ya bogise saraxan gilinxœn na a ra, a xa findi murutu fujni fajin nan na naxan bœnbœxi turen na.” **8** “Bogise saraxan naxan nafalaxi na seene ra, i xa fa na ra Alatala fema, i yi a so saraxaraliin yii, a yi a xali saraxa ganden dœxœn. **9** A nde bama bogise saraxan na nen jœxœ lu seen na Ala xœn, a na sa teeni saraxa ganden fari. Saraxan na a ra naxan nalima teen na. A xirin nafan Alatala ma. **10** Haruna nun a diine nan gbee bogise saraxan dœnxœn na. A sarijan han! Amasœto a baxi saraxane nan na naxanye ralixi teen na Alatala ma.” **11** “E bogise saraxan naxanye fima Alatala ma, ne sese nama rafala buru rate seen na. E nama sese gan buru rate seen na hanma kumin naxan yi xa bogise saraxan na a ra naxan nalima teen na Alatala ma. **12** E nœ ne fiye nen Alatala ma alo bœxœn bogise singene saraxana, koni ε nama ne gan saraxa ganden fari alo bogise saraxan naxan xiri rafan Ala ma. **13** I xa fœxœn sa i ya bogise saraxane birin yi. I nama jinan a sa feen na, amasœto fœxœn findixi Alaa Layirin taxamasenna nan na. A xa sa bogise saraxane birin yi.” **14** “Xa i fa i ya bœxœn bogise singene ra Alatala xa bogise saraxan na, i xa se xœri kendene nan fi a ma naxanye dinxi, e ganxi. **15** I xa turen nun wusulanna sa a fari. Bogise saraxan na a ra. **16** Saraxaraliin xa nde ba se xœri dœnxœne nun turen na, a a sa teeni jœxœ lu seen na Ala xœn e nun wusulanna birin. Saraxan na a ra naxan nalima Alatala ma teen na.”

3 “Xa muxuna nde a jingen bama bœje xunbeli saraxan na, a xœmena hanma a gilœna, a xa fa

jningen na Alatala yetagi fe mi naxan na. 2 A xa a yiin sa jningen xunna ma, a yi a kœ raxaba Naralan Bubun so deen na. Saraxaraline, Harunaa diine xa a wunla so saraxa ganden dexonne birin ma. 3 A xa a subeni itoe ba a ra, a ne rali Alatala ma teen na: turen naxanye buru subene ma, e nun naxanye singanxi e ra, 4 a gbingi ra xeŋe firinne, e nun turen naxanye e ma a gbingini, farafaran naxan boŋen ma naxan nun gbingi ra xelene bama. 5 Harunaa diine xa ne sa teeni saraxa ganden fari, e nun saraxa gan daxin naxanye yegene fari teeni. Saraxan nan na ra naxan nalima teen na. A xirin nafan Alatala ma.” 6 “Xa a xuruse xunxurin nan bama boŋe xunbeli saraxan na Alatala xa, a xa a xemen hanma a gileen ba fe mi naxan na. 7 Xa a yexeen ba, a xa a xali Alatala yetagi. 8 A xa a yiin sa xuruseen xunna ma a yi a kœ raxaba Naralan Bubun so deen na. Harunaa diine xa a wunla so saraxa ganden dexonne birin ma. 9 A xa a subeni itoe tongo boŋe xunbeli saraxan na, a ne rali Alatala ma teen na: a turena, a xunla nun a turene birin, naxan baxi a gbingi xonna ma, a turen naxanye birin a buru subene ma e nun naxanye singanxi e ra, 10 a gbingi ra xeŋe firinne, e nun turen naxanye e ma a gbingini, farafaran naxan boŋen ma naxan bama e nun gbingi ra xelene. 11 Saraxaraliin ne sama nen teeni saraxa ganden fari. Donseen nan na ra naxan nalixi Alatala ma teen na.” 12 “Xa a siin nan bama, a xa a xali Alatala yetagi. 13 A xa a yiin sa xuruseen xunna ma a yi a kœ raxaba Naralan Bubun yetagi. Harunaa diine xa a wunla so saraxa ganden dexonne ma. 14 A xa a subeni itoe tongo, a ne rali Alatala ma teen na: a turen birin naxanye a buru subene ma e nun naxanye singanxi e ra, 15 a gbingi ra xeŋe firinne, e nun turen naxanye e ma a gbingini, farafaran naxan boŋen ma naxan bama e nun gbingi ra xelene. 16 Saraxaraliin xa ne birin sa teeni saraxa ganden fari. Donseen na a ra naxan nalima teen na. A xirin nafan Alatala ma. Alatala nan gbee a turen birin na.” 17 “Habadan sariyan na a ra waxati famatone birin yi, e na doxo dede yi: E nama suben turen don, e nama suben wunla don.”

4 Alatala yi a fala Musa xa, 2 a xa a fala Isirayila kaane xa, a naxa, “Naxan na tantan a yulubin liga, a Alatalaa yamarina nde kala, a xa ito liga: 3 Xa saraxaraliin nan yulubin ligaxi naxan masusanxi turen na a findi saraxarali kuntigin na, a yamaan findi yulubi tongon na, a xa fa tura bulanna ra fe mi

naxan na, a na ba a yulubi xafari saraxan na Alatala xa. 4 A xa turaan xali Naralan Bubun deen na Alatala yetagi. A xa a yiin sa turaan xunna fari, a yi turaan kœ raxaba Alatala yetagi. 5 A yi a wunla nde tongo, a a xali Naralan Bubun kui. 6 A xa a yii sonla sin wunli, a a xuya Alatala yetagi doxona ma solofere yire sarijanxin ye masansan dugin yetagi. 7 Saraxaraliin xa wunla nde sa wusulan ganden tongonna fenne ma, naxan Alatala yetagi Naralan Bubun kui alogo na wunla xa rali Ala ma. A xa turaan wuli donxen naboxon saraxa gan daxin baden san bunna dexon ma Naralan Bubun deen fema. 8 A xa turani ito turen birin ba, turen naxanye a buru subene ma hanma naxanye singanxi e ra, 9 a gbingi ra xeŋe firinne nun turen naxanye e ma a gbingini, farafaran naxan boŋen ma naxan bama e nun gbingi ra xelene. 10 A turen bama nen alo turen naxanye bama boŋe xunbeli saraxana turani. Saraxaraliin xa e sa teeni saraxa ganden fari. 11 Koni turaan kidin nun a suben nun a xunna nun a sanne nun a kui seene nun a gbiine, 12 e nun a gbindin donxen birin, a xa ne xali yamaan daaxaden fari ma xube boxondeni denaxan sarijan. A yi e sa yegene fari teeni, a e gan xube malanxin fari.” 13 “Xa Isirayila yamaan birin nan Alatalaa yamarina nde kala tantanni, e mi a kolon, e bata findi yulubi tongone ra na yi. 14 E na a kolon a e bata yulubin liga, yamaan xa fa tura bulanna ra, e na ba yulubi xafari saraxan na. E na xalima nen Naralan Bubun yetagi. 15 Yamaan fonne xa e yiine sa turaan xunna ma Alatala yetagi, e turaan kœ raxaba. 16 Saraxarali gbeen xa a wunla nde xali Naralan Bubun kui. 17 A xa a yii sonla sin wunli a a xuya Alatala yetagi doxona ma solofere yire sarijanxin ye masansan dugin yetagi. 18 Saraxaraliin xa a wunla nde sa saraxa ganden tongonna fenne ma, naxan Alatala yetagi Naralan Bubun kui. A xa a wuli donxen naboxon saraxa gan daxi baden dexon ma Naralan Bubun deen fema. 19 A xa a turene birin ba, a a sa teeni saraxa ganden fari. 20 A xa na turaan liga alo turaan naxan ba a yeteen yulubi xafari saraxan na. Saraxaraliin xa Ala solona e xa na kiini, Ala yi e mafelu. 21 A xa turaan xali yamaan daaxaden fari ma, a yi a sa teeni alo a tura singen liga kii naxan yi. Yamaan yulubi xafari saraxan na ra.” 22 “Mangan na yulubin liga tantanni, a Alatalaa yamarin kala, a Ala. A bata findi yulubi tongon na. 23 A na a kolon a a bata yulubin liga, a xa fa koton na saraxan na, fe mi naxan na. 24 A xa a yiin sa koton xunna ma, a yi a kœ raxaba,

saraxa gan daxine kœ raxaban denaxan yi Alatala yetagi. Yulubi xafari saraxan na a ra. **25** Saraxaraliin xa a yii sonla sin na wunli, a yi nde sa saraxa gan daxi baden tongonna fenne ma, a yi wuli dœnxen nabœxœn saraxa ganden dœxœn ma. **26** A xa a turen birin sa tœeni saraxa ganden fari, alo bœje xunbeli saraxan turen liga kiinde. Saraxaraliin xa Ala solona mangan yulubina fe ra na kiini, Ala yi a mafelu.” **27** “Xa muxuna nde tantan yamaan ye, a yulubin liga, a Alatalaa yamarina nde kala, a bata findi yulubi tongon na. **28** A na a kolon a a bata yulubin liga, a xa fa sii gilen na saraxan na fe mi naxan na a yulubina fe ra. **29** A xa a yiin sa siin xunna fari naxan bama yulubi xafari saraxan na. A xa a kœ raxaba saraxa gan daxine bama denaxan yi. **30** Saraxaraliin xa na wunla nde tongo a yii sonla ra, a yi a sa saraxa gan daxi baden tongonna fenne ma, a yi wuli dœnxen nabœxœn saraxa ganden dœxœn. **31** A xa a turene birin ba, alo bœje xunbeli saraxan turen ba kii naxan yi. A yi a sa tœeni saraxa ganden fari, a xirin yi rafan Alatala ma. Saraxaraliin xa Ala solona na kiini, Ala yi na kanna mafelu.” **32** “Xa a fa yeœœ diin nan na a yulubi xafari saraxan na, a lan a xa a gileœ nan ba, fe mi naxan na. **33** A xa a yiin sa a xunna fari. A xa a kœ raxaba yulubi xafari saraxan na saraxa gan daxine kœ raxaban denaxan yi. **34** Saraxaraliin xa a wunla nde tongo a yii sonla ra, a yi a sa saraxa gan dixin baden tongonna fenne ma, a yi wuli dœnxen nabœxœn saraxa ganden dœxœn ma. **35** A xa a turene birin ba, alo yeœœ naxan ba bœje xunbeli saraxan na. Saraxaraliin yi a sa saraxan bonne fari naxanye ralima Alatala ma tœeni saraxa ganden fari. Saraxaraliin xa Ala solona na kiini na kanna xa a yulubi ligaxine fe ra, Ala yi a mafelu.”

5 “Xa yamaan xilixi sereya badeni e yi e rakœlœ, xa muxuna nde feen naxan toxi hanma a a kolon, xa a mi sereyaan ba na ma, a bata yulubin liga. A na haken goronna tongoma nen. **2** Xa muxuna nde a din se haramuxina nde ra, xa a findi sube haramuxi faxaxin na, hanma xuruse haramuxina nde, hanma bubuse haramuxina nde, hali a mi a kolon, a fan mi fa sarijanxi, a bata yulubin tongo. **3** Xa muxuna nde a din se xœsixin na nde ra naxan fataxi adamadiine ra, hali a mi yi a kolon, a na a kolon, a bata findi yulubi tongon na. **4** Xa muxuna nde mi a miri, a a kolœ wulen fari, fa fala a fena nde rabama nen. Xa a mi a raba, a bata findi yulubi tongon na.” **5** “Naxan na findi yulubi

tongon na na feene yi, na xa a ti a yulubi ligaxin na. **6** Na xanbi ra, a xa fa yeœœ gilen na hanma sii gilœna, a a ba saraxan na Alatala xa a yanginna ra. Nayi, saraxaraliin xa Ala solona a yulubina fe ra.” **7** “Xa fere mi a xa a xuruseen sœtœ, a xa fa ganba firin hanma kolokonde firin na, a ne ba saraxan na a yanginna ra Alatala xa, keden yulubi xafarin na, keden saraxa gan dixin na. **8** A xa e xali saraxaraliin fema. A xa yulubi xafari saraxan nan singe ba. A xa a kœœn gira, koni a nama a xunna bolœje a ra. **9** A xa a wunla nde xuya saraxa ganden dœxœnna ma, a wuli dœnxen nabœxœn saraxa ganden dœxœn. Yulubi xafari saraxan na a ra. **10** A xa xœliin boden ba saraxa gan dixin na alo sariyana a falaxi kii naxan yi, a yi Ala solona na kanna yulubina fe ra. Ala a mafeluma nen.” **11** “Xa fere mi a xa a ganba firin hanma kolokonde firin sœtœ, a nœ fe murutu fupin kilo naanin na nen yulubi xafari saraxan na. Koni a nama turen hanma wusulanna sa a yi, bayo yulubi xafari saraxan na a ra. **12** A xa a xali saraxaraliin fema, na yi a yiin ye keden ba a ra jœœœ lu seen na Ala xœn, a yi a sa saraxane fari naxanye ralima Alatala ma tœeni saraxa ganden fari. Yulubi xafari saraxan na a ra. **13** Saraxaraliin xa Ala solona na kiini na kanna yulubi ligaxine fe ra, Ala yi a mafelu. Saraxaraliin nan gbee saraxan dœnxœn na alo a ligan bogise saraxan na kii naxan yi.” **14** Alatala yi a fala Musa xa, a naxa, **15** “Xa muxuna nde tinxintareyaan liga, a yulubin liga tantanni a mi Alatala gbee se sarijanxine fi a ma. A xa fa kontonna ra e nun naxan yelan a yanginna ra Alatala xa, fe mi naxan na, naxan saren lanxi kala tixin ma, fata yire sarijanxin gbeti liga seen na. Yangin saraxan nan na ra. **16** A mi se sarijanxin naxan fixi, a xa a jœœœn fi, a yi a saren yaganna dœœœna ma firin sa a fari, a yi a birin so saraxaraliin yii. Saraxaralina Ala solonama nen na kanna xa kontonna ra, a naxan bama yangin saraxan na, Ala yi a mafelu.” **17** “Xa muxuna nde yulubin liga, a Alatalaa yamarina nde kala, hali a mi a kolon, a bata findi yulubi tongon na. A a haken goronna tongoma nen. **18** A xa fa kontonna ra saraxaraliin fema fe mi naxan na yangin saraxan na. A saren xa lan a kala tixin saren ma fata sariyan na saraxaraliin miriyani. Nayi, saraxaralina Ala solonama nen a tantanna fe ra, Ala yi a mafelu. **19** Yangin saraxan na a ra, bayo na kanna findixi yulubi tongon nan na Alatala mabinni.”

6 Alatala yi a fala Musa xa, a naxa, **2** “Xa muxuna nde yulubin liga, a yi tinxintareyaan liga Alatala ra, a wulen fala a boden xa a yii sena nde a fe ra, naxan taxuxi a ra hanma a a muja, hanma a a kansun, **3** hanma a a de yixalan sena nde a fe ra naxan loxi ayi, a yi a to, hanma a a kolo wuleni, hanma a yulubina nde liga alo adaman dari fena, **4** a na na sifan liga, a bata findi yulubi tongon na. A xa na se mujaxin naxete, hanma a naxan kansunxi, hanma naxan yi taxuxi a ra, hanma a seen naxan toxi naxan yi loxi ayi, **5** hanma a wulen falaxi seen naxan ma fe ra. A xa na joxon fi, a yi yaganna doxona ma firin sa a fari, a yi a so a kanna yii na loxon yeteni a na yangin saraxan ba loxon naxan yi. **6** A xa fa kontonna ra saraxaraliin fema fe mi naxan na yangin saraxan na Alatala xa. Na kontonna saren nun kala tixin saren xa lan. **7** Saraxaralina Alatala solonama nen, a yi a mafelu na feen na, naxan a findixi yulubi tongon na.” **8** Alatala yi a fala Musa xa, **9** a xa yamarini ito fi Haruna nun a diine ma, a naxa, “Sariyan ni i ra saraxa gan daxine fe ra. Saraxa gan daxin xa lu ganje saraxa ganden fari koeen birin na han xotonni. Teen nama tu saraxa ganden fari. **10** Na xanbi ra, saraxaraliin xa a maxidi taa dugi gubani e nun a taa dugi bunbirana, a saraxan xuben ba saraxa ganden fari teen naxanye ganxi, a yi e sa saraxa ganden dexon. **11** Na xanbi ra, a a dugine masara, a xuben xali yamaan daaxaden fari ma yirena nde yi naxan sarijan. **12** Teen naxan degema saraxa ganden fari, na nama tu. Xoton yo xoton, saraxaraliin xa yegene fari sa, a yi saraxa gan daxini ton teeni, a boje xunbeli saraxane turen sa a fari. **13** Teen xa lu dega saraxa ganden fari waxatin birin. A nama tu.” **14** “Sariyan ni i ra bogise saraxana fe ra: Harunaa diine xa fa a ra Alatala yetagi, saraxa ganden yetagi. **15** Saraxaraliin xa murutu fujin nun turen yiin yejayi keden tongo, e nun wusulanna birin naxan saxi bogise saraxan fari. A yi na sa teeni joxo lu seen na Ala xon saraxa ganden fari, a xirin yi rafan Alatala ma. **16** Haruna nun a diine xa na bogise saraxan donxen don. E xa a don yirena nde yi naxan sarijan Naralan Bubun sansanna kui. Buru rate se nama sa a yi. **17** A mi ganma buru rate seen na. N na nan soxi e yii e gbeen na fata ne saraxane ra naxanye ralima n ma teen na. A sarijan han! A sarijan alo yulubi xafari saraxan nun yangin saraxan sarijan kii naxan yi. **18** Haruna bonsonna xemene birin daxa e xa a don. E gbeen na a ra fata saraxane ra naxanye ralima Alatala

ma teen na waxati famatone birin yi. Naxan yo nema a yiin dinje a ra fo a xa sarijan.” **19** Alatala yi a fala Musa xa, a naxa, **20** “Haruna nun a diine na masusan loxon naxan yi e yi findi saraxaraline ra, e xa murutu fujin kilo saxan ba bogise saraxan na Alatala xa, a tagina xotonni, a tagiin bonna jinbanna ra. **21** Murutu fujin lan a bonbo turen na, na yi gan tunde dutunna ma. Na xanbi ra, na burudin xa yigira dungi dugin na, a rali bogise saraxan na naxan xiri rafan Alatala ma. **22** Haruna bonsonna naxan findima saraxarali kuntigin na, na xa saraxani ito ba. Habadan sariyan na a ra Alatala yetagi, a ganma nen fefe! **23** Saraxaraliin na fa bogise saraxan naxan na, a ganma nen fefe, a nama don.” **24** Alatala yi a fala Musa xa, **25** a a xa a fala Haruna nun a diine xa, a naxa, “Sariyan ni i ra yulubi xafari saraxana fe ra. Yulubi xafari saraxan xa faxa Alatala yetagi saraxa gan daxin koe raxaban denaxan yi. A sarijan han! **26** Saraxaraliin naxan a ralima, na nan a donma. A xa a don Naralan Bubun sansanna kui yirena nde yi naxan sarijan. **27** Naxan yo nema a yiin dinje a suben na fo a xa sarijan nen. Xa a wunla xuya dugina nde ma, i xa na dugin xa yire sarijanxina nde yi. **28** A na jin fejen naxan kui, i xa na kala. Koni xa a jin sula goronna nan kui, a xa maxa, a malinsaxun. **29** Xemen naxanye saraxaralina denbayani, ne nan daxa, e a don. A sarijan han! **30** Koni yulubi xafari saraxan naxan wunla bata xali Naralan Bubun yire sarijanxin kui Ala solona seen na, na nama don. Na xa sa teeni.”

7 “Sariyan ni i ra yangin saraxana fe ra. A sarijan han! **2** Yangin saraxan xa faxa saraxa gan daxin koe raxaban denaxan yi. A wunla yi so saraxa ganden dexonne birin ma. **3** A turen birin xa ba saraxan na, a xuli turen nun a turen naxanye a buru subene ma, **4** a gbingi ra xele firinne nun turen naxanye e ma a gbingini, farafaran naxan bojen ma naxan bama e nun gbingi ra xelene. **5** Saraxaraliin xa ne rali Alatala ma teeni saraxa ganden fari. Yangin saraxan na a ra. **6** Xemen naxanye saraxaralina denbayani, ne nan daxa, e a don, koni fo a xa don yire sarijanxina nde yi, bayo a sarijan han! **7** Yangin saraxan nun yulubi xafari saraxan lanxi sariya kedenni ito nan ma: saraxaraliin naxan Ala solonama, a tan nan gbee suben na.” **8** “Saraxaraliin naxan saraxa gan daxin bama muxuna nde xa, a tan nan gbee na kidin na.” **9** “Bogise saraxan naxan birin ganxi buru gandeni, naxan nafalaxi tunde dutunna ma hanma naxan gilinxi, saraxaraliin nan

gbee ne ra, naxan saraxan nalixi. **10** Bogise saraxan birin naxan basanxi turen na hanma a xarena, Haruna bõnsõnne birin nan gbee ne ra.” **11** “Sariyan ni i ra bõjɛ xunbeli saraxana fe ra naxan bama Alatala xa. **12** Xa muxuna nde xuruseen bama barika bira seen na, a xa a ba e nun buru xunne buru rate se mi naxanye yi naxanye bõnbõxi turen na e nun burudine turen saxi naxanye ma buru rate se mi naxanye yi, e nun buru yilenlɛnxin naxanye rafalaxi murutu fujin fajin na naxanye bõnbõxi turen na. **13** Buru rate seen buru xunna naxanye yi, na ndee xa sa bõjɛ xunbeli saraxan fari naxan bama barika bira seen na. **14** A xa nde ba ne keden kedenna ra, a na fi Alatala ma. Na findima saraxaraliin nan gbee ra naxan bõjɛ xunbeli saraxan wunla xuyaxi. **15** Bõjɛ xunbeli saraxan naxan bama barika bira seen na, na suben xa don a ba lɔxɔn nin. Na sese nama ramara han xɔtɔnni.” **16** “Koni, xa muxuna nde bõjɛ xunbeli saraxan bama alogo a xa a dɛ xuiin nakamali hanma a a ba jɛnige ma saraxan na, saraxa suben xa don a ba lɔxɔn nin, koni naxan na lu, a nɔɛ na donjɛ nen na xɔtɔn bode. **17** Saraxan suben dɔnxɛn naxan na lu a xii saxandeni na xa sa tɛɛni. **18** Xa muxuna nde susu a bõjɛ xunbeli saraxan suben don a xii saxande lɔxɔni, saraxan mi rasuxuma. Ala mi a yatema sese ra, a ba muxun xa bayo a haramuxi. Naxan na a don, a na haken goronna tongoma nen. **19** Suben naxan na din se haramuxin na, na nama don, a xa sa tɛɛni. Muxun naxan sarijan, na kanna daxa a saraxa suben don, **20** koni naxan mi sarijanxi, a yi bõjɛ xunbeli saraxa subena nde don Alatala gbeen naxan na, na kedima nen a yamani. **21** Naxan na a din se haramuxina nde ra, fata adaman na hanma sube haramuxina, hanma xɔsi se haramuxina nde, a yi bõjɛ xunbeli saraxa suben don Alatala gbeen naxan na, na kanna kedima nen a yamani.” **22** Alatala yi a fala Musa xa, **23** a a xa a fala Isirayila kaane xa, a naxa, “Ɛ nama jingen turen don, hanma yɛxɛɛna, hanma siina. **24** I na suben to, a faxaxi hanma burunna subene a yiboxi, ne turen nɔɛ rawale nen se gbete ra, koni i nama a don. **25** Naxan na na sube sifane turen don naxanye nɔɛ raliyɛ Alatala ma tɛɛn na, na kedima nen a yamani. **26** Ɛ nama xɔliin wunla don hanma suben wunla, ɛ nɛma dɔxi dede yi. **27** Naxan na wunla nde don, na kedima nen a yamani.” **28** Alatala yi a fala Musa xa, **29** a a xa a fala Isirayila kaane xa, a naxa, “Naxan na bõjɛ xunbeli saraxan ba, a xa fa a fɔxɔ kedenna ra, a na ba saraxan na Alatala xa. **30** A

yɛtɛɛn xa fa na kiseen na naxan nalima Alatala ma tɛɛn na. A xa fa suben turen nun a kanken na. A xa a kanken yita Alatala ra alo se ralixina. **31** Saraxaraliin xa turen sa tɛɛni saraxa ganden fari, koni a kanken xa lu Haruna nun a diine xa. **32** I xa bõjɛ xunbeli saraxan yiifari ma danban fi saraxaraliin ma kiseen na. **33** Haruna bõnsõnna naxan bõjɛ xunbeli saraxan wunla nun turen nalixi, na nan gbee a yiifari ma danban na. **34** Amasɔtɔ Isirayila kaane bõjɛ xunbeli saraxan naxanye bama, a kanke ralixin nun a danban naxan fixi, n bata ne so Haruna nun a diine yii, saraxaraline. Isirayila kaane na subene nan soma e yii habadan.” **35** “Ito nan findi Haruna nun a diine gbeen na e Alatalaa saraxarali wanla fɔlɔ lɔxɔn naxan yi. A bama ne saraxane ra naxanye ralixi Alatala ma tɛɛn na. **36** Alatala na nan yamarixi Isirayila kaane ma, e to masusan lɔxɔn naxan yi. Habadan sariyan na a ra e yixetene birin xa. **37** Sariyane nan ne ra saraxani itoe fe ra: saraxa gan daxina, bogise saraxana, yulubi xafari saraxana, yangin saraxana, saraxaraliin dɔxɔ saraxana e nun bõjɛ xunbeli saraxana. **38** Alatala na sariyan so Musa yii Sinayi geyaana nan fari, a Isirayila kaane yamari lɔxɔn naxan yi Sinayi tonbonni, a e xa fa e saraxane ra Alatala xa.”

8 Alatala yi a fala Musa xa, a naxa, **2** “Haruna nun a diine xili Naralan Bubun so dɛɛn na. I xa fa e duginɛ nun masusan turen na, e nun turaan naxan bama yulubi xafari saraxan na, e nun konton firin e nun debena buru ratetarene naxan kui. **3** I xa Isirayila yamaan birin malan Naralan Bubun so dɛɛn na.” **4** Alatala yamarin naxan fi, Musa yi na liga, yamaan yi e malan Naralan Bubun so dɛɛn na. **5** Musa yi a fala yamaan xa, a naxa, “Alatala ito nan yamarixi.” **6** Musa yi Haruna nun a diine maso, a yi e maxa. **7** A yi dugin nagodo Haruna ma, a yi a tagi xidi tagixidin na, a gubaan nagodo a ma, a saraxarali domaan nagodo a ma, a saraxarali domaan tagi xidi tagixidi fajin na. **8** A yi kanke masaan bira a kɔɛ, a masensɛn ti seene, Yurima nun Tumin sa na kui. **9** A yi namun so Haruna xun na, a yi xema walaxadin sa a tigi yɛɛ ra taxamaseri sarijanxin na alo Alatala a yamari Musa ma kii naxan yi. **10** Musa yi masusan turen tongo, a Ala batu bubun masusan e nun a yi seen birin. A ne birin nasarijan. **11** A yi na turena nde xuya saraxa ganden ma dɔxɔja ma solofere, a saraxa ganden masusan e nun a goronne birin, e nun ige sa seen nun a dɔxɔ

sena, alogo a xa ne rasarijan. **12** A mən yi turen sa Haruna xunni, a a masusan, alogo a xa a rasarijan. **13** A yi Harunaa diine maso. A yi e dugine ragodo e ma, e nun tagi xidine nun xun tagi xidine, alo Alatala yamarin naxan so Musa yii. **14** A yi fa turaan na yulubi xafari saraxan na, Haruna nun a diine yi e yiine sa turaan xunna fari. **15** Musa yi a kœ raxaba, a a wunla nde tongo, a yi a sa saraxa ganden tongonna fenne ma a yii sonla ra, alogo a xa saraxa ganden nasarijan. A yi wuli dənən naboən saraxa ganden dənən ma. A saraxa ganden nasarijan na kiini alogo a xa Ala solona mēni. **16** Musa mən yi turen tongo naxanye yi jingen buru subene rabilinni, e nun farafaran naxan yi bəjən fari, e nun a gbingi ra xele firinne nun e turene. A yi na birin sa tēni saraxa ganden fari. **17** Koni a yi jingen gbindin nun a kidin nun a suben nun a gbiine woli tēni yamaan daaxaden fari ma, alo Alatala a yamarin Musa ma kii naxan yi. **18** Na xanbi ra, a yi fa kontonna ra saraxa gan daxin na. Haruna nun a diine yi e yiine sa a xunna ma. **19** Musa yi a kœ raxaba, a a wunla nde so saraxa ganden dənənne ma. **20** A yi a yixaba dungi dungin na, a a xunna sa tēni, e nun a dungine nun a turena. **21** A yi a buru subene nun a sanne maxa, a yi kontonna gbindin birin sa tēni saraxa ganden fari saraxa gan daxin na, naxan nalixi Alatala ma tēn na alo a yamari Musa ma kii naxan yi. A xirin yi rafan Ala ma. **22** Na xanbi ra, a yi fa kontonna firinden na saraxarali dœ saraxan na. Haruna nun a diine yi e yiine sa a xunna ma. **23** Musa yi a kœ raxaba, a a wunla nde tongo, a yi a sa Haruna yiifari ma tunla ma. A nde sa a yiifari ma yii konkoribaan nun a san konkoribaan ma. **24** A yi Harunaa diine fan maso, a a wunla nde sa e yiifari ma tunle ma e nun e yiifari ma yii konkoribaan nun san konkoribane. A yi a wunla nde so saraxa ganden dənənne ma. **25** A a turen tongo, e nun a xuli turena, e nun turen naxanye a buru subene rabilinni, e nun farafaran naxan a bəjən fari, e nun a gbingi ra xele firinne nun e turene, e nun a yiifari ma danbana. **26** A deben tongo buru ratetaren naxan kui, naxan yi Alatala yetagi. A yi buru xun keden tongo, e nun buru keden naxan nafalaxi turen na e nun burudi keden. A yi e sa suben turene nun yiifari ma danban fari. **27** A yi e birin so Haruna nun a diine yii, a yi e yite Alatala yetagi se ralixin na. **28** Na xanbi ra, Musa yi e rasuxu e ra, a yi e sa tēni saraxa ganden fari saraxa gan daxine fari. Saraxarali dœ saraxan na a ra, naxan

xiri rafan Ala ma. A ralima Alatala ma tēn nan na. **29** Musa yi kontonna kanken tongo a yi a yite Alatala yetagi se ralixin na. Na yi findi Musa gbeen na alo Alatala a yamari Musa ma kii naxan yi. **30** Musa yi masusan turena nde tongo e nun wunla nde naxan yi saraxa ganden fari, a yi a xuya Haruna nun a dugine ma, e nun a diine nun e dugine. Nayi, a yi Haruna nun a dugine rasarijan, e nun a diine nun e dugine. **31** Musa yi a fala Haruna nun a diine xa, a naxa, “E suben jin Naralan Bubun de ra, e yi a don na, e nun burun naxan deben kui saraxarali dœ saraxan na, alo n na a yamari kii naxan yi. N naxa, ‘Haruna nun a diine xa a don.’ **32** E xa burun nun sube dənən woli tēni. **33** E nama keli Naralan Bubun de ra xii solofere, han e dœ fe lœne yi jan bayo e dœ feene buma nēn xii solofere. **34** Alatala to feene yamarixi nēn alogo a xa solona e xa. **35** Nanara, e xa lu Naralan Bubun dēn na xii solofere, kœn nun yanyin na, e yi Alatalaa yamarin suxu, alogo e nama faxa, amasœ na nan yamarixi n ma.” **36** Alatalaa yamarin naxanye birin fi e ma fata Musa ra, Haruna nun a diine yi ne birin liga.

9 Xii solomasexede lœni, Musa yi Haruna nun a diine xili, e nun Isirayila fonne. **2** A yi a fala Haruna xa, a naxa, “Turaan dii keden tongo i yulubi xafari saraxan na e nun konton keden saraxa gan daxin na, fe mi naxanye ra, i fa e ra Alatala yetagi. **3** I yi a fala Isirayila kaane xa, i naxa, ‘E xa kœn tongo yulubi xafari saraxan na, e nun turaan diin nun yexœ diina jœ keden kedenne, fe mi naxanye ra saraxa gan daxin na, **4** e nun turana e nun kontonna bœ xunbeli saraxan na, alogo e xa ba saraxan na Alatala yetagi, e nun bogise saraxan naxan basanxi turen na. Amasœ Alatala a nœn yitama e ra nēn to.” **5** Musa naxan yamari, e na xali Naralan Bubun yetagi. Yamaan birin yi e maso, e ti Alatala yetagi. **6** Musa yi a fala, a naxa, “Alatalaa yamarin ni i ra e naxan ligama alogo e xa a nœn to.” **7** Musa yi a fala Haruna xa, a naxa, “I maso saraxa ganden na. I yi i yulubi xafari saraxan nun saraxa gan daxin ba, i Ala solona i yetēn nun yamaan xa. I xa saraxan ba yamaan fan xa alogo i xa Ala solona e xa, alo Alatala a yamarixi kii naxan yi.” **8** Haruna yi a maso saraxa ganden na, a yi turaan diin kœ raxaba a yete yulubi xafari saraxan na. **9** A diine yi fa a wunla ra a xœn, a yi a yii sonla sin wunli, a yi a sa saraxa ganden tongonna fenne ma. A yi wuli dənən naboən saraxa ganden dənən ma. **10** A yi a

turen sa tēni saraxa ganden fari, e nun a gbingi ra xelene nun farafaran naxan a bōjēn fari, e naxanye baxi yulubi xafari saraxani, alo Alatala a yamari Musa ma kii naxan yi. **11** Koni a yi a suben nun a kidin sa tēni yamaan daaxaden fari ma. **12** A yi saraxa gan daxin kōe raxaba. A diine yi a wunla so a yii, a yi a so saraxa ganden dēxōnne ma. **13** E yi saraxan dungi keden keden so a yii e nun a xunna, a yi e sa tēni saraxa ganden fari. **14** A yi a buru subene nun a sanne maxa, a yi e sa saraxa gan daxin fari tēni saraxa ganden fari. **15** Na xanbi ra, Haruna yi fa yamana saraxan na. A yi yamana yulubi xafari saraxa kōtōn tongo, a yi a kōe raxaba. A na ba yulubi xafari saraxan na alo a singen ba kii naxan yi. **16** A yi fa saraxa gan daxin na, a na ba alo sariyana a falaxi kii naxan yi. **17** A yi fa bogise saraxan na, a yi a yiin yē keden ba a ra, a yi na sa tēni saraxa ganden fari, sa xōtōn ma saraxan gan daxin fari. **18** A yi turaan nun kontonna kōe raxaba yamana bōjē xunbeli saraxan na. A diine yi a wunla so a yii, a yi a so saraxa ganden dēxōnne ma. **19** E yi turaan nun kontonna turen tongo, e nun a xuli turena, a ture yirene, a gbingi ra xelene, e nun farafaran naxan a bōjēn fari, **20** e yi ne sa subene kankene fari. Haruna yi turene sa tēni saraxa ganden fari. **21** Haruna yi subene kankene nun e yiifari ma danbane yite Alatala yetagi, se ralixin na alo Musa a yamari kii naxan yi. **22** Haruna yi a yiine yite yamaan binni, a duba e xa. A to yulubi xafari saraxan nun saraxa gan daxin nun bōjē xunbeli saraxan ba, a yi godo. **23** Musa nun Haruna yi so Naralan Bubun kui. E to mini, e duba yamaan xa. Alatalaa nōrōn yi godo saraxa gandeni yamaan yetagi. **24** Tēen yi mini Alatala yetagi, a saraxan nun turen gan saraxa ganden fari. Yamaan to na to, e sōnxō sewani, e yi e xinbi sin, e yetagin lan bōxōn ma.

10 Haruna dii firinne, Nadaba nun Abihu, ne yi e wusulan gan seene tongo, e tēen sa e kui, e wusulanna sa a fari. E yi fa tēen na Alatala yetagi, naxan mi yi lan, a mi yi naxan yamarixi. **2** Nayi, tēen yi mini Alatala yetagi, a yi e gan, e faxa Alatala yetagi. **3** Musa yi a fala Haruna xa, a naxa, “Alatala ε rakolonxi nen ito ra, a to a fala, a naxa, ‘N na n ma sarijanna mayitama nen n batu muxune tagi. N binyama nen yamaan yetagi.’” Haruna yi lu dunduxi. **4** Musa yi Mikayeli nun Elisafan xili, Haruna sōxō Yusiyei a diine, a yi a fala e xa, a naxa, “E xa ε

ngaxakedenne binbine xali yamaan daaxaden fari ma, keli yire sarijanxin yetagi.” **5** E yi fa, e yi e xali yamaan daaxaden fari ma, alo Musa e yamari kii naxan yi. Dugine mōn yi e binbine ma. **6** Musa yi a fala Haruna nun a diine xa, Eleyasari nun Itamara, a naxa, “E nama ε xunna lu a yitōntaren na, ε to sunuxi. E nama ε dugine yibō, alogo ε nama faxa, ε yi Alatalaa xōlōn nafa yamaan birin ma. Alatala ε kon kaan naxanye faxaxi tēen na, Isirayila yamaan birin nan ne wugama. **7** E nama keli Naralan Bubun so dēen na, alogo ε nama faxa, amasōtō Alatalaa masusan turen nan ε ma.” Musa naxan fala, e na liga. **8** Alatala yi a fala Haruna xa, a naxa, **9** “I na so Naralan Bubun kui, i nama manpaan min, i nama na minse sifan min, i tan nun i ya diine, alogo ε nama faxa. A findima habadan sariyan nan na i yixetene xa waxati famatone yi. **10** E xa se sarijanxin nun a haramuxin tagi raba, naxan mi daxa e nun naxan daxa. **11** E xa Isirayila kaane xaran tōnne ma Alatala naxanye fixi e ma fata Musa ra.” **12** Musa yi a fala Haruna nun a diine xa naxanye yi fa luxi, Eleyasari nun Itamara, a naxa, “Bogise saraxan naxan luxi, naxan mi ralixi Alatala ma tēen na, ε xa na tongo, ε yi a don saraxa ganden fēma. A nama basan buru rate seen na. A sarijan fefel! **13** E xa a don yirena nde yi naxan sarijan, amasōtō i gbeen na a ra ε nun i ya diine, fata na saraxane ra naxanye ralixi Alatala ma tēen na, bayo na nan yamarixi n ma. **14** Koni suben kanken naxan nalixi e nun danban naxan yitexi Ala xa, ε nun i ya dii xemene nun i ya dii tēmene xa ne don yirena nde yi naxan sarijan. Amasōtō e bata so ε yii ε gbeen na, naxanye baxi Isirayila kaane bōjē xunbeli saraxane ra. **15** Isirayila kaane lan e xa fa danban na naxan yitexi e nun kanken naxan nalixi Ala ma, sa turene fari naxanye sama tēni, alogo e xa yite Alatala yetagi se ralixin na. Habadan sariyan na a ra: I gbeen nan e ra, ε nun i ya diine alo Alatala a yamarixi kii naxan yi.” **16** Musa yi kōtōna fe maxōdin, naxan baxi yulubi xafari saraxan na. A yi a me a e bata yi a birin sa tēni. Nayi, a yi xōlō Eleyasari nun Itamara ma, Harunaa dii naxanye lu, a naxa, **17** “Nanfera ε mi saraxani ito suben donxi yire sarijanxini? A sarijan han! Alatala subeni ito soxi e yii nen alogo Isirayila yamana haken xa ba a ma, ε yi Alatala solona e xa. **18** Amasōtō subeni ito wunla to mi soxi yire sarijanxin kui, nayi ε lan nen ε kōtōn suben don yire sarijanxini, alo n na a yamari kii naxan yi.” **19** Haruna yi a fala Musa xa, a

naxa, “I tuli mati. E bata yulubi xafari saraxan nun saraxa gan daxin ba Alatala yetagi to loxoni, na kui, i mi a to fe sifan naxan n masotoxi. Na yi Alatala kenenje ba, xa n fa yulubi xafari saraxa suben don to?” 20 Musa to na me, na yi a kenen.

11 Alatala yi a fala Musa nun Haruna xa, 2 a e xa a fala Isirayila kaane xa, e naxa, “Boxon subene birin ye, e lan e xa itoe nan don: 3 Sube toro kanna naxanye mon donseen laxunma, e noe ne birin donje nen fo naxanye toro mi boxi jaxi ra.” 4 “Koni ndee na naxanye donseen laxunma tun, hanma naxanye toro boxi tun, ne haramuxin na a ra e tan xa. Nogomena, na haramuxi bayo a donseen laxunma, koni a toro mi boxi jaxi ra. 5 Fanyerasiin donseen laxunma, koni a toro mi boxi jaxi ra. A haramuxin na a ra e tan xa. 6 Neren donseen laxunma, koni a toro mi boxi jaxi ra, a haramuxin na a ra e tan xa. 7 Xosen toron boxi, koni a mi donse laxunma, a haramuxin na a ra e tan xa. 8 E nama e suben don, e nama e yiin din e faxaxin na. E haramuxin na a ra e tan xa.” 9 “Niimaseen naxanye igeni, e lan e xa xali yexene don naxanye e bama, foxo igeni hanma baani. 10 Koni niimase xunxuri naxanye foxo igeni hanma baani, e mi e bama, e xali mi e ma, e nama ne don. E xosixin na a ra e tan xa. 11 Se xosixin nan ne ra e tan xa, e nama e suben don. E xa e faxaxin yate alo xosina. 12 Naxanye birin igeni, e mi e bama, e xali mi e ma, se xosixin nan ne ra e tan xa.” 13 “E xa xoliini itoe yate alo se xosixina, e nama ne don: singbinna nun dugan nun xolimangan 14 nun bangaan nun segen siyaan birin 15 e nun xaxaan siyaan birin 16 nun dangaranfulen nun kutunxunban nun foxo ige ma xoliin nun toxedi tongon siyaan birin, 17 e nun kunkutunna nun jinxaxan nun fotonbunsamuran 18 nun toxoroon nun yexe suxu kankon nun kankanna, 19 e nun yaya xonla nun sajni xonla siyaan birin, e nun sarasima xonla nun tuyena.” 20 “Gabuteen nun sanne niimase xunxurin naxanye ma, ba xoline ra, ne xosixin na a ra e tan xa. 21 Koni, xa na niimase xunxurin sifana nde sanna a lige a tugan, e noe na donje nen. 22 E noe itoe nan donje ne ye: supen siyaan birin nun xoxorone nun songolonbalane e nun tuguminne. 23 Koni, gabuteen nun sanne niimase xunxuri gbete naxanye ma, e xa ne yate se xosixine ra. 24 Ne e raxosima nen. Naxan yo na a yiin din e faxaxin na, na kanna mi fa sarjannxi han jinbanna ra. 25 Naxan yo na e faxaxin tongo, na lan a yi a dugine

xa. A mi fa sarjannxi han jinbanna ra.” 26 “Suben naxan birin toro mi boxi jaxi ra hanma a mi donseen laxunma, ne haramuxin na ra e tan xa. Naxan na a yiin din e faxaxin na, na mi fa sarjannxi. 27 Sube san naaninna naxanye birin sanna xunduxi, e haramuxin na a ra e tan xa. Naxan yo na a yiin din e faxaxin na, na kanna mi fa sarjannxi han jinbanna ra. 28 Naxan yo na e faxaxin tongo, na lan a yi a dugine xa, a mi fa sarjannxi han jinbanna ra. E haramuxin na a ra e tan xa.” 29 “Yili ra seen naxanye boxon ma, itoe nan haramuxi e tan xa: sulumen nun yelen nun dangen siyaan birin, 30 e nun lennakonsaan nun sagadin nun kendemelexaan nun mululuna e nun kolona. 31 Ne nan haramuxi e xa yili ra seene ye boxon ma. Naxan yo na a yiin din e faxaxin na, na kanna mi fa sarjannxi han jinbanna ra. 32 E faxaxin na bira se yo ma, na xosima nen, xa a findi wudi daxin na, hanma dugina, hanma kidina, hanma benbenla. Goron yo naxan nawale wali yo yi, a sama nen igeni. A mi fa sarjannxi han jinbanna ra. Na xanbi ra, a yi sarjann. 33 Xa na niimasena nde keden bira fejena nde kui, a xosima nen. E xa na fejena kala. 34 Donseen naxan lan a xa don, koni xa na fejne kui igen sa a ma, a xosima nen. Minse yo na min na fejena kui, a xosixin na a ra. 35 E faxaxin na bira se yo ma, na xosima nen. Xa buru ganden na a ra hanma tee yinla fo e xa a kala, bayo a xosixi. E xa a yate alo se haramuxina. 36 Koni xa a faxaxin bira tigini hanma ige ramaradeni, ne mi xosixi. Koni naxan na a yiin din a faxaxin na, na mi fa sarjannxi. 37 Xa a faxaxin bira sansiin ma naxan lan a si, a mi xosixi. 38 Koni xa igen bata sa sansiin ma, a faxaxin yi bira a yi, na sansiin bata haramu e xa.” 39 “Suben naxan lan a xa don, xa na faxes a yete ma, naxan na a yiin din a faxaxin na, na mi fa sarjannxi han jinbanna ra. 40 Naxan na a suben don, na lan a yi a dugine xa, a mi fa sarjannxi han jinbanna ra. Naxan yo na e faxaxin maxali na lan a xa a dugine xa, a mi fa sarjannxi han jinbanna ra. 41 E nama niimase xunxuridine don, naxanye boxon ma. Ne xosixin na a ra. 42 Niimase xunxurin naxanye birin e bubuma boxon ma, e nama ne sese don. Xa a bubuma a kuiin ma hanma a sigan tima a san naaninne ra hanma a san wuyaxi, a xosixin na a ra. 43 Nayi, e nama e yete raxosi na niimase xunxurine xon. E nama e yete raxosi e xon de! 44 Alatala nan n tan na, e Ala. E xa e yete suxu sarjannna kui, alogo e xa sarjann, bayo n tan sarjann. E nama e yete raxosi niimase xunxuri

yo xon naxanye e bubun boxon ma.” **45** “N tan nan Alatala ra naxan e ramini Misiran yi alogo n xa findi e Ala ra. Nanara, e xa sarijan, amasoto n tan sarijan. **46** Sariyan nan na ra naxan lanxi subene ma, e nun xoline, e nun niimaseen naxanye birin igeni e nun naxanye boxon ma. **47** E xa sube haramuxine nun sube daxaxine tagi raba, naxanye lan e don e nun naxanye mi lan e don.”

12 Alatala yi a fala Musa xa, **2** a a xa a fala Isirayila kaane xa, a naxa, “Xa jaxanla nde fudikan, a dii xemen bari, a mi fa sarijanxi na feen ma han xii solofere, alo a nema a kike wanli. **3** Xii solomasexeden loxoni, diin yi banxulan. **4** A mon mi sarijanxi xii tonge saxan nun saxan benun a xa sarijan wunla ma naxan minixi a ma dii bari waxatini. A nama a yiin din se sarijanxi yo ra, a nama siga yire sarijanxini, han a marasarijan loxone yi kamali. **5** Xa a dii temen bari, a mi fa sarijanxi xunsagi firin, alo a nema a kike wanli bayo wunla bata mini a ma. A xa a marasarijanna legeden xii tonge sennin nun sennin. **6** A marasarijan loxone na kamali a dii xemen xa hanma a dii temena, a xa yexee diin jee kedenna saraxa gan daxin xali saraxaraliin fema Naralan Bubun deen na, e nun kolokonde diina hanma ganbana, yulubi xafari saraxan na. **7** Saraxaraliin xa na saraxane ba Alatala xa, a yi Ala solona na jaxanla xa. A sarijanma nen a wunla ma. Sariyan nan na ra jaxanla xa naxan na dii xemen bari hanma dii temena. **8** Xa a mi no yexeen sote, a noe ganba firin hanma kolokonde dii firin xale nen, kedenna xa ba saraxa gan daxin na, bonna yulubi xafari saraxana. Saraxaraliin xa Ala solona a xa, a sarijanma nen.”

13 Alatala yi a fala Musa nun Haruna xa, a naxa, **2** “Xa muxun fatin yirena nde kusinxi, hanma kafanla a ma hanma fure dena nde a fatin ma naxan noe finde fure jaxin na dangu muxu gbete ma, na xa xali saraxarali Haruna fema hanma a diina nde. **3** Furen naxan a fatin ma, saraxaraliin xa na mato. Xa furen yiren xabene bata fixa, a deen yi tilinye ayi, fure jaxin nan na ra. A na yelin a matoe, saraxaraliin xa a fala, a na kanna mi sarijan. **4** Xa fure de fixena a fatin ma, koni a mi tilin, a fati ma xabe mi fixaxi, saraxaraliin xa furemaan lu a danna xunsagi keden. **5** A xii soloferede loxoni, a yi a mato. Xa a to furen deen mi masaraxi, a mi gboxi ayi a fatin ma, a mon xa furemaan lu a danna xunsagi keden. **6** Saraxaraliin xa

a mato a xunsagi firinden xii soloferede loxoni. Xa furen bata fisa a mi gboxi ayi a fatin ma, saraxaraliin xa a fala, a na kanna bata sarijan. Kafanla nan tun na a ra. A xa a dugine xa, a sarijanma nen. **7** Koni saraxaraliin yelin xanbini a fale a sarijanxi, xa kafanla fa gbo ayi a fatin ma, na kanna mon xa xete saraxaraliin fema. **8** Saraxaraliin mon xa a mato. Xa a to kafanla bata gbo ayi a fatin ma, a xa a fala, a na kanna mi sarijanxi, fure jaxin na a ra.” **9** “Xa fure jaxin bata lu muxuna nde fatin ma, e xa a xali saraxaraliin fema. **10** A xa a mato. Xa kusindena nde a ma naxan de bata fixa, xa na kusinden bata fati ma xaben fixa, a suben minixi kenenni, **11** nayi fure jaxi boxoxin nan na ra. Saraxaraliin xa a fala, a na kanna mi sarijanxi. A nama lu a danna matoni, bayo a bata a kolon a mi sarijanxi. **12** Xa saraxaraliin bata a to a na fure jaxin bata gasin namini a fatin birin ma, keli a sanne ma han a xunna, **13** a xa a mato ki faji, bayo xa na furena a fatin birin ma, a xa a fala furemaan ma, a sarijan bayo furen bata yelin xare. **14** Koni furen deen na mini a ma loxon naxan yi, a mi sarijanxi. **15** Saraxaraliin na furen deen to a ma, a xa a fala a ma, a mi sarijanxi. Fure jaxin nan na ra. **16** Xa furen deen xara, na kanna xa siga saraxaraliin fema. **17** A xa a mato. Xa furen bata xara, saraxaraliin xa a fala furemaan ma, a bata sarijan. **18** Xa seteen te muxuna nde ma, a yalan, **19** a funfun yi kusin, a fixa hanma a gbeeli, na muxun xa siga saraxaraliin fema. **20** Saraxaraliin xa a mato. Xa furen funfun tilin, a fati ma xabe bata fixa, saraxaraliin xa a fala, a na kanna mi sarijanxi. Fure jaxin na a ra, naxan minixi seteen funfuni. **21** Koni saraxaraliin na a mato, xa a mi fati ma xabe fixe to, xa furen funfun mi tilin, a xaraxi, a xa furemaan lu a danna xunsagi keden. **22** Xa furen bata gbo ayi fatin ma, saraxaraliin xa a fala na kanna ma, a mi sarijanxi. Fure jaxina nde na a ra. **23** Koni xa furen funfun mi masaraxi a mi gboxi ayi, nayi larun nan tun a ra. Saraxaraliin xa a fala na kanna ma a sarijanxi.” **24** “Xa muxuna nde fatin ganxi, xa furen deen fixa hanma a gbeeli, **25** saraxaraliin xa a mato. Xa a fati ma xabene fixa, furen deen tilin, fure jaxina nde nan na ra, naxan bata mini ganden ma. Nayi, saraxaraliin xa a fala na kanna ma a mi sarijanxi bayo fure jaxin na a ra. **26** Koni a na a mato, xa saraxaraliin mi fati ma xabe fixe to furen ye, a deen mi tilin, a bata xara, saraxaraliin xa na kanna lu a danna xunsagi keden. **27** Saraxaraliin xa a mato

xii soloferede ləxəni. Xa furen bata gbo ayi a fatin ma, saraxaraliin xa a fala na kanna ma, a mi sarijanxi. Fure jaxin na a ra. **28** Koni xa furen mi masaraxi, a mi gboxi ayi, a bata xara, gande funfun nan na ra. Saraxaraliin xa a fala, a na kanna sarijanxi. Gande larun nan na ra.” **29** “Xa furen lu xəmənə nde hanma jaxanla nde xunna ma hanma a kenkenna ma, **30** saraxaraliin xa furen mato. Xa a tilin, a xunsexen hanma a de xaben gbeeli, a xunxurun, saraxaraliin xa a fala na kanna ma, a mi sarijanxi. Fure jaxin na a ra, daxana, naxan a suxi a xunna ma hanma a kenkenna ma. **31** Xa saraxaralina a to furen mi tilin, koni a xunsexə fəre munma mini, furemaan xa lu a danna xii soloferede. **32** Saraxaraliin xa a furen mato xii soloferede ləxəni. Xa daxaan mi gboxi ayi, a mi tilin, a xunsexen mi gbeeli, **33** na kanna xa a xunna bi, fə furen denaxan ma. Saraxaraliin mən xa a lu a danna xunsagi keden. **34** Saraxaraliin xa daxaan mato xii soloferede ləxəni. Xa a mi gboxi ayi, a mi tilin, saraxaraliin xa a fala na kanna ma, a a sarijanxi. A xa a dugine xa, a sarijanma nən. **35** Koni xa daxaan gbo ayi fatin ma, saraxaraliin yelin xanbini a fale a a sarijanxi, **36** saraxaraliin xa a mato. Xa daxaan bata gbo ayi, hali saraxaraliin mi fa a xunsexen mato, a mi sarijanxi. **37** Koni xa a mi gboxi ayi, xa fati ma xabe fərene bata mini, daxaan bata yalan. A bata sarijan. Saraxaraliin xa a fala, a sarijanxi.” **38** “Xəmənə hanma jaxanla, xa fixə fixenə a fatin ma, **39** saraxaraliin xa a mato. Xa e mi məxi, gasin nan tun na ra. A sarijan.” **40** “Xa muxuna nde xun sexə mi na, teeli kanna na a ra, a sarijan. **41** Xa xunsexə mi a tigi ra, teeli kanna na a ra, a sarijan. **42** Koni xa furena a teeli hanma a tigi ra naxan fixa hanma a gbeeli, fure jaxin nan minixi a ma. **43** Saraxaraliin xa a mato. Xa a kusinden to teeli hanma a tigi ra naxan fixa hanma a gbeeli alo fure jaxin kii naxan yi, **44** furemaan nan na kanna ra, a mi sarijanxi. Saraxaraliin xa a fala, a mi sarijanxi bayo furena a xunna ma.” **45** “Awa, xa fure jaxin naxan ma, na kanna xa dugi yibəxine ragodo a ma, a xunni tontaren yi lu, a a deen yə maluxun, a yi gbelegbele. Sarijantarena! Sarijantarena! **46** Furen nema a ma, a mi sarijanxi. Nayi, a lan a lu a danna, a xa lu yamaan daaxaden fari ma.” **47** “Xa dugina nde bata fundu, xuruse xabe dugina hanma taa dugina, **48** a na findi dugi səxənxin sifa yo ra hanma xuruse xabe dugine hanma se kidine, **49** xa funduden fəro hanma a gbeeli dugin ma hanma kidin ma hanma

dugi səxənxin ma hanma se kidina nde ma, fune jaxin na a ra naxan seen kalama. Saraxaraliin xa a mato. **50** Funen seen naxan ma, saraxaraliin xa na ramara matoni xii soloferede. **51** Xii soloferede ləxəni saraxaraliin xa a mato. Xa funen bata gbo ayi na dugin ma hanma dugi səxənxin ma, hanma se kidin ma, a na rawali kii yo yi, fune jaxin nan na ra naxan seen kalama, na seen xəsixi. **52** Nayi, saraxaraliin xa na dugin gan, hanma dugi səxənxina hanma xuruse xabe dugina hanma se kidina, fune funfun naxan ma. Amasəto fune jaxin na a ra naxan seen kalama. Na seen xa gan. **53** Koni xa saraxaralina a mato, xa funen mi gboxi ayi na seen ma, **54** funen naxan ma, a xa yamarin fi e ma, a e xa na dugin xa. A mən yi a ramara xii soloferede. **55** E na a xa, saraxaraliin mən xa a mato. Xa a to funen mi maxətəxi, a mi gboxi ayi, na seen xəsixi. Xa funen bata dugin suxu a yə fajin ma hanma a yə jaxin ma, a gan daxin na a ra. **56** Xa saraxaralina a to funen bata ba fəlo, dugin xa xanbini, a xa na fune yiren bə dugin na, hanma kidina, hanma dugi səxənxina. **57** Koni, xa a mən sa dugi səxənxin suxu hanma se kidina, funen nan na ra naxan seen kalama. Nayi, funen seen naxan ma, na xa gan. **58** Funen seen naxan suxi, dugina, hanma dugi səxənxina, hanma se kidina, koni funen funfun bata lo ayi, na mən xa xa alogo a xa sarijan.” **59** Funen bata xuruse xabe dugin naxan suxu hanma taa dugina, hanma dugi gbete, hanma se kidina, sariyan nan na ra ne fe yi naxan a yitama a e sarijan hanma e mi sarijanxi.

14 Alatala yi a fala Musa xa, a naxa, **2** “Fure jaxin muxun naxan ma, na rasarijanma ikiini: A xa a yita saraxaraliin na. **3** Nayi, saraxaraliin xa mini yamaan daaxaden fari ma na kanna matodeni. Xa furemaan bata yiyalan, **4** saraxaraliin xa yamarin fi, e xa fa xəli jəjə radaxaxi firin na, e nun suman wudin nun gari gbeela nun hisopi wudi yiina nde. **5** Saraxaraliin xa yamarin fi, a e xa xəliin keden kəe raxaba fəjənə nde xun ma, tigi igen naxan kui. **6** A xa xəli jəjən tongo, e nun suman wudin nun gari gbeela nun hisopi wudi yiina, a yi e rafu xəliin kəe raxabaxin wunli. **7** A yi a xuya na kanna ma sanja ma soloferede naxan nasarijanma fure jaxin ma. A yi a fala na kanna ma a a bata sarijan. A yi xəli jəjən bejin burunna ra.” **8** “Naxan nasarijanma, na kanna xa a dugine xa, a a fati ma xabene bi, a yi a maxa. Na xanbi ra, a sarijanma nən. Nayi, a nəe soe nən

yamaan daaxadeni, koni a luma nen a bubun fari ma xii solofere. 9 Xii soloferede lɔxɔni, a mɔn yi a xunseɛene bi, e nun a de xabene, a ye gilingilinna xabene, e nun a fati ma xabene birin. A mɔn yi a dugine xa, a a fatin maxa. Na xanbi ra, a sarijanma nen. 10 Xii solomasɛɛedeni, a xa konton firin tongo e nun yeɛɛe gilena, jɛɛ keden kedenne, fe mi naxanye ra. A mɔn xa murutu fuji faɲin kilo solomanaanin tongo bogise saraxan na turen naxan yi, a turen litiri tagin sa a fari. 11 Saraxaraliin naxan na kanna rasarijanma, na xa e nun a kiseene ti Alatala yetagi Naralan Bubun de ra. 12 A xa konton keden tongo, a a ba yangin saraxan na, e nun turen litiri tagi. A xa ne yita Alatala ra saraxa ralixin na. 13 A xa a kontonna kɔɛ raxaba na yire sarijanxini muxune yulubi xafari saraxane nun saraxa gan daxine kɔɛ raxabama denaxan yi. Saraxaraliin nan gbee yangin saraxan na alo yulubi xafari saraxana. A sarijan han! 14 Saraxaraliin xa yangin saraxan wunla nde tongo, a yi a sa na kanna yiifari ma tunla ma, e nun a yiifari ma yii konkoribaaan nun a yiifari ma san konkoribana. 15 Na xanbi ra, a mɔn xa saraxa turena nde tongo, a yi a sa a yetɛɛn kɔmɛn ma yiini. 16 A xa a yiifari ma yii soli keden sin tureni, a yi a xuya Alatala yetagi dɔxɔɲa ma solofere. 17 A mɔn yi ndedi sa na kanna yiifari ma tunla ma, e nun a yiifari ma yii konkoribaaan nun a yiifari ma san konkoribana. A yangin saraxan wunla saxi denaxan yi. 18 Ture donxen naxan luxi saraxaraliin yii, a xa na sa na kanna xunni, saraxaraliin yi Alatala solona a xa. 19 Saraxaraliin xa yulubi xafari saraxan ba, a Ala solona na kanna xa naxan nasarijanma. Na xanbi ra, a yi saraxa gan daxin kɔɛ raxaba. 20 A yi saraxa gan daxin nun bogise saraxan nali saraxa ganden fari. A yi Ala solona na kanna xa, a yi sarijan.” 21 “Xa yiigelitɔɔn nan na kanna ra, a mi nɔɛ saraxane sɔte, a xa konton keden tongo yangin saraxan na, naxan yitama Ala ra solona seen na a xa, e nun murutu fuji faɲin bogise saraxan kilo saxan, turen naxan yi, e nun turen litiri tagi, 22 e nun ganba firin hanma kolokonde dii firin, a nɔɛ naxan sɔte. Keden xa findi yulubi xafari saraxan na, bonna saraxa gan daxina. 23 Xii solomasɛɛede lɔxɔni, a xa fa e ra saraxaraliin fema Naralan Bubun deen na Alatala yetagi alogo a xa rasarijan. 24 Saraxaraliin xa yangin saraxa yeɛɛɛn nun turen litiri tagin tongo, a yi e yita Alatala ra saraxa ralixin na. 25 A xa yeɛɛɛn kɔɛ raxaba yangin saraxan na. A yi a wunla nde tongo, a

a sa na kanna yiifari ma tunla nun a yiifari ma yiin konkoribaaan nun a yiifari ma san konkoribaaan ma. 26 A yi turena nde sa a yetɛɛn kɔmɛn ma yiini. 27 A xa na turena nde xuya Alatala yetagi a yiifari ma yii sonla ra sanɲa ma solofere. 28 Turen naxan a yiin kui, a xa na ndedi tongo, a yi a sa na kanna yiifari ma tunla ma, e nun a yiifari ma yii konkoribaaan nun a yiifari ma san konkoribana. A bata yi yangin saraxan wunla sa denaxan yi. 29 Turen naxan luxi a yiin kui, a xa na sa na kanna xunni, a yi Alatala solona a xa. 30 Saraxaraliin xa ganba keden tongo hanma kolokonde diina, na kanna naxan sɔtoxi, 31 a yi a ba yulubi xafari saraxan na, a yi xɔliin boden ba saraxa gan daxin na, e nun bogise saraxana. Nayi, a yi Alatala solona na kanna xa.” 32 Sariyan nan na ra na kanna xa, fure ɲaxin naxan fatin ma, naxan mi nɔɛ saraxa kamalixin sɔte. 33 Alatala yi a fala Musa nun Haruna xa, a naxa, 34 “E na so Kanan yamanani, n naxan soma e yii e keen na, xa n funen sa banxina nde ma na yamanani, 35 banxi kanna xa sa a fala saraxaraliin xa, a naxa, ‘N bata funen to n ma banxin ma.’ 36 Saraxaraliin xa yamarin fi, a e xa seene ramini banxini benun a xa siga funen matodeni, alogo sese nama lu banxini a yi yate se xɔsixin na. Na xanbi ra, saraxaraliin xa so banxini a matodeni.” 37 “A xa funen mato. Xa funen fɔro hanma a gbeeli, xa yilidine banxin ma, 38 saraxaraliin xa mini banxini, a banxin deen balan xunsagi keden. 39 Xii soloferede lɔxɔni, saraxaraliin mɔn xa fa a mato. Xa funen bata gbo ayi banxi ma, 40 saraxaraliin xa yamarin fi, a funen gemen naxanye ma, e xa ne ba na, e yi e woli yirena nde yi taan fari ma naxan mi sarijan. 41 A xa banxin kuiin birin maxɔlin, e yi a lɔxɔn woli ayi yirena nde yi taan fari ma naxan mi sarijan. 42 Na xanbi ra, e xa gɛme gbeteɛe tongo. E yi na gɛmene masara. E maso se gbete tongo, e mɔn yi banxin maso.” 43 “E na a gɛme kalaxine ba na, e banxin maxɔlin, a kankene mɔn yi maso, xa funen mɔn mini banxin ma, 44 saraxaraliin xa sa a mato. Xa a to funen bata gbo ayi banxini, na nan na ra fune ɲaxin na a ra naxan seen kalama. Banxin mi sarijanxi. 45 Banxin xa rabira, a gɛmene nun a wudine nun a maso bendene yi maxali taan fari ma yirena nde yi naxan mi sarijanxi. 46 Naxan yo na so banxini a balanxi lɔxɔn naxanye yi, na mi fa sarijanxi han jinbanna ra. 47 Naxan na a sa hanma a a dege na banxini, a xa a dugine xa.” 48 “Xa saraxaralina a mato, funen mi gboxi ayi banxin ma a maso xanbini,

a xa a fala a banxin bata sarijan, amasoto funen bata jian na.” 49 “Na kanna xa xoli firin tongo e nun suman wudina nde nun gari gbeela nun hisopi wudi yiina nde. 50 A xa xoliin keden koe raxaba fejena nde xun ma tigi igen naxan kui. 51 A yi suman wudin tongo, e nun hisopi wudi yiin nun gari gbeela e nun xoli fejena, a ne sin xoli koe raxabaxin wunla nun tigi igeni. A yi a xuya banxin ma sanja ma solofere. 52 A yi banxin nasarijan xoliin wunla ra, e nun tigi igen nun xoli fejena nun suman wudin nun hisopi wudina e nun gari gbeela. 53 A xa xoli fejena bejin taan fari ma burunna ra. Nayi, na banxina fe jaxin bata jian, a yi sarijan.” 54 Sariyane nan ne ra fure jaxine fe yi hanma daxana naxanye minin muxun fatin ma, 55 e nun funen naxan minin dugin ma hanma banxin ma, 56 kusindene, gasine, e nun larune, 57 alogo a xa kolon xa sena nde sarijan hanma xa a mi sarijanxi. Sariyan na a ra fure jaxin nun fune jaxina fe yi.

15 Alatala yi a fala Musa nun Haruna xa, 2 a e xa a fala Isirayila kaane xa, e naxa, “Xa furen xemena nde bari boden ma, faxunna naxan minima xosin nan na ra. 3 Xa a minima hanma a mi tin mine, na faxunna bata na kanna xosi. 4 Nayi, xemen na a sa saden naxan ma, na xosixi. A na doxo gbeden naxan ma, na xosixi. 5 Naxan na a yiin din a saden na, na kanna xa a dugin xa, a yi a maxa. A mi fa sarijanxi han jimbanna. 6 Furemaan bata doxo gbeden naxan ma, naxan yo doxo na ma, na kanna lan a a dugin xa, a yi a maxa, a mi fa sarijanxi han jimbanna. 7 Naxan na a yiin din furemaan na, na kanna lan a xa a dugin xa, a yi a maxa. A mi fa sarijanxi han jimbanna. 8 Xa furemaan de igen namini muxu sarijanxina nde ma, na kanna lan a a dugin xa, a yi a maxa. A mi fa sarijanxi han jimbanna. 9 Furemaan na doxo sese fari a siga sigatini, na mi fa sarijanxi. 10 Furemaan bata doxo sese ma, naxan yo na a yiin din na ra, na kanna mi fa sarijanxi han jimbanna. Naxan yo na se sifan tongo, na kanna lan a a dugin xa, a yi a maxa, a mi fa sarijanxi han jimbanna. 11 Xa furemaan mi a yiin naxa, a na a yiin din muxu yo ra, na kanna lan a a dugin xa, a yi a maxa. A mi fa sarijanxi han jimbanna. 12 Furemaan na a yiin din fejena yo ra, na lan a kala. Xa goronna wudi daxin na a ra, a lan a maxa.” 13 “Furemaan na yiyalan, na kanna lan a legedenna ti xunsagi keden benun a xa rasarijan. A xa a dugin xa, a yi a maxa tigi igen na. A sarijanma nen na yi. 14 Xii solomasexede loxoni,

a xa ganba firin tongo hanma kolokonde dii firin, a sa e so saraxaraliin yii Alatala yetagi Naralan Bubun deen na. 15 Saraxaraliin xa xoli keden ba yulubi xafari saraxan na, bonna saraxa gan daxina. Nayi, a yi na kanna rasarijan Alatala yetagi faxunna ma naxan minixi a ma. 16 Xa xemen bari bodeni igen mini, na kanna lan a a gbindin birin maxa, a mi fa sarijanxi han jimbanna. 17 Xa na ige sifan sa dugin ma hanma se kidin ma, na lan a maxa. A mi fa sarijanxi han jimbanna. 18 Xa xemen nun jaxanla kafu, e firinna birin lan e e maxa, e mi fa sarijanxi han jimbanna.” 19 “Xa jaxanla a kike wanli, wunla minima a ma, a mi fa sarijanxi xunsagi keden. Naxan na a yiin din a ra, a mi fa sarijanxi han jimbanna. 20 A nema a kike wanli, xa a a sa saden ma hanma a doxo gbeden ma, na mi fa sarijanxi. 21 Naxan na a yiin din a saden na, na kanna lan a a dugin xa, a yi a maxa, a mi fa sarijanxi han jimbanna. 22 A na doxo gbeden naxan ma, naxan na a yiin din na ra, na kanna lan a a dugin xa, a yi a maxa, a mi fa sarijanxi han jimbanna. 23 Xa sena nde saxi na saden ma hanma gbeden ma, a yi doxi naxan ma, naxan yo na a yiin din na seen na, a mi fa sarijanxi han jimbanna. 24 Xa e nun xemena nde kafu, a wunla yi sa xemen ma, a fan mi sarijanxi xunsagi keden. A na a sa sade yo ma na xosixi.” 25 “Xa wunla lu mine jaxanla ma, naxan mi findixi a kike wanla ra, hanma a kike wali waxatin yi xonkuya ayi, a mi fa sarijanxi han wunla yi jian alo a nema a kike wanli. 26 A na a sa saden naxan ma hanma a doxo gbeden naxan ma, na mi sarijanxi, alo a nema a kike wanli. 27 Naxan na a yiin din na saden na hanma a doxo na gbeden ma, na kanna lan a a dugin xa, a yi a maxa, a mi sarijanxi han jimbanna. 28 Wuli minin na jian, na jaxanla lan a legedenna ti xunsagi keden, a sarijanma nen na yi. 29 Xii soloferede loxoni, a xa ganba firin hanma kolokonde dii firin tongo, a e xali saraxaraliin fema Naralan Bubun deen na. 30 Saraxaraliin xa xoliin boden ba yulubi xafari saraxan na, bonna saraxa gan daxina. Na xanbi ra, jaxanla wuli minin xosin jianma nen Alatala yee ra yi.” 31 “E xa Isirayila kaane ratanga na feene ma naxanye e xosima, alogo e nama n batu bubun naxosi naxan e tagi, e yi faxa e xosina fe ra.” 32 Sariyane nan ne ra feni itoe ma: faxunna na mini xemen bari boden ma, igen na mini xemen xemeyani a yi a xosi, 33 jaxanla nema a kike wanli, igena nde na mini xemen hanma jaxanla bari bodeni, e nun xemen naxan kafuma jaxanla ma a kike wali waxatini.

16 Harunaa dii firinna naxanye siga Alatala yetagi, ne faxa xanbini, Alatala yi falan ti Musa xa. **2** Alatala yi a fala Musa xa, a naxa, “A fala i tada Haruna xa, a a nama so yire sarijanxi fisamantenni ye yo ye, ye masansan dugin xanbi ra Layiri Kankiraan yetagi, Ala solonama denaxan yi. Xa a na liga, n minima a ma nen kundaan yiyani Layiri Kankiraan deraganla xun ma, a yi faxa.” **3** “Haruna xa feni itoe nan liga alogo a xa so yire sarijanxi fisamantenni: A lan a tura bulanna ba yulubi xafari saraxan na, e nun kontonna saraxa gan daxin na. **4** A lan a yi taa dugi guba sarijanxin nagodo a ma, a yi a taa dugi wantanna so. A xa a tagi xidi taa dugi tagixidin na, a yi taa dugi namun so. Na dagine sarijan, nanara a lan a yi a maxa benun a xa e so. **5** Isirayila yamaan lan e koto firin so a yii yulubi xafari saraxan na, e nun konton keden saraxa gan daxin na. **6** Haruna xa turaan ba a yetena yulubi xafari saraxan na alogo a xa Ala solona a yete xa e nun a denbayana. **7** Na xanbi ra, a yi koto firinne xali Alatala yetagi, Naralan Bubun deen na. **8** A xa kotone masensen alogo a xa a kolon naxan lan a findi Alatala gbeen na e nun naxan sigan yire jaxini. **9** Masensenna na koton naxan suxu Alatala gbeen na, Haruna xa fa na ra, a a ba yulubi xafari saraxan na. **10** Masensenna na koton naxan suxu yire jaxin gbeen na, a jenen nan nalima Alatala ma a solona seen na, e sa a bejin yire jaxini burunna ra. **11** Haruna xa fa turaan na, a a ba a yetena yulubi xafari saraxan na, a Ala solona a yete xa e nun a denbayana. A xa na turaan koe raxaba a yetena yulubi xafari saraxan na. **12** A xa tee ko seen nafe tee wolonna ra naxan tongoxi saraxa ganden fari Alatala yetagi. A yi wusulan fujin yiin ye firin tongo, a yi e xali ye masansan dugin xanbi ra, yire sarijanxi fisamantenni. **13** A xa wusulanna sa teen na Alatala yetagi, alogo tutin naxan tema, na xa Layiri Kankiraan deraganla luxun alogo a nama faxa. **14** A xa turaan wunla nde tongo a yii sonla ra, a yi a xuya Layiri Kankiraan deraganla yetagin ma. A mon yi a xuya Layiri Kankiraan yetagi doxona ma solofere. **15** Na xanbi ra, a xa koton koe raxaba yamaan yulubi xafari saraxan na, a yi a wunla xali ye masansan dugin xanbi ra, a yi a liga alo turaan wunla, a a xuya Layiri Kankiraan ma e nun a yetagi.” **16** “Na kiini, a xa Ala solona yire sarijanxi fisamantenna xa alogo a xa rasarijan Isirayila kaane xosi feene nun e murute feene nun e yulubine birin ma. A mon xa a liga na kiini Naralan Bubun xa, naxan tixi Isirayila kaa xosixine

tagi. **17** Muxu yo nama lu Naralan Bubun kui a na so Ala solonadeni yire sarijanxi fisamantenni, han a yi mini. A xa Ala solona a yeteen xa e nun a denbayaan nun Isirayila yamaan birin.” **18** “Na xanbi ra, a yi mini, siga saraxa ganden yireni denaxan Alatala yetagi. A yi na fan nasarijan, a turaan nun koton wunla sa saraxa ganden tongonna fenne birin ma. **19** A xa wunla xuya a yii sonla ra doxo solofere saraxa ganden ma, alogo a xa a rasarijan Isirayila kaane xosine ma.” **20** “Haruna na yelin xosine be yire sarijanxi fisamantenna ma, e nun Naralan Bubuna, e nun saraxa ganden, a xa koto jenen fan maso. **21** Haruna xa a yii firinne sa koto jenen xunna fari, a yi Isirayila kaane hakene nun murute feene nun yulubine birin fala a ma, a yi e sa koton xunna fari. A yi muxuna nde xe, alogo a xa sa koton bejin burunna ra, **22** a yi e hakene birin xali wulani. A xa koton kedi, a siga burunna ra.” **23** “Na xanbi ra, Haruna xa so Naralan Bubun kui, a yi taa dagine ba a ma, a naxanye so benun a xa so yire sarijanxini. A xa ne lu na. **24** A xa a maxa yire sarijanxina nde yi, a yi a dugin bonne ragodo a ma. Na xanbi ra, a xa sa saraxa gan daxi firinna bonne ba a yete xa e nun yamaan xa, a Ala solona a yete xa e nun yamaan xa. **25** A mon xa yulubi xafari saraxan turene sa teeni saraxa ganden fari.” **26** “Naxan koton bejinxi yire jaxini, na lan a yi a dagine xa, a yi a maxa, a fa fa yamaan daaxadeni. **27** Turaan nun koton naxanye baxi yulubi xafari saraxan na, naxanye wuli rawalixi yire sarijanxini Ala solona seen na, ne lan e xali yamaan daaxaden fari ma, e kidine nun e suben nun e gbiine yi sa teeni. **28** Naxan na e gan, na lan a yi a dagine xa, a yi a maxa. Na xanbi ra, a yi so yamaan daaxadeni.” **29** “Habadan sariyan na a ra e xa. Kike solofereden xii fuden loxoni, e xa sunna suxu, e tan Isirayila kaane ba, xojen naxanye doxi e konni ba, e xa wanla birin bejin. **30** Amasoto Ala solonama e xa na loxon nin, alogo e xa sarijan. Nayi, e sarijanma nen e yulubine birin ma Alatala yee ra yi. **31** A xa findi Matabu Loxon nun sanla ra. E xa sunna suxu na loxoni. Habadan sariyan na a ra.” **32** “Saraxaraliin naxan bata masusan a sugandi feen na, a doxo saraxaraliyani a baba funfuni, na nan Ala solonama. A tan nan taa dugi doma rasarijanxine soma, **33** a Ala solona yire sarijanxin nun Naralan Bubun nun saraxa ganden nun saraxaraline nun Isirayila yamaan birin xa. **34** Habadan sariyan na a ra e xa. Ala solonama Isirayila kaane yulubine birin ma fe ra loxo kedenni jenen bun

ma.” E yi a liga alo Alatala a yamari Musa ma kii naxan yi.

17 Alatala yi a fala Musa xa, 2 a a xa a fala Haruna xa, e nun a diine nun Isirayila kaane birin, a naxa, “Alatala ito nan yamarixi. 3 Isirayila kaan naxan na a jingen ba saraxan na, hanma yexxena hanma siina, yamaan daaxadeni hanma a fari ma, 4 a mi a xali Naralan Bubun so deen na alogo a xa a rali Alatala ma kiseen na Alatala Batu Bubun yetagi, na kanna yatema nen alo faxa tiina. A bata wunla ramini, na kanna kedima nen a yamani. 5 Na ma, Isirayila kaane bama nen saraxan be burunna ra, e fa e saraxane ra saraxaraliin fema Alatala yetagi Naralan Bubun deen na, a yi e ba boɲe xunbeli saraxan na Alatala xa. 6 Saraxaraliin xa a wunla xuya Alatalaa saraxa ganden dɛxɔnna ma Naralan Bubun deen na, a yi a turene sa tɛeni, a xirin yi rafan Alatala ma. 7 Nayi, Isirayila kaane nama fa suxure kotone ki, e tinxintareyaan liga Ala ra naxanye xɔn. Habadan sariyan na a ra e tan xa e nun e yixetene birin.” 8 A mɔn xa a fala, a naxa, “Isirayila kaan hanma xɔɲen naxan dɔxi e tagi, a na saraxa gan daxin ba hanma saraxa gbete, 9 xa a mi a xali Naralan Bubun deen na alogo a xa ba Alatala xa, a kedima nen a yamaan ye.” 10 “Isirayila kaan hanma xɔɲen naxan dɔxi e tagi, naxan na wunla don, n kelima nen na kanna xili ma, n yi a kedi a yamaan ye. 11 Amasoto fati benden niina a wunla nin. N tan bata wunla findi n solona seen na e niine xa, naxan sama saraxa ganden fari. Amasoto wunla nan n solonama bayo niina a yi. 12 Nanara, n na falama e tan Isirayila kaane xa, e tan sese nama wunla don. Xɔɲe yo naxan dɔxi e tagi, e nama wunla don. 13 Isirayila kaan hanma xɔɲen naxan e tagi, naxan na suben hanma xoliin faxa donsoyani naxan daxa a don, a xa a wunla dindin boxoni a benden sa a ye ma. 14 Amasoto suben birin niina a wunla nin. Nanara, n bata a fala Isirayila kaane xa, n naxa, ‘E nama sube yo wunla don, amasoto suben birin niina a wunla nin. Naxan yo a don, na kedima nen Isirayila yamani.’” 15 “Naxan na suben don naxan faxaxi a yete ma hanma sube gbete naxan faxaxi, a na findi Isirayila bari diin na hanma xɔɲena, na kanna lan a yi a dugine xa, a yi a maxa. A mi fa sarijanxi han jinbanna, na xanbi ra a yi sarijan. 16 Xa a mi a dugine xa, xa a mi a maxa, a na haken goronna tongoma nen.”

18 Alatala yi a fala Musa xa, 2 a xa ito nan fala Isirayila kaane xa, a naxa, “Alatala nan n tan na, e Ala. 3 E nama Misiran kaane namunne liga, e yi dɔxi denaxan yi, hanma Kanan yamanan namunne, n na e xalima denaxan yi. E nama e namunne suxu de! 4 E xa n ma sariyane nun n ma tonne suxu bayo Alatala nan n tan na, e Ala.” 5 “E xa n ma tonne nun n ma sariyane suxu bayo naxan na e suxu, na kanna nii rakisins soto ma nen e xɔn. Alatala nan n tan na.” 6 “Muxu yo nun a bari boden nama kafu. Alatala nan n tan na.” 7 “I nama i baba rayagi, e nun i nga yi kafu. I nga na a ra. E nama kafu.” 8 “E nun i baba jaxalan gbete nama kafu, na i baba rayage nen.” 9 “E nun i magilen nama kafu, i baba dii temena hanma i nga dii temena, hali e mi maxuruxi tande kedenna ma.” 10 “E nun i mamandenna nama kafu i ya dii xemena dii temena hanma i ya dii temena dii temena. Amasoto na i tan yage nen.” 11 “E nun i baba jaxalan gbete a dii temen nama kafu, a naxan barixi i baba ma. I magilen na a ra.” 12 “E nun i baba magilen nama kafu. I baba bari boden na a ra.” 13 “E nun i nga ngaxakeden jaxalanmaan nama kafu. I nga bari boden na a ra.” 14 “I nama i baba ngaxakedenna rayagi. E nun a jaxanla yi kafu. I nga xurin na a ra.” 15 “E nun i mamuxun nama kafu. I ya diina jaxanla na a ra. E nama kafu.” 16 “E nun i ngaxakedenna jaxanla nama kafu. Na i ngaxakedenna rayage nen.” 17 “E nun jaxanla nde nama kafu, e nun a dii temen fan yi kafu. E nun a mamandenna nama kafu, a dii xemena dii temena hanma a dii temena dii temena. I bari boden nan ne ra. Na mi daxa.” 18 “I nama i ya jaxanla bari boden tongo i ya jaxanla ra, i ya jaxanla mɔn ɲeɲe, alogo i nama yengen naso e tagi.” 19 “E nun jaxanla nama kafu a nema a kike wanli, amasoto a mi sarijanxi.” 20 “E nun i lanfana jaxanla nama kafu, i yi i yete xosi a xɔn.” 21 “I nama i ya dii yo ba saraxan na Moloko suxure kideni, i yi i ya Ala xili kala. Alatala nan n tan na.” 22 “E nun xemena nama kafu alo jaxanla. Xosi feen nan na ra.” 23 “E nun suben nama kafu, i yi i yete xosi a xɔn. Naxanla nama a maso suben na e kafu. Fe haramuxin nan na ra.” 24 “E nama e xosi na kewali yo xɔn. Amasoto n siyaan naxanye kedima e yete ra, ne e yete xosi na feene nan xɔn. 25 E kewanle boxo yeteen xosi nen. Nanara, n yi e haken sarani e ra, boxon yi a me e ra. 26 Nayi, e tan Isirayila kaane nun xɔɲen naxanye e tagi, e xa n ma tonne nun sariyane suxu. E nama xosi feni itoe liga de! 27 Amasoto naxanye yi

daxi boxoni ito yi benun e tan, ne yi feni itoe birin ligama, e boxon naxosi. 28 Na boxon nama a me e fan na e xosina fe ra, alo siyaan naxanye yi na benun e tan. 29 Nanara, naxan yo na xosi feni ito nde liga, na kedima nen a yamani. 30 E xa n ma yamarine suxu, e nama namun xosixi yo liga naxanye yi ligama menni benun e tan. E nama e yete xosi e xon. Alatala nan n tan na, e Ala.”

19 Alatala yi a fala Musa xa, 2 a xa ito fala Isirayila kaane xa, a naxa, “E xa sarijan, amasoto n tan sarijan, n tan, Alatala, e Ala. 3 Birin xa a nga nun a baba binya, a yi Matabu Loxone suxu. Alatala nan n tan na, e Ala.” 4 “E nama suxurene batu, e nama wure raxulunxin nafala ala maligane ra. Alatala nan n tan na, e Ala.” 5 “E na boje xumbeli saraxan ba Alatala xa, e xa a ba a fapin na alogo a xa a rasuxu. 6 Saraxan suben xa don a faxa loxoni hanma na xoton bode. Naxan na lu han a xii saxande loxoni, e xa na sa teeni. 7 Xa e nde don xii saxande loxoni, na haramuxi, na mi rasuxuma. 8 Naxan na a don, na a haken goronna tongoma nen. Amasoto a bata Alatala se rasarjanxin naharamu. Na kanna kedima nen a yamani.” 9 “E na malo xaban folo, e nama maala xaba han xeen xedeen xon. E nama tonsonne makentun naxanye na lu a xori ma. 10 I nama sansi bogi donxene bolon langani, i nama xonne mako naxanye yolonxi. I xa ne lu yiigelitone nun xojene xa. Alatala nan n tan na, e Ala.” 11 “E nama mupan ti. E nama wulen fala. E nama e bode yanfa. 12 E nama e kolo n xinli wulen fari, amasoto i ya Ala nan xili kalama. Alatala nan n tan na.” 13 “I nama i muxun boden yii seene tongo yanfan xon, i yi a jaxankata. I nama walikeen saranna ramara i konni han na xoton bode.” 14 “I nama tuli xorin konbi, i nama sese sa danxutoon yee ra naxan a rabire, koni i xa gaxu Ala yee ra. Alatala nan n tan na.” 15 “E nama tinxintareya liga kiti sadeni. I nama yiigelitoon nafisa, i nama nafulu kanna rafisa, koni i xa i adamadi boden makiti tinxinni. 16 I nama i adamadi boden mafala yamaan tagi. I nama i adamadi boden tojege alogo a xa faxa. Alatala nan n tan na. 17 I nama i ngaxakedenna rajaxu, koni i xa i adamadi boden maxadi, alogo i nama yulubin tongo a fe ra. 18 I nama i gbeen jaxo. I nama yamaan muxuna nde fe xonnantenyaan namara i kui. I adamadi boden xanu alo i yetena. Alatala nan n tan na.” 19 “E xa n ma tonne suxu. I nama sube siya firinne rakafu. I nama

sansi siya firinna si xeen ma. I nama geese siya firinna dugi soxoxin so.” 20 “Xa xemena nde nun konyi gilena nde kafu, muxu gbete naxan masuxi a jaxanla ra, naxan munma xunba hanma a xoroya, e kala tixin saranma e ra nen. Koni e mi faxama, amasoto a munma yi xunba nen. 21 Xemen lan a kontonna xali Alatala yetagi Naralan Bubun deen na a yangin saraxan na. 22 Saraxaraliin xa yangin saraxa kontonna findi Alatala solona seen na a yulubi ligaxina fe ra, a yulubin yi xafari.” 23 “E na so na yamanani, n na e xalima denaxan yi, e yi bogiseen siyaan birin si, e xa tonna dexo e bogine ra. E haramuxi nen e tan xa jee saxan, e nama e don. 24 Neen naaninden, boxon bogine birin nasarjanma nen Alatala tantun seen na. 25 Neen suulundeni, e nde e bogine donje nen. Nayi, e bogi se sotoxine sigan gbo ayi nen. Alatala nan n tan na, e Ala.” 26 “E nama sese don wunla naxan yi. E nama e yiimato, e nama korerayaan liga. 27 E nama e xunna de bi a radigilinxin na. I nama i de xaben dexonne bi. 28 E nama e fatin mabo faxa feen sunun taxamasenna ra. E nama taxaraan te e fatin ma. Alatala nan n tan na.” 29 “I nama i ya dii temen nayagi i a findi yalunden na, alogo yamanan nama bira yalunyaan foxo ra, a yi rafe fe jaxin na. 30 E xa Matabu Loxone suxu, e yi n ma yire sarjanxin binya. Alatala nan n tan na.” 31 “E nama siga koron bonbone nun yiimatone fema, alogo e nama e raxosi. Alatala nan n tan na, e Ala.” 32 “I xa keli fonna bun binyeni. I xa fonne binya, i yi gaxu i ya Ala yee ra. Alatala nan n tan na.” 33 “Xa xojen fa dexo e yamanani, e nama jaxu a ra, 34 koni e xa a yisuxu alo yamanan bari diina e tagi. I xa a xanu alo i yetena, amasoto e findi xojen na nen Misiran yamanani. Alatala nan n tan na, e Ala.” 35 “E nama tinxintareya liga kiti sadeni, hanma se maligadeni, hanma se binyeni ligadeni, hanma se yiligadeni. 36 E sikeela xa tinxin. E nama sese malige, e xa ligase kamalixin nawali. Alatala nan n tan na, e Ala, naxan e ramini Misiran yamanani.” 37 “E xa n ma tonne nun sariyane birin suxu. Alatala nan n tan na.”

20 Alatala yi a fala Musa xa, 2 a xa a fala Isirayila kaane xa, a naxa, “Isirayila kaan hanma xojen naxan daxi Isirayila boxoni, xa na nde a diin ba saraxan na Moloko suxure kideni, yamaan xa a magolon a faxa. 3 N tan yeteen kelima nen a xili ma, n yi a ba Isirayila yamaan ye. Amasoto a to a diin ba saraxan na Moloko suxuren xa, a bata n ma yire sarjanxin naxosi, a yi n

xili sarijanxin kala. 4 Xa yamaan bata e yeene raxi na feen ma, e tondi na kanna faxe, naxan a diin baxi saraxan na Moloƙo xa, 5 n tan yeteen kelima nen a xili ma e nun a denbayana. N na a kedima nen Isirayila yamani e nun naxanye birin biraxi a ƙoƙo ra e n yanfa Moloƙo suxure kideni.” 6 “Xa muxuna nde n yanfa, a bira koron bonbone nun yiimatone ƙoƙo ra, n kelima nen a xili ma, n yi a kedi a yamani. 7 E xa e yete suxu sarijanxi, alogo e xa sarijan amasoto Alatala nan n tan na, e Ala.” 8 “E xa n ma tonne suxu, e yi e liga. Alatala nan n tan na, naxan e rasarijanma.” 9 “Naxan yo na a baba danga hanma a nga, e na kanna faxa. A tan nan a faxa feen nagidixi, bayo a bata a baba danga hanma a nga.” 10 “Xa xemena nde yalunya liga e nun xeme gbete a jaxanla, a lanfana jaxanla, e xa xeme yalunxin nun jaxalan yalunxin firinne birin faxa.” 11 “Xa xemena nde nun a baba jaxanla kafu, a bata a baba rayagi. E xa xemena nun jaxanla firinne birin faxa. E tan yeteen nan e faxa feen nagidixi. 12 Xa xemena nde nun a mamuxun kafu, e xa e firinne birin faxa. Amasoto e bata fe jaxin liga. E tan nan e faxa feen nagidixi.” 13 “Xa xemena nde kafu xemena ma alo muxun kafun jaxanla ma kii naxan yi, e firinna birin bata xosi feen liga. E xa e firinna birin faxa. E tan nan e faxa feen nagidixi.” 14 “Xa xemena nde dii teme nun a nga fen a jaxanla ra, fe jaxin nan na ra. Xemen nun jaxanle birin xa gan, alogo na fe jaxin nama lu e tagi.” 15 “Xa xemena nde kafu suben ma, e xa a faxa, e yi suben faxa.” 16 “Xa jaxanla nde a maso suben na e yi kafu, e xa jaxanla nun suben faxa. E xa faxa, e tan nan e faxa feen nagidixi.” 17 “Xa muxuna nde a magilen tongo a jaxanla ra, a baba a dii temena hanma a nga a dii temena, e yi kafu, yagin nan na ra. E xa kedi yamaan ye. Xemen bata kafu a magilen ma, a tan nan a haken goronna tongoma.” 18 “Xa xemena nde kafu jaxanla ma a nema a kike wanli, e firinne birin xa kedi yamani bayo e lanxi e yagi feen ma nen.” 19 “E nun i nga ngaxakedenna hanma i tenen nama kafu, bayo na i bari boden nayagima nen. E firinna birin e haken goronna tongoma nen.” 20 “Xa xemena nde nun a soxo jaxanla kafu, a bata a soxo rayagi. E firinna nan e haken goronna tongoma, e faxama nen e mi dii bari.” 21 “Xa xemena nde a ngaxakedenna jaxanla tongo a jaxanla ra, xosin nan na ra. A bata a ngaxakedenna rayagi. E mi dii barima.” 22 “E xa n ma tonne nun n ma sariyane birin suxu, e yi e liga, alogo na boxon nama a me e ra, n na e

xalima boxon naxan yi doxodeni. 23 N siyaan naxanye kedima e yee ra, e nama bira ne namunne ƙoƙo ra. Amasoto e feni itoe birin ligaxi nen e yi rajaxu n ma. 24 Koni n na a fala nen e xa, n naxa, ‘E boxon soma e tan nan yii. N na boxon fima e ma nen e keen na, kumin nun nonon gbo denaxan yi.’ Alatala nan n tan na, e Ala, naxan e sugandixi siyane tagi. 25 Nanara, e xa sube haramuxine nun sube daxaxine tagi raba, e nun xoli haramuxine nun a daxaxine. E nama e yete xosi subeni itoe xon, hanma xoline xon, hanma niimaseen naxanye e masigama boxon ma, n tonna saxi naxanye ra a e haramuxi.” 26 “Nayi, e findima n ma yama sarijanxin na nen, amasoto n tan Alatala sarijan. N bata e sugandi siyane tagi, alogo e xa findi n gbeen na.” 27 “Xemen hanma jaxanla naxan e tagi, xa a findi koron bonbon na hanma yiimatoon na, e xa a magolon a faxa. A tan nan a faxa feen nagidixi.”

21 Alatala yi a fala Musa xa, a a xa a fala saraxaraline xa, Harunaa diine, a naxa, “Saraxaraliin nama a yete xosi a muxuna nde jandeni, a a maso a binbin na. 2 Fo a muxu kendene alo itoe: a nga, a baba, a diina, a dii temena, a tada hanma a xunyena, 3 hanma a magilen naxan munma futu, naxan doxi a konni bayo xemena mi a yii. A noe a yete xose nen e jandeni. 4 Koni, saraxaraliin naxan tixi yamaan yee ra, na nama a yete xosi, a yete rayagi. 5 Xa sayaan ti, saraxaraline mi lan e e xunne bi, hanma e e de xabene dexon bi, hanma e e fatin mabo. 6 E xa sarijan e Ala yetagi, e nama e Ala xili kala, amasoto e tan nan saraxane ralima Alatala ma teen na, naxanye luxi alo e Ala donsena. Nayi, e xa sarijan. 7 E nama yalunden futu hanma jaxanla naxan xeme feen kolon hanma jaxanla naxan ma xeme a mexi a ra. Amasoto e rasarijanxin na a ra Ala xa. 8 I xa a yate muxu sarijanxin na, amasoto a tan nan saraxane fima Ala ma naxanye luxi alo a donsena. Nanara, e xa a kolon a sarijan, amasoto n tan Alatala sarijan, n tan nan e rasarijanma. 9 Xa saraxaralina diina nde a yete rayagi a findi yalunden na, a a baba nan nayagixi. A xa gan.” 10 “Saraxarali kuntigin naxan bata masusan, a sugandi a ngaxakedenne tagi alogo a xa no dugi rasarijanxine sodeni, na nama a xunsexen lu a yitontaren na hanma a yi a dugine yibo jandeni. 11 A nama so binbin xun ma. A nama a yete xosi hali a baba na a ra hanma a nga. 12 A nama mini yire sarijanxin kui, hanma a yete xosi, amasoto a rasarijanxi Alaa masusan turen

nan na. Alatala nan n tan na. **13** A xa sungutun nasolɔnxin tongo a naxanla ra. **14** A nama kaɲa gilen tongo, hanma naxanla bepinxina hanma yalunde xosixina, koni a xa sungutun nasolɔnxin tongo a yamani, **15** alogo a nama a yixetene rayagi a yamaan tagi. Alatala nan n tan na naxan a rasarijanma.” **16** Alatala yi a fala Musa xa, **17** a xa a fala Haruna xa, a naxa, “I yixeten muxu madɔnxi yo nama wali saraxa rabadeni, a Ala donseen nali a ma. **18** Madɔnto yo mi daxa a a maso: danxutɔna, lebutenna, naxan yetagi madɔnxi, hanma naxan salen se madɔnxi, **19** sankalatɔna hanma yiikalatɔna, **20** dantɔna hanma tongona, teeli kanna, hanma kafanla muxun naxan ma, hanma naxan tɛgenxi. **21** Saraxarali Haruna yixeten madɔnxi yo nama a maso, a yi saraxane rali Alatala ma tɛen na. Madɔntɔɔn na a ra, a mi lan a a maso, a Ala donseen nali a ma. **22** A nɔɛ Alaa donse sarijanxin sifan birin donjɛ nen, hali naxanye sarijan han. **23** Koni a madɔntɔyana fe ra, a mi lan a yi a maso yire sarijanxin yɛ masansan dugin na hanma saraxa gandena. A nama n ma yire sarijanxina fe kala. Alatala nan n tan na, naxan saraxaraline rasarijanma.” **24** Musa yi na falane rali Haruna nun a diine ma, e nun Isirayila kaane birin.

22 Alatala yi a fala Musa xa, **2** a xa a fala Haruna nun a diine xa, a Isirayila kaane na saraxa sarijanxin naxanye fi n ma, e xa ne suxu ki faɲi e don kiin ma alogo e nama n xili sarijanxin kala. Alatala nan n tan na. **3** A fala e xa, i naxa, “Xa ɛ yixete yo mi sarijan waxati famatɔne yi, a a maso Isirayila kaane saraxane ra e naxanye ralima Alatala ma, na kanna kedima nen n yetagi. Alatala nan n tan na.” **4** “Xa fure naxin bata mini Haruna yixetena nde fatin ma, hanma furen yi a bari boden suxu, na mi lan a saraxa sarijanxine don benun a xa rasarijan. A mɔn mi sarijanxi xa a bata a yiin din sena nde ra naxan bata din muxun binbin na, hanma igen sifana nde naxan minixi muxun xɛmeyani, **5** hanma a na a yiin din bubu seen na hanma muxun naxan mi sarijan, hanma a findi se xosixi yo ra. **6** Naxan na a yiin din na se sifan na, na mi fa sarijanxi han jinbanna. A nama saraxa sarijanxine don, han a yi a fatin birin maxa. **7** Sogen na godo, a bata sarijan. Na xanbi ra, a nɔɛ saraxa sarijanxine donjɛ sɔnɔn, amasɔto a balon na a ra. **8** A nama suben don naxan faxaxi a yete ma hanma burunna subene naxan yibɔxi, alogo

a nama a yete xosi a xɔn. Alatala nan n tan na.” **9** “Saraxaraline xa n ma yamarine suxu alogo e nama yulubin tongo, e faxa e kalane fe ra. Alatala nan n tan na, naxan e rasarijanma. **10** Muxu yo nama saraxa sarijanxin don xa a mi saraxaralina denbayani. Hali saraxaralina muxu xilixina hanma a walikɛen mi daxa a a don. **11** Koni xa saraxaraliin bata konyina nde sara, hanma naxan barixi a konni, na nɔɛ a donjɛ nen. **12** Xa muxuna nde saraxaralina dii temen doxo a naxanla ra, saraxarali mi a tan na, dii temen nama fa saraxa sarijanxine don. **13** Koni xa saraxaralina dii temen findi kaɲa gilen na hanma a futun yi kala, dii mi a yii, a xete a baba konni alo a to yi dii nɔɛyani, a nɔɛ a baba donseen donjɛ nen. Koni naxan mi saraxaralina denbayani, na nama a don. **14** Xa muxuna nde a saraxa sarijanxin don tantanni, a lan a yi a nɔxɔn fi, a mɔn yi yaganna doxoɲa ma firin sa a fari a yanginna ra. **15** Saraxaraline nama Isirayila kaane saraxa sarijanxine kala e naxan bama Alatala xa. **16** Xa e tin yamaan yi saraxa sarijanxine don, e bata e findi yulubi tongone ra, yanginna fima naxan ma fe ra. Alatala nan n tan na, naxan e rasarijanma.” **17** Alatala yi a fala Musa xa, **18** a xa a fala Haruna nun a diine nun Isirayila kaane birin xa, a naxa, “Isirayila kaan birin hanma xɔjɛne Isirayila yi, naxan saraxa gan daxin bama Alatala xa, de tiin nakamalina fe ra, hanma jɛnige ma saraxana, **19** a lan a yi fa turaan na hanma kontonna, hanma kɔtɔna fe mi naxan na. **20** Fɛen xuruseen naxan na, a mi lan ɛ yi fa na ra, amasɔto a mi rasuxuma ɛ xa. **21** Xa muxuna nde fa xuruse gbeen na hanma a xunxurina, bɔjɛ xunbeli saraxan na Alatala xa, hanma de tiin nakamali saraxana hanma jɛnige ma saraxana, fe yo nama lu a ra alogo a xa rasuxu. **22** Nayi, ɛ nama fa xuruse yɛɛtaren na, ɛ a rali Alatala ma tɛen na n ma saraxa ganden fari, hanma naxan madɔnxi, hanma a maxɔlɔxi, hanma furen naxan fatin ma hanma kaban naxan ma. **23** Ningena hanma yɛxɛɛna naxan salen se kuya hanma a dungi, i nɔɛ na be nen jɛnige ma saraxan na, koni a mi rasuxɛ de tiin nakamali saraxan na. **24** ɛ nama fa xuruseen na Alatala xɔn naxan tɛgenxi, a delane kalaxi, hanma e baxi na. ɛ nama na ba saraxan na ɛ yamanani. **25** ɛ nama na xuruse sifan nasuxu xɔjɛne yii, ɛ a ba donse saraxan na ɛ Ala xa. Amasɔto e tɛgenxi. Fɛna e ra. E mi rasuxɛ ɛ xa.” **26** Alatala yi a fala Musa xa, a naxa, **27** “Ningena, yɛxɛɛna hanma siin na bari, a xa lu a nga bun xii solofere. Xii solomasɛxɛde lɔxɔni e nun na xanbi ra, a

rasuxe nen saraxan na, naxan nalima Alatala ma teen na. 28 Ningena hanma yexxena, e nama e nun a diin koe raxaba loxo kedenni. 29 Xa e barika bira saraxan ba Alatala xa, e xa a ba ki fani alogo a xa rasuxu. 30 A donma na loxon yeteen nin. E nama sese lu han xotanni. Alatala nan n tan na.” 31 “E n ma yamarine suxu e yi e liga. Alatala nan n tan na.” 32 “E nama n xili sarijanxin kala, alogo n xa lu sarijanni e tagi, e tan Isirayila kaane. Alatala nan n tan na, naxan e rasarijanma. 33 N tan nan e ramini Misiran yamanani, n yi findi e Ala ra. Alatala nan n tan na.”

23 Alatala yi a fala Musa xa, 2 a xa a fala Isirayila kaane xa, a naxa, “Sali loxone ni itoe ra Alatala xa, e yamaan xilima malan sarijanxini waxatin naxan yi. Sali loxone ni itoe ra n xa. 3 E xa wali xii sennin, koni xii soloferede loxon findixi Matabu Loxon nan na, malan sarijanxin tima loxon naxan ma. E nama wali yo ke. E xa Matabu Loxon findi Alatala gbeen na e nema doxi dede yi.” 4 “Sali loxon bonne ni i ra Alatala xa. E xa yamaan xili malan sarijanxini waxatini itoe yi: 5 Kike singen xii fu nun naaninna, fitirin ma, Halagi Tiin Dangu Loxon Sanla nan na ra Alatala xa. 6 Na kiken xii fu nun suulundena, Buru Tetaren Sanla nan na ra Alatala xa. E xa buru ratetarene don xii solofere. 7 Xii singeni, e xa malan sarijanxin maxili. Na loxoni, e nama e wanle ke. 8 E xa saraxane rali Alatala ma teen na xii solofere. Xii soloferede loxoni, e mon yi malan sarijanxin maxili. Na loxoni, e nama e wanle ke.” 9 Alatala yi a fala Musa xa, 10 a xa a fala Isirayila kaane xa, a naxa, “N boxon naxan soma e yii, e na so menni, e se xaban folo, e xa fa e bogise singen xidin na saraxaraliin fema. 11 Saraxaraliin xa a yita Alatala ra Matabu Loxon xoton bode, alogo a xa a rasuxu e yii. 12 E se xidin yitama Ala ra loxo naxan yi, e xa yexxen jee kedenna ba saraxa gan daxin na Alatala xa, fe mi naxan na, 13 e nun bogise saraxana, murutu fujin kilo sennin naxan basanxi turen na. Na xa rali Alatala ma teen na, naxan xiri rafan a ma, e nun minse saraxan wudi bogi igen litiri keden e nun a tagi. 14 Burun ba, tonson ganxine ba, a xindene ba, e nama se xabaxi yo don benun e xa fa na saraxane ra e Ala xa. Habadan sariyan nan na ra e yixetene birin xa, e na doxo dede yi.” 15 “Keli Matabu Loxon xoton bode, e malo xidin yitama Ala ra loxon naxan yi, xunsagi solofere xa dangu. 16 Xii tonge suulundeni, Matabu Loxo solofereden xoton bode, e mon xa bogise xaba

nenen fi Alatala ma bogise saraxan na. 17 E xa murutu fujin kilo saxon nafala buru ratexin na, e fa na buru xun firin na bogise singe saraxa ralixin na Alatala xa. 18 Yamaan mon xa kontondi solofere ba saraxan na jee keden kedenne fe mi naxanye ra, e nun tura bulan keden nun konton firin, sa bogise saraxa burune fari e nun bogise saraxane nun minse saraxan naxanye daxa. Saraxa gan daxin nan ne ra, naxanye ralima Alatala ma teen na, e xirin yi rafan a ma. 19 E mon xa koto keden ba yulubi xafari saraxan na, e nun yexxen jee keden kedenna firin boje xunbeli saraxan na. 20 Saraxaraliin xa yexxe firin nun bogise singen burun yita n na se ralixin na. E rasarijanma Alatala xa nen, e yi so saraxaraliin yii. 21 Na loxon yeteni, e xa yamaan xili malan sarijanxini. E nama e wanle ke na loxoni. Habadan sariyan na a ra e yixetene birin xa, e na doxo dede yi. 22 E na malo xaban folo, e nama maala xaba han xeen xedeen xon, e nama tonsonne makentun naxanye na lu a xori ma. I xa ne lu yiigelitone xa e nun xojene. Alatala nan n tan na, e Ala.” 23 Alatala yi a fala Musa xa, 24 a a xa a fala Isirayila kaane xa, a naxa, “Kike solofereden xii singeni, e xa e matabu na loxoni e yi a binya, e xotaan fe, e yamaan xili malan sarijanxini. 25 E nama e wanle ke na loxoni, e xa saraxane rali Alatala ma teen na.” 26 Alatala yi a fala Musa xa, a naxa, 27 “Kike solofereden xii fuden xa findi Ala Solona Loxon na. E xa malan sarijanxin ti, e yi sunna suxu, e yi saraxane rali Alatala ma teen na. 28 E nama e wali yo ke na loxoni, amasoto Ala Solona Loxon na a ra. Alatala solonama e xa na loxon nin, e Ala. 29 Xa naxan yo mi sunna suxu na loxoni, na kedima nen a yamani. 30 Xa naxan yo wali na loxoni, n na a raxorima nen a yamaan ye. 31 E nama wali yo ke. Habadan sariyan na a ra e yixetene birin xa, e na doxo dede yi. 32 Matabu Loxon na a ra e xa e nun sali loxona. E xa sunna suxu. E xa matabu sanla raba keli kiken xii solomanaaninden jinbanna ma han na xoton bode jinbanna.” 33 Alatala yi a fala Musa xa, 34 a a xa a fala Isirayila kaane xa, a naxa, “Kike solofereden xii fu nun suulundeni, Bubu Kui Sanla na ra Alatala xinli, han xii solofere. 35 Sanla xii singeni, malan sarijanxin tima nen, e nama e wali yo ke. 36 Xii solofere, e xa saraxane rali Alatala ma teen na. Xii solomasexede loxoni, e mon xa malan sarijanxin ti, e mon yi saraxane rali Alatala ma teen na. Malan sarijanxin na a ra, e nama e wali yo ke. 37 Sali loxone nan ne ra Alatala xa, e yamaan xilima malan sarijanxini loxon naxanye yi, alogo e xa

saraxane rali Alatala ma tēen na, saraxa gan daxine nun bogise saraxane nun saraxa gbetẽye, e nun minse saraxane, naxanye daxa sali lōxōne yi. **38** Saraxani itoe sama Alatalaa Matabu Lōxōne saraxane fari nēn, e nun ε kiseene nun ε de tiin nakamali saraxane, e nun ε jēnige ma saraxane ε naxanye birin fima Alatala ma.” **39** “Kike solofereden xii fu nun suulunde lōxōni, ε na yelin bogi seene malandeni xēen ma, ε xa sanla raba Alatala xa xii solofere. Xii singen nun xii solomasexeden findin Matabu Lōxōne nan na. **40** Xii singe lōxōni, ε xa bogise fajine ba wudine kōe ra, e nun tugu yiine, e nun jōxōndene, e nun wudi yii gbetẽye, ε yi sēwa Alatala yetagi ε Ala han xii solofere. **41** E xa sanli ito raba Alatala xa jēe yo jēe, xii solofere. Habadan sariyan na a ra ε yixetene birin xa. E sanla raba jēen kike soloferedeni. **42** E xa dōxō bubune kui xii solofere. Isirayila bari diine birin xa lu bubune kui, **43** alogo ε yixetene xa a kolon fa fala n na e benbane radōxō nēn bubune kui, n to ε ramini Misiran bōxōni. Alatala nan n tan na, ε Ala.” **44** Musa Alatalaa sali lōxōne fala na kii nin Isirayila kaane xa.

24 Alatala yi a fala Musa xa, a naxa, **2** “A yamari Isirayila kaane ma a e xa fa oliwi ture fajin na i xōn, alogo lenpune xa dege waxatin birin. **3** Haruna xa a yengi lu lenpune xōn Layiri Kankiraan ye masansan dugin fari ma Naralan Bubun kui, alogo e xa dege Alatala yetagi keli jinbanna ma han xōtōnni waxatin birin. Habadan sariyan na a ra ε yixetene birin xa. **4** Haruna xa a yengi lu lenpune xōn kōeen birin na naxanye dōxi lenpu dōxō se xēma daxin fari Alatala yetagi.” **5** “Murutu fujin tongo i yi buru fu nun firin nafala. Burune keden kedenna birin binyen xa kilo sennin li. **6** I xa e dōxō yelan firin nin xēma tabanla fari Alatala yetagi, sennin sennin ye ma. **7** I xa wusulan fajin sa burune birin fari, naxan nalima Alatala ma tēen na burun jōxōn na jōxō lu seen na Ala xōn. **8** Buruni itoe xa dōxō Alatala yetagi Matabu Lōxōn birin yi. Habadan layirin na a ra Isirayila kaane xa. **9** Burune xa raxetẽ Haruna nun a diine ma, e yi e don yire sarijanxini. Amasōto se sarijanxin na a ra na saraxane ye, naxanye ralima Alatala ma tēen na, naxanye so saraxaraline yii. Habadan sariyan na a ra.” **10** Lōxōna nde muxuna nde yi mini Isirayila kaane ye, a nga Isirayila kaa, a baba Misiran kaa. Na kanna nun Isirayila kaana nde yi yenge yamaan daaxadeni. **11** Isirayila naxanla diin yi Ala xinla rayelefu, a yi a

konbi. A nga yi xili nēn Selomiti, Dibiri a dii tēmēna Dan bōnsōnni. Mafuren e yi a xali Musa fēma. **12** E yi a ramara a fajin na han Alatala yetēen yi a fe yeba e xa. **13** Alatala yi a fala Musa xa, a naxa, **14** “Naxan konbin tixi, na ramini yamaan daaxaden fari ma. Naxanye birin a xuiin mexi, ne birin xa e yiine ti a xunna ma, yamaan birin yi a magōlōn han a faxa. **15** I xa a fala Isirayila kaane xa iki, i naxa, ‘Naxan na Ala konbi, a lan a yi a yulubin goronna tongo. **16** Naxan na Alatala xinla rayelefu, na xa faxa, yamaan birin xa a magōlōn. Xa a findi xōjēn na hanma Isirayila kaana, a na Alatala xinla rayelefu, a faxama nēn. **17** Naxan na muxuna nde faxa, ε xa na kanna faxa. **18** Naxan na muxuna nde a suben faxa, a lan a yi a jōxōn so a yii. Niin jōxōn xa fi niin na. **19** Naxan na a boden maxōlo, a fan xa maxōlo na kiini. **20** Maxōlōn jōxōn nan maxōlōn na, yēen jōxōn nan yēen na, jinna jōxōn nan jinna ra. A xa maxōlo alo a a ligaxi boden na kii naxan yi. **21** Naxan na suben faxa a lan a yi a jōxōn fi, koni naxan na muxun faxa a lan a yi faxa. **22** Sariya kedenna na a ra ε birin xa, xōjēna hanma Isirayila kaana. Alatala nan n tan na, ε Ala.” **23** Musa yi falan ti Isirayila kaane xa. Xēmēn naxan konbin tixi, e yi na xali yamaan daaxaden fari ma, e yi a magōlōn, a faxa. Isirayila kaane yi a liga alo Alatala a yamari Musa ma kii naxan yi.

25 Alatala yi a fala Musa xa Sinayi geyaan fari, **2** a xa a fala Isirayila kaane xa, a naxa, “E na so na bōxōni n naxan soma ε yii, bōxōn yetēen xa a matabu Alatala xinli. **3** E nōe ε xēene biye nēn jēe sennin, ε manpa bili nakōne wali, ε yi e bogine malan. **4** Koni jēe solofereden findin matabu jēen nan na Alatala xinli. E nama ε xēene bi hanma e yi ε manpa bili nakōne wali. **5** Sansi bogin naxanye na soli e yete ma, i tan nama e malan i yete xa. I tan nama manpa tōnsōn mōxine malan naxanye bogixi e yete ma. Amasōto matabu jēen na ra bōxōn xa. **6** Koni bōxōn na naxan namini matabu jēen kui, ε birin xa na don, i tan, i ya konyi xēmēna, i ya konyi gilena, i ya walikena, xōjēn naxan luma i konni, **7** e nun i ya xuruseene, e nun hali burunna suben naxanye i ya bōxōni. Bōxōn na naxan namini, na birin nōe donjē nēn.” **8** “E xa matabu jēe solofere tēnge, jēe solofere dōxō solofere, alogo matabu jēe soloferene xa lan jēe tonge naanin e nun solomanaaninna ma. **9** Kike solofereden xii fudeni, Ala Solona Lōxōna, ε xa xōtane fe yamanan birin yi.

10 E j̄ee tonge suulunden nasarijanma nen, e yi a rali yiren birin yi a yamanan muxune birin bata x̄or̄ya. X̄or̄ya J̄een na a ra e xa, e birin yi xete e denbayana b̄ox̄on ma e b̄ons̄onne yi. 11 J̄ee tonge suulunden findima X̄or̄ya J̄een nan na e xa. E nama e x̄eene bi, e nama sansi bogine malan naxanye solima e yete ma. E nama manpa bogi t̄ons̄onne malan naxanye bogima e yete ma. 12 Amas̄oto X̄or̄ya J̄een nan na ra. A sarijan e xa. E na donseen naxan to x̄eene ma, e xa na don.” 13 “Na X̄or̄ya J̄eena, birin xa xete a gbee b̄ox̄on ma. 14 Xa e b̄ox̄ona nde mati hanma e a sara muxuna nde ma, e nama j̄axu e bode ra. 15 I a saren naxan soma i kon kaan yii, na xa lan na j̄eene yaten ma naxan luxi benun X̄or̄ya J̄een xa a li. A xa a saren nasuxu i yii naxan lan̄je se xaba waxatine yaten ma naxanye luxi. 16 Xa j̄ee wuyaxi luxi, a saren xa mate na kiini. Xa j̄ee dando nan luxi a xa a saren magodo. Amas̄oto a mi b̄ox̄on matima, f̄o se xaba waxatine. 17 E nama j̄axu e bode ra, koni e xa gaxu e Ala ȳee ra. Alatala nan n tan na, e Ala.” 18 “E xa n ma t̄onne nun sariyane suxu. Nayi, e luma nen yamanani b̄oj̄e xunbenli. 19 B̄ox̄on yi bogi seene fi, e yi e d̄ege han e lugo, e lu b̄oj̄e xunbenli. 20 Waxatina nde e a falama nen, e naxa, ‘En nanse donma j̄ee soloferedeni, xa en mi x̄een bi, en mi seen xaba?’ 21 N barakan sama nen e feene yi j̄ee senninden, alogo e se xabaxin xa e makone birin fan han j̄ee saxan. 22 J̄ee solomasexedeni, e n̄ema e x̄eene bima, e donse ramaraxin nan donma. E luma a don̄je nen han j̄een solomanaaninden se xaba waxatini.” 23 “E nama b̄ox̄on mati habadanni mume, amas̄oto n tan nan gbee b̄ox̄on na. E tan luxi nen alo x̄oj̄en naxanye yigiyaxi n konni. 24 Nanara, e na yamanan s̄oto, e xa sariyan d̄ox̄o alogo b̄ox̄o matixin xa xunba.” 25 “Xa i ngaxakedenna findi yiigelit̄oon na, a yi a b̄ox̄ona nde mati, a bari bodena nde xa fa a b̄ox̄o matixin xunba. 26 Xa a bari bode mi na naxan d̄axa a a xunba, xa a tan yet̄een bata a xunba f̄eren s̄oto, 27 a xa j̄eene yate keli a saran ma, a yi na j̄ox̄on naxete a sara muxun ma. Na xanbi, a n̄oe xete nen a b̄ox̄oni. 28 Koni, xa a mi a j̄ox̄o raxete se s̄oto, b̄ox̄on xa lu a sara muxun yii han X̄or̄ya J̄eena. Na waxatini a kari singen m̄on xa xete a b̄ox̄oni. 29 Xa muxuna nde a banxin mati taa gbeeni yinna soxi naxan ma, a n̄oe a xunbe nen han j̄ee keden a sara xanbini. 30 Koni xa banxin mi xunba benun j̄ee keden, a luma nen a sara muxun gbeeyani s̄on̄on e nun a yixetene. A mi a raxetema X̄or̄ya J̄eeni. 31 Koni banxin naxanye taa xunxurine yi naxanye

mi rabilinxi yinna ra, ne luma nen alo b̄ox̄ona. E n̄oe xunbe nen, e m̄on yi raxete e kari singen ma X̄or̄ya J̄eeni.” 32 “Lewi b̄ons̄onna taane kui, Lewine n̄oe e banxine xunbe nen waxatin birin. 33 Naxan na Lewi kaana nde a banxin sara, a minima nen banxi saraxin nun na taani X̄or̄ya J̄eeni. Amas̄oto banxin naxanye Lewi taane yi, ne findixi Lewine nan gbansan gbee ra Isirayila yamanani. 34 Koni x̄een naxanye e taane rabilinni, ne mi lan e mati, amas̄oto Lewine nan gbee e ra habadan!” 35 “Xa i ngaxakedenna findi yiigelit̄oon na, naxan d̄oxi i f̄ema, f̄eren mi fa a yii a balo, i lan i yi a maso i ra alo x̄oj̄ena alogo a xa lu i f̄ema. 36 I nama t̄on̄o yo max̄odin a ma koni i xa gaxu i ya Ala ȳee ra, i ngaxakedenna yi lu i f̄ema. 37 Xa i a doli gbetini, i nama t̄on̄o sa a fari. Xa i donseen mati a ma, i nama t̄on̄on s̄oto a x̄on.” 38 “Alatala nan n tan na, e Ala, naxan e raminixi Misiran b̄ox̄oni alogo n xa Kanan b̄ox̄on so e yii, n yi findi e Ala ra.” 39 “Xa muxuna nde findi yiigelit̄oon na i d̄ex̄on, a yi a yete mati i ma, i nama a ti konyi wanla ra. 40 A xa masuxu i konni alo walikena hanma x̄oj̄ena. A xa lu i ya wanla ra han X̄or̄ya J̄eena. 41 Na waxatini, e nun a diine yi x̄or̄ya, a yi xete a xabilani, e nun a benbane b̄ox̄oni. 42 Amas̄oto n ma walikene nan Isirayila kaane ra, n naxanye raminixi Misiran yamanani. E nama mati konyiyani. 43 I nama e j̄axankata, f̄o i xa gaxu i ya Ala ȳee ra.” 44 “Xa e konyi x̄emen hanma konyi gil̄en sara, a xa keli siya gbetene ȳe naxanye e rabilinxi. 45 E m̄on n̄oe x̄oj̄ena ndee sar̄e nen naxanye d̄oxi e ȳe, e nun e xabilan muxuna nde naxanye barixi e yamanani. E yi findi e gbeen na. 46 E m̄on n̄oe e luȳe e diine yii nen e k̄een na, alogo e xa lu konyiyani habadan. Koni e ngaxakedenne, Isirayila kaane, e tan sese nama n̄oon s̄oto a ngaxakedenna xun na, a a j̄axankata.” 47 “Xa x̄oj̄en findi nafulu kanna ra naxan d̄oxi e konni, e ngaxakedenna nde yi findi yiigelit̄oon na, a a yete mati x̄oj̄en ma, hanma x̄oj̄en xabila muxu gbete ma, 48 a n̄oe xunbe nen a mati xanbini. A ngaxakedenna nde n̄oe a xunbe nen, 49 hanma a s̄ox̄ona, hanma a dunbode, hanma a bari bodena nde a xabilani, na n̄oe a lige nen. A tan yet̄een n̄oe a yete xunbe nen, xa a f̄eren s̄oto. 50 Nayi, e nun a sara muxun xa j̄eene yate keli a sara j̄een ma han X̄or̄ya J̄eena. A xa a j̄ox̄on fi alo walik̄een n̄oe saranna yaten naxan s̄ote na j̄eene bun. 51 J̄een d̄onx̄en naxanye luxi, xa ne m̄on gbo, a xa ne xasabin gbetin naxete nafulu kanna ma a xunba saren na. 52 J̄een naxanye luxi benun X̄or̄ya

Ŋɛɛn yi a li, xa ne mi fa gbo, a xa na fan xasabin gbetin naxete a xunba saren na. **53** A yisuxuma nen a kannna konni alo walikɛɛn naxan sare fixi, a nama a jnaxankata. **54** Xa a mi xunba na kii yo yi, e nun a diine xa xɔɔya Xɔɔya Ŋɛɛni. **55** Amasɔto n ma walikene nan Isirayila kaane ra. N gbee walikene nan e ra, n naxanye raminixi Misiran bɔxɔni. Alatala nan n tan na, e Ala.”

26 “E nama suxurene rafala. E nama alana nde sawuran nafala. E nama gemen dɔxɔ, e yi a batu. E nama gɛmɛ masolixin ti e yamanani e yi a batu. Amasɔto Alatala nan n tan na, e Ala.” **2** “E xa n ma Matabu Lɔxɔne suxu, e yi n ma yire sarijanxin binya. Alatala nan n tan na.” **3** “Xa e n ma tɔnne nun yamarine suxu, **4** n tulɛn nafama nen e ma a waxatini, bɔxɔn yi balon fi, wudine yi bogi xɛene ma. **5** Se bɔnbɔ waxatin buma nen han bogise bolon waxatina. Bogi seene yi lu bolonɲɛ han xɛɛ bi waxatina. E dɛgema nen han e lugo, e yi lu e bɔxɔni bɔɲɛ xunbenli. **6** N tinma nen yamanan yi lu herini. E na e sa, sese mi e tɔrɛ. N burunna sube xajɛne bama nen e yamanani, yengen mi soɛ e konni. **7** E e yaxune kedima nen, e yi bira e bun yengeni. **8** E tan muxu suulun fama nen e yaxun muxu kɛmɛ kedideni. E tan muxu kɛmɛ yi e yaxun wuli fu kedi. E yaxune birama nen e bun yengeni. **9** N fanma nen e ra. N yi dii wuyaxi fi e ma, e wuya ayi. N na n ma layirin nakamalima nen en tagi. **10** E yala malo ramaraxine donma nen han malo xaba waxatin mɔn yi a li, e yi a fonna dɔnxɛn woli ayi alogo a nenen xa ramara. **11** N luma nen e yɛ, n mi n mɛ e ra mumɛ! **12** N na n masiga tima nen e tagi, n findi e Ala ra. E yi findi n ma yamaan na. **13** Alatala nan n tan na, e Ala, naxan e ramini Misiran bɔxɔni alogo e xa ba Misiran kaane yii. N Misiran konyiyaan goronna ba nen e ma, alogo e xa nɔ sigan tiyɛ xunna kenli.” **14** “Koni, xa e mi n xuiin namɛ, e yamarinini itoe birin suxu, **15** xa e n ma tɔnne kala, e yi e mɛ n ma sariyane ra, e mi n ma yamarine birin liga, e n ma layirin kala, **16** nayi, n ni ito nan ligama e ra: N yihadin nagodoma nen e ma, e nun fitina furene nun fati mawolonna, naxanye e yɛɛne kalama, e yi e niin ba. E sansine sima fuuni bayo e yaxune nan e donma. **17** N kelima nen e xili ma, alogo e yaxune xa e nɔ. Naxanye e rajaxuxi, ne yi nɔɔn sɔto e xun na. E e giyɛ hali muxu yo mi e fɔxɔ ra.” **18** “Na birin xanbi ra, xa e mi n xuiin namɛ, n na e yulubine saranma e ra

nen dɔxɔɲa ma solofere. **19** N yi e wason kala, n yi kuyeni xara alo wurena, e nun bɔxɔna alo sulana. **20** E senben yi jian fuuni, bayo e bɔxɔn mi bogi seene fiyɛ, yamanan wudine mi bogima.” **21** “Xa e murutɛ n ma, e tondi n xuiin namɛ, n na e tɔrɔne rawuyama ayi nen dɔxɔ solofere naxan lanxi e yulubine ma. **22** N burunna subene rafama nen e xili ma naxanye e diine faxama, e yi e xuruseene raxɔri. E yi e xurunɲɛ ayi han e kirane yi yigeli.” **23** “Xa hali na birin e mi xuru n ma, e lu murutɛxi n ma, **24** n yetɛɛn kelima nen e xili ma, n mɔn yi e tɔrɔne rawuya ayi dɔxɔ solofere. **25** N yengen nakelima nen e tan xili ma, n yi e yulubine saran e ra n ma layirin kala feen na. E na e luxun e taa ratangaxine yi, n fitina furen nafama nen, e yi lu e yaxune yiini. **26** N yi e kuma donseen na, jaxalan fu yamaan birin ma burun ganma nen buru gande kedenni, e yi e buruni taxun ligase xurudin na, e yi a don koni e mi lugo.” **27** “Xa hali na birin, e mi n xuiin namɛ, e yi lu murutɛxi n ma, **28** nayi, n kelima nen e xili ma, n yi e yulubine saran e ra dɔxɔɲa ma solofere. **29** E e diine suben donma nen. **30** N yi e taan kidene kala, n yi e wusulan gandene rabira. **31** N yi e taane findi xɔrinxɔrinna ra, e yire sarijanxine yi raxɔri. Nayi, e saraxane mi fa rafaɲma n ma. **32** N na e yamanan kalama nen. E yaxune na fa dɔxɔdeni e konne yi, e kabɛma nen a kalaxin ma. **33** N na e raxuyama ayi nen yamanane yi, n yi bira e fɔxɔ ra silanfanna ra, n yi e sagatan. E yamanani gelima nen, a yi findi taa xɔnne ra.” **34** “Nayi, e nɛma e yaxune yii e konni waxatin naxan yi, e yamanani genla yi lu, e bɔxɔn luma nen matabuni, matabu waxatine jɔxɔn na e mi naxanye suxu. **35** A nɛma rabɛɲinxɪ, a matabun sɔtɔma nen, e mi tin naxanye ma e yi dɔxi a yi waxatin naxan yi. **36** Naxanye na lu e nii ra e yɛ, n na e tunnaxɔlɔma e ma nen e yaxune yamanani, han e yi e gi jɔxɔnden gbansanna bira xuiin bun alo silanfanna, e bira hali muxɛ mi e fɔxɔ ra. **37** E birama nen e bode fari alo e nɛma e giyɛ silanfanna bun, anu muxu yo mi e fɔxɔ ra. E mi nɔɛ tiyɛ e yaxune yɛɛ ra. **38** E faxama nen siya gbetene tagi, e yaxune yamanan yi e don. **39** Naxanye na lu e tan yɛ, ne doyenma nen han e faxa e yaxune yamanane yi e tan nun e benbane hakɛne fe ra.” **40** “Koni e na e ti e hakɛne ra e nun e benbane gbeene nun e tinxintareyaan nun e murutɛna, **41** feen naxanye a ligaxi, n yi keli e xili ma, n yi e rasiga e yaxune yamanani, nayi e Ala kolontare bɔɲɛne na xuru, e yi e hakɛne yanginna fi, **42** n na n

mirima nen layirina feen ma nxu nun Yaxuba tagi, e nun nxu nun Isiyaga, e nun nxu nun Iburahima, n yi n miri yamanana fe ma. **43** Koni, fɔ yamanan nabepinxin xa lu singe, a yi a matabu e mi na waxatin naxan yi. E e hakene yanginna fima nen amasoto e bata e me n ma sariyane nun tonne ra. **44** Koni, hali e lu e yaxune yamanani, n mi e rabepinjɛ han e yi raxori, n yi n ma layirin kala. Amasoto Alatala nan n tan na, e Ala. **45** N na n mirima nen n ma layirin ma, naxan nxu nun e benbane tagi, n naxanye ramini Misiran boxoni siyane yetagi, alogo n xa findi e Ala ra. Alatala nan n tan na.” **46** Alatala tonne nun yamarine nun sariyane nan ne ra, a naxanye falaxi Isirayila kaane xa fata Musa ra Sinayi geyaan fari.

27 Alatala yi a fala Musa xa, **2** a xa a fala Isirayila kaane xa, a naxa, “Xa muxuna nde bata a de ti, a muxuna nde fi Alatala ma, a xunbama gbetin nan na naxan lanxi a yaten ma. **3** Xa xemen na a ra naxan barin bata jee mɔxɔɛ ti han jee tonge sennin, i xa a saren yate gbeti gbanan tonge suulun na, gbeti gbananna naxanye rawalima yire sarijanxini. **4** Xa jaxanla na a ra, gbeti gbanan tonge saxan. **5** Dii xemen naxan barin bata jee suulun ti han jee mɔxɔɛ, na lanma gbeti gbanan mɔxɔɛ nan ma. Dii temena, gbeti gbanan fu. **6** Dii xemen naxan barin bata kike kedenna ti han jee suulun, na lanma gbeti gbanan suulun nan ma. Dii temena, gbeti gbanan saxan. **7** Xemen naxan bata dangu jee tonge senninna ra, na lanma gbeti gbanan fu nun suulun ma. Naxanla, gbeti gbanan fu. **8** Naxan bata a de ti, xa yiigelitɔon na a ra, a mi nɔe na gbetin yaten fiye, a lan a yi na muxun xali saraxaraliin fema. Na nɔe gbetin xasabina nde fale nen a nɔe naxan fiye.” **9** “Xa muxuna nde bata a de ti xurusena fe ra naxan nɔe be saraxan na Alatala xa, na xuruse sifan na fi Alatala ma, a bata rasarijan. **10** A mi masare gbete ra. A fajin mi masare a kobin na, a kobin mi masare a fajin na. Xa a kanna xuruseen masara gbete ra, e firinna birin bata rasarijan. **11** Xa suben na a ra naxan haramuxi, naxan mi be saraxan na Alatala xa, a xa xali saraxaraliin fema. **12** Saraxaraliin xa a saren fala, xa suben fan, hanma a mi fan. A na saren naxan fala, a bata lu na ma. **13** Xa a kanna waxi suben xunba feni, a xa a joxon fi a yi yaganna dɔxɔɛ ma firin sa a fari.” **14** “Xa muxuna nde a banxin fi Alatala ma, saraxaraliin xa a saren fala, xa a fan hanma a mi fan. A na naxan fala, a bata lu na ma. **15** Xa a kanna waxi a

xunba feni, a xa a joxon fi a yi yaganna dɔxɔɛ ma firin sa a fari. Banxin yi xete a kanna ma.” **16** “Xa muxuna nde a xeen fi Alatala ma, a saren xa fala fata sansiin yaten na naxan xuye a ma. Malo benbeli gbee saxan xuye boxon naxan ma, na lanma gbeti gbanan tonge suulun nan ma. **17** Xa xeen fixi Xorɔya Jdeen nin, a saren luma na kii nin. **18** Xa xeen fixi Xorɔya Jdeen xanbin nin, saraxaraliin xa jee yate naxan luxi benun Xorɔya Jde famatona, a yi nde ba xeen saren na. **19** Xa xee kanna waxi a xunba feni, a xa a joxon fi, a yi yaganna dɔxɔɛ ma firin sa a fari, xeen yi xete a kanna ma. **20** Xa a mi xeen xunba, a yi a mati muxu gbete ma, a mi fa nɔe a xunbe. **21** Xeen na yeba Xorɔya Jdeeni, a bata rasarijan, a so Alatala yii kiseen na habadan! A findima saraxaraline gbeen nan na. **22** Xa muxuna nde xeen fi Alatala ma a naxan saraxi, naxan mi yi a keeni, **23** saraxaraliin xa a saren fala fata jee yaten na naxanye luxi benun Xorɔya Jdeena. Na kanna xa a saren fi na loxo yeteni. A sarijan Alatala yetagi. **24** Xeen naxetema a kari singen ma nen Xorɔya Jdeeni, a sara naxan ma, naxan gbee yi a ra nun. **25** Na sarene birin falama nen fata yire sarijanxini gbeti gbananna ra, naxan lanxi garamu fu ma.” **26** “Muxu yo nama a xuruse dii singen fi Alatala ma na kiini, amasoto Alatala nan gbee dii singene birin na hali ba na feen na. Ninge ba, yexee ba, Alatala nan gbee e birin na. **27** Xa a findi sube haramuxin dii singen na, a kanna nɔe a xunbe nen. A xa a joxon fi, a yi yaganna dɔxɔɛ ma firin sa a fari. Xa a mi a xunba, a xa a mati a sare falaxin na.” **28** “Koni, muxun na sese fi Alatala ma habadanni, muxu ba, xuruse ba, a kee xeen ba, na sese mi sare, a mi xunbe. Naxan yo na fi a ma habadanni, na bata sarijan a xa fefe. **29** Hali a findi muxun na naxan fixi Ala ma habadanni, a mi nɔe xunbe, e xa a faxesa.” **30** “Alatala nan gbee boxon bogiseene birin yaganna ra. A na keli xeen na hanma langan kui, a sarijan Alatala yetagi. **31** Xa muxuna nde waxi a yaganna yirena nde xunba feni, fɔ a xa a joxon fi, a yi na yiren yaganna dɔxɔɛ ma firin sa a fari. **32** Alatala nan gbee xuruseene birin yaganna ra, a xurin nun a xungbena. Xuruseene na yate, Alatala nan gbee e fudene ra. **33** Xuruseene mi yebama a fajin nun a kobin na. Xuruseen nama masara gbete ra. Xa a na liga e firinna birin nasarijanma nen, e mi nɔe xunbe.” **34** Alatala na yamarine nan so Musa yii Isirayila kaane xa Sinayi geyaan fari.

Yatene

1 Alatala yi falan ti Musa xa Naralan Bubun kui, Sinayi tonbonni, kike firinden lɔxo singeni, e minin jɛɛ firinden Misiran bɔxoni. A yi a fala, a naxa, **2** “Ɛ nun Haruna xa Isirayila yamaan birin tenge, ɛ xemene birin xinle seɓe xabila yɛɛn nun denbaya yɛɛn ma. **3** Ɛ xa Isirayila xemene birin tenge fata e ganle ra naxanye barin bata dangu jɛɛ mɔxɔɗen na, naxanye nɔɛ sofa wanla kɛ. **4** Bɔnsɔn yo bɔnsɔn, xabila manga keden xa ɛ mali.” **5** Na mali muxune xinle ni itoe ra: Keli Ruben bɔnsɔnni, Sedewuri a dii Elisuri. **6** Keli Simeyɔn bɔnsɔnni, Surisadayi a dii Selumiyeli. **7** Keli Yuda bɔnsɔnni, Aminadabo a dii Naxason. **8** Keli Isakari bɔnsɔnni, Suwari a dii Nataneli. **9** Keli Sabulon bɔnsɔnni, Xelɔn ma dii Eliyabi. **10** Yusufu a diine bɔnsɔnne: Keli Efirami bɔnsɔnni, Amixudi a dii Elisama. Keli Manase bɔnsɔnni, Pedasuri a dii Gamaliyeli. **11** Keli Bunyamin bɔnsɔnni, Gidewoni a dii Abidan. **12** Keli Dan bɔnsɔnni, Amisadayi a dii Axiyeseri. **13** Keli Aseri bɔnsɔnni, Okiran ma dii Pagiyele. **14** Keli Gadi bɔnsɔnni, Dewuyeli a dii Eliyasafi. **15** Keli Nafatali bɔnsɔnni, Enan ma dii Axira. **16** Bɔnsɔn mangani itoe nan yi xilixi yamaan ye. Ne yi findixi Isirayila gali kuntigine nan na. **17** Musa nun Haruna yi muxuni itoe tongo naxanye xinle yɛbaxi. **18** E yi yamaan birin malan kike firinden xii singen ma. Xemen naxanye birin barin bata yi dangu jɛɛ mɔxɔɗen na, e yi ne birin xinle seɓe keden keden ye ma kedin ma, xabila yɛɛn nun denbaya yɛɛn ma, **19** alo Alatala a yamari Musa ma kii naxan yi. A yi e tenge Sinayi tonbonni. **20** E yi xemene birin xinle seɓe keden keden ye ma Isirayila a dii singe Ruben bɔnsɔnni xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **21** E muxu wuli tonge naanin wuli sennin keme suulun tenge Ruben bɔnsɔnni. **22** E yi Simeyɔn bɔnsɔnna xemene birin xinle seɓe keden keden ye ma, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **23** E muxu wuli tonge suulun wuli solomanaanin keme saxan tenge Simeyɔn bɔnsɔnni. **24** E yi Gadi bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **25** E muxu wuli tonge naanin wuli suulun keme sennin tonge suulun tenge Gadi

bɔnsɔnni. **26** E yi Yuda bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **27** E muxu wuli tonge solofere wuli naanin keme sennin tenge Yuda bɔnsɔnni. **28** E yi Isakari bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **29** E muxu wuli tonge suulun wuli naanin keme naanin tenge Isakari bɔnsɔnni. **30** E yi Sabulon bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **31** E yi muxu wuli tonge suulun wuli solofere keme naanin tenge Sabulon bɔnsɔnni. **32** Yusufu a diine bɔnsɔnne ye: E yi Efirami bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **33** E muxu wuli tonge naanin keme suulun tenge Efirami bɔnsɔnni. **34** E yi Manase bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **35** E muxu wuli tonge saxan wuli firin keme firin tenge Manase bɔnsɔnni. **36** E yi Bunyamin bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **37** E muxu wuli tonge saxan wuli suulun keme naanin tenge Bunyamin bɔnsɔnni. **38** E yi Dan bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **39** E muxu wuli tonge sennin wuli firin keme solofere tenge Dan bɔnsɔnni. **40** E yi Aseri bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **41** E muxu wuli tonge naanin e nun keden keme suulun tenge Aseri bɔnsɔnni. **42** E yi Nafatali bɔnsɔnna xemene birin xinle seɓe, xabila yɛɛn nun denbaya yɛɛn ma, naxanye birin barin bata yi dangu jɛɛ mɔxɔɗen na, naxanye yi nɔɛ sofa wanla kɛ. **43** E yi muxu wuli tonge suulun wuli saxan keme naanin tenge Nafatali bɔnsɔnni. **44** Musa nun Haruna nun Isirayila yamaan manga fu nun firinna ne xasabin nan yate, bɔnsɔn keden manga keden. **45** Isirayila kaane birin yatexin denbaya yɛɛn ma, naxanye birin bata yi

dangu ɲɛ ɲɔxɔŋen na, naxanye yi ɲɛ sofa wanla ke, 46 ne birin malanxina, muxu wuli keme sennin wuli saxan keme suulun tonge suulun nan yi a ra. 47 Lewi bɔnsɔnna denbayane tan mi yi tengexi alo bonne. 48 Alatala a fala nen Musa xa, a naxa, 49 “I nama Lewi bɔnsɔnna nun Isirayila kaan bonne tenge e bode xɔn. 50 I xa layiri sereyaan Bubun taxu Lewi bɔnsɔnna muxune ra e nun a muranne nun a seene birin. E xa batu bubun nun a muranne xali. E yi e ɲɔxɔ lu e xɔn, e yi e yamaan daaxadeni tɔn a rabilinni. 51 E na keli sigadeni, Lewi bɔnsɔnna muxune nan Ala Batu Bubun wayanma, e mɔn yi a yitɔn e na dɔxɔ daaxaden naxan yi. Xa muxu gbete a maso a ra, e xa a faxa. 52 Isirayila kaane birin xa e malan e daaxadeni, birin yi dɔxɔ gali yeen ma a taxamasenna bun. 53 Lewi bɔnsɔnna muxune tan xa e bubune ti layiri sereyaan bubun nabilinni, e yi e ɲɔxɔ lu a xɔn alogo n ma xɔlɔn nama godo Isirayila yamaan ma.” 54 Alatala a yamarin Musa ma kii naxan yi, Isirayila kaane yi na birin liga.

2 Alatala yi falan ti Musa nun Haruna xa, a naxa, 2 “Isirayila kaane birin xa yamaan daaxadeni tɔn Naralan Bubun nabilinni, koni e nama a yigbeten. E xa dɔxɔ e bɔnsɔnna nun e denbayaan taxamasenne bun.” 3 “Yuda bɔnsɔnna nun a ganle xa e daaxadeni tɔn sogeteden binni e taxamasenna bun ma. Aminadabo a dii Naxason nan Yuda mangan na. 4 Muxu wuli tonge solofere wuli naanin keme sennin nan a ganli. 5 Isakari bɔnsɔnna xa e daaxadeni tɔn e dɔxɔn ma. Suwari a dii Nataneli nan Isakari bɔnsɔnna mangan na. 6 Muxu wuli tonge suulun wuli naanin keme naanin nan a ganli. 7 Sabulon bɔnsɔnna xa daaxa e fan dɔxɔn ma. Xɔlɔn ma dii Eliyabi nan Sabulon bɔnsɔnna mangan na. 8 Muxu wuli tonge suulun wuli solofere keme naanin nan a ganli. 9 Nayi, xemen naxanye Yuda yamaan daaxaden ganli, ne birin malanxina, muxu wuli keme wuli tonge solomasexe e nun sennin keme naanin. Yamaan na keli, e singen nan sigama.” 10 “Ruben bɔnsɔnna nun a ganle xa e daaxadeni tɔn yiifari fɔxɔni e taxamasenna bun ma. Sedewuri a dii Elisuri nan Ruben bɔnsɔnna mangan na. 11 Muxu wuli tonge naanin wuli sennin keme suulun nan a ganli. 12 Simeyɔn bɔnsɔnna xa e daaxadeni tɔn a dɔxɔn ma. Surisadayi a dii Selumiyeli nan Simeyɔn bɔnsɔnna mangan na. 13 Muxu wuli tonge suulun wuli solomanaanin keme saxan nan a ganli. 14 Gadi bɔnsɔnna xa daaxa na fan dɔxɔn ma. Reyuli a dii

Eliyasafi nan Gadi bɔnsɔnna mangan na. 15 Muxu wuli tonge naanin wuli suulun keme sennin tonge suulun nan a ganli. 16 Nayi, xemen naxanye Ruben yamaan daaxaden ganli, ne malanxina, muxu wuli keme wuli tonge suulun e nun keden keme naanin tonge suulun. Ne nan sigama a firinden.” 17 “Na xanbi ra, Lewi bɔnsɔnna muxune yi siga ganla bonne tagi, e nun Naralan Bubuna. E birin sigama e daaxa yeen nan ma, muxun birin nun a tidena, a bɔnsɔnna taxamasenna bun ma.” 18 “Efirami bɔnsɔnna nun a ganle xa e daaxadeni tɔn sogegododeni e taxamasenna bun ma. Amixudi a dii Elisama nan Efirami bɔnsɔnna mangan na. 19 Muxu wuli tonge naanin keme suulun nan a ganli. 20 Manase bɔnsɔnna xa daaxa a dɔxɔn ma. Pedasuri a dii Gamaliyeli nan Manase bɔnsɔnna mangan na. 21 Muxu wuli tonge saxan wuli firin keme firin nan a ganli. 22 Bunyamin bɔnsɔnna xa daaxa na fan dɔxɔn ma. Gidewoni a dii Abidan nan Bunyamin bɔnsɔnna mangan na. 23 Muxu wuli tonge saxan wuli suulun keme naanin nan a ganli. 24 Nayi, xemen naxanye Efirami yamaan daaxaden ganli, ne malanxina, muxu wuli keme wuli solomasexe muxu keme. E tan nan sigama a saxandeni.” 25 “Dan bɔnsɔnna nun a ganle xa e daaxadeni tɔn kɔmen fɔxɔni e taxamasenna bun ma. Amisadayi a dii Axiyeseri nan Dan bɔnsɔnna mangan na. 26 Muxu wuli tonge sennin wuli firin keme solofere nan a ganli. 27 Aseri bɔnsɔnna xa e daaxadeni tɔn a dɔxɔn ma. Okiran ma dii Pagiyeli nan Aseri bɔnsɔnna mangan na. 28 Muxu wuli tonge naanin e nun keden keme suulun nan a ganli. 29 Nafatali bɔnsɔnna xa daaxa na fan dɔxɔn ma. Enan ma dii Axira nan Nafatali bɔnsɔnna mangan na. 30 Muxu wuli tonge suulun wuli saxan keme naanin nan a ganli. 31 Nayi, xemen naxanye Dan ma yamaan daaxaden ganli, ne malanxina, muxu wuli keme wuli tonge suulun e nun solofere keme sennin. Ne nan sigan dɔnxen na, e taxamasenna bun ma.” 32 Isirayila kaane nan ne ra naxanye tenge denbaya yeen ma. Gali daaxadene birin malanxina, muxu wuli keme sennin wuli saxan keme suulun tonge suulun. 33 Lewi bɔnsɔnna muxune mi tenge Isirayila kaan bonne ye, alo Alatala a yamari Musa ma kii naxan yi. 34 Alatala yamarin naxanye birin fi Musa ma Isirayila kaane yi ne birin liga. E yi e daaxaden yebe e taxamasenne bun ma na kiini, e mɔn yi sigama na kii nin, xabila yeen nun denbaya yeen ma.

3 Haruna nun Musaa denbayaan muxune ni i ra, Alatala falan ti Musa xa waxatin naxan yi Sinayi geyaan fari. **2** Harunaa diine xinle ni itoe ra: a dii singena Nadaba, Abihu, Eleyasari nun Itamara. **3** Ne nan yi Harunaa diine ra naxanye masusan alogo e xa dɔxɔ saraxaraliyani, e yi na wanla ke. **4** Koni Nadaba nun Abihu faxa nen Alatala yetagi Sinayi tonbonni, e to fa tee daxataren na a xa. Dii mi yi e yii, nanara, Eleyasari nun Itamara nan lu saraxarali wanla ke e baba Haruna bun ma. **5** Alatala yi a fala Musa xa, a naxa, **6** “Lewi bɔnsɔnna maso, i yi e lu saraxarali Haruna sagoni, e lu a wanla ra. **7** E xa Haruna nun yamana wanla ke Naralan Bubuni, e Ala Batu bubun wanle ke. **8** E yengi dɔxɔma nen Naralan Bubun muranne xɔn, e yi Ala Batu Bubun wanle rakamali Isirayila kaane xa. **9** I xa Lewi bɔnsɔnna muxune lu Haruna nun a diine sagoni. E tan nan fima n ma Isirayila kaane ye habadan! **10** I xa Haruna nun a diine dɔxɔ saraxaraliyani. Muxu gbete na a maso yire sarijanxin na, e xa a faxa.” **11** Alatala mɔn yi a fala Musa xa, a naxa, **12** “N tan yeteen bata Lewi bɔnsɔnna muxune sugandi Isirayila kaane ye, e findi n gbeen na Isirayila dii singene jɔxɔn na. **13** Amasɔto n gbeen nan dii singene birin na. N Misiran dii singene birin faxa lɔxɔni, n yi dii singene birin nasarijan n yete xa Isirayila yi. Muxu ba, xuruse ba, n gbeen nan e ra. Alatala nan n tan na.” **14** Alatala yi a fala Musa xa Sinayi tonbonni, a naxa, **15** “I xa Lewi bɔnsɔnna muxune tenge, denbaya yeen nun xabila yeen ma. I xa xemene birin tenge naxanye barin bata dangu kike kedenna ra.” **16** Musa yi e tenge alo Alatala a yamari kii naxan yi. **17** Lewi a diine xinle ni itoe ra: Gerison, Kehati e nun Merari. **18** Gerison ma diine findixi xabilani itoe nan benbaye ra: Libini nun Simeyi. **19** Kehati a diine findixi xabilani itoe nan benbaye ra: Amirama, Yisehari, Xebiron e nun Yusiyei. **20** Merari a diine findixi xabilani itoe nan benbaye ra: Maxali nun Musi. Lewi xabilane nan ne ra e nun e denbayane benbane. **21** Gerison findixi Libini nun Simayi xabilane benban nan na. Ne nan Gerison xabilane ra. **22** E xemen naxanye tenge naxanye barin bata yi dangu kike kedenna ra, e muxu wuli solofere keme suulun. **23** Gerison xabilane yi e daaxadeni tonma Ala Batu Bubun nan xanbi ra, sogegodode binni. **24** Eliyasafi nan yi Gerison xabilane mangan na, Layeli a diina. **25** Gerison xabilane yi e yengi lu Naralan Bubun yireni itoe xɔn: bubun nun a xunna soon kuiin nun a fanna, a so deen

ye masansan dugina, **26** sansanna taa dugine naxan Ala Batu Bubun nun saraxa ganden nabilinni,ugin naxan singanxi sansanna deen na, e nun lutine nun e ti seene birin. **27** Kehati findixi Amirama nun Yisehari nun Xebiron nun Yusiyei xabilane benban nan na. Ne nan Kehati xabilane ra. **28** E xemen naxanye tenge naxanye barin bata yi dangu kike kedenna ra, e muxu wuli solomasexe keme sennin. E tan nan e yengi lu yire sarijanxin xɔn. **29** Kehati xabilane yi e daaxadeni tonma Ala Batu Bubun yiifari fɔxɔn nan ma. **30** Elisafan nan yi Kehati xabilane mangan na, Yusiyei a diina. **31** Kehati xabilane yi e yengi lu muranni itoe xɔn, Layiri Kankirana, tabanla, lenpu dɔxɔ sena, saraxa gandene, goronna naxanye rawalima yire sarijanxini, ye masansan dugina, e nun e rawali seene birin. **32** Saraxarali Harunaa dii Eleyasari nan yi Lewi bɔnsɔnna muxune birin mangan na. A tan nan yi dɔxi ne xun na naxanye yi e yengi luxi yire sarijanxin xɔn ma. **33** Merari findixi Maxali nun Musi xabilane benban nan na. Ne nan Merari xabilane ra. **34** E xemen naxanye tenge naxanye barin bata yi dangu kike kedenna ra, e muxu wuli sennin keme firin. **35** Suriyei nan yi Merari xabilane mangan na, Abixali a diina. E yi e daaxadeni tonma Ala Batu Bubun kɔmen fɔxɔn nan ma. **36** Merari xabilane yi e yengi lu Ala Batu Bubun buntine nun gaalane nun senbetenne nun bundɔxɔne nun muranne xɔn e nun e ti seene birin, **37** e nun a sansanna senbetenna naxanye a rabilinni nun e bundɔxɔne nun e gbangban seene nun e lutine. **38** Musa nun Haruna nun a diine yi e daaxadeni tonma Naralan Bubun so deen nan yetagi, sogeteden binni. E yi yire sarijanxin wanle xun matoma a ra Isirayila kaane xa. Xa muxu gbete yi a maso yire sarijanxin na, a yi faxama nen. **39** Lewi bɔnsɔnna muxune birin Musa nun Haruna naxanye tenge xabila yeen ma fata Alatalaa yamarin na, xemen naxanye barin bata yi dangu kike kedenna ra, e malanxina, muxu wuli mɔxɔjen nun firin. **40** Alatala yi a fala Musa xa, a naxa, “Dii xeme singene birin tenge Isirayila kaane ye, naxanye barin bata dangu kike kedenna ra, i yi e xinle sebe kedin ma. **41** Lewi bɔnsɔnna muxune so n yii e jɔxɔn na e nun e xuruseene Isirayila kaane xuruse dii singene jɔxɔn na. Alatala nan n tan na.” **42** Musa yi Isirayila kaane dii singene birin tenge, alo Alatala a yamari kii naxan yi. **43** Dii xeme singen naxanye birin barin bata yi dangu kike kedenna ra, ne xinle sebexin lan muxu wuli mɔxɔjen nun firin

keme firin tonge solofere e nun saxan nan ma. **44** Alatala yi a fala Musa xa, a naxa, **45** “Lewi bõnsõnna muxune tongo Isirayila kaane dii singene jaxõn na e nun e xuruseene Isirayila kaane xuruse dii singene jaxõn na. Lewi bõnsõnna muxune xa findi n gbeen na. Alatala nan n tan na. **46** Bayo Isirayila dii singene wuya Lewi bõnsõnna muxune xa han muxu keme firin tonge solofere e nun saxan, ne xunba daxin na a ra. **47** Muxu kedenna xunba gbeti gbanan suulun na, gbeti gbananna naxan nawalima yire sarijanxini, naxan lanxi garamu fu ma. **48** I xa na gbetin so Haruna nun a diine yii dii singene xunba seen na naxanye yi wuyaxi ayi.” **49** Naxanye mi yi jaxõ yibiraxi Lewi bõnsõnna muxune ra, Musa yi ne xunba gbetin tongo. **50** A yi Isirayila dii singene gbetin tongo han gbeti gbanan wuli keden keme saxan tonge sennin e nun suulun, gbeti gbananna naxan nawalima yire sarijanxini. **51** Nayi, Musa yi xunba gbetin so Haruna nun a diine yii, alo Alatala a yamari Musa ma kii naxan yi.

4 Alatala yi a fala Musa nun Haruna xa, a naxa, **2** “E Kehati xabilan muxune tenge Lewi yixetene ye xabila yeen nun denbaya yeen ma. **3** E xemene tenge keli jee tonge saxanna ma han jee tonge suulun, naxanye birin noe wanla ke Naralan Bubuni.” **4** “Kehati xabilan muxune xa wanli ito nan ke Naralan Bubuni: E xa e yengi lu se sarijanxi fisamantenne xõn. **5** Yamaan na keli sigadeni, Haruna nun a diine xa ye masansan dugin ba, e yi a sa Layiri Sereya Kankiraan fari. **6** E yi sube kidi fajine sa a fari, e mon yi dugi mamiloxini bandun ne fan fari. E yi Kankiraan tongo tamine yitõn. **7** E xa dugi mamiloxi gbete sa Buru Rali Tabanla fari, e yi a goronne nun igelengenne nun minse saraxa saseene daxõ na. Buru Ralixin naxanye na waxatin birin, ne xa lu tabanla fari. **8** E xa dugi gbeela so seene birin xunna, e yi sube kidi fajine so e birin xunna, e mon yi tabanla tongo tamine yitõn. **9** E xa dugi mamiloxin so lenpu daxõ seen nun lenpune nun e rawali seene nun tee ko seene nun e radege turen xun na. **10** E xa ne birin mafilin sube kidi fajni bitinganni, e mon yi e sa e xali wudin fari. **11** E xa dugi mamiloxin so saraxa gande xema daxin xun na, e yi sube kidi fajni bitinganna so na fan xun na. E mon yi a tongo tamine yitõn. **12** Muranna naxanye birin nawalima yire sarijanxini e xa ne malan, e yi e raxidi dugi mamiloxini, e yi kidi fajni bitinganna so e xun na, e yi e sa e xali wudin

fari. **13** E xa xuben ba saraxa gande sula daxin fari, e yi dugi mamiloxin so a xun na. **14** E xa a saraxa waliseene birin daxõ na fari: xube sa seene, suben tongo seene, xube ko seene, e nun wuli xuya goronne. E xa sube kidi fajni bitinganna so e xun na, e mon yi saraxa ganden tongo tamine yitõn. **15** Haruna nun a diine na yelin muranne nun goron sarijanxine xunna soe, yamaan na keli sigadeni, Kehati xabilan muxune xa fa, e yi e xali. Koni e nama e yiin din se sarijanxine ra, alogo e nama faxe. Kehati xabilan muxune xa na seene xali naxanye Naralan Bubun kui. **16** Saraxarali Harunaa dii Eleyasari xa a yengi lu lenpu turen nun wusulanna nun bogise saraxane nun masusan turen xõn ma. A yi a yengi lu Ala Batu Bubun yiren birin xõn ma e nun a kui seene nun muran sarijanxine nun a goronne birin.” **17** Alatala yi a fala Musa nun Haruna xa, a naxa, **18** “E Kehati xabilan muxune ratanga alogo e nama raxori Lewi bõnsõnna ye. **19** E ito nan liga e xa alogo e nama faxe e na e maso se sarijanxi fisamantenne ra waxatin naxan yi: Haruna nun a diine singe xa so yire sarijanxini, e yi birin ti a wali ra, e nun a lan a xa naxan xali. **20** Koni Kehati xabilan muxune nama so yire sarijanxini, e se sarijanxi fisamantenne to, hali ndedi, alogo e nama faxe.” **21** Alatala yi a fala Musa xa, a naxa, **22** “Gerisõn yixetene fan tenge, xabila yeen nun denbaya yeen ma. **23** I xa xemene tenge keli jee tonge saxanna ma han jee tonge suulun, naxanye noe wanla ke Naralan Bubuni. **24** Gerisõn yixetene xabilane wanle ni i ra e nun e lan e xa goronna naxanye xali: **25** E xa Ala Batu Bubun dugin maxali, e nun Naralan Bubuna, a xunna soona, a kidi fajni naxanye sama a fari, dugin naxanye singanma Naralan Bubun so deen na, **26** a sansanna dugin naxanye Ala Batu Bubun nun saraxa ganden nabilinni, dugin naxan singanxi a so deen na, e nun e lutine nun e singan seene birin. **27** Gerisõn xabilan muxune xa wali Haruna nun a diine yamarin bun. E tan nan a falama e xa e lan e xa naxan xali. **28** Gerisõn xabilan muxune wanle nan ne ra Naralan Bubuni. E xa wali saraxarali Harunaa dii Itamaraa yamarin bun.” **29** “I xa Merari bõnsõnna muxune tenge xabila yeen nun denbaya yeen ma. **30** I xemene birin tenge keli jee tonge saxanna ma han jee tonge suulunna, naxanye noe wanla ke Naralan Bubuni.” **31** “E wanla ni i ra Naralan Bubuni: E xa Ala Batu Bubun biitiene xali, a gaalane, a senbetenne, a bundaxõne, **32** sansanna senbetenne naxan bubun nabilinni, e

bundoxone, e gbangban wudine nun e lutine, e nun waliseene birin. E xa xemen birin goronna so a yii a naxan xalima. **33** Merari bonsonna muxune wanle nan ne ra Naralan Bubuni, saraxarali Harunaa dii Itamaraa yamarin bun.” **34** Musa nun Haruna nun yamaan mangane yi Kehati xabilan muxune tenge xabila yeen nun denbaya yeen ma. **35** Xemen naxanye birin bata yi jee tonge saxanna soto han jee tonge suulunna, naxanye birin yi noe wanla ke Naralan Bubuni, **36** ne yi tenge xabila yeen ma, e lan muxu wuli firin keme solofere tonge suulun nan ma. **37** Kehati xabila xemene yaten nan na ra, naxanye yi walima Naralan Bubuni. Musa nun Haruna yi e birin tenge alo Alatala a yamari e ma kii naxan yi fata Musa ra. **38** Gerison yixetene fan yi tenge xabila yeen nun denbaya yeen ma. **39** Xemen naxanye birin bata yi jee tonge saxanna soto han jee tonge suulun, naxanye birin yi noe wanla ke Naralan Bubuni, **40** ne yi tenge xabila yeen ma, e lan muxu wuli firin keme sennin tonge saxan nan ma. **41** Gerison yixetene yaten nan na ra, naxanye yi walima Naralan Bubuni. Musa nun Haruna yi e birin tenge alo Alatala a yamari kii naxan yi. **42** Merari yixetene fan yi tenge xabila yeen nun denbaya yeen ma. **43** Xemen naxanye birin bata yi jee tonge saxanna soto han jee tonge suulunna, naxanye birin yi noe wanla ke Naralan Bubuni, **44** ne yi tenge xabila yeen ma, e lan muxu wuli saxan keme firin nan ma. **45** Merari yixetene yaten nan na ra. Musa nun Haruna yi e birin tenge alo Alatala e yamari kii naxan yi fata Musa ra. **46** Musa nun Haruna nun Isirayila mangane yi Lewi bonsonna muxune birin tenge xabila yeen nun denbaya yeen ma. **47** Xemen naxanye birin bata yi jee tonge saxanna soto han jee tonge suulun, naxanye birin yi Naralan Bubun wanla kema, e mon yi a xali, **48** e malanxin lan muxu wuli solomasexe keme suulun tonge solomasexe nan ma. **49** E yi e tenge alo Alatala e yamari kii naxan yi fata Musa ra. Birin yi ti a wanla ra, e nun a lan a xa goronna naxan maxali, alo Alatala a yamari Musa ma kii naxan yi.

5 Alatala yi a fala Musa xa, a naxa, **2** “Isirayila kaane yamari a e xa na kanna ramini yamaan daaxaden fari ma fure naxin naxan fatin ma hanma faxunna minima muxun naxan bari boden ma hanma naxanye xosixi binbin xon. **3** Xa xemen na a ra hanma naxanla, e xa e ramini yamaan daaxaden fari ma, alogo e nama daaxaden naxosi, n luma e tagi denaxan yi.” **4** Isirayila

kaane yi na liga, e yi e ramini yamaan daaxaden fari ma, e yi a liga alo Alatala a fala Musa xa kii naxan yi. **5** Alatala yi a fala Musa xa, **6** a a xa a fala Isirayila kaane xa, a naxa, “Xa xemena nde hanma naxanla nde hake yo liga muxu gbete ra, a bata tinxintareyaan liga Alatala ra. Na kanna bata findi yulubi tongon na. **7** E a xa a ti a haken na nen, a yi a se kalaxin naxon naxete a kanna ma, a yi a se kalaxin saren yaganna doxode firin sa a fari. **8** Xa se kanna faxa, a bari bode mi na naxan na gbetin nasuxe, na seen lan a xete Alatala ma, a so saraxaraliin yii, sa kontonna fari Ala solona seen na a xa. **9** Isirayila kaane fama saraxa sarijanxin naxanye ra, saraxaraliin nan gbee ne ra. **10** Muxun na naxan nasarijan, a na ligaxi a yete nan xa. Muxun na naxan so saraxaraliin yii, na luma a tan nan yii.” **11** Alatala yi a fala Musa xa, **12** a xa ito fala Isirayila kaane xa, a naxa, “Xa xemena nde a naxanla mi tinxin, a a xemen yanfa, **13** e nun xeme gbete yi kafu, xa a xemen mi a to, naxanla yi a yete raxosi wundoni, koni xa a li sere mi na, a mi suxu na feen xun na, **14** xa xoxolon xaxinla so na xemeni, a sike a naxanla ma, xa a li a xosixi hanma a mi a ligaxi, **15** nayi, na xemen xa a naxanla xali saraxaraliin fema. A xa murutu fujin kilo saxan xali bogise saraxan na. A nama ture sa na murutuni, a nama wusulan sa a fari, amasoto xoxolonna bogise saraxan na a ra. Marabira seen na a ra hake tongoxin ma. **16** Saraxaraliin xa naxanla maso, alogo a xa ti Alatala yetagi. **17** A xa ige rasarijanxin tongo fejena nde kui, a yi Ala Batu Bubun burunburunna sa a yi. **18** Naxanla naxan tima Alatala yetagi, a xa na labaranna ba, a yi bogise saraxan so a yii naxo lu seen na a haken xon xoxolonna bogise saraxan na. Saraxaraliin xa na ige loxon suxu a yii, naxan fama dangan na. **19** A xa naxanla rakolo, a naxa, ‘Xa e nun xeme gbete mi kafuxi, i mi i ya xemen yanfaxi, i mi xosi fe rabaxi xabu i doxo xeme taa ra, i xa ratanga dangani ito ma ige loxoni ito fama naxan na. **20** Koni xa i bata i ya xemen yanfa, i yi i yete raxosi, xa e nun xeme gbete bata kafu xabu i doxo xeme taa ra,’ **21** nayi, saraxaraliin xa naxanla rakolo dangani ito ra, ‘Alatala xa a liga, i doyen, i kuiin yi mate i ra, yamaan yi i danga, e yi i mafala. **22** Igeni ito naxan fama dangan na, na xa so i fatini, a yi i kuiin mate i ra, i yi doyen.’ Naxanla xa a ratin, a naxa, ‘Amina, amina!’” **23** “Saraxaraliin xa dangani itoe sebe walaxana nde ma, a yi e xa ige yiloxin na. **24** A xa ige xolon so naxanla yii naxan

fama dangan na, a a min, alogo a xa so a fatin xon, a xolo ayi. **25** Saraxaraliin xa xoxolonna bogise saraxan tongo jaxanla yii, a a yita Alatala ra a yii, a yi a xali saraxa ganden dexon. **26** A xa a yiin ye keden ba a ra, joxo lu seen na Ala xon, a yi a sa teeni saraxa ganden fari. Na xanbi ra, jaxanla yi igen min. **27** Xa a bata a yete xosi, a a xemen yanfa, a na igen min naxan fama dangan na, na a toroma nen, a a kuiin mate a ra, a yi doyen. Na jaxanla findima nen danga muxun na yamaan tagi. **28** Koni, xa na jaxanla mi a yete xosixi, a sarijan, fefe mi a sotoma, a mon noe diine bare nen. **29** Xoxolonna sariyan nan na ra jaxanla xa naxan bata a xemen yanfa, a a yete xosi, **30** hanma xoxolon xaxinla na so xemen naxan yi, a na sogin a jaxanla ma. A xa ti Alatala yetagi, saraxaraliin yi sariya sebexini itoe birin nakamali a ma. **31** Xemen mi hake yo tongoxi, koni jaxanla a haken goronna tongoma nen.”

6 Alatala yi a fala Musa xa, **2** a xa a fala Isirayila kaane xa, a naxa, “Xa xemena nde hanma jaxanla nde a de ti, a a xa lu Alatalaa wanla ra Nasiri muxun na, **3** na kanna xa a me dolon na e nun na minse sifane, hali manpa muluxunxina. A nama minse yo min naxan nafalaxi manpa bogin na, a nama manpa bogi xinden hanma a xaraxin don. **4** A nema a Nasiri de tiin nakamalima, a nama sese don naxan kelixi manpa binle yi, hali a xonne hanma a dagina. **5** A nema a Nasiri de tiin nakamalima, biden nama a xunna li. A xa lu Alatalaa wanla ra han na waxati falaxin yi kamali. A xa sarijan, a xa a xunsexen lu kuye ayi. **6** A nema Alatalaa wanla ra, a nama a maso binbin na. **7** Hali a baba hanma a nga hanma a ngaxakedenna nde faxa, a nama a yete xosi, a so binbin xun ma. Amasoto a xunsexen findixi taxamasenna nan na, a a tan bata lu Alaa wanla ra. **8** A nema Alaa wanla ra waxatin naxan birin yi, a sarijan Alatala yetagi.” **9** “Xa muxuna nde faxa a fema, a xunsexe ralixin bata raharamu. A xa a xunna bi a rasarijan loxoni, xii soloferede loxoni. **10** Xii solomasexede loxoni, a xa ganba firin hanma kolokonde dii firin xali saraxaraliin fema Naralan Bubun so deen na. **11** Saraxaraliin xa keden faxa yulubi xafari saraxan na, bonna saraxa gan daxin na, a Ala solona a xa. Amasoto a bata lu binbin fema. Na loxoni, a mon xa a xunna rasarijan. **12** Nayi, na kanna mon xa a de ti waxatin de suxu, a yi kontonna jee kedenna ba yangin saraxan na Alatala xa. Waxatin naxan bata yi dangu, na mi a kui, amasoto

a xosi nen benun a de tiin xa kamali.” **13** “Sariyan ni ito ra Nasiri de tiin ma. A waxati saxin na kamali, e xa fa a ra Naralan Bubun so deen na. **14** A xa fa kiseni itoe ra Alatala yetagi: kontonna jee kedenna fe mi naxan na saraxa gan daxin na, yexee gilen jee kedenna fe mi naxan na yulubi xafari saraxan na, e nun konton keden fe mi naxan na boje xunbeli saraxan na. **15** A mon yi fa na saraxane bogise nun minse saraxane ra e nun burun sangatanna ye keden buru rate seen mi naxan yi, e nun buru xunne naxan nafalaxi murutu fuji fajin na naxan basanxi turen na, e nun buru yilenlenxine turen saxi naxanye ma. **16** Saraxaraliin xa ne yita Alatala ra, a yi yulubi xafari saraxan ba e nun saraxa gan daxina. **17** A mon xa kontonna ba boje xunbeli saraxan na Alatala xa, e nun buru ratetaren naxanye sangatanna kui e nun bogise saraxane nun minse saraxane. **18** Na waxatini, Nasiri muxun xa a xunna bi Naralan Bubun so deen na bayo a bata yi a xunna fi Ala ma. A yi a xun sexene sa teeni naxan boje xunbeli saraxan bun. **19** Nasiri muxun na a xunna bi, saraxaraliin xa kontonna balaxa jinxin so a yii, e nun buru xun keden nun burudi keden keli sangatanna kui, buru rate se mi naxanye yi. **20** Saraxaraliin xa e yita Alatala ra se ralixin na. E sarijan. Saraxaraliin nan gbee e ra, sa danban nun a kanken fari naxanye daxe e yita Ala ra. Na xanbi ra, Nasiri muxun noe manpaan minje nen.” **21** “Sariyan nan na ra lan Nasiri muxuna kiseen ma bayo a bata a de ti a a xa lu Alatalaa wanla ra. Xa ferena a xa, a mon noe nde se a fari. A xa a de tiin nakamali alo Nasiri muxuna sariyana a falaxi kii naxan yi.” **22** Alatala yi a fala Musa xa, **23** a a xa a fala Haruna nun a diine xa, a e xa duba Isirayila kaane xa ikimaan na: **24** Alatala xa i baraka, a i kantan! **25** Alatala noron xa godo i ma, a kininkinin i ma! **26** Alatala xa a yengi dexo i xon, a boje xunbenla fi i ma! **27** E na duba Isirayila kaane xa n xinli, n tan e barakama nen.

7 Musa yelin Ala Batu Bubun tiye loxon naxan yi, a yi a masusan turen na a rasarijan xinla ma e nun a muranne birin. A mon yi saraxa ganden nun a goronne masusan, a e rasarijan. **2** Nayi, Isirayila mangane yi fa kiseene ra. Denbaya xunne nan yi ne ra naxanye yamaan tenge, bonson mangane. **3** E yi fa e kiseene ra Alatala yetagi: Wontoro xunna soxin sennin e nun jinge fu nun firin. Manga firin, wontoro keden, manga keden jinge keden. E yi fa ne ra Ala

Batu Bubun yetagi. **4** Alatala yi a fala Musa xa, a naxa, **5** “Kiseene rasuxu e yii alogo e xa Naralan Bubun wanla ke. E xa yitaxun Lewi bõnsõnna ra, naxan lanje e wanle ma.” **6** Nayi, Musa yi wontorone nun jingene rasuxu, a yi e yitaxun Lewi bõnsõnna ra. **7** A yi jinge naanin nun wontoro firin so Gërisõn xabilan yii, alogo e wanla xa sõnya. **8** A yi jinge solomasexe nun wontoro naanin so Merari xabilan yii, alogo e wanla xa sõnya. E birin yi walima Itamaraa yamarin bun, saraxarali Harunaa diina. **9** Koni, a mi se so Kehati xabilan yii, amasoto e yi tixi se sarijanxi fisamantenne maxanla nan na, naxanye tongoma tungunna ma. **10** Saraxa ganden masusan lõxõn naxan yi turen na alogo a wanla xa folo, mangane yi e kiseene xali saraxa ganden yetagi. **11** Alatala yi a fala Musa xa, a naxa, “Lõxo yo lõxo manga keden xa fa a kiseene ra, alogo wanla xa folo saraxa ganden yetagi.” **12** Aminadabo a dii Naxason yi fa Yuda bõnsõnna kiseene ra xii singe lõxõni. **13** A kiseene ni i ra: goronna gbeti daxin keden naxan binyen yi lanxi garamu wuli keden keme saxan ma, wuli xuya goronna gbeti daxin keden naxan binyen lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **14** xema goronna naxan lanxi garamu keme ma, a rafexi wusulanna ra, **15** tura bulan keden e nun konton keden nun kontonna jee kedenna saraxa gan daxin na, **16** koto keden yulubi xafari saraxan na, **17** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Aminadabo a dii Naxason ma kiseene ra. **18** Suwari a dii Nataneli, Isakari bõnsõnna mangana, na yi fa a kiseene ra xii firinde lõxõni. **19** A kiseene ni i ra: goronna gbeti daxin keden naxan lanxi garamu wuli keden keme saxan ma, wuli xuya goronna gbeti daxin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **20** xema goronna naxan lanxi garamu keme ma, a rafexi wusulanna ra, **21** tura bulan keden e nun konton keden nun kontonna jee kedenna saraxa gan daxin na, **22** koto keden yulubi xafari saraxan na, **23** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Suwari a dii Nataneli a kiseene ra. **24** Xelõn ma dii Eliyabi, Sabulon bõnsõnna mangana, na yi fa a kiseene ra xii

saxande lõxõni. **25** A kiseene ni i ra: goronna gbeti daxin keden naxan lanxi garamu wuli keden keme saxan ma, wuli xuya goronna gbeti daxin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **26** xema goronna naxan lanxi garamu keme ma, a rafexi wusulanna ra, **27** tura bulan keden e nun konton keden nun kontonna jee kedenna saraxa gan daxin na, **28** koto keden yulubi xafari saraxan na, **29** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Xelõn ma dii Eliyabi a kiseene ra. **30** Sedewuri a dii Elisuri, Ruben bõnsõnna mangana, na yi fa a kiseene ra xii naaninde lõxõni. **31** A kiseene ni i ra: goronna gbeti daxin keden naxan lanxi garamu wuli keden keme saxan ma, wuli xuya goronna gbeti daxin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **32** xema goronna naxan lanxi garamu keme ma, a rafexi wusulanna ra, **33** tura bulan keden e nun konton keden nun kontonna jee kedenna saraxa gan daxin na, **34** koto keden yulubi xafari saraxan na, **35** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Sedewuri a dii Elisuri a kiseene ra. **36** Surisadayi a dii Selumiyeli, Simeyõn bõnsõnna mangana, na yi fa a kiseene ra xii suulunde lõxõni. **37** A kiseene ni i ra: goronna gbeti daxin keden naxan lanxi garamu wuli keden keme saxan ma, wuli xuya goronna gbeti daxin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **38** xema goronna naxan lanxi garamu keme ma, a rafexi wusulanna ra, **39** tura bulan keden e nun konton keden nun kontonna jee kedenna saraxa gan daxin na, **40** koto keden yulubi xafari saraxan na, **41** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Surisadayi a dii Selumiyeli a kiseene ra. **42** Dewuyeli a dii Eliyasafi, Gadi bõnsõnna mangana, na yi fa a kiseene ra xii senninde lõxõni. **43** A kiseene ni i ra: goronna gbeti daxin keden naxan lanxi garamu wuli keden keme saxan ma, wuli xuya goronna gbeti daxin naxan lanxi garamu keme solofere ma naxan nun

yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **44** xema goronna naxan lanxi garamu keme ma, a rafexi wusulanna ra, **45** tura bulan keden e nun konton keden nun kontonna jee kedenna saraxa gan dixin na, **46** koto keden yulubi xafari saraxan na, **47** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Dewuyeli a dii Eliyasafi a kiseene ra. **48** Amixudi a dii Elisama, Efirami bonsonna mangana, na yi fa a kiseene ra xii soloferede loxoni. **49** A kiseene ni i ra: goronna gbeti dixin keden naxan lanxi garamu wuli keden keme saxon ma, wuli xuya goronna gbeti dixin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **50** xema goronna naxan lanxi garamu keme ma, a rafexi wusulanna ra, **51** tura bulan keden e nun konton keden nun kontonna jee kedenna saraxa gan dixin na, **52** koto keden yulubi xafari saraxan na, **53** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Amixudi a dii Elisama kiseene ra. **54** Pedasuri a dii Gamaliyeli, Manase bonsonna mangana, na yi fa a kiseene ra xii solomasexede loxoni. **55** A kiseene ni i ra: goronna gbeti dixin keden naxan lanxi garamu wuli keden keme saxon ma, wuli xuya goronna gbeti dixin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **56** xema goronna naxan lanxi garamu keme ma, a rafexi wusulanna ra, **57** tura bulan keden e nun konton keden nun kontonna jee kedenna saraxa gan dixin na, **58** koto keden yulubi xafari saraxan na, **59** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Pedasuri a dii Gamaliyeli a kiseene ra. **60** Gidewoni a dii Abidan, Bunyamin bonsonna mangana, na yi fa a kiseene ra xii solomanaaninde loxoni. **61** A kiseene ni i ra: goronna gbeti dixin keden naxan lanxi garamu wuli keden keme saxon ma, wuli xuya goronna gbeti dixin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **62** xema goronna naxan lanxi garamu

keme ma, a rafexi wusulanna ra, **63** tura bulan keden e nun konton keden nun kontonna jee kedenna saraxa gan dixin na, **64** koto keden yulubi xafari saraxan na, **65** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Gidewoni a dii Abidan ma kiseene ra. **66** Amisadaya a dii Axiyeseri, Dan bonsonna mangana, na yi fa a kiseene ra xii fude loxoni. **67** A kiseene ni i ra: goronna gbeti dixin keden naxan lanxi garamu wuli keden keme saxon ma, wuli xuya goronna gbeti dixin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **68** xema goronna naxan lanxi garamu keme ma, a rafexi wusulanna ra, **69** tura bulan keden e nun konton keden nun kontonna jee kedenna saraxa gan dixin na, **70** koto keden yulubi xafari saraxan na, **71** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Amisadaya a dii Axiyeseri a kiseene ra. **72** Okiran ma dii Pagiyeli, Aseri bonsonna mangana, na yi fa a kiseene ra xii fu nun kedende loxoni. **73** A kiseene ni i ra: goronna gbeti dixin keden naxan lanxi garamu wuli keden keme saxon ma, wuli xuya goronna gbeti dixin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **74** xema goronna naxan lanxi garamu keme ma, a rafexi wusulanna ra, **75** tura bulan keden e nun konton keden nun kontonna jee kedenna saraxa gan dixin na, **76** koto keden yulubi xafari saraxan na, **77** jinge firin e nun konton suulun nun koto suulun, e nun yexeen jee keden kedenna suulun, boje xunbeli saraxan na. Ne nan findi Okiran ma dii Pagiyeli a kiseene ra. **78** Enan ma dii Axira, Nafatali bonsonna mangana, na yi fa a kiseene ra xii fu nun firinde loxoni. **79** A kiseene ni i ra: goronna gbeti dixin keden naxan lanxi garamu wuli keden keme saxon ma, wuli xuya goronna gbeti dixin naxan lanxi garamu keme solofere ma naxan nun yire sarijanxin liga seen binyen lan, e birin nafexi murutu fujin na naxan namulanxi turen na bogise saraxan na, **80** xema goronna naxan lanxi garamu keme ma, a rafexi wusulanna ra, **81** tura bulan keden e nun konton keden nun kontonna jee kedenna saraxa gan dixin na, **82** koto keden yulubi xafari saraxan na, **83** jinge firin e nun konton suulun

nun koto suulun, e nun yexeen jee keden kedenna suulun, boje xunbeli saraxan na. Ne nan findi Enan ma dii Axira a kiseene ra. **84** Isirayila denbaya xunne birin ma kiseene ni i ra, e naxanye fi saraxa ganden masusan loxoni alogo a wanla xa folo: goronna gbeti dixin fu nun firin, wuli xuya goronna gbeti dixin fu nun firin, xema goronna fu nun firin. **85** Goronna gbeti dixin keden kedenne birin yi lanxi garamu wuli keden keme saxon ma, wuli xuya goronne fan, garamu keme solofere. Na seene birin malanxin lanxi gbeti kilo moxojen nun naanin nan ma naxan nun yire sarijanxin liga seen binyen lan. **86** Goronna xema dixin keden kedenne birin yi lanxi garamu keme nan ma. E fu nun firinne malanxina, garamu wuli keden keme firin. E yi rafexi wusulanna ra. **87** E fa xuruseen naxanye ra saraxa gan dixin na: tura bulan fu nun firin, konton fu nun firin, yexeen jee kedenna fu nun firin, e nun e bogise saraxane. E yi fa koto fu nun firin na yulubi xafari saraxan na. **88** E fa xuruseen naxanye ra boje xunbeli saraxan na: tura moxojen nun naanin, konton tonge sennin, koto tonge sennin e nun yexeen jee keden kedenna tonge sennin. Ne nan findi kiseene ra alogo saraxa ganden wanla xa folo a masusan xanbini. **89** Musa nema yi soe Naralan Bubuni falatideni Ala xa, a yi Ala xuiin mema maleka gubugubu kan sawura firinne nan longori ra Layiri Sereya Kankiraan deraganla xun ma, Ala solonadena. A yi falan tima a xa.

8 Alatala yi a fala Musa xa, **2** a xa a fala Haruna xa, a naxa, “I na lenpu soloferene dexo waxatin naxan yi, e lan e yi lenpu dexo seen yetagini yalan.” **3** Haruna yi na liga. A lenpune dexo alogo e xa e dexo seen yetagini yalan alo Alatala a yamari Musa ma kii naxan yi. **4** Lenpune dexo seen yi rafalaxi xema bonboxin nan na, keli a sanna ma han a fuge sawurane, alo Alatala a yita Musa ra kii naxan yi. **5** Alatala yi a fala Musa xa, a naxa, **6** “Lewi bonsonna muxune ba Isirayila kaan bonne ye, i yi e rasarijan. **7** I xa e rasarijan ikiini: I xa marasarijan igen xuya e ma, na xanbi ra e xa e fati ma xabene birin bi, e yi e dugine xa, alogo e xa sarijan. **8** E xa tura bulan keden tongo, e nun murutu fupin naxan namulanxi turen na a bogise saraxan na, i yi tura bulan gbeti tongo yulubi xafari saraxan na. **9** I yi Isirayila yamaan birin malan, i yi Lewi bonsonna muxune xili Naralan Bubun yetagi. **10** I xa Lewi bonsonna muxune maso

Alatala yetagi, Isirayila kaane yi e yiine sa e fari. **11** Haruna xa Lewi bonsonna muxune yita Alatala ra se ralixin na Isirayila kaane tagi alogo e xa Alatala wanla folo. **12** Na xanbi ra, Lewi bonsonna muxune xa e yiine sa tura firinna xunne fari. Na keden xa ba Alatala xa yulubi xafari saraxan na, bonna saraxa gan dixin na, Ala solona seen na Lewi bonsonna muxune xa. **13** I xa Lewi bonsonna muxune ti Haruna nun a diine yetagi, e yi e yita Alatala ra se ralixin na. **14** Na kiini, i xa Lewi bonsonna muxune ba Isirayila kaan bonne tagi, Lewi bonsonna muxune yi findi n gbeen na. **15** I na Lewi bonsonna muxune rasarijan i yi e yita n na se ralixin na, e xa fa e wanle ke Naralan Bubuni. **16** Amasoto e bata findi n gbeen na mume! N bata e tongo n gbeen na Isirayila dii xeme singene birin joxon na. **17** Amasoto n gbeen nan Isirayila dii xeme singene birin na, a muxune nun a subene. Xabu n Misiran yamanan dii singene faxesa loxoni, n bata Isirayila dii singene ramara n yete xa. **18** Koni n Lewi bonsonna muxune nan tongoxi alogo e xa Isirayila dii xeme singene joxo yibira. **19** N ne nan soma Haruna nun a diine yii Isirayila kaane tagi, alogo e xa Naralan Bubun wanle ke Isirayila kaane xa, e yi Ala solona e xa. Nayi, fitina fe mi Isirayila kaane sotoma, e na e maso yire sarijanxin na.” **20** Musa nun Haruna nun Isirayila yamaan birin yi na liga Lewi bonsonna muxune xa alo Alatala a yamari Musa ma kii naxan yi. **21** Lewi bonsonna muxune yi e yete rasarijan, e e dugine xa. Haruna yi e yita Alatala ra se ralixin na, a yi Ala solona e xa alogo e xa sarijan. **22** Na xanbi ra, Lewi bonsonna muxune yi fa e wanla folo Naralan Bubuni, Haruna nun a diine yamarin bun. E yi a liga Lewi bonsonna muxune xa alo Alatala a yamari Musa ma kii naxan yi. **23** Alatala yi a fala Musa xa, a naxa, **24** “Lewi bonsonna muxune luma ikiini: Xemen naxanye barin bata dangu jee moxojen nun suulunna ra, ne xa fa walideni Naralan Bubuni. **25** Koni, e na jee tonge suulunna soto siimayaan na, e xa wanla dan. **26** E na e ngaxakedenne maliye nen walideni Naralan Bubuni, koni e yeteen nama a wanla ke. I xa wanle taxu Lewi bonsonna muxune ra na kiini.”

9 Alatala yi falan ti Musa xa Sinayi tonbonni, e minin jee firinden kike singeni Misiran yamanani. A yi a fala, a naxa, **2** “Isirayila kaane xa Halagi Tiin Dangu Loxon Sanla raba a waxatini. **3** E xa a liga kiken i to xii fu nun naaninde loxon jinbanna ra,

alo a fe yamarine nun a sariyane kii naxan yi.” 4 Musa yi na rali Isirayila kaane ma, a e xa Halagi Tiin Dangu Loxon Sanla raba. 5 E yi na liga kike singen xii fu nun naaninde jinbanna ra, Sinayi tonbonni. E yi a birin liga alo Alatala a yamari Musa ma kii naxan yi. 6 Koni, muxuna nde yi na naxanye bata yi e yiin din binbin na. E yi xosixi na loxoni, e mi yi noe Halagi Tiin Dangu Loxon Sanla rabe. E yi siga Musa nun Haruna fema, 7 e yi a fala Musa xa, e naxa, “Nxu bata xosi binbin xon. Koni, nanfera nxu mi noe nxo saraxane be Alatala xa alo Isirayila kaan bonne a waxatini?” 8 Musa yi e yabi, a naxa, “E dija han n xa a kolon Alatala naxan yamarima e fe yi.” 9 Alatala yi a fala Musa xa, 10 a a xa a fala Isirayila kaane xa, a naxa, “Xa e tan nde hanma e yixetena nde xosixi binbin xon, hanma xa e sa sigatini, a mon noe Halagi Tiin Dangu Loxon Sanla rabe nen Alatala xa. 11 E xa sanla raba kike firinden xii fu nun naaninde loxon jinbanna ra. E yexee diin don e nun buru ratetarene nun joxonde xolene. 12 E nama sese lu han xotonni, e nama a xonne yigira. E na Halagi Tiin Dangu Loxon Sanla raba, e xa a yamarine birin suxu. 13 Koni xa muxuna nde tondi Halagi Tiin Dangu Loxon Sanla rabe a waxatini, anu a mi xosixi, a mi sigatini, a kedima nen Isirayila yamani, a to mi saraxan baxi Alatala xa a waxatini. Na kanna a yulubin goronna tongoma nen. 14 Xojene naxanye doxi e tagi, xa ne wa Halagi Tiin Dangu Loxon Sanla raba feni Alatala xa, e lan e yi a sariyane nun a yamarine suxu. Sariyane lan birin xa, Isirayila kaan nun xojena.” 15 Ala Batu Bubun ti loxon naxan yi, Layiri Sereya Bubuna, kundaan yi so a xun na. Keli jinbanna ma han xotonni, na kundaan yi degema nen alo teena. 16 Kundaan yi lu a xun ma, koni koeen na, a yi lu alo teena. 17 Na kundaan na yi ba bubun xun ma waxati yo yi, Isirayila kaane yi kelima nen sigadeni. Kundaan na ti denaxan yi, Isirayila kaane yi e daaxadeni ton menni. 18 Isirayila kaane yi sigama Alatalaa yamarin nan ma, e mon yi e daaxadeni tonma Alatalaa yamarin nan ma. Fanni kundaan yi Ala Batu Bubun xun ma, e yi luma daaxadeni nen. 19 Xa kundaan yi lu Ala Batu Bubun xun ma waxati xunkuye, Isirayila kaane yi Alatalaa yamarin suxuma nen. E mi yi sigama. 20 Waxatina nde, kundaan yi luma nen Ala Batu Bubun xun ma xii dando. E yi luma daaxadeni Alatalaa yamarin nan ma, e yi sigama a yamarin nan ma. 21 Waxatina nde kundaan yi luma nen yire kedenni keli jinbanna ma

han na xoton bode, koni a na yi ba xotonni tun, e yi sigama nen. Koeen nun yanyina, kundaan na yi ba, e fan yi kelima nen. 22 Xa a lu Ala batu bubun xun ma xii firin hanma kike keden, hanma jee keden, Isirayila kaane yi luma nen daaxadeni. E mi sige mumu, fo a na ba waxatin naxan yi. 23 Isirayila kaane yi daaxama hanma e yi kelima daaxadeni Alatalaa yamarin nan ma. E yi Alatalaa yamarine suxuma, a naxanye fi e ma fata Musa ra.

10 Alatala yi a fala Musa xa, a naxa, 2 “Xota firin nafala gbeti bonboxin na yamaan xili sena malanni e nun yamaan nakeli sena sigadeni. 3 Na xota firinne na fe waxatin naxan yi, yamaan birin xa e malan i fema Naralan Bubun so deen na. 4 Xa xota keden nan fe, mangane nan gbansan xa e malan i fema, Isirayila xabila xunne. 5 Xa xotaan bata fe, bonsonna naxanye doxi Naralan Bubun sogetedeni, ne xa keli sigadeni. 6 Xotaan na fe a firinden, naxanye doxi yamaan daaxaden yiifari foxoni, ne xa keli sigadeni. Xota xuiin nan yamaan nakelima sigadeni. 7 Xotaan xa fe kii gbete yi alogo yamaan xa e malan.” 8 “Saraxarali Harunaa diine nan lan e xotaan fe. Habadan sariyan nan na ra e yixetene birin xa.” 9 “E na keli e yaxune yengedeni naxanye e jaxankatama e yamanani, e xa xotane fe. Alatala a yengi luma nen e xon ma, e Ala, a yi e rakisi e yaxune ma. 10 E xa xotaan fe jaxanaxa waxatine nun sali loxone nun kike nene sanle birin yi, e nema saraxa gan daxine nun boje xunbeli saraxane be waxatin naxan yi. N yi n yengi lu e xon. Alatala nan n tan na, e Ala.” 11 Kike firinden xii moxojedeni, e minin jee firinden Misiran boxoni, kundaan yi ba Layiri Sereya Bubun xun ma. 12 Isirayila kaane yi kiraan suxu, e keli Sinayi tonbonni. Kundaan yi siga han a sa ti Paran tonbonni. 13 E keli singen nan yi na ra Alatalaa yamarin ma fata Musa ra. 14 Yuda bonsonna ganle nan singe kiraan suxu, e taxamasenna bun. E ganle yi Aminadabo a dii Naxason ma yamarin nan bun. 15 Isakari bonsonna ganla yi Suwari a dii Nataneli a yamarin nan bun. 16 Sabulon bonsonna ganla yi Xelon ma dii Eliyabi a yamarin nan bun. 17 Ala Batu Bubun yi wayan, Gerison yixetene nun Merari yixetene yi a xali e yii. 18 Ruben bonsonna ganle yi siga e taxamasenna bun Sedewuri a dii Elisuri a yamarin bun. 19 Simeyon bonsonna ganla yi Surisadayi a dii Selumiyeli a yamarin nan bun. 20 Gadi bonsonna ganla yi Dewuyeli a dii Eliasafi a

yamarin nan bun. **21** Kehati xabilan muxune yi siga se sarijanxine xale Lewi bõnsõnna muxun bonne fõxõ ra alogo e xa Ala Batu Bubun ti benun se sarijanxine xa yamaan daaxaden li. **22** Efirami bõnsõnna ganle yi siga e taxamasenna bun Amixudi a dii Elisama yamarin nan bun. **23** Manase bõnsõnna ganla yi Pedasuri a dii Gamaliyeli a yamarin nan bun. **24** Bunyamin bõnsõnna ganla yi Gidewoni a dii Abidan ma yamarin nan bun. **25** Dõnxen na, Dan bõnsõnna ganle yi siga ganla bonne fõxõ rakantanjɛ e taxamasenna bun, Amisadayi a dii Axiyeseri a yamarin bun. **26** Aseri bõnsõnna ganle yi Okiran ma dii Pagiyeli a yamarin nan bun. **27** Nafatali bõnsõnna ganla yi Enan ma dii Axira yamarin nan bun. **28** Isirayila ganle yi yebama na kii nin sigatini. **29** Musa yi a fala Reyuli a dii Xobabi xa, Midiyan kaana, Musa bitanna, a naxa, “Nxu sigan yireni Alatala naxan fixi nxu ma. Fa nxu fõxõ ra, nxu fe fajin lige i xa, amasõtõ Alatala bata fe fajine ragidi Isirayila ma.” **30** Hobabi yi a yabi, a naxa, “En-ɛn. N xetema n konna nin n ma yamaan denaxan yi.” **31** Musa mɔn yi a fala, a naxa, “Yandi, i nama keli nxu fema. I daaxade fajine kolon tonbonni. I luyɛ alo nxu yɛɛna. **32** Xa i nxu mati, en birin nan Alatalaa se fajine sõtõma.” **33** Isirayila kaane yi keli Alatalaa geyani, e sigan ti xii saxan. Alatalaa Layiri Kankiraan yi tixi e yɛɛ ra alogo a xa matabu yirena nde fen e xa. **34** Alatalaa kundaan yi e xun ma yanyin na, e to yi kelima daaxadeni. **35** Layiri Kankiraan na yi keli sigadeni waxati yo yi, Musa yi a falama nen, a naxa, “Alatala, keli, i xa i yaxune raxuya ayi, i rajaxu muxune yi e gi i yɛɛ ra!” **36** Layiri Kankiraan yi tima waxatin naxan yi, Musa yi a falama nen, a naxa, “Alatala, fa Isirayila kaa wuli wuli wuyaxine tagi!”

11 Lõxõna nde yamaan yi lu e mawuge e tɔrõne fe ra. Alatala to na mɛ, a yi xolõ, a yi tɛɛn nafa e tagi naxan yamaan daaxaden dɛ kinkina ndee gan. **2** Yamaan yi sɔnxõ Musa ra. Musa yi Alatala maxandi, tɛɛn yi tu. **3** E yi menna xili sa Tabera, amasõtõ Alatalaa tɛɛn nagodo nen menni. **4** Lõxõna nde xɔɔyin yi muxu kobine suxu yamaan yɛ. Isirayila kaane yetɛɛn yi lu wuge, e naxa, “En suben don daxin sõtɛ di? **5** Nxu nxu mirima yɛxene ma nxu naxanye don Misiran yi naxanye sare mi yi fima e nun kòkunbane nun janle nun sabi dɛɛne nun yabane nun sabi gbɛtɛne. **6** Iki nxu niin bata yijnaxu nxu ma, donse yo mi toma fõ Manna donsɛni ito!” **7** Manna donseen yi luxi alo se

xõri xunxurin naxanye yɛɛ rafixa alo wudi igena. **8** Yamaan yi minima na nan makõdeyi, e yi a kunba gɛmɛn ma hanma e a din wunla kui. Na xanbi ra, e mɔn yi nɔɛ a jijnjɛ nɛn hanma e yi a gan burudine ra. A yi jaxun alo burun naxan gilinxi turen na. **9** Manna donseen yi godoma kɔɛɛn nan na xiila godo waxatini. **10** Musa yi Isirayila kaane mawuga xuiin mɛ, e yi malanxi denbaya yɛɛn ma e bubune so dɛɛne ra. Alatala yi xolõ han! Musa fan yi kòntõfili, **11** a yi a fala Alatala xa, a naxa, “I n tɔrõma nanfera? Nanfera n mi fa rafan i ma? Nanfera i yamani ito goronna dõxi n tan xun ma? **12** N tan nan fudi tongoxi yamani ito ra ba? N tan nan e barixi ba? Nanfera i naxa a n xa itoe banba alo dii ngana, han na yamanani i bata e benbane tuli sa naxan na? **13** N suben sõtɔn minɛn yi yamani ito birin xa? E wugama n fõxõ ra, e naxa, ‘Suben so nxu yii!’ **14** N kedenna mi nɔɛ yamani ito goronna tonge. A gbo n ma. **15** Benun i xa ito liga n na, n faxa keden na! Xa n nafan i ma, i nama tin n xa n ma tɔrɔn to.” **16** Alatala yi Musa yabi, a naxa, “Isirayila fonna muxu tonge solofere malan, i naxanye kolon Isirayila yamaan fonne nun kuntigine ra. I fa e ra Naralan Bubuni, alogo e xa ti i dɛxɔn menni. **17** N godoma nen i fema menni n falan ti i xa. N na n ma Nii Sarijanxina ndedi bama nen i yi, n yi a sa e yi. Nayi, e nɔɛ i maliyɛ nen yamani ito goronna tongodeni alogo i kedenna nama fa a tongo. **18** I xa a fala yamaan xa, i naxa, ‘E ɛ yetɛ rasarijan tilaa fe ra ɛ suben donma waxatin naxan yi. Alatala bata ɛ mawuga xuine mɛ ɛ to a fala, ɛ naxa, “En suben sõtõma di? Misiran yamanan nan fisa!” Iki, Alatala suben soma nen ɛ yii. E fan a donma nen. **19** E mi lɔxõ keden hanma firin daxin sõtɛ, hali xi suulun, xii fu, hanma xii mɔxɔjɛ, **20** koni ɛ suben donma nen kike keden, han a mini ɛ jɔɛni, a rajaxu ɛ ma. Amasõtõ ɛ bata ɛ mɛ Alatala ra naxan ɛ tagi, ɛ to wuga a yetagi, ɛ naxa: Nanfera nxu minixi Misiran yi?” **21** Musa yi a fala, a naxa, “N tan be xɛmɛ wuli kɛmɛ sennin tagi naxanye sigatini e sannɪ, anu, i a falama, a i suben soma e yii nen kike keden! **22** Xa nxu yɛxɛɛn nun siin nun jinge kurune birin faxa, ne a liyɛ ba? Xa nxu baan yɛxɛne birin suxu, ne a liyɛ ba?” **23** Alatala yi a yabi, a naxa, “N senben go, na mi a liyɛ? I fama a todeni n naxan falaxi xa a lige.” **24** Musa yi mini, a yi a fala yamaan xa Alatala naxan falaxi. A yi Isirayila fonna muxu tonge solofere malan Naralan Bubun nabilinni. **25** Alatala yi godo kundaan yiyani, e nun Musa yi falan ti. A yi a Nii

Sarijanxina ndedi ba Musa yi, a yi a ragodo fori tonge soloferene ma. Alaa Nii Sarijanxin to godo e ma, e yi waliyiya falane ti folo, koni e mi yanfan. **26** Muxu firin, Elidadi nun Medadi, ne yi daaxadeni. E yi yatexi fonne ra, koni e mi siga Ala Batu Bubuni. Koni, Alaa Nii Sarijanxin yi godo e fan ma, e yi waliyiya falane ti folo daaxadeni. **27** Banxulanna nde yi siga, a a fala Musa xa, a naxa, “Elidadi nun Medadi nabiya falane tima daaxadeni!” **28** Nunu a dii Yosuwe naxan yi Musa malima xabu a dii jorɛyani, na yi a xuini te, a naxa, “Musa, n kanna, e rati!” **29** Musa yi a yabi, a naxa, “I e maxɔxolonma n xa nen ba? Alatala xa yamaan birin findi nabine ra! Ala xa a Nii Sarijanxin nagodo e birin ma!” **30** Nayi, Musa nun Isirayila fonne yi siga daaxadeni. **31** Alatala yi foyen nafa keli baani, naxan fa domene ra daaxadeni. E yi godo e sa e bode fari e mate ayi han nongonna ye firin, e siga se daaxaden nabilinni han yanyi keden sigati. **32** Yamaan yi ferijnen e suxe, e xi e suxe. Na xoton bode e mon yi ferijnen domene suxe han birin yi e suxu han kilo wuli keden. E yi e sa daaxaden nabilinni alogo e xa xara. **33** Koni suben mon yi Isirayila kaane de, benun e xa a ragerun, Alatala yi xolo e ma, a yi fitina furen nagodo e ma. **34** Nanara, e yi menna xili sa Kibiroti-Hatawa. Amasoto xɔoyidene maluxun menna nin. **35** Isirayila kaane yi keli Kibiroti-Hatawa yi, e yi siga Xaseroti yi.

12 Musa bata yi Kusi jaxanla dɔxo. Mariyama nun Haruna yi Musa mafala folo a jaxanla fe ra. **2** E yi a fala, e naxa, “Alatala falan tiin Musa nan gbansan xon ba? A mi falan tima en fan xon ba?” Alatala yi e xuiin me. **3** Anu Musa yi findixi muxu yete magodoxin nan na, a yete magodoxi dangu birin na boxo xonna fari. **4** Alatala yi a fala Musa nun Haruna nun Mariyama xa, a naxa, “E saxanna birin xa siga Naralan Bubuni!” E birin yi siga. **5** Alatala yi godo kundaan yiyani, a yi ti Naralan Bubun so deen na, a yi Haruna nun Mariyama xili. E birin yi fa. **6** Alatala yi a fala e xa, a naxa, “E tuli mati n xuiin na. Xa n ma nabina nde e tagi, n na n yete yitama a ra nen fe toone yi alo xiye. N yi falan ti a xa xiyene yi. **7** Koni na kii mi a ra n ma walikeen Musa xon. A tan nan togondiyaxi n ma yamaan birin tagi. **8** N falan fixen tima a xa nen kenen nun kenen! Sandan mi a ra! A tan bata Alatala misaala to. Nayi, nanfera e mi gaxuma n ma walikeen Musa mafale?” **9** Alatala xoloxin yi siga. **10** Kundaan bama Naralan Bubun xun

ma waxatin naxan yi, Mariyama bata yi mafixa gasi fure jaxine ra. Haruna yi a mato, furen jaxin bata mini a fatin ma. **11** A yi a fala Musa xa, a naxa, “N kanna, yandi, dija nxu haken ma nxu naxan ligaxi xaxilitareyani! **12** Mariyama nama lu alo diin naxan faxaxi barixi, naxan fatin bata kun folo a nga fatini.” **13** Nayi, Musa yi a xuini te Alatala ma, a naxa, “E Ala! Yandi, a rakendeyal!” **14** Alatala yi a yabi, a naxa, “Xa a baba yi a de igen xuya a yetagi nun, a mi yi yage xunsagi keden ba? A xa ramini daaxaden fari ma xii soloferene. Na xanbi ra, a mon ne xete nen.” **15** Nayi, e yi Mariyama ramini daaxaden fari ma xunsagi keden. Isirayila kaane mi siga han a mon yi rasuxu. **16** Na xanbi ra, e yi keli Xaseroti yi, e yi daaxa Paran tonbonni.

13 Alatala yi a fala Musa xa, a naxa, **2** “Fe rakorɔsine rasiga Kanan yamanan matodeni n naxan soma Isirayila kaane yii. Bɔnsɔn yo bɔnsɔn, manga keden xa siga.” **3** Musa yi e rasiga Alatalaa yamarin ma, keli Paran tonbonni. Isirayila yɛɛratine nan yi e birin na. **4** E xinle ni itoe ra, Ruben bɔnsɔnna: Sakuru a diin Samuwa. **5** Simeyon bɔnsɔnna: Xori a diin Safati. **6** Yuda bɔnsɔnna: Yefune a diin Kalebi. **7** Isakari bɔnsɔnna: Yusufu a diin Yigali. **8** Efirami bɔnsɔnna: Nunu a diin Hoseya. **9** Bunyamin bɔnsɔnna: Rafu a diin Paliti. **10** Sabulon bɔnsɔnna: Sodi a diin Gadiyeli. **11** Yusufu a dii Manase bɔnsɔnna: Susi a diin Gadi. **12** Dan bɔnsɔnna: Gemali a diina Amiyeli. **13** Aseri bɔnsɔnna: Mikeli a diin Seturi. **14** Nafatali bɔnsɔnna: Fofisi a diin Naxabi. **15** Gadi bɔnsɔnna: Make a diin Geweli. **16** Muxune xinle nan ne ra, Musa naxanye xe Kanan yamanan matodeni. Musa yi Nunu a dii Hoseya xili sa “Yosuwe.” **17** Musa to yi e rasigama Kanan yamanan matodeni, a yi a fala e xa, a naxa, “E mini Negewi nin, siga geya yireni. **18** E xa yamanan mato. E a mato xa muxune senben gbo, xa a mi gbo, xa e wuya, xa e mi wuya. **19** E a mato xa e yamanan fan hanma xa a mi fan, xa e taane findixi banxidene nan na hanma xa yinne soxi e ma. **20** E a mato xa boxon fan, xa a mi fan, xa wudine na, xa e mi na. E yixɔdɔxo, e fa yamanan wudi bogine ra.” Manpa bili bogi singene waxatin nan yi a ra. **21** Nayi, e yi siga yamanan matodeni, keli Sini tonbonni siga han Rexobo yi, Lebo-Xamata dɔxon. **22** E yi so Negewi yi, e siga han Xebiron yi, Anaki bɔnsɔnna muxune yi dɔxi denaxan yi, Aximan, Sesayi, e nun Talamayi.

Xebiron bata yi ti jɛɛ solofere benun Soyan xa ti Misiran yamanani. **23** E yi siga han Esikoli lanbanni, e manpa bili yiin sege tɔnsɔn keden yi singanxi naxan na. E na singan tami kuyen na alogo muxu firin xa a xali e nun girenada nun xɔde bogina ndee. **24** E yi menna xili sa “Esikoli lanbanna” tɔnsɔnna fe ra Isirayila kaane naxan sege. **25** Xii tonge naanin to dangu, e yi e xun xete, sa keli yamana matoni. **26** E yi xete Musa nun Haruna nun Isirayila yamaan fema Kadesi yi, Paran tonbonni. E yi e dentɛge yamaan xa, e mɔn yi yamanan wudi bogine yita e ra. **27** E dentɛgeni ito nan sa Musa xa, e naxa, “Nxu bata siga yamanani i nxu rasiga denaxan yi. Nɔndi na a ra, nɔnɔn nun kumin gbo menni! A bogina ndee ni i ra. **28** Koni mɛn kaane senben gbo! Yinne soxi e taane ma, e gbo mume! Nxu yetena Anaki bɔnsɔnna muxune toxi nɛn. **29** Amalekine dɔxi Negewi yi. Xitine nun Yebusune nun Amorine dɔxi geya yireni. Kanan kaane dɔxi fɔxɔ igen de e nun Yuruden baan xɔn.” **30** Kalebi yi yamaan masabari Musa xa. A yi a fala, a naxa, “En siga yamanan suxudeni, amasɔto en nɔɛ nɛn yati!” **31** Koni fe rakɔrɔsi bonne yi a fala, e naxa, “En mi nɔɛ siyani itoe yenge, amasɔto e senben gbo en xa.” **32** E yamanan naxan mato e na mafala fɔlɔ Isirayila kaane ye, e naxa, “Nxu fitina yamanan nan toxi! Mɛn kaane gbo mume! **33** Nxu Nefilimi muxu magaxuxine nan toxi na! Nxu yi luxi nxu yete yeɛ ra yi alo supene. E fan nxu toxi na kii nin!” E na falaxi nɛn bayo Anaki bɔnsɔnna fataxi Nefilimi nan na.

14 Isirayila kaane yi gbelegbele, e xi wuge. **2** E birin yi Musa nun Haruna mafala, yamaan birin yi a fala e xa, e naxa, “A fisa nxu yi faxa Misiran yi hanma tonbonni ito yi! **3** Nanfera Alatala faxi nxu ra yamanani ito yi alogo nxu xa faxa yengeni? Nxɔ jaxanle nun nxɔ diine fama nɛn suxudeni yengeni. A mi fisa en xa xete Misiran yamanani ba?” **4** E yi lu a fale e bode xa, e naxa, “En yeɛrati gbete sugandi, en yi xete Misiran yi!” **5** Musa nun Haruna yi e yetagin lan bɔxɔn ma Isirayila yamaan birin yetagi. **6** Nunu a dii Yosuwe nun Yefune a dii Kalebi, naxanye yi xexi fe rakɔrɔsine ye, ne yi e dugine yibo e ma sununi. **7** E yi a fala Isirayila yamaan birin xa, e naxa, “Nxu yamanan naxan matoxi, a fan han! **8** Xa Alatala sa tin, a tiye nɛn en yeɛ ra siga na yamanani kumin nun nɔnɔn gbo denaxan yi, a yi a so en yii! **9** Koni ɛ nama murute Alatala xili ma tun! ɛ nama gaxu mɛn kaane

yeɛ ra, amasɔto en fama e nɔdeni nɛn fefe! E kantan seen bata e rabɛjin, anu Alatala en tan xɔn. Nayi, ɛ nama gaxu e yeɛ ra.” **10** Koni, yamaan birin yi a falama a e xa e magolɔn e yi e faxa. Nanunna, Alatala nɔrɔn yi godo Naralan Bubuni Isirayila kaane birin yetagi. **11** Alatala yi a fala Musa xa, a naxa, “Yamani ito luma n naɲaxue han waxatin mundun? E tondima denkeleye n ma han waxatin mundun yi, hali n to bata kabanako fe wuyaxi liga e tagi? **12** N fitina furen nafama nɛn e ma, n yi e raxɔri. Koni n ni i tan findima nɛn siya gbeen na, naxan senben gbo e xa.” **13** Musa yi Alatala yabi, a naxa, “Koni Misiran kaane a fe mɛma nɛn, bayo i yamani ito raminixi e tagi i senben nan xɔn. **14** E fama nɛn na faladeni be kaane xa. E bata yi a mɛ nun, a i tan, Alatala, i yamani ito xɔn. E bata a kolon a yamani ito i toma yeɛ nun yeɛ bayo i nɔrɔn luma e xun ma alo kundaan yiyana. Yanyin na, i ti e yeɛ ra kundani. Kɔɛn na, i ti alo teena. **15** Xa i yamani ito raxɔri sanɲa yi kedenni, siya gbeten naxanye birin a fe mɛma, ne a falama nɛn, e naxa, **16** ‘Alatala e tuli sa bɔxɔn naxan na, a mi nɔxi e xale menni, na nan a ligaxi a e faxaxi burunna ra.’ **17** Nayi, Marigina, i senbe gbeen mayita alo i bata naxan fala nxu xa, i naxa, **18** fa fala Alatala mi xɔlɔn xulen, a hinanna gbo, a diɲan haken nun matandin bun. Koni, a mi yulubi kanna yatema tinxinden na mume! A fafane haken saranma nɛn e diine ra han mayixete saxan hanma naanin. **19** Ala, bayo i ya hinanna gbo, i mɔn xa diɲa i ya yamaan haken ma, alo i e mafeluxi kii naxan yi xabu e sa mini Misiran yamanani han iki.” **20** Alatala yi a fala, a naxa, “N bata e mafelu alo i a falaxi kii naxan yi. **21** Koni, habadan Alatala nan n na, n nɔrɔn bɔxɔn birin nafexi, nayi, n bata n kɔlɔ n yeteni: **22** Naxanye birin bata n tan nɔrɔn nun n ma kabanako feene to Misiran yi e nun tonbonni, naxanye birin bata n mato bunbani sanɲa yi fu, e tondi n xuiin mɛ, **23** ne sese mi na bɔxɔn toma n na e benbane tuli saxi naxan na. Ne sese mi a toɛ naxanye bata n naɲaxu. **24** Koni bayo xaxili gbete luxi nɛn n ma walikeen Kalebi yi, a n fɔxɔ ra waxatin birin, n na a xalima nɛn na yamanani, a sigaxi naxan matodeni, n yi a so a yixetene yii e kɛɛn na. **25** Bayo Amalekine nun Kanan kaane dɔxi lanbanne yi, nayi tila ɛ xete, ɛ siga Gbala Baan kiraan xɔn tonbonna binni.” **26** Alatala yi a fala Musa nun Haruna xa, a naxa, **27** “Yama ɲaxini ito luma n mafale han waxatin mundun yi? N bata Isirayila kaane mawuga xuiin mɛ, e n mafala. **28** A fala e xa, i naxa, ‘Alatalaa falan ni ito

ra. Habadan Ala nan n tan na. N bata n kolo n yeteni, n na a rabama ε ra nen alo n na a mexi ε ra kii naxan yi. **29** Naxanye birin barin bata dangu jεε mɔxɔɲen na, naxanye tenge, naxanye birin bata n mafala, ε faxama nen tonbonni ito yi. **30** E sese mi soma yamanani, n bata yi ε tuli sa naxan na nun, a ε dɔxɔma nen na, fɔ Yefune a dii Kalebi nun Nunu a dii Yosuwe. **31** E diine tan, ε a falaxi naxanye ma, a e suxuma nen yengeni, n ne nan xalima na yamanani ε ε mexi naxan na, e yi dɔxɔ na. **32** Koni ε tan faxama nen tonbonni ito yi. **33** E diine e xuruseene rabama nen jεε tonge naanin tonbonni, e yi ε tinxintareyaan goronna tongo, han ε birin yi findi binbine ra tonbonni. **34** E xii tonge naanin nan tixi yamanani ito matodeni. Nayi, ε jεε tonge naanin nan tima ε yulubine goronna bun, lɔxɔ keden, jεε keden. Nayi, ε a kolonma nen a n bata keli ε xili ma. **35** N bata falan ti, n tan Alatala. N fama na nan ligadeni yama jaxini ito ra, naxan murutɛxi n xili ma. E birin jianma nen tonbonni ito yi, e faxa.” **36** Musa muxun naxanye rasiga yamanan matodeni, naxanye yamanan mafala jaxi ra, e yamaan nadin a xili ma, **37** ne yi faxa. Alatala nan e faxa furen na, bayo e fala jaxin ti lan yamanana fe ma. **38** Naxanye siga yamanan matodeni, Nunu a dii Yosuwe nun Yefune a dii Kalebi nan tun lu e nii ra. **39** Musa to Alaa falane birin nali Isirayila kaane ma, e yi nimisa sɔxɔleni. **40** Nanara, na xɔtɔn bode, subaxa, e yi kiraan suxu siga geya yireni, e yi a fale, e naxa, “En bata keli. En siga na yireni Alatala naxan ma fe falaxi. En bata yulubin ligal!” **41** Musa yi e maxɔdin, a naxa, “Nanfera ε Alatalaa yamarin matandima? Feni ito mi sɔnɔyama!” **42** Alatala mi luma ε xɔn, nayi ε nama siga. E yaxune nama ε nɔ. **43** Amasɔtɔ Amalekine nun Kanan kaane ε yεε ra, e fama nen ε faxadeni yengeni. E bata ε xun xanbi so Alatala yi, a mi luyε ε xɔn.” **44** E yi kankan na ma, e yi te geya yireni, koni Alatalaa Layiri Kankiraan nun Musa lu nen daaxadeni. **45** Na xanbi ra, Amalekine nun Kanan kaane yi godo geyane fari e yi dɔxi denaxanye yi. E yi Isirayila kaane nɔ, e siga e faxe han Xoroma yi.

15 Alatala yi a fala Musa xa, **2** a xa a fala Isirayila kaane xa, a naxa, “N yamanan naxan soxi ε yii, ε na dɔxɔ mɛnni, **3** ε yi jingene hanma siine hanma yεxεene rali Alatala ma tɛen na, saraxa gan daxin na hanma naxan de tiin nakamalima hanma jɛnige ma saraxane, hanma sali lɔxɔne gbeene, a xirin nafanma

nen Alatala ma. **4** Naxan na fa a saraxan na Alatala yetagi, a xa fa bogise saraxan fan na: murutu fujni kilo saxan naxan namulanxi turen litiri keden nun a tagi ra. **5** Xa i fa yεxεε diin na saraxa gan daxin na hanma saraxa gbetε, i xa wudi bogi igen litiri keden e nun a tagi ba minse saraxan na. **6** Xa kontonna na a ra, murutu fujin kilo sennin naxan namulanxi ture litiri firinna ra, na nan bogise saraxan na, **7** e nun wudi bogi igen litiri firin minse saraxan na. A ba alogo a xirin xa rafan n tan Alatala ma. **8** Xa tura bulanna nan bama n xa saraxa gan daxin na hanma saraxan naxan de tiin nakamalima, hanma bɔjε xunbeli saraxana Alatala xa, **9** murutu fujin kilo solomanaanin namulanxin turen litiri saxanna, na nan bogise saraxan na. **10** I mɔn xa fa wudi bogi igen litiri saxan na minse saraxan na. Saraxan na a ra naxan nalima Alatala ma tɛen na, a xirin nafan a ma.” **11** “Jingene hanma kontonne hanma yεxεene hanma sii diine, e bama na kii nin. **12** Xuruseene na wuya kiki, e keden kedenna birin lan nen e ba e nun bogise saraxane. **13** Isirayila bari diine birin xa a liga na kii nin, e nɛma saraxane raliyε tɛen na, naxanye xirin nafan Alatala ma. **14** Xɔɲen naxanye dɔxi yamanani hanma naxanye danguma ε konni hanma naxanye denbaya bata bu na, ne fan na keli saraxa ralideni Alatala ma tɛen na naxan xiri rafan a ma, e xa a liga na kii kedenni. **15** Sariyane lan yamaan muxune birin xa, ε tan Isirayila bari diine alo xɔɲene. Habadan sariyan na a ra ε yixetene birin xa. E nun xɔɲene birin keden Alatala yεε ra yi. **16** Sariyane nun yamarine birin lan ε nun xɔɲene birin xa, naxanye dɔxi ε tagi.” **17** Alatala yi a fala Musa xa, **18** a xa a fala Isirayila kaane xa, a naxa, “E na so yamanani, n na ε xalin denaxan yi, **19** ε nɛma na yamanan donseen donjε, ε xa saraxan ba a ra Alatala xa. **20** E na ε murutu singene din, ε yi burudi singen nafala, ε na rali n ma saraxan na keli lonna ma. **21** Nayi, ε xa burudi singen nali Alatala ma saraxan na waxati famatɔne birin yi.” **22** “Xa ε tantan, ε mi yamarini ito nde liga, Alatala naxan falaxi Musa xa, **23** a na findi Alatala yamari yo ra a naxan fixi ε ma fata Musa ra, folo na lɔxɔn ma a fixi naxan yi han waxati famatɔne yi, **24** xa ε a ligaxi tantanna nin, yamaan mi a kolon, nayi yamaan birin xa tura bulanna ba saraxa gan daxin na, naxan xiri rafan n tan Alatala ma, e nun bogise saraxan nun minse saraxan naxan lanjε sariyan ma, e nun kɔtɔ keden yulubi xafari saraxan na. **25** Saraxaraliin xa Ala solona Isirayila yamaan

birin xa, e yi mafelu. Amasoto tantanna nan yi a ra, e mon bata saraxan nali Alatala ma teen na, e nun yulubi xafari saraxan na e tantanna fe ra. **26** Isirayila yamaan nun xojnen naxanye e tagi, e birin mafeluma nen, amasoto e birin yi na tantanna kui.” **27** “Xa muxu kedenna nan yulubin ligaxi tantanni, a xa sii gilen jee kedenna ba yulubi xafari saraxan na. **28** Saraxaraliin xa Alatala solona na kanna xa naxan yulubin ligaxi tantanni, a mafeluma nen. **29** Isirayila bari diine nun xojnen naxanye e tagi, naxan na yulubin liga tantanni, na sariya kedenna lan ne birin xa. **30** Koni xa Isirayila bari diin hanma xojena a rakeli a ma, a yulubin liga, na bata Alatala rayelefu, a kedima nen yamani. **31** A bata Alatalaa falan najaxu, a a yamarine kala. A xa kedi yamani, a yulubin goronna luma a tan nan ma.” **32** Isirayila kaane yi tonbonni waxatin naxan yi, e muxuna nde to yege fenni Matabu Loxoni. **33** E yi a xali Musa nun Haruna fema, e nun yamaan birin. **34** E yi a ramara ki fajni, alogo sariyan xa sa a yulubin saran feen na a ra. **35** Nayi, Alatala yi a fala Musa xa, a naxa, “Muxuni ito xa faxes. Yamaan birin xa a magolon gemen na daaxaden fari ma.” **36** E yi na kanna xali daaxaden fari ma, e yi a magolon han a faxes alo Alatala a yamari Musa ma kii naxan yi. **37** Alatala yi a fala Musa xa, **38** a xa a fala Isirayila kaane xa, a naxa, “E e domane rayabu luti denbexine ra, e yi e singan e domane de kinkine ra gari mamiloxine ra waxati famatone birin yi. **39** E na luti denbexine to, Alatalaa yamarine birin nabirama e ma nen, e yi e liga. Nayi, e mi bire e bojen nun e yeene kunfa feene foxo ra, naxanye tinxintareyaan liga Ala ra. **40** Nayi, e xaxili luma nen n ma yamarine birin xon, e yi e suxu, e yi sarijan e Ala yetagi. **41** Alatala nan n tan na, e Ala, naxan e ramini Misiran yamanani alogo n xa findi e Ala ra. Alatala nan n tan na, e Ala.”

16 Xemena nde yi keli naxan yi xili Kora, Yisehari a diina. Lewi a dii Kehati mamandenna. E nun Ruben bonsonna muxuna ndee nan yi a ra naxanye yi xili Datan nun Abirami, Eliyabi a diine, e nun Hon, Peleti a diina. **2** E nun Isirayila kaan muxu keme firin tonge suulun yi keli Musa xili ma, e birin xili kan yamaan fonne tagi. **3** E yi e malan Musa nun Haruna xili ma, e yi a fala e xa, e naxa, “E bata a radangu ayi! Yamaan muxune birin sarijan. Alatala e birin tagi. Nanfera e yete yitema Alatala yamaan ma?” **4** Musa to na falane me, a yi a yetagin lan boxon ma. **5** A yi a

fala Kora nun a muxune xa, a naxa, “Tila xotonni, Alatala a yitama nen, a gbeen naxan na e nun naxan sarijan, naxan lan a siga a fema. A naxan sugandixi, a na kanna luma nen, a yi a maso a ra. **6** Nayi, Kora, e nun i ya muxune birin xa ito liga: e wusulan gan seene tongo. **7** Tila e teen sa e kui, e wusulanna sa a fari Alatala yetagi. Alatala na naxan sugandi, na nan sarijan. E tan Lewi bonsonna muxune bata a radangu ayi!” **8** Musa mon yi a fala Kora xa, a naxa, “E tuli mati, e tan Lewi bonsonna muxune! **9** Na mi e wase a Isirayilaa Ala bata e sugandi Isirayila kaan bonne tagi, a yi e maso a ra, alogo e xa wali a xa Alatala batu bubuni, e yi ti Isirayila yamaan yee ra e yi e mali Ala batu feen na? **10** A bata e maso a ra, e nun Lewi bonsonna muxune birin. Koni, e mon kataxi, a xa e findi saraxaraline ra! **11** E nun i ya muxune bata e malan Alatala xili ma. Nde Haruna ra feni ito yi e to a mafalama?” **12** Na xanbi ra, Musa yi muxuna nde rasiga Datan nun Abirami xilideni, Eliyabi a diine, koni e yi a yabi, e naxa, “Nxu mi famal! **13** Na mi i wasaxi ba, i to bata nxu ramini Misiran yamanani kumin nun nonon gbo denaxan yi alogo i xa nxu faxes tonbonni? I mon waxi nxu najankata feen nin ba? **14** I mi faxes nxu ra boxo fajni yi, kumin nun nonon gbo denaxan yi! I mi xeeene nun manpa bili nakone soxi nxu yii nxu keen na mume! I yengi a ma a i nxu mayendenma nen alo danxutone ba? Nxu mi famal!” **15** Na yabin yi Musa xolo kati, a yi a fala Alatala xa, a naxa, “I nama tin e saraxane ra! Hali sofanelan mi a tongoxi e yii, n munma muxu yo hake tongo e ye.” **16** Musa yi a fala Kora xa, a naxa, “E nun i ya muxune birin xa fa Alatala yetagi tila e nun Haruna. **17** E birin xa wusulan gan seene tongo, e yi wusulanna sa e kui, e yi a yita Alatala ra. E birin malanxina, wusulan gan seen keme firin tonge suulun. I tan nun Haruna fan xa e wusulan gan seen yita Ala ra.” **18** E birin yi e wusulan gan seene tongo, e teen nun wusulanna sa e kui, e ti Naralan Bubun so deen na, Musa nun Haruna fema. **19** Kora to a foxorabirane birin malan e xili ma Naralan Bubun so deen na, Alatala nonon yi godo yamaan birin yetagi. **20** Alatala yi a fala Musa nun Haruna xa, a naxa, **21** “E masiga yamani ito ra, alogo n xa e halagi iki sa!” **22** Musa nun Haruna yi bira, e yi e yetagin lan boxon ma, e yi a fala, e naxa, “Ala, i tan nan niin saxi muxune birin yi, i xoloma nen yamaan birin ma ba, anu muxu keden peen nan yulubin ligaxi?” **23** Alatala yi a fala Musa xa, a naxa,

24 “A fala yamaan xa, a e xa e masiga Kora nun Datan nun Abirami bubune ra.” 25 Musa yi keli, a siga Datan nun Abirami binni, Isirayila fonne biraxi a fəxo ra. 26 A yi a fala yamaan xa, a naxa, “E masiga yulubi kanni itoe bubune ra! E nama e yiin din e yii se yo ra, alogo e fan nama raxori e yulubine fe ra.” 27 Nayi, yamaan yi e masiga Kora nun Datan nun Abirami bubune ra. Datan nun Abirami yi mini e bubune kui, e ti e de ra, e nun e naxanle nun e diine birin. 28 Musa yi a fala, a naxa, “E fama a kolondeni a Alatala nan n nafaxi feni itoe birin ligadeni. N tan mi a ra. 29 Xa muxuni itoe faxa alo muxune birin faxan kii naxan yi, xa e dunuja yi gidin lu alo adamane dari fena, nayi Alatala xa mi n nafaxi. 30 Koni xa Alatala kabanako feen liga, xa bəxəni ba, a yi e nun e yii seene birin gerun, xa e njeɲen siga laxira yi, e a kolonma nen nayi fa fala muxuni itoe bata Alatala rapaxu.” (Sheol h7585) 31 Musa to yelin falan tiye tun, bəxəni yi rabi e bun. 32 A yi a raxutu e ma e nun e denbayane, e nun muxun naxanye birin yi Kora fəxo ra e nun e yii seene birin. 33 E njeɲene yi siga laxira yi e nun e yii seene birin. Bəxəni yi e ye maluxun, e lo ayi Isirayila yamaan ma. (Sheol h7585) 34 E to e gbelegbele xuiin me, Isirayila kaan naxanye birin yi e rabilinni, ne yi e gi, e naxa, “Bəxəni nama en fan gerun del!” 35 Alatala yi tɛɛn nagodo, a yi na muxu keme firin tonge suulunne birin gan, naxanye fa wusulanna ra. 36 Alatala yi a fala Musa xa, a naxa, 37 “A fala saraxarali Harunaa dii Eleyasari xa, a a xa wusulan gan seene matongo tɛɛ wolonni, a yi tɛɛ wolonne woli ayi yire makuyeni. Amasoto na wusulan gan seene bata rasarijan. 38 Ne yulubito faxaxine gbee wusulan gan wurene xa findi wure denfetenxine ra e sa saraxa ganden ma bayo e bata rali Alatala ma e yi findi se rasarijanxin na. E findima taxamasenna nan na Isirayila kaane xa.” 39 Muxun naxanye faxa tɛɛni, saraxaralina Eleyasari yi ne gbee sulan wurene malan, a yi e bonbo han e denfeten, a e sa saraxa ganden ma. 40 Na taxamasenna yi na feen nabirama nen Isirayila kaane ma alogo muxu yo nama wusulanna gan Alatala yetagi fo Haruna yixetena nde alogo e nama liga alo Kora nun a muxune. A yi liga alo Alatala a fala e xa fata Musa ra kii naxan yi. 41 Na xətəni bode, Isirayila yamaan birin yi lu Musa nun Haruna mafale, e naxa, “E bata Alatala yamaan faxa.” 42 Koni, Isirayila kaane to e malan Musa nun Haruna xili ma, e yi Naralan Bubun binna mato, nanunna, kundaan yi godo a ma, Alatala nərən yi mini kenenni.

43 Musa nun Haruna yi fa Naralan Bubun yetagi. 44 Alatala yi a fala Musa xa, a naxa, 45 “E masiga yamani ito ra alogo n xa e raxori keden na.” Musa nun Haruna yi bira, e yi e yetagin lan bəxəni ma. 46 Musa yi a fala Haruna xa, a naxa, “I ya wusulan gan seen tongo, i wusulanna sa a kui e nun tɛɛ wolonna keli saraxa ganden ma. I i mafura, i siga Ala solonadeni yamaan xa. Alatala xələn bata yihadin nafa. Fitina furen bata fəlo.” 47 Musa naxan fala Haruna yi na liga, a yi a gi yamaan tagi, fitina furen bata yi fəlo denaxan yi. A yi wusulanna gan, a Ala solona e xa. 48 A yi ti faxa muxune nun a njeɲene tagi. Nayi, fitina furen yi dan. 49 Muxu wuli fu nun naanin keme solofere yi faxa, e sa Kora a muxu faxaxine yaten fari. 50 Yihadin to jan, Haruna yi xete Musa fəma Naralan Bubun so deen na.

17 Alatala yi a fala Musa xa, a naxa, 2 “Falan ti Isirayila kaane birin xa, bənsənnə mangane birin xa dungan keden so i yii. I dungan fu nun firin nan tongoma. Birin xinla xa sebe a dunganna ma. 3 Fo Lewi bənsənnə, i xa Haruna xinla sebe na ma. Nayi, dungan keden bənsən manga keden. 4 I xa na dunganne sa Naralan Bubuni, Layiri Kankiraan yetagi n naralanma e ra denaxan yi. 5 N naxan sugandixi, na dunganna jingine minima a ma nen. Nayi, Isirayila kaane mafalan naxan tima e xili ma, n yi na dan.” 6 Musa yi falan ti Isirayila kaane xa, bənsən mangane birin yi dungan keden keden so a yii, dungan fu nun firin. Haruna gbeen yi na ye. 7 Musa yi e sa Alatala yetagi Layiri Sereya Bubun kui. 8 Na xətəni bode, Musa to siga Layiri Sereya Bubuni, e yi a to a Haruna dunganna nan jingiye minixi, Lewi bənsənnə gbeena, a mən fugaxi, a yi Amandi bogi məxine ramini! 9 Musa yi dunganne birin tongo Alatala fəma bubuni a e yita Isirayila kaane ra. Birin yi e to, birin yi a gbeen tongo. 10 Alatala yi a fala Musa xa, a naxa, “Harunaa dunganna xali Layiri Kankiraan yetagi. A xa lu mənni taxamasenna ra muxu murutəxine xa alogo e mafalane xa dan n yetagi alogo e nama faxa.” 11 Musa yi a liga alo Alatala a yamari a ma kii naxan yi. 12 Isirayila kaane yi a fala Musa xa, e naxa, “I mi a to, nxu faxamatəni na a ra! Nxu halagima nen! Nxu birin halagima nen! 13 Naxan yo na a maso Alatala Batu Bubun na, na kanna faxama nen! Nxu birin faxama nen ba?”

18 Alatala yi a fala Haruna xa, a naxa, “Xa yire sarijanxin wanla kala, i tan nun i ya diine nun

Lewi bõnsõnna muxune, ε tan nan a yulubin goronna tongoma. Koni xa saraxarali wanla nan kala, ε nun i ya diine nan gbansanna na yulubin goronna tongoma. 2 I ngaxakedenne maso i ra, Lewi bõnsõnna muxune, alogo e xa sa ε fari, e ε mali, ε nun i ya diine nẽma ε saraxarali wanla kema Layiri Sereya Bubun yetagi waxatin naxan yi. 3 E xa ε yamarine suxu, e yi e yengi lu bubun wanle birin xõn. Koni e nama e maso yire sarijanxin muranne ra hanma saraxa gandena, alogo ε birin nama faxa ε bode xõn. 4 E sama ε fari nen walideni, e yi e yengi lu Naralan Bubun xõn e nun a wanle birin. Muxu gbete yo nama sa ε fari. 5 E tan yeteen nan ε yengi dõxõma yire sarijanxin nun saraxa ganden xõn alogo Isirayila kaane xa ratanga n ma xõlõn ma. 6 E mato, n bata ε ngaxakeden Lewi bõnsõnna muxune sugandi Isirayila kaan bonne ye n tan Alatala gbeen na. N bata e taxu ε ra alogo e xa Naralan Bubun wanle ke. 7 Koni i tan Haruna nun i yixetene, ε tan nan gbansan na saraxarali wanla kema saraxa ganden yetagi e nun yire sarijanxini ye masansan dugin xanbi ra. N tan nan na wanla soxi e yii. Xa muxu gbete a maso yire sarijanxin na, ε xa a faxa.” 8 Alatala yi a fala Haruna xa, a naxa, “N bata Isirayila kaane saraxane fi e ma, e naxanye ralima n ma. N bata e so i yii i gbeen na e nun i yixetene birin han habadan. 9 Naxan yo mi sama teeni saraxa sarijanxi fisamantenne ye, ε gbeen nan ne ra. Isirayila kaane fama naxan birin na, ε nun i ya diine gbeen nan ne ra: bogise saraxane nun yulubi xafari saraxane nun yangin saraxane. 10 E e don alo se sarijanxi fisamantenne. Xẽmene nan e donma. E xa e yate se sarijanxine ra.” 11 “Naxanye bama Isirayila kaane se ralixine ra ε xa, ε gbeen nan ne fan na. N bata na so ε nun i ya dii xẽmene nun i ya dii temene yii habadan! E denbayaan muxun naxanye mi xõsixi sena nde xõn, ne nõe a donjẽ nen. 12 N mõn bata bõxõn bogise singene so ε yii: oliwi ture fajin nun manpa fajin nenene nun bogise gbete, Isirayila kaane naxanye fima n tan Alatala ma. 13 E fama bõxõn bogise singen naxanye ra Alatala xa, ne findima nen ε gbeene ra. E denbayaan muxun naxanye mi xõsixi sena nde xõn, e nõe a donjẽ nen. 14 Isirayila kaane na naxanye birin nali Ala ma kiseen na, ne yi findi ε gbeen na. 15 Dii singen naxanye birin fixi Alatala ma, muxune nun subene, ε gbeen nan ne ra. Koni ε xa tin muxune nun sube haramuxine dii singene birin xa xunba gbetin na. 16 Dii xemen

kike kedenna xunba saren lanma gbeti gbanan suulun nan ma, naxan lanjẽ yire sarijanxin gbananna ma, naxan binya garamu fu. 17 Koni, jingena, yexẽena, hanma siin dii singen mi xunbama bayo e sarijan. E xa e wunla xuya saraxa ganden fari, ε yi e ture yirene rali Alatala ma teen na, naxan xiri rafan a ma. 18 Na xanbi ra, ε gbeen nan e subene ra, alo se ralixine kankene nun e yiifari ma danbane findixi ε gbeen na kii naxan yi bõjẽ xunbeli saraxani. 19 Nayi, Isirayila kaane saraxa sarijanxin naxanye ralixi Alatala ma, n bata ne birin so ε nun i ya dii xẽmene nun dii temene yii ε gbeen na waxatin birin. Habadan layirin na a ra Alatala yetagi, ε nun ε yixetene birin xa.” 20 Alatala mõn yi a fala Haruna xa, a naxa, “N yamanan naxan soxi Isirayila kaane yii, i mi bõxõ sõtõma na yi. N tan nan findima i gbeen na nafunla funfuni.” 21 Ala mõn yi a fala, a naxa, “N bata Isirayila birin yaganne so Lewi bõnsõnna muxune yii e keen na, e wali saranna ra, e naxan kema Naralan Bubuni. 22 Isirayila kaan bonne nama fa e maso Naralan Bubun na, alogo e nama findi yulubi tongon na, e yi faxa. 23 Lewi bõnsõnna muxune nan tun wanle kema Naralan Bubuni. Xa wanla kala, e tan nan a yulubin goronna tongoma. Habadan sariyan na a ra ε yixetene birin xa. Lewi bõnsõnna muxune mi bõxõ sõtõma alo Isirayila bõnsõnna bonne. 24 Koni Isirayila kaane na yaganna naxanye fi Alatala ma, n na soma nen Lewi bõnsõnna muxune yii. Nanara, n na falaxi a e mi bõxõ sõtõma alo bõnsõnna bonne.” 25 Alatala yi a fala Musa xa, 26 a xa a fala Lewi bõnsõnna muxune xa, a naxa, “Isirayila kaane na fa yaganne ra ε xõn, n naxan soxi ε yii ε keen na, ε fan xa na seene yaganna ba, ε yi a fi Alatala ma ε yaganna ra. 27 Na luxi nen ε yii alo xee biin naxan bama a se xabaxine ra hanma a manpa nenene. 28 Nayi, ε fan bata saraxan ba Alatala xa fata Isirayila kaane yaganne ra. E xa Alatala gbeen ba yaganne ra, ε yi a so saraxarali Haruna yii. 29 Yagan sõtõxin naxan fan dangu a birin na, ε na nan fima Alatala ma a gbeen na. 30 E na a fajin yiren fi, na yatema ε xa nen alo bonne naxan fima fata e se xabaxine ra hanma e manpa nenene. 31 E nun ε denbayane nõe a dõnxene donjẽ nen denaxan na ε kenene. Amasõtõ ε saranna na ra Naralan Bubun wanla kedeni. 32 E a fajin yiren fi, alogo ε nama Isirayila kaane saraxa sarijanxine raxõsi n yee ra yi, alogo ε nama faxa.”

19 Alatala yi a fala Musa nun Haruna xa, a naxa, 2 “Ito nan daxa sariyan xɔn Alatala naxan yamarixi: A fala Isirayila kaane xa, a e xa fa jinge gile gbeela ra i fɛma fɛ mi naxan na, xun xidi yegen munma xidi naxan xunna ma. 3 I xa a so saraxarali Eleyasari yii. A xa a xali daaxaden fari ma, e yi a kɔɛ raxaba a yɛɛ xɔri. 4 Eleyasari xa a wunla nde tongo a yii sonla ra, a yi a xuya Naralan Bubun yetagi bɔxɔni dɔxɔja ma solofere. 5 E xa jinge gilen gbindin birin sa tɛeni a yɛɛ xɔri e nun a kidin nun a suben nun a wunla e nun a gbiine. 6 Saraxaraliin xa suman wudin nun hisopi wudin nun yɛɛɛ xabe gari gbeela woli tɛeni jinge gilen fari. 7 Na xanbi ra, saraxaraliin xa a dugine xa, a yi a maxa benun a xa siga daaxadeni, koni a luma nɛn xɔsɔxi han jinbanna. 8 Naxan jinge gilen sama tɛeni na fan lan a yi a dugine xa, a yi a maxa, a luma nɛn xɔsɔxi han jinbanna. 9 Muxun naxan mi xɔsɔxi, na xa jinge gilen xuben malan, a yi a sa yire sarijanxina nde yi daaxaden fari ma. Isirayila yamaan xa a xuben namara marasarijan igen nafala seen na. Yulubi xafari seen na a ra. 10 Naxan na jinge gilen xuben makɔ, na fan lan a yi a dugine xa, a luma nɛn xɔsɔxi han jinbanna. A findima habadan sariyan nan na Isirayila kaane xa e nun xɔjɛn naxanye dɔxi e tagi.” 11 “Naxan yo na a yiin din faxa muxun na, a xɔsɔxi han xunsagi keden. 12 Xii saxanden nun xii soloferedeni, a xa a yete rasarijan na igen nan na, a yi sarijan. Koni xa a mi a yete rasarijan xii saxanden nun xii soloferedeni, a mi sarijanma. 13 Naxan na a yiin din faxa muxun na, a tondi a yete rasarijanjɛ, a bata Alatala Batu Bubun naxɔsi. Na kanna kedima nɛn Isirayila yi. Bayo marasarijan igen mi xuyaxi a ma. A xɔsina a ma.” 14 “Sariyan ni i ra xa muxun faxa bubuna nde kui: Naxan na so na bubuni e nun naxanye yi na, ne xɔsɔxi xunsagi keden. 15 Xa goronna nde na naxan dɛ mi ragalixi a fajin na, a kui seene haramuxi. 16 Naxan yo a yiin din muxu binbin na burunna ra, naxan faxaxi silanfanna ra hanma a faxa a yete ma, hanma naxan yo a yiin din muxun xɔnne ra hanma gaburuna, na kanna luma nɛn xɔsɔxi han xii solofere. 17 Muxu xɔsɔxin xa rasarijan ikiini: jinge gilen naxan baxi yulubi xafarin na, na xubena nde nan tongoma, a yi sa igeni goronna kui. 18 Muxu sarijanxina nde xa hisopi wudi yiin tongo, a yi a sin igeni, a yi a xuya bubun ma muxun faxa denaxan yi, e nun a kuiin birin e nun muxun naxanye yi a kui. A mɔn xa xuya na kanna ma naxan a yiin dinxi muxun xɔnne ra, hanma

e muxun naxan faxaxi hanma naxan faxaxi a yete ma hanma gaburuna. 19 Muxun naxan sarijan, na xa na igen xuya muxu xɔsɔxin ma xii saxande lɔxɔn nun xii soloferede lɔxɔni. A yi a rasarijan xii soloferede lɔxɔni. A xa a dugine xa, a yi a maxa, jinbanna ra, a yi sarijan. 20 Koni xa muxun naxan xɔsɔxi, xa na tondi a rasarijanjɛ, a kedima nɛn Isirayila yamaan yɛ. Amasɔto a bata Alatala yire sarijanxin naxɔsi. Amasɔto marasarijan igen mi xuyaxi a ma, a luma nɛn xɔsɔxi. 21 Habadan sariyan nan na ra e xa. Naxan na marasarijan igen xuya gbete ma, na kanna lan a yi a dugine xa. Naxan na a yiin din marasarijan igen na a xɔsɔxi han jinbanna. 22 Muxu xɔsɔxin na a yiin din sese ra, na haramuma nɛn. Naxan yo na a yiin din na se haramuxin na, na fan yeteɛn xɔsɔxi han jinbanna.”

20 Isirayila yamaan birin yi fa Sini tonbonni kike singen na, e dɔxɔ Kadesi yi. Mariyama faxa mɛnna nin, e yi a maluxun. 2 Bayo igen bata yi jan yamaan yii, e yi e malan Musa nun Haruna xili ma. 3 E yi yengen fen Musa ra e naxa, “A yi fisa nun Alatala xa nxu fan faxa alo nxu lanfane! 4 Nanfera i faxi nxu ra tonbonni alogo nxu nun nxɔ xuruseene xa fa faxa be, nxu tan Alatalaa yamana? 5 Nanfera i nxu raminixi Misiran yi, i fa nxu ra yire xɔdɛxeni ito yi? Malo ba, xɔdɛ bili ba, manpa bili ba, girenada bogi ba, sese mi be. Hali igen min daxin yatigina, a mi bel!” 6 Musa nun Haruna yi keli yamaan fɛma, e yi siga Naralan Bubun so dɛɛn na, e bira, e yi e yetagin lan bɔxɔn ma. Alatala nɔrɔn yi godo e fɛma. 7 Alatala yi a fala Musa xa, a naxa, 8 “I ya dunganna tongo. E nun i tada Haruna xa yamaan malan. E xa falan ti fanyeni ito xa e yɛɛ xɔri, a igen naminima nɛn. I igen naminima nɛn yamaan xa fanyeni ito yi alogo e nun e xuruseene xa e min.” 9 Musa yi dunganna tongo Alatalaa yire sarijanxini, alo Ala a yamari kii naxan yi. 10 E nun Haruna yi yamaan malan fanyen dɛxɔn, Musa yi a fala e xa, a naxa, “E tan murutedene, e tuli mati! Fɔ nxu xa igen namini e xa fanyeni ito yi ba?” 11 Musa yi a yiini te, a fanyen garin a dunganna ra sanja ma firin. Ige gbeen yi mini mafuren! Yamaan yi e min e nun e xuruseene. 12 Koni Alatala yi a fala Musa nun Haruna xa, a naxa, “Bayo e mi laxi n na, e mi n binyaxi n ma sarijananni Isirayila kaane yetagi, nanara, e tan xa mi yamani ito xalima yamanani n naxan soxi e yii.” 13 Meriba igene yi denaxan yi, Isirayila kaane Alatala matandi nɛn mɛnni, e yi a kolon fa fala a sarijan.

14 Musa yi xerane rasiga Edon yi keli Kadesi yi, e naxa, “I ngaxakedenne, Isirayila kaane naxa, ‘E bata a kolon taron naxanye birin nxu lixi. **15** Nxu benbane godo nen Misiran yi, nxu yi doxo na waxati xunkuye. Misiran kaane yi nxu tɔrɔ e nun nxu benbane. **16** Koni nxu to Alatala maxandi, a yi nxu xuiin name. A yi malekan nafa, a yi nxu ramini Misiran yi. Nxu bata fa Kadesi yi, taan naxan i ya boxon dexion. **17** Tin nxu xa i ya yamanani gidi. Nxu mi danguma xee bixine yi hanma manpa bili nakone yi. Nxu mi xopin ige minje. Nxu birama kira gbeen nan foxo ra, nxu mi a fatama nxu yiifanna ma hanma nxu komenna ma, han nxu yi i ya yamanan birin yigidi.” **18** Edon kaane yi a yabi, e naxa, “E nama dangu nxu konni. Xa e a liga, nxu e yengema nen.” **19** Isirayila kaane mon yi a yabi, e naxa, “Nxu tema kira gbeen nan xon! Xa nxu nun xoxuruseene igena nde min e konni, nxu a saren fiye. Nxu waxi a xon ma nen, a nxu xa dangu nxu sanni e konni gbansan!” **20** E mon yi a fala, e naxa, “E mi danguma!” Edon kaane yi mini e ralandeni e nun gali gbee senbimana. **21** Nayi, Edon kaane mi tin a Isirayila kaane xa dangu e yamanani. Isirayila kaane yi kira gbete suxu. **22** Isirayila yamaan birin yi keli Kadesi yi, siga Horo geyaan ma. **23** Alatala yi a fala Musa nun Haruna xa Horo geyaan ma Edon yamanan danna ra, a naxa, **24** “Haruna sigamatxon na a ra laxira yi. N yamanan naxan soxi Isirayila kaane yii, a mi soma na, amasoto e murute nen n ma yamarin ma Meriba igene yi. **25** Nayi, Musa, i xa fa Haruna nun a dii Eleyasari ra Horo geyaan xuntagi. **26** I xa Harunaa saraxarali dugine ba a ma, i yi e ragodo a dii Eleyasari ma, bayo Haruna laxirayama menna nin.” **27** Musa yi Alatalaa yamarin suxu. E saxanna birin yi te Horo geyaan fari yamaan yetagi. **28** Musa yi Harunaa dugine tongo, a yi e ragodo Eleyasari ma. Haruna yi faxe menni, geyaan xuntagi. Na xanbi ra, Musa nun Eleyasari yi godo geyaan ma. **29** Isirayila yamaan to a kolon a Haruna bata yi faxe, e birin yi Haruna wuga xii tonge saxan.

21 Kanan Manga Aradi naxan yi doxi Negewi yi, na yi a me a Isirayila fama Atarimi kiraan xon. A yi Isirayila yenge, a yi muxuna ndee suxu. **2** Nayi, Isirayila kaane yi de xuiin ito tongo Alatala xa, e naxa, “Xa i noon fi nxu ma siyani ito xun na, nxu e taan birin naxorima nen fefe!” **3** Alatala yi Isirayila kaane xuiin name, a yi Kanan kaane lu e noon bun ma. Isirayila kaane yi e faxe, e yi e taane kala. E yi menna xili sa

Xoroma. **4** Isirayila kaane yi keli Horo geyaan ma, e yi siga Gbala Baan kiraan xon alogo e xa Edon yamanan mabilin. Koni yamaan yi tondi kira yi. **5** E yi lu Ala nun Musa mafale e naxa, “Nanfera i nxu ramini Misiran yamanani alogo nxu xa fa faxe tonbonni ito yi? Donse mi be! Ige mi be! Nxu mi fa tɔrɔ donsensi ito xon!” **6** Nayi, Alatala yi sari xolene rasiga e xili ma, e Isirayila kaa wuyaxi xin, e faxe. **7** Yamaan yi siga Musa fema, e yi a fala, e naxa, “Nxu bata yulubin liga nxu to e mafala, i tan nun Alatala! Nayi, i xa Alatala maxandi a xa sari xoleni itoe masiga nxu ra.” Musa yi Alatala maxandi yamaan xa. **8** Alatala yi a fala Musa xa, a naxa, “Sari sawurana nde rafala, i yi a singan tami kuyena nde ra. Naxan yo xinx, xa a na mato, a kisima nen.” **9** Nayi, Musa yi sulan sari nafala, a yi a singan tami kuyen na. Nayi, sari muxun naxan xinx, xa na kanna yi sulan sari mato, a kisima nen. **10** Isirayila kaane yi siga, e sa doxo Oboti yi. **11** E yi keli Oboti yi, e sa doxo Ye-Abarimi taa xonni tonbonni naxan Moyaba yetagi, a sogeteden binni. **12** E yi keli menni, e sa doxo Serede lanbanni. **13** E yi keli menni, e sa doxo Arinon baan de, naxan danguma tonbonni Amorine konni. Arinon baan findixi Moyaba danna nan na, Moyaba nun Amorine tagi. **14** Nanara, a sebexi Alatalaa Yengene Bukun kui, a naxa, “Wahebi taan naxan Sufa yamanani, e nun xudene, Arinon baana, **15** e nun a xudedine naxan tema Ari binni, na findixi Moyaba danna nan na.” **16** E yi keli menni, e siga xopin yireni. Alatala yi a fala Musa xa menni, a naxa, “Yamaan malan n xa igen so e yii.” **17** Awa, Isirayila kaane sigini ito sa menna nin: Xopinna, igen namini. En na a sign nasuxu! **18** Mangane bata xopinna ge, yamaan yeeratine bata a raba e senben nun e mangaya dunganna ra! E yi keli tonbonni, e siga Matana yi, **19** E yi keli menni, e siga Naxaliyeli yi. E mon yi keli menni, e siga Bamoti yi. **20** E yi keli Bamoti yi, e siga Pisiga geyaan lanbanni Moyaba yamanani tonbonna binni. **21** Isirayila kaane yi xerane rasiga a faladeni Sixon xa, Amorine Mangana, e naxa, **22** “Nxu waxi yamanani gidi feni. Nxu mi kiraan fatama, nxu siga xee ne yi hanma manpa bili nakone. Nxu mi xopin ige minje. Nxu luun kira gbeen nan xon han nxu yi i ya yamanan birin yigidi.” **23** Koni, Sixon mi tin e xa dangu a yamanani. A yi a sofane birin malan, e fa Isirayila kaane ralandeni tonbonni. E yi Isirayila yenge Yahasi yi. **24** Isirayila kaane yi e no, e yi e yamanan tongo, keli Arinon baani han Yaboko xudena siga han

Amonine yamanan danna bayo Amonine yamanan danna yi makantanxi ki fajni. **25** Isirayila yi Amorine taane birin tongo, e dɔxo e yi, e nun Xesibon taan nun a banxidene. **26** Amasoto Xesibon yi findixi Amorine manga Sixon ma taan nan na, xabu a Moyaba manga fonna yenge, a yi a boxon birin tongo a yii han Arinon baana. **27** Nanara, yenle naxa, E fa Xesibon yi! A mon xa ti. Sixon taan mon xa yiton! **28** Amasoto teen bata mini Xesibon yi, Sixon taan bata tee degen nafa, a yi Ari taan gan Moyaba yi, e nun mangane Arinon baan faxan na. **29** Gbalona i xa Moyaba boxonal E bata halagi, Kemosi suxure batune! E banxulanne bata e gi, e dii temene bata findi suxu muxune ra, Amorine Manga Sixon yii. **30** Koni en tan bata e bonbo. Xesibon bata kala siga han Dibon yi. En bata halagin ti siga han Nofa yi, siga han Medeba yi. **31** Isirayila kaane yi dɔxo Amorine yamanani. **32** Musa yi xerane rasiga Yaaseri taan nakrosideni wundoni. Isirayila kaane yi na taan suxu e nun a banxidene, e yi Amorine kedi na. **33** Na xanbi ra, e yi e firifiri, e siga Basan kiraan xon. Basan manga Ogo nun a sofa ganla birin yi mini e ralandeni alogo e xa e yenge Edere yi. **34** Alatala yi a fala Musa xa, a naxa, “I nama gaxu a yee ra! N na a soma nen i yii, e nun a sofa ganla birin nun a yamanana. I xa a liga alo i Sixon liga kii naxan yi, Amorine mangan naxan yi dɔxi Xesibon yi.” **35** Isirayila kaane yi Ogo faxa, e nun a diine nun a sofa ganla birin. E mi muxu yo lu a nii ra. E yi dɔxo a yamanani.

22 Isirayila kaane yi siga, e sa dɔxo Moyaba meremerene yi, Yuruden baan kidi ma Yeriko yetagi. **2** Siporo a dii Balaki yi a to Isirayila kaane naxan birin ligaxi Amorine ra. **3** Moyaba kaane yi gaxu Isirayila ganla yee ra, e yigitege bayo e yi wuya han! **4** Moyaba kaane yi a fala Midiyan fonne xa, e naxa, “Yamani ito fama en nabilinna yamanane birin halagideni nen alo jingen sexen janma kii naxan yi.” Siporo a dii Balaki nan yi Moyaba mangan na na waxatini. **5** A yi xerane rasiga Beyori a dii Balami xilideni Petori yi, Baa Gbeen dexon, a konna yi denaxan na. E xa sa a fala a xa iki, e naxa, “Siyana nde bata mini Misiran yi, e bata wuya han e boxon nafe. E bata dɔxo n dexon. **6** Yandi, fa, i fa siyani ito danga n xa, amasoto e senben gbo n xa. Nayi, waxatina nde n noe e yenge nen, n yi e kedi n ma yamanani. Amasoto n na a kolon, i na duba naxan xa, na duban sotoma nen. I na naxan danga, na dangan sotoma

nen.” **7** Moyaba fonne nun Midiyan fonne yi siga e yi yiimatoon saranna xali e yii. E sa Balami feman li, e yi Balaki a falane yeba a xa. **8** A yi e yabi, a naxa, “E xi be koeni ito ra, n yi e yabi xotonni alo Alatala na a fala n xa kii naxan yi.” Moyaba kuntigine yi lu Balami konni. **9** Ala yi fa Balami fema, a yi a fala a xa, a naxa, “Nde muxuni itoe ra naxanye i konni?” **10** Balami yi Ala yabi, a naxa, “Siporo a dii Balaki Moyaba mangan nan e rafaxi a faladeni n xa, a naxa, **11** ‘Siyana nde bata keli Misiran yi, e bata wuya han e boxon nafe. Nayi, yandi, fa n mali, i yi e danga n xa. Waxatina nde n noe e yenge nen, n yi e kedi.’” **12** Ala yi a fala Balami xa, a naxa, “I nama siga e foxo ra. I nama siyani ito danga, amasoto n bata barakan sa e fe yi.” **13** Balami to keli xotonni, a yi a fala Balaki a kuntigine xa, a naxa, “E xete e konni, amasoto Alatala mi tinx i xa siga e foxo ra.” **14** Moyaba kuntigine yi keli, e xete Balaki fema, e yi a fala, e naxa, “Balami mi tinx fe nxu foxo ra.” **15** Balaki mon yi kuntigi gbete ye rasiga naxanye yi wuya bonne xa, e binyen mon yi gbo e xa. **16** E yi sa Balami feman li. E yi a fala a xa, e naxa, “Siporo a dii Balaki naxa iki: ‘I nama tondi fe n konni de! **17** Amasoto n ni i binyama nen han! I na naxan fala n na ligama nen. Yandi fa, i yi fa siyani ito danga n xa.’” **18** Balami yi Balaki a kuntigine yabi, a naxa, “Hali Balaki a banxin fi n ma naxan nafexi gbetin nun xemaan na, n mi noe Alatalaa yamarin matande fefe ma, n ma Ala. **19** Iki yandi, e fan xa xi be to koeni ito ra, n na a kolonne Alatala mon naxan falama n xa.” **20** Ala yi fa Balami fema koen na. A yi a fala a xa, a naxa, “Bayo muxuni itoe faxi i xiliden nin, keli, i yi siga e foxo ra. Koni n na naxan fala i xa, i xa na nan liga de!” **21** Xotonni Balami yi keli, a yi a sofali gileni ton, e nun Moyaba kuntigine birin yi siga. **22** Koni, Alaa xolon yi gbo ayi, amasoto a bata siga. Alatalaa malekan yi ti kiraan na alogo a xa a rati. Balami yi dɔxi a sofali gilen fari, a walike firinne yi a foxo ra. **23** Sofanla yi Alatalaa malekan to tixi kiraan xon, a silanfanna suxi a yii. Sofanla yi kiraan fata a so burunna ra. Balami yi sofanla bonbo alogo a xa fa kiraan xon. **24** Alatalaa malekan mon yi sa ti kiradin xon manpa bili nako firinne longonna ra. Sansanna yi kiraan foxo firinne birin yi. **25** Sofanla to Alatalaa malekan to, a yi a denden sansanna ra, a yi Balami sanna gberexen sansanna ma. Balami mon yi a bonbo. **26** Alatalaa malekan mon yi siga yeen na pon! A sa ti yire yigbetenxini, dangude mi yi denaxan komenna ma, a mi yi yiifanna ma. **27** Sofanla

to Alatalaa malekan to, a yi a yigodo Balami bun ma. Balami yi xolo, a yi sofanla bonbo a dunganna ra. **28** Alatala yi sofanla deen fulun, sofanla yi a fala Balami xa, a naxa, “N nanse ligaxi i ra, alogo i xa n bonbo han sanja ma saxan?” **29** Balami yi sofanla yabi, a naxa, “Amasoto i bata n matandi! Xa silanfanna yi n yii nun, n yi i faxama nen iki sa!” **30** Sofanla yi a fala Balami xa, a naxa, “I ya sofanla xa mi n tan na ba, i darixi dexe naxan fari han to? N darixi ito lige i ra ba?” A yi a yabi, a naxa, “En-en.” **31** Alatala yi Balami yee rabi, a yi Alatalaa malekan to tixi kiraan na, a silanfanna a yii. Balami yi a xinbi sin, a yi a yetagin lan boxon ma. **32** Alatalaa malekan yi a maxodin, a naxa, “Nanfera i i ya sofanla bonboxi sanja ma saxan? N bata fa, n xa i rati, amasoto kirani ito i xalin gbalon nin. **33** Sofanla bata n to, a yi n de masara sanja ma saxan. Xa na mi yi a ra nun, n bata yi i faxa nun, koni n yi a tan luma nen a nii ra.” **34** Balami yi a fala Alatalaa malekan xa, a naxa, “N bata yulubin liga! N mi yi a kolon a i tixi n yee ra kiraan na. Iki, xa sigatini ito mi rafan i ma, n xa xete.” **35** Alatalaa malekan yi a fala Balami xa, a naxa, “Siga muxuni itoe foxo ra. Koni n na naxan fala i xa, i xa na nan fala tuni!” Balami nun Balaki a kuntigine yi siga. **36** Balaki to a me a Balami bata fa, a yi siga a ralandeni Moyaba taana nde yi naxan Arinon baan de, a yamanan danna ra. **37** Balaki yi a fala Balami xa, a naxa, “N mi yi i xilima ba? Nanfera i mi fa n fema? I yi mirixi nen a n mi noe i binye ba?” **38** Balami yi a fala Balaki xa, a naxa, “I mi n to? N bata fa. Koni n noe nanse fale i xa? Ala na naxan fala n xa, fo n xa na nan fala.” **39** Balami nun Balaki yi siga Kiriyati-Husoti yi. **40** Balaki yi jingene nun yexee ba saraxan na, a yi a subena nde so Balami nun kuntigine yii naxanye yi a foxo ra. **41** Xotanni, Balaki yi Balami tongo a yi te a ra Bamoti-Baali geyaan fari, a yamaan foxo kedenna toe denaxan yi.

23 Balami yi a fala Balaki xa, a naxa, “Saraxa gande solofere rafala n xa be, i yi tura solofere nun konton solofere yiton n xa.” **2** Balami naxan fala, Balaki yi na liga. Balaki nun Balami yi tura keden nun konton keden ba saraxan na saraxa gandene birin fari. **3** Balami yi a fala Balaki xa, a naxa, “Ti i ya saraxa gan daxine fema be. N tan xa n masiga i ra. Waxatina nde Alatala fama nen n fema. A na naxan yita n na, n na a ralima i ma nen.” A yi siga geyana nde xuntagi. **4** Ala yi fa Balami ralan. Balami yi a fala

a xa, a naxa, “N bata saraxa gande solofere rafala, n bata tura keden nun konton keden ba saraxan na e birin fari.” **5** Alatala yi falan so Balami de, a naxa, “Xete Balaki fema, i yi ito fala a xa.” **6** A yi xete a fema. A yi tixi a saraxa gan daxine dexon e nun Moyaba kuntigine birin. **7** Balami yi waliyya falane ti, a naxa, Balaki bata n nafa sa keli Arami yi, Moyaba mangan bata n nafa sa keli sogeteden geyane ma. A yi a fala, a naxa, “Fa, i fa Yaxuba bonsonna danga n xa! I fa gbalo falane ti Isirayila bonsonna xili ma!” **8** Koni, n tan xa ne danga di, Ala mi naxanye dangaxi? N tan xa gbalo falane ti ne xili ma di, Alatala mi gbalon nagidixi naxanye ma? **9** N tixi gemene xuntagi, n na e toma. N tixi geyane fari, n na e matoma. Yamani ito a danna, a mi siyaan bonne ye. **10** Yaxuba bonsonna gbo alo gbangbanna, nde noe Isirayila kaane foxo kedenna naaninden yate? N fan xa faxa tinxin muxune ye, N nananna xa liga alo e gbeena! **11** Balaki yi a fala Balami xa, a naxa, “I nanse ligaxi n na? N faxi i ra nen alogo i xa n yaxune danga, koni i dubama e xa nen tun!” **12** A yi a yabi, a naxa, “Alatala naxan soxi n de, n mi lan n na fala ba?” **13** Balaki yi a fala a xa, a naxa, “En siga yire gbete yi, i mon sa e toe denaxan yi. I e foxo kedenna toma nen. I mi a birin toe. I yi e danga n xa menni.” **14** A yi a xali Sofimi a xeen ma Pisiga geyaan xuntagi. A yi saraxa gande solofere rafala menni, a yi tura keden nun konton keden ba saraxa gandene birin fari. **15** Balami yi a fala Balaki xa, a naxa, “Ti i ya saraxa gan daxine dexon be, n tan xa siga Ala ralandeni menni.” **16** Alatala yi fa Balami yetagi, a yi falan so a de, a naxa, “Xete Balaki fema, i yi ito fala a xa.” **17** A yi xete a fema, a yi tixi a saraxa gan daxine dexon e nun Moyaba kuntigine. Balaki yi a maxodin, a naxa, “Alatala nanse falaxi?” **18** Balami yi waliyya falane ti, a naxa, Balaki keli, i n xuiin me! I tuli mati n na Siporo a dii xemena! **19** Muxu mi Ala ra, a wulen fala, Adamadi mi a ra, a nimisa. A naxan falaxi, a mi na lige ba? A na falan naxan ti, a mi na rakamale ba? **20** A duban nan soxi n yii lan e ma. A barakan sa e yi. N mi noe na maxete. **21** A mi fe jaxin toma Yaxuba bonsonna. A mi fe xolen toma Isirayila yi. Alatala, e Ala e tagi. E fan a mangayaan matoxoma. **22** Ala nan faxi e ra sa keli Misiran yi, a noon tima e xa alo burunna jingena. **23** Kexayaan mi sese noe Yaxuba bonsonna xili ma. Serikariyaan mi noe sese ra Isirayila xili ma. A falama nen e ma na waxatini, “A mato, Ala naxan ligama!” **24** Siyani ito kelima nen alo

yatana. E bata e yitɔn alo yatana naxan mi a sama fɔ a na xɔyɪ seen don, fɔ a na sube suxine wunla min. **25** Balaki yi a fala Balami xa, a naxa, “Xa i mi a dangama, hali i nama duba a xa del!” **26** Balami yi Balaki yabi, a naxa, “N mi yi a fala i xa ba, n naxa, ‘Alatala na naxan fala, n na nan ligama?’” **27** Balaki yi a fala Balami xa, a naxa, “En siga yire gbete yi. Yanyina nde Ala tinma nen i xa e danga n xa menni.” **28** Balaki yi Balami xali Peyori geyaan xuntagi, dɛnaxan yɛɛ rafindixi tonbonna ma. **29** Balami yi a fala Balaki xa, a naxa, “Saraxa gande solofere rafala n xa be, i yi tura keden nun konton keden yitɔn n xa.” **30** Balami naxan fala, Balaki yi na liga. A yi turaan nun kontonna ba saraxan na saraxa gandene birin fari.

24 Balami yi a to fa fala a yi rafan Alatala ma a xa duba Isirayila xa. Nayi, a mi kɛɛraya feene rawali alo waxatin danguxine yi. Koni a yi a yɛɛ rafindi tonbonna binni. **2** Balami to a yɛɛne rakeli, a yi Isirayila kaane to malanxi bɔnsɔn yɛɛn ma. Nayi, Alaa Nii Sarinjanxin yi godo a ma. **3** Balami yi waliyiya falane ti, a naxa, N tan Balami, Beyori a dii xɛmɛna, n tan naxan feene fixen toma, n ma falan ni i ra: **4** N ni ito nan falama, n tan naxan Alaa falane mɛma, naxan fe toon tima alo xiyene fata Ala Sɛnbɛ Kanna ra, naxan a xinbi sinma, a yɛɛne yi rabi. **5** Yaxuba bɔnsɔnna, ɛ tan Isirayila kaane! ɛ dɔxɔdɛne tofan! **6** E wuya bɔxɔn fari alo baane, alo nakɔne baan dɛ, alo Alatala sansi xiri fajin naxanye sixi, alo suman wudine igene dɛ. **7** E ige ramaradene rafema nen ken! E sansine ige sa a fajin na! E mangan gboma nen Manga Agaga xa, a mangayaan senben gboma ayi nen. **8** Ala nan faxi e ra sa keli Misiran yi, a nɔɔn tima e xa alo burunna jingena. E siyane nɔma nen naxanye e yɛngɛma, e yi e bun e xalimakunle ra, e yi e xɔnne yigira. **9** E e sama nen alo yatane. Nde susue e rakele? Naxan na duba i xa, Ala xa na kanna baraka! Naxan na i danga, Ala xa na kanna danga! **10** Balaki yi xɔlɔ Balami ma han! A yi a yiine bɔnbɔ, a yi a fala Balami xa, a naxa, “N ni i xilixi nen alogo i xa n yaxune danga, koni i tan bata duba e xa sanja ma saxan. **11** Iki keli be, siga i konni. N yi a ragidixi nen n xa i saren fi han, koni Alatala bata i kuma!” **12** Balami yi Balaki yabi, a naxa, “Anu, n na a fala nen i ya xɛrane xa, n naxa, **13** ‘Hali Balaki a banxin so n yii naxan nafexi gbetin nun xɛmaan na, n mi nɔɛ Alatalaa yamarin matande fefe ma. Alatala na naxan fala, fɔ n xa na nan

fala.’ **14** Awa iki, n bata siga n kon kaane fema. Koni ɛ tuli mati. N xa i rakolon siyani ito naxan ligama i ya yamaan na waxati famatɔni.” **15** Balami yi waliyiya falane ti, a naxa: N tan Balami, Beyori a dii xɛmɛna, n tan naxan feene fixen toma, n ma falan ni i ra: **16** N ni ito nan falama, n tan naxan Alaa falane mɛma, naxan Kore Xɔnna Ala wundo feene kolon, naxan fe toon tima alo xiyena fata Ala Sɛnbɛ Kanna ra, naxan a xinbi sinma, a yɛɛne yi rabi. **17** N na a toma, koni iki mi a ra. N na a toma, koni a mɔn makuya. Sarena nde minima nen Yaxuba bɔnsɔnni, mangan kelima nen Isirayila yamanani. A Moyaba yamanan mangane yɛngɛma nen, a Seti bɔnsɔnna nɔ. **18** A Edɔn yamanan tongoma nen, e nun Seyiri yamanana, a yaxuna. Koni Isirayila senben gboma ayi nen. **19** Nɔ tiin minima nen Yaxuba bɔnsɔnni, a yi e taane muxu dɔnxɛne raxɔri. **20** Balami yi Amalekine to. A yi waliyiya falan ti, a naxa: Amaleki nan yi yamana singen na dunuɲa yi, koni dɔnxɛn na, a tununma nen habadan! **21** A mɔn yi Keni kaane to. A yi waliyiya falan ti, a naxa: I dɔxɔden natangaxi, alo xɔliin naxan a tɛɛn saxi faranna ra. **22** Koni Asuri na ɛ suxu konyiyani, Kenine janma nen. **23** A mɔn yi waliyiya falan ti, a naxa: Ee! Ala na ito liga, nde luyɛ a nii ra? **24** Kunkine kelima nen Sipiri yi, e yi Asuri rayarabi, e nun Eberi. Koni e fan faxama nen. **25** Balami yi keli, a xɛtɛ a konni. Balaki fan yi siga.

25 Isirayila kaane yi dɔxi Sitimi yi waxatin naxan yi, xɛmɛne yi lu yalunyaan ligɛ e nun Moyaba jaxanle. **2** E yi xɛmɛne xilima e suxure kideni. Yamaan yi e dɛge, e yi e xinbi sin e suxurene bun ma. **3** Nayi, Isirayila kaane yi Baali-Peyori batu. Nanara, Alatala yi xɔlɔ e ma han! **4** Alatala yi a fala Musa xa, a naxa, “Yamaan yɛɛratine birin suxu, i yi e faxa, i yi e singan Alatala yetagi sogen na, alogo Alatala xa ba xɔlɔxi Isirayila ma.” **5** Musa yi a fala Isirayila kitisane xa, a naxa, “ɛ birin xa muxune faxa naxanye Baali-Peyori batuxi.” **6** Isirayila xɛmɛna nde yi fa Midiyan jaxanla nde ra a konni, Musa nun Isirayila yamaan birin yetagi. Yamaan birin yi wugama Naralan Bubun so dɛɛn na. **7** Na ma, Finexasi, Eleyasari a dii xɛmɛna, saraxarali Harunaa dii xɛmɛna, na yi keli yamaan yɛ, a yi tanban tongo. **8** A yi siga Isirayila kaan fɔxɔ ra a bubuni. A yi e firinna sɔxɔn tanban na sanja ma kedenni e kuini. Fitina furen naxan yi Isirayila yi, na yi dan. **9** Muxu wuli mɔxɔɲɛn nun naanin nan faxa na furen ma. **10** Alatala yi a fala Musa xa, a

naxa, **11** “Finexasi, Eleyasari a dii xemena, saraxarali Harunaa dii xemena, na bata n ma xolon ba Isirayila ma. Amasoto n ma xoxolonna nan soxi a yi. Na ma, n mi Isirayila kaane raxorima xoxolonni. **12** Nanara, i xa a fala a xa, n bata tin boje xunbenla layirin tonge a xa. **13** Na layirin luma a tan xa nen e nun a yixetene, n yi e findi saraxaraline ra habadan. Amasoto a kunfa nen a Ala xon, a yi n solona Isirayila xa.” **14** Isirayila xemen naxan nun Midiyan jaxanla faxa, a yi xili nen Simiri, Salu a dii xemena. Simeyon bansonna denbayana nde kuntigin nan yi a ra. **15** Midiyan jaxanla naxan faxa, a yi xili nen Kosibi, Suru a dii temena. Midiyan xabilana ndee mangan nan yi a ra. **16** Alatala yi a fala Musa xa, a naxa, **17** “E xa Midiyan kaane yate e yaxune ra, e yi e yenge. **18** Amasoto e bata findi e yaxune ra e to e yanfa Peyori yi, Kosibi a fe yi, e xabila mangana nde a dii temena, e naxan faxa, na feen to fitina furen nafa.”

26 Na fitina furen yi dangu. A to dangu, Alatala yi a fala Musa nun Haruna dii Eleyasari xa, a naxa, **2** “E Isirayila yamaan tenge naxanye barin bata dangu jee moxonen na, e denbaya yeen ma, naxanye birin ne yengen soe.” **3** Musa nun saraxarali Eleyasari yi falan ti e xa Moyaba meremereni Yuruden baan de Yeriko taan yetagi. E naxa, **4** “Xemene xa tenge naxanye barin bata dangu jee moxonen na, alo Alatala a yamarixi Musa ma kii naxan yi.” Isirayila kaan naxanye minixi Misiran yamanani, ne ni itoe ra: **5** Isirayila dii singe Ruben yixetene ni i ra: Xanoki xabilana, Xanoki yixetene; Palu xabilana, Palu yixetene; **6** Xesiron xabilana, Xesiron yixetene; e nun Karimi xabilana, Karimi yixetene. **7** Ruben xabilane nan ne ra, e malanxina, muxu wuli tonge naanin e nun saxan keme solofere tonge saxan. **8** Eliyabi nan yi Palu a dii xemen na. **9** Eliyabi a dii xemene nan itoe ra: Nemuweli, Datan e nun Abirami. Datan nun Abirami yi findixi yamaan kuntigine nan na naxanye murute Musa nun Haruna xili ma, e sa Kora muxune fari, e to murute Alatala xili ma. **10** Boxon yi rabi, a yi e nun Kora gerun e bode xon. Teen yi a foxo ra birane muxu keme firin tonge suulun gan. Na yi findi misaala ra yamaan xa. **11** Koni, Kora yixetene birin mi faxa. **12** Simeyon yixetene ni i ra xabila yeen ma: Nemuweli xabilana, Nemuweli yixetene; Yamin xabilana, Yamin yixetene; Yakin xabilana, Yakin yixetene; **13** Sera xabilana, Sera yixetene; e nun Sayuli xabilana, Sayuli yixetene. **14** Simeyon xabilane nan ne ra, e malanxina, muxu wuli

moxonen nun firin keme firin. **15** Gadi yixetene ni i ra xabila yeen ma: Sefon xabilana, Sefon yixetene; Xagi xabilana, Xagi yixetene; Suni xabilana, Suni yixetene; **16** Osini xabilana, Osini yixetene; Eriya xabilana, Eriya yixetene; **17** Arodi xabilana, Arodi yixetene; e nun Areli xabilana, Areli yixetene. **18** Gadi xabilane nan ne ra, e malanxina, muxu wuli tonge naanin keme suulun. **19** Eri nun Onan nan yi Yuda a dii xemene ra, koni Eri nun Onan bata yi faxa Kanan yamanani. **20** Yuda yixetene ni i ra xabila yeen ma: Selaxa xabilana, Selaxa yixetene; Peresi xabilana, Peresi yixetene; e nun Sera xabilana, Sera yixetene. **21** Peresi yixetene ni i ra xabila yeen ma: Xesiron xabilana, Xesiron yixetene; e nun Xamuli xabilana, Xamuli yixetene. **22** Yuda xabilane nan ne ra, e malanxina, muxu wuli tonge solofere wuli sennin keme suulun. **23** Isakari yixetene ni i ra xabila yeen ma: Tola xabilana, Tola yixetene; Puwa xabilana, Puwa yixetene; **24** Yasubu xabilana, Yasubu yixetene; e nun Simiron xabilana, Simiron yixetene. **25** Isakari xabilane nan ne ra, e malanxina, muxu wuli tonge sennin wuli naanin keme saxan. **26** Sabulon yixetene ni i ra xabila yeen ma: Seredi xabilana, Seredi yixetene; Elon xabilana, Elon yixetene; e nun Yalele xabilana, Yalele yixetene. **27** Sabulon xabilane nan ne ra, e malanxina, muxu wuli tonge sennin keme suulun. **28** Yusufu yixetene ni i ra xabila yeen ma: Manase nun Efirami. **29** Manase yixetene ni i ra: Makiri xabilana, Makiri yixetene. Makiri nan Galadi soto. E nun Galadi xabilana, Galadi yixetene. **30** Galadi yixetene ni i ra: Yeseri xabilana, Yeseri yixetene; Xeleki xabilana, Xeleki yixetene; **31** Asireli xabilana, Asireli yixetene; Siken xabilana, Siken yixetene; **32** Semida xabilana, Semida yixetene; e nun Xeferi xabilana, Xeferi yixetene. **33** Selofexadi, Xeferi a dii xemen mi dii xeme soto, koni a dii temene soto nen. Selofexadi a dii temene xinle ni itoe ra: Maxala, Noha, Xogala, Milika e nun Tirisa. **34** Manase xabilane nan ne ra, e malanxina, muxu wuli tonge suulun wuli firin keme solofere. **35** Efirami yixetene ni i ra xabila yeen ma: Sutela xabilana, Sutela yixetene; Bekeru xabilana, Bekeru yixetene; e nun Taxani xabilana, Taxani yixetene. **36** Sutela yixetene ni i ra: Eran xabilana, Eran yixetene. **37** Efirami xabilane nan ne ra, e malanxina, muxu wuli tonge saxan wuli firin keme suulun. Yusufu yixetene nan ne ra xabila yeen ma. **38** Bunyamin yixetene ni i ra xabila yeen ma: Bela xabilana, Bela yixetene; Asibeli

xabilana, Asibeli yixetene; Axirami xabilana, Axirami yixetene; **39** Sufami xabilana, Sufami yixetene; e nun Xufami xabilana, Xufami yixetene. **40** Bela yixetene ni i ra: Arade nun Naman. Arade xabilana, Arade yixetene; e nun Naman xabilana, Naman yixetene. **41** Bunyamin xabilane nan ne ra, e malanxina, muxu wuli tonge naanin wuli suulun keme sennin. **42** Dan yixetene ni i ra xabila yeen ma: Suxami xabilana, Suxami yixetene. Dan xabila keden nan yi na ra. **43** Suxami xabilan nan na ra, e malanxina muxu wuli tonge sennin wuli naanin keme naanin. **44** Aseri yixetene ni i ra xabila yeen ma: Yimina xabilana, Yimina yixetene; Yisiwi xabilana, Yisiwi yixetene; e nun Beriya xabilana, Beriya yixetene. **45** Beriya yixetene ni i ra: Xeberi xabilana, Xeberi yixetene; e nun Malikili xabilana, Malikili yixetene. **46** Aseri a dii temen yi xili nen Sera. **47** Aseri xabilane nan ne ra, e malanxina, muxu wuli tonge suulun wuli saxan keme naanin. **48** Nafatali yixetene ni i ra xabila yeen ma: Yaseli xabilana, Yaseli yixetene; Guni xabilana, Guni yixetene; **49** Yeseri xabilana, Yeseri yixetene; e nun Silen xabilana, Silen yixetene. **50** Nafatali xabilane nan ne ra, e malanxina, muxu wuli tonge naanin wuli suulun keme naanin. **51** Isirayila xemen naxanye yate, muxu wuli keme sennin e nun keden keme solofere tonge saxan. **52** Alatala yi a fala Musa xa, a naxa, **53** Yamanani taxunma nen e tagi e keen na, fata muxune yatən na. **54** Naxanye wuya, i xa kee gbeen so ne yii. Naxanye mi wuya, i xa kee xurin so ne yii. Birin keen xa lan muxune yatən ma. **55** Koni yamanan xa yitaxun masensenna nan xon. E a sotoma nen e keen na fata e benbane bənsənnə xindle ra. **56** Birin kee bəxəni taxunma masensenna nan xon, bənsən gbeene nun bənsən xurine ye. **57** Lewi bənsənnə muxuni itoe nan tenge e xabila yeen ma: Gerison xabilana, Gerison yixetene; Kehati xabilana, Kehati yixetene; e nun Merari xabilana, Merari yixetene. **58** Lewi bənsənnə xabila gbeten ni i ra: Libini xabilana, Xebiron xabilana, Maxali xabilana, Musi xabilana, e nun Kora xabilana. Kehati nan Amirama soto. **59** Amirama a naxanla yi xili nen “Yokebedi,” Lewi a dii temena, naxan bari Misiran yi. E nun Amirama nan Haruna nun Musa soto, e nun Mariyama, e magilena. **60** Haruna nan Nadaba nun Abihu nun Eleyasari nun Itamara soto. **61** Koni Nadaba nun Abihu faxa nen, e to tee daxataren xali Alatala yetagi. **62** E Lewi xemen naxanye tenge, naxanye barin bata yi dangi kike kedenna ra, ne lan

muxu wuli məxəjən nun saxan nan ma. E mi tenge Isirayila kaan bonne ye, amasoto e mi yi lan e xa kee bəxəni soto e ye. **63** Musa nun saraxarali Eleyasari ne nan tenge Moyaba meremerene yi Yuruden baan de Yeriko taan yetagi. **64** Musa nun saraxarali Haruna Isirayila kaan naxanye tenge Sinayi tonbonni, na sese mi yi itoe ye. **65** Amasoto Alatala bata yi a fala ne ma, a e faxama nen tonbonni. Keden mi lu fo Yefune a dii Kalebi nun Nunu a dii Yosuwe.

27 Awa, Selofexadi a dii temene yi fa, Xeferi a dii xemena, Galadi mamandenna. Manase a dii Makiri nan Galadi soto Manase bənsənni, Yusufu a dii xemena. E xinle ni itoe ra: Maxala nun Noha nun Xogala nun Milika e nun Tirisa. **2** E yi fa Naralan Bubun so deen na Musa nun saraxarali Eleyasari nun mangane nun yamaan birin yetagi. E naxa, **3** “Nxu baba bata faxa tonbonni. A mi yi Kora ganla ye naxanye yi murutexi Alatala xili ma, koni a faxaxi a yeteen yulubin nan ma, dii xeme mi yi a yii. **4** Nanfera nxu baba xinla loye ayi a xabilani, bayo dii xeme to mi a yii ba? E keena nde so nxu yii nxu baba ngaxakedenne tagi.” **5** Musa yi siga e kiti feen maxodinna tideni Alatala ma. **6** Alatala yi a fala Musa xa, a naxa, **7** “Selofexadi a dii temene jondi. Kee bəxəni nde so e yii e baba ngaxakedenne tagi. I lan i yi e baba keen so e yii. **8** A fala Isirayila kaane xa, i naxa, ‘Xa muxuna nde faxa a mi dii xeme lu, e xa a keen so a dii temen yii. **9** Xa dii teme mi a yii, e xa a keen so a ngaxakeden xememane yii. **10** Xa a ngaxakeden mi na, e xa a keen so a baba ngaxakeden xememane yii. **11** Xa a baba ngaxakeden mi na, e xa a keen so a bari bodena nde yii a xabilani, a yi findi a gbeen na. A findima kiti sa sariyan nan na Isirayila kaane xa, Alatala naxan yamarixi Musa ma.” **12** Alatala yi a fala Musa xa, a naxa, “Te Abarimi geyani ito fari, i yi bəxəni mato n naxan so Isirayila yii. **13** I na a mato, i laxirayama nen, alo i tada Haruna. **14** Amasoto e bata n ma yamarin matandi, yamaan murute waxatin naxan yi Sini tonbonni igen de. I mi n ma sarijanna binya e yetagi, e to yi igen maxodinma.” Meriba igene nan yi ne ra Kadesi yi Sini tonbonni. **15** Musa yi a fala Alatala xa, a naxa, **16** “Alatala, Ala naxan niin biraxi adamadiine birin yi, i xa muxuna nde ti yamani ito xun na **17** naxan nəe tiye a ye ra a feen birin yi. Alatalaa yamaan nama lu alo xuruseene xuruse raba mi naxanye xun na.” **18** Alatala yi a fala

Musa xa, a naxa, “Nunu a dii Yosuwe tongo, n ma Nii Sarijnanxin naxan yi, i yi i yii sa a fari. 19 I yi a ti saraxarali Eleyasari nun yamaan birin yetagi, i yi a findi yɛɛratiin na e yɛɛ xɔri. 20 I yi i senbena nde so a yii, alogo Isirayila yamaan birin xa a xuiin suxu. 21 A ti saraxarali Eleyasari yetagi, alogo a xa kiti sa feen maxɔdinne ti a xa, Yurima masensen ti seen na Alatala yetagi. Yosuwe nun Isirayila yamaan birin Eleyasari a yamarine suxuma nen e feene birin yi.” 22 Musa yi a liga alo Alatala a yamari kii naxan yi. A yi Yosuwe tongo, a yi a ti saraxarali Eleyasari nun yamaan birin yetagi. 23 A yi a yiine sa a fari, a yi a findi yɛɛratiin na, alo Alatala a fala e xa kii naxan yi fata Musa ra.

28 Alatala yi a fala Musa xa, a naxa, 2 “Yamarini ito fi Isirayila kaane ma, i naxa, ‘E fa n kise donseene ra e waxati saxine yi, naxanye ralima n ma tɛɛn na naxanye xirin nafa n ma.’ 3 Ito fala e xa, i naxa, ‘Lɔxo yo lɔxo, ɛ fa yɛxɛɛn jɛɛ kedenna firin na Alatala xɔn, fɛ mi naxanye ra saraxa gan daxin na naxan nalima a ma tɛɛn na waxatin birin. 4 Yɛxɛɛ keden xa ba xɔtɔnni, a firindena fitirin ma. 5 A bama nen e nun a bogise saraxana, murutu fujin kilo saxan naxan namulanxi oliwi bogi dinxine turen litiri keden nun a tagiin na. 6 Saraxa gan daxini ito bama nen waxatin birin alo a liga Sinayi geyaan fari kii naxan yi. A ralima Alatala ma tɛɛn nan na, a xirin yi rafan a ma. 7 Yɛxɛɛn bama nen e nun a minse saraxana, wudi bogi igen litiri keden e nun a tagi. I xa minse saraxan bɔxɔn Alatala xa yire sarijnanxini. 8 Yɛxɛɛn firinden bama fitirin nan ma, e nun a bogise saraxana e nun a minse saraxana alo i naxan bama xɔtɔnni. A ralima Alatala ma tɛɛn nan na, a xirin yi rafan a ma.” 9 “Matabu Lɔxɔni, yɛxɛɛn jɛɛ kedenna firin xa ba saraxan na, fɛ mi naxanye ra, e nun e bogise saraxane, murutu fujin kilo sennin naxan namulanxi turen na e nun e minse saraxana. 10 Na saraxa gan daxine xa ba Matabu Lɔxɔne birin yi, sa lɔxo yo lɔxo saraxa gan daxine fari e nun a minse saraxana.” 11 “Kike nenɛn fɔlɔna, ɛ xa tura bulan firin ba saraxa gan daxin na Alatala xa, e nun konton keden nun yɛxɛɛn jɛɛ keden kedenna solofere, fɛ mi naxanye ra. 12 Xuruseene birin bama nen e nun murutu fujina naxan namulanxi turen na, bogise saraxana. Ninge keden lanma murutu fujin kilo solomanaanin nan ma. Kontonna, kilo sennin. 13 Konton bulanna, kilo

saxan naxan namulanxi turen na bogise saraxan na. Saraxa gan daxin na a ra naxan nalima Alatala ma tɛɛn na, a xirin yi rafan a ma. 14 Ninge keden bama nen e nun a minse saraxana, wudi bogi igen litiri saxan. Kontonna gbeena, litiri firin. Yɛxɛɛ diina, litiri keden nun a tagi. Saraxa gan daxin na a ra naxan bama kike nenɛne birin na jɛɛn bun. 15 ɛ mɔn xa kɔto keden ba yulubi xafari saraxan na Alatala xa, sa lɔxo yo lɔxo saraxa gan daxine fari e nun e minse saraxane.” 16 “Jɛɛn kike singen xii fu nun naaninna, ɛ xa Halagi Tiin Dangu Lɔxɔn Sanla raba Alatala xa.” 17 “Kiken i to xii fu nun suulunde lɔxɔni, sanla yi fɔlɔ. ɛ xa buru ratetaren don xii solofere. 18 Sanla xii singe lɔxɔni, ɛ xa yamaan xili malan sarijnanxini. ɛ nama ɛ wanle kɛ na lɔxɔni. 19 ɛ xa tura bulan firin nun konton keden nun yɛxɛɛn jɛɛ keden kedenna solofere ba saraxa gan daxin na fɛ mi naxanye ra. E rali Alatala ma tɛɛn nan na. 20 Xuruseene bama nen e nun murutu fujin naxan namulanxi turen na, bogise saraxana. Ninge keden lanma murutu fujin kilo solomanaanin nan ma. Kontonna, kilo sennin. 21 Yɛxɛɛ soloferene, kilo saxan saxan. 22 ɛ mɔn xa kɔto keden ba yulubi xafari saraxan na Ala solona seen na ɛ xa. 23 Na birin sama lɔxo yo lɔxo saraxan nan fari naxan bama xɔtɔnni. 24 Sanla xii soloferene birin yi, ɛ xa na kise donseene nan nali tɛɛn na, e xirin yi rafan Alatala ma, sa lɔxo yo lɔxo saraxane nun minse saraxane fari. 25 Xii soloferede lɔxɔni, ɛ mɔn yi yamaan xili malan sarijnanxini. ɛ nama ɛ wanle kɛ na lɔxɔni.” 26 “Se Xaba Singen sali lɔxɔni, ɛ na fa bogise singene saraxane ra Alatala xɔn Xunsagine Sanla waxatini, ɛ xa yamaan xili malan sarijnanxini. ɛ nama ɛ wanle kɛ. 27 ɛ xa tura bulan firin nun konton keden nun yɛxɛɛn jɛɛ keden kedenna solofere ba saraxa gan daxin na, a xirin yi rafan Alatala ma. 28 Xuruseene bama nen e nun murutu fujin naxan namulanxi turen na, bogise saraxana. Ninge keden lanma murutu fujin kilo solomanaanin nan ma. Kontonna, kilo sennin. 29 Yɛxɛɛ soloferene, kilo saxan saxan. 30 ɛ mɔn xa kɔto keden ba yulubi xafari saraxan na Ala solona seen na ɛ xa. 31 Na saraxane bama nen e nun e minse saraxane. E sa lɔxo yo lɔxo saraxa gan daxine nun e bogise saraxane fari. ɛ xa xuruseene ba fɛ mi naxanye ra e nun e minse saraxane.”

29 “Kike solofereden xi singe lɔxɔni, ɛ xa yamaan xili malan sarijnanxini. ɛ nama ɛ wanle kɛ, koni

ε xa xotane fe na lɔxoni. 2 Ε xa tura bulan keden nun konton keden nun yexɛɛn jɛɛ keden kedenna solofere ba saraxa gan daxin na, fe mi naxanye ra. A xirin yi rafan Alatala ma. 3 Xuruseene bama nen e nun murutu fujin naxan namulanxi turen na, bogise saraxana. Ninge keden lanma murutu fujin kilo solomanaanin nan ma. Kontonna, kilo sennin. 4 Yexɛɛ soloferene, kilo saxan saxan. 5 Ε mɔn xa kɔtɔ keden ba yulubi xafari saraxan na Ala solona seen na ε xa. 6 Saraxan ne sama kike nenen saraxane nun lɔxɔ yo lɔxɔ saraxane nan fari e nun e bogise saraxane nun minse saraxane naxan falaxi sariyani. Saraxane nan ne ra naxanye nalima Alatala ma tɛɛn na, e xirin yi rafan a ma.” 7 “Kike solofereden xii fude lɔxoni, ε xa yamaan xili malan sarijanxini. Ε yi sun. Ε nama wali yo kɛ. 8 Ε xa tura bulan keden nun konton keden nun yexɛɛn jɛɛ keden kedenna solofere ba saraxa gan daxin na Alatala xa fe mi naxanye ra, a xirin yi rafan a ma. 9 Xuruseene bama nen e nun murutu fujin naxan namulanxi turen na, bogise saraxana. Ninge keden lanma murutu fujin kilo solomanaanin nan ma. Kontonna, kilo sennin. 10 Yexɛɛ soloferene, kilo saxan saxan. 11 Ε mɔn xa kɔtɔ keden ba yulubi xafari saraxan na, sa Ala solona saraxan fari e nun lɔxɔ yo lɔxɔ saraxa gan daxine nun e bogise saraxane nun e minse saraxane.” 12 “Kike solofereden xii fu nun suulunde lɔxoni, ε xa yamaan xili malan sarijanxini. Ε nama ε wanle kɛ. Ε xa sanla raba Alatala xa xii solofere. 13 Xii singe lɔxoni, ε xa tura bulan fu nun saxan nun konton firin nun yexɛɛn jɛɛ keden kedenna fu nun naanin ba saraxa gan daxin na Alatala xa, fe mi naxanye ra. A ralima a ma tɛɛn nan na, a xirin yi rafan a ma. 14 E bama nen e nun murutu fujin naxan namulanxi turen na bogise saraxana. Ninge keden kilo solomanaanin, kontonna kilo sennin. 15 Yexɛɛ fu nun naaninne, kilo saxan saxan. 16 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 17 “Xii firinde lɔxoni, ε xa tura bulan fu nun firin nun konton firin nun yexɛɛn jɛɛ keden kedenna fu nun naanin ba fe mi naxanye ra. 18 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 19 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 20 “Xii saxande lɔxoni, ε xa tura bulan fu nun keden

nun konton firin nun yexɛɛn jɛɛ keden kedenna fu nun naanin ba fe mi naxanye ra. 21 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 22 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 23 “Xii naaninde lɔxoni, ε xa tura bulan fu nun konton firin nun yexɛɛn jɛɛ keden kedenna fu nun naanin ba fe mi naxanye ra. 24 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 25 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 26 “Xii suulunde lɔxoni, ε xa tura bulan solomanaanin nun konton firin nun yexɛɛn jɛɛ keden kedenna fu nun naanin ba fe mi naxanye ra. 27 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 28 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 29 “Xii senninde lɔxoni, ε xa tura bulan solomasɛɛ nun konton firin nun yexɛɛn jɛɛ keden kedenna fu nun naanin ba fe mi naxanye ra. 30 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 31 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 32 “Xii soloferede lɔxoni, ε xa tura bulan solofere nun konton firin nun yexɛɛn jɛɛ keden kedenna fu nun naanin ba fe mi naxanye ra. 33 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 34 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 35 “Xii solomasɛɛde lɔxoni, ε xa ε malan. Ε nama ε wanla kɛ. 36 Ε xa tura keden nun konton keden nun yexɛɛn jɛɛ keden kedenna solofere ba saraxa gan daxin na fe mi naxanye ra. E xa rali Alatala ma tɛɛn na, naxan xiri rafan a ma. 37 E bama nen e nun e bogise saraxane nun e minse saraxane, naxanye lanjɛ turane nun kontonne nun yexɛɛne yaten ma. 38 Ε mɔn xa kɔtɔ keden ba yulubi xafari saraxan na, sa lɔxɔ yo lɔxɔ saraxa gan daxine fari e nun e bogise saraxane nun e minse saraxane.” 39 “Saraxane nan

ne ra ε lan ε xa naxanye ba Alatala xa sali lōxōne yi. E sama nen ε saraxa gan daxine fari, e nun ε bogise saraxane nun ε minse saraxane nun ε bōjne xunbeli saraxane, ε naxanye ba de tiina fe ra hanma ε jēnigē ma saraxane.” 40 Alatala Musa yamari naxanye birin ma, a yi ne birin fala Isirayila kaane xa.

30 Musa yi falan ti Isirayila bōnsōnne mangane xa, a naxa, “Alatalaa yamarini ito nan fixi: 2 Xa xēmēna nde a kōlō hanma a a de ti a a xa saraxan ba Alatala xa hanma a xa fēna nde raba, a nama a falan kala. A naxan birin falaxi, a xa na raba.” 3 “Xa sungutunna nde a kōlō hanma a a de ti a a saraxan bama Alatala xa, hanma a fēna nde rabama nen, a mōn a baba konni, 4 a baba na a mē waxatin naxan yi, xa a mi sese fala, a lan a yi a kōlōne nun a de ti xuine birin nakamali. 5 Koni a baba na a mē waxatin naxan yi, xa a mi tin, a mi lan a yi a kōlōne nun a de ti xuine rakamali. Alatala dijama nen a ma, bayo a baba mi tinxi.” 6 “Xa sungutunna nde a kōlō hanma a a de ti xaxilitareyani, na xanbi ra a yi futu, 7 a xēmēn na a mē waxatin naxan yi, xa a mi sese fala, a lan a yi a kōlōne nun a de ti xuine rakamali. 8 A xēmēn na a mē waxatin naxan yi, xa a mi tin, a xa a kōlōne nun a xaxilitareya de xuine yikala. Alatala dijama nen jaxanla ma.” 9 “Kajja gilēen hanma jaxanla naxan xēmēn bata a mē a ra, xa na nde a kōlō hanma a a de ti a fēna nde rabama nen, a lan a yi na birin nakamali.” 10 “Xa jaxanla bata dōxō xēmē taa ra, a a kōlō hanma a a de ti a fēna nde rabama nen, 11 a xēmēn na a mē, xa a mi sese fala a mi tondi, a lan a yi a kōlōne nun de ti xuine birin nakamali. 12 Koni a xēmēn na a mē waxatin naxan yi, xa a mi tin, a mi lan a yi a kōlōne nun de ti xuine rakamali. Alatala dijama nen a ma, amasōtō a xēmēn bata a kala. 13 Nayi, a xēmēn nōē tinjē nen hanma a tondi a kōlōne nun a de ti xuine ma. 14 A na a mē, xa a xēmēn mi sese fala a jaxanla xa, a bata tin a kōlōne nun de ti xuine birin ma a dunduni. 15 Koni xa lōxōn bata dangu a xēmēna a fe mexi naxan yi, a yi fa a jaxanla de ti xuine kala, xēmēna a jaxanla haken goronna tongoma nen.” 16 Alatala na sariyane nan falaxi Musa xa de tiina fe yi jaxalan futuxina fe yi hanma dii temen naxan a baba konni.

31 Alatala yi a fala Musa xa, a naxa, 2 “Midiyan kaane fe jaxin saran e ra, e naxan ligaxi Isirayila kaane ra. Na xanbi ra, i laxirayama nen.” 3 Nayi,

Musa yi a fala yamaan xa, a naxa, “Muxuna ndee xa e yitōn yēngē so xinla ma ε yē. E sigama Midiyan kaane nan yēngedeyi, alogo Alatala xa e fe jaxine saran e ra. 4 Nayi, ε xa yēngē soon muxu wuli keden keden tongo Isirayila bōnsōnne birin yi.” 5 E yi muxu wuli fu nun firin tongo Isirayila ganle yē yēngē so xinla ma. Bōnsōn keden, wuli keden. 6 Musa yi e rasiga yēngeni, bōnsōn yo bōnsōn muxu wuli keden, e nun Finexasi, saraxarali Eleyasari a dii xēmēna, naxan se rasarijanxina ndee xali e nun xōtaan naxanye fema yēngeni. 7 E yi siga Midiyan yamanan yēngedeni alo Alatala a yamari Musa ma kii naxan yi. E yi xēmēne birin faxa. 8 E Midiyan manga suulun fan faxa, Efi nun Rekemi nun Suru nun Xuru nun Reba. E Beyori a dii Balami fan faxa silanfanna ra. 9 E yi Midiyan jaxanle nun e diine tongo, e nun e xuruseene nun e yii seene birin. 10 E yi e taane nun e dōxōdene birin gan. 11 E yi se tongoxine birin xali e nun muxune nun xuruseene. 12 E yi fa suxu muxune nun se tongoxine ra Musa nun saraxarali Eleyasari nun Isirayila yamaan fema daaxadeni Moyaba meremerēni Yuruden baan dēxōn Yeriko yetagi. 13 Musa nun saraxarali Eleyasari nun yamaan mangane yi siga e ralandeni daaxaden fari ma. 14 Musa yi xōlō gali kuntigine ma naxanye muxu wuli xun na e nun naxanye muxu kēmē xun na naxanye yi kelima na yēngeni. 15 Musa yi e maxōdin, a naxa, “Nanfera ε jaxanle luxi e nii ra? 16 E tan nan Balami a kawandin name, e Isirayila kaane bira tinxintareyani Alatala ra Peyori yi, fitina furen yi so Alatala yamani. 17 Iki ε dii xēmēne birin faxa, e nun jaxanla naxanye xēmē feen kolon. 18 Koni ε nōē sungutun nasōlōnxine ramare nen ε yetē xa. 19 Naxanye birin faxan tixi ε yē hanma e yiin din muxu faxaxin na, ne xa lu daaxaden fari ma xii solofere. E lan ε yi ε rasarijan xii saxanden nun xii soloferede lōxōni e nun ε suxu muxune. 20 E mōn xa dugine rasarijan, e nun seen naxanye rafalaxi kidin na hanma sii xaben na hanma wudin na.” 21 Sofaan naxanye keli yēngeni, saraxarali Eleyasari yi a fala ne xa, a naxa, “Alatala ito nan yamarixi Musa ma a sariyani: 22 Xēmaan nun gbetin nun sulan nun wuren nun yōxōna, 23 e nun tēen mi naxanye birin ganma, ε xa ne rasarijan tēen nan na. Na xanbi ra, ε yi e rasin marasarijan igeni. Naxanye ganma, ε ne rasin marasarijan igeni gbansan. 24 E na ε dugine xa xii soloferede lōxōni, ε sarijanma nen. Nayi, ε nōē soē nen daaxadeni.” 25 Alatala yi a fala Musa xa, a

naxa, **26** “I tan nun saraxarali Eleyasari nun yamaan xabila mangane, ε muxune nun xuruseene birin tenge naxanye tongoxi yengeni. **27** Na xanbi ra, i xa e yitaxun firinna ra, fɔxɔ kedenna sofane nan gbeen na ra naxanye siga yengeni, fɔxɔ kedenna yamaan dɔnxɛn nan gbeen na ra. **28** I xa ndedi ba sofane gbeen na mudun na Alatala xa: i muxu keden ba muxu keme suulunna ra hanma xuruse keme suulun e nun jingene nun sofanelle nun yexɛene nun siine birin. **29** I xa muduni ito ba e gbeen na, i yi a so saraxarali Eleyasari yii Alatala gbeen na. **30** Isirayila yamaan dɔnxɛn gbeen tan, i xa muxu keden ba muxu tonge suulunna ra, hanma xuruse tonge suulun e nun jingene nun sofanelle nun yexɛene nun siine birin. I yi e so Lewi bɔnsɔnna muxune yii, Alatala Batu Bubun taxuxi naxanye ra.” **31** Musa nun saraxarali Eleyasari yi a liga alo Alatala a yamari Musa ma kii naxan yi. **32** Sofane seen naxanye tongo yengeni, itoe nan lu yengen xanbini: xuruse xunxuri wuli keme sennin wuli tonge solofere wuli suulun, **33** jinge wuli tonge solofere wuli firin, **34** sofali wuli tonge sennin wuli keden, **35** e nun sungutun nasɔlɔnxi wuli tonge saxan wuli firin. **36** Naxan yitaxun yengesone ra na ni i ra: xuruse xunxuri wuli keme saxan wuli tonge saxan e nun solofere keme suulun, **37** xuruse xunxurin keme sennin tonge solofere e nun suulun yi ba a ra mudun na Alatala xa, **38** e nun jinge wuli tonge saxan wuli senninne, jinge tonge solofere e nun firin yi ba a ra mudun na Alatala xa, **39** e nun sofali wuli tonge saxan keme suulunna, sofali tonge sennin e nun keden yi ba a ra mudun na Alatala xa, **40** e nun muxu wuli fu nun senninna, muxu tonge saxan e nun firin yi ba a ra mudun na Alatala xa. **41** Musa yi na mudun so saraxarali Eleyasari yii Alatala gbeen na, alo Alatala a yamari a ma kii naxan yi. **42** Isirayila yamaan gbeen ni i ra Musa naxan dɔxɔ a danna. **43** Yamaan gbeena: xuruse xunxuri wuli keme saxan wuli tonge saxan wuli solofere keme suulun, **44** e nun jinge wuli tonge saxan wuli sennin, **45** e nun sofali wuli tonge saxan keme suulun, **46** e nun muxu wuli fu nun sennin. **47** Naxan soxi Isirayila kaane yii, Musa yi muxu keden ba muxu tonge suulunna ra, a xuruse keden ba xuruse tonge suulunna ra, alo Alatala a yamari a ma kii naxan yi. A yi e so Lewi bɔnsɔnna muxune yii, Ala Batu Bubun yi taxuxi naxanye ra. **48** Ganla kuntigine yi siga Musa fema naxanye muxu wuli xun na e nun naxanye muxu keme xun na. **49** E yi a fala a xa, e naxa, “Sofaan

naxanye nxɔ yamarine bun, nxu bata ne tenge. Hali keden mi baxi nxu ra. **50** Nanara, nxu xema seen naxanye sɔtɔxi, nxu bata fa ne ra Alatala xɔn a kiseen na nxu niin xunba saranna ra: kɔɛ birane, yii kɔɛ rasone, yii soli rasone, tunla sone, e nun jɛrɛne.” **51** Musa nun saraxarali Eleyasari yi na xema muranne birin nasuxu e ra. **52** Kuntigin naxanye muxu wuli xun na e nun naxanye muxu keme xun na, ne xema seene binyan yi sigɛ han kilo keme tonge solofere, e naxanye fi Alatala ma. **53** Sofane tan yi e se tongoxine ramara e yii. **54** Musa nun saraxarali Eleyasari yi kuntigine xemaan tongo, e yi a xali Naralan Bubuni, alogo Alatala xa a jɔxɔ lu Isirayila kaane xɔn.

32 Xuruse wuyaxi yi Ruben nun Gadi bɔnsɔnne yii.

E yi a to a Yaasɛri nun Galadi bɔxɔn yi fan e xuruseene xa. **2** Nayi, Gadi kaane nun Ruben kaane yi fa Musa nun saraxarali Eleyasari nun yamaan mangane fema, e yi a fala, e naxa, **3** “Alatala yamanan naxanye nxɔ Isirayila yamaan xa, Ataroti nun Dibon nun Yaasɛri nun Nimira nun Xesibɔn nun Eleyale nun Sebami nun Nebo nun Bewoni, **4** na yamanane fan xuruseene xa, anu xuruseene nxu tan yii han, nxu tan ε walikene.” **5** E yi a fala, e naxa, “Xa ε tinjɛ nxɔ falan ma, na bɔxɔn xa so nxu yii, ε nama nxu xali Yuruden baan kidi ma.” **6** Musa yi a fala e xa, a naxa, “E tan dɔxɔn nɛn be ba, ε ngaxakedenne yi siga yenge sodeni? **7** Nanfera ε Isirayila kaane tunnaxɔlɔma sigadeni yamanani Alatala naxan soxi e yii? **8** E fafane fan na nan liga bonni, n to e rasiga yamanan matodeni keli Kadesi-Barineya yi. **9** E te nɛn han Esikoli mɛrɛmɛrɛni. E to yelin yamanan matɔɛ, e yi Isirayila kaane tunnaxɔlɔ e ma alogo e nama siga yamanani Alatala naxan soxi e yii. **10** Na lɔxɔni Alatala yi xɔlɔ, a yi a kɔlɔ, a naxa, **11** ‘Muxuni itoe naxan minixi Misiran yi, naxanye barin bata dangu jɛɛ mɔxɔjnɛn na, ne mi bɔxɔn toma n na n kɔlɔxi naxan so fe ra lburahima nun Isiyaga nun Yaxuba yii, amasɔtɔ e mi luxi n fɔxɔ ra ki fajni. **12** Fɔ Yefune a dii Kalebi, Kenisi kaana, e nun Nunu a dii Yosuwe, bayo e lu nɛn Alatala fɔxɔ ra ki fajni.’ **13** Alatalaa xɔlɔ gbeen keli nɛn Isirayila kaane xili ma, a yi e rasiga tonbonna xun xɔn jɛɛ tonge naanin, han na waxatin muxune birin yi jnan naxanye fe jnaxin liga Alatala yetagi. **14** Iki ε tan yulubi kanne, ε faxi ε fafane nan ma. E Alatala raxɔlɔma nɛn Isirayila xili ma dangu e ra. **15** Anu, xa ε xɛtɛ a fɔxɔ ra, a mɔn yamani ito birin

luma nen tonbonni, e yi findi yamaan birin halagi xunna ra.” 16 Na muxune mon yi e maso Musa ra e yi a fala a xa, e naxa, “Nxu waxi sansanne sa feni be nxo xuruseene xa nxu yi taane ti nxo denbayane xa. 17 Na xanbi ra, nxu yenge so seene tonge, nxu yi ti Isirayila kaan bonne ye ra, nxu yi e xali e yirene yi. Nayi, nxo denbayane luma nen taa makantanxine kui, e ratanga yamanani ito muxune ma. 18 Nxu mi xete nxu konne yi, fo Isirayila kaane birin na doxo e boxone yi. 19 Nxu mi boxon sotoma Yuruden baan foxo kedenni alo e tan, bayo nxu bata nxo boxon soto be binni baan sogeteden binni.” 20 Musa yi a fala e xa, a naxa, “Xa e falani ito liga, xa e yenge so seene tongo Alatala xa, 21 xa e sofane birin Yuruden baan gidi Alatala yetagi han a yi a yaxune birin kedi, 22 xa yamanan lu Alatala noon bun, nayi Alatala nun Isirayila tinma nen e yi xete be. Nayi, yamanani ito findima nen e gbeen na Alatala yetagi. 23 Koni xa e mi na liga, e bata yulubin liga Alatala ra. E xa a kolon, fa fala e yulubin saranna e lima nen. 24 Awa, e xa taane ti e denbayane xa, e nun sansanne e xuruse kurune xa, koni e xa e de ti xuine rakamali del!” 25 Gadi kaane nun Ruben kaane yi a fala Musa xa, e naxa, “Nxu tan, i ya walikene a ligama nen alo i a yamarixi kii naxan yi. 26 Nxo diine nun nxo naxanle nun nxo xuruseene birin luma nen Galadi taane yi. 27 Koni nxu tan i ya walikene birin yenge so seene tongoma nen, nxu siga yenge sodeni Alatala yetagi, alo nxu kanna a falaxi kii naxan yi.” 28 Musa yi yamarin fi saraxarali Eleyasari ma e nun Nunu a dii Yosuwe ma, e nun Isirayila bonson mangane ma e fe ra. 29 Musa yi a fala e xa, a naxa, “Xa Gadi kaane nun Ruben kaane Yuruden baan gidi e foxo ra, e birin yi yenge so seene tongo Alatala xa, nayi yamanan na lu e noon bun, e Galadi yamanan so e yii e gbeen na. 30 Koni xa e birin mi gidi e foxo ra yenge so seene ra e yii, e xa doxo e tagi Kanan boxoni.” 31 Gadi kaane nun Ruben kaane yi a fala, e naxa, “Alatala bata naxan fala, nxu tan i ya walikene na ligama nen. 32 Nxu gidima nen Kanan yamanani Alatala xa yenge so seene ra nxu yii, koni nxu kee boxon sotoma nen Yuruden baan be binni.” 33 Musa yi Amorine manga Sixon ma yamanan nun Basan manga Ogo a yamanan so Gadi kaane nun Ruben kaane nun Yusufu a dii Manase bonsonna foxo kedenna yii, e nun e taane nun boxon naxanye e rabilinni. 34 Gadi kaane yi Dibon nun Ataroti nun Aroyeri nun 35 Atiroti-Sofani nun Yaaseri nun Yogboha nun 36 Beti-Nimira nun Beti-

Haran ti taa makantanxine ra, e yi xuruse sansanne sa. 37 Ruben kaane yi Xesibon ti, e nun Eleyale nun Kiriayatayimi nun 38 Nebo nun Baali-Meyon, e naxanye xiliye masara, e nun Sibima. E taan naxanye ti e yi ne xili sa. 39 Manase a dii Makiri yixetene yi siga Galadi yi, e yi a suxu, e yi Amorine kedi naxanye yi doxi na. 40 Nayi, Musa yi Galadi so e yii alogo e xa doxo na. 41 Yayiri, Manase yixetena nde yi siga, a yi taadina ndee suxu, a yi e xili sa “Yayiriya.” 42 Noba yi siga, a yi Kenata suxu e nun a banxidene, a yi a xili sa “Nobaya.”

33 Isirayila kaane sigadene ni i ra e to mini Misiran yi e gali yeen ma, Musa nun Haruna yamarin bun. 2 Musa yi tidene sebema Alatalaa yamarin nan ma. E sigadene ni i ra, e tide yeen ma. 3 E keli Ramisesi yi kike singen xii fu nun suulundeni Halagi Tiin Dangu Loxon Sanla kuye baani. Isirayila kaane xoroyaxin yi mini Misiran kaane birin yetagi, 4 Misiran kaane yi e dii singene binbine maluxunma waxatin naxan yi Alatala naxanye faxe e ye. Amasoto Alatala e alane yalagi nen. 5 Isirayila kaane yi keli Ramisesi yi, e sa daaxa Sukoti yi. 6 E yi keli Sukoti yi, e sa daaxa Etama yi tonbonna danna ra. 7 E yi keli Etama yi, e yi xete han Pihahiroti yi, Baali-Sefon yetagi, e yi sa daaxa Migidoli dexon. 8 E yi keli Pihahiroti yi, e yi baan gidi tonbonna binni, e yi xii saxan siga ti Etama tonbonni, e yi sa daaxa Mara yi. 9 E yi keli Mara yi, e siga Elimi yi, tigi fu nun firin e nun tugu bili tonge solofere yi denaxan yi. E yi daaxa menni. 10 E yi keli Elimi yi, e sa daaxa Gbala Baan dexon. 11 E yi keli Gbala Baani, e sa daaxa Sin tonbonni. 12 E yi keli Sin tonbonni, e sa daaxa Dofika yi. 13 E yi keli Dofika yi, e sa daaxa Alusi yi. 14 E yi keli Alusi yi, e sa daaxa Refidimi yi, yamaan mi min igen soto denaxan yi. 15 E yi keli Refidimi yi, e sa daaxa Sinayi tonbonni. 16 E yi keli Sinayi tonbonni, e sa daaxa Kibiroti-Hatawa yi. 17 E yi keli Kibiroti-Hatawa yi, e sa daaxa Xaseroti yi. 18 E yi keli Xaseroti yi, e sa daaxa Ritima yi. 19 E yi keli Ritima yi, e sa daaxa Rimon-Peresi yi. 20 E yi keli Rimon-Peresi yi, e sa daaxa Libina yi. 21 E yi keli Libina yi, e sa daaxa Risa yi. 22 E yi keli Risa yi, e sa daaxa Kehelata yi. 23 E yi keli Kehelata yi, e sa daaxa Saferi geyaan ma. 24 E yi keli Saferi geyaan ma, e sa daaxa Harada yi. 25 E yi keli Harada yi, e sa daaxa Makeloti yi. 26 E yi keli Makeloti yi, e sa daaxa Taxati yi. 27 E yi keli Taxati yi, e sa daaxa Tera yi. 28 E yi

keli Tera yi, e sa daaxa Mitika yi. **29** E yi keli Mitika yi, e sa daaxa Hasimona yi. **30** E yi keli Hasimona yi, e sa daaxa Moseroti yi. **31** E yi keli Moseroti yi, e sa daaxa Bene-Yakani yi. **32** E yi keli Bene-Yakani yi, e sa daaxa Horo-Gidigadi yi. **33** E yi keli Horo-Gidigadi yi, e sa daaxa Yotobata yi. **34** E yi keli Yotobata yi, e sa daaxa Abirona yi. **35** E yi keli Abirona yi, e sa daaxa Esiyon-Gebere yi. **36** E yi keli Esiyon-Gebere yi, e sa daaxa Kadesi yi Sini tonbonni. **37** E yi keli Kadesi yi, e sa daaxa Horo geyaan ma, Edon yamanan danna. **38** Saraxarali Haruna yi te Horo geyaan ma, Alatalaa yamarin ma. A sa faxa menni, Isirayila kaane minin jɛɛ tonge naaninden Misiran yi a kike suulunden xii singeni. **39** Haruna bata yi jɛɛ kɛmɛ mɔxɔɲɛn nun saxan sɔto siimayaan na a faxa waxatin naxan yi Horo geyaan fari. **40** Kanan Manga Aradi naxan yi dɔxi Negewi yi Kanan yamanani, na yi Isirayila kaane fa feen mɛ. **41** E yi keli Horo geyaan ma, e sa daaxa Salimona yi. **42** E yi keli Salimona yi, e sa daaxa Punon yi. **43** E yi keli Punon yi, e sa daaxa Oboti yi. **44** E yi keli Oboti yi, e sa daaxa Ye-Abarimi yi Moyaba danna ra. **45** E yi keli Iyimi yi, e sa daaxa Dibon-Gadi yi. **46** E yi keli Dibon-Gadi yi, e sa daaxa Alamɔn-Dibilatayimi yi. **47** E yi keli Alamɔn-Dibilatayimi yi, e sa daaxa Abarimi geyane yi Nebo yetagi. **48** E yi keli Abarimi geyane yi, e sa daaxa Moyaba meremerene yi, Yuruden baan dɛxɔn, Yeriko yetagi. **49** E yi daaxa Yuruden baan dɛxɔn Moyaba meremerene yi, keli Beti-Yesimoti yi han Abeli-Sitimi. **50** Alatala yi a fala Musa xa Moyaba meremerene yi Yuruden baan dɛxɔn Yeriko yetagi, **51** a Musa xa a fala Isirayila kaane xa, a naxa, “E na Yuruden baan gidi, e so Kanan yamanani, **52** e xa yamanan muxune birin kedi. E e suxure gemene nun suxure wurene kala, e nun e taane kidene. **53** E e yamanan tongo e yi dɔxo na, amasɔto n bata a so e yii e gbeen na. **54** E masensenna ti, e yamanani taxun bɔnsɔnne ra. Naxanye wuya, e kɛɛ bɔxo gbeen so ne yii. Naxanye mi wuya e xa a xurin so ne yii. E na naxan sɔto masensenna xɔn, e gbeen nan na ra. Kɛɛ bɔxɔne yitaxunma e fafane bɔnsɔn yɛɛn nan ma. **55** Koni xa e mi yamanan muxune birin kedi, e na naxanye lu na, ne e tɔrɔma nɛn alo tansinna e yɛɛne xɔn hanma janla naxanye e fatin masɔxɔnma. E e tɔrɔma nɛn yamanani e dɔxɔma dɛnaxan yi. **56** Nayi, n naxan nagidixi e ma, na ligama e tan nan na.”

34 Alatala yi a fala Musa xa, **2** a a xa a yamari Isirayila kaane ma, a naxa, “E na so Kanan yamanani, n bɔxɔn naxan soma e yii e kɛɛn na, na danne ni i ra: **3** E yamanan yiifari fɔxɔn danna findima Sini tonbonna nan na, Edon yamanan danna ra. Na danna fɔlɔma Fɔxo Daraan yiifari fɔxɔn nin sogeteden binni. **4** A bilinma nɛn Akaribimi geyaan yiifari fɔxɔni, siga Sini binni, dangu Kadesi-Barineya yiifari fɔxɔn ma han Xasari-Adari han Asimon. **5** Keli Asimon yi, danna mɔn danguma nɛn sa dɔxo Misiran xuden na, a sa dɔxo fɔxo igen na. **6** Sogegodode binni, danna findima fɔxo ige gbeen nan na. **7** Kɔmɛnna ma, e xa danna sa fɔxo ige gbeen nun Horo geyaan tagi. **8** Keli Horo geyaan ma, e yi a radangu Lebo-Xamata han Sedadi yi. **9** A yi siga han Sifiron, sa dɔxo Xasari-Enan na. E kɔmɛn ma danna nan na ra. **10** Sogeteden binni, e xa danna sa keli Xasari-Enan yi siga Sefami binni. **11** Keli menni, a yi siga Ribila binni, Ayin sogeteden binni, sa dɔxo tintin yiren na Kinereti Daraan sogetedeni. **12** Danna yi sa dɔxo Yuruden Baan na siga Fɔxo Darani. E yamanan danne findin ne nan na.” **13** Musa yi na yamarine rali Isirayila kaane ma. A mɔn yi a fala e xa, a naxa, “Alatala yamanani ito nan yitaxunma bɔnsɔn solomanaanin nun a tagiin na masensenna xɔn. **14** Amasɔto Ruben bɔnsɔnna nun Gadi bɔnsɔnna nun Manase bɔnsɔnna fɔxo kedenna bata yi e kɛɛ bɔxɔn sɔto. **15** Bɔnsɔn firin nun a tagini ito bata e kɛɛ bɔxɔn sɔto Yuruden Baan sogeteden binni, Yeriko yetagi.” **16** Alatala yi a fala Musa xa, a naxa, **17** “Saraxarali Eleyasari nun Nunu a dii Yosuwe xa yamanani taxun. **18** I mɔn xa bɔnsɔn manga keden keden sa e fari e malideni.” **19** E xinle ni itoe ra: Yefune a dii Kalebi Yuda bɔnsɔnni, **20** Amixudi a dii Semuyeli Simeyɔn bɔnsɔnni, **21** Kisilon ma dii Elidadi Bunyamin bɔnsɔnni, **22** Yogili a dii Buki, Dan bɔnsɔn mangana, **23** Efodi a dii Xaniyeli, Yusufu a dii Manase bɔnsɔn mangana, **24** Sifitan ma dii Kemuyeli, Yusufu a dii Efirami bɔnsɔn mangana, **25** Parinaki a dii Elisafan, Sabulon bɔnsɔn mangana, **26** Asan ma dii Palitiyeli, Isakari bɔnsɔn mangana, **27** Selomi a dii Axixudi, Aseri bɔnsɔn mangana, **28** e nun Amixudi a dii Pedaheli Nafatali bɔnsɔn mangana. **29** Alatala ne nan yamarixi e xa Kanan yamani taxun Isirayila kaane ra.

35 Alatala yi a fala Musa xa Moyaba meremerene yi Yuruden Baan dɛxɔn Yeriko yetagi, a naxa, **2** “Isirayila kaane yamari a e xa taane ba e kɛɛ bɔxɔne

ra e yi e fi Lewi bōnsōnna muxune ma, alogo e xa dōxo na. E mōn yi na taane rabilin xēene so e yii. **3** Nayi, Lewi bōnsōnna muxune taane sōtōma nēn e dōxdodene ra, e yi bōxōne sōtō e rabilinni e jingene nun e seene nun e xuruseene xa. **4** E bōxōn naxanye soma Lewi bōnsōnna muxune yii, ne danne nun taane yinne xa makuya e bode ra han nōngōnna yē wuli keden. **5** Taan fōxo naaninne kuyan xa lan, nōngōnna yē wuli firin sogeteden binni, nōngōnna yē wuli firin yiifari fōxōni, nōngōnna yē wuli firin sogegododen binni, e nun nōngōnna yē wuli firin kōmēnna ma. Taan xa lu a tagini. E xēene danne sama na kii nin. **6** E taan naxanye soma Lewi bōnsōnna muxune yii, ε xa sennin sugandi ne yē marakisi taane ra alogo muxun naxan na faxan ti, a xa a gi, a siga mēnna nde yi. E mōn xa taa tonge naanin nun firin gbete ye so e yii. **7** A malanxina, ε taa tonge naanin nun solomasexē nan soma Lewi bōnsōnna muxune yii e nun e rabilinne xēene. **8** Isirayila bōnsōnna birin xa taana ndee so e yii naxan nun a bōnsōnna lan. Taa gbege xa ba bōnsōn gbeene bōxōne ra, ndedi yi ba bōnsōn xurine bōxōne ra.” **9** Alatala yi a fala Musa xa, **10** a a xa a fala Isirayila kaane xa, a naxa, “E na Yuruden baan gidi ε so Kanan yamanani, **11** ε xa taana ndee sugandi marakisi taane ra. Naxan na faxan ti a mi a rakelixa a ma, a a gima nēn a siga mēnna nde yi. **12** A yi ratanga faxes muxun gbeepjoxo muxun ma mēni, alogo a nama faxes benun yamaan yi a makiti. **13** E taan naxanye soma e yii, taa sennin nan findima marakisi taane ra ne yē. **14** Marakisi taa saxan xa lu Yuruden baan sogeteden binni, saxan Kanan yamanani. **15** Muxune ratangama nēn taa senninni itoe yi, Isirayila kaana hanma xōjēn naxan dōxi Isirayila kaane yē. Naxan na faxan ti, a mi a rakeli a ma, fō a xa a gi, a siga mēnna nde yi.” **16** “Xa muxuna nde faxan ti wure ma seen na, faxes tiin nan na kanna ra. A lan a yi faxes. **17** Xa a gēmen tongo naxan muxun faxes, a muxuna nde gōlon a ra, a yi a faxes, faxes tiin nan na kanna ra. A lan a yi faxes. **18** Xa a wudin tongo naxan muxun faxes, a yi muxuna nde bōnbō a ra, a faxes, faxes tiin nan na kanna ra. A lan a yi faxes. **19** Faxes muxun gbeepjoxo muxun nan faxes tiin faxama. A na a to, a xa a faxes. **20** Xa muxuna nde a boden nabira, a bata yi a yitōn xōnnantenanyi, hanma a a rakeli a ma, a yi a gōlon, a yi a faxes, **21** hanma a yi a bōnbō xōnnantenanyi, a yi a faxes, faxes tiin nan na kanna ra. A lan a yi faxes. Faxes muxun gbeepjoxo muxun na a to, a xa a faxes.” **22** “Koni xa muxuna

nde a boden nabira tantanni, xōnnantenyaan mi a ra, hanma a a gōlon, a mi a rakeli a ma, **23** hanma a mi a toxi, a yi gēmen nabira a ma naxan a faxes, a yi faxes, nayi bayo a yaxu mi a ra, a mi yi waxi fe jaxin liga feni a ra, **24** yamaan xa faxes tiin nun faxes muxun gbeepjoxo muxun makiti na sariyane xōn. **25** Yamaan xa faxes tiin xun mafala faxes muxun gbeepjoxo muxun xōn, e mōn yi a xali marakisi taani a yi denaxan yi. Faxes tiin xa lu marakisi taani han saraxarali kuntigin yi faxes, naxan masusan ture sarijanxin na. **26** Koni xa faxes tiin mini marakisi taan danna ra, a yi denaxan yi **27** faxes muxun gbeepjoxo muxun yi a to marakisi taan bōxōn fari ma, faxes muxun gbeepjoxo muxun nōn nēn a faxadeni, a mi yatema faxes tiin na. **28** Amasōtō faxes tiin lan nēn a lu marakisi taani han saraxarali kuntigin yi faxes. Fō na na faxes a yi nō xetē a bōxōne yi.” **29** “E sariyane nan ne ra waxati famatōne birin yi, ε nēma dōxi dēdē yi. **30** Naxan na muxun faxes, e xa a faxes xa sereyane sereyaan ba a a funfun na a ra. Koni ε nama muxu yo faxes sereya kedenna fala xuiin ma.” **31** “E nama gbetin nasuxu faxes tiin xunba saren na naxan lan a faxes. E xa a faxes. **32** E nama gbetin nasuxu muxun yii naxan bata a gi, a siga marakisi taani, alogo a mōn xa xetē, a dōxo a bōxōni benun saraxarali kuntigin xa faxes. **33** E nama yamanan naxōsi ε dōxi denaxan yi. Anu, muxu faxan yamanan xōsima nēn. Bōxōn mi rasarijanma faxes tixin ma fō faxes tiin na faxes. **34** E nama yamanan naxōsi ε dōxi denaxan yi, e nun n tan fan dōxi denaxan yi. Amasōtō Alatala nan n tan na, naxan dōxi Isirayila kaane tagi.”

36 Denbaya xunna ndee yi fa fala tideni Musa nun Isirayila bōnsōnne yēeratine xa keli Makiri a dii Galadi bōnsōnni, Manase mamandenna, Yusufu yixetene xabilane. **2** E yi a fala, e naxa, “Alatala to a yamari nxu kanna Musa ma a xa kēē bōxōne yitaxun Isirayila kaane ra masensenna xōn, a mōn a yamarixi a ma nēn a xa nxu ngaxakedenna Selofexadi kēēn so a dii tēmene yii. **3** Iki xa Isirayila bōnsōn gbete xēmēna e futu, e kēē bōxōn bama nēn nxu bōnsōnna gbeēn na, a sa e bōnsōn nēnēna bōxōn fari. Nayi, kēē bōxōn naxan soxi nxu bōnsōnna yii masensenna xōn, na nde bama a ra nēn. **4** Nayi, Isirayila Xōrōya Jēēn na a li, e kēē bōxōn bama nēn nxō bōnsōnna gbeēn na, a sa e bōnsōn nēnēn gbeēn fari.” **5** Musa yi Alatalaa yamarine rali Isirayila kaane ma, a naxa, “Yusufu a diine bōnsōnna muxune jōndi. **6** Alatalaa yamarin ni i ra Selofexadi a

dii temene fe yi: Xemen naxan na e kenene e xa dɔxo na xon, koni a xa findi e baba bɔnsɔnna xabilan muxuna nde nan na, 7 alogo Isirayila kee bɔxone nama keli bɔnsɔn gbete yi siga bɔnsɔn gbete yi. Isirayila kaane birin xa e benbane bɔnsɔnna kee bɔxon nan soto. 8 Xa naxalan yo bɔxon soto keene na Isirayila bɔnsɔnna nde yi, a xa dɔxo a baba bɔnsɔnna xabilan muxuna nde xon, alogo Isirayila kaane birin xa e benbane kee bɔxon soto. 9 Isirayila kee bɔxone nama keli bɔnsɔn gbete yi siga bɔnsɔn gbete yi, Isirayila bɔnsɔnne birin kee bɔxone xa lu e yii.” 10 Selofexadi a dii temene yi a liga alo Alatala a yamari Musa ma kii naxan yi. 11 Maxala nun Tirisa nun Xɔgala nun Milika nun Noha nan Selofexadi a dii temene ra. E yi dɔxo e baba ngaxakedenne dii xemene xon. 12 E dɔxo nen e baba Yusufu a dii Manase bɔnsɔnna xabilane muxuna ndee xon. Na ma, e kee bɔxone yi lu e baba bɔnsɔnna xabilani. 13 Yamarine nun sariyane nan ne ra Alatala naxanye fala Isirayila kaane xa fata Musa ra Moyaba meremerene yi Yuruden baan dexon Yeriko yetagi.

Sariyane

1 Falane ni itoe ra, Nabi Musa naxanye fala Isirayila kaane birin xa. Na waxatini, a yi Yuruden sogetede mabinna nin, Araba tonbonni Sufi yetagi, Paran, Tofeli, Laban, Xaseroti, nun Disahabi longonne ra. **2** Keli Horebe geyaan ma siga Kadesi-Barineya, xii fu nun keden sigatiin na a ra kiraan xon ma naxan danguma Seyiri geyane binni. **3** E minin jee tonge naaninden kike fu nun kedenden xii singe laxoni Misiran boxoni, Nabi Musa yi Alatalaa yamarine birin nali Isirayila kaane ma. **4** Na waxatini, Musa bata yi Amorine manga Sixon no yengeni naxan yi dxi Xesibon yi, e nun Manga Ogo, Basan mangana, naxan yi dxi Asataroti nun Edere yi. **5** Yuruden sogeteden mabinni, Moyaba boxoni, Nabi Musa yi Alaa sariyan yeba e xa, a naxa: **6** Alatala en ma Ala ito nan falaxi en xa, Horebe geyaan ma, a naxa, “E bata bu geyani ito ma. **7** E keli, e siga geyane ma Amorine denaxan yi, menna longonna birin, Araba boxoni, geyane fari, Sefela nun Negewi binni, foxo ige deen na, han Kanan boxoni, han Liban yi, sa dxi Efirati baa gbeen na. **8** E xa na boxon mato, n naxan fixi e ma. E siga, e xa na tongo, bayo n tan Alatala yati nan n kolo e benbane xa, Ibrahima nun Isiyaga nun Yaxuba, e nun e bonsonna birin hali e dangu xanbini, a n na boxon nan soma e yii.” **9** Na waxatini, n ni ito nan fala e xa, n naxa, “N tan kedenna mi noe e goronna tonge. **10** Alatala e Ala bata e rawuya ayi. Iki e bata wuya ayi alo sarene kore. **11** Alatala e benbane Ala xa e rawuya ayi han wuli wuli. A xa e baraka alo a a falaxi kii naxan yi. **12** Koni, n tan kedenna noe e birin goronna tonge di, n yi e kitine birin sa? **13** E xa xemene sugandi e bonsonne yi, naxanye xaxili fan, e feene yee toma, e binyaxi. N ne nan tima yamaan xun na.” **14** E yi n yabi, a n ma falan lanxi. **15** Nayi, n yi e yeeratine tongo, xeme xaxilimaan naxanye binyaxi e bonsonne ye. N yi e dxi muxu wuli xun na hanma muxu keme hanma muxu tonge suulun hanma muxu fu. E findi kuntigine ra e bonsonne tagi. **16** Na waxatini, n yi yamarini ito so e kitisane yii. N naxa, “E xa e tuli mati e bari bodene ra. E yi e birin makiti tinxinni, e ngaxakedenne tagi e nun e tan nun xajene tagi. **17** E nama muxu yo rafisa bonne xa kiti sadeni. E e tuli mati senbe kannu nun senbetaren fan na. E nama gaxu muxu yo yee ra, bayo Ala nan kitisaan na. Xa kitin xodxi e yii, e xa a fala n xa, n tan yi kitin sa.” **18** Na kiini n bata yamarine

birin yeba e xa, a lan e xa naxan liga. **19** Na to dangu, en bata keli Horebe geyaan ma, en yi dangu tonbon magaxuxin na e denaxan toxi. En yi ti kiraan xon siga Amori geyane ma, alo Alatala en ma Ala a yamari en ma kii naxan yi. En yi so Kadesi-Barineya yi. **20** N yi a fala e xa, n naxa, “E bata Amori geyane li, Alatala en ma Ala denaxan fixi en ma. **21** A mato, Alatala e Ala bata boxoni ito dxi en yee ra. E siga, e xa na tongo alo Alatala e benbane Ala a falaxi e xa kii naxan yi. E nama gaxu, e nama kuisan.” **22** Na waxatini, e birin yi fa n fema, e yi a fala n xa, e naxa, “En xa xerane rasiga, e xa sa boxoni ito feene rakorosi. E fa dentegen sa en xa, en lan en xa sigan ti kiraan naxan xon e nun en sigama taan naxanye yi.” **23** E miriyaan yi rafaan n ma. Nanara, n yi xeme fu nun firin yeba e bonson keden kedenne tagi. **24** E yi siga geyane yi han e sa Esikoli lanbanna li. E yi na yirene rakorosi. **25** E yi na boxon bogi seene ba, e yi fa e yita en na. E yi dentegen sa en xa, e naxa, “Alatala en ma Ala boxo fajin nan fixi en ma.” **26** Koni e mi tinxi sigi, e murute nen Alatala e Alaa yamarin bun ma. **27** E yi lu tondi falane tiye e bubune kui. E naxa, “Alatala en naxaxuxi, nanara a en naminixi Misiran yi alogo a xa en so Amorine yii e yi en halagi. **28** En sigan minen? En ngaxakedenne bata en tunnaxolo, e naxa, ‘Men kaane fangan gbo en xa! E mon kuya en xa. Na taane gbo. Yinna naxanye e rabilinni, ne texi han kore. Nxu bata Anakine yati to na yi.’” **29** N yi a fala e xa, n naxa, “E nama kuisan. E nama gaxu e yee ra de! **30** Alatala e Ala naxan tima e yee ra, a tan nan yengen soma e xa alo a a liga e yee xori kii naxan yi Misiran yi han tonbonni. **31** E bata a to nayi, Alatala e Ala faxi e ra nen alo muxuna a diin xalima kii naxan yi e sigatiin birin yi han e yi fa be li.” **32** Koni na birin yi, e mi yi laxi Alatala e Ala ra. **33** A tan nan yi tima e yee ra kiraan xon, a daaxadene fen e xa e luma denaxanye yi. Kdeen na, a kirani yalan teen na. Yanyin fan na, kundaan yi ti e yee ra. **34** Alatala to e falan me, a xolo, a yi a kolo, **35** “Muxu kobini ito yo mi soe boxo fajini ito yi, n naxan layirin tongo e benbane xa **36** fo Yefune a dii Kalebi, na nan a toma. N na boxon soma a yii nen a naxan yisigaxi e nun a bonsonna, bayo a lu nen Alatalaa kiraan xon ken!” **37** Alatala bata xolo n fan ma e tan ma fe ra. A yi a fala, a naxa, “I tan yeteen mi soma boxoni ito yi. **38** Nunu a dii Yosuwe, i mali muxun nan fama sodeni. I xa a senbe so, bayo a tan nan tima Isirayila yee ra, e boxoni ito soto e keen na. **39** E diine, e a falaxi naxanye

ma a e findima nen muxu suxine ra, e tan naxanye munma fe kobi nun fe fajin tagi rabaan kolon, e tan nan soma na bəxəni. N na fima e tan nan ma. E tan nan a sətəma e kəen na. 40 Koni e tan, e mən xa xetə, e siga tonbonni, siga Gbala Baan kiraan xən.” 41 E yi a yabi, e naxa, “Nxu bata findi yulubi kanne ra Alatala yee ra yi, koni iki nxu xa siga yenge sodeni, alo Alatala en ma Ala a yamarixi nxu ma kii naxan yi.” E birin yi e yengeso seene tongo, bayo e a mirixi nen a geya bəxəni ito masəton mi xədxə. 42 Koni Alatala yi a fala n xa, a naxa, “A fala e xa, i naxa, ‘E nama siga yenge sodeni de! N mi luma e xən. E yaxune e noma nen.”” 43 N yi e maxadi na kiini, koni e mi e tuli mati n na. E yi murute Alatalaa yamarin ma, e yi siga geya yireni wasoni. 44 Amarin naxanye yi dəxi geyane yi, ne yi mini e yengedeni alo kumi jejeene dinma muxun na kii naxan yi. E yi e kedi, e yi e bənbə keli Seyiri han Xoroma. 45 E to xetə, e yi wuga Alatala yetagi han! Koni Alatala mi e xuiin name, a mi a tuli mati e xuiin na. 46 E mən yi lu Kadesi yi alo e bu na kii naxan yi a singeni.

2 Na xanbi ra, nxu yi xetə tonbonni nxu kiraan suxu naxan danguma Gbala Baani, alo Alatala a fala n xa kii naxan yi. Nxu yi Seyiri geyane mabilin xii wuyaxi bun. 2 Alatala yi a fala n xa, a naxa, 3 “E bata bu geyani ito rabilinni. E firifiri kəmənnə ma.” 4 A yi a fala n xa a n xa yamarini ito fi e ma. E danguma nen Seyiri bəxəni, e ngaxakedenne dənaxan yi, Esayu bənsənnə. E gaxuma nen e yee ra, koni e xa a liga e yeren ma, 5 e nama yengen gidi e ma, bayo n mi sese soma e yii fata e bəxən na, hali san tidena. N bata Seyiri geyane fi Esayu ma. 6 E na donseen nun igen naxan tongo fə e xa a saren fi nen gbetin na. 7 Alatala e Ala bata barakan sa e kəwanli. A yi a ɲəxə lu e sigatiin xən ma e yi tonbonni ito yi waxatin naxan yi. Nee tonge naaninni ito bun ma, Alatala e Ala nan yi e xən. Sese mi dasaxi e ma. 8 Nanara, en yi dangu en ngaxakedenne bəxən dəxən Esayu bənsənnə naxanye dəxi Seyiri bəxəni. En mən yi Araba kiraan suxu, naxan kelima Elati nun Esiyon-Gebere yi. Na xanbi ra, en yi en maxetə, en yi dangu Moyaba tonbon kiraan xən. 9 Alatala yi a fala n xa, a naxa, “E nama yengen gidi Moyaba kaane ma de! E nama e fen yengen na de, bayo n mi e bəxə yo soma e yii e konni. N bata Ari bəxən fi Loti bənsənnə ma. 10 Emi kaane nan yi Ari bəxəni nun. Siya senbemaan nan yi ne ra. E yi wuya, e

kuya alo Anaki bənsənnə muxune. 11 Muxuna nde yi e yatəma Refa kaane nan na, alo Anaki bənsənnə muxune, koni Moyaba kaane yi a falama e ma nen a ‘Emi kaane.’ 12 Xori kaane nan yi dəxi Seyiri bəxəni a singeni. Koni Esayu bənsənnə muxune yi e kedi, e yi e raxəri. E tan yi dəxə na yi, alo Isirayila kaane fan naxan liga na bəxəni Alatala dənaxan fi e ma. 13 Iki, e keli, e yi Serede xuden gidi.” Nayi, en yi na gidi. 14 Nee tonge saxan nun solomasexə nan dangu xabu en keli Kadesi-Barineya yi, han en Serede xuden gidi waxatin naxan yi. Na lixi, yengesoona naxanye birin yi na na waxati danguxini nun, ne birin bata yi faxa alo Alatala a kələ e xa kii naxan yi. 15 Alatala yi keli e xili ma han e birin yi ɲan daaxadeni. 16 Na yengesone to ɲan yamaan ye, e faxa, 17 Alatala yi a fala n xa, a naxa, 18 “To, e danguma nen Moyaba danna ra, siga Ari bəxəni. 19 E Amonine lima nen na. E nama yengen gidi e ma de! E nama e fen yengen na, bayo n mi e bəxə yo soma e yii. N na fixi Loti bənsənnə nan ma.” 20 Na bəxən fan yi yatəxi Refa kaane gbeen nan na, bayo Refa kaane yi dəxi na nun. Amonine yi a falama e ma nen a “Samisumi kaane.” 21 Siya senbemaan nan yi e ra, e yi wuya, e kuya alo Anaki bənsənnə muxune. Koni Alatala yi e halagi Amoni kaane xən. Amoni kaane yi e kedi, e yi dəxə e bəxəni. 22 Ala bata yi na fe sifan liga Esayu a diine xa naxanye yi dəxi Seyiri bəxəni, a to yi Xori kaane halagima e xən. E e kedi nen e yi dəxə e funfuni. E dəxi menni han iki. 23 Awi kaane tan, naxanye yi dəxi taane kui han Gasa, Kafatoro kaane nan ne halagi e to fa keli Kafatoro yi. E yi dəxə e funfuni. 24 Ala yi a fala en xa, a naxa, “E ti kiraan xən, e xa Arinon xuden gidi. A mato, n bata Xesibən manga Sixən, Amarin so e yii, e nun a bəxəna. Iki, e xa na tongo. E xa na yengen nakeli. 25 To, n na e yeeragaxun luma nen dunuɲa siyane birin yi. E na e xinla me, e xuruxurunma nen gaxuni gbirigbiril!” 26 N yi xərane rasiga bəɲe xunbeli falane tideni Xesibən manga Sixən xa, keli Kedemoti tonbonni. N naxa, 27 “Nxu wama i ya bəxəni gidi feni. Nxu sigama kira gbeen nan tun xən. Nxu mi sigə kəmənnə ma, nxu mi sigə yiifanna ma. 28 Nxu na donseen nun igen naxan tongo, nxu a birin saren fima nen gbetin na. A lu nxu xa dangu nxu sanni i ya bəxəni. 29 Esayu bənsənnə naxanye dəxi Seyiri bəxəni e nun Moyaba kaan naxanye dəxi Ari bəxəni, ne bata yi nxu sago sa a nxu xa dangu e bəxəne yi. I fan xa n sago sa alogo nxu xa Yurudən baan gidi, nxu yi so bəxəni Alatala

nxo Ala denaxan fixi nxu ma.” 30 Koni Xesibon manga Sixon yi tondi nxu dangu feen ma a boxoni, bayo Alatala e Ala bata yi a xaxinla xodoxo ayi. A yi a bopen balan alogo a xa a so e yii alo a kii naxan yi to. 31 Alatala yi a fala n xa, a naxa, “A mato, n bata Sixon nun a boxon so e yii. E xa sa na tongo e gbeen na.” 32 Sixon nun a yamaan birin yi fa en yengedeni Yahasi yi. 33 Alatala en ma Ala yi Sixon so en yii, en yi a no, e nun a diine nun a yamaan birin. 34 En yi na taane birin suxu, en yi e birin kala. En mon yi xemene nun jaxanle nun diine birin faxa. En mi muxu yo lu a nii ra. 35 En mi sese tongo fo xuruseene nun se kenden naxanye yi na taane kui. 36 Keli Aroyeri Arinon xuden de, e nun taan naxan na meremereni, siga han Galadi, taa yo mi no soto en ma. Alatala en ma Ala e birin so nen en yii. 37 Koni e mi e masoxi Amonine boxon na, hanma Yaboko xuden de, hanma taan naxanye na geyane ma alo Alatala a yamari e ma kii naxan yi.

3 En yi en maxete, en yi te Basan kiraan xon. Basan manga Ogo yi mini en yengedeni Edere yi, e nun a ganla birin. 2 Alatala yi a fala n xa, a naxa, “I nama gaxu a yee ra, bayo n na soma i yii nen e nun a ganla birin e nun a boxona. I bata naxan liga Sixon na, Amordine mangana, naxan yi dxi Xesibon, i na nan ligama a fan na.” 3 Alatala en ma Ala yi Basan manga Ogo so en yii, e nun a ganla birin. En yi e birin faxa, muxu jeje yo mi lu. 4 Na waxatini, en yi a taane birin suxu. Na taa yo mi lu en mi denaxan suxu. Taa tonge sennin nan yi e ra naxanye yi Arigobi rabilinni Basan manga Ogo a mangayaan bun. 5 Na taane birin yi rabilinxi yin matexine nan na. E yi balanxi de wure daxine nan na. Banxide wuyaxi fan yi na naxanye mi yi rabilinxi yinne ra. 6 En yi na taane birin kala fefe, alo en na a liga Xesibon manga Sixon ma boxon na kii naxan yi. En yi xemene nun jaxanle nun diine birin faxa taane birin yi. 7 En yi seene birin kala fo xuruseene nun se kendene, en naxanye tongo. 8 Na waxatini, en yi boxone birin tongo Yuruden sogeteden binni, e ba Amordine manga firinne yii, keli Arinon xudeni han Xerimon geyana. 9 Sidon kaane a falama na geyaan ma nen a “Siriyon.” Amordine tan naxa a “Seniri.” 10 En yi na taane birin tongo na fiili yireni e nun Galadi boxona e nun Basan boxon birin, sa dxi Salaka nun Edere ra. Na taane birin yi Ogo a mangayaan nan bun Basan boxoni. 11 Basan manga Ogo nan keden mi faxa Refa kaane ye. A

wure saden mon Rabaha yi, Amonine manga taana. A kuyana, nongonna ye solomanaanin, a yigbona nongonna ye naanin. 12 Na waxatini, en yi na boxon tongo. Keli Aroyeri yi, sa dxi Arinon xude deen na e nun Galadi geyaan foxo kedenna e nun na taane, n yi na birin so Ruben nun Gadi bonsonna yii. 13 N yi Galadi foxo boden nun Basan manga Ogo boxon so Manase bonsonna foxo kedenna yii. Arigobi rabilinna boxon nun Basan boxon yi yatexi Refa kaane boxon nan na. 14 Manase a dii Yayiri yi Arigobi boxon findi a gbeen na han Gesuri kaane nun Maka kaane boxone danne. E yi Yayiri xili sa Basan boxon xun ma. Han iki e a falama Basan boxon ma nen a “Yayiri taana.” 15 N yi Galadi so Makiri yii. 16 N yi Galadi foxo kedenna so Ruben bonsonna nun Gadi bonsonna yii han Arinon xudena. Xude wunla nan na danna ra, sa dxi Yaboko xuden na, Amonine boxon danna. 17 N mon yi Araba boxon fan so e yii naxan danna lanxi Yuruden baan ma keli Kinereti Darani, sa dxi Araba Foxo Ige Daraan na, Pisiga geyaan lanbanni, sogeteden binni. 18 Na waxatini n yi yamarini ito fi e ma. N naxa, “Alatala e Ala bata boxoni ito fi e ma alogo a xa findi e gbeen na. Koni e xeme kendene birin xa e yiton e siga e ngaxakedenne Isirayila kaane yee ra yenge sodeni. 19 E jaxanle nun e diine nun e xuruseene nan tun luma taane kui n naxan soxi e yii. N na a kolon xuruse wuyaxi e yii. 20 E luma nen sofoyani han Alatala e Ala yi matabun fi e ngaxakedenne fan ma. Alatala e Ala boxon fima e ma nen Yuruden kidi ma. Na waxatini, e birin noe xete nen e gbee boxoni n naxan soxi e yii.” 21 Na waxatini, n yi yamarin so Yosuwe yii. N yi a fala a xa, n naxa, “I bata feene birin to i yeen na Alatala e Ala naxan ligaxi manga firinni itoe ra. Alatala na ligama nen yamanan birin na, i na dangu denaxan yi. 22 I nama gaxu e yee ra, bayo Alatala e Ala nan e yengema e xa.” 23 Na waxatini, n yi Alatala maxandi, n naxa, 24 “Marigina Alatala, i bata i ya fisamantenyaan nun i senben yita i ya walikeen na. Ala gbete yo mi kore xonna ma hanma boxon ma naxan noe i ya wanle nun i ya kabanakone lige. 25 Yandi, tin n xa Yuruden baan gidi alogo n xa na boxo fapin to naxan a kidi ma, e nun a geya yire fapina, e nun Liban boxona.” 26 Koni Alatala bata yi xolo n ma e tan ma fe ra. A mi n xuiin namexi. Alatala yi a fala n xa, a naxa, “A lu na ki, i nama fa feni ito fala n xa sonon. 27 Te Pisiga geyaan xuntagi, i yi sogegododen binna mato e nun komen foxon binni, e nun yiifari foxon binni, e nun

sogeteden binni. I xa a mato i yete yeen na. Koni i xa a kolon a fajin na, i mi Yuruden baan gidima. **28** Yamarin fi Yosuwe ma, i limaniyaan nun senben fi a ma, bayo a tan nan tima yamaan yee ra Yuruden baan gidideni. I boxon naxan toma, a tan nan a ligama Isirayila yi na boxon soto e kee boxon na.” **29** Nayi, en yi lu lanbanni Beti-Peyori yetagi.

4 Iki, Isirayila, e tuli mati. E xa tonne nun sariyane suxu, n na e xaranma naxanye ma iki, alogo e xa siimayaan soto, e mon xa boxon soto Alatala e benbane Ala naxan fixi e ma. **2** E nama sese sa n ma yamarin fari, n naxan falaxi e xa. E mon nama sese ba a ra. E xa Alatala e Ala yamarine suxu alo n na falama e xa kii naxan yi. **3** E bata a to e yee ra Alatala naxan ligaxi Baali-Peyori yi. Alatala e Ala bata muxun birin faja naxanye Baali suxuren batuxi Peyori yi. **4** Koni e tan naxanye biraxi Alatala e Ala foxo ra, e birin mon e nii ra han to. **5** E a kolon, n bata e xaran tonne nun sariyane ma alo Alatala n ma Ala a yamarixi n ma kii naxan yi, alogo e xa e suxu na boxoni denaxan findima e gbeen na. **6** E xa e suxu ki faji, alogo a xa findi lonnin na e xa, e nun xaxili fajin na siya gbetene yee ra yi. Siya gbetene na sariyani itoe e fe me, e a falama nen, e naxa, “Siya gbeen ito lonnixi, e xaxinla fan.” **7** Siyaan mundun ma ala masoxi a ra alo Alatala en ma Ala masoxi en na kii naxan yi, en na a maxandi waxatin naxan yi? **8** Siya gbeen mundun na alo en tan tonne nun sariya tinxinxine naxan yii alo n sariyan naxan soma e yii to? **9** E a liga e yeren ma e siimayaan birin yi, e yi e yete ratanga alogo e nama jinan na feene xon e naxanye toxi. Ne nama ba e bojeni. E xa e diine xaran ne ma e nun e fan yixetene. **10** E miri na boxon ma e ti Alatala e Ala yetagi waxatin naxan yi Horebe geyaan ma. Na boxoni Alatala yi a fala n xa, a naxa, “Yamaan birin xa malan n yetagi. N xa n ma sariyan fala e xa alogo e xa gaxu n yee ra e dunuja yi gidini. E mon xa e diine fan xaran ne ma.” **11** E yi e maso e ti geyaan san bun. Teen bata yi geyaan birin suxu, te han kore. Dimin nun tutin nun kundaan yi godo. **12** Alatala yi falan ti e xa teen tagi. E yi a xuiin me falan tiye, koni e mi a gbindin to. E yi a xuiin nan tun mema. **13** A yi a layirin nali e ma, yamari fune, a naxanye yamarixi e ma a e xa e suxu. A yi ne sebe geme walaxa firinne ma. **14** Na waxatini, Alatala yi n yamari, a n xa e xaran tonne nun sariyane ma, alogo e xa e suxu boxoni naxan findima e gbeen na, e na

Yuruden baan gidi. **15** Alatala falan ti e xa waxatin naxan yi Horebe geyaan fari, teen tagi, e mi a gbindin to. Nayi, e xa e yete ratanga, **16** e nama findi fe kalane ra, e suxuren nafala sena nde sawuran na naxan nun xemena hanma jaxanla maliga, **17** hanma subena naxan boxon ma, hanma xoliin naxan kore, **18** hanma bubusena hanma yexene igeni. **19** E nama e yee rate kore e sogen batu, hanma kiken, hanma sarene. Seen naxanye birin kore, e nama e yigodo ne xa, e nama e batu. Alatala e Ala nan ne soxi siyane birin yii naxanye dunuja yi. **20** Koni e tan, Alatala bata e ramini Misiran yamanani alo wuren bama sulun teeni kii naxan yi, alogo e xa findi a gbee yamaan na, alo e kii naxan yi to. **21** Alatala yi xolo n ma e fe ra. A yi a kolo, a n mi Yuruden baan gidima, n so boxo fajini ito yi Alatala e Ala naxan fi e ma e keen na. **22** N tan, n faxama boxoni ito nin. N mi Yuruden baan gidima. Koni e tan a gidima nen, e yi na boxo fajin tongo e gbeen na. **23** E a liga e yeren ma alogo e nama jinan Alatala e Alaa layirin xon a naxan tongoxi e xa. E nama se maliga suxure yo rafala Alatala e Ala tonna saxi naxan na, **24** bayo Alatala e Ala xoxolon, a luxi nen alo teen naxan halagin tima. **25** E na diine nun mamandenne soto waxatin naxan yi, e na bu na boxoni, xa e kalan ti, e suxuren nafala sena nde maligan na, e fe jaxin liga Alatala e Ala yetagi naxan a raxoloma, **26** koren nun boxon nan en serene ra to, e janma nen boxoni mafuren naxan findima e gbeen na Yuruden kidima. E mi siimaya sotoma. E halagima nen. **27** Alatala e raxuyama ayi nen siya gbetene tagi. E xurunje ayi ne ye Alatala na e xali denaxan yi. **28** E suxurene batuma nen menni, muxune naxanye rafalama wudin na, hanma gemen na, suxuren naxanye mi noe seen toe, e mi fe mema, e mi e degema, e mi se xirin mema. **29** E fama nen Alatala e Ala fendeni menni. E mon a toma nen, xa e a fen e bojen birin na e nun e niin birin yi. **30** E toroma waxatin naxan yi, na feene birin e lima nen. Na waxatini e xetema nen Alatala e Ala ma, e yi a xuiin name. **31** Bayo Alatala e Ala, Ala na a ra naxan kininkinin, naxan mi e rabepinma, naxan mi e halagima. A mi jinanje layirin xon, a a kolo naxan ma e benbane xa. **32** E miri fe fonne ma naxanye bata dangi, e nun naxanye bata liga xabu Ala Adama daci boxon fari waxatin naxan yi. E miri boxon yiren birin ma. Fe gbete bata liga naxan gbo ito xa ba? E bata na joxonna me ba? **33** Siya gbeten na ba naxan bata Ala fala xuiin me teen tagi, a mon yi lu a nii ra alo e tan? **34**

Ala mundun bata siyana nde ba siya gbeten yii misaale nun taxamasenne nun kabanakone nun yengene nun senbe gbeen nun nɔɔn nun fe magaxuxine xɔn, alo Alatala ε Ala feen naxanye birin liga ε xa Misiran yamanani ε yεε xɔri? **35** Na bata fixa ε xa alogo ε xa la a ra, a Alatala keden peen nan Ala ra, gbete mi na fo a tan. **36** E bata a xuiin name keli kore alogo a xa ε maxuru. A tεε gbeen yita ε ra bɔxɔn ma, ε mɔn yi a xuiin name teen tagi. **37** A ε benbane xanu nen, a yi e bɔnsɔnna fan sugandi hali e dangu xanbini. Na nan a toxi a yi ε ramini senben na Misiran yamanani. **38** A yi siyane kedi ε xa naxanye senben yi gbo ε tan xa. A yi e bɔxɔn so ε yii ε kεen na alo a kii naxan yi to. **39** E xa a kolon ε bɔjɛni to, a Alatala keden peen nan Ala ra kore xɔnna ma e nun bɔxɔn ma. Gbete mi na. **40** E xa a tɔnne nun a yamarine suxu, n naxanye soma ε yii to, alogo ε xa herin sɔto ε tan nun ε yixetene hali ε dangu xanbini, alogo ε xa siimaya xunkuyen sɔto bɔxɔni Alatala ε Ala denaxan fima ε ma han habadan. **41** Nabi Musa yi taa saxan sugandi Yuruden sogeteden binni. **42** Ne yi findi marakisi taane ra faxa tiine xa naxanye e boden faxama koni e mi a rakelixa a ma, e mi a yitɔnxi xɔnnantenyan. Na kanna nɔma ludeni taani itoe nde keden yi nen alogo a niin xa ratanga gbeerɔxɔyaan ma. **43** Na taane ni i ra: Beseri taan naxan tonbonni fiili yireni Ruben bɔnsɔnna konni, Ramoti taan naxan Galadi bɔxɔni, Gadi bɔnsɔnna konni, e nun Golan taan naxan Basan bɔxɔni Manase bɔnsɔnna konni. **44** Alaa sariyan ni i ra, Nabi Musa naxan nali Isirayila kaane ma. **45** Maxadi xuine nun tɔnne nun sariyane ni i ra, Nabi Musa naxan fala Isirayila kaane xa e yi minima Misiran yamanani waxatin naxan yi. **46** E yi Yuruden kidima meremerene yi Beti-Peyori yetagi, Manga Sixɔn ma bɔxɔn ma, Amorine mangana, naxan yi dɔxi Xesibɔn yi. Nabi Musa nun Isirayila kaane yi a nɔ e yi minima Misiran bɔxɔni waxatin naxan yi. **47** E yi a bɔxɔn tongo, e nun Ogo a bɔxɔna, Basan mangana. Amorine manga firinne nan yi ne ra Yuruden kidima, a sogeteden binni. **48** Na bɔxɔn danne ni i ra: Keli Aroyeri yi han Arinon xuden dε sa dɔxɔ Xerimon geyaana na, naxan xili Siyon, **49** e nun Araba bɔxɔn birin Yuruden kidima a sogeteden binni, a sa dɔxɔ Fɔxɔ Ige Daraan na Pisiga geyaana san bun.

5 Nabi Musa yi Isirayila yamaan maxili, a yi a fala e xa, a naxa, “Isirayila kaane, ε tuli mati tɔnne nun sariyane ra, n naxanye falama ε xa to. E xa e

xaran, ε yi e suxu ki fajni. **2** Alatala en ma Ala bata layirin tongo en xa Horebe geyaana ma. **3** Alatala nun en benbane xa mi layirini ito xidixi. A xidixi en tan nan birin tagi en tan naxan mɔn en nii ra to. **4** Alatala falan ti nen ε xa keli tɛen tagi geyaana ma yεε nun yεε. **5** Na waxatini n tan nan yi tima ε nun Alatala tagi alogo n xa Alatalaa falane rali ε ma, bayo ε yi gaxuxi tɛen yεε ra. E mi te geyaana fari.” A yi a fala, a naxa, **6** “Alatala nan n tan na i ya Ala naxan i ramini konyiyani Misiran yi.” **7** “I nama ala gbete batu fo n tan.” **8** “I nama suxuren nafala hanma sena nde sawurana, seen naxan kore, naxan bɔxɔn ma hanma naxan igeni. **9** I nama i xinbi sin e xa. I nama e batu. Amasɔto n tan, Alatala, i ya Ala, n xɔxɔlɔn. Naxanye na n najaxu, n ne hakene saranma e diine ra nen han mayixete saxan hanma naanin. **10** Koni naxanye na n xanu, e n ma yamarine suxu, n hinanma ne ra nen han mayixete wuli keden.” **11** “I nama Alatala i ya Ala xinla fala fuuni, amasɔto Alatala na kanna jaxankatama nen.” **12** “I xa Matabu Lɔxɔn binya, i yi a rasarijan alo Alatala i ya Ala a yamarixi i ma kii naxan yi. **13** I xa wali xii sennin bun ma, i yi i ya wanle birin kε. **14** Koni xii soloferede lɔxɔni, Alatala i ya Alaa Matabu Lɔxɔn nan na ra. I nama wali yo kε, i tan ba, i ya dii xemen ba, i ya dii temen ba, i ya konyin ba, i ya jingen ba, i ya sofana ba, i ya xuruseen birin ba hanma hali xɔjɛn naxan i konni, alogo i ya walikene fan xa e matabu alo i tan. **15** I nama jinan a konyin nan yi i ra Misiran yi. Alatala i ya Ala yi i ramini konyiyani a senben nun nɔɔn na. Na nan a toxi n na falaxi i xa, i xa Matabu Lɔxɔn binya.” **16** “I baba nun i nga binya alo Alatala i ya Ala a yamarixi i ma kii naxan yi, alogo i xa siimaya xunkuyen nun herin sɔto bɔxɔni Alatala i ya Ala naxan fima i ma.” **17** “I nama faxan ti.” **18** “I nama yalunyaan liga.” **19** “I nama mɔjan ti.” **20** “I nama wule seren ba i adamadi boden xili ma.” **21** “I nama mila i bodena jaxanla xɔn hanma a banxina hanma a xεena hanma a konyina hanma a jingena hanma a sofana hanma i adamadi boden gbee seen naxan birin na.” **22** Alatala na feene nan falaxi ε birin malanxin yεε xɔri, a xui yitexin na, geyaana fari, keli tɛen nun dimin nun kundani. A mi sese sa a fari. A yi e sebe walaxa geme daxi firin ma, a yi e so n yii. **23** E xuini ito mexi waxatin naxan yi keli dimini tɛen tagi geyaana fari, ε nun ε mangane nun fonne yi fa n fema. **24** E yi a fala n xa, ε naxa, “Alatala en ma Ala bata a nɔɔn yita en na e nun a gbona. En bata a xuiin name

falan tiye tēen tagi. Nxu bata a kolon to, a Ala nōe falan tiye nen muxun na, na kanna mōn yi lu a nii ra. 25 Iki, nanfera en na en masoma faxan na? Tēeni ito en faxama nen. Xa en mōn en tuli mati Alatala en ma Ala xuiin na, en faxama nen. 26 Adamadiin mundun luxi alo en tan naxan bata habadan Ala xuiin mē falan tiye tēen tagi, a mōn yi lu a nii ra? 27 I tan Musa, i maso Alatala en ma Ala ra, i yi i tuli mati a ra. A naxan falama, i xa na radangu nxu ma. Nxu nxu tuli matima i ra nen. Nxu mōn yi a liga.” 28 Alatala yi ε falan mē, ε naxan falaxi n xa. A yi a fala n xa, a naxa, “N bata yamaan xuiin mē, e naxan falaxi i xa. Nōndin na a ra. 29 A yi lan nun n yēeragaxun xa lu e bōjneni waxatin birin, e yi n ma yamarine suxu, alogo e tan nun e bōnsōnna xa herin sōtō habadan! 30 Siga, i xa sa a fala e xa, a e xa so e bubune kui. 31 Koni i tan xa lu n fema be. N xa n ma yamarine nun tōnne nun sariyane birin fala i xa, i lan i xa e xaran naxanye ma, alogo e xa ne suxu e na so bōxōni n denaxan fima e ma.” 32 Alatala ε Ala naxan yamarixi ε ma, ε xa na liga ki fajni. E nama siga kōmen ma, ε nama siga yiifanna ma. 33 E xa bira kirani ito nan fōxō ra Alatala en ma Ala naxan yamarixi, alogo ε xa lu ε nii ra, ε sabati, ε siimaya xunkuyen sōtō bōxōni ε denaxan sōtōma.

6 Yamarine nun tōnne nun sariyane ni i ra, Alatala ε Ala naxan yamarixi n ma alogo n xa ε xaran e ma, alogo ε xa e suxu bōxōni ε Yurudēn gidima naxan sōtōdeni. 2 E xa gaxu Alatala en ma Ala yēe ra. E xa tōnne nun yamarine birin suxu ε siimayaan birin yi, n naxanye soxi ε yii, ε tan, ε diine, e nun ε mamandenne, alogo ε xa siimaya xunkuyen sōtō. 3 Isirayila kaane, ε xa ε tuli mati falani itoe ra ε yi e suxu ki fajni, alogo ε xa herin sōtō, ε yi wuya ayi na bōxōni nōnōn nun kumin gbo denaxan yi, alo Alatala ε benbane Ala a falaxi ε xa kii naxan yi. 4 Isirayila kaane, ε tuli mati. Alatala en ma Ala keden peen na a ra. 5 I xa Alatala i ya Ala xanu i bōjnen birin na e nun i niin birin na e nun i senben birin na. 6 N yamarini itoe naxan fixi i ma iki, e xa lu i bōjneni. 7 I xa i ya diine xaran ne ma waxatin birin. I xa e fe fala i nema banxini, i nema sigatini, i nema i se e nun i nema kele. 8 I xa na falane xidi i yiin na, e nun i tigi ra alogo i nama jinan e xōn. 9 I xa e sebe i ya banxin senbetenne ma e nun deene ma. 10 Alatala ε Ala na ε xali bōxōni a denaxan soma ε yii, alo a a kōlō ε benbane Iburahima nun Isiyaga nun Yaxuba xa kii naxan yi, taa belebele

tofajine denaxan yi ε mi naxanye tixi, 11 e nun banxi rafexine herisigēn sifan birin na ε mi naxanye fenxi, e nun xōjinne ε mi naxanye gexi, e nun manpa bili langane nun oliwi bili langane ε mi naxanye sixi, 12 ε na ε dege han ε yi wasa, ε nama jinan Alatala ε Ala xōn de, naxan ε raminixi konyiyani Misiran yi. 13 E xa Alatala binya ε Ala, ε yi a keden peen batu. E xa ε kōlō a tan nin. 14 E nama ala gbete ye batu de, ε rabilinna muxune naxanye batuma, 15 bayo Alatala ε Ala naxan ε tagi, na xōxōlōn. Xa na mi a ra a xōlōma nen ε ma, a mōn yi ε faxa. 16 E nama Alatala ε Ala mato bunbani de, alo ε naxan liga Masa yi. 17 Koni ε xa Alatala ε Alaa yamarine suxu ki fajni, e nun a maxadi xuine e nun a tōnne a naxanye yamarixi ε ma. 18 E xa tinxinyaan nun fe fajine liga Alatala yēe ra yi, alogo ε xa herin sōtō, ε yi bōxō fajin sōtō Alatala a kōlō naxan na ε benbane xa. 19 E ε yaxune kedima nen alo Alatala a fala kii naxan yi. 20 E diine na ε maxōdin waxatin naxan yi, e naxa, “Maxadi xuine nun tōnne nun yamarini itoe bunna nanse ra, Alatala en ma Ala naxan yamarixi en ma?” 21 E e yabima nen, ε naxa, “Nxu yi findixi Firawonaa konyine nan na Misiran yamanani, koni Alatala yi nxu ramini Misiran yi a senben xōn. 22 Alatala yi taxamasenne nun kabanako belebele magaxuxine liga nxu yēe xōri Misiran kaane ra, e nun Firawona nun a denbayaan birin. 23 A yi nxu ramini Misiran yi alogo a xa nxu xali bōxōni, a a kōlō denaxan ma fe ra en benbane xa, a a soma en yii. 24 Alatala yi nxu yamari, a nxu xa sariyani itoe birin suxu nxu yi gaxu Alatala en ma Ala yēe ra alogo nxu xa herin sōtō waxatin birin, nxu yi siimaya fajin sōtō alo en kii naxan yi iki. 25 Xa en yamarini itoe birin suxu ki fajni Alatala en ma Ala naxanye yamarixi en ma, na findima en ma tinxinyaan nan na.”

7 Alatala ε Ala na ε xali bōxōni waxatin naxan yi, a denaxan fima ε ma, a siya solofere kedima nen: Xitine nun Girigasane nun Amorine nun Kanan kaane nun Perisine nun Xiwine, e nun Yebusune, siya solofere naxanye wuya ε xa, e senben mōn gbo ε xa. 2 Alatala ε Ala na e lu ε sagoni waxatin naxan yi, ε yi e nō, ε xa e halagi fefe! E nama layiri yo xidi, ε mōn nama kininkinin e ma. 3 Futun nama so ε tagi. E nama ε dii temene fi e dii xemene ma. E nama jaxanle fen e ye ε dii xemene jaxanle ra. 4 Xa na mi a ra xōjneni itoe ε diine ratantanma nen, e yi se gbete ye batu, Alatala yi xōlō ε ma, a yi ε halagi mafuren! 5 E xa ito nan liga

e ra: E xa e saraxa gandene nun e kide gemene birin kala. E yi e Asera kide gbindonne sege, e yi e suxurene birin gan. **6** Bayo e bata findi yama rasarijanxin na Alatala e Ala xa. Alatala e Ala bata e tan nan sugandi bōxōn siyane birin ye alogo e xa findi a gbee yamaan na. **7** Alatala mi biraxi e fōxō ra, a yi e sugandi, bayo e tan gbo yamaan birin xa. E tan yi xurun yamaan birin xa. **8** Koni Alatala e tan nan xanuxi. A yi a layirin nakamali a naxan tongo, a a kolo naxan ma e benbane xa. Na nan a toxi a e ramini a senben na konyiyani. A yi e xunba Firawona yii, Misiran mangana. **9** Nanara, e xa a kolon, a Alatala e Ala, a tan keden peen nan Ala ra. A tinxin. Naxanye na a xanu, e a yamarin suxu, a a layirin nakamalima ne xa nen a hinanni han mayixete wuli keden. **10** Naxanye na a xōnnantenya, a ne fan saranna fima nen, a yi e halagi. Ala na xōnnantenyaan saranma nen keden na. **11** Nayi, i xa n ma yamarine nun tōnne nun sariyane suxu ki fajni, n ni yamarixi naxan na to. **12** Xa i yamarini itoe rame, i yi e suxu ki fajni, Alatala i ya Alaa layirin nakamalima i xa nen a hinanni, alo a a kolo i benbane xa kii naxan yi. **13** A i xanuma nen, a barakan sa i ya fe yi, a mōn yi i wuya ayi. A barakan sama nen i ya dii barini e nun i ya xēene bogiseene, maala nun manpa nenen nun turena, e nun i ya jinge diin nun yexēe diin naxanye xalin kuruni, na bōxōni, a a kolo naxan ma e benbane xa, a a soma e yii. **14** A e barakama nen dangu siyane birin na. Dii baritaren mi luye e tagi, xēmen ba, jaxanla ba, hali xuruseene. **15** Alatala e ratangama nen furen sifan birin ma. A mi fitina fure yo ragide e ma alo e naxanye toxi Misiran yi. Koni a ne rasanbama muxune ma nen naxanye na e xōn. **16** E lan nen e xa muxune birin faxa, Alatala e Ala naxanye soma e yii. E nama kininkinin e ma, e mōn nama e gbee alane batu, alogo e nama e ratantan. **17** E a mirima nen e bōjēni, “Siyani itoe gbo en tan xa. Nxu tan e nōōn di?” **18** Koni, e nama gaxu e yēe ra. Alatala e Ala naxan ligaxi Firawona nun Misiran bōxōn birin na, na xa rabira e ma. **19** E bata fe xōdexene to naxanye doxi e ra, e nun taxamasenne nun kabanakoon naxanye ligaxi. E bata Alatala e Ala senben nun nōōn to a e ramini naxan na Misiran bōxōni. Alatala e Ala na fe sifan ligama nen yamanane birin na e gaxuxi naxanye yēe ra. **20** Alatala e Ala e luma nen alo jurun naxanye e yaxune kedima han hali naxanye e luxunxi e ma, ne fan yi halagi. **21** E nama gaxu e yēe ra, bayo Alatala e Ala nan e tagi, a gbo, a magaxu. **22** Alatala e Ala siyani itoe kedima

nen e yēe ra xunxuri yēen ma, e mi nōe e birin faxe sanja yi kedenni, alogo burunna subene nama wuya ayi, e e tōrō. **23** Alatala e Ala e soma nen e yii. A yi e yifu han, e halagi. **24** A e mangane soma nen e yii, e yi e xinle ralō ayi dunuja yi. Muxu yo mi nōe tiye e kanke. E e birin halagima nen. **25** E xa e ala sawurane gan. E nama mila xēmaan nun gbetin xōn naxan na suxurene ma. E nama ne tongo e gbeen na alogo a nama findi luti ratixin na e fan yēe ra. Amasoto se xōsixin nan na ra Alatala e Ala yēe ra yi. **26** E nama na suxure sifan naso e banxine yi de, alogo e fan nama halagi alo e tan. E xa ne rajaxu bayo e haramuxi.

8 E xa yamarini itoe birin suxu n naxanye yamarima e ma to alogo e xa siimaya fajin soto, e yi wuya ayi. E yi na bōxōn soto Alatala a kōlōxi naxan ma fe ra, a a soma nen e benbane yii. **2** E e miri sigati xunkuyen ma Alatala e Ala naxan nagidi e ma tonbonni jēe tonge naanin bun alogo a xa e findi muxu yete magodoxine ra. A mōn xa e kejaan feselese, alogo a xa a kolon feen naxan e sōndōmeni, xa e a yamarine suxe, hanma xa e mi e suxe. **3** A e findi muxu yete magodoxine ra nen, a yi e rakame. A mōn yi Manna donseen so e yii, e nun e benbane mi yi donseen naxan kolon. Na birin alogo a xa a yita e ra, a muxun mi balon donseen xan gbansan na, fō Alatala falan naxanye birin tima. **4** Nēe tonge naaninni itoe bun, e domane mi kalaxi, e sanne mi kusinxi. **5** E xa a kolon a Alatala e Ala e maxuruma nen alo diin fafe a maxuruma kii naxan yi. **6** E xa Alatala e Alaa yamarine birin suxu, e bira a kirane fōxō ra, e mōn yi gaxu a yēe ra. **7** Alatala e Ala e xalima nen bōxō fajini xudene nun darane denaxan yi. Tigi ige gbeen minima na bōxōn lanbanne nun a geyane yi. **8** Murutun nun fundenna nun manpa binle nun xōde binle nun girenada binle nun oliwi turene nun kumin gbo na bōxōni. **9** Burun mi janma na bōxōni, sese mi fa dasama e ma. E nōe wuren bē nen gemeni, wure gbeela fan yi soto geyane yi. **10** E na e dege han e yi lugo, e xa barika bira Alatala e Ala xa bōxō fajini ito a fe ra. **11** E a liga e yeren ma de! E nama jinan Alatala e Ala xōn, e yi tondi a yamarine nun sariyane nun tōnne suxe, n naxanye yamarima e ma to. **12** E na e dege han e yi lugo, e na banxi fajine ti, e yi dōxō mēnni, **13** e jingene nun siine nun yexēene na wuya ayi, e gbetin nun e xēmaan na gbo ayi, e herisigen birin na gbo, **14** e xa a liga e yeren ma alogo e nama waso han e yi jinan Alatala e Ala xōn, naxan e ramini

konyiyani Misiran bōxōni. **15** A bata ε radangu tonbon gbee magaxuxin na, saji xolene nun tanle denaxan yi, igen mi bōxōn naxan yi. A yi igen namini fanyeni ε xa. **16** A yi Manna donseen so ε yii tonbonni ε benbane mi yi donseen naxan kolon, alogo a xa ε findi muxu yete magodoxine ra, a yi ε keḡnaan feseḡese, a yi nō fe fajī ligadeni ε xa. **17** E nama a miri, a ε herisigeni ito sōtōxi ε senben nun ε fangan nan xōn. **18** E xaxili lu Alatala ε Ala xōn, bayo a tan nan senbeni ito fima ε ma alogo ε xa na herisigen birin sōtō. A a layirin nakamalima iki alo a a kōlō ε benbane xa kii naxan yi. **19** Xa ε jinan Alatala ε Ala xōn, xa ε bira ala gbeteye fōxō ra, xa ε ε xinbi sin ε xa, ε yi ε batu, n xa a fala ε xa to, ε halagima nen. **20** E halagima nen alo Alatala siya gbetene halagima ε yee ra kii naxan yi iki, bayo ε mi ε tuli matixi Alatala ε Ala a xuiin na.

9 Isirayila kaane, ε tuli mati. Iki, ε Yuruden baan gidima nen. E siyane kedima nen naxanye gbo ε xa, e senben dangu ε ra. E yi e taane tongo naxanye yinne mate han kore. **2** Men kaane gbo, e kuya. Anaki bōnsōnna muxune nan ne ra, ε naxanye fe kolon. E bata a me, muxune naxa, “Nde nōe tiye Anaki bōnsōnna kanke?” **3** E xa a kolon iki, a Alatala ε Ala nan tima ε yee ra, alo teen naxan seen birin ganma. A tan nan e halagima, a e yarabima nen ε xa. E yi e kedi, ε yi e nan mafuren alo Alatala ε Ala a fala ε xa kii naxan yi. **4** Alatala ε Ala na e kedi ε yee ra waxatin naxan yi, ε nama ε yete matōxō fa fala, “Alatala n nafaxi be bōxōni ito masōtōden ni bayo n tinxin.” Na mi a ra. Alatala siya gbetene kedima ε yee ra e kewali jaxine nan ma fe ra. **5** E nama a miri, a ε fama e bōxōn sōtōdeni ε tinxinna nun ε lannayaan nan ma. Alatala siyani itoe kedima ε yee ra e kewali jaxine nan ma, alogo a xa a kōlō xuiin nakamali, a naxan fala ε benbane Ibrahima nun Isiyaga nun Yaxuba xa. **6** E xa a kolon, a Alatala ε Ala mi bōxō fajini ito soxi ε yii ε gbeen na ε tinxinna xan ma fe ra. Amasōtō yama murutexin nan ε ra. **7** Na feen xa rabira ε ma ε Alatala ε Ala raxōlō kii naxan yi tonbonni. E nama jinan na xōn de! Xabu ε keli Misiran yi, han ε so be, ε yi murutema Alatala ε Ala xili ma. **8** E Alatala raxōlō nen Horebe गयाan fari han a yi wa ε faxa feni. **9** N to te गयाan fari alogo n xa walaxa gēme daxine tongo naxan findixi layirin na en nun Alatala tagi, n yi yanyi tonge naanin nun kōe tonge naanin ti गयाan fari, n mi donseen don, n mi igen fan min. **10** Alatala

yi walaxa gēme daxi firin so n yii, a naxan sebe a yete yiin na. Alatala yamarin naxanye fala ε xa teen tagi ε yi malanxi waxatin naxan yi गयाan fari, ne birin yi sebexi walaxane ma. **11** Yanyi tonge naanin nun kōe tonge naanin to defe, Alatala yi walaxa gēme daxi firinne so n yii a layirin na. **12** Alatala yi a fala n xa, a naxa, “Keli, i xa godo mafuren bayo i yamaan naxan naminixi Misiran yi, e bata findi fe kalane ra. E bata kiraan fata, n na e yamarixi naxan na, e wure raxulunxin nafala suxuren na.” **13** Alatala mōn yi a fala n xa, a naxa, “N bata a to, a yama murutexini ito ra. **14** I masiga n na alogo n xa e halagi, n xa e xinla ralō ayi dunuja yi. N ni i tan nan bōnsōnna muxune findima siya gbeen na naxan senben gbo, e mōn wuya dangu siyani ito ra.” **15** N yi godo गयाan ma, teen yi naxan ma. Na layiri walaxa gēme daxi firinne yi suxi n yii. **16** Na waxatini, n yi a to, a ε bata yulubin liga Alatala ε Ala ra. E bata wure raxulunxin nafala jinge sawuran na. E bata kiraan fata Alatala naxan yamari ε ma. **17** N yi walaxa gēme daxi firinne tongo, n yi e woli ayi, e yi yibō ε yee xōri. **18** N mōn yi bira bōxōni Alatala yetagi, n lu na yanyi tonge naanin nun kōe tonge naanin. N mi donseen don, n mi igen fan min. N na birin liga ε yulubine nan ma fe ra, ε fe jaxin naxan nabaxi Alatala yee ra yi, a xōlō. **19** N yi gaxu Alatalaa xōlōn na bayo a xōlōxi ε ma han a yi wa ε halagi feni. Koni Alatala mōn yi n ma maxandin name. **20** Alatala bōjen yi texi Haruna ma han a yi wa a halagi feni, koni n mōn yi Ala maxandi Haruna fan xa. **21** N mōn yi jinge sawuran tongo ε naxan nafalaxi ε yulubine yi, n yi a woli teeni, n yi a yiwuru han a findi a fujin na. N yi na fujin woli xudeni naxan kelima गयाan fari. **22** E mōn Alatala raxōlō nen Tabera taan nun Masa nun Kibiroti-Hatawa yi. **23** Alatala to ε xe keli Kadesi-Barineya yi, a yi a fala ε xa, a naxa, “E siga, ε xa bōxōn tongo n naxan soxi ε yii.” Koni ε yi Alatala ε Alaa yamarin matandi. E mi la a ra, ε mōn mi a xuiin name. **24** Xabu n na ε kolon waxatin naxan yi, ε murutexin na a ra Alatala xili ma. **25** Alatala to wa ε faxa feni, n yi bira bōxōni a yetagi, n yi lu na yanyi tonge naanin nun kōe tonge naanin. **26** N yi Alatala maxandi, n naxa, “Marigina Alatala, i nama i ya yamaan halagi i gbeen naxan na, i yamaan naxan xunba i fangan na, i naxan naminixi Misiran bōxōni i senben na. **27** I jōxō lu i ya walikene xōn ma, Ibrahima nun Isiyaga nun Yaxuba. I xa dija yamani ito a xaxili xōdexen nun a fe jaxin nun a yulubin ma, **28** alogo Misiran kaane

nama a fala, e naxa, 'Alatala mi naxi e xalideni boxoni a naxan ma fe falaxi e xa. A e rapaxuxi nen. A bata e ramini alogo a xa sa e faxa tonbonni.' 29 Koni Ala, i ya yamaan nan e ra, i gbee yamana, i naxan namini i senben nun i ya non xon."

10 Na xanbi, Alatala yi yamarin fi n ma, a naxa, "Walaxa gemen daxi firin nafala alo a singene. I mon xa wudi kankiraan nafala. I yi te n fema geyaan fari. 2 N mon xa yamarine sebe naxanye yi walaxan bonne ma i naxanye kalaxi. I xa e sa na kankiraan nan kui." 3 N yi kankiraan nafala kasiya wudin na. N yi walaxa geme daxi firin fan nafala alo bonne. N yi te e ra geyaan fari. 4 Alatala yi sebenla ti walaxa neneni itoe ma, alo naxan yi sebexi bonne ma, yamari fune, a naxan falaxi e xa geyaan ma teen tagi e yi malanxi waxatin naxan yi. Alatala yi e so n yii. 5 N yi godo geyaan fari, n yi walaxane sa kankiraan kui, n naxan nafalaxi. E yi lu na alo Alatala a yamari n ma kii naxan yi. 6 Isirayila kaane yi keli Yakani a diine xopinne yireni, siga Mosera yi. Haruna faxa mena nin, a yi maluxun na. A dii Eleyasari yi findi saraxaraliin na a funfuni. 7 Na xanbi ra, Isirayila kaane yi siga Gudugoda yi. E to keli Gudugoda yi, e yi siga Yotobata yi, xude wuyaxi yi boxon naxan yi. 8 Na waxatini, Alatala yi wanla taxu Lewi bonsonna ra, a e xa findi Alatalaa Layiri Kankiraan maxali muxune ra. E mon xa ti Alatala yetagi e a wanle ke. E yi duba yamaan xa Alatala xinli. Na nan ligama han to. 9 Nanara, Lewi bonsonna muxune mi keen sotoxi e ngaxakedenne ye. Alatala nan luxi e xa alo e kena alo a a fala e xa kii naxan yi. 10 N lu nen geyaan fari yanyi tonge naanin nun ke tonge naanin alo n naxan liga a foloni. Alatala mon yi n ma maxandin name, bayo a mi e faxa feen nagidixi. 11 Alatala yi a fala n xa, a naxa, "Keli, i ti yamaan yee ra. E xa so boxoni n na n koloxi naxan ma fe ra e benbane xa, a n na soma nen e yii." 12 Iki, Isirayila kaane, Alatala e Ala wama e xa nanse liga? A wama nen e xa gaxu Alatala e Ala yee ra alogo e xa sigan ti a kiraan xon, e yi a xanu, e yi wali Alatala e Ala xa e bopen birin na e nun e niin birin na. 13 E mon xa Alatalaa yamarine nun tonne suxu e Ala, n naxan soxi e yii to alogo e siimayaan xa fan. 14 Alatala e Ala nan gbee kore xonna birin na. E nun boxo xonna nun a yi seene birin. 15 Koni Alatala e benbane nan xanu. Iki e tan nan e bonsonna ra, a e tan nan sugandixi siyaan bonne ye, alo e kii naxan

yi to. 16 Nayi, e xa e bopenne rasarijan, e nama fa murute sonon. 17 Bayo Alatala e Ala nan alane Ala ra e nun mangane mangana, Ala naxan senben gbo, a magaxu. A mi muxune rafisama e bode xa, a mi dimi yi seene rasuxuma kiti sadeni. 18 A tan nan kiridine nun kaja gilene xun mayengen na. Xopen nafa na ma, a donseen nun maraberi baan soma e yii. 19 E fan xa xopenne rafan naxanye e tagi bayo xopenne nan yi e tan fan na Misiran yi. 20 E xa gaxu Alatala e Ala yee ra, e yi a batu. E xa kankan a ma, e mon xa e kol a tan nan xili yi. 21 E xa a tan nan tantun. A tan nan e Ala ra, naxan kabanakone nun fe magaxuxine ligaxi e yee xori. 22 E benbane yi soma Misiran yi waxatin naxan yi, e mi yi danguxi muxu tonge solofere ra. Iki Alatala e Ala bata e rawuya ayi dangu sarene ra kore.

11 E xa Alatala e Ala xanu, e yi a gelene nun tonne nun sariyane nun yamarine suxu waxatin birin. 2 E xa a kolon to, a e diine mi a toxi, Alatala e Ala e maxuru kii naxan yi a gboon nun a senben nun a non nun 3 a kabanakone nun a wanle xon, a naxanye ligaxi Misiran boxoni Firawona ra e nun a boxon birin na. 4 E mon mi a toxi a naxan ligaxi Misiran sofa ganla ra, e nun e soone nun e yenge so wontorone. E mi a kolon Ala Gbala Baa igen sa sofane xun ma kii naxan yi, e yi e sagatanma waxatin naxan yi. Alatala yi e birin nalo ayi habadan! 5 E diine mon mi a toxi a naxan ligaxi tonbonni benun e xa be li. 6 E nun a naxan liga Datan nun Abirami ra, Eliyabi a dii xemene, Ruben bonsonna. Boxon yi yibo Isirayila kaane birin yee xori, a yi a raxutu e nun e denbayane nun e bubune nun e foxorabirane birin ma. 7 E tan nan fe gbeen itoe to e yeen na Alatala naxanye ligaxi. 8 Nanara, e xa yamarini itoe birin suxu, n naxanye yamarima e ma to, alogo e xa senben soto e yi boxoni ito masoto Yuruden baan kidi ma, e sigama denaxan yi. 9 E xa e suxu alogo e xa siimaya xunkuyen soto boxoni Alatala a koloxi naxan ma fe ra e benbane xa e nun e bonsonna, nonon nun kumin gbo denaxan yi. 10 E boxon naxan sotoma a mi luxi alo Misiran boxona, e kelixi denaxan yi. Menni, xee biin na jan, fo e xa igen maxali a ma nen e sanni alo nakona. 11 E boxon naxan sotoma Yuruden baan kidi ma, geya yiren nun lanban yiren na a ra. Tule igen nan sama a ma. 12 Boxon na a ra Alatala e Ala a joxo luxi denaxan xon. A tan nan a xun matoma a ra, keli jeen folon na han a rapanna. 13 Xa e yamarini itoe suxu a fapin

na n naxanye yamarima e ma to, xa e Alatala e Ala xanu, e yi a batu e bojnen birin na e nun e niin birin na, **14** n tulen nafama nen e boxon ma a waxatini, jemen nun sogefuren na, alogo e xa herisigen soto, murutuna, manpa nenena, e nun turena. **15** N mon sexen fan nasabatima nen e boxon e xuruseene balon na. E e degema nen han e wasa. **16** E a liga e yeren ma alogo sese nama e rakunfa, e yi e xun xete, e yi e xinbi sin ala gbeteye bun, e e batu. **17** Xa e na liga, Alatala xoloma nen e ma han! A yi tulen dan alogo sansi yo nama fa sabati boxon sonon, e yi jan boxon ito yi mafuren Alatala naxan soma e yii. **18** E xa falani itoe lu e niini e nun e bojeni. E e xidi e yiin na e nun e tigi ra alogo e nama jinan e xon. **19** E xa e diine xaran ne ma, e xa e fe fala e nema doxi banxini, e nema sigatini, e nema saxi, e nema kelima. **20** E xa e sebe e banxine senbetenne nun e deene ma, **21** alogo Alatala a kolo boxon naxan ma fe ra, a a soma e benbane yii nen, e nun e yixetene xa lu menni, fanni kuyen mon boxon xun ma. **22** Xa e yamarini itoe suxu ki faji, n na e yamarima naxanye ra, xa e Alatala e Ala xanu, xa e sigan ti a kirane xon, xa e kankan a ma, **23** nayi Alatala siyani itoe birin kedima nen e yee ra. E yi siyani itoe boxon findi e gbeen na, hali e maxodxo e xa, e senben gbo e xa. **24** E na e sanna ti denaxan birin yi, na findima e gbeen nan na. E boxon danna kelima nen tonbonni sa doxo Liban boxon na, keli Efirati baan na sa doxo foxo igen na sogegododen binni. **25** Muxu yo mi tiye e yee ra. E na siga dede yi, Alatala e Ala e yee ragaxun sama nen men kaane yi e kuisan, alo a a fala e xa kii naxan yi. **26** E a mato, n bata barakan nun dangan sa e yetagi to. **27** Xa e Alatala e Alaa yamarine suxu, n na e yamarima naxanye ra to, e barakan sotoma nen. **28** Koni xa e mi Alatala e Alaa yamarine suxu, xa e kiraan fata n na e yamarima naxan na to, e bira ala gbetene foxo ra e mi naxanye kolon, e dangan nan sotoma. **29** Alatala e Ala na e xali boxon waxatin naxan yi a denaxan soma e yii, e xa duba falani itoe ti Garisimi geyaan fari, e yi danga falane ti Ebali geyaan fari. **30** Na geyane nayi Yuruden kidi ma, sogegododen kiraan xanbi ra, Kanan kaane boxon, Araba yi, Giligali yetagi, More wudi gbeene denaxan yi. **31** E Yuruden baan gidima iki, siga na boxon Alatala e Ala denaxan soma e yii, a findi e gbeen na, e mon yi doxo na. **32** Nanara, e xa tonne nun yamarine birin suxu ki faji, n naxanye soma e yii to.

12 E xa tonni itoe nun yamarine suxu ki faji na boxon, Alatala e benbane Ala denaxan soma e yii. **2** E siyaan naxanye kedima, e xa ne suxure batudene birin kala, geyane fari e nun fotonne bun. **3** E xa e saraxa gandene kala, e yi e kide gemene yibo, e yi e Asera kide gbindonne gan, e yi e ala sawurane rabira, e yi e xinle jan na yirene yi. **4** E nama Alatala e Ala batu na kiini. **5** Koni e xa Alatala fen yire kedenni, a na denaxan sugandi e bonsonne tagi, alogo a xa lu menni, a xinla matoxoma denaxan yi. E xa siga menna nin, **6** e yi e saraxa gan daxine ba e nun e saraxane nun e yaganne nun e kiseene nun e de tiin nakamali saraxane nun e jenige ma saraxane, e nun e xuruseene dii singene. **7** E xa e saraxane don menni Alatala e Ala yetagi, e tan nun e denbayane. E xa sewa herin na Alatala e Ala naxan fixi e ma. **8** Na boxon, e nama Ala batu alo en naxan nabama iki, birin nun a rafan fe. **9** En na rabama bayo e munma so e matabu yireni singen, Alatala e Ala denaxan fima e ma. **10** Koni e Yuruden baan gidima nen, e yi doxo na boxon Alatala denaxan soma e yii. A e ratangama nen e yaxune birin ma naxanye e rabilinni alogo e xa doxo boje xunbenli. **11** Alatala e Ala yirena nde sugandima nen menni, a xinla matoxon denaxan yi. E xa fa e kiseene ra menni n naxanye yamarixi e ma: e saraxa gan daxine, e saraxane, e yaganne, e kiseene, e nun e se fajin naxanye fima Ala ma de tiini. **12** E sewama nen menni Alatala e Ala yetagi, e tan, e diine, e konyine, e nun Lewi bonsonna muxun naxanye e konni bayo boxon mi soma e yii e kee boxon na. **13** E nama e saraxa gan daxine ba e waxon yirene yi de! **14** E xa e ba Alatala e Alaa yire sugandixin nin Isirayila bonson keden konni. N naxan birin yamarixi e ma, e xa na birin liga menni. **15** Koni i noe nen suben don daxon faxe yiren birin yi, Alatala naxan fixi i ma, i na doxo denaxan yi. Muxu sarijanxin nun a sarijantaren noe a donje nen, alo xenla hanma bolena. **16** Koni e nama suben don e nun a wunla, e xa a wunla boxon alo igena. **17** E mi lan e murutun hanma manpa nenen hanma turen don e konni naxan finde yaganna ra, hanma e xuruseene dii singene hanma e saraxan naxanye bama de tiin ma, hanma e jenige ma saraxane hanma e kiseene. **18** E xa ne don Alatala e Ala yetagi, a denaxan sugandima, e tan nun e diine nun e konyine, e nun Lewi bonsonna muxun naxanye e konni. E xa sewa herin na Alatala e Ala yetagi, a naxan fixi e ma. **19** E a liga e yeren

ma, ε nama jinan Lewine xɔn ε nɛma na bɔxɔni. **20** Alatala ε Ala na ε bɔxɔn nagbo ayi waxatin naxan yi, alo a falaxi ε xa kii naxan yi, xa suben xɔnla ε suxu, ε xa na don alo ε wama a xɔn kii naxan yi. **21** Xa ε dɔxɔden makuya Alatala ε Alaa yire sugandixin na, ε nɔɛ xuruseene faxɛ nɛn Alatala naxanye fixi ε ma alo n na a yamarixi ε ma kii naxan yi. E nɔɛ na subene donjɛ nɛn ε taane yi alo ε wama a xɔn kii naxan yi. **22** Muxu sarijanxin nun a sarijantaren nɔɛ a donjɛ nɛn alo xɛnla hanma bolena. **23** Koni ε nama suben don e nun a wunla, bayo wunla luxi nɛn alo a niina. A mi lan ε xa suben nun a niin don. **24** E nama suben don e nun a wunla, ε xa a bɔxɔn alo igena. **25** E nama a don alogo ε xa herin sɔto, ε tan, e nun ε diine hali ε dangu xanbini. Amasɔto ε fe tinxinxine ligama Alatala yɛɛ ra yi. **26** Koni naxan yo rasarijanxi Ala xa hanma i dɛ ti naxan ma fe ra, a i a soma Ala yii nɛn, i xa ne xali Alatalaa yire sugandixini. **27** E xa ε saraxa gan daxine ba Alatala ε Alaa saraxa ganden fari, suben nun a wunla. E xa saraxa gbɛtɛne wunla bɔxɔn Alatala ε Ala a saraxa ganden fari, ε yi a suben don. **28** E xa feni itoe birin namɛ ε yi e liga n naxanye yamarima ε ma, alogo ε xa herin sɔto, ε tan nun ε diine hali ε dangu xanbini, han habadan. Amasɔto fe fajin na a ra naxan nafan Alatala ε Ala ma. **29** Alatala ε Ala na siyane halagi ε yɛɛ ra, ε naxanye bɔxɔn masɔtɔma, ε na dɔxɔ e bɔxɔni, **30** ε xa ε yetɛ ratanga e fe jaxi ligan ma e halagi xanbini. E nama e alane feen maxɔdin, ε naxa, “Siyani itoe yi e alane batuma di? En fan xa na nan liga.” **31** E nama na fe sifan liga Alatala ε Ala ra, bayo e yi fe xɔsixin sifan birin ligama e alane xa naxanye rapaxu Alatala ma. E yi e dii xɛmɛne nun dii tɛmɛne nan ganma e suxurene kideni. **32** E xa feni itoe birin liga n naxanye yamarima ε ma. E nama sese ba a ra, ε mɔn nama sese sa a fari.

13 Xa nabina nde hanma sayibana nde keli ε tagi, a yi taxamasenna hanma kabanako fe famatɔɔn fala ε xa, **2** na yi rakamali, a mɔn yi a fala ε xa, a naxa, “En bira suxurene batu feen fɔxɔ ra,” ε tan mi alan naxanye kolon, **3** ε nama ε tuli mati na nabiin na hanma na sayibana. Alatala ε Ala nan ε kejaan fɛsɛfɛsɛma alogo a xa a kolon xa ε a xanuxi ε bɔjɛn birin na e nun ε niin birin yi. **4** E xa bira Alatala ε Ala nan keden fɔxɔ ra, ε yi gaxu a yɛɛ ra. E yi a yamarine nun a falane suxu, ε yi a keden peen batu, ε yi kankan a ma. **5** Koni ε xa nabiin hanma sayiban tan faxa, bayo

a yi wama ε ramurute feni Alatala ε Ala xili ma naxan ε raminixi Misiran yi a ε xunba konyiyani. A bata kata a xa ε ba kiraan xɔn Alatala ε yamarixi naxan na. Fɔ ε xa fe jaxin birin ba ε tagi. **6** I ngaxakedenna hanma i ya diina hanma i ya jaxanla i naxan xanuxi hanma i lanfaan naxan nafan i ma alo i yetɛna, xa na nde i rakunfa wundoni alogo ε xa alana nde batu, i mi naxan kolon, ε benbane fan mi yi naxan kolon, **7** ε rabilinna siyana ndee suxurena, naxanye makuya ε ra hanma naxanye maso, keli bɔxɔn danna boden ma sa ti boden na, **8** i nama tin a falan ma. I nama i tuli mati a ra. I nama kininkinin a ma. I nama a ratanga. I nama a luxun. **9** I xa na kanna faxa, i tan nan singe xa a gɔlɔn gɛmɛn na, yamaan fan yi a magɔlɔn. **10** E xa a magɔlɔn han a yi faxa, bayo a bata kata a xa i raxɛtɛ Alatala i ya Ala fɔxɔ ra naxan i raminixi konyiyani Misiran bɔxɔni. **11** Isirayila kaane birin na feen mema nɛn, e yi gaxu. Nayi, na fe jaxi sifan mi fa ligama ε tagi sɔnɔn. **12** Xa ε falana nde mɛ taana nde a fe ra, Alatala ε Ala denaxan soma ε yii, **13** fa fala muxu jaxina nde bata keli menni naxan a falama bonne xa, a naxa, “En xa suxurena ndee batu, ε mi naxanye kolon,” **14** nayi ε xa na feen xɔnfɛn ki fajɛi ε yi jɔndin fen. E xa a kolon xa na fe jaxin ligaxi ε tagi. **15** E xa na taa kaane birin faxa silanfanna ra. E xa na taan nun a muxune nun a xuruseene birin naxɔri. **16** E xa e herisigen birin malan taa tagini, ε tɛɛn sa a ra, ε taan birin gan Alatala ε Ala yetagi. Na findima bɔxɔ rabɛjɛnɛnɛn nan na habadan. A mi fa tima sɔnɔn. **17** E nama na sena ndee findi ε gbɛɛn na ε naxanye ganma alogo Alatala nama xolo ε ma. A kininkininma ε ma nɛn, a yi ε rawuya ayi alo a a kolo kii naxan yi ε benbane xa. **18** Na ma, ε xa Alatala ε Ala xuiin namɛ, ε yi a yamarine suxu, n naxanye yamarima ε ma to, ε yi fe tinxinxin liga Alatala ε Ala yɛɛ ra yi.

14 Alatala ε Alaa diine nan ε tan na. Xa sayaan ti, ε nama ε yetɛ maxaba. E nama ε xunna dɛ bi. **2** Yama rasarijanxin nan ε tan na Alatala ε Ala xa. A ε tan nan sugandixi bɔxɔn siyane birin tagi, a ε xa findi a gbɛɛn na. **3** E nama se xɔsɔxi yo don. **4** Subene ni i ra, ε nɔɛ naxanye donjɛ: jɛngɛn nun yɛxɛɛn nun siin **5** nun xɛnla nun tɔkɛn nun bolen nun gɛya ma siin nun wonden nun yalɛɛn e nun burunna yɛxɛɛna. **6** Sube toro kanna naxan toro bɔxi jaxi ra, a mɔn donseen laxunma, ε nɔɛ ne donjɛ nɛn. **7** Koni na subene tagi, naxanye toro bɔxi jaxi ra, hanma

naxanye donseen laxunma, ndee e ye e nama ne don alo jwgomena hanma jierena hanma fanyerasina. E findixi sube haramuxine nan na e xa, bayo e donseen laxunma, koni e toro mi boxi jaxi ra. 8 Xosen toron boxi, koni a mi donse laxunma, a haramuxin na a ra e tan xa. E nama na suben don, e mon nama e yiin din a faxaxin na. 9 Niimaseen naxanye igeni, e lan e xa xali yexene don naxanye e bama. 10 Koni naxanye mi e bama, e xali mi e ma, e nama ne don. E mi sarijan e xa. 11 E nwe xoli radaxaxine birin donje nen. 12 Koni e nama itoe don: singbinna nun dugana e nun xolimangan 13 nun bangaan nun segen siyaan birin, 14 e nun xaxaan siyaan birin 15 nun dangaranfulen nun kutunxunban nun foxo ige ma xolina, e nun toxedi tongon siyaan birin, 16 e nun kunkutunna nun fotonbunsamuran nun toxoroon 17 nun yexe suxu kankon nun kankanna nun jinyaxan 18 nun yaya xonla nun sapi xonla siyaan birin, e nun sarasima xonla nun tuyena. 19 Niimase xunxuri gabute kanna birin haramuxin na a ra e xa. E nama e don. 20 Koni e nwe niimase xunxuri gabute kanna ndee donje nen naxanye radaxaxi. 21 E nama suben don naxan faxaxi a yete ma. E nwe a soe xojen yii nen naxan dxi e konni, a yi a don, hanma e a sara xoje gbetene ma. Koni yama rasarijanxin nan e tan na Alatala e Ala xa. I nama sii diin jin a nga xije igen na. 22 E na naxan birin soto xeen ma, e xa na yaganna ba a ra jee yo jee. 23 E xa e murutun nun e manpa nenen nun e turen yaganna don Alatala e Ala yetagi a na denaxan sugandi a xinla matoxoden na alogo e xa gaxu Alatala e Ala yee ra waxatin birin. 24 Xa na yiren makuya i ra jaxi ra, xa Ala bata i baraka han i mi nwe na yaganna maxale bayo Alatala a yire sugandixi makuya i ra a xinla matoxoma denaxan yi, 25 nayi i xa i ya yaganna masara gbetin na. I na gbetin xali Alatala i ya Ala yire sugandixini. 26 Menni i xa na gbetin masara sena ndee ra naxan na i kenon, jingene hanma yexene hanma manpana, naxanye birin napan i ma. E nun i ya denbayaan yi e dege Alatala e Ala yetagi, e yi sewa. 27 E nama jinan Lewi bonsonna muxune xon naxanye dxi e konne yi, bayo e mi kee boxon sotoxi e gbeen na. 28 Jee saxan yo jee saxan e xa e yaganna birin namara e taane yi. 29 Lewi bonsonna muxune keon mi na naxanye xa e nun xojene nun kiridine nun kaja gilen naxanye e tagi, ne birin xa fa e degedeni han e yi lugo. Nayi, Alatala e Ala barakan sama nen e kewanle yi e naxanye birin ligama.

15 Jee solofere yo jee solofere e xa dija donle ma.

2 A xa liga ikiini: muxun naxanye birin bata e ngaxakedenna Isirayila kaana nde doli, e xa dija na donla ma. E nama e ngaxakedenna Isirayila kaane karahan doli fi feen na bayo Alatala waxati saxin na a ra alogo yamaan yi dija donle ma. 3 E nwe xojen tan karahanje nen, a yi e donla fi, koni e naxan dolixi e ngaxakedenna ma, e xa dija na ma. 4 Anu, toro muxun mi luma e ye, bayo Alatala baraka gbeen sama nen e fe yi na boxoni Alatala e Ala denaxan soma e yii e keon na. 5 A na ligama nen xa e Alatala e Ala xuiin name e yi a yamarine birin suxu ki fapi, n naxan falama e xa to. 6 Alatala, e Ala barakan sama nen e fe yi alo a a fala e xa kii naxan yi. Siya wuyaxine fama nen e dolideni, koni e tan mi donla tongoma. E nwon sotoxa nen siya wuyaxine xun na, koni muxe mi nwon sotoxa e tan xun na. 7 Xa toro muxuna nde i ngaxakedenne ye i konni Alatala i ya Ala denaxan fima i ma, i nama jeniye jaxiyaan liga a ra, i tondi a dole. 8 A makoon naxan ma, i xa na doli a ma fonisireyani. 9 I xa i yete ratanga miriya jaxini ito ma, i naxa, “A gbee mi luxi jee soloferen xa a li, yamaan dijama donle ma jee naxan na.” I nama ye xodoxo ayi i ngaxakeden toro muxune ma i tondi seen soe e yii. Nayi, a a mawugama nen Alatala xa i xili ma, i yi findi yulubi tongon na. 10 I xa a ki fonisireyani hali i mi nimisa i bojeni. Nayi, Alatala e Ala barakan sama nen e kewanle birin yi. 11 Yigelitoon mi janma e yamanani habadan, nanara, n na a yamarixi e ma e xa hinan e ngaxakedenne ra, toro muxun nun yigelitoon naxanye e konni. 12 Xa e ngaxakedenna Heburu xemena nde hanma jaxanla a yete mati e ma konyin na, a walima nen e xa jee sennin. A jee soloferedeni e xa a xoroja. 13 Koni e nama a yii genla yiba. 14 Alatala, e Ala seen naxanye birin fixi e ma barakani alo yexeen nun siin nun murutuna, e nun manpana, e xa a ki na nde yi. 15 E nama jinan a konyine nan yi e ra Misiran yi. Alatala e Ala nan e xunbaxi. Nanara, n yamarini ito soma e yii to. 16 Xa i ya konyina a fala i xa, a a mi kelima i konni bayo e nun i ya denbayaan napan a ma, a a lan i konni, 17 nayi, i xa soxon seen tongo, i yi a tunla maso banxin dee wudin na, i yi a tunla soxon. Nayi, a findima nen i ya konyin na a siin birin yi. I na nan ligama i ya konyi gilen fan na. 18 E nama sunu konyin xoroja feen na. Amasoto a jee sennin wanla tonon gbo dangu walikeen gbeen na dxi firin. Na ma, Alatala, e Ala barakan sama nen e kewanle birin

yi. **19** E jningen nun yexeen nun siin dii xeme singene birin naxanye xalima, ne birin findima Alatala e Ala nan gbee ra. E mi lan e turaan nawali xa dii singen na a ra, hanma e yexee diin xaben maxaba a ma xa dii singen na a ra. **20** Nee yo jee e tan nun e denbayaan xa ne don Alatala e Ala yetagi a yire sugandixini. **21** Xa feen xuruseen na, xa a yeen kalaxi hanma a sanna, hanma fe gbete, e nama na ba saraxan na Alatala e Ala xa. **22** E a donma e konni nen, e nun muxu sarijanxin nun muxu sarijantarene. E birin lan nen e xa a don alo e xenla nun bolen donma kii naxan yi. **23** Koni e nama suben wunla don de! E xa a raboxon alo igena.

16 Abiba kiken na, e xa Halagi Tiin Dangu Loxon Sanla raba Alatala e Ala binya feen na, bayo Alatala, e Ala e ramini na kiken nan na Misiran yi koeen na. **2** E xa yexeen hanma siin hanma jingen ba saraxan na Alatala e Ala xa Halagi Tiin Dangu Loxon Sali loxoni. E na saraxan bama Alatalaa yire sugandixini a xinla binyama denaxan yi. **3** Sali loxoni, e nama burun don buru rate seen saxi naxan yi. E xa buru ratetaren don xii solofere naxan findixi sunun taxamaseri burun na. Na nan a rabirama e ma a e mafuraxin nan keli Misiran yi. Na ma, e mi jinanjye e mini loxon xon e siin birin yi Misiran boxoni. **4** Na xii soloferen bun, a mi lan buru rate se yo xa to e konne yi, e boxon birin yi. E saraxan naxan bama xii singe loxon jimbanna ra, na sese nama lu han xotanni. **5** Na Halagi Tiin Dangu Loxon Sanla saraxan mi lan a xa ba yiren birin yi, Alatala e Ala naxan fima e ma. **6** E a bama yire keden peen nin, Alatala e Ala na denaxan sugandi a xinla binyama denaxan yi. Na saraxan bama jimbanna nan na sogen godo waxatini, e mini waxatin naxan yi Misiran yi. **7** E suben jinma nen, e yi a don na yireni Alatala e Ala denaxan sugandima. Na kuye yibani, e yi siga e konne yi. **8** E xa buru ratetaren don xii sennin. A xii soloferede loxoni, e malanna ti Alatala e Ala xa. E nama wali yo ke na loxoni. **9** E na murutu xaban folo, e xa xunsagi solofere tenge, **10** e yi Xunsagine Sanla raba Alatala e Ala xa. E yi jeniye ma saraxan ba naxan na lan herisigen yaten ma Alatala e Ala naxan fixi e ma. **11** E sewama nen Alatala e Ala ra na yireni a denaxan sugandima a xinla binyan denaxan yi, e tan nun e diine nun e konyine, e nun Lewi bonsonna muxun naxanye e konni e nun xojene nun kiridine nun kaja gilene. **12** E nama jinan a konyine nan yi e ra Misiran yi. E xa yamarini itoe suxu ki faji. **13** E na

yelin e sansine bonbodeni lonne ma e yi e malan, e yi e wudi bogi igene fan ba, e xa Bubu Kui Sanla raba xii solofere. **14** E xa sewa na sanli, e tan nun e diine nun e konyine nun Lewi bonsonna muxune nun xojene nun kiridine nun kaja gilen naxanye e konni. **15** E sanli ito rabama nen xii solofere Alatala e Ala xa, a na denaxan sugandi. Amasoto Alatala e Ala barakan sama nen e se xaban nun e wanla birin yi. E yi sewa han! **16** Nee yo jee, Isirayila xemene birin xa ti Alatala e Ala yetagi sanja ma saxan a na denaxan sugandi: Buru Tetaren Sanla nun Xunsagine sanla nun Bubu Kui Sanla. E mi lan e xa siga Alatala yetagi e yii genla ra. **17** E birin xa fa a kiseen na e noe naxan na, naxan na lan herisigen ma Alatala e Ala naxan fixi e ma. **18** Taane birin kui, Alatala e Ala denaxan fima e ma, bonson yo bonson, e xa kitisane sugandi, e yamaan makiti tinxinni. **19** E nama kitin sa tojegeni de! E mon nama muxune rafisa e bode xa. E nama dimi yi seene rasuxu mayifuni, bayo kiseene noe fe kolonna yee raxiye nen, a tinxin muxuna falane yifu. **20** E lu tinxinna foxo ra, alogo e xa siimaya fapin soto, e mon yi no boxon sote Alatala e Ala denaxan fima e ma. **21** E nama Asera kide gbindonna ti saraxa ganden dexon ma, e naxan nafala Alatala e Ala xa. **22** E nama suxure gemen ti, bayo Alatala e Ala na fe sifan najaxuxi.

17 E nama jingen hanma yexeen ba saraxan na Alatala e Ala xa, fe naxan na, hanma naxan madonxi, bayo Alatala e Ala na fe sifan najaxuxi. **2** Xa xemena nde hanma jaxanla nde doxi e taana nde yi Alatala e Ala naxan fima e ma, a fa fe jaxin liga naxan mi rafan Alatala e Ala ma, nayi, a bata Alaa layirin matandi. **3** Xa a mi n ma yamarin suxu, a ala gbetene batu, hanma sogena hanma kiken a hanma sarene, **4** e yi na me, e xa a feen xonfen ki faji. E na a kolon na fe jaxin bata liga Isirayila yi, **5** a na findi xemen na hanma jaxanla, e xa na kanna xali taan so deen na, e yi a magolon han a faxesa. **6** Muxun naxan lan a xa faxesa, a mi faxesa singen fo muxu firin hanma saxan na sereyaan ba. A mi lan a xa faxesa sereya kedenna gbansanna xuiin ma. **7** Naxanye sereyaan baxi, ne nan singe xa gemen woli a ma a faxesa feen na. Yama donxen fan yi a magolon. E fe jaxin janma e tagi na kiini nen. **8** Xa faxesa kitin bata fa hanma matandina hanma maxolona naxan findixi kiti xodexen na e taani, e xa siga na yireni Alatala e Ala denaxan sugandima. **9** E sigama Lewi bonsonna

muxune nan fema, saraxaraline, e nun kitisaan naxan dōxi na waxatini, ε a yeβa e xa. Nayi, e a falama nen ε xa, a lan kitin xa sa kii naxan yi. 10 E na naxan fala ε xa na yireni Alatala ε Ala denaxan sugandima, ε kitin bolonma na nan ma. E na naxan fala ε xa, ε xa na suxu ki faji. 11 E na sariyan naxan birin fala ε xa, ε xa na liga. E nama fata a ma yiifanna ma, hanma komenna ma. 12 Xa muxuna nde waso, a mi a tuli mati saraxaraliin na naxan bata dōxo Alatala ε Alaa wanla xun na hanma kitisana, na kanna lanma nen a xa faxa. E fe jnaxin jnanna na kii nin Isirayila yi. 13 Yamaan na na feen me, e gaxuma nen e wason yiba. 14 E na so bōxōni waxatin naxan yi, Alatala ε Ala denaxan fima ε ma, ε na dōxo na, yanyina nde ε a mirima nen, a ε fan xa ε gbee mangan sōto alo ε rabilinna siyane. 15 Alatala ε Ala na muxun naxan sugandi, na nan findima ε mangan na. E nama tin xōjen xa findi ε mangan na, naxan mi findixi ε ngaxakeden Isirayila kaana nde ra. 16 A mi lan ε mangan xa soo wuyaxi sōto. A mi lan a xa muxune rasiga Misiran yi soone saradeni, bayo Alatala a falaxi nen ε xa, a ε nama siga na bōxōni sōnōn. 17 A mi lan a yi jnaxalan wuyaxi dōxo. Na feene nan a bōjen naxetema Ala fōxo ra. A mi lan a yi gbeti gbeen nun xema wuyaxi sōto. 18 Mangan na dōxo a manga gbedeni waxatin naxan yi, sariya kitabun naxan namaraxi Lewine yii, saraxaraline, a xa na seβe a yete xa. 19 Na kitabun luma nen a dēxōn. A xa a xaran lōxōn birin a siimayani, alogo a xa gaxu Alatala a Ala yee ra, a mōn yi nō a sariyan nun a tōnne suxuden naxanye seβexi a kui. 20 Na nan a ligama, a mi a yete rafisama a ngaxakedenne xa, a fata sariyan ma yiifanna ma hanma komenna ma. Nayi, a mangaya xunkuyen sōtōma nen, a tan nun a diine Isirayila yamaan tagi.

18 Saraxaraline, Lewi bōnsōnna muxune, ne mi bōxo yitaxun daxin sōtōma e keēn na alo Isirayila muxu gbeteye. E baloma saraxane nan na naxan nalima Alatala ma tēen na. Na nan findixi e keēn na. 2 E mi keē sōtōma e ngaxakedenne tagi. Alatala nan findima e keēn na alo a a fala e xa kii naxan yi. 3 Isirayila kaane na fa jingen na hanma yexēna saraxa badeni, ito nan findima Lewi kaa saraxaraline gbeen na: suben balaxana, a gbēgbena, e nun a buru subene. 4 E mōn xa ε bogise singe saraxane so e yii: murutuna, manpa nenēna, turena, e nun ε yexēē xaben naxan singe maxabaxi. 5 Alatala ε Ala Lewi bōnsōnna nan

sugandixi bōnsōnna birin tagi alogo e tan nun e diine xa wali Alatala xinla binyadeni waxatin birin. 6 Xa Lewi bōnsōnna muxuna nde keli Isirayila taana nde yi a dōxi denaxan yi, a siga na yireni Alatala denaxan sugandima, 7 mēnni, a lanma a xa wali Alatala a Ala xinla a fe ra, a ngaxakeden Lewine dēxōn naxanye walima Alatala yetagi. 8 A lan nen a yi balon sōto alo saraxaraliin bonne, hali a to a yii seene matixi, a gbeti sōto. 9 E na so bōxōni Alatala ε Ala denaxan fima ε ma, ε nama so kēwali xōsixine yi mēn kaane naxanye ligama. 10 Muxun nama lu ε ye naxan a diin ganma saraxan na hanma yiimatona hanma koron bōnbōna hanma seri kanna hanma kōeramuxuna, 11 hanma tirin tiina hanma naxan barinne maxōdinma hanma jinan kanne, hanma barin kiine. 12 Na muxu sifan mi rafan Alatala ε Ala ma. Alatala ε Ala siyani itoe kedima nen ε yee ra na kēwali xōsixine fe ra. 13 E kēwanle xa kamali Alatala ε Ala yee ra yi. 14 E siyaan naxanye kedima, ne biraxi yiimatōon nun koron bōnbōn xuiin nan fōxo ra, koni Alatala ε Ala mi tinje ε tan yi na liga. 15 Alatala ε Ala nabina nde raminima nen ε ye naxan luma alo n tan. E xa ε tuli mati a ra. 16 E naxan maxōdin Alatala ε Ala ma, ε yi malanxi lōxōn naxan yi Horebe geyaan fari. E yi a fala, ε naxa, “N mi waxi Alatala n ma Ala xuiin name feni sōnōn. N mi waxi tee gbeen i to fan to feni sōnōn alogo n nama faxa.” 17 Alatala yi a fala n xa, a naxa, “E naxan falaxi, na fan. 18 N nabiin naminima nen e ye, naxan luxi alo i tan. N nan n ma falan nalima a ma nen, a yi na yeβa e xa, n na a yamarin naxan na. 19 Xa muxu yo mi a tuli mati falan na nabiin naxan nalima n xinli, n tan yetēen na kanna makitima nen. 20 Koni xa nabina nde susu, a falan ti n xinli, n mi naxan yamarixi a ma, hanma a yi falan ti ala gbeteye xinli, ε xa na kanna faxa.” 21 Yanyina nde, ε ε yete maxōdinma nen, ε naxa, “En nōe a kolonje di, a Alatala a falan mi a ra?” 22 Xa nabiin falan ti Alatala xinli, a falan mi kamali, Alatala mi na falaxi. Nabiin nan na falaxi a wasoni. Hali ε mi gaxu a yee ra.

19 Alatala ε Ala na siyane halagi, a naxanye bōxōn soma ε yii, e e kedima nen, ε yi dōxo e taane nun e banxine kui. 2 Na na dangu, ε xa taa saxan sugandi bōxōni, Alatala ε Ala naxan fi ε ma. 3 E xa kirane rafala siga mēnne yi, ε yi yamanani taxun dōxōde saxan, Alatala ε Ala naxan fima ε ma e keēn na, alogo, faxa tiine birin xa siga na taane yi, e niin yi rakisi.

4 Naxan na faxan ti, a li, a mi a rakelixi a ma, a mi a yitōnxi xōnnantenyani, na kanna nōe sigē nen na taana nde yi, a niin yi ratanga. Misaala ra, muxun naxan siga fōtōnni wudi segedeni e nun a lanfana, 5 a wudin segema, bunbin yi koren, a yi a lanfaan li, na yi faxesa. Na faxesa tiin sifan nōe luyē nen na taana nde yi alogo a niin xa rakisi. 6 Xa kirani kuya, faxesa muxun gbeenjōxo muxun faxesa tiin sagatanma nen a xōlōni han a yi a li, a yi a faxesa, hali a mi yi lan a yi faxesa bayo a mi a lanfaan faxesa feni tōnxi xōnnantenyani. 7 N yamarini ito fixi ē ma na nan ma. E xa taa saxan sugandi marakisi taane ra. 8 Xa Alatala ē Ala ē bōxōn nagbo ayi alo a a kōlō ē benbane xa kii naxan yi, xa a bōxōni ito birin so ē yii a ē benbane tuli sa naxan na, 9 xa ē yamarini itoe birin suxu a fajin na, n naxanye falama ē xa to, a ē xa Alatala ē Ala xanu, ē yi bira a kirane fōxo ra, nayi ē mōn xa taa saxan sugandi, ē yi e sa taa saxanna bonne fari. 10 Nayi, Alatala ē Ala denaxan fima ē ma ē kēen na, ē mi tōjegetōon faxe na bōxōni. 11 Koni xa muxuna nde a boden najaxuxi, a a melen, a yi a faxesa, xa na kanna siga na taana nde yi, 12 na taan fonne lan nen e xa a suxu, e yi a xali faxesa muxun gbeenjōxo muxun fēma alogo a xa a faxesa. 13 E nama kininkinin na kanna ma de! E xa na faxesa ti sifan jian Isirayila bōxōni, ē yi herin sōtō. 14 E na dōxo bōxōni Alatala ē Ala naxan fima ē ma ē kēen na, ē nama ē lanfana bōxōn danna taxamasenne masiga ē benbane naxanye dōxo. 15 Muxun naxan bata haken liga hanma gbalona hanma yulubina, na kanna mi lan a xa kiti muxu kedenna sereya baxin xōn. Na fe sifan makitima sereya firin hanma saxan fala xuiin nan xōn. 16 Xa sere jaxin sereyaan ba, a yi muxun tōjege gbalona nde a fe ma, 17 yenge fa firinni itoe lan nen e xa siga Alatala batu yireni saraxaraline nun kitisane fēma naxanye walima na waxatini. 18 Kitisane a feen fēsefēsema nen. E na a kolon a seren bata wule sereyaan ba, a a ngaxakedenna tōjege, 19 nayi ē xa a liga na kanna ra alo a tan yi a ligama a ngaxakedenna ra kii naxan yi nun. E xa fe jaxin jian ē tagi. 20 Muxu gbetene na feen mēma nen, e yi gaxu. Nayi, e mi fa susue na fe jaxin sifan ligadeni sōnōn. 21 E nama kininkinin na muxu sifan ma: Niin jōxōn xa fi niin na, yēen yi jōxo yēen na, jinna yi jōxo jinna ra, yiin yi jōxo yiin na, sanna yi jōxo sanna ra.

20 E na siga ē yaxune yengedeni, ē na soo wuyaxi to e nun yengeso seene nun sofa wuyaxi naxanye

wuya dangu ē ra, hali ē mi gaxu. Alatala ē Ala naxan ē raminixi Misiran bōxōni, na luma nen ē xōn. 2 E nēma ē yitōnma waxatin naxan yi yenge so xinla ma, saraxaraliin xa ti, a falan ti yamaan xa, a naxa, 3 “Isirayila kaane, ē tuli mati! To, ē sigama ē yaxune nan yengedeyi. E nama tunnaxōlō ē ma, ē nama gaxu, ē nama kuisan, ē bōjen nama mini, 4 bayo Alatala ē Ala luma nen ē xōn ē yaxune yengedeni. A e yengema nen ē xa, a yi ē rakisi.” 5 Na waxatini sofa kuntigine fan falan tima nen ganla xa. E naxa, “Muxuna nde ē yē be ba, naxan bata yelin banxi tideni koni a munma so a kui singen? Na kanna xa xete a konni, xa na mi a ra waxatina nde a nōe faxe nen, muxu gbete yi so a banxini. 6 Muxuna nde ē yē be ba, naxan bata manpa binle si, koni a munma e bogene bolon singen? Na kanna xa xete a konni, xa na mi a ra waxatina nde a nōe faxe nen, muxu gbete yi a tōnōn sōtō. 7 Muxuna nde ē yē be ba, naxan bata jaxalandina nde masuxu, koni jaxanla munma siga a konni singen? Na kanna xa xete a konni, xa na mi a ra waxatina nde a nōe faxe nen yengeni, muxu gbete yi a jaxanla dōxo.” 8 Sofa kuntigine mōn sofane maxōdinma nen, e naxa, “Muxuna nde ē yē be ba, naxan mi fa susue, a gaxuxi? Na kanna xa xete a konni alogo a lanfane fan nama tunnaxōlō e ma.” 9 Sofa kuntigini itoe na yelin falan tiye yamaan xa, e yi sofana ndee findi gali mangane ra. 10 E na siga taana nde yi yenge sodeni, ē xa mēn kaane maxōdin singen, a e xa e yete raxete ē ma. 11 Xa e tin na ma, e yi taan nabilin yinna rabi ē xa, e birin luma nen ē yamarin bun, e yi mudun fi. 12 Koni xa e mi tin na ma, e yi ē yenge, nayi ē xa na taan bilin. 13 Alatala ē Ala na taan soma nen ē yii, ē xēmene birin faxesa silanfanna ra. 14 Koni jaxanle nun diine nun xuruseene nun nafunla naxanye birin na taan kui, ne birin findima nen ē gbeen na. E yi ē yaxune herisigen birin don, Alatala ē Ala naxan fixi ē ma. 15 E na nan ligama taane ra naxanye makuya, naxanye mi na taane yē ē dōxōma naxanye yi. 16 Koni a na findi taane ra Alatala ē Ala denaxanye fima ē ma ē kēen na, ē mi sese luma a nii ra menni. 17 E Xitine nun Amorine nun Kanan kaane nun Perisine nun Xiwine nun Yebusune birin halagima nen alo Alatala ē Ala a yamarixi ē ma kii naxan yi, 18 alogo e nama ē xaran na fe jaxine ma e naxanye ligama e suxure batudeni. E yi Alatala ē Ala yulubin tongo. 19 Xa ē bata taana nde bilin mēn kaane yenge xinla ma, ē mi lan ē yi na wudine sege naxanye bogima. E bogene findima ē

balon nan na. Na wudi sixine mi findixi ε yengefane ra. 20 Koni wudi binla naxanye bogin mi donma, ε nœ ne sege nen alogo e xa findi yengeso seene ra ε xa, ε ne rawali na taan yengedeni han ε yi a masoto.

21 Ε na so bœxoni Alatala ε Ala denaxan fima ε ma, xa ε muxu faxaxina nde to burunna ra, a a li a faxa muxun mi kolonxi, 2 ε fonne nun ε kitisane sigama nen. Keli binbin yireni han taan naxanye menna rabilinni, e ne yikuyene maliga. 3 Ε na a kolon taan naxan maso na ra, na taan fonne jinge gilen nan tongoma naxan munma wali, xun xidi yegen munma xidi naxan xunna ma. 4 Na taan fonne jinge gilen xalima nen xudeni naxan mi xœrima, sansiin munma rawali denaxan yi. E yi a kœen gira mœnni, a faxa. 5 Lewi yixetene, saraxaraline fan fama nen, bayo Alatala ε Ala ne nan sugandixi a e xa wali a xa, e mœn yi dubane ti Alatala xinli, e mœn yi matandi feene nun muxu maxolone makiti. 6 Taan naxan maso binbin yiren na, na fonne xa e yiine raxa jinge gilen xun ma, e naxan faxaxi xudeni. 7 Ε yi a fala, e naxa, “Nxu tan xa mi faxan tixi, nxu mi a toxi lige. 8 Alatala, i xa ito rasuxu i solona seen na Isirayila yamaan xa, i naxan xunbaxi. Yandi, i nama i ya yamaan yate sonmane ra na faxa tixina fe yi.” Nayi, Alatala na solona seen nasuxuma nen faxa tixina fe yi. 9 Ε na yulubi tongoxin bama yamaan ma, bayo ε bata na feen liga naxan tinxin Alatala yœe ra yi. 10 Ε na siga ε yaxune yengedeni, xa Alatala ε Ala e sa ε sagoni, ε yi e findi ε muxu suxine ra, 11 yanyina nde muxuna nde a yeen tima nen suxu muxu jaxalan tofajina nde ra. Xa na kanna wama a doxo feni a jaxanla ra, 12 nayi a nœ a xale nen a konni. Na jaxanla a xunna bima nen, a yi a yii xanle fan maxaba, 13 a yi a domaan fan masara. A luma nen banxin kui, a yi a fafe nun a nga jian feen liga kike keden. Na xanbi ra, xemen nœ a finde a gbeen na nen, a findi a jaxanla ra. 14 Xa a fe rapaxu xemen ma, a nœ a bejinje nen, a siga denaxan na a kenan. A mi lan sœnon a xa a mati gbetin na, a mœn mi nœ a finde a konyin na sœnon bayo a bata yi a kolon a jaxanla ra. 15 Xa jaxalan firin xemena nde yii, keden yi rafan a ma dangu boden na, na jaxalan firinne yi dii xemen keden keden bari, koni dii singen yi findi jaxanla diin na naxan mi rafan xemen ma, 16 a na wa a kœeni taxun feni a diine ra, diin forimaan lan a xa kœen naxan soto, a mi lan xemen xa na so a batœna diin yii, a dii singen yi fula a tiden na. 17 A xa a kolon

jaxanla naxan napaxuxi a ma, na nan ma dii findixi a dii singen na. A herisigen doxoƊe firin nan soma dii forimaan yii, bayo na nan singen xemen senben yitaxi. A tan nan lan a dii forimaan tiden soto. 18 Xa xemena nde dii xeme xalabanten murutexin soto, a yi a li a mi a tuli matima a fafe nun a nga xuiin na, e bata kata e xa a xuru koni a mi e xuiin suxi, 19 a fafe nun a nga xa a suxu, e yi a xali taan fonne fema taan so deen na. 20 Ε yi a fala e xa, e naxa, “Nxœ diini i ra, a xalabanten, a mœn murutexi. A mi nxu xuiin suxuma. Sabaan nun dolon nan napan a ma.” 21 Nayi, taan xemene birin a magolonma nen han a faxa. Ε xa fe jaxin jian ε tagi. Isirayila kaane na feen mema nen, e gaxu. 22 Xa ε muxun faxa, naxan bata gbalo feen liga, a lan a xa faxa naxan ma, ε mœn yi a binbin singan wudin na, 23 a binbin mi lan a xa xi singanxi han xœtœnni. A lan nen a xa maluxun na loxœni, bayo Ala bata na muxu singanxin danga. Ε nama na binbi singanxina dangan lu yamanani, Alatala ε Ala denaxan fima ε ma ε kœen na.

22 Ε na ε ngaxakedenna jingen hanma a yœœen to, a sigama burunna xun xœn, ε nama ε xun xanbi so a yi. Ε lan nen ε xa a xali a kanna fema. 2 Xa ε ngaxakedenna konna makuya, hanma ε mi a yire kolon, ε xa xuruseen xali ε konni. Ε yi a ramara han ε a kanna to waxatin naxan yi, ε yi a so a yii. 3 Ε na nan ligama a sofanelan fan na, a domana, e nun a seen naxan birin loxi ayi. Ε mi lan ε xa ε xun xanbi so ne yi. 4 Xa ε ngaxakedenna sofanelan hanma a jingen to biraxi kiraan xœn, ε nama ε xun xanbi so a yi. Ε lan nen, ε xa a mali a rakele. 5 Jaxanla mi lan a yi xeme domaan nagodo a ma. Xemen fan mi lan a jaxalan domaan nagodo a ma. Muxun naxanye na fe sifan ligama, na kanne mi rafan Alatala ε Ala ma. 6 Ε na a to kiraan xœn ma, xœliin bata a tœen sa wudin kœe ra, xa na mi a ra bœxœn ma, a nga felenxi a xelene ma, xa na mi a ra a diine ma, ε mi lan ε xa a nga nun a diine tongo e bode xœn. 7 Ε xa a nga bejin, a xa siga. Ε yi a diine tan tongo. Nayi, ε siimaya xunkuyen nun herin sœtœma nen. 8 Xa i banxi nenen ti, i yi foye suxudeni tœn banxin kœe ra alo kore banxina, i xa a rabilin sansandin na alogo muxuna nde nama bira loxœna nde, a faxa, fata i ya banxin ti kiin na. 9 I nama sansi siya firinna si i ya manpa bili nakœni, xa na mi a ra a bogin findima se haramuxin nan na. 10 I nama xun xidi yegen xidi jingen nun sofanelan xunne ma

e bode xon i yi xeen bi. **11** I nama domaan nagodo i ma naxan saxonxi yexee xabe garin nun gese futu garin basanxin na. **12** I xa luti denbexine singan i ya gubaan tongon naaninne ra. **13** Xa xemena nde jaxanla doxo, e yi kafu, a feen yi rajaxu xemen ma, **14** a yi a xili kala folo, a naxa, “N bata jaxanli ito doxo, koni nxu to kafu, n yi a li, a mi yi Alaa kiraan xon.” **15** Na na liga, sungutunna fafe nun a nga sereya seen xalima nen taan fonne fema taan so deen na, naxan a yitama a sungutun nasolonxin nan yi a ra. **16** A fafe ito nan falama, a naxa, “N bata n ma dii temen fi xemeni ito ma, koni a mi rafan a ma sonon. **17** A bata wulen sa a xun ma, a sungutun nasolonxin mi yi a ra.” Sungutunna soto muxune xa na futun nasonoya sereya dugin sa taan fonne yetagi. **18** Taan fonne na xemen suxuma nen, e yi a fe jaxin saran a ra. **19** E na a makiti, e xa a yangin, a gbeti gbanan keme so sungutunna fafe yii, bayo a bata Isirayila jaxanla nde xili kala. Na xanbi a lanma nen jaxanla mon xa xete xemen konni. A nema a siimayani, a mi noe a me na jaxanla ra. **20** Koni, xa jondin nan na feen na, sereya se yo mi na naxan a yitama a bata futun nasonoya, **21** na jaxanla xalima nen a fafe a banxin deen na. Taa yi kaane yi a magolon han a faxa, bayo a bata yagi feen liga, jaxanla mi lan a xa naxan liga Isirayila boxoni. A bata xeme feen kolon a a fafe konni waxatin naxan yi. E xa fe jaxin jian e tagi. **22** Xa e xemen nun jaxanla suxu naxan findixi xeme gbete a jaxanla ra, e saxi, na fe jaxi raba firinne lan nen e xa faxa, jaxanla nun xemena. E xa fe jaxin jian Isirayila boxoni. **23** Xa xemen naralan sungutunna nde ra taan kui, naxan bata masuxu, e yi kafu, **24** e xa na muxu firinne xali taan so deen na, e yi e magolon han e faxa. Sungutunna faxama nen bayo a mi sonxon natexi taan kui. Xemen fan faxama nen bayo a bata jaxalan masuxin futun kala. E xa fe jaxin jian e tagi. **25** Koni xa xemen naralan sungutunna ra burunna ra, naxan bata masuxu, a yi fu a ma, na xeme nan gbansan faxama. **26** E nama fefe liga sungutunna ra bayo a mi fe jaxi yo ligaxi a lan a xa faxa naxan ma. Na feen luxi nen alo xemen naxan fu a boden ma alogo a xa a faxa. **27** Amasoto xemen naralanxi sungutunna ra burunna nan na. Hali sungutunna xeme kanni ito sonxon nate, muxu yo mi yi na naxan yi a ratange. **28** Xa xemen naralan sungutunna ra naxan munma masuxu, a yi fu a ma, muxuna nde yi e to na feen xun na, **29** na xemen xa gbeti gbanan tonge suulun so

sungutunna fafe yii, a yi sungutunna doxo a jaxanla ra, bayo a bata a futun kala. A nema a siimayani, a mi noe a me na jaxanla ra. **30** Xemen nun a fafe a jaxanla nama kafu, alogo a nama a fafe rayagi.

23 Muxun naxan teganxi, hanma a bari seen bolonxi, na kanna mi lan a siga Alatalaa yamaan malanni. **2** Naxanye na kafu sariyatareyani, e diin bari, na diin fan mi daxa a siga Alatalaa yamaan malanni han a yixete fudena. **3** Amonine nun Moyaba kaane mi sige Alatalaa yamaan malanni hali e yixete fudena. **4** A ligama na kiini habadan bayo siyani itoe mi faxi e ralandeni burun nun igen na e yii, e yi kelima Misiran yi waxatin naxan yi. E Beyori a dii Balami saren fi nen e xili ma keli Petori taani Mesopotamiya yamanani alogo a xa e danga. **5** Koni Alatala e Ala mi tin a tuli matiye Balami ra. A bata dangan masara barakan na bayo e rafan Alatala e Ala ma. **6** E nama e mali boje xunbenla nun herin soto feen na e siin birin yi. **7** E nama Edon kaane rajaxu bayo e ngaxakedenna nan e ra. E nama Misiran kaane rajaxu bayo e waxatina nde ti nen e boxoni. **8** E yixete saxanden noe soe nen Alatalaa yamaan malanni. **9** E na siga e yaxune yengedeni, e yi daaxa yirena nde yi, e lan nen e xa e yete ratanga fe jaxin birin ma. **10** Xa xemena nde e ye naxan mi sarjnanxi, igen bata mini a xemeyani koeen na, a xa mini daaxaden fari ma. **11** Ninbanna ra, a xa a maxa. Sogen na godo waxatin naxan yi a noe soe nen daaxadeni. **12** E xa yirena nde sugandi daaxaden fari ma, na yi findi xandaan na. **13** Wali sena nde xa lu e goronne ye, alogo e na siga xandani, e xa yinla ge, e yi e makoon naba, e benden naxete a ye ma. **14** E daaxaden lan nen a xa sarjnan, bayo Alatala e Ala masiga tiden na a ra e kantan feen na, a yi e yaxune sa e sagoni. Xa a fe jaxin li daaxadeni, a a makuyama e ra nen. **15** Xa konyina nde a gi a kanna ma, a yi a yigiya e konni, e nama a xali a kanna fema de! **16** A lan nen a xa doxo e dexon taani, a na wa lu feni denaxan yi. E nama jaxu a ra. **17** Isirayila xemena hanma jaxanla nama findi yalunden na. **18** Yalunde gilen sarena, hanma yalunde xemen sarena, na mi lan a xa so Alatala e Ala banxini e de xui yo rakamali feen na, bayo Alatala e Ala na fe sifan najaxuxi. **19** E na sena nde doli e ngaxakedenna ma, gbetina, donsena, xa na mi a ra se gbete, e nama tonoy sa a fari. **20** E noe tonon fenje nen xopen na, koni e ngaxakedenna tan mi a ra de. E xa na sarjnan suxu e boxoni, e denaxan

sotoma, alogo Alatala ε Ala xa barakan sa ε kewanle birin yi. **21** I na de xuiin tongo Alatala i ya Ala xa, i nama i madigan a rakamali feen na, xanamu Alatala i ya Ala a maxodinma nen i ma, i yi findi yulubi tongon na. **22** Xa i mi de xui tongo, yulubi fe mi a ra. **23** Koni xa i de xuiin tongo Alatala i ya Ala xa, i lan nen i xa a rakamali ki fani alo i a penige kii naxan yi. **24** I nœ manpa bogina nde be nen i gbeen mi naxan na, i yi a don, han i lugo, koni i nama nde sa i ya goronni. **25** I na so murutu xeen na, i gbee mi naxan na, i nœ tonsønna ndee bolonje nen i yiin na, koni i nama i ngaxakedenna a murutun xaba woliten na.

24 Xa xemena nde jaxanla dɔxɔ, a fe yi rajaxu a ma, nayi, a e futu kala kedin nan sebema, a a so a yii, a yi a rasiga a konni. **2** Naxanla to bata keli xemen konni, a nœ dɔxɛ nen xeme gbete xɔn. **3** Xa a fe sa rajaxu na xemen fan ma, a e taxun kedin sebe, a yi a so a yii, a yi a rasiga a konni, hanma xa na xemen sa faxesa, **4** xeme singen naxan a mexi a ra, na mi lan a yi a tongo sɔnɔn, a findi a jaxanla ra, bayo a bata haramuya a ma. Alatala na fe sifan najaxuxi. E mi lan e xa na yulubi sifan liga bɔxɔni Alatala ε Ala denaxan soma e yii e keen na. **5** Xemen naxan baxi jaxanla dɔxɔdeni, a mi lan a xa so sofoyani. Kɔntɔfili gbete yo mi lan a xa lu a ma han jee keden alogo a xa a jaxanla masuxu a naxan dɔxi, a a rasewa. **6** E mi lan e xa wuli ngan nun wuli diin dɔxɔ tolimani, xa na mi a ra wulin diin gbansanna, bayo na findima balotareyaan nan na. **7** Xa Isirayila kaana nde a ngaxakedenna suxu nœni, a yi a findi konyin na, hanma a a mati, a lan nen na kanna xa faxesa. E fe jaxin jaxanma e tagi na kiini. **8** Xa fure jaxin bata mini muxuna nde fatin ma e xa a liga alo Lewi yixeten saraxaraline a fala e xa kii naxan yi. N na e yamari naxan na, e xa na birin suxu ki fani. **9** Alatala ε Ala naxan ligaxi Mariyama ra e keli xanbini Misiran yi, e xa e miri na ma. **10** Xa e ngaxakedenna nde sena nde dɔxɔ e ma tolimani, e nama so a banxini na tolima seen tongodeni. **11** E xa lu tanden ma, na kanna xa mini na tolima seen na. **12** Xa yiigelitɔɔn na a ra, a yi a gubaan so i yii tolimaan na, i nama a ramara han kœen na. **13** I xa a raxete a ma sogen godo waxatini, alogo a xa xi a yi, a barikan bira i xa. Na yatema nen tinxinna ra Alatala i ya Ala yee ra yi. **14** I nama jaxu yiigelito walike tɔrɔxine ra, a na findi i ngaxakeden Isirayila kaan na hanma xɔjen na naxan dɔxi i konni. **15** I xa a wanla

saranna so a yii lɔxɔ yo lɔxɔ benun sogen xa godo, bayo yiigelitɔɔn nan a ra, a xaxili tixi a saranna nan na. Xa a mawuga Alatala xa i ya fe yi, i findima nen yulubi tongon na. **16** Fafane mi faxama diine funfuni, diine fan mi faxama fafane funfuni, koni birin faxama a yete yulubin nan ma fe ra. **17** I nama kiti kobin sa xɔjen ma hanma kiridina. I nama kaja gilena a gubaan nasuxu tolimaan na. **18** I nama jinan, a i findi nen konyin na Misiran yi, Alatala i ya Ala nan i xunba. Na feen na a toxi n yamarini ito fixi i ma. I xa a suxu. **19** I na seen xaba xeen ma, tonsønna naxanye na lu e xori ma, i nama ne matongo. I xa e lu na xɔjene nun kiridine nun kaja gilene xa. Nanara, Alatala i ya Ala i barakama nen i ya wanle birin yi. **20** I na i ya oliwi binle bogine malan, e bogin naxanye na lu e kœe ra, i mi lan i xa xete ne badeni. I xa e lu na xɔjene nun kiridine nun kaja gilene xa. **21** I na i ya manpa bogine fan ba, e bogin naxanye na lu e ra, i mi lan i xa xete ne badeni. I xa e lu na xɔjene nun kiridine nun kaja gilene xa. **22** I nama jinan, a i findi nen konyin na Misiran yi. Na feen na a toxi n yamarini ito fixi i ma. I xa a suxu.

25 Xa xeme firin yenge, e na siga kitisane fema alogo e xa e makiti, kitisane xa yoon fi jɔndi kanna ma, wule falana kala tixin yi saran a ra. **2** Xa wule falan lanma a xa bɔnbɔ, kitisaan xa a rasa bɔxɔni, e yi a bɔnbɔ a yee xori bosaan ye yaten na a lan a xa naxan soto fata sariyan na. **3** Na kui, e mi lan e xa dangu bosaan ye tonge naanin na. Xa e nde sa na fari, e bata e ngaxakedenna rayagi. **4** I na jingen ti malo bodonna ra, i nama a deen xidi. **5** Xa ngaxakeden ma xeme firinne dɔxi yire kedenni, keden yi faxesa a mi dii bari, na jaxanla mi lan a xa dɔxɔ xeme gbete xɔn ma denbayaan fari ma. A lan a xa dɔxɔ a xemena ngaxakedenna nde nan xɔn, a findi a jaxanla ra. **6** A dii singen naxan barima, na lan a xili sa faxesa muxun xun ma, alogo a xinla nama lo ayi Isirayila bɔxɔni. **7** Xa xemen tondi a ngaxakedenna a jaxanla dɔxe, kaja gilen xa siga taan so deen na taan fonne denaxan yi, a a yebe e xa, a naxa, “N ma xemena ngaxakedenna mi tinxi n ma fe ma. A bata tondi dii fideni a ngaxakedenna ma Isirayila bɔnsønne ye, naxan lan a xili sa a xun ma.” **8** Taan fonne xemen xilima nen, e yi a maxodin. Xa a tondi a ngaxakedenna a jaxanla dɔxe, **9** kaja gilena a masoma nen a ra taan fonne yee xori, a sankidin ba a xemena ngaxakedenna

sanni, a yi a de igen puru a yetagi. A yi a fala, a naxa, “Ito nan ligama xemen na naxan tondima mayixeten fideni a ngaxakedenna ma.” **10** Nayi, na xemena a denbayaan xili bama Isirayila yi ikiini, “Sankidi ba denbayana.” **11** Xa xeme firin yengema, na nde keden ma naxanla yi siga a xemen badeni boden yii, xa a boden xemeya yiren suxu, **12** e nama kininkinin na naxanla ma. E xa a yiin bolon a ra. **13** E nama kilo firin xali e sagbaan kui naxan mi kamalixi, keden binya, boden yelefu. **14** E nama liga se firin fan lu e konni naxan mi kamalixi, keden xungbo, boden xurun. **15** Kilo kamalixin nun liga se kamalixin nan lan a xa lu e yii. Nayi, e siimaya xunkuyen sotoma nen boxoni Alatala e Ala denaxan soma e yii. **16** Naxan yo na na liga, a mayifuun ti, na muxu sifan mi rafan Alatala e Ala ma. **17** E nama jinan Amalekine naxan liga e ra e to yi keli Misiran yi. **18** E mini nen e ma kiraan xon, e yi xanbiralune yee rasa. Na waxatini, e yi xadanxi han! Ala yee ragaxu yo mi yi e yi. **19** Iki, Alatala e Ala na e rasabati e rabilinna yaxune yee xori na boxoni a denaxan soma e yii, e xa Amalekine raxori han e xinla yi tunun dunuya yi. E nama jinan na xon!

26 E na so boxoni Alatala e Ala naxan fima e ma e keen na, a yi findi e gbeen na, e na dodoxo menni waxatin naxan yi, **2** e birin nde bama nen e boxon bogi se singene ra, na boxoni Alatala e Ala denaxan fima e ma. E xa a sa deben kui, e yi a xali na yireni Alatala e Ala denaxan sugandima a xinla matoxon denaxan yi. **3** E sigan saraxaraline nan fema naxanye walima na waxatini. E yi a fala e xa, e naxa, “N na a falama to Alatala en ma Ala xa, a n bata so na boxoni, a a kolo naxan ma fe ra a a soma en benbane yii.” **4** Saraxaraliin deben nasuxuma nen e yii, a a dodoxo Alatala e Alaa saraxa ganden yetagi. **5** E falani ito nan tima Alatala e Ala xa, e naxa, “N benban findixi Arami kaan nan na, sigatiina. A siga nen Misiran yi, e nun a muxune. E yi dodoxo na. E yi findi siya gbee senbemaan na, muxu wuyaxi. **6** Koni Misiran kaane nxu naxankata nen, e nxu toro, e konyiya xodexen sa nxu ma. **7** Nxu yi Alatala maxandi, nxu benbane Ala. A yi nxo maxandi xuiin name, a mon yi nxo mantorone to, e yi fe jaxine nun fe xodexen naxanye dodoxo nxu ra. **8** Alatala yi nxu ramini a senben nun non nun fe magaxuxine nun taxamasenne nun kabanakone ra Misiran yi. **9** A yi fa nxu ra han be, a yi boxoni ito so nxu yii, non nun kumin gbo denaxan yi. **10** Na nan

a toxi, iki, Alatala, n faxi boxon bogi se singeni itoe ra i tan fema, i naxanye fixi n ma.” E deben dodoxo nen Alatala e Ala yetagi, e yi e xinbi sin a xa. **11** E tan nun Lewine nun xojene naxanye e tagi, e birin yi sewa e bode xon ma se fajine fe ra Alatala e Ala naxan fixi e ma e nun e denbayana. **12** Nee saxandene findixi yagan jeeene nan na. E na yelin yaganna malanje, e xa a so Lewine nun xojene nun kiridine nun kaja gilene nan yii naxanye e taane yi. Ne fan yi e dege, e yi lugo. **13** Na waxatini, e falani ito nan tima Alatala e Ala xa, e naxa, “Naxan findixi i gbeen na, n bata a birin namini n konni. N bata a so Lewine nun xojene nun kiridine nun kaja gilene yii alo i a yamarixi kii naxan yi. N mi i ya yamari yo matandixi hanma n jinan a xon. **14** Hali sayaan to so n ma n mi i ya yaganna siyadin don, hanma n yi a xunnakala fe haramuxini, hanma n yi barinne ki nde ra. N bata i xuiin suxu, Alatala n ma Ala. I naxan yamarixi n ma, n bata na birin liga. **15** I xa i miri nxu ma ariyanna yi, i dodoxo sarijanxini. I yi Isirayila baraka, i ya yamana e nun i boxon naxan fixi nxu ma, i i kolo naxan ma fe ra nxu benbane xa, nonon nun kumin gbo denaxan yi.” **16** Alatala e Ala bata e yamari to, a e xa a tonne nun a sariyane suxu ki fajii! E xa e joxo lu e xon ma e bojen birin na e nun e niin birin yi. **17** E bata e de ti Alatala xa to, a a tan nan e Ala ra, a e birama nen a kirane foxo ra, a e a tonne nun a yamarine nun a sariyane suxuma nen. **18** Alatala fan bata a de ti, a e tan findima a gbee yamaan na, alo a a falaxi e xa kii naxan yi. E xa a yamarine suxu, **19** alogo a xa e rafisa a siya daxine birin xa. E noron nun e xinla nun e senben danguma nen e birin na. E mon yi findi yama rasarijanxin na Alatala e Ala xa, alo a a fala kii naxan yi.

27 Nabi Musa yi yamarini ito fi Isirayila kaane ma fonne yee xori, a naxa, “E xa yamarini itoe birin suxu n naxanye fiin to. **2** E nema Yuruden baan gidin waxatin naxan yi, siga na boxoni Alatala e Ala naxan soxi e yii, e xa geme gbeene ti, e e mafixa. **3** E yi sariya falani itoe birin sebe e ma, e na gidi waxatin naxan yi, e so na boxoni Alatala e Ala naxan soma e yii, nonon nun kumin gbo denaxan yi alo Alatala e benbane Ala a fala e xa kii naxan yi. **4** E na yelin Yuruden baan gide, e xa gemeni itoe ti Ebali गयाan fari, e yi e mafixa, alo n na yamarima e ma kii naxan yi to. **5** E xa gemene malan Alatala e Ala xa saraxa ganden na menni, wure walise mi dinxi gemen naxanye ra. **6** E gemene nan

matongoma, ε yi Alatala ε Alaa saraxa ganden nafala. Ε yi saraxa gan daxine ba Alatala ε Ala xa na fari. 7 Ε mɔn xa bɔɲε xunbeli saraxane fan ba mɛnni, ε ε don, ε sɛwa Alatala ε Ala yetagi. 8 Ε gɛmɛn naxanye tixi, ε xa Alaa sariya falane sɛbɛ ne ma, ε yi e kerenden ki fajɪ.” 9 Musa nun saraxaraline, Lewine mɔn yi falan ti yamaan xa, e naxa, “Isirayila yamana, ε sabari. Ε yi e tuli mati. Ε bata findi Alatala ε Alaa yamaan na to. 10 Ε xa Alatala ε Alaa falan name. Ε xa a yamarine nun a tɔnne suxu, n naxanye yamarima ε ma to.” 11 Na lɔxɔ kedenni, Musa mɔn yi yamarini ito so yamaan yii, a naxa, 12 “Ε na Yuruden baan gidi waxatin naxan yi, bɔnsɔnni itoe xa ti Garisimi geyaan fari, e duba yamaan xa: Simeyɔn nun Lewi nun Yuda nun Isakari nun Yusufu e nun Bunyamin. 13 Bɔnsɔnni itoe xa ti Ebalɪ geyaan nan fari, e dangan ti: Ruben nun Gadi nun Aseri nun Sabulon nun Dan e nun Nafatali. 14 Lewine falan tima nen Isirayila birin xa e xui yitexin na.” 15 E naxa, “Ala xa na kanna danga naxan na suxuren nafala, hanma se gbete rafalaxi wure raxulunxin na, a yi a batu wundoni. Na se sifan napaxu Alatala ma.” Yamaan birin xa a ratin, e naxa, “Amina.” 16 “Ala xa na kanna danga naxan na a fafe nun a nga rayagi.” Yamaan birin xa a ratin, e naxa, “Amina.” 17 “Ala xa na kanna danga naxan na a bodena bɔxɔn danne taxamasenne masiga.” Yamaan birin xa a ratin, e naxa, “Amina.” 18 “Ala xa na kanna danga naxan na danxutɔn ti kira paxin xɔn.” Yamaan birin xa a ratin, e naxa, “Amina.” 19 “Ala xa na kanna danga naxan na kiti paxin sa xɔɲen ma hanma kiridina hanma kaɲa gilena.” Yamaan birin xa a ratin, e naxa, “Amina.” 20 “Ala xa na kanna danga naxan nun a fafe a ɲaxanla kafuma, bayo a bata a fafe rayagi.” Yamaan birin xa a ratin, e naxa, “Amina.” 21 “Ala xa na kanna danga naxan na yenɛyaan liga suben xɔn.” Yamaan birin xa a ratin, e naxa, “Amina.” 22 “Ala xa na kanna danga naxan nun a magilen kafuma, a fafe a dii temena, hanma a nga a dii temena.” Yamaan birin xa a ratin, e naxa, “Amina.” 23 “Ala xa na kanna danga naxan nun a bitan ɲaxanla kafuma.” Yamaan birin xa a ratin, e naxa, “Amina.” 24 “Ala xa na kanna danga naxan na a boden faxa wundoni.” Yamaan birin xa a ratin, e naxa, “Amina.” 25 “Ala xa na kanna danga naxan na dimi yi seene rasuxu tɔɲɛgeden faxa feen na.” Yamaan birin xa a ratin, e naxa, “Amina.” 26 “Naxan mi sariya falani itoe suxuma a yi e liga, Ala xa na kanna danga.” Yamaan birin xa a ratin, e naxa, “Amina.”

28 Xa ε Alatala ε Ala xuiin suxu ki fajɪ, ε yi yamarini itoe suxu n naxanye soxi ε yii to, nayi Alatala ε rafisama nen bɔxɔn siyane birin xa. 2 Ε baraka feni itoe nan sɔtɔma, xa ε Alatala ε Ala xuiin suxu: 3 A barakan sama nen ε fe yi taan kui e nun xɛene ma. 4 A barakan sa ε dii barin nun ε bɔxɔn bogi seene nun ε xuruse kurune nun ɲingene nun yɛxɛene yi. 5 A yi barakan sa ε donse sagane nun ε donse rafaladene yi. 6 A yi ε baraka ε somatɔɔn nun ε minimatɔɔn na. 7 Ε yaxune na keli ε yengedeni, Alatala ε kedima nen ε yɛɛ ra. Xa e so kira keden nan xɔn, e e gima nen ε yɛɛ ra kira solofere xɔn. 8 Alatala ε Ala barakan sama nen ε gbengbene yi, e nun ε wanle birin yi. A barakan sama ε fe yi na bɔxɔni a denaxan fima ε ma. 9 Xa ε Alatala ε Ala yamarine suxu, ε mɔn yi bira a kirane fɔxɔ ra, a ε findima a yamaan na nen alo a a kɔlɔ ε xa kii naxan yi. 10 Bɔxɔn siyane birin a kolonma nen nayi, a Alatala xinla bata fala ε xun ma, e gaxu ε yɛɛ ra. 11 Alatala ε herisigen fari sama nen na bɔxɔni a a kɔlɔ ε benbane xa naxan ma fe ra a a soma ε yii. Ε dii wuyaxi barima nen, ε xuruseene dii wuyaxi xalima nen, a mɔn yi barikan sa ε bɔxɔn bogi seene yi. 12 Alatala koren nabima nen ε xa, a igen namaraxi denaxan yi, alogo a xa tulen nafa ε bɔxɔne ma a waxatini, a ε wanle birin nasɔɲɔya. Siya wuyaxine fama ε dolideni nen, koni ε tan mi donla tongoma. 13 Alatala ε tima nen yɛen na. Ε mi luyɛ dɔnxɛn na mume! Xa ε Alatala ε Ala yamarine suxu, n naxanye falama ε xa to, a ε yitema nen bonne xa, ε mi luye e bun mume! 14 Ε nama yamarini itoe beɲin n naxanye falaxi ε xa, ε siga yiifanna ma hanma kɔmenna ma, ε yi bira ala gbetene fɔxɔ ra, ε yi e batu. 15 Xa ε tondi Alatala ε Ala xuiin suxe, xa ε tondi a yamarine nun a tɔnne suxe, n naxanye falama ε xa to, nayi dangani itoe nan fama ε ma, e yi ε suxu. 16 Ala ε dangama nen taani e nun xɛene ma. 17 A dangan sama nen ε donse sagane nun ε donse rafaladene yi. 18 A dangan sa ε dii barin nun ε bɔxɔn bogi seene nun ε xuruse kurune nun ɲingene nun yɛxɛene yi. 19 A yi ε danga ε somatɔɔn nun ε minimatɔɔn na. 20 Alatala dangan nun mayifuun nun fe magaxuxin nafama ε ma nen ε wanle birin yi han ε sa halagi, bayo ε bata fe ɲaxin liga, ε to xɛtɛ a fɔxɔ ra. 21 Alatala fitina furen nadinma ε ma nen han ε birin yi ɲan na bɔxɔni ε sigama denaxan masɔtɔdeni. 22 Alatala ε doyenma nen furen na, e nun fati mawolonna nun fati makusinna. A fama nen kuye wolonna ra, e nun furuna, sansine funduma nen

hanma e kun. Feni itoe ε tōroma nen han ε halagi. 23 Kuyen xarama nen, bōxōn fan yi xōdōxō ayi alo wurena. 24 Alatala yi ε tulen masara gbangbanna ra keli kore, godo xēene ma, han ε birin yi halagi. 25 Alatala a ligama nen, ε yi halagi ε yaxune yetagi. Xa ε siga ε yengedeni kira keden nan xōn, ε gima nen e yēe ra kira solofere xōn. Dunuṣa muxune birin kabema nen ε kalana fe ra. 26 Xoline nun burunna subene ε binbine donma nen. Muxu yo mi e kedi. 27 Alatala ε tōroma nen setene ra alo a naxan liga Misiran kaane ra. A ε tōrō bontenbandunna nun gasine ra, e nun maxenxenna naxan mi danma. 28 Alatala ε findima nen danxutōne ra, a faan naso ε yi, ε yi findi fatōne ra. 29 Yanyin na ε sigati kiin yi ε yifu alo danxutōne. E wali yo mi lanje. E lu tōre, e yi ε yii geli. Muxu yo mi nōe ε be e yii. 30 E na jaxalandin masuxu, xeme gbete fuma a ma nen. E na banxin ti, ε mi soe a kui. E na manpa binle si, ε mi nōe e bogine donje. 31 E jingene kōe raxabama nen e yēe xōri, ε mi e suben donje. E ε sofanla bama nen ε yii, ε mi a masōte. E yexēene soma nen ε yaxune yii, muxu yo mi ε maliye. 32 E dii xēmene nun dii temene soma nen siya gbeten yii alo konyine ε yēe xōri. E xadanma nen e yēe ra kira yitodeni, koni fere yo mi luye ε xa, ε yi e mali. 33 Xōjene baloma ε sansine nan na. E wanla naxan birin kema, a tōnōn findima ε gbeen nan na. E ε rayarabima nen, e yi ε jaxankata ε siin birin yi. 34 E na feni itoe birin to, ε luma nen alo fatōne. 35 Alatala sete jaxine ratema nen ε sanne nun ε xinbine ma naxan mi yalanje. E yi din ε fatin birin na, keli ε xunna ma han ε sanne. 36 Alatala ε nun ε mangan kedima nen, ε na naxan dōxō ε xun na, siga bōxōni ε tan nun ε benbane mi naxan kolon. Menni ε ala xōjene batuma nen naxanye rafalaxi wudin na, hanma gemena. 37 Alatala ε xalima siyaan naxanye konni, ne kabema nen ε fe ma, e yi ε magele, e yi ε rayelefu. 38 E sansi gbegbe wolima nen ε xēene ma, koni ε ndedi nan tun xabama, bayo tuguminne dinma nen a birin na. 39 E manpa binle sima nen, ε yi e masuxu ki fajni, koni ε mi e igen minje, ε mi e bogine malanje bayo kunle soma e yi nen. 40 Oliwi binle luma nen bōxōn birin yi, koni ε mi e turen soma ε ma, bayo oliwi bogine yolonma nen. 41 E diine barima nen, koni ε mi luye ε yii, bayo ε yaxune ε xalima nen. 42 E wudine nun bōxōn bogi seene findima tuguminne nan gbee ra. 43 Xōjen naxanye dōxi ε yē, ne fe matema nen ε xa pon! Koni ε tan ma fe magodoma nen han! 44 E sigama nen

e dolideni, koni e tan mi fe ε dole mume! Ala e tima nen yēen na. E yi lu dōnxen na. 45 Dangani itoe birin fama nen ε fōxō ra, e yi ε sagatan, e yi ε suxu han ε birin yi halagi, bayo ε bata tondi Alatala ε Ala xuiin suxe. E mi a yamarine nun a tōnne suxi a naxanye soxi ε yii. 46 Na findima taxamasenna nun kabanakoon nan na ε tan nun ε yixetene xa habadan! 47 Bayo ε mi tin wale Alatala ε Ala xa sewan nun jēnige fajini, ε yi herini waxatin naxan yi, 48 nayi ε walima nen ε yaxune xa Alatala naxanye rafama ε xili ma. Kamen nun min xōnla ε suxuma nen. E magenla luma nen tōroni. E yi wuren xidi ε kōe xanbi ra ε goronna tongo, han ε yi halagi. 49 Alatala fama nen siyana nde ra, keli yire makuyeni bōxōn danna ra. A godoma nen ε ma alo singbinna. E mi a xuiin mema. 50 E findima muxu yē xōdexene nan na, naxanye mi xeme fonne binyama, e mōn mi kininkinije diine ma. 51 E ε xuruseene nun ε bōxōn bogi seene tongoma nen, ε yi halagi. E mi ε murutun hanma manpana hanma turen naluma ε yii. E ε jinge diine nun yexēe diine nun siine xalima nen han ε yi halagi. 52 E ε taane birin nabilinma nen yengeni, na bōxōni Alatala ε Ala denaxan soma ε yii. E ε yengema nen han ε taan yinna naxanye mate, ε laxi naxanye ra, ne yi bira. 53 Yengeni ito yi, ε yaxune ε rakamema nen han ε yi ε diine don, Alatala ε Ala naxanye fixi ε ma. 54 Hali xeme fajni hinantōna ε tagi, a mi kininkinije a ngaxakedenne ma hanma a jaxanla hanma a dii jējene. 55 A mi tinje a diin subeni taxunje e ra, bayo na findixi a balo dōnxen nan na. E yaxune ε rayarabima na kii nin ε taan birin yi. 56 Hali jaxalan fajni hinantōna ε tagi, naxan mi susue a sanna tiye bōxōn ma, a tan fan mi kininkinije a rafan xemen ma hanma a diina. 57 A mi tinje a dii barixin subeni taxunje e ra e nun a diin xunyena, bayo a wama ne don feni wundoni. E yaxune na ε rabilin yengeni e fama nen na tōrō sifan na ε konni. 58 Xa ε mi sariya falani itoe suxu a fajin na naxanye sebexi kitabuni ito kui, xa ε mi gaxu Alatala ε Ala xili gbee magaxuxin yēe ra, 59 Alatala fitina furene nun fure jaxine dōxōma nen ε tan nun ε yixetene ma naxan magaxu, e mōn mi yalanje xulen. 60 A fitina furene birin nafama nen ε ma, ε yi gaxuxi naxanye yēe ra Misiran bōxōni. Na furene yi ε suxu, e yi ε nō. 61 Alatala furen sifan birin sanbama ε ma nen e nun yihadin birin hali ba naxanye sebexi kitabuni ito kui, han ε birin yi halagi. 62 E tan naxanye yi wuya dangu sarene ra kore, ε yaten xurunma ayi nen bayo ε

bata Alatala ε Ala xuiin matandi. **63** Alatala fe fajin ligaxi ε xa kii naxan yi, a ε rawuya ayi kii naxan yi, a mɔn ε halagima na kii nin, a yi ε faxa. A ε bama nen na bɔxɔni ε fama naxan masɔtɔdeni. **64** Alatala yi ε raxuya ayi siyane birin ye, keli dunuɗa fɔlɔn ma han a danna. E ala gbetene batuma nen, naxanye rafalaxi wudin nun gemen na, ε tan nun ε benbane mi naxanye kolon. **65** Na siyane tagi, ε mi matabu yo sɔtɔma, ε mi yire yo sɔtɔma ε dɔxɔma denaxan yi. Alatala ε bɔɗene wolonma nen, a ε yeene raxadan xi xɔnla ra, a ε niine yɗɗaxu ε ma. **66** E siimayaan findima kɔntɔfinle nan na, gaxuna ε raxuruxurunma nen kɔɛn nun yanyin na. E sikema nen ε niin yetena fe ra. **67** E na na feene to waxatin naxan yi naxanye ligama, gaxun soma nen ε bɔɗeni. Xɔtɔnni, ε yi a fala, ε naxa, “Xa ɗinbanna nan yi a ra nun!” Ninbanna ra, ε yi a fala, ε naxa, “Xa xɔtɔnna nan yi a ra nun!” **68** Alatala ε xalima nen kunkine kui Misiran yi, n na a fala denaxan ma, a ε mi menna toma sɔnɔn. Menni, xemene nun ɗaxanle, ε katama nen ε xa ε yete mati ε yaxune ma konyine ra, koni muxu yo mi ε sarama.

29 Alatala falani itoe nan ti a layirin na a naxan yamari Musa ma, a xa a xidi e nun Isirayila kaane tagi, Moyaba bɔxɔni, ba layirin na e naxan xidi Horebe geyaan fari. **2** Nabi Musa yi Isirayila yamaan birin maxili, a yi a fala e xa, a naxa: E yi Misiran yi waxatin naxan yi, ε a to nen Alatala naxan liga Firawona nun a kuntigine nun a yamanan birin na. **3** E bata fe xɔdɛxene to, e nun taxamasenne nun kabanakone a naxanye liga e ra, **4** koni han to Alatala munma xaxinla fi ε ma naxan nɔɛ feni itoe kolonɗe. E yeene mi a toma, ε tunle fan mi a mema. **5** N ti nen ε yee ra tonbonni ɗɛɛ tonge naanin. E domane nun ε sankidine mi kala, **6** e mi burun don, ε mi manpaan min. Alatala na liga nen alogo ε xa a kolon, a a tan nan ε Ala ra. **7** E to so be, Sixɔn, Xesibɔn mangana, e nun Ogo, Basan mangana, ne yi fa en yengedeni, koni en yi e nɔ. **8** E yi e bɔxɔne tongo, ε e yitaxun Ruben bɔnsɔnna nun Gadi bɔnsɔnna muxune ra, e nun Manase bɔnsɔnna fɔxɔ kedenna. **9** Nanara, ε lanma ε xa layiri falani itoe suxu ki fajni, alogo ε wanle birin xa sɔnɔya. **10** Isirayila kaane, ε malanxi to Alatala ε Ala yetagi. E birin be, ε mangane nun ε yeeratine nun ε fonne nun ε kuntigine, **11** e nun ε ɗaxanle nun ε diine nun xɔɗen naxanye wudin segema e nun naxanye igen bama ε xa. **12** E be to alogo Alatala ε Ala xa layirin xidi e

nun ε tan tagi, a yi a kolo. **13** A ε tan nan a yamaan na, a a tan nan ε Ala ra, alo a a fala ε xa kii naxan yi, e nun a mɔn a kolo ε benbane Iburahima nun Isiyaga nun Yaxuba xa kii naxan yi. **14** N mi layirini ito xidima ε tan xan gbansan xa marakolon xɔn, **15** ε tan naxanye tixi be Alatala en ma Ala yetagi. N na a xidima ε nun ε yixetene nan fan xa naxanye munma bari singen. **16** E a kolon en bu Misiran yi kii naxan yi, e nun en mɔn dangu yamanane ra kii naxan yi kira yi be. **17** E bata siyani itoe suxure ɗaxine to: a wudi daxine, a gemen daxine, a gbeti daxine, e nun a xema daxine. **18** Xeme ba, ɗaxalan ba, bɔnsɔn ba, xabila ba, ε sese nama xete Alatala ε Ala fɔxɔ ra, ε siga na siyane alane batudeni. E a liga ki fajni alogo suxure batu yo nama lu e ye alo sansi salen xɔlena. **19** Na muxu sifan na koloni ito me, a dubama a yete xa nen a bɔɗeni, a naxa, “N bɔɗe xunbenla sɔtɔma nen hali n to kankanxi n keɗaan ma.” Na yi yamana feen birin kala. **20** Alatala mi diɗe na kanna ma. Alaa xolon nun a kunfa sarɗanxin kelima nen na kanna xili ma. A dangane birin sa a fari naxanye sebexi kitabuni ito kui. A xinla yi lo ayi dunuɗa yi. **21** Alatala na kanna luma nen a danna Isirayila yamaan ye alogo yihadin xa a li naxan findixi layirin dangane ra, naxanye sebexi sariya kitabuni ito kui. **22** E yixeten naxanye fama ε xanbi ra, e nun xɔɗen naxanye kelima bɔxɔ makuyene yi, ne fitina feene nun fe xɔdɛxene toma nen, Alatala naxanye dɔxɔma ε bɔxɔn na. **23** Dolen nun fɔxɔn luma nen bɔxɔn fari. Sese mi nɔɛ siye, sansi yo mi nɔɛ sole, hali ɗaxɔnde keden mi luyɛ. Yamanan luma nen alo Sodoma nun Gomora nun Adamaha nun Seboyimi, Alatala taan naxanye kala a xolonni. **24** Nayi, siya gbetene maxodinna tima nen, e naxa, “Nanfera Alatala ito rabaxi a bɔxɔn na? A xɔlɔxi nanfera na kiini?” **25** E yabima nen, e naxa, “Feni itoe ligaxi nen bayo yamani ito bata Alatala layirin kala, e benbane Ala naxan xidi e xa, a to e ramini Misiran yi. **26** E bata suxurene batu, e yi e xinbi sin e xa, e mi yi naxanye kolon, Ala mi tinxi naxanye ra. **27** Nanara, Alatala ɗaxankatani ito birin dɔxi bɔxɔni ito ra a xolonni alo a sebe kitabuni ito kui kii naxan yi. **28** Alatala bata a xolo gbeen dɔxɔ a yamaan na, a yi e ba e bɔxɔni, a yi e rasiga bɔxɔn gbeteni, e denaxan yi iki.” **29** Alatala en ma Ala nan gbee wundo feene ra. Koni feen naxanye makenenxi en xa, en nun en ma diine nan gbee ne ra habadan! A lan nen en xa sariya falani itoe birin suxu.

30 N feen naxanye birin falaxi e xa, dubane nun dangane, ne birin kamalima nen. Alatala e Ala na e raxuya ayi waxatin naxan yi siya gbetene ye, e mirima nen feni itoe ma. **2** E yi xete Alatala e Ala ma, e mon yi a xuiin suxu e bopen birin na e nun e niin birin yi, e tan nun e diine alo n na yamarima e ma kii naxan yi to. **3** Nayi, Alatala e Ala kininkininma e ma nen, a e ba konyiyani, a yi e malan keli siyane ye a e raxuya ayi naxanye ye. **4** Hali e kedixin sa dxi han boxon danna ra, Alatala e Ala e tongoma nen menni, a mon yi e malan. **5** Alatala e Ala mon e xalima nen e benbane boxoni alogo e xa na masoto, a yi e rasabati, a e rawuya ayi dangu e benbane ra. **6** Alatala e Ala nan e nun e yixetene bopen rasarijanma alogo e xa Alatala e Ala xanu e bopen ma e nun e niin birin yi, e yi siimaya fajin soto. **7** N tan Alatala, e Ala danga sebexini itoe birin dxioma nen e yaxune ra naxanye e rajaxuxi. **8** Nayi, e mon birama nen Alatala foxo ra, e a yamarine birin suxu n naxanye fima e ma to. **9** Alatala, e Ala baraka gbeen sama nen e wanle birin yi. E yi dii wuyaxi soto, e nun xuruseene nun herisige gbeena, xa e Alatala kenen alo e benbane **10** e yi Alatala e Ala xuiin suxu, e yi a yamarine nun tonne suxu naxanye sebexi sariya kitabuni ito kui, e yi xete a ma e bopen birin na e nun e niin birin yi. **11** N yamarin naxan fima e ma to, fe xodexe mi a ra e tan xa. **12** A mi kore, alogo i xa a fala, i naxa, "Nde nxe te kore, a xa sa fa a ra en xa, a a rali en ma alogo en xa a liga?" **13** A mi sa foxo igen fan kidima, alogo i xa a fala, i naxa, "Nde nxe foxo igen gide, a xa sa fa a ra en xa, a yi a rali en ma alogo en xa a liga?" **14** En-en-en, Alaa falana i dexon ma, a i deen kui, a i bopeni alogo i xa a liga. **15** N bata fa siimayaan nun faxan na to e nun fe fajin nun a jaxina. E a mato e keden sugandi. **16** N bata e yamari to, e xa Alatala e Ala xanu, e xa sigan ti a kirane xon, e xa a yamarine nun a tonne nun a sariyane suxu, alogo e xa siimaya fajin soto, e yi wuya ayi, Alatala e Ala yi e baraka na boxoni e fama denaxan masotodeyi. **17** Koni xa e xete a foxo ra, e a matandi, e bira suxure batu feen foxo ra, **18** n xa a fala e xa to, e halagima nen feu! E mi buma na boxoni e denaxan sotoma Yuruden kidima. **19** Kore xonna nun boxo xonna nan n serene ra to, fa fala a n bata fa siimayaan nun faxan na e nun duban nun dangana. E xa siimayaan nan sugandi, e tan nun e yixetene. **20** E xa Alatala e Ala xanu, e yi a xuiin suxu, e yi lu a foxo ra. Amasoto Alatala nan e nii rakisin na. A siimaya

xunkuyen fima e ma nen na boxoni, Alatala a kolob naxan ma fe ra, a a soma nen e benba Ibrahima nun Isiyaga nun Yaxuba yii.

31 Nabi Musa yi a fala Isirayila kaane birin xa, **2** a naxa, "N bata jee keme jee mxoxje soto iki, n mi fa nxe tiye e yee ra. Alatala bata a fala n xa, a n mi Yuruden baan gidima. **3** Alatala e Ala nan tima e yee ra, a men kaane birin halagi alogo e xa e boxone masoto. Yosuwe fan tima nen e yee ra, alo Alatala a fala kii naxan yi. **4** Alatala siyani itoe halagima nen alo a Sixon nun Ogo, Amorine mangane halagi kii naxan yi, e nun e yamanane. **5** Alatala yi e sa e sagoni. E xa a liga e ra alo n bata a yamari e ma kii naxan yi. **6** E senbe so, e wekile! E nama kuisan, e nama gaxu e yee ra, bayo e nun Alatala e Ala nan sigama. A mi kele i dexon mume, a mi e rabepinjje fefe ma." **7** Nabi Musa yi Yosuwe xili, a yi falan ti a xa Isirayila kaane birin malanxin yee xori, a naxa, "I senbe so, i wekile, bayo i tan nan tima Isirayila kaane yee ra siga na boxoni Alatala a kolob naxan ma fe ra a a soma e benbane yii nen. I tan xa e kee boxone yitaxun e ra. **8** Alatala tima nen i yee ra, a lu i xon, a mi kele i dexon, a mi i rabepinjje fefe ma. I nama kuisan, i nama gaxu." **9** Musa to sariyani ito sebe, a yi a taxu saraxaraline ra, Lewi yixeten naxanye Alatala Layiri Kankiraan xalima, e nun Isirayila fonne. **10** Musa yi yamarini ito fi e ma, a naxa, "Jee solofere yo jee solofere, yamaan dijama donle ma jeeen naxan na, Bubu Kui Sanla waxatini, **11** e xa sariyani ito xaran e xui yitexin na Isirayila kaane birin xa, naxanye fama e malandeni Alatala e Ala yetagi, a yire sugandixini. **12** E yamaan birin malanma nen menni, xemene nun jaxanle nun diine e nun xopen naxanye dxi e taane yi, alogo e xa a me, e yi fatan Alatala e Ala binyadeni, e sariyani ito a falane birin suxu ki fajni. **13** E diin naxanye mi sariyan kolonxi singen, ne fan a mema nen. E yi fatan Alatala e Ala binyadeni fanni e dxi na boxoni e Yuruden baan gidima naxan masotodeni." **14** Alatala yi a fala Nabi Musa xa, a naxa, "I faxa waxatin bata maso, Yosuwe xili, e birin yi siga Naralan Bubuni alogo n xa n ma yamarine fi a ma menni." Nabi Musa nun Yosuwe yi siga Naralan Bubuni. **15** Alatala yi mini e xa kundani naxan yi tema bubun so deen xun ma. **16** Alatala yi a fala Nabi Musa xa, a naxa, "I faxamatoon na a ra. I faxa xanbini, yamani ito xopene suxurene batuma nen na boxoni e sigama denaxan yi. E e mema

n na nen, e yi layirin kala n naxan xidixi e xa. **17** Na waxatini, n xoloma nen e ma han n yi n me e ra. N na n yetagin luxunma nen e ma. Siya gbetene e halagima nen. Tɔrɔ wuyaxi nun fe xɔdɛxɛne yi so e xun na. E a kolonma nen na waxatini, a tɔrɔni itoe e lixi nen bayo n tan, e Ala, mi fa e ye sɔnɔn. **18** N na n yetagin luxunma nen e ma na waxatini bayo e bata fe jaxin liga e suxurene batu. **19** Iki, i xa betini ito sebe. Musa, i xa a xaran Isirayila kaane xa, e yi lu a be, alogo a xa findi seren na n tan nun Isirayila kaane tagi. **20** N yamani ito xalima nen na bɔxɔni, nɔnɔn nun kumin gbo denaxan yi, alo n nan n kolo e benbane xa kii naxan yi. E na e dege, e lugo han e gbo, e birama nen ala gbetene fɔxɔ ra, e yi e batu, e n ma layirin kala. **21** Tɔrɔne nun fe xɔdɛxɛne na fa e ma, betini ito findima seren nan na e xili ma. E yixetene mi jinanɲe a xɔn. N yamani ito kui feene kolon hali benun e xa so na bɔxɔni n na n kolo e xa naxan ma fe ra.” **22** Na loxɔni, Nabi Musa yi na betin sebe, Ala naxan falaxi. A yi a xaran Isirayila kaane xa. **23** Ala yi yamarini ito so Nunu a dii Yosuwe yii. A yi a fala a xa, a naxa, “I senbe so, i wekile! I tan nan Isirayila kaane xalima na bɔxɔni n na n kolo e xa naxan ma fe ra. N tan yeteen luma nen i xɔn.” **24** Nabi Musa yi sariya falani itoe birin sebe Kitabun kui. **25** A to yelin, a yi yamarini ito fi Lewine ma, naxanye Alatalaa Layiri Kankiraan xalima. A yi a fala e xa, a naxa, **26** “E kitabuni ito tongo, Alaa sariyan sebexi naxan kui, e xa a sa Alatala e Alaa Layiri Kankiraan dɛxɔn ma. A xa lu menni seren na Isirayila kaane xili ma, **27** bayo n na kolon a matandi tiine nun yama murutexin nan e ra. Xa e Alatala matandima n mɔn e ye waxatin naxan yi, n na faxa, e mɔn a matandima nen dangu na ra. **28** Iki, e e malan n fema, e nun e fonne nun e bɔnsɔnne yeeratine, alogo n xa falani itoe ti e yetagi. Kore xɔnna nun bɔxɔ xɔnna nan findima serene ra e xili ma. **29** N na a kolon, a n na faxa, e kala gbeen tima nen, e yi xete kiraan fɔxɔ ra n na e yamarixi naxan na. Waxati famatone yi, e fe jaxin ligama nen Alatala yee ra yi, a yi xolo e ma e kewanle fe ra, yihadin yi e li.” **30** Nabi Musa yi betini ito birin xaran Isirayila yamaan xa.

32 Kore xɔnna, i tuli mati n ma falan na. Bɔxɔ xɔnna, n fala xuiin name. **2** N ma xaranna xa godo yamaan ma alo tule igena. N ma falan xa lu alo xiila sexɛn na. **3** N na Alatala xinla nan nalima. E xa en ma Ala tantun, a gbo! **4** En kantan fanyen nan a ra,

a wanle kamalixi. A kirane birin tinxin. Nɔndina Ala na a ra, naxan mi yifu. A tan nan tinxin, a fan! **5** Koni yamaan bata kala a yee ra yi, a dii mi fa e ra! Yagina e xa, yama yifuxin naxan mi tinxin. **6** Yama daxu xaxilitarena, e lan e xa na fe sifan liga Alatala ra ba? E Fafe xa mi a tan na, e da mangana, naxan e findixi a yamaan na? **7** E miri loxɔ danguxine ma. E yi e xaxili lu waxati gbetene xɔn. E e fafane maxɔdin e nun fonne. E xa fe danguxine yeba e xa. **8** Kore Xɔnna Ala to yi bɔxɔni taxunma siyane ra, a to yi adamadiine bama e bode ra, a yi yamanane danne sa fata Isirayila kaane yaten na. **9** Bayo Alatala gbeen findixi a yamaan nan na. A gbeen nan Yaxuba bɔnsɔnna ra. **10** A Isirayila toxi tonbonna nin, tɔrɔ bɔxɔ xarena. A yi a ratanga, a yi a jɔxɔ lu a xɔn alo a yeteen yeena. **11** A luxi alo singbinna naxan a diine maxaranma tugandeni. A a gubugubune dɔxɔ e bun alogo e nama bira, a yi e yite a gubugubune ra. **12** Alatala kedenna nan tixi a yamaan yee ra. Ala gbete yo mi a malixi. **13** A yi e rasabati geyane fari. A yi e balo xeeɛne bogi seene ra. A yi kumin ba e xa gemene yi a turen ba fanyen ma. **14** Ningene nun yexeeɛne yi nɔnɔn fi e ma. Yexeeɛ dii turaxine nun kɔtɔne, e nun kontonna naxanye kelixi Basan yi, e yi ne suben don. E yi murutu keɛe fajine don, E yi manpa hagigene min. **15** Isirayila tinxinxin yi gbo ayi, a yi tondi, turen yi gbo a fatini, a fatin yi fanɲe ayi, a yi xete Ala fɔxɔ ra, a da mangana, a yi a me Ala ra, a kantan fanyena, naxan a rakisima. **16** Isirayila yi Ala raxɔxɔlɔɲe ayi, e bira ala gbetene fɔxɔ ra, e suxurene ki. **17** E yi jinnanɲe ki, Ala mi naxanye ra, e mi yi naxanye kolon, e benbane mi yi naxanye kolon. **18** E bata jinan Ala xɔn, naxan e ratanga alo fanyena naxan e ramini dunɲa yi, a siimayaan fi e ma. **19** Alatala to a diine keɲaan to, a yi xolo e ma, a yi a me e ra. **20** A yi a fala, a naxa, “N xa n yetagi luxun e ma, n yi a mato feen naxan e lima. Amasɔto yama xaxilitaren nan e ra. Dii yanfantenne nan e ra. **21** E bata n naxɔxɔlɔɲe ayi wule alane xɔn. E bata n naxɔlo suxure fufafune fe ra. N tan fan e raxɔxɔlɔɲa ayi nen muxune xɔn yama fajin mi naxanye ra. N yi e raxɔlo siya xaxilitaren xɔn. **22** On, n ma xɔlɔn bata gbo ayi, a wolon han a barinne yimaxa laxira yi. A luma nen alo teen naxan bɔxɔn ganma. A gan han a sa geyane bunne li.” (Sheol h7585) **23** “N fitina feene gboma ayi e ma, n nan n ma xanle birin wolima nen. **24** N fitina kamen nagodoma e xili ma nen, n fitina furen nafa e ma, n burunna sube xajene rafa e ma, e nun

saji xolene. 25 Naxanye tanden ma, silanfanna nan e diine faxama. Naxanye banxini, gaxun yi ne faxa! E birin faxama nen, xemen nun jaxanla, dii joren nun fonna. 26 N yi wama nen e birin naxuya feni ayi, e xinle yi tunun dunuja yi. 27 Koni n mi tin yaxune yi n magele. N mi wama a xon a e xa e miri a e tan nan e noxi, a Alatala funfun mi a ra. 28 Siya xaxilima mi ne ra. E mi lonnixa. 29 Xa fe kolonna nan yi e ra nun, e yi a kolonna nen e sigan denaxan yi. 30 Yaxu keden noe Isirayila kaa wuli keden kede di? Yaxu firin noe muxu wuli fu kede di? Na mi lige fo Alatala na e sa yaxune sagoni a tan naxan luxi alo e kantan fanyena. 31 Yaxune yati a kolon, a e kantan se mi dangu en kantan fanyen na, Ala.” 32 “E feene foloxi Sodoma nun Gomora nin. E luxi nen alo manpa binla naxan salenne bitinxi boxo jaxini, a bogi xolene ramini, 33 naxan igen luxi alo sapin xolena. 34 Na feene birin namaraxi n yii wundoni. 35 N tan nan gbeexoxo tiin na. N feene saranma nen e joxone ra, na muxune yi dagalanje ayi a waxatini. A gbee mi luxi, yihadin yi e li, e yigitege laxon bata maso.” 36 Alatalaa yamaan makitima nen, koni a mon kininkininma e ma nen, bayo e senbe yo mi fa na. Muxu yo mi na naxan e maliye. 37 Ala e maxodinma nen, a naxa, “E alane minen naxanye yi e kantanma, 38 e yi naxanye kima sube tureni, naxanye yi e manpaan minma? E xa keli e malideni, e xa e ratanga. 39 Iki e xa a kolon, a n tan keden peen na a ra. Ala gbete mi na fo n tan. N tan nan muxun faxama, n mon yi a rakeli. N tan nan muxun maxoloma, n mon yi a yiyalan. Nde gbete noe muxuna nde be n yii? 40 Habadan Ala nan n tan na, n bata n yiini te kore, n yi n kolo n yeteni: 41 N na n ma silanfanna raxanxan, n yi a suxu n yii, n nan n gbeen joxoma nen n yaxune ra, n na e saren fima nen, naxanye n najaxuxi. 42 N na n ma xanle sinma nen wunli, n ma silanfanna yi suben don. Yengesone nun muxu suxine nun gali mangane birin faxama nen.” 43 Siyane, e nun Alaa yamaan xa sewa e bode xon. Ala a walikene faxan joxoma nen. A e gbeen joxoma nen a yaxune ra. A yi a yamaan nun e yamanan yulubine xafari. 44 Musa nun Nunu a dii Yosuwe yi betini ito birin xaran yamaan xa e xuini texin na. 45 Musa to yelin falani itoe tideni Isirayila kaane xa, 46 a yi a fala e xa, a naxa, “E xa falani itoe birin suxu ken n naxanye ralixi e ma to. E xa e yamari e diine ma alogo e xa sariya falani itoe birin suxu ki fajni. 47 Fufafu falan mi itoe ra. E niin nakisi feen yeteen nan e ra.

E siimaya xunkuyen sotoma nen e xon, na boxoni e denaxan sotoma Yuruden kidima.” 48 Na laxon, Alatala yi a fala Musa xa, a naxa, 49 “Siga Abarimi boxoni, Nebo गयाan fari, naxan Moyaba yi, Yeriko taan yetagi. I xa Kanan boxon mato menni, n naxan fima Isirayila kaane ma e keen na. 50 I na te गयाan fari, i faxama nen. I yi siga i benbane foxo ra laxira yi alo i tada Haruna faxa Horo गयाan fari kii naxan yi, a yi siga a benbane foxo ra laxira yi. 51 Na birin bayo, e mi tinxinya ligaxi Isirayila kaane yetagi Kadesi yi, Meriba igene denaxan yi, Sini tonbonni. E mi n ma sarijanna binyaxi yamaan tagi. 52 Nanara, i boxon toma nen wulani, n naxan fima Isirayila kaane ma, koni i tan gbindin mi soe na.”

33 Benun Musa xa faxa, Alaa muxuna, a yi duba Isirayila kaane xa, a naxa: 2 Alatala fa nen keli Sinayi गयाan fari alo sogena. A yi te Seyiri boxoni Isirayila kaane yi denaxan yi. A naron yi godo a yamaan ma keli Paran गयाan fari, maleka wuli wuyaxi yi biraxi a foxo ra. 3 Ala Isirayila bonsonna xanuxi yati! A a muxu sarijanxine kantanma, naxanye e xinbi sinma a bun, e yi a xaranna rame. 4 Musa bata sariyan fi en ma, alo nafunla Yaxubaa yamaan xa. 5 Ala findi nen Isirayila Mangan na, yamaan yeeratine malanni, e nun Isirayila bonsonne birin. 6 Ala xa siin fi Ruben bonsonna ma, Ala xa siimayaan fi Ruben yixetene ma, a yamaan yi wuya ayi. 7 Musa falani ito nan ti Yuda bonsonna fe yi, a naxa, “Alatala xa Yuda xuiin name, alogo a xa fa a yamaan ma, Yuda yi a yete xun mayenge. Ala xa a mali a yaxune yengedeni.” 8 Musa falani ito nan ti Lewi bonsonna fe yi, a naxa, “Ala, i bata Yurima nun Tumin so Lewi bonsonna yii i sagoon kolon feen na. I rafan muxune nan e ra, i naxanye kepaan fesefese Masa yi, i naxanye makiti Meriba igene fe ra. 9 E mi bira e fafe nun e nga sagoon foxo ra, xanamu e ngaxakedenne hanma e diine, koni e bira nen i ya fala gbansanna foxo ra, e yi i ya layirin kantan. 10 E tan nan Yaxuba bonsonna xaranma i ya yamarine ma, e yi Isirayila kaane xaran i ya sariyan ma. E wusulanna gan, e saraxa gan daxine ba i ya saraxa ganden fari. 11 Alatala xa e baraka. Ala xa barakan sa e kewanle birin yi. Ala xa e yengefane senben jan. Ala xa e yaxune rabira alogo e nama fa no kele sonon.” 12 Musa falani ito nan ti Bunyamin bonsonna fe yi, a naxa, “Alatala xanuntenne nan ne ra. E luma nen Ala fema boje xunbenli, bayo a e

ratangama nen waxatin birin, a mɔn yi lu e xɔn.”

13 Musa falani ito nan ti Yusufu bɔnsɔnna fe yi, a naxa, “Alatala xa barakan sa e bɔxɔni. Ala xa xiila ragodo a ma keli kore. Ala xa tigi igen namini a ma keli bɔxɔni. **14** Ala xa sogen xa fan e sansine ra, kike yo kike e bogine yi mɔ. **15** Ala xa e xɛne rasabati geya bɔxɔ fɔnine ma. **16** Ala xa e bɔxɔn bogi seene fan. Ala naxan falan ti fɔtɔndini, a xa hinan Yusufu ra, a naxan sugandixi mangan na a ngaxakedenne tagi. **17** Xunna kenla Yusufu xa. A senben gbo alo jingen dii tura singena, a fenne nan a yengeso seene ra alo burunna jingena. A siyane birin nɔma nen han bɔxɔn danne. Efirami bɔnsɔnna wuli fu ganle nan ne ra. Manase bɔnsɔnna wuli wuli ganle nan ne ra.” **18** Musa falani ito nan ti Sabulon bɔnsɔnna fe yi, a naxa, “Sabulon bɔnsɔnna, ɛ sewa yulayani. Isakari bɔnsɔnna, ɛ sewa ɛ bubune kui. **19** Ɛ siyane xilima nen geyaan fari, ɛ saraxa tinxinxine ba. Amasɔtɔ ɛ ɛ balon sɔtɔma nen fɔxɔ igen nafunli, e nun herisigen naxan fɔxɔ igen de.” **20** Musa falani ito nan ti Gadi bɔnsɔnna a fe yi, a naxa, “Ala xa na kanna baraka naxan Gadi a bɔxɔn nagboma ayi. Gadi dɔxi mɛnni alo yatan naxan suben suxu a a sanna nun a xunni bɔ. **21** Gadi bata dahamu bɔxɔn findi a gbeen na alo mangan naxan tixi yamaan yɛɛ ra. A bata Alatala fe ragidixin nakamali, a mɔn bata Alaa kitin sa Isirayila ma.” **22** Musa falani ito nan ti Dan bɔnsɔnna fe yi, a naxa, “Dan luxi nen alo yata senbemaan naxan kelima Basan bɔxɔni a tugan.” **23** Musa falani ito nan ti Nafatali bɔnsɔnna fe yi, a naxa, “Nafatali rafan Ala ma han! Alatala barakan saxi a fe yi kati! Ala xa a bɔxɔn nagbo ayi sogegododeni e nun yiifanna ma.” **24** Musa falani ito nan ti Aseri bɔnsɔnna fe yi, a naxa, “Ala xa Aseri baraka Yaxuba a diine yɛ. A ngaxakedenne xa hinan a ra. A turen xa gbo ayi han a yi a sanna maxa a ra. **25** Ala xa ɛ taan so deen findi wuren nun sulan na. Ala xa kendeɣaan fi ɛ ma ɛ siimayaan birin yi.” **26** Musa mɔn yi a fala, “Isirayilaa Ala maliga yo mi na. A kelima kore, a fa i mali. A kundani gidima a nɔrɔni. **27** Habadan Ala nan i yigiyaden na, a habadan yiine nan nasoxi i bun. A i yaxune kedima nen i yɛɛ ra, a naxa, ‘E halagi!’ **28** Isirayila dɔxɔma nen bɔɲɛ xunbenli. Ala Yaxuba bɔnsɔnna luma nen a danna, murutun nun manpa nenɛn yi gbo a bɔxɔni, xiila fan yi sa keli kore. **29** Sewana ɛ xa, Isirayila kaane. Ɛ maliga yo mi na siyane yɛ, Alatala naxan nakisima. A tan nan ɛ yɛ masansan wure lefaan na, ɛ mali tiina, a tan nan findixi ɛ nɔ ti

silanfanna ra. Ɛ yaxune e mafelenma nen ɛ yetagi, ɛ fan yi e taane kidene kala.”

34 Nabi Musa yi te Nebo geyaan fari, Moyaba mɛrɛmɛrɛni, han Pisiga geyana, naxan Yeriko taan yetagi. Alatala yi yamanan yiren birin yita a ra mɛnni, keli Galadi ma han sa dɔxɔ Dan yamanan na, **2** e nun Nafatali a bɔxɔn birin, e nun Efirami nun Manase a bɔxɔna, e nun Yuda a bɔxɔna han fɔxɔ igen naxan sogegododeni, **3** e nun Negewi bɔxɔna, e nun Yuruden mɛrɛmɛrɛna, e nun Yeriko taan lanbanna, tugu bili taana, han sa dɔxɔ Soyari ra. **4** Alatala yi a fala a xa, a naxa, “I yɛɛn ti bɔxɔn na n na n kɔlɔ naxan ma fe ra Iburahima nun Isiyaga nun Yaxuba xa. N naxa, ‘N bɔxɔni ito fima ɛ yixɛtene ma nen.’ N bata a yita i ra, koni i mi soon na.” **5** Musa, Alatalaa walikɛn yi faxa mɛnni, Moyaba bɔxɔni, alo Alatala a fala kii naxan yi. **6** Ala yi a maluxun mɛrɛmɛrɛni, Moyaba bɔxɔni Beti-Peyori yetagi. Muxu yo mi a kolon a gaburun denaxan yi han to. **7** Nabi Musa faxaxi a jɛɛ kɛmɛ jɛɛ mɔxɔɲɛ nan ma. Koni, a mɔn yi seen toma a fɔɲin na, a senben fan mi yi ɲanxi. **8** Isirayila kaane yi Musa wuga Moyaba mɛrɛmɛrɛni xii tonge saxan han e yi yelin a ɲan feen ligɛ. **9** Nunu a dii Yosuwe yi lugoxi fe kolonna niin na bayo Musa bata yi a yiin sa a ma. Isirayila kaane yi a xuiin suxu, e mɔn yi Musa yamarine suxu Alatala naxanye fixi a ma. **10** Nabi gbete yo munma mini Isirayila yamanani naxan maliga Nabi Musa ra. A yi falan tima Alatala xa yɛɛ nun yɛɛ. **11** Alatala a xɛxi Misiran yamanani taxamasenne nun kabanakone nan ligadeyi Firawona nun a kuntigine nun a yamanan birin yɛɛ xɔri. **12** Nabi Musa walixi senbe magaxuxin nin Isirayila kaane birin yɛɛ xɔri.

Yosuwe

1 Alatalaa walikeen Musa faxa xanbini, Alatala yi a fala Nunu a dii Yosuwe xa, Musa mali muxuna, a naxa, **2** “N ma walikeen Musa bata faxa. Iki, keli, i Yuruden baani gidi, i tan nun yamani ito birin. E siga na bōxōni n denaxan soma Isirayila kaane yii. **3** E na e sanna ti denaxan birin yi, n menna soma nen e yii, alo n na a fala Musa xa kii naxan yi. **4** E bōxōn danne fōlōma tonbon yiren nin, sa dōxō Liban geyane ra, siga Efirati baa belebelen ma, na bunna neen, Xitine bōxōn birin sa dōxō Fōxō Ige Gbeen na naxan sogegododen binni. **5** Muxu yo mi nōe i yēe ratiye i ya siimayani. N luma nen i xōn alo n yi Musa xōn kii naxan yi. N mi i rabepinjye, n mi n me i ra. **6** I wekile, i senbe so! Amasoto n na n kōlōxi yamanan naxan so fe ra e benbane yii, na findima yamani ito keen na i tan nan baraka yi. **7** I wekile, i senbe so han! I yengi dōxō sariyani ito birin xōn ma. N ma walikeen Musa sariyan naxan birin yamarixi i ma, i xa ne suxu. I nama a fata a ma yiifanna ma, hanma kōmenna ma alogo i xa nōon soto i na siga dede. **8** Sariya kitabuni ito fala xuiin nama ba i de. I yengi dōxō a xōn ma kōeen nun yanyina alogo i xa a birin suxu. Naxan birin sebexi a kui, i xa na liga, alogo i ya feen birin xa sōnōya, i nōon soto. **9** I nama jinan n ma yamarin xōn: I wekile, i senbe so! I nama kuisan, i nama gaxu, bayo i na siga dede, Alatala i ya Ala luma i xōn nen.” **10** Yosuwe yi yamarini ito so yamaan xunne yii, a naxa, **11** “E daaxaden birin yisiga, e sa yamarini ito rali yamaan ma, e naxa, ‘E fandane yiton bayo xii saxan na dangu e Yuruden baani gidima nen alogo e xa na bōxōn masoto Alatala e Ala denaxan soma e yii.’” **12** Yosuwe yi a fala Ruben bōnsōnna muxune nun Gadi bōnsōnna muxune nun Manase bōnsōnna fōxō kedenna xa, a naxa, **13** “Alatalaa walikeen Musa yamarin naxan so e yii, na fe xa rabira e ma, a to a fala, a naxa, ‘Alatala, e Ala bata matabun fi e ma. A bata bōxōni ito so e yii.’” **14** E naxanle nun e diine nun e xuruseene luma nen na bōxōni Musa denaxan soxi e yii Yuruden baan kidi ma. Koni e tan sofane tima nen e ngaxakedenne yēe ra e nun e yenge so seene, e yi e mali yenge sodeni **15** han Alatala yi matabun fi e ngaxakedenne fan ma alo e tan, han e fan bōxōn masoto waxatin naxan yi Alatala denaxan soma e yii, e Ala. Na xanbi ra, e mōn yi xete e bōxōni denaxan findixi e konna ra Alatalaa walikeen Musa naxan soxi e yii Yuruden kidi ma, sogeteden

binni.” **16** E yi Yosuwe yabi, e naxa, “I nxu yamarixi feen naxan birin na, nxu a birin ligama nen. I na nxu xe dede yi, nxu sigē. **17** Nxu i xuiin suxuma nen feen birin yi alo nxu Musa xuiin suxu kii naxan yi. Alatala i ya Ala xa lu i xōn alo a lu Musa xōn kii naxan yi. **18** Muxu yo murute i xuiin ma, a mi i ya falan suxu, i feen naxan birin yamarima, na kanna faxama nen. I tan xa i wekile tun, i yi i senbe so!”

2 Nunu a dii Yosuwe yi xera firin nasiga keli Sitimi siga Yeriko taani, a e xa sa taan nakōrōsi wundoni. A yi a fala e xa, a naxa, “E siga Yeriko taan nun a rabilinna matodeni.” E yi siga, e sa so yalunde naxanla nde konni naxan yi xili Raxabi. E yi yigiya na. **2** Muxune yi sa a fala Yeriko taan mangan xa, e naxa, “I bata a to, Isirayila kaana ndee bata fa kōeen na bōxōni ito rakōrōsideni.” **3** Nayi, Yeriko taan mangan yi xeraan nasiga a faladeni Raxabi xa, a naxa, “Xemen naxanye soxi i konni, ne ramini, bayo e faxi yamanan birin nan nakōrōsideyi.” **4** Koni naxanla bata yi na xeme firinne luxun. A fa a fala mangana xerane xa, a naxa, “Nōndin nan a ra, na xemene fa nen n konni, koni n mi yi e keliden kolon. **5** E siga nen jinbanna ra, taan so deen balan waxatini. E sigaxi dede, n mi a kolon. E e sagatan xulen, e e suxuma nen.” **6** Raxabi bata yi sa e luxun gese bili xarene bun kore banxin xuntagi. **7** Sagatan tiine yi siga e fōxō ra Yuruden baan kiraan xōn han baan gidideni. Sagatan tiine mini nen tun, e yi taan so deen balan. **8** Benun xerane xa sa e sa, Raxabi yi te banxin fari e fema. **9** A yi a fala e xa, a naxa, “N na a kolon a Alatala bata nxō bōxōn so e yii. E yēeragaxu gbeen bata nxu suxu! Yamanan muxune birin bata yilanyilan e yēe ra, **10** bayo nxu bata a me a Alatala Gbala Baani xara nen e yēe ra, e yi minima Misiran yi waxatin naxan yi. Nxu mōn bata a me e feen naxan liga Amorine manga firinne ra, naxanye yi Yuruden kidi ma, Sixōn nun Ogo. E yi e raxōri. **11** Nxu to na feen me, nxu bōnen yi kala. Limaniyaan yi ba birin yii e fe ra, bayo Alatala e Ala nan Ala ra kore xōnna ma denaxan yite, e nun bōxō xōnna ma denaxan yigodo. **12** Iki, e e kolo n xa Alatala yi fa fala a e n ma denbayani suxuma nen hinanni alo n na e yisuxi kii naxan yi. E taxamasenna so n yii naxan mi kale **13** alogo e xa n fafe nun n nga nun n xunyene nun n tadane lu e nii ra e nun e muxune birin, e yi nxu ratanga faxan ma.” **14** Na xeme firinne yi a fala Raxabi xa, e naxa, “Nxu bata nxu kolo nxu niini i xa,

koni i nama feni ito fala muxe xa de! Alatala na bōxōni ito so nxu yii waxatin naxan yi, nxu fan ε yisuxuma nen hinanna nun lannayani.” 15 Raxabi yi na xeme firinne ragodo lutin ma banxin foye soden na, bayo a banxin foye soden yi minixi taan nabilinna yinna fari ma. 16 Raxabi yi a fala e xa, a naxa, “E siga geyaan binni, ε sa ε luxun menni han xii saxan han ε sagatan muxune yi xete, xanamu e ε toma nen. Na xanbi ra, ε yi ε kiraan suxu.” 17 Na xemene yi a fala Raxabi xa, e naxa, “I nxu rakōlōxi naxan na, nxu fan bata tin na ma. 18 Koni, nxu na so ε yamanani, fō i xa luti gbeeli ito xidi banxin foye soden na, i nxu raminixi denaxan na. E nun mōn, fō i xa i ya denbayaan malan i fema i ya banxin kui, i fafe nun i nga nun i tadane nun i xunyene. 19 Xa naxan mini i ya banxin kui, a faxa feen goronna luma a tan nan xun ma, na mi nxu tan ma. Koni xa nxō muxuna nde a yiin din i ya muxuna nde ra i fema banxin kui, xa na kanna faxa, na goronna nxu tan nan xun ma. 20 Koni xa i nxō fe fala muxuna nde xa, nayi, i nxu rakōlōxi feen naxan na, nxu mi na ligan del!” 21 Raxabi yi a fala, a naxa, “Ala xa ε falan nakamali.” A yi xemene bejin, e yi siga. A yi luti gbeela xidi banxin foye soden na. 22 E yi siga, e sa geyaan li, e yi e luxun menni xii saxan, han sagatan tiine yi xete. E sagatan muxune yi e fen kiraan xōn han, koni e mi e to. 23 Xeme firinne yi fa godo geyaan fari, e yi baani gidi, e sa Nunu a dii Yosuwe li. Feen naxan birin e soto, e yi ne yebe a xa. 24 E yi a fala Yosuwe xa, e naxa, “Alatala bata na bōxōn birin so en yi yati! Men kaane birin yilanyilanxi en yee ra.”

3 Yosuwe nun Isirayila kaane birin yi kurun kele Sitimi yi, e sa Yuruden baan li. E yi xi menni benun e xa gidi waxatin naxan yi. 2 Xii saxande lōxōni, kuntigine yi yamaan daaxaden birin yisiga. 3 E yi yamarini ito rali yamaan ma, e naxa, “E na Alatala ε Alaa Layiri Kankiraan to waxatin naxan yi, e nun saraxaraliin naxanye a maxalima naxanye kelixi Lewi bōnsōnni, ε keli, ε yi bira a fōxō ra. 4 Nayi, ε siga kiraan kolonma nen, bayo ε munma yi dangu na kiraan xōn singen. Koni nongōnna ye wuli firin jōxōn xa lu ε tan nun kankiraan tagi. E nama ε maso a ra.” 5 Yosuwe yi a fala yamaan xa, a naxa, “E ε yete rasarijan, bayo tila Alatala kabanako feene ligama nen ε tagi.” 6 Yosuwe yi a fala saraxaraline xa, a naxa, “E Layiri Kankiraan tongo, ε dangu yamaan yee ra.” E yi Layiri Kankiraan tongo, e ti yamaan yee ra. 7 Alatala yi a fala Yosuwe

xa, a naxa, “N na i findi fōlōma nen muxu gbeen na to Isirayila kaane birin yetagi, alogo e xa a kolon a en birin na a ra alo nxu nun Musa yi a ra kii naxan yi. 8 I tan xa yamarini ito so saraxaraline yii naxanye Layiri Kankiraan xalima, i naxa, ‘E na Yuruden baa deen li, ε godo, ε ti a xōre ra.’” 9 Yosuwe yi a fala Isirayila kaane xa, a naxa, “E maso be, ε yi ε tuli mati Alatala falan na, ε Ala.” 10 Yosuwe mōn naxa, “Feni ito nan ligama alogo ε xa a kolon habadan Ala ε tagi. A tan nan Kanan kaane nun Xitine nun Xiwine nun Perisine nun Girigasane nun Amorine nun Yebusune kedima ε yee ra. 11 E bata a to, dunuja birin Marigina Layiri Kankiraan nan tixi ε yee ra Yuruden baani gidideni. 12 Iki ε xeme fu nun firin sugandi Isirayila bōnsōn fu nun firinne tagi. Bōnsōn keden, muxu keden. 13 Saraxaraliin naxanye dunuja birin Marigina Alatala Kankiraan xalima, ne neen fa e sanne ti Yuruden baa igeni tun, Yuruden igen bolonma nen a tagi. Igen naxan yi godoma, na yi lu malanje yire kedenni.” 14 Yamaan to mini e bubune kui alogo e xa Yuruden baani gidi, saraxaraliin naxanye yi Layiri Kankiraan xalima, ne yi ti yamaan yee ra. 15 Yuruden baan yi fema nen se xaba waxatine birin yi. Saraxaraliin naxanye yi kankiraan xalima, ne to Yuruden baan li, e sanne ti igeni, 16 igen naxan yi godoma, na yi dan, a lu malanje yire kedenni wulani Adama taani naxan Saratan fema. Igen naxan yi godoma Fōxō Ige Darani, daraan naxan mōn xili Araba Darana, na birin yi xara. Yamaan yi gidi Yeriko taan yetagi. 17 Saraxaraliin naxanye yi Alatala Layiri Kankiraan maxalima, ne yi lu tixi baan xude wuli yi xareni Yuruden tagi. Isirayila birin yi gidi xaren na, han Isirayila bōnsōnna birin yi yelin baani gide.

4 Yamaan birin to yelin Yuruden baan gide, Alatala yi a fala Yosuwe xa, a naxa, 2 “E xeme fu nun firin tongo yamaan ye, bōnsōn keden, muxu keden. 3 E xa e yamari e xa geme fu nun firin tongo Yuruden baan xude wunla ra saraxaraline yi tixi denaxan yi. E e xali, ε sa e sa ε to xideni.” 4 Yosuwe yi xeme fu nun firin xili a bata yi naxanye sugandi Isirayila yamaan ye, bōnsōn keden, muxu keden. 5 Yosuwe yi a fala e xa, a naxa, “E dangu Alatala ε Alaa Layiri Kankiraan yetagi, ε siga Yuruden baan tagini. E tan muxu keden kedenna birin xa geme keden keden tongo ε tungunna fari lan Isirayila kaane bōnsōnne xasabin ma, 6 alogo na xa findi taxamasenna ra ε tagi.

Ɛ diine fama Ɛ maxɔdindeni nen tila, e naxa, ‘Gemeni itoe findixi nanse ra Ɛ tan xa?’ 7 Ɛ a falama nen e xa, Ɛ naxa, ‘Ito nan a yitaxi a Yuruden igen bolon nen Alatalaa Layiri Kankiraan yee ra. A to Yuruden baan gidi, baa igen birin yi bolon. Gemeni itoe na feen nan nabirama Isirayila kaane ma han habadan.’”
 8 Yosuwe naxan yamari Isirayila kaane ma, e yi na liga. E yi geme fu nun firinne tongo Yuruden baan tagi, alo Alatala a fala Yosuwe xa kii naxan yi, naxan yi lanxi Isirayila bɔnsɔnne xasabin ma. E yi e xali yamaan daaxadeni, e sa e sa mɛnni. 9 Yosuwe mɔn yi geme fu nun firin dɔxɔ Yuruden baan xude wunla ra Layiri Kankiraan maxali muxune yi tixi denaxan yi. E mɔn na yi han to. 10 Saraxaraliin naxanye yi Layiri Kankiraan xalima, ne yi lu tixi Yuruden baan xude wunla ra han yamaan yi yelin Alatalaa yamarine birin nakamale Yosuwe bata yi naxanye fala e xa alo Musa fan Yosuwe yamari naxanye ra. Yamaan yi e mafura gide. 11 Yamaan birin to yelin dangue, Alatalaa Layiri Kankiraan nun saraxaraline yi dangu yamaan yetagi. 12 Ruben bɔnsɔnna nun Gadi bɔnsɔnna nun Manase bɔnsɔnna fɔxɔ kedenna yi dangu Isirayila yamaan yee ra e nun e yenge so seene alo Musa a fala e xa kii naxan yi. 13 Fayida sofa wuli tonge naanin jɔxɔndɔn yi dangu Alatala yetagi yengeso xinla ma, siga Yeriko meremerene binni. 14 Na lɔxɔni, Alatala yi Yosuwe findi muxu gbeen na Isirayila kaane birin yetagi. E yi a binya a siimayaan birin yi alo e Musa binya kii naxan yi. 15 Alatala yi a fala Yosuwe xa, a naxa, 16 “Saraxaraliin naxanye Layiri Sereya Kankiraan xalima, ne yamari, e xa te Yuruden baani.” 17 Yosuwe yi saraxaraline yamari, a naxa, “Ɛ te Yuruden baani.” 18 Saraxaraliin naxanye yi Alatalaa Layiri Kankiraan maxalima, ne to te Yuruden baani, e yi e sanna bama igeni waxatin naxan yi te xaren na, baa igen mɔn yi xete a kiini, a mɔn yi dangu fɔlɔ alo a singeni. Yuruden baan birin mɔn yi findi fufaan na. 19 Yamaan te Yuruden baani jeeen kike singen xii fuden nan ma. E yi sa e daaxadeni tɔn Giligali taani, Yeriko sogeteden binni. 20 E geme fu nun firinna naxanye tongo Yuruden baani, Yosuwe yi ne dɔxɔ Giligali taani. 21 A yi a fala Isirayila kaane xa, a naxa, “Xa Ɛ diine Ɛ maxɔdin waxati famatɔni, e naxa, ‘Nanse gemeni itoe ra?’ 22 e xaranma ito nan ma, Ɛ naxa, ‘Isirayila kaane Yuruden baani gidi nen a yixaraxin na.’ 23 Amasɔto Alatala Ɛ Ala Yuruden baani ito xɔri nen Ɛ yee ra, han Ɛ yi gidi alo Alatala Ɛ Ala Gbala Baan liga kii naxan yi,

a yi a xɔri en yee ra han en yi gidi. 24 A na feen ligaxi nen alogo dunuya siyane birin xa a kolon a Alatala senben gbo. E nun mɔn Ɛ xa gaxu Alatala Ɛ Ala yee ra habadan.”

5 Amoline mangan naxanye yi Yuruden kidi ma sogegododen binni, e nun Kanan kaane mangan naxanye birin fɔxɔ igen de, ne to a me, Alatala bata Yuruden baani xara Isirayila kaane yee ra han e birin yi gidi, e bɔnen yi kala, e yilanyilan Isirayila kaane yee ra. 2 Na waxatini, Alatala yi a fala Yosuwe xa, a naxa, “Gemeni nafala filene ra, i Isirayila xemene banxulan.” 3 Yosuwe yi gemeni nafala filene ra, a yi Isirayila xemene banxulan. E yi na geyaan xili sa banxulan tidena. 4 Yosuwe na liga feni ito nan ma. Xemen naxanye birin keli Misiran yamanani, sofane birin, ne faxa nen tonbonni kira yi e keli xanbini Misiran yi. 5 Xemen naxanye birin keli Misiran yi, ne birin yi banxulanxi, koni naxanye birin bari tonbonni kira yi e keli xanbini Misiran yi, ne sese mi yi banxulanxi. 6 Isirayila kaane lu nen tonbonni jee tonge naanin sigatini, han na xemene birin yi yelin faxe naxanye yi nɔe yengen soe e mini Misiran yamanani waxatin naxan yi, naxanye tondi Alatala xuiin name. Alatala yi a kolɔ, a e mi fa na bɔxɔn toe Alatala bata yi a kolɔ e fafane xa naxan ma fe ra a xa a so en yii, kumin nun nɔnɔn gbo bɔxɔn naxan yi. 7 Ala yi e diine tongo e funfuni. Yosuwe ne nan banxulan, bayo e mi yi banxulanxi kira yi. 8 Yamaan xemene birin yelin xanbini banxulanje, e yi e raxara daaxadeni han e yi kende ya. 9 Alatala yi a fala Yosuwe xa, a naxa, “N bata Misiran kaane marayagin masiga Ɛ ra.” Nanara, e yi menna xili sa Giligali han to. 10 Isirayila kaane yi daaxa Giligali, e Halagi Tiin Dangu Lɔxɔn Sanla raba mɛnni kiken xi fu nun naaninde lɔxɔn jinbanna ra Yeriko meremerene ma. 11 Halagi Tiin Dangu Lɔxɔn Sanla kuye baan yeteni, e yi yamanan sansi bogine don, buru ratetaren nun sansi xɔri gilinxine. 12 E to yamanan bogi seene don, na kuye bani, Isirayila kaane mi fa Manna donseen don daxi yo sɔto sɔnɔn. E yi Kanan bɔxɔn bogi seene don na jeeen na. 13 Yosuwe to Yeriko taan li, a yi a yeeen nakeli, a yi xemena nde to tixi a yetagi, a silanfanna suxi a yii. Yosuwe yi a ralan, a a maxodin, a naxa, “I nxu tan nan xa ba, hanma nxu yaxune?” 14 A yi Yosuwe yabi, a naxa, “Muxu yo. Alatalaa gali xunna nan n na. N bata fa.” Yosuwe yi bira, a yi a yetagin lan bɔxɔn ma a binya feen na,

a fa a fala a xa, a naxa, “N kanna nanse falama a walikeen xa?” 15 Alatalaa gali xunna yi a fala Yosuwe xa, a naxa, “I ya sankidine ba i sanni, bayo i tixi yire sarijanxin nin.” Yosuwe yi na liga.

6 Yeriko taan sodene birin balanxin nan yi a ra Isirayila kaane fe ra. Muxe mi yi minima, muxe mi yi soma. 2 Alatala yi a fala Yosuwe xa, a naxa, “A mato, n bata Yeriko taan nun a mangan nun a sofa fangamane so i yii. 3 E nun i ya sofane xa taan nabilin sanja ma keden loxo keden. E xa na liga xii sennin bun ma. 4 Saraxaraliin muxu solofere xa konton feri solofere tongo xotane ra, e yi ti Layiri Kankiraan yee ra. A xii soloferede loxoni, e taan nabilin sanja ma solofere, saraxaraline xa lu xotane fe. 5 E na xotane fe waxatin naxan yi, e yi a xuiin me, yamaan birin xa sonxo gbeen nate. Nayi, yinna naxan taan nabilinxi, na birama nen a yete ra, yamaan birin yi e tinxin taan na e so keden na.” 6 Nunu a dii Yosuwe yi saraxaraline xili, a a fala e xa, a naxa, “E Layiri Kankiraan tongo. E saraxarali solofere ti Alatalaa Kankiraan yee ra konton feri solofere suxi naxanye yii xotane ra.” 7 A yi a fala yamaan xa, a naxa, “E siga, e sa sigan ti taan nabilinni. Kantan muxuna ndee xa dangu Alatalaa Kankiraan yee ra.” 8 Yosuwe a fala yamaan xa kii naxan yi, e yi a liga na kiini. Saraxarali soloferene yi siga xota soloferene fe Alatala yetagi. Alatalaa Layiri Kankiraan maxali muxune yi bira e foxo ra. 9 Kantan muxun yee ra xiine yi sigan tima saraxaraline yee ra naxanye yi xotane fema. Kantan ti donxene yi bira kankiraan maxali muxune foxo ra. E yi sigan tima xota xuiin nan ma. 10 Yosuwe bata yi yamarini ito so yamaan yii, a naxa, “E nama sonxon nate, e nama e xuini te, e nama fala yo ti fo n na a fala e xa loxon naxan yi. Na waxatini, e sonxon nate!” 11 E yi taan nabilin Alatalaa Kankiraan na sanja ma keden. Na xanbi ra, e yi xete yamaan daaxadeni, e yi xi menni. 12 Yosuwe yi keli subaxa, saraxaraline yi Alatalaa Kankiraan tongo. 13 Saraxarali soloferene yi siga xota soloferene fe Alatalaa Kankiraan yee ra. Kantan muxun yee ra xiine yi tixi e yee ra. Kantan ti donxene fan yi biraxi Alatalaa Kankiraan maxali muxune foxo ra. E yi sigan tima xota xuiin nan ma. 14 E yi taan nabilin doxona keden a xi firinde loxon fan yi. Na xanbi ra, e yi xete yamaan daaxadeni. E yi na liga xii sennin. 15 A xii soloferede loxoni, e yi keli subaxani, e mon yi taan nabilin na kiini doxona ma solofere. E taan nabilin na

loxo keden peen nin sanja ma solofere. 16 Nayi, e to a rabilin a doxode soloferedeni, saraxaraline yi xotane fe. Yosuwe yi a fala yamaan xa, a naxa, “E sonxon nate, bayo Alatala bata taan so e yii. 17 Alatala bata halagin nagidi taani ito nun a yi seene birin ma, fo Raxabi keden peena, yalunde jaxanla, na nan kisima e nun muxun naxanye birin sa luma a banxin kui, bayo a en ma xerane yigiya nen en naxanye xe. 18 Koni e a liga e yeren ma. E yete ratanga se halagi daxine ma alogo e nama na sese xali, xanamu, e halagin nun gbalon nafama Isirayila yamaan daaxadeni nen. 19 Gbetin nun xemaan nun muran sula daxine nun wure muranne birin nasarijanxi Alatala nan xa, fo e xa ramara a nafulu ramaraden nin.” 20 Yamaan yi sonxon nate. Saraxaraline yi xotane fe. Yamaan to xota xuiin me, e yi sonxo gbeen nate, taan nabilinna yinna yi bira a yete ra. Yamaan yi e tinxin taan na, e so keden na. E yi taan suxu. 21 E yi taan halagi Ala xa, e men kaane birin faxa silanfanna ra, xemen nun jaxanla, dii joren nun fonna, hali jingene nun yexene nun sofanle. 22 Xeme firinna naxanye siga yamanan nakorosideni, Yosuwe bata yi a fala ne xa, a naxa, “E siga na yalunde jaxanla banxini. E sa a ramini e nun a muxune birin, alo e e kolo a xa kii naxan yi.” 23 Banxulan firinna naxanye yamanan nakorosi wundoni, ne yi siga, e sa Raxabi ramini banxini e nun a fafe nun a nga nun a tadane nun a xunyene nun a muxune birin e nun a xabilan birin, e yi e ramini, e e radoxo Isirayila yamaan daaxaden dexon. 24 Isirayila kaane yi taan gan e nun a yi seene birin, fo gbeti nun xemaan nun muran sula daxine nun wure muranne. Ne yi ramara Alatalaa banxin nafulu ramaradeni. 25 Yosuwe yi yalunde jaxanla Raxabi ratanga, e nun a denbayaan nun a muxune birin amasoto Yosuwe xeraan naxanye rasiga Yeriko taan nakorosideni, a ne yigiya nen. A mon doxi Isirayila kaane tagi han iki. 26 Na waxatini, Yosuwe yi a kolo falani ito ma, a naxa, “Dangan na kanna xa Alatala yetagi naxan na Yeriko taan ti. Na kanna na a ti folo, a bonoma a dii singeni nen. A na taan so deen ti, a bono a bolokadani.” 27 Alatala yi lu Yosuwe xon. A xinla yi yamanan birin suxu.

7 Isirayila kaane tinxintareyaan liga nen Ala ra, e yi se halagi daxine tongo. Karimi a dii xeme Akan nan na sena ndee tongo Ala tonna doxo naxanye tongo fe ra. Sabidi nan Karimi soto. Sera nan Sabidi soto. Sera keli Yuda bonsonna nin. Alatala yi xolo Isirayila kaane

ma han! 2 Yosuwe yi xerane rasiga keli Yeriko siga Ayi taani, taan naxan Beti-Aweni dɛxɔn ma, Beteli taan sogeteden binni. A yi a fala e xa, a naxa, “E siga, e sa yamanan nakɔrɔsi.” Na xemene yi siga Ayi taana fe rakɔrɔsideni. 3 E yi xetɛ Yosuwe fema, e yi a fala, e naxa, “Hali yamaan birin mi siga Ayi taan yengedeni, fɔ muxu wuli firin hanma muxu wuli saxan ɲɔxɔn gbansan. Ne Ayi kaane nɔɛ nɛn. Hali i mi yamaan birin naxadan, bayo en yaxune mi wuya.” 4 Nayi, muxu wuli saxan yatɛ yi siga, koni e yi sa e gi Ayi kaane bun yengeni. 5 Ayi kaane yi muxu tonge saxan e nun sennin faxa e yɛ. Ayi kaane yi e kedi keli taan so dɛɛn na han Sebarimi. E yi siga e faxɛ geya godon na. Isirayila yamaan bɔɲɛn yi kala, e yigitege. 6 Yosuwe yi a dugine yibo a ma, a bira, a yi a yetagin lan bɔxɔn ma Alatalaa Kankiraan yetagi han ɲinbanna ra, e nun Isirayila fonne. E yi burunburunna sa e xunni sununi. 7 Yosuwe yi a fala, a naxa, “N Marigina Alatala, nanfera i a ragidixi yamani ito xa Yuruden baani gidi, i yi nxu so Amorine yii alogo i xa nxu halagi? Hali nxu yi lu Yuruden baan mɛn binni nun! 8 N Marigina, n fa nanse falama iki, Isirayila kaane to bata e gi e yaxune yɛɛ ra? 9 Kanan kaane nun yamanan muxun bonne feni ito mɛma nɛn, e yi nxu rabilin, e nxu xinla ɲan bɔxɔ xɔnni ito ma. Nayi, i tan fa nanse ligama i xili binyena fe ra?” 10 Alatala yi a fala Yosuwe xa, a naxa, “Keli, i yetagin lanxi bɔxɔn ma nanfera? 11 Isirayila bata yulubin liga. E bata layirin kala n na e yamari naxan na. E bata se halagi daxina ndee tongo. E bata mɲan ti, e a feen luxun, e seene luxun e goronne kui. 12 Nanara, Isirayila kaane mi fa nɔɛ tiyɛ e yaxune yɛɛ ra. E e gima nɛn e yɛɛ ra, bayo e fan yetɛɛn bata findi muxu halagi daxine ra. N mi fa luyɛ ɛ xɔn, xa ɛ mi se halagi daxine raxɔri ɛ tagi. 13 Keli, i yamaan nasariɲan. I yi a fala, i naxa, ‘E yetɛ rasariɲan tila fe ra. Amasɔtɔ Alatala Isirayilaa Ala ito nan falaxi, a naxa: Se halagi daxine ɛ tagi. Isirayila kaane, ɛ mi nɔɛ tiyɛ ɛ yaxune yɛɛ ra, fanni ɛ mi na seene ba ɛ tagi. 14 Xɔtɔnni ɛ fa n yetagi bɔnsɔn yɛɛn ma. Alatala na bɔnsɔnna naxan yita, ne yi e maso xabila yɛɛn ma. Alatala na xabilan naxan yita, ne yi e maso denbaya yɛɛn ma. Alatala na denbaya naxan yita, ne yi e maso keden keden yɛɛn ma. 15 Naxan na suxu, a li se halagi daxine a yii, na kannu xa gan e nun a yii seene birin, bayo a bata Alatalaa layirin kala, a yi kalan ti Isirayila yamaan birin ma!’” 16 Xɔtɔn xɔtɔn, Yosuwe yi keli, a yi Isirayila kaane maso bɔnsɔn yɛɛn ma. Masensenna

yi Yuda bɔnsɔnna suxu. 17 A yi Yuda xabilane muxune maso, masensenna yi Sera xabilan suxu. A yi Sera xabilan muxune maso denbaya yɛɛn ma, masensenna yi Sabidi suxu. 18 A yi Sabidi a denbaya xunne maso, a yi Akan suxu, Karimi a dii xemena. Sabidi nan Karimi sɔtɔ. Sera yi Sabidi sɔtɔ keli Yuda bɔnsɔnni. 19 Yosuwe yi a fala Akan xa, a naxa, “N ma diina, ɲɔndin fala Alatalaa binyena fe ra, Isirayilaa Ala. I yi a tantun. I naxan ligaxi, a fala n xa. I nama a luxun n ma.” 20 Akan yi Yosuwe yabi, a naxa, “Nɔndin na a ra. N tan nan yulubin ligaxi Alatala ra, Isirayilaa Ala. N ni ito nan ligaxi: 21 N Sinari kaane doma gbeena nde to nɛn se suxine yɛ, naxan yi tofan han, e nun gbeti gbanan kɛmɛ firin, e nun xɛmaan kilo tagi. E xɔnla yi n suxu, n yi e tongo. E sa bitinxi n ma bubun kui. Gbetin saxi bonne bun ma.” 22 Yosuwe yi xerane rasiga e giyɛ bubun kui, e yi sa seene li luxunxi, gbetin yi saxi seen bonne bun ma. 23 E yi a birin tongo bubuni, e siga e ra Yosuwe nun Isirayila kaane fema. E yi e sa Alatala yetagi. 24 Yosuwe nun Isirayila birin yi Sera a dii Akan tongo e nun gbetin nun doma gbeen nun xɛmaan nun a dii xemene nun a dii tɛmɛne nun a ɲingene nun a sofanle nun a xuruseene nun a bubun nun a yii seen birin, e siga e ra Akori lanbanni. 25 Yosuwe yi a fala Akan xa, a naxa, “I bata ɲaxankatan nafa nxu ma, Alatala i fan ɲaxankatama nɛn to.” Isirayila kaane birin yi a magɔlɔn, e nun bonne, e yi e gan. 26 E yi gɛmɛ gɛgɛbe malan Akan fari. Han to na gɛmɛne malanxi na. Alatala yi xetɛ a xɔlɔn fɔxɔ ra. Nanara, menna xili nɛn Akori lanbanna han to.

8 Alatala yi a fala Yosuwe xa, a naxa, “Hali i nama gaxu, i nama yigitege. Ganla birin tongo, i sa Ayi taan yenge. A mato, n bata Ayi mangan so i yii e nun a yamaan birin nun a taan nun a bɔxɔna. 2 I Ayi taan nun a mangana feen ligama nɛn alo Yeriko taan nun a mangan liga kii naxan yi. Koni iki, ɛ nɔɛ e yii seene nun e xuruseene tonge nɛn. Maraterɛna yengeni tɔn taa xanbin na.” 3 Yosuwe nun ganla birin yi keli, e siga Ayi taan yengedeni. Yosuwe yi sofa yɛbaxin muxu wuli tonge saxan sugandi, a yi e rasiga kɔɛɛn na. 4 A yi yamarini ito so e yii, a naxa, “Nba, ɛ sa ɛ luxun taa xanbin na ɛ maraterɛna yengeni tɔn. ɛ nama ɛ makuya taan na. ɛ yitɔnxin xa lu mɛnni. 5 Nxu nun ganla nxu masoma nɛn taan na. Taan muxune na mini waxatin naxan yi nxu yengedeni, nxu yi nxu gi e bun alo naxan liga a singeni. 6 E sigama nɛn nxu kede

han nxu makuya taan na. Nayi, e mirima nen, a nxu nxu gima e bun nen alo a fəloni. 7 Nayi, ε yi mini ε luxundeni, ε yi din taan na. Alatala, ε Ala a soma nen ε yii. 8 E na taan suxu, ε tēen so a ra. E na birin liga alo Alatala a falaxi kii naxan yi. N bata na yamari ε ma.”

9 Yosuwe yi e rasiga, e sa e luxun Ayi taan nun Beteli taan longonna ra, Ayi taan sogegododen binni a yenge xinla ma. Yosuwe tan yi xi yamaan tagi. 10 Yosuwe yi keli subaxa, a yi a sofane mato. E nun Isirayila fonne birin yi ti yamaan yee ra, siga Ayi taani. 11 A ganla birin yi siga, han e sa taan li. E yi daaxadeni tən Ayi kōmen fəxoni, lanbanna yi lu e nun Ayi taan tagi. 12 Yosuwe yi sofa wuli suulun jəxən tongo, a yi e yamari a e xa sa e luxun Ayi taan nun Beteli taan longonna ra, taan sogegododen binni yenge so xinla ma. 13 Yamaan yi e ti kiini tən, naxanye yi daaxadeni, ne yi lu taan kōmen fəxoni, bonne yi lu taan sogegodode binni yenge so xinla ma. Na kōeen na, Yosuwe nun gali dənxen yi godo lanbanni. 14 Ayi taan mangan to na to, e nun taan xemene birin yi keli mafuren, e yi siga Isirayila kaane yengedeni Araba tonbonna de. Koni e mi yi a kolon xa muxune luxunxi e xili ma taa xanbin na. 15 Yosuwe nun Isirayila yamaan birin yi tin Ayi muxune xa e kedi, e yi e gi e bun siga tonbon kiraan xən. 16 Ayi taan muxune birin yi keli e sagatan xinla ma. E yi bira Yosuwe fəxə ra han e yi makuya taan na pon! 17 Xeme yo mi lu Ayi taan nun Beteli taani. E birin yi siga Isirayila kaane sagatandeni. E yi taan so deen lu rabixi siga Isirayila kaane fəxə ra. 18 Alatala yi a fala Yosuwe xa, a naxa, “Tanban naxan suxi i yii, na ti Ayi taan xa, bayo n taan soma nen i yii.” Yosuwe yi a tanban ti taan xa. 19 Yosuwe a yiini bandun waxatin naxan yi, xemen naxanye yi luxunxi maraterena yengen xinla ma, ne yi mini e luxundene yi mafuren, e yi e gi so taani, e na suxu, e tēen so a ra mafuren. 20 Ayi xemene to e yee raxete, e yi tee tutin to te kore e taani. Kira yo mi yi fa e xa, bayo e yi naxanye sagatanma tonbonni, ne bata yi xete e kanke. 21 Yosuwe nun Isirayila ganla birin yi a kolon, a sofaan naxanye yi luxunxi taan naterenadeni yengeni, ne bata yi taan suxu, taan tutin yi tema. E yi e xun xete Ayi kaane xili ma. 22 Isirayila kaan naxanye yi Ayi taani, ne fan yi mini taani e yengedeni. Na nan a liga sigade mi lu Ayi kaane xa, e to yi Isirayila ganle tagi. E yi e birin faxa. E sese mi lu e nii ra. Muxu yo mi nə a giye. 23 Koni e yi Ayi mangan tan suxu, e siga a ra Yosuwe fema. 24 Isirayila kaane to yelin Ayi kaane

birin faxe xee ne ma e nun burunna ra e siga e dinje e ra denaxan yi, e yi so taan kui, e na kaane birin faxa silanfanna ra. 25 Ayi kaan xemen nun jaxanla naxan faxa na ləxoni, e sigə han muxu wuli fu nun firin yate. 26 Yosuwe a tanban yi lu tixi Ayi taan xa han a muxune birin yi halagi. 27 Isirayila kaane yi men kaane yii seene tongo e gbeen na alo xuruseene nun se gbete ye, alo Alatala a yamari Yosuwe ma kii naxan yi. 28 Yosuwe yi Ayi taan gan, han to taa xəri rabejinxin na a ra. 29 Ayi mangan tan, e na singan wudin kəe ra han jinbanna ra. Sogen to godo, Yosuwe yi yamarin fi, a e xa a binbin nagodo wudin kəe ra. E yi a woli ayi taan so deen na, e yi geme wuyaxi malan a fari. Han to, na mən na kiini. 30 Nayi, Yosuwe yi saraxa ganden nafala Alatala xa Ebali geyaan fari, Isirayilaa Ala, 31 alo Musa Alatalaa walikena a yamari Isirayila kaane ma kii naxan yi. E yi saraxa ganden nafala gemene ra, naxanye mi yi solixi, wuren mi yi dinxi naxanye ra, alo a sebxə Musaa Sariya kitabun kui kii naxan yi. E yi saraxan gan daxine nun bəje xunbeli saraxane ba Alatala xa. 32 Musa sariyan naxanye sebe, Yosuwe mən yi na jəxən sebe gemene ma Isirayila kaane birin yee xəri menni. 33 Isirayila kaane birin, a fonne nun e kuntigine nun e kitisane birin xəjen nun dugurenne, ne birin yi ti kankiraan fəxə firinni e yee rafindixi Lewi bənsənnə saraxaraline ma, naxanye yi Alatalaa Layiri Kankiraan maxalima. Yamaan fəxə kedenna yi siga Garisimi geyaan fari, a bode fəxən fan yi ti Ebali geyaan fari, alo Alatalaa walikeen Musa bata yi a yamari e ma kii naxan yi, fa fala e xa duba Isirayila yamaan xa. 34 Na xanbi ra, Yosuwe yi sariyan falane birin xaran, a dubane nun a dangane, alo a sebxə Sariya Kitabun kui kii naxan yi. 35 Musa naxan birin yamari, na fala keden mi lu Yosuwe mi naxan xaran Isirayila yamaan malaxin xa, hali jaxanle nun diidine, e nun xəjen naxanye yi e ye.

9 Mangan naxanye Yuruden baan sogegododen binni, ne birin yi yengeni ito a fe me, naxanye geyane fari e nun Sefela geya yirene nun Fəxə Ige deen nun Liban dəxən ma, e nun Xitine nun Amorine nun Kanan kaane nun Perisine nun Xiwine nun Yebusune. 2 E yi e malan Yosuwe nun Isirayila yamaan yenge xinla ma. 3 Gabayon kaane fan yi a me Yosuwe Yeriko taan nun Ayi taan liga kii naxan yi. 4 E yi kata Isirayila kaane mayendendeni. E yi e yete findi xerane ra keli yire makuyeni, e bənbəli kobine nun manpa

sase madegexine sa sofanle fari. **5** E yi sankidi fori madegexine so e sannu, e doma kobi jianxine ragodo e ma. E yi buru dungi xaraxine tongo e fandan na naxanye bata yi xunxurunje ayi. **6** E yi sa Yosuwe nun Isirayila kaane li Giligali taani yamaan daaxadeni. E yi a fala e xa, e naxa, “Nxu sa kelixi yamana makuyen nin, fa be yi alogo en xa layirin xidi en tagi.” **7** Isirayila kaane yi e yabi, e naxa, “Yanyina nde, ε dɔxi nxu dɔxɔn ma nɛn. Nxu tan nɔɛ layirin xide en tagi di?” **8** E yi a fala Yosuwe xa, e naxa, “I ya walikene nan nxu ra.” Yosuwe yi e maxodin, a naxa, “Nde ε tan na? ε kelixi minen?” **9** E yi Yosuwe yabi, e naxa, “I ya walikene kelixi yamana makuyen nin Alatala xinla a fe ra, i ya Ala. Amasoto nxu bata a xinla me a naxan birin ligaxi Misiran yamanani, **10** e nun a naxan birin liga Amori manga firinne ra Yuruden baan sogeteden binni, Xesibon taan manga Sixon nun Basan yamanan manga Ogo, naxan yi dɔxi Asataroti taani.” **11** “Nxɔ fonne nun nxu kon kaane birin a fala nen nxu xa, e naxa, ‘ε fandane tongo ε naxan donma kira yi. ε siga Isirayila kaane ralandeni. ε yi a fala e xa, ε naxa, ε walikene nan nxu ra.’ Iki, en xa layirin xidi en bode tagi. **12** Nxɔ burune ni i ra. Nxu yi e tongoma nxu fandan na waxatin naxan yi nxu konni fa be yi, e mon yi wolonxi. Koni, iki e bata xara ayi, e xunxurunje ayi. **13** Nxu yi nxɔ manpa saseni itoe rafema waxatin naxan yi, e nenene nan yi a ra, koni iki e bata yibo. Nxɔ dugine nun nxɔ sankidine mato. E yeteen bata kala fefe sigatini.” **14** Isirayila kaane yi e fandane mato, koni e mi Alatala maxodin. **15** Yosuwe yi lanna raso e tagi, a layirin xidi, a xa e lu e nii ra, yamaan yeerate yi e kolo na fari. **16** E yelin xanbini layirin xide e tagi, xii saxan danguxina, Isirayila kaane yi a me a e dɔxɔ bodene nan yi ne ra. **17** Isirayila kaane yi keli, siga Gabayon kaane taani itoe yi, e sa so e kenla xii saxande loxoni. Na taane ni i ra: Gabayon, Kefira, Beroti, e nun Kiriyati-Yeyarin. **18** Isirayila kaane mi e faxa bayo yamaan yeerate bata yi e kolo e xa Alatala yi, Isirayilaa Ala. Koni yamaan birin yi e yeerate mafalama. **19** Yeerate yi a fala yamaan xa, e naxa, “Nxu bata nxu kolo Alatala yi, Isirayilaa Ala. Iki, en mi fa nɔɛ en yiin dinje e ra. **20** Nayi, en na e fe suxuma ikiini. En na e luma e nii ra nen bayo en bata en kolo e xa. Xanamu en Alaa xolon nafama nen en xili ma.” **21** Yeerate yi a fala e xa, e naxa, “E xa lu e nii ra, koni e xa findi wudi segene nun ige baane ra yamaan birin xa.” Yeerate na nan fala. **22** Yosuwe yi Gabayon

kaane xili, a falan ti e xa, a naxa, “Nanfera ε nxu mayendenxi, ε naxa, a ε sa kelixi yamana makuyen nin, anu ε dɔxi nxu dɔxɔn ma nɛn? **23** Iki, ε bata danga. E tan birin luma nen konyiyani ε findi wudi segene nun ige baane ra n ma Alaa banxin xa.” **24** E yi Yosuwe yabi, e naxa, “Muxune bata a yebe nxu tan i ya walikene xa ki fani Alatala i ya Ala a yamari a walikene Musa ma kii naxan yi, a xa boxoni ito birin so ε yii, a be kaane raxori ε yee ra. Nanara, nxu gaxuxi nxu niin na, nxu yi na liga. **25** Iki nxu fa i tan nan yii. Naxan na i kenɛn, naxan nafa i ma, na liga nxu ra.” **26** Yosuwe na nan liga, a yi e ratanga Isirayila kaane ma alogo e nama e faxa. **27** Yosuwe yi e findi wudi segene nun ige baane ra yamaan xa na loxoni, e nun Alatalaa saraxa ganden xa, a denaxan sugandima. Han to e mon na wanli.

10 Yerusalen mangana Adoni-Sedeki yi a me a Yosuwe bata Ayi taan suxu, a yi na raxori, a mon yi Ayi taan nun a mangan liga alo a Yeriko taan nun a mangan liga kii naxan yi. A mon yi a me a Gabayon kaane nun Isirayila kaane bata lanna raso e bode tagi e layirin xidi, a Gabayon kaane dɔxi e ye. **2** Na yi a gaxu ki fani, bayo taa gbeen nan yi Gabayon na, alo manga taana nde. A yi gbo Ayi taan xa, a muxune birin sofa. **3** Yerusalen mangana Adoni-Sedeki yi xeraan nasiga a faladeni Xebiron manga Hohami nun Yaramuti manga Pirami nun Lakisi manga Yafiya nun Egilon manga Debiri xa, a naxa, **4** “ε fa n fema, ε fa n mali Gabayon yengedeni, bayo e tan bata lanna raso e nun Yosuwe nun Isirayila kaane tagi.” **5** Amorine manga suulunne yi e malan: Yerusalen mangan nun Xebiron mangan nun Yaramuti mangan nun Lakisi mangana e nun Egilon mangana. Ne nun e ganle yi siga, e sa e daaxadene yiton Gabayon taan yetagi. E yi na yenge folo. **6** Gabayon kaane yi xeraan nasiga a faladeni Yosuwe xa Giligali taani yamaan daaxadeni, a naxa, “I nama i ya konyine rabepin. Fa nxu rakisi mafuren! Nxu mali, bayo Amorine mangan birin naxanye dɔxi geyane fari, ne bata e malan nxu xili ma!” **7** Yosuwe nun a ganla birin yi keli Giligali taani, e nun a sofa yebaxine. **8** Alatala yi a fala Yosuwe xa, a naxa, “I nama gaxu e yee ra, bayo n bata e so i yii. E sese mi tiye i yee ra.” **9** Yosuwe yi sigan ti kosen birin na keli Giligali taani, a fa e raterena. **10** Alatala yi e kedi Isirayila yee ra, Isirayila kaane yi sa e no Gabayon taani han! E yi siga e dinje e ra Beti-Xoron kiraan xon,

e siga e faxe han Aseka taan nun Makeda taani. **11** E yi e gima Isirayila kaane yee ra waxatin naxan yi, godo Beti-Xoron geyaan na, ito nan liga e ra: Alatala yi siga balabalan keŋe xungbene rayolonje e fari han Aseka taani. E yi raxori. Balabalan kesen muxun naxanye faxes, ne yi wuya dangu na muxune ra Isirayila kaane naxanye faxes silanfanna ra. **12** Alatala Amorine so Isirayila kaane yii loxon naxan yi, Yosuwe yi falan ti Alatala xa Isirayila kaane yetagi, a naxa, “Sogena, i raxara Gabayon xun ma. I tan kiken fan xa i raxara Ayalon meremerēn xun ma.” **13** Sogen nun kiken yi e raxara han Isirayila yamaan yi e yaxune nō. Feni ito sebexi Yasari a kedin fan kui. Sogen yi a raxara kuyen tagiyani, a mi bira sinma, a lu raxaraxi menni fayida ferijnen keden joxon. **14** Xabu a foloni han to, loxo yo munma a liga alo na loxona, Alatala muxuna nde a maxandin nasuxu na kii nin amasoto Alatala nan yi yengen soma Isirayila xa. **15** Yosuwe nun Isirayila yamaan birin yi xete Giligali taani yamaan daaxadeni. **16** Na manga suulunne yi e gi, e sa e luxun faranna ra Makeda taan dexon. **17** Muxune yi sa na fala Yosuwe xa manga suulunne yi denaxan yi, a e luxunxi faranna ra Makeda taan dexon. **18** Yosuwe yi a fala, a naxa, “E geme gbeene makutukutu, e sa e doxo faranna de ra. E kantan tiine doxo na. **19** Koni e tan nama dan menni de! E en yaxune sagatan, e kiraan bolon e ma. E nama so e taani de! Bayo Alatala e Ala bata e so e yii.” **20** Yosuwe nun Isirayila kaane yi gbalo gbeen nagodo e ma, fayida e yi e raxori fo muxu gixi keden kedenna naxanye sa so taa makantanxine yi. **21** Ganla birin yi xete boje xunbenli Yosuwe fema Makeda dexon yamaan daaxadeni. Muxu yo mi susu falan tiye Isirayila kaane xili ma. **22** Yosuwe yi a fala, a naxa, “E gemene ba faranna de ra, e manga suulunne ramini na ra.” **23** E yi manga suulunne ramini faranna ra, Yerusalem mangan nun Xebiron mangan nun Yaramuti mangan nun Lakisi mangana, e nun Egilon mangana. **24** E to fa mangane ra Yosuwe fema, Yosuwe yi Isirayila xemene birin xili. Sofa kuntigin naxanye siga yengeni, a yi a fala ne xa, a naxa, “E maso, e yi e sanne ti mangani itoe koen fari.” E yi e maso, e yi e sanne ti e koene fari. **25** Yosuwe yi a fala e xa, a naxa, “E nama kuisan, e nama gaxu, e wekile, e yi e senbe so! Amasoto e yaxun naxanye birin yengema, Alatala ito nan ligama e ra e xa.” **26** Yosuwe yi e faxes. A yi e singan wudi suulun ke ra, e yi lu singanxi menni han jinbanna ra. **27** Sogen bira waxatini, Yosuwe yi

yamarin fi, a e xa e binbine ragodo wudin ke ra. E yi luxunxi faranna naxan na, e yi sa e bira menni. E yi geme gbeene doxo faranna de ra. Han to e mon menni. **28** Yosuwe yi Makeda taan fan suxu na loxo yeteni. E yi taan muxune nun e mangan faxes silanfanna ra. A yi na muxune birin halagi, muxu yo mi lu a nii ra. A yi Makeda taan mangan liga alo a Yeriko taan mangan liga kii naxan yi. **29** Yosuwe nun Isirayila kaane birin yi keli Makeda taani e siga Libina taani. E yi na yenge folo. **30** Alatala yi na taan fan so e yii, e nun a mangana. Isirayila kaane yi taan muxune birin faxes silanfanna ra e nun muxun naxanye birin yi a kui. E mi muxu yo lu a nii ra menni. E yi na mangan liga alo e Yeriko taan mangan liga kii naxan yi. **31** Yosuwe nun Isirayila kaane birin yi keli Libina taani, e siga Lakisi taani. E yi daaxadeni ton na yetagi, e na yenge folo. **32** Alatala yi Lakisi taan so Isirayila kaane yii. Yengen xii firinde loxoni, e yi taan nō, e taan muxune faxes silanfanna ra, e nun naxanye birin yi a kui, alo e Libina taan liga kii naxan yi. **33** Nayi, Geseri taan mangana, Horami yi siga Lakisi taan malideni. Yosuwe yi e nun a ganla faxes, a mi muxu yo lu a nii ra. **34** Yosuwe nun Isirayila kaane birin yi keli Lakisi taani e siga Egilon taani. E yi e daaxadeni ton na yetagi, e yi na fan yenge folo. **35** E yi na nō na loxo yeteni, e yi taan muxune birin faxes silanfanna ra, e nun muxun naxanye birin yi a kui. Yosuwe yi na raxori na loxo yeteni alo a Lakisi taan liga kii naxan yi. **36** Yosuwe nun Isirayila kaane birin yi keli Egilon taani, e siga Xebiron taani, e yi na yenge folo. **37** E yi na nō, e taan muxune nun e mangan faxes silanfanna ra, e nun a rabilinna taane nun muxun naxanye birin yi ne kui. E mi muxu yo lu a nii ra alo e naxan liga Egilon taani. Yosuwe yi na taan naxori fefe, e nun naxanye yi a kui. **38** Yosuwe nun Isirayila kaane yi xete, e Debiri taan yenge folo. **39** E yi taan nun a mangan nō, e nun taan naxanye na rabilinni. E yi e faxes silanfanna ra. Muxun naxanye birin na taane yi, e yi ne raxori, e mi muxu yo lu a nii ra. Yosuwe yi Debiri taan nun a mangan liga alo a Xebiron taan nun Libina taan nun a mangan liga kii naxan yi. **40** Yosuwe yi na yamanan birin nō, geya yirene nun Negewi tonbonna nun Sefela geya yiren nun e mangane birin. A yi muxune birin naxori, naxanye birin yi yengima a mi muxu yo lu a nii ra alo Alatala Isirayila Ala a yamari kii naxan yi. **41** Yosuwe yi e yenge keli Kadesi-Barineya taani han Gasa taana, e nun Gosen yamanan birin, sa doxo Gabayon taan na.

42 Yosuwe yi na taane nun e mangane nɔ sanja ma kedenni, bayo Alatala Isirayilaa Ala nan yi yengen soma Isirayila xa. 43 Yosuwe nun Isirayila yamaan birin yi xete Giligali taani yamaan daaxadeni.

11 Xasori taa mangan Yabin to na me, a yi xeraan nasiga Madon taa mangan Yobabo nun Simiron taan mangan nun Akisafa taa mangan ma, 2 e nun mangan naxanye yi dɔxi geya yireni sogetede kɔmen fɔxɔni, e nun naxanye yi Yuruden meremerene ma Kinereti Daraan yiifari fɔxɔni e nun naxanye yi Sefela geya yireni, e nun naxanye yi Dɔrɔ yamanan birin yi sogegododen binni, 3 e nun Kanan kaane ma naxanye sogeteden nun sogegododen binni, e nun Amorine nun Xitine nun Perisine nun Yebusun naxanye गयाan fari, e nun Xiwin naxanye Xerimon गयाan lanbanni Misipa yamanani. 4 E nun e ganle birin yi mini, e findi yama gbeen na, alo baa xɔn jemensinna. E soone nun yenge so wontorone fan yi wuya han! 5 Mangani itoe birin yi fa e malan, e yi e yamaan daaxadeni tɔn Meromi xuden dɔxɔn ma, Isirayila kaane yenge xinla ma. 6 Alatala yi a fala Yosuwe xa, a naxa, "I nama gaxu e yeɛ ra de, bayo i yanyi tila, n ne birin soma nen i yii, e faxaxin yi lu Isirayila kaane yetagi. I yi e soone san fasane bolon. I yi e yengeso wontorone fan gan." 7 Yosuwe nun a ganla birin yi fa e raterena Meromi xuden de, e yi e yenge. 8 Alatala yi e so Isirayila kaane yii. E yi e nɔ, e yi siga e makede han Sidon taa gbeeni, han Misirefoti-Mayimi yi, han Misipe meremerene sogeteden binni. E yi e birin faxa, e mi muxu yo lu a nii ra. 9 Yosuwe yi a liga alo Alatala a fala a xa kii naxan yi. A yi e soone san fasane bolon. A yi e yenge so wontorone fan gan. 10 Na waxatini, Yosuwe xetematɔɔn yi Xasori taan yenge, a yi a mangan faxa silanfanna ra. Xasori taan nan yi yamanani itoe birin manga taan na. 11 E yi taan muxune birin faxa silanfanna ra, e yi e raxori fefe. E mi muxu yo lu a nii ra. E yi Xasori taan gan. 12 Yosuwe yi na manga taane birin yenge, a yi e mangane suxu. E yi e birin faxa silanfanna ra, e raxori, alo Alatala a walikeen Musa a yamari e ma kii naxan yi. 13 Koni taan naxanye yi geyane fari, Isirayila kaane mi ne sese gan ba Xasori taan na Yosuwe naxan gan. 14 Seen naxan birin yi taane yi e nun e xuruseene, Isirayila kaane yi ne birin tongo. Koni e yi muxune birin faxa silanfanna ra, e raxori, e mi muxu yo lu a nii ra. 15 Alatala naxan yamari a walikeen Musa

ma, Musa fan yi na yamari Yosuwe ma. Yosuwe fan yi na rakamali. A mi jinan yamari yo xɔn Alatala naxan so Musa yii. 16 Yosuwe yi yamanani itoe birin tongo: geya yiren nun Negewi tonbonna nun Gosen yamanan birin nun Sefela geya yiren nun Yuruden baan meremerene nun Isirayila bɔxɔn geyane han sa dɔxɔ Sefela ra. 17 Keli Xalaka गयाan ma naxan tema Seyiri geyane binni, han Baali-Gadi yi Liban meremerene yi Xerimon गयाan lanbanni, a yi na mangane birin suxu. A yi e faxa. 18 Yosuwe bu nen mangani itoe yenge han! 19 Taa yo mi yi na naxan lanna raso e nun Isirayila kaane tagi, e layirin xidi, fɔ Xiwin naxanye yi dɔxi Gabayon nabilinni. E taan bonne birin suxu nen yengeni. 20 Amasɔtɔ Alatala nan yi Kanan kaane bɔjɛne yixɔdɔxɔma alogo e xa Isirayila kaane yenge, Ala yi e halagi. E mi kininkinin e ma, e yi e raxori alo Alatala a yamari Musa ma kii naxan yi. 21 Na waxatini, Yosuwe yi siga. A yi Anakine yenge naxanye kelixi Xebiron geya yiren nun Debiri taan nun Anaba taan nun Yuda nun Isirayila geyane birin yi. Yosuwe yi e birin halagi e nun e taane. 22 Anaki bɔnsɔnna muxu yo mi fa lu Isirayila yamanani. E fa lu Gasa taan nun Gati taan nun Asadodi taane nin. 23 Nayi, Yosuwe yi bɔxɔn birin tongo alo Alatala a fala Musa xa kii naxan yi. Yosuwe yi na bɔxɔn so Isirayila kaane yii e keen na, a yitaxun Isirayila bɔnsɔnne ra. Na xanbi ra, bɔjɛ xunbenla yi lu yamanani, yengen yi jan.

12 Mangane ni i ra Isirayila kaane naxanye nɔ, e yi e yamanan tongo Yuruden baan sogeteden binni, keli Arinon xuden ma han sa dɔxɔ Xerimon गयाan na, sa Yuruden meremerene fari sogeteden binni. E itoe nan nɔ: 2 Amorine mangan Sixɔn naxan yi dɔxi Xesibɔn yi. A tan nan ma mangaya yi kelima Arinon xude wunla ma, Aroyeri taan yi denaxan yi siga han Yaboko xudena Amoni yamanan danna. Galadi yamanan fɔxɔ kedenna fan yi na nan kui. 3 A tan nan mɔn yi Yuruden sogeteden binna meremerene xun na, keli Kinereti Daraan ma han Araba Daraan naxan xili Fɔxɔ Ige Darana, sa dɔxɔ Beti-Yesimoti taan na, han Pisiga गयाan san bun yiifari fɔxɔn binni. 4 E mɔn yi Ogo fan nɔ, Basan mangana, Refa bɔnsɔnna muxu dɔnxena nde. A yi dɔxi Asatarɔti nun Edere taane nin. 5 A tan nan yi mangayani keli Xerimon गयाan nun Salaka nun Basan yamanan birin yi siga han Gesuri kaane nun Maka kaane yamanan

danne nun Galadi yamanan bode fəxəna, siga han Manga Sixən ma mangayaan fələdena, Xesibən taan mangana. **6** Musa Alatalaa walikēen nun Isirayila kaane yi na mangane birin nō. Alatalaa walikēen Musa yi e yamanan so Ruben bənsənnə nun Gadi bənsənnə nun Manase bənsənnə fəxə kedenna yii, mənna yi findi e gbeen na. **7** Mangane ni i ra Yosuwe nun Isirayila kaane naxanye nō Yurudən baan sogegododen binni, keli Baali-Gadi taani Liban lanbanni han sa dəxə Xalaka geyaan na naxan tema Seyiri geyane binni. Yosuwe yi bəxəni itoe birin so Isirayila bənsənnə yii, a bənsənnə birin yi e gbee kēen sətə: **8** geya yamanan nun Sefela geya yiren nun Yurudən mərəmərəne nun geyane lanban yirene nun tonbon yirene nun Negewi tonbonna. Siyani itoe nan yi dəxi na yirene yi: Xitine nun Amorine nun Kanan kaane nun Perisine nun Xiwine nun Yebusune. **9** E taa mangan naxanye nō, ne xinle ni itoe ra: Yeriko mangana, Ayi taan mangan naxan yi Beteli fema, **10** Yerusalen mangana, Xebiron mangana, **11** Yaramuti mangana, Lakisi mangana, **12** Egilon mangana, Geseri mangana, **13** Debiri mangana, Gederi mangana, **14** Xoroma mangana, Aradi mangana, **15** Libina mangana, Adulan mangana, **16** Makeda mangana, Beteli mangana, **17** Tapuwa mangana, Xeferi mangana, **18** Afeki mangana, Lasarən mangana, **19** Madon mangana, Xasori mangana, **20** Simiron Meron mangana, Akisafa mangana, **21** Taanaki mangana, Megido mangana, **22** Kedesi mangana, Yokanayimi mangan naxan yi Karemele yi, **23** Dəro mangan naxan yi Dəro yamanani, Goyin mangan naxan yi Giligali yi, **24** e nun Tirisa mangana. Na taane birin taa keden manga keden. E malanxina, manga tonge saxan e nun keden.

13 Yosuwe bata yi fori ki fəni. A siimayaan bata yi xənkuya, Alatala yi a fala a xa, a naxa, “I bata fori ki fəni, anu yamanan dənaxan masotətare luxi, mənna mən gbo. **2** Filisitine nun Gesuri kaane bəxəne birin luxi, **3** keli Sixori xuden ma Misiran sogeteden binni, siga han Ekiron taana, sogetede kəmənna ma. Na birin yatəxi Kanan kaane gbeen nan na. Filisitine manga suulunne nan mangayani mənni Awi kaan naxanye Gasa taan nun Asadodi taan nun Asikalən taan nun Gati taan nun Ekiron taani. **4** Kanan kaane bəxəne fan luxi, keli Meyara taan ma Sidən kaane dənaxan yi, han Afeki taani han Amorine danna. **5** Gebala kaane bəxəne luxi e nun Liban bəxən birin

naxan sogeteden binni, keli Baali-Gadi taan ma, naxan Xerimon geyaan san binni, han Lebo-Xamata taana. **6** E nun Sidən kaan naxanye birin geyane fari, keli Liban yi han Misirefoti-Mayimi. N yetēen na yamanane muxune kedima nən Isirayila kaane yetē ra. I xa na birin yitaxun Isirayila kaane ra e kēen na, alo n na i yamarixi kii naxan yi. **7** Yamanani ito yitaxun Isirayila bənsən solomanaaninne ra, e nun Manase bənsənnə fəxə kedenna.” **8** Manase bənsənnə fəxə kedenna nun Ruben bənsənnə nun Gadi bənsənnə, ne bata yi e gbee kēen sətə, Alatalaa walikēen Musa naxan fixi e ma Yurudən kidi ma sogeteden mabinni. **9** E bəxən fələxi Aroyeri taan nan ma Arinon xuden dē, e nun taan naxan lanbanni, siga Medeba taan mabinna lanta yiren birin yi, han Dibon taana, **10** e nun Amori mangan Sixən ma taane birin naxan yi dəxi Xesibən taani, siga han Amonine bəxən danne, **11** e nun Galadi taan nun Gesuri kaane nun Maka kaane yamanan nun Xerimon geyaan birin, e nun Basan yamanan birin siga han Salaka. **12** E nun Basan manga Ogo a yamanan fan yi findi e gbeen na, naxan dəxə Asatarəti taan nun Edere taani, naxan findi Refa bənsənnə muxu dənəxəna nde ra. Musa bata yi na mangane nō a e yamanane tongo. **13** Koni Isirayila kaane mi Gesuri kaane nun Maka kaane kedi. Han to e dəxi Isirayila kaane tagi. **14** Musa mi bəxə yo fi Lewi bənsənnə ma, bayo saraxan naxanye ralima Alatala ma tēen na, Isirayilaa Ala, ne nan findi e tan gbee kēen na alo a fala e xa kii naxan yi. **15** Musa bata yi bəxəni itoe fi Ruben bənsənnə ma, e yi yitaxun e xabilane ra: **16** Fələ Aroyeri taan ma Arinon xuden dē, e nun taan naxan na lanbanni, siga han Medeba taan mabinna lanta yirene, **17** han Xesibən nun a rabilinna taan naxanye birin lanta yirene yi. Na taane xinle ni itoe ra: Dibon, Bamoti-Baali, Beti-Baali-Meyən, **18** Yahasi, Kedemoti, Mefaati, **19** Kiriayatayimi, Sibima, Sereti-Saxari geyaan fari mərəmərəne tagi, **20** Beti-Peyori, Pisiga tintin yirene, Beti-Yəsimoti, **21** taan naxanye birin lanta yireni e nun Amori Manga Sixən naxan yi dəxi Xesibən, na yamanan birin. Musa bata yi na mangan nō, e nun Midiyan mangani itoe: Efi, Rekemi, Suru, Xuru, e nun Reba. E yi dəxi Sixən ma yamanan nin a mangayaan bun. **22** E yi bonne faxama waxatin naxan yi, Isirayila kaane yi Beyori a dii xeme yiimatoon Balami fan faxa silanfanna ra. **23** Yurudən baan nan findixi Ruben bənsənnə bəxən danna ra sogegododen mabinni. Na taane nun banxidene nan findixi Ruben bənsənnə kēen na, e

yi yitaxun e xabilane ra. **24** Musa bata yi bōxōni itoe fi Gadi bōnsōnna ma, e yi yitaxun e xabilane ra: **25** Yaaseri yamanan nun Galadi rabilinna taan birin nun Amoni yamanan fōxō kedenna siga han Aroyeri taan Rabaha taan yetagi, **26** keli Xesibōn ma han Ramati Misipe taan nun Betonimi taana, e nun keli Maxanayin taan ma siga han Debiri danna, **27** e nun Beti-Harama taan nun Beti-Nimira taan nun Sukōti taana, e nun Safon taan Yuruden baan dē, e nun Xesibōn manga Sixōn ma yamanan dōnxena, e nun yamanan naxan Yuruden baan sogeteden binni han Kinereti Daraan bode fōxōna. **28** Na taane nun e rabilinna taa xurine yi findi Gadi bōnsōnna kēen na, e yi e yitaxun e xabilane ra. **29** Musa yi bōxōni itoe fi Manase bōnsōnna fōxō kedenna ma, Manase a diine fōxō kedenna, e yi e yitaxun e xabilane ra: **30** Basan bōxōn naxan birin yi Basan manga Ogo a yamanani, fōlō Maxanayin taan ma han Yayiri taan nabilinne, taa tonge sennin, **31** e nun Galadi yamanan fōxō kedenna nun Asatarōti taan nun Edere taan naxanye findi Basan manga Ogo a manga taane ra. Ne birin yi yitaxun Manase a dii Makiri a diine fōxō kedenna ra xabila yēen ma. **32** Musa bata yi na kēe bōxōne fi Isirayila kaane ma a yi Moyaba meremerene ma waxatin naxan yi, Yuruden baan kidi ma Yeriko taan sogeteden binni. **33** Koni Musa mi bōxō yo fi Lewi bōnsōnna ma. Alatala Isirayilaa Ala yi findi e kēen na alo a fala kii naxan yi.

14 Nunu a dii Yosuwe nun saraxarali Eleyasari nun xabila xunne yi Kanan bōxōni taxun Isirayila kaane ra e kēen na ikii nin. **2** Bōxōn yi yitaxun Isirayila bōnsōn solomanaaninne nun bōnsōnna fuden fōxō kedenna ra masensenna xōn, alo Alatala a yamari Musa ma kii naxan yi. **3** Bōxōn naxan tan yi Yuruden baan sogeteden mabinni, Musa bata yi na fi bōnsōn firin dōnxene nun bōnsōn fuden fōxō kedenna ma, koni a mi bōxō yo fi Lewi bōnsōnna ma yamaan yē. **4** Yusufu bōnsōnna bata yi yitaxun a findi bōnsōn firinna ra, Manase nun Efirami. Lewi bōnsōnna mi kēe yo sōtō yamanani, fō taana ndee, e dōxō denaxanye yi e nun e rabilinne xuruseene xa. **5** Isirayila kaane yi na yamanani taxun alo Alatala a yamari Musa ma kii naxan yi. **6** Yuda bōnsōnna muxune yi siga Yosuwe fēma Giligali yi. Yefune Kenisi kaana dii Kalebi yi ne yē. Na yi a fala Yosuwe xa, a naxa, “Alatala naxan falaxi a muxu fajni Musa xa en firinna fe yi Kadesi-

Barineya yi, i na kolon. **7** N bata yi j̄e tonge naanin sōtō, Alatalaa walikēen Musa yi n xē keli Kadesi-Barineya yi siga Kanan yamanani, a n xa sa mēnna rakōrōsi. N to yelin na ra, n yi dentege tinxinxin sa a xa. **8** Koni ngaxakedenna naxanye siga n fōxō ra na, ne yi yamaan tunnaxōlō e ma, koni n tan lu Alatala nan tun fōxō ra, n ma Ala. **9** Na lōxōni, Musa yi a kōlō ito ra, a naxa, ‘I sanna tixi denaxanye birin yi, mēnne findima nēn i tan nun i ya diine kēen na waxatin birin, bayo i luxi Alatala nan tun fōxō ra, n ma Ala.’ **10** Awa, a j̄e tonge naanin nun suulunna ni i ra xabu Alatala sa na fala Musa xa, en yi sigatini tonbonni waxatin naxan yi. To, n tan ni i ra, Alatala bata n ma siimayaan nasiga han j̄e tonge solomasexē e nun suulun. **11** Anu, to n mōn kēndē ken alo Musa n xē lōxōni. Fangan mōn n na iki, n yengen so alo na waxatini. **12** Nayi, i xa geya yireni ito fi n ma alo Alatala a falaxi n xa kii naxan yi na lōxōni. I a mē nēn na lōxōni fa fala Anaki bōnsōnna nan mēnni, e taane mōn gbo, e makantanxi a fajin na. Alatala gbansan xa lu n xōn, n na e kedima nēn alo Alatala a fala kii naxan yi.” **13** Yosuwe yi duba Yefune a dii Kalebi xa, a Xebiron fi a ma a kēen na. **14** Na taan mōn a diine yii han to, bayo Yefune Kenisi kaana dii Kalebi bira Alatala nan fōxō ra, Isirayilaa Ala. **15** A fōlōni nun, Xebiron yi xili nēn “Kiriyaṭi-Aruba” bayo Araba nan yi xili kanna ra Anaki bōnsōnna muxune tagi. Na xanbi ra, bōj̄e xunbenla yi lu yamanani, yengen yi jan.

15 E bōxōn naxan yitaxun Yuda bōnsōnna ra e xabila yēen ma, na yi sige han Edōn yamanan naninna binna Sini tonbonni, yamanan yiifanna binni pon! **2** Yuda bōnsōnna bōxōn yiifanna naninna fōlōxi Fōxō Ige Daraan yiifanna dēen nan na naxan yē rafindixi Negewi tonbonna ma, **3** dangu Tali Geyaan yiifanna ma, dangu Sini tonbonni, te Kadesi-Barineya yiifanna ma, dangu Xesirōn yi, te Adari yi, siga Karaka binni, **4** dangu Asimon yi, siga Misiran xuden ma a sa dan fōxō igen dē. E bōxōn naninna nan na ra a yiifanna mabinni. **5** Sogeteden binni, Yuda bōxōn naninna findixi Fōxō Igen Daraan dēen nan na, siga han Yuruden baan sa birama darani denaxan yi. A kōmenna ma, a naninna fōlōma Yuruden baan biraden nan ma Fōxō Ige Daraan ma, **6** te Beti-Xogala mabinni, dangu Beti-Araba kōmenna ma, te han Ruben a dii Bohan ma gēme yirena. **7** Na naninna yi sigaxi han Debiri taana, dangu Akori lanbanni, siga kōmenna ma

Giligali binni, denaxan Adumimi geya teden yetagi, xuden yiifanna ma. A dangu En-Semesi igene dexion ma sa mini En-Rogeli ma. **8** Na naninna yi texi han Ben-Hinon lanbanna, Yebusune taan yiifanna ma. Na taan findixi Yerusalen nan na. A mon yi texi han geya xuntagi, naxan Hinon lanbanna yetagi a sogegododen binni Refa lanbanna xunna ra a komenna binni. **9** Keli na geya fari, na naninna yi sigaxi han Nefetowa ige xunna ra, siga han taan naxanye Eferon geya fari, dangu Baala taan binni, denaxan xili Kiriya-Yeyarin. **10** Keli menni siga sogegododen binni han Seyiri geyane binna, dangu Yeyarin geya dexion ma a komen foxoni, denaxan xili Kesalon, godo Beti-Semesi yi, dangu Timana yi. **11** Na naninna yi sigaxi han Ekiron taan geya komen foxona, siga Sikiron taan binni, dangu Baala geya ma, sa dexo Yabaneeli ra, sa mini baan ma. **12** Sogegododen binna, Foxo Ige Gbeen nan findixi na naninna ra. Yuda bonsonna boxon danne nan na ra naxan yitaxun xabila yeen ma. **13** Yosuwe yi Yuda bonsonna boxona nde fi Yefune a dii Kalebi ma, alo Alatala a yamari kii naxan yi. A taa singen findi Kiriya-Aruba taan na, naxan xili Xebiron. Araba yi findixi Anaki muxune benban nan na. **14** Kalebi yi Anaki bonsonna muxu saxanne kedi. E yi xili Sesayi nun Aximan e nun Talamayi. **15** Na xanbi ra, Kalebi yi te Debiri taan xili ma, denaxan yi xili a singeni, Kiriya-Seferi. **16** Kalebi yi a fala, a naxa, "Naxan na Kiriya-Seferi taan yenge, a a no, n nan n ma dii teme Akasa fima nen na kanna ma." **17** Kalebi xunye Kenasi a dii xeme Otiniyeli yi Seferi taan yenge, a yi a no. Kalebi yi a dii teme Akasa fi a ma a naxanla ra. **18** Akasa to dexo xeme taa ra Otiniyeli konni, a yi a radin a xa xee gbete maxodin a fafe ma. Akasa to godo a sofanel fari, Kalebi yi a maxodin, a naxa, "Nanfe ligaxi?" **19** A yi a yabi, a naxa, "Tin fe keden ma n xa, amasoto i bata boxon fi n ma naxan yamanan yiifanna mabinni. Iki i mon xa tigi yiren fi n ma." Awa, a fafe yi geya fari tigne nun lanban yi tigne fi a ma. **20** Yuda bonsonna kee boxone ni i ra, e xabila yeen ma: **21** Taan naxanye yi Yuda boxon yiifari foxoni Negewi tonbonni, Edon yamanan danna dexion, ne xinle ni itoe ra: Kabaseeli, Ederi, Yaguru, **22** Kina, Dimona, Adada, **23** Kedesi, Xasori, Yitinan, **24** Sifi, Telemi, Beyaloti, **25** Xasori-Xadata, Keriya-Yeyarin, naxan findixi Xasori ra, **26** Amama, Sema, Molada, **27** Xasari-Gada, Xesimon, Beti-Peleti, **28** Xasari-Suwali, Beriseba, Bisiyoteya **29** Baala, Iyimi, Esemi, **30** Elitoladi,

Kesili, Xoroma, **31** Sikilaga, Madamanna, Sansanna, **32** Lebayoti, Siliximi, Ayin, e nun Rimon. E birin malanxina, taa maxonen nun solomanaanin, sa e banxidene fari. **33** Taan naxanye yi Sefela geya yireni, ne xinle ni itoe ra: Esetayoli, Sora, Asena, **34** Sanowa, En-Ganimi, Tapuwa, Enama, **35** Yaramuti, Adulan, Soko, Aseka, **36** Saarayimi, Aditayimi, Gedera, e nun Gederotayimi. E birin malanxina taa fu nun naanin, e nun e banxidene. **37** Senan, Xadasa, Migidali-Gadi, **38** Dileyan, Misipe, Yokatili, **39** Lakisi, Bosikati, Egilon, **40** Kabon, Laxamasi, Kitilisi, **41** Gediroti, Beti-Dagon, Nama, e nun Makeda. E birin malanxina, taa fu nun sennin, e nun e banxidene. **42** Libina, Eteri, Asan, **43** Yifita, Asena, Nesibi, **44** Keyila, Akisibu, e nun Maresa. E birin malanxina taa solomanaanin, e nun e banxidene. **45** Ekiron e nun a rabilinna taane nun banxidene, **46** keli Ekiron taan nun a sogeteden binna ma han taan naxanye Asadodi dexion ma e nun e rabilinna taadine, **47** Asadodi taan nun a rabilinna taane nun banxidene, Gasa taan nun a rabilinna taane nun banxidene, han na yirena Misiran xuden nun Foxo Ige Gbeen birama e bode ma denaxan yi. **48** Taan naxanye yi geya yireni, ne xinle ni itoe ra: Samiri, Yatiri, Soko, **49** Danna, Kiriya-Sanna naxan mon xili Debiri, **50** Anaba, Esitemowa, Anima, **51** Gosen, Xolon, e nun Giloha. E birin malanxina taa fu nun keden, e nun e banxidene. **52** Arabu, Ruma, Eseyan, **53** Yanimi, Beti-Tapuwa, Afeka, **54** Xumeta, Kiriya-Aruba naxan mon xili Xebiron, e nun Siyoro. E birin malanxina taa solomanaanin, e nun e banxidene. **55** Mayon, Karemele, Sifi, Yuta, **56** Yeserele, Yokodeyan, Sanowa, **57** Kayin, Gibeya, e nun Timana. E birin malanxina, taa fu, e nun e banxidene. **58** Xalixuli, Beti-Suru, Gedori, **59** Maarati, Beti-Anoti, e nun Elitekon. E birin malanxina, taa sennin, e nun e banxidene. **60** Kiriya-Baali naxan mon xili Kiriya-Yeyarin, e nun Rabaha. E birin malanxina, taa firin, e nun e banxidene. **61** Taan naxanye yi tonbonni, e xinle ni itoe ra: Beti-Araba, Midin, Sekaka, **62** Nibisan, Foxo taana, e nun En-Gedi. E birin malanxina taa sennin, e nun e banxidene. **63** Yuda bonsonna mi no Yebusune kede naxanye yi dxi Yerusalen taani. Han to Yebusune dxi nayi Yuda bonsonna tagi.

16 E boxon naxan yitaxun Yusufu bonsonna ra, na danna yi foxi Yuruden baan nan ma Yeriko taan sogeteden binni, Yeriko tigne denaxan yi. Na

naninna yi danguxi tonbonni naxan Yeriko taan faxan na, siga Beteli geya yireni. **2** A yi keli Beteli yi, siga Lusi, dangu Ataroti taani, Arakane yamanan denaxan yi. **3** Godo sogegodode binna ra Yefeletine yamanan danna ra siga han Beti-Xoron taan lanbanna rabilinna boxona, siga han Geseri yi, sa mini foxo igen ma. **4** Yusufu a diine Manase nun Efirami bonsonna nan na boxon soto e keen na. **5** Efirami a boxon ni i ra e naxan yitaxun xabila yeen ma: E kee boxon danna yi sigaxi han Ataroti-Adari sogeteden binna, siga han Beti-Xoron taan faxes binna, **6** siga han foxo igena, siga Mikimetati binna ra komenna ma, siga sogeteden binni Taanati-Silo yi, dangu Yanowa yi. **7** Keli menni goda han Ataroti nun Nara yi sa doko Yeriko ra, sa mini Yuruden baan ma. **8** Keli Tapuwa, siga sogegododen binni han Kanna xudena, sa mini foxo igen ma. Efirami bonson kee boxon nan na ra e xabila yeen ma. **9** Efirami bonsonna yi taana ndee fan soto Manase bonsonna boxoni e nun e banxidene. **10** Efirami bonsonna mi Kanan kaane kedi Geseri yi. Han to ne fan doki Efirami bonsonna tagi, koni e findixi konyine nan na.

17 E boxon naxan yitaxun Yusufu a dii xeme singen Manase bonsonna muxune ra e keen na na ni ito ra. Anu, Manase a dii xeme singen Makiri naxan findi Galadi kaane benban na, na bata yi Galadi nun Basan boxon soto nun bayo sofa fajin nan yi a ra. **2** Manase bonsonna muxu donxene fan yi keen soto xabila yeen ma. Ne xinle ni itoe ra: Abiyeseri, Xeleki, Asireli, Siken, Xeferi, e nun Semida. Yusufu a dii xemen Manase a diine nan ne ra xabila yeen ma. **3** Galadi a dii xemen Xeferi a dii xemen Selofexadi mi dii xeme yo soto, koni a dii temene soto nen. Manase a dii xeme Makiri nan Galadi soto. Selofexadi a dii temene xinle ni itoe ra: Maxala, Noha, Xogala, Milika, e nun Tirisa. **4** E yi siga saraxarali Eleyasari nun Nunu a dii Yosuwe nun kuntigine fema, e yi a fala e xa, e naxa, “Alatala a yamari nen Musa ma, a xa keen fi nxu ma nxu kon kaane ye.” Awa, e yi e keen fi e ma alo a liga e fafe ngaxakedenne xa kii naxan yi alo Alatala a yamari kii naxan yi. **5** Nayi, Manase bonsonna yi yire fu soto, ba Galadi nun Basan na, naxan yi Yuruden baan kidi ma. **6** Manase a dii temene keen soto na kii nin alo a dii xemene. Galadi yamanan yi findi Manase a dii xemen bonne gbeen na. **7** Manase a boxon yi folo Aseri boxon danna ma siga han Mikimetati taana Siken taan

sogeteden binni, siga han Yamin, En-Tapuwa kaane dokodene binni. **8** Manase bonsonna nan gbee yi En-Tapuwa boxon na, koni Tapuwa taan yi findixi Manase bonsonna danna nan na. Efirami bonsonna nan gbee yi na ra. **9** Na danna yi sigaxi yiifanna mabinni han Kanna xudena. Manase a boxon danna yi findixi Kanna xuden komen foxon nan na han sa mini foxo igen ma, koni Efirami a taana ndee yi luxi Manase a taane tagi. **10** Efirami a boxon yi Kanna xuden yiifanna nan ma. Manase gbeen yi komenna ma. Manase a boxon yi danxi foxo igen ma, Aseri a boxon yi lu a komenna ma, Isakari a boxon yi lu a sogeteden binni. **11** Manase bonsonna yi taana ndee soto Isakari nun Aseri a boxone ye. E xinle ni itoe ra: Beti-Seyan, Yibeleiyami, Doru, En-Dori, Taanaki, e nun Megido nun e rabilinna banxidene. Yamana saxan nan na ra. **12** Koni, Manase bonsonna mi na taane tonge bayo Kanan kaane yi a ragidixi e xa lu doki na yamanani. **13** Koni Isirayila kaane to senben soto, e yi Kanan kaane ti konyi wanle ra, koni e mi na e kedideni. **14** Yusufu bonsonna muxune yi Yosuwe maxodin, e naxa, “Nanfera i yamanan yire kedenni ito yitaxunxi nxu ra nxu keen na? Nxo muxune wuya, bayo Alatala bata barakan sa nxo fe yi han iki.” **15** Yosuwe yi e yabi, a naxa, “Xa e wuya Efirami geya yiren xa, e sa foton yirena nde masege e yete xa Perisine nun Refa kaane yamanani.” **16** Yusufu bonsonna muxune yi a fala a xa, e naxa, “Geya yireni ito xurun nxu ma. Anu, yenge so wontoro wure daxine Kanan kaane birin yii, naxanye doki lanbanni e nun naxanye doki Beti-Seyan nun a banxidene, e nun naxanye Yesereli lanbanni.” **17** Yosuwe yi Yusufu bonsonna yabi, a naxa, “Efirami kaane nun Manase kaane, yama gbeen nan e ra, e senben fan gbo. E mi kee boxo yire keden xan tun sotoma, **18** koni e fotonna fan sotoma nen geya yireni. E na masege, e yi na tonon soto. E nae Kanan kaane kede nen hali yengeso wontoro wure daxine to e yii e senben fan gbo.”

18 Isirayila yamaan yi e malan Silo taani. E yi Naralan Bubun ti menni. Yamanan yi lu e senben bun ma. **2** Na waxatini, Isirayila bonson solofere yi na, naxanye munma yi e kee boxon soto singen. **3** Yosuwe yi a fala Isirayila kaane xa, a naxa, “Alatala, e fafane Ala boxon naxan soxi e yii, e na tongo feen boti rabama han waxatin mundun yi? **4** E muxu saxan saxan sugandi bonson yeen ma. N xa e rasiga yamanan

matodeni. E xa e bõnsõnne kɛɛ bõxõne kiin seɓe, e yi fa na dentɛge n xa. **5** E xa yamanani taxun dõxõde soloferen na. Yuda bõnsõnna xa lu a bõxõni yiifanna ma, Yusufu bõnsõnna yi lu a bõxõni kõmen fõxõni. **6** E na yelin na yamanani taxunɲe soloferen na, a seɓe, e fa na yita n na, n yi masensenna ti Alatala en ma Ala yetagi, ne yi yitaxun e ra. **7** Koni Lewi bõnsõnna mi bõxõ yo sõtõma e tagi, bayo e gbee kɛɛn findixi Alatalaa saraxa rali wanla nan na. Gadi bõnsõnna nun Ruben bõnsõnna nun Manase bõnsõnna fõxõ kedenna, ne fan bata yi e gbeen sõtõ Yuruden baan sogeteden binni alo Alatalaa walikɛɛn Musa a fi e ma kii naxan yi.” **8** Na muxune yi keli, e siga. Yosuwe bata yi e yamari, a naxa, “E siga, e yamanan mato, e yi a kiin seɓe. Na xanbi ra, e fa be Silo yi, n xa masensenna ti Alatala yetagi na yamanani taxun feen na.” **9** Na muxune yi keli, e yi yamanani siga. E yi na yamanan taane kiin seɓe, e yi ne yitaxun yire soloferen na, e yi xete Yosuwe fema Silo daaxadeni. **10** Yosuwe yi masensenna ti Silo yi Alatala yetagi. A yi na yamanan birin yitaxun Isirayila bõnsõnne ra. **11** Bunyamin nan singe bõxõn sõtõ masensenna xõn e naxan yitaxun xabila yɛɛn ma. E bõxõn yi lu Yuda bõnsõnna gbeen nun Yusufu a diine bõnsõnne gbeene longonna ra. **12** Kõmen fõxõni, e bõxõn danna yi fõlõxi Yuruden baan nan ma, dangu Yeriko ra kõmen fõxõni, te geyaan ma sogegododen binni, sa mini Beti-Aweni tonbonna ma. **13** Danna yi kelixi menna nin, sa dangu Lusi ra yiifari fõxõn binni, denaxan xili Beteli, godo Ataroti-Adari yi, te geyaan fari, naxan Beti-Xoron taan lanban yiren yiifanna ma. **14** E bõxõn sogegododen danna ni ito ra, keli geyaan ma Beti-Xoron yetagi, siga yiifanna binni sa mini Kiriyaati-Baali ma, denaxan mõn xili Kiriyaati-Yeyarin. Na taan findi Yuda bõnsõnne nan gbee ra. E bõxõn danna nan na ra a sogegododen binni. **15** E bõxõn yiifari fõxõn danna yi fõlõxi Kiriyaati-Yeyarin nin, siga sogegododen binni sa mini tigi yiren ma Nefetowa ige xunna. **16** Na danna yi danguxi geyaan san bunni Ben-Hinõn lanbanna yetagi, Refa kaane lanbanna kõmenna ma. Godo Ben-Hinõn lanbanni Yebusune fema yiifanna ma, godo En-Rogeli yi. **17** Na danna yi sigaxi han kõmenna binni, dangu En-Semesi yi, dangu Geliloti yi, Adumimi tintin yiren yetagi, godo han gemen naxan xili Bohan, Ruben a dii xemena nde nan xili yi na ra. **18** A mõn yi danguxi na geyaan kõmen fõxõni Araba yetagi, godo Araba kui, **19** dangu Beti-Xogala ra kõmenna binni, sa mini Yuruden

baan biraden ma Fõxõ Igen Daraan ma. Na bõxõn yiifanna danna nan na ra. **20** Yuruden baan findixi Bunyamin xabilane bõxõn danna nan na sogeteden binni. Bunyamin bõnsõnna bõxõn danne birin nan na ra. **21** Taan naxanye fi Bunyamin bõnsõnna xabilane ma, ne ni i ra: Yeriko, Beti-Xogala, Emeki-Kesisi, **22** Beti-Araba, Semarayin, Beteli, **23** Awi, Para, Ofara, **24** Kefara-Hamoni, Ofini, e nun Geba. Ne birin malanxina, taa fu nun firin e nun e banxidene. **25** Gabayon, Rama, Beroti, **26** Misipe, Kefira, Mosa, **27** Rekemi, Yiripeeli, Tarala, **28** Sela, Elefi, Yebusu taan naxan mõn xili Yerusalen, Gibeya, e nun Kiriyaati. Ne birin malanxina, taa fu nun naanin e nun e banxidene. Bunyamin bõnsõnna xabilane kɛɛ nan na ra.

19 Bõxõn firindeni ito yi findi Simeyõn bõnsõnna gbeen na masensenna xõn, a yitaxun xabila yɛɛn ma. E kɛɛ bõxõn yi Yuda bõnsõnna bõxõn nan tagi. **2** Taan naxanye fixi Simeyõn bõnsõnna ma, ne ni i ra: Beriseba, Seeba, Molada, **3** Xasari-Suwali, Bala, Esemi, **4** Elitoladi, Betuli, Xoroma, **5** Sikilaga, Beti-Marakaboti, Xasari-Susa, **6** Beti-Lebayoti, e nun Saruxen. Ne birin malanxina, taa fu nun saxan, e nun e banxidene. **7** Ayin, Rimõn, Eteri, e nun Asan, ne birin malanxina taa naanin, e nun e banxidene, **8** sa e rabilinna taane fari siga han Baalati-Beeeri, denaxan mõn xili Rama-Negewi. Simeyõn bõnsõnna xabilane kɛɛ bõxõn nan na ra. **9** Simeyõn kɛɛ bõxõn ba Yuda bõnsõnna bõxõn nan na, bayo Yuda bõnsõnna kɛɛ bõxõn yi gbo a xa. Na nan a liga, Simeyõn bõnsõnna yi kɛɛ bõxõn sõtõ Yuda bõnsõnna kɛɛ bõxõni. **10** Bõxõn saxandeni ito yi findi Sabulon bõnsõnna gbeen na masensenna xõn a yitaxun xabila yɛɛn ma. E kɛɛ bõxõn danna yi sigaxi han Saridi yi, **11** dangu Marala yi sogegodode binni, sa dõxõ Dabeseti ra, siga xude deni Yokanayimi yetagi. **12** Keli Saridi yi, siga sogeteden binni siga han Kisiloti-Taboro bõxõna, sa dõxõ Daberati ra, siga Yafiya yi. **13** Keli menni, dangu sogeteden binni, siga Gati-Xeferi yi e nun Eta-Kasin yi, sa mini Rimõn ma, bilin Neya ma. **14** Na danna mõn yi sigaxi han Xanatõn kõmen fõxõna, sa mini Yifita-Eli xuden ma. **15** E mõn yi Katati nun Nahalali nun Simiron nun Yidala nun Betelemi sõtõ. Ne birin malanxina taa fu nun firin, e nun e banxidene. **16** Sabulon bõnsõnna xabilane kɛɛn nan na ra, e taane nun e banxidene. **17** Bõxõn naanindeni ito yi findi Isakari bõnsõnna gbeen na masensenna xõn a yitaxun xabila yɛɛn ma. **18** E bõxõn

danna yi sigaxi han taani itoe birin: Yesereli, Kesuloti, Sunami, **19** Xafarayimi, Siyɔn, Anaxarati, **20** Rabiti, Kisiyon, Abesi, **21** Remeti, En-Ganimi, En-Xada, e nun Beti-Pasesi. **22** Sa dɔxɔ Taboro nun Saxasima nun Beti-Semesi ra, sa mini Yuruden baan ma. Ne birin malanxina, taa fu nun sennin, e nun e banxidene. **23** Isakari bɔnsɔnna xabilane kɛɛ nan na ra, e taane nun e banxidene. **24** Bɔxɔn suulundeni ito yi findi Aseri bɔnsɔnna gbeen na masensenna xɔn a yitaxun xabila yɛɛn ma. **25** E danne yi sigaxi han taani itoe: Xelekati, Xali, Beten, Akisafa, **26** Alameleki, Amada, Misala, sa dɔxɔ Karemele geyaan nun Sixori-Libanati xuden na sogegododen binni. **27** Danna yi sigaxi sogeteden binni, Beti-Dagɔn yi, sa dɔxɔ Sabulon bɔnsɔnna bɔxɔn nun Yifita-Eli lanbanna ra, siga kɔmɛn fɔxɔni sa dɔxɔ Beti-Emeki nun Neyeli ra, dangu Kabulu yi kɔmɛn fɔxɔni, **28** siga han taani itoe: Abadon nun Rexobo nun Xamɔn e nun Kanna, siga han Sidɔn taa gbeena. **29** Keli menni, danna mɔn yi sigaxi han Rama nun Tire, taa makantanxina, siga Xosa binni, sa mini Fɔxɔ Igen ma Akisibu yamanani, **30** sa Yuma nun Afeki nun Rexobo fari. Ne birin malanxina, taa mɔxɔɲɛn nun firin, e nun e banxidene. **31** Taani itoe nun e banxidene birin findixi Aseri bɔnsɔnna xabilane kɛɛ bɔxɔn nan na. **32** Bɔxɔn senninden i to yi findi Nafatali bɔnsɔnna gbeen na masensenna xɔn a yitaxun xabila yɛɛn ma. **33** Na bɔxɔn danna yi fɔlɔxi Xelefa taani, siga Saananimi taani wudi gbeen binni, dangu Adami-Nekebi nun Yabaneeli yi, siga Lakuma yi, sa mini Yuruden baan ma. **34** Na danna yi sigaxi sogegododen binni han Asanoti-Taboro, sa mini Xukɔku taan ma, sa dɔxɔ Sabulon bɔnsɔnna bɔxɔn na yiifanna ma, e nun Aseri bɔnsɔnna bɔxɔna sogegododen binni e nun Yuda bɔnsɔnna bɔxɔna, Yuruden baan yi lu a sogeteden binni. **35** E taa makantanxine xinle ni itoe ra: Sidima, Sere, Xamati, Rakati, Kinereti, **36** Adama, Rama, Xasori, **37** Kedesi, Edere, En-Xasori, **38** Yirɔn, Migidali-Eli, Xoremi, Beti-Anata, Beti-Semesi. Ne birin malanxina, taa fu nun solomanaanin, e nun e banxidene. **39** Nafatali bɔnsɔnna xabilane kɛɛn nan na ra, e taane nun e banxidene. **40** Bɔxɔn soloferedeni ito yi findi Dan bɔnsɔnna gbeen na masensenna xɔn a yitaxun xabila yɛɛn ma. **41** E kɛɛ bɔxɔn danne yi sigaxi han taane itoe: Sora, Esetayoli, Iri-Semesi, **42** Saalabin, Ayalɔn, Yitila, **43** Elon, Timana, Ekirɔn, **44** Eliteke, Gibtɔn, Baalati, **45** Yehudu, Bene-Beraki, Gati-Rimɔn, **46** Yarakɔn tigine, Rakɔn e nun bɔxɔn naxan

Yafa yetagi. **47** Koni Dan bɔnsɔnna muxune mi nɔ e bɔxɔn masɔtɔdeni. Nayi, Dan bɔnsɔnna yi siga Lesemi yi, e sa mɛn kaane yɛnge, e yi e faxa. E yi dɔxɔ na, e na taan xili sa Dan, e benban xinla. **48** Na taane nun e banxidene birin yi findi Dan bɔnsɔnna xabilane kɛɛ bɔxɔn na. **49** E to yelin yamanani taxunɲɛ e kɛɛn na, Isirayila kaane yi Nunu a dii Yosuwe kɛɛn so a yi e tagi, **50** alo Alatala a yamari kii naxan yi. Yosuwe taan naxan maxɔdin e ma, Timanati-Sera, e yi na so a yii Efirami geya yireni. Yosuwe mɔn yi taan ti, a dɔxɔ na. **51** Saraxarali Eleyasari nun Nunu a dii Yosuwe nun Isirayila bɔnsɔnne xabila kuntigine yi yamanan yireni itoe yitaxun masensenna xɔn Alatala yetagi, Naralan Bubun so dɛɛn na, Silo yi. E yi yelin yamanani taxunɲɛ.

20 Alatala yi a fala Yosuwe xa, a naxa, **2** “A fala Isirayila kaane xa, e xa taana ndee sugandi marakisi taane ra, alo n na a fala i xa kii naxan yi fata Musa ra. **3** Xa naxan faxan ti, a mi a rakeli a ma, a mi yi waxi faxa ti feni, na kanna nɔɛ a giye nɛn, a siga menna nde yi, a ratange faxa muxun gbeɲɔxɔ muxun ma denaxan yi. **4** A na a gi, a na taana nde li, a xa sa ti taan so dɛɛn na, a yi a sɔnna dentɛge taan fonne xa. E yi a rasuxu taani, e a yigiya. **5** Xa faxa muxun gbeɲɔxɔ muxun siga faxa tiin fɔxɔ ra, e mi a soma a yii, bayo a mi a rakelixa a ma, a mi a faxa feni tɔnxi xɔnnantenyan. **6** A xa lu na taani han a yi makiti yamaan yetagi, e nun han saraxarali kuntigin naxan walima na waxatini, na yi faxa. Na xanbi ra, faxa tiin nɔɛ xetɛ nɛn a banxini a konni, a kelixi denaxan yi.” **7** E yi taani itoe sugandi: Kedesi taan Galile yamanani Nafatali geya yireni, e nun Siken taana Efirami geya yireni, e nun Kiriyaati-Aruba taan denaxan mɔn xili Xebiron, Yuda geya yireni. **8** E yi taa gbetene sugandi Yuruden baan kidi ma Yeriko sogeteden binni: Bɛseri taan naxan Rubɛn tonbonna lanta yireni, Ramoti taan naxan Galadi bɔxɔni, Gadi bɔnsɔnna denaxan yi, e nun Golan taan naxan Basan bɔxɔni, Manase bɔnsɔnna denaxan yi. **9** Na taane nan sugandi Isirayila kaane nun xɔɲene xa, alogo xa naxan faxan ti, a mi a rakeli a ma, na xa a gi, siga menni, a ratanga faxa muxun gbeɲɔxɔ muxun ma. Na kui, faxa muxun gbeɲɔxɔ muxun mi a faxɛ benun yamaan xa a makiti.

21 Lewi bɔnsɔnna denbaya xunne yi siga saraxarali Eleyasari nun Nunu a dii Yosuwe nun Isirayila bɔnsɔnna xabilane kuntigine fema **2** Silo yi Kanan

yamanani, e yi a fala e xa, e naxa, “Alatala bata yi yamarin fi nun fata Musa ra, a nxu xa taane soto nxu dōxoma denaxanye yi, e nun e rabilinna bōxōne nxo xuruseene xa.” **3** Nayi, Isirayila kaane yi taani itoe ba e gbee kēe bōxōn na. Taan ne nun e rabilinna bōxōne yi fi Lewi bōnsōnna ma alo Alatala a yamari kii naxan yi. **4** E to masensenna ti, a yi Kehati yixetene xabilane singe suxu. Saraxarali Haruna yixetene yi taa fu nun saxan soto Yuda bōnsōnna nun Simeyōn bōnsōnna nun Bunyamin bōnsōnna bōxōne tagi. **5** Kehati yixeten bonne yi taa fu soto Efirami bōnsōnna nun Dan bōnsōnna nun Manase bōnsōnna fōxo kedenna bōxōne tagi. **6** Gerison yixetene xabilane yi taa fu nun saxan soto Isakari bōnsōnna nun Aseri bōnsōnna nun Nafatali bōnsōnna bōxōne tagi e nun Manase bōnsōnna fōxo kedenna bōxōn tagi Basan yamanani. **7** Merari yixetene xabilane yi taa fu nun firin soto Ruben bōnsōnna nun Gadi bōnsōnna nun Sabulon bōnsōnna bōxōne tagi. **8** Nayi, Isirayila kaane yi taani itoe nun e rabilinne bōxōne fi Lewi bōnsōnna ma alo Alatala a yamari kii naxan yi fata Musa ra. **9** Taan naxanye fi e ma Yuda bōnsōnna nun Simeyōn bōnsōnna bōxōne tagi, ne xinle ni itoe ra: **10** Kehati xabilani, Lewine ye, Haruna yixetene yi taani itoe soto bayo masensenna e tan nan singe suxi: **11** Kiriayati-Aruba, denaxan mōn xili Xebiron, e nun a rabilinna bōxōne Yuda geya yireni. Araba yi findixi Anaki benban nan na. **12** Koni xēene nun banxideen naxanye taan nabilinni, ne bata yi so Yefune a dii Kalebi yii a kēen na. **13** E taan naxanye fi saraxarali Haruna yixetene ma, ne ni i ra: Xebiron, naxan findixi marakisi taana nde ra muxun xa naxan nagixi faxa ti feen na, Libina, **14** Yatiri, Esitemowa, **15** Xolon, Debiri, **16** Ayin, Yuta, e nun Beti-Semesi, e nun e rabilinne. Ne birin malanxina, taa solomanaanin fata bōnsōn firinni itoe bōxōne ra. **17** E yi taani itoe soto Bunyamin bōnsōnna bōxōni: Gabayon, Geba, **18** Anatoti, Alamōn, e nun e rabilinne. Ne birin malanxina taa naanin. **19** Haruna yixetene, saraxaraline taan naxanye soto, ne malanxina taa fu nun saxan nan yi e ra e nun e rabilinne. **20** Lewi bōnsōnna muxun naxanye yi kelixi Kehati yixetene xabilan bonne yi, ne yi taane soto Efirami bōnsōnna bōxōni. **21** Ne ni i ra: Siken taana Efirami geya yireni, naxan findixi marakisi taana nde ra muxun xa naxan nagixi faxa ti feen na, Geseri, **22** Kibisayimi, Beti-Xoron, e nun e rabilinne. Ne birin malanxina, taa naanin. **23** E naxanye soto Dan

bōnsōnna bōxōni, ne ni i ra: Eliteke, Gibetōn, **24** Ayalōn, Gati-Rimōn, e nun e rabilinne. Ne birin malanxina taa naanin. **25** E naxanye soto Manase bōnsōnna bōxōni, ne ni i ra: Taanaki, Gati-Rimōn, e nun e rabilinne. Ne malanxina, taa firin. **26** Na taa fune nun e rabilinne yi findi Kehati yixetene xabilan bonne gbeen na. **27** Lewine ye, Gerison yixetene xabilane yi taani itoe soto Manase bōnsōnna fōxo kedenna bōxōni: e Golan soto Basan yamanani, naxan findixi marakisi taana nde ra muxun xa naxan nagixi faxa ti feen na, e nun Besetera, e nun e rabilinne. Ne malanxina, taa firin. **28** E naxanye soto Isakari bōnsōnna bōxōni, ne ni i ra: Kisiyon, Daberati, **29** Yaramuti, En-Ganimi, e nun e rabilinne. Ne malanxina, taa naanin. **30** E naxanye soto Aseri bōnsōnna bōxōni, ne ni i ra: Misala, Abadon, **31** Xelekati, Rexobo, e nun e rabilinne. Ne malanxina, taa naanin. **32** E naxanye soto Nafatali bōnsōnna bōxōni, ne ni i ra: Kedesi Galile yamanani, naxan findixi marakisi taana nde ra muxun xa naxan nagixi faxa ti feen na, Xamōti-Dōro, Karatan, e nun e rabilinne. Ne malanxina, taa saxan. **33** Gerison yixetene xabilane taa fu nun saxan soto nen e nun e rabilinne. **34** Lewin naxanye luxi, Merari yixetene xabilane, ne naxanye soto Sabulon bōnsōnna bōxōn tagi, ne ni i ra: Yokanayimi, Karata, **35** Dimina, Nahalali, e nun e rabilinne. Ne malanxina, taa naanin. **36** E naxanye soto Ruben bōnsōnna bōxōni, ne ni i ra: Beseri, Yahasi, **37** Kedemoti, Mefaati, e nun e rabilinne. Ne malanxina taa naanin. **38** E naxanye soto Gadi bōnsōnna bōxōni, ne ni i ra: Ramoti naxan Galadi yamanani, naxan findixi marakisi taana nde ra muxun xa naxan magixi faxa ti feen na, Maxanayin, **39** Xesibōn, Yaaseri, e nun e rabilinne. Ne malanxina taa naanin. **40** Taan naxanye birin fi Lewi bōnsōnna muxu dōnxene ma, Merari yixetene xabilane yi, ne findi taa fu nun firin nan na. **41** Taan naxanye birin fi Lewi bōnsōnna muxune ma Isirayila kaane bōxōni, ne birin malanxina taa tonge naanin e nun solomasexe, e nun e rabilinne. **42** E taani itoe nun e rabilinne bōxōne nan soto. **43** Alatala a kolo yamanan naxan so feen na e benbane yii, a yi na birin fi Isirayila kaane ma. E yi na findi e gbeen na, e yi dōxo na. **44** Alatala yi bōye xunbenla fi e ma e rabilinna birin yi, alo a a kolo e benbane xa kii naxan yi. Hali e yaxu yo mi nō tiye e yēe ra, Alatala yi e yaxune birin lu e sagoni. **45** Alatala bata yi fala fapin naxanye birin ti Isirayila yamaan xa, na birin yi kamali, sese mi lu a ligataren na.

22 Nayi, Yosuwe yi Ruben bõnsõnna nun Gadi bõnsõnna nun Manase bõnsõnna fõxõ kedenna xili. **2** A yi a fala e xa, a naxa, “Alatalaa walikëen Musa feen naxan birin yamari e ma, e bata na birin naba. E bata n fan ma yamarine birin suxu. **3** E mi e ngaxakedenne rabepinxi waxati xunkuyeni ito yi han to. Alatala e Ala yamarin naxan so e yii, e bata na rakamali. **4** Iki Alatala e Ala bata bõje xunbenla fi e ngaxakedenne ma, alo a fala e xa kii naxan yi. Iki e siga e konni, e sa lu na yamanani Alatalaa walikëen Musa naxan soxi e yii Yuruden kidi ma. **5** Nayi, e a liga e yeren ma, e yamarin nun sariyan suxu, Alatalaa walikëen Musa naxanye soxi e yii, e yi Alatala e Ala xanu, e sigan ti a kirane birin xõn, e yi a yamarine suxu, e yi bira a fõxõ ra, e a batu e bõjen nun e niin birin yi.” **6** Yosuwe yi duba e xa, a yi a lu e siga e konne yi. **7** Musa bata yi këe bõxõn so Manase bõnsõnna fõxõ kedenna yii Basan yamanani. Yosuwe fan yi këe bõxõ gbete so Manase bõnsõnna bode fõxõn yii Isirayila kaan bonne fema Yuruden sogegododen binni. Yosuwe to duba e xa, a yi e rasiga e konne yi. **8** A yi a fala e xa, a naxa, “E xete e konne yi e nun nafulu gbeena, e nun xuruse wuyaxin nun gbeti gbegbe nun xëmaan nun sulan nun wurena e nun dugine. E nun e ngaxakedenne xa sa e yaxune se tongoxine yitaxun.” **9** Ruben bõnsõnna nun Gadi bõnsõnna nun Manase bõnsõnna fõxõ kedenna yi xete, e keli Isirayila kaane fema Silo yi, Kanan yamanani, e yi siga Galadi yamanani, Alatala yamanan naxan nagidi e ma fata Musa ra. **10** E to maso Yuruden baan na Kanan yamanani, Ruben bõnsõnna nun Gadi bõnsõnna nun Manase bõnsõnna fõxõ kedenna yi saraxa ganden nafala Yuruden baan dë. Na saraxa ganden yi gbo han! **11** Isirayila kaane to na feen me, e yi a fala, e naxa, “E mi a to, Ruben bõnsõnna nun Gadi bõnsõnna nun Manase bõnsõnna fõxõ kedenna bata saraxa ganden nafala Kanan bõxõn danna ra, Yuruden baan dëxõn Isirayila kaane binni.” **12** Isirayila kaane to na me, e birin yi e malan Silo yi e yenge xinla ma. **13** Isirayila kaane yi saraxarali Eleyasari a dii Finexasi xë Galadi yamanani Ruben bõnsõnna nun Gadi bõnsõnna nun Manase bõnsõnna fõxõ kedenna fema. **14** Manga fu yi biraxi a fõxõ ra, Isirayila bõnsõn yo bõnsõn manga keden. Denbaya xunne nan yi ne birin na Isirayila kaane xabilane yi. **15** E yi siga Galadi yamanani Ruben bõnsõnna nun Gadi bõnsõnna nun Manase bõnsõnna fema. E yi a fala e xa, e naxa, **16**

“Alatalaa yamaan birin ito nan falaxi, ‘Nanfera e tinxintareyaan ligaxi Isirayilaa Ala ra? Nanfera e bata xete Alatala fõxõ ra to? Nanfera e bata saraxa ganden nafala, e murute Alatala xili ma to? **17** En bata yi kalan naxan ti Peyori yi, na xurun ba? Anu, han to en munma yelin tõe na yulubin xafari feen ma hali Alatala to fitina furen sa a yamaan birin fari. **18** Anu, e bata xete Alatala fõxõ ra to, e Ala! Xa e murute Alatala xili ma to, tila a xõloma nen Isirayila yamaan birin ma. **19** Nayi, xa e yamanan mi saripanxi, e xete Alatala yamanani, Alatala batuden tixi denaxan yi, e yi bõxõ gbete tongo nxu tagi. Koni e nama murute Alatala xili ma hanma nxu tan xili ma, e yi saraxa gande gbete rafala, ba Alatalaa saraxa ganden na, en ma Ala. **20** Sera a dii Akan to tinxintareyaan liga, a seene tongo tønna yi dõxi naxanye tongo fe ma, Alaa xõlõn godo Isirayila yamaan birin nan ma. A keden xa mi halagi a fe kalaxina fe ra.” **21** Ruben bõnsõnna nun Gadi bõnsõnna nun Manase bõnsõnna fõxõ kedenna yi Isirayila xabilane mangane yabi, e naxa, **22** “Marigina Ala, Alatala nan keden a kolon! Marigina Ala, Alatala! Isirayila yamaan birin fan fama nen a kolonden! Xa nxu feni ito ligaxi muruten nin hanma tinxintareyani Alatala xili ma, nxu nama kisi to lõxõni. **23** Xa nxu saraxa ganden nafalaxi nen alogo nxu xa xete Alatala fõxõ ra, nxu yi saraxa gan daxine ba a fari hanma bogise saraxane hanma bõje xunbeli saraxane, Alatala yeten xa nxu makiti! **24** Koni na mi a ra de! Nxu ito ligaxi nen bayo nxu yi xaminxi alogo tila e diine nama a fala nxõ diine ma, e naxa, ‘Nanse e tan nun Alatala tagi, Isirayilaa Ala? **25** Alatala bata Yuruden baan findi en tagi danna ra. Ruben bõnsõnna nun Gadi bõnsõnna muxune, sese mi fa e tan xa Alatala yil!’ E diine a lige nen nayi a nxõ diine yi ba Alatala yëeragaxuni. **26** Nanara, nxu yi a fala, nxu naxa, ‘En keli, en xa saraxa ganden nafala. Koni saraxa gan daxine nun saraxa gbete ye fe mi a ra.’ **27** Na xa findi sereyaan nan na e tan nun nxu tan tagi, e nun en yixetene hali en tan xanbi, fa fala nxu Alatala batuma nen nxõ saraxa gan daxine nun nxõ saraxane nun nxõ bõje xunbeli saraxane ra a batuden yeteni. Nayi, e diine mi fa a fale nxõ diine ma, e naxa, ‘Sese mi fa e tan xa Alatala yii.’ **28** Nxu yi a fala, nxu naxa, xa e falani ito ti nxu xa tila, hanma nxõ diine xa, nxu e yabima nen, nxu naxa, ‘E Alatalaa saraxa ganden maligan mato. Nxu fafane mi a rafalaxi saraxa gan daxine nun saraxa gbete ye xan ma fe ra, koni alo sereyana e tan nun nxu tan tagi.’ **29**

Nxu tan mi murute Alatala xili ma mume! Nxu mi xete a foxo ra to, nxu yi saraxa gande gbete rafala saraxa gan daxine nun bogise saraxane nun saraxa gbete ye fe ra, ba Alatalaa saraxa ganden na, naxan nafalaxi en ma Ala batu bubun yetagi.” 30 Saraxarali Finexasi nun yamaan mangane nun Isirayila xabila xunne to falani ito me, Ruben bonsonna nun Gadi bonsonna nun Manase bonsonna foxo kedenna saraxa ganden naxan nafalaxi, na yi rafan e ma kati! 31 Saraxarali Eleyasari a dii Finexasi yi a fala Ruben bonsonna nun Gadi bonsonna nun Manase bonsonna foxo kedenna xa, a naxa, “Nxu bata a kolon to a Alatala en tagi, bayo e mi tinxintareyaan ligaxi Alatala ra. E bata Isirayila kaane ratanga Alatalaa xolon ma.” 32 Saraxarali Eleyasari a dii Finexasi nun mangane yi keli Galadi yi, Ruben bonsonna nun Gadi bonsonna yi denaxan yi, e xete Kanan yamanani, e yi dentegen sa Isirayila kaane xa. 33 Dentegeni ito yi rafan Isirayila kaane ma, e yi barikan bira Ala xa. Ruben bonsonna nun Gadi bonsonna yenge feen naxan yi e xunni, e yi e yamanan kala, e mi fa na fe fala sonon. 34 Ruben bonsonna nun Gadi bonsonna yi saraxa ganden xili sa, e naxa, Sereyana En Tagi Fa Fala A Alatala Nan Ala Ra.

23 Alatala bata yi boje xunbenla fi Isirayila yamaan ma a e xunba e yaxune ma e rabilinni, waxati xunkuye yi dangu na xanbi ra. Yosuwe yi fori, a siimayaan yi xunkuya ayi han! 2 Na waxatini, Yosuwe yi Isirayila kaane birin maxili, fonne nun mangane nun kitisane nun kuntigine. A yi a fala e xa, a naxa, “N bata fori. N ma siimayaan bata xunkuya ayi han! 3 E yeteen bata a to Alatala e Ala feen naxanye birin ligaxi siyani itoe ra e fe ra. Alatala e Ala nan e yengen soxi.” 4 “E a mato, n yamanan naxanye yengexi, n yi e no, e nun siyaan naxanye mon luxi yamanani, n bata ne boxone birin yitaxun e bonsonne ra e keen na masensenna xon keli Yuruden baani han Foxo Ige Gbeena sogegododen binni. 5 Alatala e Ala e kedima nen e yee ra, a e ramini yamanani, e yi doxo e yamanani alo Alatala e Ala a fala e xa kii naxan yi.” 6 “E senbe so han! Feen naxan birin sebexi Musaa sariya kitabun kui e xa ne birin suxu. E nama na kiraan fata yiifanna ma hanma komenna ma. 7 E nama basan na siyane ra, naxanye luxi e tagi. E nama e alane xinle maxandi, e nama e kolo e yi. E nama e batu, e nama e xinbi sin e xa. 8 Koni e tan xa lu Alatala e Alaa fe yi ken, alo e bata a liga kii naxan yi han to.” 9 “Alatala

bata siya gbeene nun senbemane kedi e yee ra. Anu, han to muxu yo mi noxi tiye e yee ra. 10 E tan muxu keden yi muxu wuli nan kedima, bayo Alatala e Ala nan yi yengen soma e xa alo a fala e xa kii naxan yi. 11 Nayi, e a liga e yeren ma, e yi Alatala xanu e Ala.” 12 “Koni xa e e xun xanbin so Ala yi, e yi bira siyani itoe foxo ra naxanye luxi e tagi, e nun ne yi e bode a dii temene futu, e yi basan e ra, 13 e xa a kolon Alatala e Ala bama nen siyani itoe ragiye e bun. Koni e findima nen luti ratixine nun wosone ra e bun, e nun bosana e fari, e nun janle naxanye e yeen soxonma ayi, han e yi halagi boxo fajini itoe yi Alatala e Ala naxanye soxi e yii.” 14 “Dunuja muxune birin sigama denaxan yi, n sigamaan ni i ra menni. E a kolon e bojen nun e niin birin yi, fa fala Alatala e Alaa fala fajin naxanye tixi e xa, na sese mi luxi a kamalitaren na. A falan birin bata kamali, keden mi kalaxi. 15 Koni Alatala e Alaa fala fajine rakamalixi kii naxan yi, a mon fama nen a falane rakamalideni naxankatane ra, a e rakolonxi naxanye ra, han a yi e halagi boxo fajini ito yi, a denaxan fixi e ma. 16 Xa e layirin kala Alatala e Ala naxan yamarixi e ma, e yi siga ala gbetene batudeni, e yi e xinbi sin e xa, Alatala xoloma nen e ma, e yi halagi sinma boxo fajini ito yi, a denaxan fixi e ma.”

24 Yosuwe yi Isirayila bonsonne birin maxili a e xa malan Siken yi, fonne nun mangane nun kitisane nun kuntigine, e birin yi fa Ala yetagi. 2 Yosuwe yi a fala yamaan birin xa, a naxa, “Alatala, Isirayilaa Ala ito nan falaxi, a naxa, ‘A foloni nun, e benbane Tera nun a diine Iburahima nun Nahori, ne yi doxi Efirati Baan bode foxon nan na, e yi ala gbetene nan batuma. 3 N yi e fafe Iburahima tongo baan bode foxon na, n yi ti a yee ra siga Kanan yamanan birin yi. N yi a yixetene rawuya ayi, n Isiyaga fi a ma. 4 N yi Yaxuba nun Esayu fi Isiyaga ma. N yi Seyiri geya yiren fi Esayu ma, koni Yaxuba nun a diine tan yi godo Misiran yamanani. 5 N yi Musa nun Haruna rasiga, n yi naxankata wuyaxi doxo Misiran kaane ma. Na xanbi ra, n yi e ramini Misiran yamanani. 6 N to e benbane ramini Misiran yamanani, Misiran kaane yi e benbane sagatan wontorone nun soone fari han Gbala Baani. 7 E benbane yi e xui ramini Alatala ma, a yi dimin naso e nun Misiran kaane tagi. A yi baa igen nadin Misiran kaane xun ma. N naxan liga Misiran kaane ra, e bata na to e yeen na. E mon yi waxati xunkuye ti tonbonni.” 8 “N yi e xali Amorine yamanani Yuruden

sogeteden binni. E yi ε yenge, koni n yi e lu ε sagoni. E yi e yamanan tongo, n yi e halagi ε yee ra. **9** Siporo a dii Balaki, Moyaba mangan fan yi keli, a yi Isirayila yenge. E yi Balami xili, Beyori a dii xemena, alogo a xa fa ε danga. **10** Koni n mi tin Balami xuiin name, a falan yi findi duban na ε xa. N yi ε ba Balaki yii. **11** E yi Yuruden baani gidi, ε fa Yeriko taani. Yeriko kaane yi ε yenge. Amorine nun Perisine nun Kanan kaane nun Xitine nun Girigasane nun Xiwine nun Yebusune fan yi ε yenge, koni n yi e sa ε sagoni. **12** A luxi alo n yi jurine nan nadinma e ma naxanye yi e kedima ε yee ra e nun Amorine manga firinne. E silanfanne nun ε xanle xa mi na ligaxi. **13** N yi yamanan so ε yii ε mi naxan masegexi, e nun taane ε mi naxanye tixi, ε doxi denaxan yi iki. Manpa bogi binle nun oliwi binle, ε mi naxanye sixi, ε ne nan donma iki.” **14** “Nayi, iki ε gaxu Alatala yee ra, ε yi a batu fetareyaan nun lannayani. E benbane yi alan naxanye batuma Baa Gbeen kidi ma e nun Misiran yamanani, ε me ne ra, ε yi Alatala batu. **15** Koni xa a mi rafanɲe ε ma ε Alatala batu, ε waxi naxan batu feni, ε xa na sugandi to: E benbane alan naxanye batuxi Baa Gbeen bode foxon na ba, hanma Amorine alane ε doxi naxanye yamana yi ba. Koni nxu nun n ma denbayana, nxu tan Alatala nan batuma.” **16** Yamaan yi a yabi, e naxa, “Nxu mi nxu me Alatala ra mume, nxu yi ala gbetene batu! **17** Amasoto Alatala nan en ma Ala ra. A tan nan en naminixi Misiran yamanani konyiyani, en tan nun en benbane. A tan nan kabanako fe gbeene liga en yee xori, a yi en kantan en ma sigatiin birin yi, e nun siyane ye en yi danguma naxanye yamanaye yi. **18** Alatala bata siyane birin kedi en yee ra, hali Amarin naxanye yi doxi yamanani. Nxu fan Alatala nan batuma, bayo a tan nan en ma Ala ra.” **19** Yosuwe yi a fala yamaan xa, a naxa, “E mi nae Alatala batue, bayo Ala saripanxin na a ra, Ala xoxolonxin na a ra. A mi diɲe ε matandine nun ε yulubine ma. **20** Xa ε me Alatala ra waxatin naxan yi, ε yi ala gbetene batu, a kelima nen ε xili ma, a yi gbalon nafa ε ma, a yi ε birin naxori, hali a to fe faɲin ligaxi ε xa.” **21** Yamaan yi a fala Yosuwe xa, e naxa, “En-en de! Nxu Alatala nan batuma.” **22** Yosuwe yi a fala yamaan xa, a naxa, “E bata findi ε yete sereyaan na fa fala ε tan nan Alatala sugandixi alogo ε xa a batu.” E yi Yosuwe yabi, e naxa, “Nxu bata findi nxu serene ra.” **23** Yosuwe mon yi a fala e xa, a naxa, “Iki ε ala gbetene ba ε tagi. E yi ε boɲene lu Alatala xa, Isirayilaa Ala.” **24** Yamaan yi a

fala Yosuwe xa, e naxa, “Nxu Alatala nan batuma en ma Ala, nxu yi a xuiin suxu.” **25** Na loxoni, Yosuwe nun yamaan yi layirin xidi. A yi tonne nun sariyane so e yii Siken yi. **26** Yosuwe yi na feene birin sebe Ala Sariya Kitabun kui. A yi geme gbeen tongo, a yi a doxo wariin bun ma Alatala yire saripanxin denaxan yi. **27** Yosuwe yi a fala yamaan birin xa, a naxa, “E bata gemeni ito to? A findima sereyaan nan na en xili ma, bayo a luxi alo a bata falan birin me, Alatala naxan falaxi en xa. A findima sereyaan na ε xili ma, alogo ε nama ε me ε Ala ra.” **28** Na xanbi ra, Yosuwe yi yamaan beɲin, birin yi siga e kee boxone yi. **29** Na to dangu, Nunu a dii Yosuwe, Alatalaa walikeen yi faxa a jee keme jee fuun ma. **30** E yi a maluxun a kee boxoni Timanati-Sera yi Efirami geya yireni, Gaasa geyaan komen foxoni. **31** Isirayila yamaan yi Alatala batuma Yosuwe a siimayaan waxatin birin yi, e nun fonne siimayaan waxatin birin, naxanye luxi Yosuwe faxan xanbini, naxanye bata yi na wanle birin kolon Alatala naxan liga Isirayila kaane xa. **32** Isirayila kaane bata yi Yusufu xonna naxanye xali keli Misiran yi, e yi sa ne maluxun Siken yi Yaxuba denaxan sara Xamori a diine ma, Siken fafe, gbeti gbanan keme ra. Na yi findi Yusufu bonsonna keen na. **33** Harunaa dii Eleyasari yi faxa. E yi a maluxun Gibeya yi a dii xemen Finexasi a geyaan fari denaxan so a yii Efirami geya yireni.

Kitisane

1 Yosuwe faxa xanbini, Isirayila kaane yi Alatala maxodin, e naxa, “Nde singe kelima nxu ye be, siga Kanan kaane yengedeni?” **2** Alatala yi e yabi, a naxa, “Yuda bõnsõnna muxune lan e siga, n bata yamanan so e yii.” **3** Yuda bõnsõnna muxune yi a fala e ngaxakedenne, Simeyõn bõnsõnna muxune xa, e naxa, “Denaxan soxi nxu yii, en birin xa siga menni, en sa Kanan kaane yenge. Na xanbi ra, en birin mõn sigẽ konni denaxan soxi e yii.” Nayi, e nun Simeyõn bõnsõnna muxune yi siga. **4** Yuda bõnsõnna muxune yi siga yenge sodeni, Alatala yi Kanan kaane nun Perisine sa e sagoni, e yi muxu wuli fu faxa Beseki taani. **5** E sa Adoni-Beseki li Beseki taani, e yi a yenge. Nayi, e yi Kanan kaane nun Perisine nõ. **6** Adoni-Beseki yi a gi, koni e yi a sagatan, e sa a suxu, e yi a yii konkoribaan nun a san konkoribaan sege a ra. **7** Adoni-Beseki yi a fala, a naxa, “Manga yii konkoribaan bolonxin nun san konkoribaan bolonxi tonge solofere nan yi n ma donse dõnxen donma n ma tabanla bun nun, koni iki Ala bata n saren fi n kewanla ra.” E yi siga a ra Yerusalen yi, a sa faxa menni. **8** Yuda bõnsõnna muxune yi siga Yerusalen taan xili ma, e yi na tongo, e yi a muxune faxa silanfanna ra, e tẽn so taan na. **9** Yuda bõnsõnna muxune mõn yi siga Kanan kaane fan yengedeni naxanye yi dõxi geya yiren nun Negewi tonbon yiren nun geyadi yireni sogegododen binni. **10** Yuda bõnsõnna muxune yi siga Kanan kaane xili ma naxanye yi dõxi Xebiron taani, denaxan yi xili nun Kiriyati-Aruba. E yi Sesayi nun Aximan nun Talamayi bõnsõnne muxune nõ. **11** E yi keli menni, e yi siga Debiri kaane fan xili ma. Debiri taan yi xili nẽn nun Kiriyati-Seferi. **12** Kalebi yi a fala, a naxa, “Naxan na Kiriyati-Seferi taan yenge, a yi a nõ, n nan n ma dii temena Akasa fima nẽn na kanna ma.” **13** Kalebi xunyen Kenasi a dii xemena Otiniyeli yi taan yenge, a yi a nõ. Kalebi yi a dii temena Akasa fi a ma a jaxanla ra. **14** Akasa to dõxo Otiniyeli xõn, a yi Otiniyeli radin alogo a xa a fala Akasaa fafe xa a xa xẽe bõxõna nde so a yii. Akasa to godo a sofanla fari, Kalebi yi a maxodin, a naxa, “Nanse xõli i ma?” **15** A yi a yabi, a naxa, “Tin fe keden ma n xa, amasõtõ i bata bõxo xaren fi n ma naxan yamanan yiifanna mabinni. Iki, i mõn xa tigine fi n ma.” Kalebi yi tigi yirene so a yii, ndee laben na ndee faxan na. **16** Musa bitanna Keni bõnsõnna muxune

yi keli Tugu Taani, e nun Yuda bõnsõnna muxune. E birin yi sa dõxo Yuda tonbonni Aradi taan yiifari fõxõni yama gbeteye tagi. **17** Yuda bõnsõnna muxune nun e ngaxakedenne Simeyõn bõnsõnna muxune yi siga Kanan kaane yengedeni Sefata taani. E yi na taan naxõri, e yi menna xili sa Xoroma. **18** Yuda bõnsõnna muxune mõn yi Gasa taan nun a rabilinne nõ, e nun Asikalõn taan nun a rabilinne nun Ekirõn taan nun a rabilinne. **19** Alatala yi Yuda bõnsõnna muxune mali, e yi na geya yiren findi e gbeen na, koni e mi muxune nõ naxanye yi dõxi lanbanni, bayo yenge so wontoron wure daxine nan yi ne yii. **20** E yi Xebiron taan so Kalebi yii alo Musa a fala kii naxan yi. A yi Anaki a dii saxanne taane ba e yii. **21** Yebusu kaan naxanye yi dõxi Yerusalen yi, Bunyamin bõnsõnna muxune mi bõxõn ba ne yii. Yebusu kaane dõxi Yerusalen yi Bunyamin bõnsõnna muxune tagi han to. **22** Yusufu bõnsõnna muxune fan yi siga Beteli taan yengedeni, Alatala yi lu e xõn. **23** E xerane nan nasiga Beteli taan nakõrõsideni singen. Beteli taan yi xili nẽn nun Lusi. **24** Xerane yi xemena nde to keke taani, e yi a fala a xa, e naxa, “Nxu nõe soe taani kii naxan yi, na yita nxu ra. Nxu hinanma i ra nẽn.” **25** A yi na yita e ra. Nayi, Yusufu bõnsõnna muxune yi sa taan muxune birin faxa silanfanna ra, koni e yi na xemen nun a denbayaan lu e nii ra. **26** Na xanbi ra, na xemen yi siga Xiti kaane yamanani. A sa taana nde ti menni, a yi na xili sa Lusi, na xinla mõn menna xun ma han to. **27** Manase bõnsõnna muxune mi Beti-Seyan kaane nun e rabilinna muxune kedi, e nun Taanaki kaane nun Dõro kaane nun Yibeleyami kaane nun Megido kaane nun e rabilinne. Kanan kaane yi lu yamanani. **28** Isirayila kaane to senbe sõtõ, e Kanan kaane findi e konyine ra, koni e mi e kedi mume. **29** Efirami bõnsõnna muxune mi Kanan kaane kedi naxanye yi dõxi Geseri taani. Kanan kaane mõn dõxi Efirami bõnsõnna muxune tagi Geseri taani. **30** Sabulon bõnsõnna muxune mi Kitiron kaane kedi, e nun Nahaloli kaane. Kanan kaane yi lu Sabulon bõnsõnna muxune tagi, koni e yi lu konyiyani. **31** Aseri bõnsõnna muxune mi Ako kaane kedi, e nun Sidõn muxune nun Axalaba kaane nun Akisibu kaane nun Xeleba kaane nun Afiki kaane nun Rexobo kaane. **32** Nanara, Aseri bõnsõnna muxune yi dõxo Kanan kaane tagi yamanani. **33** Nafatali bõnsõnna muxune mi Beti-Semesi kaane kedi, e mi Beti-Anata kaane kedi, e lu dõxi Kanan yamanan muxune ye, koni Beti-Semesi kaane nun Beti-Anata kaane yi lu konyiyani. **34**

Amorine yi Dan bõnsõnna muxune lu geya yirene yi, e mi tin e xa godo lanbanni. **35** Amorine yi wa lu feni Xeresi geyaan fari e nun Ayalõn taan nun Salabimi taani. Koni na xanbi ra, Yusufu bõnsõnna muxune yi senben soto, e yi e no, e findi e konyine ra. **36** Amorine yamanan danna yi foloxi Tali Geyaan nan ma siga han Sela taan xanbi ra.

2 Alatalaa malekan yi keli Giligali yi, siga Bokin yi, a yi a fala, a naxa, “N bata ε ramini Misiran yi. N yi siga ε ra yamanani n na ε benbane tuli sa naxan na, n naxa, ‘N mi n ma layirin kale en tagi mume. **2** Koni, ε tan nama layirin xidi ε nun yamanani ito muxune tagi, ε yi e saraxa gandene kala.’ Koni, ε mi ε tuli mati n na. Nanfera ε ito ligaxi? **3** Nayi, n xa a fala ε xa, a n mi fa e kedima ε bun. E luma nen ε fema, e alane yi lu alo luti ratixine ε yee ra.” **4** Alatalaa malekan to yelin falani itoe tiye Isirayila kaane xa, yamaan yi gbelegebele folo sununi. **5** E yi menna xili sa “Bokin,” e yi saraxane ba Alatala xa menni. **6** Yosuwe yi yamaan naxete, Isirayila bõnsõnne muxune birin yi sa e ke bõxõn tongo. **7** Yamaan wali nen Alatala xa Yosuwe a siimayaan birin yi, e nun fonne siimayane yi naxanye luxi Yosuwe xanbini, naxanye Alatala wali xõnne to Isirayila bõnsõnne muxune xa. **8** Nunu a dii xemmen Yosuwe, Alatalaa walikeen faxa a jee kemε jee mõxõnen nan ma. **9** E yi a maluxun a ke bõxõni Timanati-Xeresi yi, Efirami geya yireni, Gaasa geyaan komenna ma. **10** A waxatin muxune birin yi faxa, mayixete gbeteye yi mini naxanye mi yi Alatala kolon, e nun a feen naxanye liga Isirayila bõnsõnne muxune xa. **11** Nayi, Isirayila bõnsõnne muxune yi fe jaxin liga Alatala yee ra yi, e yi Baali sawurane batu. **12** E yi e me Alatala ra, e benbane Ala naxan e ramini Misiran yi, e bira e rabilinna muxune alane fõxo ra, e yi e xinbi sin ne bun, e yi Alatala raxolo. **13** E yi e me Alatala ra, e yi Baali batu e nun Asitarate suxurene. **14** Alatala yi xolo Isirayila bõnsõnne muxune ma. A yi e sa kala tiine sagoni, a yi e so e yaxune yii naxanye yi e rabilinxi, e mi fa e yaxune no sõnõn. **15** E na yi siga yengeni waxati yo yi, Alatala mi yi no fima e ma, alo Alatala a kolo e xa kii naxan yi. E yi lu sununi. **16** Nayi, Alatala yi kitisane rasiga e ma, naxanye e ba kala tiine yii. **17** Koni, e mi e tuli mati e kitisane ra, e lu Ala yanfe ala gbetene batun xõn naxan yi luxi alo yalunyana Ala yetagi, e yi e xinbi sin e bun. E yi xete e benbane kiraan fõxo ra mafuren naxanye yi Alatalaa yamarine

suxi. **18** Alatala na yi kitisana nde rasiga e ma waxati yo yi, Alatala yi luma nen na kitisaan xõn. Ala yi e ba e yaxune sagoni na kitisana siimayaan birin yi, bayo e kininkininna yi Alatala suxuma nen e yaxune fe ra, naxanye yi e jaxankataxi. **19** Koni, kitisaan to faxa, yamaan mõn yi tantan dangu e benbane ra, e yi bira ala gbetene fõxo ra, e yi ne batu, e yi e xinbi sin e bun, e mi tin xete e fe jaxine nun bõje xõdexen fõxo ra. **20** Nayi, Alatala yi xolo Isirayila bõnsõnne muxune ma, a naxa, “Bayo siyani ito bata n ma layirin kala, n naxan tongo e benbane xa, bayo e mi n xuiin suxi, **21** n fan mi fa siya yo kedima e yee ra sõnõn Yosuwe naxanye lu benun a xa faxa. **22** N na Isirayila bõnsõnne muxune kejaan fesefesema na kii nin, alogo n xa a kolon xa e n tan Alatala sagoon lige, alo e benbane a liga kii naxan yi.” **23** Nayi, Alatala yi siyane lu yamanani Yosuwe naxanye lu na benun a xa faxa, a mi ne kedi sasani.

3 Alatala siyani itoe nan lu dõxi yamanani alogo Ala xa Isirayila bõnsõnne muxune kejaan fesefese naxanye mi yi na Isirayila kaane Kanan kaane yenge waxatin naxan yi. **2** Ala yi waxi nen, mayixete nen naxanye munma yi yengen so singen, ne xa e maxaran yenge sodeni. **3** Siyani itoe nan lu yamanani: Kuntigi suulunna naxanye yi Filisitine xun na nun Kanan kaane nun Sidõn kaane nun Xiwin naxanye yi dõxi Liban geya yireni, keli Baali-Xerimon geya yiren ma siga han Lebo-Xamata taana. **4** Alatala Isirayila bõnsõnne muxune fesefese ne nan xõn, alogo a xa a kolon xa e Alatalaa yamarine suxe, a naxanye yamari e benbane ma fata Musa ra. **5** Isirayila bõnsõnne muxune yi lu dõxi Kanan kaane nun Xiti kaane nun Amorine nun Perisine nun Xiwine nun Yebusu kaane tagi. **6** E yi e dii temene tongo e jaxanle ra, e yi e dii temene fi e ma, e yi e alane batu. **7** Naxan jaxu Alatala yee ra yi, Isirayila kaane yi na liga, e yi jinan Alatala xõn, e Ala, e yi Baali nun Asera batu. **8** Alatala yi xolo Isirayila kaane ma, a yi e lu Mesopotamiya kaane mangan Kusan-Risatayin sagoni. E yi lu Kusan-Risatayin bun ma jee solomasexe. **9** Isirayila kaane yi e xuiin namini Alatala ma, Alatala yi marakisi tiina nde fi Isirayila kaane ma naxan e rakisi, Kenasi a dii xemena Otiniyeli, Kalebi xunyena. **10** Alatalaa Nii Sarijanxin yi godo a ma. A yi findi Isirayila kitisaan na. A yi siga yengeni. Alatala yi Mesopotamiya mangan Kusan-Risatayin sa Otiniyeli sagoni, a yi Kusan-Risatayin no. **11** Nee tonge naanin,

bɔɲɛ xunbenla yi lu yamanani han Kenasi a dii xemena Otiniyeli yi faxa. **12** Isirayila kaane mɔn yi fe jaxin liga Alatala yee ra yi. Nanara, Alatala yi Moyaba mangana Egilon senbe so Isirayila kaane xili ma. **13** Egilon nun Amonine nun Amalekine yi e malan siga Isirayila kaane yengedeni, e sa Tugu Taan suxu. **14** Nee fu nun solomasexe, Isirayila kaane doxi Moyaba mangana Egilon ma noon bun. **15** Isirayila kaane mɔn yi e xui ramini Alatala ma, Alatala yi marakisi tiina nde so e yii, Geraa dii xemena Ehudu, Bunyamin bɔnsɔnni. Kɔmenmaan nan yi a ra. Isirayila kaane yi finma sena ndee so a yii alogo a xa sa a so Moyaba mangana Egilon yii. **16** Ehudu yi silanfanna de firin kannu nde rafala a yete xa, a kuyana nɔngɔnna ye keden, a yi a xidi a yiifari ma danban ma wantanna bun ma. **17** A sa na finma seene so Moyaba mangana Egilon yii. Egilon yi findixi muxu fati bende gbeen nan na. **18** Na finma seene yi muxun naxanye xun ma, Ehudu to yelin na soe mangan yii, a yi ne raxete. **19** Koni, e to suxurene yiren li Giligali yi, a tan yi xete, a naxa, “Manganal Wundo xerayana nde n yii i xa.” Mangan yi a fala a muxune xa, a naxa, “E dundul!” Muxun naxanye birin yi a fema, ne birin yi mini. **20** Nayi, Ehudu yi a maso mangan na, a doxi kore banxin kui, foye fajin yi denaxan yi a kedenna xili yi. Ehudu yi a fala, a naxa, “Alaa falana n xɔn lan i ma.” Egilon yi keli a dɔxdɔdeni. **21** Nayi, Ehudu yi silanfanna botin a kɔmenna ra a yiifari ma danban ma, a yi Egilon kuiin sɔxɔn. **22** Silanfanna feen yeteen yi so, Egilon fatin turen yi so silanfanna ma, bayo a mi silanfanna botin a kuini. **23** Nayi, Ehudu yi deen sɔxɔn a xun ma, a yi mini xanbi binni. **24** A siga xanbini, mangana walikene yi fa Egilon matodeni, e yi a to a kore banxin deene yi sɔxɔnxi. E yengi yi a ma a mangan yi a yete nan suturama banxini. **25** E yi bu han, bayo mangan mi yi deen nabima, e yi dejinna tongo, e na rabi. E yi e mangan faxaxin li saxi bɔxɔni. **26** E yi tixi waxatin naxan yi, Ehudu tan yi yanfanma tun, a dangu suxurene yiren na, a siga a giye Seyira taani. **27** A to so mɛnni, a xotaan fe Efirami geyane yi. Isirayila kaane yi e malan a fema geyane ma, a yi findi e xunna ra. **28** A yi a fala e xa, a naxa, “E bira n fɔxo ra, bayo Alatala bata Moyaba kaane sa e sagoni, e yaxune.” Na ma, e yi bira a fɔxo ra, e yi Yuruden baan kirane suxu siga Moyaba binni, e mi fa tin muxu yo xa dangu. **29** Na lɔxɔni, e yi Moyaba senbemaan muxu wuli fu faxa. Muxu yo mi a yimini. **30** Moyaba kaane lu fɔlo Isirayila kaane

noon bun ma na lɔxɔn nin. Na xanbi ra, yamanan yi lu bɔɲɛ xunbenli jee tonge solomasexe. **31** Ehudu danguxina, Anataa dii xemen Samagara nan fa. A yi Filisistine muxu keme sennin faxa jinge gbengben wuren na. Na fan yi Isirayila rakisi.

4 Ehudu faxa xanbini, Isirayila kaane mɔn yi fe jaxin liga Alatala yee ra yi. **2** Alatala yi e sa Kanan mangan Yabin sagoni, naxan yi mangayani Xasori taani. A sofa kuntigin yi xili nen Sisera. A yi doxi Xaroseti-Hagoyin taan nin. **3** Isirayila kaane yi e xui ramini Alatala ma, amasoto yenge so wontoron wure dixin keme solomanaanin nan yi Yabin yii. Xabu jee mɔxɔɲɛ, a Isirayila kaane jaxankatama. **4** Na waxatini, Lapidoto a jaxanla Debora, nabi jaxanla nan yi kitin sama Isirayila yamanani. **5** A yi doxi tugu binla nde nan bun Rama taan nun Beteli taan tagi Efirami geya yireni. E yi na yiren xili sa a Debora Tuguna. Isirayila kaane yi sigama nen a fema kitisadeni. **6** Lɔxɔna nde, a yi Abinowan ma dii xemen Baraka xili, naxan yi kelixi Kedesi taani Nafatali yamanani. A yi a fala a xa, a naxa, “Alatala yamarini ito nan fixi i ma, Isirayilaa Ala, a naxa, ‘Siga Taboro geya yireni, e nun muxu wuli fu Nafatali bɔnsɔnni e nun Sabulon bɔnsɔnni. **7** N Yabin ma sofa kuntigin Sisera radinma nen i ma Kison baan de e nun a wontorone nun a ganla, n yi e sa i sagoni.’” **8** Baraka yi a fala Debora xa, a naxa, “Xa en birin na a ra, n sigɛ. Koni, xa en birin mi a ra, n mi sigama.” **9** A yi a yabi, a naxa, “En birin sigɛ, koni i mi binye sɔtɔma na yengeni, amasoto Alatala fama Sisera sadeni jaxanla nan sago yi.” Debora yi keli, e nun Baraka yi siga Kedesi taani. **10** Baraka yi Sabulon bɔnsɔnna muxune nun Nafatali bɔnsɔnna muxune maxili Kedesi yi, muxu wuli fu yi bira a fɔxo ra. Debora fan yeteen yi siga a fɔxo ra. **11** Nba, Keni kaan Xeberi bata yi keli Keni kaan bonne fema, Musa bitanna Xobabi bɔnsɔnna, a bata yi sa a bubun ti wudi gbeen bun Saananimi yi Kedesi taan fema. **12** Abinowan ma dii xemen Sisera yi a me a Baraka bata fa Taboro geyaan ma. **13** Sisera yi yenge so wontoron wure dixin keme solomanaanin nun a sofane birin malan Xaroseti-Hagoyin yi, e yi siga Kison baan de. **14** Nayi, Debora yi a fala Baraka xa, a naxa, “Keli, bayo Alatala Sisera sama nen i sagoni to. Alatala tixi i yee ra.” Baraka yi godo Taboro geyaan ma, muxu wuli fu biraxi a fɔxo ra. **15** A yi sa Sisera yenge, Alatala yi Sisera ragi Baraka yee ra, a yi a wontorone nun a ganla

birin halagi silanfanna ra. Sisera yi godo a wontoron kui, a yi a gi a sannni. **16** Baraka yi wontorone nun ganla kedi han Xaroseti-Hagoyin yi. Siseraa ganla birin yi faxa silanfanna ra, hali muxu kedenna a mi lu. **17** Koni, Sisera yi a gi a sannni, a siga Keni kaan Xeberi a naxanla Yayeli a bubuni, bayo boɲe xunbenla yi Xasori mangan Yabin nun Keni kaan Xeberi a denbayaan tagi. **18** Yayeli yi mini Sisera yee ra, a yi a fala a xa, a naxa, “N kanna, so be, so n konni, hali i mi gaxu.” A yi so a bubuni, Yayeli yi a luxun bitinganna bun. **19** A yi a fala naxanla xa, a naxa, “Yandi, n ki igeni, min xonla n na.” A yi nono kundin nabi, a yi a ki nononi, a mon yi a xunna so. **20** Sisera mon yi a fala naxanla xa, a naxa, “Siga i ya bubun de ra. Xa muxuna nde fa i maxodin, a naxa, ‘Muxuna nde be ba?’ I xa na kanna yabi, i naxa, ‘En-en.’” **21** Koni, Xeberi a naxanla Yayeli yi bubun wudi ralemunxina nde tongo e nun deeramana, a yi a maso a ra, a yi wudin gbangban a xunni, a sa mini boxoni. Sisera xadaxin yi saxi, a xima, a yi a faxa. **22** Bayo Baraka yi Sisera sagatanma, Yayeli yi mini a ralandeni, a yi a fala a xa, a naxa, “Fa be, i xemen naxan fenma, n xa fa a yita i ra.” A yi so a konni, a sa Sisera faxaxin li saxi na, wudin sotixi a xunni. **23** Na laxonni, Ala yi Kanan mangan Yabin nayarabi Isirayila kaane yee ra. **24** Isirayila kaane yi senben soto Kanan mangan Yabin fari han e yi a raxori.

5 Na laxonni, Debora nun Baraka, Abinowan ma dii xemen yi betin ba e bode xon, e naxa, **2** “Sofane yitonxi yenge so xinla ma Isirayila yi, yamaan tinxi e xa siga yengeni, tantunna xa fi Alatala ma! **3** E tan mangane! E tan kuntigine, e tuli mati! N betin bama nen, n betin bama nen Alatala xa. N na Alatala tantunma nen betini, Isirayilaa Ala. **4** Alatala, i to keli Seyiri yi, i to keli Edon yamanani, boxon yi xuruxurun, kundaan yi findi igen na, tule gbeen yi fa. **5** Geyane yi xuruxurun Alatala yetagi, Sinayi geyana Alatala yetagi, Isirayilaa Ala. **6** Anataa dii xemen Samagara waxatini, Yayeli waxatini, kira gbeene bata yi rabepin, sigatine yi sigama kiradine nan xon. **7** Taane bata yi rabepin Isirayila yi. E yi kalaxi han n tan Debora fa waxatin naxan yi, n yi fa findi Isirayila kaane nga ra. **8** E bata yi ala gbetene sugandi. Nayi, yengen yi keli e taane yi, koni, ye masansan wure lefana hanma tanban mi yi toe muxu kedenna yii muxu wuli tonge naaninna ye Isirayila yi.” **9** “N boɲena Isirayila sofa kuntigine foxo ra, e nun muxun naxanye tinxi e xa

siga yengeni. Tantunna Alatala xa! **10** E tan naxanye e masiga tima sofali fixene fari, e tan naxanye doxi dagine ma, e tan naxanye sigan tima kirane xon, e tuli mati **11** ige maxanle xuiin na ige ramaradene yi. E Alatalaa tinxinyana fe falama, a wali fajine Isirayila kuntigine xa! Nayi, Alatalaa yamaan bata sa doxo taane so deene ra. **12** E yi a fala, e naxa, ‘Xulun, xulun! Debora, xulun! Xulun, xulun! I betin ba! Xulun! Baraka, xulun! Abinowan ma dii xemena, i sa fa i ya kasorasane ra!’ **13** Nayi, naxanye lu e nii ra, ne yi siga kuntigine foxo ra, Alatalaa yamaan yi e malan n fema, siga sofa kendene xili ma. **14** Efirami bonsonna muxuna ndee yi fa naxanye Amalekine no. Bunyamin bonsonna muxune fan yi biraxi i foxo ra. Kuntigine yi keli Makiri yi siga yengeni. Sofa kuntigine yi fa sa keli Sabulon bonsonni. **15** Isakari kuntigine yi bira Debora foxo ra, Isakari bonsonna muxune yi biraxi Baraka nan foxo ra, e godo lanbanni mafuren! Koni, matandi gbeen yi lu Ruben bonsonni. **16** Nanfera i luxi sansanne kui i lu xuruseene wuga xuiin name? Matandi gbeen yi lu Ruben bonsonni. **17** Galadi kaane yi lu Yuruden baan kidi ma! Nanfera Dan kaane luxi kunkine dexon? Aseri kaane yi lu doxi baan de, e lu doxi kunki tideni so deene ra. **18** Sabulon bonsonna muxune tan yi tin sayaan ma yengeni, Nafatali bonsonna muxune fan na kiini xene ma.” **19** “Mangane fa nen, e yi yengen so. Nayi, Kanan mangane yi yengen so Taanaki yi, Megido tigne dexon, koni, e mi gbeti yo tongo, e mi sese soto yengeni. **20** Sarene yi yengen so kore xonna ma, e yi Sisera yenge e funfuni. **21** Kison baa igen yi en yaxune xali, Kison baa igen naxan yi minima xabu a foloni. I wekile! En siga yengeni! **22** Nayi, soone torone xuiin yi mini, e danguma e giye, e tuganma alo soo senbeman. **23** Alatalaa malekana nde yi a fala, a naxa, ‘Dangan Meroso taan xa, e a muxune danga, bayo e mi fa walixi Alatalaa fe ra, e mi fa Alatalaa sofa kendene malixi.’ **24** Duban Yayeli xa dangu naxanle birin na Xeberi a naxanla, Keni kaana! Dubana a xa naxanle tagi naxanye doxi bubune kui! **25** Sisera bata igen maxodin, a yi nonon so a yii! A yi fenen so a yii igelengen fajin kui. **26** A yi wudi ralemunxin suxu a komenna ra, a yi a gbangban deeramaan na a yiifanna ra, a yi Sisera garin, a yi a xunna soxon, a yi a xunni koren, a yi a yibo. **27** A yi bira a san bun, a yi bira, a lu saxi a bun, a yi bira a san bun, a salaxun denaxan yi a bira, a lu mena nin a faxa.” **28** “Sisera nga yi a yeen namini banxin foye soden na, a yi a

fala, a naxa, ‘Nanfera, a yenge so wontoron bata bu, a mi fama? Nanfera a wontorone bata madiganjɛ ayi?’ **29** A kuntigi jaxalan xaxilimane yi a yabi ito ra hali a tan fan yeteen yi naxan mirixi, e naxa, **30** ‘Sofane seene nan tongoxi yengeni, yanyina nde e ne nan taxunma, sofa keden, sungutun keden hanma firin. E dugi kendene nan tongoxi Sisera xa, dugi fajɛ sɔxɔnxine, kɔɛ mafilin fajɛ sɔxɔnxine Sisera xa.’” **31** “Alatala, a yi lan nun, i yaxune birin xa faxa alo Sisera faxaxi kii naxan yi. Koni, i rafan naxanye ma ne xa lu alo sogen na te senbeni.” Yamanan yi lu bɔjɛ xunbenli jɛɛ tonge naanin.

6 Isirayila kaane mɔn yi fe jaxin liga Alatala yɛɛ ra yi. Nayi, Alatala yi e sa Midiyan kaane sagoni jɛɛ solofere. **2** Midiyan kaane yi Isirayila kaane jaxankata. Na yi a liga Isirayila kaane yi sa dɔxɔ geya longonne nun faranne ra. **3** Isirayila kaane na yi sansine si waxati yo yi, Midiyan kaane nun Amalekine nun sogeteden binna xuruse rabane yi sa e yengema nen. **4** E yi fa dɔxɔ Isirayila yamanani, e yi e bɔxɔn sansine birin kala siga han Gasa taani, donseen nun yɛxɛene nun jingene nun sofanle, e mi sese luyɛ Isirayila yi. **5** E nɛma yi e xuruseene nun e bubune xalɛ Isirayila yi, e yi wuyama ayi nen alo tuguminne, e jɔgɔmɛne yi wuya han e yaten mi kolon, e yi fama nen yamanani, e kalan ti. **6** Midiyan kaane yi Isirayila findi yigelitɔne ra, Isirayila kaane yi e xui ramini Alatala ma. **7** E to e xui ramini Alatala ma lan Midiyan kaane ma, **8** Alatala yi nabina nde rasiga e ma. A yi a fala e xa, a naxa, “Alatala, Isirayilaa Ala ito nan falaxi, a naxa: N tan nan ɛ raminixi Misiran yi, n yi ɛ ba koniyani. **9** N tan nan ɛ baxi Misiran kaane nɔɔn bun, e nun naxanye birin yi ɛ jaxankatama, n yi e kedi ɛ yɛɛ ra, n yi e yamanan so ɛ yii. **10** N yi a fala ɛ xa, n naxa, ‘N tan nan Alatala ra, ɛ Ala. ɛ nama Amorine alane batu yamanani ɛ dɔxi denaxan yi.’ Koni, ɛ mi ɛ tuli mati n na.” **11** Na xanbi ra, Alatalaa malekan yi fa, a yi dɔxɔ kondɛn bun Ofara taani, Yosa gbeen yi denaxan na, Abiyɛseri xabilan muxuna. A dii xɛmɛn Gedeyɔn yi murutun bɔnbɔma manpa ige badɛn yinla ra, alogo Midiyan kaane nama a to. **12** Alatalaa malekan yi mini a xa, a yi a fala a xa, a naxa, “Alatala i tan sofa kendɛn xɔn!” **13** Gedeyɔn yi a yabi, a naxa, “N kanna, xa Alatala n xɔn, nanfera ito ligama nxu ra? A wanle minɛn nxu benbane naxanye fe fala nxu xa, e to yi a falama, e naxa, ‘Alatala xa mi nxu raminixi Misiran yi ba?’ Iki, Alatala bata nxu

rabɛjin, a nxu sa Midiyan kaane sagoni!” **14** Alatala yi a yɛɛ rafindi a ma, a naxa, “Senben naxan i ra, ɛ nun na xa siga, i sa Isirayila kaane ba Midiyan kaane yii, n tan xa mi i rasigama ba?” **15** A yi a yabi, a naxa, “N Marigina, n na Isirayila rakisima di? N xabilan naxan yi, na xurun Manase bɔnsɔnna yɛ, n tan nan mɔn dii dɔnxɛn na n baba a denbayani.” **16** Alatala yi a yabi, a naxa, “N luma nɛn i fɔxɔ ra, i yi Midiyan kaane birin faxa alo muxu kedenna.” **17** Gedeyɔn yi a yabi, a naxa, “Taxamasenna yita n na naxan a yitama a i tan nan falan tixi n xa. **18** N bata i mafan, i nama i masiga be ra han n mɔn yi fa i fɛma, n fa n ma saraxan sa i yetagi.” Ala yi a fala, a naxa, “N luma nɛn han i yi fa.” **19** Gedeyɔn yi sa sii diina nde faxa, a yi murutun kilo tonge saxan gan buru tetaren na. A yi subɛn sa sangatanna kui, a yi sube igen sa igelɛngenna kui, a fa e yita malekan na kondɛn bun ma. **20** Alaa malekan yi a fala a xa, a naxa, “Subɛn nun buru tetaren sa gɛmɛn fari, i sube igen bɔxɔn e fari.” Gedeyɔn yi na liga. **21** Alatalaa malekan yi dunganna xunna sin subɛn nun buru tetarene yi gɛmɛn fari. Tɛɛn yi mini gɛmɛni a yi subɛn nun buru tetaren gan. Alatalaa malekan yi tunun a ma. **22** Gedeyɔn yi a kolon a Alatalaa malekan nan yi a ra. Gedeyɔn yi gbelegbele, a naxa, “Marigina, Alatala! N bata Alatalaa malekan to n yetagi!” **23** Alatala yi a fala a xa, a naxa, “Lu bɔjɛ xunbenli, i nama gaxu, i mi fa faxama.” **24** Gedeyɔn yi saraxa ganden nafala Alatala xa mɛnni, a yi na xili sa a “Alatala Nan Bɔjɛ Xunbenli Ra.” Na mɔn Ofara yi han to, Abiyɛseri xabilan muxune taana. **25** Na kɔɛɛn yetɛɛn na, Alatala yi a fala Gedeyɔn xa, a naxa, “I fafe a turaan firinden tongo naxan jɛɛ solofere a ra. I yi Baali suxure saraxa ganden kala, i fafe gbeen denaxan na. Asera gbɛndonna naxan a fɛma, i yi na rabira. **26** I yi saraxa gande fajɛn ti Alatala xa geyani ito xuntagi, i ya Ala. I yi turaan tongo, i tɛɛn so Asera gbɛndonna ra, i naxan nabiraxi, i yi turaan subɛn sa tɛɛni, a ba saraxan na.” **27** Gedeyɔn yi muxu fu tongo walikɛne yɛ, Alatala naxan falaxi, a yi na liga. Koni, bayo a yi gaxuxi a fafe a denbayaan yɛɛ ra e nun taan muxune, a mi tin a lige yanyin na, fɔ kɔɛɛn na. **28** Taan muxune to keli xɔtɔnni, e yi a to Baali suxure saraxa ganden kalaxi, Asera gbɛndonna mi na naxan yi tixi a fɛma, turaan firinden fan bata yi ba saraxa gan daxin na saraxa ganden fari, denaxan ti. **29** E yi a fala e bode xa, e naxa, “Nde ito ligaxi?” E yi maxɔdinna ti, e fe xɔnfenna ti. E yi a fala e xa, e naxa, “Yosaa dii xɛmɛn

Gedeyon nan a ligaxi.” 30 Nayi, taan muxune yi a fala Yosa xa, e naxa, “I ya dii xemen namini, nxu xa a faxa, bayo a bata Baali suxure kiden nabira, a yi Asera gbindonna rabira naxan yi tixi a fema.” 31 Muxun naxanye yi tixi Yosa fema, a yi ne yabi, a naxa, “E tan nan Baali malima ba? Naxan yo na Baali mali, na kanna faxama nen benun xotonni. Xa ala nan Baali ra, a xa a yete mali, bayo a batuden bata rabira.” 32 Na loxoni, e yi Gedeyon xili sa a Yerubali, e naxa, “Baali yeteen xa a yenge.” E na fala nen bayo a bata Baali kiden nabira. 33 Midiyan kaane nun Amalekine nun sogeteden binna xuruse rabane birin yi e malan, e gidi Yuruden baan kidi ma, e sa e malan Yescreli lanbanni. 34 Alatalaa Nii Sarijanxin yi godo Gedeyon ma, a yi xotaan fe, Abiyeseri xabilan yi fa, e bira a foxo ra. 35 A yi xerane rasiga Manase yamanan birin yi, alogo na muxune fan xa fa a foxo ra. A mon yi xerane rasiga Aseri nun Sabulon nun Nafatali yamanan yi, ne fan muxune yi siga e ralandeni. 36 Gedeyon yi a fala Ala xa, a naxa, “I waxi Isirayila rakisi feni n tan nan xon, alo i a falaxi kii naxan yi. 37 Awa, n xa yexee kidi xabe daxina nde sa lonna ma. Xa xiila sa kidin nan tun na, boxon yi lu xaraxi, nayi n na a kolonma nen a i Isirayila rakisima nen n xon, alo i a falaxi kii naxan yi.” 38 A yi na liga. Na xoton bode, a yi keli xoton, a yi kidini bundu, xiila naxan mini kidini, igelengenna ye keden. 39 Gedeyon yi a fala Ala xa, a naxa, “I nama xolo n ma, koni n mon waxi a kolon feni kidin nan xon. Iki, kidin xa lu yixaraxi, xiila yi boxoni kun.” 40 Ala mon yi na liga na keeen na. Kidin gbansanna yi lu yixaraxi, boxon yi yikun.

7 Gedeyon naxan mon yi xili Yerubali, na nun yamaan naxan birin yi a foxo ra, e birin yi keli xoton xoton, e sa e malan Harodi tigin yireni. Midiyan kaane yi malanxi komenna ma lanbanni More गयाan dexon. 2 Alatala yi a fala Gedeyon xa, a naxa, “I ya muxune wuya. Na ma, n mi waxi Midiyan kaane sa feni i sagoni, xanamu Isirayila kaane e yete matoxoma nen, e naxa, ‘Nxu tan nan nxu yete rakisixi.’ 3 Nayi, sa ito fala i ya yamaan xa, i naxa, ‘Xa naxan gaxuxi, a xuruxurunma, na kanna xa xete, a keli Galadi geyani keden na.’” Muxu wuli maxonjen nun firin yi xete, a yi lu muxu wuli fu ma. 4 Alatala yi a fala Gedeyon xa, a naxa, “Yamaan mon gbo. E xali igen de, n xa sa muxune sugandi i xa menni, n na naxanye yita i ra, e nun ne yi siga. N na a fala naxan yo ma a nama

siga, hali na kanna mi siga i foxo ra.” 5 Nayi, Gedeyon yi yamaan xali baan de. Alatala yi a fala Gedeyon xa menni, a naxa, “Naxanye birin e felenma igen ma, e yi e min alo barena, ne lu e danna, naxanye birin e xinbi sinma e yi e min, i yi ne fan lu e danna.” 6 Muxu keme saxan yi e min e yiine ra, yamaan donxen yi e xinbi sin, e yi e min. 7 Alatala yi a fala Gedeyon xa, a naxa, “N na e rakisima na muxu keme saxanne nan xon naxanye e minxi e yiine ra, n yi Midiyan kaane sa i sagoni. Muxu donxene xa siga e konne yi.” 8 Gedeyon yi Isirayila muxu donxene fandane nun e xotane ba e yi, a yi e rasiga e konne yi. Koni, a yi na muxu keme saxanne lu a fema. Midiyan kaane yi malanxi e labe ra nen. 9 Alatala yi a fala Gedeyon xa na keeen na, a naxa, “Keli, i godo gali malandeni, bayo n na a sama nen i sagoni. 10 Xa i gaxu gode, e nun i ya walikeen Pura xa siga gali malandeni. 11 I yi i tuli mati e ra. Na xanbi ra, i wekilema nen, i sa e yenge.” Nayi, e nun a walikeen Pura yi siga han daaxaden so deen na. 12 Midiyan kaane nun Amalekine nun sogeteden binna xuruse rabane bata yi e malan lanbanni, e wuya alo tuguminne, e jagomene yi wuya alo jemensinna foxo igen de. 13 Gedeyon yi fa, a yi xemena nde xuiin me xiyen yebe a lanfaan xa, a naxa, “N funde burun nan toxi a firifire Midiyan kaane daaxaden tagi xiyeni, a yi fa han a fa din bubun na, bubun yi maxete, a bira.” 14 A lanfaan yi a yabi, a naxa, “Gedeyon ma yengen nan na ra, Yosaa dii xemena, Isirayila kaana. Ala bata Midiyan kaane sa a sagoni e nun gali malanden birin.” 15 Gedeyon to na xiyen nun a bunna rame, a yi Ala batu, a yi xete Isirayila kaane gali daaxadeni, a naxa, “E keli, bayo Alatala bata Midiyan kaane gali daaxaden sa en sagoni.” 16 A yi na muxu keme saxanne yitaxun doxode saxanna ra, a yi xotane so e birin yii e nun feje yigenle nun xaye xidi degene, fejen sa soma naxanye xun na. 17 A yi a fala e xa, a naxa, “E yeen tima n na nen, n na naxan liga, e fan yi na liga. N neen fa ganla daaxaden li tun, n na naxan liga, e na liga. 18 N na xotaan fe waxatin naxan yi, muxun naxanye birin n foxo ra, ne birin yi xotaan fe ganla daaxaden nabilinni, e sonxo, e naxa, ‘Nxu yengen soma Alatala nun Gedeyon nan xa!’” 19 Muxu kemen naxanye lu Gedeyon fema, e nun ne yi maso gali daaxaden na ke tagini, kantan tiine masara waxatini. E yi xotane fe, fejen naxanye yi e yii, e yi ne yibo. 20 Muxu keme saxanne birin yi xotane fe daaxaden nabilinni, e yi fejene yibo, e yi xaye xidi degene suxu e komenne ra,

xotane e yiifanne yi alogo e xa e fe, e yi sɔnxɔ, e naxa, “Nxu yengen soma Alatala nun Gedeyɔn nan xa!” 21 E birin yi lu e funfuni gali malanden nabilinni, gali malanden muxune birin yi e gi fɔlɔ, e gbelegebele, e yi e gi. 22 Nayi, muxu keme saxanne birin yi xotane fe, Alatala yi muxune radin e bode ma gali daaxadeni, e yi e bode yenge. Midiyan kaane yi e gi Beti-Sita taani, Serera taan binni, siga han Abeli-Mehola taani, Tabata taan dɛxɔn. 23 Isirayila kaane yi e malan, Nafatali kaane nun Aseri kaane nun Manase kaane birin yi Midiyan kaane sagatan. 24 Gedeyɔn yi xerane rasiga Efirami geya yiren birin yi a faladeni, a naxa, “E godo Midiyan kaane ralandeni, ε yi kiraan suxu Midiyan kaane yɛε ra keli baan dε siga han Beti-Bara.” Efirami kaane yi e malan e yi Yuruden baan xɔnna birin suxu siga han Beti-Bara. 25 E yi Midiyan kaane kuntigi firinne suxu, Orebi nun Sebi, e yi Orebi faxa Orebi Gemen fari, e yi Sebi faxa Sebi a Manpa Ige Badeni. E mɔn yi lu Midiyan kaane sagatanɲε. E yi siga Orebi nun Sebi xunne ra Gedeyɔn xɔn Yuruden baan kidi ma.

8 Efirami kaane yi a fala Gedeyɔn xa, e naxa, “Nanfera i ito ligaxi nxu ra? Nanfera i mi nxu xilixi Midiyan kaane yengedeni?” E yi a mafala. 2 A yi e yabi, a naxa, “N nanse ligaxi naxan maliga ε kewanle ra? Bogi seen naxanye luxi bɔxɔne yi Efirami bɔnsɔnna muxune xa, na mi gbo dangu Abiyeseri xabilan muxune se xabane birin na ba? 3 Ala bata yi Midiyan kaane kuntigine Orebi nun Sebi sa ε sagoni. N nɔε nanse lige nayi naxan dangu ε gbeen na?” Gedeyɔn to na fala Efirami kaane xa, nde yi ba e xɔlɔn na. 4 Gedeyɔn nun a fɔxɔrabira muxu keme saxanne to Yuruden baan li, e yi baani gidi, e bata yi xadan, koni e mɔn yi lu sagatanna tiyε. 5 A yi a fala Sukɔti kaane xa, a naxa, “N bata ε mafan ε donseen so yamaan yii naxan biraxi n fɔxɔ ra, amasɔto e xadanxi, anu n mɔn Midiyan mangane sagatanma Sebaxa nun Salamuna.” 6 Sukɔti kuntigine yi a yabi, e naxa, “Sebaxa nun Salamuna bata sa i sagoni ba? Nxu xa donseen so i ya ganla yii nanfera?” 7 Nayi, Gedeyɔn yi e yabi, a naxa, “Nba, Alatala na Sebaxa nun Salamuna sa n sagoni waxatin naxan yi, n na ε naxankatama nen tonbonna wudi yii jali kanne ra.” 8 A keli mɛnni, a siga Penuyeli taani, a sa na maxandi kedenna ti Penuyeli kaane fan ma. Penuyeli kaane yi a yabi alo Sukɔti kaane a yabi kii naxan yi. 9 A fan yi a fala Penuyeli kaane xa, a naxa,

“N na nɔɔn sɔto yengeni, n xete, n na ε taan sanganso makantanxin nabirama nen.” 10 Sebaxa nun Salamuna nun e ganla yi Karakoro taani, fɔ muxu wuli fu nun suulun jɔxɔn. Ne nan tun yi fa luxi sogeteden binna xuruse rabane sofa ganla ra. Bayo, muxu wuli keme mɔxɔɲε bata yi faxa e ra yengeni. 11 Gedeyɔn yi siga xuruse rabane kiraan xɔn, Nobaya taan nun Yogboha taan sogeteden binni, a yi na sofa ganla raterɛna, a yi e yenge. 12 Sebaxa nun Salamuna yi e gi. Gedeyɔn yi e sagatan, a Midiyan kaane manga firinne suxu, sofa ganla birin yi xuya ayi. 13 Yosaa dii xɛmɛn Gedeyɔn yi fa sa keli yengeni mini Xeresi geya ma kiraan xɔn. 14 A Sukɔti banxulanna nde suxu, a yi a maxɔdin, na yi Sukɔti kuntigine nun fonne xinle sebe, muxu tonge solofere muxu solofere. 15 Na xanbi ra, a fa Sukɔti kaane fɛma, a naxa, “E n konbi naxanye fe ra, ε naxa, ‘Sebaxa nun Salamuna bata sa i sagoni ba? Nxu xa donseen so i ya muxu xadanxine yii nanfera?’ Nba, iki, Sebaxa nun Salamuna ni i ra.” 16 Nayi, a yi Sukɔti taan fonne suxu, a siga e ra tonbonni. A sa e bɔnbɔ wudi yii majalixine ra, a Sukɔti kaane kewanla saran e ra. 17 A mɔn yi Penuyeli taan sanganso makantanxin nabira, a yi taan muxune faxa. 18 Na xanbi ra, Gedeyɔn yi a fala Sebaxa nun Salamuna xa, a naxa, “E muxun naxanye faxa Taboro yi, ne yi di?” E yi a yabi, e naxa, “E yi luxi nen alo i tan, e birin yi maligaxi manga diine nan na.” 19 A yi a fala, a naxa, “Ngaxakedenne nan yi e ra, ngaa diine. N bata n kɔlɔ habadan Alatala yi. Xa ε yi e lu e nii ra nun, n mi yi ε faxama nun.” 20 A yi a fala a dii singen Yeteri xa, a naxa, “Keli, i yi itoe faxa!” Koni Yeteri mi a silanfanna botin, amasɔto a yi gaxuxi, bayo banxulanna nan mɔn yi a ra. 21 Sebaxa nun Salamuna yi a fala Gedeyɔn xa, e naxa, “I tan yetɛɛn xa keli, i yi nxu faxa! Bayo ‘xɛmɛn nan tun na lige.’” Nayi, Gedeyɔn yi keli, a yi Sebaxa nun Salamuna faxa. Se fajin naxanye yi e jɔgɔmɛne fari, a yi ne fan tongo. 22 Isirayila kaane yi a fala Gedeyɔn xa, e naxa, “Lu nxu xun na ε nun i ya diin nun i mamandenna, bayo i bata nxu rakisi Midiyan kaane ma.” 23 Gedeyɔn yi a fala e xa, a naxa, “N mi luyε ε xun na, n mi n ma diin luyε ε xun na. Alatala nan luma ε xun na.” 24 Gedeyɔn mɔn yi a fala e xa, a naxa, “N waxi sena nde maxɔdin feni ε ra. E birin xa tunlaso keden keden so n yii ε se tongoxine yi yengeni.” Tunlaso xɛma daxine nan yi Midiyan kaane tunle ra, bayo Sumayila bɔnsɔnna muxune nan yi e ra. 25 E yi a yabi, e naxa, “Nxu e fiyε i ma nen.” E

yi dugini sa bōxōni, e birin yi tunlaso keden keden woli dugin fari e naxan tongo yengeni. **26** Tunlaso xema daxine binyen yi sigē han kilo mōxōjē, Gedeyōn naxan maxōdin. A mōn yi jērene nun se fajine sōtō e nun Midiyan kaane mangane dugi fajine nun kōe filin fajin naxanye yi e jōgōmene kōe. **27** Gedeyōn yi na xemaan nafala saraxarali domana nde ra, a yi a lu Ofara taani. Isirayila kaane birin yi fama menna nin na batudeni naxan yi luxi alo yalunyana Ala yetagi, na yi findi maratantan seen na Gedeyōn nun a denbayaan xa. **28** Midiyan kaane yi yarabi Isirayila kaane yēē ra, e mi fa e xunna rakeli sōnōn. Yamanan yi lu bōjē xunbenli jēē tonge naanin Gedeyōn ma siimayaan birin yi. **29** Yosaa dii xemen Yerubali yi xetē, a dōxō a konni. **30** Gedeyōn dii tonge solofere nan sōtō, bayo jaxalan wuyaxi nan yi a yii. **31** A konyi jaxanla naxan yi Siken taani, na fan yi dii keden sōtō a xa, a yi na diin xili sa Abimeleki. **32** Yosaa dii xemen Gedeyōn faxa foriya fajin nin, e yi a maluxun a fafe Yowasa gaburun na Ofara taani, denaxan yi findixi Abiyeseri xabilan gbeen na. **33** Gedeyōn to faxa, Isirayila kaane mōn yi Ala yanfa Baali suxurene xōn naxan yi luxi alo yalunyana Ala yetagi, e yi Baali-Beriti findi e ala ra. **34** Isirayila kaane mi bira Alatala fōxō ra, e Ala naxan e ba e yaxune yii naxanye yi e rabilinxi. **35** E mi hinanna yita Gedeyōn ma denbayaan na naxan mōn xili Yerubali, hali a to fe fajī wuyaxi raba Isirayila xa.

9 Yerubali a dii xemena Abimeleki yi siga Siken taani a nga xunyen nun a xabilan muxune birin fema, a yi a fala e xa, a naxa, **2** “N bata ē mafan, ē sa a fala Siken taan fonne birin xa, ē naxa, “E waxi nen Yerubali a dii tonge soloferene birin xa findi mangan na ē xunna ba, hanma muxu keden?” E xa a kolon a ē xabilan muxuna nde nan n na.” **3** A nga xunyene yi a falane birin nali Siken fonne ma, e yi tin bire Abimeleki fōxō ra, bayo e xabilan muxuna nde nan yi a ra. **4** E Baali-Beriti batu banxin gbeti gbanan tonge solofere so a yii. Abimeleki yi fuyantenne nun mafu tiine saran na gbetin na, e bira a fōxō ra. **5** A yi siga a fafe a banxini Ofara taani, a yi a tadane nun a xunyene faxa, Yerubali a dii tonge soloferene birin gēmē kedenna fari. Yerubali a dii dōnxen Yotami nan tun lu, amasōtō na bata yi a luxun. **6** Siken kaane nun Beti-Milo kaane birin yi e malan wudi gbeen dēxōn gēmēn dēxōn naxan dōxi Siken yi. E yi sa Abimeleki dōxō mangan na mēnni. **7** Yotami yi na mē. A yi sa ti

Garisimi geyaan xuntagi, a gbelegbele, a naxa, “Siken fonne, ē tuli mati n na, xa ē waxi Ala xa ē ramē. **8** Lōxōna nde, wudine siga nēn a e xa sa e mangan dōxō. E yi a fala Oliwi bili gbeen xa, e naxa, ‘Findi nōxō mangan na.’ **9** Koni, Oliwi bili gbeen yi e yabi, a naxa, ‘N xa n mē n turen na ba, naxan nafan Ala nun muxune ma, n sa dōxō wudin bonne xun na?’ **10** Nayi, wudine yi a fala xōdē binla xa, e naxa, ‘Fa, i fa dōxō nōxū xun na.’ **11** Koni, xōdē binla yi e yabi, a naxa, ‘N xa n mē n jaxunna nun n bogi fajin na, n sa dōxō wudin bonne xun na?’ **12** Nayi, wudine yi a fala manpa binla xa, e naxa, ‘Fa, i fa dōxō nōxū xun na.’ **13** Koni, manpa binla yi e yabi, a naxa, ‘N xa n mē n igen na naxan findixi Ala nun muxune rasēwa seen na, n sa dōxō wudin bonne xun na?’ **14** Nayi, wudine birin yi a fala kōjōn xa, e naxa, ‘Fa, i fa dōxō nōxū xun na.’ **15** Kōjōn yi wudine yabi, a naxa, ‘Xa ē waxi n dōxō feni mangan na ē xun na, ē fa girindin n nininna ra. Xanamu, tēēn minima nēn kōjōni a yi Liban suman wudine gan.”’ **16** “Nba, ē Abimeleki dōxi mangan na lannayaan nun fetareyaan nin ba? E fan nēn Yerubali nun a denbayaan na ba? E a wali fajī kolonxi ba? **17** N fafe yengēn so nēn ē xa, a yi lu sayaan dē, a yi ē ba Midiyan kaane yii. **18** E tan bata keli n fafe a denbayaan xili ma to, ē yi a dii tonge soloferene faxa gēmē kedenna fari, ē yi a konyi gilēna dii xēmēna Abimeleki dōxō mangan na Siken kaane xun na, bayo ē ngaxakedenna nan a ra. **19** Xa ē lannayaan nan ligan Yerubali nun a denbayaan na to fetareyani, Abimeleki xa findi ē sēwan na, ē fan yi findi a sēwan na. **20** Xanamu, tēēn xa mini Abimeleki yi, a yi Siken kaane gan e nun Beti-Milo kaane, tēēn yi mini Siken nun Beti-Milo kaane yi, a yi Abimeleki gan!” **21** Na xanbi ra, Yotami yi a gi, a siga Beri taani, a sa lu denaxan yi, a yi a masiga a tada Abimeleki ra. **22** Abimeleki yi lu mangayani Isirayila xun na jēē saxan. **23** Nayi, Ala yi xaxili jaxin naso Abimeleki nun Siken kaane tagi, Siken kaane yi Abimeleki yanfa. **24** E fe jaxin naxan liga Yerubali a dii tonge soloferene ra, na yi xetē e ma, e faxa fēēn goronna yi lu e ngaxakedenna Abimeleki xun ma naxan e faxa, e nun Siken kaane, naxanye a mali a tadane nun a xunyene faxa. **25** Siken kaane yi muxune ti geyane fari a xili ma, na muxune yi sigatine goronne birin bama nēn e yii kira yi. Abimeleki yi na mē. **26** Lōxōna nde, Ebēdi a dii xēmēn Gaala nun a tadane yi fa Siken taani. Siken kaane yi e lannayaan sa a yi. **27** E yi siga e manpa bili nakōne yi, e yi sa e

manpa bogine bolon, e yi naxan naba. E yi so e gbee ala batu banxin kui, e yi donseen don, e yi e min, e yi lu Abimeleki dange. **28** Ebedi a dii xemen Gaala yi a fala, a naxa, “Nde Abimeleki ra, nde Siken kaane ra naxan a lige en xa wali Abimeleki xa? Yerubali a dii xemen xa mi a ra ba? A yamana kannna xa mi Sebulu ra ba? E bira Xamori xabilan muxune foxo ra, bayo Xamori nan Siken masegexi. En walima Abimeleki xa nanfera? **29** Xa n tan nan yi Siken kaane xun na nun, n yi Abimeleki kedima nen. N yi a falama nen Abimeleki xa, n naxa, ‘I ya ganla fari sa, en yenge.’” **30** Ebedi a dii xemen Gaala naxan falaxi, yamana kannna Sebulu yi na me, a yi xolo. **31** A yi xerane rasiga wundoni Abimeleki ma a faladeni a xa, a naxa, “Ebedi a dii xemen Gaala nun a ngaxakedenne bata fa Siken yi, e taan muxune radinma i xili ma. **32** Nayi, keli kœen na, e nun yamaan naxan i foxo ra, e sa e luxun burunna ra. **33** Xotœnni, sogan na te, i fan yi keli, i yi taan yenge. Gaala nun a muxune na mini e xili ma, naxan na i kenœn, i na liga e ra.” **34** Abimeleki yi keli kœen na e nun yamaan naxan birin yi a foxo ra, e sa e luxun Siken dœxon, e yitaxunxi dœxode naanin. **35** Ebedi a dii xemen Gaala yi mini, a ti taan so dœen na. Nayi, Abimeleki nun a yamaan yi mini e luxundene yi. **36** Gaala to yamaan to, a yi a fala Sebulu xa, a naxa, “Yamaan godoma keli geyane ma.” Sebulu yi a yabi, a naxa, “Geyane nininne na a ra, muxune mi a ra.” **37** Gaala mœn yi falan tongo, a naxa, “Yamana nde yati godomatoœn na a ra geyane ma, ganla bonna fama sa keli yiimato wudi gbeen kiraan binni.” **38** Sebulu yi a yabi, a naxa, “I ya fala jaxumene minœn, i tan naxan yi a falama, i naxa, ‘Nde Abimeleki ra, alogo en xa wali a xa?’ I mi muxuni itoe xan najaxu ba? Nba, siga, i sa yengen sol!” **39** Gaala yi ti Siken kaane yœe ra, a siga Abimeleki yengedeni. **40** Abimeleki yi a kedi, muxu wuyaxi maxolœxin yi lu taan so dœen na. **41** Abimeleki yi sa ti Aruma taani. Sebulu yi Gaala nun a ngaxakedenne kedi Siken taani. **42** Na xœtœn bode, Siken kaane yi mini, e siga e xœene ma. Abimeleki yi na me. **43** Nayi, a yi a ganla tongo, a yi a yitaxun dœxode saxanna ra, e yi e luxun burunna ra. A to muxune to mine taani, a yi e yenge. **44** Abimeleki nun ganla dœxode keden yi keli e yi e malan taan so dœen na, ganla dœxode firin yi xœe ma kaane yenge, e yi e birin faxes. **45** Yanyin birin na, Abimeleki taan yengema han a yi a nœ, a yi taan muxune faxes. A yi taan kala, a yi foxœn xuya na yiren birin yi. **46** Na xibarun to

sa Siken sanganso makantanxin muxune li, e yi sa e malan Beriti ala batu banxin yire makantanxini. **47** Abimeleki to na me a ne birin bata e malan, **48** a yi te Salamœn geyaan fari, e nun yamaan naxan birin yi a foxo ra. Abimeleki yi bunbin tongo, a yi wudi yiina nde sege, a yi a sa a kœœen ma. Na xanbi ra, yamaan naxan yi a foxo ra, a yi a fala ne xa, a naxa, “N naxan ligaxi e bata na to, e fan xa na liga mafuren!” **49** Yamaan birin yi wudi yiine sege, e bira Abimeleki foxo ra. E sa wudi yiine malan yire makantanxin xœn, e yi a gan, e nun seen naxanye birin yi a kui. E yi Siken sanganso makantanxin muxune birin faxes, muxu wuli keden, xœmene nun jaxanle. **50** Abimeleki yi siga Tebesi taan xili ma. A yi Tebesi kaane yenge, a yi e nœ. **51** Sanganso makantanxina nde yi taa tagini, xœmene nun jaxanle e gi, e sa e malan dœnaxan yi, e nun taan muxune birin, e yi na balan e xun ma, e te a xuntagi. **52** Abimeleki yi fa na yire makantanxin yengedeni, a yi a maso dœen na, alogo a xa tœœn so banxin na. **53** Nayi, jaxanla nde yi se din gœme gbeen sin Abimeleki xunni, a yi a xunni bœ. **54** Banxulanna naxan yi a yenge so seene maxalima, Abimeleki yi a fala na xa mafuren, a naxa, “I ya silanfanna botin, i yi n faxes, alogo muxune nama a fala, e naxa, ‘Naxanla nan a faxes.’” Banxulanna yi a sœxœn, a yi faxes. **55** Isirayila kaane to a to a Abimeleki bata faxes, e birin yi xœte e konne yi. **56** Nayi, Ala yi Abimeleki saran a fe jaxine ra, a naxan liga a fafe ra, a yi a dii tonge soloferene faxes. **57** Ala yi Siken kaane saran e fe xœsixine birin na. Yerubali a dii xemen Yotami a dangan yi e suxu.

10 Abimeleki faxes xanbini, Isakari bœnsœnna muxuna nde Puwaa dii xemen Tola, Dodo mamandenna yi keli a xa Isirayila rakisi. A yi dœxi Samiri taani Efirami geya yireni. **2** A yi findi Isirayila kitisaan na jœœ maxœjœœn nun saxan. A yi faxes, e yi a maluxun Samiri yi. **3** Tola dangu xanbini, Galadi kaan Yayiri yi ti a jœxœni. A yi findi Isirayila kitisaan na jœœ maxœjœœn nun firin. **4** Dii xœme tonge saxan nan yi a yii, naxanye yi e masiga tima sofali tonge saxan fari, e yi dœxi taa tonge saxan nin Galadi yamanani, dœnaxanye mœn xili Yayiri taane han to. **5** Yayiri yi faxes, e yi a maluxun Kamon yi. **6** Naxan jaxu Alatala yœe ra yi, Isirayila kaane mœn yi na liga. E yi Baali sawurane nun Asitarate suxurene batu, e nun Arami kaane nun Sidœn kaane nun Moyaba kaane nun Amonine nun Filisistine alane. E yi e me Alatala

ra, e mi fa a batu sɔnɔn. 7 Alatala yi xolo Isirayila kaane ma, a yi e sa Filisitine nun Amonine sagoni. 8 E yi fɔlɔ Isirayila kaane nɔxankatɛ na nɛɛn na han nɛɛ fu nun solomasɛɛ, e yi Isirayila kaane birin tɔrɔ naxanye yi dɔxi Yuruden mɛrɛmɛrɛn sogeteden binni Galadi yi Amorine yamanani. 9 Amonine fan yi Yuruden baan gidi Yuda bɔnsɔnna muxune nun Bunyamin bɔnsɔnna muxune nun Efirami bɔnsɔnna muxune xili ma. Isirayila kaane birin yi nɔxankata han. 10 Nayi, Isirayila kaane yi Alatala maxandi, e naxa, “Nxu bata yulubin liga, bayo nxu bata nxu mɛ nxɔ Ala ra, nxu yi Baali sawurane batu.” 11 Alatala yi a fala Isirayila kaane xa, a naxa, “Misiran kaane nun Amorine nun Amonine nun Filisitine 12 nun Sidɔn kaane nun Amalekine nun Mayon kaane to ɛ nɔxankata, ɛ to n mafan, n mi yi ɛ rakisi ba? 13 Koni, ɛ yi ɛ mɛ n na, ɛ yi ala gbetene batu. Na ma, n mi ɛ rakisɛ mume! 14 ɛ siga, ɛ bata seen naxanye yatɛ ɛ alane ra, ɛ sa ne mafan, ne xa ɛ rakisi ɛ nɔxankatani.” 15 Isirayila kaane yi Alatala yabi, e naxa, “Nxu bata yulubin tongo. Naxan na i kenen, na liga nxu ra, koni, yandi, tin, i xa nxu rakisi to!” 16 E yi ala xɔnɛne ba e tagi, e yi Alatala batu. Na ma, Ala yi kininkinin Isirayila kaa nɔxankataxine ma. 17 Amonine yi sa e malan daaxadeni Galadi yi, Isirayila kaane yi sa e malan daaxadeni Misipa yi. 18 Nayi, yamaan nun Galadi kuntigine yi a fala e bode xa, e naxa, “Nde singe Amonine yengɛ fɔlɛ? Naxan na na liga, na kanna findima nen Galadi kaane mangan na.”

11 Sofa kenden nan yi Galadi kaan Yefeta ra. Yalunden nan yi a nga ra, a fafe yi xili nen Galadi. 2 Galadi a nɔxanla dii xemene bari a xa nen. Na nɔxanla diine to gbo, e yi Yefeta kedi, e naxa, “I mi nxu fafe kɛɛn se sɔtɔma, bayo nɔxalan gbɛtɛ nan ma dii i tan na.” 3 Nayi, Yefeta yi a gi a ngaxakedenne bun, a yi siga Tobo yamanani. Fuyantenna ndee yi e malan Yefeta fɛma, e yi bira a fɔxɔ ra. 4 Waxatidi to dangu, Amonine yi Isirayila kaane yengɛ. 5 Na ma, Galadi fonne yi siga Yefeta fendeni Tobo yamanani. 6 E yi a fala Yefeta xa, e naxa, “Fa, i fa findi nxɔ mangan na, en yi Amonine yengɛ.” 7 Yefeta yi Galadi fonne yabi, a naxa, “ɛ tan xa mi n nɔnɔxɔ ba, ɛ yi n kedi n fafe konni? Nanfera ɛ fama n fɔxɔ ra iki a ɛ kontɔfilixi?” 8 Galadi fonne yi a fala Yefeta xa, e naxa, “Nxu faxi i fɛma na nan yatigi ra, alogo en birin xa siga, i sa Amonine yengɛ, i findi nxɔ mangan na, e

nun Galadi kaane birin.” 9 Yefeta yi Galadi fonne yabi, a naxa, “Xa en birin siga Amonine yengedeni, Alatala yi sa e sa n sagoni, n tan nan findima ɛ mangan na na yi.” 10 Galadi fonne yi Yefeta yabi, e naxa, “Alatala nan en seren na! Nxu na ligama nen.” 11 Yefeta yi bira Galadi fonne fɔxɔ ra, e yi siga. Yamaan yi a findi sofa kuntigin na. Yefeta mɔn yi xɛtɛ falane birin ma Alatala yetagi Misipa yi. 12 Yefeta yi xɛrane rasiga a faladeni Amonine mangan xa, a naxa, “Nanse xɔli i ma nxu xa, i to fama nxɔ yamanan yengedeni?” 13 Amonine mangan yi Yefeta yabi, a naxa, “Isirayila kaane to mini Misiran yi konyiyani, e yi n ma bɔxɔn tongo, keli Arinon baan ma siga Yaboko xuden ma han Yuruden baana. Iki, ɛ ne raxɛtɛ nxu ma bɔnɛ xunbenli.” 14 Yefeta mɔn yi xɛrane rasiga a faladeni Amonine mangan xa, a naxa, 15 “Isirayila kaane mi Moyaba bɔxɔn tongoxi, e mi Amonine yamanan tongoxi. 16 E to yi kelima Misiran yi waxatin naxan yi, e mini tonbon yiren nin siga han Gbala Baana siga Kadesi yi. 17 Nayi, Isirayila kaane yi xɛrane rasiga a faladeni Edɔn mangan xa, e naxa, ‘Tin nxu xa dangu i ya yamanani.’ Koni, Edɔn mangan mi tin. A fan yi xɛrane rasiga Moyaba mangan ma, na fan yi tondi, Isirayila kaane yi lu Kadesi yi. 18 Na xanbi ra, e yi siga tonbon kiraan xɔn. E yi Edɔn nun Moyaba yamanane mabilin, e sa lu Arinon baan dɛxɔn, e mi so Moyaba yamanani, bayo Arinon yi findixi Moyaba danna nan na. 19 Isirayila kaane yi xɛrane rasiga Amorine mangan Sixɔn ma naxan yi mangayani Xesibɔn taani. Isirayila kaane yi a fala a xa, e naxa, ‘A lu nxu xa dangu i ya yamanani siga nxɔ yamanani.’ 20 Koni, Sixɔn mi tin, a yi a ganla birin malan yengɛ so xinla ma, e yi sa e malan Yahasi yi, e sa Isirayila kaane yengɛ. 21 Alatala, Isirayilaa Ala yi Sixɔn nun a ganla birin sa Isirayila kaane sagoni, e yi e nɔ. Amorine yi dɔxi bɔxɔn naxanye birin yi, Isirayila kaane yi ne birin tongo, 22 keli Arinon baan ma siga han Yaboko xudena, keli tonbonni siga han Yuruden baana. 23 Alatala, Isirayilaa Ala bata Amorine bɔxɔn so Isirayila kaane yii, a yamana, i tan waxi na nan ba fe yi nxu yii ba? 24 I ya ala Kemosi bɔxɔn naxan soxi i yii, na i yii. Nayi, Alatala, nxɔ Ala bɔxɔn naxan soxi nxu yii, na luma nen nxu yii. 25 I mirixi a ma a i senben gbo Balaki xa ba, Siporo a dii xemena, Moyaba mangana? Anu, a tan mi yengɛ gidixi Isirayila kaane ma! 26 Xabu nɛɛ keme saxan, Isirayila kaane dɔxi Xesibɔn nun a rabilinna taane yi, e nun Aroyeri nun a rabilinna taane, e nun taan naxanye birin Arinon

baan de. Nanfera nayi han to ε mi ne xunba? 27 N tan xa mi haken ligaxi i ra, i tan nan fe jaxin ligaxi n tan na, i yi n yenge. Alatala xa kitin sa Isirayila kaane nun Amonine tagi.” 28 Amonine mangan mi a tuli mati Yefeta a falane ra. 29 Nayi, Alatala Nii Sarijanxin yi godo Yefeta ma, a yi Galadi nun Manase yamanane yisiga, dangu Misipe taani Galadi yamanani, siga Amonine xili ma. 30 Yefeta yi de xuiin tongo Alatala xa, a naxa, “Xa i Amonine sa n sagoni, 31 naxan yo mini n ma banxini a fa n nalandeni, n na xete n konni xunna kenli sa keli Amonine yengedeni, n na fima nen Alatala ma, n yi a gan saraxan na.” 32 Yefeta yi siga Amonine yengedeni, Alatala yi e sa a sagoni. 33 A yi taa mɔxɔɲe kala, fɔlɔ Aroyeri taan ma siga han Miniti taana, siga Abeli-Keramin ma. Ala yi Amonine rayarabi Isirayila kaane xa. 34 Yefeta yi so a konni Misipa yi. A dii temen yi mini a bodonɲe a ralandeni tanban xuiin ma. Na dii kedenna nan tun yi a yii, ba na ra, dii teme gbete mi yi na, dii xeme yo mi yi na. 35 A to a to, a yi a domani bo, a naxa, “N bata yigitege! I tan nan n tixi tɔɔn ma. N bata de xuiin tongo Alatala xa, n mi na kale mume.” 36 A diin yi a fala a xa, a naxa, “Baba, i bata de xuiin tongo Alatala xa, a yi i yaxune Amonine sa i sagoni, na ma, a liga n na alo i de xuiin naxan tongoxi.” 37 A mɔn yi a fala a fafe xa, a naxa, “Kike firin fi n ma alogo nxu nun n lanfane xa siga geyane fari, nxu sa wuga mɛnni bayo n faxama nen, n mi dɔxo xeme taa ra.” 38 A yi a yabi, a naxa, “Sigal!” A yi kike firin fi a ma. E nun a lanfane yi sa wuga a fe ra geyane fari bayo a faxama nen a mi dɔxo xeme taa ra. 39 Na kike firinne jianxin na, a mɔn yi fa a fafe fema, a yi a de xuiin nakamali a fari. A munma yi xemen kolon. Xabu na lɔxɔni, ito yi findi namunna ra Isirayila yi: 40 Nɛɛ yo nɛɛ, Isirayila sungutunne sa Yefeta, Galadi kaana dii temen wugama nen xi naanin.

12 Efirami kaane yi e malan e siga Safon taani a faladeni Yefeta xa, e naxa, “Nanfera i danguxi, i siga Amonine yengedeni i mi a fala nxu xa en birin yi siga? Nxu waxi ε nun i ya banxin gan feni.” 2 Yefeta yi e yabi, a naxa, “Yenge gbeen so nen nxu nun n ma yamaan nun Amonine tagi, koni n to ε xili, ε mi n mali. 3 N to a to ε mi fama n malideni, n yi tin sayaan ma, n sa Amonine yenge. Alatala yi e sa n sagoni. Nanfera nayi ε fa fama n xili ma to?” 4 Yefeta yi Galadi kaane birin malan Efirami kaane yenge xinla ma. Galadi kaane yi Efirami kaane faxa yengeni, ne

naxanye yi a falama, e naxa, “E tan Galadi kaane, ε findixi muxu gixine nan na Efirami bɔnsɔnni siga Manase bɔnsɔnni!” 5 Na xanbi ra, Galadi kaane yi Yuruden baan kirane birin suxu Efirami kaane yee ra. Xa Efirami muxu gixina nde yi wa dangu feni, Galadi kaane yi a falama nen, e naxa, “Efirami kaan nan i tan na ba?” Na kanna yi e yabima nen, a naxa, “En-en.” 6 Nayi, e yi a falama a xa nen, e naxa, “Xuini ito fala: Xiboleti.” Koni, na kanna fan yi a falama nen, a naxa, “Siboleti” bayo a mi yi nɔɛ a fale a kiini. Nayi, Galadi kaane yi a suxuma nen, e yi a kɔɛ raxaba Yuruden baan de. Na waxatini, e yi muxu wuli tonge naanin muxu wuli firin naxɔri Efirami yi. 7 Yefeta lu nen kitisani Isirayila yi nɛɛ sennin. Na xanbi ra, Yefeta Galadi kaan yi faxa, e yi a maluxun Galadi taana nde yi. 8 Yefeta dangu xanbini, Betelemi kaana Ibisan yi findi kitisaan na Isirayila yi. 9 A dii xeme tonge saxan e nun dii teme tonge saxan nan sɔto, a yi a dii teme tonge saxan fi bɔnsɔn gbeteɲe yi, a yi jaxalan tonge saxan fen a dii xemene xa bɔnsɔn gbeteɲe yi. A lu nen kitisani Isirayila yi nɛɛ solofere. 10 Ibisan yi faxa, e yi a maluxun Betelemi yi. 11 A tan danguxina, Elon Sabulon kaan yi findi kitisaan na Isirayila yi. A lu nen kitisani nɛɛ fu. 12 Sabulon kaana Elon yi faxa, e yi a maluxun Ayalon taani Sabulon yamanani. 13 Na danguxina, Piraton kaan Hileli a dii xemena Abadon yi findi kitisaan na Isirayila yi. 14 A yi dii xeme tonge naanin nun mamanden tonge saxan sɔto naxanye yi e masiga tima sofali tonge solofere fari. A lu nen kitisani Isirayila yi nɛɛ solomasexe. 15 Hileli a diina Abadon yi faxa, e yi a maluxun Piraton yi Efirami yamanani Amalekine geya yireni.

13 Isirayila kaane mɔn yi fe jaxin liga Alatala yee ra yi. Alatala yi e sa Filisitine sagoni nɛɛ tonge naanin. 2 Xemena nde yi Sora taani Dan bɔnsɔnni, a yi xili Manowa. Gbantani nan yi a jaxanla ra, dii yo mi yi a yii. 3 Alatala malekan yi mini a jaxanla xa, a yi a fala a xa, a naxa, “Gbantani nan i ra, dii mi i yii, koni, i fudikanma nen, i yi dii xemen bari. 4 Fɔlɔ iki ma, i yete suxu, i nama dɔlɔn min, i nama manpaan min, i nama se haramuxi yo don, 5 bayo i fudikanma nen, i dii xemen bari. A xunna mi bima, bayo i diin naxan barima, na rasarijanma nen Ala xa benun a xa bari waxatin naxan yi, a tan nan Isirayila xunbama Filisitine yii.” 6 Naxanla yi sa na fala a xemen xa, a naxa, “Alaa muxuna nde bata fa n fema, a yi luxi alo

Alaa malekana nde, a yi magaxu han. N mi a maxodin a keliden ma, a mi a xinla fan fala n xa. 7 Koni, a fala n xa nen, a naxa, "I fudikanma nen, i dii xemen bari. Nayi, folo iki ma, i nama dolon min, i nama manpaan min, i nama se haramuxi yo don, bayo i diin naxan barima, na rasarijanma nen Ala xa, benun a xa bari waxatin naxan yi han a faxa loxona." 8 Nayi, Manowa yi Alatala maxandi, a naxa, "Marigina, i Alaa muxun naxan nafaxi, i mon xa a rafa n ma alogo a xa a yita nxu ra nxu lan nxu xa naxan liga diin xa naxan fama barideni." 9 Ala yi Manowa xuiin name, Alaa malekan mon yi fa naxanla fema, a yi sa a li xeen ma, a xemen Manowa mi yi a fema. 10 A yi a gi mafuren, a sa a fala a xemen xa, a naxa, "Xemen naxan fa n fema na loxoni, a mon bata fa!" 11 Manowa yi keli, a bira a naxanla foxo ra, e siga xemen fema, a yi a fala a xa, a naxa, "I tan nan falan ti naxanli ito xa ba?" Malekan yi a yabi, a naxa, "On, n tan nan yi a ra." 12 Manowa yi a fala a xa, a naxa, "I ya falane na kamali waxatin naxan yi, nxu lan nxu xa bira sariyan mundun foxo ra lan diin ma?" 13 Alatalaa malekan yi Manowa yabi, a naxa, "N naxan birin falaxi i ya naxanla xa, a xa na liga. 14 A nama manpa bogi yo don, a nama dolon min, a nama manpaan min, a nama donse haramuxi yo don, a xa n ma yamarine suxu ki faji." 15 Manowa yi a fala Alatalaa malekan xa, a naxa, "Tin, nxu xa sii dii suben jin i xa." 16 Alatalaa malekan yi Manowa yabi, a naxa, "Xa i kankan n ma, n mi i ya donseen donma, koni xa i wa saraxa gan daxin ba feni Alatala xa, i na lige nen!" Manowa mi yi a kolon a Alatalaa malekan nan yi a ra. 17 Nayi, Manowa yi a fala Alatalaa malekan xa, a naxa, "I xili di, alogo nxu xa i binya, i ya falan na kamali waxatin naxan yi?" 18 Alatalaa malekan yi a yabi, a naxa, "Nanfera i n xinla maxodinma? Wundon nan na ra." 19 Nayi, Manowa yi sii diin nun bogise saraxan tongo, a yi saraxa gan daxin ba Alatala xa gemena nde fari. Kabanako fena nde yi liga Manowa nun a naxanla yetagi. 20 Tee degen yi tema waxatin naxan yi, Alatalaa malekan yi te tee degeni. Nayi, Manowa nun a naxanla yi bira, e yi e yetagin lan boxon ma. 21 Alatalaa malekan mi fa a yete makenen Manowa nun a naxanla xa. Nayi, Manowa yi a kolon a Alatalaa malekan nan yi a ra. 22 Manowa yi a fala a naxanla xa, a naxa, "En faxama nen! En bata Ala to!" 23 A naxanla yi a yabi, a naxa, "Xa Alatala yi waxi en faxa feni, a mi yi en ma saraxa gan daxin nun en ma bogise saraxan nasuxuma nun, a mon mi yi feni itoe birin

yitama en na nun, a mon mi yi tinje en yi fe sifani itoe me." 24 Naxanla yi a dii xemen bari, a yi a xili sa Samison. Diin yi gbo, Alatala yi barakan sa a fe yi. 25 A to doxo daaxadeni Dan yamanani Sora taan nun Esetayoli taan tagini, Alatalaa Nii Sarijanxin yi a wanla ke folo a dunuja yi gidini.

14 Samison yi siga Timana taani, a yi sa naxanla nde to Filisiti sungutunne ye. 2 A to xete, a yi a fala a fafe nun a nga xa, a naxa, "N bata naxanla nde to Timana yi Filisiti sungutunne ye, e a fen n xa n ma naxanla ra." 3 A fafe nun a nga yi a yabi, e naxa, "Naxalan yo mi i ngaxakedenne dii temene ye en ma yamani ba, fo i siga han Filisitine konni, Ala kolontarene, i sa naxanla tongo menni?" Samison yi a fala a fafe xa, a naxa, "A fen n xa n ma naxanla ra, bayo a tan nan nafa n ma." 4 A fafe nun a nga mi yi a kolon a na yi kelixi Alatala nan ma. Bayo Samison yi yengen nan fenma Filisitine ra. Na waxatini, Filisitine yi Isirayila kaane xun na. 5 Samison nun a fafe nun a nga yi siga Timana yi. E to sa Timana manpa bili nakoon li, yata senbema nde yi mini Samison ma, a wurundunma. 6 Alatalaa Nii Sarijanxin yi godo Samison ma, a yiigenla yi yatani bo alo sii diin nan yi a ra. Koni, a mi na fala a fafe nun a nga xa. 7 Nayi, a siga, e nun naxanla yi sa falan ti, a yi rafan a ma. 8 Waxatidi to dangu, Samison mon yi keli, a xa siga Timana yi a naxanla tongodeni, a yi dangu yatan binbin matoe kira yi, a yi kumi jejene li soe yatan binbini, e bata yi e turen sa. 9 A yi nde tongo, a siga a donje kira yi. Na xanbi ra, a to a fafe nun a nga feman li, a yi nde so e yii, e yi a don. Koni, a mi a fala e xa a na kumin baxi yatan binbini. 10 Samison fafe yi siga naxanla konni. Samison yi sewa bandena nde yiton menni, bayo banxulanne yi na nan ligama. 11 Filisitine to a to, e yi muxu tonge saxan sugandi siga a matideni. 12 Samison yi a fala e xa, a naxa, "N xa sandana nde sa e xa. Xa e a bunna fala n xa xi solofere sewa bande donni ito bun, n doma faji tonge saxan soe e yii, e nun tonge saxan gbete ye. 13 Koni, xa e mi no a bunna fale, e tan nan doma faji tonge saxan soma n yii, e nun tonge saxan gbete ye." E yi a yabi, e naxa, "I ya sandan sa, nxu tuli matixi i ra." 14 A yi a fala e xa, a naxa, "Naxan seen donma, donseen minixi na nin, naxan senbe gbo, naxunna yi mini na yi. Nanse na ra?" Xi saxan, e mi no a bunna fale. 15 Xi soloferede loxoni, e yi a fala Samison ma naxanla

xa, e naxa, “I ya xemen nadin, a xa sandan bunna fala nxu xa. Xanamu, nxu i ganma nen, e nun i fafe a denbayaan birin. E nxu xilixi nen alogo e xa fa nxu yii geli?” **16** Samison ma naxanla yi siga wuge, a sa a fala a xa, a naxa, “N mi rafan i ma, i mi n xanuxi, i bata sandan sa n kon kaane bun, koni i mi a bunna falaxi n tan xa.” A yi a yabi, a naxa, “N mi a bunna falaxi n fafe xa, n mi a falaxi nga xa, n xa na fala i tan nan xa ba?” **17** A yi lu wuge na xi solofere donse donna bun. Xi soloferede lɔxoni, Samison yi a bunna fala a xa, bayo a bata yi a xaxinla ye so, a sa a fala a kon kaane xa. **18** Taan muxune yi a fala Samison xa xi soloferede lɔxoni benun soken xa bira, e naxa, “Nanse naxun kumin xa, nanse senbe gbo yatan xa?” A yi a fala e xa, a naxa, “Xa e mi yi xeen bi n ma jinge sungutunna ra nun, e mi yi sandan bunna kolonma nun.” **19** Alatalaa Nii Sarijanxin yi godo a ma, a yi siga Asikalɔn taani. A sa muxu tonge saxan faha menni, a yi e dugine tongo, a yi e so muxune yii naxanye sandan bunna fala. A xoloxin yi xete a fafe konni. **20** E yi Samison ma naxanla so banxulanla yii naxan bata yi Samison mati.

15 Waxatidi to dangu, murutu xaba waxatini, Samison yi siga a naxanla xon, yexee diina a yii. A yi a fala, a naxa, “N xa so n ma naxanla banxini.” Koni, a naxanla fafe mi tin a so. **2** A yi a fala Samison xa, a naxa, “N yengi yi a ma a mi rafan i ma, n bata a so i lanfaan yii. Koni, a xunyen be, xa i na xon, i na tongo a nɔxon na.” **3** Samison yi a fala, a naxa, “Muxu yo mi n yate kala tiin na iki, xa n fe naxin liga Filisistine ra.” **4** Samison yi siga. A yi sa xulumase keme saxan suxu, a yi e xunle xidi e bode ra, a yi xaye xidin xidi e xunle ra. **5** A yi e radege, a yi xulumaseene bejin Filisistine murutu xee ne yi, e yi murutu tonsenne birin gan e nun e manpa bili nakone siga han oliwi bili xee ne. **6** Filisistine yi muxune maxodin, e naxa, “Nde ito ligaxi?” E yi e yabi, e naxa, “Samison, Timana kaan bitanna, bayo a bata a naxanla ba a yii, a yi a so a lanfaan yii.” Filisistine yi siga e sa na naxanla nun a fafe gan. **7** Samison yi a fala e xa, a naxa, “Bayo e tan a ligama i kii nin, n mi dije fo n nan n gbeen nɔxo.” **8** A yi e yenge ki fani, a yi muxu wuyaxi faha. Na xanbi ra, a sa dɔxo Etami faranna ra. **9** Nayi, Filisistine yi sa e malan Yuda kaane xili ma, e yi e sofa ganla ti Lehi rabilinni. **10** Yuda kaane yi e maxodin, e naxa, “Nanfera e faxi nxu xili ma?” E yi e yabi, e naxa, “Nxu

faxi Samison nan xidideyi, alogo a naxan ligaxi nxu ra, nxu fan xa na liga a ra.” **11** Nayi, Yuda kaan muxu wuli saxan yi siga Etami faran deen na, e sa a fala Samison xa, e naxa, “I mi a kolon a Filisistine fangan gbo en xa? I nanse ligaxi en na ito ra?” A yi e yabi, a naxa, “E naxan ligaxi n na, n fan na nan ligaxi e ra.” **12** E a fala a xa, e naxa, “Nxu faxi i xididen nin, alogo nxu xa i so Filisistine yii.” Samison yi a fala e xa, a naxa, “E kolon na xa a e mi n faxama.” **13** E yi a yabi, e naxa, “Nxu mi i faxama, nxu waxi i xidi feen nan tun yi, nxu yi i so e yii.” E yi a xidi luti nene firin na, e yi a ramini faranna ra. **14** Samison to so Lehi yi, Filisistine yi gbelegbele a xili ma. Nayi, Alatalaa Nii Sarijanxin yi godo a ma. Lutin naxanye yi a yiine ma, ne yi lu alo e ganxin nan yi a ra, e yolon a yiine ra. **15** A yi sofanelan nde faxaxin gbegebe xori xinden to biraxi, a yi a tongo, a yi muxu wuli keden faha na ra. **16** Samison yi a fala, a naxa, “N na e faha alo sofanelan sofanelan gbegebe xonna ra. N bata muxu wuli keden faha sofanelan gbegebe xonna ra.” **17** A to yelin falan tiye, a yi na gbegebe xonna rawoli ayi. E yi mena xili sa gbegebe xori geyana. **18** Min xonla yi Samison suxu, a yi Alatala maxandi, a naxa, “I tan nan kisi gbeen ito fixi i ya walikeen ma. Iki, n fa faxama ige xonla nan ma, n faxe Ala kolontarene yii ba?” **19** Nayi, fanyen naxan yi Lehi yi, Ala yi na bo, igen yi mini. Samison yi a min, a niin mon yi yifan a ma. E yi mena xili sa, a En-Hakore, mena mon Lehi yi han to. **20** Samison yi kitin sa Isirayila yi Filisistine waxatini jee mɔxɔje.

16 Samison yi siga Gasa taani, a sa naxalan yalunxina nde to menni, a so a konni. **2** Gasa kaane yi a me a Samison bata fa na yi. E yi na rabilin, e yi dɔxo a yee ra kɔena ngan na taan nabilinna yinna so deen na. E lu a fale e bode xa, e naxa, “Subaxani, en yi a faha.” **3** Koni, Samison yi lu saxi han koe tagin yi maso. Koe tagin to a li, a yi keli, a yi taan so de balanxin suxu e nun a senbetenne, a yi e nun e balan wurene tala bɔxoni, a yi e sa a koe ma, a siga e ra Xebiron geyan xuntagi. **4** Na danguxina, naxanla nde yi rafan Samison ma Soreki lanbanni, na naxanla yi xili nen Dalila. **5** Filisistine kuntigi suulunne yi siga na naxanla fema, e sa a fala a xa, e naxa, “A rakunfa i ma, alogo i xa a kolon naxan a senben nagboxi ayi, alogo nxu xa no a suxe kii naxan yi, nxu yi a xidi, nxu yi a senben ba a yi, nxu keden kedenna birin gbeti gbanan wuli keden keme soe i yii.” **6** Dalila yi a fala Samison xa, a

naxa, “N bata i mafan, a fala n xa i senbe gbeen fataxi nanse ra e nun mon i xide naxan na, i senben yi jan.” 7 Samison yi a yabi, a naxa, “Xa muxune n xidi luti nenan kidi daxi solofere ra, naxanye munma xara singen, n senben janma nen, n lu alo muxun bonne.” 8 Nayi, Filisistine kuntigine yi fa luti nenan kidi daxi solofere ra Dalila xon, naxanye munma yi xara singen. Dalila yi a xidi ne ra. 9 Anu, muxune yi malanxi a xili ma banxini. Dalila yi a fala a xa, a naxa, “Samison! Filisistine bata fa i xili ma!” A yi lutine bolon, alo teen lutin bolonma kii naxan yi. Nayi, a senben binla mi kolon. 10 Dalila yi a fala Samison xa, a naxa, “I bata n mayenden, i bata wulen fala n xa. Iki, n bata i mafan a fala n xa i xide kii naxan yi.” 11 A yi a fala a xa, a naxa, “Xa muxune n xidi luti nenene ra naxanye munma rawali singen, n senben janma nen nayi, n yi lu alo muxun bonne.” 12 Dalila yi luti nenene tongo, a yi a xidi ne ra. Muxune mon yi tixi a xili ma banxini. Dalila yi a fala a xa, a naxa, “Samison! Filisistine bata fa i xili ma!” A yi lutine bolon alo garin nan yi a yiine ma. 13 Dalila yi a fala Samison xa, a naxa, “Han to i n mayendenma, i wulen falama n xa. A fala i xide kii naxan yi.” A yi a fala a xa, a naxa, “I xa n xun sexen denbexin kira soloferene dege gese saxon wudin na.” 14 Nayi, Dalila yi na liga, a yi e xidi wudin na. Na xanbi ra, a yi gbelegebele, a naxa, “Samison! Filisistine bata fa i xili ma!” Samison yi xulun, a yi gese saxon wudin tala. 15 Dalila yi a fala a xa, a naxa, “Nanfera i a falaxi, i naxa, ‘I rafan n ma!’ Anu, i mi laxi n na? I bata n mayenden sanja ma saxan, i mi tin i senbe gbeen binla fale n xa.” 16 Dalila yi lu a tore na fala kedenna ra loxo yo loxo, a mi yi a danma han Samison niin yi rajaxu a ma. 17 Nayi, Samison yi a wundon fala a xa, a naxa, “Han to n xunna mi bi, bayo n tan nasarijanxin na a ra Ala xa benun n xa bari waxatin naxan yi. Xa n xunna bi, n senben janma nen, n lu alo muxun bonne.” 18 Dalila to a kolon a Samison bata a wundon fala a xa, a yi sa na fala Filisistine kuntigine xa, a naxa, “Iki, e fa, bayo Samison bata a wundon fala n xa.” E yi siga gbetin na e yii a konni e naxan ma fe fala a xa. 19 Dalila yi Samison naxi a sanne fari, a yi muxune xili, e yi a xun sexen denbexin kira soloferene bi, e yi a senben ba folo a yi. 20 Dalila yi a fala a xa, a naxa, “Samison! Filisistine bata fa i xili ma!” A to xulun, a mirixi a ma, a naxa, “N na n sotoma nen ito ra alo n darixi a ra kii naxan yi.” Koni, a mi yi a kolon a Alatala bata yi a masiga a ra. 21 Filisistine yi Samison suxu, e

yi a yene rate a kui, e yi siga a ra Gasa taani, e yi a xidi sula yolonxonna ra. E yi Samison karahan a xa lu se din gemen firifire kaso banxini. 22 Na waxatini, xabu a xunna bi, a xun sexene bata yi mini folo. 23 Loxona nde, Filisistine kuntigine yi e malan alogo e xa e no soton sewan naba, e yi saraxa gbeen ba Dagon xa, e ala. E sigin sama, e naxa, “Nxo ala bata Samison fi nxu ma Filisistine yaxuna.” 24 Yamaan to na to, e lu e ala matoxe, e naxa, “Nxo ala bata nxu yaxun sa nxu sagoni, naxan yi nxo yamanan toroma, a yi nxu faxesa.” 25 Bayo e yi sewaxi e lu a fale, e naxa, “En Samison xili, a xa fa en yee ramaxa ayi!” E Samison namini kasoon na, a lu sabaan soe e yetagi alogo e xa gele a ma. E sa a doxo senbeten firinne longonna ra. 26 Banxulanna naxan yi Samison yii rasuxuma, Samison yi a fala na xa, a naxa, “N xali senbeten firinne dexon banxini ito tixi naxanye xunna, alogo n xa n digan e yi.” 27 Banxin yi rafexi xemene nun jaxanle ra, Filisistine kuntigine birin yi na. Muxu wuli saxan jaxon mon yi banxin xuntagi, xemene nun jaxanla, naxanye yi Samison matoma a sabaan soma waxatin naxan yi. 28 Nayi, Samison yi Alatala mafan, a naxa, “N Marigina Alatala! N bata i mafan, i miri n ma. Ala! Senben fi n ma ito keden peeni, n xa n yee firinne jaxon fi Filisistine ra!” 29 Banxin yi tixi senbeten firinna naxanye xunna, Samison yi a komenna deten keden fari, a yi a yiifanna deten keden fari. 30 Samison yi a fala, a naxa, “Nxu nun Filisistine xa faxa!” A yi senbetenne tuntun a senben birin na, banxin yi bira kuntigine nun muxune fari naxanye yi na. E nun naxanye faxesa e bode xon, ne yi wuya muxune xa dangi a bata yi naxanye faxesa nun. 31 A ngaxakedenne nun a fafe a denbayaan birin yi siga a binbin tongodeni. E to siga a ra, e sa a maluxun Sora nun Esetayoli tagi Manowa gaburun na, a fafe. A findi nen kitisaan na Isirayila yi jee moxone.

17 Xemena nde yi Efirami गया yireni nun, a yi xili nen Mike. 2 Loxona nde, a yi a fala a nga xa, a naxa, “Muxuna nde i ya gbeti gbanan wuli keden kemen tongo nen, i yi na kanna danga n yee xori, n tan nan a tongo, a n yii.” A nga yi a fala a xa, a naxa, “Alatala xa barakan sa n ma dii xemena fe yi.” 3 A yi na gbetin naxete a nga ma. A nga yi a fala a xa, a naxa, “N waxi gbetini ito dentege feni Alatala xa, alogo sawurana nde xa rafala i xa gbeti raxulunxi igen na. Iki, n bata a so i yii.” 4 A gbetin so a nga yii, a

nga yi gbetin gbanan keme firin tongo, a yi gbetin so wure raxulunna yii. Na yi sawurana nde rafala gbeti raxulunxin na. A yi sa a ti Mike a banxini. **5** Kidenan de yi Mike konni. A bata yi batu sena nde rafala e nun suxure gbeteye, a yi a dii xeme keden findi e ki muxun na. **6** Na waxatini, manga mi yi Isirayila yi, birin yi a kenen feen nan ligama. **7** Lewi bõnsõnna banxulanndi yi Betelemi taani Yuda yamanani. **8** Na xemen yi keli Betelemi yi Yuda yamanani, alogo a xa sa dõxõ yire gbeti yi. A to yi sigama, a yi sa Efirami geya yiren li, siga han Mike a banxina. **9** Mike yi a fala a xa, a naxa, "I kelixi minen?" A yi a yabi, a naxa, "Lewi bõnsõnna muxun nan n na, keli Betelemi taani Yuda yi, n dõxõde fenna nin." **10** Mike yi a fala a xa, a naxa, "Lu n konni, i findi n ma denbayana saraxaraliin na, n na i saren fiye gbeti gbanan fu ra jeeen ma, e nun dugina ndee nun dõnsena." Lewi bõnsõnna muxun na yi so a konni. **11** A yi tin luye Mike konni, naxan a yengi dõxõ a xõn alo a diina. **12** Na banxulanndi yi yigiya Mike konni, a findi a saraxaraliin na. **13** Mike yi a fala, a naxa, "Waxatina nde Alatala fa hinanma nen n na bayo Lewi bõnsõnna muxuna nde n konni saraxaraliyani."

18 Na waxatini, manga mi yi Isirayila yi nun. Na waxatini mon, Dan bõnsõnna muxune yi ke bõxõ fenni e dõxe denaxan yi, bayo han na waxatini, ke bõxõ mi yi e tan yii alo bõnsõnna bonne Isirayila yi. **2** Dan bõnsõnna muxune yi xeme kende suulun sugandi e ye, e yi e rasiga Sora nun Esetayoli yi yamanane matodeni, alogo e xa e rakõrosi. Na muxune yi sa Efirami geya yiren li siga han Mike konni, e yi xi menni. **3** E to maso Mike a banxin na, e yi Lewi bõnsõnna banxulanndi xuiin me, e xete e sa a fala a xa, e naxa, "Nde faxi i ra be? I nanse ligan be? I nanse yi be?" **4** A yi e yabi, a naxa, "Mike bata ito nun ito raba n xa, a n saren fima, n mon bata findi a saraxaraliin na." **5** E yi a fala a xa, e naxa, "Ala maxõdin, alogo nxu xa a kolon nxu sigatiin naxan yi, xa na sõnyama nen." **6** Saraxaraliin yi e yabi, a naxa, "E siga bõnje xunbenli, Alatala e fõxõ ra e sigatini." **7** Na xeme suulunne yi siga, e sa Layisi taan li. E sa muxune li menni naxanye yi bõnje xunbenli nun makantanni, alo Sidõn kaane yi kii naxan yi. Muxu yo mi yi kuntigin mafalama e yamanani. Na muxune yi makuya Sidõn kaane ra, e hayu mi yi muxu yo ma. **8** Na muxu suulunne yi siga e ngaxakedenne fema Sora nun Esetayoli yi, e

ngaxakedenne yi e maxõdin, e naxa, "E nanse toxi?" **9** E yi e yabi, e naxa, "E fa be! En sa Layisi kaane yenge. Nxu bata a to, e yamanan fan. E nama lu be e mi sese ligama, e mafura sigi na yamanan yengedeni!" **10** E na na li, e yama fajin toma nen na, e dõxi bõxõ fajini. Ala na bõxõn soma e yii nen, sese mi dasama denaxan yi bõxõ xõnna fari." **11** Nayi, Dan bõnsõnna muxu keme sennin yi keli Sora nun Esetayoli yi, e siga e yenge so seene ra e yii. **12** E yi sa e malan Kiriyati-Yeyarin yi Yuda yi. Nanara, denaxan Kiriyati-Yeyarin xanbi ra, e mena xili sa, a Mahane-Dan han to. **13** E to keli menni, e yi siga Efirami geya yireni, siga han Mike a banxina. **14** Nayi, na xeme suulunna naxanye siga Layisi yamanan matodeni, ne yi a fala e ngaxakedenne xa, e naxa, "E xa a kolon fa fala batu sena nde banxini ito kui, e nun sawurane nun suxure gbeti naxan nafalaxi wure raxulunxin na. Iki, e tan nan a kolon e naxan ligama." **15** E mon yi xete menni, e so Lewi bõnsõnna banxulanndi banxini, Mike konni, e yi a xõntõn. **16** Dan bõnsõnna muxu keme senninne yi tixi banxin so deen na, e yenge so seene suxi e yii. **17** Xeme suulunna naxanye siga yamanan matodeni, ne yi so. E yi sawuran tongo, e nun batu seen nun suxure gbeteye nun suxure sawura gbeti daxina. Saraxaraliin nun muxu keme senninne yi tixi deen na. **18** A to bodene to soe Mike a banxini, a yi e to sawuran tonge, e nun batu seen nun suxure gbeteye nun suxure sawura gbeti daxina. Saraxaraliin yi e maxõdin, a naxa, "E nanse ligan be?" **19** E yi a yabi, e naxa, "Dundul! I nama fala ti, i bira nxu fõxõ ra, i findi nxõ xabilan saraxaraliin na. Nanse rafan i ma, i findi saraxaraliin na muxu kedenna xa hanma Isirayila bõnsõnna nde xa?" **20** Saraxaraliin yi sewa, a yi batu seen nun suxurene nun sawurane rasuxu, a bira yamaan fõxõ ra. **21** Dan bõnsõnna muxune yi kiraan suxu, e diidine nun e xuruseene nun e goronne tixi e yee ra. **22** E bata yi makuya Mike a banxin na, Mike nun a dõxõ bodene yi e malan, e yi e sagatan. **23** E yi gbelegbelema Dan bõnsõnna muxune fõxõ ra, ne yi xete, e yi Mike maxõdin, e naxa, "Nanse ligaxi? Ganli ito be nanfera?" **24** A yi e yabi, a naxa, "N tan alan naxanye rafalaxi, e bata ne nun n ma saraxaraliin tongo, e yi fa e ra e yii. Nanse fa luma n yii? Nanfera nayi e n maxõdinma, e naxa, 'Nanse ligaxi?'" **25** Dan bõnsõnna muxune yi a fala a xa, e naxa, "I nama nxu tõrõ, xanamu muxuna ndee nxu ye, ne xõlõma nen i ma, e yi i yenge. Nayi, e nun i ya denbayaan yi

faxa.” 26 Na xanbi ra, Dan bõnsõnna muxune mɔn yi e sigatiin fɔlɔ. Mike to a to a e senben yi gbo, a yi xetɛ a konni. 27 Nayi, Dan bõnsõnna muxune yi siga Mike a seene ra, a naxanye rafala, e nun saraxaraliin naxan yi a yii. E yi sa Layisi yenge, e yi na yama bɔɲɛ xunbelixin yenge, e yi e taan gan. 28 Layisi taan yi Beti-Rexobo lanbanna nin, a yi makuya Sidon na, fefe mi yi e nun muxu yo tagi. Nanara, muxu yo mi fa e malideni. Dan bõnsõnna muxune mɔn yi taan ti, e dɔxɔ na. 29 E yi taan xili sa, a Dan taana, alo Dan xinla yi kii naxan yi, e benban naxan bari Isirayila yi. Koni taan yi xili nen a singeni Layisi. 30 Dan bõnsõnna muxune yi Mike a suxure sawurane ti e yetɛ xa. Yonatan, Gerisomi a dii xemena, Musa mamandenna nun Yonatan ma dii xemene yi findi saraxaraline ra Dan bõnsõnna xa han yaxune yamanan suxu waxatin naxan yi. 31 Mike sawuran naxanye rafala, e yi ne ti e yetɛ xa, e lu e batue Ala Batu Banxin waxatin naxan birin naba Silo yi.

19 Na waxatini, manga mi yi Isirayila yi. Lewi bõnsõnna muxuna nde yi dɔxɔ Efirami geya yiren danna ra, na yi jaxanla nde tongo a konyi jaxanla ra naxan yi kelixi Betelemi taani Yuda yamanani. 2 Koni, na konyi jaxanla yi tinxintareyaan liga, a yi keli a xɔn, a siga a fafe konni Betelemi taani Yuda yamanani. A sa lu mɛnni kike naanin, 3 a xɛmɛn yi keli a siga a fɔxɔ ra alogo e xa sa lan a xetɛ a ra. A walike banxulanna nun sofali firin yi biraxi a fɔxɔ ra. Naxanla yi a rasene a fafe a banxini, a fafe to a to, a yi a rasene sewani. 4 A bitanna, sungutunna fafe yi a makankan, a yi lu a konni xi saxon. E yi e dege, e yi e min, e yi xi dando ti na. 5 Xi naaninde lɔxɔni, e yi keli xɔtɔn, Lewi bõnsõnna muxun yi wa siga feni. Koni, sungutunna fafe yi a fala a bitanna xa, a naxa, “I deba buru dungina nde ra, na xanbi ra, i yi siga.” 6 E yi dɔxɔ, e yi e dege, e birin yi e min. Na xanbi ra, sungutunna fafe yi a fala xɛmɛn xa, a naxa, “Tin, i xi be, i sewa.” 7 Xɛmɛn yi keli a xa siga, koni bayo a bitanna yi kankanxi a ma, a mɔn yi xi na. 8 Xi suulunde lɔxɔni, xɛmɛn yi keli xɔtɔn a xa siga. Nayi, sungutunna fafe yi a fala a xa, a naxa, “Yandi, i deba, i yi jinbanna mame.” E birin yi e dege. 9 Xɛmɛn yi keli a xa siga e nun a konyi jaxanla nun a walike banxulanna. Sungutunna fafe yi a fala a xa, a naxa, “Kɔɛ bata so, xi be, i sewa. Tila xɔtɔnni ɛ siga, i sa so i konni.” 10 Koni, xɛmɛn mi wa xi feni, a keli, a siga.

A yi sa Yebusu taan li denaxan mɔn xili Yerusalɛn, e nun a sofali firinne nun a goronne nun a konyi jaxanla. 11 E masoɛ Yebusu taan na, yanyin bata yi yanfan, banxulanna yi a fala a kanna xa, a naxa, “En so Yebusu kaane taani, en sa xi na.” 12 A kanna yi a yabi, a naxa, “En mi soma taa gbɛtɛ yi, Isirayila kaane mi denaxan yi, en sa xima Gibeya nin.” 13 A mɔn yi a fala a walike banxulanna xa, a naxa, “En maso yirena nde ra, Gibeya hanma Rama en sa xi mɛnni.” 14 E mɔn yi lu sigɛ, sɔgen bire, e bata yi maso Gibeya taan na, Bunyamin bõnsõnna muxune yamanana. 15 Nayi, e yi siga mɛnni alogo e xa sa xi Gibeya yi. E yi so taani, e yi sa ti taan yama malandeni. Koni, muxu yo mi e rasene a banxini alogo e xa xi na. 16 Xɛmɛ fonna nde yi fama sa keli a xɛn ma. Efirami geya yiren muxuna nde nan yi na ra, a yi dɔxi Gibeya nin, anu Bunyamin kaan nan mɛnna muxune ra. 17 Na yi xɔɲɛn to tixi taan yama malandeni. Xɛmɛ fonna yi a fala a xa, a naxa, “I sigan minen, i kelixi minen?” 18 A yi a yabi, a naxa, “Nxu sa kelixi Betelemi taan nin Yuda yamanani. Nxu sigama fɔ Efirami geya yiren danna ra, n konna denaxan yi. N kelixi Betelemi taan nin Yuda yamanani, iki n sigama Alatala Batu Banxini. Koni muxu yo mi n nasenexi a konni. 19 Anu, nxɔ sofanle balo sexɛn nun murutuna nxu yii, burun nun minseen fan nxu yii, n tan nun n ma jaxanla nun n ma walike banxulanna xa. Sese mi dasaxi nxu ma.” 20 Xɛmɛ fonna yi a fala, a naxa, “Bɔɲɛ xunbenla xa taran i xɔn! Naxan na dasa i ma, n na soɛ i yii, i mi xima taan yama malandeni be.” 21 A yi e raso a banxini, a yi donseen sa sofanle bun. Sigatine yi e sanne maxa, na xanbi ra, e yi e dege, e yi e min. 22 E yi jaxajaxani waxatin naxan yi, taan muxuna ndee, fe jaxi rabane yi banxin nabilin, e lu dɛɛn makɔnkɔn han! E yi a fala xɛmɛ fonna xa, e naxa, “Banxi kanna! Xɛmɛn naxan soxi be, a ramini alogo nxu xa nxu makoon naba a ra alo jaxanla.” 23 Banxi kanna yi mini e fema, a yi a fala e xa, a naxa, “Ngaxakedenne, na mi lanɲɛ! Yandi ɛ nama fe xɔsixin liga, bayo xɛmɛni ito bata so n ma banxini, ɛ nama fe jaxini ito liga. 24 N ma sungutun nasolɔnxin be, e nun xemena konyi jaxanla, n xa ne ramini ɛ ma. Naxan na ɛ kenɛn, ɛ yi na liga ne ra. Koni, ɛ nama sese jaxi liga xɛmɛn na.” 25 Koni, na muxune mi wa e tuli mati feni a ra. Nayi, Lewi bõnsõnna muxun yi a konyi jaxanla suxu, a yi a ramini e ma tandeni. Na yi lu e yii kɔɛna ngaan na, e yi na karahan e kafu a xɔn han subaxani. Xɔtɔnni, e yi a raxetɛ. 26 Xɔtɔnna to maso,

naxanla a xemen yi yigiyaxi xeme fonna naxan kon yi, naxanla yi sa bira na deen na, han kuye yi ba. **27** Xotōnni, a kanna yi keli, a banxin deen nabi, alogo a xa siga. A yi a konyi naxanla to biraxi deen na, a yiine saxi deen binni. **28** A yi a fala a xa, a naxa, “Keli, en siga.” Koni, a mi a yabi. Nayi, xemen yi a binbin sa a sofana fari, a siga a konni. **29** A to so a konni, a filen tongo, a yi a konyi naxanli bolon dungi dungin na dōxo fu nun firin, a yi a rasiga Isirayila bōxon birin yi. **30** Naxanye birin na to, ne yi a fala, e naxa, “Han to ito jōxonna munma liga singen xabu Isirayila kaane keli Misiran yamanani. En na en miri feni ito ma, en falan ti en bode xa.”

20 Isirayila kaane birin yi e malan, keli Dan ma siga han Beriseba han Galadi yamanani, yamaan yi e malan alo muxu kedenna Alatala yetagi Misipa yi. **2** Yama kuntigine Isirayila bōsōnne birin yi, ne yi ti Alaa yamaan yetagi, sofaan muxu wuli keme naanin fan yi na naxanye yi e sanni, silanfanne yi naxanye yii. **3** Bunyamin bōsōnna muxune yi a me a Isirayila kaane bata siga Misipa yi. Nayi, Isirayila kaane yi a fala, e naxa, “E a fala, gbaloni ito e sōtōxi di?” **4** Nayi, Lewi bōsōnna muxun naxan ma naxanla faxa, na xemen yi falan tongo, a naxa, “Nxu nun n ma konyi naxanla nan fa Gibeya taani Bunyamin yamanani, alogo nxu xa xi na. **5** Gibeya kaane yi keli n xili ma, n yi banxin naxan kui, e yi na rabilin kōeen na. E yi waxi n tan nan faxa fe yi, koni e sa dutunxi n ma konyi naxanla nan ma, e yi a faxa. **6** Nayi, n yi n ma konyi naxanla tongo, n yi a yiisege dungi dungin na, n yi a rasiga Isirayila bōsōnne birin yi, bayo e bata fe xōsixin liga Isirayila yi. **7** Iki, Isirayila kaane birin xa e bode to, e yi fena nde ragidi.” **8** Yamaan birin yi keli alo muxu kedenna, e naxa, “En tan sese mi sigama a konni. **9** En na ito nan ligama Gibeya taan na: En kelima nen a xili ma, en masensenna ti. **10** Bōsōn yo bōsōn, xa muxu keme na, en muxu fu tongoma nen, xa wuli keden na, en yi keme tongo, xa wuli fu na, en wuli keden tongoma nen, e sa fandane fen sofane xa naxanye sa Gibeya taan yengema Bunyamin yamanani alogo na taan xa raxōri alo a lan e kewali njaxin ma kii naxan yi, e naxan liga Isirayila yi.” **11** Nayi, Isirayila kaane birin yi e malan alo muxu kedenna siga Gibeya xili ma. **12** Isirayila bōsōnne yi xerane rasiga a faladeni Bunyamin bōsōnna muxune birin xa, e naxa, “Gbaloni ito faxi e tagi di? **13** Fe naxi rabaan naxanye

Gibeya yi, e ne so nxu yii, nxu xa e faxa alogo gbalon naxan Isirayila yamani, na xa jnan.” Koni, Bunyamin bōsōnna muxune mi e ngaxakedenne xuiin suxu. **14** Bunyamin bōsōnna muxune yi mini e taani, e sa e malan Gibeya yi alogo e xa Isirayila kaane yenge. **15** Bunyamin bōsōnna muxun naxanye tēnge na lōxōni, naxanye mini e taane yi, muxu wuli mōxōjen nun sennin, silanfanna yi naxanye yii, Gibeya muxune mi yi ne ye, naxanye yatēn yi sigē han sofa keme solofere. **16** Na ganla ye, sofa yēbaxi keme solofere yi e ye kōmenmaan yi naxanye ra, ne birin yi nōe lantanna wolē nen hali xun sēxe kedenna ma, e mi fula a ra. **17** E mōn yi Isirayila bōsōnna bonne yate, ba Bunyamin bōsōnna muxune ra, e yatēna: Muxu wuli keme naanin, silanfanna yi naxanye yii, e birin sofa. **18** Isirayila kaane yi keli, e siga Beteli yi, e sa Ala maxōdin, e naxa, “Nxu nde singe rasigē a xa sa Bunyamin bōsōnna muxune yenge?” Alatala yi e yabi, a naxa, “Yuda kaane nan singe sigama.” **19** Na xōtōn bode, Isirayila kaane yi sa e malan e daaxadeni Gibeya binni. **20** Na xanbi ra, e mōn yi siga Bunyamin kaane yengēdeni, e yi sa ti yenge so xinla ma Gibeya yetagi. **21** Bunyamin kaane yi mini Gibeya taani. Na lōxōni, e yi Isirayila kaan muxu wuli mōxōjen nun firin faxa. **22** Isirayila yamaan mōn yi e wekile, e sa ti yenge so xinla ma na yireni e yi sa tixi dēnaxan yi lōxo singeni. **23** Isirayila kaane yi siga, e sa wuga Alatala yetagi han jinbanna. E yi Alatala maxōdin, e naxa, “Nxu mōn lan nxu sa Bunyamin kaane yenge ba, nxu ngaxakedenne?” Alatala yi e yabi, a naxa, “E sa e yenge.” **24** Isirayila kaane mōn yi siga Bunyamin kaane yengēdeni lōxo firindeni. **25** Na lōxo firindeni, Bunyamin kaane yi mini Gibeya yi, e yi muxu wuli fu nun solomasēxe faxa Isirayila kaane ra, silanfanna yi naxanye yii. **26** Nayi, Isirayila yamaan birin yi siga Beteli yi. E sa wuga menni, e lu Alatala yetagi, e sun na lōxōni han jinbanna, e saraxa gan daxine nun bōje xunbeli saraxane ba Alatala yetagi. **27** Isirayila kaane yi Alatala maxōdin. Na waxatini, Alaa Layiri Kankiraan yi mēnna nin, **28** Haruna mamandenna, Eleyasari a dii xemen Finexasi nan yi tixi Alatala yetagi. E yi a fala, e naxa, “Nxu mōn nōe Bunyamin kaane, nxu ngaxakedenne yenge ba, hanma nxu xa a lu na kiini?” Alatala yi e yabi, a naxa, “E siga, bayo n na e sama nen e sagoni tila.” **29** Nayi, Isirayila kaane yi sofane luxun Gibeya rabilinni. **30** Isirayila kaane yi siga Bunyamin kaane xili ma xi saxande lōxōni,

e sa ti yenge so xinla ma Gibeya yi alo e yi darixi a ra kii naxan yi. **31** Bunyamin kaane yi mini yamaan yengedeni, e yi e masiga taan na, alo e darixi a ra kii naxan yi, e yi Isirayila sofane faxa folo, e muxu tonge saxan faxa burunna ra Beteli nun Gibeya kiraan xon. **32** E yengi yi a ma a e bata Isirayila kaane no alo e darixi a ra kii naxan yi. Koni Isirayila kaane yi a falama nen, e naxa, "En na en gi, en yi Bunyamin kaane mabandun burunna binni, en yi e makuya Gibeya ra." **33** Isirayila sofane birin yi keli e tidene yi, e sa ti Baali-Tamara yi. Isirayila kaan naxanye yi luxunxi Geba binni, ne yi mini Bunyamin kaane xanbi ra e yengedeni Gibeya lanbanni. **34** Isirayila sofa kenden wuli fuun yi siga Gibeya taan xili ma. Yengen yi jaxu ayi, koni Bunyamin kaane mi yi a kolon a na gbalona e sote. **35** Alatala yi Bunyamin kaane rayarabi Isirayila kaane xa, e yi sofa wuli moxojen nun suulun sofa keme faxa na loxoni. **36** Bunyamin kaane yi a kolon a e bata no. Anu, Isirayila kaane e gi nen Bunyamin kaane yee ra, bayo e yi laxi e sofa luxunxine ra Gibeya taan xili ma. **37** Muxun naxanye yi luxunxi, ne yi so Gibeya taani mafuren, e taan yiren birin suxu, e yi taan muxune birin faxa silanfanna ra. **38** E nun Isirayila sofaan bonne yi lanxi taxamasenna nde nan ma. Muxun naxanye yi luxunxi, ne yi lanma e xa tutin nate taan xun ma. **39** Isirayila sofane to xete e xanbi ra yengeni, Bunyamin kaane yi e muxu tonge saxan faxa, e yengi yi a ma, a e bata e no alo e darixi a ra kii naxan yi. **40** Koni na waxatini, tutin naxan yi findixi taxamasenna ra, na yi te folo Gibeya taan xun ma. Bunyamin kaane yi e yee raxete, e tutin to te taan xun ma. **41** Isirayila kaane yi xete Bunyamin kaane xili ma. Bunyamin kaane yi gaxu, bayo e bata yi gbalon to fe e ma. **42** E yi e gi Isirayila kaane bun, e siga tonbonna binni, koni e mi tanga yengen ma. Bunyamin kaan naxanye yi fama taane binni, Isirayila kaan naxanye yi taane yi, ne yi ne faxa. **43** Isirayila kaane yi Bunyamin kaane rabilin, e lu e kede, e lu e faxe kira yi, e mi tin e yi e matabu han Gibeya sogeteden binni. **44** Bunyamin sofa wuli fu nun solomasexe yi faxa. **45** Bunyamin kaan bonne yi e gi siga tonbonna binni, siga Rimon fanyen binni. Ne muxu wuli suulun yi faxa kira yi, e yi a donxene kedi han Gidomi yi, e mon yi muxu wuli firin faxa e ra. **46** Bunyamin kaan naxanye faxa na loxoni, sofa wuli moxojen nun suulun, sofa kenden gbansanna. **47** Koni muxun naxanye e gi siga tonbonne binni, muxu keme sennin kisi nen ne ye e

sa so Rimon fanye yireni, e lu menni han kike naanin. **48** Isirayila kaane yi xete Bunyamin yamanani, e yi e muxune faxa silanfanna ra e nun xuruseen naxanye birin yi na. E yi teen so taane birin na.

21 Isirayila kaane e malanje Misipa yi, e bata yi e kolo nun, e naxa, "Isirayila kaa yo nama a dii temen fi Bunyamin bonsonna muxuna nde ma." **2** Yamaan yi fa Beteli yi e lu Ala yetagi han jinbanna. E wuga, e yi e xuini te, **3** e naxa, "Alatala, Isirayila Ala, nanfera ito ligama Isirayila yi to, Isirayila bonsonna nde yi tunun?" **4** Na xoton bode, yamaan yi keli xoton, e yi saraxa gandena nde yiton menni, e yi saraxa gan daxine nun boje xunbeli saraxane ba. **5** Isirayila kaane yi a fala, e naxa, "Isirayila bonsonne muxun mundun mi faxi Alatala yetagi be Isirayila bonsonne birin ye?" E bata yi e kolo fa fala, naxan yo mi fa Alatala yetagi Misipa yi, e na kanna faxama nen. **6** Bunyamin kaane kinikininna yi Isirayila kaane suxu, e ngaxakedenne, e yi a fala, e naxa, "Bonsonna nde bata ba Isirayila ra to. **7** En nanse ligama Bunyamin kaane xa naxanye luxi, bayo en bata en kolo Alatala yi a en nama en ma dii temene fi e ma e jaxanla ra?" **8** Nayi, e yi maxodinna ti, e naxa, "Muxuna ndee Isirayila bonsonne muxune ye ba naxan mi faxi Alatala yetagi Misipa yi?" E yi a kolon a Yabesi-Galadi kaan muxu yo mi yi faxi yamaan daaxadeni. **9** E yi yamaan yate, e yi a to Yabesi-Galadi muxu yo mi yi na. **10** Nayi, yamaan yi xeme kende wuli fu nun firin nasiga, e yi yamarini ito so e yii, e naxa, "E siga e sa Yabesi kaane birin faxa silanfanna ra Galadi yi, xemene nun jaxanle nun diidine. **11** E xemene birin faxa, e nun jaxanla naxanye bata dexo xemen xon." **12** E yi sa sungutun nasolonxin muxu keme naanin li Yabesi-Galadi yi naxanye munma yi xemen kolon singen, e yi siga e ra daaxadeni Silo yi Kanan yamanani. **13** Yamaan birin yi xerane rasiga lanna fe faladeni Bunyamin bonsonna muxune xa naxanye yi doxi Rimon fanye yireni. **14** Na waxatini, Bunyamin bonsonna muxune yi xete, Isirayila kaane yi jaxanle so e yii e naxanye lu e nii ra Yabesi-Galadi yi. Koni, e birin mi jaxanla soto. **15** Isirayila kaane yi kinikinin Bunyamin bonsonna muxune ma, bayo Alatala bata yi gbalon nagodo Isirayila bonsonne muxune ma. **16** Yamaan kuntigine yi a fala, e naxa, "Naxalan mi fa Bunyamin bonsinni. En nanse ligama, alogo xemen naxanye mi faxaxi ne xa jaxanle soto? **17** Bunyamin

bōnsōnna muxu dōnxene xa yiwuya alogo bōnsōnna
nde nama raxōri Isirayila yi. **18** Koni, en mi nōe en
ma dii tēmēn soe e yii e naxanle ra, bayo Isirayila
kaane bata yi e kolo, e naxa, ‘Dangan na kannā xa
naxan na a dii tēmēn fi Bunyamin kaana nde mal!’” **19**
Nayi, e yi a fala, e naxa, “Sanla nde Alatala xa Silo
taani jēe yo jēe Beteli taan kōmēnna binni, kiraan
sogeteden binni naxan Beteli nun Siken tagi, Lebona
taan yiifanna ma.” **20** Na xanbi ra, e yi yamarini ito fi
Bunyamin kaane ma, e naxa, “E sa e luxun manpa
bili nakōne yi. **21** E yi lu e yēe rakōninjē, nayi, Silo
sungutunne na mini, siga e bodondeni, e mini manpa
binle bun, e keden kedenna birin yi Silo sungutunna
nde tongo, e yi e findi e naxanle ra, e siga Bunyamin
yamanani. **22** Xa e fafane hanma e ngaxakedenne
fa e mawuga nxu fēma, nxu a fale e xa, nxu naxa,
‘E kininkinin e ma, bayo nxu mi naxalan fenxi e xa
yengēni. E tan xa mi e soxi e yii. Nayi, e mi findixi
fe kalane ra.’” **23** Bunyamin kaane yi na kawandi
xuiin suxu, e yi naxalan wuyaxi soto sungutunne ye
naxanye yi sigama e bodondeni Silo yi. Na xanbi ra, e
yi xete e yamanani, e mōn yi sa e taane ti, e dōxo na.
24 Na waxatini, Isirayila kaan bonne yi keli yamani, e
xete e bōnsōnne nun e xabilane yi, e sa dōxo e bōxōne
yi. **25** Na waxatini, manga mi yi Isirayila yi, birin yi a
kenēn feen nan ligama.

Ruti

1 Kitisane yi Isirayila yamanani waxatin naxan yi, kame gbeen yi so yamanani. Nayi, xemena nde yi keli Betelemi taani, Yuda yamanani e nun a jaxanla nun a dii xeme firinne, e yi sa dɔxɔ Moyaba yamanani. **2** Na xemen yi xili nen Elimeleki. A jaxanla fan yi xili nen Nowemi. A dii xeme firinne fan xinle nan itoe ra, Malɔn nun Kiliyon. Efarata bɔnsɔnna nan yi e ra, Betelemi kaane Yuda yamanani. Elimeleki nun a denbayaan yi siga Moyaba yamanani. E yi dɔxi Moyaba yamanani waxatin naxan yi, **3** Elimeleki yi faxes. Nowemi yi findi kaja gilen na e nun a dii xeme firinne yi lu. **4** Nowemi a dii xemene yi Moyaba jaxanle futu. Jaxanla boden yi xili Oropa, boden fan yi xili Ruti. Nba, e yi lu menni han jɛɛ fu jɔxɔn. **5** Na xanbi ra, a dii xeme firinne, Malɔn nun Kiliyon fan yi faxes. Nowemi keden peen yi lu amasɔtɔ a xemen nun a dii xemene bata yi faxes. **6** Nowemi yi a mɛ fa fala a Alatala bata a yamaan baraka Isirayila yamanani. Marigin bata balon so Isirayila kaane yii ki fajin. Nanara, Nowemi yi a yitɔn a keli Moyaba e nun a mamuxune. **7** Nowemi yi dɔxi denaxan yi a keli menni, a mamuxu firinne biraxi a fɔxɔ ra, e yi kiraan suxu xete Yuda yamanani. Koni e kira yi, **8** Nowemi yi a fala a mamuxune xa, a naxa, “E xete, birin xa siga a nga konni. Alatala xa hinan e fan na alo e bata hinan n tan nun n ma diine ra kii naxan yi naxanye faxaxi. **9** Alatala xa xeme fajin fi e ma e nun bɔɛ xunbenla e banxine kui.” Awa, Nowemi yi a jɔngu a mamuxune ma, koni e lu wuge e mame a fe ra. **10** E yi a fala e mame xa, e naxa, “En-en, en birin xa siga i kon kaane fɛma.” **11** Nowemi yi a fala a mamuxune xa, a naxa, “N mamuxune, a lan e xa xete e konni. Nanfera e waxi a xɔn ma en birin xa siga? E yengi a ma fa fala a n mɔn nɔɛ dii xemena nde bare nen naxanye e fute ba? **12** E xete e konni amasɔtɔ n tan bata fori xeme taa ra dɔxɔn ma. Hali n na a fala n naxa n xeme gbete sɔte to kɔɛɛn na, n dii xemene bari, **13** e nɔɛ dɔxe han ne yi gbo ba? En-en, n mamuxune, e a kolon a na mi lige. Alatala bata n tan, Nowemi a dunɔɔna ragidin xɔdɔxɔ ayi dangu e gbeen na.” **14** Nba, Oropa nun Ruti mɔn yi wuga fɔlɔ. Awa, Oropa yi a jɔngu a mame ma, a xete a konni, koni Ruti tan mi tin xete. **15** Nanara, Nowemi yi a fala Ruti xa, a naxa, “Ruti, Oropa bata siga a muxune fɛma e nun a gbee alane. I fan xa siga a fɔxɔ ra e konni.” **16** Koni Ruti yi Nowemi yabi, a naxa,

“I nama a fala a n xa xete i fɔxɔ ra. N mame, en birin xa siga. I na siga yire yo yi, en birin nan sigama na yi. I dɔxɔ yire yo yi, n fan dɔxɔn na nin. I ya muxune yi findi n ma muxune ra, i ya Ala yi findi n ma Ala ra. **17** I na faxes yire yo yi, n fan faxan menna nin, n maluxun menni. Xa sese en tan firinna fata, xa sayaan mi a ra, Alatala a tɔrɔn naxan jaxu dangu tɔrɔn birin na, na xa n li.” **18** Nba, Nowemi to a to a Ruti bata kankan a ma, a fɔ e firinna birin xa siga, Nowemi mi fa fala yo ti sɔnɔn. **19** E firinna birin yi siga han Betelemi taani. E soxina, taan birin yi kabɛ e fe ra, jaxanle yi lu a fale, e naxa, “Nowemi nan yati ito ra ba?” **20** Nowemi yi e yabi, a naxa, “E nama n xili Nowemi, koni e n xili ba ‘Sɔxɔletɔna’ amasɔtɔ Ala Senbe Kanna bata tɔrɔn nafa n tan ma. **21** Nba, n tan Nowemi kelima be waxatin naxan yi, se wuyaxi yi n yii nun. Koni Alatala bata n naxete be yi sese mi fa n yii sɔnɔn. Nanfera e tan jaxanle n xilima a Nowemi? Alatala bata yelin n yalage, Ala Senbe Kanna bata tɔrɔn nafa n ma.” **22** Nba, Nowemi nun a mamuxun Ruti fa kii nan na ra sa keli Moyaba yamanani fa Betelemi yi malo xaba waxatini.

2 Xemena nde yi Nowemi a xemen xabilani a xili Boosu. Muxu kenden nan yi a ra e nun nafulu kanna. E nun Elimeleki yi xabila kedenna nin. **2** Lɔxɔna nde, Ruti Moyaba kaan yi a fala a mame Nowemi xa, a naxa, “N xa siga malo xɔri yikentundeni. Waxatina nde, muxuna nde tinma nen n yi na liga.” Nowemi yi a yabi, a naxa, “N mamuxuna, awa siga.” **3** Nayi, Ruti yi siga xɛɛna nde ma malo xɔri makentundeni walikene fɔxɔ ra. Boosu nan ma xɛɛ yi na ra Elimeleki xabila yi muxuna nde. **4** Ndedi ligaxina, Boosu fan yetɛɛn yi fa keli Betelemi yi, a yi a fala walikene xa, a naxa, “Alatala xa lu e xɔn.” E yi a yabi, e naxa, “Alatala xa i fan baraka.” **5** Boosu yi a walike kuntigin maxɔdin, a naxa, “Naxalan sungutunna mundun ito ra?” **6** Kuntigin yi Boosu yabi, a naxa, “Naxalan xɔɔn nan a ra naxan kelixi Moyaba yamanani, a faxi Nowemi nan fɔxɔ ra. **7** A n maxɔdin nen a xa bira n ma walikene fɔxɔ ra, alogo a xa e xɔri makentun. A wanla fɔlɔxi nen xabu xɔtɔnni, a baxi sigadeni nen iki a matabudeni gageni.” **8** Awa, Boosu yi siga Ruti fɛma, a naxa, “N xa a fala i xa, i nama fa siga malo xɔri yikentundeni dede yi sɔnɔn fɔ n ma xɛɛn ma be. E nun jaxanli itoe xa lu wale be. **9** Bira walikene fɔxɔ ra, e nɛma yire yo xabe, i siga e fɔxɔ ra menni. N bata yamarin fi n ma

muxune ma a e nama i tɔrɔ. Awa, min xɔnla na i suxu waxati yo yi, i siga, i sa i min walikene min seen na.”
10 Ruti yi a xinbi sin Boosu bun ma, a yi a yetagin lan bɔxɔn ma, a yi a fala a xa, a naxa, “Nanfera i xaminxi n ma fe ra? Nanfera i hinanxi n tan xɔɲen na?”
11 Boosu yi Ruti yabi, a naxa, “N bata na feene birin me i naxan nabaxi i mame xa xabu i ya xemen faxa. N bata a kolon fa fala i bata i nga nun i fafe nun i ya yamanan bejin, i fa be yi, i fa so n ma muxune ye, i mi yi naxanye kolon a fɔlɔni.
12 Ruti, i bata naxan liga, Alatala xa i barayi. I yi duba kamalixin sɔtɔ keli Alatala Isirayilaa Ala yii i faxi naxan fɛma i ratanga feen na.”
13 Ruti yi Boosu yabi, a naxa, “Mangana, i fan n tan xa, i bata n bɔɲen xunbeli fala fajin na i naxan tixi n xa, amasɔtɔ hali i ya walike keden peena a fisa n tan xa.”
14 Awa, dege waxatina a lixina, Boosu yi Ruti xili, a naxa, “Fa be, en birin xa fa en dege. Buruna nde tongo i yi a sin sabini.” Nba, Ruti nun walikene yi sa dɔxɔ e nun Boosu. Boosu mɔn yi donse ganxina nde radangu Ruti ma. Ruti yi a dege han a lugo, a donse dɔnxen mɔn yi lu a yii.
15 Nba, Ruti mɔn sigaxi na malo xɔri makentundeni, Boosu yi yamarin fi a walikene ma, a naxa, “Ruti xa a xaba han xidine saxi denaxan yi. E nama a rayagi fe yo raba.
16 Na na dangu, e mɔn xa maala nde ba xidine ra, e yi e rabepin bɔxɔn ma, a yi e tongo. E nama fala yo ti a xili ma.”
17 Awa, Ruti yi feripen maala malanye han jinbanna ra. A yi a maala bɔnbɔ, a yi a liga fayida barama xungbeen ye firin jɔxɔn.
18 Ruti yi maali ito tongo, a siga a ra taani. A bata naxan birin malan, a sa na yita a mame ra. Ruti mɔn yi a donse dɔnxene so a mame yii.
19 Nowemi yi Ruti maxɔdin, a naxa, “I sa maala nun donsɛni itoe birin malanxi minen yi? I yi walima nde a xee ma nun? Muxun naxan yi yengi dɔxi i xɔn ma, Ala xa na kanna baraka!”
 Awa, Ruti yi a fala a mame Nowemi xa, a naxa, “N yi sa walima na xemen nan ma xee ma naxan xili Boosu.”
20 Nowemi yi kabe, a naxa, “Alatala naxan ma hinan mi janje faxa muxune nun niiramane xa, na xa Boosu baraka.”
 Nowemi mɔn yi a fala Ruti xa, a naxa, “Na xemena, nxu bari boden na ra naxan en goronna tonge, a yi a yengi dɔxɔ en xɔn ma.”
21 Nanara, Ruti Moyaba kaan yi a fala Nowemi xa, a naxa, “Naxan dangu a birin na, Boosu mɔn yi a fala n xa a nxu nun a walikene xa lu maala nde xabe han e yelin waxatin naxan yi.”
22 Nowemi yi a fala Ruti xa, a naxa, “N mamuxuna, a lan e nun jaxanle xa lu wale Boosu a xeen ma. Xa i sa wali

muxu gbetene xeen ma, waxatina nde i tɔrɔma nen.”
23 Awa, Ruti yi siga xeen ma, a lu wale Boosu walike jaxanle fɔxɔ ra han e yelin maala nun murutun birin malanye. Ruti mɔn yi lu a mame fɛma.

3 Lɔxɔna nde, Nowemi yi a fala Ruti xa, a naxa, “N mamuxuna, n xa xemen fen i xa alogo i xa sewa.
2 I a kolon, na Boosu naxan tinxi e nun a walike jaxanle yi wali, en nun na barixi nen. To jinbanna ra, Boosu sa a maala bɔnbɔma nen.
3 Awa, Ruti, sa i maxa, i latikɔnɔnna nde so i ma. I yi i ya dugi fajine tongo, i yi i yitɔn. Na na dangu, i siga Boosu a malo bɔnbɔdeni. Koni a nama a kolon de a i na yi han a yelin a degedeni.
4 Awa, a sa xima denaxan yi, i xaxili lu menna xɔn ma. Boosu na xi waxatin naxan yi, i siga, i sa a mafeleenni te, i yi i sa a san laben na. I lan i xa naxan liga, a tan yeteen na falama i xa nen.”
5 Awa, Ruti yi Nowemi yabi, a naxa, “I naxan yo fala n xa, n na nan ligama.”
6 Nba, Ruti yi siga malo bɔnbɔdeni, a yi a liga alo a mame a yamarixi kii naxan yi.
7 Boosu yelinxina a degedeni, a niin yi fan a ma. A sa a sa maala dɔxɔn, a xi. Ruti yi siga na yi dɔɲin, a yi Boosu a mafeleenni te, a yi a sa a san laben na.
8 Kɔe tagini, Boosu yi matugan, a xulun, a yi a maxete, a yi a terena jaxanla saxin na a san laben na.
9 Boosu yi a maxɔdin, a naxa, “Nde i tan na?” Ruti yi Boosu yabi, a naxa, “Mangana, n tan na a ra. I yengi dɔxɔ n xɔn ma, i yi n goronna tongo, bayo e nun Nowemi barixi nen. Nayi, yandi, n futu.”
10 Boosu yi Ruti yabi, a naxa, “Alatala xa i baraka. I naxan ligaxi iki, na bata a yita n na fa fala i bata nxɔ xabilan binya. Na binyen gbo dangu i mame gbeen na i bata naxan liga a xa. I nɔe banxulan jɔreɛna nde fenje hali a findi se kanna ra hanma yiigelitɔna, koni i mi tinxi na ma.
11 Awa Ruti iki, i nama xamin, i na wa sese xɔn ma a fala n xa, n na a lige i xa amasɔtɔ muxun birin i ya jaxalan fajiyaan kolon taan kui.
12 Nɔndin na a ra, fa fala nxu nun Nowemi barixin na a ra, koni xeme keden na, na nun Nowemi tagi so dangu n tan na.
13 Xi be to han tila xɔtɔnni, en na a matoe xa a tinje i goronna tonge. Xa a tin, na lan. Koni xa a mi tin, n bata n kɔlɔ habadan Alatala yi fa fala n tan, Boosu, i goronna birin tonge. Ruti, i sa han xɔtɔnni.”
14 Nanara, a yi a sa Boosu san laben na han xɔtɔnni. Koni a yi keli subaxani amasɔtɔ Boosu mi yi waxi a xɔn ma a muxɛ xa a kolon fa fala a yi na yi nun.
15 Benun Ruti xa siga, Boosu yi a fala a xa, a naxa, “I ya xunbeli domaan ba

i ma, i yi a yifulun be yi.” Ruti yi a xunbeli domani sa. Boosu yi maala ligaseen ye tonge naanin e nun naanin jaxxon sa Ruti a xunbeli domani. Boosu yi Ruti rate a ma. A yi siga a ra taani. **16** Ruti a konna lixina, a mame yi a maxodin, a naxa, “N mamuxuna, nanse danguxi na?” Ruti yi na feene birin yeɓa a xa Boosu naxan ligaxi a xa. **17** Ruti mɔn yi a fala a mame xa, a naxa, “Boosu maali ito soxi n yii nɛn, a n yii genla nama fa i fema.” **18** Awa, Nowemi yi a fala Ruti xa, a naxa, “Iki, dija han i yi a to a rajanma kii naxan yi. Boosu mi dɔxe fɔ a feni itoe birin yiton.”

4 Boosu yi siga taan so deen na, a sa dɔxo na. A yi na waxatin naxan yi, Elimeleki bari boden yeteen yi fa, Boosu bata yi naxan ma fe fala Ruti xa nun. Boosu yi xemen xili, a naxa, “N xoyina, fa, i fa dɔxo be.” A yi siga na yi a sa dɔxo. **2** Awa, Boosu yi taan fori muxu fu xili alogo e fan xa fa dɔxo a fema. E to fa dɔxi na, **3** Boosu yi a fala a bari boden xa, a naxa, “Iki, Nowemi mɔn bata fa sa keli Moyaba yamanani, a waxi Elimeleki a bɔxon mati feni, en bari bodena. **4** A lan i xa feni ito kolon. Awa, xa i waxi a sara feni, a sara fonni itoe yee xori. Koni xa i mi waxi a xon ma, i na fala n tan Boosu xa amasoto xa i mi a sarama, a lan n tan yi a sara.” Na xemen yi Boosu yabi, a naxa, “N tan a sarama nɛn.” **5** Boosu yi xemen yabi, a naxa, “Nba, na lanxi. Koni xa i bɔxoni ito sara Nowemi ma, i Moyaba jaxanla Ruti fan dɔxoma nɛn i ya jaxanla ra alogo bɔxon xa lu a xemen keeni naxan faxaxi.” **6** Xemen yi Boosu yabi, a naxa, “N tinma nɛn nayi, i yi na xeen sara amasoto xa n na tongo, a mi nɛe finde n keen na n ma diine xa. I tan xa a sara amasoto a mi lan n tan yi a sara.” **7** Nba, na waxatini benun muxune xa yelin sare sodeni hanma benun e xa e yii seene masara e bode yi, keden yi a sankidin bama nɛn a sanni yamaan tagi, a yi a so boden yii naxan a seen sarama a ma. Na waxatini Isirayila kaane yi a yitama nɛn nayi fa fala feen birin bata jan e tagi. **8** Nanara xemeni ito yi a fala Boosu xa, a naxa, “I tan xa bɔxon sara.” Xemen yi a sankidin ba a sanni, a yi a so Boosu yii. **9** Awa, Boosu yi a fala yamaan fonne birin xa e nun muxun naxanye yi na yi, a naxa, “E birin bata findi seren na to fa fala a n bata Elimeleki nun Kiliyon nun Malon ma seene birin sara naxanye Nowemi yii. **10** Naxan saxi na fari, Ruti Moyaba kaana, Malon ma kajja gilen bata findi n ma jaxanla ra. Nayi, faxa muxun kon kaane mi fulama a keen na. A xabilana

fe sigama nɛn yeen na a muxun bonne ye e taani. E tan fonne bata findi seren na feni itoe yi.” **11** Awa, kuntigine nun muxun bonne yi Boosu yabi, e naxa, “Awa, nxu bata findi seren na. Alatala xa i ya jaxanla liga alo Rakeli nun Leya naxanye dii wuyaxine bari, ne yi findi Isirayila yamaan na. Ala xa i findi se kanna ra Efarata bɔnsɔnna ye. I mɔn yi findi xili kan gbeen na Betelemi taani. **12** Alatala xa dii wuyaxi fi i ma fata na sungutunna Ruti ra, i xabilan yi gbo ayi alo Peresi mamandenne kii naxan yi Tamari naxan bari Yuda ma.” **13** Awa, Boosu yi Ruti tongo, a findi a jaxanla ra. Alatala yi Ruti baraka, a yi fudikan, a yi dii xemen soto. **14** Nayi, jaxanle yi a fala Nowemi xa, e naxa, “En xa Alatala tantun amasoto a bata mamandenna fi i ma to naxan a yengi dɔxoma i xon ma. Ala xa diidini ito findi xili kan gbeen na Isirayila yamanani. **15** I rafan i mamuxun ma. Ruti mɔn bata fe fajin liga i xa hali dangu dii xeme solofere ra. Iki, Ruti bata mamandenna nde so i yii naxan i nii yifanma i ma, a yi i mali i ya foriyani.” **16** Awa, Nowemi yi diin tongo, a yi a maso a ra, a yi a yengi dɔxo a xon ma. **17** E dɔxo bode jaxanle yi Ruti a dii xemen xili sa Obedi. E yi a fala muxun birin xa, e naxa, “Nowemi bata mamandenna soto, dii xemen na a ra.” Awa, Obedi yi Yese soto. Yese fan yi Manga Dawuda soto. **18** E bɔnsɔnna muxune xinle ni itoe ra, keli Peresi ma han sa dɔxo Manga Dawuda ra. Peresi nan Xesiron soto. **19** Xesiron yi Rami soto. Rami yi Aminadabo soto. **20** Aminadabo yi Naxason soto. Naxason yi Salimon soto. **21** Salimon yi Boosu soto. Boosu yi Obedi soto. **22** Obedi yi Yese soto. Yese yi Dawuda soto.

Samuyeli Singena

1 Xemena nde yi na naxan yi kelixi Ramatayin- Sofimi yi, Efirami yamanan geya yirena. A yi xili nen Elikana, Yeroxamaa diina. Elihu nan Yeroxama soto. Toxu nan Elihu soto. Sufi Efirami kaan nan Toxu soto. **2** Naxalan firin yi Elikana yii, boden xili Xana, a firinden xili Peninna. Peninna bata yi diine bari, koni dii yo mi yi Xana yii. **3** Nee yo jee Elikana yi kelima nen a konni, a siga Alatala Senben Birin Kanna batudeni Silo taani, a mon yi saraxan bama a xa. Heli a dii firinne, Xofini nun Finexasi yi mena nin, Alatalaa saraxaraline nan yi e ra. **4** Elikana na yi saraxan ba loxon naxan yi, a yi nde fima a naxanla Peninna ma nen e nun a dii xemene nun a dii temene birin. **5** Koni a yi doxode firin nan soma Xana yii, bayo a yi rafan a ma, hali Alatala to a findi gbantan na. **6** Naxanla boden yi yengen gidima a ma nen waxatin birin, alogo a xa xolo bayo Alatala bata a findi gbantan na. **7** Nee yo jee Xana na yi siga Alatalaa banxini, na fe kedenna yi ligama nen. A yengen gidi Xana ma han a wuga, a mon mi yi sese donma. **8** Elikana a xemen yi a maxodin, a naxa, “Xana, nanfera i wugama, i mon mi i degema? Nanfera i xoloxi? N tan mi fisa dii fu xa i tan yii ba?” **9** Loxona nde e yi Silo yi, donse donna to ba a ra, Xana yi siga Alatala Batu Banxin deen na Saraxarali Heli yi doxi denaxan yi. **10** A bojen yi xoloxi, a Alatala maxandi, a wuga han! **11** A a de ti, a naxa, “Alatala Senben Birin Kanna, xa i yeen ti i ya walikena marayarabin na, xa n ma fe rabira i ma, i yi kininkinin n ma, i dii keden fi n ma, n na a fima i ma nen i ya walikeen na a siin birin yi, a xunna mi biye mumel!” **12** Xana yi Alatala maxandi waxati xunkuye, Heli yi a deen matoma. **13** Xana yi falan tima a bojeni, a deen yi ramaxama koni sese mi yi mema. Heli yi a miri a dolon nan a xunni. **14** A yi a fala a xa, a naxa, “I luma nen dolo minni han waxatin mundun? Siga, i ba dolon minje.” **15** Xana yi a yabi, a naxa, “En-en n kanna, naxalan toroxin nan n na. N mi dolo minxi. N be yi n ma kontofinla nan taxudeyi Alatala ra. **16** I nama n miri naxalan naxin na. N bata bu Ala maxande, bayo n toron nun sunun nin.” **17** Nayi, Heli yi a fala, a naxa, “Siga boje xunbenli, Isirayilaa Ala xa na so i yii i naxan maxodinxi.” **18** Xana yi a fala, a naxa, “I ya konyin xa i ya fanna soto.” Xana yi siga, a a dege. Xolon yi jan a yetagi. **19** Xoton xoton, Elikana nun a denbayaan yi keli, e e xinbi sin Alatala yetagi, e

mon yi xete e konni Rama yi. Elikana yi a naxanla Xana kolon naxanla ra, Alatala yi a maxandin yabi. **20** Na waxatini, Xana yi fudikan, a diin bari, a yi a xili sa Samuyeli, bayo a tan naxa, “N na a maxodinxi Alatala nan na.” **21** Na xanbi ra, Elikana mon yi siga Silo yi e nun a denbayana alogo e xa sa jeen saraxan ba Alatala xa e nun a xa a de tiin nakamali. **22** Koni Xana mi siga, bayo a a fala nen a xemen xa, a naxa, “Diin na de ba waxatin naxan yi, n yi a xali alogo n xa a yita Alatala ra, a yi lu na yi waxatin birin.” **23** A xemena Elikana yi a yabi, a naxa, “A liga alo a rafan i ma kii naxan yi. Lu be han a yi de ba. Alatala xa a falan nakamali.” Nayi, Xana yi lu Rama yi a diin namindeni. **24** A to a de ba, hali a to yi xurun, a siga a ra Alatalaa banxini Silo yi e nun tura jee saxan nun murutu fupin benbeli keden nun minse kundi keden. **25** E turaan kee raxaba, e diin xali Heli fema. **26** Xana yi a fala Heli xa, a naxa, “Naxanli ito fe rabiraxi i ma ba naxan yi tixi be loxona nde Alatala maxandideni? Nondin na a ra yati, n tan nan yi a ra. **27** N yi diin naxan maxodinma Alatala ma, a tan ni i ra. **28** N fan wama a fi feni Alatala ma a siin birin yi, Alatala nan gbee a ra.” E yi e xinbi sin Alatala bun ma.

2 Xana yi Alatala maxandi, a naxa, Sewana n bojeni Alatalaa fe ra. Alatala nan n xunnakelixi, n noe gele n yaxune ma nen, bayo n sewaxi i ya kisina fe yi. **2** Muxu yo mi sarinjan alo Alatala. En ma Ala keden peen nan en kantan fanyen na. Ala gbete mi na, ba i tan na. **3** E nama waso falane ti. E nama konbin ti, bayo Alatala, Ala na a ra naxan feen birin kolon, a muxune kewanle birin makitima nen. **4** Sofa senbemane xanle bata kala, koni naxanye fanga mi gbo ne bata senben soto. **5** Naxanye yi lugoxi nun ne donseen fenma, koni kamen yi naxanye ma nun ne mako mi fa wanla ma. Naxalan gbantan bata dii solofere bari, koni naxan bata yi dii xeme wuyaxi bari, na bata a kui jan. **6** Alatala faxan tima, a kisin tima, a muxun nasige laxira yi, a a be na. (Sheol h7585) **7** Alatala muxun fuxare, a a banne, a nde ragode, a nde yite. **8** A fangatarene rakele nen burunburunni, a toro muxun nakeli xubeni. A e nun kuntigine radoxo yire kedenni manga gbedene ma. Alatala nan boxo xonna beten saxi, a tan nan a doxo a funfuni. **9** A muxu togondiyaxine yisuxuma nen koni naxudene loma ayi nen dimini, bayo muxun mi noon sotooma fangani. **10** Alatala na galanna xuiin namini a yaxune raxuyama

ayi nen. A tan nan kitisa gbeen na han bōxōn danna. A a yamaan mangan senben gboma ayi nen, a a manga sugandixin fangan xun masama nen. **11** Na xanbi ra, Elikana yi xete a konni Rama yi, koni Samuyeli yi lu walideni Alatala xa, saraxarali Heli bun ma. **12** Fuyantenna nan yi Heli a diine ra, e mi yi Alatala kolon. **13** Saraxaraline namunna nan yi ito ra lan yamaan ma: Xa muxuna nde saraxan ba, saraxaralina walikeen yi a masoma nen suben jinmatōon na, wure binga de saxanna a yii. **14** A yi a rasin goronna kui hanma tundena hanma gbete. Wure bingaa na yi naxan birin sōxōn, na yi findima saraxaraliin nan gbee ra. Isirayila kaan naxanye birin yi fama Silo batu banxini, na nan yi ligama. **15** Koni, waxatina nde, benun e xa turen gan, saraxaralina walikeen yi fama nen a a fala saraxa baan xa, a naxa, “Fa suben gilin daxin na saraxaraliin xa. A mi tinje i ya sube jinxin na, fō sube xindena.” **16** Xa na kanna a fala a xa, a naxa, “Sube turen xa gan singen, na xanbi ra, naxan na i kenēn, i na tongo,” walikeen yi a yabima nen, a naxa, “En-en, a so n yii iki, hanma n xa a tongo fangan na.” **17** Nayi, Heli a diine yi yulubi jaxin nan tongoma Alatala mabinni, bayo saraxan naxan yi bama Alatala xa e mi yi binye yo saxi na ma. **18** Koni Samuyeli tan yi walima Alatala yetagi a banxulan jōreyani, a maxidixi taa dugi saraxarali domani. **19** Nēe yo jēe, Samuyeli nga yi domadina nde degema nen, a a xali a diin yēe ra, e nun a xemen na yi siga Silo yi jēen saraxan badeni waxatin naxan yi. **20** Heli yi dubama Elikana nun a jaxanla xa iki, a naxa, “Alatala xa mamandenne fi i ma fata jaxanli ito ra, naxan luye na diin jōxōni a naxan maxōdin, a yi a fi Alatala ma.” Na xanbi ra, e yi xete e konni. **21** Alatala yi Xana ki, a yi dii xeme saxan bari e nun dii tēme firin. Banxulan jōren Samuyeli yi gboma Alatala yetagi. **22** Heli naxan bata yi fori, na yi a kolon, a diine yi naxan ligama Isirayila kaane ra, a mōn yi a kolon fa fala e nun jaxanle yi kafuma naxanye yi walima Naralan Bubun dēen na. **23** A yi a fala e xa, a naxa, “Nanfera ε fe sifani itoe ligama? Bayo n na ε kēwali jaxina fe mēma yamaan birin na. **24** E lu n ma diine. N naxan mēma ε xun ma Alatala a yamaan xōn, na magaxu. **25** Xa muxuna nde a boden haken tongo, Ala nōe na kitin sē nen, koni xa muxun yulubin liga Alatala ra, nde fa kitima?” Koni e mi e baba maxadi xuiin name bayo Alatala yi wama e faxa feni. **26** Banxulan jōren Samuyeli yi gboma nen tun, a yi rafan Alatala nun muxune ma. **27** Sayibana nde

yi fa Heli fēma a yi a fala a xa, a naxa, “Alatala ito nan falaxi, a naxa, ‘I benbane to yi koniyani Misiran yi Firawona yii, n na n yete makenēn nen e xa. **28** Isirayila bōnsōnne birin tagi, n na i benba Haruna nan tongo alogo a xa findi saraxaraliin na, a wanla kē n ma saraxa ganden dēxōn, a wusulanna gan, a yi saraxarali domaan so n yetagi. Saraxane Isirayila kaane naxanye ralima n ma tēen na, n ne birin so nen i benbana denbayaan yii. **29** Awa, nanfera ε yoxi n ma saraxane nun kiseene ma n naxanye yamarixi n ma banxini? Nanfera i bata i ya diine binya dangu n tan na, ε yi ε yete ratura sube dungi fajine ra Isirayila kaane fama naxan na n xōn, n ma yamana?’ **30** Bayo a na kii nin, n tan Alatalaa falan ni ito ra, Isirayilaa Ala, n naxa, ‘N bata yi a fala i ya denbayaan xa, i bōnsōnna xa, han habadan ε findima nen n ma saraxaraline ra. Koni iki n na falama kenenni, na fe mi fa a ra. N ne binyama nen naxanye na n binya, koni naxanye na n najaxu, n ne rajaxuma nen. Alatalaa falan nan na ra. **31** A mi fa buma, n yi i ya denbayaan kala, e nun i bōnsōnna birin alogo fori nama lu. **32** I tōrōn toma nen n ma banxini, feen birin yi liga ki fajni Isirayila yamaan xa, koni fori yo mi luyε i ya denbayani. **33** Xa n mi naxan ba n batuden dēxōn ma ε tan tagi, na luma nen alogo a xa xadan wugadeni e nun sōxōleni, koni i yixetene birin faxama nen benun e xa fori. **34** I taxamasenna toma nen naxan ligama i ya dii firinne ra, Xofini nun Finexasi. E firinna birin faxama nen lōxō kedenni. **35** Na xanbi ra, n saraxarali togondiyaxin fenyje, naxan n waxōnna lige. N yi a denbayaan nasabati. A ti n ma muxu sugandixin yēe ra waxatin birin yi. **36** Muxu yo na lu i ya denbayani na fama nen a xinbin sindeni a bun ma alogo a xa gbetina nde sōtō e nun buru dungina. A mōn yi a fala, a naxa, Yandi, i xa tidena nde so n yii saraxaraline fēma alogo n xa nō balon sōtōdeni.”

3 Foningen Samuyeli yi walima Alatala xa Heli fēma, Alatala yi falan tima nen na waxatini keden keden, fe toone alo xiye, ne mi yi wuya. **2** Na waxatini Heli yi saxi a konni, a yēene bata yi suxu fōlō a ra, a mi yi nōe se tōe. **3** Samuyeli fan yi xima, a yi saxi Alatala Batu Banxini Alaa Kankiraan fēma. Benun subaxani, yire sarijanxin lenpun mōn yi degema waxatin naxan yi, **4** Alatala yi Samuyeli xili. A yi a ratin, a naxa, “N tan ni i ra.” **5** A a gi, a siga Heli fēma, a naxa, “N tan ni i ra, bayo i bata n xili.” Heli yi a yabi, a naxa, “N mi i

xilixi, xete i si i sa.” Samuyeli mɔn yi sa a sa. **6** Alatala mɔn yi Samuyeli xili, a naxa, “Samuyeli!” Samuyeli mɔn yi keli a siga Heli fɛma a yi a fala, a naxa, “N tan ni i ra, bayo i bata n xili.” Heli yi a yabi, a naxa, “N mi i xilixi n ma diina, si i sa.” **7** Samuyeli yetɛɛn mi yi Alatala kolon, bayo a munma yi falan ti a xa han to. **8** Alatala mɔn yi Samuyeli xili a saxandeni, a mɔn yi keli a siga Heli fɛma, a yi a fala, a naxa, “N tan ni i ra, bayo i bata n xili.” Heli yi a kolon a Alatala nan yi foningen xilima. **9** Heli yi a fala Samuyeli xa, a naxa, “Siga, i si i sa. Xa i xili xuiin mɛ sɔnɔn, i xa a fala iki, i naxa, ‘Alatala, falan ti bayo i ya walikɛɛn tuli matixi.’” Samuyeli yi sa a sa a funfuni. **10** Alatala yi fa, a ti na yi, a mɔn yi xinla ti, a naxa, “Samuyeli, Samuyeli!” Samuyeli yi a ratin, a naxa, “Falan ti, i ya walikɛɛn tuli matixi.” **11** Nayi, Alatala yi a fala Samuyeli xa, a naxa, “A mato, n feen ligama nen Isirayila yi, naxan yo na a mɛ a tuli madoxoma ayi nen. **12** Na lɔxɔni n feene birin nakamalima nen Heli fari n naxan falaxi a xili ma e nun a denbayana. N mi sese luye. **13** N bata yi a fala a xa, n naxa, n na a denbayaan makitima nen habadan! Amasɔto a diine haken liga nen, a tan naxan yi na kolon, a mi e yikala na liga feen ma. **14** Nanara, n bata n kɔlɔ Heli a denbayaan xa, n naxa, ‘Saraxa ba, kise ba, sese mi a denbayaan haken nanjɛ.’” **15** Samuyeli yi lu saxi han xɔtɔnni. A yi Alatala a banxin dɛɛne rabi. Samuyeli yi gaxuma a fe toxin yebe Heli xa. **16** Koni Heli yi Samuyeli xili, a naxa, “Samuyeli, n ma diina.” A yi a ratin, a naxa, “N tan ni i ra.” **17** Heli yi a maxodin, a naxa, “A falan mundun tixi i xa? Xa i Alaa fala keden peen luxun n ma, n wama nen tɔrɔn naxan xɔdɔxɔ a birin xa, a xa na sa i fari.” **18** Nayi, Samuyeli yi a birin yebe a xa, a mi sese luxun a ma. Heli yi a fala, a naxa, “Alatala na a ra. Naxan nafan a ma a xa na liga.” **19** Samuyeli yi gboma waxatin naxan yi, Alatala yi a xɔn ma. A yi tin Samuyeli a falan birin xa kamali. **20** Na nan a liga Isirayila yamanan birin yi a kolon keli Dan han Beriseba, a Alatalaa nabiin nan yi Samuyeli ra. **21** Alatala yi lu a yete makenenjɛ Silo yi, a mini Samuyeli xa, a falan ti.

4 Samuyeli a falan yi rali Isirayila birin ma. Isirayila kaane yi mini Filisistine yengɛdeni. E yi e malan Ebeni-Eseri dɛxɔn ma, Filisistine yi malanxi Afeki yi. **2** Filisistine yi e ganla ti yengɛ sodeni Isirayila kaane yetagi, yengen yi fɔlɔ. Filisistine yi Isirayila kaane nɔ, e yi muxu wuli naanin faxa na yengeni. **3** Muxu njɛnɛnɛ

so waxatin naxan yi gali malandeni, Isirayila fonne yi a fala, e naxa, “Nanfera Alatala bata a lu to Filisistine xa en nɔ? Awa, en sigal En sa Alatalaa Layiri Kankiraan tongo Silo yi. En nun na xa mini, a yi en nakisi en yaxune fangan ma.” **4** Nayi, e yi muxune rasiga Silo yi, ne yi fa Alatalaa Layiri Kankiraan na, Sɛnben Birin Kanna naxan dɔxi maleka gubugubu kanne xun na. Saraxarali Heli a dii firinne, Xofini nun Finexasi yi Alaa Layiri Kankiraan xali. **5** Alatalaa Layiri Kankiraan so gali malandeni waxatin naxan yi, Isirayila birin yi sɔnxɔ gbeeni te, bɔxɔn yi xuruxurun. **6** Filisistine yi na mɛ e yi maxodinna ti, e naxa, “Nanse sɔnxɔ sɔnxɔ xui ito ra Heburu kaane malandeni?” E to a kolon a Alatalaa Kankiraan bata so, **7** Filisistine yi gaxu. E naxa, “Alana nde bata so e gali malandeni! Gbalo feen bata en li naxan munma yi liga en na nun! **8** Gbalona en xa! Nde en nakise alani itoe ma naxanye Misiran kaane njaxankataxi kiin birin yi tonbon yireni? **9** E sɔbe so, e findi xɛmɛne ra Filisistine! Xa na mi a ra, e findima nen Heburu kaane konyine ra alo e yi e konyiyani kii naxan yi. E tan xɛmɛne xa yengen so sɔbɛɛn nal!” **10** Nayi, Filisistine yi yengen nakeli, e yi Isirayila kaane nɔ, birin yi a gi a konni. Na yi findi kala gbeɛn na. Isirayila sofaan muxu wuli tonge saxan yi faxa. **11** Alaa Kankiraan yi xali, Heli a dii firinne yi faxa, Xofini nun Finexasi. **12** Na lɔxɔn yeteni, xɛmɛna nde yi a gi yengen ma Bunyamin bɔnsɔnni Silo yi. A a dugine yibo sununi, a burunburunna sa a xunni. **13** A fɛ, Heli yi dɔxi gbɛdeni kiraan dɛxɔn. A a yɛɛ rakopinma bayo a bɔjnɛn yi dinma Alaa Kankirana fe ra. Xɛmɛn somatɔɔn taani, a yi na feen xibarun nali, taan birin yi gbelegbele. **14** Heli to na sɔnxɔ sɔnxɔ xuiin mɛ, a yi maxodinna ti, a naxa, “Nanse sɔnxɔ xui ito ra?” Xɛmɛn yi fa Heli fɛma mafuren. **15** Heli bata yi njɛɛ tonge solomanaanin njɛɛ solomasɛɛɛ sɔto, a yɛɛne bata yi danxu fefe. **16** Xɛmɛn yi a fala Heli xa, a naxa, “N baxi kelideni yengen nin, n nan n gixi to yetɛɛn nin.” Heli yi a maxodin, a naxa, “Nanse ligaxi n ma diina?” **17** Xeraan yi yabin ti, a naxa, “Isirayila kaane bata e gi Filisistine yɛɛ ra, na findixi kala gbeɛn nan na en ma ganla ma. Mɔn, i ya dii firinne, Xofini nun Finexasi bata faxa. Filisistine bata Alaa Kankiraan tongo.” **18** Xerana Alaa Kankirana fe fala waxatin naxan yi, Heli yi bira a xanbiraamaan na taan so dɛɛn dɛxɔn. A kɔɛɛn yi gira, a faxa, bayo a yi belebele, a mɔn bata yi fori. A bata yi kitin sa Isirayila yi njɛɛ tonge naanin. **19** A mamuxuna, Finexasi a njaxanla

fudikanna nan yi a ra. A yi wama a bari feni. A yi Alaa Kankiraan tongo feen me, e nun a taje nun a xemen faxes fena, a yi a felen, a diin bari. Dii barin torone yi a no. **20** A yi faxama waxatin naxan yi, jaxanla naxanye yi a dexon ma, ne yi a fala a xa, e naxa, "I nama gaxu amasoto i bata dii xemen bari." Koni a mi a me, a mi sese fala. **21** A yi a diin xili sa Ikabodi, a naxa, "Binyen bata jnan Isirayila yi." A na falaxi Alaa Kankiraan tongo feen nan ma e nun a taje nun a xemen jnan fena. **22** A yi a fala, a naxa, "Binyen bata jnan Isirayila yi bayo Alaa Kankiraan bata tongo."

5 Filisistine yi Alaa Kankiraan xali keli Ebeni-Eseri yi han Asadodi yi. **2** E yi Alaa Kankiraan naso e gbee ala Dagon batu banxini, e a dexo Dagon sawuran fema. **3** Na xoton bode, Asadodi kaane to keli, e Dagon sawuran li biraxi a yetagin ma boxoni. A yi saxi Alatalaa Kankiraan fema. E mon yi a ti a funfuni. **4** Na xoton bode, e keli sinma, e a to a Dagon sawuran mon bata bira boxoni Alatalaa Kankiraan yetagi. A gbindin nan gbansan yi fa luxi bayo a xunna nun a yiine bata yi gira a ma. Ne yi saxi so deen na. **5** Nanara, han to Dagon ma saraxaraline nun naxanye birin yi soma Dagon batu banxini Asadodi yi, e mi tima so deen yeteen na. **6** Alatala yi a yiin nagodo Asadodi kaane xili ma e nun a rabilinna. A yi e toro a xexen nagodo e ra. **7** Asadodi kaane to na to, e yi a fala, e naxa, "Isirayilaa Alaa Kankiraan nama lu en konni, bayo a yiin bata godo en xili ma e nun en ma ala, Dagon." **8** E yi Filisistine kuntigine maxili e konni e yi e maxodin, e naxa, "En nanse ligama Isirayilaa Alaa Kankiraan na?" E yi e yabi, e naxa, "Isirayilaa Alaa Kankiraan xa xali Gati taani." A yi xali Gati yi. **9** Koni a so nen tun Alatala yi a yiin nagodo na taan muxune xili ma. Magaxu fe gbeen yi liga. Muxune birin, keli fonna ma han dii jorena, xexen yi godo e ra. **10** Nayi, e yi Alaa Kankiraan xali Ekiron yi. Koni e so nen tun, Ekiron kaane yi sonxo gbeeni te, e naxa, "E bata fa Isirayilaa Alaa Kankiraan na en konni, alogo en xa faxes." **11** E yi Filisiti kuntigine birin malan, e naxa, "E Isirayilaa Alaa Kankiraan naxete a yamanani. A nama en faxes, en nun en ma yamana." Bayo taana ngaani, faxes jaxin nun gaxun nan yi a ra, Ala yiin yi jaxu e ra. **12** Muxun naxanye mi faxes, xexen yi godo ne ra. Taa muxune mawuga xuiin yi te han kore xonna ma.

6 Alatalaa Kankiraan to kike solofere ti Filisistine yamanani, **2** Filisistine yi e suxure ki muxune xili e

nun e yiimatone, e naxa, "En nanse ligama Alatalaa Kankiraan na? E a fala nxu xa en na ito raxetema kii naxan yi a funfuni." **3** E yi yabin ti, e naxa, "Xa e Isirayilaa Alaa Kankiraan naxete, e nama a kedenna raxete tun! E yangin saraxana nde fi Isirayilaa Ala ma. Nayi, e yi yalanje nen, e yi a kolon Ala e toroma naxan ma." **4** Filisistine yi maxodinna ti, e naxa, "Nxu yangin saraxan mundun nasigama a ma?" E yi e yabi, e naxa, "Xexe sawuran xema daxin suulun, e nun yele sawuran xema daxi suulun lan Filisiti kuntigine xasabin ma. Bayo fure siya kedenna nan e suxu, e nun e kuntigine. **5** E xexe sawuran nun yelene sawuran nafala naxanye e yamanan kalama, e yi binyen fi Isirayilaa Ala ma. Waxatina nde a a xolon jnanje nen e tan nun e alane nun e yamanan ma. **6** Nanfera e boren xodoxoma, alo Misiran kaane nun Firawona e boren xodoxo kii naxan yi? Ala to e jaxankata, e mi yi Isirayila kaane bejin ba, e siga? **7** Awa iki, e wontoro nene keden nafala, e jinge nga firin tongo naxanye bunduma, xun xidi wudin munma xidi naxanye xunna ma. E jinge ngane xidi wontoron na, e yi e diine xidi sansanna kui. **8** E Alatalaa Kankiraan tongo, e a dexo wontoron kui, e yi se xema daxine sa a fema kankirana nde kui, e naxanye bama yangin saraxan na a xa. Na xanbi ra, e yi wontoron bejin a siga. **9** E lu a matoc. Xa jinge gilene Isirayila kiraan suxu, Beti-Semesi binni, na bunna nen a Ala nan gbaloni ito ragidixi, xanamu en na kolonje, a a yiin xa mi fureni ito ragidixi en ma, koni a en sotoxi na kii nin tun." **10** E yi na liga. E yi jinge bundulaan firin tongo, e yi e xidi wontorone ra, e yi e diine raso sansanna kui. **11** E yi Alatalaa Kankiraan dexo a kui e nun yele sawuran nun xexe sawura xema daxine yi naxan kui. **12** Ninge bundulane yi siga e tinxinni Beti-Semesi kiraan xon ma. E yi bira kira kedenna foxo ra e lu wuge. E mi siga e komenna ma, e mi siga e yiifanna ma. Filisiti kuntigine yi bira wontoron foxo ra han Beti-Semesi danna ra. **13** Beti-Semesi kaane yi lanbanni murutu xabadeni. E to kankiraan to, e jaxan. **14** Wontoron yi Yosuwe Beti-Semesi kaana a xeen li, a yi ti geme belebelen fema. Yamaan yi wontoro wudine yibo, e jinge bundulane ba saraxa gan daxin na Alatala xa. **15** Lewi bonsonna muxune yi Alatalaa Kankiraan nagodo e nun xema seene yi kankiraan naxan kui, e yi e sa geme gbeen fari. Na loxoni, Beti-Semesi kaane yi saraxa gan daxine nun saraxa gbeteje ba Alatala xa. **16** Filisiti kuntigi suulunne to ne birin to, e xete Ekiron

yi na lɔxɔn yeteni. **17** A tan ni i ra Filisistine xexe sawura xema daxin naxanye ba yangin saraxan na Alatala xa: Asadodi taan keden, Gasa keden, Asikalɔn keden, Gati keden, e nun Ekirɔn keden. **18** Yeɛ sawura xema daxine fan xasabin yi na kii nin, taa keden keden, Filisistine kuntigine dɔxi naxanye xun na, taa makantanxine nun e banxidene. Na gɛme xungbena, e Alatalaa Kankiraan dɔxo naxan fari, a mɔn na yi han to Yosuwe Beti-Semesi kaana a xɛen ma. **19** Koni Marigin yi Beti-Semesi kaana ndee faxa han muxu tonge solofere, bayo e Alatalaa Kankiraan kui to nɛn. Yamaan yi sunu, bayo Alatala bata yi e tɔrɔ ki fajni. **20** Na xanbi ra, Beti-Semesi kaane yi a fala, e naxa, “Nde nɔɛ tiye Alatala yetagi, Ala sarijanxina? En xa a kankiraan xali minɛn, a xa ba be?” **21** E xerane rasiga Kiriyati-Yeyarin yi, e naxa, “Filisistine bata fa Alatalaa Kankiraan na, ɛ fa a tongo, ɛ a xali ɛ konni.”

7 Kiriyati-Yeyarin kaane yi fa, e fa Alatalaa Kankiraan tongo, e a xali Abinadabo a banxini, naxan yi geyaan fari. Na xanbi ra, e yi Abinadabo a dii Eleyasari findi kantan muxuna. **2** Alatalaa Layiri Kankiraan dɔxo xanbini Kiriyati-Yeyarin yi, waxati xunkuye yi dangu, jɛɛ mɔxɔjɛ. Isirayila kaane yi e mawuga xuini te Alatala ma. **3** Nayi, Samuyeli yi a fala Isirayila yamaan birin xa, a naxa, “Xa ɛ xɛtɛxi ɛ bɔjɛn birin nan na Alatala fɛma, ɛ ba ala xɔjɛne nun Asitarate suxurene batue, ɛ fa Alatala ma, ɛ a tan kedenna batu. Nayi, a ɛ be Filisistine senben bun.” **4** Isirayila kaane yi Baali nun Asitarate suxurene ba e tagi, e yi Alatala batu. **5** Samuyeli yi a fala, a naxa, “ɛ Isirayila birin malan Misipa yi, n na Alatala maxande ɛ xa.” **6** E yi e malan Misipa yi, e igen ba, e yi a rabɔxɔn Alatala xa saraxan na. E sunna suxu na lɔxɔni. E yi e ti a ra, e naxa, “Nxu bata Alatala yulubin tongo.” Samuyeli yi findi Isirayila kaane kitisaan na Misipa yi. **7** Filisistine to a mɛ a Isirayila kaane malanxi Misipa yi, e kuntigi suulun yi a ragidi a e xa sa e yenge. Isirayila kaane yi na mɛ e gaxu Filisistine yɛɛ ra. **8** Isirayila kaane yi a fala Samuyeli xa, e naxa, “I nama nxu rabɛjin. Lu Alatala maxande, en ma Ala, alogo a xa en nakisi Filisistine ma.” **9** Samuyeli yi yɛxɛɛ diin ba saraxa gan daxin na Alatala xa. A yi Alatala maxandi Isirayila xa, Alatala yi a yabi. **10** Samuyeli yi saraxa bani waxatin naxan yi, Filisistine yi fa Isirayila yengedeni. Na lɔxɔni Alatala yi galan xuiin namini Filisistine xili ma, a e ti kiraan xɔn, Isirayila kaane yi e nɔ. **11** Isirayila ganla yi

keli Misipa yi, e Filisistine nɔ, e yi e kedi han Beti-Kari xun ma. **12** Samuyeli yi gɛmɛn tongo, a a dɔxo Misipa nun Seni tagi, a a xili sa “Mali Gɛmɛ Na.” A yi a fala, a naxa, “Alatala bata en mali han be.” **13** Nayi, Filisistine yi yagi na, e mi fa xɛtɛ Isirayila bɔxɔn ma mume! Alatala yi Filisistine yenge Samuyeli a siimayaan birin yi. **14** Filisistine bata yi taan naxanye rasuxu Isirayila kaane yii, ne yi xɛtɛ Isirayila ma e nun e rabilinne, keli Ekirɔn han Gati yi. Bɔjɛ xunbenla yi lu Amorine nun Isirayila kaane tagi. **15** Samuyeli yi findi Isirayila kitisaan na a siimayaan birin yi. **16** Jɛɛ yo jɛɛ, a yi danguma Beteli yi nɛn siga Giligali nun Misipa yi, a yi Isirayila makitima mɛnne birin yi. **17** A mɔn yi xɛtɛ a konni Rama yi, a yi kitin sama denaxan yi Isirayila xa. A bata yi saraxa ganden nafala Alatala xa denaxan yi.

8 Samuyeli fori waxatin naxan yi, a a diine dɔxo Isirayila kitisane ra. **2** A diin forimaan yi xili nɛn Yoweli, a firinden xili Abiya. E yi kitisani Beriseba nin. **3** Koni e kewanle mi yi ligaxi alo e baba. E yi biraxi gbetin nan fɔxo ra sɔto kii jaxini. E yi dimi yi seene rasuxuma mayifuni, e yi kiti jaxin sama. **4** Nanara, Isirayila fonne birin yi e malan e siga Samuyeli konni Rama yi. **5** E yi a fala a xa, e naxa, “A mato, Samuyeli i tan bata fori, i ya diine mi luxi alo i tan. Nayi, mangan dɔxo nxu xun na alo a ligama yamanan bonne yi kii naxan yi.” **6** Samuyeli yi xɔlo ki fajni e to a falaxi, e naxa, “Mangan so nxu yii a xa nxu kiti.” Samuyeli yi Alatala maxandi. **7** Alatala yi a fala Samuyeli xa, a naxa, “Yamaan xuiin namɛ e naxan birin falama i xa, bayo e mi e mexi i tan na. E e mexi n tan nan na alo e mangana. **8** Xabu n fa e ra sa keli Misiran yi, e xɛtɛ nɛn n fɔxo ra e ala gbetene batu. To, e mɔn na ligama i fan na. **9** Nanara, tin e mawuga xuiin ma koni i e rakolon sɔbɛɛn na, i yi a fala e xa naxan findima mangana sariyan na e fari.” **10** Samuyeli yi Alatalaa falan birin ti yamaan xa naxanye yi a maxɔdinma mangan ma, **11** a naxa, “Mangana sariyane findima itoe nan na ɛ fari: A ɛ dii xɛmɛne tongoma nɛn e findi sofane ra, e a yenge so wontorone ragi, e te soone fari xanamu e yi e gi a wontorone yɛɛ ra. **12** Ndee findima nɛn kuntigin na sofa wuli keden xun na xanamu sofa tonge suulun xun na. Ndee gbeteye a xɛɛn bima nɛn, ndee yi a xɛɛn xaba. Ndee yi yenge so seene rafala e nun wontoro wali seene. **13** A ɛ dii tɛmɛne tongoma nɛn latikɔnɔn nafalane ra e nun kudi soone xanamu buru ganne. **14** A ɛ xɛɛ sensenne rasuxuma nɛn, ɛ

manpa bili nakōne nun ε oliwi bili xēene, a e so a walikene yii. **15** A ε siseene nun ε bogi seene yaganna tongoma nen, a yi e so a kuntigine nun a walikene yii. **16** A ε walike xemene nun naxanle nun ε jinge senseenne nun sofanle tongoma nen, e wanla ke a tan xa. **17** A ε xuruse kurune yaganna tongoma nen, ε tan yeteen yi findi a konyine ra. **18** Na lōxōni ε sōnxōma nen ε mangan xili ma ε naxan sugandixi, koni na lōxōni Alatala mi ε yabima.” **19** Isirayila kaane yi tondi Samuyeli a falan name. E naxa, “En-en! Nxu wama mangana nde xa lu nxu xun na. **20** Nxu fan yi lu alo yamanan bonne, nxō mangan yi sariyan sa, a ti nxu yee ra nxō yengene yi.” **21** Samuyeli yi Isirayila kaane falan birin name, a yi a fala Alatala xa. **22** Alatala yi Samuyeli yabi, a naxa, “E xuiin name, i yi mangan dōxō e xun na.” Samuyeli yi a fala Isirayila kaane xa, a naxa, “E siga ε konne yi.”

9 Muxu kendena nde yi Bunyamin bōnsōnni, a xili Kisu, Abiyeli a diina. Serori nan Abiyeli soto. Bekorati nan Serori soto. Bunyamin bōnsōnna nde Afiya nan Bekorati soto. **2** Diina nde yi Kisu yii naxan yi xili Sōli. Dii xeme tofapin nan yi a ra. A jōxō yo mi yi Isirayila yi. A xunna yi yite bonne birin xa. **3** Lōxōna nde Kisu a sofali gilene yi lō ayi. Kisu yi a fala a dii Sōli xa, a naxa, “Walike keden tongo ε sa sofanle fen.” **4** A yi Efirami geyane yisiga, a Salisa yamanani siga, e mi e to. E dangu Saalimi mabinni, koni e mi sofanla to. A mōn yi dangu Bunyamin ma yamanani e mi sese to. **5** E Sufi yamanan li waxatin naxan yi, Sōli yi a fala a walikeen xa, a naxa, “En xete banxini, xanamu n baba ninanma nen sofanle e fe ra, a kontofili fōlō en ma fe ra.” **6** Walikeen yi a yabi, a naxa, “A mato, sayibana nde taani ito yi en yee ra, muxu kendena na a ra. A na naxan fala, a kamalima nen. En siga menni iki. Waxatina nde a kiraan yite en na nen en sigē naxan xōn.” **7** Sōli yi a fala a walikeen xa, a naxa, “Koni xa en siga, en nanse xalima na sayiban yee ra? Bayo donse yo mi fa en ma sagbane kui, sese mi en yii en naxan fiye sayiban ma. Nanse en yii?” **8** Walikeen yi a fala Sōli xa, a naxa, “Wure gbeti fixen garamu saxan n yii, en na so a yii alogo a xa kiraan yita en na.” **9** Waxati danguxini Isirayila yi, xemen naxan yi sigama Ala maxōdindeni a yi a falama nen, a naxa, “E fa, en siga fe toon konni.” Bayo en naxan ma to a “Nabina” a fōlōni e yi a falama nen na ma a “Fe toona.” **10** Sōli yi a fala a walikeen xa, a naxa,

“Na lanxi. En siga.” E yi siga taani sayiban yi denaxan yi. **11** E to yi tema taani, e sungutunne li menni siga ike badeni. E yi e maxōdin, e naxa, “Fe toon be ba?” **12** E yi e yabi, e naxa, “Ōn, a i yee ra, koni siga iki sa bayo a bata fa taani to amasoto saraxa ba daxin na to yamaan xa geyaan ma saraxa badeni. **13** E na so taani waxatin naxan yi, ε a toē benun a xa te geyaan ma a degedeni saraxa badeni. Yamaan mi e dege fō a na fa bayo a tan nan saraxan dubama. Na xanbi ra, muxu xilixine yi e dege. E te iki sa! E a lima nen na.” **14** E yi te taani. E to yi soma taani, Samuyeli yi mini e ralandeni, a tematōon geyaan ma saraxa badeni. **15** Benun na lōxōni, Alatala bata yi Samuyeli rakolon nun, **16** a naxa, “Waxatini ito yi tila, n Bunyamin kaana nde yitama i ra nen. A masusan a sugandi feen na alogo a xa findi n ma yamana Isirayila yeeratiin na. A n ma yamaan nakisima nen Filisistine fangan ma. N bata n ma yamana tōrōn to bayo, e wuga xuiin bata n li.” **17** Samuyeli to Sōli to, Alatala yi a fala a xa, a naxa, “Xemen ni i ra, n naxan ma fe fala i xa. A tan nan tima n ma yamaan xun na.” **18** Sōli yi a maso Samuyeli ra taan deen na, a naxa, “A fala n xa yandi, fe toona banxin minen yi?” **19** Samuyeli yi Sōli yabi, a naxa, “N tan nan fe toon na. E siga n yee ra geyaan ma saraxa badeni, bayo ε ε degema nen n xōn to. Tila xōtōnni n na yelin i ya maxōdinna ngaan yabe, n na a luye i siga. **20** I nama kontofili i ya sofali gilene fe ra naxanye lōxi ayi a xii saxanna nan to. E bata to. Koni Isirayila kaane birin waxi nde xōn ma, ba i tan nun i babaa denbayaan na?” **21** Sōli yi yabin ti, a naxa, “Bunyamin bōnsōnna xa mi n tan na, Isirayila bōnsōn xuridina? Bunyamin xabilan birin mi dangue n ma xabilan na ba? Nayi, nanfera i fe sifani ito falama n ma?” **22** Samuyeli yi Sōli nun a walikeen tongo, a e xali donse dondeni, a yi e dōxō dōxōde xungbeni muxu tonge saxan jōxōn yi denaxan yi. **23** Samuyeli yi a fala kudi soon xa, a naxa, “Fa suben na n naxan soxi i yii alogo i xa a dōxō muxuna nde yee ra.” **24** Kudi soon yi sa danban nun sube gbete tongo a yi e sa Sōli yetagi. Samuyeli yi a fala, a naxa, “Na nan namaraxi i xa. A don bayo a yi dōxi i tan nan yee ra. N na a falaxi e xa nen, n naxa, “Xōjēna nde fama nen n xōn.”” Nayi, Sōli yi a dege na lōxōni e nun Samuyeli. **25** E yi godo taani keli geyaan ma saraxa badeni. Samuyeli nun Sōli yi falan ti a banxin kōe ra. **26** Na xōtōn bode e keli subaxa. Samuyeli yi Sōli xili, a naxa, “E xa ε yitōn, n xa sa ε ti kira yi.” Sōli to keli, e nun Samuyeli yi mini.

27 E to taan danna li, Samuyeli yi a fala Söli xa, a naxa, “I ya walikeen yamari a xa siga yeen na.” Na yi siga yeen na. Samuyeli yi a fala a xa, a naxa, “Ti be singen, n xa Alaa falan nali i ma.”

10 Samuyeli yi ture saseen tongo a turen susan Söli xunni, a yi a sunbu, a naxa, “Alatala yeteen bata i masusan, a i findi a yamaan yeeratiin na. 2 I na keli n fema to, i xeme firin lima nen Rakeli bilinganna yireni, Selisa taani Bunyamin yamanan danna ra. E ito falama nen i xa, e naxa, ‘I sigaxi sofanla naxanye fendeni, e bata to. I baba mi fa a mirima e ma, koni a kontofilixi e tan nan ma fe ra. A naxa: N xa nanse liga n ma diina fe ra?’ 3 I na keli menni, i sigama nen han Taboro wudi gbeena. Menni i lanma nen xeme saxan na, e sigama Ala batudeni Beteli yi. Na nde keden sii saxan xalima nen, buru saxan taranma nen a firinden yii, manpa kundi keden yi taran a saxanden yii. 4 E i xontonna nen e buru firin so i yii, i yi a rasuxu. 5 Na xanbi ra, i soma nen Gibeya-Elohimu taani, Filisitine ganla malanxi denaxan yi. I nema soma taani, i lanma nen nabi ganla ra keli geyaan ma saraxa badeni. Konden maxane nun tanban maxane nun xulen fene nun bolon maxane sigama e yee ra, nabine yi nabiya falane ti. 6 Nayi, Alatalaa Nii Sarijanxin godoma i ma nen senbeni, i yi nabiya falane ti e xon. I maxetema nen, i findi muxu gbete ra. 7 Na taxamasenne birin na liga, i na naxan to a liga daxin na, i xa na liga bayo Ala i xon. 8 I sigama nen n yee ra Giligali yi, n ni i lima na alogo saraxa gan daxine xa ba e nun boŋe xunbeli saraxane. Koni, fo i xa n mame xii solofere, n na fa, n na fale i xa i lan i xa naxan liga.” 9 Söli keli nen Samuyeli fema tun, Ala yi xaxili gbete so a yii, taxamasenne itoe birin yi liga na loxon yeteni. 10 Söli nun a walikeen Gibeya li waxatin naxan yi, e yi nabi ganla li na. Alaa Nii Sarijanxin yi godo Söli ma, a yi sa e fari e nabiya falane yi. 11 Naxanye birin yi a kolon a foloni, ne to a to nabine ye, a nabiya falane tima, e yi a fala e bode tagi, e naxa, “Nanse ligaxi Kisu a diin na? Söli fan bata findi nabiin na ba?” 12 Menna muxuna nde yi yabin ti, a naxa, “Nde nabine baba ra?” Sandan minixi mena nin: “Söli fan nabine ye ba?” 13 A to yelin nabiya falane tiye, a siga geyaan ma saraxa badeni. 14 Söli soxo yi a fala Söli xa e nun a walikena, a naxa, “E yi sigaxi minen yi?” Söli yi a yabi, a naxa, “Sofali gilene fendeni. Koni nxu mi sese to, nxu yi siga Samuyeli fema.” 15 Söli soxo yi a fala, a

naxa, “A yebe n xa Samuyeli naxan falaxi e xa.” 16 Söli yi a yabi, a naxa, “A fala nxu xa nen a sofali gilene bata to.” Koni a mi sese fala a xa a mangayana a fe yi Samuyeli naxan fala. 17 Samuyeli yi Isirayila yamaan xili Alatala yetagi Misipa yi. 18 A yi a fala Isirayila kaane xa, a naxa, “Alatala, Isirayilaa Ala ito nan falaxi, a naxa, ‘N tan nan Isirayila raminixi Misiran yi. N tan nan e xunbaxi Misiran kaane yii e nun yamanan bonna naxanye yi e jaxankataxi.’ 19 To e bata e me e Ala ra naxan e rakisi e torone nun e gbalone birin ma. E naxa, ‘Mangan doxo nxu xun na.’ Awa, e fa e yete yita Alatala ra bonson yeen nun xabila yeen ma.” 20 Samuyeli yi Isirayila bonsonne birin xili, Bunyamin bonsonna yi sugandi. 21 Awa, a yi Bunyamin bonsonna birin xili xabila yeen ma, Matiri a xabilan yi sugandi. Donxen na, Kisu a dii xemen Söli yi sugandi. E yi a fen, koni e mi a to. 22 E mon yi Alatala maxodin, e naxa, “Xemeni ito bata fa be yi ba?” Alatala yi e yabi, a naxa, “A luxunxi goronne ye.” 23 E yi e gi, e sa a ba na yi, a yi ti yamaan ye. A xunna yi yite bonne birin xa. 24 Samuyeli yi a fala yamaan xa, a naxa, “E a mato, Alatala naxan sugandixi! A jaxon mi yamaan mumee ye.” Yamaan birin yi soxo, e naxa, “Ala xa sii xunkuye fi a mal!” 25 Samuyeli yi mangaya sariyan yebe yamaan xa, a a sebe kedindin kui, a naxan sa Alatala fema. Donxen na, a Isirayila kaane birin nasiga e konne yi. 26 Söli fan yi siga a konni Gibeya yi. Muxu kendena ndee yi sa a mati Ala boŋe faŋin sa naxanye yi. 27 Koni fuyantenna ndee yi a fala, e naxa, “Xemeni ito nxu rakisima di?” E yi a rajaxu e mi sese fi a ma. Koni Söli yi a dundu.

11 Nba, Amonine mangan Naxasi yi fa Yabesi-Galadi taan nabilin. Yabesi taan xemene birin yi a fala a xa, e naxa, “Layirin xa xidi en tagi, nxu findi i ya konyine ra.” 2 Amonin mangan Naxasi yi e yabi, a naxa, “Na bata fan, n bata tin lanna xa so en tagi, koni fo ito xa liga: N xa e birin yiifari ma yee ne soxoŋe ayi, n yi Isirayila birin nayagi.” 3 Yabesi taan fonne yi a fala a xa, e naxa, “Xii solofere fi nxu ma, alogo nxu xa xerane rasiga Isirayila boxon birin yi. Xa muxu mi fa nxu rakisideni, nxu nxu yete so i yii.” 4 Xerane to siga Gibeya yi, Söli a taani, e feni itoe dentege yamaan xa, birin yi a wuga xuini te. 5 Söli yi kelima xeen ma e nun a jingene, a maxodinna ti, a naxa, “Nanfera yamaan birin wugama?” E yi Yabesi kaane falan yebe a xa. 6 Söli to falani ito me, Alaa Nii Sarijanxin yi godo a ma

senbeni, a yi xolo katil! 7 A yi jinge firin tongo, a yi e yisege a dungin dungin na, a xerane rasiga, a e xa ne xali Isirayila bɔxɔn birin yi. E naxa, “Naxan yo mi bira Soli nun Samuyeli fɔxɔ ra na kanna jingene ligama ikiini.” Yamaan yi gaxu Alatala yee ra, e yi e malan alo muxu kedenna. 8 Soli yi e tenge Beseki yi, Isirayila xemene muxu wuli keme saxon, Yuda xemene muxu wuli tonge saxon. 9 Xeraan naxanye fa, e yi a fala ne xa, e naxa, “E sa ito fala Yabesi-Galadi muxune xa, e naxa, ‘Benun soken xa xolo tila e kisin sɔtɔma nen.’” Xerane to fa na fala Yabesi muxune xa, e yi jaxan. 10 E yi a fala Amoni kaane xa, e naxa, “Nxu nxu yete soma nen e yii tila, e yi nxu raba e waxɔn kiini.” 11 Na xɔtɔn bode, Soli yi a ganli taxun dɔxɔde saxon. E so Amoni gali malandeni kɔe dɔnxen na. E yi Amonine faxa han soken yi xolo. Muxu jɛɛne yi xuya ayi hali muxu firin mi lu e bode fari. 12 Yamaan yi a fala Samuyeli xa, e naxa, “Nde yi a falama a Soli nama lu en xun na? Fa na muxune ra, nxu xa e faxal!” 13 Koni Soli yi a fala yamaan xa, a naxa, “Muxu yo mi faxama to lɔxɔni, bayo Alatala bata Isirayila rakisi to.” 14 Na xanbi ra, Samuyeli yi a fala yamaan xa, a naxa, “E fa be, en siga Giligali yi alogo en mɔn xa Soli a mangayana fe fala.” 15 Yamaan birin yi siga Giligali yi. E yi Soli findi mangan na Giligali yi Alatala yetagi. E bɔɛ xunbeli saraxane ba Alatala yetagi mɛnni. Soli nun Isirayila yamaan birin yi jaxajaxan gbeen naba.

12 Samuyeli yi a fala Isirayila birin xa, a naxa, “N bata e xuiin name e naxan birin falaxi. N bata mangan dɔxɔ e xun na. 2 Iki mangan ni i ra naxan tima e yee ra. N tan bata fori n xunsexen bata fuga. N ma diine fan be e tagi. N bata ti e yee ra keli n dii jɔren ma han to. 3 N tan ni i ra, n tixi e yetagi. E n yabi Alatala yetagi e nun a muxu sugandixina. N na nde a jinge tongo? N na nde a sofali tongo? N na nde jaxankata? N na nde tɔrɔ? N dimi yi seen nasuxu nde ra alogo n xa n yeen naxi a fe jaxin ma? Xa n na nde keden peen tongo nen, n na raxetema nen.” 4 E yi a yabi, e naxa, “I mi nxu jaxankataxi. I mi nxu tɔrɔxi. I mi se rasuxi muxu yo yii.” 5 A yi a fala e xa, a naxa, “Alatala nan e seren na, a muxu sugandixin nan e seren na to lɔxɔni, a e mi sese to n yii.” E naxa, “Seren nan a tan na.” 6 Samuyeli mɔn yi a fala yamaan xa, a naxa, “Alatala nan Musa nun Haruna tongo alogo e benbane xa mini Misiran yi. 7 Awa iki, e ti kitisadeni Alatala yetagi. Alatala fe fajin naxanye

ligaxi e nun e benbane xa, n ne rabirama nen e ma. 8 Yaxuba fa xanbini Misiran yi, e benbane yi Alatala maxandi e mali feen na. Alatala yi Musa nun Haruna rafa, e e benbane ramini Misiran yi, e yi e radɔxɔ be. 9 Koni e yi jinan Alatala xɔn, e Ala. Nanara, a yi tin e yi so Sisera yamarin bun, Xasori gali mangana. A mɔn yi e so Filisitine yii e nun Moyaba mangan yii, naxanye yi e yengema. 10 E mɔn yi Alatala maxandi, e naxa, ‘Nxu bata yulubin liga, bayo nxu bata Alatala rabɛjin nxu yi Baali nun Asitarate suxurene batu. Koni iki, nxu xunba nxu yaxune yii fa, nxu i batue.’ 11 Awa, Alatala yi Yerubali rafa e nun Bedani nun Yefeta, dɔnxen na n tan Samuyeli, alogo e xa xunba e yaxune yii naxanye e rabilinxi. E yi lu kantanna kui. 12 Koni e to Amonine manga Naxasi to fe e xili ma, e yi a fala n xa, e naxa, ‘Nxu wama mangan xɔn, a xa nxu yamari.’ A yi luxi alo Alatala mi yi e mangan na. 13 Awa, e bata a sɔtɔ e mangan naxan sugandixi, e bata naxan maxɔdin. Alatala bata mangan dɔxɔ e xun na. 14 Xa e gaxu Alatala yee ra, e yi a batu, xa e a xuiin name, xa e mi murute Alatalaa yamarine ma, nayi e nun e mangan xa bira Alatala fɔxɔ ra, e Ala. 15 Koni xa e mi Alatala xuiin name, xa e murute Alatalaa yamarine bun, nayi Alatala e yengema nen, alo a liga e benbane ra kii naxan yi. 16 Iki, e yitɔn e yi fe gbeen mato Alatala naxan ligama e yetagi. 17 To xa mi murutu xaba waxatin na ba? N na Alatala maxandima nen, a yi galanna nun tulɛn nagodo. Nayi, e e kala fe gbeen kolonma nen Alatala yee ra yi, e to mangan dɔxɔ feen maxɔdinxi.” 18 Samuyeli yi Alatala maxandi. Na lɔxɔn yeteni, Alatala yi galanna nun tulɛn nafa. Yamaan birin yi gaxu Alatala yee ra e nun Samuyeli. 19 Yamaan birin yi a fala Samuyeli xa, e naxa, “Alatala maxandi, i ya Ala, i ya walikene xa, alogo nxu nama faxa, bayo nxu bata mangan maxɔdin feen sa nxɔ yulubine birin fari.” 20 Samuyeli naxa, “E nama gaxu. E bata fe jaxini ito birin liga, koni e nama xete Alatala fɔxɔ ra, e Alatala batu e bɔɛnen ma feu! 21 E nama bira suxurene fɔxɔ ra fuyan! Naxanye mi nɔe maliin tiye, e mi marakisin tiye, bayo ala fuune nan e tan na. 22 Alatala mi a yamaan nabɛjɛnɛ a xili gbeena fe ra, bayo a tan yeteen nan tinxi e findi a yamaan na. 23 Alatala xa n fan natanga yulubi tongon ma, n tondi a maxande e xa! N na e xaranma nen kira fajin nun tinxinna ma. 24 E gaxu Alatala yee ra tun! E a batu lannayani e bɔɛnen ma feu! A mato, a fe gbeen

naxanye ligaxi ε xa. **25** Koni xa ε lu fe jnaxin lige, ε raxorima nen, ε tan nun ε mangan na.”

13 Söli findi mangan na a jnεe tonge saxanden nan ma, a yi jnεe tonge naanin nun firin ti mangayani Isirayila yi. **2** Söli yi xeme wuli saxan sugandi Isirayila kaane ye. Wuli firin yi a fema Mikimasi yi e nun Beteli geyane fari. Wuli keden yi lu Yonatan fema Gibeya yi Bunyamin böxoni. A yi yama dñxene rasiga e konne yi. **3** Loxona nde Yonatan yi fu Filisistine gali malanden ma naxan yi Geba yi. Filisistine yi na me. Söli yi xotaan fe böxon yiren birin yi. A yi a fala, a naxa, “Heburune xa a me!” **4** Isirayila birin yi a me a Söli bata fu Filisistine gali malanden ma, a yi rajaxu Filisistine ma alo se kunxin xirina. Nayi, muxune birin yi maxili, e yi malan Söli fema Giligali yi. **5** Filisistine fan yi e malan Isirayila yenge xinla ma. Yenge so wontoro wuli saxan yi e yii e nun soo ragi wuli sennin, e nun sofaan naxanye yi wuya alo mejnensinna naxan baan de. E fa e malan Mikimasi yi, Beti-Aweni sogeteden binni. **6** Isirayila xemene to a to a e bata yigbeten, e nun feene bata xodoxo e ganla ma, muxune yi siga e luxunje faranne ra, e nun fotonne yi, e nun gemε longonne nun yinle ra, e nun ige ramaradene yi. **7** Heburuna ndee fan yi Yuruden baani gidima siga Gadi nun Galadi yamanani. Söli mon yi Giligali yi, sofaan naxanye birin yi a föxo ra ne yi xuruxurumma gaxuni. **8** A yi Samuyeli mame xii solofere, han a waxatin naxan falaxi. Koni Samuyeli mi fa Giligali yi. Yamaan yi e makuya folo a ra, e xuya ayi. **9** Nayi, Söli yi a fala, a naxa, “E fa saraxa gan daxin na e nun böje xunbeli saraxane.” A yi saraxa gan daxin ba. **10** A yi yelinma na saraxan be waxatin naxan yi, Samuyeli yi fa. Söli yi siga a ralandeni alogo a xa a xonton. **11** Samuyeli yi a fala, a naxa, “I nanse ligaxi?” Söli yi a yabi, a naxa, “N na a toxi nen a yamana e masigama n na, e nun i fan mi faxi en lanma waxatin ma, Filisistine fan bata yi malan Mikimasi yi, **12** nanara n yi mirixi, n naxa, ‘Filisistine fama nen n xili ma Giligali yi, n mon munma Alatala maxandi singen,’ na yi n karahan, n yeteen yi saraxan gan.” **13** Samuyeli yi a fala, a naxa, “I bata a liga alo xaxilitarena, i mi Alatalaa yamarin suxu, i ya Ala. Alatala yi a ligama nen nun i ya mangayaan yi lu Isirayila xun na habadan! **14** Koni iki, i ya mangayaan mi luma a ra. Alatala bata xemena nde fen naxan böje luxi alo a böjena, a yi a sugandi a yamaan yeeratiin na, bayo i mi Alatalaa yamarin

suxi.” **15** Samuyeli yi keli Giligali yi a te Gibeya yi, Bunyamin yamanani. Yamaan naxan yi Söli föxo ra a ne tenge. Xeme keme sennin joxon yi na. **16** Söli a dii xemēn Yonatan nun yamaan naxan yi a föxo ra, ne yi dōxo Geba yi, Bunyamin böxon ma. Filisistine yi malanxi Mikimasi yi. **17** Ganla dōxo saxan yi mini Filisistine sofane malandeni alogo e xa yengen so. Gali keden yi siga Ofara binni Suwali yamanani. **18** Ganla boden yi siga Beti-Xoron binni. A saxanden yi siga yamanan danna binna ra Seboyin lanbanna xunna ra, tonbon yiren dēxon. **19** Na waxatini, xabun mi yi toma Isirayila böxo yo ma, bayo Filisistine bata yi a fala, e naxa, “Heburu kaane nama silanfanna nun tanban nafala.” **20** Isirayila kaan birin yi sigama Filisiti xabun nan fema a jinge kenna deni tondeni hanma kenna hanma bunbina, hanma bundena. **21** E yi gbeti gbanan keden nan fima jinge kenna deni ton feen na, e nun kenna. Koni a tagiin nan yi fima jama malan sena fe ra hanma bunbina hanma jinge gbengben wurena. **22** Nanara, yenge so löxoni, silanfanna nun tanban mi yi Söli nun Yonatan ma sofane yii. Fö mangan nun a diina. **23** Filisiti gali keden yi sa Mikimasi kiraan suxu geya longonna ra.

14 Loxona nde, Söli a diin Yonatan yi a fala a yengeso seene maxali banxulanna xa, a naxa, “Fa en gidi han Filisistine gali malandeni bode föxoni.” Koni Yonatan mi a baba rakolon. **2** Söli yi Gibeya danna ra girenada wudin bun ma Migiron yi. Sofa keme sennin yi a fema. **3** Saraxarali domain yi Axiya nan yii na yi, Ikabodi tada Axituba a dii xemena. Finexasi nan Axituba soto. Heli, Alatalaa saraxaralina Silo yi, na nan Finexasi soto. Muxu yo mi yi a kolon a Yonatan bata mini. **4** Yonatan yi minima geya longonna nan na alogo a xa Filisistine gali malanden masoto. Na kiraan yi minixi geya tintinxi firinne nan longori ra, na kedenna yi xili Bosesi, boden xili Senne. **5** Geya keden komen föxoni Mikimasi binni, boden yiifari föxoni Geba binni. **6** Yonatan yi a fala a yenge so se maxanla xa, a naxa, “Fa, en siga han Filisiti Ala kolontarene gali malandeni. Waxatina nde Alatala en malima nen. Sese mi nœ Alatalaa marakisin yee rase, hali yama xurudin na a ra, hanma a gbeena.” **7** Yenge so se maxanla yi a yabi, a naxa, “I mirixi naxan ma, na liga. Sigal N ni i föxo ra. En birin xaxili keden.” **8** Yonatan naxa, “Awa, fa en siga han xemēni itoe denaxan yi, e yi en to. **9** Xa e a fala en xa, e naxa, ‘E ti menni han nxu yi ε ralan,’

en tima nen menni. En mi tema e fema na yi. **10** Koni, xa e a fala en xa, e naxa, ‘E te nxu fema,’ en tema nen, bayo na findima taxamasenna nan na a Alatala bata e so en yii.” **11** E yi e yita Filisistine ra. Filisistine yi a fala, e naxa, “I yeen ti! Heburune bata mini fəlo yinle ra e luxunxi denaxanye yi.” **12** E yi Yonatan nun a walikeen xili, e naxa, “E te nxu fema, nxu xa fena nde yita e ra.” Yonatan yi a fala a yenge so se maxanla xa, a naxa, “Te n fəxo ra, bayo Alatala bata e so Isirayila yii.” **13** Yonatan yi te a yiine kafue a sanne ma, a yenge so se maxanla biraxi a fəxo ra. Yonatan yi lu Filisistine rabire a bun ma, a yenge so se maxanla yi e faxa. **14** Na yenge singeni Yonatan nun a yenge so se maxanla yi Filisiti muxu məxəne jəxəndən faxa yire kedenni. **15** Gaxun yi so ganli. Naxan yo yi xee ne ma e nun ganla birin, naxan yo yi gali malande gbete yi, e nun naxanye yi minixi yengesodeni, gaxun yi ne birin suxu. Bəxən yi xuruxurun. Na yi findi gaxun na fata Ala ra. **16** Səli a kantan muxun naxanye yi Gibeya yi, Bunyamin bəxəni, ne yi ganla to xuyə ayi yiren birin yi. **17** Səli yi a fala a sofane xa, a naxa, “E sofane maxili, a xa kolon naxan kelixi en ye.” E yi a kolon a Yonatan nun a yenge so se maxanla nan mi yi e ye. **18** Səli yi a fala Axiya xa, a naxa, “Alaa Kankiraan nafa.” Bayo na waxatini a yi Isirayila kaane nan yii. **19** Səli yi falan tima saraxaraliin xa waxatin naxan yi, sənəxə sənəxən mən yi gboma ayi Filisistine malandeni. Səli yi a fala saraxaraliin xa, a naxa, “A lu na.” **20** Nayi, ganla naxan birin yi Səli fəxo ra, ne yi malan e mini yenge sodeni. E yi a li Filisistine yi e bode yengema sənəxə sənəxə gbeeni. **21** Heburu naxanye yi Filisistine bun ma a singeni, naxanye yi basanxi e ra e gali malandeni, ne yi sa Isirayila fari Səli nun Yonatan mabinni. **22** Isirayila kaan naxanye birin yi luxunxi Efirami geyane yi, ne yi a me a Filisistine e gima, e fan yi lu e kede, e yi e yenge. **23** Alatala yi Isirayila rakisi na ləxəni, yengen yi siga han Beti-Aweni. **24** Isirayila kaane tərə nen na ləxəni bayo Səli bata yi tonni ito fala yamaan xa, a naxa, “Dangan na kanna xa xemen naxan na donseen don benun jinbanna, benun n yi n gbeen jəxo n yaxune ra.” Nanara, muxu yo munma yi donseen don ganli. **25** E birin yi fətonna li, kumin yi bəxənma denaxan yi. **26** E soxin fətonni, sofane yi kumin to minə, koni muxu yo mi se raso a de, bayo e birin yi gaxuxi dangan yee ra. **27** Yonatan mi yi a kolon a baba bata yi a kəlo yamaan xa. Nanara, dunganna naxan yi a yii, a na xunna rasiga, a yi a

deten kumi dengbeni, a a don. Nayi, a yeeen yi xən sege. **28** Sofana nde yi a fala a xa, a naxa, “I baba ganla rakəloxi nen ki fajji, a naxa, ‘Xa muxuna nde donseen don to, dangan na kanna xa.’ Nanara, sofane birin xadanxi.” **29** Yonatan naxa, “N baba yamaan tərəma. A mato n fangan sətəxi kii naxan yi xabu n kumini ito don. **30** Xa sofane birin yi donseen donma to, e naxan tongoxi e yaxune konni, en yi Filisistine noma nen dangu ito ra!” **31** E Filisistine nə na ləxəni keli Mikimasi siga han Ayalən yi. Yamaan yi xadanxi han! **32** E yi e yaxune yii seene tongo, e xuruseene tongo e nun jingene nun jinge diine. E e faxa bəxəni, yamaan yi e nun wunla don. **33** E yi a rali Səli ma e naxa, “A mato yamana Alatala yulubin tongoma, e suben nun a wunla don.” Səli naxa, “E bata yanfan ti! E geme gbeen makutukutu n mabinni iki sa!” **34** A mən yi a fala, a naxa, “E xuya ayi yamani, e a fala e xa, a birin xa fa a jingen na xanamu a yexee na, a yi a faxa be. Na xanbi ra, e yi e don alogo e nama Alatala yulubin tonge, e suben nun a wunla don.” Kəeen na, birin yi fa a jingen na alogo a xa a faxa menni. **35** Səli yi saraxa ganden nafala Alatala xa. Na findi saraxa gande singen nan na a naxan nafala Alatala xa. **36** Səli yi a fala, a naxa, “En godo Filisistine fəxo ra to kəeen na, en sa e yenge han xətənni. Keden nama lu a nii ra.” E yi a yabi, e naxa, “Naxan nafan i ma, na liga.” Koni, saraxaraliin naxa, “En na Ala maxədin be.” **37** Səli yi Ala maxədin, a naxa, “N xa godo Filisistine fəxo ra ba? I e soma Isirayila yii ba?” Koni na ləxəni a mi a yabi. **38** Nanara, Səli naxa, “E fa be, ganla yeeratine birin. En xa a kolon yulubin naxan ligaxi to. **39** N bata n kəlo habadan Alatala yi, Isirayila Rakisimana, hali xa n ma diin Yonatan nan a xunna ra, a faxama nen.” Muxu yo mi a yabi yamaan ye. **40** A yi a fala Isirayila birin xa, a naxa, “E dangu fəxo kedenni, n tan nun n ma dii Yonatan xa lu fəxo kedenni.” Yamaan yi a fala Səli xa, e naxa, “Naxan nafan i ma, na liga.” **41** Səli yi a fala Alatala xa, Isirayilaa Ala, a naxa, “Nəndin yita n na.” Masensenna yi Yonatan nun Səli suxu, yamaan yi ba a ye. **42** Səli naxa, “E masensenna ti nxu nun ma diin tagi.” Yonatan yi suxu. **43** Səli yi a fala Yonatan xa, a naxa, “A fala n xa i naxan ligaxi.” Yonatan yi a yabi, a naxa, “N kumi siyadi nan tongoxi n ma dunganna jəeen na, n na don. Fə n xa faxa?” **44** Səli naxa, “Ala xa tərə jaxin sa n ma xa i mi faxa, Yonatan.” **45** Koni sofane yi a fala Səli xa, e naxa, “Yonatan lan a xa faxa ba? A tan xa mi a ra, naxan Isirayila rakisi gbeen ti? A

mi faxe mume! Nxu bata nxu kolo habadan Alatala yi, hali a xunsexe kedenna, a mi bire boxoni, bayo Alalan a mali a xa noon soto to!” Nayi, sofane yi Yonatan xunba, a mi faxes. 46 Soli yi xete Filisistine foxo ra, ne yi xete e konni. 47 Soli to mangayaan tongo Isirayila yi, a yi e yaxune yenge a rabilinni, Moyaba nun Amonine nun Edon nun Soba mangane, e nun Filisistine. A na yi a yee rafindi denaxan ma, a yi noon sotoma nen na ma. 48 Loxona nde, a yi keli a senbe gbeeni, a yi Amalekine no, a Isirayila xunba ne yii, naxanye yi a kalama. 49 Soli a dii xemene nan itoe ra: Yonatan nun Yisiwi nun Maliki-Suwa. A dii teme singen xili Merabi, a bolokadaan xili Mikali. 50 Soli a jaxanla yi xili nen Axinowami, Aximaasi a dii temena. A sofa kuntigin yi xili nen Abineri, Soli soxo Neri a dii xemena. 51 Kisu, Soli baba, e nun Neri, Abineri baba, Abiyeli a diin nan yi ne ra. 52 Yenge jaxin keli nen Filisistine xili ma Soli a mangayaan jeeene birin yi. Nanara, a nema fa senbemaan to hanma wekiledena, a bata a raso a ganli.

15 Samuyeli yi a fala Soli xa, a naxa, “Alatala n tan nan xexi i xunna masusandeni i sugandi xinla ma alo mangana Isirayila xun na, a yamana. Awa, i tuli mati Alatalaa falan na. 2 Alatala Senben Birin Kanna ito nan falaxi, a naxa, ‘Amalekine to kiraan bolon Isirayila kaane yee ra e yi minima Misiran yamanani waxatin naxan yi, n mi jinanxi na feen xon ma mume! 3 Awa iki, sa Amalekine yenge, e gbeen seen naxanye birin na, i yi ne kala fefe! I nama kininkinin, niimaseene birin faxes, xemene nun jaxanle, dii jorene nun dii futene, jingene nun yexeeene, jogomene nun sofanle.” 4 Soli yi ganla maxili, a e tenge Telayimi yi. Sofaan san masiga tiin muxu wuli keme firin yi na e nun Yuda xeme wuli fu. 5 Soli yi siga han Amaleki taani, a yi yengeni ton lanbanni. 6 A yi a fala Kenine xa, a naxa, “E e masiga, e keli Amalekine ye, alogo n nama e raxori e xon. Bayo e hinan nen Isirayila kaane ra, e to yi minima Misiran yamanani.” Kenine yi e masiga Amalekine ra. 7 Soli yi Amalekine yenge keli Xawila yi han Suru, Misiran sogeteden binna. 8 A yi Agaga Amalekine mangan jejnen suxu, a yi a yamaan birin faxes silanfanna ra fefe! 9 Soli nun a ganla yi Agaga lu a nii ra e nun a xuruse senseenne nun jingene nun yexeeene nun jinge diine nun yexee diine nun sube fajine birin. E mi tin ne faxe. Koni, naxanye mi yi fan, tono mi

yi naxanye ra, e ne faxes. 10 Nayi, Alatala yi falan ti Samuyeli xa, a naxa, 11 “N nimisaxi Soli doxo feen na mangayani, bayo a bata a xun xanbi so n tan yi, a mi n ma falane ligama.” Samuyeli yi xolo, a xi Alatala maxande kena ngan na. 12 Samuyeli yi keli xoton! A siga Soli ralandeni. E yi a fala a xa a Soli bata yi siga Karemele yi, alogo a xa sa xunnayeren gemen doxo a yete xa. A mon bata yi kiraan suxu a godo Giligali yi. 13 Samuyeli yi sa a li na yi. Soli naxa, “Alatala xa i baraka. N bata Alatalaa falane suxu.” 14 Samuyeli yi a fala, a naxa, “Nayi, yexee wuga xuiin mundun mema ito ra? Ningen mundun wuga xui ito ra?” 15 Soli yi yabin ti, a naxa, “Sofane nan faxi e ra sa keli Amalekine konni. E bata yexeen nun jinge senseenne ba a ye alogo e xa ba saraxan na Alatala xa, i ya Ala. Koni nxu a donxene birin faxes nen.” 16 Samuyeli yi a fala Soli xa, a naxa, “A lu na kiini! N xa a fala i xa Alatala naxan falaxi n xa to keen na.” Soli yi a fala, a naxa, “A fala n xa.” 17 Samuyeli yi a fala, a naxa, “A singeni i yi i yete mirixi muxu xurin nan na, iki i bata findi Isirayila bonsonne mangan na. Alatala nan i masusanxi, i findi mangan na Isirayila xun na. 18 Anu, Alatala bata yi i xe fena nde ra, a naxa, ‘Sa Amalekine, yulubi kanne raxori fefe! Sa e yenge han i yi e jan fefe!’ 19 Nanfera i mi i tuli mati Alatalaa falan na? Nanfera i yenge yi seene tongo, i fe jaxin liga Alatala yetagi?” 20 Soli yi Samuyeli yabi, a naxa, “N na Alatala xuiin name nen ki fajil! N bira nen a kiraan foxo ra a naxan yita n na, n yi Amalekine raxori fefe! Fo Agaga, e mangana, n yi fa a ra be. 21 Koni, sofane bata yexeeene nun jinge senseenne ba yenge yi seene ye, naxanye fan e ne ba se kala daxine ye, alogo e xa ba saraxan na Alatala xa, i ya Ala, Giligali yi be.” 22 Samuyeli yi a fala, a naxa, “Saraxa ganxine nun saraxane Alatala kenenje dangu a xuiin suxun na ba? En-en. Fala suxun dangu saraxane ra, yete magodon dangu konton turene ra. 23 Awa, muruten fan findixi yulubin nan na alo yiimatona, matandin fan jaxu alo suxure batuna. Bayo i bata i me Alatalaa falan na, a fan fa a mema i ra nen alo mangana.” 24 Nayi, Soli yi a fala Samuyeli xa, a naxa, “N bata yulubin ligal! N bata Alatalaa falane matandi, e nun i ya falane. N gaxu nen yamaan yee ra, n yi a xuiin name. 25 Iki n bata i mayandi, dija n yulubin ma, en birin xa xete alogo n xa Alatala batu.” 26 Samuyeli yi a fala a xa, a naxa, “N mi fa fama i foxo ra, bayo i bata i me Alatalaa falan na, Alatala yi a me i ra alo Isirayila mangana.”

27 Samuyeli yi a firifiri alogo a xa siga, koni Söli yi a suxu a domaan lenben ma, a bö. 28 Samuyeli yi a fala a xa, a naxa, “Alatala Isirayilaa mangayaan bama i yii na kiini to, a yi a so i ya muxuna nde yii, naxan dangu i tan na. 29 Ala, Isirayila binyen naxan yi, a mi wule, a mi a miriyane maxetema, bayo adamadi mi a ra.” 30 Söli mōn yi a yabi, a naxa, “N bata yulubin liga! Koni yandi, binyen sa n ma, fonne nun Isirayila yamaan yetagi, en birin xa xete n yi Alatala batu i ya Ala.” 31 Samuyeli nun Söli yi xete e bode xōn, Söli yi Alatala batu. 32 Samuyeli yi a fala, a naxa, “E fa Agaga ra n xa, Amalekine mangana.” Agaga yi a maso a binni sewani, a yi a falama a yete ma, “Saya xōlen bata jan yati!” 33 Koni Samuyeli yi a fala a xa, a naxa, “I ya silanfanna bata yi diine ba naxanle yii. Na kiini i nga a diin bama nen a yii.” Samuyeli yi Agaga yisege sege Alatala yetagi Giligali yi. 34 Samuyeli yi xete Rama yi, Söli yi xete a konni Gibeya yi. 35 Samuyeli mi fa Söli to han a faxa, bayo a yi sunuxi a fe ra. Alatala yi nimisa Söli sugandi feen na mangan na Isirayila xun na.

16 Alatala yi a fala Samuyeli xa, a naxa, “Han waxatin mundun yi i luye sunuxi Söli a fe ra? N tan yeteen bata n me a ra alo mangana Isirayila xun na. I ya ture sa fenna rafe, n bata i rasiga Yese konni, Betelemi kaana. N bata mangana nde sugandi a dii xemene ye.” 2 Samuyeli yi a fala, a naxa, “N sigama di? Söli a feen mama nen, a yi n faxa.” Alatala yi a fala, a naxa, “Ninge gilena nde xali i yii, i yi a fala, i naxa, ‘N faxi saraxa baden nin Alatala xa.’ 3 Yese xili saraxa bani, n na a yite i ra i lan i xa naxan liga. N na naxan yita i ra, i yi na kanna masusan a sugandi feen na mangan na.” 4 Alatala naxan fala, Samuyeli yi na liga a siga Betelemi yi. Taan fonne birin yi fa a raladeni e xuruxurunma gaxuni. E a maxodin, e naxa, “I faxi fe fajin nan na ba?” 5 A yi a fala, a naxa, “On, herin na a ra. N faxi saraxa baden nin Alatala xa. E e rasarijan, e fa n fema saraxa badeni. A yi Yese fan nun a diine rasarijan a e xili saraxa bani.” 6 Ne fa waxatin naxan yi, Samuyeli to Eliyabi to, a yi a miri, a naxa, “Alatala a tan nan sugandixi yati!” 7 Koni Alatala yi a fala Samuyeli xa, a naxa, “I nama i miri a tofanna ma hanma a kuyana, bayo n mi a tan sugandixi. Alatala mi feene yatema adamadiine naxanye yatexi. Adamadiine a yetagin nan matoma, koni Alatala muxun bönen nan matoma.” 8 Yese yi Abinadabo xili a a radangu Samuyeli yetagi. Samuyeli

yi a fala, a naxa, “Alatala mi ito sugandixi.” 9 Yese yi Sama radangu. Samuyeli yi a fala, a naxa, “Alatala mi ito fan sugandixi.” 10 Yese a dii soloferene radangu Samuyeli yetagi, koni Samuyeli naxa, “Alatala mi itoe sese sugandixi.” 11 Samuyeli mōn yi Yese maxodin, a naxa, “Banxulanna se mi fa be?” Yese yi a yabi, a naxa, “Xurimaan nan luxi, koni a sa xuruse rabadeni.” Nayi, Samuyeli yi a fala Söli xa, a naxa, “A xa sa fen, en mi donse donna fölōma a xanbi.” 12 Yese yi muxuna nde xe, a sa fa a ra. A fatin yi gbeeli, a yetagin yi rayabu, a ti kiin yi fan. Alatala yi a fala Samuyeli xa, a naxa, “Keli, i yi a masusan a sugandi feen na, bayo a tan na a ra.” 13 Samuyeli yi ture sa fenna tongo a Dawuda xunna masusan a tadane tagi. Fölo na löxōni, Alatalaa Nii Sarijanxin yi godo Dawuda ma senbeni. Samuyeli yi keli, a siga Rama yi. 14 Alatalaa Nii Sarijanxin bata yi mini Söli yi, yinna naxin yi lu a töre fata Alatala ra. 15 Söli a walikene yi a fala a xa, e naxa, “Ninan naxin nan i töroma keli Ala ma. 16 Nxu kanna xa falan ti. I ya walikene i sagoni. Nxu xemena nde fenje naxan fatan kondenna maxe. Ninan naxin na so i yi keli Ala ma, maxaseen yi maxa, na yi i bönen napan i ma.” 17 Söli yi yabin ti, a naxa, “Awa, e maxase maxa fajina nde fen n xa, e yi fa a ra.” 18 Walike keden yi a fala, a naxa, “N bata Yese Betelemi kaana dii xeme keden to naxan fatan kondenna maxe. Sofa kenden na a ra, a wekile han! A falan tima ki faji, a mōn tofan. Alatala a xōn.” 19 Söli yi xerane rasiga a faladeni Yese xa, a naxa, “I ya dii xemen Dawuda rafa n ma naxan xuruseene föxo ra.” 20 Yese yi sofali keden tongo, a burun nate a fari, e nun manpa kundi keden nun sii keden, a yi e birin so Dawuda yii Söli xa. 21 Dawuda yi fa a ti Söli yetagi, a rafan a ma han a findi a yenge so se maxanla nde ra. 22 Söli yi xeraan nasiga Yese ma, a naxa, “Tin, i xa Dawuda lu n yii, bayo a rafan n ma.” 23 Nayi, yinnan na yi so Söli yi keli Ala ma waxatin naxan yi, Dawuda yi kondenna tongoma nen a a maxa. Na yi Söli mafisama nen, a dundu, yinna naxin yi mini ayi.

17 Filisitine yi e ganle malan yenge so xinla ma. E yi e malan Soko yi, naxan Yuda böxōn ma. E yi e ganla malan Soko nun Aseka tagi, Efesi-Damimi yi. 2 Söli nun Isirayila muxune fan yi e ganla malan Ela lanbanni. E yi e ganla ti Filisitine yenge xinla ma. 3 Filisitine yi tixi गयाan fari föxo kedenni, Isirayila kaane fan गयाan fari föxo kedenni. Lanbanna yi e tagi. 4 Fala ralina nde yi mini Filisitine ye, a a maso

gali firinne tagi. A yi xili Goliyati, Gati kaan nan yi a ra. A yi kuya fɔ nɔngonna ye sennin nun yiin ye keden. 5 Sula komotin yi soxi a xun na, sula domaan xali daxin yi a fatin kantanma naxan kilo tonge sennin liye. 6 A sanne yi ye masansanxi sulan nan na. Sula silanfanna yi sotixi a fari. 7 A tanban feen yi gbo alo gbindonna. Wuren naxan yi na nɔe ra, a kilo solofere liye. A ye masansan wure lefaan suxu muxun yi sigan tima a yee ra. 8 A a xuini te, a falan nasiga Isirayila ganla ma, a naxa, “Nanfera e tixi yenge so xinla ma? Filisitina nde xa mi n tan na ba? E tan, Soli a konyine xa mi e ra ba? E muxu keden yita naxan gode n yengedeni. 9 Xa a nɔ n bɔnbe a n faxa, nxu findi e konyine ra. Xa n na a nɔ, n yi a faxa, e findi nxɔ konyine ra, e wali nxu xa.” 10 Filisiti xemmen mon yi a fala, a naxa, “N bata na xinla rasiga Isirayila ganle ma. Xeme keden xa mini, alogo nxu xa nxu bode yenge.” 11 Soli nun Isirayila kaane birin yi Filisiti xemmena falane me, gaxu gbeen yi e suxu. 12 Yese Efarata bɔnsɔnna dii xemmen nan yi Dawuda ra, naxan yi kelixi Betelemi taani Yuda bɔxɔn ma. Dii xeme solomasexe yi Yese yii. Soli waxatini, Yese bata yi findi fonna ra yamaan ye. 13 Yese a dii xeme singe saxanne bata yi siga Soli fɔxɔ ra yengeni. A singen yi xili Eliyabi, a firinden xili Abinadabo, a saxanden xili Sama. 14 Dawuda nan yi xurimaan na. Fori saxanne yi Soli fɔxɔ ra. 15 Dawuda yi sigama Soli konni a mon yi xetema a babaa xuruseene rabadeni Betelemi yi. 16 Xii tonge naanin, xɔtɔnna nun jinbanna, Goliyati Filisiti xemmen yi tima nen e yetagi. 17 Yese yi a fala a diin Dawuda xa, a naxa, “Donse xori benbenla nun buru xun funi itoe tongo, i yi e xali i tadane xɔn gali malandeni. 18 I mon yi fene kundi funi itoe sanba e sofa kuntigin ma. I mon yi a mato xa i tadane kende, i yi fa taxamasenna nde ra keli e ma. 19 E Soli fema Ela lanbanni e nun Isirayila xemene birin Filisitine yengedeni.” 20 Dawuda yi keli xɔtɔn xɔtɔn. A xuruseene taxu xuruse kantanna nde ra, a a goronne tongo, a siga, alo Yese a yamari kii naxan yi. A so gali malandeni waxatin naxan yi, a yi ganla li tixi yenge so xinla ma, e yenge sɔnxɔni tema. 21 Isirayila nun Filisitine yi e ganle ti yenge so xinla ma, kenenni 22 Dawuda yi a goronne taxu goron kantanna ra, ganla yi tixi denaxan yi a siga a giye menni. A to so, a a tadane xɔtɔn. 23 A yi fala tiini e ra waxatin naxan yi, Filisiti sofaan Goliyati Gati kaan yi a mafa a ganla yee ra. A mon yi a xuini te, a xete a dari fe xinli ito ma. Dawuda yi a me. 24 Isirayila kaane

birin yi e masiga e to Goliyati to, bayo e yi gaxuxi a yee ra ki faji. 25 Birin yi a falama, e naxa, “E bata xemeni ito to gode? A godoma Isirayila xili feen nan ma. Naxan na a faxa, mangan nafulu gbeen fiye a ma nen. A a dii temen fi a ma futun na, a mudu fiin ba a denbayaan xun ma Isirayila yi.” 26 Xemen naxanye yi Dawuda fema, a a fala ne xa, a naxa, “Nanfe lige na kannna xa naxan na Filisitini ito faxa, a yagin ba Isirayila ma? Nde Filisiti Ala kolontareni ito ra naxan susuxi habadan Alaa ganle makonbe?” 27 Yamaan yi xete falane ma, e naxa, “Ito nan ligama na kannna xa naxan na a faxa.” 28 Eliyabi, a tadan forimaan to e nun sofane to batuɛ, a xolo Dawuda ma han! A yi a fala, a naxa, “Nanfera i faxi be? I ya xuruse kurudin taxuxi nde ra burunna ra? N ni i ya yete yigboon kolon, e nun i ya bɔne jaxiyana. I faxi yengeni gbeden nin.” 29 Dawuda yi maxodinna ti, a naxa, “N nanse ligaxi a jaxin na? N fala tiin nin gbansan!” 30 A a xun xanbi so a tada yi a sofa gbete maxodin na kii kedenni. Yamaan yi a yabi alo a singena. 31 E na falane me Dawuda ra waxatin naxan yi e sa ne dentege Soli xa. Soli yi a xili. 32 Dawuda yi a fala Soli xa, a naxa, “Muxu yo nama yigitege Filisitini ito a fe ra. N tan, i ya walikeen sigama nen a yengedeni.” 33 Soli yi Dawuda yabi, a naxa, “I mi nɔe Filisitini ito yenge, bayo banxulan jɔren ni i ra, koni a tan, yenge soon na a ra xabu a dii jɔrena.” 34 Dawuda yi a fala Soli xa, a naxa, “N tan, i ya walikeen yi n baba xuruseene nan nabama. Xa yatana hanma jarina nde yi fa, a yexee keden suxu, 35 n yi n gima a fɔxɔ ra nen, n yi a bɔnbɔ, n yexeen ba a de ra. Xa a fa n xili ma, n yi a suxuma nen a xabene ma, n na a bɔnbɔ, a faxa. 36 I ya walikeen yi yatan nun jarin faxama na kii nin, awa n Filisiti Ala kolontareni ito ligama na kiini nen. Amasoto, a bata habadan Alaa ganle makonbi. 37 Alatala naxan n natangaxi yatan nun jarin yii xanle ma, na mon n be Filisitini ito yii nen.” Nayi, Soli yi a fala Dawuda xa, a naxa, “Siga, Alatala xa lu i xon.” 38 Soli yi Dawuda maxidi a yetena a dugine yi, a a maxidi a makantan domani, a sula komotin so a xun na. 39 Dawuda yi Soli a silanfanna singan a tagi xidin na a dugine fari. A yi keli a xa siga. Koni a mi yi darixi e ra. A yi a fala, a naxa, “N mi nɔe ito birin nasiga tiye, n munma fatan singe.” Dawuda yi e ba a ma. 40 A dunganna suxu a yii, a geme malaxunxin suulun sugandi xuden de. A e sa a yexee raba sagbaan kui. A lantanna a yii, a siga Filisiti sofaan xili ma. 41 Filisiti sofaan yi a maso

Dawuda ra ndedi ndedi, a ye masansan wure lefana maxanla fan yi sigama a yee ra. **42** A Dawuda mato, a yi a kolon a banxulan joreen nan mon yi Dawuda ra, a fatin yi gbeeli, a yetagin yi tofan. Goliyati yi a rajaxu. **43** Filisiti sofaan yi a fala Dawuda xa, a naxa, "Baredin nan n na ba? I to fama n xili ma e nun dunganna?" A yi a danga a suxurene yi. **44** A yi a fala, a naxa, "Fa be! N ni i suben soma nen xoline nun subene yii!" **45** Dawuda yi a fala Filisiti sofaan xa, a naxa, "I fama n xili ma silanfanna nun tanban nun xanla nan na i yii, koni n tan fama i xili ma Alatala Senben Birin Kanna nan xili yi, Isirayila ganle Ala, i naxan konbixi. **46** To, Alatala i soma nen n yii, n yi i no, n ni i xunna bolonje a de. To, n Filisitine ganla muxune binbine soma nen xoline nun subene yii, dunuja muxune birin yi a kolon a Ala Isirayila yi. **47** Yamani ito birin yi a kolon a Alatala mi marakisin tima silanfanna nun tanban barakani. Amasoto, Alatala nan gbee yengen na, a e tan birin soma nen nxu yii." **48** Goliyati yi lu fe Dawuda binni, Dawuda yi a mafura, a a gi siga Filisiti sofaan nalandeni. **49** Dawuda yi a yiin nagodo a sagbani, a gemen tongo, a a woli lantanna ra, a Filisiti sofaan golon a tigi ra. Gemen yi so Filisiti sofaan tigini, a bira a yetagin ma boxoni. **50** Na kiini, Dawuda yi Filisiti sofaan no lantanna nun gemen na, a a faxes, silanfan mi yi a yii. **51** Dawuda yi a gi han Filisiti sofaan dexon, a ti na. A Filisiti sofana silanfanna botin a teeni, a yi a faxes, a yi a xunna bolon a de. Filisitine to a to, a e yenge so kuntigin bata faxes, e yi e gi. **52** Isirayila nun Yuda sofane yi sonxoni te, e bira e foxo ra, e e kedi han Gati nun Ekiron so deen na. Filisiti sofane binbine yi biraxi Saarayimi kiraan xon han Gati nun Ekiron. **53** Isirayila kaane to xete Filisitine foxo ra, e e gali malanden seene tongo. **54** Dawuda yi Filisiti sofaan xunna tongo, a yi a xali Yerusalen taani. A sa Filisiti sofana yenge so seene sa a bubuni. **55** Soli Dawuda to sige waxatin naxan yi Filisiti sofaan nalandeni, a yi Abineri a gali xunna maxodin, a naxa, "Abineri, nde a dii banxulan joreen ni ito ra?" Abineri yi a yabi, a naxa, "N bata n kolo i niini, mangana, n mi a kolon." **56** Mangan yi a fala, a naxa, "A ye fen, naxan ma dii banxulanni ito ra." **57** Dawuda keli xanbini Filisiti sofaan faxadeni, Abineri yi a tongo a siga a ra Soli yetagi. Filisiti sofaan xunna yi suxi Dawuda yii. **58** Soli yi a fala a xa, a naxa, "Nde a dii i ra, banxulan jorena?" Dawuda yi a yabi, a naxa, "I ya walikeen Yese a diin nan n na, Betelemi kaana."

18 Soli yelin falan tiye Dawuda xa waxatin naxan yi, Yonatan nun Dawuda yi findi xoyimane ra. Yonatan yi Dawuda xanu alo a yetena. **2** Na loxon yeteni Soli yi Dawuda makankan a fema, a mi tin a siga a babaa banxini. **3** Yonatan yi layirin xidi e nun Dawuda tagi, bayo a bata yi a xanu alo a yetena. **4** Doma gbeen naxan yi a ma, a na ba, a a so Dawuda yii e nun a yenge so domana, e nun a silanfanna nun a xanla nun a tagi xidina. **5** Soli na yi Dawuda rasiga dede, a feen sonoyama nen. Soli yi tide matexin fi a ma yengesone xun na. Na yi rafan yamaan birin ma, hali Soli a kuntigine. **6** Ganla xetematona, Dawuda to bata yelin Filisiti sofaan faxes, Isirayila taane birin jaxanle yi mini Manga Soli ralandeni, e sigin sama, e e bodonma tanban xuiin nun maxase gbetene xuiin na, e sonxoma sewani. **7** Naxanle yi e bode yabima jaxanni, e naxa, "Soli bata muxu wuli keden faxes, Dawuda tan wuli fu." **8** Soli yi na feen famu kii jaxini a xolo kati! A yi a fala, a naxa, "E wuli fu nan soxi Dawuda yii, n tan wuli keden. A mi fa dasaxi sese ra fo mangayana." **9** Soli yi Dawuda rajaxu, folo na loxon ma. **10** Na xoton bode, yinna jaxin yi so Soli yi keli Ala ma. A yi waliyiya falane ti a banxin tagini. Dawuda yi kondenna maxama a xa alo a dari fena, Soli a tanban yi a yii. **11** Soli yi a tanban woli, a naxa, "N Dawuda sonxomma nen n na a sonxoxin lu banxin kanke." Koni Dawuda yi keli a bun ma doxona ma firin. **12** Soli yi gaxu Dawuda yee ra, bayo Alatala bata yi a rabepin a lu Dawuda xon. **13** Nanara, a yi Dawuda masiga a ra, a a findi sofa wuli fu kuntigin na. Dawuda yi lu sige yengeni gali xunna ra. **14** Dawuda a feene birin yi sonoyama, bayo Alatala yi a xon. **15** Soli to a to a yi noon sotoma tun, a gaxu a yee ra. **16** Koni Dawuda yi rafan Isirayila nun Yuda birin ma, bayo a tan nan yi tima e yee ra e yengene yi. **17** Soli yi a fala Dawuda xa, a naxa, "N ma dii teme singen ni i ra, Merabi. N na a fima nen i ma futun na. Koni i wekile han! I yi Alatala a yengene so." Soli yi a miri, a naxa, "N mi n yiini tema a xili ma. Filisitine xa na liga!" **18** Dawuda yi Soli yabi, a naxa, "Sese mi n tan na, sese mi n baba a bonsonna nun a denbayaan na Isirayila yi. Mangan xa findi n bitanna ra di?" **19** Soli a dii teme Merabi fi waxatin to a li Dawuda ma, a yi fi Adiriyeli ma, Mehola kaana. **20** Awa, Mikali, Soli a dii temena, Dawuda yi rafan a ma. E to na fala Soli xa, na yi a kenene. **21** Soli yi a fala, a naxa, "N na a fima a ma nen, alogo a xa findi a suxu feren na, alogo Filisitine xa a faxes."

Soli mōn yi a fala Dawuda xa a firindeni, a naxa, “I findima nen n bitanna ra to.” **22** Soli yi yamarini ito fi a walikene ma, a naxa, “E falan ti Dawuda xa luxunni. E a fala a xa, e naxa, ‘A mato i rafan mangan nun a kuntigine birin ma. Tin, i xa findi mangan bitanna ra.’” **23** E yi na fala Dawuda xa. Koni Dawuda yi yabin ti, a naxa, “E tan yee ra yi fe xurin na a ra ba? N findi mangan bitanna ra? Setaren nan n tan na, tōnō mi n na.” **24** Soli a walikene yi sa a yebe a xa Dawuda naxan falaxi. **25** Soli yi e yabi, a naxa, “E falan ti Dawuda xa, e naxa, ‘Mangan mako mi futu se ma, koni a xa sa Filisiti muxu keme banxulan a fa e kidin na, alogo a xa a gbeen nōxō a yaxune ra.’” Soli a kōteni, Dawuda yi faxama Filisitine barakan nin. **26** Soli a walikene yi sa na falane ti Dawuda xa. Dawuda yi wa a xōn a xa findi mangan bitanna ra. Benun waxatin naxan falaxi, **27** Dawuda yi keli e nun a fōxōrabirane, a sa Filisiti xeme keme firin faxesa. Dawuda yi fa e banxulan kidine ra, a yi a bereyaan defexin so mangan yii, alogo a xa findi mangan bitanna ra. Nayi, Soli yi a dii teme Mikali fi a ma a naxanla ra. **28** Soli to a to a Alatala Dawuda xōn, Dawuda mōn yi rafan a dii Mikali ma, **29** Soli yi gaxu Dawuda yee ra dangu a fōlōn na. A yi findi a yaxun na a siin dōnxen birin yi. **30** Na waxatini Filisitine kuntigine yi sigama yengeni Isirayila kaane xili ma. Ye yo ye, Dawuda yi nōn sōtōma yengeni dangu Soli a kuntigin bonne ra. A xinla yi te.

19 Soli yi a fala a dii Yonatan nun a kuntigine birin xa a Dawuda xa faxesa. Koni Dawuda yi rafan Yonatan ma han! **2** A yi a rakolon, a naxa, “N baba Soli wama i faxesa feni. A liga i yeren ma tila xōtōnni. I luxunden fen, i yi lu na yi. **3** N minima nen nxu nun n baba. Nxu tima nen xeen ma i luxunma dōnaxan yi. N ni i ya fe falama nen a xa. N na a kui feene kolon, n na a fala i xa.” **4** Yonatan yi Dawuda a fanna fala a baba Soli xa, a naxa, “I tan mangan na, i nama i ya walikeen Dawuda haken tongo, bayo a munma i hake tongo. A yetena a fapiin nan ligaxi i xa han! **5** Fayida a niin nan fi Filisiti sofaan Goliyati faxesa feni. Na lōxōni, Alatala yi nō gbeen fi Isirayila birin ma, i yi a to, i sewa. Nanfera i haken lige, i sōntaren wunla ramini tōjegeni, i Dawuda faxesa fufafu?” **6** Soli yi Yonatan xuiin name, a kōlō, a naxa, “N bata n kōlō habadan Alatala yi, Dawuda mi faxama!” **7** Yonatan yi Dawuda xili, a na falane yebe a xa. A Dawuda xali Soli fema, Dawuda mōn yi lu a fema alo a fōlōni. **8** Yengen mōn

yi fōlō. Dawuda yi siga Filisitine yengedeni. A e no fanga gbeen na, e e gi a yee ra. **9** Awa, yinna naxin yi so Soli yi keli Alatala ma. A yi a konni, a tanban suxi a yii. Dawuda yi kondeni maxani. **10** Soli yi kata Dawuda sōxōn feen na a tanban na, alogo a xa a sōxōnxin lu banxin kanke, koni Dawuda yi a masiga, tanban yi sōti banxin kanke. Dawuda yi a gi na kōeen na. **11** Soli yi sofane rasiga Dawuda a banxin nabilinden alogo a xa faxesa xōtōnni. Koni Dawuda a naxanla Mikali yi a rakolon a a fala a xa, a naxa, “Xa i mi i yete rakisi kōeni ito ra, xōtōnni i faxama nen.” **12** A yi a ramini banxin foye soden na. Dawuda yi a gi. A a solon na kii nin. **13** Na xanbi ra, Mikali yi suxurena nde tongo a a sa Dawuda a saden ma. A sii kidin sa a xun sade ra, a a sade dugin sa a ma. **14** Soli a xerane fa waxatin naxan yi Dawuda suxudeni, Mikali yi a fala e xa, a naxa, “A mi yalan.” **15** Soli mōn yi e rasiga a firindeni. A a fala e xa, a naxa, “E fa a ra n xōn a furema saden ma, alogo n xa a faxesa.” **16** Xerane mōn yi xete, e fa suxuren to saden ma, siin kidin nan yi saden xunna ra. **17** Soli yi a fala Mikali xa, a naxa, “Nanfera i n yanfaxi na kiini, i yi n yaxun lu a siga?” Mikali yi Soli yabi, a naxa, “A a fala n xa nen, a naxa, ‘Tin n xa siga, hanma n ni i faxesa.’” **18** Dawuda yi nō a giye, a siga Samuyeli konni Rama yi. Soli naxan birin liga a ra a na yebe a xa. Nayi, e birin yi siga e sa dōxō Nayoti yi. **19** E yi a dentege Soli xa a Dawuda Nayoti yi Rama dōxōn. **20** Soli yi sofane rasiga a suxudeni. Koni, ne to nabi ganla nde li nabiya fala tiini, Samuyeli yi tixi e yee ra, Alaa Nii Sarijanxin yi godo Soli a xerane ma, e fan yi nabiya falane ti fōlō. **21** Na yi fala Soli xa, a sofa gbete ye rasiga. Ne fan yi waliyiyaan fōlō. A mōn yi sofane xe a saxandeni, ne fan yi waliyiyaan fōlō. **22** Dōnxen na, Soli yeteen yi siga Rama yi. A Seku ige ramaraden li, a maxōdinna ti, a naxa, “Samuyeli nun Dawuda minen yi?” E a yabi, e naxa, “E Nayoti yi Rama dōxōn.” **23** Soli yi siga Nayoti binni Rama yi. Koni, Alaa Nii Sarijanxin yi fa a fan ma, Soli yi siga nabiya falane tiye han a so Nayoti yi. **24** A yi a dugin ba, a nabiya falane ti Samuyeli yetagi. A ragenla yi lu saxi yanyin nun kōena ngan na. Nanara, yamaan naxa, “Soli fan bata findi nabiin na ba?”

20 Dawuda yi keli Nayoti yi Rama dōxōn a sa Yonatan li. A a maxōdin, a naxa, “N nanfe ligaxi hanma n haken mundun ligaxi, hanma n yulubin mundun tongoxi i baba ma? Nanfera a wama n faxesa feni?”

2 Yonatan yi a yabi, a naxa, “A makuya na ra! I mi faxama! N baba mi fefe ligama a mi naxan falama n xa singen. Nanfera a ito luxunɛ n ma? Na mi a ra!” 3 Dawuda yi a kolo, a naxa, “I baba a kolon ki fani, a n bata rafan i ma. A a mirima iki, a naxa, ‘Yonatan nama ito kolon, a a tɔrɔma nɛn.’ Koni n bata n kolo habadan Alatala yi e nun i tan yi, a luxi ndedi n faxesa.” 4 Yonatan yi a fala Dawuda xa, a naxa, “Naxan xoli i ma n na lige i xa.” 5 Dawuda yi a yabi, a naxa, “Tila, Kike Nenen jaxaxanaxan na a ra. A yi daxa n xa dɔxo mangan fema nxu yi nxu dege nxu bode xɔn. Koni, a lu n xa siga, n yi n luxun xɛɛn ma han tila buda jinbanna ra. 6 Xa i baba a kolon a n mi be, i yi a fala, i naxa, ‘Dawuda n mayandixi nɛn a n xa tin a xa siga a taani Betelemi yi, bayo jɛɛn saraxan nan sa bama a xabilan birin xa na yi.’ 7 Xa a a fala, a naxa, ‘Na lanxi,’ nayi i ya walikɛɛn natangaxi. Koni xa a mɔnɛ, i xa a kolon a a waxi n tɔrɔ feen nin. 8 I ya hinanna yita i ya walikɛɛn na, bayo i bata layiri xidi n xa Alatala yetagi. Xa n bata findi hake kanna ra, i tan yetɛɛn xa n faxesa. Nanfera i n xalima han i baba fema?” 9 Yonatan yi a yabi, a naxa, “Na mi lige mume! Xa n yi la a ra a n baba bata a jɛnige a xa i faxesa, n na a falama nɛn i xa.” 10 Dawuda yi a fala Yonatan xa, a naxa, “Nde n nakolonma xa i baba yabi jaxin so i yii?” 11 Yonatan yi a fala, a naxa, “Fa be. En siga xɛɛn ma.” E mini, e siga e bode xɔn. 12 Yonatan yi a fala Dawuda xa, a naxa, “N bata Alatala, Isirayilaa Ala findi n seren na, waxatini ito yi, tila buda n nan n baba kui feene kolonma nɛn. Xa i mɔn nafan a ma, n tan nan na falama i xa. 13 Koni xa n baba wama i tɔrɔ feni, Alatala xa tɔrɔya jaxin sa n ma xa n mi a fala i xa, n yi i rasiga bɔjɛ xunbenli. Alatala xa lu i xɔn alo a lu n baba xɔn kii naxan yi. 14 Koni i tan xa Alatalaa hinanna yita n na n siin birin yi, alogo n nama faxesa. 15 I ya hinanna nama dan n bɔnsɔnna xa habadan, hali Alatala na i yaxune birin jnan bɔxo xɔnna fari.” 16 Nayi, Dawuda nun Yonatan yi layirin xidi, a naxa, “Alatala xa Dawuda gbeen jɔxo a yaxune ra.” 17 Yonatan mɔn yi Dawuda rakolo a xanuntenyana fe ra bayo a yi a xanuxi alo a yetɛɛn niina. 18 Yonatan yi a fala Dawuda xa, a naxa, “Tila, Kike Nenen jaxaxanaxan na a ra. E a kolonma nɛn a i mi be, bayo i dɔxɔdeni gelima nɛn. 19 Tila buda jinbanna ra, i sigama nɛn han i sa i luxun denaxan yi bode lɔxɔni i yi n legeden Eseli gemen fema. 20 N xalimakuli saxan wolima nɛn gemen dɔxɔn alo n seen nan matinxinna. 21 N banxulanna nde rasigama nɛn,

n yi a fala a xa, n naxa, ‘Sa xalimakunle tongo.’ Xa n na a fala a xa, n naxa, ‘Xalimakunle i bun ma be binni, e tongo!’ Nayi, i fa, amasɔto bɔjɛ xunbenla i xa, fefe mi ligama i ra, n bata n kolo habadan Alatala yi. 22 Koni xa n na a fala banxulanna xa, n naxa, ‘A mato, xalimakunle makuya pon,’ nayi siga, bayo Alatala bata i rasiga. 23 I nama jinan na feen xɔn de en naxan falaxi, Alatala nan seren na i tan nun n tan tagi han habadan!” 24 Nayi, Dawuda yi siga a luxundeni burunna ra. Kike Nenen jaxaxanaxan yi a li, mangan yi dɔxo a degedeni 25 alo mangan dari fena, a yi dɔxo gbedɛn ma naxan xun xanbi soxi banxini, Yonatan yetagi. Abineri yi dɔxo a dɔxɔn, koni Dawuda dɔxɔden yi gelixi. 26 Na lɔxɔni Sɔli mi sese fala, bayo a yi a miri, a naxa, “Dawuda mi nɔxi fe fata saripantareya fena nde ra. Saripantareyaan nan finde a ra.” 27 Koni na xɔtɔn bode, kiken xii firinden na, Dawuda dɔxɔden mɔn yi gelixi. Sɔli yi Yonatan maxodin, a naxa, “Nanfera Dawuda mi faxi a degedeni to nun xoro yi, Yese a diina?” 28 Yonatan yi Sɔli yabi, a naxa, “Dawuda n mayandixi nɛn a xa siga Betelemi yi. 29 A a falaxi nɛn, a naxa, ‘Yandi, a lu n xa siga, bayo n xabilan saraxa baani taani. N tada bata n xili na yi. Xa de fanna nan en tagi, a lu n xa sa n tadane to.’ Nanara, a mi faxi mangana a donse dondeni.” 30 Nayi, Sɔli bɔjɛn yi te Yonatan xili ma. A yi a fala a xa, a naxa, “Dii kalaxi murutɛxina! N na a kolon a i xoyin nan Yese a dii xemen na! I yagima nɛn, i nga fan yi yagi naxan i barixi. 31 Amasɔto fanni Yese a dii xemeni ito a nii ra, i ya fe mi sabate, i mɔn mi nɔɛ finde mangan na! Awa iki, i xa muxune xɛ, e xa sa fa a ra n xɔn, amasɔto a faxesa daxin na a ra!” 32 Yonatan yi Sɔli yabi, a naxa, “A xa faxesa nanfera? A nanfe ligaxi?” 33 Sɔli yi a tanban woli a xili ma alogo a xa a faxesa. Nayi, Yonatan yi a kolon, fa fala a baba yi wama Dawuda faxesa feni. 34 A xɔlɔxi gbeen yi keli tabanla ra, a mi donse don na kiken xii firinden, bayo a yi sunuxi Dawudaa fe ra, a baba naxan nayarabi. 35 Na xɔtɔn bode, Yonatan yi siga xɛɛn ma e nun Dawuda lanxi denaxan ma. Banxulanna nde yi biraxi a fɔxo ra. 36 A yi a fala a xa, a naxa, “I i gi yɛɛn na i xalimakunle malan n naxanye wolima.” Banxulanna yi siga a giye, Yonatan yi xalimakuli keden woli alogo a xa dangu banxulanna ra. 37 Banxulanna to Yonatan ma xalimakunla biraden li, Yonatan yi sɔnxɔ a xanbi ra, a naxa, “Xalimakunla mi makuya i ra ba?” 38 A mɔn yi sɔnxɔ, a naxa, “I mafura! Siga, iki sa! I nama i yiti

de!” Banxulanna yi xalimakunla tongo, a fa a kannna fema. **39** Banxulanna mi yi sese famuma, Yonatan nun Dawuda nan tun yi na famuma. **40** Yonatan yi a yenge so seene so banxulanna yii, a naxa, “Siga, e xali taani.” **41** Banxulanna keli xanbini na, Dawuda yi mini a luxundeni gemen yiifari foxon ma. A yi a xinbi sin Yonatan yetagi daxonja ma saxon, a yetagin yi lan boxon ma. E yi e bode sunbu, e wuga, katarabi Dawuda ma. **42** Yonatan yi a fala Dawuda xa, a naxa, “Siga boje xunbenli. A kolon, en bata en ma xoyiyaan nakolo Alatala xinli, en yi a fala, ‘Alatala nan seren na, i tan nun n tan tagi e nun n bonsonna nun i bonsonna tagi habadan!’” Dawuda yi keli a siga, Yonatan yi xete taani.

21 Dawuda yi siga Noba yi saraxarali Aximeleki konni. Aximeleki yi fa xuruxurunje gaxuni a ralandeni, a naxa, “Nanfera i keden na a ra? Nanfera muxe mi faxi i matideni?” **2** Dawuda yi saraxarali Aximeleki yabi, a naxa, “Mangan yamarin fixi n ma nen, a naxa, ‘Muxu yo nama feni ito kolon e nun n xeraan naxan soxi i yii.’ Nanara, n yi a fala n sigati bonne xa, a e xa naralan n na yire gbete yi. **3** Awa, nanse i yii be? Buru suulun so n yii hanma i noe naxan gbete sote.” **4** Saraxaraliin yi Dawuda yabi, a naxa, “Buru gbete mi n yii, koni buru ralixin be. Anu a mi noe donje xa i ya muxune mi e yete suxi waxati danguxini ito yi, e mi e maso naxanle ra.” **5** Dawuda yi a yabi, a naxa, “On yati, nxu danxin na a ra naxanle ma alo n darixi a lige kii naxan yi n na siga yengeni. N foxorabirane yenge so seene rasarijanxin na a ra, hali nxu mi Alaa wanla ra. To dakin sarijan dangu na ra pon!” **6** Nayi, saraxaraliin yi buru ralixine so Dawuda yii. Amasoto gbete mi yi na fo Buru Rasarijanxin naxan bata yi ferijen Alatala yetagi a batu banxini, a yi masara buru nenen na. **7** Na loxon, Sali a yexee kantanne kuntigin naxan yi xili Dowegi Edon kaana, na yi na yi Alatalaa wanla ra. **8** Dawuda mon yi a fala Aximeleki xa, a naxa, “Tanba mi i yii be hanma silanfanna? Bayo mangana xerayaan yi mafuraxi han, n mi noxi waxati sote n yi n ma silanfanna tongo hanma yenge so se gbete.” **9** Saraxaraliin yi a yabi, a naxa, “Goliyati a silanfanna be, i Filisiti sofaan naxan faxa Ela lanbanni. A saxi saraxarali domaan xanbi ra, a mafilinxi dugina nde yi. A tongo xa i wama a xon, na kedenna nan nxu yii be.” Dawuda yi a yabi, a naxa, “A boxon mi na. A so n yii.” **10** Na loxon, Dawuda

yi a gi Sali ma. A siga Akisi konni, Gati mangana. **11** Koni Akisi a walikene yi a fala a xa, e naxa, “Yamanan mangan Dawuda xa mi ito ra ba? Naxanle mi yi sigin sama ito xan xili xunna ba, e yi e bodon? E naxa, ‘Sali bata muxu wuli keden faxa, Dawuda tan wuli fu?’” **12** Dawuda yi falan ne sa a bojeni, a gaxu gbeen ti Akisi yee ra Gati mangana. **13** A yi a yete findi faton na e yetagi. A yi e taani waxatin naxan yi, a yi fatoyaan nan maligama, a sebenle ti deene ma, a a de igen namini a de xabene yi. **14** Akisi yi a fala a walikene xa, a naxa, “E a mato! Xemeni ito xunna mi dxi! Nanfera e faxi a ra n fema? **15** Daxune nan dasaxi n ma ba, e to faxi ito ra n fema, a yi n findi a daxuyaana sereyaan na? A mi soma n konni de!”

22 Dawuda yi keli Gati yi, a sa a luxun Adulan faranna ra. A tadane nun a babaa denbayaan to na me, e siga a foxo ra na yi. **2** Muxun naxanye toroxi, hanma donla naxanye ma, hanma naxanye murutexi, ne birin yi e malan a fema a findi e yeeratiin na. Na ma, xeme keme naanin boxondon yi lu a foxo ra. **3** Dawuda yi keli, a siga Misipe taani, Moyaba yi. A yi a fala Moyaba mangan xa, a naxa, “Tin n baba nun nga xa fa dxi i konni, han n yi a kolon Ala naxan ligama n na.” **4** Dawuda yi e xali Moyaba mangan konni, e lu na fanni Dawuda yi faran makantanxin na waxatin naxan yi. **5** Loxona nde Nabi Gadi yi a fala Dawuda xa, a naxa, “I nama lu faran makantanxin na. Siga Yuda yamanani.” Nayi, Dawuda yi keli, a siga Xereti fotonni. **6** Sali yi Dawuda nun a foxorabirane fe xibarun me. Sali yi dxi tamaro wudi binla bun ma, Gibeya yi geyaan fari. A tanban yi suxi a yii, a kuntigine birin yi tixi a fema. **7** Sali yi a fala e xa, a naxa, “E tuli mati, e tan Bunyamin kaane! Yese a dii xemen xene nun manpa bili nakone soe e yii ba? A e birin finde muxu wuli keden kuntigin na hanma muxu keme kuntigin na ba? **8** Awa, nanfera e birin n mayanfama? Muxu yo mi n nakolonma a n ma dii nun Dawuda bata layiri xidi, Yese a diina. E tan sese mi kontofilixi n ma fe ra? E mi n nakolonje fa fala n ma diin bata n ma walikene nadin n xili ma, a xa n legeden yanfani, alo a ligama kii naxan yi to?” **9** Koni, Dowegi Edon kaan naxan yi Sali a kuntigine ye, na yi a fala, a naxa, “N Yese a dii xemen to nen fe Noba yi, Aximeleki fema, Axituba a dii xemena. **10** Aximeleki Alatala maxodin a xa nen, a fandane so a yii e nun sofaan Goliyati Filisiti kaana silanfanna.”

11 Mangan yi muxune rasiga saraxaralina Aximeleki tongodeni Axitubaa diina, e nun a fafe xabilan birin. Ne nan yi saraxaraline ra Nob i yi. E birin yi fa mangan fema. **12** Soli yi a fala, a naxa, “I tuli mati, Axitubaa dii xemena.” A yi a ratin, a naxa, “N tan ni i ra, n kanna.” **13** Soli yi a fala a xa, a naxa, “Nanfera ε yanfan soxi n ma, ε nun Yese a dii xemena? I donseen so nen a yii e nun silanfanna, i yi Ala maxodin a xa, alogo a xa keli n xili ma, a n legeden yanfani alo a ligama kii naxan yi to.” **14** Aximeleki yi mangan yabi, a naxa, “Koni, nde i ya walikene ye naxan lannayaan nabama alo Dawuda, mangan bitanna, mangan kantan tiine kuntigina, e nun muxu binyena mangana a banxini? **15** A singen mi yi na ra n xa Ala maxodin a xa. A makuya na ra! Mangan nama n tan i ya walikeen kansun hanma n baba xabilan muxuna nde, bayo n tan i ya walikeen mi fefe kolon feni ito kui mumel!” **16** Mangan yi a fala, a naxa, “I faxama nen yati, Aximeleki, ε nun ε fafe xabilan birin.” **17** Mangan yi a kantan tiine yamari, naxanye yi tixi a fema, a naxa, “ε Alatalaa saraxaraline faxa, bayo ne fan Dawuda nan malima. E a kolon nen a Dawuda bata a gi, koni e mi n nakolon.” Koni Soli a walike yo mi tin a yiin dinje Alatalaa saraxaraline ra, a e faxa. **18** Nayi, mangan yi Dowegi Edon kaan yamari, a naxa, “I tan xa sa saraxaralini itoe faxa.” Dowegi yi a maso, a yi e faxa. Na loxonni, a yi muxu tonge solomasexe e nun suulun faxa naxanye lan e xa saraxarali domain so. **19** Soli mon yi fu saraxaraline taan ma, Nob i. A yi yihadin sa xemene nun jaxanle nun diidine nun dii jorene fari e nun jingene nun sofanle nun yexene birin. **20** Abiyatari, Aximeleki a dii xemena, Axituba mamandenna, na yi mini. A a gi siga Dawuda fema. **21** A yi a fala Dawuda xa a Soli bata Alatalaa saraxaraline faxa. **22** Dawuda yi a fala Abiyatari xa, a naxa, “Na loxonni, n to Dowegi Edon kaan to na yi, n yi a kolon a a mi yi taganje Soli rakolonje a i fafe n malixi. Nayi, n tan nan findixi i baba xabilan birin faxan sabun na! **23** Lu n fema be, i nama gaxu sese ra, bayo naxan wama i niin xon, na n fan gbeen xon. I rakantanma nen n fema.”

23 Muxune yi a fala Dawuda xa, e naxa, “Filisitine bata Keyila taan yenge, e maale mujama lonne ma.” **2** Dawuda yi Alatala maxodin, a naxa, “N xa siga Filisitini itoe yengedeni ba?” Alatala yi a yabi, a naxa, “Siga, i Filisitine noma nen, i yi Keyila rakisi.” **3** Dawuda foxarabirane yi a fala a xa, e naxa, “A

mato, gaxuna nxu yi be Yuda yi. Xa en siga Keyila yi Filisitine ganle yengedeni, a jaxuma ayi nen!” **4** Dawuda mon yi Alatala maxodin. Alatala yi a yabi, a naxa, “Keli, i siga Keyila yi, bayo n Filisitine soma nen i yii.” **5** Nayi, Dawuda nun a foxarabirane yi siga Keyila yi, e sa Filisitine yenge. E yi e xuruseene tongo, a kala gbeen sa Filisitine fari. Na kiini, Dawuda yi Keyila kaane rakisi. **6** Abiyatari Aximeleki a dii xemen fa waxatini Dawuda fema Keyila yi, a fa nen saraxarali domain na Ala maxodin sena. **7** Soli yi rakolon Dawuda fa feen ma Keyila yi, a yi a fala, a naxa, “Ala bata a so n yii, bayo a bata fa so taana nde yi yinna soxi naxan ma, naxan so deene balanxi wuren na.” **8** Soli yi ganla birin xili yengeni alogo e xa siga Keyila yi, e Dawuda nun a foxarabirane rabilin. **9** Dawuda to a kolon a Soli bata kote jaxini ton a xili ma, a yi yamarin fi saraxarali Abiyatari ma, a a xa fa saraxarali domain na alogo Ala xa maxodin. **10** Dawuda yi a fala, a naxa, “Alatala, Isirayilaa Ala, n bata a me a Soli a yitonma, a xa fa Keyila taan kaladeni n tan ma fe ra. **11** Keyila muxune n soe Soli yii ba? Soli fama nen taan kaladeni alo n na a mexi kii naxan yi ba? Alatala, Isirayilaa Ala, yandi, n yabi.” Alatala yi a yabi, a naxa, “A fama nen.” **12** Dawuda mon yi a fala, a naxa, “Keyila muxune nxu nun n foxarabirane soma nen Soli yii ba?” Alatala yi a yabi, a naxa, “On, e a ligama nen.” **13** Nayi, Dawuda nun a foxarabirane yi keli Keyila yi, muxu keme sennin jaxondon. E yi siga e xun xon. Soli to a me a Dawuda bata a gi taani, a mi fa siga. **14** Dawuda yi sa doxo Sifi tonbonna गयाan yire makantanxine yi. Ye yo ye, Soli yi a fenma nen tun, koni Ala mi tin a soe a yii. **15** Dawuda yi a toxi yati a Soli yi sigama yengeni alogo a xa a faxa, koni a lu Xoresa, Sifi tonbonni. **16** Nayi, Yonatan Soli a dii xemen yi siga Dawuda fema Xoresa yi a a mali a xa fangan soto Ala yi. **17** A yi a fala, a naxa, “I nama gaxu sese ra, n baba Soli mi no sotoma i suxu feen ma. I tan nan findima mangan na Isirayila yi, n tan yi findi i bundaxon na. N baba yetena a kolon.” **18** E birin yi layirin xidi Alatala yetagi. Dawuda yi lu Xoresa yi, Yonatan yi xete a konni. **19** Sifi kaane yi keli, e sa Soli li Gibeya yi, e yi a fala a xa, e naxa, “I mi a kolon a Dawuda luxunxi nxu konni yire makantanxine yi, Xoresa yi, Xakila गयाan fari, Yesimon yiifari foxoni? **20** Nayi, fa nxu konni mangana, amasoto i rafanna nan na ra. Nxu a soe mangan yii.” **21** Soli yi a fala, a naxa, “Alatala xa ε baraka, ε to kininkinixi n ma. **22** Iki

ε mən xa siga fe yitəndeni, ε a fe xibarune kolon. Ε yi a kolon a darixi sigē kiraan naxanye xən e nun muxun naxanye a toxi na yi. Bayo n bata a mē fa fala a kōta. **23** Ε a luxundene birin nakərsi a darixi sigē denaxan yi. Ε mən yi fa xibaru kenden na n xən. En birin sigē. Xa a yamanani, n na a fenjē Yuda xabilane birin yi.” **24** Sifi muxune yi keli e xetē e konni Sōli yēē ra. Na waxatini Dawuda nun a fəxərabirane yi Mayon tonbonni, Araba yamanani, Yesimon yiifari fəxəni. **25** Sōli nun a sofane yi siga Dawuda fendeni. Dawuda to a mē, a yi siga gēmē yireni, a sa dəxə Mayon tonbonni. Sōli to na mē, a bira Dawuda fəxə ra Mayon tonbonni. **26** Sōli yi sigama geyaan fəxə kedenni, Dawuda nun a fəxərabirane yi fəxə kedenni. Dawuda yi a gima a xa keli Sōli bun ma. Sōli nun a sofane yi kataxi Dawuda nun a fəxərabirane rabilindeni alogo e xa e suxu. **27** Koni xera keden yi fa a fala Sōli xa, a naxa, “Fa mafuren! Filisistine bata so bəxəni.” **28** Sōli yi xetē Dawuda fəxə ra, a siga Filisistine ralandeni. Nanara, mēna yi xili sa, “Mayitaxun Gēmēna.” **29** Dawuda yi keli na yamanani, a sa dəxə marakantan yirene yi En-Gedi yamanani.

24 Sōli xetē waxatin naxan yi sa keli Filisistine fəxə ra, e yi a fala a xa, e naxa, “Dawuda En-Gedi tonbonni.” **2** Sōli yi sofa yebaxin wuli saxan tongo Isirayila ganla yē, a siga Dawuda nun a fəxərabirane fendeni, Sii Kōtə Gēmēne dēxən. **3** A yi danguma yēxēē kulana ndee dēxən ma, a yi faranna nde to na yi. Sōli yi so taa fanna ma mēnni. Koni Dawuda nun a fəxərabirane yi luxunxi na faranna kui pon! **4** Dawudaa muxune yi a fala, e naxa, “Waxati falaxin ni ito ra Alatala xən, a to a fala i xa, a naxa, ‘N ni i yaxun soma nēn i yii, i yi i waxən feen liga a ra.’” Nayi, Dawuda yi a maso Sōli ra dəjnin! A yi a domaan lenben xaba a ra. **5** Koni a to na liga, a yi nimisa han! Amasəto, a bata yi Sōli a doma lenben xaba a ra. **6** A yi a fala a fəxərabirane xa, a naxa, “Alatala xa n natanga na fe sifan ligadeni n kanna ra, Alatalaa muxu sugandixina. N mi n yiin dīnjē a ra amasəto Alatala nan a sugandixi mangan na.” **7** Nayi, Dawuda yi a fəxərabirane maxadi alogo e nama Sōli suxu. Sōli yi mini faranna ra, a kiraan suxu. **8** Na xanbi ra, Dawuda yi keli a mini faranna ra. A yi lu sənəxə Sōli fəxə ra, a naxa, “Mangana, n kannal!” Sōli to a xanbi rato, Dawuda yi a xinbi sin a yetagi, a yetagin yi lan bəxən ma. **9** Dawuda yi a fala Sōli xa, a naxa, “Nanfera

i tuli matima muxune ra naxanye a falama a n wama i tərə feni? **10** I bata a to i yēēne ra a Alatala bata yi i so n yii to faranna ra. Ndee a fala nēn a n xa i faxa, koni n yi dīja i ma, n yi a fala, n naxa, ‘N mi n yiiin tema n kanna xili ma, amasəto Alatala nan a sugandixi.’ **11** I yēēn ti, baba, i ya doma lenben mato n yii. N bata i ya doma lenben xaba, koni n mi i faxaxi. A kolon, i la a ra, n sənna mi a ra, murute mi n yi. N mi hake ligaxi i ra. Koni i tan n niin fəxə ra, alogo i xa n faxa. **12** Alatala xa kitin sa en tagi, Alatala xa n gbeen fəxə i ra, koni n tan mi n yiin dinma i ra. **13** Sandan naxa, ‘Naxun kelima jaxulane nan ma.’ Nanara, n tan mi fe jaxin ligama i tan na. **14** Isirayila mangan kelixi nde xili ma? I biraxi nde fəxə ra? Bare faxaxin ba? N tan luxi i tan yēē ra yi nēn alo dōwēna. **15** Alatala xa findi en ma kitin saan na, a kitin bolon i tan nun n tan tagi. A xa n mato, a yi n xun mayēngē, a findi n ma kitisaan na, a n ba i yii.” **16** Dawuda yelin falan tiyē waxatin naxan yi, Sōli yi maxədinna ti, “I tan nan yati xui ito ra ba, n ma dii Dawuda?” Sōli yi a xuini te a wuga. **17** A yi a fala Dawuda xa, a naxa, “I tinxin dangu n na, amasəto i bata fe fajin liga n xa, n tan bata i tərə. **18** I bata fanna yita n na to, i naxan ligaxi n xa. Bayo Alatala bata yi n so i yii koni i mi n faxa. **19** Xa muxuna nde a yaxun li, a tinjē a yi siga bənjē xunbenli ba? Alatala xa i saren fi i naxan ligaxi n xa to. **20** Iki, n na a kolon i mangayaan sətəma nēn, Isirayila bəxən birin yi lu i yii. **21** Awa, i kələ n xa Alatala yi fa fala n na faxa, i mi n yixetene faxē. I nama n xinla ba n xabilan muxune yē.” **22** Dawuda yi a kələ Sōli xa. Sōli mən yi xetē a konni, koni Dawuda nun a fəxərabirane yi te marakantan yireni.

25 Samuyeli yi faxa, Isirayila birin yi e malan a wugadeni. E a maluxun a dəxədeni Rama yi. Na xanbi ra, Dawuda yi siga Paran tonbonni. **2** Nafulu kan gbeena nde yi Mayon taani naxan yi walima Karemele yi. Yēxēē wuli keden e nun sii wuli keden yi a yii, a yi ne nan xabene maxabama Karemele yi. **3** Na xēmēn yi xili Nabali, a jaxanla xili Abigayili. Na jaxanla xaxinla yi fan, a yi tofan, koni a xēmēn yi yē xədxə, a jaxu. A yi Kalebi bənsənna nin. **4** Dawuda yi a me tonbonni a Nabali a yēxēēne xaben maxabama. **5** A yi banxulan fu rasiga a ma, a a fala ne xa, a naxa, “E siga Nabali fəma Karemele yi. E a xəntən n xa, **6** ε yi ito fala a xa, ε naxa, ‘Ala xa herin fi i ma. Ala xa herin fi i ya denbayaan ma. Ala xa herin lu i yii seene birin yi!

7 Dawuda bata a me a yexee xabe maxabane i konni. E nun i ya xuruse rabane waxatin naxan birin tixi Karemele yi nxu fema, nxu mi sese jaxi liga e ra, e sese mi loxi ayi. 8 I noe i ya walikene maxodinje, e a fale i xa. Nanara, Dawuda i maxandima, a naxa, "I ya fanna yita n ma banxulanne ra, amasoto nxu faxi sali loxon nan ma fe ra." Nayi, n bata i maxandi, nxu tan, i ya walikene ki e nun i ya dii Dawuda, i noe naxan sote." 9 Dawuda foxorabirane to so, e yi na falane yeba Nabali xa Dawuda xili xunna. Na xanbi ra, e yi e dundu. 10 Koni Nabali yi Dawuda a walikene yabi, a naxa, "Nde Dawuda ra? Nde Yese a diin na? Konyi wuyaxi na to naxanye e gima e kanne konna ma. 11 Nanfera n tan n ma burun nun n ma igen nun suben tonge, n naxan nafalaxi n ma yexee xabe maxabane xa, n yi a so muxune yii n yeteen mi naxanye kelide kolon?" 12 Dawuda foxorabirane yi xete. E to so, e fa Nabali a falane birin dentege. 13 Nayi, Dawuda yi a fala a foxorabirane xa, a naxa, "Birin xa a silanfanna singan a tagi xidin na." E birin yi silanfanna xidi e tagi. Dawuda fan yi a gbeen tongo. Xeme keme naanin joxon yi te a foxo ra. Keme firin yi lu goronne fema. 14 Nabali a walike keden yi fa a fala Abigayili xa, a kanna a jaxanla, a naxa, "Dawuda bata xerane rasiga nxu kanna xontondeni sa keli tonbonni koni a e makonbixi nen ki faji! 15 Anu, muxuni itoe fan nen nxu ra ki faji, e mi fe jaxi yo liga nxu ra. Nxu waxatin naxan birin naba e dexon ma burunna ra, nxo sese mi lo ayi. 16 Nxu waxatin naxan birin naba e fema xuruse rabadeni, e nxu kantan nen alo sansanna kee nun yanyin na. 17 Awa iki, i miri ki faji i lan i xa naxan liga, bayo toron nan nagidixi en kanna ma e nun a denbayana ngan ma. Fuyantenna na a ra, falan mi fa noe tiye a xa." 18 Abigayili yi a mafura, a buru keme firin tongo e nun manpa kundi firin, yexee yitonxin suulun, se kee gilinxin ligaseen ye suulun, bogise xare xonna ligaseen ye keme e nun xode bogi xaren ligaseen ye keme firin. A yi e rate sofanle fari. 19 A yi a fala a walikene xa, a naxa, "E dangu n yee ra, n xa bira e foxo ra." Koni, a mi sese fala a xemen Nabali xa. 20 A yi doxi a sofanla fari, a godoma geyana nde lanbanni, Dawuda nun a foxorabirane yi fa a mabinni, a yi naralan e ra. 21 Dawuda bata yi a fala, a naxa, "N bata xemeni ito yii seene kantan tonbonni fufafu! Sese mi loxi ayi, koni a bata n ma wali fajin saren fi a jaxin na. 22 Nayi, benun tila xotonni xa n Nabali a banxulanndu nde lu a konni, Ala xa toro gbeen nagidi n

ma!" 23 Abigayili to Dawuda to, a godo a sofanla fari mafuren, a a xinbi sin Dawuda yetagi, a yetagin yi lan boxon ma. 24 A yi lu a san bun ma, a naxa, "Hakeni ito goronna xa lu n tan nan xun ma n kanna, n keden pel Yandi tin, n xa falan ti i xa! A rame n naxan falama. 25 N kanna, i nama Nabali fuyantenna rame. A luxi alo a xinla, a xili bunna neen 'Komona,' seen nan soxi ayi. Koni, n tan i ya walikena, n mi banxulanne to n kanna naxanye rafa. 26 Iki, n kanna, n bata n kolo habadan Alatala yi e nun i fan niini, Alatala nan i ratangaxi gbalon ma, alogo i nama faxan ti, i yi i yete gbeen joxo. Ala xa i yaxune birin liga alo Nabali e nun muxun naxanye birin waxi i toro feni, n kanna. 27 Tin n ma finmaseene ra n faxi naxanye ra n kanna xa, e xa yitaxun i foxorabirane ra. 28 N bata i mayandi, dija n ma fe kalaxine ma. N na a kolon a Alatala mangayaan fima nen i ya denbayaan ma, bayo n kanna Alatala a yengene soma. Naxun nama taran i tan yi i siin birin yi. 29 Adamadina nde bata keli i sagatandeni, a xa i faxa, koni Alatala, i ya Ala i kantanma nen, a i lu kende muxune ye. Koni a yaxune niin nawolima ayi nen pon, alo a na a woli lantanna ra. 30 Alatala na a fala fajine birin nakamali a naxanye tixi n kanna xa, a i findima nen Isirayila yeeratiin na. 31 Na waxatini n kanna nama nimisa, a toro a bojeni, bayo a bata faxan ti fuyanni, a a yete gbeen joxo. Alatala na a fanna yita n kanna ra, a walike jaxanla a fe xa rabira a ma." 32 Dawuda yi a fala Abigayili xa, a naxa, "N barikan birama Alatala xa, Isirayilaa Ala, naxan i rafaxi to n nalandeni. 33 N bata i fan ma xaxilimayaan matexo, n duba i xa. Bayo i tan nan n natanga faxa tiin ma, n mi n yete gbeen joxo. 34 Koni, n bata n kolo habadan Alatala yi, Isirayilaa Ala, naxan n natangaxi fe jaxin liga feen ma, xa i mi yi fa n nalandeni nun, benun tila xotonni Nabali a banxulanndu keden mi yi luye a nii ra." 35 Abigayili fa naxanye ra Dawuda yi tin ne ra, a a fala a xa, a naxa, "Xete i konni boje xunbenli. A mato, n bata i xuiin name, n yi i ya falan nasuxu." 36 Abigayili Nabali feman li waxatin naxan yi, a yi jaxajaxan nabama a banxini alo mangane a rabama kii naxan yi. Nabali yi sewaxi, a xunna kelixi dolon na han! Nanara, a mi sese fala a xa han xotonni. 37 Koni xotonni, Nabali xunna to doxo, a jaxanla yi a fala a xa naxan danguxi. Nabali bojen yi din a fatin yi faxa a ma. 38 Xii fu joxon to dangu, Alatala yi Nabali bonbo a yi faxa. 39 Dawuda yi a me a Nabali bata faxa, a yi a fala, a naxa, "N barikan birama Alatala xa naxan

n xun mayengexi marayarabini Nabali naxan sa n fari. A bata a walikeen natanga jaxun ma, a Nabali a jaxun naxete a yete ma.” Dawuda yi xeraan nasiga Abigayili ma, a a xa findi a jaxanla ra. **40** Dawudaa walikene to Karemele li, e a fala Abigayili xa, e naxa, “Dawuda nan nxu rafaxi i fendeni alogo i xa findi a jaxanla ra.” **41** Abigayili yi a xinbi sin e yetagi, a yetagin yi lan boxon ma, a naxa, “N tan ni i ra i ya konyi jaxanla, n yitonxi findideni i ya walikeen na, n yi i ya walikene sanna maxa.” **42** Abigayili yi keli mafuren, a te sofanla nde fari, sungutun suulun yi biraxi a foxo ra, e nun Dawudaa xerane yi siga, a findi a jaxanla ra. **43** Dawuda bata yi Axinowami, Yesereli kaan fan tongo e birin yi findi a jaxanle ra. **44** Koni, Dawudaa jaxalan singen tan, Mikali, Soli a dii temena, a baba bata yi a fi futun na Paliti ma, Layisi Galin kaana a dii xemena.

26 Sifi kaane yi siga Soli fema Gibeya yi, e a fala a xa, e naxa, “Dawuda luxunxi Xakila geyaan fari, Yesimon yetagi.” **2** Soli yi kiraan suxu siga Sifi tonbonni alogo a xa Dawuda fen e nun Isirayila sofa yebaxi wuli saxan. **3** A yi a gali malandeni ton kiraan dexon Xakila geyaan fari, Yesimon yetagi. Dawuda yi doxi tonbonni. A to a kolon a Soli bata fa a foxo ra, **4** a yi tegerenne rasiga alogo e xa Soli a feene rakorosi. Ne yi a kolon a Soli bata so. **5** Nayi, Dawuda yi keli, a siga Soli a gali malandeni. A yi a to Soli yi saxi denaxan yi, e nun Abineri, Neri a dii xemena, a gali xunna. Soli yi xima gali malanden tagini, ganla yi a rabilinni. **6** Dawuda yi maxodinna ti, a a fala Xiti kaana Aximeleki nun Abisayi, Seruyaa dii xemena, Yowaba tada xa, a naxa, “Nde fe n foxo ra han Soli a gali malandeni?” Abisayi yi a yabi, a naxa, “N tan fe i foxo ra.” **7** Koeen na, Dawuda nun Abisayi yi siga gali malandeni. E yi Soli li saxi, a xima, a tanban sotixi boxoni a xun sade ra. Abineri nun sofane yi xima a rabilinni. **8** Abisayi yi a fala Dawuda xa, a naxa, “To, Ala bata i yaxun so i yii. A lu n xa a soxon, n na a rakankan boxoni n ma tanban ye keden peen na. N mi sinje firin.” **9** Koni Dawuda yi a fala Abisayi xa, a naxa, “I nama a faxes. Nde noe Alatalaa muxu sugandixin faxe, a mi yulubi tongo?” **10** Dawuda yi a fala, a naxa, “N bata n kolo habadan Alatala yi. Alatala yeteen nan a faxama, a siimayaan yi dan, a faxes na kiini hanma a a faxes yengeni. **11** Koni Alatala xa n natanga a muxu sugandixin faxes feen ma. A tanban gbansanna tongo

a xun sade ra e nun min ige sa sena. En siga.” **12** Dawuda yi tanban nun ige sa seen tongo Soli xun sade ra, e siga. Muxu yo mi a to, hanma a fena nde kolon. Muxu yo mi xulun, birin yi xima, bayo Alatala bata yi xixoli gbeen nagodo e ma. **13** Dawuda yi dangu bode foxon na, a ti geya xuntagi yire makuyeni, e tagi kuya ki fajni. **14** Dawuda yi ganla nun Abineri xili, Neri a diina, a naxa, “Abineri, i mi n yabe ba?” Abineri yi yabin ti, a naxa, “Nde i tan na, i tan naxan soxoma mangan xilideni?” **15** Dawuda yi a fala Abineri xa, a naxa, “Xeme mi i ra ba? I jaxon mi na Isirayila yi. Nayi, nanfera i mi mangan kantanma, i kanna? Muxuna nde bata fa mangan faxadeni, i kanna. **16** I naxan ligaxi ito ra a mi fan. N bata n kolo habadan Alatala yi, i lan i xa faxes, e to mi e kanna kantanxi, Alatalaa muxu sugandixin. A mato iki, mangana a tanban nun a ige sa seen minen yi, naxanye yi a xun sade ra?” **17** Soli yi Dawuda xuiin kolon, a yi a fala, a naxa, “Dawuda, n ma diina, n ni i tan nan xui mema ba?” Dawuda yi a yabi, a naxa, “N tan nan yati a ra mangana, n kanna. **18** Nanfera n kanna biraxi a walikeen foxo ra? N nanse ligaxi, fe jaxin mundun n kewanle yi? **19** Mangana, n kanna, yandi i ya walikena a falane rame. Xa Alatala nan i radinma n xili ma, a xa tin saraxan na. Koni xa muxune na a ra, e xa danga Alatala yetagi, bayo e n kedima to, e n masiga Alatalaa boxon na, e naxa, ‘Sa ala xopene batu.’ **20** Koni n tan, n mi waxi faxes feni yireni naxan makuya Alatala batuden na. Isirayila mangan bata siga yengeni boxo yi kunla doronna a fe ra, alo ganban fenje kii naxan yi burunna ra.” **21** Soli yi a fala, a naxa, “N bata yulubin tongo. N ma dii Dawuda, i mon xa xete. N mi fa fe jaxin ligama i ra, bayo i n niin natanga to. N bata a liga alo xaxilitarena yati! N bata tantan gbeen ti.” **22** Dawuda yi yabin ti, a naxa, “Mangana a tanban ni i ra. I ya banxulanna keden xa fa a tongo. **23** Alatala muxun birin ma tinxinyaan nun togondiyaan saren fima. To, Alatala i so nen n yii, koni n mi tin Alatalaa muxu sugandixin faxes feen ma. **24** Bayo to, n bata i niin yate, Alatala xa n niin yate, a n xunba toron birin ma.” **25** Soli yi a fala Dawuda xa, a naxa, “Ala xa i baraka, n ma dii Dawuda. I fe gbeene ligama nen, i noon sotoma nen yati!” Dawuda yi siga a danna, Soli fan yi xete a konni.

27 Dawuda yi a miri, a naxa, “Laxona nde Soli n faxama nen. A lan n xa n gi, n siga Filisitine

yamanani. Nayi, Söli mi n sagatanye Isirayila böxön birin yi, n mən yi n ba a yii.” 2 Dawuda yi keli, e nun a föxörabira keme senninna, a siga Akisi konni, Mawoki a dii xemena, Gati mangana. 3 E birin yi döxo Gati yi, Akisi fema. Birin nun a denbayaan nan yi a ra. Dawudaa jaxalan firinne fan yi a fema, Axinowami Yesereli kaana, e nun Abigayili, Karemele kaana, Nabali a kaja gilena. 4 Söli to a me a Dawuda bata sa a gi Gati yi, a yi ba fenje. 5 Dawuda yi a fala Akisi xa, a naxa, “Xa n nafan i ma, yirena nde xa so n yii banxidena nde ra, n döxe denaxan yi. Amasoto nanfera i ya walikeen döxe i fema manga taani?” 6 Na löxön yeteni, Akisi yi Sikilaga so a yii. Nanara, han to Sikilaga findixi Yuda mangane gbeen na. 7 Dawuda yi lu Filisistine yamanani jee keden kike naanin. 8 Dawuda nun a föxörabirane yi yengen nakeli Gesuri kaane xili ma, e nun Girisi kaane nun Amalekine. Amasoto, ne siyane yi doxi na böxöni Suru binni siga han Misiran yi xabu waxati xunkuye. 9 Dawuda yi fuma na yamanana nde ma nen, jaxanla nun xemena, a mi sese lu a nii ra. A yi yexxene nun jingene nun sofanle nun jögömene nun dugine tongoma, a mən yi xete Akisi fema. 10 Akisi yi a maxodinma, a naxa, “E yengen nakelixa nde xili ma to?” Dawuda yi a yabi, a naxa, “Yuda böxön yifari föxön xili ma” hanma “Yerameeline böxön yifari föxön xili ma,” hanma “Kenine böxön yifari föxön xili ma.” 11 Xemen nun jaxanla, Dawuda mi yi sese luma a nii ra, naxan nöfe Gati yi, bayo a yi a mirixi, a naxa, “E nöfe feene fale nxu xili ma nen, e a fale, ‘Dawuda a liga ikiini.’” A yi a ligama na kii nin a waxatin naxan birin ti Filisistine yamanani. 12 Nanara, Akisi yi laxi Dawuda ra han! Bayo a yi a mirixi nen, a naxa, “Dawuda bata Isirayila kaane raxolo han! Nayi, a findima nen n ma walikeen na habadan!”

28 Na waxatini, Filisistine yi e sofane malan a findi gali kedenna ra siga Isirayila yengedeni. Akisi yi a fala Dawuda xa, a naxa, “A kolon ki fajni a e nun i föxörabirane luma nen n ma ganla ye.” 2 Dawuda yi Akisi yabi, a naxa, “Nayi, i yetena a toma nen i ya walike naxan ligama.” Akisi yi a fala Dawuda xa, a naxa, “Nayi, n na i tongoma nen n yeteen kantan muxun na n siin birin yi.” 3 Samuyeli bata yi faxa, Isirayila birin bata yi a saya feene liga, e yi a maluxun a taani Rama yi. Söli bata yi koron bönböne nun yiimatone kedi yamanani. 4 Filisistine yi e malan e

fa kuru Sunami taani. Söli yi Isirayila birin malan Gilibowa yi. 5 Söli Filisistine ganla to waxatin naxan yi, a gaxu, a böjnen yi mini. 6 Söli yi Alatala maxodin, koni Alatala mi a yabi xiyeni, a mi a yabi saraxaraline masensen ti seene yi, a mi a yabi nabine xön. 7 Söli yi a fala a walikeen xa, a naxa, “E jaxanla nde fen n xa naxan falan tima barinne ra, alogo n xa sa a maxodin.” A walikene yi a fala a xa, e naxa, “Na nde sa En-Döri.” 8 Söli yi a maxidi alo muxu gbete, a doma gbete so. E nun a föxörabira firin yi so jaxanla konni köeen na. A yi a fala a xa, a naxa, “N wama nen i xa barinna nde maxodin n xa. N na naxan mataxamaseri i xa, i na ramini.” 9 Koni jaxanla yi a yabi, a naxa, “I a kolon ki fajni Söli naxan ligaxi. A bata koron bönböne nun yiimatone jän yamanani. I katama n mayenden feen nan na alogo n fan xa faxa ba?” 10 Söli yi a kölo Alatala yi, a naxa, “N bata n kölo i xa habadan Alatala yi, fefe mi i söte feni ito yi.” 11 Naxanla yi a fala, a naxa, “I waxi n xa nde yita i ra?” A yi a yabi, a naxa, “Samuyeli yita n na.” 12 Naxanla Samuyeli to waxatin naxan, a yi gbelegbele, a yi a fala Söli xa, a naxa, “Nanfera i n yanfaxi? I tan nan Söli ra!” 13 Mangan yi a fala a xa, a naxa, “I nama gaxu, koni i nanse toma?” Naxanla yi a fala Söli xa, a naxa, “N barinna nde nan toma mine böxön bun.” 14 A yi a fala a xa, a naxa, “A yetagin di?” A yi a yabi, a naxa, “Xeme fonna nan tema a mafilinxu dugini.” Söli yi a kolon a Samuyeli nan yi a ra, a xinbi sin, a yetagin yi lan böxön ma. 15 Samuyeli yi a fala Söli xa, a naxa, “Nanfera i n ma matabuni kalaxi n ma? Nanfera i n xilixi, n te?” Söli yi a yabi, a naxa, “N töröxi han! Filisistine n yengema, Ala bata n nabegin. A mi fa n yabima nabi yi, a mi n yabima xiye yi. N na i xilixi na nan ma alogo i xa fa a fala, n lan n xa naxan liga.” 16 Samuyeli yi a fala, a naxa, “Nanfera i n maxodinma? Bayo Alatala bata i rabegin, a findi i yaxun na. 17 Alatala bata n ma falan nakamali i ma. A bata mangayaan ba i yii, a a so Dawuda yii. 18 Bayo i mi Alatala xuiin name, i tondi Amalekine raxore, nanara Alatala ito ligaxi i ra to. 19 Alatala i tan nun Isirayila soma nen Filisistine yii. Tila, i tan nun i ya dii xemene fama nen be n denaxan yi, Alatala yi Isirayila ganla so Filisistine yii.” 20 Söli yi bira, a a yibandun böxöni, gaxu gbeen yi a suxu Samuyeli a falane fe ra. Fangan yi jän a yi, bayo a mi yi donse yo donma yanyin nun köeen na. 21 Naxanla yi fa Söli fema, a a to fa fala a gaxuxi han! A yi a fala a xa, a naxa, “A mato, i ya walikeen bata i xuiin name.

Fayida, n na n niin fi nen i ya falane suxudeni. 22 Iki, i fan xa i tuli mati n na. N xa fa donseen na i xon, i yi a don alogo i fangan soto benun i xa kiraan suxu.” 23 Koni a tondi, a yi a fala, a naxa, “N mi sese donma.” A foxorabirane nun jaxanla yi kankan a ma, a yi e xuiin name. A keli boxoni a doxo saden ma. 24 Naxanla yi jinge dii raturaxin faxa mafuren naxan yi ramaraxi a yii. A murutu fujin tongo, a a bonbo, a burun gan a rate setareyani. 25 A yi ne so Soli nun a foxorabirane yii, e yi e dege. E yi keli na kœen na, e siga.

29 Filisistine yi e ganla birin malan Afeki yi. Isirayila kaane tan yi e malan tigin dexon Yesereli yi. 2 Filisistine mangane yi e ganla yebe sofa keme keme nun sofa wuli wuli yeen ma, siga yengedeni. Dawuda nun a foxorabirane yi Manga Akisi matima, ne yi sigan ti xanbin na. 3 Filisistine kuntigine yi a fala, e naxa, “Nde Heburuni itoe ra?” Akisi yi Filisistine mangane yabi, a naxa, “Dawuda na a ra, Soli a kuntigina nde, Isirayila mangana. A n fema xabu to mi a ra. N mi fe yo toxi a ra sa keli a fa loxon ma han to.” 4 Filisistine kuntigine yi xolo Akisi ma e yi a fala a xa, e naxa, “E xemeni ito raxete, a xa xete taani i tinxi a xa doxo denaxan yi. A nama siga en ma yengeni, bayo a noe maxete nen en xili ma yengeni. Xemeni ito a kanna dijan soto ma di, xa a mi en ma sofane xunne so a yii? 5 En nama jinan a jaxanle yi Dawuda ito nan xili sama sigini e bodon waxatin naxan yi, e naxa, ‘Soli bata muxu wuli keden faxa, Dawuda tan wuli fu.’” 6 Akisi yi Dawuda xili a a fala a xa, a naxa, “N bata n kolo habadan Alatala yi, xeme fajin nan i tan na, a yi rafanye n ma xa i lu n ma ganla ye. Bayo n mi fe yo toxi i ra keli i fa loxon ma han to. Koni i rapaxu mangane ma. 7 Nayi, xete i konni boje xunbenli, alogo i nama fefe liga naxan rapaxu mangane ma.” 8 Dawuda yi a fala Akisi xa, a naxa, “Koni n nanse ligaxi? I feen mundun toxi i ya walikeen na keli n fa loxon ma han to, alogo n nama siga mangana, n kanna yaxune yengedeni?” 9 Akisi yi Dawuda yabi, a naxa, “N na a kolon, a i rafan n ma alo Alaa malekana, koni Filisistine kuntigine bata a fala iki, a naxa, ‘A nama te nxu foxo ra yengeni.’ 10 Keli sinma tila e nun naxanye faxi i foxo ra. E siga xotonni kuye nema yiba.” 11 Na xoton bode, Dawuda nun a foxorabirane yi keli sinma alogo e xa xete Filisistine yamanani. Filisistine tan yi siga Yesereli yi.

30 Xi saxande loxoni, Dawuda nun a foxorabirane yi sa Sikilaga li. A yi a li Amalekine bata yi yengen nakeli Yuda yiifari foxoni e nun Sikilaga xili ma. E bata yi Sikilaga taan kala, e a gan. 2 E bata yi jaxanle suxu e nun naxanye birin yi taani, muxudin nun muxu gbeena. E mi muxu yo faxa, koni e bata yi e birin xali, e kiraan suxu. 3 Dawuda nun a foxorabirane to Sikilaga taan li, e yi a ganxin to. E jaxanle nun e dii xemene nun e dii temene bata yi suxu. 4 Nayi, Dawuda nun a foxorabirane birin yi lu wuge xui yitexin na han fanga mi lu e ra sonon e wuga. 5 Dawuda jaxalan firinne bata yi xali, Axinowami Yesereli kaana e nun Abigayili Karemele kaana, Nabali a kaja gilena. 6 Dawuda yi lu soxoleni, bayo a foxorabirane yi a magolon feen falama. Xolon yi birin niini, birin ma dii jaxanle nun e dii xemene e fe ra. Koni Dawuda yi fangan soto Alatala yi, a Ala. 7 Dawuda yi a fala saraxarali Abiyatari xa, Aximeleki a dii xemena, a naxa, “Fa saraxarali domain na n xon ma. Ala xa maxodin.” Abiyatari yi fa a ra. 8 Dawuda yi Alatala maxodin, a naxa, “N bire ganli ito foxo ra ba? N na a suxe ba?” Alatala yi a yabi, a naxa, “Bira a foxo ra, i e suxuma nen yati, i yi muxu suxine xunba.” 9 Dawuda nun a foxorabira kemen sennin yi kiraan suxu. E Besori Baan li waxatin naxan yi, nde yi lu xanbin na menni. 10 Bayo muxu keme firin yi taganxi naxanye mi yi noe Besori xudeni gide. Dawuda nun muxu keme naaninna yi sagatanna ti. 11 E Misiran kaana nde li xeen ma, e a xali Dawuda fema. E donseen so a yii e nun igena. 12 E yi xode xarena nde so a yii e nun jaxundan xaren tonson firin. A to yelin ne donje, a xaxili soto, bayo a bata yi yanyi saxan koe saxan ti a mi ige min a mi donse don. 13 Dawuda yi a maxodin, a naxa, “I kanna nde ra, i kelixi minen yi?” A yi a yabi, a naxa, “Misiran kaan nan n na, Amalekina nde a konyina. N kanna bata n furaxin nabepin a xii saxanna nan to. 14 Nxu bata yi fu Keretine boxon yiifari foxon ma, e nun Yuda boxona, e nun Kalebi boxon yiifari foxona. Nxu yi Sikilaga taan gan.” 15 Dawuda yi a fala a xa, a naxa, “I noe n xale ganla yireni?” A yi a yabi, a naxa, “I na i kolo n xa Ala yi a i mi n faxe e nun i mi n soe n kanna yii, n na e yiren yite i ra nen.” 16 Nayi, xemen yi Dawuda xali han Amalekine denaxan yi. E yi e li xuyaxi ayi boxon birin yi, e e degema, e e minma, e jaxanxi, na yenge yi se tongoxine fe ra e naxanye tongo Filisistine nun Yuda yamanani. 17 Dawuda yi e yenge keli subaxan ma han na xoton bode jinbanna, e

sese mi a yimini, fo banxulan keme naaninna naxanye no e giye jhogomene fari. **18** Amalekine naxanye birin suxu Dawuda yi ne xoroya, katarabi a jaxalan firinne ma. **19** Muxu yo mi yi luxi, a xurin nun a xungbena, dii xemen nun dii temena, e nun yii seene, e naxanye birin tongo, na sese mi lu. Dawuda yi fa e birin na. **20** A mon yi Amalekine yexene nun e jingene tongo. Naxanye yi na xuruseene xalima ne yi a falama, e naxa, “Dawuda yii se suxine ni i ra.” **21** Dawuda yi fa menni xeme keme firinne yi denaxan yi naxanye yi taganxi, e lu xanbin na Besori Baan de. E siga Dawuda nun yamaan nalandeni naxanye yi a foxo ra. Dawuda nun a foxorabirane yi maso e ra, a yi e xonton. **22** Naxuden nun fuyantenna naxanye yi yamaan ye Dawuda foxo ra, ne yi falan tongo, e naxa, “Bayo e mi faxi en foxo ra, yenge yi seen naxanye xunbaxi sese mi yitaxunma e ra. Koni birin ma jaxanla nun a diine yi so a yii, e e xali, e siga.” **23** Koni Dawuda yi a fala, a naxa, “Ngaxakedenne e nama a liga na kiini Alatala kiseene ra, a naxan fi en ma. Bayo a bata en kantan, a ganla so nxu yii naxan fa en xili ma. **24** Nayi, nde e xuiin namema feni ito yi? Naxan godoxi yengeni e nun naxan doxi goronne dexon, e birin gbeen yelanma nen.” **25** Na laxonni Dawuda yi na findi sariyan na Isirayila xa. Na sariyan mon na han to. **26** A to Sikilaga li, Dawuda yi yenge yi seen foxo kedenna rasiga Yuda fonne ma, a xoyine. A falani ito ti e xa, a naxa, “E gbeen ni i ra, seen naxanye tongoxi Alatala yaxune yii.” **27** A a rasiga fonni itoe birin ma: naxanye Beteli nun Ramoti-Negewi nun Yatiri yi, **28** naxanye Aroyeri nun Sifimoti nun Esitemowa yi, **29** naxanye Rakali yi e nun Yrameeli taa kaane nun Keni taa kaane, **30** naxanye Xoroma nun Bori-Asan nun Ataki yi, **31** naxanye Xebiron yi, e nun Dawuda nun a foxorabirane bata yi siga denaxan birin yi.

31 Filisistine yi Isirayila yenge. Isirayila kaane yi e gi, a gbege yi faxa Gilibowa geyaan fari. **2** Filisistine yi xape ayi Soli nun a diine xili ma. E yi Soli a dii xemene faxa, Yonatan nun Abinadabo nun Maliki-Suwa. **3** Yengen yi wolon Soli rabilinni, xali wonle yi a li, a yi gaxu e yee ra han! **4** Soli yi a fala yenge so se maxanla xa, a naxa, “I ya silanfanna tongo i n faxa, bayo n mi waxi Ala kolontareni itoe xa n masaxon, e yi n toro.” Koni a yenge so se maxanla yi tondi, bayo a yi gaxuxi han! Nayi, Soli yi a silanfanna tongo a sonson a de. **5** Soli a yenge so se maxanla to a

to faxaxi, a fan yi sonson a silanfanna de e birin yi faxa. **6** Soli nun a dii xeme saxanne nun a yenge so se maxanla nun a foxorabirane birin yi faxa e bode xon lxo kedenni na kii nin. **7** Isirayila kaan naxanye yi lanbanna foxo kedenni, e nun Yuruden baan foxo boden na, ne yi a to a Isirayila ganla yi a gima. E mon yi a to a Soli nun a diine bata yi faxa. E yi e taane rabenin, e e gi. Filisistine yi fa doxo na. **8** Na xoton bode, Filisistine yi fa binbine yii seene tongodeni, e yi Soli nun a diine binbine to biraxi Gilibowa geyaan fari. **9** E Soli xunna bolon a de, e a yenge so seene tongo. E yi na fe xibarun nasiga Filisiti yamanan birin yi e nun e suxure banxine yi e nun e yamaan tagi. **10** E yi Soli a yenge so seene sa Asitarate suxure banxin kui, e a binbin singan Beti-San taan yinna xon. **11** Yabesi Galadi kaane to a me Filisistine naxan ligaxi Soli ra, **12** e banxulan senbemane yi keli, e sigan ti koon birin na siga han Beti-San. E Soli nun a diine binbine tongo Beti-San yinna kanke. E yi xete Yabesi yi, e yi e gan menni. **13** E yi e xonne tongo, e e maluxun tamaro wudi binla bun ma Yabesi yi. E yi sunna suxu xii solofere.

Samuyeli Firindena

1 Soli faxa xanbini, Dawuda Amalekine nōxina, Dawuda yi fa lu Sikilaga taani xi firin. **2** Xi saxande loxoni, banxulanna nde yi fa, sa keli Soli a gali malandeni. A dugine yibōxi, burunburunna a xunni sununa fe ra. A to Dawuda fēman li, a yi a xinbi sin bōxōn ma. **3** Dawuda yi a maxōdin, a naxa, “I kelixi minen?” A yi a yabi, a naxa, “N nan n gixi Isirayila ganla nan ma.” **4** Dawuda yi a fala a xa, a naxa, “A yebe n xa naxan danguxi.” Xemen yi a yabi, a naxa, “Isirayila sofa ganla bata a gi yengeni, sofa wuyaxi bata faxa. Hali, Soli nun a diin Yonatan bata faxa.” **5** Banxulanna naxan faxi xerayaan na, Dawuda mōn yi na maxōdin, a naxa, “I a kolonxi di, a Soli nun a dii xemen Yonatan bata faxa?” **6** Banxulanna yi a yabi, a naxa, “N yi Gilibowa geyaan nan fari, n yi Soli to, a tanban tixi a bun, a yi gbetenxi yaxune wontorone nun soo ragine xōn. **7** A to a firifiri, a yi n to, a yi n xili. N yi a yabi, n naxa, ‘N tan ni i ra.’ **8** A yi n maxōdin a nde n tan na. N yi a fala a xa a Amalekin nan n tan na. **9** Nayi, a yi n yamari a n xa fa a faxa, bayo a yi sōxōlexi, hali a mōn to yi jējē. **10** Nayi, n yi n maso a ra, n yi a faxa, bayo n yi a kolon a a mi yi kisima a biradeni. Na xanbi ra, mangana, n yi a mangaya taxamasenna ba a xun na. N yi a yiirasoon ba a yiin na. N bata fa e ra i xōn.” **11** Dawuda yi a dugine yibō a ma. Naxanye birin yi a fēma, ne fan yi na liga. **12** E yi saya feene liga, e wuga, e sun han jinbanna Soli nun a diin Yonatan ma fe ra e nun Alatala sofane nun Isirayila kaan naxanye faxaxi yengeni. **13** Na xanbi ra, Dawuda yi a fala banxulanna xa naxan faxi xeraan na, a naxa, “Nde i tan na?” A yi a yabi, a naxa, “Amalekin naxan dōxi yamanani ito yi, na nan ma diin n tan na.” **14** Dawuda yi a fala, a naxa, “I mi gaxu mangan faxe Alatala bata yi naxan sugandi?” **15** Dawuda yi a sofa keden xili, a yi a fala, a naxa, “Siga, i yi sa a faxa.” Sofaan yi Amaleki kaan garin, a yi a faxa. **16** Dawuda yi a fala Amaleki kaan ma, a naxa, “I tan nan i faxe feen nagidixi, i yi i yete yalagi, i naxa, ‘N tan nan Alatalaa manga sugandixin faxaxi.’” **17** Dawuda yi saya sigini ito sa Soli nun a diin Yonatan xa. **18** A yi yamarin fi a Yuda kaane xa e maxaran na sigin ma naxan xili “Xalimakuli Sigina.” A sebexi kedin kui naxan yi xili Tinxin Muxuna kedina. **19** Isirayila sofa kendene bata faxe geyane fari. A mato sofane faxaxi kii naxan yi! **20** A nama fala Gati taani, na xibarun nama fala

Asikalōn kirane xōn, alogo Filisitine sungutunne nama sewa, alogo Ala kolontarene sungutunne nama jaxan. **21** Xiila nun tulen nama fa fa Gilibowa geyane fari, xee sabatila nama fa lu e ma, bayo sofane ye masansan wure lefane e rayagi mēna nin, Soli ye masansan wure lefana, turen yi ba soe a ma. **22** Yonatan ma xalimakunla mi yi xetema yaxu faxe daxin yetagi, yaxun senben yetagi. Soli a silanfanna yi a wanla rakamalima. **23** Soli nun Yonatan yi rafan yamaan ma ki faji e siimayaan birin yi, hali e sayani, e mi fate. E yi xulun singbinna xa, e senben yi gbo yatan xa. **24** Isirayila jaxanle, e Soli wuga. A yi e maxidima nen dugi fajini, a xēmaan sa e dugine ra. **25** A mato, sofa senbēmane bata faxe yengeni! Yonatan bata faxe geyane fari! **26** N bōjnen sunuxi i ya fe ra, Yonatan, n tada, n xōyi kendena. I ya xanuntenyaan yi rafan n ma, dangu jaxanle gbeen na. **27** A mato, sofa senbēmane bata faxe! Sofa fangamane bata raxori!

2 Na feene dangu xanbini, Dawuda yi Alatala maxōdin, a naxa, “N lan n xa siga Yuda taana nde yi ba?” Alatala yi a yabi, a naxa, “Ōn.” Dawuda yi a maxōdin, a naxa, “N sigan minen?” Alatala yi a yabi, a naxa, “Xebiron yi.” **2** Dawuda yi siga e nun a jaxalan firinne, Axinowami, Yesereli kaana e nun Abigayili, Nabali Karemele kaana kaja gilena. **3** A yi a foxorabirane fan nun e denbayane xali, e sa dōxō Xebiron nabilinni. **4** Nayi, Yuda bōnsōnna muxune yi fa Xebiron yi alogo e xa Dawuda findi Yuda mangan na. E to a fala Dawuda xa a Yabesi-Galadi kaane bata yi Soli maluxun, **5** a yi xerane rasiga a faladeni e xa, a naxa, “Alatala xa e baraka e to Soli maluxunxi e kanna, e hinanna mayita a mabinni. **6** Ala xa Alatala fan e suxu hinanna nun lannayani. N tan fan fanma e ra nen, bayo e na nan ligaxi. **7** Iki, e sōbe so, e wēkile. E kanna Soli bata faxe, Yuda kaane n tan nan sugandixi mangan na e xun na.” **8** Abineri, Neri a dii xemena, Soli a sofa kuntigin bata yi Yiseboseti suxu. Yiseboseti, Soli a dii xemen nan yi a ra. Abineri yi a xali Maxanayin taani. **9** A yi a dōxō mangan na Galadi xun na e nun Asuri nun Yesereli nun Efirami nun Bunyamin nun Isirayila birin xun na. **10** Yiseboseti, Soli a dii xemen finde Isirayila mangan na, a bata yi jee tonge solomasexe soto. A jee firin nan ti mangayani. Koni Yuda bōnsōnna bata yi bira Dawudaa mangayaan fōxō ra. **11** Dawuda jee solofere e nun kike sennin nan ti mangayani Xebiron yi Yuda bōnsōnna xun na. **12** Neri a dii xemena Abineri

nun Soli a dii xemen Yiseboseti a walikene yi keli Maxanayin taani, e siga Gabayon taani. **13** Seruyaa dii xemen Yowaba nun Dawudaa walikene fan yi kiraan suxu. E yi naralan Gabayon ige dɔxɔdeni. Ndee yi lu ige dɔxɔden fɔxɔ kedenni, ndee fan yi lu fɔxɔ kedenni. **14** Abineri yi a fala Yowaba xa, a naxa, “Banxulanna ndee xa keli, e yengen so en yetagi.” Yowaba yi a yabi, a naxa, “E xa keli.” **15** Sofane yi keli, e yi tenge muxu fu nun firin yi Bunyamin bɔnsɔnni, Soli a dii xemen Yiseboseti xa, muxu fu nun firin yi Dawudaa walikene yɛ. E e maso e bode ra. **16** Birin yi a yenge so boden suxu a xunna ma, a yi a sɔxɔn a jɛnsenni silanfanna ra, e birin yi bira e bode xɔn. E na yiren xili sa, “Fanye Xɛɛna” Gabayon yamanani. **17** Na lɔxɔni, yenge gbeen yi keli. Dawudaa walikene yi Abineri nun Isirayila kaane nɔ na yengeni. **18** Seruyaa dii saxanne Yowaba nun Abisayi nun Asaheli nan yi menni. Asaheli yi xulun alo bolena, **19** a yi Abineri sagatanma, a mi yi xetɛma a fɔxɔ ra, a mi siga a yiifanna ma hanma a kɔmenna ma. **20** Abineri yi a xanbi rato, a yi a fala, a naxa, “I tan Asaheli nan a ra ba?” A yi a yabi, a naxa, “N tan na a ra.” **21** Abineri yi a fala a xa, a naxa, “Siga yiifanna ma hanma kɔmenna ma, i sa banxulanna nde yenge, i yi a yenge yi se tongoxine ba a yii.” Koni Asaheli mi yi waxi xetɛ feni Abineri fɔxɔ ra. **22** Abineri mɔn yi a fala Asaheli xa, a naxa, “Xetɛ n fɔxɔ ra. Nanfe a lige n xa i bɔnbɔ, n yi i faxa? Na xanbi ra, n mi fa nɔɛ i tada Yowaba yetagi tɔɛ.” **23** Koni Asaheli mi tin kiraan masare. Nayi, Abineri yi a sɔxɔn a kuini tanban xunna boden na, tanban yi sa mini Asaheli fari. A bira, a faxa. Naxanye birin yi fama Asaheli faxaxin biradeni, ne yi ti menni. **24** Yowaba nun Abisayi yi bira Abineri fɔxɔ ra. Sogen bira waxatin naxan yi, e yi fa Ama geyaan fari, Giyahi yetagi, Gabayon tonbonna kiraan xɔn. **25** Bunyamin sofane yi e malan Abineri xanbi ra, e findi ganla ra e ti geyaan xun tagi. **26** Abineri yi Yowaba xili, a yi a fala a xa, a naxa, “Silanfanna luyɛ faxan tiye tun ba? I mi a kolon a na rajanna jaxuma ayi nen? I luma han waxatin mundun, i mi a fala yamaan xa a e xa xetɛ en ngaxakedenne fɔxɔ ra?” **27** Yowaba yi yabin ti, a naxa, “N bata n kɔlɔ habadan Ala yi, xa i mi yi falan ti nun, n ma muxune mi yi xetɛma ɛ fɔxɔ ra han tila xɔtɔnni.” **28** Yowaba yi xɔtaan fe. A sofane yi xetɛ Isirayila kaane fɔxɔ ra, e yi yengen dan. **29** Abineri nun a sofane yi sigan ti kɔena ngaan na Araba yamanani. E Yuruden baani gidi, e Bitiron birin yigidi

e sa Maxanayin taan li. **30** Yowaba xetɛxina Abineri fɔxɔ ra, a yi yamaan birin malan, Dawudaa walikɛn muxu fu nun solomanaanin yi dasaxi e nun Asaheli. **31** Koni Dawudaa muxune bata yi muxu kɛmɛ saxan e nun tonge sennin faxa Bunyamin bɔnsɔnna muxune nun Abineri a muxune ra. **32** E fa Asaheli ra, e yi a maluxun a fafe gaburun na Betelemi yi. Na xanbi ra, Yowaba nun a muxune yi sigan ti kɔena ngaan na, e sa so Xebiron yi xɔtɔn deni.

3 Yengen bu nen Soli a denbayaan nun Dawudaa denbayaan tagi han! Dawuda senben yi gboma ayi nen tun, Soli a denbayaan tan senben yi lu janyɛ. **2** Dawuda yi dii xɛmɛne sɔtɔ Xebiron taani. A dii singen yi xili nen Aminon, naxan nga yi Yesereli kaana Axinowami ra. **3** A diin firindena, Kileyabi, naxan nga yi Abigayili ra, Karemele kaan Nabali a kaja gilɛna. A diin saxandena, Abisalomi, naxan nga findi Gesuri taan Manga Talamayi a dii temen Maka ra. **4** A diin naanindena, Adoniya, naxan nga findi Xagiti ra, a diin suulundena, Sefati, naxan nga yi Abitali ra. **5** A dii sennindena, Yitireyami, Dawudaa jaxanla Egela a dii xɛmena. Diini itoe nan sɔtɔ Dawuda xa Xebiron yi. **6** Yengen waxatini Soli a denbayaan nun Dawudaa denbayaan tagi, Abineri senben yi gbo ayi Soli a muxune xun na. **7** Konyi jaxanla nde yi Soli yii naxan yi xili Risipa, Ayaa dii temena. Yiseboseti yi a fala Abineri xa, a naxa, “Nanfera ɛ nun n baba konyi jaxanla sigaxi ɛ sa kafu?” **8** Yiseboseti a falan yi Abineri xɔlɔ kati, a yi a yabi, a naxa, “I n mirixi Yuda bɔnsɔnna baren nan na ba? To, n walima tinxinna nin i baba Soli a denbayaan xa, e nun a ngaxakedenne nun a xɔyine, n mi i so Dawuda yii. I fa n mafalama jaxanli ito nan ma fe ra to? **9** Alatala xa tɔrɔ jaxin sa n fari xa n mi a liga Dawuda xa alo Alatala layirin tongoxi a xa kii naxan yi, **10** a to a fala, a a mangayaan bama nen Soli a denbayaan yii, a yi Dawuda dɔxɔ mangan na Isirayila xun na e nun Yuda, keli Dan ma han sa dɔxɔ Beriseba ra.” **11** Bayo Yiseboseti yi gaxuxi Abineri yɛɛ ra, a mi nɔ a fala keden peen yabɛ. **12** Abineri yi xerane rasiga a faladeni Dawuda xa, a naxa, “Nde gbee yamanan na? En layirin xidi en tagi, n na i maliye nen Isirayila birin yi lu i fɔxɔ ra.” **13** Dawuda yi a yabi, a naxa, “N tinxɪ, n layirin xidi en tagi, koni n fe keden nan maxɔdinxɪ i ma, i mi fa n yetagin toma, fɔ i na fa Mikali ra, Soli a dii temena, i nema fe n fema.” **14** Dawuda yi xerane rasiga a faladeni Soli a dii xemen

Yiseboseti xa, a naxa, “N ma naxanla Mikali so n yii, n Filisiti xeme keme banxulan naxan futu se ra.” **15** Nayi, Yiseboseti yi sa Mikali ba a xemen Palitiyeli yii, Layisi a dii xemena. **16** A xemen wugamatson yi bira a foxo ra han Baxurin taani. Nayi, Abineri yi a fala a xa, a naxa, “Xete i konni.” A yi xete. **17** Abineri nun Isirayila fonne yi falan ti, a yi a fala e xa, a naxa, “E waxi nen Dawuda xon mangayani xabu to mi a ra, **18** awa, a liga waxatin ni i ra, amasoto Alatala bata falan ti Dawudaa fe yi, a naxa, ‘N nan n ma yamaan xoroyama, Isirayila, n ma walikenen Dawuda nan xon Filisitine yii e nun yaxun bonne.’” **19** Abineri mon yi falan ti Bunyamin kaane fan xa. Na xanbi ra, a sa rali Dawuda ma Xebiron yi, naxan birin napan Isirayila kaane ma e nun Bunyamin bonsonna muxune ma. **20** A yi fa Dawuda fema Xebiron yi, muxu moxone biraxi a foxo ra, Dawuda yi donse donna naxanxani ton Abineri xa e nun muxun naxanye yi a foxo ra. **21** Abineri yi a fala Dawuda xa, a naxa, “N kelima nen, n siga, n sa Isirayila birin malan n kanna senben bun ma, mangana. E layirin fenma nen e nun ne tagi, i mangayaan liga yiren birin yi alo i waxi a xon kii naxan yi.” Dawuda yi tin Abineri yi siga boje xunbenli. **22** Na dangu xanbini, Yowaba nun Dawudaa muxune yi fa sa keli yengeni, e yi fa yenge yi se tongoxi wuyaxi ra e yii. Abineri mi yi fa Dawuda fema Xebiron yi, bayo Dawuda tin nen a yi siga boje xunbenli. **23** Yowaba fa waxatin naxan yi e nun ganla naxan yi a foxo ra, e yi a fala a xa a Neri a dii xemena Abineri bata yi fa mangan fema, a yi a lu a siga boje xunbenli. **24** Yowaba yi siga mangan konni, a yi a fala mangan xa, a naxa, “I nanse ligaxi? Abineri yi fa i konni, i yi a lu a siga boje xunbenli?” **25** Anu, i a kolon a Neri a dii xemena Abineri faxi i yanfadani alogo a xa i siga kiin nun i xete kiin kolon e nun i naxan ligama.” **26** Yowaba keli xanbini Dawuda konni, a yi xerane rasiga Abineri jeje xon, ne yi sa a li fo Sira ige doxodeni, e sa fa a ra. Dawuda mi yi a kolon. **27** Abineri xete waxatin naxan yi Xebiron yi, Yowaba yi a xili taan so deen dexon, alo a wundo falan nan tima a xa. A yi a soxon menni a kuini, alogo a xa a xunyena Asaheli gbee faxan joxo. **28** Dawuda to a me naxan danguxi, a yi a fala, a naxa, “Alatala a kolon n tan nun n ma mangayaan mi findixi Neri a dii xemena Abineri faxa feen sabun na mume! **29** Na goronna xa doxo Yowaba nun a denbayaan xun ma. Muxuna nde xa lu Yowabaa denbayani korosilaan luye naxan ma hanma dogonfonna, hanma naxan

sigan tiye dunganna ra, hanma e faxa silanfanna ra, hanma donse mi naxan yii.” **30** Yowaba nun a tada Abisayi Abineri faxa na kii nin, amasoto a bata yi e xunyena Asaheli faxa Gabayon yi yengeni. **31** Dawuda yi a fala Yowaba xa e nun yamaan naxan yi biraxi a foxo ra, a naxa, “E e dugine yibo, e kasa benbeli dugine ragodo e ma sununi, e Abineri saya feen liga.” Manga Dawuda yeteen yi bira binbin foxo ra. **32** E yi Abineri maluxun Xebiron yi. Mangan yi a xuini te, a wuga, yamaan birin yi wuga. **33** Mangan yi saya sign sa Abineri xa, a naxa, “Abineri yi lan ba a faxa alo xaxilitarena?” **34** I yiine mi yi xidixi, i sanne mi yi xidixi. Anu, i bata faxa alo muxu faxane na muxun naterena.” Yamaan birin mon yi Abineri wuga. **35** Na xanbi ra, e yi e maso Dawuda ra alogo e xa donseen so a yii, sosen mon yi na, koni Dawuda yi a kolo, a naxa, “Ala xa toroya naxin sa n fari xa n donseen don benun sosen bira waxatini.” **36** Yamaan birin yi na kolon, na yi rafan birin ma. **37** Nayi, Yuda yamaan birin nun Isirayila kaane yi a kolon a mangan xa mi yamarin fixi alogo Neri a dii xemena Abineri xa faxa. **38** Dawuda mon yi a fala a walikene xa, a naxa, “E a kolon ba fa fala a Isirayila kuntigi gbeena nde bata faxa to?” **39** Hali mangan to n na, n senben jaxxin na a ra iki. Muxune itoe, Seruyaa dii xemene dangu n tan na. Alatala yeteen xa e toro e to faxani ito tixi.”

4 Soli a dii xemen Yiseboseti to a me a Abineri bata yi faxa Xebiron yi, a yii xudin yi tuye ayi, gaxun yi Isirayila kaane birin suxu. **2** Gali kuntigi firin yi Soli a dii xemen yii, Banaha nun Rekabu. Rimon Beroti kaan nan ma dii xeme yi e ra, Bunyamin bonsonni. **3** Amasoto Beroti kaane yi yatexi nen alo Bunyamin bonsonna, Beroti kaane bata yi fa, e doxo Gitayin taani, e doxi denaxan yi han to. **4** Soli a dii xemen Yonatan ma dii xemena nde yi na naxan yi lebutenxi. A jeje suulun nan yi a ra Soli nun Yonatan faxa feen xibarun yi fama waxatin naxan yi, sa keli Yeserele taani. Na nan a liga, dii ngana nde yi a tongo mafuren, a yi bira, a yi findi sanmadontson na, a tan diin yi xili nen Mefiboseti. **5** Beroti kaan Rimon ma dii xemene, Rekabu nun Banaha yi siga Yiseboseti konni soge xoleni, e yi a li xiye yanyin na. **6** E so han banxin tagini alo e yi murutun nan tongoma, e yi Yiseboseti soxon a kuini. Na xanbi ra, Rekabu nun a xunyen Banaha yi e gi. **7** E soe banxini, mangana a matabun saden ma, e yi a soxon, e a faxa. E a xunna xaba a

de, e yi a xunna suxu e yii, e siga yire xunkuyeni Araba kiraan xon ma. **8** E yi Yiseboseti xunna xali Manga Dawuda fema Xebiron yi, e yi a fala a xa, e naxa, “Yiseboseti xunna nan ito ra, Söli a dii xemena, i yaxuna, naxan yi wama i faxa feni. To, Alatala bata i gbeen joxo Söli nun a xanbin na.” **9** Dawuda yi a fala Beroti kaan Rimon ma dii xemene xa, Rekabu nun a xunyen Banaha, a naxa, “N bata n kolo habadan Alatala yi, a tan naxan n ba toron birin yi. **10** Naxan a fala n xa, a naxa, ‘Söli bata faxa,’ naxan yi laxi a ra a a bata xibaru fajin nali n ma, n na a suxu nen, n yi a faxa Sikilaga yi, alogo a xa na xibaru fajin saranna soto. **11** Naxudene muxu tinxinxin faxa waxatin naxan yi banxini a saden ma, iki n mi a wunla maxodinje e ra ba, n yi e nan boxon fari?” **12** Dawuda yi yamarin fi a sofa banxulanne ma e xa Rekabu nun a xunyen Banaha faxa. Na xanbi ra, e yi e yiine nun e sanne bolonje a ra, e yi e singan Xebiron ige ramaradeni. E yi Yiseboseti xunna maluxun Neri a diina Abineri gaburun na Xebiron yi.

5 Isirayila bonsonne birin yi fa Dawuda fema Xebiron yi. E yi a fala, e naxa, “En wuli keden fasa keden. **2** A foloni, Söli yi nxo mangan na waxatin naxan yi, i tan nan yi tixi Isirayila ganla yee ra. Alatala bata yi a fala i xa, a naxa, ‘I tan nan findima n ma yamana Isirayila kantan muxun na, i findi e yeeratiin na.’” **3** Nayi, Isirayila fonne birin yi fa mangan fema Xebiron yi, Manga Dawuda yi layirin tongo e xa Xebiron yi Alatala yetagi. E yi turen sa a xunni a dexo feen na Isirayila mangan na. **4** Dawuda findi mangan na a jee tonge saxanden nan ma, a yi jee tonge naanin ti mangayani. **5** A yi mangayaan liga Yuda xun na Xebiron yi jee solofere kike sennin, a yi jee tonge saxan nun saxan ti mangayani Yuda nun Isirayila birin xun na Yerusalen yi. **6** Manga Dawuda nun a foxorabirane yi siga Yerusalen xili ma. Yebusu kaan naxanye yi na yamanani, ne yi a fala Dawuda xa, e naxa, “I mi soe be, bayo hali danxutone nun sankalatone noe i kede nen.” Nanara, e mirixi a ma, e naxa, “Dawuda mi noe soe be.” **7** Koni, Dawuda yi Siyon yinna suxu a senbeni, a naxan xili sa Dawudaa Taana. **8** Na loxoni, Dawuda yi a fala, a naxa, “Naxan yo waxi Yebusu kaane no feni, fo na kanna xa siga kiraan nan xon naxan gixi sa lan igen ma alogo a yi e masoto, Dawuda yi na ‘sankalatone nun danxutone’ rapaxu.” Nanara, a falama a “Danxutone nun sankalatone”

mi soma Ala Batu Banxini. **9** Dawuda yi dexo taan yire makantanxini, a yi men xili sa a Dawudaa Taana. Na xanbi ra, Dawuda yi menna nun na rabilinna ti keli Milo gbingbinna ma siga han taa tagini. **10** Nayi, Dawuda senben yi lu gbo ayi tun, bayo Alatala yi a xon, Ala Senben Birin Kanna. **11** Tire taan mangan Xurami yi xerane rasiga Dawuda ma, e yi suman wudin xali na e nun wudi rawanle nun geme masonle naxanye manga banxin ti Dawuda xa. **12** Dawuda yi a kolon a Alatala yatin nan a findixi mangan na Isirayila xun na, a yi a mangayaan senbe so masoto a yamana Isirayila fe ra. **13** A keli xanbini Xebiron yi, Dawuda mon yi konyi jaxanla ndee nun jaxanla ndee fen Yerusalen yi, a mon yi dii xemene nun dii temene soto. **14** Naxanye soto a xa Yerusalen yi, ne xinle ni itoe ra: Samuwa nun Sobaba nun Natan nun Sulemani **15** nun Yibixari nun Elisuwa nun Nefegi nun Yafiya **16** nun Elisama nun Eliyada nun Elifeleti. **17** Filisistine yi a me a Dawuda bata yi findi mangan na Isirayila xun na, e birin yi siga a fendeni. Dawuda yi na me, a yi so yire makantanxini. **18** Filisistine yi fa, e xuya ayi Refa lanbanna birin yi. **19** Dawuda yi Alatala maxodin, a naxa, “N xa siga Filisistine xili ma ba? I e soe n yii ba?” Alatala yi a yabi, a naxa, “Siga, bayo n Filisistine soma nen i yii.” **20** Nayi, Dawuda yi siga Baali-Perasimi yi, a Filisistine no denaxan yi. A yi a fala, a naxa, “Alatala bata n yaxune raxuya ayi n yee ra, alo fufaan gbiligbinla kalan kii naxan yi.” Nanara, e menna xili sa Baali-Perasimi. **21** E yi e suxurene rabenin menni, Dawuda nun a foxorabirane yi e xali. **22** Filisistine mon yi te, e dexo Refa lanbanna birin yi. **23** Dawuda mon yi Alatala maxodin. Alatala yi a fala a xa, a naxa, “I nama te, dangi e xanbi ra, i yi i maso e ra fotonna de. **24** I na siga ti xuiin me wudine kondene yi, i keli e yengedeni mafuren, bayo Alatala nan tima i yee ra, a Filisiti ganla no i xa.” **25** Alatala naxan yamari Dawuda ma, a na liga, a Filisistine no, a lu e faxe keli Geba han sa dexo Geseri taan na.

6 Dawuda mon yi Isirayila sofa senbeman birin malan, muxu wuli tonge saxan. **2** Na ganla yi biraxi a foxo ra, a siga Baala taani Yuda yi, alogo a xa sa Alaa Kankiraan tongo, Ala xinla nan na kankiraan ma, Alatala Senben Birin Kanna, naxan dxi maleka gubugubu kan sawurane tagi. **3** E yi Alaa Kankiraan sa wontoro nenen kui keli Abinadabo a banxini geyaan fari. Wusa nun Axiyo, Abinadabo a

dii xemene nan yi wontoro nenen nagima. 4 E yi a tongo Abinadabo a banxini geyaan fari, Axiyo yi sigama a yee ra. 5 Dawuda nun Isirayila yamaan birin yi sewan mayitama Alatala ra, e maxaseen sifan birin maxama, alo bolonna nun kondenna nun tanbanna nun karijanna nun maxase gbete. 6 E to Nakon ma lonna li, Wusa yi a yiini bandun, a Alaa Kankiraan suxu, bayo jingene bata yi salaxun. 7 Nayi, Alatala yi xolo a ma han! A yi a faxa na xaxilitareya wanla fe ra. Wusa yi faxa menni, Alaa Kankiraan fema. 8 Alatala to Wusa niin ba, a faxa. Nayi, Dawuda yi xolo han, e yi men xili sa “Wusa halagidena” han to. 9 Na loxoni, Dawuda yi gaxu Alatala yee ra, a yi a fala, a naxa, “Alatalaa Kankiraan soma di n konni?” 10 Nayi, a yi tondi Alatalaa Kankiraan xale a konni, Dawudaa Taani. A yi a xali Obedi-Edon Gati kaana banxini. 11 Alatalaa Kankiraan yi lu Obedi-Edon Gati kaana banxini kike saxon, Alatala yi barakan sa Obedi-Edon nun a denbayaan birin ma fe yi. 12 E sa na fala Manga Dawuda xa a Alatala bata barakan sa Obedi-Edon ma denbayaan birin ma fe yi e nun a gbeen seen naxanye birin na masoto Alaa Kankirana fe ra. Nayi, Dawuda yi Alaa Kankiraan tongo Obedi-Edon yi, a siga a ra Dawudaa Taani sewani. 13 Alatalaa Kankiraan xali muxune na yi e sanna ye sennin tongo, Dawuda yi jinge keden nun jinge dii raturaxi keden nan bama saraxan na. 14 Dawuda yi a bodon a senben birin na Alatala yetagi, a yi maxidixi saraxarali domaan nan gbansan yi. 15 Dawuda nun Isirayila yamaan birin yi fa Alatalaa Kankiraan na Yerusalen yi, naxanaxan nun xota xuine yi. 16 Alatalaa Kankiraan yi soma Dawudaa Taani waxatin naxan yi, Soli a dii temen Mikali yi a matoma banxin foye soden na, a yi Manga Dawuda to tuganje ayi, a bodonma Alatalaa Layiri Kankiraan yetagi. Na ma, Mikali yi Dawuda rajaxu a bojeni. 17 Na xanbi ra, e fa Alatalaa Kankiraan na, e yi a doxo bubuni, Dawuda naxan yelan a xili yi, Dawuda yi saraxa gan daxine nun boje xunbeli saraxane ba Alatala xa. 18 Dawuda yelin saraxa gan daxine nun boje xunbeli saraxane be waxatin naxan yi, a yi duba Isirayila yamaan xa Alatala Senben Birin Kanna xinli. 19 A mon yi donseene yitaxun Isirayila yamaan birin na, xemen nun naxanla, birin yi burun soto e nun tamaro bogi xare rafalaxin nun naxun danna rafalaxin xundi keden keden. Na xanbi ra, birin yi siga a konni. 20 Dawuda yi xete a duba a denbayaan xa, Soli a dii temen Mikali yi menni a ralandeni. A yi a fala, a naxa,

“Binyen mundun yi a ra to Isirayila mangan to yi a yete yitama a walike naxanle nun a walike xemene ra, alo fuyantenna a lige kii naxan yi.” 21 Dawuda yi Mikali yabi, a naxa, “N na a ligaxi Alatala nan yetagi naxan n sugandixi i baba nun a denbayaan birin xa, a n findi Isirayila kuntigin na, a yamana, n nan n ma sewan yitaxi na nan na. 22 N wama nen n xa rajaxu dangu na ra, n yi n yete magodo n yete yetagi. Koni, walike naxanle n binyama nen i naxanye fe falaxi.” 23 Soli a dii temen Mikali mi dii soto han a faxa.

7 Manga Dawuda yi so a manga banxin kui. Alatala yi a ratanga a yaxune birin ma naxanye yi a yamanan nabilinxi. 2 Loxona nde, mangan yi a fala Nabi Natan xa, a naxa, “Banxin naxan nafalaxi suman wudin na, n na nan kui, koni Alaa Kankiraan mon bubun nan kui.” 3 Natan yi mangan yabi, a naxa, “Sa i rafan feene birin liga, bayo Alatala i xon.” 4 Koni na keen na, Alatala yi falan ti Natan xa, a naxa, 5 “Sa a fala n ma walikeen Dawuda xa, i naxa, ‘Alatala ito nan falaxi, a naxa: I tan xa mi batuden tima n xa n luma denaxan yi. 6 N yeteen munma lu n batu banxin kui singen, xabu n na Isirayila kaane ramini loxoni Misiran fari ma han to, koni n bata lu Isirayila kaane foxo ra bubun kui yiren birin yi. 7 N siga denaxan birin yi nxu nun Isirayila kaane, n kuntigi wuyaxi doxo nen Isirayila xun na, n ma yamana, alogo e xa n ma yamaan masuxu. Koni, na waxatin birin yi, n mi a fala muxu yo xa, n naxa, “Nanfera, i mi suman wudi banxin tixi n xa?” 8 Nanara, i mon xa a fala n ma walikeen Dawuda xa, i naxa, ‘Alatala Senben Birin Kanna ito nan falaxi, a naxa: N tan nan i baxi xuruse rabayani alogo i xa findi Isirayila yeeratiin na, n ma yamana. 9 I sigan denaxan birin yi, n lu nen i xon, n yi i yaxune birin faxa i yetagi, n yi i findi xili gbee kanna ra alo muxu gbeen naxanye boxo xonna fari. 10 N yiren soma nen Isirayila yii, n ma yamana, e doxoma denaxan yi. E luma nen na, gaxu yo mi e suxe. Muxu naxi yo mon mi fa e naxankatama alo a foloni, 11 n kitisane doxo Isirayila xun na waxatin naxan yi, n ma yamana. N na i ratangama nen i yaxun birin ma, i lu boje xunbenli. N tan, Alatala naxan fala tima i xa, Alatala nan banxin tima i xa naxan findima i yixetene ra mangayani. 12 I na faxa waxatin naxan yi, i siga i benbane fema, n yi i yetena diina nde sugandi, a ti i loxoni mangayani, n yi a mangayaan senbe so. 13 Na nan n batu banxin tima n xa, n yi a mangayaan senbe so habadan. 14 N findi a

fafe ra, a fan yi findi n ma dii xemen na. Xa a fe njaxin liga, n na a fe njaxin saranma nen a ra alo dii fafan diin natōrōnma kii naxan yi. **15** Koni, n ma hinanna mi janma a xa, alo n na a ba Soli ma kii naxan yi, n naxan makuya n na. **16** I ya mangayaan nun i ya denbayaan luma nen n yetagi habadan, bayo i ya mangayaan senben luma nen habadan.” **17** Ala naxan birin fala Natan xa fetoni alo xiyena, a na birin ye ba Dawuda xa. **18** Na xanbi ra, Manga Dawuda yi siga, a sa dōxō Alatala yetagi, a yi a fala, a naxa, “Marigina Alatala, n na a kolon a n tan nun n ma denbayaan mi lan nxu na birin soto i naxan fixi nxu ma. **19** Koni, Marigina Alatala, i tan yee ra yi, na xurun. I mōn layirine tongoma n ma denbayana yee ra sigana fe yi. Marigina Alatala, na lan a raba n tan xa ba, n tan adamadi dōrōnna?” **20** “Marigina Alatala, n nōe nanse se a fari, bayo i tan yetena i ya walikeen kolon? **21** I ya falana fe ra e nun fata i sagoon na, i bata fe gbeen i to liga alogo i xa e yita i ya walikeen na.” **22** “Marigina Alatala, i gbo. Muxu yo mi maliga i tan na. Ala gbete mi na ba i tan na, alo nxu bata yi a me kii naxan yi ye yo ye. **23** Siya gbeten mundun dunu na yi naxan luxi alo Isirayila i ya yamana, i tan Ala naxanye raminixi konyiyani? I e xunba nen Misiran kaane nun e alane senben bun, i yi e findi i ya yamaan na, i siya gbetene kedi i ya yamaan yee ra, i kabanako fe magaxuxine raba e yetagi alogo i xa i xinla makenen. **24** I yi Isirayila findi i ya yamaan na habadan. Alatala, i yi findi nxo Ala ra.” **25** “Iki, Marigina Alatala, i de xuiin naxan tongoxi n tan, i ya walikeen nun n ma denbayaan xa, na xa rakamali habadan. Na liga alo i a falaxi kii naxan yi. **26** Nayi, i xinla binyama nen habadan. Muxune yi a fala, e naxa, ‘Alatala Senben Birin Kanna nan Isirayilaa Ala ra.’ Senben xa lu i ya walikeen Dawudaa denbayani i yetagi. **27** I tan, Alatala Senben Birin Kanna, Isirayilaa Ala, i bata i miriyaan yita n na a i n yixetene findima nen mangane ra n njōxōni. Nanara, i ya walikeen bata wekilen soto a maxandini ito ti i xon.” **28** “Marigina Alatala, i tan nan Ala ra, i na naxan fala, na ligama nen. Iki, i bata fala fajini ito ti i ya walikeen xa. **29** Nayi, barakan sa n ma denbayana fe yi alogo n yixetene xa lu mangayani i yetagi habadan alo i bata layirin tongo kii naxan yi. Marigina Alatala, i ya barakan xa lu n ma denbayaan fōxō ra habadan.”

8 Na waxatin danguxina, Dawuda yi Filisitine no yengeni, a yi e rayarabi, a yi yamanan ba e yii. **2** A mōn yi Moyaba kaane nō. Na xanbi ra, a yi e karahan a e xa e sa bōxōni, a yi yamaan maliga lutin na. Lutin ye saxan yo saxan, a yi lutin ye singen nun a firinden muxune faxama nen. A yi a ye saxanden muxune lu e nii ra. Xabu na, Moyaba kaane yi lu Dawuda nōon bun ma, e lu mudun fiye. **3** Dawuda mōn yi Rexobo a dii xemen Hadadeseri fan nō yengeni, Soba mangana, Hadadeseri yi waxi Efirati baan tongo feni waxatin naxan yi. **4** Dawuda yi yenge so wontoro wuli keden keme solofere suxu yengeni e nun sofa wuli mōxōje. A yi soone birin san xanbi ra fasane bolon fō soo keme njōxōndōn a naxanye ramara. **5** Arami kaane to keli Damasi taani fa Soba mangan Hadadeseri malideni, Dawuda yi ne sofa wuli mōxōjen nun firin faxa. **6** A yi a yamana kanne dōxō Damasi taani Arami yamanani, Arami kaane yi lu Dawudaa yamarin bun, e lu mudun soe a yii. Dawuda na yi siga dede, Alatala yi xunna kenla fima nen a ma. **7** Dawuda yi Hadadeseri a sofane ye masansan wure lefa xema daxine tongo, a siga e ra Yerusalen yi. **8** Manga Dawuda mōn yi sula wuyaxi tongo Berotayi taani e nun Betaxa taani, Hadadeseri a taane. **9** Tohu, Xamata mangan yi a me a Dawuda bata Hadadeseri a sofane birin nō yengeni. **10** A yi a dii xemen Yorami rasiga Manga Dawuda ma, alogo a xa sa a xōntōn a nō sōtōna fe ra Hadadeseri yengeni, bayo Tohu nun Hadadeseri yi yengeni. Yorami yi siga xema seene ra e nun gbetin nun sulana. **11** Manga Dawuda yi ne fi Alatala ma, alo a gbeti fixen nun xemaan fi Ala ma kii naxan yi, a naxanye tongo siyane yii a naxanye nō. **12** Arami nun Moyaba nun Amonine nun Filisitine nun Amalekine. A mōn yi seene fi Ala ma, a naxanye tongo yengeni Rexobo a dii xemen Hadadeseri yii, Soba mangana. **13** Dawuda xinla soto na kii nin, a yelin xanbini Arami kaane nōe fōxō Lanbanni. A muxu wuli fu nun solomasexe faxa. **14** A yi yamana kanne lu Edōn yi alogo na xa lu Dawudaa yamarin bun ma. Dawuda na yi siga dede, Alatala yi xunna kenla fima nen a ma. **15** Dawuda yi lu Isirayila birin xun na. A yi kiti kenden sama tinxinna nin a yamaan birin yi. **16** Seruyaa dii xemen Yowaba nan yi sofa kuntigin na, Axiludu a dii xemen Yosafati nan yi mangana yenla ra. **17** Axitubaa dii xemen Sadōki nun Abiyatari a dii xemena Aximeleki nan yi saraxaraline ra. Seraya nan yi sebeli tiin na. **18** Benaya, Yehoyadaa dii xemen nan

yi Keretine nun Peletine fõxo ra, saraxaraline nan yi Dawudaa dii xemene ra.

9 Lõxõna nde, Dawuda yi maxõdinna ti, a naxa, “Soli a denbayaan muxuna nde mõn luxi ba, alogo n xa hinan a ra Yonatan ma fe ra?” **2** Walikena nde yi Soli a banxini nun, a xili Siba, e fa na ra Dawuda fema. Mangan yi a maxõdin, a naxa, “Siba nan i tan na ba?” A yi a yabi, a naxa, “N tan i ya walikẽn na a ra.” **3** Mangan yi a fala, a naxa, “Muxe mi fa Soli a denbayani ba, n na Alaa hinanna yite naxan na?” Siba yi mangan yabi, a naxa, “Yonatan ma dii xeme keden mõn na yi naxan sanne kalaxi.” **4** Mangan yi a fala, a naxa, “A minen?” Siba yi mangan yabi, a naxa, “A sa Amiyeli a dii xemen Makiri a banxini Lodebara yi.” **5** Dawuda yi muxuna nde rasiga a tongodeni Amiyeli a dii xemen Makiri a banxini Lodebara yi. **6** Soli mamandenna, Mefiboseti, Yonatan ma dii xemen fa waxatin naxan yi Dawuda konni, a bira bõxõni Dawuda yetagi, a yetagin yi lan bõxõn ma. Dawuda yi a maxõdin, a naxa, “Mefiboseti nan i tan na ba?” A yi a yabi, a naxa, “N tan nan yati a ra, mangana.” **7** Dawuda yi a fala a xa, a naxa, “I nama gaxu. I baba Yonatan ma fe ra, n waxi hinan feni i ra. N na i taje Soli a bõxõn birin soma nen i yii, i mõn yi i dege n ma tabanla ra.” **8** Mefiboseti yi a xinbi sin, a naxa, “Mangana, nanse i ya walikẽn na, alogo i xa i yeen ti bare faxaxin na alo n tan?” **9** Mangan yi Siba xili, Soli a walikena, a yi a fala a xa, a naxa, “Soli nun a denbayaan gbeen seen naxan birin na, n ne soma nen i kanna Soli mamandenna yii, Mefiboseti. **10** I tan nun i ya dii xemene nun i ya walikene, e bõxõn walima nen a xa, alogo e xa a denbayaan balo. Mefiboseti tan a degema nen n ma tabanla ra lõxo yo lõxo.” Dii xeme fu nun suulun yi Siba yii e nun walike mõxõje. **11** Siba yi a fala mangan xa, a naxa, “Mangan naxan birin yamarixi, n na ligama nen.” Dawuda bata yi a fala, a naxa, “Mefiboseti a degema nen n ma tabanla ra, alo manga diina.” **12** Dii xeme keden yi Mefiboseti yii, a xili Mika. Naxanye birin yi Siba a banxini, Mefiboseti a walikẽn nan yi ne ra. **13** Bayo a yi godoma a san firinne birin ma, a yi dõxo Yerusalen yi, alogo a xa nõ sige a degedeni mangan konni a tabanla ra lõxo yo lõxo.

10 Na dangu xanbini, Amonine mangan yi faxa, a dii xemen Xanun yi dõxo a jõxõni. **2** Dawuda yi a miri, a naxa, “N hinanma nen Naxasi a dii xemen

Xanun na, alo a fafe hinan n na kii naxan yi.” Dawuda yi xerane rasiga alogo e xa sa a fafe sayaan xõtõn. Dawudaa xerane to sa so Amonine yamanani, **3** Amonine kuntigine yi a fala Xanun xa, e kanna, e naxa, “I laxi a ra a Dawuda muxune rafaxi i fafe saya xõtõnden nan tun yi ba? E mi faxi kõtõn xan na ba alogo e xa taan nakõrõsi, lõxõna nde e yi nõ a suxe?” **4** Nayi, Xanun yi Dawudaa xerane suxu, a yi e de xabene fõxo kedenna bi, a yi e domane raxaba e xõrene yilanni, a yi e raxete. **5** E fa xerane fe dentegen sa Dawuda xa, a xera gbeteje rasiga e ralandeni, bayo e yi yagixi han! Mangan yi a fala e xa, a naxa, “E lu Yeriko yi han e de xabene yi mini. Na xanbi ra, e fa so be.” **6** Amonine yi a to a e bata rapaxu Dawuda ma alo se kunxin xirina. Nayi, e yi sofa wuli mõxõje tongo Arami kaan naxanye yi kelixi Beti-Rexobo nun Soba yi, e yi wuli keden tongo Maka mangana sofane ye, e nun wuli fu nun firin Tobo kaane ye. **7** Dawuda yi na me, a yi sofa kuntigin Yowaba nun a sofa kendene birin nasiga e yengedeni. **8** Amonine yi mini, e ti yenge so xinla ma e taan so deen na. Arami kaan naxanye yi kelixi Soba nun Rexobo yi e nun Tobo nun Maka sofane fan yi sa e malan fõxo kedenni burunna ra. **9** Yowaba to a kolon a yengen yi a yee ra, a yi a xanbi ra, a yi Isirayila sofa kendena ndee sugandi Arami kaane yenge xinla ma. **10** A yi sofa dõnxene lu a tada Abisayi a yamarin bun ma Amonine yenge xinla ma. **11** Yowaba yi a fala a tada xa, a naxa, “Xa Arami kaane senben gbo n xa, i fa n mali. Xa Amonine fan senben gbo i xa, n fan yi sa i mali. **12** I tunnafan, en na en wekile, en yi en ma yamaan xun mayenge e nun en ma Alaa taane, naxan nafa Alatala ma, a xa na liga.” **13** Yowaba nun a ganla yi e maso Arami kaane yengedeni, koni ne yi e gi e yee ra. **14** Amonine to a to, a Arami kaane bata e gi, e fan yi e gi Yowaba tada Abisayi bun. E yi sa so e taani. Nayi, Yowaba yi Amonine yenge feen dan, a xete Yerusalen yi. **15** Arami kaane to a to, a Isirayila bata e nõ, e yi e senben malan. **16** Arami kaan naxanye yi Efirati baan kidi ma, Hadadeseri yi xerane rasiga ne ma. E yi fa Xelama yi. Hadadeseri a sofa kuntigin Sofaki nan yi e xun na. **17** Dawuda to na me, a yi Isirayila kaane birin malan, a Yuruden baan gidi, a siga Xelama yi. Arami kaane yi ti yenge so xinla ma Dawuda yee ra. E yenge. **18** Arami kaane yi e gi Isirayila kaane yee ra, Dawuda nun a ganla yi yenge so wontoro sofa muxu keme solofere faxa e nun soo ragi wuli tonge naanin, a mõn

yi sofa kuntigin Sofaki fan yenge, a yi a faxa menni. **19** Mangan naxanye birin yi Hadadeseri a noon bun ma, ne to a to a Isirayila bata e no, e de fanna fen e ra. E yi lu Isirayila kaane noon bun ma. Xabu na dangu, Arami kaane mi fa susu Amonine maliye.

11 Neɛ nenen folona, mangane yi darixi mine yenge sodeni waxatin naxan yi, Dawuda yi Yowaba nun a sofa wekilexine nun Isirayila ganla birin nasiga, alogo e xa sa Amonine yenge, e yi e manga taan Rabaha rabilin. Koni, Dawuda tan lu nen Yerusalem yi. **2** Ninbanna nde ra, Dawuda yi keli a siga a masiga tideni a manga banxin xun tagi, a sa a kondeni, a yi jaxanla nde to a maxe. A yi tofan han. **3** Dawuda yi xerane rasiga na jaxanla xibarun fendeni. E yi a fala a xa, e naxa, “Batiseba na a ra, Eliyami a dii temena, Yuriya Xiti kaana jaxanla.” **4** Dawuda yi xerane rasiga a xilideni. A yi fa a konni, a yi a kolon jaxanla ra. A yi baxi yelinden a kike wanla ra. **5** Na jaxanla yi fudikan, a yi xeraan nasiga a faladeni Dawuda xa, a naxa, “N bata fudikan de.” **6** Nayi, Dawuda yi xeraan nasiga Yowaba ma, a naxa, “Yuriya Xiti kaan nafa n ma.” Yowaba yi Yuriya rafa Dawuda ma. **7** Yuriya yi siga Dawuda fema, a yi a maxodin Yowaba a fe ma, a yi a maxodin yamaan nun yengen kiin ma. **8** Na xanbi ra, a yi a fala a xa, a naxa, “Siga i konni, i sa i matabu.” Yuriya yi mini manga banxini, mangan yi finmaseene rasiga a ma. **9** Koni Yuriya yi a sa manga banxin deen na e nun a kanna walikeen bonne, a mi siga a banxini. **10** E to na fala Dawuda xa, a yi Yuriya maxodin, a naxa, “I mi kelixi sigati xunkuyen xan yi iki? Nanfera i mi sigama i konni?” **11** Yuriya yi Dawuda yabi, a naxa, “Alaa Kankiraan nun Isirayila ganla nun Yuda kaane birin bubune nan kui, n kanna Yowaba nun i ya walikene fan burunna ra. N tan sige n konni waxatini ito yi ba, n sa n dege, n yi n min, nxu nun n ma jaxanla yi kafu? N bata n kolo i yi, n mi na fe sifan lige mumel!” **12** Dawuda yi a fala Yuriya xa, a naxa, “I mon xa lu be to, tila n yi i rasiga.” Na ma, Yuriya yi lu Yerusalem yi han na xoton bode. **13** Dawuda yi a xili a xa a dege, a yi a min a tabanla ra, a yi manpaan min han a xunna yi keli a ra. Koni jinbanna ra, Yuriya yi mini, a yi sa a sa sena nde fari a kanna walikeen bonne fema, a mi siga a banxini. **14** Na xoton bode xotonni, Dawuda yi bataxina nde sebe Yowaba ma, a yi a so Yuriya yii. **15** A yi a sebe na bataxin kui, a naxa, “Yengen denaxan na jaxu,

Yuriya ti menna yeen na, e yi e masiga a ra, alogo yaxune xa a faxa.” **16** Nayi, Yowaba yi taan nabilin, a yi a kolon sofa senbeman denaxan yi, a yi Yuriya ti menni. **17** Taan sofane yi mini e Yowaba yenge, e yi Dawudaa sofana ndee faxa. Yuriya Xiti kaan yi bira, a faxa. **18** Yowaba yi na feen nasiga Dawuda ma yengen danguxi kii naxan yi. **19** A yi xeraan ti yamarini itoe ra, a naxa, “I na yelin yengen kiin yebe mangan xa waxatin naxan yi, **20** xa mangan xolo, a yi a fala, a naxa, ‘Nanfera e masoxi taan na yenge sodeni? E mi a kolon a e bunna tima nen yinna xun tagi? **21** Nde Abimeleki faxaxi, Yerubeseti a dii xemen Tebesi taani? Naxanla nde xa mi se din gemena nde ragodo a fari yinna xun tagi ba, a yi faxa? Nanfera e masoxi yinna ra?’ Nayi, i yi a fala a xa, i naxa, ‘I ya walikeen Yuriya Xiti kaan fan bata faxa.’” **22** Xeraan yi siga. A sa na birin yebe Dawuda xa alo Yowaba a fala a xa kii naxan yi. **23** Xeraan yi a fala, a naxa, “Taan kantan tiine senben yi gbo nxu xa. E siga nen nxu xili ma burunna ra, nxu yi e kedi han taan so deen na. **24** Xalimakuli kanne yi nxu mabun keli yinna xun tagi, nanara i ya sofana ndee yi faxa alo Yuriya, Xiti kaana.” **25** Dawuda yi a fala xeraan xa, a naxa, “Siga, i sa Yowaba rawekile, i yi a fala a xa, i naxa, ‘I nama feni itoe yate fe jaxin na. Yenge yo yenge, faxan tima foxo firinna birin nin. Taan suxu ki faji, i yi a kala.’” **26** Yuriyaa jaxanla na me waxatin naxan yi, a a xemen bata faxa, a yi sunu. **27** Koni sunun waxatin to dangu a xun ma, Dawuda yi fa a ra a konni. A yi a findi a jaxanla ra, a yi dii xeme keden bari a xa. Dawuda feen naxan naba, na yi rajaxu Alatala ma.

12 Alatala yi Natan nasiga Dawuda ma. Natan yi fa a fema, a yi a fala a xa, a naxa, “Xeme firin yi taa kedenni, nafulu kanna nan yi boden na, bodena, yiigelitona. **2** Xuruse xunxurin nun a xungbeen wuyaxi yi nafulu kanna yii. **3** Sese mi yi yiigelitona tan yii fo yexeedi keden, a naxan sara, a yi a baloma, a yi gboma a konni e nun a dii xemene. E birin yi donse kedenna nan donma e nun monona, a yi xima a dexan nen. A yi luxi nen alo a dii temena. **4** Loxona nde, xojen yi fa nafulu kanna konni, a mi tin a xuruse keden tonge, a yi a faxa, koni a yi sa yiigelitona yexeedin tongo, a yi na faxa a xojen xa.” **5** Dawuda yi xolo na xemen ma han, a yi a fala Natan xa, a naxa, “N bata n kolo habadan Alatala yi. Xemen naxan na ligaxi, a lan a faxa. **6** Bayo a bata na liga, a mi kininkinin, a yexee

mujaxin joxoma nen yexee naanin gbeteye ra.” 7 Nayi, Natan yi a fala Dawuda xa, a naxa, “I tan nan na xemen na! Alatala, Isirayilaa Ala ito nan falaxi, a naxa, ‘N tan nan i sugandixi mangan na Isirayila xun na, n tan nan i baxi Soli yii! 8 N yi i kanna Soli a denbayaan lu i senben bun. N yi i kanna jaxanle so i yii. N yi Isirayila yamaan nun Yuda yamaan so i yii. Xa na yi xurun nun, n mon yi nde se na fari nen. 9 Nanfera nayi, i n tan, Alatalaa falane rabepinxi, naxan mi rafan n ma, i yi na liga? I bata Xiti kaan Yuriya faxes yengeni, i yi a jaxanla findi i gbeen na, i yi a faxes Amonine silanfanna ra. 10 Awa iki, silanfanna mi a masigama i ya banxin na, bayo i bata n najaxu, e nun bayo i bata Yuriya Xiti kaana jaxanla tongo, i yi a findi i ya jaxanla ra.’ 11 Alatala ito nan falaxi, a naxa, ‘N tɔɔyaan nafama nen i ya denbayaan xili ma. N yi i ya jaxanle tongo i yee xori, n yi e so i ya muxuna ndee yii, e yi kafu yanyin na. 12 Bayo i bata a liga wundoni, n tan a rakamalima Isirayila birin nan yetagi yanyin na.’” 13 Dawuda yi a fala Natan xa, a naxa, “N bata Alatala yulubin tongo.” Natan yi a fala Dawuda xa, a naxa, “Alatala bata i mafelu i yulubin na, i mi faxama. 14 Koni bayo i bata a liga yaxune yi Alatala mafala fata feni ito ra, diin naxan barixi, na faxama nen.” 15 Na xanbi ra, Natan yi siga a konni. Yuriyaa jaxanla diin naxan bari Dawuda ma, Alatala yi na rafura, a lu doyenje. 16 Dawuda yi Ala maxandi diin xa, a sun. A to so a konni, a xi saxi boxoni. 17 A banxin muxune yi a karahan alogo e xa a rakeli boxoni, koni a mi tin kele boxoni, a mi donse don e xon. 18 Xi soloferede boxoni, diin yi faxes. Dawudaa walikene yi gaxu a fale a xa fa fala diin bata faxes. Bayo e yi a falama nen, e naxa, “Diin to yi jeje, en yi falan ti a xa, koni a mi a tuli mati en na, iki en susuma a fale a xa di fa fala diin bata faxes? A mi fe jaxina nde lige ba?” 19 Dawuda yi a walikene to koyekoyenje e bode tagi, a yi a kolon a diin bata faxes. A yi e maxodin, a naxa, “Diin bata faxes ba?” E yi a yabi, e naxa, “A bata faxes.” 20 Nayi, Dawuda yi keli boxoni. A yi a maxa, a latikononna sa a ma, a dugin masara, a mon yi siga Alatala batudeni, a yi a batu. Na xanbi ra, a yi siga a banxini, a yi a fala a e xa donseen so a yii, a yi a dege. 21 A walikene yi a fala a xa, e naxa, “I naxan ligaxi, na bunna nanse ra? Diin to yi jeje, i sun, i wuga. Awa iki, diin bata faxes, i bata keli, i yi i dege.” 22 A yi e yabi, a naxa, “Diin yi jeje waxatin naxan yi, n yi sunuxi, n wugama, bayo n yi mirixi a ma, n naxa,

‘Yanyina nde, Alatala kininkininma nen n ma, diin yi kisi.’ 23 Iki, a bata faxes, n sunma nanfera nayi? N nɔɔ a rakele ba? N tan sigama nen a fema, koni a tan mi fa fe n fema sonon.” 24 Dawuda yi a jaxanla Batiseba madenden, a yi siga a fema, a yi a kolon jaxanla ra. A dii xemen bari, Dawuda yi a xili sa Sulemani. A yi rafan Alatala ma, 25 nanara Nabi Natan yi a xili sa Yedideya, Alatalaa fe ra. 26 Na waxatini, sofa kuntigin Yowaba bata yi Rabaha suxu, Amonine manga taana. 27 A yi xerane rasiga a faladeni Dawuda xa, a naxa, “N bata Rabaha yenge, n yi e ige baden suxu. 28 Nayi, iki, gali donxen malan, i fa taan nabilin, i a tongo i yete xa, n mi wama a tongo feni binyen birin yi lu n xa.” 29 Dawuda yi gali donxen malan, a fa Rabaha yenge, a yi a tongo. 30 A yi mangaya taxamaseri komotin tongo na mangan xun na. Na mangaya taxamaseri komotin xemaan binyen yi kilo tonge saxan liye, a yi maxidixi geme fani kenden nan na. E yi a so Dawuda xun na, mangan yi se wuyaxi tongo taani. 31 Dawuda yi muxune suxu, a yi e ti karahan wanle ra, wudi masonla nun geme bonon nun wudi segen nun bitikidi bonbona. A na liga Amonine taan bonne birin yi. Na xanbi ra, a so Yerusalen yi e nun a ganla birin.

13 Na xanbi ra, Dawudaa dii xemena Abisalomi xunye dii temena nde yi na naxan yi xili Tamari, a yi tofan han, na yi rafan Aminon ma, Dawudaa dii xemena. 2 Aminon xaxinla bata yi keli han a fura Tamari a fe ra, a xunyena. A yi xodxo Aminon ma a xa fena nde liga a ra, amasoto sungutun nasolonxin nan mon yi a ra. 3 Koni Aminon lanfana nde yi na, a xili Yonadabo, Simeyaa dii xemena, Dawuda ngaxakedenna, kotaden nan yi Yonadabo ra nun. 4 A yi a fala Aminon xa, a naxa, “Nanfera xoton yo xoton i sunuxi, i tan, manga diina? I mi waxi a fala feni n xa ba?” Aminon yi a yabi, a naxa, “Tamari rafan n ma, n fafaxakedenna Abisalomi xunyena.” 5 Yonadabo yi a fala a xa, a naxa, “I yete rafura i yi i sa saden ma. I baba na fa i fema waxatin naxan yi, i yi a fala a xa, i naxa, ‘Tin, n xunyen Tamari xa fa donsena nde rafala n xa, a xa a rafala n yetagi, a yeteen yi a so n yii, n yi a don.’” 6 A yi a yete rafura, a yi a sa. Mangan yi fa a todeni, Aminon yi a fala mangan xa, a naxa, “Tin, n xunyen Tamari xa fa buru firin nafala n yetagi, a yeteen yi e raso n de, n yi e don.” 7 Dawuda yi xeraan nasiga na faladeni Tamari xa a konni, a naxa, “Siga i tada Aminon konni, i sa donseen nafala a xa.” 8

Tamari yi siga a tada Aminon ma banxini, a yi a li saxi. A yi se fujin tongo, a burun bɔnbɔ, a yi burun nafala a yetagi, a yi e gilin. 9 Na xanbi ra, a yi e ragodo alogo a xa e don, koni a mi tin. Aminon yi a fala, a naxa, “Muxune birin namini n ma banxini!” Muxune yi mini banxini. 10 Nayi, Aminon yi a fala Tamari xa, a naxa, “Fa donseen na n xi banxini, i yeteen xa a raso n de, n yi a don.” Tamari burun naxanye rafala, a ne xali a tada Aminon xi banxini. 11 A yi e soma a yii waxatin naxan yi alogo a xa e don, a yi Tamari suxu, a yi a fala a xa, a naxa, “Tamari, fa be, en fa kafu.” 12 A yi a yabi, a naxa, “En-en, n tada, i nama n nayagi, amasoto na mi ligama Isirayila yi. I nama na xaxilitareyaan sifan liga. 13 N sigan minen yi nxu nun n ma yagina? I luma nen nayi alo xaxilitarena Isirayila yi. Iki, n bata i mafan, a fala mangan xa, a mi tonde n soe i yii mumɛ.” 14 Koni a mi a tuli matixi na ra mumɛ, a yi a suxu senben na, e kafu. 15 Na xanbi ra, Aminon yi a rapaxu kati, dangu xanuntenyaan na naxan yi a bɔneni lan a ma. A yi a fala a xa, a naxa, “Keli be.” 16 A yi a yabi, a naxa, “En-en, bayo i na n kedi, na jaxuma ayi nen dangu a singen na i naxan ligaxi n na.” 17 Koni a mi a tuli matixi na ra mumɛ! Banxulan na naxan yi walima a xa, a yi na xili, a yi a fala a xa, a naxa, “Sungutunni ito masiga n konna ra. I yi banxin deen balan a fɔxɔ ra ki fajni.” 18 Aminon ma walikeen yi a ramini tandeni, a deen balan a fɔxɔ ra. Dugi yee masunbuxin nan yi ragodoxi Tamari ma, bayo mangana sungutun nasolonxine yi na nan soma. 19 Tamari yi xuben so a ma, dugi yee masunbuxin naxan yi a ma, a yi na yibo, a yi a yiin sa a xun ma, a siga wuge. 20 A tada Abisalomi yi a maxodin, a naxa, “E nun i tada Aminon bata kafu ba? N magilena, iki i dunder, i tada nan a ra, i nama feni ito sa i bɔneni.” Tamari yagixin yi lu a tada Abisalomi a banxini, alo jaxalan nabepinxina. 21 Manga Dawuda na birin me waxatin naxan yi, a xolo ki fajni. 22 Abisalomi mi yi fa falan tima Aminon na, bayo a yi rapaxu a ma, amasoto a bata a magilen Tamari karahan, e kafu. 23 Jee firin dangu xanbini, bayo yexee xabe xabane yi Abisalomi yii Baali-Xasori yi, Efirami dexɔn, a yi mangana diine birin xili. 24 Abisalomi yi siga mangan fema, a yi a fala a xa, a naxa, “Mangana, yexee xabe xabane n konni. Tin, e nun i ya walikene xa sa lan jaxanaxani ito yi.” 25 Mangan yi a fala Abisalomi xa, a naxa, “En-en, n ma diina, nxu birin mi sigɛ, a findin goronna nan na i xun ma.” Abisalomi yi kankan na

ma mangan xa, koni mangan mi wa siga feni, a yi sa duba a xa. 26 Abisalomi yi a fala, a naxa, “Nba, tin, n tada Aminon tan xa fa n fɔxɔ ra.” Mangan yi a yabi, a naxa, “Nanfera a sigama i konni?” 27 Na xanbi ra, Abisalomi mon yi xidi a ma han, a rajan na, mangan yi a dii xemene nun Aminon bejin, e birin yi siga Abisalomi konni. 28 Abisalomi yi yamarini ito fi a banxulanne ma, a naxa, “E liga ki fajni, manpaan na Aminon bɔnen nasewa waxatin naxan yi, n yi a fala e xa, n naxa, ‘E Aminon faxesa.’ Nayi, e yi a faxesa. Hali e mi gaxu, n tan xa mi e yamarixi ba? E soɓe so ki fajni.” 29 Abisalomi a banxulanne yi Aminon suxu alo Abisalomi e yamari kii naxan yi. Mafuren, mangana diin bonne yi keli, e yi te e sofanle fari, e yi e gi. 30 E mon yi kira yi, na xibarun yi sa Dawuda li, e naxa, “Abisalomi bata i ya diine faxesa. Keden mi luxi a nii ra.” 31 Mangan yi keli, a yi a dugine yibo, a yi a sa bɔxoni, a walikeen naxanye birin yi a dexɔn ma, ne fan yi e dugine yibo. 32 Koni Yonadabo, Simeyaa dii xemena, Dawudaa ngaxakedenna, na yi falan tongo, a naxa, “N kanna, i nama a miri a e bata i ya diine birin faxesa. Aminon nan keden faxaxi. Abisalomi bata yi a nata xabu Aminon kafu jaxɔyaan naba a xunyen jaxalanmaan Tamari ra waxatin naxan yi. 33 I nama a miri a i ya diine birin bata faxesa. En-en, Aminon nan keden faxaxi.” 34 Abisalomi yi a gi. Banxulan na naxan yi tixi kantan tideni, na yi a yeen nakeli, a yi gali gbeen to fe a xanbi ra Xoronayin kiraan xɔn, geyaan kanke ra. 35 Yonadabo yi a fala mangan xa, a naxa, “Mangana diine fama. N naxan birin falaxi, na bata liga.” 36 Yonadabo yi yelinma falan tiye waxatin naxan yi, mangana diine yi fa. E wuga, mangan fan nun a walikene birin yi wuga. 37 Abisalomi bata yi a gi, a siga Talamayi konni, Amixudi a dii xemena, Gesuri mangana. Dawuda tan yi sunuxi a dii xemena Aminon ma fe ra. 38 Abisalomi yi a gi, a siga Gesuri yamanani, a lu na han jee saxan. 39 Manga Dawuda yi ba xolɔxi Abisalomi ma, bayo a bata yi dija Aminon faxesa feen ma.

14 Yowaba, Seruyaa dii xemɛn bata yi a kolon a Abisalomi xɔnla bata yi mangan suxu. 2 Nayi, Yowaba yi jaxalan fe kolonna nde fen Tekowa taan kui. A yi a fala a xa, a naxa, “A liga alo i sunuxin na a ra. I saya dugine so, i nama latikɔnɔnna sa i ma, i yete liga alo jaxanla naxan faxesa muxun wugama xabu a rakuya. 3 I siga mangan fema, i falani itoe ti a

xa iki.” Nayi, Yowaba yi a fala a xa a lan a xa naxan fala. **4** Naxanla naxan kelixi Tekowa taani, na yi siga fala tideni mangan xa. A bira bōxōni, a yetagin yi lan bōxōn ma, a sōnxō, a naxa, “Mangana, n mali!” **5** Mangan yi a maxōdin, a naxa, “I waxi nanse xōn ma?” A yi a yabi, a naxa, “Kaja gilen nan n na, n ma xēmen bata faxa. **6** Dii xēme firin n yii, e bata yēnge xēen ma boden yi boden faxa, bayo muxe mi yi na yi, a yi e tagi ba. **7** Na ma, xabilan muxune birin bata keli n xili ma, e yi a fala n xa, e naxa, ‘Naxan faxan tixi, na so nxu yii. Nxu xa a faxa a ngaxakedenna fe ra a naxan faxaxi. Nxu waxi ke tongon nan faxa fe yi.’ Yigidi kedenna naxan luxi n xa, e na kalama nēn, e yi n ma xēmen xinla ralo ayi, sese mi lu bōxō xōnna fari.” **8** Mangan yi a fala naxanla xa, a naxa, “Siga banxini. N yamarin fima nēn i ya fe yi.” **9** Naxanla naxan kelixi Tekowa taani na yi a fala mangan xa, a naxa, “Mangana, n kannna, n tan nan kalan tixi e nun n babaa denbayana. Na yulubin nama lu mangan nun a mangayaan fari.” **10** Mangan yi a fala, a naxa, “Xa muxuna nde falan ti i ma, fa na kannna ra n fema. A mi fa na naxōn lige sōnōn.” **11** A yi a fala, a naxa, “Mangan xa de xuiin tongo n xa a Marigina Ala xinli, alogo gbeepnaxō tiin nama kalan nadangu ayi, n ma dii xēmen naxan luxi a yi na fan faxa.” A yi a fala, a naxa, “N bata n kōlō habadan Alatala yi, i ya diin xun sexe keden peen mi bire bōxōni.” **12** Naxanla yi a fala, a naxa, “Tin, i ya walike naxanla xa fala keden peen ti i xa, i tan, n kannna, mangana.” A yi a fala, a naxa, “Falan ti.” **13** Naxanla yi a fala, a naxa, “Nanfera i feene rabama kiini ito yi Alaa yamaan xili ma, i falan tima alo i baxi naxan ligade iki, i bata i yete findi yulubi kannna ra, bayo i mi faxi Abisalomi ra sa keli yamanani a luxunxi denaxan yi. **14** Lōxōna nde en birin faxan nēn, en luxi nēn alo igen na bōxōn, a mi fa makōe. Anu, Ala mi mafura muxun niin be, a feene yitōmma alogo naxan bata kedi, na mōn xa a maso. **15** Iki, n fa ito birin falaxi mangan xa nēn, bayo yamaan bata yi n magaxu. Nayi, n yi a fala, n naxa, ‘N na a falama nēn mangan xa, nayi waxatina nde n naxan falama, a na ligama nēn. **16** A tinma nēn naxan waxi nxu raxōri feni Alaa yamani, a yi nxu ba na yii, n tan nun n ma dii xēmena.’ **17** Iki, n tan, i ya walike naxanla naxa, ‘N kannna, mangana falan xa xaxilisaan fi n ma. Bayo n kannna, mangan luxi nēn alo Alaa malekan naxan a fajin nun a naxin kolon. Alatala, i ya Ala xa lu n xōn ma.”” **18** Mangan yi a fala naxanla xa, a naxa,

“I nama sese luxun n ma n naxan maxōdinma i ma.” Naxanla yi a yabi, a naxa, “Mangana, n kannna, falan ti.” **19** Mangan yi a maxōdin, a naxa, “Yowaba xa mi ito birin falaxi i xa ba?” A yi a yabi, a naxa, “N bata n kōlō mangan siini, mangana, n kannna, nōndin na a ra. I ya walikēen Yowaba nan n yamari, a falani itoe ti n xa n lan n xa naxanye fala i xa. **20** I ya walikēen Yowaba ito ligaxi nēn alogo feene xa liga kii gbete yi. Koni n kannna xaxinla luxi nēn alo Alaa malekana, a kolon naxan birin ligama bōxō xōnna ma.” **21** Mangan yi a fala Yowaba xa, a naxa, “Nayi, n waxi na liga feni, siga, i sa fa banxulanna Abisalomi ra.” **22** Yowaba yi bira, a yi a yetagin lan bōxōn ma, a duba mangan xa. A mōn yi a fala, a naxa, “Mangana, n bata a kolon fa a i bata i ya fanna yita n na, amasōtō i bata tin a ligadeni n naxan falaxi i xa.” **23** Yowaba yi keli, a siga Gesuri yi. A sa fa Abisalomi ra Yerusalen yi. **24** Koni mangan yi a fala, a naxa, “A xa xete a konni. A nama fa n yetagi.” Nayi, Abisalomi yi siga a banxini, a mi fa mangan yetagi. **25** Isirayila birin yi, xēme tofaji mi yi na alo Abisalomi, keli a sansonle ma han a xun tagi, fe yo mi yi a ra. **26** A yi a xunna maxabama jee rajanne nin bayo a yi binyama ayi nēn. A xun sexene binyen yi dangi kilo firin na. **27** Abisalomi dii xēme saxan nan sōtō e nun dii tēme keden naxan yi xili Tamari, a yi tofan han. **28** Abisalomi yi lu Yerusalen yi jee firin, a mi fa mangan yetagi. **29** Lōxōna nde, a yi Yowaba xili, a xa siga a ra mangan fema, koni Yowaba yi tondi sigē a konni. Abisalomi mōn yi a maxōdin a firinden, koni Yowaba mi wa siga feni. **30** Nayi, Abisalomi yi a fala a walikene xa, a naxa, “E bata Yowabaa funde xēen to n gbeen dexōn ma, e sa tēen so a ra.” Abisalomi a walikene yi sa tēen so xēen na. **31** Mafuren, Yowaba yi siga Abisalomi konni, a yi a maxōdin, a naxa, “Nanfera i tēen soxi n ma xēen na?” **32** Abisalomi yi Yowaba yabi, a naxa, “Bayo n bata yi a fala i xa nun a i xa fa, koni i mi tinxi. N yi waxi i rasiga feni mangan nan ma xerayani ito ra, fa fala ‘Nanfera n kelixi Gesuri yamanani? A yi lan nun n lu na yi mōn.’ N waxi mangan yetagin to feni fa, xa fena n na, a xa n faxa.” **33** Yowaba yi siga Abisalomi a xerayaan nalideni mangan ma. Mangan yi Abisalomi xili, a fa a fema, a yi a xinbi sin a yetagi, a yetagin yi lan bōxōn ma. Mangan yi Abisalomi sunbu.

15 Na xanbi ra, Abisalomi yi wontoro keden tongo, e nun soone nun muxu tonge suulun, naxanye yi

e gima a yee ra. 2 A yi keli xotōnni sinma, a ti taa yi kiraan deen na. Muxu yo nema yi dangue siga mangan konni kiti sadeni, Abisalomi yi na kanna xilima nen, a yi a maxodin, a naxa, “I kelixi taan mundun yi?” Na kanna yi a yabima nen, a naxa, “Manga diina, n kelixi Isirayila bōnsōnna nde nin.” 3 Abisalomi yi a falama nen na kanna xa, a naxa, “I ya fe fan, i tinxin, koni muxu yo mi mangan konni naxan a tuli matima i ra.” 4 Abisalomi yi a falama nen, a naxa, “Ee! Xa n yi nōe finde kitisaan na nun yamanani ito yi! Yengen naxanye birin tagi hanma kiti sa daxina, ne yi fama nen n fema, n yi kiti kenden sa e tagi.” 5 Xa na kanna a maso a ra, a yi a xinbi sin a yetagi, Abisalomi yi a rakelima nen, a yi a sunbu. 6 Muxun naxanye birin yi sigama mangan fema kiti sadeni, Abisalomi yi na ligama nen, Abisalomi lu rafanye Isirayila muxune ma na kii nin. 7 Nee naanin dangu xanbini, Abisalomi yi a fala mangan xa, a naxa, “Tin, n xa siga Xebiron yi, alogo n layirin naxan tongoxi Alatala xa, n xa sa na rakamali. 8 N yi Gesuri taani Arami yamanani waxatin naxan yi, n na layirin tongo nen, xa a n nafa Yerusalen yi, n saraxan bama nen Alatala xa Xebiron yi.” 9 Mangan yi a fala a xa, a naxa, “Siga bōne xunbenli.” Nayi, Abisalomi yi keli, a siga Xebiron yi. 10 Abisalomi yi xerane rasiga wundoni Isirayila bōxōn birin yi, e xa sa a fala, e naxa, “E na xōtaan xuiin me waxatin naxan yi, e xa a fala, e naxa, ‘Abisalomi nan yamanan mangan na Xebiron taani.’” 11 Muxu keme firin bata yi keli Yerusalen yi fa Abisalomi fōxō ra, koni e yi biraxi a fōxō ra xaxilitareyaan nin, e mi yi fefe kolon na feni. 12 Abisalomi yi saraxan nalima waxatin naxan yi, a yi xeraan nasiga Giloha taani, Axitofeli Giloha kaan xilideni, Dawudaa maxadi tiina. Yanfan senben yi gbo ayi, muxune yi wuya ayi Abisalomi fōxō ra. 13 Dōnxen na, fala ralina nde yi a fala Dawuda xa, a naxa, “Isirayila kaane bata bira Abisalomi fōxō ra.” 14 Nayi, Dawudaa walikeen naxanye yi a fema Yerusalen yi, a yi a fala ne xa, a naxa, “E keli, en na en gi, bayo fere mi sa luma na en yi en ba Abisalomi yii. E siga mafuren, xanamu, a tan a mafurama nen a gbalon sa taan birin fari silanfanna ra.” 15 Mangana walikene yi a fala, e naxa, “Mangana, nxu kanna, nxu i sagoni.” 16 Mangana muxune birin yi bira a fōxō ra, a yi a konyi jaxalan fu lu manga banxin kantandeni. 17 Mangan nun a fōxōrabirane birin mini taani waxatin naxan yi, e sa ti banxina nde dexōn naxan makuya taan na ndedi. 18 Dawudaa walikene birin yi lu dangue a

dexōn, e nun Keretine nun Peletine nun Gati taan muxu keme senninna naxanye bira a fōxō ra, ne birin yi lu dangue mangan yetagi. 19 Mangan yi a fala Itayi Gati kaan xa, a naxa, “Nanfera i fan fama n fōxō ra? Xete, i lu Manga Abisalomi fema amasoto xōjen nan i tan na, muxu kedixin nan i tan na keli i ya yamanani. 20 I faxi xoro nin, n xa i xali n yii to ba? Anu n tan yeteen mi a kolon n sigan denaxan yi. I ngaxakedenne tongo, i xete. Alaa hinanna nun a tinxinna xa lu i xōn.” 21 Koni, Itayi yi mangan yabi, a naxa, “N bata n kolo habadan Alatala yi e nun n ma mangan niini. Mangana, n kanna, n tan i ya walikeen luma nen i fōxō ra, i na siga dede, xa a findi sayaan na hanma kisina.” 22 Nayi, Dawuda yi a fala Itayi Gati kaan xa, a naxa, “En siga, dangu yeen na!” Na ma, Itayi nun a sofane nun a denbayane birin yi siga. 23 Yamanan muxune birin yi wugama, e gbelegbele, ganla nema danguma Dawuda yetagi. Mangan yeteen yi Kediron lanbanni gidi kiraan xōn naxan sigama tonbonni. 24 Sadoki fan yi na, e nun Lewi bōnsōnna muxun naxanye yi Alaa Layiri Kankiraan xalima. E yi Alaa Kankiraan dōxō, saraxarali Abiyatari yi lu saraxan naliye han naxanye birin yi kelima taani, ne yi dangu jan. 25 Mangan yi a fala Sadoki xa, a naxa, “Alaa Kankiraan naxete taani. Xa n na Alatalaa hinanna soto, a n naxete, a tinma nen n Layiri Kankiraan to e nun a dōxōdena. 26 Koni xa Ala a fala, a naxa, ‘I mi fa rafan n ma sōnōn,’ awa, n tan ni i ra naxan na rafan a ma a xa na liga n na.” 27 Mangan mōn yi a fala saraxarali Sadoki xa, a naxa, “Xete taani bōne xunbenli, e nun i ya dii xemena Aximaasi nun Abiyatari a dii xemen Yonatan. 28 N tan mabinni, n luma nen tonbonni baan gidideni, han n yi i ya xibarun soto i ya xerane ra.” 29 Nayi, Abiyatari nun Sadoki yi Alaa Kankiraan xali Yerusalen yi, a sa lu na. 30 Dawuda wugamatōon yi te Oliwi geyaan fari, a yetagin luxunxi, a sanni genla a ra. Naxanye birin yi tema a fōxō ra, ne fan bata yi e yetagine luxun, e yi wugama. 31 E yi a fala Dawuda xa, e naxa, “Axitofeli biraxi Abisalomi fōxō ra yanfantenne ye.” Dawuda yi a fala, a naxa, “Alatala, a liga Axitofeli maxadine xa findi fufafuun na.” 32 Dawuda geyaan xun tagin li waxatin naxan yi, Ala batuma denaxan yi, a yi a maxadi muxun Xusayi, Araka bōnsōnna muxuna nde to fe a ralandeni, a dugine yibōxi, burunburunna a xunni. 33 Dawuda yi a fala a xa, a naxa, “I nama fa n fōxō ra, i findima nen n goronna ra. 34 Xete taani, i sa a fala Abisalomi xa, i naxa, ‘N bata findi i ya walikeen

na. A singeni, n wali nen i baba xa, koni iki, n waxi wali feni i tan nan xa.' Na ma, i nœ n maliye Axitofeli a maxadi xuine kale nen n xili ma. **35** Saraxaraline, Sadoki nun Abiyatari luma nen i fema. I na naxan birin to manga banxini, i yi a fala saraxaraliin Sadoki nun Abiyatari xa. **36** Sadoki a dii xemena Aximaasi nun Abiyatari a dii xemena Yonatan firinne birin e fema, i na xibarun naxanye me, i yi e rafa ne faladeni n xa." **37** Nayi, Dawuda xoyin Xusayi xete taani waxatin naxan yi, Abisalomi fan yi so Yerusalen yi.

16 Dawuda bata yi dangu geyaan xuntagin na ndedi, Mefiboseti a walikeen Siba yi fa a ralandeni. Sofali firin yi a foxo ra, buru keme firin, bogise xonna xaren ligaseen yee keme e nun xode bogi xaren ligaseen yee keme e nun manpa kundi keden yi naxanye fari. **2** Mangan yi a fala Siba xa, a naxa, "I ito ligan di?" Siba yi a yabi, a naxa, "Sofanle findin denbaya maxali seen nan na, burune nun wudi bogine findima i ya sofane balon nan na, naxanye na tagan tonbonni, manpaan yi findi ne min seen na." **3** Mangan yi a fala, a naxa, "I kanna dii xemena minen yi?" Siba yi a yabi, a naxa, "Mefiboseti bata lu Yerusalen yi, bayo a falaxi nen, a naxa, 'Isirayila yamana n babaa mangayaan soma nen n yii to.'" **4** Mangan yi a fala, a naxa, "Mefiboseti gbeen naxan birin na, n bata na birin so i yii." Nayi, Siba yi a xinbi sin boxoni. A yi a fala, a naxa, "I nuwali Mangana, i bata hinan n na." **5** Manga Dawuda to fa Baxurin taan fema, muxuna nde yi mini, e nun Soli birin yi bonson kedenna nin, a xili Simeyi, Geraa dii xemena. A mini, a lu dangan tiye. **6** A lu gemene wole Dawuda ma e nun Manga Dawudaa walikene birin, hali yamaan nun sofa senbemanen to yi a yiifanna nun a komenna ma. **7** Simeyi yi a dangama, a gbelegbele, a naxa, "Siga, siga, fuyantenna, faxa tiina! **8** I faxan naxanye tixi Soli a denbayani, Alatala i ratononna nen ne birin na. I bata mangayaan ba Soli yii, nanara Alatala bata a so i ya dii xemena Abisalomi yii. Iki, i tan tononi bayo faxa tiin nan i ra." **9** Nayi, Seruyaa dii xemena Abisayi yi a fala mangan xa, a naxa, "Nanfera bare faxaxini ito mangan dangama, n kanna? A lu n xa sa a xunna ba a de." **10** Koni mangan yi Abisayi yabi, a naxa, "I tan nun i tada Yowaba, e gbee biran nanse yi? Xa a sa a li xemeni ito n dangama bayo Alatala nan a yamarixi a xa n danga, muxu yo mi nœ falan tiye a ma." **11** Dawuda mon yi a fala Abisayi nun a walikene xa, a naxa, "Xa n ma diin waxi n faxa feni,

a mi finde terena fe ra xa Bunyamin kaani ito fan na liga. E a lu na, a xa n danga, xa Alatala bata a yamari. **12** Waxatina nde, Alatala n ma tonon toma nen. Nayi, a n ma dangan masarama nen duban na." **13** Dawuda nun a foxorabirane yi sigan waxatin naxan yi kiraan xon, Simeyi yi sigama e yelanni geyaan kanke ra, a mon yi lu e dange, a yi lu gemen nun benden wole e ma. **14** Donxen na, mangan nun a foxorabirane yi Yuruden baan li. E bata yi xadan, e yi e matabu menni. **15** Abisalomi bata yi so Yerusalen yi e nun Isirayila yamaan birin, Axitofeli fan yi a foxo ra. **16** Xusayi, Araka bonsonna muxuna nde, Dawuda maxadi muxun fa waxatin naxan yi Abisalomi fema, a gbelegbele, a naxa, "Tantunna mangan xa." **17** Abisalomi yi Xusayi maxodin, a naxa, "I ya tinxinna ngan nan na ra i xoyin Dawuda xa ba? Nanfera i mi sa a mati?" **18** Xusayi yi Abisalomi yabi, a naxa, "N mi tinxi nen. Bayo Alatala nun Isirayila birin naxan sugandixi mangan na, n na nan foxo ra. Nayi, n luma i tan nan foxo ra. **19** N walima nde xa? A finde a dii xemena na ba? Bayo n bata yi wali i baba xa, n walima nen i fan xa." **20** Abisalomi yi a fala Axitofeli xa, a naxa, "E a fala e bode tagi en lan en xa naxan liga." **21** Axitofeli yi Abisalomi yabi, a naxa, "Dawuda konyi jaxanla naxanye lu manga banxin kantandeni, e nun ne xa sa kafu. Nayi, Isirayila birin a kolonje a i bata rajaxu i baba ma alo se kunxin xirina, i foxorabirane yi senbe so." **22** Nayi, e bubun ti Abisalomi xa manga banxin xuntagi, Abisalomi nun a babaa konyi jaxanle yi sa kafu menni Isirayila birin yetagi. **23** Na waxatini, Axitofeli a maxadin yi suxi alo Ala yetena a fala kii naxan yi. Dawuda nun Abisalomi fan yi a maxadine suxuma kii kedenna nin.

17 Waxatidi to dangu, Axitofeli yi a fala Abisalomi xa, a naxa, "Tin, n xa muxu wuli fu nun firin sugandi, n siga Dawuda foxo ra to kœen yeteen na. **2** N sa a xadanxin lima nen, fanga mi fa a ra, n yi a suxu. Naxanye biraxi a foxo ra, ne yi e gi. Nayi, n yi mangan kedenna faxa. **3** N yi yamaan birin mabandun i ma. I xemena naxan fenma, na na faxa, yamaan birin fama nen i ma, e lu boje xunbenli." **4** Na falan yi Abisalomi nun Isirayila fonne birin kenen. **5** Na waxatini, Abisalomi yi yamarin fi, a naxa, "E mon xa Xusayi, Araka bonsonna muxun fan xili alogo en xa a me a naxan falama." **6** Xusayi yi fa Abisalomi fema, Abisalomi yi a fala a xa, a naxa, "Axitofeli ito nan

falaxi, a naxan falaxi a lan en yi na liga ba hanma en-en? I fan xa falan ti.” 7 Xusayi yi Abisalomi yabi, a naxa, “Ito yi, Axitofeli mi maxadi faji tixi. 8 I yetena i baba nun a muxune kolon ki faji. Sofa kenden nan e ra, e magaxu alo yatan naxan ma diiye baxi a yii burunna ra. Yenge soon nan yi i baba ra, a mi luma yamaan fema kœen birin na. 9 Iki, a luxunxi yinla nde ra hanma yire gbete. Dawudaa ganla na en ma muxuna ndee faxa tun, na feen xibarun sigama ayi nen, e naxa a Abisalomi a ganla bata no. 10 Na na liga, hali senbemaan naxanye luxi alo yatane en ma ganla ye, ne tunnaxoloma e ma nen, bayo Isirayila kaane birin a kolon a yenge so fajin nan i baba ra, anu a fœxœrabirane senben gbo. 11 Nayi, n miriyani, Isirayila sofane birin xa e malan i fema, keli Dan ma han sa dœxœ Beriseba ra. Nayi, e wuyama ayi nen alo baan jemensinna. Na xanbi ra, i yeteen yi siga e yengedeni. 12 A lu dede, en na a suxe, en so a xunna alo xiila godon bœxœn ma kii naxan yi. E nun a muxune sese mi a yimine. 13 Xa a luxun taana nde yi en ma, Isirayila kaane birin fe lutin na, en yi na taan halagi, hali a gemedina, a mi luye.” 14 Abisalomi nun Isirayila kaane yi a fala, e naxa, “Araka bœnsœnna muxu Xusayi a maxadi xuine dangu Axitofeli gbeene ra.” Alatala bata yi a ragidi nun a Axitofeli a maxadi xuiin xa kala alogo tœron xa Abisalomi li. 15 Axitofeli naxan fala Abisalomi nun Isirayila fonne xa, Xusayi yi na rali saraxaralina Abiyatari nun Sadoki ma. 16 A yi a fala e xa, a naxa, “Iki, œ mafura xeraan nasige Dawuda ma. E yi a fala a xa, a nama kœen nadangu baan meremereni. A lan a xa baan gidi alogo a nama e nun a fœxœrabirane raxœri.” 17 Yonatan nun Aximaasi yi tixi En-Rogeli yi. Walike gilena nde yi fa a fala e xa, a e xa sa na fala Dawuda xa, bayo e mi yi suse soe taani e yi e yete mayita. 18 Koni, banxulanna nde yi e to, a sa a fala Abisalomi xa. Nayi, e firinna birin yi siga mafuren, e sa so xemena nde a banxini Baxurin taani xœjinna yi naxan ma sansan kui, e sa e luxun menna ra. 19 Naxanla yi bitinganna tongo, a yi a sa xœjinna de ra, a sansi xœri dinxin tongo a na sa men fari alogo e nama sike sese ma. 20 Abisalomi a walikene to na jaxanla banxin li, e yi a maxœdin, e naxa, “Aximaasi nun Yonatan minen?” Naxanla yi e yabi, a naxa, “E bata dangu xuden na.” Walikene yi e fen, e mi e to, e yi xete Yerusalen yi. 21 E keli xanbini na, Aximaasi nun Yonatan yi te xœjinna ra, e sa Manga Dawuda rakolon. E yi a fala Manga Dawuda xa, e naxa, “E keli, œ mafura,

œ baan gidi, bayo Axitofeli bata maxadin ti lan œ fe ma.” 22 Dawuda nun yamaan naxan yi a fœxœ ra, e keli benun subaxani, e birin yi Yuruden baan gidi. Keden mi lu naxan mi Yuruden baan gidi. 23 Axitofeli to a to, a a maxadi xuiin mi suxi, a yi a sofanel tongo, a siga a konni a taani. A yamarine fi a denbayaan ma. Na xanbi ra, a yi a yete singan, a yi faxa. E yi a maluxun a baba gaburun na. 24 Dawuda yi siga Maxanayin taani, Abisalomi Yuruden baani gidi waxatin naxan yi e nun Isirayila ganla birin. 25 Abisalomi bata yi Amasa findi sofa kuntigin na Yowaba funfuni. Amasa baba nan yi Yeteri ra, Isirayila kaan naxan Abigayili dœxœ, Naxasi a dii temena, Yowaba nga Seruya xunyena. 26 Abisalomi nun Isirayila kaane yi e gali malanden nafala Galadi yamanani. 27 Dawuda to fa Maxanayin taani, Naxasi a dii xemœn Sobi naxan yi kelixi Rabaha yi, Amonine manga taana, na nun Amiyeli a dii xemœn Makiri, Lodebara kaana, e nun Galadi kaan Barasilayi, naxan yi kelixi Rogelimi yi, 28 ne yi fa seni itoe ra Dawuda yœe ra: sadene nun goronne nun fejeœne nun murutun nun fundenna nun murutu fujin nun sansi xœri gilinxine nun konso togen nun togen siya gbeteœe nun 29 kumin nun nœnœn nun yœxœœne nun fenœna. E fa ne birin na Dawuda nun a yamaan xa naxanye yi a fœxœ ra, alogo e xa e don, bayo e yi a falama nen, e naxa, “Kamen nun ige xœnla bata yamani ito suxu tonbonni.”

18 Dawuda yi yamaan malan naxanye yi a fœxœ ra, a yi sofa kuntigine dœxœ naxanye muxu kemene nun muxu wuline xun na. 2 Dawuda yi yamaan fœxœ singen nasiga Yowaba ma a yamarin bun, a yi a fœxœ firinden nasiga Abisayi ma a yamarin bun, Seruyaa dii xemœn Yowaba tada. Dawuda yi a fœxœ saxanden nasiga Itayi Gati kaan ma a yamarin bun. Mangan mœn yi a fala yamaan xa, a naxa, “N fan wama siga feni œ fœxœ ra.” 3 Koni, yamaan yi a fala a xa, e naxa, “I mi sigama. Bayo xa nxu nxu gi, yaxune mi nxu yatœma, hali nxu fœxœ kedenna faxa, e mi na yatœma. Koni, i tan dangu nxu tan sofa muxu wuli fu ra. Nanara, a lan i lu taani, i nœe nxu maliœe denaxan yi.” 4 Mangan yi e yabi, a naxa, “Naxan nafaœ œ ma, n na nan ligama.” Sofane yi minima keme keme yœœn nun wuli wuli yœœn ma waxatin naxan yi, mangan yi ti taan so deœn na. 5 Mangan mœn yi a fala Yowaba nun Abisayi nun Itayi xa, a naxa, “N bata œ mafan, œ nama fe jaxi yo liga Abisalomi ra, n ma diina.” Sofane birin yi a

xuiin name na yamarin fiye kuntigine ma. **6** Dawudaa sofane yi mini siga Abisalomi a ganla yengedeni, yengen so Efirami fotonna nin. **7** Dawudaa ganla yi Abisalomi a ganla na, e yi muxu wuli mɔxɔɲe faxa e ra na lɔxɔni. **8** Yengen yi so yamanan birin yi. Naxanye faxa fotonni, ne yi wuya dangu naxanye faxa yengeni. **9** Na waxatini, Abisalomi yi mini Dawudaa walikene ma. Abisalomi bata yi te sofanel fari. Sofanla yi so wari bili gbeen yiine bun, Abisalomi xunna yi kankan wari yiine longonna ra. A lu bɔxɔn nun kuyen tagi, sofanel yi mini a bun. **10** Xemena nde to na to, a fa na fala Yowaba xa, a naxa, “N bata Abisalomi to singanxi wariin bun.” **11** Koni, Yowaba yi a fala xemen xa, a naxa, “I a to nen? Nanfera i mi a faxa keden na? N yi gbeti gbanan fu soe nen i yii e nun tagixidina nde.” **12** Koni na xemen yi a fala Yowaba xa, a naxa, “Hali i gbeti gbanan wuli keden so n yii, n mi tinje fe nxin lige mangana dii xemen na, bayo nxu birin a me nen manga yamarini ito fima i tan nun Abisayi nun Itayi ma, a naxa, ‘E xaxili lu Abisalomi xɔn, muxu yo nama fe nxin liga a ra.’” **13** Xa n yi na liga alo n mi sese mexi, n yi bɔnɔma n niini nen, mangan yi n ma wulen kolonma nen, bayo sese mi luxunje a ma. Nayi, i tan yeteen mi yi n xun mafale.” **14** Yowaba yi a yabi, a naxa, “N mi n ma waxatin kalama i tan xɔn.” A yi tanba saxan tongo, a sa e sɔti Abisalomi kankeni a njepen singanxin na. **15** Sofa banxulan fuun naxanye yi Yowabaa yenge so seene maxalima, ne yi Abisalomi rabilin, e yi a rajan. **16** Na xanbi ra, Yowaba yi xotaan fe alogo yengen xa dan. Nayi, Dawudaa sofane yi xete Abisalomi a ganla fɔxɔ ra. **17** E yi Abisalomi tongo, e yi a woli yili gbeen na fotonni, e geme gbege malan a fari. Na waxatini, Abisalomi a sofane yi e gi, birin yi siga a konni. **18** Abisalomi yi kende waxatin naxan yi, a bata yi banxi gbeen ti Manga lanbanni, bayo a yi a mirima nen, a naxa, “Dii xeme mi fa n yii, n xinla luye naxan yii.” Nanara, a yi na banxin xili sa a yete xun ma, naxan mɔn xili bama han to a Abisalomi a banxina. **19** Aximaasi, Sadoki a dii xemen yi a fala Yowaba xa, a naxa, “Tin, n xa n gi n sa a fala mangan xa Alatala kitin naxan nagidixi a ma, a yi a so a yaxune yii.” **20** Yowaba yi a fala a xa, a naxa, “Xibaru fajin rali mi i ra to, lɔxɔ gbeti i sa xibaru fajin naliye, koni to i mi a xale, bayo mangana dii xemen bata faxa.” **21** Yowaba yi a fala Kusi kaana nde xa, a naxa, “Siga, i naxan toxi, sa na fala mangan xa.” Kusi kaan yi a xinbi sin Yowaba bun ma, a yi a gi. **22** Aximaasi,

Sadoki a dii xemen mɔn yi a fala, a naxa, “Sese liga, tin, n fan xa n gi Kusi kaan fɔxɔ ra.” Yowaba yi a fala, a naxa, “N ma diina, nanfera i waxi i gi feni? Na mi findima xibaru fajin ra i tan xa.” **23** Aximaasi mɔn yi a fala, a naxa, “Hali fefe liga, n waxi n gi feni.” Yowaba yi a fala a xa, a naxa, “Awa, i gi!” Aximaasi yi a gi mini Yuruden mere yi kirani, a sa dangu Kusi kaan na. **24** Dawuda yi dɔxi de firinne tagi. Kantan muxun yi siga yinna xun tagi, a yi a yeen nasiga, a yi xemena nde kedenna to fe a giye. **25** Kantan muxun yi gbelegbele, a yi a fala mangan xa. Mangan yi a yabi, a naxa, “Xa a kedenna nan a ra, a fama xibaru fajin nan na.” Na xeraan yi masoma, **26** kantani muxun mɔn yi muxu gbeti fan to gixi. A gbelegbele de kantanna ra, a naxa, “Muxuna nde fan kedenna fama a giye.” Mangan yi a fala, a naxa, “Na fan faan xibaru fajin nan na.” **27** Kantan muxun yi a fala, a naxa, “Muxu singen luxi alo Aximaasi na a ra, Sadoki a dii xemena.” Mangan yi a fala, a naxa, “Xeme fajin nan a ra, a fama xibaru fajin nan na.” **28** Aximaasi yi gbelegbele, a yi a fala mangan xa, a naxa, “I nuwali.” A yi a xinbi sin mangan yetagi, a yetagin yi lan bɔxɔn ma, a yi a fala, a naxa, “Barikan bira Alatala xa, i ya Ala, naxan i yenge faane soxi i yii, mangana, n kannna.” **29** Mangan yi a maxodin, a naxa, “Abisalomi yiyalan?” Aximaasi yi a yabi, a naxa, “N tan i ya walikene mayimaxa gbeen to nen Yowaba nxu nun i ya walikena nde rafa waxatin naxan yi, koni n mi yi a kolon fefe yi a ra.” **30** Mangan yi a fala, a naxa, “I masiga, i ti be.” Aximaasi yi a masiga, a lu tixi. **31** Kusi kaan fan yi fa. A yi a fala, a naxa, “Mangana, n kannna, n baxi xibaru fajin nan medeyi, bayo Alatala bata i ya kitin sa to. Naxanye yi i yengema, a bata ne sa i sagoni.” **32** Mangan yi Kusi kaan maxodin, a naxa, “Sese mi Abisalomi sɔtɔxi ba?” Kusi kaan yi a yabi, a naxa, “Naxan na banxulanna sɔtɔxi, na xa i yaxune birin sɔtɔ, e nun naxanye birin murutɔxi i xili ma.” **33** Nayi, mangan yi kontofili, a yi te sangansoon kɔe ra taan yinna deen xun ma, a lu wuge. A yi lu sigamatini, a falama, a naxa, “N ma dii xemena Abisalomi! Hali n tan yi faxa i funfuni nun. N ma dii xemena Abisalomi, n ma dii xemena!”

19 E yi na fala Yowaba xa, e naxa, “Mangan sunuxin luma Abisalomi wuge.” **2** Na lɔxɔn xunna kenla yi masara sunun na sofane birin xa. Bayo na lɔxɔni yamana a me nen a mangan sunuxi a dii xemena fe ra. **3** Na lɔxɔn yeteni, sofane luxunxin yi so taani alo

sofa yagixin naxanye e gixi yengeni. **4** Mangan bata yi a yetagin luxun, a gbelegbelema, a naxa, “N ma dii xemena Abisalomi! Abisalomi, n ma dii xemena, n ma dii xemena!” **5** Yowaba yi so mangan konni, a yi a fala a xa, a naxa, “I bata i ya walikene birin nayagi to, naxanye i niin nakisixi, ε nun i ya dii xemene nun i ya dii temene nun i ya jaxanle nun i ya konyi jaxanle birin. **6** I rapaxu naxanye ma, i bata ne rafan, i rafan naxanye ma, i yi ne rapaxu. Bayo i bata a yita to, a i ya gali mangane nun i ya walike tinxinxine, a ne bote mi i xa. N bata a to iki xa Abisalomi yi lu a nii ra nun to, nxu tan birin yi faxa na, na yi rafan i ma nun. **7** Nayi, keli, i mini, i falan ti i ya walikene xa. Bayo n bata n kolo Alatala yi, xa i mi mini muxu keden mi luye i foxo ra to kœen na, na jaxuma ayi nen dangu tœron na naxan birin bata liga keli i foningeya waxatin ma han iki.” **8** Nayi, mangan yi keli, a dœxo taan so deen na. E na fala yamaan xa, e naxa, “Mangan dœxi taan so deen na.” Yamaan birin yi fa mangan yetagi. Na waxatini, Isirayila ganla tan bata yi a gi. Birin bata yi siga e konni. **9** Isirayila bœsonne birin nun yamaan birin yi matandin tima, e naxa, “Mangan bata en ba en yaxune yii, a tan nan en nakisi Filisistine ma, iki a bata a gi yamanani Abisalomi a fe ra. **10** Anu, en Abisalomi naxan sugandixi a xa findi en ma mangan na, na bata faxa. Nanfera nayi, ε mi Dawuda xilima, ε yi a dœxo mangan na?” **11** Manga Dawuda yi xerane rasiga a faladeni saraxaraliin Sadoki nun Abiyatari xa, a naxa, “E falan ti Yuda fonne xa, ε naxa, ‘Nanfera ε luun dœnxen na mangan naxetedeni a manga banxini? Anu, n tan yetena Isirayila kaane miriyane kolon. **12** Ngaxakedenmane nan ε ra, en wuli keden, fasa keden. Nayi, ε nama lu dœnxen na xetedeni mangan ma.’ **13** œon xa a fala Amasa xa, ε naxa, ‘I ngaxakedenma mi n na ba? Xa n mi i findi sofa kuntigin na habadan Yowaba jœxœni, Ala xa n xa tœro gbeen sœto.” **14** Dawudaa falane yi Yuda muxune birin kenan, alo muxu kedenna nan yi e ra, e xeraan nasiga a faladeni mangan xa, e naxa, “E nun i ya walikene birin xa xete be.” **15** Mangan yi xete han Yuruden baani, Yuda kaane yi siga Giligali yi alogo e xa sa mangan nalan, e yi a ragidi Yuruden baani. **16** Gera, Bunyamin kaan naxan keli Baxurin taani, na dii xemen Simeyi yi na, na yi a mafura e nun Yuda muxune yi godo Manga Dawuda ralandeni. **17** Bunyamin kaan muxu wuli keden yi biraxi a foxo ra, Siba fan naxan yi walima Soli a denbayaan xa, e nun a dii xeme fu nun suulunne

nun a walike mœxœne. Ne yi fa Yuruden baan de mangan yœe ra. **18** Kunkibane yi fa alogo e xa mangana denbayaan xali e nun naxan na mangan kenan. Na to yelin Yuruden baan gide, Geraa dii Simeyi yi bira mangan yetagi. **19** A yi a fala mangan xa, a naxa, “Mangan nama n suxu n haken na. N tan i ya walikœen haken naxan liga i ra i mini lœxœni Yerusalœn yi, ninan na xœn, i tan mangana. **20** Mangana, n kannna, n na a kolon a n bata yulubin liga, koni i bata a to to, n singe nan faxi i ralandeni Yusufu bœsonna muxune birin yœe ra.” **21** Nayi, Abisayi, Seruyaa dii xemen yi falan tongo, a yi a fala, a naxa, “Simeyi mi lan a faxa ba, a to Alatalaa muxu sugandixin dangaxi?” **22** Koni Dawuda yi a fala Abisayi nun a xunyen Yowaba xa, a naxa, “Seruyaa dii xemene, ε gbee biran nanse yi? Nanfera iki, ε n matandima? N mi waxi Isirayila kaa yo xa faxa to, n laxi a ra a n tan nan Isirayila mangan na to.” **23** Mangan yi a fala Simeyi xa, a naxa, “I mi faxama.” Mangan yi a kolo a xa. **24** Mefiboseti, Soli a dii xemen fan fa nen mangan nalandeni. A munma yi a sanne maxa, a mi a de xabene bi, a mi a dugine xa, xabu mangan siga lœxœni han a xete lœxœni bœne xunbenli. **25** A to siga mangan yetagi keli Yerusalœn yi, na yi a maxœdin, a naxa, “Mefiboseti nanfera i mi sigaxi n foxo ra?” **26** A yi a yabi, a naxa, “Mangana, n kannna, n ma walikœen nan n yanfaxi, bayo n tan i ya walikœna a fala nen, a naxa, ‘N nan n ma sofanli tonma nen, n te a fari nxu nun mangan yi siga. Bayo sankalatoœn nan i ya walikœen na.’” **27** Koni, a bata sa n tan i ya walikœen mafala n kannna xa. Nayi, mangana, i luxi nen alo Alaa malekana. Naxan napan i ma, na liga. **28** Bayo muxun naxanye birin n fafe a denbayani, mangan yi lan nun a ne faxa, n kannna, hali na birin, i bata naxanye dege tabanla ra i bata n tan i ya walikœen basan ne ra. N fe tinxinxin mundun ligaxi n yi n kannna mafan?” **29** Mangan yi a fala a xa, a naxa, “Nanfera i œon falan tima? N bata a ragidi a i tan nun Siba xa bœxœne yitaxun.” **30** Nayi, Mefiboseti yi a fala mangan xa, a naxa, “A xa a birin tongo, amasœto n kannna, mangan bata so a banxini bœne xunbenli.” **31** Barasilayi, naxan yi kelixi Rogelimi taani Galadi yamanani, na fan godo nen Yuruden baani, e nun mangan yi gidi, a fan xete nen a foxo ra baan kidi ma. **32** Fonna nan yi a ra naxan bata yi jœe tonge solomasexe sœto, nafulu kan gbee nan yi a ra, a tan nan yi mangan baloma, a yi Maxanayin taani waxatin naxan yi. **33** Mangan yi a fala Barasilayi xa, a naxa, “Fa n foxo ra Yerusalœn yi,

n nan n yengi dōxe i xōn ma.” **34** Koni, Barasilayi yi mangan yabi, a naxa, “N mōn j̄e yoli sōte alogo nxu nun mangan xa te nxu bode xōn Yerusalen yi? **35** To n bata fori j̄e tonge solomasexe. N nōe a fajin nun a jaxin kolonje ba, n donseen naxan donma, n yi a min, n mi fa nōe na jaxunna kolonje, hanma xemene nun jaxanle sigi sa xuina. Nanfera n finde goronna ra i xun ma? **36** I ya walikeen sigama nen i fōxo ra ndedi Yuruden baan kidi ma. Koni nanfera mangana, i n saranna fima maani ito ra? **37** Nayi, a lu n xa xete n ma taani, n sa faxa n baba nun nna gaburun dēxōn ma. Koni a mato, n ma dii xemen Kimihami ni i ra, a tan nan sigama i fōxo ra, naxan na i kenēn, i yi na liga a ra.” **38** Mangan yi a fala, a naxa, “Kimihami xa fa n fōxo ra, naxan nafa n ma, n na a lige a xa, i na wa naxan yo xōn ma n tan yii, n na lige i xa.” **39** Yamaan birin to Yuruden baani gidi, mangan fan yi gidi, mangan yi Barasilayi sunbu, a duba a xa, Barasilayi yi xete a konni. **40** Mangan yi siga Giligali binni, Kimihami yi biraxi a fōxo ra. Yuda yamaan birin nun Isirayila yamaan fōxo kedenna bata yi mangan nagidi Yuruden baani. **41** Koni Isirayila muxune yi fa mangan fema, e yi a fala a xa, e naxa, “Nanfera nxu ngaxakedenne Yuda kaane i ragidixi Yuruden baani, ε nun i ya denbayana, anu i ya sofane birin yi i fōxo ra?” **42** Yuda muxune birin yi Isirayila muxune yabi, e naxa, “Bayo nxu barin maso mangan na ε xa. Nanfera ε xolon na ra? Mangan nan nxu degema ba? Hanma a seen nan fixi nxu ma?” **43** Isirayila muxune yi Yuda muxune yabi, e naxa, “Nxu gbeen nan mangan na sanja ma fu, nxu gbeen nan Dawuda ra dangu ε ra. Nanara, ε nxu rajaxuxi? Nxu singe mi yi a fala a en ma mangan xa xete ba?” Koni Yuda muxune yi falan ti a jaxin na dangu Isirayila muxune ra.

20 Xeme fuyantenna nde yi Giligali yi, a xili Seeba, Bikiri a dii xemena, Bunyamin kaana. Na yi xōtaan fe, a gbelegbele, a naxa, “Sese mi en nun Dawuda tagi. En nun Yese a dii xemeni ito mi malanxi sese ma. Isirayila kaane, birin xa siga a kon yi.” **2** Nayi, Isirayila kaane yi xete Dawuda fōxo ra, e bira Seeba fōxo ra, Bikiri a dii xemena. Koni, Yuda muxune yi lu e mangan fōxo ra, e yi sa a mati keli Yuruden baani siga han Yerusalen yi. **3** Dawuda yi so a banxini Yerusalen yi. Mangan yi a konyi jaxalan fune tongo a naxanye lu banxin kantandeni. A yi e lu banxina nde kui naxan yi makantanxi ki fajni, koni e mi fa

kafu sōnōn, e yi lu ramaraxi han e sayaan lōxōni, e lu alo kaja gilene. **4** Mangan yi a fala Amasa xa, a naxa, “Yuda sofane maxili, ε birin xa fa be yi benun soqe saxon.” **5** Amasa yi sa na yamarin liga, koni mangan lōxōn naxan saxi a xa, a yi na radangu. **6** Nayi, Dawuda yi a fala Abisayi xa, a naxa, “Seeba, Bikiri a dii xemen fe jaxin ligama en na nen dangu Abisalomi ra. I tan yetēn xa i kanna walikene tongo, i yi Seeba sagatan, alogo a nama taa makantanxine li, a lō ayi e ma.” **7** Yowabaa muxune yi bira Abisayi fōxo ra e nun Keretine nun Peletine, e nun sofane birin. E birin yi mini Yerusalen yi alogo e xa Seeba sagatan, Bikiri a dii xemena. **8** E to Gabayon geme gbeen yiren li, Amasa yi fa e yee ra. Yowaba yi maxidixi a sofa dugine yi, e nun a tagixidina, silanfanna yi singanxi naxan na a tēēni. Yowaba yi masoma waxatin naxan yi, silanfanna yi ba fōlo a tēēni. **9** Yowaba yi a fala Amasa xa, a naxa, “Ngaxakedenne, i yiyalan?” A yi Amasa de xaben suxu a yiifanna ra alo a yi a sunbuma nen. **10** Silanfanna naxan yi sōtōxi Yowaba kōmenna ma, Amasa mi a yengi lu na xōn ma. Yowaba yi a sōxōn a kuini na ra. Amasa fudi lutine yi sa bōxōni, Yowaba mi fa a yee firinden sin a ma, a yi faxa. Yowaba nun a tada Abisayi yi keli Seeba xili ma, Bikiri a dii xemena. **11** Yowabaa sofa keden yi lu tixi Amasa binbin dēxōn, a naxa, “Ndee Yowaba nun Dawuda a fe yi? Ne xa bira Yowaba fōxo ra.” **12** Na waxatini, Amasa bata yi a makutukutu a wunli kira tagini. Sofaan yi a rakōrōsi, a yi a to birin tixi na. Nayi, a yi Amasa binbin ba kiraan xōn, a sa a sa xēēn ma, a dugin so a xun na. **13** A to a ba kiraan xōn, birin yi bira Yowaba fōxo ra, alogo e xa siga Bikiri a dii xemen Seeba xili ma. **14** Yowaba yi Isirayila bōnsōnne yamanan birin yigidi a sa Abeli-Beti-Maka taan li. Berimi kaane birin yi e malan, e bira a fōxo ra. **15** Yowaba nun a ganla yi Abeli-Beti-Maka taan yenge, bayo Seeba yi na nin, e yi gbingbinna nde rate taan yinna xōn. E yi lu yinna dinje alogo a xa bira. **16** Naxalan xaxilimana nde yi na taani, na yi gbelegbele, a naxa, “N bata ε mafan! ε tuli mati! ε tuli mati! ε a fala Yowaba xa a xa fa han be, n waxi falan ti feni a xa.” **17** Yowaba yi a maso, jaxanla yi a maxōdin, a naxa, “Yowaba nan i tan na ba?” A yi a yabi, a naxa, “Ōn, n tan nan yati a ra.” Jaxanla yi a fala a xa, a naxa, “Nba, i tuli mati n fala xuiin na.” Yowaba yi a yabi, a naxa, “N tuli matixi.” **18** Nayi, jaxanla yi a fala, a naxa, “A fōlōni, muxune yi darixi a fale nen, e naxa, ‘En maxōdinna ti Abeli taani, en hayun fanma nen.’ **19**

Nxo taan taa boŋe xunbelixine nun taa tinxinxine nan ye Isirayila yi, koni i tan waxi na taan kala feen nin Isirayila yi, naxan findixi munanfan taa gbeen na Isirayila yi. Nanfera naxan Alatala gbeen na, i waxi na kala feni?" **20** Yowaba yi a yabi, a naxa, "N ma miriyaan makuya na ra, sese kala fe mi n kui, hanma n yi sena nde raxori. **21** Na fe mi a ra mume! Koni, xemena nde be, naxan sa kelixi Efirami geya yireni, a xili Seeba, Bikiri a dii xemena. Na bata murute Manga Dawuda xili ma. E a keden peen yiiba n xa. Nayi, n ganla bama nen taan de ra." Naxanla yi a fala Yowaba xa, a naxa, "Awa, nxu a xunna wolima i ma nen yinna fari ma." **22** Naxanla yi sa falan ti taan muxune birin xa a xaxilimayani, e yi Bikiri a dii xemene Seeba xunna bolon a de, e yi a woli Yowaba ma. Yowaba yi xotaan fe, sofane yi e masiga taan na, birin yi siga e konne yi. Nayi, Yowaba yi xete Yerusalen yi mangan fema. **23** Yowaba yi Isirayila ganle birin yamarima nen Isirayila yi. Benaya, Yehoyadaa dii xemene nan yi Keretine nun Peletine xun na. **24** Adoran nan yi karahan wanle xunna ra, e nun Yosafati, Axiludu a dii xemene nan yi mangana yenla ra. **25** Sebeli tiin nan yi Sewa tan na. Saraxaraliin nan yi Sadoki nun Abiyatari ra. **26** Dawudaa saraxaralina nde nan yi Ira fan na, naxan yi kelixi Yayiri xabilani.

21 Dawudaa mangayaan waxatini, jee saxon kamen yi so. Dawuda yi Alatala maxodin. Ala yi a yabi, a naxa, "Na ligaxi Soli nun a denbayana muxu faxan nan ma fe ra, e to Gabayon kaane faxesa." **2** Mangan yi Gabayon kaane xili alogo a xa falan ti e xa. Isirayila bonsonna muxu mi yi Gabayon kaane ra, koni Amorine muxu donxene nan yi e ra. Isirayila kaane bata yi e niin nakisin layirin tongo e xa. Koni hali na, Soli yi kataxi e faxesa feen na bayo Isirayila nun Yuda yee rasigan xonla yi a ma. **3** Dawuda yi Gabayon kaane maxodin, a naxa, "N xa nanse liga e xa? Kalan naxan tixi e nae na yitonje di alogo e xa duba Alatalaa yamaan xa?" **4** Gabayon kaane yi a yabi, e naxa, "Yengen naxan nxu nun Soli nun a denbayaan tagi, gbetin xa mi na yitonma, hanma xemana. Anu, a mi lan nxu yi muxun faxesa Isirayila yi." Nayi, mangan yi a fala, a naxa, "Naxan xoli e ma, e na fala n xa, n xa na liga e xa." **5** E yi mangan yabi, e naxa, "Bayo xemene ito yi waxi nxu halagi feni, a bata yi a nata nun, a xa nxu halagi, a yi nxu raxori Isirayila boxon ma. **6** Nayi, e a bonsonna muxu solofere so nxu yii,

nxu xa e singan Alatala yetagi Gabayon taani, Soli yi doxi taan naxan yi, Alatala mangan naxan sugandixi." Mangan yi a fala e xa, a naxa, "N na a soma e yii nen." **7** Mangan yi Mefiboseti ratanga, Yonatan ma dii xemena, Soli mamandenna, bayo Dawuda bata yi layirin xidi e nun Yonatan tagi Alatala xinli. **8** Koni, mangan yi Ayaa dii temen Risipaa dii firinne, Aramoni nun Mefiboseti tongo, a naxanye bari Soli ma. A mon yi Soli a dii temen Mikali a dii xeme suulunne tongo, a naxanye bari Barasilayi a diina Adiriyeli ma, Abeli-Mehola kaana. **9** E yi e so Gabayon kaane yii, ne yi e singan geyaan fari Alatala yetagi. Na muxu soloferene birin yi faxesa sanja ma kedenni. E e faxesa funde xaba loxo singen nin. **10** Risipa, Ayaa dii temen yi benbenla tongo, a yi a sa fanyen ma a yete xa. Keli se xaban folon ma han tule igen yi bira boxoni, a xoline kedima yanyin na, a subene kedi koeeen na alogo e nama doxo e binbine ma. **11** Risipa, Ayaa dii temena, Soli a konyi naxanla naxan naba, e sa na fala Dawuda xa. **12** Nayi, Dawuda yi sa Soli nun a dii xemene Yonatan xonne maxili Yabesi kaane ra Galadi yamanani, naxanye bata yi e ba e funfuni Beti-San yi, Filisistine e singan denaxan yi e Soli no waxatin naxan yi Gilibowa yi. **13** Dawuda yi Soli nun Yonatan xonne tongo Yabesi yi. Muxu soloferen naxanye singan, e yi ne fan xonne malan. **14** E sa Soli nun a dii xemene Yonatan xonne maluxun Bunyamin yamanani Sela yi, Kisu gaburun na, Soli fafe. Mangan yamarin naxanye birin fi, e yi ne birin liga. Na xanbi ra, Ala yi hinan yamanan na. **15** Filisistine mon yi Isirayila yenge. Dawuda nun a walikene yi godo, e yi Filisistine yenge. Xadanna yi so Dawuda fatini. **16** Isebi-Benobi, Refa yixetena nde yi a nata a xa Dawuda faxesa. Silanfan nenen yi singanxi a tagi xidin na e nun sulan yi tanban naxan jee ra naxan binyan yi dangue kilo saxon na. **17** Koni, Abisayi, Seruyaa dii xemene yi fa Manga Dawuda mali, a na Filisitin faxesa. Nayi, Dawudaa muxune yi e kolo, e naxa, "I mi fa sigama nxu foxo ra yengeni, alogo mangayaan nama ba Isirayila yi." **18** Na xanbi ra, yengen mon yi keli Gobi yi Filisistine xili ma. Nayi, Xusa kaan Sibekayi yi Safi faxesa, Refa yixetena nde nan yi na ra. **19** Yenge gbete mon yi keli Gobi taani Filisistine xili ma. Betelemi kaan Yari a diina Elexanan yi Gati kaan Goliyati faxesa, naxan ma tanba yi gbo alo gbindonna. **20** Yenge gbete mon yi keli Gati taani. Menni, xeme kuyena nde yi na, naxan yii soli sennin nun san soli sennin kan yi a ra, e birin malanxina

moxɔɲen nun naanin. Refa yixeten nan yi na fan na. **21** A yi Isirayila kaane konbi. Dawuda tada Simeyaa dii xemen Yonatan yi a faxa. **22** Na sofa naaninna naxanye yi kelixi Gati taani Refa bɔnsɔnni, Dawuda nun a sofane yi ne birin faxa.

22 Dawuda betini ito ba Alatala nan xa, Ala to a ba a yaxune birin yii e nun Soli yii. **2** A yi a fala, a naxa, Alatala nan n ma fanyen na, n ma yinna, n natanga muxuna. **3** N ma Ala nan n ma gɛmɛ gbeen na, n na n luxunma naxan kui. A tan nan n yɛ masansan wure lefaan na, e nun marakisi tiina naxan luxi alo n ma faran makantanxina, n nakisidena. A tan nan n xunbama gbaloni. **4** Tantunna Alatala xa! N na a xili, a yi n nakisi n yaxune ma. **5** Sayaan bata yi a xunfanna radin n xunna ma alo fɔxɔ igena, a yi n magaxuma alo baan xajɛxina. **6** Sayaan bata yi n nabilin a yɔlɔnxɔnne ra. A a lutine rati n yɛɛ ra. (Sheol **h7585**) **7** N ma tɔrɔni, n na Alatala xili nen, n yi n xui ramini n ma Ala ma. A yi n xuiin mɛ a Batu Banxini, a yi a tuli mati n gbelegbele xuiin na. **8** Nanara, bɔxɔn yi maxa. Kuyen bun tiine yi yigisan, e xuruxurun Ala xɔlɔn bun. **9** Tutun yi mini a jɔɛni. Halagi ti tɛɛ dɛgen nun tɛɛ wolonne yi mini a dɛ. **10** Ala yi kuyen nafulɔɲɛ ayi alo kɔlimɔna, a yi godo, kunda yidimixina a sanne bun. **11** A te maleka gubugubu kanna fari, a tukan xulen, a siga foyeni. **12** A yi a luxun dimini, naxan nabilinxi kunda gbeen na, a yi yidimixi alo ige tilinxina. **13** Kenen gbeen yi minima a yɛɛ ra, tɛɛ dɛgen yi minima naxan yi. **14** Alatala yi a kuye sarinna xuiin namini kore, Kore Xɔnna Ala xuiin yi mɛ. **15** A yi a xalimakunle woli a yaxune ma, a yi e raxuya ayi. A yi galanna ragodo e ma, e birin yi e gi. **16** Alatala to a kɔnkɔ e ma, a xɔlɔn to keli alo foye gbeena, fɔxɔ igen xɔnna yi mini kɛnenni bɔxɔn bunna yi to. **17** Ala yi a yiini bandun keli kore, a n suxu, a yi n ba igen tilinxɔ yireni. **18** A yi n xunba n yaxu senbɛmane ma, e nun n yɛngɛ faan naxanye yi maxɔdɔxɔ n xa. **19** E n yɛngɛ nen, n yi tɔrɔxi waxatin naxan yi, koni Alatala yi n mali. **20** A n ba nen gbaloni, a yi n xɔrɔya, a yi n nakisi bayo n nafan a ma. **21** Alatala yi n kɔntɔnna fi n ma bayo n bata tinxinɲɛ ayi a yɛɛ ra yi, a n kɔntɔnna fi n ma lan n yiine sarijanna ma. **22** Bayo n bata lu Alatalaa kirane xɔn ma, n mi n makuyaxi n ma Ala ra alo muxu jaxine. **23** N bata a sariyane birin suxu, n mi tondixi a tɔnne suxe. **24** N bata n yete ratanga haken ma, fɛ yo mi n na a yɛɛ ra

yi. **25** Nanara, Alatala yi n kɔntɔnna fi n ma, bayo n bata tinxinɲɛ ayi a yɛɛ ra yi, n yiine sarijanxi a yɛɛ ra yi. **26** Naxan na tinxinɲɛ ayi, i ya tinxinyaan yitama nen na ra. Fɛ mi naxan na, i ya fetareyaan yitama nen na ra. **27** Naxan na sarijanɲɛ ayi, i ya sarijanna yitama nen na ra. Koni naxan yidɔxi, i na suxu kiin kolon. **28** Bayo i tan nan yiigelitɔne rakisima, i mɔn yi wasodene fɛ ragodo. **29** Alatala, i tan nan n ma kɛnɛnna ra. I tan nan n ma dimini yalanma, Alatala. **30** En birin nema a ra, n ganla yengema nen, nxu nun n ma Ala nema a ra, n tukanma nen yinna xun ma. **31** Alaa kirane kamalixi feul! Alatalaa falane tinxin. Naxanye na e luxun a yi, a ne kantanma nen alo yɛ masansan wure lefana e yɛɛ ma. **32** Nde gbɛtɛ Ala ra, ba Alatala ra? Nde en ma fanyen xɔdɛxɛn na, ba en ma Ala ra? **33** Ala nan n makantanma fangani, a tan nan kira kamalixin yitama n na. **34** A tan nan n naxulunma ayi mafuren alo wondene, a n nate geyane fari. **35** A bata n maxaran yengen ma, nanara n nɔxi sulan xali xɔdɛxɛn bandunɲɛ. **36** I bata n nakisi alo wure lefa yɛ masansanna, i ya fanna n senben gboma ayi. **37** I bata kira gbeeni tɔn n xa alogo n nama bira. **38** N bata bira n yaxune fɔxɔ ra, n yi e halagi. N mi tinxi xɛtɛ e fɔxɔ ra fɔ n na e raxɔri. **39** N na e raxɔri nen, n yi e yibutuxun, e mi fa kelima sɔnɔn, e yi bira n sanna bun ma. **40** I senben soma n yii yɛngɛ so feen nan na, i n yaxune xinbi sin n bun ma. **41** I n yaxune ragima n yɛɛ ra, naxanye yi n najaxuxi, n ne halagi. **42** E gbelegbelema malina fe ra, koni e mi marakisima yo sɔtɔma, E Alatala xilima, koni a mi e yabima. **43** N na e yilunburunma nen alo gbangbanna, foyen sigama naxan na. N na e yibɔma nen, n yi e yibodon alo bendɛna kiraan xɔn. **44** I n natangama yama murutɛxin ma, i yi n findi siyane xunna ra. N mi muxun naxanye kolon, n nɔɔn sɔtɔma ne xun na. **45** Xɔɲɛne n matɔxɔma, n nɛɛn fa falan ti tun, e bata n xuiin suxu. **46** E yii xudi tuma ayi, e fa xuruxurunɲɛ, sa keli e yinne kui. **47** Alatala na! Tantunna xa fi n natangamaan ma! N nakisimana Ala xa batu! **48** Ala nan n gbɛɛɲɔxɔ tiin na, naxan siyane sama n ma nɔɔn bun ma. **49** A n natangama n yaxune ma. I xunnayerenna fima n ma n yaxune xun na, i yi n ba gbalɔtɔne yii. **50** Nanara, n na i tantunma siyane tagi. Alatala, n yi i xinla binya betini. **51** A nɔ gbeene fima nen a mangan ma. A yi a hinanna yita a muxu sugandixin na, Dawuda nun a yixetene han habadan.

23 Dawudaa fala dōnxene nan itoe ra. Dawudaa falane ni itoe ra, Yese a dii xēmēna, xēmē tide kan gbeena falane, Yaxubaa Ala naxan masusanxi mangayaan xili yi, e nun Isirayilaa beti ba fajina. **2** “Alatalaa Nii Saripnanxin falan tixi n tan nan xōn, a falan soma n tan nan dē. **3** Isirayilaa Ala bata falan ti, Ala, Isirayila kantan fanyen bata a fala n xa, a naxa, ‘Mangan naxan na lu muxune xun na tinxinni, Ala yeeragaxuni, **4** na kanna luxi nēn alo xōtōnna kēnēnna, sogen na te xōtōnni kunda yo mi na, fata a wuyenna ra, sansine minima nēn bōxōn ma tulen fa xanbini.’ **5** A mato, Ala naxan nabaxi n ma denbayaan xa, a bata habadan layirin xidi n xa, a naxan xidixi sariyane xōn naxanye a makantanma. Yēyē a xunnayerenna fima n ma, a yi n ma fe ragidixine rakamali. **6** Koni fuyantenne birin luxi nēn, alo wudi jali kanna naxan nawolima ayi, muxu yo mi e tongē a yiin na. **7** Muxun naxan nēma a yiin dīnjē e ra, na kanna wuren nan nawalima hanma tanba wudi daxina, e birin yi gan, e halagi sa!” **8** Dawudaa sofa wekilēxine xinle ni itoe ra: Yosebi-Basebeti Takemōni kaana, a yi Dawuda kantan muxu sofa fajine nan yē. A mōn yi xili Adino Esini kaana, a tan nan muxu kēmē solomasexē faxa tanban na yēgē kedēnni. **9** A firinden findi Axoxi xabilan muxuna nde Dodo a diina Eleyasari nan na. A yi sofa wekilēxi saxanne yē Dawuda fōxō ra, naxanye e dē jaxu Filisitine ma naxanye yi malanxi yēgē so xinla ma. Isirayila sofa ganla yi xetē xanbin na geyane fari, **10** koni Eleyasari a sobe so nēn, a lu Filisitine faxe han xadanna yi xiin naso a yiini silanfanna fēen ma. Na lōxōni, Alatala yi xunnayeren gbeen fi Isirayila ma. Sofaan bonne yi faxi faxa muxune seene nan tun tongodeyi Eleyasari fōxō ra. **11** Harara kaana Xage a dii xēmēn Sama fan yi na. Filisitine bata yi e malan Lehi yi, toge xēēna nde ma. Isirayila sofa ganla yi e gi Filisitine bun ma. **12** Koni, Sama yi lu tixi xēēn tagi, a yi xetē a Filisitine yēgē. Alatala yi xunnayeren gbeen fi Isirayila ma. **13** Lōxōna nde, murutu xaba waxatini, kuntigi tonge saxanne muxu saxan yi godo Dawuda fema Adulan faranna ra. Filisiti ganla yi malanxi Refa lanbanni waxatin naxan yi. **14** Dawuda yi a yire makantanxi fajini waxatin naxan yi, Filisiti ganla nde yi Betelemi yi. **15** Dawuda yi a waxōn fēen fala, a naxa, “Ige ramara yinla naxan Betelemi so dēēn na, nde nōē fē na igen na, a fa a so n yii, n yi n min?” **16** Nayi, na sofa wekilēxi saxanne yi so fangani Filisitine daaxadeni. E sa igen ba ige ramara

yinla ra Betelemi so dēēn na. E yi a xali Dawuda xōn, koni mangan yi tondi a minjē, a yi a bōxōn saraxan na Alatala yetagi. **17** A yi a fala, a naxa, “Alatala, gbalon na a ra n xa, xa n igeni ito min. A luxi nēn alo muxune wunla, naxanye sigaxi igeni ito badeni, e lu sayaan dē!” Nayi, a tondi a minjē. Na sofa wekilēxi gbee saxanne na nan liga. **18** Abisayi, Yowaba tada, Seruyaa dii xēmēn yi Dawuda makantan sofa kendene nan yē. A tan nan muxu kēmē saxanna faxa a tanban na lōxō kedēnni. A fan yi xinla sōtō alo na muxu saxanne. **19** A xunnayeren gbeen sōtō nēn dangu bonne ra. A yi findi muxu saxanne kuntigin na, koni a mi yi e yē. **20** Benaya, Kabaseeli kaana, Yehoyadaa dii xēmēna, sofa wekilēxi gbee nan yi na ra, naxan kabanako fe wali wuyaxi kē. A tan nan Moyaba sofa wekilēxi firinne faxa. Lōxōna nde, xunbeli gbeen yi godon waxatin naxan yi, a tan nan mōn godo ige ramara yinla ra, a yi yatan faxa. **21** A tan nan mōn Misiran sofa gbee magaxuxina nde faxa, tanban yi naxan yii. Benaya yi godo a fōxō ra gbengbetenna ra a yii, a yi a tanban ba a yii, a yi a faxa a ra. **22** Benaya, Yehoyadaa dii xēmēn na nan liga. A yi xinla sōtō alo sofa wekilēxi saxan singene. **23** A yi binye gbeen sōtō dangu sofa tonge saxanne ra, koni a mi yi sofa muxu saxan singene yē. Dawuda yi a findi a kantan muxu sofa tonge saxanne kuntigin na. **24** Muxuni itoe fan yi na muxu tonge saxan ganla ye: Asaheli, Yowaba tada, Elexanan, Dodo Betelemi kaana dii xēmēna, **25** Sama nun Elika, Harodi kaane, **26** Xeleši, Paliti kaana, Ikēsi a dii xēmēna Ira, Tekowa kaana, **27** Abiyeseri, Anatōti kaana, Mebunnayi, Xusa kaana, **28** Salamōn, Axoxi xabilan muxuna, Maharayi Netofa kaana, **29** Xelebi, Banaha Netofa kaana dii xēmēna, Itayi, Bunyamin kaana keli Gibeya yi, Ribayi a dii xēmēna, **30** Benaya, Piraton kaana, Hidayi, keli Gaasa baa yireni, **31** Abi-Alabon, Aruba kaana, Asamaweti, Baxurin kaana, **32** Eliyaba, Saalabon kaana, Yasen ma diina nde, Yonatan, **33** Sama, Harara kaana, Axiyama, Sarari Harara kaana dii xēmēna, **34** Elifeleti, Axasibayi a dii xēmēna, Maka taa kaana nde mamandenna, Eliyami, Giloha kaana Axitofeli a dii xēmēna, **35** Xesirayi, Karemele kaana, Paarayi, Araba kaana, **36** Yigali, Natan Soba kaana dii xēmēna, Bani, Gadi bōnsōnna muxuna nde, **37** Amonin Seleki nun Beroti kaan Naxarayi, naxan yi Seruyaa dii xēmēn Yowaba a yēgē so seene maxalima nun **38** Ira nun Garebi, Yitiri xabilan muxune, **39** e nun Yuriya,

Xiti kaana. E birin malanxina muxu tonge saxan e nun solofere.

24 Alatala mən yi xələ Isirayila kaane ma. A yi Dawuda radin e xili ma, a yi a fala, a naxa, “Siga, Isirayila nun Yuda muxune yate.” **2** Nayi, mangan yi a fala sofa kuntigin Yowaba xa, naxan yi a fema, a naxa, “Sa Isirayila bəxən birin yisiga keli Dan ma han sa dəxə Beriseba ra. Yamaan xa yate, bayo n waxi muxune yaten kolon feni.” **3** Yowaba yi mangan yabi, a naxa, “Mangana, Alatala i ya Ala xa yamaan nawuya ayi dəxəde keme, n kanna yeene yi a to. Koni nanfera, n kanna, i waxi na liga feni?” **4** Koni mangan yi kankan a yamarin ma dangu Yowaba nun kuntigi gbeene gbeen na, e yi mini, e yi Isirayila yamaan yate. **5** E yi Yuruden baan gidi, e sa a fələ Aroyeri taan ma e nun taan naxan baan de, dangu Gadi yi, siga Yaaseri binni. **6** E siga Galadi yamanan nun Kadesi yi Xiti yamanani. E siga Dan yi e nun Sidən nabilinne. **7** E siga Tire taa rakantanxini, e nun Xiwine nun Kanan kaane taane birin yi. E sa a rəjan Yuda yiifari fəxən ma Beriseba yi. **8** E yi yamanan birin yisiga na kiini, kike solomanaanin xi məxəje, e sa Yerusalen li. **9** Yowaba yi yamaan yaten xasabin so mangan yii: Xeme wuli keme solomasexe yi Isirayila yi naxanye yi nəe yengen soe, wuli keme suulun Yuda yi. **10** Dawuda bəjen yi rəjaxu a ma a yelin xanbini yamaan yate. Dawuda yi a fala Alatala xa, a naxa, “N yulubi gbeen nan ligaxi ito ra. Iki, n bata i mayandi, i xa dija n tan, i ya walikeen yulubin ma. N bata xaxilitareyaan liga.” **11** Alatala yi falan ti Dawuda kawandi muxun Nabi Gadi xa, a naxa, **12** “Siga Dawuda fema, i sa a fala a xa, i naxa, ‘Alatala naxa iki: N bata tərə saxan nagidi i ma, keden sugandi. I na naxan sugandi, n na nan ligama i ra.’” **13** Gadi yi fa Dawuda konni, a fa ito fala a xa, a naxa, “Nəe solofere kamen xa so i ya yamanani ba, hanma i yi i gi i yaxune yee ra kike saxan, hanma xi saxan furen yi so i ya yamanani? I miri, i yi a fala n xa n lan n xa sa naxan fala Ala xa naxan n xexi.” **14** Dawuda yi a yabi, a naxa, “N səxəle gbeeni, koni n wekilexi n lu Alatalaa sagoni, benun n xa lu muxune sagoni, bayo Alatala kininkinin.” **15** Alatala yi furen nafa Isirayila yi keli na xətəna ma han waxati fixina, keli Dan ma han sa dəxə Beriseba ra. Muxu wuli tonge solofere yi faxa yamanani. **16** Malekan yi a yiini bandun Yerusalen xun ma alogo a xa a kala, Alatala yi sunu na tərəna a fe ra, maleka kala tiin

naxan yi tixi yamaan tagi, a yi a fala na xa, a naxa, “A bata radangu ayi. I yiin naxete fa.” Alatalaa malekan yi Arawuna Yebusu kaana xeen lonna nan dəxən. **17** Malekan naxan yi yamaan naxərima, Dawuda na to waxatin naxan yi, a yi a fala Alatala xa, a naxa, “N tan nan yulubin ligaxi. N tan nan kalan tixi, koni yamani ito nanse ligaxi? Nayi, i yiin xa lu yitexi n tan nun n ma denbayaan nan xili ma.” **18** Na ləxə kedenni, Gadi yi fa Dawuda fema, a yi a fala a xa, a naxa, “Siga Yebusu kaana Arawunaa murutu lonna ma, i sa saraxa gandena nde rafala menni Alatala xa.” **19** Gadi a falan ma, Dawuda yi siga menni alo Alatala a yamari a ma kii naxan yi. **20** Arawuna yi mangan nun a walikeen to fe a ma, nayi Arawuna yi mini, a yi a xinbi sin mangan bun ma, a yetagin yi lan bəxən ma. **21** Arawuna yi a maxədin, a naxa, “Nanfera, n kanna, mangan fama a walikeen fema?” Dawuda yi a yabi, a naxa, “N bata fa alogo n xa i ya xeen lonna sara i ma, n yi saraxa ganden nafala Alatala xa alogo furen xa masiga yamaan na.” **22** Arawuna yi a fala Dawuda xa, a naxa, “Naxan birin nafa n ma, na tongo, i yi a fi Ala ma. A mato, jingeni itoe finde nen saraxa gan daxine ra, jingen xee ra bənbə seni itoe nun xun xidi wudin yi findi yegen na. **23** Mangana, n bata a birin so i yii. Alatala, i ya Ala xa tin i ya saraxan na.” **24** Koni, mangan yi a fala Arawuna xa, a naxa, “I nama sese fi n ma. N waxi nen i xa a mati n ma. N mi saraxa gan daxi fixine bama Alatala xa n ma Ala.” Dawuda yi xeen lonna nun jingene sara gbeti gbanan tonge suulun na. **25** Dawuda yi saraxa ganden nafala menni Alatala xa, a saraxa gan daxine nun bəje xunbeli saraxane ba. Nayi, Alatala yi dija yamaan ma, furen yi masiga Isirayila yamaan na.

Mangane Singena

1 Manga Dawuda bata yi fori, a mi yi fa nɛ a fatini wolonɛ hali dugin felenxi a ma. **2** A walikene yi a fala a xa, e naxa, “Sungutun nasolɔnxina nde xa fen i tan xa, nxu kanna, mangana. A luma nen i fema, a yi a yengi dɔxɔ i xɔn, a yi a sa i fema. Nayi, i yi i fatini wolon!” **3** E yi e yɛ rakɔnin Isirayila yamanan birin yi, e dii tɛmɛ tofajina nde to, naxan yi xili Abisagi, Sunami kaana. E fa na ra mangan fema. **4** Na sungutunna yi tofan han, a yi mangan dandanma, a yi walima a xa, koni e nun mangan mi kafu mumɛ. **5** Nayi, Adoniya, Xagiti a dii xɛmɛn naxan sɔtɔxi Dawuda xa, na yi falan ti folo, a naxa, “N tan nan findima mangan na!” A yi wontorona nde nun soo ragine nun muxu tonge suulun fen naxanye yi e gima a yɛ ra. **6** Xabu a da han to a fafe munma yi a ye gidi na feen ma fa fala ito ligaxi nanfera? Adoniya fan yi tofan han, Abisalomi raburunna nan yi a ra nun. **7** Adoniya nun Seruyaa dii xɛmɛn Yowaba nun saraxaralina Abiyatari yi falan ti, e yi Adoniya mali. **8** Koni, saraxaraliin Sadɔki nun Benaya, Yehoyadaa dii xɛmɛn nun Nabi Natan nun Simeyi nun Reyi nun Dawudaa sofa wekilexine sese mi yi Adoniya fari. **9** Adoniya yi yɛxɛne nun jingene nun jinge dii raturaxine ba saraxan na geme salaxunxin fema En-Rogeli dɛxɔn, a yi a tada nun a xunyene birin xili, mangana dii xɛmɛne, e nun Yuda xɛmɛn naxanye birin yi walima mangan xa. **10** Koni, a mi Nabi Natan nun Benaya nun sofa wekilexine xili, e nun a xunyen Sulemani. **11** Nayi, Natan yi a fala Sulemani nga Batiseba xa, a naxa, “I mi a mexi ba, a Xagiti a dii xɛmɛna Adoniya bata findi mangan na, hali en kanna Dawuda mi a kolon? **12** Iki, n bata i mafan, tin n xa i kawandi, alogo i xa i yetɛ rakisi e nun i ya dii xɛmɛn Sulemani. **13** Siga, i sa so Dawuda konni. I yi a fala a xa, i naxa, ‘N kanna, mangana, i mi yi i kolo n xa ba, a i ya dii xɛmɛn Sulemani nan findima mangan na i jɔxɔni? Nanfera Adoniya bata findi mangan na?’ **14** I mɔn nema falan tiye mangan xa waxatin naxan yi, n fan yi so, n ni i ya falan senbe so.” **15** Batiseba yi siga mangan konni. Mangan yi saxi a xi banxin kui, bayo a bata yi fori han. Abisagi, Sunami kaan nan yi walima mangan xa. **16** Batiseba yi a xinbi sin mangan yetagi. Mangan yi a maxodin, a naxa, “I waxi nanse xɔn ma?” **17** A yi a yabi, a naxa, “N kanna, i i kolo nen Alatala yi, i ya Ala, i ya walike jaxanla xa, fa

fala a n ma dii xɛmɛn Sulemani nan findima mangan na i tan jɔxɔni, a dɔxɔma nen manga gbɛdeni. **18** Koni, Adoniya nan fa mangan na. Anu, n kanna, i tan mangan yetɛɛn mi na kolon. **19** A bata turane nun jinge dii raturaxine nun yɛxɛɛ wuyaxi ba saraxan na, a yi mangana dii xɛmɛne birin xili, e nun saraxaralina Abiyatari nun sofa kuntigin Yowaba, koni a mi i ya walikɛɛn Sulemani tan xilixi. **20** Iki, n kanna, mangana, Isirayila birin yɛɛn fa tixi i tan nan na, alogo i xa a fala naxan findima mangan na i tan, n kanna jɔxɔni. **21** Mangana, i na i sa waxatin naxan yi i benbane fema, n tan nun n ma dii xɛmɛn Sulemani suxuma nen alo fe kalane.” **22** Batiseba mɔn yi fala tiini mangan xa, Nabi Natan yi so. **23** E yi a fala mangan xa, e naxa, “Nabi Natan ni i ra.” Natan yi fa mangan fema, a yi a xinbi sin mangan yetagi, a yetagin yi lan bɔxɔn ma. **24** Natan yi a fala mangan xa, a naxa, “N kanna, i tan nan a falaxi ba, a Adoniya xa findi mangan na i jɔxɔni mangayani? **25** Bayo, a sigaxi nen to a sa jingene nun jinge dii raturaxine nun yɛxɛɛ wuyaxi ba saraxan na, a yi mangana dii xɛmɛne birin xili, e nun sofa kuntigine nun saraxaralina Abiyatari. E sa e dege, e min a yetagi, e naxa, ‘Binyen xa fi Manga Adoniya mal’ **26** Koni a mi n tan i ya walikɛɛn xilixi, e nun saraxaraliin Sadɔki e nun Yehoyadaa dii xɛmɛn Benaya e nun Sulemani, i ya walikena. **27** Mangana, n kanna, i tan nan na ragidixi ba? Nanfera i mi n tan, i ya walikɛɛn nakolonxi na kanna fe ma naxan dɔxɔma i ya mangaya gbɛdeni i jɔxɔni?” **28** Nayi, Manga Dawuda yi a yabi, a naxa, “Batiseba xili n xa.” Batiseba yi fa, a fa a xinbi sin mangan yetagi. **29** Mangan yi a kolo a xa, a naxa, “N bata n kolo habadan Alatala yi, Alatala naxan n malixi, a yi n ba gbaloni. **30** N nan n kolo Alatala, Isirayilaa Ala yi naxan na, n naxa, ‘N na i ya dii xɛmɛn Sulemani nan findima mangan na n jɔxɔni, a dɔxɔ n ma mangaya gbɛdeni.’ N na nan ligan to.” **31** Batiseba yi a magodo, a yi a xinbi sin mangan yetagi, a yetagin yi lan bɔxɔn ma, a yi a fala, a naxa, “Binyen xa fi n kanna Manga Dawuda ma han habadan.” **32** Manga Dawuda yi yamarine fi e ma, a naxa, “ɛ saraxaraliin Sadɔki nun Nabi Natan nun Yehoyadaa dii xɛmɛn Benaya xili.” E yi fa mangan yetagi. **33** Mangan yi a fala e xa, a naxa, “ɛ n ma muxune tongo, ɛ yi n ma dii xɛmɛn Sulemani rate sofanla fari, ɛ siga a ra Gihon tigini. **34** Menni, saraxaraliin Sadɔki nun Nabi Natan yi turen susan a xunna ma alogo a xa findi mangan na Isirayila xun

na. E yi xotaan fe, e yi a fala, e naxa, 'Binyen xa fi Manga Sulemani ma.' 35 E te a foxo ra, a xa fa dɔxo n ma mangaya gbɛdeni, a lu n ɲoxoni. N bata yamarin fi fa fala a xa findi mangan na Isirayila nun Yuda xun na." 36 Yehoyadaa dii xemen Benaya yi mangan yabi, a naxa, "Amina! A xa liga alo n kanna, mangana Ala, Alatala a falaxi kii naxan yi! 37 Amasoto Alatala bata lu n kanna, mangan xɔn, a xa lu Sulemani xɔn, a yi a mangayaan nadangu n kanna Dawudaa mangayaan na." 38 Nayi, saraxaraliin Sadoki yi siga Nabi Natan foxo ra, Yehoyadaa dii xemen Benaya nun Keretine nun Peletine yi Sulemani rate Manga Dawudaa sofanla fari, e yi siga a ra Gihon tigrini. 39 Saraxaraliin Sadoki yi ture sa fenna tongo bubu sarijanxini, a yi a susan Sulemani xunna ma. E yi xotaan fe, yamaan birin yi a fala, e naxa, "Binyen xa fi Manga Sulemani ma." 40 Yamaan birin yi bira a foxo ra, e xulenna fema, e lu sewani, boxon yi xuruxurunma e sonxo sonxon yi. 41 Adoniya nun a muxu xilixin naxanye birin bata yi yelin e dege, ne yi e sonxo xuiin me, Yowaba yi xotaan xui me, a yi maxodinna ti, a naxa, "Nanse sonxo taani?" 42 A mon yi fala tiini saraxaralina Abiyatari a dii xemen Yonatan yi fa, Adoniya yi a fala a xa, a naxa, "I mafa, bayo xeme kenden nan i ra, i faxi xibaru fajine nan na." 43 Yonatan yi Adoniya yabi, a naxa, "En-en de! Manga Dawuda bata Sulemani findi mangan na. 44 A yi saraxaraliin Sadoki rasiga a foxo ra e nun Nabi Natan e nun Yehoyadaa dii xemen Benaya nun Keretine nun Peletine, e yi a dɔxo mangana sofanla fari. 45 Saraxaraliin Sadoki nun Nabi Natan bata a xunna masusan, e a findi mangan na Gihon tigrini. Na xanbi ra, birin yi te menni sewani, taan yi yimaxa. E na sonxo sonxo xuiin nan mexi. 46 Sulemani yeteen bata dɔxo manga gbɛdeni. 47 Mangana walikene bata fa dubadeni nxu kanna Manga Dawuda xa, e naxa, 'I ya Ala xa Sulemani xinla gbo ayi dangu i xinla ra, a yi a mangayaan dangu i gbeen na!' Mangan bata yi a xinbi sin a sadeni. 48 Mangan mon yi a fala, a naxa, 'N bata barikan bira Alatala xa, Isirayilaa Ala, naxan n ɲoxo yibiran fixi n ma, a yi tin n yeen yi a to.'" 49 Adoniyaa muxu xilixine birin yi gaxu na falane fe ra, e birin yi keli, e yi siga e danna. 50 Adoniya yi gaxu Sulemani yee ra, a fan yi keli, a siga, a sa saraxa ganden fenne suxu. 51 E fa a fala Sulemani xa, e naxa, "Adoniya bata gaxu Manga Sulemani yee ra, a sa saraxa ganden fenne suxu, a naxa, 'Manga Sulemani xa a kolo n xa to fa fala a mi n

tan, a walikeen faxama silanfanna ra.'" 52 Sulemani yi a fala, a naxa, "Xa a yete findi muxu kenden na, hali a xunsexe kenden mi bire boxoni, koni xa fe ɲaxina nde to a feni, a faxama nen." 53 Manga Sulemani yi muxune rasiga a ragododeni saraxa ganden fari. Adoniya yi fa a xinbi sin Manga Sulemani yetagi, Sulemani yi a fala a xa, a naxa, "Siga i konni."

2 Dawuda to a kolon a a sayaan waxatin bata yi maso, a yi a yamarine fi a dii xemen Sulemani ma, a naxa, 2 "N sigamatɔon ni i ra birin sigadeni. I wekile, i findi muxu kenden na! 3 I yi Alatala, i ya Alaa tonne nun a yamarine suxu e nun a kiti saxine nun a maxadi xuine alo a sebexi Musaa sariya kedin kui kii naxan yi, alogo i xa ɲɔon soto i ya feene birin yi e nun i nema dede, 4 alogo Alatala xa a fala xuiin nakamali n xa, a naxan falaxi, a naxa, 'Xa i ya diine sigan ti ɲoxo luun nun lannayani n yetagi, e bojen nun e niin birin na, i ɲoxon mi janje Isirayila mangayani mume!' 5 I yetena a kolon Seruyaa dii xemen Yowaba feen naxan liga n na, e nun a naxan liga sofa manga firinne ra naxanye yi Isirayila ganle xun na, Abineri, Neri a dii xemen nun Amasa, Yeteri a dii xemena. A yi e faxesa, a yi e yenge boje xunbenla waxatini, a dugine rafexi e wunla ra. 6 I a raba i ya xaxilimayani, i mitinma a xunsexe yi fixa, a faxesa boje xunbenli. (Sheol h7585) 7 Hinan Barasilayi Galadi kaana diine ra, e xa findi muxune ra naxanye e degema i ya tabanla ra, amasoto e fan na sifan liga nen n xa, n yi n gima i tada Abisalomi bun ma waxatin naxan yi. 8 I nama jinan Simeyi xon naxan i fema, Geraa dii xemena, Bunyamin kaan naxan kelixi Baxurin taani. N to n gi loxon naxan yi Maxanayin taani, a danga ɲaxine ti nen n xili ma. Koni n xetematona, a godo nen n nalandeni Yuruden baan de, n nan n kolo a xa Alatala yi, n naxa, 'N mi fa i faxama silanfanna ra.' 9 Koni, iki, i nama a ratortontaren lu bayo xeme xaxilimaan nan i ra, i a kolon i naxan ligama a ra. Hali a to bata fori, i a faxesa, i a halagi." (Sheol h7585) 10 Dawuda to faxesa, e yi a maluxun Dawudaa Taani Yerusalen yi. 11 Dawuda jee tonge naanin nan ti mangayani Isirayila xun na, jee solofere Xebiron taani, jee tonge saxan e nun saxan Yerusalen taani. 12 Dawudaa dii xemen Sulemani yi dɔxo a ɲoxoni mangayani. Xabu na waxatini, Sulemani a mangayaan yi senbe so. 13 Loxona nde, Adoniya, Xagiti dii xemen naxan sotoxi Dawuda xa, na yi siga Sulemani nga Batiseba fema. Batiseba yi a maxodin, a

naxa, “I faxi n todeni fe fajin nan ma ba?” A yi a yabi, a naxa, “Ɔn.” **14** Adoniya mɔn yi a fala a xa, a naxa, “N waxi falan ti feni i xa.” A yi a yabi, a naxa, “A fala.” **15** A yi a fala, a naxa, “I mi a kolon a mangayaan yi daxa n tan nan xa ba! Isirayila birin yeen yi tixi n tan nan na, alogo n xa findi mangan na. Koni, mangayaan bata radangu n xunyen ma, amasoto Alatala nan a ragidixi a ma. **16** Iki, n fe keden nan maxodinma i ma, i nama tondi na ma n xa.” A yi a yabi, a naxa, “A fala.” **17** Adoniya yi a fala a xa, a naxa, “N bata i mafan, a fala Manga Sulemani xa bayo a mi tondima i yii. A xa Abisagi, Sunami kaan fi n ma, a findi n ma jnaxanla ra.” **18** Batiseba yi a yabi, a naxa, “Awa, na lanxi, n tan yetena a fale mangan xa i mabinna ra.” **19** Batiseba yi siga Manga Sulemani fema Adoniya xa. Mangan yi keli a siga a ralandeni, a yi a xinbi sin a nga yetagi. A dɔxi na, a yi manga gbedena nde dɔxo a yiifanna ma a nga xa. **20** Batiseba yi a fala a xa, a naxa, “Maxodinna nde n xon ma, i nama tondi a ma n xa de!” Mangan yi a yabi, a naxa, “Nna, n mi tonde a ma i xa mum!” **21** A yi a fala a xa, a naxa, “Abisagi, Sunami kaan xa findi i tada Adoniya jnaxanla ra.” **22** Manga Sulemani yi a nga yabi, a naxa, “Nanfera i Abisagi Sunami kaan maxodinma n na Adoniya xa? Nayi, hali i mangayaan maxodin a xa, bayo n tada na a ral Mangayaan maxodin a tan nun saraxaralina Abiyatari nun Seruyaa dii xemmen Yowaba fan xa.” **23** Nayi, Manga Sulemani yi a kolo Alatala yi, a naxa, “Xa n mi Adoniya bono a niini maxodinni ito a fe ra, Alatala xa n natonon a xolon birin yi. **24** Iki, n bata n kolo habadan Alatala yi, Alatala naxan n senbe soxi, a yi n dɔxo n fafe Dawudaa mangaya gbedeni, a mangayaan so n yii fata a layirin na: To Adoniya fama nen faxadeni.” **25** Nayi, Sulemani yi Yehoyadaa dii xemmen Benaya rasiga, a sa Adoniya faxa. **26** Mangan mɔn yi a fala saraxaralina Abiyatari xa, a naxa, “Siga i ya bɔxon Anatoti yi, amasoto i lan nen i xa faxa, koni n mi i faxan to, amasoto i bata Marigina Alatalaa Kankiraan xali n fafe Dawuda yee ra, e nun amasoto e nun n fafe nan a torone birin xali.” **27** Sulemani yi Abiyatari ba Alatalaa saraxaraliyani, alogo Ala naxan falaxi lan Heli a denbayana fe ma Silo taani, na xa kamali. **28** Naxan Adoniya nun Abiyatari sotoxi, Yowaba to na me, a sa a taxu Alatala batu bubuni, a saraxa ganden fenne suxu. Bayo, a bata yi sa nun Adoniya fari, koni a mi na raba a foloni Abisalomi xa. **29** E sa a fala Manga Sulemani xa, e naxa, “Yowaba bata sa a gi Alatalaa

batu bubun kui, a lu saraxa ganden dexon.” Nayi, Sulemani yi Yehoyadaa dii xemmen Benaya rasiga, a naxa, “Sa a faxa.” **30** Benaya yi fa Alatala batu bubuni, a yi a fala Yowaba xa, a naxa, “Mangan bata yamarin fi, a i xa mini.” Koni Yowaba yi a yabi, a naxa, “En-nen! N faxan be nin.” Benaya yi fa Yowabaa falan nali mangan ma. **31** Mangan yi a fala Benaya xa, a naxa, “A liga alo a falaxi kii naxan yi, a faxa, i yi a maluxun. Nanara, Yowaba faxan naxanye tixi, ne goronna mi luye n xun ma e nun n fafe a denbaya xun ma. **32** Alatala a wunla haken luma a yeteen nan xun ma, amasoto a bata Abineri, Neri a dii xemena, Isirayila sofa kuntigin faxa e nun Amasa, Yeteri a dii xemena, Yuda sofa kuntigina. Ne firinne birin muxu tinxinxin nan yi e ra dangu Yowaba ra. A ne birin faxaxi nen n fafe Dawuda mi a kolon. **33** E wunle goronna luma nen Yowaba nun a yixetene xun ma han habadan. Koni fata Alatala ra boje xunbenla luma nen Dawuda nun a yixetene nun a denbayaan nun a mangayaan ma han habadan.” **34** Nayi, Yehoyadaa dii xemmen Benaya yi xete Yowaba fema, a yi sa a faxa, a yi a maluxun Yowaba konni tonbonni. **35** Mangan yi Yehoyadaa dii xemmen Benaya ti Yowaba jnaxoni sofa kuntigin na. A yi Abiyatari ti Sadaki jnaxoni saraxaraliin na. **36** Mangan yi Simeyi xili, a yi a fala a xa, a naxa, “Banxina nde ti i yete xa Yerusalen yi, i dɔxo be, i nama siga dede. **37** Koni, a kolon, i na mini loxon naxan yi, i na Kediron lanbanni gidi, i faxama nen. Nayi, i wunla goronna luma i tan nan xun ma.” **38** Simeyi yi mangan yabi, a naxa, “Na bata fan! N kanna naxan falaxi, n na ligama nen.” Simeyi yi lu Yerusalen yi waxati xunkuye. **39** Koni jee saxan bun ma, Simeyi a walike firin yi e gi, e siga Akisi konni, Makaa dii xemena, Gati mangana. Muxuna nde yi a fala Simeyi xa, e naxa, “I ya walikene sa Gati taani.” **40** Simeyi yi keli, a yi a sofanel tongo, a siga Gati taani Akisi konni a walikene fendeni. Simeyi yi sa fa a walikene ra keli Gati taani. **41** E yi a fala Sulemani xa a Simeyi bata yi keli Yerusalen yi, a siga Gati taani, koni a mon bata xete. **42** Mangan yi Simeyi xili, a yi a fala a xa, a naxa, “N bata yi i rakolo Alatala yee xori, a i nama mini taani. N mon i maxadi nen, xa i mini loxo yo yi, i siga yirena nde yi, i faxama nen. Na waxatini, i n yabi nen, i naxa, ‘Na fan. N bata a me.’” **43** Nanfera nayi, i bata i kolo feen naxan na Alatala yetagi, i mi na ratinmexi. I mon mi n ma yamarin suxi, n naxan so i yii?” **44** Mangan yi a fala Simeyi xa, a naxa, “I a kolon i bojeni i fe jnaxin naxan birin liga

n fafe Dawuda ra. Alatala i saranma nen na fe jaxina fe ra. **45** Koni Ala barakan sama nen n tan Manga Sulemani a fe yi, Dawudaa mangayaan yi senbe so han habadan Alatala yetagi.” **46** Mangan yi a yamarin fi Yehoyadaa dii xemen Benaya ma, a yi mini, a yi Simeyi faxa. Sulemani a mangayaan sabati na kii nin.

3 Sulemani nun Misiran mangan yi lan futun ma.

A yi Misiran mangana dii temen dɔxo a jaxanla ra. A yi siga a jaxanla ra Dawudaa Taani Yerusalen yi han a yelin a banxin nun Alatala Batu Banxin nun Yerusalen rabilin yinna tiye. **2** Na waxatini, yamaan yi saraxan bama taan kidene nin, bayo e munma yi banxi ti Alatala xinla binyama denaxan yi. **3** Alatala yi rafan Sulemani ma, a lu a fafe Dawudaa namun feene lige. Koni, a yi saraxane bama, a wusulanna gan taan kidene yi. **4** Mangan yi siga Gabayon taani saraxa badeni, amasoto taan kide kenden nan yi menna dangu a birin na. Sulemani yi saraxa gan daxi wuli keden ba saraxa ganden fari Ala xa. **5** A to yi Gabayon taani, Alatala yi mini Sulemani xa xiyei kɔɛen na. Ala yi a fala a xa, a naxa, “Naxan xoli i ma, na maxodin, n na a soma i yii nen.” **6** Sulemani yi a yabi, a naxa, “I bata hinan n fafe Dawuda ra, i ya walikena, amasoto a yi sigan tima i yetagi lannayaan nun tinxinna nun boɲe fapiyaan nin. I bata dii xemen so a yii naxan dɔxi a mangaya gbedeni to, i yi lu a xon hinan gbeeni. **7** Iki, Alatala, n ma Ala, i bata i ya walikɛɛn findi n fafe Dawuda jɔxɔn na, koni banxulan jɔɛn nan n tan na, xaxili mi n ma. **8** N na i ya yamaan tagi i naxan sugandixi. Yama gbeen nan na ra, naxan mi nɔɛ tenge, a mi nɔɛ yate a wuyaan ma. **9** Nayi, xaxili fajin fi n tan i ya walikɛɛn ma, n xa nɔ i ya yamaan makite, n nɔ a fajin nun a jaxin tagi rabe! Amasoto nde nɔɛ yama gbeeni ito mare?” **10** Sulemani a maxodinni ito yi rafan Marigin ma. **11** Ala yi a fala a xa, a naxa, “I mi siimaya xunkuyen maxodinxi i yete xa, i mi nafunla maxodinxi, i mi i yaxune faxa feen maxodinxi, i xaxinla nan maxodinxi kiti sa feen na. **12** Nanara, n na ligama nen alo i a falaxi kii naxan yi. N xaxilimayaan nun fekolonna fima nen i ma, muxu yo munma naxan soto dangu i tan na. **13** I mi naxan maxodinxi, n mɔn na fan soma nen i yii, nafunla nun binyena i ya siimayaan birin yi. I maliga manga yo mi taranma na. **14** Xa i sigan ti n ma kiraan xon, i n ma sariyane nun n ma yamarine suxu, alo i fafe Dawuda a liga kii naxan yi, n na i ya lɔxɔne

xunkuyama ayi nen.” **15** Sulemani to keli, a kolon Ala nan falan tixi a xa xiyei. A yi xete Yerusalen yi, a sa ti Marigina Layiri Kankiraan yetagi. A saraxa gan daxine fi Ala ma, e nun boɲe xunbeli saraxane, a yi donse donni tɔn a walikene birin xa. **16** Lɔxɔna nde, yalunde jaxalan firin yi fa mangan konni, e xinbi sin a yetagi. **17** Jaxalan keden yi a fala a xa, a naxa, “Yandi! N kanna, nxu nun jaxanli ito yi banxi kedenna nin, n yi diin xali a fema banxini. **18** Xi saxan dangu xanbini, jaxanli ito fan yi diin bari. Nxu yire kedenna nin, xɔɲe yo mi yi nxu fema banxini, nxu firinna nan yi a ra. **19** Kɔɛɛn na, jaxanli ito a diin yi faxa, bayo a saxi nen a fari. **20** Nayi, kɔɛ tagini, n yi xiin waxatin naxan yi, a yi keli, a n ma diin tongo n fema, a sa a sa a fema. A diin naxan yi faxaxi, a na sa n fema. **21** Xɔtɔnni, n yi keli alogo n xa xipen fi n ma diin ma, n yi a mato, a faxaxi. Koni, n na a mato ki fajni, n ma dii mi yi a ra n naxan barixi.” **22** Jaxalan boden yi a fala, a naxa, “I wule! N ma diin nan jɛɲɛ, i ya diin nan faxaxi.” Koni, na singe naxa, “I wule! I ya diin nan faxaxi, n ma diin nan jɛɲɛ.” E falan ti na kiini mangan yetagi. **23** Mangan yi a fala, a naxa, “Kedenna a falama, ‘N ma diin nan jɛɲɛ, i ya diin nan faxaxi,’ bodena a falama, ‘En-en, i ya diin nan faxaxi, n ma diin nan jɛɲɛ.”” **24** Nayi, a mɔn yi a fala, a naxa, “E fa silanfanna ra n xa.” E fa silanfanna ra mangan xa. **25** Mangan yi a fala e xa, a naxa, “Diin naxan jɛɲɛ, ɛ na yisege a tagi, ɛ fɔxo kedenna so a singen yii, fɔxo kedenna fan boden yii.” **26** Nayi, jaxanla naxan ma diin yi jɛɲɛ, na yi kininkinin a diin ma, a yi a fala mangan xa, a naxa, “N kanna, diin naxan jɛɲɛ, ɛ na so a yii, ɛ nama a faxa.” Koni boden yi a fala, a naxa, “A mi luma n xa, a mi luma i xa, ɛ a yisege.” **27** Mangan yi a fala, a naxa, “Diin naxan jɛɲɛ, ɛ na so a singen yii, ɛ nama a faxa. A tan nan ma dii a ra.” **28** Isirayila birin yi mangana kiti saxin na mɛ. E gaxu mangan yɛɛ ra, amasoto Alaa kolonna a yi, alogo a xa kiti kenden sa.

4 Manga Sulemani nan yi mangan na Isirayila birin xun na. **2** Kuntigin naxanye yi a wanla ra, ne ni itoe ra: Asari, Sadoki a dii xemena, saraxaraliin nan yi na ra. **3** Elixorefi nun Axiya, Sisaa diine, sebelitine nan yi ne ra, Yosafati, Axiludu a dii xemena, mangana yenla nan yi na ra, **4** Benaya, Yehoyadaa diina, sofa kuntigin nan yi na ra, Sadoki nun Abiyatari, saraxaraline nan yi ne ra, **5** Asari, Natan ma diina, yamana kanne kuntigin nan yi na ra, Sabudu, Natan ma diina, saraxaraliin nan

yi na ra e nun mangan kawandi muxuna, **6** Axisari, manga banxin walikene kuntigin nan yi na ra, Abadaa dii xemena Adoniran, karahan wanle kuntigin nan yi na ra. **7** Yamana kan fu nun firin nan yi Isirayila xunna, naxanye yi lan e balon fen manga Sulemani nun a denbayaan birin xa. E birin yi na ligama nen kike keden jɛɛn bun ma. **8** E xinle ni itoe ra: Xuru a diin nan yi Efirami geya yiren xun na. **9** Dekeri a diin nan yi Makasa nun Salabimi nun Beti-Semesi nun Elon e nun Beti-Xanan taane xun na. **10** Xesede a diin nan yi Aruboti taan xun na, e nun Soko nun Xeferi yamanan birin. **11** Abinadabo a diin nan yi Dɔɔ geya yamanan birin xun na. Sulemani a dii temen Tafata nan yi a jaxanla ra. **12** Axiludu a diin Baana nan yi Taanaki nun Megido taane xun na, e nun Beti-Seyan birin denaxan Saratan fema Yesereli bun ma, keli Beti-Seyan yi han Abeli-Mehola nun Yokemen. **13** Gebere a diin nan yi Ramoti taan xun na Galadi yamanani. Manase a diin Yayiri a taadine yi a yii Galadi yamanani, e nun Arigobi yamanani Basan geyaan fari menna bɔxɔn fan mɔn yi a yii, taa tonge sennin nabilinxin yinne ra naxanye de yi balanxi sulan na. **14** Axinadaba, Yido a dii xemen nan yi Maxanayin yamanan xun na. **15** Aximaasi nan yi Nafatali yamanan xun na. A tan fan Sulemani a dii temena nde nan tongo a jaxanla ra naxan xili Basamati. **16** Baana, Xusayi a dii xemen nan yi Aseri yamanan xun na e nun Beyaloti taana. **17** Yosafati, Paruyaa dii xemen nan yi Isakari yamanan xun na. **18** Simeyi, Elaa dii xemen nan yi Bunyamin yamanan xun na. **19** Gebere, Yuri a dii xemen nan yi Galadi bɔxɔn xun na, e nun Amori manga Sixɔn nun Basan manga Ogo, ne yamanane. Yamana kan keden nan yi Yuda yamanan xun na. **20** Yuda nun Isirayila muxune yi wuya han, e yi luxi alo baan jemensinna. E e degema, e min, e sewa. **21** Sulemani mɔn yi yamanane birin nɔxi keli Efirati baan ma han Filisistine yamanani, siga han Misiran danna ra, e yi lu fe mudun na, e lu Sulemani a nɔɔn bun ma a siin sogen birin yi. **22** Lɔxɔ yo lɔxɔ Sulemani mako yi donsensi itoe nan ma e nun a muxune xa: Murutu lunburunxin kilo wuli solomanaanin nun murutu fupin kilo wuli fu nun solomasexe **23** nun jinge turaxi fu nun jingen mɔxɔɲe gbete e naxanye raba sexe yirene yi e nun xuruse xunxuri keme e nun sube gbete alo xenla nun bolen nun kulumen nun tɔxe turaxine. **24** A mɔn yi Efirati baan sogegododena yamanan birin xun na,

keli Tifisa taani han Gasa taana, menne mangane birin yi a nɔɔn nan bun. Bɔɲe xunbenla yi a xa yiren birin yi. **25** Yuda nun Isirayila kaane, keli Dan ma han Beriseba tonbonna, ne yi makantanna bun, birin yi dɔxi a manpa bogi nakɔɔn nun a xɔde binle tagi bɔɲe xunbenla nin Sulemani a mangayaan sogen birin yi. **26** Soo wuli fu nun firin yi Sulemani yii e nun soo sansanna wuli tonge naanin naxanye yi yenge so wontorone bandunɲe. **27** Yamana kanne yi Manga Sulemani balon nan fenma e nun naxan birin yi e degema a konni, birin yi kike keden nan tongoxi, e yi jɔxɔ sama na xɔn ma alogo sese nama dasa a ma. **28** E yi fama fundenna nun sexen na soo ragine soone nun yenge so wontoro soone xa mangan konni alo yatɛn naxan yamarixi e ma. **29** Ala yi fe kolonna nun xaxilimaya gbeen fi Sulemani ma, a fe kolonxine yi wuya alo baan jemensinna. **30** Sulemani a fe kolonna yi gbo sogeteden muxune birin ma kolonna xa e nun Misiran kaane birin ma kolonna xa. **31** A fe kolonna yi gbo dangu muxune birin na, dangu Esira yixetena nde Etani ra, dangu Heman na e nun Kalikoli nun Darada, Maxoli a diine. A xinla yi xuya ayi a dɛxɔn yamanane birin yi. **32** A sanda wuli saxan nan sa, e nun beti wuli keden e nun suulun. **33** A yi wudine keɲane fala, keli Liban suman wudine ma han hisopi wudi xuridin naxan minima banxi kanken ma. A mɔn yi subene fan keɲaan fala e nun xɔline nun bubuseene nun yexene. **34** Dunuja mangane birin yi muxune rafa sa keli siyane birin yi, alogo e xa Sulemani a fe kolonna rame a xinla ma, bayo e bata yi a xaxilimayana fe me nun.

5 Xurami, Tire mangan yi a walikene rasiga Sulemani ma, bayo a bata yi a me, a e bata yi a sugandi mangan na a fafe jɔxɔni, anu Dawuda yi rafan Xurami ma waxatin birin. **2** Sulemani yi xeraan nasiga, a xa sa a fala Xurami xa, a naxa, **3** “I a kolon n fafe Dawuda mi nɔxi banxin tiye Alatala xa, a Ala xinla binyama denaxan yi. Na yi masɔto yengene fe ra, a yaxune naxanye ti a xa han Alatala yi e sa a sanna bun ma. **4** Iki Alatala, n ma Ala bata matabun fi n ma yiren birin yi, yaxu mi fa n ma, yegba mi fa n ma! **5** N waxi banxin ti feni Alatala xili yi, n ma Ala, alo Alatala a fala n fafe Dawuda xa kii naxan yi, a naxa, ‘N na i ya diin naxan tima mangayani i jɔxɔni, na nan banxin tima n xinla ra.’ **6** Yamarin fi sɔnɔn muxune xa Liban suman wudine sege n xa. N ma walikene fama nen i

gbeene fema, n yi i ya walikene saren fi alo i wama a xon kii naxan yi, amasoto i a kolon muxu yo mi en ye naxan noe wudine sege alo Sidon kaane.” 7 A to Sulemani a falane me, Xurami yi sewa han, a yi a fala, a naxa, “Tantunna Alatala xa to, bayo a bata diin fi Dawuda ma naxan lugoxi xaxinla ra alogo a xa yama gbeeni ito maral!” 8 Xurami yi yabini ito rasiga Sulemani ma, a naxa, “N bata i ya xeraan me. Naxan birin nafaan i ma suman wudine nun fofone fe yi, n na lige i xa. 9 N ma walikene e ragodoma nen sa keli Liban yamanani, e sa e xali foxo igen de, e yi e raxidi, n yi e rasiga igen xun ma han i denaxan yire bama n xa. Menni, n yi e rafulun, i yi e tongo. N waxi naxan ma i tan yii, i donseen nafa n ma banxi kui kaane ma.” 10 Xurami yi suman wudine nun fofone so Sulemani yii alo a yi waxi a xon kii naxan yi. 11 Sulemani tan yi murutun kilo miliyon sennin nun oliwi turen litiri wuli solomasexe nan soma Xurami yii a muxune balon na jee yo jee. 12 Alatala yi kolonna fi Sulemani ma alo a fala a xa kii naxan yi. Lanni so Sulemani nun Xurami tagi. Nayi, e firinna birin yi layirin xidi e bode tagi. 13 Manga Sulemani yi karahan walikene ba Isirayila muxune birin ye, e sige han muxu wuli tonge saxan. 14 A yi e yitaxun dodoxe saxan, muxu wuli fu nan yi walima kike kedenna bun Liban yi. Na xanbi ra, ne yi fa e konni wali gbete ra, bodene fan yi siga Liban yi. Nayi, e dodoxo yo dodoxo e walima kike keden Liban yi, kike firin e konni. Adoniran nan yi kuntigin na karahan walikene xun na. 15 Goron maxanla muxu wuli tonge solofere nan yi Sulemani yii, e nun geme masonla muxu wuli tonge solomasexe geya yireni. 16 Na fari, yamana kanne kuntigin naxanye sugandixi karahan walikene yamari feene ra, ne sigama han wuli saxan keme saxan. 17 Mangan yi yamarin fi e xa geme masolixi xungbe fajine fen alogo e xa banxin beten sa. 18 Sulemani a walikene nun Xurami gbeene, e nun Gebala kaane yi gemene masoli, e wudine nun gemene yiton banxin ti feen na.

6 Isirayila kaane mini xanbini Misiran yamanani, na jee keme naanin jee tonge solomasexeden nan yi a ra, Sulemani yi Alatala Batu Banxin ti folo, a mangayaan jee naanindena Isirayila xun na Siwi kiken na, naxan findixi jee kike firinden na. 2 Manga Sulemani banxin naxan ti Alatala xa, na kuyana nongonna ye tonge sennin, a yigbona nongonna ye moxoje, a yitena a ye tonge saxan. 3 Ala Batu Banxin

so deen palaan yi kuya nongonna ye moxoje, naxan nun banxin yetagini gboon yi lan. A kuyana Ala Batu Banxin de ra nongonna ye fu. 4 Mangan yi foye sode fajine rafala banxin ma. 5 A yi kore banxi radigilinxine ti banxin kanken nabilinni, pala gbeen nun pala rajanna ma, a yi konkone ti a rabilinni. 6 Kore banxin laberaxini gbona nongonna ye suulun, a tagixina nongonna ye sennin, a saxandena nongonna ye solofere, amasoto banxini gboon mi yi lan a yiren birin yi, alogo xalanbene nama so banxin kankeni. 7 A to yi Ala Batu Banxin tima, e geme masolixine nan nawali naxanye yi rafalaxi e malanxi denaxan yi. Deeramaan mi rawali, bunbi mi rawali, wuremase yo xui mi mini banxin tideni. 8 Kore banxin xurin konkone so deen yi banxin yiifanna nan ma, e yi tema teden nan ma kore banxin tagixini, e nun kore banxi saxandeni. 9 Sulemani to yelin Ala Batu Banxin tiye, a yi a xunna so suman farinne nun suman xalanbene ra. 10 Kore banxin naxanye birin yi Ala Batu Banxin nabilinxi, a yi nongonna ye suulun dodoxo ne birin de, a yi e nun Ala Batu Banxin nabira e bode ma suman wudine ra. 11 Alatala yi falan ti Sulemani xa, a naxa, 12 “I Ala Batu Banxini ito tima, xa i sigan ti kiin lanxi n ma tonne ma, xa i n ma sariyane birin suxu, xa i n ma yamarine birin suxu, i yi bira e foxo ra, nayi, n layirin naxan tongoxi i fafe Dawuda xa, n na rakamalima nen i xa. 13 N luma nen Isirayila kaane tagi, n mi Isirayila rabepinma, n ma yamana.” 14 Sulemani yi yelin Ala Batu Banxin tiye. 15 Walikene yi suman farinne sa banxin kanken kuixine ma, keli boxoni han kore, a yi wudin sa a kuiin ma, a yi fofa farinne sa banxin lonna ma. 16 A yi banxin kuiin rajanni taxun suman farinne ra keli boxoni han kore nongonna ye moxoje, a men findi pala rajanna ra Ala Batu Banxin kui naxan yi xili yire saripnanxi fisamantenna. 17 Nongonna ye tonge naanin nan yi Ala Batu Banxin pala gbeen pala rajanna yetagi. 18 Suman wudin naxan yi banxin kui, ne yi rafalaxi se fuge sawura fajine nun kundi sawurane nan na, sumanna nan yi a birin na, geme yo mi yi toma. 19 Sulemani yi pala rajanni ton Ala Batu Banxin kui alogo a xa Alatalaa Layiri Kankiraan dodoxo na. 20 Pala rajanna yi kuya nongonna ye moxoje, a yigbona nongonna ye moxoje, a yitena nongonna ye moxoje. Sulemani yi xema faji yilenlaxine sa a ma, a mon yi xema faji sa saraxa ganden ma a denaxan nafala suman wudin na. 21 A xema faji yilenlaxine sa banxin kuiin ma, a yi xema

yolonxonne radangu pala rajanna yetagi, a xema yilenlenixine sa a ma. 22 A yi xema faji yilenlenixine sa banxin birin ma, saraxa ganden naxan yi pala rajanna yetagi, a xema yilenlenixine sa na ma. 23 A yi maleka gubugubu kan sawura firin yiton yire sarijanxi fisamantenna kui Oliwi wudin na, e yitena nongonna ye fu. 24 Maleka sawura singen gubugubu keden yi kuya nongonna ye suulun, boden fan yi kuya nongonna ye suulun, keli a gubugubun boden xunna ma sa ti boden xunna ra, nongonna ye fu. 25 Nongonna ye fu nan yi maleka sawura firinden fan na. Maleka sawura firinne kuyan nun e kiin birin yi lan. 26 Nongonna ye fu nan yi maleka gubugubu kan sawura firinne birin yiteen na. 27 Sulemani yi maleka sawurane ti pala rajanna tagini. E gubugubune yi raminixi. A singen gubugubun yi sigaxi han banxin kanken foxo kedenna, sawura firinden gabuteen fan yi sigaxi han banxin kanken foxo kedenna bonna. E gubugubune xunne yi dxi e bode ra banxin tagini. 28 Sulemani yi xema yilenlenixine sa maleka sawurane ma. 29 A yi maleka sawurane nun tugu bili sawurane nun se fuge sawura fajine rafala Ala Batu Banxin kanken nabilinne birin yi, a fanna nun a kuina. 30 A yi xemaan sa banxin lonna ma pala firinne birin yi. 31 A yi deen foxo firin kannna ti pala rajanna ma Oliwi wudine ra, a deen ti wudine yitaxun dxi suulun nan na. 32 Oliwi wudin nan yi deen foxo firinne ra. A yi maleka sawurane nun tugu bili sawurane nun joxonde sawura fajine rafala deen ma, a yi xema yilenlenixine sa deen ma, a mon yi xemaan sa maleka sawurane nun tugu bili sawurane ma. 33 A mon yi pala gbeen de ti wudine liga na kiini Oliwi wudin na, koni deen ti wudine yi yitaxunxi dxi naanin nan na. 34 Deen foxo firinne birin yi rafalaxi fofa farinne nan na naxanye yitaxunxi foxo firin firinna ra. 35 A yi maleka gubugubu kan sawurane nun tugu bili sawurane nun se fuge sawura fajine rafala deene ma, a yi xema bonboxin sa sawurane ma. 36 A mon yi geme sansanna bilin saxan nafala, a suman wudin bilin keden sa a fari. 37 A mangayaan jee naaninden, Siwi kiken na, e yi Alatala Batu Banxin beten sa. 38 A mangayaan jee fu nun kedendeni, Bulu kiken na, naxan findixi jeen kike solomasexeden na, banxin wanle birin yi jan alo a yi lan kii naxan yi. Sulemani a ti jee solofere nan bun.

7 Sulemani mon yi a banxin ti, na bu nen jee fu nun saxan han a yi a rajan. 2 A na banxi singen ti naxan xili Liban Fotonna Banxina, a kuyana nongonna ye keme, a yigbona nongonna ye tonge suulun, a yitena nongonna ye tonge saxan, a na ti suman senbetenna safa naanin fari. Suman xalanbene yi senbetenne ko. 3 Banxin kuiin yi xunna soxi suman farinne nan na, e saxi xalanbene ma naxanye yi senbetenne ko. Xalanbe tonge naanin e nun suulun nan yi a ra, fu nun suulun safa keden. 4 Banxin foye sodene safa saxan nan yi a ra, na foye sodene fan yi yee rafindixi nen e bode ma saxan saxan. 5 Tongon naanin nan yi deene birin nun e ti wudine ma, e yi yee rafindixi e bode ma saxan saxan. 6 Na xanbi ra, a palaan folon ti senbetenne ra naxan kuya yi nongonna ye tonge suulun, a yigbona nongonna ye tonge saxan. Na yee ra a so deen palaan fan ti senbetenne ra, a yinbene rafala a ma. 7 A yi mangayaan gbede banxin ti, a yi kitin sama denaxan yi naxan xili Kiti Sa Banxina. A yi suman farinne sa banxin kuiin yirene ma, keli boxoni han banxin kuiin xunna sone. 8 A gbee banxina, a yeteen yi dxioma denaxan yi, na fan yi ti na kiini yin gbete kui, banxin boden xanbi ra. Sulemani yi na banxi sifan fan ti Misiran mangana dii temen xa a naxan tongo a jaxanla ra. 9 Banxine birin yi tixi geme faji yebaxine nan na keli a tanden ma han yin gbeena, gemen naxanye maligaxi, e bo seraan na, banxin kuiin nun a fanna, keli boxon ma han a xuntagi. 10 Banxin beten saxi geme xungbe fajine nan na, a gemena nde yigbona nongonna ye fu, ndee nongonna ye solomasexe. 11 Banxin yi tixi geme xungbe fajine ra naxanye maligaxi, e bo alogo e xa lan e dxiadene ma, e nun suman xalanbene. 12 Geme gbeen bilin saxan nan findi yin gbeen sulunna ra, suman wudin bilin keden fan yi sa na fari alo Alatala Batu Banxini sansanna kui xiin tixi kii naxan yi, e nun a so deen palana. 13 Manga Sulemani yi xeraan nasiga Tire taani Xirami foxo ra. 14 Kaja gilen nan yi Xirami nga ra naxan kelixi Nafatali bonsonni. Tire kaan nan yi a fafe ra, a yi sulan nan nawalima. A yi lugoxi fekolonna nun xaxilimayaan nun lonnin na sulan nawali feen na. A yi fa Manga Sulemani fema, a a wanle birin ke. 15 Xirami yi sulan naxulun a senbeten xungbe firin nafala, e yitena nongonna ye fu nun solomasexe, e rabilinna nongonna ye fu nun firin. 16 A yi sulan kondan firin yelan, alogo a xa e so senbetenne xun na, konde singen yitena nongonna ye suulun, kondan firinden

yitena nongonna ye suulun. 17 A mon yi sulan nafala yaladine ra e nun yolonxonne ra kondene maxidi seen na naxanye yi senbetenne xuntagi, solofere konde singen xa, e nun solofere kondene firinden xa. 18 A yi girenada wudi bogi sawurane rafala, safa firin nan yi yalane fari naxanye yi senbetenne kondene maxidixi. 19 Kondene naxanye yi senbetenne xuntagi so deen palaan kui, ne yi ligaxi alo gabala fugena, e yitena nongonna ye naanin. 20 Kondene naxanye yi senbeten firinne xuntagi, ne keden kedenna yi rabilinxi girenada wudi bogi sawura keme firin nan na, a xungbe yiren naxanye yi rafalaxi yalaan dexon. 21 A yi na senbetenne ti Ala Batu Banxin so de palaan fema. A yi yiifari ma senbetenna ti, a xili sa Yakin, a mon yi komen ma senbetenna ti, a xili sa Boosu. 22 Ne kondene yi rafalaxi gabala fuge sawurane nan na. Na kiini Xirami yi yelin senbetenne rafalc. 23 Nayi, Xirami yi sulan naxulun, a ige ramarade digilinxi gbeen nafala, a yigbona nongonna ye fu, a yitena nongonna ye suulun. Nongonna ye tonge saxan lutin nan yi a rabilinje. 24 Kundine sawurane yi a de kinkin bunna rabilinxi. Na sawura fu yi rafalaxi a ma a nongonna ye keden yo keden bun. Kundi sawurane yi rafalaxi safa firin nan na, ne nun ige ramaraden yi rafalaxi gbindi keden nan na. 25 Ige ramaraden yi dxi turaan sawura sulan dxi fu nun firin nan fari, saxan yee rafindixi sogegododen binni, saxan sogeteden binni, saxan yiifanna binni, saxan komenna binni. E yi xun xanbi soxi e bode yi nen, e birin gbinderin yi ige ramaraden nan bun ma. 26 Yii kuiin ye kedenna nan yi ige ramaraden nabinyen na, a de kinkin yi rafalaxi alo igelengenna dena, a luxi alo gabala fugena, litiri wuli tonge solomasexe jaxon nan yi sama a kui. 27 A yi ige maxali wontoro fu rafala sulan na. E birin kuya nongonna ye naanin, e yigbona nongonna ye naanin, e yitena nongonna ye saxan. 28 Ige maxali wontorone yi rafalaxi i kii nin: Sula falafalane nan yi findixi wontorone gbinderin na. Na falafalane yi sotixi sula gbelemene yi naxanye tixi wontoron tongon naaninne ma. 29 Falafalan naxanye yi tixi sula gbelemene longonne ra, yatane nun turane nun maleka gubugubu kanne sawurane yi ne ma e nun gbelemene fan ma. Mesemesenne yi e rabilinxi. 30 Sulan nan nafalaxi wontorone birin sanne ra. Na naanin nan yi e bun ma. E soxi sula gbelemen xun na. Ige ramara kundi sula dixin yi rafalaxi e birin kui, e suxi bun ti naanin na, e rafalaxi

sula raxulunxin na, e bun ti mesemesenxine labe ra. 31 Ige maxali wontoron kui yili digilinxin nan yi rafalaxi a kui naxan yite han nongonna ye keden. Na nan yi findixi ige kundin daxonen na. Kundin daxonen deen digilinna, na yi gbo nongonna ye keden e nun a tagi. Kundin daxonen naxan yi wontoron de kinkin faza ra, mesemesenne yi rafalaxi ne ma. Na yirene mi yi digilinxi, tongon naanin nan yi ne ra. 32 Wontorone sanne yi a falafalane bun ma, e soxi sula gbelemene xun na naxanye yi sotixi a bun ma. E sanne yigbona, nongonna ye keden e nun a tagi. 33 E sanne yi rafalaxi alo yenge so wontorone sanne, e yi seene birin nafalaxi sula raxulunxin nan na. 34 Wontorone birin, a suxu se naanin yi rafalaxi a ma a tongon naaninne yi. E nun wontorone yi rafalaxi e bode yi. 35 Wure digilinxina nde yi rabilinxi ige kundi dxi yinla ma wontorone birin kui, a yikuyena nongonna ye keden. Ige ramara kundin nun a bun tiine nun wontoron kuiin birin yi rafalaxi kedenna nan na. 36 Xirami yi maleka gubugubu kanne nun yatane nun tugu binle sawurane rafala a bun tiine nun a falafalane ma, e xanje denaxan birin yi e nun a yi e birin nabilin mesemesenne ra. 37 Ige maxali wontorone yi rafalaxi na kii nin, e birin wure siya keden, e birin gbo kii keden, e birin keja keden. 38 Xirami mon yi ige ramara kundin sula dxi fu rafala, e yigbona nongonna ye naanin, litiri wuli keden e nun keme sennin yi se ne kui. A ige ramara kundi keden dxi wontorone birin kui. 39 A yi ige maxali wontoron suulun lu Ala Batu Banxin yiifanna ma, a suulun lu a komenna ma. A yi ige ramara se xungbeen ti Ala Batu Banxin yiifanna sogeteden binni a tongonna ma. 40 Xirami to ige ramara seene nun tee ko seene nun goronne rafala, a yi yelin wanle birin na, a naxanye folo Manga Sulemani xa Alatala Batu Banxini: 41 Senbeten xungbe firin, e nun e konde firinne e xuntagi alo barama, e nun yolonxon yalaan naxanye senbetenne kondene maxidi seene ra, 42 e nun girenada wudi bogi sawura keme naaninna naxanye yi na yolonxon yala firinne ma naxanye yi saxi safa firin, e singan e kondene rabilinni e maxidi seen na, kondene naxanye yi luxi alo barama, 43 e nun ige maxali wontoro fune nun ige kundine e xun tagi, 44 e nun ige kundi gbeen nun tura sawura fu nun firinne a bun tiine ra, 45 e nun goronne nun tee ko seene nun wuli xuya goronne. Xirami muranna naxanye birin nafala Sulemani xa Alatala Batu Banxini, ne birin yi rafalaxi sula xuruxin nan na.

46 Mangan sula raxulunxin nafala na seene ra boxo kui gexine nan kui, Yuruden baan meremereni Sukoti taan nun Saratan taan longonna ra. 47 Sulemani yi na seene birin nafala, na seene yaten sulan xasabin kilon mi yi nae kolonje. 48 Sulemani mon yi seni itoe birin nafala Alatala Batu Banxin xa, xema saraxa ganden nun buru ralixin xema tabanla 49 nun xema kende lenpu dexo seen naxanye yebaxi suulun foxo kedenni suulun bode foxoni yire sarijanxi fisamantenna yetagi e nun se fuge fajine sawurane e nun lenpune nun se tongo se xema daxine 50 nun goronne nun lenpu ratu seene nun wuli xuya goronne nun se sa lefane nun wusulan gan se xema daxine nun deen singan se xema daxine yire sarijanxi fisamantenna xa banxin kui e nun Ala Batu Banxin so deen yeteen xa. 51 Sulemani a wanle birin nakamali na kii nin Alatala Batu Banxini. Sulemani yi muranne birin sa banxini a fafe Dawuda naxanye rasarijan, gbetin nun xemaan nun se gbete ye. A yi ne ramara Alatalaa banxin nafunle ye.

8 Nayi, Manga Sulemani yi Isirayila fonne nun bonson kuntigine nun Isirayila kaane denbaya xunne birin malan a fema Yerusalen yi Alatalaa Layiri Kankiraan tongo feen na keli Dawudaa Taani, denaxan mon xili Siyon. E siga a ra Ala Batu Banxini. 2 Isirayila xemene birin yi e malan Manga Sulemani fema, Etanimi kiken na, naxan findixi jeen kike solofereden na, sali waxatina. 3 Isirayila fonne birin to fa, saraxaraline yi fa Layiri Kankiraan na. 4 E yi Alatalaa Kankiraan nun Naralan Bubun xali e nun se sarijanxin naxanye yi a kui. Saraxaraline nun Lewi bonsonna muxune yi e xali. 5 Manga Sulemani nun Isirayila yamaan naxan birin yi malanxi a fema, e ti Layiri Kankiraan yetagi, e yi yexene nun jingene ba saraxan na, naxanye yi wuya han e xasabin mi yi nae kolonje. 6 Saraxaraline yi Alatalaa Layiri Kankiraan xali a funfuni, banxin yire sarijanxi fisamantenni, maleka sawurane gubugubune bun ma. 7 Amasoto maleka sawurane gubugubune yi bandunxi Layiri Kankiraan nun a tongo tamine xun ma. 8 A tongo tamine yi kuya han e xunne yi toma yire sarijanxi fisamantenna yetagi, koni e mi yi toma tandeni. E mon na han to. 9 Geme walaxa firinne nan tun yi kankiraan kui Musa naxanye sa a kui Horebe geyaan ma, Alatala layirin xidi e nun Isirayila kaane tagi denaxan yi, e mini xanbini Misiran yamanani. 10 Saraxaraline mini yire

sarijanxini waxatin naxan yi, kundaan yi Alatalaa banxin nafe. 11 Kundana fe ra, saraxaraline mi yi nae e wanla rabe, amasoto Alatalaa noron yi Alatalaa banxin nafexi. 12 Nayi, Sulemani yi a fala, a naxa, “Alatala bata a ragidi a xa dexo kunda yidimixini! 13 N bata banxi fajin ti naxan findima i dodoxen na, i luma denaxan yi habadan.” 14 Mangan yi a yee rafindi Isirayila yamaan ma naxanye birin yi tixi na, a duba ne xa. 15 A yi a fala, a naxa, “Tantunna Alatala xa, Isirayilaa Ala, naxan falan ti n fafe Dawuda xa, naxan a falane rakamalima, a naxa, 16 ‘Xabu n nan n ma Isirayila yamaan namini loxoni Misiran yamanani, n mi taa sugandi Isirayila bonsonne xa, banxin tiye n xinla binya feen na denaxan yi, koni n bata Dawuda sugandi alogo a xa lu n ma Isirayila yamaan xun na.’ 17 N fafe Dawuda yi waxi banxin ti feni Alatala xinla binyaden na, Isirayilaa Ala. 18 Alatala bata yi a fala n fafe Dawuda xa, a naxa, ‘Amasoto i bata wa banxin ti feni n xinla binyaden na, na miriyaan tongo feen bata lan. 19 Koni, i tan xa mi banxin tima, fo i ya dii xemena, i yeteen naxan sotoxi, na nan banxin tima n xinla binyaden na.’” 20 “Alatalaa layirin naxan tongo, a bata na rakamali. N bata ti n fafe Dawuda joxoni, n yi dexo Isirayila mangan na, alo Alatala a fala kii naxan yi, n yi banxin ti Alatala xinla binyaden na, Isirayilaa Ala. 21 N bata yirena nde yiton kankiraan xa, Alatala layirin denaxan yi, a naxan yiton e nun en benbane tagi, a to e ramini Misiran yamanani.” 22 Sulemani yi ti Alatalaa yire sarijanxin yetagi, Isirayila yamaan birin yetagi. A yi a yiine yite kore, 23 a yi Ala maxandi, a naxa, “Alatala, Isirayilaa Ala! Ala yo mi na alo i tan kore xonna nun boxo xonna fari. I ya layirin nun i ya hinanna luma i ya walikene xon naxanye sigan tima i yetagi e bonen birin na. 24 I bata i ya falan nakamali i ya walikeen xa, n fafe Dawuda, i naxan fala i deen na, i bata na rakamali i senbeni to. 25 Iki, Alatala, Isirayilaa Ala, i mon xa i ya falan nakamali, i layirin naxan tongo n fafe Dawuda xa, i bata yi a fala a xa, i naxa, ‘I joxo yibiran mi janyje n yetagi mume Isirayilaa mangaya gbedeni, fanni i yixetene n ma kiraan suxuma, e sigan ti n yetagi alo i sigan tixi n yetagi kii naxan yi.’ 26 Iki, Isirayilaa Ala, n bata i mafan, i xa na rakamali, i layirin naxan tongoxi i ya walikeen Dawuda xa, n fafe!” 27 “Koni, Ala fa dexe dunuja yi ba? Hali kore xonna nun a gbona, i mi nae xanyje a yi, e faxi fa n banxin naxan tixi ito ra. 28 Hali na birin, Alatala, n ma Ala, i tuli mati i

ya walikena maxandi xuine nun a mafanne ra. I tuli mati i ya walikena mafan xuine nun maxandi xuine ra a naxanye falama i xa to. 29 I yeen ti banxini ito ra kœen nun yanyin na, i a fala denaxan ma, i naxa, 'N xinla luma be nin!' I tuli mati maxandi xuiin na i ya walikœen naxan tima yireni ito mabinni. 30 I ya walikœen nun i ya Isirayila yamana maxandin nasuxu, e na sali yireni ito mabinni! I yabin ti i dœxœdeni kore xœnna ma, i mafeluun ti, i yabin ti." 31 "Xa muxuna nde a boden haken tongo, muxune yi a karahan, a xa fa a kœlœ i ya yire saripnanxin yetagi banxini ito kui. 32 Nayi, a xuiin name kore xœnna ma, i yi fena nde liga, i yi kitin sa i ya walikene tagi. Naxan kalan tixi, i na yalagi, i na goronna dœxœ a xun ma, i yi tinxindena tinxinyaan yita, i yi a suxu a tinxinni." 33 "A nœe lige nen yaxun yi i ya Isirayila yamaan nœ, bayo e bata i yulubin tongo. Na waxatini, xa e xun xete i ma, e i xinla binya, e yi i maxandi, e mafeluun xandi i tan xœn banxini ito kui, 34 nayi, i xa e xuiin name kore xœnna ma, i dija i ya Isirayila yamaan yulubin ma, i fa e ra bœxœn ma i naxan so e benbane yii." 35 "A nœe lige nen kore xœnna yi balan, tulen mi fa fe mume, e yulubine fe ra lan i tan ma. Na waxatini, xa e ye rafindi be ma, e i xandi, e yi i xinla binya, e xete e yulubine fœxœ ra, bayo i bata e tœrœ, 36 nayi, i e xuiin namema nen kore xœnna ma, i dijnama nen i ya walikene yulubine ma e nun i ya yamana Isirayila. I e xaran kira fajin ma e daxa e xa bira naxan fœxœ ra. I tulen nafa bœxœn fari i naxan soxi i ya yamaan yii." 37 "A nœe lige nen tœrœyana nde fan yi fa, alo fitina kamena hanma fitina furena yamanani, hanma sansine yi xara hanma e kun hanma tuguminne yi mini hanma supene hanma yaxuna nde na Isirayila kaane taa makantanxine rabilin yœngeni, gbalon sifan birin na fa waxatin naxan yi, hanma fure jaxine. 38 Na waxatine yi, Isirayila kaane birin e tœrœn nun e jaxankatan kolonma nen, e yi sali, e yi i mafan, e yi e yiine yite banxini ito mabinni. 39 Nayi, i yi e yabi i dœxœdeni kore xœnna ma, i yi e mafelu, i yi birin saran e kewanle ra, bayo i birin bœne yi feen kolon, amasœto i tan nan keden pe adamadiine bœne yi feene kolon. 40 Nayi, e gaxuma nen i ye ra waxatin birin yi e siin birin yi yamanani, i naxan soxi nxu benbane yii." 41 "Xœnen naxan mi findixi Isirayila kaana nde ra, i ya yamana, na fama nen be sa keli yamana makuyeni, i xinla a fe ra, 42 bayo muxune a mema nen a i xinla nun i senben gbo. A na fa salideni banxini ito mabinni, 43 i

a yabi kore xœnna ma, i dœxœdeni. Xœnen naxan birin maxœdinma i ma, i xa na so a yii, alogo dunuya siyane birin xa i xinla kolon, e gaxu i ye ra, alo i ya yamana Isirayila. E xa a kolon a banxini ito ratinmexi i tan nan xili yi n naxan tixi!" 44 "A nœe lige nen Isirayila kaane yi siga e yaxune yœngedeni i ya yamarin bun. E yi i maxandi, e ye rafindi i ya taa sugandixin ma e nun Alatala Batu Banxin naxan tixi i xa. 45 Nayi, i tuli mati kore xœnna ma, naxanye i maxandima, e i mafan, i yi ne mali." 46 "A nœe lige nen, e yi yulubin tongo, bayo adamadi yo mi na naxan mi yulubin ligama. I ya xœlœn yitama e ra nen, i yi e so e yaxune yii, ne yi siga e ra konyiyani e yamana makuyena ndee yi hanma naxanye maso. 47 E na tubi i ma na yamanani e konyiyani denaxan yi, e xun xete i ma e suxu muxune yamanani, e falan ti, e naxa, 'Nxu bata haken liga, nxu bata yulubin tongo, nxu bata fe jaxin liga,' 48 e xete i ma e bœnen birin nun e niin birin yi e yaxune yamanani naxanye e xalixi konyiyani, e mayandi xuine rasiga i ma, e ye rafindixi yamanan ma i naxan so e benbane yii, e ye rafindixi i ya taa sugandixin ma e nun n Ala Batu Banxin naxan tixi i xinli. 49 Nayi, e sanla nun mafanna yabi kore xœnna ma i dœxœdeni, i fa e mali. 50 I ya yamaan mafeluma nen a yulubine ra e nun a fe jaxine birin i xili ma. Naxanye e suxi konyiyani, i yi e hinanna raso ne yi, alogo e xa kininkinin e ma. 51 Amasœto i ya yamaan nan e ra, i gbeena, i e ramini nen Misiran yamanani naxan luxi alo sulun teen naxan wuren naxulunma." 52 "I yeen xa lu i ya walikena maxandine ra, e nun i ya yamana Isirayilaa maxandine, alogo i xa nxu yabi nxœ maxandine yi waxatin birin. 53 Amasœto i bata nxu ba yamaan bonne birin ye bœxœn fari, alogo nxu xa findi i gbeen na, alo i a fala kii naxan yi fata Musa ra, i ya walikena, i to nxu benbane ramini Misiran yi. I tan Marigina Alatala!" 54 Sulemani yelin maxandine nun mafanne birin tiye waxatin naxan yi, a yi keli Alatalaa saraxa ganden yetagi, a yi xinbi sinxi denaxan yi, a yiine yitexi kore. 55 A tixi, a yi duba Isirayila yamaan birin xa a xuini texin na, a naxa, 56 "Tantunna xa fi Alatala ma, naxan matapun fi Isirayila ma, a yamana, alo a e tuli sa kii naxan yi. A fala fajin naxanye birin ti fata Musa ra, a walikena, keden mi luxi a ligataren na. 57 Alatala, nxœ Ala xa lu en xœn alo a lu en benbane xœn kii naxan yi, a nama jinan en xœn mume, a en nabepnin. 58 Koni, a xa en bœnen bandun a binni, alogo en xa sigan ti a kiraan birin xœn ma. En yi a yamarine

nun a tønne nun a sariyane suxu, a naxanye yamari en benbane ma. **59** N maxandin naxanye tixi Alatala ma, en ma Ala, ne xa rabira a ma kōēēn nun yanyin na, alogo a xa en mali lōxo yo lōxo, ε tan nun n tan bayo a yamaan nan en na, Isirayila. **60** Nanara, dunuja siyane birin xa a kolon a Alatala nan Ala ra, a gbete yo mi na. **61** Alatala xa lu ε bōjēni, en ma Ala. E bira a sariyane fōxo ra, ε yi a yamarine suxu, alo ε kii naxan yi to.” **62** Isirayila kaane birin yi fa mangan fema, e yi saraxane ba Alatala xa. **63** Ninge wuli mōxōjēn nun firin e nun yēxēē wuli kēmē mōxōjē, Sulemani yi ne kōē raxaba Alatala xa bōjē xumbeli saraxan na. Mangan nun Isirayila kaane birin yi Alatalaa banxin nabi na kii nin. **64** Na lōxōni, mangan yi sansanna rasarijan Ala Batu Banxin yetagi, a yi saraxa gan daxine nun bogise saraxane nun bōjē xumbeli saraxa subene turene fi Alatala ma sansanna kui. A na raba mēnni nēn, bayo saraxa ganden naxan yi rafalaxi sulan na Ala Batu Banxin yetagi, na yi xurun. Saraxa gan daxine nun bogise saraxane nun saraxa subene turene birin mi yi xanjē mēnna fari. **65** Sulemani yi sanla raba na waxatini, e nun Isirayila kaane birin. Yama gbeen yi fa sa keli Lebo-Xamata taani han Misiran xudeni, e yi e malan Alatala yetagi, en ma Ala, xi solofere. Na xanbi ra, e mōn yi xi solofere sa na fari, a birin malanxina, xi fu nun naanin. **66** Xi solomasexēde lōxōni, a yi yamaan bejin. E yi duba mangan xa, e siga e konni, e sewaxi e bōjēni fe fajin birin na Alatala naxan nabaxi Dawuda xa, a walikena, e nun Isirayila a yamana.

9 Sulemani yelin Alatala Batu Banxin tiyē waxatin naxan yi, e nun a manga banxina, e nun a wa naxan birin liga feni, **2** Alatala mōn yi mini Sulemani xa a firindeni, alo a mini a xa kii naxan yi Gabayon taani. **3** Alatala yi a fala a xa, a naxa, “N bata i ya mafanna nun i ya maxandi xuiin nasuxu i naxan nalixi n ma. N bata banxini ito rasarijan i naxan tixi n xili yi habadan. N yēēn nun n bōjēn luma nēn tixi be ra habadan. **4** I tan xa sigan ti fetareyaan nun tinxinyani n yetagi alo i fafe Dawuda. I feni itoe birin liga n naxanye yamarima i ma, i n ma tønne nun n ma sariyane suxu n naxanye soxi i yii. **5** Nayi, n na i ya mangayaan nasabatima nēn habadan Isirayila xun na, alo n na a fala i fafe Dawuda xa kii naxan yi, n naxa, ‘I bōnsōnna mi jnanjē i jnōxōni Isirayila mangayani habadan.’ **6** Koni, xa i tan hanma i ya diine ε xun xanbi so n yi, xa ε mi n ma sariyane nun n ma yamarine suxu n

naxanye soxi ε yii, xa ε siga ala gbete ye batudeni, ε xinbi sin e bun ma, **7** nayi, n na Isirayila kaane bama nēn na bōxōni n naxan soxi e yii. N na n mema nēn n batu banxin na, n naxan nasarijan n xinla binyaden na. Na ma, Isirayila findima nēn yagi seen nun magele seen na yamanane birin tagi. **8** Hali banxini ito to rayabu iki, na waxatini, naxan yo na dangu a fema, ne kabema nēn, e yi kōntōfili. E yi a fala, e naxa, ‘Nanfera Alatala yamanani ito nun banxini ito ligaxi iki?’ **9** E yabima nēn, e naxa, ‘Bayo e bata Alatala rabējin, e Ala, naxan e benbane ramini Misiran yamanani, e yi ala gbete ne xanu, e yi e xinbi sin e bun ma, e yi e batu, nanara Alatala bata tōrōni itoe birin nafa e ma.” **10** Nēē mōxōjēn bun ma, Sulemani yi banxi firinni itoe ti, Alatala Batu Banxin nun a manga banxina. **11** Tire manga Xurami bata yi suman wudin nun fōfō wudin nun xēmaan so Sulemani yii, a yi wama naxan yo xōn. Manga Sulemani yi taa mōxōjē so Xurami yii Galile yamanani. **12** Xurami yi mini Tire taani taane matodeni Sulemani naxanye soxi a yii. Koni e mi rafan a ma. **13** Xurami yi a maxōdin, a naxa, “Ngaxakedenna, i taan sifan mundunye soxi n yii be?” A yi e xili sa Kabulu yamanana, na xinla ne xun ma han to. **14** Anu, Xurami bata yi xēmaan kilo wuli saxan nasiga Sulemani ma. **15** Manga Sulemani bata yi karahan wanle yitōn lan Alatala Batu Banxin ti feen nun a yetena banxin nun Milo gbingbinna nun Yerusalen yinna ma, e nun Xasori nun Megido nun Geseri taane. **16** Misiran mangan bata yi fa, a Geseri taan suxu yengeni, a yi a gan, Kanan kaan naxanye yi dōxi taani, a ne faxa. A mōn yi taan sa a dii temen fari siga a xēmē taa ra, Sulemani a jaxanla. **17** Sulemani mōn yi Geseri taan ti, a mōn yi Beti-Xoron taan laben ti, **18** e nun Baalati taan nun Tamari taan naxan yamanan tonbon yireni. **19** A mōn yi taa gbete na ndee ti, a yi balone ramarama dēnaxanye yi, e nun yenge so wontorone nun soone yi luma taan naxanye yi. Sulemani wa naxan birin ti feni Yerusalen taani e nun Liban yamanan nun yire gbete, a yi yamanan naxanye birin xun na, a yi na birin ti. **20** Amorine nun Xitine nun Perisine nun Xiwine nun Yebusune muxu dōnxen naxanye mi yi findixi Isirayila kaane ra, ne fan yi yamanani. **21** E yixeten naxanye lu e xanbi ra yamanani, Isirayila kaane mi no naxanye faxe, Sulemani yi ne findi konyine ra, e na yi han to. **22** Koni, Sulemani mi fa Isirayila kaane ti konyiyaan na, bayo e yi findixi a sofane nan na, e nun

a walikene nun a kuntigine nun a sofa kuntigine, e nun a wontoro ragine nun soo ragine kuntigine. **23** Sulemani mōn yi Isirayila kaan muxu keme suulun tonge suulun sugandi naxanye yi a walikene xun na. **24** Misiran mangana dii temen yi keli Dawudaa Taani, a dōxo manga banxini Sulemani naxan tixi a xa. Na xanbi ra, Sulemani mōn yi gbingbinna rafala a banxin nabilinni, a na xili sa Milo. **25** Sulemani yi saraxa gan daxin bama nen sanja ma saxan jeeen bun ma e nun boje xunbeli saraxane yire sarjanxini a naxan ti Alatala xa. A mōn yi wusulanna ganma nen yire sarjanxin fari naxan yi Alatala yetagi. A yi Ala Batu Banxin nawalima na kii nin. **26** Manga Sulemani yi kunkine yitōn Esiyon-Gebere yi, Elati taan dexōn, Gbala Baan de, Edōn yamanani. **27** Xurami a kunki ragiin naxanye yi baan kolon, a yi ne rasiga Sulemani a walikene fema kunkine kui. **28** E siga Ofiri yamanani, e sa xemaan kilo wuli fu nun firin tongo, e fa e ra Manga Sulemani xōn.

10 Saba manga naxanla yi Sulemani mankanna me Alatala fe yi. Nayi a yi fa Sulemani todeni a fekolonna bunbadeni, a yi maxōdin xōdexene sa a bun ma. **2** A yi fa Yerusalen yi e nun a fōxōrabira gbeene, jōgomen naxanye yi latikōnōnne nun xema gbege maxalima, e nun geme fapi kendene. A yi siga Sulemani fema, naxan birin yi a bojeni, a yi na fala a xa. **3** Sulemani yi a maxōdinne birin yabi, sese mi lu mangan mi naxan ye ba a xa. **4** Saba manga naxanla yi Sulemani a fekolonna to, e nun a banxin naxan tixi, **5** e nun donseen naxanye yi a tabanla ra, e nun a rabilinna muxune ti kiine, e nun naxanye yi balon nun minse wanla ra, ne maraberibane, e nun a saraxa gan daxine a yi naxanye bama Alatala Batu Banxini. Ne yi a kenen han a yengin yi dasa. **6** A yi a fala mangan xa, a naxa, “Nōndin nan yi a ra n naxan mexi n ma yamanani i kiin nun i ya fekolonna fe yi. **7** N mi yi laxi a ra benun n xa fa n yi a to n yeeen na. E mi yi a tagiin yeteen falaxi n xa. N naxan birin mexi, i ya fekolonna nun i ya nafulu kanyaan dangu na ra. **8** Sewana i ya muxune xa, sewana i ya walikene xa naxanye i yetagi waxatin birin, naxanye i ya fekolonna ramema. **9** Tantunna Alatala xa, i ya Ala, naxan i malixi, a yi i ti Isirayila mangan na. Bayo Isirayila rafan a ma habadan, nanara a i findixi mangan na alogo i xa kiti kenden sa tinxinni.” **10** A yi xemaan kilo wuli saxan so mangan yii, e nun latikōnōn gbege nun

boxo bun nafunle. Latikōnōn fapi mi fa na sōnōn alo Saba manga naxanla naxan so Manga Sulemani yii. **11** Xurami a kunkin naxanye yi xemaan maxalima sa keli Ofiri yamanani, ne fan yi fa santali wudi sifan gbege ra e nun boxo bun nafunle keli Ofiri yi. **12** Manga Sulemani yi santali wudine findi Alatala Batu Banxin bun tiine ra, e nun manga banxin bun tiine. A mōn yi na wudina nde rafala maxaseene ra alo kondenne nun bōlōnne, maxase maxane xa. Han to, e mi fa santali wudin to fe Isirayila yi na kiini. **13** Naxan birin yi rafan Saba manga naxanla ma, a ne maxōdin, Manga Sulemani yi ne so a yii. A yeteen yi se gbeteye fi a ma a mangayaan fanni. Na xanbi ra, manga naxanla nun a walikene yi xete a yamanani. **14** Xemaan naxan yi fama Sulemani ma jee kedenna bun ma, na gboon yi sigē han kilo wuli mōxōje. **15** Yulaya seene mudun yi saxi na nan fari e nun seen naxanye yi sa kelima yire gbetene yi e nun Arabune mangane nun yamana kanne yi fama mudun naxanye ra. **16** Manga Sulemani yi ye masansan wure lefaan xema daxin xungbeen keme firin nafala, xemaan kilo sennin nan yi e keden kedenna birin na. **17** A mōn yi ye masansan wure lefaan xema daxin xurin keme saxan nafala, xemaan kilo keden e nun a tagi nan yi e keden kedenna birin na. Banxin naxan yi xili “Liban fōtōnna,” a yi sa e sa menni. **18** Mangan yi sama jinna rafala manga gbede gbeen na, a xema igen sa a ma. **19** Tede sennin nan yi manga gbeden ma, a faxa binna yi radigilinx i xanbi ra nen, a yiine yi a fōxo firinna birin ma, yata sawura firin yi tixi a yiine fema. **20** Yata sawura fu nun firin yitaxunxi tedene fari, sennin yiifanna ma, sennin komenna ma. Na jōxōnna munma liga yamana yo yi. **21** Xemaan nan yi Manga Sulemani a igelengenne birin na. Xemaan nan yi Liban fōtōn banxin kui muranne birin na. E mi yi sese rafalan gbetin na, bayo Manga Sulemani waxatini, gbetin mi yi yatexi sese ra. **22** Kunkin gbeene yi Manga Sulemani yii, a yi naxanye rasiga baan xun ma Xurami a kunkine fōxo ra. Jee saxan yo jee saxan kunkine yi xetema nen Isirayila yi, e rafexi xemaan nun gbeti fixen nun sama jinne nun kudune nun gboxune ra. **23** Manga Sulemani yi dangu bōxōn mangane birin na fata a nafulu kanyaan nun a xaxilimayaan na. **24** Dunuja muxune birin yi katama Sulemani to feen na alogo Ala xaxilimayaan naxan saxi a bojeni, e xa na rame. **25** Birin yi fama a sanbane ra, gbeti daxine nun xema daxine nun dugine nun yenge so seene nun latikōnōnne nun

soone nun gbaxalone, a yi na kii nin jɛɛ yo jɛɛ. **26** Sulemani yi yenge so wontorone nun soone malan, wontoro wuli keden keme naanin yi a yii e nun soo wuli fu nun firin, a yi ne lu taane yi a wontorone yi denaxanye yi e nun Yerusalen yi mangan fema. **27** Mangan barakani, gbetin yi gbo ayi Yerusalen yi alo gemene, suman wudin yi wuya ayi alo burunna xɔde binla naxan yamanan lanbanni. **28** Sulemani a soone yi kelima Misiran nun Kuwe yamanane nin, yulane yi sa e sarama denaxanye yi mangan xa. **29** Wontoron naxan yi kelima Misiran yamanani, na yi sarama gbeti gbanan keme sennin nan na. Soon tan yi sarama gbeti gbanan keme tonge suulun nan na. Na yula kedenne nan mɔn yi fama Xiti mangane nun Arami mangane gbeene ra.

11 Manga Sulemani naxan Misiran mangana dii temen dɔxɔ, a mɔn jaxalan xɔɲɛ wuyaxi dɔxɔ nɛn, naxanye yi fataxi Moyaba kaane nun Amonine nun Edon kaane nun Sidon kaane nun Xiti kaane ra. **2** Ne yi kelixi siya gbetene nin Alatala a fala Isirayila kaane xa naxanye fe yi, a naxa, “E nama siga e konni mume, e mi fe e konni mume, waxatina nde e e bɔɲɛn firifirima nɛn e alane binni.” Koni, Sulemani kankan ne nan ma marafanna xɔn. **3** A yi manga dii temen keme solofere sɔto jaxanla ra, e nun konyi jaxalan keme saxan a naxanye sɔto jaxanla ra. Na jaxanle yi a bɔɲɛn maxetɛ. **4** Sulemani fori waxatini, a jaxanle yi a bɔɲɛn xunsa ala gbetene ma, a bɔɲɛn birin mi lu Alatala, a Ala xa sɔnɔn, alo a fafe Dawuda bɔɲɛn yi kii naxan yi. **5** Sulemani yi Asitarate batu, Sidon kaane ala jaxalanmana, e nun Mɔlɔkɔ, Amonine ala jaxina. **6** Sulemani yi fe jaxin liga Alatala yɛɛ ra yi, a mi yi a xuiin suxi alo a fafe Dawuda. **7** Nayi, Sulemani yi taan kiden ti geyaan fari Kemosi xa denaxan Yerusalen yetagi, Moyaba kaane ala, e nun Mɔlɔkɔ, Amonine ala jaxina. **8** A yi na liga a siya gbete jaxanle birin xa, naxanye yi wusulanna nun saraxan fima e alane ma. **9** Nayi, Alatala yi xɔlɔ Sulemani ma. Bayo, a bata yi a xaxinla xun xanbi so Alatala yi, Isirayilaa Ala, naxan bata yi mini Sulemani xa sanja yi firin. **10** Alatala yi a yamarin fi a ma, a nama ala gbetene batu, koni Sulemani mi a xuiin suxu, a yi ala gbetene batu. **11** Alatala yi a fala Sulemani xa, a naxa, “Bayo i bata a liga iki, bayo i mi n ma layirin mafaxaxi, e nun n yamarin naxanye soxi i yii, n mangayaan bama i yii nɛn, n na a so i ya walikena nde yii. **12** Koni i

fafe Dawuda a fe ra, n mi tɔrɔyani ito rakamalima i ya siimayani. N mangayaan bama i ya dii xɛmɛn nan yii. **13** A yetɛna, n mi yamanan birin bama a yii, koni n bɔnsɔn keden luma a yii nɛn, n ma walikɛɛn Dawudaa fe ra, e nun Yerusalen ma fe ra, n taan naxan sugandixi.” **14** Alatala yi Sulemani yaxun nadin a ma, naxan yi xili Xadada, Edon kaan naxan keli Edon mangan bɔnsɔnni. **15** Dawuda Edon yamanan nɔ waxatin naxan yi, sofa kuntigin Yowaba bata yi te muxu maluxundeni, xɛmɛn naxanye yi Edon yi, a ne birin faxa. **16** Yowaba nun a sofane lu nɛn Edon yi kike sennin, alogo e xa banxulanne nun xɛmɛne faxa. **17** Koni Xadada mɔn yi banxulan jɔrɛyani. A tan nun Edon kaan naxanye yi a fafe a wanle ra, e nun ne yi e luxun, e siga Misiran yi. **18** E keli Midiyan yamanani, e siga Paran tonbonni, e Paran muxuna ndee bira e foxɔ ra, e fa Misiran yi Misiran mangan fema. Misiran mangan yi banxin so Xadada yii, a yi a balo, a bɔxɔne so a yii. **19** Xadada yi Misiran mangan kenen, han mangan yi a jaxanla xunyen fi a ma, manga jaxanla Tapenesi xunyɛna. **20** Tapenesi xunyen yi dii keden sɔto Xadada xa, a yi a xili sa Genubati. Tapenesi yi a maxuru Misiran mangana banxini, Genubati yi lu Misiran mangana banxini, mangana diine tagi. **21** Xadada to a mɛ Misiran yi a Dawuda bata yi faxa, e nun sofa kuntigin Yowaba, a yi a fala Misiran mangan xa, a naxa, “A lu n xa xetɛ n ma yamanani.” **22** Misiran mangan yi a maxɔdin, a naxa, “I dasaxi nanse ra n fema be ba? Nanfera i kataxi xetɛ feen na i ya yamanani?” A yi a yabi, a naxa, “Sese mi dasaxi n ma, koni a lu n xa xetɛ.” **23** Ala yi yaxu gbete rakeli Sulemani xili ma, a xili Reson, Eliyadaa dii xɛmɛn naxan a gi a kanna Hadadeseri, Soba mangan bun. **24** Dawuda Hadadeseri a ganla halagi waxatin naxan yi, Reson bata yi ganla nde malan a yetɛ xa, a yi naxan xun na. E yi siga Damasi taani, e sa dɔxɔ menni, e yi Damasi mangayaan tongo. **25** A findi nɛn Isirayila yaxun na Sulemani a siimayaan birin yi, sa Xadada gbee fe jaxine fari. Reson ma mangayani Arami yamanani, a Isirayila rajaxu nɛn. **26** Nebati a dii xɛmɛn Yerobowan fan yi murutɛ mangan xili ma Sulemani a walikɛna. Efirami bɔnsɔnna nan yi a ra naxan keli Sereda taani. Kaja gilen nan yi a nga ra, a xili Seruya. **27** A murutɛ mangan xili ma i kii nin. Sulemani yi Milo gbingsinna tima e nun a yi a fafe Dawudaa Taan nabilinna yinna yinla nde yitɔnma. **28** Na waxatini, foningɛn wekilexi fangamaan nan yi

Yerobowan na. Sulemani to na banxulanna to wale, a yi a findi Yusufu bõnsõnna karahan walikene xunna dõxõn na. **29** Lõxõna nde, Yerobowan bata yi mini Yerusalen yi, a yi naralan Nabi Axiya ra kira yi Silo kaana. E firinne yi e danna burunna ra. Doma nenen nagodoxi nabiin ma, **30** Axiya yi na suxu a a yibo dungi fu nun firinna ra. **31** A yi a fala Yerobowan xa, a naxa, “Dungi fu tongo i yete xa. Amasoto Alatala, Isirayilaa Ala naxa, ‘N yamanan bama nen Sulemani yii, n yi bõnsõn fu so i yii. **32** Koni, bõnsõn keden luma nen Sulemani yii n ma walikeen Dawudaa fe ra, e nun Yerusalen ma fe ra, n taan naxan sugandixi Isirayila bõnsõnne birin ye. **33** Amasoto e bata n nabepin, e yi Asitarate batu, Sidõn kaane ala jaxalanmana e nun Kemosi, Moyaba kaane ala e nun Mõlõkõ, Amonine ala. E mi sigan tixi n ma kiraan xõn, e mi n nafan feene ligaxi, e mi n ma yamarine nun n ma sariyane suxi, alo a fafe Dawuda a liga kii naxan yi. **34** N mi yamanan birin bama a yii, amasoto n na a luma nen mangayani a siin birin yi Dawudaa fe ra, n ma walikena, n naxan sugandixi, naxan n ma yamarine nun n ma sariyane suxu. **35** Koni n sa mangayaan bama nen a dii xemèn yii, n yi bõnsõn fu so i yii, **36** n bõnsõn keden luma a dii xemèn yii nen, alogo n ma walikeen Dawudaa dii keden xa lu n yetagi mangayani Yerusalen yi, n taan naxan sugandixi alogo n xinla xa lu na. **37** I tan, Yerobowan, n yamanan soma nen i yii alo i wama a xõn kii naxan yi. I findima nen Isirayila mangan na. **38** Xa i tuli mati n ma yamarin birin na, xa i bira kirane fõxõ ra n naxanye yitama i ra, xa i n nafan feene liga, xa i n ma sariyane nun n ma yamarine suxu, alo n ma walikeen Dawuda a liga kii naxan yi, nayi n luma nen i xõn. N bata i tuli sa, n na i bõnsõnne sabatima nen mangayani alo Dawuda gbeene. N na Isirayila bõnsõn fu soma i yii nen, **39** alogo n xa Dawuda yixetene rayagi, koni n mi e rayagima habadan.” **40** Sulemani yi kata Yerobowan faxa feen na, koni Yerobowan yi a gi, a siga Misiran yi Sisaki fema, na yamanan mangana, a yi lu na han Sulemani yi faxa. **41** Sulemani kewali dõnxene nun a feen naxanye birin ligaxi e nun a xaxilimayana, ne birin sebexi a kewali kedin kui. **42** Sulemani jee tonge naanin nan ti mangayani Isirayila birin xun na Yerusalen yi. **43** A to faxa, e yi a maluxun a benbane fema a fafe Dawudaa Taani, a diin Robowan nan ti a jõxõni mangayani.

12 Robowan yi siga Siken taani, amasoto Isirayila kaane birin bata yi fa Siken yi a findideni mangan na. **2** Nebati a dii xemèn Yerobowan yi na xibarun mema waxatin naxan yi, a mõi yi Misiran yi, a bata yi a gi a siga denaxan yi a makuya Manga Sulemani ra, a yi doxi Misiran nin. **3** E yi muxune rasiga a xilideni. Nayi, Yerobowan nun Isirayila yamaan birin yi fa Robowan fema, e yi a fala a xa, e naxa, **4** “I fafe nxu suxi konyiyaan nan na. Iki, xa i tan goronni ito rayelefu nxu xun ma naxan binya nxu tungunna ma alo xun xidi wudin jingen xun ma, nxu tinxi nxu wali i xa.” **5** A yi e yabi, a naxa, “E siga, xi saxan na dangu e fa n fema.” Yamaan yi siga. **6** Manga Robowan yi fonne maxõdin naxanye yi a fafe Sulemani fema a siimayani, a yi e maxõdin, a naxa, “E maxadin mundun fima n ma yamani ito yabin na?” **7** Fonne yi a fala a xa, e naxa, “Xa i a yita e ra to, a i tinxi walideni yamaan xa, xa i e yabi fala fajine ra, e findima nen i ya walikene ra habadan.” **8** Koni, Robowan yi fonne maxadi xuiin nabepin. A yi foningene maxõdin naxanye yi a rabilinxì, a lanfane. **9** A yi e maxõdin, a naxa, “Muxuni itoe bata n maxõdin a n xa goronna ndedi ba e xun ma, n fafe e jaxankataxi naxan na alo konyine. E n maxadima yabin mundun na n xa a so e yii?” **10** A lanfa foningene yi a fala a xa, e naxa, “Muxuni itoe e mawuga nen a i fafe bata e suxu alo konyine, e i maxõdinma a i xa na goronna ndedi ba e xun ma. Awa, i lan i xa e yabi i kiini, i naxa, ‘N yii kirin gbo dangu n fafe tagin na. **11** N fafe bata e konyiyaan naxõdõxõ ayi. N tan a raxõdõxõma ayi e ma nen dangu na ra. N fafe e jaxankata bosaan nan na, n tan e jaxankatama tanle nan na.” **12** Yerobowan nun yamaan birin yi fa Robowan fema xi saxande lõxõni alo mangana a fala kii naxan yi, a xi saxan na dangu, e fa a fema. **13** Mangan yi yamaan yabi a xõdexen na. Fonne maxadi xuiin naxan fala a xa, a yi na lu na. **14** A yi falan ti e xa iki fata foningene maxadi xuiin na, a yi a fala e xa, a naxa, “N fafe bata e konyiyaan naxõdõxõ ayi. N tan a raxõdõxõma ayi e ma nen dangu na ra. N fafe e jaxankata bosaan nan na, n tan e jaxankatama tanle nan na.” **15** Na kiini mangan mi tin yamana maxandin na. Alatala yi feene liga na kiini alogo a xa a tulisaaan nakamali a naxan tongo Yerobowan xa, Nebati a dii xemena, fata Nabi Axiya ra, Silo kaana. **16** Isirayila kaane to a kolon a manga mi tinxi e maxandin ma, e yi a fala, e naxa, “Sese mi fa en nun Dawuda tagi, en nun

Yese a dii xemēni ito mi fa malanxi sese ma. Isirayila muxune, ε xete ε konni. I tan, Dawuda yixetena, iki i yee rafindi i ya yamanan ma.” E birin yi keli mēnni, e siga e konne yi. **17** Isirayila kaan naxanye lu Yuda taane yi, Robowan lu mangayani ne nan gbansan xun na. **18** Nayi, Manga Robowan yi Adoran nasiga naxan yi findixi karahan wanle kuntigin na. Koni Isirayila kaane birin yi a magolon, e a faxa. Manga Robowan yi a mafura tedeni yenge so wontorona nde kui, a yi a gi, a siga Yerusalem yi. **19** Isirayila kaane murute Dawudaa denbayaan xili ma na kii nin han to. **20** Isirayila kaane birin to Yerobowan xete feen me, e yi a xili yamani, e a findi mangan na Isirayila birin xun na. Yuda bōnsōnna keden peen nan lu Dawudaa denbayaan fōxo ra. **21** Robowan to so Yerusalem yi, a yi Yuda denbayane birin malan e nun Bunyamin bōnsōnna muxune. Sofa wuli keme tonge solomasexe nan yi na Isirayila yamaan yenge xinla ma alogo e xa fa e ra Sulemani a dii xemen Robowan ma nōon bun ma. **22** Koni Alaa falan yi fa sayiba Semaya li, a naxa, **23** “Falan ti Robowan xa, Sulemani a dii xemena, Yuda mangana, e nun Yuda denbayaan birin nun Bunyamin bōnsōnna muxune nun yama dōnxen birin, i naxa, **24** ‘Alatala ito nan falaxi, a naxa: E nama fa ε Isirayila kaane yenge, naxanye ε ngaxakedenne ra. E tan birin xa xete ε konni, amasoto feni ito fataxi n tan nan na.” E yi Alatalaa falan suxu, e yi xete alo Alatala a falaxi kii naxan yi. **25** Yerobowan yi Siken taan ti Efirami geyaan fari, a yi dōxo na. Na xanbi ra, a mōn yi keli mēnni, a yi sa Penuyeli taan ti. **26** Yerobowan yi a fala a bōjēni, a naxa, “Iki, yamanan nōe xete nen Dawudaa denbayaan ma ki fajni. **27** Xa yamaan te Yerusalem yi saraxane badeni Alatala Batu Banxini, yamani ito bōjē xun xetema nen a kanna ma, Robowan ma, Yuda mangana. E n faxama nen e xete Manga Robowan ma.” **28** Nayi, mangan yi xaxili fen, a yi jinge dii sawura xema daxin firin nafala, a yi a fala yamaan xa, a naxa, “E bata bu te Yerusalem yi. Isirayila kaane, ε alane ni i ra, naxanye ε raminixi Misiran yamanani.” **29** A na jinge dii sawura keden ti Beteli taani, a yi sa boden ti Dan yi. **30** Na nan findi yulubin sabun na. Yamaan yi siga han Dan yi na jinge dii sawura keden yetagi. **31** Yerobowan yi taan kide banxina ndee ti, a yi na kidene kii muxuna ndee sugandi naxanye mi yi kelixi Lewi bōnsōnni. **32** Yerobowan yi sanla nde yitōn kike solomasexeden xi fu nun suulunde lōxōni, sanla naxan maligaxi alo naxan yi ligama Yuda yi. A

yeteen yi saraxane rali saraxa ganden fari. A na nan liga Beteli yi, a saraxan ba jinge dii sawurane xa a naxanye rafala, a yi kide kiina ndee sugandi mēnne xa a denaxanye ti taan kidene ra. **33** A yi saraxane rali saraxa ganden fari a naxan yitōn Beteli yi, kike solomasexeden xi fu nun suulunde lōxōni, a kiken naxan sugandi a rafanna ra. A yi sanli tōn Isirayila kaane xa, a yi te saraxa gandeni, a sa wusulanne gan.

13 Sayibana nde yi keli Yuda yi, a yi fa Beteli taani Alatalaa yamarin bun ma. Na waxatini, Yerobowan yi tixi saraxa ganden wusulan ganden. **2** Sayiban yi Alatalaa falani ito ti saraxa ganden xa, a naxa, “I tan, Saraxa Gandena! I tan, Saraxa Gandena! I xa a rame Alatala naxan falaxi, a naxa, ‘Dii xemena nde sōtoma nen Dawuda bōnsōnni, a xilima nen Yosiya. Yosiya taan kiden ki muxune ganma nen i fari naxanye wusulan ganma i fari iki. A na muxune xōnne ganma nen i fari.’” **3** Na lōxōn yeteni, a yi taxamasenni ito ti, a naxa, “Alatalaa falan tixi taxamasenni ito nan xōn: Saraxa gandeni ito yibōma nen, xuben naxan a fari, na yi xuya ayi.” **4** Manga Yerobowan na sayibana falane me waxatin naxan yi, a naxanye tixi Beteli saraxa ganden xili ma, a yi a yiini bandun saraxa ganden xun ma, a yi a fala, a naxa, “E a suxu!” Yerobowan a yiin naxan yibandun saraxa ganden xun ma, na yi xara ayi, a mi fa nō a raxete a ma. **5** Saraxa ganden yi bō, xuben naxan yi a fari, na yi xuya ayi, alo sayibana a fala kii naxan yi Alatalaa falan xōn. **6** Nayi, mangan yi a fala sayiban xa, a naxa, “Alatala mayandi, i ya Ala, i yi maxandin ti n xa, alogo n xa nō n yiin naxete.” Sayiban yi Alatala maxandi, mangan yi a yiin naxete, a lu alo a singeni. **7** Mangan yi a fala sayiban xa, a naxa, “En birin xa siga n ma banxini, i yi sa donsena nde don, n yi sena nde fi i ma.” **8** Sayiban yi a fala mangan xa, a naxa, “Hali i ya banxin fōxo kedenna so n yii, n mi sigē. N mi burun dōnjē mume, n mi igen minjē mume yireni ito yi, **9** amasoto yamarini ito soxi n yii Alatalaa falan nan xōn, a naxa, ‘I mi burun dōnjē mume, i mi igen minjē mume, e nun i xetematōon mi xete kiraan xōn i siga naxan xōn ma.’” **10** A yi siga kira gbete xōn ma, a mi xete a fa kiraan xōn Beteli yi. **11** Nabi xeme fonna nde yi na naxan yi dōxi Beteli yi. A diine yi fa a fala a xa sayiban naxan birin ligaxi Beteli yi na lōxōni, e nun a falan naxanye ti mangan xa. E to na yeēba e baba xa, **12** e baba yi e maxōdin, a naxa, “A siga kiraan mundun

xon?” A diine a to nen sayiban naxan keli Yuda yi na sigaxi kiraan naxan xon. **13** Nayi, nabiin yi a fala a diine xa, a naxa, “E sofanli tɔn n xa.” E yi sofanli tɔn a xa, a yi te a fari. **14** A yi siga sayiban fɔxɔ ra, a yi sa a li dɔxi kondena nde nininna ra. A yi a maxɔdin, a naxa, “I tan nan sayiban na ba, naxan kelixi Yuda yi?” A yi a yabi, a naxa, “N tan na a ra.” **15** Nayi, nabiin yi a fala a xa, a naxa, “En siga n ma banxini, i yi donsena nde don.” **16** Koni sayiban yi a yabi, a naxa, “N mi nɔɛ xete i fema, n mi soɛ i konni. N mi burun donjɛ mume, n mi igen minjɛ i xon yireni ito yi. **17** Bayo Alatala bata yi a fala n xa, a naxa, ‘I mi burun donjɛ mume, i mi igen minjɛ, i mi xete kiraan xon i fa naxan xon.’” **18** Nabi fonna yi a yabi, a naxa, “Nabiin nan n fan na alo i tan, malekan bata falan ti n xa Alatala xinli, a naxa, ‘Fa a ra i fema i ya banxini, a xa donseen don, a yi igen min.’” Koni, na nabiin yi wulen nan falama. **19** Sayiban yi xete a fema, a yi burun don, a yi igen mi a banxini. **20** Nba, e yi dɔxi e degedeni waxatin naxan yi, nabi fonna naxan fa a ra banxini, Alatalaa falan yi fa na ma. **21** Nabiin yi sɔnxɔ sayiban mabinni naxan kelixi Yuda yi, a naxa, “Alatala ito nan falaxi, a naxa, ‘I bata murute Alatalaa falan ma, i mi Alatalaa yamarin suxi, i ya Ala, a naxan so i yii. **22** I bata xete, i yi burun don, i yi igen min yireni ito yi, anu Ala na tɔnna sa i ra nen. Na ma, i faxama nen, i binbin mi maluxunma i benbane gaburun na.’” **23** E yelin e dege waxatin naxan yi, e yi igen min, nabiin naxan fa a ra, na yi sofanli tɔn a xa. **24** Sayiban yi sigama e nun yatan yi naralan kira yi, na yi a faxa. A binbin yi lu saxi kiraan xon, sofanla yi lu a fema, yatan yi lu tixi a binbin xun ma. **25** Muxun naxanye yi danguma, ne yi a binbin to saxi kiraan xon ma, yatan tixi a binbin xun ma. Nabi fonna yi dɔxi taan naxan yi e to so menni, e yi a yebe menni. **26** Nabiin naxan siga sayiban fɔxɔ ra kira tagi, na to a me, a yi a fala, a naxa, “Sayiban naxan murute Alatalaa yamarin ma, nanara, Alatala bata a so yatan yii, a yi a yibo, a faxa, alo Alatala a fala a xa kii naxan yi.” **27** Nayi, a yi a fala a diine xa, a naxa, “E sofanli tɔn n xa.” E yi a yitɔn a xa. **28** Nabiin yi siga. A yi binbin li saxi kiraan xon, sofanla nun yatan tixi binbin xun ma. Yatan mi binbin don, a mi sofanli bo. **29** Nabi fonna yi sayiban binbin tongo, a yi a sa sofanla fari, a yi a xali taani, a yi a wuga, a maluxun. **30** A yi a binbin sa a yete gaburun na, e yi a wuga, e yi a fala, e naxa, “Ngaxakedennal” **31** A maluxun xanbini, nabiin yi a fala a diine xa, a naxa, “N na faxa,

sayiban maluxunxi gaburun naxan na, e yi n maluxun menni, e yi n xonne sa a xonne dexɔn. **32** Amasoto a yi falan tima Alatala xinla nin naxan nakamalima Beteli saraxa ganden xili ma e nun taan kide banxine Samari taane yi.” **33** Na feen dangu xanbini, Yerobowan mi xete a fe jaxi kiraan fɔxɔ ra mume. A mɔn yi siga kide kiine sugande taan kidene xa, naxanye birin yi waxi a xon e xa findi a ra. **34** Na nan findi yulubin sabun na Yerobowan ma denbayaan xa, nanara e raxori e jan bɔxɔ xonna fari.

14 Na waxatini, Abiya, Yerobowan ma dii xemmen yi fura. **2** Yerobowan yi a fala a jaxanla xa, a naxa, “Keli, i maxidi alo muxu gbete alogo e nama a kolon a n ma jaxanla nan i ra, i siga Silo taani. Nabi Axiya menni, a tan nan a fala n xa a n findima nen yamani ito mangan na. **3** I buru fu tongo, e nun donsena nde, e nun kumi kundi keden, i sa so a konni, naxan diin sɔtɔma, a na falama nen i xa.” **4** Yerobowan ma jaxanla yi na liga, a yi keli, a siga Silo yi, a so Axiyaa banxini. Axiya mi yi fa nɔɛ seen toɛ, amasoto a bata yi fori. **5** Alatala bata yi a fala Axiya xa a Yerobowan ma jaxanla fama nen a maxɔdinden i diina fe ra, amasoto a mi yalan. **6** Jaxanla maso deen na waxatin naxan yi, Axiya yi a san xuiin me, a yi a fala, a naxa, “So, Yerobowan ma jaxanla, nanfera i waxi i yete findi feni muxu gbeten na? A na liga ki yo ki xibaru jaxin nan n yii i xa. **7** Siga, i sa a fala Yerobowan xa a Alatala, Isirayilaa Ala ito nan falaxi, a naxa, ‘N ni i tongoxi nen yamani ito muxune tagi, n yi i dɔxɔ n ma yamanana Isirayila xun na, **8** n yi mangayaan ba Dawudaa denbaya yii, n yi a so i yii. Koni, i mi lu alo n ma walikeen Dawuda. A tan n ma yamarine suxu nen, a sigan ti n fɔxɔ ra a bɔjɛn birin na, naxan fan n yeɛ ra yi, a na liga. **9** I fe jaxin ligama dangu naxanye birin fa i yeɛ ra, i bata n naxolo amasoto i bata ala xɔjɛne rafala, i yi suxurene yelan wure raxulunxine ra, i yi n nawoli ayi i xanbi ra. **10** Nanara, n tɔrɔn nafama nen Yerobowan ma denbayaan ma, Yerobowan gbeen naxan birin na, n na a raxorima nen bɔxɔn fari, konyi nun xɔrɔna Isirayila yi. N Yerobowan ma denbayaan makoma nen alo jamana, han a yi jan fefe. **11** Yerobowan ma denbayaan muxun naxanye na faxa taani, barene nan ne donma. Naxanye na faxa burunna ra, xoline nan ne donma. Amasoto Alatala bata falan ti!” **12** I tan, keli, i siga i ya banxini. I nɛɛn fa i sanna ti i ya taani, i ya diin

faxama nen. **13** Isirayila kaane birin a wugama nen, e yi a maluxun, amasoto a keden peen nan Yerobowan ma denbayaan muxun na naxan sama gaburun na, amasoto na kedenna nan Yerobowan ma denbayani Alatala fe fajin toxi naxan yi, Isirayilaa Ala. **14** Alatala mangana nde doxoma nen Isirayila xun na naxan Yerobowan ma denbayaan naxorima. Na loxon nan a lixi to! **15** Nayi, Alatala Isirayila muxune yihadima nen, e yimaxama nen alo gbalan naxanye xuden de, a yamana fajini ito talama nen Isirayila kaane yii a naxan so e benbane yii. Alatala yi e raxuya ayi han Efirati baan kidi ma, amasoto e bata gbindonna bitin Asera kiden na, e yi Alatala raxolo. **16** A Isirayila rabepinma nen Yerobowan ma yulubine fe ra e nun Yerobowan Isirayila tixi naxan liga ra.” **17** Yerobowan ma jaxanla yi keli, a siga. A yi sa so Tirisa taani, a tima so deen na, diin yi faxa. **18** E yi a maluxun, Isirayila birin yi a wuga, fata Alatalaa falan na a naxan ti Nabi Axiya xa, a walikena. **19** Yerobowan kewali donxene, a yengen so kii naxan yi, a mangayaan liga kii naxan yi, ne sebexi Isirayila mangane taruxu kedine kui. **20** A faxe, a bata yi jee moxonen nun firin ti mangayani, a dii Nadaba nan ti a joxoni. **21** Sulemani a dii xemen Robowan mangayaan liga nen Yuda yi. A findi mangan na a jee tonge naanin e nun kedenden nan ma. A yi mangayaan liga jee fu nun solofere Yerusalen yi, Alatala taan naxan sugandi Isirayila bomsenne birin xa alogo a xinla xa lu na. A nga yi xili Nama, Amonina. **22** Yuda kaane yi fe jaxin liga Alatala yee ra yi. Alatala yi xolo lan e yulubine ma e benbane munma yi naxan joxondon liga singen. **23** E fan yi taan kidene yelan, e kide gemene ti, e Asera kide gbindonne bitin geyane birin xuntagi e nun wudi gbeene birin bun. **24** Kide ki xeme yalundene yi lu yamanani. Alatala siyaan naxanye birin kedi a yi e doxoden so Isirayila yii, Isirayila kaane yi ne raliga e kewali xosixine birin yi. **25** Robowan ma mangayaan jee suulundeni, Misiran manga Sisaki yi keli Yerusalen xili ma. **26** A yi Alatala Batu Banxin nafunle birin tongo, e nun manga banxin nafunle. A na ye masansan wure lefa xema daxine birin tongo Sulemani naxanye rafala. **27** Nayi, e joxo yibirana, Manga Robowan yi ye masansan wure lefa sula daxina ndee rafala, sofaan naxanye yi manga banxin deene kantanma, a yi a taxu ne kuntigine ra. **28** Waxatin birin, xa mangan yi sigama Alatala Batu Banxini, sofane yi ye masansanne xalima nen, na xanbi ra, e mon yi xete e ra e kantan ti banxini. **29**

Robowan kewali donxene, a naxanye birin liga, ne sebexi Yuda mangane taruxu kedine kui. **30** Yengen lu nen Robowan nun Yerobowan tagi yeye. **31** Robowan to faxa, e yi a maluxun a benbane fema Dawudaa Taani. Amonin nan yi a nga ra, a yi xili Nama. Robowan ma diina Abiyan nan ti a joxoni.

15 Nebati a dii xemen Yerobowan ma mangayaan jee fu nun solomasexeden na, Abiyan yi findi mangan na Yuda xun na. **2** A yi mangayaan liga Yerusalen yi jee saxan. A nga yi xili Maka, Abisalon ma dii temena. **3** Abiyan yi yulubin birin liga alo a fafe naxanye sifaye liga a yee ra, a mi Alatala xanu a bonen ma feu, a Ala, alo a benba Dawuda bonen yi kii naxan yi. **4** Alatala, a Ala yi dii xeme keden fi a ma naxan luma a joxoni alogo mangana denbayaan nama jan e nun mon Yerusalen xa lu yamanan manga taayani, koni a na liga Dawuda nan ma fe ra. **5** Bayo, naxan fan Alatala yee ra yi, Dawuda na liga nen, a mi a xun xanbi so a yamari yo yi a siimayaan birin yi, ba Xiti kaan Yuriya fe ra. **6** Yengen lu nen Robowan nun Yerobowan tagi, a siimayaan birin yi. **7** Abiyan kewali donxene, e nun a naxan birin liga, ne sebexi Yuda mangane taruxu kedine kui. Yengen so nen Abiyan nun Yerobowan tagi. **8** Abiyan to faxa, e yi a maluxun Dawudaa Taani, a dii xemena Asa nan ti a joxoni. **9** Yerobowan ma mangayaan jee moxonedena Isirayila xun na, Asa yi findi mangan na Yuda yi. **10** A jee tonge naanin e nun keden nan ti mangayani Yerusalen yi. A mame yi xili Maka, Abisalon ma dii temena. **11** Naxan fan Alatala yee ra yi, Asa yi na liga, alo a benba Dawuda. **12** A kide kii xeme yalundene ba nen yamanani, a benbane suxuren naxanye birin nafala, a yi ne birin nalo ayi. **13** Hali a mame Makaa jaxalan mangaya tiden ba nen a yii, amasoto a bata yi Asera kide gbindonna bitin. Asa yi a kiden kala, a yi a gan Kediron lanbanni. **14** Koni taan kidene mi raxori mume, hali Asa bonen birin to lu Alatala xa a siimayaan birin yi. **15** A fafe seen naxanye fi Ala ma, a yi ne nun a gbeene maxali Alatala Batu Banxini, gbeti fixen nun xemaan nun muranna sifa wuyaxi. **16** Yengen lu nen Asa nun Isirayila manga Basa tagi e siimayaan birin yi. **17** Isirayila manga Basa yi siga Yuda xili ma, a yi Rama taan senbe so alogo a xa kiraan bolon Manga Asa ma Yuda yi. **18** Gbeti fixen nun xemaan naxan birin yi luxi Alatalaa nafulu ramaraden nun mangana nafulu ramaradeni, Asa yi

ne birin tongo, a yi ne so a walikene yii, e yi ne xali Arami manga Ben-Hadada yee ra, Tabirimon ma dii xemena, Xesiyon mamandenna, naxan yi dɔxi Damasi taani. E xa a xerani ito yiba a xa, **19** e naxa, “Layirin xa xidi i tan nun n tan tagi, alo a lu n fafe nun i fafe tagi kii naxan yi. Nanara, n bata fa xemaan nun gbeti fixen na i xa. Nayi, sa layirin kala ε nun Isirayila manga Basa tagi, alogo a xa a makuya n na.” **20** Ben-Hadada yi tin Manga Asa fala xuiin ma, a yi a gali kuntigine rasiga Isirayila taane xili ma, a yi Iyon yenge e nun Dan nun Abeli-Beti-Maka nun Kinereti yamanan birin e nun Nafatali yamanan birin. **21** Basa to na me, a yi ba Rama taan tiye, a yi lu Tirisa taani. **22** Manga Asa yi Yuda kaane birin xili, muxu yo gbee mi ba a yi, alogo e xa gemene nun wudine maxali Manga Basa naxanye malan Rama taan senbe so feen na, Manga Asa yi ne rawali Geba taan tideni Bunyamin yi e nun Misipa taana. **23** Asa kewali dɔnxene, a wekilen birin e nun a naxan birin liga, a taan naxanye ti, ne sebexi Yuda mangane taruxu kedine kui. A siimayaan nananna ra, furena nde yi a sanne suxu. **24** Asa to faxa, e yi a maluxun a benbane fema a benba Dawudaa Taani, a diin Yosafati nan ti a nɔxɔni. **25** Yerobowan ma dii xemen Nadaba yi findi mangan na Isirayila yi, Manga Asaa mangayaan jee firinden Yuda yi. Nadaba yi jee firin nan ti mangayani Isirayila xun na. **26** Naxan jaxu Alatala yee ra yi, a na liga nen, a yi sigan ti alo a fafe naxan Isirayila kaane ti yulubin ma, a fan yi na yulubi kedenna liga. **27** Nayi, Axiyaa dii xemen Basa, keli Isakari bonsonni, na yi yanfan so mangan ma. Na waxatini, Nadaba nun Isirayila ganla dɔxi Gibetɔn taani, Filisistine denaxan yi, Basa yi Manga Nadaba faxa. **28** Na liga Asaa mangayaan jee saxanden nin Yuda yi. Basa yi mangayaan tongo. **29** A to findi mangan na, a yi Yerobowan ma denbayaan birin faxa. Hali kedenna, a mi a lu a nii ra. E birin yi raxɔri fata Alatalaa falan na a naxan ti a walikena Axiya xɔn, Silo kaana. **30** Na birin liga nen bayo Yerobowan bata yi yulubine liga e nun a mɔn yi Isirayila kaane birin nadin yulubin ligan ma, nanara Alatala, Isirayilaa Ala yi xolo han! **31** Nadaba kewali dɔnxene, a naxanye birin liga, ne sebexi Isirayila mangane taruxu kedine kui. **32** Yengen so nen Yuda Manga Asa nun Isirayila Manga Basa tagi e siimayaan birin yi. **33** Asaa mangayaan jee saxanden Yuda xun na, Basa, Axiyaa dii xemen yi findi Isirayila birin mangan na Tirisa taani, a yi mangayaan liga jee mɔxɔɔnen nun naanin. **34** A yi fe

naxin liga Alatala yee ra yi. A yi sigan ti a naxin na alo Yerobowan, naxan Isirayila yamaan ti yulubi ligan ma.

16 Alatala yi falan ti Nabi Yehu xa, Xanani a dii xemena, alogo a xa falani ito ti Basa xili ma, **2** a naxa, “N na i rakelixi burunburunna nin, n yi i findi n ma yamana Isirayila mangan na. Koni bayo i bata sigan ti Yerobowan ma kiraan xɔn, i yi n ma Isirayila yamaan ti yulubin ma, e yi n naxɔlo e yulubine fe ra, **3** nanara, n na ε raxɔrima nen, i tan nun i ya denbayana, n na ε ligama nen alo Nebati a dii xemen Yerobowan ma denbayana. **4** I ya denbayaan muxu yo faxa taani barene nan na donma, naxanye na faxa burunna ra, xoline yi ne don.” **5** Basa kewali dɔnxene, a naxan liga, a wekilena, ne sebexi Isirayila mangane taruxu kedine kui. **6** A to faxa, e yi a maluxun Tirisa taani, a dii xemena Ela nan ti a nɔxɔni. **7** Nba, Alatala a falan naxan ti Basa nun a denbayaan xa na kii nin fata Nabi Yehu ra, Xanani a dii xemena, na masɔto bun firin nan xɔn. A singena, naxan mi rafan Alatala ma, Basa nun a denbayaan na liga nen, e a raxɔlo e hakene ra, alo Yerobowan nun a denbayana. A firindena, Basa Yerobowan ma denbayaan naxɔri nen. **8** Asaa mangayaan jee mɔxɔɔnen nun sennindena Yuda xun na, Basaa dii xemena Ela yi findi mangan na Isirayila xun na, a yi mangayaan liga Tirisa taani jee firin. **9** A walikenen Simiri, yenge so wontorone fɔxɔ kedenna kuntigin yi yanfan so a ma. Na waxatini, Ela yi Tirisa taani, a yi a minma dɔlotɔyani, a yi Arasaa banxini, manga banxin kuntigina Tirisa yi. **10** Simiri yi fa, a yi Ela faxa, na liga Asaa mangayaan jee mɔxɔɔnen nun solofereden nin Yuda yi. Simiri yi mangayaan tongo. **11** A to findi mangan na a dɔxɔ mangayaan gbedeni, a yi Basaa denbayaan birin naxɔri, a mi xeme yo lu a nii ra a ngaxakedenne nun a lanfane ye. **12** Simiri yi Basaa denbayaan birin halagi, fata Alatala ra a falan naxan ti Basa xili ma Nabi Yehu xɔn, **13** na masɔto Basa nun a dii xemena Ela yulubine nan xɔn e naxanye liga e nun e Isirayila ti naxanye liga fe ra, e Alatala raxɔlo suxure fufafune ra, Isirayilaa Ala. **14** Ela kewali dɔnxene, a naxanye birin liga, ne sebexi Isirayila mangane taruxu kedine kui. **15** Asaa mangayaan jee mɔxɔɔnen nun soloferedeni Yuda yi, Simiri yi findi mangan na Isirayila yi, a yi xi solofere ti mangayani Tirisa taani. Isirayila ganla yi yitɔnxi Gibetɔn taan xili ma, Filisistine dɔxi denaxan yi. **16**

Sofane yi a me a Simiri bata yi yanfan so mangan ma a yeteen bata a faxes. Mafuren, Isirayila kaane birin yi lan a ma sofane daaxan kui, e yi kuntigina Omiri sugandi Isirayila mangan na. **17** Nayi, Omiri nun a ganla birin yi keli Gibeton taani, e yi sa Tirisa taan nabilin yengeni. **18** Simiri to a to a taan bata yi suxu, a siga manga banxini, a manga banxin gan a xun ma. A faxes na kii nin **19** a yulubine fe ra a fe jaxin naxanye liga Alatala yee ra yi, a fe jaxin liga alo Yerobowan, naxan Isirayila kaane ti yulubin ma. **20** Simiri kewali donxene, e nun a yanfan naxan so, ne sebexi Isirayila mangane taruxu kedine kui. **21** Nayi, Isirayila yamaan yi taxun firinna ra. Yamaan foxo kedenna yi waxi Tibini, Ginati a dii xemen nan findi fe yi mangan na, foxo kedenna boden yi waxi Omiri nan xon. **22** Naxanye yi Omiri foxo ra ne yi noon soto Ginati a diin Tibini foxorabirane ma. Tibini yi faxes, Omiri yi lu mangayani. **23** Yuda Manga Asaa mangayaan jee tonge saxon e nun kedenna Yuda xun na, nayi Omiri yi findi Isirayila mangan na. A jee fu nun firin nan ti mangayani Isirayila xun na. A jee sennin singe liga Tirisa taani. **24** Omiri yi Samari गयाan sara Semeri ma gbeti fixen kilo tonge solofere ra, a taan ti na गयाan fari, a yi a xili sa Samari, fata Semeri xinla ra, गयाan kannna. **25** Naxan jaxu Alatala yee ra yi, Omiri yi na liga dangu naxanye birin bata yi dangu. **26** A fe jaxin liga alo Nebati a dii xemen Yerobowan naxan Isirayila kaane ti yulubin ma. E yi Alatala, Isirayilaa Ala raxolo suxure fufafune fe ra. **27** Omiri kewali donxene, a naxanye liga, a wekilena, ne sebexi Isirayila mangane taruxu kedine kui. **28** Omiri to faxes, e yi a maluxun Samari taani, a dii xemena Axabi nan ti a jaxoni. **29** Manga Asaa mangayaan jee tonge saxon e nun solomasexedena Yuda xun na, Axabi, Omiri a dii xemen yi findi Isirayila mangan na, a yi jee maxonen nun firin ti mangayani Isirayila xun na Samari taani. **30** Koni naxan mi rafan Alatala ma, Omiri a diina Axabi yi na liga dangu manga singene birin na. **31** Axabi yi dangu Nebati a dii xemen Yerobowan na yulubini. A yi Yesabele tongo jaxanla ra, Etabaali a dii temena, Sidon kaane mangana. Axabi yi tubi Baali suxuren ma, a yi a xinbi sin a yetagi. **32** A yi saraxa gandena nde rafala Baali xa Baali batu banxin kui a naxan ti a xa Samari taani, **33** Axabi mon yi Asera kide gbindonna bitin. Axabi mon yi a jaxin liga dangu Isirayila mangane birin na naxanye dangu a yee ra, a yi Alatala raxolo, Isirayilaa Ala. **34** Axabi

waxatini, Beteli kaan Xiyele mon yi Yeriko taan ti. Koni Nunu a diin Yosuwe dangan naxan ti fata Alatala ra, na yi rakamali. Xiyele yi bono a dii xeme singena Abirami yi, a to taan ti folo. A bono a bolokadaan Segubu yi, e to taan so deene ti.

17 Xemena nde yi na naxan yi kelixi Tisibi taani Galadi yamanani, a xili Eli, na yi a fala Axabi xa, a naxa, “N bata n kolo habadan Alatala yi, Isirayilaa Ala, naxan ma walike n na, xiila mi se jee famatoni itoe yi, tule mi fe, fo n na a yamari.” **2** Alatala yi falan ti Eli xa, a naxa, **3** “Keli be, i siga sogeteden binni, i luxun Keriti xuden dexon, naxan Yuruden baan sogeteden binni. **4** luma nen xude igen minje, n yi xaxane yamari e xa fa donseen na i xa.” **5** Alatala naxan fala Eli xa, a na liga, a sa doxo Keriti xuden de Yuruden baan sogeteden binni. **6** Xaxane yi fama burun nun suben na xotonna nun jinbanna ra, a lu xude igen minje. **7** Koni waxatidi to dangu, xuden yi xara, amasoto tule mi fa yamanani. **8** Nayi, Alatala yi falan ti Eli xa, a naxa, **9** “Keli i siga Sarepata taani, Sidon dexon, i sa doxo na. N bata kaja gilena nde yamari a xa i balo.” **10** A yi keli, a siga Sarepata yi. A yi taan so deen lima, kaja gilena nde yi menni yege fendeni. A yi a xili, a fala a xa, a naxa, “N bata i mafan, siga, i sa igedina nde ba n xa alogo n xa n min.” **11** Naxanla yi siga, a sa igen ba. Eli mon yi a fala a xa, a naxa, “N bata i mafan, fa buru dungina nde ra n xa i yiin kui.” **12** Naxanla yi a yabi, a naxa, “N bata n kolo habadan Alatala yi, i ya Ala. Buru mi n yii, murutu fupin ligaseen ye keden peen nan n yii goronni e nun turen siyadi fejen kui. N yegen fenma na nan ma, n sa na rafala nxu nun n ma dii xemen xa, nxu a don, na xanbi ra nxu faxes.” **13** Eli yi a fala jaxanla xa, a naxa, “I nama gaxu sonon, sa, a liga alo i a falaxi kii naxan yi. Koni buru dungidi rafala n xa singen, i fa a ra n xon, na xanbi ra i yi nde rafala i yete xa e nun i ya dii xemena. **14** Amasoto Alatala, Isirayilaa Ala ito nan falaxi, a naxa, ‘Murutun naxan goronna kui na mi janje mume e nun turen sa fejen mi kui gele mume, han Alatala tulen nafama boxon fari laxon naxan yi.’” **15** Naxanla yi siga. Eli naxan falaxi, a yi na liga. Nayi, donseen yi lu a yii waxati xunkuye, a tan nun a dii xemen xa, e nun Eli fan. **16** Murutun naxan yi goronna kui, na mi jan mume! Ture fejen fan mi kui geli na waxatini mume, fata Alatalaa falan na Eli naxan ti. **17** Na feene dangu xanbini, kaja gilena, banxi kannna dii

xemen yi fura, a furen senben yi gbo ayi han a faxa. **18** Nayi, njaxanla na yi a fala Eli xa, a naxa, “Nanse fa i tan nun n tan tagi, Alaa muxuna? I faxi n konni Ala rakolondeni n yulubine nan ma ba alogo n ma diin xa faxa?” **19** Eli yi a yabi, a naxa, “I ya dii xemen so n yii.” A yi a tongo a nga yii, a te a ra sangansoon kœ ra, a yi yigiyaxi denaxan yi, a yi a rasa a saden ma. **20** A yi Alatala maxandi, a naxa, “Alatala, n ma Ala, i fe njaxin nabe kaja gilani ito ra ba, n yigiyaxi naxan konni, i yi a dii xemen faxa?” **21** Eli yi a sa diin fari sanja yi saxan, a maxandini ito ti Alatala ma, a naxa, “Alatala, n ma Ala, n bata i mafan diini ito niin bira ayi.” **22** Alatala yi Eli a maxandin yabi. A yi dii niin bira ayi, a yengi. **23** Eli yi diin tongo, a siga a ra labe ra banxini, a yi a so a nga yii, a naxa, “A mato, i ya dii jɛɛɛ.” **24** Naxanla yi a fala a xa, a naxa, “N bata a kolon sonon a Alaa muxun nan i tan na, e nun Alatalaa falan naxan i de, jondin na a ra.”

18 Waxati xunkuye to dangu, tule fatareyaan jɛɛ saxandeni, Alatala yi falan ti Eli xa, a naxa, “Siga, i sa ti Manga Axabi yetagi, amasoto n tulen nafama nen boxo xaren fari.” **2** Eli yi siga alogo a xa sa ti Axabi yetagi. Fitina kamen yi gbo Samari taani. **3** Axabi yi Abadi xili, a banxi kuntigina. Koni Abadi yi gaxu Alatala yɛɛ ra han! **4** Yesabele yi Alatalaa nabine faxama waxatin naxan yi, Abadi yi nabi keme tongo, a yi e luxun tonge suulun suulun yɛɛn ma faran firin na, a yi e baloma igen nun burun na denaxan yi. **5** Axabi yi a fala Abadi xa, a naxa, “Siga yamanan tigine birin yi e nun xudene yi, yanyina nde sexena nde toma nen na yi, alogo en yi en ma soone nun gbaxalone niin nakisi, en hayu mi fa luma sube faxa feen ma sonon.” **6** E yi yamanani taxun e ra, a yisiga xinla ma, Axabi kedenna yi siga kira keden xon, Abadi fan kedenna yi siga kiraan boden xon. **7** Abadi mon yi kira tagi singen, Eli yi fa a ralan. Abadi to a kolon, a xinbi sin a yetagi, a yetagi yi lan boxon ma, a yi a fala a xa, a naxa, “I tan na a ra ba, n kanna Eli?” **8** A yi a yabi, a naxa, “N tan na a ra. Siga, i sa falan ti i kanna xa, i naxa, ‘Eli be.’” **9** Abadi yi a maxodin, a naxa, “N haken mundun ligaxi, alogo i xa n tan, i ya walikeɛn so Axabi yii, a xa n faxa?” **10** N bata n kolo habadan Alatala yi, siya mi na, yamana mi na, n kanna mi xeraan nasigaxi denaxan yi i fendeni, e na a fala a xa, a i mi na yi, a yi yamanan nun siyaan nakoloma nen xa e mi i toxi. **11** Iki, i bata yamarin fi n ma a n xa

sa a fala n kanna xa a Eli be. **12** Nayi, n na keli i fema, Alatalaa Nii Sarijanxina i xalima nen yire gbete yi, n mi denaxan kolon. N na sa Axabi rakolon, a mi i to, a n faxama nen. Anu Alatala batu muxu kenden nan n na xabu n ma dii jɛɛɛyani. **13** E mi yi a fala i xa nun, n kanna, n naxan naba Yesabele yi Alatalaa nabine faxama waxatin naxan yi? N nabi keme tongo nen n yi e luxun tonge suulun suulun yɛɛn ma faran firin na, n yi e baloma igen nun burun na denaxan yi. **14** Awa, iki, i a falama n xa a n xa a fala n kanna xa a Eli be yi. A n faxama nen!” **15** Koni Eli yi a yabi, a naxa, “N bata n kolo habadan Alatala yi, Alatala Senben Birin Kanna, n naxan batuma, n bata i xaxili ragidi, to yeteni n tima nen Axabi yetagi.” **16** Abadi yi siga Axabi ralandeni, feen naxanye danguxi, a ne yeba a xa. Axabi yi siga Eli yetagi. **17** Axabi to Eli to tun, a yi a fala a xa, a naxa, “I tan na a ra ba, i tan naxan torɔyaan nafaxi Isirayila ma?” **18** Eli yi a yabi, a naxa, “N mi Isirayila tore mume! I tan nun i ya denbayaan na a ra, amasoto e bata tondi Alatalaa yamarine suxe, e yi Baali suxurene batu. **19** Iki Isirayila kaane birin malan n fema, Karemele geyaan fari, e nun Baali ki muxu keme naanin tonge suulunne, e nun Asera ki muxu keme naaninna naxanye e degema Yesabele a tabanla ra.” **20** Axabi yi xerane rasiga Isirayila muxune birin ma, a yi suxure kiine malan Karemele geyaan fari. **21** Nayi, Eli yi a maso yamaan birin na, a fala e xa, a naxa, “E luma e yete yifuye han waxatin mundun yi? Xa Alatala nan Ala ra, e bira a foxo ra. Koni, xa Baali na a ra, e bira na fan foxo ra.” Yamaan mi a yabi sese ra. **22** Eli yi a fala yamaan xa, a naxa, “N kedenna nan luxi Alatalaa nabine ra. Baali ki muxun keme naanin tonge suulun nan be. **23** E xa tura firin so nxu yii, Baali ki muxune xa tura keden sugandi e yete xa, e yi a yisege, e a sa yegene fari, hali tɛɛ mi sa, n fan yi turaan bonni sege, n yi a sa yegene fari, hali tɛɛ mi sa. **24** E xa e ala maxandi a xinla ra, n fan yi Alatala maxandi a xinla ra. Ala sensenna maxandine rasuxe nen a tɛɛn nadege.” Yamaan birin yi a fala, e naxa, “Nxu tinxi.” **25** Nayi, Eli yi a fala Baali ki muxune xa, a naxa, “E tura keden sugandi, e singe yi a yiton, amasoto e tan nan wuya. Na xanbi ra, e yi e ala maxandi a xinla ra, koni e nama tɛɛ sa e yegene yi.” **26** E turaan naxan so Baali ki muxune yii, e yi na tongo, e yi a yiton saraxan na, e yi Baali maxandi a xinla ra keli xotonni han yanyi tagini saraxan gan feen na. E yi sonxo, e naxa, “Baali nxu yabi!” E yi faren bodonma e kiden

yetagi e naxan ti, koni e mi yabi xui soto. 27 Yanyi tagin masoni, Eli yi lu e magele, a naxa, “E gbelegbele naxi ra! Ala to a tan na, yanyina nde i ya lima, a a mirima fena nde ma, hanma a wali gbete ra, xa na mi a ra, a sa safarin na, hanma a xima, a xulunma nen.” 28 Baali ki muxune yi gbelegbele e xuini texin na pore, e lu e maxole silanfanne nun tanbane ra han wunli mini e fatine ma alo e namunna kiina. 29 Yanyi tagin to dangu, e lu feene fale han jinbanna saraxa ba waxatini. Koni Baali xui mi me, e mi yabi soto a ra, a taxamaseri mi to. 30 Nayi, Eli yi a fala yamaan birin xa, a naxa, “E maso n na.” Yamaan birin yi e maso a ra. Eli yi Alatalaa saraxa ganden nafala, naxan bata yi kala. 31 A yi geme fu nun firin tongo Yaxubaa dii xemene bonson fu nun firinne yatena. Alatala bata yi falani ito ti Yaxuba naxan xa, a naxa, “I xili bama nen Isirayila.” 32 Eli yi saraxa ganden nafala Alatala xa na geme fu nun firinne ra. A yi folon ge saraxa ganden nabilinni, igen litiri tonge saxan joxon noe se naxan kui. 33 A yi yegene yelan, a turani xaba a dungi dungin na, a yi a sa yegene fari. 34 A mon yi a fala, a naxa, “E feje naanin nafe igen na, e yi a boxon saraxan nun yegene fari.” A yi a fala, a naxa, “E mon xa a liga keden.” E mon yi a liga a firinden. A yi a fala, a naxa, “E mon xa a liga a saxandeni.” E mon yi a liga a saxandeni. 35 Igen yi doko yire sarijanxin nabilinni han a folon nafe. 36 Saraxan yi daxa a ba waxatin naxan yi, Nabi Eli yi a maso, a fala, a naxa, “Alatala, Ibrahima nun Isiyaga nun Isirayilaa Ala. Muxune xa a kolon to, a i tan nan Ala ra Isirayila yi, a i ya walikeen nan n na, a n feni ito ngaan ligaxi i ya falan xon. 37 N yabi, Alatala, n yabi, alogo yamani ito xa a kolon a i tan, Alatala nan Ala ra. Na kiini, i yi a liga, e tubi i ma e bopeni.” 38 Alatalaa teen yi godo, saraxan nun yegene nun gemene nun boxona, a yi e birin gan, igen naxan yi folon na, a na xori. 39 Yamaan birin na to waxatin naxan yi, e xinbi sin, e yetagin yi lan boxon ma, e yi a fala, e naxa, “Alatala nan Ala ra! Alatala nan Ala ra!” 40 Eli yi a fala e xa, a naxa, “E Baali suxure ki muxune suxu, e sese nama siga.” E yi e suxu. Eli yi e ragodo Kison xuden de, a sa e koe raxaba menni. 41 Eli yi a fala Axabi xa, a naxa, “Te, i dege, i min, amasoto n tulen xuiin mema.” 42 Axabi yi te, a sa a dege, a min. Koni, Eli tan yi te Karemele geyaan xuntagi, a sa a felen denaxan yi han boxon ma, a yi a yetagin lu a xinbine longonna ra, 43 a yi a fala a walikeen xa, a naxa, “Te, i yee rasiga foxo igen

binni.” Walikeen yi te, a mato, a xete, a naxa, “Sese mi na.” Sanja yi solofere Eli a rasigama a matodeni. 44 A sanja yi soloferedeni, walikeen yi a fala, a naxa, “Kundadin nan tema foxo igen binni, a xurun alo yii kuina.” Nayi, Eli yi a fala a xa, a naxa, “Siga i sa a fala Axabi xa, a a xa a soone yiton, a godo benun tulen xa a yee rasa be.” 45 Waxatidi, tulen yi foro ayi, foyen yi fa, tule gbeen yi fa. Axabi yi te a wontoron kui, a siga Yesereli taani. 46 Eli sigamatoon yi a tagixidin xidi, Alatala senben yi godo a ma, a siga a giye mafuren, a yi dangu Axabi a wontoron na han Yesereli taan so dena.

19 Eli naxan birin liga, Axabi yi na fala Yesabele xa, Eli a suxuren ki muxune birin faxa silanfanna ra kii naxan yi. 2 Yesabele yi xeraan nasiga Eli ma a faladeni a xa, a naxa, “Alane xa n suxu e jaxun birin yi, xa n mi i niin liga alo i e birin niine ligaxi kii naxan yi benun waxatini ito xa a li tila.” 3 Eli to na me, a keli a siga alogo a xa a niin nakisi. A yi fa Beriseba taani Yuda yamanani, a yi a walikeen lu menni. 4 Na xanbi ra, a sigan ti yanyi keden tonbonni, a sa doko wudi bilidina nde bun ma, a yi a fala Ala xa, a naxa, “A bata radangu ayi! Iki Alatala, n niin tongo, amasoto n mi dangu n benbane ra.” 5 A sa wudi binla bun, a xi. Malekana nde yi a yiin din a ra, a yi a fala a xa, a naxa, “Keli, i dege.” 6 A yeen nabi a dexon ma burun ganxin geme wolonna ma, na saxi a fema, e nun igelengenna ye keden. A to yelin a dege, a min, a mon yi a sa. 7 Koni Alatalaa malekan mon yi fa, a yiin din a ra, a fala a xa, a naxa, “Keli i dege, amasoto i sigadeni kuya.” 8 Nayi, Eli yi keli, a dege, a min, na donseen senben naxan fi a ma, a yi sigan ti xi tonge naanin koe tonge naanin han Horebe geyaan fari, Alaa geyana. 9 A sa so faranna nde ra menni, a koeen nadangu na. Nayi, Alatala yi falan ti a xa, a naxa, “Eli, nanfera i be?” 10 A yi a yabi, a naxa, “Alatala, Ala Senben Birin Kanna, i rafan n ma han! Isirayila kaane bata e me i ya layirin na, e yi i ya saraxa gandene kala, e yi i ya nabine faxa silanfanna ra, n keden peen nan fa luxi, e mon katama n fan faxa feen na.” 11 Alatala yi a fala a xa, a naxa, “Mini, i ti geyaan fari Alatala yetagi. N tan danguma nen na yi.” Alatala yee ra, foye gbeen yi mini, a geyane raxuya ayi, a gemene yibo, koni Alatala mi yi foyeni. Foyen to dangu, boxon yi xuruxurun, koni Alatala mi yi boxo xuruxurunni. 12 Boxon xuruxurunna danguxina, teen yi mini, koni Alatala mi yi teeni. Teen to dangu,

nunununun xui naxumedin yi mini. **13** Eli to na me a yi a yetagin luxun a doma gbeen bun, a mini, a ti faranna so deen na. A yi xuina nde me naxan a fala a xa, a naxa, “Nanfera i be Eli?” **14** A yi a yabi, a naxa, “Alatala, Ala Senben Birin Kanna, i rafan n ma han! Isirayila kaane bata e me i ya layirin na, e yi i ya saraxa gandene kala, e yi i ya nabine faxa silanfanna ra, n keden peen nan fa luxi, e mon katama n fan faxa feen na.” **15** Koni, Alatala yi a fala a xa, a naxa, “Siga, i xete keden na tonbonni, han Damasi taani, i na so, i turen susan Xasaye le xunna ma alogo a xa findi Arami mangan na. **16** I turen susan Nimisi a dii xemen Yehu fan xunna ma alogo a xa findi Isirayila mangan na, i mon yi turen susan Elise fan xunna ma a xa findi nabiin na i joxoni, Elise naxan findixi Safati a dii xemen na naxan kelixi Abeli-Mehola yi. **17** Nayi, Ala yaxun naxanye na e soto Xasaye le a silanfanna ra, Yehu yi ne faxa. Naxanye na e soto Yehu a silanfanna ra, Elise yi ne faxa. **18** Koni, n muxu wuli solofere luma nen Isirayila yi, naxanye mi e xinbi sinxi Baali bun, e mi a suxuren sunbu.” **19** Eli yi siga menni, a yi Safati a dii xemena Elise li xee biini, e nun xee bi jingen moxonen nun naanin naxanye yi xidixi firin firin yeen ma. A tan nan yi a moxonen nun naanin firin donxene rawalima. Eli yi a maso a ra, a doma gbeen woli a ma. **20** Nayi, Elise yi a jingene lu na, a yi a gi Eli foxo ra, a naxa, “A lu yandi, n bata i mafan, n xa sa nga nun n fafe sunbu, n yi fa lu bire i foxo ra.” Eli yi a yabi, a naxa, “Siga. N fena nde ligaxi i ra nen ba?” **21** Elise yi xete a xeen ma, a yi fa a turaan firin tongo, a e ba saraxan na, a e suben jin jingene rawali wudin na, a na suben so muxune yii. Na xanbi ra, a keli, a bira Eli foxo ra, a findi a walikéen na.

20 Ben-Hadada, Arami mangan yi a ganla birin malan a fema. Manga tonge saxon e nun firin nan yi a foxo ra, e nun e soone, e nun e yenge so wontorone, e sa Samari taan nabilin, e a yenge. **2** A yi xerane rasiga taani Axabi ma, Isirayila mangana. **3** E yi a fala a xa, e naxa, “Ben-Hadada naxa iki, ‘I ya wure gbeti fixen nun i ya xemaan so n yii, e nun i ya naxalan fajine nun i ya dii fajine.’” **4** Isirayila mangan yi a yabi, a naxa, “N bata i ya yamarine suxu, mangana, n kanna. N bata n yete so i yii e nun n gbeen naxan birin na.” **5** Xerane mon yi xete, e yi a fala Axabi xa, e naxa, “Ben-Hadada naxa iki: ‘N bata a fala i xa, a i xa i ya wure gbeti fixen nun i ya xemaan

so n yii, e nun i ya naxanle nun i ya diine. **6** Nayi, waxatini ito yi tila, n nan n ma walikene rasigama nen i konni, e yi sa i ya banxin yegetere e nun i ya walikene banxine, naxan birin i yii a kenden na e a tongoma nen, e a xali.” **7** Isirayila mangan yi yamanan fonne birin xili, a a fala e xa, a naxa, “E a mato ki faji xemeni ito wama en ma toron nan xon, a bata yi xeraan nafa n ma naxanle nun n ma diine maxilideni n na e nun n ma wure gbeti fixen nun n ma xemana, n mi tondi a sese ma.” **8** Yamaan nun fonne birin yi a fala Axabi xa, e naxa, “I nama i tuli mati a ra, i nama tin.” **9** Mangan yi yabini ito ti Ben-Hadada a xerane xa, a naxa, “E a fala mangan xa, n kanna, e naxa, ‘I naxan birin maxilixi n na a foloni, n na ligama nen, koni i naxan birin maxilixi iki n mi nee na lige.’” Xerane yi siga, e na yabin fala Ben-Hadada xa. **10** Ben-Hadada mon yi xeraan nasiga a faladeni Axabi xa, a naxa, “Alane xa n natoron e naxun birin yi xa n burunburunna gbee lu Samari taani naxan n foxorabirane yiine rafe.” **11** Isirayila mangan yi a yabi, a naxa, “E Ben-Hadada rakolon sandani ito ma, e naxa, ‘Naxan a yitonma yenge so xinla ma, na nama a kanba fo naxan bata yelin yengen soe.’” **12** Ben-Hadada na yabin sotoma waxatin naxan yi, e nun a mangane, e yi minma bubun kui, a yi a fala a walikene xa, a naxa, “E yiton.” E yi e yiton taan xili ma. **13** Koni nabina nde yi a maso Isirayila Manga Axabi ra, a yi fala a xa, a naxa, “Alatala ito nan falaxi, a naxa, ‘I bata gali gbeen ito to ba? To yeteni n na a soma nen i yii, alogo i xa a kolon a n tan nan Alatala ra.’” **14** Axabi yi a maxodin, a naxa, “Na fatama nde ra?” Nabiin yi a yabi, a naxa, “Alatala ito nan falaxi, a naxa, ‘Fata sofa foningene ra yamana kanne naxanye ye matongoxi.’” Axabi mon yi a maxodin, a naxa, “Nde yengen foloma?” Nabiin yi a yabi, a naxa, “I tan.” **15** Nayi, Axabi yi sofa foningene malan a yetagi yamana kanne naxanye ye matongoxi, naxanye yate yi keme firin tonge saxon e nun firin na. A mon yi Isirayila ganla sofane fan malan a yetagi, naxanye yate yi wuli solofere ra. **16** E yi mini yanyi tagini. Ben-Hadada yi a dolotoyani bubune kui e nun a manga tonge saxon e nun firinna naxanye fa a malideni. **17** Sofa foningene singe yi mini. Ben-Hadada yi xibarun fenne rasiga, alogo a xa a kolon feen naxan danguma. E fa a fala a xa muxune bata mini Samari taani. **18** Ben-Hadada yi a fala, a naxa, “Xa e minixi bonje xunbenla nan xilima, e e jengene suxu, xa e minixi yenge so xinla

nan ma, ε e ɲɛɲene suxu.” 19 Sofa foningene nun ganla naxan yi biraxi e ɬɔxɔ ra, ne yi mini taani. 20 Birin yi a gbee yaxu faxa, Arami kaane yi e gi. Isirayila yi bira e ɬɔxɔ ra. Arami manga Ben-Hadada yi a yete rakisi soon fari, e nun soo ragina ndee. 21 Isirayila mangan yi mini, a yi a soone faxa, a wontorone kala, a yi bɔnɔ gbeen sa Arami kaane ma. 22 Nayi, nabiin yi a maso Isirayila mangan na, a a fala a xa, a naxa, “I wekile, i miri ki faɲi, i lan i xa naxan liga, amasoto ɲɛɛ famatɔɔn waxatini ito yi, Arami mangan mɔn fama nɛn i yengedeni.” 23 Arami mangana walikene yi a fala a xa, e naxa, “E ala, geyane ala na a ra, nanara e senben gbo en xa. Koni en na e yenge lanbanni, waxatina nde en senben gboma nɛn e xa mɛnni. 24 Iki i mɔn xa ito liga. I xa i ya mangane ba ganla xun na, i yi yamana kanne dɔxɔ e ɲɔxɔni. 25 I tan xa ganla nde malan naxan senben gbo alo i bɔnɔxi naxan yi, a soone yatene xa lan e nun a yenge so wontorone yatene xa lan. Na xanbi ra, en yi e yenge lanbanni, en na a tɔɛ xa en senben mi gboɛ ayi e xa.” A yi e xuiin name, a na liga. 26 ɲɛɛ nɛnɛn to a li, na waxati kedenni, Ben-Hadada yi Arami kaane malan a yetagi, a te Afeki taani Isirayila yengedeni. 27 Axabi fan yi Isirayila kaane malan a yetagi, e donseene sɔtɔ, e siga Arami kaane yengedeni. Isirayila kaane yi e ganla daaxaden nafala Arami kaane yetagi. Isirayila kaane yi maligaxi sii kuru firinna nan na, koni Arami kaane tan yi yamanan nafexi. 28 Nabiin mɔn yi a maso, a yi a fala Isirayila mangan xa, a naxa, “Alatala ito nan falaxi, a naxa, ‘Arami kaane to yi a falama fa fala Alatala, geyane ala na a ra, lanbanna ala mi a ra, nanara n yama gbeeni ito birin sama nɛn i sagoni, ε yi a kolon a Alatala nan n tan na.’” 29 E lu malanxi e bode yetagi xi solofere. Xi soloferede lɔxɔni, yengen yi ɬɔlɔ, Arami sofaan naxanye yi e sanni, Isirayila kaane yi ne wuli kɛmɛ faxa lɔxɔ kedenni. 30 A dɔnxɛne yi e gi Afeki taani, wuli mɔxɔɲɛn nun soloferen naxan yi luxi, taan nabilinna yinna yi bira ne fari. Na waxatini, Ben-Hadada yi a gi, a siga taani, a lu luxunxi banxin konkona nde kui. 31 A walikene yi a fala a xa, e naxa, “Nxu bata a mɛ a Isirayila yamaan mangane hinan han! Nxu xa kasa benbenla ndee xidi nxu ra, nxu lutina ndee xidi nxu kɔɛ ra, nxu siga Isirayila mangan fema. Yanyina nde, nxu na a mafan i xa, a mi i faxama.” 32 E yi kasa benbenle xidi e ra, e lutine xidi e kɔɛ ra, e siga Isirayila mangan fema. E yi a fala a xa, e naxa, “I ya walikɛɛn Ben-Hadada bata i mafan, a

naxa, ‘N bata i mafan, n niin nakisi.’” Axabi yi yabin ti, a naxa, “A mɔn a nii ra? Ngaxakedenna na a ra.” 33 Ben-Hadada a xɛrane yi a to a fala faɲin nan yi na ra, e mafura a faladeni, e naxa, “I ngaxakedenna nan Ben-Hadada ra.” Axabi yi a fala e xa, a naxa, “E siga, ε sa fa a ra n fema.” Ben-Hadada yi fa a fema, Axabi yi a rate a wontoron kui. 34 Ben-Hadada yi a fala a xa, a naxa, “N fafe taan naxanye tongo i fafe yii, n ne raxetema nɛn i ma. I nɔɛ yulayaan nabe Damasi taani alo n fafe yi a rabama kii naxan yi Samari taani.” Axabi yi a fala a xa, a naxa, “N tan i beɲinma nɛn, i siga, koni ɬɔ en layirin xidi.” A yi layirin xidi e tagi, a yi a beɲin, a siga. 35 Nabi ganla nabina nde yi a fala a lanfaan xa, a naxa, “Alatalaa yamarin xɔn ma, n bata i mafan, n bɔnbɔ.” Koni na xɛmɛn yi tondi a bɔnbɛ. 36 Nabiin yi a fala, a naxa, “Bayo i mi Alatalaa yamarin suxi, i na keli n fema waxatin naxan yi, yatana i faxama nɛn.” Na xɛmɛn to keli a fema, yatana nde yi naralan a ra, a yi a faxa. 37 Nabiin yi xeme gbete li, a yi a fala, a naxa, “N bata i mafan, n bɔnbɔ.” Na xɛmɛn yi a bɔnbɔ, a yi a maxɔlɔ. 38 Nabiin yi sa dɔxɔ mangana kiraan na, a yɛɛn maxidi dugi dungin na alogo a nama a kolon. Na xanbi ra, a sa ti kiraan na Manga Axabi danguma denaxan yi. 39 Mangan dangumatɔna, nabiin yi gbelegbele a ɬɔxɔ ra, a naxa, “N yi yengeni waxatin naxan yi, muxuna nde yi mini kuruni a fa kasorasa keden na n xɔn, a yi a fala n xa, a naxa, ‘Xɛmɛni ito ramara n xa. Xa a gi, i tan nan findima a ɲɔxɔn na, xanamu, i gbeti fixɛn kilo tonge saxan nun naanin so n yii.’ 40 Koni n yi yɛɛ gbaxi ayi be binna nun be binni waxatin naxan yi, xɛmɛn yi a gi.” Isirayila mangan yi a fala a xa, a naxa, “I ya kitin nan na ra, i yetɛɛn bata a fala.” 41 Mafuren, nabiin yi dugi dungin ba a yɛɛne ma, Isirayila mangan yi a kolon a nabina nde na a ra. 42 Nayi, a yi a fala mangan xa, a naxa, “Alatala ito nan falaxi, a naxa, ‘Bayo n xɛmɛn naxan faxa fe ragidixi, i bata na beɲin, i tan yetɛɛn nan faxama a ɲɔxɔni, i ya yamaan yi faxa a yamaan funfuni.’” 43 Isirayila mangan yi xete a konni Samari taani, a kɔntɔfilixi, a xaminxi.

21 Na feene dangu xanbini, xɛmɛna nde yi Yesereli yi, a xili Naboti, manpa bili nakɔɔn yi a yii Axabi a manga banxin dɛxɔn, Samari mangana. 2 Lɔxɔna nde, Axabi yi a fala Naboti xa, a naxa, “I ya manpa xɛɛn naxan n ma manga banxin fema, a so n yii, n xa a findi sabidi nakɔɔn na, n manpa xɛɛ faɲin gbete

soe i yii, hanma xa a i kenén, n na sara gbeti fixén na.” 3 Koni Naboti yi Axabi yabi, a naxa, “Alatala xa n natanga n benbane kéén soon na i yii.” 4 Axabi xoloxin mōnēxin yi so banxini Naboti Yēserele kaana falana fe ra, a a mi a benbane kéén soma a yii. A sa a sa, a yetagin luxun, a mi wa sese don fe xōn. 5 A naxanla Yesabele yi fa a fema, a yi a fala a xa, a naxa, “Nanfera i niini naxuxi i ma, i mi i degema mume?” 6 A yi a yabi, a naxa, “N falan tixi Naboti Yēserele kaan nan xa, n naxa, ‘I ya manpa xēén sara n ma gbetin na, xa i nu wa, n manpa xēé gbete so i yii a naxōn na.’” 7 Nayi, a naxanla Yesabele yi a fala a xa, a naxa, “Iki, i tan nan mangayani Isirayila yi ba? Keli i dege, i bōjnen yi sēwa, n tan Naboti Yēserele kaana manpa xēén soma nēn i yii.” 8 A bataxine sebé Manga Axabi xinla ra a mangana taxamasenna sa e ma, Naboti taan naxan yi, a yi e rasiga na fonne nun a kuntigine ma. 9 A yi sebéxi bataxine kui, a naxa, “E a fala, yamaan xa soge keden sunna suxu, e Naboti dōxo muxu gbee dōxōdeni yamaan tagi. 10 E xalabanten firin dōxo a dēxōn naxanye a tōjēgema, a a bata Ala nun mangan danga. Na xanbi ra, e a xali taa xanbin na, e a magolōn gēmen na han a fāxa.” 11 Yesabele yamarin naxan fi bataxine kui, Naboti a taan fonne nun kuntigine yi na liga. 12 E yi a fala a yamaan xa sun, e Naboti dōxo na yamaan yēe ra, 13 xalabanten firinne fan yi fa, e dōxo Naboti dēxōn. Na xalabanten firinne yi seren ba Naboti xili ma yamaan yetagi, e naxa, “Naboti bata Ala nun mangan danga.” Mafuren, e yi a xali taa xanbin na, e a magolōn gēmen na han a fāxa. 14 Nayi, taan kuntigine yi xeraan nasiga Yesabele ma, a Naboti magolōnxi gēmen nan na han a fāxa. 15 Yesabele na mē waxatin naxan yi, a sa a fala Axabi xa, a naxa, “Naboti Yēserele kaan tondi manpa bili xēén naxan sare i ma gbeti na, na manpa bili xēén findi i gbeen na. A bata fāxa.” 16 Axabi a mexina, a Naboti bata fāxa, a yi siga a manpa bili nakōni, a findi a gbeen na. 17 Nayi, Alatala yi falan ti Nabi Eli Tisibi kaan xa, a naxa, 18 “Siga Axabi fema, Isirayila mangan naxan doxi Samari taani. A sa Naboti a manpa bili nakōni, a sigaxi naxan findideni a gbeen na. 19 Sa a fala a xa, i naxa, ‘Alatala ito nan falaxi, a naxa: I bata xēmēna nde fāxa. I mōn yi fa a yii seene tongo.’ Na xanbi ra, i mōn xa a fala a xa, i naxa, ‘Alatala ito nan falaxi, a naxa: Barene Naboti wunla makōnxi dēnaxan yi, barene i fan yetēen wunla makōmma mēna nin.’” 20 Eli yi siga na xerani badeni Axabi xa. Axabi yi a fala a

xa, a naxa, “I bata n to ba, i tan n yaxuna?” Eli yi a yabi, a naxa, “Ōn, n bata i to. Amasoto naxan mi rafan Alatala ma, na rabaan bata i kenén. 21 Ala naxa, ‘N tōrōn nafama i ma nēn. N na i raloma ayi nēn, xēmēn naxan birin Axabi a denbayani, n ne raxōri. Naxanye i mabinni, ne birin bama i yii nēn, konyine nun xōrone Isirayila yi. 22 N na i ya denbayaan suxuma nēn alo n Nebati a dii xēmēn Yerobowan ma denbayaan suxu kii naxan yi, e nun Axiyaa dii xēmēn Basaa denbayana. N na ligama nēn amasoto i bata n naxōlo gbeen ti, i yi Isirayila kaane ti yulubin ma.’ 23 Alatala mōn yi falan ti Yesabele fan xili ma, a naxa, ‘Barene Yesabele donma nēn Yēserele taan nabilinna yinna sanna xōn ma. 24 Axabi a denbayaan muxun naxanye na fāxa taani, barene nan ne donma. Naxanye na fāxa xēén ma, xoline nan ne donma.’” 25 Muxu yo mi na naxan a ragidi a xa Alatala rājaxu feen naba alo Axabi. A naxanla Yesabele nan a radin. 26 A yi haramu feene ligama, a yi suxurene batuma alo Amorine yi a ligama kii naxan yi, Alatala naxanye kedi Isirayila kaane yēe ra. 27 Axabi to Eli a falane mē, a yi a dugine yibo, a kasa benbenla so a ma sununi, a sun. E nun na kasa benbenla nan yi e sama, a yi sigan tima yete magodoni. 28 Alatala yi falan ti Eli Tisibi kaan xa, a naxa, 29 “I bata a to Axabi a yete xurunxin n yetagi kii naxan yi? Bayo a bata a yete xurun n xa, n mi tōrōyaan nafama a waxatini, a fama a diina waxatin nin, n tōrōyaan nafa a denbayaan ma.”

22 Nēe firin yi dangu, yēngen mi so Arami nun Isirayila tagi. 2 Nēe saxandena, Yuda manga Yosafati yi siga Isirayila mangan fema. 3 Isirayila mangan yi a fala a walikene xa, a naxa, “E a kolon Ramoti taan Galadi yamanani, en gbeen na a ra! Nanfera en sikēma a tongo feen na Arami mangan yii?” 4 A yi a fala Yosafati xa, a naxa, “I sigē n fōxo ra Ramoti taani Galadi yamanani yenge sodeni ba?” Yosafati yi Isirayila mangan yabi, a naxa, “I tan nun n tan keden na a ra, n ma yamaan nun i ya yamana, n ma soone nun i ya soone.” 5 Na xanbi ra, Yosafati mōn yi a fala Isirayila mangan xa, a naxa, “Alatala maxōdin singen.” 6 Isirayila mangan yi waliyine malan, kēme naanin naxōn, a yi a fala e xa, a naxa, “En lan en sa yēngen so Ramoti taani Galadi yamanani, hanma en lan en yi a lu na?” E yi a yabi, e naxa, “Marigina a soma nēn mangan yii.” 7 Koni Yosafati yi a maxōdin, a naxa, “Alatalaa nabi yo mi fa be yi ba, en nōe Alatala

maxōdinje naxan xon ma?" 8 Isirayila mangan yi Yosafati yabi, a naxa, "Keden mon na Alatala gbeen na, koni a mi rafan n ma, amasoto a fe jaxin nan tun falama n xa, a fajin mi na mume! A xili Mikahu, Yimilaa dii xemena." Yosafati yi a fala a xa, a naxa, "Mangan nama falan ti na kiini." 9 Nayi, Isirayila mangan yi kuntigi keden xili, a naxa, "Fa Mikahu ra iki sa, Yimilaa dii xemena." 10 Isirayila mangan nun Yuda manga Yosafati birin yi doxi e mangaya gbedene yi lonna ma Samari taan so deen na, e maxidixi e mangaya dugine yi. Waliyine birin yi waliyiyaan nabama e yetagi. 11 Sedeki, Kenan ma dii xemmen bata yi wure fenne rafala, a yi a fala, a naxa, "Alatala ito nan falaxi, a naxa, 'I Arami kaane bonboma fenni itoe nan na han i yi e raxori.'" 12 Waliyine birin yi feene fala, e naxa, "Siga Ramoti taani Galadi yamanani. I noon sotoma nen, Alatala a soma nen mangan yii." 13 Xeraan naxan siga Mikahu xilideni, na yi a fala a xa, a naxa, "Waliyine birin bata lan a ma, e fe fajine fala mangan xa, i yiton i siga alo e tan. I fan yi sa fe fajin fala!" 14 Koni, Mikahu yi a yabi, a naxa, "N bata n kolo habadan Alatala yi, Alatala na naxan fala n xa, n na nan falama mangan xa." 15 Mikahu to fa mangan fema, mangan yi a maxodin, a naxa, "En lan en sa Ramoti taan yenge Galadi yamanani, hanma en lan en yi a lu na?" Mikahu yi a yabi, a naxa, "Siga, i noon sotoma nen, Alatala a soma nen mangan yii." 16 Koni, mangan yi a fala a xa, a naxa, "N na i rakole Alatala yi sanja ma yoli fa fala i xa jondin nan gbansan fala n xa?" 17 Mikahu yi a yabi, a naxa, "N bata Isirayila yamaan birin to xuyaxi ayi geyane fari, alo xuruseen naxanye kantan muxu mi na, Alatala mon yi fa a fala, a naxa, 'Kan mi fa muxuni itoe ma, birin xa xete a konni bonjesani!'" 18 Isirayila mangan yi a fala Yosafati xa, a naxa, "N mi yi a fala i xa? A mi fe fajin falama n xun ma mume! A fe jaxin nan tun falama." 19 Nayi, Mikahu mon yi a fala, a naxa, "I tuli mati Alatalaa falan na. N bata Alatala to doxi a mangaya gbedeni, maleka ganla tixi a fema, a yiifanna nun a komenna ma. 20 Alatala yi a fala, a naxa, 'Nde Axabi mayendenma alogo a xa siga Ramoti taan yengedeni Galadi yamanani, a faxesa?' Malekana ndee na falana nde ti, ndee yi gbete fala. 21 Nayi, malekana nde yi fa ti Alatala yetagi, a yi a fala a xa, a naxa, 'N tan noe a mayendenje nen.' Alatala yi a fala a xa, a naxa, 'Kiin mundun yi?' 22 A yi a yabi, a naxa, 'N minima nen, n wulen naso a waliyine birin de.' Ala yi a fala a xa, a

naxa, 'I a mayendenma nen, i yi a no. Siga, i sa na liga.' 23 Iki, waliyiin naxanye be, Alatala bata wulen naso ne birin de. Alatala bata a ragidi a xa jaxankatan nafa i ma." 24 Nayi, Kenan ma dii xemmen Sedeki yi a maso, a yi Mikahu deen garin, a yi a magele, a naxa, "Alatalaa malekan sigaxi kiraan mundun xon, a to keli n fema, a wule falan ti i xa?" 25 Mikahu yi a yabi, a naxa, "I na i luxun konkon kui i ya banxini loxon naxan yi, i a kolonma nen." 26 Isirayila mangan yi a fala, a naxa, "Mikahu suxu, i siga a ra Amon fema, Samari taan kuntigina, e nun Yowasa, mangana dii xemena. 27 I yi a fala e xa, i naxa, 'Mangana ito nan falaxi, a naxa a e xa xemeni ito sa kasoon na, e yi a balo buru xaren nun igen na, han n yi xete kendeyani.'" 28 Mikahu yi a fala, a naxa, "Xa i xete kendeyani nun, nayi Alatala mi falan tixi n tan yi." A mon yi a fala, a naxa, "E tan yamaan birin xa e tuli mati." 29 Isirayila mangan nun Yosafati, Yuda mangan yi siga Ramoti taani Galadi yamanani. 30 Isirayila mangan yi a fala Yosafati xa, a naxa, "N xa n maxidi alo muxu gbete, n siga yengeni, koni i tan, i maxidi i ya mangaya dugine yi." Nayi, Isirayila mangan yi a maxete, a siga yengeni. 31 Arami mangan bata yi yamarini ito fi a yenge so wontoro kuntigi tonge saxan e nun firinna ma, a naxa, "E nama muxu yo yenge fo Isirayila mangan tun." 32 Yenge so wontoro kuntigine Yosafati to waxatin naxan yi, e yi a fala, e naxa, "Isirayila mangan nan ito ra." E maso a ra, e xa a yenge. Koni, Yosafati yi sonxon nate. 33 Yenge so wontoro kuntigine to a to Isirayila manga mi yi a ra, e yi e masiga a ra. 34 Anu, xemena nde yi a xanla woli a xunna ayi, a Isirayila mangan li makantan se mi yi denaxan yi. Naxan yi mangana wontoron nagima, mangan yi a fala na xa, a naxa, "I firifiri, n namini yenge soden fari ma, amasoto n bata maxolo." 35 Yengen yi jaxu ayi na loxoni. Mangan tixin yi lu a yenge so wontoron kui, a yi a digan a yi Arami kaane yetagi, a faxesa jinbanna ra. A maxoloden wunla bata yi boxon a wontoron kuiin birin yi. 36 Sogen bira waxatini, e sonxo sonxoni te ganla daaxadeni, e naxa, "Birin xa siga a taani, a konni." 37 Nayi, mangan yi faxesa, e fa a binbin na Samari taani, e yi a maluxun. 38 E to wontoron maxa Samari ige doxodeni, barene yi Axabi wunla kon, yalundene yi e maxa na, fata Alatalaa falan na. 39 Axabi kewali donxene, a naxanye birin liga, a sama jin manga banxin naxan ti, e nun a taan naxanye birin ti, ne sebexi Isirayila mangane taruxu kedine kui. 40 Axabi to faxesa, a dii xemena

Axasiya nan ti a jɔxɔni. **41** Asaa dii xɛmɛn Yosafati yi findi Yuda mangan na, Isirayila manga Axabi a mangayaan jɛɛ naanindeni. **42** Yosafati findi mangan na a jɛɛ tonge saxan e nun suulunden nan ma. A yi mangayaan liga Yerusalɛn yi jɛɛ mɔxɔɲɛn nun suulun. A nga yi xili nɛn Asuba, Silixi a dii tɛmɛna. **43** A yi sigan ti tinxinni alo a fafe Asa, a mi a kiraan beɲin, a fe faɲin liga Alatala yɛɛ ra yi. Koni, a mi taan kidene kala, muxune mɔn yi lu sigɛ saraxane badeni mɛnnɛ yi e nun wusulan gandeni. **44** Bɔɲɛ xunbenla yi lu Yosafati nun Isirayila mangan tagi. **45** Yosafati kɛwali dɔnxɛnɛ, a wɛkilɛn nun a yɛngɛnɛ, nɛ sɛbɛxi Yuda mangane taruxu kɛdine kui. **46** A yi kide kii xɛmɛ yalundene ba a yamanani, naxanye mɔn yi na xabu a fafe Asaa waxatini. **47** Manga mi yi fa Edɔn yamanani na waxatini, fɔ Yuda mangana muxu sugandixin gbansan. **48** Yosafati yi kunkin gbeene rafala, alogo e xa siga Ofiri yamanani xɛma feen na, koni e mi fa siga, bayo kunkine kala nɛn Esiyon-Gebere yi. **49** Nayi, Axabi a dii xɛmɛna Axasiya yi a fala Yosafati xa, a naxa, “I waxi nɛn n ma walikɛnɛ xa siga i gbeene fɔxɔ ra kunkine kui?” Koni, Yosafati mi tin. **50** Yosafati to faxa, e yi a maluxun a benbane fɛma a fafe Dawudaa Taani, a dii xɛmɛn Yehorami nan ti a jɔxɔni. **51** Axabi a dii xɛmɛna Axasiya yi findi Isirayila mangan na Samari taani, Yuda manga Yosafati a mangayaan jɛɛ fu nun soloferedeni. Axasiyaa mangayaan naba nɛn jɛɛ firin Isirayila xun na. **52** Naxan jaxu Alatala yɛɛ ra yi, a na liga nɛn, a sigan ti a jaxin na alo a fafe nun a nga e nun alo Manga Yerobowan, Nebati a dii xɛmɛna, naxan Isirayila kaane ti yulubin ma. **53** A yi Baali suxuren batu, a yi a xinbi sin a bun ma, a yi Alatala raxɔlɔ, Isirayilaa Ala, alo a fafe a liga kii naxan yi.

Mangane Firindena

1 Axabi faxa xanbini, Moyaba kaane yi murute Isirayila kaane xili ma. **2** Axasiya yi bira keli a kore banxin foye soden na Samari taani, a maxolo. Nayi, a xerane rasiga Baali-Sebubi suxuren maxodindeni, Ekiron taan muxune ala, alogo a xa a kolon xa a yiyalanje a maxoloni. **3** Koni, Alatalaa malekan yi a fala Eli Tisibi kaan xa, a naxa, “Siga, i sa Samari mangana xerane ralan kira yi, i a fala e xa, i naxa, ‘Ala mi Isirayila yi ba? Nanfera i sigama Baali-Sebubi suxuren maxodindeni, Ekiron kaane ala?’” **4** Nayi, Alatala ito nan falaxi, a naxa, ‘I naxan nabaxi, na feen ma, i mi fa godoma i ya saden ma, i saxi denaxan yi, i faxan menna nin.’” Eli yi sa na fala e xa. **5** Xerane yi xete Axasiya fema, a yi e maxodin, a naxa, “Nanfera e xetexi?” **6** E yi a yabi, e naxa, “Xemena nde nan texi nxu ralandeni, a yi a fala nxu xa, a naxa, ‘E siga, e xete mangan fema naxan e rafaxi, e sa a fala a xa, a Alatala ito nan falaxi, a naxa: Ala mi Isirayila yi ba? Nanfera nayi i xerane rasigama Baali-Sebubi suxuren maxodindeni, Ekiron kaane ala? Nanara, i mi fa kelima i ya saden ma, i saxi denaxan yi, i faxan menna nin.’” **7** Axasiya yi e maxodin, a naxa, “Xemen yi kiin mundun yi naxan te e ralandeni a falani itoe ti e xa?” **8** E yi a yabi, e naxa, “Muxun nan yi a ra naxan yi maxidixi sube kidi xabe kanna ra e nun kidi tagixidina a tagi.” Axasiya yi a fala, a naxa, “Eli, Tisibi kaan nan na ra!” **9** Axasiya yi sofa tonge suulun nasiga e nun e kuntigina. Kuntigin na yi te Eli fema geyaan xuntagi, a yi dxi denaxan yi, a yi a fala a xa, a naxa, “Sayibana, mangana yamarin ni i ra, a i xa godo.” **10** Eli yi na kuntigin yabi, a naxa, “Xa sayiban nan n na, teen xa godo keli kore, a yi e nun i ya sofa tonge suulunne gan.” Teen yi godo keli kore, a yi e nun a sofa tonge suulunne gan. **11** Axasiya mon yi sofa tonge suulun gbeteye rasiga e nun e kuntigina. Kuntigin na yi a fala Eli xa, a naxa, “Sayibana, mangana yamarin ni i ra, a i xa godo mafuren.” **12** Eli yi a yabi, a naxa, “Xa sayiban nan n na, teen xa godo keli kore, a yi e nun i ya sofa tonge suulunne gan.” Alaa teen yi godo keli kore, a yi e nun a sofa tonge suulunne gan. **13** Axasiya mon yi sofa tonge suulun e nun e kuntigin nasiga a saxandeni. Na kuntigin saxanden yi te, a to so, a xinbi sin Eli yetagi, a mafan, a naxa, “Sayibana, nxu nun n ma sofa tonge suulunna niin natanga. **14** N na a kolon, teen bata godo kore, a yi kuntigi firin

folone gan e nun e sofa tonge suulunne. Koni iki, n bata i mafan, n niin nakantan.” **15** Alatalaa malekan yi a fala Eli xa, a naxa, “Siga a foxo ra, i nama gaxu a yee ra.” Eli yi keli, a godo a foxo ra mangan fema. **16** A yi a fala mangan xa, a naxa, “Alatala ito nan falaxi, a naxa, bayo i bata xerane rasiga Baali-Sebubi suxuren maxodindeni, Ekiron kaane ala, alo Ala mi fa Isirayila yi naxan maxodinje falan na, i mi fa godoma i ya saden ma, i saxi deende, amasoto i faxama nen.” **17** Axasiya yi faxa, fata Alatalaa falan na a naxan ti Eli xa. Yorami yi ti a joxoni Yosafati a dii xemen Yehorami a mangayaan je firindeni Yuda yi. Dii xeme yo mi yi Axasiya yii. **18** Axasiya kewali donxene, a naxanye birin liga, ne sebexi Isirayila mangane taruxu kedine kui.

2 Loxona nde Alatala yi fa Eli rate kore wuluwulu gbeeni. Na waxatini Eli nun Elise yi kelima Giligali yi. **2** Eli yi a fala Elise xa, a naxa, “Lu be, n bata i mafan, amasoto Alatala bata n xe han Beteli taani.” Elise yi a yabi, a naxa, “N bata n kolo habadan Alatala yi e nun i tan, n mi xetema i foxo ra.” E birin yi siga Beteli yi. **3** Beteli taan nabi ganla yi fa Elise fema, e yi a fala a xa, e naxa, “I a kolon a Alatala i kanna ratema nen kore to?” Elise yi yabin ti, a naxa, “N na a kolon, e dundu.” **4** Eli yi a fala Elise xa, a naxa, “Lu be, n bata i mafan, amasoto Alatala bata n xe han Yeriko taani.” Elise yi a yabi, a naxa, “N bata n kolo habadan Alatala yi e nun i tan, n mi xetema i foxo ra.” E birin yi siga Yeriko yi. **5** Yeriko taan nabi ganla yi e maso Elise ra, e yi a fala a xa, e naxa, “I a kolon a Alatala i kanna ratema nen kore to?” Elise yi yabin ti, a naxa, “N na a kolon, e dundu.” **6** Eli yi a fala Elise xa, a naxa, “Lu be, n bata i mafan, amasoto Alatala bata n xe han Yuruden baani.” Elise yi a yabi, a naxa, “N bata n kolo habadan Alatala yi e nun i tan, n mi xetema i foxo ra.” E firinna birin yi siga kiraan xon. **7** Nabiin muxu tonge suulun nabi ganla ye, ne yi bira Eli nun Elise foxo ra, e sa ti, e yi e yee rafindi e firinna mabinni, e e makuya e ra ndedi. E fan firinna yi ti Yuruden baan de. **8** Eli yi a doma gbeen tongo a maramara, a igen garin, a yitaxun be binna nun be binni, e firinna birin yi dangu yire yixareni. **9** E to dangu, Eli yi a fala Elise xa, a naxa, “I waxi a xon, n xa nanse liga i xa, benun n xa ba i fema?” Elise yi a yabi, a naxa, “N bata i mafan, n waxi i ya nabiyaan xaxinla dexe firin nan soto fe yi.” **10** Eli yi a fala a xa, a naxa, “I fe xodexen nan

maxodinxi n na na ra. Koni n bama i fema waxatin naxan yi, xa i n to, na ligama i xa nen, koni xa i mi n to, na mi ligama i xa.” **11** E yi sigatini, e fala tiini, nanunna, wontoro tɛɛ kanna nun soo tɛɛ kanne yi so e tagi, Eli yi te kore wuluwulu gbeeni. **12** Elise yi a matoma a gbelegbelema, a naxa, “N fafe, n fafe! I dangu Isirayilaa yenge so wontorone birin na e nun a soone!” A mi fa a to sɔnɔn. Nayi, a yi a dugine suxu, a yi e yibo dungi firinna ra, **13** Elise yi doma gbeen tongo Eli naxan nabira. A xetɛ, a ti Yuruden baan de, **14** Eli doma gbeen naxan nabira, Elise yi na tongo, a baa igen garin, Elise yi maxodinna ti, a naxa, “Alatala, Eli a Ala minen yi iki?” A mɔn yi baa igen garin, na xanbi ra, baan yi taxun, Elise yi dangu. **15** Yeriko taan nabine ganla to a to wulani, e yi a fala, e naxa, “Eli a xaxinla Elise yi.” E yi siga a ralandeni, e xinbi sin a bun ma. **16** E yi a fala a xa, e naxa, “Xeme senbemaan muxu tonge suulun i ya walikene ye, i waxi e xa sa i kanna fen? Yanyina nde Alatalaa Nii Sarijanxin bata a xali a sa a woli geyana nde fari hanma lanbanna nde kui.” Elise yi e yabi, a naxa, “E nama e rasiga.” **17** Koni, e yi a karahan han! A yi a fala e xa, a naxa, “E e rasiga.” E yi muxu tonge suulun nasiga naxanye Eli fen xi saxon, koni e mi a to mume! **18** E to xetɛ Elise fema Yeriko taani, a yi a fala e xa, a naxa, “N mi yi a fale e xa, ‘E nama siga?’” **19** Taan muxune yi a fala Elise xa, e naxa, “Nxu kanna, taan dɔxɔ kiin fan alo i a toxi kii naxan yi, koni igen kobi han a mi tinje sansine yi soli.” **20** Elise yi a fala e xa, a naxa, “E fa fɔxɔn na goron nenen kui, e a so n yii.” E fa a ra. **21** Elise yi siga tigin xunna ra, a fɔxɔn woli igeni, a yi a fala, a naxa, “Alatala ito nan falaxi, a naxa, ‘N bata igeni ito rasarijan, a mi fa muxune faxe, sansine fan nun fa solima nen.’” **22** Igen yi rasarijan, keli na lɔxɔni fata Elise a falan na. **23** A kelimatɔɔn menni siga Beteli yi, a yi tema kiraan xɔn, taa yi diidine yi fa, e yi a magele, e yi a fala a ma, e naxa, “Teli kanna siga! Teli kanna sigal!” **24** A yi xetɛ, a e mato, a yi e danga Alatala xinli, sube xaje magaxuxi firin yi mini fɔtɔnni, e diidine tonge naanin e nun firin yibo. **25** Elise yi keli menni, a siga Karemele गयाan fari. Na xanbi ra, a xetɛ Samari taani.

3 Yuda manga Yosafati a mangayaan jɛɛ fu nun solomasɛxedeni, Axabi a dii xemen Yorami yi findi Isirayila mangan na Samari taani, a jɛɛ fu nun firin mangayaan liga Isirayila xun na. **2** Naxan jaxu Alatala

yɛɛ ra yi, a na liga nen, koni a mi dangu a fafe nun a nga fe jaxine ra. A fafe kide gɛmɛ Baali sawuran naxanye ti, a ne kala, **3** koni Nebati a dii xemen Yerobowan yulubin naxanye liga, naxan Isirayila kaane ti yulubin ligan ma, a fan yi kankan ne ligan ma, a lu ne yi, a mi xetɛ e fɔxɔ ra mume! **4** Moyaba mangan Mesa, yɛxɛɛ kurune nan yi a yii. Jɛɛ yo jɛɛ, a yi lan a xa naxan so Isirayila mangan yii mudun na, na nan lanxi yɛxɛɛ diin wuli kɛmɛ ma e nun yɛxɛɛ xungbe wuli kɛmɛ e nun e xabena. **5** Axabi to faxa, Moyaba mangan yi murute Isirayila mangan xili ma. **6** Nayi, Yorami yi mini Samari taani, a Isirayila sofane birin malan. **7** A xerane rasiga a faladeni Yuda mangan Yosafati xa, a naxa, “Moyaba mangan bata murute n xili ma. I waxi fa feni n fɔxɔ ra Moyaba yengedeni ba?” Yosafati yi a yabi, a naxa, “N sigama nen i fɔxɔ ra, i tan nun n tan keden na a ra, n ma sofane i ya sofane nan e ra, n ma soone i ya soone nan e ra.” **8** Yosafati mɔn yi a maxodin, a naxa, “En teen kiraan mundun xɔn?” Yorami yi a yabi, a naxa, “Edɔn tonbonna kiraan xɔn.” **9** Isirayila mangan nun Yuda mangan nun Edɔn mangan yi siga, e xi solofere sigan tixina, igen yi jan ganla yii e nun xuruseen naxanye yi biraxi e fɔxɔ ra. **10** Nayi, Isirayila mangan yi a fala, a naxa, “Ee! Alatala en tan manga saxanne xilixi nen, alogo a xa en sa Moyaba yamanan sagoni!” **11** Koni Yosafati yi a fala a xa, a naxa, “Alatalaa nabi yo mi na en nɔɛ Alatala maxodinje naxan yi?” Isirayila mangana walikɛen yi a fala e xa, a naxa, “Elise be, Safati a dii xemena, naxan yi igen sama Eli yiine ra.” **12** Yosafati yi a fala, a naxa, “Alatalaa falana Elise yi.” Nayi, Isirayila mangan nun Yosafati nun Edɔn mangan yi godo a fema. **13** Elise yi a fala Isirayila mangan xa, a naxa, “Nanse i tan nun n tan tagi? Siga i fafe nun i ngaa nabine fema.” Isirayila mangan yi a fala a xa, a naxa, “En-en, amasɔɔ Alatala nan nxu tan manga saxanne xilixi alogo a xa nxu so Moyaba yii.” **14** Elise yi a fala a xa, a naxa, “N bata n kɔlɔ habadan Alatala yi, Senben Birin Kanna, n walima naxan xa, xa n mi Yosafati binyaxi, Yuda mangana, i bote mi yi taranma n xa. N mi yi i matoma. **15** Iki, e fa maxase maxana nde ra n xɔn.” Maxase maxan na maxaseen maxa waxatin naxan yi, Alatala senben yi godo Elise ma. **16** A yi a fala, a naxa, “Alatala ito nan falaxi, a naxa, ‘E yili wuyaxi ge lanbanni.’” **17** Amasɔɔ Alatala ito nan falaxi, a naxa, ‘E mi foyen toma, e mi tulen toma mume, koni lanbanni ito rafema nen igen na, e yi e min, e tan nun e xuruse

xungbene nun ε xuruse xunxurine.’ 18 Koni fe di xuri nan na ra Alatala yii. A Moyaba yamanan soma nen ε yii. 19 E taa fangamane birin kalama nen e nun taa rakantanxine, ε wudi fajine birin segema nen, ε yi tigine birin dutun, ε xεene rafe gemene ra.” 20 Na xotɔn bode, saraxa ba waxatini, igen yi fa keli Edɔn yi, yamanan yi rafe igen na. 21 Moyaba kaane to a me a mangane fama e yengedeni, naxanye birin bata yi a li yenge so seen tongoden ma, e ne birin xili, e ti yamanan danna ra. 22 E to keli xɔtɔnni, sogen tixi igen na bɔxɔn fari ma, Moyaba kaane yi igen to wulani, a gbeeli alo wunla. 23 E yi a fala, e naxa, “Wunla na a ra! Mangane bata e bode yenge, e nun e sofane, e yi e bode faxa. Iki, Moyaba kaane, ε keli, en sa e yii seene tongol” 24 E yi fa Isirayila ganla daaxadeni. Koni, Isirayila ganla yi keli, a Moyaba kaane yenge, e yi e gi ganla yee ra. Isirayila ganla yi bira e fɔxɔ ra han e sa so e yamanani, e yi Moyaba kaane nɔ. 25 E taane kala, e birin yi gɛme keden kedenna woli xee fajine yi, e xεene rafe gemene ra, e yi tigine birin dutun, e yi wudi fajine birin sege. A rapanna, Kiri-Hareseti taan yinna nan tun yi fa a kiini, koni sofa lantan kanne fan yi fa na rabilin, e na fan yenge. 26 Moyaba mangan to a to a a mi yengen nɔe, a yi silanfan kanna muxu keme solofere tongo alogo a xa kirani ba han Edɔn mangan fema, koni e mi nɔ. 27 Nayi, a yi a dii singen tongo naxan yi lanma a xa ti a jɔxɔni, a yi a ba saraxan na taan yinna fari. Na xanbi ra, Moyaba kaane yi Isirayila kaane jaxankata han Isirayila kaane yi keli na yi, e xete e konni.

4 Lɔxɔna nde kaja gilena nde yi fa Elise li, nabi ganla nabina nde nan yi a xemen na. A yi Elise mafan, a naxa, “I ya walikɛna, n ma xɛmɛn bata faxa, i a kolon a i ya walikɛn yi gaxuxi Alatala yee ra, koni doli kanna bata fa n ma dii xeme firin tongodeni, a xa e findi a konyine ra.” 2 Elise yi a maxɔdin, a naxa, “N nɔe nanse lige i xa? A fala n xa nanse i yii banxini?” Naxanla yi a yabi, a naxa, “Sese mi i ya walikɛn yii banxini fɔ ture kundi keden.” 3 Elise yi a fala a xa, a naxa, “Siga, i sa goron yigenle maxɔdin i dɔxɔ bodene ra, i nama ndedi maxɔdin de! 4 I na so i konni, i deen balan ε nun i ya diine xun ma, i turen sa goronne birin kui, naxanye na rafe i ne dɔxɔ e dan na.” 5 Nayi, jaxanla yi keli a fema. A deen balan e nun a diine xun ma, e yi fa goronne ra, a yi e rafe. 6 Goronne birin to rafe, a yi a fala a dii xɛmɛn xa, a naxa, “Fa goron

gbeteye ra.” Koni a diin yi a yabi, a naxa, “Goron mi fa na.” Turen yi ba minɛ. 7 Naxanla yi sa a fala sayiban xa. Elise yi a fala a xa, a naxa, “Siga, turen mati, i yi i ya donla fi, naxan na lu i yii, na i tan nun i ya diine rakisima nen.” 8 Lɔxɔna nde Elise yi danguma Sunami taani, jaxalan nafulu kanna nde yi mɛnni, na yi a karahan a xa a dege. A nema yi dangue na waxati yo yi, a soma nen a konni a dege. 9 A yi a fala a xɛmɛn xa, a naxa, “N laxi a ra xɛmɛn naxan danguma en konni waxati yo waxati, Alaa muxu sarijanxin na a ra. 10 En lan en xa konkodina nde ti a xa en ma sangansoon kɔe ra, en saden nun tabanla nun gbɛden nun lenpun dɔxɔ a xa na. A nɔe yigiye mɛnni nen a na dangu en konni.” 11 Lɔxɔna nde Elise to fa Sunami yi, a te konkoni koren na, a sa a sa na yi. 12 A yi a fala a walikɛn Gexasi xa, a naxa, “Sunami kaan xili.” Gexasi yi na jaxanla xili, a fa a fema. 13 Elise yi a fala Gexasi xa, a naxa, “A fala jaxanla xa, i naxa, ‘I bata fe wuyaxi raba nxu xa. Nxu nɔe nanse lige i xa? Nxu xa falan ti mangan xa i ya fe yi hanma sofa kuntigina?’” Naxanla yi a yabi, a naxa, “N dɔxi n ma yamanan nan tagi, sese mi dasaxi n ma.” 14 Elise yi Gexasi maxɔdin, a naxa, “Nanse xa liga a xa?” Gexasi yi a yabi, a naxa, “Dii mi a yii, a xɛmɛn bata fori.” 15 Elise yi a fala, a naxa, “Naxanla xili.” Gexasi yi a xili, a yi fa, a so deen na. 16 Elise yi a fala a xa, a naxa, “Jɛe famatɔni waxatini ito yi, i diin barima nen, i a tongo i yii.” Naxanla yi a yabi, a naxa, “En-en, n kanna, sayibana, i nama wulen fala i ya walikɛn xa.” 17 Naxanla na yi fudikan, jɛe famatɔni na waxati kedenni, a dii xɛmɛn bari, alo Elise a fala a xa kii naxan yi. 18 Diin yi gbo. Lɔxɔna nde, a yi siga a baba fema se xabane yireni, 19 diin yi a fala a baba xa, a naxa, “N xunna! N xunna!” A baba yi a fala a walikɛn xa, a naxa, “A xali a nga fema.” 20 Walikɛn yi a tongo, a a xali a nga fema. Diin yi lu a nga xinbine fari han yanyi tagini. Na xanbi ra, a faxa. 21 Naxanla yi te, a sa diin sa sayibana saden ma, a deen balan a xun ma, a mini. 22 A yi a xɛmɛn xili, a naxa, “N bata i mafan i ya walike keden nun sofanla keden nafa n ma, n waxi siga feni sayiban fema mafuren. N fama.” 23 A yi a maxɔdin, a naxa, “Nanfera i waxi siga feni a fema to? Kike Nenen hanma Matabu Lɔxɔn mi a ra.” A yi a yabi, a naxa, “Hali i mi kɔntɔfili.” 24 A yi sofanli tɔn, a fala a walikɛn xa, a naxa, “Ti sofanla yee ra. En siga, i nama ti, xa n mi i yamari.” 25 Nayi, e siga sayiban fema Karemele गयाan fari. Sayiban to a to fe wulani, a yi a fala a walikɛn Gexasi xa, a naxa,

“Sunami kaan fama. 26 Iki i gi i sa a ralan, i yi a fala a xa, i naxa, “Tana mi i ma? I ya xemen nun i ya diina, tana mi e ma?” Naxanla yi a yabi, a naxa, “Tana yo mu.” 27 Koni, a sayiban feman li waxatin naxan yi geyaan fari, a yi a sanne suxu. Gexasi yi wa a radin feni ayi. Koni, sayiban yi a fala a xa, a naxa, “A lu na, amasoto a bojen sunuxi, koni Alatala bata na feen luxun n ma, a mi a yitaxi n na.” 28 Nayi, jaxanla yi a fala a xa, a naxa, “N kanna, n yi i maxodin diina nde ma nun? N mi yi a fala i xa, ‘I nama n yanfa?’” 29 Elise yi a fala Gexasi xa, a naxa, “I tagi xidi, i n ma dunganna suxu i yii, i siga. Xa i naralan muxuna nde ra, i nama a xonton, xa muxuna nde i xonton, i nama a ratin. I xa n ma dunganna sa diin yetagi.” 30 Naxanla yi a fala, a naxa, “N bata n kolo habadan Alatala yi, n mi sigama xa i tan mi a ra.” Nayi, Elise yi siga a foxo ra. 31 Gexasi bata yi siga e yee ra, a bata yi dunganna sa diin yetagi, koni diin mi xui ramini, a mi a ramaxa. A xete Elise ralandeni, a na feen fala a xa, a naxa, “Diin mi xulunxi.” 32 Elise so banxini waxatin naxan yi, diin bata yi faxesa, a saxi a saden ma. 33 Elise yi so, a deen balan e firinna ma, a yi Alatala maxandi. 34 A te, a yi a sa diin fari, a deen lan a deen ma, a yeene lan a yeene ma, a yiine lan a yiine ma, a a yibandun a fari, diin fatin yi wolon. 35 Elise mon yi so banxini, a so a masigani. Na xanbi ra, a te, a mon yi a yibandun a fari. Diin yi tison dexo solofere, a yeene yi rabi. 36 Elise yi Gexasi xili, a naxa, “Sunami kaan xili.” 37 Naxanla yi fa, a bira a bun ma, a xinbi sin boxoni. A diin tongo, a mini. 38 Elise yi xete Giligali taani, fitina kamen yi yamanani. Nabi ganla yi dxi a rabilinni. Elise yi a fala a walikeen xa, a naxa, “Tunden dexo teen ma, i donseen nafala nabi ganla xa.” 39 E tan nde keden yi siga burunna ra sabi de badeni, a yi sansina nde to burunna ra, a yi burunna janla bolon, a dugin nafe. A to so, a yi e yixaba dungi dungin na tunden kui, koni muxe mi a kolon naxan yi a ra. 40 A to na donseen so muxune yii, e a don, e lu gbelegbele, e naxa, “Sayibana, dabarin donsenni!” 41 Elise yi yamarin fi, a naxa, “Fa murutu fupina nde ra n xa.” A to fa a ra, Elise yi a sa donsenni. A yi a fala a walikeen xa, a naxa, “A so muxune yii, e xa a don.” Sese jaxi mi fa luxi tunden kui. 42 Na waxati kedenni, xemena nde yi fa funde buru maxope ra e nun murutu kese nenen benbeli keden sayiban xa, sa keli Baali-Salisa yi. Burun yi rafalaxi funde nenen nan na. Elise yi a fala a walikeen xa, a naxa, “Donseene yitaxun yamaan na.”

43 A walikeen yi a yabi, a naxa, “N noe a soe muxu keme yii di?” Koni, Elise yi a fala a xa, a naxa, “A so muxuni itoe yii, e xa a don, amasoto Alatala ito nan falaxi, a naxa, ‘E e degema nen, a donxen yi lu.’” 44 Nayi, a yi burune sa muxu keme yetagi, e e dege, a donxen yi lu, alo Alatala a fala kii naxan yi.

5 Arami mangana gali kuntigin Naman yi rafan a kanna ma, binye gbeen yi saxi a yi, amasoto Alatala noon fi Arami kaane ma a tan nan xon. Koni xeme wekilexi gbeeni ito, dogonfontoon nan yi a ra. 2 Na waxatini, Arami sofane bata yi fa dii temena nde ra konyiyani yengena nde xon sa keli Isirayila yamanani. Na nan yi Naman ma jaxanla walikeen na. 3 Na dii temen yi a fala a kanna jaxanla xa, a naxa, “Nabiin naxan Samari taani, xa n kanna siga na fema, a a yiyalanma nen a dogonfonna ma.” 4 Isirayila dii temen naxan fala, Naman yi sa na fala a kanna xa, mangana. 5 Arami mangan yi a fala a xa, a naxa, “Siga Samari taani, n bataxin nasigama nen Isirayila mangan ma.” A yi siga, wure gbeti fixen kilo keme saxan joxondonna a yii, e nun xemaan kilo tongo sennin e nun dugi fajin fu. 6 A yi bataxin xali Isirayila mangan xon, a yi sebexi naxan kui, a naxa, “Iki, n bata n ma gali kuntigin Naman nasiga i ma naxan bataxini ito xalixi alogo i xa a dogonfonna dandan.” 7 Isirayila mangan to na bataxin xaran, a a dugin yibo a ma, a yi a fala, a naxa, “Ala nan n na ba? N xa no faxan tiye, hanma n maratangan ti? Nanfera a xemeni ito rafaxi n ma alogo n xa a rakendeya dogonfonna ma? E a mato, a waxi yengen nan fen fe yi n na.” 8 Elise to a me a Isirayila mangan bata a dugin yibo a ma, a xeraan nasiga a faladeni mangan xa, a naxa, “Nanfera i ya dugin yibo i ma? A lu a xa fa n fema, a kolonye nayi a nabina nde Isirayila yi.” 9 Naman yi fa e nun a soone nun a wontorone, a ti Elise a banxin dee ra. 10 Elise yi xeraan nasiga a faladeni a xa, a naxa, “Siga, i sa i maxa Yuruden baani sanja ma solofere, i yiyalanma nen, i sarijan.” 11 Naman yi xolo, a siga a fale, a naxa, “N joxo a ma, nabiin minima nen a konna kui, a ti n yetagi, a Alatala maxandi a xinla ra, a Ala, a yiin ti n yire xolene xun ma, a n ma dogonfonna dandan. 12 Abana baan nun Parapara baan maxanye Damasi taani, ne mi fisa Isirayila xudene birin xa ba? N mi yi noe n maxe ne yi n sarijan ba?” Naman yi xete, a xoloxin yi siga. 13 Koni, a walikene yi fa a fala a xa, e naxa, “N fafe, xa nabiin yi fe xodexen nan

maxōdinxi i ma nun, i mi yi na lige ba? Nanfera nayi, a naxan maxōdinxi i ma, i mi na rabama? I bōxōn igeni gbansan, i sarijanma nen.” 14 Nayi, a yi godo, a yi a bōxōn Yuruden baani sanya ma solofere, lan sayibana falan ma, a fatin yi liga alo dii jōren fatina, a sarijan. 15 Naman yi xete sayiban fema, e nun naxanye birin yi a fōxō ra. E to fa, a yete yita sayiban na, a yi a fala a xa, a naxa, “N bata a kolon iki fa fala, ala yo mi na bōxō xōnna fari fō Isirayilaa Ala. N bata i mafan, tin i kiseen nasuxu n naxan soma i yii.” 16 Elise yi a yabi, a naxa, “N bata n kōlō habadan Alatala yi n naxan batuma, n mi tinjē.” Naman yi a karahan. Koni a yi tondi. 17 Nayi, Naman yi a fala a xa, a naxa, “Bayo i tondixi, tin, sofali firin nōe bōxō fujin naxan xale, na xa so n tan, i ya walikēen yii, amasōtō n tan, i ya walikēen mi fa wama saraxa gan daxin nun saraxan ba feni ala gbete yo xa, fō Alatala keden peen xa. 18 N na Alatala maxande naxan na, a xa yafe n ma feni ito yi: N kanna na so a ala Rimōn batu banxini a xinbi sindeni, nxu birin nan nxu xinbi sinma han bōxōni Rimōn suxuren bun ma bayo a suxi n tan nan xōn. Alatala xa yafe n ma ito a fe ra.” 19 Elise yi a fala a xa, a naxa, “Siga bōjē xunbenli.” Naman yi keli Elise fema. Naman to makuya ndedi, 20 Gexasi, sayibana Elise a walikēen yi a fala a yete ma, a naxa, “Arami kaan Naman yi waxi naxan fi fe yi n kanna ma, a mi tinxi sese ra. N bata n kōlō habadan Alatala yi, n nan n gima nen a fōxō ra, n yi sa sena nde rasuxu a ra.” 21 Nayi, Gexasi yi a gi Naman fōxō ra. Naman to a to, a gima a fōxō ra, a godo a wontoron kui a siga a ralandeni, a yi a fala a xa, a naxa, “Nanfe ligaxi?” 22 A yi a yabi, a naxa, “Fefe jaxi mi ligaxi. N kanna nan n nafaxi, a n xa fa a fala i xa a nabi ganla foninge firin baxi fadeni nen a konni iki sa keli Efirami geya yireni. N bata i mafan, i xa gbeti fixen kilo tonge saxan so n yii e xa, e nun sali dugi firin.” 23 Naman yi a yabi, a naxa, “Tin i xa gbeti fixen kilo tonge sennin tongo e xa.” A yi a karahan, a yi gbeti fixen tongo, a sa benbeli firin kui, a sali dugi firin so a yii, e nun a walike firinna naxanye a xalima Gexasi xa. 24 E to geyaan fanna li, Gexasi yi e tongo walikene yii, a e raso banxini, a walikene raxete, ne yi siga. 25 A mōn yi siga a kanna fema. Elise yi a fala a xa, a naxa, “I kelixi minen, Gexasi?” A yi a yabi, a naxa, “N tan, i ya walikēen mi sigaxi dede.” 26 Koni Elise yi a fala a xa, a naxa, “I jōxō a ma a n mi na xemen toxi n xaxinli a yi tuganma a wontoron kui waxatin naxan yi, a fa i ralandeni? Koni, dugi fajin

nun gbetin nasuxu waxati mi a ra iki, hanma oliwi binle nun manpa binle e nun xuruse xunxurin nun a xungbene nun konyi xemene nun konyi jaxanle. 27 Nayi, Naman ma dogonfonna xetema nen i ma e nun i ya denbayana habadan.” Gexasi kelima Elise fema waxatin naxan yi, a fatin mafixaxi dogonfonna ra alo balabalan kesena.

6 Nabi ganla yi a fala Elise xa, e naxa, “A mato nxu tan nun i tan, en na en malanma denaxan yi menna xurun en ma. 2 Xa i tin, nxu xa siga han Yuruden baan de, birin yi xalanbena nde fen mēnni, nxu yi malanden nafala mēnni en xa.” Elise yi e yabi, a naxa, “E siga.” 3 E tan nde yi a fala a xa, a naxa, “Tin i xa fa i ya walikene fōxō ra.” A yi a yabi, a naxa, “N sigama nen.” 4 A yi siga e fōxō ra. E to Yuruden baan li, e wudine sege. 5 E tan nde yi xalanbe segeni, a bunbi melenna yi bira igeni. A gbelegebele, a naxa, “N kanna, a xandixin na a ra!” 6 Sayiban yi a maxōdin, a naxa, “A biraxi minen yi?” A yi a yita a ra. Nayi, Elise yi wudi yiina nde sege, a woli na yire kedenni, bunbi melenna yi te igen xun ma. 7 Elise mōn yi a fala, a naxa, “A tongo.” Na xemen yi a yiin nasiga, a tongo. 8 Yengen yi Arami mangan nun Isirayila yamanan tagi, a yi sofa kuntigine malan, e xa e bode to. Na xanbi ra, a yi a ragidi a ganla xa daaxa denaxan yi. 9 Koni sayiban yi a fala Isirayila mangan xa, a naxa, “I yete rakantan dangu feen na mēnni, amasōtō Arami kaane fama mēnni.” 10 Isirayila mangan yi muxune rasiga mēnna kantandeni, sayiban denaxan mataxamaseri a xa. Na yi raba sanya ma wuyaxi, Elise yi Isirayila mangan nakolonma, na fan yi a jōxō luma. 11 Arami mangan yi yifu na feene fe ra, a a walikene xili, a fala e xa, a naxa, “E mi a fale n xa, nde walima Isirayila mangan xa en ye?” 12 A walike keden yi a fala, a naxa, “Muxu yo, n kanna mangana. Koni, Nabi Elise naxan Isirayila yi, i falan naxanye tima i xi banxini, na nan ne falama Isirayila mangan xa.” 13 Mangan yi a fala, a naxa, “E siga, a sa denaxan yi, e sa mēnna to, n xa a suxu.” E yi fa a fala a xa, e naxa, “A Dotan taan nin.” 14 A yi soone nun yenge so wontorone rasiga e nun gali gbeena, e sa so kōe tagini e taan nabilin. 15 Sayibana walikēen yi keli xōtōn, a mini, ganla nde yi taan nabilinxi soone nun wontorone ra. Sayibana walikēen yi a fala a xa, a naxa, “N kanna, en nanse ligama?” 16 A yi a yabi, a naxa, “I nama gaxu, amasōtō naxanye en fōxō ra, ne wuya dangu naxanye e fōxō ra.” 17 Elise yi Alatala

maxandi, a naxa, “N bata i mafan, n ma walikeen yeene rabi alogo a xa toon ti.” Alatala yi walikeen yeene rabi, a geyane to rafexi soone nun yenge so wontoro tɛ kanne ra Elise rabilinni. 18 Arami kaane yi godo Elise fema. A yi Alatala maxandi falani ito ra, a naxa, “Sofani itoe yeene danxu.” Alatala yi e yeene danxu, fata Elise a falan na. 19 Elise yi a fala sofane xa, a naxa, “Be xa mi kiraan na, taani ito mi a ra, ɛ bira n fɔxɔ ra, ɛ xemen naxan fenma, n xa ɛ xali na fema.” A yi e xali Samari taani. 20 E to so Samari taani, Elise yi a fala, a naxa, “Alatala muxuni itoe yeene rabi, e xa toon ti.” Alatala yi e yeene rabi, e a to, e Samari taan tagini. 21 Isirayila mangan to e to, a fala Elise xa, a naxa, “N fafe, n xa e faxa?” 22 Elise yi a yabi, a naxa, “I mi e faxama. I darixi na muxune faxe nen ba, naxanye suxi yengeni? Burun nun igen so e yii, e xa e dege, e min, na xanbi ra, i e lu e siga e kanna fema.” 23 Isirayila mangan yi donse gbeen so e yii, e e dege, e e min, e siga e kanna fema. Arami ganle mi fa Isirayila bɔxɔn yenge na waxatini. 24 Na dangu xanbini, Arami manga Ben-Hadada yi a ganla birin malan, e sa Samari taan nabilin yengeni. 25 Na marabilinna fe ra, fitina kame gbeen yi so Samari yi, e yi na raxɔdɔxɔ ayi han sofali xun kedenna yi sarama gbeti gbanan tonge solomasexe, e nun ganba gbiin kilo tagi yi sarama gbeti gbanan suulun nan na. 26 Isirayila Mangan yi danguma yinna fari, jaxanla nde yi gbelegbele a ra, a naxa, “Mangana, n kanna, nxu rakisi!” 27 A yi a yabi, a naxa, “Xa Alatala mi i rakisi, n tan i rakise nanse ra? Murutu dɔnxɛ mi fa na, minse dɔnxɛ mi na.” 28 Mangan mɔn yi a maxɔdin, a naxa, “I waxi nanse xɔn?” A yi a yabi, a naxa, “Naxanla nde nan a falaxi n xa, a naxa, ‘I ya diin ba. En na a don to, tila en yi n fan ma diin don.’ 29 Nxu bata n ma diin jnin, nxu yi a don. Na xɔtɔn bode, n yi a fala a xa, n naxa, ‘I ya diin ba, en na a don.’ Koni a bata a diin luxun.” 30 Mangan to jaxanla falane mɛ, a a dugine yibo, a dangumatɔna yinna fari, yamaan yi a to a kasa benbenla ragodoxi a ma sununi a domaan bun. 31 Mangan yi a fala, a naxa, “Ala xa n tɔrɔ a jaxun birin yi xa Safati a dii xemena Elise xunna lu a dɛ to.” 32 Anu Elise yi dɔxi a banxini, fonne yi dɔxi a fema. Mangan yi muxuna nde rasiga a fema. Koni benun xeraan xa so, Elise yi a fala fonne xa, a naxa, “ɛ mato, faxa tiini ito muxun nafama n xunna segedeni n dɛ! ɛ tuli mati. Xeraan na fa, ɛ dɛen balan, ɛ a radinjɛ ayi dɛen na. Yanla, en mi a kanna san xuiin mema a

xanbi ra ba?” 33 Elise mɔn yi fala tiini singen, xeraan yetɛen yi ti dɛen na, a yi mangan fala xuiin ti, a naxa, “Tɔrɔni ito birin kelixi Alatala nan ma, n mɔn fa nɔɛ n yigi tiye nanse gbete mɔn na Ala yii?”

7 Elise yi a yabi, a naxa, “ɛ tuli mati! ɛ Alatala falan name! Alatala ito nan falaxi, a naxa, ‘Waxatini ito yi tila, murutu fujin kilo fu nun firinna sɔtɔma gbeti gbanan keden nan na, e nun fundenna kilo mɔxɔjɛn nun naaninna, gbeti gbanan keden Samari taan so dɛen na.’” 2 Sofa kuntigin naxan nun mangan na a ra waxatin birin, na yi sayiban yabi, a naxa, “Hali Alatala yalenne raba kuyen ma, i bade naxanye falade, ne rakamale ba?” Elise yi a fala a xa, a naxa, “I a toma nen i yeene ra, koni i mi na donseen donma.” 3 Na waxatini, dogonfontɔ naanin yi dɔxi taan so dɛen dɛxɔn, naxanye a fala e bode xa, e naxa, “En luma be nanfera han en faxa? 4 Xa en na a fala a en xa so taani ito kui, en faxama nen bayo fitina kamen na yi. Xa en lu be fan yi, na fan en faxama nen. En siga, en sa en yete dentege Arami kaane ganla daaxadeni, xa e en lu en nii ra, en kisi, xa e en faxa, en faxa.” 5 Nayi, jninbanna ra e yi siga Arami kaane ganla daaxadeni. E to ganla daaxaden li, muxu yo mi yi na. 6 Arami kaane ganla daaxadeni, Marigin bata yi wontorone nun soone gali gbeen xuiin namini menni, Arami kaane bata yi a fala e bode xa, e naxa, “Isirayila mangan bata Xiti kaane mangan nun Misiran kaane mangan sare fi en xili ma, alogo e xa e ganle rafa en yengedeni.” 7 Ninbanna ra, e yi keli, e yi e gi, e yi bubune nun e soone nun e sofanle rabejin, e ganla daaxaden yi lu alo a yi kii naxan yi, e yi e gi alogo e xa e niine rakantan. 8 Dogonfontɔne bata yi so ganla daaxaden danna ra, e so bubuna nde kui, e e dege, e e min, e gbetin nun xemaan nun dugine tongo, e sa e luxun. E mɔn yi fa so bubu gbete kui, e seene tongo, e sa a luxun. 9 E mɔn yi a fala e bode xa, e naxa, “En mi a ligaxi alo a daxa kii naxan yi. Xibaru fajin lɔxɔn nan to, xa en dundu, en ti han xɔtɔnna kenenna, tɔrɔna en lima nen. En siga iki en sa manga banxin nakolon.” 10 E siga, e taan dɛen kantan tiine xili, e a fala e xa, e naxa, “Nxu bata so Arami ganla daaxadeni, muxu yo mi na, muxu xui yo mi mema na yi, soo xidixine nun sofali xidixine nan na, e nun bubu rabejinxine alo e kanne e luxi kii naxan yi.” 11 Dɛɛ kantanne yi muxune xili, e yi e xe manga banxin kui. 12 Mangan yi keli kɛɛn na, a yi a fala a walikene

xa, a naxa, “Arami kaane naxan liga fe yi en na, n waxi na yebe feni ε xa. Bayo e a kolon a kamena en ma, e bata keli ganla daaxadeni e sa e luxun burunna ra, e mirixi a ma, e naxa, ‘E na mini taani, en na e jɛɛene suxu, en so taani!’” **13** Mangana sofa kuntigi keden yi a yabi, a naxa, “Soon naxanye luxi taani en suulun tongo ne ye, en muxune rasiga ne fari Arami kaane daaxan matodeni. Yanyina nde e faxama nen, koni e mɔn na lu be e tan nun Isirayila yamaan birin faxama nen.” **14** E yi yenge so wontoron firin nun soone tongo, mangan yi xerane rasiga Arami ganla xɔn fendeni, a naxa, “E siga, ε a mato.” **15** E yi siga Arami kaane fɔxɔ ra han Yuruden baani, kiraan birin yi rafexi dugine nun seene ra Arami kaane naxanye wole ayi e xɔdɔxɔn kui. Xerane yi xetɛ, e yi a fala mangan xa. **16** Yamaan yi mini, e seene birin tongo Arami kaane ganla daaxadeni. Na waxatini, yamaan yi murutu fupin kilo fu nun firin sɔtɔma gbeti gbanan keden nan na, e nun fundenna kilo mɔxɔɛn nun naanin gbeti gbanan kedenna ra fata Alatalaa falan na. **17** Sofa kuntigin naxan nun mangan yi a ra waxatin birin, mangan bata yi deen kantan feen taxu na ra, koni yamaan yi na kuntigin yibodon deen na, a faxa, alo sayibana a fala kii naxan yi mangan to siga a fema. **18** Sayiban bata yi a fala mangan xa, a naxa, “Waxatini ito yi tila, murutu fupin kilo fu nun firinna sɔtɔma nen gbeti gbanan kedenna ra, e nun fundenna kilo mɔxɔɛn nun naanin, gbeti gbanan kedenna ra Samari deen na.” **19** Anu, kuntigin sayiban yabi nen, a naxa, “Hali Alatala yalenne raba kuyen ma, i bade naxanye falade, ne rakamale ba?” Elise fan yi a yabi, a naxa, “I a toma nen i yeene ra, koni i mi na donseen donma.” **20** Na feen nan a li, yamaan yi a yibodon deen na, a faxa.

8 Elise naxanla naxan ma dii nii bira ayi, Elise yi a fala na xa, a naxa, “Keli, i siga, i tan nun i ya denbayana, denaxan na i kenɛn, i sa dɔxɔ mɛnni, amasɔtɔ Alatala fitina kamen nafama nen yamanani jɛɛ solofere.” **2** Naxanli ito yi keli, a sayiban fala xuiin suxu. A yi siga, e nun a denbayana, a sa dɔxɔ Filisiti kaane yamanani jɛɛ solofere. **3** Jɛɛ solofere danguxina, naxanla yi fa keli Filisitine yamanani, a sa a banxin nun a xɛene maxandi mangan na. **4** Mangan nun sayibana walikeɛn Gexasi yi fala tiini, mangan yi a fala a xa, a naxa, “N bata i mafan, Elise fe gbeen naxanye birin liga, ne yebe n xa.” **5** A yi ne yebama

mangan xa waxatin naxan yi, Elise muxun nii bira ayi kii naxan yi, a naxanla naxan ma dii rakeli, na yi fa mangan mafandeni a banxin nun a xɛɛna fe ra. Gexasi yi a fala, a naxa, “Mangana, n kanna, a tan naxanla nan ito ra, e nun a diina, Elise naxan nakeli.” **6** Mangan yi naxanla maxodin na feen na, naxanla yi a yebe a xa. Na xanbi ra, mangan yi a walike gbeen nde yamari, a naxa, “N waxi nen sese naxanli ito gbeen na, a birin xa raxetɛ a ma, e nun a xɛɛn munanfanna birin, fɔlɔ a keli lɔxɔn ma be han to.” **7** Elise yi siga Damasi taani. Arami manga Ben-Hadada yi furaxi, e yi a fala a xa, e naxa, “Sayiban bata fa be.” **8** Mangan yi a fala Xasayeke xa, a naxa, “Kisena nde tongo i siga sayiban fema, Alatala maxodin a tan yi, i yi a maxodin xa n yiylanɛ n ma fureni ito ma.” **9** Xasayeke yi siga Elise fema, a kisena nde xali a yii. Se fajin naxan birin yi a yii Damasi taani, a yi na ndee sa jɔgɔmɛ tonge naanin xun ma. A to so, a yi a yita Elise ra, a yi a fala a xa, a naxa, “I ya diin Ben-Hadada, Arami mangan nan n nafaxi a faladeni i xa, a naxa, ‘N yiylanma nen fureni ito ma ba?’” **10** Elise yi a fala a xa, a naxa, “Siga, i yi a fala a xa, i naxa, ‘I yiylanma nen.’ Koni, Alatala bata a fala n xa a faxama nen.” **11** Sayiban yi a yeɛn kankan Xasayeke ra. Na xanbi ra, sayiban yi wuga. **12** Xasayeke yi a maxodin, a naxa, “Nanfera, n kanna, i wugama?” Elise yi a yabi, a naxa, “Bayo n na a kolon i fe naxin ligama nen Isirayila kaane ra, i tɛɛn soma nen taa senbɛmane ra, i banxulanne faxama nen silanfanna ra, i yi e dii futene yibutuxun, i yi e naxalan fudi kanne kuine rabɔ ayi.” **13** Xasayeke yi a fala, a naxa, “Koni senbetaren nan n tan i ya walikeɛn na alo barena, n nɔɛ na feene ra di?” Elise yi a fala a xa, a naxa, “Alatala bata a fala n xa a i findima nen mangan na Arami yamanani.” **14** Xasayeke yi keli Elise fema, a fa a kanna fema. Ben-Hadada yi a maxodin, a naxa, “Elise nanse falaxi i xa?” Xasayeke yi a yabi, a naxa, “A n yabixi nen a i yiylanma nen.” **15** Na xɔtɔn bode, Xasayeke yi bitinganna tongo, a yi a sin igeni, a so mangan yetagin xun na alogo a xa a niiraxinli gbeten a ma, mangan yi faxa. Xasayeke yi ti mangan jɔxɔni. **16** Isirayila manga Yoram, Axabi a dii xɛmɛna mangayaan jɛɛ suulundeni, Yuda manga Yosafati a dii xɛmen Yehoram yi findi mangan na Yuda xun na, **17** a barin jɛɛ tonge saxan e nun firin ti waxatin naxan yi. A yi jɛɛ solomasɛɛ ti mangayani Yerusalen yi. **18** A wali kiin yi naxu alo Isirayila mangane, alo Axabi a denbayana, amasɔtɔ a bata yi Axabi a dii tɛmɛna nde

dɔxɔ. Naxan j̄axu Alatala yɛɛ ra yi, a na liga nɛn. **19** Koni Alatala mi wa Yuda yamanan kala feni Dawuda fe ra, a walikɛna, amasɔto a layirin tongo nɛn Dawuda xa, a j̄oxɔn mi j̄anɲɛ mangayani habadan, a tan nun a diine. **20** Yehorami waxatini, Edɔn kaane yi murute Yuda xili ma, e yi mangana nde dɔxɔ e yɛtɛ xa. **21** Yehorami yi siga Sayiri yi, e nun a yɛngɛ so wontorone birin. Kɔɛ tagini, mangan nun a wontoro kuntigine yi Edɔn kaane yɛngɛ naxanye bata yi e rabilin, e yi e nɔ. Koni, Yuda sofane yi e gi, e siga e konni. **22** Edɔn kaane yi lu murutɛxi Yudaa nɔ sɔtɔn xili ma han to. Libina kaane fan murute nɛn na waxatini. **23** Yehorami kɛwali dɔnxene, a naxanye birin ligaxi, ne seɓexi Yuda mangane taruxu kɛdine kui. **24** Yehorami to faxa, e yi a maluxun a benbane fɛma Dawudaa Taani. A diina Axasiya yi ti a j̄oxɔni. **25** Isirayila manga Yorami, Axabi a dii xɛmɛna mangayaan j̄ɛɛ suulundeni, Yehorami a dii xɛmɛna Axasiya yi findi mangan na Yuda xun na. **26** Axasiya barin bata yi j̄ɛɛ mɔxɔɲɛ ti a findi mangan na waxatin naxan yi. A yi j̄ɛɛ keden ti mangayani Yerusalen yi. A nga xili Atali, Isirayila manga Omiri a mamandenna. **27** A sigati kiin yi lu alo Axabi a denbayana, a yi fe j̄axin liga Alatala yɛɛ ra yi alo Axabi a denbayana amasɔto e nun Axabi a denbayaan bata yi bira e bode yi lan futun ma. **28** Axasiya yi siga Axabi a diin Yorami fɔxɔ ra yɛngeni Xasayeke Arami mangan xili ma Ramoti taani Galadi yamanani. Arami kaane yi Yorami maxɔlɔ. **29** Manga Yorami yi xɛtɛ a fure dɛene dandandeni Yɛsɛrelɛ taani Arami kaane naxanye sa a ma Ramoti yi, a to yi Arami manga Xasayeke yɛngɛma. Yuda manga Yehorami a dii xɛmɛna Axasiya yi godo Yɛsɛrelɛ yi Axabi a dii xɛmɛn Yorami matodeni, amasɔto a yi furaxi.

9 Nabi Elise yi nabi keden xili nabi ganla yɛ, a yi a fala a xa, a naxa, “I tagi xidi, i turen tongo. I siga Ramoti taani Galadi yi. **2** I na so mɛnni, i Yehu toma nɛn, Yosafati a diina, Nimisi mamandenna. I sa a tongo a lanfane tagi, i yi a xali a danna konko madunduxina nde kui. **3** I turen tongo, i yi a sa a xunni, i yi a fala a xa, i naxa, ‘Alatala ito nan falaxi, a naxa: N bata i sugandi Isirayila mangan na.’ Na xanbi ra, i banxin dɛɛn nabi, i gi, i nama ti!” **4** Nabi foningen yi siga Ramoti taani Galadi yi. **5** A to so, gali kuntigine yi dɔxi. A yi a fala, a naxa, “Kuntigina, falana n xɔn ma i xa.” Yehu yi a fala a xa, a naxa, “I waxi fala ti feni nde xa nxu yɛ?” Nabiin yi a yabi, a naxa, “I tan,

kuntigina.” **6** Yehu yi keli a so banxini, foningen yi turen sa a xunni, a naxa, “Alatala, Isirayilaa Ala ito nan falaxi, a naxa, ‘N bata i sugandi Isirayila mangan na, Alatalaa yamana. **7** I Axabi a denbayaan faxama nɛn, i kanna. N na n ma walikene, n ma nabine wunla j̄oxɔma nɛn Yesabele ra, e nun Alatalaa walikene birin wunla. **8** Axabi a denbayaan birin faxama nɛn. Axabi gbeen naxan na, n na a birin naxɔrima nɛn, konyin nun xɔrɔna Isirayila yi. **9** N na Axabi a denbayaan luma nɛn alo Yerobowan ma denbayana, Nebati a diina, e nun Basaa denbayana, Axiyaa diina. **10** Barene Yesabele donma nɛn Yɛsɛrelɛ a bɔxɔni, muxu yo mi taranma na naxan a maluxunma.” Na xanbi ra, foningen yi banxin dɛɛn nabi, a gi. **11** Yehu to mini siga a kanna walikene fɛma, e yi a maxɔdin, e naxa, “Nanse ligaxi? Nanfera daxuni ito faxi i fɛma?” Yehu yi e yabi, a naxa, “ɛ muxu sifani itoe kolon e nun a nɔɛ naxan fale.” **12** Koni e yi kankanɲɛ a ma, e naxa, “I wule! Nxu yabi.” A yi a fala e xa, a naxa, “A falan tixi n xa iki nun ikimaan nan na, a naxa, ‘Alatala ito nan falaxi, a naxa: N bata i sugandi Isirayila mangan na.’” **13** E birin yi e domane ba e ma mafuren, e yi e sa Yehu sanna bun ma tedene ma, e xɔtaan fe, e sɔnxɔ, e naxa, “Yehu nan mangan na!” **14** Nayi, Yehu, Yosafati a diina, Nimisi mamandenna, na yi yanfani tɔn Yorami xili ma. Na lixi nɛn Yorami nun Isirayila kaane birin yi Ramoti Galadi makantanma Xasayeke yɛɛ ra, Arami mangana. **15** Manga Yorami bata yi xɛtɛ a furene dandandeni Yɛsɛrelɛ taani, Arami kaane a maxɔlɔn naxanye ti, a to yi Xasayeke yɛngɛma, Arami mangana. Yehu yi a fala, a naxa, “Xa ɛ waxɔnna na a ra, ɛ nama tin muxu yo yi mini taani siga xibarun nalideni Yɛsɛrelɛ yi.” **16** Yehu yi te a wontoron kui, a yi siga Yɛsɛrelɛ yi, amasɔto Yorami yi saxi mɛnni e nun Yuda manga Axasiya bata yi godo a matodeni. **17** Kantan muxun naxan yi tixi Yɛsɛrelɛ yinna xuntagi, na yi Yehu a ganla to fe. A yi a fala, a naxa, “N ganla nde toon fe.” Yorami yi a yamari, a naxa, “Soo ragina nde tongo i yi a rasiga e yɛɛ ra e maxɔdindenɛn xa bɔɲɛsaan na a ra.” **18** Soo ragiin yi siga Yehu yɛɛ ra, a fala Yehu xa, a naxa, “Mangana ito nan falaxi, a naxa, ‘Bɔɲɛsaan na a ra ba?’” Yehu yi a yabi, a naxa, “Nanse bɔɲɛsaan na i tan xa? Bira n fɔxɔ ra.” Kantan muxun yi a yɛba Yorami xa, a naxa, “Xeraan bata siga e fɛma koni a mi fama.” **19** Yorami mɔn yi soo ragi gbɛtɛ rasiga, na yi fa e fɛma, a yi a fala Yehu xa, a naxa, “Manganɛ ito nan falaxi, a naxa, ‘Bɔɲɛsaan na

a ra ba?" Yehu yi a yabi, a naxa, "Nanse bɔɓɛsaana na i tan xa? Bira n fɔxɔ ra." **20** Kantan muxun yi a yeba Yorami xa, a naxa, "Xeraan bata siga e fema koni a fan mi fama. Muxuni ito wontoro ragi kiin ligaxi alo Yehu, Nimisi mamandenna, amasɔto a ragima nen alo fatona." **21** Nayi, Yorami yi a yamari a e xa a wontoroni tɔn. A to a yitɔn, Isirayila manga Yorami e nun Yuda manga Axasiya, e birin yi siga e wontorone kui Yehu ralandeni. E yi na ralan Naboti Yesereli kaana a xɛen ma. **22** Yorami to Yehu to, a yi a fala a xa, a naxa, "Bɔɓɛsaana na a ra ba?" Yehu yi a yabi, a naxa, "Bɔɓɛsana! I a kolon i nga Yesabele mɔn ala gbetene batuma e nun a kɔɛrayaan nabama!" **23** Yorami yi soon firifiri, a gi, a fala Axasiya xa, a naxa, "Yanfana, Axasiya!" **24** Koni Yehu yi a xanla tongo a Yorami bun a tungun longonna ra a fari. Xali ma kunla yi sa mini a sondonni, Yorami yi bira a wontoron kui, a faxa. **25** Yehu yi a fala a sofa kuntigin Bidikari xa, a naxa, "A tongo, i sa a woli Naboti Yesereli kaana xɛen ma, i jɔxɔ na xɔn ma i tan nun n tan yi soon fari lɔxɔn naxan yi a fafe Axabi fɔxɔ ra, Alatala yi gbaloni ito fala a ma: **26** Alatalaa falan ni ito ra, a naxa, 'N Naboti nun a diine wunla toxi nen xoro, n na i ligama na kii nin xɛeni ito yi. Alatalaa falan nan na ral' Nayi, a tongo i yi a woli ayi xɛen ma, fata Alatalaa falan na." **27** Yuda manga Axasiya to na to, a yi a gi Beti-Gan kiraan xɔn. Yehu yi a sagatan, a fa a fala a xɛmene xa a e fan xa Axasiya faxa. E yi a sɔxɔn a wontoron kui, a yi tema Guri geyaan kiraan xɔn waxatin naxan yi Yibeleyami taan dexɔn. Axasiya yi a gi han Megido taani, a sa faxa na. **28** A walikene yi a xali wontoron kui Yerusalen yi, e a maluxun a bilinganna kui a benbane fema Dawudaa Taani. **29** Axasiya bata yi findi mangan na Yuda yi, Axabi a diin Yorami a mangayaan jɛɛ fu nun kedendeni. **30** Yehu yi so Yesereli taani. Yesabele to na mɛ, a kalen sa a yɛen na, a xunsexeni tɔn, a ti foye soden na. **31** Yehu to yi danguma taan so deen na, Yesabele yi a fala a xa, a naxa, "I bata fa bɔɓɛ xunbenla ra ba, i tan naxan luxi alo Simiri naxan a kanna faxa?" **32** Yehu yi a yɛɛ rafindi sangansoon foye soden ma, a yi a fala, a naxa, "Nde n tan xɔn? Nde?" Walike firin hanma saxan manga banxini, ne yi e yɛɛ ragodo a ma keli sangansoon kɔɛ ra. **33** Yehu yi a fala ne xa, a naxa, "Ɛ a woli bɔxɔni!" E yi Yesabele woli bɔxɔni, a wunla yi banxin nun soone kasi, Yehu yi a yibutuxun a yenge so wontoron na. **34** Yehu yi so, a a dege, a a min, a yi a fala, a naxa, "Mangana dii temen

nan yi jaxalan dangatoni ito ra, ɛ a maluxun betɛ."

35 E siga a maluxundeni, koni e a xun xɔnna nun a sanne nun a yii kuine nan tun to. **36** E xɛtɛ a faladeni Yehu xa. Nayi, Yehu yi a fala, a naxa, "Alatala na nan fala fata Eli ra, a walikɛna, Tisibi kaana, fa fala barene Yesabele suben donma nen Yesereli a xɛen ma, **37** Yesabele binbin luma nen xɛen ma alo kuruna, nayi muxu yo mi nɔɛ a fale, fa fala 'Yesabele na a ra.'"

10 Axabi a diin muxu tonge solofere nan yi Samari taani. Yehu yi bataxine seɓe a e rasiga taan sofa kuntigine ma e nun fonne Yesereli taani Samari yi, e nun muxun naxanye Axabi diine maxuruma. A yi a seɓexi, **2** "Iki, ɛ na kɛdini ito masɔto, bayo ɛ kanna diine ɛ fema e nun yenge so wontorone nun soone ɛ fema e nun taa rakantanxina nde nun yenge so seene ɛ yii, **3** nayi, ɛ ɛ kanna diina nde sugandi mangan na ɛ kanna diine yɛ naxan fisa e birin xa e nun naxan lan a xa findi mangan na, ɛ na ti mangayani. Na xanbi ra, ɛ n yenge, ɛ yi ɛ kanna denbayaan xun mayenge." **4** Koni, e yi gaxu han, e a fala e bode tagi, e naxa, "Xa manga firin mi a nɔ, en tan a nɔɔn di?" **5** Manga banxin kuntigin nun taan kuntigin nun fonne nun muxun naxanye Axabi a diine maxuruma, ne yi xeraan nasiga a faladeni Yehu xa, e naxa, "I ya walikɛne nan nxu ra, i na naxan yo fala nxu xa, nxu na nan ligama. Nxu mi muxu yo tima mangan na. Naxan nafan i ma, na liga." **6** Yehu mɔn yi bataxin firinden seɓe e ma, a yi seɓexi naxan kui, a naxa, "Xa ɛ n tan nan xa, xa ɛ xuruxi n ma, ɛ kanna diine xunne sege e de, ɛ fa n fema Yesereli taani tila xɔtɔnni waxati kedenni ito yi." Anu mangana diine muxu tonge solofere yi taan muxu gbeene konne nin, naxanye yi e maxuruma. **7** Bataxin to so, e yi mangana dii tonge soloferene suxu, e yi e kɔɛ raxaba, e yi e xunne sa benbenla kui, e yi e xali Yehu yɛɛ ra Yesereli yi. **8** Xeraan yi fa Yehu rakolon, a yi a fala a xa, a naxa, "E bata fa mangana diine xunne ra." Yehu yi a yamarin fi, a naxa, "Ɛ e sa kuru firinna ra taan so deen na han xɔtɔnni." **9** Xɔtɔnni, Yehu yi mini, a yi a yita yamaan birin na, a yi a fala e xa, a naxa, "Ɛ tan nan tinxin. N tan bata yanfan so n kanna ma, n yi a faxa. Anu, nde itoe birin faxaxi? **10** Nayi, ɛ bata a kolon, fa fala Alatalaa falan naxan yo tixi Axabi a denbayaan xili ma, na sese mi luma a rabataren na. Alatala bata ne rakamali a falan naxanye ti fata a walikɛna Eli ra." **11** Naxanye birin yi luxi Axabi a denbayani Yesereli

yi, Yehu yi ne faxa, a kuntigine nun a xoyine nun a kide kiine, a mi keden peen lu. **12** Na xanbi ra, Yehu yi keli a siga Samari taani. A to fa Beti-Ekedi yexɛɛ rabane malandena, **13** Yehu yi Yuda manga Axasiya kon kaane li na. A yi e maxodin, a naxa, “Nde ɛ tan na?” E yi a yabi, e naxa, “Axasiya kon kaane nan nxu ra, nxu sigan mangana denbayaan xontondeni, e nun mangana ngaa denbayana.” **14** Yehu yi a fala a sofane xa, a naxa, “E e ɲɛɲene suxu.” E yi muxu tonge naanin ɲɛɲene suxu, e yi e kɔɛ raxaba, e yi e woli Beti-Ekedi xɔɲinna ra, Yehu mi muxu yo lu a nii ra. **15** Yehu to keli mɛnni, a yi naralan Yehonadabu ra, Rekabu a diina, naxan fa a ralandeni. A yi a xontɔn, a a fala a xa, a naxa, “I bɔɲen sarijan n ma fe yi ba, alo n gbeen sarijan i ya fe yi kii naxan yi?” Yehonadabu yi a yabi, a naxa, “A na kii nin.” Yehu yi a fala a xa, a naxa, “Xa a na kii nin, i yiin so n yii.” Yehu yi a rate a fema a wontoron kui, **16** a yi a fala a xa, a naxa, “Fa n fema, n ma xanuntanyaan naxan Alatala xa, i na toma nen.” A yi a xali a yenge so wontoron kui. **17** Yehu to so Samari taani, naxanye birin yi luxi Axabi a denbayani Samari yi, a yi ne faxa, a yi e ɲan fefe fata Alatalaa falan na a naxan ti Eli xa. **18** Na xanbi ra, Yehu yi yamaan birin malan, a yi a fala e xa, a naxa, “Axabi walixi nen Baali xa ndedi, Yehu walima nen a xa han! **19** Iki, ɛ Baali kii muxune birin xili n fema, a walikene nun a saraxaraline birin, keden nama lu, amasɔtɔ n waxi saraxa gbeen ba feni Baali ma. Naxan yo na lu a fataren na, na mi kisima.” Yehu yi wulen nan falama alogo a xa Baali a walikene faxa. **20** A yi a fala, a naxa, “E sanla nde yitɔn Baali xa.” E a yitɔn. **21** Yehu yi xerane rasiga Isirayila birin yi, Baali a walikene birin yi fa, keden mi lu naxan mi fa, e so Baali a banxini, Baali a banxin yi rafe keli fɔxɔ kedenni han fɔxɔ kedenni. **22** Naxan yi dugi ramaraden kantanma, Yehu yi a fala na xa, a naxa, “Dugine ramini Baali a walikene birin xa.” Na yi dugine ramini e xa. **23** Nayi, Yehu yi fa Baali a banxini e nun Rekabu a diin Yehonadabu. Yehu yi a fala Baali a walikene xa, a naxa, “E yɛɛ rakojin ɛ rabilinni, ɛ a mato, alogo Alatalaa walikɛn se nama lu be, koni Baali a walikene nan tun xa lu be.” **24** E yi so saraxane nun saraxa gan daxine fidɛni Baali ma. Yehu bata yi muxu tonge solomasɛɛ ti tandeni, a yi a falaxi naxanye xa, a naxa, “N muxun naxanye soma ɛ yii naxan na a gbeen lu a siga, ɛ tan nan faxama a ɲɔxɔni.” **25** E to yelin saraxa gan daxine fidɛni, Yehu yi a fala sofane nun e kuntigine xa, a naxa, “E so, ɛ

e faxa, keden nama mini.” E yi e faxa silanfanna ra. Sofane nun e kuntigine yi e woli ayi mɛnni, e siga han taani Baali a banxini. **26** E yi gɛmɛ ki daxine ramini Baali a banxin kui, e yi e gan. **27** E yi Baali gɛmɛ ki daxin kala, e mɔn yi Baali a banxin fan nabira, e yi suturadene rafala, naxanye na han to. **28** Yehu Baali kiina fe raxori Isirayila yi na kii nin. **29** Koni a mi xɛtɛ Nebati a diin Yerobowan ma yulubine fɔxɔ ra, naxan Isirayila yamaan nadin ɲinge dii xema daxine batu feen ma Beteli nun Dan yi. **30** Alatala yi a fala Yehu xa, a naxa, “Naxan fan n yɛɛ ra yi, i bata na liga. Naxan birin yi n sagoon na, i na liga Axabi a denbayaan na. Nanara, i ya diine luma nen mangayani Isirayila yi han i yixɛtɛ naanindena.” **31** Koni, Yehu mi sigan ti a xaxinla birin yi mume Alatalaa sariyan xɔn, Isirayila Ala. Yerobowan Isirayila radin yulubin naxanye ma, a mi xɛtɛ ne fɔxɔ ra mume. **32** Na waxatini, Alatala yi nde ba fɔlɔ Isirayilaa bɔxɔn na, Xasaye Arami kaane mangan yi e nɔ Isirayila danna birin na. **33** Keli Yuruden baani han sogeteden binni, a yi Galadi yamanan birin nɔ, Gadi kaane nun Ruben kaane, e nun Manase kaane, keli Aroyeri taani Arinon xuden dɛxɔn han Basan. **34** Yehu kɛwali dɔnxɛne, a naxanye birin liga, a wekilɛna, ne sebɛxi Isirayila mangane taruxu kɛdine kui. **35** Yehu to faxa, e yi a maluxun Samari taani. A dii xɛmɛn Yehowaxasi yi ti a ɲɔxɔni. **36** Yehu ɲɛɛ mɔxɔɲɛn nun solomasɛɛ nan ti mangayani Samari taani Isirayila xun na.

11 Atali, Manga Axasiya nga to a to, a diin bata faxa, a keli a yi yamarin fi a mangan bɔnsɔnna birin xa faxa. **2** Koni e to yi e faxa feni, Yehoseba, Manga Yehorami a dii tɛmɛna, Axasiya xunyen yi Axasiyaa dii xɛmɛn Yowasa tongo, a yi a ba mangana diine yɛ, benun e xa e faxa. A yi a luxun konkona nde kui sadene yi denaxan yi e nun ɲaxanla naxan diin masuxuma. A sa luxun Atali ma na kii nin, a mi a faxa. **3** A yi lu luxunxi Yehoseba fema ɲɛɛ sennin Alatala Batu Banxini. Atali nan yi mangayani na yamanani. **4** ɲɛɛ solofere dangu xanbini, Yehoyada yi xerane rasiga Kereti sofa kuntigine nun mangan makantan sofane xilideni, a yi fa e ra a fema Alatalaa banxini. A yi layirin xidi e tagi, a yi e rakɔlɔ Alatalaa banxini, a yi mangana diin yita e ra. **5** Na xanbi ra, a yi yamarini itoe so e yii, a naxa, “E ito nan ligama. Naxanye lanma e xa wali Matabu Lɔxɔni ɛ yɛ, ndee sigama mangana banxin nan kantande yi, **6** ndee Suri dɛɛn na, ndee

deen naxan kantan tiine xanbi ra. E birin luma e masare ikiini banxin kantandeni. 7 E gali bode firinna, naxanye mi walima Matabu Loxoni, ne kantanna tima Alatala Batu Banxini mangan yireni. 8 E mangan nabilinma nen yiren birin yi, yenge so seene e birin yii, naxan yo na a maso e safan na, e na faxama nen. E luma nen mangan yireni, a nema sig'e yire yo yi." 9 Saraxaraliin Yehoyadaa yamarin naxanye birin fi sofa kuntigine ma, e ne liga. E birin yi e sofane tongo, naxanye yi e wanla danma Matabu Loxoni e nun naxanye yi a foloma Matabu Loxoni, e siga saraxarali Yehoyada fema. 10 Saraxaraliin yi tanbane nun ye masansan wure lefane so sofa kuntigine yii naxanye yi kelixi Manga Dawuda yii Alatala Batu Banxini. 11 Sofane yi mangan nabilin yenge so seene e birin yii, e ti folo banxin yifari foxoni han a kom'en foxoni saraxa ganden nun Ala Batu Banxin yetagi. 12 Saraxaraliin Yehoyada yi mangana diin maso, a yi mangaya taxamaseri komotin nun sereya kedin so a yii. E yi a sugandi, e a findi mangan na, e yi e yiine bonbo, e naxa, "Ala xa sii xunkuyen fi mangan mal!" 13 Atali yi sofane nun yamaan xuiin me, a yi fa yamaan fema Alatalaa banxini. 14 A yi mangan to tixi senbetenna dexon so deen na, fata namunna ra. Sofa kuntigine nun xota fene yi tixi mangan fema, yamaan birin yi sewaxi, e yi xotaan fema. Koni, Atali yi a domani bo a ma, a gbelegbele, a naxa, "Yanfana! Yanfana!" 15 Nayi, saraxaraliin Yehoyada yi yamarin fi sofa kuntigine ma naxanye yi sofa ganla xunna ra, a naxa, "E a ramini yamaan fari ma, naxan na bira a foxo ra, e na faxa silanfanna ra." Amasoto saraxaraliin bata yi a fala, a naxa, "E nama a faxa Alatala Batu Banxini." 16 E yi a suxu, e siga a ra manga banxin binni soone soon kiraan naxan xon, e sa a faxa menni. 17 Yehoyada yi layirin xidi Alatala nun mangan nun yamaan tagi, alogo na yamaan xa findi Alatalaa yamaan na, a mon yi lanna raso mangan nun yamaan tagi. 18 Yamanan yamaan birin yi so Baali batu banxini, e a kala, e yi saraxa gandene nun sawurane kala, e yi Matan faxa saraxa ganden yetagi, Baali kii muxuna. Saraxarali Yehoyada yi kantan tiine dexo Alatala Batu Banxini. 19 A yi Kereti sofa kuntigin e nun sofane tongo, e nun yamanan yamaan birin, e yi mangan nagodo Alatala Batu Banxini, e so manga banxini kantan tiine so deen kiraan xon ma. Nayi, Yowasa yi dexo mangane gbedeni. 20 Yamanan yamaan birin yi sewani. Taan yi xunbeli Atali faxa xanbini silanfanna ra manga

banxini. 21 Yowasa findi mangan na a jee solofereden nan ma.

12 Yehu a mangayaan jee soloferedeni, Yowasa yi findi mangan na, a yi jee tonge naanin ti mangayani Yerusalemi. A nga yi xili Sibiya, Beriseba kaana. 2 Naxan fan Alatala yee ra yi, Yowasa yi na liga saraxaraliin Yehoyadaa siimayaan waxatin birin yi, amasoto a bata yi a xuru a fajin na. 3 Koni, a mi taan kidene kala mume, yamaan mon yi saraxane bama, e wusulanne gan menne yi. 4 Yowasa yi a fala saraxaraline xa, a naxa, "Gbetin naxan fama Alatala Batu Banxini, e lan e yi na malan, gbetin naxan findixi de ti gbetin na, hanma naxan jeningexi a fi. 5 Saraxaraline xa e seene rasuxu, e yi e findi Ala Batu Banxini ton seen na, denaxan yo nema kalaxi." 6 Anu, Manga Yowasaa mangayaan jee moxonen nun saxandena a liye, banxin denaxan yi lanma a xa yiton, saraxaraline munma yi na yiton singe. 7 Manga Yowasa yi saraxaraliin Yehoyada xili e nun saraxaraliin bonne, a yi a fala e xa, a naxa, "Nanfera banxin denaxan lan a xa yiton e mi menni tonxi? Sonon, e mi fa gbeti rasuxuma e gbeti malanne yii, koni e fama a ra nen a findi Ala Batu Banxini ton seen na." 8 Saraxaraline yi lan a ma a e nama gbeti rasuxu yamaan na, e nun e nama findi banxini ton muxune ra. 9 Nayi, saraxaraliin Yehoyada yi kankira keden tongo, a yi a deraganla sonon, a dexo saraxa ganden fema Ala Batu Banxin so deen yifari foxoni. Saraxaraliin naxanye yi deen kantanma, muxune yi fama gbetin naxan na Alatala Batu Banxini, ne yi na birin sama nen kankiraan kui. 10 E na yi a to gbeti gbege bata sa kankiraan kui, mangana sebeli tiin nun saraxarali kuntigin yi gbetin yatema nen naxan bata yi so Alatala Batu Banxini, e yi a sa benbenla kui. 11 Na xanbi ra, e yi gbetin so wali kuntigine yii naxanye yi lanma e xa Alatala Batu Banxini ton. Na gbetin yi soma kamuderene nun walikene nan yii naxanye yi walima Alatala Batu Banxini, 12 e nun banxi dexe nun geme sonle. E mon yi wudin sara e nun geme masolixine nun seen naxanye birin lan e xa findi Alatala Batu Banxini ton seen na. 13 Koni e fa gbetin naxan na Alatala Batu Banxini, na mi findi gbeti fixe barama sara seen xan na, hanma filene hanma saraxarali igelengenne, hanma xotane, hanma goronna xema daxina hanma gbeti fixe daxina. 14 E yi na gbetin so walikene yii alogo e xa Alatala Batu Banxini ton. 15

Naxanye yi walikene saren fima, ne mi yi maxadinma sese ma, amasoto e yi walima tinxinna nin. **16** Yangin saraxa gbetin nun yulubi xafari saraxa gbetin mi yi xalima Alatala Batu Banxini. Saraxaraline nan gbee yi ne ra. **17** Nayi, Arami mangan Xasayeleye yi siga Gati taan yengedeni, a denaxan tongo. Xasayeleye yi a miri Yerusalen fan yenge feen ma. **18** Koni, Yuda mangan Yowasa yi se sarijanxine birin tongo, a benbane bata yi naxanye rasarijan, Yosafati nun Yehorami nun Axasiya, Yuda mangane, e nun a tan yeteen bata yi naxanye rasarijan. A mon yi xemaan tongo naxan birin yi Alatala Batu Banxini nafulu ramaraden nun manga banxin nafulu ramaradeni. A yi na birin xali Arami mangan Xasayeleye yee ra naxan mi siga Yerusalen yengedeni. **19** Yowasa kwali donxene, a naxanye birin liga, ne sebexi Yuda mangane kwali kedine kui. **20** A walikene yi yanfan so a ma, e Yowasa faxesa Beti-Milo yi, kiraan naxan godon Sila yi. **21** A walikene yi a faxesa, Simeyati a diin Yosabadi nun Someri a diin Yehosabadi. Yowasa yi faxesa, e yi a maluxun a benbane fema, Dawudaa Taani. A diina Amasiya yi doko a joxoni mangayani.

13 Yuda manga Axasiyaa diin Yowasaa mangayaan jee maxonen nun saxandeni, Yehu a diin Yehowaxasi yi findi Isirayilaa mangan na Samari taani. A yi jee fu nun solofere ti mangayani. **2** Naxan jaxu Alatala yee ra yi, a yi na liga. Nebati a diin Yerobowan yulubin naxanye liga, a fan yi ne liga, naxan Isirayila kaane ti yulubi ligan ma, a mi xete e foxo ra mume. **3** Alatala yi xolo Isirayila kaane ma han! A yi e so Arami manga Xasayeleye yii, e nun a diin Ben-Hadada. E yi lu Isirayila kaane xun na waxati wuyaxi. **4** Nayi, Yehowaxasi yi Alatala maxandi. Alatala yi a yabi, amasoto Arami mangan yi toron naxan sama Isirayila fari a bata yi na to. **5** Alatala yi xunbana nde so Isirayila yii. Isirayila kaane yi ba Arami kaane yii, e lu e bubune kui alo a foloni. **6** Koni e mi xete Yerobowan ma denbayaan yulubine foxo ra mume, naxan Isirayila ti yulubin ma. E fan yi lu ne lige. Hali Asera kide gbindonna lu nen bitinxi Samari taani. **7** Yehowaxasi a ganla bata yi kala fo soo ragiin muxu tonge suulun e nun yenge so wontoro fu e nun sofa wuli fuun naxanye yi sigan tima e sanni. Arami mangan bata yi a ganla muxune raxori, a e lu alo burunburunna. **8** Yehowaxasi kwali donxene, a naxanye birin liga, a wekilena, ne sebexi Isirayila mangane taruxu kedine

kui. **9** Yehowaxasi yi faxesa, e yi a maluxun Samari taani. A diin Yowasi yi ti a joxoni. **10** Yuda mangan Yowasa jee tonge saxandeni, Yowasi Yehowaxasi a diin yi findi Isirayila mangan na Samari taani. A jee fu nun sennin ti mangayani. **11** Naxan jaxu Alatala yee ra yi, a yi na liga. A mi xete Nebati a diin Yerobowan ma yulubi yo foxo ra, naxan Isirayila kaane ti yulubi ligan ma, a yi lu a lige. **12** Yowasa kwali donxene, a naxanye birin liga, a wekilena, e nun Yuda manga Amasiya to yenge, ne birin sebexi Isirayila mangane taruxu kedine kui. **13** Yowasi yi faxesa, e yi a maluxun Samari taani Isirayila mangane gaburun na. Yerobowan yi doko a joxoni mangayani. **14** Saya furen yi Elise suxu. Benun a xa faxesa, Isirayila manga Yowasi yi fa a fema, a yi wuga a fe ra, a naxa, “N baba! N baba! I tan dangu Isirayila yenge so wontorone nun a soo ragine ra!” **15** Elise yi a fala a xa, a naxa, “Xanla nun xalimakunle tongo.” A yi xali keden tongo e nun xalimakunle. **16** Elise mon yi a fala Isirayila mangan xa, a naxa, “Xanla bandun.” A to a bandun, Elise yi a yiine sa mangan yiine fari, **17** a yi a fala a xa, a naxa, “Banxin sogetede binna foye soden nabi.” A yi a rabi. Elise yi a fala a xa, a naxa, “A woli.” A yi a woli. Elise yi a fala a xa, a naxa, “Xunba xalimakunla ni ito ra Alatala mabinni, xunba xalimakunla na a ra Arami kaane xili ma, i Arami kaane noma nen Afeki yi han i yi e raxori.” **18** Elise mon yi a fala Isirayila mangan xa, a naxa, “Xalimakunle tongo.” A yi e tongo. Elise yi a fala a xa, a naxa, “Boxon garin.” A yi boxon garin doko saxan, a yi a dan. **19** Sayiban yi xolo a xili ma, a naxa, “A yi lan nun i xa a garin suulun hanma sennin. Nayi, i yi nne Arami kaane raxore nen. Koni iki, i e noma nen doko saxan tun.” **20** Elise yi faxesa, e yi a maluxun. Na jeeen kuyebani, Moyaba kaane ganle yi so yamanani. **21** Loxona nde, Isirayila kaane yi muxuna nde maluxunma, nanunna e yi Moyaba ganla nde to, e yi binbin bira Elise gaburun na. Binbin yi sa Elise xonne li, a nii yi bira ayi, a ti a sanne xunna. **22** Xasayeleye, Arami mangan bata yi Isirayila toro Yehowaxasi a siimayaan birin yi. **23** Koni Alatala yi kininkinin e ma, a yi e mafelu, a yi a yee rafindi e ma masoto a layirin xon e nun Ibrahima nun Isiyaga nun Yaxuba tagi. A mi wa e halagi feni, han to a mi e rawoli ayi. **24** Xasayeleye, Arami mangan yi faxesa, a diin Ben-Hadada yi ti a joxoni. **25** Yehowaxasi a diin Yowasi yi taa tongoxine rasuxu Ben-Hadada ra, Xasayeleye a diina. Xasayeleye bata yi taani itoe tongo yengeni Yowasi fafe

Yehowaxasi yii. Yowasi yi a nɔ sanja ma saxon, a Isirayila taa tongoxine suxu yengeni.

14 Isirayila mangan Yehowaxasi a diin Yowasi jɛɛ firindeni, Yowasaa diina Amasiya yi findi mangan na Yuda xun na. **2** A findi mangan na a jɛɛ mɔxɔɲɛn nun suulunden nan ma, a jɛɛ mɔxɔɲɛn nun solomanaanin ti mangayani Yerusalɛn yi. A nga yi xili Yehoyadan, Yerusalɛn kaana. **3** Naxan fan Alatala yɛɛ ra yi, a yi na liga, koni a tinxinyaan mi liga alo a benba Dawuda. A liga nen alo a fafe Yowasa a liga kii naxan yi. **4** A mi taan kidene kala mume, yamaan mɔn yi saraxane bama mɛnne yi, e wusulanna gan na. **5** Amasiyaa mangayaan to senbe sɔtɔ, a walikɛɛn naxanye a fafe faxa, e yi ne faxa. **6** Koni, a mi faxa tiine diine faxa, lan Musaa sariya kedina falan ma, Alatala yamarini ito fi denaxan yi, a naxa, “Fafane mi faxama diine funfuni, diine fan mi faxama fafane funfuni, koni birin faxama a yete yulubin nan ma fe ra.” **7** A yi Edɔn kaan muxu wuli fu faxa Fɔxɔ Lanbanni. Na yengeni, a yi Sela taan suxu, a yi a xili sa Yokatili, na xinla nan men xun ma han to. **8** Nayi, Amasiya yi xerane rasiga Isirayila mangan Yowasi ma, Yehowaxasi a diina, Yehu mamandenna, a naxa, “Fa, en fa yenge.” **9** Koni, Isirayila mangan Yowasi yi a fala Yuda mangana Amasiya xa, a naxa, “Liban tansinna nde xeraan nasiga nen a faladeni Liban suman wudin xa, a naxa, ‘I ya dii temen fi n ma dii xɛmen ma futun na!’ Liban burunna subena nde yi dangu tansinni bodonje. **10** I yete matɔxɔma a i bata Edɔn kaane nɔ. I wasa so i ya binyeni, i lu i konni. Nanfera i mɔn fe jaxin fɔlɔma naxan sa rajanma kalan ma ɛ nun Yuda yamaan birin xa?” **11** Koni, Amasiya mi a tuli mati a ra. Nayi, Isirayila mangan Yowasi yi siga e nun Yuda mangana Amasiya yi sa yenge Beti-Semesi taani Yuda yamanani. **12** Isirayila kaane yi Yuda kaane nɔ, e birin yi e gi, e siga e konne yi. **13** Isirayila mangan Yowasi yi Yuda mangana Amasiya suxu Beti-Semesi taani, Yowasaa diina, Axasiya mamandenna. A yi fa Yerusalɛn taani, a yi taan nabilinna yinna nɔngɔnna ye tonge naanin kala Yerusalɛn yinna ra, keli Efirami deen ma han Songen Ma dena. **14** Xɛmaan nun gbeti fixen nun se fajin naxanye birin yi Alatala Batu Banxin nun manga banxin nafulu ramaradene yi, a yi ne tongo, a mɔn yi muxuna ndee suxu, a xete Samari taani. **15** Yowasi kewali dɔnxene, a naxanye birin liga, a wekilena, a to Yuda mangana Amasiya

yenge, ne birin sebexi Isirayila mangane taruxu kedine kui. **16** Yowasi yi faxa, e yi a maluxun Samari taani Isirayila mangane gaburun na. A diin Yerobowan yi ti a jɔxɔni. **17** Isirayila mangan Yehowaxasi a diin Yowasi faxa xanbini, Yuda mangan Yowasaa diina Amasiya mɔn yi jɛɛ fu nun suulun sɔtɔ siimayaan na. **18** Amasiya kewali dɔnxene sebexi Yuda mangane taruxu kedine kui. **19** E yanfan so a ma Yerusalɛn yi, a yi a gi siga Lakisi taani, koni e siga a fɔxɔ ra Lakisi yi, e sa a faxa mɛnni. **20** E yi a xali soone fari, e yi a maluxun Yerusalɛn yi a benbane fɛma Dawudaa Taani. **21** Yuda yamaan birin yi Asari tongo a jɛɛ fu nun senninna ma, e yi a findi Yuda mangan na a fafe Amasiya jɔxɔni. **22** Asari yi Elati taan ti, a raso Yuda senben bun ma, Manga Amasiya faxa xanbini. **23** Yuda mangan Yowasaa diina Amasiyaa mangayaan jɛɛ fu nun suulundeni, Isirayila mangan Yowasi a diin Yerobowan yi findi mangan na Samari taani. A yi jɛɛ tonge naanin e nun keden ti mangayani. **24** Naxan jaxu Alatala yɛɛ ra yi, a yi na liga, a mi xete Yerobowan ma yulubi yo fɔxɔ ra, Nebati a diina, naxan Isirayila kaane ti yulubin ma. **25** Yamanan bonne bata yi bɔxɔn naxanye ba Isirayila bɔxɔne ra, a tan nan ne suxu yengeni, a Isirayila yamanan danne sa keli Lebo-Xamata taan ma han sa dɔxɔ Fɔxɔ Ige Daraan na, fata Alatalaa falane ra Isirayilaa Ala, a naxanye ti Nabi Yunusa xa, Amitayi Gati-Xeferi kaana diina, a walikena. **26** Alatala bata yi Isirayilaa tɔrɔn to, konyin nun xɔrɔna. Muxu yo mi yi na naxan yi Isirayila maliye. **27** Koni Alatala mi yi a ragidixi a yamanan naxɔri, nanara a yi a xunba fata Yerobowan na, Yowasi a diina. **28** Yerobowan kewali dɔnxene, a naxanye birin liga, a wekilena yengeni, e nun Damasi taan nun Xamata taan nasɔ Isirayila senben bun kii naxan yi, naxanye bata yi findi Yuda gbeen na, ne birin sebexi Isirayila mangane taruxu kedine kui. **29** Yerobowan yi faxa, e yi a maluxun a benbane fɛma, Isirayila mangane. A diin Sakari yi ti mangayani a jɔxɔni.

15 Isirayila manga Yerobowan ma mangayaan jɛɛ mɔxɔɲɛn nun soloferedeni, Manga Amasiyaa diina Asari yi findi mangan na Yuda yi. **2** A findi mangan na a jɛɛ fu nun senninden nan ma, a yi jɛɛ tonge suulun e nun firin ti mangayani Yerusalɛn yi. A nga yi xili Yekoliya, Yerusalɛn kaana. **3** Naxan fan Alatala yɛɛ ra yi, a yi na liga alo a fafe Amasiya a liga

kii naxan yi. **4** Koni a mi taan kidene kala mume, yamaan mon yi saraxane bama, e wusulanna gan menne yi. **5** Alatala yi dogonfonna ramini mangan ma, a lu a danna banxina nde kui han a faxa waxatina. A dii xemen Yotami yi findi kuntigin na manga banxini, a lu yamanan muxune xun matoc a ra. **6** Asari kewali donxene, a naxanye birin liga, ne sebexi Yuda mangane taruxu kedine kui. **7** Asari yi faxa, e yi a maluxun a benbane fema Dawudaa Taani. A diin Yotami yi ti a joxoni. **8** Asari a mangayaan jee tonge saxan e nun solomasexedeni Yuda yi, Yerobowan ma diin Sakari yi findi mangan na Isirayila xun na Samari taani, a yi a mangayaan liga kike sennin. **9** Naxan jaxu Alatala yee ra yi, a yi na liga alo a benbane a liga kii naxan yi. A mi xete Nebati a diin Yerobowan ma yulubine foxo ra mume, naxan Isirayila kaane ti yulubin ma. **10** Yabesi a diin Salun yi yanfan so a ma, a yi Sakari faxa, a ti a joxoni. **11** Sakari kewali donxene sebexi Isirayila mangane taruxu kedine kui. **12** Na feene rakamali na kii nin alo Alatala a fala kii naxan yi Yehu xa, a naxa, "I ya diine luma nen mangayani Isirayila xun na han i yixeten naanindena." **13** Yuda manga Yusiya jee tonge saxan e nun solomanaanindeni, Salun ma diin Yabesi yi findi mangan na Yuda yi. A yi kike keden ti mangayani Samari taani. **14** Gadi a diin Menahemi yi keli Tirisa taani siga Yabesi a diin Salun xili ma Samari taani, a yi a faxa, a findi mangan na a joxoni. **15** Salun kewali donxene, a yanfan naxan so, ne sebexi Isirayila mangane taruxu kedine kui. **16** Na danguxina, Menahemi yi keli Tirisa taani, a sa Tifisa taan yenge, a yi na kaane birin faxa e nun a rabilinna muxune. A yi jaxalan fudi kanne birin kuiin nabo ayi. A na liga nen bayo e mi e taan deene rabixi a yee ra. **17** Asari a mangayaan jee tonge saxan e nun solomanaanindeni Yuda yi, Gadi a diin Menahemi yi findi mangan na Isirayila yi. A yi jee fu ti mangayani Samari taani. **18** Naxan jaxu Alatala yee ra yi, a yi na liga. A mangayaan waxatin birin yi, a mi xete Nebati a diin Yerobowan ma yulubine foxo ra mume, naxan Isirayila ti yulubin ma. **19** Puli, Asiriya mangan yi fa Isirayila xili ma, Menahemi yi gbeti fixen kilo wuli tonge saxan so Puli yii, alogo a xa a mali a mangayaan senbe sodeni. **20** Nafunla yi Isirayila kaan naxanye yii, Menahemi na gbetin ba ne nan yii, alogo a xa a so Asiriya mangan yii, e keden kedenna birin yi gbeti fixen kilo tagi nan bama mudun na. Nayi, Asiriya mangan yi xete,

a mi lu yamanani. **21** Menahemi kewali donxene, a naxanye birin liga, ne sebexi Isirayila mangane taruxu kedine kui. **22** Menahemi yi faxa, a diin Pekaxiya yi ti a joxoni. **23** Yuda mangana Asari a mangayaan jee tonge suulundeni, Menahemi a diin Pekaxiya yi findi mangan na Isirayila xun na Samari taani. A yi jee firin ti mangayani. **24** Naxan jaxu Alatala yee ra yi, a yi na liga. A mi a xun xanbi so Nebati a diin Yerobowan ma yulubini, naxan Isirayila ti yulubin ma. **25** Mangana sofa kuntigina nde nan yi Remaliyaa diin Peka ra. A yi yanfan so Manga Pekaxiya ma. A yi Galadi sofaan muxu tonge suulun tongo, a yi Pekaxiya faxa manga banxin yinna kui Samari taani, a yi Aragobi nun Ariyi fan faxa. Peka manga Pekaxiya faxa na kii nin, a ti a joxoni. **26** Pekaxiya kewali donxene, a naxanye birin liga, ne sebexi Isirayila mangane taruxu kedine kui. **27** Yuda mangana Asari a mangayaan jee tonge suulun e nun firindeni, Remaliyaa diin Peka yi findi mangan na Isirayila xun na Samari taani. A yi jee moxone ti mangayani. **28** Naxan jaxu Alatala yee ra yi, a yi na liga. A mi xete Nebati a diin Yerobowan ma yulubine foxo ra mume, naxan Isirayila ti yulubin ma. **29** Isirayila mangan Peka waxatini, Asiriya mangan Tigilati-Pilesere yi fa, a yi Iyon taan nun Abeli-Beti-Maka taan nun Yanowa taan nun Kedesi taan nun Xasori taan suxu yengeni, e nun Galadi yamanan nun Galile yamanan nun Nafatali yamanan birin, a yi e muxune xali Asiriya yamanani konyiyani. **30** Elaa diin Hoseya yi yanfan so Remaliyaa diin Peka ma, a yi a yenge, a yi a faxa. Yusiya diin Yotami a mangayaan jee moxonedeni, Hoseya yi ti Peka joxoni. **31** Peka kewali donxene, a naxanye birin liga, ne sebexi Isirayila mangane taruxu kedine kui. **32** Isirayila mangan Remaliyaa diin Peka mangayaan jee firindeni, Yuda mangan Yusiya diin Yotami yi findi manga na. **33** A findi mangan na a jee moxonen nun suulunden nan ma. A jee fu nun sennin ti mangayani Yerusalem yi. A nga yi xili Yerusa, Sadoki a dii temena. **34** Naxan fan Alatala yee ra yi, a yi na liga alo a fafe Yusiya. **35** Koni, a mi taan kidene kala mume, yamaan mon yi lu saraxane be menne yi, e wusulanna gan. Yotami yi Alatala Batu Banxin So Deen Faxaraxiin ti. **36** Yotami kewali donxene, a naxanye birin liga, ne sebexi Yuda mangane taruxu kedine kui. **37** Na waxatini, Alatala yi Arami mangan Resin nun Remaliyaa diin Peka rasiga folo Yuda xili ma. **38** Yotami yi faxa, e yi

a maluxun a benbane fema Dawudaa Taani. A diina Axasi yi ti a jɔxɔni.

16 Remaliyaa diin Pekaa mangayaan jɛɛ fu nun soloferedeni, Yuda mangan Yotami a diina Axasi yi findi mangan na. **2** Axasi findi mangan na a jɛɛ mɔxɔɲeden nan ma. A yi jɛɛ fu nun sennin ti mangayani Yerusalen yi. Naxan fan Alatala yɛɛ ra yi, a mi na liga, anu a benba Dawuda tan a faɲin nan liga. **3** A bira Isirayila mangane fe jɔxine fɔxɔ ra, a yi a yetena dii xɛmen ba saraxa gan daxin na, fata siyane fe xɔsixin ra Alatala naxanye kedi Isirayila kaane yɛɛ ra. **4** A yi saraxane ba, a wusulanna gan taan kidene yi geyane xuntagi e nun wudi gbeene birin bun. **5** Nayi, Arami mangan Resin nun Isirayila mangan Peka, Remaliyaa diin yi te Yerusalen xili ma a yengedeni. E yi Axasi yenge, koni e mi a nɔ. **6** Na waxatin yeteni, Arami Mangan Resin yi Elati taan naso Arami kaane senben bun, a yi Yuda kaane kedi Elati yi. Edon kaane yi fa Elati yi, e mɔn dɔxi denaxan yi han to. **7** Axasi yi xerane rasiga a faladeni Asiriya Mangan Tigilati-Pilesere xa, a naxa, “I ya walikeen nan n na, e nun i ya diina. Fa, i fa n ba Arami mangan nun Isirayila mangan yii, naxanye n yengema.” **8** Xɛmaan nun gbeti fixen naxanye yi Alatala Batu Banxini, Axasi yi ne tongo, e nun nafunla naxanye yi manga banxini, a yi sa e fi Asiriya mangan ma. **9** Asiriya mangan yi a xuiin suxu, a te Damasi taan xili ma, a a suxu yengeni. A yi na muxune suxu, a yi e xali Kiri yi, a yi Resin faxa. **10** Manga Axasi yi siga Damasi taani Asiriya Manga Tigilati-Pilesere fema. Saraxa ganden naxan yi Damasi taani, a to na to, a yi siga na ti kiin sawuran birin na saraxaraliin Yuriya xɔn. **11** Manga Axasi fa saraxa ganden sawuran naxan na sa keli Damasi taani, saraxaraliin Yuriya yi na sifan yeteen ti. Saraxaraliin Yuriya yi a rafala benun Manga Axasi xa xɛɛ. **12** Mangan to fa sa keli Damasi taani, a yi saraxa ganden to, a yi a maso a ra. **13** A yi a saraxa gan daxin gan, a yi bogise saraxane ba, a yi a minse saraxan bɔxɔn, a yi bɔɲɛ xunbeli saraxa subene wunle xuya saraxa ganden ma. **14** Saraxa gande sula daxin naxan yi tixi Alatala yetagi, a yi na ba a funfuni naxan yi tixi saraxa gande nenen nun Ala Batu Banxin tagi. A yi a ti saraxa gande nenen dɔxɔn sogeteden kɔmen fɔxɔni. **15** Manga Axasi yi yamarini ito fi saraxaraliin Yuriya ma, a naxa, “Saraxa gan daxine ba saraxa gande nenen fari xɔtɔnni, e nun saraxane jɔnbanna

ra e nun mangana saraxa gan daxin nun a bogise saraxan nun yamanan muxune birin ma saraxa gan daxine nun e saraxane nun e minse saraxane. Saraxa gan daxin nun saraxa subene birin wunle xuya saraxa gande nenen ma. Saraxa gande sula daxin tan, n tan nan na rawalima.” **16** Manga Axasi yamarin naxanye birin fi, saraxaraliin Yuriya yi ne birin liga. **17** Manga Axasi yi ige maxali wontorone kala, a yi e falafalane ba e ma e nun e kundine. A yi ige ramarade digilixi gbeen nagodo naxan yi dɔxi sula tura sawurane fari. A yi a dɔxɔ gemen fari. **18** A yi Alatala Batu Banxin kuiin masara Asiriya mangana fe ra. Denaxan yi rafalaxi mangan dɔxɔden na Alatala Batu Banxini Matabu Lɔxɔni, a yi na kala, e nun mangan yi soma denaxan na. **19** Axasi kɛwali dɔnxene, a naxanye birin liga, ne sebexi Yuda mangane taruxu kedine kui. **20** Axasi yi faxa, e yi a maluxun a benbane fema Dawudaa Taani. A diin Xesekiya yi ti a jɔxɔni.

17 Yuda Manga Axasi a mangayaan jɛɛ fu nun firindeni, Elaa diin Hoseya yi findi mangan na Isirayila xun na Samari taani, a jɛɛ solomanaanin ti mangayani. **2** Naxan jɔxɔ Alatala yɛɛ ra yi, a yi na liga, koni Isirayila mangan naxanye dangu a tan yɛɛ ra, a mi lu alo ne. **3** Asiriya mangan Salamanasari yi te a xili ma. Hoseya bata yi lu nɔɔn bun, a lu mudun fiye jɛɛ yo jɛɛ, **4** koni Asiriya mangan yi yanfantenyaa to Hoseya yi naxan xerane rasiga Misiran mangan So ma, a a mi yi fa jɛɛn mudun fima Asiriya mangan ma. Nayi, Asiriya mangan yi yɔlɔnxɔnna sa a ma, a balan kasoon na. **5** Na waxatini, Asiriya mangan yi yamanan birin yisiga, a te Samari taan xili ma, a denaxan nabilin yengeni jɛɛ saxan. **6** Hoseya jɛɛ solomanaaninden, Asiriya mangan yi Samari taan suxu, a Isirayila kaane xali konyiyani Asiriya yamanani. A yi e radɔxɔ Xala taani Xabori baan de Gosan yamanani e nun Mede taane yi. **7** Na liga nen amasoto Isirayila kaane bata yi Alatala yulubin tongo, e Ala, naxan e ramini Misiran yamanani, Misiran mangan bun, amasoto e bata yi ala gbetene batu. **8** E bata yi bira siyane namun feene fɔxɔ ra Alatala naxanye kedi Isirayila kaane yɛɛ ra, e nun Isirayila mangane namun feen naxanye yitɔn. **9** Isirayila kaane bata yi fe jɔxine liga Alatala ra luxunni. E yi taan kidene ti e taan yiren birin yi, keli kantan ti gbengben ma han sa dɔxɔ taa makantanxin na. **10** E yi kide gemene ti, e yi Asera kide gbindonne bitin geyane birin xuntagi e nun wudi gbeene birin

bun. **11** E wusulanna gan taan kidene birin yi alo siyane a ligama kii naxan yi Alatala naxanye kedi Isirayila kaane yee ra. E yi fe njaxine liga, e Alatala raxolo naxanye ra. **12** E yi suxurene batu, hali Alatala to bata yi a fala e xa, a naxa, “E nama ito liga.” **13** Alatala yi Isirayila kaane nun Yuda kaane rakolon a nabine xon e nun muxun naxanye fe toone ti alo xiyena, a fala e xa, a naxa, “E xete e fe njaxine foxo ra, e n ma yamarine nun n ma tonne suxu, e sariyan birin suxu n naxanye soxi e benbane yii, n yi a rasiga e ma nabine xon, n ma walikene.” **14** Koni e mi e tuli mati mume, e yi lu murutexi alo e benbane, naxanye mi la Alatala ra, e Ala. **15** E yi e me a tonne ra e nun a layirin naxan xidi e nun e benbane tagi, e nun a marakolonna naxan ti e ma. E bira e suxure fuune foxo ra, e tan yeteen yi lu fuu. E yi e rabilinna siyane raliga, Alatala e danna sa naxanye raligan ma. **16** E yi Alatalaa yamarine birin nabepin, e Ala. E yi tura dii sawura firin nafala wure raxulunxin na, e yi Asera kide gbindonna bitin, e yi e xinbi sin sarene bun, e suxuren Baali batu. **17** E yi e dii xemene nun e dii temene gan saraxane ra, e yi so yiimatoon nun koe ra feene yi. Naxan njaxu Alatala yee ra yi, e lu na lige, e yi a raxolo. **18** Alatala yi xolo Isirayila xili ma, a yi e ba a yetagi. Yuda bonsonna nan keden pe lu. **19** Koni, hali na Yuda kaane mi Alatalaa yamarine suxu, e Ala. E yi bira Isirayilaa namun yitonxine foxo ra. **20** Alatala yi Isirayila bonsonne birin nawoli ayi, a yi e rayagi, a yi e so kala tiine yii. Donxen na, a yi e kedi a yetagi pon! **21** Amasoto Isirayila kaane bata yi e masiga Dawudaa denbayaan na, e yi Nebati a diin Yerobowan findi mangan na, naxan e xun xanbi so Alatala yi, a Isirayila ti yulubi gbeen ligan ma. **22** Yerobowan yulubin naxanye liga Isirayila yi lu ne birin yi, e mi e xun xete mume! **23** Alatala yi Isirayila kedi a yetagi, alo a fala kii naxan yi fata a walikene ra, nabine. Isirayila kaane yi makuya e yamanan na konyiyani Asiriya yamanani, e denaxan yi han to. **24** Asiriya mangan yi fa muxune ra sa keli Babilon nun Kuta nun Awa nun Xamata taan nun Sefarawayimi taani, a yi e radoxo Samari taane yi Isirayila kaane njoxoni. E yi Samari taane findi e gbeen na, e doxo e yi. **25** E to doxo folo na, e mi yi gaxuma Alatala yee ra, Alatala yi yatane rafa e xili ma, ne yi e muxuna ndee faxa. **26** Muxune yi a fala Asiriya mangan xa, e naxa, “I faxi siyaan naxanye ra i fa e radoxo Samari taane yi, e mi yamanan ala batu kiin kolon. A bata

yatane rafa e xili ma naxanye e faxama, amasoto e mi yamanan ala batu kiin kolon.” **27** Asiriya mangan yi yamarini ito fi, a naxa, “E fa saraxarali keden na muxu suxine ye, a xa fa doxo Samari yamanani, a yi e xaran yamanan ala batu kiin ma.” **28** Nayi, saraxaraliin naxanye suxu Samari taani, na keden yi siga Beteli yi, a sa e xaran Alatala batu kiin ma. **29** Koni, siya xojen naxanye doxo Samari yamanani, ne birin yi e gbee suxurene rafala e doxo taane yi, e yi e ti taan kidene yi Samariya kaane naxanye rafala. **30** Babilon kaane yi e gbee ala Sukoti-Benoti sawuran nafala. Kuta kaane yi e gbee ala Neragala sawuran nafala. Xamata kaane yi e gbee ala Asima sawuran nafala. **31** Awi kaane yi e gbee alane, Nibaxasa nun Tarataki sawurane rafala. Sefarawayimi kaane yi e diine gan saraxane ra e gbee alane xa, Adarameleki nun Anameleki. **32** E yi Alatala batuma, koni e mon yi suxure ki muxune doxo e muxune ye. Ne nan yi walima e xa kide banxine yi geyane fari. **33** E yi Alatala batuma, koni e mon yi e alane fan batuma, fata siyane namunne ra e kelixi denaxanye yi. **34** Han to e mon e namun fonne ligama. E mi gaxuma Alatala yee ra mume, e mi a gelene nun a yamarine nun a sariyane nun a tonne suxu Alatala naxanye so Yaxuba yixetene yii, a mon naxan xili sa a Isirayila. **35** Alatala mon bata yi layirin xidi e tagi, a yamarini ito fi, a naxa, “E nama ala gbetene batu mume, e nama e xinbi sin e bun, e nama wali e xa mume, e nama saraxan ba e xa mume. **36** Koni, e Alatala batu, naxan e ramini Misiran yamanani a senbe gbeen. E lan e xa e xinbi sin a tan nan bun, e saraxane ba a xa. **37** E yi Ala gelene nun a tonne nun a sariyane nun a yamarine suxu, a naxanye sebexi e xa, e yi e liga, e nama ala gbete yo batu. **38** N layirin naxan xidixi en tagi, e nama njinan na xon, e nama ala gbete yo batu. **39** Koni, e Alatala batu, e Ala. A tan nan e bama e yaxune birin yii.” **40** Koni, e mi e tuli mati a ra, e yi lu e namun fonne yi. **41** Hali na muxune to yi Alatala batuma, e mon yi e suxurene fan batuma. Han to, e diine nun e mamandenne mon na ligama alo e benbane.

18 Elaa diin Hoseyaa mangayaan jee saxandeni Isirayila yi, Axasi a diin Xesekiya yi findi mangan na Yuda xun na. **2** Xesekiya findi mangan na a jee moxojen nun suulunden nan ma, a yi jee moxojen nun solomanaanin ti mangayani Yerusalen yi. A nga yi xili Abiya, Sakari a dii temena. **3** Naxan fan Alatala

yee ra yi, a yi na liga alo a benba Dawuda a liga kii naxan yi. **4** A yi kidene kala geyane fari, a kide gemene yibo, a Asera kide gbindonne rabira. Musa saji sawura sula daxin naxan nafala, a na fan kala, bayo Isirayila kaane yi wusulanna ganma na nan yetagi na waxatini. Na saji sawuran yi xili nen Nehusatan. **5** Xesekiya yi a yigi sa Alatala yi, Isirayilaa Ala. Yuda mangan naxanye dangu a yee ra e nun naxanye bira a foxo ra, a joxon mi yi ne ye mume! **6** A lu Alatala foxo ra, a mi xete a foxo ra mume, Alatala yamarin naxanye sebe Musa ma a ne suxu. **7** Alatala lu nen Xesekiya xon, a noon soto a wanla birin yi. A yi murute Asiriya mangan xili ma, a mi fa xuru a bun mume. **8** A yi Filisistine no siga han Gasa dexon, a kantan ti gbengbene nun taa makantanxine fan suxu. **9** Manga Xesekiya jee naanindeni, Isirayila mangana Elaa diin Hoseya jee soloferedeni, Asiriya mangan Salamanasari yi fa Samari taan xili ma. **10** A yi Samari taan suxu jee saxanna yengen xanbini, Xesekiyaa jee sennindeni, naxan findi Isirayila mangan Hoseya jee solomanaaninden na. **11** Asiriya mangan yi Isirayila kaane xali Asiriya yi konyiyani, a sa e radoxo Xala yamanan nun Xabori baan fema Gosan yamanani e nun Mede kaane taane yi. **12** Na birin liga nen amasoto Isirayila kaane mi Alatala xuiin name, e Ala, e naxan ma layirin kala, bayo e mi a xuiin suxu. Alatalaa walikeen Musa yamarin naxanye birin fi e ma, e mi ne liga. **13** Xesekiyaa mangayaan jee fu nun naanindeni, Asiriya mangan Senakeribi yi siga Yuda taa makantanxine xili ma, a yi ne birin suxu. **14** Yuda mangan Xesekiya yi xeraan nasiga Lakisi taani a faladeni Asiriya mangan xa, a naxa, "N bata kalan ti. I masiga n na. I na naxan fala n xa, n na lige." Asiriya mangan yi gbeti fixen kilo wuli solomanaanin e nun xemaan kilo keme solomanaanin sa Yuda Mangan Xesekiya fari yanginna ra. **15** Gbeti fixen naxan birin yi Alatala Batu Banxini e nun nafulu ramaradene manga banxini, Xesekiya yi ne fi a ma. **16** Na waxatini, xemaan naxanye yi saxi Alatala Batu Banxin deene nun de ti wudine ma, Yuda mangan Xesekiya yi ne tongo, a sa e so Asiriya mangan yii. **17** Asiriya mangan yi a kuntigine mangan nasiga Manga Xesekiya ma Yerusalen yi keli Lakisi taani, e nun a tande xunna nun a sofa kuntigina e nun gali gbeena. E yi fa Yerusalen yi, e sa ti ige ramarade faxaraxiin dexon ma, dugi xane xee ma kiraan na. **18** E yi mangan xili. Xiliki a diina Eliyakimi, manga banxin kuntigin yi siga e fema,

e nun sebeli tiin Sebena nun Asafi a dii xemen Yowa, mangana yenla. **19** Sofa kuntigin yi a fala e xa, a naxa, "E a fala Xesekiya xa, e naxa, 'Asiriya manga gbeena ito nan falaxi, a naxa: I yigi saxi nanse ma? **20** I yengi a ma a feren nun senbena i yii, i yengen so, koni fala fuun nan na ra. Nayi, i ya lannayaan saxi nanse yi han i murute n xili ma? **21** I ya lannayaan saxi Misiran yamanan nin, a men kaane xa e mali. Na luxi nen alo muxun na la xayen na a dunganna ra naxan girama, a yi a yiin xaba. Naxan na a digan a yi, na a maxoloma nen. Misiran mangan na kii nin muxune xa naxanye e taxuma a ra. **22** Waxatina nde e a falama nen n xa, e naxa, "Alatala, nxo Ala, nxu nxu taxuxi na nan na." Anu, Xesekiya xa mi Ala batudene kala geyane fari ba? A tan nan a fala Yuda kaane nun Yerusalen kaane xa, a naxa, "E Ala batuma saraxa badeni ito nan yetagi naxan Yerusalen taani." **23** Iki, e nun n kanna Asiriya mangan xa lan fena nde ma, n soon wuli firin soe e yii, xa e noe soo ragine sote. **24** E mi n kanna kuntigi keden noe, hali naxan xurun e birin xa. E lannayaan saxi Misiran yi soo ragine nun wontorone nan ma fe ra. **25** A yetena, n faxi yireni ito kaladeni Alatala sagoon nan xanbi ba? Alatala yeteen nan a falaxi n xa, a n xa sa yamanani ito yenge, n yi a raxori." **26** Nayi, Eliyakimi, Xiliki a dii xemen nun Sebena nun Yowa yi a fala sofa kuntigin xa, e naxa, "Falan ti nxu xa Arami xuini, amasoto nxu a mema. En nama falan ti Heburu xuini yamaan yi a me naxanye taan nabilinna yinna xuntagi." **27** Sofa kuntigin yi e yabi, a naxa, "N kanna n nafaxi e tan nun e kanna nan gbansan ma falani itoe tideni ba? Muxun naxanye doxi yinna xuntagi, ne fan xa a me nen bayo ne fan e gbiin donma nen, e yi e xonla min e xon yengeni." **28** Nayi, sofa kuntigin to a maso, a yi a xuini te Heburu xuini, a naxa, "E manga gbeen xuiin name, Asiriya mangana! **29** Mangana ito nan falaxi, a naxa, 'E nama tin Xesekiya xa e mayenden, a mi noe e rakise n ma mume! **30** Xesekiya nama a liga e yi e lannayaan sa Alatala yi, a yi a fala a Alatala e ratangama nen, a taani ito mi sama Asiriya mangan sagoni. **31** E nama e tuli mati Xesekiya xuiin na mume, amasoto Asiriya mangana ito nan falaxi, a naxa: E boje xunbenla fen n na, e xete n ma, birin a yii seene nun a bogiseene donje, birin yi a ige ramaraden igen min, **32** han n yi fa, n yi e xali yamana gbete yi alo e gbeena, murutun nun manpa bili nakone yamanan naxan yi, bogiseen nun burun yamanan naxan yi, turen nun kumin yamanan naxan

yi. Benun ε xa faxa be, ε sa siimayaan nan sōtōma menni. Nayi, ε nama Xesekiya xuiin name mume, amasōto Xesekiya ε mayendenma nen a na a fala a Alatala ε xunbama nen. **33** Siya gbētene alane Asiriya mangani kala nen e yamanan suxu feen ma ba? **34** Xamata taan nun Arapada taana, ne alane minen? Sefarawayimi nun Hena nun Iwa, ne alane minen? E Samari taan xunba nen n yii ba? **35** Yamanane alane ye, nde a yamanan xunba n yii? Alatala xa Yerusalen xunba n yii di?” **36** Yamaan yi dundu, e mi fala yo ti, amasōto mangan bata yi yamarini ito fi, a naxa, “E nama a yabi.” **37** Eliyakimi, Xiliki a dii xēmēna, mangana banxi kuntigin nun Sebena, sebeli tiina, e nun Yowa, Asafi a dii xēmēna, mangana yenla, ne yi fa Xesekiya fēma, e yi e dugine yibo e ma kōntōfinli, e sofa kuntigina falane yeba a xa.

19 Manga Xesekiya to na mē, a yi a dugine yibo a ma, a kasa benbeli dugin nagodo a ma sununi, a siga Alatala Batu Banxini. **2** A yi Eliyakimi rasiga, mangana banxi kuntigina e nun Sebena, sebeli tiina e nun saraxarali fonne, kasa benbeli dugin nagodoxi e ma sununi, siga Nabi Esayi konni, Amōsi a dii xēmēna. **3** E yi a fala nabiin xa, e naxa, “Xesekiya naxa iki: Kōntōfinla nun tōrōn nun yagi lōxōn nan to nxu xa, alo a falan kii naxan yi, diin bari waxatin bata a li, koni fanga mi a nga ra a yi a bari. **4** Alatala, i ya Ala bata Asiriya sofa kuntigina falane birin name, naxan kari a rafaxi habadan Alatala konbideni. Xa Ala tin, Alatala, i ya Ala a naxankatama nen a falane fe ra a naxanye tixi. Nayi, i tan Esayi xa Ala maxandi a yamaan muxu dōnxene fe ra naxanye luxi e nii ra.” **5** Manga Xesekiyaa xerane to siga Esayi fēma, **6** Esayi yi a fala e xa, a naxa, “E ito nan falama ε kanna xa, ε naxa, ‘Alatala ito nan falaxi, a naxa: I falan naxanye mexi i nama gaxu ne fe ra, Asiriya mangana walikēne n nayelevu falan naxanye tixi. **7** N xaxinla nde rasoma a yi nen, a na xibarun mē waxatin naxan yi, a xetema nen a yamanani. N yi sa a faxa silanfanna ra menni.” **8** Asiriya sofa kuntigin yi a mē a a kanna bata yi keli Lakisi taani siga Libina yengedeni, a fa a li mēna nin. **9** Nayi, Asiriya mangan yi a mē a Misiran mangan Tirihaka, Kusi kaan fama a yengedeni. A to na xibarun mē, a yi xerane rasiga Xesekiya ma, a naxa, **10** “E sa ito fala Yuda mangan Xesekiya xa, ε naxa, ‘I laxi i ya Ala ra naxi ra, i yengi a ma a a nōe nen n tan Asiriya mangani kale Yerusalen yengedeni. I nama tin Ala

yi i mayenden. **11** I bata a mē Asiriya mangane feen naxanye ligaxi yamanan bonne ra, e e raxōrixi kii naxan yi. I yengi a ma a i xunbe nen na ma ba? **12** N benbane siyaan naxanye alane raxōri, ne e xunba nen ba, Gosan nun Xarani nun Resefi yamanane, e nun Eden kaan naxanye Telasara taani? **13** Manga Xamata nun Manga Arapada nun Sefarawayimi taa mangana hanma Hena, hanma Iwa, ne mangane minen yi?” **14** Xesekiya yi kedi sebexin nasuxu xerane ra, a yi a xaran. Na xanbi ra, a te Alatala Batu Banxini, a sa kedin sa Alatala yetagi. **15** Xesekiya yi Alatala maxandi, a naxa, “Alatala, Isirayilaa Ala, naxan dōxi maleka sawurane tagi! I tan Ala keden peen nan bōxo xōnna mangayane birin xun na, i tan nan bōxōn nun kuyen daxi. **16** Alatala, i tuli mati n na, i n xuiin name. Alatala, i yeēne rabi, i n mato. I Senakeribi a falane ramē, a sofa kuntigin naxan nafaxi habadan Ala konbideni. **17** Alatala, nōndin na a ra! Asiriya Mangan bata siyane raxōri, a yi e bōxōne kala. **18** E bata e alane woli tēeni, bayo Ala mi yi e ra nun mume! Muxune yii funfune nan yi e ra, wudine nun gēmē masolixine nan tun yi e ra. **19** Iki, Alatala, nxō Ala! Nxu xunba Senakeribi yii, alogo bōxo xōnna yamanane birin xa a kolon a i tan keden peen nan Ala ra, Alatala!” **20** Nayi, Esayi, Amōsi a dii xēmēn yi xeraan nasiga a faladeni Xesekiya xa, a naxa, “Isirayilaa Ala, Alatala ito nan falaxi, a naxa: N bata i ya maxandi xuiin mē i naxan tixi n ma Senakeribi a fe yi, Asiriya mangana. **21** Alatala falani ito nan tixi Senakeribi xili ma, a naxa, ‘Siyon taa fajin bata i rajaxu, a i magelema. Yerusalen kaane e xunna fitifitima i xanbi ra. **22** I nde konbixi i a rayelefu? I xuini texi nde xili ma? I bata i yeēne rate kore Isirayilaa Ala sarijanxin xili ma! **23** Fata i ya xerane ra, i bata n tan Marigin konbi. I yi a fala, i naxa, “N ma wontoro wuyaxine xōn, n bata te geyane xuntagi, Liban yamanan danne ra. N na a suman wudi kuyene segema nen, e nun a fōfō fajni fajine. N sa a xuntagin najanna li e nun a fōtōn fajina. **24** N bata xōjinne ge yamana gbētene yi, n yi e ige min. N Misiran baa igene birin xōrima nen n na siga a xili ma waxatin naxan yi.” **25** Koni, i tan Senakeribi, i mi a kolon a n feni itoe yelanxi nen to mi na ra? N yi e yitōn xabu waxati danguxine. Iki, n bata yamarin fi, a rakamali, i xa taa makantanxine lu kalaxi alo gēmē malanxine. **26** E muxune senbe mi na, e gaxuxi, e yagixi. E bata lu alo xēe ma sexene alo se sonle, alo sexen fanyen ma naxan xarama benun a

xa gbo. 27 Koni, n na a kolon, i na dɔxɔ, i na mini, i na so, i na xɔlɔ n xili ma. 28 I bata xɔlɔ n xili ma, n yi i konbi ti xuiin mɛ. Nanara, n nan n ma wuren birama nɛn i jɛni n yi n ma karafen bira i dɛ kidine yi. I faxi kiraan naxan xɔn, n yi i raxetɛ na xɔn.” 29 “Ala yi a fala Xesekiya xa, a naxa, ‘Ito xa findi taxamasenna ra i xa: Bogiseen naxanye solixi e yetɛ ma, ɛ bata ne don jɛni ito ra, na nan mɔn ligama jɛɛ famatɔni, koni jɛɛ saxandeni, ɛ seen sima nɛn, ɛ yi a xaba, ɛ yi manpa binle si, ɛ yi e bogine don. 30 Yuda bɔnsɔnna muxu dɔnxɛn naxanye na lu, ne mɔn e salenne raminima nɛn alo wudina, e bogi. 31 A dɔnxɛne minima nɛn Yerusalɛn yi, a dɔnxɛne luma nɛn e nii ra Siyon geyane yi. Alatala na nan ligama a xanuntenyani.” 32 “Nanara, Alatala ito nan falaxi Asiriya Mangan ma iki, a naxa, ‘A mi sɔɛ taani ito yi mumɛ! A mi xalimakuli wolɛ be yi. A mi makantan wure lefa tima a xa. A mi gbingbinna ratema a xili ma.’ 33 Alatalaa falan ni ito ra. ‘A faxi kiraan naxan xɔn a xetɛma nɛn na xɔn. A mi sɔɛ taani ito yi mumɛ. 34 N taani ito makantanma nɛn, n yi a rakisi n tan ma fe ra e nun Dawuda a fe ra, n ma walikɛna.” 35 Na kɔɛɛn na, Alatalaa malekan yi mini, a muxu wuli kɛmɛ tonge solomasɛxɛ wuli suulun faxa Asiriya kaane ganli. Yamaan to keli xɔtɔnni, e yi e binbine to. 36 Nayi, Asiriya mangan Senakeribi yi a ganla rakeli, a xetɛ Niniwa taani. 37 Lɔxɔna nde, Senakeribi yi xinbi sinxi a ala Nisiroki batu banxini a batudeni, a dii xemene Adarameleki nun Sareseri yi a faxa silanfanna ra, e yi e gi siga Ararati yamanani. A dii Esaraxadon yi dɔxɔ a jɔxɔni.

20 Na waxatini, saya furen yi Xesekiya suxu. Nabi Esayi, Amɔsi a diin yi fa a fɛma, a yi a fala a xa, a naxa, “Alatala ito nan falaxi, a naxa, ‘I ya feene yitɔn, amasɔtɔ i faxamatɔn ni i ra, i mi fa siimaya sɔtɔma.” 2 Xesekiya yi a yɛɛ rafindi banxi kanken ma, a maxandini ito ti Alatala ma, a naxa, 3 “Alatala, n ma fe xa rabira i ma fa fala, n sigan ti nɛn i yetagi lannayaan nun bɔɲɛ fapiyani, naxan fan i yɛɛ ra yi, n yi na liga!” Xesekiya yi wuga han! 4 Benun Esayi xa keli tanden ma, Alatala yi falan ti a xa iki, a naxa, 5 “Xetɛ, i yi a fala n ma yamaan mangan Xesekiya xa, i naxa, ‘I fafe Dawudaa Ala, Alatala ito nan falaxi, a naxa: N bata i ya maxandi xuiin mɛ, n bata i yɛɛgen to. N na i rakendeyama nɛn, benun xi saxan, i siga Alatala Batu Banxini. 6 N mɔn jɛɛ fu nun suulun sama nɛn i

ya siimayaan fari. N na i tan nun taani ito xunbama nɛn Asiriya mangan yii, n taani ito kantanma nɛn, n ma fe ra, e nun Dawudaa fe ra, n ma walikɛna.” 7 Na xanbi ra, Esayi yi a fala, a naxa, “ɛ xɔdɛ bogi yidinxina nde tongo.” E yi na tongo, e a sa a furen dɛ, Xesekiya yi kendeya. 8 Xesekiya bata yi a fala Esayi xa, a naxa, “N na a kolonma taxamasenna mundun xɔn fa fala benun xi saxan a Alatala n nakendeyama nɛn, n siga Alatala Batu Banxini?” 9 Esayi yi a yabi, a naxa, “Alatala naxa, i a kolonma taxamasenna naxan xɔn a Alatalaa falan kamalima nɛn: I waxi nɛn ba, nininna xa a maso hanma a masiga sanna yɛ fu teden ma?” 10 Xesekiya yi a yabi, a naxa, “Na lige nɛn nininna yi siga yɛɛn na sanna yɛ fu, koni n wama nɛn a xa xetɛ xanbin na sanna yɛ fu.” 11 Nayi, Nabi Esayi yi Alatala maxandi, naxan nininna raxetɛ xanbin na sanna yɛ fu Axasi a banxin teden ma, nininna bata yelin dangue denaxan na. 12 Na waxatini, Babilon Manga Baladan ma dii xɛmɛn Merodaki-Baladan yi bataxin nun finma seen nasiga Xesekiya ma, amasɔtɔ a bata yi Xesekiya fura feen mɛ. 13 Xesekiya yi xɛrane rasɛnɛ, a yi a banxin kui seene birin yita ne ra: gbɛti fixɛn nun xɛmana, wudi bogi ture fajine nun latikɔnɔnna nun a yenge so seene ramaradena, e nun naxan birin yi a nafulu ramaradeni. Sese mi lu Xesekiyaa banxini a mi naxan yita e ra e nun a bɔxɔn birin. 14 Nabi Esayi mɔn yi fa Manga Xesekiya fɛma, a yi a fala a xa, a naxa, “Muxuni itoe nanse falaxi i xa? E kelixi minɛn?” Xesekiya yi a yabi, a naxa, “E kelixi yamana makuyen nin, Babilon.” 15 Esayi mɔn yi a maxɔdin, a naxa, “E i ya banxin to nɛn?” Xesekiya yi a yabi, a naxa, “Seen naxanye birin n ma banxin kui, e ne birin to nɛn. Sese mi n ma nafulu ramaradeni, n mi naxan yitaxi e ra.” 16 Nayi, Esayi yi a fala Xesekiya xa, a naxa, “Alatalaa falan namɛ! 17 Waxati fama, seen naxanye birin i ya banxini e nun i benbane naxanye fen han to, e ne birin xalima nɛn Babilon yi, sese mi luma. Alatalaa falan nan na ra. 18 E i ya dii xɛmena ndɛɛ tongoma nɛn, i yetɛɛn naxanye sɔtɔma, alogo e xa findi Babilon mangana banxin xɛmɛ tɛgenne ra.” 19 Xesekiya yi Esayi yabi, a naxa, “I Alatalaa falan naxan tixi, a fan.” A mirixi a ma, a naxa, “En luma nɛn bɔɲɛ xunbenla nun marakantanni n ma siimayani.” 20 Xesekiya kɛwali dɔnxɛne sebexi Yuda mangane taruxu kɛdine kui. A wekilɛna fe falama e nun a igɛ ramaraden naxan gɛ e nun a igɛ kiraan naxan gɛ siga

igen na Yerusalen yi. 21 Xesekiya yi faxa. A dii xemen Manase yi ti a jɔxɔni mangayani.

21 Manase findi mangan na a jɛɛ fu nun firinden nan ma, a jɛɛ tonge suulun e nun suulun ti mangayani Yerusalen yi. A nga yi xili Xefisiba. 2 Naxan jaxu Alatala yɛɛ ra yi, a yi na liga. A yi fe xɔsixinɛ liga alo siyane Alatala naxanye kedi Isirayila kaane yɛɛ ra. 3 A mɔn yi kidene ti geyane fari a fafe Xesekiya dɛnaxanye kala, a yi saraxa ganden nafala Baali xa, a yi Asera kide gbindonna bitin, alo Isirayila manga Axabi a liga kii naxan yi, a yi a xinbi sin sarene bun, a yi e batu. 4 A yi suxure kidene ti Alatala Batu Banxini, Alatala a fala dɛnaxan ma, a naxa, “N xinla luma Yerusalen nin.” 5 A yi sarene kiden ti Alatala Batu Banxini sansan firinne birin kui. 6 A yi a dii xemen gan saraxan na, a yi kɔɛrayaan liga, a yi so yiimatonɛ, a muxune dɔxɔ naxanye yi jinanne maxɔdinma naxanye yi falan tima barinne ra. Naxan jaxu Alatala yetagi, a lu na lige tun, a yi Ala raxɔlɔ. 7 A yi Asera kide gbindonna rafala, a na bitin Alatala Batu Banxini, Alatala a fala dɛnaxan ma Dawuda nun a diin Sulemani xa, a naxa, “N bata banxini ito sugandi e nun Yerusalen Isirayila bɔnsɔnnɛ yirene birin yɛ, n waxi n xinla lu feni dɛnaxan yi habadan. 8 N mi Isirayila kaane masige yamanan na, n naxan soxi e benbane yii, koni fɔ e xa n ma yamarine birin suxu e nun n ma sariyan birin n ma walikɛɛn Musa naxan sebɛxi.” 9 Koni, yamaan mi e suxu mume, Manase yi findi sabun na e lɔ ayi, Isirayila kaane yi fe jaxin liga dangu siyane ra Alatala naxanye kedi e yɛɛ ra. 10 Nayi, Alatala yi falan ti a nabine xɔn, a naxa, 11 “Yuda mangan Manase bata fe xɔsixinɛ itoɛ liga. A bata fe jaxin liga dangu Amorine ra waxati danguxine yi, a mɔn bata Yuda kaane ti yulubin ma a suxurene xɔn. 12 Nanara, Alatala, Isirayilaa Ala ito nan falaxi, ‘N tɔrɔn nafama nɛn Yerusalen kaane nun Yuda kaane ma naxan yo na a mɛ, a tuli madɔxɔma ayi nɛn. 13 N Yerusalen kalama nɛn alo n Samari taan nun Axabi a denbayaan kala kii naxan yi, n Yerusalen muxune raxɔrima nɛn alo lɔxɔn bama goronna ma kii naxan yi a na yifitan, a maxetɛ. 14 N nan n ma yama dɔnxɛn nabɛjinma nɛn e yaxune yii, e yi e yii seene birin tongo, 15 bayo naxan jaxu n yetagi, e bata na liga, e yi n naxɔlɔ keli e benbane ramini lɔxɔn ma Misiran yamanani han to.” 16 Manase yi sɔntare wuyaxi faxa, han Yerusalen yi rafe binbine ra sa yulubin fari a

Yuda kaane ti naxan ma naxan yi jaxu Alatala yɛɛ ra yi. 17 Manase kewali dɔnxɛne, a naxanye birin liga, a yulubin naxan liga, ne sebɛxi Yuda mangane taruxune kɛdine kui. 18 Manase yi faxa, e yi a maluxun nakɔni naxan a banxin dɛxɔn, Yusaa nakɔni. A dii xɛmɛna Amɔn yi ti a jɔxɔni mangayani. 19 Amɔn findi mangan na a jɛɛ mɔxɔjɛn nun firinden nan ma, a jɛɛ firin ti mangayani Yerusalen yi. A nga yi xili nɛn Mesulemeti, Xarusi a dii tɛmɛna, naxan keli Yotoba taani. 20 Naxan jaxu Alatala yɛɛ ra yi, a na liga nɛn, alo a fafe Manase a liga kii naxan yi. 21 A yi sigan ti a jaxin na alo a fafe, a yi suxurene batu a fafe naxanye batu, a yi a xinbi sin e bun ma. 22 A yi Alatala rabɛjin, a benbane Ala, a mi sigan ti Alatalaa kiraan xɔn. 23 Manga Amɔn ma walikɛne yi yanfan so a ma, e yi sa a faxa a banxini. 24 Koni, naxanye yanfan so Manga Amɔn ma yamanan muxune yi ne faxa, yamanan muxune yi a dii xemen Yosiya ti a jɔxɔni. 25 Amɔn kewali dɔnxɛne, a naxanye birin liga, ne sebɛxi Yuda mangane taruxu kɛdine kui. 26 E yi a maluxun a gaburun na, Yusaa nakɔni. A dii xemen Yosiya yi ti a jɔxɔni mangayani.

22 Yosiya findi mangan na a jɛɛ solomasɛxɛdɛn nan ma, a jɛɛ tonge saxon e nun keden ti mangayani Yerusalen yi. A nga yi xili Yedida, Adayaa dii tɛmɛna, Bosikati kaana. 2 Naxan fan Alatala yɛɛ ra yi, a Ala, a yi na liga, a sigan ti tinxinni alo a benba Dawuda, a mi kiraan fata siga yiiɛfanni hanma kɔmɛnni. 3 A mangayaan jɛɛ fu nun solomasɛxɛdeni, Manga Yosiya yi sebɛli tiin Safan nasiga Alatala Batu Banxini, Asaliyaa dii xɛmɛna, Mesulan mamandenna. A yi a fala a xa, a naxa, 4 “Siga Xiliki fema, saraxarali kuntigina, a xa sa gbetin malan naxan soxi Alatala Batu Banxini e nun dɛ kantanne naxan nasuxi yamaan yii. 5 Muxun naxanye Alatala Batu Banxin wanli kuntigine ra, a xa so ne yii. Ne yi a so Alatala Batu Banxini tɔn muxune yii: 6 yii ra walikɛne nun kamuderene nun gɛmɛ masonle, alogo e xa wudin nun gɛmɛ masolixine sara, e banxini tɔnjɛ naxanye ra. 7 Koni, gbetin naxan soma e yi, muxu yo nama e maxɔdin na rawali kii ma, bayo e walima tinxinna nin.” 8 Nayi, Xiliki, saraxarali kuntigin yi a fala sebɛli tiin Safan xa, a naxa, “N bata sariya kedin to Alatala Batu Banxini.” Xiliki yi na kedin so Safan yii, Safan yi a xaran. 9 Na xanbi ra, sebɛli tiin Safan yi sa a fala mangan xa, a naxa, “Gbetin naxan yi Alatala Batu Banxini, i ya walikɛne

bata na so walike kuntigine yii alogo e xa Alatala Batu Banxini tɔn.” 10 Sebeli tiin Safan yi a fala mangan xa, a naxa, “Saraxaraliin Xiliki kedina nde soxi nen n yii.” Safan yi a xaran mangan yetagi. 11 Naxan yi sebexi sariya kedin kui, mangan to na me, a yi a dugine yibo a ma. 12 Mangan yi yamarini itoe so saraxaraliin Xiliki yii e nun Safan a diina Axikan e nun Mikahu a diina Akibori nun sebeli tiin Safan nun Asaya, mangana walikena, a naxa, 13 “E sa Alatala maxodin nxu nun Yuda yamaan birin xa kedina fe ra naxan toxi. Alatala bata xolo gbeen ti en xili ma, amasoto yamarin naxanye sebexi kedini ito kui, en benbane mi ne suxi e yi e liga.” 14 Saraxarali Xiliki nun Axikan nun Akibori nun Safan nun Asaya yi siga nabi jaxanla Xuluda fema. A yi doxi Yerusalen Taa Nenen nin. Dugi ramaran nan yi a xemen Salun na, Tikiwaa dii xemena, Xaraxasa mamandenna. 15 Xuluda yi a fala e xa, a naxa, “Alatala, Isirayilaa Ala ito nan falaxi, a naxa: E sa a fala e xe muxun xa naxan e rafaxi n fema, 16 e naxa, ‘Alatala ito nan falaxi, a naxa: N toron nafama nen yireni ito fari e nun a muxune, fata kedin xuine birin na Yuda mangan naxan xaranxi. 17 Bayo e bata n nabegin, e wusulanna gan ala gbetene xa, e yi n naxolo e suxurene ra e naxanye rafalaxi, na ma, n ma xolon bata gbo ayi yireni ito xili ma, a mi janyje mumel’ 18 Koni, e sa a fala Yuda mangan xa, naxan e rafaxi Alatala maxodinden, e naxa, ‘Alatala, Isirayilaa Ala ito nan falaxi falane fe yi i naxanye mexi, a naxa: 19 I to falani itoe mexi n naxanye tixi yireni ito nun a muxune xili ma, naxanye findi jaxankatan nun dangan na, i yi sunu, i yi i magodo Alatala yetagi. Bayo i bata i ya dugine yibo i ma, i yi wuga n yetagi, n fan bata a me. Alatalaa falan ni i ra. 20 Nanara, n na i luma nen i faxa boje xunbenli, i maluxun boje xunbenli i ya gaburun na, n jaxankatan naxan nagodon yireni ito fari, i mi ne toma.” E dentegeni ito sa mangan xa.

23 Manga Yosiya yi Yuda fonne nun Yerusalen fonne birin malan a fema. 2 A yi siga Alatala Batu Banxini, e nun Yuda xemene nun Yerusalen kaane birin nun saraxaraline nun nabine. Yamaan birin yi siga keli muxudine ma han muxu gbeene. A layiri kedin naxan to Alatala Batu Banxini, a na fala xuine birin xaran e yetagi. 3 Mangan yi tixi senbetenna xon Ala Batu Banxin so deen na, a lanna fen Alatala ra, a de xuiin tongo a xa bira Alatala foxo ra, a yi a yamarine nun a sariyane nun a tonne suxu a bojen nun a niin

birin na. A na layirin fala xui sebexine rakamali na kii nin. Yamaan birin yi so layirini. 4 Mangan yi saraxarali kuntigin Xiliki yamari, e nun saraxaraliin bonne nun saraxaraliin naxanye yi deen kantanma, a e xa seene birin namini Alatala Batu Banxini naxanye rafalaxi Baali nun Asera nun sarene birin batu seene ra. Yosiya yi sa e gan Yerusalen fari ma xene ma Kediron lanbanni, a siga e xuben na Beteli yi. 5 Yosiya yi kiden ki muxune kedi, Yuda mangan yi naxanye doxi alogo e xa wusulanna gan kidene yi geyane fari Yuda taane nun Yerusalen rabilinni. Kiden ki muxuni itoe yi wusulanna gan Baali nun sogen nun kiken xa e nun sare kurune nun sarene birin xa. 6 Yosiya yi Asera kide gbindowna ramini Alatala Batu Banxini, a yi a xali Yerusalen fari ma Kediron lanbanni, a sa a gan menni, a yi a findi xuben na, a sa a xuben woli yamanan muxune gaburune fari. 7 A mon yi kiden ki xeme yalundene banxine kala Alatala Batu Banxini, jaxanle yi domane degema denaxan yi Asera batu seen na. 8 Yosiya yi Yuda taane saraxaraline birin maxili, a yi taan kidene raxosi, saraxaraline yi wusulanna ganma denaxanye yi, keli Geba ma han Beriseba, a yi taan kidene kala taan so deene ra, a gbengbenna, denaxan yi taan kuntigin Yosuwe a deen na taan so deen komenna ma. 9 Taan kiden ki muxune mi yi sigama Alatala Batu Banxini Yerusalen yi, koni e yi buru tetaren donma alo saraxaraline. 10 Mangan yi Tofeti raxosi Ben-Hinon lanbanni, alogo muxu yo nama fa a dii xemen hanma a dii temen gan Moloko suxuren binya feen na. 11 Yuda mangan soon naxanye findi sogen batu seene ra, Yosiya yi ne ba Alatala Batu Banxini so deen dexon. E yi sansanna nde nan kui kuntigin Natan-Meleki a banxin dexon. Na xanbi ra, Yosiya yi wontorone gan e yi sogen batun naxanye ra. 12 Yuda mangane bata yi kiden ti Axasi a kore banxin xuntagi. Yosiya yi ne birin kala e nun Manase kiden naxanye ti Alatala Batu Banxini sansan firinne kui. A yi ne ba menni, a yi e kala, a yi e dungi durgine woli Kediron lanbanni. 13 Isirayila mangan Sulemani taan kiden naxanye ti Yerusalen sogeteden binni Maraxori Geyaan yiifanna ma, mangan yi ne raxori. Sulemani yi ne tixi Asitarate nan xa Sidon kaane ala e nun Kemosi, Moyaba kaane ala e nun Moloko, Amonine ala. 14 Yosiya yi Asera kide gbindowne nun kide gemene kala, e yi denaxan yi a mena rafe muxu xonne ra. 15 Saraxa ganden nun taan kiden naxan yi Beteli yi, a yi ne fan nabira. Nebati a dii xemen Yerobowan naxan

Isirayila kaane ti yulubin ma, na nan na kiden nafala. Yosiya yi kiden gan han a findi xuben na. A mɔn yi Asera kide gbindonna fan gan. **16** Nayi, Yosiya yi a yɛɛ rakojin, a yi gaburune to geyaan ma mɛnni, a yi walikene rasiga muxu xɔnne tongodeni gaburune ra, a sa e gan saraxa ganden fari alogo a xa men naxɔsi, fata Alatalaa falane ra sayiban naxanye fala lan feni itoe ma. **17** Manga Yosiya yi a fala, a naxa, “N gɛmɛ gbeen mundun toma ito ra?” Taan muxune yi a yabi, e naxa, “Sayiban gaburun na a ra, naxan keli Yuda yi, naxan falane ti Beteli saraxa ganden xili ma, i feen naxanye ligaxi iki.” **18** A yi a fala e xa, a naxa, “Ɛ a lu mɛnni, muxu yo nama a yiin din na sayiban xɔnne ral!” Nayi, e yi a xɔnne ramara mɛnni e nun nabi bonna xɔnne naxan keli Samari taani. **19** Yosiya mɔn yi taan kide banxine birin kala naxanye yi Samari taane yi, Isirayila mangane naxanye ti, e yi Ala raxɔlo. Yosiya yi a liga alo a liga Beteli yi kii naxan yi. **20** Yosiya yi taan kiden ki muxune birin kɔɛ raxaba e saraxa gandene fari, a yi muxu xɔnne gan ne fari. Na xanbi ra, a yi xetɛ Yerusalɛn yi. **21** Mangan yi yamarini ito fi yamaan birin ma, a naxa, “Ɛ Halagi Tiin Dangu Lɔxɔn Sanla raba Alatala binya feen na, ɛ Ala, alo a sebɛxi layiri kedin kui kii naxan yi.” **22** Halagi Tiin Dangu Lɔxɔn Sanli ito sifan munma yi liga singen, keli kitisane waxatin ma Isirayila yi e nun Isirayila mangane nun Yuda mangane lɔxɔne birin yi. **23** Manga Yosiya jɛɛ fu nun solomasɛɛ nan yi a ra a Halagi Tiin Dangu Lɔxɔn Sanli ito rabɛ Yerusalɛn yi Alatala xa. **24** Naxanye yi jinanne maxɔdinma e nun naxanye yi falan tima barinne ra, Yosiya yi ne birin faxa. A yi kɛ suxure nun suxure sawurane kala, e nun fe xɔsixin naxanye birin yi Yerusalɛn nun Yuda yamanani. A na liga nen alogo a xa sariyan nakamali naxanye kedin kui saraxaraliin Xiliki naxan to Alatala Batu Banxini. **25** Yosiya jɔxɔn munma yi lu na singen mangane yɛ, a bira nen Alatala fɔxɔ ra a bɔjɛn birin na, a niin birin yi, e nun a senben birin yi, fata Musaa sariyan birin na. A tan dangu xanbini, a maligan mi lu na mumɛ! **26** Koni, Alatala mi xetɛ a xɔlo gbeen fɔxɔ ra Yuda xili ma Manase a fe ra naxan a Alatala raxɔlo. **27** Alatala yi a fala, a naxa, “N Yuda bama nen n yetagi alo n na Isirayila ba n yetagi kii naxan yi. N Yerusalɛn wolima ayi nen n taan naxan sugandi, e nun banxina n na a fala banxin naxan ma, n naxa, ‘N xinla luma be nin.’” **28** Yosiya kɛwali dɔnxɛne, a naxanye birin liga, ne sebɛxi

Yuda mangane taruxu kedine kui. **29** A waxatini, Neko, Misiran mangan yi siga Asiriya Mangan xili ma Efirati baan binni. Manga Yosiya yi siga a ralandeni. Misiran mangan Neko to a to tun, a yi a faxa Megido taani. **30** Yosiya walikene yi a binbin xali wontoron kui, e yi keli Megido taani siga Yerusalɛn yi, e sa a maluxun a gaburun na. Yamanan muxune yi a dii xemen Yehowaxasi tongo, e turen sa a xunni, e yi a findi mangan na a fafe jɔxɔni. **31** Yehowaxasi findi mangan na a jɛɛ mɔxɔjɛn nun saxanden nan ma, a yi kike saxan ti mangayani Yerusalɛn yi. A nga yi xili Xamutali, Yereimi a dii tɛmɛna, Libina kaana. **32** Naxan jɔxɔ Alatala yɛɛ ra yi, a yi na liga alo a benbane a liga kii naxan yi. **33** Misiran Mangan Neko yi yɔlɔnxɔnna sa a ma Ribila taani, Xamata yamanani, alogo a nama fa mangayaan liga Yerusalɛn yi mume, a yi mudu gbɛti fixɛn kilo wuli saxan kɛmɛ naanin nun xɛmaan kilo tonge saxan nun naanin sa yamanan fari. **34** Misiran mangan Neko yi Yosiya dii xɛmɛna Eliyakimi dɔxɔ mangan na a fafe jɔxɔni, a yi a xinla masara a Yehoyakimi. A yi Yehowaxasi suxu, a siga a ra Misiran yi, a sa faxa dɛnaxan yi. **35** Yehoyakimi yi gbɛtin nun xɛmaan so Misiran mangan yii, koni a yi mudu gbɛtin maxili yamanan na, fata Misiran mangana yamarin na, yamanan yamaan birin lan a xa gbɛtin nun xɛmaan naxan ba a na fala, a lan a xa naxan so Misiran mangan Neko yii. **36** Yehoyakimi findi mangan na a jɛɛ mɔxɔjɛn nun suulunden nan ma, a yi jɛɛ fu nun keden ti mangayani Yerusalɛn yi. A nga yi xili Sebuda, Pedayaa dii tɛmɛna, keli Ruma taani. **37** Naxan jɔxɔ Alatala yɛɛ ra yi, a yi na liga alo a benbane a liga kii naxan yi.

24 Babilɔn Mangan Nebukadanesari so yɛngɛni Yehoyakimi waxatin nin. Yehoyakimi yi lu Nebukadanesari a nɔɔn bun jɛɛ saxan, koni a mɔn murute nen Nebukadanesari xili ma. **2** Nayi, Alatala yi Babilɔn kaane ganla rasiga a xili ma, e nun Arami kaane nun Moyaba kaane nun Amonine ganle, a yi ne birin nasiga Yuda xili ma a kaladeni, fata Alatalaa falan na a naxan ti a walikene xɔn, nabine. **3** Na fata Alatalaa yamarin nan tun na, naxan yi waxi Yuda ba feni a yetagi Manase a yulubine fe ra. **4** Manase bata yi sɔntare wuyaxi faxa, a yi Yerusalɛn rafe a fe jɔxine ra. Alatala mi wa a mafelu feni mumɛ! **5** Yehoyakimi kɛwali dɔnxɛne, a naxanye birin liga, ne sebɛxi Yuda mangane taruxu kedine kui. **6** Yehoyakimi yi faxa.

A dii xemen Yoyakin yi ti a jɔxɔni mangayani. 7 Misiran mangan mi fa mini a yamanani, bayo Babilɔn mangan bata yi a bɔxɔn birin tongo keli Misiran baani han sa dɔxɔ Efirati baan na. 8 Yoyakin findi mangan na a jɛɛ fu nun firinden nan ma, a kike saxan ti mangayani Yerusalɛn yi. A nga yi xili Nexusuta, Yerusalɛn kaana Elanatan ma dii tɛmɛna. 9 Naxan jaxu Alatala yɛɛ ra yi, a yi na liga alo a benbane a liga kii naxan yi. 10 Na waxatini, Babilɔn mangan Nebukadanesari a walikene yi siga Yerusalɛn xili ma, e yi taan nabilin yengeni. 11 Babilɔn mangan Nebukadanesari yetɛn yi fa taan yetagi, a walikene yi na yenge. 12 Nayi, Yuda mangan Yoyakin yi siga, a sa a yetɛ dentɛgɛ Babilɔn mangan xa, e nun a nga nun a walikene nun a mangane nun a kuntigine. Yoyakin a mangayaan jɛɛ solomasɛxɛdeni, Babilɔn mangan yi a suxu. 13 Nebukadanesari yi nafunla birin ba Alatala Batu Banxini e nun manga banxin nafunle, Isirayila mangan Sulemani xɛma goronna naxanye birin nafala Alatala banxini, a ne kala, alo Alatala a falaxi kii naxan yi. 14 Nebukadanesari yi Yerusalɛn kaane birin xali suxuni, kuntigine nun sofane, e birin malanxina muxu wuli fu sa yiirawanle nun xabune birin fari. A yiigelitɔne nan tun lu yamanani. 15 Nebukadanesari yi Yoyakin xali Babilɔn yi, a yi mangana nga suxu Yerusalɛn yi siga Babilɔn yi e nun mangana jaxanle nun a kuntigine nun a yamanan muxu gbeene. 16 Babilɔn mangan mɔn yi sofa kendene birin xali konyiyani Babilɔn yi, muxu wuli solofere e nun yiirawanle nun xabune, muxu wuli keden. 17 Babilɔn mangan yi Yoyakin sɔxɔ Matani findi mangan na a jɔxɔni, a naxan xili masara a Sedeki. 18 Sedeki findi mangan na a jɛɛ mɔxɔjɛn nun kedenden nan ma, a yi jɛɛ fu nun keden ti mangayani Yerusalɛn yi. A nga yi xili nɛn Xamutali, Yɛrɛmi a dii tɛmɛna, Libina kaana. 19 Naxan jaxu Alatala yɛɛ ra yi, a yi na liga alo Yehoyakimi a liga kii naxan yi. 20 Na liga Alatala xɔlɔn nan ma fe ra Yerusalɛn nun Yuda xili ma, a yi waxi naxanye ba feni a yetagi. Sedeki fan yi murute Babilɔn mangan xili ma.

25 Sedeki a mangayaan jɛɛ solomanaaninden kike fuden xi fude lɔxɔni, Babilɔn mangan Nebukadanesari nun a ganla birin yi fa Yerusalɛn xili ma, a yi daaxadeni tɔn a yetagi, e yi yire makantanxine ti a rabilinna birin yi. 2 E lu taan yengɛ han Manga Sedeki a mangayaan jɛɛ fu nun kedendena. 3 Na jɛɛn

kike naaninden xi solomanaaninde lɔxɔni, kamɛn yi gbo ayi taani, donse mi yi fa yamanan muxune yii. 4 Nayi, Babilɔn ganla yi taan yinna yirena nde rabira. Kɛɛn na, hali Babilɔn kaane to yi taan nabilinxi, Yuda sofane birin yi e gi, e dangu taa makantan yin firinne longonna ra, e sa mini taan so dɛɛn na mangana nakɔɔn dɛxɔn. Sofane yi e gi, e nun mangan yi siga Araba tonbonna lantaan mabinni. 5 Koni, Babilɔn sofa ganla yi mangan sagatan, e sa a li Yɛriko mɛrɛmɛrɛne yi, a ganla birin yi xuya ayi, e yi e masiga a ra. 6 E yi mangan suxu, e siga a ra Babilɔn mangan fɛma Ribila taani, e yi sa a makiti mɛnni. 7 E Sedeki a diine kɔɛ raxaba a yetagi, e mɔn yi Sedeki yɛɛne sɔxɔnjɛ ayi, e yi a xidi sula yɔlɔnxɔnna ra, e siga a ra Babilɔn yi. 8 Kike suulunden xi soloferede lɔxɔni, Babilɔn mangan Nebukadanesari a mangayaan jɛɛ fu nun solomanaaninden ma, mangan kantan muxune xunna Nebusaradan, Babilɔn mangana kuntigina nde yi so Yerusalɛn yi. 9 A yi tɛn so Alatala Batu Banxin na e nun mangana banxin nun Yerusalɛn banxine birin. A yi banxi kendene birin gan. 10 Babilɔn sofa ganla naxan birin yi mangan kantan muxune xunna fɔxɔ ra, ne yi Yerusalɛn yinne kala. 11 Muxu dɔnxɛn naxanye yi luxi taani, mangan kantan muxune xunna Nebusaradan yi ne xali konyiyani, naxanye bata yi e yetɛ sa Babilɔn mangan sagoni e nun yama dɔnxɛna. 12 Koni mangan kantan muxune xunna yi yiigelitɔna ndee lu yamanani alo manpa bili siine nun xɛɛ biine. 13 Sula senbetɛnna naxanye yi Alatala Batu Banxini, Babilɔn kaane yi ne kala, e nun ige maxali wontorone nun ige ramara se sula daxi gbeena, e yi siga na sulan na Babilɔn yi. 14 E yi tundene nun tɛɛ kɔ seene nun lɛnpu ratu seene nun se sa lefane birin tongo e nun wali se sula daxin naxanye birin yi rawalima Ala Batu Banxini. 15 Mangan kantan muxune xunna mɔn yi wusulan gan seene nun wuli xuya goronne tongo, xɛma daxine nun gbɛti fixɛ daxine birin. 16 Senbetɛn firinna nun ige ramara se gbeɛn nun ige maxali wontorone Sulemani naxanye rafala Alatala Batu Banxin xa, ne birin sula daxin nan yi a ra naxanye binyen xasabin mi yi nɔɛ yate. 17 Senbetɛn kedenna yi mate nɔngɔnna yɛ fu nun solomasɛxɛ, kondɛn yi a xunna, naxan yi mate nɔngɔnna yɛ saxan, a kondɛn yi rayabuxi sula yɔlɔnxɔn yalane nun girenada wudi bogi sawura sula daxine nan na. Senbetɛn firinden fan yi na kii nin e nun a rayabu kiina. 18 Mangan kantan muxune xunna yi saraxarali kuntigin Seraya suxu, e

nun saraxarali firinden Sofoni nun deen kantan muxu saxanne. **19** A yi sofa kuntigina nde suxu e nun xeme suulun mangana muxune ye naxanye yi taani, e nun sofa kuntigina sebeli tiina, naxan yi sofa nenene xinle sebema, e nun Yuda kaane muxu tonge senninna naxanye yi taani. **20** Mangan kantan muxune xunna Nebusaradan yi e tongo, a siga e ra Babilon mangan fema Ribila taani. **21** Babilon Mangan yi yamarin fi, e yi e faxes Ribila taani Xamata yamanani. Yuda kaane siga konyiyani na kii nin, e makuya e yamanan na. **22** Babilon mangan Nebukadanesari yi Yuda yamanan muxu donxene sa Gedali a yamarin bun ma, Axikan ma dii xemena, Safan mamandenna. **23** Sofa kuntigine nun e sofane birin to na me, a Babilon mangan bata Gedali findi yamana kanna ra, e yi siga Gedali fema Misipa taani, Netaniyaa dii xemen Yisimayeli nun Kareyaa dii xemen Yoxanan nun Tanxumeti a dii xemen Seraya Netofa kaan nun Maka kaana dii xemen Yaasaniya, e nun e ganle. **24** Gedali yi a kolɔ e nun e ganle xa, a naxa, “E nama gaxu sese ra Babilon kaane kuntigine fe ra, e lu yamanani, e wali Babilon mangan xa, e herin sotoma nen.” **25** Koni, jeeen kike soloferedeni, Netaniyaa dii xemen Yisimayeli, Elisama mamandenna, mangan xabilan muxuna nde, na yi fa, muxu fu biraxi a foxɔ ra, e yi Gedali faxes, e nun Yuda kaane nun Babilon kaan naxanye yi a fema Misipa taani. **26** Nayi, yamanan muxune birin, yiigelitɔne nun nafulu kanne, e nun sofa kuntigine yi keli, e siga Misiran yi, bayo e yi gaxuxi Babilon kaane yee ra. **27** Yuda mangan Yoyakin suxun jee tonge saxan e nun soloferedeni, Babilon mangana Ewili-Merodaki a mangayaan jee folɔni, a yi hinan Yuda mangan Yoyakin na, a yi a ramini kasoon na, na jeeen kike fu nun firinden xi mɔxɔjɛn nun soloferede lɔxɔni. **28** A yi fala faɛin ti a xa. Mangan bonna naxanye yi a fema Babilon yi, a yi a tiden mate ne birin xa. **29** A yi a kasorasa dugine masara, Yoyakin yi a dege mangana tabanla ra a siimayaan birin yi. **30** A makoon yi seen naxanye ma lɔxɔ yo lɔxɔ, mangan yi lu ne soe a yii a siimayaan birin yi.

Taruxune Singena

1 Adama nan Seti soto. Seti yi Enosi soto. Enosi yi Kenan soto. **2** Kenan yi Mahalaleli soto. Mahalaleli yi Yaredi soto. **3** Yaredi yi Xenoki soto. Xenoki yi Matusela soto. Matusela yi Lameki soto. **4** Lameki yi Nuhan soto. Nuhan yi Semi nun Xami nun Yepeti soto. **5** Yepeti a diine xinle ni itoe ra: Gomere nun Magogo nun Madayi nun Yawani nun Tubali nun Meseki nun Tirasi. **6** Gomere a diine xinle ni itoe ra: Asikenasi nun Rifati nun Togarama. **7** Yawani a diine xinle ni itoe ra: Elisaha nun Tarasisi nun Sipiri nun Rodanimi. **8** Xami a diine xinle ni itoe ra: Kusi nun Misiran nun Puti nun Kanan. **9** Kusi a diine xinle ni itoe ra: Seba nun Xawila nun Sabata nun Raama nun Sabiteka. Raama diini itoe nan soto: Saba nun Dedan. **10** Kusi yi Nimirodi bari. Na findi yengeso belebelen nan na dunya yi. **11** Misiran yi diine soto naxanye findixi Ludu kaane nun Anami kaane nun Lehaba kaane nun Nafatu kaane nun **12** Patirusu kaane nun Kasaluxu kaane nun Kafatoro kaane ra. Filisitine benbane nan Kafatoro kaane ra. **13** Kanan yi a dii singen Sidon soto e nun gbete ye naxanye findixi Xitine nun **14** Yebusu kaane nun Amorine nun Girigasane nun **15** Xiwine nun Arakane nun Sini kaane nun **16** Arawada kaane nun Semara kaane nun Xamata kaane ra. **17** Semi a diine xinle ni itoe ra: Elan nun Asuri nun Arapaxadi nun Ludu e nun Arami. Arami a diine ni i ra: Yusu nun Xulu nun Geteri e nun Meseki. **18** Arapaxadi yi Selaxa soto. Selaxa yi Eberi soto. **19** Eberi yi dii xeme firin soto. Keden xili Pelegi bayo dunya yitaxun a waxatin nin. A xunyen xili Yokatan. **20** Yokatan ma diine ni i ra: Alomodadi nun Selefa nun Xasaramaweti nun Yera nun **21** Hadoran nun Yusali nun Dikila nun **22** Ebalu nun Abimaye le nun Saba nun **23** Ofiri nun Xawila nun Yobabo. Yokatan ma diine nan ne ra. **24** Semi yi Arapaxadi soto. Arapaxadi yi Selaxa soto. **25** Selaxa yi Eberi soto. Eberi yi Pelegi soto. Pelegi yi Rewu soto. **26** Rewu yi Serugu soto. Serugu yi Nahori soto. Nahori yi Tera soto. **27** Tera yi Iburama soto naxan findixi Iburahima ra. **28** Iburahima yi Isiyaga nun Sumayila soto. **29** Sumayilaa dii singen yi xili nen Nebayoti. Kedari nun Adibeli nun Mibisan nun **30** Misema nun Duma nun Masa nun Xadada nun Tema nun **31** Yeturi nun Nafisi nun Kedema, Sumayilaa diine nan yi ne fan na. **32** Iburahima a konyi jaxanla Keturaa dii xemene xinle ni itoe ra a naxanye bari Iburahima xa: Simiran

nun Yokan nun Medan nun Midiyan nun Yisebaki nun Suwa. Yokan yi Saba nun Dedan soto. **33** Midiyan yi Efa nun Efere nun Xanoki nun Abida nun Elida soto. Keturaa diine nan e birin na. **34** Iburahima yi Isiyaga soto. Isiyaga yi Esayu nun Isirayila soto. **35** Esayu a diine xinle ni itoe ra: Elifasi nun Reyuli nun Yewusi nun Yalami nun Kora. **36** Elifasi a diine xinle ni itoe ra: Teman nun Omaru nun Sefo nun Gatami nun Kenasi nun Timina nun Amaleki. **37** Reyuli a diine xinle ni itoe ra: Naxati nun Sera nun Sama nun Misa. **38** Seyiri a diine xinle ni itoe ra: Lotan nun Sobali nun Sibeyon nun Ana nun Dison nun Eseri nun Disan. **39** Lotan yi Xori nun Homami soto. Lotan magilen yi xili nen Timina. **40** Sobali yi Aliyan nun Manaxati nun Ebalu nun Sefi nun Onan soto. Sibeyon yi Aya nun Ana soto. **41** Ana yi Dison soto. Dison yi Xamaran nun Eseban nun Itiran nun Keran soto. **42** Eseri yi Bilihan nun Saawan nun Yaakan soto. Disan yi Yusu nun Aran soto. **43** Mangane nan itoe ra naxanye yi Edon yamanan xun na benun Isirayila kaane xa mangan soto waxatin naxan yi. Beyori a diin Bela yi findi manga singen na, naxan ma taan yi xili Dinhaba. **44** Bela to faxa, Seraa diin Yobabo, Bosara kaan yi findi mangan na. **45** Yobabo to faxa, Xusama, naxan yi kelixi Teman yamanani, na yi findi mangan na. **46** Xusama to faxa, Bedadaa diin Xadada yi findi mangan na. A tan nan Midiyan kaane na Moyaba boxoni. A taan yi xili nen Abiti. **47** Xadada to faxa, Masareka kaan Samala yi findi mangan na. **48** Samala to faxa, Sayuli yi findi mangan na, naxan yi kelixi Rehoboti taani baan de. **49** Sayuli to faxa, Akibori a diin Baali-Xanan yi findi mangan na. **50** Baali-Xanan to faxa, Xadada yi findi mangan na. A taan yi xili nen Pawu. A jaxanla yi xili nen Mehetabeli, Matiredi a dii temena, Mesahabi mamandenna. **51** Xadada to faxa, muxuni itoe nan findi Edon mangane ra: Manga Timina nun Manga Aliwa nun Manga Yeteti nun **52** Manga Yoholibama nun Manga Ela nun Manga Pinon nun **53** Manga Kenasi nun Manga Teman nun Manga Mibisari nun **54** Manga Magadiyeli nun Manga Irami. Ne nan yi Edon mangane ra.

2 Isirayilaa diine xinle ni itoe ra: Ruben nun Simeyon nun Lewi nun Yuda nun Isakari nun Sabulon nun **2** Dan nun Yusufu nun Bunyamin nun Nafatali nun Gadi nun Aseri. **3** Yuda a diine xinle ni itoe ra: Eri nun Onan nun Selaxa. Kanan kaa jaxanla nde nan

na dii saxanne bari a xa, Suyaa dii temena. Yudaa dii singena Eri yi fe jaxin liga Alatala yee ra yi. A yi a faxesa na ma. 4 Yuda mamuxun Tamari yi Peresi nun Sera bari a xa. Yuda dii suulun soto na kii nin. 5 Peresi yi Xesiron nun Xamuli soto. 6 Sera yi dii suulun soto: Simiri nun Etani nun Heman nun Kalikoli nun Dara. 7 Karimi yi Akan soto, naxan tinxintareyaan liga Isirayila ra, a to se ratonxine tongo. 8 Etani yi Asari soto. 9 Xesiron yi Yerameeli nun Rami nun Kalebi soto. 10 Rami yi Aminadabo soto. Aminadabo yi Naxason soto, naxan findi Yuda bonsonna kuntigin na. 11 Naxason yi Salimon soto. Salimon yi Boosu soto. 12 Boosu yi Obedi soto. Obedi yi Yese soto. 13 Yese a dii xemene xinle ni itoe ra: Eliyabi nan yi a dii singen na, a firindena Abinadabo, a saxandena Simeya, 14 a naanindena Nataneli, a suulundena Radayi, 15 a sennindena Osemi, a soloferedena Dawuda. 16 Yese a dii temene xinle ni itoe ra: Seruya nun Abigayili. Seruya yi dii xeme saxan soto: Abisayi nun Yowaba nun Asaheli. 17 Abigayili yi Amasa soto Yeteri xa, naxan fataxi Sumayila bonsonna ra. 18 Xesiron ma diin Kalebi a jaxanle Asuba nun Yeriya, ne yi diini itoe bari Kalebi xa: Yesere nun Sobaba nun Aradon. 19 Asuba to faxesa, Kalebi yi Efarata doko, a yi Xuru bari a xa. 20 Xuru yi Yuri soto. Yuri yi Besaleli soto. 21 Donxen na, Xesiron to jee tonge sennin soto, a yi Galadi benban Makiri a dii temen doko, a yi a kolon jaxanla ra. E yi Segubu soto. 22 Segubu yi Yayiri soto, naxan findi taa monnen nun saxan xun na Galadi yamanani. 23 Koni, Gesuri kaane nun Arami kaane yi Yayiri taane tongo e nun Kenata taan nun a rabilinne, e birin malanxina taa tonge sennin. Makiri yixetene nan ne birin na, naxan Galadi masege. 24 Xesiron to faxesa Kalebi-Efarata taani, a jaxanla Abiya yi Asexuri bari a xa, naxan Tekowa taan masege. 25 Xesiron ma dii singen Yerameeli a diine ni i ra: a dii singen Rami nun Buna nun Oreni nun Osemi nun Axiya. 26 Yerameeli a jaxalan bodena Atara yi Onan bari. 27 Yerameeli a dii singen Rami a diine xinle ni itoe ra: Masi nun Yamin nun Ekeri. 28 Onan yi Samayi nun Yada soto. Samayi yi Nadaba nun Abisuri soto. 29 Abisuri a jaxanla Abixali yi Axaban nun Molidi soto. 30 Nadaba yi Seleda nun Apayimi soto. Seleda yi faxesa diitareyani. 31 Apayimi yi Yisi soto. Yisi yi Sesan soto. Sesan yi Axalayi soto. 32 Samayi xunyen Yada yi Yeteri nun Yonatan soto. Yeteri yi faxesa diitareyani. 33 Yonatan yi Peleti nun Sasa soto. Yerameeli yixetene

nan ne ra. 34 Sesan mi dii xeme yo soto fo dii temene. A konyi xemene Misiran kaan yi xili nen Yara. 35 Sesan yi a dii temen fi a konyi xemene Yara ma. A yi Atayi bari a xa. 36 Atayi yi Natan soto. Natan yi Sabadi soto. 37 Sabadi yi Efilali soto. Efilali yi Obedi soto. 38 Obedi yi Yehu soto. Yehu yi Asari soto. 39 Asari yi Xeleli soto. Xeleli yi Eleyasa soto. 40 Eleyasa yi Sisimayi soto. Sisimayi yi Salun soto. 41 Salun yi Yekamiya soto. Yekamiya yi Elisama soto. 42 Yerameeli xunyen Kalebi a dii singen yi xili Mesa. Mesa yi Sifi nun Maresa soto, naxan findixi Xebiron kaane benban na. 43 Xebiron yi Kora nun Tapuwa nun Rekemi nun Sema soto. 44 Sema yi Raxami soto. Raxami yi Yorekami soto. Rekemi yi Samayi soto. 45 Samayi yi Mayon soto. Mayon yi Beti-Suru soto. 46 Kalebi a konyi jaxanla Efa yi Xarani nun Mosa nun Gasesi bari a xa. Xarani yi Gasesi soto. 47 Yadayi a diine xinle ni itoe ra: Regemi nun Yotami nun Gesana nun Peleti nun Efa nun Saafi. 48 Kalebi a konyi jaxanla Maka yi Seberi nun Tirana bari a xa. 49 Maka mon yi Madamanna fafe Saafi bari e nun Sewa, Makabena nun Gibeya fafe. Kalebi a dii temen yi xili Akasa. 50 Kalebi yixete gbeteye nan itoe fan na. A jaxanla Efarataa dii singen Xuru a diine ni i ra: Sobali naxan Kiriya-Yeyarin taan masege, 51 Salima naxan Betelemi taan masege e nun Xarefi naxan Beti-Gaderi taan masege. 52 Sobali naxan Kiriya-Yeyarin taan masege, na yixetene ni i ra: Harowe nun Menuhoti kaane foxo kedenna nun 53 Kiriya-Yeyarin xabilan muxun naxanye findixi Yitirine nun Putine nun Sumane nun Miserayine ra. Ne nan findixi Sora taan muxune nun Esetayoli taan muxune ra. 54 Salima yixetene ni i ra: Betelemi kaane nun Netofa kaane nun Atiroti-Beti-Yowaba kaane nun Manaxati kaane foxo kedenna nun Sorine nun 55 sebelitine xabilan naxanye yi doki Yabesa taani e nun Tiratine nun Simeyatane nun Sukatine. Kenine nan ne ra, naxanye fataxi Xamati ra, Rekabu a denbayaan benbana.

3 Dawuda diin naxanye bari Xebiron taani, ne ni i ra. A dii singen yi xili nen Aminon, naxan nga yi findixi Yeserele kaana Axinowami ra. A dii firinden yi xili Daniyeli, naxan nga yi Karemele kaana Abigayili ra. 2 A saxanden yi xili Abisalomi, naxan nga yi findixi Gesuri taan Manga Talamayi a dii temen Maka ra. A naaninden yi xili Adoniya, naxan nga yi findixi Xagiti ra. 3 A suulunden yi xili Sefati, naxan nga yi findixi Abitali ra. A senninden yi xili Yitireyami,

naxan nga yi Egela ra. **4** Dii senninni itoe barixi Xebiron taan nin Dawudaa mangayaan naba denaxan yi jɛɛ solofere kike sennin. A yi mangayaan naba Yerusalem taani jɛɛ tonge saxan jɛɛ saxan. **5** Amiyeli a dii temen Batiseba dii naaninni itoe nan sɔto Dawuda xa Yerusalem yi: Simeya nun Sobaba nun Natan nun Sulemani. **6** Dawuda mɔn dii xɛmɛ solomanaanin gbeteɛ sɔto nɛn: Yibixari nun Elisuwa nun Elifeleti nun **7** Noga nun Nefegi nun Yafiya nun **8** Elisama nun Eliyada nun Elifeleti. **9** Dawudaa dii xɛmene nan ne ra. Konyi jaxanle diin naxanye bari a xa, ne mi ne yɛ. Tamari nan yi e magilen na. **10** Sulemani nan Robowan sɔto. Robowan yi Abiya sɔto. Abiya yi Asa sɔto. Asa yi Yosafati sɔto. **11** Yosafati yi Yehorami sɔto. Yehorami yi Axasiya sɔto. Axasiya yi Yowasa sɔto. **12** Yowasa yi Amasiya sɔto. Amasiya yi Asari sɔto. Asari yi Yotami sɔto. **13** Yotami yi Axasi sɔto. Axasi yi Xesekiya sɔto. Xesekiya yi Manase sɔto. **14** Manase yi Amɔn sɔto. Amɔn yi Yosiya sɔto. **15** Yosiya a dii singen findi Yoxanan nan na, a dii firindena, Yehoyakimi, a saxandena, Sedeki, a naanindena, Salun. **16** Yehoyakimi yi Yoyakin nun Sedeki sɔto. **17** Yoyakin naxan suxu konyiyani, na diine ni i ra: Selatili nun **18** Malakirami nun Pedaya nun Senasari nun Yekamiya nun Hosama nun Nedabiya. **19** Pedaya yi Sorobabeli nun Simeyi sɔto. Sorobabeli yi Mesulan nun Xananiya sɔto. Selomiti nan yi e magilen na. **20** Pedaya mɔn yi dii suulun gbeteɛ sɔto: Xasuba nun Oheli nun Bereki nun Xasadiya nun Yusabi-Xeseda. **21** Xananiya yixetene ni i ra: Pelati nun Yesaya nun Refayaa diine nun Aranan ma diine nun Abadi a diine nun Sekani a diine. **22** Sekani dii senninni itoe nan sɔto: Semaya nun Xatusi nun Yigali nun Bariya nun Nayaraya nun Safati. **23** Nayaraya dii saxanni itoe nan sɔto: Eliyowenayi nun Xisikiya nun Asirikami. **24** Eliyowenayi dii solofereni itoe nan sɔto: Hodafiya nun Eliyasibi nun Pelaya nun Akubu nun Yoxanan nun Delaya nun Anani.

4 Yuda yixetene ni i ra: Peresi nun Xesirɔn nun Karimi nun Xuru nun Sobali. **2** Sobali a diin Reyaya yi Yaxati sɔto. Yaxati yi Axumayi nun Lahadi sɔto. Sorane xabilane fataxi ne nan na. **3** Yesereli nun Yisema nun Yidibasi nan Etami taan masege. E magilen yi xili Haselelaponi. **4** Penuyeli nan Gedori taan masege. Xuru a diina Eseri nan Xusa taan masege. Efarataa dii singen Xuru nan Betelemi taan masege.

5 Asexuri yi Tekowa taan masege, jaxalan firin yi naxan yii, Xela nun Nara. **6** Nara yi Axusami nun Xeferi nun Temeni nun Axasetari bari a xa. **7** Xela yi Sereti nun Soxara nun Etenani **8** nun Kosi bari a xa. Kosi yi Anubi nun Sobeba sɔto, e nun Harumi a dii Axaraxeli xabilane. **9** Yabesa yi binyen sɔto dangu a ngaxakedenne ra. A nga a xili sa nɛn Yabesa bayo a naxa, “N bata a xali tɔroni.” **10** Yabesa yi Isirayilaa Ala maxandi, a naxa, “Yandi, n baraka! I yi n ma bɔxɔn fari sa. I senben xa lu n xɔn, i n natanga tɔron ma alogo fe xɔlen nama n sɔto.” Ala yi a duban yabi. **11** Suxa ngaxakedenne Kelubu yi Mexiri sɔto. Mexiri yi Eseton sɔto. **12** Eseton yi Beti-Rafa nun Paseya nun Texinna sɔto. Texinna nan Naxasa taan masege. Ne findixi Reka kaane nan na. **13** Kenasi yi Otiniyeli nun Seraya sɔto. Otiniyeli yi Xatati nun Meyonotayi sɔto. **14** Meyonotayi yi Ofara sɔto. Seraya yi Yowaba sɔto, yiirawanle benbana, naxanye yi dɔxi Yiirawanle Lanbanni. **15** Yefune a diin Kalebi yi Iru nun Ela nun Nami sɔto. Ela yi Kenasi sɔto. **16** Yehaleleli a diine ni i ra: Sifi nun Sifa nun Tiriya nun Asareli. **17** Esiraa diine ni i ra: Yeteri nun Meredi nun Efere nun Yalon. Meredi a jaxanla nde yi Mariyama nun Samayi nun Yiseba bari. Yiseba nan Esitemowa taan masege. **18** Misiran mangana dii temen Biti naxan yi dɔxi Meredi xɔn ma, na nan na diine bari. Meredi mɔn yi Yahudiya jaxanla nde dɔxo, na diine ni i ra: Yaredi naxan Gedori taan masege e nun Xeberi naxan Soko taan masege e nun Yekutiyeleli naxan Sanowa taan masege. **19** Hodiya jaxanla naxan findixi Naxami magilen na, na yixetene yi findi Garimi kaane ra naxanye yi dɔxi Keyila taani e nun Maka kaan naxanye yi dɔxi Esitemowa taani. **20** Simon ma diine ni i ra: Aminon nun Rinna nun Ben-Xanan nun Tilon. Yisi a diine ni i ra: Soxeti nun Ben-Soxeti. **21** Yudaa diin Selaxa yixetene ni i ra: Eri naxan Leka taan masege, e nun Laada naxan Maresa taan masege, e nun xabilan naxanye yi dugi sɔxɔnne ra Beti-Asibeya yi, e nun **22** Yokimi nun Koseba kaane nun Yowasa nun Sarafa naxan yi Moyaba nun Yasubi-Lexemi xun na. Fe fonne nan ne ra. **23** Ne yixetene yi findi feɛ rafalane ra mangan xa Netayimi nun Gedera taane yi. **24** Simeyon yixetene ni i ra: Nemuweli nun Yamin nun Yaribi nun Sera nun Sayuli. **25** Sayuli yi Salun sɔto. Salun yi Mibisan sɔto. Mibisan yi Misema sɔto. **26** Misema yi Xamuweli sɔto. Xamuweli yi Sakuru sɔto. Sakuru yi Simeyi sɔto. **27** Simeyi yi dii xɛmɛ fu nun sennin

soto e nun dii teme sennin. A ngaxakedenne mi dii wuyaxi soto. E xabilan muxune mi wuya ayi alo Yuda bõnsõnna muxune. 28 E yi dõxi taani itoe nin: Beriseba nun Molada nun Xasari-Suwali nun 29 Bila nun Esemi nun Toladi nun 30 Betuyeli nun Xoroma nun Sikilaga nun 31 Beti-Marakaboti nun Xasari-Susimi nun Beti-Biri nun Saarayimi. E yi lu na taane yi han Dawudaa mangayaan waxatini. 32 E mōn dõxō nen taa suulun gbete ye yi: Etami nun Ayin nun Rimōn nun Token nun Asan 33 e nun e rabilinne siga han Baalati taani. E dõxōdene nun e benbane nan ne ra naxanye sebexi e bõnsõn kedin kui. 34 Simeyōn bõnsõnna xabilane kuntigine xinle ni itoe ra: Mesobabo nun Yameleki nun Amasiyaa diin Yosahi nun 35 Yoweli nun Yosibiya a diin Yehu, Seraya mamandenna, Asiyeli tolobitana, e nun 36 Eliyowenayi nun Yaakoba nun Yesohaya nun Asaya nun Adiyeli nun Yesimiyeli nun Benaya nun 37 Sifeyi a diin Sisa. Alon nan Sifeyi soto. Yedaya nan Alon soto. Simiri nan Yedaya soto. Semaya nan Simiri soto. 38 Xabilane kuntigine nan ne ra. E denbayane gbo ayi nen han! 39 E yi siga han Gedori taan lanbanna sogeteden binna balo yire fendeni e xuruseene xa. 40 E sa sexe yire fajine to mēnni xuruseene xa. Na bõxōne yi gbo, bõjē xunbenla na. Xami bõnsõnna muxuna ndee yi na nun. 41 Muxun naxanye xinle sebe itoe ra, ne nan siga Yuda Manga Xesekiyaa waxatini, e sa Xami bõnsõnna muxune nun Meyunin bõnsõnna muxune banxine birin kala, e yi e raxōri alogo e xa dõxō na, balo fajin yi denaxan yi e xuruseene xa. 42 Simeyōn bõnsõnna muxu keme suulun yi siga Seyiri geya yireni. E yēratine yi findixi Yisi a diine nan na: Pelati nun Neyaraya nun Refaya nun Yusiyeli. 43 E yi sa Amaleki dõnxene faxa, naxanye e gi yengen bun. E dõxi mēnni han to.

5 Ruben nan findi Isirayila dii singen na, koni e nun a fafe a jaxanla nde bata yi kafu, nanara dii singe tiden yi ba a yii, a so Isirayilaa diin Yusufu a diine yii. Na nan a liga, e a foriya tiden ba a yii bõnsõn kedin ma. 2 Yuda senben soto nen a ngaxakedenne tagi, a yixetena nde yi findi mangan na, koni dii singe tiden lu nen Yusufu yii. 3 Isirayilaa dii singen Ruben yi Xanōki nun Palu nun Xesirōn nun Karimi soto. 4 Yoweli yi Semaya soto. Semaya yi Gogo soto. Gogo yi Simeyi soto. 5 Simeyi yi Mike soto. Mike yi Reyaya soto. Reyaya yi Baali soto. 6 Baali yi Bēera soto. Asiriya Mangan Tigilati-Pilesere yi Ruben bõnsõn

xunna Bēera suxu konyiyani. 7 Bera ngaxakedenne ni i ra xabila yēen ma alo e xinle sebexi e bõnsõn kedin kui kii naxan yi: e kuntigin Yeyiyeli nun Sakari nun 8 Asasi a diin Bela, Sema mamandenna, Yoweli tolobitana. E yi dõxi Aroyeri nin siga han Nebo geyaan na sa dõxō Baali-Meyōn na. 9 Sogeteden binni, e yi siga, e sa dõxō tonbonna dēxōn han Efirati xuden na. Bayo e xuruseene bata yi wuya ayi e yii Galadi yamanani. 10 Ruben bõnsõnna yi Hagarine yenge Manga Soli waxatini, e yi e nō, e yi dõxō e banxine yi Galadi yamanan sogeteden binni. 11 Gadi bõnsõnna muxune yi dõxi Ruben bõnsõnna muxune nan dēxōn ma Basan yamanani siga han Salaka taana. 12 Yoweli nan yi e kuntigi singen na Basan yamanani, a firindena, Safami. Na xanbi ra, Yanayi nun Safati. 13 E ngaxakedenne muxu solofere ni i ra denbaya yēen ma: Mikeli nun Mesulan nun Seeba nun Yorayi nun Yakan nun Siya nun Eberi. 14 Abixali a diine nan ne ra. Xuri nan Abixali soto. Yarowa nan Xuri soto. Galadi nan Yarowa soto. Mikeli nan Galadi soto. Yesisayi nan Mikeli soto. Yado nan Yesisayi soto. Busi nan Yado soto. 15 Abidiyeli a diina Axi, Guni mamandenna yi findi e xabilane xunna ra. 16 Gadi bõnsõnna muxune yi dõxi Galadi yamanan nun Basan yamanan nun e rabilinne nin siga han Sarōn danna. 17 Muxuni itoe xinle yi sebexi e bõnsõn kedin kui Yuda Manga Yotami nun Isirayila Manga Yerobowan waxatini. 18 Ruben bõnsõnna muxune nun Gadi bõnsõnna muxune nun Manase bõnsõnna muxune fõxō kedenna, ne sofane xasabin lan muxu wuli tonge naanin wuli naanin keme solofere tongo sennin nan ma. E birin yi fatan yenge sodeni. Yē masansan wure lefaan nun silanfanna nun xanla yi e birin yii. 19 E yi Hagarine nun Yeturine nun Nafisine nun Nodabone yenge. 20 E yi Ala maxandi yengeni, a yi e mali, e yi Hagarine nun e xōyine birin nō. Ala yi e xuiin name bayo e yi e yigi saxi a tan nin. 21 E yi e yaxune xuruseene suxu, jōgōme wuli tonge suulun nun yexēen nun sii wuli keme firin wuli tonge suulun, e nun sofali wuli firin. E yi muxu wuli keme fan suxu. 22 E yi e yaxu wuyaxi faxa bayo na yengen yi kelixi Ala nan ma. E yi lu dõxi na han Isirayila yamaan suxu konyiyani waxatin naxan yi. 23 Manase bõnsõnna fõxō kedenna yi dõxi yamanani keli Basan yamanan ma siga han Baali-Xerimon taana, Seniri geyaan san bun, denaxan mōn xili Xerimon geyana. E yi wuya han! 24 E denbayane xunne ni i ra: Efere nun Yisi nun Eliyeli nun Asiriyeli nun Yereimi nun Hodafiya nun

Yaxadiyeli. Sofa kendene nan yi na denbaya xunne ra e nun xili kanne. **25** Koni, e yi tinxintareyaan liga e benbane Ala ra, e yi Ala yanfa men kaane alane xon Ala bata yi muxun naxanye raxori e yee ra, feen naxan yi luxi alo yalunyana Ala yetagi. **26** Nayi, Isirayilaa Ala yi Asiriya Manga Puli radin e ma naxan mon xili Tigilati-Pilesere. E yi fa Ruben bonsonna nun Gadi bonsonna nun Manase bonsonna foxo kedenna suxu konyiyani. A yi siga e ra Xala nun Xabori nun Hara yi Gosan baan de, e mon denaxanye yi han to.

6 Lewi yi Gerison nun Kehati nun Merari soto. **2** Kehati yi Amirama nun Yisehari nun Xebiron nun Yusiyele soto. **3** Amirama yi dii xeme firin soto, Haruna nun Musa e nun dii teme keden, Mariyama. Haruna yi Nadaba nun Abihu nun Eleyasari nun Itamara soto. **4** Eleyasari yi Finexasi soto. Finexasi yi Abisuwa soto. **5** Abisuwa yi Buki soto. Buki yi Yusi soto. **6** Yusi yi Seraxaya soto. Seraxaya yi Merayoti soto. **7** Merayoti yi Amari soto. Amari yi Axituba soto. **8** Axituba yi Sadoki soto. Sadoki yi Aximaasi soto. **9** Aximaasi yi Asari soto. Asari yi Yoxanan soto. **10** Yoxanan yi Asari soto, naxan findi saraxaraliin na Ala Batu Banxini Yerusalem yi Sulemani naxan ti. **11** Asari yi Amari soto. Amari yi Axituba soto. **12** Axituba yi Sadoki soto. Sadoki yi Salun soto. **13** Salun yi Xiliki soto. Xiliki yi Asari soto. **14** Asari yi Seraya soto. Seraya yi Yehosadaki soto. **15** Alatala to Yuda nun Yerusalem kaane rasiga konyiyani Nebukadanesari xon, Yehosadaki fan yi suxu. **16** Lewi yi Gerison nun Kehati nun Merari soto. **17** Gerison yi Libini nun Simeyi soto. **18** Kehati yi Amirama nun Yisehari nun Xebiron nun Yusiyele soto. **19** Merari yi Maxali nun Musi soto. Lewi xabilane benbane ni i ra: **20** Gerison xabilani: Gerison yi Libini soto. Libini yi Yaxati soto. Yaxati yi Sima soto. **21** Sima yi Yowa soto. Yowa yi Yido soto. Yido yi Sera soto. Sera yi Yeyaterayi soto. **22** Kehati xabilani: Kehati yi Aminadabo soto. Aminadabo yi Kora soto. Kora yi Asiri soto. **23** Asiri yi Elikana soto. Elikana yi Ebiyasafi soto. Ebiyasafi yi Asiri soto. **24** Asiri yi Taxati soto. Taxati yi Yuriyele soto. Yuriyele yi Yusiya soto. Yusiya yi Sayuli soto. **25** Elikana xabilani: Elikana yi Amasayi nun Aximoti **26** nun Elikana soto. Elikana yi Sofayi soto. Sofayi yi Naxati soto. **27** Naxati yi Eliyabi soto. Eliyabi yi Yeroxama soto. Yeroxama yi Elikana soto. Elikana yi Samuyeli soto. **28** Samuyeli a diine ni i ra: a dii singena Yoweli e nun Abiya. **29** Merari xabilani: Merari yi Maxali soto. Maxali yi Libini

soto. Libini yi Simeyi soto. Simeyi yi Wusa soto. **30** Wusaha yi Simeya soto. Simeya yi Xagiya soto. Xagiya yi Asaya soto. **31** Dawuda yi Lewi bonsonna muxuna ndee doxo beti ba kuntigine ra Alatala Batu Banxini Layiri Kankiraan fa menni waxatin naxan yi. **32** Ne nan yi betine bama Ala Batu Bubun yetagi, Naralan Bubuna han Manga Sulemani Alatala Batu Banxin ti Yerusalem yi waxatin naxan yi. E yi e wanla kema alo e yi yamarixi e ma kii naxan yi. **33** Na beti baane nun e diine xinle ni itoe ra: Kehati xabilani: Yoweli nan beti baan Heman soto. Samuyeli nan Yoweli soto. **34** Elikana nan Samuyeli soto. Yeroxama nan Elikana soto. Eliyeli nan Yeroxama soto. Towa nan Eliyeli soto. **35** Sufi nan Towa soto. Elikana nan Sufi soto. Maxati nan Elikana soto. Amasayi nan Maxati soto. **36** Elikana nan Amasayi soto. Yoweli nan Elikana soto. Asari nan Yoweli soto. Sofoni nan Asari soto. **37** Taxati nan Sofoni soto. Asiri nan Taxati soto. Ebiyasafi nan Asiri soto. Kora nan Ebiyasafi soto. **38** Yisehari nan Kora soto. Kehati nan Yisehari soto. Lewi nan Kehati soto. Isirayila nan Lewi soto. **39** Heman mali muxun naxan yi tixi a yiifanna ma, na yi findixi Asafi nan na. Bereki nan Asafi soto. Simeya nan Bereki soto. **40** Mikeli nan Simeya soto. Baaseya nan Mikeli soto. Malakiya nan Baaseya soto. **41** Etini nan Malakiya soto. Sera nan Etini soto. Adaya nan Sera soto. **42** Etani nan Adaya soto. Sima nan Etani soto. Simeyi nan Sima soto. **43** Yaxati nan Simeyi soto. Gerison nan Yaxati soto. Lewi nan Gerison soto. **44** Naxan kelixi Merari xabilan nin, na yi tixi a komenna nan ma. A yi xili Etani. Kisi nan Etani soto. Abidi nan Kisi soto. Maluku nan Abidi soto. **45** Hasabi nan Maluku soto. Amasiya nan Hasabi soto. Xiliki nan Amasiya soto. **46** Amasi nan Xiliki soto. Bani nan Amasi soto. Semeri nan Bani soto. **47** Maxali nan Semeri soto. Musi nan Maxali soto. Merari nan Musi soto. Lewi nan Merari soto. **48** E ngaxakedenne Lewi bonsonni, ne yi Ala Batu Bubun wanla bonne nan kema Alaa banxini. **49** Haruna nun a diine nan yi saraxa gan daxine bama saraxa ganden fari, e mon yi wusulanna fan ganma saraxan na wusulan saraxa ganden fari. E yi na wanle birin kema yire sarijanxi fisamantenna nin Ala solona feen na Isirayila kaane xa, alo Alaa walikeen Musa a yamari kii naxan yi. **50** Haruna yixetene ni i ra: Haruna yi Eleyasari soto. Eleyasari yi Finexasi soto. Finexasi yi Abisuwa soto. **51** Abisuwa yi Buki soto. Buki yi Yusi soto. Yusi yi Seraxaya soto. **52** Seraxaya yi Merayoti soto. Merayoti

yi Amari soto. Amari yi Axituba soto. **53** Axituba yi Sadaki soto. Sadaki yi Aximaasi soto. **54** E taane xinle ni itoe ra Haruna yixeten naxanye yi Kehati xabilani, ne dexo denaxanye yi. E singe nan boxon soto bayo masensenna e tan nan singe suxu. **55** Xebiron nun a xuruse rabadene yi findi e gbeen na Yuda boxon ma, **56** koni Xebiron xeene nun a banxidene yi findi Yefune a diin Kalebi gbeen na. **57** Harunaa diine yi Xebiron soto, naxan findi marakisi taana nde ra, e nun Libina nun a rabilinne nun Yatiri nun Esitemowa nun a rabilinne, e nun **58** Xilen nun Debiri nun e rabilinne nun **59** Asan nun Beti-Semesi nun e rabilinne. **60** Lewi bonsonna taan naxanye soto Bunyamin bonsonna boxoni, ne ni i ra: Gabayon nun Geba nun Alemeti nun Anatoti nun e rabilinne. E yi taa fu nun saxanni itoe yitaxun e xabilane ra. **61** Kehati yixeten bonne yi taa fu soto masensenna xon Efirami bonsonna boxon nun Dan bonsonna boxon nun Manase bonsonna foxo kedenna boxoni. **62** Gerison yixetene yi taa fu nun saxan soto e xabila yeen ma Isakari bonsonna boxon nun Aseri bonsonna boxon nun Nafatali bonsonna boxon nun Manase bonsonna foxo kedenna boxoni naxan yi Basan yamanani. **63** Merari yixetene yi taa fu nun firin soto masensenna xon Ruben bonsonna boxon nun Gadi bonsonna boxon nun Sabulon bonsonna boxoni. **64** Isirayila kaane taane nun e rabilinne fi Lewi bonsonna ma na kii nin. **65** E na taane fi e ma masensenna nan xon naxanye yi Yuda nun Simeyon nun Bunyamin bonsonne boxone yi. **66** Kehati xabilan bonne yi taane soto Efirami bonsonna boxoni. **67** E yi marakisi taan Siken fi e ma Efirami geya yireni, e nun Geseri nun **68** Yokemen nun Beti-Xoron nun e rabilinne, e nun **69** Ayalon nun Gati-Rimon nun e rabilinne. **70** E yi Aneri nun Bileyami nun e rabilinne soto Manase bonsonna foxo kedenna boxoni. Kehati xabilan bonne taane nan ne ra. **71** Gerison yixetene taane ni i ra: Golan nun a rabilinna Basan yamanani, e nun Asataroti nun a rabilinna Manase bonsonna foxo kedenna boxoni. **72** E taan naxanye soto Isakari bonsonna boxoni, ne ni i ra: Kedesi nun Daberati nun **73** Ramoti nun Anemi nun e rabilinne. **74** E taan naxanye soto Aseri bonsonna boxoni, ne ni i ra: Masala nun Abadon nun **75** Xukoku nun Rexobo nun e rabilinne. **76** E taan naxanye soto Nafatali bonsonna boxoni, ne ni i ra: Kedesi taan Galile boxoni, e nun Xamon nun Kiriyatayimi nun e rabilinne. **77** Lewi bonsan donxene, Merari yixetene taane ni i ra:

Rimono nun Taboro nun e rabilinne Sabulon bonsonna boxoni. **78** E taan naxanye soto Ruben bonsonna boxoni Yuruden kidi ma Yeriko sogeteden binni, ne ni i ra: Beseri tonbonni e nun a rabilinne nun Yahasi nun **79** Kedemoti nun Mefaati nun e rabilinne. **80** E taan naxanye soto Gadi bonsonna boxoni, ne ni i ra: Ramoti nun a rabilinne Galadi boxoni e nun Maxanayin nun **81** Xesibon nun Yaaseri nun e rabilinne.

7 Isakari dii naanin nan soto: Tola nun Puwa nun Yasubu nun Simiron. **2** Tolaa diine ni i ra: Yusi nun Refaya nun Yeriyele nun Yamayi nun Yibisami nun Samuyeli. Muxuni itoe nan findi e xabila xunne ra. Sofa kenden muxu wuli moxojen nun firin keme sennin nan xili yi sebexi e bonsan kedin ma Manga Dawudaa waxatini. **3** Yusi yi Yisiraxiya soto. Yisiraxiyaa diine ni i ra: Mikeli nun Abadi nun Yoweli nun Yisiya. Muxu suulunni itoe findi xabila xunne nan na. **4** Sofa kenden muxu wuli tonge saxan muxu wuli sennin nan yi e xabilani e bonsan kedin kui, bayo e jaxanle nun e diine yi wuya han! **5** Isakari xabilane birin yi, sofa wuli tonge solomasexe wuli solofere nan xili yi sebexi e bonsan kedin ma. **6** Bunyamin yi Bela nun Bekeru nun Yediyayeli soto. **7** Belaa dii suulunne ni i ra: Esibon nun Yusi nun Yusiyele nun Yerimoti nun Yiri. Xabila xunne nan yi e ra. Sofaan muxu wuli moxojen nun firin tonge saxan e nun naanin nan xili yi sebexi e bonsan kedin ma. **8** Bekeru a diine ni i ra: Semira nun Yowasa nun Eliyeseri nun Eliyowenayi nun Omiru nun Yeremoti nun Abiya nun Anatoti nun Alemeti. Bekeru a diine nan yi ne ra, **9** e denbayane xunne nan yi e birin na. Sofaan muxu wuli moxoje muxu keme firin nan xili yi sebexi e bonsan kedin ma. **10** Yediyayeli yi Bilihan soto. Bilihan ma diine ni i ra: Yewusi nun Bunyamin nun Ehudu nun Kenan nun Satan nun Tarasisi nun Axisaxari. **11** Yediyayeli a diine birin findi e denbayane xunne nan na. Sofaan muxu wuli fu nun solofere muxu keme firin nan xili yi sebexi e bonsan kedin ma. **12** Yiri yi Supimi nun Xupimi soto. Axeri yi Xusimi soto. **13** Nafatali yi Yaxaseeli nun Guni nun Yeseri nun Salun soto. Nafatali nga yi xili nen Bila. **14** Manase a diine ni i ra: Asireli nun Makiri. Manase a konyi jaxanla Arami kaan nan ne bari a xa. Makiri yi Galadi soto. **15** Makiri yi jaxanla fen Xupimi nun Supimi muxune ye. Makiri magilen yi xili nen Maka. Manase a diin boden yi xili nen Selofexadi, a dii temene nan tun soto. **16** Makiri a jaxanla Maka

yi diin bari, a yi a xili sa Peresa. A xunyen yi xili Seresi. Peresa yi Yulami nun Rekemi soto. 17 Yulami yi Bedani soto. Galadi a diine nan ne ra, Makiri a diina, Manase mamandenna. 18 Galadi magilen Hamoleketi yi Isihodi nun Abiyeseri nun Maxala bari. 19 Semida yi Axiyani nun Siken nun Likixi nun Aniyama soto. 20 Efirami yixetene ni i ra: Efirami yi Sutela soto. Sutela yi Bereda soto. Bereda yi Taxati soto. Taxati yi Eleyada soto. Eleyada yi Taxati soto. 21 Taxati yi Sabadi soto. Sabadi yi Sutela soto. Gati kaane yi Efirami a dii firin gbete ye faxa, Eseri nun Eleyadi, e to siga Gati kaane xuruseene mujadeni. 22 E fafe Efirami yi sunu e faxa feen na waxati xunkuye. A kon kaane yi fa a madenden. 23 Na xanbi ra, a yi a jaxanla kolon jaxanla ra, a jaxanla yi fudikan. A to diin bari, a yi a xili sa Beri ya bayo a denbayaan yi tɔrɔxi. 24 Efirami yi dii temen soto, a yi a xili sa Seera. Beti-Xoron taan naxan गयाan fari e nun naxan lanbanni, Seera yi ne ti e nun Yuseni-Seera taana. 25 Beri ya yi Refa soto. Refa yi Resefa soto. Resefa yi Tela soto. Tela yi Taxani soto. 26 Taxani yi Ladana soto. Ladana yi Amixudi soto. Amixudi yi Elisama soto. 27 Elisama yi Nunu soto. Nunu yi Yosuwe soto. 28 E yi dɔxɔ Beteli yi e nun a banxidɛn naxanye yi a rabilinx, e nun Naran taan sogeteden binni nun Geseri nun a banxidene sogegododen binni, e nun Siken nun a banxidene siga han Aya nun a banxidene. 29 Manase bɔnsɔnna taane ni i ra: Beti-Seyan nun Taanaki nun Megido nun Dɔrɔ nun e banxidene. Isirayilaa diin Yusufu yixetene dɔxi na taane nin. 30 Aseri yi Yimina nun Yisiwa nun Yisiwi nun Beri ya soto. E magilen yi xili Sera. 31 Beri ya yi Xeberi nun Malikili soto. Malikili nan Birisayiti taan masege. 32 Xeberi yi Yefeleti nun Someri nun Xotami soto. E magilen yi xili Suya. 33 Yefeleti yi Pasaki nun Bimali nun Asefati soto. Yefeleti a diine nan ne ra. 34 Semeri yi Axi nun Roga nun Xuba nun Arami soto. 35 Semeri xunyen Helemi a diine ni i ra: Sofaxa nun Yimena nun Selesi nun Amali. 36 Sofaxaa diine ni i ra: Suwa nun Xaraneferi nun Suwali nun Beri nun Yimira nun 37 Beseri nun Hodo nun Samima nun Silesa nun Itiran nun Beera. 38 Yeteri yi Yefune nun Pisepa nun Ara soto. 39 Yula yi Ara nun Xaniyeli nun Risiya soto. 40 Aseri a diine nan ne birin na, denbaya xunne, muxu gbeene, sofa kendene, kuntigi fajine. Sofaan muxu wuli mɔxɔɲɛn nun sennin nan xili yi sebexi e bɔnsɔn kedin kui.

8 Bunyamin ma diine ni i ra: a dii singena Bela, a firindena Asibeli, a saxandena Axara, 2 a naanindena Noxa, a suulundena Rafa. 3 Bela a diine ni i ra: Adari nun Gera nun Abihudi nun 4 Abisuwa nun Naman nun Axowa nun 5 Gera nun Sefufani e nun Xurami. 6 Denbaya xunne Ehudu yixetene ye Geba taani naxanye kedi, e siga Manaxati yi, ne xinle ni itoe ra: 7 Naman nun Axiya nun Gera. Gera nan ti e yee ra, a yi Yusa nun Axixudi soto. 8 Saxarayin yi a me a jaxalan firinne ra, Xusimi nun Baara. Na xanbi ra, a yi diine soto Moyaba yamanani. 9 A jaxanla Xodesi a diine ni i ra: Yobabo nun Sibiya nun Mesa nun Malakama 10 nun Yewusi nun Sakiya nun Mirima. A diine nan ne ra naxanye findi denbaya xunne ra. 11 A jaxanla Xusimi yi Abitubu nun Elipaali bari a xa. 12 Elipaali a diine ni i ra: Eberi nun Misami nun Semedi, naxan Ono nun Lodi nun e banxidene ti, e nun 13 Beri ya nun Sema naxanye findi denbaya xunne ra Ayalon taani, e yi Gati kaane kedi. 14 Beri ya a diine ni i ra: Axiyo nun Sasaki nun Yeremoti nun 15 Sebadiya nun Aradi nun Ederi nun 16 Mikeli nun Yisepa nun Yoxa. 17 Elipaali a diine ni i ra: Sebadiya nun Mesulan nun Xisiki nun Xeberi nun 18 Yisemerayi nun Yisiliya nun Yobabo. 19 Simeyi a diine ni i ra: Yakimi nun Sikiri nun Sabidi nun 20 Eliyenayi nun Siletayi nun Eliyeli nun 21 Adaya nun Beraya nun Simirati. 22 Sasaki a diine ni i ra: Yisepan nun Eberi nun Eliyeli nun 23 Abadon nun Sikiri nun Xanan nun 24 Xananiya nun Elan nun Anatotiya nun 25 Yifideya nun Penuyeli. 26 Yeroxamaa diine ni i ra: Sameserayi nun Sexaraya nun Atali nun 27 Yaaresiya nun Eli nun Sikiri. 28 Denbaya xunne nan yi ne birin na naxanye xili yi sebexi e bɔnsɔn kedin kui. Ne yi dɔxi Yerusalen taan nin. 29 Yeyiyeli yi dɔxi Gabayon taan nin a denaxan masege. A jaxanla yi xili nen Maka. 30 A diine ni i ra: a dii singena Abadon nun Suru nun Kisu nun Baali nun Neri nun Nadaba nun 31 Gedori nun Axiyo nun Sekeri nun 32 Mikiloti, naxan findi Simeya fafe ra. E fan yi dɔxi Yerusalen taan nin e kon kaane tagi. 33 Neri yi Kisu soto. Kisu yi Soli soto. Soli yi Yonatan nun Maliki-Suwa nun Abinadabo nun Esibaali soto. 34 Yonatan yi Meribaali soto. Meribaali yi Mike soto. 35 Mike yi Piton nun Meleki nun Tareya nun Axasi soto. 36 Axasi yi Yehowada soto. Yehowada yi Alemeti nun Asamaweti nun Simiri soto. Simiri yi Mosa soto. 37 Mosa yi Bineya soto. Bineya yi Rafaha soto. Rafaha yi Eleyasa soto. Eleyasa yi Aseli soto. 38 Aseli a dii

senninne xinle ni itoe ra: Asirikami nun Bokeru nun Yisimayeli nun Seyari nun Abadi nun Xanan. Aseli a dii xemene nan ne birin na. **39** Aseli xunyena Esekaa diine ni i ra: a dii singena Yulami, a firindena Yewusi e nun a saxandena Elifeleti. **40** Sofa kenden nan yi Yulami a diine ra. E yi fatan xalimakunla wolc. E diine nun mamandenne yi wuya han muxu keme tonge suulun. Bunyamin bõnsõnna muxune nan yi ne birin na.

9 Isirayila kaane birin xinle yi sebexi e bõnsõn kedin ma Isirayila Mangane Kedin kui. Yuda bõnsõnna muxune bata yi xali konyiyani Babilon yamanani fata e tinxintareyaan na. **2** Naxanye singe xete e dõxõdeni e konne yi, Isirayila kaana ndee nan yi ne ra, e nun saraxaraline nun Lewi bõnsõnna muxune nun Ala Batu Banxin walikene. **3** Muxuna ndee Yuda nun Bunyamin nun Efirami nun Manase bõnsõnne yi, ne yi fa dõxõ Yerusalen taani. **4** Amixudi nan Yutayi sõtõ. Omiri nan Amixudi sõtõ. Yimiri nan Omiri sõtõ. Bani nan Yimiri sõtõ Peresi xabilani Yuda bõnsõnni. **5** Silo kaan naxanye yi dõxi Yerusalen yi, ne ni i ra: Asaya, dii singena, e nun a diine. **6** Sera xabilan muxun naxan dõxõ na, na ni i ra: Yeweli. Yuda bõnsõnna muxu keme sennin tonge solomanaanin nan yi dõxi Yerusalen yi. **7** Bunyamin bõnsõnna muxun naxanye yi dõxi na, ne ni i ra: a singena Salu. Mesulan nan Salu sõtõ. Hodafiya nan Mesulan sõtõ. Hasenuwa nan Hodafiya sõtõ. **8** E nun Yibineya, Yeroxamaa diina. E nun Ela, Yusi a diina. Mikiri nan Yusi sõtõ. E nun Mesulan. Sefati nan Mesulan sõtõ. Reyuli nan Sefati sõtõ. Yibiniya nan Reyuli sõtõ. **9** Bunyamin bõnsõnna muxune lan muxu keme solomanaanin tonge suulun e nun sennin nan ma naxanye yi sebexi e bõnsõn kedin kui. Denbaya xunne nan yi xemeni itoe birin na. **10** Saraxaraliin naxanye yi dõxi Yerusalen yi, ne ni i ra: Yedaya nun Yehoyaribu nun Yakini nun **11** Asari. Xiliki nan Asari sõtõ. Mesulan nan Xiliki sõtõ. Sadõki nan Mesulan sõtõ. Merayoti nan Sadõki sõtõ. Axituba nan Merayoti sõtõ. Axituba nan yi Alaa banxin wanla xun na. **12** Adaya fan yi na. Yeroxama nan Adaya sõtõ. Pasaxuri nan Yeroxama sõtõ. Malakiya nan Pasaxuri sõtõ. Masayi nan Malakiya sõtõ. Adiyeli nan Masayi sõtõ. Yasera nan Adiyeli sõtõ. Mesulan nan Yasera sõtõ. Mesilemiti nan Mesulan sõtõ. Imeri nan Mesilemiti sõtõ. **13** Saraxaraliin naxanye yi dõxi Yerusalen yi, ne denbaya xunne lanxi muxu wuli

keden keme solofere tonge sennin nan ma. Alaa banxin walike kenden nan yi e birin na. **14** Lewi bõnsõnna muxun naxanye yi dõxi Yerusalen yi, ne ni i ra: Xasubu a diin Semaya, Asirikami mamandenna, Merari kaan Hasabi tolobitana, **15** e nun Bakibakari nun Xeresi nun Galali nun Mikaa diin Matani, Sikiri mamandenna, Asafi tolobitana, **16** e nun Semayaa diin Abadi, Galali mamandenna, Yedutun tolobitana, e nun Asaa diin Bereki, Elikana mamandenna, naxan yi Netofa banxidene yi. **17** Ala Batu Banxin so dëen kantan muxune ni i ra: Salun, naxan yi e xun na e nun Akubu nun Talamõn nun Aximan nun e ngaxakedenne. **18** Salun yi Mangan So Dëen kantanma Ala Batu Banxini sogeteden mabinni han to. Lewi bõnsõnna daaxaden kantan muxune nan yi e benbane ra nun. **19** Kore a diin nan yi Salun na. Ebiyasafi nan Kore sõtõ. Kora nan Ebiyasafi sõtõ. Salun nun a ngaxakedenne nan yi Ala batu bubun dëene kantanma alo e benbane yi Alatalaa yamaan daaxaden kantanma kii naxan yi. **20** Eleyasari a diin Finexasi nan yi so dëen kantan tiine xunna ra a singeni nun. Alatala yi a xõn. **21** Naralan Bubun so dëen kantan muxun nan yi Meselemiyaa diin Sakari ra nun. **22** Muxu keme firin muxu fu nun firin nan sugandi kantan tiine ra. Ne nan xili sebexi e bõnsõn kedin ma e taane yi. Dawuda nun fe toon Samuyeli nan na lannaya wanla so e benbane yii. **23** E tan nun e diine nan yi Alatala batuden so dëene kantanma naxan mõi yi xili Ala Batu Bubuna. **24** A so dëen kantan muxuna ndee yi tixi a sogeteden nun a sogegõdõden nun a kõmenna nun a yiifanna ma. **25** E ngaxakedenna naxanye yi e taane yi, ne yi fama e malideni yeyc xii solofere. **26** Anu, Lewi bõnsõnna muxu naaninna naxanye yi so dëen kantan ti kuntigine ra, ne yi Alaa banxin nafunla ramaradene nan kantanma. **27** E yi xima Alaa banxin nabilinna nin alogo e xa menna makantan, e yi a so dëene rabi xõtõnni. **28** Saraxa raba seene kantan tiine nan yi ndee ra e yc Ala Batu Banxini, e tan nan yi e yatema e nema rasoc e nun e nema e raminc. **29** Ndee yi se dõnxene marama yire sarijanxini, e nun murutu fupin nun manpaan nun turen nun wusulanna nun latikõnõnna. **30** Saraxaraline nan yi latikõnõnne basanma. **31** Salun ma dii singen Matitiya, Lewin naxan keli Kora xabilani, na nan yi burun ganma naxan yi bama saraxan na. **32** E ngaxakedenna ndee Kehati xabilani, ne nan yi burun dõxõma tabanla fari Matabu Lõxõne birin yi. **33** Lewi denbaya xunna naxanye yi betin bama, ne yi

dəxə Ala Batu Banxin kui. Wali gbete yo mi yi e ma, bayo e yi walima waxatin birin kœen nun yanyina. **34** Lewi denbaya xunne nan yi ne ra, naxanye xinle yi sebexi e bõnsõn kedin kui. E yi dõxi Yerusalen nin. **35** Yeyiyeli yi dõxi Gabayon taan nin a denaxan masege. A jaxanla yi xili nen Maka. **36** A diine ni i ra: a dii singena Abadon nun Suru nun Kisu nun Baali nun Neri nun Nadaba nun **37** Gedori nun Axiyo nun Sakari nun Mikiloti. **38** Mikiloti yi Simeyami soto. E yi dõxi e kon kaane nan dexõn ma Yerusalen yi. **39** Neri yi Kisu soto. Kisu yi Sõli soto. Sõli yi Yonatan nun Maliki-Suwa nun Abinadabo nun Esibaali soto. **40** Yonatan yi Meribaali soto. Meribaali yi Mike soto. **41** Mike yi Piton nun Meleki nun Tareya nun Axasi soto. **42** Axasi yi Yara soto. Yara yi Alemeti nun Asamaweti nun Simiri soto. Simiri yi Mosa soto. **43** Mosa yi Bineya soto. Bineya yi Refaya soto. Refaya yi Eleyasa soto. Eleyasa yi Aseli soto. **44** Aseli a dii senninne ni i ra: Asirikami nun Bokeru nun Yisimayeli nun Seyari nun Abadi nun Xanan. Aseli a diine nan yi ne ra.

10 Filisistine yi Isirayila yenge. Isirayila kaane yi e gi, e wuyaxi yi faxa Gilibowa गयाan fari. **2** Filisistine yi xaje ayi Sõli nun a diine xili ma. E yi Sõli a dii xemene faxa, Yonatan nun Abinadabo nun Maliki-Suwa. **3** Yengen yi wolon Sõli rabilinni, xali wonle yi a li, a yi gaxu e yee ra han! **4** Sõli yi a fala a yenge so se maxanla xa, a naxa, “I ya silanfanna tongo, i yi n faxa, bayo n mi waxi Ala kolontareni itoe xa n tõe, e yi n faxa.” Koni a yenge so se maxanla yi tondi, bayo a yi gaxuxi han! Nayi, Sõli yi a silanfanna tongo a sõiõn a de. **5** Sõli a yenge so se maxanla to a to faxaxi, a fan yi sõiõn a silanfanna de, e birin yi faxa. **6** Sõli nun a dii xeme saxanne nun a denbayaan birin faxa e bode xõn ma na kii nin. **7** Isirayila kaan naxanye yi lanbanni, ne yi a to a Isirayila ganla yi a gima e nun Sõli nun a diine bata yi faxa. E yi e taane rabepin, e yi e gi. Filisistine yi fa dõxõ na. **8** Na xõtõn bode, Filisistine yi fa binbine yii seene tongodeni, e yi Sõli nun a diine binbine to biraxi Gilibowa गयाan fari. **9** E yi a yii seene birin tongo, e yi Sõli xunna nun a yenge so seene xali. E yi na xibaru nasiga Filisistine yamanan birin yi, e suxure batudene nun e yamani. **10** E yi Sõli a yenge so seene sa e alane batu banxin kui. E yi a xunna singan e ala Dagon batu banxin kui. **11** Yabesi-Galadi kaane to a me Filisistine feen naxanye birin ligaxi Sõli ra, **12** e xeme senbeman birin yi keli,

e Sõli nun a diine binbine tongo. E yi xete e ra, e sa e xõnne maluxun kondan bun Yabesi yi. Yabesi kaane yi sunna suxu xii solofere. **13** Sõli faxa a tinxintareyaan nan ma Alatala mabinni. A mi Alatalaa falan suxu, a sa muxuna nde maxõdin naxan falan tima barinne ra. **14** A mi Alatala maxõdin. Na ma, Alatala yi a faxa, a yi Sõli a mangayaan fi Yese a diin Dawuda ma.

11 Isirayila kaane birin yi fa Dawuda fema Xebiron taani, e yi a fala a xa, e naxa, “En wuli keden fasa keden. **2** Waxati danguxine yi, hali Manga Sõli a waxatini, i tan nan yi Isirayila sofa gali xunna ra. Alatala, i ya Ala yi a fala i xa, a naxa, ‘I tan nan findima n ma yamana Isirayila kantan muxun na, i findi e yeeratiin na.’” **3** Isirayila fõnne birin yi fa mangan fema Xebiron yi. Dawuda yi layirin tongo e xa Alatala yetagi. E yi turen sa a xunni a dõxõ feen na Isirayila mangan na, alo Alatala a fala Nabi Samuyeli xa kii naxan yi. **4** Manga Dawuda nun Isirayila kaane yi siga Yerusalen taani, naxan mõi yi xili Yebusu. Yebusune yi dõxi na nin. **5** E yi a fala Dawuda xa, e naxa, “I mi soe be.” Koni, Dawuda yi Siyon taa makantanxin masoto, a naxan xili sa Dawudaa Taana. **6** Dawuda bata yi a fala, a naxa, “Naxan singen na Yebusune yenge, n na kanna findima nen sofa mangan na.” Seruyaa diin Yowaba nan singe yengen so, a yi findi sofa mangan na. **7** Dawuda yi dõxõ taa makantanxini, nanara e yi mõi xili sa a Dawudaa Taana. **8** Dawuda yi menna nun na rabilinna ti keli Milo gbingbinna ma han sa dõxõ yinna ra. Yowaba fan yi taan dõnxeni tõi. **9** Dawuda senben yi gbo, bayo Alatala Senben Birin Kanna yi a xõn. **10** Dawudaa sofa wekilexine kuntigine ni i ra, naxanye yi a malima Isirayila birin mangayaan fendeni, alo Alatala bata yi a fala kii naxan yi. **11** Dawudaa sofa wekilexine ni i ra: Xakimoni xabilan muxuna nde Yasobeyami, naxan findi e xunna ra. A bata yi muxu keme saxan faxa tanban na yenge kedenni. **12** A firinden findi Axoxi xabilan muxuna nde Dodo a diina Eleyasari nan na. A yi sofa wekilexi saxanne ye. **13** A tan nan Dawuda mali Filisistine yengedeni Pasi-Damimi yi. Sofane bata yi e gi Filisistine bun nun. Funde xee na nde yi na, **14** Eleyasari nun a sofane Filisistine yenge menni. Alatala yi no gbeen fi Isirayila yamaan ma. **15** Sofa wekilexi tonge saxanne muxu saxan yi siga Dawuda fema Adulan faran yireni. Anu, Filisistine yi tixi Refa lanbanni. **16** Na waxatini, Dawuda yi dõxi yire makantanxini, Filisiti ganla nde

fan yi dōxi Betelemi yi. 17 Dawuda yi a waxōn fena nde fala, a naxa, “Ige ramara yinla naxan Betelemi so dēen na, nde nōe fē na igen na, a fa a so n yii, n yi n min?” 18 Na sofa wekilexi saxanne yi dangu Filisistine naninna ra. E sa igen ba ige ramara yinla ra Betelemi so dēen na. E to fa na ra Dawuda xōn, a yi tondi a minjē. A yi a bōxōn saraxan na Alatala xa. 19 A yi a fala, a naxa, “Ala xa n natanga igeni ito minna ma. A luxi nēn alo muxune wunla, naxanye sigaxi igeni ito badeni, e lu sayaan dē.” Na ma, a yi tondi ige minjē. A sofa wekilexi saxanne na nan liga. 20 Yowaba tada Abisayi nan yi na senbema saxanne xunna ra. Na nan xēmē kēmē saxan faxa a tanban na yengeni. Xili kanna nan yi a ra alo na sofa senbema saxanne. 21 A binyen sōto nēn dangu ne ra, koni a mi e yē hali a to yi findixi e mangan na. 22 Benaya, Kabaseeli kaana, Yehoyadaa dii xemena, sofa wekilexi gbeen nan yi na ra, naxan kabanako fe wali wuyaxi kē. A tan nan Moyaba sofa wekilexi firinne faxa. Lōxōna nde, xunbēli gbeen yi godon waxatin naxan yi, a tan nan mōn godo ige ramara yinla ra, a yi yatan faxa. 23 Lōxōna nde, a yi Misiran kaa senbēmana nde faxa naxan kuyan yi sige han kanke yē firin e nun nde. Tanban yi na Misiran kaan yii naxan yi gbo alo gbindonna. Benaya yi godo a fōxō ra gbengbetenna ra a yii, a yi a tanban ba a yii, a yi a faxa a ra. 24 Yehoyadaa diin Benaya na fe gbeene nan liga. A fan xili gbeen sōto na kii nin alo na sofa wekilexi saxanne. 25 A yi binyen sōto dangu sofa wekilexi tonge saxanne ra, koni a mi yi na sofa senbema saxanne yē. Dawuda yi a findi a kantan sofane xunna ra. 26 Sofa wekilexi gbete ye ni i ra: Yowaba xunyena Asaheli nun Dodo a diina Elexanan, Betelemi kaan nun 27 Harori kaan Samoti nun Pelon kaan Xelesi nun 28 Ikese a diina Ira, Tekowa kaan nun Anatōti kaana Abiyeseri nun 29 Xusa kaan Sibekayi nun Axoxi xabilan muxuna nde llayi nun 30 Netofa kaan Maharayi nun Banahaa diin Xeleda Netofa kaan nun 31 Ribayi a diina Itayi, naxan keli Gibeya Bunyamin bōnson bōxōni nun Piraton kaan Benaya nun 32 Xurayi naxan keli Gaasa folo yireni e nun Aruba kaana Abiyeli nun 33 Baxurin kaana Asamaweti nun Saalabon kaana Eliyaba nun 34 Gison kaan Hasemi a diine nun Harara kaan Sage a diin Yonatan nun 35 Harara kaan Sakaraa diina Axiyama nun Yuru a diina Elifala nun 36 Mekera kaan Xeferi nun Pelon kaana Axiya nun 37 Karemele kaan Xesero nun Esibayi a diin Narayi nun 38 Natan

ngaxakedenna Yoweli nun Hagari a diin Mibixari nun 39 Amonin Seleki nun Beroti kaan Naxarayi, Seruyaa diin Yowabaa yenge so se maxanla nun 40 Ira nun Garebi, Yitiri xabilan muxune nun 41 Xiti kaan Yuriya nun Axalayi a diin Sabadi nun 42 Siisaa diina Adina, Ruben bōnsonna mangana, sofa tonge saxan yi naxan fōxō ra e nun 43 Makaa diin Xanan nun Mitini kaan Yosafati nun 44 Asatarōti kaan Wusiya nun Xotami a diine Saama nun Yeyiyeli, Aroyeri kaane nun 45 Simiri a diine Yediyayeli nun a xunyen Yoxa Tisi kaana e nun 46 Maxawi kaana Eliyeli nun Elinama a diine Yeribayi nun Yosawiya e nun Moyaba kaan Yitima nun 47 Eliyeli nun Obedi nun Mesoba kaan Yaasiyeli.

12 Dawuda yi luxunxi Kisu a diin Soli ma Sikilaga yi waxatin naxan yi, sofa kēndene yi fa a fōxō ra a malideni yengesodeni. 2 Bunyamin bōnsonna muxune nan yi ne ra, Soli ngaxakedenne. Ndee yi fatan xalimakunle wole, ndee yi fatan lantanne wole, e yiifanne nun e kōmēnne ra. 3 E kuntigin Axiyeseri nun a xunyen Yowasa Gibeya kaan Semaa diine nan yi ne ra. Yesiyeli nun Peleti, Asamaweti a diine, e nun Beraka nun Anatōti kaan Yehu yi sofani itoe yē e nun 4 Gabayon kaan Yisemaya naxan findi sofa gbeen na sofa wekilexi tonge saxanne yē, a fan yi findi kuntigin na e tagi. Yeremi nun Yaxasiyeli nun Yoxanan nun Gedera kaan Yosabadi nun 5 Elusayi nun Yerimoti nun Beyalaya nun Semaraya nun Xarufu kaan Sefati fan yi ne yē. 6 Kora xabilan muxune, Elikana nun Yisiya nun Asareli nun Yoweseri nun Yasobeyami fan yi e yē, 7 e nun Yeroxamaa diine Yowela nun Sebadiya keli Gedori yi. 8 Gadi bōnsonna sofana ndee fan yi siga Dawuda fema tonbonni a yire makantanxini. Sofa wekilexin nan yi ne ra, e fatan yengen soe, yē masansan wure lefane nun tanbane yi e yii. E senben yi gbo alo yatane, e yi xulun alo xenla naxanye e gima geyane fari. 9 E xinle ni itoe ra: e kuntigina Eseri, a firindena Abadi, a saxandena Eliyabi, 10 a naanindena Misemanna, a suulundena Yeremi, 11 a sennindena Atayi, a soloferedena Eliyeli, 12 a solomasexedena Yoxanan, a solomanaanindena Elesabada, 13 a fudena Yeremi, e nun a fu nun kedendena Makabanayi. 14 Gadi kaani itoe yi findixi sofa xunne nan na. Naxan yi xurun e yē, na senben yi gbo muxu kēmē xa. Naxan yi gbo e yē, na senben yi gbo muxu wuli keden xa. 15 Ne yi Yuruden xuden gidi a yi fexi waxatin naxan yi, kike singeni, e fa lanbanna muxune kedi sogeteden

nun sogegododen mabinni. **16** Bunyamin kaana ndee nun Yuda kaana ndee yi siga Dawuda fema a yire makantanxini. **17** Dawuda yi e ralan, a yi a fala e xa, a naxa, “Xa ε faxi bɔɲɛ xunbenla nin alogo ε xa fa n mali, en luma nɛn xaxili kedenni. Koni, xa ε faxi n yanfaden nin n yaxune xa, n tan naxan mi fe naxi yo ligaxi, en benbane Ala xa na to, a yi a kitin sa.” **18** Na waxatini, Alaa Nii Sarijanxin yi godo Amasayi ma, naxan yi findixi sofa tonge saxanne xunna ra. A yi a fala, a naxa, “Nxu i sagoni, Dawuda! Nxu i sagoni, Yese a diina! Ala xa bɔɲɛ xunbenla fi Dawuda ma, Ala xa bɔɲɛ xunbenla fi i ma, e nun naxanye i malima. Bayo, i ya Ala nan i malima.” Nayi, Dawuda yi e rasɛɛ, a yi tidene so e yii a sofa kuntigine yɛ. **19** Manase bɔnsɔnni sofana ndee yi fa Dawuda fema, e nun Filisitine yi sigama Sɔli yengɛdeni waxatin naxan yi. Koni, Dawuda nun a muxune mi fa Filisitine mali yengesodeni na waxatini bayo Filisiti kuntigine e raxete nɛn, e yi a fala, e naxa, “Xa Dawuda mɔn kafu a kari fonna Sɔli ma, en birin faxama nɛn.” **20** E to na fala, Dawuda yi xete Sikilaga yi. Manase muxun naxanye bata yi bira a fɔxo ra, ne xinle ni itoe ra: Adena nun Yosabadi nun Yediyayeli nun Mikeli nun Yosabadi nun Elihu nun Siletayi. Kuntigin nan yi ne birin na sofa wuli keden xun na Manase bɔnsɔnna muxune yɛ. **21** Sofa kendene nan yi ne birin na, naxanye yi Dawuda malima yenge sodeni. E yi findixi sofa kuntigine nan na a ganli. **22** Muxune yi fama nɛn Dawuda malideni lɔxo yo lɔxo. A sofa ganla gbo ayi na kii nin alo maleka ganla. **23** Sofaan yatɛni ito nan fa Dawuda fema Xebiron yi alogo e xa fa Dawuda mali, a yi findi mangan na Sɔli nɔxɔni alo Alatala bata yi a fala kii naxan yi: **24** Yuda bɔnsɔnni, sofa wuli sennin kɛmɛ solomasɛxɛ. Yɛ masansan wure lefaan nun tanban yi e birin yii. **25** Simeyɔn bɔnsɔnni, sofa wuli solofere kɛmɛ. E birin sofa kɛndɛ. **26** Lewi bɔnsɔnni, sofa wuli naanin kɛmɛ sennin, **27** e nun Yehoyada naxan findi yɛɛratiin na Haruna nɔxɔni, na nun a sofa wuli saxan kɛmɛ soloferene. **28** Sadɔki, banxulan sofa kenden nun a xabila kuntigine, muxu mɔxɔɲɛn nun firin. **29** Bunyamin bɔnsɔnni, Sɔli ngaxakedenne, sofa wuli saxan, naxanye bata yi lu Sɔli fɔxo ra han na waxatina. **30** Efirami bɔnsɔnni, sofa wuli mɔxɔɲɛ kɛmɛ solomasɛxɛ. Sofa kɛndɛ xili kanne nan yi e birin na. **31** Manase bɔnsɔnni, sofa wuli fu nun solomasɛxɛ naxanye yi sugandixi alogo e xa Dawuda dɔxo mangan na. **32** Isakari bɔnsɔnni, kuntigi kɛmɛ firin e nun e

ngaxakedenne birin e yamarin bun ma. E bata yi a kolon Isirayila yi lan a xa naxan liga na waxatini. **33** Sabulon bɔnsɔnni, sofa wuli tonge suulun naxanye yi fatan yenge sodeni yenge so seene birin na. E yi Dawuda malima e bɔɲɛn birin na. **34** Nafatali bɔnsɔnni, sofa kuntigin wuli keden, e nun sofa wuli tonge saxan e nun solofere. Yɛ masansan wure lefaan nun tanban yi ne birin yii. **35** Dan bɔnsɔnni, sofa wuli mɔxɔɲɛn nun solomasɛxɛ kɛmɛ sennin. E yenge so seene yi e yii. **36** Aseri bɔnsɔnni, sofa wuli tonge naanin. Sofa kenden nan yi e ra, yenge so seene yi e yii. **37** Sofaan naxanye keli Yurudɛn kidima sogeteden binni, Ruben nun Gadi nun Manase bɔnsɔnni yi, ne lan muxu wuli kɛmɛ wuli mɔxɔɲɛ nan ma. Yenge so seen sifan birin yi e yii. **38** Sofani itoe naxanye birin tin sigɛ yengeni, ne bata yi fa Xebiron yi alogo e xa fa Dawuda dɔxo mangan na Isirayila xun na. Sike yo mi yi e yi. Isirayila kaane birin bata yi na ragidi. **39** E yi lu menni Dawuda fema xi saxan, e yi e dege, e yi e min. E ngaxakedenne bata yi donseen nafala e xa. **40** E dɔxo bodene fan yi fa donseen na keli Isakari nun Sabulon nun Nafatali bɔxɔnɛ yi sofanle nun nɔgɔmɛnɛ nun gbaxalone nun jingene fari. E yi fa goronna sifan birin na, donseen nun murutu faɲin nun xɔdɛ xaraxine nun manpa bogin xaraxine nun manpaan nun turen nun xuruse xunxurin nun a xungbene. E yi fa a gɛgɛbe ra bayo Isirayila kaane birin yi sewaxi.

13 Dawuda yi falan ti sofa kuntigine xa naxanye yi sofa wuli nun sofa kɛmɛ xun na e nun a kuntigine birin. **2** Na xanbi ra, Dawuda yi a fala Isirayila yamaan birin xa, a naxa, “Xa na lan ε ma, xa na fataxi Alatala nan na, en ma Ala, en xɛrane rasiga en ngaxakedenne ma Isirayila bɔxɔn birin yi. En yi saraxaraline nun Lewine fan xili, naxanye Isirayila taane nun a rabilinne yi alogo en birin xa lu yire kedenni. **3** En mɔn xa fa en ma Alaa Kankiraan na en dɛxɔn, bayo Sɔli a mangayaan waxatini, en mi siga a fɔxo ra.” **4** Na yi yamaan birin kɛnɛn bayo e birin yi laxi a ra fe faɲin nan na ra. **5** Dawuda yi Isirayila kaane birin malan, keli Sixori xuden ma Misiran yamanani sa dɔxo Lebo-Xamata ra alogo e xa sa Alaa Kankiraan tongo Kiriyati-Yeyarin yi. **6** Dawuda nun Isirayila yamaan birin yi siga Baala taani Yuda yi, denaxan mɔn xili Kiriyati-Yeyarin alogo e xa sa Alaa Kankiraan tongo. Alatala gbeen nan yi na ra, Alatala naxan dɔxi maleka gubugubu kan sawurane tagi. A xinla nan na

kankiraan ma. 7 E yi Alaa Kankiraan tongo Abinadabo konni, e yi a dōxo goron maxali wontoro nenen kui. Wusa nun Axiyo nan yi na wontoron nagima. 8 Dawuda nun Isirayila kaane yi sēwa ki fāni Ala yetagi, e yi betin ba bōlōnne nun kondenne nun tanbanne nun karijanne nun xōtane ra. 9 E to lonna li Kidon yi, Wusa yi kankiraan suxu a yīin na alogo a nama bira, bayo jingen naxanye yi wontoron bandunma, ne salaxun nen. 10 Alatala yi xōlo Wusa ma, a yi a fāxa keden na, bayo a mi yi lan a xa a yīin din na kankiraan na. Wusa fāxa na kii nin Ala yetagi. 11 Dawuda yi xōlo bayo Alatala bata Wusa fāxa. Nanara, a yi mēn xili sa “Wusa halagidena” han to. 12 Na lōxōni, Dawuda yi gaxu Ala yēē ra, a yi a yete maxōdin, a naxa, “N na Alaa Kankiraan nasoma n konni di?” 13 Nayi, Dawuda mi fa kankiraan xali a konni Dawudaa Taani. A yi sa a raso Gati kaana Obedi-Edōn ma banxini. 14 Alaa Kankiraan yi lu Obedi-Edōn konni kike saxon. Na ma, Alatala yi barakan sa a seene birin yi.

14 Tire taan mangan Xurami yi xerane rasiga Dawuda ma, e nun suman wudin nun kamuderene nun gēme masonle manga banxin tideni Dawuda xa. 2 Dawuda yi a kolon a Alatala yatin nan a findixi mangan na Isirayila xun na. A a kolon, Ala luma a mangayaan yite a yamana Isirayila nan ma fe ra. 3 Dawuda yi naxalan gbete ye dōxo Yerusalen yi. A mōn yi dii xēmene nun dii tēmene sōto. 4 Naxanye sōto a xa Yerusalen yi, ne xinle ni itoe ra: Samuwa nun Sobaba nun Natan nun Sulemani 5 nun Yibixari nun Elisawa nun Elipeleti nun 6 Noga nun Nefegi nun Yafiya nun 7 Elisama nun Beeliyada e nun Elifeleti. 8 Filisitine yi a mē a Dawuda bata yi findi mangan na Isirayila birin xun na, e birin yi siga a fendeni. Dawuda yi na mē, a yi mini e yēē ra. 9 Filisitine yi fa yengeni Refa lanbanni. 10 Dawuda yi Ala maxōdin, a naxa, “N xa siga Filisitine xili ma ba? I e sōe n yii ba?” Alatala yi a yabi, a naxa, “Siga, n ne soma nen i yii.” 11 Nayi, Dawuda nun a sofane yi siga Baali-Perasimi yi, e sa Filisitine nō yengeni. Dawuda yi a fala, a naxa, “Ala bata n yaxune raxuya ayi n yēē ra, alo fufaan gbiligbinla kalan kii naxan yi.” Nanara, e mēna xili sa Baali-Perasimi. 12 Filisitine yi e suxurene rabejin mēnni, Dawuda yi yamarin fi a e xa gan. 13 Filisitine mōn yi fa yenge sodeni Refa lanbanni. 14 Dawuda mōn yi Ala maxōdin. Ala yi a yabi, a naxa, “I nama siga e yetagi, koni e mabilin, i siga han xējēxējēne sa

denaxan yi. I sa dōxo e yēē ra mēnni. 15 I na sigati xuiin mē wudine kondenne yi, i keli e yengedeni, bayo Ala nan tima i yēē ra, a Filisiti ganla nō i xa.” 16 Dawuda yi a liga alo Ala a yamari kii naxan yi. E yi Filisitine yenge keli Gabayon yi sa dōxo Geseri ra. 17 Nayi, Dawuda yi xinla sōto yamanane birin yi. Alatala yi a liga siyane birin yi gaxu Dawuda yēē ra.

15 Dawuda yi banxine ti a yete xa Dawudaa Taani. A yi yirena nde yitōn Alaa Kankiraan xa, a yi bubun ti a xa. 2 Dawuda yi yamarin fi a muxu yo nama Alaa Kankiraan maxali fō Lewi bōnsōnna muxune, bayo Alatala e tan nan sugandixi na ma. E tan nan yi lan e wali a yetagi habadan. 3 Dawuda yi Isirayila birin malan Yerusalen yi Alatalaa Kankiraan naso feen na a yireni a denaxan yitōnxi a xa. 4 Dawuda yi Haruna yixetene nun Lewi bōnsōnna muxune malan: 5 Kehati yixetene yē, muxu kēme muxu mōxōjē. Yuriyeli nan yi e xunna ra. 6 Merari yixetene yē, muxu kēme firin muxu mōxōjē. Asaya nan yi e xunna ra. 7 Gerisōn yixetene yē, muxu kēme muxu tonge saxon. Yoweli nan yi e xunna ra. 8 Elisafan yixetene yē, muxu kēme firin. Semaya nan yi e xunna ra. 9 Xebiron yixetene yē, muxu tonge solomasexē. Eliyeli nan yi e xunna ra. 10 Yusiyeli yixetene yē, muxu kēme muxu fu nun firin. Aminadabo nan yi e xunna ra. 11 Dawuda yi saraxaraline Sadōki nun Abiyatari xili, e nun Lewine Yuriyeli nun Asaya nun Yoweli nun Semaya nun Eliyeli nun Aminadabo. 12 A yi a fala e xa, a naxa, “E tan nan Lewi bōnsōn muxune denbaya xunne ra. E yete rasarijan, e tan nun e muxune. E siga Alatalaa Kankiraan na, Isirayilaa Ala. N denaxan yitōnxi a xa, e a xali mēnni. 13 Bayo e mi yi na a singeni, na ma, Alatala, en ma Ala halagin nagodo nen en ma, amasōto en mi bira a sariyan fōxo ra.” 14 Nayi, Saraxaraline nun Lewine yi e yete rasarijan benun e xa siga Alatalaa Kankiraan na, Isirayilaa Ala. 15 Lewine yi Alaa Kankiraan suxu a tongo tamine ma, e a dōxo e tungunne fari alo Musa a yamari kii naxan yi fata Alatalaa falan na. 16 Dawuda yi a fala Lewi kuntigine xa, a e xa beti baana ndee sugandi e muxune yē naxanye betin bama maxaseene ra sēwani, e kondenne nun bōlōnne nun karijanne maxa. 17 Lewine yi Yoweli a diin Heman sugandi, e nun a ngaxakedenne Bereki a diina Asafi nun Kusayaa diina Etani, naxan yi Merari yixetene yē. 18 Lewi gbete ye nan yi dē kantanne ra e tan ma yamarin bun: Sakari nun Ben nun Yasiyeli

nun Semiramoti nun Yexiyeli nun Yunni nun Eliyabi nun Benaya nun Maaseya nun Matitiya nun Elifelehu nun Mikineyahu nun Obedi-Edon e nun Yeyiyeli. 19 Heman nun Asafi nun Etani nan yi betin bama, e karijan sula daxine maxa. 20 Sakari nun Asiyeli nun Semiramoti nun Yexiyeli nun Yunni nun Eliyabi nun Maaseya nun Benaya nan yi kondenne maxama e xuini texin na. 21 Matitiya nun Elifelehu nun Mikineyahu nun Obedi-Edon nun Yeyiyeli nun Asasiya yi kondenna luti solomasexe daxine nan maxama. 22 Lewi bõnsõnna muxun Kenaniya yi findixi beti baane yeeratiin nan na Alaa Kankiraan maxalideni. A yi na wanla kolon ki fajri. 23 Bereki nun Elikana nan yi kantan tiine ra Alaa Kankiraan dexõn, 24 e nun Obedi-Edon nun Yexiya. Saraxaraline Sebaniha nun Yosafati nun Nataneli nun Amasayi nun Sakari nun Benaya nun Eliyeseri nan yi xõtane fema Alaa Kankiraan yetagi. 25 Nayi, Dawuda nun Isirayilaa fonne nun sofa kuntigin naxanye yi dõxi sofa wuli xun na, ne birin yi ti kiraan xõn alogo e xa sa Alatalaa Layiri Kankiraan mati sèwani keli Obedi-Edon konni. 26 Ala yi Lewi bõnsõnna muxune mali Alatalaa Layiri Kankiraan xalideni. E tura solofere nun yexxe kontonna solofere ba saraxan na. 27 Dawuda yi maxidixi taa dugi doma fajine nin, e nun Lewi bõnsõnna muxun naxanye yi Layiri Kankiraan maxalima e nun beti baane nun beti ba kuntigin Kenaniya. Dawuda mõn yi saraxarali domana nde fan nagodo a ma. 28 Isirayila kaane birin yi siga Alatalaa Layiri Kankiraan na sèwani. Ndee yi fenne nun xõtane fema, ndee yi karijanne maxama, ndee yi kondenne nun bõlõnne maxama. 29 Soli a dii temen Mikali yi tixi banxin foye soden na, a Isirayila kaane to fe Alatalaa Layiri Kankiraan na Dawudaa Taani. A to Manga Dawuda to a bodonje sèwani, a yi a rajaxu a bõjneni.

16 Na xanbi ra, e yi fa Alaa Kankiraan na, e fa a dõxõ bubun kui, Dawuda naxan nafalaxi a dõxõden na. E yi saraxa gan daxine nun bõje xunbeli saraxane ba Ala xa. 2 Dawuda to yelin na saraxane be, a yi duba Isirayila yamaan xa Alatala xinli. 3 Na xanbi ra, a yi burun nun tamaro bogi xare rafalaxin nun jaxun danna rafalaxin xundi keden keden so Isirayila kaane birin yii, xemen nun jaxanla. 4 A yi Lewina ndee sugandi alogo e xa wali Alatalaa Kankiraan yetagi, e Alatala maxandi, e barikan bira Isirayilaa Ala xa, e a tantun. Ne xinle ni itoe ra: 5 Asafi, naxan findi e

kuntigin na e nun Sakari, naxan findi kuntigi firinden na e nun Yeyiyeli nun Semiramoti nun Yexiyeli nun Matitiya nun Eliyabi nun Benaya nun Obedi-Edon nun Yeyiyeli. Kondenne nun bõlõnne yi e yii. Karijanne yi Asafi yii. 6 Saraxaraline, Benaya nun Yaxasiyeli yi xõtane fema Alaa Layiri Kankiraan yetagi. 7 Dawuda betini ito so Asafi nun a muxune yii na lõxõn nin a singeni alogo e xa Alatala tantun. 8 E Alatala tantun. E yi a maxandi. A bata naxan liga, e na fala siyane xa. 9 E betin ba a xa, e yi a tantun betine yi, e yi a kabanako feene birin fala. 10 E e kanba a xili sarijanxini. Naxanye birin Alatala fenma, ne xa sèwa. 11 E e yee rafindi Alatala nun a senben ma, e lu a fenje waxatin birin. 12 A wali fajin naxanye ligaxi e nun a kabanako feene nun a kitin naxanye saxi, ne fe xa rabira e ma, 13 e tan Isirayila bõnsõnna, a walikene, e tan Yaxubaa diine, Ala naxanye sugandixi. 14 A tan nan Alatala ra, en ma Ala. A tan nan bõxõn birin kitisaan na. 15 A jõxõ luma a layirin xõn ma nen han habadan, e nun a falane fe han mayixete wuli keden, 16 e nun a layirin naxan xidi e nun Iburahima tagi, a yi a kolo Isiyaga xa. 17 A mõn yi a ragidi Yaxuba ma sariyan xõn, a findi habadan layirin na Isirayila kaane xa. 18 A yi a fala, a naxa, “N Kanan yamanan soma nen e nun i yixetene yii e keen na.” 19 E mi yi wuya nun. Xõje dando nan tun yi e ra na yamanani. 20 E yi kelima nen siyana nde ye e siga nde gbete ye, e keli yamanana nde yi e siga nde gbete yi. 21 Koni, a mi tinje muxu yo xa e jaxankata. A mangane rakolon nen e fe yi, a naxa, 22 “E nama fefe liga n ma muxu sugandixine ra. E nama fefe jaxi liga n ma nabine ra.” 23 Dunuja muxune birin xa betin ba Alatala xa. E yi lu a raliye waxatin birin yi fa fala a bata en nakisi. 24 E a binyena fe fala siyane birin xa, e yi a kabanako feene rali muxune birin ma. 25 Alatala gbo, a lan a xa matõxõ han! A lan a xa binya dangu alane birin na. 26 Siyane alane birin findixi ala fuune nan na, koni Alatala tan bata koren da. 27 A rabilinxi nõrõn nun gboon nan na. A konna rafexi senben nun sewan nan na. 28 E tan dunuja siyane birin, e fa Alatala tantun, e yi a tantun a binyen nun a senbena fe ra. 29 E fa Alatala tantun a xili binyena fe ra. E fa kiseene ra a yetagi. E Alatala batu a nõro sarijanxini. 30 Dunuja muxune, e xuruxurun a yetagi. Dunuja a kiini, a mi yigisanma. 31 Kore xõnna nun bõxõ xõnna xa sèwa han! E yi a fala siyane xa, a Alatala nan mangan na. 32 Fõxõ igen xa a xuini te e nun seen naxanye a xõre ra. Burunna xa

sewa e nun a yi seene birin. **33** Fətənnā wudine xa sənəw sewani, e sənəw Alatala yetagi, amasəto a fama nən. A fama nən a kitin sa dunuḡa yi. **34** E Alatala tantun amasəto a fan. A hinanna luma nən habadan! **35** E a fala Ala xa, e naxa, “Ala, nxu rakisi, nxu ratanga siya gbətene ma, alogo nxu xa i xili sarijanxin tantun, na yi findi nxu kanba xunna ra.” **36** Barikan xa bira Alatala xa, Isirayilaa Ala habadan han habadan! Nayi, yamaan yi a fala, e naxa, “Amin! Tantunna Alatala xa.” **37** Dawuda yi Asafi nun a ngaxakedenne yamari a e xa wali Alatalaa Layiri Kankiraan yetagi waxatin birin. **38** A yi Yedutun ma diina Obedi-Edon nun Xosa nun a muxu tonge sennin muxu solomasexə yamari a e xa so dēen kantan. **39** Saraxaraliin Sadəki nun a ngaxakedenne yi lu Alatalaa Batu Bubuni naxan yi tixi taan kideni Gabayon yi. **40** E yi lu saraxa gan daxine bə Alatala xa xətənnā nun jinbanna alo a sebəxi Alatalaa sariyani kii naxan yi, a naxan soxi Isirayila kaane yii. **41** Heman nun Yedutun nun muxun naxanye yi sugandixi, ne fan yi na alogo e xa Alatala tantun, bayo a hinanna luma nən habadan! **42** Heman nun Yedutun yi xətane fema, e yi karijanne maxama alogo e xa bətin ba Ala xa. Yedutun ma diine nan yi na dē kantanne ra. **43** Na xanbi ra, yamaan birin yi siga e konni. Dawuda fan yi xətə a konni dubadeni a denbayaan xa.

17 Dawuda to yelin soə a manga banxin kui, a yi a fala Nabi Natan xa, a naxa, “Banxin naxan nafalaxi suman wudin na, n na nan kui, koni Alatalaa Layiri Kankiraan mən bubun nan kui.” **2** Natan yi Dawuda yabi, a naxa, “I rafan feene birin liga, bayo Ala i xən.” **3** Na kəēen na, Ala yi a fala Natan xa, a naxa, **4** “Siga, a fala n ma walikēen Dawuda xa fa fala Alatala ito nan falaxi, a naxa, ‘I tan mi batuden tima n xa n luma dənaxan yi. **5** N yetēen munma lu n batu banxi kui singen, xabu n na Isirayila kaane ramini ləxəni Misiran fari ma han to, koni n yi bubun nan kui yiren birin yi. **6** N siga dənaxan birin yi nxu nun Isirayila kaane, n yēerati wuyaxi dəxə nən n ma yamana Isirayila xun na alogo e xa n ma yamaan masuxu. Koni, na waxatin birin yi, n mi a fala muxu yo xa, n naxa: Nanfera, i mi suman wudi banxin tixi n xa?’” **7** “Nanara, i mən xa a fala n ma walikēen Dawuda xa, i naxa, ‘Alatala Senben Birin Kanna ito nan falaxi, a naxa: N tan nan i baxi xuruseene fəxə ra kantan tideni alogo i xa findi n ma yamana Isirayila

yēeratiin na. **8** I siga yiren naxan birin yi n lu nən i xən, n yi i yaxune birin faxa i yetagi, n yi i findi xili gbee kanna ra alo muxu gbeen naxanye bəxə xənnā fari. **9** N yiren soma nən n ma yamana Isirayila yii e dəxəma dənaxan yi. E luma nən na, gaxu yo mi e suxə. Muxu jaxi yo mən mi fa e jaxankatama alo bodeni, **10** n kitisane dəxə n ma yamana Isirayila xun na waxatin naxan yi. N ni i yaxune birin sa i sanna bun. N naxan falama i xa, Alatala nan banxin tima i xa naxan findima i yixetene ra mangayani. **11** I na faxa waxatin naxan yi, i siga i benbane fema, n yi i yetəna diina nde sugandi a ti i jəxəni mangayani, n yi a senben xun masa. **12** Na nan n batu banxin tima n xa, n yi a mangayaan nasabati habadan. **13** N findi a fafe ra, a fan yi findi n ma diin na. N mi n ma hinanna masigama a ra alo n naxan liga manga singen na. **14** N na a findima nən n ma yamana mangan na, a mangayaan mi kale habadan.”” **15** Ala naxan birin fala Natan xa fetoni alo xiyena, a na birin yəba Dawuda xa. **16** Na xanbi ra, Manga Dawuda yi siga, a sa dəxə Alatala yetagi, a yi a fala, a naxa, “Marigina Alatala, n na a kolon a n tan nun n ma denbayaan mi lan nxu na birin sətə i naxan fixi nxu ma. **17** Koni, Ala, i tan yēe ra yi, sese mi na ra! I bata dē xuine tongo lan i ya walikena denbayana tila ma. Marigina Alatala, i bata n yate alo muxu fisamantenna. **18** N tan Dawuda, n nəe nanse fale i xa xunna kenli ito a fe ra i naxan fixi i ya walikēen ma? I tan yetəna i ya walikēen kolon. **19** Alatala, i bata fe gbeeni ito ragidi i ya walikena fe ra fata i sagoon na alogo i xa i senbe gbeen mayita. **20** Alatala, i jəxəni mi na, ala gbətə mi na ba i tan na. Nxu bata na kolon. **21** Siya gbəten mundun dunuḡa yi naxan luxi alo i ya yamana Isirayila, Ala naxanye raminixi konyiyani? I e xunba nən Misiran kaane nun e alane senben bun, i yi e findi i ya yamaan na, i siya gbətene kedi i ya yamaan yēe ra, i kabanako fe magaxuxine raba e yetagi alogo i xa i xinla makenen. **22** I yi Isirayila findi i ya yamaan na habadan. Alatala, i yi findi nəw Ala ra.” **23** “Iki, Alatala, i dē xuiin naxan tongoxi n tan, i ya walikēen nun n ma denbayaan xa, na xa rakamali habadan. Na liga alo i a falaxi kii naxan yi. **24** Na rakamali alogo i xinla xa binya han habadan. Muxune a falama nən nayi, e naxa, ‘Alatala Senben Birin Kanna, Ala naxan Isirayila xun na, a findixi Isirayilaa Ala nan na.’ Senben xa lu i ya walikēen Dawudaa denbayaan xa i yetagi. **25** N ma Ala, i bata i miriyaan yita n na a i n yixetene findima nən

mangane ra n jəxəni. Nanara, i ya walikēen bata susu fə i yetagi i maxandideni. 26 Alatala, i tan nan Ala ra. Iki, i bata fala fajini ito ti i ya walikēen xa. 27 I bata a ragidi a i xa barakan sa n ma denbayani alogo n bənsəna xa lu mangayani i yetagi habadan. Bayo, i tan, Alatala nan barakan nagidixi n ma denbayaan ma, barakan luma nən a fəxə ra habadan.”

18 Na waxatin danguxina, Dawuda yi Filisitine nɔ yengeni, a yi e rayarabi, a yi Gati taan nun a rabilinne ba e yii. 2 A yi Moyaba kaane fan nɔ yengeni, e yi lu a yamarin bun ma, e lu mudun soe a yii. 3 Dawuda mən yi Soba mangan Hadadeseri fan nɔ yengeni Xamata mabinni, Hadadeseri yi waxi Efirati baan tongo feni waxatin naxan yi. 4 Dawuda yi yenge so wontoro wuli keden nun soo ragi wuli solofere nun sofa wuli məxəje ba a yii. A yi soone birin san xanbi ra fasane bolon fə soo keme jəxəndən a naxanye ramara. 5 Arami kaane yi keli Damasi taani, e yi fa Soba mangan Hadadeseri malideni, koni Dawuda yi e sofa wuli məxəjen nun firin fəxa. 6 Dawuda yi a yamana kanne dɔxə Damasi taani Arami yamanani. Arami kaane yi lu Dawudaa yamarin bun, e lu mudun soe a yii. Dawuda na yi siga dede, Alatala yi xunna kenla fima nən a ma. 7 Dawuda yi Hadadeseri a sofane ye masansan wure lefa xema daxine xali Yerusalen yi. 8 A yi sula gbege tongo keli Hadadeseri a taane yi, Tibati nun Kun. Sulemani yi na rawali a findi ige ramara se gbeen na e nun senbetenne nun saraxa ganden waliseene. 9 Xamata mangan Tohu yi a me a Dawuda bata Soba mangan Hadadeseri a sofane birin nɔ yengeni, 10 a yi a dii xemen Hadoran nasiga Manga Dawuda ma, alogo a xa sa a xəntən a nɔ sətəna fe ra Hadadeseri yengeni, bayo Manga Tohu nun Manga Hadadeseri yi yengeni. A mən yi siga xema seene ra e nun gbetin nun sulana. 11 Manga Dawuda yi na birin fi Alatala ma, e nun gbeti fixen nun xemana a naxan tongo siyani itoe birin yii: Edən kaane nun Moyaba kaane nun Amonine nun Filisitine nun Amalekine. 12 Seruyaa diina Abisayi yi Edən kaa wuli fu nun solomasexe fəxa fəxə Lanbanni. 13 A yi yamana kanne lu Edən yi alogo na birin xa lu Dawudaa yamarin bun ma. Dawuda na yi siga dede, Alatala yi xunna kenla fima nən a ma. 14 Dawuda yi lu Isirayila birin xun na. A yi kiti kenden sama tinxinna nin a yamaan birin yi. 15 Seruyaa dii xemen Yowaba nan yi sofane kuntigin na. Axiludu a dii xemen Yosafati nan yi mangana

yenla ra. 16 Axitubaa dii xemen Sadəki nun Abiyatari a dii xeməna Abimeleki nan yi saraxaraline ra. Sawesana nan yi sebeli tiin na. 17 Yehoyadaa dii xemen Benayana nan yi Keretine nun Peleti kaane xun na. Manga Dawudaa diine nan yi mangan bundəxəne ra.

19 Na dangu xanbini, Amonine mangan Naxasi yi fəxa, a diin yi dɔxə a jəxəni. 2 Dawuda yi a miri, a naxa, “N hinanma nən Naxasi a dii xemen Xanun na, bayo a fafe hinan nən n na.” Dawuda yi xerane rasiga Xanun ma a fafe sayaan xəntən tideni. Dawudaa xerane yi sa so Amonine yamanani Xanun fema saya xəntəndeni. 3 Koni, Amonine kuntigine yi a fala Xanun xa, e naxa, “I laxi a ra a Dawuda a muxune rafaxi i fafe saya xəntənden nan tun yi ba? E mi faxi kəten xan na ba alogo e xa taan nakərsə, ləxəna nde e yi nɔ a suxe?” 4 Nayi, Xanun yi Dawudaa xerane suxu, a yi e de xabene bi, a yi e domane raxaba e xərene yilanni, a fa e raxete Dawuda ma. 5 E fa xerane fe dentegen sa Dawuda xa, a yi muxune xe a xerane fəxə ra, bayo e yi yagixi han, a yi a fala e xa, a naxa, “E lu Yeriko yi han e de xabene yi mini. Na xanbi ra, e fa so be.” 6 Amonine to a kolon a e bata rapaxu Dawuda ma alo se kunxin xirina, Xanun yi gbeti fixen kilo wuli tonge saxan e nun naanin fi Arami kaane ma, naxanye yi Mesopotamiya yamanani, e nun Maka nun Soba yamanani alogo e xa fa e yenge so wontorone nun e soo ragine ra. 7 Na ma, e yi fa yenge so wontoron wuli tonge saxan nun firin na. Maka mangan nun a yamaan fan yi fa, e fa e malan Medeba taan yetagi. Amonine fan yi mini e taane yi alogo e xa Dawuda yenge. 8 Dawuda yi na me, a yi sofa kuntigin Yowaba nun a sofa kendene birin nasiga e yengedeni. 9 Amonine yi mini, e ti yenge so xinla ma e taan so deen na. Mangan naxanye fa e malideni, ne yi tixi e danna burunna ra. 10 Yowaba to a kolon a yengen yi a yee ra e nun a xanbi ra, a yi Isirayila sofa kendena ndee sugandi Arami kaane yenge xinla ma. 11 A yi sofa dənxele lu a tada Abisayi a yamarin bun ma Amonine yenge xinla ma. 12 Yowaba yi a fala a tada xa, a naxa, “Xa Arami kaane senben gbo n xa, i fa n mali. Xa Amonine fan senben gbo i xa, n fan yi sa i mali. 13 I tunnafan, en na en wekile, en yi en ma yamaan xun mayenge e nun en ma Alaa taane. Alatala xa a rafan feen liga.” 14 Yowaba nun a ganla yi e maso Arami kaane yengedeni, koni ne yi e gi a yee ra. 15 Amonine to a to, a Arami kaane bata e gi, e fan yi e gi Yowaba tada Abisayi bun. E yi sa

so e taani. Yowaba fan yi xete Yerusalen yi. **16** Arami kaane to a kolon a Isirayila bata e nɔ yengeni, e yi xerane rasiga Arami kaane ma naxanye yi Efirati baan kidi ma. Hadadeseri a sofa kuntigin Sofaki nan yi e xun na. **17** Dawuda to na me, a yi Isirayila kaane birin malan, e yi fa Yuruden baan gidi, e siga Arami kaane yengedeni. **18** Arami kaane mon yi e gi Isirayila kaane bun. Dawuda yi e yenge so wontoro sofaan muxu wuli solofere faxa, e nun e sofaan muxu wuli tonge naanin naxanye yi sigama e sannin. A yi sofa kuntigin Sofaki fan faxa. **19** Hadadeseri a walikene to a kolon a Isirayila kaane bata e nɔ yengeni, e yi layirin xidi e nun Dawuda tagi, e yi lu a yamarin bun. Xabu na, Arami kaane mi fa tin Amonine maliye sɔnɔn.

20 Nɛɛ nenen fɔlɔn na, mangane yi darixi mine yenge sodeni waxatin naxan yi, Yowaba nun a sofa wekilɛxine yi sa Amonine yenge. Koni, Dawuda tan yi lu Yerusalen yi. Yowaba yi Rabaha taan suxu, a menna kala. **2** Nayi, Dawuda yi fa mangaya taxamaseri komotin ba Amonine mangan xun na, naxan xɛmaan binyen yi dangue kilo tonge saxan na. Gɛme fɛni kenden fan yi a ma. Na mangaya taxamaseri komotin yi so Dawuda xun na, a yi funma se wuyaxi tongo taani. **3** Yamaan naxan yi na, Dawuda yi ne xali, a yi sa e ti karahan wanle ra, wudi masonla nun gɛme bɔɔn nun wudi segɛna. A Amonine taane birin ma fe liga na kii nin. Na xanbi ra, Dawuda nun a sofane yi xete Yerusalen yi. **4** Na danguxina, Isirayila kaane nun Filisitine yi sa yenge Geseri yi. Na yengeni, Xusa kaan Sibekayi yi Sipayi faxa. Refa yixetɛna nde nan yi Sipayi ra. Na yi Filisitine yagi. **5** Isirayila kaane nun Filisitine mon yi yenge. Yayiri a diina Elexanan yi Gati kaan Goliyati xunyen Laxami faxa na waxatin nin. A senben yi gbo han, a tanban yi gbo alo gbindonna. **6** Yenge gbete yi keli Gati taani. Xɛme kuyena nde yi na, naxan yii soli sennin sennin yi a ra e nun san soli sennin sennin, e birin malanxina, mɔxɔɲɛn nun naanin. Refa yixetɛna nde nan yi na fan na. **7** A to Isirayila makonbi, Dawuda tada Simeyaa dii xɛmen Yonatan yi a faxa. **8** Xɛmeni itoe birin yi fataxi Refa yixetɛne nan na Gati taani. Dawuda nun a sofane yi ne birin faxa.

21 Setana yi keli Isirayila xili ma, a yi Dawuda radin a xa Isirayila kaane tɛnge. **2** Dawuda yi a fala Yowaba nun a sofa kuntigine xa, a naxa, “ɛ siga, ɛ sa Isirayila kaane tɛnge, keli Beriseba ma, sa dɔxɔ Dan

yamanan na. ɛ fa na yaten dentɛge n xa.” **3** Yowaba yi a yabi, a naxa, “Alatala xa Isirayila yamaan nawuya ayi dɔxɔ kɛme. Mangana, n kannna, i ya walikene xa mi ne birin na ba? Nanfera i fe sifani ito maxɔdinxi? Nanfera i waxi a xɔn ma Isirayila yamaan xa yulubin tongo?” **4** Koni, mangan xuiin mi yi matandɛ. Nanara, Yowaba yi mini, a yi Isirayila bɔxɔn birin yisiga, a fa xete Yerusalen yi. **5** A yi yamaan yaten fala Dawuda xa. Isirayila kaane yaten ni i ra: xɛme silanfan kannna miliyɔn keden wuli kɛme. Yuda kaane yaten ni i ra: xɛme silanfan kannna wuli kɛme naanin muxu wuli tonge solofere. **6** Koni, Yowaba mi Lewi nun Bunyamin bɔnsɔnna muxune tɛnge, bayo mangana yamarin mi yi rafanxi a ma. **7** Yamarini ito yi rapaxu Ala ma. A yi Isirayila naxankata. **8** Dawuda yi a fala Ala xa, a naxa, “N yulubi gbeen nan ligaxi ito ra. Iki, n bata i mayandi, i xa dija n tan, i ya walikɛɛn yulubin ma. N bata xaxilitareyaan liga.” **9** Alatala yi a fala Manga Dawudaa fetoon Gadi xa, a naxa, **10** “A fala Dawuda xa, i naxa, ‘Alatala ito nan falaxi, a naxa: Fe saxan ni i ra. Keden sugandi, n xa na liga i ra.’” **11** Gadi yi siga Dawuda fɛma, a yi a fala a xa, a naxa, “Alatala ito nan falaxi i xa, a naxa, **12** ‘Naxankatan mundun lan a xa sa i ma: ɲɛɛ saxan fitina kamɛna, hanma yaxune yi ɛ halagi silanfanna ra kike saxan, hanma Alatala xa a halagi ti malekan nafa ɛ ma, naxan Isirayila yamaan naxɔrima Alaa silanfanna nun fure ɲaxin na xii saxan.’ Iki, a fala n xa n lan n xa sa naxan fala n kannna xa naxan n xɛxi.” **13** Dawuda yi Gadi yabi, a naxa, “N bɔɲɛn sunuxi han! A lan n xa n yete lu Alatala yii bayo a kininkininna gbo, na fisa benun n xa lu adamadiine sagoni.” **14** Alatala yi fure ɲaxin nadin Isirayila yamaan ma han muxu wuli tonge solofere yi faxa Isirayila yamanani. **15** Ala yi malekan xɛ Yerusalen yi, a xa sa na kala. A yi na kalama waxatin naxan yi, Alatala yi a to, a yi nimisa na halagina fe ra. A yi a fala na malekan xa naxan yi a kalama, a naxa, “Na bata lan. E lu na fa.” Alatalaa malekan yi tixi Oronan, Yebusu kaana lonna nan ma. **16** Dawuda yi a yɛɛ rakeli, a Alatalaa malekan to tixi kuyen nun bɔxɔn lan tagini, a silanfanna baxi a tɛɛni, a yɛɛ rafindixi Yerusalen ma. Dawuda nun fonne yi kasa benbeli dugin nagodo e ma sununi, e yi bira, e yi e yetagin lan bɔxɔn ma. **17** Dawuda yi a fala Ala xa, a naxa, “N tan xa mi yamarin fixi ba a Isirayila yamaan xa tɛnge? N tan nan yulubin ligaxi, n tan nan fe kobini ito ligaxi. Yamaan tan nanse ligaxi?

Alatala, n ma Ala, n tan nun n ma denbayaan halagi, i ya yamaan lu na.” 18 Alatalaa malekan yi a fala Gadi xa, a a xa a fala Dawuda xa, fa fala a xa sa saraxa gandena nde rafala Alatala xa Oronan Yebusu kaana lonna ma. 19 Dawuda yi siga menni alo Gadi a fala a xa kii naxan yi Alatala xinla ra. 20 Oronan yi murutu bonboni lonna ma, a yi a firifiri, a yi malekan to. A dii naaninne yi e luxun. 21 Na waxatini, Dawuda fan yi a maso. Oronan to a to, a yi keli lonna ma, a sa a xinbi sin Dawuda bun ma, a yetagin yi lan bəxən ma. 22 Dawuda yi a fala Oronan xa, a naxa, “Lonni ito so n yii alogo n xa saraxa ganden nafala Alatala xa. N na a saren defexin soe i yii alogo fure naxin xa ba yamaan ma.” 23 Oronan yi Dawuda yabi, a naxa, “Mangana, a tongo. N kanna xa a rafan feen liga a ra. N bata jingeni itoe fan so i yii, e xa findi saraxa gan daxin na. Ningena xee ra bonbo seene yi findi saraxan gan yegen na, murutuni ito fan xa findi bogise saraxan na. N bata ito birin fi i ma.” 24 Koni, Manga Dawuda yi a fala Oronan xa, a naxa, “En-en, n waxi a sara feni a saren defexin nan na. N mi seen bama saraxan na Alatala xa n mi naxan saraxi. N mi nœ saraxa gan daxin be n mi naxan sare fixi.” 25 Nayi, Dawuda yi xemaan kilo solofere so Oronan yii na lonna fe ra. 26 Dawuda yi saraxa ganden nafala menni Alatala xa, a fa saraxa gan daxine nun bəne xunbeli saraxane ba. A yi Alatala maxandi, Alatala yi a yabi teen na naxan godo saraxa ganden ma keli kore. 27 Nayi, Alatala yi falan ti malekan xa, a yi silanfanna raso a teeni. 28 Na waxatini, Dawuda yi saraxane bama Oronan Yebusu kaana lonna nan ma, bayo a bata yi a kolon a Alatala a yabima menma nin. 29 Na waxatini, Musa Alatala Batu Bubun naxan nafala tonbonni, na yi na taan kideni Gabayon yi, e nun saraxa gandena, saraxa gan daxine yi bama denaxan yi. 30 Koni, Dawuda mi yi sige menni Ala maxədindeni, bayo a yi gaxuxi Alatalaa malekana silanfanna yee ra.

22 Dawuda yi a fala, a naxa, “En Marigina Alatalaa banxin ti be, e nun saraxa gandena, Isirayila saraxa gan daxine bama a xa denaxan yi.” 2 Dawuda yi yamarin fi a xəne naxanye dəxi Isirayila yamanani, a ne xa malan. A yi ne findi geme masonle ra Ala Batu Banxin ti feen na. 3 Dawuda yi wure gbege fen, naxanye findima banxin gbangban seene nun deen singan seene ra. A yi sula gbege fan fen naxan yate mi yi nœ kolonje. 4 Sidən kaane nun Tire kaane yi

Dawuda mali suman wudi faɲin gbege fendeni. 5 Dawuda yi a fala, a naxa, “N ma diin Sulemani munma kəxə singen, a mən mi wanla kolon. Banxin naxan tima Alatala xa, na lanma a xa tofaɲe ayi, a rayabu siyane birin yetagi.” Na ma, Dawuda se gbege malan nen na banxin ti feen na benun a xa faxa. 6 Dawuda yi a diin Sulemani xili, a yi a fala a xa fa fala a xa banxin ti Alatala xa, Isirayilaa Ala. 7 Dawuda yi a fala Sulemani xa, a naxa, “N ma diina, n bata yi a miri n bəne, n xa banxin ti Alatala xa, n ma Ala, 8 koni Alatala a fala nen n xa, a naxa, ‘I bata muxu wuyaxi faxa yenge wuyaxi yi, i nama banxin ti n xa. Yenge soon nan i ra, i bata faxa gbege ti n yetagi. 9 Koni, i diina nde sətəma nen, naxan findima bəne xunbeli muxun na, n matabun fima naxan ma a yaxune fe ra. A xili bama nen Sulemani. Isirayila yamaan luma nen bəne xunbenli tun a siimayaan birin yi. 10 A tan nan banxin tima n xa n xinla binyama denaxan yi, a yi findi n ma diin na, n fan yi findi a fafe ra. A mangayaan sabatima nen Isirayila xun na habadan.’” 11 “Iki, n ma diina, Alatala xa lu i xən alogo i xa nœ Alatalaa banxin tiye, i ya Ala, alo a a fala kii naxan yi lan i tan ma. 12 Alatala xa fekolonna nun xaxili faɲin fi i ma a na i findi mangan na waxatin naxan yi Isirayila yamanani alogo i xa Alatalaa sariyan suxu, i ya Ala. 13 Feen birin sənəyama i xa nen, xa i Alatalaa sariyan nun a yamarine suxu, a naxanye soxi Musa yii Isirayila xa. I wekile, i senbe so! I nama kuisan, i nama gaxu fefe yee ra! 14 N bata wekile n yi xemaan kilo miliyən saxan e nun kilo wuli keme naanin malan Alatala Batu Banxin ti feen na. N mən bata wure gbeti fixen kilo miliyən tonge saxan e nun naanin malan. Sulan nun wuren bata gbo ayi han a yaten mi nœ kolonje. N bata wudin nun gemen fan fen. I mən xa nde sa e fari. 15 Walike wuyaxi i yii naxanye fatan gemen masole, e nun naxanye fatan sawurane rafale gemen nun wudine ma, e nun yiirawanla naxanye wanla sifan birin kolon. 16 Xemaan nun wure gbeti fixen nun sulan nun wurena i yii han a dangu ayi. Keli i ya wanla fəlo keden na. Alatala xa i mali.” 17 Dawuda yi a fala Isirayila kuntigine birin xa, a e xa fa a diin Sulemani mali. A yi a fala e xa, a naxa, 18 “Alatala, e Ala mi luxi e xən ba? A mi bəne xunbenli fixi e ma yamanan birin yi ba? A bata be kaane sa n sagoni. Yamanan bata lu Alatala nun a yamaan bun ma. 19 E Alatala, e Ala fen e bəne n nun e niin birin na. E siga, e sa yire saripnaxin ti Marigina Alatala xa,

ε Ala, alogo ε xa fa Alatalaa Layiri Kankiraan nun a se sarijanxine raso Ala Batu Banxini, Alatala xinla binyama denaxan yi.”

23 Dawuda to yelin fore, a yi a diin Sulemani dɔxo Isirayila mangan na. **2** A yi Isirayila kuntigine nun saraxaraline nun Lewi bɔnsɔnna muxune malan. **3** E yi Lewi bɔnsɔnna muxune tenge, naxanye bata yi jɛɛ tonge saxan sɔto. E yaten yi siga han muxu wuli tonge saxan e nun solomasexe. **4** Dawuda yi a fala, a naxa, “N bata muxu wuli mɔxɔɣen nun naanin sugandi alogo e xa e yengi lu Alatala Batu Banxin wanle xɔn. Muxu wuli sennin xa findi kitisane ra. Muxu wuli naanin yi findi de kantan muxune ra. **5** Muxu wuli naanin yi findi Alatala tantun muxune ra maxaseene ra, n naxanye rafalaxi a tantun seen na.” **6** Dawuda yi Lewi bɔnsɔnna muxune yitaxun Lewi a diine denbaya yɛɛn ma. Lewi a diine nan itoe ra: Gerison nun Kehati nun Merari. **7** Gerison ma diine nan itoe ra: Ladana nun Simeyi. **8** Ladanaa diine nan itoe ra: Yexiyeli, a dii singen nun Setama nun Yoweli. E birin malanxina muxu saxan. **9** Simeyi a diine nan itoe ra: Selomiti nun Xasiyeli nun Haran. E birin malanxina muxu saxan. Ladanaa denbaya xunne nan ne ra. **10** Simeyi a diine nan itoe ra: Yaxati nun Sisa nun Yewusi nun Beriya. Simeyi a dii naaninne nan ne ra. **11** Yaxati nan dii singen na. Sisa nan dii firinden na. Koni, Yewusi nun Beriya mi dii wuyaxi sɔto. Na ma, e yi e diine yate denbaya kedenna ra e bɔnsɔn kedin ma. **12** Kehati a diine nan itoe ra: Amirama nun Yisehari nun Xebiron nun Yusiyeli. E birin malanxina muxu naanin. **13** Amirama a diine nan itoe ra: Haruna nun Musa. Haruna yi rasarijan Ala xa alogo a xa lu wale yire sarijanxi fisamantenni, e nun a bɔnsɔnna muxune han habadan, alogo e xa wusulanna gan saraxan na Alatala xa, e yi wali a yetagi, e mɔn yi lu dube muxune xa Ala xinli han habadan. **14** Musa tan findi Alaa muxun nan na. A diine yi lu Lewi bɔnsɔnna muxune ye. **15** Musaa diine nan itoe ra: Gerisomi nun Eliyeseri. **16** Gerisomi a diin nan ito ra: Sebuweli nan yi a dii singen na. **17** Eliyeseri a diine nan itoe ra: Rexabiya nan yi a dii singen na. Eliyeseri mi dii xeme gbete sɔto, koni Rexabiya dii wuyaxi sɔto nɛn. **18** Yisehari a diine nan itoe ra: Selomiti nan yi a dii singen na. **19** Xebiron ma diine nan itoe ra: Yeriya nan yi a dii singen na, Amari a firindena, Yaxasiyeli a saxandena, e nun Yekameyami

a naanindena. **20** Yusiyeli a diine nan itoe ra: Mike nan yi a dii singen na, Yisiya a firindena. **21** Merari a diine nan itoe ra: Maxali nun Musi. Maxali a diine nan itoe ra: Eleyasari nun Kisu. **22** Eleyasari faxa nɛn, a mi dii xeme yo lu, koni a dii temene tan lu nɛn. Kisu a diine yi e dɔxo e naxanle ra. **23** Musi a diine nan itoe ra: Maxali nun Ederi nun Yeremoti. E birin malanxina muxu saxan. **24** Ne nan findi Lewi yixetene ra naxanye findi bɔnsɔnna denbaya xunne ra, e keden kedenna birin xinle sebexi e bɔnsɔn kedin kui. E yi walima nɛn Alatala Batu Banxin kui e barin na yi jɛɛ mɔxɔɣen sɔto. **25** Dawuda bata yi a fala, a naxa, “Alatala, Isirayilaa Ala bata bɔɣe xunbenla fi a yamaan ma. A bata fa dɔxo Yerusalem yi habadan. **26** Lewine mi fa Alaa Batu Bubun nun a muranne xalima yire gbete yi sɔnɔn.” **27** Fata Dawudaa yamari dɔnxene ra, Lewi bɔnsɔnna muxune tenge nɛn naxanye barin bata yi jɛɛ mɔxɔɣen sɔto. **28** Lewi bɔnsɔnna muxune nan yi Haruna yixetene malima Alatala Batu Banxin wanle ra. E tan nan yi a sansanna kuiin nun a banxin kuiin masuxuma, e mɔn yi seene rasarijanma, e yi wali xunxurine ke Ala Batu Banxini. **29** E yi burune rafalama naxanye ralima Ala ma, e murutu fujin din naxan findima bogise saraxane ra, e buru ratetaren nafala, e nun donseen sifan birin. E tan nan mɔn yengi yi dɔxi ligaseene birin xɔn, sikenle nun ligaseen naxanye seen kuyen maligama. **30** E yi lanma e xa siga Alatala tantundeni xɔtɔnna nun jinbanna loxo yo loxo. **31** E mɔn yi saraxa gan daxine bama Alatala xa Matabu Lɔxɔne ma e nun Kike Nenen sanle yi, e nun sali gbete ye ma. E yi lanma e xa wali Alatala xa a sariyan xɔn. **32** E tan nan yi Naralan Bubun nun yire sarijanxin masuxuma. E yi Alatala batuden wanle birin kema e ngaxakedenna Haruna yixetene yamarin nan bun.

24 Haruna yixetene yi yitaxunxi a dii naaninne nan na. A diine nan itoe ra: Nadaba nun Abihu nun Eleyasari nun Itamara. **2** Nadaba nun Abihu singen nan faxa benun e fafe xa faxa. E mi dii yo sɔto. Eleyasari nun Itamara nan yi saraxaraline ra. **3** Eleyasari yixetena nde Sadaki e nun Itamara yixetena nde Aximeleki yi Dawuda mali Harunaa diine yitaxundeni alogo e xa ti wanle ra. **4** Kuntigi wuyaxi yi to Eleyasari yixetene ye dangu Itamara yixetene ra. Nanara, e yitaxun ikiini: Denbaya xunna muxu fu nun sennin Eleyasari yixetene ye. Denbaya xunna muxu solomasexe Itamara

yixetene ye. **5** E yi masensenna ti alogo e xa e yitaxun, e yi e ti e wanle ra. Na ma, Eleyasari yixetena ndee nun Itamara yixetena ndee birin yi findi yire sarijanxin kuntigine ra e nun kuntigine Ala xa. **6** Nataneli a diin Semaya, Lewi bõnsõnna muxun nan yi e xinle sebema mangan nun kuntigine nun saraxaraliin Sadõki nun Abiyatari a diina Aximeleki nun saraxaraline denbaya xunne yetagi e nun Lewi bõnsõnna muxune birin. E yi denbaya keden sugandi Eleyasari yixetene ye, e mæn yi keden sugandi Itamara yixetene ye. **7** Denbayane sugandi masensenna xøn ikiini: A singen Yehoyaribu nan suxu, a firindena Yedaya, **8** a saxandena Xarimi, a naanindena Seyorimi, **9** a suulundena Malakiya, a sennindena Miyamin, **10** a soloferedena Hakõsi, a solomasexedena Abiya, **11** a solomanaanindena Yosuwe, a fudena Sekani, **12** a fu nun kedendena Eliyasibi, a fu nun firindena Yakimi, **13** a fu nun saxandena Xupa, a fu nun naanindena Yesebeyabi, **14** a fu nun suulundena Biliga, a fu nun sennindena Imeri, **15** a fu nun soloferedena Xesiri, a fu nun solomasexedena Hapisesi, **16** a fu nun solomanaanindena Petaxi, a mæxõjedena Esekiyeli, **17** a mæxõjen nun kedendena Yakini, a mæxõjen nun firindena Gamulu, **18** a mæxõjen nun saxandena Delaya, a mæxõjen nun naanindena Maasiya. **19** A yi lan e xa Alatala Batu Banxin wanle suxu na kii nin alo e benba Haruna a yamari e ma kii naxan yi alo Alatala, Isirayilaa Ala bata yi a yamari a ma kii naxan yi. **20** Lewi bõnsõnna muxu gbeten naxanye sugandi, ne nan itoe ra: Amiramaa diine ye: Subayeli. Subayeli a diine ye: Yexedeya. **21** Rexabiya a diine ye: Yisiya, a dii singena. **22** Yisehari a diine ye: Selomiti. Selomiti a diine ye: Yaxati. **23** Xebiron ma diine: a dii singen Yeriya nun a dii firindena Amari nun a dii saxanden Yaxasiyeli nun a dii naaninden Yekameyami. **24** Yusiyele a diin Mike. Mike a diine ye: Samiri. **25** Mike xunyen Yisiya. Yisiyaa diine ye: Sakari. **26** Merari a diine ye: Maxali nun Musi e nun a diin Yaasiyaa diine. **27** Merari mamandenne, Yaasiyaa diine: Sohami nun Sakuru nun Ibiri. **28** Maxali a diina Eleyasari. Eleyasari mi dii yo soto. **29** Kisu a diine ye: Yerameeli. **30** Musi a diine ye: Maxali nun Ederi nun Yerimoti. Lewi bõnsõnna muxune nan yi ne ra denbaya yeen ma. **31** E fan sugandi masensenna nan xøn alo e ngaxakedenne, Haruna yixetene. Na liga Manga Dawuda nun Sadõki nun Aximeleki nun saraxaraline denbaya xunne nun Lewi bõnsõnna muxune nan yetagi. Na ma, denbayaan

muxune birin yi suxi ki kedenna nin keli dii singen ma han a rajanna.

25 Dawuda nun sofa kuntigine yi muxuna ndee sugandi Asafi nun Heman nun Yedutun ma diine ye alogo e xa nabiya falane ti betini bõlõnna nun kondenna nun karijanne ra. Na muxune xinle ni itoe ra naxanye yi na wanla kema. **2** Asafi a diine ye: Sakuru nun Yusufu nun Netaniya nun Asarela. Ne yi Asafi a yamarin nan bun. Asafi fan yi nabiya falane tima betini mangana yamarin bun. **3** Yedutun ma diine ye: Gedali nun Seri nun Esayi nun Simeyi nun Hasabi nun Matitiya. E birin malanxina muxu sennin. E yi lu e fafe Yedutun ma yamarin bun. Yedutun yi nabiya falane tima, a bõlõnna maxa, a Alatala matõxõ, a yi a tantun. **4** Heman a diine ye: Bukiya nun Matani nun Yusiyele nun Sebuweli nun Yerimoti nun Xananiya nun Xanani nun Eliyata nun Gidaliti nun Romanti-Eseri nun Yosobekasa nun Maloti nun Hotiri e nun Maxasiyoti. **5** Muxuni itoe birin yi findixi Heman ma diine nan na naxan yi fetoon tima mangan xa fata Ala ra alo xiyena. Ala yi Heman senben gbo ayi, a yi dii xeme fu nun naanin nun dii teme saxan fi a ma. **6** Ne birin yi e fafe a yamarin bun ma, e betine ba karijanne nun kondenne nun bõlõnne ra Alatala Batu Banxin wanla ra. Asafi nun Yedutun nun Heman yi mangana yamarin nan bun ma. **7** Muxuni itoe nun e kon kaan naxanye xaraxi beti ba feene ma Alatala xa naxanye yi fatan, ne birin malanxina, muxu keme firin muxu tonge solomasexe e nun solomasexe. **8** E birin yi masensenna tima alogo e xa ti wanle ra, dii joren nun fonna, karamõxon nun xarandiina. **9** Masensenna naxan ti, na yi Yusufu singe suxu Asafi xabilani. A firindena, Gedali nun a ngaxakedenne nun a diine, e birin malanxina muxu fu nun firin. **10** A saxandena, Sakuru nun a diine nun a ngaxakedenne, e birin malanxina muxu fu nun firin. **11** A naanindena, Yisiri nun a diine nun a ngaxakedenne, e birin malanxina muxu fu nun firin. **12** A suulundena, Netaniya nun a diine nun a ngaxakedenne, e birin malanxina muxu fu nun firin. **13** A sennindena, Bukiya nun a diine nun a ngaxakedenne, e birin malanxina muxu fu nun firin. **14** A soloferedena, Yesarela nun a diine nun a ngaxakedenne, e birin malanxina muxu fu nun firin. **15** A solomasexedena, Yesaya nun a diine nun a ngaxakedenne, e birin malanxina muxu fu nun firin. **16** A solomanaanindena, Matani nun a

diine nun a ngaxakedenne, e birin malanxina muxu fu nun firin. 17 A fudena, Simeyi nun a diine nun a ngaxakedenne, e birin malanxina muxu fu nun firin. 18 A fu nun kedendena, Asareli nun a diine nun a ngaxakedenne, e birin malanxina muxu fu nun firin. 19 A fu nun firindena, Hasabi nun a diine nun a ngaxakedenne, e birin malanxina muxu fu nun firin. 20 A fu nun saxandena, Subayeli nun a diine nun a ngaxakedenne, e birin malanxina muxu fu nun firin. 21 A fu nun naanindena, Matitiya nun a diine nun a ngaxakedenne, e birin malanxina muxu fu nun firin. 22 A fu nun suulundena, Yeremoti nun a diine nun a ngaxakedenne, e birin malanxina muxu fu nun firin. 23 A fu nun sennindena, Xananiya nun a diine nun a ngaxakedenne, e birin malanxina muxu fu nun firin. 24 A fu nun soloferedena, Yosobekasa nun a diine nun a ngaxakedenne, e birin malanxina muxu fu nun firin. 25 A fu nun solomasexedena, Xanani nun a diine nun a ngaxakedenne, e birin malanxina muxu fu nun firin. 26 A fu nun solomanaanindena, Maloti nun a diine nun a ngaxakedenne, e birin malanxina muxu fu nun firin. 27 A mǝxǝɲedena, Eliyata nun a diine nun a ngaxakedenne, e birin malanxina muxu fu nun firin. 28 A mǝxǝɲen nun kedendena, Hotiri nun a diine nun a ngaxakedenne, e birin malanxina muxu fu nun firin. 29 A mǝxǝɲen nun firindena, Gidaliti nun a diine nun a ngaxakedenne, e birin malanxina muxu fu nun firin. 30 A mǝxǝɲen nun saxandena, Maxasiyoti nun a diine nun a ngaxakedenne, e birin malanxina muxu fu nun firin. 31 A mǝxǝɲen nun naanindena, Romanti-Eseri nun a diine nun a ngaxakedenne, e birin malanxina muxu fu nun firin.

26 De kantanne yitaxunxi ikiini: Keli Kore xabilani, Kore a diin Meselemya Asafi a denbayani. 2 Meselemya yi dii xemene sǝtǝ: Sakari nan yi a dii singen na, Yediyayeli a firindena, Sebadiya a saxandena, 3 Yataniyeli a naanindena, Elan a suulundena, Yehoxanan a sennindena, e nun Eliyehowenayi a soloferedena. 4 Obedi-Edǝn fan yi dii xemene sǝtǝ: Semaya nan yi a dii singen na, Yehosabadi a firindena, Yowa a saxandena, Sakara a naanindena, Nataneli a suulundena, 5 Amiyeli a sennindena, Isakari a soloferedena, e nun Pewuletayi a solomasexedena. Ala bata yi barakan sa Obedi-Edǝn ma fe yi. 6 A dii singen Semaya yi dii xemene sǝtǝ naxanye findixi yǝeratine ra e denbayane xun

na bayo e senben yi gbo. 7 Semayaa diine nan itoe ra: Otini nun Refayeli nun Obedi nun Elesabada. Xeme wekilexin nan yi e ngaxakedenne Elihu nun Semakiya ra. 8 Obedi-Edǝn yixetene nan yi na muxune ra. E tan nun e diine nun e ngaxakedenne birin yi findixi muxu kǝndene nan na, e senben yi gbo Alaa wanli. Obedi-Edǝn yixetene birin malanxina muxu tonge sennin e nun firin. 9 Muxu kenden nan yi Meselemyaa diine nun a ngaxakedenne fan na. E birin malanxina muxu fu nun solomasexe. 10 Merari a diin Xosa yi dii xemeni itoe bari: Simiri, naxan fafe a findi a ngaxakedenne xunna ra hali dii singen to mi yi a ra, e nun 11 Xiliki, a firindena e nun Tebaliya, a saxandena e nun Sakari, a naanindena. Xosaa diine nun a ngaxakedenne birin malanxina muxu fu nun saxan. 12 De kantanne yi yitaxunxi na kii nin. E kuntigine nun e ngaxakedenne birin yi Alatala Batu Banxin wanla ra. 13 E yi masensenna tima nen alogo e xa a kolon naxan lan a xa deen naxan kantan. Muxu gbeene nun muxudine birin yi na kii nin denbayane birin yi. 14 Masensenna yi Selemya suxu lan banxin sogeteden binna deen ma. Kǝmen binna deen masensenna yi a diin Sakari suxu, naxan findixi maxadi ti xaxilimaan na. 15 Masensenna yi Obedi-Edǝn suxu lan yiifari fǝxǝn deen ma. Se ramara banxin masensenna yi a diine fan suxu. 16 Banxin sogegododen binna deen masensenna yi Supimi nun Xosa suxu, e nun deen naxan xili Saaleketi naxan yi rabima kiraan binni naxan tema गयाan ma. Kantan muxune yi yǝe rafindixi e bode ma. 17 Lewi muxu sennin yi sogeteden binni, muxu naanin kǝmenna ma, muxu naanin yiifanna ma, muxu naanin se ramara banxini. 18 Sansanna binni, naxan sogegododen binni, muxu naanin yi ti na kiraan de, muxu firin mǝn yi ti sansanna so deen yeteen na. 19 De kantanne yi yǝbaxi na kii nin Kora nun Merari yixetene ye. 20 Lewi bǝnsǝnna muxuna nde Axiya nan yi yengi dǝxi nafunla nun se saripǝnxine xǝn ma naxanye yi ramaraxi Ala Batu Banxini. 21 Ladana yixetene Gerisǝn xabilani, ne denbaya xunne nan itoe ra: Yexiyeli nun 22 Yexiyeli a diine Setama nun a xunyen Yowel. Ne nan yi yengi dǝxi nafunle xǝn naxanye yi ramaraxi Alatala Batu Banxini. 23 Amirama nun Yisehari nun Xebiron nun Yusiyele xabilane yi, muxuni itoe nan ti wanle ra: 24 Musaa diin Gerisǝmi yixetena nde Sebuweli nan yi se ramara banxin feene xun na. 25 A benba Gerisǝmi xunyena Eliyesi yi Rexabiya sǝtǝ,

Rexabiya yi Esayi soto, Esayi yi Yorami soto, Yorami yi Sikiri soto, Sikiri yi Selomiti soto. **26** Selomiti nun a ngaxakedenne nan yi yengi doxi nafulu sarijanxin xon ma, Manga Dawuda nun xabila xunne nun sofa kuntigin naxanye yi muxu wuli nun muxu keme xun na e nun sofa kuntigi gbete ye seen naxanye fixi Ala ma. **27** E seen naxanye birin tongoxi yengeni, e na ndee findi Alatala Batu Banxin masuxu seene ra. **28** Selomiti nun a ngaxakedenne mon yi e yengi doxo nafunla xon ma, Nabi Samuyeli nun Kisu a diin Soli nun Neri a diina Abineri nun Seruyaa diin Yowaba naxan fi Ala ma. **29** Yisehari xabilan muxuni itoe nan ti wanla ra: Kenaniya nun a diine nan yi yengi doxi kiti sa feene xon ma Isirayila yamaan xun na. **30** Xebiron xabilan muxun naxanye ti wanla ra: Hasabi nun a ngaxakedenne nan yi yengi doxi Isirayila yamanan xon ma Yuruden sogegododen binni. Xeme kenden muxu wuli keden muxu keme solofere nan yi e ra, naxanye yi walima Alatala nun mangan xa. **31** Yeriya nan yi Xebiron xabilane xunna ra, fata xinle sebe kiin na e bonson kedin ma. Dawudaa mangayaan jee tonge naaninden, muxune yi bonson kedine fese fese, e fa a kolon a xeme kende gbeena ndee yi Xebiron xabilane muxune ye Yaaseri taani Galadi yamanani. **32** Yeriya nun a ngaxakedenne, xeme kenden muxu wuli firin muxu keme solofere nan yi e ra. Denbaya xunne nan yi a birin na. Manga Dawuda yi e findi Ruben nun Gadi nun Manase bonson xunne ra Ala nun mangana feene birin yi.

27 Isirayila kaan naxanye wali mangana ganli, ne nan itoe ra, xabila xunne nun sofa kuntigin naxanye yi muxu wuli nun muxu keme xun na e nun sofa kuntigi gbete ye. E yitaxunxi muxu wuli moxojen nun naanin yeen nan ma. Jeen kike yo kike gali keden yi fama nen walideni mangan xa. **2** Sabadiyeli a diin Yasobeyami nan yi gali singen kuntigin na jeen kike singeni. Muxu wuli moxojen nun naanin nan yi a yamarin bun ma. **3** Sabadiyeli yi findixi Peresi yixetena nde nan na. A tan nan findi ganla birin kuntigin na jeen kike singeni. **4** Axoxi xabilan muxuna nde Dodayi yi findi gali kuntigin na jeen kike firinden. Mikiloti yi findi a sofa kuntigin na. Muxu wuli moxojen nun naanin nan yi a yamarin bun ma. **5** Saraxarali Yehoyadaa diin Benaya yi findi gali kuntigin na jeen kike saxandeni. Muxu wuli moxojen nun naanin nan yi a yamarin bun ma. **6**

Benaya nan yi Dawudaa sofa wekilexi tonge saxanne xunna ra. A diina Amisabadi yi a ganla nin. **7** Yowaba xunyena Asaheli yi findi gali kuntigin na jeen kike naaninden. A diin Sebadiya nan ti a joxon na. Muxu wuli moxojen nun naanin nan yi a yamarin bun ma. **8** Samehuti Yisira kaan yi findi gali kuntigin na jeen kike suulunden. Muxu wuli moxojen nun naanin nan yi a yamarin bun ma. **9** Ikesi a diina Ira Tekowa kaan yi findi gali kuntigin na jeen kike senninden. Muxu wuli moxojen nun naanin nan yi a yamarin bun ma. **10** Efirami bonsonna muxuna nde Xeksi Pelon kaan nan yi findi gali kuntigin na jeen kike soloferedeni. Muxu wuli moxojen nun naanin nan yi a yamarin bun ma. **11** Sera xabilan muxuna nde Sibekayi Xusa kaan yi findi gali kuntigin na jeen kike solomasexeden. Muxu wuli moxojen nun naanin nan yi a yamarin bun ma. **12** Bunyamin bonsonna muxuna nde Abiyeseri Anatoti kaan yi findi gali kuntigin na jeen kike solomanaaninden. Muxu wuli moxojen nun naanin nan yi a yamarin bun ma. **13** Sera xabilan muxuna nde Maharayi Netofa kaan yi findi gali kuntigin na jeen kike fudeni. Muxu wuli moxojen nun naanin nan yi a yamarin bun ma. **14** Efirami bonsonna muxuna nde Benaya Piraton kaan yi findi gali kuntigin na jeen kike fu nun kedenden. Muxu wuli moxojen nun naanin nan yi a yamarin bun ma. **15** Otiniyeli xabilan muxuna nde Xelidayi Netofa kaan yi findi gali kuntigin na jeen kike fu nun firinden. Muxu wuli moxojen nun naanin nan yi a yamarin bun ma. **16** Kuntigin naxanye yi Isirayila bonsonne xun na, ne ni i ra: Ruben bonsonna xun na, Sikiri a diina Eliyeseri. Simeyon bonsonna xun na, Makaa diin Sefati. **17** Lewi bonsonna xun na, Kemuyeli a diin Hasabi. Haruna yixetene xun na, Sadoki. **18** Yuda bonsonna xun na, Dawuda tada Elihu. Isakari bonsonna xun na, Mikeli a diina Omiri. **19** Sabulon bonsonna xun na, Abadi a diin Yisemaya. Nafatali bonsonna xun na, Asiriyeli a diin Yerimoti. **20** Efirami bonsonna xun na, Asasiyaa diin Hoseya. Manase bonsonna foxo kedenna xun na, Pedayaa diin Yoweli. **21** Manase bonsonna foxo kedenna fan xun na Galadi yamanani, Sakari a diin Yido. Bunyamin bonsonna xun na, Abineri a diin Yaasiyeli. **22** Dan bonsonna xun na, Yeroxamaa diina Asareli. Isirayila bonson kuntigine nan ne ra. **23** Dawuda mi xemene tenge, naxanye barin munma yi jee moxojen ti bayo Alatala bata yi a fala a Isirayila kaane wuyama ayi

nen alo sarene kore. **24** Seruyaa diin Yowaba bata yi Isirayila kaane yate fola, koni a mi a rajan masoto Alaa xolon ma lan Isirayila yamaan ma. Na yaten mi sebe Dawudaa taruxu kedine kui. **25** Adiyeli a diina Asamaweti nan yi mangana nafulu kantanna ra. Yusiya diin Yonatan nan yi nafulu kantanna ra banxidene nun taa gbetene nun kantan ti banxi matexine yi. **26** Kelubu a diina Esiri nan yi xee biine xunna ra. **27** Ramati kaan Simeyi nan yi manpa bili nako feene xun na. Sefami kaan Sabidi nan yi manpa bili bogine nun manpa feene xun na. **28** Gederi kaan Baali-Xanan nan yi oliwin nun burunna xode binle fe xun na yamanan lanbanni. Yowasa nan yi ture feen xunna ra. **29** Sitirayi Saron kaan nan yi jingene fe xunna ra Saron yamanani. Adalayi a diin Safati nan yi jingene fe xunna ra lanban yirene yi. **30** Sumayila bonsonna muxuna nde Obili nan yi jogomene fe xunna ra. Yexedeya Meronoti kaan nan yi sofanle fe xunna ra. **31** Yasisi nan yi siine nun yexene fe xunna ra, Hagari bonsonna muxuna. Na muxune nan yi yengi dxi Manga Dawuda soto seene xon ma. **32** Manga Dawuda soto Yonatan findi a kawandi muxun nun a sebeli tiin nan na, a fekolonna yi gbo. Xakimoni a diin Yexiyeli nan yi mangana dii xemene masuxu muxun na. **33** Mangan kawandi muxun nan yi Axitofeli fan na. Mangan xoyin nan yi Xusayi ra, Araka bonsonna muxuna nde. **34** Benayaa diin Yehoyada nun Abiyatari nan lu Axitofeli joxoni. Yowaba nan yi mangana gali kuntigin na.

28 Dawuda yi Isirayila kuntigine birin malan Yerusalen yi. Bonson xunne nun gali kuntigin naxanye yi walima mangan xa, ne yi fa, e nun sofa kuntigin naxanye yi muxu wuli nun muxu keme xun na. Kuntigine fan yi fa naxanye yi goronne nun xuruseene xun na, mangan nun a diine gbeen yi naxanye ra, e nun manga banxin kuntigine nun sofa wekilexine nun sofa kendene birin. **2** Manga Dawuda yi keli, a naxa, “Ngaxakedenne, n ma yamana, e tuli mati n xuiin na! N yi waxi banxina nde ti feni Alatalaa Layiri Kankiraan dxe denaxan yi, en ma Ala san tidena, n yi n yiton a ti feen na. **3** Koni, Ala bata yi a fala n xa, a naxa, ‘I mi banxin tima n xa, bayo sofaan ni i ra, i bata muxune faxa.’ **4** Koni, Alatala, Isirayilaa Ala bata n sugandi n bonsonna birin tagi alogo n xa findi Isirayila mangan na habadan, bayo a bata Yuda bonsonna sugandi kuntigin na, a yi n

fafe a denbayaan sugandi Yuda bonsanni, a yi n tan sugandi n fafe a denbayani, a yi n dexo mangan na Isirayila xun na. **5** Iki, a bata dii wuyaxin naxan fi n ma, a bata Sulemani sugandi ne ye alogo a xa a dexo n joxoni mangan na Alatala xa Isirayila xun na. **6** A bata yi a fala n xa, a naxa, ‘I ya dii xemene Sulemani nan n batu banxin tima e nun n ma yinne, bayo n bata a tan nan sugandi, a findima nen n ma diin na, n yi findi a fafe ra. **7** N mangayani tonma a xa nen naxan luma habadan, xa a n ma yamarine nun n ma sariyane suxu alo to.’ **8** Nayi, iki, Isirayila kaane birin yetagi, Alatalaa yamana, e nun en ma Ala yetagi naxan tuli tixi en na, e sobe so Alatala en ma Alaa yamarine xaranna ma, e yi e suxu. Nayi, e luma nen yamana fajini e denaxan yi, e mon yi a lu e keen na e yixetene xa. **9** I tan, n ma dii xemene Sulemani, kata Ala kolondeni n walixi naxan xa, a batu i bonen ma feu e nun i niin birin na. Alatala i bone yi feene birin fesefesema, a muxune miriyane birin kolon. Xa i a fen, a tinma nen i yi a to. Koni xa i i me a ra, a mema i ra nen habadan. **10** Iki, i nxe a kolonje nen a Alatala bata i sugandi alogo i xa a batu banxin ti a xa, denaxan findima a yire sarijanxin na. Nayi, i sobe so, i wanla ke.” **11** Dawuda yi yire sarijanxin ti kiin kedin so Sulemani yii, e nun banxin naxanye tima a rabilinni e nun gbeti ramaraden nun konkon naxan mate e birin xa hanma denaxan a kui, e nun Layiri Kankiraan dextoma denaxan yi. **12** A mon yi wama denaxanye birin ti feni, a yi ne fan ti kiin kedin so a yii, Alatala Batu Banxin yinne nun banxin naxanye tima yinna xon a rabilinni, e nun nafulu ramaradene Ala Batu Banxini, e nun se sarijanxine ramaradene. **13** A yi saraxaraline nun Lewine xinle seben fan so a yii, e nun walikeen naxanye yi lanma e yi wanle rakamali Alatala Batu Banxini, e nun seen naxanye yi rawalima na kui. **14** A yi xema seene birin binyan xasabin yita a ra, e nun gbeti fixe seene binyana, birin nun a rawali kiina, **15** lenpu dexo se xema daxine nun lenpu xema daxine nun lenpu dexo se gbeti fixe daxine nun lenpu gbeti fixe daxine binyane, birin nun a rawali kiina, **16** e nun xema tabanle birin binya xasabina, burune yi sama naxanye fari Ala Batu Banxini, e nun gbeti fixe tabanle, **17** e nun sube tongo se xema daxine nun wuli xuya goron xema daxine nun igelengen xema daxine birin binyana e nun xema barama daxine nun barama gbeti fixe daxine birin binyana, birin nun a rawali kiina. **18** A mon yi wusulan ganden ti kiin

kedin so a yii, e nun a xema fajin binyan xasabina. A mɔn yi wontoron nafala kiin kedin fan so a yii, naxan yi tixi maleka gubugubu kan sawura xema daxine bun naxanye gabuteye yi bandunxi Alatalaa Layiri Kankiraan xun ma. **19** Nayi, Dawuda yi a fala, a naxa, “Itoe birin sebexi kedin kui n naxan sɔtɔxi Alatala ra. Ala nan kolonna fi n ma n banxin ti kiini ito sebe kedini.” **20** A mɔn yi a fala Sulemani xa, a naxa, “N ma dii xemena, i wekile, i senbe so, i wanla ke. I nama kuisan, i nama gaxu! Amasɔto Marigina Alatala, n ma Ala luma nen i xɔn. A mi i rabepinjɛ mume! A i malima nen han i yelin wanli ito birin nakamale Alatala Batu Banxina fe yi. **21** Saraxaraline nun Lewine fan mɔn i fema Ala Batu Banxin tideni. Muxu jɛnige fajine fama nen i malideni wanli ito ra, kuntigine nun yamaan birin luma nen i ya yamarin bun.”

29 Manga Dawuda yi a fala yamaan birin xa, a naxa, “N ma diin Sulemani, Ala naxan sugandixi, na munma kɔxɔ, a mi wanla kolon singen. Wanla naxan be, a gbo, bayo banxini ito mi tima muxune xan xa fɔ Marigina Alatala. **2** N bata n senben birin nawali alogo n xa Ala Batu Banxin ti feni tɔn. N bata xemaan nun gbeti fixen nun sulan nun wuren nun wudin nun gɛmɛ tofajin nun dayimu daxin sifan birin nun gɛmɛ fajni fixɛ gbegbe malan. **3** N naxan birin yitɔn yire sarijanxin ti feen na, n bata n ma xemaan nun n ma gbeti fixen fan sa na fari n sɔtɔ seene yɛ bayo n na n sɔbɛ soxi Ala Batu Banxina fe ma. **4** Na yatɛne ni i ra: xemaan kilo wuli kɛmɛ wuli firin naxan keli Ofiri yi e nun gbeti fixɛ fajin kilo wuli kɛmɛ firin wuli tonge saxan e nun solomasɛxɛ. Na sama banxi kankene nan ma. **5** Xemaan nun gbeti fixeni itoe sama seene nan ma a lan e xa sa naxanye ma e nun yiirawanle yii funfune birin. Iki, nde en tan yɛ naxan jɛnigen tongɛ Alatala xa to?” **6** Denbaya xunne nun Isirayila bɔnsɔn xunne nun sofa kuntigin naxanye yi muxu wuli nun muxu kɛmɛ xun na e nun mangana wali xunne, ne birin yi jɛnigen tongo wanli ito xili yi. **7** E yi fa finmaseni itoe ra Ala Batu Banxin ti feen na: xemaan kilo wuli kɛmɛ wuli tonge solofere kilo solomasɛxɛ e nun naanin, e nun gbeti fixen kilo wuli kɛmɛ saxan wuli tonge naanin e nun sulan kilo wuli kɛmɛ sennin wuli fu nun firin e nun wuren kilo miliyɔn saxan wuli kɛmɛ naanin. **8** Birin yi gɛmɛ tofajine so Gɛrisɔn yixɛtɛn Yɛxiyeli yii, Alatala Batu Banxin nafulu ramarana. **9** Yamaan yi sɛwa na jɛnige

ma seene fe ra, bayo e bata na liga e bɔjɛn birin na Alatala xa. Manga Dawuda fan yi sɛwa na fe ra. **10** Dawuda yi Alatala tantun yamaan birin yetagi. A yi a fala, a naxa, “Nxu benba Isirayilaa Ala, Alatala, tantunna i xa habadan han habadan. **11** I tan, Alatala, gboon nun senben nun binyen nun mangayaan nun tantunna birin i xa. Seen naxan birin kore xɔnna nun bɔxɔ xɔnna ma, i tan nan gbee ne birin na. I tan, Alatala nan mangan na. I tan nan dunuja birin xun na. **12** Bannayaan nun xunna kenla fataxi i tan nan na. I tan nan feen birin xun na, senben nun fangan birin i tan nan yii. Senbena i tan nan na i muxune fe yite, i yi e senbe so.” **13** “Iki, nxɔ Ala, nxu i tantunma, nxu yi i xili magaxuxin binya. **14** Nanse n tan na? Nanse n ma yamaan na naxan a ligɛ nxu yi nɔ finmaseen sifani itoe fiye? A birin kelixi i tan nan yii. Nxu naxan soma i yii, na birin kelixi i tan nan singe yii. **15** Nxu findixi xɔjɛne nan na i yɛɛ ra yi, alo nxu benbane yi kii naxan yi. Nxɔ siimayaan luxi nen dunuja yi alo nininna naxan danguma. Yigi yo mi nxu xa. **16** Alatala, nxɔ Ala, finmase fajini itoe birin kelixi i tan nan yii, nxu naxan malanxi alogo nxu xa banxin ti i xili sarijanxin binyama denaxan yi. I tan nan gbee na birin na.” **17** “N ma Ala, n na a kolon a i muxune bɔjɛ yi feene kolon, tinxinyaan mɔn nafan i ma. N bata saraxani ito jɛnige i xa n bɔjɛ tinxinxini. N mɔn bata a to sɛwani i ya yamaan fan be alogo e xa jɛnige ma saraxane ba i xa. **18** Alatala, nxu benbane Ibrahima nun Isiyaga nun Isirayilaa Ala, i xa xaxinli ito sa i ya yamaan bɔjɛni alogo e xa lu i fɔxɔ ra habadan. **19** I xa n ma diin Sulemani mali alogo a fan xa lu i ya yamarine nun i ya sariyane fɔxɔ ra, a lu i ya tɔnne fɔxɔ ra a bɔjɛn ma feul! A mɔn yi banxini ito ti n naxan ti fe yitɔnxi.” **20** Dawuda yi a fala yamaan birin xa, a naxa, “Tantunna Alatala xa, ɛ Ala.” Yamaan birin yi Alatala tantun, e benbane Ala, e fa e yigodo, e e xinbi sin Alatala nun mangan yetagi. **21** Na xɔtɔn bode, Isirayila kaane yi saraxane ba Alatala xa. E saraxa gan daxi gbegbe ba, tura wuli keden nun konton wuli keden e nun yɛxɛɛ dii wuli keden. E mɔn yi minse saraxane nun saraxa gbete wuyaxi ba Isirayila birin ma fe ra. **22** Na lɔxɔni, e yi e dege, e yi e min Alatala yetagi sɛwa gbeeni. E mɔn yi Dawudaa diin Sulemani dɔxɔ mangan na a firindeni. E yi turen sa a xunni Alatala yetagi, a xa findi e yɛɛratiin na. E yi Sadɔki fan dɔxɔ saraxaraliin na. **23** Sulemani yi dɔxɔ Alatalaa manga gbɛdeni, a findi mangan na a fafe Dawuda

ƙɔɔɔni. A yi xunna kenla sɔɔ, Isirayila birin yi a yamarin suxu. **24** Kuntigine nun sofa wekilexine nun Manga Dawudaa dii xeme birin yi de xuiin tongo a e luma nen Manga Sulemani a yamarin bun ma. **25** Alatala yi Sulemani a fe yite Isirayila muxune birin yetagi. A yi a mangayani te dangu Isirayila manga singene birin na. **26** Yese a diin Dawuda yi mangayaan liga Isirayila birin xun na. **27** A ƙee tonge naanin nan ti mangayani Isirayila xun na, ƙee solofere Xebiron taani, ƙee tonge saxan e nun saxan Yerusalen taani. **28** A siimaya xunkuyen sɔɔ nen, a laxiraya foriya faɗin nun sewani. Herisige kanna nan yi a ra, a binyen fan sɔɔ nen. A dii Sulemani yi findi mangan na a ƙɔɔni. **29** Manga Dawuda kewanle, a folona han a rapanna, ne birin sebexi fetoon Samuyeli nun Nabi Natan nun fetoon Gadi e kedine kui. **30** Kedini itoe a mangayaan nun a wekilen nan ma fe falama e nun feen naxanye liga a waxatini Isirayila yamanan nun yamana gbetene yi.

Taruxune Firindena

1 Dawudaa dii xemen Sulemani a mangayaan sabati nen han! Alatala, a Ala lu nen a xon, a yi a findi manga binyaxin na. **2** Sulemani yi Isirayila yamaan birin maxili, gali kuntigin naxanye yi muxu wuli xun na e nun naxanye yi muxu keme xun na, e nun Isirayila muxu gbeene nun denbaya xunne birin. **3** Manga Sulemani nun Isirayila yamaan birin yi sa e malan taan kideni Gabayon taani, amasoto e nun Alaa Naralan Bubun yi tixi mena nin, Musa, Alatalaa walikeen bubun naxan ti tonbonni. **4** Koni, Dawuda bata yi siga Alaa Layiri Kankiraan na Kiriyati-Yeyarin taani, a denaxan yiton a xili yi, amasoto a bata yi bubuna nde ti Yerusalen yi nun. **5** Besaleli, Yuri a dii xemena, Xuru mamandenna, na saraxa ganden naxan nafala sulan na, na fan yi tixi mena nin Alatala Batu Bubun yetagi Gabayon taani. Sulemani nun yamaan yi e malan menni Alatala maxodin xinla ma. **6** Sulemani siga saraxa gande sula daxin dexon mena nin Alatala yetagi a yi saraxa gan daxin wuli keden ba Ala xa Naralan Bubuni. **7** Na loxon yeteen koon na, Ala yi mini Sulemani xa, a yi a fala a xa, a naxa, “Naxan xoli i ma, na maxodin, n na a soma i yii nen.” **8** Sulemani yi a yabi, a naxa, “I bata n fafe Dawuda, i ya walikeen suxu hinanni, i yi n findi mangan na a joxoni. **9** Iki, Marigina Alatala, i layirin naxan tongo n fafe xa, na rakamali, amasoto i bata n findi mangan na yama gbeen xun na naxan wuya alo burunburunna. **10** Yandi, xaxili fajin nun fe kolonna fi n ma, alogo n xa no i ya yamaan makite. Xa na mi a ra, nde noe i ya yama gbeeni ito mare?” **11** Ala yi a fala Sulemani xa, a naxa, “I mi nafunla maxodinxi, i mi binye maxodinxi, i mi a falaxi a i yaxune xa faxa, i mi siimaya xunkuyen maxodinxi. Koni i xaxilimayaan nun fekolonna nan maxodinxi alogo i xa no n ma yamaan matinxinje, n ni i findixi mangan na naxan xun na. **12** Nanara, n xaxilimayaan nun fekolonna soma i yii nen. N mon yi nafunla nun binyen nun seen birin fi i ma, manga yo munma naxan soto singen, gbete mon mi naxan sotoma ba i tan na.” **13** Sulemani yi keli taan kideni Gabayon yi Naralan Bubun yi denaxan yi, a xete Yerusalen yi, a yi lu mangayani Isirayila yi. **14** Sulemani yi yenge so wontorone nun sofane malan, wontoro wuli keden keme naanin e nun sofa wuli fu nun firin, a yi ndee lu a fema Yerusalen yi, a yi a donxene rasiga taane yi a wontorone yi ramarama

denaxanye yi. **15** Xemaan nun gbeti fixen yi gbo ayi Yerusalen yi alo gemene, suman wudine fan yi wuya alo burunna xode binla naxanye yi yamanan lanban yireni. **16** Sulemani a soone yi kelima Misiran nun Kuwe yamanane nin, yulane yi sa e sarama denaxanye yi mangan xa. **17** Wontoron naxan yi kelixi Misiran yamanani, na yi sarama gbeti fixen kilo solofere nan na. Soon yi sarama gbeti fixen kilo keden e nun a tagiin nan na. Na yulane nan mon yi fama Xiti mangane nun Arami mangane gbeene ra.

2 Sulemani yi yamarin fi a e xa Alatala Batu Banxin ti a xinla binya feen na, e nun manga banxina a tan Sulemani xa. **2** Manga Sulemani yi muxu wuli tonge solofere sugandi goron maxanle ra, geme sonle muxu wuli tonge solomasexe, muxu wuli saxan keme sennin e kantan tiine ra. **3** Sulemani yi xeraan nasiga Tire mangan Xurami ma, a naxa, “I naxan liga n fafe Dawuda xa, na liga n fan xa, i fofone rasiga naxan ma alogo a xa banxin ti a yete xa. **4** N waxi banxin ti feni Alatala xa, n ma Ala, a xinla binya feen na alogo nxu xa saraxane rali a ma, e nun wusulan xiri fajin gan daxine a yetagi, e nun burun nalixina a yetagi, e nun saraxa gan daxine xotonna nun jinbanna ra, e nun Matabu Loxone yi, e nun kike nenen sanle ma, e nun Alatala en ma Alaa sali loxone birin yi. Na nan daxa a liga Isirayila yamanani waxatin birin. **5** N waxi Ala Batu Banxin naxan ti fe yi, a lanma nen a findi banxi gbeen na, amasoto nxo Ala gbo alane birin xa. **6** Koni nde noe banxin tiye a xa? Hali kore xonna nun a gbona, a mi noe xanje a yi. Nde n tan na naxan a lige n tan yi banxin ti a xa? N saraxa ganden nan tun tima a xa. **7** Nayi, yiirawanla nde rafa n ma, naxan fatan xemaan nun gbeti fixen nun wuren nafale. A mon fatan gesen wurundunje, a fatan dugi mamiloxin nun dugi gbeela nun dugi makadanxine rafale. A xa fa sa n ma yiirawanle fari n fafe Dawuda naxanye sugandi Yerusalen taan nun Yuda yamanani. **8** I mon xa Liban sumanne rafa n ma e nun fofone nun xarinne, bayo n na a kolon a i ya walikene fatan Liban wudine sege. Nayi, n ma walikene nun i ya walikene noe wale nen e bode yi, **9** e yi wudi wuyaxi yiton n xa, bayo n waxi banxi gbeen nan ti fe yi Ala Batu Banxin na. **10** I ya walikeen naxanye wudine segema e yi e yibolon, n murutu fupin kilo wuli sennin nan soma ne yii e nun fundenna kilo wuli sennin e nun manpaan litiri keme solomasexe e nun turen litiri keme solomasexe.” **11**

Tire mangan Xurami yi Sulemani a falan yabin sebe kedini, a naxa, “Alatala to a yamaan xanuxi, a bata i findi mangan na e xun na.” **12** Xurami mɔn yi a fala a xa, a naxa, “Binyen xa fi Alatala ma, Isirayilaa Ala, naxan bɔxɔn nun kore xɔnna daxi, a yi dii xaxilimaan fi Manga Dawuda ma naxan Alatala Batu Banxin tima e nun manga banxina a yete xa. **13** Iki, n muxuna nde rasigama i ma naxan xaxili gbo, a fatan wale. Xirami-Abi nan na ra, **14** a nga kelixi Dan bɔnsɔnna nin, Tire kaan nan a fafe ra. A fatan xɛmaan nun gbeti fixɛn nun sulan nun wuren nun gɛmɛn wale. A mɔn fatan dugi mamiloxin nun dugi gbeela nun dugi makadanxin nafale. A mɔn fatan wanla sawuran sifan birin nafale, a nɔɛ seene birin nafale nɛn muxune naxanye maxɔdinɛ a ra. E nun i ya yii ra walikene xa sa wali e bode xɔn e nun i fafe Dawuda gbee muxu sugandixine. **15** Iki, n kannu, tin i xa murutun nun fundenna nun turen nun manpaan nasiga i ya walikene ma, i naxanye fe falaxi. **16** Nxu sa Liban wudine segema nɛn han i waxi xasabin naxan xɔn ma. Nxu yi e rasiga i ma igen xun ma han Yafa taani, i sa e tongo mɛnni, i siga e ra Yerusalen yi.” **17** Xɔɔɛn naxanye birin yi Isirayila yamanani, Manga Sulemani yi ne birin yate alo a fafe Dawuda a liga kii naxan yi. Muxu wuli kɛmɛ wuli tonge suulun wuli saxan kɛmɛ sennin. **18** A yi muxu wuli tonge solofere sugandi goron maxanle ra, muxu wuli tonge solomasɛɛ gɛmɛ masonle ra geyaan ma, muxu wuli saxan kɛmɛ sennin kantan tiine nun yamaan nawali muxune ra.

3 Manga Sulemani yi Alatala Batu Banxin ti folo Yerusalen yi Moriya geyaan fari, denaxan yita a fafe Dawuda ra, a fafe Dawuda denaxan yiton Oronan Yebusu kaana lonna ma. **2** A banxin ti folo a mangayaan jɛɛ naaninden kiken firinden nan ma. **3** Sulemani yi Ala Batu Banxin beten sa, a kuyana nɔngɔnna yɛ tonge suulun e nun naanin, a yigbona nɔngɔnna yɛ mɔxɔɔɛ. **4** Ala Batu Banxin so deen palaan yi kuya nɔngɔnna yɛ mɔxɔɔɛ, a kuyan nun banxini gboon yi lan, banxini teena nɔngɔnna yɛ mɔxɔɔɛ. Sulemani yi xɛma yilenlɛnxine sa na birin ma. **5** A yi farinne kankan banxin pala gbeen kankene birin ma, a yi xɛma fajin sa farinne ma, a yi tugu deen nun yɔlɔnxɔndi sawurane rafala xɛmani. **6** A yi banxin natofan gɛmɛ fajine ra, xɛmaan tan yi kelima Parabayimi nin. **7** A yi xɛma yilenlɛnxine sa Ala Batu Banxin ma, e nun a xalanbene nun a

de wudine nun a deene. A yi maleka sawurane soli banxi kankene ma. **8** Palaan naxan xili yire sarijanxi fisamantenna, a yi na ti Ala Batu Banxini, naxan nun banxini gboon yi lan, a kuyana nɔngɔnna yɛ mɔxɔɔɛ. A yi xɛma fajni yilenlɛnxine sa na palaan ma, kilo wuli mɔxɔɔɛn nun keden. **9** Kilo tagiin nan yi a gbangban lantuman xɛma daxin keden kedenna birin binyan na. A mɔn yi xɛma yilenlɛnxine sa banxin faza binna birin ma. **10** A yi maleka sawuran firin ti banxin yire sarijanxi fisamantenni, a xɛma yilenlɛnxine sa ne fan ma. **11** Maleka sawurane gubugubune birin yi kuya nɔngɔnna yɛ mɔxɔɔɛ. Sawura singen gubugubu keden yi kuya nɔngɔnna yɛ suulun, a yi sigaxi han Ala Batu Banxin kankena, a gubugubun boden fan yi kuya nɔngɔnna yɛ suulun, a yi sigaxi han maleka sawuran bonna gubugubuna. **12** Na sawura firinden gubugubu keden fan yi kuya nɔngɔnna yɛ suulun, a fan yi sigaxi han banxi kanken foxo kedenna bonna, a gubugubu boden fan yi kuya nɔngɔnna yɛ suulun, a yi sigaxi han maleka sawuran bonna gubugubuna. **13** Maleka sawurane gubugubune birin yi kuya nɔngɔnna yɛ mɔxɔɔɛ. E yi tixi e sanne xun na, e yɛɛ rafindixi palaan ma. **14** A yi gari makadanxin nun a gbeela nun a mamiloxin sɔxɔn e bode ra yɛ masansan dugin na, maleka sawurane yi rafalaxi ne ma. **15** A yi senbetɛn firin ti banxin yetagi, naxanye yi kuya nɔngɔnna yɛ tonge saxan e nun suulun. E xunna so kondene yi kuya nɔngɔnna yɛ suulun. **16** A yi yɔlɔnxɔnne rafala, a yi e singan senbetɛnne ra. A girenada wudi bogi sawura kɛmɛ rafala, a yi e singan yɔlɔnxɔnne ra. **17** A yi senbetɛnne ti Ala Batu Banxin tanden ma, keden yiifanna ma, keden kɔmɛnna ma, yiifari ma xii yi xili Yakin, kɔmɛn ma xiina Boosu.

4 A yi saraxa ganden nafala sulan na, a kuyana nɔngɔnna yɛ mɔxɔɔɛ, a yitena nɔngɔnna yɛ fu. **2** Nayi, Xirami yi sulan naxulun, a ige ramarade digilixi gbeen nafala, a yigbona nɔngɔnna yɛ fu, a yitena nɔngɔnna yɛ suulun. Nɔngɔnna yɛ tonge saxan lutin nan yi a rabilinɛ. **3** Ninge sawurane yi a de kinkin bunna rabilinxi. Na sawura fu yi rafalaxi a ma a nɔngɔnna yɛ keden yo keden bun. Ninge sawurane yi rafalaxi safa firin nan ma, ne nun ige ramaraden yi rafalaxi gbindi kedenna nan na. **4** Ige ramaraden yi doxi tura sawura sula daxi fu nun firin nan fari, saxan yɛɛ rafindixi sogegododen binni, saxan sogeteden binni, saxan yiifanna binni, saxan kɔmɛnna binni. E

yi xun xanbi soxi e bode yi nen, e birin gbindin yi ige ramaraden nan bun ma. **5** Yiin ye keden nan yi ige ramaraden nabinyen na, a de kinkin yi rafalaxi nen alo igelengenna dena, a luxi alo gabala fugena, litiri wuli keme wuli mɔxɔŋe ɲɔxɔn nan yi sama a kui. **6** A yi ige kundi fu rafala, a yi suulun dɔxɔ yiifanna ma, suulun kɔmenna ma maxaden na, e nun saraxa gan daxine rasarijandena. Ige ramarade gbeen nafala saraxaraline nan ma fe ra e maxaden na. **7** A yi lenpu dɔxɔ seen xema daxin fu rafala alo a yi yitaxi kedini kii naxan yi, a yi e dɔxɔ Ala Batu Banxini, suulun yiifanna ma, suulun kɔmenna ma. **8** A yi tabali fu rafala, a yi e ti Ala Batu Banxini, suulun yiifanna ma, suulun kɔmenna ma. A mɔn yi wuli xuya goronna xema daxi keme rafala. **9** A yi yinna nde rafala saraxaraline xa, a mɔn yi yin gbeena nde rafala e nun a so deene, a yi sulan sa deene ma. **10** A yi ige ramara se gbeen dɔxɔ Ala Batu Banxin yiifanna ma sogeteden binni. **11** Xirami yi ige ramara seene nun tɛe kɔ seene nun goronne rafala. Xirami yi yelin wanle birin na, a naxanye fɔlɔ Manga Sulemani xa Ala Batu Banxini: **12** Senbeten xungbeen firin, e nun e konde firinne e xuntagi alo barama, e nun yɔlɔnxɔn yalane senbetenne kondene maxidi seene ra, **13** e nun girenada wudi bogi sawura keme naaninna naxanye yi na yɔlɔnxɔn yala firinne ma naxanye yi saxi safa firinna ma e singan kondene rabilinni e maxidi seene ra, kondene naxanye yi luxi alo barama, **14** e nun ige maxali wontorone nun ige kundine e xun tagi, **15** e nun ige kundi gbeen nun tura sawura fu nun firinne a bun tiine ra, **16** e nun xube kɔ seene nun sube tongo seene. Xirami-Abi muranna naxanye birin nafala Sulemani xa Alatala Batu Banxini, ne birin yi rafalaxi sula xuruxin nan na. **17** Mangan na seene rafala sula raxulunxin na bɔxɔ kui gexine nan kui, Yuruden baan mɛrɛmɛrɛni Sukɔti taan nun Sereda taan longonna ra. **18** Sulemani yi na seene birin nafala, na seene yaten sulan xasabin kilon mi yi nɔe kolonɲe. **19** Sulemani mɔn yi seni itoe birin nafala Ala Batu Banxin xa, xema saraxa gandena e nun tabanle buru ralixin yi sama naxanye fari. **20** Xema lenpu dɔxɔ seene nun xema lenpune, naxanye yi lanma e radege yire sarijanxi fisamantenna yetagi alo sariyana a falaxi kii naxan yi, **21** wudi fuge sawurane nun lenpune nun lenpu suxu se xema kende daxine. **22** Filene nun wuli xuya goronne nun ige min seene nun deene yire sarijanxin

so deen nun Ala Batu Banxin so deen na, xemaan nan yi ne birin ma.

5 Manga Sulemani yelin Alatala Batu Banxin tiye waxatin naxan yi, a fafe Dawuda bata yi seen naxanye birin dentegɛ Ala xa nun, a yi fa ne birin na Ala Batu Banxini, gbetin nun xemaan nun seene birin. A yi e sa nafulu ramaradeni Ala Batu Banxini. **2** Nayi, Manga Sulemani yi Isirayila fonne nun bɔnsɔn kuntigine nun Isirayila kaane denbaya xunne birin malan Yerusalem yi Alatalaa Layiri Kankiraan tongo feen na keli Dawudaa Taani, denaxan mɔn xili Siyon. E siga a ra Ala Batu Banxini. **3** Isirayila xemene birin yi e malan mangan fema kike solofereden na, sali waxatini. **4** Isirayila fonne birin to fa, Lewi bɔnsɔnna muxuna ndee yi fa kankiraan na. **5** E yi kankiraan nun Naralan Bubun xali e nun se sarijanxin naxanye yi a kui. Saraxaraliin naxanye yi Lewi bɔnsɔnni, ne nan e xali. **6** Manga Sulemani nun Isirayila yamaan birin malanxina a fema, e ti Layiri Kankiraan yetagi. E yi yɛxɛene nun ɲingene ba saraxan na, e yi wuya han e xasabin mi yi nɔe kolonɲe. **7** Saraxaraline yi Alatalaa Layiri Kankiraan xali a yireni, banxin yire sarijanxi fisamantenni maleka sawurane gubugubune bun ma. **8** Amasɔtɔ maleka sawurane gubugubune yi yibandunxi Layiri Kankiraan nun a tongo tamine nan xun ma. **9** A tongo tamine yi kuya han e xunne yi toma yire sarijanxi fisamantenna yetagi, koni e mi yi toma tandeni. E mɔn na han to. **10** Walaxa firinne nan tun yi Layiri Kankiraan kui Musa naxanye sa a kui Horebe गयाan ma, Alatala layirin xidi e nun Isirayila kaane tagi denaxan yi, e mini xanbini Misiran yamanani. **11** Saraxaraline yi minima yire sarijanxini waxatin naxan yi, saraxaraliin naxanye birin yi na, ne birin bata yi rasarijan hali e to mi yi yɛbaxi e yitaxun kii ma. **12** Lewi bɔnsɔnna beti bani itoe nan yi tixi Ala Batu Banxin saraxa ganden yiifanna ma, Asafi nun Heman nun Yedutun nun e diine nun e xabilane. E yi maxidixi taa dugi fajine nin. E karijanne nun kondenne nun bɔlɔnne suxi e yii, saraxaraliin muxu keme firin nan yi tixi e fema naxanye yi xɔtane fema. **13** Xɔta fene nun beti baane to e malan Alatala batudeni, e yi a tantun, e yi xɔtane fe, e karijanne maxa e nun maxase gbeteɲe, e naxa, “Ala fan, a hinanna luma nen habadan!” Na waxatin yeteni, Alatalaa banxin yi rafe kundaan na. **14** Saraxaraline mi yi nɔe luyɛ na e wanla ra, bayo

kundaan yi gbo, amasoto Alatalaa nɔrɔn bata yi Alaa banxin nafe.

6 Nayi, Sulemani yi a fala, a naxa, “Alatala bata a ragidi a xa dɔxo kunda yidimixini! **2** N bata banxi fajin ti naxan findima i dɔxɔden na, i tan Ala, i luma denaxan yi habadan.” **3** Mangan yi a yee rafindi Isirayila yamaan ma naxanye birin yi tixi na, a duba e xa. **4** A yi a fala, a naxa, “Tantunna Alatala xa, Isirayilaa Ala, naxan falan ti n fafe Dawuda xa, naxan a falane rakamalima, a naxa, **5** ‘Xabu n nan n ma Isirayila yamaan namini lɔxoni Misiran yamanani, n mi taa sugandi Isirayila bɔnsɔnne xa, banxin tiye n xinla binya feen na denaxan yi, n mi mangan sugandi alogo a xa lu n ma Isirayila yamaan xun na. **6** Koni iki, n bata Yerusalen sugandi alogo n xinla xa lu na yi, n bata Dawuda sugandi alogo a xa lu n ma Isirayila yamaan xun na.’ **7** N fafe Dawuda yi waxi banxin ti feni Alatala xinla binyaden na, Isirayilaa Ala. **8** Alatala bata yi a fala n fafe xa, a naxa, ‘Amasoto i bata wa banxin ti feni n xinla binyaden na, na miriyaan tongo feen bata lan. **9** Koni, i tan xa mi banxin tima, fo i ya diina, i naxan sɔtɔxi, na nan banxin tima n xinla binyaden na.’” **10** Sulemani mɔn yi a fala, a naxa, “Alatala layirin naxan tongo, a bata na rakamali. N bata ti n fafe Dawuda jɔxɔni, n yi dɔxo Isirayila mangan na, alo Alatala a fala kii naxan yi, n yi banxin ti Alatala xinla binyaden na, Isirayilaa Ala. **11** N bata sa Layiri Kankiraan dɔxo menni. Alatala layirin naxan xidi e nun Isirayila kaane tagi, na taxamasenna nan saxi a kui.” **12** Sulemani yi ti Alatalaa yire sarjɔnɔnɔn yetagi, Isirayila yamaan birin yetagi. A yi a yiine yite kore. **13** Sulemani bata yi gbɔngbinna rafala wure gbeela ra tanden tagi, a yi kuya nɔngɔnna ye suulun, a yite nɔngɔnna ye saxan. A te na fari, a yi a xinbi sin Isirayila yamaan birin yetagi. A yi a yiine yite kore, **14** a yi Ala maxandi, a naxa, “Alatala, Isirayilaa Ala! Ala yo mi na alo i tan kore xɔnna ma hanma bɔxo xɔnna fari. I ya layirin nun i ya hinanna luma nen i ya walikene xa naxanye sigan tima i yetagi e bɔɔn birin na. **15** I bata i ya falan nakamali i ya walikeen xa, n fafe Dawuda, i naxan fala i deen na, i bata na rakamali i senbeni to. **16** Iki, Alatala, Isirayilaa Ala, i mɔn xa a liga i layirin naxan tongo n fafe Dawuda xa, i bata yi a fala a xa, i naxa, ‘I jɔxo yibiran mi jɔnɔn n yetagi mume Isirayilaa mangaya gbɛdeni, xa i ya diine n ma kiraan suxu, e sigan ti n yetagi tinxinni, e

n ma sariyan suxu alo i sigan tixi n yetagi kii naxan yi.’ **17** Iki, Alatala, Isirayilaa Ala, n bata i mafan, i xa na rakamali, i layirin naxan tongoxi i ya walikeen Dawuda xa! **18** Koni, Ala fa dɔxe muxune tagi dunɔna yi ba? Hali kore xɔnna nun a gbona, i mi nɔe xaje a yi, e faxi fa n banxin naxan tixi ito ra. **19** Hali na birin, Alatala, n ma Ala, i tuli matima i ya walikena maxandine nun a mafanne ra, i tuli mati i tantun xuine nun maxandi xuine ra i ya walikeen naxanye tima i xa to. **20** I yeene ti banxini ito ra kɔeen nun yanyin na. I a fala denaxan ma, i naxa, ‘N xinla luma be nen!’ I tuli mati maxandi xuiin na i ya walikeen naxan tima yireni ito mabinni. **21** I ya walikeen nun i ya Isirayila yamana maxandine rasuxu, e na sali yireni ito mabinni! I yabin ti i dɔxɔdeni kore xɔnna ma, i mafeluun ti, i yabin ti.” **22** “Xa muxuna nde a boden haken tongo, a yi nɔn sa a ma, a rakolo, a xa fa a kolo i ya yire sarjɔnɔnɔn yetagi banxini ito kui. **23** I a xuiin name kore, i tin, i ya walikene kitin sa, i yi fe kalan yalagi, i yi a fe kalan goronna dɔxo a xun ma, i yi tɔɔegelana kitin sa, i yi a suxu a tɔɔegeni.” **24** “A nɔe lige nen yaxun yi i ya Isirayila yamaan nɔ, bayo e bata i yulubin tongo. Na waxatini, xa e xun xete, e i xinla binya, e yi i maxandi, e mafeluun xandi i yetagi banxini ito kui, **25** nayi, i xa e xuiin name kore, i dija i ya Isirayila yamaan yulubin ma, i fa e ra bɔxɔn ma i naxan so e tan nun e benbane yii.” **26** “A nɔe lige nen kore xɔnna yi balan, tulen mi fa fe mume e yulubine fe ra lan i tan ma. Na waxatini, xa e yee rafindi be ma, e yi i xandi, e yi i xinla binya, e xete e yulubine fɔxo ra, bayo i bata e jaxankata, **27** nayi, i e xuiin namema nen kore, i dijnama nen i ya walikene yulubine ma e nun i ya Isirayila yamana. I yi e xaran kira fajin ma e daxe a xa bira naxan fɔxo ra. I tulen nafa bɔxɔn fari i naxan soxi i ya yamaan yii.” **28** “A nɔe lige nen tɔɔoyana nde fan yi fa, alo fitina kamena hanma fitina furena yamanani, hanma sansine yi xara, e kun hanma tuguminne yi mini hanma sujɔne hanma yaxune na Isirayila kaane tɔɔo waxatin naxan yi han e taa makantɔnɔnɔn yi, gbalon sifan birin na fa waxatin naxan yi, hanma fure jaxine. **29** Na waxatine yi, Isirayila kaane birin e tɔɔon nun e jaxankatan kolonma nen, e yi sali, e yi i mafan, e yi e yiine yite banxini ito mabinni. **30** Nayi, i yi e yabi i dɔxɔdeni kore xɔnna ma, i yi e mafelu, i yi birin saran e kewanle ra, bayo i birin bɔɔe yi feen kolon, amasoto i tan nan keden pe adamadiine bɔɔe yi feene kolon. **31** Nayi, e

gaxuma nen i yee ra, e lu i ya kiraan xon ma waxatin birin yi, e siin birin yi yamanani, i naxan soxi nxu benbane yii.” 32 “Xojen naxan mi findixi i ya Isirayila yamaan muxun na, na fama nen be sa keli yamana makuyeni, i xili gbeen nun i senbe gbeena fe ra. A na fa salideni banxini ito mabinni, 33 i a yabi kore xonna ma, i doxodeni. Xojen na naxan birin maxodin i ma, i xa na so a yii, alogo dunuɗa siyane birin xa i xinla kolon, e gaxu i yee ra, alo Isirayila i ya yamana. E xa a kolon a banxi radaxaxin ni ito ra i tan xinli n naxan tixil!” 34 “A nœ lige nen Isirayila kaane yi siga e yaxune yengedeni i ya yamarin bun. E yi i maxandi, e yee rafindi i ya taa sugandixin ma e nun n na Ala Batu Banxin naxan tixi i xa. 35 Nayi, i tuli mati kore xonna ma, naxanye i maxandima, e i mafan, i yi ne mali.” 36 “A nœ liga nen, e yi yulubin tongo, bayo adamadi yo mi na naxan mi yulubin ligama. I ya xolon yitama e ra nen, i yi e so e yaxune yii, ne yi siga e ra konyiyani e yamana makuyena ndee yi hanma naxanye maso. 37 Koni, e na tubi yamanani e konyiyani denaxan yi, e xete i ma e suxu muxune yamanani, e falan ti, e naxa, ‘Nxu bata yulubin tongo, nxu bata haken liga, nxu bata fe jaxin liga,’ 38 e xete i ma e boɗen birin na, e niin birin yi e suxu muxune yamanani naxanye e xalixi konyiyani, e mayandine rasiga i ma, e yee rafindixi yamanan ma i naxan so e benbane yii, e yee rafindixi i ya taa sugandixin ma e nun n na Ala Batu Banxin naxan tixi i xinli, 39 nayi, e sanla nun mafanne yabi kore xonna ma i doxodeni, i fa e mali, i yi i ya yamaan mafelu e yulubine ra.” 40 “N ma Ala, i yeen nakeli, i yi i tuli mati i maxandi xuiin na yireni ito yi, nxu na i xandi waxatin naxan yi.” 41 “Marigina Alatala, keli, i fa i doxodeni, i tan nun i ya Layiri Kankirana, i senben naxan yi. Marigina Alatala, i ya saraxaraline rabilin kisin na alo domana, i ya tinxin muxune xa sewan soɗo, bayo i tan fan. 42 Marigina Alatala, i nama i ya manga sugandixin naberin, i miri i ya walikeen Dawudaa tinxinyaan ma.”

7 Sulemani yelin Ala maxande waxatin naxan yi, teen yi keli kore xonna ma, a godo, a yi saraxane gan, Alatalaa nɔron yi Ala Batu Banxin nafe. 2 Saraxaraline mi yi fa nœ soe Alatala Batu Banxini sonon, amasoto Alatalaa nɔron bata yi a batu banxin nafe ken! 3 Isirayila kaane birin teen to keɗe kore xonna ma waxatin naxan yi, a yi Alatala Batu Banxin nafe, e yi e xinbi sin, e yi e yetagin lan boɗon ma, e yi Alatala

tantun, e naxa, “A fan, a hinanna luma nen habadan!” 4 Mangan nun yamaan birin yi saraxane ba Alatala xa. 5 Ninge wuli moɗojen nun firin e nun xuruse xunxuri wuli keme wuli moɗoje, Manga Sulemani yi ne koɗe raxaba Ala xa. Na kiini mangan nun yamaan birin yi Ala Batu Banxin nabi. 6 Saraxaraline yi e wanla ra, Lewi bonsonna muxune fan ma maxaseene yi e yii Manga Dawuda naxanye rafala Alatala tantun seene ra. E yi Alatala tantun Dawudaa beti xuine ra, e naxa, “A hinanna luma nen habadan!” Saraxaraline yi xotane fema nen e yetagi, yamaan birin tixi. 7 Nayi, Sulemani yi yinna rasarijan Ala Batu Banxin yetagi, a yi saraxa gan daxine nun boɗje xunbeli saraxane turene fi Alatala ma yinna kui. A na raba menni nen, bayo a bata yi saraxa gande sula daxin naxan nafala, na yi xurun, saraxa gan daxine nun bogise saraxane nun turene birin mi yi xanje menɗa fari. 8 Sulemani yi sanla raba xi solofere na waxatini, e nun Isirayila kaane birin. Yama gbeen yi fa sa keli Lebo-Xamata taani han Misiran xudeni. 9 Sanla xi solomasexede loɗoni, e yi malanna ti, bayo e bata yi saraxa ganden nasarijan nun xi solofere, e mon yi sanla fan yeteen naba xi solofere. 10 Kike solofereden xi moɗojen nun saxande loɗoni, Sulemani yi muxune raxete e konni. Alatala bata yi naxan liga Dawuda nun Sulemani nun a yamana Isirayila birin xa, e yi sewaxi na fe ra han! 11 Sulemani yi yelin Alatala Batu Banxin tiye na kii nin e nun manga banxina. A naxan birin miri a xa a liga Alatala Batu Banxini e nun a yetena manga banxini, a yi no ne birin lige. 12 Alatala yi mini Sulemani xa koɗen na, a yi a fala a xa, a naxa, “N bata i ya maxandi xuiin nasuxu, n bata yireni ito sugandi n yete xa n batu banxin nun saraxa ganden na. 13 A nœ lige nen n kore xonna balan, tulen mi fa fe mume, hanma n tuguminne yamari e siseene raxori boɗon ma, hanma n fitina furen nasiga n ma yamaan ma. 14 Na waxatini, xa n xinla yamaan naxan yi, n ma yamana, xa ne e yete magodo, xa e n maxandi, xa e n fen, e yi e xun xanbi so e fe jaxine yi, nayi n nan n tuli matima nen e ra kore xonna ma, n yi e yulubine xafari, n yi yamanan nakendeya. 15 Folo iki ma, n na n yeen tima e ra nen, n yi n tuli mati e maxandi xuiin na e na naxan naba yireni ito yi. 16 N bata banxini ito sugandi, n na a rasarijan, alogo n xinla xa lu a yi habadan. Nayi, n nan n yeen nun n xaxinla tima nen na ra habadan. 17 I tan, xa i sigan ti n yetagi alo i fafe Dawuda a liga kii naxan yi, i feni itoe birin liga n naxanye yamarima i

ma, i n ma tønne nun n ma sariyane suxu n naxanye soxi i yii, **18** nayi, n ni i ya mangayaan nasabatima nen, alo n na a fala i fafe Dawuda xa kii naxan yi, n to a fala a xa, n naxa, 'I bønsonna mi jnanje i jnəxəni Isirayila xun na habadan.' **19** Koni, xa i xun xanbi so n yi, xa i i mē n ma sariyane nun n ma yamarine ra, n naxanye soxi i yii, xa i siga ala gbete ye batudeni, i xinbi sin e bun ma, **20** nayi, n na Isirayila kaane bama nen n ma bəxəni n naxan soxi e yii, n yi n mē n batu banxin na, n naxan nasarijan n xinla binyaden na, na yi findi yagi feen nun magele feen na yamanane birin tagi. **21** Hali banxini ito to rayabu iki, n na n mē a ra waxatin naxan yi, dangu muxune birin kabema a ma nen. E yi a fala, e naxa, 'Nanfera Alatala yamanani ito nun banxini ito ligaxi iki?' **22** E yabima nen fa fala, 'Bayo e bata Alatala rabəjin, e benbane Ala, naxan e ramini Misiran yamanani, e yi ala gbete ne xanu, e yi e xinbi sin e bun ma, e yi e batu, nanara Alatala bata tərəni itoe birin nafa e ma.'"

8 Nē məxəje bun ma, Sulemani yi Alatala Batu Banxin nun a manga banxin ti. **2** Xurami taan naxanye soxi a yii, Sulemani mən yi xete ne tiin ma, a yi Isirayila kaane dəxə e yi. **3** Na xanbi ra, Sulemani yi siga Xamata-Soba taan xili ma, a na tongo. **4** Tadamori taan naxan yamanan tonbon yireni, a mən yi na ti e nun taan naxanye findi se ramaradene ra Xamata yamanani. **5** Beti-Xoron taan naxan geyaan fari e nun Beti-Xoron taan naxan lanbanni, a yi ne fan ti taa rakantanxine ra, a yinne rabilin naxanye ma, a dēne ti e ma naxanye balanma. **6** A mən yi Baalati taan ti e nun taa gbete ye a yi balone ramarama denaxanye yi, e nun yenge so wontorone nun soone yi taan naxanye yi. Sulemani wa naxanye birin ti feni Yerusalen taan nun Liban yamanani, e nun a yi dəxi yamanan naxanye birin xun na, a na birin liga. **7** Xitine nun Amorine nun Perisine nun Xiwine nun Yebusun naxanye mi yi findixi Isirayila kaane ra, ne fan yi dəxi Isirayila yamanani. **8** E diin naxanye lu e xanbi ra yamanani, Isirayila kaane mi naxanye raxəri, Sulemani yi ne findi konyi walikene ra, e na yi han to. **9** Koni Sulemani mi Isirayila kaane ti konyi wanle ra a xa, bayo e findixi sofane nun sofa kuntigine nun a wontorone nun a soone ragi muxune nan na. **10** Manga Sulemani mən yi Isirayila kaan muxu keme firin muxu tonge suulun sugandi naxanye yi a walikene xun na. **11** Sulemani yi Misiran mangana dii temen tongo

Dawudaa Taani, a siga a ra manga banxini a naxan tixi a xa, bayo a bata yi a fala, a naxa, "N ma jaxanla mi luma Isirayila mangan Dawudaa banxini, amasəto Alatalaa Layiri Kankiraan soxi denaxan yi, men findixi yire saripjanxin nan na." **12** Nayi, Sulemani yi saraxa gan daxine ba Alatala xa saraxa ganden fari a naxan nafala Alatala Batu Banxin so dēen palaan yetagi. **13** A yi saraxane bama ləxə yo ləxə alo Musa a yamari kii naxan yi a xa a liga waxatin birin, Matabu Ləxəne nun kike nenen sanle nun sali ləxə saxanne jēe yo jēe, Buru Tetaren Sanla nun Xunsagine Sanla nun Bubu Kui Sanla. **14** A yi saraxaraline dəxə kuru yēen ma alo a fafe Dawuda a liga kii naxan yi, Lewi bønsonna xemene yi findixi beti baane nan na Ala xa e nun e wali saraxaraliin xa alo a yi daxa kii naxan yi ləxə yo ləxə. Sulemani mən yi muxune ti Ala Batu Banxin dēne kantandeni, a ito birin liga nen bayo Alaa muxun Dawuda bata yi a yamari na kiini. **15** E mi mangana yamarine matandi mume lan saraxaraline nun Lewine ma, hanma feen naxanye yi lanxi Alaa nafulu ramaraden ma. **16** Sulemani wanle birin ke na kii nin, keli Alatala Batu Banxin ti fəlo ləxən ma han a jan. Alatala Batu Banxin wanle rajan na kii nin. **17** Nayi, Sulemani yi siga Esiyon-Gebere kunki tiden nun Elati taani naxanye yi fəxə igen dē, Edən yamanani. **18** Xurami yi kunkine rasiga Sulemani ma, fata Xurami a kunki ragine ra naxanye yi fəxə igen kolon ki fəji. Ne nun Sulemani a walikene yi siga Ofiri yamanani, e sa xemaan kilo wuli fu nun firin kilo keme kilo məxəje tongo, e fa e ra Manga Sulemani xən.

9 Saba yamanan Manga jaxanla yi Sulemani mankana mē. Nayi, a yi fa Yerusalen yi Sulemani todeni a fekolonna bunbadeni. Muxu wuyaxi yi biraxi a fəxə ra e nun jəgəmen naxanye yi latikənnəne nun xemaan nun munanfan gemene maxalima. A yi siga Sulemani fema, naxan birin yi a bəjəni a yi ne fala a xa. **2** Sulemani yi a maxədinne birin yabi, sese mi lu a mi naxan yeba a xa. **3** Saba manga jaxanla yi Sulemani a fekolonna to, e nun a banxin naxan tixi, **4** e nun donseen naxanye yi a tabanla ra e nun a rabilinna muxune ti kiine nun naxanye yi balon nun minse wanla ra, ne maraberibane nun a saraxa gan daxine, a yi naxanye bama Alatala Batu Banxini. Ne yi a kenen han a yengin yi bolon. **5** A yi a fala mangan xa, a naxa, "Nəndin nan yi a ra n naxan mexi n ma yamanani lan i ya falane nun i ya fekolonna ma. **6** N mi yi laxi a ra

benun n xa fa, n fa a to n ye'en na. E mi yi a tagiin yeteen falaxi n xa. N naxan birin mexi, i ya fekolonna dangu na ra. **7** Sewana i ya muxune xa, sewana i ya walikene xa naxanye i yetagi waxatin birin, naxanye i ya fekolonna ramema. **8** Tantunna Alatala xa, i ya Ala, naxan i malixi, a yi i doxo a manga gbedeni alo mangana Alatala xa, i ya Ala. Bayo Isirayila rafan i ya Ala ma, a waxi a mali feni habadan, nanara a i findixi mangan na Isirayila xun na alogo i xa kiti kenden sa tinxinni.” **9** Naxalan mangan yi xemaan kilo wuli saxan so mangan yii e nun latikononna gbege, e nun munanfan gemene. Latikonon fani munma yi to nun singen alo Saba manga naxanla naxan so Manga Sulemani yii. **10** Xurami a walikene nun Sulemani a walikene yi xemaan maxalima keli Ofiri yamanani, ne fan yi fa santali wudin sifa gbege ra e nun munanfan gemene sa keli Ofiri yi. **11** Manga Sulemani santali wudine findi te seene nan na Alatala Batu Banxini, e nun te seene mangana banxini, e nun maxaseene, alo kondenne nun bolonne maxa se maxane xa. Ne joxon munma yi to nun Yuda yi. **12** Naxan birin yi rafan Saba manga naxanla ma a ne maxodin, Manga Sulemani yi ne so a yii. Manga Sulemani yeteen seen naxanye so Saba manga naxanla yii, ne yi gbo dangu a fa naxanye ra. Na xanbi ra, manga naxanla nun a walikene yi xete a yamanani. **13** Xemaan naxan yi fama Sulemani ma jee kedenna bun ma, na gboon yi sige han kilo wuli moxone. **14** Yulaya seene mudun fan yi saxi ne fari e nun seen naxanye yi sa kelima yire gbetene yi. Arabi mangane nun yamana kanne fan yi fama xemaan nun gbeti fixen na Sulemani xon. **15** Manga Sulemani yi ye masansan wure lefaan xema daxon xungbeen keme firin nafala, xemaan kilo sennin nan yi e keden kedenna birin na. **16** A mon yi ye masansan seen xema daxon xurin keme saxan nafala, xemaan kilo keden e nun a tagi nan yi e keden kedenna birin na. Banxin naxan yi xili “Liban fotonna,” a yi sa e sa menni. **17** Mangan yi sama jinna rafala manga gbede gbeen na a xema igen sa a ma. **18** Tede sennin nan yi manga gbeden ma e nun san tiden xema daxon keden, a yiine yi a foxo firinna birin ma, yata sawura firin yi tixi a yiine fema. **19** Yata sawura fu nun firin yitaxunxi tedene fari, sennin yiifanna ma, sennin yi komenna ma. Na joxonna mi yi yamana yo yi. **20** Xemaan nan yi Manga Sulemani a igelengenne birin na. Xemaan nan yi Liban foton banxin kui muranne birin na. E mi yi sese

rafalama wure gbeti fixen na, bayo Manga Sulemani waxatini wure gbeti fixen mi yi yatexi munanfan se ra. **21** Kunki gbeene yi Manga Sulemani yii, a yi naxanye rasigama baan xun ma Xurami a walikene yi naxanye ragima. Jee saxan yo jee saxan kunkine yi xetema nen Isirayila yi, e rafexi xemaan nun gbeti fixen nun sama jinne nun kudune nun gboxune ra. **22** Manga Sulemani yi dangu boxon mangane birin na fata a nafulu kanyaan nun a xaxilimayaan na. **23** Dunuja mangane birin yi katama Sulemani to feen na alogo Ala xaxilimayaan naxan saxi a boneni e xa na me. **24** Birin yi fama a sanbane ra, gbeti daxine nun xema daxine nun dagine nun yenge so seene nun latikononne nun soone nun gbaxalone, a yi na kii nin jee yo jee. **25** Soo kula wuli naanin nan yi Sulemani yii soone nun yenge so wontorone xa, e nun soo wuli fu nun firin, a yi ndee lu a fema Yerusalen taani, a yi a donxene rasiga taane yi naxanye yi yitonxi e xili yi. **26** Folo Efirati baan ma, siga Filisitine yamanan ma han sa doxo Misiran danna ra, a tan nan yi menne mangane birin xun na. **27** Mangan barakani, gbetin yi gbo ayi Yerusalen yi alo gemene, suman wudin yi wuya ayi alo burunna xode binla naxan yamanan lanbanni. **28** Sulemani a soone yi kelima Misiran nun yamana gbete ye nin. **29** Manga Sulemani kewanle birin, keli a folon ma han a rajanna, ne birin sebexi Nabi Natan kewali kedin kui e nun Silo kaana Axiya nabiya fala kedin kui, e nun Yido fetona a fetone yi lan Nebati a dii Yerobowan ma fe ma. **30** Sulemani jee tonge naanin nan ti mangayani Isirayila birin xun na Yerusalen yi. **31** A to faza, e yi a maluxun a benbane fema a fafe Dawudaa Taani, a dii xemen Robowan yi ti a joxoni mangayani.

10 Robowan yi siga Siken taani, amasoto Isirayila kaane birin bata yi fa Siken yi a findideni mangan na. **2** Nebati a dii xemen Yerobowan mon yi Misiran yamanan nin, a to a gi Manga Sulemani bun ma, a sa doxo denaxan yi. A na xibarune me waxatin naxan yi, a mon yi xete sa keli Misiran yi. **3** E yi muxune rasiga a xilideni. Nayi, Yerobowan nun Isirayila yamaan birin yi fa Robowan fema, e yi a fala a xa, e naxa, **4** “I fafe nxu suxi konyiyaan nan na. Iki, xa i tan nde ba na goronna ra nxu tungunna ma naxan binya alo xun xidi wudina jingen ma, nxu tinxi nxu wali i xa.” **5** Robowan yi e yabi, a naxa, “E siga, xi saxan na dangu e fa n fema.” Yamaan yi siga. **6** Manga Robowan yi fonne

maxōdin naxanye yi a fafe Sulemani fema a siimayani, a yi e maxōdin, a naxa, “E maxadin mundun tiye yamani ito yabin na?” 7 Fonne yi a fala a xa, e naxa, “Xa i fan e ra, xa i e yisuxu, xa i e yabi fala fajine ra, e findima nen i ya walikene ra habadan.” 8 Koni Robowan mi fonne maxadi xuiin suxu. A yi foningene maxōdin naxanye yi a rabilinxi, a lanfane. 9 A yi e maxōdin, a naxa, “Muxuni ito bata n maxōdin a n xa ndedi ba goronna ra e xun ma n fafe e jaxankataxi naxan na. E n maxadima yabin mundun na n xa a so e yii?” 10 A lanfa foningene yi a fala a xa, e naxa, “Muxune e mawuga nen a i fafe bata e suxu alo konyine, e i maxōdinxi nen a i xa ndedi ba goronna ra e xun ma. Awa, i lan i xa e yabi i kiini, i naxa, ‘N yii kirin gbo n fafe tagin xa. 11 N fafe bata e konyiyaan naxōdōxo ayi, koni, n tan a raxōdōxōma ayi e ma nen dangu na ra. N fafe e tōrō bosaan nan na, koni n tan e tōrōma tanle nan na.’” 12 Yerobowan nun yamaan birin yi fa Manga Robowan fema xi saxande lōxōni alo mangana a fala kii naxan yi, a naxa, “Xi saxan na dangu, e fa n fema.” 13 Mangan yi ne yabi a xōdexen na. Fonne maxadi xuiin naxan ti a xa, a yi na lu na. 14 A yi e yabi fata foningene maxadi xuiin na, a yi a fala e xa, a naxa, “N fafe bata e konyiyaan naxōdōxo ayi, koni, n tan a raxōdōxōma ayi e ma nen dangu na ra. N fafe e tōrō bosaan nan na, koni, n tan e tōrōma tanle nan na.” 15 Na kiini, mangan mi tin yamana maxandin ma. Marigina Alatala yi feene liga na kiini alogo a xa a tuli sa xuiin nakamali a naxan tongo Yerobowan xa, Nebati a dii xēmēna, fata Nabi Axiya, Silo kaan na. 16 Isirayila kaane to a kolon a mangan mi tinxi e maxandin ma, e yi a fala, e naxa, “Sese mi fa en nun Dawuda tagi, nxu nun Yese a dii xēmēni ito mi fa malanxi sese ma! Isirayila muxune, e xete e konne yi! I tan, Dawuda bōnsōnna, iki i ya mangayaan naba i ya yamanani!” Isirayila kaane birin yi keli mēnni, e siga e konne yi. 17 Isirayila kaan naxanye lu Yuda taane yi, Robowan lu mangayani ne nan gbansan xun na. 18 Nayi, Manga Robowan yi Hadoran nasiga naxan yi findixi karahan walikene kuntigin na. Koni Isirayila kaane yi a magolōn, e yi a faxa. Manga Robowan yi a mafura soe yenge so wontorona nde kui, a yi a gi, a siga Yerusalen yi. 19 Isirayila kaane murute Dawuda bōnsōnna xili ma na kii nin han to.

11 Robowan to so Yerusalen yi, a yi Yuda bōnsōnna muxune malan e nun Bunyamin bōnsōnna

muxune, sofa wuli kēmē wuli tonge solomasexē, alogo e xa Isirayila bōnsōnne yenge, e yamanan lu Robowan ma nōon bun ma. 2 Koni Alatalaa falan yi fa sayiban Semaya ma, a naxa, 3 “Falan ti Robowan xa, Sulemani a dii xēmēna, Yuda mangana, e nun Isirayila kaane birin Yuda nun Bunyamin yi, i yi a fala e xa, i naxa, 4 ‘Alatala ito nan falaxi, a naxa: E nama fa Isirayila kaane yenge, naxanye findixi e ngaxakedenne ra. E tan birin xa xete e konne yi, amasoto feni ito fataxi n tan nan na.’” E yi Alatalaa falane suxu, e yi xete Yerobowan yengen fōxo ra. 5 Robowan yi dōxo Yerusalen yi. A yi taa makantanxina ndee ti Yuda yi. 6 A yi Beteleemi nun Etami nun Tekowa taane ti, 7 e nun Beti-Suru nun Soko nun Adulan, 8 e nun Gati nun Maresa nun Sifi, 9 e nun Adorayin nun Lakisi nun Aseka, 10 e nun Sora nun Ayalon nun Xebiron taane Yuda nun Bunyamin yamanane yi. Ne nan findi taa rakantanxine ra. 11 Robowan yi na taane rabilin yinne ra e nun donse ramaradene, e nun turen nun manpana. 12 Ye masansan wure lefane nun tanbane yi na taane birin yi, a yi ne findi taa senbēmane ra. A tan nan gbee yi Yuda nun Bunyamin ra. 13 Saraxaraline nun Lewi bōnsōnna muxun naxanye yi Isirayila yamanani, ne fan yi fa kafu Robowan ma. 14 Lewine yi e konna nun e seene rabējin, e siga Yuda nun Yerusalen yi, bayo Yerobowan nun a diine bata yi tondi e xa wali Alatala xa. 15 Yerobowan yi kide kiine sugandi alogo e xa saraxane ba taan kidene yi koto sawurane nun jinge dii sawurane xa, a naxanye rafala. 16 Bōnsōnna naxanye birin yi Isirayila yamanani, naxanye yi Alatala fenma, Isirayilaa Ala, ne yi bira Lewine fōxo ra siga Yerusalen yi alogo e xa sa saraxane ba Alatala xa, e benbane Ala. 17 Na yi a liga Yuda yamanan yi senbe soto, e yi Sulemani a dii xēmēn Robowan mali jee saxan, bayo e lu nen tinxinni Dawuda nun Sulemani a kiraan xon jee saxan. 18 Robowan yi Mahalati futu. Mahalati fafe nan yi Dawudaa dii xēmēn Yerimoti ra, a nga yi xili Abixali, Eliyabi a dii tēmēna, Yese a mamandenna. 19 Mahalati yi dii xēmēne bari a xa, Yewusi nun Semaraya nun Sahan. 20 Ba na ra, a mon yi Abisalomi a dii tēmēn Maka futu. A yi Abiya nun Atayi nun Sisa nun Selomiti soto a xa. 21 Abisalomi a dii tēmēn Maka yi rafan Robowan ma dangu a jaxalan bonne nun a konyi jaxanle birin na. Jaxalan futuxin fu nun solomasexē nan yi a yii e nun konyi jaxalan tonge sennin naxanye findi a jaxanle ra, a yi dii xēmē mōxōjen nun solomasexē soto e nun dii tēmē

tonge sennin. **22** Robowan yi tide singen so Makaa dii xemena Abiya yii, a yi a findi kuntigin na a diine birin xun na, bayo a yi waxi a findi feni mangan nan na. **23** Robowan yi xaxinla soto, a yi a dii xemene raxuya ayi Yuda nun Bunyamin yamanan xun xon taa rakantanxine birin yi. A yi donse gbegebe so e yii, a yi njaxalan wuyaxi futu e xa.

12 Robowan to yelin finde mangan na, a senben soto, e nun Isirayila kaane birin yi Alatalaa sariyan nabegin. **2** Bayo e mi yi tinxinx Alatala yee ra yi, Misiran mangan Sisaki yi keli Yerusalen xili ma, Robowan ma mangayaan jee suulundeni. **3** Yenge so wontoron wuli keden keme firin e nun soo ragiin muxu wuli tonge sennin nan yi a yii, e nun sofa wuyaxi, Libiya kaane nun Sudan kaane nun Suki kaane nun Kusi kaan naxanye bira a foxo ra keli Misiran yamanani. **4** A yi Yuda taa rakantanxine suxu siga han Yerusalen. **5** Nayi, Nabi Semaya yi fa Robowan nun Yuda kuntigine fema Yerusalen yi, e yi malanxi denaxan yi Sisaki yengedeni. A yi a fala e xa, a naxa, “Alatala ito nan falaxi, a naxa, ‘Bayo e bata e me n na, n fan bata n me e ra, n yi e so Sisaki yii.’” **6** Isirayila kuntigine nun mangan yi e ti e yulubine ra, e yi a fala, e naxa, “Yoonaa Alatala xa.” **7** Alatala to a to a e bata e yete magodo, Alatala yi falan ti Semaya xa, a naxa, “Bayo e bata e yete magodo, n mi fa e halagima sonon, n na e ratanga feren fima e ma nen benun waxati, n ma xolon mi fa Yerusalen lima sonon fata Sisaki ra. **8** Koni e luma nen Sisaki a noon bun, alogo e xa a kolon fa fala, wanla n tan xa e nun wanla dunuwa mangane xa, ne keden mi a ra.” **9** Misiran mangan Sisaki yi siga Yerusalen xili ma. A yi Alatala Batu Banxini nafunle birin tongo, e nun manga banxin daxine. A ye masansan wure lefa xema daxine tongo Sulemani naxanye rafala. **10** Nayi, e joxo yibirana, Manga Robowan yi ye masansan wure lefaan sula daxina ndee rafala, sofaan naxanye yi manga banxin deene kantanma, a yi e taxu ne kuntigine ra. **11** Waxatin birin mangan nema yi sigama Alatala Batu Banxini, sofane yi ye masansan wure lefane xalima nen mangan fema. Na xanbi ra, e mon yi xete e ra e kantan ti banxini. **12** Bayo Robowan bata yi a yete magodo, Alatala mi fa lu xoloxi a ma, alogo a nama a halagi. Fe fajina nde mon yi Yuda yi nun. **13** Robowan yi a mangayaan liga Yerusalen yi senbemaiani. Robowan findi mangan na a jee

tonge naanin e nun kedenden nan ma, a yi jee fu nun solofere ti mangayani Yerusalen yi, Alatala taan naxan sugandi Isirayila bonsonne birin xa, alogo a xinla xa lu a yi. A nga yi xili nen Nama, Amonin nan yi a ra. **14** Robowan fe jaxin nan liga, bayo a mi a ragidi a boneni, a xa Alatala fen. **15** Robowan ma kewanle, keli a folon ma han a rajanna, ne sebexi Nabi Semayaa kedine kui e nun fetoon Yido a kedine kui. Yengen yi Robowan nun Yerobowan tagi yeye. **16** Robowan yi faxa, e yi a maluxun Dawudaa Taani. A dii xemena Abiya yi ti a joxoni mangayani.

13 Yerobowan ma mangayaan jee fu nun solomasexeden na, Abiya yi findi mangan na Yuda xun na. **2** A yi a mangayaan liga Yerusalen yi jee saxan. A nga yi xili nen Mikahu, Yuriyeli a dii temena nde, naxan yi kelixi Gibeya taani. Yengen so nen Abiya nun Yerobowan tagi. **3** Yenge so senbemaane nan yi Abiya yii, sofa wuli keme naanin nan yi a yii. Yerobowan tan yi kata, a yi sofa kenden muxu wuli keme solomasexe soto. **4** Abiya yi te Semarayin geyaan fari Efirami geya yireni. Abiya yi keli, a gbelegebele, a naxa, “E tuli mati n na, Yerobowan nun Isirayila kaane birin! **5** E mi a kolon ba fa fala a Alatala, Isirayilaa Ala bata Isirayila mangayaan so Dawuda nun a diine yii layirin xon naxan mi kale mume? **6** Koni Nebati a dii xemen Yerobowan, Dawudaa dii xemen Sulemani a kuntigina nde bata yi murute a kanna xili ma. **7** Fuyantenna ndee bata yi e malan a fema. E yi murute Robowan xili ma. Sulemani a dii xemen Robowan yi dii joreyani waxatin naxan yi, a munma yi xaxili soto singen, a senben mi yi na a xa e yenge. **8** Iki, e waxi Alatalaa yamanan yenge feni, denaxan Dawudaa diine yii. Sofa gali gbeen nan e ra, jinge dii sawura xema daxine e yii, Yerobowan naxanye rafalaxi e xa, e findi e alane ra. **9** Koni, e bata Alatalaa saraxaraline kedi, Harunaa dii xemene nun Lewi bonsonna muxune, e yi saraxaraline fen e yete xa alo yamanan bonne. Naxan yo na fa jinge diin nun konton solofere ra alogo a xa findi kide kiin na, na noe finde kide kiin na e wule alane xa. **10** Koni Alatala nan nxu tan ma Ala ra, nxu nun mi nxu mexi a ra. Harunaa dii xemene nan Alatalaa saraxaraline ra, Lewine fan walima e fema. **11** Xotonna nun jinbanna, loko yo loko, nxu saraxa gan daxine bama Alatala xa, nxu yi wusulanna gan a xa, nxu yi burun sa Alaa tabanla ra, nxu lenpu xema daxine radege jinbari yo jinbari. Nxu Alatalaa

yamarine suxi, nxo Ala. Koni, e tan bata e me a ra. **12** Ala, nxo Ala nun a saraxaraline nxu xon, e dxi nxu xun na. Ala saraxaraline yeteen xotane fema nen alogo yamaan xa keli, siga yengeni e xili ma. Isirayila kaane, e nama Alatala yenge, e benbane Ala, amasoto e mi a noe mume!” **13** Abiya mon yi fala tiini, Yerobowan yi a sofa ganla nde rasiga Yuda sofa ganle xanbi ra alogo ndee xa lu e yee ra, ndee yi lu e xanbi ra. **14** Yuda sofane yi xete e xanbi ra. Koni, e yi a to a yengen yi e yee ra, a yi e xanbi ra, e yi Alatala maxandi, saraxaraline yi yenge so xotaan fe. **15** Yuda sofane yi gbelegbele. Na to liga, Ala yi Yerobowan nun Isirayila kaane birin kedi Abiya nun Yuda kaane yee ra. **16** Isirayila sofane yi e gi Yuda sofane bun ma. Ala yi a liga Yuda sofane yi Isirayila sofane no. **17** Abiya nun a muxune yi Isirayila kaane kasari, e yi muxu wuli keme suulun faxa Isirayila sofane ye. **18** Yuda sofane yi Isirayila sofane no na waxatini, amasoto e yi laxi Alatala nan na, e benbane Ala. **19** Abiya yi lu Yerobowan sagatanje, a yi a taana ndee tongo a yii, Beteli nun a rabilinna taane, Yesana nun a rabilinna taane nun Eferon nun a rabilinna taane. **20** Fanga mi fa lu Yerobowan na Abiya waxatini. Donxen na, Alatala mon yi a yenge, a yi a faxes. **21** Koni Abiya tan senben soto nen. A yi jaxalan fu nun naanin futu. A yi dii xeme maxonen nun firin soto e nun dii teme fu nun sennin. **22** Abiya kewali donxene, a naxanye birin liga e nun a falane, ne birin sebexi Nabi Yido a kedine kui.

14 Abiya yi faxes, e yi a maluxun Dawudaa Taani. A dii xemena Asa yi ti a joxoni mangayani. Yamanan yi lu boje xunbenli a waxatini jee fu. **2** Naxan yi fan, a tinxin Alatala yee ra yi, a Ala, Asa yi na liga. **3** A yi ala gbetene saraxa gandene kala e nun taan kidene, a ne kala, a kide gemene yibo, a yi Asera kide gbindonne rabira. **4** A yi yamarin fi Yuda kaane xa a e xa lu Alatala foxo ra, e benbane Ala, e yi a sariyane nun a yamarine suxu. **5** A yi taan kidene nun wusulan gandene ba Yuda taane birin yi, yamanan yi lu boje xunbenli a waxatini. **6** A yi taa rakantanxine ti Yuda yi, yamanan yi lu boje xunbenli, muxu yo mi a yenge na waxatini, amasoto Alatala boje xunbenla fi nen a ma. **7** A yi a fala Yuda kaane xa, a naxa, “En taani itoe ti, en yi e rabilin yinne ra, de balan daxine naxanye ma. Yamanan mon en gbeeyani iki, amasoto en bata Alatala fen, en ma Ala, a yi boje xunbenla fi en ma yiren birin yi.” Nayi, e yi taane ti, e sabati. **8** Sofa wuli

keme saxan nan yi Asa yii Yuda yi. Ye masansan wure lefaan nun tanban yi e birin yii. Sofa wuli keme firin wuli tonge solomasxe nan keli Bunyamin bonsenni, ye masansan wure lefa xurudine nun xalimakunle yi e yii, sofa kenden nan yi e birin na. **9** Kusi kaan Sera nun a ganla muxu miliyon keden yi keli e xili ma, e nun yenge so wontoro keme saxan, e yi siga han Maresa taani. **10** Asa yi mini a ralandeni, e nun a ganla yi ti yenge so kii ma Sefata lanbanni Maresa dexon. **11** Asa yi Alatala maxandi, a Ala, a naxa, “Alatala, i noe senbetaren maliye nen alo senbe kanna. Fa nxu mali, Alatala, nxo Ala. Amasoto nxu yengi i tan nan ma, anu nxu faxi i xinla nin gali gbeeni ito xili ma. Alatala, i tan nan nxo Ala ra. I nama tin muxu yo xa nxu no.” **12** Alatala yi Kusi kaane no Asa nun Yuda kaane xa, Kusi kaane yi e gi. **13** Asa nun a ganla yi e kedi han Gerari taani, Kusi kaa wuyaxi yi faxes, fayida muxe mi lu, amasoto e halagi nen Alatala nun a ganla yetagi. Asa nun a yamaan yi se wuyaxi tongo. **14** E yi Gerari rabilinna taane birin halagi, bayo e muxune birin bata yi gaxu Alatala yee ra, e yi se wuyaxi tongo. **15** E yi xuruse kulane fan kala, e yi xuruse xunxuri wuyaxi tongo e nun jogomene. Na xanbi ra, e yi xete Yerusalen yi.

15 Alaa Nii Sarijanxin yi godo Odedi a dii xemena Asari ma. **2** A yi siga Asa fema, a yi a fala a xa, a naxa, “Asa nun e tan Yuda kaane nun Bunyamin bonsonna muxune, e tuli mati n na. Alatala e xon xa e lu a foxo ra. Xa e a fen, e a toma nen, koni xa e xun xanbi so a yi, a mema nen e ra. **3** Xabu waxati xunkuye, Isirayila kaane lu nen, e mi bira Ala yeteen foxo ra, saraxarali mi yi na naxan yi e xaranne, sariya fan mi yi na. **4** Koni, e xete nen Alatala ma, Isirayilaa Ala, e toro waxatini, e yi a fen, a yi a yete yita e ra. **5** Na waxatini, muxune mi yi sigama sigatini boje xunbenli, bayo kontofinle yi yamanan birin yi. **6** Siyane yi kelima siyane xili ma, taane yi keli taane xili ma, amasoto Ala bata yi jaxankatan sifan birin nagodo e ma. **7** Koni iki, e tan xa e sobe so, e nama xadan, amasoto e kontonna sotoma nen.” **8** Manga Asa to na nabiya falane me, Nabi Asari naxan ti, Odedi a dii xemena, Asa yi a sobe so, a yi suxurene ba Yuda yamanan nun Bunyamin yamanan birin yi, e nun a taan naxanye tongo Efirami geya yireni. A yi Alatalaa saraxa ganden nafala, naxan yi Alatala Batu Banxin so deen palaan yetagi. **9** A yi Yuda kaane nun Bunyamin

bõnsõnna muxune birin malan e nun muxun naxanye sa kelixi Efirami bõnsõnna nun Manase bõnsõnna nun Simeyõn bõnsõnna ye, e fa dõxo Yuda yamanani, bayo Isirayila kaan wuyaxi bira nen Asa fõxo ra, e to a to a Alatala, a Ala yi a xõn. **10** Asaa mangayaan jee fu nun suulunden kike saxandeni, e birin yi e malan Yerusalen yi. **11** Na loxõni, e fa xuruseen naxanye ra keli yengeni, e yi ne birin ba saraxan na Alatala xa, jinge keme solofere e nun yexee wuli solofere. **12** E yi layirin xidi a e xa Alatala fen, e benbane Ala, e bõnen nun e niin birin na. **13** Xa naxan yo mi Alatala fen, Isirayilaa Ala, muxudin nun muxu gbeena, xemmen nun jaxanla, na kanna yi lan nen a faxa. **14** E yi e kolo Alatala xa e xuini texin na, e nun butu xuiin nun xõta xuini. **15** Yuda kaane birin yi sowa na kolõna fe ra, bayo e layirin xidi e bõnen birin nan na, e yi Alatala fen sewani, a yi a yete yita e ra. Alatala yi bõne xunbenla fi e ma yamanan birin yi. **16** Manga Asa yi a mame Makaa jaxalan mangaya tiden ba a yii, amasõto a bata yi Asera kide gbindonna bitin. Asa yi na gbindonna rabira, a yi a gan Kedirõn lanbanni. **17** Koni, Asa mi taan kidene kala Isirayila yi, hali a to yi Ala fõxo ra a bõnen ma feu, a siimayaan birin yi. **18** A fafe bata yi seen naxanye dentegẽ Ala xa e nun a tan yeteen bata yi naxanye dentegẽ Ala xa, a yi ne birin maxali Ala Batu Banxini, gbeti fixen nun xemaan nun se sifa wuyaxi. **19** Yenge mi so Yuda yi han Asaa mangayaan jee tonge saxan e nun suulundena.

16 Asaa mangayaan jee tonge saxan e nun sennindeni, Isirayila manga Basa yi siga Yuda xili ma, a yi Rama taan senbe so alogo a xa kiraan bolon Manga Asa ma Yuda yi. **2** Gbeti fixen nun xemaan naxan yi Alatalaa nafulu ramaraden nun mangana nafulu ramaradeni, Asa yi ne tongo, a yi e rasiga Damasi taani alogo e xa so Arami manga Ben-Hadada yii. **3** A mon yi xeraan nasiga a faladeni, a naxa, “Layirin xa xidi i tan nun n tan tagi, alo a lu n fafe nun i fafe tagi kii naxan yi. Nanara, n bata xemaan nun gbeti fixen nasiga i ma. Nayi, sa layirin kala e nun Isirayila mangan Basa tagi, alogo a xa a makuya n na.” **4** Ben-Hadada yi tin Manga Asa xuiin ma, a yi a gali kuntigine rasiga Isirayila taane xili ma, a yi Iyon taan no e nun Dan nun Abeli-Mayin, e nun Nafatali taane birin seene yi ramarama denaxanye yi. **5** Basa to na me, a yi ba Rama taan tiye. **6** Nayi, Manga Asa yi Yuda kaane birin xili, e yi gemene nun wudine

maxali Manga Basa naxanye malan Rama taan senbe so feen na, Asa yi ne rawali Geba nun Misipa taane tideni. **7** Na waxatini, Xanani yi siga Asa fema, Yuda mangana. Fetoon nan yi Xanani ra. A yi a fala Asa xa, a naxa, “Bayo, i bata i yigi sa Arami mangani, i mi i yigi saxi Alatala yi, i ya Ala, i bata fula Arami mangana ganla ra. **8** Kusi kaane nun Libiya kaane gali gbeen to malan waxati danguxine yi, e nun wontorone nun soo ragi wuyaxine, Alatala ne so nen i yii, bayo i yigi sa nen a yi. **9** Alatala dunuɲa yiren birin yitoma, a xa na muxune fen naxanye bõnen mumeen luxi a xa, alogo a xa e senbe so. I bata xaxilitareyaan liga feni ito yi, bayo fõlo to ma, i soma nen yengene yi.” **10** Asa yi xõlo fetoon ma han, a yi a sa kasoon na, amasõto a yi xõlõxi a ma lan na feen ma. Na waxatin yeteni, Asa yi a yamaan muxuna ndee jaxankata fõlo. **11** Asa kewanle, keli a fõlon ma han a rajanna, ne sebexi Yuda nun Isirayila mangane kedine kui. **12** Manga Asaa mangayaan jee tonge saxan e nun solomanaaninden na, fure jaxin yi Asa sanne suxu, koni hali a to yi furaxi, a mi Alatala fen, a lu seribane nan tun fenyje. **13** Asa yi faxa a mangayaan jee tonge naanin e nun kedenna ma. **14** E yi a maluxun a gaburu gexin na, a naxan ge Dawudaa Taani. E yi a sa sadena nde ma naxan yi maxidixi se fajine ra, e ture xiri jaxumen so a ma alo a yi lan kii naxan yi, e yi wusulan gbegbe gan a binya feen na.

17 Asaa dii xemmen Yosafati yi dõxo a jõxõni mangayani. A yi senben soto Isirayila xili ma. **2** A yi sofane rasiga Yuda taa rakantanxine birin yi, a yi yamana kanne dõxo a yamanani, e nun a fafe Asa taan naxanye birin tongo Efirami kaane yii. **3** Alatala yi lu Yosafati xõn, bayo a lu nen a benba Dawudaa kiraan xõn. A mi Baali suxuren batu, **4** a a fafe a Ala batu nen, a yi a yamarine suxu. Isirayila kaane yi naxan ligama, a tan mi tin na ma. **5** Alatala yi a mangayaan senbe so, Yuda kaane birin yi fama nen finmaseene ra Yosafati xõn. A yi nafunla nun binye gbeen soto. **6** A yi lu Alatala batu dexunni, na nan a liga, a yi taan kidene kala, a yi Asera kide gbindonne birin naxõri Yuda yi. **7** A mangayaan jee saxanden ma, a yi a kuntigini itoe rasiga Yuda taane yi e muxune xarandeni: Ben-Xayili nun Abadi nun Sakari nun Nataneli e nun Mikahu. **8** A yi Lewi bõnsõnna muxuna ndee fan nasiga e fõxo ra: Semaya nun Netaniya nun Sebadiya nun Asaheli nun Semiramoti nun Yehonatan nun Adoniya nun Tobiya

e nun Tobadoniya. Saraxarali firin fan yi e ƒoxo ra: Elisama nun Yehorami. **9** E yi sa Yuda kaane xaran sariyane ma naxanye sebexi Alatalaa sariya kedin kui. E yi Yuda birin yisiga yamaan xarandeni. **10** Alatala yeeragaxun yi Yuda yamanan nabilinna taane birin suxu, e mi susu Yosafati yenge. **11** Filisitine yi fa gbeti fixen nun se wuyaxi ra Yosafati xon, Arabune yi fa konton wuli keme solofere keme solofere ra e nun koto wuli keme solofere keme solofere. **12** Yosafati a mangayaan yi lu sabate kati. A yi taa makantanxine nun se ramaradene ti Yuda yamanani. **13** Se gbegbe yi ramaraxi a xon Yuda taane yi, e nun sofa kendene Yerusalen yi. **14** E yatene ni i ra bonson yeen ma: Yuda bonsonni, Adena, gali kuntigin yi sofa wuli keme saxan nan xun na. **15** Gali kuntigin Yehoxanan nan fan yi tugunxi na ra, a yi sofa wuli keme firin wuli tonge solomasexe nan xun na. **16** Sikiri a dii xemena Amasiya fan yi tugunxi na ra, naxan a yete dentege Alatala xa, a yi sofa wuli keme firin nan xun na. **17** Bunyamin bonsonni, Eliyada, sofa kenden yi sofa wuli keme firin nan xun na naxanye yi xalimakunla wolima. **18** Gali kuntigin Yehosabadi fan yi tugunxi na ra, a yi sofa wuli keme wuli tonge solomasexe nan xun na. **19** Sofaan naxanye yi walima mangan xa ne nan itoe ra, mangan naxanye rasiga Yuda taa rakantanxine yi.

18 Yuda mangan Yosafati yi binyen nun nafunla soto, e nun Manga Axabi yi findi bitanmane ra. **2** Nee dando to dangu, a yi siga Axabi fema Samari taani, Axabi yi yexee wuyaxi nun jinge wuyaxi koe raxaba Yosafati nun a foxorabirane donseen na. Na xanbi ra, a yi a fala Yosafati xa, a e birin xa siga Ramoti kaane yengedeni Galadi yamanani. **3** Axabi, Isirayila mangan yi a fala Yuda mangan Yosafati xa, a naxa, “I sige n ƒoxo ra Ramoti taani Galadi yamanani yenge sodeni ba?” Yosafati yi a yabi, a naxa, “I tan nun n tan birin keden, n ma yamaan nun i ya yamana, nxu birama nen i ƒoxo ra siga yengeni.” **4** Koni, Yosafati mon yi a fala Isirayila mangan xa, a naxa, “Alatala maxodin singen.” **5** Nayi, Isirayila mangan yi waliyine malan, keme naanin joxon, a yi a fala e xa, a naxa, “En lan en sa yengen so Ramoti taani Galadi yamanani ba hanma en nama a liga?” E yi a yabi, e naxa, “Ala a soma nen mangan yii.” **6** Koni, Yosafati yi a maxodin, a naxa, “Alatalaa nabi yo mi fa be yi, en noe Alatala maxodinje naxan xon?” **7** Axabi, Isirayila mangan yi Yosafati yabi, a naxa, “Keden mon na Alatala gbeen

na, koni a mi rafan n ma, amasoto a fe jaxin nan tun falama n xa, a fajin mi na mume! A xili Mikahu, Yimilaa dii xemena.” Yosafati yi a fala a xa, a naxa, “Mangan nama falan ti na kiini.” **8** Nayi, Isirayila mangan yi kuntigi keden xili, a naxa, “Fa Mikahu ra iki sa, Yimilaa dii xemena.” **9** Isirayila mangan nun Yuda mangan Yosafati birin yi doxi lonna ma Samari taan so deen na, e mangaya gbenede yi, e maxidixi e mangaya dugine yi. Waliyine birin yi waliyiyaan nabama e yetagi. **10** Sedeki, Kenan ma dii xemen bata yi wure fenne rafala, a yi a fala, a naxa, “Alatala ito nan falaxi, a naxa, ‘I Arami kaane bonboma fenni itoe nan na han i yi e raxori.’” **11** Waliyine birin yi feene fala, e naxa, “Siga Ramoti taani Galadi yamanani. I noon sotoma nen, Alatala a soma nen mangan yii.” **12** Xeraan naxan siga Mikahu xilideni, na yi a fala a xa, a naxa, “Waliyine birin bata lan a ma, e fe fajine fala mangan xa, i yiton i siga alo e tan. I fan yi sa fe fajin fala!” **13** Koni Mikahu yi a yabi, a naxa, “N bata n kolo habadan Alatala yi, n ma Ala na naxan fala n xa, n na nan falama mangan xa.” **14** Mikahu to fa mangan fema, mangan yi a maxodin, a naxa, “En lan en sa Ramoti taan yenge Galadi yamanani ba hanma en nama a liga?” Mikahu yi a yabi, a naxa, “Siga, i noon sotoma nen. Men kaane soma nen i yii.” **15** Koni, mangan yi a fala a xa, a naxa, “N na i rakole Alatala yi sanja ma yoli fa fala i xa jondin nan gbansanna fala n xa?” **16** Mikahu yi a yabi, a naxa, “N bata Isirayila yamaan birin to xuyaxi ayi geyane fari, alo xuruseen naxanye kantan muxu mi na. Alatala mon yi fa a fala, a naxa, ‘Kan mi fa muxuni itoe ma, birin xa xete a konni boje sani!’” **17** Isirayila mangan yi a fala Yosafati xa, a naxa, “N mi yi a fala i xa? A mi fe fajin falama n xun ma mume! A fe jaxin nan tun falama.” **18** Nayi, Mikahu mon yi a fala, a naxa, “I tuli mati Alatalaa falan na. N bata Alatala to doxi a mangaya gbenedi, maleka ganla tixi a yiifanna nun a komenna ma. **19** Alatala naxa, ‘Nde Isirayila mangan mayendenma, Axabi, alogo a xa siga Ramoti taan yengedeni Galadi yamanani, a faxes?’ Malekana ndee na falana nde ti, ndee yi gbete fala. **20** Nayi, malekana nde yi fa ti Alatala yetagi, a yi a fala a xa, a naxa, ‘N tan noe a mayendenje nen.’ Alatala yi a fala a xa, a naxa, ‘Kiin mundun yi?’ **21** A yi a yabi, a naxa, ‘N minima nen, n wulen naso a waliyine birin de.’ Ala yi a fala a xa, a naxa, ‘I a mayendenma nen, i yi a no. Siga, i sa na liga.’ **22** Iki, waliyiin naxanye be, Alatala bata wulen naso ne

birin de. Alatala bata a ragidi a xa naxankatan nafa i ma.” **23** Nayi, Kenan ma dii xemen Sedeki yi a maso, a Mikahu deen garin, a yi a magele, a naxa, “Alatalaa malekan minixi kiraan mundun xon, keli n tan yi, a wule falan ti i xa?” **24** Mikahu yi a yabi, a naxa, “I na i luxun konkon kui i ya banxini loxon naxan yi, i a kolonma nen.” **25** Isirayila mangan yi a fala, a naxa, “Mikahu suxu, i siga a ra Amon fema, Samari taan kuntigina, e nun Yowasa, mangana dii xemena. **26** I yi a fala e xa, i naxa, ‘Mangana ito nan falaxi, a naxa a e xa xemeni ito sa kasoon na, e yi a balo buru xaren nun igen na, han n yi xete kendeanyi.’” **27** Mikahu yi a fala, a naxa, “Xa i xete kendeanyi, nayi Alatala mi falan tixi n tan yi.” A mon yi a fala, a naxa, “E tan yamaan birin xa e tuli mati.” **28** Isirayila mangan nun Yosafati, Yuda mangan yi siga Ramoti taani Galadi yamanani. **29** Isirayila mangan yi a fala Yosafati xa, a naxa, “N xa n maxidi alo muxu gbete, n siga yengeni, koni i tan xa, i maxidi i ya mangaya dugine yi.” Nayi, Isirayila mangan yi a maxete, a siga yengeni. **30** Arami mangan bata yi yamarini ito fi a yenge so wontoro kuntigine ma, a naxa, “E nama muxu yo yenge fo Isirayila mangan tun.” **31** Yenge so wontoro kuntigine Yosafati to waxatin naxan yi, e yi a fala, e naxa, “Isirayila mangan nan ito ra.” E maso a ra, e xa a yenge. Koni, Yosafati yi xinla ti a mali feen na. Alatala yi a mali, a yi Yosafati ratanga ne ma. **32** Yenge so wontoro kuntigine to a to Isirayila mangan mi yi a ra, e yi e masiga a ra. **33** Anu, xemena nde yi a xanla woli a xunna ayi, a Isirayila mangan fatin mageli yirena nde li makantan se mi yi denaxan yi. Naxan yi mangana wontoron nagima, mangan yi a fala na xa, a naxa, “I firifiri, i n namini yenge soden fari ma, amasoto n bata maxolo.” **34** Yengen yi naxu ayi na loxoni. Isirayila mangan tixin yi lu a yenge so wontoron kui, a yi a digan a yi Arami kaane yetagi han jinbanna ra, a yi faxeso godon na.

19 Yuda mangan Yosafati yi xete boje xunbenli Yerusalen yi. **2** Fe toon Yehu, Xanani a dii xemen yi mini a ralandeni. A yi a fala Yosafati xa, a naxa, “I muxu naxin maliin nanfera? Alatala yaxune rafan i tan ma ba? Na ma, Alatala bata xolo i ma. **3** Koni hali na, fe fajina nde mon i yi, bayo, i bata Asera kide gbindonne raxori i ya yamanani, i yi Alaa falan suxu.” **4** Manga Yosafati yi lu Yerusalen yi. Na waxatini, a yi lu yamanani sigi, keli Beriseba taan ma siga han

Efirami geya yirena, a falama Isirayila kaane xa, a e xa fa Alatala ma, e benbane Ala. **5** A yi kitisane dexo Yuda yamanan taa rakantanxine birin yi. **6** A yi a fala kitisane xa, a naxa, “E a liga e yeren ma, amasoto e mi kitin sama muxune xan xili yi, koni e a sama Alatala nan xili yi. A tan yeteen luma nen e xon e nema kitin bolonje waxatin naxan yi. **7** Nayi, Alatala yeeragaxun xa lu e yii, e a liga e yeren ma feene yi, bayo Alatala, en ma Ala mi tinje tinxintareyaan ma kitini, a mi tinje muxune xa rafisa e bode xa, a mi tinje e dimi yi seene rasuxu mayifuni.” **8** Na kiini, Yosafati mon yi Lewi bonsonna muxune nun saraxaraline nun Isirayila bonson xunne dexo Yerusalen yi, alogo e xa kitin sa Alatala xinli, e yi yengene nan yamaan tagi. **9** A yi e yamari, a naxa, “E kitin sa Alatala yeeragaxun nun tinxinni. **10** E ngaxakedenna naxanye taa gbetene yi, ne na fa kiti yo ra e xon, xa a findi faxeso feen na, hanma yengena, hanma sariyana fe, hanma yamarina fe, e e rakolon alogo e nama bira Alatala ra, a yi xolo e nun e ngaxakedenne ma. E na nan ligama alogo e tan yeteen nama bira Alatala ra. **11** Saraxaraline kuntigina Amari e xun na Alatalaa feene yi. Yuda bonson kuntigin Sebadiya, Yisimayeli a dii xemena e xun na mangana feene birin yi. Lewine fan e fema sebeli tiine ra. E e yixodexo, e wali, Alatala xa lu na kanna xon naxan walima a fajin na.”

20 Na to dangu, Moyaba kaane nun Amonine nun Mayon kaana ndee yi fa Yosafati yengedeni. **2** Xerane yi fa Yosafati fema, e fa a fala a xa, e naxa, “Gali gbeen fama i yengedeni sa keli Foxo Ige Daraan xanbi ra Arami yamanan binni, e bata fa han Xasason-Tamari taani,” denaxan mon xili En-Gedi. **3** Yosafati yi gaxu han a yi Alatala maxandi, a mon yi yamarin fi a birin xa sunna suxu Yuda yamanani. **4** Yuda kaane birin yi fa keli yamanan taan birin yi Alatalaa maxandideni, e yi e malan Alatala maxandideni. **5** Yosafati yi keli, a ti Yuda kaane nun Yerusalen kaane birin tagi Alatala Batu Banxin sansan nenen yetagi. **6** A yi a fala, a naxa, “Alatala, nxu benbane Ala, i tan Ala kore xonna ma, i tan nan yamanane birin xun na. Muxu yo mi noe tiye i yee ra. **7** I tan, nxo Ala xa mi yamanani ito muxune kedi Isirayila yamaan yee ra ba, i yi a so i ya yamaan yi, i xanuntenna Iburahima bonsonna muxune? **8** E yi dexo a yi, e yi yire saripnanxin ti, e yi a fala, e naxa, **9** ‘Xa fe naxina nxu soto alo fe xolena hanma yengena hanma

fitina furene hanma fitina kamena, nxu fama nen i yetagi banxini ito yi, amasoto i xinla banxini ito nin. Nxu yi i xili nxo tɔrɔni, i yi nxu rame, i yi nxu mali.” **10** “Iki, Amonine nun Moyaba kaane nun Seyiri geyaan muxune bata fa nxu yengedeni. Koni Isirayila kaane keli Misiran yamanani waxatin naxan yi, i mi tin Isirayila kaane xa yamanani itoe halagi. Nanara, nxu benbane yi kira gbete tongo, e mi e halagi. **11** A mato, e nxu saranma naxan na to, e fama e fa nxu kedi bɔxɔn ma i naxan soxi nxu yii. **12** Nxɔ Ala, i mi i ya kitin yite e ra ba? Amasoto fanga mi fa nxu ra yamani ito xili ma naxan fa nxu yengema, nxu nun mi a kolon nxu naxan ligama, koni nxu yeen tixi i ra.” **13** Yuda yamaan birin yi ti Alatala yetagi, hali e diidine nun e paxanle nun e mamandenne. **14** Alatalaa Nii Sarijanxin yi godo Yaxasiyeli ma yamaan tagi, Lewi bɔnsɔnna muxuna nde nan yi a ra Asafi xabilani, Sakari a dii xemena. Sakari fafe yi xili nen Benaya, na fan fafe yi xili Yeyiyeli, na fan fafe yi xili Matani. **15** Yaxasiyeli yi a fala, a naxa, “Yuda kaane nun Yerusalen kaane nun i tan Manga Yosafati, ε liga ε yeren ma! Alatala ito nan falaxi, a naxa, ‘E nama gaxu, ε nama xuruxurun gali gbeeni ito yee ra, bayo ε yenge mi yengeni ito ra, koni Ala nan ma yenge a ra. **16** Tila, ε siga e xili ma. E na te Sisi geya yiren ma, ε sa e lima nen lanbanni Yeruyeli tonbonna yetagi. **17** E hayu mi e yenge feen ma. E fa, ε fa ti be, ε Alatalaa maliin sɔtɔma nen. Yuda kaane nun Yerusalen kaane, ε nama gaxu, ε mini e yetagi tila, Alatala ε malima nen!” **18** Yosafati yi a xinbi sin, a yetagin yi lan bɔxɔn ma, Yuda kaane nun Yerusalen kaane birin yi e xinbi sin Alatala yetagi. **19** Lewi bɔnsɔnna muxuna ndee Kehati nun Kora xabilane yi, ne yi keli, e yi Alatala tantun e xuini texin na, Isirayilaa Ala. **20** E yi keli xɔtɔn, e siga Tekowa tonbonni. E yi minima waxatin naxan yi, Yosafati yi keli, a yi a fala e xa, a naxa, “Yuda kaane nun Yerusalen kaane, ε tuli mati n na! E la Alatala ra, ε Ala, ε senben sɔtɔma nen. E sɔbe so, ε la Alaa nabine ra, ε nɔɔn sɔtɔma nen.” **21** Yosafati nun yamaan yi lan a ma, a yi beti baane sugandi Alatala xa alogo e xa lu betin be a nɔrɔ sarijanxin matɔxɔdeni ganla yee ra, e naxa, “E Alatala tantun, bayo a hinanna luma nen habadan!” **22** E yi betine nun tantunna fɔlɔma waxatin naxan yi, Alatala yi tantanna raso Amonine nun Moyaba kaane nun Seyiri geya fari kaane tagi, naxanye yi faxi Yuda xili ma, ne yi e bode yenge. **23** Amonine nun Moyaba kaane yi Seyiri geyaan muxune

yenge, e yi e faxa han e yi e raxori. E to yelin Seyiri geyaan muxune faxe, e yi lu e bode faxe. **24** Yuda kaane ganla to fa yire matexina nde yi tonbon yiren xun ma, e yi e yee rafindi e yaxune ganla ma, koni muxu faxaxine nan tun yi biraxi. Muxu yo mi mini ayi. **25** Yosafati nun a sofane yi siga, e lu e seene kale, e yi xuruse wuyaxi li na e nun nafunla nun dugine nun se fajine. E yi e tongo han e yi e dɔnxen lu na. E yi xi saxon ti e seene tongoma, bayo seene yi wuya han! **26** Xi naaninde lɔxɔni, e yi e malan Beraka lanbanni, e yi barikan bira Alatala xa mɛnni, nanara, e yi mɛn xili sa a Beraka lanbanna han to. **27** Yosafati yi ti Yuda kaane nun Yerusalen kaane yee ra, e xete Yerusalen yi sewani, amasoto Alatala bata yi e ralugo sewan na e yaxune xun na. **28** E yi so Yerusalen yi e xulenne nun xɔtane fema, e bɔlɔnne maxama, e siga han Alatala Batu Banxini. **29** Alatala yee ragaxun yi so yamanane muxune birin yi, e to a mɛ a Alatala bata Isirayila yaxune yenge. **30** Yosafati a yamanan yi lu bɔɔne xunbenli, a Ala yi bɔɔne xunbenla fi a ma yiren birin yi. **31** Yosafati yi findi mangan na Yuda xun na. A findi mangan na a jee tonge saxon e nun suulunden nan ma. A yi mangayaan liga Yerusalen yi jee mɔxɔɔnen nun suulun. A nga yi xili nen Asuba, Silixi a dii temena. **32** A yi sigan ti tinxinni alo a fafe Asa, a mi a kiraan bejin, a fe fajin liga Alatala yee ra yi. **33** Koni, a mi taan kidene kala, yamaan munma yi bira Ala fɔxɔ ra singen, e benbane Ala. **34** Yosafati kewali dɔnxene, keli a fɔlɔn ma han a rajan na, ne sebexi Xanani a dii xemen Yehu a kedin kui, naxan sebexi Isirayila mangane kedine kui. **35** Na xanbi ra, Yuda manga Yosafati nun Isirayila mangan yi lu fe kedenni, Axasiya naxan yi fe jaxine rabama. **36** E yi lan e kunki gbeene rafala, e kunkine rafala Esiyon-Gebere nin. **37** Koni Maresa kaan Dodafaa dii xemena Eliyeseri yi nabiya falane ti Yosafati xili ma, a naxa, “Bayo ε nun Axasiya bata kafu, Alatala i ya wanla kalama nen.” Kunkine yi kala, e mi nɔ sige yire makuyeni.

21 Yosafati yi faxa, e yi a maluxun a benbane fema Dawudaa Taani. A dii xemen Yehorami yi dɔxɔ a jɔxɔni mangayani. **2** Yehorami xunyene ni i ra, Yosafati a dii xemene: Asari nun Yexiyeli nun Sakari nun Asarayahu nun Mikeli e nun Sefati. Isirayila mangan Yosafati nan ma dii xemeye yi e birin na. **3** E fafe Yosafati bata yi se fajni wuyaxi so e yii gbeti

fixe daxin nun xema daxin nun se fani gbeteɣe, a mɔn yi Yuda taa rakantanxine sa ne fari, koni a yi Yehorami lu a ɲɔxɔni mangayani bayo na nan yi dii xeme singen na. **4** Yehorami yelin dɔxe mangan na a fafe a yamanani waxatin naxan yi, a senben soto, a yi a xunyeɣe birin faxa silanfanna ra e nun Isirayila kuntigina ndee. **5** Yehorami findi mangan na a ɲee tonge saxan e nun firinden nan ma, a yi ɲee solomasexe ti mangayani Yerusalen yi. **6** A wali kiin yi ɲaxu alo Isirayila mangane, alo Axabi a denbayana, amasoto a bata yi Axabi a dii temena nde dɔxo. Naxan ɲaxu Alatala yee ra yi, a na liga nen. **7** Koni hali na, Alatala mi tin Dawuda bɔnsɔnna raxore, amasoto a layirin tongo nen Dawuda xa, a ɲɔxɔn mi ɲanɲe mangayani habadan, a tan nun a diine. **8** Yehorami waxatini, Edon kaane yi murute Yuda xili ma, e yi mangana nde dɔxo e yete xa. **9** Yehorami nun a sofa kuntigine nun a yenge so wontorone birin yi siga. Koe tagini, mangan nun a wontoro kuntigine yi Edon kaane yenge naxanye bata yi e rabilin, e yi e no. **10** Edon kaane yi lu murutexi Yuda no soton xili ma han to. Libina kaane fan murute nen na waxatini, amasoto Yehorami bata yi a me Alatala ra, a benbane Ala. **11** Yehorami yi kidene rafala Yuda geyane fari, a yi Yerusalen kaane nun Yuda kaane ti tinxintareyaan ma, e yi Ala yanfa e suxurene xon alo ɲaxanla na a xemen yanfa yalunyaan kiraan xon. **12** Nabi Eli yi bataxin sebe Yehorami ma, a naxa, “Alatala, i benba Dawudaa Ala ito nan falaxi, a naxa, ‘I mi luxi tinxinni alo i fafe Yosafati nun Yuda mangana Asa. **13** I yi bira Isirayila mangane foxo ra. I bata Yuda kaane nun Yerusalen kaane ti tinxintareyaan ma, e yi Ala yanfa e suxurene xon alo Axabi a denbayana a liga kii naxan yi. I bata i xunye xememane faxa i fafe a denbayani, naxanye yi fisa i tan xa. **14** Nanara, Alatala toron nafama nen i ya muxune ma, i ya diine nun i ya ɲaxanle nun i gbeen seen naxanye birin na, **15** a yi fure ɲaxin nafa i ma, na furen ɲaxuma ayi i ra nen han i fudi xunxurine yi mini kenenni.” **16** Filisistine nun Arabun naxanye yi doxi Kusi kaane fema, Alatala yi ne radin Yehorami xili ma. **17** E yi siga Yuda kaane xili ma, e yi so yamanani. Seen naxanye birin yi manga banxini, e yi ne birin tongo, e yi mangana diine nun a ɲaxanle suxu, e siga e ra. A dii xeme donxena Axasiya nan keden lu na. **18** Na birin to dangu, Alatala yi kui fure yalantaren nafa a ma. **19** A furen yi siga gboe ayi, han a ɲee firinden donxen na, Yehorami a furen

senben yi gbo ayi, a fudi xunxurine yi mini kenenni. A yi faxa ɲaxankata gbeeni. A muxune mi wusulan gan a binya feen na, alo e a liga a benbane xa kii naxan yi. **20** Yehorami findi mangan na a ɲee tonge saxan e nun firinden nan ma, a yi ɲee solomasexe ti mangayani Yerusalen yi. A yi faxa. Muxu yo mi nimisa. E yi a maluxun Dawudaa Taani, koni a mi maluxun mangane gaburune ra.

22 Yerusalen kaane yi Yehorami a dii donxena Axasiya dɔxo mangan na a fafe ɲɔxɔni. A tadane birin bata yi faxa Arabune xon naxanye so Yuda sofane gali daaxadeni. Nayi, Yehorami a dii xemena Axasiya yi findi mangan na Yuda yi. **2** Axasiya findi mangan na a ɲee tonge naanin e nun firinden nan ma, a yi ɲee keden ti mangayani Yerusalen yi. A nga yi xili nen Atali, Omiri mamandenna. **3** A fan wali kiin yi ɲaxu ayi alo Axabi a denbayana, bayo a nga yi a tima fe ɲaxin nan na. **4** Naxan ɲaxu Alatala yee ra yi, a na liga nen alo Axabi a denbayana a liga kii naxan yi, bayo ne findi a kawandi muxune nan na a fafe faxa xanbini, e yi a ti halagin ma. **5** E kawandi xuiin ma, Axasiya yi siga Isirayila mangana Axabi a dii xemen Yorami foxo ra Arami mangan Xasayeɣe yengedeni Ramoti taani Galadi yamanani. Arami kaane yi Yorami maxolo. **6** A yi xete a maxolodene dandandeni Yesereli taani, Arami kaane a maxolo denaxanye ma Ramoti yi, a to yi Arami mangan Xasayeɣe yengema. Yuda mangan Yehorami a dii xemena Axasiya yi xete Yorami matodeni, Axabi a dii xemen Yesereli yi, bayo a mi yi yalan. **7** Ala yi a liga, Axasiya yi siga Yorami fema a halagi feen ma. Axasiya to fa, e nun Yorami yi siga Nimisi a dii xemen Yehu fema, Alatala Axabi a denbayaan naxori feen yamarin so naxan yii. **8** Yehu yi Axabi a denbayaan halagin waxatin naxan yi, a yi sa Yuda kuntigina ndee nun Axasiya ngaxakedenna ndee li na, naxanye yi walima Axasiya xa, a yi e birin faxa. **9** A yi Axasiya fan fen, e yi sa a li luxunxi Samari taani. E yi siga a ra Yehu fema, e yi a faxa. E yi a maluxun, bayo e yi a falama nen, e naxa, “Yosafati a dii xemen nan a ra, naxan Alatala fen a bɔɲen ma feul!” Muxu yo mi fa lu mangayani Axasiya xabilani. **10** Axasiya nga Atali to a to a dii xemen bata faxa, a yi Yuda manga bɔnsɔnna muxune birin faxa. **11** Koni Manga Yehorami a dii temen Yehoseba yi Axasiyaa dii xemen Yowasa tongo mangana diine ye wundoni naxanye yi lan e faxa. A yi sa a luxun xi banxina

nde kui e nun dii ngana nde. Saraxarali Yehoyadaa jnaxanla Yehoseba na liga nen, bayo Axasiya xunyen nan yi a ra. A a luxun Atali ma na kii nin, a mi a faxa. 12 Nee sennin a luxunxi e fema Ala Batu Banxini. Atali nan yi yamanan xun na na waxatini.

23 Nee solofere dangu xanbini, Yehoyada senben yi gbo ayi, a yi layirin xidi e nun gali kuntigini itoe tagi naxanye yi doxi sofa keme xun na: Yeroxamaa dii xemena Asari nun Yehoxanan ma dii xemen Yisimayeli nun Obedi a dii xemena Asari nun Adayaa dii xemen Maaseya, e nun Sikiri a dii xemena Elisafati. 2 E yi Yuda yamanan birin yisiga, e yi Lewi bonsonna muxune malan naxanye yi Yuda yamanan taane yi e nun Isirayila xabila xunne. E yi fa Yerusalen yi, 3 yamaan birin yi layirin xidi e nun mangan tagi Ala Batu Banxini. Yehoyada yi a fala e xa, a naxa, “Mangana dii xemen findima nen mangan na alo Alatala a falaxi kii naxan yi lan Dawudaa diine ma. 4 E ito nan ligama: Saraxaraline nun Lewin naxanye lanma e xa wali Matabu Loxoni, ndee xa Ala Batu Banxin deen kantan, 5 ndee yi lu manga banxini, ndee yi sa ti so deen na denaxan xili Yesodi. Yamaan birin xa fa Alatala Batu Banxin yinna kui. 6 Muxu yo nama so Alatala Batu Banxini, ba saraxaraline nun Lewine ra naxanye walima na loxoni. Ne nan lanma e so, bayo e sarijan. Yamaan birin xa Alatalaa sariyani ito suxu. 7 Lewine xa mangan nabilin yenge so seene suxi e yii, muxu yo so banxini, e xa na kanna faxa. Mangan nema soe, a nema mine, e xa lu a dexon.” 8 Saraxaraliin Yehoyada yamarin naxanye fi, Lewine nun Yuda kaane birin yi ne suxu. E birin yi e muxune tongo, naxanye yi e wanla danma Matabu Loxoni e nun naxanye yi a foloma Matabu Loxoni, bayo saraxaraliin Yehoyada mi matabu waxati fi e sese ma. 9 Manga Dawudaa tanbane nun a ye masansan wure lefaan naxanye yi ramaraxi Ala Batu Banxini, Yehoyada yi ne birin so sofa kuntigine yii. 10 A yi yamaan birin ti, e yenge so seene suxi e yii, e ti folo banxin yiifari foxoni han a komen foxoni saraxa ganden nun Ala Batu Banxin yetagi alogo e xa mangan nabilin. 11 E yi mangana dii xemen maso, e yi manga komotin so a xun na, e yi layiri kedin so a yii. E yi a doxo mangan na, Yehoyada nun a dii xemene yi a ratinme, e yi a fala, e naxa, “Ala xa sii xunkuye fi mangan mal” 12 Atali yi yamaan gi xuiin me e mangan tantunma, a yi fa yamaan fema Alatala Batu Banxini,

13 a yi mangan to tixi senbetenna xon so deen na. Sofa kuntigine nun xota fene yi tixi mangan fema, yamaan birin yi sewaxi, e xotaan fema, sigi saane nun maxase maxane sigi sani. Nayi, Atali yi a domani bo a ma, a gbelegbele, a naxa, “Yanfana! Yanfana!” 14 Nayi, saraxaraliin Yehoyada yi yamarin fi sofa kuntigine ma naxanye yi gali xunna ra, a naxa, “E a ramini yamaan fari ma! Naxan na bira a foxo ra, e na faxa silanfanna ra.” Amasoto saraxaraliin bata yi a fala, a naxa, “E nama a faxa Alatala Batu Banxini.” 15 E yi a suxu, e siga a ra manga banxin binni deen naxan yi xili Soona, e sa a faxa menni. 16 Yehoyada yi layirin xidi a tan mangan yeteen nun yamaan tagi alogo e xa findi Alatalaa yamaan na. 17 Muxune yi sa so Baali batu banxini, e yi a birin kala, e yi saraxa gandene nun sawurane kala, e yi Baali ki muxun Matan fan faxa saraxa ganden yetagi. 18 Yehoyada yi Alatala Batu Banxin kantan feen wanla lu Lewi bonsonna muxune ma, Manga Dawuda bata yi wanla taxun naxanye ra Alatala Batu Banxini alogo e xa saraxa gan daxine ba Alatala xa, alo a sebexi Musaa sariya kedini kii naxan yi, e nun Dawuda a falaxi kii naxan yi, a e xa a liga sewani beti xuine yi. 19 Yehoyada mon yi kantan tiine ti Alatala Batu Banxin deene ra alogo sarijantare yo nama so. 20 Yehoyada mon yi sofa kuntigine nun fonne nun yamana kanne malan e nun yamaan birin. A yi mangan tongo Alatala Batu Banxini, a siga a ra manga banxini mini So Deen Faxaraxiin na, e yi sa Yowasa doxo manga gbedeni. 21 Yamanan muxune birin yi sewa, boje xunbenla yi lu taani Atali faxa xanbini silanfanna ra.

24 Yowasa findi mangan na a jee solofereden nan ma, a yi jee tonge naanin e nun keden ti mangayani Yerusalen yi. A nga yi xili nen Sibiya, Beriseba kaana. 2 Naxan fan Alatala yee ra yi, Yowasa yi na liga saraxarali Yehoyadaa siimayaan birin yi. 3 Yehoyada yi jaxalan firin futu Yowasa xa, a yi dii xemene nun dii temene soto. 4 Na xanbi ra, Yowasa yi a ragidi a xa Alatala Batu Banxini ton. 5 A yi saraxaraline nun Lewi bonsonna muxune malan, a yi a fala e xa, a naxa, “E siga Yuda taane birin yi, e sa gbetin nasuxu Isirayila kaane birin na jee yo jee alogo en xa Ala Batu Banxini ton. E na feni fura.” Koni Lewi bonsonna muxune mi na feene mafura. 6 Mangan yi saraxaraline kuntigin Yehoyada xili, a yi a maxodin, a naxa, “Nanfera i mi Lewine karahanxi a e xa mudun

maxodin Yuda kaane nun Yerusalen kaane ra Alatalaa walikéen Musa nun Isirayila yamaan naxan maxodinxi e ma Layiri Sereya Bubuna fe yi?" 7 Naxalan jaxina Atali foxo ra birane bata yi Ala Batu Banxin deen kala. Se sarjannxin naxanye yi Alatala Batu Banxini, e yi ne tongo, e yi e findi Baali batu seene ra. 8 Nayi, Manga Yowasa yi a fala, a e xa kankirana ndee rafala mudu sa seen na, e sa a doxo Alatala Batu Banxin deen na. 9 E yi xibaruna nde rali Yerusalen nun Yuda yamanan birin yi, naxan yi a falama, a birin xa fa mudun na Alatala xon alo Alatalaa walikéen Musa a yamari kii naxan yi Isirayila yi tonbonni. 10 Kuntigine nun yamaan yi lu fe mudune ra sewani gbeti ramara kankiraan kui han a yi rafe. 11 Lewine yi gbeti kankiraan xalima waxatin naxan yi, alogo mangana walikene xa a kui to xa gbeti gbegbe a kui, mangana sebeli tiin nun saraxaraline kuntigina walikéen bundoxon yi fama nen, e fa gbeti kankiraan kui ba, e mon yi a tongo e xete a ra a funfuni. E yi ferjennma gbetin nasuxe na kii nin loxo yo loxo. 12 Mangan nun Yehoyada yi na gbetin soma Alatala Batu Banxin wali muxune nan yii, naxanye yi muxune tima geme sonla nun xalanbe wanla nun wure wanla nun sulan wanla ra alogo e xa Alatala Batu Banxini ton. 13 Walikene yi wanla raba alo a yi lan kii naxan yi. E yi Ala Batu Banxin liga alo a yi kii naxan yi a singeni. E yi a yiton ki faji. 14 E to yelin banxini tonje, e yi gbeti donxen xali Manga Yowasa nun Yehoyada xon. E yi seni itoe sara Alatala Batu Banxin xa: sali seene nun saraxa gan seene nun igelengenne nun se gbeteje, a xema daxine nun gbeti fixe daxine. E lu nen saraxa gan daxin be Alatala Batu Banxini Yehoyadaa siimayaan birin yi. 15 Yehoyada yi fori, a faxes a jee keme jee tonge saxanna ma. 16 E yi a maluxun Dawudaa Taani mangane fema, bayo a fe fajin naba nen Isirayila yi Ala binya feen na e nun a batu banxina. 17 Yehoyada faxes xanbini, Yuda muxu gbeene yi fa Manga Yowasa fema a tantundeni. Mangan yi a tuli mati e ra. 18 E yi Alatala Batu Banxin nabegin, e benbane Ala, e yi Asera kide gbindonne nun suxurene batu. Alatala yi xolo Yerusalen nun Yuda kaane ma. 19 Alatala yi nabine rasiga e ma alogo e xa sa e raxete a ma. Nabine yi sa sereyaan ba e xa, koni e mi e tuli mati. 20 Na xanbi ra, Alaa Nii Sarjannxin yi godo saraxaraliin Yehoyadaa dii xemen Sakari ma, a yi ti yamaan yetagi, a yi a fala e xa, a naxa, "Ala naxa iki: Nanfera e mi Alatalaa yamarine suxuma? E mi sabatima, bayo e

bata e me Alatala ra. A fan a mema e ra nen." 21 E yi yanfan so a ma, mangan yi e yamari, e yi a magolon Alatala Batu Banxin yinna kui. 22 Sakari fafe Yehoyada bata yi hinanna naxan birin yita Manga Yowasa ra, na sese mi yi fa a kui. A yi a dii xemen faxes. Sakari faxamatxon yi a fala, a naxa, "Alatala xa feni ito to, a yi i makiti a ra." 23 Neen donxen na, Arami kaane sofane yi siga Yowasa yengedeni. E yi fa Yerusalen nun Yuda yamanani. E yi kuntigine birin faxes, e yi e seene birin tongo, e siga e ra Damasi mangan xon. 24 Arami kaane sofane mi yi wuya, koni Alatala yi tin a e xa sofa gali senbemaan naxori, bayo Yuda kaane bata yi e me Alatala ra, e benbane Ala. Alatala Yowasa makiti na kii nin. 25 Arami kaane to xete, e yi Yowasa furaxin lu jaxankata gbeeni, a walikene yi yanfan so a ma Yehoyadaa diina fe ra, e yi sa a faxes a saden ma. E yi a maluxun Dawudaa Taani, koni e mi a maluxun mangane gaburune ra. 26 Itoe nan yanfan so a ma: Amoni jaxanla naxan yi xili Simeyati, na dii xemen Sabadi nun Moyaba kaa jaxanla naxan yi xili Simiriti, na dii xemen Yehosabadi. 27 A dii xemene xinle nun waliyiya falan naxanye ti a xili ma e nun Ala Batu Banxini ton fena a xon, ne birin sebexi mangane kedine kui. A dii xemena Amasiya yi ti a joxoni mangayani.

25 Amasiya findi mangan na a jee moxonen nun suulunden nan ma. Jee moxonen nun solomanaanin a mangayani Yerusalen yi. A nga yi xili nen Yehoyadan, Yerusalen kaana. 2 Naxan fan Alatala yee ra yi, a yi na liga, koni a mi a sobe so Alatala fe yi jaxi ra. 3 Amasiyaa mangayaan to senbe soto, a yi na kuntigine faxes naxanye a fafe faxes. 4 Koni a mi e diine faxes, lan Musaa sariya kedin ma, Alatala yamarini ito fi denaxan yi, a naxa, "Fafane mi faxama diine funfuni, diine fan mi faxama fafane funfuni, koni birin faxama a yete yulubin nan ma fe ra." 5 Amasiya yi a yamanan muxune malan denbaya yeen ma, Yuda bonsonna muxune nun Bunyamin bonsonna muxune, a yi sofa kuntigine doxo e xun na naxanye yi muxu wuli nun muxu keme xun na. A yi muxune yate keli jee moxonen ma han e nun nde. E yatena, muxu wuli keme saxan, naxanye yi no sige yengeni, naxanye yi tanban nun ye masansan wure lefaan noe. 6 A mon yi sofa muxu wuli keme tongo Isirayila yi, naxanye yi sare fima gbeti fixen kilo wuli saxan na. 7 Koni Alaa sayibana nde yi fa falan ti mangan

xa, a naxa, “Mangana, Isirayila sofane mi lan e siga i fəxo ra, bayo Alatala mi Isirayila kaani itoe xən, Efirami bənsənnə muxune. **8** Xa e siga i fəxo ra, hali i senben sətə yəngeni, Ala i rabəjinma nən i yaxune yii, bayo mali senbena Ala nan keden pe ra, a tan nan mən nəe muxun nabirə.” **9** Amasiya yi Alaa sayiban yabi, a naxa, “N gbeti fixen kilo wuli saxanna naxan soxi Isirayila sofane yii, n fa nanfe ligan na yi?” Alaa sayiban yi a yabi, a naxa, “Alatala nəe gbete soe i yii nən naxan dangu na ra.” **10** Amasiya yi sofane raxete naxanye sa kelixi Efirami yi, e yi xete e konne yi. Koni, e yi xolo Yuda kaane ma, e xoloxi gbeen yi xete e konne yi. **11** Amasiyaa mangayaan yi senben sətə a yamanani. E nun a ganla yi siga fəxo Lanbanni, a sa muxu wuli fu fəxa naxanye yi kelixi Seyiri geya yireni. **12** Yuda kaane yi muxu wuli fu suxu e yə, e siga e ra geya gbeen xuntagi. E yi e radinjə ayi gəmen xuntagi, e birin yi fəxa. **13** Amasiya bata yi Isirayila sofaan naxanye raxete, alogo e nama lan yəngeni, ne yi Yuda taane yenge keli Samari taani han Beti-Xoron, e yi muxu wuli saxan fəxa, e yi se wuyaxi tongo. **14** Amasiya yi fama waxatin naxan yi sa keli yəngeni, a sa Edən kaane nə yəngən naxan yi, a yi fa Seyiri kaane suxurene ra a yii, a yi e ramara a yii, a lu e batue, a lu wusulanna ganjə e xa. **15** Nayi, Alatalaa yi xolo Amasiya ma, a yi sayibana nde rasiga a faladeni a xa, a naxa, “Nanfera i yamani ito alane batuxi, naxanye mi nə e yamaan badeni i yii?” **16** Sayiban mən yi fala tiini, Amasiya yi a yabi, a naxa, “N tan nan i findixi n kawandi muxun na ba? A lu. I waxi nən n xa i bənbə ba?” Sayiban yi a dundu, koni a mən yi a fala, a naxa, “N na a kolon Ala bata yelin a ragide a xa i halagi, bayo i bata ito liga, i mi n ma falan suxi.” **17** Yuda mangana Amasiya yelin falan tiye a kawandi muxune xa waxatin naxan yi, a yi xerane rasiga a faladeni Yowasi xa, Yehowaxasi a dii xəmənə, Isirayila mangan Yehu mamandenna, a naxa, “Fa, en xa yenge.” **18** Koni, Isirayila mangan Yowasi yi a fala Yuda mangana Amasiya xa, a naxa, “Tansinna nde yi Liban yamanani, a xeraan nasiga a faladeni suman wudina nde xa Liban yamanani, a naxa, ‘I ya dii tēmen fi n ma dii xēmen ma futun na!’ Na xanbi ra, Liban burunna subena nde yi dangu tansinni bodonjə. **19** I yete matəxəma, i wasoma, a i bata Edən kaane nə. Koni iki, lu i konni! Nanfera i mən fe jaxin fəloma naxan sa rəjanma kalan ma e nun Yuda yamaan birin xa?” **20** Koni Amasiya mi a tuli mati a ra, fata Ala

waxən feen na, alogo e nun a sofane xa sa e yaxune sagoni, amasətə a bata yi a yəe rafindi Edən suxurene ma. **21** Nayi, Isirayila mangan Yowasi yi siga, e nun Yuda mangana Amasiya yi sa yenge Beti-Semesi taani Yuda yamanani. **22** Isirayila kaane yi Yuda kaane nə, e birin yi e gi, e siga e konne yi. **23** Isirayila mangan Yowasi yi Yuda mangana Amasiya suxu Beti-Semesi taani, Yowasaa diina, Axasiya mamandenna. A yi siga a ra Yerusalen yi, a yi nongonna yə tonge naanin kala Yerusalen yinna ra, keli Efirami dēen ma han Songen ma dēna. **24** Xəmaan nun gbeti fixen nun se fəpin naxanye birin yi Ala Batu Banxini, e nun naxanye yi Obedi-Edən ma nəon bun, a yi ne birin tongo, e nun manga banxin nafunle. A mən yi muxuna ndee suxu, a xete Samari taani. **25** Isirayila mangan Yehowaxasi a diin Yowasi fəxa xanbini, Yuda mangan Yowasaa diina Amasiya mən yi jəe fu nun suulun sətə siimayaan na. **26** Amasiya kəwali dənxe, keli a fəlon ma han a rəjan na, ne birin sebexi Yuda mangane nun Isirayila mangane kəwali kədine kui. **27** Na xanbi ra, Amasiya yi a masiga Alatala ra, e yi yanfan so a ma Yerusalen yi, a yi a gi, a siga Lakisi taani, koni e yi siga a fəxo ra Lakisi yi, e sa a fəxa mənni. **28** E yi a binbin xali soone fari, e sa a maluxun Yuda Taani a benbane fəma.

26 Yuda kaane birin yi Yusiya dəxo mangayani a fafe Amasiya jəoxoni. Yusiya barin jəe fu nun sennin nan yi a ra. **2** A fafe fəxa xanbini, a mən yi Elati taan ti, a mən yi a raxete Yuda yamanan fari. **3** Yusiya findi mangan na a jəe fu nun senninden nan ma, a yi jəe tonge suulun e nun firin naba mangayani Yerusalen yi. A nga yi xili Yekoliya, Yerusalen kaana. **4** Naxan fan Alatala yəe ra yi, a yi na liga alo a fafe Amasiya a liga kii naxan yi. **5** A yi lu Alaa kiraan xən Sakari a siimayaan birin yi, naxan yi feene toma fata Ala ra. Fanni a yi Alatala fenma, Ala nəon fima a ma feen birin yi. **6** A yi mini Filisitine yengedeni, a yi Gati taan yinne birin nabira e nun Yaben taan nun Asadodi taana. Na xanbi ra, a yi taane ti Asadodi fəma e nun yire gbete yi Filisitine tagi. **7** Ala yi a mali Filisitine yengedeni e nun Arabun naxanye yi dəxi Guri-Baali taani. Ala mən yi a mali Meyunin bənsənnə muxune yengedeni. **8** Amonine yi mudun soma Yusiya nan yii, a xinla yi siga han Misiran yamana na, bayo a senben yi gbo. **9** Yusiya yi makantan sangansona ndee ti Yerusalen yinna xən. A yi kedenna ti Songenna so dēen dəxən, keden Lanban ma dēen dəxən, keden

yinna songenna nde dexɔn. A yi e makantan. **10** Na xanbi ra, a mɔn yi makantan banxi matexina ndee ti tonbonni, a yi xɔjin wuyaxi ge, bayo xuruse wuyaxi yi a yii xuruse sansanna nun meremerene yi. Xɛɛ biine nun sansi siine fan yi a yii geya longonne ra, bayo xɛ biin yi rafan a ma. **11** Gali kenden yi Yusiya yii, e yi e yitaxun gali yɛen ma fata xasabin na sebeli tiin Yeyiyeli nun fe xunmatoon Maaseya naxanye yate Xananiyaa yamarin bun, mangana kuntigina nde. **12** Sofa kuntigin naxanye yi denbaya xunne ra, ne yi lanxi muxu wuli firin muxu keme sennin nan ma. **13** Sofaan muxu wuli keme saxan wuli solofere keme suulun nan yi e yamarin bun naxanye yi mangan malima a yaxune yengedeni. **14** Yusiya yi yɛ masansan wure lefane nun tanbane nun wure kɔmɔtine nun tagi xidine nun xalimakunle nun lantan gemene so sofane birin yii. **15** Yusiya yi yenge so sena ndee rafala Yerusalen yi fata fekolonna ndee ra naxanye yi nɔɛ xalimakunle nun gɛmɛ belebelene wole. A yi e ti makantan sangansone fari taan yinna xuntagi e nun yinna songenne ma. Yusiya xinla yi siga ayi pon, bayo a mali kenden sɔto nen han a mangayaan yi sabati. **16** Koni, Yusiya to senben sɔto a mangayani, a yi waso ayi. Na feen nan najan kalan ma a xa. A yi tinxintareyaan liga Alatala, a Ala yɛɛ ra yi. Lɔxɔna nde, a yi so Alatala Batu Banxini alogo a xa wusulanne gan wusulan saraxa ganden fari. **17** Saraxaralina Asari nun Alatalaa saraxarali gbeteye muxu tonge solomasɛɛ yi so a fɔxɔ ra wɛkileni. **18** E yi a fala a xa, e naxa, “Yusiya, i tan xa mi lan i wusulanne gan Alatala xa, fɔ saraxaraline Haruna xabilani naxanye yi rasarijanxi lan na feen ma. Mini yire sarijanxini, bayo tinxintaren nan i ra, na mi findima binye ra i xa Marigina Alatala yɛɛ ra yi.” **19** Yusiya yi tixi, wusulan gan daxin suxi a yii, a yi xɔlɔ saraxaraline ma. Na sasani, dogonfonna yi mini a tigi ra saraxaraline yetagi Alatala Batu Banxin wusulan ganden dexɔn. **20** Saraxaraline kuntigina Asari nun na saraxarali gbetene birin yi a mato, e yi dogonfonna to a tigi ra. E yi a ramini tandeni mafuren, a tan yatigin yi a mafura minideni bayo Alatala bata yi a yulubin saran a ra. **21** Yusiya yi lu a danna banxini dogonfonna a ma han a yi faxa. A mi yi fa nɔɛ soɛ Alatala Batu Banxini. A dii xɛmen Yotami yi findi kuntigin na manga banxini, a lu yamanan muxune xun matoɛ a ra. **22** Yusiya kɛwali dɔnxɛne, keli a fɔlɔn ma han a rajan na, Nabi Esayi, Amɔsi a dii xɛmen ne birin seɓe nen. **23** Yusiya yi

faxa, e yi a maluxun a danna xɛɛna nde ma a benbane fɛma, a mi yi makuya mangane gaburune ra, bayo e yi a falama nen, e naxa, “Dogonfontɔɔn nan a ra.” A dii xɛmen Yotami yi dɔxɔ a jɔxɔni mangayani.

27 Yotami findi mangan na a jɛɛ mɔxɔɔnen nun suulunna nan ma. A yi jɛɛ fu nun sennin ti mangayani Yerusalen yi. A nga yi xili nen Yerusa, Sadoki a dii tɛmena. **2** Naxan fan Alatala yɛɛ ra yi, a yi na liga, alo a fafe Yusiya a liga kii naxan yi. Koni, a mi so Alatala Batu Banxini. Yamaan mɔn mi yi tinxin. **3** A tan nan Alatala Batu Banxin So Dɛen Faxaraxini tɔn, a mɔn yi nde dɔxɔ Ofeli yinna dɛ. **4** A yi taane ti Yuda yamanan geya yirene yi e nun sanganso makantanxine fɔtɔn yirene yi. **5** A yi Amonine mangan yenge, a yi e nɔ. Na jɛɛn na, Amonine yi gbeti fixen kilo wuli saxan so a yii, e nun murutun kilo wuli saxan e nun fundenna kilo wuli saxan. E mɔn ne nan so a yii jɛɛ firinden nun a saxandeni. **6** Yotami yi senben sɔto, amasɔto a yi tinxin Alatala yɛɛ ra yi, a Ala. **7** Yotami kɛwali dɔnxɛne, a yengen naxanye so e nun a feene birin, ne seɓexi Isirayila mangane nun Yuda mangane kɛdine kui. **8** Yotami findi mangan na a jɛɛ mɔxɔɔnen nun suulunna nan ma. A yi jɛɛ fu nun suulun ti mangayani Yerusalen yi. **9** Yotami yi faxa, e yi a maluxun a benbane fema Dawudaa Taani. A dii xɛmena Axasi yi ti a jɔxɔni.

28 Axasi findi mangan na a jɛɛ mɔxɔɔnden nan ma, a yi jɛɛ fu nun sennin ti mangayani Yerusalen yi. Naxan fan Alatala yɛɛ ra yi, a mi na liga, anu a benba Dawuda tan a fajin nan liga. **2** Axasi yi sigan ti a jaxin na alo Isirayila mangane a liga kii naxan yi, a yetɛen yi suxure sawura wure daxine rafala Baali xa. **3** A yi saraxane ba Ben-Hinɔn lanbanni, a yi a dii xɛmene gan saraxan na, a yi na siyane raliga e fe xɔsixin yi, Alatala naxanye kedi yamanani, a e yamanan so Isirayila kaane yii. **4** Mangan yi saraxane bama, a wusulanna gan taan kidene yi geyane xuntagi e nun wudi gbeene birin bun. **5** Nanara, Alatala, a Ala yi a ganla sa Arami mangan sagoni. Arami kaane yi e yenge, e yi muxu wuyaxi suxu konyiyani, e siga e ra Damasi taani. A ganla mɔn yi sa Isirayila mangan fan sagoni, na yi bɔnɔ gbeen sa e ma. **6** Remaliyaa dii xɛmen Peka yi a liga sofaan muxu wuli keme wuli mɔxɔɔnɛ yi faxa Yuda yamanani lɔxɔ kedenni. Amasɔto e bata yi e mɛ Alatala ra, e benbane Ala. **7** Efirami bɔnsɔnna sofa kenden Sikiri yi mangana

dii xemen Maaseya faxa e nun Asirikami manga banxin kuntigina e nun Elikana mangan fe rafala bode singena. **8** Isirayila kaane yi muxu wuli keme firin suxu konyiyani Yuda kaane ye, naxanle nun dii xemene nun dii temene. E mon yi se wuyaxi tongo, e siga na seene ra Samari taani. **9** Koni, Alatalaa nabina nde yi menni naxan yi xili Odedi. Na yi mini sofane ralandeni sa keli Samari taani. A yi a fala e xa, a naxa, "Alatala, e benbane Ala bata xolo Yuda kaane ma, a yi e sa e sagoni, anu, e tan bata halagin nagodo e ma han e gbelegebele xuiin yi te han kore xonna ma. **10** Iki, e waxi e xa na Yuda kaane nun Yerusalen kaane findi e konyi xemene nun e konyi gilene ra. Koni, e fan mi findixi yulubitone ra Alatala yee ra yi ba, e Ala? **11** Nayi, e tuli mati n na, e mon xa Yuda muxu suxini itoe raxete e konni, bayo Alatala xoloxi e ma ki faji." **12** Nayi, Efirami muxu gbeena nde, alo Yehoxanan ma dii xemena Asari nun Mesilimoti a dii xemen Bereki nun Salun ma dii xemen Yexisikayi nun Xadilayi a dii xemena Amasa, ne yi xolo sofane ma naxanye yi sa yengeni. **13** E yi a fala e xa, e naxa, "E nama fa konyini itoe ra be, bayo en findima nen yulubitone ra Alatala yee ra yi. E waxi en yulubine nan fari sa fe yi ba? En yulubine bata gbo ayi, Ala bata xolo gbeen ti Isirayila kaane ma." **14** Nayi, sofane yi muxu suxine nun se tongoxine birin naxete kuntigine nun yamaan birin yetagi. **15** E muxun naxanye xili fala, ne yi keli, e yi dugine ragodo muxu suxi ragenle birin ma, e dugine nun sankidine so e yii, e donseene nun igen so e yii, e yi e furene dandan, naxanye mi yi noe sigan tiye, e yi ne doxo sofanelle fari, e siga e ra e ngaxakedenne fema Yeriko yi, Tugu Taana. Isirayila kaane mon yi xete Samari taani. **16** Na waxatini, Manga Axasi yi xeraan nasiga Asiriya mangan ma alogo a xa fa a mali. **17** Edon kaane mon yi Yuda kaane yenge, e yi muxuna ndee suxu. **18** Na waxatin yeteni, Filisitine yi yengen nakeli lanban yi taane nun Negewi taane ma Yuda yi. E yi Beti-Semesi taan tongo, e nun Ayalon nun Gediroti taane nun Soko nun Timana nun Ginso taane nun e rabillinne taane, e yi doxo e yi. **19** Alatala Yuda yamanan nayarabi na kii nin Isirayila mangana Axasi a fe ra, naxan Alatalaa yamaan ti tantanna ma, e yi yulubin tongo. **20** Asiriya mangan Tigilati-Pilesere yi fa Axasi fema, koni benun a xa a mali, a yi a yenge. **21** Axasi bata yi Alatala Batu Banxin nafunle birin tongo, e nun manga banxin nun kuntigine nafunle, a yi e fi Asiriya mangan ma. Koni na tona mi lu a ma. **22**

Hali Axasi yi kontofilixi waxatin naxan yi, a mon lu nen tinxintareyani Alatala yee ra yi. **23** A yi saraxane ba Damasi alane xa, a na toron masotaxi naxanye xon, bayo a yi a mirima nen, a naxa, "Bayo, Arami mangana alane a malima, n fan xa saraxane ba e xa alogo e xa n mali." Koni, na nan najan kala ma a ra, e nun Isirayila birin. **24** Axasi yi Alatala Batu Banxin seene birin malan, a yi e kala. A yi Alatala Batu Banxin deene balan, a yi kidene rafala Yerusalen taan yiren birin yi. **25** A yi taan kidene rafala Yuda taane birin yi alogo a xa saraxane ba ala gbetene xa. Na ma, Alatala, a benbane Ala yi xolo a ma kati! **26** A kawali donxene, a feene birin, keli a folon ma han a rajanna, ne sebexi Yuda mangane nun Isirayila mangane kedine kui. **27** Axasi yi faxa, e yi a maluxun Yerusalen taani, koni a tan mi maluxun Isirayila mangane gaburun na. A dii xemen Xesekiya yi ti a joxoni.

29 Xesekiya findi mangan na a jee maxonen nun suulunna nan ma, a yi jee maxonen nun solomanaanin ti mangayani Yerusalen yi. A nga yi xili nen Abiya, Sakari a dii temena. **2** Naxan fan Alatala yee ra yi, a yi na liga, alo a benba Dawuda a liga kii naxan yi. **3** A tan nan Alatala Batu Banxin nabi a mangayaan jee singen kike singen ma, a yi a deene yiton. **4** A yi saraxaraline nun Lewi bonsonna muxune malan yamaan malandeni sogeteden binni. **5** A yi a fala e xa, a naxa, "E tuli mati n na, e tan Lewine. E yete rasarijan, e yi Alatala Batu Banxin nasarijan, e benbane Ala, e yi se xosixine ramini yire sarijanxini ito kui. **6** Bayo en benbane fe xosixine raba nen, naxanye rajaxu Alatala ma, en ma Ala, e yi na liga, e yi e me a ra, e yi e xun xanbi so Alatalaa yire sarijanxini. **7** E yeteen yi Ala Batu Banxin so deene balan, e yi lenpune ratu, e mi wusulan gan, e mi saraxa gan daxine ba Isirayilaa Ala xa yire sarijanxini. **8** Nayi, Alatala yi xolo Yuda kaane nun Yerusalen kaane ma, a yi gbalon nun sunun nun yagin nagodo e ma alo e a toma kii naxan yi. **9** Nanara, en benbane faxa yengeni, en ma dii xemene nun en ma dii temene nun en ma naxanle yi lu konyiyani. **10** Iki, n waxi layirin xidi feni en nun Alatala tagi, Isirayilaa Ala. **11** Iki, ngaxakedenne, e ba tunnaxolon ma, bayo Alatala e tan nan sugandixi alogo e xa ti a yetagi a wanla ra, e findi a walikene ra, e yi wusulanne gan a xa." **12** Nayi, Lewi bonsonna muxuni itoe yi fa: Kehati xabilani: Amasayi a diin Maxati nun Asari a diin Yoweli. Merari xabilani:

Abidi a diin Kisu nun Yehaleleli a diina Asari. Gerison xabilani: Simaa diin Yowa nun Yowaa diina Eden. **13** Elisafan xabilani: Simiri nun Yeyiyeli. Asafi xabilani: Sakari nun Matani. **14** Heman xabilani: Yexiyeli nun Simeyi. Yedutun xabilani: Semaya nun Yusiyele. **15** E yi e bõnsõnna muxune birin malan. E yelin xanbini e rasarijanjɛ, e fa Alatala Batu Banxin nasarijan alo mangana e yamarixi kii naxan yi, e nun Alatala a falaxi kii naxan yi. **16** Saraxaraline yi so Alatalaa yire sarijanxini a rasarijandeni. E se xõsixin naxanye birin li Alatala Batu Banxini, e yi ne birin namini, Lewi bõnsõnna muxune yi se xõsixin tongo e sa e woli Kedirõn lanbanni. **17** E Alatala Batu Banxin nasarijan fõlõ kike singen xi singe lõxõn nin. Xi solomasexede lõxõni, e yi so Alatala Batu Banxin so deen palaan ma, e mõn yi xi solomasexẽ wali kẽ a rasarijandeni. E yi yelin kike singen xi fu nun senninden ma. **18** Na xanbi ra, e mõn yi siga Manga Xesekiya konni, e yi a fala a xa, e naxa, “Nxu bata Alatala Batu Banxin birin nasarijan e nun saraxa ganden nun a seene birin e nun buru rasarijanxin sama tabanla naxan fari e nun a seene birin. **19** Manga Axasi seen naxanye birin naxõsi a tinxintareyani a mangayaan waxatini, nxu bata ne birin nasarijan, nxu yi e sa Alatala yetagi.” **20** Manga Xesekiya yi keli xõtõn, a yi taan kuntigine malan, e siga Alatala Batu Banxini. **21** E yi siga tura solofere nun konton solofere nun yexẽẽ dii solofere nun kõtõ solofere ra mangana denbayaan nun yire sarijanxin nun Yuda kaane yulubi xafarin na alogo e xa rasarijan. Mangan yi a fala saraxaraline xa, Haruna yixetene, a e xa e ba saraxan na Alatalaa saraxa ganden fari. **22** Saraxaraline yi jingene kõe raxaba, e yi e wunla xuya saraxa ganden ma. E mõn yi kontonne kõe raxaba, e yi e wunla xuya saraxa ganden ma. Na xanbi ra, e yi yexẽẽ diine kõe raxaba, e yi e wunla xuya saraxa ganden ma. **23** E mõn yi siga kõtõ kõe raxaba daxine ra yulubi xafari seen na mangan nun yamaan birin yetagi, ne yi e yiine sa e ma. **24** Nayi, saraxaraline yi kõtõne kõe raxaba, e yi e wunla bõxõn saraxa ganden ma alogo Isirayila kaane birin yulubine xa xafari. Mangan nan na saraxa sifa firinne yamarin fi alogo yamaan birin yulubin xa xafari. **25** Mangan yi Lewi bõnsõnna muxune lu Alatala Batu Banxini, karijanne nun kondenne nun bõlõnne yi suxi naxanye yii alo Dawuda nun mangana fetoon Gadi nun Nabi Natan a yamari kii naxan yi, bayo Alatalaa yamarin nan yi a ra, a nabine naxan nali

muxune ma. **26** Lewi bõnsõnna muxune yi ti, Dawudaa maxaseene suxi e yii. Saraxaraline fan yi na, xõtane suxi e yii. **27** Manga Xesekiya yi a fala, a e xa saraxa gan dixin ba saraxa ganden fari. E nẽma yi saraxan gan fõle waxatin naxan yi, e yi betin ba Alatala xa xõtã xuiin nun Isirayila manga Dawudaa maxaseene ra. **28** Yamaan birin yi e xinbi sin, e lu betin bẽ, e xõtãan fema han saraxa gan dixin birin yi yelin ganjɛ. **29** E to yelin saraxa gan dixin bẽ, mangan nun a yamaan naxan birin yi a fõxõ ra, e birin yi e xinbi sin, e yi Ala tantun. **30** Na xanbi ra, Manga Xesekiya nun a kuntigine yi Lewi bõnsõnna muxune yamari a e xa Alatala tantun Dawudaa beti xuine nun fetona Asafi a beti xuine ra. E yi betin ba sɛwani, e yi e xinbi sin, e Alatala tantun. **31** Manga Xesekiya yi a fala, a naxa, “Bayo iki ẽ bata dentege Alatala xa, ẽ fa ẽ saraxane nun barika bira saraxane ra Alatala Batu Banxini.” Yamaan yi fa e saraxane nun barika bira saraxane ra, e nun muxu bõjɛ fajine birin yi fa saraxa gan daxine ra. **32** Yamaan fa saraxa gan dixin naxanye ra, ne yatɛn yi siga han jinge tonge solofere e nun yexẽẽ dii keme firin e nun konton keme, ne birin saraxa gan daxine Alatala xa. **33** E mõn yi jinge keme sennin e nun kontonne nun kõtõ wuli saxan ba saraxa gbetene ra. **34** Koni saraxaraline mi yi wuya, e mi yi nõe saraxa gan daxine birin budẽ. Nanara, e ngaxakedenne Lewi bõnsõnni, ne yi fa e mali han wanla yi jan, han saraxaraliin bonne yi rasarijan. E ngaxakedenne Lewi bõnsõnni, ne yi kataxi e rasarijan feen nan na dangu saraxaraline ra. **35** Saraxa gan dixin yi wuya, sa bõjɛ xunbeli saraxane turene fari, e nun minse saraxane nun saraxa gan daxine. Alatala Batu Banxin nasarijan na kii nin. **36** Ala bata yi naxan birin yitõn yamana fe ra, Manga Xesekiya nun yamaan birin yi sɛwa na ra, amasõtõ na feene liga nẽn mafuren.

30 Manga Xesekiya yi xerane rasiga Yuda yamanan yiren birin yi. A mõn yi bataxine sebe Eframi nun Manase kaane ma, alogo e xa fa Alatala Batu Banxini Yerusalen yi, e fa Alatala tantun, Isirayilaa Ala, Halagi Tiin Dangu Lõxõn Sanla rabadeni. **2** Mangan nun a kuntigine nun yamaan birin bata yi lan a ma Yerusalen yi a e xa Halagi Tiin Dangu Lõxõn Sanla raba jɛen kike firinden ma. **3** Bayo saraxarali wuyaxi mi yi sarijanxi na waxatini, yamaan mõn munma yi malan Yerusalen yi singen, e mi yi nõe na sanla rabe singen. **4** Bayo mangan nun yamaan lanma feen nan

yi a ra, 5 e yi a ragidi, a xa rali Isirayila birin ma, keli Beriseba taan ma han Dan yamanani alogo muxune xa fa Yerusalen yi, e fa Halagi Tiin Dangu Lōxōn Sanla raba mēnni Alatala xa, Isirayilaa Ala. Amasōto yamaan mi yi fa na sanla rabama e bode xōn alo a yi sebexi kii naxan yi. 6 Xerane yi siga mangan nun a kuntigine bataxine ra Isirayila nun Yuda yamanan yiren birin yi, alo mangana a yamarixi kii naxan yi. E naxa, “E tan Isirayila kaane, e xete Alatala ma, Iburahimaa Ala, Isiyagaa Ala, Isirayilaa Ala alogo a mōn xa xete e ma, e tan yamaan muxu dōnxen naxanye luxi e nii ra, e tan naxanye tangaxi Asiriya mangane ma. 7 E nama lu alo e fafane, alo e ngaxakedenne, naxanye mi yi tinxinxī Alatala yēe ra yi, e benbane Ala, naxan e ba gbalon dē alo e a toma kii naxan yi. 8 Nayi, e nama tuli maxōdōxō ayi alo e benbane. E fa Alatala ma, e fa a yire sarijanxini, a dēnaxan nasarijanxi han habadan, e wali Alatala xa, e Ala, alogo a xōlo gbeen xa xete e fōxō ra. 9 Xa e fa Alatala ma, muxun naxanye e ngaxakedenne suxu konyiyani, ne kininkininma nēn e ma, e mōn yi xete yamanani ito yi. Alatala hinan, e Ala, a fan, a mi a yetagin luxunma e ma, xa e xete a ma.” 10 Xerane yi siga taane yi Efirami yamanan nun Manase yamanani han Sabulon yamanani. Koni, muxune yi lu e magele. 11 Koni, Aseri bōnsōnna muxuna ndee nun Manase bōnsōnna muxuna ndee nun Sabulon bōnsōnna muxuna ndee yi e yete magodo Ala xa, e tin sigē Yerusalen yi. 12 Ala yi muxune bōjnen masara Yuda fan yi, e mangan nun a kuntigine yamarin suxu, alo Alatala a falaxi kii naxan yi. 13 Yama gbeen yi fa Yerusalen yi Buru Tetaren Sanla rabadeni kike firindenī. Yamaan yi gbo han! 14 Suxure batuden naxanye yi Yerusalen yi, e yi ne birin kala e nun e wusulan gandene, e yi ne woli Kadirōn lanbanni. 15 Nēen kike firinden xi fu nun naaninde lōxōni, e yi xuruseene kōe raxaba Halagi Tiin Dangu Lōxōn Sanla fe ra. Nayi, Lewi bōnsōnna muxune nun saraxaraline yi yagi han, e yi e yete dentēge Ala xa, e yi saraxa gan daxine ba Alatala Batu Banxini. 16 Birin yi a wali suxu alo e yi lan kii naxan yi, fata Alaa walikēen Musaa sariyan na. Xuruseen naxanye ba saraxan na, Lewine yi lu ne wunla soe saraxaraline yii, e yi lu a xuyē saraxa ganden ma. 17 Muxu wuyaxi mi yi sarijanxi yamaan yē, e mi nōe saraxane bē Alatala xa. Nayi, Lewine yi lu xuruseene kōe raxabē e xa Halagi Tiin Dangu Lōxōn Sanla fe ra. 18 Muxu wuyaxi yi na, Efirami kaane nun Manase kaane nun Isakari kaane nun Sabulon kaane

ye naxanye mi yi sarijanxi. Anu, e Halagi Tiin Dangu Lōxōn Sanla saraxa subene don nēn, e sariyan kala na nan xōn. Na ma, Xesekiya yi duba e xa, a naxa, “Alatala naxan fan, na xa dija e yulubin ma. 19 Ala xa dija muxune birin ma naxanye Alatala, e benbane Ala fenxi e bōjnen ma feu, hali e mi yi sarijanxi.” 20 Alatala yi Xesekiya xuiin name, a yi dija yamaan ma. 21 Nayi, Isirayila kaan naxanye yi Yerusalen yi, ne yi Buru Tetaren Sanla raba sēwa gbeen xi solofere. Lewi bōnsōnna muxune nun saraxaraline yi lu Alatala tantunje e senben birin na e maxaseene ra. 22 Xesekiya yi Lewine wali fajni xōntōnna ti, naxanye yi walima Alatala xa ki fajni. E saraxa subene don xi solofere, naxanye yi baxi bōje xunbeli saraxane ra, e yi Alatala tantun, e benbane Ala. 23 Yamaan birin mōn yi lan a ma, a e xa xi solofere sa salī lōxōne fari, e mōn yi sanla raba sēwani xi solofere, 24 bayo Yuda mangan Xesekiya bata yi binye gbeen fi yamaan ma, a yi e fanda tura wuli keden na e nun xuruse wuli solofere. Kuntigine fan bata yi tura wuli keden nun xuruse wuli fu ba sa mangan gbeene fari. Saraxarali wuyaxi bata yi rasarijan. 25 Yuda kaane nun saraxaraline nun Lewine nun Isirayila kaan naxanye yi kelixi yire gbete ye yi e nun xōjnen naxanye yi dōxi Isirayila kaane nun Yuda kaane yē, ne birin yi lu sēwani e bode xōn ma. 26 Sēwa gbeen yi lu Yerusalen kaane yi. Xabu Isirayila Manga Dawudaa dii xemen Sulemani waxatini, na jōxōn munma yi liga Yerusalen yi singen. 27 Saraxaraline nun Lewine yi keli, e duba yamaan xa, e Ala maxandi, Ala yi e xuiin mē a konni ariyanna yi.

31 Na danguxina, muxun naxanye birin yi Isirayila yi, ne birin yi siga Yuda taane yi, e yi kide gemene kala, e yi Asera kide gbindonne rabira. E yi taan kidene kala, e nun e suxure saraxa gandene Yuda yamanan birin yi e nun Bunyamin nun Efirami nun Manase bōnsōnne yamanane yi. Na xanbi ra, Isirayila kaane birin yi siga e konni. 2 Xesekiya yi saraxaraline nun Lewi bōnsōnna muxune yitaxun, a yi birin ti a wali ra. E tan nan yi saraxa gan daxine nun bōje xunbeli saraxane bama. E tan nan mōn yi findixi Alatalaa walikene ra, e yi Alatala tantunma, e yi betine ba Alatala xa a banxin so dēen na. 3 Mangan yi a sōto sena ndee ba saraxa gan daxine ra, saraxan naxanye yi ganma xōtōnna nun jinbanna ra e nun Matabu Lōxōne nun kike nēnen nun salī lōxōne ma, alo a sebexi kii naxan yi Alatalaa sariyani. 4 Xesekiya

yi a fala Yerusalen kaane xa a e xa fa seene mudun na saraxaraline nun Lewine xa, alogo e xa Alatalaa sariyan nabatu a kiin ma. **5** Na falan me yiren birin yi waxatin naxan yi, Isirayila kaane birin yi e murutu xabaxi singene nun manpa bogi singene nun ture baxi singene nun kumi ture singene nun sansi singene nun e yaganne birin so folo saraxaraline nun Lewine yii. **6** Na kiini, Yuda kaane nun Isirayila kaan naxanye yi doxi Yuda taane yi, ne fan yi lu fe e xuruse xurin nun a xungbene yaganne ra e xon, e nun e se sarjnanxine yaganna naxanye yi dentegexi Alatala xa, e Ala, e yi se wuyaxi malan. **7** E yi se wuyaxi malan folo jeen kike saxandeni, e yi yelin jeen kike solofereden ma. **8** Xesekiya nun a kuntigine yi fa na seene matodeni, e yi Alatala tantun, e yi duba a yamaan xa, Isirayila kaane. **9** Xesekiya yi saraxaraline nun Lewine maxodin na seene fe ra. **10** Nayi, saraxaraline kuntigina Asari, Sadoki bonsonna, na yi a yabi, a naxa, “Xabu nxu fa folo seene ra Alatala Batu Banxini, nxu donseen soto nen nxu lugo, nxu yi a donxen gbegbe lu, amasoto Alatala duba nen a yamaan xa, a donxen naxanye luxi ne nan itoe ra.” **11** Xesekiya yi yamarin fi a e xa donse ramaradene rafala Alatala Batu Banxini. Nayi, e yi donse ramaradene rafala. **12** E yi fa na finmaseene nun yaganne nun se sarjnanxine birin na menni. Lewi bonsonna muxuna nde yi na naxan yi xili Konani, e yi finmaseene taxu na ra, e yi a ngaxakedenna Simeyi fan findi a bundoxon na. **13** Xemen naxanye yi xili Yexiyeli nun Asasiya nun Naxati nun Asaheli nun Yerimoti nun Yosabadi nun Eliyeli nun Yisimaki nun Maxati nun Benaya, ne nan yi yamaan xunmatone ra Konani nun a xunyen Simeyi bun ma alo Manga Xesekiya nun saraxarali Asari a yamari kii naxan yi. Asari yi findi Ala Batu Banxin kuntigi gbeen na. **14** Yiminaa dii xemen Kore, Lewi bonsonna muxun naxan yi Sogeteden deen kantanma, a tan nan yi jenige ma saraxane rasuxuma naxanye yi fima Ala ma. A mon yi yaganne yitaxunma Alatala Batu Banxini e nun se sarjnanxi gbete. **15** Saraxaralini itoe yi doxi saraxarali taan naxanye yi, ne yi a mali: Eden nun Menayamin nun Yosuwe nun Semaya nun Amari nun Sekani. E yi seene yitaxun menne yi e ngaxakedenne ra, fonna nun dii jorena alo a yi lan kii naxan yi, **16** folo dii xemene ma naxanye xili sebexi e bonson kedin ma folo e jee saxanna ma, e nun naxanye birin yi soma Alatala Batu Banxini loxo yo loxo e wanla ra alo a yi yamarixi kii naxan yi fata e yeba kiin na. **17**

Saraxaraline xinle yi sebexi e bonson kedin kui fata e denbayane ra, e nun Lewi bonsonna muxune folo e jee moxonen ma, alo e yi yamarixi wanla de kii naxan yi fata e yeba kiin na, **18** e nun e denbayane birin xinle yi sebexi e bonson kedin kui, e naxanle nun e dii xemene nun e dii temene nun e muxune birin, bayo e tan bata yi rasarjnan Alaa wanla ra. **19** Haruna yixetene, saraxaralina ndee yi doxi banxidene ra saraxarali taane rabilinne yi. Muxuna ndee yi sugandixi taane birin yi alogo e xa donseene xali e xa e nun Lewi bonsonna xemene birin naxanye xinle yi sebexi e bonson kedin kui. **20** Xesekiya na nan liga Yuda taane birin yi, a fe fajin liga tinxinna nun lannayani Alatala yee ra yi, a Ala. **21** A wali wuyaxi ke nen Ala Batu Banxina fe yi, a yi Alaa sariyan nun a yamarin suxu a fajin na. A yi Ala fen a bojen ma feu, a yi sabati.

32 Xesekiya lannaya wanle dangu xanbini, Asiriya mangan Senakeribi yi so Yuda yi, a yi taa makantanxine yenge, a yi a ragidi a xa e findi a gbeen na. **2** Manga Xesekiya to a to Senakeribi bata fa Yerusalen yengedeni, **3** Xesekiya nun a kuntigine nun sofane yi lan a ma a e xa taa xanbi ra tigne birin dutun. **4** Yamaan yi e malan, e yi tigne birin dutun taa xanbin na, e nun ige dangudena nde boxon bun ma. E yi a fala, e naxa, “Asiriya kaane nama ige yo li be.” **5** Xesekiya yi a wekile, a yi taan yinna yire kalaxine ti, a mon yi sangansone ti yinna xuntagi, a mon yi yin gbete ti a faru ma. A yi Milo gbingbinna rafala Dawudaa Taani. A yi yenge so wuyaxi nun ye masansan wure lefa wuyaxi soto a ganla xa. **6** A yi sofa kuntigine doxo yamaan xun na. A muxune birin malan taan yama malandeni taan so deen na. A yi a fala e xa, a naxa, **7** “E wekile, e senbe so! E nama kuisan, e nama gaxu Asiriya kaane mangan yee ra e nun yamaan naxan a foxo ra amasoto senben naxan en tan na, na gbo a gbeen xa. **8** Adamadi senben nan a tan na, anu Alatala nan en tan foxo ra, en ma Ala, naxan en malima en ma yengene yi.” Yamaan yi Yuda mangan Xesekiya a falane suxu. **9** Na danguxina, Asiriya mangan Senakeribi nun a ganla birin yi siga Lakisi taan xili ma. Na waxatini, Senakeribi yi sofa kuntigina ndee rasiga Yerusalen yi. A yi xeraan nasiga Yuda mangan Xesekiya ma, e nun Yuda kaane birin Yerusalen yi, a naxa, **10** “Asiriya mangan Senakeribi ito nan falaxi, a naxa, ‘E yigi saxi nanse yi, naxan a ligaxi e mon doxi Yerusalen yi yengen tagi? **11**

Xesekiya xa mi ε radinma ba alogo kamen nun ige xonla xa ε faxa, a nema a fale, a naxa, “Alatala, en ma Ala en natange Asiriya mangan ma ba?” 12 Xesekiya nan i ya Alaa saraxa gandene nun a kidene kalaxi, a yi a fala Yuda kaane nun Yerusalen kaane xa, a naxa, “E xinbi sinma saraxa garden keden peen nan yetagi, ε yi saraxane gan menni.” 13 E mi a kolon ba, nxu naxan liga muxune nun yamanan bonne ra, n tan nun n benbane? Na siyane alane nō nen e yamanan muxune xunbe ba? 14 Awa, n benbane yamanan naxanye kala, yamanan mundun ma ala a rakisi? Nayi, ε Ala nōe ε rakise ba? 15 Na ma, Manga Xesekiya nama ε mayenden, a yi ε radin na kiini. E nama ε yigi sa a yi, bayo siya yo ala hanma yamana yo ala mi nōxi a yamaan natange n benbane ma. Nayi, ε alane fan mi nōe ε be n fan yii mumel!” 16 Na xanbi ra, Asiriya mangan mōn yi fala jaxin ti Marigina Alatala ma, e nun a walikeen Xesekiya. 17 Asiriya mangan yeteen bata yi Alatala, Isirayilaa Ala konbi kedin sebe nun, a naxa, “Siyaan bonne alane mi nōxi e yamanan muxune ratange n ma kii naxan yi, Xesekiyaa Ala fan mi nōe a yamaan natange n ma na kii nin.” 18 A yi falan ti a xuini texin na Heburu xuini, alogo Yerusalen yamaan naxan yi yinna xuntagi, a xa gaxun naso ne yi, a yi nō taan finde a gbeen na. 19 E lu falan tiye Yerusalen Ala ma alo e yi falan tima siya gbetene ala rafalaxine nan ma bōxo xōnna fari. 20 Nayi, Manga Xesekiya nun Nabi Esayi, Amōsi a dii xemen yi e xuiin namini fōlo Ala ma lan feni ito ma. 21 Na ma, Alatala yi malekana nde xε naxan sa Asiriya mangana sofa kendene birin naxōri a gali dōxōdeni, e nun mangane nun kuntigi gbeene. Nayi, mangan yagixin yi xete a yamanani. A sa so a gbee ala batu banxini, a dii xemene yi sa a faxa menni. 22 Alatala Manga Xesekiya nun Yerusalen kaane rakisi na kii nin Asiriya manga Senakeribi senben ma, a mōn yi e ratanga e rabilinna siyane birin ma. 23 Muxu wuyaxi yi fa saraxane ra Alatala xōn Yerusalen yi, e nun kise fajine Yuda mangan Xesekiya xa. Xabu na lōxōni, siyane birin yi a binya. 24 Na waxatini, saya furen yi Xesekiya suxu. A yi Alatala maxandi, Ala yi a yabi, a yi kabanako feen liga alogo a xa a kolon a kende yaan sōtōma nen. 25 Koni Xesekiya mi findi wali fajni kolon na, a yi waso ayi a bōjneni. Ala yi xolo a ma, e nun Yuda nun Yerusalen. 26 Nayi, Manga Xesekiya nun Yerusalen kaane birin yi e xun xete Alatala ma. Na ma, Alatalaa xōlōn mi fa e li Xesekiyaa

siimayani. 27 Manga Xesekiya yi nafunla nun binye gbeen sōto. A yi gbeti fixen nun xēmaan nun bōxo bun nafunle nun latikōnōnne nun ye masansan wure lefane nun se fajine birin namaradene rafala. 28 A yi murutun nun manpaan nun ture ramaradene rafala, e nun xuruseen sifan birin namaradene. 29 A yi taana ndee ti, Ala yi xuruse wuyaxi fi a ma e nun nafulu gbege. 30 Manga Xesekiya nan Gihon tigi ige kiraan masara, a yi a xun ti Dawudaa Taan sogegododen binni. Xesekiya nō sōto nen a feene birin ma. 31 Koni, lōxōna nde Babilōn mangane to xerane rasiga a ma xibaru fendeni lan kabanako feen ma naxan danguxi a yamanani, Ala yi a lu a yete yii a mato xinla ma alogo a xa a bōje yi feene birin kolon. 32 Manga Xesekiya kēwali dōnxene, a tinxinyaan naxan liga, ne sebexi Amōsi a dii xemen Nabi Esayi a kedin kui lan a fe toxine ma alo xiyena, naxan sebexi Yuda mangane nun Isirayila mangane kedine kui. 33 Manga Xesekiya yi faxa. Dawuda yixetene gaburun denaxan yitōnxi muxu gbeene xa, e yi sa a maluxun menni. Yuda kaane nun Yerusalen kaane birin yi fa a saya xōntōdeni. A dii xemen Manase yi findi mangan na a jōxōni.

33 Manase findi mangan na a jεε fu nun firinna nan ma, a yi jεε tonge suulun e nun suulun ti mangayani Yerusalen yi. 2 Naxan jaxu Alatala yee ra yi, Manase yi na liga. Alatala siyaan naxan kedi Isirayila yamaan yee ra, a yi so ne fe xōsixinine yi. 3 A fafe Xesekiya taan kiden naxanye kala, a tan mōn yi ne rafala. A yi saraxa garden nafala Baali xa, a mōn yi Asera kide gbindonne bitin, a yi a xinbi sin sarene birin xa, a yi e batu. 4 A yi suxure kidene ti Alatala Batu Banxini, Alatala bata a fala denaxan ma, a naxa, “N xinla luma nen Yerusalen yi habadan.” 5 A yi sarene kidene ti Alatala Batu Banxin yin firinne kui. 6 A yi a diine ba saraxa gan daxin na Hinōn lanbanni suxurene xa. A yi so yimato feene nun woyimeyaan nun kōera feene yi. A yi muxune maxōdin naxanye falan tima barinne ra. A yi fe xōsixi gbege liga Alatala yee ra yi, a yi a raxōlo. 7 A yi sa a suxure rafalaxi sawurana nde dōxo Ala Batu Banxini. Anu, Ala a fala nen Dawuda xa e nun a dii xemen Sulemani, a naxa, “N xinla luma n batu banxini ito nin habadan e nun Yerusalen, n denaxan sugandixi Isirayila bōnsōnne birin ye. 8 Xa Isirayila kaane n ma yamarine birin suxu, n naxan soxi ε benbane yii fata Musa ra, n mi tinje mume e yi kedi yamanani ito yi.” 9 Koni,

Manase yi a liga Yuda kaane nun Yerusalen kaane yi yulubin tongo. E yi fe x̣osixine liga dangu siyane ra Alatala naxanye halagi Isirayila bun. **10** Alatala yi falan ti Manase nun a yamaan xa, koni e mi e tuli mati a ra. **11** Nayi, Alatala yi Asiriya yamanan mangana gali kuntigine rafa e xili ma, e yi Manase suxu, e karafen bira a ma, e yi a xidi sula yoḷonx̣onna ra, e siga a ra Babilon yi. **12** A ṭoṛoni, a yi Alatala maxandi, a Ala, a yi a yete magodo a benbane Ala xa. **13** A yi a mafan, Alatala yi a maxandi xuiin nasuxu. A yi a maxandin yabi, a m̄on yi xete a ra Yerusalen yi a mangayani. Nayi, Manase yi a kolon a Alatala nan Ala ra. **14** Na danguxina, Manga Manase m̄on yi Dawudaa Taan nabilin yinna yirena nde ti, a yi a mate ayi, keli Gihon tigin ma lanbanni, siga sogegododen binni han taan so d̄een naxan xili Ȳex̄e Dena, a yi Ofeli गयाan nabilin. A m̄on yi sofa kuntigine d̄ox̄o Yuda taa makantanxine birin yi. **15** A yi x̄oj̄e suxurene nun sawurane ba Alatala Batu Banxini, a yi ne birin kala. A bata yi suxure saraxa ganden naxanye rafala गयाan fari, Alatala Batu Banxin yi denaxan yi e nun Yerusalen yi, a yi ne birin kala. A yi e woli taan fari ma. **16** A m̄on yi saraxa ganden nafala Alatala xa, a yi b̄oj̄e xunbeli saraxane nun barika bira saraxane ba. A yi a fala Yuda kaane xa a e xa bira Alatala f̄ox̄o ra, Isirayilaa Ala. **17** Yamaan m̄on yi saraxane bama taan kidene yi, koni e yi e bama Alatala nan tun xa, e Ala. **18** Manase kewali d̄onxene, a Ala maxandina, e nun nabiin naxanye yi falan tima a xa Alatala Isirayilaa Ala xinli, ne birin sebexi Isirayila mangane kedine kui. **19** A Ala maxandina, e nun Ala a yabi kii naxan yi, a tinxintareyaan nun a yulubina, taan kidene a naxanye ti, e nun a Asera kide gb̄indonna naxanye bitin, e nun a suxure sawuran naxanye ti benun a xa a yete magodo, ne birin sebexi Hosayi a taruxu kedine kui. **20** Manase yi faxa, e yi a maluxun a konni. A dii x̄em̄ena Am̄on yi findi mangan na a j̄ox̄oni. **21** Am̄on findi mangan na a j̄ee m̄ox̄oj̄en nun firinden nan ma, a yi j̄ee firin ti mangayani Yerusalen yi. **22** Naxan j̄axu Alatala ȳee ra yi, a yi na liga alo a fafe Manase a liga kii naxan yi. Am̄on yi saraxane bama suxurene birin xa, a fafe naxanye rafala, a yi ne batu. **23** Koni, a mi a yete magodo Alatala xa alo a fafe Manase a liga kii naxan yi, bayo Am̄on findi nen yulubi kan gbeen na. **24** A walikene yi yanfan so a ma, e sa a faxa a banxini. **25** Koni naxanye birin yanfan so Manga Am̄on ma,

yamanan muxune yi ne birin faxa, yamanan muxune yi a dii x̄em̄en Yosiya d̄ox̄o a j̄ox̄oni mangayani.

34 Yosiya findi mangan na a j̄ee solomas̄ex̄eden nan ma, a yi j̄ee tonge saxan e nun keden ti mangayani Yerusalen yi. **2** Naxan fan Alatala ȳee ra yi, a yi na liga, a yi a benba Dawuda s̄onna tongo. A lu tinxinyaan kiraan x̄on. **3** A mangayaan j̄ee solomas̄ex̄edeni, hali a m̄on to yi xurun, a lu nen a benba Dawudaa Ala batue. A j̄ee fu nun firinna, a yi taan kidene kala f̄ol̄o Yuda nun Yerusalen yi, e nun Asera kide gb̄indonne nun wure raxulunxi sawurane. **4** A yi Baali saraxa gandene kala. Wusulan ganden naxanye yi tixi e fari, a yi ne fan kala, a yi Asera kide gb̄indonne rax̄ori, e nun suxure sawurane. A ne birin findi dungi dungine ra, a ne raxuya ayi muxune gaburune fari naxanye saraxane ba e xa. **5** A yi kide ki muxune x̄onne gan e suxure saraxa ganden fari. A Yuda nun Yerusalen rasarijan na kii nin. **6** A m̄on yi siga Manase yamanani e nun Efirami b̄ons̄onna nun Simeȳon b̄ons̄onna nun Nafatali b̄ons̄onna e nun b̄ox̄on naxanye yi e rabilinxi. **7** A yi suxure saraxa gandene nun Asera kide gb̄indonne kala m̄enne yi, a yi suxurene findi burunburunna ra, a yi wusulan gandene birin kala Isirayila yi. Na xanbi ra, a m̄on yi xete Yerusalen yi. **8** Yosiya mangayaan j̄ee fu nun solomas̄ex̄edeni, a yi muxuni itoe rasiga yamanan nun Ala Batu Banxin nasarijandeni: Asaliyaa dii x̄em̄en Safan nun taa mangan Maaseya nun Yehowaxasi a dii x̄emen Yowa, mangana yenla, e xa sa Alatala Batu Banxini t̄on, mangana Ala. **9** E sa saraxarali kuntigin Xiliki li a konni. Yamaan fa gb̄etin naxan na Ala Batu Banxini e nun Lewine kantan tiine gb̄etin naxan malan Efirami nun Manase nun Isirayila yamaan muxu d̄onx̄en naxanye luxi e nii ra, e nun Yuda nun Bunyamin b̄ons̄onne, e yi ne so a yii. E yi xete Yerusalen yi. **10** Naxanye yi findixi Alatala Batu Banxini t̄on feen ȳeeratine ra, a na gb̄etin so ne yii. Ne yi a so walikene yii e saranna ra, naxanye yi walima Alatala Batu Banxini. **11** Ne yi na gb̄etin so geme masonle nun kamuderene yii alogo e xa gem̄ene nun xalanbene sara banxine xa Yuda mangane naxanye rab̄ej̄in, e kala. **12** Na walikene yi wanla k̄e tinxinni. Lewi b̄ons̄onna muxune Yaxati nun Abadi Kehati xabilani, ne yi e xun na e nun Merari nun Sakari Mesulan xabilani. Na Lewine birin yi fatan maxaseen max̄e. **13** E tan nan yi goron maxanle xunna e nun

walikene xunmatone a ra walidene birin yi. Sebeli tiin nan yi Lewi muxuna ndee ra e nun taruxu sebene nun kantan tiine. **14** Yamaan fa gbetin naxan na Alatala Batu Banxini, e yi na tongoma waxatin naxan yi, saraxaraliin Xiliki yi Alatalaa sariya kedin to a naxan so Musa yii. **15** Nayi, Xiliki yi a fala sebeli tiin Safan xa, a naxa, “N bata sariya kedin to Alatala Batu Banxini.” Xiliki yi sariya kedin so Safan yii. **16** Safan yi siga a ra Manga Yosiya konni, Safan yi a fala a xa, a naxa, “I nxi ti wanla naxan na, nxi bata na birin ke. **17** Gbetin naxan yi Alatala Batu Banxini, e bata na tongo e yi a so wali kuntigine yii.” **18** Sebeli tiin Safan yi sa ne birin yebe mangan xa, a naxa, “Saraxaraliin Xiliki sariya kedin so nen n yii.” Na xanbi ra, Safan yi a xaran mangan yetagi. **19** Mangan to sariya falane me na kedin kui, a yi a domani bo a ma. **20** Mangan yi yamarin so Xiliki yii e nun Safan ma dii xemena Axikan nun Mike a dii xemena Abadon nun sebeli tiin Safan nun mangana walikena Asaya, a naxa, **21** “E sa Alatala maxodin n xa, e nun muxun naxanye luxi Yuda nun Isirayila yi lan kedi toxini ito a fe ma, bayo Alatalaa xolon gbo en xili ma, amasoto en benbane mi Alatalaa falan suxu mume alo a sebexi kii naxan yi kedini ito kui.” **22** Xiliki nun mangana muxu sugandixine yi siga nabi naxanla Xuluda fema. Xasara naxan yi dagine kantanma, na mamandenna Salun ma naxanla, Tokehata dii xemena. Na naxanla yi doxi Yerusalen Taa Neneni. E yi e lanma xuiin fala a xa. **23** A yi a fala e xa, a naxa, “Alatala, Isirayilaa Ala ito nan falaxi, a naxa: E sa a fala e xe muxun xa, **24** e naxa, ‘Alatala ito nan falaxi, a naxa: N toron nafama nen yireni ito nun a muxune xili ma, alo danga feene sebexi kii naxan yi kedini ito kui naxan xaranxi Yuda mangan yetagi. **25** Bayo, e bata e xun xanbi so n yi, e yi saraxane nun wusulanne gan suxurene xa alogo e xa n naxolo e kewanle xon. Nayi, n ma xolon gbo taani ito xili ma, a mi nanje mume!’ **26** E mon xa a fala Yuda mangan xa, naxan e xexi Alatala maxodindeni, Isirayilaa Ala, a Alatala ito nan falaxi lan falane ma e naxanye mexi, a naxa, **27** ‘Bayo i bata gaxu, i yi i yete magodo Ala xa, i to falani itoe me naxanye ti yireni ito nun a muxune xili ma, i yi xete n ma, bayo i bata i ya dagine yiibo i ma, i yi wuga n yetagi, n bata a me. Alatalaa falan ni i ra. **28** N ni i rasuxuma nen i benbane fema, i rasenema nen boje xunbenli i gaburun na, bayo i tan mi na torone toma n naxanye rafama yamanani ito nun a muxune xili

ma waxati famatone yi.” E yi sa na yabin nali mangan ma. **29** Manga Yosiya yi Yuda nun Yerusalen fonne birin malan. **30** Na xanbi ra, mangan yi siga Alatala Batu Banxini, Yuda kaane nun Yerusalen kaane nun saraxaraline nun Lewi bonsonna muxune nun yamaan birin biraxi a foxo ra, muxudin nun muxu gbeena. Alaa layirin kedin naxan to Alatala Batu Banxini, a yi na kui feen xaran birin tuli matixin na. **31** Mangan yi ti a tideni Alatala yetagi, a yi layirin tongo Alatala xa, a xa a yamarine nun a sariyane nun a tonne suxu a bonen nun a niin birin yi, alo a sebexi layiri kedin kui kii naxan yi. **32** A yi Bunyamin bonsonna muxune nun Yerusalen kaane birin naso na layirin bun. Yerusalen kaane yi na layirin suxu alo Ala a yamarixi kii naxan yi, e benbane Ala. **33** Yosiya yi danna sa fe naxine birin na naxanye sa kelixi yamana gbetene yi, naxanye yi findixi Isirayila kaane gbeene ra. A yi muxune birin karahan Isirayila yi a e xa Alatala batu, e Ala. A lu nen Alatala, e benbane Ala foxo ra a dunuja yi gidin birin yi.

35 Yosiya yi Halagi Tiin Dangu Loxon Sanla raba Alatala xa Yerusalen yi jenen kike singen xi fu nun naaninde loxoni, e yi Halagi Tiin Dangu Loxon Sanla saraxa subene kee raxaba. **2** Yosiya mon yi saraxaraline ti e wanla ra, a yi e sobe so Alatala Batu Banxin wanla dexunni. **3** A yi a fala Lewi bonsonna muxune xa, naxanye yi Isirayila birin naxaranma, naxanye yi rasarjnanxi Alatalaa wanla dexunni, a naxa, “E sa Layiri Kankiraan doxo Alatala Batu Banxini Isirayila Manga Dawudaa dii xemen Sulemani naxan tixi. E mi fa a maxalima e tungunne ma iki. Nayi, e wali Alatala e Ala xa e nun Isirayila, a yamana. **4** E yi e yitaxun denbaya yeen nun wali xunde yeen ma, alo Isirayila manga Dawuda a sebexi kii naxan yi, e nun a dii xemen Sulemani. **5** E birin xa sa ti yire sarjnanxini, e yebe yamaan bonsonne yeen ma. **6** E Halagi Tiin Dangu Loxon Sanla saraxa yexee diine faza e ngaxakedenne xa, e yi a liga alo Alatala a fala kii naxan yi fata Musa ra.” **7** Yosiya yi jinge wuli saxan ba yamaan birin xa e nun xuruse xunxuri wuli tonge saxan Halagi Tiin Dangu Loxon Sanla saraxan na. Na birin ba mangana xuruseene nan na. **8** A kuntigine fan jenenigen ma, ne fan yi xurusena nde ba yamaan nun saraxaraline nun Lewi bonsonna muxune xa. Ala Batu Banxin kuntigine Xiliki nun Sakari nun Yexiyeli, ne yi xuruse wuli firin keme sennin ba Halagi Tiin Dangu

Lõxon Sanla fe ra e nun jinge keme saxan. **9** Konani nun Semaya nun Nataneli nun a ngaxakedenne nun Hasabi nun Yeyiyeli nun Yosabadi, ne yi xuruse wuli suulun e nun jinge keme suulun so Lewine yii Halagi Tiin Dangu Lõxon Sanla fe ra. **10** Sanla feene raba i kiini: saraxaraline nun Lewine yi lu tixi wali xunde yeen ma, alo mangana a yamari kii naxan yi. **11** E Halagi Tiin Dangu Lõxon Sanla saraxa xuruseene kœ raxabe, saraxaraline yi lu marasarijanna tiye xuruseene wunla ra Lewine yi naxan soma e yii, Lewine nan yi na saraxa subene budoma. **12** E yi saraxa gan daxine ba a ra, e naxanye soma muxune yii alogo e xa e yita Alatala ra, alo a sebexi Musaa kedine kui kii naxan yi, e jingene fan liga na kii nin. **13** E yi Halagi Tiin Dangu Lõxon Sanla saraxa subene sa tœni, alo e darixi a ra kii naxan yi. Marasarijan saraxa se gbetene, e yi ne jin tundene nun goronne kui, e yi e taxun yamaan na mafuren. **14** Na danguxina, e yi e nun saraxaraline gbeen nafala, bayo saraxaraline, Haruna yixetene lu nen wale han kœen na, e yi saraxa gan daxine ba e nun saraxa sube turene. Na nan a liga Lewine yi e donseen nafala e nun Haruna yixetene xa, saraxaraline. **15** Asafi yixeten naxanye yi betin bama, ne yi e wanle kema nen alo Dawuda a yamari kii naxan yi, e nun Asafi nun Heman nun mangana fetoon Yedutun. Kantan muxune birin yi e wanla de. E mi keli e wali xundene yi mume, bayo e ngaxakedenne Lewi bõnsõnna muxune yi donseen nafalama e xa. **16** Na lõxoni, wanle birin liga na kii nin alogo Halagi Tiin Dangu Lõxon Sanla xa raba Alatala xa, e yi saraxa gan daxine ba Alatala xa saraxa gandeni, alo Yosiya a yamarixi kii naxan yi. **17** Isirayila kaan naxanye yi na yi, ne yi Halagi Tiin Dangu Lõxon Sanla raba na waxatini. E mõi yi Buru Tetaren Sanla raba xi solofere bun ma. **18** Sa fõlõ Nabi Samuyeli waxatin ma, Halagi Tiin Dangu Lõxon Sali yo munma yi raba singen naxan yi luxi alo na. Yosiya nun saraxaraline nun Lewine nun Yuda kaane nun Isirayila kaan naxanye yi Yerusalen yi, ne birin yi Halagi Tiin Dangu Lõxon Sanla raba. Isirayila manga yo munma yi na sifan naba singen. **19** Na Halagi Tiin Dangu Lõxon Sanla raba Yosiya mangayaan jœe fu nun solomasexen nan ma. **20** Na birin dangu xanbini, Yosiya yelin xanbini Ala Batu Banxini tõi, Misiran mangan Neko yi siga Karakemisi taan yengedeni Efirati baan dõxon. Yosiya yi mini a ralandeni. **21** Neko yi xerane rasiga Yuda mangan ma, a naxa, “Nanse en tagi? N mi

sigama i tan xan yengedeyi de, n sigan yama gbete nan yengedeyi. Koni, Ala naxa a n xa siga mafuren. I nama Ala yenge de naxan n malima alogo a nama i halagi.” **22** Koni, Yosiya mi xete a fõxõ ra, a yi a maxidi alo muxu gbete alogo a xa siga a yengedeni. A mi a tuli mati Neko a falan na, naxan yi kelixi Ala ma. A fa a yengedeni Megido fixe yireni. **23** Xalimakuli wonle yi a sõxon, a yi a fala a walikene xa, a naxa, “E n xali, amasõto n maxõlõxi naxi ra.” **24** A walikene yi a ragodo a yenge so wontoron kui, e a rate a wontoron firinden kui, e siga a ra Yerusalen yi. A yi faxa, e yi a maluxun a benbane gaburun na. Yuda kaane nun Yerusalen kaane birin yi sunu Yosiya faxa feen na. **25** Nabi Yeremi yi Yosiya saya feen sunu betini tõi. Han to, naxanle nun xemene birin Yosiya saya feen sunu betin bama, bayo a bata findi namun feen na Isirayila yamanani. Na betine sebexi Sunu kedine kui. **26** Manga Yosiya kewali donxene, a tinxinyana, fata Alatalaa sariya kedin na, **27** keli a fe taruxun fõlõn ma han a rajanna, ne sebexi Yuda mangane nun Isirayila mangane kedine kui.

36 Yamanan muxune yi Yosiya dii xemen Yehowaxasi dõxo mangan na Yerusalen yi a fafe jõxõni. **2** Yehowaxasi findi mangan na a jœe mõiõjõen nun saxanden nan ma, a yi kike saxan ti mangayani Yerusalen yi. **3** Misiran mangan Neko yi fa a ba mangayani Yerusalen yi, a yeteen yi mudu fiin sa yamanan ma, gbete fixen kilo wuli saxan e nun xemaan kilo tonge saxan. **4** Misiran mangan yi Yehowaxasi ngaxakedenne Eliyakimi dõxo mangayani Yuda xun na Yerusalen yi, a yi a xinla masara Yehoyakimi. Neko yi Yehowaxasi tongo, a siga a ra Misiran yamanani. **5** Yehoyakimi findi mangan na a jœe mõiõjõen nun saxanden nan ma, a yi jœe fu nun keden ti mangayani Yerusalen yi. A yi fe jaxin liga Alatala, a Ala yœe ra yi. **6** Babilõn mangan Nebukadanesari yi sa a yenge, a yi a xidi yõlõnõnna ra, a siga a ra Babilõn yamanani. **7** Nebukadanesari yi Alatala Batu Banxini seene birin tongo, a sa e sa a manga banxini Babilõn yi. **8** Yehoyakimi kewali donxene mangayani, a fe xõsixin naxanye raba e nun feen naxan liga a ra, ne birin sebexi Isirayila mangane nun Yuda mangane kedine kui. A dii xemen Yoyakin yi ti mangayani a jõxõni. **9** Yoyakin findi mangan na a jœe solomasexeden nan ma, a yi kike saxan xi solomasexẽ ti mangayani Yerusalen yi. Naxan jaxu Alatala yœe ra yi, a yi na liga.

10 Jεε nenεn fεlεn na, Manga Nebukadanesari yi siga a ra Babilεn yi e nun Alatala Batu Banxin kui seene. A yi a ngaxakedenna Sedeki dεxε mangayani Yuda nun Yerusalen xun na. 11 Sedeki findi mangan na a jεε mεxεjεnεn nun kedenden nan ma, a yi jεε fu nun keden ti mangayani Yerusalen yi. 12 Naxan jaxu Alatala yεε ra yi, a Ala, a yi na liga. A mi a yεε magodo Nabi Yeremi xa, naxan yi falan tima Alatala xinli. 13 Manga Nebukadanesari Sedeki rakεlε nen Ala yi. Koni hali na, a murute nen Manga Nebukadanesari yetεen xili ma. Sedeki yi a tuli maxεdεxε, a yi a bεjεni xεdεxε benun a xa fa Alatala ma, Isirayilaa Ala. 14 Saraxarali kuntigine nun yamaan birin yi so fe xεsixi rabani, alo siyaan bonne a raba kii naxan yi. E yi Alatala Batu Banxin naxεsi, a naxan nasarijan Yerusalen yi. 15 Alatala, e benbane Ala bata yi nabi wuyaxi rasiga e ma dεxε wuyaxi alogo e xa sa a fe fala e xa. 16 Koni fo e to Alaa xεrane magele, e mi tin a falan suxe, e yi nabine magele han Alatala yi xεlε a yamaan ma, xεlεn naxan mi yi janjε. 17 Nayi, Ala yi Babilεn mangan nadin e ma, a yi e banxulanne faxa silanfanna ra yire sarijanxini. Banxulanna nun sungutunna nun xεme fonna nun jaxalan fonna hali naxanye bata yi fuga, Ala ne birin so nen Nebukadanesari yii. 18 Nebukadanesari yi Ala Batu Banxin seene birin tongo, a xurin nun a xungbena. Alatala Batu Banxin nafunle nun mangana nafunle nun a kuntigine nafunle, a siga ne ra Babilεn yi. 19 E yi tεen so Ala Batu Banxin na, e yi Yerusalen taan yinna rabira. E tεen so banxi fajine birin na, e yi se fajine birin kala. 20 Naxanye lu e nii ra, Nebukadanesari yi siga ne birin na Babilεn yi, e findi a konyine ra e nun e diine han Perise yamanan senben sεtε waxatin naxan yi. 21 Alatalaa falan kamali na kii nin, a naxan fala Yeremi xa, a naxa, “Yamanan luma nen matabuni, a lu rabεjinxi jεε tonge solofere. Na findima waxatin jεxεnεn nan na a yi lan nun a xa matabun sεtε fata sariyan na naxan mi suxu.” 22 Perise mangan Kirusi a mangayaan jεε singeni, Alatala yi Kirusi xaxinla rabi alogo Alatalaa falan xa kamali a naxan fala Yeremi xεn. Perise mangan yi falan nali, a yi a sebe a yamanan yiren birin ma, a naxa, 23 “Perise mangan Kirusi naxa iki, ‘Alatala, Ala Naxan Kore, na bata yamanane birin so n yii dunupa yi, a bata n yamari a n xa a batu banxin ti Yerusalen yi Yuda yi. A yamaan muxun naxanye ra ε yε, Alatala, e Ala xa lu ne xεn, ne xa siga.”

Esirasi

1 Perise yamanan manga Kirusi a mangayaan jɛɛ singeni, Alatala yi Kirusi xaxinla rabi alogo Alatalaa falan xa kamali a naxan fala Yeremi xa. Perise mangan yi falani ito rali, a yi a sebe a yamanan yiren birin ma, a naxa, **2** “Perise manga Kirusi naxa iki, ‘Alatala, Ala Naxan Kore, na bata yamanan birin so n yii dununya yi, a bata n yamari a n xa a batu banxin ti Yerusalen taani Yuda yi. **3** A yamaan muxun naxanye ra ε yε, e Ala xa lu ne xɔn, ne xa xεtε Yerusalen taani Yuda yi, e sa Alatala Batu Banxin ti na, Isirayilaa Ala. Ala nan a ra naxan Yerusalen yi. **4** Isirayila yamaan muxu dɔnxen naxanye luxi e nii ra, ne nema dɔxi dede yi, mɛn kaane xa e mali e yi seene fi e ma, gbeti fixen nun xɛmaan nun se gbetɛye nun xuruseene, e yi jɛnige ma saraxane fi Ala Batu Banxina fe yi naxan Yerusalen yi.” **5** Nayi, Yuda nun Bunyamin denbaya xunne nun saraxaraline nun Lewi bɔnsɔnna muxune, e nun Ala xaxinla fi naxanye birin ma, ne yi e yitɔn, e xa siga Alatala Batu Banxin tideni Yerusalen yi. **6** Naxanye birin yi e rabilinni, ne birin yi fa mali seene ra, gbeti fixen nun xɛmaan nun se gbetɛye nun xuruseene nun se fɛnine, e nun jɛnige ma saraxane. **7** Nebukadanesari seen naxanye tongo Alatala Batu Banxini Yerusalen yi, a sa ne sa a gbee ala batu banxini, Manga Kirusi yetɛɛn yi ne raxetε. **8** Perise yamanan manga Kirusi a yamarin bun, gbeti ramaran Mitiredati yi ne ramini. Mitiredati yi Ala Batu Banxin seene yate Sesebasari xa, Yuda mangana dii xɛmɛna, a yi e birin tɛnge. **9** E yaten nan ito ra: goronna xema daxin tonge saxan e nun goronna gbeti fixε daxin wuli keden e nun file mɔxɔjɛn nun solomanaanin e nun **10** igelengenna xema daxin tonge saxan e nun a gbeti fixε daxin kɛmɛ naanin e nun fu, e nun se gbetɛye, ne fan wuli keden. **11** Se xema daxine nun a gbeti fixε daxine birin malanxina, wuli suulun kɛmɛ naanin. Muxu suxine yi tema waxatin naxan yi, Sesebasari fan yi te e birin na na waxatini keli Babilɔn yi siga Yerusalen yi.

2 Babilɔn mangan Nebukadanesari bata yi Yuda yamanan muxun naxanye suxu, a siga ne ra Babilɔn yi, e mɔn yi xεtε e taane yi Yerusalen nun Yuda yi, ne nan itoe ra **2** naxanye xεtε e nun Sorobabeli: Yosuwe nun Neyemi nun Seraya nun Relaya nun Marodoke nun Bilisan nun Misipari nun Bigiwayi nun

Rexun e nun Banaha. Isirayila yamaan yaten nan itoe ra, xɛmɛne gbansan: **3** Parosi xabilana: Muxu wuli firin kɛmɛ tonge solofere e nun firin, **4** Sefati xabilana: Muxu kɛmɛ saxan tonge solofere e nun firin, **5** Ara xabilana: Muxu kɛmɛ solofere tonge solofere e nun suulun, **6** Yosuwe nun Yowaba yixetene Paxata-Moyaba xabilani: Muxu wuli firin kɛmɛ solomasexe fu nun firin, **7** Elan xabilana: Muxu wuli keden kɛmɛ firin tonge suulun e nun naanin, **8** Satu xabilana: Muxu kɛmɛ solomanaanin tonge naanin e nun suulun, **9** Sakayi xabilana: Muxu kɛmɛ solofere tonge sennin, **10** Bani xabilana: Muxu kɛmɛ sennin tonge naanin e nun firin, **11** Bebayi xabilana: Muxu kɛmɛ sennin mɔxɔjɛn nun saxan **12** Asagada xabilana: Muxu wuli keden kɛmɛ firin mɔxɔjɛn nun firin, **13** Adonikami xabilana: Muxu kɛmɛ sennin tonge sennin e nun sennin, **14** Bigiwayi xabilana: Muxu wuli firin tonge suulun e nun sennin, **15** Adin xabilana: Muxu kɛmɛ naanin tonge suulun e nun naanin, **16** Xesekiya yixetene Ateri xabilani: Muxu tonge solomanaanin e nun solomasexe, **17** Besayi xabilana: Muxu kɛmɛ saxan mɔxɔjɛn nun saxan, **18** Yora xabilana: Muxu kɛmɛ fu nun firin, **19** Xasun xabilana: Muxu kɛmɛ firin mɔxɔjɛn nun saxan, **20** Gibari xabilana: Muxu tonge solomanaanin e nun suulun, **21** Betelemi taan muxune: Muxu kɛmɛ mɔxɔjɛn nun saxan, **22** Netofa taan muxune: Muxu tonge suulun e nun sennin, **23** Anatɔti taan muxune: Muxu kɛmɛ mɔxɔjɛn nun saxan, **24** Asamaweti taan muxune: Muxu tonge naanin e nun firin, **25** Kiriyaati-Yeyarin taan muxune nun Kefira kaane nun Beroti kaane: Muxu kɛmɛ solofere tonge naanin e nun saxan, **26** Rama nun Geba taane muxune: Muxu kɛmɛ sennin mɔxɔjɛn nun keden, **27** Mikimasi taan muxune: Muxu kɛmɛ mɔxɔjɛn nun firin, **28** Beteli nun Ayi taane muxune: Muxu kɛmɛ firin mɔxɔjɛn nun saxan, **29** Nebo taan muxune: Muxu tonge suulun e nun firin, **30** Magbiki taan muxune: Muxu kɛmɛ tonge suulun e nun sennin, **31** Elan bonna xabilana: Muxu wuli keden kɛmɛ firin tonge suulun e nun naanin, **32** Xarimi xabilana: Muxu kɛmɛ saxan mɔxɔjɛ, **33** Lodi nun Xadidi nun Ono taane muxune: Muxu kɛmɛ solofere mɔxɔjɛn nun suulun, **34** Yeriko taan muxune: Muxu kɛmɛ saxan tonge naanin e nun suulun, **35** Sena taan muxune: Muxu wuli saxan kɛmɛ sennin tonge saxan, **36** Saraxaraline: Yosuwe yixetene Yɛdaya xabilani: Muxu kɛmɛ solomanaanin tonge solofere e nun saxan, **37** Imeri xabilana: Muxu wuli keden tonge suulun e

nun firin, **38** Pasaxuri xabilana: Muxu wuli keden keme firin tonge naanin e nun solofere, **39** Xarimi xabilana: Muxu wuli keden fu nun solofere. **40** Lewi bõnsõnna muxune: Yosuwe xabilan nun Hodafiya yixetene Kadamile xabilani: Muxu tonge solofere e nun naanin. **41** Beti baane: Asafi xabilani: Muxu keme mōxōjēn nun solomasexē. **42** Kantan muxune Ala Batu Banxini: Salun xabilan nun Ateri xabilan nun Talamon xabilan nun Akubu xabilan nun Xatita xabilan nun Sobayi xabilana, e birin malanxina: Muxu keme tonge saxan e nun solomanaanin. **43** Ala Batu Banxin walikene xabila yeen ma: Sixa nun Xasufa nun Tabayoti nun **44** Kerosi nun Siyaha nun Padon nun **45** Lebana nun Xagaba nun Akubu nun **46** Xagabi nun Sanlayi nun Xanan nun **47** Gideli nun Gaxara nun Reyaya nun **48** Resin nun Nekoda nun Gasami nun **49** Yusa nun Paseya nun Besayi nun **50** Asana nun Meyunin nun Nefusin nun **51** Bakabuku nun Xakufa nun Xaraxuru nun **52** Basaliti nun Mexida nun Xarasa nun **53** Barakosi nun Sisera nun Tama nun **54** Nesixa e nun Xatifa. **55** Sulemani a walikene xabilane yi: Sotayi yixetene nun Sofereti yixetene nun Peruda yixetene nun **56** Yaala yixetene nun Darakon yixetene nun Gideli yixetene nun **57** Sefati yixetene nun Xatili yixetene nun Pokereti-Hasebayin yixetene nun Ami yixetene. **58** Ala Batu Banxin walikene nun Sulemani a walikene yixetene malanxina: Muxu keme saxan tonge solomanaanin e nun firin. **59** Muxu suxine nan itoe ra naxanye fa sa keli Tela-Mela nun Tela-Harasa nun Kerubu-Adan nun Imeri taane yi naxanye mi nōe a yite a e denbayane nun e xabilane kelixi Isirayila nin: **60** Delaya xabilan nun Tobiya xabilan nun Nekoda xabilan ye: Muxu keme sennin muxu tonge suulun e nun firin. **61** Saraxaraline ye: Xobaya yixetene nun Hakōsi yixetene nun Barasilayi yixetene fan yi na kii nin. E yi xemeni ito xili bama Barasilayi bayo a bata yi Galadi kaan Barasilayi a dii temena nde futu. **62** E yi e benbane taruxu kedin fen, koni e mi a to. E yi e ba saraxaraliyani, e yi e yate saripantarene ra. **63** Yamana kanna yi e yamari a e nama se saripantarene don han saraxaralina nde yi soto naxan masensenna tiye Yurima nun Tumin na. **64** Yamaan birin malanxina muxu wuli tonge naanin e nun firin keme saxan tonge sennin, **65** e walike xemene nun e walike naxanle mi yi ne ye, naxanye xasabin yi lanxi muxu wuli solofere keme saxan tonge saxan e nun solofere ma. Beti ba xemene nun naxanle muxu wuli firin fan mi yi ne ye.

66 So keme solofere tonge saxan e nun sennin nun gbaxalo keme firin tonge naanin e nun suulun fan yi e yii e nun **67** jōgōme keme naanin tonge saxan e nun suulun nun sofali wuli sennin keme solofere mōxōjē. **68** Denbaya xunna muxu wuyaxi, e to Alatala Batu Banxin li Yerusalen yi, e yi jēnige ma saraxane ba Ala Batu Banxin ti feen na alogo a mōn xa ti a tideni. **69** E yi e nafunla ba wanla fe yi lan e feren xasabin ma, e birin malanxina xemaan gbanan wuli tonge sennin wuli keden e nun wure gbeti fixen kilo wuli firin keme suulun, e nun saraxarali domain keme. **70** Saraxaraline nun Lewi bõnsõnna muxune nun yamanan muxune nun beti baane nun kantan tiine nun Ala Batu Banxin walikene yi dōxō e taane yi, Isirayila kaane birin fan yi e taane yi.

3 Nēen kike soloferedena a liye, Isirayila kaane birin bata yi dōxō e taane yi. Nayi, yamaan yi e malan xaxili kedenni Yerusalen yi. **2** Yosadaki a dii xemēn Yosuwe nun a ngaxakeden saraxaraline nun Selatili a dii xemēn Sorobabeli nun a xabilan muxune mōn yi saraxa ganden nafala Isirayilaa Ala xa alogo e xa saraxa gan daxine ba, alo a sebexi Nabi Musaa sariya kedin kui kii naxan yi. **3** E yi gaxuxi e rabilinna siyane yēē ra, koni e mōn yi saraxa ganden beten sa, e a rafala a yire fonni, e yi saraxa gan daxine ba Alatala xa, e nun xōtōn ma saraxa gan daxine nun jīnbanna xiine. **4** E yi Bubu Kui Sanla raba alo a sebexi kii naxan yi, e yi saraxa gan daxine yatene ba naxanye lan sali lōxōne ma alo a sebexi kii naxan yi. **5** Na danguxina, e lu saraxa gan daxine be yeye, kike nenen saraxa gan daxine nun sanla naxanye birin nabama Alatala xa, e nun naxanye birin yi jēnige ma saraxane bama Alatala xa. **6** Kike solofereden xi singeni, e yi saraxa gan daxine ba fōlō Alatala xa. Anu, na waxatini, Alatala Batu Banxin munma yi beten sa singen. **7** E yi gbetin so gēme sonle nun kamuderene yii, e mōn yi donseene nun minseene nun turen so Sidōn kaane nun Tire kaane yii alogo e xa sa fa suman wudine ra igen xun ma sa keli Liban yi siga han Yafa, alo Perise yamanan mangan Kirusi a yamari kii naxan yi. **8** Nēē firinden kike firinden e so xanbini Ala Batu Banxini Yerusalen yi, Selatili a dii xemēn Sorobabeli nun Yosadaki a dii xemēn Yosuwe nun e ngaxakedenna bonne yi wali fōlō, saraxaraline nun Lewine e nun naxanye birin fa Yerusalen yi, sa keli konyiyani, e yi Lewine ti Alatala Batu Banxin wanle xunna ra naxanye bata yi jēē

moxɔɲe e nun nde sɔtɔ. **9** Lewi bɔnsɔnna muxun naxanye a ragidi a e xa Ala Batu Banxin walikene xun mato a ra, ne ni i ra: Yosuwe nun a dii xemene nun a ngaxakedenne nun Kadamile nun a dii xemen naxanye yi findixi Yuda kaane ra Hodawiya xabilani, e nun muxune Xenadada xabilani, ne dii xemene nun e xunyene. **10** Walikene to Alatala Batu Banxin beten sa, e yi saraxaraline lu e danna, e maxidixi saraxaraliya dugine yi, xɔtane suxi e yii. E nun Lewine nan yi tixi na naxanye yi Asafi xabilani, karijanne suxi naxanye yii alogo e xa Alatala tantun alo Isirayila manga Dawuda a yita kii naxan yi. **11** E yi e bode yabima Alatala batu xuiin nun a tantun xuiin nin falani itoe ra, e naxa, “Amasɔtɔ a fan, a hinanna luma nen Isirayila xa habadan!” Yamaan birin yi gbelegbelema, e Alatala tantunma, bayo e bata yi Alatala Batu Banxin beten sa. **12** Koni, saraxarali wuyaxi yi na, e nun Lewi bɔnsɔnna muxune nun denbaya xunna naxanye bata yi fori, naxanye banxi singen to, ne yi wugama e to yamaan to Ala Batu Banxi nenen beten sɛ. Muxu wuyaxi fan yi gbelegbelema sewani. **13** Yamaan mi yi fa nɔɛ wuga xuiin nun sewa xuiin tagi rabe, bayo yamaan yi gbelegbelema, e gbelegbele xuiin yi siga pon!

4 Yuda bɔnsɔnna nun Bunyamin bɔnsɔnna yaxune yi a mɛ a muxun naxanye kelixi konyiyani, ne Alatala Batu Banxin tima, Isirayilaa Ala. **2** E fa Sorobabeli nun denbaya xunne fema, e yi a fala e xa, e naxa, “En birin nan a tima, bayo, nxu fan en ma Ala batuma alo ɛ tan, nxu saraxane bama a xa xabu Asiriya mangana Esaraxadon waxatini, naxan faxi nxu ra be.” **3** Koni Sorobabeli nun Yosuwe nun Isirayila denbaya xunna bonne yi e yabi, e naxa, “En birin xa mi Ala Batu Banxin tima nxɔ Ala xa, nxu tan nan Alatala Batu Banxin tima a xa, Isirayilaa Ala, alo Perise yamanan mangan Kirusi a yamarixi nxu ma kii naxan yi.” **4** Nayi, yamanan muxune yi Yuda muxune tunnaɔlɔ fɔlɔ e ma, e lu e magaxue, alogo e xa e yikala Ala Batu Banxin tideni. **5** E yi gbetin so manga gbeen kawandi muxune yii alogo e xa na wanla raxete xanbin na. Na yi liga keli Perise yamanan mangan Kirusi a mangayaan yanyin birin ma han sa dɔxɔ Dariyusi a mangayaan waxatina, Perise mangana. **6** Asuyerusu a mangayaan fɔlɔ waxatini, e yi kedin seɓe Yuda kaane nun Yerusalen kaane xili ma. **7** Arataserekesi a mangayaan waxatini, Bisilan nun

Mitiredati nun Tabele nun e lanfa dɔnxene yi bataxin seɓe Perise yamanan mangana Arataserekesi ma. Bataxin yi maxete Arami xuini, a seɓe Arami kaane seɓenla nin. **8** Yamana kanna Rexun nun seɓeli tiin Simisayi nan bataxin seɓe Manga Arataserekesi xa Yerusalen kaane xili ma, e ito nan seɓe singen, e naxa, **9** “Yamana kanna Rexun nun seɓeli tiin Simisayi nan bataxini ito seɓexi e nun e lanfa dɔnxene nun Din kaane nun Afarasataka nun Tarapele nun Afarasa nun Ereki nun Babilɔn kaane nun Suse kaane nun Deha kaane nun Elan kaane, **10** e nun yamanan bonne muxune, muxu gbeena Osinapari naxanye suxu a siga e ra Samari taane yi, e nun yiren naxanye Efirati baan sogegododen binni.” **11** Na muxune nan bataxini ito seɓe, e a rasiga Manga Arataserekesi ma, e naxa, “Manga Arataserekesi, i ya walikɛn naxanye dɔxi Efirati baan sogegododen binni, ne i xɔntɔn. **12** Mangana, a kolon a Yahudiyen naxanye kelixi i konni e fa nxu ye Yerusalen yi, ne taa murutexi jaxin nan tima. E mɔn yinna soma taan ma. E mɔn taan banxine beten sama. **13** Mangan xa a kolon, xa e na taan ti, e yinna so a ma, e mi fa mudun fima sɔnɔn, e mi e xun saren fima, na mi fama fandeni mangan na. **14** Anu, bayo nxu nxu degema i ya mangayani, nxu mi nɔɛ tinje muxune xa mangan napaxu, nanara, nxu faxi xibaruni itoe ra i xɔn **15** alogo i ya muxune xa feene feseɓe i benbane kedine kui yamanan fe taruxune seɓexi denaxan yi. I a tɔɛ mangane kedine kui fa fala taani ito findixi taa murutexin nan na, taan naxan muxune mangane nun yamananane tɔrɔma, naxanye murutexi xabu waxati xɔnkuye. Taani ito kalaxi na nan ma fe ra. **16** Mangana, nxu a falama i xa nen, xa taani ito ti, yinna yi so a ma, na ma, i mi fa dede sɔte Efirati baan sogegododen binna yirene yi.” **17** Manga Arataserekesi yi yabini ito rasiga, a naxa, “Yamana kanna Rexun nun seɓeli tiin Simisayi nun e lanfa dɔnxen naxanye dɔxi Samari yamanan nun Efirati baan sogegododen binna yire gbetene yi, n bata ɛ xɔntɔn. **18** ɛ bataxin naxan nafaxi nxu ma, a bata xaran n yeɛ xori. **19** N bata feene xɔnfen yamarin fi, n bata a kolon fa fala taani ito murutema mangane xili ma xabu waxati xɔnkuye, muxu murutexine nan e ra. **20** Manga senbeman lu nen Yerusalen yi, naxanye yi yamanan birin nɔxi Efirati baan sogegododen binni, mudun nun xun saren nun yamanani gidi saranna yi soma naxanye yii. **21** Na ma, ɛ yamarin fi muxuni itoe e wanla xa dan alogo taani ito mɔn nama ti xa n

tan mi yamarin fi. **22** E nama feni ito xonbepin de, alogo tɔron nama gbo ayi mangan ma.” **23** Manga Arataserekesi a bataxin xaran nen yamana kanna Rexun nun sebeli tiin Simisayi nun e lanfaan donxene yee xori tun, e yi siga Yahudiyane fema Yerusalen yi mafuren, e sa danna sa e wanla ra non nun yengeni. **24** Nayi, Ala Batu Banxin wanla yi dan Yerusalen yi han Perise yamanan mangan Dariyusi a mangayaan jee firindena.

5 Nabi Xage nun Nabi Sakari, Yido yixeten yi nabiya falane ti Isirayilaa Ala xinli Yahudiyane xa naxanye yi Yuda nun Yerusalen yi. **2** Nayi, Selatili a dii xemen Sorobabeli nun Yosadaki a dii xemen Yosuwe yi keli, e Ala Batu Banxin ti folo Yerusalen yi. Alaa nabine fan yi e malima. **3** Na waxatini, yamana kanna Tatenayi naxan yi Efirati baan sogegododen binna xun na, e nun Setara-Bosenayi nun e lanfane yi siga e fema, e yi e maxodin, e naxa, “Nde e yamarixi a e xa banxini ito ti e nun a yinna?” **4** E mon yi e maxodin, e naxa, “Muxun naxanye banxini ito tima, ne xili di?” **5** Koni, Ala yi a joxo luxi Yahudiyane fonne xon. E mi wanli kala e ma alogo e xa sa dentegena nde sa Dariyusi xa han e yi kedina nde soto a ra lan wanla fe ma. **6** Baan binna yamana kanna Tatenayi nun Setara-Bosenayi nan kedin nasiga e nun e lanfane, yamana kuntigin naxanye yi Efirati baan sogegododen binna xun na. E kedini ito nan nasiga Manga Dariyusi ma. **7** Ito nan yi sebexi, a naxa, “Manga Dariyusi, Ala xa boje xunbenla fi i ma! **8** Mangan xa a kolon fa fala nxu bata siga han Yuda yamanani, siga han Ala Batu Banxini, Ala naxan gbo. Muxune a tima geme masolixine nan na, wudine yi sa yinne xuntagi. Wanla rabama a fajin na, a mon mafuraxi e yii. **9** Nxu fonne maxodin nen, nxu naxa, ‘Nde e yamarixi e mon xa banxini ito ti?’ **10** Nxu mon yi e maxodin e xinle ma, nxu yi e yeeratine singe xinle sebe alogo nxu xa e fala i xa. **11** E nxu yabixi ito nan na, e naxa, ‘Kore xonna nun boxo xonna Alaa walikene nan nxu ra. Ala Batu Banxini ito naxan ti bata bu, nxu mon na tima nen. Waxati danguxine yi, Isirayila manga gbeena nde a ti nen, a yi a rajan. **12** Koni nxu benbane to Ala raxolo, Ala Naxan Kore, Ala yi e sa Babilon mangan Nebukadanesari, Kalidi kaan sagoni. Na yi na banxin kala, a yi yamaan suxu, a siga e ra Babilon yi. **13** Koni, Kirusi a mangayaan jee singeni Babilon yi, Manga Kirusi mon yi Ala Batu Banxin ti feen yamarin fi. **14** Manga Kirusi mon yi seene birin

tongo naxan yi Ala Batu Banxini nun a foloni, xemaan nun gbeti fixena. Nebukadanesari bata yi ne ba Ala Batu Banxini Yerusalen yi, a siga e ra a gbee ala batu banxini Babilon yi. Manga Kirusi nan e tongo, a yi e so Sesebasari yii, a naxan dɔxo yamana kanna ra Isirayila yamanani. **15** A yi a fala a xa, a naxa, “Seni itoe tongo, i sa e sa Ala Batu Banxini Yerusalen yi. Ala Batu Banxin mon xa ti a funfuni.” **16** Na Sesebasari yi fa Ala Batu Banxin beten sa Yerusalen yi. Xabu na waxatini han to, banxin mon tima, a munma rajan.” **17** “Iki, xa a rafan mangan ma, muxune xa fe xonfenna ti Babilon mangana kedi ramaradeni alogo a xa kolon xa Manga Kirusi yamarin fi nen fa fala Ala Batu Banxin mon xa ti Yerusalen yi. Mangan mon xa a waxon feene fala nxu xa lan feni ito ma.”

6 Nayi, Manga Dariyusi yi fe xonfenna yamarin fi lan Babilon kedi ramaraden ma. **2** E yi sa kedi mafilinxina nde to Ekabatana manga taani Mede yamanani, a yi sebexi naxan ma fa fala: **3** Manga Kirusi a mangayaan jee singeni, a yi yamarini ito fi Ala Batu Banxina fe yi Yerusalen yi, a naxa, “Ala Batu Banxin xa ti alogo saraxane xa ba a xa menni, a xa beten sa ki faji. A xa mate ayi nongonna ye tonge sennin, a yigbona nongonna ye tonge sennin. **4** Geme gbeen masolixin bilin saxan xa dɔxo e nun wudin sanja ma keden. Mangan nan wali saren fima. **5** Nebukadanesari xema seene nun gbeti fixe seen naxanye tongo Ala Batu Banxini Yerusalen yi, a siga e ra Babilon yi, ne mon naxetema nen e funfuni Ala Batu Banxini Yerusalen yi, e sa tongo denaxan yi Alaa banxini.” **6** Nayi, Manga Dariyusi yi a sebe, a naxa, “Baan binna yamana kanna Tatenayi nun Setara-Bosenayi nun e tan, e lanfane, yamana kuntigin naxanye dɔxi Efirati baan sogegododen binni, feni ito mi e matoxi. **7** E tin Ala Batu Banxin wanla xa siga yeen na. Yahudiya yamana kanna nun Yahudiya fonne xa Ala Batu Banxin ti a funfuni. **8** N yamarini ito nan soma e yii, e sa Yahudiya fonne malima kii naxan yi Ala Batu Banxin tideni: Se saren naxanye bama mudun na sa keli Efirati baan sogegododen binni so mangan yii, ne xa so muxuni itoe yii, alogo wanla nama dan. **9** Naxan fan saraxa gan daxin na Ala yetagi, Ala Naxan Kore, tura bulanne nun kontonne nun yexee diine e nun murutun nun foxon nun manpaan nun turena alo a yitaxi kii naxan yi Yerusalen saraxaraline xon, e xa ne so e yii na kiini loxo yo loxo, **10** alogo e xa saraxa

xiri fajine ba Ala xa naxan kore, e yi Ala maxandi mangan nun a diine xa. **11** Awa, xa muxu yo falani ito kala, xalanbe keden xa botin a banxini, na kanna yi soti a de, a banxin yi kala fefe. **12** Ala naxan a xinla luxi Yerusalen yi, na Ala xa na kanna halagi naxan na n ma yamarini ito bejin a banxini ito kala, xa a findi mangan na hanma muxu yo. N tan Dariyusi bata yamarini ito fi, a xa liga a kiini.” **13** Nayi, yamana kanna Tatenayi naxan yi Efirati baan sogegododen binna xun na, e nun Setara-Bosenayi nun e lanfane birin yi na yamarin suxu Manga Dariyusi naxan nafaxi. **14** Yahudiya fonne yi no soto banxin tideni, alo Nabi Xage nun Yido mamandenna Nabi Sakari a fala kii naxan yi. E yi banxin ti, e yelin, alo Isirayilaa Ala a yamari kii naxan yi e nun Kirusi nun Dariyusi nun Arataserekese, Perise mangane. **15** Banxin yi rapan Ada kiken xi saxande loxoni, Manga Dariyusi a mangayaan jee senninden. **16** Isirayila kaane nun saraxaraline nun Lewi bonsonna muxune nun muxu suxi donxene yi Ala Batu Banxin nabi sewani. **17** E yi tura keme nun konton keme firin nun yexee dii keme naanin ba banxin nasarijan seen na, e nun koto fu nun firin Isirayila kaane birin ma yulubi xafari saraxan na, lan Isirayila bonsonne yaten ma. **18** E yi saraxaraline fan doxo lan e yebe kiin ma, e nun Lewi bonsonna muxune fata e yitaxun kiin na Yerusalen yi Alaa wanla ra, alo a sebexi Musaa kedin kui kii naxan yi. **19** Muxun naxanye sa kelixi konyiyani, ne yi Halagi Tiin Dangu Loxon Sanla raba kike singen xi fu nun naaninde loxoni. **20** Saraxaraline nun Lewi bonsonna muxune bata yi e bode rasarijan sanla xili yi, e birin yi sarijan. Lewi bonsonna muxune yi yexee diine koe raxaba Halagi Tiin Dangu Loxon Sanla fe ra muxu suxi fonne birin xa, e nun e ngaxakeden saraxaraline xa, e nun e tan yeteen xa. **21** Muxun naxanye birin bata yi xete siyane fe sarijantarene foxo ra, e yi Alatala fen, Isirayilaa Ala, ne nun Isirayila kaan naxanye xete sa keli konyiyani, e birin yi Halagi Tiin Dangu Loxon Sanla donseene don e bode xon. **22** E Buru Tetaren Sanla raba sewani xi solofere, bayo Alatala bata Manga Asiriya bonen masara a yi e mali Ala Batu Banxin wanli, Isirayilaa Ala.

7 Na feene dangu xanbini, Perise mangana Arataserekese waxatini, Esirasi fan yi fa, Serayaa dii xemena. Asari nan Seraya soto. Xiliki nan Asari soto. 2 Salun nan Xiliki soto. Sadoki nan Salun soto. Axituba

nan Sadoki soto. **3** Amari nan Axituba soto. Asari nan Amari soto. Merayoti nan Asari soto. **4** Seraxaya nan Merayoti soto. Yusi nan Seraxaya soto. Buki nan Yusi soto. **5** Abisuwa nan Buki soto. Finexasi nan Abisuwa soto. Eleyasari nan Finexasi soto. Saraxarali kuntigin Haruna nan Eleyasari soto. **6** Na Esirasi yi siga Babilon yi. Sebeli tiin nan yi a ra, naxan yi xaranxi Musaa sariyana fe ma ki faji, Alatala, Isirayilaa Ala naxan soxi Musa yii. Mangan yi a waxon feene birin naba a xa, bayo Alatala, Isirayilaa Ala yi a foxo ra. **7** Isirayila kaana ndee nun Lewi bonsonna muxuna ndee nun beti baane nun kantan tiine nun walikene Ala Batu Banxini, ne fan birin yi siga Yerusalen yi Manga Arataserekese a mangayaan jee solofereden ma. **8** Esirasi yi fa Yerusalen yi mangana mangayaan jee solofereden kike suulunden ma. **9** A keli Babilon yi kike singen xi singe loxoni, a sa so Yerusalen yi kike suulunden xi singe loxoni, bayo a Ala yi a foxo ra a fanni. **10** Esirasi bata yi Alatalaa sariyan xaran feen nun a suxu feen sa a boneni, a yi Isirayila yamaan xaran tonne nun sariyane ma. **11** Manga Arataserekese bataxini ito nan so Esirasi yii, saraxaraliin nun sebeli tiin naxan yi yamarine nun tonne sebema, Alatala naxanye fala lan Isirayila fe ma. Mangan yi falani ito rasiga, a naxa, **12** “Mangane mangana Arataserekese naxa saraxaralina Esirasi xa, naxan yi Alaa sariyan kolon naxan kore: **13** N bata yamarin so i yii, yamaan naxan birin Isirayila yi, saraxaraline nun Lewi bonsonna muxune nun naxanye birin n ma yamanani naxanye waxi siga feni Yerusalen yi, a lu e birin xa siga i foxo ra. **14** Mangan nun a kawandi muxu soloferene nan i rasigaxi Yuda nun Yerusalen yi alogo i xa siga i ya Alaa sariyan na i yii, i menna rakorosi xa na sariyan suxi. **15** I siga gbetin nun xemaan na mangan nun a kawandi muxune naxan jeniigexi e xa ba saraxan na Isirayilaa Ala xa, naxan doxi Yerusalen yi. **16** I mon yi siga wure gbeti fixen nun xemaan na i na naxan soto Babilon yi, e nun jeniige ma saraxane yamaan nun saraxaraline naxanye bama e Ala Batu Banxin xa Yerusalen yi. **17** Na ma, i noe turane nun kontonne nun yexee sare nen na gbetin na, e nun seen naxanye birin lanma e findi bogise saraxane nun minse saraxane ra, i yi e ba e Ala Batu Banxin saraxa ganden fari Yerusalen yi. **18** E nun i ngaxakedenne na naxan nagidi lan gbetin nun xema donxene fe ma, e na liga, alo e Ala wama a xon kii naxan yi. **19** Seen naxanye so i yii e Ala Batu Banxin nawali feen na, i fa ne ra Ala Batu

Banxini Yerusalem yi. **20** I xa gbetin tongo mangana gbeti ramaradeni, i makoon naxan ma naxan lanje se gbete ye saren ma, i naxanye rawalima e Ala Batu Banxini. **21** N tan Manga Arataserekesi bata yamarini ito fi Efirati baan sogegododen binna gbeti ramarane birin ma. Saraxaralina Esirasi, sebeli tiin naxan Alaa sariyan xaranma, Ala Naxan Kore, na na naxan yo maxodin, e xa a so a yii, **22** han gbeti fixen kilo wuli saxon, murutun kilo wuli tonge saxon, manpaan litiri wuli naanin, turen litiri wuli naanin e nun a na wa foxon xasabin naxan xon. **23** Ala Naxan Kore, na naxan birin yamarixi, na birin xa liga a kiini kore xonna Ala Batu Banxina fe yi, alogo a xolon nama godo mangana yamanan nun a muxune ma. **24** Nanara, nxu a falama e xa a e nama mudun nun muxu dangumatxon saren nasuxu saraxaraline nun Lewi bonsonna muxune nun beti baane nun kantan tiine nun Ala Batu Banxi walikene nun Ala Batu Banxini ito muxu yo ra. **25** I tan Esirasi, fata i ya Alaa fekolonna ra, a naxan fixi i ma, i xa kitisane dexo naxanye kitin se yamaan birin ma Efirati baan sogegododen binni, naxanye birin Alaa sariyan kolon. Naxanye mi a kolon, i ne xaran a ma. **26** Naxan yo mi i ya Alaa sariyan suxu e nun mangana sariyana, na kanna yalagima nen, a faxa, hanma a kedi yamanani, hanma a yiiseene yi ba a yii, hanma a yi sa kasoon na.” **27** Tantunna Alatala xa, en benbane Ala, naxan xaxinla fixi mangan ma, a yi binye sifani ito fi Ala Batu Banxin ma Yerusalem yi, **28** a yi a hinanna yita n na mangan nun a kawandi muxune nun a kuntigi senbeman birin yetagi! Alatala to yi n senbe soma, n ma Ala, n yi Isirayila kuntigine malan alogo nxu birin xa siga.

8 Denbaya xunne nun e foxorabirane xinle sebexin ni ito ra, naxanye bira n foxo ra keli Babilon yi Manga Arataserekesi waxatini. **2** Gerisomi, Finexasi yixetene ye, Daniyeli, Itamara yixetene ye, Xatusi, Dawuda yixetene ye, **3** Sekani a dii xemen Sakari, Parosi yixetene ye, e nun muxu keme tonge suulun nan yi a ra naxanye xinle yi sebexi, xemene gbansan. **4** Paxata-Moyaba yixetene ye, Seraxayaa dii xemena Eliyehowenayi e nun muxu keme firin, xemene gbansan. **5** Satu yixetene ye, Yaxasiyeli a dii xemen Sekani e nun muxu keme saxon, xemene gbansan. **6** Adin yixetene ye, Yonatan ma dii xemena Ebedi e nun muxu tonge suulun, xemene gbansan. **7** Elan yixetene ye, Atali a dii xemen Yesaya e nun muxu tonge

solofere, xemene gbansan. **8** Sefati yixetene ye, Mikeli a dii xemen Sebadiya e nun muxu tongo solomasexe, xemene gbansan. **9** Yowaba yixetene ye, Yexiyeli a dii xemena Abadi e nun muxu keme firin muxu fu nun solomasexe, xemene gbansan. **10** Bani yixetene ye, Yosifi a dii xemen Selomiti e nun muxu keme tonge sennin, xemene gbansan. **11** Bebaya yixetene ye, Sakari, Bebaya a dii xemena e nun muxu maxonjen nun solomasexe, xemene gbansan. **12** Asagada yixetene ye, Hakatan ma dii xemen Yoxanan e nun muxu keme muxu fu, xemene gbansan. **13** Adonikami yixeten muxu donxene ye, Elifeleti nun Yeyiyeli nun Semaya, e nun muxu tonge sennin, xemene gbansan. **14** Bigiwayi yixetene ye, Yutayi nun Sakuru e nun muxu tonge solofere, xemene gbansan. **15** Baan naxan danguma Ahawa taan dexon, n yi muxuni itoe malan menni, nxu lu na xi saxon. N yi yamaan nun saraxaraline yee to, koni n mi Lewi bonsonna muxu yo to e ye. **16** Nayi, n yi yecratini itoe xili, Eliyeseri nun Ariyele nun Semaya nun Elanatan nun Yaribi nun Elanatan boden nun Natan nun Sakari nun Mesulan, e nun xaran tiine Yoyaribi nun Elanatan. **17** N yi e rasiga Manga Yido konni, naxan dxi Kasifiya yi, n yi a fala e xa e lanma e xa naxan fala Yido nun a ngaxakedenne xa Ala Batu Banxin walikxen naxanye yi dxi Kasifiya yi alogo e xa fa nxu foxo ra e nxu mali Ala Batu Banxini. **18** Bayo en ma Ala yi nxu malima, e yi fa Serebi ra nxu xa, xeme xaxilimana Maxali yixetene ye, Isirayilaa diin Lewi mamandenna nde, a tan nun a xunyene nun a dii xemene, e muxu fu nun solomasexe. **19** E mon yi fa Hasabi ra e nun Yesaya Merari yixetene ye, e nun a ngaxakedenne nun a dii xemene, muxu maxone. **20** E mon yi fa Ala Batu Banxin walikxen bonsen muxuna ndee ra muxu keme firin muxu maxone. Dawuda nun a kuntigine bata yi na bonsonna muxune sugandi naxanye yi walima Lewi bonsonna muxune foxo ra, ne birin xinle yi sebexi. **21** N yi a fala, a birin xa sunna suxu Ala yetagi Ahawa baan dexon, alogo a xa lu nxu xon sigatini nxu nun nxo diine nun nxo seene birin. **22** N yi yagima nen a faladeni mangan xa a xa sofane nun soo ragine bira nxu foxo ra e yi nxu ratanga nxu yaxune ma kira yi, bayo nxu a fala nen mangan xa, nxu naxa, “Nxo Ala muxune birin malima naxanye a fenma, koni a xolon luma nen muxune ma naxanye e mema a tan na.” **23** Nxu sunxi na nan ma, nxu yi Ala maxandi, a yi nxu yabi. **24** N yi saraxarali kuntigin muxu fu nun firin sugandi Serebi nun Hasabi e nun e

ngaxakedenne, muxu fu. **25** N yi gbeti fixen yate e yee xori, e nun xemaan nun seene, mangan naxanye ba e nun a kawandi muxune nun a kuntigine nun Isirayila kaan naxanye birin yi na lan en ma Ala Batu Banxina fe ma. **26** N yi gbeti fixen kilo wuli mɔxɔɲe so e yii, e nun gbeti fixe seen naxanye yi lanɲe kilo wuli saxon ma e nun xemaan kilo wuli saxon, **27** nun igelengenma xema daxin mɔxɔɲe naxanye yi lanɲe kilo solomasexe ma e nun sula xuruxi goron firin naxanye yi fan alo xemana. **28** N yi a fala e xa, n naxa, “E bata findi Alatala gbeen na, seni itoe fan bata rasarijan Ala gbeen na. Gbeti fixeni ito nun xemaan findixi ɲenige ma saraxan nan na Alatala xa, en benbane Ala. **29** E liga e yeren ma, e yengi dɔxɔ itoe xɔn ma han e sa e yiliga kuntigine nun Lewi bɔnsɔnna muxune yetagi, e nun Isirayila denbaya xunne Alatala Batu Banxini konkone kui Yerusalen yi.” **30** Saraxaraline nun Lewine yi gbeti fixen nun xemaan nun seene rasuxu naxanye bata yi yiliga alogo e xa rasiga Yerusalen yi en ma Ala Batu Banxini. **31** Nxu yi keli Ahawa baan de siga Yerusalen yi kiken xi fu nun firinna ma. En ma Ala yi lu nxu xɔn, a yi nxu ratanga nxu yaxune nun fe ɲaxin sifan birin ma kira yi. **32** Nxu to so Yerusalen yi, nxu yi nxu matabu xi saxon. **33** Xi naaninde lɔxɔni, gbetin nun xemaan nun seen naxanye yiliga nxɔ Ala Batu Banxini, ne yi so saraxaraliin Yuriyaa dii xemen Meremoti yii. Finexasi a dii xemena Eleyasari yi a fema e nun Yosabadi a dii xemen Yosuwe e nun Binuwi a dii xemen Nowadi, Lewi bɔnsɔnna muxune. **34** E to e birin yate, e yi e yiliga, e yi e birin malanxin binyen xasabin seɓe. **35** Muxu suxi fonne, naxanye fa sa keli konyiyani, ne yi tura fu nun firin ba saraxa gan daxin na Isirayilaa Ala xa Isirayila kaane birin ma fe ra, e nun konton tonge solomanaanin e nun sennin, e nun yexɛɛ tonge solofere e nun solofere. E mɔn yi kɔtɔ fu nun firin ba yulubi xafari saraxan na. Ne birin saraxa gan daxin na Alatala xa. **36** Na xanbi ra, e yi mangana yamarine rali mangan bundɔxɔne ma, e nun Efirati baan sogegododen binna yamana kanne, ne yi yamaan mali lan Ala Batu Banxina feene ma.

9 Na ɲan xanbini, kuntigine yi fa n fema, e yi a fala, e naxa, “Isirayila yamaan nun saraxaraline nun Lewi bɔnsɔnna muxune mi e makuyaxi siya gbetene muxune ra. E fe xɔsixin ligama alo Kanan kaane nun Xitine nun Perisine nun Yebusune nun Amonine nun Moyaba kaane nun Misiran kaane e nun Amorine. **2**

Bayo, e bata ne dii temene futu e yete xa e nun e dii xemene xa, e bɔnsɔn sarijanxin sunbu e rabilinna siyane muxune ra. Kuntigine nun kitisane nan singe na tinxintareyaan ligaxi.” **3** N to na me, n yi n ma domani bɔ n ma, n yi n xunsexene nun n de xabene matala, n sunuxin yi dɔxɔ. **4** Naxanye birin yi gaxuxi Isirayila Alaa falan yee ra, ne birin yi dɔxi n nabilinni lan na muxune tinxintareyaan ma naxanye sa kelixi konyiyani. N tan sunuxin yi lu dɔxi han ɲinbanna saraxa ba waxatini. **5** Ninbanna saraxa ba waxatini, n yagixin yi keli, n ma dugini bɔxi, n yi n xinbi sin, n yi n yiine ti Alatala, n ma Ala xa, **6** n yi Ala maxandi, n naxa, “N ma Ala, n yagixi, n mi nɔe n xunna rakele i tan n ma Ala yetagi, bayo nxɔ fe ɲaxin bata gbo ayi nxu xun ma. Nxu yulubine bata te han kore. **7** Xabu nxu benbane waxatini han to, nxu findixi yulubi rabane nan na, nxɔ yamaan yi haken liga. Nanara, nxu tan nun nxɔ mangane nun nxɔ saraxaraline findixi konyine ra manga xɔɲene bun, yengen nun suxun nun halagin nun yagini, alo a kii naxan yi to. **8** Koni, Alatala, nxɔ Ala, i baxi hinande nxu ra iki, i yi nxu tan ndee lu e nii ra, i yi luden so nxu yii yire sarijanxini, alogo nxɔ Ala xa nxu yeene rabi, a yi nxu nii yifan nxu ma nxɔ konyiyani. **9** Hali konyin to nxu ra, i tan nxɔ Ala mi nxu rabɛɲinxi nxɔ konyiyani. I bata hinan nxu ra Perise mangan yetagi, i nxu lu nxu nii ra, alogo nxu xa Ala Batu Banxin ti, denaxanye kalaxi nxu yi menne yiton, i yi matabuden fi nxu ma Yuda nun Yerusalen yi. **10** Nxɔ Ala, nxu fa nanse fale i xa na xanbi ra? Nxu bata nxu me i ya yamarine ra, **11** i bata a fala nxu xa fata nabine ra, i ya walikene, i naxa, ‘E soma yamanan naxan yi, e dɔxɔ a yi, yamana xɔsixin nan na ra na yamanane muxune kewali xɔsixine xɔn, e bata yamanan birin nafe e fe xɔsixine ra. **12** Nayi, e nama e dii temene fi e dii xemene ma, e nama e dii temene fan fen e dii xemene xa. E nama lanna raso e nun ne tagi, e nama e mali e xa herin sɔtɔ. Nayi, e senben sɔtɔma nen, e yamanan muxune yi donse fajine don, e mɔn yi yamanan lu e diine xa e keen na han habadan!’ **13** Nxɔ Ala, na feene birin nxu sɔtɔxi nen amasɔtɔ nxɔ fe xɔsixine nun nxɔ yulubi ɲaxine xɔn. Koni, i mi nxu saranxi nxɔ fe ɲaxine ra alo a yi lan kii naxan yi, i mɔn bata tin nxu xa lu nxu nii ra. **14** Nxu lan nxu mɔn xa lu i ya yamarine kale ba? Nxu lan nxu xa bira na yamanan muxune fɔxɔ ra naxanye fe xɔsixini? I ya xɔlɔn mi gode nxu ma ba, a yi nxu raxori, muxu yo mi lu? **15** Alatala, Isirayilaa Ala, i tinxin, bayo nxu mɔn

nxu nii ra to. Nxu tan nan ito ra i yetagi nxu nun nxo yulubine, muxu yo mi yi nœ luye a nii ra i yetagi.”

10 Esirasi yi xinbi sinxi waxatin naxan yi Ala Batu Banxin yetagi, a wugama, a Ala maxandima a ti e yulubine ra, Isirayila kaane yi e malan a fema, xemene nun jaxanle nun diidine, yamaan birin yi lu wuge. **2** Nayi, Yexiyeli a dii xemen Sekani Elan xabilani, na yi falan tongo, a yi a fala Esirasi xa, a naxa, “Nxu bata tinxintareyaan liga en ma Ala yee ra yi, nxu yi jaxalan xojene futu, naxanye yi findixi siya gbete muxune ra. Hali na, yigin mon Isirayila ma lan na feen ma. **3** En na jaxanle nun e diine kedi, en layirin xidi en nun Ala tagi, alo n kanna a falaxi kii naxan yi en nun naxanye birin xuruxurunma en ma Alaa yamarine ra. En xa a liga alo sariyana a falaxi kii naxan yi. **4** Keli, bayo feni ito i tan nan matoxi. Nxu birama nen i foxo ra. I wekile, i a liga.” **5** Nayi, Esirasi yi keli, a yi saraxarali kuntigine nun Lewine nun Isirayila kaane birin nakolo, a baxi naxan falade, e birin xa na liga. E yi e kolo a xa. **6** Na xanbi ra, Esirasi yi mini Ala Batu Banxini, a yi siga Eliyasibi a dii xemen Yehoxanan ma banxini. A to yi menni, a mi donse don, a mi ige min, bayo a yi sunuxi muxu suxi fonne tinxintareyana fe ra. **7** E yi yamarin nawanga Yuda nun Yerusalen birin yi, naxan yi a falaxi a muxu suxine birin xa e malan Yerusalen yi. **8** Naxan yo mi fa benun xi saxan, a yiiseene birin nasuxuma nen a ra, a tan yeteen yi kedi yamaan ye alo kuntigine nun fonne a falaxi kii naxan yi. **9** Yuda nun Bunyamin xemene yi e malan Yerusalen yi na xi saxanna bun ma. Kike solomasexeden xi mæxojen nan yi a ra. Yamaan birin yi malanxi yama malandeni Ala Batu Banxin yetagi, e gaxuxin xuruxurunma lan na feen ma, e nun tulena fe ra. **10** Saraxaralina Esirasi yi keli, a naxa, “E bata tinxintareyaan naba e to jaxalan xojene doxi, e mon yi Isirayila yamaan findi yulubi tongone ra. **11** Iki, e ti e yulubine ra Alatala yetagi, e benbane Ala, e yi a sagoon liga! E masiga yamanan muxune nun jaxalan xojene ra.” **12** Yamaan birin yi yabin ti e xuini texin na, e naxa, “On! Nxu lanma nen nxu a liga alo i a falaxi kii naxan yi. **13** Koni yamaan gbo, tule waxatin na a ra. Nxu mi nœ luye tandeni be, bayo xi keden hanma xi firin wali xa mi ito ra, muxu wuyaxi bata yulubin liga feni ito yi. **14** Nxœ kuntigine xa lu be yamaan birin xinla ra. Naxanye birin jaxalan xojene doxi nxœ taane yi, ne xa fa waxati saxine ma, e nun

taan fonne nun taan kitisane, e yi na feen sa a kiini han Ala xolo gbeen yi jan, a makuya en na lan feni ito ma.” **15** Koni, Asaheli a dii xemen Yonatan nun Tikiwaa dii xemen Yaxasiya yi na feen yenge. Lewi bõnsõnna muxuna nde Sabetayi nun Mesulan yi ne mali. **16** Koni muxu suxi fonne yi tin Esirasi a falan ma. Saraxaralina Esirasi yi denbaya xunna ndee sugandi denbaya yeen ma, e yi e birin xinla fala. E yi doxo na kike fuden loxo singen ma alogo e xa na feen mato. **17** Kike singen loxo singen ma, e yi yelin xemene kitin se naxanye birin jaxalan xojene doxo. **18** Saraxaraline ye, naxanye jaxalan xojene doxo, ne nan itoe ra: Yosadaki a dii xemen Yosuwe nun a xunyene xabilan muxune ye, Maaseya nun Eliyeseri nun Yaribi e nun Gedali. **19** E yi a ragidi a e xa e me e jaxanle ra, e yi kontonna ba yangin saraxan na e yulubina fe ra. **20** Imeri xabilani, Xanani nun Sebadiya. **21** Xarimi xabilani, Maaseya nun Eli nun Semaya nun Yexiyeli e nun Yusiya. **22** Pasaxuri xabilani, Eliyowenayi nun Maaseya nun Yisimayeli nun Nataneli nun Yosabadi e nun Elasa. **23** Lewi bõnsõnna muxune ye, Yosabadi nun Simeyi nun Kelaya naxan mon xili Kelita e nun Petaxi nun Yuda e nun Eliyeseri. **24** Beti baane ye Lewi bõnsõnni, Eliyasibi. De kantanne ye Lewi bõnsõnni, Salun nun Telemi e nun Yuri. **25** Isirayila kaa gbete ye: Parosi xabilani, Ramiya nun Isiya nun Malakiya nun Miyamin nun Eleyasari nun Malakiya e nun Benaya. **26** Elan xabilani, Matani nun Sakari nun Yexiyeli nun Abidi nun Yeremoti e nun Eli. **27** Satu xabilani, Eliyowenayi nun Eliyasibi nun Matani nun Yeremoti nun Sabadi e nun Asisa. **28** Bebayi xabilani, Yehoxanan nun Xananiya nun Sabayi e nun Atalay. **29** Bani xabilani, Mesulan nun Maluku nun Adaya nun Yasubu nun Seyala e nun Yeremoti. **30** Paxata-Moyaba xabilani, Adana nun Kelala nun Benaya nun Maaseya nun Matani nun Besaleli nun Binuwi e nun Manase. **31** Xarimi xabilani, Eliyeseri nun Yisiya nun Malakiya nun Semaya nun Simeyon **32** nun Bunyamin nun Maluku e nun Semaraya. **33** Xasun xabilani, Matenayi nun Matata nun Sabadi nun Elifeleti nun Yeremayi nun Manase e nun Simeyi. **34** Bani xabilani, Maadayi nun Amirama nun Yuweli **35** nun Benaya nun Bedeya nun Keluhi **36** nun Waniya nun Meremoti nun Eliyasibi **37** nun Matani nun Matenayi nun Yaasu **38** nun Bani nun Binuwi nun Simeyi **39** nun Selemiya nun Natan nun Adaya **40** nun Makanadebayi nun Sasayi nun Sarayi **41** nun Asareli nun Selemiya nun Semaraya **42**

nun Salun nun Amari e nun Yusufu. **43** Nebo xabilani,
Yeyiyeli nun Matitiya nun Sabadi nun Sebina nun
Yadayi nun Yoweli e nun Benaya. **44** Ne birin bata yi
jaxalan xəjəne dəxə nun, ndee bata yi diine bari.

Neyemi

1 Xakaliyaa dii xemen Neyemi a falane. Kisilewi kiken na, Arataserekesi a mangayaan jee moxonedeni, n yi Suse manga taani. **2** Ngaxakedenna Xanani nun muxuna ndee yi fa sa keli Yuda yi. N yi e maxodin Yahudiyane fe ma, yaxune naxanye suxu, e siga e ra konyiyani, e jejeene mon yi xete Yerusalen yi, e nun lan Yerusalen ma fe ma. **3** E yi n yabi, e naxa, “Suxu muxun naxanye lu e nii ra, na ndee bata fa dɔxɔ Yuda yamanani, koni e yigitegexi, e yagixi. Yerusalen taan nabilinna yinne yirena ndee bata bira, teen yi taan so deene birin gan.” **4** N to na falane me, n yi dɔxɔ, n wuga, n yi sunu xi wuyaxi, n yi sun, n yi Ala maxandi, Ala Naxan Kore, **5** n naxa, “Alatala, Ala Naxan Kore, naxan gbo, a magaxu, i tan naxan i ya layirin nun i ya hinanna luma i xanuntenne xa naxanye i ya yamarine suxuma, **6** i tuli mati, i yi i yeen ti n na, i yi i ya walikena maxandi xuiin name. N ni i maxandima waxatini ito yi i ya walikene xa, Isirayila kaane, kɔeen nun yanyin na, n yi n ti Isirayila kaane yulubine ra bayo nxu bata yulubin liga i ra nxu nun n ma denbayana, nxu bata yulubin liga. **7** Nxu bata fe naxin liga i ra, nxu mi i ya yamarine nun i ya tɔnne nun i ya sariyane suxi i naxanye so i ya walikeen Musa yii. **8** I ya falana fe xa rabira i ma, i naxan so i ya walikeen Musa yii, i naxa, ‘E na tinxintareyaan naba waxatin naxan yi, n na e raxuyama ayi nen siyane ye. **9** Koni, xa e xete n ma, xa e n ma yamarine suxu, e yi e liga, nayi, hali e sa bɔxɔ xɔnna danna ra, n sa fama e ra nen yireni n denaxan sugandixi alogo n xinla xa lu na.’ **10** I ya walikene nun i ya yamaan nan e ra, i naxanye xunbaxi i senbe gbeenii. **11** Marigina, i tuli mati n tan, i ya walikena maxandi xuiin na, e nun i ya walikeen naxanye sewaxi gaxuma i xinla yee ra! N ma feene rasonɔya to, n tan i ya walikena, i yi a liga xemeni ito xa kininkinin n ma n na siga a yetagi.” Na waxatini, n tan nan yi yengi saxi mangan minseene xon ma.

2 Nisan kiken na, Arataserekesi a mangayaan jee moxonedeni, manpaan yi dɔxi mangan yetagi, n yi a tongo, n yi a so mangan yii. N yi sunuxi a yetagi, naxan nɔxɔn munma yi liga n na singen. **2** Mangan yi a fala n xa, a naxa, “I yetagini fɔrɔxi nanfera? Anu, i mi furaxi. Waxatina nde bɔje rafɔren ni ito ra.” N yi gaxu han, **3** koni n yi mangan yabi, n naxa, “Mangan xa lu a nii ra habadan! N yetagini fɔrɔxi nen bayo

n benbane gaburune sa taan naxan yi, menna birin bata halagi, teen yi na taan so deene birin gan.” **4** Mangan yi a fala n xa, a naxa, “Nanse xɔli i ma, n xa a liga i xa?” N yi Ala maxandi naxan kore, **5** n yi mangan yabi, n naxa, “Xa mangan tin, xa n tan i ya walikeen nafaan i ma, n nasiga Yuda yamanani. N benbane gaburune sa taan naxan yi, n mon xa sa na ti.” **6** Mangana naxanla yi dɔxi a fema, mangan yi n maxodin, a naxa, “I ya sigatiin buma han waxatin mundun yi, i xeten waxatin mundun yi?” Mangan yi tin n xa siga, nayi n yi n xete waxatin fala a xa. **7** N mon yi a fala mangan xa, n naxa, “Xa mangan tinje, a xa kedine so n yii siga Efirati baan sogegododen binna yamana kanne ma, alogo e xa a lu n dangu siga han Yuda yi, **8** i mon yi kedi keden so n yii Asafi xa, naxan mangana fɔtɔnne kantanma, alogo a xa xalanbe wudine so n yii, n sa yire makantanxin deene ti Ala Batu Banxin dɔxɔn, e nun taan yinne nun n sa luma banxin naxan kui.” Mangan yi ne so n yii, bayo Ala yi n xon. **9** N yi siga yamana kanne fema naxanye yi Efirati baan sogegododen binni, n yi mangana kedin so e yii. Mangan bata yi sofa kuntigine nun soo ragine bira n fɔxɔ ra. **10** Sanbalata, Horoni kaan nun Amonina nde Tobiya, a walikeen to na me, e yi xɔlɔ kati a nanfera muxuna nde fama a fa Isirayila kaane mali. **11** N yi so Yerusalen yi, n yi xi saxan ti na. **12** Nayi, nxu nun muxuna ndee yi keli kɔeen na, n mi a fala muxe xa n ma Ala bata yi naxan yita n na a n xa a liga Yerusalen xa. N keden peen nan yi dɔxi sofanla fari. **13** N yi mini Lanbanna so deen na kɔe tagini siga Sube Magaxuxi Tigin nun Neje deen binna ra, n yi lu Yerusalen taan nabilinna yinne matoe. N yi taan yinna to kalaxi, a yire wuyaxi yi biraxi, teen bata yi deene gan nun. **14** N yi dangu Tigin so deen nun mangana ige ramaraden dɔxɔn, koni n ma soon mi a dangude sɔtɔ. **15** N yi te xuden xon kɔeen na, n siga taan yinne matoe Kediron lanbanna binni. Na xanbi ra, n mon yi so Lanbanna so deen na, n xete na kii nin. **16** Taan kuntigine mi yi a kolon n yi sigaxi denaxan yi e nun n yi naxan ligama. Han na waxatini, n munma yi sese fala Yahudiyane nun saraxaraline nun taa kanne nun kuntigine nun tide kan gbete ye xa. **17** Nayi, n yi a fala e xa, n naxa, “E bata a to en tɔron naxan yi iki! Yerusalen bata kala, teen bata a so deene gan! E fa, en fa Yerusalen taan nabilinna yinne ti. Nayi, en mi fa yagima sɔnɔn.” **18** N yi a yebe e xa Ala n mali kii naxan yi, e nun mangan falan naxan ti

n xa. E yi a fala, e naxa, “En siga, en sa taan ti!” Nayi, e yi e bode senbe so na wali fajina fe yi. **19** Horoni kaan Sanbalata nun Amonin Tobiya a kuntigin nun Arabun Gesen to na me, e yi nxu magele, e yi nxu rajaxu. E yi a fala, e naxa, “E nanse ligama ito ra? E murutema mangan nan xili ma ba?” **20** N yi e yabi, n naxa, “Ala noon fima nen nxu ma, Ala Naxan Kore. Nxu tan, a walikene, nxu kelima nen, nxu yi a ti. Koni e tan, e mi kee soton taani ito yi, e mi sariya se be, e fe mi fa rabirama muxe ma Yerusalen taani!”

3 Saraxarali kuntigina Eliyasibi nun a ngaxakeden saraxaraline yi keli walideni. E mon yi Yexene So Deni ton. E yi a rasarijan, e yi a deene ti a ma. E yi taan yinna ti siga han sangansoon naxan yi xili Keme, e yi na rasarijan. E mon yi taan yinna ti siga han Xananeli Sangansona. **2** Yeriko kaane fan yi walima menna dexon, e nun Sakuru, Yimiri a dii xemena. **3** Sena kaane yi taan so deni ton denaxan xili Yexe So Dena. E de wudine ti, e deene sa e ma e nun e balan wurene. **4** Yuriyaa dii xemen Meremoti fan yi walima na yiren dexon, Hakosi mamandenna. Bereki a dii xemen Mesulan fan yi walima na yiren dexon Mesesabele mamandenna, e nun Banahaa dii xemen Sadaki. **5** Tekowa taan muxune fan yi walima na dexon ma. Anu, taan muxu gbeene tondi wale nen walike kuntigine yamarin bun. **6** Yoyadaa dii xemen Paseya nun Besodiya dii xemen Mesulan yi De Fonni ton. E yi a deen wudine ti, e yi a balan wurene sa. **7** Gabayon kaan Melatiya fan yi yinna yirena nde yitonma na dexon ma, e nun Meronoti kaan Yadon nun Gabayon kaa gbete ye nun Misipa kaane. E birin yi walima yamana kanna nan bun Efirati baan sogegododen binni. **8** Xarahaa dii xemen Yusiyele fan yi yinna yirena nde yitonma na dexon e nun Xananiya, latikonon nafalana nde. E yi siga wale han Yerusalen yinna yigbo yirena. **9** Xuru a dii xemen Refaya fan yi yirena nde yitonma na dexon, Yerusalen boxon foxo kedenna yirena nde kuntigina. **10** Xarumafaa dii xemen Yedaya fan yi walima a banxin yetagi, Xasabaneyaa dii xemen Xatusi fan yi yinna yirena nde yitonma na dexon. **11** Xarimi a dii xemen Malakiya nun Paxata-Moyabaa dii xemen Xasubu fan yi walima yire gbete ye yi siga han sangansoon naxan xili Buru Gandena. **12** Haloxesi a dii xemen Salun nun a dii temene fan yi yinna yirena nde yitonma na dexon, Yerusalen boxon foxo kedenna yirena nde kuntigina. **13** Xanun nun Sanowa

kaane yi Lanbanna So Deni ton. E yi a deen wudine ti, e yi a balan wurene sa. E mon yi nongonna ye wuli keden fan yiton taan yinni, siga han Xuruse Neje Dena. **14** Rekabu a dii xemen Malakiya, Beti-Hakeremi kuntigin yi Xuruse Neje Deni ton. A yi a deen wudine ti, a yi a balan wurene sa. **15** Kola-Xose a dii xemen Salun, Misipa kuntigin yi Tigi Deni ton, a yi a ti, a yi a xunna soon so a xun na, a yi a deen wudine ti, a yi a balan wurene sa. A mon yi taan yinni ton Selaxa ige ramaraden dexon, denaxan mangana nakoon fema, siga han tedene, denaxan sigama Dawudaa Taani. **16** Donxen na, Asabuku a dii xemen Neyemi, Beti-Suru foxo kedenna kanna yi siga yinni tonje Dawudaa gaburun binni siga han ige malanden binna, siga han mangana sofane banxina. **17** A xanbi ra, Lewi bonsonna muxune yi walima Bani a dii xemen Rexun bun ma. Hasabi, Keyila foxo kedenna kuntigin fan yi taan yinni tonma a dingirani. **18** A ngaxakedenne fan yi walima a xanbi ra, Xenadadaa dii xemen Bawayi, Keyila foxo kedenna bonna kuntigin bun. **19** Misipa kuntigin Yosuwe a dii xemena Eseri fan yi yire gbete yiton, keli yenge so seene malan banxin yetagi, siga han denaxan xili Songenna. **20** Sabayi a dii xemen Baruku fan yi yire gbete yiton a xanbi ra, keli Songenna ma siga han saraxarali kuntigina Eliyasibi a banxin de ra. **21** Yuriyaa dii xemen Meremoti, Hakosi mamandenna fan yi yire gbete yiton a xanbi ra, keli Eliyasibi a banxin so deen ma siga han a danna. **22** Saraxaraliin naxanye sa keli Yerusalen rabillinne yi, ne fan yi walima men xanbi ra. **23** Ne fan xanbi ra, Bunyamin nun Xasubu yi walima menni e banxine yetagi. Ananiyaa dii xemen Maaseyaa dii xemena Asari fan yi walima menni ne xanbi ra a banxin dexon ma. **24** Xenadadaa dii xemen Binuwi fan yi yire gbete yiton na xanbi ra, keli Asari a banxin ma siga han yinna songenna nde. **25** Yusayi a dii xemen Palala fan yi walima na yinna songenna yetagi e nun sanganso kuyen manga banxin yetagi kantan tiine sansanna dexon. Parosi a dii xemen Pedaya fan yi walima a xanbi ra. **26** Ala Batu Banxin walikeen naxanye yi doxi Ofeli गयाan ma, ne fan yi siga yinni tonje han sangansoon songenna ma, deen naxan xili Ige So Dena sogegododen binni. **27** Tekowa kaane fan yi yinna yire gbete yiton ne xanbi ra, keli sangansoon songenna ma siga han Ofeli yinna. **28** Deen naxan yi xili Soona, saraxaraline fan yi walima na faxan na e banxine yetagi. **29** Imeri a dii xemen Sadaki yi

walima e xanbi ra a banxin yetagi. A xanbi ra, Sekani a dii xemen Semaya fan yi walima menni, naxan yi deen kantanma naxan yi xili Sogeteden So Dena. **30** E xanbi ra, Selemiyaa dii xemen Xananiya nun Salafaa dii xemen senninden Xanun yi menni, ne fan yi yire gbete yiton yinna ma. Bereki a dii xemen Mesulan fan yi ne xanbi ra, a banxin yetagi. **31** A xanbi ra, xema wanla Malakiya fan yi walima menni, siga han Ala Batu Banxin walikene nun yulane banxina Mifikadi deen yetagi, siga han sangansoon naxan sa yinna songenna ma. **32** Xema wanla bonne nun yulane fan yi yinni ton keli sangansoon songenna ma siga han Yexene So Dena.

4 Sanbalata to a me a nxu mon yinna tima, a yi xolo han! A yi Yahudiyane magele. **2** A yi a fala a ngaxakedenne nun Samari kaa sofane yee xori, a naxa, “Yahudiya fangatareni itoe nanse ligama? En tinje e xa na liga ba? E noe saraxan be ba? E a rajanje to ba? E mon noe geme maluxunxine ramine ba naxanye benden nun se ganxine bun ma?” **3** Amonina nde Tobiya yi a dexon ma, na yi a fala, a naxa, “Hali e ti, xa xulumasena nde sigan ti a fari, e geme yinna birin kalama nen!” **4** Nayi, n yi Ala maxandi, n naxa, “Nxo Ala, i tuli mati nxu ra, amasoto nxu yaxune bata nxu rajaxu! I marayarabin naxete e ma, i yi e rasiga koniyani. **5** I nama dija e hakene ma, e yulubine nama ba i yetagi, amasoto e bata yinna ti muxune makonbi.” **6** Nxu yinni ton na kii nin han a yiteyaan tagi taan nabilinni. Yamaan yi na wanla suxu e sobeen na. **7** Koni, Sanbalata nun Tobiya nun Arabune nun Amonine nun Asadodi kaane to a me a Yerusalen rabilinna yinna ti feen sigama yeen na, e nun a muxune bata yi a yire biraxine yiton folo, e yi xolo kati. **8** E lan a ma a e birin xa sa Yerusalen yenge, e na kala. **9** Nayi, nxu bata nxo Ala maxandi, nxu yi kantan tiine dexo koeen nun yanyin na alogo e xa nxu ratanga e ma. **10** Anu, Yuda kaane yi a falama nen, e naxa, “Nxo walikene senben bata jan, geme biraxine maxali dixin mon gbo, nxu mi noe yinna tiye.” **11** Nxu yaxune yi a falama nen, e naxa, “Yahudiyane mi a kolonje, e mi a famunje han en yi so e tagi, en yi e faxa, en yi e wanli kala.” **12** Anu, Yahudiyen naxanye yi dxi nxu yaxune rabilinni, ne fa nen, e fa nxu rakolon na feen ma han dexoja ma fu, e naxa, “E fa en yengema nen sa keli yiren birin yi.” **13** Nanara, n yi muxuna ndee dexo yinna xanbirane yi denaxanye

so jiaxun, n yi yamanan muxune dexo bonson yeen ma, e silanfanne nun tanbane nun xanle ra e yii. **14** N to e ti kiin mato, n yi falan ti taan fonne nun kitisane xa e nun yamaan naxan birin yi na, n naxa, “E nama gaxu en yaxune yee ra. A xa rabira e ma fa fala Marigin senben gbo, a magaxu. E yengen so e ngaxakedenne nun e dii xemene nun e dii temene nun e jaxanle nun e dodoxene xa.” **15** Nxu yaxune yi a me fa fala nxu bata rakolon, a Ala bata e fe nataxin kala. Nxu birin yi xete yinni, birin yi sa a wanla de suxu. **16** Keli na laxon ma, n ma walikene foxo kedenna nan yi fa walima, foxo kedenna yi tanbane nun ye masansan wure lefane nun silanfanne nun xanle suxu e yii, e yi e tagi xidi. Kuntigine yi Yuda kaane birin makantanma, **17** naxanye yi yinna tima. Naxanye yi goronne maxalima hanma, e yi goronne kui sa, ne yi walima e yii kedenne nan na, e yi yenge so seen suxu e yii kedenna ra. **18** Naxanye yi a tima, ne birin ma silanfanne yi xidixi e tagi nen, e yi walima na kii nin. Xemen naxan yi xotaan fema, na yi biraxi n foxo ra. **19** N yi a fala fonne nun kitisane nun yamaan donxen xa, n naxa, “Wanla gbo, wulani kuya, en bata xuya ayi yinna xuntagi, en bata masiga en bode ra. **20** E nema dede, xa e xotaan fe xuiin me, e malan nxu fema. En ma Ala yengen soma nen en xa.” **21** Nxu siga wanla ma na kii nin, tanban suxi yamaan foxo kedenna yii keli subaxan ma han sarene yi mini kore. **22** Na waxatini, n mon yi a fala yamaan xa, n naxa, “Xemene birin xa xi Yerusalen yi e nun a walikena, en kantanna ti koeen na, en yi wali yanyin na.” **23** Nxu mi yi nxo dugine bama mume, n tan ba, ngaxakedenne ba, n ma walikene ba, muxun naxanye yi n kantanma ba, birin ma yenge so seen nun a min igen nan tun yi suxi a yii.

5 Loxona nde, yamanan xemena ndee nun e jaxanle yi e mawuga e ngaxakeden Yahudiyane fari, **2** ndee naxa, “Nxu nun nxo dii xemene nun nxo dii temene wuya. Nxu wama nen nxu xa balon soto alogo nxu xa nxu dege, nxu lu nxu nii ra.” **3** Ndee fan yi a fala, e naxa, “Nxu bata nxo xene nun nxo manpa binle nun nxo banxine dexo tolimani alogo nxu xa balon soto fitina kameni.” **4** Gbete ye fan naxa, “Nxu bata gbetin tongo donla ra nxo xene nun nxo manpa binle xun yi, alogo nxu xa mudun fi naxan lan a so mangan yii. **5** Anu, nxu nun nxu ngaxakedenne birin keden, nxo dii xemene luxi nen alo e gbeene, koni a mato nxu nxo

dii xemene nun nxo dii temene matima konyine ra, nxo dii teme wuyaxiye bata findi konyine ra, nafulu mi nxu yii, nxo xeeene nun nxo manpa binle mon bata findi muxu gbeteye gbeen na.” 6 N to e mawuga xuiin me, n yi xolo han! 7 N yi a ragidi n xa taan muxu gbeene nun kitisane maxadi, n yi a fala e xa, n naxa, “E tonon fenma e ngaxakedenne ra nanferal!” N yi malan gbeen maxili e fe ra. 8 N mon yi a fala e xa, n naxa, “En bata en ngaxakeden Yahudiyane xun ba, naxanye yi saraxi siya gbetene xon konyine ra. Iki, e tan yeteen nan fa e ngaxakeden Yahudiyane matima e Yahudiya bodene ma.” E mi fala soto e naxan tiye, e yi e dundu. 9 N mon yi a fala, n naxa, “E naxan ligama, na mi fan. E mi noe sigan tiye Ala yee ra yi gaxuni ba, alogo siya gbeteye nama en nayelegu, en yaxune? 10 N tan fan nun ngaxakedenne nun n ma walikene, nxu fan muxune doli nen gbetin nun donsensi. Nayi, e lanma e xa naxan naxete, en nama na maxili. 11 E sa e xeeene raxete e ma to yeteni, e nun e manpa binle nun e oliwi binle nun e banxine. E nama tono maxili e ra gbetin nun murutun nun minseen nun turen fari.” 12 E yi yabin ti, e naxa, “Nxu e raxetema e ma nen, nxu mi fa sese maxodinma e ma, i naxan falaxi nxu na liga.” Nayi, n yi saraxaraline xili, alogo e xa e kolo e yee xori. 13 Na xanbi ra, n yi n ma doma gbeen lenbeni maxa, n yi a fala, n naxa, “Ala xa muxune birin yimaxa na kiini naxanye na e fala xuiin kala, a yi e bono e denbayane nun e seene yi, alogo e yiigenla xa lu!” Yamaan birin yi Alatala tantun, e yi sonxo, e naxa, “Ala xa na liga, amina!” Donxen na, yamaan yi a falan suxu. 14 Xabu n doxo loxoni yamana kanna ra Yahudiyane xun na Yuda yamanani, xabu Manga Arataserekesi a mangayaan jee moxojedena han jee tonge saxon e nun firindena, n tan nun ngaxakedenne nxu mi sese ba mudun na naxan soma yamana kanna yii. 15 Yamana kanna naxanye dangu n tan yee ra, ne yi donseene nun manpane rasuxuma nen yamaan na e nun gbeti gbanan tonge naanin. Hali yamana kanne xoyine yi yamaan toroma. Koni, n tan to yi gaxuxi Ala yee ra, n mi na sifan liga. 16 Koni, n tan yeteen wali nen taan yinna tideni, n mi xee yo sara n yete xa, anu n ma walikene birin yi yinna tiin fari. 17 Anu, muxu keme tonge suulun nan yi e degema n konni Yahudiyane nun kuntigine ye, ba muxune ra naxanye yi fama sa keli yamanan nabilinna siya gbetene ye. 18 Ninge keden nun yexee yebaxi sennin nan yi faxama n xa loxo yo loxo e nun toxena ndee. Xi fu yo xi fu,

manpa fani gbegbe yi rafalama n xa nen. Koni, hali na, n mi mudun maxili n tan yamana kanna xa, bayo wanla yi xodoxo yamaan ma. 19 N ma Ala, n ma fe xa rabira i ma, i fan n na bayo n bata wali fajan ke yamaan xa.

6 Sanbalata nun Tobiya nun Arabun Gesen nun nxu yaxun bonne yi a me a n mon bata taan yinna ti, a dede mi fa kalaxi. Na waxatini, n munma yi deene ti singen. 2 Sanbalata nun Gesen yi xerane rafa a faladeni n xa, e naxa, “Fa en fa en bode to Kefirimi yi Ono lanbanni.” E bata yi a ragidi a e xa fe jaxin liga n na. 3 Koni, n yi e yabi, n naxa, “Wanla n yii han! N mi noe sige. Nanfera wanla xa rati be, n siga e fema?” 4 E na xeraan nafa n ma doxona ma naanin, n fan yi e yabi na kii kedenni. 5 Sanbalata mon yi a walikene nasiga na fala kedenna ra a suulundeni, kedi rabixin yi suxi naxan yi. 6 Ito nan yi sebexi a kui, a naxa, “Siya gbetene ito nan falama, anu Gesen fan a falama, a jondin na a ra, e naxa a i tan nun i ngaxakeden Yahudiyane waxi murute feni. I taan yinna tima na nan ma. A luxi alo i waxi findi feni Yahudiyane mangan nan na. 7 I yeteen bata nabine doxo alogo e xa i ya fe fala Yerusalen yi fa fala a i bata findi mangan na Yuda yi. Perise mangan mi buma na medeni. Nayi, fa en fa batu.” 8 N yi a yabi, n naxa, “Muxe mi na falane tima. Nondi mi i ya falane ra! I tan nan tun ne mirixi, i yi e fala!” 9 Na muxune birin yi wama nxu ragaxu feen nin, e naxa, “E senben janma nen, e mi wanla rananma.” Koni, n yi Ala maxandi, n naxa, “Ala, iki, n senbe so.” 10 N yi siga Delayaa dii xemen Semaya konni, Mehetabeli mamandenna, bayo a mi yi noe fe n konni. A yi a fala n xa, a naxa, “En birin xa siga Yire Saripanxini Ala Batu Banxin kui, en sa a deene balan en xun ma, amasoto i yaxune fama nen i xili ma, e fama koeen nan na i faxadeni.” 11 N yi a yabi, n naxa, “Na muxu mi n tan na naxan a gima! N tan muxu sifan noe soe Ala Batu Banxini ba, n lu n nii ra? N mi soma Ala Batu Banxini n luxundeni!” 12 N yi a kolon fa fala a mi yi Alaa falan xan nalima n ma. Koni, a yi na falama n xa nen, amasoto Sanbalata nun Tobiya bata yi a saranna fi alogo a xa fa falan ti n xa na kiini. 13 A na liga nen alogo n xa gaxu a yee ra, n yi a maxadi xuiin suxu, n yi yulubin tongo. Nayi, e yi noe n xili kale nen, n yi yagi. 14 N ma Ala, Tobiya nun Sanbalata naxan ligama n na, na xa rabira i ma, e nun nabi jaxanla Nowadi nun nabiin bonna naxanye kata

n magaxudeni. **15** Taan yinna yi ranan Elulu kiken xi mǝxǝŋen nun suulunde lǝxǝni, xi tonge suulun e nun firinna bun. **16** Nxu yaxune to a mǝ, e nun siyaan naxanye birin yi nxu rabilinxi, ne yi gaxu, e yi yagi e to a to a wanla bata yi ranan alo nxǝ Ala sagoon kii naxan yi. **17** Na waxatine yi, Yuda muxu gbeene yi bataxine seǝma Tobiya ma waxatin birin, Tobiya fan yi e yabima. **18** Yuda kaan wuyaxi bata yi e kǝlǝ a xa, amasǝtǝ Sekani bitanna nan yi a ra, Araa dii xǝmena, e nun a dii xǝmen Yehoxanan bata yi Mesulan ma dii tǝmen tongo, Bereki a dii xǝmena. **19** E yetǝen yi a xili faŋin fala n yeǝ xǝri, e yi n ma falane rali a ma. Tobiya fan yi kedine rasigama alogo a xa n magaxu.

7 Taan yinna to yelin tiye, n yi a dǝene ti a ma, kantan tiine nun beti baane nun Lewi bǝnsǝnna muxune yi ti e wanle ra. **2** N yi Yerusalen kuntigiyaan taxu ngaxakedenna Xanani ra e nun Xananiya, Yerusalen yire makantanxin kuntigina. Lannaya muxu gbeen nan yi Xananiya ra, e nun Ala yeǝragaxu muxuna dangu bonne ra. **3** N yi a fala e xa, n naxa, “Yerusalen dǝene mi rabima fǝ sǝgen na te, a mǝn balanma nen wurene ra jinbanna ra benun kantan tiine xa siga. Yerusalen kaane yi ti kantan tideni, ndee yi siga taan kantan tidene yi, bonne yi lu e konne kantanje.” **4** Taan yi gbo, koni yamaan mi yi wuya, banxine fan munma yi jǝxǝ yiti singen. **5** N ma Ala yi a sa n bǝŋeni a n xa fonne malan e nun kitisane nun yamaan birin alogo n xa muxune yate. N yi bǝnsǝn kǝdina nde to, muxun naxanye singe xete sa keli konyiyani, n yi ito to seǝxi na ma: **6** Babilǝn mangan Nebukadanesari siga muxun naxanye ra konyiyani, ne wuyaxi yi xete Yerusalen nun Yuda yi, birin yi siga a taa yi. **7** E yi xete e nun Sorobabeli nun Yosuwe nun Neyemi nun Asari nun Raamiya nun Naxamani nun Marodoke nun Bilisan nun Misipereti nun Bigiwayi nun Nexun e nun Banaha. Isirayila yamaan xǝmene yaten ni i ra: **8** Parosi xabilani, muxu wuli firin muxu kǝme muxu tonge solofere e nun firin. **9** Sefati xabilani, muxu kǝme saxan muxu tonge solofere muxu firin. **10** Ara xabilani, muxu kǝme sennin muxu tonge suulun e nun firin. **11** Paxata-Moyaba xabilani, Yosuwe nun Yowaba yixetene ye, muxu wuli firin kǝme solomasǝxe muxu fu nun solomasǝxe. **12** Elan xabilani, muxu wuli keden muxu kǝme firin muxu tonge suulun e nun naanin. **13** Satu xabilani, muxu kǝme solomasǝxe muxu tonge naanin e nun suulun. **14** Sakayi xabilani, muxu kǝme

solofere muxu tonge sennin. **15** Binuwi xabilani, muxu kǝme sennin muxu tonge naanin e nun solomasǝxe. **16** Bebayi xabilani, muxu kǝme sennin muxu mǝxǝŋen nun solomasǝxe. **17** Asagada xabilani, muxu wuli firin muxu kǝme saxan muxu mǝxǝŋen nun firin. **18** Adonikami xabilani, muxu kǝme sennin muxu tonge sennin e nun solofere. **19** Bigiwayi xabilani, muxu wuli firin muxu tonge sennin e nun solofere. **20** Adin xabilani, muxu kǝme sennin muxu tonge suulun e nun suulun. **21** Ateri xabilani, Xesekiya yixetene ye, muxu tonge solomanaanin muxu solomasǝxe. **22** Xasun xabilani, muxu kǝme saxan muxu mǝxǝŋen nun solomasǝxe. **23** Besayi xabilani, muxu kǝme saxan muxu mǝxǝŋen nun naanin. **24** Xarifi xabilani, muxu kǝme muxu fu nun firin. **25** Gabayon kaane ye, muxu tonge solomanaanin muxu suulun. **26** Betelemi kaane nun Netofa kaane ye, muxu kǝme muxu tonge solomasǝxe muxu solomasǝxe. **27** Anatǝti kaane ye, muxu kǝme muxu mǝxǝŋen nun solomasǝxe. **28** Beti-Asamaweti kaane ye, muxu tonge naanin muxu firin. **29** Kiriyaŋi-Yeyarin kaane nun Kefira kaane nun Beroti kaane ye, muxu kǝme solofere muxu tonge naanin muxu saxan. **30** Rama kaane nun Geba kaane ye, muxu kǝme sennin muxu mǝxǝŋen nun keden. **31** Mikimasi kaane ye, muxu kǝme muxu mǝxǝŋen nun firin. **32** Beteli kaane nun Ayi kaane ye, muxu kǝme muxu mǝxǝŋen nun saxan. **33** Nebo bonna muxune ye, muxu tonge suulun muxu firin. **34** Elan bonne xabilan muxune ye, muxu wuli keden muxu kǝme firin muxu tonge suulun e nun naanin. **35** Xarimi xabilani, muxu kǝme saxan muxu mǝxǝŋe. **36** Yeriko kaane ye, muxu kǝme saxan muxu tonge naanin e nun suulun. **37** Lodi kaane nun Xadidi kaane nun Ono kaane ye, muxu kǝme solofere muxu mǝxǝŋen nun keden. **38** Sena kaane ye, muxu wuli saxan muxu kǝme solomanaanin muxu tonge saxan. **39** Saraxaralane ye: Yeǝdaya xabilani Yosuwe a denbayani, muxu kǝme solomanaanin muxu tonge solofere muxu saxan. **40** Imeri xabilani, muxu wuli keden muxu tonge suulun muxu firin. **41** Pasaxuri xabilani, muxu wuli keden muxu kǝme firin muxu tonge naanin e nun solofere. **42** Xarimi xabilani, muxu wuli keden muxu fu nun solofere. **43** Lewi bǝnsǝnna muxune ye: Yosuwe xabilani, Kadamile nun Hodawi yixetene ye, muxu tonge solofere e nun naanin. **44** Beti baane: Asafi xabilani, muxu kǝme muxu tonge naanin e nun solomasǝxe. **45** Kantan muxune: Salun nun Ateri nun Talamǝn nun Akubu nun Xatita nun

Sobayi yixetene ye, muxu keme muxu tonge saxan e nun solomasexe. 46 Ala Batu Banxin walikene: E benbane nan itoe ra: Sixa nun Xasufa nun Tabayoti nun 47 Kerosi nun Siya nun Padon nun 48 Lebana nun Xagaba nun Salamayi nun 49 Xanan nun Gideli nun Gaxara nun 50 Reyaya nun Resin nun Nekoda nun 51 Gasami nun Yusa nun Paseya nun 52 Besayi nun Meyunin nun Nefusin nun 53 Bakabuku nun Xakufa nun Xaraxuru nun 54 Basaliti nun Mexida nun Xarasa nun 55 Barakosi nun Sisera nun Tama nun 56 Nesixa e nun Xatifa. 57 Sulemani a walikene yixetene ye: Sotayi nun Sofereti nun Perida nun 58 Yaala nun Darakon nun Gideli nun 59 Sefati nun Xatili nun Pokereti-Hasebayin nun Amøn. 60 Ala Batu Banxin walikene birin malanxina e nun Sulemani a walikene: muxu keme saxan muxu tonge solomanaanin muxu firin. 61 Muxuni itoe nan keli Tela-Mela nun Tela-Harasa nun Kerubu-Adan nun Imeri taane yi, koni ne mi e xabilane kolon naxan a yite fa fala Isirayila kaan nan e ra: 62 Delaya nun Tobiya nun Nekoda yixetene ye, muxu keme sennin muxu tonge naanin e nun firin. 63 Saraxaralina ndee yi na: Xobaya nun Hakosi nun Barasilayi yixetene. Barasilayi bata Galadi kaan Barasilayi a dii temen dɔxɔ, na nan xili te a xun ma. 64 E yi kata e xabilane fendeni bɔnsɔn kedin keli, koni e mi e to. E yi e ba saraxarali wanla ra. 65 Yamana kannu yi yamarin fi a muxu yo nama se sarijanxine don e ye han saraxaralina nde yi sɔto naxan masensen ti seene rawale, Yurima nun Tumin. 66 Yamaan birin malanxina, muxu wuli tonge naanin muxu wuli firin muxu keme saxan muxu tonge sennin. 67 E walike xemene nun e walike jaxanle mi yi ne ye, ne muxu wuli solofere muxu keme saxan tonge saxan e nun solofere nan yi a ra. Beti ba xemene nun a jaxanle, muxu keme firin tonge naanin e nun suulun yi e ye. 68 Nɔgɔmen keme naanin tonge saxan e nun suulun, sofanla wuli sennin keme solofere e nun mɔxɔne fan yi na. 69 Denbaya xun wuyaxi seene fi nen wanla fe yi. Yamana kannu yi xemaan kilo solomasexe e nun a tagi nun igelengen tonge suulun e nun saraxarali domaan keme suulun tonge saxan fi wanla fe yi. 70 Denbaya xunne yi xemaan kilo keme kilo tonge solofere nun gbeti fixen kilo wuli keden kilo keme ba. 71 Isirayila yamaan muxu dɔnxene yi xemaan kilo keme tonge solofere nun gbeti fixen kilo wuli keden ba e nun saraxarali domaan tonge sennin e nun solofere. 72 Saraxaraline nun Lewi bɔnsɔnna muxune nun kantan

tiine nun beti baane nun Ala Batu Banxin walikene nun Isirayila yamaan birin yi dɔxɔ e taane yi. Nɛen kike soloferedena a liye, Isirayila kaane birin bata yi dɔxɔ e taane yi.

8 Yamaan birin yi e malan yama malandeni Ige Dɛen na alo muxu kedenna. E yi a fala sebeli tiina Esirasi xa a xa fa Musaa sariya kedin na, Alatala sariyan naxan yamari Isirayila kaane ma. 2 Saraxaralina Esirasi yi fa sariya kedin na yamaan birin yetagi, xemene nun jaxanla, naxanye birin yi nɔe falan famunje e naxan mema. Kike solofreden xi singen nan yi a ra. 3 Keli xɔtɔnni han yanyi tagini, Esirasi na sariya kedin xaranma yamaan yetagi Ige Dɛen na, xemene nun jaxanle nun naxanye birin yi a famuma. Yamaan birin yi tuli matixi sariya kedin xaran xuiin na. 4 Sebeli tiina Esirasi yi tixi wudi gbingbinna nan fari, naxan yi rafalaxi na feen ma. Matitiya nun Sema nun Anaya nun Yuriya nun Xiliki nun Maaseya yi tixi a fema a yiifanna ma. Pɛdaya nun Mikayeli nun Malakiya nun Xasun nun Xasabadana nun Sakari nun Mesulan tixi a komenna ma. 5 Esirasi yi kedin nabi yamaan birin yetagi, a tixi e birin xun ma, a to kedin nabi, yamaan birin yi keli. 6 Esirasi yi Alatala tantun, Ala naxan gbo, yamaan yi lu e yiine yite kore, e yi a yabi, e naxa, “Amina! Amina!” Nayi, e birin yi e xinbi sin, e yetagine yi lan bɔxɔn ma, e yi Alatala batu. 7 Lewi bɔnsɔnna muxune, Yosuwe nun Bani nun Serebi nun Yamin nun Akubu nun Sabetayi nun Hodiya nun Maaseya nun Kelita nun Asari nun Yosabadi nun Xanan nun Pelaya, ne yi lu yamaan tixin xaranje sariyan ma. 8 Ne yi lu Alaa sariya kedin xaranje yamaan xa, e lu a yebe e xa alogo e birin xa nɔ a famunje. 9 Nayi, yamana kannu Neyemi nun Esirasi naxan yi saraxaraliyaan nun sebeli tiini, e nun Lewi bɔnsɔnna muxun naxanye yi yamaan xaranma, ne yi a fala yamaan xa, e naxa, “Lɔxɔni ito bata rasarijan Alatala xa, e Ala. E nama lu sunuxi, e lu wuge.” Bayo yamaan birin yi wugama nen, e nema yi sariya kedin xaran xuiin namema. 10 Neyemi yi a fala e xa, a naxa, “E sa donse fajin don, e yi minse fajin min, e siga ndee ra muxune xa se mi naxanye yii, amasɔto to lɔxɔn bata findi lɔxɔ sarijanxin na en Marigin xa. E nama e yete rasunu, bayo Alatalaa sewan nan findixi e senben na.” 11 Lewi bɔnsɔnna muxune yi yamaan birin masabari, e naxa, “E sabari, amasɔto to lɔxɔn sarijan, e nama e yete rasunu!” 12 Yamaan birin yi siga e degeden nun e

mindeni. Se mi yi naxanye yii, e yi ndee so ne yii. E lu sewa gbeeni, bayo e bata yi falane famu naxanye yeba e xa. **13** Na xotɔn bode, Isirayila denbaya xunne nun saraxaraline nun Lewine birin yi e malan sebɛli tiina Esirasi fema alogo e xa sariya falane ramɛ. **14** Alatala sariya kedin naxan so Musa yii, a yi sebɛxi na kui fa fala, Isirayila kaane yi lanma e lu bubune kui Bubu Kui Sanla waxatini jɛɛn kike solofereden na. **15** E lan e yi na rali birin ma e taane yi e nun Yerusalem yi, e naxa, “Ɛ mini geya yireni, ɛ fa Oliwi bili yii taa kui xiine nun burunna xiine nun miriti bili yiine nun tugu yiine nun wudi yii jingixine ra alogo ɛ xa fa Bubu Kui Sanla raba alo a sebɛxi kii naxan yi.” **16** Nayi, Isirayila yamaan yi mini, e siga jɔxɔnde fendeni, alogo e xa fa Bubu Kui Sanla raba e banxine dɛ ra hanma e sansanne kui, hanma Ala Batu Banxin sansanne kui, e nun yama malandene yi Ige Dɛɛn nun Efirami Dɛɛn na. **17** Muxun naxanye birin yi malanxi na, naxanye yi faxi sa keli konyiyani, ne birin yi bubune ti, e dɔxo e bubune yi. Keli Nunu a dii xɛmɛn Yosuwe a waxatin ma han na waxatini, Isirayila kaane munma yi na fe sifan liga singen, sewa gbeen yi lu e tagi. **18** E lu Alaa sariya kedin xaranɲɛ lɔxo yo lɔxo keli xi singen ma han lɔxo dɔnxɛna. E yi sanla raba xi solofere, yamaan yi e malan xi solomasɛɛdeni, alo sariyana a falaxi kii naxan yi.

9 Kiken xi mɔxɔɲɛde lɔxoni, Isirayila kaane yi e malan, e sun, e kasa benbeli dugine ragodo e ma, e burunburunna sa e xunne yi sunu taxamasenne ra. **2** Naxanye yi findixi Isirayila kaane ra, ne yi e masiga xɔɲene ra, e yi e ti e yulubine ra e nun e benbane gbeene. **3** E to keli, e ti, e yi Alatala, e Alaa sariya kedin xaran waxati xunkuye. Yanyin na, e yi e xinbi sin Alatala yetagi, e Ala, e mɔn yi e ti e yulubine ra han waxati xunkuye. **4** Lewi bɔnsɔnna muxuna ndee yi keli, e te gbingbinna fari, Yosuwe nun Bani nun Kadamile nun Sebanuha nun Bunni nun Serebi nun Bani nun Kenani. Ne yi e xuini te Alatala ma, e Ala. **5** Lewi bɔnsɔnna muxune, Yosuwe nun Kadamile nun Bani nun Xasabaneya nun Serebi nun Hodiya nun Sebanuha nun Petaxi yi a fala, e naxa, “Ɛ keli, en Alatala, en ma Ala tantun habadan han habadan!” E yi Ala maxandi, e naxa, “Nxu i xili binyen tantunma, tantunna naxan dangi binyen nun tantunna birin na! **6** I tan nan keden pe Alatala ra, i tan naxan ariyanna nun kore xɔnna nun sarene birin daxi, i bɔxo xɔnna

nun a yi seene birin da, e nun baane nun e yi seene birin. I yi niin bira niimaseene birin yi, malekane birin e xinbi sinma i tan nan bun. **7** I tan Marigina Alatala, i tan nan Iburama sugandi, i yi a ramini Yuru taani Babilɔn yamanani, i yi a xili sa, Iburahima. **8** I yi a to a dɛnkeleyaxi i ma a bɔɲeni, i yi layirin xidi e tagi a i xa Kanan kaane nun Xitine nun Amorine nun Perisine nun Yebusune nun Girigasane yamanan so a bɔnsɔnna yii. I dɛ xuiin nakamali nɛn bayo i tinxin.” **9** “I nxu benbane jaxankatan to nɛn Misiran yi, i yi e gbelegbele xuiin mɛ Gbala Baan dɛ. **10** I yi taxamasenne nun kabanako feene yita Firawona nun a walikene nun a yamanan muxune birin na. Amasɔto i a kolon e nxu benbane suxu kii naxan yi wasoni. I yi xinla sɔto naxan gbo han to. **11** I yi baa igeni taxun e yɛɛ ra, e yi baani gidi a yixaren na, koni i tilin igen nadin nɛn e sagatan muxune xun ma alo gɛmɛna igen xɔnna ma. **12** I yi kundaan ti e yɛɛ ra yanyin na, i yi tɛ dɛgen ti e yɛɛ ra kɔɛɛn na naxan yi kirani yalanma e yɛɛ ra. **13** I godo nɛn keli kore, i falan ti e xa Sinayi geyaan fari. I yi i gelene fala e xa naxanye tinxin, e nun jɔndin sariyan nun tɔnne nun yamarin naxanye fan. **14** Fata i ya walikɛɛn Musa ra, i yi i ya Matabu Lɔxo sarijanxin nun i ya yamarine nun sariyane nun tɔnne yita e ra. **15** Kamen to e suxu, i yi donseen nagodo e ma keli kore. Min xɔnla to e suxu, i yi igen namini fanyeni, i yi a fala e xa a e xa so yamanani i kɔlo naxan so fe ra e benbane yii. **16** Koni nxu benbane murute nɛn wasoni, e mi i ya yamarine suxu. **17** E mi tin e suxɛ, e jinan i ya kabanako feene xɔn i naxanye liga e xa, e yi e bɔɲeni xɔdɔxo e murutɛni, e yi a nata a e xa yɛɛrati gbɛtɛ sugandi, e xɛtɛ e konyiyani Misiran yi. Koni i tan mi i mɛ e ra. Ala nan i tan na naxan muxune mafeluma e yulubine ra. I dija, i kininkinin, i mi xɔlɔn xulɛn, i ya hinanna gbo. **18** E yi jinge di sawura wure daxin nafala e yɛtɛ xa, e naxa, ‘En ma Ala nan ito ra, naxan en naminixi Misiran yi.’ E yi fala jaxine ti i ma. **19** Koni i ya kininkinin gbeeni, i mi e rabɛɲin tonbonni. Kundaan lu nɛn e yɛɛ ra kiraan xɔn yanyin na, tɛ dɛgen yi lu e yɛɛ ra kɔɛɛn na. **20** I yi i ya Nii faɲin naso e yi alogo a xa e xaran, i yi i ya Manna donseen so e yii, e nun igena, min xɔnla to e suxu. **21** I yi i yengi dɔxo e xɔn ma tonbonni jɛɛ tonge naanin, sese mi dasa e ma, e dugine mi kala, e sanne mi kusin. **22** I yamanane nun siyane so nɛn e yii, i yi e rabilinna yamanane birin sa e sagoni. E yi Xɛsibɔn mangan Sixɔn ma yamanan tongo e gbeen na, e nun Ogo a

yamanana, Basan mangana. **23** I yi e diine rawuya ayi alo sarene kore xonna ma, i yi e raso yamanani, i kolo e benbane xa dɛnaxan ma fe yi. **24** E yixetene yi so menni, e dɔxo na yamanani, i yi na yamanan muxune rayagi e yetagi, Kanan kaane, i yi e sa e sagoni, e mangane nun e yamanane muxune, alogo e xa e raba e waxonna ra. **25** E yi taa makantanxine tongo e nun boxo fajina, e yi banxine tongo naxanye yi rafexi se fajin sifan birin na, e nun xɔpinne nun manpa binle nun oliwi binle nun wudi bogila wuyaxine, e yi e don, e yi lugo, e yi gbo, e yi lu heri gbeeni.” **26** “Koni, e keli nen e yi murute i xili ma. E yi e xun xanbi so i ya sariyane yi, e yi nabine faxa, naxanye yi e mabandunma i ma, e yi Ala rayelefu gbeene ti. **27** Nayi, i yi e sa e yaxune sagoni, ne yi e tɔrɔ. Koni e jaxankatan waxatini, e xui ramini nen i ma, i yi e xuiin name kore xonna ma, i yi e yabi i ya kininkinin gbeeni, i yi e xunba muxune fi e ma, naxanye e ba e yaxune yii. **28** Koni, e xɔrɔyaan soto nen tun, e mon yi fe jaxine liga folo i yee ra. Nayi, i yi e rabepin e yaxune yii, e yi e no. Koni, e mon yi e xui ramini i ma, i yi e xuiin name kore xonna ma i ya kininkinin gbeeni, i mon yi e rakisi sanja ma wuyaxi. **29** I yi e mabandun i ya sariyan ma, koni e yi findi wasodene ra, e mi e tuli mati i ya yamarine ra. E yi yulubin liga e i ya kiti saxine kala, anu naxan na e suxu, na kannan nii rakisin sɔtɔma nen e xɔn. E yi murute, e tondi e tuli matiye i tan na. **30** I ti nen e bun ma jee wuyaxi, i yi e rakolon i ya Nii Sarijanxin na nabine xɔn, koni e mi e tuli mati. Nayi, i yi e sa e yamana gbeteye sagoni. **31** I ya kininkinin gbeeni, i mi e raxori, i mi e rabepin, bayo Ala dijaxi kininkininxin nan i tan na.” **32** “Iki, nɔ Ala, Ala gbeena, senbɛmana, i tan naxan magaxu, i tan naxan i ya layirin nakamalima i ya hinanni, fe xolen naxanye nɔ sɔtɔxi, e nun nɔ mangane nun nɔ nabine nun nɔ saraxaraline nun nɔ benbane nun yamaan birin, i nama ne yate fe fuune ra, sa folo Asiriya mangane waxatin ma han to. **33** Feen naxanye birin nɔ sɔtɔxi, i tan tinxin ne birin yi, bayo i ya lannayaan yita nen, koni nɔ tan fe jaxin nan liga. **34** Nɔ mangane nun nɔ kuntigine nun nɔ saraxaraline nun nɔ benbane mi i ya sariyane suxu, e mi i ya yamarine suxu, e nun i ya maxadi xuine, i yi naxanye falama e xa. **35** E yi e yamanani waxatin naxan yi heri gbeeni i naxan so e yii, yamana sabatixi gbeeni i naxan sa e sagoni, e mi i batu, e mi xete e kɛwali jaxine fɔxo ra. **36** To, nɔ bata findi

konyine ra yamanani i naxan so nɔ benbane yii alogo e xa balo na bogiseene nun a se fajine ra. **37** A seene bata findi mangane gbeene ra i nɔ saxi naxanye sagoni masoto nɔ yulubine xɔn. Nɔ nun nɔ xuruseene bata lu e sagoni, nɔ lu jaxankata gbeeni.” **38** “Amasoto na feene birin xɔn, nɔ tan Isirayila kaane bata lan feni ito ma, nɔ yi a sebe, nɔ kuntigine nun Lewi bɔnsɔnna muxun naxanye nɔ ye, e nun nɔ saraxaraline yi e yii fɔxɔn sa a ma.”

10 Muxun naxanye e yii fɔxɔn sa a ma, ne xinle ni itoe ra: Yamana kannan Neyemi, Xakaliya diina e nun Sedeki nun **2** Seraya nun Asari nun Yeremi nun **3** Pasaxuri nun Amari nun Malakiya nun **4** Xatusi nun Sebaniha nun Maluku nun **5** Xarimi nun Meremoti nun Abadi nun **6** Daniyeli nun Gineton nun Baruku nun **7** Mesulan nun Abiya nun Miyamin nun **8** Maasiya nun Biligayi nun Semaya. Saraxaraline nan yi ne ra. **9** Lewine ye: Asani a dii xemene Yosuwe nun Xenadadaa diine Binuwi nun Kadamile **10** e nun e ngaxakedenne: Sebaniha nun Hodiya nun Kelita nun Pelaya nun Xanan **11** nun Mika nun Rexobo nun Hasabi **12** nun Sakuru nun Serebi nun Sebaniha **13** nun Hodiya nun Bani nun Beninu. **14** Yamaan kuntigine ye: Parosi nun Paxata-Moyaba nun Elan nun Satu nun Bani nun **15** Bunni nun Asagada nun Bebayi nun **16** Adoniya nun Bigiwayi nun Adin nun **17** Ateri nun Xesekiya nun Asuru nun **18** Hodiya nun Xasun nun Besayi nun **19** Xarifi nun Anatoti nun Nebayi nun **20** Magapiyasi nun Mesulan nun Xesiri nun **21** Mesesabele nun Sadaki nun Yaduwa nun **22** Pelati nun Xanan nun Anaya nun **23** Hoseya nun Xananiya nun Xasubu nun **24** Haloxesi nun Pilixa nun Sobeki nun **25** Rexun nun Xasabana nun Maaseya nun **26** Axiya nun Xanan nun Anan nun **27** Maluku nun Xarimi nun Banaha. **28** Yamaan dɔnxen birin yi sa e fari, saraxaraline nun Lewine nun taan de kantanne nun beti baane nun Ala Batu Banxin walikene nun muxun naxanye birin xete nɔ rabilinna siyane fɔxo ra, e bira Alaa sariyan fɔxo ra, e yi e mali, e jaxanle nun e dii xemene nun e dii temen naxanye birin yi nɔ feen famunje. **29** E birin yi sa e ngaxakedenne fari, e kuntigine. E yi e kolo a e xa Alaa sariyan suxu, a walikɛn Musa naxan nalixi nɔ ma, nɔ yi nɔ Marigina Alatalaa sariyane nun yamarine birin suxu. **30** Nɔ bata yi de xuiin tongo a nɔ nama nɔ dii temene fi siya gbetene ma naxanye dɔxi nɔ yamanani, nɔ mon mi e dii

temene tongoma naxanle ra nxo dii xemene xa. **31** Na muxune yulane na fa Matabu Loxoni hanma loxo sarijanxine yi, nxu nama yulaya se yo sara ne ma hanma donseene. Nxu yi boxon fan lu a yi a matabu jee soloferedeni, nxu mi xeen bima na jeen na, nxu donle fan nakala ayi. **32** Nxu bata sariyan sa fa fala nxu xa gbeti fixen garamu naanin fi jee yo jee, a findi nxo Ala Batu Banxin nawali seen na. **33** A xa findi buru rasarijanxin saren na, e nun bogise saraxane nun saraxa gan daxine nun saraxan naxanye bama Matabu Loxone ma e nun kike nenen sanle hanma sali loxo gbeteye ma. A tan nan mon findima saraxa gbeteye saren na saraxa sarijanxine nun yulubi xafari saraxane ra Isirayila xa, e nun wanle birin en ma Ala Batu Banxini. **34** Nxu tan saraxaraline nun Lewine nun yamaan bata masensenna ti alogo a xa kolon muxune lanma e xa fa yegen na waxatin naxan yi Ala Batu Banxini denbaya yeen ma jee yo jee alogo a xa gan Alatalaa saraxa gandeni, en ma Ala, alo a sebexi kii naxan yi sariyani. **35** Nxu bata de xuiin tongo a nxu xa fa nxo boxon bogise singene nun wudi bogi singene ra Alatala Batu Banxini, **36** nxu yi fa nxo dii singene nun nxo xuruseene dii singene ra Ala yetagi, alo sariyana a falaxi kii naxan yi. Nxu fa nxo jingene dii singene nun yexene nun siine dii singene ra Ala Batu Banxini. Nxu yi e so saraxaraline yii naxanye walima Ala Batu Banxini. **37** Nxu mon yi siga nxo sansi singene ra saraxaraline xon Ala Batu Banxin se ramaradeni, e nun bogise saraxane nun wudi bogine nun manpa nenen nun turena. Boxon bogiseene yaganna yi findi Lewine gbeen na. E tan nan yati e rasuxuma taane birin yi nxu denaxanye bima. **38** Harunaa yixetena nde luma nen Lewine foxo ra e nema sigc yaganne tongodeni waxatin naxan yi. Lewine yi na yaganna doxode fuden xali Ala Batu Banxin gbeti ramaradeni. **39** Isirayila kaane nun Lewine sigama nen e murutune nun manpa nene nun turen yaganne ra Ala Batu Banxin se ramaradeni, yire sarijanxin goronne denaxan yi, Ala Batu Banxin saraxaraline nun de kantanne nun beti baane fan luma menna nin. Na kiini, en mi en ma Ala Batu Banxin nabepinma.

11 Yamana kanne yi fa doxo Yerusalen yi. Yamaan donxen yi masensenna ti alogo muxu fu ye, muxu keden xa fa doxo Yerusalen yi, taa rasarijanxina. Muxu fu ye, muxu solomanaanin nae luye nen e kon taane yi. **2** Yamaan yi barika bira na muxune xa

naxanye birin tin e xa fa doxo Yerusalen yi. **3** Yamana kanni itoe nan fa doxo Yerusalen yi, koni Isirayila kaana ndee nun saraxaraline nun Lewine nun Ala Batu Banxin walikene nun Sulemani a banxin walikene denbayane, ne yi lu e taani Yuda yi, birin yi lu a kon yi. **4** Yuda kaana ndee nun Bunyamin kaana ndee fa doxo nen Yerusalen yi. Yuda bonsonna muxune ye: Ataya. Yusiya nan Ataya soto. Sakari nan Yusiya soto. Amari nan Sakari soto. Sefati nan Amari soto. Mahalaleli nan Sefati soto Peresi xabilani. **5** Maaseya fan fata Yuda bonsonna nan na. Baruku nan Maaseya soto. Kola-Xose nan Baruku soto. Xasaya nan Kola-Xose soto. Adaya nan Xasaya soto. Yoyaribi nan Adaya soto. Sakari nan Yoyaribi soto Silo xabilani. **6** Peresi yixeten naxanye yi doxi Yerusalen yi, sofa kendene: muxu keme naanin muxu tonge sennin e nun solomasexe. **7** Bunyamin bonsonna muxune ye: Salu. Mesulan nan Salu soto. Yowedi nan Mesulan soto. Pedaya nan Yowedi soto. Kolaya nan Pedaya soto. Maaseya nan Kolaya soto. Itiyeli nan Maaseya soto. Yesaya nan Itiyeli soto. **8** Salu nun a foxorabirane nan yi a ra, Gabayi nun Salayi. Xemene gbansanna, muxu keme solomanaanin muxu moxojen nun solomasexe nan yi Yerusalen yi Bunyamin bonsonna muxune ra. **9** Sikiri a diin Yoweli nan yi e sofa kuntigin na, Hasenuwaa dii xemen Yuda nan yi taan kuntigi firinden na. **10** Saraxaraline ye: Yoyaribi a dii xemen Yedaya nun Yakin nun **11** Xiliki a diin Seraya. Mesulan nan Xiliki soto. Sadoki nan Mesulan soto. Merayoti nan Sadoki soto. Axituba nan Merayoti soto. Axituba yi findixi Ala Batu Banxin kuntigin nan na. **12** Ne nun e walikene yi muxu keme solomasexe muxu moxojen nun firin nan xun na naxanye yi walima Ala Batu Banxini. Yeroxamaa diina Adaya yi findixi denbaya xunna nan na. Pelaliya nan Yeroxama soto. Amasi nan Pelaliya soto. Sakari nan Amasi soto. Pasaxuri nan Sakari soto. Malakiya nan Pasaxuri soto. **13** Adaya nun a ngaxakedenne, muxu keme firin muxu tonge naanin e nun firinna findi denbaya xunne nan na. Asareli a diina Amasasayi fan findi kuntigin nan na. Axasayi nan Asareli soto. Mesilimoti nan Axasayi soto. Imeri nan Mesilemoti soto. **14** Sofa kenden muxu keme muxu moxojen nun solomasexe nan yi Amasasayi nun a ngaxakedenne ye. Hagedolimi a diin Sabadiyeli nan yi e yamaan xunna ra. **15** Lewi bonsonna muxune ye: Xasubu a diin Semaya. Asirikami nan Xasubu soto. Hasabi nan Asirikami soto. Bunni nan Hasabi soto. **16** Sabetayi

nun Yosabadi Lewi kuntigine ye, ne nan yi wanle kema naxanye yi Ala Batu Banxin fari ma. **17** Mikaa diin Matani fan yi na. Sabidi nan Mika soto. Asafi nan Sabidi soto. Asafi nan yi barika bira betin bama sali waxatini. Bakabukiya fan yi na naxan yi findixi kuntigi firinden na a ngaxakedenne ye, e nun Samuwaa diina Abada, Galali mamandenna, Yedutun tolobitana. **18** E birin malanxina, Lewi bonsonna muxune, muxu keme firin muxu tonge solomasexe e nun naanin nan yi taa sarjnanxini. **19** De kantanne ye: Akubu nun Talamon nun e ngaxakedenna naxanye yi deene kantanma, muxu keme muxu tonge solofere e nun firin. **20** Isirayila kaa donxene, saraxaraline nun Lewi bonsonna muxune, ne yi doxi Yuda taane nin e benbane boxone yi. **21** Ala Batu Banxin walikene yi doxi Ofeli geyaan nan fari. Sixa nun Gisipa nan yi e kuntigine ra. **22** Bani a diin Yusi nan yi Lewine xun na Yerusalen yi. Hasabi nan Bani soto. Matani nan Hasabi soto. Mika nan Matani soto Asafi bonsonni. Asafi yixetene yi findixi Ala Batu Banxin beti baane nan na. **23** Beti baane yi mangana yamarin nan bun e nun sariyana lan lxo yo lxo betin ma. **24** Mesesabele a diin Petaxi, Yudaa diin Sera yixetene ye, na nan yi Isirayila yamaan xunna ra Perise mangan dexon. **25** Yuda bonsonna muxuna ndee yi sa doxo banxidene nun taadine yi: Kiriyaati-Aruba nun Dibon nun Yekabaseli nun e rabilinne taane yi, **26** e nun Yosuwe nun Molada nun Beti-Peleti taane nun **27** Xasari-Suwali nun Beriseba nun e rabilinne taane, **28** e nun Sikilaga nun Mekona nun a rabilinna taane yi, **29** e nun En-Rimon nun Sora nun Yaramuti taane nun **30** Sanowa nun Adulan nun e rabilinne taane nun Lakisi nun a xene nun Aseka taan nun a banxidene. Nanara, e yi doxi Beriseba yi siga han Hiron lanbanna. **31** Bunyamin bonsonna muxun naxanye sa keli Geba yi, ne yi doxi Mikimasi nun Aya nun Beteli taane nun e rabilinne nun **32** Anatoti nun Nobi nun Ananiya nun **33** Xasori nun Rama nun Gitayin nun **34** Xadidi nun Seboyin nun Nebalati nun **35** Lodi nun Ono taane nun Yiirawanle Lanbanna nin. **36** Yuda yamanan Lewi bonsonna muxuna ndee yi doxi Bunyamin yamanan nin.

12 Saraxaralini itoe nun Lewi bonsonna muxuni itoe nun Selatili a diin Sorobabeli nun Yosuwe nan xete sa keli konyiyani yamana gbete yi: Seraya nun Yereimi nun Esirasi nun **2** Amari nun Maluku nun Xatusi **3** nun Sekani nun Rexun nun Meremoti **4**

nun Yido nun Gineton nun Abiya **5** nun Miyamin nun Maadiya nun Biliga **6** nun Semaya nun Yoyaribi nun Yedaya **7** nun Salu nun Amoki nun Xiliki nun Yedaya. Xemeni itoe nun e ngaxakedenne nan findi saraxarali kuntigine ra Yosuwe waxatini. **8** Lewi bonsonna muxune nan yi itoe ra: Yosuwe nun Binuwi nun Kadamile nun Serebi nun Yuda nun Matani. Matani nun a muxune nan yi barika bira betine bama. **9** E ngaxakedenne Bakabukiya nun Yunni yi tixi e yetagi Ala batu waxatini. **10** Yosuwe yi Yoyakin soto, Yoyakin yi Eliyasibi soto, Eliyasibi yi Yoyada soto. **11** Yoyada yi Yonatan soto, Yonatan yi Yaduwa soto. **12** Yoyakin yi saraxarali kuntigiyani waxatin naxan yi, muxuni itoe nan yi saraxaraline denbayane xunne ra: Meraya, Serayaa denbaya xunna e nun Xananiya, Yereimi a denbaya xunna **13** Esirasi, Mesulan ma denbaya xunna e nun Yehoxanan, Amari a denbaya xunna **14** e nun Yonatan, Maluku a denbaya xunna e nun Yusufu, Sebanihaa denbaya xunna **15** e nun Xarimi, Adanaa denbaya xunna e nun Xelekayi, Merayoti a denbaya xunna **16** e nun Sakari, Yido a denbaya xunna e nun Mesulan, Gineton ma denbaya xunna **17** e nun Sikiri, Abiyaa denbaya xunna e nun Mowadi, Miniyamin ma denbaya xunna **18** e nun Samuwa, Biligaa denbaya xunna e nun Yehonatan, Semayaa denbaya xunna **19** e nun Matenayi, Yoyaribi a denbaya xunna e nun Yusi, Yedayaa denbaya xunna **20** e nun Kalayi, Salayi a denbaya xunna e nun Eberi, Amoki a denbaya xunna **21** e nun Hasabi, Xiliki a denbaya xunna e nun Nataneli, Yedayaa denbaya xunna. **22** Eliyasibi nun Yoyada nun Yoxanan nun Yaduwa waxatini, Lewi bonsonna muxune denbaya xunne nun saraxaraline xinle sebe nen Perise kaan Dariyusi a mangayaan waxatini. **23** Lewi bonsonna muxune denbaya xunne fan xinle sebe nen taruxu kedine kui han Eliyasibi a diin Yoxanan waxatina. **24** Hasabi nun Serebi nun Kadamile a diin Yosuwe nan yi Lewi bonson xunne ra. Ala batu waxatini, e yi tima nen e ngaxakedenne yetagi, e Ala tantunma, e barikan bira Ala xa e ti yeen ma alo Dawuda, Alaa muxuna a yamarixi kii naxan yi. **25** Matani nun Bakabukiya nun Abadi nun Mesulan nun Talamon nun Akubu nan yi Ala Batu Banxin se ramaraden de kantanne ra. **26** E yi walima Yosuwe a dii xemen Yoyakin waxatin nin, Yosadaki mamandenna, e nun yamana kanna Neyemi waxatin nun saraxaraliin nun sebali tiina Esirasi waxatini. **27** Yerusalen yinna to yelin nafale, e yi sa Lewine tongo

alogo e mon xa fa dōxo Yerusalen yi e lan naxanaxani bayo Yerusalen yinna bata yelin tiye, e yi Ala tantun beti ba karijanne nun kondenne nun bōlonne ra. **28** Beti baane yi e malan keli Netofa banxidene ra Yerusalen rabilinna nun **29** Beti-Giligali taan nun Geba nun Asamaweti yamanane yi. Beti baane bata yi taane ti Yerusalen rabilinni. **30** Saraxaraline nun Lewine yi e yete rasarijan, e yamaan fan nasarijan, e nun taan deene nun a yinna. **31** N yi yamarin fi a Yuda kuntigine xa te yinna xuntagi. N yi beti baane yitaxun firinna ra. A singen yi siga yiifanna ma yinna xuntagi Xuruse Neje Deen binni. **32** Hosaya nun Yuda kuntigine fōxo kedenna biraxi e fōxo ra, **33** e nun Asari nun Esirasi nun Mesulan nun **34** Yuda nun Bunyamin nun Semaya nun Yereimi **35** e nun saraxaraline diine, xōtane yi naxanye yii e nun Yonatan ma diin Sakari. Semaya nan Yonatan soto. Matani nan Semaya soto. Mikahu nan Matani soto. Sakuru nan Mikahu soto. Asafi nan Sakuru soto. **36** A ngaxakedenne fan yi a fōxo ra: Semaya nun Asareli nun Milalayi nun Gilalayi nun Maayi nun Nataneli nun Yuda nun Xanani. Dawuda, Alaa muxuna beti ba seene yi e yii. Sebela tiina Esirasi nan yi tixi e yee ra. **37** E to Tigi Deen li, e yi te Dawudaa Taan kiraan xon, te yinna xuntagi, Dawudaa banxin xun ma, siga han Ige Dena sogeteden binni. **38** Beti baane dōxoden firinden yi siga komenna ma. Nxu nun yama dōnxen yi bira e fōxo ra yinna xuntagi. Nxu yi dangu Buru Ganden Sangansoon na siga han yinna yigbo yirena, **39** han Efirami Deen xanbi ra, siga han De Fonna, dangu Yexe Deen na, han Xananeli Sangansona e nun sangansoon naxan xili Keme han Yexee So Dena. E yi ti Kantan Ti Deen na. **40** Na xanbi ra, beti ba dōxo firinne yi ti Ala Batu Banxini. Nxu nun kuntigine yi ti naxanye yi n fōxo ra, e nun **41** saraxaraline: Eliyakimi nun Maaseya nun Miniyamin nun Mikahu nun Eliyowenayi nun Sakari nun Xananiya. E xōtane suxi e yii. **42** Maaseya nun Semaya nun Eleyasari nun Yusi nun Yehoxanan nun Malakiya nun Elan nun Eseri fan yi na. Yesiraxiya nan yi beti baane yeeratiin na. **43** Muxune yi saraxa wuyaxi ba na lōxoni, e sewa, bayo Ala bata yi sewa fe gbeen nagidi e ma. Naxanle nun diidine fan yi sewa, Yerusalen sewa xuiin yi mema yire makuyeni. **44** Na lōxoni, e yi muxune dōxo se ramaradene xunna bogise singene nun yaganne yi ramarama denaxanye yi. E yi e ti ne malanna ra, yamanan taane birin yi, naxan lanma a so saraxaraline nun Lewine yii Ala kiseen na. Yuda kaane yi sewaxi

bayo saraxaraline nun Lewine birin yi e wanla ra. **45** E lu Alaa wanla ke, e nun marasarijan wanla, e nun beti baane nun kantan tiine alo Dawuda nun a dii xemen Sulemani a yamari kii naxan yi. **46** Bayo waxati danguxini, Dawuda nun Asafi waxatini, beti ba kuntigine yi na e nun betine Ala tantun xinla ma. **47** Sorobabeli nun Neyemi waxatini, Isirayila kaane birin yi seene soma nen beti baane nun kantan tiine yii alo a yi lan kii naxan yi lōxo yo lōxo. E yi e yagan sarijanxine soma nen Lewine yii, Lewine fan yi nde so Haruna yixetene yii.

13 Na waxatini, e yi Musaa sariya kedin xaran yamaan xa, e yi a to sebexi fa fala, Amonine nun Moyaba kaane mi lan e so Alaa yamani mume, **2** amasoto waxati danguxini, e mi Isirayila kaane yisuxu, e mi donseen nun igen so e yii, e yeteen yi Balami saren fi alogo a xa e danga. Koni, en ma Ala yi dangan maxete duban na. **3** Yamaan to sariya kedin xaran xuiin name, e yi xōjene birin kedi Isirayila kaane ye. **4** Benun na xa liga, saraxaralina Eliyasibi naxan yi walima en ma Ala Batu Banxin se ramaradene yi, naxan mon yi findixi Tobiya ngaxakedenne ra, **5** na bata yi banxin kuiin yire belebelena nde yiton Tobiya xa, bogise saraxane nun wusulanna nun goronne yi ramaraxi denaxan yi nun, e nun murutun yaganna nun manpaan nun turena, naxan yi findixi Lewi bōsonna muxune gbeen na, e nun beti baane nun kantan tiine nun saraxaraline. **6** N mi yi Yerusalen yi na waxatini na feene lige, amasoto n bata yi xete Babilon mangana Arataserekesi fema, a mangayaan jee tonge saxon e nun firinden ma. Na xanbi ra, n yi mangan maxodin, a yi tin n xa siga, **7** n yi xete Yerusalen yi. N yi fe jaxin to Eliyasibi naxan naba, a to palana nde so Tobiya yii Alaa banxin yinna kui. **8** Na yi n xolo ki fajni. N yi Tobiya yiiseene birin namini palaan fari ma. **9** N yi yamarin fi a e xa palane rasarijan, n mon yi Ala Batu Banxin seene dōxo e funfune yi, e nun bogise saraxane nun wusulanne. **10** N mon yi a me a Lewine mi e gbee saraxane sotoxi, n mon yi a me fa fala Lewine nun beti baan naxanye yi walima Ala Batu Banxini, ne bata xete e xeeene ma. **11** N yi kuntigine maxadi, n naxa, “Nanfera Ala Batu Banxin bata rabejin?” N yi Lewine nun beti baane malan, n yi birin ti a funfuni. **12** Nayi, Yuda kaane birin yi fa yaganna nun murutun nun turen na se ramaradeni. **13** N yi se ramaraden taxu saraxaraliin Selemiya nun

sebeli tiin Sadoki nun Lewina nde ra naxan xili Pɛdaya. N yi Sakuru a diin Xanan findi e mali muxun na, Matani mamandenna, bayo birin yi laxi e ra. E tan nan yi solɔnni taxunma e ngaxakedenne ma. **14** N ma Ala, n ma fe xa rabira i ma, na ma, n naxan nabaxi lannayani n ma Alaa banxin xa alogo i xa batu. I nama i mɛ n na. **15** N muxune to na waxatin nin sali lɔxɔni Yuda yamanani, e manpa bogine yibutuxunma. Nde yi bogise xidine rasoma, e xidixi sofanle fari, e nun wudi bogi igen nun manpa bogine nun xɔdɛne nun goronna sifan birin, siga Yerusalɛn yi Matabu Lɔxɔni. N yi a fala e xa a e nama fa donseene mati na lɔxɔni. **16** Tire kaane fan yi dɔxi mɛnni, naxanye fan yi fama yɛxɛn nun sare seen sifan birin na, e yi e mati Yuda kaane ma Yerusalɛn yi sali lɔxɔni. **17** N mɔn yi Yuda fonne maxadi, n naxa, “Fe jaxini ito bunna nanse ra, ɛ yi Matabu Lɔxɔn naxɔsi? **18** Ɛ benbane fan mi ito xan liga ba? Ala bata fe jaxini itoe birin nafa en nun taani ito ma. Ɛ tan mɔn a xɔlɔn fari sama Isirayila xili ma, ɛ yi Matabu Lɔxɔn sarɔjanna kala.” **19** Na xanbi ra, benun Matabu Lɔxɔn xa a li, dimin nɛma Yerusalɛn dɛɛne li tun, n yi yamarin fi, a dɛɛne xa ragali, e nama fa rabi fɔ Matabu Lɔxɔn na dangu. N yi n ma walikɛna ndee dɔxɔ dɛɛne ra, alogo muxune nama so goronne ra Matabu Lɔxɔni. **20** Na ma, sare matine nun sare soone yi kɔɛɛn nadangu Yerusalɛn fari ma sanja ma keden hanma sanja ma firin. **21** N yi e rakolon, n naxa, “Nanfera ɛ kɔɛɛn nadanguma yinna fari ma? Xa ɛ mɔn a liga, n na ɛ suxuma nɛn.” Xabu na lɔxɔni, e mi fa fa Matabu Lɔxɔni sɔnɔn. **22** N mɔn yi yamarin fi Lewine ma a e xa e rasarɔjan, e fa dɛɛne kantan alogo e xa Matabu Lɔxɔn findi lɔxɔ sarɔjanxin na. Na feen ma, n ma fe xa rabira i ma, n ma Ala, i yi n kantan i ya hinan gbeeni. **23** Na waxatini, Yuda kaana ndee bata yi jaxanle dɔxɔ naxanye yi kelixi Asadodi nun Amoni nun Moyaba siyane yɛ. **24** E diine fɔxɔ kedenna yi Asadodi xuiin falama ba xui gbetɛye ra, koni e mi yi nɔɛ Heburu xuiin fale. **25** N yi e maxadi, n yi e danga, n yi ndee bɔnbɔ, n yi e xunsexɛne matala, n yi e rakolo Ala yi, n naxa, “Ɛ nama ɛ dii tɛmɛne so siya gbetɛne yii e jaxanle ra, ɛ nama siya gbetɛne dii tɛmɛne tongo ɛ nun ɛ dii xɛmɛne xa. **26** Isirayila mangan Sulemani mi yulubin liga na kiin xan yi ba? A jɔxɔn manga mi yi na siyane yɛ, a yi rafan a Ala ma. Ala bata yi a findi mangan na Isirayila birin xun na. Koni hali na, siya gbetɛne jaxanle a ti nen yulubin ma. **27** Nxu fa a mɛ iki fa fala a ɛ fe jaxi

sifani ito ligama, fe jaxi gbeena en ma Ala ra, ɛ yi siya gbetɛ jaxanle dɔxɔ.” **28** Yehoyadaa dii xɛmɛna nde, saraxarali kuntigina Eliyasibi mamandenna yi findixi Horoni kaan Sanbalata bitanna nan na. N yi a kedi n yɛtagi. **29** E fe xa rabira i ma, n ma Ala, bayo e bata saraxarali wanla sarɔjanna kala, e nun saraxaraline nun Lewine layirina. **30** N na e birin nasarɔjan nɛn xɔjɛne seene birin ma, n mɔn yi saraxaraline nun Lewine ti e wanle ra. **31** N mɔn na liga nɛn saraxa yegene ra waxati saxini, e nun bogise singene. N ma Ala, n ma fe xa rabira i ma, i fan n na.

Esita

1 Mangana nde yi na nun naxan yi xili Asuyerusu. A tan nan yi mangayani keli Indiya yamanani han sa dɔxɔ Kusi yamanan na. Yamana keme mɔxɔɲen nun solofere nan yi a ra. **2** Na waxatini, Asuyerusu yi dɔxi mangayani Suse taani denaxan yi findixi yamana kan taan na. **3** A mangayaan ɲɛ saxandeni, a yi a kuntigine birin xili donse don malanni. Sofa mangan naxanye yi Perise nun Mede yi nun, e nun muxu gbeene nun yamana kanne, ne birin yi fa a yetagi. **4** A yi a fangan nun a binyen nun a nafulu kanyaan yita yamaan na kike sennin. **5** Na danguxina, xii solofere bun ma, mangan yi donse don malanni tɔn muxun birin xa a manga banxin tanden ma muxudine nun muxu gbeene xa naxanye Suse manga taani. **6** Tanden yi maxidi ki fajni. Tanden yi rabilinxi geme fixe senbetenne ra. Gbeti wurene singanxi na senbetenne ra. E yi taa dugi luti mamiloxin nun a fixene xidi na ra. Tanden lonna yi rafalaxi geme fajni fixene nun a gbeele nun a mamiloxine nun a fixe mayilensexine nan na. Saden naxanye rafalaxi xemaan nun gbetin na, e ne ti menni. **7** Dɔlɔn yi fima muxune ma xema igelengenne nan kui. Mangan yi dɔlɔn fima yamaan ma nii yifanna nin. **8** Birin yi a minma nen alo a rafan a ma kii naxan yi. Mangan yi a walikene yamari a e xa yamaan nafen feen naba. **9** Mangana ɲaxalan Bate Fasita fan bata yi donse donni tɔn ɲaxanle xa Manga Asuyerusu a mangaya banxini. **10** Donse donna malanna xii soloferedeni, Manga Asuyerusu to sewa dɔlɔn na, a yi a xeme tɛgenxi solofereni itoe xili: Mehuman, Bisita, Harabona, Bigita, Abagita, Setara, e nun Karakasi. **11** A yi a fala e xa a e xa sa fa Baten Fasita ra a dɛxɔn ma a mangaya kɔmɔtin soxi a xunna. Mangan yi waxi a xɔn ma nen a xa a ɲaxanla tofanna mayita a mangane nun a yamaan na, bayo a yi tofan han. **12** Koni mangana xerane sigaxi na Baten Fasita fema, e to mangana xerani ba a xa, a tondi fe. Na yi mangan xolo ki fajni. **13** Awa, alo mangan dari fena, a yi a fekolonne maxɔdin naxanye sariyan nun taan dɔxɔ kiin kolon. **14** Mangana lannayaan yi Perise kaan nun Mede kaan kuntigi gbee solofere naxanye yi, naxanye yi a kawandima, ne nan itoe ra: Karasena, Setara, Adamata, Tarasisi, Meresi, Marasena, e nun Memukan. **15** A yi a fala e xa, a naxa, “N tan Manga Asuyerusu bata n ma xerane rasiga Baten Fasita ma, koni a mi n ma yamarin suxi. Sariyan nanse falaxi n lan n xa

naxan liga Baten Fasita ra?” **16** Memukan yi a fala mangan nun a kuntigine xa, a naxa, “Baten Fasita mi fe ɲaxin ligaxi mangan xan keden na koni mangana kuntigine nun a yamaan birin yamanani. **17** Naxanle na na me a ɲaxalan mangan bata a xemen bote raba, yamanan ɲaxanle birin fan e yoma e xemene ma nen. Naxanle luma a fale nen, e naxa, ‘Manga Asuyerusu xeraan nasiga nen Baten Fasita ma alogo a xa fa a dɛxɔn koni a mi tin.’ **18** Awa, Perise nun Mede kuntigine ɲaxanle na na me a Baten Fasita na nan ligaxi, e mi fa e xemene binyama sɔnɔn. Na findima nen xɔlɔn nun yagin na e xemene ma. **19** Xa a sa mangan kenenɲɛ, a xa yamarin fi fa fala Baten Fasita nama fa ti a yetagi sɔnɔn. A tiden xa so ɲaxalan gbete yii naxan fisa a tan xa. Yamarin fi, a xa sebe, a xa sa na tɔnne fari naxanye Perise nun Mede yamanani alogo a nama fa maxete mume! **20** Mangana, i na i ya fala xuini itoe rali i ya yamanan birin ma, ɲaxanla birin fa a xemen binyama nen nayi, keli a xunbeen ma han a xurina.” **21** Na yamarin yi rafan mangan ma, e nun a kuntigine birin, mangan yi a liga alo Memukan a fala kii naxan yi. **22** Mangan yi kedin nasiga a taane birin yi e gbee sebenla nun e gbee xuine yi, alogo xemen birin xa findi a denbayaan kuntigin na e nun birin xa a kon xuiin fala.

2 Na danguxina, mangan bɔɲɛn godo xanbini, a a miri folo na feen ma Bate Fasita naxan ligaxi a ra e nun a fan sariyan naxan saxi lan a ma. **2** Awa, mangan bundɔxɔna ndee yi a fala a xa, e naxa, “Sungutunna nde xa fen i xa naxan tofan han! **3** Yamarin fi i ya bɔxɔn birin yi a kuntigine xa fa dii teme tofajine birin na i ya ɲaxanle banxini. Suse manga taani. Na dii temene birin xa lu na xeme tɛgenxin yii naxan xili Hege naxan ɲaxanle xun na. Na xemen xa a yengi dɔxɔ e xɔn ma a yi maratofan seene so e yii. **4** Nayi, dii temen naxan na rafan i ma ne ye, na yi findi baten na Fasita funfuni.” Na falan yi Mangan kenen, a yi na liga. **5** Yahudiyana nde yi Suse manga taani nun naxan yi xili Marodoke, Yayiri a dii xemen nan yi a ra. Simeyi nan Yayiri sɔto. Kisu nan Simeyi sɔto. Kisu kelixi Bunyamin bɔnsɔnna nin. **6** Babilɔn mangan Nebukadanesari Yuda manga Yoyakin nun muxun naxanye suxu Yerusalen yi, a yi ne nan ye. **7** Marodoke nan yi Hadasa xuruma naxan mɔn xili Esita. A sɔxɔ a dii temena. Esita fafe nun a nga bata yi faxa. Sungutunni ito yi tofan han! A nga nun a fafe to

faxa, a yi lu alo Marodoke a diina. **8** Mangan yamarin fi xanbini, e fa dii teme wuyaxi ra Suse manga taani, Esita yi ne ye nun. A tan Esita fan yi lu mangan konni Hege bun ma naxan mangana naxanle xun na. **9** Esita a fe yi rafan Hege ma han! A yi hinan a ra. Nanara, a yi fati rayabu seene so folo a yii, e nun donse fajina. Hege yi Esita lu yire fajini naxanle tagi, a yi dii teme solofere ye ba mangan konni naxanye luma wanla ke Esita xa. **10** Koni Esita mi tin muxu yo xa a kolon a kelixi siyaan nun xabilan naxan yi, amasoto Marodoke bata yi yamarin fi a ma nun fa fala a nama na fala. **11** Marodoke yi sigama nen mangan konna dexon loko yo loko alogo a xa a kolon Esita yi kii naxan yi e nun e yi naxan ligama a ra. **12** Sungutunni itoe birin yi lan e siga Manga Asuyerusu konni keden keden ye ma e na yelin e yitonje kike fu nun firinna bun. Kike sennin e ture fajin soma e ma. Na xanbi ra, e latikononna nun naxanle rayabu seen sifan birin so e ma kike sennin mon. **13** Sungutunna naxan siga waxatin na a li mangan konni, a sese maxodin na nan yi soma a yii. **14** Naxan nema yi sigi mangan konni, a yi sigama jinbanna nan na. Na xoton bode, a siga naxanle banxi gbete yi, a gberijenne ye. Sasigasi yi a yengi dokoma e xon denaxan yi. Naxan na keli mangan konni, a mi fa sigama na yi sonon fo xa a rafan mangan ma, a yi a xili a xinla ma. **15** Nba, Marodoke soko Abixali a dii temena Esita, Marodoke yi naxan xuruma, na gbee waxatina a lixina siga mangan konni, a mi sese xali fo Hege seen naxanye fe fala a xa. Muxu yo yi Esita to, a rafanje a ma. **16** Awa, Manga Asuyerusu a mangayaan jee solofere kike fudeni, naxan xili Tebeti kiken, e fa Esita ra Manga Asuyerusu fema a konni. **17** Esita yi rafan mangan ma, dangu sungutunne birin na. A mangana fanna nun a hinanna soto dangu sungutunna bonne birin na! Nanara, mangan yi mangaya taxamaseri komotin so Esita xun na, a yi a findi baten na Fasita funfuni. **18** Awa, mangan yi donseen nafala a kuntigine nun a muxune birin xa Esita a fe ra. A yi na lonon findi Matabu Lonon na a yamanan birin yi. A yi yamaan ki mangayaan hinanni. **19** Awa, sungutunne mon yi malan a firinden. Na waxatini, Marodoke yi walima manga banxin sansanna so deen na. **20** Han na waxatini, Esita munma yi a xabilan nun a siyana fe fala muxe xa alo Marodoke a yamari kii naxan yi. Esita yi a falan suxu alo a to yi a maxuruma waxatin naxan yi. **21** Lonona nde, Marodoke yi walima manga

banxin sansanna so deen na. Mangana kuntigi firinna naxanye yi xili Bigitana nun Teresi, ne nan yi mangan konna kantanma. Ne yi xolo Manga Asuyerusu ma, e kata folo a faxa feen na. **22** Marodoke yi a me, a yi a fala Esita xa, mangana batena. Esita yi Marodoke a falan nali mangan ma. **23** E folo na feen ye fenje, e fa a to fa fala jondin na a ra. Nayi, e yi na xeme firinne singan wudin na, e faxa. Na birin yi sebe yamanan fe fori taruxu kedin kui Mangan yee xori.

3 Na dangu xanbini, Manga Asuyerusu yi Hamedata Agaga kaana dii xemen Haman tiden mate dangu kuntigine birin na. **2** Mangana walikeen naxanye birin yi a banxini, ne birin yi e xinbi sinma nen Haman bun e yi a binya, alo mangan bata yi a yamari kii naxan yi. Koni, Marodoke tan mi tin na lige. **3** Mangana Walikeen bonne yi a maxodin, e naxa, “Nanferi i mi mangan fala xuiin suxuma?” **4** Loko yo loko kuntigine yi Marodoke maxodinma nen, koni a mi yi e xuiin danxunma. Nayi, e yi a fala Haman xa alogo e xa a kolon xa a kankanje a kejaan ma bayo a bata a fala a Yahudiyana nan a ra. **5** Haman a toxina fa fala a Marodoke mi tinma a xinbi sinje a tan bun ma, a yi xolo kati! **6** A mon a kolonxina fa fala Yahudiyana nan Marodoke ra, a yi a miri a boneni, a a nama Marodoke keden peen faxa. Nanara, Haman yi feren fen folo alogo a xa Yahudiyane birin halagi naxanye yi Asuyerusu yamanan birin yi. **7** Awa, Manga Asuyerusu a mangayaan jee fu nun firinden kike singen naxan xili Nisan kiken, Haman yi yamarin fi fa fala masensenna naxan xili Puri, a e xa na bira a xa, alogo e xa Yahudiyane faxa waxatin kolon, fe yitonxine lanma kiken naxan ma e nun a lonona. A kike fu nun firinden suxu naxan xili Ada kiken. **8** Haman yi a fala Manga Asuyerusu xa, a naxa, “Siyana ndee na, e xuyaxi ayi i ya yamanan yiren birin yi, e namunna nun muxu yo a namun keden mi a ra. E mi yamanan yamarine suxuma. Awa, a mi lan i xa ne lu na. **9** Mangana, xa i sa tinje, i xa yamarin fi fa fala ne xa halagi. Xa i tin ne halagi feen ma, n tan gbetin gbananna wuli fu se i ya gbeti ramaradeni ne xa naxanye na lige.” **10** Mangan yi a wuren ba a yiin na, a taxamasenna, a yi a so Hamedata Agaga kaana dii Haman yii, Yahudiyane yaxuna. **11** Mangan yi a fala a xa, a naxa, “Muxuni itoe nun na gbetin na, i tan nan gbee e ra. Nanara, i neen waxi feen naxan liga fe yi e ra, i na liga.” **12** A kike singen xii fu nun saxande

lɔxoni, Haman yi mangana sebeli tiine malan alogo e xa a yamarine sebe yamana kanne nun taa mangane birin ma siyane birin yi e sebenle nun e xuine yi. Awa, na kedine yi sebe Manga Asuyerusu yeteen xinla ra. E mɔn yi a mangayaan taxamasenna wuren funfun sa a ma. **13** Xerane yi siga kedini itoe ra mangana yamanan birin yi. E yamarin fi a yamaan xa Yahudiyane birin naxɔri lɔxɔ kedenni, kike fu nun firinden xii fu nun saxande lɔxoni, naxan xili Ada kiken. E yi e faxa, dii jɔren nun fonna nun jaxanle nun diidine birin, e yi e yii seene tongo. **14** Awa, na sariyan kedin yi rawuya, a xaran yamanan yamaan birin xa alogo e xa e yiton na lɔxɔn yee ra. **15** Mangana xerane yi siga e giye, Suse manga taan yiren birin yi xera ralideni. Na xanbi, Mangan nun Haman yi dɔxɔ dɔlɔ mindeni, koni Suse taan muxune tan yi wugama.

4 Marodoke feni ito birin me waxatin naxan yi, a yi a dugine yibo a ma, a yi kasa benbeli dugin nagodo a ma sununi. A mɔn yi xuben so a ma, a mini taa tagini, a sunuxin yi a wuga xuini te, a gbelegebele. **2** A yi siga han mangana banxin dexɔn, a yi ti menni. Muxu yo mi yi lan a so menni a maxidixi kasa benbeli dugini. **3** Yamanan birin yi, mangana falan nun yamarin na yi so denaxan yi, Yahudiyane yi sunuma nen menni. E yi sunuma nen e wuga, muxu wuyaxi yi e maxidima benbenla nin, e yi e sa xubeni. **4** Esita a walike jaxanle nun xeme tegenne yi fa Marodoke a fe fala a xa, na yi Esita yigitege kati! Esita yi dugine rasiga Marodoke ma alogo a xa kasa benbeli dugin ba a ma. Koni Marodoke mi tin. **5** Esita yi Hetaka xili, mangana xeme tegenna naxan yi findixi walikeen na Esita fema, a yi na xe alogo a xa sa a kolon Marodoke sunuxi naxan na. **6** Hetaka yi sa Marodoke li tixi taan yama malandeni mangan konna de ra. **7** Marodoke yi na feen birin fala Hetaka xa naxan ligaxi, a mɔn yi a fala a xa Haman mangan tuli saxi gbetin naxan na, alogo a xa Yahudiyane birin faxa. **8** Marodoke mɔn yi na kedin so Hetaka yii naxan xaranxi Suse yi, lan Yahudiyane faxa feen ma. Marodoke yi waxi a xɔn ma nen a xa a so Esita yii, a mɔn yi dentegen sa Esita xa alogo Esita xa sa mangan mafan, a dija a muxune ma. **9** Awa, Hetaka yi xete, a sa Marodoke falane yebe Esita xa. **10** Awa, Esita mɔn yi Hetaka xe Marodoke ma, a yi a fala a xa, a naxa, **11** “Mangana walikene nun muxun naxanye birin mangana yamanani, ne birin a kolon a muxu yo muxu, xemen nun jaxanla, naxan na siga mangan

fema a banxini xa a mi a xilixi, sariyan wama nen na kanna xa faxa. Koni naxan keden a lige na kanna mi faxa, fo mangana a xema dunganna ti a xa. Koni a bata kiken ti mangan mi n tan xili.” **12** Marodoke yi Esita a jungu xuiin me. **13** A fan yi a yabi, a naxa, “I nama i miri fa fala i tan Esita keden peen kisima nen Yahudiyane tagi, bayo i mangan konni. **14** Xa i dundu i deen ma waxatini ito yi, waxatina nde Yahudiyane sabu gbete sɔtɔn nen e kisi, koni i tan nun i babaa denbayaan naxɔrima nen. Nde a kolon? Waxatina nde, xa i mi findixi mangana baten na lɔxoni ito xan ma fe ra?” **15** Awa, Esita fan yi Marodoke yabin nasiga a ma, a naxa, **16** “Siga, i sa Yahudiyane birin malan Suse yi, e sunna suxu n xa. E nama ige min, e nama e dege kɔe saxan, yanyi saxan. N tan Esita nun n ma walike jaxanle fan sunna suxuma nen. Na na dangu, n sigan mangan fema nen hali xa n tɔnna kala. Xa a lan a yi, n xa faxa, n xa faxa.” **17** Marodoke yi siga, a yi a liga alo Esita a yamari kii naxan yi.

5 Sunna xii saxande lɔxoni, Esita yi a maxidi a jaxalan manga dugine yi, a sa ti tanden ma manga banxin de ra. Mangan yi dɔxi manga gbedeni, a yee rafindixi banxin so deen ma. **2** Mangan to Esita to a tixi tandeni, a fe yi rafan a ma ki faɲi, na ma, mangan yi a xema dunganna ti a xa. Esita yi sa a yiin din mangana xema dunganna ra. **3** Mangan yi Esita maxodin, a naxa, “Nanfe ligaxi? I waxi nanse xɔn ma? N na soe i yii nen hali i waxi n ma yamanan fɔxɔn kedenna nan xɔn.” **4** Esita yi a yabi, a naxa, “Mangana, xa a sa i kenɛn, n waxi a xɔn ma e nun Haman xa fa donse dondeni n konni to, n naxan nafalaxi e xa.” **5** Mangan yi xeraan nasiga Haman ma, a xa fa mafuren alogo e firinna xa sa Esita waxɔn feen liga. **6** Nayi, mangan nun Haman yi siga Esita donseen dondeni. E yi dɔlɔ minni waxatin naxan yi, mangan yi Esita maxodin, a naxa, “Esita, i waxi naxan xɔn ma a fala n xa, n xa na liga i xa. Nanse xɔli i ma? Hali i waxi n ma yamanan fɔxɔ kedenna nan xɔn, n na a soe i yii.” **7** Esita yi mangan yabi, a naxa, “N waxi naxan xɔn ma, **8** xa mangan tinɲe, a yi n ma maxandin yabi, Mangan nun Haman mɔn xa fa n konni donse dondeni tila n naxan nafalama, nayi n mangan yabe.” **9** Awa, Haman sewaxin yi keli na yi na lɔxoni. Koni a to yi danguma mangana banxin de ra, a yi Marodoke to. Marodoke mi keli, a mi xuruxurun a yee ra. Na yi Haman xɔlɔ a xili ma kati! **10** Koni Haman yi a bɔɲɛn suxu, a siga

a konni. Menni, Haman yi a lanfane nun a jaxanla Seresi, xili. **11** Haman yi a kanba fɔlɔ a lanfane nun a jaxanla yetagi, a nafulu kanna nan a tan na, a dii wuyaxi a yii, a mangan bata a tiden mate, a tan dangu mangana kuntigine nun mangana muxu gbeene birin na. **12** Haman yi lu a kanbe, a naxa, “Naxan dangu na birin na, Mangana Bate Esita bata n tan Haman xili, a nxu nun mangan xa sa nxu dege nxu bode xɔn ma. Nxu mɔn sigama na nan ma tila nxu nun mangana. **13** Koni fanni, n mɔn Marodoke toma dɔxi mangana banxin de ra, Yahudiyana, sese mi na ra n tan Haman xa.” **14** A jaxanla Seresi nun a lanfane yi a fala Haman xa, e naxa, “Muxu singandena nde rafala naxan nɔngɔnna ye tonge suulun liye. Nayi, tila xɔtɔnni i yi a fala mangan xa, a a xa Marodoke singan mɛnni, a xa faxa, alogo i sɛwaxin xa siga mangan matideni donse dondeni.” Awa, na falan yi Haman kenɛn, a muxu singanden nafala.

6 Na kɔɛɛn na, mangan mi nɔ xiye. Nayi, a yi a fala a e xa fa yamanan taruxu kedin na, e yi a xaran a yetagi. **2** E denaxan xaran, e yi a to mɛnni fa fala Mangana kuntigi firinna naxanye yi a banxin dɛɛn kantanma, Bigitana nun Teresi, ne manga Asuyerusu faxa feni tɔn nɛn, koni Marodoke yi na feen namini kenɛnni. **3** Awa, mangan yi maxɔdinna ti, a naxa, “En binyɛn mundun fi Marodoke ma e nun a kɔntɔnna?” Mangana walikene yi mangan yabi, e naxa, “Fefe munma raba a xa singen.” **4** Mangan mɔn yi maxɔdinna ti, a naxa, “Nde n ma banxini?” Na yi a li, Haman yi baxi sode mangana genla kui. A bata yi fa a faladeni mangan xa, a xa Marodoke singan na singan tideni a naxan yitɔnxi Marodoke xili ma. **5** Nanara, mangana walikene yi mangan yabi, e naxa, “Haman nan be.” Mangan yi a fala e xa, a naxa, “A xa so.” **6** Haman yi so, mangan yi a maxɔdin, a naxa, “Nanse ligɛ muxun xa mangan waxi naxan binya feni ki fajɪ?” Haman yi a miri a yete ma, a naxa, “Awa iki, mangan waxi a xɔn ma a xa muxun mundun binya ki fajɪ? Muxu gbete mi na fɔ n tan.” **7** Haman yi mangan yabi, a naxa, “Mangan waxi muxun naxan binya feni, **8** a lan mangaya dugin xa so na kanna yii, i tan mangan yetɛɛn bata naxan nagodo i ma e nun soona i bata dɔxɔ naxan fari, a xunna soxi mangaya taxamaseri kɔmɔtin na. **9** Mangana, i ya kuntigi gbeena nde xa na dugine tongo a yi e ragodo na kanna ma mangan waxi naxan binya feni, a dɔxɔ soon fari, a yi a radangu taan yiren birin yi. Na muxu

gbeen xa siga falani ito tiye, a naxa, ‘E a mato mangan naxan nabama muxun xa, a waxi naxan binya feni.’” **10** Nayi, mangan yi a fala Haman xa, a naxa, “I mafura, i sa dugine tongo e nun soona, i yi e ragodo Marodoke ma, na Yahudiyana. I naxan birin falaxi, i yi na birin liga Marodoke xa, naxan dɔxi manga banxin so dɛɛn na. I nama jinan sese ma i naxan birin falaxi.” **11** Na xanbi ra, Haman yi sa dugine tongo e nun soona. A yi mangana dugine ragodo Marodoke ma. Marodoke to te soon fari, Haman yi ti Marodoke yeɛ ra siga taa tagini. A siga a fale yamaan xa, a naxa, “E a mato, mangan naxan nabama muxun xa, a waxi naxan binya feni.” **12** Marodoke yi xete manga banxin so dɛɛn na. Koni Haman tan yi siga a konni mafuren, a yetagin luxunxi amasɔto a yi sunuxi kati! **13** Feen naxanye liga a ra, a yi ne birin fala a jaxanla Seresi nun a lanfane xa. Haman ma jaxanla nun a fekolonne yi a fala a xa, e naxa, “Marodoke, Yahudiyana nan a ra. Na nan a toxi, i mi nɔɛ a ra. I fama yagideni a yeɛ ra, na yetɛɛn bata fɔlɔ!” **14** E mɔn yi fala tiini, mangana xɛrane yi fa, a Haman xa siga mafuren donse dondeni Mangana Batena Esita naxan nafalaxi.

7 Mangan nun Haman yi siga Esita donse dondeni. **2** Na lɔxɔ firindenɛ, e yi dɔlɔ minni, mangan yi Esita maxɔdin, a naxa, “Esita, i waxi naxan xɔn ma a fala n xa alogo n xa na liga. Nanse xoli i ma? Hali, i wa n ma yamanan bode fɔxɔn nan xɔn ma, n na a soɛ i yii.” **3** Koni Esita yi a yabi, a naxa, “Mangana, xa i tin, xa a rafan i ma, n waxi feen naxan xɔn ma, na nan ito ra: N tan Esita nun n ma muxune xa kisi. **4** Bayo n tan nun n ma muxune bata sara alogo nxu xa halagi, nxu faxa, nxu mɔn yi raxɔri. Xa nxu yi sara nɛn konyiyaan gbansanna xili yi, n yi dunduma nɛn nun, bayo na mi yi finde fe ra nun, n yi mangan ye mɔ ayi.” **5** Manga Asuyerusu yi Esita maxɔdin, a naxa, “Nde a ra, naxan susuxi fe sifani ito mire? Na kanna minen yi?” **6** Esita yi a yabi, a naxa, “Haman nan nxu tɔrɔ muxun nun nxu yaxun na, na muxu jaxinala!” Nayi, gaxu gbeen yi Haman suxu mangan nun Esita yetagi. **7** Mangan xɔlɔxin yi keli donse dondeni, a yi mini tandeni. Awa, Haman to a to fa fala mangan bata fe jaxin nagidi a fe yi, a yi lu xanbin na Esita mafandeni alogo a niin xa kisi. **8** Haman a mafelenxi waxatin naxan yi Esita dɔxɔ seen ma, mangan yi so, a sɔnxɔ, a naxa, “Wan! Xɛmɛni ito fa waxi n ma baten Esita nan mafu fe yi n yeɛ xɔri n ma banxini?” Benun mangan xa yelin fala

tiye, e bata Haman xunna so. **9** Mangana kuntigina nde yi na naxan yi xili Harabona, na yi a fala mangan xa, a naxa, “Haman yeteen bata singan tiden nafala a banxin dexon ma a Marodoke mangana muxu fajin singanye denaxan yi. Na wudin mateen fo nongonna ye tonge suulun.” Awa, mangan yi yamarin fi, a naxa, “Haman xa sa singan na yi.” **10** Nayi, Haman yi singan na singan tideni a naxan nafala Marodoke faxe feen na. Awa, na ligaxina, mangan bonen yi xunbali.

8 Na loxon yeteni, Manga Asuyerusu yi Yahudiyane yaxu Haman yii seene birin so Esita yii. Marodoke yi siga mangan fema, bayo Esita bata yi a fala mangan xa fa fala a tan nun Marodoke barixi nen. **2** Mangan yi a taxamaseri yiisilirason ba a yiin na, a naxan taxu Haman na, a yi a so Marodoke yii. Esita yi Marodoke lu Haman ma seene xun na. **3** Esita yi a sa mangan bun ma, a wugama, a yi a mafan alogo a xa Haman Agaga kaana fe jaxi yitonxin kala Yahudiyane xili ma. **4** Mangan yi a xema dunganna ti Esita xa. Nayi, Esita yi keli, a yi ti a yetagi. **5** Esita naxa, “Mangana, xa i bata tin, xa i ya fe n ma fe yi, xa a lanxi i ma, xa n nafan i ma, yandi, i xa kedin sebe naxan Haman ma yamarine kalama. Hamedata a dii xemena Agaga kaan yamarin naxan fi Yahudiyane faxe feen na i ya yamanan birin yi, na nama liga. **6** N tan mi noe tinje n bonsonna yi toro, a raxori.” **7** Awa, Manga Asuyerusu yi Esita nun Yahudiya Marodoke yabi, a naxa, “E mato, n bata Haman faxe bayo a Yahudiyane faxe feni ton nen. N mon bata Haman ma seene so Esita yii. **8** Iki, e xa sebenla ti lan Yahudiyane feen ma, naxan yo na e kenan, n tan mangan xinli, e yi n ma taxamasenna sa a ma. Bayo, kedin naxan sebexi mangan xinli mangaya taxamasenna yi sa a ma na mi kale mumu.” **9** Na loxon yeteni, e yi yamanan sebali tiine birin xili, kike saxanden xii moxonen nun saxande loxon nin, kiken naxan xili Sifan kiken. Mangana sebali tiine yi Marodoke a yamarine sebe siga Yahudiyane nun yamana kanne nun kuntigine birin ma na yamana kan taa keme moxonen nun solofere birin yi, keli Indiya yamanani han sa doko Kusi yamanani. Siyane birin yi kedin sebexin soto e sebenla nun e xuiin nin, Yahudiyane fan yi a soto e gbee sebenla nun e xuini. **10** Kedini itoe yi sebe mangan xinli, a yi a taxamasenna sa e ma. A yi xerane rasiga kedini itoe ra soo fajine fari naxanye ramaraxi e danna mangan xon ma. **11** A yi sebexi nen Mangana kedini ito kui

fa fala Yahudiyane xa e malan taan birin yi, e yi e yete xun mayenge. Xa siya gbete yo waxi e yenge feni, e tan Yahudiyane fan xa ne yenge, e yi e faxe e nun e jaxanle nun e diine. Yahudiyane xa ne birin faxe, e yi e yii seene tongo. **12** Na yamarin yi lanxi xii keden nan ma Manga Asuyerusu a yamanan birin yi, Ada kiken xii fu nun saxande loxon, jeeen kiken fu nun firindena. **13** Na yamarin yi mini yamanan birin yi alogo siyane birin xa a kolon fa fala a bata findi sariyan na alogo Yahudiyane fan e yitonje e yaxune yengedeni kii naxan yi. **14** Awa, mangan to yamarin fi, xerane yi doko soone fari, e yi siga e giye mafuren alogo yamarin xa xaran Suse manga taani. **15** Marodoke yi mini mangana banxini, manga dugin doma mamiloxin fixen nagodoxi a ma, mangaya xemaan taxamasenna fan soxi a xunna, doma xungbe mamiloxin fan a ma. Awa, muxun naxanye birin Suse yi, e sewa kati, e sonxo sonxo sewani. **16** Na loxon yi findi sewa loxon nun no soto loxon na Yahudiyane xa. **17** Mangana sariyan so yamanan nun taan naxanye birin yi Yahudiyane yi sewan soto menne yi, e yi e malan jaxanjaxani. Nanara, muxu wuyaxi yi e yete findi Yahudiyane na yamanani amasoto e bata gaxu e yee ra.

9 Kike fu nun firinden naxan xili Ada, na xi fu nun saxande loxon to a li, mangana yamarin yi lan a xa folo loxon naxan yete yi. Na loxon, Yahudiyane yaxune yi mirixi fa fala a Yahudiyane luma nen e senben bun ma. Koni, feene yi maxete, Yahudiyane yi noon soto e yaxune ma. **2** Yahudiyane yi e malan Manga Asuyerusu yamanan taan birin yi e yaxune yengedeni. Nayi, muxune birin yi gaxu Yahudiyane yee ra, muxu yo mi fa a ti e yee ra yenge sodeni. **3** Hali boxon mangane nun kuntigine nun yamanan kanne nun mangan jaxon yibirane birin yi Yahudiyane mali amasoto e yi gaxuxi Marodoke yee ra. **4** Marodoke bata yi findi kuntigi gbeen na manga banxini, e nun a xili fajin bata yi lan yamanan birin na amasoto a senben yi gboma ayi nen tun! **5** Nanara, Yahudiyane yi e yaxune faxe silanfanna ra, e yi e jan. E wa naxan liga fe yi e yaxune ra, e na liga. **6** Yahudiyane yi muxu keme suulun faxe Suse manga taani. **7** E mon yi Pansandata nun Dalifon nun Asipata nun **8** Porota nun Adaliya nun Aridata nun **9** Paramasata nun Arisayi nun Aridayi nun Fayesata birin faxe. **10** Ne nan Hamedataa dii Haman ma dii keme fuune ra,

Yahudiyane yaxuna. Koni, e mi ne yii seene tongo. **11** Na lɔxɔ yeteni, e mangan nakolon muxun naxan bereya faxa Suse manga taani. **12** Mangan yi a fala Esita xa, a naxa, “Yahudiyane bata muxu keme suulun faxa Suse manga taani sa Haman ma dii xeme fu fari. E nɔxi nanse lige yamanan bodene yi? Koni, xa i mɔn waxi fena nde xɔn ma, i a sɔtɔma nɛn. I waxi nanse xɔn? N na rabama i xa nɛn.” **13** Awa, Esita yi a yabi, a naxa, “Xa i bata tin, Yahudiyan naxanye Suse yi, ne mɔn xa to jɔxɔn liga tila. Haman ma dii xemene binbine xa singan wudin na.” **14** Mangan yi yamarin fi a na xa liga alo Esita a falaxi a xa kii naxan yi. Na yamarin yi rawanga Suse taani. E Haman ma dii xemene binbine singan. **15** Kiken naxan xili Ada, na xii fu nun naaninde lɔxɔni, Suse taan Yahudiyane mɔn yi e malan, e muxu keme saxan faxa taani, koni e mi e sese tongo. **16** Yahudiyan bonna naxanye yi mangana a yamana gbetene yi, ne fan yi e malan e yete xun mayengedeni. E yi e yete sɔtɔ e yaxune ra. Yahudiyane yi e yaxun muxu wuli tonge solofere e nun suulun faxa. Koni ne fan mi e sese tongo. **17** Na ligaxi Ada kiken xii fu nun saxande lɔxɔn nin. A xii fu nun naaninde lɔxɔni, e yi e matabu. Yahudiyane yi na findi sanla nun sewa lɔxɔn na. **18** Yahudiyan naxanye yi Suse yi, ne yi yengen so a xii fu nun saxanden nun a naaninden, ne yi e matabu a xii fu nun suulunde lɔxɔni. Na lɔxɔn yi findi sanla nun sewa lɔxɔn na. **19** Nanara, Yahudiyan naxanye yi banxidene ra, ne Ada kiken xii fu nun naaninden findixi sewa nun sali lɔxɔn na. E mɔn yi kiseene so e bode yii. **20** Awa, Marodoke yi na feene birin sebe a yi e rasiga Yahudiyane birin ma Manga Asuyerusu a yamanane yi naxanye maso e nun naxanye makuya. **21** A yi a sebe, a yamaan xa Ada kiken xii fu nun naaninde nun a xii fu nun suulunde lɔxɔn findi sanla ra jɛɛ yo jɛɛ. **22** bayo Yahudiyane e yete sɔtɔxi e yaxune ra ne lɔxɔne nan ma. E sunun nun e nimisan findi e ma sewan nun bɔjɛ xunbenla ra kiken i to nan na. Nanara, a falaxi a e xa sumunna ti sewani ne lɔxɔne ma, e yi e bode ki, e mɔn yi tɔrɔ muxune ki. **23** Yahudiyane yi Marodoke a yamarin suxu, a findi e namunna ra jɛɛ yo jɛɛ. **24** bayo Yahudiyane yaxun Hamedata Agaga kaana dii xemen Haman e raxɔri feni tɔn nɛn. A bata yi koronna bira, naxan xili Puri, alogo a xa e halagi a yi e raxɔri. **25** Koni Esita bata yi siga mangan fema, mangan yi kedin sebe alogo Haman fe jaxin naxan yiton Yahudiyane xili ma, na xa xete a tan ma. Haman

nun a dii xemene birin yi singan wudin ma. **26** Nanara, e lɔxɔni itoe xili bama Purimi naxan fataxi koronna xinla ra, “Purimine.” Fata Marodoke a kedin xuiin na, e nun feen naxanye liga e tan yeteen na, ne yi findi e seren na, **27** nanara Yahudiyane sogɛ firinni itoe findixi namunna ra e tan nun e bɔnsɔnna birin xa e nun muxun naxanye e yete findima Yahudiyane ra. E xa lɔxɔni itoe suxu jɛɛ yo jɛɛ alo Marodoke bata e yamari kii naxan yi. **28** Nanara, Yahudiyane yixeten denbayaan birin yi, e nun taan nun yamanan birin yi, e xa lɔxɔni itoe sumunna raba e ma naxan xili Purimi, alogo e fe danguxin nama jinan e mamanderne ra. **29** Awa, Abixali a dii temena Esita nun Yahudiyan Marodoke yi kedin firinden sebe e nɔ sɔtɔn birin xɔn Purimi sanla a fe ra. **30** E yi kedin rasiga Yahudiyane birin ma naxanye Manga Asuyerusu a yamana kan taa keme mɔxɔjɛn nun soloferen birin yi. E yi e xɔntɔn bɔjɛ xunbenla nun e xaxili saana fe ra. **31** Kedin mɔn yi a fala Yahudiyane xa, a e xa Purimi lɔxɔne suxu e lɔxɔne yeteni alo Marodoke nun Esita e yamarixi kii naxan yi. E yeteen yi sun suxun nun maxandin lɔxɔn nagidi e tan nun e bɔnsɔnna ma. **32** Esita yamarin naxanye fi lan Purimi Matabu Lɔxɔni itoe a fe ma, ne yi sebe kedin kui.

10 Manga Asuyerusu yi wali xɔdɛxene sa muxune ma keli a yamanani han sa dɔxɔ fɔxɔ igen dɛxɔnna ra. **2** Mangan kewanla naxanye birin a senben nun muxu gbeeyaan mayitama, e nun a Marodoke tiden mate kii naxan yi, ne sebɛxi Perise nun Mede mangane kedin kui. **3** Marodoke Yahudiyan yi findi Manga Asuyerusu a manga singen na. A findi muxu kenden na Yahudiyane xa, a mɔn yi rafan Yahudiyan bodene ma, bayo a yi walima a siyana bɔjɛ xunbenla nun a yɛɛ rasigan nan ma fe ra.

Yuba

1 Xemena nde yi Yusu yamanani, a yi xili Yuba. Fe mi yi na xemēn na, muxu fajin nan yi a ra, a yi gaxuxi Ala yee ra, a yi fe jaxin matangama. **2** A dii xeme solofere nun dii teme saxan nan soto. **3** Yexeen wuli solofere yi a yii, e nun jogomen wuli saxan nun tura keme suulun nun sofali gile keme suulun e nun walike wuyaxi. Muxu gbeen nan yi xemēni ito ra dangu sogeteden muxune birin na. **4** A dii xemene yi e malanma e bode kon yi donse dondeni waxatin birin, e yi xeraan nasigama e magile saxanne ma nen alogo e xa fa e dege, e min e bode xon. **5** Donse don loxone na yi dangu, Yuba yi a diine xilima nen alogo a xa e rasarijan. A yi kelima nen xoton, a yi saraxa gan daxin ba e birin xa, amasoto Yuba yi mirixi a ma fa fala, “Waxatina nde, n ma diine bata yulubin tongo, e fala jaxin ti Ala ma e bɔneni.” Yuba yi na nan ligama waxatin birin. **6** Loxona nde, malekane yi fa e malan Alatala yetagi, Setana fan yi fa e ye. **7** Alatala yi a fala Setana xa, a naxa, “I kelixi minen?” Setana yi Alatala yabi, a naxa, “N kelixi bɔxon xun xon, n masiga tideni.” **8** Alatala yi a fala Setana xa, a naxa, “I bata n ma walikeen Yuba rakorosi ba? Muxu yo mi luxi alo a tan bɔxon fari, sontaren nun muxu fajin na a ra, naxan gaxuxi Ala yee ra, a fe jaxin matangama.” **9** Setana yi Alatala yabi, a naxa, “Yuba gaxuxi Ala yee ra nen tun ba? **10** I mi a makantanxi ba, e nun a denbayaan nun a seene birin? I bata barakan sa a feene yi, a xuruseene mon wuyama ayi yamanani. **11** Koni, xa i i yiini bandun, i yi a din a seene ra, a i dangama nen.” **12** Alatala yi a fala Setana xa, a naxa, “N bata a yii seene birin sa i sagoni, koni i nama i yii din a gbindin na.” Nayi, Setana yi keli Alatala yetagi. **13** Loxona nde, Yubaa dii xemene nun a dii temene yi e degema, e manpaan minma e tadaa banxini, **14** xerana nde yi fa Yuba li, a yi a fala a xa, a naxa, “Turane yi xee biini, sofali gilene yi e degema e dexon, **15** Sabe kaane bata e suxu, e siga e ra, e bata i ya walikene faxa. N keden peen nan minixi ayi, n faxi nen n xa fa na xibarun nali i ma.” **16** A mon yi fala tiini, walike gbete yi fa, a yi a fala a xa, a naxa, “Alaa teen bata godo keli kore, a yi yexeeen nun walikene gan, e birin yi faxa. N keden peen nan a yiminixi, n faxi nen n xa fa na xibarun nali i ma.” **17** A mon yi fala tiini, walike gbete fan yi fa, a yi a fala a xa, a naxa, “Babilon kaane malanxin gali saxanna ra, e bata i ya jogomene suxu,

e siga e ra, e yi i ya walikene faxa. N keden peen nan a yiminixi, n faxi nen n xa fa na xibarun nali i ma.” **18** A mon yi fala tiini, walike gbete yi fa, a yi a fala a xa, a naxa, “I ya dii xemene nun i ya dii temene yi e degema, e yi manpaan minma e tadaa banxini. **19** Nanunna, foye gbeen yi fa keli tonbonni, a yi banxin foxo naaninne birin tuntun, a yi bira e fari, e birin bata faxa. N keden peen nan a yiminixi, n faxi nen n xa fa na xibarun nali i ma.” **20** Nayi, Yuba yi keli, a yi a domani bo, a yi a xunna bi. Na xanbi ra, a yi bira bɔxon, a xinbi sin Ala yetagi, **21** a naxa, “N magenla nan minixi nga kuini, n magenla nan mon sigama laxiraya yi. Alatala nan e fixi n ma, Alatala nan e tongoxi. Alatala xinla xa tantun.” **22** Na birin yi, Yuba mi yulubin tongo. A mi fala jaxi yo ti Ala ma.

2 Loxona nde, malekane mon yi fa e malan Alatala yetagi, Setana fan yi fa e ye Alatala yetagi. **2** Alatala yi a fala Setana xa, a naxa, “I kelixi minen?” Setana yi a yabi, a naxa, “Bɔxon xun xon, n masiga tideni.” **3** Alatala yi a fala Setana xa, a naxa, “I bata n ma walikeen Yuba rakorosi ba? Muxu yo mi luxi alo a tan bɔxon fari, sontaren nun muxu fajin na a ra, naxan gaxuxi Ala yee ra, a fe jaxin matangama. A mon tinxinyani tun, anu i n nadinma a n xa a toro a sontareyani.” **4** Setana yi a fala Alatala xa, a naxa, “Muxun yeteen nan a fatin na! Muxun naxan birin sotoma, a findima a dunupa yi gidin kontonna nan na. **5** Koni, xa i yiini bandun, i yi a din a xonne nun a fati benden na, a fala jaxin tima nen i ma kenenni.” **6** Alatala yi Setana yabi, a naxa, “Awa, n bata a sa i sagoni, koni i nama a faxa de.” **7** Nayi, Setana yi keli Alatala yetagi. Na xanbi ra, a yi sete jaxine ramini Yuba fatin birin ma, keli a sanne kui han a xun tagi. **8** Yuba yi feje ferenna tongo a xolin seen na, a dɔxo tee xubeni. **9** A jaxanla yi a fala a xa, a naxa, “I luma nen i ya tinxinni ba? Fala jaxin ti Ala ma, i xa faxa!” **10** Koni, a yi a yabi, a naxa, “I falan tima alo jaxalan xaxilitarena! En herin nasuxuma Ala yii, nanfera en mi toron nasuxe?” Na birin yi, Yuba mi yulubin tongo a fala xuiin xon. **11** Yuba xoyi saxanne yi a torone birin ma fe me naxanye a soto, e yi fa sa keli e yamanane yi, Teman kaana Elifasi nun Suxa kaan Bilidada nun Nama kaan Sofara. E yi lan a ma a e xa sa e xoyiyaan yita Yuba ra, e yi a madenden. **12** E to sa a to wulani, fayida e mi a kolon. E yi gbelegbele, e yi e dugine yibo, e burunburunna sa e xunne yi. **13** E yi lu dɔxi a fema

bəxəni xi solofere, kəe solofere. Muxu yo mi sese fala a xa, amasəto e bata yi a to, a yi tərəxi kii naxan yi.

3 Na xanbi ra, Yuba yi a deni bi, a yi a bari ləxən danga. **2** Yuba yi a fala, a naxa, **3** “N bari ləxən xa raxəri, e nun kəəna muxune a fala waxatin naxan yi, e naxa, ‘Dii xəmen bata bari!’ **4** Na ləxən xa findi dimin na, Ala mako nama lu a ma kore, kənenna nama fa mini a ma sənən. **5** Dimi gbeen xa a suxu, kunda fəren yi godo na ləxən ma, han dimin yi sogan suxu. **6** Na kəeen xa findi dimi gbeen na, a nama fa yate jəeen ləxəne yə a nama fa lu kikene yi. **7** Na ləxən xa findi gbantan na, səwa xui nama lu a yi. **8** Naxanye gballo ləxəne fe falama, naxanye fatan ige yi sube jaxin naxulunjə, ne xa na ləxən danga. **9** A subaxa ma sarene xa yidimi, a yengi xa lu kənenna xən, koni a nama a to, a nama xotonna to. **10** Amasəto, a mi sese ligaxi alogo n nama soto, a bata n lu, n yi səxələni ito soto to.” **11** “Nanfera n mi faxa n to bari? Nanfera n mi faxa n xali ləxəni? **12** Nanfera n bata xinbi firinna li n yəe ra n nasuxudeni, e nun xijene alogo n xa xijen min? **13** Xa n yi faxa nun, a lima nən nun n saxi n ma gaburun na bəjə xunbenli, nayi, n yi xima nən xaxili sani nun **14** manga fonne fəma, bəxən kuntigine, naxanye banxi fajine tixi naxanye kalaxin bata lu iki, **15** e nun kuntigi fonne fəma, xəmaan yi naxanye yii, naxanye e banxine rafe gbeti fixen na. **16** Xanamu, a yi lan nun n mi balo, alo diin naxan faxaxi barixi, a mi kənenna to. **17** Bayo, muxu jaxine mi fa walima gaburun na, muxu xadanxine e matabuma denaxan yi. **18** Kasorasane fan birin yi bəjə xunbenla soto, e mi fa jaxankata tiin xuiin mema sənən. **19** Senbetaren nun senbə kanna na, konyin yi xunba a kanna ma. **20** Nanfera Ala, i kənenna fima tərə muxune ma? Nanfera i siimayaan fima muxu nimisaxine ma, **21** naxanye faxan maməma, a mi fama, naxanye sayaan fenma dangu nafunla ra? **22** Bayo e yi luma nən səwani e na siga laxira yi, e bəjən yi xunbelima nən e na maluxun waxatin naxan yi. **23** Nanfera muxun luyə a nii ra naxan mi kira yo toma a sige naxan xən, Ala yeteen naxan saxi sansanna kui? **24** N ma tərəne bata findi n balon na, n gbelegbele xuiin minima alo igena. **25** N gaxuxi naxan birin yəe ra, na nan n sətən be. N yi gaxuxi tərən naxanye yəe ra, ne nan n fari be. **26** N mi fa raxaraxi, n mi bəjə xunbelixi, n mi n matabuma, n kontəfilixi yəye.”

4 Nayi, Teman kaana Elifasi yi falan tongo, a naxa, **2** “Xa n falan ti i xa, i nəe dijə na ma ba? Koni, nde nəe a dunde? **3** A mato, i bata muxu wuyaxi xaran, i yi senbetarene madenden, **4** naxanye yi birama, i ya falan yi ne rakeli, naxanye san yi xadanma, i yi ne mali. **5** Iki, na bata i fan soto, anu i bata yigitege. A to i tan li, i yi kontəfili. **6** I ya lannantenyaan xa lu i ya Ala yəeragaxuni, i ya fetareyaan yi findi i yigin na.” **7** “Awa, i miri, səntaren mundun bata halagi? Muxu fajin mundun bata raxəri? **8** N naxan nakərəsixi, naxanye hake feene ligama e nun naxanye jaxankatan tima, ne na saranna sətəma nən. **9** Alaa foyen nan e halagima, a xolən tən yi e gan. **10** Ala yatane wurundun xuiin nadunduma, a yi yata senbəmane jinne gira. **11** Nayi, yatan faxama donsetareyaan nan na, yatana diine yi xuya ayi.” **12** “Xibarun bata fa n ma alo wundona, n tunla bata junujunun xuiin mē. **13** Xiyene nema fe kəeen na, xixənla nema muxune fari, **14** gaxu gbeen yi n suxu, n xənne birin yi xuruxurun. **15** Yinnan yi dangu n yetagi, n fati ma xaben yi ramaxa. **16** Sena nde yi tixi n yetagi, n mi yi naxan kolon, a nininna yi n yəe ma. Na yi madundu, na xanbi ra n yi xuina nde mē, a naxa, **17** ‘Adamadiin tinxinjə ayi dangu Ala ra ba? Muxun sarijanjə ayi dangu a Dali Marigin na ba? **18** Xa Ala mi laxi a walikene ra, xa a fe jaxin to a malekane yi, **19** a fa lə muxune ra nayi ba, naxanye bende banxine kui, naxanye fatiye findixi benden na, naxanye yibutuxunjə alo laxaturane? **20** E faxe nən ləxə kedenni. E halage nən habadan, muxe mi kontəfili e fe ra. **21** E bubune xidi lutine bata bolon, e faxama nən e fekolontareyani.”

5 “Iki, xinla ti i mali feen na! Muxuna nde na ba naxan i yabə? I falan tima maleka sarijanxin mundun xa? **2** Fe matandin nan xaxilitaren faxama. Xəxələnya gbeen yi kəmən faxa. **3** N xaxilitaren to nən sabate, koni dangan so nən a banxini xulən. **4** Mali ti yo mi a diine xa, e bata yalagi taan kitisadeni, muxu yo mi e xunba! **5** Kametəne a sansi bogine donma. Hali naxanye janle tagi, e yi ne birin tongo, yiigelitəne yi a yiiseene tongo. **6** Haken mi kelima bəxən xan yi, səxələn mi solima bəxəni. **7** Muxun daxi səxələn nan xili yi, alo tēe budone to tunganma ayi.” **8** “Xa n tan na yi a ra nun, n yi Ala nan maxandima, n yi n ma kontəfinla yita Ala ra. **9** A feen naxanye ligama ne gbo, e mi yəe toə, a kabanako feene dan mi na. **10** A tulən nafama bəxən fari, a igen nafa xəene ma. **11** Muxun

naxanye magodoxi, a ne yite. Naxanye sunuxi, a kisin fi ne ma. **12** A muxu kɔtaxine miriyane kalama, e mi nɔ sɔtɔma e feene yi. **13** A xaxilimane suxuma e yetena kɔtɛne nan xɔn, kɔtadene fe yitɔnxine kalama nen xulen. **14** E soma dimini yanyi tagin nin, e tantanma yanyi tagini alo kɔɛen na a ra. **15** Koni, a tan tɔrɔ muxun natangama fala jaxin ma naxan luxi alo silanfanna, a e rakisi senbe kanna ma. **16** Nayi, yigin senbetaren xa, koni fala mi tinxintaren de.” **17** “Nayi, sewan na kanna xa Ala na naxan natɔrɔn! I nama i mɛ Ala Senbe Kanna a xurun na. **18** Amasɔtɔ a tan nan maxɔlɔn tima, a yi dandanna ti. A tan nan faxan tima, a mɔn yi marakisin ti. **19** A i rakise nen tɔrɔn ma dɔxɔɲa ma sennin, a i ratanga fe jaxin ma dɔxɔɲa ma solofere. **20** A i rakisima nen faxan ma fitina kameni, a i rakisi silanfanna ma yengeni. **21** A i ratangama nen fala jaxin ma, i mi gaxuma halagin waxatini. **22** Halagin nun fitina kamen bɔtɛ mi luma i xa, i mi gaxuma burunna subene yɛɛ ra. **23** Gɛmɛ mi taranma i ya xɛen ma, hali burunna subene, yenge mi luma e nun ne tagi. **24** Bɔɲɛ xunbenla luma nen i konni. I na i ya xuruseene xun mato a ra, i a lima nen sese mi dasaxi. **25** I ya diine wuyama ayi nen, i yixetene yigboma ayi nen alo sexɛna. **26** I faxama foriyaan nin, alo murutuna a xaba waxatini.” **27** “Nxɔ fe xɔnfenna xun soon nan na ra. I tuli mati na ra, i xaxili sɔtɔ.”

6 Yuba yi a yabi, a naxa, **2** “N yi wama nen n ma sunun yaten xa kolon, n ma tɔrɔn yi sa sikeela kanke ra. **3** A yi binyama ayi nen dangu baan jɛmensinna ra. Nanara, n ma falan bata radangu ayi. **4** Nɔndin na a ra, Ala Senbe Kanna bata n sɔxɔn a xalimakunle ra, e xɔlɛn yi so n niini, n bata gaxu gbalone yɛɛ ra Ala naxanye rafama n xili ma. **5** Burunna sofanla luye wuge sexɛ sabatixini ba? Ningen wuge sexɛ xɔnla ma sexɛni ba? **6** Donseen naxan mi jaxun, na donɲɛ ba xa fɔxɔ mi a yi? Silon xinden jaxun muxun de ba? **7** N mi yi waxi n yiin din feni na donseene ra. N ma tɔrɔn bata findi donseen na n xa naxan mi jaxun!” **8** “N waxi nen n ma maxɔdinna xa yabi, Ala yi n waxɔn feen liga n xa. **9** A xa Ala kɛnen, a yi n faxa. A xa a yiini bandun, a yi n naɲan. **10** Nayi, n bɔɲɛ xunbenla sɔtɔma nen, n sewa n ma tɔrɔ jantareni, bayo n mi n mema Ala sarijanxina falane ra. **11** N senben bata jian, n yi yigitege. N naɲanna findima nanse ra, n to luma n nii ra? **12** N senben luxi nen alo gɛmɛ xɔdɛxɛn ba? N fati bendɛn findixi sulan nan na ba? **13** N mali se yo

mi fa n yii, hali a xuridina, a mi fa n yii.” **14** “Muxun naxan yigitegeni na lan a hinanna sɔtɔ a xɔyine ra, hali a na a mɛ Ala Senbe Kanna yɛɛragaxun na. **15** Anu, n xɔyine tan bata n yanfa alo baa igen na xara tonbonni, alo baa wunle na xara. **16** Xunbeli waxatin naɲanni, e findima nen fufaan na, e rafe ige xunbenla nun ige dundun na. **17** Soge furen na, e xɔri, sɔgen na te, e xara xulen. **18** Yulane kiraan beɲinma siga na ige fendeni, e siga tonbonni, e faxa. **19** Tema kaa yulane igen fenma, Saba kaa sigatiine tan ne laxi a ra a igen na yi. **20** Koni, e yagima nen bayo e bata e yigi sa na yi, e na na li, e sunuma nen. **21** E luxi nen alo na igen tonbonni n tan xa. E na n ma tɔrɔn to, e gaxuma nen. **22** N bata e maxɔdin kisena nde ma ba? N bata e maxɔdin a e xa finmase yifuxina nde fi muxuna nde ma n xa ba? **23** N bata e maxɔdin a e xa n ba yaxun yii ba? N bata e maxɔdin a e xa n xunba n jaxankata muxune yii ba?” **24** “E n xaran, nayi, n xa n duudu. N naxan kalaxi, e na fala n xa. **25** Fala fajine mi muxun tɔrɔma, koni e mafalane tɔnɔn nanse ra? **26** E waxi n ma falane nan matandi fe yi alo yigitarena fala fuune. **27** E muxu sifan suse masensenna tiye alogo e xa kiridin sɔtɔ e konyin na, e yi sa e xɔyi kenden mati konyiyani!” **28** “Iki, e yɛɛ ra findi n ma, n wulen fale e yetagi ba? **29** E xɛtɛ na falan fɔxɔ ra, n bata e mafan, e nama findi tinxintarene ra. E mɔn xa xɛtɛ, e miri, n ma tinxinyaan nan a bunna ra. **30** Tinxintareya falana n de ba? N mi nɔɛ fe jaxin kolonɲɛ ba?”

7 “Adamadina dunuɲa yi gidin xɔdɔxɔ alo sofa wanla ganli, a siimayana alo karahan walikeɛn gbeena, **2** alo konyina, nininna xɔnla naxan ma, alo walikeɛn naxan a saren mamema. **3** Na kiini, n kɛen bata findi fuun na n ma siimayani, kɔɛne yi rafe sɔxɔlene ra n tan xa. **4** N na n sa, n yi a fala, n naxa, ‘N kelima waxatin mundun yi?’ Kɔɛen mi janma, n lu n maxɛtɛ n ma sadɛn ma han xɔtɔnni. **5** Kunle nun bendɛna n fatin ma alo dugina, setene sɔxɔnma n fatin birin ma, a kun. **6** N ma siimayaan mafura dangue dangu gɛsɛ sɔxɔnna kinaan na, a danguma yigitegeni.” **7** “Ala, a xa rabira i ma, a n ma siimayaan mi buma, n mi fa herin toma n yɛɛn na sɔnɔn. **8** Yɛɛn naxan n matoma, na mi fa n toma sɔnɔn, i n fenma nen, koni n mi fa na sɔnɔn. **9** Kundaan naxan danguma, na janma nen. Na kiini, muxun naxan na siga laxira yi, na mi fa xɛtɛma sɔnɔn. (Sheol h7585) **10** A mi fa xɛtɛma a banxini sɔnɔn, a konna mi fa a kolonma sɔnɔn.” **11** “Nanara, n mi fa n

dunduma sɔnɔn, n falan tima nen n niin jaxankatani. N nan n mawugama nen n niin xɔleni. **12** Nanfera i kantan muxun dɔxi n xili ma? N tan magaxu ba, alo fufana, hanma ige yi sube xajena nde? **13** N na a falama, n naxa, 'N sadena n masabarima nen, n xiden yi n mali n ma mawugani suxe.' **14** Nayi, i n magaxuma xiyene yi, i n xibaruma kuisan feene nan ma. **15** A yi rafanɛ n ma nun, n faxa. Sayaan fisa n xa benun n xa lu doyenɛ tun. **16** N ma siimayaan bata rajaxu n ma, n mi waxi a xɔn n xa lu n nii ra habadan. Nayi, xete n fɔxɔ ra, amasɔtɔ n ma siimayaan mi xunkuya." **17** "Nanse adamadiin na alogo i xa feni itoe birin liga a ra, han i yi i yengi dɔxɔ a xɔn ma iki, **18** han i yi lu fe a xɔn xɔtɔn yo xɔtɔn, i yi lu a fefesefe waxatin birin? **19** I xun xanbi soma n yi waxatin mundun yi? I a luma waxatin mundun yi n yi n degen nagerun? **20** Hali n bata yulubin liga, n nɔe nanse lige i ra, i tan naxan adamadiine rakɔsima? Nanfera i n yatexi se kala daxin na? N goronna i tan xun ma di? **21** Nanfera i mi n ma matandine mafeluye, i n hakene ba n ma? Iki, n na n sama nen burunburunni, i n fenma nen, n mi fa na."

8 Suxa kaan Bilidada yi falan tongo, a naxa, **2** "Han waxatin mundun yi, i luye i fala xuini? Han waxatin mundun yi, i fala xuine finde foye jaxin na? **3** Alaa sariyan kale ba? Ala Senbe Kanna tinxinna kale ba? **4** I ya diine yulubin liga nen a ra, Ala yi e saran e murute feene ra. **5** Koni, xa i tan Ala fen, xa i Ala Senbe Kanna maxandi, **6** xa i sarijan, xa i fanɛ ayi, a i malima nen, a i raxete i funfuni. **7** I kii fonna mi yi sese ra, i kii nenen findima nen binye gbeen na. **8** Nayi, mayixete danguxine maxodin, i xaxili dɔxɔ e benbane xaxilimayaan xɔn. **9** Amasɔtɔ, en barixi xoroni, en mi sese kolon, en ma siimayaan luxi nen alo nininna. **10** Koni, e i xaranma, e falan tima i xa e xaxilimayani." **11** "Gbalan solɛ daraan xanbi ba? Gbalan sabate igen xanbi ba? **12** Hali a xindena, a mi segexi, a xare sinma sexen bonne yee ra xa a mi igeni. **13** Na nan ligama muxune birin na naxanye jinanma Ala xɔn. Naxanye mi Ala kolon, ne yigin janma nen, **14** e yigin kalama nen alo simisamana yalana. **15** A yigi sama a banxin nin, koni a mi sensen, a kankanxi a yiiseene ma, koni e mi luma. **16** A luxi nen alo wudi xinden sogen na, naxan a yiine yibandunma nakɔɔn xun ma. **17** A salenne godoxi han e sa so gemeni, a sa gemen kuiin li. **18** Koni, xa a ba a tideni, menna

boxɔna a mema a ra nen, a naxa, 'N tan munma i tan to.' **19** E sewan janma na kii nin naxanye jinanma Ala xɔn, gbeteɛ fan yi mini e funfuni. **20** A mato, Ala mi sɔntaren nawolima ayi, a mi fe jaxi rabane senbe soma. **21** Ala i ragelema nen, a yi sewan sa i yi. **22** I yaxune yagima nen, jaxudene yi jan."

9 Yuba yi a yabi, a naxa, **2** "Nɔndin na a ra, n na a kolon a na kii nin, anu adamadiin nɔe tinxinɛ ayi di Ala yee ra yi? **3** Xa muxuna nde waxi Ala matandi feni, hali Ala a maxodin sanja ma wuli keden, a mi a yabe hali keden pe. **4** Fekolonna nun senben birin a tan nan xa. Nde nɔe Ala matande, na feen mi saran a ra? **5** A geyane bama e funfuni, a mi e rasogin, a yi e raxuya ayi a xɔloni. **6** A boxɔn naxuruxurunma a dɔxɔdeni, a yi boxɔn bunne raxuruxurun. **7** A na falan ti sogen xa, sogen mi tema, a yi sarene ratagan dege. **8** A tan nan keden koren daxi, a sigan ti fɔxɔ igen mɔrɔnne fari. **9** A bata Kanko Gbee sare kurun nun Donso sare kurun nun Dii Teme Solofere sare kurun nun yiifari fɔxɔn sarene da. **10** A fe gbeene ligama muxun mi naxan famunɛ, a kabanako feene liga naxanye mi nɔe yate. **11** A danguma n dexɔn ma, n mi a toma. A loma ayi, n mi a yigbema. **12** A naxan xasunxi fangani, nde nɔe na be a yii? Nde suse a maxodinɛ, fa fala, 'I nanse ligama?' **13** Ala mi xetema a xɔlon fɔxɔ ra, hali ige yi ninginangan Raxabi nun a walikene xinbi sinxi Ala bun ma." **14** "Nayi, n tan nɔe a yabe nanse ra? N falan mundun tiye a yetagi? **15** Hali n tinxin, n mi a yabe, n na n makiti muxun nan mafanma. **16** Hali n na a xili, a yi a ratin, n mi le a ra xa a tuli matiye n xuini na. **17** Amasɔtɔ a bata n halagi foye jaxin na, a yi n ma fure deene rawuya ayi, bun mi naxan ma. **18** A mi tinma n yi yengi a fajin na, koni a n nalugoma xɔlen nan na. **19** Nde senbe gbo dangu birin na, xa a tan mi a ra? Nde n xilima kiti sadeni, xa a tan mi a ra? **20** Hali n yi tinxin, a n yalagima nen n ma falane xɔn. Hali sɔntaren nan yi n na, a yi n yite sɔnmaan na. **21** Sɔntaren nan n na, koni n mi fa n yete yatexi, n bata n me n niin na, **22** a birin keden, nanara n na a falama fa fala a Ala sɔntaren naxɔrima nen alo muxu jaxina. **23** Xa gbalon fa, a faxan ti sa, Ala sɔntarene tɔrɔyaan magelema nen. **24** A dunɔja sama muxu jaxine sagoni, a yi kitisane yeene raxi. Xa a tan mi a ra, nde fa a lige?" **25** "N ma siimayaan mafura dangue dangu gilaan na, n ma lɔxɔne e gima, n mi herin toma, **26** e mafura alo kunki gbalaxina igeni,

alo singbinna naxan sinma suben ma. **27** Xa n na a fala, n naxa, 'N xa jinan n ma mawugan xon, n yi n ma sunun lu na, n yi n soɓe so,' **28** n gaxuma nen n ma tɔɔn birin yee ra, bayo n na a kolon a i mi n yate sɔntaren na, **29** n kolonma tinxintaren nan na i yee ra yi. Nanfera n na n yete xadanma fuuni? **30** Xa n na n maxa safunna ra, xa n na n yiine raxa libin na, **31** i n nasinma nen lɔxon xore ra, n yi rajaxu n ma dugine yeteen ma. **32** Muxu mi a tan na alo n tan, n mi nɔe a yabe, hanma nxu siga kiti sadeni. **33** Tagi yiton muxu mi nxu tagi, naxan nɔe a yiin se nxu firinna birin ma **34** naxan a dunganna be n fari, alogo a nɔɔn nama fa n magaxu. **35** Nayi, n yi falan tima nen, n mi gaxu a yee ra. Koni n bata a kolon a n kedenna na a ra."

10 Yuba mɔn yi a fala, a naxa, "N ma siimayaan bata rajaxu n ma, n mi fa n ma mawugane danma sɔnɔn, n na n ma sɔxɔlen falama nen. **2** N na a falama nen Ala xa, n naxa: I nama n yalagi, a yita n na nanfera i xɔlɔxi n ma. **3** Naxankatan finde fe fajin na i tan xa ba? I yete wali xonna rawole ayi ba? I yi muxu jaxine feene rasabati? **4** I toon tima i muxu yeeene nan na ba, i toon tima nen alo adamadiine ba? **5** I ya siimayaan luxi nen alo adamadiine gbeen ba? I ya lɔxone luxi nen alo muxune gbeen ba? **6** Nanfera i yi n hakene fenma, i yi n yulubine xɔnfen? **7** Anu, i a kolon a muxu jaxi mi n na, muxu yo mɔn mi nɔe n nakise i yii. **8** I tan nan n daxi, i yiine yi n nafala, koni iki, i waxi n naxori feni. **9** N ma fe xa rabira i ma, a i n nafalaxi nen alo bende yi sena, i mɔn waxi n naxete feen nin bendeni ba? **10** I n nafala nen nga fatini, alo nɔnɔn naxan findin fenen na. **11** I yi fati benden nun fati kidin sa n ma, i yi n nafala xonne nun fasane ra. **12** I mɔn yi siimayaan fi n ma, i hinan n na, i yi n niin nakantan. **13** Koni, i yi wundo feni ito luxunxi i bɔjɛni, n na i ya miriyani ito kolon, **14** fa fala xa n yulubin liga, i nɔe n toe nen, i mɔn mi dijɛ n haken ma. **15** Xa muxu jaxin nan n na nun, gbalona n xa! Hali n tinxin, n mi nɔe n xunna rakele, n tan naxan nafexi yagin nun tɔɔn na. **16** Xa n nan n xunna rakeli, i n kedima nen alo yatana, i mɔn yi i ya kabanako feene ragodo n xili ma han! **17** I mɔn i ya gbalone rakelima n xili ma, i ya xɔlon xun masama n xili ma, i ya ganle biraxi e bode fɔxɔ ra n yenge xinla ma." **18** "Nanfera i naminixi nga kuini? Hali n yi faxa nun, muxu yo mi n to, **19** n lu alo n mi da, n ba nga kuini, n sa maluxun gaburun na. **20** N ma lɔxone mi fa

wuya sɔnɔn, nayi, a lu, n xa sewa ndedi, **21** benun n xa siga yamanani xete mi denaxan yi, denaxan nafexi dimin nun sayaan nininna ra, **22** yamana yifɔrena alo dimina, sayaan nininna nun kalan denaxan yi, kenenna luxi denaxan yi alo dimina."

11 Nama kaan Sofara yi falan tongo, a naxa, **2** "Fala wuyaxini itoe yabi mi na ba? Falan nan tun yoon fima muxun ma ba? **3** Muxune dunde i ya fala jaxine bun ma ba? I magelen tiye ba, muxe mi i rayagi? **4** I a falama, i naxa, 'N ma fekolonna sarijan, fe yo mi n na Ala yetagi.' **5** Koni, xa Ala yi waxi falan ti feni nun, xa a yi a deni biye a falan ti i xa nun, **6** xa a yi a fekolonna wundone fala i xa, naxanye fan xaxinla xa, nayi, i yi a kolonma nen a Ala mi i hakene birin saranxi i ra." **7** "I nɔe Ala miriyane kolonjɛ? I nɔe Ala Senbe Kanna senben danna kolonjɛ? **8** A mate dangu kore xonna ra. I nanse lige? A tilin laxira xa. I nanse famuma? (Sheol h7585) **9** A kuya dangu bɔxɔn na, a gbo dangu fɔxɔ ige baan na. **10** Xa Ala fa muxune suxe, xa a e xili kiti sadeni, nde nɔe a matande? **11** Amasɔɔ, Ala fuyantenne kolon, a na haken to, a mi a yeen naxiye a ma. **12** Koni, kɔmɔn mi nɔe finde xaxilimaan na, alo sofali xuruxin to mi bare burunna ra." **13** "I bɔjɛn nafindi Ala ma, i yiin ti a tan xa, **14** i mɛ i hakene ra, i nama tin tinxintareyaan yi so i konni. **15** Nayi, fe mi luma i ra, i xunna kenla sɔtɔma nen, i findi muxu kenden na, i mi fa gaxuma sese ra. **16** I jinanma nen i ya sɔxɔlene ra, i jinanma nen e xon alo igen naxan danguma xude wunla ra. **17** I ya siimayaan makenenna nen alo yanyi tagina, a dimin yi lu alo xɔtɔnna. **18** I lannayaan sɔtɔma nen, bayo i yigin sɔtɔma nen, Ala i rakantanma nen i lu bɔjɛ xunbenli. **19** Muxu yo mi fa i raxulunjɛ i ya xixɔnli, muxu wuyaxi fama nen i xandideni. **20** Koni, jaxudene yeen danxuma nen, e yigin kalama nen, e yengi fa tixi sayaan nan na."

12 Yuba yi a yabi, a naxa, **2** "Nɔndin na a ra, muxuyaana kolonna birin e yi, fekolonna janma nen e faxa xanbini. **3** Koni, xaxilimayana nde n fan yi, alo e tan, e mi dangu n na, nayi nde mi nɔe feni itoe birin kolonjɛ? **4** N bata findi magele seen na n xoyine xa, n tan naxan yi Ala maxandima, a yi n yabi. Muxu tinxinxi kamalixin bata findi magele seen na. **5** E tan, muxu herixine tɔɔ muxune rajaxuxi, na luxi nen alo muxun na salaxun, e mɔn yi a radinjɛ ayi. **6** Bɔjɛ xunbenla mafu tiine konne yi, naxanye Ala rafenna,

ne makantanni, e e yete senben nan yatexi e gbee ala ra.” 7 “Koni, subene maxodin, e i xaranye nen. Xoline maxodin kore xonna ma, e a fale i xa nen. 8 Falan ti boxon na, a i xaranye nen, yexene baani, e a fale i xa nen. 9 Ne birin ye, nde mi a kolon fa fala naxan birin daxi, a Alatala wanla nan na a ra? 10 Dali seene birin niine a tan nan yii, e nun yengin naxan muxune birin yi. 11 Tunla falane tagi rabaan kolon, alo deen donseen jaxunna kolonma kii naxan yi. 12 Fekolonna fama foriyaan nan xon, xaxilimayaan fama simaya xunkuyen nan xon.” 13 “Koni Ala nan gbee fekolonna nun senben na. Maxadin nun xaxilimayana a tan nan yii. 14 Ala na naxan kala, muxu yo mi na yitonje, a na naxan sa kasoon na, muxu yo mi na xoroye. 15 Xa a mi tin tulen xa fa, furun yi ti, koni a na tulen bepin, boxon yi kala. 16 Senben nun kolonna a tan nan yi, yanfantenne nun muxu yanfaxine birin a tan nan bun. 17 A tan nan a ligama yamaan kawandi muxune yi sigan ti e san yigenla ra, a yi kitisane findi daxune ra. 18 A tan nan mangane senben bama e ra, a yi kasorasa dugin nagodo e ma. 19 A tan nan saraxaraline fan nasigama e san yigenla ra, a yi noya kendene kala. 20 A tan nan falan bama fala tiine yi, a yi xaxilimayaan ba fonne yi. 21 A tan nan toron nafama kuntigine ma, a yi senbemanen senben kala. 22 A tan nan dimi yi feene ramini kenenni, naxanye yi laxira yi, a yi ne makenen. 23 A tan nan siyane rawuyama ayi, a yi e raxori. A siyane ragbo ayi, a yi e raxuya ayi. 24 A xaxinla ba yamaan kuntigine ma, a yi e rabepin tonbonni kira mi denaxan yi. 25 E lu dimini kenen mi denaxan yi, a yi e xun magi e ra alo dolo minna.”

13 Yuba mon yi a fala, a naxa, “A mato, n yeen bata na birin to, n tunla bata na birin me, n yi a famu. 2 E naxan kolon, n fan na kolon, e mi dangu n na. 3 Koni, n tan waxi falan ti feni Ala Senbe Kanna nan xa, n waxi n xa n mawuga Ala xa. 4 Koni e tan wulen nan tun sama jondin ye ma, e birin findixi dandan ti fuyanne nan na. 5 Xa e yi e dunde nun, na yi finde e fekolonna ra nen. 6 E n ma mawugan name, e tuli mati n ma mawuga xuiin na. 7 Ala makoon luye e tinxintareyaan ma ba, e wulene fala Ala mali feen na? 8 E waxi e sa feni Ala nan fari n xili ma ba? E Ala nan xun mafalama ba? 9 A na e miriyane yate, na fanye e ra ba? E noe a yanfe ba alo muxuna? 10 Nondin naxan na, e na kitin sa yetagin ma hali wundoni, Ala falan tima nen e xili ma. 11 E mi gaxuma a binyen yee

ra ba? A magaxun mi e suxe ba? 12 E sandane luxi nen alo xubena, e xun mafala falane kalama nen alo bendena.” 13 “E dundu, e n lu! N xa falan ti hali sese n soto. 14 Nanfera n nan n fati benden xinje n jinne ra, nanfera n tinje sayaan ma? 15 Xa Ala wa, a xa n faxa, n yengi mi fa sese ma koni n waxi n sigati kiin xonba feni a tan nan yetagi. 16 Na yeteen findima n ma kisin nan na, bayo Ala kolontare yo mi tima a yetagi. 17 E tuli mati n ma falan na a fapiin na, n ma fe ye xaranna xa so e tunla ma. 18 N bata n xun mafala feni ton, n na a kolon a jondina n tan nan xa. 19 Nde waxi n xun maxidi feni? Nayi, xa jondi mi n xa, n tinxi n yi n dundu, n faxa.” 20 “N ma Ala, fe firin gbansan masiga n na, nayi, n mi luxunje i ma: 21 I ya xolon masiga n na, i ya magaxun nama fa n suxu sonon. 22 Na xanbi ra, falan ti n xa, n ni i yabe, hanma n yi falan ti, i yi n yabi. 23 Yoli n hakene nun n yulubine yaten na? N ma murute feene nun n ma yulubine yita n na. 24 Nanfera i yetagin luxunma n ma, i yi n yate i yaxun na? 25 I n tan nan magaxuma ba, n tan naxan luxi alo joxondena foyen sigan naxan na? I n tan nan sagatanma ba, n tan naxan luxi alo malo dagi xarena? 26 I fe xolene sebema n xili ma, i n ma dii joreyaan haken goronna dexo n xun ma. 27 I n sanne sama kutun na, i yeen tixi n sigati kiin birin na, hali n san funfune, i e birin nakorosima. 28 Koni, adamadiine kunma alo wudi kalaxi, alo xiine dugin kala kii naxan yi.”

14 Yuba mon yi a fala, a naxa, “Adamadiin minixi jaxanla nin, a siimayaan mi xunkuya, a rafexi lanbaranna nan na, 2 a luxi nen alo wudi fugen naxan minima, a xara, alo nininna, a mi buma. 3 N ma Ala, i yeen tima n tan nan na ba naxan luxi alo adamadiin bodene? I kitin nasoma en tan nan tagi ba? 4 Nde noe se sarijanxin be se haramuxini? Muxu yo. 5 I bata muxuna siimayaan danna ragidi, i yi a siimayaan kikene yate, a mi dangue naxanye ra i naxanye saxi. 6 Nanara, i yeen ba muxun na, a xa a matabu, alogo a xa a waxatin napan boje xunbenli alo walikeen yanyin napanma kii naxan yi.” 7 “Yigin wudin tan ma, bayo a na sege, a mon yi mini, a joxon mi janma, 8 hali a salenna fori boxoni, a xun dungin yi faxa boxoni, 9 igen neen fa sa a ma tun, a mon bata a mabun, a yi a jingine ramini alo a yi kii naxan yi a foloni. 10 Koni, xa muxun faxa, a senben bata jan. Muxun na faxa, a sigan minen? 11 Igen janma nen baani,

xudene yi xara. **12** Muxun na faxa, a jianma na kii nin, a mi fa kelima sɔnɔn, fanni kore xɔnna na, a mi xulunma, a mi kelima a xixɔnli.” **13** “Xa i yi tinjɛ n luxunjɛ laxira yi nun, n yi lu na han i ya xɔlɔn yi jan! I mɔn yi waxatin nagidi n ma, n ma fe rabirama i ma waxatin naxan yi. (Sheol h7585) **14** Koni muxun naxan bata faxa, na mɔn kele ba? N diɲama nen n ma wali waxatin bun, han i fa n naxulunma waxatin naxan yi. **15** Nayi, n ni i yabɛ, i na n xili, i na wa n to feni, i tan naxan n daxi. **16** Anu iki, i n sigati kiin birin yatexi. Koni na waxatini, i mi fa n yulubine yatema, **17** i n ma murute feene luxunma nen benbenla kui, i yi n hakene mafelu.” **18** “Koni, hali geyane, nde luma bɛ e ra waxatin birin han e xuya ayi, hali fanyene, e bama e funfuni a xunxuri yɛɛn ma, **19** igen luma nde bɛ gemene ra, baa walanxine yi bɔxɔn tongo, i fan adamadiine yigin kalama na kii nin. **20** I muxune yengema habadan, e yi faxa, i yi e yetagin masara, i yi e kedi. **21** Xa binyena e diine ma, e mi na kolon. Xa e rayarabi, e mi na yigbema. **22** A tan nan tun a tɔrɔn kolon, a sunuxi a yete nan tun ma fe ra.”

15 Teman kaana Elifasi mɔn yi falan tongo, a naxa, **2** “Fekolonna lan a yi yabin ti naxan tɔnɔ mi na ba, naxan findixi fala fuun na? **3** I lan i yi i xun mafala fala buntarene ra ba, naxanye tɔnɔ mi na? **4** I Ala yɛɛragaxun kalama muxune yi, i e Ala maxandi feene xunna kalama. **5** I i hakene nan ma fe falama. Fala jaxine nan i dɛ. **6** N tan mi a ra, i fala xuiin nan i yalagixi. I dɛɛn nan i seren na. **7** I singe nan barixi adamadiine birin yɛɛ ra ba? I singe nan daxi benun geyane xa da ba? **8** I Ala wundo falane rame nen ba? I tan nan keden fe kolon ba? **9** I nanse kolon, nxu mi naxan kolon? I nanse famuma, nxu mi naxan famuma? **10** Xun sexɛ fixɛne na, fonne nxu yɛ, naxanye fori i fafe xa. **11** Ala i ralimaniyama falan naxanye ra, i makoon mi ne ma ba, nxu fala fajin naxanye tima? **12** Nanfera i bɔjɛn tema? Nanfera i yɛɛn xun sinma, **13** i niin nafɔɔ Ala xili ma, i na fala sifane ti? **14** Nanse adamadiin na, a yi a yete yate saripanden na? Naxan minixi jaxanli, na finde tinxinden na ba? **15** Hali a malekane, Ala mi lannayaan saxi ne yi. Hali kore xɔnna, a mi saripjan a yɛɛ ra yi. **16** A xa lannayaan sa muxun tan yi di nayi, naxan jaxu, naxan yanfan tima, tinxintareyaan nafan naxan ma alo igen min daxina?” **17** “N xa a yɛba i xa, i tuli mati. N xa a yɛba n naxan toxi, **18** fekolonne naxan falaxi, e nun

e benbane, naxanye mi sese luxunxi e ma, **19** Ala yamanan so naxanye gbansan yii, xɔjɛ yo munma yi so naxanye yɛ.” **20** “Naxuden luma kɔntɔfinla nin a siimayaan birin yi, jaxankata tiina waxatin yatɛxin na a ra. **21** A wurundun xui magaxuxine mema, bɔjɛ xunbeli waxatini, halagin yi fa a tan ma. **22** A mi laxi a mini feen na sɔnɔn dimini, a faxama yɛngɛn nin. **23** A donseen fenma, koni a sɔtɛ minen? A kolon a faxan lɔxɔna a mamɛma. **24** Kɔntɔfili feene nun kuisan feene a magaxuma nen, e wuyaxi yi fa a xili ma alo mangana ganla nan sigan yɛngɛni. **25** Ne feene birin a sɔtɔma nen bayo a bata susu Ala ra, a murute Ala Senbɛ Kanna xili ma. **26** A keli nen Ala xili ma a tengbesenyani, a yɛ masansan wure lefa gbeen tixi a yɛɛ ma. **27** A yetagin tuyanxi, a gbingin gbo, **28** koni a luma nen taa rabɛjinxine yi, banxi kui genle yi, naxanye kalamato a ra. **29** Na kanna mi fa herin sɔtɔma, a nafunla mi sabatima, a fɔxɔn mi fa luma bɔxɔn fari sɔnɔn. **30** A mi tangama sayaan ma, a luma nen alo tɛɛn wudi dungin naxan ganma, Ala dɛ foyen yi a xali wulani.” **31** “A yigin saxi fuyanten feene nin, koni a yete nan yanfanma, bayo fuyantenyaan nan findima a saranna ra. **32** Na kamalima nen benun a xa faxa, alo wudin naxan mi fa a majingima. **33** A luxi nen alo manpa binla naxan a bogine rayolonma e mɔn xinde, hanma alo oliwi binla naxan fugeye yolonma a ra.” **34** “Na ligama nen bayo dii mi barima Ala kolontarene denbayane yi, yanfan banxin naxanye kui, ne findima tɛɛn balon nan na. **35** Sɔxɔlɛ feene e yi, na yi findi fe jaxine ra, e yanfani tɔn e bɔjɛni.”

16 Yuba yi a yabi, a naxa, **2** “N bata fala sifani ito mɛ dɔxɔ wuyaxi, ɛ birin findixi madenden ti jaxine nan na. **3** Danna fuyanten falani itoe ma ba? Nanse ɛ tɔrɔma ɛ to n yabima na kiini? **4** N fan yi nɔɛ falan tiyɛ nen alo ɛ tan, xa ɛ tan nan yi n tan na nun. Nayi, n yi falane tima nen ɛ xili ma nun, n yi n xunni maxa ɛ magele xinla ma, **5** n yi ɛ senbɛ soma nen n ma falane ra, n yi ɛ madenden ɛ tɔrɔni n ma fala fajine xɔn.” **6** “Koni, n ma falane mi nɔɛ n tan madendenjɛ n ma tɔrɔni. Xa n na n dundu, na fan mi se bɛ n ma tɔrɔn na. **7** Iki, Ala bata n senben jian yati! A bata n ma denbayaan birin halagi. **8** A bata n fatin mafasa, na yi findi sereyaan na n xili ma. A to n naxɔsixi, na yi findi n magi xunna ra. **9** Ala n yibɔma a xɔlɔni, a n yɛngɛ, a jinne raxinma n xili ma, n yɛngɛ faan yi a yɛɛ jaxin ti n na. **10** Muxune e dɛni bima n xili ma, e

n konbi, e n deen bonbo, e malan n xili ma. **11** Ala bata n so tinxintarene yii, a bata n so naxudene yii. **12** N yi boɲe xunbenla nin, Ala bata fa n kaladeni. A bata n suxu n xanbi ra, a n nabira boɲoni. A bata n lu alo xalimakunla sa sɔtima seen naxan yi, **13** a xalimakuli wonle bata n nabilin. Ala n sɔxɔnma n gbingini, a mi kininkininma, a n boɲen sa boɲoni. **14** A fama n xili ma alo sofana, a n naxankata, a lu n maxɔle.” **15** “N bata kasa benbeli dugin nagodo n ma sununi, n mi naxan bama, n lu xun sinxi burunburunni. **16** Wugan bata n yeen gbeeli, sayaan singanxi n yetagi. **17** Anu, n mi fe naxi yo ligaxi, n ma Ala maxandin yi sarijan.” **18** “I tan Boɲona, n faxamatɔɔn ni i ra, i nama n wunla ye maluxun. N wuga xuiin xa me han habadan. **19** Iki yeteni, serena nde n xa kore, naxan seren bama n xa mɛnni. **20** N xɔyine n magelema, koni n yeen tixi Ala nan na n ma wugani. **21** Na kanna Ala solonama muxun xa, alo adamadina a xɔyin xun mafalama kii naxan yi. **22** Koni, n ma siimayaan bata a danna li, n sigama nen kiraan xɔn, xete mi denaxan yi.”

17 Yuba mɔn yi a fala, a naxa, “N yengin dasama, n ma siimayaan yi jan, gaburun dɔxi n ye ra. **2** Magele tiine n nabilinni yati, e fa fuma n ma, n mi nɔe xiyɛ.” **3** “Ala, i bata tolimaan naxan maxɔdin n ma, i yeteen xa na so n yii. Xa i tan mi a ra, nde gbete n ma donla goronna tonge? **4** Bayo i bata xaxinla birin ba n xɔyine yi, na ma, i nama tin e xa nɔɔn sɔtɔ. **5** E luxi nen alo muxun naxan yanfan soma a xɔyine xili ma, na yi findi tɔrɔn na a diine xa.” **6** “Muxune n magelema e sigine yi, e degen namini n yetagi. **7** N yeene bata yidimi sununi, n fati benden bata yelefu ayi alo a nininna. **8** Muxu fajine na n to, n kiin yi e ratereɲa, sɔntarene xɔloma n ma, e yi n yate Ala kolontaren na. **9** Koni, tinxin muxune xa lu e kiraan xɔn, naxanye sarijan, ne senben sɔtɔma nen. **10** Koni e tan, e xete, e mɔn xa fa. N mi fekolon toma e ye. **11** N ma siimayaan bata jan, n ma wanle bata kala, n waxɔn feene bata kala. **12** N xɔyine a falama, e naxa, a kɔeen findima nen a yanyin na, fitirin na so, e fala a subaxan na a ra. **13** N xa n yigi sa laxira yi tun ba, n na n sama dimini denaxan yi? (Sheol h7585) **14** N falan tima nen n gaburun xa alo a tan nan n fafe ra. N falan ti kunle xa alo e tan nan nga nun n magilen na. **15** Nayi, n yigin minen? Nde n yigin toe? **16** Yigin laxira yi ba, nxu birin na siga nxu sa nxu sa burunburunni?” (Sheol h7585)

18 Suxa kaan Bilidada mɔn yi falan ti, a naxa, **2** “I falan danma waxatin mundun yi? Xaxili fen, na xanbi ra, en falan tiye. **3** Nanfera i nxu yatexi xuruseene ra? Nanfera i nxu mirixi xaxilitarene ra? **4** Yuba, i tan nan i yete maxɔlɔxi i ya xɔlɔni. I laxi a ra a muxune dunuya rabeginma i tan ma fe ra ba? Fanyen xa keli a dɔxɔdeni i ya fe ra ba?” **5** “Naxudena tee degen tuma nen, a tanden yalanna yi jan. **6** Kenenna yi findi dimin na a konni, a lenpun yi tu a xun ma.” **7** “A madiganma nen a sigatiin senbeni, a feene a rabirama nen. **8** A sanne suxuma nen yalaan na, a sin yinla ra. **9** A suxuma a san tinban nan ma, gbatun yi a suxu. **10** Lutin natixi a ye ra boɲɔn nin, wosona a kiraan xɔn. **11** Gaxun luma ayi nen yiren birin yi, a bira a san funfun fɔxɔ ra.” **12** “A tan naxan senbe yi gbo, a senben bata jan, gbalon bata maso a ra. **13** Furen bata a fati kidin kala, saya furen bata a salen seene kun a ma. **14** Sayaan bata a suxu a konni, a yigi saxi denaxan yi, a yi a xali manga magaxuxin fema. **15** Muxu gbete nɔe dɔxe nen a konni sɔnɔn, a gbee mi fa a ra, seri fujin bata sa a konna birin ma. **16** A bata lu alo wudin salenne na xara a bun, a deene yi xara a ma.” **17** “A funfun birin bata jan boɲɔn fari, a xinla mi fa falama kiraan xɔn sɔnɔn. **18** A bata radin dimini keli kenenna ma, a yi jan dunuya yi. **19** Dii yo mi a yii, mayixete yo mi a xanbi ra, muxu yo mi fa a konni sɔnɔn. **20** Muxun naxanye sogeteden binni, ne kabema nen a rajanna ma, muxun naxanye sogegododen binni, gaxun yi ne suxu. **21** Tinxintarena denbayaan luma na kii nin, Ala kolontaren nan kon na ra.”

19 Yuba yi a yabi, a naxa, **2** “E luma n naxankate han waxatin mundun yi, e n sɔxɔle e falane ra? **3** E bata n konbi han sanja ma fu, e mi yage n tɔre sɔnɔn ba? **4** Hali n bata tantan, n ma tantanna goronna luma n tan nan xun ma. **5** Xa e ye yite n xili ma, e yi n mafala n yagi feen na, **6** nayi, e xa a kolon a Ala nan tɔrɔni ito ragidixi n ma, a n mafilin a yalani. **7** Xa n gbelegbele tɔrɔni ito bun, n mi yabi sɔtɔma. N na xinla ti n mali feen na, kiti kenden mi se. **8** Ala bata kiraan suxu n ye ra, n mi nɔe dangue, a yi dimin naso n ma kiraan xɔn. **9** A bata n ma binyen ba n yi, a yi n ma xunna kenla ba n yi naxan yi luxi alo manga kɔmɔtina n xa. **10** A bata n kala yiren birin yi, n naxɔrima nen. A bata n yigin kala alo wudin talaxina. **11** A bata xolo n xili ma han, a yi n yate a yaxun na. **12** A yengesone bata e malan, e fa n xili ma,

e yi n konna rabilin.” 13 “A bata ngaxakedenne masiga n na, naxanye n kolon, ne bata siga ayi pon. 14 N kon kaane bata n nabegin, n lanfane yi jinan n xon. 15 N ma muxune nun n ma walike jaxanle birin n yatexi alo xajena, n bata findi xajen na e yee ra yi. 16 N na n ma walikeen xilima, koni a mi n yabima, hali n na a mafan. 17 N ma jaxanla mi fa tinje n deen xirin ma, n ma fe bata rajaxu n ma denbayaan ma. 18 Hali dii jorene, n najaxu e birin ma, n na keli, e n mafala. 19 N najaxu n xoyi kendene birin ma, hali naxanye rafa n ma, ne bata e xun xanbi so n yii. 20 N bata doyen, n kidin nun n xonne nan gbansan fan n ma. 21 N xoyine, e kininkinin n ma, e kininkinin n ma, bayo Ala senben bata n jaxankata! 22 Nanfera e n sagatanma alo Ala? E munma wasa n jaxankatadeni ba?” 23 “N yi waxi a xon ma nun n ma falane yi sebe, e yi sa kedini, 24 e yi sebe yoxo lefaan ma wure jae ralemunxin na, e yi kerenden fanyen ma han habadan! 25 N na a kolon a n xunbamana a nii ra. Donxen na, a kelima nen, a ti boxo xonna ma. 26 Hali n fati kidin birin na kun fureni, n gbindin sa Ala toma nen. 27 N na a toma nen, n na a tan nan toma, gbete mi a ra. N kunfaxi na waxatin xon! 28 E a falama, e naxa, ‘En na a sagatanma di? En fa feen mundun toma a ra a yalagi xunna ra?’ 29 Anu, e yi lan nen, e gaxu silanfanna yee ra, amasoto Ala e saranma nen e jaxankatane ra sayaan na. Nayi, e a kolonma nen a Ala kitin na.”

20 Nama kaan Sofara mon yi a fala, a naxa, 2 “N xaminxi e miriyane fe yi na nan n karahanma, n xa yabin ti, n mi fa nae dije. 3 N bata n konbi xuine me, koni, n yabin tima nen xaxilimayani. 4 I mi a kolon ba, waxatin birin, xabu adamadiine lu boxon fari, 5 a jaxudene xunna kenla mi buma, a Ala kolontarene sewan janma nen mafuren? 6 Hali a te han kore, hali a xunna sa so kundani, 7 a loma ayi nen habadan alo a gbiina. Naxanye yi a toma, ne a falama nen, e naxa, ‘A minen?’ 8 A danguma nen alo xiyena, a funfun yi lo ayi, a janma nen alo xiyen keenen na. 9 Muxun naxan yi a matoma, na mi fa a matoma sonon, hali a doxoden mi fa a toma sonon. 10 A diine karahanxin yi yiigelitone yii raxete, e tan yeteen yi a nafunle raxete na muxune ma. 11 Hali a siimayaan to munma yi xunkuya, a yi sa a gaburun na.” 12 “Fe jaxin jaxun a de alo sukana, a naxan luxunma a lenna bun, 13 a naxan madunxunma a de, a mi waxi naxan xa jan, 14 koni a donseen kunma nen a kui, a

findi fodogoon xolen na. 15 A bata nafunle magerun, koni a e baxunma nen, Ala e raminima nen a kui. 16 A yi fodogoon xolen nan madunxunma, sajnin xolen nan a faxama. 17 Kumin nun nonon gbo yamanani alo baa igena, koni a mi fa na toma sonon. 18 A tonon naxan sotoxi, a na raxetema nen, a mi a donma, a mi fa a yulaya seene tonon sotoma sonon. 19 Na birin ligama nen bayo a yiigelitone jaxankata nen, a yi e rabegin, a yi banxina nde tongo a mi naxan tixi.” 20 “A mi yi wasama a kunfani, nanara, a nafunla sese mi yi luma. 21 Muxu yo mi tangama a kunfan ma, koni a herin mi buma. 22 A kontofilima nen hali a herini, toroyaana sifan birin yi fa a ma. 23 A na a kuiin nafe, Ala a xolon nafama nen a xili ma, a godoma nen a ma alo tulena, a findi a balon na. 24 Xa a gi wure silanfanna bun, xalimakuli sula daxon nan sa a yisoxonma. 25 A xalimakunla botinma nen a fatini, naxan jae bata sa a bojen soxon, koni sayaan magaxuna a suxuma nen. 26 A nafulu ramaraden nafema dimi gbeen nan tun na. Teen yi fa a halagideni muxe mi naxan nadegexi, muxun naxanye mon na lu a konni, teen yi ne fan gan. 27 Kore xonna a hakene raminima nen kenenni, boxo xonna yi keli a xili ma. 28 A nafunle yi makuyama a ra nen, Ala na a xolon nagodo a xili ma loxon naxan yi. 29 Ala fe jaxi rabane rajanma na kii nin, Ala na nan findixi a keenen na.”

21 Yuba mon yi falan ti, a naxa, 2 “E tuli mati, e tuli mati n ma falan na, e n nalimaniyama na kiini. 3 E tin n xa falan ti, n na falan ti, nayi, e nae n magele nen. 4 N na n mawugama adamadiine nan xon ba? En-en de! Nanfera nayi, e waxi a xon a n xa dija? 5 E na e miri n ma fe ma, e kabema nen, e yi e yiin sa e de ra, e yi e dundu. 6 Feen naxan birin n sotoxi, n na n miri ne ma, n kuisanma nen, n fatin yi xuruxurun n ma.” 7 “Nanfera jaxudene mon e nii ra? Nanfera e siimayaan buma? Nanfera e senben sotoma? 8 E yi e yixetene to sabate e dexon ma, e yi e mamandenne to. 9 Feene birin lanxi e yii, e mi gaxuma, Ala mi e ratoronma. 10 E turane e jinge gilene rawuyama ayi waxatin birin, e jingene diine barima, e mi faxama. 11 E diine e gima na xun xon alo xuruse diine, e yi e bodon. 12 E sigin sama kondenna nun tanban xuini, xulen xuiin nafa n ma. 13 E na e siimayani dangu a fajan na, e siga laxira yi boje xunbenli.” (Sheol h7585) 14 “Anu, e a falama Ala xa, e naxa, ‘I masiga nxu ra, nxu mi waxi i ya kirane kolon feni. 15 A lan nxu yi findi

Ala Senbe Kanna konyine ra ba? Ala mafanna tɔnɔn finde nanse ra nxu xa?" 16 E laxi a ra a herin kanna e tan nan na, koni, e fe yitɔnxine rajaxu n ma." 17 "E bata jaxudene lenpun to tuye sanja ma yoli? E bata e to gbaloni ba? E bata Ala to e ratɔrɔnjɛ a xɔlɔni ba? 18 E luxi nen ba alo foyen sexen naxan xalima, alo wuluwunla xuben naxan yitema? 19 E a falama, e naxa, 'Ala jaxudene hakene saranna ramaraxi e diine nan xa.' Koni, e hakene yi lan a xa saran e yetɛɛn nan na, alogo e xa a kolon. 20 A yi lan e yetɛɛn yi e halagin to, e yi Ala Senbe Kanna xɔlɛn min. 21 A denbayaan bɔtɛ mundun fa a tan xa a faxa xanbini? 22 Nde nɔɛ Ala xaranyɛ fe kolonna ma, a tan naxan malekane makitima? 23 Muxuna nde faxama heri gbeen nin, kɔntɔfili yo mi a ma, a bɔjen xunbelixi, 24 a tuyanxi, senben mɔn a ra. 25 Muxu gbete bɔjen sunuxin yi faxa, a mi fe fajɪ yo sɔtɔ hali keden pe. 26 Koni, e firinna birin sama benden nin, kunle yi e don." 27 "N bata e miriyane kolon ki fajɪ, e feen naxanye yitɔnxi n xili ma. 28 E a falama nen, e naxa, 'Muxu gbeeni ito, a banxin minen? Naxuden konna go? E mi fa na.' 29 Koni, e mi dangu muxune maxɔdinxi ba? E mi laxi e sereyaan na ba? 30 Gbalon na fa, fe jaxi rabane yi kisi, Alaa xɔlɔn na fa, a mi sese ligama e tan na. 31 Nde e raxɔle e fe raba kiin ma? Nde e saren fiye e kewanle ra? 32 E na e maluxun, muxune yi e yengi dɔxɔ e gaburune xɔn, 33 merɛmerɛn bende yelefuxine yi sa e fari. Dunuya muxune birin birama nen e fɔxɔ ra, gali gbeen yi siga e yeɛ ra. 34 Nanfera nayi e n masabarima fala fuune ra? Yanfa falane nan tun e yabine ra."

22 Teman kaana Elifasi mɔn yi falan ti, a naxa, 2 "Adamadiin tɔnɔna Ala ma ba? Hali xaxilimana, a tɔnɔn luma a yete nan tun ma. 3 I na tinxinjɛ ayi, na tɔnɔna Ala Senbe Kanna nan ma ba? Xa fe mi i sigati kiin na, na munanfanna a ma ba? 4 I mirixi a ma ba a Ala i ratɔrɔnma nen, a i xali kiti sadeni, i to gaxuxi a yeɛ ra? 5 I ya fe jaxine mi gbo ba? I hakene dan mi na. 6 I yi tolimaan tongoma i ngaxakedenne yii fuun nin, i yi e dugine ba e ma, i yi e magenla lu. 7 I mi yi igen soma muxun yii min xɔnla naxan ma, i yi tondi donseen soe kamɛtɔn yii. 8 Yamanan yi senbemaan nan yii, wasoden nan yi dɔxi yamanani. 9 I yi kaja gilene raxetema nen e yii genla ra, i yi kiridine jaxankata. 10 Nanara, i rabilinxi luti ratixine ra, gaxun yi i suxu xulen. 11 Nayi, i mi dimini ito toma ba, i mi fufani ito toma ba naxan i rabilinxi?" 12 "Ala

mi kore xɔnna xan ma ba? Sarene mato kore, e mate pon! 13 I a falama, i naxa, 'Ala nanse kolon? A nɔɛ kitin se kunda dimin xanbi ra ba? 14 Kundana a yeɛ ma, a mi sese toma, a nɛma kore xɔnna rabilinjɛ.' 15 I mɔn waxi lu feni kira fonni ito xɔn ba, muxu jaxine sigan tima naxan xɔn? 16 E faxan nen benun e waxatin xa li, alo fufa gbeen banxi kanken xalima kii naxan yi. 17 E yi a falama nen Ala xa, e naxa, 'I masiga nxu ra. Ala Senbe Kanna nan i tan na, koni i nɔɛ nanse lige nxu ra?' 18 Anu, Ala nan e banxine rafe nafunla ra. Eel Jaxudene fe yitɔnxine rajaxu n ma! 19 Tinxindene na e to gbaloni, e sɛwa. Sɔntarene e magelema nen, e naxa, 20 'En yaxune bata raxɔri! Tɛɛn yi e yiiseene halagi.'" 21 "Lanna xa lu e nun Ala tagi, nayi, i bɔje xunbenla sɔtɔma nen, i herin sɔtɔ. 22 Ala i xaranma naxan ma, i na suxu, i yi a falane sa i bɔjɛni. 23 Xa i mɔn fa Ala Senbe Kanna ma, a mɔn i senbe soma nen. I xa tinxintareyaan masiga i konna ra, 24 i xa i ya xema fajin woli ayi bɔxɔni, hanma i sa a bira xude yi gemene longonna ra. 25 Ala Senbe Kanna nan xa findi i ya nafunla ra, alo xɛmaan nun gbeti fixe gbeena i xa. 26 Nayi, i sewan sɔtɔma nen Ala Senbe Kanni, i xunna kenla sɔtɔ Ala yetagi, 27 i yi a maxandi, a yi i yabi, i yi i de ti xuine rakamali. 28 Xa i fena nde ragidi, Ala a rakamalima nen i xa, kenenna luma nen i ya kiraan birin xɔn. 29 Ala na muxuna nde rayagi, i a falama nen a Ala na ligaxi nen bayo wasoden nan na kanna ra, koni, naxan na a yete magodo, Ala na rakisima nen. 30 Ala nan sɔntarene xunbama, nanara, xa i sarijan, a i xunbama nen."

23 Yuba mɔn yi falan ti, a naxa, 2 "N ma mawugan mɔn findixi muruten nan na to, n yiin saxi n de ra, koni n wuga xuiin mɔn minima. 3 Xa n yi a kolon nun Ala denaxan yi, n yi sigama nen han a konni, 4 n yi n ma mawugan yita a ra, n yi n xɔnba fala wuyaxi ti a xa. 5 Nayi, n yi a kolonma nen a n yabima falan naxan na, n yi a famu a naxan falama n xa. 6 A yi kele n xili ma a senbe gbeeni ba? En-en de, a yi a tuli matima nen n na. 7 A yi a kolonma nen a muxu fajin nan falan tima a xa. Nayi, n yi tangama nen kitin ma habadan." 8 "Koni, n na siga sogeteden binni, a mi na, n mi a toma sogegododen binni, 9 n na a fen n kɔmenna ma, n mi a toma, n na xete n yiifanna mabinni, n mi a toma. 10 Anu, a n ma kiraan kolon. A na n fesefese tɔrɔni, n sarijanxin minima nen alo xɛmana. 11 N biraxi a san funfun nan tun fɔxɔ ra, n lu

a kiraan xon, n mi keli a xon. 12 N mi tondi a yamarine suxe, n na a falane birin namara nen n bojnani. 13 Koni, a na fena nde ragidi, nde a lige a na masara? A na wa naxan xon, a na liga. 14 A naxan nagidixi n ma, a na nan nakamalima, anu a mon na fe sifa wuyaxin nagidixi n ma yeen na. 15 Nanara, n gaxuma Ala yee ra. N na n miri, n gaxu a fe yi. 16 Ala bata n tunnaxolo n ma, Ala Senbe Kanna bata n nafe gaxun na. 17 Koni hali dimin to so n ma, a yi n nabilin, hali n mi fa sese toma, n mi n dunderu.”

24 “Nanfera Ala Senbe Kanna mi kiti waxatine saxi? Nanfera naxanye a kolon ne mi a toma kele muxu jaxine xili ma? 2 Muxu jaxine xe boxone danne fari sama, e xuruseene mujama, e yi e raba, 3 e kiridin nan ma sofali suxuma, e kaja gilen nan ma jinge makankanma tolimani, 4 e toro muxune radinma ayi kiraan xon, yamanan yiigelitone birin e luxunma e bun.” 5 “Yiigelitone sigama e wanla ra nen, e sa e donseen fen burunna ra, e sa e diine balon fen alo burunna sofanle tonbonni. 6 E sa e xuruseene balon fen muxu gbete ye xene ma, e lu jaxudene manpa bogi donxene makentunje. 7 E ragenle nan xima keeen na, dugi mi e ma, bitingan mi e yii xunbenla ra. 8 Tulen naxan fama geyane fari, na e bonboma xunbenli, banxi mi e yii, e saxi fanyene nan ma.” 9 “Muxu jaxine yiigelitona diin tongoma a yii doli saranna ra, hali kiridina, e xasunma xijen na a nga yii. 10 Yiigelitone ragenla nan sigama, dugi mi e ma, hali e to malo xidine maxali, kamena e ma, 11 e oliwi turen bama muxu gbete ne sansanne kui, e walima manpa rafaladeni, koni e mi noe sese minje. 12 Muxune faxamatoon wugama taani, muxu maxoloxine wugama e mali feen na, anu na fe mi finde terena fe ra Ala xa.” 13 “Kenenyaan najaxu muxu jaxine ma, kira yiyalanxin mi rafan e ma, e mi sigama a xon. 14 Faxe tiin kelima sogen godo waxatin nin, a yi yiigelitoon nun toro muxun faxe, a mujan ti keeen na. 15 Yalunden jinbanna nan mamema, a a falama nen, a naxa, ‘Muxu yo mi n toma,’ a yi a yetagin luxun. 16 Mujaden banxin deen kalama keeen nan na, yanyin na, a yete mabalan a konni, a mi kenenna kolon. 17 Na muxune yanyin foloma sogen godo waxatin nin, e bata dari keeen magaxu feene ra.” 18 “Koni e tan a falama, e naxa, ‘Naxuden xalima nen alo se yelefuxina igen xun ma, a doxoden yi findi yire dangaxin na boxon fari, a mon mi fa walima a manpa bili xeen ma.

19 Balabalan kesene xuyama ayi kii naxan yi sogen na, yulubi kanne sigama na kii nin laxira yi. (Sheol h7585) 20 Hali naxanye e barixi, ne jinanma nen e xon, e findi donseen na kunle xa, e fe falan mon yi dan. Nanara, tinxintareyaan kalama nen alo wudin na bira.” 21 “Na muxune jaxalan gbantane toroxi nen, e mi kaja gile ne mali. 22 Koni Ala noe senbemaneraxore a senbeni nen, a na keli, a muxu jaxine halagi. 23 Ala ne luma boje xunbenla nun marakantanni, koni a yeen tima nen e sigati kiin na. 24 Na muxune sabatima nen waxati di, koni na xanbi ra, e lo ayi, e konkoronma nen alo joxonde xarena, e xun sinma nen alo se tonsonna xaba daxina.” 25 “Xa a mi na kiini, nde n matande, a n ma falan nakala ayi?”

25 Suxa kaan Bilidada yi Yuba yabi, a naxa, 2 “Senben nun magaxuna Ala nan yi, a tan nan boje xunbenla rafama han kore xonna ma. 3 Nde noe a ganla yate? A sogen mi tema nde xun ma? 4 Adamadiin noe tinxinje di Ala yee ra yi? Naxan barixi jaxanla xon, na rasarijanma di? 5 Hali kiken mi fixa Ala yee ra yi, hali sarene mi sarijan. 6 Adamadiine tan di nayi, naxanye tide xurun alo konene nun kunle?”

26 Yuba mon yi falan ti, a naxa, 2 “I fatan senbetarene maliye yati! I bata fa fangatarene malideni! 3 I fatan fekolontaren kawande, i yi a maxadi han! 4 Koni i ya falane tima nde xa? I falani itoe tongoxi nde yi?” 5 “Faxa muxune niine xuruxurunma Ala yee ragaxuni laxira yi, naxanye boxo bun igene bun. 6 Ala yeen laxira yiren birin na, hali sayani muxe mi e luxunje a tan ma. (Sheol h7585) 7 Ala nan kore xonni fulunxi na yigenla xun ma, a boxon singan na yigenli. 8 Ala tulen namarama kundani, koni kundane mi kalama igen binyen bun. 9 A yi a mangaya gbeden luxun, a yi a kundaan sa a yee ma. 10 Ala yi digilinna sa foxo igen xun ma, naxan dan findixi kenenna nun dimin naralanden na. 11 Kore xonna senbetenne xuruxurunma, e kabe Alaa xolon ma. 12 Ala bata foxo igene no a senbeni, a yi ige yi ninginangan Raxabi faxe a xaxilimayani. 13 A foyen bata kore xonna fixa, a bata ige yi sube jaxin faxe a yiin na, sajin naxan a gima. 14 A wali xurine nan itoe ra, nxu a jumunjunun xuiin nan tun mema. Nayi, nde noe a senben galan xuiin kolonje?”

27 Yuba mon yi falan ti, a naxa, 2 “N bata n kolo habadan Ala yi, naxan tondixi n ma kitin se, Ala

Senbe Kanna naxan n niin nafexi xölen na, **3** xa n niin mōn n yi, xa Alaa foyen mōn soma n jōeni, **4** n bata n kōlo n dēen mi tinxintareya falan tiye, wule yo mi mine n dē. **5** Na miriyaan makuya n na, n xa jōandin fi ε ma. Han n yi faxa, n mi n ma fetareya wanle kale, **6** n luma nen tinxinni, n mi a bejinjε mume, n xaxinla mi n yalage n ma simayani mumel!” **7** “N yaxun nan lan a yate jaxuden na, naxan kelima n xili ma, na xa yate tinxintaren na! **8** Ala kolontarena a yigin sama nanse yi, Ala na a niin ba a yi? **9** Tōrōn na fa a ma, Ala a gbelegbele xuiin name ba? **10** A sewan sōte Ala Senbe Kanna yii ba? A Ala maxande waxatin birin ba?” **11** “Iki, n na Ala senben yitama nen ε ra, n mi Ala Senbe Kanna miriyane luxunma ε ma. **12** E birin bata a to ki fajni, nayi, nanfera ε yete luma fe fuune yi?” **13** “Ala nan kēeni ito ramaraxi jaxuden xa, jaxankata tiin naxan sōtōma Ala Senbe Kanna yii fa fala: **14** Xa e diine wuya, e faxama yengen nin, donseen yi dasa e yixetene ma. **15** Naxanye na lu e xanbi ra, furen yi ne faxa, e kaja gilene mi e wugama. **16** Hali e gbeti fixen mako alo burunburunna, e nun dugina alo borona, **17** tinxin muxune nan e dugine ragodoma e ma, sōntarene nan e gbeti fixeni taxunma e ra. **18** E banxine kala jaxun alo dondoli xuyenna, alo kantan muxuna bubuna. **19** E sama nen nafulu kanyani, koni a danna nan na ra, e na xulun, e lima nen sese mi na. **20** Gaxuna e ratērenama nen alo fufana, wuluwunla yi e xasun kōeen na. **21** Sogeteden foyen yi e tongo, a yi e xali wulani, a yi e ba e dōxōdeni, **22** a yi e radinjε ayi kininkinintareyani, e yi e gi a senben bun ma. **23** Yamaan yi e yii bōnbō e magele feen na, muxune yi kolin e dōxōde fonne birin kala kii ma.”

28 “Nōndin na a ra, gbeti wure fixen geden na, xēmaan fan nasarijanden na, **2** wuren bama benden nin, wure gbeela fan bama gēmen nin. **3** Wuren fen muxune kēnenna raminima dimin nin bōxōn bun, e godoma wuren fenjε han a dandena, e wuren fen naxan luxunxi dimini bōxōn bun. **4** Wuren fen muxune yili tilinxine gema burunna ra, muxu gbetε yo mi sigε denaxan yi, e makuya muxu gbetene ra, e singanxin nan walima e yinle ra lutine ra. **5** Bōxō xōnna donseen fima en ma, koni, a bunni maxaxi alo tēen nan a ganxi. **6** Gēme mamiloxi fajine toma fanye yirene nin, xēma fupin toma benden nin.” **7** “Dugane mi na bōxō bun kirane kolon, segen yēen mi ne toma, **8** burunna sube yo munma siga e xōn, yata yo munma

dangu e xōn. **9** Koni, muxun susuma fanyen gε, a yi geyane gε han e danna, **10** a folon gema fanyene yi, a yi se kendene birin to a yēen na, **11** a yi xude xunne xōri, naxan luxunxi, a yi na ramini kēnenni.” **12** “Koni, fekolonna minen yi? Xaxilimayaan dōxi minen yi? **13** Adamadiine mi a saren kolon, a mi niiramane yε bōxō xōnna fari. **14** Fōxō ige gbeena a falama, a naxa, ‘A mi n tan yii.’ Baan fan a falama, a naxa, ‘A mi n tan yii.’ **15** Fekolonna mi sōte xēmaan xōn, a mi sare gbeti fixen na, **16** xēmaan naxan kelima Ofiri yamanani, a mi sōte na ra, hanma onixi gēme tofajina, hanma gēme mamiloxi fajina. **17** A mi se xēmaan ma, a mi se kilasi gēme fixε fajin ma, a mi masare xēma fajin goronna ra. **18** A dangu korala gēme tofajin nun gēme gbetε ra naxan fixa alo dayimuna. Fekolonna dangu bōxō bun nafunla birin na. **19** Topasi gēme fajin naxan keli Kusi yamanani, a mi se na ma, a mi misale xēma sensenna ma.” **20** “Nayi, fekolonna kelima minen yi? Xaxilimayaan dōxi minen yi? **21** A luxunxi niiramane birin ma, hali xōliin naxanye kore xōnna ma, ne mi a toma. **22** Sayaan nun laxira yi a fala, e naxa, ‘Nxu a xinla nan gbansan mexi.’” **23** “Koni, Ala a kiraan kolon, a tan nan keden a dōxōden kolon, **24** bayo a tan nan toon tima han bōxōn danna, a seen birin toma kore xōnna bun. **25** A tan foyen senben danna saxi, a yi igene danna sa, **26** a yi tulen danna sa, a yi galanna kiraan sa. **27** Nayi, Ala yi fekolonna to, a yi a fεsefεse, a yi a makenen. **28** Na xanbi ra, a yi a fala adamadiine xa, a naxa, ‘Margin yēeragaxun nan findixi fekolonna ra! Xaxilimayaan nan fe jaxin matangan na!’”

29 Yuba mōn yi falan ti, a naxa, **2** “Xa n yi luyε nun alo waxati danguxine yi, na yi lanjε! Na waxati danguxine yi, Ala yi yengi dōxi n xōn nun, **3** a lenpun yi degema n xun ma, n yi sigan tima a kēnenna nin hali kōeen na. **4** N yi kēndε, Alaa xanuntenyaan yi n konni. **5** Na waxatini, Ala Senbe Kanna mōn yi n xōn, n ma diine birin mōn yi n dēxōn, **6** n yi n sanne maxama nōnōn fenen nan na, hali turen yi minima fanyeni n xa! **7** Na waxatini, n na yi mini siga taan so dēen na, n sa n ma gbeden dōxō yamaan malandeni, **8** banxulanne yi n to, e yi xetema nen, fonne yi keli, e lu tixi n yetagi, **9** kuntigine yi e falan dan, e duudu, **10** mangane yi e falane dan, e lenne yi xidi e dε kanken. **11** Muxu yo na yi n ma falane mε, na kanna yi a falama nen n ma a dubadiina. Muxu yo na yi n to, a yi n matōxō, **12** amasōtō n yi yiigelitōne ratangama

naxanye yi e mawugama n xa, n yi kiridine ratanga muxu yo mi naxanye malima. **13** Saya furen yi muxun naxanye ma, ne yi dubama n tan nan xa, n yi kaja gilen nasewama. **14** Tinxinyaan yi ragodoxi n ma alo n ma domana, kiti kenden nan yi findixi n ma dugin nun n ma komotin na. **15** N tan nan yi findixi danxutsoon yeene ra, n tan nan yi madontsoon sanne ra. **16** N yi findixi toro muxune fafe ra, n yi xone xun mayenge kitini. **17** N tan nan yi tinxintarene senben kalama, n yi e se tongoxine ba e yii. **18** Nayi, n yi a fala n yete ma, n naxa, 'N faxama nen sabatini, n ma loxone gboma ayi nen alo jemensinna, **19** n luma nen alo wudina, naxan salen sinxi igeni, xiila sama naxan yii ra koene na. **20** N ma binyen gboma ayi nen, n senben mi janma mume, a lu alo xali bandunxina.'" **21** "Na waxatini, muxune yi e tuli matima n na sabarini. N na yi e kawandi, e yi e dunder. **22** N na yi falan ti, e mi yi a matandima. N ma falane yi luxi nen e xa alo tulen naxan godoma boxo xaren ma. **23** E yi n mamema nen alo e tulen mamema kii naxan yi, e deene yi lu yibixi n bun alo muxun naxanye tulen mamema soge furen na. **24** E na yi yigitege, n yi e ralimaniya, e mi yi wama fula feni n ma fanna ra. **25** N tan nan yi doxi e xun na, n kiraan yita e ra, alo mangana a ganla xun na, alo muxun naxan toro muxune masabarima."

30 "Koni iki, n bata findi magele seen na diidine xa, naxanye babaye yi rajaxu n ma, han n mi yi tinje e lu n ma barene ye n ma xuruseene kantandeni. **2** E babane yi nae nanse lige n xa e senbeni? E senben birin bata yi jan. **3** Kamen nun toron bata yi e raxadan, e yi donseen fenma tonbonna nin, **4** e yi donseen fenma fotonne nin burunna ra, budemaan nan tun yi e yii balon na. **5** E yi kedixi muxune ye, muxune gbelegbele e foxo ra alo mujadene nan yi e ra. **6** E yi e banxine tima geya kankene nan na, e nun yili yirene nun faran yinle ra. **7** E yi wugama fotondine nin alo sofandle, e yi sa e sa janle yi. **8** Xaxilitarene nan ne ra, xili mi e ra, naxanye yi kedima gbelemen na yamanani." **9** "Koni iki, n bata findi magele seen na e sigine yi, e lu n konbe tun. **10** N najaxu e ma, e masigama n na. E mi sikema degen namine n yetagi. **11** Bayo Ala bata n senben kala, a yi n nayarabi, e mi fa yagima feen lige n na. **12** Muxu kobine kelima n xili ma n yiifanna ma, e katama n nabiradeni e sanne ra, e n yengema alogo e xa n halagi. **13** E bata n ma kirane kala. Birin kataxi gbalon xa n soto, e mako mi

muxu yo ma na feni. **14** E fa n yengema alo sofane na fu taan ma e yinna rabira. E mi sikema fadeni n xili ma n jaxankata waxatini. **15** Gaxun bata n nabilin, n ma binyen bata siga alo foyen nan a xalixi, n ma herin waxatin bata dangu alo kundana." **16** "Iki, n niin bama n yi. Toro loxone bata n li. **17** Xolena n suxuma koene na han n xonne, naxan dan mi na. **18** Ala n suxuma a senben birin yi n ma domaan ma, a yi n yideten alo doma koene naxan muxune koeni detenna. **19** A bata n woli boroni. N bata lu alo xuben nun burunburunna." **20** "N ma Ala, n na i xilima, koni i mi n yabima. N tima i yetagi, koni i n matoma nen gbansan. **21** I bata i ye xodexo n ma, i n yenge i senben birin na. **22** I bata n lu foyeni, a lu sigi n na. Wuluwunla n xalima na xun xon. **23** N na a kolon a i n xalima sayaan nin, niiramane birin sigama denaxan yi." **24** "N mi yi toro muxune mali ba, naxanye n xili e jaxankatani? **25** Naxanye yi toroxi, n mi wuga ne xon ba? N bonen mi yi sunu yigelitone fe ra ba? **26** N yengi yi fe fapine nan ma, koni fe jaxine bata fa. N yi kenenna nan mamema, koni dimin bata fa. **27** Xabu torona n soto, n kui seene jinma. **28** N sigan tiin dimin nan tun yi, n mi sogen toma mume! N tima yamaan tagi, n yi e mafan n mali feen na, **29** n wuga xuiin minima alo kankone, alo dangaranfulene. **30** N fati kidin bata foro n ma, a yi koyen. Fati mawolonna bata n xonne yili. **31** N ma kondenna bata findi sunu sigi sa seen na, n ma xulenna yi findi wuga seen na."

31 "Nxu nun n yeene bata layirin xidi fa fala n nama sungutunna mato kunfani. **2** Xa n na liga, Ala nanse rafe n ma keli kore? Ala Senbe Kanna keen mundun nafama n ma keli kore? **3** Halagin mi fama tinxintareyaan xan xon ba? Gbalon mi fama hake kanne xan xa ba? **4** Ala mi n sigati kiin toma ba? A mi n san funfune birin yaten kolon ba?" **5** "Na ma, n sigan ti nen fuyantenyani ba? N sanne yi birama yanfan nin ba? **6** Ala xa n sa sikeli tinxinxin fari, a yi n ma fetareya wanle to. **7** Xa n keli nen a kiraan xon, xa n bonen yi bira n yeen foxo ra, xa xosi yo yi lu n yiine ra, **8** nayi, n naxan sixi, gbete xa na don, muxune yi n ma sansine matala na boxon ma." **9** "Xa n bonen kunfa nen jaxanla nde xon, xa n doxo nen n doxo bodena jaxanla ye ra, **10** nayi, n ma jaxanla xa lu xeme gbete bun, e nun xeme gbete ye yi kafu. **11** Amasoto xa n yi na liga nun, n ma yalunyaan yi findima fe haramuxin nan na, na yi findi haken na

kitisane naxan natōronjɛ. 12 N ma kalan yi findin tɛɛn na naxan yi n ganma han a n halagi fefe, a yi n herisigen birin kala.” 13 “N tondi nen kiti kenden se n ma walikene xa ba, e mawuga n fari waxatin naxan yi? 14 Xa n yi na liga nun, n nanse lige Ala na keli waxatin naxan yi? A na na feen feseɛse, n na a yabima nanse ra? 15 Amasoto a tan Ala keden peen nan nxu birin daxi, e tan nun n tan nxu ngane kui.” 16 “N tondi nen tōrō muxune maxōdinna yabɛ ba? N kaɲa gilene lu nen e yigitegeni ba? 17 N kedenna donseen don nen ba, n mi se so kiridine yii? 18 Anu, xabu n foningɛ waxatini, n lu nen kiridine masuxɛ alo e fafane. Xabu n da, n na n yengi dōxi kaɲa gilene xon. 19 N yiigelitōon to nen ba, dugi mi yi naxan yii, hanma tōrō muxuna marabenna yi naxan ma, 20 n mi yi e maraberi ba n ma yɛxɛɛ xabɛ dugi binyene ra, alogo e xa duba n xa? 21 Xa n na n yiini te nen kiridin xili ma, bayo n kitisane maliin sōtoma nen, 22 nayi, n tungunna xa ba n fanna ra, n yii tōnsōnna yi bolon n tōnxōnna ra. 23 N mi yi na lige bayo n gaxuxi Alaa gbalon yɛɛ ra, n mi nɔɛ tiyɛ a yetagi a nōrōni xa n yi na liga nun.” 24 “N yi n yigin sa xɛmani ba? N yi a fala, n naxa, ‘I tan nan n kantān seen na?’ ɛn-ɛn de! 25 N sewa nen n ma herige gbee kanyaana na ba, n nafunla naxanye sōtō? 26 N to sogen to xōɛ, hanma n to kiken nayabuxin to kore xōnna ma, 27 n bōjɛn mi kunfa wundoni. N mi e batu mume. 28 Xa n yi na liga nun, na yi findima nen haken na kitisane naxan natōronjɛ, nayi n bata yi Ala rame nun naxan kore xōnna ma.” 29 “N sewa nen n yaxuna jaxankatan na ba? N na n bodon nen ba, fe jaxine to a li? 30 N mi n yaxune danga alogo Ala xa e faxa, bayo n mi tinjɛ yulubin tongɛ n fala xuine xon. 31 Naxanye birin yi fama n konni, ne yi a falama nen, e naxa, ‘Muxun birin lugoma suben na Yuba konni.’ 32 Xōjɛn mi yi xima tandeni mume, n yi n ma dɛɛn nabima nen dangu muxune xa. 33 N na n ma murutɛ feene luxun nen ba alo adamadi gbeteɛyɛ? N na n hakene luxun n yetɛ yi ba? 34 N yi gaxuxi yamana falan nan na ba? I laxi a ra a n yi gaxuxi denbayane marajaxun nan yɛɛ ra ba, han n yi n dunder, n lu n konni? 35 A yi rafanjɛ n ma n ma mawuga xuiin yi rame! N ma fala dōnxene ni i ra, n na n yii fōxōn sama naxan ma, Ala Senbɛ Kanna xa n yabi. Xa n yaxun yi mawuga kedin seɛ n xili ma, na yi rafanjɛ n ma. 36 N yi a sama nen n tungunna ma, n yi a so n xunna alo manga kōmōtina. 37 N nan n sigati kiin yɛbama nen a xa, n yi fa a yetagi alo kuntigina.”

38 “N ma bōxōn yi gbelegbele n xili ma ba? N ma xɛene yi e mawuga n fari ba? 39 N yi muxune bogi seene don ba, n mi e saren fi? N yi e kanne tōrō ba? 40 Xa n yi na liga nun, nayi, janle xa sabati n ma xɛene ma, benun murutun xa sabati, sɛxɛn yi sabati, benun fundenna xa sabati.” Yubaa falane danna ni ito ra.

32 Elifasi nun Bilidada nun Sofara yi ba falan tiyɛ Yuba xa, bayo a yi a yetɛ mirixi tinxinden nan na. 2 Nayi, Elihu yi xōɔ, Busi kaan Barakeli a dii xɛmen naxan Rami xabilani. A xōɔ Yuba xili ma, amasoto a yi a falama nen a a tinxin Ala yetagi. 3 A mōn yi xōɔ xɛmɛ saxanne ma, bayo e mi yabi fajin sōtōxi Yuba ra, na feen yi lu alo Ala nan findixi fe kalan na. 4 Bayo e yi fori a xa, Elihu yi a sabari, a munma yi falan ti Yuba xa. 5 Koni Elihu to a to yabi mi yi fa xɛmɛ saxanna ne dɛ, a yi xōɔ. 6 Nayi, Elihu, Busi kaan Barakeli a dii xɛmen yi falan ti, a naxa, “N tan nan mōn foningeyani, fonna nan ɛ tan na, nanara n yi xuruxurunma, n gaxu n ma kolonna yitɛ ɛ ra. 7 N yi a mirixi nen, n naxa, ‘Fonne nan lanma e falan ti, fonne nan lan e fekolonna xaranna ti.’ 8 Koni jōndin naxan na, naxan xaxinla fima muxun ma, niin nan na ra, naxan kelima Ala Senbɛ Kanna niiraxinli. 9 Siimayaan xa mi tun fama fekolonna ra, kiti kenden kolonna mi fama foriyaan xan xon tun. 10 Nanara, n na a falama, n naxa, ‘Yuba, i tuli mati n fan na. N fan xa n ma kolonna yita i ra.’” 11 “Han iki, n bata ɛ falane rame, n yi waxi ɛ fe kolon falane nan namɛ fe yi, han ɛ yi ɛ falane yɛba. 12 N na n tuli matixi nen ɛ ra ki fajɛ, koni ɛ tan sese a fala mi Yuba kenɛnxi, ɛ tan sese mi a falane yabixi a fajin na. 13 ɛ nama a fala, ɛ naxa, ‘Nxu bata yabin sōtō fekolonni fa fala Ala nan keden nōon sōtɛ Yuba ma, muxun mi a ra.’ 14 Yuba mi a falane tixi n tan xan xili ma, n mi a yabima alo ɛ tan.” 15 “Yuba, i lanfane bata tunna xōɔ e ma, e mi fa i yabima, fala mi fa e xon. 16 N mōn xa lu sabarixi ba, hali e to mi fa fala tima, bayo e bata e dunder, e mi fa yabi tima? 17 N fan waxi n ma yabin ti feni. N fan waxi n ma kolonna yita feni, 18 bayo fala gbegbe n kui, n xaxinla n nadinma n xa falan ti, 19 na bata n bōjɛn nate, alo manpa nenen naxan wuyenna a sa seen balanxini bōma. 20 N xa falan ti, nanara a gode, n xa n deni bi, n yi n ma yabin fi. 21 N mi muxu yo rafisama a bode xa. N mi muxu yo matōxōma. 22 A yetɛna, n mi fatan muxu matōxɛ, xanamu, naxan n daxi na yi n faxama nen mafuren.”

33 Elihu mōn yi a fala Yuba xa, a naxa, “Yuba, iki i tuli mati n ma falane ra, i tuli mati n ma falane ra ki fajni. **2** N nan n deni bima, n falan ti i xa. **3** N ma falane n ma bōnje fajniyaan nan makenenma, n na n ma kolonna nōndin nan falama i xa. **4** Alaa Nii Sarijanxin nan n daxi, Ala Senbe Kanna niiraxinla nan niin biraxi n yi. **5** N yabi, xa i nōe, i yitōn, i fa n yabi n yetagi. **6** En birin lan Ala yetagi, n fan baxi benden nin. **7** Nayi, i nama gaxu n tan yee ra, n mi i jaxankatama.” **8** “Koni, i fala xuiin mōn n tunla ma, n bata i ya falane me dōxo wuyaxi, **9** i naxa, ‘Fe yo mi n na, murutede mi n na Ala ma. N sarijan, hake mi n ma. **10** Anu, Ala mōn feen toma n na, a n yatexi a yaxun na. **11** A n sanne sama kutun na, a yeen tixi n sigati kiin birin na.” **12** “Koni, na feen ma, n xa a fala i xa, nōndi mi i xa, amasoto Ala dangu adamadiin birin na. **13** Nanfera i a matandima, a to mi a dentegema i xa? **14** Anu, Ala falan tima muxune xa kii wuyaxi, koni e mi e tuli matima a ra. **15** A falan tiin muxune xa xiyene nun fe toni kōeen na. Xixoli gbeen na dangu muxune ma, e nema saxi e sadene ma, **16** nayi, Ala yi feene yita muxune ra, a yi e rakolon, **17** alogo a xa muxune ba e wali jaxine yi, a yi e ratanga wason ma. **18** Nayi, Ala muxun niin natangama nen gaburun ma, a yi a rakisi laxira yi.” **19** “Ala mōn muxun natorōnma tōron na, naxan a rakankanma a sadeni, a xōnne yi lu a xole. **20** Nayi, donseen yi rapaxu a ma, hali donse jaxumene. **21** A yi doyen mafuren, a yi xōsi, han a xōnna naxanye mi yi toma, ne yi mini kenenni. **22** A yi maso gaburun na, a niin yi so saya malekane yii.” **23** “Koni, na yi lan xa Alaa malekana nde fa a fema, naxan finde tagi yitōn keden peen na wuli kedenna ye, a kira tinxinxin yita a ra. **24** Malekan yi kininkinin a ma, a naxa, ‘Ala, i nama tin a xa godo gaburun na, n bata a xunbaan soto.’ **25** Nayi, na muxun fatin mōn yi a dii jōre senben soto, a mōn yi senben soto alo a foninge waxatina. **26** Nayi, na muxun na falan ti Ala xa, a yi a yabi, a yi fa gbelegbele Ala yetagi sewani, amasoto Ala bata a tinxinyaan saren fi a ma. **27** A luma sign se nen yamaan yetagi, a naxa, ‘N yulubin tongo nen, n yi sariyan kala, koni Ala mi na saranxi n na. **28** Ala bata n niin natanga gaburun ma, n luma nen kenenna nin.” **29** “Ala na birin ligama, a ligama nen sanja ma wuyaxi muxune xa, **30** alogo a xa e niin natanga gaburun ma, alogo e xa lu e nii ra kenenni.” **31** “Yuba, i tuli mati n na ki fajni! I dundu, n xa falan ti i xa. **32** N yabi, xa falana nde i xōn, falan ti, amasoto n

waxi i ya tinxinyaan to feni. **33** Xanamu, i tan nan lan i tuli mati n na, i dundu, n xa i xaran fekolonna ma.”

34 Nayi, Elihu mōn yi falan ti, a naxa, **2** “Fekolonne, e n ma falane rame, e tan xaxilimane, e tuli mati n na! **3** Bayo, muxun tunla nōe falane fefefese nen, alo a deen to nōe donse fajin kolonje. **4** En birin xa kiti kenden fen, en na a kolon en bode tagi naxan fan.” **5** “Yuba bata yi a fala, a naxa, ‘N tinxin, koni Ala mi tinx i kiti kenden se n xa. **6** Yoono n tan nan xa, koni n yatexi wuleden nan na. N ma furen mi yalanma, hali n to mi murutexi Ala ma.” **7** “Muxun mundun na naxan luxi alo Yuba? A magelen tima alo a igen minma kii naxan yi, **8** a birama fe jaxi rabane fōxo ra, e nun jaxudene sigan tima, **9** bayo Yuba bata yi a fala, a naxa, ‘Muxun mi sese sōtōma, a na kata e nun Ala xa lan.” **10** “Nayi, xaxilimane, e tuli mati n na! Ala mi jaxu mume! Tinxintare mi Ala Senbe Kanna ra mume! **11** Ala muxune saranma e kewanla nan na, a birin suxu a sigati kiin xōn. **12** Nōndin nan na ra, Ala mi fe jaxin ligama! Ala Senbe Kanna mi kiti kenden kalama! **13** Nde Ala dōxi bōxōn xun na? Nde dunuja birin taxuxi a ra? **14** Xa Ala yi mirixi a yete nan tun ma, a yi a niin namara a yete xa, **15** nayi, daliseene birin yi faxama nen sanja ma kedenni, adamadiine mōn yi xete bendeni.” **16** “Yuba, xa i xaxinla na, ito rame, i tuli mati n fala xuine ra. **17** Kiti kenden rapaxu naxan ma, na nōe mangayaan lige ba? I suse tinxinden yalage ba, a tan naxan senbe kanna ra? **18** Ala nan keden pe nōe suse a fale mangan xa, a naxa, ‘Fuyantenna! Ala nan tun a fale kuntigine xa, a naxa, ‘Naxudene!’ **19** Ala mi kuntigine rafisama e bode xa, a mi yiigelitōon nun nafulu kanna tagi rasaxi, amasoto a tan nan e birin daxi. **20** E birin faxama nen. Kōe tagini, Ala na e yigisan, e raxori, senbemanne fe yi godo. Na mi fatama muxu yo ra.” **21** “Ala yeen tixi muxune sigati kiin birin na, a e san funfune birin yatema. **22** Dimi yo mi fa na, fe jaxi rabane nōe e luxunje naxan yi. **23** Ala mako mi fa muxune kejaan fefefesen ma, benun a xa e xali kiti sadeni. **24** A hayu mi fa senbemanne fenna ma, benun a xa e kala, a mōn yi muxu gbete dōxo e funfuni. **25** Nōndin nan na ra, a e kewanle kolon. Kōe kedenna ra, a yi e ba, a yi e faxa. **26** A e jaxankatama nen yamaan yetagi alo fe jaxi rabane, **27** bayo e bata xete Ala fōxo ra, e yi a sariyane birin bepin. **28** E yi yiigelitōne jaxankata han e yi e xuini te Ala ma. Nayi, Ala yi tōro muxune wuga xuiin

name.” 29 “Koni, xa Ala lu dunduxi, nde a yalage? Xa a yetagin luxun, nde nœ a toe? Anu, a mœn luma muxune nun siyane birin xun na nœn 30 alogo Ala kolontaren nama dœxœ mangayani, naxan findima kalan na yamaan xa.” 31 “A nœ lige nœn, muxuna nde yi a fala Ala xa, a naxa, ‘N bata kalan ti, koni n mi fa fe jnaxin ligama sœnœn. 32 N mi naxan toma, na yita n na. Xa n bata tinxintareyaan liga, n mi fa a ligama sœnœn.’ 33 Ala lan a xa na kanna ratœrœn fata i miriyaan na ba? I tan naxan Ala rasœtœma, i tan naxan tondixi Ala ra. I tan nan lan i yi a yebe, n tan mi a ra, i miriyaan fala.” 34 “Xaxilimane a falama nœn n xa, e nun fekolonna naxanye n xuiin namœma, e naxa, 35 ‘Yuba falan tima fekolontareyaan nin, xaxilimaya mi a falane ra.’ 36 A lan Yuba yi lu kitin de han a danna, bayo a falan tima alo fe jnaxi rabana. 37 A mœn muruten sama a yulubin fari, a Ala magelema en yetagi, a falane mi jnanma Ala xili ma.”

35 Nayi, Elihu mœn yi falan ti, a naxa, 2 “I laxi a ra a jœndina i xa ba? I yi a fala, i naxa, ‘N tinxin Ala yœe ra yi.’ 3 Koni, i mœn a falama, i naxa, ‘N to mi yulubi ligaxi, na tœnœn nanse ra n tan xa?’” 4 “Awa, n tan nan i yabima, e nun i xœyin naxanye i fema. 5 I yœen ti kore, i kundaan mato, e mate i xun ma pon! 6 Xa i yulubin liga, na sa Ala tœre mœnni ba? I ya muruten na gbo ayi, na nanse lige a ra? 7 Xa i tinxin, na nanse fima Ala ma? A nanse sœtœma i yii na ma? 8 I ya fe jnaxine muxune nan tun tœrœma, i ya tinxinyaan munanfanna muxune nan ma.” 9 “Naxankatan na gbo ayi yamaan ma, e mawugama nœn. Senbemaan na e tœrœ, e xui ramini malina fe ra. 10 Koni, muxu yo mi a fale, a naxa, ‘Ala minen, a tan naxan n daxi? A muxune rawekilema e betin ba dimini, 11 a en xaranma burunna subene kepane xœn. A fekolonna fi en ma xœline kiine xœn.’ 12 Na muxune gbelegbelema malina fe ra, koni Ala mi e yabima, bayo e tan findixi fe jnaxi rabane nun wasodene nan na. 13 E gbelegbelema fuyan, Ala mi e ramœma, Ala Senbe Kanna mi a tuli matima e xuiin na. 14 A i xuiin namœma di nayi, i tan naxan a falama a i mi a toma? I yi a fala a i bata i ya kitin so a yii, i a tan nan mamœma! 15 Iki, bayo Alaa xœlœn munma fa, e nun a mi a tuli matixi murute falane ra, 16 nayi, Yuba luma a fala fuun nan tun tiye, a yi fekolontare falane rawuya ayi.”

36 Elihu mœn yi siga falan ma, a naxa, 2 “I mœn xa tin ndedi, n xa i xaran, amasœto fala gbegebe mœn n xœn n naxan fale i xa Ala fe ra. 3 N nan n ma kolonna fenma yire makuyen nin, n yi yœon fi Ala ma naxan n daxi. 4 Wule mi n ma falane ra mœme. N tan naxan be i yetagi, n ma fekolonna kamalixi.” 5 “Ala senben gbo yati, a mi muxu yo rawolima ayi. A senben gbo a xaxilimayaan xœn. 6 A mi jnaxudene luma e nii ra. A kiti kœnden sama yiigelitœne xa. 7 A mi a xun xanbi soma tinxin muxune yi, koni a e fe yitema nœn, a yi e dœxœ manga gbedene yi habadan. 8 Xa e xidixi yœlœnxœnne ra, xa e tœrœni, 9 Ala e kewanle nan makenœnma e xa na kiini, e nun e murute feene e naxanye ligaxi wasoni. 10 A yi e xaran, a e xa e tuli mati e xuru falane ra, a yi e yamari, a e xa xœte e haken fœxœ ra. 11 Xa e tuli mati, e yi a yamarin suxu, e siimayaan danguma herin nin, e yi e dunuœa yi gidin jnan sewani. 12 Xa e mi a rame, e faxama nœn yengeni, e halagi e fe kolontareyani.” 13 “Ala kolontarene nan xœlœn namarama, e mi Ala maxandima malina fe ra hali a na e ratœrœn. 14 E faxama e foningeyaan nin, e siimayaan yi rapan yagin ma yalundene tagi. 15 Koni, Ala tœrœ muxune rakisima e tœrœn nan xœn, a yi e rakolon jnaxankatan xœn. 16 A i tan fan bama nœn tœrœni, a yi dœxœde rafulunxin fi i ma, a yi i ya tabanla rafe donse fajine ra.” 17 “Koni iki, kitin naxan nagidixi fe jnaxi rabane xili ma, na bata i sœto, Ala to a kiti kœnden sa i xili ma, a yi i yalagi. 18 Nayi, xœlœn nama i radin i yi fe kobin liga, i nama xœte Ala fœxœ ra bayo na saren gbo. 19 I ya nafunle i be tœrœni ba? Hali i senbe gbeen mi nœe i maliye iki. 20 A xœli nama i suxu kœœn xa so, alogo i xa muxune ba e konne yi. 21 A liga i yeren ma! I nama fa haken liga sœnœn, i bata yi gbalœn sœto na fe ra. 22 I xa a kolon a Alaa binyen gbo a senbeni. Nde nœe xaranna tiye alo a tan? 23 Nde kiraan yitaxi a ra? Nde nœe a fale, a naxa, ‘I bata tinxintareyaan liga?’” 24 “I nama jnan Alaa wanle matœxœn ma, muxune birin naxanye fe falama e betine yi, 25 adamadiine birin nœe naxanye toe, e yi e mato wulani. 26 Ala gbo yati, en mi a gboœn danna kolon, a siimayaan dan mi na. 27 A na igen nate wuyenni kore, a yi na findi tulœn na mœnni. 28 Na tulœn yi keli kundane yi, a godo adamadiine ma. 29 Nde nœe kundaan nafala kiin kolœnyœ, e nun galanna godœn kii naxan yi keli kore? 30 A mato, a kuyen jnin masœxœnna raminima a rabilinni, a fœxœ igen nafema han dimin yi so a tilinna ma. 31 A yamaan makitima na tulœn nan

xɔn, a donse gbege fi e ma. 32 A galanna tongoma a yii firinne nan na, a yi a ragodo a na wa denaxan xɔn. 33 A kuye sarinna a fa feen nan mayitama, hali xuruseene a fa feen kolon.”

37 “Nanara, n bɔɔn xuruxurunma, a keli a sadeni. 2 E tuli mati, e tuli mati kuye sarinna ra naxan findixi Ala xuiin na, a sɔnxɔ xuiin naxan minima a dɛ. 3 Ala a galanna ragodoma keli kore, a yi a ragodo dunuɔa birin xun xɔn. 4 Na xanbi ra, a sɔnxɔ, a yi a xui gbeen namini alo kuye sarinna, a mi fa galanni tima a na a xui ramini. 5 A kabanako feene rabama a sɔnxɔ xuiin xɔn, en mi nɔɛ naxanye famunɔ.” 6 “Ala yi balabalan kɛsɛne yamari, a naxa, ‘E godo bɔxɔni,’ a yi tulɛn nagodo, tule gbeen yati. 7 A yi muxune wanle ratima na kii nin alogo ne birin xa a wanla kolon. 8 Hali burunna subene soma nɛn faranne kui, e lu e yinle ra. 9 Kala ti foyen yi keli sogeteden yiifanna ma, xunbenla yi keli kɔmɛn fɔxɔni. 10 Ala niiraxinla nan igɛ xundin naminima, igen xunmaan yi xɔdɔxɔ alo wurena. 11 A yi kundane rafe tule igen na, e nun kuye ɔnin masɔxɔnna, a yi e raxuya ayi yiren birin yi. 12 A tan nan e rasigama alo a ragidixi kii naxan yi alogo e xa a yamarin birin nakamali, dunuɔa birin yi. 13 Nayi, Ala a waxɔnna nan ligama bɔxɔn fari, a yi muxune ratorɔn hanma a yi hinan e ra.” 14 “Yuba, i tuli mati ito ra. Ti, i maɔxɔn Alaa kabanako feene ma! 15 I a kolon ba Ala e yamarima kii naxan yi? I a kolon ba a galanna ragodoma kii naxan yi kundani? 16 I a kolon ba e singanxi kii naxan yi foyeni? Kabanako feni itoɛ findixi fekolon kamalixina wanla nan na. 17 Koni i tan, i luma kuye wolonxini i ya dugine yi, foyen nɛma bɔxɔn ganɔɔ waxatin naxan yi. 18 I nɔɛ Ala maliye kuyen dadeni ba naxan xɔdɔxɔ alo wure kiken? 19 Yuba, a yita nxu ra nxu nɔɛ naxan fale Ala xa. Sese mi makɛnɛnxi nxu xa, nxu dimin nin. 20 N mi waxi n xa falan ti Ala xa. Muxu mundun waxi Ala xa a raxɔri? 21 Muxu yo mi nɔɛ a yɛɛn tiye sogen na, a na te kore, foyen na kundaan ba a yɛɛ ma. 22 Na ki kedenni, Alaa kɛnɛnna fama sa keli sogeteden kɔmɛn fɔxɔni naxan luxi alo xɛmana, nɔɔn gbeen yi Ala rabilin. 23 Ala Senbɛ Kanna nan a ra, en mi nɔɛ en masɔɛ naxan na, a senben gbo, a kiti kendɛne gbo, a mi muxu tinxinxine ɔxankatama. 24 Nanara, muxune gaxuma a yɛɛ ra, koni a tan yetɛɛn mi na muxune yatɛxi naxanye e yetɛ yatɛxi xaxilimane ra.”

38 Nayi, Alatala yi Yuba yabi wuluwulu gbeeni, a naxa, 2 “Nde i tan na naxan n ma fe ragidixine yidimima a xaxilitareya falane xɔn? 3 Keli, i yitɔn alo xɛmɛ wɛkilexina, n xa i maxɔdin, i yi n yabi.” 4 “I yi minen yi n to yi bɔxɔn beten sama? A yɛba n xa, xa i ɔndin kolon. 5 Nde dunuɔa danne sa, i na kolon ba? Nde lutini bandun a yi a maliga? 6 Bɔxɔ xɔnna beten saxi nanse fari? Nde a tongon gɛmɛn dɔxi, 7 xɔtɔn ma sarene to yi betine bama, Alaa malekane to yi gbelegbelema sewani?” 8 “Nde fɔxɔ igen balanxi alogo a xa a raxara a dɔxɔdeni, a to yi minima a dadeni? 9 N yi kundaan findi a dugin na, n yi kunda fɔrɛn findi a mafilin dugin na, 10 n nan n ma sariyan sa a ma, n yi a danne sa, n to yi dɛɛne nun balan seene sama a ma. 11 N yi a fala fɔxɔ igen xa, n naxa, ‘I fama nɛn han be, i nama dangu be ra. I mɔɔn gbeene danma be nin yati.” 12 “I bata yamarin fi xɔtɔnna ma i ya siimayani ba, hali sanɔa ma keden pe? I bata a miniden yita subaxan na ba, 13 alogo a xa bɔxɔn suxu a danne ma, a yi a yimaxa, a yi ɔxudene kedi? 14 Sogen na te, a yi bɔxɔni yalan, a yigbɛ alo yii fɔxɔn bendeni, a kɛnɛnna yi so dunuɔa xun na alo dugina. 15 Koni, ɔxudene kumama nɛn e waxatin na, e senben yi kala.” 16 “I bata siga ba han fɔxɔ igen xunna? I bata i masiga ti fɔxɔ igen tilinna ma? 17 Laxira so dɛɛne yita nɛn i ra ba? I sayaan so dɛɛne to nɛn ba?” 18 “I bɔxɔna gboon yatɛn kolon ba? A fala n xa, xa i na feene birin kolon. 19 I kɛnɛnna dɔxɔden kolon? I a kolon dimin konna denaxan yi? 20 I nɔɛ e bɛ e yirene yi? I e konna kiraan bayen kolon? 21 I lan i yi a kolon, to mi i tan naxan da.” 22 “I bata siga han igɛ xundin namaran denaxan yi ba? I bata balabalan kɛsɛne ramaradene to ba? 23 N ne dɔxi gbalon waxatine nan yɛɛ ra, e nun sɔnxɔ nun yenge lɔxɔne. 24 I a kolon ba kɛnɛnna minin kiraan naxan xɔn? I a kolon ba sogetede foyen kelima denaxan yi?” 25 “Nde kiraan nabaxi tule igen xa? Nde kiraan yitaxi kuye sarinna ra? 26 Nde tulɛn nafama bɔxɔn fari muxu yo mi denaxan yi, e nun tonbonni muxɛ mi dɔxi denaxan yi? 27 Nde igen nafama yire xarene ma, alogo sɛxɛn xa sabati?” 28 “Tulɛn fafe na ba? Nde xiila barixi? 29 Ige xundina nga na ba? Nde xunbenla barixi? 30 Igen xɔdɔxɔma alo gɛmɛna, igɛ xundin yi sa fufaan xun ma.” 31 “Nde nɔɛ sare kuru Dii Tɛmɛ Soloferene yɔlɔnxɔnna tugunɔɔ? I tan nɔɛ sare kuru Donsona lutin fulunɔɔ ba? 32 I nɔɛ sare kurune raminɛ e waxatini ba, i yi sare kuru Kanko Gbeen nun a diine rasiga ti? 33 I a kolon ba yanban seene koreni

sigama sariyan naxanye ma? I tan nan yanban seene senben nawalima bɔxɔn ma ba?” 34 “I xuiin tɛ han kundane ma kore xɔnna ma ba, i yi e yamari a tulen xa fa i ma? 35 I tan nan kuye sarinne rasigama ba, e yi a fala i xa, e naxa, ‘Nxu tan ni i ra?’ 36 Nde fekolonna saxi muxun bɔɲɛni? Nde xaxilimayaan fixi a ma? 37 Nde nɔɛ kundaan yatɛ a xaxilimayaan xɔn? Nde nɔɛ ige sa seene xun sinɲɛ kore, 38 gbangbanna yi findi boron na, bɔxɔn kobelene yi dɔxɔ e bode ra?” 39 “I tan nan donseen soma yata gilen yii ba? I tan nan kamen bama yata senbemanɛ ma ba, 40 e nɛma sa e yinla kui, hanma e nɛma luxunxi subene yɛɛ ra? 41 Nde donseen soma xaxaan yii, a diine na e xuini tɛ Ala ma, a na siga na xun xɔn donse fendeni?”

39 “I a kolon ba bolen diin xalima waxatin naxan yi? I xɛnle toma ba, e nɛma diin xalɛ? 2 I e kuiin maxali waxatin yatɛma ba? I e dii xali waxatin kolon ba, 3 e na e felen e dii xalin tɔrɔni, e yi e diin xali? 4 E diine senben sɔtɔma, e gbo xunnabani. Na xanbi ra, e keli e ngane fɛma, e mi fa fama sɔnɔn.” 5 “Nde burunna sofanla xunnabaxi? Nde a fulunxi? 6 N bata tonbonna findi a dɔxɔdɛn na, fɔxɔ bɔxɔn yi findi a konna ra. 7 A na sɔnxɔ sɔnxɔ xuiin mɛ taane yi, a gele, a mi soo ragiin xuiin mɛ mume! 8 A sigama a dɛgɛdeni geyane nan fari, dɛnaxan xinde, a yi mɛn fɛn.” 9 “Burunna jingen tinɲɛ findɛ i ya walikɛɛn na ba? A xiɲɛ i ya xuruseene balon sa seen dɛxɔn ba? 10 I nɔɛ a xidɛ alogo a xa i ya xɛɛn bi ba? A xɛɛ rabɔnbɔ seen bandunɲɛ i fɔxɔ ra mɛrɛmɛrɛnɛ yi ba? 11 I yigin sɛ a yi ba, bayo a senben gbo? I ya wali xɔdɛxɛnɛ luyɛ a ma ba? 12 I yengi sɛ a ma ba? A fɛ i ya sɛ xabaxine ra i xa, a fa e sa i ya lonna ma? 13 Dangaranfulene gabutɛnɛ yitɛma sewani, koni e mi nɔɛ tunganɲɛ alo xɔliin bodɛnɛ. 14 A xɛlɛnɛ luma biraxi bɔxɔn nan ma, a yi e lu burunburun wolonni. 15 A mi mirixi a ma fa fala e nɔɛ yibɔɛ nɛn, a burunna subɛna ndɛ tiyɛ e yi nɛn. 16 A jaxu a diine ra alo a tan xa mi e xalixi, a mi gaxuma fa fala a bata tɔrɔ fuuni e xalideni. 17 Ala bata a kuma fɛ kolonna ra, a mi xaxili fixi a ma. 18 Koni, a na keli a gidɛni, a gelemɛ nɛn soon nun soo ragiin ma.” 19 “I tan nan senben fima soon ma ba? I tan nan a kɔɛ ma xabɛnɛ saxi ba? 20 I nɔɛ a ratuganɲɛ alo supɲɛna? A gbelegbelexuiin magaxun nan tima. 21 A bɔxɔni sɔxɔnma a toronɛ ra lanbanni, a sewaxi a fangan na, a sigama ganla yɛɛ ra yɛngɛni. 22 Gaxun bɔtɛ mi a xa, a mi kuisanna kolon, a mi xɛtɛma a

xanbi ra silanfanna yɛɛ ra. 23 Xalimakuli sa seen nun tanban gbeɛn nun a xurin naxan xidixi a fari, nɛ xuiin minima a nɛma a giɲɛ. 24 A kunfaxin tunganma, a siga. Xɔtaan na fɛ, a mi fa nɔɛ tiyɛ yɛngɛni. 25 Xɔta xuiin na mini, a gbelegbelexewani, a yɛngɛn xirin mɛma hali a nɛma sa wulani, e nun kuntigine gbelegbelexuiin nun yɛngɛ so xuina.” 26 “Sɛgen tunganma i ya xaxilimayaan nan xɔn ba, a yi a gabutɛnɛ yibandun sogetɛdɛn yiifanna binni? 27 Singbinna tunganma i ya yamarin nan bun ba, a yi a tɛɛn sa gɛya matɛxine fari? 28 A yigiyaxi gɛmɛ yirɛnɛ nin, a yirɛ makantanxine nin geyanɛ xuntagi. 29 A a donseen fɛnma mɛnna nin a nɛma dɔxi, a yi sa a to yirɛ makuyɛni. 30 Binbine dɛnaxan yi, a mɛnna nin, a diine baloma wunla nan na.”

40 Alatala mɔn yi a fala Yuba xa, a naxa, 2 “I tan naxan Ala Senbɛ Kanna yalagima, i mɔn luyɛ a matandɛ? I tan naxan Ala mafalama, i nɔɛ a yabɛ?” 3 Yuba yi Alatala yabi, a naxa, 4 “Sɛsɛ mi n tan na. N nɔɛ i yabɛ nanse ra? Fɔ n na n yiin sa n dɛ ra, n yi n dundu. 5 N bata falan ti, n mi fa yabi tima. N bata a radangu ayi, n mi fa sɛsɛ falama.” 6 Alatala yi Yuba yabi wuluwulu gbeɛni, a naxa, 7 “Keli, i yitɔn alo xɛmɛ wɛkilexina, n xa i maxɔdin, i yi n yabi. 8 I waxi a fala fɛɛn nin ba fa fala a n mi kiti kɛndɛn sama? I waxi n yalagi fɛɛn nin ba, i yi yoon fi i yɛtɛ ma? 9 I senben gbo alo Ala ba? I xuiin findɛ kuyɛ sarinna ra ba alo Ala gbeɛna?” 10 “I yɛtɛ maxidi binyɛn nun gboon na, i yi i maxidi nɔrɔn nun xunnayerɛnna ra. 11 I ya xɔlon nasiga muxɛnɛ ma, i wasɔdɛnɛ birin nagodo sanɲa yi kɛdɛnni. 12 I wasɔdɛnɛ birin nagodo sanɲa yi kɛdɛnni yati, i jaxudɛnɛ birin halagi e dɛnaxanɛ yi, 13 i yi nɛ birin maluxun, i yi e balan gaburun kui. 14 Nayi, xa i yi na liga nun, n tan yɛtɛɛn yi i matɔxɔma nɛn, bayo i yɛtɛ senben yi i rakisima nɛn.” 15 “Malinna mato, subɛ magaxuxina. N tan nan a daxi alo n ni i daxi kii naxan yi. A sɛxɛn donma alo jingɛna. 16 A senbɛna a tagin nin. A senbɛna a fudi ma fasanɛ nin. 17 A xunla xɔdɔxɔ alo sumanna, a danba subɛnɛ fasanɛ yibalanxi kɛn! 18 A xɔnnɛ fan luxi alo sulana, a jɛnsɛn xɔnnɛ luxi alo wurenna.” 19 “A findixi Alaa dalisɛ fisamantenna nan na. N tan, a da mangan nan kɛdɛn nɔɔn sɔtɔma a ma silanfanna ra. 20 A balon sɔtɔma geyanɛ fari, burunna subɛnɛ birin dɛnaxan yi. 21 A sama wudine nan bun, a yi a luxun dara yi gbalanɛ bun, 22 a matabuma wudine nininna nan na,

wudin naxanye xuden de, ne yi a rabilin. 23 Xa igen gbo ayi, a mi gaxuma, hali Yuruden baa igen fa han a de, a luma nen xaxili sani. 24 Xa a yeene rabixi, nde noe a suxe? Nde noe a suxe, a wuren bira a jonei?

41 I ige yi sube jaxin suxe konna ra ba? I a suxe a lenna ma ba i ya lutin na? 2 I gbalan sote a joneen kui ba, i yi a gbegeben soxon wuren na? 3 I mirixi a ma a kankanje i mafanna ma ba, a fala fajine ti i xa? 4 A layirin xide e tagi ba, a finde i ya konyin na habadan? 5 I sabaan soe a ra ba alo xolina? I lutin xide a sanna ra ba, i yi a so i ya dii temene yii? 6 Yexe suxune a matiye loxoni ba, e a yitaxunje yulane ra? 7 I noe a kidin kale xalimakunle ra ba? I noe a xunna soxonje kulundene ra ba? 8 Nayi, hali i yiin din a ra a yenge xinla ma sanja ma keden pe, i mi fa na joxon ligama sonon." 9 "Muxun naxan waxi a xa a no, na a yete nan madaxuma. Muxu yo na a to tun, na birama nen a xanbiramaan na. 10 Muxu yo mi suse yengen bage a ma, nayi nde suse tiye n yetagi? 11 Nde a doli n ma, alogo n xa a fi? N tan nan gbee dunuja seene birin na!" 12 "N mon xa falan ti ige yi sube jaxin salen seene ma, e nun a senbe magaxuxin nun a fati fajina. 13 Nde noe a kidin be a ma? Nde noe a xanle soxonje naxanye xodoxo alo wurena? 14 Nde noe a gbegebeni biye? Muxune gaxuma a jinne nan yee ra. 15 A xali xodexene safa wuyaxi nan a fari, e doci e bode ra a fari alo ye masansan wure lefane. 16 E saxi e bode fari, hali foyen mi noe dangue. 17 E tugunxi e bode ra, e bode suxi, e mi noe be e bode ra." 18 "Ige yi sube jaxin na tison, kenenna yi mini, a yeene luxi alo subaxana. 19 Tee degen minima a de, tee wolonne tunganma. 20 A jone tutin tema, alo tunde wolonna, alo sexe tutina. 21 A jone foyen tigrine radegema, tee degen yi mini a de. 22 Senbena a keeen nin, gaxun nan sigama a yee ra. 23 A fati kidin jixirijixirine wuya, e bata xodoxo ayi a ma, sese mi bama a ma. 24 A boren xodoxo alo gemena, a xodoxo alo se kunba gemena." 25 "A na keli, alane yi gaxu, e yigitegexin yi xete. 26 Silanfanna mi sese ligama a ra, hanma tanba xurin nun degemaan nun tanba gbeena. 27 Wuren luxi nen a tan xa alo sexena, sulana alo wudi kunxina. 28 A mi a gima xalimakunla yee ra, lantan gemene findixi se dagin nan na a tan xa. 29 Gbelemen luxi nen a tan xa alo sexena, a gelen tanban woli xuiin ma nen. 30 A kui kidin luxi nen alo game ralemunxine, alo xee rabonbo seen naxan bubuma boroni." 31 "A na sin foxo igen

tilinna ma, igen yi a ramini alo a teen nan ma. A foxo igeni maxama nen alo seri igen teen ma. 32 A funfuni yalanxin nan luma a xanbi ra igeni, a lu alo fonna xun sexen na mini fufaan fari. 33 A kanna mi muxu yo ra boxo xonna fari. Dali seen na a ra naxan mi gaxuma. 34 A yaxu senbema yo na keli, a yeen yoma na kanna ma nen, bayo a tan nan sube xajene birin ma mangan na."

42 Yuba yi Alatala yabi, a naxa, 2 "N na a kolon a i noe feen birin na, i noe i waxon feene birin nakamale. 3 I yi n maxodin, i naxa, 'Nde i tan na, naxan n ma fe ragidixine yidimima a xaxilitareya falane xon?' Awa, n yi feene falama nen, n mi yi naxanye famuma a fajin na. 4 I yi a fala n xa, i naxa, 'I tuli mati, a lu n xa falan ti, n xa i maxodin, i yi n yabi.' 5 Awa, n bata yi i ya fe me, iki n yeen bata i to. 6 Nanara, n nan n yete yalagima, n doxo burunburunna nun xubeni nimisani." 7 Alatala yelin xanbini falane tiye Yuba xa, Alatala yi a fala Elifasi, Teman kaan xa, a naxa, "N ma xolon bata keli i xili ma e nun i lanfa firinne, amasoto e mi n ma fe falaxi tinxinni alo n ma walikeen Yubaa ligaxi kii naxan yi. 8 Iki, e tura solofere nun konton solofere tongo, e siga n ma walikeen Yuba fema, e yi saraxa gan daxon ba e yete xa. N ma walikeen Yuba n solonama nen e xa, n yi a maxandi xuiin nasuxu, n mi e suxu e xaxilitareyani. E mi n ma fe falaxi tinxinni, alo n ma walikeen Yubaa ligaxi kii naxan yi." 9 Teman kaana Elifasi nun Suxa kaan Bilidada nun Nama kaan Sofara yi siga, e yi a liga alo Alatala a fala kii naxan yi, Alatala yi Yubaa maxandi xuiin nasuxu. 10 Yuba yelin maxandin tiye a lanfane xa waxatin naxan yi, Alatala mon yi a raxete a kii fonni. Seen naxanye yi Yuba yii nun, Ala yi ne doxode firin so a yii. 11 Yuba tada xememane nun a magilene birin yi fa a xonton e nun muxun naxanye birin yi a kolon, e yi sewa banden don a xon a konni, e yi kininkinin falane ti a xa, e yi a masabari lan gbalon ma Alatala naxan birin saxi a fari. E birin yi a ki gbetin nun xema yiisolirasone yi. 12 Alatala mon yi barakan sa Yuba siimaya donxeni dangu a folon na, a yi yexee wuli fu nun naanin soto, jogome wuli fu nun sennin, jinge wuli keden, e nun sofali wuli keden. 13 A mon yi dii xeme solofere soto e nun dii teme saxon. 14 A yi a singen xili sa Yemima, a firindena Kesiya, a saxandena Keren-Hapuku. 15 Naxalan tofajin mi yi toe yamanani alo Yubaa dii temene. E fafe Yuba yi

keen so e birin yii alo e tada xememane. **16** Na xanbi
ra, Yubaa siimayaan yi siga han jee keme jee tonge
naanin, a yi a yixetene to han a doxode naanindena.
17 Na xanbi ra, Yuba yi faxa foriyani, a wasaxina a
siimayaan na.

Yaburina

1 Sewan na kanna xa, naxan mi muxu jaxine maxadi xuine suxuma, naxan mi birama yulubitone kiraan foxo ra, naxan mi a sama magele tiine fari. **2** Na kanna sewama nen Alatalaa sariyan suxudeni, a a xaxili lu Alaa sariyan xon koeen nun yanyin na. **3** A sabatima nen alo wudi binla naxan xude deni, a bogima nen a waxatini, a deene mi xare. Na kanna na fefe suxu, a sonoyama nen a xa. **4** Koni muxu jaxine mi na kiini mume, e luxi nen alo foyen se dagin naxan xalima. **5** Nanara, muxu jaxine yalagima nen kiti sa waxatini, yulubitone mi tiye tinxin muxune ye. **6** Alatala a joxo luma nen tinxin muxune xon, koni muxu jaxine kiraan sigama gbalon nin.

2 Nanfera siyane murutema? Nanfera yamanane muxune yanfa fuune soma? **2** Dunuja mangane bata tondi, kuntigine bata e malan Alatala nun a muxu sugandixin xili ma. **3** E naxa, “En xa en yete ba e noon bun, en xa en xunna ba e yamarin bun.”

4 Marigin naxan ariyanna yi na gelema e ma. **5** A fitinaxin yi falan ti e xili ma, a e magaxu a xoloni, **6** a naxa, “N bata n ma mangan doko n ma geya sarijanxin fari Siyon yi.” **7** Mangan fan naxa, “Alatala bata naxan nagidi, n na a ralima nen: a naxa n na, ‘N ma dii xemen nan i tan na. N bata findi i fafe ra to. **8** N maxodin, n siyane soma nen i yii i keen na, boxon danne birin yi findi i gbeen na. **9** I e noma nen mangaya wure dunganna ra, i yi e rayensenye ayi alo fejena.” **10** Nayi, e tan mangane, e xaxili fen. E tan dunuja kuntigine, e kawandin name. **11** E Alatala batu, e gaxu a yee ra, e sewa, e xuruxurun. **12** E dii xemen mafan, alogo a nama xolo, a yi e raxori. Bayo, a bojen mafura te. Sewan ne xa, naxanye e yigiya a ma.

3 Dawudaa betina, a to a gi a dii Abisalomi bun. Alatala, n yengefane bata wuya ayi. E ghegbe bata keli n xili ma! **2** E n ma fe falama, e naxa, “Ala mi a malima.” Beti xuini te. **3** Koni, Alatala, i tan nan n ma ye masansan wure lefaan na. I binyen fima n ma, e nun xunna kenla. **4** N na n xuini tema Alatala ma, a yi n yabi keli a geya sarijanxini. Beti xuini te. **5** N na n sa, n yi xi, n yi xulun bayo Alatala n kantanma. **6** N mi gaxue yaxu wuli wuyaxin yee ra, naxanye n nabilinxi yiren birin yi. **7** Alatala keli! N nakisi, n ma Ala. N yaxune birin deene bonbo, i yi muxu jaxine

jinne magira. **8** Marakisi Tiin nan Alatala ra! Ala xa a yamaan baraka. Beti xuini te.

4 Dawudaa betina, beti baane kuntigin xa. A xa ba maxase luti kanne ra. N ma Ala tinxinxina, n na i xili, i xa n yabi. N ma toroni, i xa n mali. Kininkinin n ma, i yi n ma maxandin name. **2** E tan adamadiine, e n ma binyen findima yagin na han waxatin mundun yi? E fatama fe fuune nun wulene ma waxatin mundun yi? Beti xuini te. **3** E xa a kolon, a Alatala bata muxu togondiyaxine sugandi a yete xa. N na Alatala maxandi, a n xuini mema nen. **4** E gaxu, e fata yulubi ligan ma. E na e sa, e raxara, e bojen namiri. Beti xuini te. **5** E saraxan ba Ala xa tinxinni. E yigin sa Alatala yi. **6** Muxu wuyaxi naxa, “Nde herin yite en na? Alatala, i noron xa godo nxu ma!” **7** Koni i bata n bojen nasewa han, dangu se xaba waxatin lugon sewan na. **8** N na n sa, n xima boje xunbenla nin, amasoto i tan Alatala nan tun n makantanma.

5 Dawudaa betina, beti baane kuntigin xa. A xa ba xulenna ra. Alatala, i tuli mati n fala xuine ra, i yi i tuli mati n kutun xuiin na. **2** N ma Ala nun n ma mangana, i tuli mati n ma wuga xuiin na. N ni i tan nan maxandima. **3** Alatala, xotonni i n xuiin namema. Xotonni, n na n yitama i ra, n yi i ya yabin mame. **4** Ala mi i tan na fe jaxin nafaan naxan ma. I mi tinje muxu jaxi yo ra i yetagi. **5** Wasodene mi tiye i yetagi. I fe jaxi rabane birin najaxuma nen. **6** I wuledene halagima nen. Alatala faxa tiine nun yanfantenne najaxuma nen. **7** Koni n tan soma nen i konni i ya hinan gbeen xon ma, n ni i batuma nen i ya Banxi Sarijanxini. **8** Alatala, ti n yee ra i ya tinxinni n yaxune e fe ra. I ya kiraan yita n na. **9** N mi le n yaxune fala xui yo ra, e waxi fe kalan nan tun xon ma. E koe yinle rabixi alo gaburuna, yanfa falane nan e lenne ma. **10** Ala, e yalagi, e kotene xa findi e yete bira xunna ra. E kedi i yetagi e matandine fe ra, bayo e bata murute i ma. **11** Koni ne birin xa jaxan, naxanye e luxunxi i yi. E xa betin ba sewani habadan! Na muxune ratanga i xinla rafan naxanye ma, e yi sewa i ya fe ra! **12** Alatala, i tinxin muxune barakama nen, i yi e rabilin fanna ra i yi e ratanga alo ye masansan wure lefana.

6 Dawudaa betina, beti baane kuntigin xa. A xa ba maxase luti kanne ra e nun kondenna luti solomasexe kanna ra. Alatala, i nama n maxadi xoloni!

I nama fitina n xili ma, i n jaxankata! **2** Alatala, kininkinin n ma, n bata xadan! Alatala, n nakendeya, bayo fanga mi fa n na. **3** N niin toroxi han! Alatala, han waxatin mundun yi? **4** Alatala, fa n kantan. N niin nakisi i ya hinanni. **5** Muxe mi e mire i tan ma sayani. Nde nœ i tantunje laxira yi? (Sheol h7585) **6** N bata xadan kutundeni, n ma sadeni kunxi yeegen na kœ yo kœ, n wugama han n ma xunbunsaan yi yikun. **7** Sunun bata n yeeni forô. Wugan bata n yeene buturun n yaxune fe ra. **8** E makuya n na, e tan fe jaxi rabane! Bayo Alatala n wuga xuiin mema. **9** Alatala bata n ma mayandi xuiin me, Alatala mon bata n ma maxandin suxu. **10** N yaxune birin yagima nen, e yarabi. E kuisanxin xetema nen mafuren!

7 Dawudaa mawugan betina, a naxan baxi Alatala xa Kusi Bunyamin kaana fe ra. Alatala n ma Ala, n bata n luxun i yi. N xunba, i yi n nakisi ne birin ma naxanye n foxo ra. **2** Yaxune nama n yibo alo yatana, naxan ma se suxi mi xunbe. **3** Alatala n ma Ala, e n kansunma naxan na, xa n sonna na a ra, **4** xa n bata fe jaxin doxo muxun na, nxu nun naxan doxi boje xunbenli, xa n bata n yengefaan muja tojegeni, **5** nayi, i xa tin n yaxune xa n kedi, e yi n suxu, e yi n mabodon, e yi n fatin lu saxi gbangbanni. Beti xuini te. **6** Alatala keli i ya xoloni, keli n yaxu xajene xili ma. Keli, n ma Ala, i sariya kenden sa! **7** Siyane malanxin xa i rabilin, i mangayaan liga e xunna. **8** Alatala xa siyane makiti. Alatala, i xa n ma kitin sa n ma tinxinni, bayo fe yo mi n na. **9** Danna sa muxu jaxine gbalone ra! I xa tinxin muxune ratanga, i tan Ala tinxinxina, i tan naxan muxun bojene nun sondomene rakorosima. **10** Ala nan n ye masansan wure lefaan na. A muxu sondome fajine rakisima nen. **11** Ala nan kitisa tinxinxin na. Ala na a ra naxan xoloma waxatin birin. **12** Xa muxu jaxin mi tubi Ala ma, a silanfanna raxanxanma nen, a yi a xanla ba a woli xinla ma. **13** Ala bata a faxa ti seene tongo, a a xalimakunle findi teen na. **14** Naxan lugoxi tinxintareyaan na, a mon nafexi gbalon na, a rajanna nan wulen na. **15** A yinla gema a a ratilin, a yeteen yi bira a kui. **16** A toron nun gbalon nakeli, ne yi xete a ma. **17** N na Alatala tantunma a tinxinna fe ra. N betin bama nen Kore Xonna Alatala xinli.

8 Dawudaa betina, beti baane kuntigin xa. A xa ba Gati kaane kondenna ra. Nxu Marigina Alatala, i tan nan xili gbee kannna ra boxon birin yi! I bata i ya noron nate han kore xonna ma! **2** I bata diidine nun

dii jorene yamari e yi i matoxo alogo i yaxune xa e dundu, e nun yengefane nun gbeepoxo tiine. **3** N na koren mato i naxan nafalaxi i yiin na, kiken nun sarene i naxanye doxi e yirene yi, n naxa, **4** “Nanse dapoxon na, i to i yengi doxi a xon? Nanfera i joxo luxi adamadiin xon?” **5** I a daxi nen, a noron yi maso malekane ra. I binyen nun xunnayerenna fi a ma. **6** I bata yamarin so a yii i ya dali seene birin xunna. I bata seen birin lu a sanna bun: **7** alo xuruse kurune nun jinge kurune nun burunna subene **8** nun xoline nun yexene e nun niimaseen naxanye foxo igeni. **9** Nxu Marigina Alatala, i tan nan xili gbee kannna ra boxon birin yi!

9 Dawudaa betina, beti baane kuntigin xa. A xa ba alo “Dii Xeme Faxan” betina. Alatala, n ni i tantunma nen n bojen ma feu! N ni i ya kabanako feene yebama nen. **2** N jaxanma nen n sewa i ya fe ra. Kore Xonna Ala, n tantun betin bama i xa nen. **3** N yaxune xetema e giye nen i yee ra, e dagalanje ayi, e jan. **4** Bayo i bata n xun mayenge kitin bolon, i bata doxo i ya mangaya gbedeni, i yi kitin sa tinxinni. **5** I bata falan ti siya gbetene xili ma, i mon yi muxu jaxine raxori, muxe mi fa e mirima e xinle ma sonon habadan! **6** Yaxune bata jan fefe, i bata e taane kala. Ninan bata ti e ma feu! **7** Koni Alatala nan mangan na habadan, a mangaya gbeden doxi kiti sa xinla ma. **8** A dunuja makitima tinxinni. A sariya kenden sama yamane xa. **9** Muxu yigbetenxine faran makantanxin nan Alatala ra, e luxundena toro waxatine yi. **10** Naxanye i tan kolon, ne e yigi sama i yi nen, bayo naxan na i fen, Alatala, i mi i me na ra mume! **11** E Alatala tantun betin na, naxan doxi Siyon yi, a manga taani! E a wali fajine rali siyane ma! **12** Ala nan wuli boxonxin gbeepoxo tiin na. A mi jinanje a xon ma. A yengi doxi yiigelitone wuga xuiin xon ma. **13** Alatala, kininkinin n ma! A mato n yaxune n nayarabima kii naxan yi, i tan naxan n bama faxan de. **14** Nanara, n ni i tantunje Siyon kaane yetagi, n yi sewa i ya marakisina fe ra. **15** Siyane bata yinla ge, e bira a kui, e bata e suxu e yete luti ratixine ra. **16** Alatala bata a yete yita a kiti kendene xon ma. Muxu jaxin tan suxuma a kewanle nan na. Maxase xuina. Beti xuini te. **17** Muxu jaxine sigama laxira yi, e nun siyaan naxanye birin e mexi Ala ra. (Sheol h7585) **18** Ala mi toro muxune rabejinje mume! Yiigelitone mi yigitegema. **19** Alatala, keli! Adamane nama non soto! Siyane xa makiti i yee xori!

20 Alatala, gaxun nagodo e ma! E xa a kolon fa fala dajoxon nan tun e ra. Beti xuini te.

10 Alatala, nanfera i makuyaxi nxu ra? I luxunma nxu ma toro waxatine yi nanfera? 2 Muxu jaxine bata waso ayi, e mon yiigelitone besenxonyama. A e suxu a kotene ra. 3 A kanbama a nata jaxine yi. Kumadena Alatala rajaxuma, a a me a ra. 4 Muxu jaxina a falama de jaxun na, a naxa, “Ala mi muxu yulubine saranma e ra! Ala mi na!” A a miriyaan birin nan na ra. 5 A feen birin nasonyama. A mi i ya kitine suxuma, a mon yoma a yaxune ma. 6 A a falama a yete ma, a naxa, “N mi fule mume, n mi luye toroni mumel!” 7 A deen nafexi dangane nun wulene nun fala xui xolene nan na. A fe jaxin nun toro feen nan tun falama. 8 A a luxunma banxidene ra, a sontarene legedenma e faxes feen na. A yee masama fangatarene ma wundoni. 9 A legedenna tima a luxundeni alo yatana. A saxi, a yiigelitone legedenma, a e suxu a lutin na, a e bubu, a e xali. 10 Fangatarene e felenma e bira, e lu a noon bun ma. 11 A yi a fala a yete ma, a naxa, “Ala a fe mi a yi! A bata a yee raxi. A mi n toel!” 12 Alatala, keli! I fangan mayita, Ala! I nama jinan yiigelitone ma! 13 Nanfera muxu jaxina Ala rajaxuma, a yi a fala a yete ma, a naxa, “Ala mi n jaxankate?” 14 Koni i tan Ala, i toron nun soxolen toma yati! I xaxili luma nen ne xon ma mali xinla ma. Fangatarene bata e yete taxu i tan na. Kiridi mali tiin nan i tan na. 15 Muxu jaxin fangan kala, i yi a jaxankata a fe jaxine fe ra han i yi a raxori. 16 Alatala nan mangan na habadan. Suxure batune raxorima nen a boxon ma. 17 Alatala, i yiigelitone maxandi xuiin mema nen, i yi e bojen senbe so. I yi e wuga xuiin name. 18 I xa sariya kenden sa kiridine xa e nun muxu jaxankataxine. Nanara, dajoxon mi fa magaxun tiye sonon.

11 Dawudaa betina beti baane kuntigin xa. N bata Alatala findi n luxunden na. I mon a falama n xa nanfera nayi fa fala, “Tugan alo xolina, i siga geyaan ma, 2 amasoto a mato, muxu jaxine bata e xanle ba, e e xalimakunle ti muxu sondome fajine ra e bun xinla ma dimini. 3 Xa sariya mi fa na, tinxin muxune noe nanse lige?” 4 Alatala a Batu Banxi Sarijanxini. Alatala a manga gbedeni ariyanna yi. A adamadiine xun matoma a ra a e rakorosima a yeen na. 5 Alatala tinxin muxune nun muxu jaxine rakorosima. Gbalo feen nafanxi naxanye ma, a ne rajaxuma a niin birin

yi nen. 6 A tee wolonna nun dole teen nagodoma nen muxu jaxine ma. A e toroma foye wolonna ra nen. 7 Alatala tinxin, tinxinyaan nafa na ma. Muxu fajine a yetagin toma nen.

12 Dawudaa betina, beti baane kuntigin xa. A xa ba kondenna luti solomasexen na. Alatala, nxu mali, bayo muxu togondiyaxine bata jan. Denkeleya muxu yo mi fa adamadiine ye. 2 Birin wulen falama a boden xa. E e bode yanfa wule matoxon xon. 3 Alatala, na muxune deen suxu naxanye wule matoxon tima, e nun muxu de rajaxuxine, 4 naxanye a falama, e naxa, “Nxu noon sotoma nxu fala xuine nan xon. Nxu deen fatan han! Nde nxu noe?” 5 Awa, Alatala naxa, “Bayo yiigelitone jaxankataxi, e nun toro muxune wugama, nba iki, n bata keli, n na e ratangama nen naxanye rajaxuxi.” 6 Alatala falane, fala sarijanxin nan e ra alo gbeti fixena naxan nasensenxi sulun teen na han sanya ma solofere. 7 Alatala, i nxu kantanye, i nxu ratanga muxu sifani itoe ma habadan. 8 Na muxu jaxine e kanbama yiren birin yi bayo Adamadiine fe fuune yatexi.

13 Dawudaa betina, beti baane kuntigin xa. 2 Alatala, han waxatin mundun yi? I jinan ye n xon han habadan? I yetagin luxunye n ma han waxatin mundun yi? 3 N niin xa toro, n bojen yi ferijen sunuxi han waxatin mundun yi? N yaxuna n fari han waxatin mundun yi? 4 Alatala n ma Ala, n mato, i n yabi. N fangan xun masa, xa na mi a ra, n faxama nen. 5 N yaxun yi a fala, a naxa, “N bata a no.” N yaxune sewama nen n na bira waxatin naxan yi. 6 N tan n yigin saxi i ya hinanna nin, sewana n bojeni i ya kisina fe ra. Alatala, n betin bama i xa nen amasoto i bata fe fajin liga n xa.

14 Dawudaa betina beti baane kuntigin xa. Xaxilitarena a falama a bojeni, a naxa, “Ala mi na.” E birin yifu, e haramu feene ligama. Muxu yo mi a fajin nabama. 2 Alatala a yeen nagodoma adamadiine ma keli ariyanna yi, a xa a to, xa nde na naxan xaxili sote, a yi Ala fen. 3 Koni birin bata kiraan bepin, e jaxu ayi. Muxu yo mi a fajin nabama hali muxu keden pe! 4 Fe jaxi rabane mi fe kolon ba? E n ma yamaan tonon donma alo donsena, koni e mi Alatala xandima mumel! 5 Awa nayi, e gaxuma nen, e xuruxurun. Amasoto Ala tinxin muxune xon. 6 E tan fe jaxi rabane yiigelitone fe yitonxine kalama koni

Alatala nan e maratangaden na. 7 Nde keɛ Siyon yi a Isirayila rakisi? Alatala mɔn na a yamaan sɛnbɛ so, Yaxuba bɔnsɔnna sɛwama nɛn, Isirayila yi jaxan!

15 Dawudaa betina. Alatala nde nɔɛ luyɛ i ya yire sarijanxini? Nde luyɛ i ya geya sarijanxin fari? 2 Fɛ mi naxan kewanle ra, a tinxin, a jɔndin falama fata a sɔndɔmɛn na. 3 A mi bonne xili kalama, a mi fe jaxi yo ligama a dɔxɔ boden na, a mɔn mi a rayagima. 4 Ala bata naxanye rajaxu, a mɛma nɛn ne ra. Koni a Alatala yɛɛragaxu muxune binyama nɛn. Hali a tɔrɔ, a fala xuiin nakamalima nɛn. 5 A muxune dolima koni e mi se sama a fari a raxetɛdeni. A mi dimi yi seene rasuxuma alogo a xa wulen sa sɔntaren xun ma. Naxan na feni itoe liga, na mi mamaxɛ mumɛ.

16 Dawuda Ala maxandi fajina. Ala, n kantan, bayo n bata n luxun i yi. 2 N bata a fala Alatala xa, n naxa, “N Marigin nan i tan na. Se fajni gbɛtɛ mi n yii ba i tan na.” 3 N sewaxi yamanan muxu sarijanxi gbeene nan ma fe ra. 4 Naxanye suxurene batuma, ne tɔrɔyaan gboma ayi nɛn. Koni n tan mi saraxan bɛ e xa, n dɛ mi e xinle fale. 5 Alatala, i tan nan keden pe n yii, i maragidi fajin fima n ma. N ma dunuja yi gidina i tan nan yii. 6 Ala naxan soxi n yii, na rafan n ma, n bata sewa n ma kɛɛ sɔtɔxin na. 7 N barikan birama Alatala xa naxan n kawandima. Hali kɔɛɛn na, n xaxili sɔtɛ. 8 N xaxili Alatala xɔn ma waxatin birin, bayo a n dɛxɔn ma, sese mi n mamaxɛ. 9 Nanara, n bɔjɛn sewaxi, n niin yi yifan n ma, n yi n matabu bɔjɛn xunbenli. 10 Amasɔtɔ, i mi i mɛ n na, n siga laxira yi. I mi tinjɛ i ya muxu tɔgɔndiyaxin yi kun gaburun kui. (Sheol h7585) 11 I nii rakisi kiraan yitama n na nɛn, nanara n sɛwama nɛn i yetagi han! Nii fanna mi jianjɛ i dɛxɔn ma habadan!

17 Dawudaa Ala maxandina. Alatala, n ma maxandin name tinxinyana fe ra. I tuli mati n wuga xuiin na! I tuli mati n ma maxandi xuiin na, wule mi naxan yi. 2 I n xun mafala kitin bolon amasɔtɔ naxan tinxin, i na kolon. 3 I na n bɔjɛni feene fɛsɛfɛsɛ, i na n nakɔrɔsi kɔɛɛn na, i na n kɛjaan fɛsɛfɛsɛ, i mi fe yo tɔɛ n na. N mi tinjɛ fala jaxin yi mini n dɛ 4 alo muxu gbetene kewanle kii naxan yi. N bata i ya yamarin suxu. N mɔn mi biraxi gbalotɔne kirane fɔxɔ ra. 5 N sigan tima i ya kirane nan xɔn ma tun, han iki, n munma dagalanjɛ ayi singen. 6 Ala, n na i maxandima amasɔtɔ i n yabima nɛn, nanara i firifiri n xɔn ma, i yi

i tuli mati n ma maxandi xuiin na. 7 I ya kabanako hinanna yita nxu ra, i tan naxan muxune rakisima e yaxune ma naxan na a luxun i yi. 8 N natanga alo i yɛɛne. N luxun alo tɔxɛ diin soma a nga gabutene bun ma kii naxan yi. 9 Nanara, muxu jaxine mi n liyɛ, n yaxu jaxin naxanye n nabilinni. 10 Kininkin yɔ mi e yi, e falan tima yandan na. 11 E bata fa n fɔxɔ ra iki, e n nabilinni. E yɛɛne tixi n na e fɛrɛn fenma e n nabira bɔxɔni. 12 E ligaxi alo yatana xɔɔyi se xɔnla naxan na, alo yata gbeen naxan n legedenma luxunni. 13 Keli Alatala! N yaxune yɛngɛ, i yi e nɔ. N natanga muxu jaxine ma i ya silanfanna ra. 14 Alatala, n natanga na dunuja muxu sifane ma naxanye e kɔntɔnna sɔtɔma e siimayani. E ralugo na kɔntɔnna ra ken i naxan namaraxi e xa, e diine fan xa wasa a ra, a dɔnxɛn mɔn yi lu e mamandenne xa! 15 Koni n na i yetagin toma nɛn tinxinni, n na xulun, n wasa i yetagin na.

18 Alatalaa walikɛɛn Dawudaa betin beti baane kuntigin xa. A betini ito baxi nɛn Alatala to a ba a yaxune birin yii e nun Sɔli yii. Alatala n fangana, n bata i xanu! 2 Alatala nan n kantan fanyen na, n ma yinna, n xunba muxuna. N ma Ala nan n kantan gɛmɛ gbeen na, n na n luxunma naxan yi. A tan nan n yɛ masansan wure lefaan na, e nun marakisi tiina naxan luxi alo n ma faran makantanxina. 3 Alatala xa tantun! N na a xili, a yi n nakisi n yaxune ma. 4 Sayaan gbalon bata yi n nabilin nun, halagin bata yi lu n xun ma nun alo ige xunfanna. 5 Laxira gbalon bata yi n nabilin nun. Bilinganna bata yi a lutin nati n yɛɛ ra nun. (Sheol h7585) 6 N na Alatala xili nɛn n ma tɔrɔni, n yi n xuini te n ma Ala ma malina fe ra. A yi n xuiin mɛ a Batu Banxini, a yi a tuli mati n gbelegbele xuiin na. 7 Nanara, bɔxɔn yi xuruxurun, a yimaxa, geyane bunne yi siga, e xɛtɛ, e xuruxurun Ala xɔlɔn bun. 8 A liga alo tutin nan minima a jɔɛ yinla ra. Halagi ti tɛɛ dɛgen nun tɛɛ wolonne yi mini a dɛ. 9 A yi kuyeni bɔ firinna ra, a godo a sanne tixi kunda fɔrɛn fari. 10 A te maleka gubugubu kanna fari, a tугan xulɛn, a siga foyeni. 11 A a luxun dimini, kunda fɔrɛn nun tule igen yi a rabilin kore. 12 Kundaan yi mini a nɔrɔni. Balabalan kesene nun galanna yi godo. 13 Alatala yi a galanna xuiin namini keli kore, Kore Xɔnna Ala yi a xuiin namini. 14 A yi a xalimakunle woli a yaxune ma a e raxuya ayi. A e birin nagi kuye sarinna ra. 15 Alatala to falan ti e xili ma, a sɔnxɔ e ma xɔlɔni, fɔxɔ igen xɔnna yi mini kenɛnni bɔxɔ xɔnnɛ yi to. 16 Ala

yi a yiini bandun keli kore, a n suxu, a yi n ba igen tilin yireni. **17** A n xunba n yaxu senbe kanne yii, n yengefaan naxanye fangan yi gbo n xa nun. **18** E n yenge nen, n yi gbaloni waxatin naxan yi, koni Alatala yi n natanga. **19** A n ba nen gbalo yireni, a n nakisi amasoto n tan a kenexi. **20** Alatala bata n kontonna fi n ma tinxinyani, a n saren fi amasoto n kewanle sarijan. **21** N bata sigan ti Alatala a kirane xon, n mi n makuyaxi Ala ra. **22** N bata a kitine birin suxu, n mi tondixi a tonne suxe. **23** Fe yo mi n na a yee ra yi, bayo n bata n yete ratanga haken ma. **24** Nanara, Alatala bata n kontonna fi n ma amasoto n tinxin, n kewanle sarijan a yee ra yi. **25** Naxan na tinxin i xa, i tinxinma nen na kannu xa. Fe yo mi naxanye ra, i ya fetareyaan yitama nen ne ra. **26** I sarijanma nen ne xa naxanye na sarijan, koni i jaxuma nen na muxune ra naxanye jaxu. **27** Bayo i tan nan yiigelitone rakisima, i mon yi wasodene ragodo. **28** Alatala, i tan nan kenenna fima n ma, n ma Ala, i yi n ba dimini. **29** N ganla yengema nen i tan barakani. I tan yi, n tunganma yinna xun ma. **30** Alaa kirane kamalixi feu! Alatalaa falane tinxin. Naxanye na e luxun a yi, a ne kantanma nen alo wure lefana. **31** Alatala nan keden Ala ra. Nde en kantan fanyen na, ba en ma Ala ra? **32** A tan nan Ala ra naxan fangan fima n ma naxan n kantanma kira yi. **33** A n sanne senbe soma nen alo xenla, a n nate geyane fari. **34** A bata n maxaran yengen ma, nanara n naxi sulan xali xodexen bandunje. **35** I bata n ye masansan wure lefaan so n yii, i yi n nakisi. I bata i yengi sa n xon ma, i ya maliin bata n nagbo. **36** I kirani ton n xa alogo n nama bira. **37** Koni n biraxi n yaxune foxo ra, n yi e suxu. N mi xete e foxo ra han e jan. **38** N na e rabirama nen han e mi fa kele sonon, e yi bira n sanna bun ma. **39** I senben soma n yii yenge so feen nan na, i n yaxune sa n bun ma. **40** I a liga n yaxune yi e gi n bun ma, n bata ne kala naxanye yi n najaxuma. **41** E wugama nen malina fe ra, koni muxu yo mi e rakise. E Alatala xilima nen koni a mi e yabima. **42** N na e yilunburunma nen alo gbangbanna foyen sigama naxan na. N mon yi ti e fari alo bendena kiraan xon. **43** I bata n natanga yama murutexin ma, i yi n findi siyane xunna ra. N mi yi muxun naxanye kolon, n bata noon soto ne xun na. **44** Xojene e xinbi sinma n bun ma iki, e na n fala xuiin me, e yi a suxu. **45** E yii xudin tuma ayi, e fa xuruxurunje keli e yinne ra. **46** Alatala na yi! Tantunna xa fi n natangamaan ma! N nakisimana Ala xa batu! **47** A tan Ala nan n

gbeen jaxoma, naxan siyane luma n senben bun ma. **48** A n natangama n yaxune ma. I tan nan n natexi n yaxune xun ma, i mon yi n xunba gbalotone yii. **49** Nanara, n na i tantunma siyane tagi. Alatala, n na i xinla tantunma nen betini. **50** Ala no soton nagidima a mangan ma han! A a hinanna yita a muxu sugandixin na, Dawuda nun a yixetene habadan.

19 Dawudaa betina, beti baane kuntigin xa. Kore xonna nan Ala a nonon mayitama. Koren nan Ala a wanla makenenna. **2** Yanyin kawandin bama loxo yo loxo. Dimin xaxili fima koe yo koe. **3** Xui yati mi a ra, falane fan mi a ra. Tunla mi e xuiin mema. **4** Koni, hali na, e fala xuiin boxon birin lima, e falane yi siga han dunuja danna. Ala nan banxin nafalaxi sogen xa kore. **5** Sogen minima nen alo xemen naxan minima a banxini siga futu xidideni, alo fangamaan naxan sigan tima a yetena a kiraan xon. **6** A minima sogetedeni, a sa jan sogegododeni. Sese mi luxunje a xolon ma. Beti xuini te. **7** Alatalaa sariyan kamalixi, a muxun nii yifanma a ma. Nondin nan Alatalaa maxadi xuine ra. E xaxilitarene findima xaxilimane ra. **8** Alatala fe ragidixine tinxin. A muxun bojen nasewama nen. Alatalaa yamarine noroxi. A muxun xaxinla rabima nen. **9** Alatala a yee ragaxun sarijan. A buma habadan. Nondin nan Alatalaa kitine ra, e tinxin feu! **10** E fisa xemaan xa, e fan xema fajine birin xa. E jaxun kumin xa, dangu kumi xinden na. Beti xuini te. **11** I ya walikeen xaxili sotoma nen e xon. A tonon gbegebe sotoma nen e xon. **12** Nde noe a yetena tantanne birin kolonje? I xa n ma hake luxunxine mafelu. **13** N natanga tondin ma, a nama n no. Nayi, n findima muxu defexin na nen naxan mi matandi jaxin tiye. **14** Falan naxanye minima n de, e nun miriyaan naxanye n bojeni, Alatala xa ne rasuxu sewani, n kantan fanyena e nun n xunbamana.

20 Dawudaa betina, beti baane kuntigin xa. Alatala xa i yabi i tononi waxatin naxan yi. Yaxubaa Ala xa i ratanga. **2** Ala xa a maliin nagodo i ma keli a yire sarijanxini, a xa i mali keli Siyon Geyaan fari. **3** Ala xa i ya kiseene birin nasuxu, a mon yi sewa i ya saraxa gan daxine birin na. Beti xuini te. **4** Ala xa i bojen waxon feene so i yii, a mon yi i ya fe yitonxine birin nasabati. **5** Nanara, nxu sonxoe sewani i ya no sotona fe ra. En yi en gbee taxamaseri dugine rate Ala xinli. Alatala xa tin i ya maxandin birin ma. **6** N na a kolon yati, Alatalaa muxu sugandixin nakisima nen. A

a yabima nen keli a ariyanna sarijanxini, a yi a rakisi a senben na. 7 Ndee yigin sama e yenge so wontoroni, bonne yi e yigin sa e soone yi, koni en tan yigin saxi Alatala xinla nin, en ma Ala. 8 Na kanne tantanma nen e bira, koni en tan kelima nen, en ti ken! 9 Alatala xa mangan nakisi! I xa nxu yabi, nxu na i maxandi waxatin naxan yi!

21 Dawudaa betina, beti baane kuntigin xa. Alatala, mangan bata sewa i fangan na. A sewan gbo bayo i bata a rakisi. 2 A waxi naxan xon, i tinxi na ma. I bata a maxandin yabi. Beti xuini te. 3 I bata a rasene duba fajine ra, i mon yi xema mangaya taxamasenna so a xun na. 4 A maxodinna ti nen a siimayana fe ra, i yi sii xunkuyen so a yii, naxan luma habadan. 5 A binyen bata gbo ayi fata i ya marakisin na. I noron nun xunnayerenna fixi nen a ma. 6 I a barakama habadan! I a ralugoma sewan na i yetagi. 7 Bayo Mangan yigin saxi Alatala nin, a kantanxi Kore Xonna Ala hinanna nan baraka yi. 8 I tan i yaxune birin suxuma nen. Naxanye i rapaxuxi, i ne suxuma nen i fangan na. 9 I na mini kenenni waxatin naxan yi, i e janma nen alo sulun teena. Alatala xoloxina e halagima nen teen yi e gan. 10 I e yixetene raxorima nen dunupa yi, e nun e bonsonne adamadiine ye. 11 Hali e fe jaxini ton i xili ma, e mon yi e miri kote jaxine ma, e fulama nen. 12 Bayo, i na i ya xalimakunle ti e ra, e e xun xanbi soma nen, e yi e gi. 13 Alatala xa batu a senbe gbeena fe ra. Nxu betin bama nen, nxu yi i tantun i fangana fe ra.

22 Dawudaa betina, beti baane kuntigin xa. A xa ba alo betin naxan xili: “Xotonna Xeli Gilena.” N ma Ala! N ma Ala! I n nabepinxi nanfera? Nanfera i ya marakisin makuyaxi n na? Nanfera i mi n kutun xuiin namema? 2 N ma Ala, n ni i xilima yanyin na, koni i mi n yabima. Hali kosen na, n mi n dunde. 3 Koni i tan sarijan, i ya mangaya gbeden nabilinxi Isirayilaa tantunna ra. 4 Nxu benbane yigin saxi i tan nan yi. E e yigin sa i yi, i yi e ratanga. 5 E to e xui ramini i ma, i yi e xoroya. E yigin saxi i yi, nanara, e mi yagixi. 6 Koni dajoxo mi fa n tan na sonon. N ligaxi nen alo kunla adamadiin naxan najaxuxi yamaan naxan bote raba. 7 Naxanye na n to, e yo n ma. E yi e deen betexun, e e xunne yimaxa. 8 E naxa, “A tan naxan Alatalaa fe yi, Alatala a ratangama ba? Xa a rafan Alatala ma, a xa a xunba.” 9 Koni i tan nan n naminixi nga kuini, i yi n sa nga kanken ma. 10 Xabu n bari loxoni, n taxuxi i ra. N ma Ala nan i ra, xabu n yi nga kuini waxatin naxan

yi han iki. 11 I nama i makuya n na. Toron bata maso n na, muxu yo mi na yi naxan n maliye. 12 N yaxune n nabilinxi alo turane, alo Basan yamanan tura xajene. 13 E deene yibixi alo yatane, e wurundunma n ma, e xa n yibo. 14 N fangan bata jan alo ige boxonxina. N xonne birin bata ba e bode ra. N bonen bata liga alo dolen na yilo. 15 N fangan bata jan feu! N lenna xaraxin bata kankan n de. I bata n sa faxa bendeni. 16 Muxu jaxi ganla bata n nabilin alo barene. E bata n yiine nun n sanne mabo. 17 N xonne birin kenenni. E yeene kankanxi n na. 18 E bata masensenna ti n ma dugine fe ra, e xa e yitaxun e bode tagi. 19 Alatala, i nama i makuya n na! N ma senbemaan nan i tan na. N mali iki sa! 20 N niin xunba silanfanna yii. N natanga bareni itoe ma. 21 N nakisi yatani itoe ma. N nakisi burunna turaan fenne ma. 22 N na i xinla ralima nen ngaxakedenne ma. N ni i matoxo nen yamaan ye. 23 E tan naxanye gaxu Alatala yee ra, e a matoxo. E tan Yaxuba bonsonna, e a binya. E tan Isirayila kaane, e gaxu a yee ra. 24 Bayo, a mi a mexi yiigelitone torone ra, a mi a rabepinma. A mi a yetagin luxunma a ma. Fo a a xandi xuiin name. 25 N ni i tantunma yamaan malan gbeeni. N na n ma de ti xuine rakamalima nen i yee ragaxu muxune yee xori. 26 Yiigelitone xa e dege, e lugo. Naxanye Alatala fenma, ne xa a matoxo. Ala xa siimayaan fi e ma habadan! 27 Boxon danna muxun birin e xaxili luma nen Alatala xon, e yi e yee rafindi a ma. Siyane bonsonne birin a batuma nen. 28 Bayo, Alatala nan mangan na siyane xun na. 29 Nafulu kanne fan fama nen e degedeni, e a batu. Naxanye birin xetema bendeni, ne xinbi sinma nen a bun ma, naxanye mi noe e niin nakise. 30 Waxati famatoon muxune walima a xa nen Marigina a fe falama nen mamandenne xa. 31 A tinxinyaan fama nen nalideni muxune ma naxanye munma bari, Ala bata na ragidi.

23 Dawudaa betina. Alatala n masuxuma alo xuruse rabana a xuruseene kantanma kii naxan yi. Nanara, n mi dase sese ra. 2 A matabuden fi n ma sexe jingi fajin denaxan yi. A yi siga n na ige xunbenla dexon ma. 3 A bata n nii yifan n ma. A n xalima kira tinxinxin xon ma nen a xinla fe ra. 4 Hali n so sayaan tilinna dimin xore ra, n mi gaxue sese yee ra amasoto i tan Ala n xon ma. I ya gbengbetenna n nakantanma i ya dunganna n gbengbenma. 5 I bata donseen nafala n xa n yaxune yee xori, i yi n masuxu alo xajne binyena, i turen sa n xunni. I bata n ma igelengenna rafe han a

bɔxɔŋɛ a ma. 6 Yati, i ya fanna nun i ya hinanna birama n fɔxɔ ra nɛn n siin sɔgɛn birin yi. N luma nɛn Alatalaa banxin kui han n siin sɔgɛ dɔnxɛna.

24 Dawudaa bɛtina. Alatala nan gbee bɔxɔn nun ayi seene birin na e nun dunuɗa nun muxun naxanye birin dɔxi a yi. 2 Amasɔtɔ a tan nan bɔxɔn dɔxi igen tagi. A yi a dɔxɔ igene fari. 3 Nde lan a te Alatala geyaan fari? Nde tiyɛ a yire sariɗanxini? 4 Naxanye sariɗan e kɛwanle nun e sɔndɔmɛne yi, naxanye mi suxurene batuma, xanamu naxanye mi e kɔlɔma wuleni, 5 Alatala ne barakama nɛn. Marakisi Tiina Ala yoon fima e ma nɛn. 6 Muxu sifani itoe nan Ala fenma, naxanye Yaxubaa Ala yetagin fenma. Bɛti xuini te. 7 Yinna dɛɛne xa rabi fefe, dɛ fonne xa rabi mume, nanara Manga Binyen sɔɛ. 8 Nde Manga Binyeni ito ra? Alatala na a ra fangamaan nun senbɛmana! Alatala na a ra naxan senbɛn gbo yɛngɛni. 9 Yinna dɛɛne xa rabi fefe, dɛ fonne xa rabi mume, nanara Manga Binyen sɔɛ. 10 Nde Manga Binyeni ito ra? Alatala Senbɛn Birin Kanna, a tan nan manga binyen na. Bɛti xuini te.

25 Dawuda gbeena. Alatala, n bata i maxandi n niin birin na. 2 N ma Ala, n yigin saxi i tan nan yi. N nama yagi. I nama tin n yaxune yi n nɔ, e sɛwa. 3 Naxan na a xaxili ti i ra, na kanna mi yarabima mume! Koni naxanye yanfan soma, ne yagin sɔtɔma nɛn. 4 Alatala, kiraan yita n na, i xa n xaran i ya kiraan ma. 5 N xa sigan ti i ya jɔndini, n xaran. Amasɔtɔ n nakisima Ala nan i tan na. N xaxili tixi i ra ferijɛn gbɛn! 6 Alatala, i xaxili lu i ya kininkininna nun hinanna xɔn bayo e yi na xabu a folɔni. 7 I nama i miri n ma foningeya yulubine nun matandine ma! N suxu i ya hinanni, amasɔtɔ i fan, Alatala. 8 Alatala fan, a mɔn tinxin, nanara a yulubi kanne xaranma a kirane ma. 9 Naxan a yetɛ magodoma, a a sariyan nabirama na ma. A mɔn a xaranma a sagoon na nɛn. 10 Naxanye a layirin maxadine suxi, Alatala hinan, a mɔn lannayaan nabama ne nan xa kiin birin yi. 11 Alatala, n hakɛne mafɛlu i xinla a fɛ ra, amasɔtɔ a gbo. 12 Nde gaxuma Alatala yɛɛ ra? A kiraan yitama na kanna ra a lan a xa sigan ti naxan xɔn. 13 Na kanna sabatima nɛn a siimayani, bɔxɔn yi findi a diine kɛɛn ra. 14 Alatala a wundone makenɛnma nɛn a yɛɛ ragaxu muxune xa. A a layirin yitama e ra nɛn. 15 N yɛɛn tixi Alatala ra waxatin birin, bayo a tan nan n natangama suxu yalaan ma. 16 Ala, yandi, kininkinin n ma amasɔtɔ n

kedenna na a ra, n tɔrɔxi. 17 Nii yifɔrɛn bata n yili, n namini na tɔrɔni. 18 I miri n ma tɔrɔne nun n ma sɔxɔlene ma, i yi n ma yulubine xafari. 19 A mato, n yaxune wuya, e n najaxuxi kati! 20 N niin nakantan, i yi n xunba. N nama yarabi, amasɔtɔ n bata n luxun i yi. 21 N ma fetareyaan nun tinxinyaan xa n kantan amasɔtɔ n xaxili tixi i tan nan na. 22 Ala, i xa Isirayila xunba a tɔrɔne birin yi!

26 Dawuda gbeena. Alatala, n ma kitin sa amasɔtɔ fɛ yo mi n kɛwanle ra, n yigin mɔn i yi feu! 2 Alatala, n fɛsɛfɛsɛ, i yi n mato, n sɔndɔmɛn nun bɔjɛn nakɔrɔsi. 3 I ya hinanna n yi waxatin birin yi, n sigan tima i ya lannayani! 4 N tan mi n magodɛ fuyantenne fɛma, nxu nun nafiɗine mi fɛ kedenni. 5 Fɛ jaxi raba yamaan mi rafan n ma. N mi dɔxɛ muxu jaxine fɛma. 6 Alatala, n bata n yiin naxa sɔntareyani, n yi so i batudeni, 7 n barikan bira i xa n xui yitɛxin na, n yi i ya kabanako feene fala. 8 Alatala, i ya banxin nafan n ma, i nɔrɔn denaxan yi. 9 I nama nxu nun hake kanne faxa nxu bode xɔn, i nama nxu nun faxa tiine rajanna findi kedenna ra. 10 Na muxune fɛ jaxin ligama, e dimi yi seene rasuxu mayifuni. 11 Koni, n tan, fɛ yo mi n kɛwanle ra. N xunba, i diɗa n ma! 12 N tixi tinxinni ken! N na Alatala tantunma nɛn a yama gbeeni.

27 Dawuda gbeena. Alatala nan n ma kenɛnna nun n ma kisin na. N xa gaxu mundun yɛɛ ra? Alatala nan n ma dunuɗa yi gidin xun mayɛngɛ muxun na. Nde n magaxuɛ? 2 Muxu jaxine na keli n xili ma alogo e xa n halagi, yaxune na n yɛngɛ, e tan nan dagalanma ayi nɛn, e bira. 3 Hali sofa ganla na n nabilin, n bɔjɛn susuma nɛn. Hali yɛngɛ gbeɛn na keli n xili ma n yigin tixi. 4 N bata Alatala maxɔdin fɛ kɛden ma. N fɛ kɛden peen nan fenma. N lu Alatalaa banxin kui han n siin sɔgɛ danna. N Alatala wali fajin kolon, n yi lu a batue a banxini. 5 Amasɔtɔ a n namare nɛn a banxini tɔrɔ waxatini. A n luxunɗɛ nɛn a Batu Banxini. A n natema nɛn geyaan xuntagi. 6 A xunna kenla fima n ma nɛn n yaxune tagi. N saraxane bama nɛn Ala Batu Banxini, n sɔnxɔ sewani. N bɛtin bama nɛn, n na Alatala tantun. 7 Alatala, i tuli mati n xuiin na, n na i xili waxatin naxan yi. Kininkinin n ma, i yi n yabi! 8 N bɔjɛn waxi i fen feni. Alatala, n ni i fenma, 9 i nama i yetagi luxun n ma! I nama i ya walikɛɛn kedi xɔlɔni. I bata findi n mali muxun na. I nama n nabɛpin, i nama i mɛ n na, n nakisimana Ala. 10 Hali nga nun n fafɛ n nabɛpin, Alatala n yisuxuma nɛn. 11

Alatala, n xaran sigati kiin ma. Ti n yee ra kira fajin xon ma, amasoto n yaxune wuya. **12** I nama n so n yaxune yii, amasoto wule serene bata keli n xili ma, e e konkoma n ma. **13** N mon laxi ito ra: n na Alatalaa nemaan toma nen dunuja yi. **14** I xaxili ti Alatala ra! I senbe so! I bojen xa limaniya! I xaxili ti Alatala ra!

28 Dawuda gbeena. Alatala n ma fanyena, n bata i xili. I tuli mati n na! Xa i mi n yabi, n sama laxira faxa muxune fari nen. **2** N ma mayandi xuiin me malina fe ra, n bata n yiini te i Batu Banxin yire sarjannxin mabinni. **3** I nama nxu nun muxu jaxine yalagi nxu bode xon, fe jaxi rabane naxanye fala fajine tima koni marajaxuna e bojene yi. **4** E kewanle saranna fi, e nun e wali jaxine e bata naxanye liga. A liga e ra naxan lan e kewanle ma. E lan e xa naxan soto, na so e yii! **5** E xaxili mi luxi Alatalaa wanle xon ma, hanma a yiine bata naxan da. Nanara, a e kalama nen a e jan habadan. **6** Barikan bira Alatala xa, a bata n ma mayandi xuiin me. **7** Alatala nan n senben na. A n xun mayengema alo wure lefana. N yigin saxi a fari, bayo a n malima. Nanara, n bojen bata rafe sewan na. N na a tantunma nen betine yi. **8** Alatala nan a yamaan senben na, e nun yigiya kantanxina a muxu sugandixin xa. **9** I ya yamaan nakisi, i mon yi e baraka. Findi e gbengben muxun na, i yi i yengi dexo e xon ma habadan!

29 Dawudaa betina. E tan malekane, e fa Alatala tantun, e a tantun a binyen nun a senbena fe ra. **2** E binyen fi Alatala ma a xinla fe ra, e Alatala batu a noro sarjannxini. **3** Alatala xuiin mema foxo igene yi, Ala binye kanna sarinma, Alatala a xuiin nasigama ige gbeene xun ma. **4** Alatala xuiin senben gbo, Alatala xuiin noroxi. **5** Alatala xuiin suman binle yigirama, hali suman wudin naxanye Liban yamanani. **6** Ala Liban geyane ratuganma alo jinge diina, e nun Siriyon geyana alo burunna jingena. **7** Alatala xuiin sigama ayi alo kuye sarinna. **8** Alatala xuiin tonbon yirene yimaxama, a Kadesi tonbonni maxa. **9** Xenle diin xalima Alatala xuiin ma, a mon yi warine deene rayolon, yamaan birin sonxoma a Batu Banxini, e naxa, “Binyen xa fi a ma!” **10** Alatala doxi fufane xun na. A mangayaan na habadan! **11** Alatala nan senben fima a yamaan ma, a boje xunbeli barakan sa e yi.

30 Dawudaa betina. Sigi sarjannxina. Batu Banxin nasarjann betina. Alatala, n ni i batuma, amasoto

i bata n yite. I mi tin n yaxune yi e xunnayeren n xun na. **2** Alatala n ma Ala, n ni i mafan nen malina fe ra, i yi n nakendeya. **3** Alatala i n niin masiga nen laxira ra, i n faxamatoon nakisi. (Sheol h7585) **4** Alatalaa togondiya muxune birin xa betin ba a xa! E a matoxo a wali sarjannxine fe ra! **5** Bayo, a xolon mi xunkuya, koni a marafanna luma nen muxun siin sogen birin. Wuga xuiin minima nen koon na, koni sewan fama nen xotonni. **6** N yi laxi n ma herin na waxatin naxan yi n naxa, “Sese mi n yimaxe!” **7** Alatala, n to yi i ya xanuntenyani, i n lu nen fangani alo geyana. Koni i to i yetagin luxun n ma, na yi n kontofili. **8** N yi i tan Alatala xili, n yi Marigin mafan, **9** n naxa, “N na faxa, i tonon mundun sotoma nayi? N na sa gaburun kui, tonon mundun na ra? Faxe muxune nxe i tantunje ba? E nxe i ya lannayaan matoxe ba? **10** Alatala, i tuli mati n na, i kininkinin n ma! Alatala, n mali!” **11** I bata n ma nimisan maxete sewan na. I n makininkininna ba n ma, i yi n nabilin sewan na. **12** Nanara, n mi n dunde, n betin bama i xa nen. Alatala n ma Ala, n barikan birama i xa nen habadan!

31 Dawudaa betina, beti baane kuntigin xa. Alatala, n bata n luxun i yi. I nama tin n yi yarabi! N natanga i ya tinxinyana fe ra. **2** I tuli mati n na, i yi n xunba iki sa! Findi n yigiya gemen na, e nun n makantan yinna. **3** N ma game gbeen nun n ma yinna nan i tan na. Ti n yee ra, i yi n maxaran i xinla a fe ra. **4** N natanga na luti ratixin ma n yee ra, bayo i tan nan n xun mayengema. **5** N bata n niin so i yii, n xunba Alatala, lannaya Ala. **6** N bata ne rapaxu naxanye suxure fufafune batuma, koni n tan yigin saxi Alatala nan fari. **7** N sewama nen, n jaxan i ya hinanna fe ra, bayo, i bata n ma torone to, i n sondomena soxolen kolon. **8** I mi n soxi n yaxune yii, koni i n xoroyaxi nen. **9** Alatala, kininkinin n ma, amasoto n toroni. N bata xadan wuge. Sunun bata n niin nun n fatin natagan. **10** Sunun bata n ma dunuja yi gidin jan, wugan yi nde ba n siin na. N fangan bata jan n yi n ma torone fe ra. N xonne bata yelefu ayi. **11** N yaxune birin, katarabi n dexo bodene ma, ne n nayarabima. N xoyine bata gaxu n yee ra, e na n to kiraan xon ma, e e gi n yee ra. **12** E birin bata jinan n xon ma alo n faxaxin na a ra. N bata lu alo feje kalaxina. **13** N bata yaxu wuyaxi koyekoyen xuiin me, gbalona n nabilinni. E feene yitonma lan n faxe feen ma. **14** Alatala, n tan yigin saxi i tan nin, n naxa, “I tan nan n ma Ala ra.” **15** N ma

waxatine i sagoni. N natanga n yaxune ma naxanye n besenxonyama. **16** I nɔɔn xa godo i ya walikeen ma, n nakisi i ya hinanni. **17** Alatala, n bata n xui ramini i ma, i nama tin n yi rayarabi. Ala xa muxu jaxine yarabi, Ala xa e dunduxin nagodo laxira yi. (Sheol h7585)

18 Na wule xelene radundu, na wasode yandaxine birin naxanye fala jaxin tima tinxin muxune ma. **19** I ya nemaan makabe, i bata naxan namara i yeeragaxu muxune xa! Muxun birin yetagi, i ya fanna fima ne ma nen naxanye luxunxi i yi. **20** I bata e yigiya i fema, i e kantanma muxune fe yitonxine ma. I bata e ratanga wule xelene ma. **21** Barikan bira Alatala xa! N yi rabilinxi yaxune ra waxatin naxan yi n yenge xinla ma, a yi a hinanna yita n na. **22** N ma gaxuni, n yi a fala, n naxa, "I bata n kedi i yetagi." Koni n to n xuiin namini i ma malina fe ra, i yi n ma mayandi xuiin me. **23** E tan togondiya muxune birin xa Alatala xanu! Alatala denkeleya muxune ratangama nen, koni a yandadene sare fima nen alo a lan kiinde. **24** E tan naxanye birin yigi saxi Alatala fari, e senben so, e boje ragidi.

32 Dawudaa fala jaxumena. Sewan na kanna xa naxan ma matandine bata mafelu naxan yulubine bata xafari. **2** Sewan na adaman xa Alatala bata dija naxan haken ma e nun mayifu mi naxan yi. **3** N to munma yi n ti n hakene ra nun, ferijen gben kutunne yi n nayelefuma. **4** I ya toron yi n fari koeen nun yanyin na. Fangan yi jan n na a liga alo n tonbon yiren nin. Beti xuini te. **5** Awa, n yi n ti n yulubine ra i xa. N mi n ma hake yo luxun i ma. N naxa, "N na n tima nen n ma matandine ra Alatala xa." Awa, i yi n hakene nun yulubine birin ba n ma. Beti xuini te. **6** Nanara, muxu togondiyaxine birin xa i mafan a waxatini, alogo fufaan na fa, a nama e li. **7** N luxunden nan i tan na. I tan nan n natangama toron ma, yamaan birin yi xoroya betine ba. Beti xuini te. **8** Nanara, n na e xaranma kiraan ma e bire naxan foxo ra. N na e kawandima, n yi n yengi sa e xon. **9** I nama findi daxun na alo soona hanma sofanla naxanye mi sigе fo karafen na bira e ma. **10** Muxu jaxine toron gbo. Koni naxanye e yigi saxi Alatala yi, a ne rabilinma nen hinanna ra. **11** E tan tinxin muxune xa jaxan Alatala a fe ra, e sewa, e betin ba, e tan muxu sondome fajine.

33 E betin ba sewani Alatala xa, e tan naxanye tinxin! Muxu fajine lan e xa a tantun. **2** E barikan bira Alatala xa bolonna ra, e barikan bira

a xa kondenna ra. **3** E beti nenen ba a xa. E maxa seene maxa ki faji, e yi e xuini te a ma. **4** Nondin nan Alatala falan na. A kewanle birin kamalima tinxinna nin. **5** Tinxinyaan nun sariya suxun nafan Alatala ma, dunuja birin wasaxi a hinanna ra. **6** Alatala kore xonna daxi a fala xuiin barakan nin, e nun yanban seene a de xuiin na. **7** A foxo igene birin malanma yire kedenni, a fufane ramara. **8** Boxon birin xa gaxu Alatala yee ra! Dunuja muxune birin xa a binya! **9** A falan nan tixi, dunuja yi da. A yamarin fi, seen birin yi taran na. **10** Alatala siyane natane kalama nen. A mi tinje siyane yi e miriyane rawali. **11** Koni Alatala fe ragidixine luma nen habadan! A miriyane yi lu habadan! **12** Sewan na siyaan xa naxan ma Ala findixi Alatala ra. Sewan na muxune xa Alatala bata naxanye sugandi! **13** Alatala a yee ragodoma keli ariyanna yi, a muxune birin mato. **14** Keli a mangaya yireni, a dunuja muxune birin xun mato a ra. **15** A e sondomene rafixa, a a xaxili lu e kewanle birin xon. **16** Manga yo mi kise a ganla senben ma. Sofa yo mi ratange a fangan xon. **17** Xunba se mi soon na yengeni, a fangan na gbo ki yo ki, a mi marakisiti tiye. **18** Koni Alatala yeen tixi a yeeragaxu muxune ra, naxanye e xaxili tixi a hinanna ra. **19** A ne rakisima sayaan ma nen, a mon yi e niine rakisi fitina kamen ma. **20** En xaxili tixi Alatala nan na. A tan nan en mali muxun na e nun en ye masansan wure lefana. **21** En bojene sewaxi a tan nan ma fe ra, bayo en bata en yigi sa a xili sarijanxini. **22** Alatala, i ya hinanna xa lu nxu xon bayo nxu nxu yigi saxi i tan nin.

34 Dawuda gbeena. A to a yete findi fatoon na Abimeleki fema, naxan a kedi. N barikan birama Alatala xa waxatin birin, n lu a tantunje! **2** N na Alatala matoxoma n sondomene. Toro muxune yi a me, e jaxan. **3** En xa Alatala gbona fe fala! En na a xinli te en bode xon! **4** N bata Alatala xandi, a yi n yabi, a gaxun birin ba n yi. **5** Naxanye yeen tixi a tan na, ne sewama nen, e mi yarabe mume! **6** N tan yiigelitona n xui ramini nen Alatala ma, a yi n xuiin me, a yi n nakisi gbalon ma. **7** Alatala malekana a yeeragaxu muxune rabilinma nen, a yi e kantan. **8** A mato, i a kolonje a Alatala fan. Sewan na kanna xa naxan na a luxun i tan yi. **9** E gaxu Alatala yee ra, e tan a yama sarijanxina, bayo naxan na gaxu a yee ra, na makoon fanma nen. **10** Hali yatane, kamena e suxuma nen, koni naxanye Alatala fenma, ne mi dase se faji yo ra.

11 N ma diidine, ε fa, ε fa ε tuli mati n na. N xa ε xaran Alatala yεεragaxun ma. 12 Ndee waxi siimayaan xɔn? Ndee waxi siimaya xunkuyen nun sewan xɔn? 13 Nayi, ε fala jaxine yiba, e nun wulena. 14 E ε xun xanbi so fe jaxini, ε fe fajin liga. E bɔɲε xunbenla fen, ε lu a fɔxɔ ra. 15 Alatala yεen muxu tinxinxine ra, a tuli matixi e xuiin na. 16 Alatala xun xanbi soxi fe jaxi rabane yi. E na faxa, jinan tima e xɔn nen sinma! 17 Tinxin muxune na e mawuga Alatala xa, a tuli matima e ra nen, a e xunba e tɔrɔne birin yi. 18 Alatala luma nen ne xɔn naxanye bɔɲen kalaxi. A yigitegetɔne rakisi. 19 Tɔrɔ wuyaxi tinxin muxun lima nen, koni Alatala a bama nen e birin yi. 20 Ala a xɔnne birin kantanma nen, hali keden, a mi gire. 21 Fe jaxin nan muxu jaxin faxama. Tinxin muxune yaxune yalagima nen. 22 Alatala a walikene niin xunbama nen. Naxan na a luxun a yi, na mi yalage mum!

35 Dawuda gbeena. Alatala, n kiti muxun makiti. I n yengefaan yenge. 2 Keli, i ya wure lefane tongo i fa n mali. 3 I ya tanban nun bunbini te ne xili ma naxanye n fɔxɔ ra. A fala n xa, a i tan nan n nakisima. 4 Ala xa ne rayagi a e rayarabi, naxanye katama n faxa feen na! Naxanye fe jaxine yitonma n xili ma, Ala xa ne ye yifu a e raxete! 5 E xa liga alo foyen sigama se dagin naxan na. Alatalaa malekan xa e kedi. 6 Ala xa e kirani fɔrɔ, a salaxunɲε ayi, Alatalaa malekan yi e sagatan. 7 E lutin natixi nen n yεε ra fuu! E yili ratilinxin ge n suxu feen na. 8 Nanara, e xa e tereɲa halagin na, e suxu e luti ratixin na, e bira, e faxa. 9 Nayi, n niin sewama nen Alatala ra. N jaxan a marakisina fe ra. 10 N na fale n bɔɲen ma feu! N naxa, “Muxu yo mi luxi alo i tan Alatala. I yiigelitɔne ratangama fanga kanne ma. I tɔrɔ muxune ratanga ne ma naxanye e yigbetenxi.” 11 Muxu jaxine n kansunma. E sɔnne sama n na, n mi naxanye fe kolon mum! 12 E n ma fanna jɔxɔ a jaxin na. N yifuxin yi lu. 13 Koni e yi furaxi waxatin naxan yi, n yi n maxidima sunun nin. N yi n yete magodo sun suxuni. N ma maxandi xuiin to mi yabi, 14 n sunuxin yi lu e fe ra alo n xɔyina hanma alo ngaxakedenna nan yi e ra nun. N xun sinxin yi lu nimisani alo n nga nan yi a ra. 15 Koni tɔrɔn to n tan li, e birin yi jaxan. E e malan n xili ma. N yengefane, n mi yi naxanye kolon, ne yi lu n tɔrε tun! 16 E n naɲaxu, e n magele. E e jinne raxinma n xili ma. 17 Marigina, i yεen sama e xɔn han waxatin mundun yi? N niin natanga e

yengeni, i n nakisi yatani itoe ma! 18 Nayi, n barikan birama nen i xa yamani. N ni i matɔxɔ e birin yetagi. 19 I nama tin n yaxu wuledene yi jaxan n ma fe ra. Naxanye n naɲaxuxi fuuni, ne nama gele n ma. 20 E mi ngaxakedenya fala tima, fɔ e yi bɔɲε xunbelitɔne kansun wulen na. 21 E feene falama n xun ma, e sɔnxɔ, e naxa, “Yo! I naxan ligaxi nxu bata a to!” 22 Alatala, i tan bata ne to, nayi, i nama i dundu. Marigina, i nama i makuya n na! 23 Marigina, keli, i yi n xun mayenge. N ma Ala, n ma yengen so. 24 Alatala n ma Ala, yoon fi n ma bayo i tinxin. I nama tin n yaxune yi jaxan n ma fe ra. 25 I nama tin e yi a fala, e naxa, “Yo! Nxu bata a manɔ! Nxu yi waxi na nan tun xɔn ma!” 26 Muxun naxanye sewama n tɔrɔ feen na, Ala xa ne rayagi, a e yifu. Ala xa ne rayagi, a yi e rayarabi naxanye e yete yitema n ma. 27 Naxanye waxi n xɔrɔyaxin to feni, ne xa sɔnxɔ sewani, e naxa, “Alatala gbo! A bata sewa a walikena yεε ra sigan na.” 28 Nayi, n ni i ya tinxinyana fe falama nen, n yi i tantun ferinjen gben!

36 Alatalaa walikeen Dawudaa betina, beti baane kuntigin xa. Yulubin falan tima muxu jaxin xa a bɔɲeni. A mi gaxuma Ala yεε ra mum! 2 Bayo a lugoxi a yete ra a mi nɔε a yulubine kolonɲε, a a mε e ra. 3 A falane jaxu, wulen nan gbansan e ra. A mi fa xaxilimaya feeye rabama. A mi fe fajni ligama. 4 A nɛma saxi a saden ma, a fe jaxine mirima, a kira kobine natama, a mi a mɛma fe jaxi yo ra. 5 Alatala, i ya hinanna gbo han ariyanna, i ya lannayaan gbo han kore. 6 I ya tinxinna gbo alo geyane. I ya kiti sa kiin tilin alo fɔxɔ igena. Dapɔxɔne nun subene i tan nan yii, Alatala. 7 Ala, i ya hinanna kende han! Adamadiine birin luxunden sɔtɔma nen i yi alo tɔxe diine e nga gabutene bun kii naxan yi. 8 E lugoma i ya donse gbeen nan na. E e min i ya fanni alo xudena. 9 Niin binla i tan nan yi. Nxu bata kenenna to i ya kenenna xɔn. 10 I xa hinan ne ra naxanye i kolon. I ya tinxinyaan yita sɔndɔmε fajni kanne ra. 11 I nama tin yandadene yi n yenge, hanma muxu jaxine yi n kedi. 12 A mato, fe jaxi rabane bata bira. E saxi, e mi nɔε kele.

37 Dawuda gbeena. I nama xamin muxu jaxine ra. I nama i sa fe jaxi rabane ma. 2 E tununma nen xulen alo sexe xarena. E faxama nen alo si seen naxan bata lisi a ra. 3 I yigin sa Alatala yi, i yi fe fajin naba. Nayi, i luyε yamanani nen, i yi sabati bɔɲε xunbenli. 4 I xa sewa Alatala yi nanara a i bɔɲen

waxon feene lige i xa. **5** Bira Alatalaa kiraan nan xon. I yigin sa a yi. Nanara a i maliye. **6** I ya tinxinyaan nun sariya suxun makenenma nen a tan barakani alo yanyi tagi sogena. **7** I xa dija, i Alatala legeden. I nama xamin na muxune ra naxanye sabatima, naxanye e fe yitonxine rasonyama a jaxin na. **8** I nama xolo, i nama fitina, i nama xamin. Ne i birama toroni nen. **9** Muxu jaxine janma nen, koni naxanye e yigin sama Alatala yi, boxon luma ne nan xa. **10** A mi buma muxu jaxine yi tunun. E e yee rakopinma e ma nen, koni e mi e toe. **11** Naxanye limaniyaxi, boxon luma ne xa nen, e yi sabati, e boje xunbenla soto. **12** Muxu jaxin fe jaxin nan yitonma tinxin muxun xili ma, a a jinne raxin a xili ma. **13** Koni Marigin gelema muxu jaxine ma, amasoto a a kolon, e fitina boxon mi fa buma. **14** Muxu jaxine bata e silanfanne botin, e e xanle ba, e xa yiigelitone nun toro muxune yenge, e xa muxu fajine faxes. **15** Koni, e saxonma e gbee silanfanne nan na. E xanle yi gira. **16** Se xurin naxan tinxin muxun yii, na fisa muxu jaxine bannayaan xa. **17** Amasoto muxu jaxine senben kalama nen, koni Alatala tinxin muxune ratangama nen. **18** Alatala yengi doxi sontarene xon. E keen luma nen habadan. **19** E mi tore waxati xodexene yi. Fitina kamen na so, e tan lugoma nen. **20** Koni muxu jaxine faxama nen. Alatala yaxune yi tunun alo xeen fugene. E loma ayi nen alo tutina. **21** Muxu jaxin donla tongoma nen, a mi a fiye. Koni tinxin muxun kiin tima fonisireyaan nin. **22** Ala naxanye barakama, boxon luma ne xa nen. Koni a naxanye dangama, ne janma nen. **23** Alatala nan muxun sigati kiin nagidima a lu na kiraan xon naxan nafa a ma. **24** Xa a dagalanje ayi, a mi bire, amasoto Alatala a malima. **25** Dii mesen nan yi n na, koni iki n bata fori. N siin bata waxati xunkuye soto. Koni n munma tinxin muxun nabepinxin to singen, hanma a diine yi donseen maxandi. **26** A kiin tima fonisireyaan nan na waxatin birin yi, a mon bonne dolima. Dubana a diine xa. **27** E xun xanbi so fe jaxini, e fe fajin naba, nanara i mamandenne luye boxon ma habadan! **28** Amasoto sariya suxun nafa Alatala ma. A mi a muxu togondiyaxin nabepinje. A a kantanma nen habadan. Koni muxu jaxine mamandenne tan janma nen. **29** Tinxin muxune boxon sotoma nen alo keena, e lu na yi habadan. **30** Tinxin muxun xaxilimaya falane nan tima. Sariyan nan a falan na. **31** A Alaa sariyan namarama a bojeni nen. A mi tantanma a fe yi mume! **32** Muxu jaxin tinxin muxun legedenma a

faxes feen nan na. **33** Koni Alatala mi a luye a yaxune senben bun ma. A mi tinje a yalagi feen ma, a na kiti waxatin naxan yi. **34** E e xaxili ti Alatala ra, e yi lu a kiraan xon. A e yitema nen, a yamanan so e yii. E a toma nen nayi muxu jaxine bata jan. **35** N yi muxu jaxina nde kolon nun, gbalotoon nan yi a ra naxan bata yi sabati alo wudi gbeena. **36** Koni a danguxi nen, a lo ayi feu! N yi a fen, koni n mi a to. **37** I xaxili lu sontaren xon. I yeen sa muxu fajin xon. Boje xunbelitoon mayixetene sotoma nen. **38** Koni yulubi kanne kalama nen feu! E bonsonna birin yi raxori. **39** Alatala tinxin muxune rakisima nen. E yigiya makantanxin nan a tan na toro waxatine yi. **40** Alatala e malima nen a e ratanga. A e ratanga muxu jaxine ma nen, a e rakisi, amasoto e luxunxi a yi.

38 Dawudaa betina. Maxandina. Alatala, i nama n maxadi xoloni! I nama fitina n xili ma, i n jaxankata. **2** I bata n maxolo i ya xalimakunla ra. I yi n nabira. **3** Kendeya mi fa n fatini i ya xolona fe ra. N gbinding mi yalan n yulubina fe ra. **4** N hakene bata gbo ayi n xun ma han a radangu ayi, alo goronna naxan binya n mi a noe. **5** N ma korone bata kun, e xirin yi mini. Amasoto daxun nan yi n na nun. **6** N bojen bata kala han n yi n xun sin. N lu wuge n bojeni ferijen ghen! **7** N fatin birin wolonxi n ma kati! Kendeya yo mi fa n fatini. **8** N bata yelefu boxon ma, n bata kala feu! N bojen toroxi, n kutunma, amasoto n soxolexi. **9** Marigina, n naxan fenma, i na kolon. I bata n kutun xuiin birin me. **10** N bojen dinma, n fangan bata jan. N yetagin bata yitonon. **11** N xoyine nun n doxo bodene mi fa fama n fema amasoto n ma furen xon. Hali n kon kaane bata e makuya n na. **12** Naxanye waxi n faxes feni, ne bata lutin nati n yee ra. Naxanye waxi n maxolo feni, ne n kala feen falama. E mi xadanma fe jaxi yitondeni. **13** N bata liga alo tuli xorina, n mi fe mema. N bata liga alo bobona, n mi fala tima. **14** N bata liga alo muxun naxan mi yabin tiye amasoto a mi fe mema. **15** Koni Alatala, n xaxili tixi i tan na. I n yabima nen, Marigina n ma Ala. **16** N naxa, "I nama tin n yaxune yi e xunnayeren n na, e nama jaxan n ma toron na." **17** N biramatoon na a ra. N xoleni waxatin birin. **18** N bata n ti n hakene ra, n yulubine bata n naxamin kati! **19** N yaxune tan kende, e yixodexo. E wuya naxanye n napaxuxi fuu! **20** Naxanye fe fajin saranma fe jaxin na, ne n toroma, amasoto n tan a fajin nan foxo ra. **21** Alatala, i nama

n nabɛɛnin. N ma Ala, i nama i makuya n na. 22 N Marigina, n nakisimana, n mali iki sa!

39 Dawudaa betina, beti baane kuntigin xa, Yedutun xa. N bata a fala, n naxa, “N na n kewanle rakorɔsima nɛn, alogo n dɛ xuiin nama n bira yulubini. N mi fa fala yo tiye muxu njaxine yɛɛ xɔri.” 2 N yi n dundu, n yi n naxara, n mi yi fala yo tima hali fe fajina, koni n ma sɔxɔlɛn yi siga fari sɛ tun! 3 N bɔɛn yi wolon n kui. N to yi n mirima a ma, a yi n kuiin gan fɔlɔ alo tɛɛna. N yi falan ti fɔlɔ, n naxa, 4 “Alatala, n siin sogɛ dɔnxɛn yita n na e nun a yatɛ saxina. I xa n nakolon a n ma siimayaan mi buma.” 5 I tan nan n ma lɔxɔnɛ yatɛn nadungixi ayi. Sɛsɛ mi n siin waxatin na i yɛɛ ra yi. Adamadiin birin buma nɛn alo foyedin gbansan! Beti xuini tɛ. 6 Nininna nan gbansan a tan na. Muxuna a masigama, a fɛɛn ligama koni fuyan! A nafunla malanma, koni naxan a sɔtɛ a xanbi a mi na kolon. 7 Marigina, n fa n xaxili tima nanse ra nayi? N na n yigin sama i tan nan yi. 8 N nakisi n yulubin birin ma. I nama tin daxunɛ yi gɛlɛ n ma. 9 N yi dunduxi nɛn. N mi yi fala yo tima. Amasɔtɔ i tan nan ito ligaxi n na. 10 I ya furen ba n ma, benun i xa n najan tɔrɔni. 11 I muxun maxadima a hakɛna fɛ ra i yi a haken saran a ra. I muxuna nafunlɛ kalama alo xiinɛ. Adamadi yɛtɛɛn ligaxi nɛn alo foyedina. Beti xuini tɛ. 12 Alatala, n ma maxandi xuiin mɛ. I yi i tuli mati n ma mawuga xuiin na. N na wuga, i nama i dundu. I ya xɔɛn nan tun n tan na sigatini, alo n benbane yi kii naxan yi. 13 N yiba singɛn alogo n xa sɛwa benun n xa dangu, benun n xa faxa.

40 Dawudaa betina, beti baane kuntigin xa. N dija nɛn Alatala maliin legedɛndɛni, a yi a tuli mati, a yi n ma mawuga xuiin mɛ. 2 A n ba yili njaxin na, a n ba boron nun bɛndɛni. A yi n ti fanyɛn fari, a san tide fajin fi n ma. 3 A yi n xaran beti nɛnɛn ma, n na ɛn ma Ala tantunma naxan na. Muxu wuyaxi na toma nɛn e yi gaxu a yɛɛ ra, e mɔn yi e yigin sa Alatala yi. 4 Sɛwan na kanna xa, naxan na a yigi sa Alatala yi, naxan mi kidɛnɛ batuma, naxan mi a sama suxurɛ batunɛ ma. 5 I ya wali fajinɛ wuya ayi! Alatala, n ma Ala, i njɔxɔn mi na! I bata kabanako fɛ wuyaxi yitɔn nxu xa! N mi nɔɛ e fɛ falɛ, e yatɛn bata gbo ayi! 6 I mi waxi saraxan nun kiseɛn xɔn gbansan, fɔ i n tunlɛ raba ayi. I mi yi saraxa gan daxinɛ nun yulubi xafari saraxanɛ gbansan fɔxɔ ra. 7 Nanara, n naxa, “N tan ni i ra. N bata fa. N ma fɛ sɛbɛxi Kitabuni. 8 N ma Ala, i

sagoon nafa n ma! I ya sariyan namaraxi n bɔɛnɛni.” 9 N tinxinyaan nalima nɛn i ya yamani. Alatala, i a kolon, n mi n dundɛ. 10 N mi i ya tinxinyaan namaraxi n kedɛnna xa. N ni i ya njɔndin nun marakisina fɛ falama nɛn. N mi i ya hinanna nun i ya lannayaan luxunɛ yamaan ma. 11 I nama tondi kininkinɛn n ma, Alatala. I ya hinanna nun lannayana n marama nɛn waxatin birin. 12 Amasɔtɔ, n ma tɔrɔnɛ bata wuya han e mi yatɛ! N hakɛnɛ bata n suxu, n mi fa sɛ toma. E wuya dangu n xunxɛnɛ ra. Bɔɛn yixɔdɛxɛ mi fa n yi sɔnɔn. 13 Yandi, Alatala, n nakisi! Alatala, fa n mali iki sa! 14 Ala xa nɛ yarabi naxanyɛ katama n faxa fɛɛn na, a e yɛ yifu fɛfɛ! Ala xa nɛ raxɛtɛ marafɛyani n ma tɔrɔyaan nafa nxi naxanyɛ ma. 15 Ala xa nɛ ratɛrɛna e yagin na, naxanyɛ a falama n ma, e naxa, “Yo! I suxi yatɛ!” 16 Naxanyɛ birin i tan fɛnma, i xa nɛ birin nasɛwa. I ya kisin xɔnla naxanyɛ ra, nɛ xa lu a falɛ, e naxa, “Alatala gbo!” 17 Koni, yiigelitɔɔn nun tɔrɔ muxun nan n tan na. N Marigin nama njinan n xɔn. I tan nan n maliin nun n ma maratanga tiin na. Ala, i nama buyɛ ayi.

41 Dawudaa betina, beti baane kuntigin xa. Sɛwan na kanna xa naxan yengi dɔxi sɛnbɛtarene xɔn. Alatala na kanna xunbama tɔrɔ waxatinɛ yi nɛn. 2 Alatala a ratangama nɛn a a niin nakisi. A a barakama nɛn bɔxɔn ma. A mi a luyɛ a yaxunɛ sɛnbɛn bun ma. 3 Alatala a malima nɛn, furen na a li waxatin naxan yi, a a rakɛndɛya. 4 N na a fala nɛn, n naxa, “Alatala, dija, i n nakɛndɛya, bayo n bata yulubin liga i ra.” 5 N yaxunɛ fala njaxinɛ tima n ma, e naxa, “A faxama waxatin mundun yi, a xinla yi lɔ ayi?” 6 Naxanyɛ fama n xɔntɔndɛni, nɛ fala fajinɛ nan tima n xa nafiɛyani. Koni, a dɛntɛgɛ njaxini tɔnma n ma fɛ ra, a yi mini a ralidɛni yirɛn birin yi. 7 Naxanyɛ birin n najaxuxi, nɛ kɔyɛkɔyɛnma e bɔdɛ xa n ma fɛ ra. E mirixi a njaxin nan ma n ma fɛ yi. 8 E naxa, “Furɛ njaxin bata a suxu! A mi fa kɛlɛ a sadɛni fɛu!” 9 Hali n lanfa fajina, n yi laxi naxan na, nxu nun naxan yi donseɛn donma nxu bɔdɛ xɔn, na bata kɛli n xili ma. 10 Alatala, kininkinin n ma, i yi n nakɛli sɔnɔn, nanara n na n yaxunɛ donla saranɛ. 11 N na a kolon fa fala n bata i kɛnɛn bayo e mi n nɔɛ. 12 I n malima nɛn amasɔtɔ n tinxin. I yi n lu i yɛtagi habadan! 13 Barikan xa bira Alatala xa, Isirayilaa Ala! Habadan han habadan! Amina! Amina!

42 Koraa diinɛ fala njaxumɛna. Beti baane kuntigin xa. Ala, i xɔnla n niin suxuma alo igɛ xunbɛnla

xonla xenla suxun kii naxan yi. **2** Habadan Ala xonla n niin suxuma nen alo min xonla. N sigama waxatin mundun yi n sa ti Ala yetagi? **3** N wugama kœen nun yanyin na. N baloma yœegen nin. N yaxune n maxodinma waxatin birin e naxa, “I ya Ala minen yi?” **4** Waxati danguxine fe na rabira n ma, n bœjen yi kala. Nxu nun yamaan nan yi sigama Alaa banxini, n yi tima e yœe ra, e sewaxin sœnxœma, e barikan birama Ala xa jaxan nin. **5** Nanfera n niin sœxœlexi? Nanfera n bœjen sunuxi? N xa n yigi sa Ala yi. N mœn a tantunma nen. N kisi muxun nun n ma Ala nan a ra. **6** Koni iki, n niin sœxœlexi, nanara n na n mirima i ma Yuruden bœxœni, Xerimon geyane xuntagi, e nun Misari geyaan ma. **7** Fufaan sama fufaan fari n xili ma, igen xuxu xuiin yi gbo ayi a surundeni. I xunfan gbeene radangu n xun ma, gbalon yi keli n xili ma alo walanna. **8** Alatala xa a hinanna mayita yanyin na alogo n yi xi betin be a xa kœen na. N ma dunuƣa yi gidin Ala nan maxandima. **9** N na a falama n natangamana Ala nan xa, n naxa, “Nanfera i jinanxi n xœn ma? Nanfera n luma tœre n yaxune yii?” **10** N niin tœrxœi n yaxune xœn amasœto e ferijœnma n maxœdinƣe nen, e naxa, “I ya Ala minen?” **11** Nanfera n niin sœxœlexi? Nanfera n bœjen sunuxi? N xa n yigin sa Ala yi. N mœn a tantunma nen n ma Ala, n nakisimana.

43 Ala, yœon fi n ma, i n xun mayengen so denkeleyatare yamaan xili ma. N natanga wuledene nun muxu jaxine ma! **2** N kantan muxun nan i tan na. Nanfera i n nabœjinma? Nanfera n sunuxin luma tœre muxu jaxine xœn? **3** I ya kenenna nun i ya jœndin nafa n ma! E xa ti n yœe ra, siga i ya geya sarijanxin fari i yetagi. **4** Nayi, n sigama nen Alaa saraxa ganden dœxœn, Ala naxan findixi n ma sewan nun n ma jaxanna ra. N na n ma bœlœnna maxa n tantun betin ba i tan Ala xa, n ma Ala. **5** Nanfera n niin sœxœlexi? Nanfera n bœjen sunuxi? N xa n yigin sa Ala yi. N mœn a tantunma nen n ma Ala, n nakisimana.

44 Koraa diine fala jaxumœna, beti baane kuntigin xa. Ala, nxu bata a mœ nxu tunle ra. Nxu benbane bata yi a fala nxu xa nun, i fe gbeen naxanye liga e xa na waxatini, lœxœn naxanye bata xunkuya. **2** I tan nan siya denkeleyatarene kedi i senbeni, i mœn yi nxu benbane radœxo na. I siya gbetene raxuya ayi nen, i yi nxu benbane rasabati. **3** E mi na bœxœn sœtœxi e silanfanne xa ra! E mi a nœxi e yete fangan xan xœn. E

a nœxi i yete fangan nan xœn ma, i fangana, e nun i lu fena e xœn, bayo e rafan i ma. **4** N ma mangan nun n ma Ala nan i tan na. I tan nan nœ sœtœn nagidima Yaxuba bœnsœnna xa. **5** Nxu nxu yaxune raxetœma i tan nan baraka yi. Nxu e nœ i xinli. **6** N yigin mi saxi n ma xanla xan yi. N ma silanfanna mi a ra naxan nœn fima n ma. **7** Koni i tan nan nœn fima nxu ma nxu yaxune ma. I tan nan ne rayarabima, naxanye nxu rapaxuxi. **8** Nxu Ala nan matœxœma waxatin birin, nxu i tan nan xili tantunma habadan! Beti xuini te. **9** Koni iki, i bata i mœ nxu ra, i yi nxu rayarabi. I mi fa minima nœ ganle fœxo ra sœnœn. **10** I bata nxu ragi nxu yaxune yœe ra, e yi nxu yii seene birin tongo. **11** I bata nxu rabœjin alogo e xa nxu faxa alo yœxœene. I bata nxu raxuya ayi yamana gbetene ma. **12** I bata i gbee muxune mati sare xurin na alo dœ mi seen naxan na. **13** I bata nxu rayarabi nxu dœxœ bodene yetagi, nxu rabilin muxune yi nxu makonbi, e nxu magele. **14** I bata nxu findi gelema seen na siyane yœ. E e xunne yimaxama nxu mageledeni. **15** N fœyani waxatin birin. N bata yagi **16** xœnnantenne falane xœn naxanye n besœnxœnyama, e nun n yaxun naxanye e gbeen jœxœma n na. **17** Ito birin ligaxi nxu ra nen, hali nxu to mi jinanxi i xœn ma, hanma nxu yi i ya layirin kala. **18** Nxu mi xetexi i fœxo ra. Nxu munma yi fata i ya kiraan na. **19** Koni hali na, i nxu lu nen kankone bun. I nxu rabœjin banban dimini. **20** Xa nxu yi jinan nœxœ Ala xinla ma nun, nxu yi ala gbetene batu, **21** i yatin yi na kolonma nen nun amasœto i nxu miriya wundone kolon. **22** Koni e nxu faxama i tan nan ma fe ra ferijœn gbœn! E nxu ligama alo yœxœœn naxan faxa daxi a ra! **23** Xulun Marigina! Nanfera i xima? Keli, i nama i me nxu ra habadan! **24** Nanfera i i yetagin luxunma nxu ma? I nama jinan nœxœ tœrœne nun marayarabine xœn! **25** Nxu niine bata bira gbangbanni, nxu gbœndin mi fa nœ kele bœxœn ma. **26** Keli, i fa nxu mali! Nxu xunba i ya hinanna nin!

45 Koraa diine fala jaxumœna, beti baane kuntigin xa. A xa ba alo betin naxan xili: “Fuge Fœjine.” Xanuntenya sigina. Fala fœjine bata n bœjen nasœwa. Nanara, n betini ito bama mangan xa. N deni xaxi betina fe ra alo sebœli ti fœjina xayœn kii naxan yi. **2** I tofan adamadiine birin xa, i fatan fala jaxumœn tiye, bayo Ala i barakama nen habadan! **3** I ya silanfanna sœti i dœxœn, senbœmana. Xunnayerœna nun binyœna i tan nan xa! **4** Siga soon fari xunnayerœnni, i sa nœn

ti jɔndin nun yete magodon nun tinxinyana fe ra. I fangan xa fe magaxuxine makenen! **5** I ya xalimakuli ralemunxine xa i yaxune bɔjɛne yisɔxɔn. Siyane birama nen i sanne bun. **6** Ala, i luma nen i ya mangaya gbɛdeni habadan! I ya mangaya taxamasenna nan tinxinyaan na. **7** Tinxinna nan nafari i ma. A jaxin mi rafan i ma. Na nan a toxi Ala, i ya Ala bata i sugandi. A mɔn bata i ya sewan fari sa dangu bonne ra. **8** Latikɔnɔnna nun se xiri jaxumene i ya dugine yi. Maxa se maxane i rasumunma mangane banxine yi naxanye maxidixi sama jinne ra. **9** Mangane dii temene jaxalandi tiine ye. I ya batɛn tixi i ya mangaya gbɛden yii fari fɔxɔni. A maxidi seene rafalaxi xɛma fajɛn nan na. **10** Mangana jaxalandina, i tuli mati n ma falan na. Ninan i kon kaane nun i bari bodene xɔn ma. **11** I xɔnla bata mangan suxu i ya tofanna fe ra. I ya kuntigin na a ra, i xa a binya. **12** Tire kaane fama kiseene ra i xa nen. Nafulu kanne i ya fanna fenma nen. **13** Binyen birin mangana dii temen xa mangayani. A doma gbeen nafalaxi xɛma dugin nan na. **14** E nun a doma rayabuxin nan sigan mangan fɛma jaxalandi tiine biraxi a fɔxɔ ra a tideni. **15** E so mangana genla ma sewan nun jaxan nin. **16** I tan mangana, i dii xɛme wuyaxi sɔtɔma nen naxanye luma mangayani i benbane funfuni. I e findima kuntigine ra nen bɔxɔn birin xun na. **17** N ni i findima xili kanna ra habadan. Muxun birin i matɔxɔma nen habadan han habadan.

46 Koraa diine Ala tantun sigina, beti baane kuntigin xa. Sungutunne xa a ba. Ala nan en yigiyaan na e nun en fangana. A yitɔnxi mali ti feen na tɔrɔ waxatine birin yi. **2** Nanara, hali bɔxɔn xuruxurun, geyane yi bira fɔxɔ ige tilinxine yi, en mi gaxuɛ. **3** Hali fɔxɔ igene xuxu, geyane fan yi yimaxa gbaloni en mi gaxuɛ. Beti xuini te. **4** Xudena Alaa taani naxan a muxune rasewama naxan findixi Kore Xɔnna Ala dɔxɔde sarijanxin na. **5** Ala na taani, a mi yimaxɛ mum! Kuye nɛma yiba, Ala bata taan mali, **6** siyane yi sɔnxɔn nate, mangayane yi yimaxa. Ala na a xuini te, bɔxɔn yi xuruxurun. **7** Alatala Senben Birin Kanna nan en xɔn. Yaxubaa Ala nan en ma faran makantanxin na. Beti xuini te. **8** E fa Alatala a wanle mato, a gbalon naxanye rakelixi bɔxɔn ma. **9** A yɛngene janma han bɔxɔn danna birin yi. A xanle yigirama, a tanbane kala, a yi ye masansan wure lefane gan. **10** A yi a fala, a naxa, “E e raxara, e yi a kolon a n tan nan Ala ra. N

batuma nen siyane tagi. N yi batu bɔxɔn birin yi.” **11** Alatala Senben Birin Kanna en tan nan xɔn. Yaxubaa Ala nan en ma faran makantanxin na. Beti xuini te.

47 Koraa diine betina, beti baane kuntigin xa. E tan, siyane birin xa e yiin bɔnbɔ, e sɔnxɔ, e xuini te sewani Ala xa! **2** Alatala, Kore Xɔnna Ala magaxu han! Manga gbeen na a ra dunuɔa birin xun na! **3** A bata nɔɔn fi en ma siyane xun na, a yamane raso en ma nɔɔn bun. **4** A bɔxɔn sugandi nen nxu xa, Yaxuba bɔnsɔnne sabatima denaxan yi, a naxanye xanuxi. Beti xuini te. **5** Ala bata dɔxɔ a mangaya gbɛdeni. Yamaan sɔnxɔma sewani, xɔta xuine yi mini Alatala xa. **6** Tantun betin ba Ala xa, betine ba han! Tantun betin ba en ma mangan xa, betine ba han! **7** Ala nan mangan na dunuɔa birin xun na, e a tantun betini. **8** Ala dɔxi a manga gbɛde sarijanxini, a mangayaan nabama siyane xun na. **9** Siyane mangane sama nen Ibrahima Alaa yamaan fari. A tan nan gbee dunuɔa ganle birin na. Ala gbo han!

48 Koraa diine betina. Sigi sarijanxina. Alatala gbo, a lan a xa matɔxɔ a gbee taani geya sarijanxin fari. **2** Siyon, Alaa geyana, a mate, a tofan, dunuɔa birin sewama a fe ra. A mate alo bɔxɔne birin manga taana Manga Gbeen dɔxi denaxan yi. **3** Ala a yengi sama nen a taa makantanxin xɔn, a bata a yete findi a kantanmaan na. **4** Mangane to e malan Siyon yenge xinla ma, **5** e yi a to, e kabe, e gaxu, e yi e gi. **6** Xuruxurunna nun kuisanna yi e suxu na, alo jaxanla kuiin na keli a ra, **7** alo kunkibane na kɔntɔfili foye gbeena fe ra. **8** Ala kabanako feen naxanye ligaxi, nxu bata ne mɛ. Iki, nxu bata ne to Alatala Senben Birin Kanna taani. A na taan nakisima nen habadan! Beti xuini te. **9** Nanara, Ala nxu nxu mirima i ya hinanna ma i Batu Banxini. **10** I tan xili kanna tantunma dunuɔa yiren birin yi. I mangayaan ligama tinxinyaan na. **11** Yamaan xa jaxan Siyon geyaan fari, Yuda taa kaane xa sewa i ya kitisana fe ra! **12** E bilin Siyon ma, e yi a kondene yate. **13** E e xaxili lu a yinna xɔn ma, e mɔn yi a sangansone mato, nanara e a fale mayixete famatɔne xa, e naxa, **14** “Ala ito, nxɔ Ala na a ra habadan! A tima nxu yɛɛ ra nen han a rajanni.”

49 Koraa diine betina, beti baane kuntigin xa. E ito mɛ, e tan siyane, e tuli mati e tan muxun naxanye birin dunuɔa yi. **2** Fanga kanne nun tɔrɔ muxune, nafulu kanne nun yiigelitone, birin xa a tuli

mati. **3** N fekolonna falane nan tima, n mirine xaxili fajin nan fima. **4** N na n xaxinla rasigama sandan nan xon, n yi a yebe, n nema n ma bolonna maxe. **5** Nanfera n gaxuma gbalo loxone yee ra, hake kan yanfantenne n nabilinma waxatin naxan yi? **6** E yigin saxi e se kanyaan nan ma, e mon yi e kanba e nafulu kanyani. **7** Muxun mi noe a boden xunbe. A mi noe a niin saren soe Ala yii. **8** Amasoto muxun niin xunbaan xodoxo! A mi noe a saren fiye, **9** alogo a xa bu habadan, a mi faxa. **10** Amasoto, en birin a kolon xaxilimane fan faxama e nun daxune nun komone. E birin e nafunle luma muxu gbetene nan yii. **11** Gaburun yi findi e habadan banxin na, e luma denaxan yi, dan mi naxan na, hali boxon to yi e yii e yete ra. **12** Muxuna gboon mi a rabuye. A fan faxama nen alo subene. **13** Muxun naxanye laxi e yete ra fuyan nin, e sigaden nan na ra, naxanye wasaxi e nafunle ra, ne rananma na kii nin. Beti xuini te. **14** E rasigama laxira yi nen alo yexeen nanjanna to faxan na. Sayaan yi e gbindine don. Muxu fajine noon sotoma nen e xun na sinma, e tofanna yi kala, e siga gaburuni. (Sheol h7585) **15** Koni Ala n niin xunbama nen laxira yi yati! A yi n xali. Beti xuini te. (Sheol h7585) **16** Muxun na nafunla soto, a nafunli gbo ayi, i nama gaxu, **17** bayo a mi sese xalima a yii laxira yi. A herisigen mi birama a foxo ra. **18** Hali duba diin nan yi a ra a dunuya yi gidini, hali a to matoxoxi, a yi sabatixi waxatin naxan yi, **19** a sama a benbane fari nen laxira yi. Ne mi fa dunuya toma sonon. **20** Nafulu kannna naxan xaxili xurun, na maliga xuruseen nan na, naxan faxamato a ra.

50 Asafi a betina. Fangamana, Marigina Alatala falan tima, a dunuya muxune birin maxili, sa folo sogetedeni han sa doko sogegododen na. **2** Alaa nonon mayilenma keli Siyon yi na taa kamalixi tofajina. **3** En ma Ala fama, a mi dunduxi. Kala ti tee gbeena a yee ra, foye gbeena a rabilinxi. **4** A koren nun boxon xilima e xa findi seren na a yamaan makitideni. **5** A yi a fala, a naxa, “N ma muxu togondiyaxine malan n fema, naxanye layirin xidixi n xon ma saraxa baan na.” **6** Koren xonna a tinxinyaan nalima nen, bayo Ala yeteen nan kitisaan na. Beti xuini te. **7** “N ma yamana, e e tuli mati, n falan tima nen. Isirayila, n na e maxadima, bayo Ala nan n tan na, e Ala. **8** N mi e maxadima e saraxane xan ma fe ra. E saraxa gan daxine bama n xa waxatin birin. **9** Koni, n mi turaan xa tongoma e sansanne yi xanamu koton naxan e

kulane yi. **10** Amasoto n gbeen nan burunna subene birin na. N gbeen nan jingene ra naxanye geya wuli wuyaxine ma. **11** N tan nan xoline ngaan kannna ra naxanye geyane ma e nun niimaseen naxanye birin fixene ma. **12** Xa kamen yi n suxun nen nun, n mi na fale i xa, amasoto n tan nan gbee dunuya nun ayi seene birin na. **13** N jinge suben donje ba? En-en de! Xanamu n siin wunla min? En-en de! **14** Nanara, barika biran xa findi e saraxan na Ala xa. E e de ti xuine rakamali Kore Xonna Ala xa. **15** N xili toxo waxatini. N ni i kantanma nen, i yi n binya.” **16** Koni Ala a falama muxu jiaxine xa nen, a naxa, “Nanfera e xetema n ma tonne falan ma, e yi n ma layirina fe fala, **17** koni n ma xaranna mi rafan e ma? E mexi n ma falane ra! **18** E nun mupadene na a ra. E nun yalundene na a ra. **19** E fala naxin nan tun tima. E wulen nan tun falama. **20** E ngaxakedenne kansunma waxatin birin yi. E katama e tojeggedeni. **21** E bata ito birin liga n mi fala ti. Nanara, e mirixi a n fan ligaxi alo e tan. Koni iki, n na e maxadima, n yi a yebe e xa.” **22** “Iki, e ito famu, e tan naxanye Ala bote rabaxi. Xa na mi a ra, n na e raxorima nen. Muxu yo mi e xunbe. **23** Naxan na saraxa baan findi barika biran na, na nan n binyaxi. Naxan na siga kira fajin xon, n na Ala kisin yitama nen na ra.”

51 Dawudaa betina, beti baane kuntigin xa. A naxan ba Nabi Natan to fa a fema a yalunyaan ligaxina e nun Batiseba. Ala, dija n ma i ya hinanna nin. N ma matandine mafelu i ya kininkinin gbeeni! **2** N hakene birin ba n ma. I yi n yulubine xafari. **3** N na n ma matandine kolon. N na n mirima n yulubine ma waxatin birin. **4** N na i tan nan keden yulubi tongoxi. N naxan nabaxi, na jiaxu i yee ra yi. Nanara, i na falan ti, i tan nan tinxin, i na kitin sa, i yoon soto. **5** N barixi haken nin yati! Yulubi kannna nan yi n na xabu nga fudikan na a ra. **6** I waxi jondin nan xon ma n sondomeni yati! I n xaranma fekolonna ma n bojeni. **7** N yulubin ba n ma nanara n sarijanje. I xa n maxa nanara n fixe dangu balabalan kesen na. **8** N mon xa sewa n jaxan. I bojen naxan kalaxi, na mon xa sewa. **9** I yeen ba n yulubine ra, i yi n mafelu n hakene birin na. **10** Ala, boje sarijanxin sa n yi. I mon yi n xaxili ragidi. **11** I nama n kedi i yetagi. I nama i ya Nii Sarijanxin ba n yi. **12** I mon xa kisin sewan fi n ma. Xaxili fajin xa n mali. **13** Nanara, n matandi tiine xaranye i ya kirane ma, yulubi kanne yi xete i

ma. **14** N nakisimana, Ala, n nakisi n ma faxa tixin ma. Ala, yandi n xunba, alogo n xa i ya tinxinyaan nali betini. **15** Marigina, na liga n xa, n xa i tantun. **16** Saraxan mi rafan i ma, xa na mi a ra, n yi a bama i xa nen nun. Saraxa gan daxin mi i kenɛɲɛ. **17** Yetɛ magodon nan Ala rafan saraxan na. Ala, i mi na kanna rabɛɲɲɛ naxan nimisaxi a bɔɲɛni a tubi. **18** Tin, i Siyon nasabati. I mɔn xa Yerusalɛn yinna ti. **19** Na waxatini, tinxin saraxane rafanma i ma nen. Saraxa gan daxine yi i kenɛn. Na waxatini, nxu yi turane rali i xa i ya saraxa ganden fari.

52 Dawudaa fala jaxumena, beti baane kuntigin xa.

A naxan ba, Dowegi Edon kaan to siga Sɔli fɛma, a naxa, “Dawuda bata siga Aximeleki a banxini.” Ee! Muxu gbeena! Nanfera i kanbama i ya fe jaxine yi? Alaa hinanna luma nen habadan! **2** I feene yitonma bonne kala xinla ma. I lenna luxi nen alo file xɛnxɛna. Ee! Yanfantenna! **3** Fe jaxin nafan i ma dangu fe fajin na. Wulen nafan i ma dangu jɔndin na. Beti xuini te. **4** Ee! Wuledena! Fala xolene rafan i ma! **5** Nanara, Ala i raxorima nen habadan! A i suxuma nen, a i ba i konni. A i bama nen kende muxune yɛ dunuya yi. Beti xuini te. **6** Tinxin muxune ito toma nen, e gaxu. Nayi, e gelema i ma nen, e naxa, **7** “Na xɛmɛn mato, naxan mi Ala findi a kantanmaan na. Koni a yigin saxi a nafulu gbeen nin. A fangan sɔtɔxi a bodɛn kalan nan xɔn.” **8** Koni, n tan luxi nen alo Oliwi wudin naxan sabatima Alaa banxini. N yigin saxi a hinanna nin habadan han habadan! **9** N ni i tan Ala tantunma nen i ya wanla a fe ra habadan! N ni i xinla binyama nen i ya tɔgɔndiya muxune yɛ, bayo i tan fan!

53 Dawudaa fala jaxumena, beti baane kuntigin

xa. A xa ba xulenna ra. Xaxilitarena a falama a bɔɲɛni, a naxa, “Ala mi na.” E birin yifu, e haramu feene ligama. Muxu yo mi a fajin nabama. **2** Ala a yɛɛn nagodoma adamadiine ma keli ariyanna yi, a xa a to xa nde na naxan xaxili sɔtɛ, a Ala fɛn. **3** Koni birin bata kiraan fata, e jaxu ayi. Hali keden pe mi a fajin ligama. **4** Fe jaxi rabane mi fe kolon ba? E n ma yamaan tɔnɔn donma alo donsena, koni e mi Ala xandima mume! **5** Awa nayi, gaxun ne suxuma nen e tan naxanye mi yi gaxuma. Ala e kalama nen, a e rayarabi bayo e rapaxu a ma. **6** Nde keɛ Siyon yi a Isirayila rakisi? Ala mɔn na a yamaan senbe so, Yaxuba bɔnsɔnna sewama nen, Isirayila yi jaxan!

54 Dawudaa fala jaxumena, beti baane kuntigin xa.

A xa ba kondenne ra. Dawuda beti naxan ba, Sifi kaane to siga Sɔli fɛma e naxa, “Dawuda luxunxi nxu tagi.” Ala, n nakisi i senben na. N xun mafala kitin bolon! **2** Ala, n ma maxandi xuiin namɛ. I tuli mati n fala xuine ra! **3** Xɔɲɛne bata keli n xili ma. Gbalotɔne katama n faxa feen na. E mi e mirima Ala ma. Beti xuini te. **4** Koni Ala nan n mali muxun na. Marigin nan n niin kantanma. **5** A n yaxune fe jaxine raxɛtɛ e ma. E halagi amasɔto i lannayaan nabama. **6** Nayi, n jɛnige ma saraxan bama i xa nen, n yi i tan Alatala tantun amasɔto i fan. **7** Bayo, i tan nan n baxi n ma tɔrɔne yi, n yi n yaxune biraxin to.

55 Dawudaa fala jaxumena, beti baane kuntigin xa.

A xa ba kondenne ra. Ala, n ma maxandi xuiin namɛ. I nama i xun xanbi so n ma mawugani! **2** I tuli mati n na, i yi n yabi. Xaminna bata n suxu han n kuisan **3** n yaxune fala xuine fe ra. Muxu jaxine n yigbetɛnma, e n tɔrɔma. E bata xɔlɔ n ma, e yi n napaxu. **4** N bata kɔntɔfili. Sayaan gbalon bata n xun matugan. **5** Gaxun nun xuruxurunna bata n suxu. Gbalon yi n nabilin. **6** Xa gabutɛɛn yi n ma nun alo ganbana, n yi tuganma nen nun n sa dɔxɔɔɛn fɛn. **7** N yi n gima nen, n siga yire makuyeni. N yi lu burunna ra. Beti xuini te. **8** N yi maratangaden fɛnma nen mafuren n keli foye gbeen nun gbalon bun. **9** Muxu jaxine raxuya ayi, Marigina, e fala xuine yifu! Bayo, n gbalon nun yengen toma taani han! **10** Kɔɛɛn nun yanyin na, e taan nabilinma, haken nun yengene nan taani. **11** Kala tiin gboma ayi taani. Bɛsɛnxɔnyaan nun mayifuun nan taani. **12** Xa yaxun nan tun yi n makonbima nun, n yi dijama a bun ma nen. Xa n napaxu muxun nan tun yi a yetɛ yigboma n yɛ nun, n yi n luxunma a ma nen nun. **13** Koni i tan na a ra, n lanfana, n bodena, n xɔyi kendɛna! **14** En ma lanfamayaan yi jaxun Alaa banxini en yi sigan tima yamaan yɛ waxatin naxan yi. **15** Sayaan xa n yaxune raterɛna, e kendɛn yi siga laxira yi. Bayo fe jaxina e yi e konni. (Sheol h7585) **16** Koni n bata Ala xili, Alatala n nakisima nen. **17** N ma mawugan nun kutun xuina a lima nen. Xɔtɔnna nun yanyin nun jinbanna ra, a n xuiin mɛma. **18** A n niin natangama, n yi keli yengeni herini hali n yaxune to yi wuya! **19** Habadan mangana Ala a tuli matima nen, a yi n yaxune rabira. Beti xuini te. Amasɔto e bata tondi tubɛ. E mɔn mi gaxuxi Ala yɛɛ ra. **20** N lanfana a xɔyine yengɛma. A a

layiri xidixine kalama. **21** A fala xuiin jaxun fenen xa koni marajaxuna a bojneni. A fala xuine salaxun alo turena. Koni e segen tima alo silanfan xenxena. **22** I ya kontofinle lu Alatala ma. A i malima nen. A mi tinje tinxin muxun yi bira mume! **23** Koni i tan, Ala, i na muxu faxane nun wuledene faxama nen benun e siin tagiin xa a li. N tan mabinni, n na n yigi sama i tan nin.

56 Dawudaa maxandi jaxumena. Beti baane kuntigin xa: a xa ba alo betin naxan xili, “Ganban Wudi Makuyeni” a naxan ba Filisistine to a suxu Gati taani. Ala, kininkinin n ma amasoto e n yengema. N yaxune n besenxonyama ferijen gben! **2** Ferijen gben n yaxune n yengema. N yengefane bata wuya ayi, e waso. **3** N na gaxu waxatin naxan yi, n na n yigi sama i tan nan yi. **4** N na Alaa fala kamalixine matoxoma, n yi n yigi sa a yi, nanara n mi gaxue mume! Dajoxon doronna nanse lige n na? **5** Ferijen gben n yaxune n toroma. E n jaxankata feni tonma waxatin birin! **6** E e malanma luxundene yi, e yee ne tixi n na, n neen dede. E yengi a ma e n faxe. **7** I nama tin e rakisi feen ma e fe jaxine ma. Ee! Ala! I xoloxin xa na muxune rabira. **8** N ma sunun yate. N yee gena fe xa rabira i ma. I xaxili mi doxi e xon ba? **9** N na i xili waxatin naxan yi, n yaxune xetema n foxo ra nen, n yi a kolon a Ala n xon. **10** N na Ala matoxoma a falane fe ra! N na Alatala matoxoma! **11** N yigi saxi Ala nin, n mi gaxue mume! Adamadiin nanse ligama n na? **12** Ala, n de xuiin naxan tongoxi, n na a rakamalima nen. N na barika bira saraxan bama i xa nen. **13** Amasoto i bata n ba sayani, i yi n natanga biran ma. Nanara, n sigan tima Ala yetagi n ma siimayani.

57 Dawudaa maxandi jaxumena, beti baane kuntigin xa. A xa ba alo betin naxan xili, “I Nama Halagin Ti” Dawuda naxan ba a to a gi Soli bun, a sa a so faran yinla ra. Kininkinin n ma! Ee! Ala! Kininkinin n ma! Amasoto n niin marakisin fenma i tan nan yii. N xa luxunden soto i gabuteen bun, han yihadin yi dangu. **2** N bata Kore Xonna Ala maxandi naxan n ma feene rasonoyama. **3** A n yabima nen keli ariyanna yi, a n nakisi. A ne mafalama nen naxanye n yengema. Beti xuini te. Alaa hinanna nun a lannayaan yitama n na nen. **4** Yatane bata n nabilin, n saxi adamadi jaxine tagi. E jinne ligaxi nen alo tanbane nun xalimakunle. E lenne ligaxi nen alo silanfan xenxene. **5** Ala, i ya binyen xa mayita kore xonna ma, a yi boxon nafe! **6**

E bata yalaan nati n yee ra n suxu xinla ma, e yi n nayagi. E bata yinla ge n yee ra, koni e tan yeteen bata bira a kui. Beti xuini te. **7** Ala, n xaxili ragidixi yati! N betin bama nen, n yi i tantun! **8** N xulunma nen sinma, n yi n ma bolonna nun kondenna maxa! N kurunma betin be nen subaxa! **9** Marigina, n ni i tantunma nen siyane ye. N betin bama i xa nen bonsonne tagi. **10** I ya hinanna gbo han ariyanna. I ya lannayaan texi han kore xonna. **11** Ala i ya binyen xa mayita kore xonna ma, a yi boxon nafe!

58 Dawudaa maxandi jaxumena, beti baane kuntigin xa. A xa ba alo betin naxan xili: “I Nama Halagin Ti.” E tan muxu gbeene, e falane mi tinxin feu! E noe adamadiine makite tinxinni ba? **2** En-en de! Tinxintareyana e bojneni, e gbalon nakelima boxon ma. **3** Xabu e bari waxatini, e jaxu. Wuledene loxi ayi xabu e bari loxoni. **4** E xolen luxi nen alo sapin xolena, alo fodogoon naxan mi sapi suxun xuiin mema, **5** naxan mi a kanna xuiin namema. Sapi suxun na fatan kiki, a mi noe a suxe. Beti xuini te. **6** Ala, i xa e jinne magira e de! Alatala, i xa na yatane deen kala! **7** E xa jian alo igen naxan boxonma. E tanbane xa yelefu ayi. **8** E xa liga alo korosiraan naxan fati tununma ayi lingini, alo diin naxan faxaxi barixi, a mi sogen to. **9** Tansin xindena hanma a xarena, ne ganma nen tunden bun. Foyen jaxudene fan xalima nen, a e raxori. Beti xuini te. **10** Tinxin muxune jaxanma nen bayo a gbeen joxoma nen. E fama e sanna maxadeni nen muxu jaxine wunla ra. **11** Nayi, adamadiine yi a fala, “Ala tinxin muxune saren fima yati! Ala na yatigi, naxan dunuja makitima!”

59 Dawudaa maxandi jaxumena, beti baane kuntigin xa. A xa ba alo betin naxan xili: “I Nama Halagin Ti,” a naxan ba Soli to sofane xe e xa sa e luxun Dawuda yee ra a banxini a faxes xinla ma. N ma Ala, n xunba n yaxune yii. N natanga ne ma naxanye kelixi n xili ma! **2** N xunba fe jaxi rabane yii. N nakisi na muxu faxane ma! **3** A mato, e n legedenma n faxes feen na. Senbeman e malanma n xili ma. N mi i matandixi, n mi yulubi ligaxi, Alatala. **4** N sonna mi a ra, koni e yitonxi e xa n yenge. Keli, i fa n mali! Yandi n mato! **5** Alatala, Ala Senben Birin Kanna, Isirayilaa Ala, keli! I yi siya denkeleyatarene fe jaxine saran e ra. I nama dija yanfanten jaxine ma mume! Beti xuini te. **6** E fama jianbanna ra. E xaje alo barene taan xun xon. **7** I tuli mati e konbi ti xuine ra. E lenne

luxi nen e de alo silanfanne, e mon a falama, e naxa, “Nde nœ en ma falan mœ?” **8** Koni Alatala, i gelema e ma. I siya denkeleyatarene birin magelema. **9** Ala n senbena, n xaxili tixi i tan nan na. I tan nan n ma faran makantanxin na. **10** N ma hinantenna Ala, a tima n yœ ra nen. A a liga, n na n yœen nagodo n yaxune ma. **11** Koni, i nama e faxa, Marigina, nxu ye masansan wure lefana. Nanara, n ma muxune mi jinanjœ. E raxuya ayi i senbeni, i yi e nœ. **12** Bayo yulubi falane e de e xa suxu e yetena wasona fe ra! Bayo e dangane tima e wulene falama, **13** e jan i ya xolon! E jan fefe! Sese nama lu! Nayi, birin a kolonma nen fa fala Ala mangayaan nabama Yaxuba bœnsœnna xun na han bœxœn danna birin. Beti xuini te. **14** E fama jinbanna ra. E xajœ alo barene taan xun xœn. **15** Barene nœma donse fenni, xa e mi lugo, e wurundunma nen. **16** Koni n tan i senben matœxœma nen betini. Xœtœnni, n na n ma beti xuini tema nen i ya hinanna fe ra. Bayo, n ma faran makantanxin nan i tan na, n na n yigiyama denaxan yi tœrœ waxatine yi. **17** N senbena, n betin bama i xa nen. I tan Ala nan n ma faran makantanxin na n ma hinantenna Ala.

60 Dawudaa maxandi jaxumœna, beti baane kuntigin xa, a xa ba alo betin naxan xili: “Gabalan Fugaxina Sereyana.” A xa ba xaran feen na. Dawuda betini ito nan ba a to Arami kaane yenge naxanye keli Mesopotamiya yamanan nun Soba yamanani, Yowaba yi xete, a Edœn kaa wuli fu nun firin faxa Fœxœ Lanbanni. Ala, i bata i mœ nxu ra, i yi gbalon nakeli nxu ma. I bata xœlœ nxu ma. Koni iki, i mon xa nxu yitœn. **2** I bata bœxœn naxuruxurun, a yibœ. I mon xa a tugun a bode ra, a nama xuya ayi. **3** I bata waxatine raxœdœxœ i ya muxune ma. Nxu dagalanma ayi alo nxu minxin na a ra. **4** Koni naxanye gaxuxi i yœ ra, i bata taxamasenni te ne xa, naxan e ratangama xalimakunle ma. Beti xuini te. **5** I xa i xanuntenne kantan i yi e rakisi i senbeni. I yi nxœ maxandin yabi. **6** Ala bata falan ti a yire saripanxini, a naxa, “N nœœn tima nen, n Siken taani taxun, n yi Sukœti lanbanna danne sa. **7** N tan nan gbee Galadi bœxœn nun Manase ra. Efirami kaane findixi n ma yengesone nan na. Yuda luxi nen alo n ma mangaya dunganna. **8** Koni n ma konyin nan Moyaba yamanan na. N tan nan Edœn yamanan kannna ra. N yenge sœnxœni tema Filisiti yamanani.” **9** Ala, nde sigama n na na taa makantanxini? Nde tima n yœ ra siga Edœn yi? **10** Ala, i tan xa mi i mexi nxu ra

ba? I mi fa nxœ ganla fœxœ ra sœnœn ba? **11** Nxu mali yaxune yengœdeni! Sese mi adamana maliin na. **12** Koni Ala na lu en xœn, en nœœn sœtœma nen. A tan nan en yaxune halagima.

61 Dawudaa betina, beti baane kuntigin xa. A xa ba kondenne ra. Ala n ma mawuga xuiin mœ. I tuli mati n ma maxandi xuiin na. **2** N yigitegexin bata n xui ramini i ma wulani. N xali na geyaan fari naxan mate n xa. **3** Amasœtœ i tan nan n yigiyaden na, e nun yinna naxan n natangama n yaxune ma. **4** N waxi lu feni i konni waxatin birin yi. N xa luxunden sœtœ i gabutene bun ma. Beti xuini te. **5** Ala, i bata n de ti xuine mœ. I bata na kœœn so n yii i naxan namaraxi i ya yœeragaxu muxune xa. **6** Ala xa mangan siin xun masa, a xa bu han! **7** Ala xa mangan sabati a yetagi habadan! A ratanga i ya hinanna nun i ya lannayaan nin. **8** Nanara, n tantun betin bœ i xinli waxatin birin, n yi n de ti xuine rakamali lœxœ yo lœxœ.

62 Dawudaa betina, beti baane kuntigin xa Yedutun xa. N bœjœn saxi Ala nan baraka yi, a tan nan n nakisima. **2** A tan kedenna nan n kantan fanyen na, n nakisimana. N ma faran makantanxin nan a ra. Yaxune mi n nœ mume! **3** Han waxatin mundun yi, œ luye fuyœ muxune ma? œ tan e rabirama alo banxi xœnna hanma langa fonna? **4** E waxi muxune ragodo feni tun, keli a binyeni. E e yoron wuleni. E duban tima e deni, koni e dangan tima e bœjœni. Beti xuini te. **5** N bœjœ xunbenla sœtœma Ala nan xœn. A tan nan n yigin na. **6** A tan nan n kantan fanyen na, n nakisimana. N ma faran makantanxin nan a ra. Yaxune mi n nœ mume! **7** N ma kisin nun n ma binyena Ala nan yii. N kantan fanyen senbemaan nan Ala ra. N ma yigiyana a tan nan na. **8** Yamana, œ œ yigin sa a yi waxatin birin! œ yi œ kœntœfinle so Ala yii, amasœtœ en yigiyaden nan Ala ra. Beti xuini te. **9** Adamadiine ligaxi nen alo foyedina. A xungbeen nun a xurina, sese mi e ra. Hali e rate sikeela fari, e yelefu. E malanxin yelefu foyedin xa. **10** I nama i yigin sa gbalo feene yi. I nama i waso se mujaxini. Hali nafunla gbo i yii han, i nama i yigin sa a yi! **11** Ala luma a fale, fa fala a tan nan gbee fangan na. **12** I gbeen nan hinanna ra, n Marigina. Bayo i tan muxun kœntœnna fima nen alo a kewanla.

63 Dawudaa betina, a yi Yuda tonbon yireni waxatin naxan yi. Ala, n ni i fenma, n ma Ala nan i tan

na. I xonla n sɔndɔmɛn na. I xonla n fati benden ma alo min xonla n suxuma tonbonni ito yi kii naxan yi, bɔxɔ magenla, ige mi denaxan yi. 2 N xa i to i ya yire sarijanxini. N yi i senben nun binyeni gbɛ. 3 I ya hinanna fisa siimayaan xa. Nanara, n na i batuma. 4 N barikan birama i xa nen n ma siimayaan birin yi, n na n yiine yite i maxandideni. 5 N nii yifanma n ma nen, alo n na wasa donse hagigene ra. N yi i tantun sewa betine yi. 6 N nɛma saxi n ma saden ma, n na n mirima i ma. N xaxili luma i xɔn nen kɔɛɛn birin na. 7 Amasɔto i tan nan n mali muxun na, n sewa betin ba i nininna bun ma. 8 N bata kankan i ma, i yiin nan n natangama. 9 Naxanye katama n faxa feen na, ne faxama nen. 10 E faxama silanfanna ra nen yengeni, kankone yi e binbine don. 11 Nayi, Mangan sewama nen Ala yi. Naxanye e kɔlɔma Ala xinli, ne a matɔxɔma nen. Koni wuledene deene raxutuma nen.

64 Dawudaa betina, beti baane kuntigin xa. Ala, i tuli mati n ma mawuga xuiin na! N bata gaxu n yaxune yɛɛ ra. N niin natanga! 2 N luxun muxu jaxine ma naxanye e bode toma wundoni, e nun fe jaxi raba ganla. 3 E lenne xanxan alo silanfanna. Fala jaxine minima e de alo xalimakuli ralemunxina. 4 E e xanle tima sɔntaren na wundoni. E mafura bunna tiye, e mi gaxuma. 5 E e bode rawɛkilema kewali jaxin ma. E e bode toma, e lutine ratima denaxan yi. E naxa, “Nde nɔɛ e toɛ?” 6 E tinxintareyani tɔnma, e naxa, “En ma kɔtɛ yitɔnxin mi fule mumɛ!” Muxun kui feene kolon naxɔlɔ! 7 Koni Alaa xalimakunle wolima e ma nen, a e li keden na. 8 E gbee fala xuine xetema e ma nen, e yi halagi. Naxan yo na e to, ne e xunne yimaxama nen e mageledeni. 9 Nayi, gaxun adaman birin suxuma nen. E e xaxili lu Ala a wanla xɔn, e yi a fe rabaxine famu. 10 Tinxin muxune xa sewa Alatala yi, e yi a findi e luxunden na. Muxu sɔndɔmɛ fajin birin xa a matɔxɔ.

65 Dawudaa betina, beti baane kuntigin xa. Sigi sarijanxina. Ala, a lan yamaan yi i tantun Siyon yi, nxu mɔn yi nxu de ti xuine rakamali. 2 I tan naxan maxandi xuine ramɛma, muxun birin fama nen i fema. 3 Hakene to senben sɔto nxu xun ma i yi nxɔ matandine mafelu. 4 Sewan ne xa, i bata naxanye sugandi e xa lu i konni! Nxu bata lugo i ya banxin fe fajine ra, i Batu Banxi Sarijanxina. 5 I nxɔ maxandin yabima kabanakoon nan na tinxinni. Ala nxu rakisimana, bɔxɔn danna muxun birin yigina i tan nan na, e nun naxanye fɔxɔ igen kidi ma pon! 6 I

senben bata geyane da bayo fangamaan ni i ra. 7 I bata baan xuini ti, i yi a walanne raxara. I mɔn yi siyane masabari. 8 Dunuja birin gaxuma i ya kabanakone yɛɛ ra. Keli sogetedeni han sogegododeni, e birin betin bama i xa sewani. 9 I yengi dɔxi bɔxɔn xɔn i yi tule igen sa a ma, han a ramɔ. Alaa xuden nafexi igen na, alogo donseen xa sɔto. I tan nan na ragidixi. 10 I tule gbeen nafama xɛɛ bixine ma bɔxɔn yi xunbeli, a yogon igen na. I tan barakan sama xɛɛni, a sabati. 11 Xɛɛ xaba waxatini, i ya fanna warama ayi nen. I na dangu denaxan yi, menna yi sabati. 12 Fixene fanma e nun fiile. Geyane rayabuma nen han! 13 Xuruseene yiriwama nen fixene ma. Lanbanne yi rafe siseene ra. Na birin yi findi beti ba xunna ra e nun sewa sɔnxɔna.

66 Sigi sarijanxina. Tantun betina. Beti baane kuntigin xa. Dunuja muxun birin xa sɔnxɔ sewani Ala xa! 2 E a xinla binya betin ba! E tantun gbeen fi a ma! 3 E a fala Ala xa, “I ya kabanako wanle magaxu! I senben gbo han! Nanara, i yaxune gaxuxin felenxi i bun ma. 4 Muxun birin i batuma dunuja yi, e tantun betin ba i xa. E i xinla tantunma betini.” Beti xuini te. 5 E fa be! E a mato Ala bata naxan liga! A wanle magaxu adamadiine ye han! 6 A fɔxɔ igen findi nen yire yixaren na, en benbane yi gidi baan tagi e sanni. Nayi, en xa jaxan a tan yi. 7 A mangayaan nabama a senbeni habadan! A yɛɛn tixi siyane ra, nanara muxu yo nama murute. Beti xuini te. 8 Siyane, e barikan bira en ma Ala xa! E a tantun xuini te! 9 A bata siimayaan fi en ma, a mi tin en yi bira. 10 Ala i nxu rasarijanma sulun tɛɛni alo wure gbetina. 11 I a liga nen nxu yi suxu, i mɔn yi goron gbeen sa nxu xun ma. 12 I tin nen nxu yaxune yi ti nxu fari. Nxu yi dangu ige tilinxin nun tɛɛni. Koni, i fa nxu ra dahamu bɔxɔni. 13 N fama saraxa gan daxin na nen i ya banxini. N bata de xuiin naxan tongo i xa, n na rakamalima nen. 14 De ti xuini itoe falaxi nen n yi tɔrɔni waxatin naxan yi. 15 N sube turaxine bama saraxa gan daxin na nen, n yi kontonne ba, e tutin yi te kore. N turane nun kɔtɔne fan bama nen. Beti xuini te. 16 E fa be! E e tuli mati, e tan naxanye birin gaxu Ala yɛɛ ra. A bata naxan liga n xa, n na a falama e xa nen. 17 N bata a xili malina fe ra, n yi a batu n de xuiin na. 18 Xa haken yi ramaraxi n bojeni nun, Marigin mi yi a tuli matima n xuiin na nun. 19 Koni Ala yatin bata n namɛ, a a tuli mati n ma maxandi xuiin na. 20

N barikan birama Ala xa amasoto a mi a mexi n ma maxandi xuiin na. A mi a hinanna baxi n yii.

67 Tantun betina, beti baane kuntigin xa. A xa ba kondenne ra. Sigi sarijanxina. Ala xa kininkinin en ma, Ala xa en baraka. Ala nɔrɔn xa godo en ma. Beti xuini te. **2** Nanara, dunuɔa birin yi ya kiraan kolonɛ, siyane birin yi ya marakisin kolon. **3** Siyane xa i tantun Ala, siyane birin xa i tantun! **4** Muxune xa naxan, e betin ba sewani, amasoto i siyane makitima tinxinna nin. I tixi dunuɔa muxune birin yɛɛ ra. Beti xuini te. **5** Siyane xa i tantun Ala, siyane birin xa i tantun! **6** Nayi, bɔxɔn donse gbegbe fima. Ala, en ma Ala en barakama nɛn. **7** Ala en barakama nɛn, bɔxɔn danna muxun birin yi gaxu a yɛɛ ra.

68 Dawudaa betina, beti baane kuntigin xa. Sigi sarijanxina. Ala xa keli, a yi a yaxune raxuya ayi. Naxanye a rapaxuxi, ne yi e gi a bun. **2** E kedi, alo foyen sigama tutin na kii naxan yi. E xa ɲan Ala yetagi alo dolen na lo tɛɛni. **3** Koni tinxin muxune xa naxan, e sewa Ala yetagi. E xa gele ɲaxanni. **4** Betin ba Ala xa, a xinla xa tantun betini. Naxan fama kundani, ɛ na rasɛnɛ! A xili nɛn Alatala. En xa en sewa xuini te a yɛɛ ra! **5** Ala naxan a kon sarijanxini, kiridine fafe na a ra, kaja gilene xun mayengen na a ra. **6** Ala denbayaan fima denbayatarene ma, A kasorasane xɔrɔyama, e mini betin be. Koni murute muxune luma bɔxɔ yidunduxin nin. **7** Ala, i to ti i ya yamaan yɛɛ ra, i siga na tonbon yireni. Beti xuini te. **8** Bɔxɔn yi xuruxurun, koren yi rabi Ala yɛɛ ra, Sinayi Geyana Ala, Isirayilaa Ala. **9** Ala, i tule gbeen nafa nɛn, i ya bɔxɔn mɔn yi xɛtɛ a kiini. **10** I ya yamaan yi dɔxɔ na, I yi yiigelitɔne ki i ya nɛmana fe ra. **11** Marigin bata feni ito xibarun fi, ɲaxalan gali gbeen yi siga a ralideni, e naxa, **12** “Mangane nun sofane e gima! E e gima! Nxu tan ɲaxanle yi yenge yi se tongoxine yitaxun. **13** ɛ tan naxanye fan luxi xuruseene dɛxɔn, ɛ a mɛ, Ala a yamaan suturama nɛn alo ganba tofajina naxan gabuteye rafalaxi gbetin nun xɛma fajin na.” **14** Ala Senbe Kanna to na mangane raxuya ayi, e yolon alo balabalan kɛsena Geya Fɔren ma. **15** Basan yamanan geyane gbo! Yire matexi wuyaxi e ma. **16** Nanfera ɛ Alaa geya sugandixin matoma xɔxɔlɔnni, Ala yetɛɛn dɔxi denaxan yi? Alatala luma denaxan yi habadan! **17** Marigin bata fa a yire sarijanxini keli Sinayi Geyaan ma e nun a yenge so wontoro wuli wuli wuyaxi. **18** Marigina Alatala, i bata te kore, muxu suxine biraxi i

fɔxɔ ra. I yi kiseene rasuxu adamadiine ra, hali muxu murutɛxine, i yi dɔxɔ na yi. **19** Barikan xa bira Marigin xa lɔxɔ yo lɔxɔ, en ma goronna saxi naxan xun ma, Ala en nakisimana. Beti xuini te. **20** En ma Ala, Ala na a ra naxan muxune rakisima. En Marigina Alatala na a ra naxan en bama sayani. **21** Ala yatina a yaxune xunne yibɔma nɛn naxanye kankanxi e sɔnnɛ ma. **22** Marigin bata a fala, a naxa, “N fama nɛn ɛ yaxune ra keli Basan yi. N fama e ra nɛn sa keli fɔxɔ igen xɔnna ma **23** alogo ɛ xa ɛ sanne sin e wunli ɛ barene fan yi e wunla kɔn han e wasa.” **24** Ala, nxu bata i ya yamaan famatɔɔn to. I ya yamaan soma yire sarijanxini i tan n ma Ala nun n ma mangana. **25** Beti baane yɛɛn na, maxa se maxane xanbin na, sungutunne wɔsɔwɔsɔnnɛ maxama ne tagi. **26** Barikan bira Ala xa a malan gbeen. Isirayila bɔnsɔnna birin xa Alatala tantun. **27** Bunyamin bɔnsɔnna, dɔnxɛ ra barin tixi e yɛɛ ra. Yuda bɔnsɔnna mangane fan fama, e sɔnxɔma e nun Sabulon mangane nun Nafatali mangane. **28** Ala, i senben nagodo, i senben mayita, Ala, alo waxati danguxini. **29** I Batu Banxin Yerusalen taani, mangane fama kiseene ra i xa na yi. **30** I xa falan ti Misiran bɔxɔn xili ma naxan nun sube xajɛn maliga sexeni. Misiran luxi nɛn alo tura ganla siya gbetɛne biraxi naxan fɔxɔ ra alo ɲinge diine. E ragodo han e fa mudu gbetin na. Na siya yenge ralanne raxuya ayi! **31** Xɛrane kelima nɛn Misiran yamanani, Kusi kaane yi e yiine ti Ala xa a maxandideni. **32** Dunuɔa yamanane, ɛ betin ba Ala xa, ɛ Marigin tantun betini. Beti xuini te. **33** A masiga tima kore xɔnna ma xabu waxati xunkuye. A galan xuiin naminima fangani. **34** ɛ Ala senbena fe rali, a mangayaan nabama Isirayila xun na. A senben kore xɔnna ma. **35** Ala na mini a Yire Sarijanxini, a magaxu han! Isirayilaa Ala senben fima a yamaan ma nɛn e nun fangana. Barikan xa bira Ala xa!

69 Dawudaa betina, beti baane kuntigin xa. A xa ba alo betin naxan xili: “Fuge Fajine.” Ala, n nakisi! Igen bata te han n kɔɛɛn bun ma. **2** N bitinma boro tilinxini. San tide yo mi na yi. N tilinna xɔre ra. N na n maminma fufani. **3** N bata xadan xili tidɛni n mali feen na. N kɔɛ yinla nan fa n xɔlɔma. N yɛɛne bata xadan, e bata bu i yɛɛ ra kira yi. **4** Naxanye n ɲapaxuxi fuuni, ne wuya dangu n xunsexɛn na. A gbegbe wama n faxa feni, naxanye n yaxuyaxi fuu! N mi naxan muɲaxi n na raxetɛ ba? **5** N yi daxuyani kii naxan yi, i na kolon Ala, n sɔnna mi luxunxi i tan ma.

6 Marigina Alatala Senben Birin Kanna, n nama ne rayagi naxanye yigi saxi i yi. Isirayilaa Ala, n nama findi ne yarabi muxu ra, naxanye i batuma! 7 E n konbima i tan nan ma fe ra. N bata yagi han! 8 N bata liga alo xɔɲena ngaxakedenne xa, alo fa muxuna n xabilani. 9 I ya banxina fe xaminna n ma, han a n ganma alo tɛna. Nanara, e i konbin naxanye tima, ne n tan nan lima. 10 N na wuga, n yi sunna suxu, yamaan yi n konbi. 11 N na kasa dugin nagodo n ma sununi, yamaan yi sabaan so n na. 12 Naxanye batuma taan so deen na ne n nafeyama. Dolo minne sigin sama, e n magele. 13 Koni Alatala, n na i tan nan maxandima. I ya hinan gbeen waxatin ni i ra n xa. Ala, n yabi i ya marakisi barakaxini. 14 N xunba, n nama bitin boroni. N xunba n yaxune yii, n ba tilinni. 15 I nama tin fufaan yi sa n xun ma. I nama tin n yi n mamin tilinni, hanma n bitin gaburun na. 16 N ma Alatala, n yabi i ya hinanna nun i ya fanni. I firifiri n binni i ya kininkinin gbeen. 17 I nama i yetagin luxun i ya walikeen ma. N yabi iki sa! Bayo n tɔrɔxi. 18 Fa n fema i yi n nakisi. N xunba n yaxune yii. 19 I a kolon n konbima kii naxan yi, n nayagima, n nayarabima. I n yaxune birin toma. 20 Konbin bata n bɔɲen kala han n yigitege. N yengi yi kininkininna a fe ma nun koni se mi na. N yengi yi madendenna nan ma nun, koni n mi se to. 21 E dabarin sama n ma donsani. Min xɔnla to n suxu, e minse xɔlen so n yii. 22 Ala xa e ɲaxaɲaxane findi luti ratixin na e yɛɛ ra. Ala xa e herin findi e suxu xunna ra. 23 E yɛene xa rafɔrɔ ayi, e yi danxu! E fanne xa ba a ra waxatin birin! 24 I xa fitina e xili ma, i ya xɔlo gbeen yi e li. 25 E dɔxɔden xa kala. Muxe nama lu e bubune kui. 26 Bayo, i naxanye tɔrɔxi, e ne ɲaxankatama. I naxanye ɲaxankataxi, e ne fe falama sewani. 27 I xa e magi e hakene birin na. E nama i ya kisin soto mume! 28 Ala xa e xinle ba nii rakisin kitabun kui. E nama basan tinxin muxune xinle ra. 29 Koni n xɔleni, n mɔn yigitegexi. Ala, i ya marakisin xa n natanga! 30 N na Ala xinla matɔxoma betini nɛn. N yi a gboon nali, n barikan bira a xa. 31 Na Alatala kenenma nɛn dangu jinge baan na a xa, dangu tura kamalixin baan na saraxan na. 32 Yiigelitɔne a toma nɛn, e sewa. E tan naxanye Ala fenma, Ala xa siimayaan fi e ma. 33 Alatala tuli matixi tɔrɔ muxune ra. A mi ɲinanma muxu suxine xɔn a gbeen naxanye ra. 34 Koren nun bɔxɔn nun fɔxɔ igena e nun e yi seene, e birin xa Ala matɔxɔ. 35 Ala Siyon taan nakisima nɛn. A Yuda taane tima nɛn. A mɔn yi a

yamaan nadɔxɔ na yi, e mɔn yi findi a gbeen na. 36 Na findima a walikene mamandenne kɛɛn na nɛn. Naxanye Ala xanuxi, ne yi lu na yi.

70 Dawudaa betina, beti baane kuntigin xa. Maxandina. Ala, n nakisi! Alatala, fa n mali iki sa! 2 Ala xa ne yarabi naxanye n faxa feni tɔnma, e yifu. Ala xa ne raxete marafeyani n ma tɔrɔn nafanxi naxanye ma. 3 E yagixin xa xete naxanye a falama, e naxa, “Yo! I suxi!” 4 Naxanye birin i tan fenma, i xa ne birin nasɛwa. Naxanye waxi i ya kisi feen xɔn, ne xa lu a fale, “Ala gbol!” 5 Koni, yiigelitɔɔn nun tɔrɔ muxun nan n tan na. Ala, fa n fema mafuren! I tan nan n malimaan nun n natangamaan na. Alatala, i nama buye ayi.

71 Alatala, i tan nan n luxunden na. I nama tin n yi yagi! 2 N natanga i yi n xunba amasɔto i tinxin. I tuli mati n na i yi n nakisi! 3 Ala, findi n kantan fanyen na, n luxundena, n luma sige denaxan yi. Yamarin fi, i yi n nakisi. Amasɔto, n kantan fanyen nun n ma yinna nan i tan na. 4 N ma Ala, n natanga muxu ɲaxine senben ma, i n ba hake kanne nun gbalotɔne yii. 5 N Marigina Alatala, n yigin na i tan na. N bata n yigin sa i yi xabu n dii ɲɔreyani. 6 I n masuxi xabu n yi n nga kui waxatin naxan yi. I tan nan a liga n yi bari, nanara n ni i tantunma. 7 N findixi misaala nan na a wuyaxi xa, amasɔto n yigiya senbemaan nan i tan na. 8 N ni i tantunma nɛn ferijɛn gben! N yi i ya nɔrɔn matɔxɔ. 9 I nama i mɛ n na amasɔto iki, n bata fori. I nama n nabepin amasɔto n fangan bata ɲan. 10 N yaxune n mafalama. Naxanye waxi n faxa feni, ne e bode toma. 11 E naxa, “Ala bata a rabepin. En siga a fɔxɔ ra en yi a suxu. A xunba muxu mi na yi.” 12 Ala, i nama i makuya n na. N ma Ala, i mafura, i fa n mali! 13 Ala xa ne yarabi, e ɲan, naxanye n kansunma. Ala xa ne yagi, e xun nagodo naxanye waxi n maxɔlo feni. 14 N xaxili tixi i ra tun! N mɔn sigama i tantunɲe tun! 15 N ni i ya tinxinyaan matɔxoma nɛn ferijɛn gben! E nun i ya marakisina, hali n to mi e birin kolon. 16 Marigina Alatala, n fama i senben barakani, n ni i tan keden peen nan ma tinxinyaan matɔxoma. 17 Ala, xabu n xurun waxatin naxan yi, i n xaran nɛn. N mɔn i ya kabanakone matɔxoma tun! 18 Ala, iki, n bata fori, n xunsexen fan bata fuga. Koni i nama n nabepin fɔ n xa i senben nali iki muxune ma, n yi i ya fangana fe yɛba mayixete famatɔne birin xa. 19 Ala, i ya tinxinyaan bata kore li! I bata kabanako fe wuyaxi

liga. Nde ligaxi alo i tan? **20** Hali i to tɔrɔn nun xɔlɛ gbeen nafa n ma, i mɔn n niin naxetɛma n yi nen. Hali n sa gaburun tilinxini bɔxɔn bun, i n natema nen mɔn. **21** I n ma xunnayerenna ragboma ayi nen, i mɔn yi n madenden. **22** N na i tantunma nen kondenna ra i ya lannayana fe ra, n ma Ala. N tantun betin bama i xa nen bolonni, Isirayila Sarijantɔna. **23** N sɔnxɔma nen sewani n nema beti baani waxatin naxan yi amasɔtɔ i bata n xunba. **24** N ni i ya tinxinyaan matɔxɔma nen ferijɛn gben! Amasɔtɔ naxanye yi waxi n tɔrɔ feni, ne bata yagi, e yarabi.

72 Sulemani gbeena. Ala, mangan xaran i ya kitisa kenden na. I ya tinxinyaan yita n tan mangana diin na. **2** Nanara, a i ya yamaan makite tinxinni. A sariya kenden sa yiigelitɔne xa. **3** Ala xa bɔxɔn nasabati yamaan xa. Ala xa tinxinyaan sabati yamanani. **4** Mangan xa sariya kenden sa yiigelitɔne xa. A xa tɔrɔ muxune diine rakisi, a yi e yengefane rayensenjɛ ayi. **5** I ya mangayaan xa magaxu ayi han mamandenne mamandenne fanni sogen tema fanni kiken mɔn degema. **6** Mangan fanna xa liga alo tulena xɛene ma, a xa liga alo tule igen nɛen fɛ bɔxɔn ma. **7** Tinxin muxune xa sabati mangan waxatini. Ala xa heri gbeen fi fanni kiken degema. **8** A mangayaan gboma ayi nen sa folɔ sogeteden na han sa dɔxɔ sogegododen na. Folɔ Efirati baan ma han sa dɔxɔ bɔxɔn danna ra. **9** Naxanye wulani ne e xinbi sinma a bun ma nen. A yaxune e sama bɔxɔn ma nen a bun ma. **10** Tarasisi mangane fama kiseene ra nen a fema e nun fɔxɔ ige tagi bɔxɔne. Saba nun Seba mangane mudun fima a ma nen. **11** Mangan birin e xinbi sinma a bun ma nen. Siyane birin wanla kema a xa nen. **12** A tɔrɔ muxune xunbama nen naxanye na a xili, e nun yiigelitɔ rabɛjinxine. **13** A kininkininma senbetarene nun tɔrɔ muxune ma nen. A tɔrɔ muxune niin nakisi. **14** A e xɔrɔyama nen mayigbetenna nun gbalon ma, bayo a e yatɛxi. **15** Ala xa mangan bu! Ala xa xɛmaan fi a ma keli Saba yamanani. Yamaan xa Ala maxandi a xa waxatin birin! E xa duba a xa ferijɛn gben! **16** Ala xa donseen wara ayi bɔxɔni. Geyane xa rafe siseene ra. E xa bogi alo naxanye Liban yamanani. Taa kaane xa sabati alo sexena. **17** Ala xa mangan findi xili kanna ra habadan! A xinla xa bu alo sogena. Siyane birin duban sɔtɔma nen a barakani. E fan yi duba a xa. **18** Barikan xa bira Marigina Alatala xa, Isirayilaa Ala! A tan keden peen nan kabanako feene ligama. **19**

Barikan xa bira a xa habadan! Ala xa dunuɲa birin nafe a binyen na! Amina! Amina! **20** Yese a dii xɛmɛn Dawuda maxandine danna ni i ra.

73 Asafi a betina. Ala fan Isirayila ra han! A fan bɔjɛ sarijanxi kanne ra. **2** Koni fayida n bata yi tantan, n kiraan bejin. **3** Amasɔtɔ n yi wasodene maxɔxɔlonma nun n muxu jaxine sabatixin to waxatin naxan yi. **4** E mi kɔntɔfilixi sese ra mume! E fatine fan, e kende. **5** E mi sɔxɔlexi sese ra alo bonne. Adamadiine tɔrɔne mi e tan lima. **6** Nanara, wasona e yi alo jɛren muxune kɛ. Gbalona e yi alo domain muxune ma. **7** Turena e fatini han e yetagin bata yikusin. Fe jaxin nan e bɔjɛni han! **8** E gelen muxune ma, e fala jaxine ti. E muxune jaxankatama wasoni. **9** E fala jaxine tima Ala ma, e dɛ jaxu falane dunuɲa birin yi. **10** Nanara, yamaan biraxi e fɔxɔ ra, e falane xɔnla yi e suxu alo igen min daxina. **11** E naxa, “Ala nanse kolon? Kore Xɔnna Ala nɔɛ na kolonjɛ di?” **12** Muxu jaxine na kii nin. E bɔjɛn saxi waxatin birin, e lu nafunla sɔtɛ tun! **13** Nayi, n luxi tinxinyani nen fuu! N yi n yetɛ rasarijan fuyan! **14** N tɔrɔxi lɔxɔ yo lɔxɔ! I n haken saranma n na xɔtɔn yo xɔtɔn! **15** Xa n yi falan ti alo e tan, nayi, n yi i ya muxune yanfama nen nun. **16** Nanara, n yi kata feni ito famudeni, koni, a yi xɔdɔxɔ n ma. **17** Han n so Alaa yire sarijanxini waxatin naxan yi, n yi n miri e rapan kiin ma. **18** Ala, i e tima yire salaxunxin nin, e birama denaxan yi, e kala. **19** Nba, e halagima nen mafuren, gbalon yi e jan sasa! **20** E luxi nen alo xiyena naxan jinanma muxun na xɔtɔnni. Marigina, i na keli waxatin naxan yi, e tununma nen. **21** N bɔjɛn yi sɔxɔlexi waxatin naxan yi, n niin yi sunuxi, **22** n yi daxuyaana nun xaxilitareyani. N yi luxi i yɛɛ ra yi alo subena. **23** Koni hali na, n yi i fɔxɔ ra waxatin birin, i yi n yii rasuxu, **24** i ti n yɛɛ ra i ya maxadine xɔn, i yi n nasuxu binyen nin. **25** Nde n malima kore xɔnna ma, ba i tan na? Bayo i bata lu n xɔn, n fa waxi nanse gbete xɔn dunuɲa yi? **26** N fati benden nun n niin taganjɛ nen, koni Ala nan n niin senben na e nun n kɛena habadan! **27** Naxanye e makuyaxi i ra, ne yatin halagima nen. Naxanye e mexi i ra, i yi ne raxɔri. **28** Koni a rafan n tan ma, n yi n maso Ala ra. N bata Marigina Alatala findi n yigiyaana, alogo n xa i ya wali fajine birin nali!

74 Asafi a fala jaxumena. Ala, nanfera i mexi nxu ra habadan? Nanfera i xɔloma i ya yama kantanxin ma? **2** I xaxili lu i ya yamaan xɔn ma, i naxan xunba

xabu waxati xunkuye, bōnsōnna naxan findixi i gbeen na. I nama jinan i dōxōden Siyon Geyaan xōn. **3** I xun ti taa xōnni ito ra. Nxu yaxune bata kala gbeen ti yire sarijanxini. **4** Nxu yi naralanma i ra dēnaxan yi, I yaxune sewaxin bata sōnxōn nate menni. E yi e taxamasenne yite na yi. **5** E liga menni alo xēē segēne naxanye fōtōn wudine segēma e bunbine ra. **6** E na sawura wudi tofajine birin kala e bunbine nun e degēmane ra. **7** E tēēn so i ya Yire Sarijanxin na, a gan fefe. E yi i xinla batuden naharamu. **8** E yi a mirixi, e naxa, “En ne birin naxōrima nēn feul!” E yi Ala batudene birin gan yamanani. **9** Nxu mi fa kabanako taxamasenne toma. Nabi yo mi fa na sōnōn. Nxu mi a kolon na buma han waxatin mundun. **10** Ala, i yaxune i magelen danma waxatin mundun yi? E luma i xili kalē nēn ba, han habadan? **11** I tondixi nxu maliye nanfera? I yiini bandun, i yi e raxōri! **12** Ala, i tan nan nāxō mangan na xabu a fōlōni. I tan nan marakisi tiin na dunujā yi. **13** I tan nan fōxō igene yitaxun i senbeni. I mōn yi ige yi sube jaxine xunne yibō. **14** I tan nan ige yi sube magaxuxin xunne kala. I yi a so burunna subene yii donseen na. **15** I tan nan tigine nun xudene ramini. I tan nan baane yixara. **16** I tan nan gbee yanyin nun kōēēn na. I bata sogen nun kiken dōxō e yirene yi. **17** I tan nan dunujā danne rafalaxi. I soqe furen nun jēmēn da. **18** Koni Alatala, i xaxili lu ito xōn ma: i yaxune gelema i ma! Xaxilitarene i xili kalama! **19** I nama i ya yamaan nabepin alo ganbana sube xajēne yii! I nama jinan i ya muxune xōn mume, naxanye tōrōxi. **20** I xaxili lu i ya layirin xōn ma, bayo bōxōn yire yi fōrene rafexi gbalotōne ra. **21** I nama tin muxu jaxankataxine yi yarabi, alogo yiigelitōne nun tōrō muxune xa i xinla matōxō. **22** Ala, keli i yi i yete xun mayenge! I xaxili lu a xōn, a xaxilitarene i magelema ferijēn gben! **23** I nama jinan i yaxune sōnxō xuiin ma, i yengefane e xuini tema mume!

75 Asafi a betina, beti baane kuntigin xa, a xa ba alo betin naxan xili, “I Nama Halagin Ti.” Sigi sarijanxina. Ala, nxu bata i tantun. Nxu i tantunma han! Nxu i maxandima i xinli, nxu yi i ya kabanakone fe fala. **2** I naxa, “N bata kiti sa lōxōn sa. N kiti fajin sama nēn. **3** Bōxōn xuruxurunma waxatin naxan yi, a niimaseene birin yi xuruxurun, n tan nan a san bundōxōn xōdōxōma ayi ken! Beti xuini te. **4** N bata a fala wasodene xa, ‘E nama e yete yigbo!’ N bata a fala muxu jaxine xa, ‘E nama e kanba e senben xōn! **5**

E nama e kanba e senben xōn kore xōnna xili ma! E nama waso falane ti!” **6** Amasōto xun mayengen mi kelima sogeteden binna xan na hanma sogegododen binni hanma burunna ra. **7** Ala nan kitin sama. A yi nde yalagi, a yi nde yoo sa. **8** Amasōto igelengenna suxi Alatala yii, a rafexi a xōlēn na alo dōlō xōdēxena. A a xēlema nēn, muxu jaxine birin yi a min han a jnan. **9** Koni n na a fe falama nēn betine yi habadan! N yi tantun betin ba Yaxubaa Ala xa! **10** A muxu jaxine birin fangan kala, a tinxin muxune xunna keli.

76 Asafi a betina, beti baane kuntigin xa. A xa ba kondenne ra. Sigi sarijanxina. Yuda kaane Ala kolon. A xinla binyaxi Isirayila yi. **2** A konna Salemi taan nin, a dōxi Siyon Geyaan nin. **3** A a yaxune xalimakunle yigira mēnna nin, e nun yē masansan wure lefane nun e silanfanne nun e yenge so seene birin. Beti xuini te. **4** Ala, i tan nan senben birin kannā ra, i nōrōxi dangu habadan geyane ra. **5** Sofa wekilexine birin bata bira, e yii seene yi tongo yengeni. E fa saya xixōnla nin. Na sofa yo mi fa a yiini maxama. **6** Yaxubaa Ala, i na falan ti xōlōni, soone nun soo ragine yi bira, e faxa. **7** I tan nan magaxu, Ala. I na xōlō, nde nōē tiyē i yēē ra. **8** I to kitisa xuiin namini keli kore, yamanan muxune yi gaxu, e yi e dunderu, **9** i to keli kiti bolondeni alogo i xa yiigelitōne rakisi. Beti xuini te. **10** Hali muxune na xōlō i ma, na rajanma tantunna nan ma i tan xa. Naxanye na mini i ya xōlōn bun, ne xaxili sōtōma nēn. **11** I na i dē ti Alatala xa, i ya Ala, i xa a rakamali. Yamanan naxanye birin be rabilinni, e Alatala ki! A lan birin xa gaxu a yēē ra! **12** A tan kuntigi wasoxine ragodoma nēn, a yi dunujā mangane magaxu.

77 Asafi a betina, beti baane kuntigin xa, Yedutun xa. N bata n xuini te Ala ma. N bata n ma mawuga xuini te, a xa n xuini name. **2** N yi tōrōni waxatin naxan yi, n Marigin maxandi nēn. Kōēēn birin na, n yi n yiini te Ala ma, koni n mi madēndēn. **3** Alaa fe to rabira n ma, n kutun. N to n miri a ma, n xaxinla yi yifu. Beti xuini te. **4** N yi xi n yēē ra yi. N xaminxi, n mi fala tima. **5** Nayi, n yi n miri waxati danguxine ma e nun jēē xunkuyene. **6** Betine yi rabira n ma kōēēn na. N yi n miri n bōjēni, n maxōdinna ti n xaxinli iki: **7** “Marigina a mema nxu ra nēn ba, han habadan? Nxu mi fa a kēnenma ba? **8** Marigina hinanna bata jnan ba, han habadan? A tulisaan bata jnan ba, han habadan? **9** Ala bata jinan hinanna xōn ma ba? Ala

bata a kininkininna jnan a xoloni ba?" Beti xuini te. **10** N yi a fala, n naxa, "Naxan n tərōma, na ni ito ra: Kore Xōnna Ala mi fa a fangan yitama alo a fōlōni." **11** Alatala, n xa i ya kewanle rabira n yete ma. I ya kabanako fe fonne yi rabira n ma. **12** N xa n miri i ya wanle ma. N yi n xaxili lu i ya wali gbeene xon ma. **13** Ala, i ya kiraan sarijan. Batu se yo mi gbo alo Ala. **14** Ala nan i tan na naxan kabanako wanle kema. I bata i senben mayita siyane tagi. **15** I bata i ya yamaan xunba i senbeni, Yaxuba nun Yusufu bōnsōnne. Beti xuini te. **16** Ala, igene to i to, e yi xuruxurun. Tilinne yi xuruxurun. **17** Tulen yi godo keli kore. Galanna yi a xuiin namini kore. Kuyen yi a jinna masōxon yiren birin yi. **18** I ya kuye sarinna xuiin yi gbo ayi. I ya kuyena jin masōxonna yi dunuja birin yiyalan. Bōxon yi xuruxurun, a yi yimaxa. **19** I ya kiraan yi fōxo igeni. I gidi baa tilinxini, i san fōxone mi toe. **20** I yi Nabi Musa nun Haruna ti i ya yamaan yee ra alo xuruse rabaan tima yexee kurun yee ra kii naxan yi.

78 Asafi a fala paxumena. N ma muxune, e e tuli mati n ma xaranna ra, e yi n ma fala xuine rame. **2** N sandane nan sama. N wundo fonne nan yebama. **3** En bata feen naxanye me, en yi e to, en fafane feen naxanye falaxi en xa, **4** en mi ne luxunje en ma diine ma. En Alatala matoxo feene nun a senben nun a kabanako feene falama en mamanden famatone xa. **5** A bata tōnne so Yaxuba bōnsōnna yii. A mōn yi sariyan so Isirayila yii. A en fafane yamari, a e xa e diine xaran na ma, **6** alogo muxu famatone xa e kolon. Hali diin naxanye munma bari singen, ne fan yi a fala e diine xa. **7** Nayi, e fan e yigi sama Ala fari nen. E mi fa jinanma a wanle xon ma, e yi a yamarine suxu. **8** Nayi, e mi luma alo e benbane yi kii naxan yi nun. Tengbesendene nun murutedene nan yi ne ra nun naxanye mako mi yi Alaa fe yi, e mi yi tōgōndiyaxi Ala ma. **9** Xanla yi Efirami bōnsōnna muxun naxanye yii, ne e gi nen yengen lōxoni. **10** E Alaa layirin nabepin, e tondi a sariyan suxe. **11** E jinan nen Ala kewanle xon, a kabanako feen naxanye yitaxi e ra. **12** A kabanako feene liga nen e benbane yee xori Misiran yamanani, Soyan yi. **13** A yi fōxo igeni taxun a tagi a yi e ragidi. A yi a liga igene yi mate ayi e bode fari alo banxi kankena. **14** A ti e yee ra yanyin na kundani. A mōn yi ti e yee ra kōeen na tee degeni. **15** A fanyeni bō tonbonni, a yi tigin namini, e yi e min. **16** A yi xuden namini gemene yi, igen yi godo alo baana. **17** Koni

e lu yulubin lige a ra, e murute Kore Xōnna Ala ma tonbonni. **18** E yi a nata, a e xa Ala bunba, e yi e waxon donseen maxodin Ala ra. **19** E yi Ala mafala, e naxa, "Ala nōe donseen namine tonbonni ito yi ba?" **20** A to gemen bō, igen nan mini ayi yati, koni a nōe burun nun suben soe a muxune yii ba?" **21** Na ma, Alatala e xuiin mexina, a fitina. A yi xolo Isirayila ma, teen yi mini Yaxuba bōnsōnna xili ma. **22** Amasoto e mi yi laxi Ala ra, e mi yi e yigi saxi a marakisini. **23** Koni a yi kuyen yamari, a koren deene xa rabi, **24** a yi Manna donseen nagodo e ma, a ariyanna donseen so e yii. **25** Adamadiine yi malekane burun don. Ala yi donseen nasiga e ma han e lugo. **26** Ala yi foyen nafa keli sogetede binna ra. A mōn yi foyen namini yiifanna ma a senben na. **27** A yi xoline ragodo e ma naxanye yi wuya alo baan menjensinna. **28** E yi yolon e daaxaden tagi e bubune rabilinni. **29** Yamaan yi e dege han e lugo. E yi waxi naxan xon ma Ala na so nen e yii. **30** Koni benun e xa wasa, donseen mōn yi e de, **31** Ala yi xolo e ma, a yi e senbemanefaxa, Isirayila banxulanne. **32** Hali na birin to liga, e mōn lu nen yulubin lige! Hali a to kabanako feene liga e mi denkeleya. **33** Nayi, a yi e dunuja yi gidin lu fuuni, han e yi faxes kuisanni. **34** A to ndee faxes, a dōnxene yi tubi, e yi Ala fen sōbeen na. **35** A yi rabira e ma fa fala Ala nan e kantan fanyen na, a Kore Xōnna Ala nan yi e xunba muxun na. **36** Koni e falane mi yi fixaxi, e yi wulen nan falama a xa. **37** E mako mi yi Alaa fe yi, e mi yi tinxinxu Ala layirini. **38** Koni bayo a kininkin, a yi e hakene mafelu. A mi e halagi. A xolon lu dōxona ma wuyaxi, a mi fitina e xili ma. **39** A a kolon fa fala dāpōxon nan tun e ra, e siimayaan luxi nen alo foyedina naxan danguma a mi xete. **40** E murute Ala ma nen tonbonni sanja ma wuyaxi. A yi sunu e fe ra burunna ra sanja ma wuyaxi! **41** E yi Ala bunbama ye yo ye. E yi a liga Isirayilaa Ala Sarijanxin yi xolo. **42** E jinan nen a senbe gbeen xon, e nun a e xunba e yaxune yii lōxon naxan yi. **43** E jinan nen a taxamasenne xon Misiran yi, e nun a kabanako feen naxanye liga Soyan yi. **44** A yi e baane findi wunla ra. Ige yo mi yi na nun Misiran kaane yi naxan minje. **45** A tugetuge xolene rasiga e ma naxanye e don. Xunje ne fan yi e bōxon kala. **46** A e siseene so supene yii. A bogiseen birin so tuguminne yii. **47** A yi e wudi binle kala balabalan kesene ra. A yi e xode binle kala xunbenla ra. **48** A yi e jingene faxes balabalan kesene ra. Galanna yi e xuruseene faxes. **49** A fitinaxin yi a

xolo naxin nun a boje teen nun a marajaxun nagodo e ma. Halagi ti ganla nan yi ne ra. **50** A mi xete a xolon foxo ra, a mi tin e niine yi rakisi, a yi e faxa fitina furene ra. **51** A yi dii sarane faxa Misiran denbayaan birin yi. Xami a denbayane dii singene birin naxanye singe e fangan mayita. **52** A yi fa a yamaan na keli Misiran yi alo xuruse kuruna. A yi e kantan burunna ra. **53** A yi ti e yee ra, sese mi e soto, nanara e mi gaxu. Koni foxo igen yi a ragali e yaxune ma. **54** A yi fa e ra a boxo sarijanxini na geyaan ma a naxan soto a senben xon. **55** A siya gbetene kedi nen a yamaan yee ra, a yi e boxone yitaxun e ra. A yi Isirayila bonsonna rasabati e konne yi. **56** Koni e yi murute Kore Xonna Ala ma, e yi a bunba. E mi e xaxili lu a maxadi xuine xon, **57** e yi e masiga a ra, e yanfan ti alo e benbane. E mi fa tinxinxi alo xalimakuli yidoxina. **58** E Ala raxolon nen e suxure batudene ra. E yi Ala raxolon e ala sawurane xon. **59** Ala to na me, a yi xolo han! Nanara, a yi a me Isirayila ra feu! **60** A yi a banxin nabepin naxan Silo yi, a yi doxi adamadiine tagi denaxan yi nun. **61** A yi tin a senbe kankiraan yi suxu. A naron misaala yi so yaxune yii. **62** A yi tin a muxune yi faxa silanfanna ra, a yi a xolo gbeen nagodo a muxune ma. **63** Teen yi e banxulanne gan, han naxalan dii ti sigine yi dan na fe ra. **64** Saraxaraline yi faxa silanfanna ra. Koni yengen mi tin kaja gilene yi e wuga. **65** Donxen na, Marigin yi keli alo a yi xiin nen. A yengen so alo sofa senbemaan na manpaan min. **66** A mon yi a yaxune kedi. A yi e rayarabi habadan! **67** A yi a me Yusufu bonsonna ra. A mi Efirami bonsonna sugandi. **68** A Yuda bonsonna nan sugandi e nun a Siyon Geyaan naxan xanuxi. **69** A yi a Yire Sarijanxin ti menni alo kore xonna nun boxo xonna naxanye na habadan! **70** A yi a walikeen Dawuda sugandi. A yi a ba yexee kulan dexon. **71** A yi a tongo xuruse kantandeni, a yi a findi a yamaan kantanmaan na, Yaxuba bonsonna, a gbee muxune Isirayila. **72** Dawuda yi a joxo lu e xon ma jeniye fajini. A ti e yee ra ki fajini.

79 Asafi a betina. Ala, siya gbetene bata i ya boxon yenge, e so. E bata i Batu Banxi Sarijanxin naharamu. E bata Yerusalen findi taa xonna ra. **2** E bata i ya walikene binbine so xoline yii e yi e don. I ya muxu togondiyaxine binbine bata lu burunna subene bun. **3** E bata e wunla ramini Yerusalen birin yi alo igen boxonma. Muxu yo mi luxi naxan faxa muxune maluxunje. **4** Nxu rabilinna siyane fala naxin tima

nxu ma, e nxu makonbi, e nxu magele. **5** Alatala, i luma xoloxi nxu ma nen han waxatin mundun? I ya xolon luma nen alo teena han waxatin mundun yi? **6** I ya xolon nagodo siyane ma naxanye mi i batuma, e nun yamanan naxanye mi i xinla binyama. **7** Amasoto e bata Yaxuba bonsonna no, e a boxon kala. **8** I nama nxu toro nxu benbane hakene fe ra. I ya kininkininna xa nxu ralan iki sa! Amasoto nxu makona a ma han! **9** Ala, nxu rakisi muxuna, nxu mali i xinla binya feen na! Nxu xunba, i yi nxu mafelu nxu yulubine ra i xinla a fe ra. **10** Nanfera siyane maxodinna tima, e naxa, “E Ala minen?” A yita siyane ra nxu yee xori a i ya walikene faxa feen joxoma nen. **11** I tuli mati suxu muxune kutun xuiin na. Naxanye yalagin bun, ne ratanga i senbe gbeen na. **12** Na siyane konbin naxanye ti i ma Marigina, ne saranna fi na ra doxo solofere. **13** Nanara, nxu tan i ya yamana, i naxan kantanma alo i ya xuruse kuruna, nxu i tantunje na yi habadan, nxu i matoxo waxati famatone birin yi.

80 Asafi a betina beti baane kuntigin xa, sereyana, a xa ba alo betin naxan xili: “Fuge Fajine.” Isirayila kantan muxuna, i tuli mati nxu ra. I tan naxan tixi Yusufu bonsonna yee ra alo xuruse kuruna, i tan naxan doxi maleka gubugubu kanne tagi, i yete makenen naroni. **2** I senben yita Efirami nun Bunyamin nun Manase bonsonne ra. Keli, i fa nxu rakisi! **3** Ala, i mon xa nxu senbe so, i naron nagodo nxu ma, alogo nxu xa kisi. **4** Alatala, Ala Senben Birin Kanna, i luma xoloxi i ya yamaan ma han waxatin mundun i tondi a maxandin yabe? **5** I bata e balon findi saxonen na, i yi e igelengenne rafe yeegeen na. **6** I bata no boxon findi yenge so xunna ra nxu rabilinna siyane xa. Nxu yaxune nxu magelema. **7** Ala Senben Birin Kanna, i mon xa nxu senbe so, i naron nagodo nxu ma, alogo nxu xa kisi! **8** I fa nen wudi binla ra sa keli Misiran yamanani. I siyaan bonne kedi, i yi na wudi binla si e boxoni. **9** I yi yirena nde yiton a rasoliden na. A salenne yi godo pon! A yi yamanan nafe. **10** A nininna yi so geyane xun na. A yiine yi so suman wudi gbeene xun na. **11** A yiine yi sigama han foxo igen xun ma, e mon yi sigaxi han baan xun ma. **12** Nanfera i a langan kalaxi? I tin dangu muxune birin yi a bogine muja? **13** Segune yi keli fotonni, e a kala, burunna subene yi a don. **14** Senben Birin Kanna Ala, i mon xa fa. I yee ragodo nxu ma keli ariyanna yi, i yi nxu mato. I ya yamaan nakisi naxan findixi na wudi

binla ra! **15** I tan yeteen naxan sixi, i xa na ratanga! A luxi nen alo i tan yeteen diin naxan nagboxi. **16** E bata a sege, e a gan, i ya yamaan kalama i ya xolon bun ma. **17** I yengi lu mangan xon ma i tan yeteen naxan doxi, i tan yeteen diin naxan nagboxi. **18** Nxu mi fa nxu xun xanbi soma i yi sonon. Nxu rakisi nanara nxu i tantunje. **19** Alatala, Ala Senben Birin Kanna, i mon xa nxu senbe so, i noron nagodo nxu ma, alogo nxu xa kisi!

81 Asafi gbeena, beti baane kuntigin xa. A xa ba Gati kaane kondenna ra. Sonxo sewani en ma Ala xa, en senbena. E xuini te Yaxubaa Ala xa! **2** E beti baan folo, e tanbanne maxa, e nun bolonna nun kondenna. **3** Kike nenen na te, e nun kiken na koxo, e xotaan fe en ma sali loxone yi. **4** Sariyan nan ito ra Isirayila xa. Yaxubaa Alaa yamarin nan ito ra. **5** A a so Yusufu a denbayaan yii nen a Misiran yamanan yenge waxatin naxan yi. En yi xuina nde me en mi yi naxan kolon, **6** A naxa, "N bata goronne ba e xun ma. E bata goron binyen doxo. **7** E yi toroni waxatin naxan yi, e yi n xili n yi e xunba. N yi e yabi foye gbeeni. N yi e kejaan feselese Meriba igene yi." Beti xuini te. **8** "N ma yamana, e e tuli mati n ma maxadi xuine ra. Isirayila, xa e yi n xuiin name nun! **9** E nama Ala gbete batu! E nama e xinbi sin ala gbete yo xa! **10** Alatala nan n tan na, e Ala naxan faxi e ra sa keli Misiran yamanani. E e deene yibi, n xa e ralugo. **11** Koni n ma yamaan mi e tuli matixi n na. Isirayila mi tin n na. **12** Nayi, n yi e lu e tengbesenyani, e yi bira e waxon feene foxo ra. **13** Xa n ma yamaan yi n xuiin name nun, xa Isirayila yi bire n ma kirane foxo ra nun, **14** n yi e yaxune yarabima nen nun mafuren! N yi e yengefane halagima nen. **15** Naxanye Alatala rajaxuxi ne gaxuxine yi e felenma nen a bun ma. E toron mi yi janma habadan! **16** N yi e baloma nen malo fajin nun kumin na."

82 Asafi a betina. Ala doxi a manga gbedeni, a tan nan kitin sama senbeman tagi. A yi a fala, a naxa, **2** "E luma kitin se tinxintareyani han waxatin mundun, e yi lu muxu jaxine rafise bonne xa? Beti xuini te. **3** E xa senbetarene nun kiridine xun mayenge kitin sa, e yi tinxin yiigelitone nun muxu jaxankataxine xa. **4** E xa senbetarene nun toro muxune ratanga, e e xunba muxu jaxine yii." **5** "E mi fe kolon, e xaxili mi na, e sigan tima dimin nin, boxon bunne birin xuruxurunma. **6** N bata yi a fala, n naxa, 'Alane nan e

tan na. Kore Xonna Alaa diine nan e birin na.' **7** Koni e faxama nen alo adamadiin bonne, e bira alo kuntigin bonne." **8** Ala, keli, i fa dunuja makiti, bayo i tan nan gbee siyane birin na.

83 Sigi sarijanxina. Asafi a betina. Ala, i nama i dundu. Ala, falan ti, i nama i raxara! **2** A mato, i yaxune bata keli. Naxanye i rajaxuxi, ne bata murute. **3** E feene yitonma wundoni i ya yamaan xili ma. I naxanye ratangaxi, e sama e bode fari ne xili ma. **4** E naxa, "En sa e raxori, alogo Isirayila xinla xa tunun dunuja yi." **5** E bata lan a ma, e xa e malan i xili ma, **6** Edon kaane nun Sumayila bonsonna muxune nun Moyaba kaane nun Hagari kaane **7** nun Gebala kaane nun Amonine nun Amalekine nun Filisitine e nun Tire kaane. **8** Asiriya yamanan fan bata sa e fari, alogo e xa Loti bonsonna muxune mali. Beti xuini te. **9** A liga e ra alo i a liga Midiyan kaane ra kii naxan yi, alo i a liga Sisera nun Yabin na Kison xudeni kii naxan yi. **10** E faxa nen En-Dori yi, e yi kun boxon fari. **11** A liga e kuntigine ra alo i Orebi nun Sebi liga kii naxan yi. E mangane birin xa lu alo Sebaxa nun Salamuna, **12** naxanye yi a falama, e naxa, "Nxu xa Alaa boxone tongo nxu gbeen na." **13** Ala, e liga alo wuluwunla na sexe xarene tongo, alo foyen na se dagin xali, **14** alo teen fotonna ganma kii naxan yi, alo teen tema geyane ma kii naxan yi. **15** E kedi i ya tule gbeen na. E magaxu i ya foye gbeen na. **16** Alatala, e rayagi, han e yi i xinla fen. **17** E xa lu yagin nun kuisanni habadan. E xa yigitege, e raxori. **18** E xa a kolon fa fala i tan Alatala, i tan keden peen nan Kore Xonna Ala ra, naxan mangayaan ligama dunuja birin xun na.

84 Koraa diine tantun betina, beti baane kuntigin xa. A xa ba Gati kaane kondenna ra. Alatala Senben Birin Kanna, i luden nayabu n yi han! **2** Alatalaa banxin xonla n na han! N bonen nun n fati benden sewa betin bama Habadan Ala xinla nan ma fe ra. **3** Hali tuntunne bata e teene sa i ya banxini, debelenne fan bata na findi e konna ra, alogo e diine xa maso i ya saraxa ganden na Alatala Senben Birin Kanna, n ma mangan nun n ma Ala. **4** Sewan na kanne xa naxanye luma i ya banxini! E i matoxoma nen waxatin birin! Beti xuini te. **5** Sewan na kanne xa naxanye senben kelima i tan yi, naxanye xun tixi Ala Batu Banxin na. **6** E nema danguma Baka lanbanni, menna yi lu e xa alo tigi yirene. Tule singen na fa, darane yi fe. **7** E senben yi siga fari se, han e yi ti Ala

yetagi Siyon yi. **8** Alatala, Ala Senben Birin Kanna, n ma maxandi xuiin name. Yaxubaa Ala, i tuli mati n na. Beti xuini te. **9** Ala, nxo mangan mato, nxu ye masansan wure lefana. I ya muxu sugandixin nasuxu! **10** Soge kedenna i Batu Banxini, na dangu xii wuli keden na yire gbete yi. A fisa n xa lu tixi i ya banxin so deen na gbansan benun n xa sabati muxu jaxine konne yi. **11** Marigina Alatala luxi nen en xa alo en ma sogen nun en ye masansan wure lefana. Alatala nan hinanna nun binyen fima en ma. Naxanye sigati kii kamalixi, a herin fima nen ne ma. **12** Alatala Senben Birin Kanna, sewan na kanne xa naxanye e yigin sama i tan yi.

85 Koraa diine tantun betina, beti baane kuntigin xa. Alatala, i bata yi hinan i ya yamanan na. I bata yi Yaxuba bonsonna senbe so. **2** I bata yi i ya muxune hakene mafelu, i yi e yulubine xafari. Beti xuini te. **3** I bata yi i ya xolon jan, i yi xete i ya xolo gbeen foxo ra. **4** Ala, nxu rakisi muxuna, i mon xa nxu senbe so. I nama fa lu xole nxu ma. **5** I luma xoloxi nxu ma nen ba han habadan? I ya xolon luma nen han mayixete nun mayixete? **6** I mi fa nxu rakisima ba, alogo i ya yamaan mon xa sewa i ya fe ra? **7** Alatala, hinan nxu ra, i yi nxu rakisi. **8** N waxi n tuli mati feni Ala ra, Alatala. A boje xunbenla nan ma fe falama a yamaan xa, a muxu togondiyaxine, xa e mi fa xete e xaxilitareyaan ma sonon. **9** A fama a yeeragaxu muxune rakisideni iki sa! A binyen yi lu en ma yamanani. **10** Hinanna nun lannayana e bode xon ma. Tinxinyaan nun boje xunbenla yi rakafu. **11** Lannayaan sabatima nen boxoni, tinxinna yi godo keli kore. **12** Alatala herin fima nen en ma yati, en ma boxon sansine yi sabati. **13** Tinxinyaan tima nen Marigin yee ra, a kirani ton a xa.

86 Dawudaa Ala maxandina. Alatala, i tuli mati n na, i yi n yabi. Amasoto yiigelitoon nun toro muxun nan n na. **2** N niin natanga, amasoto n togondiyaxi i ma. I tan n ma Ala, i ya walikeen nakisi, naxan a yigi saxi i tan yi. **3** N Marigina, kininkinin n mal N ferijenma i tan nan maxande. **4** Marigina, i ya walikeen nasewa, amasoto n na n niin taxuxi i tan nan na. **5** Marigina, i tan fan! I dija! Naxan na i maxandi, i hinanma nen na ra han! **6** Alatala, i tuli mati n ma maxandi xuiin na, n ma mawuga xuiin name. **7** N nema toroni, n yi i maxandi, amasoto i yabin tima. **8** Marigina, ala yo mi luxi alo i tan. I ya wanle jaxon

mi na. **9** Marigina, i siyaan naxanye birin daxi, ne fama nen, e yi e xinbi sin i yetagi, e yi i xinla binya. **10** Amasoto i tan gbo, i kabanako feene rabama. I tan keden peen nan Ala ra. **11** Alatala, i ya kiraan yita n na alogo n xa sigan ti i ya jondini. Na fe keden peen sa n bojeni, alogo n xa i xinla binya. **12** Marigina, n ma Ala, n ni i tantunma nen n bojen ma feu! N yi i xinla binya habadan! **13** I bata hinan n na han! I yi n niin natanga sayaan ma. (Sheol h7585) **14** Ala, wasodene bata keli n xili ma, gbaloto ganla waxi n faxa feni, e miriya yo mi sigama i tan ma. **15** Koni Marigina, i tan nan Ala ra naxan kininkinin, i dija, i mi xolon xulen, i ya hinanna nun i ya lannayaan gbo. **16** I yee rafindi n ma, i yi hinan n na. Senben fi n ma, n tan i ya walikena. N nakisi, n tan i ya walike naxanla diina. **17** A yita n na, a i fan, alogo naxanye n napaxuxi, ne xa a to, e yagi. Amasoto i tan Alatala bata n mali, i yi n madenden.

87 Koraa diine tantun betina. Sigi sarijanxina. Ala bata a taan ti Geya Sarijanxin fari. **2** Siyon taan nafan Alatala ma Yaxuba bonsonna taane birin xa. **3** Muxune Alaa taan matoxoma han! Beti xuini te. **4** Ala naxa, "N Misiran kaane nun Babilon kaane sama nen n kolon muxune fari e nun Filisiti kaane nun Tire kaane nun Kusi kaane." N yi a fala, n naxa, "Itoe fan barixi Siyon taan nin." **5** E a falama nen Siyon taan ma fa fala siyani itoe fan barixi mena nin, Kore Xonna Ala yeteen yi a rasabati. **6** Alatala na siyane xinle sebe, a a falama nen ndee ma, a naxa, "Itoe fan barixi Siyon taan nin." Beti xuini te. **7** E bodonma nen, e betin ba. E naxa, "Nxu yigin birin i tan nin."

88 Sigi sarijanxina. Koraa diine tantun betina, beti baane kuntigin xa. A xa ba xulenna ra. Esira yixetena nde Heman ma fala jaxumena. Alatala, Ala naxan n nakisima, koen nun yanyin na, n gbelegbelema i tan nan na. **2** N ma maxandi xuiin xa i li. I tuli mati n ma mawuga xuiin na! **3** Toro wuyaxi bata n niini li, sayaan bata maso n na. (Sheol h7585) **4** E n yatema alo naxanye sigama gaburun na. N fangan birin bata jan. **5** E bata n nabepin faxa muxune ye, alo muxu faxaxine gaburun na, alo i bata jinan naxanye xon, i mi fa sese ligama naxanye xa. **6** I bata n woli ayi bilingan tilinxin na dimi gbeeni. **7** I ya xolon bata gbo ayi n ma, i n yigbetenma i senben na. Beti xuini te. **8** I bata n xoyine makuya n na, i bata n findi se jaxin na e yee ra yi. N balanxi, n mi noe mine. **9** N yeene bata wasa toron na, n ni i xilima loxo yo loxo,

Alatala, n na n yiine yibandunma i tan nan ma. 10 I kabanako feen lige faxa muxune xa ba? Faxe muxune kele ba, e yi i tantun? Beti xuini te. 11 Muxuna i ya hinanna fe fale gaburun kui ba? I ya lannayana fe fale halagi yireni ba? 12 I ya kabanako feene to'e dimini ba? Ninan tima binbine xon denaxan yi, i ya tinxinyaan kolonje menni ba? 13 Alatala, n bata i xili, n mali. N ni i maxandima xoton yo xoton. 14 Alatala, nanfera i i mexi n na? Nanfera i i yetagi luxunxi n ma? 15 Xabu n dii jorena, n yi toroni. N yi masoxi sayaan na. Gaxun bata n yili, n yigitege. 16 I ya xolo gbeen bata godo n ma. I n kuisan gbeen naxan ti, na bata n halagi. 17 Kuisanne n nabilinxi waxatin birin alo fufana, e bata n nabilin yiren birin yi. 18 I bata n lanfane nun n xoyine makuya n na. N fa dimin nan tun kolon.

89 Esira yixetena nde Etani a fala jaxumena. N betin bama nen waxatin birin Alatala hinanna fe ra, n yi i ya tinxinna fe fala mayixetene nun mayixetene xa. 2 N yi a fala a i ya hinanna luma nen habadan, a i ya tinxinyaan buma nen alo kore xonna. 3 I naxa, "N bata layirin xidi n ma muxu sugandixin xa, n bata n kolo n ma walikeen Dawuda xa, 4 n naxa, 'N ni i yixetene findima nen mangane ra waxatin birin, n yi e mangayaan lu han habadan.'" Beti xuini te. 5 Alatala, malekan naxanye ariyanna yi ne tantun betin bama i ya kabanakone fe ra, e nun i ya tinxinyana fe ra. 6 Alatala, i tan jaxon mi na kore xonna ma. Nde luxi alo Alatala, alane ye? 7 Ala magaxu maleka sarijanxine malanni, naxanye a rabilinxi, a makabe ne birin yee ra yi. 8 Alatala, Ala Senben Birin Kanna, nde luxi alo i tan? I senben nun i ya tinxinyana i rabilinxi. 9 I tan nan foxo igen senben natima, a walanne na te, i tan nan e ragodoma. 10 I tan nan Misiran halagixi, i tan nan i yaxune raxuya ayi i senben na. 11 I tan nan gbee kore xonna nun boxo xonna ra. I tan nan dunya daxi e nun a yi seene birin. 12 I tan nan komen foxo nun yiifari foxon daxi. Taboro nun Xerimon geyane sonxoma sewani i ya fe ra. 13 I senben gbo! I fangan magaxu han! 14 I ya mangayaan senbe soxi tinxinyaan nun sariya kenden nan na. Hinanna nun jondina i kewanle birin yi. 15 Sewan na kanne xa naxanye i batuma betini, e sigan ti kenenni i yetagi, Alatala. 16 E jaxanma nen i xinli waxatin birin, e i ya tinxinyaan binya. 17 I tan nan findixi e binyen nun e senben na, i yi nxu xunna keli i ya fanni. 18 Amasoto Alatala nan nxu xun mayengen na, nxo mangan nan Isirayilaa Ala

Sarijanxin na. 19 Loxona nde, i ya togondiya muxune fe toon ti nen alo xiye, i yi a fala e xa, i naxa, "N bata senben fi sofana nde ma, n bata banxulanna nde sugandi yamaan ye. 20 N bata Dawuda to, n ma walikena. N yi n ma ture sarijanxin susan a ma. 21 N ma fangan luma a yi nen, n yi a senbe so. 22 A yaxune mi a noe mume, tinxintaren mi a rayarabe mume. 23 N na a yengefane halagima nen a yee xori, naxanye a rapaxuma, n yi ne yenge. 24 N ma tinxinna nun n ma hinanna luma nen a xon, a senben soto n xinli. 25 N na a mangayaan nasigama nen han foxo igena, a yi noon ti baane xun na." 26 "A n xilima nen, a naxa, 'I tan nan n Fafe ra, n ma Ala, n kantan fanyen naxan n nakisima.' 27 N na a findima nen n ma dii singen na, naxan gbo mangane birin xa boxo xonna fari. 28 N hinan a ra habadan! N layirin naxan xidi nxu tagi, na mi kale mume! 29 N na a yixetena nde luma nen mangayani habadan! Fanni kuyen daxi, a mangayaan daxi." 30 "Xa a yixetene mi tin n ma sariyan suxe, xa e mi bira n ma sariyane foxo ra, 31 e yi n ma tonne kala, e tondi n ma yamarine suxe, 32 nayi, n na e murute feene saranma e ra nen dunganna ra, n yi e jaxankata e hakene fe ra. 33 Koni n ma hinanna luma nen Dawuda xon, n mi n ma tinxinyaan kalama. 34 N mi n ma layirin kale. N na a tuli saxi naxan na, n mi na maxete. 35 N bata n kolo n ma sarijanni n mi wulen falama Dawuda xa, 36 a yixetene luma nen habadan, a mangayaan buma nen n yetagi alo sogena. 37 A buma nen mangayani habadan alo kiken, naxan kore xonna ma taxamasenna ra waxatin birin." Beti xuini te. 38 Koni i bata i me a ra, i yi a masiga i ra! I bata xolo i ya manga sugandixin ma han! 39 I bata i ya layirin kala i naxan xidi e nun i ya walikeen tagi. I bata a mangaya taxamasenna rabira boxoni. 40 I bata a taan yinne birin nabira. I yi a yire makantanxine findi taa xonne ra. 41 Dangu muxune birin a mujama, a doko bodene bata a rapaxu. 42 I bata a yengefane senben gbo ayi. I yi a yaxune birin nasewa. 43 I bata a yenge so seene senben jan. I tondi a maliye yengeni. 44 I bata a noron ba a yii, i yi a mangaya gbeden nabira boxoni. 45 I bata a banxulanya waxatini kala a ma, i yi a rayagi han! Beti xuini te. 46 Alatala, i mon i luxunma nen nxu ma han waxatin mundun? I ya xolon luma gbo ayi alo teena han waxatin mundun? 47 A xa rabira i ma a n ma siimayaan mi fa xunkuya. I adamadiine birin daxi nen tun ba? 48 Nde luma a faxataren na, a yi a yete ratanga sayaan ma? Beti xuini te. (Sheol h7585)

49 Marigina, i ya hinanna minen, naxan yi na nun, i i kolo naxan na Dawuda xa i ya tinxinni? 50 Marigina, i miri i ya walikene yagin ma, e nun yamaan naxanye birin goron n xun ma. 51 Alatala, i yaxune bata nxu rayagi, e biraxi i ya muxu sugandixin fɔxɔ ra yiren birin. 52 Barikan xa bira Alatala xa habadan! Amina! Amina!

90 Nabi Musa, Alaa xerana maxandina. Marigina, i tan nan findixi nxu yigiyaden na, keli waxati danguxine ma han habadan. 2 Benun geyane xa da, benun bɔxɔ xɔnna nun dunɔɔra yetɛɛn xa da, xabu a foloni, han to, han habadan i tan nan Ala ra. 3 I tan nan muxune raxetema bendeni, i yi a fala, i naxa, “Adamadiine, ɛ xɛtɛ ɛ kelideni.” 4 Bayo jɛɛ wuli kedenna luxi nɛn i yɛɛ ra yi alo xii keden danguxina, alo kɛ kedenna. 5 I tan nan muxun niin bama, a dangu alo xɔtɔn ma xixonla, alo sexen naxan solima. 6 Xɔtɔnni, a jingi, a sabati, jinbanna na maso, a lisi a ra, a xara. 7 I ya xɔlɔna nxu yigitegema nɛn, a yi nxu jan. 8 I bata nxu hakene sa i yetagi. I bata nxɔ wundo yulubine birin sa kenɛnni. 9 Nxu siin janma nɛn i ya xɔlɔn bun ma. Nxu nxɔ siimayaan toon janjɛ alo kutunna. 10 Yanyina nde nxɔ siimayana, jɛɛ tonge solofere nan tun a ra. Xa a xunkuya ayi, jɛɛ tonge solomasɛɛ. Koni lanbaranna nun tɔrɔn nan ne birin na. A janma nɛn xulen, nxu faxa. 11 Nde nɔɛ i ya xɔlɔn senben kolonjɛ, a yi i binya lan i ya xɔlɔn yaten ma? 12 Nxu xaran nxɔ siimayaan tenge, alogo nxu xa sigan ti fe kolonni. 13 Alatala, i ya xɔlɔn janma waxatin mundun yi? Kininkinin nxu tan i ya konyine ma. 14 Nxu ralugo i ya hinanni xɔtɔn yo xɔtɔn. Nanara, nxu betin bɛ, nxu sewa nxu siin birin yi. 15 Nxu bata lu yagini waxati xunkuye. Awa, iki sewa jɛɛne fi nxu ma nxu naxan xasabi ligaxi tɔrɔni. 16 Nxu tan i ya konyine xa i ya wali gbeene to. Nxɔ diine xa i ya binye magaxuxin to. 17 Marigina nxɔ Ala, i ya fanna xa lu nxu xɔn. Nxɔ wanle rasɔnɔɔra nxu xa, yandi nxɔ wanle rasɔnɔɔra nxu xa.

91 Naxan na yigiya Kore Xɔnna Ala ma, na bata lu Ala Senbe Kanna makantanna bun. 2 N na a falama Alatala xa nɛn, n naxa, “N yigiyaden nun n kantan yinna nan i tan na. N ma Ala nan i tan na n yigin saxi naxan yi.” 3 A i ratangama nɛn luti ratixine birin ma, e nun faxa furene. 4 A i ratangama nɛn, i yi i luxun a yi, alo tɔxɛ ngana a gabutɛne soma a diine xun na kii naxan yi. A lannayaan yi findi i ye

masansan wure lefaan na. 5 I mi gaxun kɛɛn gbalon yɛɛ ra, hanma xalimakunla naxanye wolima yanyin na. 6 I mi gaxuɛ fitina furene yɛɛ ra naxanye i lima dimini, hanma fure jaxin naxanye faxan tima yanyin na. 7 Muxu wuli kedenna faxama nɛn i dɛxɔn ma, muxu wuli fu yi bira i rabilinni, koni fefe mi ligɛ i tan na. 8 I i yɛɛn tima nɛn tun, i yi muxu jaxine saranna to. 9 N bata n yigiya i tan ma Alatala. I na Kore Xɔnna Ala findi i luxunden na, 10 fe jaxi yo mi i liyɛ. Gbalo yo mi masoɛ i konna ra. 11 Ala yamarin fima nɛn a malekane ma i ya fe yi alogo e xa i kantan i ya sigatiin birin yi. 12 E yi i tongo alogo i nama i sanna din gɛmɛ yo ra. 13 I tima yatane nun sapine fari nɛn. I yi yata senbɛmane nun sɔɔi jaxine yibodon. 14 Ala naxa, “N na kanna rakisima nɛn bayo a n xanuxi. N na ratangama nɛn bayo a n kolon Ala ra. 15 A na n xili, n na a yabima nɛn. N luma a xɔn ma nɛn tɔrɔni. N na a xunbama nɛn, n yi binyen sa a ma. 16 N yi siimaya xunkuye fajin fi a ma, n yi a yita a ra a n tan nan a rakisima.”

92 Tantun betina. Sigi sarjannxina. A xa ba Matabu Lɔxɔni. A lan Alatala yi tantun. Kore Xɔnna Ala, a lan betin xa ba i xa, 2 i ya hinanna fe yi fala xɔtɔn yo xɔtɔn, i ya tinxinna fe yi fala kɛɛ yo kɛɛ, 3 betine yi ba i xa kondenna nun bɔlɔn xuiin na. 4 Alatala, i kewanle bata n nasɛwa. N sewa betin bama nɛn i ya wanle fe ra. 5 Alatala, i ya wanle gbo de! I miriyane tilin han! 6 Xaxilitaren mi ito kolon. Daxun mi ito famuma. 7 Fa fala, muxu jaxin kelima nɛn alo sexɛ jaxina, fe jaxi rabane birin sabatima nɛn, koni habadan halagin nan e yɛɛ ra. 8 Amasɔtɔ i tan Alatala nan feen birin xun na habadan. 9 I yaxune ni i ra, Alatala, i yaxune ni i ra, e halagima! Fe jaxi rabane birin xuyama ayi nɛn. 10 I bata n senben gbo ayi alo burunna jingena, i yi ture fajin susan n ma. 11 N na n yengefane yarabixin toma. N na n yaxune wuga xuiin mɛma. 12 Koni tinxin muxune sabatima nɛn alo tugu binla. E senben gboma ayi nɛn alo suman binle Liban yamanani 13 alo wudin naxanye sixi Alatalaa banxini. E sabatima nɛn en ma Alaa banxini. 14 E mɔn bogima hali e to bata kɔxɔ. E rafexi igen na, e xinde. 15 Na bata Alatalaa tinxinna yita. A tan nan n kantan fanyen na, fe jaxi yo mi a tan yi.

93 Alatala nan mangan na, a rabilinxi nɔrɔn nun fangan nan na. Nanara, bɔxɔn dɔxi ken, a mi yigisanma. 2 Ala, xabu a foloni, i ya mangayaan na. I

na yi habadan! **3** Alatala, baane e xuini tema, baane e xuini tema han! Baane bata walanje ayi. **4** Alatala senben gbo kore xonna ma! A gbo foxo igen mawonne xa. A dangu foxo igen xunfan gbeen na. **5** Alatala, i ya maxadi xuine luma nen habadan! Sarijanna lanxi i ya banxin nan ma, han habadan!

94 Ala naxan gbeenfoxo tiin na, Alatala, i tan Ala naxan gbeenfoxo tiin na, i xa i yete makenen. **2** Dunuja kitisana, keli, i yi wasodene saran e kewanle ra. **3** Alatala, muxu jaxine luma jaxanje han waxatin mundun yi? **4** Fe jaxi rabane e yete matoxoma kanba falane yi. **5** Alatala, e bata i ya muxune yigbeten. E bata i ya yamaan nayarabi. **6** E kaja gilene nun kiridine nun xajene faxama. **7** E yi a fala, e naxa, "Alatala mi nxu toma. Yaxubaa Ala mi a joxo luxi a xon." **8** E a liga e yeren ma e tan xaxilitarene, e tan daxune, e xaxili sotoma waxatin mundun? **9** Ala naxan en tunle rafalaxi, a tan mi fala xuiin mema ba? Ala naxan en yeene rafalaxi, a tan mi toon tiin ba? **10** A tan naxan siyane birin xuruma, a mi e fe saranma e ra ba, a tan naxan muxune xaranma fe kolonna ma? **11** Alatala muxune miriyane kolon, a sese mi ne ra. **12** Alatala, sewan na kanna xa i naxan xuruma, i naxan xaranma i ya sariyan xon. **13** I matabun fi a ma toro loxone yi, han yinli ge muxu jaxine yee ra. **14** Alatala mi a muxune rabeginma, a mi a mema a keen na. **15** Kitine mon sama nen tinxinni, sondome fani kanne birin tinma nen na ma. **16** Nde tiye n xon muxu jaxine xili ma? Nde kele, a ti n xon fe jaxi rabane xili ma? **17** Xa Alatala mi yi n mali nun, n niin yi bama nen mafuren! **18** N to yi a falama, n naxa, "N birama nen!" Alatala, i yi n mali i ya hinanni. **19** N na kuisan, i ya hinanna n niin lugoma nen sewan na. **20** I mako mi kitisa tinxintarene ma, naxanye muxune jaxankatama e tonne yi. **21** E e malanma tinxin muxune xili ma, e yi sontarene yalagi, e faxa. **22** Koni Alatala bata findi n ma faran makantanxin na. N ma Ala nan n kantan fanyen na n nan n luxunma naxan yi. **23** A e hakene saranma e ra nen. Alatala en ma Ala e raxorima nen e fe jaxine ma.

95 E fa, en xa fa sewa betin ba Alatala xa! En sonxo sewani Ala xa, en kantan fanyena, en nakisimana. **2** En fa a yetagi, en barikan bira a xa. En yi a tantun sewa betine yi. **3** Amasoto Alatala nan Ala gbeen na. A tan nan manga gbeena alane birin xun na. **4** A tan nan gbee boxon bunne nun geyane xuntagine ra. **5** A

tan nan gbee foxo igen na, bayo a tan nan a daxi. A tan nan boxo xonna rafalaxi. **6** E fa, en fa en xinbi sin, en yi Ala batu. En xa en xinbi sin Alatala bun naxan en daxi. **7** Amasoto a tan nan en ma Ala ra. En findixi a yamaan nan na alo a xuruse kurun naxan nabama. Xa e Ala fala xuiin me to, **8** e nama e bopeni xodoxo alo e benbane Meriba yi, alo e naxanye liga na waxatini Masa yi tonbonni. **9** E n matandi nen menni, e yi n mato, hali e to bata yi n kewanle to. **10** N xolo na waxati muxune ma jee tonge naanin, n yi a fala, n naxa, "Yamani ito bopen makuya n na, e mi biraxi n ma kiraan foxo ra." **11** Nayi, n yi n kolo n ma xoloni n naxa, "E mi soe n ma matabudeni mume!"

96 Beti nenen xa ba Alatala xa! Dunuja muxune birin xa betin ba Alatala xa. **2** Betin xa ba Alatala xa, a xinla yi tantun! E yi lu a raliye waxatin birin yi fa fala a bata en nakisi. **3** E a binyena fe fala siyane birin xa, e yi a kabanako feene rali muxune birin ma. **4** Alatala gbo, a lan a xa matoxo han! A lan a xa binya dangu alane birin na. **5** Siyane alane birin findixi ala fuune nan na, koni Alatala tan bata koren da. **6** A rabilinxi noron nun gboon nan na. A yire sarijanxin nafexi senben nun binyen nan na. **7** E tan dunuja siyane birin, e fa Alatala tantun, e yi a tantun a binyen nun a senbena fe ra. **8** E fa Alatala tantun a xili binyena fe ra. E fa kiseene ra a Batu Banxini. **9** E Alatala batu a noro sarijanxini. Dunuja muxune, e xuruxurun a yetagi. **10** E yi a fala siyane xa, a Alatala nan mangan na. Nanara, dunuja a kiini, a mi yigisanma. Ala siyane makitima tinxinna nin. **11** Kore xonna nun boxo xonna xa sewa han! Foxo igen xa a xuini te e nun seen naxanye a xore ra. **12** Burunna xa sewa e nun a yi seene birin. Fotonna wudine birin xa sonxo sewani, **13** e sonxo Alatala yetagi, amasoto a fama nen. A fama nen a kitin sa dunuja yi. A dunuja muxune makitima nen tinxinni, a siyane kiti a jondini.

97 Alatala nan mangan na! Dunuja xa jaxan! E sewa e tan foxo ige tagi boxone! **2** A rabilinxi kundaan nun dimin nan na. A mangayaan senbe soxi tinxinyaan nun sariya kenden nan na. **3** Teena a yee ra, naxan a yaxune ganma a rabilinni. **4** A kuyen na a jinna masoxon, dunuja birin yi yalan. Boxon yi a to a xuruxurun. **5** Geyane xuyama ayi Alatala yetagi, dunuja birin Marigina, alo kumi dolen na xulun. **6** Koren xonna a tinxinyaan nalima nen, siyane

birin yi a binyen to. 7 Suxure batune yagima nen, naxanye suxurene matoxoma. Alane birin e xinbi sinma nen a bun. 8 Siyon kaane a mema nen e sewa. Yuda taane yi naxan i ya kiti saxine fe ra, Alatala. 9 Alatala, i tan nan Kore Xonna Ala ra dunuja birin xun na. I tan gbo dangu alane birin na. 10 Alatala rafan naxanye ma, fe naxin xa rapaxu ne ma. A togondiya muxune kantanma nen, a yi e xunba muxu naxine yii. 11 Kenenna minima nen tinxin muxune xa, muxu sondome fajine sewama nen. 12 E tan naxanye birin tinxin, e sewa Alatala a fe ra, e a xili sarijanxin tantun.

98 Tantun betina. E beti nenen ba Alatala xa. A bata kabanako feene liga! A en nakisima a senben nun a sarijanna nan xon. 2 Alatala bata a marakisin nun tinxinna yita siyane ra. 3 A mi jinanxi a hinanna nun a tinxinna xon Isirayila yamaan xa. Baxon danne birin bata a to a en ma Ala bata en nakisi. 4 Dunuja muxune birin xa sonxo sewani Alatala xa. E sewaxin yi sonxo han, e yi a tantun betini! 5 E tantun betine ba Alatala xa bolonna ra! E bolonna nun tantun beti xuini te! 6 E xotane nun fenne fe. E sonxo sewani mangan xa, Alatala. 7 Foxo igen xa a xuini te e nun seen naxanye birin a xore ra. Dunuja muxune birin xa e xuini te. 8 Baane xa e xuini te alo yii bonbo xuina! Geyane xa sonxo sewani e bode xon! 9 E sewa Alatala yetagi, amasoto a fama nen. A fama nen, a kitine sa dunuja yi. A dunuja muxune makitima nen tinxinni, a siyane kiti a jondini.

99 Alatala nan mangan na. Siyane xuruxurunma. A mangaya gbeden maleka gubugubu kanne tagi. Baxon xuruxurunma. 2 Alatala gbo Siyon yi! A tan nan siyane birin xun na. 3 Birin xa i xinla tantun naxan gbo, a magaxu. Ala sarijan han! 4 Mangan Ala senben gbo! Sariya kenden nafa a ma. I tan nan tinxinyaan daxi. I tan nan sariya kenden nun tinxinna saxi Yaxuba bonsonni. 5 E Alatala batu, en ma Ala. E yi e xinbi sin a manga gbeden san bun. A sarijan! 6 Nabi Musa nun Haruna yi a saraxaraline ye. Samuyeli yi a maxandi muxune ye. E yi Alatala maxandima, a yi e yabi. 7 A yi falan tima e xa nen keli kundani. E yi na maxadi xuine nun tonne suxuma, a yi naxanye soma e yii. 8 Alatala nxo Ala, i tan yeteen nan yi e yabima, i findi Ala dipaxin nan na e xa, koni i e fe naxine saran e ra nen. 9 E Alatala en ma Ala batu, e xinbi sin a geya sarijanxin bun. Amasoto Alatala en ma Ala sarijan.

100 Tantun betina, barika birana. Dunuja muxune birin xa sonxo sewani Alatala xa. 2 E Alatala batu sewani. E fa a yetagi, e sewa betine ba a xa! 3 E a kolon a Alatala nan Ala ra. A tan nan en daxi. A tan nan gbee en na. A yamaan nan en tan na, alo a xuruseen naxanye rabama. 4 E nema soma a Batu Banxini, e barikan bira a xa! E a tantun a tanden ma! E a tantun, e barikan bira a xa. 5 Amasoto Alatala fan, a hinanna luma nen habadan! A tinxinyaan luma nen habadan han habadan!

101 Dawudaa betina. N betini ito bama i ya hinanna nun i ya sariya kenden nan ma fe ra. Alatala, n tantun betin bama i tan nan xa. 2 N katama nen n xa lu kira kamalixin xon. I fama n fema waxatin mundun yi? N sigan ti tinxinni n ma banxini. 3 N mi tinje fe naxin ma mume! N denkeleyatarene kewanle rapaxuma nen. N xu mi sese malanje. 4 N mi finde tinxintaren na. N mi fe naxi yo rabe. 5 Naxanye muxune mafalan wundoni, n ne deen suxuma nen. Naxanye muxune matoma a naxin na wasoni, n mi dije ne ma mume! 6 N na n yeen tima nen muxu togondiyaxine ra yamanani, alogo e xa lu n fema. Naxan na sigan ti tinxinni, na luma nen n ma wanla ra. 7 Yanfanten yo mi luye n konni. Wule fala yo mi luye n yetagi. 8 Xoton yo xoton n muxu naxine bama nen yamanani, n fe naxi rabane birin kedima nen Alatalaa taani.

102 Taro muxuna Ala maxandina saxoneni, a a mawuga Alatala xa. Alatala, i tuli mati n ma maxandin na. I n ma mawuga xuiin name! 2 I nama i yetagin luxun n ma n nema toroni waxatin naxan yi! I tuli mati n na. N na i xili, n yabi mafuren! 3 Amasoto, n siin janmatoon ni i ra alo tutina. N fatin ganma alo tee wolonna. 4 N bonen xaraxi alo sexena. Donse xoli mi fa n na sonon. 5 Kutunna bata n doyen. 6 N bata liga alo toxorona tonbonni, alo kutunxunban taa xonni. 7 N mi xima. N bata lu yee radunduni alo xoliin banxin fari. 8 N yaxune n konbima feripen gben, e fala xolen ti n ma, e n xinla findi danga ti seen na. 9 N xube fujin nan donma. N yeegeen bata basan n min igen na. 10 Amasoto i ya xolona fe ra, i bata n tongo i yi n woli ayi. 11 N siin janmatoon ni i ra alo nininna jinbanna ra. N bata liga alo sexe xarena. 12 Koni Alatala, i tan nan mangan na habadan! Mayixetene nun mayixetene i ya fe falama nen. 13 I kelima nen i kininkinin Siyon taan ma. I dija waxatin

bata a li a ma. Waxati saxi yeteen ni ito ra. **14** Hali taani ito gemene rafan nxu tan i ya walikene ma. A gbangbanna yeteen kininkininna nxu ma. **15** Siyane birin gaxuma Alatala yee ra nen. Dunuja mangane birin yi gaxu i ya binyen yee ra. **16** Alatala mon na Siyon ti waxatin naxan yi, a yi a yete makenen a binyeni. **17** A a yee ra findi muxu ramexine ma, a yi a tuli mati e maxandi xuiin na. **18** Na xa sebe mayixete famatone xa, alogo yama famatoon xa Alatala matoox. **19** Alatala bata a yee ragodo keli a yire sarjannaxini kore xonna ma. A bata a yee ragodo dunuja ma keli ariyanna yi. **20** Muxun naxanye kasoon na a bata ne kutun xuine me. A bata na muxu yalagixine xoroya, **21** alogo e xa Alatala xinla fala Siyon yi, e yi a tantun Yerusalen taani, **22** siyane nun yamanane birin na e malan waxatin naxan yi Alatala batudeni. **23** Marigin bata n senben jan n ma siimayani, a yi n siin jan. **24** N yi a fala, n naxa, "N ma Ala, i nama n faxes. N munma fori. I tan luma nen habadan! **25** I boxo xonna da nen, xabu a foloni. I yii foxon nan kore xonna ra. **26** Ne birin danguma nen, koni i tan luma nen na. Ne birin forima nen, e kala alo dugina, i yi e masara. **27** Koni i tan luma nen i kiini waxatin birin. I ya siimayaan mi janyje mume! **28** Nxu tan i ya walikene diine luma nen i fema, e yixetene fan yi sabati i yetagi."

103 Dawuda gbeena. N xa Alatala tantun n niin birin na! N xa a xili sarjannaxin tantun n bojan ma feu! **2** N xa Alatala tantun n niin birin na! N nama jinan a wali faji yo xon. **3** A tan nan n mafeluma n haken birin na. A tan nan n nakendeyama furen birin ma. **4** A tan nan n natangama sayaan ma, a yi n nakamali hinanna nun kininkininni. **5** A tan nan siimaya fajin fima n ma, alogo n mon xa fangan soto alo singbinna. **6** Alatala tinxin, a tan nan kiti kenden sama muxu njaxankataxine xa. **7** A bata a feene yita Nabi Musa ra, a yi a kewanle yita Isirayila yamaan na. **8** Alatala kininkinin, a dija. A mi xolon xulen. A hinanna gbo. **9** A xoloxin mi en mafale yeye! A mi luye xoloxi han habadan! **10** A mi en suxuma en yulubine ra. A mi en saranma en hakene ra. **11** A hinanna gbo a yeeragaxu muxune yee ra yi, alo kore xonna makuya boxo xonna ra kii naxan yi. **12** A bata en yulubine ba en ma, a yi e makuya en na alo sogeteden nun sogegododen tagi kuya kii naxan yi. **13** Alatala kininkininma a yeeragaxu muxune ma nen alo fapan kininkininma a diine ma kii naxan yi. **14** A en da kiin

kolon, a kolon fa fala en kelixi benden nin. **15** Muxuna siimayaan luxi nen alo sexena, a sabatima nen alo sexe fugena, **16** koni foye wolonna na sa a ma a xara ayi, a yi jan hali a funfuna, a mi luma na. **17** Koni Alatalaa hinanna luma nen a yeeragaxu muxune xa habadan han habadan. A tinxinna yi lu e diine diine xa, **18** xa e a layirin suxu, e yi e miri a fe ragidixine ma alogo e xa e rakamali. **19** Alatala bata a mangaya gbeden nafala kore xonna ma. A tan nan mangayani seene birin xunna. **20** E Alatala tantun, e tan malekane. E tan naxanye senbe kanne ra, naxanye a falane ligama, naxanye a fala xuine suxuma. **21** E Alatala tantun, e tan a ganle kore xonna ma, e tan, a walikeen naxanye a sagoon ligama. **22** E Alatala tantun, e tan a dali seene birin, e na lu dede a mangayaan bun. N xa Alatala tantun n niin birin na!

104 N xa Alatala tantun n niin birin na! Alatala n ma Ala, i tan gbo de! I tan maraberi baxi noron nun gboon nan na. **2** A bata a yete rabilin kenenna ra alo doma gbeena. A yi kore xonna yifulun alo senkena. **3** A bata a banxin ti igene fari kore xonna ma, a yi kundane findi a masiga ti wontoron na, a sigan tiin foyen nin. **4** A foyen findi a xeraan na, a teen findi a walikeen na. **5** A boxon beten sa ki faji. A mi yigisanje mume. **6** I bata tilinna radin boxon ma alo domana, igene yi te han geyane xuntagi. **7** Koni e yi e gi i ya xolon bun, e yi e gi i ya galanna xuiin ma. **8** E yi godo lanbanne yi keli geyane ma, han i yiren naxan yitonxi e xa. **9** I yi naninna sa e mi dangue naxan na mume, alogo e nama fa sa boxon xun ma. **10** I tigi igene ragima xude wunle xon dangu geya longonne ra. **11** Burunna subene birin fa e minma mena nin, burunna sofanle fan yi fa min xonla ba na yi. **12** Xoline e teene sama xude deen nin, e yi sonxoe wudine koe ra. **13** A yi tulen nafa geyane fari keli kore, i kewanle yi boxoni li. **14** A yi sexen namini xuruseene xa, e nun sansine muxune xa, alogo e xa balon soto boxoni, **15** e nun manpaan naxan e rasewama, e nun turen naxanye e fatin nayabuma ayi, e nun donseen naxanye e senbe soma. **16** Hali Alatalaa wudi binle fan igen sotoma e makoon naxan ma, Liban yamanan suman wudine Ala naxanye sixi. **17** Xolidine e teene sama mena nin. Xoli xungbene fan yi e teene sa na fofa binle yi. **18** Xenle fan luma geya matexine fari, fanye ra siine yi e luxun geme yinle ra. **19** I bata kiken da waxatine yate feen na.

Sogena a godo waxatin kolon. 20 I dimin da alogo kœen xa so, burunna subene birin e masiga tima waxatin naxan yi. 21 Yata senbemanen wurundunma e balon fendeni e e balon maxodinma Ala ma. 22 Sogen na te waxatin naxan yi, e mon yi xete, e sa e sa e yinle ra. 23 Nayi, muxune yi mini, e siga e wanle ra han jinbanna ra. 24 Alatala, i kewanle gbo, I ne birin dafi fe kolonna nin. Bœon nafexi i ya dali seene nan na. 25 Fœo igen mato, a gbo. Niimaseen sifan birin a yi, a xurin nun a xungbena, naxanye mi nœ yate konin. 26 Kunkine sigama a tan nan xun ma. E nun ige yi sube magaxuxine i naxan dafi alogo e xa sabaan so a yi. 27 E birin yengi i tan nan ma donse feen na, e makoon na bira a ma waxatin naxan yi. 28 I donseen soma e yii nen, e yi a don. I donseen so e yii han e yi wasa. 29 I na i xun xanbi so, e yigitege. I na e niin ba, e yi faxes. E xete bendeni e kelixi denaxan yi. 30 Koni i na niin bira e yi waxatin naxan yi, e da, seen birin yi findi a nenen na bœon fari. 31 Alatalaa binyen xa lu habadan! Alatala xa sewa a kewanle fe ra! 32 Ala na bœon mato, a xuruxurun. A na a yiin din geyane ra, e tutin yi mini. 33 Fanni n nan n nii ra, n betin bama nen Alatala xa. N tantun betin bama n ma Ala xa nen n siin birin yi. 34 N ma betin xa a kenan. Amasœto n ma sewan kelima Alatala nin. 35 Ala xa yulubi kanne jan bœoni. Ala xa muxu jaxine ratunu. N xa Alatala tantun n niin birin na! Tantunna Ala xa!

105 E Alatala tantun. E yi a maxandi. A bata naxan liga, e na fala siyane xa. 2 E betin ba a xa, e yi a tantun betine yi, e yi a kabanako feene birin fala. 3 E e kanba a xili sarignanxini. Naxanye birin Alatala fenma, ne xa sewa. 4 E e yœe rafindi Alatala nun a senben ma, e lu a fenje waxatin birin. 5 A wali fajin naxanye ligaxi e nun a kabanako feene nun a kitin naxanye saxi, ne fe xa rabira e ma, 6 e tan Ibrahima bœsonna, a walikene, e tan Yaxubaa diene, Ala naxanye sugandixi. 7 A tan nan Alatala ra, en ma Ala. A tan nan bœon birin kitisaan na. 8 A jœo luma a layirin œon ma nen han habadan, e nun a falane fe han mayixete wuli keden, 9 e nun a layirin naxan xidi e nun Ibrahima tagi, a yi a kolo Isiyaga xa. 10 A mon yi a ragidi Yaxuba ma sariyan œon, a findi habadan layirin na Isirayila kaane xa. 11 A naxa, “N Kanan yamanan soma nen e nun i yixetene yii e keen na.” 12 E mi yi wuya nun. Xœne dando nan tun yi e ra na yamanani. 13 E yi kelima nen siyana nde ye e siga nde

gbete ye, e keli yamananan nde yi e siga nde gbete yi. 14 Koni a mi tinje muxu yo xa e jaxankata. A mangane rakolon nen e fe yi, a naxa, 15 “E nama fefe liga n ma muxu sugandixine ra. E nama fefe jaxi liga n ma nabine ra.” 16 Ala yi fitina kamen naso e yamanani, a yi e donseen birin jan. 17 Koni Ala yi xœmena nde rasiga a yamaan yœe ra. Yusufu nan yi na ra naxan mati konyiyani. 18 E yi yolonœonna sa a sanne ma, e wuren bira a kœ. 19 Han na waliyiya falane yi kamali a naxanye ti. Alatalaa falan yi a yita a a jœndi. 20 Nanara, mangan yi a bejin, naxan yi siyane xun na, na yi a xœœa. 21 A yi Yusufu lu a yamanan xun na. A yi lu mangan yii seene birin xun na, 22 alogo a xa a kuntigine matinxin a waxœna ra, a yi na fonne xaran fe kolonna ma. 23 Nayi, Isirayila yi fa Misiran yi, Yaxuba yi dœo Xami bœsonna yamanani. 24 Ala yi dii wuyaxi fi a muxune ma. E senben yi gbo ayi dangu e yaxune ra. 25 A yi Misiran muxune bœnen masara, Isirayila yamaan yi rajaxu e ma. E yi a walikene jaxankata feni œon. 26 A yi a walikœen Musa rasiga e ma e nun Haruna, a naxan sugandixi. 27 E yi Alaa taxamaseri magaxuxine liga e ye, e a kabanako fe wanle ke Xami bœsonna yamanani. 28 Ala yi dimin naso na yamanani. E mi yi nœ na yamarin matande. 29 A yi e igene findi wunla ra, e yexene birin yi faxes. 30 E yamanan birin yi findi xunœene ra. Mangana banxin birin yi rafe xunœene ra. 31 Ala yi xenne nun sosone yamari, e yi mini yamanan birin yi. 32 A yi balabalan kesene ragodo e ma, Galanna yi godo a yamanan birin yi. 33 Ala yi e manpa binle kala a yi yamanan wudine birin magira. 34 A yi tuguminne fan yamari, e yi fa, sunen naxanye mi yi nœ yate. 35 E yi yamanan se jingine birin don. E yi e donseen birin don. 36 Ala yi e dii singene birin faxes yamanani, naxanye findixi e yixete senben na. 37 A yi Isirayila yamaan namini Misiran yamanani, e gbetin nun xœmaan xali, muxu yo mi bira e bœsonne ye. 38 Misiran kaane yi sewa e keli feen na, bayo e yi gaxuxi e yœe ra han! 39 Ala yi kundaan so a muxune xun na. N yi tœe degen ti e yœe ra alogo a xa e lu kenenni. 40 E Ala maxodin, a yi œœene nun donseene ragodo e ma keli kore, e lugo. 41 A yi fanyen bœ, igen yi mini a yi, a yi godo tonbonni alo xude wunla, 42 bayo a fala sarignanxina fe rabira nen a ma a naxan ti Ibrahima xa, a walikena. 43 A yi a yama sugandixin namini Misiran yi, e jaxan, e œœœœ sewani. 44 A yi siya gbetene bœon so e yii, e yama gbetene wali œœœœ œœœœ e keen na, 45 alogo e

xa a tonne suxu, e yi a sariyan birin suxu. Tantunna Alatala xa!

106 Tantunna Ala xa! E Alatala tantun amasoto a fan. A hinanna luma nen habadan! 2 Nde nœ Alatalaa wali gbeene birin ma fe fale? Nde nœ tantunna birin fiye a ma? 3 Sewan na kanne xa naxanye a sariyane suxuma, naxanye fe tinxinxin ligama waxatin birin. 4 Alatala, i nema i ya yamaan maliye waxatin naxan yi, i xaxili lu n xon ma. I yi n fan mali i nema e rakise waxatin naxan yi, 5 alogo n xa i ya yama sugandixin sabatixin to, alogo nxu nun i ya muxune xa sewa nxu bode xon ma, nxu birin yi nxu yete matoxo sewani. 6 Nxu bata yulubin liga alo nxu benbane a liga kii naxan yi. Nxu bata hakene nun fe naxine raba. 7 Nxu benbane to yi Misiran yamanani, ne mi yi i ya kabanako fe wanle yatexi. E jinan nen na waxatine birin xon ma i yi hinanma e ra waxatin naxanye yi. E yi murute Gbala Baan de. 8 Koni a yi e rakisi a xili binyena fe ra, alogo a senbe gbeena fe xa kolon. 9 A yi falan ti Gbala Baan xili ma, a yi xara ken! A yi e ragidi igen tilinxi yire xareni alo tonbonna. 10 Ala yi e rakisi na muxune ma naxanye yi e rajaxuxi. A yi e xunba e yaxune yii. 11 E yenge faane yi faxesa igeni. Muxu yo mi lu. 12 Nayi, e yi la a fala xuine ra, e yi tantun betine ba a xa. 13 Koni Ala naxan ligaxi, e jinan na xon mafuren, e mi a mame a yi feene rakamali, 14 Xooyin yi e suxu tonbonni e yi Ala bunba boxo xareni. 15 E naxan maxodin, Ala yi na so e yii, koni a yi furen fan nafa e ma. 16 E yi Nabi Musa maxoxolon folo, e nun Haruna naxan nasarijanxi Alatala xa. 17 Boxon deen yi rabi a Datan gerun. A yi Abirami nun a muxune ye maluxun. 18 Teen yi e ganla gan, a yi muxu naxine suxu. 19 E yi xemaan nafala jinge dii sawura suxuren na Horebe Geyaan ma, e yi seen batu naxan nafalaxi wuren na. 20 E yi Ala binyen masara jinge dii sawuran na naxan sexen donma. 21 E jinan Ala xon naxan e rakisixi naxan wali gbeene ke Misiran yamanani. 22 A kabanako feene liga Xami bonsonna yamanani, e nun fe magaxuxine Gbala baani. 23 Ala yi a fala a e raxorima nen, fo a muxu sugandixin Musa a ti a yetagi alogo a xa xete a xolon foxo ra, alogo a nama e birin halagi. 24 Awa, e yi e me na boxo fajin fan na amasoto e mi yi laxi a falan na. 25 E yi lu a mafale e bubune kui. E mi Alatalaa falan name. 26 Nanara, a yi a kolo e xili ma, a e luma nen tonbonni e faxesa, 27 a yi e yixetene raxuya ayi siyane

ye, a yi e raxuya ayi yamanane yi. 28 Alaa yamaan Baali-Peyori li waxatin naxan yi, e yi saraxane don naxanye yi bama ala fuune xa. 29 E kewanle yi Ala raxolo e ma fure naxin yi godo e ma. 30 Koni Finexasi yi keli, a yi na feen dan, na furen yi dangu. 31 Ala yi na yate tinxinna ra a xa waxati famatone yi han habadan. 32 E yi Ala raxolo Meriba igene de, Musa yi toron soto e fe ra. 33 E yi a liga Musa xoloxin yi falan ti xaxilitareyani. 34 E mon mi siya gbetene faxesa Alatala tonna sa naxanye fe yi. 35 E yi basan siyane ra, e yi lu e namunne lige. 36 E yi e suxurene batu. Na nan findi e rabira xunna ra. 37 E yi e dii xemene nun dii temene ba saraxane ra jinanne xa. 38 E diidine faxesa naxanye mi fefe kolon. E ne ba saraxane ra Kanan suxure kidene yi, boxon yi xosi na faxesa fe ra. 39 E yi e yete xosi e kewanle xon. E suxure feene yi lu alo yalunyana Ala mabinni. 40 Nanara, Alatala yi xolo a yamaan ma. E yi rajaxu a ma. 41 A yi e rabepin siyane yii, e yi rajaxu naxanye ma, ne yi noon soto e xun na. 42 E yaxune yi e naxankata, e yi e rayarabi e senbeni. 43 A yi a muxune xunba sanja ma wuyaxi, koni e yi lu murute, e lu kankanje e hakene ma. 44 Koni, a to e wuga xuiin me, a yi e torooyaan to. 45 A yi a miri a layirina fe ma. A yi dija a hinanna a fe ra. 46 Ala yi a liga a naxanye a yamaan suxi ne yi kininkinin e ma. 47 Alatala nxo Ala, nxu rakisi. I mon xa fa nxu ra keli siya gbetene ye, alogo nxu xa i xili sarijanxin tantun, na yi findi nxu kanba xunna ra. 48 Barikan xa bira Alatala xa, Isirayilaa Ala habadan han habadan! Yamaan birin xa a ratin "Amina." Tantunna Ala xa!

107 E Alatala tantun bayo a fan! A hinanna luma nen habadan! 2 Alatala e tan naxanye birin xunbaxi, e a fala, a e tan naxanye xunbaxi e yaxune yii, 3 a faxesa e tan naxanye ra sa keli yamana gbetene yi, sa keli sogeteden nun sogegododen binni, e nun komen foxon nun yifari foxon ma. 4 Ndee bata yi lo ayi tonbon magaxuxini, e mi yi fa kiraan toma siga taani muxune doxi denaxan yi. 5 Kamen nun min xonla yi e suxu, e yigitege. 6 Awa, e yi toroni waxatin naxan yi, e yi e xui ramini Alatala ma, a yi e xunba e toroni. 7 A yi ti e yee ra siga kira tinxinxin xon ma. A siga e ra taani muxune doxi denaxan yi. 8 E xa Alatala tantun a hinanna fe ra, e nun a kabanako feen naxanye ligaxi e xa. 9 A min xonla bama muxune ra, a yi kametone ralugo donse fajine ra. 10 Ndee yi dimin nun boje raforen nin, e naxankataxin xidixi

yolõnxõnna ra kasonn kui. **11** Amasõtõ e bata yi murute Alaa falane ma, e mi yi Kore Xõnna Alaa maxadi xuine suxi. **12** Tõrõn yi e xadan, e dagalanjẽ ayi, muxu yo mi e mali. **13** Awa, e yi tõrõni waxatin naxan yi, e yi e xui ramini Alatala ma, a yi e rakisi tõrõn ma. **14** A yi e ba dimin nun bõjẽ rafõreni. A yi e yolõnxõnne yibolon. **15** E xa Alatala tantun a hinanna fe ra, e nun a kabanako feen naxanye ligaxi e xa. **16** A wure dẽene gira, a yi wure gbelemene kala. **17** Xaxilitaren nan yi ndee ra. E yi tõrõma e matandine nun e hakene nan ma fe ra. **18** E na donseen to, e bõjẽ masiga ayi. E yi maso sayaan na. **19** Awa, e yi tõrõni waxatin naxan yi, e yi e xui ramini Alatala ma, a yi e rakisi tõrõn ma. **20** A yi falan ti, a e rakendeyã. A yi e ratanga gaburun ma. **21** E xa Alatala tantun a hinanna fe ra, e nun a kabanako feen naxanye ligaxi e xa. **22** E xa barika bira saraxane ba Ala xa e yi a wali fajine fe fala, e sõnxõ sewani. **23** Ndee yi siga fõxõ igen xun ma kunkin kui, e yulayaan naba fõxõ igen xun ma. **24** E yi Alatalaa wanle to, a kabanako feene liga tilinna xun ma. **25** A yi foye gbeen yamari, a yi fa fõlõ. Fõxõ igen yi walanjẽ ayi. **26** Igen mårõnne yi lu kunkini tẽ pon, a mõi yi lu a ragodẽ tilinna ma. E bata yi kontõfili, e yigitege. **27** E xun yi magi e ra, e dagalanjẽ ayi alo muxun na a min. E kõtẽn birin yi findi fe fuun na. **28** Awa, e yi tõrõni waxatin naxan yi, e yi e xui ramini Alatala ma. A yi e ba e tõrõni. **29** A yi a liga foye gbeen yi a raxara. Walanna yi a raxara fõlõ. **30** Fõxõ igen to a raxara, e yi sewa. A yi fa e ra e sodeni e yi waxi denaxan xõn. **31** E xa Alatala tantun a hinanna fe ra, e nun a kabanako feen naxanye ligaxi e xa. **32** E xa a batu yamaan malanni. E mõi xa a matõxõ fonne malanni. **33** A tan nan baane masarama tonbonna ra, a yi tigine findi bõxõ xaren na. **34** A bõxõ fajin findi bõxõ kalaxin na fõxõn denaxan yi na kaane jaxuyana fe ra. **35** A mõi yi tonbonna maxetẽ daraan na, a yi bõxõ xaren findi tigi yiren na. **36** A yi fa kametõne ra, e dõxõ na, e taan ti e luyẽ denaxan yi. **37** E yi xẽene bi, e manpa binle si, e yi tõnõ gbeen sõtõ e yi. **38** A yi a yamaan baraka, e yi wuya ayi, a mi tin se yi ba e jingene ra. **39** A yamaan yaten to xurun fõlõ e rayarabin nun tõrõn nun jaxankatan bun, **40** a yi na kuntigine rapaxu naxanye a yamaan lu, e siga wulaan xun xõn kira mi denaxan yi. **41** Koni a yi tõrõ muxune ba e tõrõni, a yi e denbayane rawuya ayi alo e xuruseene. **42** Tinxin muxune yi na to, e sewa, koni muxu jaxine yi e

dundu. **43** Naxan na findi xaxilimaan na, a xa a yengi lu feni itoe birin xõn, a yi Alatalaa hinanna kolon.

108 Dawudaa betina. Sigi sarijanxina. Ala, n ma binyena, n xaxili ragidixi yatil! N betin bama nen, n yi i tantun! **2** N xulunma nen sinma, n yi n ma bolõnna nun kondenna maxa! N kurunma betin be nen subaxa! **3** Alatala, n ni i tantunma nen siyane yẽ. N betin bama i xa nen bõnsõnne tagi. **4** I ya hinanna gbo han ariyanna. I ya lannayaan texi han kore xõnna. **5** Ala, i ya binyen xa mayita kore xõnna ma, a yi bõxõn nafe! **6** I xanuntenne xunba, i yi e rakisi i senbeni. I yi n yabi. **7** Ala bata falan ti a yire sarijanxini, a naxa, “N nõõn tima nen, n Siken taani taxun, n yi Sukõtĩ lanbanna danne sa. **8** N tan nan gbee Galadi bõxõn nun Manase ra. Eframi kaane findixi n ma yengesone nan na. Yuda luxi nen alo n ma mangaya dunganna. **9** Koni n ma konyin nan Moyaba yamanan na. N tan nan Edõn yamanan kanna ra. N yenge sõnxõni tema Filisiti yamanani.” **10** Ala, nde sigama n na na taa makantanxini? Nde tima n yẽe ra siga Edõn yi? **11** Ala, i tan xa mi i mæxi nxu ra ba? I mi fa nxõ ganla fõxõ ra sõnõn ba? **12** Nxu mali yaxune yengedeni! Sese mi adamana maliin na. **13** Koni Ala na lu en xõn, en nõõn sõtõma nen. A tan nan en yaxune halagima.

109 Dawudaa betina, beti baane kuntigin xa. Ala, n naxan tantunma, i nama lu dunduxil! **2** Amasõtõ muxu jaxine nun wuledene n mafalama. E wulene sama n xun ma. **3** E mõi fala jaxine tima lan n ma. E n yengema na kiini fuul! **4** N tan e xanuxi, e tan n tõjẽgema. Koni n tan Ala maxandima. **5** E n ma fe fajin saranma fe jaxin na, e n ma xanuntenyaan saran xõnnantenyaan na. **6** E a falama n ma e naxa, “Gbalõ feen xa sa a xun ma, muxuna nde yi a tõjẽge. **7** A na makiti, a yi yalagi. A Ala maxandi xuine yi yate haken na. **8** Ala xa a siin jan mafuren, muxu gbetẽ yi a tiden tongo. **9** Ala xa a diine findi kiridine ra, a jaxanla yi findi kaja gilen na! **10** Ala xa a diine findi sigatine nun xandi tiine ra, e yi makuya e banxi xõnne ra. **11** Ala xa a doli faan siga a yii seene birin na, xõjẽne yi a wali xõnne birin tongo. **12** Ala xa muxe nama fa hinan a ra sõnõn, hanma muxe yi e yengi dõxõ a kiridine xõn ma. **13** Ala xa a yixetene birin halagi, e xinle yi lõ ayi habadan. **14** Alatala xa a xaxili lu a benbane hakene xõn ma. Alatala nama a nga yulubine xafari mumẽ! **15** Alatala xa a yengi lu e hakene xõn ma waxatin birin, koni Ala xa jinan xa ti e

fe xon ma fefe! **16** Bayo xemeni ito mi findixi hinanten na a yi yiigelitōne nun tōrō muxune naxankatama, han a yi muxu sunuxin faxa. **17** Danga tiin yi rafan a ma, Ala xa ne raxete a ma. A mi yi rafan a ma a xa duba muxe xa, Ala xa duban masiga a ra. **18** A yi rabilinxi a danga xuine ra alo a dugina. Ala xa a gbee dangana a li alo igena a fatin ma, e nun alo turena a xonne yi. **19** A dangane xa lu a fari alo a dugina a ma. E lu a ma waxatin birin alo a tagi xidina.” **20** Alatala xa n tōnege muxune saran na kii nin e nun naxanye n mafalama. **21** Awa, Marigina Alatala, n mali i xili binyena fe ra. Amasoto i ya hinanna gbo, n xunba. **22** Yiigelitōn nun tōrō muxun nan n na, n niin sunuxi. **23** N tununmaan ni i ra alo nininna jinbanna ra. E n kedima alo supena. **24** N xinbi xudine bata tuye ayi sun suxuni. N bata doyen, n xosi. **25** E na n to, e yi e xunni maxa, e n magele. **26** Alatala n ma Ala, n mali, i n nakisi i ya hinanni, **27** alogo e xa a kolon a i tan Alatala nan na ligaxi i senbeni. **28** E tan n dangama nen, i tan yi barakan sa n ma fe yi. E na keli n xili ma, e yagima nen, n tan, i ya walikeen yi sewa. **29** Ala xa n tōnege muxune yalagi. Ala xa yagin so e xunna alo dugina. **30** N nan n xuini tema nen, n na Alatala tantun han! N yi a matōxo yamani. **31** Amasoto a keli nen a ti tōrō muxun xon, a yi a rakisi a yalagi muxune ma.

110 Dawudaa betina. Alatalaa falan ni ito ra n marigin xa, a naxa, “Doxo n yiifanna ma, han n yi i yaxune sa i sanna bun ma.” **2** Alatala xa i ya mangayaan senben gbo ayi fōlo Siyon ma, i yi i yaxune nō i rabilinni. **3** I na i ya ganla xili, i ya yamana a sobe soma nen. I ya banxulanne yi fa i ma xunna kenla nun sarjanni alo xiila subaxani. **4** Alatala bata a kolo, a mi a xuiin maxetema, a naxa, “Saraxaraliin nan i ra habadan, alo Melikisedeki yi kii naxan yi.” **5** Marigina i xon. Xa a xolo loxon naxan yi, a mangane halagima nen. **6** A siyane makitima nen, binbine yi lu yiren birin yi. A dunuja mangane birin noma nen. **7** Mangana a minma nen xudeni kira yi, a xunna keli.

111 Tantunna Ala xa! N na Alatala tantunma nen n bōnen ma feu, muxu fajine nun yamaan ye. **2** Alatala kewanle gbo! E rafan naxanye ma, ne majoxonma e ma. **3** A kewanle magaxu, e gbo. A tinxinyaan luma nen habadan. **4** A bata a kabanako feene rabira en ma. Alatala dija, a kininkinin. **5** A balon fima nen a yeeragaxu muxune ma. A mi

jinanma a layirin xon mume! **6** A bata a senben yita a muxune ra, a yi xōjene bōxon so e yii. **7** Nōndin nun sariya kendena a kewanle yi. Lannayana a fe ragidixine birin yi. **8** E na waxatin birin, lannayaan nun tinxinna nan e ra. **9** A bata a muxune xōroya, a yi habadan layirin xidi e xon ma. A xinla sarijan, a magaxu. **10** Fe kolonna fōloma Alatala yeeragaxun nan ma. Xaxilimaan nan ne ra naxanye na ligama. Tantunna a xa habadan!

112 Tantunna Ala xa! Sewan na kannna xa naxan gaxuma Alatala ye ra, a yamarine yi rafan a ma. **2** A diine senben sōtoma nen yamanani. Muxu fajine yixetene duban sōtoma nen. **3** E herin nun nafunla sōtoma nen, e sabatima nen tinxinyani habadan. **4** Kenenna tima nen muxu fajine ma dimini, naxanye kininkinin e mōn tinxin. **5** A lan muxune xa donla so fonisireyani, a yi a feene raba tinxinni. **6** Bayo tinxin muxun mi tantanye mume! Yamaan mi jinanye a fe xon habadan! **7** A mi gaxun xibaru jaxina fe ra. A xaxili ragidi, a yigi saxi Alatala nan fari. **8** A bōnen mi xuruxurunma, a mi gaxuma. Dōnxen na, a a yaxune biraxin toma nen. **9** A tan nan tōrō muxune kima fonisireyani. A tinxinyaan luma nen habadan! A senben xun masama nen binyeni. **10** Muxu jaxin na na to, a xoloma nen, a sunu, a yi a jinna raxin. Muxu jaxin waxon feene kalama nen.

113 Tantunna Ala xa! E tan Alatalaa walikene, e a matōxo, e Alatala xinla matōxo! **2** Alatala xinla xa tantun fōlo iki ma han habadan! **3** Sa fōlo sogeteden mabinna ma han sa doxo sogegododen binna ra, birin xa Alatala xinla matōxo. **4** Alatala nan siyane birin xun na. A binyen tema han kore xonna. **5** Nde luxi alo Alatala, a tan naxan doxi ariyanna yi, **6** a tan naxan a yigodoma, a kore xonna nun bōxo xonna mato? **7** A senbetarene rakelima, a tōrō muxune ba e tōroni. **8** A yi e radōxo muxu gbeene fema a yamani. **9** A gbantan findi dii barin na, a yi a findi dii nga sewaxin na. Tantunna Alatala xa!

114 Isirayila to mini Misiran yamanani, Yaxuba yixetene to keli yamanani e yi xōneyani denaxan yi, **2** Yuda yi findi Alaa yama sarijanxin na. Isirayila yi findi a gbeen na. **3** Fōxo igen to a to, a yi a gi, Yuruden Baan yi xete a xanbi ra. **4** Geyane yi tugan alo kontonne yire matexine fan yi tugan alo yexee diine. **5** Fōxo igena, nanfera i i gima? Yuruden baana,

nanfera i xetema i xanbi ra? 6 E tan geyane, nanfera e tunganma alo kontonne, e tan yire matexine, nanfera e tunganma alo yexxe diine? 7 Bɔxɔn xa xuruxurun Marigin yee ra, Yaxubaa Ala. 8 A tan naxan fanyene findi darane ra, a yi gɛme gbeen findi tigin na.

115 Alatala, nxu tan mi a ra de! I tan nan xili xa binya i ya hinanna nun lannayana fe ra. Nxu tan mi a ra! 2 Nanfera siyane maxɔdinna tima, e naxa, “E Ala go?” 3 En ma Ala ariyanna yi. Naxan nafa na ma, a na nan ligama. 4 Gbetin nun xɛmaan nan tun e tan ma suxurene ra! Muxune nan ne rafalaxi. 5 E de na, koni e mi fala tima. E yɛɛne na, koni e mi sese toma. 6 E tunle na, koni e mi fefe mɛma. E jɔɛɛn na, koni e mi sese xiri mɛma. 7 E yiine na, koni e mi nɔɛ seen suxɛ. E sanne na, koni e mi nɔɛ sigan tiye. E mi nɔɛ xui yo raminc. 8 Naxan na e rafala, a a yigin sa e yi, na fan luma nen alo e tan. 9 E tan Isirayila yamana, e yigin sa Alatala nin, a tan nan e malima alo ye masansan wure lefana. 10 E tan saraxaraline, e yigin sa Alatala nin, a tan nan e malima alo ye masansan wure lefana. 11 E tan a yee ra gaxu muxune, e yigin sa Alatala nin, a tan nan e malima alo ye masansan wure lefana. 12 Alatala a jɔxɔ luma en xɔn ma nen, a en baraka. A Isirayila yamaan barakama nen e nun a saraxaraline. 13 Alatala a yee ra gaxu muxune birin barakama nen, muxudine nun muxu gbeene. 14 Alatala xa diine fi e nun e diine ma. 15 Alatala xa e baraka naxan koren nun bɔxɔn daxi! 16 Alatala nan gbee ariyanna ra, koni a bata bɔxɔn taxu adamadiine ra. 17 Faxe muxune xa mi Alatala tantunma de! 18 Koni en tan nan barikan birama a xa iki e nun habadan. Tantunna Alatala xa!

116 N bata Alatala xanu amasɔto a n ma maxandi xuiin namema. 2 N na a xili waxati yo yi, a a tuli matiye n na. 3 Sayaan gbalon bata yi n nabilin nun, n bata yi maso gaburun na nun, gaxun nun kuisanna bata yi n li nun, (Sheol h7585) 4 n yi Alatala maxandi a xinla ra, n naxa, “Alatala, n nakisi!” 5 Alatala dija, a tinxin. En ma Ala kininkinin han! 6 Alatala muxu bɔje fixene nan natangama. N senben bata yi jan, a yi n nakisi. 7 N bɔjen xa xunbeli, amasɔto Alatala bata fe fajin liga n xa. 8 Ala bata n niin natanga sayaan ma. A bata n yeeɛgen fitan n yetagi. A mi tinxin n bira. 9 N sigan tima nen Alatala yetagi dunɔja yi. 10 N denkeleyaxi, nanara n yi falan ti, n naxa, “N tɔrɔxi ki fajil!” 11 N yi gaxuni waxatin

naxan yi, n yi a fala, n naxa, “Adamadiine birin wule!” 12 N fa nanse soma Alatala yii lan na fe fajine birin ma a bata naxanye liga n xa? 13 N minse saraxan bama nen a xa a marakisina fe ra n yi Alatala maxandi a xinla ra. 14 N nan n de xuine rakamalima nen yamaan birin yee xori n naxanye tongo Alatala xa. 15 Alatalaa tɔgɔndiya muxuna nde na faxe na a tɔrɔma nen han! 16 Alatala, i ya walikeen nan n na, i ya walike jaxanla naxan barixi. I bata n naxɔrɔya. 17 N barika bira saraxan bama i xa nen n yi Alatala maxandi a xinla ra. 18 N nan n de xuine rakamalima nen yamaan birin yee xori n naxanye tongo Alatala xa, 19 Alatalaa banxin tanden ma, Yerusalen taani. Tantunna Alatala xa!

117 Siyane birin xa Alatala tantun! Yamane birin xa a batu! 2 Amasɔto a hinanna gbo han! Alatalaa lannayaan mi janma habadan! Tantunna Alatala xa!

118 Alatala xa tantun amasɔto a fan. A hinanna luma nen habadan! 2 Isirayila muxune xa a fala, e naxa, “A hinanna luma nen habadan!” 3 Alaa saraxaraline xa a fala, e naxa, “A hinanna luma nen habadan!” 4 Alatala yee ra gaxu muxune xa a fala, e naxa, “A hinanna luma nen habadan!” 5 N yi tɔrɔni waxatin naxan yi, n yi n xui ramini Alatala ma. A yi n yabi, a n xɔrɔya. 6 Alatala n xɔn, n mi gaxue mume! Adamadiine nɔɛ nanse lige n na? 7 Alatala n xɔn, a tan nan n malima. N na n yaxune biraxin toma nen. 8 A fisa muxun yi a yigin sa Alatala yi benun a xa a yigin sa adamadiine yi. 9 A fisa muxun yi a yigin sa Alatala yi benun a xa a yigin sa mangane yi. 10 Siyane birin bata yi n nabilin yengeni nun, koni n na e birin halagi nen Alatala barakani! 11 E yi n nabilinxi yiren birin yi nun, koni n na e birin halagi nen Alatala barakani! 12 E so nen n xun na alo kumi jɛjɛne, koni e raxori nen mafuren alo teen na sexe xaren gan, n yi e halagi Alatala barakani. 13 E yi n nadinma nen alogo n xa bira, koni Alatala yi n mali. 14 Alatala nan n senben na, n ma betina. A tan nan n nakisixi. 15 Muxu tinxinxine bata e sewa xuini te kisina fe ra, e naxa, “Alatala senben gbo! 16 Marigin bata nɔɔn ti a senbeni! Alatala senben gbo!” 17 Nayi, n mi faxama, n luma nen n nii ra, n yi a fala Alatala naxan ligaxi n xa. 18 Alatala bata yi n saran n hakene ra, koni a mi tinxin n faxe. 19 Alaa banxin deene xa rabi n xa. N xa so, n yi Alatala tantun. 20 Alatalaa banxin deen ni i ra, tinxin muxune soon deen naxan na. 21 Ala, n ni i tantunma nen, amasɔto i bata n yabi, bayo i bata n

nakisi. **22** Banxi tiine e me gemen naxan na, na bata findi banxin geme fisamantenna ra. **23** Alatala nan na ligaxi, kabanako feen nan na ra en yee ra yi. **24** Alatala toon loxon nan nagidixi, en naxan, en sewa a fe ra. **25** Alatala, fa nxu rakisi, Alatala, tin, nxu xa ncon ti. **26** Naxan fama Alatala xinli, Ala xa na baraka! Nxu dubama e xa Alatala banxini. **27** Alatala nan Ala ra, a bata en lu a kenenyani. E joxonde deene suxu e yii, e fa sanla raba siga han saraxa ganden nabilinni. **28** I tan nan n ma Ala ra, n ni i tantunma nen. I tan nan n ma Ala ra, n ni i batuma nen. **29** E Alatala tantun, bayo a fan. A hinanna luma nen habadan!

119 Sewan na kanne xa fe mi naxanye kewanle ra, naxanye sigan tima Alatala sariyan xon. **2** Sewan na kanne xa naxanye birama a maxadi xuine foxo ra, naxanye a fenma e bopen ma feu! **3** E mi fe jaxin ligan mume! E sigan tima Alaa kiraan xon ma. **4** Ala, i bata i ya fe ragidixine so nxu yii alogo e xa suxu ki fajni. **5** A yi lan nun, n sigati kiin xa tinxinye ayi alogo n xa i ya tonne suxu. **6** N na n xaxili lu i ya yamarine birin xon ma, n mi yage mume! **7** N na i tantunma nen n bopen fixen na, n nema i ya kiti tinxinxine fe xaranye. **8** N na i ya tonne suxuma nen. I nama n nabeyin mume! **9** Banxulanna a kewanle rasarijanma di? Fo a xa i ya falan nan suxu. **10** N kataxi n xa i fen n bopen ma feu! I nama tin n yi i ya yamarine beyin. **11** N bata i de xuiin namara n bopeni, alogo n nama yulubin liga i tan na. **12** Alatala, n barikan birama i xa. N xaran i ya tonne ma. **13** N nan n xuini tema nen, n xete i ya kiti saxine ma. **14** N sewaxin nan i ya maxadi xuine suxuma, alo n na nafulu gbeen soto. **15** N na n mirima i ya fe ragidixine ma, n yi i ya xaranne fesefese. **16** I ya tonne n kenexi. N mi jinanxine i ya falan xon ma mume! **17** Fe fajin liga i ya walikeen xa, alogo n xa lu n nii ra, n yi i ya falan suxu. **18** N yee rabi alogo n xa i ya sariyan magaxune to. **19** Xopen nan n na dununa ito yi! I nama i ya yamarine luxun n ma. **20** A rafan n ma n xa lu i ya kiti saxine bun waxatin birin. **21** I falan tima nen muxu dangaxi wasoxine xili ma naxanye e masigama i ya yamarine ra. **22** Marayagin nun marajaxun ba n ma, bayo n bata i ya maxadi xuine suxu. **23** Mangane bata e malan n xili ma, koni n tan i ya walikena a mirima i ya tonne nan ma. **24** I ya maxadi xuine n kenexi, e tan nan n maxadima. **25** N saxi burunburunni. Siimayaan fi n ma, alo i a falaxi

kii naxan yi. **26** N bata n ti n kewanle ra, i yi n yabi. N xaran i ya tonne ma. **27** N mali n xa i ya fe ragidixine kolon, alogo n xa n miri i ya kabanako feene ma. **28** N niin wugama soxoleni. N nakeli alo i a falaxi kii naxan yi. **29** Wulen masiga n na, i yi n xaran i ya sariyan ma i ya hinanni. **30** N bata wa a xon, n xa togondiya, n yi tin i ya kiti saxine ma. **31** Alatala, n bata bira i ya maxadi xuine foxo ra. I nama tin, n yi yagi. **32** N biraxi i ya yamarin kiraan foxo ra. Amasoto i bopen xunbenla fima n ma. **33** Alatala, n xaran i ya tonne bunne ma, alogo n xa e suxu waxatin birin. **34** Xaxinla fi n ma, alogo n xa i ya sariyan suxu n bopen ma feu! **35** N ti i ya yamarine kiraan xon, amasoto na n kenexi. **36** I ya maxadi xuine sa n bopeni, alogo n nama bira nafunla foxo ra. **37** N xun xanbi so fe kobine yi, alogo n xa siimayaan soto i ya kiraan xon. **38** I de xuiin naxan tongoxi i yee ragaxu muxune xa, na rakamali n tan i ya walikeen xa. **39** N natanga yagine ma n gaxuma naxanye yee ra. Amasoto i ya kiti saxine fan. **40** N waxi i ya fe ragidixine suxu feni han! N xa siimayaan soto i ya tinxinni. **41** Alatala, i ya hinanna xa n li. N nakisi alo i de xui tongoxi kii naxan yi. **42** N xa no n konbi muxune yabideni, bayo n na n yigi saxi i ya falan nin. **43** Tin n xa lu jondin fale waxatin birin, amasoto n xaxili tixi i ya kitin nan na. **44** N ni i ya sariyan suxuma nen waxatin birin, habadan han habadan. **45** N luma nen xoxoyani, Amasoto n ni i ya fe ragidixine suxi. **46** N ni i ya maxadi xuine fe falama mangane xa nen. N mi yage na ra mume! **47** I ya yamarine n kenexi, e rafan n ma. **48** N na n yiine tima i ya yamarine bun ma nen, e rafan n ma. N yi lu n mire i ya tonne ma. **49** I xaxili lu i ya falan xon ma n tan i ya walikena fe yi, bayo i bata yigin fi n ma. **50** N yi toroni waxatin naxan yi, i n madenden nen amasoto n bata kisi i de xuiin ma. **51** Wasodene n magelema han, koni n mi i ya sariyan fataxi mume. **52** Alatala, n na n mirima i ya kiti saxine ma. Waxati danguxine yi, ne nan yi n madendenma. **53** N na muxu jaxine to naxanye e mema i ya sariyan na, n xoloma nen han. **54** I ya tonne findixi beti ba xunna nan na n xa, n xopenyani denaxan yi. **55** Alatala, n na n mirima i ma koeen na, alogo n xa i ya sariyan suxu. **56** N gbeen findixi i ya fe ragidixine suxu feen nan na. **57** Alatala, n gbeen findixi naxan na, na ni ito ra, i ya falan suxu feen na a ra. **58** N ni i maxandima n bopen ma feu! Kininkinin n ma, alo i bata de xuiin tongo kii naxan yi. **59** N bata n miri n yete kejaan ma, n waxi bira feni i ya maxadi xuine

foxo ra. 60 N ni i ya yamarine suxuma nen mafuren, n mi buma. 61 Muxu jaxine bata lutin nati n yee ra, koni n mi jinanma i ya sariyan xon ma. 62 N kelima nen kae tagini i tantundeni i ya kiti tinxinxine fe ra. 63 N xoyine nan i yee ragaxu muxune ra, e nun naxanye i ya fe ragidixine suxuma. 64 Alatala, dunupa rafexi i ya hinanna nan na, n xaran i ya tonne ma. 65 Alatala, i bata i ya falan nakamali, i fe fapin naba n tan i ya walikeen xa. 66 N xaran xaxilimayaan nun fe kolonna ma, amasoto n laxi i ya yamarine ra. 67 Benun n xa toro waxatin naxan yi, n bata yi tantan, koni iki, n bata i ya falan suxu. 68 I fan, i kewanle fan! N xaran i ya tonne ma. 69 Muxu wasoxine bata wulen sa n xun ma. Koni i ya fe ragidixine suxi n xon ma n bojen ma feu! 70 E bojene mi fan, koni i ya sariyana n tan kenexi. 71 A rafan n ma, n toro, alogo n xa no i ya tonne kolonje. 72 I ya sariyan nafa n tan ma dangu xemaan nun gbetin wuliyaxin xa. 73 I tan nan n daxi, i yi n namara, nayi xaxinla fi n ma, alogo n xa i ya yamarine xaran. 74 I yee ragaxu muxune sewama nen e na n to waxatin naxan yi, a n laxi i ya falan nan na. 75 Alatala, n na a kolon a i tinxin kiti sadeni. I n nayagi nen amasoto i tinxin. 76 I ya hinanna xa n nii yifan n ma alo i de xuiin tongoxi n tan i ya walikeen xa kii naxan yi. 77 Kininkinin n ma alogo n xa lu n nii ra, amasoto i ya sariyana n kenexi. 78 Ala xa muxu wasoxine rayagi, yo mi naxanye xa, naxanye n toroma. Koni n na n mirima i ya fe ragidixine nan ma. 79 Ala xa a yee ragaxu muxune maso n na, naxanye birin i ya maxadi xuine kolon. 80 N xa i ya tonne suxu n bojen ma feu, alogo n nama yagi. 81 Ala, n bata xadan i mamedeni n nakisi feen na. N bata n yigi sa i ya falani. 82 N yeene bata bu i yee ra kira yitoe i de xuina fe ra, n yi a fala, n naxa, "I n malima waxatin mundun yi?" 83 N bata liga alo manpaan sa labana teen xun ma naxan xaraxi ayi. Koni hali na, n mi jinanxi i ya tonne xon. 84 N mon xa i legeden han waxatin mundun yi? I na muxune makitima waxatin mundun yi naxanye n besenxonyama? 85 Muxu wasoxin naxanye mi i ya sariyan suxi ne bata yinla ge n yee ra n suxu feen na. 86 I ya yamarine birin tinxin. Muxune n tonegema, n mali. 87 A yi fa luxi ndedi n xa faxa, koni n mi i ya fe ragidixine rabepinje mume! 88 N nakisi i ya hinanni, alogo n xa i ya maxadi xuine suxu. 89 Alatala, i ya falan luma nen habadan. A luma nen ariyanna yi habadan. 90 I ya tinxinyaan luma nen mayixetene birin xa. I bata boxon dexo a dodoxeni. A mon luma

menna nin. 91 Seene birin mon daxi i ya maragidini han to, bayo e birin walima i xa. 92 Xa i ya sariyan mi yi n kenexi nun, n yi faxama nen n ma toroni. 93 N mi jinanje i ya fe ragidixine xon mume, amasoto i n nakisi e tan nan xon. 94 Bayo n ni i ya fe ragidixine fenma, i tan nan gbee n na, n nakisi. 95 Muxu jaxine n legedenma n faxa feen na. Koni n na n joxo luma nen i ya maxadi xuine xon. 96 N bata a kolon danna feen birin ma, koni i ya yamarin tan dan mi na. 97 I ya sariyan nafa n ma han! N na n mirima a ma ferijen gben! 98 I ya yamarina n findima xaxilimaan na dangu n yaxune ra, bayo a n yii waxatin birin. 99 N dangu n karamoxone birin na, amasoto n luma n mire i ya maxadi xuine ma. 100 Xaxinla naxan n ma na gbo xeme fonne gbeen xa, amasoto n ni i ya fe ragidixine suxi. 101 N bata tondi sige kira jaxin birin xon, alogo n xa i ya falan suxu. 102 N mi n masigama i ya kiti saxine ra, amasoto i tan yeteen nan n xaranma. 103 I de xuine jaxun kumin xa. 104 N xaxinla sotoma i ya fe ragidixine nin, nanara mayifu fe yo mi fa rafan n ma. 105 I ya falan findixi kenenna nan na n sanna bun ma, naxan n siga kirani yalanma. 106 N de xuiin naxanye tongoxi i xa, n bata n kolo n ne rakamalima nen, n yi i ya kiti tinxinxine suxu. 107 Alatala n ma mantorone bata gbo ayi han. N nakisi alo i a fala n xa kii naxan yi. 108 Alatala, n ma tantun xuiin nasuxu, i yi n xaran i ya kiti saxine ma. 109 N niin gbalon de waxatin birin, koni n mi jinanma i ya sariyan xon. 110 Muxu jaxine bata lutin nati n yee ra, koni n mi n masigama i ya fe ragidixine ra. 111 I ya maxadi xuine nan n keen na habadan, e tan nan n bojen nasewama. 112 N bata a ragidi n bojeni n xa i ya tonne suxu, han n faxa. 113 Nafigne mi rafan n ma, koni i ya sariyan tan nafa n ma. 114 N ye masansan wure lefaan nan i tan na. N bata n yigi sa i ya falani. 115 E tan fe jaxi rabane, e e masiga n na, alogo n xa n ma Alaa yamarine suxu. 116 N senbe so alo i bata a fala kii naxan yi, i nama n yigitge. 117 Findi n yigin na alogo n xa kisi, n yi i ya tonne binya waxatin birin. 118 Naxanye e masigama i ya tonne ra, i ne makuyama i ra nen, bayo e yanfan nan tun tima. 119 I muxu jaxine birin wolima ayi nen kurun na, nanara i ya maxadi xuine rafanxi n ma. 120 N bata gaxu i yee ra, n xuruxurun. I ya kiti saxine bata n magaxu han! 121 N tinxinna nun sariya kenden ligama, i nama n nabepin n yaxune yii. 122 I ya walikeen xaxili ragidi a i fe fapin ligama a xa nen, i nama tin wasodene xa n jaxankata sonon. 123

N yεene bata bu i yεε ra kira yitoε n nakisi feen na, alo i dε xui tinxinxin naxan tongo n ma fe yi. **124** N suxu i ya hinanni, i yi n xaran i ya tōnne ma. **125** Xaxinla fi n ma amasoto i ya walikeen nan n na, alogo n xa i ya maxadi xuine kolon ki faji. **126** Alatala, i ya wanla kε waxatin nan ito ra, amasoto yamana i ya sariyan kalama. **127** Nanara, i ya yamarine rafan n ma xema fajin xa. **128** Nanara, n biraxi i ya fe ragidixi tinxinxine fōxo ra. Mayifu feene mi rafan n ma. **129** Kabanako feen nan i ya maxadi xuine ra. Nanara, n na e suxuma n niin birin na. **130** I ya falane nan kenenna fima, e tan nan xaxinla fima xaxilitaren ma. **131** I ya yamarine xōnla n suxuma alo min xoli gbeen naxan n deen naxarama. **132** I yεε rafindi n ma, i yi kininkinin n ma, alo i darixi a lige kii naxan yi muxune xa i xinla rafan naxanye ma. **133** N sigati kiin senbe so i dε xui tongoxine xōn, i nama tin fe jaxi yo xa n nō. **134** N xunba jaxankatatiine ma, alogo n xa i ya fe ragidixine suxu. **135** I nōrōn xa godo i ya walikeen ma, i yi n xaran i ya tōnne ma. **136** N yεegen minima alo baana, amasoto yamaan mi i ya sariyan suxuma. **137** Alatala, i tinxin, i ya kiti saxine fan tinxin. **138** I ya maxadi xuine fixi tinxinna nun lannayaan nin. **139** N na a to, n yaxune jinanma i fala xuiin xōn, na xolōma n ma nen han! **140** I mi i dε xuiin kale mume! E rafan n tan i ya walikeen ma. **141** N mi yatexi bonne yε, e bata n napaxu, koni n mi jinanma i ya fe ragidixine xōn. **142** I ya tinxinyaan luma nen habadan! Nōndin nan i ya sariyan na. **143** Tōrōn nun kuisanna bata n yili, koni i ya yamarine n kenexxi. **144** I ya maxadi xuine tinxin waxatin birin. Xaxinla fi n ma alogo n xa siimayaan soto. **145** N bata n xui ramini i ma n bōjen birin na. Alatala n yabi alogo n xa i ya tōnne suxu! **146** N bata n xui ramini i ma. N nakisi alogo n xa i ya maxadi xuine suxu. **147** N kurunma i maxande, n mali. N yigi saxi i ya falan nin. **148** N xima n mire i dε xui tongoxine ma nen. **149** Alatala, i hinan. N xuiin name, alogo n xa siimayaan soto i ya kiti saxin xōn. **150** N nabilinna muxune biraxi fe jaxine fōxo ra, e yi e masiga i ya sariyan na. **151** Koni i tan Alatala, i maso n na. Nōndin nan i ya yamarine birin na. **152** N na a kolon xabu waxati xunkuye a i ya maxadi xuine luma nen habadan. **153** Ala, n ma tōrōn mato i yi n xunba, amasoto n mi jinanxi i ya sariyan xōn. **154** N xun mayenge kitin sa, i yi n xunba, n yi siimayaan soto alo i a falaxi kii naxan yi. **155** Muxu jaxine tan mi kisima, amasoto e mi biraxi i ya tōnne fōxo ra. **156**

Koni Alatala, i ya kininkininna gbo, n xa siimayaan soto i ya kiti saxine xōn. **157** N yaxune wuya naxanye n besenxōnyaxi, koni n mi i ya maxadi xuine bejinma. **158** N na i ya fala suxutarene to, na n xolōma nen. **159** Alatala, a mato i ya fe ragidixine rafan n ma, n xa siimayaan soto i ya hinanni. **160** Nōndin nan i ya falan birin na. I ya kiti tinxinxine luma nen habadan! **161** Mangane bata n jaxankata fu, koni n gaxuma i tan nan keden ma fala yεε ra. **162** N sewaxi i dε xui tongoxine fe ra, alo n na nafulu gbeen soto. **163** Wulen mi rafan n ma, koni i ya sariyan nafa n ma. **164** N ni i tantunma nen dōxōja ma solofere lōxo yo lōxo i ya kiti tinxinxine fe ra. **165** Bōje xunbeli gbeen na kanne xa i ya sariyan nafa naxanye ma, sese mi na kanne ratantanje. **166** Alatala, n yigi saxi i tan nan ma marakisi yi, n luma nen i ya yamarine suxe. **167** N na i ya maxadi xuine suxuma nen n niin birin na, bayo e rafan n ma ki faji. **168** N bata i ya fe ragidixine nun i ya maxadi xuine suxu, i n kewanle birin kolon. **169** Alatala, n ma mawuga xuiin xa i li. Xaxinla fi n ma alo i a falaxi kii naxan yi. **170** I tuli mati n ma maxandi xuiin na, i yi n nakisi alo i bata dε xuiin tongo kii naxan yi. **171** N ni i tantunma nen waxatin birin, amasoto i bata n xaran i ya tōnne ma. **172** N betin bama nen lan i dε xui tongoxina fe ma, amasoto i ya yamarine birin tinxin. **173** N mali i senben nin, amasoto n bata i ya fe ragidixine nan sugandi. **174** Alatala, i ya marakisin xōnla n na! I ya sariyana n kenexxi. **175** N xa siimayaan soto alogo n xa i matōxo, i ya kiti saxine yi n mali. **176** N bata tantan kiraan ma alo yexeen naxan lōxi ayi. Fa n tan i ya walikeen fen, amasoto n mi jinanxi i ya yamarine xōn.

120 Ala Batu Banxi yisiga betina. N yi tōrōni waxatin naxan yi, n yi n xui ramini Alatala ma, a yi n yabi. **2** Alatala n nakisi wuledene nun yanfantenne ma. **3** E tan wuledene, Ala nanse ligama ε ra, a ε saranma nanse ra? **4** A lan a xa ε tōrō sofane xalimakunle nun tee wolonne nan na. **5** Tōrōn na a ra n tan xa, n lu ε tagi, ε tan Meseki kaane, n dōxo ε yε alo Kedari bōnsōnna muxune wulaan kui. **6** N bata bu muxune tagi bōje xunbenla mi rafan naxanye ma! **7** N na bōje xunbenla fe fala, e tan yi yengen so.

121 Ala Batu Banxi yisiga betina. N bata n yεε rate geyane ma, n naxa, “N ma maliin kelima minen yi?” **2** N ma maliin kelima Alatala nan ma naxan ariyanna nun dunuja daxi. **3** A mi tinje, i yi bira. I

kantanmaan mi xiye mume. 4 Isirayila kantanmaan mi kinsanyɛ, a mi xiye. 5 Alatala i kantanma, a i dɛxɔn ma alo i nininna. 6 Sogen mi fefe lige i ra yanyin na, kiken fan mi fefe lige i ra kɔɛn na. 7 Alatala i kantanma nɛn fe jaxin birin ma, a yi i niin natanga. 8 Alatala i kantanma nɛn i ya sigan nun xɛteni, folo iki ma han habadan.

122 Ala Batu Banxi yisiga betina, Dawuda gbeena. Sewan na a ra n xa, e na a fala n xa, “En siga Alatalaa banxini!” 2 Iki, en tixi Yerusalen so dɛen na. 3 Yerusalen tixi ki fajɪ a banxine tugunxi e bode ra. 4 Alatalaa yamaan sigama menna nin bɔnsɔn yɛen ma, alo a sariyana a falaxi Isirayila xa kii naxan yi, alogo e xa sa a xinla tantun. 5 Mangane kitin sama menna nin Dawudaa manga gbɛden ma. 6 E Ala maxandi bɔɲɛ xunbenla fe ra Yerusalen xa. Ala xa bɔɲɛ xunbenla fi a rafan muxune ma. 7 Ala xa bɔɲɛ xunbenla lu taani. Ala xa herin fi taa yi kaane ma. 8 Ngaxakedenne nun n xɔyine fe ra, n naxa, “Ala xa bɔɲɛ xunbenla fi Yerusalen ma.” 9 N taana bɔɲɛ xunbenla nan fenma Alatalaa banxina fe ra, en ma Ala.

123 Ala Batu Banxi yisiga betina. I tan naxan dɔxi kore xɔnna ma, n na n yɛɛ ratema i tan nan ma, 2 alo konyine e yɛɛn tima e kanna ra kii naxan yi, alo walike jaxanla yɛɛne luma tixi a kanna ra kii naxan yi. En na en yɛɛne tima en ma Ala ra na kii nin, Alatala, en yi a hinanna mame. 3 Hinan nxu ra, Alatala, hinan nxu ra, amasɔto e nxu rapaxuxi han! 4 Nxu niin bata wasa fere kanne nun wasodene magele xuine ra.

124 Ala Batu Banxi yisiga betina, Dawuda gbeena. Xa Alatala mi yi ti en xɔn nun, Isirayila muxune fan xa a fala, e naxa, 2 “Xa Alatala mi yi ti en xɔn nun yaxune yi en yɛngɛma waxatin naxan yi,” 3 e yi en jɛɲɛn gerunma nɛn nun e xɔlɔ en xili ma waxatin naxan yi. 4 Nayi, walanna yi sigama en na nɛn nun, fufaan yi en mamin, 5 ige xunfan gbeen yi sa en xun ma. 6 En barikan bira Alatala xa, a mi tinxi en yaxune yi en jian. 7 Nxu bata nxu sɔto alo xolina a sɔtɔma xoli suxuna lutin na kii naxan yi. Lutin bata bolon, nxu xɔrɔya! 8 En ma maliin kelima Alatala nan yii naxan ariyanna nun dunuɲa daxi.

125 Ala Batu Banxi yisiga betina. Naxanye e yigi sama Alatala yi, na kanne ligaxi nɛn alo Siyon Geyana, naxan luma a funfuni habadan, a mi mamaxe

mume! 2 Yerusalen rabilinxi geyane ra kii naxan yi, Alatala fan a muxune rabilinma na kii nin, keli to ma han habadan! 3 Amasɔto tinxintarene mi luyɛ tinxin muxune yamanan xun na mume, alogo tinxin muxune fan nama fe jaxin liga. 4 Alatala, fe fajin naba na kanne xa naxanye fan e nun naxanye sɔndɔmɛn fan. 5 Koni, naxanye kira tinxintarene fɔxɔ ra, Alatala xa ne nun fe jaxi rabane jian e bode xɔn ma. Ala xa bɔɲɛ xunbenla fi Isirayila ma.

126 Ala Batu Banxi yisiga betina. Alatala mɔn faxina en tan muxu suxine ra Siyon taani, a liga nɛn en yɛɛ ra yi alo xiye na a ra! 2 En gele nɛn han, en yi sɛwa betine ba! Siyaan bonne yi a falama nɛn, e naxa, “Alatala bata fe gbeene liga e xa.” 3 Alatala bata fe gbeene liga en xa, en birin bata sɛwa. 4 Alatala, i mɔn xa nxɔ yamanan sɛnbɛ so alo tulɛn fama igen na xude wuli yixaren na kii naxan yi. 5 Naxanye sansiin wolima e wugama, ne sɔnxɔma nɛn sɛwani se xabadɛni. 6 Naxanye sigama wuge sansi wolideni, ne xɛtɛma gele nɛn malo xidine ra e xun ma.

127 Ala Batu Banxi yisiga betina, Sulemani gbeena. Xa Alatala xa mi banxin tima, banxi tiine wali fuun nan kema. Xa Alatala xa mi taan makantan, taa kantanne fe fuun nan xun na. 2 E kurunma walideni fuyan, e kɔɛ rasoma fuyan, e balon sɔtɔma tɔrɔn nin. Anu, Ala balon soma a xanuntenne yii nɛn, e saxi. 3 Alatala diine fima muxune ma nɛn e kɛɛn na. E findixi kɔntɔnna nan na Alatala naxan fima. 4 Xɛmɛn dii xɛmɛn naxanye sɔtɔma banxulanyani, ne ligaxi nɛn alo xalimakunla sofaan yii kii naxan yi. 5 Sewan na xɛmɛn xa xalimakuli wuyaxin naxan yii. E nun a yaxune na kiti, a mi yagima.

128 Ala Batu Banxi yisiga betina. Sewan na kanne xa naxanye gaxuma Alatala yɛɛ ra, naxanye birama a kiraan fɔxɔ ra. 2 I wali xɔnna i makone fanma nɛn. I sɛwama nɛn i mɔn yi sabati. 3 I ya jaxanla diine barima nɛn alo wudi bili bogilana. I ya dii xɛmɛne i ya tabanla rabilinma nɛn alo oliwi wudi binle. 4 Muxun naxan gaxuma Alatala yɛɛ ra, na kanna dubani itoe nan sɔtɔma. 5 Alatala xa barakan sa i ya fe yi keli Siyon yi! Ala xa i Yerusalen sabatixin to i siin birin yi! 6 Ala xa i i mamandenne to! Ala xa bɔɲɛ xunbenla fi Isirayila ma.

129 Ala Batu Banxi yisiga betina. E n yengema xabu n dii jɔrɛ waxatini, Isirayila kaane fan xa a fala, e naxa, **2** “E en yengema xabu en dii jɔrɛ waxatini,” koni e mi en nɔ. **3** E bata n fanna makorondon, alo xɛn bi daxina. **4** Koni Alatala tinxin, a bata nxu nun muxu jaxine tagi bolon. **5** Muxun naxanye Siyon najaxuxi, Ala xa ne yagixin naxetɛ. **6** E xa liga alo sexen naxan solima banxin fari, sogen yi a xara ayi. **7** Muxun naxan a xabama hali yii fe kedenna a mi a sɔtɔma, hali xidi kedenna a raxidi muxun fan mi a sɔtɔma. **8** Dangu muxune mi a falama e xa, e naxa, “Alatala xa barakan sa ɛ fe yi.” Hanma e naxa, “Nxu dubama ɛ xa Alatala xinli.”

130 Ala Batu Banxi yisiga betina. Alatala, n bata n xui ramini i ma tɔroni. **2** Marigina, n xuiin name, i yi i tuli mati n ma maxandi xuiin na. **3** Alatala, xa i nxu suxu nxu hakene ra, Marigina, nde luma a yalagitaren na? **4** Koni i tan nan nxu mafeluma nxu hakene ra, nxu yi gaxu i yɛɛ ra. **5** N yengi saxi Alatala nan ma, n niin taxuxi a ra, n xaxili tixi a falan nan na. **6** N yengi tixi Marigin na alo taa kantanne yengi kuye yibaana ma kii naxan yi. **7** Isirayila, i yengi ti Alatala ra, amasɔtɔ a hinan, a nɔɛ i xunbe nɛn. **8** A tan nan Isirayila rakisima a haken birin ma.

131 Ala Batu Banxi yisiga betina, Dawuda gbeena. Alatala, n mi fa waso, n mi kanba. N mi fa n xaxinla rasigama feene ma sɔnɔn, naxanye gbo dangu n na, naxanye magaxu n yɛɛ ra yi. **2** Koni n bata n xaxinla raxara, n yi n sabari, n nii yifanxi n ma alo dii jɔrena a nga fema. **3** Isirayila, i yengi ti Alatala ra fɔlɔ to ma han habadan!

132 Ala Batu Banxi yisiga betina. Alatala, Dawudaa fe xa rabira i ma, e nun a tɔrɔne birin. **2** A tan nan a kɔlɔ Alatala xa, a yi a dɛ ti Yaxubaa Ala Senbɛmaan xa. **3** A naxa, “N mi soma n konni, n mi n sama n ma saden ma, **4** n mi tinjɛ n yi kinsan hanma n yi xi, **5** han n yiren fen Alatala xa, Yaxubaa Ala Senbɛmaan luma denaxan yi.” **6** Nxu bata a fe mɛ Efarata yi, nxu bata a to Yaari taan nabilinni. **7** E naxa, “En siga Alaa banxini, en yi en xinbi sin a san bun.” **8** Alatala, keli, i fa i dɔxɔdeni, i tan nun i ya kankirana, i senben naxan yi. **9** Ala xa i ya saraxaraline findi tinxin muxune ra, i ya tɔgɔndiya muxune yi sɔnxɔ sewani. **10** I nama i ya manga sugandixin nabɛnin, i ya walikɛɛn Dawuda fe ra. **11** Alatala bata a kɔlɔ Dawuda xa, a mi a

kale mumɛ! A naxa, “N ni i ya dii xɛmɛna nde nan sugandima, a ti i funfuni mangan na. **12** Xa i ya dii xɛmɛne n ma layirin suxu, e nun n ma maxadi xuine, n na e xaranma naxanye ma, e diine fan dɔxɔma nɛn i ya mangaya gbɛdeni han habadan.” **13** Alatala bata Siyon sugandi a dɔxɔden na. **14** A bata a fala, a naxa, “N luma be nin habadan. N waxi mangayaan liga feni be nin. **15** N baraka gbeen sama nɛn Siyon ma baloni, n donseen so a tɔrɔ muxune birin yii. **16** N kisin fima nɛn a saraxaraline birin ma, a tɔgɔndiya muxune yi sɔnxɔ sewani. **17** N mangana nde raminima nɛn Dawuda yixetene yɛ mɛnni, na yi lu n ma manga sugandixin funfuni. **18** N na a yaxune rayagima nɛn, koni a mangayaan taxamasenna nɔrɔma nɛn han!”

133 Ala Batu Banxi yisiga betina, Dawuda gbeena. Fe fajin na a ra e nun sewana, ngaxakedenne na lu e bode xɔn bɔjɛ xunbenli. **2** A luxi nɛn alo ture xiri jaxumen naxan sama Haruna xunni, a godo a dɛ xaben ma han a domaan kɔɛɛn xɔn. **3** A luxi nɛn alo xiila naxan kelin Xerimon geyaan fari godo Siyon geyaan ma. Amasɔtɔ Alatala habadan nii rakisin duban nagodoma mɛnna nin.

134 Ala Batu Banxi yisiga betina. Alatalaa walikene birin xa a tantun, naxanye birin xima a batue a banxini, ɛ fa a tantun. **2** E ɛ yiine yite yire sarijanxini, ɛ Alatala tantun! **3** Alatala xa i baraka keli Siyon yi, a tan naxan kore xɔnna nun bɔxɔ xɔnna daxi.

135 Tantunna Ala xa! E Alatala xinla tantun! E tan Alatalaa walikene, ɛ a tantun. **2** E tan naxanye tixi Alatalaa banxini naxanye en ma Alaa banxin tanden ma. **3** Tantunna Ala xa! Amasɔtɔ Alatala fan. E a tantun betine yi, amasɔtɔ a dija. **4** Alatala nan Yaxuba sugandixi a yetɛ xa, a yi Isirayila findi a gbeen na. **5** N na a kolon fa fala Alatala gbo, en Marigin gbo alane birin xa. **6** Kore xɔnna nun bɔxɔ xɔnna ma, fɔxɔ igene nun yire tilinxine birin yi, naxan na rafan Alatala ma, a na nan ligama. **7** A bata foyen nun tulɛn nakeli bɔxɔn danna ra, a kuye sarinna ramini e nun tulɛna, a foyen nakeli a ramaradeni. **8** A yi dii singene nun xuruse dii singene faxa Misiran yamanani. **9** A yi kabanako feene liga ɛ tan Misiran kaane tagi, Firawona nun a kuntigine birin xili ma. **10** A siya wuyaxine halagi, a yi manga senbɛmane faxa, **11** sa fɔlɔ Amordine Manga Sixɔn ma, e nun Basan Manga Ogo e nun mangan naxanye birin Kanan yamanani.

12 A yi e bəxəne so Isirayila yii e keən na, a findi a yamaan keən na. 13 Alatala, i xinla fe luma nen habadan! Mayixetene nun mayixetene e xaxili luma i xən ma nen. 14 Alatala a muxune xun mayenge kitin sama nen. A kininkinin a walikene ma. 15 Gbetin nun xemaan nan tun siyane suxurene ra! 16 E deen na, koni e mi fala tima. E yeene na, koni e mi sese toma. 17 E tunle na, koni e mi fefe mema. Niiraxili yo mi e yi. 18 Naxan na e rafala, a a yigin sa e yi, na fan luma nen alo e tan. 19 E tan Isirayila yamana, e Alatala tantun. E tan saraxaraline, e Alatala tantun. 20 E tan Lewi bənsənnə, e Alatala tantun. E tan a yeeragaxu muxune, e Alatala tantun. 21 Barikan bira Alatala xa Siyon yi, a tan naxan luma Yerusalen taani. Tantunna Ala xa!

136 E Alatala tantun amasəto a fan. A hinanna luma nen habadan! 2 E alane Ala tantun. A hinanna luma nen habadan! 3 E marigine birin Marigin tantun. A hinanna luma nen habadan! 4 A tan nan keden pe kabanako feene ligama. A hinanna luma nen habadan! 5 A bata ariyanna rafala a xaxilimayani. A hinanna luma nen habadan! 6 A bata bəxən ti tilinne fari. A hinanna luma nen habadan! 7 A bata yanban seene da kore xənnə ma. A hinanna luma nen habadan! 8 Sogen mangayaan ligama yanyin nan na. A hinanna luma nen habadan! 9 Kiken nun sarene mangayaan ligan kəeen nan na. A hinanna luma nen habadan! 10 A yi Misiran kaane dii singene faxa. A hinanna luma nen habadan! 11 A ti Isirayila muxune yee ra keli Misiran yamanani. A hinanna luma nen habadan! 12 A na liga a senbe gbeen nan na. A hinanna luma nen habadan! 13 A yi Gbala Baani taxun a tagi. A hinanna luma nen habadan! 14 A yi a muxune ragidi a tagi, Isirayila kaane. A hinanna luma nen habadan! 15 A yi Firawona nun a sofane radin Gbala Baani. A hinanna luma nen habadan! 16 A ti a muxune yee ra tonbonni. A hinanna luma nen habadan! 17 A yi manga gbeene faxa. A hinanna luma nen habadan! 18 A yi manga senbemanə faxa. A hinanna luma nen habadan! 19 A yi Amorine manga Sixən faxa. A hinanna luma nen habadan! 20 A yi Basan kaane manga Ogo faxa. A hinanna luma nen habadan! 21 A yi e bəxən so a yamaan yii e keən na. A hinanna luma nen habadan! 22 A yi findi Isirayila keən na, a walikəna. A hinanna luma nen habadan! 23 A jəxə lu nen en tan yiigelitəne xən. A hinanna luma nen habadan! 24 A yi en xəwəya

en yaxune ma. A hinanna luma nen habadan! 25 A tan nan donseen soma niimaseen birin yii. A hinanna luma nen habadan! 26 E Ala tantun naxan kore! A hinanna luma nen habadan!

137 Nxu yi dəxi Babilən xude deene yi waxatin naxan yi nxu wugama, nxu yi lu nxu mire Siyon ma. 2 Nxu yi nxə bəlonne singan na yamanan wudi tofəpine ra. 3 Muxun naxanye nxu suxu, ne yi betine maxədin nxu ma. Nxu jaxankata muxune yi sewa betine maxədin nxu ma, e naxa, “E Siyon betina nde ba nxu xa.” 4 Nxu tan betin bama Alatala xa di xəne taani? 5 Xa n jinan i xən Yerusalen, Ala xa n yiifanna faxa n ma. 6 Xa n jinan i tan xən, xa n mi lu Yerusalen yatə n ma sewan birin yi, Ala xa n deen suxu! 7 Alatala, Edən kaane fe xa rabira i ma, e yi naxan falama Yerusalen suxu ləxəni, e naxa, “E a kala, e taan naxəri fefe!” 8 I tan Babilən taana, i halagima nen fefe! Sewan na kanna xa naxan i ya donla saranma alo i a ligaxi nxu ra kii naxan yi, 9 naxanye e dii futene tongoma e yi e yigolən fanyen ma.

138 Dawuda gbeena. Ala, n bata i tantun n bəjəni fefe! N betin bama Ala yetagi. 2 N na n xinbi sinma i ya Banxi Sarijanxin yetagi, n yi i xinla tantun i ya hinanna nun i ya lannayana fe ra. Amasəto i bata i de xuiin nafisa i xinla yeteen xa. 3 N ni i xili waxatin naxan yi, i n yabi nen, i yi n senbe so, i n xaxili ragidi. 4 Alatala, dunujə mangane birin i tantunma nen, e na i ya falane me waxatin naxan yi. 5 Alatala, e i kewanle matəxəma nen betini, amasəto i ya binyen gbo. 6 Hali Alatala to mate, a yengi dəxi muxu dijəxine xən, koni a yeən tixi wasodene ra wulani. 7 Xa n sigan tima tərəni, i n nakisima nen, i yi n yaxune yenge i senbeni, n kisi i senben xən. 8 Alatala feene rajanma a fajin nan ma n xa. Alatala i ya hinanna luma nen habadan! I nama i wali xənnə rabəpin.

139 Dawudaa betina, beti baane kuntigin xa. Alatala, i bata n fese fese, i n kolon. 2 I n sa waxatin nun n keli waxatin birin kolon. Hali i makuya n na, i n ma miriyane birin kolon. 3 I a kolon n nema sigatini hanma n nema saxi, i n kewanle birin kolon. 4 Alatala, benun n xa falan ti waxatin naxan yi, n naxan falama i na kolon ki fajə. 5 I n nabilinni, n yee ra e nun n xanbi ra. N ni i tan nan yii. 6 Na fe kolonna magaxu n tan yee ra yi. A dangu n na, n mi nəe a

yigbe mum! 7 N nœ sigē minen, n yi n luxun i ya Nii Sarijanxin ma? N sigan minen yi, n keli i tan yetagi? 8 Xa n te ariyanna yi, i na yi. N na siga laxira yi, i na yi. (Sheol h7585) 9 Hali n siga han sogetedeni, hanma n sa dōxō fōxō igen xanbi ra, 10 i tima nen n yēē ra mēnna fan yi, i mi n nabepinjye mum! 11 Xa n na a fala, n naxa, “N xa n luxun dimini. Kenēnna xa findi kōēēn na n nabilinni.” 12 Koni sese mi dimin na i tan yēē ra yi, kōēni yalan alo yanyina i tan yēē ra yi. Dimin nun yanyin birin lan i tan xa. 13 I tan nan n sōndōmēn daxi, i tan nan n saxi nga fatini. 14 Ala, n ni i tantunma, amasoto n da kiin magaxu, i kewanle magaxu. N na a kolon n niini ki fajni. 15 N fati benden mi yi luxunxi i tan ma, i to yi n nafalama suturani i yi n dama nga kui waxatin naxan yi. 16 I yi n toma benun n fatin xa yelin nafale. I bata yi n ma siimayaan xasabin sebe i ya kitabun kui, benun a xa fōlō waxatin naxan yi. 17 Ala, i ya miriyane famu raxōlō n xōn. E xasabin wuya! 18 Xa n na e yate, e wuya mējensinna xa. N na xulun waxatin naxan yi, n mōn luma i tan nan fema. 19 Ala, a yi lan nun i xa muxu jaxine faxa! Faxe tiine, ē masiga n na. 20 E fala jaxine tima, e i xili kala. I yengefane i xinla falama fuun nin. 21 Alatala, n mi muxune rajaxue ba naxanye i rajaxuma? N bata n mē na muxune ra naxanye murutexi i xili ma. 22 E mi rafan n ma mum! N bata e yate yaxune ra. 23 Ala, n fesefese i yi n bōjēni feen kolon. N mato, i yi n ma miriyane kolon. 24 A mato, xa n kira jaxin nan xōn, i siga n na habadan kira fajin xōn ma.

140 Dawudaa betina, beti baane kuntigin xa. Alatala, n xunba muxu jaxine yii. N natanga gbalotōne ma. 2 E fe jaxi yitōnna nin waxatin birin. E yenge ralanna nin lōxō yo lōxō! 3 Fala xōlene nan e lenne ma alo sapina. E fala xuine xōlō alo koson xōlena. Beti xuini te. 4 Alatala, n natanga muxu jaxine senben ma. N nakisi gbalotōne ma, naxanye kataxi n nabira feen na. 5 Muxu wasoxine bata lutin nati n yēē ra. E bata e gbatune rati kiraan xōn ma n suxu xinla ma. Beti xuini te. 6 N bata a fala Alatala xa n naxa, “N ma Ala nan i tan na. Alatala n ma maxandi xuiin name!” 7 Marigina Alatala, n nakisi senbena, i n xun mayengema yenge so waxatini. 8 Alatala, i nama tin muxu jaxine waxōn feen yi liga. I nama tin e fe nataxine yi kamali, e yi waso ayi. Beti xuini te. 9 I nama tin n yaxune yi nōōn sōtō. Ala xa n yaxune gbalō falane so e xun na. 10 Ala xa tēē wolonne bōxōn e ma.

Ala xa e woli ayi tēēni. Ala xa e woli yinla kui e mi nœ tē naxan na. 11 Nafigine mi luma yamanani. Ala xa yihadin so gbalotōne xun na. 12 N na a kolon a Alatala kiti kenden sama tōrō muxune xa, a yi yiigelitōne xun mayenge kitin sa. 13 Tinxin muxune i tantunma nen yati! Muxu fajine yi lu i yetagi.

141 Dawudaa betina. Alatala, n bata n xui ramini i ma, fa n mali mafuren! N na i xili, i tuli mati n na. 2 N ma maxandin xa lu alo wusulanna i yetagi. N yiine yitexin xa liga alo jinbari ra saraxana. 3 Alatala i yengi dōxō n fala xuiin xōn, i yi n deen kantan. 4 I nama tin n bōjēn yi lu fe jaxini, n nama fe jaxine liga nxu nun fe jaxi rabane. Nxu nama nxu dege nxu bode xōn. 5 N tinma nen tinxin muxun yi n bōnbō, bayo hinanna na a ra. A rafan n ma, a yi n kawandi. Na luxi nen alo turen na susan n xunni. N mi tonde na ma. Koni n na Ala maxandima nen fe jaxi rabane wanle xili ma. 6 E mangane radinma nen geyaan san bun fanyene ma, muxu jaxine yi a kolon nayi a jōndin nan n ma falane ra. 7 Xēēn bima kiin de, bōxōn yi buxa, nxu xōnne xuyama ayi na kiini laxira so deen na. (Sheol h7585) 8 Marigina Alatala, n yēēn tixi i tan nan na. N na n luxunma i tan nin, i nama tin n faxa. 9 N natanga na lutine ma e naxanye ratixi n yēē ra e nun fe jaxi rabane wosone. 10 Ala xa muxu jaxine suxu e yetena luti ratixine ra, koni n tan xa dangu bōjē xunbenli.

142 Dawudaa fala jaxumena, a yi faranna ra waxatin naxan yi. Ala maxandina. N na n xui raminima Alatala ma, n yi a mafan. 2 N na n kōntōfili feene birin fala a xa, n yi n ma tōrōne birin yita a ra. 3 Wēkilen na jian n yi, i tan n sigaden kolon. N sigan tima kiraan naxan xōn, e bata woson nati n yēē ra na xōn ma. 4 N dēxōn to, muxune mi e jōxō luma n tan xōn. Luxunde yo mi fa n tan ma. Muxu yo mi kōntōfilixi n ma fe ra. 5 Alatala, n ni i tan nan mafanma. N naxa, “I tan nan n luxunden na. I tan nan findixi n gbeen na bōxō xōnna fari.” 6 I tuli mati n ma mawuga xuiin na. Amasoto n bata xadan. N xunba n sagatan muxune yii. Amasoto e senben gbo n xa. 7 N namini kasoon na, alogo n xa i xinla tantun. Tinxin muxune yi n nabilin bayo i bata fe fajin naba n xa.

143 Dawudaa betina. Alatala, n ma maxandi xuiin name! I tuli mati n xuiin na. N yabi i ya tinxinna nun i ya hinanna nin. 2 I nama n tan i ya

walikeen makiti, bayo muxu yo mi tinxin i tan yetagi. **3** N yaxuna n sagatanma, a yi n nabira boxoni, a yi n lu dimini alo muxu singe faxaxine. **4** Wekilen bata jnan n yi, n senbe mi fa na sonon. **5** N na n mirima waxati danguxine ma. I feen naxanye birin nabaxi, n na n mirima ne ma, n na n mirima i kewanle ma. **6** N na n yiine tima i tan nan xa. N niin xaraxi i yetagi alo boxo xarena. Beti xuini te. **7** Alatala, n yabi iki sa! N niin janmatoon na a ra. I nama i yetagin luxun n ma. Xanamu n sama faxa muxune fari nen. **8** Benun xotonni, i xa n yabi i ya hinanni. Amasoto n na n yigi saxi i tan nin. A yita n na n lan n xa sigan ti kiraan naxan xon. Amasoto n na n niin taxuxi i tan nan na. **9** Alatala, n xunba n yaxune yii. N na n luxunxi i tan nan fema. **10** N xaran i sagoon ligan ma, bayo n ma Ala nan i ra. I ya Nii fajin xa n xali boxo fajini. **11** Alatala siimayaan fi n ma i xinla fe ra. I xa n ba teroni i ya tinxinni. **12** N yaxune de xidi i ya hinanni. N yengefane halagi, amasoto i ya walikeen nan n na.

144 Dawuda gbeena. Barikan bira Alatala xa, n kantan muxuna, naxan n maxaranma yenge sodeni. **2** A tan nan hinanma n na, n ma yinna, n ma faran makantanxina, n xunba muxuna, e nun n ye masansan wure lefana. N na n luxunma a tan nin. A tan nan siyane luma n sanna bun. **3** Alatala, nanse muxun na alogo i xa i joxo lu a xon? Nanse adamadiin na alogo i xa i miri a ma? **4** Adamadiin luxi nen alo foyedina. A siimayaan luxi nen alo nininna naxan danguma. **5** Alatala, kuyen tintin, i godo. I yiin din geyane ra, e tutin xa te. **6** Kuye sarinne rasiga, i yi yaxune raxuya ayi. I ya xalimakunle woli, i yi e kedi. **7** I yiin nagodo keli kore, i yi n ba tilinna ma. N ba xojene senben bun **8** naxanye wulen falama, naxanye mi e fala xuine rakamalima. **9** Ala, n beti nenen bama nen i xa, n yi i tantun kondenna ra. **10** A tan nan mangane rakisima. A tan nan a walikeen Dawuda rakisima silanfanna ma. **11** N xunba, i n ba xojene senben bun ma, naxanye wulen falama, naxanye mi e fala xuine rakamalima. **12** Ala xa en ma dii xemene rasabati alo wudi binle. Ala xa en ma dii temene xa tofanye ayi alo geme senbeten nayabuxin naxanye manga banxine bun. **13** Ala xa en ma sagane rafe donseen sifan birin na. Ala xa en ma xuruseene rawuya ayi xeen ma, doxona ma wuli keden han wuli fu. **14** Ala xa en ma jingene rasabati. Ala xa en tanga yengen ma alogo muxu nama suxu, wuga xuiin yi

te taani. **15** Sewan na yamaan xa, na feene ligama naxanye xa. Sewan na yamaan xa, naxanye Ala findixi Alatala ra.

145 Dawuda Ala tantunna. N ma Ala, n ma mangana, n ni i batuma. N barikan birama i xa nen habadan han habadan. **2** Loxo yo loxo n barikan bire i xa. N ni i xinla tantunma nen habadan han habadan. **3** Alatala gbo, a lan a yi tantun. A gboon dan mi na. **4** Mayixetene birin xa i ya wanle fe fala mayixete famatone xa, e yi i kewanle fe yebe e xa. **5** E i ya binye gbeen nun norona fe fala. N luma nen n mire i ya kabanako wanle ma. **6** E xa i senbe magaxuxina fe fala. N tan i ya gbona fe falama nen. **7** E xa i ya nemana fe fala, e yi i ya tinxinna fe rali sewani. **8** Alatala dija, a kininkinin, a mi xolon xulen, a hinanna gbo. **9** Alatala fe fajin nabama muxun birin xa. A kininkininma a daala birin ma. **10** Alatala, i ya dali seene birin i tantunma nen. I ya togondiya muxune birin barikan birama i xa nen. **11** E i ya mangayaan binyena fe falama nen. E mon yi i senbena fe yebe **12** alogo muxun birin xa i kewanle kolon, e nun i ya mangayaan binye gbeena. **13** I ya mangayaan findixi habadan mangayaan nan na. I senben luma nen mayixetene nun mayixetene xun na. Ala a de xuine birin nakamalima, a hinan a daala birin na. **14** Alatala ne malima nen naxanye biraxi, a yi muxune rakeli naxanye felenxi. **15** Birin yeen tixi i tan nan na alogo i xa donseen so e yii a waxatini. **16** I tan nan i yiin nabima, i yi donseen so niimaseene birin yii. **17** Alatala feen birin ligama tinxinna nin. A hinan a kewanle birin yi. **18** Alatala maso na muxune ra naxanye a xilima, naxanye birin a xilima jondini. **19** A a yeeagaxu muxune rafan feene ligama nen, a e xuiin me, a yi e rakisi. **20** Alatala muxune kantanma a rafan naxanye birin ma. Koni a muxu jaxine birin halagima nen. **21** N na Alatala tantunma nen. Dali seene birin xa a xili sarijanxin tantun habadan han habadan!

146 Tantunna Ala xa! N xa Alatala tantun n niini fefe! **2** Fanni n na n nii ra, n na Alatala tantunma nen. Fanni n daxi, n na n ma Ala tantunma nen betini. **3** E nama e yigi sa mangane yi, adamadiine nan ne ra. E rakisi fere yo mi ne xa. **4** E na faxa, e xetema nen bendeni. E fe yitonxine birin kalama na loxon yeteen nin. **5** Sewan na kanna xa, Yaxubaa Ala muxun naxan malima, naxan a yigin sama Alatala yi, a Ala. **6** A tan nan ariyanna nun dunuja daxi e nun e

yi seene birin. A tinxinyaan luma nen han habadan. 7 A tan nan kiti kenden sama muxu jaxankataxine xa, a donseen so kametone yii. Alatala nan kasorasane xunbama. 8 Alatala nan danxutone yee ne rabama ayi. A tan nan muxu mafelenxine rakelima. Tinxin muxune rafan Alatala ma. 9 Alatala nan xojene kantanma. A kana gilene nun kiridine mali. Koni a muxu jaxine fe yitonxine kalama nen. 10 Alatala nan habadan mangan na. Siyon, a tan nan i ya Ala ra habadan han habadan. Tantunna Ala xa!

147 Tantunna Alatala xa! A lan tantun betin xa ba en ma Ala xa. Fe fajin nan a tantunna ra e nun sewana. 2 Alatala mon Yerusalen tima nen. A mon fama na muxu suxine ra nen Isirayila kaan naxanye bata yi xuya ayi nun. 3 A muxune dandan naxanye boje ye kalaxi. A yi e maxolodene maxidi. 4 A tan nan sarene xasabin nagidima, a yi e birin xili sa. 5 Nxu Marigin gbo, a senben magaxu. A xaxilimayaan dan mi na. 6 Alatala muxu limaniyaxine malima nen. Koni a muxu jaxine rabirama nen boxoni. 7 E barika bira betin ba Alatala xa. E tantun betin ba en ma Ala xa bolonna ra. 8 A tan nan kundani fulunxi kore xonna ma. A yi tulen nafa boxoni. A yi sexen nasoli geyane ma. 9 A xuruseene balon nagidi e ma. A xoline dege e na e xui ramini a ma waxatin naxan yi. 10 Soo kendene xa mi a kenenna. A mi sewama muxun senben fan na. 11 Koni naxanye gaxuxi Alatala yee ra, e xaxili tixi a hinanna ra, ne nan a rasewama. 12 Yerusalen kaane, e Alatala binya. Siyon kaane, e Ala tantun. 13 Amasoto a bata taan so deen senbe so, a yi taa yi kaane baraka. 14 A tan nan boje xunbenla fima e yamanan ma, a balo fajin fi e ma. 15 A yi a de xui tongoxine rafa boxon ma, a falan yi siga ayi mafuren. 16 A kundani fulun alo dugi fixena, a ige xundin xuya boxon ma alo xubena, 17 a balabalan kesen nagodo. Nde nae a xunbenla raxanye? 18 Koni a falan ti nen, ige xundin yi xuya ayi. A foyen nafa, igene yi godo. 19 A yi a falane makenen Yaxuba bonsonna xon. A bata tonne nun sariyane sebe Isirayila xa. 20 A mi na joxonna ligaxi siya gbete yo xa. E mi a sariyane kolon. Tantunna Alatala xa!

148 Tantunna Ala xa! E tan naxanye kore xonna ma, e Alatala tantun. E tan naxanye kore, e a tantun. 2 E tan a malekane birin xa a tantun. E tan a ganla birin, e a tantun. 3 Sogen nun kiken a, e a tantun. E tan saren naxanye yilenma, e a tantun. 4 E a

tantun, e tan naxanye ariyanna yi, e nun e tan igen naxanye kore walaxan fari. 5 E Alatala xinla tantun! Amasoto e daxi a yamarin nan bun ma. 6 A yi e ti e funfuni habadan han habadan. A yi yamarin fi naxan mi matande mume. 7 E Alatala tantun boxo xonna fari, e tan ige yi sube magaxuxine, e tan foxo igen tilinne, 8 kuye sarinna, balabalan kesena, kundaan nun ige xundina, foye gbeen naxan a falan suxu, 9 e tan geyane nun yire matexine, wudi bogilane nun sumanne birin, 10 burunna subene nun xuruseene, xoline nun bubu seene, 11 boxon mangane nun siyane birin, e tan kuntigine nun kitisaan naxanye birin boxon ma, 12 banxulanne nun sungutunne, xeme fonne nun dii jorene, 13 e birin xa Alatala xinla tantun! A xili keden peen nan binyaxi. A tan nan naon nabama boxon nun koren xun na. 14 A bata a togondiya muxune senbe so. Isirayila muxune rafan a ma han! Tantunna Alatala xa!

149 Tantunna Ala xa! E beti nenen ba Alatala xa. E a tantun a togondiya muxune malanni. 2 Isirayila muxune, e sewa, a tan nan e daxi. Siyon muxune xa jaxan e mangan na. 3 E xa e bodon, e yi Ala tantun, e tanbanna nun bolonna maxa a xa. 4 Alatala muxune a kenenna, naxanye limaniyaxi, a ne rakisima nen. 5 Togondiya muxune xa jaxan, e binyen fi Ala ma, e sonxo sewani e sadene ma. 6 E xa lu Ala tantunje, e yi silanfan de firin kanna suxu e yii, 7 e e gbeen joxo siyane ra, e siya gbete ne jaxankata. 8 E yi yolonxonna sa e mangane ma, e yi e kuntigine xidi wuren na. 9 E yi e jaxankata alo e yalagi feen sebexi kii naxan yi. A togondiya muxune birin ma xunna kenla nan na ra. Tantunna Alatala xa!

150 Tantunna Alatala xa! E Ala tantun a yire sarijanxini, e a senben tantun kore xonna ma. 2 E a tantun a wali gbeene fe ra. E a tantun bayo a gbo han! 3 E a tantun xota xuiin na. E a tantun bolonna nun kondenni. 4 E a tantun tanbanni e nun sewa fare bodonni. E a tantun maxa se luti kanne nun xulenne ra. 5 E a tantun karijanne ra. E a tantun karijan xui gbeene ra. 6 Niimaseene birin xa Alatala tantun! Tantunna Ala xa!

Sandane

1 Dawuda dii xemen Sulemani a sandane, Isirayila Mangana. **2** Sandani itoe sebexi nen alogo muxune xa fe kolonna nun xurun soto e yi xaxilimaya falane famu **3** alogo e xa xuru, e xaxili soto e tinxinna nun kiti sa kenden nun fe fajin liga, **4** fe kolontarene yi e joxo lu, foningene yi kolonna soto, e feene ye fen. **5** Fe kolonne xa itoe rame, e yi e fe kolonna fari sa, xaxilimane yi fatan muxune maxade **6** alogo e xa sandane nun taline bunna kolon e nun fe kolonne wundo falane nun e maxodin tilinxine. **7** Xaxilimayaan foloma Alatala yeeragaxun nan ma. Fe kolonna nun xurun najaxu xaxilitarene nan ma. **8** N ma diina, i fafe nema i xuru falane tiye, i tuli mati a ra, i nama i ngaa kawandi falane bejin. **9** E luxi nen alo mangaya komotina i xunna alo jierena i koe i maxidi seen na. **10** N ma diina, xa yulubitone kata i mayendendeni, i nama tin de! **11** Xa e a fala i xa, e naxa, "Fa nxu foxo ra! En sa dexo muxuna nde yee ra, en yi a faxes. En sa fu sontarena ndee ma, **12** en yi e jiejene ralo ayi alo gaburun muxun gerunma kii naxan yi, e gbindic birin alo en tan nan yi sayaan na. (Sheol h7585) **13** En se fajni kenden sifan birin sotoma nen en yi en ma banxine rafe se tongoxine ra. **14** Nxu na seene yitaxun, i fan i gbeen sotoma nen, en ma gbetine birin yi malan gbeti sase kedenna kui." **15** N ma diina, i nama bira ne foxo ra mume! I nama bira ne kiraan foxo ra de! **16** E gima siga fe jaxin nabadeni, e mafura wunla ramine. **17** Naxan na lutin nati xoline yee ra xoline yeen tixi a ra, a na ligan nen fufafu. **18** Muxu sifani ito lutin natima e yete nan yee ra, e yanfan soma e yete nan ma. **19** Awa, naxanye kunfama se mujaxine xon, ne niin luma na nin. **20** Xaxilimayaan falan tima kirane xon, a xuini te yamaan malandeni, **21** a sonxoma kira xunne ma yamaan gbo denaxan yi, a kawandin ba taan so deene ra. **22** A naxa, "E tan fe kolontarene, fe kolontareyaan nafanje e ma han waxatin mundun yi? E tan magele tiine, magelen nafanje e ma han waxatin mundun yi, xaxilitarene yi kolonna najaxu? **23** N na e sonna fala, e n xuiin name. Nayi, n nan n ma niin sa e yii, n yi n ma falane makenen e xa. **24** Koni bayo n bata e xili, e tondixi n ma xinla ratinge, n yi n yiini bandun e xa, e mi a suxu, **25** e yi e me n ma maxadi xuine birin na n yi e sonna fala e xa, e mi na yate, **26** nayi, gbalon na e soto, n fan gelema e ma nen. Fe magaxuxin na e soto, n yi e magele. **27** Fe

magaxuxin fama e ma nen alo tule gbeena, gbalona e sotoma alo foye gbeen na keli, torooyaan nun nii yiforen yi e yili." **28** "Na waxatini, e n xilima nen e malideni koni n mi e yabima, e yi n fen koni e mi n toma. **29** Amasoto e bata kolonna najaxu, e yi e me Alatala yeeragaxun na, **30** bayo e mi tin n ma maxadi xuine rame, n to e sonna fala e xa, na yi najaxu e ma. **31** E sigati kiin saranna sotoma nen, e wasa e kewanle ra. **32** Amasoto fe kolontarene faxama nen e dina suxutareyani, xaxilitarene yi halagi e bote rabani. **33** Koni naxan na a tuli mati n na, na ratangama nen a lu boje xunbenli toron mi a magaxuma."

2 N ma diina, xa i n ma falane suxu, xa i n ma yamarine suxu, **2** xa i fe kolonna xaranne rame, i yi kata e famudeni, **3** xa i xaxilimayaan fen, i yi i xui ramini a famun feen na, **4** xa i a fen alo gbetina, i yi a xon fen alo nafulu luxunxina **5** nayi, i Alatala yeeragaxun famuma nen i yi Ala kolonna soto. **6** Amasoto Alatala nan fekolonna fima, kolonna nun xaxilimayaan fataxi a falane nan na. **7** A muxu fajine malima, naxanye sigan tima fetareyani, a ne ye masansanma alo wure lefana e rabilinni. **8** Naxanye sigan tima tinxinni, a ne ratangama. A yi a muxu togondiyaxine kantan. **9** Xa i n xuiin name, i tinxinna nun kiti sa kenden nun fe fajin nun kira fajin birin famuma nen. **10** Amasoto fe kolonna luma nen i yi, kolonna yi i nii yifan i ma. **11** I na feene ye fen, na i ratangama nen famun yi i kantan. **12** E yi i xunba kewali jaxin kiraan ma, e i ratanga wuledene falane ma **13** naxanye kira tinxinxin bejinma e siga kira yidimixine xon **14** naxanye sewan fe jaxin ligadeni, e yi jaxan fe jaxin na tinxintareyani **15** naxanye sigati ki mi tinxin, e kewanle kobi. **16** I xunbama jaxalan yalunxin yii na kii nin. Muxu gbetena jaxanla mi noe i rakunfe fala jaxumene ra, **17** jaxanla naxan bata a me a xemen na a dexo xemen naxan xon a sungutun waxatini a yi jinan na futu layirin xon a naxan xidi Ala yetagi. **18** A kewanle findima bonon nan na a ma, a sigati kiin yi a xali sayani. **19** Naxan na siga a konni, na mi fa xetema a mi fa nii rakisin kiraan masotoma mume! **20** I sigama muxu fajine kiraan xon na kii nin, i lu tinxinyaan fari. **21** Amasoto muxu fajine siimayaan sotoma nen yamanani. Fe mi muxun naxanye ra, ne luma nen yamanani. **22** Koni muxu jaxine bama nen yamanani, yanfantenne yi raxori.

3 N ma diina, i nama jinan n ma xaranna xon, i xa n ma yamarine suxu, **2** amasoto e i ya siimayaan xonkuyama ayi nen, i ya boje xunbeli jeene yi fari sa. **3** Hinanna nun lannayaan nama jan i yi, e bira i koe jeren na, i e sa i bojeni. **4** Nayi, i marafanna nun xili fajin sotoma nen, Ala nun muxune ra. **5** I yigin sa Alatala yi i bojen ma feu! I nama la i ya xaxilimayaan na. **6** I xa Ala kolon i ya feene birin yi, a tan yi i ya kirane matinxin. **7** I nama i yete yate fe kolonna ra. Gaxu Alatala yee ra, i masiga fe jaxin na. **8** Na findima nen kendeyaan na i fatini, a yi i xonne senbe so. **9** Alatala binya i yii seene ra e nun i ya bogi se xabaxi singene. **10** Nayi, i ya sagane rafema nen kenken, i ya kundine yi rafe manpaan nenen na han e boxon a ma. **11** N ma diina, Alatala nema i xure, i nama yo na ma. A nema i sonna yite i ra, i nama xolo. **12** Amasoto Alatala a xanuntenne xuruma, alo dii fafan nafaan dii xemena. **13** Sewan na kanna xa, naxan na fekolonna soto, naxan na famunna soto. **14** Amasoto a tonon gbo dangu gbetin na, a seen naxanye sotoma, ne fisa xemaan xa. **15** A fan dangu boxo bun nafunla ra, i waxon se yo mi noe se a ma. **16** A siimaya xonkuyen fima muxun ma, a nafunla nun binyen fi a ma. **17** A kirane birin fan, boje xunbenla nan ne ra. **18** Naxanye fekolonna fenma a findixi siimaya wudin nan na ne xa. Naxanye a sotoma, sewan ne xa. **19** Alatala boxon nafalaxi fe kolonna nan xon, a famun yi kuyen da, **20** tilinne rabixi a kolonna nan ma, kundane yi xiila rafa. **21** N ma diina, xaxilimayaan namara, i feene ye fen, i lu na fari waxatin birin. **22** Na findima nen siimayaan na i niin xa, a lu alo jereena i koe. **23** Nayi, i sigan tima nen xaxili sani i ya kiraan xon, i mi i sanna radinye sese ra. **24** I na i sa, i mi gaxue. I nema saxi, i ya xixonla jaxunma nen. **25** I nama gaxu fe magaxuxi yo yee ra naxan fe sanja ma kedenni, hanma gbalon naxan muxu jaxine sotoma, **26** amasoto Alatala findima nen i ya xaxili ragidin na. A i sanne ratanga luti ratixine birin ma. **27** I nama tondi fe fajin nabe muxune xa, naxanye daxa e a soto, xa ferena i xa. **28** Xa sena i yii iki, i nama a fala i adamadi boden xa, i naxa, "Siga, tila i fa, n na a soma i yii!" **29** I nama fe jaxini ton i adamadi boden xili ma, a nema dxi i fema lannayani. **30** I nama muxun kansun xa yo mi i xa, a mi fe jaxi ligaxi i ra. **31** I nama gbalotxon maxoxolon, i nama a kira yo sugandi. **32** Amasoto muxu jaxin mi rafan Alatala ma, koni Alaa wundo feene muxu fajine nan xa. **33** Alatala dangan

muxu jaxina denbayaan foxo ra, koni a barakan sama nen tinxin muxune konni. **34** A magele ti wasoxine magelema nen, koni a hinanma nen yete magodone ra. **35** Fekolonne binyen nan sotoma e keen na, koni xaxilitarene yagi gbeen nan sotoma.

4 N ma diine, e n tan fafana maxuru falane rame. E liga e yeren ma alogo e xa xaxilimayaan kolonna soto. **2** N yi n ma fe kolon kenden so e yii. E nama n ma xaranna woli ayi. **3** N yi n baba konni waxatin naxan yi, n nga n nafaan nen han alo dii kedenna. **4** N baba yi n xaranma ikiini, a naxa, "N ma falane rame ki faji, i n ma yamarine suxu, alogo i xa kisi. **5** Fekolonna nun xaxilimayaan fen, i nama jinan n ma falane xon. I nama ne sese xon bejin. **6** I nama fekolonna rabepin, a i kantanma nen, a xa rafan i ma, a i ratangama nen. **7** Fekolonna folon findixi xaxili fenna nan na. Hali i soto seene birin fi, alogo i xa xaxilimayaan soto. **8** Fekolonna ramara, a i findima nen muxu gbeen na, i yii firinna dxi a bun, a binyen fima i ma nen. **9** A luma nen alo i xunna na maxidi hinanna ra, alo manga komoti mayilinxin na so i xun na." **10** I tuli mati n ma diina, i tin n ma falan ma, i jee wuyaxi sotoma nen i ya siimayaan na. **11** N bata i xaran fe kolonna kiraan ma, n na i matinxinma sigati ki tinxinna ma. **12** Nayi, i sanna mi raxide siga tideni, i mi bire i gideni. **13** I xurun naxan sotoxi, na ramara, kankan a ma amasoto i ya siimayaan binla na a ra. **14** I nama ti muxu jaxine kiraan xon, i nama bira fe jaxi rabane foxo ra. **15** I masiga e kiraan na. I nama dangu a xon. A matanga, i dangu yire gbete. **16** Muxu jaxin mi noe xiye, xa a mi fe jaxin liga. Xixonla a gima e ma nen, xa e munma muxun nabira. **17** Amasoto e baloma fe jaxin nan na, gbalon nafaan e ma alo e na dolon min. **18** Tinxin muxune sigati kiin fixa alo kuye yi yalanna subaxani, kenenna naxan sigan mine han yanyin yi defe. **19** Koni muxu jaxine sigati kiin findixi dimin nan na. E mi na seen toma naxan e rabire. **20** N ma diina, n ma falane fe liga i yeren ma i yi i tuli mati n xuiin na. **21** I nama jinan e xon, koni e ramara i bojeni. **22** Naxanye birin e sotoma e siimayaan nun kendeyaan nan fima ne ma. **23** I bojen suxu dangu seen birin na, amasoto siimayaan binla nan na ra. **24** I deen natanga wulen ma, i deen nama yanfa falane ti. **25** I yeen xa lu tixi i yee ra, i matoon ti tinxinni i yetagi. **26** I dangu kirani ton, a yelan, i xa siga kira

kendene nan tun xon. 27 I nama kiraan fata yifanna ma hanma komenna ma. I masiga fe jaxin na.

5 N ma diina, n ma fe kolonna fe liga i yeren ma, i tuli mati n ma xaxilimaya falane ra 2 alogo i xa feene ye fen, i lu falan tiye fe kolonni. 3 Yalunden naxanla fala xuiin jaxun nen alo kumina, a fala xuine masalaxun alo turen fatin ma. 4 Koni donxen na, se xolen nan na jaxanla ra alo menla, a maxolon tima nen alo silanfan de firin kannna. 5 A sigati kiin sa tixi sayaan nan ma, a tinxinxu gaburun nan na. (Sheol h7585) 6 A mi tima siimayaan kiraan xon, a bata tantanna kiraan tongo, anu a mi a kolon. 7 N ma diina, nayi n xuiin name, i nama n fala xuine rawoli ayi. 8 Siga kiraan xon naxan makuya na jaxalan sifan na i nama i maso a banxin deen na 9 alogo i nama i ya binyen nadangu muxu gbetene ma, kininkinintaren yi i ya siimayaan kala 10 muxune yi lugo i ya nafunla ra, i ya wanla tonon yi lu muxu gbete xa. 11 Donxen na, i fatin na xunna kala, i fasa, i lu kutunje, 12 i a falama nen, i naxa, “A mi yi rafan n ma nun muxun xa n xuru, naxan na yi n sonna fala, na yi rajaxuma n bojen ma nen han! 13 N mi yi n karamoxone falane ramema, n mi yi n tuli matima e xaranna ra. 14 Iki, n bata fa rajan a jaxin na mafuren yamaan birin yetagi.” 15 Igen min naxan namaraxi i konni naxan minima i yete gbee xoninna ra. 16 I nama lu i gbee tigi igen naxuye ayi taa yi kirane xon a din yamaan malandene ra. 17 A xa findi i kedenna gbeen na! E nun muxu gbete ye nama a taxun i mi naxanye kolon. 18 Ala xa barakan sa i ya tigina fe yi, i yi sewa na jaxanla xon i naxan doko i ya foningeya waxatini 19 naxan nayabu alo xenla, a fan alo bolena. I wasa so a tan nin waxatin birin. A marafanna nama ba i rasewe mume! 20 N ma diina, nanfera gbete a jaxanla xonla i suxuma? Nanfera i marafanna fenma jaxalan gbete ra i mi naxan kolon? 21 Amasoto Alatala muxun birin sigati kiin toma, a kewanle birin nakowsima. 22 Muxu jaxin kewali jaxine nan a suxuma a yulubine yi a xidi alo lutina. 23 Naxan mi noe a yete xure, na a yete faxama nen. A daxuya gbeena a raloma ayi nen.

6 N ma diina, xa i bata de xuiin tongo i muxu gbetena donla goronna tongo, xa i bata layirin xidi muxu gbetena fena nde yi, 2 xa i bata i xunna raso fena nde yi i fala xuiin xon xa i bata suxu i ya tuli sa xuine xon, 3 nayi i xa ito nan liga alogo i xa i yete ba a yi, i to bata bira doli kannna ra. Siga, i sa i yete

magodo, i yi i adamadi boden mafan han! 4 I nama i matabu, i nama i yeen naxi, 5 fanni i munma xunba a yii, alo bolena a yete sotoma donson na kii naxan yi, alo xoliin naxan a yete bama luti ratixin na. 6 I tan muxu narixina, sa dondonla mato. I miri a fe raba kiin ma, i yi fekolonna nde soto. 7 Manga yo mi dondonla xun na, a xun mato muxu mi na, kuntigi mi a ma. 8 Anu, a donseen namarama a waxatini, a balon malanma se xaba waxatini. 9 I tan muxu narixina, i luma saxi han waxatin mundun yi? I kelima xixonli waxatin mundun yi? 10 I na i sa, yeriyerinna yi dangi i ma ndedi, i xi ndedi, i yi i yiine filin e bode ma ndedi, 11 yiigelitoyaan yi бага i ma alo mafu tiina, e nun setareyana alo mujadena. 12 Muxun naxan wule falane tima fuyantenna na a ra, muxu xaxilitarena. 13 A yee ne magirama bodene yanfadeni, a lanfane rakolon a sanne ra wundoni, a yiine maliga. 14 Tinxintareyaan nan a bojeni. A fe jaxini tonma waxatin birin, a yengene rakelima. 15 Nanara, gbalona a sotoma nen xulen, a halagi sanja ma kedenni a yigitge. 16 Se sennin nan na naxanye rajaxu Alatala ma, han se solofere a mi tinje naxanye ma mume: 17 Yee wasoxine, wule fala lenne, sontarene faxa yiine, 18 bojen naxan kote jaxini tonma, sanna naxanye e mafurama siga fe jaxi ligadeni, 19 wule seren naxanye wulen falama, e nun muxun naxan yengene rakelima ngaxakedenmane tagi. 20 N ma diina, i fafe a yamarine suxu, i nama i nga xaranna rawole ayi. 21 E sa i xaxinli habadan, e bira i koe alo jere na. 22 E tima nen i yee ra i ya sigatine yi. E i kantanma nen i ya xixonli, i na keli, e yi i kawandi. 23 Amasoto yamarini itoe luxi nen alo lenpuna, xaranni ito findixi kenenna nan na. I xuru falan naxan i sonna yitama i ra, na i tima siimayaan kiraan nan xon. 24 E i ratangama nen jaxalan yalunxin ma e nun muxu gbetena jaxanla fala jaxumene. 25 I nama kunfa na jaxalan sifan xon a tofanna ma. I nama tin a i rakunfa a mato fajin xon. 26 Amasoto yalunden na feen yatema buru xun kedenna saren nan na, muxu gbete jaxanla i niin nan foxo ra. 27 Muxun noe teen se nen a yibaan kui hali a dugin birin mi gan ba? 28 Muxun noe sigan tiye tee wolonne fari hali a sanne mi gan ba? 29 Na luxi nen alo muxun na bira muxu gbetena jaxanla foxo ra, a na a yiin din a ra, na feen saranma a ra nen. 30 Yamaan mi mujaden najaxuma xa a seen mujaxi alogo a xa kamen ba. 31 Koni hali na, a na suxu, fo a xa a se mujaxin joxon fi doko solofere a yanginna

ra, a yii seene birin yi jnan a konni. **32** Koni xemen naxan na yalunyaan liga na xaxili mi na. Naxan a a liga, a waxi a yete halagi feen nin. **33** A bɔnbɔma nen, a rayarabi, a yagin mi bama a ma. **34** Amasɔto xɔxɔlɔnna xemen naxanema ayi nen, a nema a gbeen jɔxe, a mi kininkininje. **35** A mi yangin yo rasuxe, a mi dije, hali i yanginna fixin na gbo ki yo ki.

7 N ma diina, n ma falane suxu. I n ma yamarine suxu. **2** N ma yamarine suxu alogo i xa kisi. N ma xaranne mara i bɔjeni alo i ye kesene makantanma kii naxan yi. **3** E xidi i yiin na, i yi e sa i bɔjeni. **4** Fe kolonna suxu alo i magilena, xaxilimayana alo i kon kaana. **5** E i ratangama nen yalunde jaxanla ma, e nun muxu gbetena jaxanla marakunfa falane. **6** Lɔxɔna nde, n yi tixi n ma banxi foye soden na n yi tanden matoma, **7** n foninge keden nakɔɔsi banxulan fe kolontarene ye. Xaxili mi yi na banxulanma ma. **8** A yi danguma kiraan xɔn, denaxan maso jaxanla nde konna kira fataden na a yi danguma a banxin mabinni. **9** Sogen godomatoɔn nan yi a ra, kɔena a li waxatin naxan yi, dimin yi so. **10** Naxanla yi mini a ralandeni, a maxidixi alo yalundena, kɔte jaxin yi a bɔjeni. **11** Xurutaren nan yi a ra naxan mi yagima, a mi luye a konni mume! **12** Waxatina nde, a sa kirane xɔn waxati gbete a sa yama malandene yi, a dɔxi xemene yee ra kira xunne birin na. **13** A yi na banxulanma suxu, a yi a sunbu. A yi a fala a xa a yeeni yalanxin na, a naxa, **14** “N bata yi de xuiin tongo n xa bɔje xunbeli saraxan ba Ala xa. To n bata a ba, na suben sa banxini. **15** Nanara, n bata mini i ralandeni. N yi i tan nan fenma, anu n bata i to! **16** N bata n ma sadeni tɔn bitingan fajine ra, Misiran yamanan taa dugine. **17** N bata mirihi latikɔnɔnna sa a ma, e nun wudi ige xiri jaxumen nun sinamon wudi ige xiri jaxumena. **18** Fa be, en fa kafu han xɔtɔnni, en lu marafanna jaxunni! **19** N ma xemen mi banxini, a bata siga yire makuyeni sigatini. **20** A bata a gbete saseen xali, a rafexi, a mi fama fo kiken na kɔxo.” **21** A to fatan falan tiye, a yi a mabandun, a yi a rakunfa a fala jaxumene xɔn. **22** Sanja ma kedenni, a yi bira a fɔxo ra alo jingen naxan sigama a kɔe raxabadeni, alo daxun naxan xidima alogo a xa xuru, **23** han xalimakunla yi a bɔjen sɔxɔn, alo xɔliin naxan so luti ratixin na, a mi a kolon a niin nan bama. **24** Nanara, n ma diine, e tuli mati, e n ma fala xuine fe liga e yeren ma. **25** E bɔjen nama mayenden e bira na jaxalan sifan fɔxo ra, e lo ayi a

kirane xɔn. **26** A bata muxu wuyaxi rabira. A bata xemen yaten naxanye faxa, ne nun gali senbemaan xasabin lan. **27** A banxin findixi gaburun kira yisoxin nan na siga laxira yi. (Sheol h7585)

8 Fe kolonna luxi nen alo muxun naxan xinla tima, fe famunna xa mi a xuini tema iki ba? E mi a meen ba? **2** Fekolonna tixi yire matexine nun kira xunne nan na alo muxuna. **3** A sɔnxɔma taan kirane nun a so deene ra, a naxa, **4** “N na e tan yamaan nan xilima. N falan tima adamadiine birin nan xa. **5** E tan fe kolontarene, e jɔxo lu. E tan xaxilitarene, e findi xaxilimane ra. **6** E tuli mati bayo n ma falan kende. N fala fajine nan tima e xa. **7** N deen jɔndin nan falama, bayo wule falane rajaxu n ma. **8** N de falane birin tinxin, e sese mi findixi wulen na hanma yanfana. **9** E birin fixa xaxilimaan yee ra yi. Naxanye bata kolonna sɔto, ne e yatexi jɔndin nan na. **10** E n ma xaranna fen dangu gbetin na, e nun kolonna dangu xema kenden na. **11** Amasɔto fe kolonna fisa bɔxo bun nafunla xa. A dangu muxun waxɔn seene birin na.” **12** “N tan, fe kolonna, n feene famuma. N muxun malima a xa kolonna sɔto a yi feene ye fen. **13** Alatala yee ragaxun kui, fo i fe jaxin najaxu. N tan, n wason nun yete yigboon nun kewali jaxine nun wule falane rajaxuxi. **14** N gbeen nan maxadin nun miriya kenden na. N tan nan xaxilimaya yeteen na. N tan nan gbee senben na. **15** Mangane mangayaan ligama n tan nan baraka yi, kuntigine yi tɔne dɔxo tinxinni. **16** Yamana kanne nun muxu gbeene kiti tinxinxin sama n tan nan xɔn. **17** N nafan naxanye ma, n fan ne rafanma nen. Naxanye n fenma, ne n toma nen. **18** N nafunla nun binyen fima e ma nen, e nun herisigen naxanye buma e nun tinxinyana. **19** N ma finma seene dangu xema kenden na, N tɔnɔn naxan fima, na dangu gbete kenden na. **20** N kira tinxinxin nan xɔn, kiti kenden sama naxan xɔn. **21** N nafan naxanye ma n keen soma nen ne yii, n yi e banxine rafe nafunla ra. **22** Alatala n tan nan da a wali fɔlon na, benun a wali singe bodene, to mi na ra. **23** N nafala nen xabu waxati fɔlɔne, benun dunuja yeten xa da. **24** N bare, fɔxo ige yo mi yi na, tigi mi yi na igene yi mine denaxan yi. **25** Benun geyane xa dɔxo, benun geyadine xa malan, n yi da. **26** Ala munma yi bɔxɔn nun burunne da, hanma a gbangbanna xɔri singena. **27** A to yi kuyen dama, n yi na, a to yi koren danna kerendenma tilinna ma, **28** a to kundane sa kore, a yi senben fi tilin igene xunne ma,

29 a yi danna sa fɔxo igen ma alogo igene nama dangu na ra a yi bɔxɔn beten sa. 30 Na waxatini n yi walima a dɛxɔn alo a yii rafala kuntigin na. N yi sewaxi lɔxo yo lɔxo a yetagi, n jaxan a fe ra 31 n jaxan a dunuya daxin na, a bɔxɔna. N yi sewa adamadiine fe yi.” 32 “Iki, n ma diine, ε tuli mati n na. Sewan na kanna xa, naxan na bira n ma kiraan fɔxo ra. 33 N nema ε xuru falane tiye, ε tuli mati, ε yi fe kolonna soto, ε nama ε me a ra. 34 Sewan na kanna xa naxan na n xuiin name, naxan na lu n konna de ra lɔxɔn birin a n ma banxin deen kantan. 35 Amasoto naxan na n soto, na bata siimayaan soto, a mon yi Alatala kenɛn. 36 Koni naxan munma n to, na a yete nan tɔroma. Naxan na n najaxu, sayaan nan nafa na ma.”

9 Fe kolonna bata senbeten solofere masoli, a banxin ti alo muxuna. 2 A bata suben jin, a minseen nafala, a donseene dɔxo tabanla ra. 3 A bata a walike jaxanle rasiga e xa sa a xili xuini ito rawanga taan yire matexini, e naxa, 4 “ε tan fe kolontarene, ε fa dangu be binni.” Xaxili mi naxanye ma, a falani ito ti ne ma, a naxa, 5 “ε fa n ma donseene don, ε n ma minseen min n naxan nafalaxi. 6 ε xete ε fe kolontareyaan fɔxo ra, ε kisima nen, nayi ε ti xaxilimayaan kiraan xɔn.” 7 Naxan na magele tiin maxadi, na konbin nan sɔtoma. Naxan na muxu jaxin sɔnna fala a xa, na tɔroma nen. 8 I nama magele tiin sɔnna fala alogo a nama i najaxu, koni i na fe kolonna sɔnna fala a xa, a i xanuma nen. 9 I na fe kolonna maxadi, na nde sama nen a fe kolonna fari. I na tinxin muxun xaran, na a fekolonna nan xun masama. 10 Fe kolonna foloma Alatala yɛragaxun nan ma. Muxu sarijanxine fe kolonna findixi xaxilimayaan nan na. 11 N tan fe kolonna, n na i siin sogene rawuyama ayi nen, n yi jɛɛna ndee sa i ya siimayaan fari. 12 Xa i findi fe kolonna ra, i tan nan a saranna sɔtoma. Xa i findi magele tiin na, i tan nan tɔro sɔtoma. 13 Xaxilitareyaan luxi nen alo jaxanla naxan sɔnxoma. Xurutaren na a ra naxan mi sese kolon. 14 A dɔxi a banxin de ra, taan yire matexini. 15 A lu dangu muxune xile mɛnni naxanye sigama e yɛɛ ra tinxinni. 16 A naxa, “ε tan fe kolontarene, ε dangu be binni.” Xaxili mi naxanye ma, a ne nan xilima. 17 A naxa, “Minseen naxan mujaxi na nan jaxun, donseen naxan donxi luxunni na nan jaxun.” 18 E mi a kolon a faxa muxune nan mɛnni, a na jaxanla a muxu xilixine sigan laxirani. (Sheol h7585)

10 Sulemani a sandane ni itoe ra: Dii fe kolonna a fafe rasewama nen, koni dii xaxilitarena a nga tɔroma nen. 2 Nafunla sɔtɔxina a jaxin na, na tɔno mi na, koni tinxinyaan muxun xunbama sayaan nin. 3 Alatala mi tinxin muxune luye kamen na, koni a muxu jaxine fe nataxine kalama. 4 Muxun naxanye mi walima, ne yiigelitɔyaan nan xilima, koni muxun naxanye tan walima, ne nafunla nan sɔtoma. 5 Muxun naxan se xabaxine malanma a waxatini, xaxilimaan nan na kanna ra, koni naxan xima se xaba waxatini, yagin nan na kanna xa. 6 Tinxin muxune barakan nan xilima e yete ma. Koni muxu jaxine fala xuine gbalo feene nan luxunma. 7 Tinxin muxune fe na rabira muxune ma, e dubama nen e xa, koni muxu jaxine xili kalama nen alo se kunxina. 8 Fe kolonna muxun naxan bɔjɛni, na tinma nen yamarine ma. Koni xaxilitare falane muxun naxan de, bɔnɔn na kanna xa. 9 Fe mi muxun naxan sigati kii ra, na kanna ratangaxi. Koni naxan sigan tima tinxintareyaan kiraan xɔn, na fe makenɛnma nen. 10 Muxun naxan a yɛɛn magirama bodene yanfadeni, na yamaan nan tɔroma. Koni xaxilitare falane muxun naxan de, bɔnɔn na kanna xa. 11 Tinxin muxuna falane fama nii rakisin nan na. Koni muxu jaxine fala xuine gbalo feene nan luxunma. 12 Xɔnnantenyaan yengene nan nakelima, koni xanuntenyaan hakene birin nan janma. 13 Fe kolonna famuma xaxilimana falane nin, koni xaxili mi muxun naxan ma, bosaan nan na kanna xa. 14 Fekolonne kolonna nan namarama, koni xaxilitarene falan kalan nan tima xulen. 15 Nafulu kanna soto seene nan a ratangama alo taa makantanxina. Koni yiigelitɔyaan nan senbetarene kalama. 16 Tinxin muxune saranna nan nii rakisin na. Koni muxu jaxina a soto seene nan tongoma, a yulubin liga. 17 Muxun naxan a xuru falane ramema, na sigan nii rakisin kiraan nan xɔn. Koni, muxun naxan sɔn falama a xa, a mi a suxu, na loma ayi nen. 18 Nafigin nan xɔnnantenyaan luxunma. Koni xaxilitaren nan xili kala falane raxuyama ayi. 19 Falan na wuya ayi, haken fan mi janma. Nayi, xaxilimaan nan a deen suxuma. 20 Tinxin muxuna falane dangu gbeti gbeen na. Koni muxu jaxin bɔje yi feen tɔnɔn mi na. 21 Tinxin muxuna falan tɔnɔn muxu gbegbe ma, anu, xaxilitarene faxama bayo e mi e mirima. 22 Nafunla sɔtoma Alatala barakan nin. A mi tɔroya yo sama a fari. 23 Fe jaxi ligan findixi sabaan nan na xaxilitaren yii. Koni xaxilimayaan findixi sewan nan

na xaxilimaan yii. **24** Muxu jaxin gaxuma naxan yee ra, na a sötöma nen. Koni tinxin muxun tan a waxon feene nan sötöma. **25** Foye gbeen neen fa dangu, muxu jaxine bata raxori, koni tinxin muxun luma nen habadan. **26** Muluxunna jinne ramuluxunma, tutin fan yeene tötöma, muxu narixin fan na kii nin a xe muxun xa. **27** Alatala yeeragaxun muxune siimayaan xonkuyama ayi, koni muxu jaxine siin janma nen sinma. **28** Tinxin muxune xaxili tixi sewan nan na, koni muxu jaxine yigin kalama nen. **29** Alatala kiraan findixi yigiyaden nan na tinxin muxune xa, koni a fe jaxi rabane kalama nen. **30** Sese mi tinxin muxun nabire, koni muxu jaxine mi nœ luye yamanani. **31** Xaxilima falane minima tinxin muxun nan de. Koni wule falane lenne xabama a ra nen. **32** Xa tinxin muxun falan ti, fanna na a ra, koni muxu jaxine deen fe jaxin nan falama.

11 Sikeela naxan muxun mayendenma na findixi fe jaxin nan na Alatala yee ra yi. Koni ligase senseenne a kenengi. **2** Wason fama marajaxun nan na. Koni yete magodon fama fe kolonna nan na. **3** Muxu fajine fetareya wanle nan e tima kira fajin xon. Koni yanfantenne tinxintareyaan nan e halagima. **4** Sese mi nafunla ra Ala kiti sa lœxoni. Koni tinxinna nan muxune xunbama sayaan ma. **5** Sontarene tinxinyaan nan e kiraan fixama. Koni fe jaxin nan muxu jaxin nabirama. **6** Muxu fajine tinxinyaan nan e xunbama, koni kunfa jaxine findima luti ratixin nan na yanfantenne yee ra. **7** Muxu jaxin na faxa, a yigin birin bata kala, a xaxili tixi senben naxan na, na bata lo ayi. **8** Muxu tinxinxin xunbama nen a tœroyani, na tœroyaan yi sa muxu jaxin sötö a funfuni. **9** Ala kolontarena a adamadi bodene halagima a fala xuiin nan na. Koni tinxin muxune xunbama e fe kolonna nan xon. **10** Xa tinxin muxune sewa, taan birin nan jaxanma. Koni muxu jaxine na faxa, jaxajaxan nan na ra. **11** Taan sabatima muxu fajine duban nan xon. Koni a kalama nen muxu jaxine de xuiin ma. **12** Naxan na a adamadi boden najaxu, na xaxili mi na. Koni xaxilimana a dunduma nen. **13** Mafala tiin wundo feene nan naminima kenenni. Koni lannaya muxuna e ramarama nen. **14** Xa maxadin mi na, yamaan birama nen. Koni kisin na a ra xa kawandi muxune wuya ayi. **15** Naxan na a bodena donla goronna tongo, na tötöma nen yati. Koni naxan na tondi na de xui sifane ma, na kanna luma makantanna nin. **16** Naxalan fajin

binyen nan sötöma. Koni xajeden tan nafunla nan sötöma. **17** Lannaya muxuna a yete nan malima. Koni kininkintarena a yete nan tötöma. **18** Muxu jaxine walima nen fuu! Koni naxan na tinxinyaan liga, na saran kenden nan sötöma. **19** Tinxinyaan fama nii rakisin nan na. Koni naxan na lu fe jaxin fœxo ra, na faxama nen. **20** Muxu bœje jaxine mi rafan Alatala ma. Koni fe mi naxanye sigati ki ra, ne nan a kenengi. **21** Muxu jaxine saranma nen e kewanle ra. Koni tinxin muxune xunbama nen. **22** Naxalan tofajin na findi xaxilitaren na, na luxi nen alo xema wuredin xœsen jœœen na. **23** Tinxin muxun waxon feen nan fe fajin na, koni muxu jaxine natan nan xœlon na. **24** Muxuna ndee kiin tima e findi nafulu kanne ra, gbeteye yi kuma ayi, e findi yiigelitœne ra. **25** Muxun naxan luma dube bonne xa, na bannama nen. Naxan bonne nii yifanma e ma, na fan nii yifanma a ma nen. **26** Naxan na maala malan, a tondi a matiye, yamaan na dangama nen. Koni naxan na a mati, yamaan dubama nen na fan xa. **27** Naxan na fe fajin fen na rafan muxune ma. Koni naxan na fe jaxin fen, na yati a sötöma nen. **28** Naxan na la a nafunle ra, na birama nen. Koni tinxin muxune sabatima nen alo jœxœndena. **29** Naxan na a denbayaan tœro na mi kee sötöma fo foyena. Xaxilitarene luma nen fe kolonne konyiyani. **30** Tinxin muxune kewanle luxi nen alo siimaya wudina. Fe kolonna naxan yi, na muxune niin nan nakisima. **31** Tinxin muxuna a saranna sötöma dunuja yi, e faxi fa muxu jaxine nun yulubi kanne.

12 Xurun naxan naxan ma, fe kolonna fan naxan na kanna ma. Naxan mi tinje bonne xa a sœnna fala a xa, xaxilitaren nan na kanna ra. **2** Muxu fajin Alatala kenenna. Koni Alatala kœtade jaxin yalagima nen. **3** Muxun mi sabatima fe jaxin xon. Koni tinxin muxune salenne bitinma nen ken. **4** Naxalan kenden nan a xœmena xunna kenla ra. Koni jaxalan yagitaren luxi nen a xœmen xa alo xœri xœle furena. **5** Tinxin muxune miriyane findixi kiti kenden nan na. Koni muxu jaxine fe yitœnxine yanfan nan tima. **6** Muxu jaxine falane findixi faxa ti woson nan na. Koni muxu fajine de xuina e xunbama nen. **7** Muxu jaxine na bira, e raxœrima nen. Koni tinxin muxune denbayaan sabatima nen. **8** Muxun matœxœma a xaxilimayaan nan ma fe ra. Koni naxan bœje jaxu, na rajaxuma nen. **9** A fisa walike keden yi lu i yii, i lu muxudiyani, benun i xa i yete findi muxu gbeen na, donseen yi dasa i ma.

10 Tinxin muxuna a yengi dɔxɔma a xuruseene xɔn nɛn. Koni kininkinin mi muxu jaxine yi mumɛ! 11 Naxan na a bɔxɔn nawali, na lugoma nɛn. Koni naxan na bira fe fuune fɔxɔ ra, na xaxili mi na. 12 Muxu jaxine kunfama se mujaxine nan xɔn. Koni tinxin muxune salenne sabatin nɛn. 13 Muxu jaxina hake falane a suxuma nɛn alo luti ratixina. Koni tinxin muxun futuxuluma nɛn tɔɔyaan yii. 14 Muxun fala xuiin nan a ralugoma se fajine ra, a wali xonna yi findi a saranna ra. 15 Xaxilitarena a yete sigati kiin nan yatexi kira kenden na. Koni fe kolonna nan a tuli matima maxadi xuine ra. 16 Xaxilitarena a xɔlɔn mayitama nɛn mafuren. Koni xaxilimaan yagi feen suturama nɛn. 17 Naxan na sereyaan ba jɔndini, na tinxinna nan fenma. Koni wule seren yanfan nan tima. 18 Naxan na falan ti a xunna yi, na muxune bɔjɛn nan kalama alo degemaan nan segen tima. Koni fe kolonne falane dandanna nan tima. 19 Nɔndin luma nɛn habadan. Koni wulen sii mi na. 20 Naxanye fe jaxine yitɔnma, yanfan nan ne bɔjɛni. Koni sewan na kanna xa naxan bɔjɛ xunbenla rasoma. 21 Fe jaxi yo mi tinxin muxune liye. Koni fe jaxin nan muxu jaxin sɔtɔma han a wasa. 22 Wule falane mi rafan Alatala ma. Koni jɔndi falane rafan a ma. 23 Xaxilimana a kolonna luxunma nɛn. Koni xaxilitarene e daxuyaana nawangama nɛn. 24 Naxanye walima a xɔdɛxɛn na, ne mangayaan sɔtɔma nɛn. Koni salantenna rapanma konyiyaan nin. 25 Kɔntɔfinla muxun bɔjɛn tɔɔma nɛn. Koni fala fajina a rasewama nɛn. 26 Tinxin muxun findixi yeeratiin nan na a xɔyin xa. Koni muxu jaxine kirana e ralɔma ayi nɛn. 27 Salantenna na mini donsoyani, a mi sube gan daxin sɔte. Koni naxan walima a xɔdɛxɛn na, na se kenden nan sɔtɔma. 28 Siimayaan sɔtɔma tinxinna kiraan nan xɔn. Na kiraan mi tinxinxɪ sayaan na.

13 Diine fafe nɛma e xuru falane tiye xaxilimane e tuli matima a ra nɛn. Koni magele tiin na maxadi, a mi na ramɛma. 2 Muxun balo fajin sɔtɔma a fala xuine nan xɔn. Koni tinxintarene kunfahi gbalon nan xɔn. 3 Naxan na a dɛɛn suxu, na a niin natangama nɛn. Naxan falan tima jaxi ra, na bɔnɔn nan fenma a yete xa. 4 Muxu narixin kunfama seene xɔn anu sese mi a yii. Koni naxanye walima, ne wasama nɛn feu. 5 Wulen najaxu tinxin muxun ma. Koni muxu jaxin xunna godon nun yagin nan xilima a yete ma. 6 Fe mi naxan sigati ki ra, tinxinyaan na rakantanma nɛn. Koni fe

jaxin nan yulubitɔɔn nabirama. 7 Muxuna nde a yete findima se kanna ra, anu sese mi a yii. Muxu gbete a yete findima setaren na, anu nafulu gbeena a yii. 8 Muxuna nafunla nɔe a xunbe nɛn. Anu, muxune mi e kɔnkɔma yiigelitɔɔn tan ma. 9 Tinxin muxune luma sewan nin kɛnɛnyani. Koni muxu jaxine luxi nɛn alo lenpun na tu. 10 Wason yengene nan nakelima. Koni naxanye e tuli matima maxadi xuine ra, fe kolonyaana ne nin. 11 Seen naxanye sɔtɔxi a jaxin na mafuren, ne sigan janje nɛn. Koni naxanye sɔtɔxi a fajin na ndedi ndedi, ne xun masama nɛn. 12 Yigi makuyen muxun tunnaɔlɔma a ma nɛn. Koni muxun waxɔn feen na liga a xa, na a nii yifanma a ma nɛn alo siimaya wudin yetena. 13 Naxan na a mɛ maxadi xuiin na, na kanna a saranna sɔtɔma nɛn. Naxan fan na yamarin suxu, na fan a saranna sɔtɔma nɛn. 14 Fe kolonne xaranna fama nii rakisin nan na, a muxun ba sayaan lutin na. 15 Xaxilimaan muxune kɛnɛn. Koni yanfantenna kiraan mi rapanma a ma. 16 Xaxilimaan feen ligama a kolonna nan xɔn. Koni xaxilitarena a daxuyaana nawangama. 17 Xɛra jaxin birama kɔntɔfinla nin. Koni xɛra tinxinxin dandanna nan tima. 18 Naxan mi a tuli matiye a xuru falane ra, na yiigelitɔyaan nun yagin sɔtɔma nɛn. Koni naxan na a tuli mati a sɔnna fala muxune ra, na binyama nɛn. 19 Muxun waxɔn feen na liga, na a nii yifanma a ma nɛn. Koni a mi rafan xaxilitarene ma, e xete fe jaxin fɔxɔ ra. 20 Naxan nun fekolonne sigan tima, na fe kolonna tima nɛn. Koni xaxilitarene xɔyine tɔɔma nɛn. 21 Tɔɔyaan yulubitɔɔn nan fɔxɔ ra. Koni herin nan tinxin muxun saranna ra. 22 Muxu fajin kɛɛn luma a mamandenne yeɛ ra nɛn. Koni yulubitɔna nafunle sa findima tinxin muxune nan gbee ra. 23 Yiigelitɔne xɛɛn naxan bima na donse gbeen nan fima. Koni kiti sa kobina a birin naminima nɛn. 24 Naxan mi a diin bulanma a sɔnne ma, na kanna diin mi rafan a ma. Koni naxan a diin xanuxi, na kanna a xuruma nɛn. 25 Tinxin muxuna a degema nɛn han a lugo. Koni muxu jaxin luma nɛn kamen na tun.

14 Naxalan xaxilimana a denbayani tɔnma nɛn, koni xaxilitarena a gbeen kalama nɛn a yete ra. 2 Naxan sigati kiin fan, na gaxuma Alatala nan yeɛ ra. Koni naxan sigan tima tinxintareyani, na Ala rapaxuma nɛn. 3 Wason nan sabatixi xaxilitaren dɛ, koni fekolonne falane e rakantanma nɛn. 4 Xa tura mi na, sagani gelima nɛn, bayo jingen fangan

nan xεε biin tɔnɔn gboma ayi. **5** Sere tinxinxin mi wulen falama, koni wule seren wulen nan falama. **6** Magele tiin fe kolonna fenma nen, a mi a toma. Koni fe kolonna sɔtɔn mi raxɔlɔ xaxilimaan xɔn. **7** I makuya xaxilitaren na, amasɔtɔ fe kolonna falan mi a dε. **8** Xaxilimana a mirima a sigati kiin nan ma, na nan a fe kolonna ra. Koni xaxilitaren yanfan naxanye soma, ne nan a daxuyaana na. **9** Tagi yitɔnna bɔtε mi xaxilitarene xa, koni jenige fajiyaana toma muxu fajine nan tagi. **10** Muxun nan a bɔjen xɔlɔ feen kolon, muxu gbete mi nɛ a sewan fan kolonje. **11** Muxu jaxine banxin kalama nen. Koni muxu fajine bubun sabatima nen. **12** Kirana nde tinxin adamadiin yεε ra yi, koni a rajanma sayaana nan ma. **13** Muxun gele nen, a bɔjen tɔrɔxi, dɔnxen na sewan yi findi sunun na. **14** Dεnkeleyataren wasama nen a kewanle tɔnɔn na, koni muxu fajin fisa a xa. **15** Fe kolontaren la fena ngaan na, koni xaxilimana a mirima nen a sigati kiin ma. **16** Fekolonna gaxun fe jaxin na nen, a masiga a ra, koni xaxilitaren susuma a ra nen, a so a yi. **17** Naxan xɔlɔn mafuren, na xaxilitareyaana nan ligama, kɔtade jaxin najaxu muxune ma. **18** Kɔmɔyaana nan fe kolontarene yii e kεen na, koni kolonna luxi alo xaxilimane mangaya taxamaseri kɔmɔtina. **19** Muxu jaxine e mafelenma muxu fajine nan bun ma, fe jaxi rabane yi lu tinxin muxune dεen na. **20** Yiigelitɔɔn najaxu hali a lanfane ma, koni nafulu kanna xɔyine wuya. **21** Naxan a adamadi boden najaxuma, hake kanna nan na ra. Koni sewan na kanna xa naxan kininkininma yiigelitɔne ma. **22** Naxanye fe jaxini tɔnma, ne mi lɔma ayi ba? Koni naxanye fe fajin mirima, hinanna nun lannayaana ne nan xa. **23** Tɔnɔn wali xɔdexe birin yi koni falan gbansanna fama yiigelitɔyaana nan na. **24** Nafunla luxi nen alo fekolonne mangaya taxamaseri kɔmɔtina, koni xaxilitarene daxuyaana najanma daxuyaana nan ma. **25** Sere jɔndi falan muxune niine rakisima, koni wule seren yanfan nan soma. **26** Naxan gaxuxi Alatala yεε ra, na ratangaxi, yigiyadena a diine xa. **27** Siimayaana binla nan Alatala yεεragaxun na, a muxun bama nen sayaana lutin na. **28** Yamaan na gbo ayi, mangana binyen nan na ra, yamaan na xurunje ayi, kalan nan na ra mangan ma. **29** Naxan dija, na famunna gbo. Koni naxan xɔlɔn xulen, na a xaxilitareyaana nan mayitama. **30** Bɔje xunbenla nan kendeyaana na fatin xa. Koni xɔxɔlɔnna findixi furen nan na fatini. **31** Naxan na sɛnbetarene jaxankata, na e da mangan

nan najaxuxi. Koni naxan na hinan tɔrɔ muxune ra, na bata Ala binya. **32** Muxu jaxina wali jaxin nan a rabirama, koni hali sayaana tinxin muxun li, a yigiyaden sɔtɔma nen. **33** Fe kolonna xaxilimaan nan bɔje yi, koni hali xaxilitarene yε, a makεnεnxi. **34** Tinxinyaana nan yamanan nasabatima, koni yulubin findixi yagin nan na siyane ma. **35** Walike xaxilimaan nafa mangan ma, koni naxan marayagin tima, a xɔlɔma nen na ma.

15 Yabi fajin xɔlɔn janma nen, koni fala xɔlɔn xɔlɔn fari saan nen. **2** Fe kolonne falane kolonna nan sɛnbε soma, koni daxuya falan nan minima xaxilitaren dε han! **3** Alatala yεen yiren birin na, a muxu jaxine nun muxu fajine rakɔsima. **4** Fala fajin luxi nen alo siimaya wudina, koni yanfantanya falan muxun niin nan tɔrɔma. **5** Xaxilitaren fafe a kawandi xuiin mi rafan a ma, koni naxan a tuli matima a sɔnna fala muxun na, xaxilimaan nan na ra. **6** Nafulu gbeen luma nen tinxin muxuna banxini, koni muxu jaxine sɔtɔ seen fama kɔntɔfinla nan na. **7** Fe kolonne falane kolonna nan naxuyama ayi, koni xaxilitarene bɔjen mi na kiini. **8** Muxu jaxine saraxan findixi haramun nan na Alatala xa, koni muxu fajine maxandin nafa Alatala ma. **9** Muxu jaxine kiraan najaxu Alatala ma. Koni naxan tinxinna fenma na rafan a ma. **10** Naxan na kiraan bejin, na kanna xuruma nen ki xɔdεxeni. A mi rafan naxan ma a sɔnna xa fala, na kanna faxama nen. **11** Alatala laxira nun yahannama yiren birin toma, e faxi fa naxan muxun bɔjeni! (Sheol h7585) **12** Maxadin mi rafan magele tiin ma, a mi sigama fekolonne fεma. **13** Sewan yetagini yalanma nen, koni nii yifɔrεn fama bɔje kalan nan xɔn. **14** Xaxilimaan kolonna nan fenma a bɔjeni. Koni daxuya falan nan tun xaxilitaren dε. **15** Yiigelitɔne siimayaana findixi tɔrɔn nan na, koni naxan bɔje sewaxi, na luma jaxanxi nen waxatin birin. **16** A fisa i ndedi sɔtɔ i lu Alatala yεεragaxuni, benun i xa nafulu gbeen sɔtɔ kɔntɔfinli. **17** Bogi seene gbansanna donna fisa xanuntenmane tagi, dangu jinge raturaxin suben donna ra xɔnnantenyani. **18** Muxu bɔje gbeen yengen nan nakelima. Koni muxu dijnaxin tan yengen naxunbelima nen. **19** Muxu narixina kiraan nafexi janle nan na, koni muxu fajina kiraan malaxun nen. **20** Dii xaxilimana a baba rasεwama nen, koni xaxilitarena a nga xurunma nen. **21** Xaxilitareyaana findixi sewan nan na xaxilitaren xa, koni xaxilimana kiraan tinxin nen. **22** Maxaditareyaana nan fe yitɔnxine

kalama, koni e sonoyama nen xa maxadi tiine wuya. 23 Sewan na ra muxun xa, a na yabi fajin ti. Falan naxan tima a waxatini, na tonon gbo han! 24 Xaxilimana dunuya yi gidin kiraan tema nen han kore xonna, a yi a tanga laxira ma. (Sheol h7585) 25 Alatala wasodene banxine rabirama nen, koni a kaja gilena boxon danne luma nen e kiini. 26 Miriya jaxine mi rafan Alatala ma, koni fala fajine sarijan. 27 Tonon soto ki jaxin naxan naxan ma, na kanna gbalon nan nasoma a denbayani, koni naxan mi dimi yi seene rasuxuma mayifuni, na siimayaan sotoma nen. 28 Tinxin muxuna a mirima nen, benun a xa yabin ti, koni muxu jaxin fala jaxin nan tima han! 29 Alatala makuya muxu jaxine ra, koni a tinxin muxune maxandi xuine ramema nen. 30 Yee yiyalanna muxune bojen nan nasewama, xerayaan fala fajin muxun senbe soma nen. 31 Naxan na a tuli mati maxadi xuine ra naxanye muxun nakisima, na kanna luma nen fe kolonne ye. 32 Naxan na tondi xure, na mi rafan a yeten ma, koni naxan na a tuli mati a sonna fala muxune ra, na xaxinla nan sotoma. 33 Fe kolonna sotoma Alatala yeeragaxun nin, yete magodon nan fama binyen na.

16 Adamadiin feene natama a bojeni nen, koni Alatala nan feene ragidima. 2 Muxuna kirane birin sarijan a yete yee ra yi, koni Alatala nan muxun kui feene fesefesema. 3 I ya wanle taxu Alatala ra, alogo e xa sonoya. 4 Bunna Alatala kewanle birin na, hali muxu jaxina, a daxi gbalon laxon nan yee ra. 5 Muxu wasoxine rajaxu Alatala ma, a e fe jaxin saranma e ra nen yati. 6 Muxun haken mafeluma hinanna nun lannayaan nan xon. Muxuna a masigama fe jaxin na Alatala yeeragaxun nin. 7 Xa muxun sigati kiin naxan Alatala ma, a lanna rasoe hali e nun a yaxune tagi. 8 A lan ndedi yi lu i yii tinxinni, benun tonon gbeena tinxintareyani. 9 Muxuna a siga kiraan natama a bojeni nen, koni Alatala nan a sanna tidene ragidima. 10 Mangana Alaa falane nan tima, a mi kitin se tinxintareyani. 11 Sikeli tinxinxine birin fataxi Alatala nan na. A tan nan wali xori ligaseene birin na. 12 Kewali jaxine mi rafan mangane ma, bayo tinxinna nan e mangayaan senbe soma. 13 Tinxin muxuna falan naxan mangane ma, jondi falan naxan e ma. 14 Mangana xolon faxan nan tima, koni xaxilimaan fatan a raxunbele. 15 Mangan na sewa, siimayaan na a ra, a fanna luxi nen alo kundaan naxan fama tulen na. 16 Fe kolonna soton tonon gbo dangu xemaan na pon!

Xaxilimayaan soton fisa gbetin xa ki fajin! 17 Muxu fajine kiraan mi sigama fe jaxin mabinni. Naxan na a yengi doko a sigati kiin xon, na a niin nakantanma nen. 18 Kalan fama wason nan xon. Naxan na a yete yite, na fe godomatoon nan na ra. 19 A fisa i lu magodoni yiigelitone ye, benun e nun wasodene xa se mujaxine yitaxun. 20 Naxan na a miri ki fajin, na herin sotoma nen. Sewan na kanna xa naxan na a yigi sa Alatala yi. 21 Fekolonna naxanye boje yi a falama nen ne ma a xaxilimane, fala fajin xaxinla nan xun masama. 22 Siimayaan binla nan xaxilimayaan na xaxilimane xa. Xaxilitareyaan nan xaxilitarene jaxankatan na. 23 Fe kolonne bojen nan fala fajin naminima e de, xaxilimaya falane nan e de. 24 Fala fajine findixi kumin nan na, e jaxun muxun niini e soma han muxun xonne alo senna. 25 Kirana nde tinxin adamadiin yee ra yi, koni a rajanma sayaan nan ma. 26 Walikeen kuiin nan a rawekilema wanla ma, kamen yi a karahan a xa lu wale. 27 Fuyantenna fe jaxini tonma, a deen muxune ganma alo halagi ti teena. 28 Muxu jaxin matandi feene nan nakelima, nafigin fan xoyimane yitaxunna nen. 29 Gbalotona a adamadi boden nakunfama nen, a yi a ti kira jaxin xon. 30 Naxan a yeen magirama, na fe jaxini tonma. Naxan a de kidin xinma, na bata yelin fe jaxin lige. 31 Xunsexe fixene luxi nen alo mangaya komoti binyena, naxan sotoma tinxinyaan kiraan xon. 32 Muxu dijaxin fisa yenge so senbemaan xa. A fisa muxun xa a yete suxu, benun a xa taana nde suxu. 33 Masensen ti seene bama adamadina yiibaan nin, koni Alatala nan a feene birin nagidima.

17 A fisa buru dungin xaren yi lu i yii xaxili sani benun banxin xa rafe suben na lantareyani. 2 Walike xaxilimaan fisa wali kanna diin xa, naxan yagi feen nabama. Na walike sifan keen sotoma nen na denbayani. 3 Gbetin nun xemaan nasensenma sulun teen nan na, koni Alatala nan adamadiine bojen fesefesema. 4 Fe jaxi rabaan fala jaxin nan namema. Wule falana a tuli matima fala xolen nan na. 5 Naxan na yiigelitoon magele na bata yiigelitone dali mangan nayeifu. Naxan na sewa a bodena toron na, na feen saranma na kanna ra nen. 6 Mamandenne findixi fonne xunna kenla nan na. Fafane fan findixi diine xunnayerenna nan na. 7 Yeti yigbo falane mi daxa komon de, wulen fan mi lan mangan de. 8 Finma seen luxi nen alo xiriyana a fi muxun xa. A na siga dede, a

feene sonoyama nen. **9** Naxan muxune mafeluma e haken na, na xanuntanyaana nan fenma. Koni naxan luma muxune hakene fe rabire e ma, na xoyimane taxunma nen. **10** Maxadi keden peen xaxilimaan maliye dangu bosaan ye keme ra xaxilitaren ma. **11** Fe jaxi rabaan muruten nan tun fenma, koni xera kininkinintaren sigama nen a xili ma. **12** A fisa i naralan sube xapen na naxan ma diiye baxi a yii, benun i xa naralan xaxilitaren na a xaxilitareyani. **13** Naxan na fe fajin jaxo fe jaxin na fe jaxin mi a masige na kanna banxin na mume. **14** Fe matandi rakenla luxi nen alo i na igen nati gbligbinla bo a ra. A yi fisa i yi na feen lu na, benun yengen xa bira ayi. **15** Naxan yoon fima kala tiin ma e nun naxan tinxin muxun yalagima ne firinna sese mi rafan Alatala ma. **16** Gbetin tonon nanse ra xaxilitaren yii? A mi na rawalima fe kolonna soto feen na. A xaxili yo mi na. **17** Muxun xoyina a xanuxi waxatin birin. Muxuna ngaxakedenna daxi toro waxatine nan ma fe ra. **18** Xaxilitaren nan muxu gbetena donla goronna tongoma, a yi a yete doro tolimani a xa. **19** Yengen nafan naxan ma, haken fan nafan na kanna ma. Naxan na a yete yigbo, na gbalon nan foxo ra. **20** Boje jaxin mi herin sotoma. Naxan fala tinxintaren tima, na biran toron nin. **21** Naxan na xaxilitaren bari, na yagima nen, komon baba mi sewama. **22** Boje sewaxin kendeyaan nan nasonyama, koni nii foren fatin soma a ra nen. **23** Muxu jaxin dimi yi seen nasuxuma mayifuun nin a kiti jaxin sa. **24** Xaxilimaan biraxi fe kolonna nan foxo ra, koni xaxilitarena a yeene rasigama boxon nan xun xon. **25** Dii xaxilitarena a baba raxoloma nen a findi xolen na a nga xa. **26** A mi lan tinxin muxun xa yangin. Sariya mi a ra muxu kenden yi bulan. **27** Naxan na a deen suxu, na bata fe kolonna soto. Xaxilimaan sabari nen. **28** Hali xaxilitaren yatexi fekolonna ra, xa a sabari. Xaxilimana a deen suxe nen.

18 Muxun naxan a danna, na tonon fenma a yete nan xa. A bojen tema nen xaxilimaya falane birin ma. **2** Fe famunna bote mi xaxilitaren xa, fo a yete miriyane fala fena. **3** Muxu jaxin na fa, maraxaxun fan yi fa. Konbin fama yagin nan na. **4** Adamadiine falane luxi nen alo tilinna, koni fe kolonna luxi nen alo tigi igen naxan tema ayi. **5** A mi lan muxu jaxin xa rafisa bodene xa, hanma muxun yi tondi kiti kenden se tinxin muxun xa. **6** Xaxilitarena falane fe matandin nan nakelima, a bonbo a de xuiin ma. **7** Xaxilitaren

dena a halagima nen, a fala xuine findixi luti ratixin nan na a xa. **8** Nafgina falane luxi nen alo donse jaxumen naxan godon muxun kui. **9** Naxan tunna xolo a wanli na nun se kalan birin muxu keden. **10** Alatala xinla muxun natangama alo yin barakaxina, tinxin muxuna a gima nen a siga a kui, a lu makantanni. **11** Nafulu kanna keen findixi a taa makantanxin nan na. A miriyani, yinna na a ra naxan mi noe kale. **12** Muxuna wasona a xalin kalan nan ma, koni binyen sotoma yete magodon nan xon. **13** Naxan yabin tima benun a xa a tuli mati, daxuyaana nan na ra, e nun yagina! **14** Muxuna limaniyaana nan a malima a fureni. Koni xa a nii yiforo a ma, nde a rasewama? **15** Xaxilimaan fe kolonna nan sotoma a bojeni. Fekolonne e tuli matima fe kolonna nan na. **16** Finma seen kiraan nan nabima a fi muxun yee ra, siga muxu gbeene fema. **17** Naxan singe na a yaxasari masa, na maliga yo kanna ra, han a yengefaan yi fa maxodinna ti. **18** Masensenna sonxo sonxone raxunbelima nen, a yengene jan senbemanen tagi. **19** Xa muxuna a ngaxakedenna konbi na bojen xodoxoma ayi nen a ma dangu taa makantanxin yinna ra. Fe matandine xodoxo manga banxin deen balan wurene xa. **20** Muxun fala xuine nan balon sotoma a xa. Falan naxan minima a de, na nan a ralugoma. **21** Sayaana nun siimayaan binla findixi falan nan na. A rafan naxan ma, na a tonon sotoma nen. **22** Naxan na jaxanla soto, na bata herin soto, a Alatala fanna nan sotoxi. **23** Yiigelitoon falan tima mafanna nin, koni nafulu kanna yabi xodexen nan tima. **24** Xoyi wuyaxi noe finde nen bonon na muxun ma. Koni xoyina nde na, na lannayaan dangu ngaxakedenna ra.

19 A fisa muxun yi findi yiigelitoon na fetareyani, benun a xa findi wule fala xaxilitaren na. **2** Wekilen tonon mi na fe kolonna xanbi. Naxan na san mafura ayi, na sinma nen yinla ra. **3** Adamadina a sigati kiini doxoma a xaxilitareyaana nan xon, a fa xolo Alatala ma. **4** Nafunla muxun xoyine rawuyama ayi nen, koni yiigelitoon xoyina a makuyama a ra nen. **5** Wule serena fe saranma a ra nen. Naxan wulen falama, na mi xunbama. **6** Muxu wuyaxi kuntigin mafanma. Naxan muxune kima, na xoyin nan birin na. **7** Xa yiigelitona ngaxakedenne birin a rapaxuma, a xoyine e makuyama a ra nen dangu ne ra! Hali a lu e foxo ra, a e mafan han, e mi fa toma. **8** Naxan na findi xaxilimaan na, na niin nafan a ma. Naxan na xaxinla fen, na bata herin soto. **9** Wule serena

fe saranma a ra nen. Wule falan halagima nen. 10 A mi daxa xaxilitaren xa lu jaxunni, konyin fan mi lan a kuntigine yamari. 11 Xaxilimaan dija. Xunna kenla na a ra a xa, a na muxuna nde mafelu a haken na. 12 Mangana xolon luxi nen alo yatan wurundun xuina, a hinanna fan luxi nen alo xiila sexen ma. 13 Gbalon nan dii xaxilitaren na a baba yii. Naxanla a yenge xunxurine luxi nen alo igen na lu dindinje banxini. 14 Banxin nun herisigen fataxi muxun fafe keen nan na, koni Alatala nan jaxalan xaxilimaan soma a yii. 15 Narin xixonla nan biran muxun na, koni kamen muxu narixin suxuma nen. 16 Naxan na sariyan suxu, na a niin nan nakantanma, koni naxan na sigan ti a jaxin na, na faxama nen. 17 Naxan na hinan senbetaren na, na Alatala nan dolima, a saranna soma a yii nen. 18 I ya diin xuru, bayo i yigin na nan na. I nama tin a xa faxa. 19 Boje gbee kannu lan a yanginna fi. I na a xunba, i bata a rawekile kalan ma. 20 I tuli mati kawandi xuine ra, i xurun soto, alogo i xa findi fekolonna ra. 21 Miriya wuyaxi nan muxun bojeni, koni Alatala a fe ragidixin nan nakamalima. 22 Muxun waxi hinanna nan xon, anu, yiigelitson fisa wule falan xa. 23 Alatala yee ragaxun siimayaan nan fima. Na ma, muxun lugoxin yi a sa, a mi toro. 24 Muxu narixina a yiin sinma donse goronna kui nen, koni a tagan a rasoe a de. 25 I na magele tiin bonbo, fe kolontaren xaxili sotoma nen. I na xaxilimaan maxadi, a kolonna sotoma nen. 26 Naxan a baba rayarabima, a yi a nga kedi, na kannu fama yagin nun yarabin nan na. 27 N ma diina, i na tondi i xuru falane rame, i yete masigama kolonna falane nan na. 28 Wule seren gelema kiti kenden ma nen, tinxintareya falan nan muxu jaxin de. 29 Yanginne saxi magele tiine nan xa, e nun bonbon xaxilitarene xa.

20 Manpaan muxun findin magele tiin nan na, dolon sonxon nan biran muxun na, dolo minna mi finde xaxilimaan na mume! 2 Mangana xolon luxi nen alo yatan wurundun xuina, naxan na mangan bojen nate, na kannu a niin nan halagima. 3 Binyen na a ra muxun xa naxan na a masiga yengen na, koni xaxilitaren birin mafura soe yengeni. 4 Muxu narixin mi xeen bima a waxatini xunbenla a fe ra, anu, se xaba waxatini, a balon ferma nen, koni sese mi na. 5 Muxun boje yi feene luxi nen alo igena xoninna ra, koni xaxilimaan fatan na igen be. 6 Muxu wuyaxi e yete hinanna fe falama, koni nde noe lannaya muxun toe?

7 Tinxin muxun sigan tima fetareyaan nin, sewana a diine xa a xanbi ra! 8 Mangan nema doxi a mangaya gbedeni kiti sadeni a fe jaxine birin nakorosima. 9 Nde noe a fale, a naxa, "N bata n bojen natanga fe jaxin ma, n bata n nasarijan yulubin birin ma?" 10 Sikeli tinxintaren nun liga se tinxintarena, na sese mi rafan Alatala ma. 11 Foningen sonna kolonma a kewanla nan xon xa fe mi a kewanle ra, a tinxin. 12 Tunla naxan feen mema, e nun ye naxan seen toma, Alatala nan ne birin daxi. 13 I nama i yete lu xixonli alogo i nama findi yiigelitson na. Xa i lu i yee ra yi, i lugoma nen balon na ki fajni. 14 Saresona a falama nen, a naxa, "A mi fan, a mi fan!" A mon yi sa a yete matoxo a se saraxina fe ra. 15 Xemaan nun boxo bun nafunla wuyaxi dunuya yi, koni deen naxan fe kolonna falan tima, na tonon gbo e birin xa. 16 Naxan na donla tongo i yii muxu gbete xa, a mi naxan kolon, na kannu domain tongo a joxoni. Tolimaan maxodin a ma, xa a rabaxi xonen nan xa. 17 Balon naxan soton wulen xon, na jaxun muxun de. Koni ndedi na liga, a luma nen alo a deen nafexi geme xonna nan na. 18 Maxadi xuine rame alogo i waxon feene xa kamali. Xa i sigama yengeni, xaxinla fen. 19 Muxu mafalane wundo feene nan makenenma, nayi, naxan falan tima jaxi ra, i nama lu na foxo ra. 20 Naxan a fafe nun a nga rayarabima, na lenpun tuma nen a lu dimini. 21 Keen naxan sotoxi sinna na mi fama barakadeni donxen na. 22 I nama a fala, i naxa, "N fe jaxin joxoma nen." I yigin sa Alatala yi, a i rakisima nen. 23 Liga se tinxintarene rapaxu Alatala ma. Sikeli tinxintaren mi fan. 24 Alatala nan adamadiine san tidene ragidima, nayi muxun noe a sigaden kolonje di? 25 Naxan na de xuiin tongo bote rabani, a xa sena nde fi Ala ma, na luxi alo a suxi nan fa a ra a na a miri na fe ma na xanbi ra. 26 Manga xaxilimaan muxu jaxine raxuyama ayi nen alo maala na yife, a yi e jaxankata alo malo bonbona. 27 Adamadiin niin findixi lenpun nan na a xa, Alatala naxan fixi a ma alogo a xa a bojen kui fe tilinxine fesefese. 28 Hinanna nun lannayaan mangan makantanma nen, a mangayaan sabatima a hinanna nan xon. 29 Fangan nan banxulanne xunna kenla ra. Xun sexe fixen nan fonne binyen na. 30 Maxolodene nan son jaxin dandan senna ra, bonbon nan sondomen matinxinna.

21 Mangan bojen luxi nen alo xude wunla Alatala yii, denaxan na a kenen, a yi a rasiga menni.

2 Muxuna kirane birin tinxin a yete yee ra yi, koni Alatala nan boɓɓen kui feene fefesefema. 3 Tinxinyaan nun kiti kenden saan nafan Alatala ma dangu saraxane ra. 4 Yee rawason nun yete yiteen nan findixi muxu jaxine kenenna ra, anu yulubin nan ne ra. 5 Tunnaafan muxuna miriyane findima munanfanna nan na, koni naxan feene rabama mafurani, na sigama yiigelitoayaan nin. 6 Nafunla naxanye soɗoxi wuleni ne findixi fe fu butarene nan na muxune xa naxanye sayaan fenma. 7 Muxu jaxine gbalone e raloma ayi nen, bayo e bata tondi kiti kenden ma. 8 Yulubitone biraxi kira yifuxin nan foxo ra, koni sontarene sigati kiin tinxin nen. 9 A fisa i lu banxin fari ma dogodogoni, benun e nun jaxalan yenge gidin xa lu banxin kui. 10 Muxu jaxin kunfahi fe jaxin nan xon, hali a xoyin mi kinikininna soɗe a ra. 11 Xa magele tiin saran a fe jaxin na, fe kolontarene fekolonna soɗoma nen. Koni muxun na xaxilimaan xaran tun, a kolonna fari sama nen. 12 Tinxinna Kanna muxu jaxina denbayaan nakorosima nen, a yi e radinje ayi e toroni. 13 Naxan na a tunla dutun senbetaren gbelegbele xuiin bun, a tan fan gbelegbelema nen, a mi yabi soɗo. 14 Finmaseen na so muxun yii wundoni na xolon maxunbelima nen. Muxun na dimi bun seen ba suturani, na xolo gbeen nan jianma. 15 Sewan na a ra tinxin muxun xa, kiti kenden na sa. Koni gbalon na a ra fe jaxi rabane xa. 16 Naxan na keli xaxilimayaan kiraan xon, na sa a matabun faha muxune nan ye. 17 Mananmanantoon setareyaan kolonna nen. Naxan na lu dolon nun jaxunna foxo ra, na mi finde nafulu kanna ra mum! 18 Muxu jaxin nun yanfantenna gbalon nan soɗoma, tinxin muxun nun muxu fajine yi xunba na ma. 19 A fisa i doxo tonbonni, benun e nun jaxalan yenge gidin xoloxin xa doxo. 20 Nafulu kenden nun ture fajin namaraxi fekolonne konne yi, koni xaxilitarena a gbeene birin donma nen. 21 Naxan na bira tinxinyaan nun hinanna foxo ra, na siimayaan nun tinxinna nun binyen soɗoma nen. 22 Fekolonne na kurugbane taan tonge nen, e yi e taan nabilinna yinna kala, e yigi saxi naxan yi. 23 Naxan na a deen nun a falan suxu, na a niin nakantanma gbalon nan ma. 24 Feene birin magele wasode yete yigboon yii. A feen birin ligama yanda gbeen nin. 25 Muxu narixine waxon feene nan e faxama, amasoto e tondima wale. 26 E kunfahi e waxon seene xon waxatin birin, koni tinxin muxune kiin tiin fonisireyaan nin. 27 Se haramuxin nan muxu jaxine saraxane ra. E na a ba bun kobina nde ma,

e jaxu dangu na ra. 28 Wule seren halagima nen, koni naxan a tuli matima ki faji, na fala tixine luma nen habadan. 29 Muxu jaxina a wekilen yitama a yetagin nan ma, koni muxu fajin sigati kiin nan a wekilen yitama. 30 Fe kolonya mi na, xaxilimaya mi na, maxadi fala mi na naxan nae xele Alatala xili ma. 31 Yenge so soone yitonma nen lan yengen loxon ma, koni kisin fataxi Alatala nan na!

22 Xili fajiyaan fisa nafulu gbeen xa, hinanna fisa gbetin nun xemaan xa. 2 Nafulu kanna nun yiigelitoon birin lan, bayo Alatala nan e birin dahi. 3 Xaxilimaan na gbalon to fe, a luxunden fenma nen, koni fe kolontarene dangun nen tun, jaxankatan yi e soɗo. 4 Nafunla nun binyen nun siimayaan soɗoma yete magodon nun Alatala yee ragaxun nan xon. 5 Janle nun luti ratixine nan muxu jaxine kiraan xon, koni naxan waxi a niin nakantan feni, na a masigama a ra nen. 6 Dii joren ti kiraan xon naxan lanje a ma, nayi hali a findi fonna ra, a mi kele a xon. 7 Nafulu kanna yiigelitoon yamarima, doli kanna konyin nan doli tongon na. 8 Naxan na seen si tinxintareyani, na toron soɗoma nen se xaba waxatini, amasoto a na soɗo dunganna kalama nen. 9 Muxu jenenige fajin barakan soɗoma nen, amasoto a baloni taxunma e nun sebetaren tagi. 10 Magele tiin kedi, soɗoxo soɗoxon fan jianma nen, e nun yengen nun konbina. 11 Boje fajin naxan ma, fala fajina a de, mangan xoyin nan na ra. 12 Fe kolonna Alatala nan yii, koni a yanfantenna falani fuma nen. 13 Muxu narixina falama nen, a naxa, “Yatan tandeni, a n faxama nen kira yi!” 14 Yalunde jaxanle fala xuine findixi yili tilinxin nan na, Alatala xoloxi naxanye ma, ne sinma nen na ra. 15 Xaxilitareyaan dii joren boɓɓeni, koni a na xuru bosaan na, na a masigama a ra nen. 16 Naxan na senbetaren nawali alogo a xa nafunla soɗo, e nun naxan na nafulu kanna ki, ne e yete yiigelima nen. 17 I tuli mati, i fekolonne falane rame, i xaxili lu n ma xaranna xon. 18 Amasoto a lan i yi e ramara i sondomeni, e nama ba i de mum, 19 alogo i xa i yigin sa Alatala yi. N waxi i tan yeteen xaran fe yi to. 20 N mi maxadi fala tonge saxan xan sebexi i xa ba, maxadine nun fe kolonna falane, 21 alogo i xa fe kendene nun jondi falane kolon, i yi i xe muxun yabi jondi falane ra? 22 I nama senbetaren nawali, fanga to mi a ra, i nama yiigelitoon jaxankata kitisadeni. 23 Amasoto Alatala e xun mayengen soma nen, a yi e yiigelitone

niin ba. 24 I nama bɔɲɛ gbee kannu findi i xɔyin na, i nama bira yɛnge gidin fɔxɔ ra. 25 alogo i nama a sigati kiin tongo, i yi suxu luti ratixin na. 26 I nama de xuiin tongo muxu gbetena donla fe ra, i yete dɔxɔ tolimani na ma. 27 Xa se mi i yii i naxan fiye, e fa i tan nan ma sade bama i bun. 28 I nama bɔxɔn danna taxamaseri gemene ba e funfuni i benbane naxanye dɔxi xabu to mi na ra. 29 Muxun naxan fatan a wanla ra na walima mangane nan fema, a mi luyɛ muxudine ye.

23 Xa ɛ nun kuntigina nde dɔxɔma ɛ dɛgedeni, naxan i yetagi, na rakɔɔsi ki fajni. 2 Xa i fudi jaxu, i yete suxu a xɔdɛxɛn na de! 3 I nama mila a donse fajine xɔn, bayo yanfa so donseene nan ne ra. 4 I nama i yete raxadan nafunla fɔxɔ ra, i xaxili ba na xɔn. 5 I nɛma fa i yɛɛn ti nafunla ra a bata jan! Amasɔtɔ gabutene minima a ma nɛn, a tugaɲ, te kore alo singbinna. 6 I nama muxu yetagi yiɔfɔɛna balon don, i nama kunfa a donse fajine xɔn. 7 Bayo i a lima nɛn, a bata fena nde nata, a naxa, “I dɛge, i min.” Koni na mi a bɔɲɛni! 8 I naxan donxi, i a baxunma nɛn, i bɔnɔ i ya fala fajine yi. 9 I nama fala ti xaxilitaren xa, bayo i ya xaxilimaya falane bɔte mi a xa. 10 I nama bɔxɔn danna taxamaseri gɛmɛ singene ba e funfuni. I nama se ba kiri diine xɛɛne ra, 11 amasɔtɔ Ala fangan gbo e xunbadeni, a e xun mayɛngen soma nɛn i xili ma. 12 I xaxinla rabi i xuru falane ma. I tuli mati fekolon falane ra. 13 I nama diin nafutuxulu a xurun ma, xa i a bɔnbɔ, a mi faxama. 14 I na diin xuru bosaan na, i a niin nakisima nɛn sayaan ma. (Sheol h7585) 15 N ma diina, xa fekolonna lu i bɔɲɛni, nayi, n fan bɔɲɛn sewama nɛn. 16 N sɔndɔmɛ yetɛn jaxanma nɛn, i na fala fajin ti. 17 I nama yulubitɔne maxɔxɔlɔn i bɔɲɛni koni gaxu Alatala yɛɛ ra waxatin birin yi. 18 Nayi, i yigin sɔtɔma nɛn waxati famatɔne yi, i mi yigitege mume! 19 I tan n ma diina, i tuli mati, i findi fekolonna ra, i yi i bɔɲɛn lu kira fajin xɔn. 20 I nama lu dɔlɔ minne ye, e nun naxanye suben donma, e a radangu ayi. 21 Amasɔtɔ fudimane nun dɔlɔ minne yiigelima nɛn, e tunnaɔlɔn yi marabenna ti e ma. 22 I tuli mati i baba ra, a tan naxan i sɔtɔxi. I nama yo i nga ma a foriyani. 23 Nɔndin nun fe kolonna nun xurun nun xaxilimayaan fen, i nama ne masara sese ra. 24 Tinxin muxun baba jaxanma nɛn, dii fekolonna sɔtɔ muxun luma nɛn sewani. 25 Ala xa sewan fi i baba nun i nga ma, i bari muxun yi jaxan! 26 N ma diina, i xaxili ti n na, i yɛɛn ti n ma misaala ra. 27

Amasɔtɔ jaxalan yalunden muxun nabirama nɛn alo yili tilinxina, muxu gbetena jaxanla magaxu alo xɔɲin naxurina. 28 A dɔxɔma nɛn muxune yɛɛ ra alo mafu tiina. A xɛmɛ wuyaxi findi yanfantenne ra. 29 Tɔrɔna nde xa? Nimisana nde xa? Matandine nde fɔxɔ ra? Mawugane nde xɔn? Maxɔlɔde fufafune nde ma? Nde yɛɛ gbeelixi? 30 Dɔlɔ minne nan na kiini, naxanye sa dɔlɔ fajine fenma, e xa e mato. 31 I nama i yɛɛn ti dɔlɔ to fajni gbeela ra, a yiyalanxi igelengenna kui waxatin naxan yi godo xinla ma muxun kɔɛ ra ki fajni. 32 Bayo na xanbi ra, a xɔlɔma i ra nɛn alo saɲin na muxun xin a i gan alo koson xin dɛna. 33 I fe magaxuxine toma nɛn i yi lu fala yifuxine tiye. 34 I xun magima i ra nɛn alo muxun naxan saxi kunkin kui fɔxɔ igen tagi, kunkin xuntagi yeteni. 35 I luma a fale nɛn, i naxa, “E bata n garin, anu a mi n xɔlɔxi! E bata n mabɔnbɔ, anu n mi fe kolonxi a yi! N fa xulunma waxatin mundun yi? Dɔlɔ xɔnla mɔn n ma!”

24 I nama mila muxu jaxine fe xɔn. E ye lu xɔnla nama i suxu. 2 Amasɔtɔ e gbalo feen nan yitɔnma e bɔɲɛni, fe jaxin nan minima e de. 3 Banxin tima fe kolonna nan xɔn, a sabatima xaxinla nan xɔn. 4 Banxin nafema herisige kendene nun se fajine ra fe kolonna sabun nin. 5 Fe kolonne sɛnbɛn gbo han! Kolonna muxun naxan yi, na fangan xun masama nɛn. 6 Amasɔtɔ fɔ muxun xa a miri ki fajni benun a xa mini yɛnge sodeni. Nɔɔn sɔtɔma maxadi muxu wuyaxi nan baraka yi. 7 Xaxilimayaan gbo xaxilitaren ma, a mi falan tiye taan fonne malanni. 8 Naxan fe jaxini tɔnma, na xilima nɛn a kɔte jaxin kannu. 9 Xaxilitareyana miriyane findixi yulubin nan na. Magele tiin najaxuma nɛn muxune tagi. 10 Xa wɛkilen jan i yi gbalon lɔxɔni, sese mi i fangan na. 11 Muxune xunba naxanye xalima e faxadeni, i yi muxune rakisi naxanye faxamatɔ a ra. 12 Xa i a fala, i naxa, “Nxu mi yi a kolon,” naxan bɔɲɛne fesefesema, na mi jɔndin kolonje ba? Naxan i niin kantanma, na mi a kolon ba? 13 N ma diina, kumina nde kɔn bayo a fan. Kumi dengben jaxun i de. 14 Fe kolonna fan na kii nin i niin xa. Xa i a sɔtɔ, i herin sɔtɔma nɛn yɛɛn na, i mi yigitegema. 15 Muxu jaxine, ɛ nama dɔxɔ muxune yɛɛ ra e suxu xinla ma tinxin muxun konni, ɛ fu a dɔxɔden ma. 16 Bayo tinxin muxun nɔɛ birɛ nɛn dɔxɔna ma solofere a mɔn yi keli. Koni muxu jaxine birama nɛn gbaloni keden na. 17 I nama jaxan xa i yaxun bira. Xa a dagalanje ayi, i nama sewa i bɔɲɛni

18 alogo Alatala nama na to, na yi rajaxu a ma, a yi ba xoloxi i yaxun ma. 19 I nama xolo muxu jaxine fe ra, i nama mila e seene xon. 20 Amasoto fe jaxi rabaan mi herin lima a yee ra. Muxu jaxine lenpun tuma nen. 21 N ma diina, gaxu Alatala yee ra e nun mangana, i nama lu muxu murutexine ye. 22 Amasoto e toron kelima nen sanya ma kedenni. Nde nœ a kolonje Ala nun mangan halagin naxan nagidima? 23 Fekolonne mon ito nan falaxi: A mi lan muxune xa rafisa e bode xa kiti sadeni. 24 Naxan na a fala muxu jaxin ma, a naxa, "I tinxin," yamaan nan na kanna dangama, siyane yi xolo a xili ma. 25 Koni naxan na muxu jaxin yalagi, na lanxi. Duba gbeen nan na kanna xa. 26 Yabi tinxinxin jaxun alo marafan sunbuna. 27 I ya wanle rakamali tanden ma, i yi i ya xee ne yiton, na xanbi ra i fa i ya banxin ti. 28 I nama i adamadi boden tojege, i wulen nan sama a xun ma ba? 29 I nama a fala, i naxa, "A to bata a liga n na, n fan xa a joxon liga a ra, n muxun birin saren fima a wanla nan na." 30 N dangu nen muxu narixina nde a xeen dexon ma, xaxilitarena nde nako yirena. 31 Xalone bata yi mini yirena ngaani, sexe jaxine yi xeen birin ma, a geme sansanna bata yi bira. 32 N to na to, n yi a rakorosi, n yi na feen sa n bojeeni, n yi xurun soto. 33 I na i sa, yeriyeinna yi dangu i ma ndedi, i xi ndedi, i yi i yiine filin e bode ma ndedi, 34 yiigelitoyaan yi бага i ma alo mafu tiina, e nun setareyana alo mujadena.

25 Sulemani a sanda gbetene nan itoe ra, Yuda Mangana Xesekiyaa muxune naxanye sebexi. 2 Alaa binyen findixi feene luxunna nan na, mangane binyen yi findi feene ye fenna ra. 3 Koren mateen nun boxon tilinna nun mangane kui feene, muxun mi nœ ne sese fesefese. 4 Xa i wure gbeti fixen gbiin ba, xabun nœ goron tofajin nafale nen. 5 Xa i muxu jaxine ba mangan nabilinni, a mangayaan sabatima nen tinxinna xon. 6 I nama i yete yigbo mangan yetagi, i nama ti muxu gbeene tideni. 7 Amasoto a fisa mangan xa a fala i xa, a naxa, "Te be n fema," benun a xa i rayagi kuntigina nde yetagi i yeen naxan na. 8 I nama mafura i mawuge muxun fari kitisadeni. I nanse lige donxen na, xa a yoon soto i ma? 9 Yoon fen i adamadi boden xun ma kitisadeni, koni i nama muxu gbetena wundo feen makenen 10 alogo naxan na a me, na nama i konbi, i yi xili jaxin soto habadan. 11 Xema sawurane nun gbeti se tofajine, ne fan alo fala fajina. 12 Fekolonne maxadi xuiin luxi nen a rame

muxun xa alo tunla soon xema dixin tunla ra hanma maxidi seen xema daxina a ma. 13 Xera tinxinxina a xe muxun nii yifanma a ma nen alo foye fajina se xaba waxatini. 14 Naxan na a yete matoxo a finma seene fe ra anu a mi muxun kima, na luxi nen alo kundaan nun foyen naxanye mi tulen nafama. 15 Muxu dijaxin nœ kitisaan mabandunje nen. Fala jaxumene fan nœ xonna kale nen. 16 Xa i kumin to, naxan i luge, na nan don, alogo i nama a radangu ayi, i yi a baxun. 17 I nama lu sige i bodena banxini yeye, alogo i ya fe nama xoli ba a ra, a i rajaxu. 18 Muxun naxan wulen sama a adamadi boden xun ma, na luxi nen alo silanfanna nun gbelemen nun xalimakuli jœe ralemunxina. 19 I mi i yigin se yanfantenni toro waxatini, alo jin xolen nun san kalaxina. 20 I na sign sa muxu sunuxin yetagi, na xolon luxi nen alo i na domaan ba muxun ma xunbenli, hanma i muluxunna sa furen de. 21 Xa kamena i yaxun ma, donseen so a yii. Xa min xonla a ma, igen so a yii, 22 bayo na luma a xa nen alo i tee wolonne nan malanma a xunna ma, Alatala nan i saranma. 23 Foyen naxan kelima sogeteden komenna ma, na tulen nafama nen. Yanfa falane fan muxun yetagini xoloma. 24 A fisa i lu banxin fari ma dogodogoni, benun e nun jaxalan yenge gidin xa lu banxini. 25 Xibaru fajin na keli yamana gbete yi, na jaxun alo ige xunbenla muxu xadanxin xa. 26 Tinxin muxun naxan gaxun muxu jaxin yee ra na yifu nen alo tigin dunduxina hanma xojin ige loxina. 27 A mi lan i yi kumi gbeen kon. I na binyen fan fen i yete xa, binye mi na ra. 28 Muxun naxan mi a yete suxuma, na kanna mi nœ a yete xun mafale alo taan naxan nabilin yinna bata bira.

26 Xunbenla mi fama kuye wolon waxatini. Tulen mi fama soge furen na. Na ma, xaxilitaren fan mi lan a binyen soto. 2 Xa muxun danga xun mi na danga tixin fulama nen a ra alo tuntunne na e futuxulu, alo debelenne na tukan. 3 Bosaan lan soon ma, lutin fan lan sofanel ma, xaxilitaren fan bonbe nen alogo a xa xuru. 4 I nama xaxilitaren yabi a xaxilitareyani alogo i nama lu alo a tan. 5 Xaxilitaren yabi a xaxilitareyana fe ra alogo a nama a yete yate fekolonna ra. 6 Muxun na xaxilitaren nasiga xerayaan na kalan na a ra alo i na i sanna sege a ra hanma i se xolen min. 7 Sandan toni mi xaxilitaren ma, alo fanga to mi lebutenna sanne ra. 8 I na binyen fi xaxilitaren ma, na luxi nen alo i na gemen maxidi lantanna kui a

wolideni. 9 Xaxilitarena sandan xolo nen alo wudi jnali kanna dolo minna yii. 10 Naxan na xaxilitaren ti wanla ra hanma dangu muxuna, na kanna kalan nan tima alo muxun naxan xalimakunla wolima a xunna yi. 11 Baren xetema a baxunna ma. Xaxilitaren fan xetema a xaxilitareyaan ma. 12 I na muxun to naxan a yete yatexi fekolonna ra, yigin xaxilitaren ma dangu na kanna ra. 13 Muxu narixina a falama nen, a naxa, “Yatan kiraan xon, yata xajen taani!” 14 Banxin deen nabima, a ragalima. Muxu narixin fan luma a maxete a sadeni na kii nin. 15 Muxu narixina a yiin sinma donse goronna kui nen, koni a tagan a rasoe a de. 16 Muxu narixina a yete yatema fekolonna ra dangu xaxilima solofere ra naxanye yabi fapi tima. 17 Dangu muxun na sunbu muxu gbetene yengen na, na luxi nen alo muxun na baren tunle suxu. 18 Daxun naxan teen nun xalimakunle wolima faxa ti xinla ma, 19 na luxi nen alo muxun naxan wulen falama a boden xa, a fa a fala, a naxa, “N yi sabaan nan na.” 20 Yegen na jian, teen tuun nen. Muxu mafalan na dan, yengene fan yi xunbeli. 21 Nafigin yengen nagboma ayi nen alo tigenna tee wolonna fari, alo yegen teen de. 22 Nafigina falane luxi nen alo donse jaxumen naxan godon muxun kui. 23 Muxun naxan de jaxun, a bojen jaxu, na luxi nen alo wure gbeti kobin naxulunxin na so fejen ma. 24 Xonnantenna a kejaan luxunma a falane nan xon koni yanfantenyaan nan a bojeni. 25 Xa a fala fapin ti, i nama la a ra, bayo fe haramuxi solofere nan a bojeni. 26 A koten noe a xonnantenyaan luxunje nen koni a fe jaxin makenenma nen yamani. 27 Yaxu yinla ge muxun nan sinma a kui. Gemen xetema a makutukutu muxun nan kanke. 28 Wule falan muxune nan najaxuma a naxanye toroma. Wulen matoxo falane kalan nan tima.

27 I nama i yete matoxo tila yi, amasoto i mi a kolon naxan sa ligama na lxonni. 2 Muxune xa i tantun, koni i tan nama a fala. Na lan muxu gbeti ma, koni a mi lan i tan de. 3 Gemen binya, mejensinna rabinya, koni xaxilitarena tandi falan dangu ne ra. 4 Xolon jaxu, boje teen magaxu, koni nde noe tiye xoxolonna senben yee ra? 5 A fisa muxun sonna xa fala a xa kenenni, benun xanuntenyaan xa lu luxunxi. 6 I noe le i xoyina fala xolene ra nen, koni i yaxuna i masunbuma nen han! 7 Naxan lugoxi, na nan a mema kumin na, koni hali naxan xolo, na jaxun kametoon

de. 8 Xemen naxan a mema a konna ra, na luxi nen alo xoliin na a me a teen na. 9 Latikonnonna nun wusulanna muxun bojen nan nasewama, i xoyina fanna dangu i yete miriyane ra. 10 I nama i xoyin nabepin, hanma i baba xoyina. I nama siga i ngaxakedenna fema gballo waxatini, i dexo boden fisa i ngaxakeden makuyen xa. 11 N ma diina, findi fekolonna ra, i n bojen nasewa. Nayi, naxan na n nayagi, n noe na yabe nen. 12 Xaxilimaan na gbalon to fe, a luxunden fenma nen, koni fe kolontarene dangun nen tun, jaxankatan yi e soto. 13 Naxan na donla tongo i yii muxu gbeti xa, a mi naxan kolon, na kanna domaan tongo a joxoni. Tolimaan maxodin a ma, xa a raba xojen nan xa. 14 Duban xui yitexin na xoton xotonni, na yatema dangan nan na. 15 Naxanla a yenge xunxurine luxi nen alo tule igen na lu dindinje banxini. 16 A ramaran naxolo alo foyena, alo muxun na turen sa a yiin kui. 17 Wuren nan wuren nalemunma, muxun nan muxuni tonma. 18 Wudi binla masuxu muxun nan a bogin donma. Naxan na a kanna masuxu, na binyama nen. 19 Muxuna a yete yetagin nininna nan toma igeni. Muxun bojen fan a yete kejaan nan yitama. 20 Laxira nun yahannama mi wasama. Muxun yeene fan mi noe wase. (Sheol h7585) 21 Gbetin nun xemaan nasensenma sulun teeni, koni muxun kejaan fesefesema a tantun kiin nan xon. 22 Hali i xaxilitaren din wunla kui se kesene tagi wulin diin na, a mi be a xaxilitareyani. 23 I ya xuruseene kolon ki fapi, i yi i joxo lu i ya xuruse kurune xon, 24 amasoto nafunla mi luma habadan, mangayaan mi marama i ya denbayaan xa mayixeten nun mayixeteni. 25 I na sexene lanfun, i yi e ramara xuruseene xa, sexe nenen mon yi mini, i geya ma sexene malan xuruseene balon na, 26 nayi, yexene xabene findima i ya dugine ra nen, kontonne yi findi gbetin na i xeen sarama naxan na. 27 Siine nonon yi gbo ayi, a i wasa, a findi i ya denbayaan balon na e nun i ya walike jaxanle.

28 Muxu jaxina a gima nen hali muxi mi a foxo ra, koni tinxin muxun tan susu alo yata senbimana. 2 Xa yamanan dugurenne murute, kuntigine wuyama ayi nen na yi. Koni manga xaxilimaan naxan fe kolon, na a ligama nen yamaan yi e raxara. 3 Yigelitoon naxan senbetarene jaxankatama na luxi nen alo kala ti tulen naxan mi balo luma na. 4 Naxanye sariyan bejinma ne muxu jaxine nan tantunma, koni naxanye sariyan suxuma ne xoloma nen e ma.

5 Muxu jaxine mi kiti kenden kolon koni naxanye Alatala fenma ne a birin famuma. 6 Yiigelitöön naxan sigan tiin tinxinni, na fisa nafulu kanna xa naxan kira yifuxin xön. 7 Naxan na sariyan suxu, dii xaxilimaan nan na ra, koni naxan na lu fuyantenne ye, na fama yagin nan na a baba ma. 8 Naxan na dahamu gbeti donla tönö gbeene xön na a malanma muxu gbeten nan xa naxan hinanma senbetarene ra. 9 Xa muxuna nde a tunla ba sariyan na alogo a nama a me, hali a na sali, na yeteen haramuxi. 10 Naxan na muxu fajine xali kira jaxin xön, na biran yinla nan na a naxan gexi. Koni fe mi naxan na, na herin nan sötöma a keen na. 11 Nafulu kanna a mirixi nen a fe kolon, koni yiigelito xaxilimana a kejaan nakörsima nen. 12 Tinxin muxune na nöön sötö, binye gbeen na a ra, koni xa muxu jaxine keli, birin a luxunma nen. 13 Naxan na a hakene luxun, na mi herin sötöma. Koni naxan na a ti e ra, a xete e föxo ra Ala kininkininma na ma nen. 14 Sewan na kanna xa naxan gaxun Ala yee ra, koni naxan na a böjoni xödöxo na birama töröni. 15 Yatan naxan wurundunma e nun kanko gbeen naxan fonma muxun ma, na luxi nen alo muxu jaxina yama senbetaren xun na. 16 Manga xaxilitaren tinxintare wanle wuya. Koni herisigen naxan sötöxi wulen xön, na rajaxu naxan ma, na siimayaan xunkuyama ayi nen. 17 Faxe ti goronna muxun naxan xun ma, na a gima nen han a sa a gaburun li. Muxu yo nama a rati! 18 Naxan na sigan ti fetareyani, na kisima nen. Koni naxan na tinxintareyaan liga, a kira firinna suxu na birama nen na nde kedenna xön. 19 Naxan na a böxön nawali, na lugoma nen. Koni naxan na bira fe fuune föxo ra, na wasama yiigelitöyaan nan na. 20 Lannaya muxun wasaxi barakan nan na. Koni naxan kunfaji bannayaan xön, na saranma nen na feen na. 21 A mi lan i muxune rafisa e bode xa, anu, muxun haken sötöma buru dungin xön. 22 Naxan kuma, na kunfaji bannayaan nan xön, a mi a kolon a törön nan fama a ma. 23 Naxan na muxun sönnä fala a xa, na rafanma nen na kanna ma nen dönxen na dangu muxun na naxan a matöxöma wuleni. 24 Naxan na a baba nun a nga muja, a yi a fala, a naxa, “Fe jaxi mi na ra,” na findixi halagi tiin föxörabiran nan na. 25 Naxan a yete yigboma, na yengene nan nakelima. Koni naxan na a yigin sa Alatala yi, na sabatima nen. 26 Naxan na a yigi sa a yete xaxinli xaxilitaren nan na ra. Koni naxan sigan tima fe kolonni, na kisima nen. 27 Naxan yiigelitöne kima, sese mi dase na ma. Koni naxan na a

yeen naxi e ma, na danga gbeen nan sötöma. 28 Xa muxu jaxine keli, birin a luxunma nen. Koni xa e halagi, tinxin muxune nan wuyama ayi.

29 Muxun naxan tondin maxadi xuine suxe, na halagima nen mafuren, a mi yelanje. 2 Xa tinxin muxune wuya, yamaan sewama nen. Xa muxu jaxine nöön sötö, yamaan wugama nen. 3 Fe kolonna rafan muxun naxan ma na a baba rasewama nen. Koni naxan biraxi yalundene föxo ra, na bönnöma nen a sötö seene yi. 4 Mangana a yamanan nasabatima kiti kenden nan xön, koni naxan dimi yi seene rasuxuma mayifuni, na a kalama nen. 5 Naxan na a adamadi boden matöxo wuleni, na lutin nan natima a sanna bun. 6 Muxu jaxina matandine findixi luti ratixin nan na a xa, koni tinxin muxuna a sewa xuini tema nen. 7 Tinxin muxun senbetarene xun mayenge kitine kolon. Koni muxu jaxin mi na xaxinla sötöma. 8 Magele tiine taani maxama nen, koni fekolonne xölon nan naxunbelima. 9 Fekolonna nun xaxilitaren na so kitini, xa a xolo hanma xa a gele, a mi xaxili sa sötöma. 10 Söntaren mi rafan faxe tiin ma, koni muxu fajine söntaren niin nakantanma nen. 11 Xaxilitarena kui feene birin falama nen, koni fekolonna tan e ramarama nen. 12 Mangan na a tuli mati wule falane ra, a kuntigine birin findima muxu jaxine nan na. 13 Yiigelitöön nun jaxankata tiin naralan fe kedenna ma, Alatala nan e firinna birin yeene rabima. 14 Mangan naxan senbetarene makitin lannayani, na mangayaan luma sabate nen han habadan. 15 Bosaan nun maxadi falane nan fe kolonna fima diin ma koni diin naxan luxi a yete ma, na a nga rayagima nen. 16 Muxu jaxine na wuya ayi, haken nan gboma ayi. Koni tinxin muxune ne biraden toma nen. 17 I na i ya diin xuru, a böje xunbenla fima i ma nen, a nii yifanna fi i ma. 18 Xa Alaa fe mi makenen yamaan xa, e mi fa danma fe yo ra. Sewan na kanna xa naxan na sariyan suxu! 19 Konyin mi maxadima falane gbansanna ra, bayo hali a me, a mi a suxe. 20 I na muxun to naxan falan tima benun a xa a miri, yigin xaxilitaren ma dangu na kanna ra. 21 Naxan na fan a walikeen na jaxi ra a dii jöreyani, dönxen na a sa findima finsiriwanla nan na. 22 Böje gbee kanna yengen nan nakelima. Xöläden hakene nan nagboma ayi. 23 Muxuna a wasona a biran yagin nin. Koni muxu xuruxin binyen nan sötöma. 24 Mupaden na a seene yitaxun e nun muxun naxan na, na niin mi rafan a ma. Na kanna rakölöma nen

dangan xon ma, koni a mi a fe mayite. **25** Adamadiin yeeragaxun findixi luti ratixin nan na, koni naxan na a yigi sa Alatala yi, na ratangama nen. **26** Muxu wuyaxi kiraan fenma siga mangan fema. Koni muxun kiti kenden sotoma Alatala nan yii. **27** Tinxintarene rapaxu tinxin muxune ma, muxu fajine rapaxu muxu jaxine ma.

30 Yake a dii xemena Aguri a waliyiya falane. A fala nen Itiyeli nun Yukala xa, a naxa: **2** Xaxilitaren nan n na dangu muxun birin na. Adamadi xaxili mi n ma. **3** N mi fe kolonna sotoxi, n mi Ala Sarijanxina kolonna sotoxi. **4** Nde texi kore xonna ma, a mon yi godo? Nde foyen malanxi a yiine kui? Nde igen naxudu a domani? Nde boxon danne birin nafalaxi? A xili di, a diin fan xili di? I na kolon ba? **5** Alaa falane birin sarijan. Naxanye e luxunma a yi, a ne ye masansanma nen. **6** I nama sese sa a falane fari alogo a nama i maxadi, i yi kolon wule falan na. **7** N fe firin nan maxodinma i ma, Ala. I nama tondi e ma n xa, benun n xa faxa! **8** Fuyantenyaan nun wulen masiga n na. I nama bannayaan fi n ma hanma yiigelitoyana, fo n mako donseen naxan ma **9** alogo n nama lugo jaxi ra, n na n me i ra n yi a fala, n naxa, “Nde Alatala ra?” Hanma n findi yiigelitoxon na, n yi mujan ti, n yi n ma Ala xili kala. **10** I nama walike mafala a kanna xa alogo a nama i danga, a haken yi lu i ma. **11** Muxuna ndee na naxanye e baba dangama, naxanye mi dubama e nga xa, **12** naxanye sarijan e yete yee ra yi anu, e xosin mi baxi e ma **13** naxanye yee rawaso e muxune matoma yete yigboni, **14** naxanye jinne luxi alo silanfanne e gbegebene maxolon tima alo filene, alogo e xa yiigelitone raxori boxon fari e toro muxune jan adamadiine ye. **15** Dii firin yi nusun yii naxanye yi a falama tun, e naxa, “N ki! N ki!” Se saxan nan na naxanye mi wasama mume, han se naanin naxanye mi a fale, e naxa, “Na lan.” **16** E tan ni i ra: Laxira nun gbantan nun boxon naxan mi wasama igen na, e nun teen naxan mi a falan mume, a naxa, “Na lan.” (Sheol h7585) **17** Muxun naxan yee yoma a baba ma, naxan tondima a nga xuiin suxe, xude xon xaxane a yeene gema nen a kui, dugane yi e don. **18** Se saxan na naxanye dangu n na, han naanin n mi naxanye famuxi. **19** E tan ni i ra: Singbinna kirana kore, sapina kirana gemen fari, kunkina kirana foxo igen xun ma, e nun banxulanna kirana sungutunna konni. **20** Naxalan yalunden kepaan ni ito ra: A na

a dege, a a deen nasugusugu, a yi a fala, a naxa, “N mi sese ligaxi a jaxin na.” **21** Boxon xuruxurunma se saxan bun, han naanin a mi tiye naxan bun. **22** E tan ni i ra: Konyin na findi mangan na, komon na lugo donseen na, **23** jaxalan najaxuxin na futu, e nun konyi gilen na a kanna keen tongo. **24** Sube naanin xurun boxon ma koni e tan nan fekolonna sotoxi: **25** Dondonle fanga mi na, koni e e donseen namarama a waxatini. **26** Fanye ra siine senbe mi na, koni e sodene rafalaxi gemene nin. **27** Manga mi tuguminne xun na, koni e birin minima e gali ye ma. **28** Dangene suxe nen yiin na, koni e toma manga banxine kui. **29** Se saxan na naxanye rayabu, han naanin naxanye sigati kiin tofan. **30** Yatana, susulaan subene tagi, naxan mi a gima muxu yo bun, **31** donton kanbaxina, hanma kotona, e nun mangana a ganli. **32** Xa i bata i yete yigbo xaxilitareyani, xa i bata koteni ton, nayi, i deen suxu. **33** Amasoto muxun na nonon naxi, na nan findin fenen na, i na muxun joxen din, wunla nan minima, i mon na xolon nakeli, na rapanma yengen nan ma.

31 Manga Lemuyeli a sandane. A nga a xaran waliyiya falan naxanye ma. **2** N ma diina, n nanse falama i xa? N nanse falama i xa, n diin naxan barixi, n naxan sotoxi Ala barakani? **3** I nama i senbe lu jaxanle yii. I fangan nama jan ne foxo ra naxanye mangane raloma ayi. **4** I tan Lemuyeli, a mi daxa mangane xa, a mi daxa mangane yi manpaan min, kuntigine mi lan e bira dolon foxo ra **5** alogo e minxin nama jinan tonne xon, e fa muxu jaxankataxine yanfa kitini. **6** E dolon lu na muxune xa naxanye halagima, naxanye niin nafexi xolen na, e manpaan lu ne xa. **7** Ne na e min, e jinanma e yiigelitoyaan xon nen, e toroyaan mi fa rabirama e ma. **8** Detarene xun mafala, i muxu naxine birin mali e kitine yi. **9** I falan ti, i kitin sa tinxinni, i yiigelitone nun toro muxune xun mayenge kitini. **10** Nde noe jaxalan fajin sote? A tonon dangu boxo bun nafunle ra. **11** A xemene xaxili tixi a tan nan na, a munanfanna mi janyne mume! **12** A fe fajin nan ligama a xa, a jaxin mi a ra, a siin sogen birin yi. **13** A yexee xabe garin nun gese futu garin nan fenma a e rafala dugin na sewani. **14** A faan balon na nen sa keli wulani alo yulaya kunkine. **15** A kurunma nen subaxa, a kudin so a denbayaan xa, a fa a walike jaxanle ti e wanle ra. **16** A na miri xee na nde ma, a yi a soto, a nakoon sa a tono sotoxine gbetin na. **17** A wanle de suxuma tunnafanna nin. A wali a yiin na senbeni. **18**

A a kolon a feene sonoyama nen, a lenpun mi tuma
 kœen na. **19** A gesen wurundun a yiin na, a gesen
 sœon dugin na. **20** A yiine dœon yiigelitœne bun. A
 yiin ti tœrœ muxune xa. **21** A mi gaxun xunbenla fe ra
 a denbayaan xa, amasœtœ e birin maraberi baxi dugi
 fajin nan na. **22** A bitinganne rafalama, a maraberi
 baxi taa dagine nun dugi mamiloxine nan na. **23** A
 xœmen yatœxi fœne malanni, a dœœma taan fœne
 yœ. **24** A taa dugi domane rafalama, a e mati, a tagi
 xidine rafala yulane xa. **25** Senben nun binyena a ma
 alo domana. A na a miri waxati famatœne ma, a gele.
26 A falan tima fe kolonna nin, a muxune xaran hinan
 falane ma. **27** A yengi dœxi a denbayana feene xœn, a
 mi narin kolon. **28** A diine kelima nen, e a fala a ma
 a dubadena. A xœmen fan yi keli, a yi a tantun, **29** a
 naxa, “Kœwali fajin naxalan wuyaxi yi, koni i tan, i
 dangu e birin na.” **30** Marayabun yanfan tima, tofanna
 danguma, koni naxanla naxan gaxuma Alatala yœœ ra
 na nan lan a tantun. **31** E saranna so a yii, a wanle xa
 findi a tantun xunna ra taani.

Karamɔxɔna

1 Karamɔxɔna falane nan itoe ra, Dawudaa dii xɛmɛn naxan findixi mangan na Yerusalɛn yi. **2** N tan karamɔxɔ naxa: Fe fuune fe fuune fari, fe fuyanne kɔnin, e birin fe fuu! **3** Muxun wanla naxan birin nabama dunuɗa yi, na tɔnɔn nanse ra a ma? **4** Mayixetɛna nde danguma, mayixetɛna nde barima, koni bɔxɔ xɔnna tan a kiini han habadan! **5** Sogen tema, a godoma, a mɔn yi a mafura xetɛ a tedeni. **6** Foyen sigama yiifanna ma, a xetema kɔmɛnna ma, a firifirima, a firifiri han a mɔn yi xetɛ a kelideni. **7** Baa igene birin sa sinma fɔxɔ igen nan ma, koni fɔxɔ igen mi rafema mume! Igene mɔn luma xetɛ e kelidene yi xude xunne yi. **8** Feene birin muxun xadanma han a mi nɔɛ a fale! Yɛɛn mi wasama toon tiye, tunla mi wasama fe ramedeni. **9** Naxan yi na nun, na nan mɔn na, naxan bata yi liga, na nan mɔn ligama, fefe nɛnɛ mi na dunuɗa yi. **10** Muxune a falama sena nde ma, fa fala, “A mato, a nɛnɛn na a ra!” Anu, na yi na nun, xabu benun en xa da. **11** Ninan tima nɛn fe danguxine xɔn. Hali fe famatɔne jinanma muxune ra nɛn naxanye barima e xanbi waxati famatɔne yi. **12** N tan, karamɔxɔna, n bata findi Isirayila Mangan na Yerusalɛn yi. **13** N bata a ragidi n bɔjɛni, n xa feene birin fɛsɛfɛsɛ, n yi e rakɔrɔsi n ma fekolonna xɔn feen naxanye birin ligama dunuɗa yi. Ala bata adamadiine ti jaxankata wanla nan na! **14** Feen naxanye ligama dunuɗa yi, n bata ne birin to, e birin findixi fe fuun nan na alo muxun na kata foyen sagatandeni. **15** Naxan dalinxi na mi nɔɛ ratinxinjɛ. Naxan dasaxi, na mi nɔɛ yate. **16** N yi a fala n yete ma, n naxa, “N tan bata fekolon gbeen sɔtɔ dangu muxun bonne birin na naxanye bata yi mangayaan liga n yɛɛ ra Yerusalɛn yi. N bata xaxilimayaan nun fekolonna gbegbe famu.” **17** N kataxi nɛn n xa fekolonna famu, e nun xaxilitareyaan nun daxuyana. Koni n yi a kolon, na fan birin luxi nɛn alo muxun na kata foyen sagatandeni. **18** Bayo, fekolonna gbegbeen fama xaminna nan na, xaxinla nɛma gboma ayi, bɔjɛ rafɔrɛn fan gboma ayi.

2 N yi a fala n yete ma, n naxa, “En siga, n xa sa a mato xa jaxajaxan fan.” Koni hali na fan findixi fe fuun nan na. **2** N yi a fala, n naxa, “Daxuyaan nan gele ma feene ra, jaxajaxan tɔnɔn nanse ra?” **3** N yi a ragidi n bɔjɛni, a n xa n yete rasewa dolon minna nin,

n yi n sɔbɛ so xaxilitareyaan ma, anu n yi matoon nan tima fekolonna xɔn, han n yi a kolon xa na nan fan adamadiin na, a na liga a siimayani dunuɗa yi. **4** N bata wali gbeene kɛ. N banxine ti nɛn n yete xa, n manpa bili nakɔne si, **5** n yi nakɔne nun langane yitɔn, n yi wudi bogilaan sifan birin si e yi. **6** N bata ige ramaradene rafala alogo n xa n ma wudidine ige sa nakɔni. **7** N konyi xɛmɛne nun konyi gilene sɔtɔ nɛn, e diine bari n konni. Xuruse xungbeen nun a xunxurin fan yi n yii dangu muxune birin na naxanye yi n yɛɛ ra Yerusalɛn yi. **8** N gbetin nun xɛmaan gbegbe ramara nɛn n yete xa, e nun mangane nun yamanane nafulu kendene. Yeli xɛmɛne nun yeli gilene yi n yii. N mɔn yi xɛmɛne rafan fe kendɛn sɔtɔ, jaxalan wuyaxi. **9** N findi nɛn muxu gbeen na dangu muxune birin na, naxanye bata yi dangu n yɛɛ ra Yerusalɛn yi. Anu, n yi matoon nan tima n ma fekolonna xɔn. **10** N yɛɛn kunfa sese xɔn, n mi tagan na sɔtɛ. N mi n mɛ n waxɔn fe yo ra, bayo n ma wanle birin yi n bɔjɛn nasewama, na nan yi findixi n saranna ra n ma wanle birin yi. **11** Anu, na xanbi ra, n yi n miri n wali xɔnne birin ma, e nun n tɔrɔn naxan sɔtɔ e kedeni, n yi a to fa fala a birin findixi fe fuun nan na, alo muxun na kata foyen sagatandeni, e tɔnɔ yo mi luma dunuɗa yi. **12** Nayi, n yi wa fekolonna famu feni, e nun daxuyaan nun xaxilitareyana. Muxun naxan findima mangan na n jɔxɔni, na nɔɛ nanse ligɛ? Fɔ naxan bata yi liga nun. **13** N yi a to fa fala fekolonna fisa xaxilitareyaan xa, alo kenɛnna to fisa dimin xa. **14** Amasɔtɔ xaxilimaan yɛɛn na alogo a xa seen to, koni xaxilitaren tan sigan tiin dimin nin. Anu, n tan a kolon yati, a marajan kii kedenna nan e firinna birin mamɛma. **15** N yi a fala n yete ma, n naxa, “Xa xaxilitaren najan kiin nan n fan mamɛma, nayi, na tɔnɔn nanse ra, xa n findi fekolonna ra?” N yi a fala n yete ma, n naxa, “Na fan findixi fe fuun nan na.” **16** Bayo muxune jinanma xaxilima danguxin xɔn sinma alo xaxilitarena. Fanni lɔxɔne danguma, jinan tima a xɔn. Xaxilimaan faxama nɛn alo xaxilitarena! **17** Nayi, dunuɗa yi gidin yi rajaxu n ma, bayo tɔrɔyaan nan adamadiine wanla ra e naxan birin ligama dunuɗa ito yi. Fe fuun nan a birin na, alo muxun na kata foyen sagatandeni. **18** N ma wanle birin yi rajaxu n ma n naxanye kɛxi dunuɗa yi, bayo fɔ n xa e tɔnɔn lu n xanbi ra muxun yii. **19** Nde a kolon xa na kanna finde xaxilimaan na hanma xaxilitarena? Anu, n naxan birin sɔtɔxi dunuɗa yi n ma wanla nun n ma xaxilimayani, a na sɔtɔma nɛn. Fe fuun nan

møn na fan na! **20** Nayi, n yi tunnaxolo fōlo n ma lan wali xodexene birin ma n naxanye ligaxi dunuja ito yi. **21** Amasoto, muxun naxan fatan, na nœ wale fekolonna nun xaxilimayani, a keen yi findi muxun gbeen na naxan mi walixi. Na fan findixi fe fuun nan na e nun kala gbeena. **22** Muxun nanse soto ma fata a wali xodexene nun a kontofinle birin na dunuja ito yi? **23** A siimayaan birin findixi toron nun soxolen nan na. Boje sa mi a xa hali koen na. Fe fuun nan na fan na. **24** Sese mi fan adamadiin na fo a xa a dege, a yi a min, a herin soto a wanli. Koni, n na a toxi nen fa fala na fan kelima Ala nan ma, **25** bayo, nde nœ a dege, hanma a sewa, xa Ala mi tin? **26** Muxun naxan na Ala kenen, a yi xaxinla fi na kanna ma e nun fekolonna nun sewana. Koni, a yulubi kanna tan tima wanla ra nen alogo a xa nafunla malan, a yi a ramara muxu gbete yee ra naxan Ala kenenxi. Fe fuun nan na fan na alo muxun na kata foyen sagatandeni.

3 Feen birin nun a waxati saxin na a ra, waxatin feen birin ma dunuja yi. **2** Muxun bari waxatin na, a faxa waxatin na. Soli seen si waxatin na, a tala waxatin fan na. **3** Faxe ti waxatin na, dandan waxatin fan na. Banxin kala waxatin na, a ti waxatin fan na. **4** Wuga waxatin na, gele waxatin fan na. Sunu waxatin na, bodon waxatin fan na. **5** Gemene woli waxatin na, e matongo waxatin na. Sunbun waxatin na, sunbutareyaan waxatin fan na. **6** Seen fen waxatin na, a tunun waxatin na. Seen namara waxatin na, a rabepin waxatin fan na. **7** Seni bo waxatin na, a madege waxatin na. Dundu waxatin na, fala ti waxatin fan na. **8** Marafanna waxatin na, marajaxun waxatin fan na. Yenge waxatin na, boje xunbeli waxatin fan na. **9** Walikeen tonon mundun soto ma wanli? **10** N bata a to Ala bata adamadiine ti jaxankata wanla naxan na. **11** Ala bata seen birin da alogo e xa lan e waxatin ma. A mon yi a ragidi habadan feene xa lu adamadiine bojeni. Anu, e mi nœ Ala kewanle yee toe keli e foloden ma han e rapanna. **12** N yi a kolon fa fala, sese mi fan muxun na fo a xa jaxan, a fe fapin liga a dunuja yi gidini. **13** Muxun birin xa a dege, a yi a min, a yi herin soto a wanli. Ala bata na nan nagidi muxune ma. **14** N na a kolon Alaa wanle birin luma nen habadan, sese mi sama a fari, sese mi bama a ra. Ala na feene ligaxi nen alogo muxune xa gaxu a yee ra. **15** Feen naxanye ligama, e nun naxanye fama ligadeni, ne bata yi liga nun. Ala nan fe

danguxine raminima dunuja yi mon. **16** N mon fe gbete toxi dunuja yi. Kiti sa kenden yi lan denaxan yi, jaxuyaan nan menni. Tinxinna yi lan denaxan yi jaxuyaan nan menni. **17** N yi a fala n yete ma, n naxa, “Ala tinxin muxun nun jaxuden makitima nen, bayo feen birin nun a waxati saxin na a ra, kewanla birin nun a dingiraan na a ra.” **18** N yi a fala n yete ma lan adamadiine ma, n naxa, “Ala muxune kejaan nan fesefesema alogo e tan yeteen xa a kolon a e luxi nen alo subene. **19** Bayo muxune nun subene rajanna birin keden, e birin faxama nen. Nii kedenna nan e birin yi. Na kui, muxun mi dangu suben na. Fe fuun nan ne birin na. **20** E birin sigama yire kedenna nin. E birin kelixi burunburunna nin, e birin xeten burunburunna nin. **21** Nde a kolon xa adamadiine niin tema kore nen, subene niin yi godo boxon bun?” **22** N bata a to sese mi lan adamadiin xa fo a yi jaxan a wanle yi, a gbeen na nan na. Bayo muxu mi faxe muxun naxete alogo a xa a to naxan ligama a xanbi.

4 N mon yi jaxankatane birin to naxanye ligama dunuja yi, muxu jaxankataxine wugama, muxu yo mi e madendenma! Fangana e jaxankata muxun nan na, muxu yo mi e masabarima. **2** N tan naxan fale, faxe muxune nan e jaxun yi dangu niiramane ra, e tan to bata faxe. **3** Koni naxan munma da, na fisa ne firinna xa, bayo a munma fe jaxine to naxanye ligama dunuja yi. **4** N bata a to a muxune xadanna nun e wali xonne birin fataxi e xoxolonayaan nan na lan e adamadi bodene ma. Fe fuun nan na fan na alo muxun na kata foyen sagatandeni. **5** Xaxilitaren tondima wale, kamen yi a kala. **6** Koni a fisa muxun yi mondo kedenna soto boje xunbenli benun a xa mondo firinna soto jaxankata wanli naxan nun foye sagatanna lan. **7** N mon fe fu sifana nde toxi nen dunuja yi. **8** N muxuna nde toxi nen, a keden pe, muxu mi a foxo ra. Dii mi a yii, a ngaxakeden mi na, anu, dan mi yi a wanla ma. Hali a mi wasama nafunla ra. A yi maxodinna ti, a naxa, “N fa walima nde xa, n yi n niin kuma herin na?” Fe fuun nan na fan na, jaxankata wanla. **9** Muxu firinna fisa muxu kedenna xa, bayo e saran fapin sote nen e wanli. **10** Bayo, xa boden bira, bodena a rakele nen, koni gbalon na kanna xa naxan keden a ra. Xa a bira, muxu gbete mi na naxan a rakele! **11** Na kiini, xa muxu firinna e sa, xunbenla mi e suxe, koni naxan keden saxi, xunbenla be na ma di? **12** Yaxun naxan muxu kedenna nœ

yengeni, muxu firinna tan tiye na yaxun yee ra nen. Luti saxanna denbexin mi bolonje xulen! **13** Dii joreen yiigelitoon xaxilimaan dangu Manga forixi xaxilitaren na naxan mi fa noe kawandi xuiin name. **14** Bayo, na dii joreen noe mine nen kasoon na a findi mangan na, muxun mon noe bare nen yiigelitoyani a findi a bari taan mangan na. **15** N bata adamadiine birin to biraxi dii joreni ito foxo ra dunuja yi naxan fama doxodeni mangan funfuni. **16** Na yamaan dan mi yi na, a yi tixi naxanye yee ra. Na birin, a mi rafanje mayixete famatone ma. Na fan findixi fe fuun nan na alo muxun na kata foyen sagatandeni.

5 A liga i yeren ma i na siga Alaa banxini waxatin naxan yi. I maso i tuli matideni benun i xa saraxan ba alo xaxilitarene, bayo e nema fe jaxin ligama, e mi a kolon. **2** I nama de mafura ayi, i bojen nama wolon, i falan ti Ala yetagi, bayo Ala kore xonna nan ma, i tan dunuja nin. Nayi, i ya falan nama radangu ayi. **3** Amasoto muxun na xamin, a xiye sama nen xulen. Na kiini, falan na wuya ayi, xaxilitareya falane yi keli. **4** Xa i de xuiin tongo Ala xa, i nama bu a rakamalideni, bayo xaxilitarene mi Ala kenenje. Nayi, i de xuiin nakamali i naxan tongoxi. **5** A fisa i nama de xuiin tongo, benun a xa lu a rakamalitaren na. **6** I nama tin i deen xa i gbindin birin bira yulubini. I nama a fala xeraan xa fa fala tantanna nan yi i de xuiin na. Nanfera i falan tiye naxan Alaa xolon nakelima, a yi i wali xonne kala? **7** Bayo xiyene na wuya ayi, fe fuune e yi. Falan fan na kii nin. Nayi, gaxu Ala yee ra. **8** Xa i a to yamanana nde yi, muxune yiigelitone jaxankatama, kiti kenden nun tinxinyaan bata ba na, na nama i raterena, bayo kuntigi gbeene nan kuntigine xun mayengema, kuntigi gbete mon ne fan xun na. **9** Birin nan boxon bogiseene tongoma, hali manga yeten tonon sotoa xene ma. **10** Gbetin nafan naxan ma, na mi wasama gbetin na mume! Nafulu gbeen nafan naxan ma, na mi a sote. Fe fuun nan mon na fan na! **11** Nafunla nema gboma ayi, a don muxune fan yi wuya ayi. A tonon mundun se kanne ma nayi ba a mato feen na? **12** Walikena xixonla jaxun, xa a donse gbeen don, hanma ndedi, koni nafulu kanna se kanyaan mi tinje a yi xi. **13** N bata gbaloni ito to dunuja yi: Muxun naxanye nafunla ramarama e yetena toroyaan yee ra. **14** Na nafunla kalama fe xodexen nin. A diin naxan barixi, na mi sese soto. **15** Muxun barima nen a magenla, a mon xeten na kii

nin. A mi sese xalima a wanla tonon na, a mi sigama sese ra a yii. **16** Gbalon nan mon na fan na. A xetema nen alo a faxi kii naxan yi. Nayi, a tonon mundun sotoa, a to walixi foyen nan foxo ra? **17** Anu, a mon a siimayaan birin nabama dimin nin, lanbaranna nun soxolen nun nii yigbetenna denaxan yi. **18** N na ito nan toxi: A fan muxun xa, a yi a dege, a yi a min, a yi herin soto a wanle birin yi dunuja yi a siimayani Ala naxan fixi a ma. A gbeen na nan na. **19** Xa Ala nafunla nun seen fi muxun ma, a mon yi tin na kanna xa no e donje, a yi a wasa so a gbeeni, a sewa a wanli, Ala nan na fixi a ma. **20** Na kanna mi a mire a siimayaan danna ma jaxi ra bayo Ala bata a bojen nasewa.

6 N gballo fena nde toxi nen dunuja yi, naxan adamadiin toroma han! **2** Muxuna nde na yi, Ala nafunla nun herisigen nun binyen fixi naxan ma, sese mi dasaxi naxan ma, a waxi naxan birin xon, koni Ala mi tinxi a xa a nafunla don, muxu gbete yi e don. Na nan findixi fe fuun na e nun gballo gbeena. **3** Xa muxuna nde dii keme bari nun, a mon yi siimaya xunkuyen soto, a na fori ki yo ki, na birin tonon nanse ra a ma, xa a mi sewan soto a se kanyani, a yi maluxun binyeni? N na a fale nen, n naxa, "Diin naxan faxesa nga kui, na fisa na kanna xa." **4** Bayo na diin daxi nen fuu, a mon dangun dimin nin, a xinla yi lu wundoni. **5** Hali na diin mi sogen toxi, a mi fefe kolonxi, na boje xunbelixi dangu bonna ra. **6** Hali a jee wuli firin soto siimayaan na, xa a mi sewan soto a se kanyani, na tonon nanse ra? E birin mi sigama yire kedenna xan yi ba? **7** Adamadina wanla birin kema a dege feen nan na, anu a mi wase mume! **8** Nanse fekolonna danguxi xaxilitaren na? Yiigelitoon na sigati ki kenden kolon a dunuja yi gidini, na tonon nanse ra? **9** Yeen bata seen naxan to, na fisa se xonla xa muxun naxan mirixi. Fe fuun nan mon na fan na alo muxun na kata foyen sagatandeni. **10** Seen birin xinla na. Adamadiin findixi naxan na, na kolonxi. Naxan senben dangu a tan na, a mi noe na matande. **11** Falan nema gboma ayi, fe fuune fan wuyama ayi. En nanse sotoa na yi? **12** Awa, nde a kolon naxan fan adamadiin xa a dunuja yi gidini, a nema a siimaya yi genli, naxan danguma alo nininna? Nde noe a fale adamadiin xa naxan ligama a xanbi dunuja yi a na faxesa waxatin naxan yi?

7 Xili kanyaan fisa latikonon kenden xa, muxun faxesa lonon dangu a bari lonon na. **2** A fisa i siga jandeni benun i xa siga sewa bande dondeni, bayo sayaan

muxune birin yee ra, niiramane birin lan e yi xaxili
 soto na ma. **3** Soxolen fisa gelen xa, bayo yetagin na
 yiforo, na muxun xaxinla maliye nen. **4** Fekolonne
 bojen darixi nanden nan na, koni xaxilitarene bojen
 darixi jaxajaxa yiren nan na. **5** A fisa muxun yi
 fekolonna maxadin name, benun a xa xaxilitarene
 sign name. **6** Bayo xaxilitarene gele xuiin luxi nen alo
 janla budo xuiin teeni tunden bun. Fe fuun nan na
 fan na. **7** Fekolonna na jaxankatan ti, na a findima
 xaxilitaren nan na, dimi yi seene na rasuxu mayifuni,
 na muxun bojen natantanma nen. **8** Feen najanna
 dangu a folon na. A fisa muxun yi sabari benun a xa
 waso ayi. **9** I nama mafura xole, bayo boje gbeen
 xaxilitarene nin. **10** I nama a fala, i naxa, “Nanfera
 waxati danguxine fisa iki xa?” Bayo na maxodinna
 mi kelixi fekolonna xan yi. **11** Fekolonna nun keen
 tonon birin lan, bayo a muxune malima dunupa yi.
12 I na lu fekolonni, na i ratangama nen alo gbeti
 kanyana, i na fe kolon, na fekolonna i luma nen i
 nii ra. **13** Alaa wanla mato: A na naxan yidoxo, nde
 noe a ratinxinje? **14** I xa sewa waxati fajini, i yi i
 miri toro waxatini, bayo Ala nan e firinna birin daxi.
 Nanara, adamadiin mi noe sese yee toe fe famatone
 fe yi. **15** N bata feen birin to n ma dunupa yi gidi
 fufafuni. Tinxin muxuna ndee halagima e tinxinyani,
 jaxudena ndee yi siimaya xunkuyen soto e jaxuyani.
16 I nama i ya tinxinyaan nadangu ayi, i nama i yete
 findi fekolon gbeen na. Nanfera i yete rahalagima? **17** I
 nama jaxuyaan nadangu ayi, i nama findi xaxilitaren
 na. Nanfera i faxe benun i ya waxatin xa a li? **18** A lan
 i yi kedenna suxu hali i mi boden bejin, bayo naxan
 na gaxu Ala yee ra na feen birin yiminima nen. **19**
 Fekolonna xaxilimaan senbe soma nen dangu yamana
 kan fu ra taani. **20** Tinxin muxu yo mi dunupa yi naxan
 fe fajin ligama a mi yulubi liga. **21** I nama i tuli mati
 falan birin na, alogo i nama i ya walikeen xuiin me, a i
 rayelefuma. **22** Bayo i a kolon i bojeni, i tan yeteen
 bata muxune rayelefu sanja ma wuyaxi. **23** N bata na
 feene birin feselese fekolonna xon, n yi a fala, n naxa,
 “N fekolonna sotoma nen,” koni a mon makuya n na.
24 Sese a ra, a makuya pon! A tilin mume! Nde noe a
 toe? **25** Nayi, n bata kata fekolonna famu feen nun a
 feselese feen nun a fen feen na e nun feene bunna,
 alogo n xa a famu a xaxilitareyaan nan jaxuyaan na,
 fa fala daxuyaan mi fan. **26** N bata a kolon a jaxanla
 naxan luxi alo luti ratixina, naxan boje findixi yalaan
 na, naxan yiine luxi alo yolonxonna, na xolo dangu

sayaan na! Muxun naxan Ala kenenxi, na tangama nen
 a ma, koni yulubi kanna a suxuma nen a ra. **27** N tan,
 karamxonna, n na ito nan toxi, n to feene feselesexi
 keden keden yeen ma, alogo n xa feene bunna yee
 to. **28** N mon feene ye fenma, koni n munma a yee to
 singen. N xeme kende kedenna nan toxi xeme wuli
 keden ye, koni n mi jaxalan kende keden peen toxi
 jaxanle ye. **29** Koni, n na ito nan to: Ala adamadiine
 da nen, e fan, koni e tan bata kote wuyaxi fen.

8 Nde luxi alo fekolonna, naxan noe feene bunne
 feselese? Muxuna fekolonna a yetagini yalanma
 nen, a yetagi yiforen yi tunun. **2** N yi a fala, n naxa,
 “Mangana yamarin suxu, i to bata i kolo Ala xa.” **3** I
 nama mafura i makuye mangan na, i nama kankan fe
 jaxin ma, bayo naxan nafa a ma, a na nan ligama. **4**
 Mangan sese fala, senben na nan na. Nayi, nde noe
 a fale a xa, fa fala, “I nanse ligama?” **5** Naxan na a
 yamarin suxu, na mi fe jaxin kolonma. Fekolonna
 mangana waxati saxin nun a kiti saxin kolonma nen.
6 Amasoto feen birin nun a waxatin nun a kiti saxin
 na a ra, bayo adamadiine fe jaxin gbo e ma. **7** A mi a
 kolon feen naxan fama, nayi nde noe a fale a xa naxan
 sa ligama? **8** Adamadiin xa mi niin kanna ra alogo
 a xa a makankan, fanga yo mi a ra a sayaan lonon
 fari. Yengen matanga fere mi a xa, jaxuyaan fan mi
 muxu jaxi yo xunbama. **9** N bata na birin to, n yi n
 miri muxune kewanle birin ma dunupa yi. Waxatini
 ito yi, muxun noyaan nan ligama a adamadi boden
 xun na, a yi a jaxankata. **10** N mon muxune toxi
 jaxudene maluxunje. Yamaan sigama, e xetema sa
 keli yire sarjannxini, e jinan taani na muxu jannxin yi
 naxan ligama. Fe fuun nan na fan na. **11** Muxune to mi
 ratononma e kewanle ra sasani, nanara fe jaxi rabaan
 xonla adamadiine bojeni han! **12** Hali yulubitoon fe
 jaxi keme liga, a siimayaan mon yi xunkuya ayi, n
 na a kolon, herina Ala yee ragaxu muxune nan xa,
 bayo e gaxuxi a yee ra. **13** Koni herin mi muxu jaxin
 xa! Seen nininna buma muxu jaxina siimayaan xa,
 amasoto a mi gaxuxi Ala yee ra. **14** Fe fu gbete fan
 ligama dunupa yi: Tinxin muxuna nde najanna yi
 lanje muxu jaxin nan ma, muxu jaxina nde fan
 najanna yi lanje tinxin muxun nan ma. N na fale
 nen, n naxa, fe fuun nan na fan na. **15** Nayi, n sewan
 nan matoxoma, amasoto sese faji mi fa adamadiin xa
 dunupa yi, fo a a dege, a yi a min, a yi jaxan. Na nan
 a malima a wanli a siimayani Ala naxan nagidixi a ma

dununya yi. **16** N to kata fekolonna famu feen na, n yi muxune kewanle rakorosi dununya yi, bayo adamadiin luma a yee ra yi yanyin nun koeen na, **17** n yi Ala wali xonna to. Adamadiin mi nœ feene yee toe naxanye ligama dununya yi. Adamadiin naxan fenma toroni, a mi na toe, hali fekolonna yengi a ma a a fe kolon, a mi nœ a yee toe.

9 N bata n miri feni itoe birin ma, n yi a rakorosi fa fala, tinxin muxune nun fekolonne nun e kewanle birin Ala nan yii. Adamadiin mi a kolon xa xanuntenyaan nan a yee ra hanma xonnantenyaana. **2** Birin najanma kii kedenna nin. Tinxin muxun nun muxu jaxin birin najanna keden, muxu fajni ba, muxu sarijanxin ba, haramuden ba, muxun naxan saraxan bama e nun naxan mi saraxan bama, a na kii nin muxu fajin nun yulubitoon xa, naxan a koloma e nun naxan gaxuma a kole. **3** Na nan fe jaxin na feene ye naxanye ligama dununya yi. Marajan kii kedenna nan birin mamema. Fe jaxin nan muxune bojeni han! Daxuyana e bojeni e siimayaan birin yi. Na xanbi ra, e sa faxa muxune fari. **4** Yigin niiramane birin xa. Hali baren jenen fisa yatan faxaxin xa. **5** Niiramane a kolon a e faxama nen, koni faxa muxune mi sese kolon. Saran mi fa e xa, amasoto jinan bata ti e xon. **6** E xanuntenyaan nun e xonnantenyaan nun e xoxolonyaan bata jan, sese mi fa e xa feene ye naxanye ligama dununya yi. **7** Nayi, sa i ya donseen don jaxanni, i yi i ya manpaan min boje xunbenli, bayo Ala bata yelin i kewanle birin nasuxe. **8** Sewa dugine xa lu i ma waxatin birin, turen yi lu i xunni waxatin birin. **9** I jaxan i ya dununya yi gidini i ya jaxanla fema i naxan xanuxi, i ya siimaya fufafuun birin yi Ala naxan nagidixi i ma dununya yi, i siin soge fuune birin, bayo i gbeen na nan na i ya dununya yi gidini, i nema i ya wali xodexen kema dununya yi. **10** I nœ naxan yo lige, na liga i sobeen nan na, bayo i na sa gaburun na, wali mi na, miriya mi na, xaxilimaya mi na, fekolon mi na. (Sheol h7585) **11** N mon bata feni ito to dununya yi: Gilaan mi a ra naxan singe soma, senbema mi na ra naxan noon sotoma yengeni, fekolonna mi na ra naxan donseen sotoma, xaxilimaan mi na ra naxan nafunla sotoma, muxu xaranxin mi a ra naxan marafanna sotoma, bayo waxatine nun yegbane sa birama ayi e birin nan ma. **12** Awa, muxun mi a kolon feen naxan a yee ra. A luxi nen alo yexen naxanye mayendenma, e suxu yalaan na, hanma xoliin naxanye

suxuma luti ratixin na, waxati jaxin bagama nen adamadiine ma mafuren, a e raterena. **13** N mon xaxilimayaan misaala nde toxi nen dununya yi, naxan n naterena. **14** Taadina nde yi na nun, a muxune mi yi wuya. Manga senbema nde yi siga a xili ma, a yi a rabilin yengeni, a yi yenge so seene yiton a xili ma han! **15** Fekolon yiigelitona nde yi na taani nun, naxan taan xunba a fekolonna xon. Koni muxu yo mi a yengi doko na yiigelitoon xon. **16** Nayi, n yi a fala, n naxa, “Fe kolonna dangu senben na.” Anu, muxune e mexi na yiigelitona fekolonna ra, e mi e tuli mati a falane ra. **17** Fe kolonne falan namena maraxarani, na dangu mangan sonxo xuiin na xaxilitarene ye. **18** Fekolonna dangu yenge so seene ra, koni yulubito keden peen nœ fe fajni gbegbe kale nen.

10 Tugetugene faxaxin nœ latikonnna xiri jaxue nen. Na kiini xaxilitareyana ndedi nœ fekolonna nun binyen kale nen. **2** Fekolonna xaxinla sigan kira fajin nan xon, koni xaxilitaren xaxinla sigan kira jaxin nan xon. **3** Xaxilitaren nema sigan tima kiraan xon, xaxili mi a ma. Birin a xaxilitareyaan toma. **4** Xa kuntigin xolo i xili ma, i nama keli i ya walideni, bayo maraxaran yulubi gbeen nan matangama. **5** N fe jaxina ndee toxi dununya yi, tantanna naxanye fata mangan na: **6** Fekolontarene tide gbeene sotoma, senbe kanne yi lu tide xurine yi. **7** N bata konyine to soone fari, mangane yi sigan ti e sanni alo konyine. **8** Naxan na yinla ge, a birama nen na ra. Naxan na yinna rabira, sapin nan na xinma. **9** Naxan na gemene maxete, na a maxoloma nen e ra, naxan wudin boma, na nœ a maxole nen. **10** Xa bunbi melenna de mi a yi, a mi raxanxanxi, fo i xa i senben xun masa nen, koni fekolonna feen nœ dangu na ra. **11** Naxan fatan sapin suxe, na tonon nanse ra xa sapina a xin benun a xa a suxu? **12** Fekolonna falane rafexi hinanna nan na, koni xaxilitarena falane bonon nan tima a ma. **13** A falane folon xaxilitareyaan nan ma, a rajan daxuya jaxin ma. **14** Xaxilitaren falane rawuyama ayi nen. Adamadiin mi a kolon naxan fama ligadeni. Nde a fale a xa naxan fa ligama a xanbi? **15** Xaxilitarena wanla a xadanma nen, bayo a yeteen mi a kolon a sigi taani kii naxan yi. **16** Yamanan naxan manga findixi foningen na, gbalon na xa, e nun naxan ma kuntigiye e waxatin birin nadanguma donse dondeni. **17** Sewan na yamaan xa naxan manga findixi muxu binyene diin na, naxan ma kuntigiye e degema a waxatini, e makoon naxan

ma, e mɔn mi manpaan minna radangu ayi. **18** Muxu narixina xalanben fɔnma nɛn. Xa a mi wale, tulɛn soma nɛn a banxini. **19** Muxune sɛwa bande donna tima jaxaxanaxani, manpaan yi e niini fan e ma. Gbetin nan feen birin yabin na. **20** I nama mangan danga, hali i miriyani, i nama nafulu kanna danga i ya banxin kui, bayo a luyɛ nɛn alo xɔliin nan sa i xuiin nalgama a xa, a yi i ya falane yɛba a xa.

11 I ya balon xuya igen xun ma, amasɔto waxati xunkuyen na dangu, i mɔn a toma nɛn. **2** I yii seene yitaxun muxu solofere hanma muxu solomasɛxe ra, bayo i mi a kolon gbalon naxan sa fama yamanani. **3** Igen na gbo kundani, a findima tulɛn nan na bɔxɔni. Xa wudin bira be binni hanma mɛn binni, a luma a biraden nan ma. **4** Naxan gaxuxi foyen nun tulɛn fa feen na, na mi nɔɛ sansiin siyɛ, a mɔn mi a xabɛ. **5** I to mi foyen siga kiin kolon, i mɔn mi a kolon diin gboma a nga kui kii naxan yi, na kiini, i mi nɔɛ dali manga Ala kɛwanle fan famunɛ. **6** Sansi xɔnna xuya, fɔlɔ xɔtɔnni han jɛnbanɛna, i nama i ya wanla rati. I mi a kolon i wali xɔnna dɛnaxan sɔnɔyama hanma xa i wali xɔnne birin fanma nɛn. **7** Kɛnɛnna fan, lu fena dunɔya yi, na jaxun. **8** Adamadiin na siimayaan sɔto han jɛɛ wuyaxi, a lan a xa sɛwa e birin na. Koni a xa a miri fa fala dimin waxatine gboma ayi nɛn. Fe famatɔne luxi nɛn alo foyena. **9** I tan naxan dii jɔrɛyani, jaxan i ya dii jɔrɛyaan waxatini, i sɛwa i bɔjɛni. I bira i bɔjɛ yi feene fɔxɔ ra, e nun i na seen naxanye to. Koni, a kolon fa fala Ala i kɛwanle birin makitima nɛn. **10** Nayi, xaminna ba i bɔjɛni, tɔrɔyaan masiga i fatin na amasɔto dii jɔrɛyaan nun fangan danguma nɛn fuyan!

12 I Dali Marigina fe xa rabira i ma i nema dii jɔrɛyani waxatin naxan yi, benun tɔrɔ lɔxɔne xa fa, waxatin yi maso, i a falama naxan yi, i naxa, “N mi jaxun yo toma,” **2** benun sogen nun kɛnɛnna nun kiken nun sarene xa yidimi, kundaan yi fa tulɛn dangu xanbini. **3** Na lɔxɔni, banxi kantanɛ xuruxurunma nɛn, xɛmɛ senbɛmanɛ yi e fɛlɛn, jaxanle yi ba seen dinɛ bayo e mi fa wuya, naxanye seen matoma foye soden na, ne yi lu dimini. **4** Nayi, dɛɛn fɔxɔ firinna naxanye rabima kiraan ma, ne balanma nɛn, se din xuiin yi siga xurunɛ ayi. Muxun kelima nɛn xɔliin wuga xuiin ma, koni sigisane birin yi siga xadanyɛ ayi. **5** Yire matexin yi magaxu fɔlɔ ayi, gaxun yi lu kiraan xɔn. Xun sɛxɛne yi fixa alo wudin na fuga.

Fatin yi binya ayi alo sujɛn na sin bɔxɔni. Kunfa mi fa na, bayo adamadiin fa sigama a habadan banxin nin, wugalaane yi dangu kiraan xɔn a jɛn feen na. **6** Alaa fe xa rabira i ma benun gbeti wure luti daxin xa fulun, xɛma kundin yi kala, fɛjɛn yi yibo tigi yinla ra, ige kundin lutin yi bolon a bira xɔjɛnna ra, **7** benun benden xa xɛtɛ bɔxɔni a kelixi dɛnaxan yi, niin yi xɛtɛ Ala ma naxan a fixi. **8** Nanara, n tan karamɔxɔ naxa: Fe fuune fe fuune fari, fe fuyanɛ kɔnin, e birin fe fuu! **9** Karamɔxɔni ito findixi fekolonna nan na, koni a mɔn yamaan xaranxi nɛn. A mɔn yi a miri sanda wuyaxin ma, a ne yitɔn, a e yɛba. **10** Karamɔxɔni ito bata kata fala fajɛnɛ yitɔn feen na, a yi e sɛbɛ a kiin yɛtɛni, jɔndi falane nan e ra. **11** Fekolonɛ falane luxi nɛn alo xuruse gbɛngbɛn dunganɛ, e fala sɛbɛxine yi baraka alo wudi bitinxine, yɛɛrati kedenna nan e fixi. **12** N ma diina, i nama sese sa e fari. Kɛdi sɛbɛn dan mi na, kɛdi xaranna gbeen fati benden xadanma nɛn. **13** Awa, feni itoe birin bata mɛ. E fala yisoxin ni i ra: Gaxu Ala yɛɛ ra, i yi a yamarine suxu bayo adamadiyaan gbɛngbɛnna na nan na. **14** Amasɔto Ala adamadiine kɛwanle birin makitima nɛn, hali naxanye luxunxi, a fajɛn nun a jaxina.

Marafanna Falane

1 Sulemani a sigi fisamantenna. **2** N sunbu marafan sunbuni! Amasoto i ya xanuntenyaan jaxun dangu manpaan na. **3** I ya latikōnōnna xirin jaxun. I xinla luxi nen alo latikōnōnna naxan xiri sigama ayi. Nanara, i rafan sungutunne ma. **4** N suxu n yiin ma! En na en gi! Mangan bata n xali a konni. Nxu jaxanma, nxu sewa i ya fe ra, nxu i ya xanuntenyaan matōxōma nen dangu manpaan na. Yoon sungutunne xa, i rafan e ma! **5** Yerusalēn sungutunne, n fatin nan gbeelixi, koni n nayabu alo Kedari kaane bubu fōrene, alo Sulemani a dugin naxanye singanxi a banxini. **6** Koni, i nama n mato, n to gbeelixi. Sogen nan n fatin gbeelixi. Ngaa dii xemene nan xōlōxi n ma, e yi n findi manpa bili nako kantanna ra. Koni n mi n yengi luxi n yetēna nakōon xōn. **7** A fala n xa, i tan naxan nafaan n ma n bōjēni, i fa i ya xuruse kurun nabama denaxan yi, hanma i e luma denaxan yi yanyi tagini alogo n nama lu i fenje na xun xōn alo jaxalan kobina i xōyine xuruse kurune denaxan yi. **8** Xa i mi na kolon, i tan naxan tofan jaxanle birin xa, siga i ya sii diine rabe yexee kurune funfun xōn, xuruse kantanne bubune dexōn. **9** N nafaan jaxanla, i luxi nen n yee ra yi alo soo gile fajin naxanye Misiran mangana yenge so wontoron bandunma. **10** I xadene rayabu tunlasone longonna ra, i kōeen nayabu jēreni. **11** En tunlaso xema daxine rafalama nen i xa, naxanye rayabuxi gbeti wuredine ra. **12** Mangan yi a degema waxatin naxan yi, n ma latikōnōnna xiri fajin yi sigama a ma. **13** N nafaan muxun luxi nen n xa alo mirihi latikōnōnna se sa seen kui naxan singanxi n xije longonna ra. **14** N nafaan muxun luxi n xa nen alo se fuge fajine keli manpa bili nakōne yi En-Gedi yamanani. **15** I rayabu, n nafaan jaxanla, i rayabu han! I yēene rayabu alo ganbane. **16** N xanuntenna, i tofan, i rayabu han! En saden findixi sexe xindene nan na. **17** Suman yiine nan en xunna soon na, fōfo binle yi findi banxi kankene ra en xa.

2 N luxi nen alo se fuge fajin naxanye Saron yamanani, gabala fugene meremerene yi. **2** N nafaan jaxanla luxi sungutunne tagi nen alo gabala fugen sexe jali kanne tagi. **3** N nafaan xemen luxi banxulanne tagi nen alo mangon binla fōtōn yi wudine tagi. A rafan n ma n dōxō a nininna ra, a rafan n ma alo wudi bogi jaxumena n de. **4** A bata n xali sumun yireni.

A xanuntenyaan luxi nen n xa alo taxamasenna. **5** E n senbe so se bogine ra, e yi n bōjēn maxunbeli mangon bogine ra, bayo xanuntenyaan furena n ma. **6** A kōmen ma yiina n xunna bun, a yi a yiifanna rabilin n ma. **7** Yerusalēn sungutunne, n bata e rakolo bolene nun burunna xenle yi, e nama xanuntenyaan nakeli, e nama a raxulun, benun a waxatin xa a li. **8** N bata n xanuntenna xuiin me! A fama tuganje ayi geyane xun tagi, a a gima yire matexine xun tagi. **9** N xanuntenna a gima alo bolena hanma xeli senbēmana. A mato, a tixi en konna sansanna xanbi ra. A yēen nasoma banxin foyesoden na, a yee masama wure sansanna yinle ra. **10** N xanuntenna falan tima n xa, a naxa, “Keli, n xanunten tofajina, fa en siga! **11** Bayo jēmen janmatoon ni i ra, tulen bata jan, a bata siga. **12** Se fuge fajine bata wara ayi bōxōni, sigi sa waxatin bata a li, kolokondene xuiin minima burunna ra. **13** Xode binla bata a bogi singene ramini fōlo, manpa binle bata fuga, e xiri fajin naminima. N xanuntenna, keli, fa en siga.” **14** N ma jaxanla, i nama i luxun alo ganbana gēme yinle ra geyaan kanke. I yetagin yita n na, i xuiin namini n xa a mē, amasoto i xuiin jaxun, i tofan. **15** E xulumaseene suxu nxu xa, xulumase xurin naxanye nxō manpa bili fugaxine kalama. **16** N gbeen nan n xanuntenna ra, a fan gbeen nan n na, a nema a xuruseene rabama sansi fugaxine tagi. **17** N xanuntenna, benun kuye xa yiba, dimin yi siga, xete, i i gi alo bolena alo xeli senbēmaan gēme geyane fari.

3 N nema saxi n ma saden ma kōeen na, n kataxi n xanuntenna to feen na, n na a fenma, koni n mi a toma. **2** Nayi, n kelima nen, n yi taan nabilin, n yi siga taan yama malandene nun kirane xōn, n yi n bōjēn nafaan muxun fen. N na a fenma, koni n mi a toma. **3** Taan kantan muxune yi fa n li, n yi e maxodin, n naxa, “E mi n bōjēn nafaan muxun toxi ba?” **4** N dangu e ra nen tun, n yi n bōjēn nafaan muxun to, n yi a suxu, n mi fa a bejin sōnōn, han n yi sa a raso ngaa banxini, nga fudi tongo n na denaxan yi. **5** Yerusalēn sungutunne, n bata e rakolo bolene nun burunna xenle yi, e nama xanuntenyaan nakeli, e nama a raxulun, benun a waxatin xa a li. **6** Nde ito ra naxan kelima tonbonni, naxan tema alo tutina, alo mirihi nun wusulanna xirina, e nun latikōnōnna xiri jaxumen sifan birin? **7** Sulemani maxali saden nan a ra, sofa tonge sennin a rabilinxi, Isirayila sofa kendene nan e birin na. **8** Silanfanna e birin yii e birin

darixi yengen na. Silanfanna xidixi e birin tagi, alogo e xa makantanna ti kœen na. **9** Manga Sulemani a saden nafalaxi Liban yamanan wudine nan na. **10** A bun tiine rafalaxi wure gbetin nan na, xëmaan nan a bundœxon na. Yerusalen sungutunne a dœxo seen nafalaxi dugi mamiloxin nan na xanuntenyani. **11** E mini, Siyon taan sungutunne, e Manga Sulemani nun a manga kœmœtin mato a nga naxan soxi a xun na a jaxalandin mati lœxœni, a bœjen sewa lœxœna.

4 I rayabu, n nafan jaxanla, i rayabu. I yœene rayabu alo ganbane hali dugin soxi i yetagin xun na. I xun sexen saxi a ma alo sii kurun nœma gode Galadi geyaan ma. **2** I jinne fixa alo yexœe kurun naxan xabe baxi maxabadeni naxanye kelima e maxadeni. E lanxi e boden ma firin firin yœen ma alo gulunne, e keden pe mi baxi. **3** I dœ kidine luxi alo luti gbeela, i dœen tofan han! I xaden nayabu alo girenada wudi bogini xabaxina a tagi hali dugin bata so i yetagin xun na. **4** I kœen maxidixi alo Dawudaa sangansona, sofane yenge so wure lefa wuli kedenna singanxi naxan na alo jœrœna i kœ ra. **5** I xijœ firinne rayabu alo bolen dii gulun firinne, naxanye e dœgema sansi fugaxine tagi. **6** N sigama nen na mirihi latikœnœnna nun wusulanna yireni han kuye yiba, dimin yi siga. **7** N xanuntenna, i rayabu, fœ yo mi i ra. **8** N ma jaxalandi masuxina, fa n fœxo ra keli Liban yamanani Amana geyaan xuntagi, Xerimon geyaan nun Seniri geyaan xuntagi, yatane xiin dœnaxan yi, burunna jœarine geyane. **9** I n bœjen nadinma, i tan sungutunna, n ma jaxalan masuxina, i na i yœen ti n na keden pe i n bœjen nadinma nen. Hali i ya jœeren xœri keden pe, a na lige n na. **10** I ya xanuntenyaan jaxun, i tan sungutunna, n ma jaxalan masuxina, i ya xanuntenyaan jaxun dangu manpa fajin na, i ya latikœnœnna xirin jaxun dangu se xiri jaxumœne birin na. **11** N ma jaxalan masuxina, i dœen jaxun alo kumina, nœnœn nun kumin nan i lenna bun, i ya dugin xirin luxi nen alo Liban wudi xiri jaxumœne. **12** I tan sungutunna, n ma jaxalan masuxina, i luxi nen alo n ma nakœ masansanxina, n ma tigina, n ma ige miniden naxan namaraxi n keden peen xa. **13** I fan alo sansi fajin sixi nakœœn naxan yi, alo girenada binla naxanye bogi fajine raminima, e nun henna binle nun naradi sansi xiri fajina, **14** naradin nun sansi fuge nœri fœjiramaan nun gbala xiri jaxumœne nun sinamon wudi xiri jaxumœne, e nun wusulanna kelixi wudin naxanye birin ma e nun

mirihi latikœnœnna nun wudi ige xiri jaxumœne nun sansi xiri jaxumœ fajine birin. **15** I luxi nen alo nakœ yi tigina, alo xude xunna naxan godoma keli Liban geyane ma. **16** Foye fajin xa fa sa keli kœmœnna nun yiifanna ma, e yi n ma nakœœn xiri fajin nasiga ayi alogo n nafan muxun xa fa so a nakœni, a yi a bogise fajine don!

5 N fama n ma nakœni, i tan sungutunna, n ma jaxalan masuxina, n xa sa n ma mirihi latikœnœnna nun wusulanna ba, n yi n ma kumi dengben nun kumin don, n yi n ma manpaan nun n ma nœnœn min. Xœyine falana: Nxu xœyine, e min, e xunne xa magi a ra xanuntenyani. **2** N bata yi xi, koni n bœjen mi yi xima. N yi n xanuntenna xuiin nan mœma dœen na. Xœmœna falana a jaxanla xa: Dœen nabi n xa, i tan sungutunna, n ma jaxalandi masuxina, n ma ganbadina, fœ mi jaxanla naxan na. Xiila bata n xunni kun n xun sexen bata yikun kœ ra kundaan bun. **3** N bata n ma domain ba n ma, n fa a ragodoma n ma di? N baxi n sanne maxadeni nen, n fa e malœxœma di? **4** N xanuntenna bata a yiin naso dœen yalenna ra, n fatin yi xuruxurun. **5** N to keli n xa dœen nabi n xanuntenna xa, mirihi latikœnœnna yi n yiine nun yii sonle ra, han a lu dindinjœ bœxœni e nun dœen balan seen ma. **6** N yi dœen nabi n xanuntenna xa, koni n xanuntenna bata yi a xun xanbi so, a dangu. A fala xuiin yi godoma n niini, n yi a fen, n mi a to, n yi a xili han, koni a mi n yabi. **7** Kantan tiin naxanye taan nabilinna, ne yi fa n li, e yi n bœnbœ, e yi n maxœlo, e yi n ma xunbeli domain ba n ma, e tan naxanye taan nabilinna yinna kantanma. **8** Yerusalen sungutunne, e kœlo n xa. Xa e n xanuntenna to, e nanse falama a xa? E a fala a xa, fa fala a fe xanuntenyaan fœrena n ma. **9** I tan jaxanla naxan tofan jaxanle birin xa i xanuntenna fan e birin xa di? I xanuntenna fisa gbetœye xa kiin mundun yi, naxan a ligaxi i nxu rakœlœma na kiini? **10** N xanuntenna fatin fixa, a gbeeli, a rayabu muxu wuli fuun yœ. **11** A xunna luxi alo xœma kœndœna, a xunsexœne saxi a ma, e fœœ alo xaxaan xabœna. **12** A yœene rayabu alo ganbane xuden dœ. E fixa alo nœnœna, e mayilenma alo dayimuna. **13** A xadene luxi alo sansi xiri jaxumœ nakœna, naxanye xiri jaxumen tema. A dœ kidine luxi alo gabala fugene mirihi latikœnœnna minima dœnaxan yi. **14** A yiine rayabu alo yiiraso xœma dæxin naxanye rayabuxi kirisoliti gœmœ fajine ra. A fatin luxi alo sama jin xuruxina safiri gœmœ fajin

saxin naxan ma. 15 A sanne luxi nen alo senbeten geme fixe daxin naxanye tixi xema fajin fari. A tofan alo Liban yamanana, a tixi alo sumanna. 16 Naxunna nan tun a de, a fatin birin nayabu. N xanuntenna na kii nin, n fəxərabiran na kii nin, ε tan Yerusalen sungutunne.

6 I tan naxanla naxan tofan birin xa, i xanuntenna sigaxi minen? I xanuntenna a xun tixi minen na, alogo nxu fan xa sa a fen i xa? 2 N xanuntenna bata siga a nakəni, sansi xiri naxume yireni alogo a xa a xuruseene raba menni, a yi sansi fugaxina ndee malan. 3 N xanuntenna gbeen nan n na, n fan gbeen nan a ra, a nema a xuruseene rabama sansi fugaxine tagi. 4 N nafan naxanla, i rayabu alo Tirisa taana, i rayabu alo Yerusalen taana, koni i magaxu alo sofa ganla. 5 I yeen ba n na alogo e nama n xaxinli fu. I xunsexen saxi a ma alo sii kurun nema gode Galadi geyaan na. 6 I jinne fixa alo yexee kurun naxanye kelima e maxadeni. E lanxi e boden ma firin firin yeen ma alo gulunne. E keden pe mi baxi e bode ma. 7 I xaden nayabu alo girenada wudi bogini xabaxina a tagi hali dugin bata so i yetagin xun na. 8 Mangan nœ naxalan manga tonge sennin sote nen, e nun konyi naxalan tonge solomasexε, e nun sungutun wuyaxi naxanye xasabi mi nœ kolonje, 9 koni n tan naxalan keden peen nan kolon. N ma ganbadin na a ra, fe mi naxanla naxan na. A keden peen nan a nga yii dii temen na. A nga a tan nan nafxaxi a diine birin xa. Sungutunne to a to, e a sewana fe fala nen, mangana naxanle nun mangana konyi naxanle fan yi a matoxo. 10 E naxa, “Nde ito ra naxan fama alo subaxana, a rayabu alo kikenā, a mayilenma alo sogena, koni a magaxu alo sofa ganla?” 11 N bata siga nakəni kantin yireni, alogo n xa sa se solixine mato xuden de, alogo n xa a to xa manpa binle mangingima, xa girenada wudine bata fuga. 12 Anu n mi a kolon naxan a ligaxi, n fa n yetε rasoxi yamaan kuntigine yenge so wontorone tagi. 13 I xun xete, i xun xete, i tan Sulami kaana! I xun xete, i xun xete alogo nxu xa i mato. Nanfera i Sulami kaan matoma alo gali firinna nema e bodonma?

7 I sanne rayabu i ya sankidine kui, i tan xoro naxanla! I danbane rayabu alo yiirafalan jeren naxan nafalaxi. 2 I xuli fundin luxi nen alo lenge radigilinxina, minse xiri naxumen mi janma denaxan yi. I kuiin luxi nen alo murutu malanxina naxan

nabilinxi gabala fugene ra. 3 I xije firinne luxi nen alo bolen dii gulun firinne. 4 I kœen merendenxi nen alo sanganso sama jin daxina. I yeene mayilenma alo Xesibon dara igena, Bati-Rabimi so deen dexon. I jœeen fan alo Liban sangansoon naxan tixi Damasi taan binni. 5 I xunna ratinxinxi i gbindin de alo Karemele geyana, i xun sexene mayilenma alo mangane dugi mamiloxine. Mangan mi nœ a yeen be e ra. 6 I rayabu, i tofan han, n xanuntenna, n ma sewa xunna. 7 I kuya alo tugu binla, i xijene luxi alo tugu bogi tœnsœnne. 8 Nanara, n na a falama, n naxa, “N tema nen tugu binla kœ ra, n yi a bogine suxu.” I xijene luxi nen alo naxundan tœnsœnne, i de foyen xirin luxi nen alo mangon mœen xirina. 9 I deen xirin luxi nen alo manpa xiri naxumena. Naxanla falana a xemen xa: Na manpaan xa lu n xanuntenna nan xa, a godo a de kidine nun a jinne ma. 10 N xanuntenna nan gbee n na a waxi n tan nan xœn. 11 N xanuntenna, fa en siga burunna ra, en kœene radangu banxidene ra. 12 Xœtœnni en kurun sigε manpa bili nakœne yi, en sa a mato xa e solima, xa e fugama, xa girenada binle fugama. Mœnni, n sa n ma xanuntenyaan yita i ra. 13 Marafan bogi binle e xiri fajine raminima, bogise fajine birin en dexon. N xanuntenna, n fe fajine birin namaraxi i tan nan xa a fœnne nun a nenene.

8 Xa ngaxakeden xememaan nan yi i ra nun, naxan nga xijen minxi, n yi sa i ralanma nen nun, n yi i sunbu tanden ma, muxu yo mi n naxaxu. 2 N yi i xalima nen nun, n sa i raso ngaa banxini. I yi n xaran xanuntenyaan ma. I yi n ma manpa xiri naxumen min, n ma girenada bogine igene. 3 A kœmen ma yiina n xunna bun, a yi a yiifanna rabilin n ma. 4 Yerusalen sungutunne, n bata ε rakolo, ε nama xanuntenyaan nakeli, ε nama a raxulun, benun a waxatin xa a li. 5 Naxanla mundun fama ito ra sa keli tonbonni, a singanxi a xanuntenna ra? Naxanla falana a xemen xa: N bata i raxulun mangon binla bun, i bari ngana i fudi tongoxi denaxan yeteni. 6 N ma fe sa i bœjeni alo taxamasenna i yiin na, bayo xanuntenyaan senben gbo alo sayana. Xœxolœnna naxu alo laxira, a degen xolo alo habadan tœε degena. (Sheol h7585) 7 Ige gbeene mi nœ xanuntenyaan janje. Baa igene mi nœ a xalc. Xa muxuna nde yi kate a banxin kui seene birin masare xanuntenyaan na, muxε mi yi tinje a rasuxε. 8 Nxu xunye naxalanmana nde na, naxan xijeye munma te singen. En nanse ligama en xunye naxalanmaan xa,

en na a futu feen fala lɔxɔn naxan yi? **9** Xa a luxi alo taan nabilinna yinna naxan mi rabima, nxu a binyama nɛn gbeti gbeen na. Koni xa a luxi alo dɛɛn naxan nabima keden na, nxu a balanma suman farinne nan na. **10** N tan luxi nɛn alo taan makantan yinna, n xijɛne luxi alo sangansona. N luxi nɛn n ma xɛmɛn yɛɛ ra yi alo naxanla naxan fama bɔɲɛ xunbenla ra a xa. **11** Manpa bili nakɔna nde yi Sulemani yii Baali-Hamon yi, a yi a taxu muxuna ndee ra. E birin yi fama gbeti gbanan wuli keden nan na a bogine saren na. **12** N ma nakɔna n tan nan xa. A n yii. Na gbeti gbanan wuli kedenna i tan nan xa Sulemani, i yi kɛmɛ firin so a kantan muxune yii. **13** I tan naxan dɔxi nakɔni, n lanfane tuli matixi i ra. I xuiin namini n xa a mɛ. **14** N xanuntenna, i gi, alo bolena hanma xɛli sɛnbɛmaan geyane fari sansi xiri naxumɛne dɛnaxan yi.

Esayi

1 Feni itoe makenen Amosi a dii xemena Esayi nan xa lan Yuda nun Yerusalen ma, Yusiya nun Yotami nun Axasi nun Xesekiya Yuda mangane waxatine yi. **2** Kore xonna, ito rame! Bəxo xonna, i tuli mati! Amasoto, Alatala falan tima, a naxa, “N bata diine ragbo, n yi e maxuru, koni e bata murute n ma. **3** Ningena a kanna kolon, sofanla a kolon a kanna a degema denaxan yi, koni Isirayila mi sese kolon, n ma yamaan mi sese famuma.” **4** Gbalon yama yulubitoni ito xa, siyaan naxan hakene goronna binya, fe jaxi rabane bənsonna, dii tinxintareni itoe! E bata Alatala rabənin, e yi e mē Isirayilaa Ala Sarijanxin na, e xun xanbi so a yi. **5** E wama a mən xa e bənbə minen ma, e to luma murute a ma? E xunna birin bata findi furen na, e bəjən birin sɔxɔlexi. **6** Keli e sanna ma han e xunna, sese mi kende. Maxɔldene nun bənbə fəxone nun fure deene e fatin birin ma, muxe mi naxanye dandanma, muxe mi e maxidima, muxe mi turen tima e de. **7** E yamanan luxi nən alo tonbon jaxina, e taane bata gan. Xəjene e yamanan sansine kalama e yee xori. E bəxən bata halagi, a lu alo yaxune na dangu a yi. **8** Siyon taan nan keden pe luxi alo bubun manpa bili nakoni alo gagen kəkunba xeeni alo yaxune na taan nabilin a yenge xinla ma. **9** Xa Alatala Senben Birin Kanna mi yi muxe lu a nii ra en konni nun, en yi luma nən nun alo Sodoma taana, en liga alo Gomora taana. **10** E Alatalaa falan name, Sodoma mangane! E tuli mati en ma Alaa sariyan na, Gomora kaane! **11** Alatala naxa, “E saraxa wuyaxine tənən mundun n ma? E bata yexee gan n xa saraxan na e nun xuruse raturaxine turena, han n yi wasa na feene ra. Turane nun yexee diine nun kətone wunla mi fa n kenənxi sənən! **12** E na fa n yetagi, nde a falaxi e xa fa n batu banxin tanden mabodon gbansan? **13** E ba fe kiseene ra n xən, naxanye tənə mi na, e wusulanna tutin haramuxin na a ra n yee ra yi. E kike nenen sanle rabama e nun Matabu Ləxone, e malanne tima. E haken naxanye ligama malanne yi, ne bata n yili. **14** E kike nene sanle nun e malanne bata n niin tɔrɔ. Goronna nan e ra n xun ma, n bata xadan e bun. **15** E na e yiine yite n maxandideni, n mi n yeen tima e ra. Hali e n maxandi han, n mi n tuli matiye e ra. Wunla e yiin birin na. **16** E maxa, e yete rasarijan, e yi e kewali jaxine ba n yetagi, e ba fe jaxine lige. **17** E xaran fe fajin ligan ma, e tinxinna fen, e jaxankata tiine ti

kira fajin xən. E yi kiridine xun mayenge kitin bolon, e kaja gilene xun mafala kitini.” **18** Alatala naxa, “E fa, en fa feene feselese en bode xən. Hali e yulubine luxi alo wunla, e fixama nən alo balabalan kesena. Hali e to gbeeli iki, e mən sarijanma nən alo dugi fixena. **19** Xa e xuru, e n ma falan name, e nɔe yamanan bogise fajine donje nən. **20** Koni xa e tondi, xa e lu murute n xili ma silanfanna nan e faxama,” Alatala de xuiin nan na ra. **21** Taa tinxinxin findixi taa yalunxin na di? Kiti kenden yi Yerusalen yiren birin yi a fəloni nun. Tinxin muxune nan yi dɔxi na. Koni iki, faxa tiine nan na yi. **22** Yerusalen kaane, e gbetin bata findi wuren gbiin na, igen bata basan e dɔlɔ fajin na. **23** Muxu murutexine nan e kutigine ra e nun mujadene bata malan. Dimi yi seene rafan e ma mayifuni e yi e gi kiseene fəxo ra. E mi kiridine xun mayenge kitin bolonma. Kaja gilene kitine bote mi e xa. **24** Nanara, Marigina Alatala Senben Birin Kanna, Isirayilaa Ala Senbemana falan ni ito ra, a naxa, “Gbalona e xa! N nan n yete sɔtoma nən n yengefane ra. N nan n gbeen jəxoma nən n yaxune ra. **25** Yerusalen kaane, n kelima nən e xili ma. N na e rasarijanma nən alo wuren gbiin na ba teen na, a maxa safunna ra. N yi e fe jaxine birin ba e yi alo yəxən bama wureni kii naxan yi. **26** N mən kitisa fajine fima e ma nən alo a fəloni, e kawandi muxune yi lu alo a singene. Na xanbi ra, a fa falama e ma nən nayi, a taa tinxinxina, lannaya yirena.” **27** Siyon taan xunbama nən kiti kenden xən. A muxun naxanye na fa Ala ma, ne xunbama nən tinxinyaan xən. **28** Koni murutedene nun yulubitone halagima nən e bode xən. Naxanye na e mē Alatala ra, ne fe bata dan. **29** Nayi, e yagima nən e wudi binle fe ra, e yi naxanye batuma e nun e nako yiren naxanye sugandi e kidene ra. **30** Amasoto e luma nən alo wudin naxanye de yolonma, hanma alo ige mi nakən naxanye yi. **31** E senbemane luma nən alo sexe xarena, e kewanle yi findi tee fuluxaan na naxan teen soma, e nun e wanle yi gan e bode xən, muxu yo mi na teen natu.

2 Feni itoe makenen Amosi a dii xemena Esayi nan xa lan Yuda nun Yerusalen ma. **2** Waxati famatoni Alatala Batu Banxin गयाan naxan fari na danguma nən geyane birin na, a lu geyane birin xun ma, siyane birin yi lu fe a ma han! **3** Siya wuyaxine fama nən, e a fala, e naxa, “E fa, en siga, en te Alatalaa गयाan ma, Yaxubaa Alaa banxini. A xa en xaran a sigati kiine ma, alogo en xa bira a kirane fəxo ra.” Amasoto

sariyan minima nen Siyon yi. Alatalaa falan minima nen Yerusalen yi. **4** A findima nen kitisaan na siyane tagi. A yengene janma nen yama wuyaxi tagi. E e silanfanne bɔnbɔma nen e yi e rafala jinge kenne ra, e tanbane yi rafala wɔlitene ra. Siya yo mi fa silanfanna tongoma gbete xili ma. Yengen mi fa maxaranye nume. **5** Yaxuba yixetene, ε fa, en sigan ti Alatalaa kenenni! **6** Ala, i bata i me i ya yamaan na, Yaxuba bɔnsɔnna, bayo koron bɔnbɔne waraxi ayi naxanye sa kelixi sogeteden mabinni, yiimatone fan bata wuya ayi alo naxanye Filisitine konni. I ya yamaan nun siya gbetene bata so feene yi. **7** Yamanan nafexi gbeti fixen nun xɛmaan nan na, a nafunla mi nɔe yate. Yamanan nafexi soone nan na, a yenge so wontorone mi nɔe yate. **8** Yamanan nafexi suxurene nan na. Muxune e xinbi sinma e yii fɔxɔn nan bun ma, e tan yetɛen seen naxanye rafalaxi. **9** Nayi, muxune birin e mafelenma nen, e fe yi magodo. Ala, i nama e rakeli de! **10** E sa ε luxun fanyene bun, ε so bɔxɔn bun ma alogo ε xa ε gi Alatala bun ma naxan magaxu, e nun a binye gbeen nɔrɔna! **11** Adamadi yɛɛ rawasoxine xun sinma nen, wasodene yi mafelen. Alatala nan keden ma fe yitema na lɔxɔni. **12** Amasɔto Alatala Senben Birin Kanna lɔxɔn mamema a kelima wasodene nun yete yigbone xili ma lɔxɔn naxan yi, a yi ne ragodo naxanye e yete yitema. **13** A kelima nen Liban suman kuyene birin xili ma e nun Basan yamanan warine birin **14** e nun geya gbeene nun yire matexine birin, **15** e nun kore banxine nun makantan yinne birin, **16** e nun Tarasisi kaane kunki gbeene nun gise fajine birin. **17** Wasodene mafelenma nen, yete yigbone fe yi godo. Alatala nan keden ma fe yitema na lɔxɔni. **18** Suxurene birin yi lɔ ayi. **19** Muxune soma nen faranne nun yinle ra alogo e xa e luxun Alatala ma, naxan magaxu, e nun a binye gbeen nɔrɔna a na keli bɔxɔni maxadeni. **20** Na lɔxɔni, muxune e suxure gbeti daxine nun xɛma daxine rawolima ayi nen sulumene nun tuyene bun e suxuren naxanye rafalaxi e batu seen na. **21** E soma nen fanye longonne nun yinle ra alogo e xa e gi Alatala ma, naxan magaxu e nun a binye gbeen nɔrɔna a na keli bɔxɔni maxadeni. **22** Nayi, ε xete adamadiine fɔxɔ ra nii raxili keden peen nan fa e nun sayaan tagi. Nayi, nanse e tan na?

3 Marigina Alatala Senben Birin Kanna balon nun feren birin bama nen Yerusalen kaane nun Yuda kaane birin yii. A donseene nun igene birin ba na

2 e nun sofa kendene nun yengesone nun kitisane nun nabine nun yiimatone nun fonne birin, **3** e nun sofa kuntigine nun muxu gbeene nun kawandi tiine nun yii rafalane, e nun woyime yɛbaxine. **4** Ala naxa, “N diidine findima nen e mangane ra, naxanye mangayaan nabama e waxɔnna ra.” **5** Muxune e bode jaxankatama nen yamani, birin yi lu a dɔxɔ boden xili ma diidine yi jaxu fonne ra fuyantenne yi jaxu muxu binyene ra. **6** Muxuna nde a ngaxakedenna suxuma nen a fafe xabilani, a yi a fala a xa, a naxa, “Dugi fajin mɔn i yii, findi en ma mangan na, i ti yama kalaxini ito yɛɛ ra!” **7** Bodena a yabima nen na lɔxɔni, a naxa, “E mali feren mi n xa. Donse mi n konni, maraberi ba mi na. I nama n findi yamaan mangan na de!” **8** Yerusalen kalamatɔɔn ni i ra, Yuda yamanan bata bira. Amasɔto e bata murute Alatalaa binyen xili ma, e a matandima e falane nun e kɛwanle yi. **9** E yetagin kiin gbansanna e xun maxidima. Kenen ma feen nan fa e yulubine ra alo Sodoma kaane, e mi fa e fe luxunma. Gbalon na kanne xa, amasɔto e halagin nan yitɔnma e yete xa na ra! **10** E nɔe a fale nen, ε naxa, “Tinxin muxune nan herini. E kɛwanle tɔnɔn sɔtɔma nen. **11** Koni gbalon muxu jaxine xa! Feene birin xɔdɔxɔma ayi nen e ma. Amasɔto, e saranma nen e kɛwanle ra.” **12** Ala yi a fala, a naxa, “Diidine nan n ma yamaan jaxankata tiine ra, jaxanle nan e xun na. N ma yamana, ε yɛɛratine ε raloma ayi nen, e yi ε kirani fu ε ma.” **13** Alatala bata keli, a yitɔnxi kitin xili ma, a bata keli siyane makitideni. **14** Alatala a yamaan fonne nun a kuntigine makitima, a naxa, “E tan nan n ma nakɔɔn kalaxi, n ma yamana. E yi ε banxine rafe yiigelitɔne seene ra. **15** Nanfera ε n ma yamani lunburunma. Nanfera ε yiigelitɔne jaxankatama?” Marigina Alatala Senben Birin Kanna falan nan na ra. **16** Alatala naxa, “Siyon sungutunne bata e yete yite. E sigan tima e kɔɛni texin na e muxune rakunfa e yɛene ra. E sigan tima dɔjɔn dɔjɔinna ra, e lu e san kɔe rasone xuiin namine.” **17** Marigin Siyon kaa sungutunne findima nen teli kanne ra, Alatala yi e xunne magenle lu. **18** Na lɔxɔni, Marigina e ratofan seene bama nen e yii: San kɔe rasone nun jɛrɛne nun maxidi seen naxanye digilin fɔlɔxi alo kiken a **19** e nun tunla soone nun yii kɔe rasone nun kɔe mafilinne **20** e nun labaranne nun jɛrɛ yɔlɔnxɔnne nun tagixidi dɛnbɛxine nun latikɔnɔnne nun e kantan seene, **21** e nun yii soli rasone nun jɔɛ raso wurene, **22** nun sali dugi fajine nun doma gbeene nun gubane

nun gbeti sa seene e yii, **23** e nun mato kikene nun doma yelefuxin tofajine nun kœ raxidine nun tungun mafelenne. **24** E latikœnœnne xirin masarama nen se kunxin xirin na, e tagi xidin yi masara lutin na. E xun denbœxi fajine gbananma nen, sunu dagine nun benbenle yi ragodo e ma dugi fajine funfuni. Yagin larune yi sa e ma tofanna funfuni. **25** Yerusalen kaane, ε xemene faxama nen silanfanna ra, ε sofane yi faxa yengeni. **26** Nayi, taan birin e wugama nen, e sunu. A muxune halagixin yi lu dœxi bœxœni.

4 Na lœxœni, naxalan solofere xœmε kedenna suxuma nen e a fala a xa, e naxa, “Nxu donseen nun maraberi baan fenjœ nxu yete xa, alogo tun nxu xa yate i ya naxanle ra, i yi nxœ yagin ba!” **2** Na lœxœni, Alatala se fajni nœrœxina nde rasolima nen yamani. Yamanan bogi seene yi findi Isirayila muxu dœnxene kanba xunna nun binyen na. **3** Nayi, naxanye na lu Yerusalen yi, naxanye mœn na lu e nii ra Siyon yi, a falama nen ne ma, a “Muxu Rasarijanxine,” Ala bata naxanye birin xili sebe alogo e xa nii rakisin sœto Yerusalen yi. **4** Marigina Nii Sarijanxin yi kiti kenden nun tœen nafa Yerusalen yi, a naxanle rasarijan e fe xœsixine ma. A Siyon taan nasarijan faxa ti wuli funfune ma. **5** Na xanbi ra, Alatala kundaan nun tutin naminima nen Siyon geyaan nun a yama malanxin xun ma. Kœœn na, a findi tœe dege gbeen na. A nœron yi lu e birin xun ma alo xunna soona, **6** alo yigiyaden naxan nininna fima kuye wolon waxatini yanyin na e nun soden nun luxundena, tule gbeen na fa.

5 N xa sigin sa n xanuntenna xa, n xœyina manpa bili nakœna fe ra. Manpa bili nakœna nde yi n xanuntenna yii geyaan sabati yireni. **2** A bœxœn wali nen a yi gemene ba a yi, a yi sansi yebaxine si na yi. A yi gbengben ti kantan tiden na. A yi dœlœ ige baden ge fanyeni. A yengi yi manpa bogi fajine nan ma a nakœni, koni a manpa bogi xœlene nan sœtœxi. **3** Nayi, n xanuntenna naxa, “ε tan naxanye dœxi Yerusalen yi, ε tan Yuda kaane, ε tan nan kitin sama nxu nun n ma nakœn tagi. **4** N yi lan nun n xa nanfe gbete liga n ma nakœn xa, n munma naxan liga a xa singen? N yengi yi bogi fajine nan ma nun, nanfera nayi, a bogine birin xœlœ? **5** Iki, n xa a fala ε xa n fama naxan ligadeni n ma manpa bili nakœn na: N na a sansanna kalama nen, xuruseene yi a madon. N na a rabilinna yinna rabirama nen dangun muxune yi a yibodon. **6** N na a findima bœxœ rabepinxin na nen, a mi fa masege,

a mi biye. Sexœ naxine nun janle minima nen a ma, n yi tœnna dœxœ kundane ma a e nama tulen nafa a ma.” **7** Alatala Senben Birin Kanna manpa bili nakœn lanxi Isirayila yamaan nan ma. Nakœn naxan yi rafan a ma nun han, Yuda yamaan nan yi na ra. Alatala yengi yi kiti kenden nan ma a yamani koni a gbalon nan lixi na. A yengi yi tinxinyaan nan ma, koni a gbelegbele xuiin nan mexi na. **8** Gbalon na kanne xa naxanye banxine tima e bode fari, e xœene tugun e bode ra han e bœxœn birin tongo, e yi dœxœ kedenyani yamanani. **9** N tunla Alatala Senben Birin Kanna falani ito nan mexi, a naxa, “N bata n kœlœ, banxi wuyaxini itoe kalama nen. Banxi gbee fajini itoe kui genla yi lu. **10** Manpa bili nakœn naxan gbo han jingen xi fu tiye naxan bideni, na mi manpa litiri tonge naanin namine. Naxan na murutun kilo kœmε bi, na kilo fu nan tun xabama.” **11** Gbalon na kanne xa naxanye kurunma, e e gi dœlœn fœxœ ra, naxanye xima e yœœ ra yi dœlœ mindeni, han e xunna yi keli. **12** E degema e banden don naxanxane yi bœlœn xuiin nun kondan xuiini e nun tanban xuiin nun xulen xuiin nun dœlœna. Anu, e mi Alatala kewanle rakœrœsima e mi a wanle toma. **13** Nanara, Ala naxa, “N ma yamaan sigama nen konyiyani, bayo e mi waxi sese kolon feni. E muxu gbeene faxama kamen nan na, yamaan yi halagi ige xœnla ma.” **14** Nanara, laxira a deni bima nen pon, a yi a so dœ gbeeni bi dan mi naxan na muxu gbeene nun e yamaan birin yi godo mœnni e nun e sœnxœ ratene nun e mananmanantœne birin. (Sheol h7585) **15** Muxune birin mafelenma nen, adamadiine fe yi godo, wasodene yi e xun sin. **16** Alatala Senben Birin Kanna fe yitema nen a kiti kenden xœn. Ala sarijanxina a sarijanna mayitama nen a tinxinyaan xœn. **17** Nayi, taa kalaxini ito findima nen yœxœene rabaden na, e fa e dege na, xœjœne yi e balon sœto nafulu kanne banxi xœnne yi. **18** Gbalon na kanne xa naxanye hakene e xidixi wulen xœn alo lutina, e bubu e fœxœ ra. E e yulubin bandunma e fœxœ ra alo yœlœnxœnna wontoron bandunma kii naxan yi. **19** E a falama, e naxa, “Ala xa a mafura, a xa a wanla kœ xulen alogo nxu xa a to. A feen xa yiso, Isirayilaa Ala Sarijanxina fe ragidixine xa rakamali, nxu yi a fe kolon.” **20** Gbalon na kanne xa, naxanye a falama, a fe naxin fan, a fe fajin naxu, naxanye kenenna yatema dimin na, dimin yi yate kenenna ra, naxanye xœlœn yatema a naxumen na, naxunna yi yate xœlœn na. **21** Gbalon na kanne xa naxanye e yete findixi fe kolonne ra e yi e yete yate xaxilimane ra! **22**

Gbalon na kanne xa naxanye tunnafan dolo mindeni, naxanye fatan dolo minseene basanye! **23** E fe kalan bejinma se feen na koni e mi tinma sontarena kitin se. **24** Nanara, e luma nen alo teen sexen naxan ganma, alo sexe xaren naxan janma tee degeni. E salenne kunma nen, e fugene yi siga ayi alo gbangbanna. Amasoto e bata e me Alatalaa sariyan na, Senben Birin Kanna. E bata Isirayilaa Ala Sarijanxina falan nabegin. **25** Nanara, Alatala bata xolo a yamaan ma han! A bata a yiini bandun e xili ma, a yi e jaxankata. Geyane xuruxurunma, binbine biraxi na xun xon alo jaman kiraan xon. Koni hali na birin, Alatalaa xolon mi jan, a yiin mon yi lu yitexi e xili ma. **26** Ala bata taxamasenni te alogo siya makuyene xa a to, a yi siyana nde xili kolinni sa keli boxon danna ra. E mi e to fe e giye? E xulun de! **27** Muxu yo mi xadanxi e ye, e sese mi e madiganma, xixonla mi muxu yo ma, e birin bata xulun. Sofa yo mi a tagixidin fulunxi, e sese a sankidi luti mi bolonxi. **28** E xalimakunle jone ralemunxi, e xanle birin bandunxi. E soone torone xodoxo alo gemena, e wontorone sanne firifirima alo wuluwunla. **29** E sofane sonxo xuiin magaxu alo yatana, e wurundunma alo yata senbeman, e xajexin xoyi seen suxuma, e yi a xali. Muxu yo mi noe a be e yii. **30** Na boxoni, e sonxoni tema nen na yi alo foxo igen na walanje ayi. Nayi, naxan na a yeen ti yamanan na, na dimin nun yigitegen nan toma a yi, kundaan yi lu kenenna ye ma.

6 Manga Yusiya faxa jeeeni, n Marigin to nen dxi mangaya gbade matexini pon! A doma gbeen lenbene yi Ala Batu Banxin nafexi. **2** Maleka gubugubu kanne yi a xun ma. Gubugubu sennin nan yi e keden kedenna birin ma. Gubugubu firinna e yetagin yee maluxunxi, firinna e sanne yee maluxunxi, firin yi lu e tугan seen na. **3** E yi e xui raminima e bode ma, e naxa, "A sarijan, a sarijan, Alatala Senben Birin Kanna sarijan! Boxon birin nafexi a binyen nan na." **4** Ala Batu Banxin deen ti wudine nun a so deen lonna yeteen yi lu xuruxurunje e xuiin ma, na yi rafe tutin na. **5** N yi a fala, n naxa, "Gbalona n xa, n bata halagi! Amasoto muxun nan n na naxan de haramuxi, n dxi yamaan ye, fala haramuxin minima naxanye de. Anu, n bata mangan to n yeen na, Alatala Senben Birin Kanna." **6** Koni maleka gubugubu kanna nde keden yi tугan, a fa n binni, tee wolonna suxi a yii, a naxan tongo saraxa ganden fari tee ko seen na. **7** A yi tee

wolonna din n deen na, a yi a fala, a naxa, "Iki, bayo ito bata din i deen na, i haken bata xafari, solonaan bata ti i yulubin jan feen na." **8** Nayi, n yi Marigin xuiin me maxodinna tiye, a naxa, "N na nde rasigama? Nde sigе nxu xa?" N yi a yabi, n naxa, "N tan ni i ra, n nasiga." **9** A mon yi a fala, a naxa, "Siga, i sa a fala yamani ito xa, i naxa, 'E tuli matima nen han, koni e mi fefe famuma. E seen matoma nen han, koni e mi a yigbema.' **10** E bojen naxodoxo ayi, i yi e tunle xori, i e yeeene raxi. Xanamu, e yeeene toon tima nen, e tunle yi falan me, e xaxinle yi feen famu, e yi xete n ma, e kendeayaan soto." **11** N yi maxodinna ti, n naxa, "Marigina, han waxatin mundun yi?" A yi n yabi, a naxa, "Han taane na halagi waxatin naxan yi, e muxu yo mi lu, e banxine yi kui geli, xeeene yi kala, e findi boxo rabepinxine ra, **12** han Alatala yi muxune masiga a ra han yamanan yi rabegin fefe!" **13** Xa muxune yaten yaganna joxon na lu yamanani, teen mon xetema nen na raxorideni. Koni wudi gbeene dungine nun wari dungine luma boxoni kii naxan yi e na sege waxatin naxan yi, bonsen sarijanxina nde fan luma yamanani na kii nin alo wudi dungin naxan sa majingima.

7 Yotami a dii xemena Axasi, Yusiya mamandenna, Yuda Mangan waxatini, Arami manga Resin nun Remaliyaa dii xemen Peka, Isirayila mangan yi siga Yerusalen yenge xinla ma, koni e mi a no. **2** Muxune yi a fala Axasi xa Dawuda yixetena, e naxa, "Arami kaane nun Efirami bonsonna muxune bata e malan e xili ma." Mangan nun a yamaan bojen yi maxa na feen ma alo foyen wudine yimaxama kii naxan yi. **3** Nayi, Alatala yi a fala Esayi xa, a naxa, "E nun i ya dii xemen Seyari-Yasubu xa mini Axasi ralandeni ige ramaraden faxaraxiin xunna ra, dugi xane xee ma kiraan xon. **4** A fala a xa, i naxa, 'A liga i yeren ma, i raxara, i nama gaxu. I nama tunnaxolo i ma muxu firinni itoe xolo gbeena fe ra, Resin Arami kaan nun Remaliyaa dii xemena. Yegen tumatoon nan tun ne firinna ra. **5** N na a kolon Arami kaane nun Efirami bonsonna muxune nun Remaliyaa dii xemen bata a nata a e xa fe jaxin liga i ra. E naxa, **6** "En siga Yuda yamanan xili ma! En sa men kaane yigitege! En yi e yamanani taxun, en yi Tabele a dii xemen doxo mangan na e xun na." **7** Koni Marigina Alatala ito nan falaxi, Na mi lanje, na mi ligama. **8** Amasoto Damasi findixi Arami manga taan nan tun na. Resin findixi Damasi

mangan nan tun na. Benun jɛɛ tonge sennin e nun suulun, Efirami bɔnsɔnna kalama nɛn, a mi fa yate yamaan na. **9** Samari findixi Efirami manga taan nan tun na. Remaliyaa dii xɛmɛn findixi Samari mangan nan tun na. Xa ɛ mi denkeɛya, ɛ mi tiye!” **10** Alatala mɔn yi falan ti Axasi xa, a naxa, **11** “Taxamasenna nde maxɔdin bɔxɔn bun hanma kore xɔnna ma Alatala ma, i ya Ala.” (Sheol h7585) **12** Koni Axasi yi a yabi, a naxa, “N mi sese maxɔdinma, n mi Alatala bunbama.” **13** Nayi, Esayi yi a fala Axasi xa, a naxa, “Ɛ tuli mati, Dawuda yixetene! Ɛ muxune tunnaxɔlɔma e ma, koni ɛ mi ɛ wasa soxi na yi. Ɛ mɔn n ma Ala fan tunnaxɔle a ma ba? **14** Nayi, Marigin yetɛɛn taxamasenna yite ɛ ra: sungutun nasɔlɔnxin fudikanma nɛn, a yi dii xɛmɛn bari. A yi xili sa ‘Emanuweli,’ na bunna nɛɛn fa fala, ‘Ala en tagi.’ **15** A baloma fɛnɛn nun kumin nan na, han a yi nɔ fe jaxin nun a fajin tagi rabe. **16** Anu benun na diin xa nɔ fe jaxin nun a fajin tagi rabe, i gaxuxi manga firinna naxanye yɛɛ ra, ne yamanane rabɛpinma nɛn. **17** Koni Alatala jaxankata lɔxɔne rafama nɛn i tan xili ma, e nun i ya yamaan nun i babaa denbayaan xili ma. Na lɔxɔne jɔxɔn munma lu na singen xabu Isirayila nun Yuda yamanane fata. Na fatama Asiriya mangan nan na.” **18** Na lɔxɔni, Alatala tugetugene xilima nɛn kolinni sa keli Nila baan biradeni fɔxɔ igen ma Misiran yi e nun kumi jɛpɛn naxanye Asiriya yamanani. **19** E birin fama nɛn e fa dɔxɔ folone ra xudene xɔn, e nun gɛmɛ bɔxine kanke ra, e nun wudi dungine nun darane birin yi. **20** Na lɔxɔni, Marigina Asiriya mangan findima nɛn a walikɛɛn na, a findi dɛ xabe biin na keli Efirati baan kidi ma a yi ɛ xunne nun ɛ sanne mabi, hali ɛ dɛ xabene birin. **21** Na lɔxɔni, muxuna nde jinge keden nun sii firin namarama nɛn. **22** E yi nɔnɔ gɛgɛbe fi muxune ma e fɛnɛn yi don. Muxun naxanye birin na lu yamanani, ne baloma fɛnɛn nun kumin nan na. **23** Na lɔxɔni, manpa bili wuli keden xɛɛn naxan ma naxanye sarama gbɛti gbanan wuli keden na mɛnna findima janle nun tansin xɛɛn nan na. **24** Muxune sigama nɛn mɛnni xanle nun xalimakunle ra e yii, amasɔto sexɛn nun janle nan luma bɔxɔn ma. **25** Muxune gaxuma nɛn janle nun tansinne yɛɛ ra, muxu yo mi fa sige geyane fari dɛnaxanye yi bima jinge kenna ra nun. Mɛn yi findi jinge rabaden na, yɛxɛɛne yi na yibodon.

8 Alatala yi a fala n xa, a naxa, “Walaxa belebelena nde tongo, i yi seɛnla ti a ma naxan nɛɛ xaranjɛ, i naxa, ‘Nafunle Suxu Keden Na. A Tongo Mafuren.’” **2** N yi walaxan yita sereya tinxinxɔ firin na: Saraxarali Yuriya nun Sakari, Yeberekiyaa dii xɛmɛna. **3** Na xanbi ra, n yi n ma jaxanla kolon jaxanla ra, nabi jaxalanmana. A yi fudikan, a yi dii xɛmɛn bari. Nayi, Alatala yi a fala n xa, a naxa, “A xili sa, ‘Nafunle Suxu Keden Na. E Tongo Mafuren.’” **4** Amasɔto, benun i ya diin xa fatan a fale ‘baba’ hanma ‘n na,’ Asiriya mangana muxune Damasɔ taan nun Samari taan nafunle tongoma yɛngɛni nɛn.” **5** Alatala mɔn yi a fala n xa, a naxa: **6** Yamani ito tondixi Silowa baa ige fajin ma, e tunnaxɔlɔxi e ma Manga Resin yetagi e nun Remaliyaa dii xɛmɛna. **7** Nayi, Marigina Efirati baa ige walanxi gɛɛn nadinma nɛn e xili ma alo fufana, Asiriya mangan nun a senbɛ gɛɛn nan na ra. Efirati baan fema nɛn han a bɔxɔn a ma. **8** Fufaan danguma nɛn Yuda yamanan naxɔrɛ, a sa yiren birin xun ma, a te han a kɔɛɛn bun. A fa han a sa ɛ yamanan yiren birin xun ma. Ala en tagi! **9** Siyane, ɛ gɛlegɛbele, ɛ gaxu! Ɛ tuli mati, ɛ tan naxanye sa yamana makuyene yi! Ɛ yitɔn yɛngɛn xili ma, ɛ yigitegema nen! **10** Ɛ na yenge feene yitɔn, e kalama nɛn! Ɛ na falan ti, a mi kamalima! Amasɔto Ala nxu tagi. **11** Alatala bata a yii senbɛ gɛɛn sa n ma, a yi n maxadi, a n nama yamani ito raliga. A yi a fala n xa, a naxa: **12** Yamani ito feen naxanye yatɛma yanfan na ɛ tan nama ne birin yate yanfan na de! Ɛ nama gaxu e gaxu feene yɛɛ ra ɛ nama xamin ne fe yi de! **13** Ɛ xa Alatala Senben Birin Kanna nan tun kolon sarɛɛnanden na, ɛ lan ɛ xa na nan binya, ɛ lan ɛ xa gaxu a tan nan yɛɛ ra. **14** Amasɔto Ala findima nɛn yire sarɛɛnɔnxin na e nun gɛmɛna Isirayila yama firinne xa, yamana e sanna radinma gɛmɛn naxan na, a findi e rabira gɛmɛn na. A findima nɛn luti ratixin na Yerusalem kaane yɛɛ ra, a e suxu. **15** E wuyaxi e sanna radinma nɛn, e bira, e fe yi kala. E suxuma nɛn lutin na, e mi nɔɛ e fulunjɛ. **16** N yi na sereyaan namara n yi, n yi xaranni ito balan, n na fala n ma xarandiine nan tun xa. **17** N na Alatala mamɛma naxan bata a yetagin luxun Yaxuba bɔnsɔnna ma. N nan n yigi sama Ala nin. **18** Nxu nun n ma diine nan ito ra, Alatala naxanye fixi n ma. Nxu findixi taxamasenne nun marakolon seene nan na Isirayila yi, fata Alatala Senben Birin Kanna ra naxan dɔxɔɔɔɔn Siyon geyaan fari. **19** Ndeɛ a falama, e naxa, “Ɛ barin kiine nun yiimatone maxɔdin, naxanye

wundo feene koyekoyenma, e falan ti e de bun ma. A mi daxa yamaan xa e gbee alane maxodin ba? Muxune mi barinne xan maxodinma jɛɛɛ muxune xa ba?” 20 E ne yabima nen, e naxa, “Fɔ en xa xete Alaa sariyan nun a fala xuine nan ma.” Xa naxan mi falan tima na kiini, na kanna mi kenenna toma. 21 Muxune yigitegexin nun e kametone e masiga tima nen yamanan xun xon ma. Kamen na e suxu jaxi ra, e xoloma nen, e sa e mangan nun e Ala danga. E yeen tima nen koren na, 22 na xanbi ra e yi boxon mato. Koni e toron nun dimin nun boje rafore gbeen nan tun toma. E yi rawoli dimi gbeeni.

9 Anu, naxanye yi luxi na toroni, ne dimin janma nen. Waxati danguxini, Ala yagin nan nagidi Sabulon yamanan nun Nafatali yamanan ma. Koni waxati famatoni, kiraan naxan sigama baan ma, Yuruden baan kidi ma, a na rafema nen binyen na e nun siya gbetene yamanana, Galile. 2 Yamaan naxan sigan tima dimini, ne bata kenen gbeen to. Naxanye dɔxi dimi gbeeni, kenenna bata mini ne ma! 3 Ala i bata yamaan nawuya ayi, i yi e sewan nagbo ayi. E sewaxi i yetagi alo muxune nema sewe se xaba waxatini, alo e jaxanma kii naxan yi e nema yenge yi se tongoxine yitaxunje. 4 Amasoto i ya yamaan toroma goron tongo wudin naxan bun e nun wure gbelemen naxan saxi e tungunna ma e nun e jaxankata muxune bosana, i bata ne birin kala alo i a liga kii naxan yi Midiyane no loxoni. 5 Yaxune sankidin naxanye birin yenge yirene yibodonma e nun dugin naxanye birin bata sin wunli ne birin ganma nen alo yegen teeni. 6 Amasoto diina nde bata bari en xa, dii xemen bata soto en xa. Mangayaan luma nen a tan xa. A xili bama nen a, “Kabanako Kawandi Tiina, Ala Senbemana, Habadan Fafe, Boje Xunbeli Mangana.” 7 A mangayaan nun boje xunbenla sigama gboe ayi nen dan mi naxan na. A dɔxoma nen Dawuda mangaya gbedeni a yamanan xun na. A yi a senbe so, a yi a masuxu kiti kenden nun tinxinni, keli to ma han habadan. Alatala Senben Birin Kanna na ligama a xanuntenya gbeen nin. 8 Marigin bata falan ti Yaxuba bonsonna xili ma, na yi Isirayila yamaan soto. 9 Yamaan birin a kolonma nen. Efirami bonsonna muxune nun Samari kaane birin yi falan tima wason nun yete yigboni, e naxa, 10 “Yinna bitikidine bata bira, en na a ti geme masolixine ra. Xode binle bata kala, en na e masara sumanne ra.” 11 Nayi, Alatala Asiriya kaane radinma nen Isirayila

kaane ma, Manga Resin yengefane. A bata e yaxune senbe so. 12 Arami kaan naxanye sogeteden binni, e nun Filisiti kaan naxanye sogegododen binni, ne nan Isirayila kaane raxorima feul Koni hali na birin, Alaa xolon mi jan, a yiin mon yi lu yitexi e xili ma. 13 Nayi, Alatala bata a yamaan jaxankata, koni e mi e xun xetexi a ma, e mon mi Alatala Senben Birin Kanna fenxi. 14 Nayi, Alatala Isirayila yamanan birin naxorima nen loxo keden peeni, folo a xunna ma han a xunla, folo tugu binle ma han gbalane. 15 Fonne nun kuntigine nan a xunna ra, nabiin naxanye wule xaranna tima, ne nan a xunla ra. 16 Yamani ito yeeratine nan e raloma ayi, e muxun naxanye matinxinma, ne fan yifuxi. 17 Nanara, Marigin mi sewaxi a foningene ra, a mi kininkininma a kiridine nun a kaja gilene ma. Amasoto Ala kolontarene nun muxu jaxine nan e birin na, e fala jaxin nan tun tima. Koni hali na birin, Alaa xolon mi jan, a yiin mon yi lu yitexi e xili ma. 18 Naxuyaan muxune ganma yati, alo teen naxan janle nun sexene birin janma, a yi teen so fotonna jansanne ra, e tutin yi lu te kore. 19 Alatala Senben Birin Kanna xolo gbeen bata teen so yamanan birin na. A luxi nen alo teen yamaan nan ganma, muxu yo mi kininkininma a ngaxakedenna ma. 20 Muxune donseen tongoma yiifanna ma, kamen mi ba e ma. E yi e balon fen e komenna ma, e mi wasa. Birin baloma a lanfaan nan na. 21 Manase bonsonna baloma Efirami bonsonna ra, Efirami bonsonna baloma Manase bonsonna ra, e tan bonson firinne yi keli Yuda bonsonna xili ma. Koni hali na birin, Alaa xolon mi jan, a yiin mon yi lu yitexi e xili ma.

10 Gbalon na kanne xa naxanye tonne dɔxoma hakeni, naxanye sariyane sebema bodene toro xinla ma, 2 e tondi senbetarene xun mayenge kitin se. Yiigelitɔon naxanye n ma yamaan ye, e mi ne kitin sama. E kaja gilene kansunma, e kiridine mupa. 3 E fe saranna na e soto loxo naxan yi, gbalon na fa sa keli wulani, e nanse ligama? E e gima siga nde kon yi alogo e xa maliin soto? E nafunle luma minen? 4 Fɔ e mafelen kasorasane tagi, hanma e bira boxoni binbine ye. Koni hali na birin, Alaa xolon mi jan, a yiin mon yi lu yitexi e xili ma. 5 Ala naxa, “Gbalona Asiriya yamanan xa, naxan findixi bosaan na n yii n ma xolona fe ra! N ma fitinan dunganna a tan nan yii. 6 N na a sofane rasigama nen Ala kolontare siyaan xili ma. N yi e radin yamaan xili ma naxanye n naxoloma e xa

sa men kaane yii seene suxu, e yi e nafunle tongo, e yi e yibodon alo borona kiraan xon! 7 Koni Asiriya kaane mi na feen to na kiini. E tan e miri na fe ma kii gbeteni. E tan yi waxi halagi nan tun ti feni, e yi siya wuyaxine raxori fefe! 8 Amasoto e naxa, 'N ma sofa kuntigine mi findixi mangane xan na ba? 9 N mi Kalano taan suxi alo Karakemisi taan ba? N mi Xamata taan ligaxi alo Arapada taan ba? N mi Samari taan ligaxi alo Damasi taan ba? 10 N bata suxure batu yamanani itoe suxu, naxanye suxurene yi fisa Yerusalen nun Samari yamanan gbeene xa. 11 N naxan liga Samari yamanan nun a suxurene ra, n mi nœ na lige Yerusalen nun a suxurene ra ba?'" 12 Koni Marigin na yelin a wanle birin nakamale Siyon geyaan fari e nun Yerusalen yi, a Asiriya mangan fan saranma nen a yete yiteen nun a yete rawason na. 13 Amasoto na mangan yi a falama nen, a naxa, "N feni itoe birin ligaxi n fangan nun n ma fe kolonna nin, amasoto xaxilimaan nan n na. N bata yamanane danne kala, n yi e nafunle mupa, n mangane ba e dõxodene yi alo senbemaan yetena. 14 N bata siyane nafunle tongo alo muxun xoli teen tongon kii naxan yi. N bata bõxo xonna seene birin malan alo muxun xoli xeke rabejinxine matongon kii naxan yi. E sese mi nõxi e gabuteni te, hanma e de xanli bi, e wuga." 15 Bunbin nœ a yete matõxe dangu a rawali muxun na ba? Scrana a yete matõxe dangu a rawali muxun na ba? Bosaan nœ a tongo muxun nawale ba? Dunganna nœ muxun tonge ba? 16 Nanara, Marigina Alatala Senben Birin Kanna yama hiyabuxini ito radoyenma nen. Halagi ti tee gbeen yi so e binyen na. 17 Isirayilaa kenenna, Ala yeteen findima nen teen na. E sarjantõon yi findi tee degen na, a Asiriya yamanan janle nun a sexene birin gan, e jan lõxo kedenni. 18 A fõton gbeene raxõrma nen fefe e nun wudin naxanye birin bogima. A yamanan halagi alo furemaan nema doyenje. 19 Wudi dõnxen naxanye na lu Asiriya fõtonne yi hali dii jõrena, a nœ e yaten sebe nen. 20 Na lõxõni, Isirayila yamaan muxu dõnxen naxanye na lu e nii ra Yaxuba bõnsõnni, ne mi fa e lannantenyaan sama e jaxankata muxune yi sõnõn. E fa e lannayaan sama Alatala nin, Isirayilaa Ala Sarjantõxina. 21 Yamaan muxu dõnxene xetema nen Ala senbemaan ma, Yaxuba bõnsõnna muxu dõnxene. 22 Anu, Isirayila kaane, hali e yamaan wuya ayi alo mejensinna naxan fõxo igen de, hali na, e dõnxedin nan tun xetema. Halagin bata ragidi, naxan gboma ayi, a mõn tinxin. 23 Marigina Alatala Senben Birin

Kanna bata halagin naxan nagidi, a na rakamalima nen yamanan birin yi. 24 Nanara, Marigina Alatala Senben Birin Kanna ito nan falaxi, a naxa, "N ma yamana, e tan naxanye dõxi Siyon yi, e nama gaxu Asiriya kaane yete ra! E e bõnbõma nen dunganna ra, e yi gbengbetenni te e xili ma alo Misiran kaane yi a ligama kii naxan yi nun. 25 Koni benun waxati, n ma xõlon janma nen e xili ma. N fitinaxin yi keli e kaladeni." 26 Alatala Senben Birin Kanna bosaan tongoma nen Asiriya kaane xili ma, alo a keli Midiyan kaane xili ma kii naxan yi Orebi fanye yireni. A a dunganni bandunma nen baan xun ma, alo a liga Misiran yamanani kii naxan yi. 27 Na lõxõni, a goronna bama nen e tungunna ma, e goron tongo wudin naxan sa e kœe ma konyiyani, e xungboma nen han na yi gira, a bira. 28 E bata Ayati taan li. E danguma Migiron nin, e yi e goronne lu Mikimasi taani. 29 E danguma geya longori ra kiraan nan xõn e a fala, e naxa, "En xi Geba yi." Rama kaane xuruxurunma gaxuni. Soli a taan Gibeya muxune bata e gi. 30 Galin kaane, e gbelegebe! Layisa kaane, e tuli mati! Anatõti kaane, e makininkinin de! 31 Madimena kaane bata xuya ayi, Gebimi kaane e luxunden fenma. 32 To, yaxune sa tima nen Nobi yi, e yi e yiini te, e yi e kõnkõ Siyon taa fapin geyaan xili ma, Yerusalen geyana. 33 Marigina Alatala Senben Birin Kanna wudi yii gbeene segema nen senbeni. Wudi kuyene yi rabira bõxõni. Naxanye kondeye mate han, a ne ragodoma nen. 34 A fõtonna jansanne segema nen bunbin na, Liban fõtonne yi bira Senbe Kanna bun.

11 Dii xemen minima nen Yese bõnsõnni alo wudi jingin minima wudi dungin ma kii naxan yi. Na sabatima nen fata a salenne ra. 2 Alatalaa Nii Sarjantõxin luma nen a yi, fe kolonna nun xaxilimayaan sõtõma niin naxan xõn, kawandi kenden nun senben sõtõma niin naxan xõn, Alatala kolonna nun a yeeragaxun sõtõn niin naxan xõn. 3 A niin sama nen Alatala yeeragaxun fari. A mi kitin sama yetagin ma. A mi feene ragidima muxune fala xuiin xõn. 4 Koni a senbetarene makitima nen tinxinni. Yigelitõon naxanye yamanani, a yi ne feene ragidi jenige fajini. A yamanan muxune garinma nen falan na alo bosana. A fala xuine yi muxu jaxine faxa. 5 Tinxinyaan nun tõgõndiyaan luma nen a yi alo tagi xidin muxun tagi waxatin birin. 6 Nayi, kankon nun yexee diin luma nen e bode xõn, burunna jarin nun siin yi e sa yire

kedenni, turadin nun yatan nun xuruse turaxin yi lu e bode xɔn, diidina nde yi ti e yɛɛ ra. 7 Ninge gilen nun kanko gbeena e degema nɛn, e diine yi sa e sa yire kedenni. Yatan yi sexen don alo jingena. 8 Dii jɔren sabaan soma nɛn sapin soden dexɔn, diin yi nɔ a yiin nasoe koson yinla ra. 9 Fe paxi mi fa luma na, gbalo mi na Alatalaa geya sarijanxin birin fari. Amasoto Alatala kolonna yamanan nafema nɛn, alo fɔxɔ igena a folon nafema kii naxan yi. 10 Na lɔxɔni, diin naxan minixi Yese bɔnsɔnni na luma tixi nɛn alo taxamasenna yamane yɛɛ ra. Siyane fama nɛn a fema, a dɔxɔden yi lu mayilenjɛ binyeni. 11 Na lɔxɔni, Marigin mɔn a yiini bandunma nɛn alogo a xa a yamaan muxu dɔnxene xunba: naxanye na lu e nii ra Asiriya yamanani e nun Misiran yamanan lanbanna nun a faxan na, e nun Kusi nun Elan nun Babilɔn yamanane yi, e nun Xamata yamanan nun fɔxɔ ige tagi bɔxɔne yi. 12 A taxamasenna tima nɛn siyane xa, a Isirayila kaane malan naxanye yi suxi yengeni. Yuda bɔnsɔnna muxun naxanye xuyaxi ayi dunɔja xun xɔn, a yi ne malan sa keli bɔxɔn tongon naaninne birin yi. 13 Nayi, Efirami bɔnsɔnna mi fa Yuda bɔnsɔnna maxɔxɔlɔnma. Yuda bɔnsɔnna yaxune raxɔrima nɛn, Efirami mi fa Yuda maxɔxɔlɔnma, Yuda mi fa findima Efirami yaxun na sɔnɔn. 14 E birin sigama nɛn yengeni sogegododen binni Filisitine geyane fari, e sa sogeteden binna muxune nafunle tongo yengeni. Edɔn nun Moyaba yamanane yi lu e senben bun, Amonine yi xuru e ma. 15 Alatala igen janma nɛn Misiran fɔxɔ ige yireni, a yi a yiini bandun Efirati baan xun ma, a yi na baani taxun xude solofere ra a de foye gbeen na, muxune yi nɔ a gide, e mi e sankidine ba. 16 Kiraan luma nɛn a yamaan xa naxanye na lu e nii ra Asiriya yamanani. A luma nɛn alo a liga e benbane xa kii naxan yi e to mini Misiran yamanani.

12 I a falama nɛn na lɔxɔni, i naxa, “Alatala, n ni i tantunma. I yi xɔlɔxi n ma, koni i ya xɔlɔn bata xete n fɔxɔ ra, i yi n madenden. 2 Ala nan n nakisixi yati. N na n yigi sama a tan nin, n mi fa gaxuma. Alatala nan n fangan na. Alatala nan n ma beti ba xunna ra. N nakisimana a tan nan na.” 3 E kisin sɔtɔma nɛn sewani alo e igen bama tigi yinla ra kii naxan yi. 4 Na lɔxɔni, e a falama nɛn, e naxa, “E tantunna fi Alatala ma, e xui ramini a ma a xinli, e a kewanle rali siyane tagi e a rabira muxune ma a xinla

gbo kii naxan yi. 5 E betin ba Alatala xa bayo a bata fe gbeene rakamali. E e fe fala dunɔja muxune birin xal!” 6 Siyon kaane, e sɔnxɔ sewani, e gbelegbele jaxanni! Amasoto, Isirayilaa Ala Sarijanxin gbo, naxan e tagi!

13 Waliyiya falan ni ito ra naxan makɛnen Amosi a dii xɛmɛna Esayi xa lan Babilɔn taan ma. 2 Ala naxa, “E taxamasenna ti geya mabaxin fari. E gbelegbele alogo e xa sofane rakolon. E yiine maliga alogo e xa so taan muxu gbeene so deene ra. 3 N tan nan yamarin fixi muxune ma naxanye rasarijanxi n xa. N bata n ma sofa yebaxine xili, naxanye sewama n ma nɔ sɔtɔn na, alogo e xa n ma xɔlɔn mayita.” 4 E tuli mati sɔnxɔ xuini ito ra geyane fari yama gbeen nan xui a ra. E tuli mati, yamanane bata yimaxa alo siyane na e malan. Alatala Senben Birin Kanna nan a ganli tɔnma yenge so xinla ma. 5 Alatala fama e nun ganla naxan a xɔlɔn naxuyama ayi sa keli bɔxɔn yire makuyeni sa keli kore xɔnna danna ra. E yamanan birin kalama nɛn. 6 E gbelegbele sununi, amasoto Alatalaa lɔxɔn bata maso. A fama alo halagi ti gbalona, fata Ala Senbe Kanna ra. 7 Nanara, birin bata xadan, muxune bata tunnaxɔlɔ e ma. 8 Gaxun bata e suxu, xɔlɔn sifan birin e fari. Muxune e fatine yimaxama xɔlɔn bun alo jaxanla tinna ma. E birin xaminxina e bode matoma. E yetagine yifɔrɔxi. 9 A mato, Alatalaa lɔxɔn fama, kininkinintare lɔxɔna, fitinan nun xɔlɔ gbeen naxan yi, alogo bɔxɔ xɔnna xa raxɔri, a findi tonbonna ra a yi yulubitɔne halagi a yi. 10 Saren naxanye kore e nun e sare kurune, ne mi fa degen sɔnɔn. Sogen nɛɛn fa te, a bata yidimi, kiken mi fa degema sɔnɔn. 11 Ala naxa, “N dunɔja muxune kewali jaxine saranma e ra nɛn, n yi muxu jaxine hakene saran e ra. N yi yete yitene wason dan, n yi nɔ kanne yandan kala. 12 N muxune xuruma nɛn bɔxɔni han e mi fa toma xulen alo xema fajina, e to raxɔlɔma ayi nɛn alo xemaan naxan sa kelima Ofiri yamanani.” 13 Nanara, n kore xɔnni maxama nɛn, bɔxɔ xɔnna yi xuruxurun, a ba a funfuni Alatala Senben Birin Kanna fitinana fe ra a xɔlɔn na keli lɔxɔn naxan yi alo tɛɛna. 14 Nayi, muxune birin sigama nɛn e konne yi birin yi a gi siga a yamaan fema alo xɛnla naxan sagatanma, alo xuruse raba mi yɛxɛɛn naxanye fɔxɔ ra. 15 E na muxu yo to, na kanni sɔxɔnma nɛn tanban na, E na naxan yo suxu, na kanna faxama nɛn silanfanna ra. 16 E dii futene yi yibutuxun e yetagi, e banxi kui seene yi tongo, muxune yi fu e jaxanle ma e yetagi.

17 Ala naxa, “N Mede kaane rakelima nen e xili ma gbetin bote mi siyaan naxan xa, e mon mi sewama xemaan na. 18 E banxulanne yi faxa Mede kaane xalimakunle ra, e mi kininkininma dii futene ma, e jaxu diidine ra.” 19 Babilon naxan findixi taa tofajin na yamanane ye, naxan findixi Babilon kaane binyen nun e kanba xunna ra, Ala na taan halagima nen alo Sodoma taan nun Gomora taana. 20 Muxu yo mi fa dɔxoma a yi, a yigenla luma nen han mayixete nun mayixete. Hali Arabu sigatine yati mi dangue a yi, hali xuruse rabane mi fa e xuruseene xalima na. 21 Koni burunna subene nan dɔxoma na, xutunxunbane yi e banxine rafe. Dangaranfulene yi lu na yi, kotone yi na findi e bodonden na. 22 Kankone wuga xuiin yi lu mine a yire makantanxine yi, barekodane yi so a manga banxine kui. Babilon gbee waxati saxin bata maso. A siimayaan mi fa xunkuya.

14 Alatala kininkininma nen Yaxuba yixetene ma. A mon Isirayila yamaan sugandima nen, a mon yi e radoxo e boxoni. Xɔne ye sa e fari, e findi Yaxubaa yamaan na. 2 Siyaan bonne fama nen Isirayila kaane tongodeni, e siga e ra Alatalaa yamanani. Isirayila yamaan yi siyane findi e konyine ra, xemen nun jaxanla. Na kiini, muxun naxanye e findi konyine ra, e fan yi ne findi e konyi ra, e findi e jaxankata muxune kanne ra. 3 Isirayila kaane, loxona nde, Alatala matabun fima nen e ma e torone nun e lanbaranne nun e konyiya xodexen jan xanbini. 4 Na waxatini, e sigi jaxumeni ito sama nen, e Babilon mangan magele, e naxa, Ee! En jaxankata muxun mi fa na! A gbalon bata jan! 5 Alatala bata muxu jaxine bosaan senben kala. A bata no soto dunganna kala 6 naxan yi siyane mabonboma xoloni a ye wuyaxi, dan mi naxan na, naxan fitinaxin yi noon tima yamanane xun na a gbalon sa e fari naxan dan mi na. 7 Iki, yamanan birin bata lu boje xunbenli, muxune gbelegbelema sewani. 8 Hali fofone nun Liban sumanne sewaxi i kala feen na, e a falama, e naxa, “Xabu i binbin maluxun, muxu yo mi fa fama nxu segedeni.” 9 Faxe muxune e ramaxama nen boxon bun ma fa i ralandeni, i nema fe waxatin naxan yi, dunya ito muxu gbeene birin. Naxanye yi siyane mangane ra, ne birin kelima nen. (Sheol h7585) 10 E falan ti, e naxa, “I fan bata findi fangataren na alo nxu tan. Iki, i bata lu alo nxu tan!” 11 E bata e nun i ya wason nun i ya bolon xuiin birin nagodo gaburun na. Kone nan i saden na i bun ma, kunle yi findi i ya

bitinganna ra. (Sheol h7585) 12 Ee! I bata bira sa keli kore i tan tagalan saren naxan degema subaxani! I bata woli boxoni, i tan naxan yi siyane rabirama! 13 I yi a falama i yete ma, i naxa, “N tema nen kore xonna ma, n sa n ma mangaya gbeden dɔxo menni Alaa sarene faxe ra. N sa dɔxo alane tagi, e malanma geyaan naxan ma sogeteden komenna ma. 14 N tema nen kundane fari, N yi lu alo Kore Xonna Ala.” 15 Koni e bata sa i sa fo gaburun xonna ma i lu laxira yili tilinxin na. (Sheol h7585) 16 Naxanye na i to, ne i matoma nen ki faji. E miri i ya fe ma, e yi a fala, e naxa, “Xemeni ito xa mi yi boxon naxuruxurunma ba, a yi yamanane yimaxe? 17 Ito xa mi dunya findi tonbonne ra ba a yi taane kala, a tondi kasorasane bejinje?” 18 Nondin na a ra, siyane birin mangane maluxunxi binyen nin e keden kedenna birin yi lu e gaburune ra. 19 Koni i tan bata woli ayi i ya gaburun fari ma alo wudi yii xaren biraxina. Faxe muxune bata sa i ye ma, naxanye faxaxi silanfanna ra naxanye bata sa gemene fari yinla ra. I bata lu alo binbi yibodonxina. 20 Koni i tan mi maluxunma alo ne amasoto i bata i ya yamanan kala, i yi i ya yamaan naxori. Bonson jaxina fe mi fa falama habadan. 21 E a diine faxe feni ton lan e benbane gbalo feene ma. E nama fa keli, e yi boxon birin findi e gbeen na, e dunya rafe e taane ra. 22 Alatala Senben Birin Kanna falan ni ito ra, a naxa, “N kelima nen Babilon taan xili ma, n yi a xinla ralɔ ayi e nun a muxun naxanye na lu e nii ra e nun e diine nun e yixetene birin.” Alatalaa falan nan na ra. 23 N taani ito findima nen dara yiren na gbalane denaxan yi e nun sagalene dingirana. N yi Babilon taan mako halagi ti silanden na. Alatala Senben Birin Kanna falan nan na ra. 24 Alatala Senben Birin Kanna bata a kolo, a naxa, “N bata feen naxan yiton, na ligama nen. N bata naxan nagidi, na kamalima nen. 25 N Asiriya kaane halagima nen n ma yamanani, n yi e raxori n ma geyane fari. E konyiyaan bama nen n ma yamaan xun ma, e goronna yi ba e tungunna fari.” 26 Ala na nan nagidixi dunya birin xili ma, a yiini texi siyane birin xili ma na kii nin. 27 Xa Alatala Senben Birin Kanna fena nde ragidi, nde no e yikalɛ? A na a yiini te, nde no e raxete a funfuni? 28 Waliyiya falani ito tixi Manga Axasi faxe jeeen nan na. 29 E tan Filisitine, e yi e bonboma bosaan naxan na, na bata kala, koni e nama sewa na ra. Amasoto koson minima nen sapi faxaxin bonsonni, ninginangan yi mini koson bonsonni naxan tunganma. 30 Toro muxu gbeene, ne donseen sɔtoma

nen, senbetarene yi e matabu boŋe xunbenli. Koni e tan Filisistine, n na e bõnsõnna halagima fitina kamen nan na. Naxanye na lu e nii ra, ne birin yi faxa. **31** E tan taa makantanxine, e wuga xuini te! Taan muxune, e gbelegbe! Filisiti yamaan bata tunnaɔlo e ma, amasoto te tutin fama nen sa keli sogeteden komenna ma. Muxu yo mi baxi yaxune ganla safane ra. **32** Filisistine xerane yabin findin nanse ra? “Alatala nan Siyon taan tixi, a yamaan yiigelitone yigiyade fajin sotoma denaxan yi.”

15 Waliyiya falana Moyaba yamanan xili ma: Ari taan bata raxori Moyaba yamanani a kala koe kedenna ra. Kiri taan bata raxori Moyaba yamanani a kala koe kedenna ra. **2** Dibon kaane tema e suxure kide matexine yi e wugama. Moyaba kaane gbelegbelema Nebo nun Medeba taane yi. Muxune birin bata e xunne nun e de xabene bi sununi. **3** Sunu dugine nun benbenle ragodoxi e ma kirane xon ma. E gbelegbelema e banxine fari e nun e yama malandene yi, e birin wugama han! **4** Xesibon nun Eleyale kaane gbelegbelema mali muxu feen na. E xuiin sa mema fo Yahasi taani. Nanara, Moyaba sofane gbelegbelema, e bata tunnaɔlo e ma. **5** N gbelegbelema Moyaba kaane fe ra. A muxune bata e gi siga han Soyari taani, siga han Egilati-Selisiya taani. E tema wuge Luxiti geyaan na. E wuga xuini tema e kalana fe ra Xoronayin kiraan xon. **6** Nimirimi daraan bata xori sexene bata xara, joxondene bata jan. Sese xinde mi fa na. **7** Nanara, muxune e se donxene tongoma naxanye luxi e yii, e naxi naxanye ramare, e yi siga e ra Wudi Tofajin Xuden kidi ma. **8** Sonxo xuiin minima Moyaba yamanan birin yi. E wuga xuiin minima sa keli fo Egilayimi taani, sa keli fo Elimi xonin yireni. **9** Xuden naxan danguma Dimon yi, na bata findi wunla ra. Ala naxa, “N mon gbalõ nenene rasigama nen Dimon yi. N yatana nde rafama nen Moyaba muxu gixine xili ma, e nun naxanye na lu e yamanani.”

16 Moyaba mangane yi a fala, e naxa, “E yexene rasiga Yuda yamanan mangan ma, sa keli Sela tonbonni, siga Siyon geyaan fari.” **2** Moyaba naxanle bata baan gididen li Arinon yi. E luxi nen alo xoliin naxanye e gixi, naxanye kedixi, e makuya e teen na. **3** Moyaba kaane yi a fala Yerusalen kaane xa, e naxa, “Nxu maxadi, i fena nde ragidi. Yanyi tagi sogen bun, i nininna xa so nxu xun na alo kœna, i nxu kantan. Nxõ muxu gixine luxun, i nama gi muxune

yanfa de! **4** A lu nxõ muxu gixine xa e dõxõ e konni, dõxõden so e yii e ratange halagi tiin ma denaxan yi. Naxan nxu naxankatama, na mi luma habadan, halagin fama nen a dandeni. Naxan nxu yengema, na kelima nen yamanani. **5** Nayi, i ya mangayaan senben sotoma nen hinanna xon, Dawuda yixetena nde yi mangayaan naba lannayani, kitisaan naxan kiti kenden fenma naxan sobe soxi tinxinna ma.” **6** Nxu bata Moyaba kaane wasona fe me naxan gbo han, e nun e yete yigboon nun e wason nun e yete yitena. Koni e yete matõxoma fuun nin. **7** Nanara, Moyaba kaane gbelegbelema sununi e yamanana fe ra, e birin e wuga xuini tema. E kutunma nimisani Kiri-Hareseti taa kalaxina fe ra. E bata tunnaɔlo e ma fefe! **8** Xesibon xene bata kala, alo Sibima manpa binle. Siyane mangane bata manpa bili yebaxine yibodon naxanye bogine yi sigama han Yaaseri taani, e xuya tonbonna xun xonna ra, e yiine yi sigaxi han Foxõ Daraan kidi ma. **9** Nanara, n wugama Yaaseri kaane xon Sibima manpa binle fe ra. Ee! Xesibon taan nun Eleyale taana! N na n yegen nagboma ayi nen e mal! Yengen xuiin bata mini e manpa bili nakone yi, e nun e se xaba daxine yi. **10** Sewan nun naxan naxan bata jan wudi bili nakone yi. Sigi sa xuiin nun sewa xuiin mi fa mema nxõ manpa bili nakone yi. Muxu yo mi fa manpa bogine igen bama, n bata danna sa sewa xuiin na. **11** Nanara, n boŋen wugama Moyaba fe ra. N ma mawuga xuiin luxi nen alo bolon xuiina sununi. N kutunma Kiri-Hareseti taana fe ra. **12** Nxu Moyaba yamaan toma xadanje e suxure kide matexine yi, e yi so e suxure banxine yi maxandi tideni, koni na tonõ yo mi na. **13** Alatala bata yi na fala Moyaba kaane xili ma. **14** Iki Alatala naxa, “Benun jee saxon yate xa dangu, Moyaba muxu gbeene nun a yama gbeen yarabima nen, fangatare dando gbansan yi lu e nii ra ne ye.”

17 Waliyiya falana Damasi taan xili ma: Damasi taan kalamatõon ni i ra, a taa xonna yi lu alo gemene e bode fari. **2** Aroyeri yamanan taane luma nen nabepinxi e findi xuruseene konna ra. E luma nen na, muxu yo mi e yigbetenma. **3** Taa makantan yin yo mi fa luma Efirami yamanani sonon. Mangayaan bama nen Damasi taani. Arami yamanan muxu donxen naxanye luma, ne binyen mi dangue Isirayila kaane binyen na. Alatala Senben Birin Kanna falan nan na ra. **4** Nayi, na lœxoni, Yaxubaa binyen xurunma

nen. A yamaan yi lu doyenɲe. **5** A luma nen alo sansine na yelin malanɲe se xaba waxatini alo a xaba muxun na a tɔnsɔn xabaxine malan a yii alo e na tɔnsɔnne makentun Refa lanbanni. **6** A tɔnsɔn dɔnxɛna ndee luma nen a kentun daxin na, alo oliwi bogine na rayolon tamin na, a xori firin saxan yi lu a kondeni, naanin suulun ɲɔxɔn yi lu a yii bogixine ra. Alatalaa falan nan na ra, Isirayilaa Ala. **7** Na lɔxɔni, muxune yɛene luma e da mangan nan na, e yɛe rafindi Isirayilaa Ala Sarɲanxin ma. **8** E mi fa e yɛe rasige suxure kidene yi mume, e naxanye rafalaxi e yiine ra. E mi fa Asera kide gbindonne matɔe mume, e nun e wusulan gandene, e yete yii fɔxɔne. **9** Na lɔxɔni, e taa makantanxin naxanye rabɛɲinma Isirayila kaane bun, ne birin yigenla luma nen alo fɔtɔnna hanma geyaan kondena. **10** Amasɔtɔ i bata ɲinan Ala xɔn i rakisimana. I mi i yengi dɔxi i kantan fanyen xɔn, i ya Ala. Nanara, i bata nakɔɔn nafala a faɲin na, i yi sansi xɔɲene si. **11** I e si lɔxɔn naxan yi, hali e na soli na lɔxɔni, na xɔtɔnna yeteni i ya si seen yi fuga, koni a xaba waxatin na a li, a lɔma ayi nen, furen nun sɔxɔle ɲantaren na fa lɔxɔn naxan yi. **12** Ee! Siya wuyaxine sɔnxɔma alo fɔxɔ igen xuxu xuiin kii naxan yi. Ee! Yamanane muxune xɔɲema ayi alo baa ige gbeen na walanɲe ayi. **13** Siyane sɔnxɔ xuiin luxi nen alo fɔxɔ ige gbeen xuxu xuina. Marigin na a kɔnkɔ e ma, e e gi, siga yire makuyeni. E kedima nen alo foyen na se dagin xali geyaan fari alo sexɛ xaren kala ti foyeni. **14** Gaxu gbeen na a ra ɲinbanna ra, benun xɔtɔnni, e mi fa na! Na nan na muxune sɔtɔma naxanye nxɔ seene birin tongoma. Na nan e sɔtɔma naxanye fuma nxu ma.

18 Gbalon yamanan xa, tuguminne gabutene xuiin gbo denaxan yi Kusi yamanan baane xun ma! **2** Mɛn kaane xɛrane rasigama baan xɔn kunkine kui naxanye rafalaxi gbala xidine ra. E siga e konne yi e tan xera sɔɔyaxine. E siga e siyaan fema naxan muxuye kuya, e fatin mayilenma, naxan magaxu be nun yiren birin yi, siya senbɛmani ito naxan nɔɔn tima, baane wuya naxan ma yamanayi. **3** E tan dunɲa muxune birin, e tan naxanye bɔxɔ xɔnna fari, e na taxamasenni te geyaan fari, e a mato! E na xɔtaan fe xuiin mɛ waxatin naxan yi, e tuli mati! **4** Amasɔtɔ Alatala bata a fala n xa, a naxa, “N waxi feene rakɔrɔsi feni, n lu raxaraxi n dɔxɔdeni ti, alo wuyenna naxan minima yanyin na, alo xiila wuyenna bɔxɔn ma kuye

wolon waxatini.” **5** Amasɔtɔ benun se xaba waxatin xa a li, fugene yolonma nen, e yi findi tɔnsɔnne ra, ne yi mɔ fɔlɔ, muxune yi e yii bogitarene xaba filen na, e nun e sonle nun e deene. **6** Kusi kaane fan nabɛɲinma na kii nin xɔline xa geyane fari e nun burunna subene. Segene e yibɔma nen soge furen na, sube xɔɲene fan yi e don ɲɛmen na. **7** Nayi, muxune fama nen finmaseene ra Alatala Senben Birin Kanna xɔn, keli siyaan fema naxan muxuye kuya, e fatin mayilenma, e magaxu be nun yiren birin yi, siya senbɛmani ito naxan nɔɔn tima, baane wuya naxan ma yamanayi. E fama nen na finmaseene ra Siyon geyaan fari Alatala Senben Birin Kanna xinla binyama denaxan yi.

19 Waliyiya falana Misiran yamanan xili ma: Alatala ni i ra, a fama kundani Misiran yi mafuren! Misiran kaane suxurene xuruxurunma nen a yɛe ra, Misiran kaane yi tunnaxɔlɔ e ma. **2** Ala naxa, “N Misiran kaane radinma e bode xili ma nen, e yi e bode yenge, birin yi keli a ngaxakedenmaan xili ma, birin yi keli a xɔyin xili ma, taane yi keli e bode xili ma, mangayane yi keli mangayane xili ma. **3** Misiran kaane tunnaxɔlɔma e ma nen, n yi mayifuun bira e feene yi. E suxurene maxɔdinma nen, e nun barinne nun yiimatone nun kɔeramuxune. **4** N Misiran sama nen kininkinintarena nde sagoni, manga yɛe xɔdɛxen yi lu a xun na.” Marigina Alatala Senben Birin Kanna falan nan na ra. **5** Nila baan xɔrima nen, baan wunla yi xara fefe! **6** Baane xirin yi mini, xudene yi xurun Misiran yi, e birin yi xara. Gbalane lisima a ra nen, **7** sexene yi xara Nila baan xɔn han a biradena fɔxɔ igen ma. Xɛen naxanye bixi Nila baan xɔn, ne xarama ayi nen, foyen yi siga e ra, sese mi fa luma. **8** Yɛɛe suxune kutunma nen, e sunu, naxanye birin kɔnna birama Nila baani. Yala wonle fan senben yi ɲan. **9** Naxanye gesene wurundunma, ne yagima nen. Naxanye dugine rafalama e nun naxanye e sɔxɔnma, ne yigitegema nen. **10** Yamanan muxu kendene fangan ɲanma nen, walikene yi kɔntɔfili. **11** Xaxilitaren nan Soyan taan kuntigine ra, Misiran mangan kawandi muxune a kawandima xaxilitareyaan nin e naxa, “Fekolonna nde nan ma dii n tan na, a singe ra mangane diina nde.” E nɔe suse na fale mangan xa di? **12** Nayi, Misiran mangana, i ya xaxilimane minen? Alatala Senben Birin Kanna naxan nagidixi lan i ya yamanan ma, e xa i xaran na ma. **13** Xaxilitaren nan Soyan taan kuntigine ra. Nofi taan mangane tantanma. Misiran yamana

kanne nan a ralɔma ayi. **14** Alatala bata niina nde raso e yi naxan e xun magima e ra alogo Misiran kaane xa tantan e feen birin yi alo dɔlɔ minna na dingɛnjɛ ayi baxundeni. **15** Misiran muxu gbeen nun a muxudina, muxu yo mi fa sese ligama naxan fan, a na findi muxu binyen na hanma a binyetarena. **16** Na lɔxɔni, Misiran kaane luma nɛn alo jaxanle. E xuruxurunma nɛn gaxuni, Alatala Senben Birin Kanna na a yiini te e xili ma waxatin naxan yi. **17** Yuda yamanana fe findima fe magaxuxin nan na Misiran kaane xa. Muxune na a fe fala e yɛɛ xɔri, e gaxuma nɛn na feen yɛɛ ra Alatala Senben Birin Kanna bata naxan nagidi e ma. **18** Na lɔxɔni, Heburu xuiin fama nɛn faladeni Misiran taa suulunna ndee yi, e muxune yi e kɔlɔ a e bata findi Alatala Senben Birin Kanna gbeen na. Na taan keden xili bama nɛn a Taa Halagixina. **19** Na lɔxɔni, saraxa ganden fama nɛn ludeni Alatala xa Misiran yamanan tagini, gɛmɛ gbeena nde yi dɔxɔ yamanan danna ra naxan Alatalaa fe rabirama muxune ma. **20** Na nan findima taxamasenna nun seren na fa fala Alatala Senben Birin Kanna Misiran yi. Misiran kaane na e xui ramini Alatala ma e jaxankata muxune fe ra waxatin naxan yi, a Marakisi Tiin nafama nɛn e ma, naxan e xun mayɛngema a yi e xunba. **21** Alatala a yete yitama nɛn Misiran kaane ra. Na lɔxɔni, Misiran kaane Alatala kolonma nɛn. E yi a batu, e saraxane nun bogise saraxane ba a xa. E yi dɛ xuine tongo Alatala xa, e yi e rakamali. **22** Alatala Misiran kaane jaxankatama nɛn fitina fena nde xɔn, koni a e yiyalanma nɛn, e yi xetɛ Alatala ma, a yi e maxandi xuiin name, a yi e yiyalan. **23** Na lɔxɔni, kiraan kelima nɛn Misiran yi siga Asiriya yamanani. Asiriya kaane sigama nɛn Misiran yi, Misiran kaane yi siga Asiriya yi. E birin yi Ala batu e bode xɔn. **24** Na lɔxɔni, Isirayila findima nɛn Misiran nun Asiriya yamanane saxanden na dunɔɔa duban sɔtɔma naxanye xɔn. **25** Alatala Senben Birin Kanna dubama nɛn e xa, a naxa, “N bata barakan sa n ma yamaan Misiran ma fe yi, e nun Asiriya yamanana, n yii fɔxɔna e nun Isirayila, n ma bɔxɔna.”

20 Asiriya mangan Sarigon a sofa kuntigin nasiga jɛɛn naxan na Asadodi taan xili ma Filisiti yamanani, a yi a yɛngɛ, a yi a tongo, **2** na waxatin yeteni, Alatala yi falan ti Esayi xa Amɔsi a dii xɛmena, a naxa, “Sunu dugin naxan xidixi i tagi, na ba, i yi i ya sankidine ba.” Esayi yi a falan suxu, a magenla yi lu sigan tiyɛ, sankidi mi a sannɩ. **3** Alatala mɔn yi a fala, a

naxa, “A jɛɛ saxanna ni i ra n ma walikɛna Esayi sigan tima a magenla, sankidi mi a sannɩ. Taxamasenna nan na ra e nun marakolonna Misiran yamanan nun Kusi yamanan xa, **4** fa fala Asiriya mangan Misiran kaane nun Kusi kaane suxuma nɛn yɛngɛni, a e xali konyiyani. A dii jɔrɛne nun fonne magenle nan xalima, sankidi mi e sannɩ, e xɔrɛ magenle yi findi yagin na e xa. **5** Nayi, muxun naxanye e yigi saxi Kusi yi hanma naxanye yi Misiran matɔxɔma, ne gaxuma nɛn, e yagi. **6** Na lɔxɔni, muxun naxanye dɔxi fɔxɔ igen dɛ, ne a falama nɛn, e naxa, ‘Nxu yi yigi saxi naxanye fari, a mato naxan ligama ne ra. Nxu yi waxi siga feni nxu luxundeni e konni, alogo nxu xa maliin sɔtɔ, nxu yi xunba Asiriya mangan ma. Nayi, nxu fa nɔɛ kise di?’”

21 Waliyiya falan ni i ra tonbonna xili ma fɔxɔ igen dɛ. Yaxun fama nɛn sa keli tonbonni yamana magaxuxini alo kala ti foyen nɛma fɛ yiyafari ma tonbonna makɛ. **2** Ala bata fe magaxuxin yita n na. Yanfantenna bata keli yanfa sodeni. Halagi tiin bata halagin ti fɔlɔ. Elan kaane, ɛ siga yɛngɛni! Medɛ kaane ɛ taan nabilin! Muxune yi kutunma e bun ma, koni n fa danna sama nɛn na ma! **3** Nanara, n tagin xuruxurunma. N jaxankataxi alo jaxanla tinna ma. N naxan mɛma, na bata n gaxu ki fajɩ! N naxan toma, na bata n kɔntɔfili. **4** Wekile mi fa n yii, n xuruxurunma gaxuni. N yi jinbanna nan mamɛma nun alogo n xa bɔɔnɛ xunbeli, koni kɔɛɛn fan bata magaxu ayi. **5** Donseen bata rafala, dagine bata yisa, muxune dɔxi e degedeni, e minma. Kuntigine, ɛ keli! ɛ yɛngɛ so seene yitɔn. **6** Marigina ito nan falaxi n xa, a naxa, “Sa kantɔn tina nde ti, a na naxan to, a na fala i xa. **7** Xa a yɛngɛ so wontorone to, soone naxanye bandunma, soo ragine dɔxi sofanle fari, ndee fan dɔxi jɔgɔmɛne fari, a xa a liga a yeren ma ki fajɩ.” **8** Kantɔn tiin xa sɔnxɔ, a naxa, “N Marigina, n tixi yinna xuntagi fɛrɩjɛn gben! N nan n ma kantɔn tidɛni kɔɛna ngaan na. **9** ɛ a mato, xɛmɛna nde fama yɛngɛ so wontoron kui soo firin naxan bandunma. Na yi a xuini te, a naxa, ‘Babilɔn taan bata kala! A bata kala! E ala sawurane birin bata bira e xuya ayi bɔxɔni.” **10** N ma yamana, ɛ tan naxan bata bɔnbɔ alo murutun lonna ma, n na nan mexi Alatala Senben Birin Kanna ra, Isirayilaa Ala, n yi a rali ɛ ma. **11** Waliyiya falan ni i ra Duma taan xili ma. Xuina nde minima Seyiri yamanani, a naxa, “Kantɔn tina, kɔɛɛn di? Kantɔn tina kɔɛɛn di?”

12 Kantan tiin yi a yabi, a naxa, “Xotonna a lima nen, kœen fan yi so. Xa i mon waxi maxodinna ti feni, maxodinna ti. Waxati gbete, i mon yi fa.” 13 Waliyiya falan ni i ra Arabi yamanan xili ma. E xima nen Arabi burunna ra, Dedan bonsonna, sigatiine tonbonni. 14 E tan Tema kaane, e sa fa igen na muxune xa min xonla naxanye ma e fa balon na muxu gixine xa. 15 Muxune bata e gi silanfanna bun silanfanne yi texi e xili ma, xanle bandunxi e xili ma, e gixi yengen gbalon bun. 16 Marigina ito nan falaxi n xa, a naxa, “Benun jœe keden yate, Kedari bonsonna binyen birin jianma nen. 17 Muxu wuyaxi mi fa luma e nii ra e xali wonle ye, Kedari yengesone.” Alatala, Isirayilaa Ala nan na falaxi.

22 Waliyiya falan ni i ra Lankenemaya Lanbanna xili ma. Yerusalen kaane, nanfera e tema banxine xuntagi? 2 Nanfera sonxo sonxon bata keli e taani, a yimaxa, sumunna taan naxan yi yeye? E faxa muxune mi faxaxi silanfanna ra, e mi faxaxi yengeni. 3 E kuntigine birin bata e gi, xalimakuli wonle yi e findi kasorasane ra. E muxune birin bata yi e gi yaxune yee ra, e yi e birin suxu, e yi e xali. 4 Nanara, n yi a fala, n naxa, “E yeen ba n na, e n lu na, n xa wuga xoleni. N ma yamaan bata kala, koni hali e mi kata n masabarideni.” 5 Amasoto to, Marigina Alatala Senben Birin Kanna bata magaxun nun mantoron nun mayibasanna rafa en ma Lankenemaya Lanbanni. Taan nabilinna yinna bata kala! Xili ti xuiin minima malina fe ra geyaan ma. 6 Elan yamanan ganle bata xalimakunle tongo e nun yenge so wontorone nun soone. Kiri yamanan sofane e ye masansan wure lefane yitonma. 7 E meremeran fajine bata rafe yenge so wontorone ra, soo ragine yitonxi e xa yengen folo e taan so deene ra. 8 Yuda yamanan mi fa makantanxi sonon. Na loxoni, i yee raxetema nen yenge so seene ma banxini naxan xili “Foton Yi Banxina.” 9 E yi yalenne to Dawudaa Taan makantan yinna ma e yi igen namara ige ramarade xurini yengen yee ra. 10 E Yerusalen taan banxine yate, e ndee rabira alogo e xa makantan yinna senbe so. 11 E yi ige ramaraden nafala yin firinne longonna ra ige ramarade fonna igen xa. Koni naxan na feene birin xunna ra, e mi e yee rafindixi na ma. A yi e yitonma to mi na ra, koni e mi yi na kanna toma. 12 Marigina Alatala Senben Birin Kanna a falaxi na loxon nin, a e xa wuga, e gbelegbele, e yi e xunne bi, e yi kasa benbeli dugine so sununi.

13 Anu, sewan nun jaxajaxan nan be iki! Muxune jingene kœe raxabama, e yexeeene faxama, e suben donma, e manpaan minma. E a falama, e naxa, “En na en dege, en yi en min, bayo en faxan nen tila!” 14 N tunla Alatala Senben Birin Kanna falani ito nan mexi, a naxa, “E hakeni ito mi xafarima han e faxa!” 15 Marigina Alatala Senben Birin Kanna na nan falaxi. 16 Marigina Alatala Senben Birin Kanna ito nan falaxi, a naxa, “Siga, i sa mangana muxuni ito li, Sebeba, naxan manga banxina feene xun na, i yi a fala a xa, i naxa, 16 ‘Nanse i xa be? I ya muxun mundun be, i to gaburun gema i yete xa be? I matabude donxen nafalama i yete xa geyaan fari i gaburun ge i yete xa fanyeni! 17 I tan senbemana, Alatala i wolima ayi nen pon! A yi i suxu ken, 18 a yi siga i mafilinfilinje alo se radigilinxina a i woli yamana gbeeni. I sa faxama menna nin, e nun i ya wontoro fajine yi lu na, i tan naxan i kanna denbayaan nayagima!” 19 Ala naxa, “N ni i kedima nen i ya walideni, n yi i ba i tideni. 20 Na loxoni, n nan n ma walikena Eliyakimi xilima nen, Xiliki a dii xemena. 21 N ni i ya dugine ragodo a ma, n ni i ya tagi xidin xidi a tagi, n ni i senben so a yii. A findima nen Yerusalen kaane fafe ra Yuda yamaan birin ye. 22 N Dawudaa manga banxin dejinna soma nen a yii. A na naxan nabi, muxu yo mi noe a balanje. A na naxan balan, muxu yo mi noe a rabiye. 23 N na a bitinma nen alo bitin wudina yire kendeni, a yi binyen fi a fafe a denbayaan ma. 24 A denbayaan muxu binyene birin luma nen singanxi a ra, alo wudi yiin singanxi a binla ra kii naxan yi, alo goron xunxurine nun baramane nun ige sa seene doxoma e bode fari kii naxan yi.” 25 Alatala Senben Birin Kanna falan ni ito ra, a naxa, “Na loxoni, gbangban wudin talama nen naxan yi bitinxi yire kendeni. A kalama nen, a yi bira. Nayi, goronna naxan yi singanxi a ra, na yi halagi.” Alatala na nan falaxi.

23 Waliyiya falana Tire taan xili ma: E tan Tarasisi kaan naxanye kunkine kui foxo igen xun ma, e gbelegbele sununi amasoto Tire taan bata kala, banxi yo mi fa na, kunki tide mi fa na. E bata na xibarun me, fata Sipiri foxo ige tagi boxon na. 2 E dunder, e tan naxanye doxi foxo igen de, e tan naxanye bata foxo igeni siga e Sidon taan yulane findi nafulu kanne ra. 3 Sansiin naxanye yi bima baan de Sihori yi, foxo igen kidi ma pon, e fa ne ra e taani. Sansiin naxanye yi xabama Nila baan xon, ne yi findixi Sidon

taan tōnōn nan na. Na yamanan bata yi findi siyane lōxō tiden na. 4 Sidōn kaane, ε yagi, baan xōn yire makantanxina. Bayo fōxō igen bata a mε ε ra, a naxa, “N mi dii barin tōrōyane sōtōxi, n mi dii barixi. N mi dii xēmeye ragboxi, n mi dii tēmε maxuruxi.” 5 Xibaruni ito na Misiran yamanan li, e yigitegema nen Tire taana fe ra. 6 Ε fōxō igeni gidi han Tarasisi taani, ε gbelegbele sununi ε tan fōxō ige tagi bōxō yidōxōne. 7 Ε jaxajaxa taan nan ito ra ba, naxan masege xabu waxati xunkuyene yi naxan muxuye bata yi siga e sa dōxō yire makuyene yi? 8 Nayi, nde na feen nataxi Tire taan xili ma, naxan yi mangayane yitaxunma yamanane yi nun? Kuntigin nan yi a yulane ra, xili kan gbeene dunuja yi. 9 Alatala Senben Birin Kanna nan na ragidixi, alogo a xa ne fe magodo naxanye wasoxi e tofanna fe ra, alogo a xa bōxōn muxu yitexine rayagi. 10 Nayi, Tarasisi kaane, ε bōxōn bi, alo e a ligama Nila baan dε kii naxan yi, amasōtō kunki tide mi fa na ε kunkine xa. 11 Alatala bata a yiini te baan xili ma, a bata yamanane yimaxa. A bata yamarin fi Kanan yamanan xili ma, a taa makantanxine xa kala. 12 A bata a fala, a naxa, “Ε tan Sidōn kaane, ε sumunna bata jan. Yaxune bata fu ε taa tofajin ma. Keli, ε fōxō igeni gidi, siga Sipiri fōxō ige tagi bōxōni. Hali na, matabu yo mi ε xa.” 13 Babilōn yamanan mato, yamaan naxan mi yi sese ra, Asiriya kaane bata yi naxan findi burunna subene gbeen na. E e sanganso makantanxine ti nen a yi, e yi a banxine kala, a findi taa xōnna ra. 14 Ε tan Tarasisi kaan naxanye kunkine kui fōxō igen xun ma, ε gbelegbele sununi amasōtō ε yire makantanxin bata kala. 15 Na waxatini, jinan tima nen Tire taan xōn jεε tonge solofere, na lanxi mangana nde nan ma siimaya ma. A ligama Tire taan na nen alo a liga yalunden na kii naxan yi sigini ito yi, a naxa, 16 Bōlōnna tongo, i a maxa, i sigi wuyaxi sa, i taani siga i tan jaxalan majinanxina alogo i ya fe xa rabira muxune ma. 17 Nεε tonge solofere na dangu, Alatala Tire taana fe ragidima nen. A mōn yi a saran haramuxin sōtō fōlō, a yalunyaan naba bōxō xōnna yamanane birin xōn. 18 Koni a sōtō seen nun a saren haramuxin luma Alatala nan xa. E mi malanma, e mi ramarama. E soma muxune nan yii naxanye luma Alatala yetagi alogo e xa balo gbeen nun maraberi ba fajin sōtō.

24 Alatala bōxōn birin halagima nen, a yi a raxōri.
A bōxō xōnna kalama nen, a yi a muxune birin

naxuya ayi. 2 Na marajan ki kedenna nan saraxaraliin nun a yamaan xa, e nun kuntigin nun a walikeen xa, e nun banxi kannu nun a walike jaxanla xa, e nun sare matiin nun sare soon xa, e nun doli tongo nun doli soon xa, e nun donla naxan ma e nun seen soma naxan yii. 3 Bōxō xōnna kalama nen fefe, a yigenla yi lu amasōtō Alatala bata na fala. 4 Bōxōn sunuxi, a xaraxi. Dunuja sigama kale, a muxu gbeene fan yi doyen. 5 Adamadiine bata bōxō xōnna raharamu. E mi Alaa sariyane suxi, e yi a tōnne bejin. E bata habadan layirin kala e nun Ala tagi. 6 Nanara, Alaa dangan bata bōxō xōnna suxu, a muxune yi e yulubin yanginna sōtō. A muxune ganma, e wuyaxi mi lu. 7 Manpa nenen bata xara, manpa binle yi lisi a ra. Naxanye bōjε yi sewaxi, ne wugama. 8 Sewan tanban xuine bata dan, jaxajaxa xuine bata jan, sewan bōlōn xuine bata dan. 9 Muxune mi fa manpaan minma sigini. Manpane bata xōlō ayi e min muxune dε. 10 Taa rabepinxin bata kala. Banxine birin nagalixi, muxu yo mi fa nōε sōε. 11 Muxune gbelegbelema manpa feen na kirane xōn. Sewan bata findi bōjε rafōren na. Naxajaxan bata jan yamanani. 12 Banxi xōnne nan tun fa luxi taani, taan so dεen bata kala, a biraxin yi lu na. 13 A ligama na kii nin bōxōni siyane tagi, se wuyaxi mi luma, alo oliwi bogine na yelin malanjε, alo manpa binle xōri bolon waxatini. 14 Naxanye luxi e nii ra, ne e xuini tema, e sōnxō sewani e Alatalaa binyen nali. E gbelegbelema jaxajaxani keli sogegododen binni. 15 E naxa, “Sogeteden binna yamanane, ε Alatala binya! Ε Alatala xinla tantun fōxō ige tagi bōxōne yi, Isirayilaa Ala!” 16 Nxu beti xuine mema nen bōxōn danne birin yi: “Binyena Ala tinxinxin xa!” Koni n tan naxa, “N bata lō ayi, n bata lō ayi, gbalona n xa! Yanfantenne yanfan soma! Yanfana! Yanfantenne yanfan soma!” 17 Gaxun nun yili gbeen nun luti ratixine ε tan bōxō xōnna muxune yεε ra. 18 Naxan na a gi gbelegbele xuiin bun gaxuni, na yi sin yinla ra. Xa naxan te yinla ra, na yi a suxu lutin na. Kore xōnna dεene birin nabima nen tulen yi fa, bōxō xōnna bunne birin yi xuruxurun. 19 Bōxō xōnni bōma nen, a xuya ayi, a yolon, bōxōn bata yimaxa fefe! 20 Bōxōn dinginga ayi nen alo dōlō minna, a tintin alo gagen foye gbeen bun. A bira a Ala matandine goronna bun a mi fa nōε kele. 21 Na lōxōni, Alatala senbema ganla saranma e kewanle ra nen naxanye bōxōn nun kuyen lan tagini e nun bōxō xōnni ito mangane. 22 E malanma nen yili gbeen na

alo kasorasane. E balan kasoon na. Waxati xunkuye na dangu, e fa e dentege. **23** Kiken nun soken yagima nen. Amasoto Alatala Senben Birin Kanna findima nen mangan na Yerusalem yi, Siyon geyaan fari. A binyen yi makenen taan fonne birin yetagi.

25 Alatala! N ma Ala ni i ra! N ni i tantunma nen, n yi i xinla binya. I bata i ya kabanako feene rakamali, i naxanye ragidixi i ya tinxinyani xabu to mi na ra. **21** I bata taan lu alo game malanxine, i bata taa makantanxin findi taa xonna ra. Taa mi fa xojene taa fangamaan na, a mi fa tima sonon. **3** Nanara, yama senbemanen i binyama nen siya gbalotone taane yi gaxu i yee ra. **4** Luxunden nan i tan na yiigelitone xa, senbetarene luxundena e na bira lanbaranni, e nun yigiyadena tule gbeen bun, e nun nininna soge xolen bun. Muxu jaxine xolon luxi nen alo tule foye gbeen na doxo sansanni, **5** alo soken wuyenna tonbonna ma. I xojene sonxo xuiin danma, alo kundaan nininna wuyenni suxuma kii naxan yi, i gbalotone no soto sigin danma na kii nin. **6** Alatala Senben Birin Kanna jaxajaxani tonma geyani ito fari, a lu alo sube turaxi donna nun manpa faji minna, suben nun manpa fisamantenne yetena. **7** Geyani ito fari, a sunu dugin bama nen yamanane muxune birin yetagin xun na, e nun kasangenna naxan siyane birin ma. **8** A sayaan halagima nen habadan! Marigina Alatala yi muxune birin yeegeen fitan e yetagi. A yi yagin ba a yamani boxon yiren birin yi. Alatala nan na falaxi. **9** Na boxoni, e a falama nen, e naxa, “En ma Ala ni i ra! En na en xaxili tixi a tan nan na, a yi en nakisi! Alatala ni i ra! En xaxili tixi a tan nan na. En jaxan, en sewa a marakisina fe ra!” **10** Alatala bata a yengi lu geyani ito xon! Anu, Moyaba yamanan bata kala alo sexen naxan yibodonxi jenje yinla ra. **11** Men kaane yiine yitexi alo muxun naxan a bama igeni. Koni hali e to kataxi, Marigina e ragodoma nen e wasoni. **12** Moyaba kaane, Marigina e yamanan makantan yinne rabirama nen, a e rabirama nen boxoni, a yi e findi burunburunna ra.

26 Na boxoni, Yuda yamanan muxune betin bama nen, e naxa, “Nxu bata taa makantanxi fajin soto. Ala bata a rabilin marakisina na alo yinna a xa nxu makantan. **2** E taan so deene rabi, yama tinxinxin xa so naxanye luxi togondiyani. **3** Naxanye yugon fan, i tan Ala nan boje xunbeli kenden nagidima ne ma, amasoto e yigi saxi i tan nin. **4** E yigi sa Alatala yi habadan, bayo Alatala nan e habadan kantan fanyen

na, e Alatala. **5** Muxun naxanye doxi yire matexini, a ne ragodoma nen, a yi e taa matexin kala, a yi a halagi boxo xonna ma, a a findi burunburunna ra. **6** Senbetarene a yibodonma nen, a lu yiigelitone san tidene bun.” **7** Tinxin muxuna kiraan tinxin nen. I tan Ala fajin kiraan malaxunma nen tinxin muxun xa. **8** Alatala, nxu xaxili tixi i tan nan na i ya kiti saxine kiraan xon ma. Nxu niin makoon naxan ma, nxu lu i xinla fale, nxu lu nxu mire i ma. **9** I xonla n niin yeteen suxuma koeeen na, n ni i fenma n sendomen birin na. I na kiti kenden sa boxoni dunuja muxune yi tinxinyaan kolon. **10** Xa i hinan muxu jaxine ra, e mi tinxinyaan kolonje. Hali yamana fajini, e tinxintareyaan nan nabama, e mi Alatalaa gboon toma. **11** Alatala, i yiini texi e xili ma, koni e mi a toma. Anu, e i ya xanuntenya gbeen toma nen i ya yamaan xa, e yi yagi. Teen naxan i yaxune raxorima, na xa e gan. **12** Alatala i boje xunbenla fima nxu ma, i tan nan nxo feene birin nakamalima nxu xa. **13** Alatala, nxo Ala, kari gbetene nxu no nen, naxanye mi findixi i tan na, koni nxu i tan nan keden pe xili binyama. **14** Ne bata faxa, e mi fa xetema sonon. E bata findi yiyane ra, e mi fa kelima sonon. I bata e kewanle saran e ra, i yi e halagi, i yi e funfun birin naxori. **15** Alatala, i bata nxo boxon fari sa, i bata a fari sa. I bata i ya binyen mayita, i yi yamanan danne masiga. **16** Alatala, muxune e yee rafindima i tan nan ma toroni. I na e xuru mantoroni, e yi xete i xande e de bun. **17** Alatala, nxu lu nen i yetagi, alo jaxanla nema wugama soxoleni tinna ma. **18** Nxu fan na soxolen sifan sotoxi nen, nxu wuga, koni nxu foyen nan tun barixi. Nxu mi kisin fixi boxo xonna ma nxu mi muxu nenene raminixi dunuja yi. **19** E faxa muxune niin birama e yi nen, e yi keli. E tan naxanye saxi burunburunni, e xulun, e sonxo sewani. Marigina, i xiila rafama boxon ma alo kenenna, faxa muxune yi keli gaburun na. **20** N ma yamana, e so e konni, e deen balan e foxo ra. E luxun waxatidi, han Alaa xolon yi dangu. **21** Amasoto Alatala nan minima a doxodeni a yi boxon muxune hakene saran e ra. Boxo xonna muxu faxaxine wunla makenenma nen, a yi ba muxune wunla luxunje naxanye faxaxi a fari.

27 Na boxoni, Alatala a silanfan wure xodexen tongoma nen naxan gbo, a senben gbo, a yi keli ige yi sube jaxin xili ma ige yi sube jaxina, sapin naxan a gima, ige yi sube jaxina, sapi tinxintarena. A yi foxo ige yi ninginanga gbeen faxa. **2** E manpa bili

nakoon mataxoma nen sigini na loxoni, naxan bogiye jaxun han! **3** “N tan, Alatala, n tan nan manpa bili nakoni ito kantan muxun na. N na a ige sama nen waxatin birin, n yi a kantan kœen nun yanyin na alogo muxu yo nama fe jaxin liga a ra. **4** N mi fa xoloxi a ma. Koni xa n tansinne nun janle li na, n na e yengema nen, n yi e gan. **5** Koni xa naxan a yigiyaden fen n tan yi, na kanna xa boje xunbenla raso nxu nun a tan tagi, a xa boje xunbenla yatin naso nxu nun a tan tagi!” **6** Waxati famatone yi, Yaxubaa yamana a salenne raminima nen, Isirayila bonsonna yi a sonle nun a fugene ramini. A dunujia rafe a bogine ra. **7** Ala a yamaan bonboxi nen ba, alo a e bonbo muxune bonboxi kii naxan yi? A a yamaan faxaxi nen ba alo a na kanne faxa kii naxan yi naxanye yi e faxama nun? **8** En-en de, koni a e makitixi nen a yi e kedi, a siga e ra konyiyani. A e kedi a kala ti foyen nan na, alo sogeteden foye gbeena. **9** Yaxuba bonsonna haken mafeluma ikii nin, ito nan Isirayila bonsonna yulubi xafarin mayitama: e na e kide saraxa gandene birin findi burunburunna ra, e Asera kide gbindowe nun wusulan gandene ba tixi. **10** Muxu yo mi fa luma taa makantanxini. A luma nen nabepinxi alo tonbonna. Ninge diine yi fa e de madondeni a yi, e yi na findi e matabuden na. E yi a wudi jingine madon. **11** Wudi yiine na xara, e girama nen, jaxanle yi e gan. Amasoto yama xaxilitaren nan ito ra. Nanara, e da mangan mi fa kininkininma e ma. Ala naxan e daxi, na mi hinanma e ra. **12** Na loxoni, Alatala a sansi xabaxine bonboma nen keli Efirati baan ma han sa dexo Misiran xuden na, e birin yi malan keden keden yeen ma, e tan Isirayila kaane. **13** Na loxoni, xota xui gbeen minima nen. Muxun naxanye loxi ayi Asiriya yamanani, e nun naxanye kedi Misiran yi, ne birin fama nen, e fa Alatala batu geya sarijanxin fari Yerusalen yi.

28 Gbalon Samari taan xa, naxan maligaxi manga komotin na naxan findixi Efirami yamanan dolo minne xunna kenla ra, naxanye noron luxi alo se fugen yolonmatona, taan naxan meremere jingixin xun ma, dolon bata naxan muxuye kala. **2** A mato, Marigina walike senbemaan fama nen, alo balabalan kesene foye gbeeni alo tulen foye kala tiin naxan fama fufaan na a yi taan nagodo boxoni a fangani. **3** Taan naxan luxi alo mangaya komotina, naxan findixi Efirami dolo minne xunna kenla ra, na yibodonma nen. **4** Taan naxan noron luxi alo fugen yolonmatona

naxan tixi meremere jingixin xun ma, na luma nen alo xode bogi singen naxan moma benun se xaba waxatin xa a li. Muxu yo na a to, na kanna a bama nen kedenna, a yi a don sa! **5** Na loxoni, Alatala Senben Birin Kanna nan findima manga komotin na a yamaan muxu donxene xa naxanye na lu e nii ra, alo mangaya taxamaseri noroxina. **6** A xaxinla fima nen kitisane ma alogo e xa kiti kenden sa. A yi fangan fi muxune ma naxanye yaxune kedima taan so deen na. **7** Hali e saraxaraline nun e nabine tantanma dolon xon. Manpaan bata e xunna firifiri. Manpaan bata e ratantan. Dolon bata e xaxinli fu, manpaan yi e xunna firifiri. E nema fe toon tima alo xiyena, e tantanma, e nema kitin se, e a feni fu. **8** E tabanle birin nafexi e baxunna ra, e yiren birin xosixi. **9** Na dolo minne maxodinna tima, e naxa, “Esayi ito waxi nde xaran feyi? A a falane yebama nde xa? Diidin naxanye baxi xijen na ba? Dii futen naxanye deen baxi badeni xijen na ba? **10** Bayo a naxa, ‘Tonne tonne fari, tonne tonne fari. Sonne sonne fari, sonne sonne fari. Ndee be, ndee na.’” **11** Awa, nayi, Ala fa falan tima yamani ito xa xojene falane nun xui gbetene nan xon, e mi naxanye famuma. **12** Anu, a bata yi a fala e xa nun, a naxa, “Matabuden nan be ra, xa naxan xadanxi, na xa fa a matabu be. Boje xunbeli yiren nan be ra.” Koni e tondixi e tuli matiye. **13** Nayi, Alatala falan tima e xa na kii nin yati, a naxa, “Tonne tonne fari, tonne tonne fari. Sonne sonne fari, sonne sonne fari. Ndee be, ndee na,” alogo e nema sigan tiye, e xa bira e xanbiramaan na, e maxolo, e yi e suxu lutin na, e sa kasoon na. **14** E tan magele tiin naxanye Yerusalen yamaan xunna, e tuli mati Alatalaa falan na! **15** E a falama, e naxa, “Nxu bata layirin xidi nxu nun sayaan tagi, nxu bata lanna raso nxu nun laxira tagi. Xa gbalon fa, a mi nxu konna lima, amasoto nxu bata wulene findi nxu yigiyaden na, nxu yi mayifu falane findi nxu luxunden na.” (Sheol h7585) **16** Nanara, Marigina Alatala ito nan falaxi, a naxa, “N bata gemena nde dexo Siyon taani alo banxin tongon geme fapi yebaxina. Naxan na denkeleya a ma, na mi yimaxe mum!” **17** N kiti kenden nun tinxinyaan findima n ma banxin ti se tinxinxine nan na, koni balabalan kesene e yigiyaden makoma nen, e wulene, igen yi sa e luxunden xun ma. **18** Layirin naxan e nun sayaan tagi, na yi kala. Lanna naxan e nun laxira tagi, na mi fa luma na. Gbalon na fa waxatin naxan yi, a yi e halagi. (Sheol h7585) **19** A na fa waxati yo yi, a e xale a yii, bayo a danguma nen xotonna nun yanyin

nun kœen na. Gaxun nan tun a ra, a xuiin bunna na famu waxatin naxan yi. **20** Saden xurunma ayi nen saden na, bitinganna yi dungi ayi mafelenna ra. **21** Alatala mœn kelima nen alo a liga kii naxan yi Perasimi geyaan fari. A bœjen tema nen alo a liga kii naxan yi Gabayon lanbanni, alogo a xa a wanle rakamali naxanye makabe, a kewali magaxuxine. **22** Awa iki, e magelen dan. Xanamu, e xidi yolœnxœnne mœn gbetenma nen e yi. Marigina Alatala Senben Birin Kanna na nan falaxi n xa, a bata a ragidi a xa yamanan birin halagi. **23** E tuli mati n xuiin na. E xaxili lu n ma falane xœn. **24** Xœe biin na wa sansiin si feni, a luun bœxœn biin nan tun fari waxatin birin yi ba? A luma a bœxœn nawale nen ba, a buxa dan mi naxan na? **25** Koni a na yelin a bœxœni tœnjœ waxatin naxan yi, a mi sabi de daxine xan sima na xanbi ra ba? A mi sabi seene siye ba e nun sorontonna? A mi maala nun fundenna wole e xœene yi ba, a sansi gbeteje si xœen de? **26** A Ala nan na tagi raba kiin yitaxi a ra, a yi a xaran a liga kiin ma. **27** Sabide daxine mi bodonma jingen xœe ra bœnbœ seen na, muxu yo mi wontoron sanne radangœ sabi se xun xurine fari e bœnbœ seen na, koni ndee bœnbœma gbelemen nan na, muxune yi nde bodon. **28** Fœ sansi kesene xa din nen e findi fujin na benun burun xa sœtœ. Nayi, muxun mi luma a bœnbœ han habadan. Hali e wontoron nun a bandun soone radangu a fari, na mi a kesene finde a fujin na. **29** Na feene fataxi Alatala Senben Birin Kanna nan na, kabanako kawandi tiin naxan ma fe kolonna gbo han!

29 Gbalona Ariyele taan xa, Ariyele! Manga Dawudaa ganla taan naxan nabilin yengeni! E sanle birin nabama e kiini jœe yo jœe, **2** koni n na Ariyele taan yengema nen. E wugama nen, e sunu, e taan yi lu n xa alo saraxan ganma denaxan fari. **3** N nan n ma ganla tima nen e taan nabilinni. N yi e mini kiraan bolon e ma yenge so seene ra. N yi yire makantanxine yitœn e xili ma. **4** E fe yigodoma nen han a lu alo e xuiin kelima bœxœn nan bun ma. E xuiin yi xurun mini burunburunni. E xuiin luma mine nen bœxœni, alo barinne junununun xuiin bendœn bun. **5** E yaxu yamaan luma nen alo xubena, e tœrœ muxune ganla luma nen alo foyen sexen naxan xalima. Sanja ma kedenni, mafuren, **6** Alatala Senben Birin Kanna fama i malideni galan xuiin nun bœxœ xuruxurunna nun xui gbeen nun kala ti foyen nun tule foye gbeen nun halagi ti tœe dege gbeen nin. **7** Ariyele kaane,

yamanan naxanye ganle e yengema, ne danguma nen alo xiyena. Naxanye birin yi fuma e ma e e taan nabilin yengeni, ne jianma nen alo xiyen kœen na. **8** Kamen muxun naxan ma, na xiye sama nen, a degema, koni a na xulun, a lima nen, kamen mœn a ma. Min xœnla muxun naxan ma, na xiye sama nen, a minma, koni a na xulun, a a li, a kœe yinla raxaraxi, a fanga mi na. A ligama na kii nin yamanan muxune xa naxanye Siyon geyaan yengema. **9** E kabe, e e dundu! E findi danxutœne ra, e nama seen to. E xunna xa firifiri, koni hali e mi manpaan min. E dingenjœ ayi siga tideni, koni hali a mi findi dœlœn funfun na. **10** Amasœtœ Alatala bata e xaxinli fu, a mi tinxi e nabine xa fe toon ti, a dugin so e fe toone xun na. **11** Fe makenœnxini itoe birin bata lu e tan xa alo fala sebœxine kedœ mafilinxini, naxan balanxi taxamasenna ra. E a so muxu xaranxina nde yii, e yi a fala a xa, e naxa, “Ito xaran nxu xa yandi.” A e yabima nen, a naxa, “N mi nœe a xaranjœ, kedœn balanxin na ra.” **12** Hanma e xa a so xarantarena nde yii, e naxa, “Ito xaran nxu xa yandi!” A e yabima nen, a naxa, “N mi nœe sebenla xaranjœ!” **13** Marigin naxa, “Yamani ito maso n na e falane xœn. E n binyama e dœen nin, koni e bœjen makuya n na pon! Binyen naxan e yi lan n ma, na fataxi adamadiine yamari xaranxine nan gbansan na! **14** Nanara, n mœn luma nen yamani ito raterene kabanako feene ra. E fe kolonne fe kolonna tununma nen, e xaxilimane xaxinla yi lœ ayi.” **15** Gbalon na kanne xa naxanye kata gbeen tima alogo e xa e fe yitœnxine luxun Alatala ma wundoni. E wanle kema dimini, e yi a fala, e naxa, “Nde nœe en tœe? Nde en ma fe kolonjœ?” **16** Anu, e bata tantan fefe! Nde feje rafalan yatœ feje bendœn na? Muxun yii fœxœna a fale a rafala muxun ma ba, a naxa, “I tan mi n nafalaxi”? Fejeœna a fale feje rafalan ma ba, a naxa, “I mi sese kolon”? **17** Benun waxatidi, Liban fœtœnna findima nen bogise wudi bili nakœn na, na bogise wudi bili nakœne yi lu alo fœtœnna. **18** Na lœxœni, naxan sebœxi kedœn kui, tuli xœrine na mema nen. Danxutœne yi mini dimi gbeeni, e yi seen to. **19** Tœrœ muxune sewa gbeen sœtœma nen Alatala yi, yiigelitœne yi naxan Isirayilaa Ala Sarijanxini. **20** Amasœtœ gbalotœne tununma nen, magele tiine yi lœ ayi. Naxanye katama haken ligadeni bonne ra, ne halagima nen, **21** naxanye wulen sama muxune xun ma kitisadeni, e yi lutin nati muxune yœe ra kitini, e yoo kanna tœnjege. **22** Nanara, Alatala naxan Iburahima xunba, na ito nan falaxi Yaxubaa yamaan

xa, a naxa, “Yaxuba bõnsõnna mi fa rayarabima, a mi fa yagima sõnõn. **23** Amasõtõ e tan nun e diine n kewanle toma nèn, e yi n xili sarijanxin binya, e yi n tan Yaxubaa Ala Sarijanxina sarijanna kolon, e gaxu n yee ra, n tan Isirayilaa Ala. **24** Naxanye yi lõxi ayi e miriyane xõn, ne xaxinla sõtõma nèn, matandi tiine yi xaranna sõtõ.”

30 Alatalaa falan ni ito ra, a naxa, “Gbalona e tan dii murutexine xa! E feene yitõnma naxanye mi kelihi n tan ma. E layirine xidima naxanye mi fataxi n ma Nii Sarijanxin na. E yulubine sama e bode fari. **2** E sigama Misiran yamanani, koni e mi n maxõdinma. A xõnla e ma Misiran mangan xa e kantani, e yi yigiyaden fen Misiran senben bun alo nininna! **3** Koni Misiran Mangana makantanna findima e xa yagin nan na. E yigiyaden naxan fenma Misiran kaane fema na yi e yigin kala. **4** Kuntigine bata sa Soyan taan li, xerane bata Xanesi taan li. **5** Koni e birin nayagima nèn bayo na yamanan tõnõ yo mi e ma. Misiran kaane mi e malima, e mi munanfan yo fima e ma. E yagin nun yarabin nan tun nalima e ma.” **6** Waliyiya falana subene xili ma Negewi tonbonni: E xerane danguma gbalõ yiren nun tõrõ yiren nin yata xemene nun yata gilene denaxan yi, e nun fõdõgõne nun sãji jaxin naxanye tunganma. E nafunle maxalima sofanle nan fari e nun e sõtõ seene jõgõmene fari, sanbane nan ne ra na yamanan xa naxan tõnõ mi na. **7** E sigama Misiran yi naxan ma maliin findima fe fuun na, sese mi a ra! Nanara, n na a xili bama Ninginanga Narixina. **8** Marigin yi a fala Esayi xa, a naxa, “Iki, feni itoe sebe kedina nde kui Yerusalen kaane yetagi e nun walaxan fari alogo a xa lu na waxati famatõne yi habadan han habadan.” **9** Yama murutexin nan ito ra, diidi wule falane, diidin naxanye tondima Alatala sariyan name. **10** E a falama fe toone xa, e naxa, “E nama fa fe toon ti sõnõn!” E a falama nabine xa, e naxa, “E nama jõndin makenen nxu xa! E fe fajin nan ma fe fala nxu xa. E nxu rafan feene fala nxu xa, hali a findi wulen na. **11** E keli kira fajin xõn, e a bejin. E ba Isirayilaa Ala Sarijanxina fe yebe nxu xa!” **12** Nanara, Isirayilaa Ala Sarijanxina ito nan falaxi, a naxa, “E to e mema n ma falane ra e yi e yigi sa e muxu jaxankata feene nun e muxu mayanfa feene yi, **13** nayi, na haken luma e xa nèn alo taan makantan yin matexin na bõ fõlõ! Menna na tintin, a birama nèn sa! **14** A yibõma nèn a xunxurin na alo feje goronna, a yensenje ayi

kininkinintareyani, hali a dungi xungbena a mi toe a dungine ye naxan finde tee kõ seen na hanma ige sege sena.” **15** Marigina Alatala Isirayilaa Ala Sarijanxin naxa, “E na e xun xete n ma, e raxara, e kisin sõtõma na nin. E na e sabari, e yigi sa n yi, e senben sõtõma na nin.” Koni na xõli mi e ma. **16** E a falama, e naxa, “Nxu nxu gima nèn soone fari!” Nayi, e e gima nèn yati! E naxa, “Nxu nxu gima nèn soo xulumene fari!” Nanara, e sagatan muxune fan xulunma ayi nèn katil! **17** E muxu wuli kedenna e gima nèn e yaxun muxu kedenna bun, yaxun muxu suulun pe na e kõnkõ e ma, e birin e gima nèn. Naxanye na lu e tagi, ne luma nèn kedenyani alo taxamaseri dugin wudi kuyen jõe ra geyaan xuntagi. **18** Anu, Alatala e mamema alogo a xa hinan e ra, a kelima nèn a yi a kininkininna yita e ra. Ala naxan kiti kenden sama, na nan Alatala ra. Sewan na kanne xa naxanye e xaxili tima a ra. **19** E tan Siyon kaane, e tan naxanye dõxi Yerusalen yi, e mi fa wugama sõnõn! E na e xui ramini a ma, a hinanma e ra nèn han! A na e xuiin me tun, a e yabima nèn. **20** Marigin tõryaan nun mayigbetenna ragidi nèn e ma e donseen nun e min igen na. Koni e karamõxõ mi fa a luxunma e ma, e a toma nèn e yeen na. **21** I na siga yiifanna ma hanma kõmenna, i fala xuiin mema nèn i xanbi ra, a naxa, “Kiraan ni ito ra, siga a xõn!” **22** E suxure gbeti daxine nun a xema daxine yatema nèn se haramuxine ra, e woli ayi alo jamana, i yi a fala e ma, i naxa, “Xõsina.” **23** Nayi, Ala tulen nafama nèn i ya sansi sixine ma, bõxõn yi balo fajni gbeen fi i ma. Na lõxõni, i ya xuruseene sa e de madonma nèn xuruse rabade gbeene yi. **24** Ningene nun sofanla naxanye xeen bima, ne yi balo jaxumèn don fõxõn saxi naxan yi naxan sama e bun se kõ seen nun sansi yife seen na. **25** Faxe gbeen tima lõxõn naxan yi, taan makantan sangansone na bira waxatin naxan yi, folone nun xudene rafema nèn geya gbeene nun yire matexine birin yi. **26** Kiken degema nèn alo sogena na lõxõni, sogen degen yi gbo ayi dõxõ solofere dangu a ki fonna ra. Na lõxõni, Alatala a muxune maxõlodene dandanma nèn, a yi e fure deene yiyalan, a tan yeteen naxanye maxõlo. **27** A mato, Alatala senben fama sa keli wulani, a fama xõlo gbeen nun jaxankatan nan na, a fitinaxin yi falan ti alo teen naxan halagin tima. **28** A nii raxinla luxi nèn alo baan na walanje ayi naxan bõxõnma a ma a te han muxun kõeen bun. Nayi, a siyane yimaxama nèn a halagi ti segedenna ra. A yi karafen bira xõje yamane

deni, naxan e rasigama yireni denaxan xoli mi e ma. **29** E tan Yerusalen kaane, e betin bama nen alo sali loxon kœena. E bojen sewama nen alo muxune nema sige xulen xuini Alatalaa geyaan fari, Isirayila kantan fanyena Ala. **30** Alatala a xui gbeen naminima nen a yi a senbe gbeen makenen. A yi a xolo gbeen nagodo alo halagi ti tee gbeena, tule ige gbeen nun galanna nun balabalan kesene yi godo. **31** Asiriya kaane na Alatala xuiin me, e xuruxurunma nen gaxuni a bosaan bun ma. **32** Alatala ne xuruma bosaan yeen naxanye birin na, ne ligama tanbanna nun bolon xuiin nin, a nema e yengema a senbeni. **33** Teeni tonxi xabu to mi na ra! A yitonxi mangan xili yi yili gbee tilinxin na, yege gbeen nun tee gbeen naxan na. Alatala nii raxinla nan minima alo dole teen xudena, a na teen nadege.

31 Gbalon ne xa naxanye sigama Misiran yi maliin fendeni, naxanye xaxili tixi soone ra, naxanye e yigi sama yenge so wontorone yi, bayo e wuya, e nun soo ragine, bayo e senben gbo, koni e mi e yee rafindima Isirayilaa Ala Sarijanxin ma, e mi Alatala fenma! **2** Anu, a tan fan fe kolon, a noe gbalon nafe nen. A mi a falan maxetema. A kelima nen muxu jaxine yamaan xili ma, hake kanne mali muxune. **3** Misiran kaane findixi adamadiine nan na, Ala mi e ra. E soone mi findixi niin xan na, subene nan tun e ra. Alatala na a yiini te naxan xili ma, naxan na na kanna mali, na salaxunma nen, a fan naxan malima, na kanna yi bira, e firinna birin yi halagi e bode xon. **4** Alatala bata a fala n xa, a naxa, "N tan Alatala Senben Birin Kanna godoma nen n yi yengen so Siyon geyaan fari e nun a yire matexine yi alo yatan wurundunma a se suxin ma kii naxan yi, alo yata senbemaan na xuruseen suxu. Hali xuruse rabane birin keli a xili ma, a mi gaxuma e sonxo sonxon yee ra, hali e to wuya, a mi tunnaxoloma a ma. **5** Alatala Senben Birin Kanna Yerusalen kantanma nen, alo xoliin naxanye e firifirima e teen xun ma a kantandeni. A a kantanma nen, a yi a xunba. A a ratangama nen, a yi a xoroya." **6** E tan Isirayila kaane, e xun xete a ma, e murutexi a tan naxan ma fefe! **7** Na loxoni, e birin e mema nen e suxure gbeti daxine nun a xema daxine ra, e tan yulubitone yii foxone. **8** Asiriya kaane faxama nen silanfanna ra naxan mi findixi muxun gbeen na. Silanfanna naxan mi fataxi adamadi yo ra, na e raxorima nen. E gima nen silanfanna bun, e banxulanne yi findi konyine ra.

9 Naxan e kantanma, na gaxuxin yi a gi. E kuntigine gaxuma nen e na e yaxune taxamasenna to. Alatalaa falan nan na ra naxan ma teen degema Siyon yi, sulun teen naxan yii Yerusalen yi.

32 A mato, mangana nde mangayaan nabama nen tinxinni, kuntigine yi kuntigiyaan liga kiti kenden xon. **2** E muxune birin luma nen alo yigiyaden foyen bun alo luxunden kala ti foyen bun, alo igena kiraan tonbonni, alo geme gbeen nininna boxo yixareni. **3** Yee kanne yee ne mi fa luma raxixi, tuli kanne yi e tuli mati. **4** Muxun naxanye xaxili mi doxi, ne xaxinla nun kolonna sotoma nen, de masuxune yi falan ti a tinxinni e de mafuraxin na. **5** Nayi, a mi fa falama xaxilitarene ma a xaxilimane, fe jaxi rabane mi fa yatema muxu gbeene ra. **6** Amasoto xaxilitaren xaxilitareya falan nan tima. E hake feene yitonma e bojeni, e lu Ala kolontareya wanle ke, e lu fala jaxine tiye Alatala ma. E kametone luma kamen na, min xonla naxan ma, e na kuma igeni. **7** Fe jaxi rabane wanle jaxu. E fe jaxine yitonma alogo e xa yiigelitone halagi wulene xon, hali yoon toro muxune xa e kitini. **8** Koni muxu fajine fe fajine nan yitonma e yi lu e jenige fajiyani. **9** E tan jaxanla naxanye luxi xaxili sani, e keli, e tuli mati n na! E tan sungutunna naxanye xaxili ragidixi feu, e tuli mati n ma falan na! **10** Benun jee keden e nun nde, e tan naxanye xaxili ragidixi, e yimaxama nen, bayo se bogi bolon daxine janma nen, sansi xaba daxine yi dasa se xaba waxatini. **11** Nayi, e gaxu, e tan jaxanla naxanye xaxili sani, e kontofili, e tan sungutunna naxanye xaxili ragidixi. E dugine ba e ma, e yi kasa benbeli dugine xidi e tagi sununi. **12** E kanken makudun, e wuga xee tofajine nun manpa bili sabatixine fe ra, **13** e nun n ma yamana boxona, firin jali kanne nun tansinne bata sabati denaxan yi. E wuga banxi fajine fe ra sewan yi denaxanye yi e nun sumunna yi taan naxan yi yeye. **14** Amasoto manga banxin nabeginma nen, taa yimaxaxini ito yigelima nen, a yire makantanxine nun sangansone yi findi banxi xonne ra han habadan, e nun burunna sofanle magidena, e nun xuruseene de madondena, **15** han Alaa Nii Sarijanxin yi godo nxu ma keli kore, tonbonna yi findi wudi bili nakoon na, wudi bili nakoon yi findi fotonna ra. **16** Nayi, kiti kenden luma nen tonbonni, tinxinna yi lu wudi bili nakoni. **17** Tinxinyaan yi boje xunbenla raso. Tinxinyaan tonon yi findi sabarin nun makantanna ra habadan. **18** N

ma yamaan dɔxɔma nɛn bɔɲɛ xunbeli yireni, dɔxɔde makantanxine yi, matabu faɲin denaxanye yi. **19** Hali balabalan kesene fɔtɔnna kalama nɛn, taan mumɛɛn yi fɔn, **20** sewan luma nɛn ɛ tan xa. Ɛ tan ɛ sansine sima nɛn xudene birin dɛ, ɛ yi ɛ jingene nun sofanle lu e sagoni.

33 Gbaloni i xa, i tan naxan halagin tima i tan naxan munma halagin sɔtɔ singen, i tan naxan bonne yanfama muxɛ munma i tan naxan yanfa singen! I na yelin halagin tiyɛ waxatin naxan yi, i fan yi halagi. I na yanfantɛnyaan dan waxatin naxan yi, muxune yi i fan yanfa. **2** Alatala, hinan nxu ra! Nxu xaxili tixi i tan nan na. Findi nxu fangan na xɔtɔn yo xɔtɔn, i nxu rakisi tɔrɔ waxatini! **3** Siyane na i xuiin mɛ, e yi e gi. I nɛɛn fa keli, yamanane muxune bata xuya ayi. **4** Ɛ tan siyane, ɛ seen naxanye tongoxi yengeni, muxune bata fu na ma alo tuguminne na so. Muxune dutunma ne ma alo suɲɛ setɛna. **5** Alatala na feene birin xun ma bayo a dɔxi kore xɔnna ma. A bata sariyan nun tinxinna raso Siyon taan yiren birin yi. **6** I tan, Alatalaa yamana, i luma nɛn makantanni. Xaxilimayaan nun Ala kolonna findixi kisin nan na, e nun Marigin binyana na nan findixi i ya nafunla ra. **7** Sofa wekilɛxine nan gbelegbele xui ito ra kirane xɔn. Bɔɲɛ xunbenla rali muxune yi xɛtɛ wugɛ xɔlɛni. **8** Kirane bata rabɛɲin, muxu yo mi fa danguma kirane xɔn. Yaxun bata layirin kala, a yi taane rapaxu, a mi muxu yo binyaxi. **9** Yamanan bata lu sununi, a kalama. Liban yamanan bata yagi, a fɔtɔnna bata xara. Sarɔn meremeren luxi alo tonbonna, Basan nun Karemele yamanane wudine dɛɛne yi yolɔn. **10** Alatala naxa, “Iki, n bata keli. Iki, n na n ma binyen mayitama nɛn. Iki, n na n ma fe yitema nɛn. **11** Ɛ feen naxanye yitɔnma, ne luxi nɛn alo se dagina hanma sɛxɛna. Ɛ yetɛɛn yengin yi findi tɛɛn na naxan ɛ raxɔrima. **12** Siyane ganma nɛn e lu alo xuben sulun tɛɛni, alo tansinne na masege, e gan.” **13** Ɛ tan naxanye makuya, ɛ tuli mati n naxan ligaxi. Ɛ tan naxanye maso, ɛ n senben yatɛn kolon. **14** Yulubitɔne bata gaxu Siyon yi, xuruxurunna bata so Ala kolontarene yi. E maxɔdinna tima, e naxa, “Nde luyɛ halagi tɛɛni ito dɛxɔn en yɛ? Nde nɔɛ luyɛ habadan tɛɛ wolɔnni ito dɛxɔn en yɛ?” **15** Fɔ naxan sigan tima tinxinni, a ɲɔndin fala, naxan a mɛma tɔnɔne ra naxanye sɔtɔxi gbaloni, naxan mi tinma dimi yi seen nasuxɛ mayifuni, a tunla ba muxune ra naxanye faxa ti feene yitɔnma, a yɛɛn

ba fe ɲaxine ra. **16** Na kanna fe luma nɛn alo a na dɔxɔ yire matexini, gɛyaan faran makantanxin yi findi a luxunden na. A donseen nun igen mi dasama. **17** I mangan toma nɛn i yɛɛn na a nɔrɔ gbeeni, i yi yamanan danne to masigaxi pon! **18** Nayi, i mirima nɛn i ya ɲaxankata danguxine ma, i yi a fala, i naxa, “Na kuntigine minen naxanye yi mudun nasuxuma e nun naxanye yi makantan yinna xun matoma a ra?” **19** I mi fa na yama wasoxin toma sɔnɔn, xɔɲɛn naxanye fala xuine mi nɔɛ famunɲɛ, xɔɲɛn naxanye fala xui mi mɛma a faɲin na. **20** Siyon taan mato, en sanle rabama taan naxan yi. Ɛ yɛɛn tima nɛn Yerusalɛn ra, bɔɲɛ xunbeli yirena, a lu alo bubun naxan mi fa wayanma, naxan wudiye mi fa talama naxan lutiye mi fa fulunma sɔnɔn. **21** Alatala a yetɛ yitama en na Ala Senbɛmaan na mɛnna nin. Xudene nun baa gbeene luma nɛn mɛnni, yɛngɛ so kunkine mi dangue denaxan yi. Kunki gbeene mi dangue na mumɛ! **22** Amasɔtɔ Alatala nan en ma kitisaan na. Alatala nan en ma sariyasaan na. Alatala nan en ma mangan na. A tan nan en nakisima. **23** Koni yaxune luxi nɛn alo kunkin naxan lutiye bata fulun, foyen kunkin nasigama dugin naxanye xɔn ne mi fa xidixi sɔnɔn, ne fan singanxi wudi kuyen naxan na, na mi fa suxi. Nayi, e se tongoxi gbeɛn yengeni, na yitaxunma nɛn hali sankalatone e gbeɛn xalima nɛn. **24** Nayi, Yerusalɛn kaa yo mi a fale, e naxa, “N mi yalan.” Na taan muxune hakene mafeluma nɛn.

34 Siyane, ɛ maso, ɛ yi ɛ tuli mati. Siyane, ɛ a liga ɛ yeren ma! Bɔxɔ xɔnna xa a mɛ, e nun a yi seene birin, e nun dunuɲa nun naxanye birin minima a yi. **2** Amasɔtɔ Alatalaa xɔlɔn godoma nɛn siyane birin fari, a fitinan yi godo e ganle birin ma. A bata halagin nagidi e birin ma. A tinma nɛn e birin yi faxa. **3** E faxa muxune luma nɛn biraxi bɔxɔn ma e binbine xirin yi mini han, e wunle yi sa e geyane birin ma. **4** Sare kurune birin kalama nɛn alo se kunxina, kuyen yi mafilin alo kɛdina, sare ganla birin yi yolɔn alo manpa binla dɛ xarene alo xɔdɛ bili bogi xaraxine. **5** Ala naxa, “N ma silanfanna bata sarene wunla ramini han! A godoma nɛn Edɔn kaane ma, a yi e makiti, n halagin nagidixi yamaan naxan ma.” **6** Wunla bata so Alatalaa silanfanna yiren birin ma a madole muxu turen na. A luxi nɛn alo kontonne nun kɔtɔne wunla saraxabadeni, alo e turen naxan e gbingini. Bayo Alatala saraxa gbeɛn bama nɛn Bosara taani Edɔn kaa

wuyaxi yi faxa yengeni. 7 E yeeratine fangan gbo alo burunna jingene, koni e fan faxama nen bonne xon, e nun jingene nun turane. E yamanan nafema nen wunla ra, e turen yi radin boxon ma. 8 Bayo, gbeexoxo boxon nan na ra Alatala xon, gbeexoxon jeeen nan na ra Siyon taan xun mayengena fe yi. 9 Edon yamanan baane findima nen dolen na. A xuben yi maxete dole teen na, e boxon yi findi dolen ganmatoon na. 10 Koeen nun yanyin na, a teen mi tuma, a tutin yi lu te kore habadan! E yamanan yi lu rabexinxi han mayixete nun mayixete, muxun mi fa dangue na yi mume! 11 Na yi findi xutunxunbane nun sagalene konna ra, toxorone nun xaxane yigiyadena. Ala yi a lu a yitontaren nun a yigenla ra alo a dunupa da waxatin naxan yi. 12 A muxu gbeene mi fa luma na, naxanye mangan doxe, a kuntigine birin janma nen. 13 Wudi jali kanne solima e manga banxine kui nen, sexe jaxine nun tansinne yi a yire makantanxine rasuxu, a findi kankone nun dangaranfulene konna ra, 14 burunna subene nun kankone naralandena, burunna kotone yi lu wuge e bode ma menni. Koe ra yinnan Liliti yi doxo boje xunbenli. 15 Sapin fan a soden toma na nin, a yi a xelene bira, a yi e rasege, a a diine malan a nininna bun. Segene fan e malanma na nin. 16 Xa e Alatalaa kedin kui to, e ito xaranma nen na, a naxa, "Subeni itoe sese mi dasama na yi, birin nun a lanfaan nan fama, bayo Ala bata na yamarin fala. A Nii Sarijanxin nan e malanma. 17 A tan nan e doxodene ragidima. A tan nan e yirene maliga, a yi e yitaxun. Na yamanan findima nen e gbeen na han habadan, e yi lu na han mayixeten nun mayixete."

35 Tonbonna nun boxo xaren sewama nen! Burunna jingima nen sewani a fuga alo gabala fugena. 2 Eugene luma nen burunna yiren birin yi. Burunna jingine yiriwama nen jaxanni. A sonxo sewani! Liban yamanan noron sifan bata fi a ma, e nun Karemele geyaan nun Saron meremerena. Nayi, muxune noe Alatalaa binye gbeen toe nen, en ma Alaa norona. 3 E muxu xadanxine rawekile. Naxanye xinbiye xuruxurunma, e ne senbe so. 4 Naxanye boje bata mini, e a fala ne xa, e naxa, "E wekile, e nama gaxu, e Ala famaani ni i ra e gbeen joxodeni. Ala e yaxune saranna fima nen, a tan yeteen yi fa e rakisideni." 5 Nayi, danxutone seen toma nen, tuli xorine yi feen me. 6 Nayi, sankalatone yi tuganye ayi alo xenle, bobone yi sonxon nate sewani. Amasoto tigi ige gbeen

minima nen tonbonni, baane yi mini boxo xareni. 7 Nemensin wolonxin findima nen daraan na, min xoli yiren yi masara tigi yirene ra. Kankone yi xima denaxanye yi nun, gbalan nun tanbinna yi sabati menni. 8 Kira gbeen luma mena nin naxan xili bama a "Sarijanna Kirana." Muxu haramuxine mi sigan tima a xon fo a xa findi ne nan gbee ra naxanye na bira a foxo ra. Xaxilitare yo mi na xon sige. 9 Yatane mi luma menni, sube xajene mi fe na mume! E mi toe na! Alaa muxu xunbaxine nan sigan tima menni. 10 Alatala na naxanye xoroa, ne fama mena nin. E fama nen gbelegbele jaxajaxani Siyon taani, habadan sewan yi e yetagini yalan. Naxajaxan nun sewan luma nen e yi, sunun nun kutunna yi jan fefe!

36 Xesekiya mangayaan jee fu nun naaninden, Asiriya mangan Senakeribi yi siga Yuda taa makantanxine xili ma, a yi e birin suxu. 2 Asiriya mangan yi a sofa kuntigin nun a gali senbemaan nasiga Manga Xesekiya ma Yerusalen yi keli Lakisi taani. Sofa kuntigin yi fa Yerusalen yi, a sa ti ige ramaraden faxaraxiin dexon, dugi xane xee ma kiraan na. 3 Nayi, Xiliki a diina Eliyakimi, manga banxi kuntigin yi mini a ralandeni e nun sebeli tiin Sebena nun Asafi a dii xemem Yowa, mangana yenla. 4 Sofa kuntigin yi a fala e xa, a naxa, "E a fala Xesekiya xa, e naxa, 'Asiriya manga gbeena ito nan falaxi, a naxa: I yigi saxi nanse ma? 5 I yengi a ma a feren nun senbena i yii, i yengen so, koni fala fuun nan na ra. Nayi, i ya lannayaan saxi nanse yi han i murute n xili ma? 6 I ya lannayaan saxi Misiran nin, a men kaane xa e mali. Na luxi nen alo muxun na la xayen na a dunganna ra naxan girama, a yi a yiin xaba. Naxan na a digan a yi, na a maxoloma nen. Misiran mangan na kii nin muxune xa naxanye e taxuma a ra. 7 Waxatina nde e falama nen n xa, e naxa, "Alatala, nxa Ala, nxu nxu taxuxi na nan na." Koni, Xesekiya bata yi Ala batudene kala geyaan fari, a yi a fala Yuda kaane nun Yerusalen kaane xa, a naxa, "E xinbi sinma nen yire sarijanxini ito yetagi." 8 Iki, e nun n kanna Asiriya mangan xa lan fena nde ma, n soo wuli firin soe e yii, xa e noe soo ragine sote. 9 E mi n kanna walikeen keden peen noe, hali naxan xurun e birin xa. E lannayaan saxi Misiran yi soo ragine nun wontorone nan ma fe ra. 10 A yetena, n faxi yamanani ito kaladeni Alatala sagoon nan xanbi ba? Alatala yeteen nan a falaxi n xa, a n xa sa yamanani ito yenge,

n yi a raxōri.” **11** Nayi, Eliyakimi nun Sebensa nun Yowa yi a fala sofa kuntigin xa, e naxa, “Falan ti nxu xa Arami xuini, amasoto nxu a mema, nxu mi falan tima Heburi xuini yamaan yi a me naxanye yinna xuntagi.” **12** Sofa kuntigin yi e yabi, a naxa, “N kanna n nafaxi e tan nun e kanna nan ma falani itoe tideni ba? Muxun naxanye doxi yinna xuntagi, ne fan xa a me nen bayo ne fan e gbiin donma nen, e yi e xonla min e xon yengeni.” **13** Nayi, sofa kuntigin to a maso, a yi a xuini te Heburi xuini, a naxa, “E manga gbeen xuine ramε, Asiriya mangana! **14** Mangana ito nan falaxi, a naxa, ‘E nama tin Xesekiya xa e mayenden, a mi nōe e rakise n ma mume. **15** Xesekiya nama a liga e yi e lannayaan sa Alatala yi, a yi a fale a Alatala e ratangama nen, a taani ito mi sama Asiriya mangan sagoni. **16** E nama e tuli mati Xesekiya xuiin na mume, amasoto Asiriya mangana ito nan falaxi, a naxa: E boje xunbenla fen n na, e xete n ma, birin a yii se nun a bogise donje, birin yi a ige ramaraden igen min, **17** han n yi fa, n yi e xali yamana gbete yi alo e gbeena, murutun nun manpa bili nakone yamanan naxan yi, bogiseen nun burun yamanan naxan yi. **18** Nayi, e nama tin Xesekiya xa e mayenden, a fala a Alatala e xunbama nen. Siya gbetene alane Asiriya mangani kala nen e yamanan suxu feen ma ba? **19** Xamata taan nun Arapada taana, ne alane minen? Sefarawayimi alane minen? E Samari xunba nen n yii ba? **20** Yamanane alane ye, nde a yamanan xunba n yii? Alatala xa Yerusaleen xunba n yii di?” **21** Naxanye birin yi na, ne yi dundu, e mi yabi keden peen ti, amasoto Manga Xesekiyaa yamarin nan yi na ra. **22** Xiliki a dii xemena Eliyakimi, mangana banxi kuntigin nun sebeli tiin Sebensa nun Asafi a dii xemēn Yowa, mangana yenla, ne yi fa Xesekiya fema, e dugine yiboxi e ma sununi, e sofa kuntigina falane yeba a xa.

37 Manga Xesekiya to na me, a yi a dugine yibo a ma, a kasa benbeli dugin nagodo a ma sununi, a siga Alatala Batu Banxini. **2** A yi Eliyakimi rasiga, mangana banxi kuntigina e nun Sebensa, sebeli tiina e nun saraxarali fonne, kasa benbeli dugin nagodoxi e ma sununi siga Nabi Esayi konni, Amosi a dii xemena. **3** E yi a fala nabiin xa, e naxa, “Xesekiya naxa iki: ‘Kontofinla nun toron nun yagi loxon nan to ra nxu xa, diin bari waxatin bata a li, koni fanga mi a nga ra a yi a bari. **4** Alatala, i ya Ala bata Asiriya sofa kuntigina falane birin name, naxan kari a rafaxi habadan Alatala

konbideni. Xa Ala tin, Alatala, i ya Ala a jaxankatama nen a falane fe ra a naxanye tixi. Nayi, i tan Esayi xa Ala maxandi yama donxena fe ra.” **5** Manga Xesekiyaa xerane to siga Esayi fema, **6** Esayi yi a fala e xa, a naxa, “E ito nan falama e kanna xa, e naxa, ‘Alatala ito nan falaxi, a naxa: I falan naxanye mexi i nama gaxu ne fe ra, Asiriya mangana walikene n nayelevu falan naxanye tixi. **7** N xaxinla nde rasoma a yi nen, a na xibarun me waxatin naxan yi, a xetema nen a yamanani. N yi sa a faxa silanfanna ra menni.” **8** Asiriya sofa kuntigin yi a me a kanna bata yi keli Lakisi taani siga Libina yengedeni, a fa a li menna nin. **9** Nayi, Asiriya mangan yi a me a Misiran mangan Tirihaka, Kusi kaan fama a yengedeni. A na fe mexina, a yi xerane rasiga Xesekiya ma, a naxa, **10** “E sa ito fala Yuda mangan Xesekiya xa, e naxa, ‘I laxi i ya Ala ra jaxi ra, i yengi a ma a nōe nen n tan Asiriya mangani kale Yerusaleen yengedeni. I nama tin Ala yi i mayenden. **11** I bata a me Asiriya mangane feen naxanye ligaxi yamanan bonne ra, e e raxorixi kii naxan yi. I yengi a ma a i xunbe nen na ma ba? **12** N benbane siyaan naxanye alane raxori, ne e xunba nen ba, Gosan nun Xarani nun Resefi yamanane, e nun Eden kaan naxanye Telasara taani? **13** Manga Xamata nun Manga Arapada nun Sefarawayimi taa mangana hanma Hena, hanma Iwa, ne mangane minen yi?” **14** Xesekiya yi kedi sebexin nasuxu xerane yii, a yi a xaran. Na xanbi ra, a te Alatala Batu Banxini, a sa kedin sa Alatala yetagi. **15** Xesekiya yi Alatala maxandi, a naxa, **16** “Alatala Senben Birin Kanna, Isirayilaa Ala, naxan doxi maleka sawurane tagi! I tan Ala keden peen nan boxo xonna mangayane birin xun na, i tan nan boxon nun kuyen daxi. **17** Alatala, i tuli mati n na, i n xuiin name. Alatala, i yeene rabi, i n mato. I Senakeribi a falani itoe birin name, a sofa kuntigin naxanye rafaxi habadan Ala konbideni. **18** Alatala, jondin na a ra! Asiriya Mangan bata siyane raxori, a yi e boxone kala. **19** E bata e alane woli teeni, bayo Ala mi yi e ra nun mume, muxune yii funfune nan yi e ra, wudine nun geme masolixine nan tun yi e ra. **20** Iki, Alatala, nxo Ala! Nxu xunba Senakeribi yii, alogo boxo xonna yamanane birin xa a kolon a i tan keden peen nan Ala ra, Alatala!” **21** Nayi, Esayi, Amosi a dii xemēn yi xeraan nasiga a faladeni Xesekiya xa, a naxa, “Isirayilaa Ala, Alatala ito nan falaxi, a naxa: N bata i ya maxandi xuiin me i naxan tixi n ma Senakeribi a fe yi, Asiriya mangana. **22** Alatala falani ito nan

tixi Senakeribi xili ma, a naxa, ‘Siyon taa faɲin bata i raɲaxu, a i magelema. Yerusalen kaane e xunna fitifitima i xanbi ra. **23** I nde konbixi i a rayelefu? I xuini texi nde xili ma? I bata i yeene rate kore Isirayilaa Ala Saripanxin xili ma! **24** Fata i ya xerane ra, n tan Marigina, i bata n konbi. I yi a fala, i naxa, “N ma wontoro wuyaxine xon, n bata te geyane xuntagi, Liban yamanan danne ra. N na a wudi kuyene segema nen, e nun a suman wudi faɲi faɲine. N sa a xuntagin naɲanna li e nun a foton faɲina. **25** N bata xoninne ge yamana gbetene yi, n yi e igen min. N Misiran baa igene birin xarima nen n na siga a xili ma waxatin naxan yi.” **26** Koni, i tan Senakeribi, i mi a kolon a n feni itoe yelanxi nen to mi na ra? N yi e yiton xabu waxati danguxine. Iki, n bata yamarin fi, a rakamali, i xa taa makantanxine lu kalaxi alo geme malanxine. **27** E muxune senbe mi na, e gaxuxi, e yagixi. E bata lu alo xee ma sexene alo se sonle, alo sexen fanyen ma naxan xarama benun a xa gbo. **28** Koni, n na a kolon, i na doxo, i na mini, i na so, i na xolo n xili ma. **29** I bata xolo n xili ma, n yi i konbi ti xuiin me. Nanara, n nan n ma wuren birama nen i jone ni yi n ma karafen bira i de kidine yi. I faxi kiraan naxan xon n yi i raxete na xon.’ **30** Ala ito nan falaxi i tan Xesekiya xa, a naxa, ‘Ito xa findi taxamasenna ra i xa: Bogiseen naxanye solixi e yete ma, e bata ne don jene i to ra, na nan mon ligama je famatoni, koni je saxandeni, e seen sima nen, e yi a xaba, e yi manpa binle si, e yi e bogine don. **31** Yuda bonsonna muxu donxen naxanye na lu, ne mon e salenne raminima nen alo wudina, e bogi. **32** A donxene minima nen Yerusalen yi, a donxene luma nen e nii ra Siyon geyane yi. Alatala Senben Birin Kanna na nan ligama a xanuntenyani.” **33** Nanara, Alatala ito nan falaxi Asiriya Mangan ma iki, a naxa, “A mi soe taani ito yi mume! A mi xalimakuli wole be yi. A mi makantan wure lefa tima a xa. A mi gbingbin natema a xili ma.” **34** Alatalaa falan ni ito ra. A naxa, “A faxi kiraan naxan xon a xetema nen na xon. A mi soe taani ito yi mume. **35** N taani ito makantanma nen, n yi a rakisi, n tan ma fe ra e nun Dawuda a fe ra, n ma walikena.” **36** Na xanbi ra, Alatalaa malekan yi mini, a muxu wuli keme tonge solomasexe wuli suulun faxa Asiriya kaane ganli. Yamaan to keli xotanni, e yi e binbine to. **37** Nayi, Asiriya mangan Senakeribi yi a ganla rakeli, a xete Niniwa yi. **38** Loxona nde, Senakeribi yi xinbi sinxi a ala Nisiroki batu banxini a batudeni, a dii xemene Adarameleki nun Sareseri yi a

faxa silanfanna ra, e yi e gi siga Ararati yamanani. A dii Esaraxadon yi doxo a joxoni.

38 Na waxatini, saya furen yi Xesekiya suxu. Nabi Esayi, Amosi a diin yi fa a fema, a yi a fala a xa, a naxa, “Alatala ito nan falaxi, a naxa, ‘I ya feene yiton, amasoto i faxamaton ni i ra, i mi fa siimaya sotoma.”” **2** Xesekiya yi a ye rafindi banxin kanken ma, a maxandini ito ti Alatala ma, a naxa, **3** “Alatala, n ma fe xa rabira i ma fa fala, n sigan ti nen i yetagi lannayaan nun bone faɲiyani, naxan fan i ye ra yi, n yi na liga!” Xesekiya yi wuga han. **4** Nayi, Alatala yi falan ti Esayi xa, a naxa, **5** “Siga, i sa a fala Xesekiya xa, i naxa, ‘I fafe Dawudaa Ala, Alatala ito nan falaxi, a naxa: N bata i ya maxandi xuiin me, n bata i yeegen to. N mon je fu nun suulun sama nen i ya siimayaan fari. **6** N ni i tan nun i ya taan xunbama nen Asiriya mangan yii, n taani ito kantanma nen.”” **7** Esayi yi a fala a xa, a naxa, “Alatala taxamasenni ito nan yitama i ra, alogo i xa a kolon fa fala Alatala naxan falaxi, a na ligama nen, a naxa, **8** ‘N nininna raxetema nen xanbin na Axasi a banxin teden ma sanna ye fu.”” Nayi, nininna yi xete xanbin na banxin teden ma sanna ye fu. **9** Yuda mangan Xesekiya betini ito nan sebe, a to fura, a yi keli furen ma. **10** N yi a falama nen, n naxa, “N neen fa n ma siimayaan tagiin li tun, n sigama nen laxira so deene ra n yi bone n ma siimayaan loxo donxene yi!” (Sheol h7585) **11** N mon yi a falama nen, n naxa, “N mi fa Alatala toma sonon niiramane tagi boxo xonna fari, Alatala! N mon mi fa muxu yo toma sonon muxune ye dunuɲa yi! **12** N fati bendena n niin yigiyadeni ito bata kala, a makuya n na a lu alo xuruse rabana bubuna. N bata n ma siimayaan mafilin alo gese wurundunxina. N ma gesen bata bolon. Xotonna nun jinbanna tagi, i n naɲanma nen! **13** N bata n naxara han xotanni, koni alo yatana, a bata n xonne birin yixin. Yanyin nun keene na, i bata n naɲan. **14** N wuga xuiin mini nen alo tuntunna nema tuganye, n lu kutunje alo ganbana. N yeene lu nen tixi kore toroni, n yi lu a fale, n naxa, ‘Marigina, n jaxankataxi, n mali!”” **15** N fa nanse falama? A bata falan ti n xa. A tan yeteen nan feni ito ligaxi. N sigan tima nen yete magodoni n ma siimayaan birin yi n niin soxoleni ito a fe ra. **16** Marigina, siimayaan sotoma i ya fanna nin, n mon n nii ra a tan nan xon. I bata n senbe so, i yi n nakendeya. **17** N ma toroyaana bata maxete bone xunbenla ra. I tan nan n niin masigaxi sayaan na, n to

rafanxi i ma, i yi i xun xanbi so n yulubine birin yi. **18** Laxira xa mi i tantunma. Sayaan xa mi i matōxo betin bama. Faxe muxune nema sama gaburun na, ne yengi mi fa i ya lannayaan ma. (Sheol h7585) **19** Koni naxanye e nii ra, niiramane, ne nan i tantunma alo n tan to. Fafane i ya lannayana fe falama nen e diine xa. **20** Alatala bata n nakisi! Nayi, nxu nxo maxaseene xuiin naminima nen Alatala Batu Banxini nxu siin sogen dōnxen birin yi. **21** Esayi bata yi a fala, a naxa, “E xōde bogi yidinxina nde tongo, e a sa a furen de, a yalanma nen.” **22** Xesekiya bata yi a fala, a naxa, “N na kolonma taxamasenna mundun xon fa fala a n sigama Alatala Batu Banxini?”

39 Na waxatini, Babilon Manga Baladan ma dii xemē Merodaki-Baladan yi bataxin nun finma seen nasiga Xesekiya ma, amasoto a bata yi a fure feen nun a kende yana fe me nun. **2** Xesekiya yi xerane rasene, a yi a banxin kui seene birin yita e ra: gbeti fixen nun xemana, wudi bogi ture fajine nun latikononna nun a yenge so seene ramaradena, e nun naxan birin yi a nafulu ramaradeni. Sese mi lu Xesekiyaa banxini a mi naxan yita e ra e nun a bōxōn birin. **3** Nabi Esayi mōn yi fa Manga Xesekiya fema, a yi a fala a xa, a naxa, “Muxuni itoe nanse falaxi i xa? E kelixi minen?” Xesekiya yi a yabi, a naxa, “E kelixi yamana makuyen nin, Babilon.” **4** Esayi mōn yi a maxōdin, a naxa, “E i ya banxin to nen?” Xesekiya yi a yabi, a naxa, “Seen naxanye birin n ma banxin kui, e ne birin to nen. Sese mi n ma nafulu ramaradeni, n mi naxan yitaxi e ra.” **5** Nayi, Esayi yi a fala Xesekiya xa, a naxa, “Alatala Senben Birin Kanna falan name! **6** Waxati fama, seen naxanye birin i ya banxini e nun i benbane naxanye fen han to, e ne birin xalima nen Babilon yi, sese mi luma. Alatalaa falan nan na ra. **7** E i ya dii xemēna ndee tongoma nen, i yetēen naxanye sōtōma, alogo e xa findi Babilon mangana banxin xeme tēgenne ra.” **8** Xesekiya yi Esayi yabi, a naxa, “I Alatalaa falan naxan tixi, a fan.” A mirixi a ma, a naxa, “En luma nen bōje xunbenli e nun marakantanni n ma siimayani.”

40 E Ala naxa, “E n ma yamaan madenden, e a madenden! **2** E Yerusalen kaane ralimaniya, e a rali e ma, a e paxankata wanle bata jan. A e bata mafelu e haken na, e bata yelin e yulubine saranna sote Alatala yii han dōxo firin!” **3** Muxuna nde xuiin minima, a naxa, “E kirani tōn Alatala yee ra tonbonni,

e kira tinxinxin nafala en ma Ala xa burunna ra! **4** E folone birin naxutu, e geyane nun yire matexine birin wuru. Yire tintinxine yi matinxin, gēme yirene yi findi lantane ra. **5** Nayi, Alatalaa binyen minima nen kenenni, daala birin yi a to!” Alatala de xuiin nan na ra. **6** Muxuna nde a falama, a naxa, “I xui ramini!” N yi a fala, n naxa, “N xa nanse fala?” A naxa, “Adamadiine birin luxi nen alo sexena e binyen birin yi lu alo se fugena. **7** Alatala de foyen na dangu sexene fari, e xarama nen, e fugene yi yolon. Yamaan luxi nen alo sexena yati! **8** Sexene xarama nen, e fugene yi yolon, koni en ma Alaa falan luma nen habadan.” **9** E tan Siyon kaan naxanye sa xibaru fajin xerayani bama, e te geya matexin fari, e xuini te han, e tan Yerusalen kaan naxanye sa xibaru fajin xerayani bama. E xuini te, e nama gaxu. E a fala Yuda yamanan taane xa, e naxa, “E Ala ni i ra!” **10** A mato, Marigina Alatala fama fangani. A mangayaan nabama a senbeni. A fama a yama xunbaxin na, a naxan sōtōxi a kōtōnna ra. **11** A a yamaan masuxuma alo xuruse rabana. A yexee diine tongoma nen a yii, a yi e xali a yii kanke, a ti e ngane yee ra a fanni. **12** Nde fōxo igene saxi a yiin kui, a yi e maliga, a kore xōnna danne maliga a yiin na? Nde bōxōn bēnden yatexi deben kui, a geyane yiliga sikeela ra, a yire matexine binyan yaten kolon ligaseen xon? **13** Nde Alatala miriyane kolon? Nde nōe finde a kawandi muxun na, a yi a rakōta? **14** Ala nde maxōdinx i a maxadi feen na, alogo a xa xaxinla soto? Nde a xaranxi kiti kende saan ma? Nde a xaranxi fekolonna ma? Nde xaxilimayaan kiraan yitaxi a ra? **15** Siyane luxi nen alo igen dindinna palanna kui. E mi yatexi se ra alo gbangbanna na sa sikeela fari. Fōxo ige tagi bōxōne yelefu alo gbangbanna naxan tema. **16** Liban yamanan subene birin xurun saraxan na naxan yi daxe nun a ba Ala xa, a wudine mi wuya naxanye finde saraxa gan tēen yegene ra. **17** Sese mi siyane ra a yee ra yi! Ala ne yatexi fufafuun nan na. A yigenla fisa e xa! **18** E waxi Ala sa feni nde ma? E sawuran mundun yite e nun naxan maliga? **19** Xabun nan sawuran nafalama suxuren na, xema wanla yi xemaan sa a ma, a yi kōe bira yōlōnxōn wure gbeti daxine rafala. **20** Yiigelitōon naxan mi nōe na sote a gbee ala xa, na kanna wudi xōdexen nan sugandima, a yi xabu kesuxin fen, na yi suxuren nafala a xa naxan mi kalama. **21** E mi a kolon ba? E mi a mexi ba? A mi ralixi e ma ba, xabu a fōlōni? Bōxōn bēten saxi kii naxan yi, e munma na famu ba? **22** A tan nan dōxi

bɔxɔ xɔri digilinxin xun ma, muxune fan luxi a yɛ ra yi nɛn alo supɛne. A kore xɔnni fulunma alo dugi yelexuxina xunna soon na, alo gagen a dɔxɔden na. **23** A tan nan kuntigine senben kalama, e lu fuyan, a yi bɔxɔ xɔnna kitisane lu fuu. **24** E luxi nɛn alo sansina. E nɛn fa si tun, e na woli xɛn ma tun, salen yete mi e binle ma singen, Alaa foyen yi fa e ma, e xara, wuluwunla yi e xali alo se dagina. **25** Ala sarijanxin naxa, “E n misalima nde ma, nxu nun naxan lan?” **26** E yɛene rate kore, e a mato! Nde na seene daxi? Nde e ganla defexin naminima, a yi e birin xili e xinla ra? Fata a fanga gbeen nun a senbe magaxuxin na, keden peen mi dasama. **27** Yaxuba bɔnsɔnna, nanfera e a falama, Isirayila yixetene, nanfera e a falama, e naxa, “Nxɔ kiraan bata luxun Alatala ma, nxɔ Ala mi fa nxu xun mafala kitin sama?” **28** I mi a kolon ba? I mi a mexi ba? Alatala nan habadan Ala ra, naxan bɔxɔn danne birin daxi. A mi xadanma, a mi taganma. A xaxilimayaan mi nɔɛ fɛsɛfɛsɛ! **29** A fangan fima muxu xadanxine ma, a muxu taganxine senben xun masa. **30** Banxulanne yetɛɛn xadanma, e tagan, foningene yi bira xadanni. **31** Koni naxanye xaxili tixi Alatala ra, ne mɔn senben sɔtɔma nɛn. E tunganma nɛn alo singbinna, e yi e gi, e mi xadan, e lu sigan tiye, e mi tagan.

41 Ala naxa, “E tan fɔxɔ ige tagi bɔxɔn muxune, e dunder alogo e xa n xuɛin namɛ. E tan yamanane muxune, e wekilen sɔtɔ, e maso, e falan ti. En kitin sa en tagi. **2** Nde muxuna nde rakelixi sogeteden binni, a yi a xili, a xa lu tinxinna fɔxɔ ra? Nde siyane soxi a yii a mangane xuru a bun, a silanfanna yi e findi burunburunna ra a xanla yi e findi se dagin na foyen naxan xalima! **3** A muxune sagatanma yengeni, a mɔn yi dangu bɔɲɛ xunbenli kiraan xɔn a munma yi a sanna ti denaxan yi. **4** Nde feni itoe rakamalixi, a tan naxan yi mayixetene maxilima xabu a fɔloni? N tan Alatala nan a fɔlon na, n mɔn luma nɛn a rananni.” **5** Fɔxɔ ige tagi bɔxɔne muxune bata a to, e gaxu, bɔxɔn danne muxune xuruxurunma, e birin bata keli, e fama. **6** Birin a bode malima, birin a falama a lanfaan xa, a naxa, “I wekile!” **7** Yii rafalan fan xabun senbe soma, naxan wuren malaxunma, na xabun nawekilema, a yi a fala suxuren nafala kiin ma, a naxa, “A lanxi.” A yi suxuren gbangban alogo a nama bira. **8** Koni e tan, Isirayila yixetene, n ma walikene, Yaxuba yixetene, n naxanye sugandixi, e tan Iburahima bɔnsɔnna, n

xoyina, **9** n sa e tan nan fenxi bɔxɔn danne ra, n sa e tan nan xilixi bɔxɔn tongonne ra, n na a falaxi e tan nan xa, n naxa, “N ma walikɛɛn nan e ra, n bata e sugandi, n mi n mexi e ra.” **10** Nayi, e nama gaxu amasɔtɔ n na e xɔn. E nama kɔntɔfili, amasɔtɔ e Ala nan n na. N na e senben gboma ayi nɛn, n yi e mali, n yi ti e bun senben nun tinxinni. **11** Naxanye birin yi kelixi e xili ma, ne yagima nɛn e xun sin! Naxanye yengen nakelixi e xili ma, ne luma nɛn fufafu, e raxɔri. **12** E e yengefane fenma nɛn, koni e mi fa e toma sɔnɔn! Naxanye yi e yengema, ne luma nɛn fuu. **13** Amasɔtɔ n tan nan Alatala ra, e Ala, naxan e yiifari ma yiin suxuma, n yi a fala e xa, n naxa, “E nama gaxu, n tan nan e malima.” **14** Alatalaa falan ni ito ra, a naxa, “E tan Yaxuba bɔnsɔnna, e tan naxanye luxi alo kunla, e nama gaxu, e tan Isirayila muxudine, n tan nan e malima, n tan Isirayilaa Ala Sarijanxin naxan e xunbama. **15** A mato, n bata i findi jingen xɛɛ ra bɔnbɔ seen na wure jin wuyaxin naxan ma naxanye nɛnɛ a ra, e ɲɔɛ raminixi. I geyane wuruma nɛn, i yi e raxuya ayi, i yi yire matexine liga alo se dagina. **16** I e yifema nɛn, foyen yi siga e ra, wuluwulu gbeen yi e raxuya ayi. I tan naxanma nɛn Alatala yi, i yi i kanba Isirayilaa Ala Sarijanxini.” **17** Yiigelitɔne nun tɔrɔ muxune igen fenma, koni sese mi na! Min xɔnla bata e lenna maxara. Koni n tan, Alatala, n na e yabima nɛn, n tan, Isirayilaa Ala, n mi e rabɛɲɲɛ mume! **18** N baa igen nafama nɛn yire matexi magenle fari, n yi ige xunne ramini mɛrɛmɛrɛne tagi, n tonbonne findi darane ra, bɔxɔ xaren yi findi tigi yiren na. **19** N suman binle nun kasiya binle sima nɛn tonbonni, e nun miriti binle nun oliwi binle. Ige mi yiren naxanye yi, n fɔfɔne nun gbɲɲɛne nun xarinne si mɛnne yi e bode xɔn, **20** alogo e xa a to, e yi a kolon, e yi a rakɔrɔsi, e birin yi a famu a Alatala nan feni itoe birin ligaxi, a Isirayilaa Ala Sarijanxin nan e rakamalixi. **21** Alatala naxa, “E fa e xun mafala kitini.” Yaxubaa Mangan naxa, “E fa e xɔn ba.” **22** E suxurene xa fa a fala en xa naxan fama ligadeni. E a fala nxu xa feen naxanye bata liga, alogo nxu xa nxu miri e ma, nxu yi e ranan kiin kolon. Xanamu, e a yita nxu ra naxan fama ligadeni. **23** E waxati famatɔne fe fala nxu xa. Nayi nxu a kolonma nɛn a alane nan e ra. E fena nde liga, xa a findi a fajin na hanma a naxina, alogo nxu birin xa na to, gaxun yi nxu suxu. **24** Koni na yigenla fisa e xa, e wanle mi sese ra. Naxan na e sugandi, muxu haramuxin nan na kanna ra. **25** N bata muxuna

nde rakeli sogeteden komenna ma, a fama nen sa keli sogeteden binni naxan n maxandima. A mangane yibodonma alo borona, alo feje rafalan feje bendeni bodonma kii naxan yi. **26** Nayi, nde bata yi na feen fala a foloni, alogo en xa a kolon? Nde a fala benun a xa liga, alogo en xa a fala, en naxa, “A jondi”? Muxu yo mi sese fala, feni ito mi falaxi benun a xa liga, muxe mi e fala yo mexi. **27** Koni n singe nan a fala Siyon taani, n naxa, “A mato, e tan ni i ra!” N bata xerana nde fi Yerusalem ma, naxan fama xibaru fajin na. **28** Anu n mi kawandi muxu yo toxi suxureni itoe ye, n na maxodinna ti, e mi n yabima. **29** A mato sese mi e ra. E wanle mi sese ra. E suxurene findixi foyen nun fe fuun nan na.

42 N ma walikeen ni i ra, n naxan senbe soma, n naxan sugandixi, naxan n kenexxi. N na n ma Nii Sarijanxin sama nen a yi, a yi kiti kenden sa siyane xun na. **2** A mi sonxo sonxoe, a mi a xuini te, a mi falan tiye taan xun xon, **3** a mi xaye yidoxini gire. A mi lenpun tumatoon natuye. Koni, a kiti kenden sama nen jondin xon. **4** A mi xadanma, a mi tunnaxoloma a ma, han a yi fa kiti kenden na boxo xonna fari, han foxo ige tagi boxone muxune fan yi e yigi sa a sariyani. **5** Alatala ito nan falaxi, Ala naxan kore xonna daxi, a yi a yibandun, naxan boxon nun a yi seene daxi, a niiraxinla bira adamadiine yi naxanye dxi a yi, a niin bira ne yi naxanye sigan tima a fari, a naxa, **6** “N tan Alatala, n tan nan i xilixi tinxinni, n yi i suxu i yii ma, n yi i makantan, n yi n yengi lu i xon. N ni i findi n ma yamaan layirin xidi muxun na e nun kenenna siyane xa, **7** alogo i xa danxutone yeene rabi, i yi suxu muxune ramini kasoon na, i yi kasorasane xoroya, e mini dimini.” **8** “Alatala nan n tan na, n xinla nan na ra. N mi n ma binyen soma gbete yii. N mi n ma tantunna fiye suxurene ma. **9** Fe singene bata yelin kamale, n fe nenene nan ma fe ralima e ma benun e xa folo, n xa e rakolon ne ma.” **10** E beti nenen ba Alatala xa, boxon danne birin xa a tantun betini, e tan naxanye sigama foxo igen xun ma e nun a yi seene birin, foxo ige tagi boxone nun e muxune birin. **11** Tonbonna nun a taane xa e xuini te, e nun Kedari bonsonna doxodene! Sela kaane xa gbelegebe sewani, e xa sonxo jaxaxaxani geyane xuntagi! **12** Binyen xa fi Alatala ma! A xa tantun foxo ige tagi boxone birin yi! **13** Alatala minima nen alo sofa wekilexina, a bopen tema nen alo yenge so senbimana. A sonxoma nen

yaxune xili ma yengeni, a yi e no. **14** Xabu waxati xunkuye, n dunduxi, n naxaraxi, n na n yete suxi. Koni iki, n sonxolexi alo jaxanla nema tinna ma, n gbelegebelema, n kutunma jaxankatani. **15** N geyane nun yire matexine kalama nen n yi e se jingine birin xara. N baane findima nen tonbonne ra n yi darane xori. **16** N danxutone rasigama nen kiraan xon e mi naxan kolon. E yengi mi kiraan naxanye ma, n yi ti e yee ra ne xon, n yi dimin findi kenenna ra e yetagi, n geme yirene findi lantaan na e xa. N na nan ligama, n mi e rabepinjne mume! **17** Koni naxanye e yigi sama suxurene yi, e yi a fala sawurane xa, e naxa, “Nxo alane nan e ra,” ne xetema nen e xanbi ra, e yagi. **18** E tan tuli xorine, e tuli mati! E tan danxutone, e yeen ti, e seen to! **19** Danxutona nde ra, xa n ma walikeen xa mi a ra? Tuli xorina nde ra alo n xeraan naxan nasigaxi? Danxutona nde ra, alo n boje xunbenla fixi naxan ma? Danxutona nde ra, alo Alatala walikena? **20** I bata fe gbege to, koni i mi e famuxi. I tunle rabixi, koni e mi feen mema! **21** Alatala tinxinna fe ra, a bata a kenan, a xa a sariyan gboon nun a noron makenen. **22** Anu, yama yiigelito halagixini ito mato! E bata e birin suxu, e birin balanxi yinle ra, e birin saxi kasoon na. E yii seene bata suxu yengeni, muxe mi na naxan e xunbe. E yeteen bata findi se suxin na yengeni, muxe mi na naxan a fale, a naxa, “Ne raxete!” **23** Nde a tuli matima ito ra e ye? Nde a ligama a yeren ma, to xanbi ra, a yi a tuli mati? **24** Nde Yaxuba bonsonna soxi a yaxune yii, a Isirayila so halagi tiine yii? Alatala xa mi a ra, en naxan yulubi tongo, en mi tin bire naxan ma kira foxo ra en tondi a sariyane suxe? **25** Nayi, a yi a xolo gbeen nagodo e fari alo teena e nun yengen gbalone. A yi e gan, koni e mi sese famuxi, a yi e raxori, koni e mi na feen yate e bopeni.

43 Ala naxan i daxi, Yaxuba bonsonna, naxan i rafalaxi, Isirayila bonsonna, Alatala ito nan falaxi iki, a naxa, “I nama gaxu, amasoto n bata i xunba! N bata i xili i xinla ma. N tan nan gbee i ra! **2** Xa i danguma foxo igeni, n luma nen i xon. Xa i danguma baane yi, i mi i maminje. Xa i danguma teeni, a mi i ganje, tee degen mi i raxore. **3** Amasoto Alatala nan n na, i ya Ala, Isirayilaa Ala Sarijanxina, i rakisimana. N bata Misiran yamanan fi i xunbaan na, n yi Kusi yamanan nun Seba yamanan findi i joxon na. **4** Bayo i yatexi n xon, i binyaxi n yee ra yi, n bata i xanu. N bata muxune findi i joxon na, n yi yamane fi i niin

xunbaan na.” 5 “I nama gaxu, amasoto n luma nen i xon. N fama nen i yixetene ra sa keli sogeteden binni, n yi sa e malan keli sogegododen binni. 6 N na a falama nen komenna binna xa, n naxa, ‘E bejin!’ N yi a fala yiifanna binna xa, n naxa, ‘I nama e makankan!’ Fa n ma dii xemene ra sa keli yire makuyeni, e nun n ma dii temene sa keli boxon danne ra, 7 n xinla falama naxanye birin xun ma n naxanye daxi n ma binyena fe ra, n naxanye rafalaxi, n yi e da.” 8 Yamani ito ramini naxanye danxuxi, anu e yeene fan, tuli xorini itoe, naxanye tunle fan. 9 Siyane birin xa e malan e bode xon, yamanane muxune birin! Nde na fe falaxi e ye benun a xa liga? Nde fe fonne ralixi en ma? E xa fa e serene ra, e yi a mayita a yoono e xa! En xa e xuiin name, alogo muxune xa a fala, e naxa, “E jondi!” 10 Alatalaa falan ni ito ra, a naxa, “E tan nan n serene ra, e tan naxanye findixi n ma walikene ra, n naxanye sugandixi alogo e xa n kolon, e yi la n na. N tan yi na yi benun suxure yo xa rafala, ala gbete yo mi na n tan xanbi. 11 N tan nan Alatala ra, n tan yati! Ba n tan na, marakisi ti gbete yo mi na. 12 N tan nan feene makenenma, n muxune rakisi, n yi e rakolon! Ala xope mi a ra naxan e tagi fo n tan! Nayi, n serene nan e ra, fa fala n tan nan Ala ra.” Alatalaa falan nan na ra. 13 “N tan yatigin nan na ra xabu a foloni! Muxu yo mi noe muxun be n yii. N na naxan liga, nde noe a rakale ayi?” 14 Alatala ito nan falaxi, naxan e xunbama, Isirayilaa Ala Sarijanxina, a naxa, “N muxuna nde rasigama nen Babilon yamanan xili ma, e tan ma fe ra. N yi Babilon muxu gixine kunkine kala, e yi e mamin, e yi e kanbama naxanye yi nun. 15 Alatala nan n tan na, e Ala sarijanxina, naxan Isirayila daxi, e mangana.” 16 Alatala ito nan falaxi, naxan kiraan sama baa igen xonna ma, dangu ige gbeene yi, 17 naxan yenge so wontorone nun soone rasiga yengeni, e nun ganla nun sofa wekilexine e bode xon, e yi e sa, e mi fa kelima sonon, e yi tu alo saraban na jan. 18 A naxa: Fe singene nama fa rabira e ma, e jinan fe fonne xon! 19 E a mato, n fe nenen nan ligama! Na bata a folo iki, e mi a kolon ba? N kiraan sama nen tonbonni, n yi baane ramini boxo xareni. 20 Burunna subene n binyama nen, kankone nun dangaranfulene, amasoto n bata igen namini tonbonni, n yi baane ramini boxo xareni, alogo n ma yamaan xa e min, n naxan sugandixi. 21 N yamaan naxan nafalaxi, na n tantunma nen. 22 E tan Yaxuba bonsonna, e mi n tan xan xilixi! E tan Isirayila kaane, e bata e tunnaxolo

e ma n tan mabinni. 23 E mi e yexene nun e siine baxi n xa saraxa gan daxin na. E saraxane mi findixi n ma binyen na. N mi saraxane findixi goronna ra e xun ma, n mi e raxadanxi wusulan saraxane badeni. 24 E mi gbeti yikalaxi n xa, alogo e xa latikononna sara n xa, e saraxa subene turen mi n wasaxi. Koni e yulubine bata findi goronna ra n xun ma e yi n naxadan hakene xon. 25 Koni n tan nan keden pe e hakene xafarima, n tan yetena fe ra. N mi fa n mirima e yulubine fe ma sonon. 26 Fe danguxine rabira n ma. En kiti feni ito yebe en bode xa. E falan ti, e yi e yete xun mafala. 27 E benban nan singe yulubin liga, e fala radangune yi murute n xili ma. 28 Nanara, n bata yire sarijanxin kuntigine yate muxu haramuxine ra, n yi halagin nagidi Yaxuba yixetene ma, n yi marayarabin nagidi Isirayila kaane ma.

44 Koni iki, Yaxuba bonsonna, n ma walikene, e tuli mati, n na Isirayila naxan sugandixi! 2 Alatala ito nan falaxi, naxan i daxi, naxan i rafalaxi i nga kui, naxan i malima, a naxa, “E nama gaxu, n ma walikene, Yaxuba bonsonna, i tan Isirayila tinxinxina n naxan sugandixi. 3 Bayo n ni igen nafama nen boxo xareni n yi xudene radangu tonbonni. N na n ma Nii Sarijanxin nagodoma nen i bonsonne ma, n yi barakan sa i yixetene fe yi. 4 E sabatima nen alo sexene burunna ra, alo wudi fapine xudene de. 5 Muxuna nde a falama nen, a naxa, ‘Alatala nan gbee n na,’ boden yi a fala, a a xili nen ‘Yaxuba,’ gbete yi a sebe a yiin ma, fa fala ‘Alatala gbeena,’ a yi a yete xili ba a ‘Isirayila.’” 6 Alatala ito nan falaxi, Isirayila Mangan naxan a xunbama, Alatala Senben Birin Kanna naxa, “N tan nan a folon nun a rajanna ra. Ba n tan na, Ala gbete mi na. 7 Nde luxi alo n tan? Na kanna xa a xuini te! A xa a yebe n xa, naxan birin bata dangu xabu n singe ra muxune da waxatin naxan yi! A mon xa fe famatone fe fala, naxanye fama ligadeni! 8 E nama gaxu, e nama xuruxurun, n mi yi e rakolonxi feni ito ma ba, n yi a rali e ma xabu to mi na ra? N serene nan e tan na. Ala gbete na, ba n tan na ba? E kantan fanye gbete yo mi na, ba n tan na. N mi gbete kolon.” 9 Naxanye birin suxurene rafalama, fuyantenne nan ne birin na, e se rafalaxi fisamantenne tonjo yo mi na. E yete serene nan e ra: E mi se toma, e mi fe kolon, e mon luma nen yagini. 10 Muxun na alana nde rafala hanma suxurena nde, na tonjo mi na. 11 Na kanna nun a sifan birin yagima nen. Suxuren nafala muxune

findixi adamadiine nan tun na. E birin xa e malan, e xa e maso. E gaxuma nen, e yagi e bode xon. **12** Xabun nema bunbin xabuma, a walima te wolonne nan na, a yi a rafala deeramaan na. A a rawalima a senben nan na koni kamen na a suxu, a senben yi jan, min xonla yi a suxu, a xadan. **13** Kabintan lutin sama nen wudin ma, a yi lutin funfun naba a ma, a yi a masoli wali seen na, a yi a radigilin, a yi a rafala muxu sawuran na, a lu adamadiyaan noron birin yi alogo a xa a ti a batu banxini. **14** A sumanne nan segema hanma xarinne hanma warine a naxanye raluxi fotonni, e gbo. Xanamu, a fofona nde tongo, a tan yeteen naxan sixi, tule igen yi sa a ma, a gbo. **15** Adamadiine na wudina ndee ganma yegen na, e yi nde tongo, e yi e maxara a ra. E na nan ndee mon tongoma, e yi kudin so, e mon yi ndee tongo, e yi e gbee alana nde rafala, e yi e xinbi sin a bun, e suxuren nafala, e yi a batu. **16** E yi a wudi donxen findi yegen na, a gan, e yi suben jin ndee ra, e yi a gan ndee ra, e yi a don han e lugo. A mon yi a maxara, a yi a fala, a naxa, "N na n maxarama, n tee degen toma yatil!" **17** A wudin donxena, a yi na rafala a gbee ala ra, a suxurena, a yi a xinbi sin a yetagi, a yi a batu, a naxa, "N xunba, bayo i tan nan n ma ala ra!" **18** E mi fe kolon, e xaxili mi na, e yeene raxixi alogo e nama sese to. E mi nae e mire, e feene famu. **19** Muxune mi e mirima, e xaxinla soto, e mi feene yee toe alogo e xa a fala, e naxa, "N bata wudina ndee gan, n kudin so a ra, n yi suben gan ndee ra, n yi a don. N lan n xa a donxen findi se haramuxin na ba, n yi n xinbi sin yegen bun?" **20** E kankanma naxan ma, xuben nan gbansan na ra. E bojen bata tantan, a e ralɔ ayi. E niin mi xunbama, e mi a falama, e naxa, "Seen naxan n yii ito ra, wulen xa mi a ra ba?" **21** Yaxuba bonsonne, na feen xa rabira e ma! Amasoto n ma walikeen nan e ra, Isirayila kaane! N na e rafalaxi nen alogo e xa findi n ma walikene ra, Isirayila kaane, n mi jinanma e xon. **22** N bata e hakene ba e ma alo kundaan kore xonna ma e nun e yulubine alo kundaan xotonni. E xun xete n ma, amasoto n bata e xunba. **23** Kore xonna, gbelegebele sewani, amasoto Alatala bata wali! Boxon bunna, sonxo sewani, geyane, e xuini te e nun e tan fotonne nun wudine birin. Amasoto Alatala bata Yaxuba yixetene xunba, a yi a binyen mayita Isirayila yi. **24** Alatala ito nan falaxi, a tan naxan i xunbama, naxan i rafalaxi xabu i i nga kui, a naxa, "N tan, Alatala, n bata feen birin liga, n tan nan keden kore xonni fulunxi, n tan yeteen nan boxo xonna saxi.

25 N tan nan waliyine wule mantaxane kalama, n yi yiimatone findi daxune ra, n yi fekolonne raxete xanbin na n yi e xaxilimayaan findi xaxilitareyaan na. **26** N na n ma walikena falane rakamalima nen. N ma xerane na fe famatcon naxanye rali, n na a rakamalima nen. N bata a fala Yerusalen ma, n naxa, 'Muxune mon dɔxoma nen a yi, Yuda taane mon tima nen, n mon yi taa kalaxine yiton.' **27** N nae a fale tilinna ma, n naxa, 'Xara, n xa i ya igen xori.' **28** N yi a fala Kirusi ma, n naxa, 'N ma xuruse rabana! A n waxon feene birin ligama nen.' N na a fala Yerusalen ma, n naxa, 'A mon xa ti!' E nun Ala Batu Banxin ma, n naxa, 'A mon xa beten sa!'"

45 Alatala ito nan falaxi a muxu sugandixin xa, a naxa, "Kirusi, n naxan yii suxi, alogo n xa siyane magodo a yetagi, n yi mangane yenge so seene ba e ma, n yi deen foxo firinne rabi a yee ra, alogo taan so deene nama fa ragali sonon, **2** n tan yeteen tima nen i yee ra, n yi gbingbinne malaxun, n yi sulan deene kala, n yi deene balan wurene bolon. **3** N boxo bun nafunla soma nen i yii, e nun nafulu luxunxina, alogo i xa a kolon fa fala a n tan nan Alatala ra, naxan i xilima i xinla ra, n tan Isirayilaa Ala. **4** N bata i xili i xinla ma, n yi tide binyen fi i ma, n ma walikeen Yaxuba yixetene fe ra, Isirayila kaane, n naxanye sugandixi, koni i mi n kolon. **5** Alatala nan n tan na, gbete mi na. Ba n tan na, Ala gbete mi na. N bata i yiton yengen xili yi, hali i to mi n kolon, **6** alogo muxune xa a kolon, keli sogen teden ma han a gododena, fa fala ba n tan na, se gbete mi na. N tan nan Alatala ra, gbete mi na. **7** N tan nan kenenna daxi, n yi dimin da, n yi boje xunbenla fi, n yi toron nafa. N tan Alatala nan feen birin ligama." **8** "Tulen xa a yiton kore, tinxinna yi godo alo tulena! Boxon xa rasonɔya alogo kisin xa mini alo sansina, e nun tinxinyaan yi sabati e bode xon! N tan Alatala nan ne birin daxi." **9** Gbalon na kanna xa naxan yengen nakelima a dali marigin ma, muxun naxan luxi alo fejena fejene tagi. Feje bendena a fale a rafala muxun ma ba, a naxa, "I nanse ligama?" hanma a naxa, "Sese mi i ya wanla ra!" **10** Gbalon na kanna xa naxan a falama a fafe ma, a naxa, "I nanse barixi ito ra?" hanma a naxa a nga ma, "I diin barin nanfera?" **11** Alatala ito nan falaxi, Isirayilaa Ala Sarijanxina, naxan Isirayila daxi, a naxa, "E tan nan n maxodinma fe famatone ma, lan n ma diine fe ma, e yi yamarine so n yii lan n yii foxon ma? **12** N tan

nan boxo xonna rafalaxi n adamadiine da a fari! N tan yeteen nan kore xonni fulunxi. N tan nan a sarene birin yamarima. **13** N tan nan Kirusi rakelixa n ma tinxinyana fe ra, n yi a ti kira yitonxin xon. A n ma taan tima nen. N ma muxun naxanye yi suxi yengeni, a ne bejinma nen, e mi e xun saren fi.” Alatala Senben Birin Kanna naxa na kiini. **14** Alatala ito nan falaxi, a naxa, “Misiran kaane nun Kusi yamanan yulaya seene, na Sabe kaa muxu kuyene wanle tonon luma nen i xa. E fama nen i konni, e findi i gbeen na, e bira i foxo ra, e xidixi e bode ra, e yi e xinbi sin i yetagi e yi i maxandi, e naxa, ‘Ala i tan nan xon. Ala gbete mi na, sese mi ala gbete ye ra!’” **15** I tan Isirayilaa Ala, Marakisi Tiina, i findixi Ala luxunxin nan na. **16** Suxure rafalane birin yagixi, e xun sinxi, e birin xun sinxin sigama e bode xon. **17** Koni Isirayila kaane tan kisin sotoma Alatala nan na habadan. E mi fa yarabe, e xun sin mume! **18** Amasoto Alatala ito nan falaxi, a tan naxan kore xonna daxi, a tan Ala, naxan boxo xonna daxi, naxan a beten saxi, a mi a magenla lu, koni a yi a da alogo muxune xa lu a yi. A naxa, “N tan nan Alatala ra, gbete mi na. **19** N mi falan tixi luxunna xan yi, dimini boxon yirena nde yi. N mi a falaxi Yaxuba yixetene xa, n naxa, ‘E n fen fuyan!’ N tan Alatala, n jondin nan falama, n fe fajin nan nalima.” **20** “E tan siyane muxu gixine, e fa e malan, e birin yi e maso bel Xaxilitarene nan wudi suxurene tongoma, e yi batu seene maxandi naxanye mi nœ e rakise. **21** E falane ti, e yi e xonba. E bode kawandi! Nde muxune rakolonxi feni ito ra xabu a foloni? Nde bata yi a rali nun xabu to mi na ra? N tan Alatala mi a ra ba? Ba n tan na, Ala gbete mi na, Ala naxan tinxin, Marakisi Tiina. Ba n tan na, gbete mi na. **22** E yœ rafindi n ma, e xa kisi, e tan naxanye birin boxon danne ra! Bayo Ala nan n na, gbete mi na. **23** N bata n kolo n yeteni, n yeteen bata fala tinxinxini ito ti, falan naxan mi maxetema, n naxa, ‘Xinbin birin sinma nen n bun ma, lenna birin yi a kolo n yi. **24** E naxa: Tinxinna nun senbena Alatala nan keden pe yi.’” Naxanye birin yi xoloxi a ma, ne birin yagixin fama nen a fema. **25** Isirayila kaane birin tinxinna sotoma nen Alatala xon, e yi e kanba Ala yi.

46 Beli suxuren bata a xinbi sin, Nebo suxuren yi a felen. Ningene nan e suxurene maxalima. E yi e doxoma e xun ma nen sali waxatine yi, koni iki e bata findi goronna ra sube xadanxine xun ma. **2** E bata e felen e bode xon, e yi e xinbi sin, e mi nœ e

suxurene rakise naxanye findixi goronna ra bayo e tan yeteen sigama konyiyani. **3** Yaxuba yixetene, e tuli mati n na, e tan Isirayila yamaan muxu donxene, e tan naxanye goron n xun ma xabu e nga kui, xabu e xijen minma! **4** N luma na ki kedenna nin han e fori waxatini. N tima nen e bun ma han e xun sexene yi fixa. N bata na liga, n mon waxi e xali feni, n ti e bun, n yi e xoroya. **5** E n misalixi nde ra? Nxu nun nde lan? E nxu nun nde saxi nxu bode ma, nxu nun naxan maliga? **6** Muxune e xεmane fima, e gbete fixeni liga sikeela fari, e xabun saren fi alogo a xa ala sawurana nde rafala, e xinbi sinje naxan bun ma, e yi a batu. **7** E a tongo e tungunna ma, e a maxali, e sa a doxo a doxodeni. A mi nœ kele a funfuni! Hali e xui ramini a ma, a mi e yabima. A mi e ratangama e kontofinle ma. **8** Feni ito xa rabira e ma, e yi e wεkile! E tan muxu murutεxine, e miri na ma e bojeni. **9** Feen naxanye danguxi a folo foloni, ne xa rabira e ma. Amasoto Ala nan n na, gbete mi na! Ala nan n na, sese mi maliga n na! **10** Naxan fama ligadeni a rajanna ra, n na ralima a folon nin. Naxan munma liga, n na fe falama xabu waxati xunkuye. N naxa, n ma fe ragidixin nakamalima nen. N wama naxan birin xon, n yi na liga. **11** N bata senbεmana nde xili, sa keli sogeteden binni, naxan luxi alo singbinna alogo a xa n ma fe ragidixin nakamali, sa keli yamana makuyeni. N naxan falaxi, n yi na rakamali, n na naxan yiton, n yi na liga. **12** E tuli mati n xuiin na, e tan muxu boje xodεxene, e tan naxanye makuya tinxinna ra! **13** N ma tinxinyaan somatdon ni i ra! A mi fa makuya. N mi fa buma, n kisin nafa. N kisin nasoma nen Siyon taani, n yi n ma nœron fi Isirayila ma.

47 Keli i ya mangaya gbεdeni i doxo boxoni, Babilon taa fajina. Babilon kaane, e doxo boxoni! A mi fa falama a ma sœnon a taa jaxume tofajina. **2** E se din seene tongo alo konyine, e yi sansi kesene findi a fujin na. E doma gbeene mate, e danbane xa to, e xudene gidi. **3** E ragenla toma nen, e yagixin yi to. N nan n gbeen joxoma nen, muxu yo mi n yikale. **4** Isirayilaa Ala Sarijanxin nan en xunbama, a xili nen Alatala Senben Birin Kanna. **5** E doxo, e dundu, e siga dimini, e tan Babilon kaane! A mi fa falama a ma sœnon a yamanane mangana. **6** N xolo nen n ma yamaan ma, n bata yi n keen nayarabi, n yi e rabεjin e yii. E mi kininkinixi e ma, e konyi wanle ragboxi ayi hali fonne fari. **7** E yi a falama nen, e naxa, “N luma

nen mangayani habadan!” Koni ε mi na feene yatexi ε mi ε mirixi feene rajan kiin ma. **8** Nayi, Babilon taana, i tan naxan luxi alo jaxalan jaxina, i tuli mati ito ra iki. E tan Babilon kaan naxanye doxi makantanni, ε tan naxanye a falama, ε naxa, “Nxu tan, nxu joxon mi na, nxu mi finde kaja gilene ra mumε, nxo diine mi faxε mumε!” **9** Na fe firinne ε sotoma nen lxo kedenni sanja ma kedenni, ε diine yi faxa, ε findi kaja gilene ra. Ne defexin ligama nen ε ra, hali ε koe ra feene to gboxi ayi, hali ε tirin feene senben yi gbo! **10** E bata ε yigi sa ε fe jaxine yi. E yi a falama nen ε yete ma, ε naxa, “Muxu yo mi nxu toma!” E xaxilimayaan nun ε fekolonna bata ε xunna firifiri. E yi a falama ε bojneni nen, ε naxa, “Nxu tan, nxu joxon mi na!” **11** Gbalon fama nen ε ma ε mi naxan nadangu xiriya kolon. Halagin godoma nen ε ma, ε mi naxan nadangu saraxan noε. Yihadin fama nen ε ma sanja ma kedenni, ε xaxili mi naxan ma. **12** Nayi, ε lu ε tirin feene fari e nun ε koeraya fe wuyaxine, ε yi ε yete yixadanma naxanye foxo ra xabu ε dii jore waxatina! Yanyina nde, ε tonon sotoma e yi nen, yanyina nde ε muxune magaxuma e yi nen. **13** E bata ε yete yixadan suxurene maxodindeni. Awa, nayi, muxun naxanye xibarune toma sarene yi, ne xa keli, e fa ε rakisi, e tan naxanye sarene rakorosima e fe famatone fala kike yo kike! **14** E luma nen alo se dagina, teen yi e gan. E niin mi tangama na tee degen ma. Anu a mi findima tee wolondin xan na de burun ganma naxan na, muxuna a maxare naxan na! **15** E yixadanma muxun naxanye foxo ra xabu ε dii jore waxatina, ne rajanna ligama na kii nin, ε toroma naxanye fe ra. E birin sigama nen e xun xon e tantanni, e tan sese mi ε rakise mumε!

48 E tan Yaxuba yixetene, ε tuli mati ito ra, ε tan naxanye xili Isirayila ε tan naxanye barixi Yuda bonsanni, ε tan naxanye ε koloma Alatala xinli ε tan naxanye Isirayilaa Ala maxandima, koni jondin nun tinxinyaan mi a ra! **2** Amasoto ε xili saxi taa sarijanxin nan xun ma. E yengi saxi Isirayilaa Ala nan ma naxan xili Alatala Senben Birin Kanna. **3** Feen naxanye danguxi, n bata yi ne fala xabu waxati xunkuye. N yeteen nan ne ralixi, n yi muxune rakolon ne ra, na xanbi ra, sanja ma kedenni, n yi e liga, e yi rakamali. **4** Amasoto n na a kolon nen a yama tengbesenxin nan ε ra, ε koeni balanxi alo wure gbelemena, ε tigin xodoxo alo sulana. **5** Nanara, n feni itoe fala ε xa xabu waxati xunkuye, n yi ε rakolon e ra benun e xa liga,

alogo ε nama a fala, ε naxa, “Nxo suxurene nan e ligaxi, nxo sawurana hanma nxo ala wure daxin nan e yamarixi.” **6** E bata feni itoe me, ε yi e birin to rakamale! E fan mi ε tiye e ra ε deni ba? Iki, n fa ε rakolonma fe nenene nan ma, naxanye luxunxi, ε mi naxanye kolon. **7** N baxi e yitondeni nen, fe fonne mi e tan na. Benun to, ε munma yi e sese a fe me nun, alogo ε nama a fala, ε naxa, “Nxu yi na kolon.” **8** Anu, ε mi yi sese mexi, ε mi yi sese kolon. E tunla munma yi a me singen waxati danguxine yi. Bayo n yi a kolon a yanfantenne nan ε ra. Xabu ε yi ε ngakui, a yi falama ε ma a muxu murutexine. **9** N bata n ma xoleni suxu n xinla fe ra. N bata dijna ε ma n tantunna fe ra, alogo n nama ε halagi. **10** N bata ε rasensen teen na alo gbeti wurena sulun teeni. N mi yi ε rasoxi sulun teen xan yi de, koni n yi ε rasoxi jaxankata yinla nan na. **11** N bata keli ito ligadeni n yetena fe ra, n na a ligama n yeteen yatin nan ma fe ra! Amasoto n tinje di, n xinla yi rayelefu? N mi n ma binyen fiye gbete ma. **12** Yaxuba bonsonna, ε tuli mati n na! Isirayila kaane, n naxanye xilixi! N tan na a ra, n tan nan a folon nun a rajanna ra. **13** N tan nan boxo xonna beten saxi, n yiifanna yi kore xonni fulun. N na e xili, e fama nen mafuren! **14** E birin xa ε malan, ε tuli mati! Nde feni ito falaxi suxurene ye? Muxuna nde rafan Alatala ma. Na a waxon feene ligama nen Babilon taan na, a yiini tema nen Babilon kaane xili ma. **15** N tan nan keden pe falan tixi, n mon yi a xili, n yi a rafa. A wanla sonoyama nen! **16** E maso n na, ε tuli mati ito ra. Xabu a foloni, n mi falan ti wundoni. Xabu feni itoe folona, n yi be. Iki, Marigina Alatala bata nxu nun a Nii Sarijanxin xe. **17** Alatala ito nan falaxi, naxan i xunbama, Isirayilaa Ala Sarijanxina, a naxa, “Alatala nan n tan na, i ya Ala, naxan i xaranma i yete munanfanna ma, naxan tima i yee ra, a siga i ra kiraan xon naxan lanje i ma. **18** Xa i yi n ma yamarine rame nun, i ya boje xunbenla yi luma nen nun alo baana, i ya tinxinna yi lu alo foxo igen walanna, **19** i yixetene yi wuya ayi alo jemensinna i ya diine yi gbo ayi alo jemensin xonne. I xinla mi be n yetagi mumε!” **20** E mini Babilon yamanani, E ε gi Babilon kaane mal E gbelegebe sewani, ε fa a rali, a xa rawanga! E a fe raxuya ayi han boxon danne, ε a fala, ε naxa, “Alatala bata a walikeen Yaxuba bonsonna xunba!” **21** Min xonla mi e suxuma, a na ti e yee ra, dangu tonbonni. A igen naminima nen fanyeni e xa. A fanyen boma nen,

ige gbeen yi mini keden na. **22** Alatala naxa, “Bɔɲe xunbeli mi muxu ɲaxine xal!”

49 E tuli mati n na, ɓɔɔ ige tagi ɓɔxɔn muxune.

Yamana makuyene, ε ito rame. Benun n xa bari, Alatala bata yi n xili. **2** A bata n deen lu alo silanfan xenxena, a yi a yiin nininna ti n xun ma, a yi n findi xalimakuli ɲɔɛ ralemunxin na, a n luxun a xalimakuli sasen. **3** A yi a fala n xa, a naxa, “N ma walikeen nan i ra, Isirayila, n ma binyen luma naxan yi.” **4** Koni n tan yi a fala, n naxa, “N bata n yete yixadan fufafu, n bata n fangani kala fuyan, n mi se sɔtɔxi. Koni Alatala n ma kitin sama nen. N saranna n ma Ala nan yii. **5** Awa iki, Alatala bata falan ti, a tan naxan n daxi nga kui alogo n xa findi a walikeen na, alogo n xa Yaxuba ɓɔnsɔnna raxete a ma, alogo Isirayila kaane mɔn xa malan a fema, n bata binyen sɔtɔ Alatala yetagi. Amasɔtɔ n ma Ala nan findixi n fangan na. **6** A bata a fala n xa, a naxa, ‘I findi fena n ma walikeen na alogo i mɔn xa Yaxuba ɓɔnsɔnna rakeli, i yi Isirayila yamaan muxu dɔnxene raxete n ma, na xurun. N ni i findima nen kenenna ra siyane xa, alogo n ma marakisin xa makenen siga han ɓɔxɔn danne ra.’” **7** Alatala naxan i xunbama, Isirayilaa Ala Sarijanxina, na nan ito falaxi i xa, i tan naxan ɲaxuxu, i tan naxan yatexi muxu haramuxin na yamaan xɔn, i tan naxan findixi kuntigine konyin na, a naxa, “Mangane i toma nen, e yi keli, kuntigine i toma nen, e yi e xinbi sin i bun ma Alatalaa fe ra naxan tinxin, Isirayilaa Ala Sarijanxina naxan i sugandixi.” **8** Alatala ito nan falaxi, a naxa, “N ma marafanna waxatin na a li, n ni i yabima nen! I rakisin waxatin na a li, n ni i malima nen. N na i ramarama nen, n yi i findi layiri xidi muxun na alogo yamanan mɔn xa yitɔn ɓɔxɔn kee rabɛɲinxine mɔn yi yitaxun, **9** alogo a xa fala kasorasane xa fa fala, ‘E mini!’ e nun naxanye luxi dimini fa fala, ‘E mini kenenni!’ E nɔɛ e dege nen kirane xɔn alo xuruse kuruna, e xuruse rabaden tɔɛ nen geyane birin fari. **10** Kamen mi fa e suxuma sɔnɔn, min xɔnla mi e suxe. Kuye wolonna nun sogen mi e tɔɛ mume, bayo naxan kininkininma e ma, na tima nen e yee ra, a yi e xali tigi yirene yi. **11** N na n ma geyane birin findima nen kirane ra, n ma kirane mɔn yi yitɔn. **12** E mato, e fama sa keli yire makuyeni, ndee kelima sogeteden kɔmenna binni, ndee sogegododen binni, ndee sa kelima Sinimi yamanani.” **13** Kore xɔnna, gbelegbele sewani! ɓɔɔ xɔnna, ɲaxan! Geyane, ε sewa xuini tel

Bayo, Alatala a yamaan madendenma, a kininkininma a tɔɔ muxune ma. **14** Siyon kaane yi a falama nen, e naxa, “Alatala bata nxu rabɛɲin, Marigin bata ɲinan nxu xɔn.” **15** Ala naxa, “Naxanla ɲinanɲe a diin xɔn ba, naxan xɲen na? A mi kininkininɲe a dii barixin ma ba? Hali a tan ɲinanɲe a xɔn, n tan mi ɲinanɲe i xɔn mume! **16** N bata i xinla kerenden n yiine kui, n na n ɲɔɔ lu taan makantan yinne xɔn ma waxatin birin. **17** I ya diine xetema e giye i ma nen, i kala muxun naxanye yi i halagima, ne e gima i ma nen. **18** I yee rakojin i rabilinni, i ya diine birin bata e malan, e fama i fema. Habadan Ala nan n na, n bata n kɔlɔ n yeteni, e findima nen i maxidi seen na alo ɲereɲa i kɔɛ ra alo ɲaxalandina a maxidima kii naxan yi.” Alatalaa falan nan na ra! **19** Hali taa xɔnne nun ɓɔɔ rabɛɲinxine nun yire kalaxine to gbo yamanani iki, e sa xurunma ayi nen dɔxɔden na i ya yamaan xa. Naxanye yi i halagima, ne makuyama i ra nen. **20** E diin naxanye baxi i yii, ne mɔn a falama nen i xa, e naxa, “Yireni ito xurun nxu ma, dɔxɔdena nde fen nxu xa, nxu xa ba yigbetenxi.” **21** Nayi, i a falama nen i ɓɔɲeni, i naxa, “Nde itoe barixi n xa? Diine yi baxi n yii nun, n yi luxi alo gbantana. N bata yi xali konyiyani, n namexin nan yi a ra! Nde diini itoe maxuruxi? N kedenna bata yi lu, koni diini itoe sa kelixi minen?” **22** Marigina Alatala ito nan falaxi, a naxa, “N na n yiin maligama nen siyane xa, n na n ma taxamasenni tema nen yamanane xa, e yi fa i ya dii xemene ra e yii kanke, e yi i ya dii temene maxali e tungunne ma. **23** Mangane nan i ya diine maxuruma i xa mangane ɲaxanle yi i ya dii temene balo i xa. E yi e xinbin sin i yetagi, e yetagin yi lan ɓɔxɔn ma, e yi i san ma lɔxɔne makɔn. I a kolonma nen nayi, a Alatala nan n tan na, naxanye e xaxili tixi n tan na ne mi yagima.” **24** Sofaan seen naxan tongoxi yengeni, na be a yii ba? Naxankata tiina muxu suxin nɔɛ a futuxule ba? **25** Alatala ito nan falaxi, a naxa, “Sofana se tongoxin bama nen a yii yati, ɲaxankata tiina muxu suxin yi a futuxulu. N na i yengefane yengema nen, n yi i ya diine rakisi. **26** Naxanye yi ɲaxu i ra, n yi ne radin e bode ma e balo e bode suben na, e yi e bode wunla min alo manpa nenena. Nayi, adamadiine birin a kolonma nen a Alatala nan n na, i rakisiimaan naxan i xunbama, Yaxubaa Ala Senbemana.”

50 Alatala ito nan falaxi, a naxa, “Futu kala kedin minen n na n mexi ε nga ra naxan xɔn? Hanma

n na ε matixi n doli faane ma naxan xon? E matixi ε hakena nan ma fe ra ε nga ramexi ε matandine nan ma fe ra. 2 N to fa, nanfera muxe mi yi be? N to xinla ti, nanfera, muxe mi n yabi? N yiin dungi nayi ba, a yi muxune xunba? Senbe mi n na ba, n yi muxune xoroya? Anu, n baa igen xarima, n na n konko a ma, n yi baane findi tonbonna ra, e yexene yi kun, bayo ige mi na, e birin yi faxa min xonla ra. 3 N yi dimin naso kore alo sunu dugina.” 4 Marigina Alatala bata n xaran alogo n xa a kolon n naxan fale muxu xadanxine xa, e senben soto. A n naxulunma xoton yo xoton, alogo n xa a falan name alo a xarandiina. 5 Marigina Alatala bata n tunle rabi, n tan fan mi murutexi a ma, n mi xetexi xanbin na. 6 N na n fanna ti nen n bonbo muxune xa, n yi n deen ti ne xa naxanye n de xabene matalama. N mi n yetagin baxi konbin nun degen bun. 7 Koni Marigina Alatala n mali nen, nanara n mi rayarabi. N bata n yetagin findi fanyen na, n to a kolon a n mi fama yagideni. 8 Naxan yoon fima n ma, na bata maso. Nde waxi n xun maxidi feni nayi? En kitin yebe en bode xa! Nde mi tinxi n ma yoon ma? A xa fa n xili ma! 9 Marigina Alatala n malima nen. Nayi, nde n yalagima? E birin kalama nen alo dugi fonna, kunle yi e don. 10 Nde a tuli matiye Alaa walikeen na Alatala yeeragaxun ma? Naxan yo sigan tima dimini, kenenna dasaxi naxan ma, na xa a yigi sa Alatala yi, a yi a xaxili ti a Ala ra! 11 Koni ε tan naxanye teene soma, e yi tanba radegeixine tongo, nba ε sigan ti ε yetena tee degen ma, ε tanban naxanye radegexi. E fa ito nan sotoma: ε faxama soxolen nin.

51 E tuli mati n na, ε tan naxanye tinxinyaan foxo ra, ε tan naxanye Alatala fenma! E yeen ti fanyen na, ε minixi naxan yi, e nun gemena ε baxi denaxan yi. 2 E yeen ti Iburahima ra, ε fafe, e nun Saran, naxan ε barixi. Amasoto n Iburahima xili waxatin naxan yi, dii mi yi a yii nun. Koni n barakan sa nen a fe yi, n yi mayixete wuyaxi fi a ma. 3 Alatala Siyon taan masabarima na kii nin, a yi kininkinin a yire kalaxine birin ma. A yi a tonbonna lu alo Eden nakona. A boxo xarene yi lu alo Alatalaa nakona. Sewan nun jaxanna luma nen a yi, beti xuine nun sigi xuine yi me a yi. 4 Ala naxa, “E tan n ma yamana, ε tuli mati n na! E tan n ma yamanan muxune, ε n xuiin name, bayo n sariyan fima nen, n ma kiti kenden yi findi kenenna ra siyane xa. 5 N ma tinxinyaan somatsoon ni i ra, n ma marakisin yi makenen. N kiti kenden nafama nen

siyane ma n senben xon. Foxo ige tagi boxone yi e yigi sa n yi, e yi e xaxili ti n senben na. 6 E yee rate kore, ε mon xa boxon mato. Kore xonna loma ayi nen alo tutina, boxo xonna yi jan alo dugina, a muxune yi faxa alo tugetugene. Koni n ma marakisin luma nen habadan, n ma tinxinyaan mi janje mume! 7 E tuli mati n na, ε tan naxanye tinxinna kolon. E tan yamaan naxan n ma sariyan namaraxi ε bojeni! E nama gaxu muxune mafala xuine yee ra, ε nama gaxu e konbine yee ra. 8 Bayo, e fatin kalama nen, kunle yi e don, alo domain xiine bun, koni n ma tinxinna luma nen habadan, n ma marakisin yi lu mayixete nun mayixetene xa.” 9 Keli Ala, keli! I senbe so! Alatala, i fangan nakeli alo boxo singene, alo waxati danguxine yi! I tan xa mi Misiran yamanan kala ba, i yi na ige yi ninginangani soxon? 10 I tan xa mi baa gbeen igen xara ba, tilin gbeen yi xori. I tan xa mi kiraan sa baan xonna ma alogo i ya muxu xunbaxine xa gidi? 11 Alatala na naxanye xoroya, ne xetema nen. E fama nen gbelegbele jaxanaxani Siyon taani, habadan sewan yi e yetagini yalan. Naxanaxan nun sewan luma nen e yi, sunun nun kutunna yi jan fefe! 12 N tan keden peen nan ε ralimaniyama. Nanfera ε gaxuma muxune yee ra, naxanye faxama? Adamadiine rajanna luma nen alo sexena. 13 I bata jinan Alatala xon naxan i daxi, naxan kore xonni fulunxi, a boxo xonna beten sa! I luma nen gaxuni waxatin birin i jaxankata tiin bun ma alo a na a yiton i halagi xinla ma! Koni jaxankata tiina fitinan minen? 14 A gbee mi fa luxi kasorasane xa bejin. E mi faxama kasoon na, donseen mi fa dasama e ma sonon. 15 Alatala nan n tan na, i ya Ala, naxan foxo igeni maxama, a moronne yi xuxu. A xili nen Alatala Senben Birin Kanna. 16 N bata n ma falan naso i de n yi n yiin nininna ti i xun ma. N tan naxan kore xonna sa a funfuni, n yi boxo xonna beten sa, n yi a fala Siyon kaane xa, n naxa, “N ma yamaan nan ε tan na.” 17 E xulun, ε xulun! Yerusalem kaane ε keli! E tan naxanye ε minxi Alatalaa xolon dolo lengenna ra ε tan naxanye a xolo igelengenna rafexin minxi han ε yi a jan, a yi ε xunna firifiri! 18 E diin naxanye birin barixi, keden mi na naxan tiye ε yee ra. E diin naxanye birin maxuruxi keden mi na naxan ε yii rasuxe. 19 Toron bata ε soto firin firin yeen ma: gbalon nun halagina fitina kamen nun yengena. Anu, nde i ralimaniye, nde i masabare? 20 E banxulanne bata bira boxon ma kira xunne birin na, e fugaxi a ra alo bolen na a suxu lutin na, e saxi Alatalaa xolon bun, ε

Ala bata a kōnko e ma. **21** Nanara, i tuli mati n na, taa tōrōxina, i tan naxan xunna firifirixi, koni i mi dōlo minxi! **22** Marigina Alatala ito nan falaxi, i ya Ala, naxan a yamaan xun mayengema, a naxa, “N ni igelengenna bama nen i yii naxan i xun magima a ra, n ma xōlo igelengenna. I mi fa a minma sōnōn. **23** N na a soma nen muxune yii naxanye yi i tōrōma, naxanye yi a falama i ma, e naxa, ‘I felen nxu xa dangul’ I yi i fanna ti e xa alo bōxōna alo kirana dangu muxune xa.”

52 E xulun, e xulun Siyon kaane! E mōn xa senben soto. Yerusalen taa sarījanxin muxune, e dugi fajine tongo! Bayo, xōje sarījantaren mi fa soma e konni. **2** E yikunkun, e gbangbanna ba e ma Siyon kaane, E mōn xa keli, e dōxo e funfu fonni. E lutine ba e kōe, e tan Yerusalen taan muxu suxine! **3** Alatala ito nan falaxi, a naxa, “Bayo e matixi nen, e sare mi fi, e mōn xunbama nen, se mi fi.” **4** Marigina Alatala mōn ito nan falaxi, a naxa, “N ma yamaan sigaxi nen Misiran yamanani singen, a sa lu konyiyani, koni dōnxen na, Asiriya kaane nan e jaxankata.” **5** Alatalaa falan ni ito ra, a naxa, “Iki, n fa nanse ligama? N ma yamaan bata xali konyiyani, e mi sara. Naxanye bata nōon soto e xun na, ne sōnxōma, e n xinla rayelefuma waxatin birin.” Alatalaa falan nan na ra. **6** “Nanara, n ma yamana n xinla kolonma nen, nanara e a kolonma nen na lōxōni, a n tan nan falan tixi, n naxa, ‘N tan ni i ra!’” **7** Xera faji yibane faan lanxi geyane fari han, naxanye bōje xunbenla fe ralima, naxanye fama sewa feen xibarun na, naxanye marakisina fe falama, naxanye a falama Siyon kaane xa, e naxa, “E Ala nan mangan na!” **8** E tuli mati e taan kantan muxune xuiin na! E xuini tema, e birin yi sōnxō sewani, bayo e Alatala toma fe Siyon taani e yetagi. **9** E xuini te, e gbelegbele sewani e bode xōn ma, Yerusalen taa kalaxin muxune! Bayo Alatala a yamaan masabarima, a Yerusalen taan xunbama nen. **10** Alatala bata a yii sarījanxin senben makenen siyane birin yetagi, bōxōn danne birin en ma Alaa marakisin toma nen. **11** E siga, e siga, e mini na yi! E nama din se sarījantare yo ra! E masiga e ra, e yi sarījan e tan naxanye Alatalaa goronne maxalima! **12** E mafuraxin nama mini, e nama siga e giye, bayo Alatala tixi e ye e ra. Isirayilaa Ala mōn luma nen e xanbi ra e kantandeni. **13** N ma walikēna fe sabatima nen, a fe yi mate, a yi tide gbeen soto, a binyen soto, **14** hali a fe to findixi terēna feen

na muxu wuyaxi xa, bayo a yetagin mi yi fa luxi alo muxuna, a kiin mi yi fa maliga adamadiin na. **15** Anu, a siya wuyaxine rasarījanma nen wuli raxuyaxin xōn. Falan yi jan mangane de a yetagi, bayo e bata feen to naxan munma yi fala e xa, e munma yi naxan me nun, e yi na famu.

53 Feen naxan nalixi en ma, nde laxi na ra? Alatala a senben makenen nde xa? **2** Alaa walikēen sabati nen a yetagi alo sansi sonla, alo wudi salenna naxan minima bōxō xareni. A mi yi tofan, a mi yi nōrōxi naxan a ligē en yabu a ra. A to ki yo mi yi en mabandunma. **3** A yi rajaxuxi nen, muxune yi e me a ra. Muxu sōxōlexin nan yi a ra naxan bata yi dari tōrōn na, muxu mi yi wama naxan mato feni. A yi rajaxuxi, en mi yi a yatēxi se ra. **4** Anu, a en ma furene sōxōlen nan tongo, a yi a ti en ma tōrōne ra. Koni, en yi mirixi a ma fa fala a Ala nan a ratōrōnxi, a yi a jaxankata, a yi a rayarabi. **5** Anu, muxune a sōxōn en yulubine nan ma fe ra, a yi rahalagi en hakene fe ra. Maratōrōnna naxan bōje xunbenla fiye en ma, na yi sa a fari, en kende yaan sōtōxi a maxōlōne nan xōn. **6** En birin bata yi lō ayi, alo xuruseene, birin yi sigama a gbee kira nan xōn, koni Alatala yi en birin haken goronna dōxo a tan xun ma. **7** E a jaxankata nen, e a rayarabi, a mi sese fala. A yi lu alo ye xēe diin naxan xalima a faxadeni, alo ye xēen naxan a dunduma e nēma a fati ma xabene maxabe, a mi sese fala. **8** A xali nen gbaloni, a makiti, koni nde yi kontōfilixi na feen na a waxatin muxune ye? Amasoto a ba nen jeje muxune ye jaxankatan yi sa a fari n ma yamaan yulubine fe ra. **9** A gaburun lu nen muxu jaxine ye, a maluxun nafulu kanne fema, hali a to mi gbalo fe yo liga a mi yanfa fala yo ti. **10** Alatala tin nen a xa halagi xōleni, bayo xa a niin ba tagi yitōnna saraxan nan na, a mayixetene toma nen a siimayaan yi xunkuya ayi Alatala yi a sagoon nakamali a xōn. **11** A niin sōxōlene dangu xanbini, a kenenna toma nen, a wasa. A kolonna xōn, n ma walike tinxinxi muxu wuyaxi ratinxinma nen a yi e hakene goronna tongo. **12** Nanara, n tide gbeen soma a yii nen, a yi yenge se tongoxine yitaxun e nun senbemanē. Amasoto a tin nen a sayaan ma, a yate nen alo fe jaxi rabane, a yi muxu wuyaxi yulubin goronna tongo a yi solonaan ti hake kanne xa.

54 I tan Yerusalen taan naxan luxi alo gbantana, i xa sewa, i tan naxan mi dii barixi! I xa jaxan i

sənxə sewani, i tan naxan mi dii sətən xələn kolon. Bayo naxalan nabəjinxina diine wuyama ayi nən dangu xəmə taa ra dōxən gbeene ra. Alatala naxa na kiini. 2 I ya bubuni gbo, i yi a fari sa han! I nama sike, i ya bubun lutine rakuya ayi, i yi a senbetenne xən din. 3 Amasəto ɛ sabatima nən yiifanna nun kōmenna ma, yamanane yi findi ɛ yixetene gbeen na, e yi taa yigenle rafe. 4 ɛ nama gaxu, amasəto ɛ mi yagin sətə. ɛ nama kontəfili amasəto ɛ mi rayagima, koni ɛ jinanma nən ɛ dii jərəyaan yagin xən ɛ mi fa ɛ mirima ɛ kaɲa gileyaan yagine ma sənən. 5 Amasəto naxan ɛ daxi, na luxi nən alo ɛ xəmə nən na ra. A xili nən Alatala Senben Birin Kanna. Isirayilaa Ala Sarijanxin nan ɛ xunbama. A xili nən bōxən birin ma Ala. 6 Amasəto Alatala mən ɛ xilima nən alo naxanla naxan yi rabəjinx, naxan sunuxi! Muxun mi nə ɛ a foningə waxatin naxanla rame! ɛ Ala naxa na kiini. 7 N na ɛ rabəjin nən waxatidi, koni n mən yi ɛ xən suxu kininkinin gbeeni. 8 N na n yetagin luxun nən ɛ ma waxatidi, n ma xolo gbeeni. Koni n kininkininma ɛ ma nən n ma habadan hinanni. Alatala na nan falaxi naxan ɛ xunbama. 9 Ala naxa, “N na a ligama nən to alo Nuhan waxatini, n na n kolo waxatin naxan yi fa fala fufa gbeen mi fa sama bōxo xōnna xun ma sənən. N mən bata n kolo na kiini, n mi fa xoloma ɛ xili ma sənən, n mi fa n kōnkoma ɛ ma sənən. 10 Hali geyane xuruxurun, hali yire matexine yimaxa, n ma hinanna mi a makuyə ɛ ra, n ma bōjə xunbeli layirin mi kale en tagi.” Alatala naxa na kiini, naxan kininkininxi ɛ ma. 11 Yerusalen taa tərōxina, foye gbeen naxan yimaxaxi, muxu yo mi naxan madendenxi! Awa, n tan, Ala, n mən Yerusalen taan tima nən gəmə tofajine ra, n mən yi a beten sa gəmə mamiloxi fajine ra. 12 N taan makantan sangansone findima nən gəmə gbeeli fajine ra, n yi taan so dəene ti gəmə fixə mayilənxine ra n taan nabilinna yinna ti bōxo bun nafunle ra. 13 ɛ diine birin findima nən Alatalaa xarandiine ra, e bōjə xunbenla yi gbo ayi. 14 ɛ sabatima nən tinxinyani. Naxankatan masigama ɛ ra nən. ɛ mi fa gaxuma sese yə ɛ ra, gaxun masigama ɛ ra nən, a mi fa a masoma ɛ ra. 15 Xa muxune ɛ yenge, na mi kelixi n tan ma, naxan yo na ɛ yenge, na birama nən ɛ sanna bun! 16 A mato, n bata xabun da, naxan tigen tən nafema, naxan yenge so seen nafalama a kiini. Koni n tan nan mən halagi tiin daxi naxan a kalama. 17 Yenge so se yo na rafala ɛ xili ma, na mi fefe lige ɛ ra. Naxan yo na ɛ tōjəge kitisadeni, ɛ yoon sətoma na ma nən. Alatalaa

walikene na nan sətoma e kēen na, n bata na kitin sa e xun mayengen na. Alatalaa falan nan na ra.

55 Min xōnla ɛ tan naxanye birin ma, ɛ birin xa fa, igen ni i ra! Hali gbeti mi ɛ yii, ɛ fa, ɛ fa donseen sara, ɛ a don! ɛ fa minseen nun nənən sara, gbeti mi fima, a sare mi fima. 2 Nanfera ɛ seen sarama donse mi naxan na? Nanfera ɛ yete yixadanma seene fe ra naxanye mi ɛ wasama? Nayi, ɛ tuli mati n na ki fajni, ɛ yi donse kenden don, donse jaxumene yi ɛ nii yifan ɛ ma. 3 ɛ tuli mati, ɛ fa n ma, ɛ n xuiin name, ɛ nii rakisin sətoma nən. N habadan layirin xidima en tagi nən, alo n hinanna nun tinxinna naxan yita Dawuda ra. 4 N bata Dawuda findi seren na siyane xa, e nun mangana siyane xun na. 5 ɛ siyana ndee xilima nən ɛ mi naxanye kolon, siyaan naxanye mi ɛ kolon, ne yi e gi e fa ɛ fəma Alatalaa fe ra, ɛ Ala Isirayilaa Ala Sarijanxina, naxan xunnayerenna fima ɛ ma. 6 ɛ Alatala fen a tinma ɛ xa a to waxatin naxan yi. ɛ a xili, a maso ɛ ra waxatin naxan yi. 7 Muxu jaxin xa xete a kiraan fōxo ra, hake kanna xa a miriyane lu, a tubi Alatala ma, naxan kininkininma a ma, en ma Ala naxan a mafeluma hinanni. 8 Alatalaa falan ni ito ra, a naxa, “Bayo n ma miriyane mi ɛ miriyane ra, ɛ kirane mi lanxi n ma kiraan ma. 9 Kore xōnna matexi bōxən xun ma kii naxan yi, n fan ma kirane fisa ɛ kirane xa na kii nin n ma miriyane fan yi fisa ɛ miriyane xa na kiini.” 10 Tulen nun balabalan kesene godoma keli kore anu, e wuyenna mi tē kore fō bōxo xōnni kun, e yi seene rasoli, e sabati e yi findi sansi bogine ra xē biine xa, e findi donseen na kametone xa. 11 N ma falan fan na kii nin naxan minima n də. A yigenla mi xete n ma, fō a n waxən feen liga, a n ma fe ragidixin nakamali, n na a rasigaxi naxan na. 12 ɛ minima konyiyani sewan nin, ɛ yi rafa bōjə xunbenli, geyane nun yire matexine sənōma nən jaxanni ɛ yē ra, burunna wudine birin yi e yiine bōnbō. 13 Nali yirene yi findi fōfō yirene ra, tansin yirene yi findi miriti wudi xiri jaxumə yirene ra. Na findima nən xinla ra Alatala xa, habadan taxamasenna naxan mi kalama mume!

56 Alatala ito nan falaxi, a naxa, “ɛ kiti kenden sa, ɛ tinxinyaan liga, amasəto n ma marakisin bata maso n ma tinxinyaan makenenmatōn ni i ra. 2 Sewan na kanna xa naxan na ligama, adamadiin naxan na suxuma, a yi Matabu Lōxən binya, a mi a rayelefu, a yi a yiin ba fe jaxin birin yi.” 3 Xōjən

naxan findima Alatala gbeen na, na nama a fala, a naxa, “Alatala n bama nen a yamaan ye!” Hanma xeme tegenna yi a fala, a naxa, “Wudi xaren nan tun n tan na!” **4** Amasoto Alatala ito nan falaxi, a naxa, “Naxanye n ma Matabu Loxon binyama e yi n nafan feen sugandi, e lu n ma layirin bun ki faji, **5** n yirena nde luma nen e xa n Batu Banxin nun a yinna kui, n yi e xinle sebe menni alogo jinan nama ti e xon. Na tonona e ma dangu dii xemene nun dii temene ra. N xinla naxan fima e ma, na luma nen habadan, sese mi a be na. **6** Xojen naxanye findixi Alatala gbeen na, alogo e xa a batu, Alatala xinla rafan naxanye ma, naxanye birin Matabu Loxon binyama, e mi a rayelefu, e lu n ma layirin bun ki faji, **7** n ne xalima nen n ma geya sarijanxin fari, n yi e rasewa n xinla maxandi banxini. E saraxa gan daxine nun e saraxane rasuxuma nen n ma saraxa ganden fari, amasoto n ma banxin xili bama nen, Ala maxandi banxina siyane birin xa.” **8** Marigina Alatala falan ni ito ra, a tan naxan Isirayila muxu suxine malanma, a naxa, “N bata ndee malan, n mon gbete ye malanma nen sa ne fari.” **9** E tan burunna subene, e tan foton yi subene, e fa e dege! **10** Isirayila xun makantanne bata findi danxutone ra, e mi sese kolon, e bata findi bare bobone ra, naxanye mi nae wonwonje. E luma saxi nen, e lu xiye se, xixonla yi rafan e ma. **11** Barene nan ne ra naxanye seni boma, naxanye mi wasama mum! Xuruse rabane nan ne ra naxanye mi sese famuma. E birin sigama e gbee kiraan nan xon. Birin biraxi a yete tonon nan foxo ra. **12** E naxa, “E fa, nxu xa sa dolon fen! En dolon min han en xunna yi keli! Tila fan luma nen alo to, bayo a gbegbe mon luxi.”

57 Tinxindene halagima, koni muxu yo mi a mirima na feen ma. Lannaya muxune faxama, muxu yo mi a famuma fa fala tinxindene faxama nen alogo e xa ba gbalo famatcon yee ra. **2** Bayo naxanye sigan tima jondini, ne soma boje xunbeli yiren nin, e matabuden soto. **3** E tan kceramuxu diine, e maso be, yalunde bonsonna, naxan yalunyaan ligama! **4** E nde magelema, e deen bandunma nde ma e lenna raminima nde ma? E mi findixi dii murutexine xan na ba, wule fala bonsonne, **5** e tan naxanye kunfan nagboma ayi wudine kideni, e nun wudi yifotonxine birin bun, e tan naxanye e diine kee raxaban darane kideni, e nun geme longonne ra? **6** Geme malaxunxine nan e keen na e xude kidene yi, e gbeen ne nan na

Isirayila kaane! E minse saraxane boxonxi ne nan xa, e yi bogi se saraxane ba e xa. N nae dije na birin bun ba? **7** E sa e sadene tixi geya matexine nan fari, e tema mena nin e sa saraxane ba. **8** E bata e suxurene singan e banxin deen nun a ti wudine xanbi ra. E bata e masiga n na, e ragenla yi lu, e te e sade xungbeen ma, e nun muxune yi lanna raso e tagi a rafan e ma e nun naxanye xa kafu, e yi lu ne matoe. **9** E bata siga turen na manga gbeen kideni, e yi latikononna ragbo ayi. E bata e xerane rasiga pon, e yi godo han laxira yi. (Sheol h7585) **10** E bata e yixadan na sigatine yi han, koni e mi a fala, e naxa, “A lu na!” E mon e senbe soxi, e mi xadanxi. **11** Nayi, e yi gaxuxi nde yee ra, naxan a liga, e n yanfa, n ma fe mi fa rabiraxi e ma, e mon mi e mirima n ma? N to dunduxi xabuto mi a ra, na nan a ligaxi, e mi fa gaxuma n yee ra ba? **12** Koni n na e gbee tinxinna nun e kewanle raminima nen kenenni. E tono mi luma e ma. **13** E na e xui ramini malina fe ra, e suxure kurun xa e xunba! Foyena e birin xalima nen, foyedi xurun yi e tongo a siga e ra. Koni naxan na a yigiya n tan yi, na yamanan sotoma nen a keen na, n ma geya sarijanxin yi findi a gbeen na. **14** A falama nen nayi, fa fala, “E kirani ton ki faji, e kiraan kalaxi yirene birin nafala n ma yamaan yee ra.” **15** Amasoto kore xonna Ala matexina ito nan falaxi, naxan na yi habadan, naxan xili sarijan, a naxa, “N doxi yire matexi sarijanxin nin, koni n mon muxu jaxankataxine xon naxanye e yete magodoxi alogo n xa muxu nii soxoloxine rasewa. **16** N mi luma yalagin tiye waxatin birin, n mi luye xoloxi habadan, bayo muxune niin bama nen n yetagi nayi, n naxanye daxi, ne yi raxori. **17** N bojen bata te Isirayila kaane ma lan e hake tongoxine fe ma mileni, n yi e jaxankata, n yi n yetagin luxun e ma n ma xoloni. Anu, e tengbesenxin bata lu e bojena kiraan xon. **18** N bata e kewanle to, koni n na e yiyalanma nen, n yi ti e yee ra, n mon yi e madenden, e nun naxanye sunuxi e foxo ra. **19** N tantun falan sama nen e de. Boje xunbeli defexin yi lu muxune xa naxanye makuya e nun naxanye maso! N na e rakendeyama nen.” Alatala naxa na kiini. **20** Koni muxu jaxine luxi nen alo foxo igen naxan walanxi ayi naxan mi nae a raxare naxan walanye boron nun loxon nakelima. **21** N ma Ala naxa, “Boje xunbeli mi muxu jaxine xa!”

58 Sonxo i xuini texin na! I xuini te han alo xota xuina, i n ma yamana murutena fe rali e ma, i

yi Yaxuba yixetene yulubina fe fala e xa! 2 E waxi n tan nan fen fe yi lɔxɔ yo lɔxɔ, e sɔbɛ soxi n ma kiraan kolon feni, alo yamaan naxanye yi tinxinyaan ligama naxanye mi e mexi e Alaa kiti kendene ra. E n maxodinma a n xa kiti tinxinxine sa e xa. 3 E naxa, “Nxu sunna suxuma nanfera, xa i mi a toma? Nxu nxu yete tɔrɔma nanfera, xa i mi na yatexi?” Anu, e na sunna suxu lɔxɔn naxan yi, e e rafan feene nan ligama, e yi e walikene naxankata. 4 E nema sunni, sɔnxɔ sɔnxɔn nun yengene na a ra, e bɔnbɔn ti a naxin na. Koni xa e sunna suxu alo to, e xuiin mi Ala lima. 5 N na e xaranxi na sunna sifan nan ma ba alogo tun muxun xa a yete tɔrɔ lɔxɔna nde yi, alogo tun muxun xa a xun sin alo sɛxɛna, a yi sunu dugine ragodo a ma, a yi a sa xubeni. E na nan ma ba, a sunna, lɔxɔn naxan nafan Alatala ma? 6 N na e xaranxi sun suxu kiini ito nan ma: E yɔlɔnxɔn naxine ba muxune ma, e konyine fulun, e muxu naxankataxine xɔrɔya e xun xidi wudine birin kala. 7 Feni itoe xa mi a ra ba: E donsɛni taxun e nun kametɔne ra, e yiigelitɔne yigiya e konni, yigiyade mi naxanye yii, e dugin so muxune yii, marabenna naxanye ma, e ba e xun xanbi soe e ngaxakedenne yi? 8 Nayi, e yanbanma nɛn alo kuye bamatɔna e yi kendeya mafuren, e tinxinyaan yi ti e yee ra, Alatalaa binyen yi e kantan e xanbi ra. 9 Nayi, e xinla tima nɛn, Alatala yi e yabi, e xui raminima nɛn a ma, a yi a fala, a naxa, “N tan ni i ra!” Xa e konyiya feene masiga e konna ra, e ba e yii sonla tiye bonne ra, e ba fala naxine tiye, 10 xa e e yete fi kametɔne fe ra, e muxu naxankataxine ralugo, nayi, e yanbanma nɛn dimini, kɛɛn yi lu e xa alo yanyi tagina. 11 Alatala tima nɛn e yee ra waxatin birin, a yi e rawasa tonbonni, a yi e fati benden sɛnbɛ so. Nayi, e luma nɛn alo nakɔ ige saxina, alo tigin naxan mi xarama. 12 Yire kalaxi fɔnne mɔn tima nɛn e barakani, e benbane banxi kalaxine mɔn yi bɛtɛn sa, a yi fala e ma, a “Yinna yinle yitɔn muxun naxanye kirane nun dɔxɔdene rafalama.” 13 Xa i yete suxu Matabu Lɔxɔn kala feen ma, i ba i yete rafan feene ligɛ n ma lɔxɔ sarjɔnɔxini, xa i a fala Matabu Lɔxɔn ma, a “sɛwa lɔxɔna,” i yi a fala Alatalaa lɔxɔ sarjɔnɔxin ma, a “lɔxɔ binyena,” i yi a binya, i mi siga i yete a kiraan xɔn, i mi i yete rafan fe liga hanma i fala fuune ti, 14 nayi, i sɛwama nɛn Alatala yi, n yi i rate bɔxɔn yire matexine fari, n yi i balo i benba Yaxuba kɛɛn na. Alatala de xuiin nan na ra.

59 Alatala yiin mi dungi, a yi e rakisi. Tuli xɔri mi a ra naxan mi e xuiin name. 2 Koni e hakene nan e masigama e Ala ra, e yulubine nan a yetagin luxunma e ma, naxan a ligama a mi e xuiin namɛma. 3 Bayo faxa ti wunla e yiine ra, e yiine hake feene yi, wulena e de, tinxintareya falan nan e lenna ma. 4 Muxu yo mi a mawugama tinxinni, muxu yo mi kitin yebama nɔndini, muxune yigi saxi e fala fuune nun wule falane nin. Fe kobin muxune kui alo e fudi kanna na a ra, e yi lu hakene bare. 5 E koso xelene birama, e yalane yitɔnma muxune yee ra alo simisamana. Naxan na e xelene don, na yi faxa, anu xa keden bɔ, saɔi naxin nan minima a kui. 6 E fan mi yalani tɔnma dugin xan na de, e mi nɔe e ragenla luxunye e yii fɔxɔne ra. Hakene nan ne ra, gbalon nan tun e yiine ra. 7 E sanne e rasigan fe naxini mafuren! E mafura sɔntarene wunla ramine, e miriyane naxu, gbalon nun kalan nan e kirane xɔn. 8 E mi bɔye xunbenla kiraan kolon. Kiti kenden mi e kiraan xɔn. E kira yifuxine nan nafalama e yete xa, naxan yo na siga e xɔn, na mi bɔye xunbenla sɔtɔma. 9 Nanara, kiti kenden makuya en na tinxinna mi a masoma en na. En yengi kenenna ma, koni en dimin nin! Kenenna na, koni en sigan tima banban dimin nin. 10 En tantanma alo danxutɔne nema sigan tiye banxin xɔn, a luxi alo en yee mi na, en tantanma. En na en sanna radinma yanyin na alo fitirin na a ra. En luxi nɛn alo faxa muxune niiramane ye. 11 En sɔnxɔma alo kanko xajene, en kutunma alo ganbane. En yengi a ma kiti kenden xa sa en xa, koni na mi ligama! En yengi kisin ma, koni a makuya en na! 12 Amasɔtɔ nxɔ matandine gbo i tan Ala yetagi, nxɔ yulubine sereyaan bama nxu xili ma, nxɔ matandine nxu fɔxɔ ra, nxu nxu hakene kolon: 13 Nxu bata murute, nxu Alatala yanfa, nxu yi nxu masiga nxɔ Ala ra. Nxu gbalo feene nun murute feene nan falama, nxu wulene fala nxu bata naxanye yitɔn nxu bɔjɛni. 14 Nanara, nxu nxu mema kiti kenden na, tinxinyaan yi masiga nxu ra pon! Lannayaan bata kala yamani, nɔndi fala mi na. 15 Lannayaan bata lo ayi, naxan na a me fe naxin na, na yi findi muxu kansun daxin na. Alatala yi a to a kiti kenden mi fa na mume, na yi rapaxu a ma. 16 A yi a to a muxu fajɔi keden peen mi na. Na yi a raterɛna fa fala a solona muxu mi na. Nayi, a yetɛɛn yi marakisin ti, a tinxinyaan yi findi a mali seen na. 17 A yi tinxinyaan findi a kanke ye masansanna ra, a yi kisin findi a xunna makantan wure kɔmɔtin na, a gbee nɔxɔn yatɛ a dugin na, a

yi a yete rabilin a xanuntenya gbeen na alo doma gbeena. **18** A muxune birin kewanla saranma e ranen, a yi fitinan nagidi a yenge faane ma a yi a gbeen joxo a yaxune ma, a yi ige tagi boxone saran alo a lan e ma kii naxan yi. **19** Nayi, muxune gaxuma nen Alatala xinla yee ra sa keli sogeteden ma han sa dexo sogegododen na. Yaxune na fa alo baana, Alatala de foyena e radinma ayi nen. **20** Xunba tiin fama nen Siyon taani Yaxuba yixetene xa naxanye na xete e Ala matandine foxo ra. Alatalaa falan nan na ra. **21** Alatala naxa, “N ma layirin ni ito ra nxu nun ne tagi: N ma Nii Sarijanxin naxan e ma, e nun n ma falane n naxanye rasoxi e de, ne mi bama e de, e mon mi bama e diine de, e mon mi bama e diine yixetene de keli iki ma han habadan!” Alatala naxa na kiini.

60 E keli, e yanban, amasoto e kenenna bata fa.

Alatalaa binyen bata te alo sogena, a degema e xun ma. **2** E a mato, dimin bata sin boxon ma e nun dimin gbeen yamanane xun ma, koni Alatala bata mini kenenni e tan xun ma, a binyen yi godo e ma. **3** Siyane sigan tima e kenenni e mayiyalanna yi kenenna fi mangane ma alo sogen tematona. **4** E yee rakopin e rabilinni: birin e malanma, e fama e fema. E dii xemene fama sa keli yire makuyeni, e dii temene maxalima muxune yii kanke. **5** E na a to, e sewan gboma ayi nen, e bopen dinma nen sewani, e jaxan, bayo foxo igen nafunle e xun sama e ma nen, siyane nafunle yi fa e ma. **6** Ndogome kurune luma nen e yamanan birin yi, Midiyan nun Efa bonsonne ndogome kendene. Muxune birin fama nen xemaan nun wusulanna ra e xon sa keli Saba yamanani, e fa Alatalaa binyen naliye. **7** Kedari bonsonna xuruse kurune birin malanma nen e konni, Nebayoti bonsonna xuruseene luma nen e sagoni, e ba saraxa gan daxine ra n ma saraxa ganden fari, e yi rafan n ma. N yi a liga n ma banxi noroxin yi noro han! **8** Ndee ne ra naxanye tunganma alo kundana, alo ganban naxanye tunganma siga e teen ma? **9** Ige tagi boxone yigi saxi n tan nin, Tarasisi kunkine sigama kunkin bonne yee ra, sa fa e diine ra sa keli yire makuyeni e nun e gbeti fixen nun e xemana Alatalaa xinla fe ra, e Ala, Isirayilaa Ala Sarijanxina, naxan noron fixi e ma. **10** Xojene mon e taan makantan yinna tima nen, e mangane yi findi e walikene ra, bayo n na e jaxankata nen n ma xolo gbeeni, koni n kininkininma nen e ma n ma hinanni. **11** E taan so deene luma nen nabixi habadan, e mi

balanje koeen na e mi balanje yanyin na, alogo siyane nafunle xa so e konni, e nun e mangane nun e foxo ra birane. **12** Bayo, siyaan nun yamanan naxanye mi wale e tan xa, ne halagima nen. E raxorima nen fefel! **13** Liban yamanan binyen fama nen e konni, fofone nun gbinjene nun xarinne birin alogo e xa fa n ma yire sarijanxin nayabu, alogo n xa n san tiden binyen nagbo ayi. **14** E jaxankata muxune diine fama nen, e fa e felen e yetagi, muxun naxanye e rajaxuxi, ne birin yi fa e xinbi sin e bun ma. E yi a fala e ma, a “Alatalaa taana, Isirayilaa Ala Sarijanxina taana, Siyon.” **15** E yi rabeginxi, e rajaxu, muxu yo mi yi fa danguma e konni. Iki, n xunna kenla fima e ma nen habadan, n yi e findi sewa xunna ra mayixete nun mayixetene xa. **16** E siyane nun e mangane nafunle donma nen, nayi, e yi a kolon a n tan nan Alatala ra naxan e rakisima, e xunbamana, Yaxubaa Ala Senbimana. **17** N xemaan nafama nen e ma sulan joxoni, e nun wure gbetina wure foren joxoni. N sulan nafama e ma nen wudin joxoni, e nun wuren na gemen joxoni. N yeeratine nun kuntigine fi e ma naxanye boje xunbenla nun tinxinyaan nasoma. **18** Gbalona fe mi fa mema e yamanani, hanma kalana hanma halagina e boxon danne ra, e yi e taan makantan yinna xili sa “Marakisina,” e yi e taan so deene xili sa “Tantunna.” **19** Sogen xa mi fa findima kenenna ra e xa yanyin na, hanma kike degena koeen na, koni Alatala nan fa findima kenenna ra e xa habadan, e Ala yi findi e binyen na. **20** Sogen mi fa birama e konni sonon, kiken mi fa godoma e konni, bayo Alatala nan findima kenenna ra e xa habadan e sunu boxone yi jan. **21** Nayi, tinxin muxune nan tun fa luma e yamanani, yamanan findima nen e gbeen na habadan. E tan findima nen n ma sansi sonla ra, n naxan sixi n yiine ra, alogo e xa n ma binyen makenen. **22** Naxan xurun e tagi, na muxu wuli keden naminima nen, muxudina e tagi, na bonsonna yi findi siya senbemaan na. N tan Alatala, n na feene rabama nen mafuren, e waxatin na a li.

61 Marigina Alatalaa Niina n yi, bayo Alatala bata n sugandi, a n xa Xibaru Fajin nali yigelitone ma, a bata n nasiga a n xa muxu boje kalaxine mali, a n xa xoroya feen kawandin ba suxu muxune xa, e nun kasorasane bejin fena. **2** N yi Alatalaa hinan jeeena fe rali e nun en ma Ala gbeepoxo boxona, alogo n xa muxu sunuxine madenden, **3** naxanye wugama

Siyon taani, n yi ne ralimaniya. Benun e xa xuben sa e xunni sununi, n yi mangaya kōmōti fajin so e xun na, n sewa turen sa e xunni benun a xa findi sunun na, n tantun dugin nagodo e ma benun a xa findi xaxili kalan na, alogo muxune xa a fala e ma misaala ra fa fala muxu tinxinxine alo warine, Alatala muxun naxanye rasabatixi alogo a binyen xa makenen. 4 E mōn singe ra fonne taa xōnne tima nen, e yire kalaxi fonne yitōn e yi taa rabepinxine ti, denaxanye kalaxi xabu mayixete danguxine. 5 Xōjēne findima nen e xuruse rabane ra, siya gbētēne diine yi findi e xēē biine nun manpa bili nakō walikēne ra. 6 Koni a falama e tan ma nen, a Alatalaa saraxaraline, a fala e ma, a en ma Ala batu muxune. E baloma nen siyane nafunle ra, e yi e kanba e binyeni. 7 Benun e xa yagi, e seene dōxōde firin sōtōma nen. Benun e xa rayarabi, e gbelegbelema nen sēwani e kēēna fe ra. E yi kēēn dōxōde firin sōtō e yamanani e yi habadan sēwan sōtō. 8 Bayo, kiti kēnden nafan n tan Alatala ma, mujan nun tinxintareyaan najaxu n ma. N na e saranma nen n ma tinxinni, n yi habadan layirin xidi en tagi. 9 E bōnsōnna kolonma nen siyane tagi, e yixetene yi kolon yamanan muxune birin yē. Naxan yo na e to, a a kolonma nen a Alatalaa duba diine nan e ra. 10 N sēwama nen Alatala yi, n niin yi sēwa n ma Ala yi, bayo a bata n maxidi marakisi dugine yi, a yi tinxinyaan nagodo n ma alo domana, alo xēmen jaxalandi kanna a xunna maxidima kii naxan yi alo saraxaralina alo jaxalandina a maxidi seene soma kii naxan yi. 11 Marigina Alatala tinxinyaan nun tantunna raminima nen siyane birin yetagi alo bōxōn soli seene raminin kii naxan yi, alo nakōōn sansine ramini kii naxan yi.

62 Siyon taana fe ra, n mi n dunduma, Yerusalen ma fe ra, n mi n naxarama, han a tinxinyaan yi makenen alo sogen tematōna, a marakisin yi mayilen alo xaye xidi degēne dimini. 2 Nayi, siyane e tinxinna toma nen mangane birin yi e binyen to, e yi xili nenen sōtō, Alatala na naxan fala a dēen na. 3 E findima nen manga kōmōti mayilenxin na Alatala yii, e nun mangaya taxamaseri namuna e Ala yii. 4 A mi fa falama e ma sōnōn, fa fala “Yama rabepinxina.” A mi fa falama e bōxōn ma sōnōn fa fala “Bōxō raxōrixina.” Koni e xili bama nen fa fala “N nafan yirena,” a fala e bōxōn ma fa fala “Naxalan futuxina.” Bayo e rafan Alatala ma, a findima nen e bōxōn kanna ra. 5 E diine e yamanan masuxuma nen alo banxulanna sungutunna

futuma kii naxan yi, e yi findi sēwan na e Ala xa alo jaxalandina a xēmen nasēwama kii naxan yi. 6 Yerusalen kaane, n bata kantan tiine dōxō e taan makantan yinna xuntagi, kōēēn nun yanyin na, e mi e dunduma. E tan naxanye taana fe rabirama Alatala ma e nēma a maxande, e nama e matabu de! 7 E mōn nama tin a fan xa a raxara han a yi Yerusalen rasabati, bōxō xōnna muxune birin yi a tantun. 8 Alatala bata a kolo a yiifanna nun a sēnbe gbēeni, a naxa, “N mi fa e bogi seene soma e yaxune yii e balon na mume, xōjēne mi fa e manpa nenen minjē mume, e wali xōnna. 9 Koni naxanye bogi seene xabama, ne nan e donma e Alatala tantun, naxanye na manpa bogine malan, ne nan e igen minma n ma yire sarijanxin yinna kui.” 10 E mini, e mini taan so dēēne ra! E kirani tōn yamaan yēē ra! E kiraan nafala, e a rafala, e gemene ba a xōn, e taxamasenni te, a siyane xa fa. 11 E a mato, Alatala a xuiin naminima han bōxōn danne ra, a naxa, “E a fala Siyon kaane xa, e naxa, ‘E a mato, e rakisimaan fama! E a mato, a fama e nun a muxu sōtōxine, a kōntōnna biraxi a fōxō ra.’” 12 A falama nen ne ma a “Yama Sarijanxina, Alatalaa Muxu Xunbaxine.” A falama nen ne ma a “Ala Yamaan Naxan Xōn Fenxi, Taan Naxan Mi Fa Rabepinxin.”

63 Nde ito ra naxan fama sa keli Edōn yamanani, naxan keli Bosara taani, dugi gbēela ragodoxi a ma, a maxidixi dugi mayilenxini, a sigan tima xunna kenli, a sēnben binyeni? Ala naxa, “N tan na a ra, naxan falan tima tinxinni naxan muxune rakisima a sēnbeni.” 2 Nanfera i ya dugine gbēeli alo naxanye manpa bogine yibodonma manpa ige badeni? 3 Ala naxa, “N kedenna nan yi manpa bogine yibodonma manpa ige badeni siyane muxu yo mi yi n fēma. Nayi, n yi e yidin n ma xōlōni, n fitinaxin yi e yibodon, e wunla yi xuya n ma dugine ra, e yi gbēeli. 4 Bayo gbēējōxō lōxōna fe yi n bōjēni. N ma yamaan xunba jēēn bata a li. 5 N muxune fen nen, koni muxu yo mi fa n mali! N kabē na feen ma, fa fala muxu yo mi fa n sēnbe so. Nayi, n yetēēn yiin nan marakisini tōn, n ma xōlōn yi findi n sēnben na. 6 N yi yamanane yibodon n ma xōlōni, n fitinaxin yi e halagi, n yi e wunla xuya bōxōn ma.” 7 N na Alatala hinan wanle rabirama nen muxune ma, a lan a xa tantun naxanye fe ra, Alatala feen naxanye birin ligaxi en xa, a fanna Isirayila yamaan xa naxan gbo, a naxan birin ligaxi a kininkininna nun a hinan gbēeni. 8 Bayo, a bata yi a

fala, a naxa, “N ma yamaan nan e ra yati, n ma diin naxanye mi n yanfel!” A yi findi e rakisimaan na. **9** E tɔrɔne birin yi a fan tɔrɔ, malekan naxan a yetagi, na yi e rakisi. A yeteen yi e xunba a xanuntenyaan nun a kininkininni. A tan nan e tongo, a e mali waxati danguxine birin yi. **10** Koni e murute nen, e yi a Nii Sarijanxin naforo a ma. A yi findi e yaxun na, a tan yeteen yi e yenge. **11** Nayi, waxati danguxine fe yi rabira a yamaan ma, Musaa waxatina, e yi a fala, e naxa, “Ala minen naxan e ragidi baani, e nun a yamaan yeerate? A minen, naxan yi a Nii Sarijanxin nagodoma e tagi? **12** Naxan a yii senbemaan makenen Musa xa, a yi lu a xɔn, a yi igeni taxun e yetagi, alogo a xinla xa lu habadan. **13** Nde yi tixi e yee ra dangu tilinna xonna ma? E mi e sanna radin alo soon nema a giye tonbonni. **14** Alatalaa Nii Sarijanxin yi e xali matabuni alo xuruseen naxan godoma lanbanni. I tixi i ya yamaan yee ra na kii nin i yi xili binyen soto.” **15** Ala, i yee masa nxu ma keli kore, i nxu mato, sa keli i doxoɔde sarijanxi nɔrɔxini. I ya xanuntenya gbeen nun i senbe gbeen minen? Nxu mi fa i ya marafanna nun i ya kininkinna toma. **16** Anu, i tan nan nxu fafe ra! Hali xa nxu benba Iburahima mi nxu kolon, xa nxu benba Isirayila fan mi nxu kolon, i tan Alatala, i tan nan nxu fafe ra, i xili nen, Nxu Xunbamana xabu to mi na ra. **17** Nanfera Alatala, i nxu makuyama i ya kiraan na, i nxu boɓeni xɔɔxoɔ alogo nxu nama gaxu i yee ra? I mɔn xa fa i ya walikene fe ra, i kee bɔnsɔnna fe ra. **18** Yamanan findixi nen i ya yama sarijanxin gbeen na waxatidi tun, nxu yaxune yi i ya yire sarijanxini bodon. **19** Xabu waxati xunkuye nxu luxi nen alo i mi yi muxun naxanye kari ra, e nun i xinla mi falama naxanye xun ma. Xa i yi kuyeni boe nun, xa i yi gode nun, geyane yi yimaxama i bun ma nen.

64 Alo tee degen tee wolonna ganma kii naxan yi, igen yi a ramini teen ma, i yaxune i xinla kolonma na kii nin, siyane birin yi xuruxurun i yetagi. **2** I fe magaxuxine liga nen, nxu yengi mi yi naxanye ma i godo nen, geyane yi yimaxa i yee ra. **3** Xabu a rakuya, a munma kolon, tuli yo munma a me, yeen munma a to singen, fa fala alana nde na, ba i tan na muxuna a yigi se naxan yi, a yi a mali. **4** I muxuni suxuma naxan tinxinna ligama sewani, naxan a xaxili luma i ya kiraan xɔn. Koni i bata xɔlo bayo nxu luxi yulubin nan lige waxatin birin. Nayi, nxu kisima di?

5 Nxu birin bata lu alo se haramuxine, nxu kewali tinxinxine birin luxi alo dunkobi xɔsixinna. Nxu birin xarama ayi alo jɔxɔnde xarene, nxu yulubine nxu xalima alo foyena. **6** Muxu yo mi na naxan i xinla xandima, a yi kata, a bira i foxo ra. Bayo i bata i yetagin luxun nxu ma, i yi nxu lu halagini nxu yulubine fe ra. **7** Anu, Alatala, i tan nan nxu fafe ra. Feje benden nan nxu tan na, feje rafalan nan i tan na. I tan nan yii foxo nxu tan birin na. **8** Alatala, i nama xɔlo han a dangu ayi, nxu yulubine fe nama rabira i ma han habadan. Yandi, nxu mato, i ya yamaan nan nxu birin na! **9** I ya taa sarijanxine bata findi tonbonne ra. Siyon taan bata findi tonbonna ra, Yerusalen taan bata findi yire rabenjinxin na. **10** Nxɔ Ala Batu Banxi sarijanxi nɔrɔxina, nxu benbane yi i tantunma denaxan yi, teen bata na gan. Nxu rafan se kendene birin bata kala. **11** Alatala, tɔroni ito birin yi, i mɔn mi fe ligama? I mɔn luma dunduxi nen, i yi nxu ratorɔn han a dangu ayi ba?

65 Naxanye mi yi n maxodinma, n bata n yete yita ne ra. Naxanye mi yi n fenma, ne bata n to. Yamaan naxan mi yi n maxandima n xinli, n yi a fala ne xa, n naxa, “N tan ni i ra! N tan ni i ra!” **2** N na n yiini bandunma yama murutexin xa ferijen gben, naxanye sigan tima kiraan xɔn naxan mi fan, e lu e yete miriyane foxo ra. **3** Yamaan na a ra naxan n naxoloma n yetagi e saraxane bama kide nakone yi e wusulanne gan saraxa gande bitikidi daxine fari, **4** e doxoɔma gaburu yirene yi, e koee nadangu faranne ra, e xɔse subene don. Donse haramuxine nan e goronne kui. **5** E a falama, e naxa, “I masiga, i nama i yiin din n na, n ma sarjanna nɔron gbo i ma.” Na falana n tɔroma alo tee tutina n jɔeni, teen naxan luma dege waxatin birin. **6** Koni ito nan sebexi n yetagi: N mi n dunde na feene ma mumɛ, n na e saranma nen a defexin na yati! **7** N na e hakene yatema nen e nun e benbane hakene! E to wusulanna gan saraxan na geyane fari e n naxɔlo yire matexine fari, n na e saranma nen e kewali fonne ra a defexin na. N tan Alatala naxa na kiini. **8** Alatala ito nan falaxi, a naxa, “Ige jaxumen na to manpa bogi tɔnsɔnna naxan yi, muxune a falama nen, e naxa, ‘I nama a kala, bayo se fajina nde a yi!’ N tan fan a ligama na kii nin n ma walikene fe ra, alogo e birin nama halagi. **9** N mayixetena nde raminima nen Yaxuba bɔnsɔnni, n yi n ma geyane findi Yuda bɔnsɔnna ndee

gbeen na, n naxanye sugandixi, e yi findi ne keen na, n ma walikene yi dɔxɔ e yi. **10** Sarɔn yamanan yi findi xuruse rabaden na, Akori lanbanna yi findi jinge kurune saden na n ma yamaan xa naxan n fenma.” **11** “Koni ε tan naxanye ε mema Alatala ra, ε jinan n ma geya sarijanxin xɔn, ε yi donseene rafala Gadi suxuren xa ε yi igelengenne rafe dɔlɔ basanxine ra Meni suxuren xa, **12** n sayaan nan nagidima ε ma silanfanna ra. E birin ε xinbi sinma nen, ε kɔɛ raxaba, bayo n bata xinla ti, ε mi n yabi, n falan ti, ε mi ε tuli mati n na. Naxan jiaxu Ala yεε ra yi, ε yi na liga, naxan mi rafan n ma, ε yi na sugandi.” **13** Nanara, Marigina Alatala ito nan falaxi, a naxa, “N ma walikene e degema nen, koni kamena ε tan suxuma nen. N ma walikene e minma nen, koni min xɔnla ε tan suxuma nen. N ma walikene sewama nen, koni ε tan yarabima nen. **14** N ma walikene e xuiini tema nen jaxanni e bɔjɛn sewaxin na, koni ε tan, ε xuiini tema nen sɔxɔlɛn nin, ε bɔjɛ kalaxin na, ε gbelegbele nii raforɛni. **15** E xinla findima nen danga ti seen na n ma muxu sugandixine xa, e naxa, ‘Marigina Alatala xa i fan faxa alo ne!’ Koni n ma walikene tan xili gbete sɔtɔma nen. **16** Naxan na duban ti yamanani, na duban tima nen Ala jɔndin kanna xɔn ma. Naxan na a kɔlɔ yamanani, na a kɔlɔma Ala jɔndin kanna nin, bayo jinan tima nen tɔrɔ danguxine xɔn ma, e bama nen n yetagi. **17** Amasɔtɔ n kore xɔri nenen nun bɔxɔ xɔri nenen dama nen, jinan yi ti waxati danguxin xɔn, miri mi fa tima a xɔn mumɛ! **18** Koni ε sewama nen han habadan, ε lu jaxanni na fe ra n naxan dama. Bayo, n Yerusalen dama sewan nan xili yi a muxune yi lu jaxanni. **19** N Yerusalen findima nen sewan na n xa n yi jaxan n ma yamani. Wuga xuiin nun gbelegbele xuiin mi fa mema a yi sɔnɔn. **20** A mi fa ligama mɛnni diin bari nenen yi faxa, a na xii dando ti, hanma fonne mi e siimayaan defe, bayo muxun naxan mi forixi e tagi, na mi faxe jɛɛ kemen xanbi. Yulubi kanna naxan ma siimayaan mi danguma jɛɛ kemen na, na yatema dangatɔɔn nan na. **21** E banxine tima nen, e dɔxɔ e kui, e sansine sima nen, e yi e bogine don. **22** E mi fa banxine tima, muxu gbete yi dɔxɔ e kui. E mi fa sansine sima, muxu gbete yi e bogin don, bayo n ma muxune siimayaan luma nen alo wudina, n ma muxu sugandixine sewama nen e wali xɔnne fe ra. **23** E mi fa walima fuuni, e mi fa diine barima, gbalon yi e sɔtɔ, bayo e findima yamaan nan na Alatala barakan sama naxanye fe yi, e tan nun e yixetene. **24** Nayi, benun e

xa n maxandi, n bata e yabi, e nema falan ti, n bata e xuiin name. **25** Kankon nun yεxεε diina e degema nen e bode xɔn, yatan sexen donma nen alo jingena, burunburunna yi findi sapin balon na. E mi fe jaxi yo ligama, kala yo mi fa tiye n ma geya sarijanxin yire yo yi!” Alatala naxa na kiini.

66 Alatala ito nan falaxi, a naxa, “Kore xɔnna nan n ma manga gbɛden na, bɔxɔn yi findi n san tiden na. E nɔɛ banxin mundun tiye n xa, n ma matabuden finde minen na? **2** N tan nan seni itoe birin daxi, e yi lu na. Nayi, n na n yeen tima muxun sifani ito nan na: tɔrɔ muxun naxan niin sɔxɔlexi, naxan xuruxurunma gaxuni n ma falan bun.” Alatalaa falan nan na ra. **3** Naxan na jingen ba saraxan na na yatema nen alo muxu faxana, naxan na yεxεen ba saraxan na, na luxi nen alo a baren nan faxama, naxan na bogi se saraxan ba, na luxi nen alo a xɔsen wunla nan nalima n ma, naxan na wusulanna gan, na luxi nen alo a suxuren nan kima, na muxune birin biraxi e yete kirane nan fɔxɔ ra, e haramu feene yi rafan e ma. **4** N fan fe xɔdɛxɛn nan nagidima e ma. N na e gaxu feen nafama nen e ma, bayo n bata xinla ti, muxu yo mi a ratin, bayo n bata falan ti, muxu yo mi a tuli mati n na. Koni naxan najiaxu n ma, e yi na liga, naxan yo mi rafan n ma, e yi na sugandi. **5** E tuli mati Alatalaa falan na, ε tan naxanye xuruxurunma gaxuni a falan bun ma. A naxa, “E ngaxakedenne ito nan falaxi, ε rajaxu naxanye ma, naxanye e mema ε ra n xinla fe ra, e naxa, ‘Alatala xa a binyen mayita, nxu yi ε sewan to!’ Koni e tan nan yagima. **6** Sɔnxɔ xuiin minima nen taani! Gbelegbele xuiin yi mini Ala Batu Banxini! Alatala nan a yaxune saranma e kewanle ra.” **7** “Benun a kuiin xa keli a ra, a bata diin xali, benun a xa diin barin xɔlɛn kolon, a bata a dii xɛmen bari! **8** Nde bata na fe sifan mɛ singen? Nde bata na fe sifan to singen? Yamanan tiye lɔxɔ kedenni ba? Siyana nde nɔɛ sɔte lɔxɔ kedenni ba? Anu, Siyon taan luxi nen alo jaxalan fudikanna, a kuina a xɔlɔ fɔlɔxi nen tun, a yi a yamaan bari!” **9** Alatala naxa, “N tan dii bari waxatin nafe ba, diin mi bari? Xa n tan nan diin barin nagidixi, n tonde na ma ba?” E Ala naxa na kiini. **10** E jaxan Yerusalen kaane xɔn, a xa findi ε sewa xunna ra, a rafan ε tan naxanye birin ma! E jaxan Yerusalen kaane xɔn han, ε tan naxanye birin sunuxi a fe ra. **11** Amasɔtɔ, a luma nen alo ε nga, ε yi a xijɛn min, a yi ε madɛnden. E lugoma nen, ε yi a fanna nun a binyen

kolon. **12** Bayo Alatala ito nan falaxi, a naxa, “N bɔɲɛ xunbenla rasigama Yerusalɛn ma nɛn alo baana, e nun siyane nafunla alo fufana. E xijɛn minma nɛn, e yi banba, e masugusugu xinbin fari, **13** alo muxuna nga a madɛndenma kii naxan yi, n fan e madɛndenma na kii nin. E madɛndenma nɛn Yerusalɛn taani.” **14** E na toma nɛn, e bɔɲɛn yi lu sɛwaxi, e mɔn yi sabati alo sexɛna. Alatala a senben yitama nɛn a walikɛne ra, a yi a xɔlɔn yita a yaxune ra. **15** Bayo Alatala fama tɛɛn nan na, a yɛngɛ so wontorone luxi alo wuluwunla, alogo a fitinaxin xa a xɔlɔn nakamali a kɔnkɔ xuiin yi rakamali tɛɛ dɛgɛ gbeen na. **16** Alatala muxune birin makitima nɛn tɛɛn nun silanfanna ra. Alatala muxu faxaxine rawuyama ayi nɛn. **17** Naxanye e yitɔnma, e yetɛ rasarijan alogo e xa siga kide nakɔne yi, e biraxi e bode fɔxɔ ra, siga nakɔn tagini, e tan naxanye xɔsɛ subene nun sulumene nun haramu seene donma, ne birin halagima nɛn e bode xɔn. Alatalaa falan nan na ra. **18** Ala naxa, “N na e kewanle nun e miriyane kolon. Siyane nun xuine birin malan waxatin bata a li. E fama nɛn, e yi n ma binyen to. **19** N taxamasenna sama nɛn e tagi: yamaan muxu dɔnxɛn naxanye luxi e nii ra, n na ndee rasigama nɛn siyane ma, siga Tarasisi kaane nun Pulone ma e nun Ludu kaane, xali woli kɛndɛne. Ndee mɔn yi siga Tubali nun Gireki yamanani e nun fɔxɔ ige tagi bɔxɔ makuyene, naxanye mi n xinla fe mɛxi, naxanye mi n ma binyen toxi, e yi n ma binyena fe fala siyane tagi. **20** E fama nɛn e ngaxakedenne birin na, keli siyane birin yi, e findi kiseene ra Alatala xa, e fa soone fari e nun wontorone nun wontoro xunna soxine kui e nun sofanle nun ɲɔgɔmɛne fari, fa n ma geya sarijanxin fari Yerusalɛn yi. Alatala naxa na kiini. E fama e ra nɛn alo Isirayila kaane fama e bogi se saraxane ra Alatala Batu Banxini kii naxan yi goron sarijanxine kui. **21** N mɔn e tan ndee findima nɛn saraxaraline nun Lewi bɔnsɔnna muxune ra.” Alatala naxa na kiini. **22** “E xinla nun e yixɛtene luma nɛn n yetagi alo kore xɔri nɛnɛn nun bɔxɔ xɔri nɛnɛn luma n yetagi kii naxan yi, n fama naxanye dadeni.” Alatalaa falan nan na ra **23** “Nayi, kike nɛnɛ yo kike nɛnɛ, Matabu Lɔxɔ yo Matabu Lɔxɔ, adamadiine birin fama nɛn, e fa e xinbi sin n bun ma.” Alatala naxa na kiini. **24** “E na mini, e yi muxune binbine to, naxanye murutɛxi n xili ma. Kunla naxanye e donma, ne mi faxɛ mume, tɛɛn naxan e ganma, na mi tuyɛ mumɛ! Adamadiine birin yi kabe e tɔrɔyaan ma.”

Yeremi

1 Yeremi a falan ni ito ra, Xiliki a dii xemena, saraxaralina nde Anatoti taani Bunyamin yamanani. **2** Alatala falan ti nen a xa Yuda mangana Amon ma dii xemen Yosiyaa mangayaan jɛɛ fu nun saxandeni. **3** A mon yi falan ti a xa Yuda mangan Yosiyaa dii xemen Yehoyakimi a mangayaan waxatini han Yosiyaa dii xemen Sedeki a mangayaan jɛɛ fu nun kedenden kike suulundeni. Yerusalen kaane suxu waxatin nan yi na ra. **4** Alatala yi falan ti n xa, a naxa, **5** “Benun i nga xa fudikan i ra, n yi i kolon. Benun a xa i bari, n bata yi i sugandi, n bata yi i findi nabiin na siyane xa.” **6** N yi a yabi, n naxa, “Ee! Marigina, Alatala! N mi fatan falan tiye, bayo banxulan jɔɔɔn nan n na.” **7** Alatala yi a fala n xa, a naxa, “I nama a fala, ‘Banxulan jɔɔɔn nan n na’ bayo i sigama nen muxune birin ma, n na i rasigama naxanye ma, n na naxan yo fala i xa, i yi na fala. **8** I nama gaxu e yɛɛ ra, amasoto, n na i ɔɔɔɔ ra, n ni i xunbama nen.” Alatalaa falan nan na ra. **9** Na xanbi ra, Alatala yi a yiin sa n deen ma. Alatala yi a fala n xa, a naxa, “N bata n ma falan sa i de. **10** N bata i doxo siyane nun mangane xun na to, alogo i xa e fe kala, i e rabira, i e halagi, i e raxori, i mon yi e ti, i yi e xon bitin.” **11** Alatala yi falan ti n xa, a naxa, “Yeremi, i nanse toma?” N yi a yabi, n naxa, “N na Amandi wudi yiin nan toma.” **12** Alatala yi falan ti n xa, a naxa, “I bata a to ki faji, bayo n yengi n ma falan xon, n yi a rakamali.” **13** Alatala mon yi falan ti n xa, a naxa, “I nanse toma?” N yi a yabi, n naxa, “N tunden nan toma a ramine sogeteden komenna binni.” **14** Alatala yi a fala n xa, a naxa, “Gbalon sa kelima komenna binna nin, siga yamanan birin yi. **15** Bayo n fama nen komenna binna yamanane birin maxilideni, e yi fa, e birin yi fa e manga gbedene doxo Yerusalen so deene ra, taan makantan yinne nun Yuda taane birin xili ma,” Alatalaa falan nan na ra. **16** A mon yi a fala, a naxa, “N na e makitima nen, lan e fe jaxine birin ma, bayo e bata n nabepin, e yi wusulanna gan ala gbetene xa, e yi e xinbi sin e ala rafalaxine bun. **17** I tan xa keli, i tagi xidi, n yamarin naxanye birin soxi i yii, i yi ne birin nali e ma. I nama gaxu e yɛɛ ra, alogo n nama i ragaxu e yɛɛ ra. **18** Folo to ma, n bata i doxo yamanan birin xun na alo taa makantanxina, alo wure senbetenna, alo yinna sula daxina, Yuda mangane nun a kuntigine nun saraxaraline nun yamanan muxune birin xili ma.

19 E i yengema nen, koni e mi i noma, bayo n ni i ɔɔɔɔ ra, n yi i kantan,” Alatalaa falan nan na ra.

2 Alatala yi falan ti n xa, a naxa, **2** “Sa falani ito ti Yerusalen kaane xa, i naxa, ‘Alatala ito nan falaxi, a naxa: N bata n miri e ma e yi kii naxan yi e foningeyaan xanuntenyani. N yi rafan e ma alo jaxalandi futuxina. E yi bira n ɔɔɔɔ ra tonbonni, e yi n ɔɔɔɔ ra ɔɔɔɔ xareni. **3** Isirayila kaane yi rasarijanxi Alatala xa. E yi findixi a se bogi singen nan na, naxan yo na yi e don, na feen yi saran e ra, gbalon yi godo na kanna ma.” Alatalaa falan nan na ra. **4** E tuli mati Alatalaa falan na, Yaxuba yixetene, e tan, Isirayila yamaan denbayane birin! **5** Alatala ito nan falaxi, a naxa, “E benbane tinxintareyaan mundun toxi n yi, naxan a ligaxi e yi makuya n na? E biraxi suxure fufafune ɔɔɔɔ ra, e yeteen yi findi fufafune ra. **6** E mi a fala, e naxa, ‘Alatala minen? A bata nxu ramini Misiran yi, a fa nxu ra tonbonni, ɔɔɔɔ xaren folon gbo denaxan yi, naxan luma tuletareyaan nun dimi gbeeni, muxu yo mi danguma denaxan yi, muxu yo mi doxi denaxan yi.’ **7** N bata fa e ra yamana fajini alogo e xa wudi bogi fajine don. Koni, e bata fa, e fa n ma yamanan naxosi e yi n keen findi se xosixin na. **8** Saraxaraline mi a fala, e naxa, ‘Alatala minen?’ Sariya kanne fan mi n kolon, kuntigine murutexi n xili ma, nabine yi lu Baali a fe fale, e biraxi suxure fufafune ɔɔɔɔ ra. **9** Nanara, n mon e makitima nen, n yi e mamandenne makiti.” Alatalaa falan nan na ra. **10** A mon yi a fala, a naxa, “E siga ɔɔɔɔ ige tagi ɔɔɔɔn Sipiri yi, e sa a matol E xerane rasiga Kedari bonsonna yamanani, e xa sa na rakorosi ki fajni, e a mato xa na fe sifan ligama na! **11** Yamana nde a alane masaraxi ba? Hali e to mi findixi ala kendene ra. Koni, n ma yamaan tan bata a binyen masara suxure fufafune ra. **12** Kore xonna xa sunu lan na ma, a xa kutun, a yi xara.” Alatalaa falan nan na ra. **13** A mon yi a fala, a naxa, “N ma yamaan bata yulubi firin tongo. E bata e me n na, n tan naxan findixi siimaya ige tigin na, e yi sa e gbee ige ramaradene rafala, naxanye yiboxi, e minima. **14** Isirayila kaane bata findi konyine ra iki ba? Hanma e barixi konyiyaan nin ba? Nanfera e findixi se tongo daxine ra? **15** Yatane kelima e xili ma, e wurundunma e xili ma, e yi e ɔɔɔɔn naxori, muxu mi fa e taa ganxine yi sonon. **16** Hali Nofi kaane nun Tapanese kaane noon sotoma e xun na. **17** Na birin mi ligaxi e ra naxi ba, bayo e bata e me Alatala ra,

ε Ala, a yi ε tima kira fajin xon ma waxatin naxan yete yi? 18 Ε fa sigan nanfera Misiran yi iki? Ε sigama Nila baa igen nan mindeyi? Ε sigan nanfera Asiriya yi? Ε sigama Efirati baa igen nan mindeyi ba? 19 Ε saren xa fi ε fe jaxin na, ε yanfantenyaan yi xete ε ma. Ε a mato! Ε yi a kolon a fe jaxin na ra, naxan xolo ε ra. Ε bata ε me Alatala ra, ε Ala, gaxu yo mi lu ε yi n tan yee ra.” Marigina Alatala Senben Birin Kanna falan nan na ra. 20 A mon yi a fala, a naxa, “To mi na ra, ε murutexi n xili ma, ε yi en tagin kala, ε yi a fala, ε naxa, ‘Nxu bata mini konyiyani!’ Ε yi suxurene batu geya matexine birin fari, e nun wudi gbeene birin bun! Na luxi nen alo yalunyana Ala yee ra yi. 21 N bata yi ε rasabati alo manpa bili fajin naxan kende. Nanfera ε masaraxi, ε findi manpa bili kalaxin na? 22 Hali ε ε maxa libin na, ε yi ε maxa safun wuyaxi ra, ε hakene luma nen n yetagi.” Marigina Alatalaa falan nan na ra. 23 A mon yi a fala, a naxa, “Nanfera ε a falama, ε naxa, ‘N mi xosixi, n mi Baali batuxi?’ Ε funfunne mato lanbanni, ε xa a kolon ε naxan nabaxi, alo jdogomen naxan a masiga tima na xun xon. 24 Ε luxi nen alo burunna sofali gilen naxan darixi tonbonna ra naxan sigama alogo e nun a xemene xa sa kafu. Nde noe ε raxete? Naxanye birin a fenma, ne nama e yete yixadan, bayo e a toma nen a waxatini. 25 Ε a liga ε yeren ma, alogo ε nama xadan, ε san yigenla yi lu, min xonla yi ε suxu! Koni ε yi a fala, ε naxa, ‘A mi lanje! Bayo ala xajene rafan nxu ma, nxu waxi bira feni e foxo ra.’ 26 Isirayila yamaan yagixi, alo mujaden na suxu a yagi, e nun e mangane nun e kuntigine nun e saraxaraline nun e nabine, 27 e tan naxanye a falama wudin ma, e naxa, ‘Nxu fafe nan i ra!’ E a fala gemen xa, e naxa, ‘I tan nan nxu barixi!’ E bata e xun xanbi so n yi, e mi e yetagin tixi n xa, koni, e nema toroni, e naxa, ‘Keli, i nxu mali!’ 28 Nayi, ε alane minen, ε naxanye rafalaxi ε yete xa? E xa keli, xa e noe ε rakise ε toro waxatini! Yuda kaane, ε gbee alane wuya alo ε taane. 29 Nanfera ε ε mawugama n fari? Ε birin bata murute n xili ma,” Alatalaa falan nan na ra. 30 A mon yi a fala, a naxa, “N bata ε diine ratoron fuuni, e mi tinxi xure, ε yetena silanfanna bata nabine faxa, alo yatan naxan halagin tima. 31 Ε tan, iki muxune, ε Alatalaa falan yate! N findi nen tonbonna ra Isirayila xa ba hanma dimi yamanana? Nanfera n ma yamana a falama, e naxa, ‘Nxu bata xoroya, nxu mi waxi xete feni i ma?’ 32 Sungutunna jinanje a tunla sone ma ba? Naxalandin jinanje a

futu dugi tagi xidin ma ba? Anu, n ma yamaan bata jinan n xon xabu waxati xunkuye. 33 Ε fatan sige ε yangane fendeni! Hali jaxanla naxan jaxu e birin xa, ε mon noe na xaranje nen yanfantenyaan ma. 34 Sontare yiigelitone niin wunla bata sa ε dugi lenbene ma, ε naxanye faxaxi alo ε e lixi ε banxin deen kale. Koni hali na birin, 35 ε naxa, ‘Sontaren nan nxu tan na! A xa ba xoloxi nxu ma.’ Bayo, ε bata a fala a ε mi yulubi ligaxi, n na ε kitima nen. 36 Nanfera ε kiraan masarama xulen? Ε yagima nen Misiran kaane yee ra, alo ε yagixi Asiriya kaane yee ra kii naxan yi. 37 Ε minima nen menma fan yi, ε yiine saxi ε xun ma yagini bayo naxanye ε malima, Alatala a mema nen ne ra, ε mi noon sotoma e xon.”

3 Ala yi a fala, a naxa, “Xa muxuna nde a me a jaxanla ra, na jaxanla yi sa dodox xeme gbete xon, na xemen mon na jaxanla fenje ba? Na mi finde fe xosixin na yamanani ba? Ε tan bata suxure wuyaxi batu, naxanye luxi n yee ra yi alo ε yangane, ε tan mon noe xete n tan ma ba?” Alatalaa falan nan na ra. 2 A mon yi a fala, a naxa, “E yeen ti geyane ra, yiren mundun na ε mi ala gbetene batuxi denaxan yi? Ε yi doxi nen kira xunne ma alo jaxanla naxan a yangane legedenma, alo sigatine tonbonni. Ε bata yamanan naxosi ε fe jaxine nun ε yalunya suxurene xon. 3 Nayi, n mi tinxi tulen yi fa, jemen tulen mi faxi. Koni, ε yetagin luxi alo yalundena, ε tondima ε tiye ε yagi feen na. 4 Iki, ε n xili, ε naxa, ‘N fafe! I tan nan yi nxu xoyin na nxu dii jore waxatini! 5 I luma xoloxi nxu ma han waxatin mundun yi? I luye xoloxi ba han habadan?’ Ε yi na nan falama, koni, ε mon yi fe jaxin sifan birin ligama.” 6 Alatala yi a fala n xa Manga Yosiyaa waxatini, a naxa, “I bata a to Isirayila kaane naxan ligaxi? E bata siga geyane birin fari e nun wudi gbeene birin bun, e sa kidene batu menne yi alo yalunden naxan yanga wuyaxin suxi. 7 N yi laxi a ra nun, e yelin xanbini feni ito birin lige, e xun xetema nen n ma. Koni, e mi e xun xetexi. Na ma, Isirayila magilen Yuda yanfantenna fan yi na to. 8 Hali n to n mexi Isirayila ra a yalunyane fe ra, n yi e rame futu kala kedin so e yii, koni Yuda yanfantenna mi gaxuxi. Yuda kaane fan siga nen e sa suxurene batu alo yalunyana. 9 Ε yalunya kunfa gbeeni, Isirayila kaane bata yamanan naxosi, e yi yalunyaan liga e to e suxure geme daxine nun e suxure wudi daxine batu. 10 Koni hali na birin, Yuda kaane mi e xun

xetexi n ma e bɔɲen birin na, e yi wulen nan falama,” Alatalaa falan nan na ra. **11** Alatala mɔn yi a fala n xa, a naxa, “Isirayilaa tinxintareyani, a tinxin dangu Yudaan yanfantenna xa. **12** Siga, i sa falani itoe ti sogeteden kɔmenna ma, i naxa, ‘Alatalaa falan ni ito ra. Isirayila tinxintarena, ε xun xetε! N mi fa jaxuma ε ra sɔnɔn, bayo n tinxin, n mi luma xɔlɔxi habadan. Alatalaa falan nan na ra. **13** E ti ε hakene ra tun, bayo ε murutexi Alatala nan xili ma, ε Ala. E yi ala xɔɲene batu wudi gbeene birin bun, ε mi ε tuli mati n na.’” Alatalaa falan nan na ra. **14** Alatalaa falan ni ito ra, a naxa, “Dii murutexine, ε xetε n ma, bayo n tan nan ε kanna ra. N muxu keden sugandima nɛn taana nde yi, n yi muxu firin sugandi denbayana nde yi, n siga ε ra Siyon taani. **15** N yi yεerateine so ε yii naxanye bɔɲen luxi alo n bɔɲena, e yi lu ε xun na xaxilimayaan nun fe kolonni.” **16** Alatalaa falan ni ito ra, a naxa, “E na wuya ayi waxatin naxan yi yamanani, Alatalaa Layiri Kankirana fe mi fa falama na waxatini, muxune mi fa e mirima na ma sɔnɔn. A fe mi fa falama, a fe mi fa kolonma nayi, gbeteɣe mi rafalama. **17** Na waxatini, a falama nɛn Yerusalɛn taan ma, a Alatalaa manga gbɛdɛna. Siyane birin fama nɛn a ma Alatala xinli Yerusalɛn yi. Nayi, e mi fa birama e bɔɲε yi fe jaxine fɔxɔ ra sɔnɔn e tengbesenyani.” **18** “Na lɔxɔne yi, Yuda muxune nun Isirayila yamaan sigan tima nɛn e bode xɔn. E birin mɔn yi fa sa keli sogeteden kɔmenna yamanani, e fa yamanani n denaxan so e benbane yii e kɛɛn na.” **19** Ala mɔn yi a fala, a naxa, “N mirixi a ma a n xa ε yatε n ma diine ra, n yi bɔxɔ fɔɲin fi ε ma, denaxan fan dangu siyane birin kɛɛn na. N yi laxi a ra a ε n xilima nɛn fafe, ε mi fa ε xun xanbi soma n yi. **20** Anu, ε bata n yanfa, ε tan Isirayila yamana alo jaxalan yalunxina a xɛmɛn yanfama kii naxan yi!” Alatalaa falan nan na ra. **21** Ala mɔn yi a fala, a naxa, “Xuina nde minima geyane fari, Isirayila kaane mayandi xuine. E wugama bayo e bata kiraan beɲin, e bata jinan Alatala xɔn, e Ala. **22** Muxu murutexine, ε xun xetε, n na ε furene dandanma nɛn.” Muxune yi a yabi, e naxa, “Nxu tan ni i ra, nxu bata fa i ma, bayo i tan nan Alatala ra, nxɔ Ala. **23** Nɔndin na a ra, xuiin naxanye minima geyane ma kidene yi, wulen nan ne ra. Nɔndin na a ra, Isirayila marakisɛn sɔtɔma Alatala nan yii, nxɔ Ala. **24** Yagin bata nxu benbane wanla kala xabu nxu dii jɔɣε waxatini, e nun e xuruse xunxurine nun e jingene nun e dii xɛmɛne nun e dii tɛmɛne. **25** Nxɔ yagin nan findixi nxu sa seen na,

nxɔ marafeyaan yi findi nxɔ bitinganna ra, bayo nxu bata yulubin sɔtɔ Alatala ra, nxɔ Ala, nxu nun nxu benbane, keli nxu dii jɔɣε waxatin ma han to, nxu mi nxu tuli mati Alatala xuiin na, nxɔ Alaa.”

4 Alatalaa falan ni ito ra, a naxa, “Isirayila kaane, xa ε xun xetε n ma, xa ε xetε n ma, xa ε ε suxurene ba n yetagi, xa ε ba sigε na xun xɔn, **2** xa ε kɔlɔ n tan habadan Alatala yi, jɔndin nun kiti kenden nun tinxinni, nayi, siyane duban sɔtɔma nɛn n tan Ala ra, e yi e kanba n yi.” **3** Amasɔtɔ Alatala ito nan falaxi Yuda bɔnsɔnna muxune nun Yerusalɛn kaane xa, a naxa, “E xε nɛnɛn sege, ε nama sansiɛn si janle tagi. **4** E kafiri bɔɲene xa sarijan alo dɛnkɛɣataren na tubi Alatala ma, a banxulan, ε tan Yuda bɔnsɔnna muxune nun Yerusalɛn kaane, ε tubi alogo n ma xɔlɔn nama godo ε ma ε kewali jaxine fe ra alo tɛɛn naxan halagin tima naxan mi nɔε ratuyε.” **5** “E falani ito rali Yuda yamanani, ε yi a rawanga Yerusalɛn taani, ε naxa, ‘E xɔtaan fe yamanan birin yi!’ E a fala ε xuiini texin na, ε naxa, ‘E malan, en na en gi, sa so taa makantanxine yi!’ **6** E yengen taxamasenni te Siyon kaane xa! E gi, ε nama ε ti de! Bayo n gbalon nun halagi gbeɛn nafama nɛn sa keli sogeteden kɔmenna ma.” **7** Yatan bata mini a yinla ra! Muxun naxan yamanane halagima, na bata kiraan suxu. A bata mini a konni, a xa fa ε yamanan kala, a ε taane raxɔri, muxu yo mi fa lu e yi. **8** Nanara, ε kasa benbeli dugine so sununi, ε wuga, ε gbelegebele, bayo en mi tangama Alatalaa xɔlɔ gbeɛn ma. **9** Alatalaa falan ni ito ra, a naxa, “Na lɔxɔni, mangan nun kuntigine tunnaɔlɔma e ma nɛn, saraxaraline yi yigitege. Nabine yi kabe.” **10** Nayi, n yi a fala, n naxa, “Ee! Marigina, Alatala! I bata yamani ito nun Yerusalɛn kaane mayenden, i to a fala, i naxa, ‘E bɔɲε xunbenla sɔtɔma nɛn!’ Anu, silanfanna yitɔnxi nxu kɔε raxaba xinla ma.” **11** Na waxatini, Ala a falama nɛn yamani ito nun Yerusalɛn kaane xa, a naxa, “Foye wolonna fama n ma yamaan ma keli geyane ma tonbonni, a mi fama se fintandeni, a mi se yɛbama. **12** Foye gbeɛn nan a ra naxan sa kelixi menni n ma yamarin bun. Iki, n tan nan kitin sama n ma yamaan xili ma.” **13** Yamaan naxa, “A matɔ! Yaxune nan itoe ra, e tema alo kundana! E yenge so wontorone fama alo wuluwunla. E soone xulun singbinna xa. Gbalona en xa, bayo en naxɔrimatɔɔn ni i ra!” **14** Ala naxa, “Yerusalɛn kaane, ε fe jaxin ba ε bɔɲeni, alogo ε xa kisi! E miriya jaxine ramarama ε yi

han waxatin mundun? **15** Bayo, falana nde fama sa keli fɔ Dan yamanani, a halagin nan ma fe ralima sa keli Efirami geyane fari. **16** E siyane rakolon ito ma, e a fala Yerusalen kaane xa, e naxa, Sofa ganla fama sa keli yire makuyeni, e xa fa fu taane ma. E yenge so sɔnxɔni tema Yuda taane xili ma. **17** E Yerusalen taan nabilinma nen yengeni alo xɛ kantanne, bayo a bata murute n xili ma.” Alatalaa falan nan na ra. **18** E sigati kiin nun e kɛwanle saren nan na ra. E fe xɔlen ni ito ra, a xɔlɔ mume! A soma nen fɔ e bɔjɛni. **19** N kuisanxi! N kuisanxi! N kutunma tɔrɔyaan ma. Kɔntɔfinla bata n bɔjɛni li. N bɔjɛn dinma, n mi nɔɛ n dunde! Bayo n bata xɔtaan fe xuiin mɛ, e nun yenge so sɔnxɔ xuine. **20** Fitina fena nde nɛma raliye, gbete sa fama, bayo halagin bata so yamanan birin yi. N ma bubune birin bata kala, e nun n ma banxine birin sanja ma kedenni. **21** N yɛngen taxamasenna toma singanxi han waxatin mundun yi? N xɔta xuiin mema han waxatin mundun yi? **22** Ala naxa, “Xaxilitarene nan n ma yamaan na, e mi n kolon. Dii kɔmɔne nan e ra, xaxili yo mi e ma. E fatan fe jaxin nan tun lige, e mi a kolon fe fajin nabama kii naxan yi.” **23** “N to n yɛɛn ti bɔxɔ xɔnna ra, a yitɔntareyaan nun a yigenla yi lu. N to n yɛɛn ti kore xɔnna ra, kɛnɛnna yi jan a yi. **24** N to n yɛɛn ti geyane ra, e yi xuruxurun yire matexine birin yi yimaxa. **25** N to n yɛɛn ti e ra, muxu yo mi fa lu na, xɔline birin yi e gi. **26** N to n yɛɛn ti yamana sabatixin na, a yi findi tonbonna ra, a taane birin kalaxin yi lu n tan Alatala fitinaxin yɛɛ ra n ma xɔlɔna fe ra.” **27** Bayo Alatala ito nan falaxi, a naxa, “Yamanan birin kalama nen, koni n mi e raxɔrima. **28** Na ma, bɔxɔ xɔnna sunuma nen, kore xɔnna fan yi yifɔrɔ, bayo n na a fala nen, n mi fa nimisama. N bata a feen nagidi, n mi fa xetɛma a fɔxɔ ra.” **29** Taan muxune birin e gima nen soo ragine nun xalimakuli wonle fa xuiin bun, muxuna ndee yi sa e luxun jansanne yi, ndee yi so gɛmɛ gbeene longonna ra, taan nabɛjinxin yi lu a yetɛ ma. Muxu yo mi fa luma a yi. **30** E tan naxan ma taa kalaxi, e fa nanse ligama? E fa dugi mamiloxine ragode e ma ba, e yi xɛma maxidi seene so, e e yetagine yitɔn? Siyaan naxanye yi e rakunfama alo e yangane, e mi fa rafan ne ma! E waxi e faxa feni. **31** Bayo, n gbelegbele xuina nde mema alo jaxanla nɛma dii barini, e nun kutun xuina alo jaxanla nɛma a dii singen bare. Siyon kaane nan xui ne ra, e kutunma, e yiine yibandunma, e yi a

fala, e naxa, “Gbalona nxu xa! Muxu faxane nxu niin bamatɔɔn ni i ra.”

5 “Siga Yerusalen kirane xɔn, i a rakɔrɔsi ki fajni, i a feene fɛsɛfɛsɛ. I a yirene birin yito. Xa i muxu keden peen to naxan tinxinna nun jɔndin fɔxɔ ra, n dijama nen Yerusalen kaane ma na yi. **2** Hali e na a fala, e naxa, ‘N bata n kɔlɔ habadan Alatala yi!’ e kɔlɔma wulen nan fari.” **3** Alatala, i mi lannaya muxun xan fenma ba? I bata e jaxankata, koni e mi fe kolonxi ayi, i wa nen e raxɔri feni, koni e mi xurun sɔtɔxi na yi. E ye xɔdɔxɔ alo fanyena, e tondi e xun xetɛ i ma. **4** N yi n miri, n naxa, “Yiigelitɔne nan ne ra, e feene ligama xaxilitareyaan nin, bayo e mi Alatalaa kiraan nun e Alaa kiti saxine kolon. **5** N sigama nen yɛɛratine fema, n sa falan ti ne xa. E tan Alatalaa kiraan kolon, e nun Alaa kiti saxine.” Koni, a li, e tan fan birin bata murute Ala ma, e tondi xure a bun. **6** Nanara, yatan minima fɔtɔnni, a fu e ma. Kankon kelima burunna ra, a yi e yibɔ. Narin dɔxɔma e yɛɛ ra e taane dɛxɔn, alogo naxan yo na mini, a yi na yibɔ a dungi dungin na. Bayo, muxuni itoe Ala matandin bata gbo ayi, e yanfantenyaan bata radangu ayi. **7** Ala yi a fala, a naxa, “N dijama e ma di nayi? E diine bata e mɛ n na, e yi e kɔlɔ alane yi naxanye mi ala yo ra. N tan nan yi e balon soma e yii, koni e yi yalunyaan naba, e birin yi e gi siga yalundene banxine yi. **8** E luxi nen alo soo xɛmɛ kendena, a nɛma wuge a gileɛn fɔxɔ ra, birin a lanfana jaxanla fɔxɔ ra. **9** N mi lan n xa e saran na fe sifane ra ba? N mi n gbeen jɔxɛ na yama sifan na ba?” Alatalaa falan nan na ra. **10** “E te e nakɔ sansanne ra, e yi e rabira, koni e nama e raxɔri! E wudi yiine ba e binle ma, bayo Alatala gbee mi fa e ra. **11** Bayo, Yuda yamaan nun Isirayila yamaan bata n yanfa mume!” Alatalaa falan nan na ra. **12** E bata e mɛ Alatala ra, e yi a fala, e naxa, “A mi na! Tɔrɔn mi fa fama en ma sɔnɔn, En mi fa yɛngen toma, en mi kamɛma. **13** Foyen nan tun nabine ra, Ala mi falan tima e xɔn. Nayi, e naxan falama, na xa e tan nan sɔtɔ.” **14** Nanara, Alatala, Ala Senben Birin Kanna ito nan falaxi, a naxa, “Bayo e bata na falan ti, n bata n ma falan sa i tan Yɛrimi dɛ, falan naxan luxi alo tɛɛna, yamani ito findima yegen nan na, na tɛɛn naxan ganma.” **15** Alatalaa falan ni ito ra, a naxa, “E tan Isirayila yamana, n siyana nde rafama nen e xili ma sa keli yire makuyeni, siya barakaxin nan a ra, naxan na yi xabu waxati xunkuye,

ε mi naxan xui mema, ε mi naxan ma falan yεε toma. **16** E xalimakunle faxan tima han! E muxune birin findixi sofa wekilexine nan na. **17** E fama ε se xabaxine nun ε donseene birin naxōideni nen, e nun ε dii xemene nun ε dii temene, e nun ε xuruse xunxurine nun a xungbene, e nun ε manpa binle nun ε xōde binle. E yi ε taa makantanxine kala yengeni ε yigi saxi taan naxanye yi.” **18** Alatalaa falan ni ito ra, a naxa, “Koni hali na waxatini, n mi ε raxōima fefe. **19** Nayi, muxune na maxōdinna ti, e naxa, ‘Nanfera, Alatala, en ma Ala ito birin ligama en na?’ I tan Yeremi yi e yabi, i naxa, ‘Bayo ε bata ε mε a ra. E yi ala xōjene batu ε yamanani. Nayi, ε sa walima nen xōjene xa yamana gbeteni denaxan mi findixi ε konna ra.’” **20** “E ito fala Yaxuba bōnsōnna muxune xa, ε a fala Yuda yamanani, ε naxa, **21** E tuli mati ito ra, ε tan yama xaxilitaren miritarena! E yεene na, koni ε mi sese toma! E tunle na, koni ε mi sese mema! **22** Alatalaa falan ni ito ra. E mi gaxuma n yεε ra ba? E mi xuruxurunje gaxuni n yetagi ba? N tan nan baan jemensinna findixi fōxo igen danna ra, a mi nōε naxan yigide habadan. A walanne tema, koni e mi a nōε, e xuxu xuiin minima, koni e mi danguma a ra. **23** Koni yamani ito muxune tengbesen, e murutεxi e bōjeni, e xun xanbi so, e siga. **24** E mi e mirima, e naxa, ‘En xa gaxu Alatala yεε ra, en ma Ala, naxan tulen nafama a waxatini, tule singen nun tule dōnxena, naxan se xaba waxatine ragidixi en xa.’ **25** E hakene nan ne baxi e kiini. E yulubine yi ε munanfanna kala. **26** Bayo muxu jaxine n ma yamaan ye, alo xōli suxun naxanye xōline mamelenma, e lutine ratima muxune yεε ra. **27** E banxine rafexi muxune se kansunxine ra alo xōli suxun xōli sa seen nafema kii naxan yi. E findixi senbemanen nun nafulu kanne ra na kii nin. **28** E fatin bata fanje ayi, e tuyanxi. Dan yo mi e fe jaxine ma. E mi kiridine xun mafalama kitini. E nafunla sōtōma tun! E mi tōrō muxune xun mayenge kitine bolonma. **29** N mi lan n xa e saran na fe sifane ra ba? N mi n gbeen jōxe na yama sifan na ba?” Alatalaa falan nan na ra. **30** “Fe jaxin bata so yamanani naxan magaxu mumε! **31** Nabine wule nabiya falane nan tima. Saraxaraline nōyaan ligama e yete senben nan xōn. Anu, a rafan n ma yamaan ma na kiini. Koni a rajanna na a li, ε nanse ligama nayi?”

6 Bunyamin bōnsōnna muxune, ε gi! E keli Yerusalen yi! E xōtaan fe Tekowa taani! E yengen taxamasenni te Beti-Hakeremi taani! Bayo, gbalo gbeen fama sa

keli sogeteden kōmenna ma, halagi magaxuxin na a ra. **2** Siyon taan naxan tofan, a rayabu, n na raxōima nen! **3** Sofa ganla fama a ma nen alo xuruse rabane nun e xuruseene, e yi e bubune ti a rabilinni, e birin yi lu e konna kantanje. **4** E yi a fala, e naxa, “E keli, ε a yenge feni tōn! E keli, en na a yenge yanyin nan na! Anu, sōgen bata godo fōlo. Ninbanna bata a li, nininne bata siga fōlo iki. **5** Nanara, ε keli, en na a yenge kōeen na. En sa a banxi fanje kala.” **6** Alatala Senben Birin Kanna ito nan falaxi, a naxa, “E wudine sege, ε gbingbinne rate Yerusalen taan makantan yinna xōn. Taani ito lan a kewanle yi saran a ra, bayo muxu jaxankatanxine bata gbo ayi taani. **7** Fe jaxine minima taani ito yi alo igen minima xōjinna ra kii naxan yi. Fala yo mi mema a yi fō gbalo feene nun halagi feene. N na a tōrōn nun a furene nan tun toma n yetagi. **8** Yerusalen kaane, ε a liga ε yeren ma, alogo n nama n masiga ε ra, n yi ε konna findi bōxo rabejinxin na, muxu mi nōε dōxe denaxan yi.” **9** Alatala Senben Birin Kanna ito nan falaxi, a naxa, “E Isirayila yamaan muxu dōnxene tongo ma nen alo manpa bogi tōnsōnne na makentun. E mōn xa dangu ndee suxe alo se bogi malanne na xete nakōon yirena nde ma.” **10** N falan tima nde xa? N na ndee rakolonma alogo e xa e tuli mati n na? Denkeleyatare tunle nan e ma, e mi nōε falan mε. Alatalaa falan luxi nen e xa alo konbina, e mi e rafan fe yo toma a yi. **11** Koni n tan bōjen bata rafe Alatalaa xōlōn na, n mi fa nōε a ramare. Ala naxa, “N ma xōlōn xuya diine ma kiraan xōn, e nun foningen naxanye malanxi na yi. Xemene nun jaxanle birin suxuma nen e bode xōn, e nun fonne nun muxu kōbōkōbōxine. **12** E banxine yi findi muxu gbeteye gbeene ra, e nun e xεene nun e jaxanle, n na keli yamanan muxune xili ma waxatin naxan yi.” Alatalaa falan nan na ra. **13** “Bayo keli muxudin ma han muxu gbeene, e birin kunfaxi e tōnōn nan xōn. Keli nabiin ma han saraxaralina, e birin wulen falama. **14** E mi n ma yamana furen dandanma e sobe ra. E luma a fale nen, e naxa, ‘Bōje xunbenla! Bōje xunbenla!’ Koni, bōje xunbeli mi na. **15** E yi lanma nen e yagi e xōsi feene ra, koni, e mi yagima hali! E mi yagin yeteen kolon! Nanara, naxanye faxama, e nun ne nan faxama. N na e kewanle saranma e ra nen, e yi bira bōxōni.” Alatalaa falan nan na ra. **16** Alatala ito nan falaxi, a naxa, “E ti kirane xōn, ε yi e mato. E maxōdinna ti lan singe ra kirane fe ma, ε naxa, ‘Kira fājin minen?’ E yi siga na xōn. E matabuden sōtōma

nen na yi e niin xa. Koni e yi a fala, e naxa, 'Nxu mi sigama na kiraan xon.' 17 N bata e xun makantan muxune ti, n naxa, 'E tuli mati xotaan xuiin na del' Koni, e yi n yabi, e naxa, 'Nxu mi nxu tuli matima!' 18 Nanara, e tan siyaan bonne, e tuli mati! E birin xa a kolon feen naxan danguma e konni. 19 Dunuja muxune, e tuli mati! N tan nan gbalon nafama yamani ito xili ma, naxan findixi e miriyane saranna ra. Bayo e mi e tuli matixi n ma falane ra, e yi e me n ma sariyan fan na. 20 N hayun mundun wusulanna ma naxan kelixi Saba yamanani? Hanma se xiri jaxumen naxan kelixi yire makuyeni? E saraxa gan daxine mi n kenexxi, e saraxane mi rafan n ma." 21 Nanara, Alatala ito nan falaxi, a naxa, "N gemene sama nen yamani ito yee ra, e sanne radinma naxanye ra, fafane nun e diine, e nun e dɔxo bodene nun e xoyine, e birin yi bira halagini." 22 Alatala ito nan falaxi, a naxa, "Ganla fama nen keli sogeteden komenna binni. Yama senbemaan fama nen sa keli fo boxon danna ra. 23 Xalimakunle nun tanbane e yii, e yee xodɔxo, e mi kininkinin. E xuiin gbo alo fɔxo igen xuina, e nema fama e soone fari. E yebaxin fama safa yeen ma yenge so xinla ma, e fama e tan Siyon kaane nan xili ma." 24 Yamaan naxa, "Nxu bata na feen xibarun me, nxu senben yi jan. Kuisanna bata nxu suxu, a xɔlen luxi alo naxanla dii barimatona. 25 E nama mini taani siga burunna ra. E nama siga kirane xon, bayo yaxun nun a silanfanna kira yi. Gaxun yiren birin yi. 26 N ma yamana, e kasa benbeli dugin so sununi, e e sa xubeni, e gbelegbele alo muxuna dii xeme kedenna na faxa, bayo naxan muxune birin halagima, na fa en naterenama nen. 27 N bata i tan Yeremi dɔxo alogo i xa n ma yamaan kejaan fesefese, alo xabun naxan wuren matoma, alogo i xa e sigati kiin nakorosi, i yi a mato. 28 E birin findixi muxu murutexi tengbesenxine nan na, nafigin naxanye xodɔxo alo wuren nun sulana. Kala tiine nan e birin na. 29 Xabun teen nafema nen alogo teen xa yoxon ba wureni, koni a katama wuren nasensendeni fuun nin, bayo wuren gbiin mi tinma be a yi. 30 E luxi nen alo wure gbetin naxan lan a woli ayi, bayo Alatala bata a me e ra."

7 Alatala falani ito nan ti Yeremi xa, a naxa, **2** "Sa ti Alatalaa banxin so deen na, i yi falani ito rali menni, i naxa, 'E tuli mati Alatalaa falan na! E tan, Yuda kaan naxanye soma deni itoe ra, e yi Alatala batu.' 3 Alatala Senben Birin Kanna, Isirayilaa Alaa

ito nan falaxi, a naxa, 'E sigati kiin nun e kewanle masara. Nayi, n tinma nen e lu dɔxi yireni ito yi. 4 E nama e yigi sa wule falane yi, bayo e a falama, e naxa, "Alatala Batu Banxin ni ito ra! Alatala Batu Banxina! Alatala Batu Banxina!" 5 Xa e sigati kii nun e kewanle masara, xa e bode suxu kiti kendeni, 6 xa e mi xojen jaxankata, e nun kiridin nun kaja gilena, xa e mi sontarene faxa be, xa e mi bira ala gbetene fɔxo ra, e yi e yete toro, 7 nayi, n tinje nen, e lu dɔxi be yi, n yamanan naxan soxi e benbane yii habadan han habadan.'" 8 "Koni, e yigi saxi wule falane nin naxanye tonɔ mi na. 9 E mujan tima, e faxan tima, e yalunyaan ligama. E kolon wulen fari, e wusulanna ganma Baali suxuren xa, e ala gbetene batuma, e mi naxanye kolon. 10 Na xanbi ra, e mon yi fa ti n yetagi n batu banxin kui n xinla binyama denaxan yi. E yi a fala, e naxa, 'Nxu bata xunba.' E bata xunba alogo e xa lu xosi feene rabe ba? 11 Nayi, n xinla binyama banxin naxan yi, e na yatexi mafu tiine luxunden nan na ba? N tan yee na e ra del!" Alatalaa falan nan na ra. 12 "Nayi, e siga n ma yire fonni Silo taani n xinla yi binyama denaxan singe yi. E sa a to n naxan ligaxi a ra, lan n ma yamana fe jaxin ma, Isirayila kaane. 13 E yi feni itoe birin ligama waxatin naxan yi, n tan, Alatala yi lu falan tiye e xa ye yo ye. Koni, e mi tinxi n xuiin name. N bata e xili, e mi tinxi n natinje. Nayi, n tan Alatalaa falan ni ito ra. 14 E yigi saxi n Batu Banxini ito naxan yi, n denaxan soxi e nun e benbane yii n xinla binyaden na, n na a suxuma nen alo n Silo taan suxi kii naxan yi. 15 N na e kedima nen n yetagi, alo n na n mexi e ngaxakedenne ra kii naxan yi, Efirami bonsonna muxune." 16 "I tan Yeremi nama n madija e fe ra. I nama n mafan, i nama n maxandi. I nama n solona e xa, bayo n mi i xuiin namema. 17 I mi a toxi ba e naxan ligama Yuda taane nun Yerusalem kirane xon? 18 Diidine yegen fenma, fafane teen sama e ra, naxanle taminna ramulanma alogo e xa burudine rafala Kore Xonna Naxalan Mangan kiden xa, e yi minse saraxane raboxon ala gbetene xa, e yi n naxolo. 19 E n tan nan toroma ba? E mi e yete xan toroma ba, e yi e yete rayagi?" Alatalaa falan nan na ra. 20 Nanara, Marigina Alatala ito nan falaxi, a naxa, "N fitinaxina n ma xolon nagodoma nen be ma, e nun a muxune nun a xuruseene, e nun a wudine nun a bogi seene. Taan ganma nen, a teen mi nɔe ratuye." 21 Alatala Senben Birin Kanna, Isirayilaa Ala ito nan falaxi, a naxa, "E saraxa gan daxine sa e saraxan bonne fari, e

tan yi e subene don! **22** Bayo, n to ε benbane ramini Misiran yi, n mi yamarine soxi e yii lan saraxa gan daxine nun saraxan bonne xan ma na lōxōni! **23** Koni, yamarin nan ito ra n naxan so e yii: E tuli mati n xuiin na, alogo n xa findi ε Ala ra, ε yi findi n ma yamaan na. N na ε yamari feen naxanye birin ma, ε sigan ti na kiraan xōn, ε yi herin sōtō. **24** Koni, e mi tin n xuiin name, e mi e tuli mati. E yi bira e bōjε yi fe jaxine fōxō ra e tengbesenyani. E yi xetε xanbin na, benun e xa siga yēen na. **25** Xabu ε benbane mini lōxōni Misiran yi han to, n na n ma walikene rasigama ε ma, nabine, lōxō yo lōxō waxatin birin. **26** Koni, ε mi tinxī n xuiin name, ε mi ε tuli mati n na. E yi tengbesenjε ayi, ε fe jaxin naba dangu ε benbane ra.” **27** “I tan Yere mi na falani ito birin ti e xa, e mi e tuli matima i ra, e mi i yabε sese ma. **28** Nayi, i yi a fala e xa, i naxa, ‘E findixi yamaan nan na naxan mi Alatala xuiin namema, naxan tondixi xure ε Ala ma. Lannayaan bata lō ayi ε ma, na mi fa ε falane yi.” **29** Ala naxa, “E xunsexe kuyen naxan ε rasarijanma n xa, ε na maxaba, ε yi a woli ayi. E lu ε mawuge yire matexi yigenla fari, bayo Alatala bata a mε iki waxatin muxune ra a yi e rabejin e tan naxanye a raxolō.” **30** Alatalaa falan ni ito ra, a naxa, “Yuda kaane bata fe jaxin liga n yēε ra yi. E bata e suxure xōsixinε dōxō banxini, n xinla binyama denaxan yi, e yi na sarijanana kala. **31** E bata Tofeti kidene ti Ben-Hinōn lanbanni, alogo e xa e dii xemene nun e dii tēmene gan menni. N mi naxan yamarixi, n mi sa mirixi naxan ma.” **32** Alatalaa falan ni ito ra, a naxa, “Nanara, lōxōna nde fama, muxune mi fa mena xili bama a ‘Tofeti’ hanma ‘Ben-Hinōn lanbanna.’ Koni e fa na xili bama nen ‘Faxa Ti Lanbanna.’ Muxune yi maluxun Tofeti yi, han na yi rafe. **33** Yamani ito binbine yi findi xoline balon na e nun burunna subene. Muxu yo mi e kede. **34** N danna sama nen sewa sigine nun jaxan sigine nun jaxalandi ti sigine ra xemēn nun a jaxanla xa Yuda yamanani e nun Yerusalen taane yi, bayo yamanan kalama nen.”

8 Alatalaa falan ni ito ra, a naxa, “Na waxatini, e Yuda mangane nun kuntigine xōnne bama nen gaburun na, e nun a saraxaraline nun a nabine nun Yerusalen kaane birin. **2** E yi e sa sogen na, e lu raxuyaxi ayi kike degen nun sare ganla birin bun, naxanye yi rafan e ma, e yi naxanye batuma, e bira naxanye fōxō ra, e yi xibarune sōtōma naxanye ra,

e xinbi sin naxanye bun. E xōnne mi fa malanma, e mi maluxunjε, e birin findima nen lōxōn na bōxōn fari. **3** Sayaan xōnla yama jaxini ito muxu dōnxene suxuma nen, n na e raxuya ayi denaxanye birin yi.” Alatala Senben Birin Kanna falan nan na ra. **4** Yere mi, a fala yamaan xa, i naxa, “Alatala ito nan falaxi, a naxa, ‘Muxun birε ba, a mi keli? Muxuna a xun xanbi soε ba, a mi fa a xun xetε? **5** Nanfera nayi, Yerusalen yamani ito xun xanbi soxi, e lu e masige n na waxatin birin? E tantanni han, e tondixi e xun xetε n ma. **6** N tuli matixi e ra ki fajni koni e falan mi lanma. E sese mi nimisama e fe jaxine ra, e mi a falama, e naxa, “N nanfe ligaxi?” E birin gixin sigama e xun xōn alo soon naxan sigan yengēni. **7** Hali yaya xōnla naxan kore, na a xetε waxatine kolon. Hali ganban nun tuntunna nun sapi xōnla e xetε waxatine yatexi. Koni n ma yamaan mi Alatalaa kiti saxine kolon.” **8** “Nayi, ε nōε a fale di, ε naxa, ‘Nxu bata fe kolonna sōtō, bayo Alatalaa sariyana nxu yii?’ Anu, karamōxōne wule sebenle tima alogo na xa findi wulen nan na. **9** Fe kolonni itoe yagima nen, e yigitege, e suxin na a ra bayo e bata e mε Alatalaa falan na. Fe kolonna sifan mundun fa e yii sōnōn?” **10** Ala naxa, “Nanara, n na e jaxanle soma nen gbete ye yi, muxu gbete ye yi e xēene ba e yii. Bayo keli muxudin ma han muxu gbeene, e birin kunfaxi e yetε tōnōn nan xōn, keli nabine ma han saraxaraline, e birin wulen falama. **11** E mi n ma yamana furen dandanma e sōbeēn na. E luma a fale nen, e naxa, ‘Bōjε xunbenla! Bōjε xunbenla!’ Koni, bōjε xunbeli mi na. **12** E yi lanma nen e yagi e xōsi feene ra, koni, e mi yagima hali! E mi yagin yetēen kolon! Nanara, naxanye faxama, e nun ne nan faxama. N na e kewanle saranma e ra nen, e yi bira bōxōni.” Alatala naxa na kiini. **13** Alatalaa falan ni ito ra, a naxa, “N wama nen n xa danna sa e ra, manpa bogi mi fa luma na, xōdε bogi mi luma na, e wudine dēene xarama ayi nen. N seen naxanye soxi e yii, na bama e yii nen.” **14** Yamaan naxa, “Nanfera en luma dōxi? E malan! En na en gi, siga taa makantanxine yi, en sa halagi menni! Bayo Alatala, en ma Ala bata halagin nagidi en ma, a ige xōlene fi en ma, bayo en bata yulubin liga a ra. **15** En yengi yi bōjε xunbenla nan ma, koni en mi sese fajni sōtōma. En yi marakendēyaan nan mamema, koni fe magaxuxin nan fama. **16** En bata yaxune soone xuiin mε Dan bōxōn mabinni, bōxōn birin bata yimaxa e soo kendene wuga xuiin ma! E fama, e yamanan nun a seen birin naxōri, e nun taan

nun a muxune.” 17 Alatalaa falan ni ito ra, a naxa, “N saɣine rasigama nen ε xili ma naxanye seri mi na, e yi ε maxin.” 18 N yi wama n ma tɔrɔni suxu feni, n bɔɣen sunuxi n kui. 19 N ma yamaan wuga xuiin nan ito ra sa keli yire makuyeni. E naxa, “Alatala mi fa Siyon taani ba? A mangan mi fa na yi ba?” Ala naxa, “Nanfera e n naxɔlɔxi e suxurene ra, e nun xɔɣene batu se fufafune?” 20 Se xaba waxatin bata ɣan, kuye wolon waxatin fan bata dangu, koni han to en mi rakisixi! 21 N ma yamana tɔrɔna n tɔrɔma, n sunuxi, n kuisanxi. 22 Seri mi fa Galadi yamanani ba? Dandan ti mi fa na? Nanfera nayi, n ma yamana furen mi yalanma?

9 Xa ige xunna nan yi n xunna ra nun xa n yεε yinle yi findixi tigin nan na nun, n yi Siyon faxa muxune wugama nen kɔε nun yanyin birin na. 2 Xa n yi yigiyaden sɔtɔ burunna ra nun, n yi n mɛma nen n ma yamaan na, n yi n masiga e ra! Bayo e birin yalunde, yanfanten ganla nan e ra. 3 Alatalaa falan nan na ra, a naxa, “E lenne yitɔnxi nen e xa wulen fala alo xanla xalimakunle wolima kii naxan yi. E mi nɔɔn sɔtɔn yamanani ɣɔndi falan xan xɔn, koni e fe ɣaxin nan tun nabama. E mi n kolon. 4 Birin xa a xɔyina fe liga a yeren ma. Muxu yo nama a yigi sa a ngaxakedenne yi, bayo muxune ngaxakedenne birin findixi yanfantenne nan na, muxune xɔyine birin yi findi nafigine ra. 5 E birin e bode mayendenma, muxe mi ɣɔndin falama. E bata e xaran wulen ma ki faɣi. E yi e yete yixadan hake ligadeni. 6 Yere mi, i dɔxi yanfantenne nan tagi. E tondixi n kolonɣe e yanfantenyaa nin.” Alatalaa falan nan na ra. 7 Nanara, Alatala Senben Birin Kanna naxa, “N na e rasariɣanma nen, alo xabun wuren naxulunma kii naxan yi n yi e keɣaan fεfεfε, bayo n fa n ma yamaan suxe di? 8 E lenne maxɔlɔn tima alo faxa ti xalimakunla, e yanfa falane nan tun tima. E bɔɣe xunbeli falane tima e adamadi bodene xa, koni e luti ratixini tɔnma e bɔɣeni. 9 N mi lan n xa e saran na fe sifane ra ba? N mi n gbeen ɣɔxe na yama sifan ma ba?” Alatalaa falan nan na ra. 10 N wugama nen, n gbelegbele sununi geyane fari. N na n mawugama xuruse rabade kalaxine nan ma fe ra, bayo e bata gan, muxu yo mi fa danguma e yi. Xuruseene wuga xuiin mi fa minima na yi sɔnɔn. Xɔline nun burunna subene birin bata e gi, e siga. 11 N Yerusalen taan luma nen alo gεmε malanxine, kankone kurudena, n Yuda taane raxɔri, muxu yo mi lu e yii. 12 Xaxilimaan mundun feni itoe yεε toε? Xa Alatala bata falan ti a

xa, a xa na ye ba! Nanfera yamanan bata kala, a raxɔri alo burunna, muxu yo mi danguma denaxan yi? 13 Alatala naxa, “Na feene ligaxi nen bayo e bata e mε n ma sariyan na, n naxan so e yii, bayo e mi e tuli matixi n xuiin na, e sigan ti a ma. 14 E biraxi e bɔɣe yi feene fɔxɔ ra e tengbesenyani, e nun Baali suxurene alo e fafane e xaranxi a ma kii naxan yi.” 15 Nanara, Alatala, Isirayilaa Ala Senben Birin Kanna ito nan falaxi, a naxa, “N dabarin nun ige xɔlen fima yamani ito ma nen e balon na. 16 N yi e raxuya ayi siyane ye, e nun e benbane mi naxanye kolon, n yengen bira e fɔxɔ ra han n yi e birin naxɔri.” 17 Alatala Senben Birin Kanna ito nan falaxi, a naxa, “E miri! E sa ɣaxalan wugalane fen, e xa fa! Naxanla naxanye fatan gbelegbeleden sununi, ε ne fen de! 18 E xa e mafura fe, e fa e wuga xuini te en ma fe ra, han en fan yi wuga, en yεεgen yi godo alo xude igena. 19 Bayo wuga xuiin minima Siyon taani, e naxa, ‘En bata halagi feu! Yagin bata gbo en ma! Fɔ en xa keli nen yamanani, bayo e bata en ma banxine rabira!’” 20 Nayi, ɣaxanle, ε tuli mati Alatalaa falan na, a naxan falama a dεen na, ε yi na rame! E ε dii temene xaran wugan ma, ε bode xaran mawugan ma! 21 Bayo sayaan bata so en ma banxine foye sodene ra, siga han en ma banxi faɣine kui, en ma diidine yi faxa kirane xɔn, en ma foningene yi faxa yama malandene yi. 22 Yere mi, a fala iki, i naxa, “Alatalaa falan ni ito ra, fa fala ‘Binbine luma nen yiren birin yi alo ɣaman xεen ma, alo malo xidine xεen xun xɔn malo xaban fɔxɔ ra, koni e malan muxu mi na!’” 23 Alatala ito nan falaxi, a naxa, “Fe kolonne nama e kanba e fe kolonni. Senbemaan nama a kanba a senbeni. Nafulu kanna nama a waso a nafulu kanyani. 24 Koni xa naxan a kanbama, na xa a kanba ito nin: fa fala, a bata n famu, a yi n kolon. A xa n kolon Alatala ra, naxan hinanna nun kiti kenden nun tinxinyaan nabama dunuɣa yi bayo na fe sifane nan nafa n ma.” Alatalaa falan nan na ra. 25 Alatalaa falan ni ito ra, a naxa, “Lɔxɔne fama, n muxune saranma e kewanle ra waxatin naxan yi, naxanye birin banxulanxi e fati benden mabinni koni e mi tubixi e bɔɣeni, 26 alo Misiran kaane nun Yuda kaane nun Edɔn kaane nun Amonine nun Moyaba kaane, naxanye birin dɔxi tonbonni, naxanye e xunne dɔxɔn bima. Amasɔtɔ Ala kolontarene nan siyani itoe ra. Isirayila yamaan birin fan luxi nen alo banxulantarene denkeleyaan mabinni.”

10 Isirayila yamana, ε tuli mati Alatalaa falan na lan ε ma! **2** Alatala ito nan falaxi, a naxa, “E nama bira siya gbetene kirane foxo ra. E nama gaxu taxamasenne yee ra naxanye toma kore, alo siya gbetene. **3** Bayo yamanane namunne findixi fe fuune nan na. E wudin segema fotonni, yii rawali keen yi a masoli soden na. **4** E yi a rayabu wure gbeti fixen nun xemaan na, e yi a gbangban alogo a nama bira. **5** Na suxurene luxi nen alo xoli magaxu seen naxan tixi xeen ma, e mi fala tima, fo e maxali, bayo e mi noe sigan tiye hali ndedi. E nama gaxu e yee ra, bayo e mi noe sese njaxi rabe, e mon mi noe a fajin fan nabe.” **6** Alatala, i tan joxon mi na! I gbo, i xinla senben gbo. **7** Nde mi gaxue i tan yee ra, i tan siyane mangana? E lan e gaxu i yee ra bayo i joxon mi na siyane fekolonne ye, hanma e yamanane birin yi. **8** E birin xaxilitare, e birin fekolontare. E xaranxi fe fuun nan ma, wudi batuna. **9** E fama na wure gbetine ra sa keli Tarasisi yamanani, e nun xemane sa keli Yufasi yi, xabun nun xema rawanla yi e rafala suxuren na, e yi a maxidi dugi mamiloxine nun a gbee le yi. Muxu kesuxine wali xonna nan tun ne ra. **10** Koni Alatala nan Ala jondin kanna ra. A tan nan habadan Ala ra, habadan mangana. Boxo xonna xuruxurunma a tan nan ma xolo bun, yamanane mi suse naxan ma xolo yee ra. **11** Yeremi, a fala e xa, i naxa, “Wule alani itoe, e tan naxanye mi kore xonna nun boxo xonna daxi ne tununma nen boxo xonna fari, e nun kore xonna bun.” **12** Ala nan boxo xonna daxi a senbeni, a yi dunuja beten sa a fe kolonna xon, a kore walaxani bandun a xaxilimayani. **13** A na a xui ramini, tulen yi a malan kore, a kundaan nafa, sa keli boxon danne ra. A yi galanna nun tulen nafa, a foyen namini a ramaradeni. **14** Muxune birin bata findi xaxilitarene nun fekolontarene ra. Xema rawanle birin yagixi lan e sawura rafalaxine fe ma, bayo wulen nan e suxurene ra, nii yo mi e yi. **15** Fe fuun nan e ra, wali magelexina. E halagi waxatin na a li, e raxorima nen. **16** Koni Yaxuba gbee Ala mi luxi alo e tan. Bayo a tan nan seen birin daxi. A tan nan gbee Isirayila bonsonne ra. A xili nen Alatala Senben Birin Kanna. **17** E yiiseene malan boxon ma, ε tan naxanye rabilinxi yengeni! **18** Amasoto Alatala ito nan falaxi, a naxa, “N yamanan muxune wolima ayi nen alo lantan gemena. N yi e yigbeten alogo e xa suxu yengeni.” **19** Yamaan naxa, “Gbalona nxu xa! Nxu maxoloxi! Nxu furen deen mi yiyalanje! Nxu tan nan yi a falama, nxu naxa, ‘Nxu

furen na a ra, nxu a raxanje!’ **20** N ma bubun bata kala, a lutine birin bata a bejin! N ma diine bata keli n fema, e mi fa na. Muxu yo mi fa n yii naxan mon n ma bubun tiye, hanma a yigiyaden ti n xa.” **21** Bayo yamaan yeeratine xaxili mi na. E mi Alatala fenma. Nanara, e mi sabatixi. E yamaan birin bata raxuya ayi. **22** E tuli mati xui magaxuxini ito ra, a fama muxune yimaxe sa keli sogeteden komenna binni. A Yuda taane findima nen yire rabejinxine ra a e findi kankone kurudene ra. **23** Alatala, n bata a kolon fa fala adamadiin gbee mi a dunuja yi gidin na. Muxun mi a sanna tidene ragidima. **24** Alatala, n xuru alo a lan kii naxan yi koni hali i mi n suxu i ya xoloni alogo i nama n halagi. **25** I ya xolon nagodo siya gbetene ma naxanye mi i kolon, e nun yamanan naxanye mi i xinla binyama! Bayo e i ya yamaan halagima, Yaxuba bonsonna, e a raxorima han, e a boxone kalama.

11 Alatala yi falani ito ti Yeremi xa, a naxa, **2** “E tuli mati layiri falani itoe ra, ε yi e fala Yuda kaane nun Yerusalen kaane xa! **3** A fala e xa, fa fala Alatala, Isirayilaa Ala ito nan falaxi, a naxa, ‘Dangan na kanna xa naxan mi layiri falani itoe ramema. **4** N falan naxanye sebexi ε benbane ma, n na e ramini waxatin naxan yi Misiran yamanani denaxan luxi alo sulun teen naxan wuren naxulunma.’ N na a fala nen e xa, n naxa, ‘E n xuiin name, ε yi n ma yamarine birin suxu. Nayi, ε findima nen n ma yamaan na, n yi findi ε Ala ra. **5** Nayi, n na n kolo feen naxan ma ε benbane xa, n na rakamalima nen, fa fala a n yamanana nde soma ε yii nen kumin nun nonon gbo denaxan yi. E menna nin to.” N yi a yabi, n naxa, “Amina, Alatala!” **6** Alatala yi a fala n xa, a naxa, “Falani ito rali Yuda taane birin yi e nun Yerusalen kirane birin xon, i naxa, ‘E tuli mati layiri falane ra, ε yi e suxu! **7** Bayo n na ε benbane maxadi nen ki faji, xabu n na e ramini loxon Misiran yamanani han to. N lu e maxade n sobeen na, n naxa, “E n xuiin name!” **8** Koni e mi n xuiin name, e mi e tuli mati. E birin yi bira e boje yi fe njaxine foxo ra e tengbesenyani. Nayi, n yi layirini ito falane birin nakamali e xili ma, n na e yamari naxan liga fe ra koni e mi tin a suxe.” **9** Alatala yi a fala n xa, a naxa, “Yuda kaane nun Yerusalen kaane bata yanfan so n ma. **10** E bata xete e benbane hakeni, naxanye tondi n ma falan name, e bira ala gbetene foxo ra, e yi e batu. Isirayila yamaan nun Yuda yamaan bata e me n ma layirin na, n naxan xidi nxu nun e benbane tagi.” **11** “Nanara,

Alatala ito nan falaxi, a naxa, 'N gbalon nafama nen e ma, e mi mine naxan yi. E n xilima nen, koni n mi e xuiin namema. 12 Yuda kaane nun Yerusalen kaane sa alane maxandima nen, e wusulanna gan naxanye xa, koni ne mi e rakise gbalon waxatini mumel! 13 E tan Yuda kaane, e gbee alane wuya alo e taane! E tan Yerusalen kaane, e bata wusulan gandene ti Baali suxurene kidene ra, e wuya alo kiraan naxanye taani. Na mayagi del! 14 Yeremi, i nama n maxandi yamani ito xa, i nama n mafan, i nama n solona e xa, bayo e na n maxandi waxatin naxan yi lan e torona fe ma, n mi e xuiin namema." 15 "N xanunterne mon fa nanse ligama n ma banxini? E kote jaxi wuyaxi yitonma. E saraxa subene nce ne saranna masige e ra nen ba, hali e to sewama fe jaxi rabadeni? 16 Alatala bata yi i xili sa fa fala a 'Oliwi bili yifotonxin naxan bogiye rayabu,' koni a fa teen nan soma a ra, a yiine yi raxori teen xui gbeeni." 17 Alatala Senben Birin Kanna naxan e fe foloxi, na nan toron nafaxi e ma, lan Isirayila yamaan nun Yuda yamana fe jaxi rabaan ma, e to wusulanna gan Baali suxuren xa, e yi a raxolo. 18 Alatala bata muxune fe nataxin makenen n xa, n yi a kolon. A bata e kewanle yita n na. 19 N yi luxi nen alo e xuruseen naxan xalima a faxadeni. N mi yi a kolon e feen naxanye yitonxi n xili ma, e naxa, "En wudini ito kala a bogixi waxatin naxan yi! En na a ba jenje muxune ye, jinan xa ti a xinla xon!" 20 Koni kitisa tinxinxin nan Alatala Senben Birin Kanna ra naxan muxun bojen nun sondomen kejaan fesefesema. Tin, n xa i to i gbeen joxe e ra bayo n bata n xun mayenge feen lu i tan ma. 21 Nanara, Alatala ito nan falaxi Anatoti kaane xili ma, naxanye waxi n faxa feni, naxanye a falama, e naxa, "I nama fa nabiya falane ti Alatala xinli, xanamu, nxu i faxama nen!" 22 Nanara, Alatala Senben Birin Kanna ito nan falaxi, a naxa, "N na e saranma nen e kewanle ra. E banxulanne faxama nen yengeni, fitina kamen yi e dii temene nun e dii xemene faxa. 23 E muxu yo mi luye a nii ra, bayo n gbalon nafama nen Anatoti kaane ma, n na e saran e kewanle ra jenen naxan na."

12 Alatala, i tinxin na ma, kitin xa so en tan tagi. Koni n waxi i maxodin feni lan i ya kiti saxina nde a fe ma: Nanfera muxu jaxine hiyabuxi? Nanfera yanfantenne boje xunbelixi? 2 I bata e ti, i yi e senbe so. E sabatima, e wanle ke. I ya falana e de waxatin birin, koni e boje makuya i ra. 3 Anu, i tan Alatala, i

n kolon. I n toma, i n boje yi feene fesefesema lan i ma. Muxu jaxine lu e danna alo xuruseen naxanye sigama e faxadeni, i yi e ramara halagin loxon yee ra. 4 Yamanan luma sunuxi han waxatin mundun, sexene yi lu xaraxi xee ne ma? Amasoto a muxune jaxu, subene nun xoline raxorima. Bayo e a falama, e naxa, "A mi en najanna toma." 5 Xa e nun adamadiine e gima, i yi tagan, e nun soone xa e gi di nayi? Xa i xaxili mi ragidixi fo i nema boje xunbeli yireni, i nanse ligama i na so fotonni Yuruden baan de? 6 Bayo, i ngaxakedenne nun i fafe a denbayaan fan i yanfama, e fan sonxoma i xili ma i xun xanbi ra. I nama la e ra, e na fala fajine ti i xa waxatin naxan yi. 7 Ala naxa, "N bata n me n ma banxin na, n yi n ma yamanan nabepin. N naxanye xanuxi han, n bata ne so e yaxune yii. 8 N ma yamaan luxi nen n tan yee ra yi alo yatan fotonni, e bata sonxo n na, nanara n yi e rajaxu. 9 N ma yamaan mi luxi n tan yee ra yi ba, alo wunla minima segen naxan ma, segen bonne e malanxi naxan ma a dondeni? E burunna subene birin malan, e xa fa e dege! 10 Xuruse raba wuyaxi bata n ma nakoon kala, e yi n ma xeeni bodon, e yi n nafan xeen findi tonbonna ra. 11 E bata a findi yire rabejinxin na, a xaraxi, a raxorixi n yetagi. Yamanan birin naxorixi, a kontofili mi muxu yo ma." 12 Halagi ti ganla fama tonbonna yire matexine yi, bayo Alatalaa silanfanna yamanan birin naxorima nen, yengen yi a danne birin li. Muxu yo mi fa luma boje xunbenli. 13 E bata sansine si, koni e sa tansinne nan sotoma. E toroma walideni, koni e mi tono sotoma. E yagi lan e wanla saranna fe ma bayo Alatala bata xolo e ma han! 14 Alatala ito nan falaxi a yamaan nabilinna yamana jaxine xili ma, a naxa, "E bata e yiin din n ma yamanan na, n naxan soxi Isirayila kaane yii e keen na. Nayi, n fa na siyane bama nen e yamanane yi, n yi Yuda kaane ba e tagi. 15 N na yelin na siyane be e yamanane yi, n mon kininkinima e ma nen, n mon yi e birin naxete e kee boxone yi, e dexo e yamanane yi. 16 Xa e lu n ma yamana kirane foxo ra, e yi e kolo n xinli, e naxa, 'N bata n kolo habadan Alatala yi!' alo e yi n ma yamaan xaranma a ma kii naxan yi nun, e yi e kolo Baali suxurene yi. Nayi, e sabatima nen n ma yamaan tagi. 17 Koni xa e mi e tuli mati, n na yama sifan bama nen na, n yi a raxori." Alatalaa falan nan na ra.

13 Alatala yi a fala n xa, a naxa, “Siga, i sa taa dugi tagi xidina nde sara, i yi i tagi xidi a ra. Koni, i nama a sin igeni de.” **2** N yi tagi xidin sara alo Alatala a falaxi kii naxan yi, n yi a xidi n tagi. **3** Alatala mon yi falan ti n xa, a naxa, **4** “I tagi xidin naxan saraxi i yi a xidi i tagi, a tongo i siga Efirati baan binni, i sa a luxun fanye yinla ra menni.” **5** Nayi, n yi siga, n sa a luxun Efirati baan dexon, alo Alatala a yamari n ma kii naxan yi. **6** Na waxati xunkuyen to dangu, Alatala mon yi a fala n xa, a naxa, “Keli, i siga Efirati baan binni, i sa tagi xidin tongo, n na i yamari naxan luxun fe ra.” **7** Nayi, n yi siga Efirati baan binni, n sa na yiwulen, n tagi xidin sa denaxan yi, n yi a tongo menni, koni tagi xidin bata yi kala, a tona mi yi fa na sonon. **8** Alatala yi falan ti n xa iki, **9** “N tan Alatala ito nan falaxi, n naxa, ‘N Yuda kaane wason kalama na kii nin e nun Yerusalen kaane waso gbeena. **10** Yama jaxani ito naxan tondima n ma falan name, naxanye biraxi e boje yi feene foxo ra e tengbesenyani, e nun ala gbetene, e yi e batu, e yi e xinbi sin e bun, ne luma nen alo tagi xidini ito, naxan tona mi fa na! **11** Awa, n bata yi Isirayila yamaan nun Yuda yamaan birin tugun n na alo tagi xidin xidima muxun tagi kii naxan yi alogo e xa findi n ma yamaan na, e yi n xinla matoxo, e n tantun, e n binya. Koni e mi e tuli mati.” Alatalaa falan nan na ra. **12** “Yeremi, sa ito fala e xa, i naxa, ‘Alatala, Isirayilaa Ala ito nan falaxi, a naxa, a manpa kundine birin lanma nen e xa rafe manpaan na.’ E i yabima nen, e naxa, ‘Alo nxu mi na kolon ba, a manpa kundine lan nen e rafe manpaan na?’ **13** Nayi, i yi a fala e xa, i naxa, ‘Alatala ito nan falaxi, a naxa: n yamanani ito muxune birin luma nen alo dolo minna naxanye lugoxi dolon na, hali a mangan naxanye doxi Dawudaa mangaya gbedeni, e nun a saraxaraline nun a nabine, e nun Yerusalen kaane birin. **14** N na e xusinma nen e bode ra, e yi kala alo kundine, diine nun fafane birin. N mi muxu yo ratange, n mi kininkinima, n mi hinanye e ra, sese mi a lige n tagan e halage.’ Alatalaa falan nan na ra.” **15** E n xuiin name, e tuli mati! E nama fa e yete yite, bayo Alatala nan falan tima. **16** E binyen fi Alatala ma, e Ala, benun a xa dimin naso, e yi e sanne radin geya yidimixine yi. E yengi kenenna nan ma, koni Ala yi a masara sayaan dimin na, a yi findi dimi gbeen na. **17** Xa e mi e tuli mati, n wugama nen wundoni e wasona fe ra. N yegen minima nen han, n yeen xonna yi rafe yegen na, bayo Alatalaa

yamaan sigama nen konyiyani. **18** A fala mangan nun jaxalan mangan xa, i naxa, “E doxo boxoni, bayo e mangaya taxamaseri komoti noroxin bata bira.” **19** Negewi yamanan taane balanma nen, muxu yo mi fa na naxan e rabiye. Yuda kaane birin sigama konyiyani, e birin bata xali. **20** I yeen nakeli, i muxune mato naxanye fama sa keli sogeteden komenna ma. Xuruse kurun minen naxan taxu i ra, i yi i kanbama xuruseen naxanye yi? **21** E bata naxanye radari e xa findi e xoyine ra, e nanse falama, ne na keli e xili ma e doxo e xun na. I mi tore nayi ba alo jaxanla naxan diin barima? **22** Xa e na fala, e naxa, “Nanfera ito n sotoma?” E xa a kolon, a muxune fuma e ma nen, e yi e rayagi e hake wuyaxi saranna ra. **23** Fati foren noe a fatin masare ba, hanma burunna jarin yi a fatin makatunxi yirene maxete a ma? Na ma, e fan mi noe fe fapin lige, e to darixi fe jaxin na. **24** N na e raxuyama ayi nen alo foyen se dagin naxan xalima tonbonni. **25** Alatalaa falan ni ito ra, a naxa, “N bata ito nan nagidi e ma bayo e bata jinan n xon, e yi e yigi sa wule alane yi. **26** N na e rayagima nen alo jaxanla dugin na mate a ra han a yetagi, alogo a ragenla xa to. **27** N bata e yalunyaan nun e kunfa feene to, e tonon fenma yalunyani yagitareyani! N bata e fe xosixine to geyane fari e nun burunna ra. Gbalona e xa Yerusalen kaane! E mon luma nen saripantareyani han waxatin mundun?”

14 Alatala yi falan ti Yeremi xa lan fitina furuna fe ma, a naxa, **2** “Yuda kaane sunuxi, e taane bata kala, e muxune gbelegbelema boxoni, e wuga xuini tema Yerusalen taani. **3** Muxu gbeene muxudine rasigama ige badeni. E sigama ige ramaradeni, e mi ige soto. E yigitexexin yi xete e kundine kui genla ra, e yi e xunna so yagini. **4** Boxon bata xara bayo tulen mi fama yamanani, nayi xee biine yagixin yi e xunna so. **5** Hali xenla a dii xali nenen nabepinma burunna ra, bayo sexe xinde mi na. **6** Burunna sofanle tema geyane fari, e yi foyen tongo alo kankone. E yee rakopinma, bayo sexe mi na.” **7** Nxu hakene seren bama nxu xili ma, koni Alatala, nxu mali i xinla fe ra! Bayo nxo tinxintareyaan gbo, nxu bata yulubin liga i ra. **8** I tan, Isirayila yigina, naxan a rakisima jaxankata waxatini, nanfera i luye alo xojen dangumatona yamanani, alo sigatiin naxan xii kedenna tima be? **9** Nanfera i luxi alo sofaan na a terena yengen na, naxan mi noe marakisin tiye? Anu, Alatala, i nxu ye, i xinla

falama nxu xun ma. I nama i me nxu ra! **10** Alatala ito nan falaxi lan a yamana fe ma, a naxa, “Na xun xon sigan nafa e ma, e mi e raxare yire kedenni. Nanara, Alatala mi e rasuxuma, a mi jinanma e hakene xon, a e saranma nen e yulubine ra.” **11** Nayi, Alatala yi a fala n xa, a naxa, “I nama n maxandi yamani ito herina fe ra. **12** Hali e sunna suxu, n mi n tuli matiye e wuga xuiin na. Hali e saraxa gan daxine nun bogise saraxane ba, n mi e rasuxe, bayo n waxi e halagi feni yengen nun fitina kamen nun fitina furen na.” **13** N yi a yabi, n naxa, “Ee! Marigina Alatala! E nabine luma a fale e xa, e naxa, ‘E mi yengen toma, fitina kamen mi e konna liye. Ala boje xunbeli kenden fima nen e ma be.’” **14** Alatala yi a fala n xa, a naxa, “Na nabine wulen nan falama n xinli. N tan xa mi e rafaxi. N mi yamari soxi e yii, n mi fala tixi e xa. E nabiya falane tima wule fe toone nan xon alo xiyena. Ne fataxi yiimato feene nun suxure batu feene nun e yete boje mayendexine nan na.” **15** Nanara, Alatala ito nan falaxi lan nabine fe ma naxanye falan tima a xinli, a naxa, “N mi ne xexi, koni e a falama, e naxa, ‘Yengen nun fitina kamen mi soe yamanani ito yi.’ Nanara, n na nabine faxama nen yengen nun fitina kamen xon. **16** E nabiya falan tima yamaan naxan xa, ne binbine rabepinma nen Yerusalen kirane xon fitina kamen nun yengeni. Muxu yo mi luma naxan e maluxunje, e tan nun e jaxanle nun e dii xemene nun e dii temene. N na e fe jaxin naxetema nen e ma.” **17** “Falani ito ti e xa, i naxa, ‘N yeegen minima ko e nun yanyin na, a mi danma, bayo gbalogbeen bata godo n ma yama fajin ma, a jaxankataxi han! **18** Xa n siga burunna ra, n muxu faxaxine toma menni silanfanna naxanye faxaxi. Xa n siga taani, fitina kamen bata muxune rafura menni. Nabine nun saraxaraline yamanani sigama koni e mi sese famuma.’” **19** Yamaan naxa, “I bata i me Yuda kaane ra ba fefe? I niin bata a me Siyon taan na ba? Nanfera i nxu jaxankatama han nxu mi fa kendeyaan sotoma? Nxu yengi yi boje xunbenla ma, koni nxu mi sese faji sotoma. Nxu yi marakendeyaan nan mamema, koni fe magaxuxin nan fama. **20** Alatala, nxu bata nxo fe jaxine kolon, e nun nxu benbane hakene, bayo nxu bata yulubin liga i ra. **21** I xinla fe ra, i nama nxu rajaxu. I nama i ya mangaya gbede noroxina fe magodo! I miri layirin ma en tagi, i nama a kala. **22** Siyane ala fufafuna ndee no e tulen nafa ba? Hanma koren nan tulen nagodoma a yete ma ba? En-en de! I tan Alatala na a ra, nxo

Ala! Nxu yigi saxi i yi, bayo i tan nan na feene birin ligama.”

15 Alatala yi a fala n xa, a naxa, “Hali Musa nun Samuyeli fa ti n yetagi n solonadeni yamani ito xa, n mi kininkininje e ma. E kedi n yetagi, e xa siga! **2** Xa e a fala i xa, e naxa, ‘Nxu xa siga minen?’ I xa e yabi, i naxa, ‘Alatala ito nan falaxi, a naxa: Sayaan nagidixi naxanye ma, ne sayaan sotoma nen! Naxanye faxama silanfanna ra, ne faxama nen! Fitina kamen nagidixi naxanye ma, ne kamema nen! Konyiyaan nagidixi naxanye ma, ne xalima nen konyiyani!’” **3** Alatalaa falan ni ito ra, a naxa, “N fitina feen sifa naanin nan nafama e xili ma: silanfanna yi e faxa, barene yi e yibo, xoline nun burunna subene yi e don, e yi e jan. **4** N na e findima nen fe magaxuxin na boxo xonna yamanane birin xa, lan Yuda mangan Xesekiyaa dii xemene Manase kewanle ma a naxanye rabaxi Yerusalen taani.” **5** Ala naxa, “Nayi, nde kininkininma e tan Yerusalen kaane ma? Nde a mawugama e fe ra? Nde danguma e xontonje?” **6** Alatalaa falan ni ito ra, a naxa, “E bata e me n na, e lu xete xanbin na. Nayi, n na n yiini tema nen e xili ma, n yi e halagi, bayo e kininkinin mi fa n yi. **7** N na e fintanma nen alo se dagina yamanan taane so deene birin na. N yi e diine ba e yii, n yi n ma yamaan halagi bayo e mi e xun xanbi soxi e kewanle yi. **8** N na a ligama nen kaja gilene yi wuya ayi alo baan jemensinna. N halagi tiin nafama nen e banxulanne ngane ma yanyi tagini, sanja ma kedenni, jaxankatan nun kui sanna yi e li. **9** Naxan bata dii solofere bari, na furama nen, a faxa. Koen yi so a ma yanyin na, a yagi, a xun sin. Naxanye na lu e nii ra, e yaxune yi fa ne raxori e silanfanne ra.” Alatalaa falan nan na ra. **10** Yereimi naxa, “Nna, gbalona n xa bayo i bata n bari. Yamanan muxune birin n matandima, e yi n yenge! Doli so mi n na, n mon mi doli tongoxi, koni birin n dangama.” **11** Alatala yi a fala n xa, a naxa, “N na i xunbama nen alogo i xa fe fajin soto yati! N na i yaxune rafama nen i mafandeni toron nun gbalon waxatini yati! **12** Muxun no e wuren bolonje a yiin na ba, wuren naxan kelixi sogeteden komenna ma hanma sulana? **13** Yuda kaane, n na e herisigene nun e nafunle fima e yaxune ma nen e yenge yi se tongoxine ra, masoto e yulubine xon e yamanan birin yi. **14** N bata e so e yaxune yii e konyine ra e yi siga yamanani e mi denaxan kolon. N bata teen so e xili ma n ma xoloni.” **15** Yereimi naxa,

“I tan, Alatala, i feene birin kolon. I miri n ma, i yi n mali, i yi n gbeen jaxo n naxankata muxune ra! I nama n faxa, i tan naxan mi xoloma xulen! A kolon, n yagin masotoma i tan nan ma fe ra! **16** I ya falane na yi n li tun, n yi e rasuxuma nen alo donsena, bayo i ya falane nan n nasewama, n yi naxan n bojeni. Amasoto i xinla bata fala n xun ma, Alatala, Ala Senben Birin Kanna! **17** N mi doxi fuyantenne tagi batudeni. N yi luxi n danna nen bayo i senben yi n fari, bayo i n nafexi i ya xolon na. **18** Nanfera nayi n ma toron dan mi na? Nanfera n ma furen mi yalanma? I luyɛ n xa alo tigin naxan xorima ba, muxun mi noɛ a xaxili tiye naxan na?” **19** Nanara, Alatala ito nan falaxi, a naxa, “Xa i xun xete n ma, n mon i tima nen i ya wanla ra n yetagi. Xa i fala kendene ti, i fala fuune lu na, i falan tima nen nayi alo n yeteen de xuina. E tan nan fa xetema i ma, koni i tan xa mi xetema e tan ma de! **20** N na i findima nen yinna wure daxin na nayi, yamani ito yetagi, naxan mi noɛ rabire. E i yengema nen, koni e mi i noɛ sese ma, bayo n na i foxo ra, n ni i rakisi, n yi i xoroya.” Alatalaa falan nan na ra. **21** “N na i xunbama nen muxu naxine yii, n yi i xoroya gbalotone senben ma.”

16 Alatala yi falan ti n xa, a naxa, **2** “I nama naxanla futu. I nama dii xeme soto hanma dii temena yireni ito yi.” **3** Bayo Alatala ito nan falaxi dii xemene nun dii temene xili ma naxanye barima be, e nun dii ngaan naxanye e barima, e nun fafan naxanye e sotoma yamanani ito yi, a naxa, **4** “E faxama nen fureni. E sayaan mi wuge, e mi maluxunje. E luma nen alo jaman boxon ma. Yengen nun fitina kamen nan e raxorima. E binbine yi findi balon na xoline nun burunna subene xa.” **5** Bayo, Alatala ito nan falaxi, a naxa, “I nama so jande banxini. I nama siga saya yirene yi sununi. I nama e wuga. Bayo n bata n ma boje xunbenla ba yamanani ito yi e nun n ma hinanna nun n ma kininkininna.” Alatalaa falan nan na ra. **6** “Muxu gbeene nun muxudine birin faxama nen yamanani ito yi. E sayaan mi wuge, e mi maluxunje, muxe mi a yete maxabe sununi hanma a xunna bi e fe ra. **7** Tamin mi yitaxunma muxu sunuxine ra e madenden xinla ma. E mi minseen soma sunu muxune yii, e yi e madenden, hali e fafe hanma e nga nan faxaxi.” **8** “I nama so banxina nde yi sewa donse donna denaxan yi, i yi dexo muxune fema i degedeni, i yi i min. **9** Bayo Alatala Senben Birin Kanna, Isirayilaa

Ala ito nan falaxi, a naxa, ‘N danna sama nen sewa sigine nun naxan sigine nun naxalandi ti sigine ra xemen nun a naxanla xa yireni ito yi, waxatini ito yi i yeɛ xori.” **10** “I na falani ito birin ti yamani ito xa waxatin naxan yi, e a falama nen i xa, e naxa, ‘Nanfera Alatala gballo gbeeni itoe birin nagidixi nxu ma? Nxu kalan mundun tixi? Nxu yulubin mundun ligaxi Alatala ra, nxo Ala?” **11** Nayi, i yi a fala e xa, i naxa, ‘Alatalaa falan ni ito ra, a naxa: N na ligaxi nen bayo e benbane e me nen n na, e bira ala gbetene foxo ra, e yi e xinbi sin e bun, e yi e batu, e yi e me n tan na, e mi n ma sariyan suxu. **12** Anu, e tan bata fe naxin naba dangu e benbane ra. E birin biraxi e boje yi fe naxine nan foxo ra e tengbesenyani, e mi e tuli matima n na. **13** N na e kedima nen yamanani ito yi. N yi e rasiga yamanani e nun e benbane mi denaxan kolon. E sa ala gbetene batu menni koɛɛn nun yanyin na, bayo n mi fa hinanje e ra mumel!” **14** Alatalaa falan ni ito ra, a naxa, “Loxone fama, muxe mi a fale loxon naxanye yi, a naxa, ‘N bata n kolo habadan Alatala yi, naxan Isirayila kaane ramini Misiran yi!’ **15** Koni a a falama nen, a naxa, ‘N bata n kolo habadan Alatala yi, naxan Isirayila kaane ramini komen foxon yamanani, e nun a e kedi yamanan naxanye birin yi!’ Bayo n mon fama nen e ra na boxoni, n denaxan so e benbane yii.” **16** Alatalaa falan ni ito ra, a naxa, “N yamani ito yaxu wuyaxi xilima nen e xili ma, e fa e suxu alo yeɛɛ suxune. E fa e sagatan geyane nun yire matexine nun geme yinle birin yi alo donsone. **17** Bayo n yeena e kewanle birin na, e mi luxunxi n ma. E hakene mi luxunje n ma. **18** N na e hakene nun e yulubine saranma nen e ra dexo firin, bayo e bata n ma yamanan naharamu, e bata n keɛ boxon nafe e sawura niitarene nun e suxure xosixine ra.” **19** Alatala, n senbena, n ma faran makantanxina, n na n yigiyama denaxan yi toro waxatine yi, siyane fama nen i tan ma keli boxon danne birin na, e yi a fala, e naxa, “Wulen nan findixi nxu benbane keɛn na, suxure fufafuun naxanye tɔno mi na. **20** Adamadiine noɛ alane rafale e yete xa ba? A rabama, koni ala xa mi ne ra!” **21** Nayi, Alatala naxa, “Nanara, n na a yitama nen e ra ito yi, n na n fangan nun senben yitama nen e ra, e yi a kolon, a n xili nen Alatala.”

17 Yuda kaane yulubine kerendenxi wure sebeli ti seen nan na, naxan xodexo alo dayimuna. E sebexi e boje walaxan nan ma, e nun e saraxa

gandene fenne ma. 2 Nayi, e diine luma nen e mire e saraxa gandene ma, e nun e Asera kide gbindonne wudi yifɔtɔnxine fɛma, e nun geya matexine fari. 3 E tan seen naxanye batuma n ma geyaana ma e nun burunne ra, ne nun e herisigene nun e nafunle birin soma nen e yaxune yii e yenge se tongoxine ra e nun e taan kidene, masɔto e yulubine xɔn e yamanan birin yi. 4 E tan yeteen nan fama keen nabepindeni, n naxan soxi e yii. N yi e findi konyine ra e yaxune xa yamanani e mi denaxan kolon, bayo e bata n ma xolon teen nadege. A e ganma nen han habadan. 5 Alatala ito nan falaxi, a naxa, “Dangan na kanna xa naxan a yigi sama adamadiine yi, naxan a xaxili tixi muxune ra, a yi a xun xanbi so Alatala yi a bɔpɛni. 6 Na kanna luxi nen alo wudi dungin tonbonni. A tan mi herin toɛ. A dɔxɔma nen tonbonna yire yixareni, fɔxɔn denaxan yi bɔxɔ rabepinxini. 7 Koni, duban na kanna xa naxan a yigi saxi Alatala yi, Alatala findixi naxan yigi ra. 8 A luxi nen alo wudin naxan sixi igen de, a salenne sigama igen bun. Wuyenna mi a tɔrɔma, a deene xinde yeye. Furun na ti jeeɛna nde ra, na mi a tan tɔrɔma a bogin mi janma.” 9 “Muxun bɔpɛna a mayendenma dangu seen birin na. A furen mi dandanyɛ! Nde nɔɛ a famunye? 10 N tan Alatala, n muxune bɔpɛn fɛsɛfɛsɛma, n yi e sɔndɔmen nakɔrɔsi, alogo n xa birin saren fi a kewanle ra, lan a sigati kiin ma. 11 Muxun naxan nafulu sɔto ki mi fan, na luxi nen alo dɔmen naxan xelene rasegema, a mi naxanye biraxi. A nɛma a dunɔɔa yi gidin tagini, a fuxari. A rananna, a lu alo xaxilitarena.” 12 En ma banxi sarinɔnxin findixi Alaa mangaya gbɛde nɔrɔxin nan na naxan ma fe yitexi xabu a fɔlɔni. 13 I tan Alatala, Isirayila yigina, naxanye birin e mema i ra, ne yagima nen. Naxanye e masigama i ra, ne sa luma burunburunna nin, bayo e bata e mɛ Alatala ra, siimaya ige tigina. 14 Alatala, n nakendeya, alogo n xa yiyalan. N nakisi, alogo n xa kisi, bayo n ni i tan nan tantunma. 15 E a falama n xa, e naxa, “Alatalaa falane mi kamalima ba? A xa e rakamali fa.” 16 N tan mi tondixi finde yɛɛratiin na i fɔxɔ ra. N fan mi yi waxi tɔrɔ lɔxɔni ito xa a li. I na kolon. N ma falane birin kenenni i yetagi. 17 Nayi, i nama kui sanna ragidi n ma. I tan naxan findixi n luxunden na gbalon lɔxɔni. 18 N jaxankata muxune xa yagi, koni i nama n tan lu yagini! E tan nan xa magaxu, koni n tan nama gaxu. Gbalon lɔxɔn nafa e tan nan ma i xa e halagi gbalon na dɔxɔna ma firin. 19 Alatala ito nan falaxi n xa, a

naxa, “Siga, i sa ti taan so deen na, naxan xili ‘Yamaan So Dɛna’ Yuda mangane danguma denaxan yi e nɛma soma hanma e nɛma minɛ. I mɔn xa ti Yerusalɛn taan so deene birin na. 20 I yi a fala e xa, i naxa, ‘E tuli mati Alatalaa falan na, Yuda mangane nun Yuda yamaan birin, e nun Yerusalɛn kaane birin, e tan naxanye soma deni itoe ra. 21 Alatala ito nan falaxi, a naxa: E a liga e yeren ma! E nama goron tongo Matabu Lɔxɔni, e yi a raso Yerusalɛn deene ra. 22 E nama goron namini e konne yi Matabu Lɔxɔni. E nama wali yo ke. Koni e Matabu Lɔxɔn nasarijan, alo n na a yamari e benbane ma kii naxan yi. 23 Koni e mi n xuiin name, e mi e tuli mati n na. E yi e tengbesen, e tondi n xuiin name, e mi tin xure. 24 Alatalaa falan ni ito ra. Xa e n xuiin name ki fapi, xa e mi goron naso taan so deni itoe ra Matabu Lɔxɔni, e Matabu Lɔxɔn nasarijan, e mi wali yo ke, 25 nayi mangane nun kuntigine soma nen deni itoe ra, naxanye dɔxi Dawuda jɔxɔni a manga gbɛdeni. E tema nen wontorone nun soone fari, e tan nun e kuntigine, e so e nun Yuda kaane nun Yerusalɛn kaane. Muxune luma nen taani ito yi han habadan! 26 Muxune fama nen sa keli Yuda taane yi e nun Yerusalɛn rabilinna taane nun Bunyamin yamanan nun geya yiren sogegododen binni e nun geyaana bonne nun Negewi tonbonni, alogo e xa fa saraxa gan daxine nun saraxa gbɛteye nun bogise saraxane nun wusulanne nun barika bira saraxane ba Alatalaa banxini. 27 Koni xa e mi e tuli mati n na, e yi Matabu Lɔxɔn nasarijan, xa e goronna raso Yerusalɛn taani Matabu Lɔxɔni, nayi, n teen soma nen taan deene ra naxan mi nɔɛ ratuye, a yi taan banxi fapine gan.”

18 Alatala yi falan ti Yereɛmi xa, a naxa, 2 “Keli, i siga feje rafalan konni, i sa n ma falan mema mɛnna nin.” 3 N yi siga feje rafalan konni, n yi a li fejenade rafale. 4 Koni fejen naxan yi a yii, a yi naxan nafalama feje benden na, feen yi na ra. Nayi, a mɔn yi xete a ma, a feje gbete rafala na feje benden na, alo a yi rafan a ma kii naxan yi. 5 Alatala yi falan ti n xa, a naxa, 6 “E tan Isirayila yamana, n fan mi nɔɛ na fe sifan lige e ra ba, alo feje rafalana? Isirayila yamana, e fan luxi n yii nen alo feje benden feje rafalan yii.” Alatalaa falan nan na ra. 7 “Waxatina nde yi, n na a falama nen a siyana nde hanma yamanana nde xa kala, hanma a halagi, hanma a raxɔri. 8 Koni n falan tixi siyaan naxan xili ma, xa na xete a fe jaxine fɔxɔ

ra, nayi n naxankatan naxan nagidixi e ma, n xetema nen na feen fɔxɔ ra, na mi fa e sɔtɔma. **9** Waxatina nde, n yi a fala a siyana nde hanma yamanana nde xa ti, a sabati. **10** Koni xa na siyaan fe naxin naba n yee ra yi, a mi n xuiin name, nayi n fe fajin naxan nagidixi e ma, n na xunbama nen e ra, na mi fa liga.” **11** “Iki, Yeremi, falan ti Yuda kaane nun Yerusalen kaane xa, i naxa, Alatala ito nan falaxi, a naxa, ‘E a mato, n gbalona nde rafama e ma, n fena nde yitɔnma e xili ma. Nayi, e xete e fe naxine fɔxɔ ra! E birin xa e sigati kiin nun e kewanle maxetɛ!’ **12** Koni e a falama nen, e naxa, ‘A mi lanje! Fɔ nxu xa lu nxu miriyane lige, birin yi bira a bɔɲe yi fe naxine fɔxɔ ra tengbesenyani.” **13** Nanara, Alatala ito nan falaxi, a naxa, “Maxɔdinna ti siyane ye. Nde bata fe sifani ito me singe? Isirayila yama fajin bata fe magaxuxin liga. **14** Ige xundin janje Liban geyane gɛme gbeene fari ba? Ige xunbenla janje xudeni ba naxan fama sa keli na yire makuyeni? **15** Anu, n ma yamaan bata jinan n xɔn! E wusulanna ganma saraxan na suxure fufafune xa, naxanye e ratantanma e sigati kiini, e yi e ba e kira fonna xɔn, e yi e ti kira yitɔntarene xɔn. **16** E bata e yamanan findi yire rabepinxin na, muxune kabɛma naxan ma e kolin a ma han habadan. A fe dangu muxune birin yigitegɛma nen, e xunni maxa. **17** N na e raxuyama ayi nen e yaxune bun alo sogeteden foyena. N na n yeen bama e ra nen, n yi n xun xanbi so e yi e gbalon waxatini.” **18** Muxune a falama, e naxa, “E fa be, en fa yanfan so Yeremi ma! Bayo saraxaraline sariya xaranna, na mi janma alo Yeremi a falan kii naxan yi, fekolonne maxadi xuine fan mi janje, nabine falane mi janje. E fa, en fa a mafala yamani alogo a xa tɔrɔ. En nama en tuli mati a fala yo ra!” **19** Alatala, i tuli mati n na! I tuli mati n yaxune xuiin na n xili ma! **20** Fe fajin lan a saran a naxin na ba? Anu e bata n faxa yinla ge n yee ra. Koni, a kolon a n bata ti i yetagi i solonadeni e xa alogo i ya xɔlɔn xa masiga e ra. **21** Na ma, i xa fitina kamen nagidi e diine ma, i yi sayaan nagidi e ma yengeni, e naxanle yi findi kaɲa gilene ra naxanye diiye baxi e yii. E xɛmene xa sayaan sɔtɔ, e banxulanne yi faxa yengeni! **22** Gbelegbele xuiin xa mini e banxine yi, i na fa sofa ganla ra e xili ma sanja ma kedenni. Bayo e bata yinla ge n xili ma, e yalaan nati n yee ra. **23** I tan Alatala, i e yanfantenyane birin kolon, e naxanye yitɔnxi n faxa xinla ma. I nama e hakene mafelu, i

nama i yeen ba e yulubine ra! E xa bira i yetagi! Keli e xili ma, i ya xɔlɔ waxatin xa a li!

19 Alatala yi ito fala, a naxa, “Sa feɲena nde sara feɲe rafalan konni, i yi yamaan fonne nun saraxaraline xili. **2** I siga Ben-Hinɔn lanbanni, denaxan sa Feɲe So Deen binni, i sa falani itoe rali menni n naxanye tima i xa. **3** I yi a fala, i naxa, ‘E tuli mati Alatalaa falan na, e tan Yuda mangane nun Yerusalen kaane! Alatala Senben Birin Kanna, Isirayilaa Ala ito nan falaxi, a naxa: N gbalon nagodoma nen be ma, naxan yo na a fe me, na kanna tuli madɔxɔma ayi nen. **4** Amasɔtɔ e bata e me n na! Muxun mi fa be kolonma bayo e bata be findi wusulan ganden na ala gbɛtene xa, e mi naxanye kolon, e benbane mi e kolon, Yuda mangane mi e kolon, e yi be rafe sɔntarene wunla ra. **5** E yi kidene rafala Baali suxurene xa alogo e xa e diine gan menni Baali xa, n mi naxan yamarixi, n mi naxan ma fe falaxi, n mi sa mirixi naxan ma.” **6** Alatalaa falan ni ito ra, a naxa, “Nanara, lɔxɔna nde fama, muxune mi fa be xili bama a ‘Tofeti’ hanma ‘Ben-Hinɔn lanbanna.’ Koni e fa be xili bama nen ‘Faxa Ti Lanbanna.’ **7** N fa Yuda kaane nun Yerusalen kaane fe yitɔnxine kalama be nin. N yi e faxa e yaxune silanfanne ra naxanye waxi e raxɔri feni. N yi e binbine lu xɔline nun burunna subene bun. **8** N taani ito findima nen yire rabepinxin na, muxune kabɛma naxan ma e kolin a ma. Naxan yo nɛma dangue be, na kanna yigitegɛma nen a kolin a yire kalaxine ma. **9** N yaxune rafama nen naxanye waxi e raxɔri feni, e taan nabilin yengeni. Na kamen gbama nen han e yi e dii xɛmene nun dii tɛmene suben don, e yi e bode sube don.” **10** “Na xanbi ra, i xa feɲeni bɔ muxune yetagi naxanye biraxi i fɔxɔ ra, **11** i yi a fala e xa, i naxa, ‘Alatala Senben Birin Kanna ito nan falaxi, a naxa: N yamani ito nun taani ito halagima kiini ito nin, alo feɲen kalama kii naxan yi, naxan mi nɔɛ yitɔɲe. E binbine maluxunma nen Tofeti yi han na yi rafe. **12** N yireni ito ligama na kii nin, e nun a muxune, n mɔn yi taani ito fan liga alo Tofeti yireni ito. Alatalaa falan nan na ra. **13** Yerusalen banxine nun Yuda mangane banxine raharamuma nen alo Tofeti yire haramuxini ito, e yi wusulanna ganma banxin naxanye xuntagi sarene birin xa, e minse saraxane rabɔxɔn ala gbɛtene xa denaxanye birin yi.” **14** Yeremi yi fa, sa keli Tofeti yi Alatala a rasiga denaxan yi nabiya falane tideni. A yi ti Alatala Batu Banxin tanden ma, a yi a fala yamaan birin xa, a

naxa, **15** “Alatala Senben Birin Kanna, Isirayilaa Ala ito nan falaxi, a naxa, ‘N gbalon nafama nen taani ito xili ma e nun a rabilinna taane birin, n bata gbalon feen naxanye birin ma fe fala e xili ma, bayo e bata tondi e tuli matiye n ma falane ra tengbesenyani.”

20 Saraxaralina Imeri a dii xemen Pasaxuri, kuntigin naxan yi Alatala Batu Banxin xun na, na to Yereṃi a nabiya falane me, **2** a yi Nabi Yereṃi bonbo, a sa a sa kutun na Alatala Batu Banxin dexon Bunyamin So Deen Faxaraxiin binni. **3** Koni na xoton bode, Pasaxuri to Yereṃi bejin, Yereṃi yi a fala a xa, a naxa, “Alatala mi i xili saxi Pasaxuri, koni a bata i xili sa ‘Gaxun Yiren Birin Yi.’ **4** Bayo Alatala ito nan falaxi, a naxa, ‘N gaxun nasoma nen e nun i xoyine birin yi. E yaxune i xoyine faxama nen i yee xori. N Yuda kaane birin sama nen Babilon mangan sagoni, a yi e suxu a siga e ra konyiyani Babilon taani, hanma a e faxa silanfanna ra. **5** N taani ito nafunle birin sama nen e yaxune sagoni, e wali xonne nun e se fajine, e nun Yuda mangane nafunle birin. E yi e tongo yengeni, e siga e ra Babilon taani. **6** I tan Pasaxuri e nun muxun naxanye birin i ya banxini, e sigama nen konyiyani Babilon taani, i sa faxa na, i maluxun na, e nun i wule nabiya falane ti i xoyin naxanye birin xa.” **7** Alatala i bata n mayenden, n lu mayendenni. I bata n suxu senbeni, i yi n no feu! Muxune yoma n ma waxatin birin, e birin n magelema. **8** Bayo n nema falan tiye yeye, fo n gbelegbele, n yi gbalon nun halagina fe fala! Nayi, e n konbima, e n magele waxatin birin Alatalaa falana fe ra. **9** Koni xa n na a fala nun, n naxa, “N mi fa n mirima Alaa fe ma, n mi fa falan tima a xinli sonon,” a falan luma nen n yi nayi alo teen nan n bonen ganma, alo n teen nan namaraxi n xonne yi, n xadan a yisuxe, n mi no. **10** Bayo n muxu wuyaxi xuiin mema n mafale. E n xili bama “Gaxuna yiren birin yi.” E naxa, “E a tojege! En na a tojege.” N xoyine n matoma, xa n tantanye, e naxa, “Waxatina nde, a mayendenma nen. Nayi, en yi a no, en yi en gbeen joxo a ma.” **11** Koni Alatala bata lu n xon alo sofa senbema. Nanara, n jaxankata muxune tantanma nen, e mi n no sese ma. E fulama n na nen, na yi e yagi han! A findi marafeyaan na e xa han habadan, jinan mi tiye naxan xon. **12** Alatala Senben Birin Kanna i tan nan tinxin muxun kejaan fefesema, i muxun bonen nun a sondamen toma. Tin, n xa i to i gbeen joxe e ma bayo n bata n xun

mayenge feen lu i tan ma. **13** E betin ba Alatala xa, e Alatala tantun. Bayo a toxo muxune xunbama nen muxu jaxine yii. **14** Dangana n bari loxon xa. Nga n xalixi loxon naxan yi, na mi findixi duba loxo ra. **15** Dangan na kanna xa naxan sa xibaru fajina fe rali n fafe ma fa fala dii xemen bata bari a xa, a yi sewa na ma. **16** Na kanna xa lu alo taane Alatala naxanye kalaxi kininkinintareyani. A xa gbelegbele xuiin me xotoni, a yi yenge so sonxo xuiin me yanyin na. **17** A yi lan nun a xa n faxa nga kui, alogo nga kuiin xa findi n gaburun na n yi lu na yi habadan. **18** Nanfera n minixi nga kuini n yi toxon nun xolen kolon n yi n ma siimayaan birin naba yagini?

21 Alatala yi falan ti Yereṃi xa, Manga Sedeki to Malakiyaa dii xemen Pasaxuri rasiga a ma e nun saraxaraliin Sofoni, Maaseyaa dii xemena. E yi a fala Yereṃi xa, e naxa, **2** “Alatala maxodin nxu xa, bayo Babilon mangan Nebukadanesari bata nxu yenge folo. Waxatina nde Alatala nxu maliye nen, a yi a kabanako fena ndee raba nxu xa, alogo yaxuni ito xa a masiga nxu ra.” **3** Yereṃi yi e yabi, a naxa, “E a fala Sedeki xa, e naxa, **4** ‘Alatala, Isirayilaa Ala ito nan falaxi, a naxa: Babilon mangan nun Babilon kaan naxanye e taan makantan yinna rabilinxi yengeni iki, e ne yengema yenge so seen naxanye ra, n ne raxetema e tan nan ma, n yi e yaxuni itoe malan taani ito kui. **5** N tan yetena e yengema nen, n fitinaxin yi n senben nun n fanga gbeen yita e ra n ma xolon nun n ma bonje teeni. **6** Naxanye birin taani ito yi, n ne jaxankatama nen, a muxune nun a xuruseene, e birin yi faxa fitina fureni. **7** Alatalaa falan ni ito ra! Na na dangu, naxanye na lu e nii ra fitina furen nun yengen nun fitina kamen xanbi ra, n ne birin sama nen Babilon mangan Nebukadanesari sagoni, Yuda mangan Sedeki nun a kuntigine nun taani ito muxune birin, n yi e lu e yaxune sagoni, naxanye waxi e faxa feni. A e faxama nen silanfanna ra, a mi kininkinin e ma, a mi hinan e ra sese ma.” **8** “Yereṃi, a fala yamani ito xa, i naxa, ‘Alatala ito nan falaxi, a naxa, “E a mato, n bata siimayaan kiraan nun sayaan kiraan yita e ra. **9** Naxan yo na lu taani ito kui, silanfanna nun fitina kamen nun fitina furen nan na kanna faxama. Koni naxan na mini, a yi sa a yete dentege Babilon kaane xa, naxanye e rabilinxi yengeni, na kanna kisima nen, a tan yi lu a nii ra bete. **10** Bayo n na n yee rafindima nen taani ito ma a jaxin na, a fajin mi a ra. A sama nen

Babilon mangan sagoni, a yi a gan.” Alatalaa falan nan na ra.” **11** “Yeremi, a fala Yuda mangana denbayaan xa, i naxa, ‘E tuli mati Alatalaa falan na. **12** Dawuda bɔnsɔnna, Alatala ito nan falaxi, a naxa: E kiti kenden sa xɔtɔn yo xɔtɔn, e yi muxu kansunxin ba jaxankata tiin yii, alogo n ma xolon nama godo e ma e fe jaxine fe ra alo teen naxan e ganma naxan mi nɔe ratuye. **13** Alatalaa falan ni ito ra, a naxa: N bata keli e xili ma, e tan naxanye dɔxi lanbanni, e tan naxanye dɔxi fanyen ma fiila ma, e tan naxanye a falama, e naxa, “Nde nɔe fe nxu xili ma? Nde nɔe soe nxu luxunden kui?” **14** N na e saranma e kewanle ra nen. N teen soma nen e fɔtɔnne ra, a yi e rabilinna birin gan.’ Alatalaa falan nan na ra.”

22 Alatala ito nan falaxi, a naxa, “Siga Yuda mangana banxini, i sa falani ito ti na, i naxa, **2** ‘I tan Yuda mangana, i tan naxan dɔxi Dawudaa mangaya gbɛdeni, i tuli mati Alatalaa falan na, i tan nun i ya kuntigine nun i ya yamaan birin, naxanye soma deni itoe ra! **3** Alatala ito nan falaxi, a naxa, “E kiti kendene sa, e tinxinna raba. E muxu kansunxine xunba e jaxankata muxune yii. E nama jaxu xɔɔene nun kiridine nun kaɔa gilene ra, e nama gbalɔ feen liga, e nama sɔntaren faxa yireni ito yi. **4** Bayo xa e falani ito suxu ki faɔi, mangan naxanye dɔxi Dawudaa mangaya gbɛdeni, ne soma nen banxini ito tanden so deene ra, e dɔxi wontorone kui e nun soone fari, e tan nun e kuntigine nun e yamana. **5** Koni xa e mi falani itoe suxu, n bata n kolo n yeteni, banxini ito findima nen banxi xɔnna ra.” Alatalaa falan nan na ra.” **6** Bayo, Alatala ito nan falaxi lan Yuda mangana banxin ma, a naxa, “Banxini ito rayabu n tan yee ra yi alo Galadi yamanana, alo Liban geyaan xuntagina. Koni n na a findima nen tonbonna ra yati, alo taa rabɛjinxina. **7** N halagi tiine rasigama nen a xili ma, e birin nun e yenge so seene e yi a suman senbetenne sege a bun, e yi e gan.” **8** “Siya wuyaxine danguma nen taani ito dɛxɔn. E yi a fala e bode xa, e naxa, ‘Nanfera Alatala taa gbɛeni ito ligaxi iki?’ **9** Muxune e yabima nen nayi, e naxa, ‘Bayo e bata e me Alatala, e Alaa layirin na, e yi e xinbi sin ala gbɛtene bun, e yi e batu.” **10** E nama manga faxaxin wuga, e nama sunu Manga Yosiyaa fe ra, koni fo e bata mangan naxan xali konyiyani, e na nan wuga, bayo a mi fa xetema sɔnɔn! A mi fa a konna toma sɔnɔn! **11** Bayo Alatala ito nan falaxi lan Yuda mangan Yosiya a dii xɛmen Salun ma, naxan yi a fafe

Yosiya jɔxɔni mangayani, naxan bata keli be, a naxa, “A mi fa xetema sɔnɔn! **12** Koni e a xalixi konyiyani denaxan yi, a sa faxama menna nin. A mi fa yamanani ito toma sɔnɔn!” **13** “Gbalon na kannna xa, naxan a banxin tima tinxintareyani, a yi a banxi kuine fari sa kansun ti kitini, a yi a muxu boden ti konyi wanle ra, a mi a saren fi. **14** A a falama, a naxa, ‘N banxi gbɛen tima nen n yete xa naxan konkone gbo mumɛ! A yi foye sodene rafala a ma, a suman farinne sa banxin kankene yi, a yi a kasi a gbeela ra. **15** I mangayani nen ba, bayo suman wudin nafan i ma? I fafe mi yi a degema ba, a yi a min? Koni na yi tinxin, a kiti kenden kolon, nanara a feene birin yi lanxi. **16** A yi yiigelitɔne nun tɔɔ muxune xun mafalama kitini, nanara a feene birin yi lanxi. Muxun mi n kolonma na kiin xan yi ba?” Alatalaa falan nan na ra. **17** “Koni i yeene nun i bɔɔen tixi i yetɛna tɔnɔn nan tun na, i yi sɔntarene faxa, i muxune jaxankata, i e kansun.” **18** Nanara, Alatala ito nan falaxi lan Yuda mangan Yehoyakimi ma Yosiyaa dii xɛmena, a naxa, “Muxune mi a saya feen wuge, e naxa, ‘Ee! Ngaxakedenna xɛmen nun jaxanla, en nu tɔɔ de!’ E mi a saya feen wuge, e naxa, ‘Ee! N kann! Ee! Mangana!’ **19** A tan saya feen ligama nen alo sofanla gbɛena, a binbin bubuma nen, a sa woli ayi Yerusalem fari ma.” **20** “E te Liban geyaan xuntagi, e gbɛlegbe! E xuiin xa siga han Basan yamanana! E gbɛlegbe! Abarimi geyane xuntagi! Bayo e xɔyine birin bata xunna kala. **21** N falan ti nen e xa, benun e kontɔfili waxatin xa a li. E yi a falama nen, e naxa, ‘Nxu mi nxu tuli matima.’ E yi na kii nin xabu e dii jɔɔe waxatini. E mi n xuiin name. **22** E yeeratine bata lo ayi foyeni, e xɔyine birin yi xali konyiyani. E yagima nen na waxatini, e lu marafeyani, masɔɔ e fe jaxine xɔn. **23** I tan naxan dɔxi Liban fɔtɔnni i tan naxan dɔxi suman wudi banxin kui, i gbɛlegbe! e naxan na i sɔɔ waxatin naxan yi, jaxankatana alo jaxanla naxan dii barini!” **24** Alatalaa falan ni ito ra, a naxa, “N tan Habadan Ala, n bata n kolo n yeteni, fa fala i tan Yuda mangan Yoyakin, Yehoyakimi a dii xɛmena, hali i yi findixi n ma taxamaseri yiisolirasoon nan na n yiifanni, n yi i be nen na. **25** N na i sama nen i yaxune sagoni naxanye waxi i faxa feni, i gaxuma naxanye yee ra, Babilon mangan Nebukadanesari e nun Babilon kaane. **26** N na i wolima ayi nen yamana gbɛteni, e nun i nga naxan i barixi. E yi faxa yamanani e mi barixi denaxan yi. **27** E kon yamanan xɔnla e suxuma nen han! Koni e mi fa xetema mumɛ!” **28**

Yamaan naxa, “Nayi, Yoyakin bata findi goron kalaxin nan na ba, se ramexina? Nanfera e nun a diine wolima ayi nen yamana gbete yi e mi denaxan kolon?” 29 Yamanana, n ma yamanana, n ma yamanan muxune, e tuli mati Alatalaa falan na. 30 Alatala ito nan falaxi, a naxa, “Xemeni ito xinla xa sebe alo naxan mi dii barixi, alo muxun naxan ma dunuya yi gidin findixi bonon na, bayo a bonson yo mi nœ dœxe Dawudaa mangaya gbedeni, a yi lu Yuda yamanan xun na.”

23 Alatalaa falan ni ito ra, a naxa, “Gbalon na yeeratine xa, naxanye n ma yamaan naxuyama ayi, e e ralo ayi!” 2 Nanara, Alatala, Isirayilaa Ala ito nan falaxi lan yeeratine ma naxanye a yamaan masuxuma, a naxa, “E bata n ma yamaan naxuya ayi, e yi e kedi, e mi e yengi dœxi e xœn. Nayi, n na e kewali jaxine saranma e ra nen.” Alatalaa falan nan na ra. 3 “N na n ma yamaan muxu dœnxene malanma nen keli yamanane yi, n na e raxuyaxi ayi denaxanye yi, n mœn yi fa e ra e yireni. E yi sabati menni, e wuya ayi. 4 N yi yeeratine lu e xun na naxanye e masuxuma ki fapi, naxanye mi fa gaxue, e mi yilanyilanje. N ma yamaan muxu yo mi dase e ra.” Alatalaa falan nan na ra. 5 Alatalaa falan ni ito ra, a naxa, “Lœxœne fama, n manga tinxinin naminima Dawuda bonsonni waxatin naxan yi alo wudi jingin na mini wudin ma, a mangayaan naba xaxilimayani, a yi kiti kenden sa, a tinxinyaan liga yamanani. 6 Yuda bonsonna rakisima nen a waxatini, Isirayila kaane yi lu bœne xunbenli. E a xili bama nen fa fala, ‘En ma tinxinna, Alatala.’” 7 Nanara, Alatalaa falan ni ito ra, a naxa, “Lœxœne fama, muxu mi a fale lœxon naxanye yi, fa fala, ‘N bata n kolo habadan Alatala yi, naxan Isirayila kaane ramini Misiran yi!’ 8 Koni a a falama nen, a naxa, ‘N bata n kolo habadan Alatala yi, naxan Isirayila kaane ramini kœmen fœxon yamanani, e nun a e kedi yamanan naxanye birin yi!’ Na waxatini, e mœn dœxœma nen e bœxœni.” 9 Falana lan nabine ma: N bœnen bata kala n kui, n fatin birin xuruxurunma. N bata lu alo n xunna kelixi manpaan nan na, masœto Alatala nun a fala sarijanxina fe ma. 10 Bayo, yamanan bata rafe yalundene ra. Yamanan bata yi xara dangan xœn. Xuruse rabadene birin bata kala. Muxune mafura fe jaxin nabe, e sobe soxi tinxintareyaan nan tun ma. 11 “Nabine nun saraxaraline birin, e sese mi fa sarijan! N fa e kewali jaxine toma hali n ma banxini.” Alatalaa falan nan na ra. 12 “Nanara, e kiraan masalaxunma

nen, a yidimi, e yi radin, e bira. Bayo n gbalon nafama nen e ma, n na e kewanle saran e ra jœe naxan na.” Alatalaa falan nan na ra. 13 N bata fe magaxuxine to Samari taan nabine ye, e nabiya falane ti Baali suxuren senben xœn ma, e yi n ma yamana Isirayila ralo ayi. 14 Koni Yerusalœn nabine ye, n fe jaxine nan toxi. E yalun, wulen yi findi e siga seen na. E fe jaxi rabane rawekilema, alogo muxu yo nama xete fe jaxin fœxo ra. E birin luxi n yeœ ra yi alo Sodoma kaane, Yerusalœn kaane luxi alo Gomora kaane. 15 Nanara, Alatala Senben Birin Kanna ito nan falaxi lan nabini itoe ma, a naxa, “N dabarin nun ige xœlen fima yamani ito ma nen e balon na, bayo sarijantareyaan soxi yamanan yiren birin yi Yerusalœn nabine nan xœn.” 16 Alatala Senben Birin Kanna ito nan falaxi, a naxa, “E nama e tuli mati nabine falane ra naxanye nabiya falane tima e xa. E e mayendenma nen, e e xibaru fata e yete miriyane ra, koni Alatala de xuiin mi na ra. 17 N mi rafan naxanye ma, e a falama ne xa, fa fala, Alatala naxa, ‘E bœne xunbenla sœtœma nen.’ Naxanye biraxi e bœne yi feene fœxo ra tengbesenyani, e a falama ne xa, e naxa, ‘Fefe jaxi mi e sœte.’ 18 Koni nde yi tixi Alatala yetagi alogo a xa fe toon ti, a yi a falan me? Nde bata a tuli mati, a yi a falan name?” 19 Alatala gbalon soma nen muxu jaxine xun na alo foye kala tiina. A xœlon jaxankatan yi fa e ma alo wuluwunla. 20 Alatalaa xœlon mi xetœma e fœxo ra fœ feene kamali Ala naxanye birin nagidixi a bœneni. E xaxili sœtœma nen na feene xœn waxati famatœne yi. 21 Ala naxa, “N tan mi nabini itoe xexi, koni e gixin sigama xerayaan na. N mi fala tixi e xa, koni e nabiya falane tima. 22 Xa e yi tixi n yetagi nun, e yi n ma falan nalima nen n ma yamaan ma nun e yamaan ba e kira jaxine xœn, e yi e raxete e kewali jaxine fœxo ra.” 23 Alatalaa falan ni ito ra, a naxa, “Ala xa mi n na ba, naxan maso e ra? Ala nan mœn n na yire makuyene fan yi.” 24 Alatalaa falan ni ito ra, a naxa, “Muxun nœ a luxunje wundo yireni ba, alogo n nama a to? N mi bœxo xœnna nun kore xœnna rafexi ba?” Alatalaa falan nan na ra. 25 “N bata nabine fala xuiin me naxanye nabiya falane tima n xinli wulen fari, e naxa, ‘N bata xiye sa, n bata xiylene nde to.’ 26 Nabine bœjene luma e tiye wule falan na nabiyani han waxatin mundun, e yi mayenden falane ti fata e yete bœne yi feene ra? 27 E yengi a ma a e n xinla rajinanje nen yamaan na e xiylene xœn e naxanye falama e bode xa, alo e benbane jinanxi n xinla ra kii naxan yi Baali suxurene fe ra. 28

Xa nabiin naxan xiye saxi, na xa a xiyeen yēba. Xa n ma falan naxan yi, na kanna xa a rali a jɔndin kiini.” Alatalaa falan ni ito ra. A naxa, “Malo kessen nun malo dagin lanje e bode ma di?” **29** Alatalaa falan ni ito ra, a naxa, “N ma falan mi luxi ba alo teena, alo sinben naxan fanyen boma?” **30** Nanara, n bata keli nabini itoe xili ma naxanye falane mujama e bode ma, e mon naxa a ne fataxi n tan nan na.” Alatalaa falan nan na ra. **31** Alatalaa falan ni ito ra, a naxa, “N bata keli nabine xili ma naxanye e yete de xuiin findima n ma falan na.” **32** Alatalaa falan ni ito ra, a naxa, “N bata keli nabine xili ma naxanye wule xiyene yebama, naxanye falane tima e xunna ayi, e yi n ma yamaan nalo ayi e wulene xon. Anu, n tan mi e rasigaxi, n mi e yamarixi, e tonɔ yo mi yamani ito ma,” Alatalaa falan nan na ra. **33** Alatala naxa, “Xa yamani ito hanma nabina nde hanma saraxaralina nde i maxodin, a naxa, ‘Waliyiya falan mundun tixi nxu xili ma keli Alatala ma?’ I xa e yabi, i naxa, ‘Waliyiya falan mundun? Alatalaa falan ni ito ra, a naxa, “N na n mema nen e ra.”” **34** Xa nabina nde hanma saraxaralina nde hanma muxu gbete a fala, a naxa, ‘Waliyiya falan ni ito ra keli Alatala ma,’ n na kanna kewanla saranma nen a ra e nun a denbayana. **35** E a falama e bode xa, e naxa, ‘Alatala yabin mundun tixi?’ hanma ‘Alatala nanse falaxi?’ **36** Koni e nama fa waliyiya falana fe fala Alatala xun ma sonon, bayo birin waliyiya falan findixi e gbee falan nan na. E habadan Alaa falane maxetema na kii nin, Alatala Senben Birin Kanna, en ma Ala, **37** e lu a fale nabina nde xa, e naxa, ‘Alatala i yabixi nanse ra?’ hanma ‘Alatala nanse falaxi?’ **38** Xa e mon a fala, e naxa, ‘Waliyiya falan ni ito ra keli Alatala ma.’ Nayi, Alatala ito nan falaxi, a naxa, ‘Amasoto e a falama, e naxa, “Waliyiya falan ni ito ra keli Alatala ma,” hali n to a falaxi a e nama na fala, **39** nayi, n jinanma nen e xon fefe, n yi e kedi n yetagi, e tan nun e taana n denaxan so e nun e benbane yii. **40** N yi habadan yagin sa e fari, habadan marafeyaan naxan mi jinanje muxune ra mum!”

24 Babilon mangan Nebukadanesari yelin xanbini Yehoyakimi a dii xemen Yoyakin suxe, Yuda mangana, e nun a kuntigine nun yiirawanle nun xabune, a siga e ra konyiyani Babilon taani keli Yerusalen taani, Alatala yi debe firin yita n na Alatala Batu Banxin yetagi, e rafexi xode bogine ra. **2** Debe kedenna yi rafexi xode bogi fajine ra alo bogin

naxanye bolonma xode malan waxati singeni. Koni deben boden xodene mi yi fan, e mi yi nxe donje. **3** Alatala yi a fala, a naxa, “Yeremi, i nanse toma?” N yi a yabi, n naxa, “Xode bogine. Xode bogi fajine na, naxanye fan han! A jaxine fan na naxanye kalaxi han e mi nxe donje.” **4** Alatala yi falan ti n xa. **5** Alatala, Isirayilaa Ala ito nan falaxi, a naxa, “I xode bogi fajini itoe toxi kii naxan yi, n Yuda muxune fan yisuxuma na kii nin, n naxanye rasiga Babilon kaane yamanani. **6** N na n joxo luma nen e xon ki fajni, n xete e ra yamanani ito yi. N na e senbe soma nen, n mi fa e halagima. N na e sima nen, n mi fa e talama. **7** N boje fajin fima nen e ma alogo e xa a kolon a Alatala nan n tan na. Xa e xete n ma e bojen birin na, e findima nen n ma yamaan na, n yi findi e Ala ra.” **8** Alatala ito nan falaxi, a naxa, “Xode bogi jaxini itoe tan, naxanye kalaxi han e mi nxe donje, n Yuda mangan Sedeki nun a kuntigine suxuma na kii nin e nun Yerusalen yamaan muxu donxene, naxanye luxi yamanani, e nun naxanye dxi Misiran yamanani. **9** E fe magaxuma ayi nen e findi gbalon misaala ra boxon yamanane muxune birin xa. N na e raxuya ayi denaxanye birin yi, men kaane e mafalama nen, e yi yo e ma, e yi e magele, e e danga. **10** N na e raxoxima nen yengen nun fitina kamen nun fitina furen na han e jan yamanani n denaxan so e yii e nun e benbane.”

25 Ala yi falan ti Yeremi xa lan Yuda yamaan birin ma, Yosiya dii xemen Yehoyakimi a mangayaan jee naaninden Yuda yamanani, naxan mon findixi Nebukadanesari a mangayaan jee singen na Babilon yi. **2** Nayi, Nabi Yeremi yi falan ti Yerusalen kaane nun Yuda yamaan birin xa, a naxa, **3** “Xabu Amon ma dii xemen Yosiya mangayaan jee fu nun saxandena, Yuda mangana, han to, na jee moxonen nun saxanna nan ito ra Alatala falan tima n xa, n fan a falama e xa yeye, koni e mi e tuli matixi n na. **4** Alatala bata a walikene birin nafa e ma waxatin birin, nabine, koni e mi e xuiin name, e mi e tuli mati e ra. **5** E yi a falama nen, e naxa, ‘E birin xa xete e kira jaxine nun e kewali jaxine foxo ra, alogo e xa lu boxoni Alatala denaxan soxi e nun e benbane yii, habadan han habadan. **6** E nama bira ala gbetene foxo ra, e yi e xinbi sin e bun, e yi e batu. E nama n naxolo batu seene ra e naxanye rafalaxi. Nayi, n mi sese jaxi ligama e ra.’ **7** Koni e mi e tuli mati n na, e yi n naxolo batu seene ra e naxanye rafala, e yi toroyaana nafa e yete ma.”

Alatalaa falan nan na ra. **8** Na ma, Alatala Senben Birin Kanna ito nan falaxi, a naxa, “Bayo ε mi ε tuli matixi n ma falan na, **9** n yamanan muxune birin xilima nen keli sogeteden kōmenna ma e nun Babilōn mangan Nebukadanesari, n ma walikena. N na e rafama nen yamanani ito nun a muxune nun a rabilinna siyane birin xili ma, alogo n xa e raxōri fefe. N yi e fe findi fe magaxuxin na muxune kabema naxan ma, e kolin e ma, e nun yire rabepinxin na han habadan. Alatalaa falan nan na ra. **10** N danna sama nen sewa sigine nun jaxan sigine nun jaxalandi ti sigine ra xemen nun a jaxanla xa, e nun se din xuine nun lenpu degene. **11** Yamanani ito birin kalama nen, a raxōri, siyani itoe yi findi konyine ra Babilōn mangan xa jεε tonge solofere.” **12** “Koni na jεε tonge soloferene na jan waxatin naxan yi, n Babilōn mangan nun a yamaan hakene saranma e ra nen, n Babilōn kaane yamanan findi yire rabepinxin na habadan. Alatalaa falan nan na ra. **13** N feen naxanye birin fala na yamanan xili ma, n na birin ligama nen a ra, feen naxanye birin sebexi kitabuni ito kui, Yeremi naxanye fala siyane birin xili ma. **14** Bayo Babilōn kaane fan luma nen siya senbemane nun manga gbeene bun, n yi e fan kewanle nun e wali xonne saran e ra.” **15** Alatala, Isirayilaa Ala ito nan falaxi n xa, a naxa, “Yeremi, igelengenni ito rasuxu n yii, naxan nafexi n ma xolōn na, i yi a so siyane birin yii, n na i rasigaxi naxanye fema, alogo e xa a min. **16** E na a min, e xunna firifirima nen, e lu alo dolo minna silanfanna yεε ra, n yengen naxan nasigama e ma.” **17** N yi igelengenna rasuxu Alatala yii, n yi a so siyane birin yii, alogo e xa a min, Alatala n nasiga naxanye ma. **18** N na a so Yerusalen nun Yuda taane muxune yii, a mangane nun a kuntigine, alogo menne xa findi yire kalaxine ra, muxune kabema naxanye ma, e kolin e ma, e yi a danga alo a kii naxan yi to. **19** N mōn yi a so Misiran mangan yii e nun a bundōxōne nun a kuntigine nun a yamaan birin, **20** e nun siyaan naxanye basanxi e ra. N yi a so Yusu yamanan mangane birin yii, e nun Filisiti yamanan taa mangane birin, Asikalōn taan nun Gasa taan nun Ekirōn taana e nun naxanye na lu e nii ra Asadodi taani. **21** N yi a so Edōn kaane nun Moyaba kaane nun Amonine yii, **22** e nun Tire taan nun Sidōn taan mangane birin, e nun fōxō ige tagi bōxōne mangane baan kidi ma. **23** N yi a so Dedan kaane nun Tema kaane nun Busi kaane yii e nun muxun naxanye birin e xunne dēxōn bima. **24** N yi

a so Arabi mangane birin yii, e nun siya basanxin naxanye dōxi tonbonni, **25** e nun Simiri mangane nun Elan mangane nun Mede yamanan mangane birin **26** e nun sogeteden kōmen fōxōn mangane birin, naxanye maso, naxanye makuya, bōxō xōnna yamanane birin. Ne xanbi ra, Sesaki mangan fan a minma nen. **27** Ala ito nan falaxi, a naxa, “Yeremi, a fala e xa, i naxa, ‘Alatala Senben Birin Kanna, Isirayilaa Ala naxa, “E n ma xōlo igelengenni ito min, a ε xunna firifirima nen alo dōlōna, ε yi baxun, ε bira. E mi fa kelima sōnōn yengena fe ra n naxan nafama ε xili ma.” **28** Xa e tondi igelengenna rasuxε i ra, e yi e min, nayi a fala e xa, i naxa, ‘Alatala Senben Birin Kanna ito nan falaxi, a naxa, “Fō ε xa a min, ε a min! **29** Bayo, xa n gbalon fōlōma taan nan ma n xinla binyaxi denaxan yi, nayi, ε fan kewanle mi saranjεε ra ba? E mi tange na ma sese ma. Bayo n yengen nasigama nen bōxō xōnna muxune birin xili ma,” Alatala Senben Birin Kanna falan nan na ra.” **30** “I tan xa nabiya falani itoe birin ti e xili ma, i naxa, ‘Alatala sōnxō xuiin bata keli kore, a bata a xui ramini a dōxōde sarijanxini! A xōlo xuiin naminima a muxune ma. A sōnxōma alo naxanye manpa bogini bodonma alogo e xa a igen ba, a sōnxōma bōxō xōnna muxune birin xili ma. **31** A xuiin sigama han bōxōn danna, bayo kitina Alatala nun siyane tagi, e nun adamadiine birin kitima nen. A muxu jaxine faxama nen silanfanna ra,’ Alatalaa falan nan na ra.” **32** Alatala Senben Birin Kanna ito nan falaxi, a naxa, “Gbalon bata keli naxan luma sigε keli siyana nde yi siga gbete yi, alo foye kala tiin naxan bata sa keli bōxōn danne ra.” **33** Na lōxōni, Alatala muxu faxaxine binbine luma nen yiren birin yi, keli bōxōn fōxō kedenni han bode fōxōni. Muxu yo mi e sayaan wugama, e binbine mi malanma, e mi maluxunma. E binbine yi lu bōxōn ma alo jamana. **34** E tan yεεratine, ε wuga, ε gbelegbele, ε yi ε makutukutu ε tan naxanye yamaan xun na! Bayo ε kōε raxaba waxatin bata a li. E birama nen, ε fe yi kala alo fεjε fajin na raxuya ayi. **35** Sigade mi fa yεεratine xa e gima denaxan yi. Luxunde yo mi fa e xa e tan naxanye yamaan xun na. **36** E yεεratine wuga xuiin name, yamaan kuntigine gbelegbele xuina, bayo Alatala e bōxōn kalama. **37** Langa sabatixine yidunduxi Alatalaa xōlo magaxuxin bun. **38** Ala bata a yamanan nabepin alo yatan na a dingiraan masara, e yamanan yi kala halagi tiin bun a xōlo gbeeni.

26 Yosiya dii xemen Yehoyakimi a mangayaan folo waxatini Yuda yamanani, Alatala yi falan ti Yeremi xa. **2** Alatala ito nan falaxi, a naxa, “Sa ti Alatalaa banxin yinna kui, i falan ti Yuda yamanan taane muxune xa naxanye birin fa e xinbi sinma Alatalaa banxini. N na i yamari falan naxan birin ti feen na, i xa na birin fala e xa, i nama sese ba a ra. **3** Waxatina nde, e tuli matima nen, e birin yi xete e kira jaxine foxo ra. Nayi, n gbalon naxan nagidixi e ma e fe jaxine fe ra, n xetema nen na feen foxo ra, na mi fa e soto. **4** A fala e xa, i naxa, ‘Alatala ito nan falaxi, a naxa: Xa e mi e tuli mati n na, xa e mi n ma sariyane suxu, n naxanye soxi e yii, **5** e yi n ma walikene xuiin name, nabine, n naxanye rasigaxi e ma waxatin birin, e mi tin e tuli matiye naxanye ra, **6** nayi, n banxini ito kalama nen alo Silo taana, n yi taani ito findi danga taan na boxon siyane birin tagi.” **7** Saraxaraline nun nabine nun yamaan birin yi Yeremi xuiin me falani itoe tiye Alatalaa banxini. **8** Yeremi yi yelinma falane tiye waxatin naxan yi Alatala a yamari naxanye fala fe ra, saraxaraline nun nabine nun yamaan birin yi a suxu, e naxa, “I faxama nen yati! **9** Nanfera i nabiya falane tima Alatala xinli fa fala banxini ito kalama nen alo Silo taana, taani ito yi kala, a findi yire rabepinxin na?” Yamaan birin yi e malan Yeremi rabilinni Alatalaa banxini. **10** Yuda yamanan kuntigine to na feene me, e yi keli mangana banxini, e sa dexo Alatalaa banxini denaxan xili “So De Nenena.” **11** Nayi, saraxaraline nun nabine yi a fala kuntigine nun yamaan birin xa, e naxa, “Xemeni ito a kitin xa lan sayaan ma! Bayo a bata nabiya falane ti taani ito xili ma, alo e fan yetena a mexi kii naxan yi!” **12** Yeremi yi a fala kuntigine nun yamaan birin xa, a naxa, “E falan naxanye birin mexi, Alatala nan n nafaxi a n xa fa na nabiya falane ti banxini ito nun taani ito xili ma. **13** Iki, e sigati kiin nun e kewanle maxete, e yi e tuli mati Alatala ra, e Ala. Nayi, Alatala gbalon naxan nagidixi e xili ma, a xetema nen na feen foxo ra, na mi fa e sotoma. **14** N tan fa e sagoon nin. Naxan fan e yee ra yi, a tinxin, e na liga n na. **15** Koni, e xa a kolon nen, xa e n faxes, sontaren faxes feen goronna luma nen e xun ma, e tan nun taani ito nun a muxune, bayo Alatala nan n nafaxi yo, alogo n xa falani itoe ti e xa.” **16** Kuntigine nun yamaan birin yi a fala saraxaraline nun nabine xa, e naxa, “Hali xemeni ito a kitin mi lan sayaan ma! Bayo a falan tixi en xa Alatala nan xili yi, en ma Ala.” **17** Yamanan fonna

ndee yi keli, e yi a fala yamaan malanxin birin xa, e naxa, **18** “Yuda mangan Xesekiya waxatini, Moreseti kaan Mike a fala nen Yuda yamaan birin xa, a naxa, ‘Alatala Senben Birin Kanna ito nan falaxi, a naxa, “Siyon taani buxama nen alo xena, Yerusalen findima nen taa xonna ra. Ala Batu Banxin tixi geyaan naxan ma, na findima nen fotonna yire matexin na.”” **19** Yuda mangan Xesekiya nun Yuda yamaan birin Mike faxes nen na ma ba? Xesekiya mi gaxu Alatala yee ra ba, a yi Alatala mafan? Nayi, Alatala gbalon xunba nen e ra, a yi naxan nagidixi e ma. En fe jaxin nan nafama en yete ma, xa en xemeni ito faxes!” **20** Xemena nde fan yi na naxan yi nabiya falane tima Alatala xinli, naxan ma falaye yi luxi alo Yeremi a falane, Semaya Kiriyati-Yeyarin kaana dii xemen Yuriya. A fan nabiya falane ti nen taani ito nun yamanani ito xili ma. **21** Yehoyakimi nun a sofa kuntigine nun a kuntigine birin to na falane me, mangan yi wa a faxes feni. Koni, Yuriya to na feen me, a yi gaxu, a yi a gi, a siga Misiran yamanani. **22** Manga Yehoyakimi yi muxune rasiga Misiran yi, Akibori a dii xemena Elanatan e nun muxuna ndee. **23** E sa Yuriya suxu Misiran yi, e sa fa a ra Manga Yehoyakimi xon, a yi a faxes silanfanna ra, e sa a binbin woli ayi yamaan yiigelitone gaburu yireni. **24** Anu, na waxatini, Safan ma dii xemena Axikan Yeremi ratanga nen alogo e nama a lu yamaan sagoni, e yi a faxes.

27 Yosiya dii xemen Yehoyakimi a mangayaan folo waxatini Yuda yamanani, Alatala yi falan ti Yeremi xa. **2** Alatala yi falani ito ti n xa, a naxa, “Gbelemene rasege, i lutine ti e ra goron tongo seen na, i e sa i koe ma. **3** I mon yi e rasiga Edon mangan nun Moyaba mangan nun Amoni mangan nun Tire mangan nun Sidon mangan ma e xerane xon e naxanye rafaxi Yerusalen yi Yuda Manga Sedeki fema. **4** I yi n ma yamarin nali e ma, alogo e xa sa a fala e kanne xa, i naxa, Alatala Senben Birin Kanna, Isirayilaa Ala ito nan falaxi, a naxa, e sa ito fala e kanne xa, e naxa, **5** ‘N tan nan boxo xonna daxi n senbe gbeeni, e nun muxune nun suben naxanye a fari. Naxan na n kenan, n yi boxo xonna so na yii. **6** Iki n fa e yamanane birin sama nen Babilon mangan Nebukadanesari sagoni, n ma walikena. N mon burunna subene sama nen a sagoni. **7** N siyane birin sama nen a noon bun e nun a diin nun a mamandenna noon bun, han a waxati saxin yi a li, a fan ma yamanan yi sa lu siya senbemanen nun manga

gbeene noon bun. **8** Xa siyana nde hanma yamanana nde mi xuru Babilon mangan Nebukadanesari ma, a mi tin Babilon mangana konyiyaan xa lu a xun ma alo goron tongo gbelemena, n na siyaan kewanla saranma a ra nen yengen nun fitina kamen nun fitina furen na, han n yi yelin e halage Babilon mangan xon.' Alatalaa falan nan na ra. **9** E tan nama e tuli mati e nabine nun e yiimatone nun e xiyene nun e koron bonbone nun e kœeramuxune ra, naxanye a falama e xa, e naxa, 'E mi luma Babilon mangana noon bun.' **10** Bayo, e wulen nan falama e xa, naxan e masigama e boxon na. N na e kedima nen e yamanani, n yi e raxori. **11** Koni siyaan naxan na tin Babilon mangana konyiyaan yi sa a fari alo goron tongo gbelemena, a xuru a ma, n matabun fima nen na ma a yete boxoni, a yi a bi, a lu doxi na," Alatalaa falan nan na ra. **12** N na nan fala Yuda mangan Sedeki fan xa, n naxa, "E tin Babilon mangana konyiyaan xa sa e fari alo goron tongo gbelemena, e xuru e nun a yamaan ma, e kisima nen. **13** Nanfera e nun i ya yamaan lanma e faza yengen nun fitina kamen nun fitina fureni, alo Alatala a falaxi kii naxan yi siyane xa naxanye tondin xure Babilon mangan ma? **14** E nama e tuli mati nabine ra, naxanye a falama e xa, e naxa, 'E mi luma Babilon mangana noon bun!' Bayo, e wule nabiya falane nan tima e xa. **15** N tan mi e xexi, e wulen nan falama n xinli. Nayi, n na e kedima nen e yamanani, e nun e nabiin naxanye falane tima, e birin yi raxori." Alatalaa falan nan na ra. **16** N ni ito nan fala saraxaraline nun yamaan birin xa, n naxa, "Alatala ito nan falaxi, a naxa, 'E nama e tuli mati e nabine ra naxanye a falama e xa, e naxa, "Alatalaa banxin muranne famatoon ni i ra sa keli Babilon yi!" Bayo e wule nabiya falane nan tima e xa. **17** E nama e tuli mati ne ra. E xuru Babilon mangan ma, e yi kisi. Nanfera e waxi taani ito kala feni? **18** Xa nabiin nan e ra, xa Alatalaa falana e yi, nayi e xa Alatala Senben Birin Kanna mafan alogo muranna naxanye fa luxi Alatalaa banxini, e nun Yuda mangana banxin nun Yerusalem yi, a ne fan nama xali Babilon yamanani. **19** Bayo Alatala Senben Birin Kanna ito nan falaxi lan senbetenne ma, e nun ige ramaraden nun ige maxali wontorone nun muran gbeten naxanye luxi taani ito yi, **20** Babilon mangan Nebukadanesari mi naxanye tongo a Yehoyakimi a dii xemen Yoyakin xali konyiyani waxatin naxan yi, Yuda mangana, e nun Yuda yamanan nun Yerusalem taan muxu gbeene birin a siga naxanye ra konyiyani

Babilon yi, **21** Alatala Senben Birin Kanna, Isirayilaa Ala ito nan falaxi yati muranne xili ma naxanye luxi Alatalaa banxini, e nun Yuda mangana manga banxini e nun Yerusalem taani, a naxa, **22** "Ne tongoma nen, e xali Babilon yi, e sa lu na yi han n na keli loxon naxan yi, n mon yi e rafa be." Alatalaa falan nan na ra."

28 Na jee kedenna ra, Yuda mangan Sedeki a mangayaan jee naaninden kike suulunden loxona nde yi, Gabayon kaana Asuru a dii xemen Nabi Xananiya yi falan ti n xa Alatalaa banxini saraxaraline nun yamaan birin yee xori, a naxa, **2** "Alatala Senben Birin Kanna, Isirayilaa Ala ito nan falaxi, a naxa, 'Babilon mangan goron tongo gbelemen naxan sama muxune kœe ma, n fama na kaladeni nen! **3** Benun jee firin, n mon xetema nen muranne birin na be Alatalaa banxini, Babilon mangan Nebukadanesari naxanye tongoxi be, a siga e ra Babilon yi. **4** N mon xetema nen Yuda mangan na, Yoyakin Yehoyakimi a dii xemena, e nun Yuda muxu suxine birin, naxanye sigaxi Babilon yi, bayo Babilon mangan goron tongo gbelemen naxan sama muxune kœe ma, n fama na kaladeni nen! Alatalaa falan nan na ra." **5** Nabi Yere mi yi Xananiya yabi saraxaraline nun yamaan birin yee xori naxanye yi Alatalaa banxini. **6** Nabi Yere mi naxa, "Amina! Alatala xa na liga! Alatala xa i fala xuine rakamali, a yi xete Alatalaa banxin muranne nun muxu suxine ra be sa keli Babilon yi. **7** Koni i tuli mati falani ito ra n naxan falama e nun yamaan birin xa: **8** Nabiin naxanye fa benun i tan nun n tan xa fa, xabu a foloni, ne nabiya falane ti nen lan yengen nun gbalon nun fitina furene fe ma yamana wuyaxi nun mangaya gbeene xili ma. **9** Koni xa nabina nde boje xunbenla fe fala, fo a falan xa kamali nen benun muxune xa a kolon a Alatala nan a xexi." **10** Nayi, nabi Xananiya yi goron tongo gbelemen ba Nabi Yere mi kœe ma, a yi a yigira. **11** Xananiya yi a fala yamaan birin yee xori, a naxa, "Alatala ito nan falaxi, a naxa, 'Babilon mangan Nebukadanesari noon naxan sama siyane birin fari alo goron tongo gbelemena, benun jee firin, n na kalama na kii nin.'" Nabi Yere mi yi siga. **12** Nabi Xananiya yelin xanbini goron tongo gbelemen gi re, a naxan ba Nabi Yere mi kœe ma, Alatala yi falan ti Yere mi xa, a naxa, **13** "Sa a fala Xananiya xa, i naxa, 'Alatala ito nan falaxi, a naxa: I bata wudi gbelemen gi ra, koni i fa wure gbelemen nan sotoma a funfuni. **14** Alatala Senben Birin Kanna, Isirayilaa Ala ito nan

falaxi, a naxa: N goron tongo wure gbelemen sama nen siyani itoe birin kœ ma, alogo e xa lu Babilon mangan Nebukadanesari a nœon bun, e lu wale a xa, n mœn burunna subene sama nen a sagoni.” 15 Nabi Yere mi yi a fala Nabi Xananiya xa, a naxa, “Xananiya, i tuli mati! Alatala mi i xexi, anu i bata yamani ito mayenden alogo e xa e yigi sa wulene yi. 16 Nanara, Alatala ito nan falaxi, a naxa, ‘N ni i janma nen bœxo xœnna fari, i faxama nen jœeni ito ra, bayo i ya falane yamaan namurutema Alatala ma.” 17 Nabi Xananiya yi faxa na jœen kike solofereden na.

29 Nabi Yere mi a falan ni i ra a naxan sebe kœdin kui Yerusalœn taani, a yi a rasiga fœnne ma naxanye xali konyiyani, e nun saraxaraline nun nabine nun yamaan dœnxœn birin, Nebukadanesari naxanye suxu Yerusalœn yi a siga e ra konyiyani Babilon yi. 2 A lixi, Manga Yoyakin nun a nga nun mangan bundœxœne nun Yuda kuntigine nun Yerusalœn kuntigine nun yiirawanle nun xabune fan bata yi mini Yerusalœn yi siga konyiyani. 3 A kœdin taxu nen Safan ma dii xœmena Elasa nun Xiliki a dii xœmen Gemariya ra, Yuda mangan Sedeki naxanye xœ Babilon mangan Nebukadanesari ma. Kœdin kui falan ni i ra: 4 Alatala Senben Birin Kanna, Isirayilaa Ala ito nan falaxi muxu suxine birin xa, n naxanye rasiga konyiyani keli Yerusalœn yi siga Babilon yi, a naxa, 5 “E banxine ti, e dœxo e kui. E nakœne si, e yi e bogine don. 6 E jaxanle futu, e yi diine sœtœ. E jaxanle fen e dii xœmene xa, e yi e dii temene fi xœmœ taa ra, alogo e fan xa diine bari. E wuya ayi e dingirani, e yatœn nama xurunjœe ayi de! 7 E bœnjœe xunbenla raso taani, n na e xalixi konyiyani denaxan yi, e yi Alatala maxandi na taan xa, bayo e bœnjœe xunbenla sœtœma na nan xœn.” 8 Bayo Alatala Senben Birin Kanna, Isirayilaa Ala ito nan falaxi, a naxa, “E nama tin, nabine nun yiimatone xa e mayenden naxanye e tagi. E nama e tuli mati e xiyene ra! 9 Bayo e wule nabiya falane nan tima e xa n xinli. N tan mi e xexi,” Alatalaa falan nan na ra. 10 Koni Alatala ito nan falaxi, a naxa, “Babilon yamanana no sœtœn na jœœe tonge soloferœ ti, n na e malima nen, n yi n ma fala fajœn nakamali e xa, n xœte e ra be. 11 Bayo n na a kolon n feen naxanye yitœnxi e xa. N bœnjœe xunbenla nan yitœnxi e xa, tœrœyaan mi a ra, alogo n xa yigin lu e ma waxati famatœne yi.” Alatalaa falan nan na ra. 12 “Nayi, e na n xili, e yi fa n maxandi, n na e yabima nen. 13 E na n fen, e n toma nen, xa e

n fen e bœnjœen birin na.” 14 Alatalaa falan ni ito ra. “N tinma nen e xa n to, n yi xœte e ra keli konyiyani, n yi e malan keli siyane nun yirene birin yi, n na e raxuya ayi denaxanye yi, n yi xœte e ra be, n na e kedixi denaxan yi siga konyiyani.” Alatalaa falan nan na ra. 15 Na ma, e a falama nen, e naxa, “Alatala bata nabine fi nxu ma Babilon yi!” 16 Koni Alatala ito nan falaxi lan mangan ma naxan dœxi Dawudaa manga gbœdeni, e nun yamaan naxan birin dœxi Yerusalœn taani ito yi, e ngaxakœdena naxanye mi siga e fœxo ra konyiyani, 17 Alatala Senben Birin Kanna ito nan falaxi, a naxa, “N yœngen nun fitina kamœn nun fitina furen nafama e ma nen, n yi e lu alo xœde bogi kalaxin naxanye mi nœe donjœe. 18 N na e sagatanma nen yœngen nun fitina kamœn nun fitina furen na, n yi e fe findi fe magaxuxin na bœxœn yamanane birin xa, e yi findi danga taan misaala ra, e fe yi yamanane birin muxune yigitege, e yi kabœ e ma, e kolin e ma, e e konbi, n na e raxuya ayi denaxanye birin yi.” 19 Alatalaa falan ni ito ra. “Na ligama nen bayo e mi e tuli matixi n ma falan na, n na n ma walikene rasigaxi e tan naxanye ma waxatin birin, nabine. Anu e fan mi e tuli matixi,” Alatalaa falan nan na ra. 20 Koni e tan xa e tuli mati Alatalaa falan na, e tan muxu suxine birin, n bata e tan naxanye rasiga keli Yerusalœn yi siga Babilon yi! 21 Alatala Senben Birin Kanna, Isirayilaa Ala ito nan falaxi lan Kolayaa dii xœmena Axabi nun Maaseyaa dii xœmen Sedeki ma, naxanye wule nabiya falane tima e xa, a naxa, “N na e sama nen Babilon mangan Nebukadanesari sagoni, a yi e faxa e yœœ xœri. 22 Yuda kaan naxanye birin siga konyiyani Babilon yi, ne birin dangan misaala tongoma muxu firinni itoe nan ma sœnœn, e naxa, ‘Alatala xa i lu alo Sedeki nun Axabi, Babilon mangan naxanye gan!’ 23 Bayo e bata xaxilitareyaan liga Isirayila yi. E bata yalunyaan liga e muxu bodene jaxanle xœn, e yi falan ti n xinli wulen fari, anu, n tan xa mi yamarin fixi e ma. N na kolon, na feen seren nan mœn n na.” Alatalaa falan nan na ra. 24 A fala Nexelan kaan Semaya xa, i naxa, 25 “Alatala Senben Birin Kanna, Isirayilaa Ala ito nan falaxi, a naxa, i bata kedine sebe Yerusalœn kaane birin ma, e nun Maaseya a dii xœmen Sofoni saraxaralina, e nun saraxarali gbœtœye birin, i ito nan sebœxi Sofoni ma, i naxa, 26 ‘Alatala bata i findi saraxaraliin na Yehoyada jœœxœni alogo i xa i yengi dœxo Alatalaa banxin feene xœn. Na ma, muxu yo na a yœte findi nabiin na daxuyani, i lan i xa a sa kutun

na, i a kœeen xidi yolõnxõnna ra. **27** Nanfera nayi, i mi i kõnkõma Yeremi Anatõti kaan ma, naxan a yete findixi nabiin na e tagi? **28** A yeteen bata kedin nasiga nxu ma Babilõn yi, a naxa: E buma nen mœnni del Nayi, e banxine ti, e dõxo e kui. E nakõne si, e yi e bogine don.” **29** Saraxarali Sofoni yi na kedin xaran Nabi Yeremi xa. **30** Alatala yi falan ti Yeremi xa, a naxa, **31** “Xeraan nasiga a faladeni muxu suxine birin xa naxanye Babilõn yi, i naxa, ‘Alatala ito nan falaxi Semaya Nexelan kaan xili ma, a naxa, “Bayo Semaya nabiya falane tima e xa, anu, n tan mi a xexi, a yi e mayenden alogo e xa e yigi sa wuleni.” **32** Nayi, Alatala ito nan falaxi, a naxa, “N Semaya Nexelan kaan nun a bõnsõnna kewanle saranma e ra nen. A bõnsõnna muxu yo mi luye yamani ito ye, a mœn mi fe fajin toma n naxan ligama n ma yamaan xa, bayo a falane yamaan namurutema Alatala ma.” Alatalaa falan nan na ra.”

30 Alatala yi falan ti Yeremi xa, a naxa, **2** “Alatala, Isirayilaa Ala ito nan falaxi, a naxa, ‘N falan naxanye tixi i xa, e birin sebe kedin kui.’ **3** Alatalaa falan ni ito ra, a naxa, ‘Lõxõne fama, n Yuda nun Isirayila muxu suxine raxetema waxatin naxan yi, n fa e ra yamanani n naxan so e benbane yii, e yi dõxo a yi,’ Alatala naxa na kiini.” **4** Alatala falani itoe nan ti lan Isirayila nun Yuda yamanane ma, a naxa, **5** “Alatala ito nan falaxi, a naxa, ‘En gbelegbele xuiin mema. Gaxun nan na ra, bõje xunbeli mi fa na. **6** E maxõdinna ti, xa xemen nœ diin bare! Nanfera nayi, xemene birin e tagin suxi alo jaxanla nema dii barini? Nanfera birin yetagini tõjõnxi? **7** Gbalo lõxo gbeen nan a ra! A jõxõn mi na. Waxati xõdexen nan na ra Yaxuba bõnsõnna xa, koni e xunna minima a yi nen, e kisi.” **8** “Alatala Senben Birin Kanna falan ni ito ra, a naxa, ‘Na lõxõni, n goron tongo wudine kalama nen, a ba e kœe ma, n yi e xidi lutine yibolon, n yi e ba xõjene koniyiaan bun. **9** E yi wali Alatala xa e Ala, e nun Dawuda yixetena, e mangana, n naxan fima e ma.’ **10** Alatalaa falan ni ito ra, a naxa, ‘E tan Yaxuba yixetene, n ma walikene, e nama gaxu, Isirayila kaane, e nama kuisan! Bayo, n na e rakisima nen, n yi sa e ba yire makuyeni, n yi e bõnsõnna ba yamanani e sa koniyiani denaxan yi. Yaxuba bõnsõnna muxune mœn xetema nen, e yi lu maraxaran nun bõje xunbenli. E mi fa yimaxe sõnõn! **11** Bayo, n luma nen e xõn, alogo n xa e rakisi. N siyane birin naxõre nen, n na e

raxuyaxi ayi naxanye ye, koni n mi e tan naxõrima. N na e xuruma nen alo a lan kii naxan yi, bayo n mi e yatema sõtarenene ra.’ Alatalaa falan nan na ra.” **12** “Alatala ito nan falaxi, a naxa, ‘E jaxankatan mi dandanje, e furen magaxu. **13** Muxu yo mi e xun mafalama, e fure deen dandan muxu mi na, a seri mi e tan yii. **14** E xõyine birin bata jinan e xõn, e mi fa e fenma sõnõn. Bayo, n bata e jaxankata alo yaxuna, n yi e hake gbeene nun e yulubi wuyaxine saran e ra a jaxin na. **15** Nanfera e wugama e jaxankatan nun e tõrõyaan bun naxan mi nœ dandanje? N na ligaxi e ra e hake gbeene nun e yulubi wuyaxine nan ma fe ra.” **16** “Koni naxan yo na wa e raxõri feni, na fan naxõrima nen. E yaxune birin xalima nen koniyiani. Naxanye birin fuma e yiiseene ma, muxune fuma ne fan yiiseene ma nen. Naxanye e suxuma yengeni, ne fan birin suxuma nen yengeni.’ **17** Alatalaa falan ni ito ra, a naxa, ‘Koni n mœn e rasabatima nen, n yi e rakendeya e furene ma, bayo e a falama e ma nen a yama ramexina, muxu mi a yengi dõxi naxan xõn, Siyon taana.’ **18** Alatala ito nan falaxi, a naxa, ‘N mœn Yaxuba bõnsõnne yigiyadene rasabatima nen, n kininkinin e dõxõdene ma. Taa xõnna mœn tima nen a funfuni. Manga banxin mœn yi ti a yireni. **19** Beti xuiin nun sewa xuiin minima nen e tagi. N na e rawuyama ayi nen, e mi fa xurunje ayi mumẽ! N binyen fima nen e ma, e mi fa rayelefue sõnõn. **20** E diine luma nen alo a fõlõni, e yamaan luma nen n yetagi. N yi e jaxankata muxune kewanle saran e ra. **21** E mangan minima e tan nin, e tan nde nan tima e ye ra. N yi na kanna maso n na, a yi a maso n na, bayo muxun mundun suse a masõe n na a yete ra? Alatalaa falan nan na ra. **22** ‘E findima nen n ma yamaan na, n yi findi e Ala ra.” **23** Alatala gbalon soma nen muxu jaxine xun na alo foye kala tiina. A xõlõn jaxankatan yi fa e ma alo wuluwunla. **24** Alatalaa xõlõn mi xetema e fõxo ra fõ feene rakamali Ala naxanye birin nagidixi a bõjeni. E xaxili sõtõma nen na feene xõn waxati famatõne yi.

31 Alatalaa falan ni ito ra, a naxa, “Na waxatini, n findima nen Isirayila xabilane birin ma Ala ra, e yi findi n ma yamaan na.” **2** Alatala ito nan falaxi, a naxa, “Yama dõnxen naxanye luxi e nii ra yengen xanbini, ne n ma hinanna toma nen tonbonni, Isirayila yamaan yi matabun sõtõ.” **3** Alatala a yete yita nen n na wulani, a naxa, “N bata e xanu habadan!

Nanara, n ma hinanna mi jnanma e xa. 4 Isirayila yama fajina, n mon e rasabatima nen, e yamanan mon tima nen. E mon e tanbanne maxama nen e yi siga bodonlane foxo ra jaxanaxani. 5 E mon manpa bili nakone sima nen Samari geyane fari. Xee biine sansine sima nen, e yi e bogine soto. 6 Bayo loxona nde fama, kantan tiine e xui raminima Efirami yamanan geyane ma waxatin naxan yi, e naxa, 'E keli, en siga Siyon taani Alatala fema, en ma Ala.'" 7 Bayo Alatala ito nan falaxi, a naxa, "E xuini te sewani Yaxuba bonsonna fe ra, E jaxan e fe ra e tan naxanye siyane xun na! E xui ramini, e yi Ala tantun, e naxa, 'Alatala, i ya yamaan nakisi, Isirayila muxu donxene.'" 8 N xetema nen e ra sa keli komen foxon yamanani, n yi e malan sa keli boxon danne ra. Danxutone nun sankalatone e ye, jaxalan fudi kanne nun naxanye dii barini, e birin. Yama gbeen nan xeten be. 9 E fama nen wuge, e lu n maxande, n yi ti e yee ra, siga xudene de, kira yitonxin xon, e mi e sanna radinje denaxan yi, bayo Isirayila yamaan fafe nan n na, Efirami bonsonna luxi nen alo n ma dii singena." 10 Siyane, e tuli mati Alatalaa falan na, e sa a rali fo foxo ige tagi boxo makuyene yi! E naxa, "Naxan Isirayila yamaan naxuyaxi ayi, na e malanma nen. A e kantanma nen alo xuruse rabaan nun a xuruse kuruna. 11 Bayo, Alatala bata Yaxuba yixetene xoroya, a yi e xunba muxune yii naxanye senben gbo e xa. 12 E fama nen, e xuini te jaxanaxani Siyon geyaan xuntagi. E sewama nen Alatalaa nemaan birin na, murutun nun manpa nenen nun turen nun yexeeene nun siine nun jingene. E nii yifanma e ma nen alo igen saxi nakoon naxan ma, e mi fa yigitege mum! 13 Nayi, sungutunne sewama nen e bodondeni, e nun banxulanne nun fonne birin. N yi e sunun findi sewan na, n yi e madenden, n yi e rasewa e jaxankatan xanbini. 14 N yi saraxaraline ralugo sube turaxine ra n ma yamaan yi wasa n ma nemaan na," Alatalaa falan nan na ra. 15 Alatala ito nan falaxi, a naxa, "Gbelegbele xuiin nun wuga xui gbeen tema Rama taani. Rakeli nan a diine wugama. A mi tinje a xa masabari amasoto e birin bata faxa." 16 Alatala ito nan falaxi, a naxa, "E wuga xuiin nun e yeegeen dan, bayo e kewanle saren fima nen, e diine fama nen sa keli yaxune konni." Alatalaa falan nan na ra. 17 "E yigin sotoma nen waxati famatone yi, bayo e diine mon xetema nen e konni." Alatalaa falan nan na ra. 18 N bata Efirami bonsonna wuga xuiin me, e naxa, "Ala, i bata nxu xuru kari xodexeni alo turaan naxan

mi suxi, nxu yi xuru ki faji. I mon xa nxu raxete, nxu xetema nen, bayo i tan nan Alatala ra, nxo Ala. 19 Nxu nxu xun xanbi so nen i yi, koni na xanbi ra, nxu yi nimisa. Nxu yelin xanbini xaxinla sote, nxu yi xolo nxu yete ma, nxu yagi, nxu yi nxu xun sin, bayo nxu bata kalan ti nxu dii jore waxatini han!" 20 Ala naxa, "Efirami bonsonna mi findixi n nafan diin xan na ba, n diin naxan nafisama bonne xa? Bayo n nema falane tiye a ma, a fe rabirama n ma. Nanara, n bojen bata kala a fe ra, a kininkinna yi n suxu han!" Alatalaa falan nan na ra. 21 E taxamasenne ti kiraan xon, e wudine bitin kiraan de alogo muxune nama kira gbeen fata e lan e xa bira naxan foxo ra. Isirayila yama fajina, e mon xa xete, e xete e taane yi. 22 N ma dii murutexine, e luma na xun xon sigani han waxatin mundun yi? Bayo Alatala fe nenen naminima nen boxo xonna fari, jaxanla fama nen xemen fendeni. 23 Alatala Senben Birin Kanna, Isirayilaa Ala ito nan falaxi, a naxa, "N na xete e muxu suxine ra waxatin naxan yi, a mon falama nen Yuda yamanan nun a taane yi, e naxa, 'Alatala xa barakan sa tinxin yirena fe yi geya saripanxina.'" 24 Xee biine nun xuruse rabane doxoma nen Yuda yamanani e nun a taane birin. 25 Bayo n muxu xadanxine nii yifanma e ma nen, n yi muxu nii kalaxine ralugo." 26 Na waxati yeteni, n yi xulun, n yi a kolon a n ma xixonla yi jaxun han! 27 Alatalaa falan ni ito ra, a naxa, "Loxone fama, n mon muxune nun xuruseene rasabatima nen Isirayila nun Yuda yamanane yi, e wuya ayi alo muxun na sansiin xuya xeen ma. 28 Benun to, n na n yeen ti nen e ra alogo n xa e xunna kala, n yi e tala, n yi e halagi, n yi e raxori, n yi gbalon nafa e ma. Koni iki, n mon n yengi doxoma nen e xon alogo n xa e yamanan ti, n yi e si," Alatalaa falan nan na ra. 29 A mi fa falama na loxoni fa fala, Fafane bata jaxundan xindene don, koni e diine nan jinye ramuluxun. 30 Koni birin faxama a yete haken nan ma fe ra. Muxu yo jaxundan xindene don, na kanna yeteen nan jinye ramuluxunma. 31 Alatalaa falan ni ito ra, a naxa, "Na loxone fama, n layiri nenen xidima nxu nun Isirayila nun Yuda yamane tagi waxatin naxan yi. 32 A mi ligama alo n layirin naxan xidi nxu nun e benbane tagi, n to e yii rasuxu n yi e ramini Misiran yamanani. Bayo e n ma layirin kala nen hali n to findi e kanna ra," Alatalaa falan nan na ra. 33 "Koni layirin ni i ra, n naxan xidima nxu nun Isirayila yamaan tagi." Alatalaa falan ni ito ra, a naxa, "Na waxatin na dangu, n na n ma sariyane sama nen

e xaxinli, n yi e seɓe e ɓɔɓeni. N findima nen e Ala ra, e yi findi n ma yamaan na. **34** Muxu yo mi fa a boden maxaranma, muxu yo mi a fale a ngaxakedenna xa, a naxa, 'I xa Alatala kolon,' bayo e birin n kolonma nen, keli muxudin ma han muxu gbeen. Bayo n dijama nen e hakene ma n yi e yulubine xafari." Alatalaa falan nan na ra. **35** Alatala ito nan falaxi, a tan naxan sogen da alogo a xa kenenna fi yanyin na, e nun kiken nun sarene kɛɛn na, naxan fɔɔ igeni maxama, a mɔɔɔne yi xuxu, naxan xili Alatala Senben Birin Kanna, na naxa, **36** "Fanni dunɔɔa da kiin sariyani itoe n yetagi, Isirayila yixetene fan yatema nen siyaan na n yɛɛ ra yi." Alatalaa falan nan na ra. **37** Alatala ito nan falaxi, a naxa, "Xa kore xɔɔna nɔɛ malige, xa ɓɔɔ xɔɔna bunne nɔɛ kolonɔɛ, nayi, n fan n mema nen Isirayila ɓɔɔsɔɔna ra e kewanle fe ra," Alatalaa falan nan na ra. **38** Alatalaa falan ni ito ra, a naxa, "Loxɔne fama, taani ito mɔn tima Alatala xa waxatin naxan yi, keli Xananeli Sangansoon ma han sa dɔɔ Songen Ma Deen na. **39** Taan dan nenɛn fɔlɔma menna nin siga tinxinni han Garebi geyana, sa dangu Gowa binni. **40** Binbine nun xubene ɓɔɔɔnma lanbanna naxan yi e nun gbingbinna naxanye sigama han Kedirɔn xudeni siga han taan so deen tongonna so deen naxan xili Soone Dena, sogeteden binni, menne birin nasarijanma nen Alatala xa. Yire yo mi fa kale na hanma a raxɔri."

32 Alatala yi falan ti Yeremi xa, Yuda manga Sedeki a mangayaan jɛɛ fudeni, Nebukadanesari a mangayaan jɛɛ fu nun solomasɛxeden nan yi a ra nun. **2** Babilɔn yamanan sofa ganla bata yi Yerusalen taan nabilin nun na waxatini, e yi taan yengema. Nabi Yeremi yi saxi kasoon na kantan tiine banxin sansanna kui Yuda mangan konni. **3** Yuda mangan Sedeki bata yi a balan mɛnni, a naxa, "Nanfera i nabiya falani itoe tima? I yi a fala, i naxa, 'Alatala ito nan falaxi, a naxa, "N taani ito sama nen Babilɔn mangan sagoni, a yi a tongo. **4** Yuda mangan Sedeki mi tangama Babilɔn kaane ma de! N na a sama nen Babilɔn mangan sagoni yati, a yi falan ti a xa kenɛn nun kenɛn, a yi a yetagi to. **5** Babilɔn mangan sigama nen Sedeki ra Babilɔn yi, a sa luma denaxan yi han n na keli a malideni waxatin naxan yi. Xa ɛ Babilɔn kaane yenge, ɛ mi nɔ sɔtɔma de!" Alatalaa falan nan na ra." **6** Yeremi a falan ni ito ra, a naxa, "Alatala falan ti nen n xa, a naxa, **7** I sɔɔ Salun ma dii xɛmɛn

Xanameli fama nen i fema, a yi a fala i xa, a naxa, 'N ma xɛɛ ɓɔɔɔn sara n ma, naxan Anatɔti taani, bayo i tan daxa kɛ sariyan na, i yi a sara, a findi i gbeen na.' **8** Nayi, n sɔɔ a dii xɛmɛn Xanameli yi fa n fema kantan tiine banxin sansanna kui alo Alatala a fala kii naxan yi. Xanameli yi fa a fala n xa, a naxa, 'N ma xɛɛ ɓɔɔɔn sara n ma naxan Anatɔti taani, Bunyamin yamanani, bayo i tan daxa kɛ sariyan na, i yi a sara, a findi i gbeen na. A sara! N yi a kolon fa fala Alatalaa falan nan yi kamalixi na ra. **9** Nayi, n yi n sɔɔ a diin Xanameli a xɛɛ ɓɔɔɔn sara a ma naxan Anatɔti taani, n yi gbeti gbanan fu nun solofere so a yii. **10** N yi a sara kedini tɔn, n yi n ma taxamasenna sa a ma, n yi serene xili, n gbetin maliga sikeela ra. **11** N yi a sara kedin tongo, n ma taxamasenna yi naxan ma, sariyane yi seɓexi naxan kui, e nun kedi gbete naxan mi yi balanxi taxamasenna ra. **12** N yi a sara kedin so Neriya dii xɛmɛn Baruku yii Maxiseya mamandenna. N na liga n sɔɔ a dii xɛmɛn Xanameli yɛɛ xɔri, e nun seren naxanye e yii fɔɔɔn sa xɛɛ ɓɔɔɔn sara kedin ma, e nun Yahudiyan naxanye birin yi kantan tiine banxin sansanna kui. **13** N yi yamarini ito so Baruku yii e yɛɛ xɔri, n naxa, **14** 'Alatala Senben Birin Kanna ito nan falaxi, Isirayilaa Ala, a naxa, ɓɔɔɔn sara kedini itoe tongo, naxan balanxi n ma taxamasenna ra e nun naxan nabixi, i sa e sa feɓɛna nde kui, e mi kale denaxan yi. **15** Bayo Alatala Senben Birin Kanna, Isirayilaa Ala ito nan falaxi, a naxa, loxɔna nde, muxune mɔn banxine nun xɛɛ ɓɔɔɔne nun manpa bili nako ɓɔɔɔne sarama nen yamanani ito yi.'" **16** "N to ɓɔɔɔn sara kedin so Neriya dii xɛmɛn Baruku yii, n yi Alatala maxandi, n naxa, **17** 'Marigina Alatala, i tan naxan kore xɔɔna nun ɓɔɔɔ xɔɔna daxi i senbe gbeeni, kabanako fe yo mi xɔɔɔɔ i tan yii. **18** I ya hinanna mayitama nen muxune xa han mayixete wuli keden, koni i fafane hakene saranma e diine ra nen. Ala, i gbo, Ala senbɛmaan nan i tan na naxan xili Alatala Senben Birin Kanna. **19** I ya fe ragidixine gbo, i kewanle magaxu. I yɛɛna adamadiine birin sigati kiin na, alogo i xa birin saran a kewanle ra, saranna naxan lan a wali xɔɔne ma. **20** I yi kabanako feene nun taxamasenne ligama xabu nxu yi Misiran yamanani waxatin naxan yi han to, i ne liga Isirayila kaane yɛ e nun adamadiine birin, i yi xinla sɔtɔ naxan gbo han to. **21** I bata Isirayila i ya yamaan namini Misiran yamanani taxamasenne nun kabanako feene nun senbe gbeen nun nɔɔn nun fe magaxuxine xɔn.

22 I yamanani ito so nen e yii, i bata yi i kolo naxan so fe ra e benbane yii, kumin nun nɔnɔn gbo yamanan naxan yi. 23 E bata fa, e fa dɔxɔ a yi. Koni, e mi e tuli matixi i xuiin na, e mi bira i ya sariyan fɔxɔ ra, e mi i ya yamarine suxi. Nanara, i jaxankatani ito birin nafaxi e ma. 24 Yaxune bata gbingbinne rate taan yinna xɔn alogo e xa dangu a xun ma. Taan fama nen ludeni Babilon kaane sagoni, naxanye a yengema, silanfanna nun fitina kamen nun fitina furen yi taan kala. I naxan falaxi, na bata kamali, a tan ni ito ra. 25 Marigina Alatala, i a fala n xa nen, i naxa, “Xɛɛ bɔxɔn sara gbetin na serene yɛɛ xɔri.” Anu, taan sa luma Babilon kaane nan sago yi.” 26 Alatala yi falan ti Yeremi xa, a naxa, 27 “Alatala nan n tan na, niiramane birin ma Ala. Kabanako fena nde na yi ba, naxan xɔdɔxɔ n tan yii? 28 Nanara, n tan, Alatala, n ni ito nan falama, fa fala taani ito sama Babilon kaane nun Babilon mangan Nebukadanesari sagoni nen, e yi a tongo. 29 Babilon kaan naxanye taani ito yengema, ne soma nen taani ito yi, e tɛɛn so a ra, e a gan, e nun a banxine e wusulanna gan Baali xa naxanye xuntagi, e minse saraxane rabɔxɔn ala gbetene xa denaxanye yi, e yi n naxɔlɔ. 30 Bayo xabu e dii jɔrɛ waxatine yi Yuda kaane nun Isirayila kaane mi sese ligaxi fɔ fe jaxina n yɛɛ ra yi, e lu n naxɔlɛ e suxure rafalaxine xɔn, Alatalaa falan nan na ra. 31 Bayo taani ito muxune bata n naxɔlɔ, e n bɔjɛn nate, keli a ti lɔxɔn ma han to. Nayi, n fa a bama nen n yetagi. 32 Yuda kaane nun Isirayila kaane bata n naxɔlɔ e kɛwali jaxine xɔn, e tan nun e mangane nun e kuntigine nun e saraxaraline nun e nabine, e nun Yuda kaane nun Yerusalen kaane birin. 33 E bata e xun xanbi so n yi, e mi e yɛɛ rafindixi n ma. Anu, n yi e xaranma waxatin birin, koni e mi tin e tuli matiye, e xurun sɔtɔ. 34 E yi e suxurene dɔxɔ n ma banxini n xinla binyama denaxan yi, e yi a raharamu. 35 E yi kidene rafala Baali xa Ben-Hinon lanbanni, alogo e xa e diine gan saraxan na Mɔlɔkɔ xa. N mi e yamari naxan ma, n mi sa mirixi naxan ma. E bata xɔsi fe sifani itoe liga, e yi Yuda bonsonna ti yulubin ma.” 36 “Iki, ɛ fa a falama taani ito ma nen, ɛ naxa, ‘A sama nen Babilon mangan sagoni! E a noma nen yengen nun fitina kamen nun fitina furen xɔn!’ Nanara, n tan Alatala, Isirayilaa Ala, n fa ito nan falama, n naxa, 37 ‘N na e malanma nen yati, sa keli yamanane birin yi, n na e raxuyama ayi denaxanye yi n ma xɔlɔ gbeen nun n ma bɔjɛ teeni. N mɔn xetema e ra nen be, n yi tin e dɔxɔ bɔjɛ xunbenli.

38 E findima nen n ma yamaan na, n yi findi e Ala ra. 39 N yi xaxili kedenna fi e ma. E lu kira kedenna xɔn, alogo e xa gaxu n yɛɛ ra habadan, alogo e nun e diine xa lu herini. 40 N yi habadan layirin xidi n tan nun e tan tagi, n mi e rabɛjinɛ mume. N luma nen fe fajin lige e xa, n yi n yɛɛragaxun sa e bɔjɛni, alogo e nama e xun xanbi so n yi. 41 N sɛwama nen fe fajin liga feen na e xa. N yi e rasabati yamanani ito yi yati, n bɔjɛn nun n niin birin na.” 42 Bayo Alatala ito nan falaxi, a naxa, “N fe fajin naxan falaxi lan e fe ma, n na ligama e xa nen alo n jaxankatani itoe birin nafaxi yamanani ito xili ma kii naxan yi. 43 ɛ mɔn xɛɛ bɔxɔne sarama nen yamanani ito yi na waxatini, ɛ a falama denaxan ma, ɛ naxa, ‘Yire raxɔrixin nan a ra, muxu mi na, sube mi na, a bata sa Babilon kaane sagoni.’ 44 Xɛɛ bɔxɔne sarama nen gbetin na, e sara kɛdine yi yelan, muxune yi e taxamasenne sa e ma sereyane yɛɛ xɔri Bunyamin yamanani e nun Yerusalen rabilinna taane nun Yuda taane nun geya yire taane nun sogegododen binna geya yire taane nun Negewi yamanan taane yi. Bayo, Alatala mɔn e yamanan nasabatima nen. Alatalaa falan nan na ra.”

33 Alatala mɔn yi falan ti Yeremi xa a firindeni, a yi balanxi kantan tiine sansanna kui waxatin naxan yi. A naxa, 2 “Alatala ito nan falaxi, a tan naxan feene ligama, a tan naxan feene yitɔnma, a e ragidi, a xili Alatala, a tan naxan a falama, a naxa, 3 ‘N maxandi, n na i yabima nen. N fe gbeene yebama nen i xa, wundo fe luxunxine i mi naxanye kolon.’ 4 Alatala, Isirayilaa Ala ito nan falaxi lan taani ito banxine ma e nun Yuda mangane banxine, naxanye bata rabira alogo e xa yaxune yenge naxanye tema yinna fari yengeni, a naxa, 5 ‘Yamaan na Babilon kaane yenge waxatin naxan yi, banxini itoe rafema nen muxune binbine ra n naxanye faxama n ma xɔlɔ gbeeni. N na n yetagin luxunma nen taani ito muxune ma e kɛwali jaxine fe ra. 6 Koni, n mɔn taani ito rasabatima nen, n yi a muxune rakendeya, n yi bɔjɛ xunbenla nun lannayaan fi e ma han! 7 N Yuda muxu suxine nun Isirayila muxu suxine raxetema nen keli konyiyani, n mɔn yi e rasabati alo a fɔlɔni. 8 N yi e rasarijan e hakene birin ma e yulubin ligaxi n na naxanye xɔn. N na e hakene birin mafeluma nen e n yulubin tongoxi naxanye xɔn, naxanye findixi murute feene ra n xili ma. 9 Nayi, taani ito findima nen sewan na n xa, e nun tantunna nun binyena bɔxɔ xɔnna siyane

birin tagi, e na fe fajine birin me waxatin naxan yi n naxanye ligama e xa. E kuisanma nen e gaxu lan na fe fajine nun boje xunbenla birin ma n naxanye fima e ma.” 10 “Alatala ito nan falaxi, a naxa, ‘E tan a falama yireni ito ma, e naxa, “Yire raxorixin na a ra, muxu mi fa na, xuruse mi na.” Anu, Yuda taani itoe nun Yerusalen kirani itoe naxanye rabepinx i, muxune nun xuruseene mi fa denaxanye yi i, 11 sewa sigine nun jaxaxaxa sigine mon sama nen menne yi e nun jaxalandi ti sigine xemen nun a jaxanla xa, e nun naxanye sigama betin be barika bira saraxane badeni Alatalaa banxini, e naxa, “En Alatala Senben Birin Kanna tantun, bayo Alatala fan, a hinanna luma nen habadan.” Bayo n mon yamanan nasabatima nen alo a foloni, Alatala naxa na kiini.” 12 “Alatala Senben Birin Kanna ito nan falaxi, a naxa, ‘Yamana raxorixin ito, muxune nun xuruseene mi fa denaxan yi, loxona nde xuruse rabane mon xuruse rabaden nun matabuden sotoma nen e xuruse kurune xa mena taane birin yi. 13 Xuruseene mon luma nen e kantan muxune dexon geya yire taane nun sogegododen geya yire taane nun Negewi yamanan taane nun Bunyamin yamanan nun Yerusalen rabilinna taane birin yi, e nun Yuda taane yi.’ Alatala naxa na kiini.” 14 “Alatalaa falan ni ito ra, a naxa, ‘Loxone fama, n fala fajine rakamalima loxon naxanye yi, n naxanye fala lan Isirayila yamaan nun Yuda yamaan ma. 15 Na loxone nun na waxatini, n tinxinden naminima nen Dawuda bonsanni, alo wudi jingin na mini wudin ma, a yi kiti kenden nun tinxinyaan naba yamanani. 16 Yuda yamaan nakisima nen na loxone yi, boje xunbenla yi so Yerusalen yi. E a xili bama nen fa fala, “En ma tinxinna, Alatala.” 17 Bayo Alatala ito nan falaxi, a naxa: Dawuda joxo yi biran mi dase mume naxan daxe Isirayila yamaan manga gbenedi. 18 Lewi saraxaraline joxo yi biran mi dase mume naxan saraxa gan daxine be, a bogise saraxane tutin nali, a saraxane ba loxo yo loxo.” 19 Alatala yi falan ti Yeremi xa. A naxa, 20 “Alatala ito nan falaxi, a naxa, ‘Xa e nxe layirin kale nxu nun yanyin nun koxen tagi, koxen nun yanyin yi ba mine e waxatini nun, 21 nayi, n ma layirin nxe kale nxu nun n ma walikxen Dawuda fan tagi nen, a bonsanna muxun yi dasa naxan daxe a joxoni a manga gbenedi. Nayi, n ma layirin mon nxe kale nxu nun Lewi saraxaraline tagi nen naxanye n ma wanla ra. 22 N na n ma walikxen Dawuda yixetene rawuyama ayi nen, e nun Lewi bonsanna muxun naxanye n ma

wanla ra alo kore xonna saren naxanye mi nxe yate, alo baan jemensinna naxan yaten mi kolonje.” 23 Alatala yi falan ti Yeremi xa, a naxa, 24 “I mi a toxi ba, yamani ito naxan falama? E naxa, ‘Alatala bata a me a yama sugandixi firinne ra.’ Nayi, e n ma yamaan napaxuma, e mi fa e yatexi siya ra.” 25 Alatala ito nan falaxi, a naxa, “Xa layirin mi yi nxu nun yanyin nun koxen tagi nun, xa n mi yi kore xonna nun boxo xonna da kiin sariyane sa nun, 26 nayi, n yi nxe n me nen Yaxuba yixetene nun n ma walikxen Dawuda yixetene ra, n yi tondi a bonsanna muxuna nde sugande alogo a xa lu Iburahima nun Isiyaga nun Yaxuba yixetene xun na. Bayo n mon e yamanan nasabatima nen, n yi kininkinin e ma.”

34 Babilon mangan Nebukadanesari nun a sofa ganla nun yamanan naxanye birin yi a nkon bun ma e nun siyane birin yi Yerusalen nun a rabilinna taane birin yengema waxatin naxan yi, Alatala yi falan ti Yeremi xa, a naxa, 2 “Alatala, Isirayilaa Ala naxa, sa falan ti Yuda mangan Sedeki xa, i naxa, Alatala ito nan falaxi, a naxa, ‘N taani ito sama nen Babilon mangan sagoni, a yi a gan. 3 I tan mi tangama a ma, koni a i suxuma nen yati, i lu a sagoni, i Babilon mangan toma nen i yeen na, a yi falan ti i xa kenen nun kenen, a yi siga i ra Babilon yi. 4 Koni Yuda mangan Sedeki, i tuli mati Alatalaa falan na! Alatala falani ito nan tixi lan i ma, a naxa, i mi faxe yengeni sese ma. 5 I faxan boje xunbenla nin. I saya feen ligama nen alo i benbane gbeene liga kii naxan yi, manga danguxine, muxune yi wusulanna gan i ya binyen mayita feen na, e i wuga, e naxa, “Ee! Nxu kanna bata faxa!” N tan Alatala nan na falaxi.’ Alatalaa falan nan na ra.” 6 Nabi Yeremi yi na falane birin nali Yuda mangan Sedeki ma Yerusalen yi. 7 Na waxatini, Babilon mangana ganla yi Yerusalen yengema e nun Yuda taan bonne birin, a li Lakisi taan nun Aseka taan nan tun yi fa luxi Yuda taa makantanxine ra. 8 Alatala yi falan ti Yeremi xa, mangan Sedeki yelin xanbini layirin xide e nun Yerusalen yamaan tagi, alogo e xa konyine xoroya. 9 Birin yi xoroyaan fima a konyi Heburu kaane ma, alogo muxu yo nama fa a Yahudiyan boden nawali alo konyina. 10 Kuntigine nun yamaan naxanye na layirin xidi, ne yi tin e konyine bejin feen ma alogo e nama fa lu konyiyani. E yi tin na ma, e yi e bejin. 11 Koni na xanbi ra, e mon yi e miriyaan masara, e yi e konyine maxili, e bata yi

naxanye bejin, e yi e karahan alogo e mɔn xa findi konyine ra. **12** Nayi, Alatala yi falan ti Yeremi xa, a naxa, **13** “Alatala, Isirayilaa Ala ito nan falaxi, a naxa, ‘N layirin xidi nen nxu nun ε benbane tagi, n na e ramini waxatin naxan yi Misiran yi konyiyani. N yi a fala e xa, n naxa, **14** “Xa ε ngaxakedenna Heburuna nde a yete mati ε ma konyin na, a walima nen ε xa jɛε sennin. A jɛε soloferedeni ε xa a xɔɔya.” Koni ε benbane mi n xuiin suxu, e mi e tuli mati n na. **15** E tan bata yi ε kewanle masara waxati danguxini itoe yi, naxan fan n tan yεε ra yi, ε yi na liga, ε birin yi xɔɔyaan fi ε ngaxakedenne ma. E layirin xidi nen n yetagi, n ma banxini n xinla binyama denaxan yi. **16** Koni ε bata xete ε fe ragidixin fɔxɔ ra, ε yi n xinla kala, ε to ε konyine maxili, ε bata yi naxanye bejin nun, ε bata yi naxanye lu e xa siga, ε mɔn yi e karahan a e xa findi ε konyine ra.” **17** “Nanara, Alatala ito nan falaxi, a naxa, ‘E to mi n binyaxi, ε tondi xɔɔyaan fiye ε ngaxakedenne ma ε adamadi bodene. Nayi, n xɔɔyaan sifana nde fima ε ma nen, ε fa xɔɔyani ito nan sɔtɔma, naxan a lige ε faxa silanfanna nun fitina furen nun fitina kamenti, han ε fe yi bɔxɔ xɔnna yamanane birin muxune magaxu.’ Alatalaa falan nan na ra. **18** ‘Muxun naxanye n ma layirin kalaxi, naxanye mɔn mi tin layirin nakamale e yetεen naxan xidi n yetagi, n na e suxuma nen alo e jinge diin naxan yisεgen firinna ra, e yi dangu a dungine tagi layiri xidin dangan misaala ra. **19** Yuda nun Yerusalen kuntigine nun mangan bundɔxɔne nun saraxaraline nun yamanan muxun naxanye birin danguxi na jingen dungine tagi, **20** n ne sama nen e yaxune sagoni, naxanye waxi e faxa feni, e binbine yi findi xoline nun burunna subene balon na. **21** N Yuda mangan Sedeki nun a kuntigine sama nen e yaxune sagoni, naxanye waxi e faxa feni, Babilɔn mangana sofa ganla, naxanye e masigaxi ε ra. **22** N yamarin fima nen, n yi e raxete be taani ito xili ma. E taan yengema nen, e yi a tongo, e yi a gan. N yi Yuda taane raxɔri, e findi bɔxɔ rabejinxin na.’ Alatalaa falan nan na ra.”

35 Alatala bata yi falani ito ti Yeremi xa Yuda mangan Yosiyaa dii Yehoyakimi a mangayaan waxatini, a naxa, **2** “Siga Rekabu bɔnsɔnne fema, i yi e xili, e xa fa Alatalaa banxin kuiin yirena nde yi, i manpaan so e yii, alogo e xa a min.” **3** Nanara, n yi Yaasaniya tongo, Xabasiniyaa dii xεmen Yeremi a dii xεmena, e nun a ngaxakedenne nun a diine

nun Rekabu bɔnsɔnna birin. **4** N yi siga e ra Alatalaa banxini, Alaa muxun Yigidali a dii xεmen Xanan ma dii xεmene yi walima banxin konkon naxan kui, kuntigine banxin kuiin yiren dεxɔn, Salun ma dii xεmen Maaseyaa waliden konkon xun ma, naxan yi so dεen kantanma. **5** N yi fejeɛne dɔxɔ Rekabu bɔnsɔnna muxune yetagi e rafexi manpaan na e nun igelengenne. N yi a fala e xa, n naxa, “E manpana nde mini!” **6** E yi n yabi, e naxa, “Nxu mi manpaan minma, bayo nxu benba Rekabu a dii xεmen Yonadabo nxu yamari nen, a naxa, ‘E nama manpaan min mume, ε tan nun ε yixetene, **7** E nama banxi ti, ε nama sansi si, ε nama manpa bili si, seni itoe mɔn nama lu ε yii. Koni ε luma bubune nin ε dunupa yi gidin birin yi, alogo ε xa bu yamanani ε dɔxɔma xɔɔeyani denaxan yi.’ **8** Nxu benba Rekabu a dii xεmen Yehonadabu nxu yamari feen naxanye ma, nxu bata ne suxu. Nxu mi manpaan minma nxɔ simayani mume, nxu tan ba, nxɔ jaxanle ba, nxɔ dii xεmene ba, nxɔ dii tεmene ba, **9** nxu mi banxi tima, nxu so a kui, nxu gbee mi finde manpa bili nakɔ ra, hanma xεena hanma langana. **10** Nxu luma bubune nan kui, nxu bata nxu benba Yonadabo a yamarine birin suxu ken! **11** Koni Babilɔn mangan Nebukadanesari to yamanan yenge, nxu a fala nen, nxu naxa, ‘En siga Yerusalen yi, en na en gi Babilɔn kaane nun Arami kaane sofa ganle bun.’ Nayi, nxu yi dɔxɔ Yerusalen yi.” **12** Nayi, Alatala yi falan ti Yeremi xa, a naxa, **13** “Alatala Senben Birin Kanna, Isirayilaa Ala ito nan falaxi, a naxa, sa a fala Yuda kaane nun Yerusalen kaane xa, i naxa, ‘E mi xaxili sɔte ba? E mi n ma falane suxe ba?’ Alatalaa falan nan na ra. **14** ‘Rekabu a dii xεmen Yehonadabu bata yi yamarin fi a diine ma, a e nama manpaan min. E bata a yamarin suxu. E mi a minxi han to. Han to, e mi manpaan min bayo e bata e benbana a yamarin suxu. Anu, n tan falan tima ε xa yeye, koni ε mi n xuiin suxi. **15** N na n ma walikene rasigama ε ma yeye, nabine, alogo e xa a fala ε xa, e naxa, “E xete ε kira jaxin fɔxɔ ra, ε kewanle maxete, ε nama bira ala gbetene fɔxɔ ra, ε yi e batu. Nayi, ε luma nen yamanani n naxan soxi ε nun ε benbane yii.” Koni ε mi e tuli mati n na, ε mi n xuiin name. **16** Rekabu a dii xεmen Yehonadabu yixetene bata e benbana a yamarin suxu, koni yamani ito mi n xuiin suxi!” **17** Nanara, Alatala, Ala Senben Birin Kanna, Isirayilaa Ala ito nan falaxi, a naxa, ‘N gbalon nafama nen Yuda kaane nun Yerusalen kaane ma, n feen naxanye birin

fala e xili ma. Amasoto n bata falan ti e xa, e mi n xuiin namexi, n yi e xili, e mi n yabi.” **18** Yeremi yi a fala Rekabu bōnsōnna muxune xa, a naxa, “Alatala Senben Birin Kanna, Isirayilaa Ala ito nan falaxi, a naxa, ‘E bata e benba Yehonadabu a yamarine suxu, e bira a yamarine birin fōxo ra, e yi e birin liga,’ **19** Na ma, Alatala Senben Birin Kanna, Isirayilaa Ala ito nan falaxi, a naxa, ‘Rekabu a dii xemen Yonadabo yixetena ndee luma nen wale n yetagi, e mi janjje mumel!’”

36 Yuda mangan Yosiya a dii xemen Yehoyakimi a mangayaan jee naanindeni, Alatala yi falani ito ti Yeremi xa, a naxa, **2** “Kedi mafilinxina nde tongo, i yi n ma falane birin sebe n bata naxanye fala lan Isirayila yamaan nun Yuda yamaan ma e nun siya gbetene birin xabu n falan ti fōlo i xa lōxon naxan yi Yosiya waxatini han to. **3** Waxatina nde, Yuda kaane a famuma nen n fe jaxin naxan nagidixi e xili ma, e birin yi xete e kira jaxin fōxo ra. Nayi, n na e yulubine nun e hake ne mafeluye nen.” **4** Yeremi yi Neriya dii xemen Baruku xili. Alatala bata yi falan naxanye birin ti a xa, Yeremi yi ne fala, Baruku yi ne sebe kedini kui. **5** Na xanbi ra, Yeremi yi yamarin fi Baruku ma, a naxa, “E tōnna nan dōxi n ma mēnni, n mi nōe sigē Alatala Batu Banxini. **6** Nayi, i tan xa siga Alatalaa banxini. N na Alatalaa falan naxanye tixi i xa, i naxanye sebe, i sa ne xaran yamaan yetagi sun suxu lōxoni. I e xaran Yuda kaane xa naxanye fama sa keli e taane yi. **7** Nayi, waxatina nde, e Alatala mafanma nen, e birin yi xete e kira jaxin fōxo ra. Bayo Alatalaa xōlon nun a fitinan gbo yamaan xili ma.” **8** Nabi Yeremi Neriya dii xemen Baruku yamari feen naxanye birin ma, a yi ne liga, a yi sa Alatalaa falane xaran kedini Alatala Batu Banxini. **9** Yuda mangan Yosiya dii xemen Yehoyakimi a mangayaan jee suulunden kike solomanaanindeni, e yi lōxo keden sugandi a Yerusalen kaane xa sunna suxu na lōxoni Alatala yetagi e nun Yuda kaan naxanye birin fa Yerusalen yi sa keli Yuda taane yi. **10** Baruku yi Yeremi a falane birin xaran kedini Alatala Batu Banxini yamaan birin yetagi. A yi dōxi sebeli tiin Gemariyaa konkon nin, Safan ma dii xemena, denaxan yi sansanna kui naxan faxan na Alatala Batu Banxin so de nenen na. **11** Gemariya dii xemen Mikahu, Safan mamandenna to Alatalaa falane birin name naxanye yi sebexi na kedini kui, **12** a yi siga sebeli tiin dōxōdeni manga banxini kuntigine birin yi malanxi denaxan yi, sebeli tiina Elisama nun

Semayaa diin Delaya nun Akibori a diina Elanatan nun Safan ma diin Gemariya nun Xananiyaa diin Sedeki, e nun kuntigin bonne birin. **13** Mikahu yi na falane birin ye ba e xa, a naxanye me, Baruku yi kedin xaranma waxatin naxan yi yamaan birin yetagi. **14** Nayi, kuntigine yi Netaniyaa dii xemen Yehudi rasiga, Kusi a dii xemen Selemiya mamandenna, a xa sa a fala Baruku xa, a naxa, “I kedin naxan xaranxi yamaan birin yetagi, na tongo, i fal” Neriya dii xemen Baruku yi na kedin tongo, a siga e fema. **15** E yi a fala a xa, e naxa, “I magodo, i yi a xaran nxu xa.” Baruku yi a xaran e xa. **16** E to na falane birin me, e gaxuxin yi e bode mato, e yi a fala Baruku xa, e naxa, “Nxu falani itoe birin yebama nen mangan xa.” **17** Nayi, e yi Baruku maxodin, e naxa, “A fala nxu xa, i falani itoe birin sebexi kii naxan yi. Yeremi nan de xui itoe ra ba?” **18** Baruku yi e yabi, a naxa, “A falani itoe tixi n xa a xuiini texin nan na, n yi e sebe kedini ito kui duba igen na.” **19** Kuntigine yi a fala Baruku xa, e naxa, “Siga, e nun Yeremi xa sa e luxun, muxu yo nama a kolon e denaxan yi.” **20** E yi kedin lu Elisama sebeli tiina konkoni, e siga mangan fema a tanden ma, e sa falane birin ye ba mangan xa. **21** Mangan yi Yehudi rasiga kedin tongodeni. Yehudi yi sa a tongo Elisama sebeli tiina konkoni, a yi fa a xaran mangan yetagi e nun kuntigin naxanye birin yi mangan fema. **22** Neen kike solomanaaninden nan yi a ra, mangan yi dōxi a xunbeli waxatin banxini, teen yi degema wuren kui a yetagi. **23** Yehudi na yi kedin yire saxon hanma naanin xaran, mangan fan yi na kedin yiren xabama a ra nen sebeli tiina filedin na, a yi na woli teeni wuren kui, han kedin birin yi gan jan. **24** Nayi, mangan nun a kuntigine birin yi na falane birin name, e mi gaxu hali, e mi e dugine yibo e ma nimisani. **25** Anu, Elanatan nun Delaya nun Gemariya mangan mafan nen alogo a nama kedin gan, koni a mi a tuli mati e ra. **26** Mangan yi yamarin fi Yerameeli ma, mangana dii xemena nde, e nun Asiriyeli a dii xemen Seraya nun Abadele a dii xemen Selemiya, a e xa sebeli tiin Baruku nun Nabi Yeremi suxu. Koni Alatala yi e raluxun. **27** Baruku bata yi Yeremi a falan naxanye sebe, mangan to na kedini gan, Alatala yi falan ti Yeremi xa, a naxa, **28** “I mōn xa kedi gbete tongo. Falan naxanye yi kedi singen ma, Yuda mangan Yehoyakimi naxan ganxi, i mōn xa ne sebe kedini. **29** I mōn xa a fala Yuda mangan Yehoyakimi xa, i naxa, ‘Alatala ito nan falaxi, a naxa, i tan nan

kedin ganxi, i naxa, “Nanfera i falani itoe sebexi a Babilon mangan fama nen, a yi yamanani ito kala, a yi a muxune nun a xuruseene birin naxori?” **30** Nanara, Alatala ito nan falaxi Yuda mangan Yehoyakimi xili ma, fa fala a bonsonna muxu yo mi dɔxɔma Dawudaa manga gbedeni, a yeteen binbin nabepinma nen sogen na yanyin na e nun xunbenla ra kɛen na. **31** N na a kewali jaxine saranma nen a ra e nun a diine nun a kuntigine. N gbalon nafama e tan nun Yerusalen kaane nun Yuda kaane birin ma nen, n feen naxanye birin fala e xili ma, bayo e mi e tuli matixi n na.” **32** Yeremi yi kedi mafilinxi gbete tongo, a yi a so Neriya dii xemen Baruku yii, sebeli tiina. Baruku yi falane birin sebe Yeremi naxanye fala a xa, naxanye yi kedi singen kui, Yuda mangan Yehoyakimi naxan gan. A mon yi na fala sifa wuyaxi gbete ye sa ne fari.

37 Babilon mangan Nebukadanesari yi Yosiya dii xemen Sedeki dɔxɔ mangan na Yehoyakimi a dii xemen Yoyakin jɔxɔni Yuda yamanan xun na. **2** Alatala falan naxan ti Nabi Yeremi xa, a tan ba, a kuntigine ba, yamanan muxune ba, e sese mi na rame. **3** Anu, na waxatini Manga Sedeki bata yi Selemiyaa dii xemen Yehukali nun saraxaraliin Maaseya dii xemen Sofoni xe a faladeni Nabi Yeremi xa, a naxa, “Alatala en ma Ala maxandi nxu xa.” **4** Na waxatini Yeremi yi sigan nun xeten nabama yamaan tagi. A munma yi sa kasoon na singen. **5** Misiran mangana ganla bata yi mini Misiran yamanani. Babilon kaan naxanye yi Yerusalen rabilinxi a yengedeni, ne yi na feen me, e yi e masiga Yerusalen ra. **6** Nayi, Alatala yi falan ti Nabi Yeremi xa, a naxa, **7** “Alatala, Isirayilaa Ala ito nan falaxi, a naxa, ‘E sa a fala Yuda mangan xa naxan e xexi n maxodindeni, e naxa, “Misiran mangana ganla naxan minixi e malideni, ne xetema nen e konni Misiran yamanani. **8** Nayi, Babilon kaane mon fama nen, e yi taani ito yenge, e yi a no, e a gan.” **9** Alatala ito nan falaxi, a naxa: E nama e yete mayenden, e yi a miri a Babilon kaane e makuyama e ra nen! Bayo e mi sigama. **10** Hali e Babilon kaane sofa ganla birin no, naxanye e yengema, hali muxu maxoloxine nan gbansan lu e faxataren na, e birin kelima nen, e mini e bubune kui, e yi taani ito gan.” **11** Babilon kaane sofane yi makuyaxi Yerusalen ra waxatin naxan yi lan Misiran mangana ganla fe ma, **12** Yeremi yi wa mini feni Yerusalen yi siga Bunyamin yamanani, alogo a xa sa keena nde tongo a konni. **13** A to taan so deen

li denaxan xili Bunyamin dena, mini taani, kantan ti kuntigin naxan xili Yiriya, Selemiyaa dii xemena, Xananiya mamandenna, na yi Nabi Yeremi rati, a yi a fala a xa, a naxa, “I bata sa Babilon kaane fari!” **14** Yeremi yi a yabi, a naxa, “Nondi mi na ra, n mi se Babilon kaane fari sese ma!” Koni Yiriya mi a tuli mati a ra. A yi Yeremi suxu, a siga a ra kuntigine fema. **15** Kuntigine xoloxin yi a bonbo, e yi a sa kasoon na Yonatan ma banxini, sebeli tiina, bayo e bata yi men findi kaso banxina nde ra. **16** E Yeremi raso yinla nde ra kaso banxin bun, a sa balan menni, a yi bu na han! **17** Loxona nde, Manga Sedeki yi xeraan nasiga a tongodeni. E to fa a ra mangan konni, mangan yi a maxodin wundoni, a naxa, “Alatala bata falana nde ti i xa iki ba?” Yeremi yi a yabi, a naxa, “On, a naxa a i sama nen Babilon mangan sagoni.” **18** Yeremi mon yi a fala Manga Sedeki xa, a naxa, “N haken mundun ligaxi i ra, hanma i ya kuntigine hanma yamana, naxan a ligaxi i n saxi kasoon na? **19** E nabine sa minen yi iki, naxanye yi nabiya falane tima e xa, e naxa, ‘Babilon mangan mi fama e tan nun yamanani ito yengedeni?’ **20** Iki, mangana, n kanna, yandi, i tuli mati n na, i xa tin n ma falan ma. I nama n naxete sebeli tiin Yonatan ma banxini, alogo n nama faxa menni.” **21** Manga Sedeki yi yamarin fi a e xa e yengi dɔxɔ Yeremi xon kantan tiine banxin sansanna kui, e yi lu buru xun keden soe a yii loxo yo loxo keli buru ganne yireni han taan burun birin na jan loxon naxan yi. Yeremi lu na kii nin kantan tiine banxin sansanna kui.

38 Yeremi yi falan naxanye tima yamaan xa, Matan ma dii xemen Sefati nun Pasaxuri a dii xemen Gedali nun Selemiyaa dii xemen Yukala nun Malakiyaa dii xemen Pasaxuri yi ne birin name. A yi a falama, a naxa, **2** “Alatala ito nan falaxi, a naxa, ‘Naxan yo lu taani ito yi, na kanna faxama yengen nun fitina kamen nun fitina furen nin, koni naxan na keli taani ito yi, a sa a yete dentege Babilon kaane xa, na kanna kisima nen, a tan yi lu a nii ra bete. A kisima nen.’ **3** Alatala mon ito nan falaxi, a naxa, ‘Taani ito sama nen Babilon mangan sagoni yati, a yi a tongo.’” **4** Kuntigine yi a fala mangan xa, e naxa, “Xemeni ito xa faxa! Bayo sofaan naxanye luxi taani ito yi, a ne tunnaxoloma e ma e nun yamaan birin, a lu fala sifani itoe tiye e xa. Xemeni ito mi yamaan munanfanna xan fenma, fo a kala fena.” **5** Manga Sedeki yi e yabi, a naxa, “N bata a lu e yii. N tan mangan mi noe e yee ratiye.”

6 Nayi, e yi Yeremi tongo, e sa a rasin mangana dii xemen Malakiyaa ige ramara yinla ra kantan tiine banxin sansanna kui, e Yeremi ragodo menni lutin na. Ige mi yi fa na kui, koni boron yi na. Yeremi yi bitin boroni. 7 Koni Ebedi-Meleki Kusi kaan naxan yi findixi kuntigin na mangana banxini, na yi a me a e bata Yeremi rasin ige ramara yinla ra. Mangan yi tixi taan so deen na denaxan xili Bunyamin. 8 Ebedi-Meleki yi mini manga banxini, a yi a fala mangan xa, a naxa, 9 “Mangana, n kannna, muxuni itoe bata fe jaxin liga Nabi Yeremi ra, e sa a woli ige ramara yinla ra. A faxama nen kamen na nayi, bayo buru mi fa taani.” 10 Mangan yi Ebedi-Meleki Kusi kaan yamari, a naxa, “Muxu tonge saxan tongo, i sa Nabi Yeremi rate ige ramara yinla ra, benun a xa faxesa.” 11 Ebedi-Meleki yi muxune tongo, e siga mangana banxin kui yirena nde yi gbeti ramaraden bun ma, e sa dunkobine nun dugi fori kalaxine tongo menni, e yi sa e ragodo Yeremi ma lutin na. 12 Ebedi-Meleki Kusi kaan yi a fala Yeremi xa, a naxa, “Dunkobin nun dugi fori kalaxini itoe raso i ganla bun ma, i lutine xidi e fari.” Yeremi yi na liga. 13 E yi Yeremi bandun lutine ra, e yi a rate ige ramara yinla ra. Yeremi yi lu kantan tiine banxin sansanna kui. 14 Manga Sedeki yi xerane rasiga Nabi Yeremi tongodeni. E yi fa a ra mangan fema Alatala Batu Banxin so de saxanden na. Mangan yi a fala Yeremi xa, a naxa, “N fe keden nan maxodinma i ma, i nama sese luxun n ma.” 15 Yeremi yi Sedeki yabi, a naxa, “Xa n na a fala i xa, i mi n faxes ba? N na i kawandi, i mi a suxe sese ma.” 16 Manga Sedeki yi a kolo Yeremi xa wundoni, a naxa, “N bata n kolo habadan Alatala yi, a tan naxan niin biraxi en yi, n mi i faxes, n mon mi i se muxune sagoni naxanye waxi i faxesa feni.” 17 Nayi, Yeremi yi a fala Sedeki xa, a naxa, “Alatala, Ala Senben Birin Kanna, Isirayilaa Ala ito nan falaxi, a naxa, ‘Xa i mini i yi i yete dentegge Babilon mangana sofa ganla kuntigine xa, i kisima nen, taani ito mi ganje, e nun i ya denbayaan yi kisi. 18 Koni, xa i mi i yete dentegge Babilon mangana sofa ganla kuntigine xa, taani ito sama nen Babilon kaane sagoni, e yi a gan, i tan nun mi tange e ma.’” 19 Manga Sedeki yi a fala Yeremi xa, a naxa, “N gaxuxi Yahudiyane nan yee ra naxanye saxi Babilon kaane fari. N gaxuxi nen, xa Babilon kaane mi n soe ne yii, e yi n jaxankata.” 20 Yeremi yi a yabi, a naxa, “E mi i soe ne yii. I tuli mati Alatalaa falan na, n naxan falama i xa. Nayi, i herin sotoma nen, i niin yi kisi. 21 Koni xa i tondi i

yetede dentegge e xa, Alatala falani ito nan makenenxi n xa, a naxa 22 ‘Naxanla naxanye birin luma Yuda mangana banxini, ne raminima nen Babilon mangana kuntigine yetagi, e yi a fala i xa, e naxa: I yi laxi i xoyin naxanye ra, ne bata i mayenden, e yi i no. I bata bitin boroni, e tan yi i rabepin.’” 23 “Naxanle nun e diine birin xalima nen Babilon kaane fema, i tan fan mi tangama e ma. Babilon mangana i suxuma nen, a yi taani ito gan.” 24 Nayi, Sedeki yi a fala Yeremi xa, a naxa, “Muxu yo nama en ma falani itoe fe me. Nayi, i mi faxes. 25 Xa kuntigine a me a n bata falana nde ti i xa, e fa i maxodinma nen na falan ma, e naxa, ‘A fala nxu xa, mangan naxan falaxi i xa, i nama sese luxun nxu ma, xa na mi a ra, nxu i faxesa nen.’ 26 I xa a fala e xa nen, i naxa, ‘N mangan mafanxi nen alogo a nama n nasiga Yonatan ma banxini alogo n nama faxesa menni.’” 27 Kuntigine birin yi fa Yeremi fema, e yi a maxodin. A yi e yabi alo mangana a yamari kii naxan yi. E yi Yeremi lu na, bayo muxu yo mi na falane mexi. 28 Yeremi yi lu kantan tiine sansanna kui han Yerusalen suxu loxona. Yerusalen suxu kiina a taruxun ni ito ra:

39 Yuda mangan Sedeki a mangayaan jee solomanaaninden kike fudeni, Babilon mangan Nebukadanesari nun a ganla birin yi fa Yerusalen xili ma, e yi a rabilin. 2 Sedeki a mangayaan jee fu nun kedenden kike naaninden xi solomanaaninde loxoni, e yi taan yinna yirena nde rabira. 3 Nayi, Babilon mangana kuntigine birin yi e maso, e yi doxo gbedene yi Taa Tagin so deen na, Neragala-Sareseri nun Samigara-Nebu nun Sarasekimi, mangan bundoxone kuntigin nun Neragala-Sareseri, kuntigi gbeena e nun Babilon mangana kuntigin bonne birin. 4 Yuda mangan Sedeki nun sofane birin to e to, e yi e gi, e mini mangana nakoon kiraan xon taan so deen na koon na naxan makantan yin firinne tagi, siga Araba tonbonna lantaan kiraan xon. 5 Koni, Babilon sofa ganla yi e sagatan e sa Sedeki li Yeriko meremerene yi. E yi a suxu, e siga a ra Babilon manga Nebukadanesari fema Ribila taani Xamata yamanani, a yi sa a makiti menni. 6 Babilon mangan yi Sedeki a diine koe raxaba a yetagi Ribila taani. A mon yi Yuda yamanan muxu gbeena fan birin faxesa. 7 A yi Sedeki yee ne soxonje ayi, a yi a xidi sula yolonxonna ra, a siga a ra Babilon yi. 8 Babilon kaane yi mangana banxin nun muxune banxine birin gan, e yi Yerusalen

taan makantan yinne rabira. **9** Yamaan muxu dɔnxen naxanye lu taani, Babilɔn mangan kantan muxune xunna Nebusaradan yi ne suxu a siga e ra konyiyani Babilɔn yi e nun naxanye bata yi e yete dentege a xa e nun yamaan dɔnxen birin. **10** Koni yiigelitɔɔn naxanye yi yamaan ye, sese mi yi naxanye yii, mangan kantan muxune xunna Nebusaradan yi ne lu Yuda yamanani, a yi manpa bili nakone nun xene fi e ma. **11** Babilɔn mangan Nebukadanesari bata yi yamarinini ito fi mangan kantan muxune xunna Nebusaradan ma lan Yeremi ma, a naxa, **12** “Sa a tongo, i yi i yengi dɔxo a xɔn, i nama sese naxi dɔxo a ra, koni a na naxan fala, i na liga a xa.” **13** Mangan kantan muxune xunna Nebusaradan nun Nebusasaban, mangan bundɔxɔne kuntigin nun Neragala-Sareseri, kuntigi gbeena nde e nun Babilɔn kuntigine birin **14** yi xerane rasiga Yeremi tongodeni kantan tiine banxin sansanna kui, e yi a taxu Axikan ma diin Gedali ra, Safan mamandenna, alogo a xa siga a ra a konni. A sa lu a kon kaane ye. **15** Alatala yi falan ti Yeremi xa, a yi kantan tiine banxin sansanna kui waxatin naxan yi, a naxa, **16** “Sa falani ito ti Ebedi-Meleki Kusi kaan xa, i naxa, ‘Alatala Senben Birin Kanna, Isirayilaa Ala ito nan falaxi, a naxa, “N bata naxankatan nan ma fe fala taani ito xili ma a faɔin mi naxan na. Awa, iki n fama na rakamalideni nen i yee xori. **17** Alatalaa falan ni ito ra. Na lɔxɔni, n na i makantanma nen, i mi se muxune sagoni i gaxuxi naxanye yee ra. **18** N na i rakisima nen, i mi faxe silanfanna ra sese ma. Bayo i bata i yigi sa n yi, i luma nen i nii ra,” Alatalaa falan nan na ra.”

40 Alatala yi falan ti Yeremi xa, mangan kantan muxune xunna Nebusaradan yelin xanbini a bejinɔ Rama taani. Bayo a bata yi Yeremi li xidixi yɔlɔnxɔnna ra menni Yerusalem nun Yuda muxu suxine ye e yi sigama naxanye ra Babilɔn yi konyiyani. **2** Mangan kantan muxune xunna yi Yeremi tongo, a yi a fala a xa, a naxa, “Alatala, i ya Ala gbaloni ito nan ma fe fala be xili ma. **3** Alatala naxan fala, a bata na rakamali, bayo e bata yulubin liga Alatala ra, e mi e tuli matixi a xuiin na, feni ito yi liga e ra. **4** Iki, n yɔlɔnxɔnna bama nen i yiine ma. Xa i tinɔe fe n fɔxo ra Babilɔn yi, fa. N na n yengi dɔxe i xɔn. Xa a mi i kenenxi, i fa n fɔxo ra Babilɔn yi, hali i mi fa. I nɔe sigɔ nen yamanan yiren birin yi, denaxan na i kenen i siga menni.” **5** A to mi a yabi sinma Nebusaradan mɔn yi a fala a xa, a naxa, “Babilɔn mangan bata

Gedali findi Yuda yamanan xunna ra, xete na fema, Axikan ma dii xemena, Safan mamandenna. I sa dɔxo yamaan ye a fema, hanma denaxan na i kenen, i siga menni.” Mangan kantan muxune xunna yi donseene nun kiseene fi a ma, a yi a bejin. **6** Yeremi yi siga Axikan ma dii xemɛn Gedali fema Misipa taani, a yi lu a fema yamaan ye naxanye luxi yamanani. **7** Sofa kuntigine nun e sofaan naxanye mɔn yi burunne ra, ne birin to a me, a Babilɔn mangan bata Axikan ma dii xemɛn Gedali findi yamana kanna ra, a yi yamanan xemene nun naxanle nun diidine taxu a ra, yiigelitɔɔn naxanye mi xali konyiyani Babilɔn yi. **8** Netaniyaa dii xemɛn Yisimayeli nun Kareyaa dii xemene Yoxanan nun Yonatan nun Tanxumeti a dii xemɛn Seraya, e nun Netofa kaana Efayi a diine nun Maka kaana dii xemɛn Yaasaniya, ne nun e ganle yi siga Gedali fema Misipa taani. **9** Axikan ma dii xemɛn Gedali, Safan mamandenna yi a kolo e nun e ganle xa, a naxa, “E nama gaxu wale Babilɔn kaane xa, e lu yamanani, e wali Babilɔn mangan xa, e herin sɔtoma nen. **10** N luma nen Misipa taani Babilɔn kaane yee ra, naxanye fama en ma. E tan xa manpa bogine bolon, e bogiseene xaba, e turene ba, e yi e ramara, e lu e taane yi, e denaxanye tongoxi.” **11** Na ma, Yahudiyɔn naxanye birin yi Moyaba yamanan nun Amonine yamanan nun Edɔn yamanani e nun yamana gbete ye birin yi, ne yi a me a Babilɔn mangan bata yamaan muxun dɔnxene lu Yuda yamanani, a yi Axikan ma dii xemɛn Gedali findi yamana kanna ra e xunna, Safan mamandenna. **12** Yahudiyane yi fa, sa keli yiren birin yi, e yi raxuyaxi ayi denaxanye yi, e yi fa Yuda yamanani Gedali fema Misipa taani, e yi manpa bogine nun bogiseene malan han a gbo ayi. **13** Kareyaa dii xemɛn Yoxanan nun sofa kuntigin naxanye birin yi burunne ra, ne yi fa Gedali fema Misipa taani. **14** E yi a fala a xa, e naxa, “I mi a kolon ba, a Amonine mangan Baalisi bata Netaniyaa dii xemɛn Yisimayeli rafa alogo a xa fa i faxa?” Koni Axikan ma dii xemɛn Gedali mi la e ra. **15** Kareyaa dii xemɛn Yoxanan yi a fala Gedali xa wundoni Misipa taani, a naxa, “Tin n xa sa Netaniyaa dii xemɛn Yisimayeli faxa. Muxu yo mi a kolonma. Nanfera i tinma a xa i faxa, Yahudiyani itoe birin yi raxuya ayi naxanye i rabilinni, Yuda yamaan dɔnxen yi lo ayi?” **16** Axikan ma dii xemɛn Gedali yi Kareyaa dii xemɛn Yoxanan yabi, a naxa, “I nama na liga del Bayo i naxan falama Yisimayeli xun ma, wulen nan na ra.”

41 Nēen kike soloferedeni, Netaniyaa dii xēmen Yisimayeli, Elisama mamandenna mangan xabilan muxuna nde, naxan yi mangana kuntigina nde ra, na yi fa Axikan ma dii xēmen Gedali fēma Misipa yi, muxu fu biraxi a fōxō ra. E yi e dege e bode xōn ma mēnni Misipa taani. **2** Nayi, Netaniyaa dii xēmen Yisimayeli nun na muxu fune yi keli sanja ma kedenni, e yi Axikan ma dii xēmen Gedali fāxa silanfanna ra, Safan mamandenna, Babilōn mangan naxan dōxō yamanan xun na. **3** Yisimayeli mōn yi Yahudiyane birin fāxa, naxanye yi Gedali fēma Misipa taani, e nun Babilōn kaane sofaan naxanye yi na. **4** Gedali fāxa lōxōn xōtōn bode, muxu yo munma yi a kolon, **5** muxu tonge solomasēxē yi fa sa keli Siken nun Silo nun Samari taane yi, naxanye de xabeye yi bixi, e dugine yibōxi, e yete maxabaxi sunun taxamasenna ra, alogo e xa fa bogise saraxane nun wusulanna ba saraxan na Alatalaa banxini. **6** Netaniyaa dii xēmen Yisimayeli yi mini e ralandeni Misipa taani. A siga wugē. A to e li, a yi a fala e xa, a naxa, “E fa so Axikan ma dii xēmen Gedali konni.” **7** Koni e to so taani, Netaniyaa dii xēmen Yisimayeli nun a fōxōrabirane yi e kōē raxaba, e yi e birin woli ige ramaraden yinla ra. **8** Koni muxu fu yi e yē, ne yi a fala Yisimayeli xa, e naxa, “I nama nxu fāxa, bayo donseene luxunxi nxu xōn xēene ma, murutun nun fundenna nun turen nun kumina.” Nayi, a mi ne fāxa e ngaxakedenne xōn. **9** Yisimayeli Gedali a muxune binbine woli ige ramara yinla naxan na, Manga Asa nan na rafala, alogo a xa taan xun mayenge Isirayila mangan Basa ma. Netaniyaa dii xēmen Yisimayeli yi men nafe binbine ra. **10** Na danguxina, Yisimayeli yi Misipa kaane suxu, mangana dii tēmene nun yamaan naxan birin yi luxi na yi, mangan kantan muxune xunna Nebusaradan naxanye taxu Gedali ra, Axikan ma dii xēmena. Netaniyaa dii xēmen Yisimayeli yi keli, a xa siga e ra konyiyani Amonine yamanani. **11** Netaniyaa dii xēmen Yisimayeli fe jaxin naxan liga, Kareyaa dii xēmen Yoxanan yi na mē e nun sofa kuntigin naxanye birin yi a fōxō ra. **12** E yi ganla birin tongo e siga Netaniya a dii xēmen Yisimayeli yengēdeni, e sa a li dara gbeen de Gabayon taani. **13** Yisimayeli yi sigama yamaan naxan na, ne to Kareyaa dii xēmen Yoxanan to, e nun sofa kuntigin naxanye yi a fōxō ra, e birin yi sewa. **14** Yisimayeli muxun naxanye birin suxu Misipa taani, a siga e ra konyiyani, ne yi xete Yoxanan ma, Kareyaa dii

xēmena. **15** Koni Netaniyaa dii xēmen Yisimayeli nun a muxu solomasēxē yi nō e giye Yoxanan yēē ra, e siga Amonine yamanani. **16** Kareyaa dii xēmen Yoxanan nun sofa kuntigin naxanye birin yi a fōxō ra, ne yi ti yamaan yēē ra naxanye yi luxi e nii ra, Netaniyaa dii xēmen Yisimayeli naxanye suxu Misipa taani Axikan ma dii Gedali fāxa xanbini, sofane nun jaxanle nun diidine nun kuntigine, a naxanye xali Gabayon taani. **17** E yi siga, e sa ti Kimihami yigiyadeni, Betelemini taan dēxōn, alogo e xa siga Misiran yamanani, **18** e makuya Babilōn kaane ra, e yi gaxuma naxanye yēē ra, bayo Netaniyaa dii xēmen Yisimayeli bata yi Gedali fāxa, Axikan ma dii xēmena, Babilōn mangan naxan dōxō yamanan xun na.

42 Sofa kuntigine nun Kareyaa dii xēmen Yoxanan nun Hosayaa dii xēmen Yesani nun yamaan birin, muxudin nun muxu gbeen birin yi e maso, **2** e yi a fala Nabi Yereimi xa, e naxa, “Yandi, tin, i yi Alatala, i ya Ala mafan nxu xa, i yi a mafan yama dōnxēni ito xa. Bayo nxu yi wuya, koni iki nxu muxu dando nan luxi, alo i a toma kii naxan yi. **3** Alatala, i ya Ala xa kiraan yita nxu ra, nxu lanma nxu xa bira naxan fōxō ra, e nun nxu lanma nxu xa naxan liga.” **4** Nabi Yereimi yi a fala e xa, a naxa, “N bata a mē. N na Alatala maxandima nēn, ε Ala, alo ε a falaxi kii naxan yi. Alatala na ε yabi naxan na, n na birin falama nēn ε xa, n mi sese luxunje ε ma.” **5** E yi a fala Yereimi xa, e naxa, “Alatala xa findi sere tinxinxi jōndi falan na nxu xili ma, xa nxu mi Alatala i ya Alaa falane birin suxu a naxanye tima i xa lan nxu ma! **6** Xa a findi a jaxin na hanma a fajina, nxu Alatala xuiin suxuma nēn, en ma Ala, nxu i xēxi naxan fēma alogo nxu xa herin sōto, Alatala, en ma Alaa fala suxun xōn.” **7** Xi fu to dangu, Alatala yi falan ti Yereimi xa. **8** Yereimi yi Kareyaa dii xēmen Yoxanan xili, e nun sofa kuntigin naxanye birin yi a fōxō ra, e yamaan birin, muxudin nun muxu gbeena. **9** A yi a fala e xa, a naxa, “Alatala, Isirayilaa Ala ito nan falaxi, ε n xēxi naxan ma alogo n xa sa a mafan ε xa, a naxa, **10** ‘Xa ε lu dōxi yamanani ito yi, n na ε rasabatima nēn, n mi ε fe kale, n yi ε si, n mi ε tale mume, bayo n bata sunu lan gbalon ma, n naxan ligaxi ε ra.’ **11** Alatalaa falan ni ito ra, a naxa, ‘E nama gaxu Babilōn mangan yēē ra, ε gaxuxi naxan yēē ra iki. E nama gaxu a yēē ra, bayo n luxi ε xōn nēn alogo n xa ε rakisi, n yi ε xunba a yii. **12** N kininkininma nēn ε ma, a fan yi kininkinin e

ma, a yi ε raxete ε yamanani.' 13 Koni xa ε a fala, ε naxa, 'Nxu mi luma yamanani ito yi!' Xa ε mi ε tuli mati Alatala ε Alaa falan na, 14 xa ε a fala, ε naxa, 'En-en, nxu sigama Misiran yamanan nin, nxu mi fa yengen toe denaxan yi, nxu mi fa yenge so xotaan fe xuiin mema denaxan yi, donseen mi fa dasama nxu yii denaxan yi. Nxu luma menna nin!' 15 Nayi, Yuda muxu donxene, ε tuli mati Alatalaa falan na! Alatala Senben Birin Kanna, Isirayilaa Ala ito nan falaxi, a naxa, 'Xa ε a ragidi yati, a ε xa siga Misiran yamanani, xa ε sa doxo nayi xoneyani, 16 nayi, ε gaxuxi yengen nun fitina kamen naxanye yee ra, ne sa ε sotoma nen Misiran yamanani, ε yi faxa menni. 17 Naxanye birin waxi siga feni Misiran yamanani, e sa doxo na, ne faxama yengen nun fitina kamen nun fitina furen nin, e sese mi luye e nii ra, e sese mi gbaloni minima n naxan nasigama e xili ma.' 18 Alatala Senben Birin Kanna mon ito nan falaxi, Isirayilaa Ala, a naxa, 'N ma xolon nun n ma fitinan godoxi Yerusalen kaane ma kii naxan yi, n ma xolon godoma ε ma na kii nin, xa ε siga Misiran yamanani. E findima nen danga yamaan misaala ra, ε fe yi muxune yigitege, e yi ε yalagi, e ε konbi. E mi fa yireni ito toe mumel!' 19 "Yuda yamaan muxu donxene, Alatala bata a fala ε xa, a ε nama siga Misiran yamanani. E xa a kolon ki faji, a n bata ε rakolon to! 20 E tantanni ito sa findima ε faxa xunna nan na, ε to n xexi Alatala fema, ε Ala, ε naxa, 'Alatala en ma Ala maxandi nxu xa. Alatala en ma Ala na naxan yo fala, i na fala nxu xa, nxu a ligama nen.' 21 Awa, n bata fa ε yabi to, koni ε mi ε tuli matima Alatalaa falan na, en ma Ala, a naxanye birin falaxi n xa lan ε ma. 22 Awa iki, ε xa a kolon. E faxama nen yengen nun fitina kamen nun fitina fureni ε sigan doxodeni denaxan yi."

43 Yeremi yelinxina falane raliye yamaan birin ma, Alatala e Alaa falane birin, alo Alatala e Ala a yamari a ma kii naxan yi, 2 Hosayaa dii xemena Asari nun Kareyaa dii xemene Yoxanan nun a yamaan wasodene birin yi a fala Yeremi xa, e naxa, "I wule! Alatala, en ma Ala mi i rafaxi a faladeni, fa fala, 'e nama siga Misiran yi ε sa doxo na.' 3 Koni Neriya dii xemene Baruku nan i radinxu nxu ma alogo nxu xa sa Babilon kaane sagoni, e yi nxu faxa hanma e siga nxu ra konyiyani Babilon yi." 4 Kareyaa dii xemene Yoxanan nun sofa kuntigine nun yamaan birin yi tondi e tuli matiye Alatalaa falan na, fa fala e xa

doxo Yuda yamanani. 5 Kareyaa dii xemene Yoxanan nun sofa kuntigine birin yi Yuda yama donxen tongo naxanye bata yi fa doxo Yuda yamanani sa keli siyane birin tagi, e yi raxuyaxi ayi denaxanye birin yi 6 e nun xemene nun jaxanle nun diidine nun mangana dii temene, Babilon mangan kantan muxune xunna Nebusaradan muxun naxanye taxu Gedali ra, Axikan ma dii xemena, Safan mamandenna, e nun Nabi Yeremi nun Baruku, Neriya dii xemena. 7 E yi siga Misiran yamanani, bayo e mi tin e tuli matiye Alatala xuiin na, e yi sa Tapanese taan li. 8 Alatala yi falan ti Yeremi xa Tapanese taani, a naxa, 9 "Geme xungbena ndee tongo i yi e bitin bendeni Misiran mangana banxin so deen na Tapanese taani Yuda kaane yee xori. 10 I yi a fala e xa, i naxa, 'Alatala Senben Birin Kanna, Isirayilaa Ala ito nan falaxi, a naxa: N xeraan nasigama nen Babilon mangan Nebukadanesari foxo ra, n ma walikena. N yi a manga gbeden doxo gemeni itoe fari n naxanye luxunxi, e yi xunna soni bandun nininna ra mangan xun ma be. 11 A fama nen, a Misiran yamanan yenge. Sayaan nagidixi naxanye ma, ne yi faxa. Konyiyaan nagidixi naxanye ma, ne yi siga konyiyani. Silanfanna nagidixi naxanye ma, ne yi faxa silanfanna ra. 12 A yi teen so Misiran yamanan suxure kidene ra, a yi e gan, a siga e suxurene ra. A yi Misiran yamanan no alo xuruse kantanna a domaan tongoma kii naxan yi, a mon yi xete boje xunbenli. 13 A Beti-Semesi senbeten geme daxine fan kala Misiran yi, a yi Misiran kaane suxurene kide banxine gan."

44 Ala yi falan ti Yeremi xa lan Yahudiyane birin ma Misiran yamanani naxanye yi doxi Migidoli taan nun Tapanese taan nun Nofi taani e nun Misiran yamanan faxa binna, a naxa, 2 Alatala Senben Birin Kanna, Isirayilaa Ala ito nan falaxi, a naxa, "E bata a to n jaxankatan naxan saxi Yerusalen fari, e nun Yuda taane birin. To, e bata kala hali muxuna, a mi fa e yi 3 amasoto e fe jaxin xon e naxan ligaxi e to n naxolo, e sa wusulanna gan ala gbetene xa, e yi e batu, e tan nun ε tan nun ε benbane mi naxanye kolon. 4 N yi n ma walikene rafama ε ma yeye, nabine, e yi a falama, e naxa, 'E xete xosi feni itoe foxo ra naxanye mi rafan Ala ma.' 5 Koni e mi n xuiin name, e mi e tuli mati, e mi xete e fe jaxine foxo ra, e mi ba wusulanna ganje ala gbetene xa. 6 Nayi, n ma xolo gbeen yi godo, a yi fitinan nafa Yuda taane birin ma, e nun Yerusalen kirane, e yi kala, e yi raxori, alo e kii naxan yi to." 7

iki, Alatala, Ala Senben Birin Kanna, Isirayilaa Ala ito nan falaxi, a naxa, “Nanfera e fe naxi sifani ito ligama e yete ra, e yi xemene nun naxanla nun dii joren nun dii futene raxori Yuda yamaan ye, muxu yo mi lu? 8 E n naxoloma e batu se rafalaxine ra, e wusulanna gan ala gbetene xa Misiran yamanani ito yi e fa yigiyaxi denaxan yi. E waxi e yete raxori feen nin, e findi danga yamaan misaala ra boxo xonna siyaan bonne xa, e lu e konbe. 9 E bata jinan e benbane kewali naxine xon ba, e nun Yuda mangane nun e naxanle nun e nun e naxanle kewali naxine, e naxanye liga Yuda yamanan nun Yerusalen taani? 10 Han to muxu yo munma nimisa, a gaxu, a n ma sariyan nun n ma yamarine suxu n naxanye soxi e nun e benbane yii.” 11 Nanara, Alatala Senben Birin Kanna, Isirayilaa Ala ito nan falaxi, a naxa, “N bata a ragidi, n xa gbalon liga e ra, n yi Yuda yamaan birin naxori. 12 Yuda kaan naxanye luxi e nii ra, naxanye a ragidixi e xa sa dexo Misiran yamanani, ne birin naxorima nen Misiran yamanani, e birin yi faxa yengen nun fitina kameni muxudin nun muxu gbeena. E findima nen danga yamaan misaala ra, e fe yi muxune yigitege, e yi e yalagi, e e makonbi. 13 N na e kewanle saranma nen e ra e tan naxanye doxi Misiran yi, alo n Yerusalen kaane kewanle saran e ra kii naxan yi yengen nun fitina kameni nun fitina furen na. 14 Muxu yo mi luye a nii ra Yuda muxu donxene ye, naxanye bata sa dexo Misiran yamanani, e sese mi e futuxule alogo e xa xete, e dexo Yuda yamanani, bayo e mi xetema, fo e muxu gixi dando gbansan.” 15 Xemene naxanye birin yi a kolon a e naxanle yi wusulanna ganma ala gbetene xa, e nun naxanla naxanye birin yi tixi na yama gbeen malanni, e nun yamaan naxan birin yi doxi Misiran nun Misiran yamanan faxa binni, ne yi Yereimi yabi, e naxa, 16 “Nxu mi fa waxi i ya falan name feni, i naxan tima fata Alatala ra. 17 Koni nxu waxi nxu de xuiin nan nakamali fe yi, nxu yi wusulanna gan Kore Xonna Naxalan Mangan xa, nxu yi minse saraxane raboxon a xa alo nxu nun nxu benbane nun nxo mangane nun kuntigine yi a ligama kii naxan yi a foloni Yuda taane yi, e nun Yerusalen kirane xon. Na waxatini, donseene yi nxu yii nun, nxu yi naxunni, nxu mi yi naxankataxi. 18 Koni xabu nxu ba wusulanna ganje Kore Xonna Naxalan Mangan xa, nxu ba minse saraxane raboxonje a xa, seene birin yi dasa nxu ma, yengen nun fitina kameni yi nxu naxankata.” 19 Naxanle mon yi a fala, e naxa, “Nxu yi

wusulanna ganma Kore Xonna Naxalan Mangan xa waxatin naxan yi, nxo xemene mi yi na kolon ba? E yi a kolon a nxu yi burudine ganma a maligan na, nxu yi minse saraxane raboxon a xa.” 20 Nayi, Yereimi yi a fala yamaan xa, xemene nun naxanla, yamaan naxan birin na yabin so a yii, a naxa, 21 “E wusulanna naxanye ganxi Yuda taane nun Yerusalen kirane xon, e tan nun e benbane nun e mangane nun e kuntigine nun yamaan birin, Alatala mi a xaxili luxi na xon ba, a yi a miri na ma a bojeni? 22 Alatala mi yi fa noe e kewali naxine nun e xosi feene raxanje waxatin naxan yi, e yamanan yi kala, a yi raxori, a findi danga yiren misaala ra, muxu yo mi doxi naxan yi, alo a kii naxan yi to. 23 Bayo e bata wusulanna gan suxurene xa, e yi yulubin liga Alatala ra, bayo e mi e tuli matixi Alatala xuiin na, e mi a sariyane nun a yamarine nun a maxadi xuine suxu, nanara, gbaloni ito e lixi, alo a kii naxan yi to.” 24 Yereimi yi a fala yamaan xa, e nun naxanle birin, a naxa, “E tuli mati Alatala falan na, e tan Yuda kaan naxanye Misiran yamanani. 25 Alatala Senben Birin Kanna, Isirayilaa Ala ito nan falaxi, a naxa, ‘E nun e naxanle naxan falaxi e deen na, e bata na liga. E a fala nen, e naxa, “Nxu waxi nxu de xuine nan nakamali fe yi, nxu yi wusulanna gan Kore Xonna Naxalan Mangan xa, nxu minse saraxane raboxon a xa.” Nba, e naxan falaxi, e na liga. E de xuiin nakamali!’ 26 Koni, e tuli mati Alatala falan na, e tan Yuda kaan naxanye doxi Misiran yamanani! Alatala naxa, ‘N bata n kolo n xili gbeeni, Yuda kaa yo mi fa a koloma n xinli sonon, naxanye doxi Misiran yi. E sese mi fa a falama, e naxa, “N bata n kolo Habadan Marigina Alatala yi.” 27 Bayo n na n yeen tima e ra nen alogo e xa gbalon soto, koni herin mi a ra. Yuda kaane birin naxorima nen yengen nun fitina kameni, naxanye doxi Misiran yamanani, han e jan. 28 Muxu dando nan tun yengeni minima, e keli Misiran yamanani siga Yuda yamanani. Nayi, Yuda yamaan muxu donxen naxanye faxi doxodeni Misiran yamanani, ne birin a kolonma nen, xa e tan nan ma fala jondin na hanma n ma falana.’ 29 Alatala falan ni ito ra, a naxa, ‘Ito nan fa findima taxamasenna ra e xa fa fala n fama nen e kewanle sarandeni e ra yireni ito yi alogo e xa a kolon a n konko falane kamalima nen yati, lan e naxankata feen ma.’ 30 Alatala ito nan falaxi, a naxa, ‘N Misiran mangan Xofira sama nen a yaxune sagoni, naxanye waxi a faxa feni, alo n Yuda mangan Sedeki sa Babilon mangan Nebukadanesari

sagoni kii naxan yi, a yaxun naxan yi waxi a faxa feni.”

45 Yuda mangan Yosiyaa dii xemen Yehoyakimi a mangayaan j̄ee naaninden, Nabi Yereṃi yi falani ito ti Neriya dii xemen Baruku xa, a Yereṃi a falane sebe kedini waxatin naxan yi, a naxa, **2** “Alatala, Isirayilaa Ala ito nan falaxi lan i ma, Baruku, a naxa, **3** ‘I yi a falama, i naxa, “Gbalona n xa! Bayo Alatala bata j̄axankatan sa n ma soxolen fari, n bata xadan kutunden, n mi matabu yo s̄ot̄oma.” **4** Nanara, Alatala yi a fala n xa a n xa ito fala i xa, a naxa, ‘Alatala ito nan falaxi, a naxa, “N naxan tixi, n na rabirama nen. N naxan sixi, n na talama nen, yamanani ito k̄onin. **5** Nayi, i tan muxu gbeeyaan nan fenma i yete xa ba? I nama a fen! Bayo n gbalon nafama nen birin ma. Koni, n na i rakisima nen, i na siga dede yamanani.” Alatalaa falan nan na ra.”

46 Alatala falani itoe nan ti Nabi Yereṃi xa lan siyane ma: **2** A ito nan fala lan Misiran yamanan nun Misiran mangan Neko a ganla ma, Babilon mangan Nebukadanesari naxan n̄o yengeni Efirati baan de Karakemisi taani, Yuda mangan Yehoyakimi a mangayaan j̄ee naaninden, Yosiyaa dii xemena. **3** “E ye masansan wure lefa xungbene nun a xurine yiton! E maso, e yengen so! **4** E soone yiton, soo ragine xa te e fari! E xunna makantan wure k̄om̄etine so, e ti e yirene yi! E tanbane yiton! E kanke ye masansanne ragodo e ma! **5** Nanfera, n fa e gaxuxin nan toma iki? E xetema e xanbi ra, e sofane bata faxa. E xetema e giye! E e gima, e mi e xanbi rato. E gaxuxin yiren birin yi,” Alatalaa falan nan na ra. **6** “Hali xulunlane mi n̄oe e giye! Hali fangamane mi n̄oe e futuxule! E sanna radinma, e sa bira f̄o k̄omen f̄ox̄on yamanani Efirati baan de.” **7** “Nde ito ra naxan tema alo Nila baana, naxan igeye b̄ox̄onma a ma a findi fufaan na? **8** Misiran nan tema alo Nila baana, naxan igeye b̄ox̄onma a ma a findi fufaan na. A a falama, a naxa, ‘N tema nen, n sa b̄ox̄on birin xun ma, n yi taane nun e muxune birin nax̄ori.’ **9** Soo ragine, e te yengeni! Wontoro ragine e f̄on e ma! Sofane, e mini e ye masansan wure lefane ra, e tan Kusi kaane nun Puti kaane nun Ludu kaan xali wonle!” **10** “Marigina Alatala Senben Birin Kanna nan gbee na l̄ox̄on na, a gbeej̄ox̄o l̄ox̄ona, a gbeen j̄ox̄oma a yaxune ra l̄ox̄on naxan yi. Silanfanna faxan tima nen na l̄ox̄oni han a wasa wunla ra, bayo a luxi nen alo saraxana

Marigina Alatala Senben Birin Kanna xa, k̄omen f̄ox̄on yamanani Efirati baan de. **11** Misiran yama fajina, e siga Galadi yamanani e sa senna fen. Koni e dandan ferene fenma fuyan, seri mi fa e yiyalanj̄e s̄on̄on. **12** Siyane bata i ya yarabina fe me. I gbelegbele xuiin bata b̄ox̄on birin suxu. Amasoto sofane tema e bode fari, e birin yi bira.” **13** Alatala falani ito nan ti Nabi Yereṃi xa lan Babilon mangan Nebukadanesari fa feen ma Misiran yamanan yengedeni: **14** “E a rawanga Misiran yamanani, Migidoli kaane xa a me, Nofi kaane nun Tapanese kaane xa a me! A fala e xa, e naxa, ‘E keli, e yiton, bayo yengen bata e konna li!’ **15** Nanfera e sofane bata rax̄ori? E mi tiye, bayo Alatala bata e radin b̄ox̄oni. **16** A muxu wuyaxi rabirama nen. E tema nen e bode ma, e bira, e naxa, ‘En keli, en xete en konne yi, en bari taane! En na en masiga halagi ti yengeni ito ra!’ **17** E a falama nen menni, e naxa, ‘Misiran mangani ito a s̄on̄on gbo de! Koni na waxatin bata a dan!’” **18** Mangana falan ni ito ra naxan xili Alatala Senben Birin Kanna, a naxa, “Habadan Ala nan n na, n bata n k̄olo n yeteni, fa fala muxuna nde fama naxan senben gbo alo Taboro geyana geyane tagi, alo Karemele geyana baan dex̄on. **19** Misiran kaane, e goronne yiton e siga konyiyani! Bayo Nofi taan findima nen yire magenla ra, a ganma nen, muxu yo mi luma a yi. **20** Misiran yamanan findixi j̄inge fajin nan na. Sigin fama nen a xili ma sa keli sogeteden k̄om̄enna ma. **21** Misiran kaane bata x̄oje sofa yebaxine ramara e ganli naxanye masuxi e x̄on alo tura raturaxine. Hali ne fan e xun xetema nen, e gi e bode x̄on. E mi tiye e funfuni yengen l̄ox̄oni, bayo gbalon l̄ox̄on bata fa e ma, n na e kewanle saranma e ra l̄ox̄on naxan yi. **22** Misiran kaane e gima nen e yaxu senb̄emane bun alo sajina. E fama e xili ma nen e nun bunbine, alo naxanye wudine segema. **23** Alatalaa falan ni ito ra, e a f̄ot̄onna segema nen, hali muxun mi n̄oe soe f̄ot̄onna naxan na bayo e wuya alo tuguminne, e yat̄en mi n̄oe kolonj̄e. **24** Yagin nan a ra Misiran yamana fajin xa. A bata sa yamaan sagoni, naxanye sa kelixi k̄om̄enna ma.” **25** Alatala Senben Birin Kanna, Isirayilaa Ala naxa, “N kelima nen No taana ala xili ma, Am̄on e nun Misiran yamanan nun a mangan nun a alane nun a kuntigine e nun naxanye birin e yigi sama Misiran mangani. **26** N na e sama nen e yaxune sagoni, naxanye waxi e faxa feni, Babilon mangan Nebukadanesari nun a kuntigine. Na xanbi ra, muxune m̄on yi d̄ox̄o Misiran yi alo a f̄ol̄oni,” Alatalaa falan nan na ra. **27** “E tan Yaxuba

yixetene, n ma walikene, e nama gaxu, Isirayila kaane, e nama kuisan! Bayo, n na e rakisima nen, n yi sa e ba yire makuyeni, n yi e bõnsõnna ba yamanani e sa konyiyani denaxan yi. Yaxuba bõnsõnna muxune mōn xetema nen, e yi lu maraxaran nun bõnɛ xunbenli. E mi fa yimaxe sōnōn! 28 Alatalaa falan ni ito ra, a naxa, ‘E tan Yaxuba yixetene, n ma walikene, e nama gaxu, bayo n luma nen e xōn. N siyane birin naxōre nen, n na e raxuyaxi ayi naxanye yɛ, koni n mi e tan naxōrima. N na e xuruma nen alo a lan kii naxan yi, bayo n mi e yatema sōntarene ra.’”

47 Alatala falani ito nan ti Nabi Yeremi xa lan Filisistine ma, benun Misiran mangan xa Gasa taan yenge: 2 Alatala ito nan falaxi, a naxa, “Walanne bata keli sogeteden kōmenna ma, e luma nen alo fufana, e sa yamanan xun ma, e nun naxanye birin a yi, e nun taane nun e muxune. Yamaan sōnxōma nen, yamanan muxune birin yi gbelegbele. 3 Soone torone xuiin minima nen, yaxune yenge so wontorone gi xuine yi mɛ. Fafane mi e diine danxunma na lōxōni bayo e tunna xōlōma e ma nen fefe! 4 Amasōto Filisiti yamanan birin naxōri lōxōn bata a li, han muxu yo mi lu naxan Tire taan nun Sidōn taan maliyɛ. Bayo Alatala Filisiti kaane halagima nen, yamaan dōnxen naxan sa kelixi Kafatoro fōxō ige tagi bōxōni. 5 Gasa kaane e xunna bima nen sununi, Asikalōn taan yi yidundu. E tan yamaan muxu dōnxen naxanye dōxi meremerene yi, e luma e yete maxabe sununi han waxatin mundun yi? 6 E a falama nen, e naxa, ‘Ee! Alatalaa silanfanna luma nxu faxe han waxatin mundun yi? A xa so a tēeni, a danna sa faxan na, a raxara fa.’ 7 Koni a xa a raxara di? Bayo Alatala nan yamarin fixi a yengen xa keli Asikalōn taan nun baan binna xili ma.”

48 Alatala Senben Birin Kanna, Isirayilaa Ala ito nan falaxi lan Moyaba yamanan ma, a naxa, “Gbalon Nebo taan xa, bayo a bata kala! Yarabin na a ra Kiriyaṭayimi taan xa, e bata a suxu yengen! Yarabina e yire makantanxin xa e nun yigitegena. 2 Tantunna mi fa Moyaba yamanan xa, bayo e fe jaxine nan yitōnna a xili ma Xesibōn taani, e naxa, ‘En siga, en sa a raxōri siyane ye!’ E tan Madimen kaane fan, e taani dunduma nen bayo yengena e fōxō ra. 3 Gbelegbele xuiin tema nen Xoronayin taani! Halagin na a ra! A birin kalama nen! 4 Moyaba yamanan kalama nen! A diine gbelegbele xuiin mēma nen. 5 E tema wuge nen Luxiti geyaan ma. E godoma nen

gbelegbele Xoronayin taani jaxankatana fe ra. 6 E gi! Birin xa a niin makata! E luxun alo wudi dungin burunna ra! 7 Amasōto e yigi saxi e kēwanle nun e nafunle nin, e fan suxuma nen yengeni, e suxuren Kemosi fan yi xali konyiyani e nun a ki muxune nun e kuntigine. 8 Halagi tiin soma nen e taane birin yi, taa yo mi luye. Bōnbōn kuine kalama nen, meremerene yi halagi, bayo Alatala na nan falaxi. 9 E Moyaba mali a xa a gi alo xōliin na tugan. A taane yigelima nen, muxu yo mi luma e yi. 10 Dangan na kanna xa naxan na Alatalaa wanla rabepin. Dangan na kanna xa naxan tondima yengen soe!” 11 “Moyaba yi bōnɛ xunbelixi xabu a dii jōre waxatini, alo manpaan na ramara alogo a xa siga jaxunɛ ayi. A mi baxi a yamanani, a siga gbete yi, a mi sigaxi konyiyani. Nanara, a mōn jaxun a kiini, a xirin mi masaraxi.” 12 Koni, Alatalaa falan ni ito ra, a naxa, “Lōxōne fama, n muxune rafama e ma lōxōn naxanye yi, e yi e ba e yamanani siga yamana gbete yi. E yi e yamanani geli, e yi a xunna kala. 13 Moyaba yagima nen Kemosi suxurena fe ra, alo Isirayila yamaan yagi kii naxan yi Beteli kidena fe ra, e yi e yete taxuxi naxan na. 14 E a falama di nayi, e naxa, ‘Sofa fajine nan nxu ra, yenge so wekilexine?’ 15 Moyaba yamanan kalama nen, tutin yi te a taane yi. E sigama a banxulan fajine ra nen e faxadeni,” Mangana falan nan na ra, naxan xili Alatala Senben Birin Kanna. 16 Moyaba halagi waxatin bata a li, gbalon mafuraxin fama a xili ma. 17 E tan a rabilinna muxune, e a wuga, e tan naxanye birin a xili gbeen kolon! E naxa, “Ee! Senbe gbee sifani ito bata kala! Mangaya gbeeni ito bata halagi!” 18 “E tan Dibon kaane, e keli e binyeni, e godo han e sa dōxō bōxō xareni, bayo Moyaba yamanan kala muxun fama nen e xili ma. A e taa makantanxine kalama nen. 19 Aroyeri kaane, e ti kiraan matodeni, muxu gixi dangumatōon naxanye e futuxuluxi, e ne maxōdin, e naxa, ‘Nanfe ligaxi?’ 20 Yagin nan a ra Moyaba xa, bayo a bata yigitege. E xuini te! E gbelegbele! E a rali Arinon xuden de a Moyaba bata kala!” 21 “Kitin bata keli yamanan xili ma naxan lantani, a bata fa Xolon nun Yahasi nun Mefaati xili ma, 22 e nun Dibon nun Nebo nun Beti-Dibilatayimi, 23 e nun Kiriyaṭayimi nun Beti-Gamulu nun Beti-Meyōn, 24 e nun Keriyoti nun Bosara, e nun Moyaba yamanan taane birin, naxanye maso, naxanye makuya. 25 Moyaba senben bata kala, a fangan bata ba a ra,” Alatalaa falan nan na ra. 26 “E Alaa xōlōn dōlōn so a yii, a xa a xun magi a ra bayo a

bata murute Alatala xili ma! Moyaba xa a makutukutu a baxunni, birin yi gele a ma. 27 E tan xa mi yi Isirayila yamanan magelema ba? E a toxi suxi mujadene nan ye ba, e to e xunne yimaxama a mageledeni, e na a fe fala? 28 E tan Moyaba kaane, e taane rabepin, e sa dōxo fanye yinle ra, e ganbane raliga naxanye e teen sama gēme longonne ra.” 29 “Nxu bata Moyaba kaane wasona fe me naxan gbo han, e nun e yete yigboon nun e wason nun e yete yitena, e nun e yandana.” 30 Alatalaa falan ni ito ra, a naxa, “N na wasona fe kolon, koni e yete matōxōma fuun nin.” 31 “Nanara, n Moyaba wugama, n gbelegbelema sununi Moyaba birin xa. N kutunma Kiri-Hareseti kaane fe ra. 32 N wugama Sibima manpa binle fe ra dangu Yaaseri kaane ra, bayo e yiine bata yi siga han baan xanbi ra, e yiine yi sigaxi han Fōxo Daraan kidi ma. Koni halagi tiin bata e bogi fajine kala. 33 Sewan nun jaxanaxan bata jan Moyaba wudi bili nakone nun xēene yi. N bata manpa igen jan manpa ige badene yi, muxu yo mi fa manpa bogi igen bama sewani. Yenge so sōnxo xuiin nan fa mema na yi. 34 Xesibon kaane gbelegbele xuiin sigama han Eleyale taani, e xuiin sa mema han Yahasi taani, keli Soyari taan ma siga han Xoronayin taani, siga Egilati-Selisiya taani, bayo hali Nimirimi daraan fan bata xōri. 35 N Moyaba yamanan naxorima nen, e tan naxanye saraxane bama taane suxure kidene yi e wusulanna gan e alane xa,” Alatalaa falan nan na ra. 36 “Nanara, n bōnen wugama Moyaba fe ra. N ma mawuga xuiin luxi nen alo xulen xuina sununi. N kutunma Kiri-Hareseti taana fe ra, bayo e nafunla naxan malan, na bata tunun. 37 Bayo muxune birin bata e xunne bi, e birin yi e de xabene bi sununi, e yi e yiine birin maxaba, e kasa benbeli dugine so sununi. 38 Saya feen nan tun fa mema Moyaba banxine nun a yama malandene yi, bayo n bata Moyaba yamanan kala alo fējena muxe mako mi fa naxan ma,” Alatalaa falan nan na ra. 39 Ee! E jaxankataxi! E gbelegbelema han! E yagixin bata e xun xanbi so! Moyaba yamanana fe findima magelen nun gaxu xunna ra nen a rabilinna birin xa! 40 Bayo Alatala ito nan falaxi, a naxa, “E yaxun sinma nen e ma alo singbinna naxan a gabutene yifulunma Moyaba xun ma. 41 Keriyoti suxuma nen, a yire makantanxine yi tongo. Moyaba sofane bōnen luma nen na lōxōni alo jaxanla naxan dii barini. 42 Moyaba kalama nen, a mi fa findima siyaan na sōnōn, bayo a bata murute Alatala xili ma. 43 E tan Moyaba

kaane, gbalon nun yinla nun luti ratixina e yee ra.” Alatalaa falan nan na ra. 44 “Naxan na a gi gbalon bun, na yi sa sin yinla ra! Naxan na te yinla ra, na yi sa a suxu luti ratixin na. Bayo n Moyaba kaane kewanle saranma e ra jēen naxan na, na a limatōon ni i ra,” Alatalaa falan nan na ra. 45 “Muxu gixine taganxin yigiyaan fenma nen Xesibon taani, koni teen minima nen Xesibon taani, tee degen yi mini Sixon ma manga banxini, a Moyaba kaane xunna kala, a yi gbalotoni itoe gan. 46 Gbalona e tan Moyaba kaane xa! Kemosi suxurena yamaan bata tunun, bayo e diine bata xali konyiyani. 47 Koni waxati famatoni, n mon Moyaba muxu suxine raxetema nen. Na kitin nan saxi Moyaba sanna.” Alatalaa falan nan na ra.

49 Alatala ito nan falaxi Amonine xili ma, a naxa, “Dii mi fa Isirayila kaane yii sōnōn ba? Kēe tongo yo mi fa e xa sōnōn ba? Nanfera nayi, Amonine dōxi Isirayila taane yi? Nanfera Mōlōko suxurena yamaan bata Gadi yamanan tongo?” 2 Nanara, Alatalaa falan ni ito ra, a naxa, “Lōxōne fama, n yenge so sōnxo xuiin natema lōxōn naxanye yi Amonine taan Rabaha xili ma, a yi findi taa xōnna ra, a rabilinna taane yi gan. Nayi, Isirayila kaane yi e kedi muxune kedi,” Alatala naxa na kiini. 3 “Xesibon kaane, e gbelegbele, bayo Ayi taan bata kala! Rabaha kaane e sunu xuini te, e kasa benbeli dugine ragodo e ma, e wuga. E gi taan makantan yinna yiren birin yi bayo yaxune bata fa e suxuren Mōlōko suxudeni, e siga a ra konyiyani, e nun a ki muxune nun a kuntigine. 4 Nanfera e kanbama e lanbanne nun e xēene yi, e to rafexi bogise xaba daxine ra? E tan Raba kaane, yama murutexina, e tan naxanye e yigi saxi e nafunle yi e naxa, ‘Nde nōe nxu yenge?’” 5 Marigina, Alatala Senben Birin Kanna falan ni ito ra, a naxa, “N fe magaxuxin nafama nen e xili ma, sa keli e rabilinne birin yi, e birin yi kedi, muxu yo mi muxu gixine xun lanje. 6 Koni na na dangu, n mon Amonine muxu suxine raxetema nen,” Alatalaa falan nan na ra. 7 Alatala Senben Birin Kanna ito nan falaxi Edon yamanan xili ma, a naxa, “Fekolonne bata dasa Teman yamanani ba? Maxadi tiine mi fa na xaxilimane ye ba? E fe kolonna bata kala ba? 8 E xete e giye, e luxun faran yinle ra, e tan Dedan kaane! Bayo n gbalon nafama nen Esayu yixetene xili ma, n na e kewanle saran e ra waxatin naxan yi.” 9 “Xa muxune fa e nakōni e manpa bogine mujadene, e mi bogi dando xan gbansan luma na ba? Xa mujadene fa

i konni kœeen na, e mi e waxonna xan tongoma ba? 10 Nba, n tan Ala Esayu yixetene yii seene birin naxorima nen, n yi e luxundene birin namini kenenni. E mi fa nœ e luxunje. E bõsonna nun e ngaxakedenne nun e dõxõ bodene birin halagima nen, muxu yo mi lu Esayu bõsonni. 11 E e kiridine lu na, n na n yengi dõxe e xõn. E kaja gilene xa e yigi sa n yi.” 12 Bayo Alatala ito nan falaxi, a naxa, “N tan mi naxanye yalagixi kitini, xa ne karahan xõlo igelengenna mindeni, e tan yate sõtaren na nayi ba? En-en de! E mi suxuma sõtarene ra de! E a minma nen yati!” 13 Bayo Alatalaa falan ni ito ra, a naxa, “N bata n kolo n yeteni, fa fala Bosara taan naxorima nen, a rayarabi, a danga, a halagi. A taane birin kalama nen habadan!” 14 N bata xerayana nde a fe me fata Alatala ra, xeraan bata rasiga siyane ma, a xa sa a fala, a naxa, “E keli, e sa Edõn kaane yenge! E keli e sa yengen sol!” 15 Ala naxa, “Edõn kaane, n na e senben xurunma nen siyane birin xa. Birin e rapaxuma nen. 16 E to muxune magaxuma, wason naxan e bõjeni, na bata e ratantan e tan naxanye dõxi faran yinle ra, e nun geyane fari. Hali e e teen sa kore alo singbinna, n na e ragodoma nen,” Alatalaa falan nan na ra. 17 “Edõn yamanan kalama nen, naxan yo na dangu a dõxõn ma, ne yigitegema nen, e kabe, e kolin a fitina feene ma.” 18 Alatala yi a fala, a naxa, “Muxu yo mi fa luye be. Adamadi yo mi dõxe a yi alo Sodoma nun Gomora nun e rabilinna taane halagi kii naxan yi. 19 N luma nen alo yatan naxan xapexin minima fõtõnni Yuruden baan de, a siga sube fendeni yire fajini. N Edõn kaane kedima nen e yamanani sanja ma kedenni, n naxan sugandixi, n sa na dõxõ na yi. Bayo, nde maliga n tan na? Nde n yamare? Xuruse rabaan mundun n yee ratiye?” 20 Nanara, e tuli mati Alatalaa fe ragidixin na lan Edõn kaane ma, e nun a feen naxanye yitõnxi Teman kaane xili ma! E luma nen alo xuruse diin naxanye suxuma e xali, e dõxõden yi yigeli yati! 21 E kala xuiin bõxõni maxama nen, e gbelegbele xuiin yi siga han Gbala Baana. 22 A luma nen alo singbinna nan tema a sa sin e ma, a yi a gabutene yifulun Bosara taan xun ma. Na lõxõni Edõn sofane bõjen luma nen alo jaxanla naxan dii barini. 23 Falana lan Damasi taan ma: “Xamata kaane nun Arapada kaane bata yagi, bayo e bata xibaru jaxina fe me. E bata kontõfili, e yimaxa alo baan na walanje ayi. 24 Damasi kaane senben bata jnan, e bata e xun xanbi so, e waxi e gi feni. Gaxun nun kuisanna nun xõlen bata e suxu,

alo jaxanla naxan dii barini. 25 Taa xili kanni ito fa rabepinxii di, n ma sewa taana?” 26 “A banxulanne birama nen taan xun xõn yati! A sofane birin yi faxa na lõxõni,” Alatala Senben Birin Kanna falan nan na ra. 27 “N teen soma nen Damasi taan makantan yinne ra, a yi Ben-Hadada manga banxin gan.” 28 Alatala ito nan falaxi Kedari bõsonna nun Xasori mangayane xili ma Babilõn mangan Nebukadanesari naxanye yenge a yi e nœ, a naxa, “E keli, e Kedari bõsonna yenge! E sogeteden yamanan muxune halagi! 29 E e xuruse kurune nun e kidi bubune tongo e yii, e nun e yigiyadene nun e goronne nun e jõgõmene birin. Muxune sõnxõn natema nen e ma, e naxa, ‘Gaxun yiren birin yi!’” 30 Alatalaa falan ni ito ra, a naxa, “E tan Xasori kaane, e gi mafuren! E sa e luxun faran yinle ra! Bayo Babilõn mangan Nebukadanesari bata yengeni tõi e xili ma. 31 E keli, e fu siyani ito ma naxan dõxi bõje xunbenli. A taane so deene mi nœ balanje, e mi sõxõnxi, e dõxi e danna nen,” Alatalaa falan nan na ra. 32 “Yaxune e jõgõmene tongoma nen yengeni, e nun e xuruse kuru wuyaxine. Naxanye e xunne dõxõn bima, n ne raxuyama ayi nen foyeni, n gbalon nafa e ma keli yiren birin yi,” Alatalaa falan nan na ra. 33 Xasori taan findima nen kankone kuruden na, yire rabepinxina han habadan. Muxu yo mi dõxe a yi, adamadi yo mi luye na. 34 Alatala yi falan ti Nabi Yeremi xa lan Elan yamanan ma Yuda mangan Sedeki a mangayaan fõlo waxatini, a naxa, 35 Alatala Senben Birin Kanna ito nan falaxi, a naxa, “N Elan yamanana xanli girama nen, naxan findixi e senben binla ra. 36 N foye naanin nafama nen Elan xili ma keli kore xõnna tongon naaninne ma, n yi e raxuya ayi foyeni. Yamana yo mi luye Elan muxu gixine mi sigan denaxan yi. 37 N Elan kaane rayarabima nen e yaxune yee ra naxanye waxi e faxa feni. N gbalon nafama nen e ma n ma xõlo gbeeni, n yi yengen bira e fõxõ ra, han n yi e rapan.” Alatalaa falan nan na ra. 38 “N Elan mangan nun a kuntigine halagima nen, n yi n ma manga gbõden dõxõ na,” Alatalaa falan nan na ra. 39 “Koni waxati famatoni, n fama nen Elan muxu suxine ra,” Alatalaa falan nan na ra.

50 Alatala falani ito nan ti Nabi Yeremi xa lan Babilõn nun a rabilinna taane ma, a naxa, 2 “E xibaruni ito rali siyane ma, e a rawanga! E taxamasenni te, e a fe rali birin ma, e nama sese luxun, e a fala, e naxa, ‘Babilõn taan suxuma nen! Yarabin na a ra Beli

suxuren xa, Merodaki suxuren gaxuma nen! Yarabin na a ra e alane sawurane xa, gaxuna e suxurene suxuma nen!" 3 Bayo siyana nde fama nen a yengedeni sa keli sogeteden komenna ma, a e yamanan naxorima nen, muxu yo mi lu a yi. Muxune nun xuruseene birin e gima nen." 4 Alatala ito nan falaxi, a naxa, "Na loxone nun na waxatini, Isirayila kaane nun Yuda kaane fama nen e bode xon, e siga wuge, e Alatala fen, e Ala. 5 E maxodinna tima nen Siyon kirana fe yi, e yi e yee rafindi men binna ma, e yi e yete findi Alatala gbeen na habadan layirin xon naxan mi jinanma muxune ra mum! 6 N ma yamaan yi luxi nen alo xuruse tununxine. E xuruse rabane bata yi e ralo ayi, e yi lu sigi geyane nun yire matexine xun xon e jinan e matabuden ma. 7 Naxan yo na yi e to, a yi e faxes, e yi a fala, e naxa, 'Nxu mi kala tixi, bayo e bata yulubin liga Alatala ra, tinxinna kanna, Alatala, e benbane yigina.'" 8 "E gi, e keli Babilon yi, e keli Babilon kaane yamanani, e lu alo kotone xuruse kurun yee ra. 9 Bayo n siya gbeene rakelima nen, n na e malan, n yi e radin Babilon taan xili ma sa keli sogeteden komenna ma. E taan yengema nen, e yi a tongo. E xalimakunle mi fule mum alo sofa yebaxin to mi xete a yii genla ra keli yengeni. 10 E fuma Babilon taan ma nen, a kala muxune birin yi wasa," Alatalaa falan nan na ra. 11 "E sewa, e jaxan, e tan naxanye fuma n ma yamaan ma! E tuganye ayi sewani alo jinge diin sexen de. E jaxan xuiin xa gbo ayi alo soo kenden wuga xuina. 12 Koni e nga yarabima nen, naxan e barixi, na yagima nen. E findima siya donxen nan na siyane birin tagi, e yamanan yi findi burunna nun yire xaren nun tonbonna ra. 13 Muxu yo mi fa luma a yi sonon, bayo Alatala a findima nen yire magenla ra a xoloni. Naxan yo na dangu Babilon yi, na kanna yigitegema nen, a kolin a kala kii ma." 14 "E ti Babilon yenge xinla ma a rabilinna birin yi, e tan xali wonle! E a bun, e xalimakunle birin woli a ma! Bayo a bata yulubin liga Alatala ra. 15 E yenge so sonxon nate a ma yiren birin yi! E minima nen e yete dentegedeni e yiine yitexi. A sangansone birama nen, a taa makantan yinne yi kala. Bayo Alatala bata a gbeen joxo. E gbeen joxo a ma! E a liga a ra alo a ligaxi bonne ra kii naxan yi. 16 E sansi siine nun bogise xabane raxori e bode xon Babilon yi. Halagi tiina silanfanna fama nen, birin xa xete a konni, birin xa a gi, siga a yamanani." 17 "Isirayila yamaan bata findi xuruse tununxin na yatane naxan kedixi. Asiriya mangan nan singe yi a yengema. Donxen na,

Babilon mangan Nebukadanesari nan a halagi." 18 Nanara, Alatala Senben Birin Kanna, Isirayila Ala ito nan falaxi, a naxa, "N Babilon mangan nun a yamanan muxune kewanle saranma e ra nen alo n Asiriya mangan liga kii naxan yi. 19 Koni, n mon xetema nen Isirayila ra alo xuruse kuruna a sansanni, e yi e dege Karemele geyaan nun Basan yire matexin fari. E lugoma nen Efirami geya yiren nun Galadi yamanani." 20 Alatalaa falan ni ito ra, a naxa, "Na loxone nun na waxatini, muxune Isirayila yamaan hakene funfun fenma nen, koni a sese mi luma na. E Yuda yamaan yulubine xon fenma nen, koni sese mi toe. Bayo n na yamaan muxu donxen naxanye lu e nii ra, n ne yulubine xafarima nen." 21 "E fu Meratayin yamanan ma, e nun Pekodo kaane! E e sagatan, e e birin naxori. N na e yamarixi naxan birin na, e ne liga." Alatalaa falan nan na ra. 22 "Yenge so sonxone nan tun tema yamanani. Naxankata gbeen na a ra. 23 Ee! Yamanan naxan senbe gbo a birin xa, na bata kala, a halagi! Ee! Babilon bata findi yamana rabepinxin na! 24 Babilon kaane, n bata lutin nati e yee ra, e yi e suxu a ra, benun e xa a fe kolon. E yi e li na, e yi e suxu, amasoto e bata n tan Alatala yenge. 25 Alatala bata a yenge so seene ramini e ramaradeni a xoloni. Marigina Alatala Senben Birin Kanna wanla kema nen Babilon kaane yamanani. 26 E fa a xili ma keli yire makuyene yi. E a sagane rabi, e yi a nafunle yitaxun alo sansi kesene e yi e birin kala, sese nama lu a yii. 27 E a turane birin faxes, e e birin xali e faxadeni! Gbalon na a ra e xa, bayo e loxon bata a li, e kewanle saranma e ra waxatin naxan yi." 28 "Muxu gixine xuiin nan ito ra, naxanye minixi yengeni Babilon yi, e fa a rali Siyon taani a Alatala en ma Ala bata a gbeen joxo a batu banxina fe ra. 29 E xali wonle xili e xa fa Babilon xili ma, naxanye fatan xalimakunla wole. E daaxadene yiton a rabilinni, muxu yo xun nama mini ayi. E e saranna fi e kewanle ra, e a liga e ra alo e a liga bonne ra kii naxan yi! Bayo a bata murute Alatala xili ma, Isirayila Sarjandena. 30 Nanara, yaxune a banxulanne faxama nen taan yama malandene yi, a sofane birin yi halagi na loxoni," Alatalaa falan nan na ra. 31 Marigina Alatala Senben Birin Kanna falan ni ito ra, a naxa, "E tan yete yigbone, n bata keli e xili ma. E kewanle saranma e ra waxatin naxan yi, na bata a li. 32 Yeti yigbone e sanna radinma nen, e bira, muxu yo mi e rakelima. N teen soma nen e taane ra, a yi e rabilinne birin gan." 33 Alatala Senben

Birin Kanna yi falani ito ti, a naxa, “Isirayila kaane nun Yuda kaane birin jaxankataxi. Muxun naxanye e suxi konyiyani, ne tondixi e bejinjɛ. **34** Koni e xunbamaan senben gbo, a xili nen Alatala Senben Birin Kanna. A e xun mayengema nen alogo a xa boɲɛ xunbenla sɔto e yamanan xa, a yi Babilon kaane yimaxa.” **35** Alatalaa falan ni ito ra, a naxa, “Yengen kelima nen Babilon kaane xili ma! Yengen kelima nen muxune birin xili ma naxanye dɔxi Babilon yi, e nun e kuntigine nun e fekolonne. **36** Yengen kelima nen e yiimatone xili ma, e yi findi daxune ra! Yengen kelima nen e sofane xili ma, e yi lu gaxuni! **37** Yengen kelima nen e soone nun e yenge so wontorone xili ma, e nun siya basanxine birin xili ma naxanye dɔxi a yi, e sofane yi lu alo jaxanle! Yengen kelima nen e nafunle xili ma, e birin yi ba e yii! **38** Ala xa igen jan e xudene yi, e xori! Bayo suxure yamanan nan a ra, e xaxinla bata jan gaxu feene bun. **39** Nanara, burunna subene nun kankone luma nen Babilon yi, a findi dangaranfulene konna ra. Muxu yo mi fa luma a yi, a yigelima nen han mayixeten nun mayixete, **40** ala Ala Sodoma nun Gomora nun e rabilinna taane halagi kii naxan yi. Muxu yo mi fa luma a yi, adamadi yo mi fa dɔxe na,” Alatalaa falan nan na ra. **41** “Yamaan fama nen sa keli sogeteden kɔmenna ma, siya gbeen nun manga senbɛmane fama nen sa keli fɔ boxɔn danna ra. **42** E sofane fama nen xanle nun degɛmane ra e yii. E jaxu, e mi kininkininna kolon. E xuiin minima nen alo fɔxo igena, e nema fama e soone fari. E fama nen safa yɛɛn ma, e yengen so e bode xɔn alo muxu kedenna. E fama Babilon taa fajin nan yengede yi! **43** Babilon mangan to na feen xibarun mɛ, a gaxu, a fangan yi jan alo jaxanla naxan dii barini. **44** N luma nen alo yatan naxan xajɛxin minima fɔtɔnni Yuruden baan dɛ, a siga sube fendeni yire fajini. N ne kedima nen e yamanani sanja ma kedenni, n naxan sugandixi, n sa na dɔxo na. Bayo, nde maliga n tan na? Nde n yamare? Xuruse rabaan mundun n yɛɛ ratiye?” **45** Nanara, ɛ tuli mati Alatalaa fe ragidixin na Babilon xili ma, a feen naxanye yitɔnxi Babilon kaane yamanan xili ma. E luma nen alo xuruse diin naxanye suxuma e xali, e dɔxɔden yi yigeli yati! **46** Dunuja muxune na a mɛ a Babilon bata suxu yengeni, siyane yimaxama nen, e gbelegbele xuini te.

51 Alatala ito nan falaxi, a naxa, “N kala ti foyen nafama nen Babilon nun Lebo-Kamayi muxune

birin xili ma. **2** N xɔɲene xɛma nen Babilon xili ma naxanye a fintanma alo maala, a muxune birin yi kedi alo se dagina. Bayo e fuma nen a ma keli yiren birin yi gbalon lɔxoni. **3** E xalimakunle woli ɛ yaxune xalimakuli wonle xili ma, e nun wasodene kanke yɛ masansanne ragodoxi naxanye ma! E nama dija e sofa yo ma! E e sofa ganla birin faxa. **4** E maxoloxine xa lu biraxi Babilon yamanan xun xɔn, e sɔxɔnxin yi lu saxi Babilon taan kirane xɔn. **5** Bayo Ala mi Isirayila yamaan nun Yuda yamaan nabepinxi, Alatala Senben Birin Kanna, hali e yamanan to rafexi yulubine ra Isirayilaa Sarijanden yɛɛ ra yi. **6** E gi, ɛ mini Babilon yi, birin xa a niin makata, alogo ɛ nama faxa Babilon kaane hakene fe ra! Bayo Alatala gbeɛɲɔxo waxatin bata a li, Ala Babilon kaane saranma nen alo a lan e ma kii naxan yi. **7** Babilon yi findixi xɛma igelengenna nan na Alatala yii, dunuja muxune birin xunna firifiri naxan kui dɔlo ra. Siyane bata a dɔlon min, e xunne yi keli e ra. **8** Babilon taan bata kala, a bata kala! E gbelegbele a fe ra! E senna fen naxan sama a furen dɛ! Waxatina nde, a yalanma nen. **9** ‘Nxu wa nen Babilon dandan feni, koni a mi nɔɛ yiyalanjɛ. Nayi, en na a rabepin. Birin xa siga a konyi. Bayo kitin naxan nagidixi a xili ma, na feen bata te han kore xɔnna.’ **10** ‘Alatala bata en xun mayenge kitin sa. E fa, en sa Alatala, en ma Ala kewanla yɛba Siyon taani.” **11** “E xalimakunle ralemun! E wure lefane tongo! Alatala bata Mede mangane radin Babilon xili ma bayo a bata a kala feen nagidi. Alatala a gbeen jɔxɔma nen a batu banxina fe ra. **12** E taxamasenne yite alogo muxune xa siga yenge sodeni Babilon taan makantan yinne xɔn! E xun makantan muxune fari sa, ɛ yi kantan tiine ti! E sofane yitɔn yaxune xili ma! Bayo Alatala naxan nagidixi, a na rakamalima nen a naxan falaxi lan Babilon kaane ma. **13** E tan naxanye dɔxi baa gbeene dɛ nafulu gbeena ɛ tan naxanye yii, ɛ rajanna bata a li, danna fa sama e siimayaan na nen.” **14** Alatala Senben Birin Kanna bata a kɔlo a yete yi, a naxa, “N taani ito rafema nen yaxune ra yati, e wuya alo tuguminne, e yi e nɔ sɔto xuini te ɛ xili ma sewani.” **15** “Ala nan bɔxo xɔnna daxi a senbeni, a yi dunuja beten sa a fe kolonna xɔn, a kore walaxani bandun a xaxilimayani. **16** A na a xui ramini, tulɛn yi a malan kore, a kundaan nafa, sa keli bɔxɔn danne ra. A yi galanna nun tulɛn nafa, a foyen namini a ramaradeni. **17** Muxune birin bata findi xaxilitarene nun fekolontarene ra. Xɛma rawanle birin yagixi lan e sawura rafalaxine fe ma,

bayo wulen nan e suxurene ra, nii yo mi e yi. 18 Fe fuun nan e ra, wali magelexina. E halagi waxatin na a li, e raxōrima nēn. 19 Koni Yaxuba gbee Ala mi luxi alo e tan. Bayo a tan nan seen birin daxi. A tan nan gbee Isirayila bōnsōnne ra. A xili nēn Alatala Senben Birin Kanna.” 20 “Babilōn kaane, ε lu nēn n xa alo sinbena, yenge so se fapina, n yi siyane raxuya ayi ε ra, n yi yamanane kala ε xōn. 21 N soone nun soo ragine raxuyaxi ayi ε tan nan na, e nun yenge so wontorone nun a ragi muxune, 22 e nun xemene nun jaxanle, e nun fonne nun dii jōrene, e nun banxulanne nun sungutunne, 23 e nun xuruseene nun xuruse rabane, e nun xēē biine nun e jingene, e nun yamana kanne nun kuntigine. 24 Babilōn taan nun a muxune fe jaxin naxanye ligaxi Siyon taan na, n na kewanle saranma nēn e ra ε yetagi,” Alatalaa falan nan na ra. 25 “N kelima nēn ε xili ma, Babilōn kaane. E tan naxanye maxōdōxo kala tideni alo geyana, ε tan naxanye bōxōn birin halagima! N na n yiini bandunma nēn ε xili ma, n yi ε taan makutukutu keli gemene xuntagi n yi ε konna findi geya ganxin na,” Alatalaa falan nan na ra. 26 “Geme mi sote ε konni, naxan finde banxin tongon ma geme kenden na banxin nōē beten se gemen naxan na. Amasōto ε konna luma nēn kalaxi han habadan,” Alatalaa falan nan na ra. 27 “E taxamasenni te yamanani! E xōtaan fe siyane tagi! E siyane yitōn, e xa a yenge, ε Ararati nun Minni nun Asikenasi yamanane xili a yengedeni! E sofa ganle kuntigin dōxo a xa yengen xun mato a ra Babilōn xili ma! E soone rasiga a xili ma naxanye wuya alo tuguminne. 28 E siyane yitōn, e xa sa a yenge, Medene mangane nun e yamana kanne nun e kitisane birin e nun yamanan naxanye birin e nōōn bun ma. 29 Alatala yengen naxan yitōnxi Babilōn kaane xili ma, na na rakamali waxatin naxan yi, a Babilōn yamanan findi yire yigenla ra muxu yo mi luma denaxan yi habadan, nayi bōxo xōnna xuruxurunma nēn, a yimaxa. 30 Babilōn sofane bama nēn yengen soē, e so e yire makantanxine yi, e senben na jian. E luma nēn alo jaxanle. Tēēn soma nēn e taan banxine ra, e taa makantanxin yinne so deene birin kalama nēn. 31 Xerane gixin fama nēn xerane fōxo ra a faladeni Babilōn mangan xa, fa fala yaxune bata e taan yiren birin tongo yengeni, 32 kirane bata suxu, tēē dara yirene ganma, gaxun bata sofane suxu.” 33 Amasōto Alatala Senben Birin Kanna, Isirayilaa Ala ito nan falaxi, a naxa, “Babilōn taan malaxunma nēn alo se bōnbo lonna a nema

yibodonma waxatin naxan yi. Se xaba waxatina a limaan ni i ra a xa.” 34 Yerusalen kaane a falama, e naxa, “Babilōn mangan Nebukadanesari bata en naxōri, a yi en ma taani maxa alo goron kui genla. A bata en gerun alo ninginangana, a lugo en yii se fapine ra, a mōn yi en baxun.” 35 Siyon kaane a falama, e naxa, “Babilōn kaane gbalon naxan saxi en fari, Ala xa na sa e fan fari!” Yerusalen kaane a falama, e naxa, “Babilōn kaane faxan naxanye ti en konni, Ala xa na wunla goronna lu e xun ma.” 36 Nanara, Alatala ito nan falaxi, a naxa, “N na ε xun mayengema nēn, n na ε gbeen jōxōma nēn, n yi Babilōn yamanan baa gbeen xōri, n yi a baan xunna xara. 37 N Babilōn taan kalama nēn, a findi geme malanxine ra, e nun kankone kurudena. A fe yi magaxu ayi, muxune yi kolin a kala kii ma. Muxu yo mi dōxe a yi. 38 A muxune xaje alo yatane, e wurundunma alo yata senbemanē. 39 Koni e na kunfa jaxi ra, n donse donna yitōnma nēn e xa e yi n ma xōlōn dōlōn min han e xunna yi keli e ra, e yi xi habadan, e mi fa kele mumē!” Alatalaa falan nan na ra. 40 “N yi e xali alo yēxēē diine na siga e faxadeni, alo kontonne nun kōtōne.” 41 “Ee! Sesaki taan suxuma nēn! A tan naxan matōxōma bōxo xōnna taane birin ye! Ee! Babilōn taan naxōrima nēn siyane tagi!” 42 “Fōxo igen sama nēn Babilōn bōxōn xun ma, a mōrōnne yi dangu a fari. 43 A taane kalama nēn, a findi bōxo xaren nun tonbonna ra, muxu yo mi dōxe yamanan naxan yi, adamadi yo mi dangue denaxan yi. 44 N Beli suxuren jaxankatama nēn, Babilōn taana ala. A naxan gerunxi, n na bama a de nēn. Siyane mi fa luma sigē a ma sōnōn. Babilōn taan makantan yinne yatin birama nēn. 45 N ma yamana, ε mini a yi, birin xa a niin makata! E masiga Alatalaa xōlo gbeen na! 46 E nama tunnaxolo ε ma, ε nama gaxu feene yēē ra naxanye xinla mema yamanani! Bayo fena nde xinla mema nēn to fari, fe gbete xinla yi mē faraxi. E naxa, a gbalon na a ra yamanani, hanma mangana nde bata keli nde xili ma. 47 Nanara, lōxōne fama, n Babilōn suxurene jaxankatama lōxōn naxanye yi. N na e yamanan birin nayarabima nēn a faxa muxune binbine birin yi lu biraxi taan xun xōn. 48 Naxanye birin kore xōnna nun bōxo xōnna ma, ne e xuini tema nēn Babilōn xili ma sewani, bayo halagi tiine fama nēn a xili ma sa keli sogeteden kōmenna ma,” Alatalaa falan nan na ra. 49 “Babilōn taan kalama nēn Isirayila faxa muxune fe ra alo muxune bata faxa dunujra yiren birin yi Babilōn taana fe ra kii naxan yi. 50 E tan

naxanye mi faxaxi yengeni, ε gi, ε nama ti de! Ε nema sa yamana makuyeni, ε miri Alatala ma, Yerusalen ma fe yi lu ε bəjəni!” 51 Yamana a falama nən, e naxa, “En yagi nən, en to konbi ti xuine mε, yagin yi lu en yetagi, bayo xəjəne bata so yire sarinaxine yi Alatalaa banxini.” 52 Alatalaa falan ni ito ra, a naxa, “Ləxəne fama, n suxureni itoe naxankatama ləxən naxanye yi, muxu maxələxine kutun xuiin yi mini e yamanan birin yi. 53 Hali Babilən taan te tiye han kore xənna, a yire makantanxine yi so raxələ ayi, n halagi tiine rafama nən a xili ma,” Alatalaa falan nan na ra. 54 “Gbelegbele xuiin tema nən Babilən taani, gballo gbeen naba xuiin mεma nən Babilən kaane yamanani. 55 Bayo Alatala Babilən kalama nən, a yi a xui gbeen dan. Yaxune fa xuiin minima nən alo fəxə igen mərənne xuxu xuina, e yi sənəxə alo kuye sarinna. 56 Halagi tiin fama nən Babilən taan xili ma, a yi a sofane suxu, a yi e xanle kala. Bayo Ala nan Alatala ra naxan a gbeen nəxəma, a muxune birin saran e kewanle ra. 57 N na n ma xələn dələn fima a kuntigine nun a fe kolonne ma nən han e xunne yi keli e ra, e nun a yamana kanne nun a kitisane nun a sofane, e yi xi habadan, e mi fa keke sənən!” Mangana falan nan na ra, naxan xili Alatala Senben Birin Kanna. 58 Alatala Senben Birin Kanna ito nan falaxi, a naxa, “Babilən taan makantan yin gbeene rabirama nən, a taan so de gbeene yi gan. Nayi, siyane e yete yixadanma fuyanna nin, yamanane muxune wali xənne sa luma teen nin.” 59 Nabi Yeremi na falane nan xəraya so Neriya dii xemen Seraya yii, Maxiseya mamandenna, kuntigi gbeena nde, a to siga Babilən yi e nun Yuda mangan Sedeki, na mangayaan jεε naaninden ma. 60 Gbalon naxan birin yi lanma a xa Babilən sətə, Yeremi yi ne birin sebə kedin kui, a falan naxanye birin sebə lan Babilən ma. 61 Yeremi yi a fala Seraya xa, a naxa, “I na so Babilən yi waxatin naxan yi, falani itoe birin xaran i xuini texin na, 62 i yi a fala, i naxa, ‘Alatala, i tan yeteen nan falan tixi be xili ma alogo a xa kala, alogo muxune nun dali seene nama fa lu a yi sənən, a findi yire rabəjinxin na han habadan!’ 63 I na yelin kedini ito xaranje, i gemen xidi a ra, i yi a woli Efirati baan tagi. 64 Na xanbi ra, i naxa, ‘Awa, Babilən taana fe godoma ikiini, a mi a sətə gbalon na mume, Ala naxan nafama a xili ma. A yamaan taganma nən.’” Yeremi a falane danna ni ito ra.

52 Sedeki findi mangan na a jεε məxəjən nun kedenden nan ma, a yi jεε fu nun keden ti mangayani Yerusalen yi. A nga yi xili nən Xamutali Yeremi a dii teməna, Libina kaana. 2 Naxan naxu Alatala yεε ra yi, a yi na liga alo Yehoyakimi a liga kii naxan yi. 3 Na liga Alatala xələn nan ma fe ra Yerusalen nun Yuda xili ma, a yi wama naxanye ba feni a yetagi. Sedeki fan yi murutε Babilən mangan xili ma. 4 Sedeki a mangayaan jεε solomanaaninden kike fuden xi fude ləxəni, Babilən mangan Nebukadanesari nun a ganla birin yi fa Yerusalen xili ma, e yi daaxadeni tən a yetagi, e yi yire makantanxine ti a rabilinna birin yi. 5 E lu taan yenge han Manga Sedeki a mangayaan jεε fu nun kedendena. 6 Na jεεn kike naaninden xi solomanaaninde ləxəni, kəmen yi gbo ayi taani, donse mi yi fa yamanan muxune yii. 7 Nayi, Babilən ganla yi taan yinna yirena nde rabira. Kəεn na, hali Babilən kaane to yi taan nabilinxi, Yuda sofane birin yi e gi, e dangu taan makantan yin firinne longonna ra, e sa mini taan so dεen na mangana nakəən dεxən. Sofane yi e gi, e nun mangan yi siga Araba tonbonna lantaan mabinni. 8 Koni, Babilən sofa ganla yi mangan sagatan, e sa Manga Sedeki li Yeriko mεrεmεrene yi, a ganla birin yi xuya ayi e masiga a ra. 9 E yi mangan suxu e siga a ra Babilən mangan fεma Ribila taani, Xamata yamanani, a yi sa a makiti mənni. 10 Babilən mangan yi Sedeki a diine kəε raxaba a yetagi, a mən yi Yuda yamanan muxu gbeene fan birin faxa Ribila taani. 11 A yi Sedeki yεene səxəjε ayi, a yi a xidi sula yələnxənna ra, a siga a ra Babilən yi, a sa a sa kasoon na han a faxa. 12 Kike suulunden xi fude ləxəni, Babilən mangan Nebukadanesari a mangayaan jεε fu nun solomanaaninden ma, mangan kantan muxune xunna Nebusaradan naxan yi walima Babilən mangan xa, na yi fa Yerusalen yi. 13 A yi tεen so Alatala Batu Banxin na e nun mangana banxin nun Yerusalen banxine birin. A yi banxi kendene birin gan. 14 Babilən sofa ganla naxan birin yi mangan kantan muxune xunna fəxə ra, ne yi Yerusalen yinne birin kala. 15 Yiigelitəna ndee nun yamaan muxu dənən naxanye yi luxi taani, mangan kantan muxune xunna Nebusaradan yi ne xali konyiyani, e nun yiirawali dənəne, e nun naxanye bata yi e yete sa Babilən mangan sagoni. 16 Koni Nebusaradan yi yiigelitəna ndee lu yamanani alo manpa bili siine nun xεε biine. 17 Sula senbetenna naxanye yi Alatala Batu Banxini, Babilən kaane yi ne kala, e nun ige maxali wontorone

nun ige ramara se sula daxi gbeena, e yi siga na sulan birin na Babilɔn yi. **18** E yi tundene nun tɛɛ kɔ seene nun lɛnpu ratu seene nun wuli xuya goronne nun se sa lefane birin tongo e nun wali se sula daxin naxanye birin yi rawalima Ala Batu Banxini. **19** Mangan kantan muxune xunna mɔn yi baramane nun wusulanna gan wurene nun wuli xuya goronne nun tundene nun lɛnpu dɔxɔ seene nun se sa lefane nun minse saraxa rabɔxɔn goronne tongo, a xɛma daxine nun gbeti fixɛ daxine birin. **20** Senbetɛn firinna nun ige ramara se gbeen nun turaan sawura fu nun firinna naxanye yi tixi a bun e nun ige maxali wontorone Manga Sulemani naxanye rafala Alatala Batu Banxin xa, ne birin sula daxin nan yi a ra naxanye binyen xasabin mi yi nɔɛ yatɛ. **21** Senbetɛn kedenna yi mate nɔngɔnna yɛ fu nun solomasɛɛɛ, lutin nɔngɔnna yɛ fu nun firin nan yi a rabilinjɛ, a kui genla nan yi a ra, a yigboon yi yii soli naanin sa liyɛ. **22** Konden yi a xunna, naxan yi mate nɔngɔnna yɛ suulun, a konden yi rayabuxi sula yɔlɔnxɔn yalane nun girenada wudi bogi sawura sula daxine nan na. Senbetɛn firinden fan yi na kii nin e nun a rayabu kiina. **23** Girenada wudi bogin sawura tonge solomanaanin e nun sennin nan yi rafalaxi senbetenna dɛxɔnne ma. E birin malanxina, girenada wudi bogin sawura kɛmɛ nan yi sula yalaan nabilinni. **24** Mangan kantan muxune xunna yi saraxarali kuntigin Seraya suxu, e nun saraxarali firinden Sofoni nun dɛɛn kantan muxu saxanne. **25** A yi sofa kuntigina nde suxu e nun xɛmɛ solofere mangana muxune yɛ naxanye yi taani, e nun sofa kuntigina sebɛli tiina, naxan yi sofa nenene xinle sebɛma, e nun Yuda kaane muxu tonge senninna naxanye yi taani. **26** Mangan kantan muxune xunna Nebusaradan yi e tongo, a siga e ra Babilɔn mangan fɛma Ribila taani. **27** Babilɔn Mangan yi yamarin fi, e yi e faxa Ribila taani Xamata yamanani. Yuda kaane siga konyiyani na kii nin, e makuya e yamanan na. **28** Nebukadanesari muxun naxanye suxu, a siga e ra konyiyani, ne nan itoe ra: A mangayaan jɛɛ soloferedeni, a siga Yahudiyan muxu wuli saxan muxu mɔxɔjnɛn nun saxan nan na. **29** Nebukadanesari a mangayaan jɛɛ fu nun solomasɛɛɛdeni, a siga muxu kɛmɛ solomasɛɛɛ muxu tonge saxan e nun firin nan na, a naxanye suxu Yerusalen yi. **30** Nebukadanesari a mangayaan jɛɛ mɔxɔjnɛn nun saxandeni, mangan kantan muxune xunna Nebusaradan siga Yahudiyan muxu kɛmɛ solofere muxu tonge naanin nun suulun

nan na konyiyani. E birin malanxina, muxu wuli naanin muxu kɛmɛ sennin. **31** Yuda mangan Yoyakin suxun jɛɛ tonge saxan e nun soloferedeni, Babilɔn mangana Ewili-Merodaki a mangayaan jɛɛ fɔlɔni, a yi hinan Yuda mangan Yoyakin na, a yi a ramini kasoon na, na jɛɛn kike fu nun firinden xi mɔxɔjnɛn nun suulunde lɔxɔni. **32** A yi fala fajin ti a xa, mangan bonna naxanye yi a fɛma Babilɔn yi, a yi a tiden mate ne birin xa. **33** A yi a kasorasa dugine masara, Yoyakin yi a dɛge mangana tabanla ra a siimayaan birin yi. **34** A makoon yi seen naxanye ma lɔxɔ yo lɔxɔ, Babilɔn mangan yi lu ne soɛ a yii a siimayaan birin yi han a faxa lɔxɔn naxan yi.

Mawuga Xuine

1 Ee! Yerusalem bata rabepin, taani ito naxan yi rafexi nun. Ee! A bata lu alo kaja gilena! A tan naxan yi findixi taa senbemaan na siyane ye, a tan naxan yi findixi manga taan na yamanane xun na, a bata findi konyin na to. **2** A kœen janma wuge, a yœegen bata a xadene maxa. A xanuntenne mi fa a madendenma. A xœyine birin bata e mœ a ra, e findi a yaxune ra! **3** Yuda yamaan birin bata xali konyiyani, e jaxankataxi, e rayarabixi. E bata sa dœxo siya gbetene konni e mi matabu yo sœtœma. E sagatan muxune birin bata sa e li tœroni. **4** Sunun nan Siyon taan kirane xœn, bayo muxu yo mi fa fama a sanle yi. Taan so dœene birin bata kala, a saraxaraline e kutunma, a sungutunne sunuxi. Siyon taan bata rafe sœxœle gbeen na! **5** A yengefane bata senben sœto a xun na. A yaxune bata lu bœjœ xunbenli. Bayo Alatala bata taan muxune lu sununi masœto e Ala matandi wuyaxine xœn. Yaxune bata e diine suxu siga e ra konyiyani, e yengefane yi siga e ragbengbenjœ. **6** Siyon taana binyen birin bata kala. A kuntigine bata e gi alo xœnle naxanye mi e dœgede sœtœma, e xadanxin sigama e giye donsone bun. **7** Yerusalem kaane nema na xun xœn sigama tœroni, e mirima e waxati danguxin nafunle birin ma. A yamaan to sa a yaxune sagoni, muxu yo mi fa a mali. A yaxune yi a matoma nen, e gele a kala kiin ma. **8** Yerusalem kaane bata yulubin liga han! Nanara, taan bata findi yire xœsixin na. Naxanye birin yi a binyaxi, ne fa a rayelefuma nen. A bata lu alo e muxu ragenla nan toma, naxan kutunma tœroni, a a makuya. **9** A xœsin bata sa a domaan na. A mi a mirixi a rajan kii ma. A kala feen bata a raterœna. Muxu yo mi a madendenma. A a falama, a naxa, “Alatala, n ma tœron mato, bayo n yaxun bata nœœn sœto.” **10** A yengefane bata a nafunle birin tongo. A bata siya gbetene to sœe a yire sarijanxini i tœnna dœxo naxanye ma, a e nama so i ya yamaan malanni. **11** Taan muxune birin kutunma, e donseen fenma, e e se kendene masarama balon na alogo e xa lu e nii ra. E a falama, e naxa, “Alatala, a mato, i yi a rakœrosi n nayarabixi kii naxan yi. **12** E tan naxanye birin dangun kiraan xœn, feni ito mi e sœtœxi. E a mato ki fajni xa sœxœleni ito sifan muxu gbete ma, alo sœxœlen naxan n halagima. Alatala nan a saxi n fari a xœlo gbeen lœxœni. **13** A bata tœœn nagodo keli kore n xœnne gan xinla ma. A bata yalaan nati n yœœ ra, a yi n naxete xanbin na, a yi n findi muxu

rabepinxin na n lu furaxi waxatin birin. **14** A bata n yulubine xidi n kœœœn ma alo goron tongo gbelemœna. A bata e maxidi, a yi e singan n kœœ. Marigin bata n senben jan, a yi n sa muxune sagoni, n mi nœœ tiye naxanye yœœ ra. **15** Sofa kendœn naxanye birin yi n yii, Marigin bata a mœ ne birin na. A bata ganla malan n xili ma alogo e xa n ma sofa banxulanne halagi. Marigin bata Yuda yamani butuxun ki fajni. **16** Nanara, n wugama, yœegen bata n yœœœn xœnna rafe. Naxan nœœ n madendenjœ, a yi n niini fan n ma, na bata a makuya n na. N ma diine bata yigitege, bayo yaxune bata nœœœn sœto.” **17** Siyon kaane bata e yiini bandun muxune ma koni muxu yo mi e madendenma. Alatala bata yamarin fi Yaxuba bœnsœnna rabilinna siyane ma a e xa a yenge. Yerusalem taan bata findi se xœsixin na e tagi. **18** Yamaan yi a fala, e naxa, “Alatala nan tinxin, bayo nxu bata murute a ma. Nayi, e tuli mati, e tan siyane birin, e n ma sœxœlen mato. Nxœ dii sungutunne nun nxœ dii banxulanne bata siga konyiyani. **19** Nxu bata nxu xœyine xili, e yi nxu yanfa. Nxœ saraxaraline nun nxœ fonne birin bata faxa taani, e yi donseen fenma waxatin naxan yi alogo e xa lu e nii ra. **20** Alatala, a mato, nxu jaxankataxi kii naxan yi, han nxu kuine e raminima. Nxu bœjœœn bata kala nxu kui, bayo nxu bata murute i ma mume! Nxœ diine bata faxa silanfanna ra tandeni sayaan nan mœœn a ra banxini. **21** Muxune nxu kutun xuiin mœœma, koni muxu yo mi nxu madendenma. Nxu yaxune birin bata nxœ sœxœlena fe me! Ala, i naxan ligaxi nxu ra, e sewaxi na nan na. I bata lœxœœn nafa, i naxan ma fe fala. Tin nxu yaxune xa lu alo nxu tan! **22** E fe jaxine birin mato, e birin xa saran e ra alo i nxu saranxi nxu yulubine ra kii naxan yi! Nxu kutunma waxatin birin, nxu bœjœœn tœrœxin na ra yati.”

2 Ee! Marigin bata a xœlœœn nagodo Siyon taan ma alo kundana, a yi Isirayilaa binyen nadin bœxœœni keli kore xœnna ma! A san tidena fe mi rabiraxi a ma a xœlœœn lœxœœni. **2** Marigin bata Yaxuba bœnsœnna dœxœdene birin naxœri, a mi kininkinin! A fitinaxin bata Yuda yamaan taa makantanxine birin kala. A bata e mangayaan nun e kuntigine birin nabira a yi e rayarabi. **3** A bata Isirayila yamaan senben birin kala a xœlo gbeen. Yaxun to so, a mi tin a yamaan maliye. Koni a xœlœœn luxi nen alo a tœœ gbeen nan nakeli Yaxuba bœnsœnna xili ma naxan a rabilinna birin gan. **4** A bata a xanla bandun alo yaxuna, a yi a yiifanni te e

xili ma alo yengefana. Muxun naxanye birin nayabu, a yi ne birin faxa. A bata a xolɔn nagodo Ala Batu Banxin ma Siyon taani alo tɛna. **5** Marigin bata lu alo yaxuna. A bata Isirayila yamanan naxori. A bata a manga banxine birin naxori, a yi a taa makantanxine birin kala. A bata wugan nun sunun nagbo ayi Yuda bɔnsɔnna xa. **6** A bata so a sansanna kui karahanni, a yi en nun a tan naralanden kala. Alatala bata sali lɔxɔne nun Matabu Lɔxɔne rajinan Siyon kaane ra, a fitinaxin yi a mɛ mangane nun saraxaraline ra a xolɔni. **7** Marigin bata a mɛ a saraxa ganden na, a yi a yire sarijanxin nabepin. A bata taan manga banxine lu yaxune yii. Yaxune bata e sɔnxɔ xuini te Alatalaa banxini alo sali lɔxɔn nan yi a ra nun. **8** Alatala bata a ragidi a xa Siyon taan makantan yinne rabira. A bata lutin bandun alogo a xa e birin sa yelanni a mi a yetɛ ratangama a raxori feen ma. A bata taan makantan yinne radinjɛ ayi, e birin yi bira. **9** Taan so deene bata godo bɔxɔn bun. Ala bata e balan wurene bolon, e kala. A mangan nun a kuntigine bata xali siya gbetene konni, sariya mi fa na sɔnɔn! Hali a nabine yetɛɛn mi fa fe toon tima sɔnɔn fata Alatala ra. **10** Siyon taan fonne dɔxi bɔxɔni, e birin dunduxi. E bata burunburunna sa e xunni, e sunu dugine ragodo e ma. Yerusalɛn sungutunne bata e xun sin bɔxɔn ma. **11** N yeɛne bata xadan wuge, n kuina a raminima. N bɔnjɛn bata kala masɔtɔ gbalon ma naxan n ma yamaan sɔtɔxi. Bayo diidine nun dii futene fugama a ra taan yama malandene yi. **12** E e ngane maxɔdinma, e naxa, “Donseen nun minseen minɛn?” E fugama a ra taan yama malandene yi alo muxu maxɔlɔxine, e niin bama e ngane yii kanke. **13** N mi fa a kolon n naxan fale ɛ xa. Yerusalɛn kaane, n na ɛ sama nanse ma? N na ɛ misale seen mundun ma, n yi ɛ madenden, ɛ tan Siyon taa fajɪ kaane? Bayo i ya tɔrɔn gbo alo fɔxɔ igena. Nde nɔɛ i dandanjɛ? **14** E nabine wule fe toone nun fe fuune nan tun yɛbaxi ɛ xa alo xiyene. E mi ɛ hakene makenɛnxi ɛ xa alogo ɛ xa ratanga konyiyaan ma. E waliyiya wule falane nun yanfa falane nan tun tixi ɛ xa. **15** Dangu muxune birin e yiin bɔnbɔma ɛ fe ra, e kolin ɛ kala kiin ma, e yi e xunni maxa Yerusalɛn kaane magele feen na. E yi a fala, e naxa, “A yi falama taani ito nan ma ba, fa fala a taan naxan ma tofanna kamalixi, bɔxɔn birin sewa xunna?” **16** ɛ yaxune birin deni bixi ɛ xili ma han! E kolinma ɛ kala kiin ma, e yi e jinne raxin ɛ xili ma e naxa, “Nxu bata e gerun! Nxu yi lɔxɔni ito nan mamema yɔ! A bata a li, nxu bata a

tol!” **17** Alatala naxan nagidi, a bata na liga. A bata a falan nakamali, a feen naxan yamari xabu a fɔlɔni. A bata halagin ti kininkinintareyani. A bata tin ɛ yaxune yi e xunnayeren ɛ xun na, a yi ɛ yaxune senben fari sa. **18** Yamaan bata e wuga xuini te Marigin ma e bɔnjɛn ma feu! Hali ɛ taan yinna, a xa a yeɛgen namini kɔɛn nun yanyina alo baa igena. ɛ nama ɛ matabu, ɛ yeɛgen nama dan de! **19** ɛ keli, ɛ gbelegbele kɔɛna ngaan na. ɛ yi ɛ bɔnjɛ yi feen fala Marigin yetagi alo ɛ igen nan bɔxɔnma. ɛ yiine ti a xa alogo a xa ɛ diidine rakisi naxanye fugama a ra kamen ma kira xunne ma. **20** Alatala, a mato, i yi a rakɔrɔsi i ito jɔxɔnna ligaxi muxun naxanye ra! Naxanle lan ba, e xa e bari diine don e dii jɔrɛn naxanye xanuxi? A lan ba, i ya saraxaraline nun i ya nabine xa faxa Marigina yire sarijanxini? **21** Diidine nun fonne birin biraxi bɔxɔni kirane xɔn. N ma sungutunne nun n ma banxulanne bata faxa yɛngeni. I bata faxan ti i ya xɔlɔ gbeen lɔxɔni, i yi muxune kɔɛ raxaba hinantareyani. **22** I bata gaxun nafa n ma sa keli yiren birin yi, alo yamaan na maxili sali lɔxɔni. Alatalaa xolɔn lɔxɔni, muxu yo mi a yimini, muxu yo mi lu a nii ra. N naxanye xanuxi, n diidin naxanye maxuru, n yaxune bata ne raxori.

3 Muxun nan n na, naxan jaxankatan toxi Alaa xolɔn senben bun ma. **2** A n gbɛngben nen a yeɛ ra, a yi n nasiga ti dimini, kenen mi denaxan yi. **3** A luma a senben nakele n tan xili ma waxatin birin! **4** A bata n fatin nun n fati kidin mafasa, a yi n xɔnne gira. **5** A bata n nabilin xɔlɛn nun jaxankatane ra feu! **6** A bata n lu dimini, alo muxun naxanye bata faxa to mi na ra. **7** Ala bata n nabilin yinna ra, n mi fa nɔɛ mine, a yi n xidi yɔlɔnxɔn binyene ra. **8** Hali n xinla ti n mali feen na han, a mi a tuli matima n ma maxandin na. **9** A bata kiraan bolon n yeɛ ra gɛmɛ fɛrenne ra, a yi n ti kira yifuxin xɔn. **10** Ala luxi nen n xa alo kanko gbeen naxan dɔxi n yeɛ ra, alo yatan na a luxun fɔtɔnni, **11** a yi n ba kiraan xɔn, a n yibo, a yi n lu halagixi. **12** A bata a xanla bandun a yi a xalimakunle xun ti n na. **13** A xalimakunle bata n gbɛngin sɔxɔn. **14** N bata findi magele seen na n ma yamaan birin xa, n magele feen bata findi muxune sigi sa xunna ra lɔxɔ yo lɔxɔ. **15** Ala bata n nalugo sansi xɔlene ra, a dabari igen findi n minseen na. **16** A bata n karahan n yi n jinne kala gɛmɛ xɔnne ra, a yi n yibodon burunburunni. **17** A bata n ba bɔnjɛ xunbenli, herin yetɛɛn yi jinan n na. **18** N yi fa a fala, n naxa, “Siimaya mi fa n xa

sonon, hanma n yigi yi tixi seen naxanye birin na fata Alatala ra.” 19 N ma jaxankatana fe xa rabira i ma, n lu na xun xon kii naxan yi, n dabari igen nun se xolen naxanye soto. 20 N na n miri ne ma, n niin yi raforo. 21 Koni miriyani ito nan fa n bojeni alogo n xa yigin soto: 22 Alatalaa hinanna mi janna, a kininkininna mi a danna liye. 23 Ala mon xetema e ma xoton yo xoton. I ya lannayaan gbo han! 24 N na a falama nen n bojeni, n naxa, “Alatala nan n keen na nanara, n yigi saxi a yi.” 25 Alatala fan muxun na, naxan a xaxili tixi a ra, naxan a fenma. 26 A lan muxun xa Alatalaa kisin mame maraxarani. 27 A lan adamadiin xa xuru toro yaan bun folo a foninge waxatin ma. 28 Xa Ala a ragidi a ma, a lan a yi doko a danna sabarini, 29 a yi a xinbi sin a yetagi burunburunni. Waxatina nde a mon yigin sotoma nen. 30 A xa a deen ti a bonbo muxun xa, a yi wasa yarabin na! 31 Amasoto, Marigin mi a mema adamadiine ra han habadan. 32 Hali a toron nafa e ma, a kininkininma e ma nen bayo a hinanna gbo. 33 Alaa jnigen mi a ra, a xa adamadiine toro a yi e jaxankata. 34 Xa muxune yamanan kasorasane birin yibutuxun, 35 xa kiti kenden mi sama adamadiin xa Kore Xonna Ala yee xori, 36 xa kitisane mi tin muxun xun mayenge kitin se, Marigin mi na toma ba? 37 Nde nae fena nde fale, a yi liga, xa Marigin mi na feen yamari? 38 Gbalon nun herin firinna birin mi fataxi Kore Xonna Ala fala xuiin xan na ba? 39 Nayi, xa muxun bata yulubine liga, a lu a nii ra, na kanna xa a mawuga nanfera? 40 En na en sigati kiine rakorosi, en yi e fesefese, en yi xete Alatala ma. 41 En Ala maxandi en bojen ma feu, en yi en yiine ti Ala xa kore xonna ma. 42 Yamaan yi Ala maxandi, e naxa, “Nxu bata i matandi, nxu yi murute i ma, i fan mi tinxi nxu mafeluye!” 43 “I bata i yete rabilin xolon na alo domana, i yi nxu sagatan i yi faxan ti kininkinintareyani. 44 I bata i yete luxun kundani alogo nxo maxandi xuine nama i li. 45 I bata nxu lu alo paman kurun na, alo se kunxina siya gbetene tagi.” 46 “Nxu yaxune birin deni bixi nxu xili ma han! 47 Fe magaxuxine nun yili gexine nan tun nxu yee ra, e nun kalan nun gbalona.” 48 N yeen xonna bata rafe yeegeen na gbalona fe ra naxan n ma yamaan sotoxi. 49 N yeegeen minima dan mi naxan na, n mi matabu sotoma, 50 han Alatala yi a yee ragodo n ma keli kore xonna ma, a n mato. 51 N yee ne n xoloma n na n ma taan sungutunne birin toma toroxi. 52 Naxanye n yaxuyama fuyan, ne bata n sagatan alo e yi xoliin nan

foxo ra. 53 E bata n jenen nagodo yili tilinxin na, e yi gemene ragodo n xun ma. 54 Igen yi sa n xun ma, n yi a fala, n naxa, “N bata lo ayi!” 55 Alatala, n na i xili nen yili tilinxin kui. 56 I bata n gbelegebele xuiin me, i nama i tunla ba n xili ti xuiin na malina fe ra. 57 N to i xili, i yi i maso n na i yi a fala, i naxa, “I nama gaxul!” 58 Marigina, i bata n xun mayenge kitini, i yi n niin xunba. 59 Alatala, i bata a to, n jaxankataxi kii naxan yi. N ma kitin sa n xa! 60 I bata a to, e e gbeen joxoma n na kii naxan yi, e feen naxanye birin yitonxi n xili ma. 61 Alatala, i bata e konbi ti xuine me, e nun e feen naxanye birin yitonxi n xili ma, 62 e falan tima n xili ma, e n mafala ferijen gben! 63 E mato, e nema doki, e nema tixi, n magele feen bata findi e sigi sa xunna ra. 64 Alatala, e kewanle saran e ra, alo a lan e fe raba kiin ma kii naxan yi. 65 E bojene raxodoko ayi, i ya dangan yi lu e ma. 66 Alatala, e sagatan i ya xoloni i yi e raxori dunuja yi!

4 Ee! Xemaan mi fa mayilenma! Xemaan naxan yi fan, na mi fa yanbanma! Boko bun nafunla naxanye yi rasarijanxi Ala xa, ne bata raxuya ayi kira xunne ra! 2 Siyon kaan naxanye yi yatexi dangu xemaan na hali naxan nun e gbindin binyan lan, ne bata fa yate fepene ra, naxanye rafalaxi benden na, fepene rafalan naxanye rafalaxi! 3 Hali kankone e xijen tima e diine xa e diine yi e xijen min, koni n ma yamaan tan bata lu alo dii nga jaxina, alo dangaranfulene tonbonni. 4 Dii futene lenna kankanma e de kankeni ige xonla ma. Diidine donseen maxodinma, koni muxu yo mi se soma e yii. 5 Naxanye yi e baloma donse jaxume fapine ra, kamen nan fa ne halagima taan xon. Naxanye gboxi jaxunni, ne jamani yegelenma e yiine ra. 6 N ma yamaan haken gbo dangu Sodoma kaane yulubin na. Na taan halagi sanja ma kedenna nin muxu yo mi a yiin din a ra. 7 En ma kuntigine fatine yi sarijan dangu balabalan kesen na, e fati kidin yi fixa dangu nonon na. E fatin yi mayilenma dangu geme gbeeli fapine ra e yetagine yi tofan alo geme mamiloxi fapine. 8 Koni iki, e yetagine fero tigena xa, e mi fa kolon kirane xon. E kidin nan tun fa bolixi e xonne ma, e fati kidine fasaxi e ma alo firinne. 9 Muxun naxanye faxaxi yengeni ne fisa muxune xa naxanye faxaxi kamen na donse xonla naxanye jaxankatama, naxanye doyenma donsetareyani. 10 Gbalon godo n ma yamaan ma waxatin naxan yi, hali dii ngane jnigene to yi fan, e e diine gan nen, e yi e don. 11

Alatala bata a xolon mayita han a danna, a fitinaxin bata yelin a xolo gbeen nagode. A bata tee gbeen nadege Siyon taani naxan taan ganxi han boxona. **12** Boxon mangane nun dunuja muxu yo mi yi laxi a ra a yaxune nun yengefane yi noe soe nen Yerusalen taan so deene ra. **13** Na ligaxi taan nabine yulubine nan ma fe ra e nun a saraxaraline hakene naxanye tinxin muxune faxe taani. **14** Iki e tununxin nan sigan tima taan xun xon alo danxutone. Wunla bata e sarjanna kala han yii mi fa dinje e dugine ra. **15** Muxune yi lu sonxoe e famatxon na, e naxa, "E masiga nxu ra, e tan muxu sarjantarene! E masiga, e masiga! E nama e yiin din sese ra de!" E lu e giye, e mi a kolon e sigede. Koni hali siya gbetene a falama nen, e naxa, "E mi noe luye nxu konni." **16** Alatala yeteen bata e raxuya ayi a mi fa a joxo luma e xon mum! Nayi, muxu yo mi fa saraxaraline binyama, muxu yo mi hinanma yamaan fonne ra. **17** Nxu yeene xadan nen nxu mali muxu fendeni fuuni. Nxu yi tixi nxo kantan tidene yi, nxu siyaan mame naxan mi yi noe nxu rakise. **18** Yaxune yi nxu mamelenma nxu sigadene birin yi alogo nxu nama mini taan xon. Nxo dunuja rajanna bata yi maso, nxo siimayaan janmatxon nan yi a ra, nxu rajanna bata yi fa yati! **19** Nxu sagatan muxune yi mafura singbinna xa kore. E nxu kedi nen ge ya longonne ra, e yi dexo nxu yee ra tonbonni. **20** E yi Alatalaa muxu sugandixin suxu naxan yi luxi alo nxu niin yetena, nxu yi nxu mirixi naxan ma fa fala nxu yi noe dexe nen a nininna bun siyane ye. **21** Edon kaane, e sewa, e jaxan, e tan naxanye dxi Yusu yamanani. Igelengenni ito radanguma e tan fan ma nen, e yi a dolo xolen min, e xun magi a ra, e ragenla yi lu. **22** Siyon kaane, e kewanle bata yelin saranye e ra. E mi fa xalima konyiyani sonon! Koni, e tan Edon kaane, Ala e haken saranma nen e ra, a yi e yulubine ramini kenenni!

5 Alatala, feen naxan nxu sotoxi, i nama jinan na xon. I yeen ti, i yi a to e nxu rayarabima kii naxan yi. **2** Nxo kee boxon bata findi xojene gbeen na, nxo banxine bata lu muxu gbeteye xa. **3** Nxu fafane mi fa be, nxu bata findi kiridine ra. Nxu ngane bata lu alo kaja gilene. **4** Nxu mi fa noe nxo igene minje fo nxu a sara, hali nxo yegene fo nxu xa e sara nen. **5** Muxun naxanye nxu toroma, ne nxu kdeen suxi. Nxu bata xadan, matabu mi nxu xa. **6** Nxu nxu yiin tima Misiran yamanan nun Asiriya yamanan xa alogo

nxu xa donseene soto. **7** Nxu fafane bata yulubin liga, e mi fa be. Nxu tan nan fa e haken goronna tongoma. **8** Konyine bata findi nxu kanne ra, muxu yo mi na naxan nxu be e yii. **9** Nxu sayaan nan de, nxu na mini donse fendeni bayo mafu tiine burunna ra. **10** Kamen bata nxu suxu han nxu fatin yi gan alo nxu nema wonson teeni. **11** Nxu yaxune bata fu jaxanle nun sungutunne ma Siyon taan nun Yuda taane yi. **12** E yeteen bata kuntigine singan, e mi binye yo sama fonne ma. **13** Diidine walima se dinden. Banxulanne yegene maxalima han e tagan. **14** Fonne mi fa e malanma taan so deen na, diidine fan mi fa sigi sama. **15** Sewan bata jan nxu bojeni, nxo sumunne bata findi sunun na. **16** Xunna kenla bata ba nxu yii. Gbalona nxu xa, bayo nxu bata yulubin liga. **17** Nanara, nxu bojen toroxi, nxu mi fa fefe yigbema. **18** Siyon ge yaan bata findi yire rabepinxin na e nun kankone kurudena. **19** Koni, Alatala, mangan nan i tan na habadan, i ya mangayaan senben luma nen han mayixete nun mayixete. **20** Nanfera i jinanje nxu xon han habadan? I nxu rabepinje nxu siin birin yi ba? **21** Alatala, nxu raxete i ma, nxu fan yi xete i ma yati! Nxu yi kii naxan yi a foloni, i mon xa nxo fe yiton na kiini. **22** I bata i me nxu ra ba fefe? I xoloxi nxu ma han a dangu ayi ba?

Esekiyeli

1 N ma siimayaan jɛɛ tonge saxanden kike naaninden xi suulunde lɔxoni, n yi muxu suxine yɛ Kebari baan dɛ konyiyani waxatin naxan yi, kore xonna yi rabi, n yi fe toone ti keli Ala ma alo xiyene. **2** Kiken xii suulunden nan yi a ra, Manga Yoyakin suxun jɛɛ suulunden na, **3** Alatala yi falan ti saraxaraliin Busi a dii xɛmɛna Esekiyeli xa Kebari baan dɛ Babilɔn kaane yamanani. Alatala sɛnben godo a ma mɛnna nin. **4** N na n yɛɛn nakeli, n yi foye gbeen to keɛ sogeteden kɔmɛn fɔxɔn binni e nun kunda gbeen nun tɛɛ dɛgɛ gbeena. Kɛnɛn gbeen nan yi minima kundani a rabilinni. Tɛɛn yi a tagiyani naxan yi mayilenma alo wuren na gbeeli tɛɛni. **5** Dalise naanin yi a tagi naxanye yi luxi alo adamadina. **6** Anu, yetagi naanin nun gubugubu naanin nan yi e birin ma. **7** E sanne yi tinxin, e luxi alo jingen torona, e mɔn yi mayilenma alo sulan xuruxina. **8** Muxu yiin yi e gubugubu naaninne keden kedenna birin bun ma. E naaninne birin yiine yi minixi tongon naaninne birin yi alo e yetagine nun e gubugubune. **9** E gubugubu xunne yi dɔxi e bode ra. E nɛma yi sigɛ, e mi yi e firifirima, koni e birin yi sigama a tinxinna nin. **10** E birin yetagi naanin: A singen yi maliga muxun yetagin na. Yata yetagin nan yi e naaninna birin ma e yiifanna ma e nun tura yetagina e naaninna birin ma e kɔmɛnna ma e nun singbin yetagina e naaninna birin ma. **11** E yetagine yi na kii nin. E gubugubun firinne ratexi koren binni, ne yi dɔxi e bode ra. E gubugubu firinna bonne yi e gbɛndin yɛɛ maluxunma. **12** E birin yi sigama a tinxinna nin e yɛɛ ra. Nii Sarijanxin na yi siga dɛnaxan yi, ne yi sigama mɛnni, hali e mi e firifiri. **13** Na daliseene yi luxi nɛn alo tɛɛ wolonna, e yi dɛgema alo xayɛ xidin dɛgɛne. Tɛɛn yi a firifirima daliseene tagi, a mayilenma, galanna minima a yi. **14** Daliseene gixin yi fama, e xɛtɛ, alo kuyen jiin masɔxɔnna. **15** N to na daliseene to, n yi san digilinxɛ keden kedenna to e birin ma naxan yi a gima bɔxɔn ma alo wontoro sanna dalise naaninne dɛxɔn yetagi naanin yi naxanye ma. **16** Sanna ne yi mayilenma alo kirisoliti gɛmɛ fajina. E birin yi maliga. E yi rafalaxi nɛn alo san digilinxɛn kankanxina san digilinxɛ gbɛtɛ kui. **17** E nɛma sigɛ, e yi nɔɛ sigɛ e fɔxɔ naaninne birin ma nɛn hali e mi e firifiri. **18** E san digilinxɛ kuixine yi gbo, e magaxu han, yɛɛne yi e san dingilixɛ kuixine rabilinne

birin yi. **19** Daliseene nɛma yi sigɛ, e sanni itoe fan yi sigama e dɛxɔn nɛn. Xa daliseene yi tunganma bɔxɔn ma, e sanne fan yi tunganma nɛn. **20** Nii Sarijanxin na yi siga dɛnaxan biri ra, daliseene fan yi sigama mɛn binna nin, e sanni itoe fan yi te e fɔxɔ ra, bayo daliseene niine yi e sanne fan yi. **21** E nɛma yi sigɛ hanma e ti, hanma e tungan bɔxɔn ma, e sanne fan yi na nan ligama, amasɔtɔ daliseene niine yi e fan yi. **22** Sena nde yi yibandunxi daliseene xun ma naxan nun kore walaxan yi maliga, a yi mayilenma alo balabalan kɛsɛna, a yi magaxu han! **23** Na kore walaxa maligan bun ma, daliseene birin gubugubu firinne yi tixi e bode xa, firinna bonne yi e gbɛndin yɛɛ maluxunma. **24** Daliseene nɛma yi sigɛ, n yi e gubugubune xuiin mɛma nɛn alo ige walanna xuina, hanma Ala Sɛnbe Kanna xuina hanma sofa ganla sɔnxɔ xuina. E na yi ti, e yi e gubugubune rasama nɛn. **25** Fala ti xuina nde yi minima nɛn kore walaxan fari naxan yi e xun ma. E na yi ti, e yi e gubugubune rasama nɛn. **26** Kore walaxan naxan yi e xun ma, manga gbɛden yiyana nde yi na fan fari. Na yi mayilenma alo safiri gɛmɛ fajina, adamadiin maligana nde yi dɔxi na manga gbɛdeni kore pon! **27** N yi tɛɛ wolonna to a fatin xun binni alo wuren naxan mayilenma, a rabilinxɛ tɛɛn na. Tɛɛn yiyaan nan yi a labe binni, a yi rabilinxɛ kɛnɛnyaan na. **28** A nɔrɔn yi luxi nɛn alo sengunna naxan minima kuyen ma tule waxatini. A rabilinna yi yalanxi na kii nin. Alatalaa binyen maligan misaala nan yi a ra. N to a to, n bira, n yetagin yi lan bɔxɔn ma, n yi fala ti xuiin mɛ.

2 A yi a fala n xa, a naxa, “Adamadina, keli, i ti i sanne xunna, n xa falan ti i xa.” **2** A to na fala n xa tun, Alaa Nii Sarijanxin yi so n yi, a yi n nati n sanne xunna. Naxan yi falan tima n xa, n yi n tuli mati na ra. **3** A yi a fala n xa, a naxa, “Adamadina, n tan nan i rasigama Isirayila kaane ma. Siya murutɛxin nan ne ra naxanye murutɛxi n xili ma. E nun e benbane mɔn murutɛxi n xili ma han to. **4** N ni i rasigama na muxune nan ma naxanye tengbesenxi, e tuli maxɔdɔxɔ. I xa a fala e xa, i naxa, ‘E tuli mati Marigina Alatalaa falan na.’ **5** Xa e a rame, hanma e mi a rame, bayo siya murutɛxin nan e ra, e a kolonma nɛn a nabina nde e yɛ. **6** I tan adamadina, i nama gaxu e yɛɛ ra, i nama gaxu e falane yɛɛ ra. E luma nɛn i rabilinni alo janle nun tansinne, alo i dɔxi tanle nan fari, koni hali na, i nama gaxu yama murutɛxini ito

nun e falane yee ra. 7 Xa e a rame hanma e mi a rame, fo i xa n ma falane ti e xa nen, bayo murutedene nan e ra. 8 Adamadina, n naxan falama i xa, i tuli mati na ra, i nama findi muruteden na alo yama murutexini ito! I deni bi, i donseen don n naxan soma i yii!” 9 N yi yiina nde to yibandunxin n binni, kedi mafilinxina nde a kui. 10 A yi a yifulun n yetagi, sebenla yi a foxo firinne birin ma. Sunu falane nun mawuga falane nun gballo falane nan yi sebexi a ma.

3 A yi a fala n xa, a naxa, “Adamadina, naxan i yetagi, na don! Kedi mafilinxini ito don, i sa falan ti Isirayila yamaan xa.” 2 Nayi, n yi n deni bi, a yi na kedi mafilinxin naso n de a don xinla ma. 3 A mon yi a fala n xa, a naxa, “Adamadina, i dege han i lugo! I kuiin nafe kedi mafilinxini ito ra!” Nayi, n yi a don, a yi jaxun n de alo kumina. 4 A yi a fala n xa, a naxa, “Adamadina, siga Isirayila yamaan fema, i sa n ma falane ti e xa! 5 N mi i rasigama yamaan xan fema naxan xui gbeten falama naxan famu raxolo, koni n na i rasigama Isirayila yamaan nan ma. 6 N mi i rasigama siya wuyaxine fema naxanye xui gbetene falama naxanye famu raxolo, i yeteen mi naxanye mema. Xa n yi i rasigama ne nan ma nun, e yi e tuli matiye nen i xuiin na. 7 Koni, Isirayila yamaan mi waxi i xuiin name feni, bayo e mi waxi n fan xuiin name feni, amasoto Isirayila yamaan birin tuli maxodoxo, e tengbesen. 8 Nayi, n ni i fan yee xodoxoma ayi nen alo e tan, i yi i kankan e yee ra. 9 N ni i ye xodoxoma ayi nen dangu dayimun na naxan xodoxo fanyen xa. Na ma, i nama gaxu e yee ra, yama murutexini ito a fe nama i kuisan.” 10 A mon yi a fala n xa, a naxa, “Adamadina, i tuli mati falani itoe birin na ki fajni, n naxanye falama i xa, i yi e ramara i bojeni! 11 Siga i kon kaa muxu suxine fema, xa e a rame, a fala e xa, hali xa e mi a rame, i naxa, ‘E tuli mati Marigina Alatalaa falan na.’” 12 Alaa Nii Sarijanxin yi n yite, n yi sonxo xui gbeena nde me n xanbi ra, naxan a fala, a naxa, “Binyen xa fi Alatala ma a dodoxeni!” 13 N mon yi daliseene gubugubune xuiin me naxanye yi bonboma e bode ra, e nun san digilinxine xuina, naxanye yi e dexon ma e nun sonxo xui gbeena. 14 Alaa Nii Sarijanxin yi n yite, a siga n na. N niin soxelxin yi siga xoleni, bayo Alatala senben yi n fari a xodexen na. 15 N yi sa so muxu suxine konni, naxanye yi dxi Teli-Abiba yi, Kebari baan de. N yi sa dxi e konni xi solofere, n yigitegexi e tagi. 16

Xi solofere xanbi ra, Alatala yi falan ti n xa, a naxa, 17 “Adamadina, n bata i findi Isirayila yamaan kantan muxun na. Nayi, n ma falane rame, i yi e rakolon n xa. 18 N na a fala muxu jaxin ma, n naxa, ‘I faxama nen.’ Xa i mi a rakolon, xa i mi falan ti a xa, fa fala a xa xete a kira jaxin foxo ra alogo a xa kisi, na muxu jaxin faxama nen a haken ma, koni a wunla goronna luma i tan nan xun ma. 19 Koni, xa i na muxu jaxin nakolon, a mi xete a kwali jaxine nun a kira jaxin foxo ra, a faxama nen a haken ma, koni i tan bata i niin natanga na yi.” 20 “Xa tinxin muxuna nde fan a xun xanbi so a tinxinyani, a yi tinxintareyaan liga folo, n yi sena nde sa a yee ra naxan a rabire, na kanna faxama nen. I to mi a rakolonxi, a faxama nen a yulubin ma. A tinxinyaan naxan liga, jinan tima nen na xon, a wunla goronna yi lu i tan xun ma. 21 Koni i na tinxin muxun nakolon alogo a nama yulubin liga, xa a mi yulubin liga, a kisima nen, i to a rakolonxi, i fan bata i niin natanga na yi.” 22 Alatala senben mon yi godo n ma menni. A yi a fala n xa, a naxa, “Keli, i siga lanbanni, n sa falan tima i xa menna nin.” 23 Nayi, n yi keli, n siga lanbanni, n yi a to a Alatalaa noron yi na yi alo n na a to kii naxan yi Kebari baan de. N yi bira, n yetagin yi lan boxon ma. 24 Alaa Nii Sarijanxin yi so n yi, a yi n nakeli, n yi ti n sanne xun na. A yi a fala n xa, a naxa, “Siga, i sa so i ya banxini, i deen balan i xun ma. 25 I tan adamadina, muxune lutin tima i ra nen, e yi i xidi, i mi fa nxe mine e tagi. 26 N ni i lenna xidima nen i de kanken, alogo i nama falan ti, i yi e maxadi, hali muxu murutexine nan e ra. 27 Koni, n na falan ti i xa, n ni i deen fulunma nen, alogo i xa a fala e xa, i naxa, ‘E tuli mati Marigina Alatalaa falan na.’ Xa naxan waxi a rame feni, na xa a rame. Xa naxan mi waxi a rame feni, na nama a rame, bayo muxu murutexine nan e ra.”

4 “Iki, i tan adamadina, bitikidin tongo i yi a dxi i yetagi, i yi Yerusalen taan sawuran kerenden a fari. 2 I yi a liga alo ganla na a rabilin yengeni, i yi yire makantanxine ti a rabilinni, i gbingbinne rate taan makantan yinna xon, i daaxadene yiton ganle xa taan xili ma, i yenge so seene ti a rabilinni naxanye a so deene kale. 3 Na xanbi ra, i xa tunde dutunna nde tongo i yi a ti yinna misaala ra e nun taan tagi, i yi i yee rafindi a ma. Taan nabilinxin nan na ra yengeni, i tan nan a yengema. Na xa findi taxamasenna ra Isirayila yamaan xa.” 4 “Na xanbi ra,

i sa i sa i kōmenna ma, i yetēen yi Isirayila yamaan haken goronna tongo. Fanni i saxi i kōmenna fari, i e haken goronna tongoma. 5 N lōxōne yatēn nagidima i ma nēn naxan lanjē e hakene jēene yatēn ma. Nayi, i Isirayila yamaan haken goronna tongoma nēn xi keme saxan xi tonge solomanaaninna bun ma. 6 I na yelin na ra, i mōn xa i sa i yiifanna fari, i yi Yuda bōnsonna hakene goronna tongo xi tonge naanin, xi keden jēē keden hakēna fe ra. 7 I yēē rafindi Yerusalēn sawuran fan ma naxan nabilinxi yengeni, i yi i yiin magenla yibandun a xili ma, i yi nabiya falane ti a xili ma. 8 N na i xidima nēn alogo i nama nō i maxetē i taan yenge feen misaala mayitama waxatin naxan birin yi.” 9 “I xa maala nun fundenna nun togen nun murutun nun sansi kēē gbētēye tongo, i yi e birin sa goron kedenna kui, i yi lu e rafale burun na i balon na xi keme saxan e nun xi tonge solomanaaninna bun ma. 10 I garamu kēmē firin nan maligama lōxō kedenni i balon na. I na nan donma na waxatin birin yi. 11 I igen litiri keden nan minma lōxō kedenni. I na nan minma na waxatin birin yi. 12 I na donseen nafalama nēn alo funde burun ganma kii naxan yi, koni i a ganma adamadiine gbiin tēen nan na muxune birin yetagi.” 13 Alatala mōn yi a fala, a naxa, “Isirayila kaane donse haramuxine donma ikii nin siyane yē, n na e kedima naxanye tagi.” 14 N yi a yabi, n naxa, “Ee! Marigina Alatala! N tan munma n niin naharamu singen del Keli n dii jōrē waxatin ma han to, n munma sube yifaxin don hanma burunna subene naxan faxaxi. Han to, n munma sube haramuxi yo raso n dē singen!” 15 A yi n yabi, a naxa, “Awa, n bata tin, i xa jinge gbiin tongo muxu gbiin jōxōni, i yi i ya burun gan na ra.” 16 A mōn yi a fala n xa, a naxa, “Adamadina, n donseene birin janma nēn Yerusalēn yi. A muxune e lōxō yo lōxō solōnna maligama nēn, e yi a don kōntōfinli, e yi e lōxō yo lōxō min igene maliga, na yi e yigitege. 17 Nayi, burun nun igen janma nēn e yii, e birin yi yigitege, e lu doyenjē e hakēne fe ra.”

5 “I tan adamadina, silanfann xēnxēn tongo, i yi i xun sexene nun i dē xabene bi na ra, i yi e yiliga sikeela kui, i yi e yitaxun dōxō saxanna ra. 2 I nēma Yerusalēn taan yenge feen misaala mayita waxatin naxan yi, na na jan, i yi i xunsexene dōxōde kedenna gan taani. I yi a dōxō firinden tongo, i yi a bonbō i ya silanfanna ra taan nabilinni. I yi a dōxōde saxanden naxuya ayi foyeni, bayo n tan Isirayila kaane sagatanma nēn n

ma silanfanna ra. 3 Koni i xunsexē dando tongo ne yē, i yi e raxudu i ya domaan lenbeni. 4 I mōn xa ndee ba ne fan na, i yi e woli tēēni. Nayi, tēēn kelima nēn menni a Isirayila yamaan birin li.” 5 Marigina Alatala ito nan falaxi, a naxa, “Yerusalēn taan ligama na kii nin, n taan naxan ti siyane tagi, n naxan nabilinxi yamana xōjēne ra. 6 Bayo a muxune bata murute n ma sariyane nun n ma tōnne bun, e fe jaxine yi gbo ayi dangu e rabilinna siyane nun yamanane ra. Mēn kaane bata e mē n ma sariyane ra, e mi n ma tōnne suxi.” 7 Nanara, Marigina Alatala ito nan falaxi, a naxa, “Bayo ē bata findi yamaritarene ra dangu ē rabilinna siyane nun yamanane ra, bayo ē mi n ma tōnne nun n ma sariyane suxi, hali ē rabilinna siyane sariyane ē mi ne suxi.” 8 Na ma, Marigina Alatala ito nan falaxi, a naxa, “Yerusalēn kaane, n tan yetēen kelima nēn ē xili ma! N na n ma kiti ragidixine rakamalima nēn ē xili ma siyane birin yetagi. 9 N feene ligama nēn ē ra ē kēwali xōsixinē fe ra, n munma naxanye sifa liga singen, a jōxōn nun mi fa ligama. 10 Nanara, fafane e diine donma nēn ē tagi, diine yi e fafane don. N na n ma kiti ragidixine rakamalima nēn ē xili ma, naxanye na lu e nii ra, n yi ne raxuya ayi foyeni.” 11 Nanara, Marigina Alatalaa falan ni ito ra, a naxa, “N tan habadan Ala, n bata n kōlō n yetēni, bayo ē bata n ma yire sarijanxin naxōsi ē suxurene birin na e nun ē kēwali xōsixinē, n fan n masigama nēn ē ra, n mi fa kininkininma ē ma, n tan mi fa ē muxu yo ratangama. 12 E yitaxunxin dōxō saxanna ra, kedenna faxama nēn fitina furen nun fitina kamēni taani, a firinden yi faxa silanfanna ra taan fari ma, n yi a saxanden naxuya ayi foyeni, n yi e sagatan silanfanna ra.” 13 “Nayi, n ma xōlōn janma nēn, n yi ba fitinaxi e xili ma, n na yelin n gbeen jōxē waxatin naxan yi. E a kolonma nēn nayi a n tan Alatala nan falan tixi n sōbēēn yetēēn na, amasōtō n bata n ma xōlōn birin nagodo e ma han a danna. 14 N na ē konna findima nēn taa xōnna ra ē rabilinna siyane naxan nayarabima, dangu muxune birin yi a to. 15 N fitinaxin na n ma kiti ragidixine rakamali ē xili ma n ma xōlōni waxatin naxan yi, n yi ē maxadi a xōdēxēn na, ē rabilinna siyane ē makonbima nēn, e yi ē magele, ē findi misaala ra, ē fe yi e yigitege. N tan Alatala nan falan tixi.” 16 “N fitina kamen nafama nēn ē xili ma, a yi ē halagi, n mōn yi lu na kamēn fari sē. E donse dōnxene birin janma nēn. 17 N fitina kamen nun sube xājēne rafama nēn ē xili ma, naxanye ē diine faxama.

Fitina furen nun faxan yi wara ayi e taani, n yi yengen nafa e xili ma. N tan Alatala nan falan tixi.”

6 Alatala yi falan ti n xa, a naxa, **2** “Adamadina, i yee rafindi Isirayila geyane ma, i nabiya falane ti e xili ma, **3** i naxa, ‘Isirayila kaan naxanye geya yirene yi, e Marigina Alatalaa falan name. Marigina Alatala ito nan falaxi muxune xili ma naxanye doxi geya yirene nun yire matexine nun xude deene nun lanban yirene yi, a naxa: N yengen nafama nen e xili ma, n yi e taane kidene raxori. **4** E saraxa gandene kalama nen, e wusulan gandene yi rayensenje ayi, n yi e faxa e suxurene yetagi. **5** N na Isirayila kaane binbine luma nen biraxi e suxurene yetagi, n yi e xonne raxuya ayi e saraxa gandene rabilinne yi. **6** E na doxo dede yi, e taane raxorima nen, e taane kidene yi kala, e saraxa gandene yi raxori, e suxurene yi kala, e yi jan, e wusulan gandene yi rabira, e yii foxone birin yi lo ayi. **7** Muxu wuyaxi faxaxin luma nen biraxi e tagi. Nayi, e a kolonma nen a Alatala nan n na. **8** Koni n na e tan ndee luma nen e nii ra yengen xanbini, ne yi xuya ayi siyane ye yamanane birin yi. **9** Nayi, e na xali denaxanye yi siyane ye konyiyani, n ma fe rabirama nen e muxu gixine ma menni, e n nasunu kii naxan yi e yanfanten bojene yi, naxanye e masiga n na, e nun e yeen naxanye e rakunfa suxurene xon. Nayi, e fe rapaxuma e tan yeteen ma nen e kewali jaxine nun e fe xosixi rabana fe ra. **10** E a kolonma nen nayi a Alatala nan n na, a n mi falan tixi e xa fuun xan yi, fa fala a n yi gbaloni ito rafama nen e xili ma.” **11** “Marigina Alatala ito nan falaxi n xa, a naxa: I yiin bonbo, i sanni din, i yi a fala, i naxa, “Gbalona!” bayo Isirayila yamaan faxama nen silanfanna nun fitina kamen nun fitina fureni e fe jaxine nun kewali xosixine fe ra e naxanye birin ligaxi. **12** Naxanye makuya, ne faxama fitina furen nin. Naxanye maso, ne faxama silanfanna nan na. Naxanye na lu e nii ra, ne faxama nen fitina kameni. N sigama nen han n ma xolon danna e xili ma. **13** E a kolonma nen, a Alatala nan n na, e muxu faxaxine na lu biraxi e suxurene tagi waxatin naxan yi e saraxa gandene rabilinni yire matexine birin fari e nun geyane birin xuntagi, e nun wudi yifotnxine nun wari gbeene birin bun, e yi wusulan xiri jaxumene ganma e suxurene xa denaxanye yi. **14** N na n yiini bandunma nen e xili ma, n yi yamanan findi yire rabepinxin na, keli tonbonna

ma han Dibila yi, e doxodene birin. Nayi, e a kolonma nen a Alatala nan n na.”

7 Alatala falani ito nan ti n xa, a naxa, **2** “Adamadina, Marigina Alatala ito nan falaxi Isirayila kaane xili ma, a naxa, ‘A danna nan fa ito ra! A danna bata a li yamanan tongon naaninne birin yi! **3** Awa iki, a danna bata a li e ma. N na n ma xolon nafama nen e ma. N na e makitima nen lan e sigati kiin ma, n yi e saran e kewali xosixine ra. **4** N mi kininkininma e ma, n mi e ratangama, amasoto n na e sigati kiin nun e kewali xosixine saranma nen e ra. Nayi, e a kolonma nen a Alatala nan n na.’ **5** Marigina Alatala ito nan falaxi, a naxa, ‘Gbalon fama, gbalon naxan joxon mi na! **6** Feene danna nan na ra! A danna bata a li! A kelima nen e xili ma! A fama! **7** E tan yamanan muxune, e waxatin bata a li! Waxati saxin bata a li e ma, a laxon bata maso! Kontofinla na a ra! Sewa xui mi fa tema geyane fari sonon! **8** Iki, n mi fa buma, n na n ma xolon nagodo e ma, n ma bojeteen sigama nen han a danna e xili ma. N na e makitima nen lan e sigati kiin ma, n yi e saran e kewali xosixine ra. **9** N mi kininkininma e ma, n mi e ratangama, amasoto n na e sigati kiin nun e kewali xosixine saranma nen e ra. Nayi, e a kolonma nen a n tan Alatala, n tan nan e jaxankatama.” **10** Laxon bata a li, a bata a li! E waxatin bata a li! Bonbo ti dunganna bata a mapingi! Wason bata sabati ayi! **11** Gbalon bata keli, a findi muxu jaxine jaxankata dunganna ra. E sese mi fa luma, e nafulu mi luma, e mi fa wuyama ayi, e noro mi fa luma. **12** Waxatin bata a li, laxon bata maso! Sare soon nama fa sewa, sare matiin nama fa sunu, bayo xolo gbeen fama yamaan birin xili ma. **13** Sare matiin naxan matixi, a mi na sotoma hali a mon lu a nii ra, bayo fe toon naxan tixi lan yamaan ma alo xiyena, na mi kalama, muxu yo mi a niin natange masoto e hakene xon. **14** Xootaan fema nen, feen birin yi yiton, koni muxu yo mi sigama yengeni bayo n ma xolon bata godo yamaan birin xili ma. **15** Yengen taan nabilinma nen, fitina furen nun fitina kamen yi so a yi! Naxanye burunna ra, ne yi faxa silanfanna ra. Naxanye taani, fitina kamen nun fitina furen yi ne halagi. **16** Naxanye na e futuxulu, ne sa e luxunma nen geyane fari, e lu kutunje e yete hakene fe ra alo ganban naxanye lanbanni. **17** E birin fangan janma nen, e birin xinbi xudine yi tu ayi, e lu alo igena. **18** E e maxidima nen kasa benbeli dugine yi sununi, kuisanna yi e birin suxu, e yagi han, e birin yi

e xunne bi sununi. **19** E e wure gbetine wolima ayi nen kirane xɔn, e yi e mɛ e xɛmane ra alo se haramuxina. Bayo e gbetine nun e xɛmane mi nɔɛ e xunbe Alatalaa xɔlɔn lɔxɔni. Ne mi fa e wase, e mi e raluge, bayo ne nan e biraxi hakeni. **20** E bata waso ayi e nafunle xɔn e yi suxure xɔsɔxi haramuxine rafala e ra. Nanara, n tan Ala ne findima nen se xɔsine ra e xa. **21** N na e birin findima nen yenge se tongoxine ra xɔɛne xa, fuyantenne yi e ba e yii yengɛni, e yi na raxɔsi. **22** N na n xun xanbi soma nen e yi, muxune yi n ma yire kendena sarijanna kala, mafu tiine yi so a kui, e yi a sarijanna kala. **23** Yɔlɔnxɔnne rafala, bayo faxan bata wara ayi yamanani, gbalon yi gbo ayi taani. **24** Siyaan naxanye naxu e birin xa, n ne rafama nen, e yi e banxine tongo e yii. N senbɛmane wason janma nen, e yire sarijanxine sarijanna yi kala. **25** Kuisan waxatine na fa, e bɔɛ xunbenla fenma nen, koni e mi a toɛ! **26** Gbalon sama nen gbalon fari, xibaru naxine yi sa xibaru naxine fari. E fe toon maxɔdinma nen nabine ma fata Ala ra, koni saraxaraline bama nen muxune xaranye sariyan ma, fonne fan yi ba maxadin tiye. **27** Mangan sunuma nen, manga diin yi yigitege, yamanan muxune birin yiine yi xuruxurun gaxuni. N na e sigati kiin saranma nen e ra, n yi e kiti e kiti saxine xɔn, e yi a kolon a Alatala nan n na.

8 Yamaan xali konyiyani waxatin naxan yi, na jɛɛ senninden kike senninden xi suulunde lɔxɔni, n yi dɔxi n ma banxini, Yuda bɔnsɔnna fonne yi dɔxi n yetagi, Marigina Alatala senben yi godo n ma. **2** N yi dajɔxɔna nde to naxan yi maliga tɛen na. Denaxan yi luxi alo a tagina han a sanne, tɛen yiyaan nan yi na ra. Keli menna ma mɔn han a xunna, na yi luxi alo tɛen na wuren gbeeli. **3** Denaxan yi luxi alo a yiina, a yi na yibandun, a yi n suxu n xun sexen ma. Alaa Nii Sarijanxin yi n nate bɔxɔn nun koren lantagini, a yi n xali fe tooni fata Ala ra alo xiyena, a siga n na Yerusalen yi Ala Batu Banxin yinna kui xiin so dɛen na naxan yi yɛ rafindixi sogeteden kɔmɛn fɔxɔn ma suxuren yi dɔxi denaxan yi naxan Ala raxɔloma fata a xanuntenya gbeen na lan a yamaan ma. **4** Isirayilaa Alaa nɔrɔn yi menni, alo n na a to kii naxan yi lanbanni. **5** A yi a fala n xa, a naxa, “Adamadina, i yɛ rasiga kɔmenna binni.” N yi n yɛ rasiga, n yi sa na suxuren to naxan Ala raxɔloma, a dɔxi saraxa ganden kiraan so dɛen kɔmɛn fɔxɔni. **6** A yi a fala n xa, a naxa, “Adamadina, i bata a to e naxan ligama,

Isirayila yamaan fe xɔsɔxi gbeen naxanye ligama be, feen naxanye n masigama n ma yire sarijanxin na? Koni i mɔn fe xɔsɔxi gbee gbeteɛe toma nen.” **7** Nayi, a yi n xali Ala Batu Banxin yinna so dɛen na. N yi yinla nde to yinna ma. **8** Ala yi a fala n xa, a naxa, “Adamadina, yinla raba yinna ma.” N yi yinla raba yinna ma, so dɛen yi taran a ma. **9** A yi a fala n xa, a naxa, “So menni, i sa e fe xɔsɔxi haramuxine mato e naxanye ligan be.” **10** N yi so, n yi a mato, bubuseene nun sube xɔsixin sifan birin sawuran yi na, e nun Isirayila yamana suxurene birin sawurane yi rafalaxi yinna kui a kanke yiren birin ma. **11** Isirayila yamaan fonne muxu tonge solofere yi tixi na sawurane yetagi. Safan ma dii xɛmɛn Yaasaniya yi ne ye. Wusulan gan seen yi suxi e birin yii, wusulanna tutin yi tema han! **12** A yi a fala n xa, a naxa, “Adamadina, i bata a to ba, Isirayila yamaan fonne naxan ligama dimini? E birin e gbee suxure batu konko yi. E a falama, e naxa, ‘Alatala mi nxu toma. Alatala bata yamanan nabepin!’” **13** A yi a fala n xa, a naxa, “I mɔn e toma nen fe xɔsɔxi gbee gbeteɛe lige.” **14** A yi n xali Alatalaa banxin so dɛen na kɔmɛn fɔxɔni. Naxanle yi dɔxi menni naxanye yi Tamusi suxuren sayaan wugama. **15** A yi a fala n xa, a naxa, “Adamadina, i a toma ba? I mɔn fe xɔsɔxi gbeteɛe toma nen naxanye dangui itoe ra.” **16** A yi n xali Alatalaa banxin yinna kui xiini, Ala Batu Banxin so dɛen na, so dɛen palaan nun saraxa ganden longonna ra. Xɛmɛ mɔxɔɛn nun suulun nɔxɔn yi menni, e xun xanbi soxi Alatala Batu Banxini, e yɛ rafindixi sogeteden binna ma. E yi e xinbi sinma sogen mabinni a batudeni. **17** A yi a fala n xa, a naxa, “Adamadina, i feni itoe toma ba? Fe xɔsixin itoe xurun ba, Yuda yamaan naxanye ligan be? Anu, e mɔn yamanan nafema gbalɔ feene ra, e yi lu n naxɔle. I mi e toma wudi yiin masoɛ e jɔɛen na e namunne xɔn ba? **18** Nanara, n fan e saranma nen n ma xɔlɔ gbeeni. N mi kininkininma e ma, n mi e ratangama. E n xilima nen e xui yitexin na, koni n mi n tuli matima e ra.”

9 Na xanbi ra, n yi a mɛ a fale a xuini texin na, a naxa, “E tan naxanye taani ito muxune kewanle saranma e ra, e maso, birin xa a yenge so seen tongo taan xili ma.” **2** Nayi, n yi xɛmɛ sennin to fe sa keli faxa ra so dɛen binni naxan yi yɛ rafindixi kɔmɛn fɔxɔn ma. Halagi ti yenge so seen yi suxi e birin yii. Xɛmɛna nde yi e tagi naxan yi maxidixi taa dugini,

sebeli ti seene yi singanxi a tagi xidin na. E yi fa ti saraxa gande sula daxin dexion. 3 Isirayilaa Alaa naron yi keli maleka gubugubu kanne sawurane xun ma, a yi denaxan yi, a yi siga banxin deen na. Xemen naxan yi maxidixi taa dugini, sebeli ti seene yi singanxi naxan ma tagi xidin na, 4 Alatala yi na xili, a yi a fala a xa, a naxa, “Dangu Yerusalen taan tagi, i yi taxamasenna sa muxune birin tigi ra naxanye wugama, e kutunma lan fe xosixine fe ma Yerusalen kaane naxanye ligama.” 5 A yi a fala bonne xa n yee xori, a naxa, “E tan xa bira a foxo ra taani, e muxune faxesa, e nama kininkinin, e nama dijia muxe ma! 6 E fonne nun banxulanne nun sungutunne nun dii norene nun naxanle birin faxesa, e yi e raxori. Koni taxamasenna muxun naxanye birin ma, e ne lu na. E a folo n ma yire saripanxin mal” E yi a folo fonne ma, naxanye yi Ala Batu Banxin yetagi. 7 A yi a fala e xa, a naxa, “E n Batu Banxin naharamu, e yi a yinna kuine rafe muxu faxaxine ra! E siga!” E yi siga, e sa faxan ti folo taani. 8 E yi faxan tima waxatin naxan yi, n kedenna nan yi fa luxi menni, n yi bira, n yetagin yi lan boxon ma, n yi gbelegbele, n naxa, “Marigina Alatala, i Isirayila muxu donxene birin naxorima nen ba, i to i ya xolon nagodoma Yerusalen ma?” 9 A yi n yabi, a naxa, “Isirayila yamaan nun Yuda yamaan hakene gbo han! Yamanan nafexi e muxu faxaxine wunla nan na, taan nafexi tinxintareyaan nan na. Amasoto e yi a falama nen, e naxa, ‘Alatala bata yamanan nabepin. Alatala mi fa sese toma.’ 10 N fan mi fa kininkininma e ma, n mi fa e ratangama. N na e kwali naxine saranma nen e ra.” 11 Xemen naxan yi maxidixi taa dugini, sebeliti seene yi singanxi naxan ma tagi xidin na, na yi fa a fala, a naxa, “I n yamarixi naxan ma, n bata na liga.”

10 N yi n yeen nakeli, n yi manga gbeden yiyaan to kore walaxa maligan fari naxan yi maleka gubugubu kanne xun ma. A mayilenma alo safiri gemena. 2 Xemen naxan yi maxidixi taa dugini, Ala yi a fala na xa, a naxa, “Sa so san digilinxine longonna ra naxanye maleka gubugubu kanne labe ra, i yi i yiine rafe tee wolonne ra, i sa e woli taan xun xon.” N yi xemen to sigi menni. 3 Maleka gubugubu kanne yi tixi Ala Batu Banxin dexion sogeteden yifari foxoni na muxun yi fama waxatin naxan yi. Kundaan yi Ala Batu Banxin yinna kui xiin nafexi. 4 Alatala naron yi keli maleka gubugubu kanne xun ma, a siga Ala Batu Banxin so deen na. Banxin yi rafe kundaan

na, yinna kuiin yi rafe Alatala naron kenenna ra. 5 Malekane gubugubune xuiin yi siga mine han yinna fari ma xiina. Na yi luxi alo Ala Senbe Kanna xuina, a nema falan tiye. 6 Xemen naxan yi maxidixi taa dugini, a to na yamari, a naxa, “Teen tongo san digilinxine longonna ra naxanye maleka gubugubu kanne tagi,” xemen yi sa ti san digilinxina nde dexion alo wontoro sanna. 7 Nayi, maleka gubugubu kan keden yi a yiin nasiga teen ma naxan yi maleka gubugubu kanne longonna ra. A yi tee wolonne tongo, a yi e sa xemen yii naxan yi maxidixi taa dugini. Na yi tee wolonne tongo, a mini. 8 Sena nde yi malekane gubugubune bun ma alo muxu yiina. 9 N yi a matoma, n yi san digilinxini naanin to maleka gubugubu kan keden kedenne dexion alo wontoro sanna. Sanna ne yi mayilenma alo kirisoliti geme fajina. 10 E birin yi maliga. E yi rafalaxi nen alo san digilinxin kankanxina san digilinxini gbete kui. 11 E nema sigi, e yi nae sigi e foxo naaninne birin ma nen hali e mi e firifiri. Maleka gubugubu kanne yi xun tixi denaxan biri ra, san digilinxine yi sigama men binna nin, hali e mi e firifiri. 12 Yee ne nan yi maleka gubugubu kanne fatin birin ma, e fanna nun e yiine nun e gubugubune birin e nun e san digilinxini naaninne. 13 N yi a me e na sanne xilima, a “wuluwunle.” 14 Yetagi naanin nan yi malekane birin ma. A singen yi maligaxi maleka gubugubu kanna yetagin nan na, a firindena, muxu yetagina, a saxandena, yata yetagina, a naanindena, singbin yetagina. 15 Maleka gubugubu kanne yi te. Daliseene nan yi ne ra n naxanye to Kebari baan de. 16 Maleka gubugubu kanne nema yi sigi, e san digilinxine fan yi sigama nen e foxo ra. Malekane na yi e gubugubune yite alogo e xa tугan boxon ma, e san digilinxine mi yi kelima e dexion. 17 E na yi ti, e sanne fan yi tima nen. E na yi tугan, e sanne fan yi tугan, amasoto niin naxan yi daliseene yi, na yi e fan yi. 18 Alatala naron yi keli Ala Batu Banxin so deen na, a sa ti maleka gubugubu kanne xun ma. 19 Nayi, maleka gubugubu kanne yi e gubugubune yifulun, e tугan boxon ma n yee xori, e san digilinxine fan yi te e foxo ra. E yi sa ti Alatalaa banxin yinna so deen na sogeteden binni. Isirayilaa Ala naron yi lu e xun ma kore. 20 Daliseene nan yi e ra n naxanye to Isirayilaa Ala bun ma Kebari baan de, n yi a kolon a maleka gubugubu kanne nan yi e ra. 21 Yetagi naanin nan yi e birin ma, e nun gubugubu naanin. Sena nde yi e birin gubugubune bun ma alo muxu yiina. 22 E yetagine

yi maliga daliseene yetagine ra n naxanye to Kebari baan de. E birin yi sigama e yee ra e tinxinna nin.

11 Alaa Nii Sarijanxin yi n tongo a n xali Alatalaa banxin deen na, deen naxan yi yee rafindixi sogeteden ma. N yi muxu moxonen nun suulun to tixi deen na, yamaan yeeratina ndee yi ne ye, Asuru a dii xemen Yaasaniya nun Benayaa dii xemen Pelati. **2** Alaa Nii Sarijanxin yi a fala n xa, a naxa, “Adamadina, muxuni itoe nan fe jaxine yitonma, e maxadi jaxin ti taani ito yi. **3** E a falama, e naxa, ‘Banxine mi tiye be iki singen! Taan makantan yinna luxi nen alo tundena, en tan namaraxi a kui alo suben tunden kuil’ **4** Nanara, Adamadina, nabiya falan ti e xili ma, nabiya falan til!” **5** Nayi, Alatalaa Nii Sarijanxin yi godo n ma. A yi a fala, a n xa falani ito ti, a naxa, “Isirayila yamana, e luma a fale, e naxa, ‘E Alatala xuiin name,’ anu, n na e miriyaan kolon! **6** E bata faxan ti taani ito yi han kirane bata rafe binbine ra.” **7** Nanara, Marigina Alatala ito nan falaxi, a naxa, “E faxan naxanye tixi taan xun xon, na faxesa muxune nan luxi alo suben naxan namaraxi tundeni, taan nan tunden na koni n fa e tan kedima a yi nen. **8** E to gaxuxi yengen yee ra, n yengen nan nafama e xili ma,” Marigina Alatalaa falan nan na ra. **9** “N na e kedima nen taani, n yi e sa xone sagoni, n yi n ma kiti ragidixine rakamali e xili ma. **10** E faxama nen silanfanna ra, n yi e makiti Isirayila boxon danna ra. Nayi, e a kolonma nen a Alatala nan n na. **11** Taan makantan yinna mi findima tunden na e tan xa, e fan mi ramarama a kui alo subena, bayo n na e makitima nen Isirayila boxon danna ra. **12** Nayi, e a kolonma nen a Alatala nan n na, e tan naxanye mi n ma sariyane nun n ma tonne suxi, e yi bira e rabilinna siyane namunne foxo ra.” **13** Nayi, n yi nabiya falane tima waxatin naxan yi, Benayaa dii xemen Pelati yi faxesa. N yi bira, n yetagin yi lan boxon ma, n yi gbelegebele, n naxa, “Ee! Marigina Alatala, i fa Isirayila yama donxen naxorima nen ba?” **14** Alatala yi falan ti n xa, a naxa, **15** “Adamadina, naxanye doxi Yerusalen yi, ne a falama i ngaxakedenne xa, i ya denbayaan muxune, Isirayila yamaan naxan birin bata xali konyiyani, e naxa, ‘E lu makuyaxi Alatalaa dingiraan na, bayo a boxoni ito fixi nxu tan nan ma nxu keen na!’ **16** Na ma, a fala e xa, i naxa, ‘Marigina Alatala ito nan falaxi, a naxa: Hali n to e rasigaxi siyane ye pon, n yi e raxuya ayi yamanane yi, n luma nen e xon menni alo e yi yire

sarijanxinini nun.’ **17** Na ma, a fala, i naxa, ‘Marigina Alatala ito nan falaxi, a naxa: N na e malanma nen sa keli siyane ye, n yi e maxili yamanane yi, e raxuyaxi ayi denaxanye yi, n yi Isirayila yamanan so e yii.’ **18** E mon xetema nen menni, e yi suxurene nun batu se xosixine birin naxori a yi. **19** N yi xaxili kedenna lu e birin ma, n yi nii nenen sa e yi, n boje xodexeyaan ba e yi naxan luxi alo gemena, n yi boje fajin fi e ma **20** alogo e xa n ma tonne nun n ma sariyane suxu. Nayi, e yi findi n ma yamaan na, n findi e Ala ra. **21** Koni naxanye kunfaxi e suxurene nun batu se xosixine xon e bojeni, n na kanne kewali jaxine saranma nen e ra. Marigina Alatalaa falan nan na ra.” **22** Maleka gubugubu kanna naxanye nun san digilinxine yi a ra, ne yi e gubugubune yifulun, Isirayila Ala noron yi e xun ma kore. **23** Alatala noron yi ba taan xun ma, a sa ti geyaan xun ma naxan yi Yerusalen sogeteden binni. **24** Alaa Nii Sarijanxin yi n nate, a xete n na muxu suxine fema Babilon kaane yamanani fe tooni alo xiyena fata Alaa Nii Sarijanxin na. N yi fe toon naxan tima alo xiyena, na yi dan. **25** Alatala feen naxanye birin yita n na, n yi ne birin fala muxu suxine xa.

12 Alatala yi falani ito ti n xa, a naxa, **2** “Adamadina, i doxi yama murutexin nan tagi. E yeen na, alogo e xa seen to, koni e mi a yigbema. E tunla na, alogo e xa feen me, koni e mi a famuma, amasoto yama murutexin nan e ra. **3** Nanara, i tan Adamadina, i ya goronne yiton i a liga alo i sigama konyiyaan nin yanyi tagini yamaan yee xori. Keli be i siga yire gbete yi e yee xori. Waxatina nde, e a kolonma nen a yama murutexin nan e ra. **4** I ya goron yitonxine ramini e yee xori yanyin na, i tan yi mini jinbanna ra e yee xori alo naxanye sigama konyiyani. **5** Yinla raba yinna ma e yee xori, i yi i ya goronne ramini mena ra, **6** i yi e tongo i tungunna ma e yee xori, i yi e xali fitirin ma. I xa i yetagin xunna so alogo i nama yamanan mato, bayo n na i findima nen taxamasenna ra Isirayila yamaan xa.” **7** N yamari naxan na, n yi na liga. N yi n ma goronne ramini yanyin na siga konyiyani. Jinbanna ra, n yi yinla raba yinna ma n yin na, n yi n ma goronne ramini fitirin ma, n yi a tongo n tungunna ma e yee xori. **8** Xotonni, Alatala yi falan ti n xa, a naxa, **9** “Adamadina, Isirayila yama murutexin mi yi i maxodin ba, fa fala, ‘I nanse ligama?’ **10** E yabi, fa fala, ‘Marigina Alatala ito nan falaxi, a naxa: Nabiya falani ito tixi Yerusalen mangan nun Isirayila yamaan

birin nan xili ma naxanye luxi menni.’ **11** A fala e xa, i naxa, ‘N findixi ε rakolon feen taxamasenna nan na. N naxan ligaxi, na nan nakamalima e ma, e yi suxu yengeni, e siga konyiyani.’ **12** Mangan naxan e ye, na a goronne tongoma nen a tungunna ma fitirin ma, a mini taani. Yinla nan nabama a xa yinna ma, a yi mini mena ra. A yi a yetagin xunna so alogo a nama yamanan mato. **13** N na n ma yalaan natima nen a yee ra, a yi a suxu n ma luti ratixin na, n yi a xali Babilon taani, Babilon kaane yamanani, a mi denaxan toma a yeen na, a yi sa faxa na. **14** N na a rabilinna muxune birin naxuyama ayi nen e nun a ganle, n yi e sagatan silanfanna ra. **15** Nayi, e a kolonma nen a Alatala nan n na, n na e raxuya ayi siyane ye e nun yamanane yi. **16** Koni n muxuna ndee ratangama nen yengen nun fitina kamen nun fitina furen ma alogo e xa sa e ti e kewali xosixine ra e deni siyane birin xa e na siga denaxanye yi. Nayi, na kanne a kolonma nen a Alatala nan n na.” **17** Alatala yi falan ti n xa, a naxa, **18** “Adamadina, i nema i degema i xuruxurun, i yi igen min gaxun nun kuisanni. **19** I a falama nen yamanan muxune xa, i naxa, ‘Marigina Alatala ito nan falaxi lan Yerusalen kaane ma naxanye luxi Isirayila yamanani, a naxa: E degema kuisanna nin, e yi igen min yigitegeni, amasoto e yamanan nun a yi seene birin naxarima nen a muxune gbalone fe ma. **20** Muxune janma nen taane yi, yamanan yi findi yire rabepinxin na. Nayi, ε a kolonma nen a Alatala nan n na.” **21** Alatala yi falani ito ti n xa, a naxa, **22** “Adamadina, nanfera ε sandani ito falama ε tagi Isirayila boxon ma, fa fala, ‘Waxatin danguma, koni fe toon naxanye tima alo xiyena, ne sese mi rakamalima.’” **23** A fala e xa, i naxa, ‘Marigina Alatala ito nan falaxi, a naxa, “N bata danna sa sandani ito ra, a mi fa falama Isirayila yi sonon.”’ Koni a fala e xa, i naxa, ‘Fe toone birin nakamali waxatin bata maso. **24** Fe to fuu yo mi fa falama Isirayila kaane tagi alo xiyena, yiimatone mi fa muxune rafan feene falama e xa wuleni. **25** Bayo n tan Alatala, n falan tima nen, na yi rakamali keden na. E tan yama murutexina, na ligama nen ε waxatini. N falan tima nen, n yi a rakamali.’ Marigina Alatalaa falan nan na ra.” **26** Alatala yi falan ti n xa, a naxa, **27** “Adamadina, Isirayila yamana a falama, e naxa, ‘A fe toon naxan tixi, iki fe mi na ra, a nabiya falan tima lan waxati famatone nan ma naxanye makuya pon!’” **28** Nanara, a fala e xa, i naxa, ‘Marigina Alatala ito nan falaxi n xa, a naxa, “N

na fala yo ti sonon, na rakamalima nen keden na.” Marigina Alatalaa falan nan na ra.”

13 Alatala yi falan ti n xa, a naxa, **2** “Adamadina, nabiya falan ti Isirayila nabine xili ma naxanye nabiya falane tima iki, i yi a fala ne xa naxanye e boje yi feene tun falama, i naxa, ‘E Alatala xuiin name! **3** Marigina Alatala ito nan falaxi, a naxa: Gbalon nabi xaxilitarene xa, naxanye e yete xaxili yi feene falama, anu e mi fe to yo tixi keli Ala ma. **4** Isirayila kaane, ε nabine luxi nen alo kankone banxi xonne yi! **5** E mi e masoxi yinna yire biraxine ra alogo e xa Isirayila yamaan makantan yinna yinle rafaxa, a yi lu tixi yengeni Alatalaa xolon loxoni. **6** Wulen nan e fe toone ra, jondi mi e yiimato falane yi. E a falama, e naxa, “E tuli mati Alatalaa falan na.” Koni Alatala xa mi e xexi. Anu, e wama e falane xa rakamali. **7** E fe toon naxanye tima, fe fuun xa mi ne ra ba? E wule falan naxanye tima yiimatoni, wulen xa mi ne ra ba? E a falama, ε naxa, “E Alatalaa falan name!” Anu, n mi fala tixi.”” **8** “Nanara, Marigina Alatala ito nan falaxi, a naxa, ‘Bayo wulen nan ε falane nun ε fe toone ra, n bata keli ε xili ma.’ Marigina Alatalaa falan nan na ra. **9** ‘N senben kelima nen nabine xili ma naxanye fe to fuune tima, e yi wule falane ti yiimatoni. E mi daxode sotoma n ma yamaan malanni, e xinle mi sebema Isirayila kaane xili sebe kedin kui, e mon mi Isirayila yamanan lima. Nayi, ε a kolonma nen a Marigina Alatala nan na.”” **10** “E n ma yamaan naloma ayi, e naxa, “Boje xunbenla be,” anu boje xunbeli mi na. Bonne nema yinna tima naxan biramatō a ra, e tan bende fixen nan soma a ma. **11** Nayi, a fala na yinna maso muxune xa, a na yinna birama nen! Tule gbeen fama nen, balabalan kesene yi godo, foye gbeen yi fa. **12** Yinna na bira, muxune mi ε maxodinye nayi ba, fa fala, “E a masoxi bende fixen naxan na, na minen?””” **13** “Nanara, Marigina Alatala ito nan falaxi, a naxa: N fitinaxin kala ti foyen nafama nen, n tule gbeen nafa n ma xolo gbeeni, balabalan kese jaxine yi godo halagi tideni. **14** E bende fixen soxi yinna naxan ma, n na rabirama nen boxoni, a bunne yi mini kenenni. A na bira, ε fan halagima nen a xon. Nayi, ε a kolonma nen a Alatala nan n na. **15** N sigama nen han n ma xolon danna na yinna xili ma e nun naxanye a masoxi. Nayi, n yi a fala ε xa, n naxa, “Yin mi fa na, nabiin naxanye a masoxi ne fan mi fa na, **16** Isirayila nabiin naxanye yi boje xunbenla fe falama Yerusalen kaane xa e fe to fuune xon, anu

bōnje xunbeli mi yi na! Marigina Alatalaa falan nan na ra.”” 17 “Adamadina, i yee rafindi Isirayila yamaan sungutunne ma naxanye e yete bōnje yi falane tima nabiya falane ra. Nabiya falane ti e xili ma, 18 i naxa, ‘Marigina Alatala ito nan falaxi, a naxa: Gbalona e xa e tan naxanye yii kōe rasone degeḡema, e yi e so e yii kōene birin na tirin ti seene ra, e yi duguine dege naxanye soma muxune yetagine xun na fonne nun dii jōrene birin alogo e xa senben sōto e niine mal E n ma yamaan muxune niin tirinjē ba, e yi e yete niine ratanga? 19 E n ma sarjanna rayelefuma n ma yamaan yetagi fundenna yiin yē dandona fe ra hanma buru dungina ndee fe ra. E to wulene falama n ma yamaan xa naxanye mafura wule falane rame, e muxune faxama naxanye mi lan e faxa, e ndee lu e nii ra naxanye yi lan nun e faxa.”” 20 “Nanara, Marigina Alatala ito nan falaxi, a naxa: N kelima nen e tirin ti seene xili ma e muxune suxuma naxanye ra alo xoline. N na e bama nen e yii, n yi na kanne niine xunba e naxanye suxuma alo xoline. 21 N na e duguine bama nen e yetagine xun na, n yi n ma yamaan xunba e yii, e mi fa muxune tirinjē e senbene xōn sōnōn. Nayi, e a kolonma nen a Alatala nan n na. 22 Bayo e bata tinxin muxune bōjnen kala e wulene xōn, n tan mi yi waxi naxanye tōro feni, e yi muxu jaxine senbe so alogo e nama xete e kira jaxine fōxo ra, e yi kisi. 23 Na feene ma, e mi fa wule fe to yo tima alo xiyena, e mi fa e yiimatoma. N na n ma yamaan xunbama nen e yii. Nayi, e a kolonma nen a Alatala nan n na.””

14 Isirayila fonna ndee yi fa n fema e fa dōxo n yetagi. 2 Alatala yi falan ti n xa, a naxa, 3 “Adamadina, suxurene fe bata muxuni itoe bōjnen nō. Seen naxan e birama hakeni, e na nan dōxōma e yete yee ra. N tinjē nayi, e xa n maxōdin fena nde ma ba? 4 Nayi, falan ti e xa, i yi a fala e xa, i naxa, ‘Marigina Alatala ito nan falaxi, a naxa, “Suxure feen na Isirayila kaan naxan bōjne nō, a yi seen dōxo a yete yee ra naxan a bire hakeni, na xanbi ra a mōn yi fa nabiin fema, n tan Alatala yeteen nan na kanna yabima alo a lan a suxure wuyaxine ma kii naxan yi 5 alogo n mōn xa Isirayila kaane bōjene sōto naxanye birin e mexi n na e suxurene fe ra.”” 6 Nanara, a fala Isirayila yamaan xa, i naxa, ‘Marigina Alatala ito nan falaxi, a naxa: E xun xete, e xete e suxurene fōxo ra, e me e kewali xōsixine birin na. 7 Xa Isirayila kaana nde hanma xōjnen naxan dōxi Isirayila yi, xa na a me n na,

suxure feen yi a bōjnen nō, a yi seen dōxo a yete yee ra naxan a bire hakeni, a mōn yi siga nabiin fema alogo a xa n maxōdin fena nde ma, nayi, n tan Alatala yeteen nan a yabima. 8 N kelima nen na kanna xili ma, n yi a findi misaala ra, yamaan naxan mafalama. E yi a kolon a Alatala nan n na.”” 9 “Xa nabiin tin muxune yi a ratantan a tan yeteen yi nabiya falan ti na kanna xa, nayi n tan Alatala nan a radinxī tantanni. N na n yiini tema nen a xili ma, n yi a raxōri n ma yamana Isirayila kaane yē. 10 E birin nan na haken goronna tongoma, nabiin nun naxan a maxōdinxī, ne firinna birin haken lan. 11 Nayi, Isirayila kaane mi fa e masige n na, e mi fa e yete raxōse e yulubine birin xōn. Nayi, e findima nen n ma yamaan na, n findi e Ala ra,’ Marigina Alatalaa falan nan na ra.” 12 Alatala yi falan ti n xa, a naxa, 13 “Adamadina, xa yamanana nde tinxintareyaan liga, e n yulubin tongo, xa n na n yiini te a xili ma, n yi donseen nadasa e ma, n fitina kamen nafa e ma, n yi muxune nun xuruseene raxōri, 14 hali xa tinxin muxu saxanni itoe yi lu na yamaan yē nun: Nuhan nun Daniyeli nun Yuba, ne yi e yete niine nan tun natange e tinxinyaan xōn.” Marigina Alatalaa falan nan na ra. 15 “Hanma xa n mōn burunna sube xājene radin yamanan ma, e yi diidine birin faxa, yamanan yi findi yire rabejinxin na muxu yo mi fa danguma denaxan yi masōto na sube xājene fe ra, 16 hali xa na tinxin muxu saxanne taran yamanani, n tan habadan Ala, n bata n kōlo n yeteni, ne mi yi nōe hali e dii xemen hanma e dii temen natange, koni na muxu saxanne tan tange nen, yamanan yi findi yire rabejinxin na.” Marigina Alatalaa falan nan na ra. 17 “Hanma xa n yengen nafa na yamanan xili ma, xa n na a fala, n naxa, ‘Yengen xa dangu yamanan yiren birin yi!’ xa n muxune nun e xuruseene raxōri menni, 18 hali xa na tinxi muxu saxanne taran yamanani, n tan habadan Ala, n bata n kōlo n yeteni, e mi nōe e dii xemen hanma e dii temen natange. E tan nan gbansan tangama.” Marigina Alatalaa falan nan na ra. 19 “Hanma xa n fitina furen nafa na yamanani, n yi faxan nafa e ma n ma xōlōni, alogo muxune nun xuruseene xa raxōri, 20 hali xa tinxin muxu saxanni itoe yi lu na yamaan yē nun: Nuhan nun Daniyeli nun Yuba, n tan habadan Alatala, n bata n kōlo n yeteni, e mi nōe e dii xemen hanma e dii temen natange. E yete niine nan tun natange e tinxinyaan xōn.” Marigina Alatalaa falan nan na ra. 21 Amasōto, Marigina Alatala ito nan falaxi, a naxa, “Hali n to bata n ma kiti xōdexe

naaninne rasiga Yerusalen xili ma, yengen nun fitina kamen nun burunna sube xajene nun fitina furena, alogo e xa muxune nun xuruseene raxori, **22** hali na birin, muxuna ndee luma nen e nii ra. Xemene nun jaxanla ndee xunna minima ayi nen. E na e sigati kiin nun e kewanle to, na e masabarima nen lan gbaloni itoe birin ma n naxanye rafaxi Yerusalen ma. **23** E masabarima nen, e na e sigati kiin nun e kewanle to waxatin naxan yi. Nayi, e a kolonma nen a n mi feni itoe rabaxi fuun xan na taan xili ma.” Marigina Alatalaa falan nan na ra.

15 Alatala yi falan ti n xa, a naxa, **2** “Adamadina, jaxundan binla yatexi muxune xon dangu wudin bonne ra ba? A yiine tonon gbo dangu foton yi wudin bonne ra ba? **3** I na wudin tonge ba i yi sena nde rafala a ra? I a nde finde bitin wudina nde ra ba, i sena nde xidi a ma? **4** A na sa teeni yegen na, teen yi a xun firinne gan, a fa a tagin suxu, a tonon fa na ba? **5** Nayi, xa a tonon mi yi na benun a xa gan waxatin naxan yi, teena a gan xanbini, a fa rafale sena nde ra ba?” **6** Nanara, Marigina Alatala ito nan falaxi, a naxa, “N bata Yerusalen kaane findi se gan daxin na alo n jaxundan binla findixi yegen na foton yi wudin bonne tagi kii naxan yi. **7** N kelima nen e xili ma. Hali e to bata yi mini teeni nun, teen nan fa e halagima. N na keli e xili ma waxatin naxan yi, nayi e a kolonma nen a Alatala nan n na. **8** N yamanan findima nen yire rabeginxin na, bayo a muxune bata tinxintareyaan liga,” Marigina Alatalaa falan nan na ra.

16 Alatala yi falan ti n xa, a naxa, **2** “Adamadina, Yerusalen kaane kewali xosixine fe fala e xa. **3** A fala, i naxa, ‘Marigina Alatala ito nan falaxi Yerusalen taan xili ma, a naxa: Kanan boxon nan yi i benbane gbeen na, i barixi mena nin. Amarin nan yi i fafe ra, i nga, Xiti kaana. **4** I barixi boxon naxan yi, i xuli fundin mi xaba, i mi maxa alogo i xa sarijan, foxon mi sugusugu i ma, i mi mafilin dugini. **5** Muxu yo mi kininkinin i ma, a yi na fe kedenna nde liga i xa, a yi i ratanga. I woli ayi nen burunna ra i bari boxoni, amasoto i rapaxu nen muxune ma.”’ **6** “Koni, n yi danguma i dexon ma, n yi i to i ramaxe i wunli, n yi a fala i xa, n naxa, “Hali wunla to i ma, i luma nen i nii ra! Hali wunla to i ma, i luma nen i nii ra!” **7** Na xanbi ra, n yi i rasabati alo sexene burunna ra. N yi i ragbo, i yi koxo, n yi i rayabu ayi, i xijene yi te, i xun sexene yi mini. Koni i ragenla nan mon yi a ra singen.

8 Loxona nde, n yi danguma i dexon ma, n yi i mato, n yi a to i bata a li i muxu xanu waxatin ma, n yi n ma domaan lenben so i xunna, n yi i ba i ragenla ra, n yi n kolo i xa, n yi layirin xidi en tagi, i yi findi n gbeen na.’ Marigina Alatalaa falan nan na ra.” **9** “N bata i maxa. Wunla naxan yi i ma, n yi na ba i ma, n yi ture xiri jaxumen susan i ma. **10** N bata i maxidi taa dugi doma boxonxini, n yi kidi sankidin so i sanni, n yi i maraberi ba taa dugi fajini, n dugi fajin nagodo i ma naxan saren xodexo. **11** N yi i maxidi marayabu se fajine yi, n yi yii rasona so i yiine ra, n yi jeren bira i koe. **12** N wuredin sa i joxen na, n yi tunla sone so i tunle ra, n yi manga komoti fajin so i xun na. **13** Nayi, i yi maxidi xemaan nun wure gbeti fixen na, taa dugi boxonxin nun dugi sare xodexene yi findi i maraberi baan na. I yi balo murutu fupin fajin nun kumin nun oliwi turen na. I yi tofanye ayi, alo a lan jaxalan mangan ma kii naxan yi. **14** I xinla yi siyane birin li masoto i ya tofanna ma, bayo i yi rayabu han fata i maxidi se fajine ra, n ni i rayabu naxanye yi.’ Marigina Alatalaa falan nan na ra.” **15** “Koni i yi i yigi sa i ya tofanni. I ya xili gbeeyan yi findi feren na i xa, i findi yalunden na. I yi lu yalunyaan lige dangu muxune birin xon, i findi e gbeen na. **16** I bata i ya dugine tongo, i yi suxure kidene rayabu e ra, i yi yalunyaan naba menne yi naxan joxon munma yi liga, anu a joxon mi fa ligama sonon. **17** N tunla so xema daxin nun wure gbeti fixe daxin naxanye so i yii, i yi ne findi i ya suxure xememane ra, i yi n yanfa, i yalunyaan liga. **18** I bata i ya taa dugi boxonxine tongo, i yi i ya suxurene maxidi e yi, i yi n ma turen nun n ma wusulanna ba saraxan na e xa. **19** N donseen naxanye so i yii, murutu fupin nun oliwi turen nun kumina, n yi i baloma naxanye ra, i yi ne ba saraxane ra na suxurene xa alogo e gan xirin xa rafan e ma. I na nan ligaxi.’ Marigina Alatalaa falan nan na ra.” **20** “I yi i ya dii xemene nun i ya dii temene tongo, i naxanye bari n xa, i yi e gan saraxan na suxurene xa alogo e xa findi e donseene ra! I mi yi i wasa soe i ya yalunyani ba? **21** I bata n ma diine koe raxaba, i yi e gan saraxan na suxurene xa! **22** Anu, i kewali xosixine ligama yalunyani waxatin naxan yi, i mi i miri i ya dii joreyaan waxatin ma, i ragenla yi a ra waxatin naxan yi, i yi i ramaxama i wunli waxatin naxan yi.”’ **23** “Marigina Alatalaa falan ni ito ra, a naxa, ‘Gbalona! Gbalona e xa, bayo e yelin xanbini na fe jaxine birin lige **24** e bata gbingbinna rafala kiden na, e yi yire

matexine rafala kidene ra yama malandene yi. 25 E bata yire matexine rafala kidene ra taan kira xunne birin na. E yi e tofanna findi fe xosixin na, e yi e fatin lu dangu muxune birin sagoni, e yalunya feene yi siga gboe ayi. 26 E bata yalunyaan liga Misiran kaane xon, e dɔxɔ bode fati fajine, e yi e yalunyaan nadangu ayi, e yi n naxɔlɔ. 27 Nayi, n yi keli e xili ma, n yi nde ba e bɔxɔn na, n yi e sa e yaxu kunfadene sagoni, Filisitine taane, naxanye yati yi yagixi e yagitareya kewanle ra. 28 Koni e mon yi yalunyaan naba Asiriya kaane xon, bayo e munma yi wasa singen yalunyaan na, anu, hali na, e mi wasa. 29 Nayi, e yi e yalunyaan nadangu ayi, e Babilɔn kaane sa a fari, naxanye findixi yulane ra, anu, na fan mi e wasa.” 30 “Nayi, Marigina Alatalaa falan ni ito ra, a naxa, ‘E yugon kobi de, e to bata feni itoe birin liga, naxanye findixi yalunde jaxalan gbeen kewanle ra! 31 Anu, e to gbingbinna rafala kira xunne birin na, e yi yire matexine rafala kidene ra yama malandene yi, e mi yi luxi alo yalundena, bayo e mi yi gbetin nasuxuma e yangane ra. 32 E tan luxi nen alo jaxalan yalunxin naxan xeme gbete ye rafisama a xemen yeten xa a mi naxanye kolon. 33 Yalunde jaxanle birin sena nde rasuxuma e yangane yii. Koni e tan luxi nen alo jaxanla na a yangane ki alogo e xa fa, sa keli yiren birin yi, e yi kafu. 34 E yalunyaan nun jaxanla bonne yalunyaan keden mi a ra. Muxu yo mi a gima e fɔxɔ ra e kisena a yii. E tan nan e yangane kima, se mi so e yii.” 35 “Nanara, i tan naxan luxi alo yalunde jaxanla, i tuli mati Alatala fala xuiin na! 36 Marigina Alatala ito nan falaxi, a naxa, ‘Bayo i bata i ya nafunle birin yikala, bayo i bata i ragenla lu i ya yalunyaan xon i yangane yii e nun i ya suxurene nun i ya fe xosixine birin, i yi i ya diine wunla ba saraxan na e xa, 37 na ma, n na e nun i yangane birin malanma nen yire kedenni, naxanye yi rafan i ma e nun naxanye yi rajaxu i ma, n na e birin malanma nen i xili ma, n yi i rageli, e birin yi i ragenla to. 38 N na i kitima nen alo a lan yalunde jaxanle nun muxu faxane ma kii naxan yi. N yi i wunla ramini n ma xolo gbeen nun n ma xanuntenyaan kalan xɔxɔlonni. 39 N na i sama nen i yangane sagoni, e yi i ya kide gbingbinne nun i ya suxure batude matexine kala, e yi i ya dugine ba i ma, e yi i rayabu se fajine tongo, e yi i ragenla lu. 40 E yi yamaan nadin i ma, e yi i magɔlon, e yi i masɔxon silanfanna ra, 41 e yi eten so i ya banxine ra, e yi i makiti jaxalan wuyaxi yetagi. N danna sama nen i ya yalunyaan na, i mi fa i yangane saranna

fiye sɔnon! 42 N sigama nen han n ma xɔlon danna i xili ma, n ma xanuntenyaan kalan xɔxɔlonnyaan yi a masiga i ra. N na n sabarima nen, n mi fa xɔloma i ma. 43 N na i kewali jaxine saranma nen i ra, bayo i mi i xaxili luxi i ya dii meseyaan waxatina fe ma, i yi n naxɔlo feni itoe birin xon. I mi yagitareyaan xan saxi i kewali xosixi gbete ye fari ba? Marigina Alatalaa falan nan na ra.” 44 “Nayi, sandasane birin sandani ito falama nen i ma, e naxa, “Dii temen fama a nga nan ma.” 45 I ngaa dii temen nan i ra yati, naxan a xemen najaxuxi e nun a diine. E nun i ngaxakeden jaxalanmane birin keden, naxanye e xemene nun e diine rajaxuxi. Xiti kaan nan yi i nga ra, Amarin nan yi i fafe ra. 46 I tada jaxalanmaan naxan yi dɔxi i komenna ma, na findixi Samari taan nan na e nun a muxune. I xunyen jaxalanmaan naxan yi dɔxi i yiifanna ma, Sodoma taan nan na ra e nun a muxune. 47 I bira nen e kirane fɔxɔ ra yati, i fan yi e raliga e kewali xosixine yi, koni i mi danxi na ma gbansan, i tan sigati kiin yi jaxu ayi dangu e tan gbeen na i ya feene birin yi. 48 Habadan Ala nan n na, n bata n kolo n yeteni, e nun i ya muxune naxan ligaxi, i ngaxakeden jaxalanmaan Sodoma nun a muxune mi na sifan ligaxi.’ Marigina Alatalaa falan nan na ra.” 49 “I ngaxakeden jaxalanmaan Sodoma taan hakeni itoe nan ligaxi: A muxune yi waso ayi, e to yi herini, kontɔfili mi yi e ma. E mi yi yiigelitone nun tɔro muxune malima. 50 E yi e yete yigboma, e fe xosixine liga n yetagi. N to na to, n yi e raxori! 51 Samari taan muxune mi i yulubin tagiin yatin ligaxi. I bata fe xosixine liga naxanye dangu e gbeene ra pon, han i ngaxakeden jaxalanmane Sodoma taan nun Samari taan muxune yi lu alo tinxin muxune, xa e yulubine sa i gbeene ma. 52 I tan naxan yi i ngaxakeden jaxalanmane yalagima, iki, i fan ma yalagin waxatin bata a li, masɔto i yulubine xon, i yete raxosixi naxanye xon dangu e tan na, naxanye a ligaxi e tinxinje ayi dangu i tan na. I fan yagima nen, i yi rayarabi, bayo i bata i ngaxakedenne lu alo tinxin muxune, e na sa i ma.” 53 “N mon Sodoma taan nun Samari taan nun e muxune rasabatima nen, e nun e tan fan e xon ma 54 alogo i xa rayarabi, i yagi lan i kewanle birin ma, naxanye e rawekilexi. 55 I ngaxakeden jaxalanmane, Sodoma taan nun Samari taan nun e muxune mon xetema nen e kii fonni, i fan nun i ya muxune yi xete e kii singeni. 56 I yi i wasoma waxatin naxan yi, i mi yi fala jaxine tima

Sodoma taan xili ma ba, **57** benun i ya jaxuyaana xa kolon waxatin naxan yi. Iki, Arami kaane nun e rabilinna muxune nun Filisiti muxun naxanye i rabilinni, ne fa i tan nan makonbima, e i rapaxu. **58** I fa i ya yagitareyaan nun i kewali xosixine saranna nan sotoma iki,' Alatalaa falan nan na ra." **59** "Bayo, Marigina Alatala ito nan falaxi, a naxa, 'N na a ligama i ra nen alo a lan i ma kii naxan yi, i tan naxan mi n kolo xuiin yatexi, i yi layirin kala. **60** Koni, n na n xaxili luma nen layirin xon, n naxan xidi en tagi i dii mese waxatini, n yi habadan layirin xidi en tagi. **61** I kewanle fe rabirama i ma nen, i yi yagi, i na i tada jaxalanmane nun i xunye jaxalanmane rasene waxatin naxan yi, n yi e so i yii i ya dii temene ra, hali e to mi fataxi layirin na n naxan xidixi en tagi. **62** N na n ma layirin xidima nen en tagi, nayi, i a kolonma nen a Alatala nan n na, **63** alogo i ya fe jaxine xa rabira i ma, i yi yagi, i deen yi suxu i ra i ya yagini, n na i yulubine birin xafari waxatin naxan yi, i naxanye birin ligaxi.' Marigina Alatalaa falan nan na ra."

17 Alatala yi falan ti n xa, a naxa, **2** "Adamadina, misaala nde fala, sandana nde sa Isirayila yamaan xa. **3** I yi a fala e xa, i naxa, 'Marigina Alatala ito nan falaxi, a naxa, "Singbinna nde yi na nun naxan gbo, a gubugubune kuya, a xabene kuya, e yi majingixi. Na singbinna yi siga Liban yamanani, a sa dɔxo suman binla nde kondeni. **4** Wudi yiin naxan mate a birin xa, a yi na bolon, a siga a ra yula yamana nde yi, a sa a dɔxo yulane taani. **5** Na xanbi ra, a mon yi Isirayila yamanan sansi gbete tongo, a sa a si sansi xori mafedena nde yi ige gbeen de alo wudi fajina igen nafan naxan ma. **6** Na sansiin yi gbo, a yi findi manpa bili sabatixin na, koni a mi yi kuya, a yiine yi tixi singbinna binni, koni a salenne yi lu a bun ma. A yi kɔxo, a yi lu a yiine ramine, a yifoton. **7** Koni singbin gbee gbete mon yi na nun, naxan gubugubune yi kuya, a xabene gbo. Na manpa binla yi a yibandun a binni e nun a salenne, a yi a yiine yibandun a binni alogo a xa a ige sa. **8** Anu a yi xixi boxo fajin nin ige gbeen de alogo a xa a yiine ramini, a yi bogi, a yi findi manpa bili fajin na."''' **9** "A fala e xa, i naxa, 'Marigina Alatala ito nan falaxi, a naxa: A sabate ba? Singbin singen mi a binla tale ba, a yi a bogine bolon, alogo a xa xara, a sonle birin yi lisi a ra? Nayi, a mako mi fanga gbeen ma, a mako mi muxu wuyaxi ma naxan a tale a jan na fefe! **10** A yi bitinxi a fajin na, koni iki a noe sabate

ba? Sogeteden foyen na fa, na a xarama nen fefe! A yi bitinxi boxoni denaxan yi, a yi xara menni." **11** Alatala yi falan ti n xa, a naxa, **12** "Nba, yama murutexini ito maxodin iki, i naxa, 'E mi na sandan bunna kolon ba?' A fala e xa, i naxa, 'Babilon mangan bata siga Yerusalen yi, a sa mangan nun a kuntigine suxu, a e xali Babilon taani. **13** A yi muxuna nde sugandi mangane bonsonna muxune ye, a yi layirin xidi e tagi, a yi na kanna rakolo. A mon yi yamanan yeeratine xali konyiyani **14** alogo yamanan xa lu noon bun ma, a nama fa senben soto sonon, a yi na layirin suxu, alogo e nama halagi. **15** Koni na manga nenen bata murute a xili ma, a yi a xerane rasiga Misiran yamanani alogo e xa sa soone nun sofa gali gbeen so a yii. Muxun naxan na ligaxi, na fe sonye ba? Na kanna a futuxule Babilon mangan bun ba? A to layirin kala, a mi noe a futuxule a bun sese ma!'" **16** Marigina Alatalaa falan ni ito ra, a naxa, "Habadan Ala nan n na, n bata n kolo n yeteni! Yuda mangani ito faxama Babilon mangana yamanan nin, naxan a findixi mangan na. Amasoto a bata a kolo xuiin kala, a mi layirin nakamalixi e tagi. **17** Misiran mangan mi noe a xun mayenge hali e nun a gali senbemaan nun a sofa wuyaxine. Babilon kaane gbingbinne ratema nen taan makantan yinna xon e yi taan yenge e muxu wuyaxi faxa. **18** Bayo, Yuda mangan bata a me a kolo xuiin na, a yi layirin kala. A to a kolo, a yi na feene birin liga, a mi a futuxule a bun mume!" **19** Nanara, Marigina Alatala ito nan falaxi, a naxa, "Habadan Ala nan n na, n bata n kolo n yeteni, fa fala a mexi a kolo xuiin na n tan nan yetagi, a n ma layirin nan kalaxi. Nayi, n na a kewali jaxine saranma nen a ra. **20** N na n ma yalaan soma nen a xun na, a yi a suxu n ma lutin na, n yi a xali Babilon yi, n yi sa a makiti menni lan a tinxintareyaan ma a naxan liga n na. **21** A sofa gixine birin faxama nen silanfanna ra, naxanye na lu e nii ra, ne yi xuya ayi yiren birin yi. Nayi, e a kolonma nen a n tan Alatala nan falan tixi." **22** Marigina Alatala ito nan falaxi, a naxa, "N tan yeteen nan suman wudin konde yi yiina nde tongoma, n yeteen yi sa a bitin geya gbee matexina nde xun tagi. **23** N sa a bitinma geyaan nan fari naxan mate Isirayila yamanani, a yi a yiine ramini, a yi bogi, a findi suman bili fajin na. Xoliin sifan birin e teen sama nen a yi, e lu a yiine nininna bun. **24** Nayi, burunna wudine birin a kolonma nen, a n tan Alatala nan wudi matexin nabirama, n yi a magodoxini te. N

wudi xinden xara, n yi wudi xaren majingi. N tan Alatala nan falan tixi, n na a ligama nen.”

18 Alatala yi falan ti n xa, a naxa, **2** “Nanfera ε xetema sandani ito ma Isirayila yamanani, ε naxa, Fafane bata jaxundan xindene don, koni e diine nan jinye ramuluxunxi.” **3** “Marigina Alatalaa falan ni ito ra, a naxa: Habadan Ala nan n na, n bata n kolo n yeteni, ε mi fa xetema sandani ito ma sɔnɔn Isirayila yamanani! **4** N tan nan gbee adamadiine birin niin na, diin nun a fafana, n gbeen nan e firinna birin na. Naxan na yulubin tongo, na nan faxama.” **5** “Xa a sa a li, muxuna nde tinxin, a kiti kenden nun tinxinyaan ligama, **6** a mi donse ralixine donma kidene yi geyane fari, a mi a xaxili tixi Isirayila kaane suxurene ra, a mi a bodena jaxanla rakunfama, a mi a masoma jaxanla ra a nema a kike wanli waxatin naxan yi, **7** a mi muxe jaxankatama, a tolimaan naxetema a kanna ma, a mi mujan tima, a donseen soma kametone yii, marabenna naxan ma, a dugin so na yii, **8** a mi tɔnɔ sama donla fari naxan tongoxi a ma, a mi tɔnɔ gbeen fenma muxune ra, a tinxintareyaan matanga, a kiti kenden sama muxune tagi, **9** a n ma tɔnne nun n ma sariyane suxuma lannayani. Awa, tinxin muxun nan na kanna ra. Na kanna luma nen a nii ra.” Marigina Alatalaa falan nan na ra. **10** “Koni xa na kanna diina nde bari, na yi findi mafu tiin na, a faxan ti hanma a yi na fena nde liga a ngaxakedenna nde ra, **11** hali diin fafe mi feni itoe sese ligaxi, xa a diin donse ralixine donma kidene yi geyane fari, a bodena jaxanla rakunfama, **12** a jaxu yiigelitɔne nun tɔrɔ muxune ra, a mujan tima, a mi muxune tolimaan naxetema e ma. A xaxili tixi suxurene nan na, a fe xɔsixinine ligama, **13** a donla soma, a tɔnɔn sa a fari, a tɔnɔn gbeen fenma muxune ra. Na kanna luye a nii ra ba? En-en de! A mi luye a nii ra. A to bata fe xɔsixinini itoe liga, yamaan na kanna faxama nen. A tan nan a yete faxe feen nagidixi.” **14** “Koni xa a sa a li, na fan yi diina nde bari, na diin yi a fafe to yulubini itoe birin lige, koni, hali a to bata e to, a mi na fe sifan liga, **15** a mi donse ralixine don kidene yi geyane fari, a mi a xaxili ti Isirayila kaane suxurene ra, a mi a bodena jaxanla rakunfa, **16** a mi jaxu muxu yo ra, a mi tolimaan nasuxuma donle fe ra, a mi muja ti, a donseen so kametone yii, a dugin so muxune yii marabenna naxanye ma, **17** a tinxintareyaan matanga, a mi tɔnɔn sa donla fari naxan tongoxi a ma, a mi

tɔnɔ gbeen fen muxune ra, a n ma sariyane nun n ma tɔnne suxu, na kanna mi faxe a fafe hakene fe ra de! A luma nen a nii ra. **18** A fafe nan muxune jaxankata, a yi a ngaxakedenna muja. Naxan mi fan, a na liga a yamaan ye. Nayi, na nan yati faxama a hakene fe ra.” **19** “Anu, ε n maxɔdinma, ε naxa, ‘Nanfera fafan haken goronna mi luma a diin xun ma?’ Bayo a diin bata kiti kenden nun tinxinyaan liga, a yi n ma tɔnne birin suxu. A yati luma nen a nii ra. **20** Naxan na yulubin liga, na nan faxama. Diin mi a fafana haken goronna tonge, fafan fan mi a diin haken goronna tonge. Tinxin muxuna tinxinna saranna fima a tan nan ma, muxu jaxin fan ma jaxuyaan yi saran a ra.” **21** “Koni, xa muxu jaxin xete a yulubine birin fɔxɔ ra, a naxanye ligaxi, xa a n ma tɔnne birin suxu, a kiti kenden nun tinxinyaan liga, a luma nen a nii ra. A mi faxama. **22** A yulubin naxanye birin ligaxi, jinan tima nen ne birin xɔn. A luma nen a nii ra a tinxinyana fe ra, a naxan ligaxi. **23** Muxu jaxin na faxe, na nan n nasewama ba? A na xete a kewanle fɔxɔ ra, a yi kisi, na nan n nasewama.” Marigina Alatalaa falan nan na ra. **24** “Xa tinxin muxun xete a tinxinyaan fɔxɔ ra, a yi tinxintareyaan liga fɔlɔ, a yi na fe xɔsixinine liga muxu jaxin naxanye ligama, na kanna luye a nii ra ba? A tinxinyana fe mi fa rabirama muxune ma sɔnɔn, a naxan liga. A faxama nen a tinxintareyaan nun a yulubine fe ra a naxanye ligaxi.” **25** “Anu, ε a falama, ε naxa, ‘Marigina kiraan mi lanxi!’ Isirayila yamana, iki ε tuli mati! N ma kiraan nan mi lanxi ba? ε tan xan ma kiraye yidɔxi ba? **26** Xa tinxin muxun xete a tinxinyaan fɔxɔ ra, a yi tinxintareyaan liga, a faxama nen. A faxama nen bayo a bata tinxintareyaan liga. **27** Xa muxu jaxin xete a fe jaxin fɔxɔ ra, a bata naxan liga, a yi kiti kenden nun tinxinyaan liga, a niin nakisima nen. **28** Xa a na feene yee to, a xete a murute feene birin fɔxɔ ra, a naxanye ligaxi, a luma nen a nii ra, a mi faxama. **29** Anu, Isirayila yamana a falama, e naxa, ‘Marigina kiraan mi lanxi.’ Isirayila yamana, n ma kirane nan mi lanxi ba? ε tan xan ma kiraye yidɔxi ba?” **30** Marigina Alatalaa falan ni ito ra, a naxa, “Nanara, Isirayila yamana, n na ε birin makitima nen ε kewanle xɔn. ε xun xete, ε xun xanbi so ε murute feene yi alogo sese nama ε bira hakeni. **31** ε me ε murute feene birin na ε naxanye ligama, ε boje nenene sɔtɔ, nii nenen yi sa ε yi. Isirayila yamana, nanfera ε tinma ε xa halagi? **32** Muxun na faxe, na

mi n nasewama. Nayi, ε xun xete, ε yi lu ε nii ra!” Marigina Alatalaa falan nan na ra.

19 Ala nan a falaxi a n xa sunu sigini ito sa Isirayila kuntigine xa fa fala, **2** “I nga findixi yata gile kenden nan na yatane tagi. A yi saxi yata senbemane nan tagi a diine maxurudeni. **3** A yi a dii xeme keden maxuru naxan findi yata xeme senbemaan na. A yi fatan a se suxine yiboe, a yi muxune fan donma. **4** Siyane yi a xinla me, e yi sa a suxu yinla ra, e wuren bira a jone, e yi siga a ra Misiran yamanani. **5** Yata gilen to a kolon, a a yi a diin legedenma fuun nin, a yigi mi yi fa a ma, a yi a dii gbeten sugandi, a yi na fan findi yata xeme senbemaan na. **6** A yi a masigama yatane tagi, bayo a yi findixi yata xeme senbemaan nan na. A yi fatan a se suxuni boe, a yi muxune fan donma, **7** a fu e kana gilene ma, a yi e taane findi yire rabeginxine ra. Yamanan muxune birin yi yilanyilan a wurundun xuiin ma. **8** A rabilinna siyane yi keli a xili ma yiren birin yi, e yi yalaan nati a yee ra, e yi a suxu yinla ra. **9** E yi wuren bira a jone, e yi a balan wure sansanna kui, e yi siga a ra Babilon mangan fema, e yi a sa kasoon na alogo a wurundun xuiin nama fa me sonon Isirayila geyane fari.” **10** “I nga yi luxi nen alo manpa binla a yi tixi igen nan de. A yi bogixi, a yifotonxi bayo igen yi gbo. **11** A yiine yi sabatixi, e yi noe rafale mangaya taxamaseri dunganne ra nen. A yi tixi wudine xun ma, a kuya wudine birin xa a yiine fan yi wuya. **12** Koni a tala nen xoloni, a rawoli ayi boxoni. Sogeteden foyen yi a bogine xara a yii fajine yi ba a ma, e xara, teen yi e gan. **13** Iki, a fa tixi tonbonna nin boxo xareni min xonla denaxan yi. **14** Teen bata a yiine li, a yi a deene nun a bogine gan. A yii sabatixi yo mi fa a ma sonon, naxan noe rafale manga dunganna ra.” Sunu sigin nan na ra naxan daxa a sa alo wuga sigine lan e xa sa kii naxan yi.

20 Yamaan xali konyiyani waxatin naxan yi, na jee solofereden kike suulunden xi fude laxoni, Isirayila yamaan fonna ndee yi fa Alatala maxodinden. E doko n yetagi. **2** Nayi, Alatala yi falan ti n xa, a naxa, **3** “Adamadina, falan ti Isirayila yamaan fonne xa, i naxa: Marigina Alatala ito nan falaxi, a naxa, ‘E faxi n maxodinden nin ba? Habadan Ala nan n na, n bata n kolo n yeteni! N mi tinje mume ε yi n maxodin,’ Marigina Alatalaa falan nan na ra.” **4** “I e makite nen ba? Adamadina, i e makite? Nayi, e benbane kewali xosixine yita e ra! **5** A fala e xa, i

naxa: Marigina Alatala ito nan falaxi, a naxa: N na Isirayila sugandi laxon naxan yi, n na n kolo nen n yiini texin na Yaxuba yixetene xa, n yi n yete yita e ra Misiran yamanani, n yi n kolo e xa n yiini texin na, fa fala Alatala nan n na, ε Ala. **6** Na laxoni, n na n kolo nen e xa n yiini texin na, a n na e raminima nen Misiran yamanani, n siga e ra yamanani n naxan fenxi e xa, nonon nun kumin gbo yamanan naxan yi, naxan fan yamanane birin xa. **7** Nayi, n yi a fala e xa, n naxa, ‘E birin xa ε me suxurene ra naxanye ε yee rakunfama! E nama ε yete raharamu Misiran suxurene xon! Alatala nan n na, ε Ala.”’ **8** “Koni e bata murute n xili ma, e mi tinxi n xuiin name feni. E mi tinxi e me e suxurene ra naxanye e yee rakunfama. E mi Misiran suxurene bejinxi. Nayi, a xonla yi n suxu n xa n ma xolon nagodo e ma, n ma xolon yi siga han a danna e xili ma Misiran yamanani. **9** Koni n mi na ligaxi n xinla fe ra, alogo n xinla nama rayelefu siyane ye e doxi naxanye tagi, n na n yete makenen Isirayila yamaan xa naxanye yee xori, n to e ramini Misiran yamanani.”’ **10** “N yi e ramini Misiran yi, n siga e ra tonbonni. **11** N yi n ma tonne so e yii, n yi e rakolon n ma sariyane ra, bayo naxan na e suxu, na kanna nii rakisin sotoma nen e xon. **12** N mon yi n ma Matabu Loxone ragidi e ma alogo e xa findi taxamasenne ra nxu tagi, alogo e xa a kolon a n tan Alatala nan e rasarijanma.”’ **13** “Koni Isirayila yamaan murute nen n xili ma tonbonni. E mi n ma tonne suxu, e yi e me n ma sariyane ra, anu, naxan na e suxu, na nii rakisin sotoma nen e xon. E yi n ma Matabu Loxone rayelefu mume. A xonla yi n suxu n xa n ma xolon nagodo e ma tonbonni, n yi e raxori. **14** Koni n mi na liga n xinla fe ra alogo n xinla nama rayelefu siyane ye, n na e ramini Misiran yi naxanye yee xori. **15** N tan nan mon n kolo e xa tonbonni n yiini texin na, a n mi tima e yee ra siga yamanani n naxan soxi e yii, nonon nun kumin gbo yamanan naxan yi, yamanan naxan fan yamanane birin xa, **16** bayo e bata e me n ma sariyane ra e nun n ma tonne, e yi n ma Matabu Loxone rayelefu. E bojen yi e suxurene nan foxo ra. **17** Koni n yi kininkinin e ma, n mi e halagi, n mi e raxori tonbonni.”’ **18** “N yi a fala e diine xa tonbonni, n naxa: E nama bira ε benbane namunne foxo ra, ε nama e yamarine suxu, ε nama ε yete raharamu e suxurene xon de! **19** Alatala nan n na, ε Ala. E n ma tonne nun n ma sariyane suxu ki fajil! **20** E n ma Matabu Loxone rasarijan, alogo e xa findi taxamasenne ra en tagi a

kolonma naxanye xon a Alatala nan n na, e Ala.” 21 “Koni e diine bata murute n xili ma tonbonni. E mi n ma tonne nun n ma sariyane suxi, e mi e ligaxi, anu, naxan na e suxu na nii rakisin sotoma nen e xon. E yi n ma Matabu Loxone rayelefu. Nayi, a xonla yi n suxu, n xa n ma xolon nagodo e xili ma, n ma xolon yi siga han a danna e xili ma tonbonni. 22 Koni n bata xete n ma xolon foxo ra n xinla fe ra, alogo a nama rayelefu siyane tagi, n na e ramini Misiran yi naxanye yetagi. 23 N tan nan mon n kolo e xa tonbonni n yiini texin na e raxuya feen na ayi siyane ye, fa fala n na e raxuyama ayi nen yamanane yi 24 bayo e mi n ma sariyane suxi, e yi e me n ma tonne ra, e yi n ma Matabu Loxone rayelefu, e yi kunfa e fafane suxurene xon. 25 N tan nan mon tonne so e yii naxanye mi yi fan, e nun sariyane e mi yi kise naxanye xon. 26 N yi tin e xa raharamu e dii singene fe ra, e yi naxanye bama saraxan na. N na ligaxi nen alogo e xa yigitege, e yi a kolon a Alatala nan n na.” 27 “Nanara, adamadina, falan ti Isirayila kaane xa, i yi a fala e xa, i naxa, ‘Marigina Alatala ito nan falaxi, a naxa: E benbane mon n nayelevu nen, e yi e me n na kii gbete yi: 28 N na e xali nen yamanani, n na n kolo e xa n yiini texin na naxan so fe ra e yii, koni e yi e yeen ti geyane nun fotonne ra, e saraxane ba menne yi, e yi e kiseene fi ne ma, e n naxolo naxanye xon, e yi e wusulan fajine gan, e yi e minse saraxane raboxon na. 29 N yi a fala e xa, n naxa, “Nanse kide matexini ito ra e sigan denaxan yi?” E yi men xili sa “Kide Matexina” han to.” 30 “Na ma, a fala Isirayila yamaan xa, i naxa, ‘Marigina Alatala ito nan falaxi, a naxa: E fan mi e yete raharamuma ba alo e benbane? E fan mi n yanfama e suxurene xon ba alo yalundena a xemen yanfama kii naxan yi? 31 E nema e kiseene ralima, e yi e diine gan saraxan na, e mon e yete raharamuma e suxurene birin xon han to. Nayi, Isirayila yamana, n tinje ba, e yi n maxodin? Habadan Ala nan n na, n bata n kolo n yeteni, fa fala n mi tinje e yi n maxodin.’ Marigina Alatalaa falan nan na ra.” 32 “Naxan e bojeni, na mi ligama, e na a fala, e naxa, ‘Nxu waxi lu feni alo siyaan bonne, alo xabila gbetene yamanane yi, nxu yi wudine nun gemene batu.’ 33 Marigina Alatalaa falan ni i ra, a naxa: Habadan Ala nan n na, n bata n kolo n yeteni! N mangayaan nabama nen e xun na, n yii senbemani bandunxin na, n yi n ma xolon nagodo. 34 N kelima nen n yii senbemani bandunxin na, n yi n ma xolon nagodo, n yi e ramini siyane ye, n yi e malan

sa keli yamanane yi, n na e raxuyaxi ayi denaxanye yi. 35 N na e xalima nen tonbonni, e masiga siyaan bonne ra, n sa e kiti menni yee nun yee. 36 N na e makitima nen alo n na e benbane makiti kii naxan yi Misiran tonbonni.” Marigina Alatalaa falan nan na ra. 37 N na e findima nen n ma xuruse kurun na, e yi lu n ma dunganna bun, n yi e masuxu n ma layirin xon n naxan xidixi en tagi. 38 N muxu murutexine bama nen e ye naxanye n matandima. E sa yamanan naxanye yi iki koniyani, n na e ramini nen ne yi, koni e mi fa soma Isirayila yamanani de! Nayi, e a kolonma nen a Alatala nan n na. 39 “E tan, Isirayila yamana, Marigina Alatala ito nan falaxi, a naxa: E siga, birin xa sa a suxuren batu! E na yelin na matoe waxatin naxan yi, e fa n xuiin suxuma nen, e yi ba n xili saripanxin nayelevu e kiseene nun e suxurene xon fefe!” 40 Marigina Alatalaa falan ni ito ra, a naxa, ‘Bayo Isirayila yamaan birin n batuma nen n ma geya saripanxin fari, Isirayila geya matexina, naxanye birin na lu yamanani, n ne rasenema nen menni, n yi e saraxane nun e kise fajine rasuxu e nun e na seen naxanye birin nasaripan n xa. 41 N na e ramini siyane ye waxatin naxan yi, n yi e malan sa keli yamanane yi, n na e raxuyaxi ayi denaxanye yi, na waxatini, n na e rasenema nen alo n saraxa xiri jaxumen nasuxuma kii naxan yi, n yi n ma saripanna mayita e xon siyane yetagi. 42 Nayi, e a kolonma nen a Alatala nan n na, n na e xali Isirayila yamanani waxatin naxan yi, n na n kolo n yiini texin na yamanan naxan so fe ra e benbane yii. 43 E sa e mirima nen e kewanle nun e fe xosixine birin ma menni, e yete raharamuxi naxanye xon, e yagi e kewali jaxine ra ki faji! 44 Nayi, Isirayila yamana, e a kolonma nen a Alatala nan n na, bayo n mi e suxuma alo a lan e sigati ki jaxin nun e kewali yifuxine ma kii naxan yi, koni n na e fe suxuma nen alo a lan n xinla binyen ma kii naxan yi.’ Marigina Alatalaa falan nan na ra.” 45 Alatala yi falani ito ti n xa, a naxa, 46 “Adamadina, i yee rasiga sogeteden yiifari foxoni, i yi yiifari foxon yamanan muxune maxadi! Nabiya falane ti yiifari foxon binna fotonna xili ma! 47 A fala yiifari foxon binna fotonna muxune xa, i naxa, ‘E tuli mati Alatalaa falan na! Marigina Alatala ito nan falaxi, a naxa: N teen nasigama nen e xili ma naxan wudi xindene nun wudi xarene birin ganma, a degen mi tuye mume! Muxune birin ganma nen keli yiifari foxon binna ma sa doxo komen foxon na. 48 Nayi, birin a kolonma nen a n tan Alatala nan

te'en nadegexi, a mi tuye mumel!" 49 Nayi, n yi a fala Alata, n naxa, "Marigina Alatala, muxune bata a fala folo n ma, nayi, a n sandan nan gbansan sama."

21 Alatala mon yi falan ti n xa, a naxa, 2 "Adamadina, i yee rafindi Yerusalen ma, i yire sarignanxine muxune maxadi, i nabiya falane ti Isirayila yamanan xili ma. 3 A fala Isirayila kaane xa, i naxa, 'Alatala ito nan falaxi, a naxa: N kelima nen e xili ma, n yi n ma silanfanna botin a teeni, n yi tinxin muxune nun muxu jaxine birin faxa e bode xon yamanani. 4 Bayo n tinxin muxune nun muxu jaxine birin halagima nen. Na ma, n na n ma silanfanna botinma nen a teeni muxune birin xili ma, keli yiifanna ma han komenna. 5 Nayi, muxune birin a kolonma nen a n tan Alatala nan n ma silanfanna botinxi a teeni. Anu, n mi fa a rasoma sonon.'" 6 "Nayi, adamadina, i kutun i bonen kalaxin na soxoleni, i wuga e yetagi! 7 Nayi, xa e fa i maxodin, e naxa, 'Nanfera i wugama?' i yi e yabi, i naxa, 'Bayo, fe xodexena nde a fe mema nen, muxune birin bonen yi kala, e fangan yi jian, e niin yi foro e ma, e birin xinbin xudin yi tuye ayi. Na feen xibarun famaani ni i ra! A fama nen ligadeni iki sa! Marigina Alatalaa falan nan na ra.'" 8 Alatala yi falan ti n xa, a naxa, 9 "Adamadina, nabiya falan ti, i naxa, 'Marigina ito nan falaxi, a naxa: Silanfanna! Silanfanna bata raxanxan, a wuren mayilenma. 10 A raxanxanxi halagin nan xili ma yati, a wuren degema, a mayilenma alo kuyen jin masoxonna. En lan en xa sewa ba? Anu, n ma diina mangaya dunganna yoma wudine birin ma. 11 N bata a ragidi a silanfanna wuren xa mayilen, muxuna nde yi a rawali. A bata raxanxan, a wuren mayilenma alogo a xa so faxa tiin yii! 12 Adamadina, gbelegbele, i wuga, bayo silanfanna bata yiton n ma yamaan xili ma, e nun Isirayila kuntigine birin. Kuntigine nun n ma yamaan birin bata wole ayi silanfanna bun! Na ma, i yete makudun xoleni.'" 13 "Bayo fesefesen na a ra: Nanse lige xa mangaya dunganna mi noe luye, naxan yoma bonne ma? Marigina Alatalaa falan nan na ra!" 14 "Adamadina, i nema nabiya falan tima e xa, i yiin bonbo, keden, firin, saxan. Silanfanna misaala na a ra naxan faxan tima, faxa ti silanfan gbeen nan a ra naxan e rabilinma. 15 N bata faxa ti silanfanna rafa taan so deene birin na, alogo e xa salaya ayi yengeni, e muxu faxaxine yi wuya ayi! Silanfanni ito mayilenma alo kuyen jin masoxonna a yitonxi halagin nan xili yi. 16 I tan silanfan xenxena, faxan ti yiifanna ma,

i faxan ti komenna ma, i na i firifiri denaxan biri ra! 17 N fan n yiin bonboma nen, n yi n ma xolon nagodo. N tan Alatala nan falan tixi." 18 Alatala yi falan ti n xa, a naxa, 19 "Adamadina, kira firin nafala misaala ra, Babilon mangana silanfanna sigama naxanye xon. Kira firinna ne birin xa keli yamana keden nin. Sebenla ti, i kirane sigadene mataxamaseri, i yi taxamasenne ti kira xunne ra naxanye taane xinle falama kirane sigama denaxanye yi. 20 Kira keden nafala alogo silanfanna xa siga Amonine taan xili ma naxan xili Rabaha. Bonna xa siga Yuda yamanan nun Yerusalen taan xili ma, taa makantanxina. 21 Bayo Babilon mangan bata a ti kira xunna ra kira firinne longonna ra, alogo a xa a yiimato, a feene fesefese, a yi masensenne ti xalimakunle ra, a yi a suxurene maxodin, a yi suben bonen mato yiimatoni. 22 A bata masensenna ti, a Yerusalen suxu. A yenge so seene rafalama nen naxanye taan so deene kale, a yamarin fi a taa yi kaane xa halagi, a ganla yi yenge so sonxoni te. A yenge so seene rasigama nen taan so deene xili ma, a gbingbin gbeen nafala taan yinna xon, a sanganso makantanxine ti taan nabilinni a yenge feen na. 23 Yerusalen kaane na feene yatema yiimato fe fuune nan na, e tan naxanye bata e kolo e xa lu Babilon mangan bun. Koni Babilon mangana e hakena fe rabirama e ma nen, naxan a ligama a yi e suxu yengeni. 24 Nanara, Marigina Alatala ito nan falaxi, a naxa, 'Bayo e murute feene bata e hakene fe rabira n ma, e yi e yulubine makenen e kewanle birin yi, e to e fe rabiraxi n ma na kiini, e yaxun fa e noma nen yengeni.'" 25 "I tan Isirayila manga haramuxina, muxu jaxina, i ya waxatin bata a li, i ya hakene saranma i ra waxatin naxan yi.' 26 Marigina Alatala ito nan falaxi, a naxa, 'Namun ba i xunni, i manga komotin ba. Feene birin masarama nen! Naxan magodoxi, na yitema nen, naxan matexi, na yigodoma nen. 27 Taa xonna! Taa xonna yati! N Yerusalen taan findima nen taa xonna ra. Koni na feene mi ligama fo na kannan na fa n kiti sa senben nagidixi naxan ma.'" 28 "I tan, adamadina, nabiya falane ti, i naxa: Marigina Alatala ito nan falaxi Amonine xili ma lan e konbi tixine fe ma, a naxa, 'Silanfanna! Silanfanna bata raxanxan, a wuren mayilenma. A raxanxanxi halagin nan xili ma yati, a wuren degema, a mayilenma alo kuyen jin masoxonna. 29 Hali e to e yigi saxi xiye fuune nun wulede yiimato falane yi, silanfanni ito e muxu jaxine koe raxabama nen, naxanye waxati bata

a li, e hakene saranma e ra waxatin naxan yi. **30** E silanfanne raso e tēene yi. E daxi denaxan yati yi, n na e makitima mēnna nin, e binla yamanan naxan yi.” **31** “N na n ma xolōn nagodoma e ma nēn, n yi n ma fitina feene ragodo e xili ma, n yi e sa gbalotōne sagoni naxanye fatan halagi tideni. **32** Tēen nan e halagima, e wunla yi lu bōxōn ma e yamanani, muxu yo mi fa a mirima e fe ma sōnōn. N tan Alatala nan falan tixi.”

22 Alatala yi falan ti n xa, a naxa, **2** “Adamadina, i e makite nēn ba? I gbalotō taani ito makite? Nayi, e kēwali xōsixinē yita e ra! **3** A fala e xa, i naxa, ‘Marigina Alatala ito nan falaxi, a naxa: Yerusalen kaane, e faxan tima taani ito yi, naxan fama gbalon na e xili ma, e suxurene batuma, naxan taan haramuma. **4** E bata e yete findi yulubi kanne ra e faxa tixine xōn. E bata suxuren naxanye rafala, ne bata e raxōsi. Nayi, e bata e waxatini so, e siimayaan yi dungi ayi. Nanara, n tinma nēn siyane yi lu e konbē, yamanane birin yi e magele. **5** Naxanye maso e nun naxanye makuya, ne birin e magelema nēn, amasotō e xinla bata kala, e kontōfinle bata gbo ayi.” **6** “Isirayila kuntigine birin e senben nawalima e konni alogo e xa faxan ti. **7** E bata fafane nun ngane rajaxu e konni, e xōjēne kansun, e jaxu kiridine nun kaja gilene ra. **8** Naxan nasarijanxi n xa, e mēma na ra. E n ma Matabu Lōxōne rayelefuma. **9** Muxune nafiğiyaan nabama e konni alogo e xa faxan ti. Muxune e degema kidene yi geyane fari e konni, e yi yalunyaan liga. **10** E nun e fafane jaxanle kafuma e konni, e nun jaxanla yi kafu a kike wanla waxatini a mi sarijan waxatin naxan yi. **11** E konni, muxuna ndee yalunyaan ligama a bodena jaxanla xōn, muxu gbetēye nun e diine jaxanle yi kafu. Gbetēye nun e magilen yi kafu, a fafe a dii tēmena. **12** Muxune dimi yi seene rasuxuma mayifuni e konni, e faxan ti. E gbetin dolima muxune ma, e tōnō gbeen fen e ra, e muxu boden yii seen kansunma, e jinan n tan xōn,’ Marigina Alatalaa falan nan na ra.” **13** “Koni n xolōxina n yiin bōnbōma nēn e xili ma e to tōnōn fenxi tinxintareyani, e nun e mōn faxan naxanye tixi. **14** E wēkilen nōe senben sōtē ba, n na keli e xili ma lōxōn naxan yi? N tan Alatala nan falan tixi, n na a ligama nēn. **15** N na e raxuyama ayi nēn siyane yē yamanane birin yi, n yi danna sa e xōsi feene ra. **16** E tan yetēen nan e rayarabima siyane yetagi. Nayi, e a kolonma nēn a Alatala nan n na.” **17** Alatala yi falani ito ti n xa, a naxa, **18** “Adamadina, Isirayila

yamaan bata lu n tan yēe ra yi alo wuren gbiina, e birin bata findi wure gbeela nun sulan nun wure fōren nun yōxōn na naxanye xulunma sulun tēeni. E birin bata kobi ayi alo wuren gbiina wure gbeti fixeni. **19** Nanara, Marigina Alatala ito nan falaxi, a naxa: Bayo e birin bata lu alo wuren gbiina, n na e malanma nēn Yerusalen taani. **20** N fitinaxina e malanma nēn n ma xolōni alo wure gbeti fixen nun wure gbeela nun wuren nun yōxōn nun sulan malanma kii naxan yi yinla ra tēen yi sa e fari alogo e xa xulun. N na e malanma taani nēn, e yi lu alo wuren na raxulun. **21** N na e malanma nēn e bode fari, n yi tēen nafe e xili ma, e yi raxulun taa tagini alo yōxōna. **22** Alo gbeti fixen xulunma kii naxan yi yinla ra, e fan naxulunma na kii nin taa tagini. Nayi, e a kolonma nēn a Alatala nan n na, naxan a xolōn nagodoxi e xili ma.” **23** Alatala mōn yi falan ti n xa, a naxa, **24** “Adamadina, a fala Isirayila kaane xa, i naxa, ‘E yamanan mi sarijan. Tule igen mi sama a ma n ma xolōn godo lōxōni.’ **25** A nabine yanfan soma alo yata xajen naxan a dōnseni bōma, e baloma muxune ra, e nafunla nun se kēndene tongoma, e kaja gilene rawuya ayi taani. **26** Yamanan saraxaraline n ma sariyan kalama. Seen naxanye rasarijanxi n xa, e ne raxōsima. E mi se radaxaxine nun se haramuxine tagi rabama, e mōn mi yamaan xaranma alogo e xa se sarijanxine nun se sarijantarene tagi raba. E mi e jōxō luxi n ma Matabu Lōxōne binya feen xōn, nayi yamaan yi n nayelevu. **27** Yamanan kuntigine luxi nēn alo kankon naxanye e dōnseni bōma. E muxune wunla raminima, e faxan ti alogo e xa tōnōn sōtō tinxintareyani. **28** Yamanan nabine e kēwanle matōxōma alo muxun na bēnde fixen so banxin ma. E fe to fuune tima alo xiyena, e wule falane ti yiimatoni, e naxa, ‘Marigina Alatalaa falan namel’ Anu, Alatala mi fala tixi. **29** Yamanan muxune yamaan jaxankatama, e mupān tima, e jaxu yiigelitōne nun tōrō muxune ra, e xōjen kansunma tinxintareyani. **30** N bata muxun fen e yē naxan e taan nabilinna yinna tiyē, naxan tiyē n yetagi yinna yalenna ra, a n mafan yamanana fe ra, alogo n nama e raxōri, koni n mi muxu kēden peen toxi. **31** Nayi, n na n ma xolōn nagodoma e fari nēn, n yi e raxōri n ma xolōn tēen na, n yi e kēwanla goronna dōxō e xun ma.” Marigina Alatalaa falan nan na ra.

23 Alatala yi falan ti n xa iki, a naxa, **2** “Adamadina, jaxalan firin yi na nun, naxanye nga kēden yi a

ra. **3** Ne findi yalundene nan na Misiran yamanani, e yalunyaan liga folo e foningeya waxatin nin. Muxune e xijene masuxu na nin, e yi e sungutun xijene rasa. **4** Forimaan yi xili Ohola, xurimaan yi xili Oholiba. E yi findi n gbeene ra, e dii xeme ne nun dii teme ne bari. Misaali ito yi, Ohola luxi nen alo Samari taana Oholiba yi lu alo Yerusalen taana.” **5** “Koni Ohola yalunyaan liga nen hali n gbeen to yi a ra. A yi kunfa a yangane xon, Asiriya kaane, a dɔxɔ bodene, **6** naxanye yi maxidixi dugi mamiloxine yi, yamana kanne nun kuntigine. Banxulan fajine nan yi e birin na, e nun soo ragine. **7** A yalunyaan liga nen Asiriya yɛɛratine birin xon, a yi n yanfa, a na muxune birin ma suxurene batu a kunfa naxanye xon. **8** A yi lu yalunyaan lige xabu a sa naxan folo Misiran yamanani, bayo e nun men xeme ne bata yi kafu a foningeya waxatini, e yi a sungutun xijene rasa, e yi yalunyaan liga a xon. **9** Nanara, n na a lu a yangane yii, Asiriya kaane, a kunfa naxanye xon. **10** Ne yi a mageli fefe, e yi a dii xeme ne nun a dii teme ne tongo, e yi a tan faxa silanfanna ra, a yi findi misaala ra jaxanle xa bayo Asiriya kaane bata a kitin sa.” **11** “A xunye Oholiba yi na birin to, koni a tan kunfa nen, a yi tinxintareyaan liga dangi a tada Ohola ra, a yalunyaan liga a xa. **12** A fan yi kunfa Asiriya kaane xon, yamana kanne nun kuntigine, a dɔxɔ boden naxanye maraberi baxi ki faji, e nun soo ragine. Banxulan fajine nan yi e birin na. **13** N yi a to fa fala a fan bata a yete raxosi, e firinna birin bata lu kira kedenna xon. **14** Anu, a tan mon yi a yalunyaan nadangu ayi. Loxona nde, Oholiba yi muxu sawurane to banxi kankena nde ma. Babilon kaane nan sawura yi ne ra naxanye dugiye gbeeli, **15** tagi xidine yi ne tagi, namu fajina e xunni. E birin yi maliga Babilon sofa mangane ra naxanye barixi Babilon yamanani. **16** A to ne to, a yi kunfa e xon, a xerane rasiga e ma Babilon yamanani. **17** Nayi, Babilon kaane yi fa a konni, e yi e sa, e kafu. E yi a raxosi e yalunyani. A to yelin naxose e xon, a yi e rajaxu. **18** A bata a yalunyaan mayita, a yi a ragenla lu, n tan Ala yi n masiga a ra, alo n na n masiga a tada ra kii naxan yi. **19** Koni a yi lu a yalunyaan fari se alogo a sungutun waxatin yalunyana fe xa rabira a ma, a naxan liga a yi Misiran yamanani waxatin naxan yi. **20** A yi kunfaji a yangane xon menni naxanye xemyaan luxi alo sofanla gbeena, naxanye yi sobe soxi kafujoxoyani alo soone.” **21** “Nayi, i mon bata a liga folo alo i ya foningeya yagitareya waxatina,

i to yi a luma Misiran kaane yi i xijene masuxu, e yi i sungutun xijene rasa. **22** Nanara, i tan Oholiba, Marigina Alatala ito nan falaxi, a naxa: N na i yangane rakelima nen i xili ma, naxanye bata rajaxu i ma. N ne rafama nen i xili ma sa keli yiren birin yi, **23** Babilon kaane birin nun Pekodo kaane nun Sowa kaane nun Kowa kaane nun Asiriya kaane birin, banxulan fajin naxanye birin findixi yamana kanne nun kuntigine nun sofa mangane nun yɛɛratine ra. Soo ragine nan e birin na. **24** E fama nen i xili ma yenge so seene ra e yii, e nun yenge so wontorone nun gi seene e nun gali gbeena. E i rabilinma nen yengeni, e ye masansan wure lefa xungbeen nun a xurini te i xili ma, e yenge so wure komotin so e xunna. N na i luma nen e sagoni alogo e xa i makiti fata e sariyan na. **25** N na n ma xolo gbeen nagodoma i xili ma nen, i to bata n yanfa, n yi a lu e fitinaxin yi i jaxankata. E i jɔɛɛn nun i tunle xabama nen na, e yi i yixetene faxa silanfanna ra. E i ya dii teme ne nun i ya dii xeme ne suxuma nen, teen yi i yixetene gan. **26** E i ya dugine tongoma nen, e nun i ya maxidi se fajine birin. **27** Nayi, n danna sama nen i ya yagitareyaan nun i ya yalunya feene ra i naxanye foloxi Misiran yamanani. I mi fa i xaxili tima ne ra sonon. Misiran ma fe mi fa rabirama i ma sonon.” **28** “Amasoto Marigina Alatala ito nan falaxi, a naxa: Naxanye rajaxu i ma, i masiga naxanye ra, n na i sama nen ne sagoni. **29** E i suxuma nen marajaxuni, e yi siga i wali xonne birin na. E yi i ragenla lu marabenni, e yi i rayarabi i ya xaxilitareyaan nun i ya yagitareyaan nun i ya yalunyani. **30** Na ligama i ra nen, masoto i bata n tan Ala yanfa, i yalunyaan liga siyane birin xon, i yi e suxurene batu. **31** I bata bira i tadaa kiraan foxo ra, nayi, n xolo igelengenna naxan so a yii, n na soma nen i fan yii.” **32** “Marigina Alatala ito nan falaxi, a naxa: I tada a minxi xolo igelengenna naxan na, i fan i minma nen na ra. Igelengen gbeen na a ra naxan kui tilin. Muxune gelema nen i ma, e yi i magele amasoto a rafexi ken! **33** Sununa i xun magima i ra nen alo i na dolon min. Yigitegen nun halagin igelengenna nan a ra, n naxan so i tada Samari taan yii. **34** Koni i a minma nen i yi a kui geli, i yi a xin, i a yibo, i yi i kanken mabo a ferenne ra. Amasoto n tan bata na fala, Marigina Alatala falan nan na ra.” **35** “Nanara, Marigina Alatala ito nan falaxi, a naxa: Amasoto i bata jinan n xon, i yi n nawoli ayi i xanbi ra, i ya yagitareyaan nun i ya yalunyaan goronna tongoma nen.” **36** Alatala yi a fala n xa, a naxa, “Adamadina, i

Ohola nun Oholiba makite ba? Nayi, e kewali xosixine yita e ra. **37** Amasoto e bata n yanfa, e yalunyaan liga, e yi faxan ti, e yi suxurene batu. E diin naxanye barixi n xa, e bata ne gan saraxane ra suxurene xa, e lu alo suxurene donseene. **38** A mato e mon naxan ligaxi: E bata n ma yire sarijanxin naxosi, na waxati kedenni, e yi n ma Matabu Loxon nayeleftu. **39** E e diine ba saraxan na e suxurene xa loxon naxan yeteni, e yi siga n ma yire sarijanxini, e yi sa na raxosi. E na nan ligaxi n ma banxini. **40** E mon xerane rasiga nen muxune fendeni sa keli yire makuyeni, e yi fa, i yi i yeene rayabu, i yi i maxidi e xa. **41** I yi doxo sade fajini, tabanla yi doxi naxan yetagi, i yi n ma wusulanna nun n ma turen doxo a fari.” **42** Yama gbeen xuiin yi minima jaxanli ito rabilinni, naxanye boje xunbelixi. Muxu ganla nun Sabe kaane yi fa, sa keli tonbonni naxanye yiirase ne sungutun firinne yiin na, e yi mangaya komotin so e xun na. **43** Nayi, n yi a fala na jaxanla xa naxan bata a yete raxadan yalunyani, n naxa, “Awa, iki a xa lu e yalunyani, bayo yalunden nan a tan na! **44** Xemene fama a ma alo yalunde jaxanla. Muxune fama Ohola nun Oholiba ma na kii nin, na yagitare jaxanle. **45** Koni tinxin muxune e makitima nen alo jaxalan yalunxine makitima kii naxan yi, alo muxun naxanye faxan tixi, amasoto yalunden nan e ra e nun faxa tiine.” **46** Amasoto Marigina Alatala ito nan falaxi, a naxa, “Yamaan xa siga e xili ma, e yi e rayarabi, e yi e yiiseene tongo. **47** Na yamaan xa e magolon, e yi e faxa silanfanna ra. E e dii xemene nun e dii temene faxama nen, e yi e banxine gan. **48** Na kiini, n danna sama nen yamanan muxune yagitareyaan na. Nayi, jaxanle birin xaxinla sotoma nen, e mi fa jaxalan firinni itoe yalunyaan sifan lige sonon. **49** E fama e yagitareyaan saranna nan sotodeyi. N na e yulubine nun e suxure batu feene goronna doxoma nen e xun ma. Nayi, e a kolonma nen a Marigina Alatala nan n na.”

24 Yamaan xali konyiyani waxatin naxan yi, na jee solomanaaninden kike fuden xi fude loxoni, Alatala yi falan ti n xa, a naxa, **2** “Adamadina, loxoni ito sebe, too loxon yetena, amasoto Babilon mangan Yerusalen taan nabilinma yengeni to yeteen nin. **3** Sandan sa yama murutexini ito xa, a fala e xa, i naxa, ‘Marigina Alatala ito nan falaxi, a naxa: Tunden doxo teen ma, a doxo, i igen sa a kui. **4** I sube dungine sa a kui, danba subene nun balaxa sube dungi fajine. A

rafe xori jaxumene ra. **5** Yexee fajin suben yeba, i yi a xonne malan tunden xoren ma, e birin xa jin han e butuxun, bayo hali a xonne, e birin lan nen e jin.” **6** “Nanara, Marigina Alatala ito nan falaxi, a naxa: Gbalona e tan faxa ti taan muxune xa, e tan naxanye luxi alo xorinxorinna bata tunden naxan suxu, naxan funfu mi noe be a ma. Xonne birin nate a kui keden keden yeen ma, e sese mi tangama halagin ma masensenna xon. **7** Amasoto e muxune wunla naxan naminixi, na mon e taan ma singen. E wunla radinxi nen fanyen fari kenenni. E mi a radinxi boxon xan fari, alogo burunburunna xa sa a yee ma. **8** N fan bata xolo, n yi n gbeen joxo, n yi e wunla radin fanyen fari kenenni alogo a nama ye maluxun.” **9** “Nanara, Marigina Alatala ito nan falaxi, a naxa: Gbalona e tan faxa ti taan muxune xa! Amasoto n wonson gbeen nafalama nen! **10** E yegen malan, e teen sa e ra, e suben jin han! E sabine sa a fari. Xonne xa gan fefe! **11** Na xanbi ra, e tundeni genla doxo teen ma, han a wolon, a wuren yi gbeeli, a gbiin yi xulun, a xorinxorinna yi gan a ma fefe! **12** Koni na katane sese tono mi na, bayo a rafexi xorinxorinna nan na, naxan mi noe be a ma. Hali teena, a mi noe! **13** Yerusalen kaane, e yagitareyaan bata e xosi. Amasoto n wa nen e rasarijan feni, koni e mi tin. Nayi, e mi fa rasarijanje e xosi feene ma fo n ma xolon na a danna li e xili ma.” **14** “N tan Alatala nan falan tixi. Na nu ligama nen. N na a rabama nen, n mi dijama sese ma, n mi kininkininma, n mi nimisama. I kitima nen lan i sigati kiin nun i kewanle ma.’ Marigina Alatala falan nan na ra.” **15** Alatala yi falan ti n xa, a naxa, **16** “Adamadina, muxun naxan fan i yee ra yi dangu e birin na, n na niin bama nen sanja yi kedenni. Anu, i nama sunu, i nama wuga, i yee gen nama mini. **17** I kutunma wundon nin, i nama i ya faxa muxun saya feen liga. I ya namun xa lu xidixi i xunni, i ya sankidine xa lu soxi. I nama i de xabene luxun sununi, i nama muxune saya xonton donseene don.” **18** Nayi, n falan ti nen yamaan xa xotanni, n ma jaxanla yi faxa jinbanna ra. Na xoton bode, naxan yamarixi n ma, n yi na liga. **19** Muxune yi a fala n xa, e naxa, “I feen naxan ligama ito ra, i mi na bunna fale nxu xa ba, a lanxi nxu ma kii naxan yi?” **20** Nayi, n yi a fala e xa, n naxa, “Alatala bata falan ti n xa iki, a naxa: **21** A fala Isirayila yamaan xa, i naxa, ‘Marigina Alatala ito nan falaxi, a naxa: N nan n ma yire sarijanxin sarijanna kalama nen, e wekilen sotoma naxan yi, e

yete matəxəma naxan yi, naxan fan ε yee ra yi dangu yire gbete ra, ε niin naxan fari. Nayi, ε dii xemene nun ε dii temen naxanye luxi Yerusalen yi, ne faxama nen silanfanna ra. **22** Na waxatini, ε a ligama nen alo n tan. E mi ε de xabene luxunje sununa fe ra, ε mi muxune saya xontən donseene donje, **23** ε namun luma xidixi ε xunni nen, ε yi ε sankidine lu soxi, ε mi e saya feen nabe, ε mi wuge. Koni ε doyenma nen, ε lu kutunje ε hakene fe ra. **24** Esekiyeli findima nen taxamasenna ra ε xa. A bata naxan liga, ε na ligama nen yati! Na na liga waxatin naxan yi, ε a kolonma nen a Marigina Alatala nan n na.” **25** “Adamadina, n na e yire sarjənxin ba e yii ləxən naxan yi, e wekilen sətəma naxan yi, e sewa xunna nun e binya xunna, denaxan fan e yee ra yi dangu yire gbete ra, e bəjen naxan yire kendena, n na na yiren nun e dii xemene nun e dii temene ba e yii, **26** na ləxəni, muxu gixina nde keden fama nen i fema na feen xibarun nalideni. **27** Na waxatini, i deen fulunma nen, ε nun na muxu gixin yi falan ti, i mi fa luma boboyani sənən. Nayi, i findima nen taxamasenna ra yamaan xa, e yi a kolon a Marigina Alatala nan n na.”

25 Alatala yi falan ti n xa, a naxa, **2** “Adamadina, i yee rafindi Amonine ma, i yi nabiya falan ti e xili ma. **3** A fala Amonine xa, i naxa, ‘E tuli mati Marigina Alatalaa falan na. Marigina Alatala ito nan falaxi, a naxa: Bayo ε bata gele n ma yire sarjənxin ma a sarjənna to bata kala, e nun Isirayila yamanan ma a raxəri waxatin naxan yi, e nun Yuda kaane ma e xali konyiyani waxatin naxan yi, **4** na ma, n na ε soma nen sogeteden binna yamanan muxune yii e gbeen na. E fama nen e daaxadene nun e bubune tideni ε tagi. E tan nan ε wudi bogine donma, e yi ε nənəne min. **5** N na ε manga taan Rabaha findima nen jəgəməne rabaden na, n yi Amoni yamanan findi xuruseene kuruden na. Nayi, ε a kolonma nen a Alatala nan n na.”” **6** “Amasəto, Marigina Alatala ito nan falaxi, a naxa: Bayo gbalon naxan Isirayila sətəxi, ε bata sewa na fe ra ε bəje naxiyaan birin na, ε yi ε yiin bənbən, ε yi ε sanni din, **7** na ma, n na n yiini bandunma ε xili ma nen, n yi ε sa siyane sagoni, e yi lu fuyε ε ma. N na ε bama nen siyane ye, n yi ε raxəri yamanane yi, n yi ε halagi. Nayi, ε a kolonma nen a Alatala nan n na.”” **8** “Marigina Alatala ito nan falaxi, a naxa: Bayo Moyaba kaane nun Seyiri kaane bata a fala, e naxa, ‘Yuda yamaan bata lu alo siyaan bonne!’ **9** na ma, n

tinma nen Moyaba yamanan danna makantan taane birin xa kala keden keden yeen ma, taan naxanye findixi yamanan binyen na alo Beti-Yesimoti nun Baali-Meyən nun Kiriyaatayimi. **10** N Moyaba yamanan soma nen sogeteden binna yamanan muxune yii e gbeen na alo n Amonine liga kii naxan yi. Nayi, waxati famatəni, muxu yo mi fa a mirima Amonine ma siyane ye, **11** n mən yi n ma kiti ragidixine rakamali Moyaba yamanan fan xili ma. Nayi, e a kolonma nen a Alatala nan n na.” **12** “Marigina Alatala ito nan falaxi, a naxa: Edən kaane to e gbeen jəxo Yuda yamaan ma jaxi ra, e findi nen yulubi tongo gbeene ra. **13** Na ma, Marigina Alatala ito nan falaxi, a naxa: N na n yiini bandunma nen Edən yamanan xili ma, n yi a muxune nun a xuruseene raxəri, n yi e birin halagi keli Teman taan ma han Dedan taana, e birin yi faxa silanfanna ra. **14** N na n gbeen jəxəma nen Edən yamanan ma Isirayila kaane xən, n ma yamana, e yi Edən suxu alo a lan n ma xələn nun n ma fitinan ma kii naxan yi. Nayi, e n ma gbeen jəxən kolonma nen.” Marigina Alatalaa falan nan na ra. **15** “Marigina Alatala ito nan falaxi, a naxa: Bayo Filisitine bata e gbeen jəxo marajəxuni e bəjen ma feu, alogo e xa Yuda halagi e habadan xənnantenyani, **16** na ma, Marigina Alatala ito nan falaxi, a naxa: N na n yiini bandunma nen Filisitine xili ma, n Kereti kaane janma nen, naxanye na lu baan de, n yi ne raxəri. **17** N fitinaxina n gbeen jəxəma e ra nen, n yi e jəxənkata han! Nayi, e a kolonma nen a Alatala nan n na, n na n gbeen jəxo e ma waxatin naxan yi.”

26 Yamaan xali konyiyani waxatin naxan yi, na jee fu nun kedenden xi singe ləxəni, Alatala yi falan ti n xa, a naxa, **2** “Adamadina, bayo Tire kaane Yerusalen magele nen, e naxa: ‘Siyane birin yi danguma taan naxan yi, na bata kala yati! A to bata findi taa xənna ra, nxu tan nan fa nafulu gbeen sətəmal!’ **3** Na ma, Marigina Alatala ito nan falaxi, a naxa: N bata keli ε xili ma, ε tan Tire kaane! N siya wuyaxine rafama nen ε xili ma alo fəxo igen mərənne tema kii naxan yi. **4** E Tire taan makantan yinna kalama nen, e yi a sangansone rabira. N na a burunburunna makəma nen, han n yi a findi geme magenla ra. **5** A yi findi yala ratiden na yexe suxune xa fəxo igen tagi. N tan nan falan tixi. A sama nen siyane sagoni, e yi lu fuyε a ma. Marigina Alatalaa falan nan na ra. **6** A banxidəen naxanye burunna

ra, ne muxune faxama silanfanna nan na. Nayi, e a kolonma nen, a Alatala nan n na.” 7 Amasoto Marigina Alatala ito nan falaxi, a naxa, “N Nebukadanesari rafama nen Tire taan xili ma sa keli komen foxoni, Babilon mangana, mangane mangana, e nun a soone nun a yenge so wontorone nun a soo ragine nun gali gbeena. 8 Banxideen naxanye burunne ra, a yi ne muxune faxa silanfanna ra. A yire makantanxine tima nen e taan nabilinni, a yi gbingbinna rate e taan nabilinna yinna xon, a sofane yi e ye masansan wure lefane yite e xili ma. 9 A yenge so seene rafama nen e taan makantan yinna rabiradeni, a yi e sangansone rabira a wali seene ra. 10 A soo kurun gboma ayi nen han a yi gbangbanna so e xunna, e taan yinne yi xuruxurun a yenge so wontorone nun a giseene san xuine bun, e na so e taan so deene ra waxatin naxan yi alo no tiine soma yinna yalenne ra kii naxan yi. 11 A soone sanne e kirane birin yibodonma nen, a yi e muxune faxa silanfanna ra, a e geme senbeten gbeene rabira boxoni. 12 E nafunle tongoma nen, e sare seene yi findi yenge yi se tongoxine ra, e yi e taan yinne rabira, e yi e banxi fajine kala, e yi e taan gemene nun a wudine nun a burunburunna woli foxo igeni. 13 N danna sama nen e sigi xuine ra, e kondon xuiin mi fa me mum! 14 N na e taan findima nen fanye magenla ra, e konna yi findi yala ratiden na yexe suxune xa, a mi fa tima sonon. N tan Alatala nan falan tixi.” Marigina Alatala falan nan na ra. 15 “Marigina Alatala ito nan falaxi Tire taan xa, a naxa: Hali foxo ige tagi boxone muxune, ne mi xuruxurunje gaxuni ba, e na e konna kala feen xinla me, muxu faxamatone na lu kutunje loxon naxan yi, faxa gbeen na ti e konni loxon naxan yi? 16 Kuntigin naxanye birin foxo igen de, ne kelima nen e manga gbedene yi, e yi e gubane rate e ma, e yi e dugi soxoxine ba e ma. Gaxun yi e suxu e doxo boxoni, e lu yigitegexi waxatin birin, masoto e kalana fe ra. 17 E sunu sigini ito sama nen e xa, e naxa, ‘Ee! E konna bata kala! E taa xili kanni ito, foxo igeni siga muxune doxodena, taan naxan senbe yi gbo baan xun ma, e tan naxan yi e rabilinna muxune birin magaxuma! 18 Iki, foxo ige tagi boxone muxune xuruxurunma nen gaxuni, e taan na kala loxon naxan yi. E gaxuma nen e halagi feen na.” 19 “Amasoto, Marigina Alatala ito nan falaxi, a naxa: N na e konna findi taa xonna ra waxatin naxan yi, a fan yi lu alo taa kalaxine, n na fufaan nafa e xili ma waxatin naxan yi, ige gbeen yi sa e konna xun ma,

20 nayi n na e nun muxu danguxine rabirama nen e bode xon ma naxanye godoma gaburun na. N sa e radoxoma nen boxo xonna ma, denaxan luxi alo yire kalaxi fonna, e nun naxanye godoma laxira yi, e mi fa doxoma e konni sonon. N yi binyen fi niiramane yamanan ma. 21 N na e rajanna fe magaxuma ayi nen, e mi fa luma na mum! Muxune e fenma nen, koni e mi fa toma sonon! Marigina Alatala falan nan na ra.”

27 Alatala yi falan ti n xa, a naxa, 2 “Adamadina, sunu sigin sa Tire taan xa, 3 i a fala Tire taan muxune ma, naxanye doxi foxo igen de, naxanye nun foxo ige tagi yamanan birin yulayaan nabama e bode tagi, i naxa, ‘Marigina Alatala ito nan falaxi, a naxa: E tan Tire kaane, e a falama, e naxa, “Nxu konna rayabu han!” 4 E mangayaan sigaxi han foxo igen tagi. Muxun naxanye e konna tixi, ne a ti kiin nakamalixi nen mum! 5 E bata e taan ti alo kunkina. E kunkin dexonne rafalaxi Seniri yamanan fofone nan na. Foyen kunkin nasigama dugin naxanye xon, ne xidixi suman wudine nan na sa keli Liban yamanani. 6 Kunkibane kunkin nagima wudin naxanye ra, ne rafalaxi Basan yamanan warine nan na, kunkin lonna rafalaxi xarin wudin nan na naxan nayabuxi sama jinne ra, sa keli Sipiri foxo ige tagi yamanani. 7 Foyen kunkin nasigama dugin naxanye xon, taa dugi soxoxine nan ne ra sa keli Misiran yamanani, e tan nan mon findixi e taxamaseri dugine ra. E kunkin xunna soon nafalaxi dugi mamiloxin nun a gbeela nan na sa keli Elisaha foxo ige tagi boxoni. 8 Sidon kaane nun Arawada kaane nan yi e kunkine bama, Tire kaa xaxilimane nan yi e ragima. 9 Gebala fonne nun fe kolonne yi e konni alogo e xa e kunkin kaladene yiton. Kunki ragine birin yi e kunkine ratima e konna nin, naxanye birin foxo igen xun ma alogo e xa e sare seene sara. 10 Perise kaane nun Ludu kaane nun Puti kaane nan yi findixi e sofane ra, e yenge sone nan yi e ra, e yi e ye masansan wure lefane nun wure komotine singanma e konna nin, e yi findi e binye xunna ra. 11 Arawada kaane nun e sofane birin yi tixi e taan nabilinna yinna xuntagi kantan tiine ra. Gamada kaane yi tixi e taan makantan sangansone xuntagi, e yi e ye masansan wure lefane singan e yinna rabilinni. E tan nan yi e taan tofanna defema.” 12 “E nun Tarasisi kaane yi yulayaan nabama e nafulu gbeena fe ra, e fa wure gbeti fixen nun wuren nun sulan nun yoxo gbegbe ra e xa yulayani. 13 E nun Gireki kaane nun Tubali kaane

nun Meseki kaane yi yulayaan nabama ε bode tagi, e yi fa konyine nun muran sula daxine ra ε yulaya seene jɔxɔn na. **14** Beti-Togarama kaane nan yi fama soone ra ε xa yulayani, naxanye walima e nun naxanye ragima yengeni e nun gbaxalone. **15** E nun Dedan kaane yi yulayaan nabama ε bode tagi, ε yulaya seene yi sigama fɔxɔ ige tagi bɔxɔ wuyaxi yi, e yi ε yulaya seene saren fima sama jinne nun wudine nan na. **16** Arami kaane yi se wuyaxi sarama ε ma, e yi ε yulaya seene sarama gɛmɛ fɔjine nun dugi mamiloxine nun dugi sɔxɔnxine nun taa dugine nan na, e nun fɔxɔ ige bun nafunle nun gɛmɛ gbeeli fɔjine. **17** Yuda nun Isirayila yamanane fan yi yulayaan ligama ε xɔn, e yi Miniti kaane murutun nun burune nun kumin nun turen nun senna soma ε yii yulaya seen na. **18** E nun Damasi kaane yi yulayaan nabama, e yi ε se rafalaxin gbege sarama e nun nafunla sifan birin, e yi ε saren fima Xelibon kaane manpaan nun yexɛɛ xabe dugi fixen nan na. **19** Dan kaane nun Gireki kaane yi wure rafalaxin nun sinamon fuge xarene nun xaye xiri jaxumene soma ε yii yulayani sa keli Yusali yi. **20** Dedan nan yi fama soone maxidi dugine ra ε xɔn yulayani. **21** Arabi kaane nun Kedari kuntigine birin yi yulayaan ligama ε tan nan xɔn. E yi ε yexɛɛne nun kontonne nun kɔtɔne sarama e konna nin. **22** E nun Saba nun Raama yulane yi yulayaan ligama ε bode tagi. E tan nan yi fama latikonɔnna sifan birin nun bɔxɔ bun nafunle nun xɛmane ra yulayani. **23** Xarani kaane nun Kane kaane nun Eden kaane nun Saba yulane nun Asuri kaane nun Kilimada kaane yi yulayaan ligama ε tan nan xɔn. **24** E yi se fɔjine sarama ε ma yulayani, e fa doma tofɔjine nun a mamiloxine nun dugi sɔxɔnxine ra e nun dugi binye majingixine ra naxanye sama bɔxɔni e nun lutin naxanye dɛnbexi ki fɔjɪ.” **25** “Kunki gbeene nan yi ε yulaya seene maxalima. E yi wasaxi nafunla nun binyen na fɔxɔ igen tagi. **26** E kunkibane yi ε xalima fɔxɔ ige gbeen tagi, koni sogeteden foyen sa ε kunkin kalama nɛn fɔxɔ igen tagiyani sa pon! **27** E kunkin na kala lɔxɔn naxan yi, ε nafunle nun ε sare seene nun ε yulaya seene nun ε kunki kanne nun ε kunki ragine nun ε kunki rafalane nun ε yulane nun ε sofane nun muxun naxanye birin ε kunkin kui, ne birin godoma nɛn baan xɔnna ma. **28** Muxun naxanye birin dɔxi igen dɛ, ne xuruxurunma nɛn gaxuni ε kunki ragine gbelegbele xuiin ma. **29** Kunkibane birin godoma nɛn e kunkine kui. Kunki kanne nun kunki ragine birin

tima nɛn igen dɛ, **30** e yi e xuini te, e wuga sɔxɔleni ε fe ra e yi burunburunna sa e xunni sununi, e yi e makutukutu xubeni, **31** e yi e xunne bi ε fe ra, e yi e maxidi kasa benbeli dugine yi sununi, e yi e mawuga ε fari nii yifɔrɛn nun nimisa gbeeni. **32** E mawugama nɛn ε fari e tɔrɔni, e yi gbelegbele ε xinla ra, e naxa, “Nde yi luxi alo Tire taani ito naxan kalaxi, fɔxɔ igen yi naxan nabilinxi?” **33** E yulaya seene to yi fama sa keli baan ma ε yi siya wuyaxine nan baloma ε se kanyaan nun ε yulaya seene xɔn, ε yi bɔxɔn mangane findima nafulu kanne ra. **34** Koni ε na kala baa igeni, ε godo igen bun ε yulaya seene nun ε muxune birin naxɔrima nɛn ε xɔn. **35** Fɔxɔ ige tagi bɔxɔne muxune birin yigitegɛma nɛn ε fe ra, e mangane yi xuruxurun gaxuni, kuisanna yi e yetagine masara. **36** Naxanye yulayaan nabama siyane tagi, ne kolinma nɛn ε fe ra, bayo ε rajanna magaxuma ayi nɛn. E mi fa luma na sɔnɔn!”

28 Alatala yi falan ti n xa, a naxa, **2** “Adamadina, a fala Tire mangan xa, i naxa, ‘Marigina Alatala ito nan falaxi n xa, a naxa: I waso ayi nɛn, i yi a fala, i naxa, “Alana nde nan n na, n dɔxi alane dɔxɔden nin fɔxɔ igen tagini!” Koni i tan, muxun nan i ra, ala mi i ra, anu i bata i yetɛ xaxinla yate Ala xaxinla ra. **3** I fe kolon Daniyeli xa ba? Wundo fe yo mi luxunxi i tan ma ba? **4** I bata nafunla sɔtɔ i ya fe kolonna nun i ya xaxilimayaan xɔn, i xɛmaan nun gbetin malan i ya nafulu ramaradeni. **5** I bata tɔnɔ gbeen sɔtɔ i ya yulaya xaxinli, i yi findi wasoden na na nafulu kanyani. **6** Nanara, Marigina Alatala ito nan falaxi, a naxa: Bayo i yetɛ miriyaan yatɛxi Ala miriyaan nan na, **7** n xɔjɛne rafama nɛn i xili ma, naxanye jaxu siyane birin xa. E silanfanna tongoma nɛn i ya fe kolon fɔjin xili ma e yi i ya nɔrɔn kala. **8** E i radinma nɛn gaburun na, i yi faxa xɔleni fɔxɔ igen tagini. **9** Nayi, i mɔn a fale i faxa muxune yetagi ba, fa fala a ala nan n na? I fa kolonna muxun nan na i faxa muxune yii, ala mi i ra. **10** I faxama yarabin nin xɔjɛne yii, alo Ala kolontarene faxama kii naxan yi. Amasɔtɔ n tan bata falan ti. Marigina Alatala falan nan na ra.” **11** Alatala yi falan ti n xa, a naxa, **12** “Adamadina, sunu sigin sa Tire mangan ma! I xa a fala a ma, i naxa, ‘Marigina Alatala ito nan falaxi, a naxa: I yi findixi muxu defexin misaala nan na, i yi lugo fe kolonna ra, i ya tofanna yi defexi. **13** I yi Eden nakɔn nin, Alaa nakɔna. Gɛmɛ fɔjin sifan birin

yi i rayabuxi: saridon gemen nun topasi gemen nun dayimu gemen nun kirisoliti gemen nun onixi gemen nun yasipi gemen nun safiri gemen nun esikaribukili gemen nun emerodi gemena. I yi maxidixi xemane ra naxanye radaxa i xa xabu i da lɔxoni. **14** I yi luxi nen alo kantan ti malekan naxan gabuteye yi yifulunxi. N na i ti nen Alaa geya sarijanxin fari, i yi mena nin, i masiga tima geme tee wolonne tagi. **15** E mi yi i sigati kiin na xabu i da lɔxoni han tinxintareyaan yi so i yi. **16** I ya yulayaan tonon ma, i yi rafe gbalon na, i yi yulubin liga. Nayi, n na i kedima nen Alaa geya sarijanxin fari n yi i ralo ayi, i tan naxan yi luxi alo kantan ti malekan naxan yi geme tee wolonne tagi. **17** I bata waso ayi i bojeni masoto i ya tofanna xon, i bata i ya fe kolonni fu i ya binyen xon. Nayi, n na i rabirama nen boxoni, n yi i findi yee ramaxa seen na mangane xa. **18** I bata i ya yire sarijanxine raxosi i ya hake wuyaxine nun i ya tinxintareyaan xon yulayani. Na ma, n teen naminima nen i xili ma i konni, a yi i gan, n yi i findi xuben na boxon fari muxune birin yetagi naxanye i matoma. **19** Naxanye birin yi i kolon siyane ye, ne birin yigitegema nen i ya fe ra, i rajanna magaxuma ayi nen. I mi fa luma na sonon!” **20** Alatala yi falan ti n xa, a naxa, **21** “Adamadina, i yee rafindi Sidon taan ma, i nabiya falan ti a xili ma! **22** I a fala, i naxa, ‘Marigina Alatala ito nan falaxi, a naxa: N bata keli e xili ma Sidon kaane! N binyama nen e konni! E a kolonma nen a Alatala nan n na, n na n ma kiti ragidixine rakamali e xili ma waxatin naxan yi n yi n ma sarjanna mayita e konni. **23** N fitina furen nafama nen e xili ma n yi tin muxune xa faxa e taan kirane xon ma, faxa muxune yi lu biraxi e konni, yengen yi lu kele e xili ma e rabilinna birin yi. Nayi, e a kolonma nen a Alatala nan n na.”” **24** “Nayi, Isirayila rabilinna siyane mi fa a tore alo janla naxan saxonna tima alo tansinne. Nayi, e a kolonma nen a Marigina Alatala nan n na.”” **25** “Marigina Alatala ito nan falaxi, a naxa: N na Isirayila yamaan malan waxatin naxan yi keli siyane ye, e raxuyaxi ayi denaxanye yi, n na n ma sarjanna mayitama e xon nen siyane yetagi. E dɔxoma nen e boxoni, n naxan so n ma walikeen Yaxuba yii. **26** E luma nen boje xunbenli, e banxine ti, e manpa binle si. E luma nen boje xunbenli, n na n ma kiti ragidixine rakamali e rabilinna siyane xili ma waxatin naxan yi, naxanye birin yi e rajaxuxi, e yi a kolon a Alatala nan n na, e Ala.””

29 Yamaan xali konyiyani waxatin naxan yi, na jee fuden kike fuden xi fu nun firinde lɔxoni, Alatala yi falan ti n xa, a naxa, **2** “Adamadina, i yee rafindi Misiran mangan ma, i nabiya falan ti a xili ma e nun Misiran yamanan birin. **3** I a fala a ma, i naxa, ‘Marigina Alatala ito nan falaxi, a naxa: N kelima nen i xili ma, i tan Misiran mangana, i tan naxan luxi alo ige yi sube magaxuxin naxan saxi Nila baan biradene tagi, i tan naxan a falama, i naxa, “N tan nan gbee Nila baan na, n tan nan a daxi n yete xa.” **4** Koni, n karafen birama nen i gbegbene yi, n yi Nila baa igen yexene singan i xanle ra, n yi i ba Nila baa biradene tagi e nun Nila baa yi yexen naxanye birin e singanma i xanle ra. **5** N na i wolima ayi nen tonbonni, i tan nun i ya baa yi yexene birin, e sa bira xee boxone yi. E mi malanje, e mi tonge. N na i findima nen balon na burunna subene nun xoline xa. **6** Misiran kaane birin a kolonma nen nayi a Alatala nan n na, bayo, i findi nen mali tiin na Isirayila yamaan xa wuleni alo muxun na la xayen na a dunganna ra. **7** E to i suxu, i yi gira, i e tungunne birin mabo. E to e digan i yi, i yi gira, i yi e gbingin ba a ra.”” **8** “Nanara, Marigina Alatala ito nan falaxi, a naxa: N yengen nakelima nen i xili ma, n yi tin i ya muxune nun i ya xuruseene yi faxa silanfanna ra i konni. **9** Misiran yamanan findima nen tonbonna nun yire rabepinxin na. Nayi, muxune a kolonma nen a Alatala nan n na. Bayo i bata a fala, i naxa, “N tan nan gbee Nila baan na, n tan nan a daxi,” **10** nanara, n kelima nen e nun Nila baan biradene xili ma, n yi Misiran yamanan findi yire kalaxin na, a findi tonbonna nun yire rabepinxin na, keli Migidoli taan ma siga han Sinimi yamanana, siga han Kusi yamanan danna. **11** Muxun mi fa a sanna tima a yi, hanma subena han jee tonge naanin. **12** N Misiran yamanan findima nen yamana rabepinxine yire rabepinxin na, a taane yi findi taa rabepinxine ra taa xonne ye jee tonge naanin. N Misiran kaane raxuyama ayi nen siyane ye, n yi e rasiga ayi yamana wuyaxi xun xon.”” **13** “Marigina Alatala ito nan falaxi, a naxa: Nee tonge naanin na dangu, n Misiran kaane malanma nen keli siyane ye e na raxuya ayi naxanye ye. **14** N mon xetema nen Misiran yamanan suxu muxune ra Misiran yamanan faxa binni, e benba yamanana, e sa yamana magodoxin ti menni. **15** A findima nen mangaya magodoxin na mangayane birin xa, a mi fa a yete yitema siyaan bonne xun na sonon. N na a raxurunma ayi nen alogo a nama siyane no sonon. **16**

Nayi, a mi fa finde Isirayila kaane yigin na mume, alogo a xa findi Isirayila kaane haken nabira seen na e ma, e naxan liga e to bira Misiran kaane fɔxɔ ra malina fe ra. Nayi, e a kolonma nen a Marigina Alatala nan na.” 17 Yamaan xali konyiyani waxatin naxan yi, na jɛɛ mɔxɔnɛn nun solofereden kike singen xi singe lɔxɔni, Alatala yi falan ti n xa, a naxa, 18 “Adamadina, Babilɔn mangan Nebukadanesari bata a sofa ganla karahan, a e xa wali a xɔdɛxɛn na Tire taan xili ma, e birin bata findi teli kanne ra, e birin tungunne makotenxi, koni e nun a ganla mi sese sɔtɔxi Tire taani e saren na e wanli Tire taani. 19 Nanara, Marigina Alatala ito nan falaxi, a naxa: N Misiran yamanan soma nen Babilɔn mangan Nebukadanesari yii, a yi a nafunle birin xali, a yi a seene tongo yɛngeni, ne yi findi a ganla saren na. 20 N Misiran yamanan soma nen a yii a kontɔnna ra, amasɔto e nun a ganla bata wali n xa. Marigina Alatalaa falan nan na ra. 21 Na lɔxɔni, n na Isirayila yamaan senben xun masama nen. I tan Esekiyeli, n falan sama nen i de yamaan tagi na waxatini, nayi e a kolonma nen a Alatala nan n na.”

30 Alatala yi falan ti n xa, a naxa, 2 “Adamadina, nabiya falan ti, i naxa, Marigina Alatala ito nan falaxi, a naxa: E gbelegbele, e naxa, ‘Ee! Naxankata lɔxɔn famal!’ 3 Amasɔto lɔxɔn bata maso, Alatalaa lɔxɔn bata maso, kundaan nun gbalon lɔxɔn siyane xa. 4 Yɛngen soma nen Misiran yamanani. Kontɔfinla soma nen Kusi yamanani. Muxune faxama nen Misiran yi, e nafunle yi xali, e banxine yi rabira, sese mi luma.” 5 Misiran kaane nun Kusi kaane nun Puti kaane nun Ludu kaane nun Arabi kaane nun Libiya kaane nun n ma yamaan muxuna ndee faxama nen silanfanna ra e bode xɔn. 6 “Alatala ito nan falaxi, a naxa: Misiran yamanan xɔyine kalama nen, a wason nun senben yi jan. Keli Migidoli ma siga han Sinimi yamanana muxune faxama nen silanfanna ra e konni. Marigina Alatalaa falan nan na ra. 7 A taane findima nen yamana rabɛjɛnɛn xine yire rabɛjɛnɛn na, a taane yi lu taa xɔnne yɛ. 8 Nayi, e a kolonma nen a Alatala nan n na, n na tɛɛn so Misiran yamanan na waxatin naxan yi, a fɔxɔ ra birane birin yi gan.” 9 Na lɔxɔni, n ma xɛrane sigama nen kunkine kui, e sa Kusi yamanani maxa a bɔjɛ xunbenli. E kuisanma nen Misiran yamanana gbalon lɔxɔni, amasɔto na lɔxɔna a lima nen yati! 10 “Marigina Alatala ito nan falaxi, a naxa: N Misiran yama gbeen naxɔrima nen Babilɔn

mangan Nebukadanesari xɔn. 11 A tan nun a ganla naxanye jaxu siyane birin xa, ne nan nasigama yamanan kaladeni. E sa e silanfanne botinma nen Misiran yamanan xili ma e yi yamanan nafe faxa muxune ra. 12 N Nila baa igen xɔrima nen, n yi yamanan mati muxu jaxine ma. N tinma nen xɔjɛne yi yamanan kala, e nun seen naxanye birin a yi. N tan Alatala nan falan tixi.” 13 “Marigina Alatala ito nan falaxi, a naxa: N suxurene halagima nen, n yi batu seene jan Nofi taani. Kuntigi yo mi fa luma Misiran yamanani, n yi gaxun naso yamanan birin yi. 14 N Misiran yamanan faxa binna raxɔrima nen, n yi tɛɛn so Soyan taan na, n yi n ma kiti ragidixine rakamali No taan ma.” 15 “N na n ma xɔlɔn nagodoma nen Sin taani, Misiran yamanan taa makantanxina, n yi No taana gali gbeen birin halagi. 16 N tɛɛn soma nen Misiran yamanan na, Sin taan yi yimaxa gaxuni. No taan nabilinna yinna rabirama nen, yaxune yi Nofi taan tongo yanyin na. 17 Hon taan nun Pi-Beseti taan banxulanne faxama nen silanfanna ra, taan muxune yi xali konyiyani. 18 Lɔxɔ yidimixin na a ra Tapanese taan xa n na Misiran yamanan senben kala lɔxɔn naxan yi, a wasoma a fangan naxan yi, na yi jan. Kundaan soma nen taan xun na, a banxidene muxune yi xali konyiyani. 19 N na n ma kiti ragidixine rakamalima nen Misiran ma, e yi a kolon a Alatala nan n na.” 20 Yamaan xali konyiyani waxatin naxan yi, na jɛɛ fu nun kedenden kike singen xi soloferede lɔxɔni, Alatala yi falan ti n xa, a naxa, 21 “Adamadina, n bata yi Misiran mangan yiini gira. Muxu yo munma a dandan singen, a yiin munma maxidi alogo a xa yalan, a fangan sɔto, a fa nɔ silanfanna tonge. 22 Nanara, Marigina Alatala ito nan falaxi, a naxa: N bata keli Misiran mangan xili ma, n mɔn a yiine yigirama nen, a yiin naxan fan, e nun a yigiraxina, n yi a silanfanna rabira a yii. 23 N Misiran kaane raxuyama ayi nen siyane yɛ, n yi e rayensenjɛ ayi yamanane xun xɔn. 24 Koni n Babilɔn mangan yiine senbe soma nen, n yi n ma silanfanna so a yii, n yi Misiran mangan yiine yigira, a yi lu kutunjɛ a yetagi alo muxu maxɔlɔxin faxamatɔna. 25 N Babilɔn mangan yiine senbe soma nen, koni Misiran mangan tan senben janma nen. Nayi, e a kolonma nen a Alatala nan n na, n na n ma silanfanna so Babilɔn mangan yii waxatin naxan yi, a yi a yite Misiran yamanan xili ma. 26 N Misiran kaane raxuyama ayi nen siyane yɛ, n yi e rayensenjɛ ayi

yamanane xun xon. Nayi, e a kolonma nen a Alatala nan n na.”

31 Yamaan xali konyiyani waxatin naxan yi, na jɛɛ fu nun kedenden kike saxanden xi singe lɔxoni, Alatala yi falan ti n xa, a naxa, **2** “Adamadina, a fala Misiran mangan nun a ganla xa, i naxa: I maliga nde ra i ya gboni? **3** I miri feni ito ma: Asiriya yamanan yi luxi nen alo suman bili gbeena Liban yamanani, naxan yiye yi sabatixi a fajin na, a yi fɔtɔnxi ki fapi, a yi kuya, a konden yi texi dangu fɔtɔn yi wudine birin na. **4** Igen bata yi a rasabati, bɔxɔ bun ige tilinxin bata yi a ragbo. Igen yi danguma a salenne nan longori ra, siga burunna wudine birin ma. **5** Nanara, a yi kuya burunna wudine birin xa, a dɛɛne bata yi sabati, a yiine yi kuya fata ige gbeen na naxan yi a rasabatima. **6** Xoline birin yi e tɛɛn sama a yiine nin, burunna subene birin yi fa e diine xalima a tan nan bun, siya gbeene birin yi fa yigiya a nininna bun. **7** A yi rayabu a gboyani, a yiine yi yiriwaxi, bayo a salenne yi godoxi bɔxɔn bun ma igeni pon! **8** A mi yi suman wudi yo ninin bun Alaa nakoni. Fɔfɔ yo dɛ mi yi fan a dɛɛne xa nun, wudi gbete mi yi maliga a yiine ra. Wudi yo mi yi maliga a ra a tofanni Alaa nakoni. **9** N bata yi a ratofanɲɛ ayi a yii sabatixine xon, han wudine birin yi fa a maxɔxɔlɔnma Eden nakoni, Alaa nakona.” **10** Nanara, Marigina Alatala ito nan falaxi, a naxa, “Wudini ito to kuyaxi ayi, a konden yi te fɔtɔn yi wudine birin xa, nanara, a wasoxi ayi han! **11** N yi a sa siyane mangan sagoni alogo a xa a suxu a jaxun yatɛn na. N bata n mɛ a ra. **12** Xɔɲɛn naxanye jaxu siyane birin xa, ne yi a sege, e yi a rabepin. A yiine yi lu biraxi geyane nun lanbanne yi. A dɛɛne bɔxin yi lu yamanan folone birin na. Siyane birin yi keli a nininna bun, e a rabepin. **13** Xoline birin yi fa dɔxɔ a yii biraxine fari, burunna subene birin yi e malan a yiine fari.” **14** “Nayi, ige dɛ yi wudi yo mi fa suse, a kuya alo a tan, sese konde mi fa tema fɔtɔn yi wudin bonne xa. Nayi, wudi yo mi fa lan a igen soto han a kuya alo na. Amasoto sayaan nan nagidixi e birin ma, e siga bɔxɔn bun faxa muxune tagi, e nun naxanye birin godoma gaburun na.” **15** “Marigina Alatala ito nan falaxi, a naxa: A siga laxira yi lɔxɔn naxan yi, n na a saya sunun namini nen, n tigi ige tilinxine nun a xude igene balan a fe ra, n yi a ige gbeene rati. N yi Liban yamanani dimi a fe ra, burunna wudine birin yi xara a fe ra. (Sheol h7585) **16** N siyane birin naxuruxurun

nen gaxuni a bira xuiin ma, n na a ragodo laxira yi waxatin naxan yi, e nun faxa muxune yi godo gaburun na. Nayi, Eden nakɔɔn wudi fajin naxanye birin bata yi godo bɔxɔn bun, Liban bɔxɔn wudi tofapi fisamantenna naxanye birin yi rasabatixi ige gbeene xon dununa yi nun, ne yi madɛnden. (Sheol h7585) **17** Naxanye yi yigiyaxi a nininna bun, a xoyine siyane ye, e nun ne fan godo nen gaburun na e bode xon, e sa sa ne fari naxanye faxa yengeni.” (Sheol h7585) **18** “E nun nde maliga Eden nakɔɔn wudine ye lan e binyen nun e gboon ma? Anu, i fan sigama laxira yi, e nun Eden nakɔɔn wudine birin. I sa sama nen Ala kolontarene tagi bɔxɔn bun ma, naxanye faxaxi silanfanna ra. Misiran mangan nun a yamaan birin najanma na kii nin! Marigina Alatalaa falan nan na ra.”

32 Yamaan xali konyiyani waxatin naxan yi, na jɛɛ fu nun firinden kike fu nun firinden xi singe lɔxoni, Alatala yi falan ti n xa, a naxa, **2** “Adamadina, sunu sign sa Misiran mangan xa. A fala a xa, i naxa: I luxi nen alo yata senbemaan siyane tagi, alo ige yi sube magaxuxin fɔxɔ igeni, naxan a masiga tima a baa gbeeni. I i ya igene dunduma i sanne ra, i yi e walanne raxaɲɛ ayi.” **3** “Marigina Alatala ito nan falaxi, a naxa: N na n ma yalaan soma nen i xun na, nxu nun yama gbeen malanxina, e yi i bandun n ma yalaan na. **4** N na i ratema nen xaren na, n yi i radin xɛɛne ma, n yi xoline birin lu e dɔxɔ i fari, burunna subene birin yi lugo i suben na. **5** N na i suben naxuyama ayi nen geyane fari, n yi lanbanne rafe i binbin sube dɔnxɛn na. **6** N yamanan birin ige sama nen i wunla ra, han a geyane birin xude wunle yi rafe. **7** I niin na ba waxatin naxan yi, n kore xɔnni fɔrɔma nen, n yi sarene yidimi, n yi kundaan sa sogen ye ma kiken mi fa degema. **8** N yanban seene birin yidimima nen i ya fe ra, n yi dimi gbeen nasin i ya yamanan birin yi, Marigina Alatalaa falan nan na ra. **9** N siya wuyaxine rakɔntɔfilima nen, n na i kala feen xibarun nali siyane ma waxatin naxan yi hali i mi yamanan naxanye kolon. **10** N yama wuyaxi yigitegema nen i ya fe ra, e mangane yi xuruxurun gaxuni i ya fe yi, n na n ma silanfanni te e yetagi waxatin naxan yi. Birin xuruxurunma nen gaxuni a yete niin na waxatin birin, i na faxa lɔxɔn naxan yi.” **11** “Amasoto Marigina Alatala ito nan falaxi, a naxa: Babilon mangana silanfanna fama nen i xili ma. **12** N na i ya gali gbeene faxama nen sofa wekilexine silanfanna ra. Siyaan naxan jaxu a birin

xa, ne Misiran yamanana wason kalama nen, a ganle birin yi faxa. 13 N na a xuruseene birin naxɔrima nen Nila baa ige gbeene de. Muxune sanne mi fa na igene yimaxama sɔnɔn xuruseene torone mi fa e dunduma. 14 Nayi, n yi a lu e igene yi e raxara, e xudene yi lu gode yetetenna alo turena, Marigina Alatalaa falan nan na ra. 15 N na Misiran yamanan naxɔri waxatin naxan yi, yamanani seene birin yi ba a yi, n yi a muxune birin faxa, nayi, e a kolonma nen a Alatala nan n na.” 16 “Sunu sigin nan na ra, a nu sama nen. Siyane sungutunne sunu sigini ito sama nen Misiran yamanan nun a yamaan birin xa, Marigina Alatalaa falan nan na ra.” 17 Yamaan xali konyiyani waxatin naxan yi, na jɛɛ fu nun firinden kike fu nun firinden xi fu nun suulundena, Alatala yi falan ti n xa, a naxa, 18 “Adamadina, gbelegbe Misiran kaane ganle fe ra, i wuga xuiin xa e nun siya senbeman xali laxiraya yi, faxa muxune sigama denaxan yi. 19 A fala e xa, i naxa, ‘I rayabu dangu nde ra? Godo, i fa i sa Ala kolontarene fema!’ 20 E luma nen faxa muxune yɛ naxanye faxaxi silanfanna ra. Silanfanni tɔnxi! E nun e ganle birin xa xali. 21 Sofa senbema danguxine falan tima a ma nen laxira yi, e nun a fɔxɔrabirane, e naxa, ‘E bata godo be, e saxi Ala kolontarene fema naxanye faxaxi yengeni.’” (Sheol h7585) 22 “Asiriya mangan mato menni e nun a ganle birin, a rabilinxi a muxune ra naxanye faxaxi silanfanna ra. 23 E gaburune danna sa bɔxɔn nan bun pon, laxira xɔnna ma, mangan gaburun nabilinni. E birin faxaxi yengen nin, e tan naxanye yi muxune magaxuma dunuja yi.” 24 “Elan fan mangan mato menni, e nun a ganle birin a gaburun nabilinni. E birin faxaxi silanfanna nan na yengeni, e bata maluxun Ala kolontareyani, e tan naxanye yi muxune magaxuma dunuja yi, e bata rayagi, e nun naxanye birin godoma yili gbeen na. 25 A saden bata rafala faxa muxune tagi e nun a ganle birin a gaburun nabilinni. Na Ala kolontarene birin bata faxa silanfanna ra. Bayo e yɛeragaxun bata yi xuya ayi dunuja xun xɔn, anu iki e bata rayagi, e nun naxanye sigama yili gbeen na, e sa sa faxa muxune tagi.” 26 “Meseke mangan fan na e nun Tubali mangan nun e ganle birin e gaburune rabilinni. Na Ala kolontarene birin faxaxi silanfanna nan na, bayo e bata dunuja muxune birin magaxu. 27 E nun sofa kendene mi saxi yire kedenna xan yi ba, naxanye birin faxaxi Ala kolontarene yɛ? E ganla birin bata siga laxira yi e nun e yenge so seene. E silanfanne saxi e xunne bun. E yulubine goronna bata lu e xɔnne fari,

bayo sofani itoe yɛeragaxun bata yi xuya ayi dunuja muxune yɛ! (Sheol h7585) 28 I tan Misiran mangan fan kalaxin sama nen Ala kolontarene yɛ, naxanye faxaxi silanfanna ra!” 29 “Edɔn yamaan mato, a mangane nun a kuntigin naxanye senbe yi gbo, koni e bata sa faxa muxune yɛ, naxanye faxaxi silanfanna ra! E saxi Ala kolontarene yɛ, naxanye godon yili gbeen na.” 30 “Kɔmen fɔxɔn kuntigine birin mato menni, e nun Sidɔn kaane birin naxanye faxaxi, e yagixi, hali e sofane to yi muxune magaxuma. Na Ala kolontarene saxi faxa muxune yɛ naxanye faxa silanfanna ra. E yagixi e nun naxanye godoma yili gbeen na.” 31 “Misiran mangan nun a ganla birin na na faxa muxu wuyaxine to, na a masabarima nen a ganla fe ra naxanye faxa silanfanna ra. Marigina Alatalaa falan nan na ra. 32 Bayo n tinxi a xa yamanane magaxu dunuja yi, Misiran mangan nun a ganle birin fan e sama nen Ala kolontarene yɛ, e nun naxanye faxaxi silanfanna ra. Marigina Alatalaa falan nan na ra.”

33 Alatala yi falan ti n xa, a naxa, 2 “Adamadina, falan ti i ya yamaan xa! A fala e xa, i naxa: N na yengen nakeli yamanan xili ma waxatin naxan yi, e yi muxuna nde sugandi, a yi findi kantan muxun na, 3 xa na kanna yaxune to fe yamanan yengedeni, a yi xɔtaan fe, a yamaan nakolon, 4 nayi, xa naxan na xɔta xuiin me, a mi a yate, a faxa feen goronna luma a tan nan xun ma. 5 Naxan na tondi a tuli matiye na xɔta xuiin na, a faxa feen goronna luma a tan nan xun ma. Naxan na a tuli mati a fe xuiin na, na a niin natangama nen. 6 Koni xa kantan muxun yaxune to fe, a mi xɔtaan fe, xa a mi yamaan nakolon, yaxune yi fa muxuna nde faxa, na kanna faxama nen a haken ma, koni a wunla goronna luma nen kantan muxun xun ma.” 7 “Nayi, i tan adamadina, n bata i findi Isirayila yamaan kantan muxun na. Nayi, n ma falane rame, i yi e rakolon n xa. 8 N na a fala muxu jaxin xa, n naxa, ‘Muxu jaxina, i faxama nen,’ xa i mi na fala muxu jaxin xa, i yi a rakolon fa fala a xa xete a kira jaxin fɔxɔ ra alogo a xa kisi, na muxu jaxin faxama nen a haken ma, koni a wunla goronna luma i tan nan xun ma. 9 Koni xa i muxu jaxin nakolon alogo a xa xete a kewanle fɔxɔ ra, koni a mi tin, a faxama nen a haken ma, koni i tan bata i niin natanga na yi.” 10 “Adamadina, a fala Isirayila yamaan xa, i naxa: E luma a fale, e naxa, ‘Nxɔ muruten nun nxu yulubine goronna gbo nxu xun ma, nxu kalama e bun. Nxu nɛ

kise di?” 11 A fala e xa, i naxa: Marigina Alatalaa falan ni ito ra, a naxa, ‘Habadan Ala nan n na, n bata n kolo n yeteni! N mi waxi muxu jaxin xa faxa, n waxi nen a xa xete a kewanle foxo ra, a yi kisi. E xun xete, e xete e kewali jaxine foxo ra. Isirayila yamana, nanfera e tinxi e xa halagi?” 12 “I tan adamadina, a fala i ya yamaan xa, i naxa: Tinxin muxuna tinxinyaan mi a rakise a na murute n ma loxon naxan yi. Muxu jaxina jaxuyaan fan mi a halage, xa a sa xete a jaxuyaan foxo ra. Xa tinxin muxun yulubin liga folo loxon naxan yi, a tinxinya fonna mi a niin natangama. 13 Xa n na a fala tinxin muxun xa, n naxa, ‘I kisima nen,’ xa a yigi sa a tinxinyani, a yi fe jaxin liga, a tinxin wali yo mi fa yatema. A halagima nen a fe jaxina fe ra a naxan ligaxi. 14 N na a fala muxu jaxin xa, n naxa, ‘I faxama nen,’ xa a xun xanbi so a yulubini, a yi kiti kenden nun tinxinyaan liga folo, 15 a tolimaana naxete, a mon yi seen naxete a naxan muxaxi, a yi yamarine suxu muxun kisin naxanye xon, a mi fa fe jaxi yo liga, na kanna kisima nen, a mi faxama. 16 Ninan tima nen a yulubi fonne birin xon. A bata kiti kenden nun tinxinyaan liga folo, na kanna kisima nen.” 17 “Anu, i ya yamana a falama, e naxa, ‘Marigina kiraan mi lanxi!’ Koni e tan nan ma kira mi lanxi. 18 Xa tinxin muxuna a xun xanbi so a tinxinyani, a yi fe jaxin liga folo, a faxama nen na ma. 19 Xa muxu jaxina a xun xanbi so a jaxuyani, a yi kiti kenden nun tinxinyaan liga folo, a kisima nen na fe ra. 20 Anu, Isirayila yamana, e a falama, e naxa, ‘Marigina kiraan mi lanxi.’ Nayi, n na e keden kedenna birin makitima nen e kewanle ra.” 21 Nxu xali konyiyani waxatin naxan yi, na jee fu nun firinden kike fuden xi suulunde loxon nan yi a ra, Yerusalen muxu gixina nde yi fa a fala n xa, a naxa, “Taan bata kala!” 22 Koni Alatala bata yi a yiin sa n ma jinbanna ra benun na muxu gixin xa fa n fema xotanni. N deen bata yi fulun, bobo mi yi fa n na. 23 Alatala yi falan ti n xa, a naxa, 24 “Adamadina, muxun naxanye doxi Isirayila yamana kalaxini, ne a falama, e naxa, ‘Ibrahim kedenna nan yi a ra, anu, a yamanan birin tongo nen a keen na. En tan to wuya, yamanan bata fi en tan ma en gbeen na yati!’ 25 Nanara, a fala e xa, i naxa, ‘Marigina Alatala ito nan falaxi, a naxa: E suben donma naxan mi koe raxabaxi, e xaxili tixi suxurene ra, e faxan tima, e lan e yi yamanan soto nayi ba? 26 E laxi e silanfanne nan na, e fe haramuxine ligama, e yalunyaan ligama, e lan e yi yamanan soto nayi ba?’ 27 I ito nan falama e

xa, i naxa, ‘Marigina Alatala ito nan falaxi, a naxa: Habadan Ala nan n na, n bata n kolo n yeteni, fa fala, naxanye luxi e nii ra Yerusalen taa kalaxini, ne faxama silanfanna nan na. Naxanye e gixi burunna ra, n na e luma subene nan xa, e yi e don. Naxanye luxunxi geme longonne nun faranne ra, fitina furen nan ne faxama. 28 N yamanan findima nen yire rabepinxin na. A senben naxan yi findixi a muxune waso xunna ra, n na jianma a yi nen. Isirayila geyane yigelima nen, muxu yo mi dangue e yi. 29 E a kolonma nen nayi a Alatala nan n na, n na yamanan findi yire rabepinxin na e fe xosixine fe ra e naxanye ligaxi.” 30 “I tan adamadina, i ya yamanan muxune i ya fe falama taan nabilinna yinne xon e nun banxine de ra, e a falama e bode xa, e naxa, ‘E fa a rame, falan naxan kelixi Alatala mal!’ 31 N ma yamaan sigama i fema, e doxo i yetagi i xuiin namedeni. E i xuiin namema, koni e mi a suxuma. Bayo e fala fajine nan tima, koni kunfan nan e bojeni e xa tonon fen tinxintareyani. 32 I ya fe bata findi e xa sigin na, naxan fan, a jaxun. E i ya falane ramema, koni e mi e suxuma. 33 Koni na feene na rakamali, anu e waxatin bata a li, e a kolonma nen nayi, a nabina nde yi e ye.”

34 Alatala yi falan ti n xa, a naxa, 2 “Adamadina, falan ti Isirayila yamaan yeeratine xili ma naxanye luxi alo xuruse kantanne. I naxa, ‘Marigina Alatala ito nan falaxi, a naxa: Gbalona Isirayila yeeratine xa naxanye e joxo luxi e yete gbansanna xon. Xuruse kantanne mi lan e xa xuruse kurun naba ba? 3 Anu, e e xuruse kurun turen donma, e e maxidima xuruse xabe dugine yi, e xuruse turaxine koe raxabama, e yi e don, koni e mi e joxo luma xuruseene xon. 4 Naxanye xadanxi, e mi ne senbe soma. Naxanye furaxi e mi ne dandanma. Naxanye maxoloxi, e mi ne maxidima. Naxanye bata siga na xun xon, e mi ne malanma. Naxanye loxi ayi, e mi ne xon fenma, koni e doxi yamaan xun na jaxankatan nun jaxuyaan nin. 5 E bata xuya ayi bayo xuruse raba mi na. E to raxuyaxi ayi, e bata findi burunna subene balon na. 6 N ma xuruseene bata xuya ayi geyane nun yire matexine birin fari. E bata xuya ayi boxon birin xun xon, koni muxe mi na naxan a yengi doxoma e xon, a yi e fen.” 7 “Nanara, e tan yeeratine, e tuli mati Alatalaa falan na! 8 Marigina Alatalaa falan ni ito ra, a naxa: Habadan Ala nan n na, n bata n kolo n yeteni. Bayo yeerati mi n ma yamaan masuxuma, e yi lu alo xuruse rabepinxine, bayo ganle

fuma n ma yamaan ma, e lu alo burunna subene balona, bayo n ma xuruse rabane mi sigaxi n ma xuruseene fendeni, bayo xuruse rabane e joxo luxi e yete nan gbansan xon, e mi n ma xuruseene raba, 9 nanara, e tan yeeratine, e tuli mati Alatalaa falan na! 10 Marigina Alatala ito nan falaxi, a naxa: N bata keli yeeratine xili ma! N na n ma yamaan bama nen e yii. N mi fa tinma e yi n ma yamaan lu alo xuruse rabepinxine, alogo xuruse rabane nama fa e joxo lu e yete gbansanna xon. N na n ma xuruseene xunbama nen e yii, e mi fa findima e balon na sonon.” 11 “Bayo, Marigina Alatala ito nan falaxi, a naxa: N tan yeteen nan n yengi dɔxɔma n ma yamaan xon, n yi e masuxu 12 alo xuruse raba fajina a yengi dɔxɔma a xuruseene xon kii naxan yi, e nema raxuyaxi ayi waxatin naxan yi. N na n ma xuruseene masuxuma na kii nin, n yi sa e xunba yirene yi e yi xuyaxi ayi denaxanye yi na waxati yidimixini kundani. 13 N na e raminima nen siyane ye, n yi e malan sa keli yamana wuyaxi yi, n yi e xali e yamanani. N na n yengi dɔxɔma nen e xon Isirayila geyane fari, e nun xudene de e nun yamaan dɔxɔdene birin yi yamanani. 14 N na e rabama nen yire fajini, Isirayila yamanan geya matexine yi findi e rabaden na. E sa e matabuma menne nin e rabade fajini, e yi e dege yire sabatixine yi Isirayila geyane fari. 15 N tan yetena n ma xuruseene rabama nen, n yi matabun fi e ma. Marigina Alatalaa falan nan na ra. 16 Xuruseen naxan loxi ayi, n na fenma nen. Naxan sigaxi na xun xon, n mon fama nen na ra. Naxan maxoloxi, n yi na dandan. Naxan xadanxi, n yi na senbe so. Koni naxan turaxi e nun naxan senben gbo, n ne faxama nen. N na n ma xuruseene rabama kiti kenden nin.” 17 “E tan naxanye luxi alo n ma xuruse kuruna, Marigina Alatala ito nan falaxi e xa, a naxa: n mon kitin sama nen xuruse nun xuruse tagi, e nun kontonna nun koton tagi. 18 Na mi e kenexi ba, e lu e dege yire fajini? Naxan don daxi a ra, e mon waxi na nan yibodon feyi e sanna ra ba? E mi e wasa soe ige sarjnanxin minni ba? E mon waxi a donxen dunder feen nin ba? 19 N ma xuruseene lan ba, e donseen don e naxan yibodonxi, e yi igen min e bata naxan dunder e sanna ra?” 20 “Nanara, Marigina Alatala ito nan falaxi, a naxa: N tan yeteen kitin sama nen xuruse turaxin nun xuruse xosixin tagi. 21 Bayo, e bata xuruse xadanxine tuntun e jinginna nun e tungunna ra, e lu e kudunje e fenne ra han e yi e kedi, 22 n na n ma xuruseene rakisima nen alogo e yii

seene nama fa lu yaxune sagoni. N kitin sama nen xuruseene tagi. 23 N xuruse raba keden pe dɔxɔma nen e xun na, naxan e rabama, n ma walikeen Dawuda. A e masuxuma nen, a yi findi e yeeratiin na. 24 N tan Alatala findima nen e Ala ra, n ma walikeen Dawuda yi findi e yeeratiin na. N tan Alatala nan falan tixi. 25 N boje xunbeli layirin xidima nen nxu nun ne tagi, n yi yamanan sube xajene raxori, alogo e xa dɔxɔ burunna ra makantanni, e yi xi fotonne yi. 26 N na e nun n ma yire sarjnanxin nabilinna barakama nen, n yi tulen nafa a waxatini, e yi findi duba tulene ra. 27 Wudine bogima nen xeeene ma, boxon yi sansi bogine ramini. Yamaan luma nen boje xunbenli e yamanani. Nayi, e a kolonma nen a Alatala nan n na, n na e konyiyaan kala waxatin naxan yi, n yi e xunba muxune yii naxanye e jaxankatama. 28 Siyane mi fa e yii seene tongoma sonon, sube xajene mi fa e donma sonon. E luma nen boje xunbenli, muxu yo mi fa e magaxuma. 29 N xee fajine yitonma nen e xa naxanye xili minima, fitina kame yo mi fa e toroma yamanani. Siyane mi fa e rayage sonon. 30 Nayi, e a kolonma nen a n tan Alatala e xon, e Ala. E mon yi a kolon a e tan nan findixi n ma yamaan na, Isirayila kaane. Marigina Alatalaa falan nan na ra. 31 E tan adamadiine luxi nen alo n ma xuruse kuruna, e tan naxanye dɔxi n ma xuruse rabadeni. N tan nan e Ala ra. Marigina Alatalaa falan nan na ra.”

35 Alatala yi falan ti n xa, a naxa: 2 “Adamadina, i yee rafindi Seyiri geyaan ma, i yi nabiya falan ti a xili ma! 3 A fala a ma, i naxa, ‘Marigina Alatala ito nan falaxi, a naxa: N bata keli e xili ma e tan naxanye Seyiri geya yireni. N na n yiini bandunma nen e xili ma, n yi e konna findi yire rabepinxin na feu! 4 N na e taane kalama nen, e konna yi findi yire rabepinxin na. Nayi, e a kolonma nen a Alatala nan n na.” 5 “Amasoto e bata habadan xonnantenyaan namara, e yi Isirayila kaane lu e faxa silanfanna ra, gbalon fa e ma waxatin naxan yi, e e hakene saranna defexin soto waxatin naxan yi. 6 Marigina Alatalaa falan ni ito ra, a naxa: Habadan Ala nan n na, n bata n kolo n yeteni! N na e sama nen faxa tiin sagoni, a yi lu e sagatanye. Bayo faxa tiin mi rajaxuxi e tan ma, faxa tiin luma nen e sagatanye. 7 N Seyiri geya yiren findima nen yire rabepinxin na fefe! Naxan yo na dangu na yi, n yi na kanna faxa. 8 N na e geyane rafema nen muxu faxaxine ra. Naxanye faxama silanfanna ra, ne birama

nen e yire matexine nun e meremerene nun e xudene birin yi. **9** N na e konna findima nen yire rabenjinxin na habadan, muxu yo mi fa dɔxɔma e taane yi. Nayi, e a kolonma nen a Alatala nan n na.”” **10** “Bayo e bata a fala, e naxa, “Isirayila nun Yuda yama firinni itoe nun e yamanane findima nen nxu gbeen na, nxu yi dɔxɔ e yi.” Anu, Alatala fan yi na yi! **11** Marigina Alatalaa falan ni ito ra, a naxa: Habadan Ala nan n na, n bata n kolo n yeteni. E xolon nun xoxolonna naxan yitaxi Isirayila kaane ra e xonnantenyani, n na e suxuma nen na ra! N na n yete makenenma nen e xa, n na e makiti waxatin naxan yi. **12** Nayi, e a kolonma nen a n tan Alatala bata e fala jaxine birin me Isirayila geya yirene xili ma, e naxanye falaxi, e naxa, “E konna bata halagi, a yi findi nxu balon na.” **13** E bata e yete yite n tan xili ma e falane yi, e yi konbine ti n xili ma, n tan yeteen yi e me.”” **14** “Marigina Alatala ito nan falaxi, a naxa: Yamanane birin na lu sewani waxatin naxan yi, n na e konna tan naxorima nen fefe! **15** E sewa nen Isirayila yamaan kee boxon kala feen na, n ma yamana. Nayi, n na e fan konna ligama na kiini nen. Seyiri geya yiren findima nen yire rabenjinxin na, e nun Edon yamanan birin. Nayi, e a kolonma nen a Alatala nan n na.””

36 “Adamadina, nabiya falan ti Isirayila geyane xa! A fala e xa, i naxa, ‘Isirayila geyane, e tuli mati Alatalaa falan na! **2** Marigina Alatala ito nan falaxi, a naxa: Bayo yaxune bata gele e ma, e naxa, “Yo! Habadan geyani itoe bata findi nxu tan nan gbee ra!”” **3** Nayi, nabiya falan ti, i naxa, ‘Marigina Alatala ito nan falaxi, a naxa: Bayo e rabilinna muxune birin bata kata e raxorideni, e yi e jaxankata alogo e xa findi siya gbete ye gbeen na, muxune yi e magele, e yi e xili kala, **4** nanara, Isirayila geyane, e tuli mati Marigina Alatalaa falan na! Marigina Alatala ito nan falaxi lan geyane nun yire matexine nun xudene nun meremerene nun yire kalaxine nun taa rabenjinxine fe ma, e rabilinna siya gbete ne bata fu naxanye ma, e mon yi e magele. **5** Marigina Alatala ito nan falaxi, a naxa: N bata falan ti siya gbete ne xili ma n ma xanuntenya gbeeni n ma yamaan xa, e nun Edon taane birin xili ma, naxanye n ma yamanan findixi e gbeen na jaxajaxa gbeen nun xonnantenyani, e yi a xuruse rabadene tongol!’ **6** Nanara, nabiya falan ti Isirayila yamanan fe yi. A fala geyane nun yire matexine nun xudene nun meremerene xa, i naxa,

‘Marigina Alatala ito nan falaxi, a naxa: Siyane bata e makonbi han! Nayi, n xoloxin falan tima e xili ma nen n ma xanuntenya gbeeni n ma yamaan xa. **7** Nanara, Marigina Alatala ito nan falaxi, a naxa: N bata n kolo n yiini texin na, fa fala e rabilinna siyane e yete nan nayagima e konbine xon.”” **8** “E tan Isirayila geyane, e jingima nen, e yi e bogin namini Isirayila kaane xa, n ma yamana, bayo na feene fa waxatin bata a li. **9** N fama nen e fema, n na n yete rafindima nen e ma, e tan geyane bima nen, e yi e si. **10** N muxune rawuyama ayi nen e fari, Isirayila yamaan birin. Muxune dɔxɔma nen taane yi, e mon yi yire kalaxine ti. **11** N muxune nun xuruseene rawuyama ayi nen e tan geyane fari. E wuyama ayi nen, e yi diine bari. N mon tinma nen muxune yi dɔxɔ e tan geyane fari alo a foloni, n yi e rasabati alo waxati danguxine yi. Nayi, e a kolonma nen a Alatala nan n na. **12** N na a ligama nen muxune yi sigan ti e tan geyane yiren birin yi, Isirayila kaane, n ma yamana, e yi findi e kee boxon na, e mi fa findima e diine faxa xunna ra sonon.”” **13** “Marigina Alatala ito nan falaxi, a naxa: Bayo a falama e ma fa fala e tan geyane bata muxune halagi, e yi findi e yetena yamana diine faxa xunna ra, **14** nanara, e mi fa muxu yo halagima sonon. E mi fa findima e yamana diine faxa xunna ra sonon. Marigina Alatalaa falan nan na ra. **15** E mi fa siyane konbi ti xuiin mema sonon, siyane mi fa e rayarabima sonon, e mi fa e yamaan nabirama sonon! Marigina Alatalaa falan nan na ra.”” **16** Marigina Alatala yi a fala n xa, a naxa, **17** “Adamadina, Isirayila kaane yi dɔxi e yamanani waxatin naxan yi, e a sarjanna kala nen e fe raba kiine nun e kewanle xon, e fe raba kiin yi findi fe xosixin na n yete ra yi alo jaxanla nema kike wanli. **18** Nayi, n na n ma xolon nagodo nen e xili ma e to faxan tixi yamanani, e yi a sarjanna kala e suxurene xon. **19** Nanara, n na e raxuyaxi ayi siyane ye yamanane birin yi, n yi e makiti e sigati kiin nun e kewanle xon. **20** E na yi siga denaxanye birin yi siyane ye, e yi n xili sarjannxin sarjanna kalama nen bayo muxune yi a falama e ma nen, e naxa, ‘Alatalaa yamaan nan e ra, anu e kelixi a yamanan nin.’ **21** Nanara, n yi wa n xili sarjannxin natanga feni e ma, Isirayila yamaan yi naxan sarjanna kalama siyane tagi e siga denaxanye yi.”” **22** “Nanara, a fala Isirayila yamaan xa, i naxa, ‘Marigina Alatala ito nan falaxi, a naxa: N mi ito ligama e tan Isirayila yamaan xan ma fe ra, koni n na a ligama n xili sarjannxin nan ma fe ra e naxan

sarijanna kalaxi siyane tagi ε siga denaxanye yi. **23** N na n xili gbeen sarijanna mayitama nen, ε naxan sarijan kalaxi siyane ye. Nayi, siyane a kolonma nen a Alatala nan n na, n na n ma sarijanna mayita ε xon waxatin naxan yi siyane yetagi.’ Marigina Alatalaa falan nan na ra.” **24** “N na ε bama nen siyane ye, n yi ε malan keli yamanane birin yi, n yi ε xali ε boxoni. **25** N na ε rasarijanma nen ige sarijanxin na, n yi a xuya ε ma, ε yi rasarijan. N na ε rasarijanma nen ε fe xosixine nun ε suxure feene birin ma. **26** N boje nenen fima nen ε ma, n yi nii nenen sa ε yi. N boje xodexen bama nen ε yi alo gemena, n yi boje fajin sa ε yi. **27** N na n ma Nii Sarijanxin sama nen ε yi, n yi a liga, ε yi bira n ma tonne foxo ra, ε n ma sariyane suxu, ε yi e liga. **28** E doxoma nen yamanani n naxan so ε benbane yii, ε yi findi n ma yamaan na, n yi findi ε Ala ra. **29** N na ε rakisima nen ε fe xosine birin ma. N bogi seene raminima nen, n yi a rawuya ayi, kamen mi fa ε suxe sonon! **30** N wudi bogine nun sansine rawuyama ayi nen alogo ε nama fa rayarabi kameni sonon siyane ye. **31** Nayi, ε sigati ki jaxin nun ε kewali jaxine fe rabirama nen ε ma, ε yi nimisa ε hakene nun ε kewali xosixine fe ra ki fajii! **32** N mi na ligama ε tan xan ma fe ra, ε xa a kolon Isirayila yamana! E yagi ε kewanle fe ra ki fajii! Marigina Alatalaa falan nan na ra.” **33** “Marigina Alatala ito nan falaxi, a naxa: N na ε rasarijan ε hakene birin ma boxon naxan yi, n mon taane rafema nen, yire kalaxine mon yi ti, **34** xee kalaxine mon yi bi alogo e nama lu rabepinxi dangu muxune yetagi. **35** E a falama nen nayi, e naxa, “Yamanani ito naxan yi kalaxi, a bata lu alo Eden nakona. Taan naxanye yi kalaxi, e yi rabepin, na taa xonne mon bata ti, e findi muxune doxide makantanxine ra.” **36** Nayi, siyaan naxanye na lu ε rabilinni, ne a kolonma nen a n tan Alatala nan bata yire kalaxine ti, n mon yi xee rabepinxine bi. N tan Alatala nan falan tixi, n na a ligama nen.” **37** “Marigina Alatala ito nan falaxi, a naxa: N mon tinma nen Isirayila yamaan xa n fen, n yi e mali. N muxune rawuyama ayi nen alo xuruseene. **38** Taa kalaxine rafema nen muxune ra alo xuruse kurune Yerusalen yi sali boxone yi naxanye bata rasarijan Ala xa. Nayi, e a kolonma nen a Alatala nan n na.”

37 Alatala senben yi so n yi, a Nii Sarijanxin yi n xali lanbanna nde tagi, denaxan yi rafexi faxa muxune xonne ra. **2** A yi n nasiga ti e tagi na yiren

birin yi, anu e yi gbo na han, e bata yi xara ayi fefe! **3** A yi a fala n xa, a naxa, “Adamadina, xonni itoe niin mon nxe bire e yi ba?” N yi a yabi, n naxa, “Marigina Alatala, i tan nan keden pe na koloni!” **4** A yi a fala n xa, a naxa, “Nabiya falan ti xonni itoe xa! A fala, i naxa, ‘Xori xaraxine, ε Alatalaa falan name! **5** Marigina Alatala ito nan falaxi xonni itoe xa, a naxa: N niin birama ε yi nen, ε yi keli sayani! **6** N na ε fasane sama nen ε ma, n fati benden nun ε fati kidin sa ε ma, n mon yi ε niin bira ε yi alogo ε xa keli sayani. Nayi, ε a kolonma nen a Alatala nan n na.” **7** N yi nabiya falan ti xonne xa alo a yamarixi n ma kii naxan yi. N yi nabiya falan tima waxatin naxan yi, xuina nde yi mini, alo se ramaxa xuina, xonne yi e maso e bode ra. **8** N yi a to fasane bata sa xonne ma, fati benden yi sa e ma, fati kidin yi e ye maluxun, koni e nii mi yi e yi singen. **9** Nayi, Alatala yi a fala n xa, a naxa, “Nabiya falan ti foyen xa! Adamadina, nabiya falan ti a xa, i naxa, ‘Marigina Alatala ito nan falaxi, a naxa: I tan foyena, keli boxon tongon naaninne yi, i fa so faxa muxuni itoe yi alogo e xa keli sayani.” **10** N yi nabiya falan ti alo a yamari n ma kii naxan yi. Niin yi bira e yi, e mon yi keli sayani, e ti e sanne xunna. Gali senbemaan nan yi a ra naxan yi gbo mumu! **11** A yi a fala n xa, a naxa, “Adamadina, Isirayila yamaan birin nan xori itoe ra. E luma a fale, e naxa, ‘Nxu xonne bata xara. Yigi yo mi fa nxu xa! Nxu bata lo ayi!’ **12** Nanara, nabiya falan ti, i a fala e xa, i naxa, ‘Marigina Alatala ito nan falaxi, a naxa: N na ε gaburune rabima nen, n yi ε rate yinla ra, ε tan n ma yamana. N mon fama nen ε ra Isirayila yamanani. **13** E a kolonma nen nayi, n ma yamana, a Alatala nan n na, n na ε gaburune rabi waxatin naxan yi, n yi ε rate! **14** N na n ma Nii Sarijanxin birama ε yi nen, ε yi keli sayani, n mon yi ε duxe ε yamanani. Nayi, ε a kolonma nen a n tan Alatala nan falan tixi, n yi a liga. Alatalaa falan nan na ra.” **15** Alatala yi falan ti n xa, a naxa, **16** “Adamadina, yegena nde tongo i yi ito kerenden a fari, fa fala Yuda gbeena e nun Isirayila kaan naxanye a foxo ra. I mon xa yege gbete tongo, i ito kerenden a ma fa fala Efirami a yegena, Yusufu gbeena e nun Isirayila yamaan naxanye birin a foxo ra. **17** Yegene ratugun alogo e xa findi yege kedenna ra i yii. **18** Xa i ya yamanan muxune i maxodin, e naxa, ‘I mi ito bunna falama nxu xa ba?’ **19** I xa e yabi, i naxa, ‘Marigina Alatala ito nan falaxi, a naxa: N Yusufu a yegen tongoma nen, naxan Efirami yii, e nun Isirayila

bonsonna naxanye a foxo ra, n yi a tugun Yudaa yegen na, e findi yege kedenna ra. E findima nen kedenna ra n yii.” 20 “I sebenla kerendenma yegen naxanye fari, ne xa lu suxi i yii e yetagi. 21 I yi a fala e xa, i naxa, ‘Marigina Alatala ito nan falaxi, a naxa: N na Isirayila kaane bama nen siya gbetene tagi e sigaxi denaxanye yi, n yi e malan keli yiren birin yi, n yi e raxete e yamanani. 22 N na e findima nen yama kedenna ra yamanani, Isirayila geyane fari, manga kedenna yi lu e birin xun na, e mi fa findima siya firinna ra, e mon mi fa yitaxunje mangaya firinna ra. 23 E mi fa e yete raxosima e suxurene nun e batu se haramuxine nun e murute feene xon. N na e rakisima nen e yulubi rabadene birin ma, n yi e rasarijan. E findima nen n ma yamaan na, n yi findi e Ala ra. 24 N ma walikeen Dawuda nan findima e mangan na, xuruse raba keden peen yi lu e yee ra. E n ma sariyane nun n ma tonne suxuma nen, e yi e liga. 25 E doxoma nen yamanani n denaxan soxi n ma walikeen Yaxuba yii, e benbane doxo denaxan yi. E doxoma nen menni, e tan nun e diine nun e diine diine han habadan, n ma walikeen Dawuda yi findi e mangan na habadan! 26 N boje xunbeli layirin xidima nen nxu nun ne tagi, a findi habadan layirin na. N na e rasabatima nen, n yi e rawuya ayi, n yi n ma yire sarijanxin lu e tagi habadan! 27 N doxoden luma nen e tagi, n findi e Ala ra, e findi n ma yamaan na. 28 Nayi, siyane a kolonma nen a n tan Alatala nan Isirayila rasarijanxi, n na n ma yire sarijanxin lu e tagi waxatin naxan yi habadan.”

38 Alatala yi falan ti n xa, a naxa, 2 “Adamadina, i yee rafindi Manga Gogo Magogo kaan ma, Meseki nun Tubali manga gbeena, i nabiya falan ti a xili ma. 3 A fala a xa, i naxa, ‘Marigina Alatala ito nan falaxi, a naxa: N bata keli i xili ma Gogo, Meseki nun Tubali manga gbeena. 4 N karafen birama nen i deni, n yi i karahan, n yi i ramini i konni e nun i ya ganla birin, e nun i ya soone nun i ya soo ragine, naxanye yenge so seene yebaxi, e nun sofa gali gbeena ye masansan wure lefa gbeen nun a xurin suxi naxanye yii naxanye fatan yengen soe silanfanna ra. 5 Perise kaane nun Kusi kaane nun Puti kaane fan sigama nen i foxo ra, ye masansan wure lefaan nun wure komatin naxanye yii. 6 E nun Gomere kaane nun e sofa ganle birin, e nun Beti-Togarama kaane, naxanye keli komen foxoni, e nun e ganle birin, e nun siya

wuyaxine sigama nen i foxo ra.” 7 “Keli, i yi i yiton, e nun gali gbeen naxanye birin i foxo ra, bayo i tan nan doxi e birin xun na. 8 Loxona nde, n na a ragidima i ma nen jee wuyaxi dangu xanbini, i siga na yamanan xili ma naxan muxuye futuxuluxi silanfanna bun ma, naxanye kelixi yamana wuyaxi yi, e sa e malan Isirayila geyane fari naxanye bata yi lu rabejinxi xabu waxati xunkuye. E birin bata keli siyane ye, e yi lu doxi boje xunbenli. 9 E nun e ganle birin kelima nen e nun siya wuyaxine, e yi fa e yamanani alo tule gbeena, alo kundaan naxan sama yamanan xun ma.” 10 “Marigina Alatala ito nan falaxi, a naxa: Na loxoni, miriyane soma nen i bojeni, i yi kote jaxini ton. 11 I a falama nen, i naxa, “N sa fuma nen yamana makantantaren ma, n yi muxune yenge naxanye boje xunbelixi, e lanni, naxanye doxi taane yi yinna mi naxanye rabilinni, naxanye taan so deeye mi balanma wurene ra. 12 N na e yii seene tongoma nen yengeni, n yi e nafunle muja.” Muxune mon bata doxo taa xonna naxanye yi, i sa fuma nen ne ma, yamaan naxan naminixi siya gbetene ye, naxanye bata xuruseene nun nafunla soto, naxanye doxi dunuja tagini. 13 Saba nun Dedan nun Tarasisi yulane nun e sofa senbemanane birin a falama nen i ma, e naxa, “I faxi yenge yi se tongoden nin ba? I ya ganla malanxi nafunla nan mujadeyi ba, alogo e xa gbetin nun xemaan xali, e yi xuruseene nun nafunla tongo, e yi se wuyaxi tongo yengeni?” 14 “Nanara, adamadina, nabiya falan ti. A fala Gogo xa, i naxa, ‘Marigina Alatala ito nan falaxi, a naxa: Isirayila kaane na lu boje xunbenli loxon naxan yi, n ma yamana, i na kolonma nen. 15 I fama nen, i sa keli i doxodeni sogeteden komen foxoni pon, e nun siya wuyaxin naxanye i foxo ra, e birin doxi soone fari, yama gbeena, gali senbemanana. 16 I sa fuma nen Isirayila kaane ma, n ma yamana, alo kundaan naxan sama yamanan xun ma. Waxati famatoni, n na i rafama nen n ma yamanan xili ma alogo siyane xa n kolon, n na n ma sarijanna mayita i tan xon e yetagi waxatin naxan yi.” 17 “Marigina Alatala ito nan falaxi, a naxa: N falan ti i tan nan ma fe yi Isirayila nabine xon waxati danguxine yi ba, n ma walikene? Na waxatini, e nabiya falane ti nen jee wuyaxi bun, fa fala a n na i rasigama nen n ma yamaan xili ma. 18 Na loxoni, Gogo fama nen Isirayila yamanan xili ma, n bojen yi te, n xolo han! Marigina Alatala falan nan na ra. 19 N fitinaxina a ragidi nen n ma xolo gbeeni, fa fala na loxoni boxon xuruxurun

gbeen tima nen Isirayila yi. 20 Yexene nun xoline nun burunna subene nun niimaseene birin xuruxurunma nen gaxuni n yetagi, e nun muxun naxanye birin bɔxɔ xɔnna fari. Geyane godoma nen, tintin yirene birin yi wuru, yinne birin yi bira bɔxɔni. 21 N yengen nakelima nen Manga Gogo xili ma n ma geyane birin fari. Birin silanfanna tongoma nen a ngaxakedenna xili ma. Marigina Alatalaa falan nan na ra. 22 N Gogo makitima nen fitina furen nun sayaan na, n tule gbeen nun balabalan kesene nun dole tɛɛn nafa a xili ma e nun a ganle nun siya wuyaxin naxanye a fɔxɔ ra. 23 N na n ma gboon nun n ma sarijanma mayitama nen, n yi a liga siya wuyaxine yi n kolon. Nayi, e a kolonma nen a Alatala nan n na.”

39 “Adamadina, nabiya falan ti Manga Gogo xili ma, a fala a xa, i naxa, ‘Marigina Alatala ito nan falaxi, a naxa: N bata keli i xili ma Gogo, Meseki nun Tubali manga gbeena. 2 N na i karahanma nen, i yi keli i ya yamanani sogeteden kɔmenna ma pon, n yi i xali Isirayila geyane fari. 3 N na i ya xanla ragarinma ayi nen, a bira i kɔmenni, n yi i ya xalimakunle rayolon i yiifanni. 4 I faxama nen Isirayila geyane fari, i tan nun i ya ganle nun siyaan naxanye birin i fɔxɔ ra. N yi i binbin lu xoline nun burunna subene bun e balon na. 5 I faxama nen burunna ra, bayo n tan bata a fala. Marigina Alatalaa falan nan na ra. 6 N tɛɛn nafama nen Magogo yamanani, e nun na kanne konni naxanye birin dɔxi ige tagi bɔxɔne yi bɔɲɛ xunbenli. Nayi, e a kolonma nen a Alatala nan n na. 7 N na a ligama nen Isirayila kaane yi a kolon a n xinla sarijan. N mi fa n ma yamaan luyɛ sɔnɔn e yi n xinla sarijanma kala. Nayi, siyane a kolonma nen a n tan Alatala nan sarijan Isirayila yamanani.” 8 “Marigina Alatalaa falan ni ito ra: Na feene fama nen, e yi rakamali. N falan tixi na lɔxɔn nan ma fe yi. 9 Nayi, Isirayila kaane minima nen taani, e yi yaxune yengɛ so se biraxine matongo, e yi e gan yegen na, yɛ masansan wure lefa xurin nun a xungbene, e nun xanle nun xalimakunle nun yengɛ so dunganne nun tanbane. Ne mi gan janɲɛ han ɲɛɛ solofere. 10 E mi yege fenɲɛ burunna ra, e mi se sɛgɛ fɔtɔnne yi, bayo yaxune yengɛ so seene nan ganma yegene ra. Naxanye e yii seene tongo yengeni, e fan ne yii seene tongoma nen yengeni. Naxanye e nafunla ba e yii, e fan yi ne nafunla ba e yii. Marigina Alatalaa falan nan na ra.” 11 “Na lɔxɔni, n sigatine lanban yiren findima nen

gaburu soon na Manga Gogo xa Isirayila yamanani fɔxɔ ige daraan sogeteden binni. A kiraan bolonma nen dangu muxune yɛɛ ra bayo Gogo maluxunma menna nin e nun a ganla birin, menna yi xili sa Gogo a ganla lanbanna. 12 Isirayila yamana e maluxunma nen kike solofere alogo yamanan xa rasarijan. 13 Yamanan muxune birin e maluxunma nen, na yi findi xunna kenla ra e xa, n na n ma binyen makenen lɔxɔn naxan yi. Marigina Alatalaa falan nan na ra.” 14 “Muxune sugandima nen, e yi yamanani siga binbine fendeni waxatin birin. Muxu faxaxin naxanye bɔxɔn fari ma, muxu gbeteye yi dangu ne maluxunɲɛ. Na fɔlɔma nen kike solofere na dangu, e yi bɔxɔn nasarijan na kiini. 15 Na muxun naxanye danguma yamanani, na nde keden na muxune xonne to, a taxamasenna tima nen mɛnni alogo gaburu geene xa sa e maluxun Gogo a ganla meremerɛni. 16 E mɔn taana nde xili sama nen mɛnni fa fala “Galiya.” Yamanan nasarijanma na kii nin.” 17 “Adamadina, Marigina Alatala ito nan falaxi, a naxa: A fala xɔliin sifan birin xa, e nun burunna subene birin, i naxa, ‘ɛ e malan, e fa, e malan sa keli yiren birin yi, e fa n ma saraxa suben dondeni, n tan yetɛɛn naxan bama e xa. Saraxa gbeen nan na ra Isirayila geyane fari! E suben donma nen, e yi wunla min. 18 E sofa wekilexine subene donma nen, e yi dunuɲa mangane wunla min, naxanye faxaxi alo kontonne nun yexɛene nun kɔtɔne nun turane, e birin naturaxi alo Basan yamanan xuruseene. 19 E turen donma nen n ma saraxani n naxan bama e xa, e wasa a ra. E wunla minma nen alo dɔlɔna han e xun magi a ra. 20 E lugoma nen soone suben nun soo ragine suben na n ma donse dondeni, e nun sofa wekilexine nun yenge sone sifan birin suben na.’ Marigina Alatalaa falan nan na ra.” 21 “N na n ma binyen mayitama nen siyane tagi, siyane birin yi n ma kiti saxin to, n na n senben nagodo e xili ma waxatin naxan yi. 22 Nayi, keli na lɔxɔn ma han waxati famatɔna, Isirayila yamana a kolonma nen a Alatala nan n na, e Ala. 23 Nayi, siyane a kolonma nen a Isirayila kaane yulubine nan ma fe a ligaxi e sigaxi konyiyani, e to tinxintareyaan liga n na, n yi n yetagin luxun e ma, n yi e sa e yaxune sagoni alogo e xa e faxa yengeni. 24 N na e saranma nen e fe xɔsixinɛ nun e murute feene ra, n yi n yetagin luxun e ma.” 25 “Na ma, Marigina Alatala ito nan falaxi, a naxa: Iki, n mɔn xetema nen Yaxuba bɔnsɔnna muxu suxine ra, n kininkinɛnen Isirayila kaane birin ma, n yi n sɔbɛ so alogo birin xa n xili sarijanxɛn

binya. **26** Nayi, e jinanma nen e yagin xon e nun e tinxintareyaan naxanye birin ligaxi n na. E mon luma nen makantanni e boxoni, muxune mi fa e yimaxama. **27** N na e ramini siyane ye waxatin naxan yi, n na e malan sa keli e yaxune yamanane yi, n na n ma sarijanna mayitama nen e xon siya wuyaxine yetagi. **28** Nayi, e a kolonma nen a Alatala nan n na, e Ala, amasoto hali n to e raxuyaxi ayi siyane tagi konyiyani, n mon e malanma nen e konni, n mi e sese luma na. **29** N mi fa n yetagin luxunma e ma nayi sonon, bayo n na n ma Nii Sarijanxin nagodoma nen Isirayila yamaan fari. Marigina Alatalaa falan nan na ra.”

40 Nxo konyiyaan jee maxajen nun suulunden kike singen xi fude laxoni, Yerusalen taan kalan jee fu nun naaninden, na laxon yeteni, Alatala yi n tongo, a yi siga n na na yi. **2** Ala yi n xali Isirayila yamanani fe tooni alo xiyena. A yi n nate geya matexina nde fari banxine yi tixi naxan sogeteden yiifari foxoni alo taana. **3** A yi n xali menni, n yi dajoxona nde to, a kiin luxi alo wure gbeela. Taa dugi lutin yi suxi a yii e nun tamina, se maliga sena. A yi tixi dena nde ra. **4** Na muxun yi a fala n xa, a naxa, “Adamadina, i yeen ti, i tuli mati, i yengi sa feni itoe birin xon n naxanye yitama i ra, amasoto i faxi be na nan ma, i yi sa a fala Isirayila yamaan xa i na naxan birin to.” **5** N yi a to, yinna nde yi Ala Batu Banxin nabilinxi a yiren birin yi. Se maliga tamin yi suxi na muxun yii a kuya nongonna ye sennin, koni na tamin nongonne yi kuya nongonna yeteen xa. Nongonna keden e nun yii kuiin yee keden nan yi e kuyan na nun. A yi yinni gboon maliga, e nun se maliga tamin kuyan yi lan. A yiteen fan nun se maliga tamin kuyan yi lan. **6** Na xanbi ra, a yi siga yinna so deen na denaxan yi yee rafindixi sogeteden ma. A yi te tedene ma so mena kui. A yi yinna so deen fari binna maliga, na kuyana, se maliga tamin ye keden. **7** Konkodine nan yi rafalaxi yinna so deen kanke, kantan tiine yi tiye yiren naxanye yi. Ne birin yi kuya se maliga tamin ye keden keden, e yigbona, a ye keden. Nongonna ye suulun nan yi kantan tiine konkodine longonne ra. So deen mini deen yinna kuiin ma, na yi kuya se maliga tamin ye keden. **8** Na muxun mon yi na so de palaan maliga naxan yi yinna kuiin binni: **9** A yi kuya nongonna ye solomasexe. A banxin kankeni gbona, nongonna ye firin. Na so de palaan yi a kui nen, a yee rafindixi Ala Batu Banxin ma. **10** Yinna so deen naxan yi sogeteden

binni, kantan tiine konko saxanne nan yi rafalaxi a so deen kanke a foxo firinna birin yi. Ne birin yi lan. E birin yi tagi kuya kii kedenni. **11** A yi deni gboon maliga, nongonna ye fu, a kuyana, nongonna ye fu nun saxan. **12** Sansandina nde yi tixi kantan tiine konkone yetagi, a yitena nongonna ye keden. Kantan muxune konkone tan yigbona nongonna ye sennin, e kuyana, a ye sennin. **13** A yi so deen yiren maliga, keli sansandi kedenna konden ma han gbete bode foxoni, na yigbona, nongonna ye maxajen nun suulun. **14** A yi so deen palaan maliga kantan tiine konkone yetagi, na kuyana, nongonna ye tonge sennin. Na yi sa danxi yinna so deen kui xiin nan ma. **15** Keli yinna so deen fari ma xiin ma han so deen kui xiin palana, nongonna ye tonge suulun. **16** Foye sodene nan yi palaan banxi kankene birin ma wure sansanne tixi naxanye ma kantan tiine konkone yiren birin yi. Ndee fan yi so deen palaan ma. Banxi kanken naxanye yi kantan tiine konkone longonne ra, tugu yii sawurane nan yi kerendenxi ne rayabu seen na. **17** A yi n xali Ala Batu Banxin yinna kui. Na yinna kuiin nabilinna yitonxi geme daxine nan na boxon ma a lonna ra, a yi rabilinxi konko tonge saxan nan na naxanye yi doxi yinna ra. **18** A kuiin nabilinna birin yi doxi geme malaxunxine nan na alo lonna. A rabilinna yi magodo yinna kuiin tagiyaan xa. **19** A yi a kuyan maliga, keli yinna fari ma xiin so deen palaan yetagin ma han Ala Batu Banxin yinna kui xiina. Na yi lan nongonna ye keme ma sogeteden mabinna nun a komen foxon fan xa. **20** Yinna so deen naxan yi yee ra findixi sogeteden komenna ma, a yi na kuyan nun a yigboon maliga. **21** Kantan muxune konkone, saxan be binni, saxan be binni, e nun banxi kanken naxanye yi ne longonne ra e nun a so deen palana, ne nun yinna so deen boden birin yi lan, a kuyana nongonna ye tonge suulun, a yigbona, nongonna ye maxajen nun suulun. **22** Na so deen foye sodene nun a kantan tiine konkone nun a tugu yii sawura kerendenxine, ne birin nun so deen boden gbeene yi lan naxan yi yee ra findixi sogeteden binna ma. San tide solofere nan yi tedene na a so deen palaan yetagi. **23** Ala Batu Banxin yinna kui xiin so dena nde yi yinna komen foxon so deen yetagi, alo a yi kii naxan yi sogeteden mabinni. Na muxun yi na kuyan maliga keli yinna fari ma xiin so deen ma han yinna kui xiin so dena, nongonna ye keme. **24** A yi ti n yee ra siga yinna yiifari foxon mabinni, n yi so de gbete to naxan yi yee rafindixi yiifari foxon ma. A

yi a yirene maliga, na fan yi lan bonne ma. **25** Foye sodene yi yinna so deen nun a so de palaan yiren birin ma alo bonne yi kii naxan yi. A kuyana, nongonna ye tonge suulun, a yigbona nongonna ye maxojen nun suulun. **26** San tide solofere nan yi teden na a so deen palaan yetagi. Banxi kanken yi rayabuxi tugu yii sawura kerendexine nan na kantan tiine konkone longonne ra. **27** Ala Batu Banxin yinna kui xiin so dena nde fan yi yiifari foxoni. Na muxun yi a kuyan maliga keli yinna kui xiin so deen ma han yinna fari ma xiin so dena, nongonna ye keme. **28** Na xanbi ra, a yi fa n na Ala Batu Banxin yinna kui xiini, n so a yiifari ma so deen na. A yi so deen maliga, na fan nun bonne birin yi lan. **29** Kantan muxune konkone nun banxi kanken naxanye yi ne longonne ra e nun a so deen palana, ne nun so deen bonne birin yi lan. Foye sodene yi so deen nun a palaan yiren birin ma. A kuyana, nongonna ye tonge suulun, a yigbona, nongonna ye maxojen nun suulun. **30** So deene palaan naxanye yi yinna ma, ne yi kuya nongonna ye maxojen nun suulun, e yigbona nongonna ye suulun. **31** So deen palaan yi yee rafindixi yinna fari ma xiin nan ma, a senbetenne yi rayabuxi tugu yii sawura kerendexine nan na. San tide solofere nan yi teden na. **32** Na xanbi ra, a yi fa n na yinna kui xiin sogeteden mabinni, a yi so deen maliga, na fan nun bonne birin yi lan. **33** Kantan muxune konkone nun banxi kanken naxanye yi ne longonne ra e nun a so deen palana, ne nun so deen bonne birin yi lan. Foye sodene yi so deen nun a palaan yiren birin ma. A kuyana, nongonna ye tonge suulun, a yigbona, nongonna ye maxojen nun suulun. **34** A so deen palaan yi yee rafindixi yinna fari ma xiin nan ma. A senbetenne yi rayabuxi tugu yii sawura kerendexine nan na. San tide solofere nan yi teden na. **35** Na xanbi ra, a yi fa n na komen foxon so deen na, a yi a maliga. E nun bonne birin yi lan. **36** Kantan muxune konkone nun banxi kanken naxanye yi ne longonne ra e nun a so deen palana, ne nun so deen bonne birin yi lan. Foye sodene yi a yiren birin ma. A kuyana, nongonna ye tonge suulun, a yigbona, nongonna ye maxojen nun suulun. **37** A so deen palaan yi yee rafindixi yinna fari ma xiin nan ma. A senbetenne yi rayabuxi tugu yii sawura kerendexine nan na. San tide solofere nan yi teden na. **38** Konkona nde yi sansanna so de palane kui saraxa xuruse gan daxine yi maxama denaxan yi. **39** Tabali firin firin yi so deen palaan foxo firinna birin

yi xuruseene yi koe raxabama de naxanye yi alogo e xa ba saraxa gan daxin na hanma yulubi xafari saraxana hanma yangin saraxana. **40** Tabali firin firin mon yi so deen palaan be binna nun be binni teden dexon yinna kui xiin komen foxon so deen na. **41** Nayi, tabali naanin yi so deen be binni, naanin be binni, e birin malanxina tabali solomasexe xuruseene yi koe raxabama denaxanye yi. **42** Tabali naanin gbete ye fan yi na yi naxanye rafalaxi geme masolixine ra saraxa gan daxine fe ra, e birin kuyana nongonna ye keden e nun a tagi, e yigbona nongonna ye keden nun a tagi, e yitena nongonna ye keden. Waliseene nan yi ne fari xuruseene koe raxabama naxanye ra alogo e xa ba saraxa gan daxin na hanma saraxa gbete. **43** Banxin kanken yi rayabuxi a rabilinna birin yi sawura kerendexine nan na naxanye rabinya yi yiin ye keden liye. Tabanle yi rafalaxi saraxa subene nan ma fe ra. **44** Konko firin yi yinna kui xiin kui, kedenna komen foxon so deen dexon, a yee rafindixi yinna kuiin ma, kedenna yiifari foxon so deen dexon a yee rafindixi yinna kuiin ma. **45** Na muxun yi a fala n xa, a naxa, "Konkon naxan yinna kui xiin komen foxoni, saraxaraline nan gbee na ra naxanye Ala Batu Banxin feene xun na. **46** Konkon naxan yinna kui xiin yiifari foxoni, saraxaraline nan gbee na ra naxanye saraxa ganden feene xun na. Sadoki yixetene nan ne ra, Lewi bonsonna muxune. Ne gbansanna nan noe e masoe Alatala yetagi e a wanle ke." **47** Na xanbi ra, a yinna kui xiin kuiin maliga. A kuyana nongonna ye keme, a yigbona nongonna ye keme. Saraxa ganden yi Ala Batu Banxin yetagi. **48** A yi fa n na Ala Batu Banxin tanden ma, a yi a so deen palaan maliga. A senbetenne yigboon nabinyana nongonna ye suulun suulun. A deni gbona nongonna ye fu nun naanin. Banxi kanken naxanye yi so deen be binna nun be binni, ne kuyana nongonna ye saxan saxan. **49** Nayi, Ala Batu Banxin so deen palaan birin yigboon yi nongonna ye maxoje nan na, a kuyana nongonna ye fu nun firin keli deen ma siga yeen na. Te yi tima san tidene nan fari. Senbeten keden keden nan yi tixi so deen be binna nun be binni.

41 Na muxun yi n xali banxin kui yire sarijanxi singeni. A yi a senbetenne maliga, a foxo kedenna yigboon nongonna ye sennin, a foxo kedenna boden fan nongonna ye sennin. **2** Banxin deni gbona, nongonna ye fu, banxi kanken naxanye deen be binna

nun be binni, nongonna ye suulun suulun. A mon yi banxin kui yire sarijanxi singen maliga, a kuyana nongonna ye tonge naanin, a yigbona nongonna ye mɔxɔŋɛ. **3** A yi so banxin kui yire sarijanxi firinden, a yi a so dɛɛn senbetenne maliga, e firinna birin yigbona, nongonna ye firin firin. A so deni gbona nongonna ye sennin. Banxi kanken naxan yi dɛɛn be binna nun be binni, nongonna ye solofere solofere. **4** A yi banxin kuiin yire sarijanxi firinden kuyan maliga, nongonna ye mɔxɔŋɛ, a yigbona nongonna ye mɔxɔŋɛ. A yi a fala n xa, a naxa, “Yire Sarijanxi Fisamantenna ni ito ra.” **5** A yi Ala Batu Banxin kanken maliga, a yigbona nongonna ye sennin. Konkodine yi banxin kui a rabilinna birin yi, e yigbona nongonna ye naanin. **6** Konkodin naxanye yi banxin kui a rabilinni, ne mon yi e bode fari kore banxiramaan na han dɔxɔ saxan, a dɔxɔ yo dɔxɔ konkodi tonge saxan saxan. Konkodine nan yi banxi kanken kui xiine senbe soma. E yi nde bama banxi kanken fari ma xiini gboon na, koni e mi yi se bama banxi kanken kui xiini gboon na. **7** Konkodine yigboon yi sigama fari se, e nɛma tema bayo a yi tema nde be banxi kanken na. Muxune yi nɛ tɛ te seene ma keli bɔxɔni, sa te kore banxin firinden han a saxandeni. **8** N yi a to a banxin yirena nde yi konkodine ma e bun ti seen na, na yigbona se maliga tamin ye keden, naxan yi lanxi nongon kuyen ye senninna ma. **9** Konkodine banxi kanken fari ma xiini gboon yi nongonna ye suulun nan na. Yirena nde magenla yi Ala Batu Banxin **10** nun saraxaraline banxine tagi, na yigbona nongonna ye mɔxɔŋɛ Ala Batu Banxin nabilinna birin yi. **11** Dɛɛne yi konkodina ndee ma naxanye yi rabiye lan na yiren ma, kedenna kɔmɛn fɔxɔn ma, kedenna yiifari fɔxɔn ma. Sigatidena nde yi lu banxin nabilinna birin yi, na yigbona nongonna ye suulun. **12** Banxina nde yi yɛɛ rafindixi yinna kuiin ma a sogegododen binni, na yigbona nongonna ye tonge solofere. Na banxin kankeni gboon yi nongonna ye suulun nan na a rabilinna birin yi. Banxin kuyana nongonna ye tonge solomanaanin. **13** Na muxun yi Ala Batu Banxin maliga, a kuyana nongonna ye kɛmɛ. Yire magenla nun banxin bonna fan nongonna ye kɛmɛ. **14** Yinna kui xiin sogetede binna fan, nongonna ye kɛmɛ. Ala Batu Banxin yi lu na tagiyani. **15** Na muxun yi banxin maliga naxan yɛɛ yi rafindixi yinna kuiin ma Ala Batu Banxin xanbi ra. Banxin nun banxi kui yiren naxanye a fɔxɔ firinna birin yi, na birin malanxin kuyana

nongonna ye kɛmɛ. Ala Batu Banxin yire sarijanxi singen nun a firindena e nun a so dɛ palaa naxan yɛɛ yi rafindixi yinna kuiin ma **16** e nun e dɛ yirene nun e foye sode yixurine nun banxine kui yiren naxanye na yire saxanne rabilinxi, farinne yi saxi na banxi kankene birin ma e rayabu seen na han e so dɛɛne. Banxi lonna nun banxi kanken yi rayabuxi farinne nan na siga han foye sodene. Foye sodene fan yi nɔɛ balanɛ nɛn. **17** Banxin yire sarijanxi firinden so dɛɛn xun ma e nun yire sarijanxi firinne rabilinne banxi kankene birin ma, **18** maleka gubugubu kan sawurane nun tugu yiine sawurane yi masolixi mɛnne nan ma. Tugu yii sawurane yi solixi maleka gubugubu kan sawurane longonne ra. Yetagi firin firin nan yi maleka gubugubu kan sawurane ma. **19** Yetagi keden yi luxi alo adamadiin gbeena naxan yi yɛɛ rafindixi tugu yii kedenna ma. Yetagin bonna yi luxi alo yatan yetagin naxan yi yɛɛ rafindixi tugu yiin bonna ma. Ne yi solixi Ala Batu Banxin yiren birin ma. **20** Keli banxin yire sarijanxi singen lonna ma siga han a so dɛɛn xun ma, maleka gubugubu kan sawurane nun tugu yii sawurane nan yi solixi banxi kanken ma. **21** Yire sarijanxi singen dɛ rati wudine yi rafalaxi tongon naanin nan ma, fɛ mi yi naxanye ti kiin na. Yire Sarijanxi Fisamantenna dɛ rati wudine fan yi na kii nin. **22** Se ralixine dɔxɔ se tabanla yi na yi, a yitena nongonna ye saxan, a fɔxɔ firinne birin yigbona, nongonna ye firin firin. A tongonne nun a bun tiin nun a dɛxɔnne yi rafalaxi wudin nan na. Na muxun yi a fala n xa, a naxa, “Tabanla ni ito ra, naxan Alatala yetagi.” **23** Yire sarijanxi singen nun Yire Sarijanxi Fisamantenna firinne birin, dɛ firin nan yi tixi e so dɛɛn na. **24** E dɛ firinne yi rabima yiifanna nun kɔmɛnna nan ma. **25** Maleka gubugubu kan sawurane nun tugu yii sawurane yi solixi yire sarijanxi singen dɛɛn ma alo naxanye yi banxi kankene ma. Wudi xunna soon yi rafalaxi so dɛ palaa so dɛɛn xun ma. **26** Foye sode yixurine yi so dɛ palaa dɛxɔnne ma wure sansanna naxanye ma, tugu yii sawurane yi solixi banxi kanken ma foye sodene fɔxɔ firinne birin yi. Wudi xunna soon yi rafalaxi konkodine fan yetagi.

42 Na muxun yi ti n yɛɛ ra kɔmɛn fɔxɔni, mini yinna kui xiin fari ma, a fa n na banxin dɛxɔn ma naxan yi yinna kɔmɛn fɔxɔn yetagi yinna kui xiin xɔn ma. **2** Na banxin kuyana nongonna ye kɛmɛ, a yigbona nongonna ye tonge suulun, a dɛɛn yi rabima

kōmen fōxōn nan ma. **3** Nōngōnna yē mōxōjē yi luxi Ala Batu Banxin nabilinni, gēme dōxine fan yi yinna fari ma xiin dē a lonna ra. Banxini ito yi mēne nan longori ra. Kore banxin dōxōde saxan nan yi a ra Ala Batu Banxin kore banxin yetagi. **4** Konkon naxanye yi kore banxine kui, sigatiden yi danguma ne birin tagi banxin kui. Sigatideni gbona, nōngōnna yē fu, a kuyana nōngōnna yē kēmē. Konkone yi rabima kōmen fōxōn nan ma. **5** Konkon naxanye yi kore banxin faxa ra xiine kui, ne yi yixurun dangu a laberaxine ra bayo sigatidene yi nde baxi e yigboon na dangu firinna bonne ra. **6** Konkon naxanye yi kore banxin xuntagi, sēnbeten yo mi yi ne ma alo e yi yinna ma kii naxan yi. E mōn yi yixurun dangu kore banxin singen nun a firinden konkone ra. **7** Konkon naxanye yi rafalaxi banxini yinna fari ma xiin mabinni, ne yi danxi banxin tagiyaan nin, e kuyana nōngōnna yē tonge suulun. **8** Konkon naxanye yi yinna mabinni banxin kui, ne kuyana nōngōnna yē tonge suulun, koni konkon naxanye yi yire sarijanxin mabinni, ne kuyana nōngōnna yē kēmē. **9** So yi tima banxin sogeteden mabinna nin keli yinna fari ma xiin binni siga labe ra konkone kui. **10** Yiifari fōxōni, banxina nde fan yi yinna fari ma xiin yetagi Ala Batu Banxin yinna kui xiin ma, konkone fan yi na banxin kui. **11** Sigatidena nde yi konkone tagi. Na banxin nun banxin naxan yi kōmen fōxōni, ne firinna birin kuyan nun e yigboon yi lan e nun e so dēene nun e yēba kiina. Yiifari fōxōn banxin so dēene **12** nun kōmen fōxōn banxin konkone so dēene birin yi lan. So yi tima konkone longonna ra sigatiden nan xōn keli sogeteden binni. **13** Na muxun yi a fala n xa, a naxa, “Banxin naxanye kōmen fōxōn nun yiifari fōxōni, naxanye rabima Ala Batu Banxin yinna kui xiin kuiin binni, saraxaraline nan gbee ne ra, naxanye walima Alatala yetagi, e saraxa sarijanxi fisamantenne subene donma denaxan yi. Na saraxa sarijanxi fisamantenne ramarama mēne yi nēn alo bogi se saraxane nun yulubi xafari saraxane nun yangin saraxane bayo na yirene sarijan. **14** Saraxaraline na so yire sarijanxin longonne ra, e mi nōē minē, siga yinna fari ma xiin kui fō e na e saraxaraliya wali dugine ba e ma, e yi e lu na bayo ne sarijan. Ne lan nēn e xa dugi gbeteŷe ragodo e ma benun e xa siga yamaan yirene yi.” **15** A yelinxina Ala Batu Banxin kuiin yirene malige, a yi siga n na, mini sogeteden so dēen na, a yinna fari ma xiin maliga. **16** A yi yinna sogeteden mabinna

maliga se maliga tamin na, a kuyana nōngōnna yē kēmē suulun. **17** A yi yinna kōmen fōxōn maliga se maliga tamin na, a kuyana nōngōnna yē kēmē suulun. **18** A yi yinna yiifari fōxōn maliga se maliga tamin na, a kuyana nōngōnna yē kēmē suulun. **19** A yi yinna sogeteden binna maliga se maliga tamin na, a kuyana nōngōnna yē kēmē suulun. **20** A yinna fari ma xiin yirene birin maliga na kii nin, a kuyan nun a yigbona, nōngōnna yē kēmē suulun. A yi rabilinxi yinna nan na alogo se sarijanxine nun se gbeteŷe xa fata.

43 Na muxun yi n xali so dēen binni, naxan yi yēē rafindixi sogeteden binna ma. **2** Nayi, n yi Isirayilaa Alaa nōrōn to fē sa keli sogeteden binni. A xuiin yi luxi alo ige walanna xuina, bōxōn yi mayilenma a nōrōn na. **3** N yi fe toon nan tima alo xiyena. Na yi luxi nēn alo n fe toon naxan ti Ala to yi fama taan kaladeni. Na fe toone mōn yi luxi alo n naxan to Kebari baan dē. Nayi, n yi bira, n yetagin yi lan bōxōn ma. **4** Alatalaa nōrōn yi so dēen na naxan yi sogeteden binni. **5** Alaa Nii Sarijanxin yi n tongo a yi n xali Ala Batu Banxin yinna kui xiini. Alatalaa nōrōn yi banxin nafexi. **6** Na muxun yi tixi n fēma waxatin naxan yi, n yi muxuna nde xuiin mē naxan yi falan tima banxini. **7** A yi a fala n xa, a naxa, “Adamadina, n ma manga gbēden luma be nin. N na n sanna tima be nin. N luma nēn be Isirayila kaane tagi habadan. Isirayila yamaan nun e mangan mi fa n xili sarijanxin sarijananna kalama e yalunyaan xōn sōnōn, e nun e mangane binbine xōn e suxure batudene yi. **8** E dōxōden so dēen yi rafalaxi n dōxōden so dēen nan dēxōn, e yi e banxin dē rati wudine ti n ma banxin dē rati wudine dēxōn. Yin keden peen nan gbansan yi nxu tagi, nayi e bata n xili sarijanxin sarijananna kala e kewali xōsixinē xōn. Nanara, n yi e raxōri n ma xōlōni. **9** Iki e fa e yalunyaan masigama nēn n na, e nun e mangane binbine, n yi lu e tagi habadan.” **10** “Adamadina, Ala Batu Banxini ito ti kiin yēba Isirayila kaane xa alogo e xa yagi e hakēne ra, e yi e miri na banxin ti kiin ma. **11** Xa e yagi e kewanle birin na, i xa banxini ito ti kiin yēba e xa, a yirene tima e bode xōn kii naxan yi e nun a mini dēene nun a so dēene, a birin ti kiin nun a sariyane nun a tōnne birin. Feni itoe birin sebe e xa alogo e xa a ti kiine rakamali, e yi a tōnne birin suxu. **12** Alaa banxin sariyan ni ito ra: Geyaan xuntagin nun a rabilinna birin sarijan han! Banxin sariyan nan na ra.” **13**

“Saraxa ganden nafala kiin ni i ra. A yebaxi nongon kuyen yeen nan ma, nongonna naxan kuya nongonna yeteen xa: yii kuiin yee keden nan saxi nongon keden fari. Folon naxan yi saraxa ganden nabilinni, na yi ratilin nongonna ye keden, a yigbona nongonna ye keden, a jinginna yi lanxi nongonna tagiin nan ma a rabilinni. Saraxa gandeni teen ni i ra: **14** a yi rafalaxi nen alo tedene keli saraxa ganden bundoxon bunna ma han a dɔxo singena, nongonna ye firin. Na yireni gbona nongonna ye keden. Keli a dɔxo singen ma han a firindena, nongonna ye naanin. Na yireni gbona nongonna ye keden. **15** Saraxa ganden xunna fan yi mate na birin xa a tagiyani nongonna ye naanin, teen yi saraxane ganma denaxan yi. Feri naanin yi tixi a tongon naaninne ma. **16** Teen ganma denaxan yi, na yi kuya nongonna ye fu nun firin, a yigbo nongonna ye fu nun firin, tongon naanin nan yi a ma. **17** Denaxan yi na laben na, na fan yi kuya nongonna ye fu nun naanin, a yigboon fan nongonna ye fu nun naanin. A jinginna yi mate a xa a rabilinni nongonna tagi. Na yi yinla lu a fari a rabilinni naxan yigbo nongonna ye keden. Saraxa ganden teden yi yee rafindixi sogeteden binna nan ma.” **18** A yi a fala n xa, a naxa, “Adamadina, Marigina Alatala ito nan falaxi, a naxa: Sariyane ni i ra lan saraxa ganden ma, a na ti loxon naxan yi, alogo saraxa gan daxine xa ba menni, yulubi xafari wunla yi xuya na. **19** I xa tura bulan keden so Lewi bɔnsɔnna saraxaraline yii, naxanye findixi Sadoki yixetene ra, naxanye walima n yetagi alogo a xa ba yulubi xafari saraxan na. Marigina Alatalaa falan nan na ra. **20** I xa a wunla nde tongo, i yi a sa saraxa ganden ferin naaninne ma, i yi nde sa na laben na saraxa ganden dɔxo firinden tongon naaninne ma e nun a jinginna fari na rabilinni. Nayi, i saraxa ganden nasarijanma nen, i yi Ala solona a fe yi. **21** Turaan naxan baxi yulubi xafari saraxan na, i xa na tongo, i yi a gan yirena nde yi, yire sarijanxin fari ma denaxan yebaxi lan na feen ma.” **22** “Xi firindeni, i yi koton ba yulubi xafari saraxan na fe mi naxan na, saraxa ganden yi rasarijan alo a liga turaan na kii naxan yi. **23** I na yelin a rasarijanne, i xa tura bulanna ba saraxan na fe mi naxan na e nun kontonna, fe mi naxan na, naxan tongoxi xuruse xunxurine ye. **24** I xa e rali Alatala ma, saraxaraline yi foxon xuya e fari, e yi e ba saraxa gan dixin na Alatala xa. **25** I xa kotɔ keden ba yulubi xafari saraxan na loxo yo loxo xi solofere, i mon yi tura bulan keden nun konton keden ba saraxan na

keli xuruse xunxurine ye, fe mi naxanye ra. **26** Ala xa solona saraxa gandena fe yi xi solofere alogo a xa rasarijan, a yi ratinme. **27** Na loxone na dangu, folo xi solomasxede loxon ma, saraxaraline xa e saraxa gan daxine nun boje xunbeli saraxane ba saraxa ganden fari, n yi e yisuxu, Marigina Alatalaa falan nan na ra.”

44 Na muxun yi n xali yire sarijanxin yinna fari ma xiin so deen binni, naxan yi yee rafindixi sogeteden binna ma. A yi ragalixi. **2** Alatala yi a fala n xa, a naxa, “Deni ito luma ragalixi nen, a mi rabima. Muxu yo mi dangun be, amasoto Alatala bata so be ra, Isirayilaa Ala. A luma nen balanxi. **3** Koni mangan tan noe dɔxe nen be alogo a xa a dege Alatala yetagi. A soma so deen palaan nan xon, a mon minima men nan na.” **4** Na muxun yi n naso komen ma deen na Ala Batu Banxin yetagi. N yi na mato, n yi Alatalaa noron to, a yi Alatalaa banxin nafexi. N yi bira, n yetagin yi lan boxon ma. **5** Alatala yi a fala n xa, a naxa, “Adamadina, a liga i yeren ma, i yeen ti ki fani, i tuli mati, i yi n ma falane birin name lan Alatalaa banxin tonne nun a sariyane fe ma. A liga i yeren ma naxanye daxa e so banxini e nun naxanye noe mine yire sarijanxini. **6** A fala Isirayila yama murutexin xa, i naxa, ‘Marigina Alatala ito nan falaxi, a naxa: N bata wasa e kewali xosixine ra, Isirayila yamana. **7** E bata tin siya gbetene xa so n ma yire sarijanxin kui, Ala kolontaren naxanye mi banxulanxi, alogo e xa n ma banxin naharamu. E yi donseene nun turen nun wunla ralima n ma waxatin naxan yi, e yi n ma layirin kala e kewali xosixine xon. **8** E mi e yengi dɔxi wanle xon n ma se rasarijanxine fe yi, koni e siya gbeteye nan tixi wanla ra e joxoni n ma yire sarijanxini. **9** Marigina Alatala ito nan falaxi, a naxa: Xɔje yo mi soma n ma yire sarijanxini Ala kolontaren naxanye mi banxulanxi, hali xɔjen naxan dɔxi Isirayila kaane tagi.” **10** “Lewi kaan naxanye e masiga n na, Isirayila kaane e me n na waxatin naxan yi, e yi e xun xanbi so n yi, e bira suxurene foxo ra, ne e haken goronna tongoma nen. **11** Nanara, e noe wale nen n ma yire sarijanxini, e yi e yengi dɔxo n ma banxin yinna so deene xon, e yi wali banxini, e yi xuruseene ko raxaba saraxa gan daxine ra e nun saraxa gbeteye yamaan xa, e ti yamaan yee ra, e wali e xa. **12** Koni, bayo e yi suxurene kima yamaan xa nun, e yi Isirayila yamaan bira hakeni, nanara, n bata n kolo n yiini texin na, fa fala e haken goronna luma nen e xun ma.

Marigina Alatalaa falan nan na ra. **13** Nayi, e mi fa nœ e masœ n na, e yi saraxarali wanle ke, e yi duba naxan na nun. E mi fa nœ e masœ n ma se rasarijanxine ra hanma n ma saraxa sarijanxi fisamantenne. Nayi, e yagima nen lan e kewali xosixine ma. **14** Anu, n na n Batu Banxin wanle soma nen e yii, wanla naxanye birin lan a ke, e ne birin kema nen.” **15** “Koni Lewi bõnsõnna saraxaraliin naxanye mōn findixi Sadōki yixetene ra, naxanye e yengi dōxo n ma wanle xōn n ma yire sarijanxini, Isirayila kaane to yi e masigama n na, ne e masoma n na nen, e yi wali n yetagi. E tima nen n yetagi, e xuruse turen nun wunla rali n ma. Marigina Alatalaa falan nan na ra. **16** E tan nan soma n ma yire sarijanxini, e tan nan e masoma n ma tabanla ra alogo e xa lu n ma wanla ke, e yi e yengi dōxo n ma wanla xōn. **17** Nayi, e na so Ala Batu Banxin yinna kui xiin deene ra, e xa e maxidi taa dugine yi. E nama yexee xabe dugin so, e nema wale n Batu Banxin yinna kui xiin deene ra waxatin naxan yi hanma banxin kui. **18** E taa dugi namune soma nen e xun na, e yi taa dugi wantanne so. E nama tagixidi xidi e tagi kuye wolonna fe ra. **19** E nema sigē yinna fari ma xiini, yamaan denaxan yi, e dugin naxanye soxi walideni, e xa ne sa yire sarijanxin palaan kui, e yi dugi gbete ye so e ma, alogo yamaan xa ratanga e dugi rasarijanxine ma.” **20** “Saraxaraline nama e xunna bi mume, koni e xa e xunna maxaba benun e xun sexen xa kuya ayi. **21** E sese nama dolon min benun e xa so Ala Batu Banxin yinna kui xiin kui. **22** Saraxarali yo nama kaja gilen futu hanma jaxanla naxan nun a xemen fataxi. E xa Isirayila kaa sungutunna nan futu hanma saraxaralina nde a kaja gilena.” **23** “Naxan sarijan e nun naxan mi sarijan, saraxaraline xa yamaan xaran na tagi rabaan ma, e xa a yita e ra naxan haramuxi e nun naxan daxa. **24** Xa kitin muxuna ndee tagi, saraxaraline xa kitin sa e tagi alo sariyana a falaxi kii naxan yi. E xa n ma sariyane nun n ma tōnne suxu lan n ma sali lōxōne birin ma, e yi n ma Matabu Lōxōne rasarijan. **25** Saraxaraliin mi lan a yete a sarijanna kala muxuna nde binbin xōn, fo xa a li a baba hanma a nga nan faxaxi hanma a diina nde hanma a ngaxakeden xemena hanma a magilena nde naxan mi futuxi. **26** Na xanbi ra, fo a mōn xa a yete rasarijan, a yi legedenna ti han xi solofere benun a xa a wanla fōlo. **27** A na so walideni yire sarijanxin yinna kui xiini lōxōn naxan yi, a xa yulubi xafari saraxan ba a yete a fe ra. Marigina Alatalaa falan nan

na ra.” **28** “Saraxaraline keeni ito nan sōtōma: N tan nan findima e keen na. E nama sese so e yii e gbee bōxōn na Isirayila yamanani bayo n tan nan findima e keen na. **29** E bogi se saraxane nan donma, e nun yulubi xafari saraxane nun yangin saraxane nun seen naxanye birin nalixi Ala ma Isirayila yamanani. Ne nan findima e gbeen na. **30** Saraxaraline nan gbee e sansi bogi singene ra e nun seen naxanye birin baxi kiseene ra n xa Isirayila kaane nafunle ra. Muxune xa e bogi se dinxi singene so e yii alogo n xa barakan sa e denbayane fe yi. **31** Koni saraxaraline nama xoline nun subene don naxanye faxaxi e yete ma hanma burunna suben naxanye faxaxi.”

45 “Yamanan na yitaxun Isirayila bõnsõnne tagi waxatin naxan yi, e yirena nde lu Alatala xa bōxo sarijanxin na, a kuyana nōngōnna ye wuli mōxōjen nun suulun, a yigbona nōngōnna ye wuli mōxōje. A birin nasarijanma nen. **2** Na kui, bōxōna nde luma nen yire sarijanxin xa naxan tongon naaninne kuyan lan, nōngōnna ye keme suulun. Bōxo magenla xa lu yire sarijanxin nabilinni nōngōnna ye tonge suulun. **3** Na bōxo sarijanxin kui, yirena nde xa lu a danna, a kuyana nōngōnna ye wuli mōxōjen nun suulun a yigbona nōngōnna ye wuli fu. Yire sarijanxin tima menna nin, yire sarijanxi fisamantenna.” **4** “Yire sarijanxin nan menna ra yamanani. Saraxaraline nan gbee menna ra naxanye wanla ra yire sarijanxini, naxanye walima Alatala yetagi. E banxine luma menna nin, a mōn yi findi bōxo sarijanxin na yire sarijanxin xa. **5** Yirena nde mōn luma nen Lewi bõnsõnna muxune gbeen na naxanye walima Ala Batu Banxini, a kuyana nōngōnna ye wuli mōxōjen nun suulun, a yigbona nōngōnna ye wuli fu. A findima nen e keen na alogo e xa taane ti e dōxōdene ra. **6** Yire gbete luma nen a danna taan gbeen na bōxo sarijanxin dēxōn, a yigbona nōngōnna ye wuli suulun, a kuyana nōngōnna ye wuli mōxōjen nun suulun, na yi findi Isirayila yamaan birin gbeen na.” **7** “Bōxōna nde mōn luma nen a danna mangan xa fōlo bōxo sarijanxin ma sa dōxo fōxo igen na sogegododen binni, a mōn yi fōlo bōxo sarijanxin bode fōxōn ma sa dōxo yamanan danna ra sogeteden binni. A bōxōn nun Isirayila bōnsōn kedenna gbeen birin kuyan xa lan, keli yamanan danna ma sogegododen binni han sogeteden binna. **8** Men nan findima a kee bōxōn na Isirayila yamanani. Nayi, n ma kuntigine mi fa n ma yamaan jaxankatama

sonon, koni e yamanan luma nen Isirayila yamaan yii, birin nun a bonsonna kee boxona.” 9 “Marigina Alatala ito nan falaxi, a naxa: E bata a radangu ayi, Isirayila kuntigine. E gbalon nun jaxankatan dan, e kiti kenden nun tinxinna liga. E ba n ma yamaan kansunje! Marigina Alatalaa falan nan na ra.” 10 “E sikeli tinxinxin nawali. E Efa ligase kamalixine rawali, e se maliga barama defexin nawali. 11 E Efa ligaseen nun e se maliga baraman xa lan nen. Efa liga se fu nun homeri liga se keden xa lan. Se maliga barama fu nun homeri liga se keden xa lan e bode ma. Ne firinna birin yaten xa fata homeri liga seen nan na. 12 Gbeti gbanan keden nun gerasi gbanan maxone xa lan. Gbeti gbanan tonge sennin yi lan ‘mine’ gbanan keden ma.” 13 “E itoe nan bama e se xabaxine ra Ala kiseen na: E na homeri liga seen ye keden malan, e Efa liga seen ye keden tongo, a yitaxun doxode sennin, i keden ba a ra, xa murutu xabaxin na a ra hanma fundenna. 14 Turen tan, na se maliga barama keme na malan, e keden ba a ra. Homeri liga se ye kedenna nun ‘kori’ liga se ye keden xa lan. Ne firinna birin lanma se maliga baraman ye fu nan ma. 15 E mon xa yexee keden tongo, hanma sii keden xuruse keme firin ye Isirayila kaane xuruse rabade sabatixine yi, e findi bogi se saraxane nun saraxa gan daxine nun boje xunbeli saraxane ra alogo Ala xa solona yamaan xa. Marigina Alatalaa falan nan na ra. 16 Yamanan muxune birin xa fa na kiseen na Isirayila kuntigin xon. 17 Mangan nan daxa a fa saraxa gan daxine nun bogise saraxane nun minse saraxane ra sali waxatine yi, kike nenene nun Matabu Loxone ma e nun sali waxatin naxanye birin saxi Isirayila yamaan xa. A tan nan lan a fa yulubi xafari saraxane nun bogise saraxane nun saraxa gan daxine nun boje xunbeli saraxane ra alogo Ala xa solona Isirayila yamaan xa.” 18 “Marigina Alatala ito nan falaxi, a naxa: Kike singen xi singe loxoni, i xa tura bulanna tongo fe mi naxan na, i yi yire sarijanxin nasarijan. 19 Saraxaraliin xa na yulubi xafari saraxan wunla nde tongo, a yi a so Alaa banxin de rati wudine ma e nun saraxa ganden tongon naaninne bundoxone ma e nun yinna kui xiin de rati wudine ma. 20 Kiken xi soloferede loxon fan ma, i mon yi na liga muxune xa naxanye haken ligaxi, e mi a rakelixi a ma hanma e mi a kolon. Ala Batu Banxin nasarijanma na kii nin.” 21 “Kike singen xi fu nun naaninde loxoni, e yi Halagi Tiin Dangu Loxon Sanla raba. Xi solofere sanla nan na ra, e burune

don buru rateseen mi saxi naxanye yi. 22 Mangan xa turaan ba yulubi xafari saraxan na a yete yulubina fe ra na loxoni e nun yamanan muxune birin xa. 23 Xi solofere sanla bun ma, a xa tura solofere ba saraxa gan dixin na Alatala xa e nun konton solofere, fe mi naxanye ra xi soloferene bun, e nun koto keden yulubi xafari saraxan na, loxo yo loxo. 24 A xa murutun kilo tonge saxan saxan nun turen litiri sennin sennin sa turane nun kontonne birin fari bogise saraxan na.” 25 “Kike solofereden xi fu nun suulunde loxoni, Bubu Kui Sanla waxatini, a mon xa fa na seene ra yulubi xafari saraxane nun saraxa gan daxine nun bogise saraxane nun ture saraxane ra.”

46 “Marigina Alatala ito nan falaxi, a naxa: Alaa banxin yinna kui xiin deen naxan yee rafindixi sogeteden binna ma, na luma nen balanxi xi sennin bun ma wanla kema loxon naxanye yi, koni a rabima nen Matabu Loxon nun kike nenan sanla ma. 2 Mangan lan a xa keli yinna fari ma xiin kui, a so so deen palaan xon, a yi ti de rati wudin dexon. Saraxaraline xa mangana saraxa gan dixin ba e nun a boje xunbeli saraxane. Mangan xa a xinbi sin so deen yeteen na, na xanbi ra, a yi mini, koni deen nama ragali han jinbanna. 3 Yamanan muxune xa e xinbi sin Alatala yetagi na so de kedenna ra Matabu Loxon nun kike nenene sali loxone ma. 4 Mangan yexee dii sennin nan bama Alatala xa saraxa gan dixin na Matabu Loxone yi, e nun konton keden fe mi naxanye ra. 5 A xa murutun kilo tonge saxan sa konton kedenna fari bogise saraxan na. Murutun xasabin naxan na a kenan, a xa na sa yexee diine fari bogise saraxan na. A xa turen litiri sennin sa murutun kilo tonge saxan saxanne birin fari. 6 Kike nenan sali loxoni, a xa tura bulan keden ba saraxan na, e nun yexee dii sennin nun konton keden, fe mi naxanye ra. 7 A xa murutun kilo tonge saxan saxan sa turaan nun kontonna fari bogise saraxan na, a murutun xasabin sa yexee diine fari naxan na a kenan. A yi turen litiri sennin sa murutun kilo tonge saxan saxanne birin fari. 8 Mangan nema soe, a xa so so de palaan deen nan na, a mon yi mini na yire kedenni.” 9 “Yamanan muxune na fa Alatala yetagi sali loxone yi, naxan na so koman ma deen xon, a yi a xinbi sin, na xa mini yiifari ma deen na. Naxan na so yiifari ma deen xon, na xa mini koman ma deen na. So tixi kiraan naxan xon, mini nama ti na xon. Koni, mini tima gbete nan

xɔn. 10 Yamaan na so, mangan fan xa so, a yi mini e fɔxɔ ra, e na mini waxatin naxan yi. 11 Sali lɔxɔne nun sɛwa malanne yi, murutun kilo tonge saxan saxan xa sa turane nun kontonne fari bogise saraxan na. Murutun xasabin naxan na a kɛnɛn, a xa na sa yɛxɛɛ diine fari. A xa turen litiri sennin sa murutun kilo tonge saxan saxanne birin fari.” 12 “Xa mangan jɛnige ma saraxan bama Alatala xa hanma saraxa gan daxina hanma bɔjɛ xunbeli saraxana, dɛɛn naxan yɛɛ rafindixi sogeteden binna ma, na xa rabi a xa, a yi a saraxa gan dixin ba hanma a bɔjɛ xunbeli saraxana alo a ligama Matabu Lɔxɔni kii naxan yi, na xanbi ra a yi mini, e yi dɛɛn balan a fɔxɔ ra. 13 Yɛxɛɛ diin jɛɛ kedenna xa ba saraxa gan dixin na Alatala xa lɔxɔ yo lɔxɔ, fɛ mi naxan na. A xa ba xɔtɔn yo xɔtɔn. 14 Xɔtɔn yo xɔtɔn murutu fuɲi kilo suulun xa ba Alatala xa bogise saraxan na naxan namulanxi turen litiri firin na. Lɔxɔ yo lɔxɔ saraxa ba feni ito xa findi habadan sariyan nan na. 15 Yɛxɛɛ diin nun bogise saraxan nun turen xa ba saraxa gan dixin na xɔtɔn yo xɔtɔn han habadan.” 16 “Marigina Alatala ito nan falaxi, a naxa: Xa mangan sena nde tongo a kɛɛni, a yi a fi a diina nde ma, na bata findi na diin kɛɛn na, a findima a yixetɛne kɛɛn nan na. 17 Koni xa a sena nde tongo a kɛɛni, a yi a fi a konyin ma, na konyin gbeen nan na ra han xɔrɔya jɛɛn na a li, na xanbi ra a yi a raxetɛ mangan ma. Mangana diine nan gbee a kɛɛn na. 18 Mangan nama sese tongo yamaan kɛɛni, a nama sese ba e gbeen na. A naxan soma a diine yii kɛɛn na, a xa na tongo a gbeen, alogo muxu yo gbee nama ba a yii n ma yamani.” 19 Na xanbi ra, so dɛɛn naxan yi so dɛ gbeen dɛxɔn naxan yɛɛ rafindixi kɔmɛn fɔxɔn binna ma, na muxun yi n tan Esekiyeli raso mɛnna ra siga konko sarijanxine kui dɛnaxan namaraxi saraxaraline xa. A yi banxin kuiin yirena nde yita n na sogegododen binni. 20 A yi a fala n xa, a naxa, “Yiren nan na ra saraxaraline yangin saraxane nun yulubi xafari saraxane nun bogise saraxane jinma dɛnaxan yi alogo e nama e ramini yinna fari ma xiin kui, alogo yamaan xa ratanga e sarijanna ma.” 21 Na xanbi ra, a yi n xali yinna fari ma xiin kui, a yi n nadangu a tongon naaninne matodeni. N yi sansandina nde to rafalaxi yinna tongon naaninne birin ma. 22 Na sansandine birin kuyana nɔngɔnna yɛ tonge naanin, e yigbona nɔngɔnna yɛ tonge saxan. E naaninne birin gboon yi lan. 23 E birin yi rabilinxi gemɛ sansanna nan na, kudi sodene yi rafalaxi sansanna xɔn. 24

Na muxun yi a fala n xa, a naxa, “Kudi sodene nan itoe ra Alaa banxina wali kɛɛne saraxa subene jinma dɛnaxanye yi yamaan xa.”

47 Na muxun mɔn yi n xali Ala Batu Banxin so dɛɛn na. Igen yi minima banxin so dɛɛn bun ma siga sogeteden binni, bayo banxin yi yɛɛ rafindixi sogeteden binna nan ma. Igen yi minima banxin bun ma yiifari fɔxɔni, a dangu saraxa ganden yiifari fɔxɔni. 2 A yi n namini kɔmɛn fɔxɔn dɛɛn na, a yi n xali yinna fari ma han yinna fari ma xiin so dɛɛn naxan sogeteden binni. Igen yi minima dɛɛn yiifari fɔxɔni. 3 Na muxun to mini sogeteden binni, lutin yi suxi a yii, a yi nɔngɔnna yɛ wuli keden yatɛ. A yi n nagidi igeni. Igen yi n suxuma n wɔsɔxɔn nan ma. 4 A mɔn yi nɔngɔnna yɛ wuli keden yatɛ, a yi n nagidi igeni. Igen yi n suxuma n xinbin nan ma. A mɔn yi nɔngɔnna yɛ wuli keden yatɛ, a yi n nagidi igeni. A yi n suxuma n tagin nan ma. 5 A mɔn yi nɔngɔnna yɛ wuli keden yatɛ, fufaan nan yi a ra, n mi yi nɔɛ naxan yigide, amasɔto igen bata yi te han fɔ n xa n ba nɛn igeni, muxɛ mi yi nɔɛ a yigide. 6 Na muxun yi a fala n xa, a naxa, “Adamadina, i na toxi ba?” A mɔn yi xɛtɛ n na, a n xali fufaan dɛ. 7 A xɛtɛxina n na, n yi wudi wuyaxi to igen dɛ a fɔxɔ firinne birin na. 8 A yi a fala n xa, a naxa, “Igeni ito sigama nɛn sogeteden binni sa godo Araba yamanan binni sa bira Fɔxɔ Ige Daraan ma. A na bɔxɔn Fɔxɔ Ige Darani waxatin naxan yi, dara igen sarijanma nɛn. 9 Fufaan na dɛnaxan birin li niimaseene warama ayi nɛn. Yɛxɛne fan wuyama ayi nɛn, bayo igeni ito mɛnna lima nɛn, fɔxɔ igen yi sarijan. Nayi, igeni ito na dangu dɛnaxan birin yi, seene birin luma nɛn e nii ra mɛnne yi. 10 Nayi, yɛxɛ suxune tima nɛn igen dɛ. Keli En-Gedi ma han sa dɔxɔ En-Egilami ra, e yalane yibandunma nɛn. Na yɛxɛne findima nɛn baa gbeen yɛxɛn sifan birin na. 11 Koni a dɛxɔn dara yirene nun a xudedine mi rasarijanma, e luma nɛn alogo fɔxɔn xa sɔto. 12 Wudi bogilaan sifan birin solima nɛn fufaan dɛ kinki firinne ra. E dɛɛne yi lu xindexi ayi tun, e bogine mi janjɛ mum! E bogima nɛn kike yo kike, bayo igen naxan e yi, na kelima yire sarijanxin nin. E bogin findima nɛn donseen na, e dɛɛne yi findi senna ra.” 13 Marigina Alatalaa ito nan falaxi, a naxa, “Yamanan danne ni i ra, ɛ naxan yitaxunma Isirayila bɔnsɔn fu nun firinne ra e kɛɛn na. Yusufu yixetɛne yire firin nan sɔtɔma. 14 ɛ keden kedenna birin a sɔtɔma nɛn ɛ kɛɛn na alo

n na n kolo kii naxan yi n yiini texin na fa fala a n na a soma nen e benbane yii. Nayi, yamanani ito findima nen e keen na. **15** Yamanan danne ni i ra: Sogeteden komenna binni, keli foxo ige gbeen ma, siga Xetilon taan kiraan xon, dangu Lebo-Xamata ra han Sedadi, **16** siga Berota nun Sibirayimi ma (naxan Damasi taan boxon nun Xamata taan boxon tagi) siga Xasari-Hatikon ma Xawuran yamanan danna binni. **17** Nayi, danna sa foloma foxo igen nan ma siga han Xasari-Enan, Damasi taan danna, Safon komenna binna, siga Xamata taan danna ma. Yamanan komen foxon danna nan na ra. **18** Sogeteden binna danna kelima Xawuran yamanan danna nun Damasi taan danna nan tagi, dangu Yuruden baan xon Galadi yamanan nun Isirayila yamanan tagi siga han Tamari taana Foxo Ige Daraan de. Yamanan danna nan na ra sogeteden binni. **19** Sogeteden yiifanna binna danna, sa keli Tamari taan ma han sa doko Meriba igene ra Kadesi yamanani, dangu Misiran baan xon han sa boxon foxo ige gbeen ma. Yamanan danna nan na ra yiifanna binni. **20** Foxo ige gbeen nan yamanan danna ra sogegododen binni, keli yiifanna ma siga han Lebo-Xamata taana komen foxoni. Yamanan sogegododen binna danna nan na ra.” **21** “E yamanani ito yitaxun e ra fata Isirayila bonsonne ra. **22** E xa a yitaxun e tagi keen na masensenna xon. A xa yitaxun e ra e nun xojen naxanye doki e tagi, naxanye bata diine soto. E yatema nen e ye alo Isirayila diine. E keeni taxunma nen e ra Isirayila bonsonne tagi. **23** Nayi, xojen na doko bonsonna naxan ye, na nan a keen soma a yii. Marigina Alatalaa falan nan na ra.”

48 “Bonsonne xinle ni itoe ra e nun e kee boxone.

Dan bonsonna muxune gbeen luma yamanan sogeteden komen foxon danna binna nin. A danna minima kiraan nan denaxan danguma Xetilon taani siga han Lebo-Xamata taani han Xasari-Enan yi han Damasi taan danna komen foxoni Xamata taan dexon, keli yamanan sogeteden danna ma sa doko sogegododen danna ra Dan bonsonna gbeen nan na ra, yamanan yire yitaxunxi keden nan na ra. **2** Dan boxon danna, keli sogeteden ma sa doko sogegododen na Aseri bonsonna gbeen yi tugun na de, yamanan yire yitaxunxi keden nan na fan na. **3** Aseri boxon danna, keli sogeteden ma sa doko sogegododen na, Nafatali bonsonna gbeen yi tugun na de, yamanan yire yitaxunxi keden nan na fan

na. **4** Nafatali danna, keli sogeteden ma sa doko sogegododen na, Manase bonsonna gbeen yi tugun na de, yamanan yire yitaxunxi keden nan na fan na. **5** Manase danna, keli sogeteden ma sa doko sogegododen na, Efirami bonsonna gbeen yi tugun na de, yamanan yire yitaxunxi keden nan na fan na. **6** Efirami danna, keli sogeteden ma sa doko sogegododen na, Ruben bonsonna gbeen yi tugun na de, yamanan yire yitaxunxi keden nan na fan na. **7** Ruben danna, keli sogeteden ma sa doko sogegododen na, Yuda bonsonna gbeen yi tugun na de, yamanan yire yitaxunxi keden nan na fan na.” **8** “Yuda danna, keli sogeteden ma sa doko sogegododen na, e xa boxona nde lu a danna menni naxan kuyan nun bonsonna bonne birin gbeen kuyan lan, a yigbona, nongonna ye wuli moxojen nun suulun. Yire sarijanxin xa lu a tagi. **9** E denaxan bama na boxon na Alatala xa, na kuyama ayi nen nongonna ye wuli moxojen nun suulun, a yigbona nongonna ye wuli fu. **10** Saraxaraline nan gbee na boxo sarijanxin na. Nongonna ye wuli moxojen nun suulun na a ra komenna ma, a ye wuli fu nan a yigboon na sogegododen binni, a ye wuli fu nan a yigboon na sogeteden binni, a ye wuli moxojen nun suulun a yiifanna ma. Alatalaa yire sarijanxin xa lu a tagi. **11** Saraxaraliin naxanye rasarijanxi Sadoki yixetene ye, ne nan gbee a ra, naxanye n ma wanla kema ki faji e nun naxanye mi e yete raloxi ayi, alo Lewi bonsonna muxune a liga kii naxan yi Isirayila kaane yi e yete raloma ayi waxatin naxan yi. **12** E gbeen findima menna nan na, denaxan sarijan yirene birin xa bayo a baxi boxo ratinmexin nan na. E boxon tugunma Lewine bonsonna boxon danna nan na. **13** Lewi bonsonna muxune gbeen luma nen saraxaraline gbeen danna ra. E firinna birin kuyan findima nongonna ye wuli moxojen nun suulun nan na, a yigbona nongonna ye wuli fu. **14** E nama e boxon mati, e nama a masara gbete ra, a nama fi, amasoto boxo fisamantenna na a ra naxan nasarijanxi Alatala xa.” **15** “Denaxan luma, naxan yigbo nongonna ye wuli suulun, a kuya nongonna ye wuli moxojen nun suulun, men mi rasarijanma. Taan nan tima a tagi, taan muxune yi a rabilinna findi banxidene nun xuruse rabadene ra. **16** Taan danne ni i ra: Nongonna ye wuli naanin keme suulun komenna ma, a ye wuli naanin keme suulun yiifanna ma, a ye wuli naanin keme suulun sogeteden binni e nun a ye wuli naanin keme suulun sogegododen binni. **17** Boxo

magenle xa lu taan nabilinni nongonna ye keme firin tonge suulun. **18** Bɔxo dɔnxena nde luma nen bɔxo sarijanxin sogeteden binni e nun a sogegododen binni, e firinna birin, nongonna ye wuli fu. Menna bogise xabaxine findima muxune nan balo ra naxanye walima taan xa. **19** Muxun naxanye walima taan xa naxanye mena bima, ne fatama Isirayila bɔnsɔnne birin nan na. **20** Bɔxo sarijanxin nun taana bɔxon na malan, na kuyan nun a yigboon xa findi nongonna ye wuli mɔxɔɲen nun suulun nan na.” **21** “Bɔxo sarijanxin nun taana bɔxona, e firinna birin danne kuyana nongonna ye wuli mɔxɔɲen nun suulun. Bɔxo dɔnxena ndee luma nen keli na sogeteden danna ma sa dɔxo yamanan sogeteden danna ra, a dɔnxena ndee mɔn yi lu keli na sogegododen danna ma sa dɔxo yamanan sogegododen danna ra. Na bɔxo dɔnxene xa findi mangan nan gbee ra. Na bɔxone nun Isirayila bɔnsɔnne bɔxon kuyan birin lan. Bɔxo sarijanxin nun Alaa yire sarijanxin luma a tagin nin. **22** Nayi, Lewi bɔnsɔnna muxune bɔxon nun taan gbeen luma mangana bɔxon nan tagi. Mangana bɔxon luma Yuda bɔnsɔnna bɔxon danna nun Bunyamin bɔnsɔnna bɔxon danna nan tagi.” **23** “Bɔnsɔn dɔnxene kee bɔxone nan itoe ra: Keli sogeteden ma han sa dɔxo sogegododen na, Bunyamin bɔnsɔnna gbeen nan na ra, yamanan yire yitaxunxi keden nan na fan na. **24** Bunyamin bɔnsɔnna bɔxon danna, keli sogeteden ma sa dɔxo sogegododen na, Simeyɔn bɔnsɔnna gbeen yi tugun na de, yamanan yire yitaxunxi keden nan na fan na. **25** Simeyɔn bɔxon danna, keli sogeteden ma sa dɔxo sogegododen na, Isakari bɔnsɔnna gbeen yi tugun na de, yamanan yire yitaxunxi keden nan na fan na. **26** Isakari bɔxon danna, keli sogeteden ma sa dɔxo sogegododen na, Sabulon bɔnsɔnna gbeen yi tugun na de, yamanan yire yitaxunxi keden nan na fan na. **27** Sabulon danna, keli sogeteden ma sa dɔxo sogegododen na, Gadi bɔnsɔnna gbeen yi tugun na de, yamanan yire yitaxunxi keden nan na fan na. **28** Gadi bɔnsɔnna bɔxon danna findima yamanan danna nan na yiifari fɔxoni, folo Tamari taan ma siga Meriba igene ma Kadesi yi, siga Misiran xuden xɔn han sa bɔxon fɔxo ige gbeen ma. **29** E yamanani ito yitaxunma Isirayila bɔnsɔnne muxune ra masensenna nan xɔn, a findi e kee bɔxone ra. Marigina Alatalaa falan nan na ra.” **30** “Yerusalen taan so de fu nun firinne ni i ra. Taan kɔmen fɔxon kuyana, nongonna ye wuli naanin keme suulun. **31** Taan so deene xili sama

Isirayila bɔnsɔnne nan xun ma. De saxan kɔmenna ma: Ruben gbeen de keden, Yuda gbeen de keden, Lewi gbeen de keden. **32** Taan sogeteden binna kuyana, nongonna ye wuli naanin keme suulun. Men fan de saxan: Yusufu gbeen de keden, Bunyamin gbeen de keden, Dan gbeen de keden. **33** Yiifari fɔxon kuyana, nongonna ye wuli naanin keme suulun. Men fan de saxan: Simeyɔn gbeen de keden, Isakari gbeen de keden, Sabulon gbeen de keden. **34** Sogegodode binna kuyana, nongonna ye wuli naanin keme suulun. Men fan de saxan: Gadi gbeen de keden, Aseri gbeen de keden, e nun Nafatali gbeen de keden. **35** A rabilinna birin, nongonna ye wuli fu nun solomasexe. Sa folo na waxatin ma, taan yi xili sa, a ‘Alatala na yi.’”

Daniyeli

1 Yehoyakimi a mangayaan jɛɛ saxandena, Yuda yamanani, Babilɔn mangan naxan yi xili Nebukadanesari, na nun a muxune yi siga, e sa fu Yerusalen taan ma, e yi a rabilin yengesone ra. **2** Marigin nan tinxi Yehoyakimi suxu feen ma, Yuda Mangana, e nun Ala Batu Banxin muran nasarijanxine tongo feen ma. Manga Nebukadanesari yi ne xali Babilɔn yamanani, a yi se xɔnne ramara a gbee suxure banxin nafulu ramaradeni. **3** Mangan yi a fala a muxu gbeen xa, naxan xili Asipenasi, a naxa, a a xa sa Isirayila foningena ndee yɛ matongo, naxanye kelixi manga banxini xanamu xabila hiyabuxine yi. **4** A xa xaxilima xaraxine yɛ matongo naxanye kɛnde, e tofan. E xa kɔta alogo e xa nɔ wanla kɛ mangana banxini. E luma nen e xaranyɛ Babilɔn xuiin nun a sebenle ma. **5** Mangan mɔn yi e soɛ keden balon tongo, keli a gbee donseene yi e nun a gbee dɔlɔne yi. E xaranma nen jɛɛ saxan bun ma, na xanbi ra, e yi fa lu wanla kɛ mangan xa. **6** Yuda kaan naxanye yi na muxune yɛ, ne xili: Daniyeli nun Xananiya nun Mikayeli, e nun Asari. **7** Mangana tande xunna yi xili nenen sa e xun ma. A yi Daniyeli xili sa a “Belitisasari.” A yi Xananiya xili sa “Sadiraki.” A yi Mikayeli xili sa “Mesaki.” A yi Asari xili sa “Abedinego.” **8** Daniyeli yi a miri, a nama a yetɛ raharamu mangana a donseene ra e nun a dɔlɔn na. Nanara, a yi tande xunna mafan a e nama a karahan a a yetɛ raharamu. **9** Ala yi a ragidi, tande xunna yi hinan Daniyeli ra, a mɔn yi kininkinin a ma. **10** Tande xunna yi a fala Daniyeli xa, a naxa, “N gaxuxi mangan yɛɛ ra, n kanna, naxan bata ɛ donna nun ɛ minse feen nagidi. Xa a i to, i fatin baxi i ra i lanfane tagi, n xunna lɔma ayi nen ɛ fe ra.” **11** Daniyeli yi a fala na xa, tande xunna naxan tixi Daniyeli nun Xananiya nun Mikayeli nun Asari xunna dɔxɔn na, a naxa, **12** “Se bogine nun igen gbansanna fi nxu ma, i xa nxu mato nayi han xi fu. **13** Na xanbi ra, i nxu nun nxu lanfane fatin sama e bode ma nen naxanye mangana a donseen donma, i nxɔ donse feen yɛɛɛ nayi alo i naxan toxi.” **14** Nanara, a tin na ma, a yi e mato xi fu bun ma. **15** Xii fu danguxina, a yi a to e kɛnde, e fatin fan, dangu mangana donseen don muxune ra. **16** Nanara, e xunna dɔxɔn yi se bogine fi e ma, mangana donseen nun a dɔlɔn jɔxɔn na. **17** Ala yi lonnin fi foninge naaninni itoe ma a e xa fe sebexin birin bunna famu, e nun fekolonna. Daniyeli

yi nɔɛ xiyene bunne fale e nun fe toone alo xiyena. **18** E waxatin jian yanyi naxan yi mangan naxan sa, tande xunna yi e yita Nebukadanesari ra. **19** E birin nun mangan yi e bode to, foningene yɛ, muxu yo mi a kenen alo Daniyeli nun Xananiya nun Mikayeli e nun Asari. Ne yi so a wanli. **20** Mangana e maxodin fefe ma lan xaxilimayaan nun fe kolonna fe ma, a yi a to e yabine yi dangu a woyimene nun a jinan kanne gbeen na dɔxɔna ma fu, naxanye yi a yamanani. **21** Daniyeli yi lu na yi han Kirusi a mangayaan jɛɛ singena.

2 Nebukadanesari a mangayaan jɛɛ firindena, a yi xiyɛ sa. A xaxinla yi jaxamin han xixɔnla yi a bejin. **2** A yi woyimene nun jinan kanne nun kɔmɔ kanne nun yiimatone xili alogo e xa a xiyen bunna fala a xa. Ne yi malan, e ti a yetagi. **3** Mangan yi a fala ne xa, a naxa, “N xiyena nde nan saxi, naxan bata n xaxinla jaxamin. A xɔnla n ma, n xa na xiyen bunna kolon.” **4** Na yiimatone yi mangan yabi Arami xuini, e naxa, “Nxu kanna, Ala xa siin fi i ma. I ya xiyen yɛba nxu xa, nxu xa a bunna fala i xa.” **5** Mangan yi a fala yiimatone xa, a naxa, “N bata yelin a natɛ fa fala xa ɛ mi n ma xiyeni ito fala n xa e nun a bunna, n na ɛ yibolonma nen dungi dungi yɛɛn ma, ɛ banxine fan yi kala fefe! **6** Koni xa ɛ mɔn nɔ n ma xiyen nun a bunna faladeni n xa, ɛ kise wuyaxi sɔtɔma nen n yii, e nun kɔntɔnne nun xunnayeren gbegbe. Nanara, ɛ xa xiyen nun a bunna fala n xa.” **7** E mɔn yi a fala mangan xa, e naxa, “Mangana, i ya xiyen fala nxu xa, nxu xa a bunna fala i xa.” **8** Mangan yi a fala e xa, a naxa, “N bata a kolon, ɛ katama n xa dija han waxati gbɛɛ bayo ɛ a kolon n ma fe ragidixin mi kale. **9** Koni, xa ɛ mi n ma xiyen fala n xa, jaxankata kedenna sama ɛ birin fari nen. ɛ faxi wulen nun yanfantɛnya falan nan tideyi n xa han n ma miriyaan yi maxɛɛɛ. Nanara, ɛ n ma xiyen fala n xa, nayi n na a kolonma nen fa fala ɛ nɔɛ a bunna fale nen.” **10** Yiimatone yi a yabi, e naxa, “Nxɔ mangana, na muxu yo mi dunujani ito yi naxan nɔɛ na lige naxan xɔli i ma. Na manga yo mi na, hali a fangan nun a senben na gbo kii yo ki, na munma fe sifani ito maxodin woyimene nun jinan kanne nun yiimatone ma singen. **11** I naxan maxodinxi, na xɔdɔxɔ. Muxu yo mi nɔɛ na yabin soɛ i yii fɔ alane, koni ne mi dɔxi adamadiine tagi.” **12** Nayi, mangan yi xɔlɔ, a bɔjɛn yi te han! A yamarin fi fa fala a Babilɔn fekolonne birin xa faxa. **13** Mangana falan yi rawanga, fekolonne yi fa fama faxadeni nen. Nayi, e Daniyeli

fen e nun a lanfane alogo e fan xa faxa. **14** Daniyeli yi a xuiin namini 𐤎𐤍𐤏𐤍 luun nun xaxilimayaan na Ariyoki ma mangan kantan muxune xunna, naxan yi faan kiraan xon ma siga Babilon fekolonne faxadeni. **15** A Ariyoki maxodin, a naxa, “Nanfera mangan bata sariya xodexe sifani ito sa.” Ariyoki yi na feen yeɓa Daniyeli xa. **16** Nanara, Daniyeli yi siga mangan fema, a yi a mayandi alogo a xa waxatin fi a ma, a xa no a xiyen nun a bunna fale mangan xa. **17** Daniyeli yi siga banxini, a feni ito birin yeɓa a lanfane xa, Xananiya nun Mikayeli e nun Asari. **18** A yi e mafan a e xa Ala maxandi naxan kore, a xa kininkinin e ma, a xa fe luxunxini ito yita e ra alogo e nama Daniyeli nun a lanfane faxa Babilon fekolonna bonne xon. **19** Nanara, Daniyeli yi fe toon ti kœen na alo xiyena, fe luxunxin yi lankenemaya a xa. Daniyeli yi Ala tantun naxan kore, **20** a naxa, “Ala xinla xa tantun habadan habadan! Amasoto a tan nan gbee kolonna nun senben na. **21** A tan nan waxatin nun a keɗane maxetema: A tan nan mangane bama. A tan nan mangane dɔxoma. A fekolonna fima fekolonne ma, a lonnin fima xaxilimane ma. **22** A fe tilinxi luxunxine lankenemayama. A dimi yi feen kolon, bayo kenenna a yii. **23** N benbane Ala, n na i tantunma, n yi i batu fekolonna nun fangana a fe ra i naxan fixi n ma. I bata n nakolon na ra, nxu naxan maxodinx i ma, i bata nxu rakolon mangana xiyen na.” **24** Na xanbi ra, Daniyeli yi siga Ariyoki fema, mangan yamarin fi naxan ma a xa Babilon fekolonne faxa. A sa a fala a xa iki, a naxa, “Hali i nama Babilon fekolonne faxa. Siga n na mangan yetagi. N xa a xiyen bunna fala a xa.” **25** Mafuren, Ariyoki yi siga Daniyeli ra mangan fema, a yi a fala a xa, a naxa, “N bata muxu keden to na Yuda kaa suxine ye, naxan xiyen bunna fale mangan xa.” **26** Mangan yi Daniyeli maxodin naxan xili Belitisasari, a naxa, “I tan nœ xiyen nun a bunna fale n xa ba?” **27** Daniyeli yi mangan yabi, a naxa, “Mangana, i fe luxunxin naxan maxodinx i fekolonne nun jinan kanne nun woyimene nun yiimatone ma, ne sese mi nœ i ya xiyen nun a bunna fale i xa. **28** Koni Ala na yi, naxan kore xonna ma. A nœ fe luxunxine ye mayalanɗe. A bata Manga Nebukadanesari rakolon naxan ligama waxati famani. Awa, i ya xiyen nun i ya fe toone ni i ra i naxanye to i ya saden ma. **29** I yi saxi waxatin naxan yi, mangana, i yi lu i mire fe famatone ma. Awa, naxan fe luxunxine ye mayalanma, na bata i rakolon fe famatone ra. **30** N tan ma binni, fe luxunxini

ito mi ye mayalanxi n xa fa fala n tan fekolon dangu ndenden na, koni alogo a bunna xa fala mangan xa, i yi i sondonna miriyane kolon.” **31** “Mangana, i fe toon nan tixi naxan findixi sawura belebelen na. Na sawura yi gbo kati! A yi mayilenma, a yi tixi i yetagi, a keɗaan yi magaxu han! **32** Xemaan yeteen nan yi sawuran xunna ra, a kanken nun a yiine gbeti wuren nan e ra, a kuiin nun a tagina, sulana. **33** A danbane yi rafalaxi wure foren na, a sanne wure foren nun bende ganxina. **34** I yi a matoma waxatin naxan yi, gemena nde yi keben muxu yii mi naxan boxi, a fa bonbo na sawuran sanna ra wure foren nun bende ganxin denaxan yi. A yi e rayensen. **35** Awa, a wure fore yo, a bende ganxi yo, a sulan yo, a wure gbeti yo, a xema yo, na birin yi lunburunɗe ayi, e yi findi burun burunna ra alo se dagin naxan yifema soɗe furen na. Foyen yi a xali a funfu yo mi lu na. Awa na gemen naxan fa bonbo na sawuran na, na yi findi geya belebelen na, a boxona ngaan nafe.” **36** “Xiyen ni i ra. Nxu a bunna fan falama nen mangan xa. **37** N kanna, mangane mangan ni i tan na. Amasoto Ala nan mangayaan nun senben nun fangan nun xunnayerenna fixi i ma, Ala Naxan Kore. **38** A tan nan i dɔxi muxune nun subene nun xoline xun na, e nema dede yi, a yi nœon fi i ma ne birin xun na. I tan nan xema xunna ra. **39** I tan na dangu, mangaya gbeten kelima nen naxan senben xurun i gbeen xa. Na xanbi, mangayaan saxanden ligama nen alo sulana, na yi nœon sa boxon birin ma. **40** Mangaya naaninden fama nen, na xodoxo alo wurena. Wuren seen birin yensenma, a a lunburun. Na mangayaan fan bonne yensenma na kii nin, a yi e lunburun. **41** I a sanne nun a san sonle toxi rafalaxi wuren nun bende ganxin basanxin na kiin de, na yamanani taxunma nen, koni wuren xodoxon 𐤎𐤍𐤏𐤍𐤎𐤎𐤎𐤎 taranma a yi nen, bayo i wuren nun bende ganxin basanxin nan toxi. **42** Nanara, alo a san sonle yi rafalaxi wuren nun bende ganxin basanxin na kii naxan yi, na yamanan foxo kedenna fangan gboma ayi nen, bode foxon yi xetunɗe ayi. **43** I wuren nun bende ganxin basanxin nan toxi, bayo na muxune katama nen e xa malan, koni e mi malanɗe alo wuren nun bende ganxin to mi basanɗe.” **44** “Na mangane waxatini, Ala Naxan Kore, na mangayana nde rafama nen naxan mi kale habadan! Na mangayaan mi danguma yamana gbete nœon bun. A yamanan bonne raxuyama ayi nen, a yi e raxori, koni a tan yeteen luma nen habadan. **45** Na bunna nen, alo i gemen naxan toxi kebenɗe geyaan

fari muxun yii mi dinxi naxan na, a fa wuren nun sulan nun benden nun gbeti wuren nun xëmaan yensen. Ala bata a yita mangan na naxan fama ligadeni yëen na. Nɔndin nan xiyeni ito ra, muxune lan e xa la a bunna fan na.” 46 Nba, Manga Nebukadanesari yi a xinbi sin Daniyeli bun ma, a yetagin yi lan bɔxɔn ma. A yamarin fi a e xa saraxane ba a xa, e nun wusulanna. 47 Mangan yi a fala Daniyeli xa, a naxa, “E Ala nan alane Ala ra. E nun mangane gbee marigina naxan wundo feene lankenemayama. Bayo i bata nɔ wundo feni ito yɛ mayalanjɛ.” 48 Mangan yi Daniyeli mate, a banna se wuyaxi so a yii. A yi a dɔxɔ Babilɔn yamanan birin xun na, a yi a findi mangan na Babilɔn fekolonna birin xun na. 49 Daniyeli yi mangan mafan, a xa Babilɔn bɔxɔn fe yɛban so Sadiraki nun Mesaki nun Abedinego yii. Daniyeli yetɛen yi lu Manga Nebukadanesari a tanden ma wanla ra.

3 Manga Nebukadanesari yi sawura xëmaan nafala.

A kuyan nɔngɔnna yɛ tonge sennin lixi. A yigbona, nɔngɔnna yɛ sennin. A sa a ti Dura Lanbanni, Babilɔn yamanani. 2 Manga Nebukadanesari yi bɔxɔne mangane nun bɔxɔ kanne nun yamana kanne nun sariya kanne nun nafulu ramarane nun sariyasane nun kitisane nun bɔxɔn kuntigine ngaan xili alogo e xa fa sawurana fe rawangadeni Manga Nebukadanesari naxan nafalaxi. 3 Awa, bɔxɔne mangane nun bɔxɔ kanne nun yamana kanne nun sariya kanne nun nafulu ramarane nun sariyasane nun kitisane nun bɔxɔn kuntigine ngaan yi e malan na sawurana fe rawangadeni Manga Nebukadanesari naxan nafala. E ti sawuran yetagi Manga Nebukadanesari naxan nafala. 4 Mangana fe rawangan yi sarin fangan na, a naxa, “Siyane nun bɔnsɔnne birin naxanye xuine birin falama, naxan yamarixi ɛ ma, na ni ito ra: 5 E na xɔtaan nun xulenna nun sɔrɔnna nun kondenna nun bɔlɔnna nun saraan nun sumun seen sifan birin xuiin mɛ waxatin naxan yi, ɛ bira bɔxɔni, ɛ yi sawura xëmaan batu, Manga Nebukadanesari naxan nafalaxi. 6 Xa naxan yo mi bira a bun ma, a yi a batu, na rawolima ayi nen sulun tɛeni keden na!” 7 Nanara, siyane birin to xɔtaan nun xulenna nun sɔrɔnna nun kondenna nun bɔlɔnna nun saraan nun sumun seen sifan birin xuiin mɛ, siyane nun bɔnsɔnne birin naxanye xuine birin falama, ne yi bira sawura xëmaan bun ma, e yi a batu, Manga Nebukadanesari naxan nafalaxi. 8 Na waxatin yeteni, yiimatona ndee yi

fa, e xa Yahudiyane kansun. 9 E yi a fala Manga Nebukadanesari xa, e naxa, “Ee! mangana! I xa bu dunuɲa yi. 10 Nxu kannna, i bata yi yamarin fi, a muxune birin xa bira sawura xëmaan bun ma, e yi a batu, e na xɔtaan nun xulenna nun sɔrɔnna nun kondenna nun bɔlɔnna nun saraan nun sumun seen sifan birin xuiin mɛ waxatin naxan yi. 11 Nayi, naxan yo mi tin bire a bun, a yi a batu, na kannna wolima nen sulun tɛeni. 12 Koni Yahudiyana ndee na yi, i tan yetɛen Babilɔn bɔxɔn fe yɛbaan soxi naxanye yii, Sadiraki nun Mesaki e nun Abedinego. I ya yamarin bɔte mi ne xa. Ee! Mangana! E mi i ya alane batuma, e mi i ya sawura xëmaan fan batuxi i naxan nafalaxi.” 13 Nebukadanesari bɔɲɛn yi te a xɔlɔ! A yi yamarin fi, e xa fa Sadiraki nun Mesaki nun Abedinego ra. Sofane yi fa na xɛmɛne ra a yetagi. 14 Nebukadanesari yi a fala e xa, a naxa, “Sadiraki nun Mesaki e nun Abedinego, ɲɔndin na a ra ba? E mi n ma alane batuma, ɛ mɔn mi sawura xëmaan batuma, n naxan nafala? 15 Awa, iki, ɛ na xɔtaan nun xulenna nun sɔrɔnna nun kondenna nun bɔlɔnna nun saraan nun sumun seen sifan birin xuiin mɛ sɔnɔn, ɛ bira, ɛ yi sawura xëmaan batu n naxan nafalaxi. Koni xa ɛ mi a batu, ɛ rawolima nen sulun tɛeni keden na! Ala mundun na yi naxan ɛ bama n yii?” 16 Sadiraki nun Mesaki nun Abedinego yi a fala, e naxa, “Ee! Manga Nebukadanesari! Nxu mi waxi nxu yetɛ makata fe yi i yetagi. 17 Xa na rabe, nxɔ Ala, nxu walima naxan xa, na nɔɛ nxu ratange. A nxu ratangama sulun xajɛn ma nen e nun i yiin ma. 18 Hali a mi na lige, mangana, a kolon a nxu mi i ya alane batuma, nxu mi i ya sawura xëmaan batuɛ i naxan nafalaxi.” 19 Nayi, Nebukadanesari yi mɔne han! A yetagin yi masara Sadiraki nun Mesaki nun Abedinego yɛɛ xɔri. Nebukadanesari yi yamarin fi e xa sulun nawolon dɔxɔɲa ma solofere dangu e yi darixi a ra kiin de. 20 A yi a yengesona ndee yamari naxanye maxɔdɔxɔ a gali diine yɛ, e xa Sadiraki nun Mesaki nun Abedinego xidi, e yi e rawoli sulun tɛɛ xajɛni. 21 Na xɛmɛ saxanna yi xidi, e maraberi baxi e dugine nun e wantanne nun e namune yi, e nun e domaan birin. E yi woli sulun tɛɛ xajɛ tagi. 22 Sofaan naxanye Sadiraki nun Mesaki nun Abedinego woli tɛɛni, tɛɛn yi ne faxa bayo mangan bata yi yamarin fi a xa wolon ɲaxi ra. 23 Koni Sadiraki nun Mesaki nun Abedinego, ne saxanna xidixin yi bira sulun tɛɛ xajɛni. 24 Manga Nebukadanesari yi gaxu, a tuganɲɛ ayi, a keli. A yi a fala a maxadi tiine xa, a naxa, “En

mi muxu saxan xidixin xan wolixi tēen tagi ba?” E mangan yabi, e naxa, “Ōn Mangana!” **25** A mōn naxa, “Anu, n muxu naanin nan toma, e mi xidixi. E sigan tima tēen tagi, tōrōya yo mi e ma. E naaninden kejaan maliga malekan na.” **26** Nebukadanesari yi a maso sulun xajen de ra, a naxa, “Sadiraki! Mesaki! Abedinego! Ala Matexina walikene, ε mini, ε fa be.” Sadiraki nun Mesaki nun Abedinego yi keli tēen tagi. **27** Bōxōne mangane nun bōxō kanne nun yamana kanne yi e maso e ra. E yi a to, tēen mi nō yo sōtōxi na xēmene fatin ma. E xunsexene mi ganxi, e dugine mi kalaxi. Tēen xiri mi dōxi e ma. **28** Nebukadanesari yi a fala, a naxa, “Tantunna Sadiraki nun Mesaki nun Abedinego a Ala xa! A tan nan a malekan nafaxi, a yi a walikene ratanga. E bata la a ra han, e yi mangana a yamarin kala. E yitōnxi faxa feen ma, benun e xa ala gbete batu, ba e Ala ra. **29** A mato fa, n yamarin naxan fima: xa muxu yo Sadiraki nun Mesaki nun Abedinego a Ala rafeya, a na taran siya yo yi, yamana yo yi, xui yo yi, na kanni segema dungi dungi yēen nan ma, a banxin yi findi kurun na, bayo ala yo mi na naxan nōe makantan sifani ito ra alo a tan.” **30** Nanara, mangan yi Sadiraki nun Mesaki nun Abedinego a fe mate Babilōn yamanani.

4 Manga Nebukadanesari yi xerane rasiga siyane nun bōnsōnne birin ma naxanye xuine birin falama, dunuŋa yiren birin yi, a naxa, Bōŋesa gbeen xa lu ε xa. **2** A findixi n xa fe fajin nan na, n xa taxamasenne nun kabanako feene yebe ε xa Ala Matexin naxanye ligaxi n xa. **3** A taxamasenne gbo, a kabanako feene senben gbo. A mangayana, habadan mangayaan na a ra. A nōyaan luma nen mayixete nun mayixete. **4** N tan Nebukadanesari, n yi bōŋe xunbenla nun ŋaxunna nin n ma mangaya banxini. **5** N yi xiye sa naxan n magaxuxi. Miriyane yi soma n yi n ma saden ma, n xaxinla fe toone yi n kuisan han! **6** Nanara, n bata yamarin fi, e xa fa Babilōn fekolonne ra n fēma alogo e xa n ma xiyeen bunna fala n xa. **7** Woyimene nun ŋinan kanne nun yiimatone nun kōmō kanne faxina, n yi n ma xiyeen yebe e xa, koni e sese mi nō a bunna fale n xa. **8** A rajanna, Daniyeli fan yi fa n fema naxan mōn yi xili Belitisasari naxan xili luxi alo n ma ala xinla. Ala sarijanxine niina a tan yi. N yi n ma xiyeen yebe a xa, **9** n naxa, “Belitisasari, woyimene kuntigina, n na a kolon fa fala ala sarijanxine niina i tan yi. Wundo fe yo mi xōdōxō i tan yii. Fe toone bunna fala

n xa, n xiye saxi naxanye ra.” **10** “Awa, n xaxinla toon naxan tixi, na ni i ra, n to yi saxi n ma saden ma, n yi n yēe rakōŋinma, n yi a to: Wudi bili gbee keden tixi bōxōn tagi, naxan yi mate han! **11** Na wudin yi gbo, a magaxu ayi, a kondeni yi texi nen han kuyena. A yi toma bōxōn danna birin na. **12** A ŋōxōndene yi fan, a bogine yi wuya han! Birin balon yi a kōe ra. Burunna subene yi fama a nininna bun. Xoline yigiyaxi a yiine kōe ra. Daliseene birin yi e donna sōtōma a bogin nan xōn. **13** N xaxinla tooni, n naxan to n ma saden ma, n yēen tixi, n yi marakantan ti sarijanxina nde keden to gode keli kore xōnna ma. **14** Na yi sōnxō fangan na, a falan ti iki, a naxa, ‘E wudini ito rabira, ε yi a yiine sege, ε yi a ŋōxōndene ba a ma, ε yi a bogine raxuya ayi. Subene xa e giye a bun, xoline yi keli a yiine yi. **15** Koni ε xa a dungin nun a salenne lu bōxōni ε yi a xidi wuren nun sula yōlōnxōnna ra, a yi lu xēen ma sexen xōre ra. A xa yikun xiila ra, a yi a balo sexen na alo subene. **16** A adamadi xaxinla maxetema nen, sube xaxinla yi so a yii. Nēe solofere danguma a xun ma nen. **17** Marakantan muxune nan sariyani ito ragidixi, maleka sarijanxine nan yamarini ito fixi alogo daale xa a kolon fa fala Ala Matexin nōon nabama adamadiine mangayaan fari. A a sōe muxe yii naxan na rafan a ma, hali muxune birin dangu naxan na.” **18** “N tan Manga Nebukadanesari, n xiyeen naxan sa, na nan na ra. Awa, i tan Belitisasari, i xa n xiyeen bunna fala n xa, bayo n ma bōxōn fe kolonne, ne sese mi nōxi a bunna fale n xa. Koni i tan nōe bayo ala sarijanxine niina i tan yi.” **19** Awa, Daniyeli naxan xili Belitisasari, na yi a raxunbeli waxatidi, a miriyane yi a kuisan. Mangan yi a fala, a naxa, “Belitisasari, xiyeen nun a bunna nama i kuisan.” Belitisasari yi a yabi, a naxa, “N kannna, a yi lan nun, xiyeen xa findi i yaxune gbeen na, a bunna yi lu i sangarŋōxōne xa. **20** I wudi bili gbeen toxi gboε, a maxōdōxō ayi, naxan kondeni texi han kuye, naxan yi toma bōxōn danna birin yi, **21** naxan ŋōxōndene fan, naxan bogi wuya, naxan daliseen birin baloma, burunna subene e sama naxan bun ma, xoline e tēen sama naxan yiine yi.” **22** “Ee! Mangana! Na wudin ni i tan na. Bayo, i bata gbo i findi senbe kannna ra. I ya gboon bata te han kuye e nun i ya nōon bata dunuŋa danna birin li. **23** I tan mangan mōn yi kantan ti sarijanxine keden to gode keli kuye, a naxa, ‘E wudini ito rabira, ε a kala, koni ε dungin nun a salenne lu bōxōni. Koni ε a maxidi wure yōlōnxōnna nun sulan yōlōnxōnni xēen ma sexen xōre ra. A xa

yikun xiila ra. A xa lu burunna subene xon ma han jee solofere yi dangu a xun ma.” 24 “Ee! Mangana! N xa a yeba i xa Ala Matexin naxan nagidixi n kanna mangan ma. 25 I kedima nen adamadiine tagi, i sa i damake burunna subene ye. I i degema sexen nan na alo jingene. I mon yikunma xiila ra nen jee solofere bun ma, han i yi a kolon a Ala Matexin nan noon nabama adamadiine mangayaan xun na. A mangayaan fima muxun ma naxan na a kenen. 26 Wudi dungin nun a salenne lu feen yamarin fan bunna na, a i ya mangayaan naxetema i ma nen i na a kolon, a noon naxan yi, na kuye. 27 Nanara, Mangana, n ma maxadin xa rafan i ma: Danna sa i yulubine ra, i xa tinxin. I ya tantanne lu na, i xa kininkinin toro muxune ma. Yanyina nde yi, i luye boje xunbenli nen.” 28 Na feen birin yi kamali Manga Nebukadanesari ma. 29 Kike fu nun firin to dangu, a yi a masiga tima manga banxin sangansoon ke ra Babilon yi, 30 Mangan yi a fala, a naxa, “Babilon gbo de! N tan nan a tixi manga yigiyaden na n senben fangan na n ma xunnayerenna nun n ma binyen xa!” 31 Falan mon yi mangan deni singen, fala xuina nde yi keli kuye, a naxa, “Manga Nebukadanesari, falani ito tima i tan xa. Mangayaan senben bata ba i yii to. 32 I kedima nen muxune tagi, i sa i damake burunna subene tagi, i yi sexen don alo jingene, jee solofere bun ma han i na a kolon waxatin naxan yi a Ala Matexin nan noon nabama adamadiine mangayaan fari. A a so muxe yi naxan na a kenen.” 33 Na waxatin yeteni, na fala xuiin yi kamali Manga Nebukadanesari xili ma, a yi kedi adamadiine ye, a sexen don alo jingene. A fatin yi yikun xiila ra, han a xunsexen yi mini alo singbin xabena. A san xanle yi kuya ayi alo xoliin gbeena. 34 Waxatin naxan saxi na danna to a li, n tan Nebukadanesari, n yi n yeen nate kuye, n xaxinla yi xete n ma. N na Ala Matexin batu, n yi a tantun, n yi a binya naxan na yi habadan! Naxan ma noon findixi habadan noon na e nun naxan ma mangayaan ligama mayixete nun mayixete xun na. 35 Sese mi dunuja muxune senben na Ala yee ra yi. Naxan na a kenen, a na nan ligama maleka ganla ra e nun muxune boxon ma. Muxu yo mi na naxan a yiin yee ratiye, a a fala, a naxa, “I nanfe ligama?” 36 Na waxatin yeteni, n xaxinla yi xete n ma, n ma mangayaan xunnayerenna nun n ma noon mirinna fan yi xete n ma. N ma maxadi tiine nun n ma muxu gbeene mon yi n xili, n doxo n ma mangaya gbedeni. N ma gboon yi siga xun mase. 37 Iki, n tan

Nebukadanesari, n na a batuma, n na a yite, n na a binya, kore xonna mangana yoon a xa a kewanla birin yi, a kirane tinxin. A na muxune magode nen naxanye e yete yitema.

5 Loxona nde, Manga Belisari yi jaxanaxani ton a muxu gbee wuli kedenna xa. A yi lu dolon minje e xon. 2 Dolon to a suxu, Belisari yi yamarin fi a e xa fa igelengenna xema daxin nun gbeti daxin na, a baba Nebukadanesari kelixi naxanye ra Ala Batu Banxi gbeen Yerusalen taani. Mangan yi waxi a min feni ne ra e nun a jaxanle nun a konyi jaxanle nun a muxu gbeene. 3 Nayi, e yi fa xema igelengenne ra naxanye sa tongo Ala Batu Banxini Yerusalen taani. Mangan nun a muxu gbeene nun a jaxanle nun a konyi gilene yi e min ne ra. 4 E dolon min waxatin naxan yi, e yi lu alane batue, xemaan nun gbetin nun sulan nun wuren nun wudin nun geme alane. 5 Na waxatin yeteni, muxun yii sonle yi mini kenenni lenpu degen ma. E sebenla ti manga banxin kanke. Mangan yi yiini ito to naxan yi sebenla tima. 6 Mangan yetagin yi maxete, a miriyane yi a kuisan, a tagi xudine yi ba a yi, a xinbine yi lu bonbe e bode ra. 7 A yi gbelegbele fangan na, a e xa fa jinan kanne nun yiimatone nun komo kanne ra. A yi a fala Babilon fekolonne xa, a naxa, “Naxan na sebenli itoe xaran, a yi a bunna fala n xa, na maxidima nen manga dugin na, xema jeren yi bira a kee, a mon yi mangaya tiden saxanden soto boxoni ito yi.” 8 Mangana a fekolonne birin yi so, koni e mi no sebenla xaranye, e yi a bunna fala mangan xa. 9 Na nan a liga, Manga Belisari mon yi gaxu han, a yetagin yi maxete, a muxu gbeene yi kui yifu. 10 Mangana nga to mangan nun a muxu gbeene sonxo xuiin me, a so jaxanaxa banxini. A yi a fala, a naxa, “Mangana, i xa bu han! I ya miriyaye nama i kuisan. I yetagi nama maxete. 11 Muxuna nde i ya boxoni, ala sarijanxine xaxinla a yi. I baba waxatini, a yi feene fixen toma, a xaxinla fan, a fekolonna nun alane gbeen lan. Nanara, i baba Manga Nebukadanesari yi a findi woyimene nun jinan kanne nun yiimatone nun komo kanne kuntigin na. I baba mangan yeteen na liga nen. 12 Bayo, nii fisamantenna nun lonnin nun xaxilimayaan Daniyeli yi, mangan naxan xili sa Belitisari. Xiyene bunna kolonna fan ayi. A mon sandane yebama, a maxodin xodexene yabima. Nanara, e xa Daniyeli xili. A noma nen a bunna faladeni i xa.” 13 Nayi, e fa Daniyeli ra mangan yetagi. Mangan yi a fala a xa, a

naxa, “I tan nan na Daniyeli ra n baba faxi naxan na sa keli Yuda yi? 14 N bata i ya fe me a alane niina i tan yi e nun i feene fixen toma. Xaxinla nun fekolonna i tan yi naxan jaxxon mi na. 15 E baxi fadeni nen fekolonne nun jinan kanne ra n fema alogo e xa sebenli ito xaran, e yi a bunna fala n xa, koni e mi naxi a bunna faladeni! 16 N bata a me a i nxe feene bunne yebe nen, i yi maxodin xodexene yabi. Iki, xa i nō sebenli ito xaranje, i n nakolon a bunna ma, i maxidima manga dugin na nen, xema jeren yi bira i koe, i yi findi boxon mangan muxu saxanden na.” 17 Daniyeli yi a fala mangan xa, a naxa, “I ya kiseene ramara i yete xa, i ya finmaseene fi gbete ma. Hali na, n sebenla xaranma nen mangan xa, n yi i rakolon a bunna ma. 18 Ee! Mangana! Ala Matexin nan mangayaan nun gboon nun xunnayerenna nun naxon fixi i baba Nebukadanesari ma. 19 Nanara, siyane nun bōnsōnne birin naxanye xuike birin falama, ne gaxuxi a yee ra. A na wa a xon, a muxun faxa. A na wa, a a rakisi. A na wa naxan yite fe yi hanma a yigodo fe yi, a na liga. 20 Koni a yanda waxatin naxan yi, a bōnen yi xodoxo han a waso ayi. Ala yi a ba a mangaya gbedeni, a a binyen ba a yii. 21 A kedi adamane ye, a xaxinla yi lu alo subene gbeena. A yi lu burunna sofanle foxo ra, a yi sexen don alo jingene. A fatin yi yikun xiila ra, han a kolon a Ala Matexin nan nōon nabama adamane mangayaan xun na. A muxe nan findima mangan na, a na wa naxan xon.” 22 “I tan, a diina Belisari, i yi na birin kolon, koni i mi i yete magodo. 23 I bata i yete yite Marigin xili ma naxan kore, i yi Ala Batu Banxina igelengenne maxili i yetagi. E yi dolon min e ra, i tan nun i ya muxu gbeene nun i ya jaxanle nun i ya konyi jaxanle. I yi alane batu, gbetin nun xemaan nun sulan nun wuren nun wudin nun geme alane, naxanye mi se toma, e mi fe mama, kolon mi e yii. I mi Ala binyaxi i ya niiraxinla nun i ya dunuja yi gidin naxan yii. 24 Na nan a toxi, a yiini ito rafaxi naxan sebenli ito tixi.” 25 “A tan ni i ra keden keden yeen ma naxan sebexi: MENE MENE TEKELI PARISIN. 26 Falani itoe bunna ni i ra: ‘MENE’ na bunna neen fa fala ‘Yatena.’ Ala bata i ya mangayaan loxon yate, a danna sa a ra. 27 ‘TEKELI’ na bunna neen fa fala ‘A maliga.’ I ratexi sikeela nan na, a li, i yelefu. 28 ‘PARISIN’ na bunna neen ‘Mayitaxunna.’ Bayo i ya boxoni taxunma nen, a yi so Mede kaane nun Perise kaane yii.” 29 Sasa, Belisari yi yamarin fi a Daniyeli xa maxidi manga dugin na, xema jeren yi bira a

koe, a yi yamarin fi, a xa rawanga a bata yamanan mangayaan tiden saxanden soto. 30 Na kōeen yeteen na, e Babilon manga Belisari faxa. 31 Dariyusi Mede kaan mangayaan soto a jee tonge sennin e nun firin nan ma.

6 Dariyusi yi a ragidi a xa boxone manga keme e nun maxonen ti a gbee yamanan xun na. 2 A yi manga gbee saxan dōxo e xun na boxone mangane fa dentegen sama naxanye xa alogo mangana tonone xa xun makantan. Daniyeli yi na manga saxanne ye. 3 Awa, Daniyeli yi dangu manga gbee firinna bodene ra e nun boxone mangan birin bayo nii fisamantenna yi a tan yi. Nanara, mangan yi wa a dōxo feni boxon birin xun na. 4 Awa, manga gbee bodene nun boxone mangane yi feren fen folo a tōjege feen na lan boxona feene ma. Koni e mi kii yo soto, e mi mayifu yo to a tan ma binna ra bayo a tinxin. Nanara, e mi kalan to a yi hanma mayifuna. 5 Awa, na muxune yi a fala, e naxa, “En mi fere yo sote Daniyeli tōjege feen ma xa a mi fata a Alaa sariyana feen na.” 6 Na manga gbeene nun boxone mangane birin yi siga mangan fema e bode xon. E yi falan ti, e naxa, “Manga Dariyusi xa siimayaan soto habadan! 7 Yamanan manga gbeene nun boxo kanne nun boxone mangane nun maxadi tiine nun yamana kanne birin tinxi a mangana sariya keden xa rawanga naxan fama tonni ito sadeni: Xii tonge saxanna bun ma, naxan na ala yo maxandi hanma muxu gbete ba i tan na, mangana, na xa woli yatane yinla ra. 8 Ee! Mangana! Iki, tonni ito yisarin, i yi i ya taxamasenna sa alogo a xa findi maxetetaren na alo Mede kaane nun Perise kaane sariyan to mi maxete.” 9 Nanara, Manga Dariyusi yi a taxamasenna sa tonna seben fari. 10 Awa, Daniyeli to a kolon a feni ito bata yisarin, a yi te a sangansoon koe ra naxan foye suxuden deene yi rabixi Yerusalen binni. Dōxona ma saxan sogen ma, a yi a xinbin sinma, a Ala maxandi, a a tantun alo a yi a ligan kiin de a singeni. 11 Na muxune birin yi siga Daniyeli konni, e so, e Daniyeli li a Ala mafanje, a yi Ala maxandima. 12 Nayi, e siga mangan fema, e yi mangana tonna fe fala a xa, e naxa, “I mi yi tonna nde yisarin naxan a fala a xii tonge saxanna bun ma, muxu yo a xui ramini ala gbete ma a xandideni hanma muxu gbete ba i tan na, mangana, na wolima yatane yinla ra nen?” Mangan yi e yabi, a naxa, “Nōndin nan a feen na, fata Mede kaane nun Perise kaane gbee sariyan na naxan mi

maxete.” 13 E mən yi a fala, e naxa, “Ee! Mangana! Daniyeli, Yuda muxu suxina nde, na mi i tan yatexi sese ra hanma i ya tən yisarinxina. A Ala maxandin nabama dɔxɔja ma saxan sogen ma.” 14 Mangan to na mɛ, a yi kontofili kati, a yi a ragidi a bɔɲeni a a xa Daniyeli rakisi. Han sogen bira waxatini, a katama a xa a rakisi. 15 Koni na muxune birin yi fa mangan fema, e yi a fala mangan xa, e naxa, “A kolon, mangana, Mede kaane nun Perise kaane sariyan mi tinje a tɔri saxin nun lanma xui sebexina mangan xɔn, na xa maxete.” 16 Nanara, mangan yi yamarin fi a Daniyeli xa woli yatane yinla ra. Mangan yi a fala Daniyeli xa, a naxa, “I ya Ala, i naxan batuma sɔnɔyani, na xa i rakisi.” 17 E yi fa gemena nde ra, e a dɔxɔ yinla de ra, mangan yi a mataxamaseri a yiirasoon na e nun a muxu gbeene yiirasone ra alogo fefe nama maxete Daniyeli ma binni. 18 Na xanbi ra, mangan yi siga a banxini, a yi xi sunni, a konyi naxalan yo mi fa a fema, xixoli mi a suxu. 19 Subaxa, mangan yi keli, a yi siga sasa yatane yinla de ra. 20 A to maso yinla ra, a yi Daniyeli xili a xui sɔxɔlexin na. Mangan yi a fala Daniyeli xa, a naxa, “Daniyeli, habadan Alaa walikena! I ya Ala, i naxan batuma sɔnɔyani, na nɔxi i rakise yatane ma nen ba?” 21 Daniyeli yi a yabi, a naxa, “Mangana, i xa siimayaan sɔtɔ habadan! 22 N ma Ala bata a malekan nafa, a fa yatane deɛn balan. E mi fe naxi ligaxi n na, bayo n findixi sɔntaren nan na a yetagi, hali i fan yetagi. Ee! Mangana! N mi fe naxi yo rabaxi.” 23 Nayi, mangan yi sewa han, a yi yamarin fi a e xa Daniyeli rate yinla ra. Daniyeli yi rate yinla ra, e mi maxɔlɔde yo to a ma, amasɔtɔ a yi denkeleyaxi a Ala ma. 24 Mangan yi yamarin fi a muxun naxanye Daniyeli tɔɲegexi, a ne xa woli yatane yinla ra, e tan nun e diine nun e naxanle. Benun e xa yinla xɔnna li, yatane yi e kutukutu, e yi e xɔnne yilunburun. 25 Na xanbi ra, Manga Dariyusi yi seɓenla ti siyane nun bɔnsɔnne birin ma naxanye xuine birin falama naxanye bɔxɔna ngan ma, a naxa, “Bɔɲɛ xunbeli gbegbe xa lu ɛ xɔn ma! 26 N bata yamarin fi n ma bɔxɔn birin yi, binyen xa fi Daniyeli a Ala ma, yamaan yi gaxu a yɛɛ ra. Bayo habadan Ala na a ra. A neen habadan. A mangayaan mi kalama habadan. A nɔɔn luma nen han a rajanna. 27 A tan nan maratangan nun marakisin tima, a mantaxane nun kabanako feene ligama kuyen nun bɔxɔn ma. A tan nan Daniyeli ratangaxi yatane fangan ma.” 28 Na

xanbi ra, Daniyeli yi sabati Dariyusi mangayaan bun ma, e nun Kirusi Perise kaana mangayaan bun ma.

7 Belisari a mangayaan ɲɛɛ singena Babilɔn yi, Daniyeli yi xiye sa, a fe toon ti a xaxinli, a yi a saden ma waxatin de. Na xanbi ra, a yi xiye nun a fe xɔnne seɓe. 2 Daniyeli yi a fala, a naxa, “N na a to nen n ma kɔɛ ra tooni, foyene sa kelima kuyen tongon naaninne yi, e e radin fɔxɔ ige gbeen xun ma.” 3 “Sube magaxuxi naanin yi mini fɔxɔ igeni, e sese keden mi yi a ra. 4 A singe ra xiin yi luxi alo yatana, a gubugubune alo singbin. N yi a matoma, e a gubugubune ba a ma, e a rakeli, e a ti a sanne xunna alo adama. Muxun sɔndɔmɛn yi so a yii.” 5 “Sube firinden luxi alo kanko belebelena. A saxi a fɔxɔ kedenna ma. Nensen xɔri saxan yi a de, a e xinma. E yi a fala a xa, e naxa, “Keli, i xɔɔyi se gbeen don.” 6 “Na xanbi, n yi a matoma, n yi gbete to alo tagi suxu jari. Xoli gubugubu naaninna a fari, a xunna fan naanin. Nɔɔn yi so a yii. 7 Na xanbi ra, n yi a matoma n ma kɔɛ ra tooni, n yi suben naaninden to naxan mamirin, a magaxu e nun a maxɔdɔxɔ han a dangu ayi. Wure jin belebelene yi a de ra, a yi a se suxine donma, a yi e laxunma, a dɔnxene bira a sanne bun. A tan nun sube fɔlɔne sese keden mi yi a ra, feri fu nan yi a ma. 8 N yi n mirima a fenne ma waxatin naxan yi, n yi a to, a feri xuridina nde yi mini e tagi, a feri fɔloyixi saxanne yi tala a yɛɛ ra. Awa, yɛɛ firin yi na fenna ma alo adaman yɛɛna e nun dena naxan yi falan tima de naxun na.” 9 N yi lu a matɔɛ, gbɛdene yi dɔxɔ. Habadan Siin Kanna yi fa dɔxɔ. A dugine yi fixa alo nɔnɔna, a xunsexen luxi alo garina, a gbɛden luxi alo tɛɛ dege, sanna digilinxine yi degema a gbɛden ma alo wonson tɛɛna. 10 Baan yi minima a yetagi a degema tɛɛn na. Muxu wuli wuline yi a batuma, yatɛtaren yi tixi a dɛxɔn. Nayi, kitisane yi e magodo, e kitabune rabi. 11 N yi lu a matɔɛ: Waso falane fe ra fenna yi naxan falama, e sube naaninden faxa n yɛɛ xɔri. E yi a binbin woli tɛɛni, a gan. 12 “Suben bonne fangan yi ba e yi, koni nde yi sa e siimayaan fari han waxatina nde. 13 N yi a matoma n ma kɔɛ ra tooni, a mato: adamadi maligan yi fa sa keli kore kundani. A yi a maso Habadan Siin Kanna binni, e a maso a ra. 14 Senben nun xunnayerenna nun mangayaan yi so a yii, alogo siyane nun bɔnsɔnne birin xa a batu naxanye xuine birin falama. A nɔɔna, habadan nɔɔn na a ra naxan mi danguma mumɛ! A mangayaan

mi kale habadan!” 15 “N tan Daniyeli, n xaxinla yi njaxamin n kui, n ma fe toone yi n kuisan. 16 N yi n maso na muxuna nde ra, n yi a maxodin feni ito xunna yeteen na. 17 A yi a bunna fala n xa, a naxa, ‘Sube magaxuxi naaninni itoe mangaya naaninna nan mayitaxi naxanye kelima dunuja yi. 18 Koni Ala Matexina muxu sarijanxine mangayaan sotoma nen, mangayaan yi lu e yii habadan, han habadanne habadanna.” 19 “Na xanbi, n yi wama fixen soto feni sube naanindena fe yi naxan nun suben bonne keden mi yi a ra, naxan yi magaxu, wure jinne yi naxan de ra. A san xanle luxi alo sulana, a yi a se suxine donma, a e laxun a a donxene mabodon. 20 N mon yi wama feri fune fe kolon feni, e nun fenna naxan mini, a yi saxon nabira e ye, na fenna naxan yee firin yi a ma e nun naxan de yi yete yigbo falane tima, a mon yi ligaxi alo a gbo bonne birin xa.” 21 “N yi a matoma, a yi muxu sarijanxine yengema, a no deen soto e ma. 22 Han Habadan Siin Kanna yi fa, a xa yoon fi Ala Matexina muxu sarijanxine ma. Waxatin yi a li, muxu sarijanxine yi mangayaan soto.” 23 “A yi falan ti n xa, a naxa, ‘Sube naanindena, mangayana nde nan na ra naxan taranma dunuja yi, naxan nun mangayaan bodene keden mi a ra. A boxona ngaan sotoma nen, a a yibodon, a a lunburunje ayi.’ 24 Feri fune findixi manga fuun nan na naxanye kelima yamanani ito ma. Nde gbete kelima nen e tan xanbi ra, e nun a folone keden mi a ra, a manga saxon nagodoma nen. 25 A fala jaxine tima nen Ala Matexin ma, a yi muxu sarijanxine kasari, a wama nen a xa waxatine nun sariyan masara. Muxu sarijanxine yi lu a bun ma waxati saxon nun a tagi bun ma. 26 Na xanbi ra, kitin fama nen, e noon bama a yii nen, e a kala, e a raxori habadan. 27 Mangayaan nun noon nun gboon naxan yamana makuyene yi, ne soma nen Ala Matexina yama sarijanxin yii. A mangayana, habadan mangayaan na a ra, no kanna ngaana a batuma nen, e a yamarine suxu.” 28 “Bataxin danna ni ito ra. N tan Daniyeli, n kuisan nen n ma miriyane ra, n yetagin yi maxete. N yi falani itoe ramara n bojeni.”

8 Manga Belisari a mangayaan jee saxandena, n tan Daniyeli, n mon yi fe toon ti alo xiyena. 2 N yi a matoma na toon kui, a liga n yee ra yi alo n Suse taani, Elan yamanan manga taana, Wolayi xuden de. 3 N yi n yeen nakeli, n yi kontonna to, a tixi xuden dexon ma. Feri kuye firin yi a ma, koni naxan minixi donxen na,

na kuya boden xa. 4 N yi kontonna to a fenne wole sogegododen binni e nun komen foxon nun yifari foxon binni. Muxu yo mi yi noe a ratange a senben ma. A yi a waxon feen nabama tun, a senben sigan gboe ayi. 5 N yi n majoxonma na ma waxatin naxan yi, nanunna yi, kotona nde yi fa sa keli sogegododeni, a yi boxona ngaani sigama, a sanne mi yi dinma boxon na. Feri magaxuxi keden yi kotoni ito xunna ma. 6 A fa han konton feri firin kanna yireni, n naxan to xuden dexon. A fopen a ma a fangan birin na. 7 N yi a to a masoe kontonna ra. A a konko a ma, a a garin, a a feri firinne gira. Hali kontonna mi fanga soto, a koton nati. Koton yi a rabira boxoni, a yi a bodon, muxu yo mi no a be a yii. 8 Koton senben yi gbo ayi han! Koni a senben to gbo ayi, a feri gbeen yi gira. Feri rayabuxi naanin yi mini a funfuni, e xunne tixi boxon tongon naaninne ra. 9 Ne ye, feri xurin yi mini keden ma, naxan senben yi gboma ayi yifari foxon binna nun sogeteden binna nun na yamanan mabinni naxan tofan. 10 A mon yi keli kore xonna ganla xili ma, a yi na foxo kedenna nde rabira boxoni e nun sarene. A yi e yibodon. 11 A yi keli kore gali manga yeteen xili ma, a loxo yo loxo saraxan ba a yii, a yire sarijanxin nabira. 12 Fata a murute jaxin na, na ganla nun loxo yo loxo saraxan yi lu a senben bun ma. Fenna yi jondin woli boxoni. A yi no deen soto a kewanla ngaan ma. 13 N yi maleka keden fala ti xuiin me, maleka gbete yi a fala fala tiin xa, a naxa, “Fe toxini itoe buma han waxatin mundun yi lan loxo yo loxo saraxan nun murute halagi tiina fe ma, e nun yire sarijanxin nun ganla yibodonna fe?” 14 A yi n yabi, a naxa, “Fo jinbanna nun xoton wuli firin keme saxon na dangi. Na xanbi ra, yire sarijanxin mon yi rasarijan.” 15 N tan Daniyeli, n yi fe tooni ito matoma, n mon yi a famunna fenma, daala nde yi ti n dexon ma naxan nun muxun maliga. 16 N mon yi muxu xuiin me Wolayi xuden tagi, a yi sonxo, a naxa, “Baraka Yibirila, muxuni ito rafamu fe toon bunna ra.” 17 A yi a maso n dingirani. A to maso, n gaxu, n bira, n yetagin yi lan boxon ma. Koni a naxa n na, “A famu, adamadina, fa fala fe tooni ito waxati rapanna nan gbee a ra.” 18 A falan tima n xa waxatin naxan yi, n yi fuga a ra, n yetagin yi lan boxon ma, koni a a yiin din n na, a n nakeli. 19 A mon yi a fala n xa, a naxa, “N xa i rakolon naxan fama ligadeni xolon jan waxatini, bayo waxatina nde saxi a janna ma. 20 I kontonna naxan toxi feri firinna a xun ma, Mede nun Perise mangane nan ne ra. 21

Koto maxabexin tan, Gireki boxon mangan nan na ra. Feri gbeen naxan yi a yeene longonna ra, e manga singen nan na ra. 22 Fenna to gira, feru naanin yi mini a funfuni naxan findixi mangaya naanin na naxanye kelima a boxoni, koni e mi fanga sotoma alo a tan.” 23 “E mangayaan na jan, murutelane na jaxu ayi, manga de jaxuxi yii radon tiina nde kelima nen. 24 A senben gboma ayi nen, koni a tan yeteen fangan mi a ra. A kala magaxuxine tima nen, a yi no deen soto a kewanle yi, a senbene halagi e nun siya sarijanxina. 25 A lugoxi koten na, a noma nen bonne yanfadeni. A wasoma nen a sondonni, a muxu wuyaxi raxorima nen naxanye yengin yi a ma, e makantanxi. A kelima nen Mangane Mangan xili ma, koni a kalama nen, hali adama fangan mi a raba. 26 Ninbanna nun xoton ma fe toxin naxan ito ra, jondin na a ra. Fe tooni ito ramara wundoni, amasoto a waxati yikuyene nan ma fe falama.” 27 “N tan Daniyeli, n yi lu soge wuyaxi, n fangan jianxi, n furaxi. Na xanbi, n keli, n yi n togbo mangan hayune ra. N yi kontofinla nin, lan na fe toxin ma, bayo n mi yi a famuma.”

9 Dariyusi, Asuyerusu a diina, keli Mede bonsenni, na yi findi mangan na Babilon yamanani. 2 A mangayaan jee singeni, n tan Daniyeli, n yi a kolon Kitabun xon ma, a a daxa jee tonge solofere xa kamali Yerusalen taan kala xanbini, fata jeeene yaten na Alatala naxan fala Nabi Yere mi xa. 3 Nanara, n yi sunna suxu, n kasa dugin nagodo n ma, n yi xuben so n xunna ma, n yi n yee rafindi Marigina Ala ma, alogo n xa a maxandi, n yi a mafan. 4 N yi Alatala maxandi, n ma Ala, n yi ito rali a ma, n naxa: “Marigina Ala, i gbo, i magaxu. I tan nan i ya layirin nun hinanna ramaraxi i rafan muxune xa, naxanye i ya yamarine suxi. 5 Nxu bata yulubin liga, nxu bata tantan, nxu bata findi son kanne ra, nxu bata murute i tan xili ma, nxu yi nxu xun xanbi so i ya yamarine nun i ya sariyane yi. 6 Nxu mi i ya walikene, nabine xuiin namexi, naxanye falan ti i xinla ra nxo mangane xa, e nun nxo manga xunxurine nun nxu babane nun nxo yamanan muxune birin. 7 I tan, Marigina, i tinxin. To loxoni, yagina nxu tan nan xa Yuda muxune nun Yerusalen kaane e nun Isirayila yamaan birin, naxanye maso e nun naxanye makuya e nun naxanye yamanane birin yi. I tan nan e rasigaxi amasoto e tinxintareyaan xon ma. 8 Alatala, yagina nxu tan nan xa e nun nxo manga gbeene nun nxo manga xunxurine nun nxu babane,

bayo nxu bata yulubin tongo i tan ma. 9 Koni, i tan, Marigina, nxo Ala, i nxu mafeluma i ya kininkininni, hali nxu to murute xi i xili ma. 10 Nxu mi i tan Alatala xuiin namexi, nxo Ala, i to nxu maxodin nxu xa xuru i ya sariyane ma, i naxanye falaxi nxu xa fata i ya walikene nabine ra. 11 Isirayila yamaan birin bata i ya sariyan kala, e mi i xuiin name. Nanara, dangan naxan sebexi Musaa sariyan kui, na bata godo nxu fari. 12 I bata na falan nakamali i naxan fala nxu xili ma e nun nxo kuntigin naxanye nxu ramaraxi. I toraya gbeen nafa nxu ma Yerusalen taani naxan joxondon munma godo yire yo yi 13 alo a sebexi kiin de Musa a sariyani. Na toron birin bata fa nxu ma. Hali na, nxu mi Alatala maxandi, nxo Ala. Nxu munma fata nxo hakene ra, nxu mi i ya jondin kolon. 14 Nanara, Alatala tinxi torayani ito rafadeni nxu ma. Amasoto Alatala nxo Ala, i tinxin i kewanla ngaani i naxanye rabaxi. Koni nxu mi i xuiin name.” 15 “Marigina, nxo Ala, i tan nan i ya muxune ramini Misiran yi i yii senbemaan na, naxan xili gbeen fi i ma alo a kiin de to. Koni nxu tan, nxu bata yulubin liga nxu findi sonmane ra. 16 Marigina, i ya xolon ba Yerusalen taan ma, e nun i ya geya sarijanxina, i nama fitina men kaane xili ma bayo i tinxin feene birin yi. Nxu yulubine nun nxu babane hakene bata nxu rayagi nxu rabilinna muxune yee ra. 17 Awa, nxo Ala, i xa i ya walikena maxandin name e nun a mafanna. I tan Marigina fe ra, i yetagin toron xa godo i ya yire sarijanxi kalaxin ma. 18 N ma Ala, i tuli mati, i yi a me, i yeen nabi i yi nxo taa xonna mato, i xinla maxandin deen de! Amasoto nxu mi i maxandima nxu kewali tinxinxine xon ma fo i ya kininkinin gbeena. 19 Marigina, a rame! Marigina nxu mafelu, i joxo lu. A raba, i nama bu i yetena fe ra. Ee! N ma Ala, bayo i xinla falama i ya taan nun i ya muxune nan xun ma.” 20 N yi lu falan tiye, n yi n ti n yulubine ra e nun n ma yamaan gbeene ra, Isirayila, n yi lu Alatala mafanye, n ma Ala, a geya sarijanxina fe ra. 21 N yi maxandini waxatin naxan yi, Baraka Yibirila, n maleka naxan to n ma fe too singeni, na gixin yi a maso n na kuye, jinbanna saraxa ba waxatini. 22 A yi n xaran a a fala n xa, a naxa, “Daniyeli n bata fa mon alogo i xa no famun tiye. 23 I mafanna foloxina, bataxina nde yi mini, n faxi nen, n xa fa a rali i ma, bayo marafan muxun nan i ra. Falani ito suxu i yi fe tooni ito famun.” 24 Nee solofere doxode tonge solofere nan saxi i ya siyaan nun i ya taa sarijanxin xa, alogo muruten xa jan, dan

yi sa yulubine ra, alogo hakene xa xafari, habadan tinxinyaan yi fa, alogo fe toon nun waliyiyaan xa kamali, alogo sarijandene sarijanden xa masusan. **25** “I xa a kolon, i yi a famun: Keli na falan yisarin waxatin ma naxan a fala a Yerusalen mōn xa yitōn, a ti, han Manga sugandixin faana, j̄eē solofere dōxōde solofere nun j̄eē solofere dōxōde tonge sennin nun firin nan tima. Taan nun a yinna mōn tima nen koni a waxatine xōdōxōma ayi nēn. **26** Na j̄eē solofere dōxōde tonge sennin nun firin na dangu, e Muxu Sugandixin faxama nēn, muxu yo mi luma a xa. Na xanbi ra, mangana nde nun a ganla fama nēn, e taan kala e nun yire sarijanxina. Na mangan najanna fama nēn alo fufana. Kala nan nagidixi han yengen najanna. **27** Nēē solofere bun ma, na mangan nun muxu wuyaxi layirin xidima nēn. Na j̄eē solofere tagiin bun ma, a saraxane nun kiseene bama a yii nēn, a yi se haramuxin ti yire sarijanxini naxan halagin tima, han a sa a najanna li naxan nagidixi a xa.”

10 Perise mangana Kirusi a mangayaan j̄eē saxandeni, Ala yi falana nde lankenemaya Daniyeli xa naxan xili Belitisasari. Nōndin nan na falan na fa fala yenge gbeen kelima nēn. A na falan famu fe toon nan xōn alo xiyena. **2** Na waxatini, n tan Daniyeli, n yi xunsagi saxan naba sununi. **3** N mi donse timin timinxi yo don, n mi sube don, n mi minse min, n mi n masusan ture xiri j̄axumen yo ra, han lōxō xun saxan yi dangu. **4** Kike fōlōn xii mōxōjen nun naaninna, n yi baa gbeen dēxōn ma naxan xili Tigiri baana. **5** N yi n yēen nakeli, n yi muxun to, taa dugi fixēna a ma e nun xēmaan yetēen tagi xidin xidixi a tagi. **6** A fatin degema a ma alo gēmē fixēna. A yetagin mayilenma alo kuyen na a j̄inna masōxōn. A yēene ligaxi alo tēē degēna. A yiine nun a sanne mayilenma alo sulan xuruxina. A fala xuine ligaxi alo seten xuina. **7** N tan, Daniyeli, n keden peen nan na fe toon ti, muxun naxanye yi n dēxōn, ne mi na to, koni gaxu gbeen yi e suxu, e yi e gi, e sa e luxun. **8** N keden peen yi lu, n yi fe to gbeen i to. Fangan yi j̄an n yi, n yetagin yi maxetē, a tōjōn. **9** N yi a fala ti xuiin mē. N yi a fala xuiin mēma waxatin naxan yi, n fuga a ra, n yi bira, n yetagin yi lan bōxōn ma. **10** Nayi, yiina nde yi din n na, a n xuruxuruxin nakeli n xinbine nun n yii xunna. **11** A a fala n xa, a naxa, “Daniyeli, muxu rafanxina, kata i n ma fala tixine famu. Keli, i ti i funfuni i dēēn de, bayo n xēxi i tan

nan fēma iki.” A to na falan ti n xa, n keli dingenj̄e ayi. **12** A mōn naxa, “Daniyeli i nama gaxu, bayo xabu i a ragidi lōxō singen naxan yi i bōj̄eni i xa famun fen, i yi i yetē magodo Ala xa, i ya maxandi xuiin yi ramē. N faxi i ya fala xuine nan yabi ra i ma. **13** Koni Setanaa malekan naxan Perise bōxōn ma, na tixi n yēē ra nēn xii mōxōjen nun keden han Mikeli, malekane mangana nde yetēēn yi fa n mali. Nayi, n nadigi nēn Perise mangane fēma. **14** Awa, iki n bata fa i rakolondeni feen naxan fama ligadeni i siyaan na yēēn na bayo fe toona nde luxi na waxatine xa.” **15** A to yi na falane tima n xa, n yi n xun sin bōxōn ma, n yi n dundu. **16** Na xanbi, adamadiine maligana nde yi fa a yiin din n dē kidin na, n yi n deni bi. Naxan yi tixi n dēxōn ma, n yi a fala na xa, n naxa, “N kanna, fe tooni ito a fe bata n kuisan. Fanga yo mi fa n na. **17** Konyin falan tima a marigin xa di? Iki, fanga yo mi fa n na, n niiraxinla dasama.” **18** Adamadiin maligan mōn yi a yiin din n na. A fangan fi n ma. **19** A yi a fala, a naxa, “I nama gaxu, muxu rafanxina, i bōj̄en xa xunbeli. I senbē so, i wekile!” A to na fala n xa, n yi fangan sōtō, n yi a fala, n naxa, “N kanna xa falan ti, bayo i bata n senbē so.” **20** A yi a fala n xa, a naxa, “I a kolon, n faxi i ma naxan na? Iki n xetēma, n xa sa Perise Yinna Mangan yenge. N na siga waxatin naxan yi, Gireki Yinna Mangan fama nēn. **21** Koni naxan sebexi j̄ōndi kitabuni, n faxi na nan nalideyi i ma singen. Muxu yo mi n maliye n yaxuni itoe xili ma fō ē gbee malekan Mikeli.”

11 “N tan nan yi Mikeli malima yēngeni Dariyusi Mede kaana mangayaan j̄eē singeni.” **2** “Iki n xa j̄ōndin fala i xa. Manga saxan dōxōma Perise xunna nēn, a naaninden nafunla sōtōma nēn dangu bonne ra. A fangan na gbo ayi waxatin naxan yi a nafunle xōn, a birin nakelima nēn Gireki yamanan xili ma.” **3** “Koni, gali mangana nde kelima nēn, a nōōn sa e nun senbē gbeen. Naxan na a kenēn, a na rabama nēn. **4** Koni a na mate kati, a yamanan yensenma nēn, a yi yitaxun bōxōn tongon naaninna ra. A mi luyē a bonsonna xa, a mōn senben mi gboma ayi alo a yi kiin de bayo a yamanani taxunma nēn, a radangu gbētēye ma naxan mi e tan na.” **5** “Yiifari fōxōn mangan findima fangamaan na nēn, koni a kuntigina nde keden fangan gboma a gbeen xa nēn, a nōōn ti. A nōōn findima nō senbēmaan nan na. **6** J̄ēēna ndee na dangu, e findima xōyimaan na nēn. Yiifari fōxōn mangana a

dii temen fama nen kōmen fōxōn mangan fēma e xa lanna xidi, koni a fangan mi luma a yi, a xēmen nun a senben mi buma. Na waxatini, a soma nen yiini, e nun a rabilinna nun a baba nun naxanye tixi a bun. 7 Dii temēna xabilan muxuna nde kelima nen a baba jōxōni, a fama nen kōmen fōxōn mangana ganla xili ma, a yi so a taa makantanxine kui. A e yenge, a e nō. 8 A mōn sigama e suxurene yetēen na nen Misiran yi e nun e sawura wure xabuxin nun muran xōnne gbeti daxin nun xēma daxina. Na xanbi, a lu jēe dando, a makuyaxi kōmen fōxōn mangan na. 9 Kōmen fōxōn mangan sigama nen yiifari fōxōn mangana yamanani, koni a mōn xetēma nen a bōxōni.” 10 “Kōmen fōxōn mangana a diine yitōnma nen yenge so xinla ma, e gali wuli wuyaxi malanma nen naxan sigama yēen na alo fufaan naxan bōxōnma, a mōn yi xetē a yamanani. A fuma a yaxuna taa makantanxina nde ma nen. 11 Yiifari fōxōn mangan xōloxina, a yi mini yengesodeni kōmen fōxōn mangan xili ma, na fan yi gali gbeen nakeli. Koni na ganla suxuma nen yengeni. 12 Na ganla xalima nen, yiifari mangan yi waso ayi. A muxu wuli wuyaxi rabirama nen, koni a mi nōde sōtōma.” 13 “Amasōto kōmen fōxōn mangan mōn fama gali wuli wuyaxi malandeni nen dangu a fōlōn na. Waxati dando nun jēe dandon bun ma, e nun gali gbeen minima nen e nun gali muran wuyaxi. 14 Na waxatini, muxu wuyaxi kelima nen yiifari fōxōn mangan xili ma. Hali gbalotōna ndee murutema nen i tan siyani alogo fe toon xa kamali, koni e dagalanma ayi nen. 15 Kōmen fōxōn mangan fama nen gbingbinna ratedeni han a taa makantanxin yinna suxu ayi. Yiifari ganla nun a sofa kendene mi a yēe ratiye. E fangan jianma nen. 16 Naxan na rafan kōmen fōxōn sofa mangan ma, a na nan ligama nen, bayo muxu yo mi a yēe ratiye. A dōxōma Yamana To Fajini nen, a kala ti senbena a yii.” 17 “A a natama nen a a xa fa e nun a yamanan senben birin alogo e nun yiifari fōxōn mangan xa lanna xidi, a wama nen a dii temen fi feni yiifari fōxōn mangan ma a jaxanla ra, alogo a nōdeēen sote a ma kii naxan yi, koni a fe yitōnxin mi lanma. 18 Na danguxina, a firifirima nen yamanane xili ma naxanye fōxō igen mabinna ra, a a wuyaxi suxuma nen, koni gali mangana nde a marayarabi kewanla kalama nen hali a tan yetēen mi yarabi. 19 Na xanbi ra, a a firifirima nen a yamanan taa makantanxine xili ma, koni a dagalanma ayi nen, a bira, a mi fa toma sōnōn.” 20 “A jōxōn yibiran fitinatōna nde

rafama nen yamanan fajni yireni. Koni soge dando, a halagima nen, a mi fata xōle ra, a mi fata yenge ra.” 21 “Muxu rajanaxuxina nde tima nen a jōxōni, mangaya mahiban mi naxan ma. Bōje xunbeli waxatin tagini, na xēmen fama nen mangayaan tongodeni kōtene ra. 22 Yaxu ganla naxan minima a xili ma alo fufana, a ne rayensenma ayi nen e nun layiri mangana. 23 A yanfan tima nen e nun bodene saratine kui, han a findi senbemaan na hali a xōyine to mi wuya. 24 Bōje xunbenla waxatini, a sa fumama nen bōxōn nafulu yirene ma. A feen ligama nen a babane nun a benbane mi nō naxan lige. A yengen tōnōne yitaxun e nun nafunla nun sōlo feene. A kōten nan ligama a sa fu taa makantanxine ma han waxati.” 25 “A gali gbeen xunna ra, a fangan nun a wēkilen nakelima yiifari fōxōn mangan xili ma nen. Yiifari fōxōn mangana a yitōnma nen yenge so xinla ma, a gali xungbe senbemaan nakeli. Koni a mi nōon sōtōma, bayo e yanfan dōxōma a ra nen. 26 A rabilinna muxune nan a yanfama. A ganla suxuma nen, sofa wuyaxi yi faxa. 27 Manga firinna e bode toma nen yire kedenni koni bayo e sōndōmene rafexi fe jaxin na e wule falan nan tun masarama e bode tagi, koni a mi gasama amasōto a rajanna waxati munma li. 28 Kōmen fōxōn mangan xetēma nen a konni e nun sōlo fe wuyaxi. A bōjen tema Layiri Sarijanxin xili ma nen kira yi, a a rafan feen liga, a xetē a konni.” 29 “A waxatin na a li, kōmen fōxōn mangan mōn fuma nen yiifari fōxōn ma, koni waxatini ito yi feene mi ligama alo a singeni. 30 Kunkine fama a yengedeni nen sa keli sogegododeni Sipiri yamanani. A na yōntō, a xetēma a xanbi ra nen. A xōlen soma layiri sarijanxin xun na nen. Muxun naxanye e xun xanbi soma na layiri sarijanxini a jōxō luma nen ne xōn.” 31 “Sofane fama a yamarin bun nen, e makantande sarijanxin xun kala. E tōnna dōxōma nen lōxō yo lōxō saraxan ma. E ‘Halagi Tiina Se Haramuxin’ ti. 32 A layiri kalane yifuma a matōxōn xōn nen. Koni muxun naxanye e Ala kolon, ne e yixōdōxōma nen e tondi a yii. 33 Fe yēe toone yamaan yē, ne muxu wuyaxi xaranma nen, koni nde dagalanma ayi nen waxatina nde yi silanfanna nun tēen nun koniyaan nun funmana fe ra. 34 E na dagalanje ayi na waxatini, e mali siyadi sōtōma nen, nanara muxu wuyaxi basanma e ra nen nafigiyani. 35 Fe yēe toone yē, nde faxama nen, alogo e sayaan xa yamaan sarijan, a a yixa, a fixa han waxati rajanni, bayo a mi fe fō waxatin naxan saxi.” 36 “Mangana a

rabama alo a waxonna. A a yitema nen, a a yigbo alane ngaan xun na. A falana nde tima nen muxun yengi mi naxan ma alane Ala xili ma. A sabatima nen han Alaa xolon yi defe, bayo naxan na ragidi, na kamalima nen. **37** Mangan mi alane binyama. A babane gbee ba, naxanle gbee rafanxi ba, a mi ala yo binyama bayo a yete yigboma e birin xun na nen. **38** E naxoni, a tan makantandene ala binyama nen a babane mi yi naxan kolon. A a binyama nen xemaan nun gbetin nun boxo bun nafunle ra, e nun se xonne. **39** E nun na ala xonen fuma nen taa makantanxine ma. Naxan na a binya, a xunnayerenna fi na ma, a noon fi a ma muxu wuyaxi xun na, a boxone fi a ma a kontonna ra.” **40** “Waxati rajanni, yiifari foxon mangan kelima a xili ma nen, komen foxon mangan soma a xun na nen alo foye gbeena e nun a yenge so wontorone nun soo kanne nun yenge kunki wuyaxi. A tan sigama nen yamanane kuine yi, a boxon e ma alo fufana, a dangu. **41** A soma Yamanan Tofajin kui nen, muxu wuyaxi yi dagalanje ayi, koni Edon nun Moyaba nun Amoni a kuntigine e yete sotoma a yii nen. **42** A noon sama nen boxo wuyaxin ma, hali Misiran mi a yete sotoma. **43** A noon sotoma nen Misiran nafunla birin xun na e nun xemaan nun gbetin nun muran xonne. Libiya kaane nun Kusi kaane xuruma nen a bun ma. **44** Koni sogeteden nun komen foxon xibarune fama nen a magaxudeni, e nun xolo gbeen sigama nen kala ti xinla ma a muxu wuli wuyaxi raxori. **45** A a gbee manga bubu gbeene tima nen baane longonna ra geya binyaxin nun a sarijanxin ma binni. A fe rajanna yi a li, muxu yo mi a maliye.”

12 “Na waxatini, maleka mangan Mikeli kelima nen naxan i ya yamanan kantanma. Na findima waxati xodexen na nen naxan joxon munma liga xabu yamanane foloni han iki. I ya siyaan muxune kisima nen naxanye xili na taran sebexi nii rakisin kitabun kui. **2** A gbegebe naxanye xima boxon bun, ne xulunma ayi nen. Ndee habadan nii rakisin sotoma, ndee yalagima nen, e yagi habadan! **3** Fe yee toone yanbanma nen alo kore xonna lonni yalanna, naxanye na muxu wuyaxi xaran tinxinna ma, ne degema nen alo sarene habadan habadan!” **4** “I tan, Daniyeli, falani ito ramara wundoni, kitabuni ito balan, han waxati rajanni. Nayi, a wuyaxi a xaranma nen, kolonna yi fari sa.” **5** N tan Daniyeli, n yi fe toon matoma, dajoxo firin gbete ye yi mini, boden tixi baan foxo kedenni,

boden tixi foxo kedenni. **6** E keden yi falan nasiga xemen ma naxan maxidixi taa dugini, naxan yi tixi baa igen xun ma. A yi a fala, a naxa, “Fe magaxuxini itoe kamalima waxatin mundun yi?” **7** Muxun naxan yi maxidixi taa dugini, naxan yi tixi igen xun ma, na yi a yii firinne yite kuyen binni, n yi a xuiin me, a naxa, “N bata n kolo Ala xinli naxan mi janma habadan, feni itoe buma nen han waxati saxan nun a tagi. Feni itoe kamalima nen, koni fo muxu sarijanxine senben na jan fefe.” **8** N yi a me, koni n mi a yee to, n yi a fala, n naxa, “N kannna, nanse minima feni itoe birin yi?” **9** A yi n yabi, a naxa, “Daniyeli, siga, bayo falani itoe luma nen wundoni, e balan, han waxati rajanna. **10** A wuyaxi sarijanma nen, e fixa, e xelexele. Naxudene a kobin nabama, a mi noe a yee toe. Fe yee toone a famuma nen.” **11** “Xabu boxo yo boxo saraxan ba ayi waxatin naxan yi, han sa ti Haramu Halagi Tiin daxon na a funfuni, xii wuli keden keme firin e nun xii tonge solomanaanin nan danguma. **12** Sewan na kannna xa naxan na dija han xii wuli keden keme saxan tonge saxan e nun suulun yi a li.” **13** “I tan Daniyeli, lu a fajin fari han a rajanna, i yi i matabu. I mon kelima nen alo go i xa i keen soto waxati rajanni.”

Hose

1 Alatala yi falan ti Beeri a dii xemen Hose xa, Yusiya yi mangayani Yuda yamanani waxatin naxan yi e nun Yotami nun Axasi nun Xesekiya. Isirayila Manga Yowasi a diin Yerobowan yi mangayani Isirayila yi na waxatini. **2** Alatala to falan ti folo Hose xa, a yi a fala a xa, a naxa, “Sa jaxalan yalunxina nde tongo, i dii yalunxine soto, amasoto yamaan yalunyaan nan ligama, e Alatala rabepin!” **3** A yi siga, a sa Gomere tongo, Dibilayin ma dii temena. Na yi fudikan, a dii xemen bari a xa. **4** Alatala yi a fala a xa, a naxa, “A xili sa Yesereli, amasoto waxatidi mon, n Yehu a denbayaan jaxankatama nen amasoto e faxan ti nen Yesereli yi. N mon Isirayila mangayaan janma nen. **5** Na loxoni, n na Isirayilaa yenge so xanla senben kalama nen Yesereli meremereni.” **6** Gomere mon yi fudikan, a dii temen bari. Ala yi a fala Hose xa, a naxa, “A xili sa ‘Kininkinintarena,’ amasoto n mi fa kininkinima Isirayila yamaan ma, n mi a mafeluma sonon. **7** Koni n kininkinima nen Yuda tan ma, n yi a rakisi Alatala senbeni, a Ala. N mi e rakise tanban na. Silanfanna mi a ra, yengen mi a ra, soone mi a ra, soo ragine mi a ra.” **8** Gomere yi “Kininkinintaren” de ba, a fudikan, a dii xemen bari. **9** Ala yi a fala, a naxa, “A xili sa ‘Kantarena,’ amasoto n ma yamaan mi fa e ra, e Ala mi n na.” **10** “Koni, Isirayila kaane fama wuyadeni ayi nen alo baan mepensinna naxan mi lige, a mi yate. A yi a falama e xa menna nin, a naxa, ‘N ma yamaan mi e ra!’ Koni e fa xili bama nen menni, ‘Habadan Alaa diine.’” **11** Yuda bonsonna nun Isirayila bonsonna e malanma nen, e kuntigi keden sugandi. E minima nen yamana gbete yi, amasoto Ala yamaan na sabati loxon naxan yi, loxo gbeen nan na ra.

2 E a fala e tadane ma, “Alaa Yamana” e nun e magilene, “Alaa Rafan Muxunel!” **2** E e nga Isirayila maxadi, e a maxadi, amasoto n ma jaxalan mi fa a ra, a xeme mi fa n na! A xa yalunde maxidi seene ba a yetagin ma, a yanga maxidi seene ba a xijne longonna ra. **3** Xanamu, n na a ragelima nen, n yi a lu alo a bari loxoni. N yi a lu alo tonbonna, n yi a findi boxo xaren na, n yi a faxa ige xonla ma. **4** N mi kininkininje a diine ma, amasoto yalunde diin nan e ra. **5** E nga yalunyaan liga nen, a yi e soto, a a yete rayagi, amasoto a a fala nen: “N birama nen suxurene foxo ra, naxanye n ma donseen nun n ma min igen

soma n yii, e nun n ma yexee xabe dugin nun n ma taa dugina, e nun n ma turen nun n ma minsena.” **6** Nanara, n na a kiraan nafaxama nen janle ra n yi a rabilin yinna ra, alogo a nama fa a kiraan to. **7** A sigama nen a yangane foxo ra, koni a mi e liye. A e fenma nen, koni a mi e toe. Na xanbi ra, a a falama nen: “N xetema nen n ma xemen fema alo a foloni, amasoto n yi sewani menni dangu iki ra.” **8** A mi a kolon a n tan nan balon soma a yii, e nun minseen nun turena. N tan nan gbetin nun xemaan soma a yii fonisireyani, a yi e findi waliseen na Baali suxuren xa. **9** Nanara, a balon nun minse bogin na mo, n na ba a yii. N na n ma yexee xabe dugin nun n ma taa dugin ba a yii naxanye yi lan e yi a ba a ragelixa. **10** Iki n na a yagin naminima nen kenenni a yangane yee xori, muxu yo mi a be n yii. **11** N yi a sewan birin dan, a sanle, a kike nenene, a Matabu Loxone nun a binya loxone birin. **12** N na a bogise binle nun a xode binle kalama nen, a yi a falan naxanye ma, a naxa, “N saren ni itoe ra n yangane naxanye soxi n yii!” N ne findima fotonna ra nen, burunna subene yi e kala. **13** Ala naxa, “N na a fe jaxin saranma a ra nen loxone fe ra a wusulanna gan Baali suxurene xa naxanye ma. A yi a maxidi a yiirasona nun a tunlasone yi, a siga a suxurene fema, a jinan n tan ma.” Alatalaa falan nan na ra. **14** Nanara, n na a mabandunma nen, n yi a xali tonbonni, n fala fajin ti a xa. **15** N mon a bogise bili langane raxetema a ma nen menni. Akori meremeran yi findi yigin na. Isirayila sigin sama nen menni alo a dii jore waxatini, alo a keli Misiran yamanani loxon naxan yi. **16** Na loxoni, Alatalaa falan ni ito ra, a naxa, “I n xilima nen: ‘N ma xemena!’ I mi fa n xilima fa fala ‘N kanna, Baali.’” **17** N Baali suxurene xinle bama nen i de, alogo e xinle nama fa fala. **18** Na loxoni, n layirin tongoma nen e nun burunna subene tagi, e nun xoline nun bubuseene. N xanla nun silanfanna nun yengen bama nen boxon ma, n ma yamaan yi e sa boje xunbenli. **19** N findima nen i ya xemen na habadan, n findi i ya xemen na tinxinna nun sariya kenden nun hinanna nun kininkininni. **20** N findima nen i ya xemen na lannayani, i yi Alatala kolon.” **21** Alatalaa falan ni ito ra, a naxa, “Na loxoni, n ni i ya maxandin yabima nen, koren yi tule igen nagodo boxon ma. **22** Boxon yi balon nun minse bogin nun turen namini. Ne yi Yesereli makone fan. **23** N na Isirayila rasabatima nen boxon ma n yete xa. N yi naxan ma fa fala ‘Kininkinintarena’ n kininkinima a

ma nen. N yi naxan ma a 'Kantarena.' N na falama nen, n naxa, 'N ma yamaan nan ε ra!' Ne yi n yabi, e naxa, 'N ma Ala.'"

3 Alatala yi a fala n xa, a naxa, "I mən xa sa xanuntenyaan yita i ya naxanla ra yangan naxan yii, naxan findixi yalunden na. I xa a xanu alo Alatala Isirayila kaane xanuxi kii naxan yi, naxanye birama ala gbetene fəxo ra, bogise ralixine rafan naxanye ma." **2** N yi naxanla futu gbeti gbanan fu nun suulun na, e nun murutu benbeli keden nun a tagi. **3** N yi a fala a xa, n naxa, "Lu n konni waxati xunkuye. I nama yalunyaan liga. I nama xeme fe yo kolon. N fan luye i xa na kiini." **4** Amasoto Isirayila kaane luma nen waxati xunkuye ikiini: Manga mi e xunna, kuntigi mi na, saraxa mi na, kide geme mi na, saraxarali doma mi na, suxure mi na. **5** Na xanbi ra, Isirayila kaane xetema nen, e Alatala fen, e Ala, e nun Dawuda, e mangana. E gaxuxin yi fa Alatala ma e nun a nema waxati famatoni.

4 Isirayila kaane, ε Alatala falan name! Amasoto kitina Alatala nun ε tan tagi. A naxa, "Lannaya mi fa na. Hinan mi na. Ala kolon mi fa yamanani ito yi. **2** Dangan nun wulen nun faxan nun mupan nun yalunyaan nan na. Gbalon bata gbo ayi, faxan tima a bode fari." **3** Nanara, ε yamanani xarama nen, a niimaseen birin yi xosi. Subene nun xoline, hali baa yexene fan faxama nen. **4** Koni muxu yo nama matandin ti, muxu yo nama yamaan mafala, amasoto kitina nxu nun saraxaraline nan tagi. **5** ε tan saraxaraline nun nabine tantanma kœen nun yanyin na. Nanara, n na e nga Isirayila faxama nen. **6** N ma yamaan bata kala, amasoto kolonna dasaxi a ma. Bayo ε bata ε me kolonna ra, n bata ε ba n ma saraxaraliyani. Bayo ε bata ε Alaa sariyan nabepin, n fan bata ε diine rabepin. **7** Saraxaraline nema wuye ayi, e yulubine fan gboma ayi. Nanara, n na e binyen masarama nen yagin na. **8** E lugoma n ma yamaan yulubine xon. Yamaan hakene e nii yifanma e ma. **9** A ligama nen saraxaraline ra alo yamana, n yi e kewanle saran e ra. **10** E e degema nen, koni e mi lugoma. E suxurene batuma, koni ne mi e rasabatima. Amasoto e bata Alatala rabepin, e yi e sɔbe so **11** yalunyaan ma e nun dolo fonna nun dolo nene minna. Ne nan e xaxinla kalaxi. **12** N ma yamaan suxure wudine maxodinma, alo dunganna nan falan tiye e xa. Amasoto yalunya xaxinla bata e ralɔ ayi, e

yalunyaan ligama Ala ra. **13** E saraxan bama geya gbeene xuntagi. E wusulanna ganma geyane fari, xanamu warine nun wudi tofajine nun kondene bun ma, e nun wudi belebelen naxanye ninin gbo. Nanara, ε dii temene yalunyaan ligama e nun yalunden nan ε bitan gilene ra. **14** N mi ε dii temene yulubine saranma e ra bayo e yalunyaan ligama, hanma ε bitan gilene bayo yalunden nan e ra. Bayo ε tan yeten yalunyaan ligama ε nun yalundene, ε nun naxalan yalunxine saraxan bama. Yama xaxilitarena a gima a bononi. **15** Isirayila, xa i lu yalunyani, ε nama Yuda ti haken ma, ε nama siga Giligali yi, ε nama te Beti-Aweni yi. ε nama ε kolo Alatala xinli! **16** Xa Isirayila murutexi alo jinge mataganxina, Alatala xa e masuxu di? Alo yexedina meremere fajin ma. **17** Efirami bonsonna muxune bata kankan suxure batun ma, e lu na! **18** Xa e minseene bata dasa, e sa dangu yalunyaan ma. E mangane waxi yagin nan xon. **19** Nanara, wuluwunla e xalima nen, e yi yagi e saraxane fe ra.

5 Saraxaraline, ε ito rame! Isirayila kaane, ε liga ki fajni! Mangana denbayana, ε tuli mati! Amasoto kitina ε tan nan xili ma. ε bata findi woson na Misipa yi, e nun luti ratixina Taboro geyaan ma. **2** ε bata yili tilinxin ge yamaan yee ra Sitimi yi. Koni n tan na feen saranma ε birin na nen. **3** N na Efirami bonsonna kolon, Isirayila mi luxunxi n ma. Bayo iki, Efirami bonsonna, ε bata yalunyaan liga. Isirayila bata a yete raxosi. **4** E bata kankan e kewanle ma, e mi fa xetema e Ala ma. Amasoto yalunya xaxinla bata so e yi, bayo e mi fa Alatala kolon. **5** Isirayilaa wason nan sereyaan bama a xili ma. Isirayila nun Efirami bonsonna muxune dagalanma ayi nen e hakeni, Yuda fan birama nen e fəxo ra. **6** E na e yexee kurune nun jingene ba saraxan na, e Alatala fen, e mi a toe mume bayo a bata keli e ye. **7** E bata tinxintareyaan liga Alatala ra, e diine bari e yangane xa. Iki, kike keden peen nan luxi, e bəxon yi kala. **8** ε xotaan fe Gibeya yi, ε xotaan fe Rama yi! E yenge so sonxoni te Beti-Aweni yi! Bunyamin kaane, yaxune ε xanbi ra! **9** Efirami bonsonna kalama nen Fe Saran ləxoni. N jondin nan falama Isirayila bonsonne xa iki. **10** Yuda kuntigine bata liga alo naxanye e bəxon dan gemene maxetema. N ma xolon fama e ma nen alo fufana. **11** Efirami bonsonna naxankataxi, a yalagixi, bayo a biraxi fe fune nan fəxo ra. **12** N bata Efirami bonsonna toro alo setena, e nun Yuda bonsonna alo furena. **13** Efirami

bõnsõnna to a furen to, Yuda bõnsõnna to a furene dēene to, Efirami bõnsõnna yi siga Asiriya yamanani, a xeraan nasiga Manga Gbeen ma a mali feen na. Koni a mi nœ ε rakendeye, a mi nœ ε furen dēene raxunbele. **14** Amasõto, n luma nen alo yatana Efirami bõnsõnna xa, alo yata gbeena Yuda bõnsõnna xa. N ne yibõma nen, n siga e ra, muxu yo mi e bε n yii. **15** N mōn xetema nen n dōxōdeni, han e yi e ti e sōnne ra, e n fen. E na tōrō tun, e n fenma nen.

6 E fa be, en xete Alatala ma! Amasõto a bata en yibo, koni a mōn en nakendeyama nen. A bata en garin, koni a en maxōlōdene maxidima nen. **2** Xii firin na dangu, a en niin bire en yi mōn, a xii saxandeni a en yitōn, en yi lu a yetagi. **3** En xa Alatala kolon, en bira a kolonna fōxō ra. Alo kuye yibaan to fama, a fan minima nen kenenni yati! A fama nen en xa alo tulen jēmēn na, alo furu tulen naxan bōxōni kunma. **4** N nanse ligama ε tan na, Efirami bõnsõnna? N nanse ligama ε ra, Yuda bõnsõnna? E hinanna luxi nen alo xōtōn ma kundana, alo xiila naxan yolonma a xuya ayi mafuren! **5** Nanara, n na ε yengema nen nabine ra, n na ε faxama nen n dēen fala xuine ra. N ma kitine fixa alo kēnēnna. **6** Amasõto hinanna rafan n ma dangu saraxan na. Ala kolonna dangu saraxa gan daxine ra. **7** E bata layiri kala alo adamadiine, nayi e bata n yanfa. **8** Galadi taan nafexi fe jaxi rabane nan na, han wuli funfunē toma ayi. **9** Alo mafu tiin naxanye muxune legedenma luxunni, saraxarali ganla fan bata faxan ti Siken taan kiraan xōn, e gbalone raba. **10** N bata fe jaxine to Isirayila yamaan ye: Efirami bõnsõnna bata yalunyaan liga, Isirayila bõnsõnna e yete raxōsima. **11** I tan fan, Yuda, se xaba waxatin nagidixi i xa, n na fa n ma yamaan suxu muxune ra waxatin naxan yi.

7 N to wa Isirayila bõnsõnna rakendeya feni, Efirami bõnsõnna haken mōn yi keli. Samari a jaxun yi mini kēnēnni. Bayo e darixi yanfan soē. Mupadene soma, mafu tiine yi lu tandeni. **2** E mi e mirima fa fala n xaxili e jaxuyane birin xōn. Iki e kewanle e rabilinxī, e hakēne n yetagi waxatin birin. **3** Itoe rafan mangan ma, koni e jaxu! E wulene rafan kuntigine ma. **4** E birin yalunde. E kui feene wolonxi alo buru gandena. A na wolon, buru ganna mi fa a tēen nafe keli burun bōnbō waxatini han a yi te. **5** Na kiini, mangana jaxajaxan lōxōni, kuntigine xunne yi keli dōlōn na. Mangan yi magele tiini itoe rasene. **6** E xaje alo sulun tēena, e maso mangan na, e xa yanfan so a ma. E bōje

teen dēgema nen kōena ngaan na, xōtōnni a keli alo wonson tēena. **7** Isirayila kaane xaje alo sulun tēena, e e kuntigine raxōrima, e e mangane birin faxa. Anu, na sese mi n maxandima. **8** Efirami bõnsõnna basanma siyane ra. Efirami bõnsõnna findixi buru xunna ra naxan fōxō keden ganxi bode fōxō mi ganxi. **9** Xōje ne a senben kalama koni a mi sikema. Foriyana a suxuma, koni a mi a rakōsima. **10** Isirayilaa wason sereyaan bama a xili ma. Koni na birin kui, a mi xetema Alatala ma, a Ala, a yi a fen. **11** Efirami bõnsõnna luxi nen alo ganba xaxilitarena naxan madaxuma sinma! A Misiran bōxōn xilima waxatina nde yi, a fa bira Asiriya mangane fōxō ra. **12** Xa e siga, n yalaan wolima nen e fari, n yi e rabira alo xolina. N yi e yulubine saran e ra, alo e rakolonxi kii naxan yi e malanni. **13** Gbalona e xa, amasõto e e gima n ma! Fitina na e xa, amasõto e murutexi n ma. N yi waxi e xunba feni, koni e wulene falama n xun ma. **14** E mi n maxandima e bōje ne yi, koni e wugama e sadene nan ma. E kunfama donseen nun dōlōn fōxō ra, koni e e masiga n tan na. **15** N tan nan e maxaranxi, n yi senben fi e ma, koni e fe jaxine mirima n xili ma. **16** Naxan kore, e mi xetema na ma, e yanfan tima alo xali yidōxina. Nanara, e kuntigine faxama nen silanfanna ra, e dε jaxune fe ra. Misiran kaane yi e magele na ra.

8 E xōtani tōn, yaxun godoma nen Alatala banxin ma alo singbinna. Amasõto yamaan bata n ma layirin kala, e yi murutε n ma sariyan ma. **2** E sōnxōma n xinla ra: “Nxō Ala, nxu i kolon, nxu tan, Isirayila!” **3** Koni, naxan fan, Isirayila bata a mε na ra, nanara yaxun birama nen a fōxō ra. **4** E bata mangane ti n ma yamarin mi naxan na, e bata kuntigine ti e mi n maxōdin. E bata suxurene rafala e gbetine nun e xεmane ra, nanara e raxōrima nen. **5** Ala bata i ya jinge dii suxuren nawoli ayi, Samari kaane! N ma xōlōn bata keli e xili ma han! Han waxatin mundun yi e tonde e rasarijanje? **6** A kelixi ε tan nan yii, ε tan Isirayila kaane. Walikena nde nan a rafalaxi, Ala mi a ra! Nanara, Samari a jinge dii suxuren kalama nen fefe! **7** Naxan na fe jaxin nakeli, gbalon nan xetema a ma. Nanara, hali murutun tōnsōn keden, e mi a sōtōma xēen ma. Xa na nde mini, na mi murutu fupni ramine. Hali na nde yi na nun, xōje ne nan yi a donma. **8** Isirayila bata kala! E tōnōn mi fa na siyane ye. **9** E bata siga Asiriya yi, alo burunna sofanla naxan sa tima a danna. Nayi, Efirami bõnsõnna bata a yete

sara a suxurene ma. **10** Hali e bata kantan tiine sara siyane tagi, iki n na e birin malanma nen, alogo e xa sa tɔrɔ ndedi Manga Gbeena goronne bun ma. **11** Efirami bɔnsɔnna bata yulubi xafari saraxa gandene rawuya ayi, koni ne bata findi yulubi tongoden na. **12** N bata n ma sariyane birin seɓe e xa, koni e a toxi alo se xɔɓena. **13** E saraxane ba, e kiseene rali, e a suben don. Koni ne mi rafan Alatala ma. Iki, Alatala xaxili e hakene xɔn, a e yulubine saranma e ra nen. E xete Misiran bɔxɔn ma. **14** Naxan Isirayila daxi e bata jinan na xɔn, e sa manga banxine ti. Yuda bata a taa ratangaxine rawuya ayi, koni n tɛɛn nafama nen e taane yi, a yi e yinne gan.

9 Isirayila, i nama sɛwa, i nama jaxan alo siyaan bonne. Bayo, i to suxure xɔɓen batu, i findi yalunden nan na. Yalunden kɔntɔnna bata jaxun i de murutu bɔnbɔdene birin yi! **2** Koni ne murutu bɔnbɔdene nun manpa ige badene mi fa yamaan baloma mume! Minseen dasama e ma nen. **3** Amasɔto, e mi luxi Alatala yamanani, Efirami bɔnsɔnna xetema nen Misiran yi, e yi donse haramuxine don Asiriya yi. **4** E mi fa minse saraxane rabɔxɔnma Alatala xa. E saraxane mi a kɛnɛɲɛ. E saraxan haramuxi alo janden buruna. Naxanye na a don e e yete raharamu. Bayo e buruna e tan yetɛɛn lugoma nen, a mi soma Alatala banxini mume! **5** E nanse ligama sali lɔxɔne yi, Alatala batu lɔxɔne yi? **6** Hali e sa mini halagin bun, Misiran bɔxɔna e suxuma nen, e maluxun Nofi taani. Tansinne sabatima e yii se fajine nun gbetin fari, janle fan sabatima e bubune kui. **7** Fe Saran lɔxɔne fama, fe yeɓa lɔxɔne bata yiso. Isirayila bata sɔnxɔ, e naxa, “Kɔmɔn nan nabiin na, Alaa Niin naxan yi na daxuya falane nan tima.” E hakene nun e xɔnnantɛnyaan bata gbo ayi de! **8** Kantan muxun nan Efirami bɔnsɔnna ra n ma Ala xili ma. Nanara, luti ratixine nabina kiraan birin xɔn, Xɔnnantɛnyaan nan luxi a xa Alaa banxini. **9** E bata so mayifu feene yi, alo naxan ligaxi Gibeya yi. Ala xaxili e hakene xɔn, a e yulubine saranma e ra nen. **10** N to Isirayila to, a ligaxi alo jaxundanne tonbonni. N to e benbane to, e ligaxi alo xɔden bogi singena. Koni e yi siga Baali-Peyori mabinni, e yi e yete taxu na yagi suxuren na, e raharamu alo e naxan batuma. **11** Efirami bɔnsɔnna a binyen janma nen alo xɔliin na tугan. Dii bari mi na, fudikanya mi na, se mi toma. **12** E na e diine ragbo, n na e birin bama nen e yii. Gbalon ne xa, n na n me e

ra. **13** N bata Efirami bɔnsɔnna sabatixin to yire fajini alo Tire taana. Koni Efirami a diine soma nen faxa tiin yii. **14** Alatala, a lan i xa nanse fi e ma? E jaxanle dii kuine kala, e xijene yi xara. **15** E jaxuya birin yitaxi nen Giligali yi. N na e rajaxuxi menna nin e kewali jaxine fe ra. N na e kedima nen n ma banxini. N mi fa e rafanɲe mume! Muxu murutexine nan e kuntigine birin na. **16** Efirami bɔnsɔnna luxi nen alo sansiin naxan lisixi a ra, a salenne bata xara, a mi fa bogima sɔnɔn. Xa e diine bari, n na e rafan diine birin faxama nen. **17** N ma Ala e rabɛjinma nen, amasɔto e mi e tuli matixi a ra. E findima nen sigatine ra siyane tagi.

10 Sansi bili sabatixin nan yi Isirayila ra, naxan yi bogi gbeen tima. A bogine to wuya fɔlo, a yi fɔlo saraxa gandene rawuyɛ ayi. A yamanan to sabati fɔlo, a yi kide gemene maxidi. **2** Bayo e bɔɓeni taxunxi, iki na yalagin goronna sama e xun ma nen. Ala e saraxa gandene rabirama nen, a yi e kide gemene kala. **3** Nayi, e a falama nen, e naxa, “Manga mi fa nxu yii, amasɔto nxu mi gaxuxi Alatala yɛɛ ra. Hali mangana, a nɔɛ nanse lige nxu xa?” **4** E falane tima, e e kɔlɔma wulen fari, e layirine xidi. Nanara kitine bata wara ayi, alo sise xolene xɛɛ bixini. **5** Samari kaane xaminma nen jinge dii suxurena fe ra naxan Beti-Aweni yi. Yamaan sunuma nen a fe ra. A saraxaraline fan sunuma nen a xa, naxanye yi sɛwama a binyeni, bayo a bata ba e yii. **6** A xalima nen Asiriya yi, a fi Manga Gbeen ma. Efirami bɔnsɔnna yagima nen, Isirayila yagima nen a fe yitɔnxine xɔn. **7** Samari nun a mangan fan ligama na kii nin, e xalima nen alo tamin naxan igen xun ma. **8** Se jaxi batude matexine kalama nen, naxanye findixi Isirayilaa yulubin na. Janle nun tansinne sabatima nen e saraxa gandene fari. E a falama nen geyane xa, e naxa, “E nxu yɛ maluxun!” E yi a fala yire matexine xa, e naxa, “E bira nxu fari!” **9** Xabu i naxan liga Gibeya yi, Isirayila, i mɔn na yulubin fari! E luxi menna nin! Yengen xa mi a ra naxan fe jaxi rabane lixi Gibeya yi? **10** A na n kɛnɛn, n na e yulubine saranma e ra nen. Siyane e malanma nen e xili ma, alogo e xa e suxu, e yi e xidi e hake wuyaxine fe ra. **11** Anu, Efirami bɔnsɔnna yi luxi nen alo jinge gile xuruxina, wanla rafan naxan ma. Nanara, n xun xidi wudin xidixi a xunna ma, n yi Efirami bɔnsɔnna rawali. Fɔ Yuda bɔnsɔnna xa xɛɛn bi. Fɔ Yaxuba bɔnsɔnna xa bɔxɔn nawali. **12** E xa seen si tinxinni, e sa hinanna nan sɔtɔma a xaba waxatini.

Ɛ xεε nenene sege, bayo Alatala fen waxatin bata a li, han a yi fa, a sariya kenden sa ε xa. **13** Koni ε tan bata seen si tinxintareyani, a xaba waxatini ε bata a saran jaxin soto. Ɛ bata bogin don wulen naxan sotoxi. Amasoto ε laxi ε yenge so wontorone ra, e nun ε sofa senbeman, **14** yengen kelima nen yamaan xili ma. Ɛ yinne birin kalama nen, alo Saliman to Beti-Aribeli taan kala waxatin naxan yi. Na waxatini, ngane nun diine faxesa nen e bode xon. **15** A ligama na kii fan yi nen Beteli muxune ra, bayo e jaxu han! Na subaxan ma, Isirayila mangan halagima nen fefe!

11 Isirayila to yi xurun, n yi a xanu. N yi n ma dii xemen xili a xa keli Misiran boxoni. **2** Koni n to yi e xilima, e yi e masiga n na. E yi saraxan ba Baali suxurene xa, e yi wusulanne gan suxurene xa. **3** N tan nan yi Efirami bonsonna maxaranma siga tideni, n yi e suxu e yiine ma, koni e mi a kolonxi a n tan nan yi e rakendeyama. **4** N yi e mabandunma marafanna nun xanuntenyaan nin. N tan nan xun xidi wudin baxi e xunna ma, n yi n felen n donseen so e yii. **5** E xetema nen Misiran boxoni yati! Asiriya yamanan nan noon soto ma e xun na, amasoto e bata tondi fe n ma. **6** Nanara, sofane fama silanfanne ra e taane yi, e yi e taan deen wurene gira Isirayila kaane fe yitonxine fe ra. **7** N ma yamaan kankanxi muruten ma, e birin bata ala gbete ye fen koni e mi xunna kenla fiye e ma. **8** Koni, Efirami, n xa i rabepin di? N xa Isirayila so yiini di? N xa i liga alo Adamaha ba? N xa i lu alo Seboyimi ba? N bojen wolonxi n kui. N ma kininkininna birin bata fa. **9** N mi a ligama n ma xolo gbeen xasabini, n mi fa Efirami bonsonna kalama, amasoto Ala nan n na, muxu mi n na. Sarijantoon nan n na i fema, n mi fama xoloni. **10** Bayo e sa birama nen Alatala foxo ra, a na wurundun alo yatana. A tan na wurundun, a diine fama xuruxurunje nen keli baan de. **11** E fama xuruxurunje nen alo xoline keli Misiran yamanani, alo ganbane e keli Asiriya yamanani. N na e radoxoma nen e banxine yi. Alatalaa falan nan na ra. **12** Efirami bonsonna n nabilinxi wulen na. Isirayila yamana n yanfama. Koni Yuda kaane mon biraxi Ala nan foxo ra, e lannayaan nabama e nun sarjandane.

12 Efirami bonsonna e masoma fe fufafune nan na, a luxi alo a foyen nan sagatanma ferijen gben! A wulen nun fe jaxin nawuyama ayi. A layirin xidima e nun Asiriya yamanan tagi, a Oliwi turen soma Misiran mangan yii. **2** Alatala Yuda muxune makitima nen, a

Yaxuba bonsonna wali jaxin saranma a ra nen, a yi a saren fi a kewanle ra. **3** A a nga kui, Yaxuba yi a tada santinban suxu, a to fori, e nun Ala yi gerenna so. **4** E nun malekan yi yengen so, a noon soto. A yi wuga, a yi mayandin ti. Yaxuba Ala li Beteli nin. E nun Ala falan ti menna nin. **5** Alatala, Ala Senben Birin Kanna nan yi na ra. Xili gbee kanna nan Alatala ra. **6** I tan xa fa i ya Ala ma, i hinanje ayi, i sariyan suxu. I xaxili ti i ya Ala ra waxatin birin! **7** Isirayila yanfan tima alo sarematina, ligase jaxin naxan yii. Mupan nafa a ma. **8** Efirami bonsonna bata a fala, “N bata bannaya han! N bata nafunla soto, koni n ma wanla tonon nan a ra! Hakena hanma yulubi yo mi n ma.” **9** Alatala nan n tan na, i ya Ala, naxan i rafaxi keli Misiran yamanani. N mon i radoxoma nen bubune bun alo yamaan yi kii naxan yi na waxatini. **10** N bata falan ti nabine xa, e yi toone ti n xon. N bata sandane sa nabine xa. **11** Xa suxurene Galadi yi, e yeteen luma nen fuu! E jingene bama saraxan na Giligali yi, koni e saraxa gandene luma nen alo geme malanxine xene ma. **12** Yaxuba a gixi nen siga Arami yamanani, Isirayila yi wanla ke a jaxanla futu seen na, a yi xuruseene kantan. **13** Alatala Isirayila raminixi nen Misiran boxoni nabiin xon, a Isirayila kantan nabiin sabun na. **14** Koni Efirami yi Ala raxolo gbeen ti. Nanara, a marigin mi a mafeluma a faxesa tixin na, a a xonnantenyaan naxetema a ma nen.

13 Efirami bonsonna na yi falan ti, birin yi gaxuma nen. A yi binyaxi nen Isirayila yi. Koni a findi son kanna nan na a Baali suxuren batu, a faxesa. **2** Iki e mon yulubin nan ligama, e sawurane rafalama gbeti xulunxin na. E kota suxure rafaladeni, koni xabuna wanla gbansanna nan e ra. A falama e ma a e adamane bama saraxan na! Koni jinge dii suxuren tan, e na tan sunbuma! **3** Nanara, e janma nen alo xoton ma kundana, alo xiila naxan yolonma xotonni, alo foyen se gbaxan naxan xalima lonna fari ma, alo tutin naxan minima banxi sulunna xon. **4** Alatala nan n tan na, i ya Ala, naxan i raminixi Misiran yamanani. I nama ala gbete kolon fo n tan. I rakisima mi na fo n tan. **5** N yengi saxi xon tonbonni, boxo xareni. **6** Koni, n to e balo, e yi lugo. E to lugo, e bojen yi waso ayi. Nanara, e jinanxi n xon. **7** N luma nen e xa alo yatana, alo burunna jarina, n yi e suxu kiraan xon. **8** N na e suxuma nen alo sube xajen naxan ma diiye baxi a yii. N yi e bojeni bo. N yi e don alo yatana.

Burunna subene e yibōma nēn dungi dungi na. **9** Isirayila, i ya kalan ni i ra, bayo i kelixi nēn n xili ma, n tan, i ya mali ti fajina. **10** Iki, i ya Mangan minen? A xa i rakisi i ya taane birin yi! I ya kitisane minen, i yi a falama naxanye fe ra “Mangan so nxu yii e nun kuntigine?” **11** N bata Mangan so i yii n ma xōlōni, n na a bama nēn i yii n ma xōlōni. **12** Efirami bōnsōnna haken nun a yulubin namaraxi. **13** Tōrōne fama nēn a ma alo paxanla kuiin na keli a ra. Koni dii xaxilitaren na a ra. A bari waxatin na a li, a mi tinjɛ barɛ. **14** N na e xunbama nēn laxira senbeni, n yi e xunsara sayani. Faxana, i ya fitinan minen? Sayana, i ya faxa ti senben minen? N mi fa kininkinima. (Sheol h7585) **15** Hali a to sabatixi a ngaxakedenne tagi, Alatala sogetede foyen nafama nēn keli tonbonni, a tigine nun xōjinne xōri. E se xōri ramaraden kui gelima nēn. **16** Samari kaane yulubine saranma e ra nēn, amasōto e bata murutɛ e Ala xili ma. E faxama nēn silanfanna ra, e dii jōrɛne bira bōxōni, e paxalan fudikanne kuine rabo ayi.

14 Isirayila, fa Alatala ma, i ya Ala! Amasōto i hakene bata i rabira. **2** E tubi Alatala ma e a mafan falan na. E a fala a xa, e naxa, “Nxu mafelu nxu hakene birin na, i nxu rasene ki fajɛ, alogo nxu xa tantun xuiin findi nxo saraxan na. **3** Asiriya kaa mi nxu rakise, nxu mi tema soone fari yenge xinla ma. Nxu mi fa a fale nxo se rafalaxine ma, ‘Nxo ala!’ Amasōto i tan nan kininkinima kiridine ma.” **4** N na e xōnfenma nēn e na xun xōn sigani. N na e xanuma nēn fonisireyaan na, amasōto n ma xōlōn bata xɛtɛ e fōxo ra. **5** N luma nēn Isirayila xa alo xiila, a tofanma nēn alo gabalan fugaxina. A sabatima nēn alo wudi binla naxanye Liban yamanani, **6** alo wudi binla na mājɛngi a fajin na, a tofanma nēn alo oliwi wudina, a xiri fajin yi mini alo Liban suman fōtōnne. **7** Yamaan fama Isirayila ma alo e soma wudi binla nan ninin bun. E maala mōn fanma nēn. E sabatima alo manpa binla na fuga. E xinla sōtōma nēn alo Liban minseen fajina. **8** Efirami bōnsōnna, nanse mōn nxu nun suxurene tagi? N tan nan i ramema, n yi n yengi sa i xōn. N luma nēn i xa alo wudi gbee xindena. I bogin sōtōma n tan nan na. **9** Fekolonna nde ra? A xa feni itoe famu! Xaxilimane xa e yɛɛ to! Amasōto Alatalaa kirane tinxin, tinxin muxune sigan tima nēn e xōn, koni murutɛ muxune dagalanma ayi nēn na yi.

Yoweli

1 Alatala falan naxan ti Yoweli xa, Petuweli a dii xemena. **2** E tan fonne, e feni ito rame, e tan yamanan muxune, e birin xa e tuli mati. Fe sifani ito jaxonna bata yi liga e waxatini ba, hanma e benbane waxatini? **3** E a yebe e diine xa, e diine yi a yebe e diine xa, e diine yi a yebe mayixete famatone xa. **4** Sujene donseen naxanye luxi, tuguminne bata ne don. Tuguminne naxan luxi, xoxorone bata na don. Xoxorone naxan luxi, songolonbalane bata na don. **5** E xulun, dolo minne, e wuga! E birin xa gbelegbele, e tan naxanye dolon minma, bayo manpa bogine bata kala, e ba e de. **6** Ganla nde bata fa fu n ma yamanan ma, e fangan gbo, e wuya han e mi yate. E jinne luxi alo yatan jinne, e gbegbene luxi alo yata gilen gbeene. **7** E n ma manpa binle kalama. E n ma xode binle jan fefe, e yi e yixin, e yi e kobelene ba e ma, e yiine yi gbendu fefe! **8** E mawuga alo sungutunna kasa dugini jandeni naxan a xemen wugama, a baxi daxodeni naxan xon. **9** Bogise saraxan nun minse saraxan bata jan Alatalaa banxini. Saraxaraline sunuxi, Alatalaa walikene. **10** Xeeene bata kala, boxon bata xara. Bogiseene bata raxori. Manpa bogi igen bata so a ra. Turen bata jan. **11** Xee biine bata yigitege. Manpa bili nako sane gbelegbelema sununi, murutun nun fundenna fe ra, bayo se xaba daxine bata halagi. **12** Manpa binle bata xara ayi. Xode binle bata lisi a ra e nun Girenada wudine nun tugu binle nun ponmi binle. Xee ma wudine birin bata xara. Muxune sewan birin bata jan. **13** E sunu dugine tongo, e wuga, e tan saraxaraline. E gbelegbele, e tan naxanye walima saraxa ganden yetagi. N ma Alaa walikene, e fa, e xi maxidixi kasa benbeli dugine yi nimisani, bayo bogise saraxane nun minse saraxane bata jan e Alaa banxini. **14** E sun suxu waxatin nagidi, e yamaan maxili malan sarijanxini, e fonne malan e nun yamanan muxune birin, e xa fa Alatalaa banxini, e Ala, e yi e xuini te Alatala ma. **15** Loxo xodexen bata a li de! Alatalaa loxon bata maso, a fama kalan nan na fata Ala Senbe Kanna ra. **16** Donseen bata jan en yee xori yati! Sewan nun jaxanna bata jan en ma Alaa banxini! **17** Sansi xonne bata xara ayi xutune bun, sagane bata kui geli. Se ramaradene bata kala, bayo murutu mi fa na. **18** Xuruseene wuga xuiin gbo iki! Ninge kurune xuyaxi ayi na xun xon ma, amasoto sexe mi fa na, hali yexeeene fan toroxi. **19** Alatala, n nan n xuini te i tan

nan ma! Amasoto teen bata burunna halagi, tee degen bata xee ma wudine birin gan. **20** Na ma, hali burunna subene e wuga xuini tema i tan Ala ma. Xudene bata xori, teen bata burunna halagi.

2 E xotaan fe Siyon yi! E gbelegbele n ma geya sarijanxin fari! Yamanan muxune birin xa xuruxurun gaxuni bayo Alatalaa loxon fama, a bata maso. **2** Dimin nun nii raforen loxona, kundaan nun kuye yiforen loxona. Ganla fama alo kuye yi yalanna geyaan kanke ra subaxani. Gali gbee senbemaan fama, naxan loxon munma to, naxan loxon mi fa toma waxati famatone birin yi. **3** Tee degena e yee ra, a e xanbi ra. Boxon tofan e yee ra alo Eden nakona. Tonbonna nan a ra e xanbi ra. Sese mi a futuxuluma e yii. **4** E maliga soo yama gbeen nan na, alo soo ragine ganla, naxanye xulun e gideni han! **5** E dangu xuiin luxi nen alo yenge so wontorone. E tuganma geyane xun ma, alo tee gbeen nema sexe xaren ganje alo gali senbemaan na ti yenge so xinla ma. **6** Siyane birin xuruxurunma e yee ra, e yetagine yi tojoxni. **7** E fonma seene ma alo yenge sone, e tema taan nabilinna yinna ma alo sofane. E birin sigama e kiraan xon, e mi kiraan fatama. **8** E sese mi dinma e bode ra, birin sigama a tinxinni. Sese na ti e yee ra, e tuganma nen na xun ma, e safane mi kalama. **9** E na boxon taan ma, e e gi yinna ma, e tema banxine ma, e so banxin foye sodene ra alo mujadene. **10** Boxon xuruxurunma e yee ra, kore xonna yi maxa. Sogen nun kiken yi yidimi. Sarene mi fa degema. **11** Alatala sonxoma a ganla yee ra. A yamaan mi noe yate. Naxanye a falan suxuma, ne senben gbo! Amasoto Alatalaa loxon gbo, a magaxu! Nde noe tiye a bun? **12** Alatalaa falan ni ito ra, a naxa, "Koni iki, e mon xa xete n ma e bojeni feu, sun suxun nun wugan nun gbelegbele xuine yi!" **13** Benun e xa e dugine yibo nimisani e bojene nan xa kala. E xete Alatala ma, e Ala bayo a dija, a kininkinin, a mi xolon xulen, a hinanna gbo. A a yete ratangaxi yihadin ma. **14** Nde a kolon xa a mi maxetema a kininkinin e ma, a yi baraka sa e feene yi, alogo e xa no bogise saraxane nun minse saraxane be Alatala xa, e Ala? **15** E xotaan fe Siyon yi! E sun suxu waxatin nagidi. E yamaan maxili malan sarijanxini. **16** E yamaan malan, e malanna rasarijan. E fonne malan, e dii jorene malan hali naxanye xijen minma. Hali xemen naxan baxi jaxanla daxodeni, na fan xa mini a banxini, a jaxanla fan xa fa malanni. **17** Saraxaraliin naxanye

walima Alatala xa ne xa wuga Ala Batu Banxin so deen nun saraxa ganden tagini. E yi Ala mafan, e naxa, “Alatala, kininkinin nxu ma, nxu tan i ya yamana. I nama i ya muxune rayagi, i nama tin yama xəjəne yi nxu magele, e a fala, e naxa, ‘E Ala minen yi?’”

18 Nayi, Alatalaa xəxəlonna kelima nen a yamanana fe ra, a yamaan kininkininna yi a suxu. **19** Alatala a yamaan yabima nen nayi, a naxa, “N mən bogiseene ragidima ε ma nen, e nun manpa bogine nun ture fajina. E lugoma nen ken! N mi fa ε findima magele seen na siyane tagi. **20** Yaxun naxan kelima sogeteden kəmenna ma, n na a masigama nen ε ra pon! N na a kedima nen siga bəxə xare madunduxin mabinni. N na a ganla yεε ra xiin naxuyama ayi nen siga han sogeteden baana, e nun a xanbi ra xiina siga han sogegododen fəxə igena. E faxaxine xiri jaxin minima nen, a findi furen na foyeni. Amasəto Ala wali gbeen kema nen. **21** I tan, bəxəna, i nama gaxu! I ya səwan xa gbo ayi, i jaxan! Amasəto Alatala bata fe gbeene rakamali. **22** E tan, subene, ε nama gaxu! Amasəto burunna sexene mən jingima nen, wudine mən yi bogi. Xəde binle nun manpa binle mən yi dahamun namini. **23** E tan, Siyon kaane, ε jaxan, ε sewa Alatala yi, ε Ala, bayo a mən tulen fima ε ma a waxatini a tinxinni, a tule gbeen nafa ε ma a darixi fe waxatin naxanye birin yi. **24** Lonne rafema nen, kundine yi rafe manpa nenen nun turen na.” **25** “N jεε danguxine seene jəxəne raxetema nen ε ma tuguminne nun xoxorone naxanye donxi, e nun songolonbalane nun supene, n ma gali gbeena, n naxan nasiga ε xili ma. **26** E degema nen han ε lugo. E Alatala xinla tantunma nen, ε Ala, naxan bata kabanako feene liga ε xa. N ma yamaan mi fa yagima mumε! **27** E a kolonma nen nayi a n luxi Isirayila kaane ye. Alatala nan n tan na, ε Ala. Ala gbetε mi na mumε. N ma yamaan mi fa yagima mumε!” **28** “Na xanbi ra, n na n ma Nii Sarijanxin nagodoma nen adamadiin birin ma. E dii xemene nun ε dii temene nabiya falane tima nen. E xeme fonne yi xiye sa. E banxulanne yi fe toon ti alo xiyena. **29** Na ləxəne yi, n na n ma Nii Sarijanxin nagodoma nen hali konyi xemene nun konyi gilene xun ma. **30** N kabanako feene yitama nen kore xənna ma e nun bəxə xənna ma, wunla nun teen nun tεε tuti gbeen minima nen. **31** Sogeni dimima nen, kiken yi gbeeli alo wunla, benun Alatalaa ləxə binye gbeen xa a li. **32** Nba, naxan yo na Alatala maxandi a xinla ra, na kisima nen. Nayi, yamaan muxu dənxa ndee luma nen e nii ra Ala na

naxanye xili, ne nan xunbama Siyon geyaan fari e nun Yerusalen yi alo Alatala a fala kii naxan yi.”

3 “Amasəto na ləxəne yi, na waxatini, n na fa Yuda nun Yerusalen suxu muxune ra waxatin naxan yi, **2** n siyane birin malanma nen, n yi fa e ra Yosafati lanbanni, n na e makitima denaxan yi, lan n ma yamana fe ma, Isirayila. Amasəto, e e raxuyaxi ayi nen siyane ye, e yi e bəxəni taxun e tagi. **3** E n ma yamanan muxune yitaxun nen e ra, masensenna xən, e yi dii xemene mati konyine ra alogo e xa yalundene sara, e yi dii temene mati alogo e xa manpaan sara, e yi a min.” **4** “E tan Tire kaane nun Sidən kaane nun Filisistine birin, nanse xəli ε ma n xili ma? E gbeen jəxən nanse ra n ma? Koni xa ε waxi yengen nakeli feni n xili ma, nayi n na ε yengene raxetema ε ma nen mafuren! **5** E tan naxanye n ma gbetin nun n ma xemaan tongoxi, n ma nafulu fajine, ε yi e sa ε suxurene batudeni. **6** E Yuda nun Yerusalen muxune mati nen Gireki muxune ma, ε yi e masiga e bəxən na.” **7** “N tan nan sa e bama na yirene yi ε e matixi denaxanye yi. N yi tərən naxetε ε ma ε naxan jəxən saxi e fari. **8** N na ε dii xemene nun ε dii temene matima nen Yuda kaane ma. E fan yi e mati Sabe kaane ma, siya makuyena.” Alatala nan falan tixi! **9** E ito fala siyane xa, ε naxa, “E yitən yengen xili yi, ε yenge sone rakeli. Sofane birin xa keli, e yengen so. **10** E jinge kenne bənbə silanfanne ra, ε wolitene rafala tanbane ra. Senbetarene xa a fala, e naxa, ‘Nxu senben gbo.’ **11** E mafura, ε fa, ε tan siyaan naxanye birin be rabilinni, ε fa ε malan be.” Alatala, i ya malekane ragodo e xili ma. **12** Siyane xa keli, e xa godo Yosafati lanbanni. Amasəto n dəxəma menna nin, n na Isirayila rabilinna siyane birin makiti. **13** E woliten tongo ε bogi seene xaba bayo e bata mə. E fa manpa bogine yibodon, ε e igen ba bayo manpa ige baden bata rafe, han a fεjəne yi bəxənjε a ma. E jaxuyaan fan gboxi ayi na kii nin. **14** Yama gbeen bata lu kiti saden lanbanni! Amasəto Alatalaa ləxən bata maso e ra kiti saden lanbanni. **15** Sogen nun kiken dimima nen, sarene mi fa degema. **16** Alatala sənəma nen keli Siyon yi, a a xui ramini senbeni, keli Yerusalen yi. Nayi, bəxən nun koren xuruxurunma nen, koni Alatala findixi luxunden nan na a yamaan xa, e nun yigiyade makantanxina Isirayila kaane xa. **17** “E a kolonma nen nayi, a n tan nan Alatala ra, ε Ala, naxan dəxi Siyon yi, n ma geya sarijanxina.

Yerusalén sarijanma nɛn, xɔɲɛnɛ mi fa fuma a ma sɔnɔn!” **18** “Na lɔxɔni, manpa nɛnɛn minima nɛn geyane yi, yire matexine yi nɔnɔn namini, igen yi lu Yuda baane birin yi. Tigin minima nɛn Alatalaa banxini, a yi kasiya lanbanna ige sa. **19** Misiran tan findima nɛn bɔxɔ kalaxin na, Edɔn yi findi tonbonna ra e gbalone fe ra e naxanye ligaxi Yuda kaane ra. E bata sontarene faxa Yuda yamanani. **20** Koni muxun luma nɛn Yuda nun Yerusalén yi habadan, mayixɛtɛ nun mayixɛtɛ. **21** N munma n ma yamaan yulubin naxanye xafari e faxa tixine ma, n ne mafeluma nɛn. N tan Alatala, n lu Siyon taani.”

Amosi

1 Amosi, Tekowa kaana, xuruse kanna a falan ni i ra. A toon naxan tixi Isirayilaa fe yi alo xiyena Yuda Manga Yusiya nun Isirayila Manga Yerobowan, Yowasi a diin waxatini, jɛɛ firin benun bɔxɔn xa xuruxurun. **2** A naxa, “Alatala xajɛ xuiin naminima Siyon ma alo yatana, a galan xuiin kelima Yerusalen yi. Balo mi na xuruseen naxanye donma, Karemele geya yati bata xara.” **3** Alatala ito nan falaxi, a naxa, “Damasi a hake saxanna, hanma naanin ma fe ra, n mi xetema n ma fe ragidixin fɔxɔ ra. Bayo e bata Galadi tɔrɔ jaxi ra, alo maala bɔnbɔma kii naxan yi. **4** Nanara, n Xasaye le a banxin ganma nɛn. Tɛɛn fama Ben-Hadada yire makantanxin kaladeni nɛn. **5** N Damasi taan so dɛɛn balan seene girama nɛn. N Aweni lanban yi kaane halagima nɛn, e nun mangan naxan Beti-Eden yi. Arami yamaan xalima nɛn Kiri yi.” Alatala naxa na kiini. **6** Alatala ito nan falaxi, a naxa, “Gasa taana hake saxanna, hanma naanin ma fe ra, n mi xetema n ma fe ragidixin fɔxɔ ra. E bata taana ndee muxune birin xali Edɔn yi konyiyani. **7** Nanara, n Gasa a yinna ganma nɛn. Tɛɛn fama a yire makantanxin kaladeni nɛn. **8** N na Asadodi kaane halagima nɛn, e nun mangan naxan Asikalɔn yi. N na Ekiron paxankatama nɛn, han Filisiti kaan birin yi faxa.” Marigina Alatala naxa na kiini. **9** Alatala ito nan falaxi, a naxa, “Tire taana hake saxanna, hanma naanin ma fe ra, n mi xetema n ma fe ragidixin fɔxɔ ra. E bata taana ndee yamaan birin xali Edɔn yi konyiyani, e layirin kala e nun e ngaxakedenne Isirayila kaane tagi. **10** Nanara, n Tire taan yinna ganma nɛn. Tɛɛn fama a yire makantanxin kaladeni nɛn.” **11** Alatala ito nan falaxi, a naxa, “Edɔn kaane hake saxanna, hanma naanin ma fe ra, n mi xetema n ma fe ragidixin fɔxɔ ra. E bata e ngaxakedenne yenge silanfanna ra. E mi kininkinin e ma, e e xɔlɔn nadangu ayi! **12** N Teman ganma nɛn. Tɛɛn nan fama Bosara yire makantanxin kaladeni.” **13** Alatala ito nan falaxi, a naxa, “Amonine hake saxanna, hanma naanin ma fe ra, n mi xetema n ma fe ragidixin fɔxɔ ra. E bata Galadi jaxalan fudikanne kuine yibo silanfanna ra, alogo e xa bɔxɔ gbete sɔtɔ. **14** Nanara, n tɛɛn soma nɛn Rabaha yinna ra. Tɛɛn nan fama na yire makantanxin kaladeni yenge sɔnxɔ sɔnxɔ xuini. Na yengen luma nɛn alo foye gbeena, alo tule gbeena. **15** E mangan

xalima nɛn konyiyani, e nun a kuntigine.” Alatala naxa na kiini.

2 Alatala ito nan falaxi, a naxa, “Moyabaa hake saxanna, hanma naanin ma fe ra, n mi xetema n ma fe ragidixin fɔxɔ ra. E bata Edɔn mangan xɔnne gan han e findi a fupin na. **2** Nanara, n Moyaba ganma nɛn. Tɛɛn nan fama Keriyo ti yire makantanxin kaladeni. Moyaba janma yenge sɔnxɔn nin, yenge so xɔtaan na fe waxatin naxan yi. **3** N na e mangan halagima nɛn, e nun e kuntigine.” Alatala naxa na kiini. **4** Alatala ito nan falaxi, a naxa, “Yuda kaane hake saxanna, hanma naanin ma fe ra, n mi xetema n ma fe ragidixin fɔxɔ ra. E bata e mɛ Alatalaa sariyan na, e mi a tɔnne suxi. Bayo e bata la wule alane ra, e fafane yi naxanye fɔxɔ ra. Na nan e ralɔxi ayi. **5** Nanara, n Yuda yamanan ganma nɛn. Tɛɛn nan fama Yerusalen yire makantanxin kaladeni.” **6** Alatala ito nan falaxi, a naxa, “Isirayila a hake saxanna, hanma naanin ma fe ra, n mi xetema n ma fe ragidixin fɔxɔ ra. E tinxin muxune masara gbetin na, e tɔrɔ muxune masara sankidi saren na. **7** Yiigelitɔne tɔrɔn nafan e ma han e e dunuja yi gidin bama e yii. Diine nun e baba kafuma sungutun kedenna ma. Nayi, e bata n xili sarijanxin xɔsi. **8** E e sa saraxa ganden dɛxɔn dugine ma e naxanye sɔtɔ tolimaan na. E dɔlɔn min e suxurene banxin kui e naxan sɔtɔ tinxintareyani.” **9** “Anu, n tan nan Amorine halagi e xa, naxanye senben yi gbo alo suman wudina alo warine. N na Amorine fangan birin jan fefe, alogo e nama fa keli sɔnɔn. **10** N mɔn yi e ramini Misiran bɔxɔn ma, n yi e rasiga ti jɛɛ tonge naanin tonbonni alogo e xa Amori bɔxɔn sɔtɔ. **11** N yi nabine ramini e diine tagi, e nun De Ti Nasiri muxune. Isirayila kaane, a mi na kiini ba?” Alatalaa falan nan na ra. **12** “Koni e tan bata dɔlɔn so De Ti Nasiri muxune yii. E bata tɔnna dɔxɔ nabine ma a e nama nabiya falane ti.” **13** “Nanara, n na e yibutuxunma nɛn, alo wontorona, goron binyen naxan fari. **14** Muxu xulunxin mi nɔɛ a giye. Senbemaan senben janma nɛn. Sofaan faxama nɛn yengeni. **15** Xalimakuli wonla mi tiye. Naxan san mafura, na mi a giye. Soo ragiin mi a niin nakise. **16** Sofa wekilexin nagenla a gima nɛn na lɔxɔni.” Alatalaa falan nan na ra.

3 E falani ito rame, Alatala naxan falama Isirayila kaane xili ma, a xabilan naxan namini Misiran bɔxɔn ma. **2** “N na e tan nan gbansan sugandi dunuja

xabilane birin tagi. Nanara, n bata a jɛnige n xa ε yulubine saran ε ra.” **3** Muxu firin nœ sigan tiye yire kedenni ba, xa e mi lanxi na ma? **4** Yatan wurundunɲe burunna ra ba, xa a mi subena nde sɔtɔxi? A a xuini tɛ a faranna ra ba, xa a munma sese suxu? **5** Xɔliin birama yalaan kui bɔxɔn ma ba, xa a mabandun se mi saxi na woson ma? Yalaan woson balanɲe ba, xa sese mi a kui? **6** Xɔtaan fema taan kui waxatin naxan yi, muxune mi kɔntɔfilɛ ba? Gbalon taan liye ba, xa Alatala mi a ragidixi? **7** Marigina Alatala mi fefe ligama, fɔ a wundon makenen a nabine xa, a walikene. **8** Xa yatan bata wurundun, nde mi gaxuɛ? Marigina Alatala bata falan ti, nde tonde na nabiya falan naliye? **9** ε xa ito fala Asadodi a yire makantanxine yi, e nun Misiran ma yire makantanxine yi, ε naxa, “ε xa ε malan Samari geyane fari, ε xa a mato mɛn kaane kɔntɔfilixi kii naxan yi, e e bode jaxankatama kii naxan yi. **10** E mi tinxinna kolon, e seene sɔtɔma gbalon nun muɲan nin, e ne se sɔtɔxine mara e banxi fajine kui.” Alatalaa falan nan na ra. **11** Nanara, Marigina Alatala ito nan falaxi, a naxa, “A mato, ε yaxun fama ε bɔxɔ kaladeni nɛn. E fama ε xunnakaladeni, e yi ε yire makantanxine kui geli.” **12** Alatala ito nan falaxi, a naxa, “Yatan na yɛxɛɛni bɔ, xuruse rabaan nœ yɛxɛɛn sanna hanma a tunla nan gbansan nakise yatan ma. Isirayila kaane fan kisima na kiini nɛn. Samari kaan naxanye e matabuma saden ma, naxanye e magodoma Damasi karaxane ma, ε tan mi kisc.” **13** Marigina Alatala, Ala Senben Birin Kanna falan nan na ra. “ε ε tuli mati n na, ε sereyani ito ba Yaxuba bɔnsɔnna xili ma. **14** N na Isirayila yulubine saran e ra waxatin naxan yi, n na e jaxankatama nɛn e saraxa gandene fe ra naxanye Beteli yi. Na saraxa gandene suxu seene birama nɛn bɔxɔni. **15** N mɔn e banxi fajine rabirama nɛn, jɛmɛn nun sogefuren banxine birin, naxanye maxidixi sama jinne ra. N ne birin kalama nɛn.” Alatalaa falan nan na ra.

4 ε falani ito ramɛ, ε tan jaxanla naxanye belebele alo jinge turaxin naxanye Basan bɔxɔn ma. ε tan naxanye dɔxi Samari geyaan fari, ε tan naxanye senbetarene yigbetenma, ε tan naxanye tima tɔrɔ muxune fari. ε a falama ε xɛmɛne xa, ε naxa, “ε fa minseene ra nxu xa, yo!” **2** Marigina Alatala bata a kolo a sariɲanni, a naxa, “A mato, kiti lɔxɔn fama ε xa. E fama ε suxudeni wure kɔnkɔrɔnxin nan na, e yi ε tan nun ε diine xali. **3** ε minima nɛn ε taa nabilinna

yin kalaxin kui, birin tixi a bode xanbi ra. E ε xalima nɛn e yire makantanxini.” Alatalaa falan nan na ra. **4** “ε siga Beteli yi, ε sa yulubin liga na. ε siga Giligali yi, ε sa yulubin fari sa. ε xa saraxan ba xɔtɔnna birin yi, ε mɔn xa yaganna ba jɛɛ saxan yo jɛɛ saxan. **5** ε burun ba barika bira saraxan na buru rate seen naxan yi. ε xa ε kanba ε jɛnige ma saraxane yi, bayo na fe sifan nafan ε ma, ε tan Isirayila kaane.” Marigina Alatalaa falan nan na ra. **6** “N bata yi kamen naso ε taane birin yi. Donseen yi dasa ε konni. Koni hali n to na birin liga, ε mi tubi n ma.” Alatalaa falan nan na ra. **7** “Kike saxan to yi luxi xɛɛn xa xaba, n tondi nɛn tulɛn nafa ε ma. N bata a liga taana nde yi tulɛn sɔtɔ, taana nde mi a sɔtɔ. N bata a ragidi xɛɛna nde xa tulɛn sɔtɔ, xɛɛna nde nama tulɛn sɔtɔ. **8** Muxune yi e masiga taane yi ige fendeni, koni hali min xɔnla, a mi ba e ra. Hali n to na birin liga, ε mi tubi n ma.” Alatalaa falan nan na ra. **9** “N bata furen nafa ε sansine ma, n bata e xara. Tuguminne bata ε nakɔne kala, e nun ε manpa bili nakɔne nun ε xɔde binle nun ε oliwi binle. Hali n to na birin liga, ε mi tubi n ma.” Alatalaa falan nan na ra. **10** “N bata fitina furen nafa ε ma, alo n na a liga Misiran bɔxɔn ma kii naxan yi. N bata ε banxulanne faxa silanfanna ra, han ε yi wasa e binbine xirin na ε konni. ε yaxune yi ε soone tongo. Hali n to na birin liga, ε mi tubi n ma.” Alatalaa falan nan na ra. **11** “N bata ε jaxankata alo Sodoma nun Gomora. ε luxi nɛn alo wudi ganmatɔɔn naxan baxi tɛɛni. Hali n to na birin liga, ε mi tubi n ma.” Alatalaa falan nan na ra. **12** “Nanara, n fama ε tan Isirayila kaane jaxankatadeni nɛn. N na a ligama ε ra nɛn. ε xa ε yitɔn ε dentege feen na ε Ala xa.” **13** Naxan geyane nun foyen daxi, a a miriyane makenen adamane xa, naxan subaxan findima kɔɛɛn na, naxan sigan tima yire matexin fari, a xili nɛn Alatala, Ala Senben Birin Kanna.

5 ε falani ito ramɛ. N bata jande betini ito ba Isirayila yamaan xa. **2** “Isirayila bata lu alo sungutun faxaxina, a mi fa keɛ sɔnɔn. A saxi bɔxɔni, muxu yo mi a rakeɛ.” **3** Marigina Alatala ito nan falaxi, a naxa, “Isirayila bɔnsɔnna, taan naxan muxu wuli keden nasigama yengesodeni, a muxu kɛmɛ nan gbansan toma xɛtɛ. Taan naxan muxu kɛmɛ rasigama yengesodeni, a muxu fu nan gbansan toma xɛtɛ.” **4** Alatala ito nan falaxi Isirayila yamaan xa, a naxa, “ε xa n fen alogo ε niin xa kisi. **5** ε nama n fen Beteli yi, ε nama siga Giligali yi, hanma Beriseba, bayo Giligali

kaan birin sigama nen konyiyani, Beteli fan halagima nen.” 6 E xa Alatala fen alogo e niin xa kisi. Xa na mi a ra, Yusufu bõnsõnna, a e jianma nen alo tēena. Beteli kaa yo mi na naxan na tēen natuyē. 7 E tan bata sariyan maxetē xōlen na, e bata yo tinxinyaan ma. 8 A tan nan Dii Teme Solofere sare kurun nun Donso sare kurun yebaxi kore xōnna ma, a dimini yalan kuyebaan na, a sogen nagodo kōēen na, a igen nakeli baani, a na ragodo bōxōni tulen na. A tan xili nen “Alatala.” 9 A muxu gbeene halagima nen, a e yire makantanxine kala. 10 E muxun xōnnantenyama naxan na e makiti, bayo jōndi falan mi rafan e ma. 11 E senbetarene yigbetenma, e balon nasuxuma e ra mudun na. E bata banxi fajine ti gemene ra, koni e mi fama dōxōdeni ne kui. E bata manpa bili nakō fajine si, koni e mi na dolo minjē. 12 Amasoto, n na a kolon e haken nun yulubin gbo. E tinxin muxune yigbetenma. E dimi yi seene rasuxu alogo tōrō muxune nama makiti jōndin na. 13 Na na a toxi xaxilimaan dunduma, bayo waxatini ito mi fan. 14 E fanna fen, e xetē fe jaxin fōxō ra, alogo e xa kisi. Nayi, Alatala, Ala Senben Birin Kanna na luma nen e xōn, alo e a fala kii naxan yi. 15 E xa fe jaxin najaxu. Fe fajin xa rafan e ma. E xa kiti tinxinxin sa. Xa e na liga, yanyina nde, Alatala, Ala Senben Birin Kanna dijama e tan Yusufu bõnsōn dōnxen ma nen. 16 Nanara Marigina Alatala, Ala Senben Birin Kanna ito nan falaxi, a naxa, “E wuga xuini tema nen taana ngaani, e sunu xuini te kirane birin xōn. E xē rawanle xilima nen e xa e wuga xuini te, e beti baane xilima nen, e xa jande betine ba. 17 N na dangu e konni, wuga xuiin tema nen e xēene birin ma.” Alatala naxa na kiini. 18 Gbalon ne xa, naxanye waxi Alatalaa kiti lōxōn xa fa. E wama nanse xōn ma na lōxōni? Na findima dimin nan na e xa, na mi finde kenenna ra e xa. 19 Na luxi nen alo muxun naxan a gima yatan yēe ra, a sa kanko xajē li. A na so banxin kui, a a digan banxini, sajnin yi a xin. 20 Alatalaa kitin lōxōna, dimin xa mi a ra ba? Kenenna mi a ra e xa na lōxōni hali! 21 “N bata e sanle rajaxu, e mi rafan n ma fefe ma. N mi waxi e malanne xōn feu! 22 E saraxa gan daxi yo, e Ala kise yo, e bōjē xunbeli saraxa yo, e saraxa turaxi yo, e sese mi rafan n ma. N mi tinma e rasuxē hali keden. 23 E beti xuiin makuya n na. N mi waxi e konden betin xuiin mē feni. 24 N wama naxan xōn, sariya kenden xa gbo e tagi alo igen naxan baani. E tinxinyaan xa lu alo xuden naxan mi xōrima. 25 E tan Isirayila yamaan to yi na tonbon yireni jēe tonge naaninna bun ma,

e saraxane ba nen n tan xa ba? 26 E e gbee suxure Sikoti xali nen na waxatini ba? Alo e gbee mangana. Hanma e sare ala Kiyun, e naxanye rafalaxi e yetē xa. 27 Nanara, n na e xalima nen konyiyani Damasi xanbi ra.” Alatala naxa na kiini. A xili nen “Ala Senben Birin Kanna.”

6 Gbalona e xa, naxanye laxi e yetē ra Siyon nun Samari geyane fari. E tan muxu gbeene naxanye na siya fisamantenna xun na, Isirayila kaane xaxili tixi e tan nan na. 2 E siga Kalene taan matodeni, hanma Xamata, na taa gbeena. E mōn xa godo Filisiti bōxōni Gati matodeni. Ne fisa e xa ba? E bōxōn gbo e gbeene xa? 3 E a mirixi a jaxankata lōxōn mi e lima, koni e a ligama nen gbalon yi e soto. 4 E e matabuma sade fajin ma, e yēxēen nun jinge raturaxin donma, 5 e sigin sa kondenna ra. E yengi a ma, a e fatan maxaseene ra alo Nabi Dawuda. 6 E dolo gbegbe minma, e ture fajin maso e fatin ma. Koni, e mi kontōfilixi Yusufu bõnsōnna kala feen na. 7 Nanara, e singe nan sigama konyiyani. E sumunne danma nen. 8 Marigina Alatala bata a kolo a yetē yi. Alatala, Ala Senben Birin Kanna falan ni ito ra: “Yaxuba bõnsōnna wason bata rajaxu n ma. E yire makantanxine mi rafan n ma. N fama e birin halagideni nen.” 9 Xa muxu fu banxina nde kui, e birin faxama nen. 10 E kon kaan na so na banxini, e binbine tongodeni, a xa e gan, a na naxan li banxini a a falama nen na xa, “Muxu gbete mi be, ba i tan na ba?” A a yabima nen, “En-en.” A mōn naxa, “I dundu, i nama Alatala xinla fala!” 11 Bayo Alatala bata yamarin fi a banxi gbeene nun banxi xurine, e birin xa rabira, e kala. 12 Soone e giye gēmē yireni ba? Ningene mēnna biye ba? Awa, nanfera e sariyan maxetema xōlen na, e tinxinyaan maxetē fe jaxin na? 13 E jaxanma fe fuune ra. E naxa, a e fe bata sōnōya e yetēen senben xōn. 14 Alatala, Ala Senben Birin Kanna falan ni ito ra: “Nanara, n kelima nen e xili ma, Isirayila yamana. E tan naxanye Lebo-Xamata taani han Araba xudeni, siyana nde fama nen e tōrōdeni.”

7 Marigina Alatala yi fe tooni ito yita n na: Xēen to xaba mangan xa, sansi nenen fan yi minima, Alatala yi tuguminne ramini. 2 E to yelin sansine birin donjē bōxōn ma, n yi a fala, “Marigina Alatala, i xa e mafelu e hakene ra, xa na mi a ra Yaxuba bõnsōnna baloma di? A senben mi gbo.” 3 Alatala yi kininkinin e ma, a yi a fala, a naxa, “Ito mi lige.” Alatala naxa na kiini. 4 Marigina Alatala yi tooni ito yita n na:

Marigina Alatala yi a ragidi a tɛɛn xa mini. Tɛɛn yi bɔxɔn birin gan, bɔxɔ igen birin yi xara. **5** N yi a fala, “Marigina Alatala, yandi, diɲa, xa na mi a ra Yaxuba bɔnsɔnna baloma di? A sɛnben mi gbo.” **6** Alatala yi kininkinin e ma, a yi a fala, a naxa, “Ito mi ligɛ.” Marigina Alatala naxa na kiini. **7** A yi fe tooni ito yita n na alo xiyena: Marigin yi tixi yinna tinxinxin dɛxɔn, bitikidi matinxin lutin yi suxi a yii. **8** Alatala yi n maxɔdin, a naxa, “Amosi, i nanse toxi?” N yi a yabi, n naxa, “Bitikidi matinxin lutina.” Marigin yi a fala, “N waxi a xɔn, n ma yamaan xa matinxin, Isirayila kaane. N mi diɲɛ sɔnɔn. **9** Suxure batude matexine kalama nɛn Isiyaga bɔxɔn ma. Isirayila a batudene rabirama nɛn. N kelima nɛn Yerobowan ma denbayaan xili ma silanfanna ra.” **10** Amasiya Beteli saraxaraliin yi a fala Isirayila manga Yerobowan xa, a naxa, “Amosi yanfan nakelima i xili ma Isirayila bɔnsɔnna tagi. A naxan falama na mi fan bɔxɔn xa. **11** Amosi a falama, ‘Yerobowan faxama silanfanna nan na. Isirayila kelima nɛn a bɔxɔni konyiyani.” **12** Amasiya yi a fala Amosi xa, a naxa, “I tan naxan toon tima, keli be, siga Yuda yamanani! Sa i balon fen mɛnni nabiya wanli, **13** koni i nama fa nabiya falane ti Beteli sɔnɔn, bayo mangana yire sarɲanxin be manga taani ito yi.” **14** Amosi yi Amasiya yabi, a naxa, “Nabiin xa mi n na! N fafe fan, nabi mi yi na ra. Xuruse kannan na n na. N Sikomoro binle fan nawalima. **15** Alatala yi n fen xuruseene tagi, a yi a fala n xa, ‘Siga, nabiya falane ti n ma yamana Isirayila xa.’ **16** Iki, i tuli mati Alatalaa falan na, i tan naxan a falama n xa, ‘I nama nabiya falane ti Isirayila xa, i nama falan ti Isiyaga bɔnsɔnna xa.’ **17** Nayi, Alatala ito nan falaxi, a naxa, ‘I ya ɲaxanla findima nɛn yalunden na taani. I ya diine faxama nɛn silanfanna ra. I ya bɔxɔn bama nɛn i yii, a yitaxun muxu gbetene ra. I tan, i faxama nɛn bɔxɔ haramuxin ma, Isirayila fan xalima nɛn yire makuyeni.”

8 Marigina Alatala yi fe tooni ito yita n na alo xiyena: Deben naxan yi rafexi sansi bogi mɔxin na. **2** A yi n maxɔdin, a naxa, “Amosi, i nanse toxi?” N yi a yabi, “Debe rafexi sansi bogi mɔxin na.” Alatala yi a fala n xa, a naxa, “Isirayila fan bata kɔxɔ n ma yamana. N mi diɲɛ sɔnɔn.” **3** Marigina Alatalaa falan ni ito ra: “Na lɔxɔni, sigin naxan sama mangana banxini, na masarama nɛn wuga xuiin na. Binbine wolima ayi nɛn yiren birin yi, birin dunduma nɛn.” **4** Ɛ falani

ito ramɛ, ɛ tan naxanye yiigelitɔɔn tɔrɔma, ɛ tan naxanye tɔrɔ muxun ɲaxankatama. **5** Ɛ naxa, “Kike nɛnɛn sanla ɲanma waxatin mundun yi, alogo en xa en ma seene mati? Matabu Lɔxɔn ɲanma waxatin mundun yi, alogo en ma maala yi mati? En ma se maliga seen xa xurunɲɛ ayi, en ma saren xa mate. En xa wule sikeela rafala. **6** En sɛnbetarene masarama nɛn gbetin na, en tɔrɔ muxune masara sankidi saren na. En maala matima nɛn e nun a dagina.” **7** Alatala naxan Yaxuba rakanbaxi, na yi a kɔlɔ a yete yi, a naxa, “N mi ɲinanɲɛ e liga feene ma, han dunuɲa yi ɲan. **8** Bɔxɔni ito kalama na nan ma. Be kaane birin luma nɛn sununi. Bɔxɔn xuruxurunma nɛn alo Misiran xudena, naxan tema, a mɔn yi godo.” **9** Marigina Alatalaa falan ni ito ra: “N fama a ragidideni nɛn na lɔxɔni, sɔgen xa godo benun a waxatina, dimin xa sin bɔxɔni yanyi waxatini. **10** Ɛ sanle findima nɛn ɲan feene ra, ɛ sigine findima nɛn wuga xuiin na. N kasa dugin nagodoma nɛn ɛ ma, n yi ɛ xunna bi sununi. N fama sunu xungbeen nasodeni bɔxɔni, alo dii kedenna na faxa waxatin naxan yi. Na xɔlɛn mi be ɛ ma habadan!” **11** Marigina Alatalaa falan ni ito ra: “Na lɔxɔne yi, kamen soma nɛn bɔxɔni, koni donse kamɛ mi a ra, ige xɔli fan mi a ra. Ɛ kamɛma Alatalaa falan nan ma. **12** Ɛ bɔxɔn birin yisigama nɛn, keli kɔmɛnna ma han sogetedeni, Alatala a fala fendeni, koni ɛ mi a toma. **13** Na lɔxɔni, ɛ sungutun tofajine nun ɛ banxulanne fugama a ra nɛn. **14** A singeni nun, e yi e kɔlɔma Samari a suxure haramuxin nin. E a fala, e naxa, ‘Ɛ gbee ala gbo, Dan kaane!’ ‘Bɛriseba gbeen sɛnben gbol’ Koni, e fama nɛn biradeni, e mi kele habadan!”

9 N yi fe toona nde ti. Marigin yi a saraxa ganden dɛxɔn. A yi yamarin fi, a naxa, “Sɛnbetɛnne kondɛn din, han bɔxɔn yi xuruxurun. Banxin birin xa bira muxune fari. N na e diine halagima nɛn silanfanna ra. Hali muxu keden mi kisima. Muxu keden mi a xunbama. **2** Hali e sa e luxun laxira yi, n na e suxuma nɛn. Xa e te kore xɔnna ma, n na e ragodoma nɛn. (Sheol h7585) **3** Xa e e luxun Karemele geyaan fari, n na e sagatanma nɛn, n na e suxu. Xa e e luxun baan xɔnna ma, n saɲin yamarima nɛn, a xa e xin. **4** Xa e yaxune e xali konyiyani, n yamarin fima nɛn, e xa faxa silanfanna ra. N na n yɛɛn tima e ra nɛn, koni e munanfanna mi a ra, n na e ɲaxankatama nɛn.” **5** Marigina Alatala Sɛnben Birin Kanna, a tan nan a yiin din bɔxɔn na, a xuya ayi. Muxun birin yi sunu.

Bõxõn xuruxurunma nẽn, a te, a mõn yi godo alo Nila Misiran xudena. **6** A bata a dõxõden ti kore xõnna ma. A bata kore walaxan sa bõxõn xun ma. A igen nakelima baani, a na ragodo bõxõni tulen na. A xili nẽn “Alatala.” **7** Alatalaa falan ni ito ra: “Isirayila kaane, ε nun Kusi kaane keden mi a ra n tan xa ba? N mi ε ramini Misiran bõxõn ma, alo n Filisistine ramini Kafatoro kii naxan yi? N mi ε ramini Misiran bõxõn ma, alo n Arami kaane ramini Kiri kii naxan yi? **8** A mato: Marigina Alatala bata yulubi kanne mangayaan to, n fama na raxõrideni nẽn bõxõni ito ma. Koni n mi Yaxuba yamaan birin halagima.” Alatalaa falan nan na ra. **9** A naxa, “N yamarin fima nẽn alogo Isirayila yamaan xa yimaxa. N na a yifema nẽn alo maali fema kii naxan yi, alogo xõri fajin keden nama bira. **10** Koni yulubi kanna naxanye n ma yamaan tagi, n na e faxama nẽn silanfanna ra, e tan naxanye a falama, ‘A mi fama nxu jaxankatadeni, na mi nõε nxu liyε.’” **11** “Na lõxõni, n Dawudaa mangaya kalaxini tõnma nẽn. N na rafalama nẽn, n na neneni tõnma nẽn alo a yi kiinde, **12** alogo e mõn xa Edõn bõxõn sõtõ, e nun siyane birin naxanye n xinla batuma.” Alatalaa falan nan na ra, a fama na birin nakamalideni nẽn. **13** Alatalaa falan ni ito ra, a naxa: “A mato: Lõxõne fama, xεε biine nun se xabane walima waxati kedenna nin. Manpa rafalane nun xεε biine, ne fan walima nẽn waxati kedenni. Manpaan gboma ayi nẽn geyane fari, a yi lu alo geyane birin yikunxi. **14** N na n ma yamaan naxetema nẽn a konni keli konyiyani, Isirayila kaane. E fama nẽn taa kalaxine tideni, e dõxõma denaxanye yi. E manpa bili nakõne sima nẽn, e na minseen min. E nakõõn sama nẽn, e na bogin don. **15** N na Isirayila rasabatima nẽn e gbee bõxõni. E mi keε na sõnõn, n denaxan fixi e ma.” Alatala naxa na kiini, ε Ala.

Abadi

1 Falani ito nan makenen Abadi xa fe tooni alo xiyea: Marigina Alatala ito nan falaxi Edon kaane fe yi. Nxu bata xerayana nde a fe me fata Alatala ra, xeraan bata rasiga siyane tagi, a xa sa a fala e xa fa fala: “En keli, en sa Edon kaane yenge!” **2** Ala naxa, “Edon kaane, n na e senben xurunma nen siyane birin xa. Birin e rajaxuma nen. **3** Wason naxan e bojeni, na bata e ratantan e tan naxanye dxi faran yinle ra, e nun geyane fari, e tan naxanye e mirima, e naxa, ‘Nde nxe nxu be be xuntagi?’ **4** Hali e mate ayi alo singbinna, hali e sa e teen sa kore alo xoline, a mate ayi alo sarene, n na e ragodoma nen.” Alatalaa falan nan na ra. **5** “Xa mujadana hanma mafu tiine fa i konni kxene na, e mi e waxonna xan tongoma ba? E luma boje xunbenli di nayi? Xa muxune fa e nakoni e manpa bogine mujadeni, e mi bogi dando xan gbansan luma na ba? **6** Nba, Esayu yixetene yii seene birin naxorima nen, a nafulu luxunxine birin yi to. **7** E mali muxune birin e kedima nen e bxxoni. E xoyine bata e yanfa, e bata e no. Muxun naxanye yi e donseene donma, ne lutin natima e yee ra nen e naxa, ‘E xaxili mi fa na!’ **8** Na lxxoni, n mi Edon yamanan fekolonne raxore ba? N yi xaxilimane ba Esayu a geyane fari?” Alatalaa falan nan na ra. **9** “Teman kaane, e sofane gaxuma nen muxune birin yi raxori Esayu a geyane mal!” **10** “E yarabima nen bayo e bata gbalo feen liga e ngaxakedenna Yaxuba yixetene ra. E raxorima nen han habadan! **11** Amasoto na lxxoni e yeen yi na xoyene ra e yi soma Yerusalen taani waxatin naxan yi e a nafunle tongo, e a seene yitaxun masensenna xon. E tan fan luxi nen nayi alo e tan. **12** E mi yi lan e sewa e ngaxakedenna Yuda yixetene toro lxxona fe ra. E mi yi lan e jaxan e kalan waxatini, hanma e yi e kanba e soxolen waxatini. **13** E mi yi lan e so n ma yamana taani a halagi waxatini. E mi yi lan e a mato sewani a kala waxatini, hanma e yi a nafunle tongo a halagi waxatini. **14** E mon mi yi lan e ti kira xunne ra e a muxu gixine faxa, hanma e yi e so e yaxun yii, e toro waxatini.” **15** Amasoto Alatalaa lxxon bata maso, a siyane birin makitima lxxon naxan yi. Nayi, e suxuma nen alo e bonne suxu kii naxan yi. E fe jaxin naxanye liga, ne xetema nen e ma. **16** Awa, e to dolon minxi n ma geya saripanxin fari, nayi siyane birin e minma nen han e a radangu ayi! E luma e minje nen, han e lugo, e yi lu alo e mi

da. **17** Koni yamaan muxu donxene luma nen Siyon geyaan fari. Yaxuba yixetene e keen masotoma nen. **18** Yaxuba yixetene luma nen alo teena, Yusufu bomsenne yi lu alo tee degena. Koni Esayu yixetene luma nen alo sexena. Ne e suxuma nen e yi e gan, muxu yo mi kisima Esayu bomsenni. Alatala bata na fala! **19** Yuda kaan naxanye dxi Negewi yireni, ne Esayu a geyane suxuma nen. Yamanan lanbanna muxune Filisistine bxxon tongoma nen. E Efirami nun Samari burunne tongo, Bunyamin bomsonna muxune yi Galadi suxu. **20** Isirayila kaan naxanye suxi yengeni, gali gbeeni ito, ne Kanan kaane yamanan suxuma nen siga han Sarepata taana. Yerusalen kaan naxanye suxi yengeni naxanye Sefarada taani, ne fan yi Negewi yamanan taane findi e gbeen na. **21** Muxu kisixine tema nen Siyon geyaan fari, e Esayu a geya yirene makiti, mangayaan yi lu Alatala xa.

Yunusa

1 Lɔxɔna nde Alatala yi falan ti Amitayi a dii xɛmɛn Yunusa xa, a naxa, **2** “Keli, i siga Niniwa taani, taa gbeena, i sa na kaane kawandi. Amasɔto n bata e fe naxine to.” **3** Koni Yunusa yi keli, a yi a gi Alatala ma, a xa siga Tarasisi yamanani. Nayi, a yi siga Yafa taani, a sa kunkina nde to naxan yi siga feni Tarasisi yamanani. A yi na saranna fi, a so kunkin kui, a yi a masiga Alatala ra. **4** Koni Alatala yi foye gbeen nafa fɔxɔ igen xun ma. Walan gbeen yi keli igen xun ma. A yi liga alo kunkin xa kala. **5** Kunkibane yi gaxu, birin yi a gbee ala maxandi fɔlɔ. Na danguxina, seen naxanye yi kunkin kui, e yi ne rawoli ayi fɔxɔ igeni alogo kunkin xa yelefu ayi. Yunusa tan yi saxi xixoli gbeeni kunkin kui. **6** Awa, kunkibane kuntigin yi Yunusa to, a yi a fala a xa, a naxa, “I xima nanfera? Keli i yi i gbee Ala maxandi, waxatina nde, a en malima nɛn, nayi en mi faxama.” **7** Awa, kunkibane yi a fala e bode xa, e naxa, “En feni ito yɛɛ fen alogo en xa a kolon naxan faxi tɔrɔni ito ra en ma.” Nayi, e yi masensenna ti, a yi Yunusa suxu. **8** Nayi, kunkibane yi a fala Yunusa xa, e naxa, “A fala nxu xa, nde faxi tɔrɔni ito ra? I wanla sifan mundun ligama? I kelixi minen yi? I fataxi yamanan mundun na, e nun i fataxi siyaan naxan na?” **9** Yunusa yi e yabi, a naxa, “Heburu nan n na. N na Alatala nan batuma, Ala Naxan Kore, naxan baane nun bɔxɔn daxi.” **10** Na kunkibane yi gaxu ki fɔni, e yi a maxodin, e naxa, “I na ligaxi nanfera?” Amasɔto e bata yi a kolon fa fala a gima Alatala nan ma, bayo a bata yi a yebe e xa nun. **11** Koni foyen mɔn yi lu fe nanara kunkibane yi a fala Yunusa xa, e naxa, “Nxu fa nanse ligama i ra alogo fɔxɔ igen xa a raxara? Bayo fɔxɔ igen mɔn yi luma xajɛ ayi nɛn tun.” **12** Awa, Yunusa yi e yabi, a naxa, “Ɛ n tongo, ɛ yi n woli fɔxɔ igeni, nayi igena a raxarama nɛn. N na kolon fa fala foye gbeeni ito ɛ tɔrɔma n tan nan ma fe ra.” **13** Koni kunkibane yi kata kunkin nasigadeni xaren binni, koni e mi nɔ amasɔto foyen yi gboma ayi nɛn tun. **14** Nanara, e yi Alatala maxandi, e naxa, “Alatala, i nama tin nxu xa halagi xɛmɛni ito a fe ra. I mɔn nama tin nxu xa findi muxun faxa sabun na naxan mi fefe ligaxi nxu ra.” **15** Nayi, e yi Yunusa tongo, e yi a woli fɔxɔ igeni. Na ligaxina, igen yi a raxara yiri. **16** Na yi a liga kunkibane yi gaxu Alatala yɛɛ ra han, nanara e yi saraxan ba Alatala xa, e yi e kolo. **17** Alatala yi

yɛɛ gbeen nafa a yi Yunusa gerun. Yunusa yi lu yɛɛ gbeen kui soge saxan, kɔɛ saxan.

2 Yunusa yi yɛɛ gbeen kui waxatin naxan yi, a yi Alatala, a Ala maxandi. **2 A** yi a fala, a naxa, “N yi tɔrɔni waxatin naxan yi, Alatala, n yi i maxandi, i yi n yabi. N to yi faxan de, n yi i xili, i yi n xuiin name. (Sheol h7585) **3** I bata n woli baani tilinna ma. N bata lu mɔrɔnne bun, xunfanne birin danguma n fari. **4** N yi a falama nɛn, n naxa, I bata n kedi i yetagi. Koni, n mɔn i ya banxi sarijanxin toma nɛn. **5** Igen bata te han n kɔɛna. N bata lu tilinna ma. Fɔxɔ igen sexene yi filin n xunna ma. **6** N bata yi godo igeni han geyane bun. Bɔxɔn bata yi raxutu n ma han habadan. Koni i tan Alatala, n ma Ala, i bata n kendɛn ba faxan de.” **7** “N niin ba waxatini, n yi n miri i tan Alatala ma, n ma maxandi xuiin yi sa i li i ya banxi sarijanxini. **8** Naxanye suxurene batuma fuyan ne e makuyama hinanna nan na. **9** N tan saraxane bama i xa nɛn, n yi barikan bira i xa betini. N de xuiin naxanye tongoxi, n yi ne liga. Alatala, i tan nan kisin kannu ra.” **10** Alatala yi yɛɛn yamari alogo a xa sa Yunusa baxun xaren na.

3 Awa, Alatala mɔn yi falan ti Yunusa xa, **2 a** naxa, “Keli, i siga Niniwa taa gbeeni, i sa kawandin ba na n na i yamarixi naxan na.” **3** Nayi, Yunusa yi keli a siga Niniwa yi alo Alatala a falaxi a xa kii naxan yi. Taa gbeen nan yi Niniwa ra, a yisigana, fɔ soge saxan sigati. **4** Awa, Yunusa yi yanyi keden siga ti taani a sarinma, a naxa, “Xii tonge naanin to xanbi ra, Niniwa taan halagima nɛn!” **5** Niniwa kaane yi denkeleya Ala ma. Awa, e yi a rawanga a muxun birin xa sunna suxu, e yi kasa benbeli dugine ragodo e ma keli muxu gbeene ma han muxudine. **6** Niniwa mangan to na feen mɛ, a yi keli a manga gbɛdeni, a yi a manga domain nate a ma, a yi kasa benbeli dugin nagodo a ma, a yi sa dɔxɔ burunburunni. **7 E** yi falani ito rali Niniwa yiren birin yi, e naxa, “Mangan nun a kuntigine naxa, ‘Muxune nun xuruse xungbeen nun a xunxurina, sese nama donseen don hanma a yi a min. **8** Muxune nun xuruseene, birin xa benbenla ragodo e ma, e yi e xuini te Ala ma senben na, birin yi xɛte a sigati kii naxin fɔxɔ ra e nun a gbalon naxan ligama. **9** Waxatina nde Ala dijama nɛn, a xɛte a xolon fɔxɔ ra, nayi en mi fa halagima.” **10** Ala yi a to Niniwa kaane na ligama, a yi a kolon a e bata xɛte e kɛwali naxine

ƒoxo ra. A yi yihadin naxan nagidixi a xa a liga e ra, a yi na dan.

4 Na feen yi Yunusa xolo ki faji. **2** A yi Alatala maxandi, a naxa, “Alatala, n mi yi ito xan falan ba n yi n ma yamanani waxatin naxan yi? N yi ito nan ma fe falama n yi n gima Tarasisi yamanani waxatin naxan yi. Amasoto n yi a kolon a i tan Ala i dija, i kininkinin, i mi xolon xulen, i ya hinanna gbo, i yete ratanga yihadin liga feen ma. **3** Alatala, n bata i mafan i xa n niin ba n yi, amasoto a rafan n ma n faxa benun n xa lu n nii ra.” **4** Alatala yi a fala Yunusa xa, a naxa, “I lan i xolo ba?” **5** Awa, Yunusa yi keli taani siga sogeteden binna ra. A yi sa gagen ti a yete xa menni, a doko a bun nininna ra alogo a xa a to naxan ligama taani. **6** Marigina Alatala yi wudi binla nde ramini, a yi sabati Yunusa xun ma, a findi nininna ra a xa, na yi a xolon ba a yi. Yunusa yi sewa han! **7** Koni na xoton bode, subaxani, Ala yi kunla nde rafa a yi wudi binla soxon, a yi xara. **8** Sogen texina, Ala yi foye wolonna rafa keli sogeteden binna ra. Sogen yi Yunusa xunni li han a liga alo a xa fuga a ra. A yi a fala, a a xa faxa, a naxa, “Benun n xa lu n niini, a lan n xa faxa.” **9** Koni Ala yi a fala Yunusa xa, a naxa, “I lan i xolo wudi binli ito a fe ra ba?” A yi a yabi, a naxa, “A lan n xolo wudi binla fe ra han n faxa.” **10** Nayi, Alatala yi a fala Yunusa xa, a naxa, “Wudi binli ito mi wali yo tixi i tan ma, i tan xa mi a ragboxi, a daki ke kedenna nan na, a halagi ke kedenna ra. **11** Koni n tan mi lan nun n kininkinin Niniwa ma ba, taa gbeena, muxu wuli keme muxu wuli mawoye denaxan yi, naxanye mi fatan e komenna nun e yiifanna tagi rabe? Xuruseene fan na.”

Mike

1 Alatala falan naxanye ti Mike Moreseti kaan xa Manga Yotami nun Manga Axasi nun Manga Xesekiya waxatine yi, Yuda yamanan mangane. A fe tooni ito nan ti alo xiyena lan Samari taan nun Yerusalen taane fe ma. **2** E tuli mati, e tan siyane birin! I tan bōxōna, i tuli mati, e nun muxun naxanye birin a yi. Marigina Alatala sereyaan bama nen e xili ma. Marigin nan a falama keli a Batu Banxi sarijanxini. **3** A mato, Alatala minima a dōxōdeni. A godoma, a sigan tima bōxōn yire matexine fari. **4** Geyane xulunma ayi a sanna bun ma, lanbanne yibōma e tagi alo kumin dengben tēen ma, alo ige bōxōnxin tintinna ra. **5** Na birin Yaxuba yamaan murutena fe ra, Isirayila yamaan yulubine fe ra. Nde Yaxuba yamaan namurutexi? E manga taa Samari kaane xa mi a ra ba? Nde tixi Yuda yee ra suxure batuni? E manga taa Yerusalen kaane xa mi a ra ba? **6** Ala naxa, “N Samari taan findima nen taa xōnna ra burunna ra, manpa bili nakō yirena. N na a banxi gemene ragodoma nen lanbanne yi, n yi a banxine sandōxōne ramini kenenni. **7** A suxurene birin yibōma nen dungi dungin na. Tēen nan e kide se ralixine ganma. N na a batu seene birin kalama nen, e naxanye malanxi yalundene sarene xōn, e mōn sa findima nen yalundene saren na.” **8** Nanara, n wugama nen, n gbelegbele, n san yigenla nun n nagenla yi sigan ti. N gbelegbelema nen alo kankona. N kutun alo xutunxunbane. **9** Amasōto Samari kaane furen mi yalanma. A bata Yuda yamanan li. A bata n ma yamaan taan so deen li han Yerusalen taana. **10** E nama a fala Gati taani. E nama a wuga! E makutukutu burunburunni Beti-Leyafira taani. **11** Safiri kaane, e yagixin nagenla xa dangu! Saanan kaane, e nama susu mine. Beti-Hayeseli taan sununi, e mi e maliye. **12** Maroti kaane xaminxi e herina fe ra, bayo Alatala bata gbalon nagodo, han Yerusalen taan so dena. **13** E tan Lakisi kaane, e soone nun wontorone yitōn! E tan nan Siyon kaane tixi yulubin ma bayo Isirayila kaane yulubin naxanye ligama e ne toxi e konna nan singe yi. **14** Nanara, Yuda kaane, e masigama nen Moreseti-Gati taan na. Akisibu taan findima luti ratixin nan na Isirayila mangane yee ra. **15** Ala naxa, “E tan Maresa kaane, n mōn e yengefaan nafama nen e xili ma. Isirayila manga binyena a gima nen a sa a luxun Adulan faranna ra. **16** E xunna bi e rafan dii

xemene wuga feen na! E xunna gbanan alo dugan xun xōnna, amasōto e sigama nen e diine ra pon!”

2 Gbalon na kanne xa, naxanye haken mirima, e fe jaxini tōn e sadeni. Kuye nēma yibama e yi sa a liga, amasōto na fērena e xa. **2** E mila xēene xōn, e yi e tongo, e kunfa banxine xōn, e yi e kansun. E muxune nun e denbayane nun e kēene suxu. **3** Nanara, Alatala ito nan falaxi, a naxa, “A mato, n gbalon nan nafama bōnsōnni ito ma. E mi e xunna ramine a bun mume! E mi fa sigan tima xunna kenli, amasōto tōrō waxatin na a ra. **4** Na lōxōni, sandani ito falama nen e xili ma, e e magelema nen mawuga sigini. E naxa, ‘En bata kala fefe, n ma yamaan ke bōxōn bata yitaxun gbete ye ra. E bata a ba n yii, e bata en ma xēene so yanfantenne yii!’” **5** Nanara, muxu yo mi bōxōna nde malige i tan kēen na Alatala yamani. **6** E waliyiya falan tima n xili ma iki, e naxa, “E nama waliyiyaan fala! Waliyiya falani ito nama ti de! A findima yagin nan na!” **7** E tan Yaxuba bōnsōnna, a lan e xa na fala ba? Dijan janje Alatala yi ba? A darixi na lige ba? Ala naxa, “N ma falane fan na kanne xa naxan kewanle fan. **8** E bata keli n ma yamaan xili ma waxati dōnxeni ito yi alo yaxune. E muxune gubane bama e ma naxanye xetematō a ra keli yengeni bōje xunbenli. **9** E n ma yamaan jaxanle kedima e rafan banxine yi. E n ma binyen ba e diine ma habadan. **10** E keli, e siga, amasōto e matabude mi ito ra, bayo e yamanan bata raharamu. A findima tōrōn nan na naxan magaxu han! **11** Xa muxuna nde a gima foyen fōxō ra a wule waliyiya falane ti, a naxa, ‘I fama dōlōn nun manpaan sōtōdeni nen!’ Na nabi sifan nan yi lanje yamani ito ma yati!” **12** “N na e birin malanma nen Yaxuba bōnsōnna. N na e tan muxu dōnxene xun lanma nen, naxanye luxi Isirayila bōnsōnni. N na e malanma nen alo yexēene sansanna kui, alo xuruse kuruna e dēgedeni. Gali gbeen sōnxō xuiin yi mini na. **13** Naxan kiraan nabama, na tima nen e yee ra. E kiraan nabama nen, e mini. E mangan bata ti e yee ra, Alatala nan e xunna ra.”

3 N bata a fala, n naxa, “Yaxuba bōnsōn mangane Isirayila bōnsōn kuntigine, e tuli mati iki! E tan xa mi lan e sariyan kolon ba? **2** Fe fajin najaxu e tan naxanye ma, a jaxin yi rafan e ma, e muxune kidin nun e suben bama e ma han e xōnna. **3** E n ma yamaan suben donma, e yi e kidin ba, e yi e xōnne yigira, e yi e yisege alo suben naxan sama tunden kui.” **4**

Nanara, mangane na gbelegbele Alatala ra, a mi e yabima. A yetagin luxunma nen e ma na waxatini, e kɛwali jaxine fe ra. **5** Alatala ito nan falaxi lan nabine fe ma naxanye n ma yamaan nalɔma ayi, a naxa, “Donseen nema e de, e muxune xibaruma bɔɔɔ xunbenla nan na. Koni xa naxanye mi e kima donsɛni e yengen nan nakelima ne ma. **6** Nanara, kɛɛn soma nen e ma e mi fa fe toon tima alo xiyena, dimin yi so, fe yo mi fa makenɛnma e xa. Sogen birama nen na nabine mabinni, kenɛnna yi findi dimin na e xa.” **7** Sayibane yagima nen e nun naxanye birin waliyiya falane tima. Ne e yetagine luxunma nen yagini amasɔtɔ Ala mi e yabima. **8** Koni n tan, n lugoxi senben na e nun Alatalaa Nii Sarijanxin nun kiti sa kenden nun fangana alogo n xa Yaxuba bɔnsɔnna Ala matandine yita a ra e nun Isirayila bɔnsɔnna yulubina. **9** Nayi, e tuli mati ito ra, Yaxuba bɔnsɔn mangane, e tan Isirayila bɔnsɔn kuntigine, kiti kenden najaxu e tan naxanye ma e yi fe fajine birin yifu, **10** e tan naxanye Siyon taan tima wunli, e yi Yerusalɛn ti gbaloni. **11** Mɛn mangane kitin sama, e dimi yi seen nasuxu mayifuni. Mɛn saraxaraline xaranna tima, alogo e xa e saren sɔtɔ. Mɛn nabine fe famatɔne xibarune falama, alogo e xa gbetin sɔtɔ. Anu, e mɔn fa e diganma Alatala yi, e susu a fale, e naxa, “Alatala mi en tagi ba? Tɔrɔ yo mi fama en ma.” **12** Nanara, e tan ma fe ra, Siyon taani buxama nen alo xɛɛna, Yerusalɛn findima nen taa xɔnna ra. Ala Batu Banxin tixi geyaan naxan ma, na findima nen fɔtɔnna yire matexin na.

4 Waxati famatɔni Alatala Batu Banxin geyaan naxan fari na danguma nen geyane birin na, a lu geyane birin xun ma, siyane yi lu fe a ma han! **2** Siya wuyaxine fama nen, e a fala, e naxa, “E fa, en siga, en te Alatalaa geyaan ma, Yaxubaa Alaa banxini. A xa en xaran a sigati kiine ma, alogo en xa bira a kirane fɔxɔ ra.” Amasɔtɔ sariyan minima nen Siyon yi Alatalaa falan minima nen Yerusalɛn yi. **3** A findima nen kitisaan na siya wuyaxin tagi. A yengene janma nen yama senbɛmane tagi hali naxanye makuya. E e silanfanne bɔnbɔma nen, e findi jinge kenne ra, e tanbane yi rafala wolitene ra. Siya yo mi fa silanfanna tongoma gbete xili ma, yengen mi fa maxaranye mume. **4** Birin dɔxɔma nen a manpa binla nun a xɔde binla bun, muxu yo mi fa e magaxu, amasɔtɔ Alatala Senben Birin Kanna bata falan ti. **5** Siyane birin sigan tima e gbee ala nan xili yi. Koni en tan sigan tima Alatala nan xili

yi en ma Ala waxatin birin han habadan! **6** Alatalaa falan ni ito ra, a naxa, “Na lɔxɔni, n sankalatɔne malanma nen. Naxanye yi suxi yengeni n yi ne xun lan, n tɔrɔn nagidixi naxanye ma. **7** N sankalatɔne findima n ma yama dɔnxɛn na nen. Naxanye yi xuyaxi ayi, na muxune yi findi siya senbɛmaan na. Alatala dɔxɔma nen e xun na Siyon geyani keli na waxatin ma han habadan. **8** I tan, Siyon taan sanganso matexina, i tan naxan yamaan makantanma alo xuruse rabaan nun a kuruna, i fama nen senben sɔtɔdeni naxan yi i yii a fɔlɔni. Yerusalɛn mɔn findima nen manga taan na.” **9** Nanfera iki i gbelegbelema? Manga mi fa i konni ba? I kawandi muxun bata lɔ ayi ba, alogo sɔxɔlɛn xa i li alo jaxanla naxan tinna ma? **10** Siyon kaane, e tɔrɔ, e gbelegbele alo jaxanla naxan diin barima. Amasɔtɔ iki e minima nen e taani e sa dɔxɔ burunna ra. E sigama nen han Babilɔn taani. E sa xɔrɔyama menna nin, Alatala sa e xunbama menna nin e yaxune yii. **11** Iki siya wuyaxine e malanma i xili ma. E a falama, e naxa, “En fu e taan ma, en xa Siyon kalaxin to!” **12** Koni e mi Alatala miriyaan kolon. E mi a fe ragidixine famuma. E mi a kolon a e malanma nen alo malo xidine lonna ma. **13** Siyon kaane, e keli, e maala bɔnbɔ! N senben fima nen e ma alo wure fenne turaan ma alo a torone na findi sulan na. E yama wuyaxi yilunburunma nen, e bata yi seen naxanye sɔtɔ yengeni, e ne rasarijan Alatala xa, e yi e nafunla so bɔxɔn birin kanna yii.

5 Iki, e ganle malan, taa yenge sone! Yaxune bata e rabilin! E bata Isirayila kuntigin yetagi garin dunganna ra. **2** I tan, Betelemi-Efarata taana, i tan xurun Yuda taane tagi, koni naxan mangayaan ligama Isirayila xun na n tan xa, na minima i tan nin. A bɔnsɔnna fɔlɔxi xabu waxati danguxine yi, xabu singe ra fonne waxatina. **3** Nanara, Ala Isirayila yamanan nabɛjinma nen han naxan diin barima na yi diin bari. A ngaxakeden dɔnxɛne mɔn yi xɛtɛ Isirayila yi. **4** A kelima nen, a yi a xuruse kurun naba Alatala senbeni, Alatala xili binyeni, a Ala. E luma nen bɔɔɔ xunbenli, amasɔtɔ a binyama nen han bɔxɔn danne. **5** A tan yetɛɛn nan findima e bɔɔɔ xunbenla ra. Asiriya kaane na fa en ma bɔxɔni e yi so en ma manga banxine kui, en yɛɛrati solofere nan nakelima e xili ma hali yamaan kuntigi solomasɛɛ. **6** E mangayaan ligama nen Asiriya yamanani silanfanna ra e yii, e Nimirodi bɔxɔn tongo. Mangana en xunbama nen Asiriya kaane

yii, e na sa so en yamanani e na e sanna ti en ma bōxōni. 7 Nayi, Yaxubaa yamaan muxu dōnxene luma nen siya wuyaxin ye, alo xiila naxan kelixi Alatala ma, alo tulen naxan sama sexen yii ra, naxanye mako mi adamadiine ma, e yengi mi sese ma muxune yii. 8 Nayi, Yaxuba bōnsonna muxu dōnxene luma nen siyane nun yama wuyaxine ye, alo yatan burunna subene ye, alo yata senbemaan xuruse xunxurine ye. A na dangu, a e suxu, a e yibō, muxu yo mi e bama a yii. 9 E yiini te e yaxune xili ma, alogo e yaxune birin xa raxōri. 10 Alatalaa falan ni ito ra, a naxa, “Na lōxōni, n ni i ya soone bama nen i konni n yi i ya wontorone ralō ayi. 11 N na i ya taane kalama nen i ya yamanani, n yi i ya yire makantanxine birin nabira. 12 N kōerayaan bama nen e ye. Yiimatone mi fa luma e ye. 13 N na e suxurene nun e kide gēmene bama nen e yii. E mi fa e xinbi sinma e yii funfun bun ma. 14 N na e Asera kide gbindonne bama nen e yii, n yi e taane halagi. 15 N fitinaxina n gbeen jōxōma nen xōloni siyane birin na naxanye mi n xuiin namexi.”

6 E tuli mati Alatalaa falan na, a naxa, “E keli, e xun mafala, geyane yi findi i ya kitin serene ra, yire matexine xa i xuiin namē. 2 Geyane, e Alatala kitin namē, e tuli mati, e tan bōxōn bunna naxanye mi yimaxe, amasōto Alatala nun a yamaan kitini, a waxi Isirayila makiti feni. 3 N ma yamana, n nanse ligaxi e ra? N goronna mundun saxi e xun ma? E n yabi! 4 N bata e ramini Misiran yamanani. N bata e xunba konyiya bōxōni. N yi Musa rasiga, a xa ti e yeē ra, e nun Haruna nun Mariyama. 5 N ma yamana, na feen xa rabira e ma, Moyaba mangan Balaki yi fe jaxin naxan falama, e nun Beyori a dii Balami mōn a yabi naxan na. E sigan naxan ti keli Sitimi yi han Giligali taani, na feen xa rabira e ma alogo e xa Alatalaa tinxin wanle kolon.” 6 N fama nanse ra n yii Alatala yetagi, n yi n xinbi sin Ala matexin bun? N xa fa, nxu nun saraxa gan daxine ba? E nun jinge diin jēē kedenne ba? 7 Alatala konton wuli wuyaxine rasuxe ba? Ture saraxan naxan gbo xude wuli wuli wuyaxine igen xa ba? N na n ma dii singen soe a yii n hakene saren na ba? Diin naxan minixi n fatini, na finde niin xunbaan na yulubine fe ra ba? 8 Adamadina, a bata a yita i ra naxan fan, Alatala naxan maxōdinma i ra: Tinxinyaan liga, hinanna yi rafan i ma, i yi sigan ti i ya Ala xōn yete magodoni. 9 Alatala a xui raminima taan muxune ma, xaxilimana a xinla ratinma nen. E

tuli mati falan na naxan yamaan yulubine saranna ralixi e nun naxan a fe ragidixi. 10 Nafunla naxan sōtōxi a jaxin na na mōn muxu jaxine banxine kui ba, e nun ligase tinxintaren naxan dangan nafama? 11 N luyē n mi a fe saran na kanna ra ba, naxan sikeli tinxintaren nawalima se liga se defetaren naxanye benbeli kui? 12 Taan nafulu kanne gbalon ligama, a muxune wulen falama. E deen yanfan tima. 13 Nanara, n tōrōn nagodoma nen i ma, n yi i kala i yulubine fe ra. 14 I tan, i degema nen i mi lugo. Kamen i kuiin bōrōxōma nen. I sena ndee ramarama nen, koni sese mi luma. I na naxan namara, n na kalama nen yengeni. 15 I seen sima nen, koni i mi a xabama. I oliwi turen bama nen, koni i mi a turen nawalima. I manpa bogi igen bama nen, koni i mi a minma. 16 I Manga Omiri a sariyane nan suxuma e nun Manga Axabi a denbayaan misaale birin, i bira e kawandi xuine fōxō ra. Nanara, n halagin nagidixi i ma, n na i ya muxune findima nen gele ma feen na e nun yagina siyane tagi.

7 Gbalona n xa! Amasōto n sunuxi alo naxan se bogin fenma a xōri makentun waxatini. A dondaxin se mi fa na, hali xōde bogi keden pe naxan yi jaxunje n de. 2 Tōgōndiya muxune bata jnan yamanani na kiini. Muxu fajni yo mi fa luxi. E birin dōxi e bode yeē ra faxa ti xinla ma. Birin lutin natima a ngaxakedenna yeē ra. 3 E yiine fatan fe jaxin lige. Mangane seen nan fenma, kitisane dimi yi seene rasuxuma mayifuni, kuntigine e waxōn feen falama, e birin yi malan na feen ma. 4 Naxan fisamantenna ra e ye, na jaxu alo janla. Naxan tinxin e tagi, na fe raxolo sansanna jali kanna xa. E kantan tiine bata e rakolon lōxōn naxan ma fe ra, e kewanle saranna sōtōma lōxōn naxan yi, na bata li. E kontōfilima nen iki. 5 I nama la i adamadi boden na. I nama i taxu i xōyin na. I nama falan ti hali i ya jaxanla yeē xōri. 6 Amasōto dii xēmēna a baba rafeyama, dii temene fan yi keli e ngane xili ma, jaxanle fan yi keli e mamene xili ma. Muxune yaxune kelima e denbayane yetēen nin. 7 Koni n tan, n na Alatala yeē ra kira yitoma nen yigini, n yi Ala mame, n nakisimana. N ma Ala n xui namēma nen. 8 I nama sewa n ma fe ra, n yaxuna. Amasōto xa n bira, n kelima nen. Xa n lu dimini, Alatala findima nen kenenna ra n xa. 9 N na Alatalaa xōlon naxanma nen, amasōto n bata yulubin liga a ra, han a yi n xun mayenge, a yi n ma kitin sa. A n naminima nen kenenni, n yi a tinxinyaan to. 10 N yaxuna a toma nen, a yi yagi han!

A tan naxan yi a falama n xa, a naxa, “Alatala minen, i ya Ala?” N yee a biraxin toma nen, a yi yibodon, alo boron kiraan xon. 11 Taan nabilinna yinna mon na ti laxon naxan yi, ndee mon sama nen e boxon danne fari na waxatini. 12 Na laxon, muxune fama nen i fema, keli Asiriya yi han Misiran taane yi, keli Misiran yi sa dexo Efirati baan na, keli Efirati baan na han foxo igena, keli geyane birin ma. 13 Boxon kalama nen a muxune kewanle fe ra. 14 I ya yamaan nagbengben i ya dunganna ra, i kurun naxan sotoxi i keen na, naxan sa dxi a danna burunna ra sexe faji yireni. E yi e dege Basan nun Galadi yi alo lxo danguxine. 15 N mon kabanako wanle yitama e ra nen alo e mini waxatini Misiran yi. 16 Siyane a toma nen e yagi, hali e senben to gbo. E yiin sama nen e de ra, e tunle yi xori. 17 E burunburunna dunxunma nen alo sapina, alo daliseen naxanye e bubuma boxoni. E minima nen xuruxurunje e luxundene yi, e fa Alatala ma, en ma Ala. E gaxuma nen i yee ra, e yilanyilan. 18 Nde luxi alo i tan, Ala, i tan naxan i ya yamaan muxu donxene yulubin xafarima, i tan naxan muruten mafeluma? I ya xolon mi buma han habadan amasoto hinanna rafan i ma. 19 I mon kininkininma nen nxu ma, i nxo hakene yibodonma nen i sanna bun, i nxo yulubine birin wolima ayi nen fo foxo igen tilinna ma. 20 I ya lannayaan yitama nen Yaxuba bonsonne ra i yi hinan Iburahima yixetene ra, alo i kol kii naxan yi nxu benbane xa a singeni.

Nahun

1 Waliyyi falan ni ito ra Niniwa taan xili ma, Nabi Nahun Elekosi kaan fe toon naxan ti alo xiyena, a yi a sebe. **2** Alatala a yamaan namarama xoxolonna nin. A gbeen joxoma nen. Alatalaa xolon gbo, a gbeen joxoma nen. A yengefane saranna fima nen, a fitinaxin yi a gbeen joxo a yaxune ma. **3** Alatala mi xolon xulen, a senben gbo! Alatala mi yulubi kanna yatema tinxinden na mume! Alatala dangu funfun findixi wuluwulu gbeen nun foye kala tiin nan na. Kundaan yi findi gbangbanna ra a sanna bun. **4** A na falan ti foxo igen xili ma, a xara, baane birin yi xori. Basan nun Karemele yamanane sexene yi gbeeli, Liban yamanan wudi fugene yi lisi a ra. **5** A geyane birin yimaxama nen a yee ra, yire matexine birin yi xuya ayi. Boxon yi xuruxurun a yetagi, e nun dunuja nun a yi seene birin. **6** Nde nae tiye a xolon yee ra nayi? Nde kise a xolon gbalon ma? A fitinan sigama ayi alo teeena hali gemene a e birin ganma. **7** Alatala fan. Luxunden nan a tan na toro waxatine yi. A yengi muxune xon naxanye na e yigiya a yi. **8** Koni a yaxune daxonen kalama nen alo fufaan na dangu na xun ma. A yi a yengefane kedi han laxira dimini. **9** E feen mundun yitonma Alatala xili ma? A tan nan halagin tima fefe! Naxankatan firinden mi e lima. **10** Amasoto e luma nen jali jansanne yi, e xunne kelima nen e dolone ra, e yi halagi alo sexe xaren na gan fefe! **11** Niniwa kaane, muxuna nde minixi e tan nan ye naxan fe jaxini tonma Alatala xili ma, naxan maxadi jaxine tima. **12** Alatala ito nan falaxi, a naxa, “Hali e kamalixi, e na wuya ki yo ki, e raxorima nen, e jan. Yuda kaane, xa n bata toron nagidi e ma iki, na ligaxi nen alogo e nama fa toro sonon. **13** N na e xunbama nen konyiyani iki, n yi yolonxonne yibolon, e ba e ma.” **14** Niniwa kaane, Alatala ito nan yamarixi e fe yi, a naxa, “E bonsonna muxu yo mi luye. N na e wudi suxurene nun e wure suxurene kalama nen e kidene yi. N yi e gaburune yiton, bayo sese mi e ra.” **15** E mi a to, xeraan sigan tima geyane fari, naxan fama xibaru fajin na naxan boje xunbenla a fe ralima. Yuda kaane, e sanle raba, e de ti xuiine rakamali. Amasoto halagi tiin mi fa danguma e konni. A bata raxori fefe!

2 Niniwa kaane, halagi tiine bata keli e xili ma. E yinna makantan, e yeen ti kirane ra, e tagi xidi

yenge so xinla ma, e fangan birin malan. **2** Amasoto Alatala mon binyen soma nen Yaxuba bonsonne yii e nun Isirayila boxona, hali halagi tiine to bata yi so na kaladeni e yi e manpa binle jan. **3** Yaxu sofani itoe ye masansan wure lefane gbeeli. E sofa wekilixine maxidixi dugi gbeele nin. Wurene mayilenma e wontorone ma, e na e yiton yengeso loxon xili yi, e yi tanbane tongo. **4** Yenge so wontorone e gima taan kirane xon han! E gixin sigama yama malandene yi. E mayilenma alo xaye xidi degene, e xulun alo kuye sarinna. **5** A bata a sofa yebaxine maxili, koni e fama dagalanje ayi. E e gima siga taan nabilinna yinna ma, e luxun e ye masansan wurene bun. **6** Taan so deene bata rabi baan mabinni, manga banxin fan birama. **7** Feen bata ragidi, e bata taan muxune suxu, e siga e ra konyiyani. Taan konyi gilene yi lu kutunje alo ganbane, e siga e kanken makudunje sununi. **8** Niniwa taan luxi nen alo ige sa sena igen minima naxan na. E a falama a muxu gixine xa, e naxa, “E ti! E ti!” Koni muxu yo mi xetema. **9** E gbetin tongo! E xemaan tongo! Nafunla na naxan mi janma. A sifan birin malanxi na yi. **10** Kalan nun halagin nun bonona! Bojene bata kala, xinbine yi sin. Fatine birin yi xuruxurun, yetagine birin yi yitonon. **11** Yatane sodeni ito luxi di, denaxan yi findixi yatadine degeden na, yatane nun e diine yi e gima denaxan yi, muxu yo mi e yikala? **12** Yatan yi subene faxama a diine xa, a yi a se suxine kosen bolon a gileen xa, a luxunden nafe xooyi seene ra a soden nafe se suxine ra. **13** Alatala Senben Birin Kanna falan ni ito ra, a naxa, “N bata keli e xili ma! N na e yenge so wontorone ganma nen e findi tutin na. E banxulanne faxama nen silanfanna ra alo yata senbeman. N danna sa e se tongon na yengene yi dunuja yi. Muxu yo mi fa e xerane xuiin mema sonon.”

3 Gbalon faxesa ti taani ito xa, naxan nafexi wule falane nun gbalotone ra, se tongoxine mi janma denaxan yi. **2** Bosa xuiin minima, e nun soone nun yenge so wontorone gi xuina. **3** Soo ragine e gima siga yengeni, e silanfanne mayilenma, e tanbane luxi alo kuye sarinna! Muxu maxoloxine yiren birin yi! Binbine saxi e bode fari han! Faxesa muxune mi janma mume! Muxune e sanna radinma binbine ra. **4** Na feene birin fataxi yalundena yalunyaan kunfan nan na, jaxalan tofajin nun woyime jaxanla naxan ma yalunyaan yi siyane findima konyine ra, a yama wuyaxi tirin a

køerayani. **5** Alatala Senben Birin Kanna falan ni ito ra, a naxa, “N bata keli i xili ma! N na i ya dugin lenben soma nen i yetagin xunna, n yi i ragenla yita siyane ra, yamanane yi i ya yagitareyaan to. **6** N se xosixine wolima i ma nen, n yi i rayagi, i findi misaala ra. **7** Nayi, naxan yo na i to, na kanna a gima nen i ma, a yi a fala, a naxa, ‘Niniwa taan bata kala. Nde kininkininje a ma?’ N sa i madenden muxune sote minen?” **8** E tan Niniwa kaane, e taan fisa No-Amoni taan xa ba, naxan yi baan de, igen naxan nabilinxi? A yi makantanxi baan nan na, igene nan yi a rabilinni alo taan yinna. **9** Kusi yamanan nun Misiran yamanan nan yi e fangan na dan mi naxan na. Puti kaane nun Libiya kaane nan yi findixi e xoyine ra. **10** Anu, na taan suxu nen yengeni, a muxune yi xali konyiyani. Yaxune yi e dii futene yibutuxun taan kira xunne birin na. A kuntigi suxine yi yitaxun masensenna xon, a muxu gbeene birin yi xidi yolonxonna ra. **11** E fan xunne kelima nen dolo xolen na, e yi e luxun e yaxune bun, e fan yi yigiyaden fen. **12** E yire makantanxine birin luma nen alo xoden na mo. Muxune na a yuguyugu, a bogine yi lu yolonje e de. **13** E ganla mato. Naxanle nan tun fa e konni. E yamanan so deene bata rabi e yaxune xa mum! Teen bata e taan so deene balan wurene gan. **14** E igen namara taani yengen yee ra! E taan nabilinna yinni ton! E benden malan, e gberingbeen namaxa! E bitikidine rafala! **15** Nayi, teena e ganma nen, silanfanna yi e raxori alo supene. E wuya, e wuya ayi alo supene! E findi ganla ra alo tuguminne! **16** E yulane bata wuya ayi dangu sarene ra kore. Anu, ne fan luxi alo tuguminne na tukan, e tunun. **17** E taan kantan muxune luxi alo tuguminne, e kuntigine fan alo tuguminne na wuya ayi. E daxon sansanna ma xunbeli waxatini. Sogen na te, e tukan, e sigade mi kolon. **18** Asiriya mangana, i ya yeeratine bata xi habadan. I ya sofa kuntigine mi fa e ramaxama. I ya yamaan bata xuya ayi geyane xun xon, muxu yo mi fa e malanje. **19** I ya furen dandan se mi na. I maxolodene i faxama nen. Naxan yo na i ya fe me na kanna a yiin bonboma nen sewani bayo muxu yo mi na, e fe naxin toron munma naxan li dan mi naxan na.

Xabakuki

1 Waliyiya falan naxan so Nabi Xabakuki yii fe tooni alo xiyea: **2** Alatala, n luma i maxande han waxatin mundun yi n mali feen na i mi n xuiin me? N luma gbelegbele han waxatin mundun yi n naxa, “Gbalona!” i mi n nakisi? **3** Nanfera i tinxi n yeen yi lu haken na? Nanfera i tinxi a yamaan xa jaxankata? Halagin nun gbalona n yetagi waxatin birin. Lantareyaan nun yengen bata gbo ayi. **4** Nanara, senbe mi fa sariyan na, kiti kenden mi sama mum! Bayo muxu jaxine bata tinxin muxune rabilin, kiti tinxintarene yi lu se. **5** E yeen ti siyane ra, e e mato, e yi kabe, e yigitege. Bayo n fena nde ligama nen e waxatini ito yi e mi yi le naxan na, hali xa a fala e xa. **6** Bayo n Babilon kaane rakelima nen, siya kininkinintare wekilexina, e yi boxon birin yisiga e yi yirene tongo e gbee mi naxanye ra. **7** E magaxu, e senben gbo, e fangan nan e sariyan nun e xunna kenla ra. **8** E soone xulun burunna jarin xa, e xaje jinbari ra kankone xa. E soo ragine gixin fama nen tuganye sa keli yire makuyeni. E gima alo singbinna neen fonje seen ma. **9** E birin fama gbalon nan xili ma. E ganle yeen tixi e sigaden nan na, e suxu muxune malan alo jemensinna. **10** E mangane magelema, e gelema kuntigine ma. E gelema yire makantanxine birin ma e gbingbinne nan nafalama taan yinna xon e dangu yinna xun ma, e taan suxu. **11** E yi dangu alo foye kala tiina, e birin hake kan, e fangan nan e gbee ala ra. **12** Koni Alatala xa mi i tan na xabu a foloni ba, n ma Ala sarijanxina? Nayi, e mi nxu faxama! Alatala, i bata e findi nxu makiti muxune ra. Ala, n kantan fanyena, i bata e senbe so alogo e xa nxo wanle saran nxu ra. **13** I yeene sarijan fe jaxin toon ma. I mi tinje yamana jaxankatan matoe. Nanfera nayi, i yeen tixi yanfantenni itoe ra? Nanfera i dunduxi muxu jaxini itoe yi yamaan naxori naxanye tinxin e xa? **14** I bata adamadiine liga alo yexene baani, alo kari mi niimaseen naxanye ma. **15** Yaxune e birin suxuma konna ra, e yi e rate e yalaan na, e e malan e benbenla kui, e jaxan han! **16** Nayi, e yi saraxane ba e yalane xa e yi wusulanna gan e benbenle xa, bayo ne nan a ligama e balon yi gbo ayi, e donse jaxumene soto. **17** Nayi, a mon xa lu a yalani kunkunje nen ba, a mon yi siga siyane halage kininkinintareyani ba?

2 N tan luma nen tixi kantan tideni, n yi lu taan nabilinna yinna xuntagi alogo n xa a kolon Ala naxan falama n xa, mawuga xuini ito yabima kii naxan yi. **2** Alatala yi n yabi, a naxa, “Fe tooni ito sebe n naxan yitama i ra, i yi a sebe walaxane ma ki faji alogo muxune xa mafura a xarandeni. **3** Bayo fe makenenxin na a ra naxan nakamalima a waxatini. A fa a waxatin nan legedenma, a mi luma a ligataren na. Hali a bu, a mame, bayo a rakamalima nen yati. A mi xunkuyama ayi. **4** A mato! A yete yigboxi, a niin mi fan. Koni tinxin muxun nii rakisin soto ma nen a denkeleyaan xon.” **5** “Dolon mayanfan nan tima. Wasoden mi a raxare mum! A mi wasama alo laxira, alo sayaan to mi wasama. A siyane birin malanma a yete xa a e birin suxu yengeni. (Sheol h7585) **6** Na muxune birin xa mi a mafalama ba magele falane nun fala xolene ra? E naxa, ‘Gbalon na kanna xa naxan se mujaxine malanma. A yi a doli goronna fari sa! Ito fa ligama han waxatin mundun yi?’ **7** I doli faane mi kele i xili ma ba? Ne mi xulunje ba, e fa i yimaxa? I fan findima nen e se suxin na! **8** Bayo i bata siya wuyaxine yii seene tongo yengeni, yama donxene i fan yii seene tongoma nen yengeni. Amasoto i bata muxune faxesa, i yi yamanane nun taane nun e muxune birin halagi.” **9** “Gbalon na kanna xa, naxan tonon fenma tinxintareyani alogo a xa tide gbeen soto, a yi a futuxulu tonon na. **10** I bata i ya denbayaan yagi feen nan nata na ra, i yi yama wuyaxi halagi, i bono i niini. **11** Bayo hali i banxin tixi gemen naxanye ra, ne gbelegbelema nen i xili xunna, xalanbene fan yi a ratin.” **12** “Gbalon na kanna xa, naxan taan nasabatima muxun wunla xon naxan taan beten sama jaxankatan xon. **13** Alatala Senben Birin Kanna xa mi a ragidixi ba, a yamane wali xonne findixi yegen nan tun na teen xa, a siyane e yete yixadanma fuyan? **14** Amasoto boxo xonna rafema nen Alatala binyen kolonna ra alo igen baane rafexi kii naxan yi.” **15** “Gbalon na kanna xa, naxan dolon fima a adamadi bodene ma han e xunne yi keli, a yi e ragenla to. **16** I tan lugoxi yagin nan tun na, binyen mi a ra. I fan xa i min, i xunna yi keli, i ragenla yi lu. Alatala a yiifari ma igelengen xolen soma nen i yii i ya binyen yi findi yagin na! **17** Bayo i gbalon naxan nabaxi Liban yamanani, na xetema nen i ma. I bata xuruseen naxanye halagi, na feen findima gaxun nan na i ma. Amasoto i bata muxune faxesa, i yamanane nun taane nun e muxune birin halagi. **18** Suxurene tonon nanse ra naxan a lige muxune xa e yiton? Sawuran

nan tun ne ra naxanye rafalaxi wuren naxulunxin na. E wulen nan falama muxune xa alogo e rafala muxun xa e yigi sa e yi. E ala bobone nan nafalama. **19** Gbalon na kanna xa, naxan a falama wudin xa, a naxa, ‘Keli!’ A yi a fala gemen xa, a naxa, ‘Xulun!’ Xemaan nun wure gbeti fixen nan soxi a ma, koni nii mi a yi. Na fa i xaranma di? **20** Koni Alatala nan a Batu Banxi sarjantxini. Bəxən muxune birin xa sabari a yetagi.”

3 Nabi Xabakuki Ala maxandina, muxune naxan bama mawuga betin na. **2** Alatala, n bata i xinla me. Alatala, n bata kabe i kewali gbeene ma. I mon xa ne rakamali to! I mon xa i kewanle yita waxatini ito muxune ra. I ya kininkininna xa rabira i ma i ya xoloni. **3** Ala kelima Teman nin. Sarjantəon sa kelima Paran geyaan nin. Beti xuini te. A binyen kore xonna birin ma, a tantunna bəxo xonna rafexi. **4** A nərən gbo alo sogena. Tεε dεgen kelima a yiini a senben luxunxi denaxan yi. **5** Fitina furen minima a yεε ra, furene biraxi a fəxo ra. **6** A na ti, a bəxəni maxa. A na a yεen ti siyane ra, e xuruxurun. Habadan geyane xuyama ayi, geya singene kalama, a dangu funfune luma nən habadan. **7** N Kusan kaane bubune kalaxine toma, n Midiyan kaane dəxədene yigitεgεxin to. **8** Alatala i yi xələxi baane nan ma ba? I bəjε te nən xudene xili ma ba? I xələxi fəxo igen nan ma, i te i ya soone fari waxatin naxan yi, i to te i ya yenge so wontorone kui nə sətəni? **9** I ya xanla bata ramini, i kələ xuine luxi nən alo xalimakunle. Beti xuini te. I bəxəni bəma, baa igene yi mini. **10** Geyane to i to, e xuruxurun, tule gbeen yi fa, tilinna yi xuxu, a yi a mərənne yite. **11** I xalimakunla naxanye wolima sogen nun kiken bata ti e funfuni ne dεgen bun, koren yi a jinna masəxən i ya tanban bun. **12** I fitinaxin nan bəxəni siga, i siyane halagi xələni. **13** I minima i ya yamaan nan xunbadeyi, alogo i xa i ya muxu yebaxin nakisi. I muxu jaxine bənsənnə mangan faxa, i yi a bundəxəne birin naxəri. Beti xuini te. **14** I e kuntigine xunne səxənma e yetena xalimakunle nan na naxanye gixin yi fama nxu raxuyadeni ayi e gbelegbelema sewani, alo e nεma yiigelitəne faxama wundoni. **15** I ya soone bata fəxo igeni bodon, igene yi walənje ayi. **16** N to na birin me, n bəjεn yi mini, n de xara gaxuni. N xənne yi n xələ, n sanne yi lu xuruxurunje. Anu, n gbalo ləxəni ito mamema limaniyaan nin bayo a fama nxu jaxankata siyaan nan xili ma. **17** Hali xədə binle mi fa fugama, manpa binle mi fa bogima, oliwi bocrine

yi kala, hali donse yo mi fa kelima xεene ma, hali yεxεene mi fa kulani, jingene fan yi jian ε sansanne yi, **18** koni n tan sewama nən Alatala yi, n tan jaxanma nən Alaa fe ra, n nakisimana. **19** Marigina Alatala nan n senben na. A bata n sanne lu alo xənla sanne a yi geyane xuntagine findi n ma siga tiden na. Na sebəxi beti baane kuntigin nan xa. A xa ba maxase luti kanne ra.

Sofoni

1 Alatala yi falan ti Kusi a dii xemen Sofoni xa. Kusi findixi Gedaliyaa dii xemen nan na. Gedaliya yi findi Amari a dii xemen na. Amari yi findixi Xesekiya dii xemen nan na. A falaxi Yuda mangan Yosiya waxatin nin Amon ma dii xemena. **2** Alatalaa falan ni ito ra, a naxa, “N seene birin naxorima nen boxo xonna fari. **3** N na adamadiine nun subene birin naxorima nen, n yi xoline nun yexene raxori, e nun seen naxanye muxu jaxine birama yulubini. N mi muxu yo luye boxo xonna fari.” Alatalaa falan nan na ra. **4** “N na n yiini bandunma nen Yuda kaane nun Yerusalen kaane birin xili ma. N yi Baali suxurene birin jan e yi, yamaan yi jinan e ki muxune xon naxanye yi saraxane bama e xa, **5** e nun naxanye e xinbi sinma kore banxin xuntagi kore xonna yanban seene batudeni, e nun naxanye e koloma Alatala yi, e mon yi e kol e gbee ala Moloko yi, **6** e nun naxanye e xun xanbi soxi Alatala yi naxanye mi Alatala fenma, e mi a maxodinma.” **7** E raxara Marigina Alatala yetagi, bayo Alatalaa loxon bata maso. Alatala bata saraxani ton, a yi a muxu xilixine rasarijan. **8** Anu Alatala naxa, “N ma saraxa ba loxoni, n kuntigine nun manga diine saranma nen e fe jaxine ra, e nun naxanye birama siya gbetene namunne foxo ra. **9** Na loxoni, n muxune saranma nen e fe jaxine ra naxanye birin e sanna ratuganma so deen gbingbinna xun ma e nun naxanye birin e kanne banxine rafema nafunle ra naxanye sotoxi funmaan nun yanfane yi.” **10** Alatalaa falan ni ito ra, a naxa, “Na loxoni, gbelegbele xuiin tema nen taan so deen na denaxan xili Yexē Dena, e nun wuga xuiin Yerusalen Taa Neneni e nun sonxo xui gbeena geyane yi. **11** Naxanye doxi taan laben na, e gbelegbele! Bayo yulane birin bata halagi, gbeti fenne birin naxorima nen. **12** Na waxatini, n lenpun nadegegema nen, n yi Yerusalen taan birin yigbe. N yi na muxune saran e hakene ra, naxanye e wasa soxi e fe jaxine yi, e lu a fale, e naxa, ‘Alatala mi fefe rabama, a fapina hanma a jaxina.’ **13** Yaxune e nafunle birin tongoma nen yengeni, e banxine yi kala. E banxine tima nen, koni e mi soma e kui. E wudine sima nen, koni e mi e bogine igen minma.” **14** Alatalaa loxo gbeen bata maso, a bata maso, a famaton ni i ra. Hali sofa wekilexine gbelegbelema nen yigitengeni Alatala fa loxon xuiin bun. **15** Na loxon findixi xolo loxon nan na. Kontofinla nun xamin loxona, jaxankatan nun halagi loxona,

dimin nun nii raforen loxona, kundaan nun kuye yi foren loxona. **16** Sofane xota fe xuiin minima nen na loxoni e sonxo yenge so xinla ma taa senbemanen nun e rabillinne yinne xili ma. **17** N muxune luma nen jaxankatani, e yi sigan ti alo danxutone amasoto e bata Alatala yulubin tongo. E wunla radinma nen alo burunburunna boxon ma, e fatin yi kun alo jaman boxon ma. **18** E gbetin nun e xemane mi noe e rakise Alatalaa xolon fa loxoni. A xolo gbeen yi boxo xonna birin halagi alo teena, a muxune birin naxori a fari ki magaxuxini.

2 E malan, e bode to, e tan yama yagitarena, **2** benun waxati saxin xa a li, benun loxoni ito xa dangu alo se dabin foyeni, benun Alatalaa xolo gbeen xa e li, benun Alatalaa xolo loxon xa fa e ma. **3** E Alatala fen, e tan yamanan muxu xuruxine, e tan naxanye a sariya kenden ligama. E tinxinyaan fen, e lu yete magodoni. Waxatina nde, e tangama nen Alatalaa xolo loxon ma. **4** Gasa taan nabepinma nen, Asikalon taan halagima nen, Asadodi kaane yi kedi yanyin na, Ekiron yi raxori. **5** Gbalon na muxune xa, naxanye doxi foxo igen de siyaan naxanye sa kelixi Kereti yamanani. E tan Kanan kaane, e tan Filisitine, Alatala falan tima e xili ma, a naxa, “N na e raxorima nen, muxu yo mi luye e yi.” **6** Foxo igen dexonne findima nen xuruse rabadene nun kula yirene ra xuruse kantanne xa. **7** Menne findima nen Yuda muxu donxene gbeen na. E yi e xuruseene raba na. Ninbanna ra, e sa e sa Asikalon kaane banxine kui. Bayo, Alatala, e Ala, e malima nen, Ala yi e muxune raxete e ma naxanye yi suxi yengeni. **8** N bata Moyaba konbi ti xuine me e nun Amonine n ma yamaan magelema kii naxan yi, e yi e yamanan danne fari sa, ba Isirayila boxon na. **9** Alatala Senben Birin Kanna falan ni ito ra, Isirayilaa Ala naxa, “N tan habadan Ala, n bata n kolo n yeteni, Moyaba yamanan luma nen alo Sodoma taana, Amoni yamanan yi lu alo Gomora taana, sexe jaxine denaxan yi, foxon gema denaxan yi, denaxan halagixi han habadan. N ma yamaan muxu donxene yi ne yii seene tongo. N ma muxun naxanye na lu, ne yi e boxon tongo.” **10** Na fena e sotoma e wason saranna nan na, bayo e bata Alatala Senben Birin Kanna yamaan konbi e yi keli e xili ma. **11** Alatala jaxuma ayi nen e ra, bayo a e gbee alane birin naxorima nen yamanani. Hali yire makuyene yi, siyane birin a batuma nen e konne yi. **12** E tan Kusi kaane, n na e fan yengema nen, n yi e faxa.

13 A kelima nen sogeteden komenna binna yamanan xili ma, a yi Asiriya raxori. A yi Niniwa taan halagi, a na findi tonbonna ra. 14 Xuruseene yi na findi e kuruden na, e nun suben sifan birin. Singbinne nun sagalene yi xi a senbeten longonne nun kondene yi. Sonxo xuiin minima nen foye soden na, a naxa, “Taan bata kala fefe folo so deen ma, bayo suman xalanbene birin bata mini kenenni.” 15 Taa fani makantanxini ito mato, naxan yi a falama, a naxa, “Ba n tan na, gbete mi na!” Taani ito kalaxi di, a findi subene birin konna ra? Naxan yo na dangu a dexon, na kanna kolinma a ma nen, a yiin ti a ma, a kabe.

3 Gbalon na taan xa, naxan findixi taa murutexi xosixin na, jaxankata tiine denaxan yi. 2 Men kaane mi ndende xui ramema, e mi e tuli matima maxadi xuine ra, e mi laxi Alatala ra, e mi e masoma e Ala ra. 3 E kuntigine luxi nen alo yata xajene. E kitisane luxi nen alo kankon naxanye suben suxun jinbanna ra, e mi sese ramara xotonna xa. 4 E nabine xurutare, e muxune yanfanten. E saraxaraline se sarjannxine raxosima, e sariyan kalama. 5 Anu, Alatala dxi taani nen alogo a xa a tinxinyaan mayita. A kiti kenden sama lxxo yo lxxo waxatin birin. Koni fe jaxi rabane mi yagima mume. 6 N bata siyane raxori n yi e taa makantanxine kala. N yi e taane nun e kirane findi yire rabenjinxine ra. Muxe mi fa doxoma e taane yi, muxe mi danguma e kirane xon. 7 N na a fala nen men kaane xa, n naxa, “Xa e yi gaxu n yee ra nun, xa e yi tin n ma maxadi xuiin na nun, n mi yi e doxoden kalama nun. N nema e fe jaxine saranma e ra, e tan mon e mafurama fe jaxi rabadeni e feene birin yi.” 8 Alatalaa falan ni ito ra, a naxa, “E waxatin mame, n fama e suxudeni yengeni waxatin naxan yi. Bayo, n bata a ragidi, n xa siyane nun yamanane birin malan, n yi n ma xolo gbeen nagodo e xili ma. Bayo n ma xolo gbeen boxon birin halagima nen alo txxna.” 9 Nayi, n fala sarjannxine rasoma nen yamanan muxune de, alogo e xa Alatala maxandi a xinla ra. E birin yi a batu e bode xon. 10 Naxanye n batuma, naxanye raxuyaxi ayi boxon xun xon, ne sa fama nen saraxane ra n xa sa keli Kusi yamanan baane kidi ma. 11 Na lxxoni, e mi fa yagima e kewanle fe ra, e n yulubin naxanye tongo bayo, n wasodene birin bama nen e ye na lxxoni. E yi ba e yete yigboe n ma geya sarjannxin fari. 12 N muxu dijnaxine nun yiigelitone luma nen e ye, naxanye e yigi sama Alatala yi. 13 Isirayila muxu

donxene mi fa tinxintareyaan nabama sonon. E mi wule falama. E mi yanfa falane tima. E na e yigiyaden li waxatin naxan yi muxu yo mi e yigbetenje menni. 14 Siyon kaane, e jaxan! Isirayila kaane, e gbelegbele sewani! Yerusalen kaane, e sewa e bonen ma feu! 15 Alatala bata kitin masiga e ra, a yi e yaxune ragi e bun. Alatala, Isirayila mangana e xon. E mi fa gaxuma gballo fe yo yee ra. 16 Muxune a falama nen Yerusalen kaane xa na lxxoni, e naxa, “Siyon kaane, e nama gaxul Siyon kaane, e nama tagan! 17 Alatala, e Ala e xon, naxan e rakisima a senbe gbeen. A sewama nen e fe ra han! A i madendenma nen a xanuntenyani, a sonxo sewani e fe ra. 18 N sali lxxon jaxankatane bama nen e ma, naxanye bata yi findi goronna nun yagin na e ma. 19 Na waxatini, naxanye birin e jaxankata, n kelima nen ne xili ma. Naxanye jaxankataxi, n yi ne rakisi. Naxanye yi raxuyaxi ayi, n yi ne malan. N yi tantunna nun xinla fi e ma yirene birin yi, e yagin soto denaxanye yi.” 20 Alatala naxa, “Na lxxoni, n mon fama nen e ra e konni, n yi e malan. Bayo n na e findima nen xili kanne nun binye muxune ra boxon muxune birin ye, n na fa e muxune ra e yetagi waxatin naxan yi naxanye yi suxi yengeni.”

Xage

1 Manga Dariyusi a mangayaan jɛɛ firinden kike senninden xi singe lɔxɔni, Alatala yi falan ti Nabi Xage xɔn Selatili a dii xeme Sorobabeli Yuda yamana kanna xa, e nun Yehosadaki a dii xemen Yosuwe saraxarali kuntigina: **2** Alatala Senben Birin Kanna ito nan falaxi, a naxa, “Yamani ito a falama, e naxa, ‘En lan en xa Alatala Batu banxin ti waxatin naxan yi, na munma a li singen.’” **3** Nayi, Nabi Xage yi Alatalaa falani ito ti, a naxa, **4** “E lan e lu e banxi tofajine kui waxatini ito yi ba, n ma banxin yi lu kalaxi?” **5** Iki, Alatala Senben Birin Kanna ito nan falaxi, a naxa, “E miri e sigati kiin ma. **6** E bata sansi gbegebe si, koni e ndedi nan sɔtɔxi. E degema, koni e mi lugoma. E minma, koni e mi wasama. Dugina e ma, koni xunbenla mɔn e ma. E bata e wanla saranna sɔto, e yi a sa benbeli sɔxɔnxin kui.” **7** Alatala Senben Birin Kanna ito nan falaxi, a naxa, “E miri e sigati kiin ma.” **8** Alatala naxa, “E siga geyane fari, e sa fa wudin na, e yi n ma banxin ti alogo n xa sewa a ra, n binyen sɔto.” **9** Alatala Senben Birin Kanna falan ni ito ra, a naxa, “E yengi yi se gbegebe nan ma nun, koni a mato, e ndedi nan sɔtɔxi. E naxan namaraxi banxini, n bata na raxuya ayi n de foyen na. Nanfera? N batu banxina fe ra, naxan kalaxi. Anu, e birin yengi dɔxi e banxine xɔn. **10** Na nan a ligaxi tule mi faxi e konni, sansine fan mi bogi. **11** N bata fitina furun naso yamanani geyane fari, e nun murutu xeeɛe nun manpa bili nakɔne yi. Turen yi dasa. Sansine mi fa bogi. Muxune nun xuruseene bata tɔrɔ, e nun e wali xɔnne birin.” **12** Nayi, Selatili a dii xemen Sorobabeli nun Yehosadaki a dii xemen Yosuwe saraxarali kuntigin nun yamaan dɔnxɛn birin naxanye luxi yamanani, ne yi Alatalaa falan suxu, e Ala, Alatala Nabi Xage xɛ falan naxan tideyi. Yamaan yi gaxu Alatala yɛɛ ra. **13** Alatalaa xerana Xage yi falan ti yamaan xa alo Alatala a fala kii naxan yi, a naxa, “N luma nɛn e xɔn.” Alatalaa falan nan na ra. **14** Alatala yi Selatili a dii xemen Sorobabeli bɔɓɛn nadin, Yuda yamana kanna, e nun Yehosadaki a dii xemen Yosuwe saraxarali kuntigina e nun yamaan birin alogo e xa fa Alatala Senben Birin Kanna Batu Banxin ti, e Ala, **15** Manga Dariyusi a mangayaan jɛɛ firinden kike senninden xi mɔxɔɓɛn nun naaninde lɔxɔni.

2 Kike solofereden xi mɔxɔɓɛn nun kedende lɔxɔni, Alatala yi falan ti Nabi Xage xɔn, a naxa, **2** “Falan ti Selatili a dii xemen Sorobabeli Yuda yamana kanna nun Yehosadaki a dii xemen Yosuwe saraxarali kuntigin nun yamaan birin xa, i naxa, **3** ‘Banxini ito yi nɔrɔxi kii naxan yi a singeni, nde luxi e yɛ naxan a to na waxatini? A fa di to? Sese mi a ra e yɛ ra yi ba?’ **4** Nayi, Alatalaa falan ni ito ra, a naxa, ‘Sorobabeli, i wɛkile! Yehosadaki a dii xemen Yosuwe, saraxarali kuntigina, i wɛkile! E tan yamanan muxune birin, e wɛkile!’ Alatala Senben Birin Kanna fala ni ito ra, a naxa, ‘E wali! Amasɔto n luma nɛn e xɔn. **5** Hali e mi gaxu bayo n layirin nan tongoxi e xa, e benbane to mini Misiran yamanani. N ma Nii Sarijanxi mɔn e tagi.’ **6** Bayo Alatala Senben Birin Kanna ito nan falaxi, a naxa, ‘Benun waxatidi, n mɔn bɔxɔ xɔnna nun kore xɔnni maxama nɛn, e nun baane nun xareyana.’ **7** Alatala Senben Birin Kanna naxa, ‘N siyane birin yimaxama nɛn. Siyane kunfaxi naxan xɔn, na yi fa, n yi banxini ito rafe binyen na.’ **8** Alatala Senben Birin Kanna falan ni ito ra, a naxa, ‘N tan nan gbee gbetin nun xɛmaan na.’ **9** Alatala Senben Birin Kanna naxa, ‘Dɔnxɛ ra banxini ito binyen gboma ayi nɛn dangu a singen na.’ Alatala Senben Birin Kanna falan ni ito ra, a naxa, ‘N bɔɓɛ xunbenla fima yireni ito nin.’” **10** Dariyusi a mangayaan jɛɛ firinden kike solomanaaninden xi mɔxɔɓɛn nun naaninde lɔxɔni, Alatala yi falan ti Nabi Xage xa: **11** Alatala Senben Birin Kanna ito nan falaxi, a naxa, “Sariyana nde maxɔdin saraxaraline ma. **12** Xa sube dungina nde kankanxi muxuna nde a domain lenben na naxan bata rasarijan saraxabadeni, na xanbi ra, na doma lenben yi sa din donsena nde ra, buruna hanma sabina hanma manpana hanma turena hanma donse yo donse, na fan nasarijanxin nan na ra ba?” Saraxaraline yi a yabi, e naxa, “A mi sarijanxi.” **13** Xage yi e maxɔdin, a naxa, “Nayi, xa muxuna nde a yiin din binbin na, a sarijanxa yi kala, a yi a yiin din na donse sifana nde ra, na fan sarijanxa kalaxin nan na ra ba?” Saraxaraline yi a yabi, e naxa, “Na fan mi fa sarijan.” **14** Nayi, Xage mɔn yi falan tongo, a naxa, “Awa, Alatalaa falan ni ito ra, a naxa, ‘Yamani ito nun siyani ito fan na kii nin n tan yɛɛ ra yi. E kɛwanle birin na kii nin. E naxan yo bama n xa saraxan na, a mi sarijan.’” **15** “E miri na ma, naxan fa e sɔtɔma, folo to ma siga yɛɛn na. Benun e xa Alatala Batu Banxin ti gɛmɛne dɔxɔ folo e bode jɔɛ ra waxatin naxan yi,

16 ε yi luxi ikii nin: Xa muxuna nde siga ligaseen ye mɔxɔɲen tongodeni sagan kui, a sa a ye fu nan liin na. Xa a siga manpa ige sege seen ye tonge suulun segedeni, a sa a ye mɔxɔɲe nan liin na.’ 17 Alatalaa falan ni ito ra, a naxa, ‘N bata yi ε wali xɔnne birin kala xɔrinxɔrinna nun funen nun balabalan kesene ra, koni ε mi ε xun xete n ma. 18 Nayi, ε miri a ma ki fajni, naxan fama ligadeni, fɔlɔ to ma siga yeen na, keli ɲeen kike solomanaaninden xi mɔxɔɲen nun naaninden ma, Alatala Batu Banxin beten saxi lɔxɔn naxan yi. ε miri na ma ki fajni. 19 Sansina nde mɔn sagan kui ba? Benun to, manpa binle nun xɔde binle nun girenada binle mi yi bogixi mume. Koni to dangu xanbini, n barakan sama nen ε fe yi.” 20 Alatala mɔn yi falan ti Xage xa kiken xi mɔxɔɲen nun naaninde lɔxɔni, a naxa, 21 “Sa a fala Yuda yamana kanna Sorobabeli xa, a n kore xɔnna nun bɔxɔ xɔnni maxama nen, 22 n yi mangane ba, n yi siyane senben kala. N wontorone kalama nen e nun naxanye e ragima. Soone nun soo ragine birama nen, e birin yi faxa e ngaxakedenmane silanfanna ra.” 23 Alatala Senben Birin Kanna falan ni ito ra, a naxa, “Selatili a dii xemɛn Sorobabeli, n ma walikɛna, na lɔxɔni, n na i tongoma nen, n yi i findi n ma taxamaseri yiisolirasoon na, bayo n bata i sugandi.” Alatala Senben Birin Kanna falan nan na ra.

Sakari

1 Dariyusi a mangayaan jɛɛ firinden kike solomasexɛdeni, Alatala yi falan ti Nabi Sakari xa, Bereki a dii xemena, Yido mamandenna. A naxa: **2** “Alatala xɔlɔ gbeen ti nɛn ɛ benbane xili ma. **3** Koni, i xa a fala e xa fa fala Alatala Senben Birin Kanna naxa iki: ‘Ɛ mɔn xa fa n ma,’ Alatala Senben Birin Kanna ito nan falaxi, a naxa, ‘N fan fama nɛn ɛ ma.’ Alatala Senben Birin Kanna falan nan na ra. **4** Ɛ nama lu alo ɛ benbane, nabi fonne yi ito ralima naxanye ma: Alatala Senben Birin Kanna ito nan falaxi, a naxa, ‘Ɛ xɛtɛ ɛ fe jɔxine nun ɛ kewali jɔxine fɔxɔ ra.’ Koni e mi e tuli mati, e mi n xuiin name. Alatalaa falan nan na ra. **5** Ɛ benbane minen? Nabine go? E jɛɛɛ habadan? **6** Anu, n falane nun sariyan naxanye yamari nabine ma, n ma walikene, ne xa mi ɛ benbane li ba? Nayi e yi tubi, e yi a fala, e naxa, ‘Naxan lanxi nxɔ feene nun kɛwanle ma, Alatala Senben Birin Kanna bata na nan liga nxu ra alo a bata yi a ragidi kii naxan yi.’” **7** Kike fu nun kedenden xii mɔxɔɲɛn nun naanindena, Sebati kikenana, Dariyusi a mangayaan jɛɛ firindena, Alatala yi falan ti Nabi Sakari xa, Bereki a dii xemena, Yido mamandenna. **8** N fe toon tixi nɛn kɔɛɛn na alo xiyena. N soo ragina nde nan to soo gbeela fari, a yi tixi miriti wudine tagi darani. Soo gbeele, a gbeeli makatunxine e nun a fixɛne yi a xanbi ra. **9** N yi a maxɔdin, n naxa, “Nanse itoe ra, n kanna?” Malekan naxan yi falan tima n xa, na yi n yabi, a naxa, “N xa a yita i ra naxan e ra.” **10** Muxun naxan yi tixi miriti wudine tagi, na yi a fala, a naxa, “Alatala ne nan xɛxi bɔxɔni sigadeni.” **11** E yi dentɛgɛn sa Alatala malekan xa naxan yi tixi miriti wudine tagi, e naxa, “Nxu bata bɔxɔn birin yisiga, bɔxɔn muxune birin sabatixi bɔɲɛ xunbenli.” **12** Nayi, Alatalaa malekan yi a fala, a naxa, “Alatala Senben Birin Kanna, i mi tinma kininkininyɛ Yerusalɛn nun Yuda taane ma han waxatin mundun yi, i xɔlɔxi naxanye ma xabu jɛɛ tonge solofere?” **13** Malekan naxan yi falan tima n xa, Alatala yi fala faɲine ti na xa, a yi a masabari. **14** Malekan naxan yi falan tima n xa, na yi a fala n xa, a n xa falani ito rali: “Alatala Senben Birin Kanna ito nan falaxi, a naxa, ‘Xɔxɔlɔn gbeena n yi Yerusalɛn nun Siyon ma fe ra. **15** Siya gbɛtɛn naxanye bɔɲɛ xunbenli, n bata xɔlɔ ne ma han! Amasɔtɔ n yi xɔlɔxi nɛn ndedi, koni e tan bata yihadin fari sa.’ **16** Nanara, Alatala ito nan falaxi, a naxa, ‘N mɔn fama nɛn Yerusalɛn taani

kininkininni, n ma banxin mɔn yi ti. Se maliga lutin mɔn yibandunma nɛn Yerusalɛn taan xun ma.’ Alatala Senben Birin Kanna falan nan na ra. **17** I mɔn xa ito rali: Alatala Senben Birin Kanna ito nan falaxi, a naxa, ‘Naxunna mɔn soma nɛn n ma taane yi. Alatala mɔn Siyon muxune madendenma nɛn, a mɔn yi Yerusalɛn sugandi.’” **18** N yi n yɛɛn nakeli n yi fe toon ti alo xiye. Feri naanin yi n yetagi. **19** Malekan naxan yi falan tima n xa, n yi na maxɔdin, n naxa, “Nanse itoe ra?” A yi n yabi, a naxa, “Senbene nan e ra naxanye Yuda nun Isirayila nun Yerusalɛn raxuyaxi ayi.” **20** Na xanbi ra, Alatala yi xabu naanin yita n na. **21** N yi maxɔdinna ti, n naxa, “Itoe faxi nanse ligadeyi be?” A yi n yabi, a naxa, “Fenni itoe nan Yuda raxuyaxi ayi fefe, han muxu yo mi fa nɔɛ a xunni tɛ. Koni xabuni itoe tan faxi e magaxudeni, e yi siya gbɛtɛne senbene rabira, naxanye kelixi Yuda bɔxɔn xili ma alogo e xa Yuda kaane raxuya ayi.”

2 N yi n yɛɛn nakeli n yi fe toon ti alo xiye. Se maliga lutin yi suxi muxuna nde yii. **2** N yi a maxɔdin, n naxa, “I sigan minen?” A yi n yabi, a naxa, “N Yerusalɛn nan maligama, alogo n xa a yigboon nun a kuyan kolon.” **3** Malekan naxan yi falan tima n xa, na yi siga, koni maleka gbɛtɛ yi fa na ralan. **4** A yi a fala a xa, a naxa, “I gi, sa a fala banxulanni ito xa, a Yerusalɛn kaane nun xuruseene wuyama ayi nɛn han! Yinna mi fa nɔɛ taan nabilinyɛ. **5** Alatalaa falan ni ito ra, a naxa, ‘N tan yetena a kantanma nɛn alo tɛɛna a rabilinni, n yi n nɔrɔn nagodo a yi.’” **6** “Ɛ xɔdɔxɔ del Ɛ gi kɔmɛn fɔxɔn yamanan bun!” Alatalaa falan nan na ra, “Bayo n na ɛ raxuya ayi nɛn bɔxɔn tongon naaninne ma.” Alatalaa falan nan na ra. **7** “Ɛ xɔdɔxɔ! Siyon kaane, ɛ gi, ɛ tan naxanye dɔxi Babilɔn yi.” **8** Alatala Senben Birin Kanna naxa iki: “A bata n xɛ binyeni siyane ma naxanye fuxi ɛ ma, bayo naxan na a yiin din ɛ ra, a luxi nɛn alo na bata a yiin din Ala yɛ diin na. **9** N kelima nɛn e xili ma yati, e konyine yi e yii seene birin tongo yengɛni. Nayi, ɛ a kolonma nɛn a Alatala Senben Birin Kanna nan n nafaxi. **10** Ɛ xuini tɛ sewani, ɛ tan Siyon kaane, bayo n fama nɛn, n yi lu ɛ tagi.” Alatalaa falan nan na ra. **11** Siya wuyaxine fama nɛn Alatala ma na lɔxɔni e yi findi n ma yamaan na. N luma nɛn ɛ tagi, ɛ yi a kolon a Alatala Senben Birin Kanna nan n nafaxi ɛ ma. **12** Yuda mɔn findima nɛn Alatala gbeen na, yamana sarijanxina, a mɔn yi Yerusalɛn sugandi. **13**

Adamadiin birin xa a dundu Alatala yetagi, amasoto a bata keli mini a yire sarijanxini.

3 A yi saraxarali kuntigi Yosuwe yita n na, a yi tixi Alatalaa malekan yetagi. Setana yi tixi a yiifanna ma a tojɛgedeni. **2** Alatalaa malekan yi a fala Setana xa, a naxa, “Alatala xa falan ti i xili ma, Setana, a xa falan ti i xili ma, a tan naxan Yerusalɛn sugandixi! Tɛɛ yege dungin xa mi yi xɛmeni ito ra ba naxan baxi tɛɛni?” **3** Dugi xosixine nan yi ragodoxi Yosuwe ma, a yi tixi malekan yetagi. **4** Naxanye yi tixi a yetagi, malekan yi a fala ne xa, a naxa, “E dugi xosixine ba a mal!” A mɔn yi a fala Yosuwe xa, a naxa, “A mato, n bata i hakene ba i ma n dugi fajine ragodo i ma.” **5** N yi a fala, n naxa, “E xa namu sarijanxin so a xunna!” E yi namu sarijanxin so a xunna, e yi dugine ragodo a ma. Alatala malekan yi tixi na. **6** Alatala malekan yi ito rali Yosuwe ma, a naxa, **7** “Alatala Senben Birin Kanna ito nan falaxi, a naxa, ‘Xa i sigan ti n ma kirane xɔn, xa i n ma yamarine suxu, i tan nan dɔxɔma n ma banxin nun n ma tanden xun na, n yi tiden fi i ma itoe yɛ naxanye tixi be. **8** Nayi, saraxarali kuntigi Yosuwe, i tan nun i fɔxɔrabiran naxanye dɔxi i yetagi, ɛ tuli mati! Amasoto muxuni itoe findima fe famatɔne taxamasenne nan na. N nan n ma walikeɛn nafama nen, naxan xili “Nimena.” **9** Amasoto gɛmen mato n naxan dɔxi Yosuwe yetagi. Fɔxɔ solofere nan na gɛme kedenna ma. N sebenla tima nen a ma. Alatala Senben Birin Kanna falan ni ito ra: N yamanani ito haken bama nen a ma lɔxɔ kedenni. **10** Na lɔxɔni, muxun birin a lanfaan xilima nen, e yi dɔxɔ e manpa binla nun xɔde binla nininna ra.’ Alatala Senben Birin Kanna falan nan na ra.”

4 Malekan naxan yi falan tima n xa nun, na mɔn yi fa, a n nakeli alo muxun naxan naxulunxi xixɔnli. **2** A yi n maxodin, a naxa, “I nanse toma?” N yi a yabi, n naxa, “N lenpu dɔxɔ se xɛma daxin nan toma, e nun ture ramaradena a xuntagi. Lenpu solofere a ma. Ture godode solofere nan turen sama lenpu soloferene kui. **3** Oliwi wudi bili firin tixi ture ramaraden dɔxɔn ma, keden a yiifanna ma, keden a kɔmenna ma.” **4** Malekan naxan yi falan tima n xa, n yi na maxodin, n naxa, “N kanna, nanse itoe ra?” **5** A yi n maxodin, a naxa, “I mi a kolon?” N yi a yabi, n naxa, “N mi a kolon, n kanna.” **6** Nayi, a yi a fala n xa, a naxa, “Alatalaa falan ni i ra, a naxan tixi Sorobabeli ma, a naxa, ‘A mi ligama senben xɔn hanma fangana, koni fɔ

n ma Niin barakan nin.’ Alatala Senben Birin Kanna falan nan na ra.” **7** “Hali geya gbeen naxan Sorobabeli yɛɛ ra, na findima nen lantaan na. A fama nen Ala Batu banxin konde gɛmen na, yamaan yi e xuini te, e naxa, ‘Ala xa hinan a ra habadan!’” **8** Alatala yi falan ti n xa, a naxa, **9** “Sorobabeli bata banxini ito ti fɔlo, a mɔn a rajanma nen. Nayi, ɛ a kolonma nen a Alatala Senben Birin Kanna nan n nafaxi ɛ ma. **10** Nde feene fɔlɔn magelema nen a to xurun? Yamaan jaxanma nen e na gɛme matinxin seen to Sorobabeli yii.” Na lenpu soloferene findixi Alatala yɛene nan na naxanye bɔxɔn birin yisigama. **11** N yi a maxodin, n naxa, “Nanse Oliwi wudi firinna ne ra, lenpu dɔxɔ seen yiifanna nun a kɔmenna ma?” **12** N mɔn yi a maxodin, n naxa, “Nanse Oliwi wudi yii firinna ne ra, naxanye ture godode xɛma daxi firinne dɔxɔn, oliwi turen danguma naxanye kui?” **13** A yi n maxodin, a naxa, “I mi a kolon naxan ne ra?” N yi a yabi, n naxa, “N mi e kolon, n kanna.” **14** Nayi, a yi a fala n xa, a naxa, “E findixi muxu firinne nan na naxanye masusan turen na alogo e xa wali dunuɓa birin Marigin xa.”

5 N mɔn yi n yɛɛn nakeli, n fe toon ti alo xiye, n kedin mafilinxin to kore. **2** Malekan yi a fala n xa, a naxa, “I nanse toma?” N yi a yabi, n naxa, “N kedin nan toma kore, a kuya nɔngɔnna yɛ mɔxɔɓɛ, a yigbo nɔngɔnna yɛ fu.” **3** Nayi, a yi a fala n xa, a naxa, “Dangan nan na ra naxan xuyama ayi yamanan birin yi. A sebɛxi kedin fɔxɔ kedenna ma fa fala muɓadene birin kedima nen yamanani. A mɔn sebɛxi fɔxɔ kedenna boden ma fa fala naxanye birin e kolɔma wuleni, ne fan kedima nen. **4** Alatala Senben Birin Kanna falan ni ito ra: ‘N dangani ito rafama nen, a yi so muɓadene birin ma banxine yi e nun muxun naxanye birin e kolɔma wuleni n xinli. A luma nen e banxine kui alogo a xa e nun a xalanbene nun a gɛmene birin kala.”’ **5** Malekan naxan yi falan tima n xa, na yi a maso, a a fala n xa, a naxa, “I yɛɛn nakeli, i a mato naxan minin be iki.” **6** N yi a maxodin, n naxa, “Nanse a ra?” A yi n yabi, a naxa, “Liga se debedin nan famato a ra.” A mɔn yi a fala, a naxa, “Na nan toma yamanan muxun birin yi.” **7** E yi debedin de raganla yɔxɔ daxini te, n yi jaxanla nde to dɔxi a kui. **8** Malekan yi a fala n xa, a naxa, “Fe jaxin misaala nan jaxanli ito ra.” Na xanbi ra, a mɔn yi jaxanla madɛten debedin kui, a yi a deraganla dɛten a dɛ ra. **9** N yi n yɛɛn nakeli, n yi fe toon ti alo xiyena, n yi

naxalan firin to tuganyɛ. Foyen yi e gabutene yi alo yaya xɔnla gabutene. E yi debedin tongo, e te a ra kore. **10** Malekan naxan yi falan tima n xa, n yi na maxodin, n naxa, “E debedin xalima minen?” **11** A yi a fala n xa, a naxa, “E sa banxin nan tima a xa Babilon yamanani. Banxin na rajan, debedin dɔxɔma nen menni, e yi a batu.”

6 N mɔn yi n yɛɛne rakeli, n yi fe toon ti alo xiye. N wontoro naanin to mine geya firinne longonna ra, sulan geyaan nan yi ne ra. **2** Soo gbeele nan yi wontoro singen bandunma, a firindena soo fɔreɛne, **3** a saxandena, soo fixene, a naanindena, soo gbeeli makatunxine. **4** Malekan naxan yi falan tima n na, n yi na maxodin, n naxa, “Nanse itoe ra n kanna?” **5** Malekan yi a fala n xa, a naxa, “Bɔxɔn tongon naaninne foyene nan ne ra. E kelixi dunuya birin Marigin nan fema. **6** Soo fɔreɛne naxan bandunma, na sigama kɔmenna yamanan binna nin. Na xanbi ra, a fixene nan minima. A makatunxine sigama yiifanna yamanan binna nin.” **7** A gbeeli makatunxine yi mini, e yi wama bɔxɔni siga feni. Malekan yi a fala e xa, a naxa, “E siga, e bɔxɔni sigal!” E yi bɔxɔni siga. **8** A yi n xili, a naxa, “A mato, naxanye sigama kɔmenna yamanan binni, ne bata n nii yifan n ma kɔmenna yamanani.” **9** Alatala yi falan ti n xa, a naxa, **10** “I xa suxu muxune kiseene rasuxu, Xelidayi, Tobiya e nun Yedaya. I xa siga Sofoni a dii Yosiya a banxini to, e faxi denaxan yi keli Babilon yi. **11** I xa gbetin nun xemaan tongo. I yi mangaya taxamasenna rafala i yi a so saraxarali kuntigi Yosuwe xun na, Yehosadaki a dii xemena. **12** I xa a fala a xa a Alatala Senben Birin Kanna ito nan falaxi, a naxa, ‘Muxun ni i ra naxan xili “Nimena,” a sabatima nen a denaxan yi, a yi Alatala Batu Banxin ti. **13** A tan nan Alatala Batu Banxin tima, mangayaan binyen yi lu a tan ma. A dɔxɔma nen a mangaya gbɛdeni, a nɔɔn ti. Saraxaralina nde fan dɔxɔma nen a mangaya gbɛdeni. Bɔɲɛ xunbenla yi lu e firinna tagi.’ **14** Mangaya taxamasenna luma nen Alatala Batu Banxini jɔxɔ lu seen na Xelemini nun Tobiya nun Yedaya nun Sofoni a dii Xenɛ xɔn. **15** Muxun naxanye makuya, ne fama nen, e wali Alatala Batu Banxin tideni. Nayi, e a kolonma nen a Alatala Senben Birin Kanna nan n nafaxi e ma. Na ligama nen, xa e Alatala xuiin name ki fajni, e Ala.”

7 Dariyusi a mangayaan jɛɛ naaninden kike solomanaaninden xii naaninde lɔxɔni, Kisilewi

kikena, Alatala yi falan ti Sakari xa. **2** Beteli kaane bata yi Sareseri nun Regemi-Meleki nun e muxune rasiga Alatala maxandideni. **3** E yi lan e Alatala Senben Birin Kanna a saraxaraline nun nabine maxodin, e naxa, “Nxu lan nxu yi lu sunuxi ba, nxu lu sunna suxe kike suulunden ma ba, alo nxu a liga kii naxan yi jɛɛ wuyaxi danguxine yi?” **4** Alatala Senben Birin Kanna yi falan ti n xa, a naxa, **5** “A fala yamanan muxune birin xa e nun saraxaraline, i naxa, ‘E to yi sunna suxuma e yi sunu kike suulundene nun kike soloferedene yi, xabu jɛɛ tonge soloferɛ, e yi sunna suxuma n tan nan xa ba? **6** E to yi e degema, e yi e min, e mi yi a ligama e yete xan xa ba? **7** Alatala mi falan ne xan ti nabi singene xɔn ba, Yerusalɛn nun a rabilinna taane yi sabatixi bɔɲɛ xunbenli waxatin naxan yi, muxune yi dɔxi Negewi nun Sefala geyane yi waxatin naxan yi?” **8** Alatala yi falan ti Sakari xa, a naxa, **9** “Alatala Senben Birin Kanna ito nan falaxi, a naxa, ‘E xa kitin sa tinxiinni, e hinan e bode ra, e yi kininkinin. **10** E nama kaja gilene nun kiridine nun xɔɲɛne nun yiigelitɔne tɔrɔ, e nama miriya jaxin tongo e bode xili ma.’ **11** Koni e tan mi tin na rame, e yi e xun xanbi so, e yi e tunle dutun. **12** E bɔɲɛne yi xɔdɔxɔ ayi alo dayimuna. E yi tondi Alatala Senben Birin Kanna sariyane rame e nun falane a yi naxanye tima nabi singene xɔn Alaa Niin barakani. Nayi, Alatala Senben Birin Kanna yi xɔlɔ han! **13** Alatala Senben Birin Kanna naxa, ‘N to yi xinla tima, e mi n natin. E fan na n xili, n mi e ratinma. **14** N na e raxuya ayi nen siyane birin yɛ e mi naxanye kolon. Yamanani geli nen e xanbi. Muxu yo mi yi sigan na, muxu yo mi yi keli na. E yi yamana fajini geli.”

8 Alatala Senben Birin Kanna yi falan ti, a naxa, **2** “Alatala Senben Birin Kanna ito nan falaxi, a naxa, ‘Xɔxɔlɔn gbeena n yi Siyon ma fe ra han. N bɔɲɛn wolonxi a fe ra ki fajil!” **3** Alatala ito nan falaxi, a naxa, “N mɔn fama nen Siyon yi, n yi dɔxɔ Yerusalɛn taani. Yerusalɛn fama nen xili badeni jɔndi taana.’ Alatala Senben Birin Kanna geyaan yi xili ba ‘geya sarijanxina.” **4** Alatala Senben Birin Kanna ito nan falaxi, a naxa, “Xeme fonne nun jaxalan fonne mɔn dɔxɔma nen Yerusalɛn taan malandene yi, dunganna suxi e birin yii e siimaya xunkuyena fe ra. **5** Taan malandene rafema nen dii xemene nun dii temene ra saba sodeni.” **6** Alatala Senben Birin Kanna ito nan falaxi, a naxa, “Yanyina nde, yama dɔnxɛn naxan na

lu, na kabema nen na feen ma na loxoni, koni na mi n tan naterenamal!" Alatala Senben Birin Kanna falan nan na ra. 7 Alatala Senben Birin Kanna ito nan falaxi, a naxa, "N nan n ma yamaan nakisima nen sogeteden nun sogegododen yamanane ma. 8 N fama nen e ra, e yi dɔxo Yerusalen taani. E findima nen n ma yamaan na, n yi findi e Ala ra, jɔndin nun tinxinni." 9 Alatala Senben Birin Kanna ito nan falaxi, a naxa, "E wekile, e tan naxanye falani itoe mema, nabine yi naxanye falama muxune yi Alatala Senben Birin Kanna banxin beten sama waxatin naxan yi a ti feen na. 10 Bayo benun na loxone, walikena hanma jingene wanla saranna mi yi sote. Yaxune mi yi tinje yamaan yi mini hanma e so boje xunbenli. Amasoto n yi muxune luma e bode xili ma nen. 11 Koni iki n mi fa a ligama yama donxeni ito ra alo waxati danguxine," Alatala Senben Birin Kanna falan nan na ra. 12 "E sansiin sima nen boje xunbenli. Manpa binle bogima nen. Boxon balon naminima nen. Tule igen fama nen. N na birin soma nen yama donxen yii e keen na. 13 Yuda bɔnsɔnna nun Isirayila kaane, e bata yi findi danga muxune ra siyane tagi kii naxan yi, n na e rakisima nen, e yi baraka na kiini. E nama gaxu, e wekile." 14 Amasoto Alatala Senben Birin Kanna ito nan falaxi, a naxa, "E benbane to yi n naxoloma, n na a ragidi nen n xa e jaxankata, n mi nimisa. 15 Koni iki n mon bata a ragidi, n xa a fajin naba e xa, Yerusalen nun Yuda bɔnsɔnna muxune. Nayi, e nama gaxu. 16 E xa feni itoe liga: E xa jɔndin fala e bode xa, e kitin sa jɔndini, kitin naxan boje xunbenla rasoma. 17 Muxu yo nama miriya jaxin tongo a boden xili ma. E nama e kolɔ wuleni. Amasoto n na feene rapaxuxi," Alatala falan nan na ra. 18 Alatala Senben Birin Kanna yi falan ti n xa, a naxa, 19 "Alatala Senben Birin Kanna ito nan falaxi, a naxa: Kike naaninden sunna, kike suulunden sunna, kike solofereden sunna e nun kike fuden sunna, ne findima nen Yuda bɔnsɔnna sewa loxone nun jaxajaxa loxone ra, e nun sali loxone. Koni jɔndin nun boje xunbenla xa rafan e ma de!" 20 Alatala Senben Birin Kanna ito nan falaxi, a naxa, "Siya wuyaxine nun taa wuyaxi muxune mon fama nen. 21 Taa keden muxune fama nen taan bonna muxune ma, e naxa, 'En siga Alatala maxandideni, en yi Alatala Senben Birin Kanna fen! N tan fan sigama nen!' 22 Nayi, yama wuyaxin nun siya senbemanema fama nen Alatala Senben Birin Kanna fendeni Yerusalen taani, e yi a maxandi." 23 Alatala Senben Birin Kanna ito nan falaxi, a naxa, "Na loxone

yi, xeme fu fama nen keli siyane birin yi naxanye xuine birin falama, e yi e singan Yahudiya keden ma domaan lenben na, e yi a fala, e naxa, 'En birin nan sigama, amasoto nxu bata a me a Ala i xon.'"

9 Waliyiya falan ni i ra, Alatala falan naxan tixi Xadiraki yamanan xili ma, a Damasi taan li. Amasoto Alatala gbeen nan adamadiin bonne ra, alo Isirayila bɔnsɔnne birin. 2 A mon xa Xamata taan li, Damasi danna, e nun Tire taan nun Sidon taana, kolonna gbo denaxan yi. 3 Tire taan bata yinna ti, a bata gbetin malan alo burunburunna. A xemaan gbo alo kira xon borona. 4 Koni Marigina a bama a yii nen, a yi a yinna radin baani, teen yi taan gan. 5 Asikalon kaane na toma nen e gaxu. Gasa kaane fan gaxuma nen e xuruxurun, e nun Ekiron kaane, amasoto e yigitegema nen. Mangayaan janma nen Gasa taani, Asikalon taani gelima nen. 6 Siya basanxin fa Asadodi taan tongoma nen, n yi Filisistine wason kala. 7 N suben bama nen e de wunla naxan yi, e nun donse haramuxine. E donxen naxanye na lu, ne fan findima nen en ma Ala gbeen na. E yi lu alo Yuda xabila kedenna. Ekiron kaane luma nen alo Yebusu kaane. 8 Ganla naxanye danguma hanma naxanye fama, n daaxama nen n ma yamaan makantandeni ne ma. E mi luma fitina muxu yo a mon bun, amasoto iki n yeen tixi e ra. 9 Siyon kaane, e jaxan han! Yerusalen kaane, e xuini te sewani. E a mato! E mangan fama e ma. A tinxin. A bata rakisi. A limaniya. A fama sofanelan nan fari, sofali diina, sofali gilen diina. 10 N yenge so wontorone bama nen Efirami yi e nun soone Yerusalen taani. Yenge so xanle kalama nen. A tan boje xunbenla ralima siyane ma nen. A mangayaan xuyama ayi nen keli foxo igen ma han foxo igena, keli baan ma han boxon danna. 11 E tan mabinni, n na e muxu suxine xunbama nen en ma layirin wunla fe ra naxanye ramaraxi alo kasorasane yili kui xareni. 12 E mon xa so taa makantanxini, e tan kasorasaa naxanye yigi saxi. N mon xa a rali e ma to: n ni i saranma nen dɔxɔpa ma firin. 13 Amasoto n bata Yuda yiton alo xanla, Efirami yi lu alo n ma xalimakunla. Siyon, n ni i ya dii xemene rakelima nen Gireki kaane xili ma. N yi e lu alo sofana silanfanna. 14 Alatala a makenenma nen e xun ma, a xalimakunla yi siga alo kuye sarinna. Marigina Alatala xotaan fema nen, a fa yiifari ma tule foyeni. 15 Alatala Senben Birin Kanna e rakantanma nen. E e degema nen, e sigan ti lantan gemene fari. E e

minma nen sewani, e sarin alo dolo minne. E lugo alo goron nafexina alo saraxa ganden tongonne wasan wunla ra kii naxan yi. **16** Alatala, e Ala e rakisima nen na loxoni, alo a xuruse kuruna. E noroxin yi lu a yamanani alo geme fajine mangaya taxamaseri komotin ma. **17** E tofanma nen han! E rayabuma nen han! Balon banxulanne ragboma nen, minse fajine yi sungutunne rayabu.

10 E xa Alatala maxodin a xa tulen nafa e ma jemen na. A tan nan foyen nakelima, a yi tule gbeen nafa a yi birin ma xeen nasabati. **2** Amasoto wule falan nan suxurene ra. Yiimatone wule feene nan toma. E wule xiye falane nan tima! E madendenna tima fala fuune nan na. Nanara, yamaan bata siga a xun xon, e toroxi alo kari mi xuruseen naxanye ma. **3** N bata xolo na xuruse rabane ma han! N yecratine hakene saranma e ra nen. Amasoto Alatala Senben Birin Kanna a joxo luma nen a kurun xon, a yamana, Yuda bonsonna. A fama e ra nen yengeni alo a soo kendene. **4** Kuntigine sifan birin minima a tan nin. Banxin tongon geme kenden minima a tan nin. Bubu wudin minima a tan nin. Yenge so xanla minima a tan nin. **5** E luma nen alo sofa wekilexine naxanye e yaxune yibodonma yengeni alo kira xon borona. Bayo Alatala e xon, e yengen soma nen, e sofa soo ragine yarabi. **6** N Yuda bonsonna senbe soma nen, n yi Yusufu bonsonna rakisi. N mon e rafama nen e konni bayo n bata kininkinin e ma. E luma nen alo n mi e rabegin. Alatala nan n tan na, e Ala, n na e maxandine yabima nen. **7** Efirami kaane findima nen sofa wekilexine ra. E sewama nen alo e minxin na a ra. E diine na toma nen, e jaxan, e sewama nen Alatalaa fe ra. **8** N nan n ma yamaan xilima nen, n yi e malan. N na e xunbama nen, e mon yi wuya alo a foloni. **9** Hali n to e raxuyaxi ayi siyane ye, n ma fe rabirama e ma nen yire makuyeni. E nun e diine yi kisi, e mon yi xete. **10** N na e rafama nen keli Misiran yamanani n yi e malan keli Asiriya yamanani. N fama nen e ra Galadi nun Liban yamanani, koni e mi xanje menni. **11** Ala baan walanne ragodoma nen e yi toro baani gidi, hali Nila baan tilinne xorima nen. Asiriya yamanan wason kalama nen, Misiran yamanan senben yi jian. **12** N tan nan e senbe soma, e yi sigan ti n xinli, Alatalaa falan nan na ra.

11 Liban boxona, i ya deene rabi. Teen xa i ya suman binle gan. **2** Fofa binle, e gbelegbele, amasoto

suman wudin bata bira. Wudi gbeene bata kala. Basan warine, e gbelegbele, amasoto foton xolen bata kala. **3** Xuruse rabane bata gbelegbele, amasoto e binyen waxatin bata dangu. Yatane bata wurundun, bayo foton gbeen bata kala Yuruden baan de. **4** Alatala n ma Ala naxa iki: "I xa xuruse kuru faxa daxini ito raba. **5** Muxun naxanye e sarama ne e kee raxabama, e kewali jaxin mi saran e ra. Naxanye e matima ne naxa, 'Alatala tantun! N bata bannaya!' E raba muxune mi kininkininxi e ma. **6** Amasoto n mi fa kininkininma yamanan muxune ma," Alatalaa falan nan na ra. "N bata e birin lu e bode a yii ma, e nun e mangana yiin ma. E yamanan jaxankatama nen. N mi muxu yo bama e yii." **7** Nayi, n yi xuruse kuru faxa daxin naba, katarabi xuruse toroxine ma. N yi dungan firin tongo. N yi keden xili sa "Fanna," bonna "Lanna." N yi xuruse kurun naba. **8** N yi xuruse raba saxan kedi kike kedenna bun. Dijan yi jian n yi, n fan yi rajaxu xuruseene ma. **9** Nayi, n yi a fala ne xa, n naxa, "N mi fa e rabama. Xa naxan faxama, a xa faxa. Xa naxan loma ayi, a xa lo ayi. Naxanye na lu, ne xa e bode suben don." **10** N yi n ma fanna dunganna tongo n yi a yigira, alogo n xa n ma layirin kala n naxan xidi nxu nun siyane birin tagi. **11** A yi kala na loxoni, nayi xuruse toroxin naxanye yi n matoma na loxoni, ne yi a kolon a Alatalaa falan nan yi a ra. **12** N yi a fala e xa, n naxa, "Xa a e kenen, e n saranna fi, xanamu, e a lu na." E yi gbeti gbanan tonge saxan fi n saranna ra. **13** Alatala yi a fala n xa, a naxa, "A wole ayi feje rafalan xa, e saran gbeeni ito naxan mirixi n xa." N yi gbeti gbanan tonge saxanna tongo, n yi e woli Alatala banxini feje rafalan xa. **14** Na xanbi ra, n yi n ma lan dunganna fan yigira alogo n xa ngaxakedenyaan kala Yuda nun Isirayila tagi. **15** Alatala yi a fala n xa, a naxa, "I mon xa xuruse raba xaxilitarena waliseene tongo. **16** Amasoto n tan yeteen xuruse rabana nde rafama nen yamanani. A mi a yengi dexe xuruseene xon ma naxanye loma ayi, a mi a dii xali nenene fenje, a mi a maxoloxine dandanje, a mi a kendene baloe. Koni a yexee turaxine donma nen a yi e toron koten." **17** Gbalon na xuruse raba fuyantenna xa, naxan xuruseene rabeginma! Silanfanna xa a yiin sege a yi a yiifari ma yeen saxon. A yiin xa faxa a ma fefe, a yiifari ma yeen yi xori.

12 Waliyiya falan ni i ra, Alatala falan naxan tixi Isirayila fe yi. A tan naxan kore xonna nun boxo

xonna daxi, a yi muxun niin sa a yi, Alatalaa falan ni ito ra: **2** N Yerusalen findima nen dolo min seen na, naxan a rabilinna siyane birin fugama a ra. Yerusalen taan nabilinna nen yengeni, e nun Yuda yamanan birin. **3** Na loxoni, n Yerusalen findima nen geme binyen na siyane birin xa. Naxan yo na kata a yite feen na, na maxoloma nen. Boxon siyane birin e malanma nen a xili ma. **4** Alatalaa falan ni ito ra: Na loxoni n faan nasoma nen e soone birin yi, n yi gaxun naso e soo ragine yi. Koni n nan n yeen tima nen Yuda bõnsõnna muxune ra. N yi siyane soone birin yeeene xori. **5** Yuda mangane a falama nen e bõjɛni, “Yerusalen muxune bata en senbe so Alatala Senben Birin Kanna barakani, e Ala.” **6** Na loxoni, n Yuda mangane luma nen alo tɛɛ wolonne yegene dɛ, alo xaye radegexin malo xidine tagi. E fama e rabilinna siyane halagideni e kɔmenna nun e yiifanna ma. Koni Yerusalen kaane mɔn luma nen e konni. **7** Alatala Yuda dɔxɔdene nan singe rakisima, alogo Dawuda yixetene nun Yerusalen muxune binyen nama dangu Yuda muxune ra. **8** Na loxoni, Alatala Yerusalen kaane ratangama nen. Hali naxan bata tagan e yɛ, a yengen soma nen na loxoni alo Dawuda. Dawuda yixetene fan luma nen alo Ala yetena, alo Alatalaa malekana e yɛɛ ra. **9** Na loxoni, n siyane birin naxorima nen naxanye fama Yerusalen xili ma. **10** Nayi, n hinanna nun maxandin niin nagodoma nen Dawuda yixetene ma e nun Yerusalen muxune. E yi e yɛɛ rafindi n ma, e naxan yisɔxɔnxi. E sunuma nen a fe ra alo dii keden peena. E a wugama nen sɔxɔleni, alo dii singena. **11** Na loxoni, sunun gboma ayi nen Yerusalen taani, alo Xadada-Rimɔn ma sununa Megido meremereni. **12** Yamanan sunuma nen, xabilane birin yi lu e danna. Dawuda bõnsõnna a danna, e jaxanle fan e danna, Natan bõnsõnna a danna, e jaxanle fan e danna, **13** Lewi bõnsõnna a danna, e jaxanle fan e danna, Simayi bõnsõnna a danna, e jaxanle fan e danna, **14** e nun bõnsõnna bonne birin. Birin luma nen a danna, e jaxanle fan yi lu e danna.

13 Na loxoni, tigin minima nen Dawuda yixetene xa, e nun Yerusalen muxune, alogo yulubine nun xosin xa ba e ma. **2** Alatala Senben Birin Kanna falan ni ito ra: Na loxoni, n suxurene xinle bama nen yamanani, jinan yi ti e xon ma fefe! N mɔn nabine nun xaxili jaxin bama nen yamanani. **3** Xa muxuna nde mɔn nabiya falan ti, a nga nun a baba naxan

a barixi, ne a falama a xa nen, e naxa, “I xa faxa, amasoto i bata wulen fala Alatala xinli.” A nga nun a baba naxan a barixi, ne a sɔxɔnma nen a nɛma nabiya falane tima. **4** Na loxoni, nabine birin yagima nen e fe toxine nun e waliyiya falane ra. E mi fa nabiya domaan soma sɔnɔn alogo e xa madaxun ti. **5** E birin a falama nen, e naxa, “Nabi mi n na, xɛɛ biin nan n na. Amasoto muxuna nde n sara nen xabu n dii jɔɔɛ waxatini.” **6** Koni e a maxɔdinma nen, e naxa, “Nanse laru itoe ra i kanken ma?” A e yabima nen, a naxa, “E n maxolo nen n xɔyine konni.” **7** “Silanfanna, i xa keli n ma xuruse rabaan xili ma, xɛmɛn naxan n fema.” Alatala Senben Birin Kanna falan ni ito ra. “Xuruse rabaan faxa, yɛxɛene xa xuya ayi. N yi keli a xunxurine xili ma. **8** Nayi, yamaan dɔxɔde saxon, firin faxama nen keden yi lu na. Alatalaa falan nan na ra. **9** N yi a dɔnxɛn sa tɛɛni n yi a rasɛnsɛn alo gbetina. N yi e mato tɛɛni, alo xɛmaan matoon kii naxan yi. Nayi, e n maxandima nen, n yi e yabi. N na a falama nen, ‘N ma yamaan nan ne ra.’ E yi a fala, e naxa, ‘Alatala nan nxɔ Ala ra.’”

14 Alatalaa loxon fama. Yaxune ɛ seene yitaxunma nen ɛ yɛɛ xori. **2** N siyane birin malanma nen e yi Yerusalen yenge. Taan suxuma nen. Banxine yi kui geli. E yi fu jaxanle ma. Taan fɔxɔ kedenna yi siga suxuni. Koni yama dɔnxɛn luma nen taani. **3** Alatala kelima nen a yi na siyane yenge, alo a yi yengen soma waxati gbete yi kii naxan yi. **4** A tima nen na loxoni Oliwi geyaan fari, naxan Yerusalen yetagi a sogeteden binni. Oliwi geyani bɔma nen a tagi, keli a sogeteden binni han a sogegodode binni. Folo gbeen yi lu na. Geyaan fɔxɔ kedenna xetema nen kɔmenna ma, a fɔxɔ kedenna boden fan yi siga yiifanna ma. **5** Nayi, ɛ ɛ gima nen n ma geyane folon na. Amasoto geyane folon sigama nen han Aseli. E ɛ gima nen alo ɛ to ɛ gi bɔxɔ xuruxurunna yɛɛ ra, Yusiya waxatini, Yuda mangana. Nayi, Alatala fama nen, n ma Ala, e nun malekane birin. **6** Na loxoni, kenen mi luma na, hanma xunbenla hanma ige xundina. **7** E nun loxon bonne keden mi a ra. Alatala nan na loxon kolon. Yanyi mi luma na, kɔɛ mi luma na. Hali kɔɛɛn na, kenenna luma nen na. **8** Na loxoni, siimaya igen minima nen Yerusalen taani. A fɔxɔ kedenna yi siga sogetede baan binni, a fɔxɔ kedenna yi siga sogegodode fɔxɔ igen binni. A minima nen soge fure waxatini alo jɛmɛna. **9** Alatala nan findima boxon birin mangan na. Na loxoni, Alatala

nan keden yatema Ala ra, a keden peen xinla yi lu
 na. **10** Yerusalen rabilinna boxon birin findima nen
 meremerēn na, keli Geba yi han Rimōn yi, Yerusalen
 yiifanna ma. Yerusalen tima nen. Taan danne yi lu
 iki: Keli Bunyamin dēn na han dē singen yireni han
 tongonna dena. Keli Xananeli sangansoon ma han
 mangana manpa ige badena. **11** Muxune dōxoma
 nen taani. A mi fa halagima. Yerusalen luma nen
 bōje xunbenli. **12** Siyaan naxanye Yerusalen yengexi,
 Alatala fitina fureni ito nan sama ne fari: E birin
 fatin kunma nen e jējen na. E yēene kunma nen e yē
 yinla ra, e lenne fan yi kun e dē. **13** Na lōxōni, Alatala
 gaxu gbeen nasoma nen e yi, e yi e bode suxu e yiin
 ma, e yi e bode yenge. **14** Yuda kaane fan Yerusalen
 xun mayengema nen. E e rabilinna siyane birin ma
 nafunle tongoma nen: xēmaan nun gbetin nun dugi
 gbegbe. **15** Na fitina fure sifan soone nun gbaxalone
 nun jōgōmēne nun sofanle fan suxuma nen e nun
 xuruseen naxanye birin yaxune daaxadeni. **16** Nayi,
 siyaan naxanye birin Yerusalen yengexi na muxu
 dōnxene fama nen jēē yo jēē, e Manga Alatala Senben
 Birin Kanna batu, e yi Bubu Kui Sanla raba. **17** Xa
 boxon xabilana nde tondi sigē Yerusalen taani Manga
 Alatala Senben Birin Kanna batudeni, tulen mi fama
 e konni. **18** Xa Misiran kaane tondi sigē, xa e mi fa,
 tulen mi fama na. Alatala fitina furen nagodoma e ma
 nen a naxan nagodoma siyane ma naxanye tondixi
 sigē Bubu Kui Sanla rabadeni. **19** Ala Misiran kaane
 fe jaxin saranma e ra na kii nin, a siyane yulubine
 birin saran e ra, naxanye mi sigama Bubu Kui Sanla
 rabadeni. **20** Na lōxōni, hali talandin naxanye singanxi
 soone ra a sebema nen ne ma fa fala: “A Sarijanxi
 Alatala xa.” Tunden naxanye Alatalaa banxini ne fan
 yatema nen se rasarijanxine ra alo saraxa ganden
 goronne. **21** Tunden naxanye birin Yerusalen nun
 Yuda yi, ne birin nasarijanma nen Alatala Senben
 Birin Kanna xa. Naxanye birin fama saraxa badeni,
 ne nde xalima nen, alogo e xa sa kudin so e kui. Na
 lōxōni, sare mati yo mi fa luma Alatala Senben Birin
 Kanna batu banxini.

Malaki

1 Alatala yi waliyiya falani ito ti Isirayila kaane xa Malaki xon. **2** Alatala naxa, “N bata e xanu.” Koni e naxa, “I ya xanuntenyaan yitaxi nxu ra di?” Alatalaa falan ni ito ra, a naxa, “Esayu xunyeyen xa mi yi Yaxuba ra ba? Anu n bata Yaxuba xanu, **3** koni n bata Esayu rajaxu. N bata a geya yirene findi tonbonne ra, n yi a keen lu kankone xa.” **4** Xa Edon kaane a fala, e naxa, “Nxu bata halagi, koni nxu mon nxo taa kalaxine tima nen!” Nayi, n tan Alatala Senben Birin Kanna naxa, “E na e ti, n mon yi e rabira. Muxune menna xilima nen, ‘Boxo Naxina,’ Alatala xoloxi yamaan naxan ma habadan! **5** E na toma nen, e yi a fala, e naxa, ‘Alatala gbo hali Isirayila yamanan fari ma!’” **6** “Diina a fafe binyama nen. Walikeen fan a kuntigin binyama nen. Xa n tan nan e fafe ra, na binyen sifan minen yi? Xa e mangan nan n na, na binyen sifan minen yi?” Alatala Senben Birin Kanna naxa na kiini. “E tan saraxaraline, e tan nan n xinla rayelefuma. E mon yi a fala, e naxa, ‘Nxu i xinla rayelefuxi di?’ **7** E fama donse haramuxin nan na, e yi a doko saraxa ganden fari. E mon yi a fala, e naxa, ‘Nxu i ya sarijanna kalaxi di?’ A luxi nen alo e a falama nen, e naxa, ‘Alatalaa saraxa ganden tono mi na’ **8** e na fa xuruse yectaren na saraxan na. Fe jaxin xa mi na ra ba? E na fa xuruseen na, a sanna giraxi hanma a furaxi, fe jaxin xa mi na fan na ba? Xa i na fi i ya yamana kanna ma, na go? A sewe i ra ba? A i yisuxe a fapin na ba?” Alatala Senben Birin Kanna naxa na kiini. **9** “Nayi, iki, e kata e Ala mafan alogo a xa hinan en na! E to na se sifane fima a ma, a a tuli matiye e ra ba?” Alatala Senben Birin Kanna naxa na kiini. **10** “Hali e tan nde kedenna yi Ala Batu Banxin deen nagale nun alogo e nama teen nadege fuuni n ma saraxa ganden fari! N mi n sewa fe yo toxi e yi,” Alatala Senben Birin Kanna naxa na kiini. “N mi e saraxane rasuxuma. **11** N xinla binyama nen siyane birin ye keli sogeteden ma han a biradena. E wusulanna nun kise sarijanxine bama saraxan na n xinli yiren birin yi. N xinla binyama nen siyane birin ye.” Alatala Senben Birin Kanna naxa na kiini. **12** “Koni e tan nan n ma sarijanna kalama, e to a falama, e naxa, ‘Marigina saraxa ganden haramuxi, en donseen naxan sotoma a fari na yelefu.’ **13** E a falama, e naxa, ‘Fitinan ni ito ra!’ E yi e kutun marajaxuni.” Alatala Senben Birin Kanna naxa na kiini. “Anu, e fama xuruse mujaxine ra n xon saraxan na, naxanye madonxi hanma naxanye furaxi.

N tan tinje ne rasuxe e ra ba?” Alatala naxa na kiini. **14** “Dangan na yanfantenna xa xuruse xeme radaxaxin naxan ma kuruni, a yi a kolo a so feen na n yii, a fa fa a madonxin na Marigin xon saraxan na. Bayo manga gbeen nan n na. N xinla magaxu siyane ye.” Alatala Senben Birin Kanna naxa na kiini.

2 “Iki, yamarini ito e tan saraxaraline nan xa! **2** Xa e mi e tuli mati, xa e mi a ragidi e bopeni, a e xa n xinla binya, n dangan nafama nen e ma, n yi e dubane findi dangane ra. N bata e dubane danga yati! Bayo e mi n ma fe ragidixi e bopeni.” Alatala Senben Birin Kanna naxa na kiini. **3** “Iki, n konkoxi e bonsonna xili ma e fe ra. E xuruseen naxanye bama saraxan na n xa sali waxatini, n na e gbiine soma nen e yetagi, muxune yi sa e nun na woli ayi e bode xon. **4** Nayi, e a kolonma nen, a n yamarini ito falaxi e xa nen alogo layirin naxan nxu nun Lewine tagi, na nama kala.” Alatala Senben Birin Kanna naxa na kiini. **5** “N ma layirin luxi nen e xon, a findi siimayaan nun boje xunbenla ra e xa. N na e so nen e yii alogo e xa gaxu n yee ra. E lu nen n yeeragaxuni yati, e yi n xinla binya. **6** N ma sariyan jondin yi e de. Wule fala yo mi lu e de. E bira nen n foxo ra boje xunbenla nun muxu fapiyani, e yi muxu wuyaxi raxete haken foxo ra.” **7** “Amasoto saraxaralina falane fekolonna nan fima muxune ma. Muxune xaranna fenma a tan nan na lan sariyane ma. Amasoto Alatala Senben Birin Kanna xeraan nan a ra. **8** Koni e tan bata kiraan bejin, e bata muxu wuyaxi ratantan sariyan xon. N layirin naxan xidi nxu nun Lewi bonsonna muxune, e bata na kala.” Alatala Senben Birin Kanna naxa na kiini. **9** “N marajaxun nun marayarabin nagidima e ma nen yamaan tagi. Amasoto e mi biraxi n ma kiraan foxo ra, fo e to muxune rafisaxi e bode xa sariyan xon.” **10** En birin fafe keden xa mi a ra ba? Ala kedenna xa mi en birin daxi ba? Nanfera nayi en na en bode yanfama, en yi layirin kala naxan xidi en benbane nun Ala tagi? **11** Yuda kaane bata tinxintareyaan liga. Fe haramuxin bata liga Isirayila nun Yerusalen yi, bayo yire sarijanxin naxan yi rafan Alatala ma, Yuda kaane bata na raharamu. E bata sungutunne futu naxanye ala xopena nde batuma. **12** Naxan na ito liga, Alatala xa na kanna kedi Yaxuba bonsonne dodoxene yi. A tan nan kantanna tima, a yabin ti. Ala xa na kanna kedi hali a saraxane ba Alatala Senben Birin Kanna xa. **13** A mato, e mon naxan xunna. E wugama, e kutunma, e yi

Alatalaa saraxa ganden nafe yeeḡen na bayo a mi fa e saraxane matoma, a mi sese rasuxuma e yii. **14** E mon yi a fala, a nanfera? Bayo Alatala nan seren na e nun naxanla tagi i naxan doxi i foninge waxatini, i naxan yanfaxi, hali i fe rafala boden to yi a ra, hali e nun na to bata yi layirin xidi. **15** Ala mi e findixi gbindi kedenna xan na ba, a yi niin bira na yi? Na gbindi kedenna nanse fenma fo bonsonna naxan Ala kolon. Nayi, e yete suxu e niini, e nama e foninge waxatin naxanla yanfa. **16** Alatala, Isirayilaa Ala naxa, “Naxan na a me a naxanla ra xonnantenyani, na gbalon funfu luma a ma nen. Nayi, e yete suxu e niini e nama muxune yanfa.” Alatala Senben Birin Kanna naxa na kiini. **17** E fala xuine Alatala xadanma. E a falama, e naxa, “Nxu a raxadanma di?” E nema a fale, e naxa, “Naxan yo fe naxin liga, ne nan fan Alatala yee ra yi. Na kanne nan nafa a ma.” Hanma e naxa, “Ala naxan kiti kenden sama, na minen yi?”


3 “A mato, n nan n ma xeraan nasigama nen, a yi kirani ton n yee ra. Nayi, sanja ma kedenni, e marigin naxan fenma, na soma nen a batu banxini. E n ma xeraan naxan mamema lan n ma layirin ma, na fama nen.” Alatala Senben Birin Kanna naxa na kiini. **2** Anu, nde luye a nii ra a fa loxoni? Nde luyetixi a na fa waxatin naxan yi? Bayo a luma nen alo xabuna sulun teena, alo dugin xana xosi ba safunna. **3** A doxoma nen alo xabun naxan wure gbeti fixen naxulunma a rasensen xinla ma a yi a gbiin ba. A Lewine rasarijanma nen alo xemaan nun wure gbeti fixen nasensenma kii naxan yi, e findi saraxarali tinxinxine ra Alatala xa. **4** Nayi, Yuda kaane nun Yerusalen kaane kiseene rafanma nen Alatala ma, alo waxati danguxine yi. **5** “N nan n masoma nen e ra kitisadeni. N yi sereyaan ba koeramuxune nun yalundene xili ma mafuren, e nun naxanye e koloma wulen fari, e nun naxanye walikene saranna nun kaja gilene nun kiridine kansunma, e nun naxanye xojene rabepinma, naxanye mi gaxuma n yee ra.” Alatala Senben Birin Kanna naxa na kiini. **6** “N tan Alatala, n mi masaraxi. Nanara, e tan Yaxuba bonsonne, e mi raxorixi. **7** Xabu e benbane waxatini, e bata e xun xanbi so n ma tonne yi, e mi e suxi. E mon xa xete n ma, n fan yi n yee rafindi e ma.” Alatala Senben Birin Kanna naxa na kiini. “Anu, e a falama, e naxa, ‘Nxu fa xetema Ala ma di?’ **8** Adamadiin noe Ala muje ba? Anu e bata n muja. E n maxodinma, e naxa,

‘Nxu i mujaxi di?’ E to mi yaganna nun kise defexine fima. **9** Dangana e tan yamanan muxune birin foxo ra amasoto e n mujama. **10** E fa yaganne defexin na se ramaradeni alogo balon xa lu n ma banxini waxatin birin.” Alatala Senben Birin Kanna naxa, “E n nakorosi feni ito yi iki, e a mato, xa n mi kore xonna deen nabiye e xa, n baraka gbeen nagodo e ma han a dangu ayi.” **11** Alatala Senben Birin Kanna naxa, “N mi tinje se kalane yi e sansine kala boxoni, e wudi binle mi luye e bogitarene ra. **12** Siyane birin a falama nen e ma a dubadene, bayo e yamanan naxunma nen.” Alatala Senben Birin Kanna naxa na kiini. **13** Alatala naxa, “E fala xolene ti nen n ma. E mon a falama, e naxa, ‘Nxu nanse falaxi i ma?’ **14** E a fala nen, e naxa, ‘Ala batun tono yo mi na! Nxu nanse sotoxi a sariya suxuni, nxu sunuxin yi lu sigan tiye Alatala Senben Birin Kanna fe ra. **15** Nxu fa a falama nen iki a sewan yete yigboone nan xa. Fe naxi rabane nan sabatixi yati! Hali naxanye Ala bunbama, e yete sotoma a ra.” **16** Nayi, naxanye gaxuxi Alatala yee ra, ne falan tima e bode tagi, Alatala tuli matixi e ra, a e xuiin namema. Muxun naxanye gaxuxi Alatala yee ra e a xinla binya, ne xinle yi sebe Ala yetagi alogo a xa a joxo lu e xon. **17** Alatala Senben Birin Kanna naxa, “E findima nen n gbeen na. N na e findi n yete gbee yamaan na loxo naxan yi, e kininkininna n suxuma nen alo dii fafan kininkinima a diin ma kii naxan yi naxan walima a xa. **18** Nayi, e mon tagi rabaan toma nen tinxin muxun nun muxu naxin tagi, e nun Ala batu muxun nun naxan mi a batuma.”

4 Amasoto Alatala Senben Birin Kanna naxa, “Na loxon fama teen nan na alo sulun teena. Yete yigboone nun fe naxi rabane birin findima sexe xaren nan na, na loxon yi findi teen na e xa. E salen mi luye, hali e siyadina a mi luye. **2** Koni e tan naxanye n xinla binyaxi, n ma tinxinyaan minima nen kenenni e xa alo sogen na te, a kenenna yi e rakisi, e xoroyama nen, e yi tугan sewani alo jinge dii lugoxine.” **3** Alatala Senben Birin Kanna naxa, “Nayi, e muxu naxine yibodonma nen, e lu alo xubena e sanna bun, na loxoni, n loxon naxan yitonma.” **4** N sariyan naxanye so n ma walikene Musa yii Horebe geyani Isirayila kaane xa, n ma tonne nun yamarine, ne fe xa rabira e ma. **5** N tan yeteen Nabi Eli rafama nen e ma benun Alatalaa loxo gbee magaxuxin xa a li. **6** A yi dii fafane

bɔɲɛn nafindi e diine ma, a diine bɔɲɛn nafindi e
fafane ma, alogo n nama fa ɛ bɔxɔn halagi.

NEW TESTAMENT



Yesu naxa, “N Fafe, e mafelu, amasoto e naxan ligama e mi na kolon.”

Awa, e yi masensenna ti lan a dugine yitaxun feen ma.

Luke 23:34

Matiyu

1 Yesu Alaa Muxu Sugandixin benbane xinle nan itoe ra. Dawuda bõnsõnna nde nan yi Yesu ra. Iburahima bõnsõnna nde nan yi Dawuda ra. **2** Iburahima nan Isiyaga soto. Isiyaga yi Yaxuba soto. Yaxuba yi Yuda nun a xunyene nun a tadane soto. **3** Yuda yi Peresi nun Sera soto. E nga nan yi Tamari ra. Peresi yi Xesirõn soto. Xesirõn yi Rami soto. **4** Rami yi Aminadabo soto. Aminadabo yi Naxason soto. Naxason yi Salimon soto. **5** Salimon nun Raxabi yi Boosu soto. Boosu nun Ruti yi Obedi soto. Obedi yi Yese soto. **6** Yese yi Manga Dawuda soto. Dawuda yi Sulemani soto. A nga yi findixi Yurayaa jaxanla nan na. **7** Sulemani yi Robowan soto. Robowan yi Abiya soto. Abiya yi Asa soto. **8** Asa yi Yosafati soto. Yosafati yi Yehorami soto. Yehorami yi Yusiya soto. **9** Yusiya yi Yotami soto. Yotami yi Axasi soto. Axasi yi Xesekiya soto. **10** Xesekiya yi Manase soto. Manase yi Amõn soto. Amõn yi Yosiya soto. **11** Yosiya yi Yekonaya nun a xunyene nun a tadane soto, e Isirayila muxune suxu waxatin naxan yi, e siga e ra Babilõn taani konyiyani. **12** E siga xanbini Babilõn taani, Yekonaya yi Selatili soto. Selatili yi Sorobabeli soto. **13** Sorobabeli yi Abiyudi soto. Abiyudi yi Eliyakimi soto. Eliyakimi yi Asori soto. **14** Asori yi Sadoki soto. Sadoki yi Ahimi soto. Ahimi yi Eliyudi soto. **15** Eliyudi yi Eleyasari soto. Eleyasari yi Matani soto. Matani yi Yaxuba soto. **16** Yaxuba yi Yusufu soto, Mariyamaa xemena, naxan Yesu bari, naxan xili “Alaa Muxu Sugandixina.” **17** Awa, fõlõ Iburahima ma, han sa dõxõ Dawuda ra, na findi mayixete fu nun naanin nan na. Fõlõ Dawuda ma, han e siga Isirayila yamaan na Babilõn taani waxatin naxan yi, na fan mayixete fu nun naanin. Fõlõ e sigan ma Babilõn taani, sa dõxõ Alaa Muxu Sugandixin bari waxatin na, na fan findixi mayixete fu nun naanin nan na. **18** Awa, Yesu Alaa Muxu Sugandixin sotoxi kii naxan yi, na nan ito ra. A nga, Mariyama yi masuxi Yusufu xõn ma nun, koni benun a xa dõxõ a xõn ma waxatin naxan yi, a yi a to a bata fudikan fata Alaa Nii Sarijanxin na. **19** Tinxin muxun nan yi a xemèn Yusufu ra. A mi yi waxi a xa Mariyama rayagi yamaan yetagi. Nanara, a yi a miri a xa a futun kala luxunni. **20** A yi a mirima na feen ma waxatin naxan yi, Marigina malekan yi mini a xa xiyeni, a naxa, “Yusufu, Dawuda bõnsõnna, i nama gaxu i ya jaxanla Mariyama tonge, amasoto a diin naxan barima, na fataxi Alaa Nii Sarijanxin

nan na. **21** A dii xemèn barima nèn, i yi a xili sa Yesu amasoto a tan nan a yamaan nakisima e yulubine ma.” **22** Ito birin ligaxi nèn alogo Marigin naxan falaxi a nabiin xõn ma, a na xa kamali. **23** A naxa, “Sungutun nasolõnxin fudikanma nèn, a dii xemèn bari. E yi a xili sa Emanuweli, na bunna nèn fa fala, ‘Ala en tagi.’” **24** Nanara, Yusufu xulun waxatin naxan yi, Marigina malekan naxan yamari a ma, a na liga, a yi Mariyama tongo a jaxanla ra. **25** Koni e mi kafu han a yi dii xemèn bari. Yusufu yi a xili sa “Yesu.”

2 Yesu to soto Betelemi taani Yudaya yamanani Manga Herode waxatini, fekolonne yi fa sa keli sogeteden binni, fa Yerusalen taani. **2** E muxune maxodin, e naxa, “Diidin naxan barixi Yahudiyan mangan na, na minen yi? Nxu bata a taxamaseri saren to nxu yi sogeteden binni waxatin naxan yi. Nanara, nxu bata fa nxu xa fa a batu.” **3** Manga Herode na me waxatin naxan yi, a kuisan, e nun Yerusalen kaane birin. **4** A yi yamaan saraxarali kuntigine nun sariya karamõxõne xili, a yi e maxodin, a naxa, “Alaa Muxu Sugandixin yi lan a xa bari minen yi?” **5** E yi a yabi, e naxa, “A barima Betelemi taan nin Yudaya yamanani. Nabini ito nan sebexi, a naxa, **6** ‘I tan, Betelemi taan Yuda yamanani, taa xuri mi i tan na Yudaya taa gbeene ye. Amasoto mangana nde kelima nèn i tan yi naxan Isirayila muxune masuxuma, n ma yamana.’” **7** Awa, Manga Herode yi fekolonne xili wundoni, a yi e maxodin na saren mini waxatin yeteen ma. **8** A yi jungun sa e ma siga Betelemi taani, a naxa, “E sa diidina fe yee fen han! E na a to waxatin naxan yi, e yi n nakolon alogo n fan xa sa a batu.” **9** E to mangana falan name, e yi siga. E saren naxan to sogeteden binni a fõloni, e mõi yi na to, a yi lu e yee ra han a sa ti diidin yiren xun ma. **10** E to na saren to, e yi sewa han! **11** E to so banxini, e yi diidin nun a nga Mariyama to. E yi e xinbi sin a xa, e yi a batu. Na xanbi ra, e yi e sanba seene ramini, e yi xemaa nun wusulanna nun mirihi latikõnõnna fi a ma. **12** Ala yi fekolonne rakolon xiyeni, a e nama fa xete Manga Herode fema. E yi xete kira gbete xõn ma e konni. **13** Fekolonne kelixin na yi, Marigina malekan yi mini Yusufu xa xiyeni, a yi a fala a xa, a naxa, “Keli, i diidin nun a nga tongo, e yi e gi, e siga Misiran yamanani. E sa lu na han n na falan ti e xa waxatin naxan yi. Amasoto Herode diidin fenma a faxa xinla nan ma.” **14** Nayi, Yusufu yi keli, a diidin nun a nga tongo kõe na, e siga Misiran yamanani. **15**

A lu na han Herode yi faxa. Marigin naxan fala nabiin xon ma, na yi kamali, a naxa, “N na n ma dii xemen xili nen a xa keli Misiran boxoni.” 16 Herode to a kolon a fekolonne bata a mayenden, a bonen yi te kati! A yi yamarin fi, a dii xemen naxanye Betelemi taan nun a rabilinna birin yi, naxanye barin munma jee firin soto, a ne birin xa faxa. A na waxatin nagidi fekolonne gbee falan nan xon. 17 Nayi, Nabi Yereimi a falan yi kamali, a naxa, 18 “Gbelegbele xuiin nun wuga xui gbeen tema Rama taani, Rakeli nan a diine wugama. A mi tinje a xa masabari amasoto e birin bata faxa.” 19 Herode faxa waxatin naxan yi, Marigina malekan yi mini Yusufu xa xiyeni Misiran yamanani, 20 a yi a fala, a naxa, “Keli, i diidin nun a nga tongo, i xete Isirayila yamanani amasoto naxanye diidin fenma a faxa feen na, ne bata faxa.” 21 Nanara, Yusufu yi keli, a diidin nun a nga tongo, a xete Isirayila yamanani. 22 Koni a me waxatin naxan yi, a Herode a dii xemen Arikelayusi doxi a fafe boxoni mangan na Yudaya yamanan xun na, Yusufu yi gaxu na yidoxo feen na. Ala mon yi a rakolon xiyeni, a yi siga Galile yamanani. 23 A yi sa doxo taana nde yi naxan xili Nasareti. Nabine falane yi rakamali, fa fala, “A xili bama nen ‘Nasareti kaana.’”

3 Yoni Marafu Tiin yi fa na waxatini a kawandin ba folo tonbonni Yudaya yamanani. 2 A naxa, “E xun xanbi so e hakene yi, amasoto Ariyanna Mangayaan bata masol!” 3 Nabi Esayi yi a tan nan ma fe falama, a naxa, “Muxuna nde xuiin minima tonbonni, naxan a falama, ‘E kirani ton Marigin yee ra, e kirane matinxin a xa!’” 4 Nogome xabe dugin nan yi ragodoxi Yoni ma. A yi tagi xidixi kidin na. A yi baloma tuguminne nun kumin nan na. 5 Yamaan yi lu fe a fema keli Yerusalen nun Yudaya yamanan nun Yuruden baan nabilinna birin yi. 6 E yi e ti e yulubine ra, a yi e rafu Yuruden baani e tubi xinla ma Ala ma. 7 Yoni to Farisi muxune nun Saduse muxun wuyaxi to fe a fema, a xa e rafu igeni, Yoni yi a fala e xa, a naxa, “E tan saji bonsonne! Nde e rakolonxi, e xa e gi Alaa xolon bun ma? 8 E kewanle xa a yita fa fala e bata e xun xanbi so e hakene yi. 9 E nama e miri fa fala e benban nan Iburahima ra. N xa a fala e xa, Ala noe gemeni itoe finde nen Iburahima bonsonne ra! 10 Bunbin bata yiton wudi salenne sege feen na. Wudin naxan mi bogi faji tima, na segema nen, a woli teeni. 11 N tan e rafuma igeni e tubi xinla nan ma Ala ma. Koni naxan

senben gbo n tan xa, na fama n tan xanbi ra, n mi noe naxan ma sankidi fulunje yati. Na e rafuma Alaa Nii Sarijanxin nun teen nin. 12 A segedenna a yii, a maali fe, a yi a sa sagan kui, koni a se dagin sama nen tee tutareni!” 13 Na waxatini Yesu yi keli Galile yamanani, a siga Yoni fema Yuruden baani, alogo Yoni xa a rafu igeni. 14 Koni Yoni yi tondi, a naxa, “N makona a ma, i tan nan xa n tan nafu, koni i bata fa n tan fema.” 15 Yesu yi a yabi, a naxa, “Tin ito xa liga singen, amasoto a lan nen en xa fe tinxinxine birin nakamali.” Nanara, Yoni yi tin. 16 Yesu to rafu, a keli igeni nen tun, kore xonna deen yi rabi a xa, a yi Alaa Nii Sarijanxin to gode ganba sawurani, a doxo a ma. 17 Fala xuiin yi keli kore, a yi a fala, a naxa, “N napan Dii Xemen nan ito ra naxan bata n kenan ki faji.”

4 Na xanbi ra, Alaa Nii Sarijanxin yi Yesu xali tonbonni alogo Yinna Manga Setana xa kata a ratantan feen na. 2 Yesu yi soqe tonge naanin koe tonge naanin ti sunni, a mi donse don, sunna yi a suxu. 3 Maratantan tiin yi fa Yesu fema, a naxa, “Xa Alaa Dii Xemen nan i tan na, a fala gemeni itoe xa, e xa maxete burun na.” 4 Yesu yi a yabi, a naxa, “A sebexi Kitabun kui, a naxa, ‘Muxun mi balon donseen xan gbansan na fo Ala falan naxanye birin tima.’” 5 Yinna Manga Setana yi Yesu tongo, a siga a ra Taa Sarijanxini, a sa a ti Ala Batu Banxin xun tagi. 6 A yi a fala Yesu xa, a naxa, “Xa Alaa Dii Xemen nan i tan na, tungan, amasoto a sebexi Kitabun kui, a naxa, ‘Ala yamarin fima nen a malekane ma i ya fe yi. E yi i tongo, alogo i nama i sanna din geme yo ra.’” 7 Yesu yi a yabi, a naxa, “A mon sebexi Kitabun kui, a naxa, ‘I nama i Marigina Ala mato bunbani.’” 8 Na xanbi ra, Yinna Manga Setana mon yi a tongo, a siga a ra geya gbeen fari, a dununa mangayane nun a binyene birin yita a ra. 9 Setana yi a fala a xa, a naxa, “Xa i xinbi sin n bun ma, i yi n batu, n ni itoe birin fima i ma nen.” 10 Yesu yi a yabi, a naxa, “Setana, keli be! Amasoto a sebexi Kitabun kui, a naxa, ‘I xa i Marigina Ala binya, i yi a keden peen batu.’” 11 Nayi, Yinna Manga Setana yi keli Yesu fema. Malekane yi fa a mali. 12 Yesu a me waxatin naxan yi, a e bata Yoni sa kagoon na, a siga Galile yamanani. 13 A mi fa doxo Nasareti taani sonon, a sa doxo Kaperunan taani Galile daraan de Sabulon nun Nafatali boxoni. 14 A na ligaxi nen, alogo Nabi Esayi naxan falaxi, na xa kamali, a naxa, 15 “Sabulon kaan nun Nafatali kaan

naxanye baan binni, Yuruden baan de, siya gbetene gbeen Galile naxan na, **16** yamaan naxan dɔxi dimini, ne bata kenɛn gbeen to. Naxanye dɔxi sayaan dimini, kenenna bata mini ne mal!” **17** Na waxatini, Yesu yi kawandin ba fɔlɔ, a naxa, “E xun xanbi so e hakene yi! Amasoto Ariyanna Mangayaan bata maso.” **18** Yesu sigan tima Galile Daraan dɛxɔn ma waxatin naxan yi, a yi ngaxakedenna firin to. Yɛxɛ suxun nan yi e ra. Simɔn naxan xili Piyɛri e nun a ngaxakedenna, Andire, e yi yɛxɛ suxuni yalaan na darani. **19** Yesu yi a fala e xa, a naxa, “E bira n fɔxɔ ra. N xa e findi muxu fenne ra Ala xa alo e yɛxɛn suxuma kii naxan yi.” **20** E yi e yalane sa mafuren! E bira a fɔxɔ ra. **21** A sigaxin yɛɛn na ndedi, a yi ngaxakedenna firin gbɛtɛye to, Yaki nun Yoni, Sebede a dii xɛmɛne. E nun e fafe yi e yalane yitɔnma kunkin kui. Yesu yi e xili. **22** E yi e fafe lu kunkin kui sa! E bira Yesu fɔxɔ ra. **23** Yesu yi siga Galile yamanan birin yi, a yamaan xaran e salide banxine yi. A yi Ariyanna Mangayana fe Xibaru Fajin kawandin ba e xa, a yi yamaan furetone rakendɛya furen sifan birin ma. **24** Muxune yi na feen xibarun mɛ Siriya yamanan birin yi. Yamaan yi fa fureton sifan birin nun tɔrɔ muxune ra e nun jinan jaxin yi naxanye fɔxɔ ra e nun gan furetone nun lɛbutɛnne. Yesu yi ne birin nakendɛya. **25** Yama gbeen yi bira a fɔxɔ ra keli Galile yamanan nun Taa Xun Fune yi. Ndee fan yi sa keli Yerusalɛn nun Yudaya nun Yuruden baan kidi ma.

5 Yesu to yama gbeen to, a te a sa dɔxɔ geyaan fari. A xarandiine yi fa a fɛma. **2** A yi e xaran fɔlɔ. **3** A naxa, “Sewan na kanne xa, naxanye mako Ala ma bayo ne Ariyanna Mangayaan sɔtɔma nɛn. **4** Sewan na kanne xa, naxanye wugama, bayo Ala ne madendenma nɛn. **5** Sewan na kanne xa, naxanye limaniyaxi, bayo bɔxɔn findima nɛn ne kɛɛn na. **6** Sewan na kanne xa, tinxinna xɔnla naxanye suxuma alo kamen nun min xɔnla, bayo ne wasama nɛn. **7** Sewan na kanne xa, naxanye kininkininma, bayo Ala kininkininma nɛn ne fan ma. **8** Sewan na kanne xa, naxanye bɔjɛn sarijanxi, bayo ne Ala toma nɛn. **9** Sewan na kanne xa, naxanye bɔjɛ xunbenla rasoma, Ala ne xilima nɛn a a diine. **10** Sewan na kanne xa, naxanye besɛnxɔni e tinxinyana fe ra, bayo ne Ariyanna Mangayaan sɔtɔma nɛn.” **11** “Yamaan na e konbi, e yi e besɛnxɔnya, e yi fala jaxin sifan birin ti e xili ma n tan ma fe ra, sewana e tan xa nayi. **12** E sewa, e jaxan, amasoto

barayi gbeen namaraxi e xa ariyanna yi. Amasoto e nabine fan besɛnxɔnya na kii nin xabu a fɔlɔni.” **13** Yesu naxa, “E luxi nɛn alo fɔxɔna dunuɲa muxune birin xa. Koni xa fɔxɔn mɛxɛmɛxɛnna ba ayi, a fa ramɛxɛmɛxɛnma nanse ra nayi? A tɔnɔ mi fa na fɔ a woli ayi, yamaan yi a yibodon. **14** E luxi nɛn alo kenenna dunuɲa muxune birin xa. Taan naxan tixi geyaan fari, na mi luxunɲɛ. **15** Muxu yo mi lɛnpun nadɛgɛ, a a raso deben bun ma. Koni fɔ lɛnpun xa dɔxɔ seen nan fari. Nanara, a kenenna fiyɛ banxi kui kaane birin ma. **16** A na kii nin, e kenenna xa yanban yamaan yetagi alogo e xa e wali fajine to, e yi e Fafe Ala binya ariyanna yi.” **17** Yesu naxa, “E nama e miri fa fala n bata fa Sariya Kitabun nun nabine kitabune kaladeni. N mi faxi e kaladeni fɔ e rakamalideni. **18** N xa jɔndin fala e xa, fanni kore xɔnna nun bɔxɔ xɔnna daxi, sese mi be Sariya Kitabun na hali sebenla yiredi keden pe han feen birin yi kamali. **19** Nanara, naxan na yamarini ito nde keden kala hali a xurun ki yo ki, a bonne xaran na ma, na kanna yatema muxudin nan na Ariyanna Mangayani. Koni naxan sariyani itoe suxuma, a bonne xaran ne ma, na kanna findima nɛn muxu gbeen na Ariyanna Mangayani. **20** N xa jɔndin fala e xa, xa e tinxinyaan mi dangu sariya karamɔxɔne nun Farisi muxune tinxinyaan na, e mi soɛ Ariyanna Mangayani mumɛ!” **21** Yesu naxa, “E bata a mɛ a Ala bata yi a fala en benbane xa, a naxa, ‘I nama faxan ti. Naxan na muxun faxa, na kitima nɛn.’ **22** Koni n tan a falama e xa iki, naxan na xɔlɔ a ngaxakedenna ma, na kitima nɛn. Naxan na a ngaxakedenna konbi, kitisa yamaan na makitima nɛn. Naxan na a fala fa fala, ‘I tan xaxilitarena,’ na kanna lan yahannama tɛɛn nin. (Geenna g1067) **23** Nanara, i nema i ya kiseen nalima Ala ma waxatin naxan yi saraxa ganden yetagi, a na rabira i ma fa fala i ngaxakedenna xɔlɔxi i ma, **24** i ya kiseen lu saraxa ganden yetagi singen. I siga xulɛn, i sa e nun i ngaxakedenna tagini tɔn. Na xanbi ra, i yi i ya kiseen fi Ala ma.” **25** “Xa i yengefaan sigama i ra i kitideni, e nema kira yi, i xa kata i na feen jan e tagi sinma alogo a nama i so kitisaan yii. Na fan yi i so doma kanne yii. Ne fan yi i sa kasoon na. **26** N xa jɔndin fala i xa, nayi, i mi keɛɛ na mume, fɔ i yanginna birin fi!” **27** Yesu naxa, “E bata yi a mɛ nun a Ala bata yi a fala, a naxa, ‘I nama yalunyaan liga.’ **28** Koni n tan a falama e xa, naxan na jaxanla mato han a kunfa a ma, na kanna bata yelin yalunyaan lige a bɔjɛni. **29** Xa i yiifari ma yɛɛn nan i bire yulubini, a ba na, i yi

a woli ayi. Amasoto i fatin yirena nde halagixin fisa dangu i gbindin birin soon na yahannama yi. (Geenna g1067) 30 Xa i yiifari ma yiin nan i bire yulubini, a sege a ra, i yi a woli ayi. I yii kedenna segexin fisa dangu i gbindin birin soon na yahannama yi.” (Geenna g1067)

31 Yesu naxa, “E yi a falama nun, e naxa, ‘Naxan yo nema a naxanla bejinnye, a xa futu kala kedin so a yii.’ 32 Koni n tan a falama iki, xa muxuna a naxanla bejin, naxanla mi yalunya ligaxi, a bata a naxanla ti yalunyaan ma nayi, bayo xa xeme gbete a futu, na bata yalunyaan liga a xon ma.” 33 Yesu naxa, “E mon bata yi a me nun, a a fala nen en benbane xa, a i na i kolo Marigini, fo i xa a rakamali. 34 Koni n na a falama e xa iki, e nama e kolo ariyanna yi amasoto Ala mangaya gbeden menni. 35 E nama e kolo dunuya ra amasoto Ala san tiden na a ra. E nama e kolo Yerusalem taani amasoto Manga gbeena taan nan na ra. 36 E nama e kolo e xunna ra amasoto hali e xun sexe kedenna, e mi noe a fore hanma e yi a fixa. 37 Koni i ya falan xa findi ‘On,’ hanma ‘En-en’ tun! Xa i nde sa na fari, na kelixi Fe Naxin Kanna nin.” 38 Yesu naxa, “E bata yi a me nun fa fala, ‘Yeen joxon xa fi yeen na, jinna joxon xa fi jinna ra.’ 39 Koni n tan a falama iki, i nama i kankan muxu naxin yee ra. Naxan na i deen foxo kedenna garin a ma, bode foxo fan ti a xa. 40 Xa muxuna nde waxi i kiti feni i ya doma bun birana fe ra, tin a xa i ya doma gbeen fan tongo. 41 Xa muxu yo i karahan i xa goronna maxali kilo kedenni, i tan xa a findi kilo firinna ra. 42 Naxan na i xandi seni, i xa na ki. Xa muxuna nde wa i doli feni sena nde yi, i nama tondi.” 43 Yesu naxa, “E bata yi a me nun fa fala, ‘I adamadi boden xanu, i yi i yaxune rajaxu.’ 44 Koni n tan a falama e xa iki, e xa e yaxune xanu. Naxanye e besenxonyama, e xa Ala maxandi ne xa. 45 Nanara, e ligama nen alo e Fafe Ala naxan ariyanna yi. Amasoto a sogen natema muxu fajine nun muxu naxine nan xa. Amasoto tinxin muxun nun tinxintarena, Ala tulen nafama ne birin xa. 46 Muxun naxanye bata e xanu, xa e ne nan tun xanu, e barayin sotoma nayi di? Hali mudu maxinle fan na ligama! 47 Xa e e ngaxakedenne nan tun xonton, e nanfe ligaxi nayi naxan dangu bonne gbeen na? Amasoto hali denkeleyatarene na joxonna ligama. 48 Nanara, e lu fetareyani alo fe mi e Fafe Ala ra kii naxan yi naxan ariyanna yi.”

6 Yesu naxa, “E a liga e yeren ma, e nama e wali fajine ke yamaan yetagi alogo e xa e to. Xa e na

liga, e mi barayi sotoma e Fafe Ala ra ariyanna yi. 2 Nanara, xa i yiigelitone kima, i nama xotaan fe i yee ra a ralideni alo nafigine a ligama kii naxan yi salide banxine nun taa tagine yi alogo yamaan xa e matoxo. N xa jondin fala e xa, e bata yelin e saranna sote yamaan yii. 3 Koni xa i yiigelitone kima, hali i komenna nama a kolon i yiifanna naxan ligama 4 alogo i ya hinan wanla xa raba suturani. Nayi, i Fafe Ala naxan i toma suturani, na i barayima nen.” 5 Yesu naxa, “E nema Ala maxande, e nama a liga alo nafigine. Amasoto a rafan e ma, e xa ti salide banxine nun taa tagine yi, e yi sali alogo yamaan xa e to. N xa jondin fala e xa, e bata yelin e saranna sote yamaan yii. 6 Koni i tan nema Ala maxande, so i ya banxini, i deen nagali, i yi i Fafe Ala maxandi i mi naxan toma. Nayi, i Fafe Ala naxan wundo yi feene toma, na i barayima nen.” 7 Yesu naxa, “E nama lu xete fala fuyanne ma tun Ala maxandini alo denkeleyatarene. Amasoto e mirima a ma fa fala e na falan nawuya ayi Ala e xuiin namema na nin. 8 E nama liga alo ne, bayo e Fafe Ala e makone kolon benun e xa a maxandi. 9 Awa, e Ala maxandima ikiini, e naxa, ‘Nxu Fafe naxan kore xonna ma, i xinla xa sarijan. 10 I ya Mangayaan xa fa, i sagoon xa liga dunuya yi alo a ligama kore xonna ma kii naxan yi. 11 I nxo to balon fi nxu ma. 12 I nxu mafelu nxu yulubine ra, alo nxu fan nxu hake tongone mafeluma kii naxan yi. 13 I nama tin nxu xa bira tantanni fo i nxu rakisi fe naxin ma.” 14 “Amasoto xa e e hake tongone mafelu, e Fafe naxan ariyanna yi, na fan e mafeluma nen. 15 Koni xa e mi ne mafelu e hakene ra, e Fafe Ala fan mi e mafeluye e yulubine ra.” 16 Yesu naxa, “E nema sunni, e nama e yetagini tojon alo nafigine e yetagine yixidima kii naxan yi alogo yamaan xa a kolon a e sunni. N xa jondin fala e xa, ne bata yelin e saranna sote yamaan yii. 17 I tan nema sunna suxuma, i yetagin maxa, i yi i xunni ton 18 alogo yamaan nama a kolon fa fala i sunni fo i Fafe Ala i mi naxan toma, na a kolonma nen. I Fafe Ala naxan wundo feene toma, na i barayima nen.” 19 Yesu naxa, “E nama e nafunle ramara dunujani ito yi e banxine kui, xorinxorinna nun melimenle a kalama denaxan yi. Mujadene fan soma nen, e yi a muja. 20 Koni e xa nafunla ramara ariyanna yi, xorinxorinna nun melimenle mi a kale denaxan yi, mujadene fan mi soe na, e a muja. 21 bayo i ya nafunla denaxan yi, i xaxinla fan menna nin.” 22 Yesu naxa, “Muxun yeen luxi nen alo lenpuna a fati benden xa. Xa i yeen kende,

i fatin birin luma nen kenenni. **23** Koni xa i yeen kala, i fatin birin luma nen dimini. Nayi, kenenna naxan i yi, xa na bata findi dimin na, na dimin gboma ayi nen.” **24** Yesu naxa, “Muxu yo mi nœ wale kari firinna xa sanja ma kedenni. Amasoto a kedenna rajaxuma nen, a kedenna xanu, hanma a kedenna binyama nen, a yi bonna rayelefu. E mi nœ wanla ke Ala nun nafunla xa sanja ma kedenni.” **25** “Nanara, n na a falama e xa, e nama kontofili e dunupa yi gidina fe ra, e naxan donma hanma e naxan minma hanma e e maxidima naxan yi. Niin mi dangu donseen na ba? Fati benden mi dangu dugin na ba? **26** E xoline mato, e mi se sima, e mi se xabama, donse ramarade mi e yii, koni e Fafe naxan ariyanna yi, na nan e baloma. E mi fisa xoline xa ba? **27** E tan nde nœ waxatidi se e yete siine fari e xaminna ma ba? **28** E xaminma dugina fe ra nanfera? E wudi fuge fajine gbo kiin mato. E mi walima, e mi dugi rafalama e yete xa, **29** anu n xa a fala e xa, hali Manga Sulemani e nun a nœron birin yi, a mi a yete maraberi ba alo e tan nde. **30** Ala nan sexene maraberi bama naxanye solima to, tila e gan, e jan fefe! A mi e maraberi be dangu ne ra ba? E denkeleyaan xurun.” **31** “Nanara, e nama xamin fa fala, ‘En balon sotoma di?’ hanma ‘En na igen sotoma di?’ hanma ‘En dugin sotoma di?’ **32** Amasoto denkeleyatarene seni itoe birin fenma. Koni e Fafe naxan ariyanna yi, na e makoon kolon. **33** Koni e Alaa Mangayaan fen singen e nun a tinxinyana, na xanbi ra a seni itoe birin soma e yii nen. **34** Nanara, e nama xamin tila tœrona fe ra. Tila xaminna tila nan ma. Amasoto lœxon birin nun a tœron na a ra.”

7 Yesu naxa, “E nama e yete findi e adamadi boden kewanle makiti muxun na, alogo Ala nama e fan makiti. **2** Bayo e na bonne kewanle makiti kii naxan yi, Ala e fan makitima na kii nin. E ligaseen naxan yatema bonne xa, Ala fan na nan yatema e xa. **3** Nanfera jamadin naxan i adamadi boden yeen xœn, i na toma, koni gbindonna naxan i tan yeen xœn, i mi na toma? **4** I ya a falama i adamadi boden xa nanfera fa fala, ‘Tin, n xa jamadin ba i yeen xœn ma,’ koni gbindonna i tan yeen xœn ma. **5** I tan nafigina! Gbindonna ba i yete yeen xœn ma singen, na xanbi ra, i nœ na jamadin toœ nen, i yi a ba i adamadi boden yeen xœn ma.” **6** “E nama se sarijanxin sa barene bun. E nama e bœxo bun nafunla woli xœsene bun ma. Xa i na liga xœsene e yibodonma nen, barene yi xaje e ma, e yi e xin.” **7** “E

seen maxœdin, e a sotoma nen. E seen fen, e a toma nen. E deen kœnkœn, a rabima e xa nen. **8** Amasoto naxan yo na seen maxœdin, na a sotoma nen. Naxan na seen fen, na a toma nen. Naxan na deen kœnkœn, a rabima a xa nen. **9** Muxuna nde e ye ba, naxan ma diin burun maxœdinma a ra, a gœmen so a yii? **10** Hanma a na yœxen maxœdin a ra, a sajin so a yii? **11** Hali e to findixi muxu jaxine ra, e a kolon fa fala a lan nen, e xa se fajin so e diine yii. E faxi fa, e Fafe naxan ariyanna yi, na se fajine soma a maxandi muxune yii kii naxan yi!” **12** “Sariya Kitabun nun nabine kitabune birin bunna nan ito ra: I waxi muxune xa feen naxanye raba i xa, na jœxœnna liga bonne xa.” **13** “E so de xurin na, amasoto kiraan naxan sigama yahannama yi, na ragbo, a so deen nagbo. Muxu wuyaxi soma nen menni. **14** Kiraan naxan sigama habadan nii rakisini, na yisiga raxœlo, a deen mi ragbo, muxu wuyaxi mi a toma.” **15** “E a liga e yeren ma wule nabine fe yi. E nema fama e xuruxi alo yœxœna, koni e kui feen luxi nen alo kanko xœjene. **16** E ne kolonma e kewanle nan xœn. I manpa bogin bolonje tansinna kœ ra ba? I xœde bogin bolonje wudi majalixin kœ ra ba? **17** Wudi fajin bogi fajin nan tima. Wudi jaxin bogi jaxin nan tima. **18** Wudi fajin mi bogi jaxin tima. Wudi jaxin mi bogi fajin tima. **19** Wudin naxan mi bogi fajin tima, na segema nen, a gan. **20** Nba, e wule nabine kolonma e kewanle xœn ma na kii nin.” **21** “Muxun naxanye a falama, e naxa, ‘Marigina, Mariginal’ ne birin mi soma Ariyanna Mangayani fœ naxanye n Fafe Ala sagoon ligama. **22** Nanara, na lœxon na a li, muxu wuyaxi a falama nen, e naxa, ‘Marigina, Mariginal! Nxu bata yi nabiya falane ti i xinli nun, nxu jinanne kedi i xinli, nxu kabanako fe wuyaxi liga i xinli!’ **23** Nba, n na a falama e xa nen, n naxa, ‘N mi e kolon mumel! E tan fe jaxi rabane, e keli n femal!’” **24** “Awa, muxun naxan birin n ma falane ramema, e yi e suxu, ne luxi nen alo xeme xaxilimaan naxan a banxin ti fanyen fari. **25** Tulen fa waxatin naxan yi, xudene yi rafe, foye gbeen yi fa. Koni na banxin mi bira bayo a yi tixi fanyen nan fari. **26** Muxun naxanye birin n ma falane ramema koni e mi e suxuma, ne luxi nen alo xaxilitaren naxan a banxin ti mepensinna fari. **27** Tulen faxina, xudene yi rafe, foye gbeen yi fa, banxin yi bira kii jaxini!” **28** Yesu yelinxina falane birin tiye, yamaan yi kabœ a xaran ti kiin ma. **29** A tan mi luxi alo e sariya karamœxœne kii naxan yi, Yesu yi xaranna tima Ala senben nin.

8 Yesu yi godo keli geyaan ma, yama gbeen yi biraxi a fɔxɔ ra. **2** Awa, dogonfontɔɔn yi fa a fema, a yi a xinbi sin a bun ma, a naxa, “N kanna, xa i tin, i nɔɛ n nakendeye nen.” **3** Yesu yi a yiin sa a ma, a yi a yabi, a naxa, “N bata tin, i xa kendeya.” Dogonfontɔɔn yi kendeya mafuren. **4** Na xanbi ra, Yesu yi a fala a xa, a naxa, “I nama a fala muxu yo xa, koni siga saraxaraliin fema, a xa sa i mato. Na xanbi ra, Musaa sariyan saraxan naxan yamarixi, i na ba. Na finde nen sereyaan na e xa.” **5** Yesu so Kaperunan taani waxatin naxan yi, Romi sofaan keme kuntigin yi fa a fema, a yi a mafan, a naxa, **6** “N fafe, n ma walikeen furaxina n konni, hali a mi nɔɛ a mamaxe. A tɔrɔxi kati!” **7** Yesu yi a yabi, a naxa, “N xa sa a rakendeya.” **8** Kuntigin yi a yabi, a naxa, “N fafe, na binyen mi lan n ma, i siga n konni. Falan ti tun, n ma walikeen kendeyama nen. **9** N fan kuntigina nde nan ma nɔ bun, sofane n fan bun. N na a fale na ndee xa nen, n naxa, ‘Siga,’ a siga. N yi a fala nde gbete xa, n naxa, ‘Fa,’ a fa. N yi a fala n ma konyin xa, n naxa, ‘Ito liga,’ a na liga.” **10** Yesu na me waxatin naxan yi, a kabe. Muxun naxanye yi biraxi a fɔxɔ ra, a yi a fala ne xa, a naxa, “N xa jɔndin fala e xa, n munma denkeleyaan sifani ito to Isirayila muxu yo yi. **11** N xa a fala e xa, muxu wuyaxi fama nen sa keli sogeteden nun sogegodode binni, e yi fa dɔxɔ Iburahima nun Isiyaga nun Yaxuba fema Ariyanna Mangayani. **12** Koni naxanye yi lan nun e xa so Ariyanna Mangayani, ne raminima nen tanden ma dimini, wugan nun jin naxinna denaxan yi.” **13** Yesu yi a fala kuntigin xa, a naxa, “Siga, a ligama i xa nen alo i denkeyaxi a ma kii naxan yi.” Kuntigina walikeen yi kendeya na waxatin yeteni. **14** Yesu yi siga Piyeri konni, a yi a bitan gilen furaxin li saxi a konni a fatin wolonxi a ma. **15** Yesu yi jaxanla yiin suxu, fati mawolonna yi a bejin, a keli, a ti, a wali folo a xa. **16** Jinbanna soxina, yamaan yi fa muxu wuyaxi ra Yesu fema yinna jaxine yi naxanye fɔxɔ ra. Yesu yi yinnane kedi a falan xɔn, a furetɔne birin nakendeya. **17** A na liga nen, alogo Nabi Esayi naxan fala, a na xa kamali, a naxa, “A en ma tɔrɔne nan tongoxi, en ma furene nan yi a fari.” **18** Yesu to yama gbeen to a rabilinni, a yi a fala a xarandiine xa, a e xa gidi daraan bode fɔxɔn na. **19** Sariya karamɔxɔna nde yi fa a fema, a naxa, “Karamɔxɔ, i siga dede, n siga i fɔxɔ ra.” **20** Yesu yi a yabi, a naxa, “Xulumaseene xima yinle nan na, xɔline yi e tɛɛn sa, koni hali n na n xunna sama denaxan yi, na mi n tan Muxuna Dii Xemen yii.” **21** A fɔxɔrabirana

nde yi a fala a xa, a naxa, “N Marigina, tin n xa sa n fafe maluxun singen.” **22** Yesu yi a yabi, a naxa, “Bira n fɔxɔ ra, a lu faxa muxune xa faxa muxune maluxun.” **23** Yesu yi dɔxɔ kunkin kui, a xarandiine yi siga a fɔxɔ ra. **24** E daraan xun ma, foye gbeen yi keli, a igeni maxa. Igen mɔrɔnne yi sa kunkin xun ma. Koni Yesu yi xima. **25** Xarandiine yi siga a fema, e yi a raxulun. E yi a fala, e naxa, “Marigina, nxu rakisi, nxu faxamaan ni i ra.” **26** Yesu yi e yabi, a naxa, “E gaxuma nanfera? E denkeleyaan mi gbo mum!” Na xanbi ra, a keli, a foyen nun ige mɔrɔnne yamari, e yi e raxara. **27** Muxune birin yi kabe, e naxa, “Muxu sifan mundun ito ra? Hali foyen nun igen mɔrɔnne a falan suxuma!” **28** Yesu yi siga Gadara yamanani daraan bode fɔxɔn na. Muxu firin yi a li na yi naxanye yi kelixi bilingan yireni, yinna jaxine yi e fɔxɔ ra. E yi xaje kati! Muxu yo mi yi suse sigan tiye na kiraan xɔn. **29** Yinnane yi e rasonxo e falan ti e xɔn, e naxa, “Alaa Dii Xemeni, i nanse fenma nxu fema? I faxi nxu jaxankataden nin ba benun waxatin xa a li?” **30** Xɔse kuru gbeen yi e degema na dɛxɔn ma nun. **31** Yinnane yi Yesu mafan, e naxa, “Xa i nxu kedima, nxu rasiga xɔse kuruni ito yi.” **32** Yesu yi a fala e xa, a naxa, “E siga.” Nayi, e sa so na xɔse kuruni. Xɔse kurun yi godo e giye geyaan ma, e sa faxa darani. **33** Muxun naxanye yi xɔsene kantanma, ne yi e gi, e siga taani. E sa na feene birin fala e nun feen naxan ligaxi na muxune xa yinna jaxine yi naxanye fɔxɔ ra. **34** Na ma, taa yi kaane birin yi sa Yesu ralan. E a to waxatin naxan yi, e yi a mafan, a xa keli e yamanani.

9 Yesu yi dɔxɔ kunkin kui, a darani gidi, a siga a kon taani. **2** Muxuna ndee yi fa xeme lebutenna nde ra a fema, a saxi a sa seni e yii. Yesu yi e denkeleyaan to, a yi a fala lebutenna xa, a naxa, “N ma diina, i bɔɓɛn xa sa, i yulubine bata xafari.” **3** Sariya karamɔxɔna ndee yi e miri, e naxa, “Xemeni ito Ala rayelefuma!” **4** Yesu yi e miriyaan kolon. A yi a fala, a naxa, “E mirima fe jaxi sifani itoe ma nanfera? **5** Mundun fala raxɔlo, ‘I yulubine bata xafari’ hanma, ‘Keli, i sigan ti?’ **6** N na a yitama e ra nen nayi fa fala senbena n tan Muxuna Dii Xemen yii dunuja yi, n muxune mafelu e yulubine ra.” A yi a fala lebutenna xa, a naxa, “Keli, i ya sa seen tongo, i siga i konni!” **7** Xemen yi keli, a siga a konni. **8** Yamaan to na to, e gaxu, e yi Ala tantun amasɔto a bata na senbe sifan fi muxune ma. **9** Yesu yi keli, a siga. A yi mudu maxinla nde to, a yi xili

Matiyu, a yi dāxi mudu maxilideni. Yesu yi a fala a xa, a naxa, “Bira n fōxō ra.” Matiyu yi keli, a bira a fōxō ra. **10** Yesu yi a dēgema Matiyu a banxini waxatin naxan yi, mudu maxili wuyaxi nun hake kan wuyaxi yi fa, e dāxō Yesu nun a xarandiine fēma e dēgedeni. **11** Farisi muxuna ndee na to waxatin naxan yi, e yi a fala a xarandiine xa, e naxa, “E karamōxōn nun mudu maxinle nun hake kanne e dēgema e bode xōn ma nanfera?” **12** Yesu yi e xuiin mē, a yi e yabi, a naxa, “Muxun naxan kende, na mako mi seribaana ma fō furetōne. **13** E siga, ε sa Kitabuna falani ito bunna fēsefese, a naxa, ‘Hinanna rafan n ma dangi saraxan na.’ Amasōto n mi faxi tinxin muxune xan xilideyi fō hake kanne.” **14** Yoni a xarandiine yi fa Yesu fēma, e yi a maxōdin, e naxa, “Nxu tan nun Farisi muxune sunna suxuma, koni nanfera i ya xarandiine mi sunna suxuma?” **15** Yesu yi e yabi, a naxa, “Naxalandi kanna nema jaxalandi tiine fēma waxatin naxan yi, e lan e xa sunu ba? Koni waxatina nde fama jaxalandi kanna bama nen e yē, e sunna suxuma nen na yi. **16** Muxu yo mi nōe dugi nenen tonge a yi dugi fonna beteren a ra amasōto a dugi nenen bōma nen a fonna ra, a yinla yi ragbo ayi. **17** Muxun mi manpa nenen se se sase fonna kui. Xa a na liga, manpa nenen se sase fonna kalama nen, manpaan yi bōxōn, se sase fonna yi kala. Koni manpa nenen sama se sase nenen nan kui, e firinna birin namarama nen nayi ki fajai.” **18** Yesu yi na falama e xa waxatin naxan yi, Yahudiya kuntigina nde yi fa a xinbi sin Yesu bun, a naxa, “N ma dii temen bata fāxa iki sa! Koni fa i yiin sa a ma, a niin birama a yi nen na yi.” **19** Na ma, Yesu yi keli, a bira a fōxō ra, e nun a xarandiine. **20** Naxanla nde yi na yi, jaxalan furen yi a ma xabu jēe fu nun firin. Na yi fa Yesu xanbi ra, a yi a yiin din a domaan lenben na. **21** Bayo a yi a mirixi a ma, a naxa, “Xa n na n yiin din a domaan na tun, n kende yama nen na yi.” **22** Yesu yi a firifiri, a yi a to, a yi a fala a xa, a naxa, “N ma dii temena, i bōjen xa sa, i ya denkeleyaan bata i rakendeya.” Naxanla yi kende ya na waxatin yeteni! **23** Awa, Yesu yi so kuntigina banxini, a xulen fene to e nun yamaan naxan yi wugama, **24** a naxa, “E mini! Dii temeni ito mi faxaxi, a xiin nen tun!” E birin yi gele a ma. **25** E to yamaan namini, Yesu yi so, a dii temen suxu a yiin ma, dii temen yi keli. **26** Muxune yi na feen xibarun mē na yamanan yiren birin yi. **27** Yesu keli mēnni waxatin naxan yi, danxuto firin yi bira a fōxō ra. E gbelegebele a fōxō ra, e naxa, “Dawudaa

Dii Xēmēna, kininkinin nxu ma!” **28** Yesu so banxini waxatin naxan yi, danxuto firin yi so a fēma banxin kui. A yi e maxōdin, a naxa, “E laxi a ra yati fa fala a n nōe ito lige nen ba?” E yi a yabi, e naxa, “Ōn, nxu fafe.” **29** Yesu yi a yiin din e yēene ra. A yi a fala, a naxa, “A xa liga ε xa alo ε denkeleyaxi a ma kii naxan yi.” **30** E yēene yi raba ayi. Yesu yi falan ti e xa a sōbeen na, a naxa, “Muxu yo nama feni ito kolon!” **31** Koni e yi siga, e sa Yesu a fe xibarun nali na yamanan yiren birin yi. **32** Awa, na xēmene yi sigama waxatin naxan yi, muxuna ndee yi fa xēmēna nde ra Yesu fēma naxan mi yi nōe falan tiye amasōto yinna jaxin nan yi a fōxō ra. **33** Yesu yinnan kedi waxatin naxan yi, bobon yi falan ti fōlō! Yamaan yi kabe, e naxa, “Ito jōxōnna munma to Isirayila muxune yē singen!” **34** Koni Farisi muxune yi a fala, e naxa, “Yinna mangan nan senben fixi a ma a yinnane kedi.” **35** Awa, Yesu yi siga taane nun banxidene yi, a sa yamaan xaran e salide banxine yi. A yi Ariyanna Mangayana fe Xibaru Fajin kawandin ba e xa, a yi muxune rakendeya furen sifan birin ma. **36** A yamaan toxi waxatin naxan yi, a yi kininkinin e ma, amasōto e xaminxi, e mali muxu mi yi na yi alo yēxēen naxanye kantan muxu mi na. **37** Nanara, Yesu yi sandan sa a xarandiine xa, a naxa, “Malo xaba daxin gbo koni a xaba muxune mi wuya. **38** E xēe kanna mafan, a xa walikēna ndee rasiga malo xabadeni.”

10 Yesu yi a xarandii fu nun firinne xili. A senben fi e ma a e xa yinna jaxine kedi, e mōn yi furetōn sifan birin nakendeya. **2** Na xera fu nun firinne xinle nan itoe ra. A fōlōna, Simōn, naxan mōn yi xili “Piyeri,” e nun a ngaxakedenna Andire nun Sebede a dii xēmēn Yaki nun a xunyēn Yoni **3** nun Filipi nun Barotolome nun Tomasi nun mudu maxinla Matiyu, e nun Alifaa dii xēmēn Yaki nun Tade **4** nun Simōn, e naxan ma a “Yahudiya siya xanuna,” e nun Yudasī Isakariyoti naxan Yesu yanfa, a a so yiini. **5** Yesu yi yamarine fi muxu fu nun firinni itoe ma, a naxa, “E nama siga siya gbetene yamanani hanma Samariya taane yi. **6** Koni ε siga Isirayila muxune fēma naxanye lōxi ayi alo yēxēene. **7** E siga, ε sa e kawandi, ε naxa, ‘Ariyanna Mangayaan bata maso.’ **8** E yi furetōne rakendeya, ε fāxa muxune rakeli sayani, ε dogonfontōne rakendeya, ε jinanne kedi. E seen naxanye sōtōxi ε mi ne saraxi, nayi ε bonne ki hali ε mi se rasuxu. **9** E nama xēma xali, hanma gbeti fixēna

hanma wure gbeeli gbananne, ε naxanye singanma ε tagixidin na, **10** hanma bōndunla ε sigatini, hanma doma firin, hanma sankidina, hanma dunganna. Amasōtō walikēen lan a yi a balon sōtō.” **11** “Awa, ε na taan li hanma banxidena, ε muxu kēdena nde fen, ε yi yigiya a konni han ε kelin waxatin naxan yi. **12** E na so banxini, ε naxa, ‘Ala xa bōje xunbenla lu banxini ito kui.’ **13** Xa na falan lanxi na banxi kui kaane ma, na duban xa lu e xōn. Koni xa na mi a ra, na duban mōn xa xete ε ma. **14** Xa muxune mi ε yisuxu, e mi e tuli mati ε falane ra banxina nde yi hanma taana nde yi, ε sanne rakunkun, ε kenla. **15** N xa jōndin fala ε xa, kiti sa lōxōni, Ala kininkinima nen Sodoma taan nun Gomora taan ma dangu na taan na!” **16** Yesu naxa, “E tuli mati, n bata ε xē alo yexēene kankone tagi. Nayi, ε kōta ayi alo sapine, ε findi sōntarene ra alo ganbane. **17** E a liga ε yeren ma amasōtō muxune ε suxuma nen, e siga ε ra e taan fonne fema ε makitideni, e yi ε bōnbō e salide banxine yi. **18** E sigama ε ra nen mangane nun kuntigine fema n tan ma fe ra, ε yi findi n serene ra e xa e nun siya gbetene xa. **19** E na ε suxu waxatin naxan yi, ε naxan falama ε nama xamin na fe ra. A waxatin na a li, ε naxan falama Ala na fima ε ma nen. **20** Amasōtō a mi findima ε tan ma fala ra. E falan tima ε Fafe Alaa Nii Sarijanxin nan xōn.” **21** “Muxune ε ngaxakedenne yanfama nen, e yi faxa, fafane fan na ligama nen e diine ra. Diine fan murutema nen e sōtō muxune xili ma, e yi findi e faxa sabun na. **22** Muxune birin ε rajaxuma nen n tan ma fe ra. Koni naxan na a yixōdōxō han a rajanna, na kisima nen. **23** E na ε besēnxōnya taana nde yi, ε ε gi mēnni, ε siga yire gbete yi. N xa jōndin fala ε xa, ε mi ε wanla rajanje Isirayila taane birin yi benun n tan Muxuna Dii Xemen xa fa.” **24** “Xarandiin mi dangu a karamōxōn na, konyin mi dangu a kanna ra. **25** Xarandiin na liga alo a karamōxōna, na bata lan. Konyin fan xa liga alo a kanna. Xa e bata denbaya kanna xili ba yinna mangan Belesēbu, e nde falama nen denbayaan fan ma dangu na ra!” **26** Yesu naxa, “Na ma, ε nama gaxu yamaan yēε ra. Fe luxunxine minima nen kenēnni, wundo feen birin kolonma nen. **27** N naxan falama ε xa dimini, ε na fala kenēnna ma. N na naxan kōyekōyen ε xa, ε na rawanga banxine xuntagi. **28** Muxun naxanye fati benden faxama, koni e mi nōε ε niin halage, ε nama gaxu ne yēε ra. Koni ε gaxu Ala yēε ra naxan fati benden nun niin halagima yahannama yi. (Geenna g1067) **29** Xolidi firin mi sare

gbanan firinna ra ba? Koni hali na xolidi keden pe mi birε bōxōni xa i Fafe Ala mi tin. **30** Hali ε xun sēxε keden kedenne, Ala e birin xasabin kolon. **31** Nanara, ε nama gaxu, ε tan fisa xolidi wuyaxi xa!” **32** Yesu naxa, “Naxan yo na a ti n ma fe ra yamaan yetagi, n fan na jōxōnna ligama a xa nen n Fafe Ala yetagi ariyanna yi. **33** Koni naxan yo na a mē n na yamaan yetagi, n tan fan n mema a ra nen n Fafe Ala yetagi ariyanna yi.” **34** Yesu naxa, “E nama ε miri fa fala n faxi bōje xunbenla nan na dunuja yi. N mi faxi bōje xunbenla xan na koni fō silanfanna. **35** N bata fa alogo dii xēmene xa keli e fafane xili ma, dii tēmene yi keli e ngane xili ma, jaxanle fan yi keli e mamene xili ma. **36** Muxune yaxune kelima e denbayane yetēen nin. **37** Naxan yo a nga hanma a fafe xanu dangu n tan na, na kanna mi findε n gbeen na. Naxan yo a dii xēmēna hanma a dii tēmēn xanu dangu n tan na, na kanna mi findε n gbeen na. **38** Naxan mi a faxa wudin tongoma, a bira n fōxō ra, na kanna mi findε n gbeen na. **39** Naxan na a niin makantan, na bōnōma ayi nen. Koni naxan na bōnō a niini n ma fe ra, na kisima nen.” **40** Yesu naxa, “Naxan na ε tan yisuxu, na bata n fan yisuxu. Naxan na n tan yisuxu, na bata na kanni suxu naxan n xexi. **41** Naxan na Alaa xerana nde yisuxu bayo Alaa xeraan to a ra, na kanna barayin sōtōma nen naxan nagidixi Alaa xerane ma. Naxan na tinxin muxuni suxu bayo a tinxin, na kanna barayin sōtōma nen naxan nagidixi tinxin muxune ma. **42** N xa jōndin fala ε xa, naxan na ige xunbenla gbansanna fi muxudina nde ma bayo n fōxōrabirana nde to a ra, na mi fulama a barayin na.”

11 Yesu yelin yamarine fiye a xarandii fu nun firinne ma waxatin naxan yi, a yi siga xaran tideni e nun kawandi badeni Galile yamanan taane yi. **2** Yoni yi Alaa Muxu Sugandixina wanle fe mē kasoon na, a yi a xarandiina ndee rasiga a fema. **3** E xa sa Yesu maxōdin, e naxa, “Yoni yi naxan ma fa fe falama, na nan i tan na ba, hanma nxu lan nxu xa muxu gbete nan legeden?” **4** Yesu yi e yabi, a naxa, “E naxan mema, ε yi a to, ε sa na fala Yoni xa. **5** Danxutōne seen toma, lebutenne sigan tima, dogonfontōne kēndeyaan sōtōma, tuli xōrine falan mema, faxa muxune kelima sayani, n ma falan Xibaru Fajin nalima yigēlitōne ma. **6** Sewan na kanna xa naxan mi birama tantanni n ma fe yi!” **7** Yoni a xarandiine yi sigama waxatin naxan yi, Yesu yi Yoni a fe fala fōlo yamaan xa, a naxa, “E siga nanse matodeyi tonbonni? Foyen sēxε ramaxan

ba? **8** Xa na mi yi a ra, ε siga nanse matodeyi? Xemen naxan maraberi baxi dugi fajin na ba? Koni muxun naxanye maraberi baxi na kiini, ne manga banxine nin! **9** Nayi, ε siga nanse matodeyi, nabiin ba? N xa a fala ε xa, ε bata nde to naxan gbo nabiin xa. **10** Amasoto Kitabun bata Yoni a fe fala, a naxa, 'N nan n ma xeraan nasigama i yee ra, naxan kirani tonma i xa.' **11** N xa njondin fala ε xa, muxun naxanye birin folo bari, Yoni gbo ne birin xa. Koni naxan xurun e birin xa Ariyanna Mangayani, na gbo Yoni xa. **12** Folo Yoni a waxatin ma han iki, e bata Ariyanna Mangayaan jaxankata. Gbalotone kataxi e xa a suxu. **13** Nabine kitabune nun Sariya Kitabun bata nabiya falane ti fa han fa doxo Yoni a waxatin na. **14** Xa ε tinje a feen me, ε a kolonma nen, Yoni nan Nabi Eli ra naxan yi daxe a xa fa. **15** Awa, xa tunla naxan xon, na xa a tuli mati!" **16** "Awa, n to muxune misale nanse ra iki? E luxi nen alo diidin naxanye sabaan soma loxo tideni e yi e xui ramini bonne ma, **17** e naxa, 'Nxu bata xulenna fe ε xa koni ε mi ε bodon. Nxu bata binbi wuga sign sa koni ε mi wuga!' **18** Yoni fa nen a mi donse don, a mi a min, bayo a yi sunni waxatin birin, e birin yi a fala, e naxa, 'Ninanna nan a foxo ra!' **19** N tan Muxuna Dii Xemen yi fa, n donseen don, n yi n min, e birin yi a fala, e naxa, 'Xemeni ito matol Fudimaan nun dolo minna nan a ra. Mudu maxinle nun hake kanne xoyin nan a ra!' Koni naxanye Alaa fe kolonna suxi, ne njondin yitama e kewanle xon ma nen." **20** Na xanbi ra, Yesu yi na taane yalagi folo, a bata yi kabanako fe wuyaxi liga denaxanye yi, bayo e muxune mi yi tinma e kewanle masare. **21** A yi a fala, a naxa, "Gbalon Korasin kaane yee ra! Gbalon Betasada kaane yee ra, bayo kabanako feen naxanye liga ε tagi, xa ne yi liga Tire taan nun Sidon taani nun, na kaane yi e xun xanbi soma e hakene yi nen, e kasa benbenle ragodo e ma nimisani, e doxo xubeni. **22** Nba, n xa a fala ε xa, fa fala Ala kininkininma nen Tire taan nun Sidon taan ma Kiti Sa Loxoni dangu ε tan na. **23** E tan Kaperrunan kaane, ε tema nen kore xonna ma ba? En-en, ε godoma laxira nin! Bayo kabanako feen naxanye bata liga ε tagi, xa na yi liga Sodoma taani nun, sa a mon yi na nun han to! (Hadēs g86) **24** N xa a fala ε xa, Ala kininkininma Sodoma kaane ma nen Kiti Sa Loxoni dangu ε tan na!" **25** Yesu yi a fala na waxatini, a naxa, "N Fafe Ala, kore xonna nun dunuja Marigina, n barikan birama i xa bayo i feen naxanye luxunxi xaxilimane nun fekolonne ma, i bata ne yita

diidine ra. **26** N Fafe, a i kenexi na kii nin. **27** N Fafe bata feen birin taxu n na. Muxu yo mi Alaa Dii Xemen kolon fo a Fafe Ala. Muxu yo mi Fafe Ala kolon fo a Dii Xemen e nun a Dii Xemen waxi a yita feni naxanye ra." **28** "E tan naxanye birin xadanxi, goron binyene ε tan naxanye xun ma, ε fa n ma, n xa matabun fi ε ma. **29** E n ma goron tongo gbelemen tongo, ε yi n ma xaranna suxu bayo n limaniyaxi, n nan n yete magodoxi, ε niine matabun sotoma nen. **30** Amasoto, n ma goron tongo gbelemen mi binya, n ma goronna yelefu."

12 Na waxatini, Yesu yi danguma xena nde ma Matabu Loxoni, kamen yi a xarandiine suxu e sansi tonsonne ratorondon folo, e yi e don. **2** Farisi muxune to na to, e yi a fala Yesu xa, e naxa, "A mato, i ya xarandiine feen naxan ligama na mi daxe Matabu Loxoni." **3** Yesu yi e yabi, a naxa, "E mi na xaranxi ba, kamen Dawuda nun a foxorabirane suxu waxatin naxan yi? **4** Na waxatini, a so nen Alaa banxini. A tan nun a foxorabirane yi buru ralixin don, muxun mi yi daxe a xa naxan don fo saraxaraline. **5** E munma Sariya Kitabun xaran ba? A sebexi naxan kui fa fala a saraxaraline walima saraxa badeni Ala Batu Banxini Matabu Loxon birin yi koni e mi yalagixi. **6** N xa a fala ε xa, fena nde be naxan gbo Ala Batu Banxin xa. **7** Kitabun naxa, 'Hinanna rafan n ma dangu saraxan na.' Xa ε yi na bunna kolon nun, ε mi yi yo kanna yalagima nun. **8** Bayo n tan Muxuna Dii Xemen nan Matabu Loxon kanna ra." **9** Yesu yi keli na, a siga e salide banxini. **10** Xemen nde yi na yi naxan yiin yi madonxi. E yi Yesu maxodin, e naxa, "A daxe dandanna yi ti Matabu Loxoni ba?" Amasoto e yi wama a tajege feni fena nde ma. **11** Yesu yi e yabi, a naxa, "Xa yexena ε tan nde keden yii, xa a sin yinla ra Matabu Loxoni, ε mi a rate ba? **12** Muxun fisa yexen xa pon! Nanara, a daxe muxun xa fe fajin liga Matabu Loxoni." **13** Na xanbi ra, a yi a fala xemen xa, a naxa, "I yiini bandun." Xemen yi a yiini bandun. A yiin yi kendeya alo a yiin bonna kii naxan yi. **14** Farisi muxune yi siga, e sa e bode to Yesu xili ma a faxe feen ma. **15** Yesu yi na kolon, a keli, a siga. Muxu wuyaxi yi biraxi a foxo ra. A yi e furetone birin nakendeya, **16** a yi e yamari, a e nama a fe fala bonne xa. **17** A na ligaxi nen, alogo Nabi Esayi naxan falaxi, na xa kamali, a naxa, **18** "Ala naxa, 'N ma walikeen ni i ra, n naxan sugandixi, n xanuntenna naxan n

kenenxi han! N nan n ma Nii Sarijanxin nagodoma a ma nen. A yi n ma kiti kenden nali siyane ma. 19 A mi fe matandin tiye, a mi sɔnxɔ sɔnxɔɛ. A mi falan tiye taan xun xɔn. 20 A mi xayɛ yidɔxini gire, a mi lenpun tumatɔɔn natuyɛ. Han a yi nɔɔn sɔtɔ kiti kenden xa. 21 Siyane e yigi sama nen a yi.” 22 Muxuna nde yi fa xeme danxutɔna nde ra Yesu fema, a mi yi nɔɛ falan fan tiye bayo jinan jaxin nan yi a fɔxɔ ra. Yesu yi a rakendeya, a nɔ falan tiye, a yi seen to. 23 Yamaan birin yi kabe e maxɔdinna ti, e naxa, “Dawudaa Dii Xemen nan ito ra ba?” 24 Farisi muxune to na mɛ, e yi a fala, e naxa, “A jinnan ke dima yinna mangan Belesɛbu barakan nin.” 25 Yesu yi e miriyaan kolon. A yi a fala e xa, a naxa, “Yengen yamanan naxan yitaxunxi, na yamanan kalama nen mafuren! Yengen tanden naxan kui hanma taana, na fan kalama nen. 26 Xa Setana nan Setana kedima, a mangayaan bata yitaxun yengeni. A sabatima nayi di? 27 Xa n jinnan ke dima Belesɛbu barakan nin, ɛ fɔxɔrabirane e kedima nanse xɔn nayi? Na ma, ɛ fɔxɔrabirane a yitama nen nayi fa fala yo mi ɛ xa! 28 Koni xa n jinnan ke dima Alaa Nii Sarijanxin barakan nin, na a yitama nen nayi fa fala Alaa Mangayaan bata ɛ li.” 29 “Muxu yo mi nɔɛ soɛ senbɛmana banxini, a yi a yii seene tongo, fɔ a senbɛmaan xidi singen. Na xanbi ra, a nɔɛ banxin kui seene tongɛ nen. 30 Xa muxun mi luxi n xa, na bata keli n xili ma. Xa nxu nun muxu yo mi malan, ne sigama ayi nen.” 31 “Nanara, n na a falama ɛ xa fa fala muxun yulubin naxan birin ligama e nun a fala jaxin naxan birin tima Ala ma, Ala e mafeluyɛ nen ne birin na. Koni muxu yo na Alaa Nii Sarijanxin nayelevu, na kanna mi mafeluyɛ mume! 32 Muxu yo fala jaxin ti n tan Muxuna Dii Xemen ma, Ala a mafeluyɛ nen. Koni muxu yo fala jaxin ti Alaa Nii Sarijanxin ma, Ala mi na kanna mafeluyɛ dunɔɔra yi hanma waxati famatɔni han habadan.” (aiɔn g165) 33 “Xa wudin binla fan, a bogin fan fanma ayi nen. Xa wudin binla kobi, a bogin fan kobima ayi nen. Bayo wudin kolonma a bogin nan xɔn. 34 ɛ tan sari bɔnsɔnne! ɛ nɔɛ fala fajin tiye di, bayo ɛ jaxu? Amasɔtɔ feen naxanye muxun bɔjɛni, a ne nan falama. 35 Muxu fajin fe fajin nan naminima a muxu fajiyani. Muxu jaxin yi fe jaxin namini a muxu jaxiyani. 36 N xa a fala ɛ xa fa fala muxune dentegen sama nen kiti lɔxɔni lan e fala fuune birin ma. 37 Bayo i ya fala tixine nan yoon fima i ma, e tan nan mɔn findima i yalagi xunna ra.” 38 Na xanbi ra, sariya karamɔxɔn nun Farisi muxuna

ndee yi falan ti a xa, e naxa, “Karamɔxɔ, nxu waxi a xɔn ma, nxu xa i to kabanako taxamasenna nde lige.” 39 Yesu yi e yabi, a naxa, “Iki muxune findixi muxu jaxine nun nafigine nan na, ɛ to n maxɔdinma kabanako taxamasenna ma. Koni ɛ mi kabanako fe yo toɛ ba Nabi Yunusa taxamasenna ra. 40 Nabi Yunusa kɔɛ saxan soge saxan ti yɛxɛ gbeen kui kii naxan yi, n tan Muxuna Dii Xemen fan kɔɛ saxan soge saxan tima na kii nin bɔxɔn bun ma. 41 Niniwa kaane tima nen Kiti Sa Lɔxɔni, e yi iki muxune yalagi bayo ne Yunusaa kawandin mɛ waxatin naxan yi, e xun xanbi so nen e hakene yi. Anu, fena nde be naxan gbo Yunusa xa. 42 Jaxalan Mangan naxan keli sogetede yiifanna ma, na tima nen kiti sa lɔxɔni, a yi iki muxune yalagi bayo a kelixi bɔxɔn danna nan na fa a tuli matideni Sulemani a fekolonna falane ra. Awa, n xa a fala ɛ xa, naxan gbo Sulemani xa, na be yi.” 43 “Yinna jaxin na xete muxun fɔxɔ ra waxatin naxan yi, a sigama yire yixaren nin, a sa a matabuden fen. Xa a mi yire yo to, 44 a a mirima nen nayi, a naxa, ‘N kelixi denaxan yi, n mɔn xa xete na.’ Nayi, a na xete na, xa a sa na kui genla li, a makɔxi, a yitɔnxi, 45 a sigama nen nayi, a sa fa yinna jaxi solofere gbɛteye ra naxanye jaxu dangu a tan na. Ne yi lu a fema. Na muxuna fe rajanna jaxuma ayi nen dangu a fɔlɔn na. A ligama na kii nin iki muxu jaxine fan na.” 46 Yesu yi falan tima yamaan xa waxatin naxan yi, a nga nun a xunyene yi fa, e ti tandeni, e yi waxi a xɔn ma, e xa falan ti Yesu xa. 47 Nanara, muxuna nde yi a fala a xa, a naxa, “I nga nun i xunyene tixi tandeni, e waxi i to feni.” 48 Yesu yi e yabi, a naxa, “Nga nun n xunyene findixi nde ra?” 49 Na xanbi ra, a yi a yiin ti a xarandiine ma, a naxa, “Nga nun n xunyene itoo nan na. 50 Bayo naxanye n Fafe Ala sagoon liga, naxan ariyanna yi, ngaxakeden xemɛmaan nun jaxalanmaan ne nan na, e nun nga.”

13 Na lɔxɔn yetɛni Yesu yi keli banxini, a siga daraan dexɔn ma, a sa dɔxɔ na yi. 2 Yama gbeen yi malan a fema. Nayi, a yi so kunkin kui, a dɔxɔ. Yamaan yi lu xareyaan na. 3 A fala wuyaxi ti e xa sandani, a naxa, “Xɛɛ biina nde yi mini, a siga a sansiin wolideni. 4 A yi sansiin wolima waxatin naxan yi, ndee yi bira kiraan xɔn ma, xɔline yi ne don. 5 Ndee yi bira fanyen fari, bende gbɛɛ mi yi denaxan yi. E yi soli mafuren, amasɔtɔ benden mi yi gbo na yi. 6 Sogen to te, ne yi lisi a ra, e xara bayo e salenne mi yi godoxi bɔxɔni ki fajni. 7 Sansina ndee yi bira sexɛ jali kanne tagi,

sexene yi gbo, e yi e don. **8** Koni ndee yi bira boxo fajini, e bogi, e keden kedenna birin yi keme soto hanma tonge sennin, hanma tonge saxan. **9** Xa tunla naxan xon, na xa a tuli mati!" **10** Xarandiine yi fa Yesu fema, e yi a maxodin, e naxa, "Nanfera i falan tima yamaan xa sandani?" **11** Yesu yi e yabi, a naxa, "Ariyanna Mangayaan wundo feene kolonna bata so e yii koni a mi soxi e tan yii. **12** Amasoto seen muxun naxan yii, nde mon soma nen na yii, a yi gbo ayi. Koni se mi muxun naxan yii hali naxan di a yii, na bama a yii nen. **13** Nanara, n falan tima ne xa sandan nin. Amasoto e seen matoma nen han, koni e mi a yigbema, e tuli matima nen han, koni e mi fe mema, e mon mi a famuma. **14** Na ma, Nabi Esayi a nabiya falan bata kamali nayi, a naxa, 'E tuli matima nen han, koni e mi fefe famuma. E seen matoma nen han, koni e mi a yigbema. **15** Amasoto yamani ito bonen bata xodxo ayi. E bata e tunle dutun, e yi e yeene raxi. Na ma, e mi fa seen toma e tunle yi falan me, e xaxinla yi feen famu. E yi xete n ma, n yi e rakendeya.'" **16** "Koni sewana e xa, amasoto e yeene bata seen to, e tunle mon bata feen me. **17** N xa pondin fala e xa, nabi wuyaxi nun tinxin muxu wuyaxi yi waxi a to feni e naxan toma, koni e mi a to, e mon mi a me e naxan mema." **18** Yesu naxa, "E tuli mati, e yi sansi wonla fe sandan bunna kolon. **19** Naxanye na Ariyanna Mangayaan falan me, koni e mi a famu, Fe Naxin Kanna fama nen, a yi a xasun e boneni. Ne luxi nen alo sansiin naxanye bira kiraan xon ma. **20** Sansiin naxanye bira fanyen fari, ne luxi nen alo muxun naxanye falan me, e yi a suxu sewani sa! **21** Koni salen mi e bun, e mi buma. Tonon nun besenxonyaan na fa waxatin naxan yi Alaa falana fe ra, e birama nen tantanni xulen! **22** Sansiin naxanye bira sexe jiali kanne tagi, ne luxi nen alo muxun naxanye falan mema, koni dunuja xaminne nun nafulu feen kunfan yi a liga e Alaa falan bejin, a tonon mi lu e ma. (aiŋ g165) **23** Sansiin naxanye bira boxo fajini, ne luxi nen alo muxun naxanye falan me, e yi a famu. E bogima nen, ndee yi bogi keme ramini, ndee tonge sennin, ndee tonge saxan." **24** Yesu yi sanda gbete sa e xa, a naxa, "Ariyanna Mangayaan luxi nen alo xemen naxan sansi fajin woli a xeen ma. **25** Koni yamaan yi xima waxatin naxan yi, a yaxun yi fa xaratu kesen woli maali, a siga. **26** E to sabati, maala yi a biye ayi, xaratun fan yi a biye ayi. **27** Xee kanna walikene yi fa a fema, e naxa, 'Nxu fafe, i mi sansi fajin xan woli i ya xeen

ma ba, xaratuni ito kelixi minen yi?" **28** A yi e yabi, a naxa, 'N yaxuna nde nan na ligaxi.' Walikene yi a maxodin, e naxa, 'I waxi a xon nxu xa sa e matala ba?' **29** A yi e yabi, a naxa, 'En-en de! E nema xaratune tale waxatin naxan yi, e maala nde fan talama nen. **30** E xa a lu na, maala nun xaratun xa gbo e bode xon ma han a xaba waxatina. N na a fale n ma walikene xa na waxatini, n naxa, e xaratun singen malan, e yi a raxidi alogo e xa sa teeni. Na xanbi ra, e maala fan malan, e yi a sa n ma sagan kui.'" **31** Yesu yi sanda gbete sa e xa, a naxa, "Ariyanna Mangayaan luxi nen alo sansi kese xuridina, muxun naxan sima a xeen ma. **32** Hali a to xurun sansiin birin xa, koni a na gbo waxatin naxan yi, a danguma nen sii seene birin na, a findi wudi binla ra, xoline yi e teen sa a yi." **33** Yesu yi sanda gbete sa e xa, a naxa, "Ariyanna Mangayaan luxi nen alo burun nate sena jaxanla naxan tongo, a yi a sa buru fujin benbeli keden yi, a yi a yimaxa, a birin yi te." **34** Yesu yi feni itoe birin fala yamaan xa sandane yi. A mi yi falan tima e xa, xa a mi sandan sa. **35** Nayi, nabina falan yi kamali, a naxa, "N sandane nan sama. N wundo fonne nan yebama naxanye yi luxunxi xabu dunuja da." **36** Na xanbi ra, Yesu yi keli yamaan fema, a so banxini. A xarandiine yi fa a fema, e naxa, "Xaratun naxanye xeen ma, na sandan bunna fala nxu xa." **37** Yesu yi e yabi, a naxa, "Xemen naxan sansi fajin woli, n tan Muxuna Dii Xemen nan na ra. **38** Xeen, dunuja nan na ra. Sansi fajina, Ariyanna Mangayaan muxune nan ne ra. Xaratu kesene, Fe Naxin Kanna muxune nan ne ra. **39** Yaxun naxan xaratu kesen wolin xeen ma, Yinna Mangan nan na ra, Setana. Malo xabana, waxati rajanna nan na ra, malo xabane nan malekane ra. (aiŋ g165) **40** Xaratun ba fena maali, a sa teeni, a ligama na kii nin waxati rajanni. (aiŋ g165) **41** N tan Muxuna Dii Xemen, n nan n ma malekane rasigama nen. Naxanye birin muxune birama tantanni e nun fe jaxi rabane birin, malekane ne malanma nen, e yi e ba n ma Mangayani. **42** E yi e woli sulun teeni, wugan nun jin naxinna denaxan yi. **43** Koni tinxin muxune yilenma nen alo sogena e fafe Alaa Mangayani. Xa tunla naxan xon, na xa a tuli mati!" **44** Yesu naxa, "Ariyanna Mangayaan luxi nen alo nafulu gbeen naxan luxunxi xeen ma. Xemen, nde yi na to, a mon yi a luxun. Nayi, a sewaxin yi sa a yii seene birin mati, a xete, a fa na boxon sara." **45** Yesu naxa, "Ariyanna Mangayaan mon luxi nen alo yulan naxan boxon bun nafunla fenma. **46** A to

geme fani fajin to naxan sare gbo han, a yi xete a konni, a yi sa a yii seene birin mati, a sa na gemen sara.” 47 Yesu naxa, “Ariyanna Mangayaan luxi nen alo yexe suxun yalaan naxan wolin baani, a yi yexen siyane birin suxu. 48 Yalaan na rafe waxatin naxan yi, yexe suxune yi a bandun. E yi a rate xareyaan na, e dɔxɔ. E yi yexe sensenne malan debene kui, e yi a jaxine woli ayi. 49 A ligama na kii nin waxati rananni. Malekane sigama nen, e muxu jaxine malan e danna, keli tinxin muxune tagi, (aiɔn g165) 50 e yi e woli sulun teeni, wugan nun jin naxinna denaxan yi.” 51 Yesu yi e maxodin, a naxa, “E bata feni itoe famu ba?” E yi a yabi, e naxa, “Ɖn.” 52 A yi a fala e xa, a naxa, “Nanara, sariya karamɔxɔn naxanye birin bata xaran lan Ariyanna Mangayana fe ma, ne luxi nen alo banxi kanna naxan nafulu nenene nun a fonne raminima a se ramaradeni.” 53 Yesu yelin sandane se waxatin naxan yi, a yi keli menni, 54 a xete a konni a maxuruxi taan naxan yi. A e xaran e salide banxini waxatin naxan yi, naxanye a xuiin me, ne yi kabe. E maxodinna ti, e naxa, “A xaxili sifani ito nun kabanako senbeni ito sɔtɔxi minen yi? 55 Kamuderena dii xemen xa mi ito ra ba? Mariyama a diin xa mi a ra ba? Yaki nun Yusufu nun Simɔn nun Yudasida tada xa mi ito ra ba? 56 A xunye dii temene xa mi dɔxi be ba? A tan feni itoe birin sɔtɔxi minen yi?” 57 E yi e me a ra. Yesu yi a fala e xa, a naxa, “Nabiin binye yiren birin yi fo a konna nun a denbayani.” 58 A mi kabanako fe wuyaxi liga na amasoto e mi yi denkeleyaxi.

14 Na waxatini, Galile mangan Herode yi Yesu a fe me. 2 A yi a fala a foxorabirane xa, a naxa, “Yoni Marafu Tiin nan a ra. Yoni bata keli sayani! Nanara, senbena a yii, a kabanako feene liga.” 3 A na fala nen, amasoto a bata yi Yoni suxu nun, a yi a xidi, a yi a sa kasoon na Herodiyade a fe ra, naxan yi findixi Herode fafaxakedenna Filipi a jaxanla ra nun. 4 Yoni yi a falama Herode xa, a naxa, “A mi daxa, i xa Herodiyade futu!” 5 Herode yi waxi a xɔn ma a xa Yoni faxa, koni a yi gaxuxi yamaan yee ra bayo ne yi Yoni yatexi nabiin nan na. 6 Awa, Herode bari loxɔn sumunna a lixina, Herodiyade a dii temen yi a bodon yamaan yetagi. Na yi Herode kenen han 7 a yi saratin tongo na sungutunna xa, a yi a kolo, a a na a xandi sese yi, a na soma a yii nen. 8 A nga yi a radin alogo a xa ito nan fala, a naxa, “Yoni Marafu Tiin xunna so n yii wure lefaan ma be.” 9 Manga Herode niin yi raforo a

ma, koni bayo a bata yi saratin tongo a muxu xilixine yee xori, a yi yamarin fi, a na xa liga. 10 Nayi, e sa Yoni xunna sege a de kasoon na. 11 E yi fa a xunna ra wure lefaan ma, e yi a so sungutunna yii, a siga a ra a nga fema. 12 Yoni a xarandiine yi fa a binbin tongo, e sa a maluxun. Na xanbi ra, e yi sa a fala Yesu xa. 13 Yesu na feen xibarun me waxatin naxan yi, a siga kunkin kui a danna yire madunduxina nde yi. Yamaan to na me, e keli e taane yi, e siga a foxo ra e sanna ma. 14 Yesu to mini kunkin kui, a yi yama gbeen to, a kininkinin e ma, a yi e furetone rakendeya. 15 Ninbanna ra, a xarandiine yi e maso a ra, e naxa, “Koe bata so, burunna nan nun be ra, yamaan bepin, e xa siga banxidene ra, alogo e xa sa donseen sara e yete xa.” 16 Yesu yi e yabi, a naxa, “Hali e mi siga, e tan yeteen xa donseen so e yii.” 17 E yi Yesu yabi, e naxa, “Naxan nxu yii be buru xun suulun nun yexe firin.” 18 Yesu naxa, “E fa ne ra be.” 19 A yi a fala yamaan xa, a e xa dɔxɔ sexene fari. Na xanbi ra, a yi na buru xun suulunne nun yexe firinne tongo, a yi a yeen nate kore, a barikan bira Ala xa, a burune yigira. A yi e so a xarandiine yii, e yi e yitaxun yamaan na. 20 E birin yi e dege, e lugo ken! A xarandiine yi debe fu nun firin nafe e dungi dungi donxene ra. 21 Muxun naxanye e dege, ba jaxanle nun diidine ra, muxu wuli suulun jɔxɔn. 22 Na xanbi ra, Yesu yi a xarandiine rasiga kunkin kui a yee ra daraan kidi ma. A tan yi lu xanbin na, a yi yamaan naxete. 23 A to yelin yamaan nasige, a kedenna yi te गयाan fari Ala maxandideni. A yi lu na han koe yi so. 24 Kunkin bata yi siga daraan xun ma pon! Igen moronne yi lu kunkini maxe amasoto foye gbeen bata yi a xun sa e ma. 25 Yesu yi fa sigan tiye igen fari, a yi sa e li subaxa makedini. 26 A xarandiine to a to sigan tiye igen fari, e gaxu kati! E gbelegbele, e naxa, “Muxun yelenna nan ito ra!” 27 Yesu yi falan ti e xa mafuren, a naxa, “E wekile, n tan nan a ra. E nama gaxu!” 28 Piyeri yi falan ti, a naxa, “Marigina, xa i tan nan a ra yati, n yamari a n xa siga i fema igen fari.” 29 Yesu yi a yabi, a naxa, “Fa be!” Nayi, Piyeri yi keli kunkin kui, a sigan ti folo igen fari siga Yesu fema. 30 Koni a toxina a foyen gbo, a yi gaxu, a godo folo igen bun ma. A gbelegbele, a naxa, “Marigina, n nakisi.” 31 Yesu yi a yiin nasiga mafuren! A yi a rate, a naxa, “I ya denkeleyaan xurun. I sikexi nanfera?” 32 E firinna birin yi dɔxɔ kunkin kui, foyen yi a raxara. 33 Xarandiin naxanye yi kunkin kui, ne yi e xinbi sin Yesu bun ma, e naxa, “Nondin nan a ra yati, Alaa Dii

Xemen nan i tan na!” 34 E to daraan gidi, e sa xaren li Genesareti yamanani. 35 Yamaan yi Yesu kolon menni. Na ma, e xeraan nasiga na rabilinna taane birin yi, e yi fa e furetone ra Yesu fema. 36 E yi a mayandi, a xa tin furetone xa e yiine din a doma gbeen lenben na. Naxanye birin yi e yiin dinma a ra, ne birin yi kende yama nen.

15 Na xanbi ra, Farisi muxuna ndee nun sariya karamoxone yi keli Yerusalen taani. E fa Yesu fema, e yi a maxodin, e naxa, 2 “Nanfera i ya xarandiine mi en benbane namun feene suxuma? Benun e xa donseen don e mi e yiin naxama en ma dinan kiin ma.” 3 Yesu yi e yabi, a naxa, “E fan Alaa yamarin kalama e yete namun feene ma nanfera? 4 Bayo Ala naxa, ‘I baba nun i nga binya. Naxan na a baba danga hanma a nga, e na kanna faxa.’ 5 Koni e tan naxa, a naxan na a fala a fafe xa hanma a nga, a naxa, ‘I yi maliin naxan sotoma n na nun, n bata na fi Ala ma’ 6 hali na kanna nama fa a fafe binya na maliin na. Nayi, e bata Alaa falan kala e namunna fe ra. 7 E tan nafigine! Nabi Esayi waliyiya falan naxan ti e fe ra, jondin na a ra, a naxa, 8 ‘Ala naxa, yamani ito n binyama e deen nin koni e bojen makuya n na pon! 9 E n batuma fuyan! Bayo e xaranna findixi adamadiine yamari xaraxine nan gbansan na!’” 10 Na xanbi ra, Yesu yi yamaan xili a fema. A yi a fala e xa, a naxa, “E tuli mati, e yi ito famu. 11 Seen naxan soma muxun de, na mi a sarijanna kalama fo falan naxan minima a de.” 12 A xarandiine yi fa Yesu fema, e naxa, “I mi a kolon ba, fa fala i ya falan bata Farisi muxune xolo?” 13 Yesu yi e yabi, a naxa, “N Fafe naxan ariyanna yi, na mi si seen naxanye siki, ne birin talama nen. 14 E e lu na, danxutone nan e ra danxutone yee ra. Xa danxutoon danxutoon yii rasuxu, e firinna birin birama nen yinla ra.” 15 Piyeri yi falan ti, a naxa, “Sandani ito bunna fala nxu xa.” 16 Yesu yi a fala e xa, a naxa, “E fan munma xaxili soto ba? 17 E mi a kolon ba? Seen naxan na so muxun de, na godoma a kui nen, na xanbi ra, a mini a fatini. 18 Koni falan naxan minima muxun de, na kelima a bojen nin, na nan muxune sarijanna kalama. 19 Bayo miriya jaxine kelima muxun bojen nin, a yi a ti muxu faxan nun yalunyaan nun yanga suxun nun mujan nun wule sere baan nun konbin ma. 20 Na feene nan muxune sarijanna kalama. Koni i na i dege i yiin naxataren na, na mi muxune sarijanna

kalama.” 21 Yesu yi keli na, a siga Tire taan nun Sidon taan yamanani. 22 Kanan kaa jaxanla nde yi na yi, na yi fa Yesu fema. A gbelegbelema, a naxa, “N fafe, Dawudaa Dii Xemena, kininkinin n ma! Ninanna n ma dii temen foxo ra, a toroxi han!” 23 Koni Yesu mi fala yo ti a xa. Yesu a xarandiina ndee yi fa a fema, e yi a mafan, e naxa, “Jaxanli ito rasiga! A biraxi en foxo ra, a gbelegbelema.” 24 Awa, Yesu yi e yabi, a naxa, “N mi faxi muxu gbete ma fo Isirayila kaa tununxine alo yexene.” 25 Awa, na jaxanla yi fa, a yi a xinbi sin Yesu bun ma, a yi a fala, a naxa, “N fafe, n mali.” 26 Yesu yi sandan sa a xa, a naxa, “A mi lan i xa diidine donseen sa barene bun ma.” 27 Jaxanla yi a yabi, a naxa, “N fafe, jondin nan na ra. Koni hali barene donse yolonxine donma nen e kanna naxanye rayolonma boxoni.” 28 Nayi, Yesu yi a yabi, a naxa, “Nga jaxanla, i ya denkeleyaan gbo! I rafan feen bata liga i xa.” Na waxatin yeteni, a dii temen yi kende ya. 29 Yesu yi keli na yi, a siga Galile Daraan dexon ma. A yi te गयाan fari, a doko. 30 Yama gbeen yi fa a fema, e fa lebutenne nun danxutone nun madontone nun bobone nun fureto wuyaxi gbete ye ra, e yi e sa Yesu bun ma. A yi e rakende ya. 31 Yamaan to a to, fa fala bobone falan tima, madontone bata kende ya, lebutenne bata sigan ti, danxutone seen toma, e kabe. E yi Isirayilaa Ala tantun. 32 Yesu yi a xarandiine xili a fema, a yi a fala e xa, a naxa, “Yamani ito kininkininna bata n suxu bayo e bata soge saxon ti n fema, donse mi fa e yii iki. N mi waxi e rasiga feni kamena e ma. Xa na mi a ra, e fangan jannma nen kira yi.” 33 Xarandiine yi a maxodin, e naxa, “Nxu tan donseen sotoma minen yi wulani ito yi naxan yama gbeeni ito luge?” 34 Yesu yi e maxodin, a naxa, “Buru xun yoli e yii?” E yi a yabi, e naxa, “Buru xun solofere, e nun yexedi dando nan nxu yii.” 35 Yesu yi yamaan xili a e xa fa doko boxon ma. 36 Na xanbi ra, a buru xun soloferen nun yexene tongo, a barikan bira Ala xa. A yi e yigira, a yi e so a xarandiine yii, xarandiine yi e yitaxun yamaan na. 37 E birin yi e dege, e lugo. Xarandiine yi a dungi dungine matongo, e debe solofere rafe ne ra. 38 Xemen naxanye na don, ba jaxanle nun diidine ra, muxu wuli naanin. 39 Na xanbi ra, Yesu yi yamaan nasiga, a doko kunkin kui, a siga Magadan yamanani.

16 Farisi muxuna ndee nun Saduse muxuna ndee yi fa Yesu fema alogo e xa a kejaan fese fese, e a maxodin a xa taxamasenna yita e ra keli ariyanna yi.

2 Yesu yi e yabi, a naxa, “Xa kuyeni gbeelixi jinbanna ra ε a falama nen a kuye faji yibama nen tila. 3 Xotɔnni xa kuyeni gbeelixi ε naxa, ‘Tulen famaani ni i ra.’ E nɔε kore xonna matɔε nen ε yi a bunna kolon. Koni ε mi nɔε waxatini ito feene bunna kolonjɛ. 4 Iki muxune findixi muxu jaxine nun nafigine nan na, ε to n maxodinma kabanako taxamasenna ma. Koni ε mi sese toma xa naxan mi findixi Yunusa taxamasenna ra.” Na xanbi ra, a keli e fema, a yi siga. 5 Xarandiine yi gidima daraan kidi ma waxatin naxan yi, e yi jinan, e mi buru xali e yii. 6 Yesu yi a fala e xa, a naxa, “E a liga ε yeren ma Farisi muxune nun Saduse muxune burun nate sena fe ra.” 7 E falan ti fɔlɔ e bode tagi, e naxa, “A ito falama nen bayo en mi faxi buru ra en yii.” 8 Yesu yi a kolon e yi naxan falama. Nanara, a yi e maxodin, a naxa, “E nanse falama ε bode tagi, a ε mi faxi burun na? E denkeleyaan xurun jɛ? 9 E munma xaxili soto ba? E bata jinan na xɔn ba, n muxu wuli suulunna dege waxatin naxan yi buru xun suulunna ra, ε debe yoli rafe buru dungi dungi dɔnxene ra? 10 Hanma buru xun soloferen naxan yitaxun muxu wuli naaninna ra, ε debe yoli rafe buru dɔnxene ra na yi? 11 Nanfera ε mi a bunna kolonxi fa fala n mi burun xan ma fe falama ε xa. N naxa, ‘E a liga ε yeren ma Farisi muxune nun Saduse muxune buru rate sena fe ra!’” 12 Na xanbi ra, xarandiine yi a kolon, a mi yi a falama e xa a e xa a liga e yeren ma burun nate sena a fe yi naxan buruni, koni fɔ Farisi muxune nun Saduse muxune xaranna fe yi. 13 Yesu yi siga Sesariya taani Filipi yamanani, a yi maxodinni ito ti a xarandiine ma, a naxa, “Yamana a falama a nde n tan Muxuna Dii Xɛmɛn na?” 14 E yi a yabi, e naxa, “Ndee naxa, a Yoni Marafu Tiin nan i tan na. Bonne naxa, a Nabi Eli nan i tan na. Nde gbɛtɛye fan naxa, a Yereimi nan i tan na hanma nabina nde.” 15 A yi e maxodin, a naxa, “E tan go, ε tan naxa di? Nde n tan na?” 16 Simɔn Piyeri yi a yabi, a naxa, “Alaa Muxu Sugandixin nan i tan na, habadan Alaa Dii Xɛmena.” 17 Yesu yi a yabi, a naxa, “Sewana i tan xa Simɔn, Yunusaa dii xɛmena, bayo adamadi mi ito makenenxi i xa, fɔ n fafe Ala naxan ariyanna yi. 18 Nanara, n na a falama i xa, Piyeri, gɛmɛn nan i tan na, n nan n ma banxin tima gɛmɛn naxan fari, n ma denkeleya yamana. Hali laxira so deene mi nɔɔn sɔtɛ n ma denkeleya yamaan ma mumɛ! (Hadɛs g86) 19 N na Ariyanna Mangayaan so deen jinna soma i yii nen. I na tɔnna dɔxɔ feen naxan na dunɔja yi, Ala tɔnna dɔxɔma nen na ra ariyanna yi. I

na tin feen naxan ma dunɔja yi, Ala tinma nen na ma ariyanna yi.” 20 Na xanbi ra, Yesu yi a xarandiine yamari, a e nama a fala muxu yo xa fa fala Alaa Muxu Sugandixin nan a tan na. 21 Fɔlɔ na waxatin ma, Yesu yi a yɛba fɔlɔ a xarandiine xa, a naxa, a fɛrɛ mi na fɔ a xa siga Yerusalem taani, a sa tɔrɔ wuyaxi soto yamaan fonne nun saraxarali kuntigine nun sariya karamɔxɔne yii, e yi a faxa, a mɔn yi keli sayani a soqe saxande lɔxɔni. 22 Piyeri yi Yesu ba bonne fema, a Yesu maxadi fɔlɔ, a naxa, “Marigina, Ala xa i tanga na ma, na nama liga i ra mumɛ!” 23 Yesu yi a yɛɛ rafindi a ma, a yi a fala Piyeri xa, a naxa, “Setana, fata n ma! I kataxi n natantan feen nan na. I mi i mirima Alaa feene ma fɔ adamadiine.” 24 Na xanbi ra, Yesu yi a fala a xarandiine xa, a naxa, “Xa muxu yo waxi bira feni n tan fɔxɔ ra fɔ a xa a mɛ a yɛtɛ ra, a yi a yɛtɛ faxa wudin tongo, a bira n fɔxɔ ra. 25 Bayo naxan waxi a niin nakisi feni, na bɔnɔma ayi nen, koni naxan bɔnɔma a niini n tan ma fe ra, na kisima nen. 26 Xa muxun dunɔja birin soto, a bɔnɔ a niini habadan, na tɔnɔn nanse ra? Muxun nɔε nanse fiyɛ, alogo a niin mɔn xa kisi? 27 Bayo n tan Muxuna Dii Xɛmɛn fama nen n Fafe Alaa binyeni, nxu nun a malekane. N yi muxun birin saranna fi lan a kɛwanle ma. 28 N xa jɔndin fala ε xa, muxuna ndee be e mi faxɛ fɔ e n tan Muxuna Dii Xɛmɛn to fɛ n ma mangayani.”

17 Xii sennin danguxina, Yesu yi Piyeri nun Yaki nun a ngaxakedenna Yoni tongo, a siga e ra e danna geya gbeen fari. 2 A kɛjaan yi masara e yɛɛ ra yi, a yetagin yi lu mayilenjɛ alo sogena. A dugine yi fixa ayi alo kenenyana. 3 Na waxatin yeteni, Nabi Musa nun Nabi Eli yi mini kenenni e yetagi, e yi lu falan tiyɛ Yesu xa. 4 Piyeri yi a fala Yesu xa, a naxa, “Marigina, a lanxi bayo nxu be. Xa i waxi a xɔn ma, n xa gage saxan ti be, i gbeen keden, Nabi Musa gbeen keden, Nabi Eli gbeen keden.” 5 A yi falan tima waxatin naxan yi, kunda mayilenxin yi godo e xun ma, fala xuiin yi keli na kundani, a naxa, “N nafan Dii Xɛmɛn nan ito ra naxan bata n kɛnen ki faji, ε tuli mati a xuiin na!” 6 Xarandiine na mɛ waxatin naxan yi, e gaxu kati, han e sa felen, e yetagine yi lan bɔxɔn ma. 7 Yesu yi fa e fema, a yi a yiin din e ra, a naxa, “E keli, ε nama gaxu!” 8 E yi e yɛɛ rakɔpin, e mi muxu yo to fɔ Yesu. 9 E yi godoma geyaan na waxatin naxan yi, Yesu yi e yamari, a naxa, “E feen naxan toxi, ε nama a fala muxu yo xa han n tan Muxuna Dii

Xemen yi keli sayani.” 10 Xarandiine yi Yesu maxodin, e naxa, “Sariya karamoxone a falama nanfera nayi fa fala Nabi Eli nan singe fama?” 11 Yesu yi e yabi, a naxa, “Nabi Eli nan singe fama yati, a yi feene birin yiton. 12 Koni n xa a fala ε xa fa fala Eli bata yelin fe koni yamaan mi a kolon, e yi e rafan feene birin liga a ra. Awa, e n tan Muxuna Dii Xemen fan toroma nen na kiini.” 13 Na xanbi ra, xarandiine yi a kolon fa fala a falan tima Yoni Marafu Tiin nan ma fe ma. 14 E fa yamaan fema waxatin naxan yi, xemena nde yi fa Yesu fema, a yi a xinbi sin a bun ma, 15 a naxa, “N fafe, kininkinin n ma dii xemen ma. Gan furen nan a fari, a toroxi kati, a bata bira teeni sanja yi wuyaxi hanma igeni. 16 N bata fa a ra i ya xarandiine fema koni e mi noxi a rakendeye.” 17 Yesu yi a yabi, a naxa, “E tan denkeleyatarene nun tinxintarene, n xa lu ε fema han waxatin mundun yi? N xa dija ε xa han waxatin mundun yi? Fa diin na n fema!” 18 Yesu yi yinnan yamari, a xete a foxo ra. Nayi, a dii xemen yi kendeya na waxatin yeteni. 19 Na xanbi ra, xarandiine yi siga Yesu fema e danna, e yi a maxodin, e naxa, “Nanfera nxu tan mi noxi yinnan kede?” 20 Yesu yi e yabi, a naxa, “Bayo ε denkeleyaan xurun. N xa jondin fala ε xa. Xa denkeleyana ε yi, hali a xurun alo sansi kese xurudina, ε nœ a fale nen geyani ito ma, ε naxa, ‘Keli be, i siga menni!’ a yi siga. E nœ feen birin lige nen!” 22 Xarandiine birin e malan e bode xon ma waxatin naxan yi Galile yamanani, Yesu yi a fala e xa, a naxa, “N tan Muxuna Dii Xemen soma nen muxune yii, 23 e yi n faxa. Koni n mon kelima nen sayani a soge saxande loxoni.” Xarandiine nii yi rajaxu e ma katil! 24 Yesu nun a xarandiine Kaperunan taan li waxatin naxan yi, Ala Batu Banxin mudu maxinle yi fa Piyeri fema, e yi a maxodin, e naxa, “I karamoxon mi Ala Batu Banxin mudun fima ba?” 25 Piyeri yi e yabi, a naxa, “A fima nen.” Piyeri so banxini waxatin naxan yi, Yesu singe yi falan ti, a naxa, “Simon, i mirixi a ma di? Dunuja mangane mudun maxilima nde ra? E diine ba, hanma muxu gbete?” 26 Piyeri yi a yabi, a naxa, “Muxu gbete.” Yesu yi a fala, a naxa, “Na bunna neen, hali a diine mi a fi. 27 Koni nxu mi waxi a xon ma, nxu xa muxuni itoe rafan. Nanara, siga baani, i sa konna bira. I na yexe singen naxan suxu, i a deeni bi, i gbeti gbanan keden toma nen a de, naxan lanje en ma mudun ma. I siga na ra, i sa i gbeen nun n gbeen fi.”

18 Xarandiine yi fa Yesu fema na waxatini, e yi a maxodin, e naxa, “Nde gbo birin xa Ariyanna Mangayani?” 2 Yesu yi diidina nde xili, a yi a ti e birin yetagi. 3 Yesu yi a fala, a naxa, “N xa jondin fala ε xa, xa ε mi maxete, ε liga alo diidine, ε mi soe Ariyanna Mangayani mume! 4 Nanara, naxan yo na a yete magodo alo diidini ito, na gbo dangu a birin na Ariyanna Mangayani. 5 Naxan yo mon na diidini ito sifani suxu n xinli, na bata n tan yisuxu.” 6 “Diidini itoe naxanye bata denkeleya n ma, xa muxu yo ne bira yulubini, a fisa na kanni geme gbeen xidi a kœ ra, a woli baan tilinna ma.” 7 “Gbalon dunuja muxune yee ra bayo feen naxanye yamaan birama yulubini. A fere mi na fo na fe sifane xa fa koni e fatama muxun naxanye ra, gbalon na kanne yee ra! 8 Xa i yiina hanma i sanna i birama yulubini, a sege a ra, i yi a woli ayi! A fisa i yii dungin nun i san dungi kanna xa so habadan nii rakisini, benun i yii firinna nun i san firin kanna xa woli yahannama teeni. (aiōnios g166) 9 Xa i yeen nan i bire yulubini, a ba na, i yi a woli ayi! A fisa i yee keden kanna yi so habadan nii rakisini, benun i yee firin kanna xa so yahannama teeni.” (Geenna g1067) 10 “E a liga ε yeren ma, ε nama diidini itoe rafeya. N xa a fala ε xa, e kantan malekane ariyanna yi. E n Fafe Ala yetagin toma waxatin birin.” 12 “E mirixi a ma di? Xa yexee keme muxuna nde yii, xa keden siga na xun xon, na kanna nanfe ligama? A yexee tonge solomanaanin e nun solomanaaninne luma nen e degedeni geyaan fari, a siga a tununxi kedenna fendeni. 13 N xa jondin fala ε xa, a na a to waxatin naxan yi, a sewama nen na yexee kedenna fe ra dangu tonge solomanaanin e nun solomanaaninne ra naxanye mi loxi ayi. 14 A na kii nin, ε Fafe Ala naxan ariyanna yi, a mi rafan a ma diidini ito nde keden peen xa lo ayi.” 15 “Xa i ngaxakedenna haken liga i ra, siga a fema i yi a sonna fala a xa ε firinna tagi. Xa a i xuiin name, i bata i ngaxakedenna soto na yi. 16 Koni xa a mi a tuli mati i xuiin na, ε nun muxu keden hanma muxu firin xa siga a fema alogo ‘feen birin xa makiti sereya firin hanma saxan xuiin xon.’ 17 Koni xa a mi a tuli mati ne xuiin na, na feen fala denkeleya yamaan xa. Xa a mi a tuli mati denkeleya yamaan xuiin na, a yate alo denkeleyatarena hanma mudu maxinla.” 18 “N xa jondin fala ε xa, ε na tonna doxo feen naxan na dunuja yi, Ala tonna doxoma nen na ra ariyanna yi. E na tin feen naxan ma dunuja yi, Ala tinma nen na ma ariyanna yi.” 19 “N mon xa a

fala ε xa, xa muxu firinna lan fefe ma dunuɲa yi Ala maxandini, n Fafe naxan ariyanna yi, a na ligama ε xa nen. **20** Bayo muxu firin hanma saxan na e malan dede yi n xinli, n fan luma nen menni e ye.” **21** Na xanbi ra, Piyeri yi fa Yesu fema, a yi a maxodin, a naxa, “Marigina, n xa ngaxakedenna mafelu doɲɲa ma yoli, a na n haken tongo waxatin naxan yi? Han doɲɲa ma solofere ba?” **22** Yesu yi a yabi, a naxa, “N xa a fala i xa, doɲɲa ma solofere mi a ra de, fo tonge solofere e nun solofere.” **23** “Nanara, Ariyanna Mangayaan luxi nen alo mangan naxan waxi a walikene saren fi feni. **24** A na foloxina, e fa walike keden na gbeti gbananna wuli fu donla yi naxan ma, donla naxan nun a siimayaan birin wali saranna yi lan. **25** Bayo a mi yi nɔe a donla fiye, mangan yi a ragidi a e xa a tan nun a jaxanla nun a diine nun a yii seene birin mati e findi konyine ra, alogo a xa donla fi. **26** Nanara, walikeen yi a xinbi sin mangan bun ma, a yi a mafan, a naxa, ‘Dija n xa, n na i ya donla birin fima nen!’ **27** A kanna yi kininkinin a ma, a yi dija a donla ma, a yi a lu na.” **28** “Koni na walikeen yi siga, a sa a lanfana nde to a gbeti xurudi yi naxan ma. A yi a suxu, a yi a kɔeen deten. A yi a fala, a naxa, ‘N ma donla fi!’ **29** A lanfaan yi a xinbi sin a bun ma, a yi a mafan, a naxa, ‘Dija n xa, n na i ya donla fima nen!’ **30** Koni a mi tin. A yi sa a sa kasoon na han a na a donla fi waxatin naxan yi. **31** Walikeen bonne to na to, e xolo kati, e siga e kanna fema, e sa na birin fala a xa. **32** Nanara, e kanna yi a tan walikeen xili, a naxa, ‘I tan walike jaxina, n ma donla naxan birin i ma, n dija nen na ma bayo i bata n mafan. **33** A mi yi lan nun ba, i fan xa kininkinin i walike boden ma alo n kininkinin i ma kii naxan yi?’ **34** Nayi, a kanna yi a sa kasoon na a xoloni alogo a kantan muxune xa a jaxankata han a yi a donla birin fi. **35** N Fafe naxan ariyanna yi, na fan ε suxuma na kii nin, xa ε tan nde mi a ngaxakedenna mafelu a boɲeni.”

19 Yesu yelinxi na falane tiye, a keli Galile yamanani, a siga Yudaya yamanani denaxan Yuruden baan kidi ma. **2** Yama gbeen yi bira a foxo ra, a yi ne rakendeya. **3** Farisi muxuna ndee yi fa a fema a bunbadeni, e yi a maxodin, e naxa, “Sariyan na a ra ba, xemen xa jaxanla rame, a findi bun yo ra?” **4** Yesu yi e yabi, a naxa, “E mi Kitabun xaranxi ba? A naxa fa fala a foloni ‘Ala yi adaman da, xemen nun jaxanla,’ **5** a naxa, ‘Nanara, xemena a nga nun a fafe

bejinma, a a maso a jaxanla ra, e findi fati bende kedenna ra.’ **6** Nayi, muxu firin mi fa e ra koni fo keden. Nayi, Ala bata seen naxanye tugun e bode ra, muxe nama ne fata.” **7** E yi a maxodin, e naxa, “Nanfera Musa a yamarixi fa fala a xemen xa futu kala kedin so a jaxanla yii, a yi a bejin?” **8** Yesu yi e yabi, a naxa, “Musa bata tin, a ε xa ε jaxanle bejin amasoto ε boɲen xodoxo. Koni a mi yi na kiini nun a foloni. **9** Awa, n xa a fala ε xa, xemen naxan na a me a jaxanla ra, xa a jaxanla mi yalunya ligaxi, xemen yi nde gbete futu, na xemen bata yalunyaan liga.” **10** A xarandiine yi a fala a xa, e naxa, “Xa xemen nun a jaxanla tagi na kii nin, a lan futu nama ti na yi.” **11** Yesu yi e yabi, a naxa, “Birin mi nɔe xaranni ito suxe, koni fo Ala bata a feren fi naxanye ma. **12** Xemena ndee mi nɔe jaxanla futue amasoto e bari kiin xon, muxune nan ndee gbeteɲe ligaxi na kiini, koni ndee gbeteɲe lanxi a ma nen a e nama jaxanla futu alogo e xa lu wale Ariyanna Mangayaan xa. Awa, xa naxan nɔe xaranni ito suxe, na xa a suxu.” **13** Muxuna ndee yi fa e diidine ra Yesu fema, alogo a xa a yiin sa e diidine xunni, a yi Ala maxandi e xa koni xarandiine yi falan ti ne ma. **14** Yesu naxa, “E tin diidine xa fa n fema, ε nama e raxete amasoto e tan sifane nan gbee Ariyanna Mangayaan na.” **15** A yi a yiin sa e xunni, a yi duba e xa, a siga. **16** Banxulanna nde yi fa Yesu fema, a naxa, “Karamoxo, n fe fajin mundun lige, n habadan nii rakisinsoto?” (aiōnios g166) **17** Yesu yi a yabi, a naxa, “Nanfera i n maxodinma fe fajina fe ma? Ala nan keden fan. Xa i waxi a xon ma, i xa nii rakisinsoto, yamarine suxu.” **18** A mon yi maxodinna ti, a naxa, “Yamari mundun ne ra?” Yesu yi a yabi, a naxa, “I nama faxan ti. I nama yalunyaan liga. I nama muɲan ti. I nama wule seren ba. **19** I baba nun i nga binya, i yi i adamadi boden xanu alo i yetena.” **20** Banxulanna yi a yabi, a naxa, “N bata ne birin suxu, nanfe fa luxi?” **21** Yesu yi a yabi, a naxa, “Xa i waxi a xon ma, i xa findi muxu kamalixin na, siga, i sa i yii seene mati, i yi yiigelitone ki. I nafunla sotoma nen ariyanna yi. Na xanbi ra, i fa bira n foxo ra.” **22** Banxulanna na me waxatin naxan yi, a sunuxin yi siga amasoto nafulu gbee kanna nan yi a ra. **23** Na xanbi ra, Yesu yi a fala a xarandiine xa, a naxa, “N xa jondin fala ε xa, nafulu kanne so raxolo Ariyanna Mangayani! **24** N mon xa a fala ε xa, nafulu kanna so raxolo Alaa Mangayani dangu jogomen so feen na sagilaan yinla ra.” **25** Xarandiine na me waxatin naxan

yi, e yi kabɛ kati! E yi a maxodin, e naxa, “Nde fa nɔɛ kise nayi?” **26** Yesu yi e mato, a naxa, “Muxun mi nɔɛ na lige koni Ala nɔɛ feen birin lige nen.” **27** Na xanbi ra, Piyeri yi a fala a xa, a naxa, “A mato, nxu bata feen birin bejin, nxu bira i fɔxɔ ra. Nxu tan nanse sɔtɔma nayi?” **28** Yesu yi a fala e xa, a naxa, “N xa jɔndin fala e xa, waxati nene famatɔni, n tan Muxuna Dii Xɛmen na dɔxɔ n ma mangaya gbede binyaxini, e tan naxanye biraxi n fɔxɔ ra, e fan dɔxɔma nen manga gbede fu nun firinne ma, e yi Isirayila bɔnsɔn fu nun firinne makiti. **29** Naxanye birin bata banxine lu na, hanma a ngaxakeden xɛmɛmane nun a jaxalanmane hanma a fafe hanma a nga hanma a diine hanma a xɛene n tan ma fe ra, a na jɔxɔn kɛmɛ sɔtɔma nen e nun habadan nii rakisina. (aiðnios g166) **30** Koni naxanye yɛen na, ne wuyaxi sa luma nen xanbin na. Naxanye xanbin na iki, ne yi sa lu yɛen na.”

20 Yesu naxa, “Ariyanna Mangayaan luxi nen alo xɛɛ kanna naxan minin subaxani muxu fendeni alogo e xa sa wali a manpa bili nakɔni. **2** E yi lan a ma, a xa e saranna fi gbeti gbanan keden keden, naxan lanjɛ soge keden saranna ma. A yi e rasiga a manpa bili nakɔni. **3** Soge raxɛnxɛn waxatini, a keli, a siga lɔxɔ deen na, a yi muxuna ndee li tixi na, naxanye mi yi wali yo ra. **4** Nanara, a yi a fala e xa, a naxa, ‘E fan xa siga, e sa wali n ma manpa bili nakɔni, a lan n xa e saren fi naxan na, n na soe e yii.’ **5** Awa, ne yi siga walideni. Na danguxina, a mɔn yi na jɔxɔn liga yanyi tagini e nun se din waxatin masoxina. **6** Awa, se din waxatin danguxina, a mɔn yi siga, a sa muxu gbeteɛe fan li tixi na. A yi e maxodin, a naxa, ‘E ferijɛnxi be nanfera? E mi fefe ligama?’ **7** E yi a yabi, e naxa, ‘Bayo muxu yo mi nxu tixi wali ra.’ A yi a fala e xa, a naxa, ‘Awa, e fan xa siga wali kedeni n ma manpa bili nakɔni.’” **8** “Ninbanna soxina, manpa bili nako kanna yi a fala walike kuntigin xa, a naxa, ‘Walikene xili, e saranna xa fi. A fɔlɔ dɔnxɛ ra xiine ma, i sa a rapan a singe ra xiine ma.’ **9** Xɛmen naxanye wanla fɔlɔ jinbari waxatini, ne keden kedenne birin yi gbeti gbanan keden keden sɔtɔ. **10** Nanara, muxun naxanye singe wanla fɔlɔ, ne to fa, e yi a miri fa fala, a e a sɔtɔma nen dangu bonne ra, koni e keden kedenna birin yi gbeti gbanan keden keden sɔtɔ.” **11** “Awa, e to yi a rasuxuma, e xɛɛ kanna mafala fɔlɔ. **12** E yi a fala, e naxa, ‘Muxun naxanye faxi dɔnxɛn na, ne waxatidi nan tun wali kɛxi. I nxu nun ne birin saren fima kii

kedenna nin ba, nxu tan naxanye ferijɛnxi soge na?” **13** Xɛɛ kanna yi e tan nde keden yabi, a naxa, ‘Sɔxɔ, n mi tinxintareya xan ligaxi i ra. En mi lanxi gbeti gbanan keden xan ma ba? **14** I saranna tongo, i siga i konni. Naxanye faxi dɔnxɛn na, n waxi ne saranna fi feni alo n bata i saranna fi kii naxan yi. **15** N mi daxa ba, n xa n sagoon liga n ma gbetini? I n maxɔxɔlɔnma nen ba bayo n fonisire?’ **16** Na kiini, naxanye yɛen na, ne wuyaxi sa luma nen xanbin na. Naxanye xanbin na iki, ne yi sa lu yɛen na.” **17** Yesu yi sigama Yerusalɛn taani waxatin naxan yi, a yi a xarandii fu nun firinne xali e danna. A yi a fala e xa, **18** a naxa, “E a mato, en sigama Yerusalɛn taani, n tan Muxuna Dii Xɛmen sa soma nen saraxarali kuntigine nun sariya karamɔxɔne yii na yi. E n ma kitin bolonma nen, a lan sayaan ma. **19** Na xanbi ra, e yi n so siya gbetene yii naxanye n magelema, e yi n bulan, e yi n gbangban wudin ma. A soge saxande lɔxɔni n kelima nen sayani.” **20** Sebede a dii xɛmene nga yi fa Yesu fema e nun a dii xɛmene, e yi e xinbi sin Yesu bun ma, e yi a maxandi fena nde ma. **21** Yesu yi e maxodin, a naxa, “I waxi nanse xɔn ma?” A yi a yabi, a naxa, “Tin, i na i ya mangayaan sɔtɔ, n ma dii xɛmɛ firinni itoe xa dɔxɔ i fema, kedenna i yiifanna ma, kedenna i kɔmɛnna ma.” **22** Yesu yi e yabi, a naxa, “E n maxandixi naxan ma, e mi na kolon. E nɔɛ e minjɛ tɔrɔya igelengenna ra ba, n fama n mindeni naxan na?” E yi a yabi, e naxa, “Nxu nɔɛ nen.” **23** Yesu yi a fala e xa, a naxa, “E fama e mindeni nen n ma tɔrɔya igelengenna ra yati! Koni muxun dɔxɔ fena n yiifanna ma hanma n kɔmɛnna ma, na mi n tan ma fɔ n fafe bata yi a ragidi naxanye xa.” **24** Xarandii fuun bonne na mɛ waxatin naxan yi, e xɔlɔ na ngaxakedenma firinne ma. **25** Nanara, Yesu yi e birin xili a fema, a naxa, “E a kolon yati siyane mangane nɔɔyaan nan ligama e xun na, e muxu gbeene fan yi kuntigiyaan naba e xun na. **26** Koni a mi na kiini e tan tagi. Xa naxan yo waxi findi feni muxu gbeen na e yɛ, fɔ a xa findi e walikɛen nan na. **27** Xa naxan yo wa findi feni e yɛeratiin na fɔ a xa findi e konyin nan na **28** alo n tan Muxuna Dii Xɛmen to mi faxi muxɛ xa wali n xa koni alogo n tan xa wali, n yi n niin fi muxu wuyaxi xunbaan na.” **29** E yi kelima Yeriko taani waxatin naxan yi, yama gbeen yi bira Yesu fɔxɔ ra. **30** Danxutɔ firinna naxanye yi dɔxi kiraan na, ne yi a mɛ a Yesu dangumatɔɔn nan yi a ra, e yi gbelegbele, e naxa, “Nxu fafe, Dawudaa Dii Xɛmena, kininkinin nxu ma!” **31** Yamaan yi e masabari, koni e

mɔn yi gbelegbele kati, e naxa, “Marigina, Dawudaa Dii Xemena, kininkinin nxu ma.” **32** Awa, Yesu yi ti, a yi e xili, a yi e maxodin, a naxa, “E waxi a xon ma n xa nanfe liga e xa?” **33** E yi a yabi, e naxa, “Marigina, nxu waxi a xon ma nen, nxu mɔn xa seen to.” **34** Yesu yi kininkinin e ma, a yi a yiin din e yeene ra. E yi seen to mafuren, e bira Yesu foxo ra.

21 E to maso Yerusalen taan na, e yi Betifage taan li, Oliwi Geyaan fari. Yesu yi a xarandii firin nasiga e yee ra. **2** A yi a jungu e ma, a naxa, “E siga banxideen na e yee ra, e sa sofanel na nde lima xidixi na yi, a diina a fema. E e fulun, e fa e firinna ra n xa. **3** Xa muxuna nde e maxodin, e a fala a xa, e naxa, ‘Marigin nan mako e ma,’ na kanna e soma e yii nen sa.” **4** Na liga nen alogo nabiin naxan fala, na xa kamali, a naxa, **5** “E a fala Siyon kaane xa, e naxa, ‘E a mato! E mangan fama e ma. A limaniya. A fama sofanel nan fari, sofali diina, sofali gilen diina.’” **6** Na ma, xarandiine yi siga, Yesu naxan fala e xa, e sa na liga. **7** E yi fa sofanel nan a diin na. E yi e dugine yifulun e fari, Yesu yi dɔxo sofanel fari. **8** Yamaan yi e dugine yifulun kiraan xon ma, nde yi jɔxondene magira, e yi e sa kiraan xon a binya feen na. **9** Yamaan naxan yi a yee ra e nun a xanbi ra, ne birin yi lu sɔnxɔe, e naxa, “Tantunna xa fi Dawudaa dii xemen ma! Naxan fama Marigin xinli, Ala xa na baraka! Ala tantun kore xonna ma pon!” **10** Yesu so Yerusalen taani waxatin naxan yi, taan yi maxa. Yamaan yi maxodinna ti, e naxa, “Nde ito ra?” **11** Yamaan yi e yabi, e naxa, “Nabi Yesu nan ito ra, keli Nasareti taani Galile yamanani.” **12** Yesu to so Ala Batu Banxini, a yi sare matine nun sare soone birin kedi na yi. A yi gbeti masarane tabanle rafelen e nun ganba matine gbedene. **13** A yi a fala e xa, a naxa, “A seɓexi Kitabun kui, Ala naxa, ‘N ma Banxin xili bama nen Ala maxandi banxina.’ Koni e tan bata a findi mujadene luxunden na!” **14** Danxutone nun lebutenne yi siga Yesu fema Ala Batu Banxini, a yi e rakendeya. **15** Koni saraxarali kuntigine nun sariya karamoxone to a to kabanako feene lige, e diidine fan to naxanye yi sɔnxoma Ala Batu Banxini, e naxa, “Tantunna xa fi Dawudaa Dii Xemen ma,” e yi xolo. **16** E yi a fala Yesu xa, e naxa, “I mi diidine falan meen ba?” Yesu yi e yabi, a naxa, “Di! E mi Kitabun yireni ito xaranxi ba, naxan a falaxi, ‘I bata diidine nun dii jɔrene yamari, e yi i matoxo?” **17** Yesu yi e lu menni, a keli taani, a siga Betani taani, a sa xi na. **18**

Na xoton bode, a xetematɔon Yerusalen taani, kamen yi a suxu. **19** A yi xode binla to kiraan dexon ma, a yi siga a bun ma, koni a mi a bogi yo li a ra, fo a deene. Nanara, a yi a fala xode binla ma, a naxa, “I tan mi fa bogin sɔxon!” Awa, na waxatin yeteni xode binla yi xara! (aiɔn g165) **20** Xarandiine to na to, e yi kabe, e maxodinna ti, e naxa, “Xode binli ito xaraxi di xulen?” **21** Yesu yi e yabi, a naxa, “N xa jɔndin fala e xa, xa e denkeleyaxi, e mi sike, n naxan ligaxi xode binli ito ra, e fan nɔe na jɔxonna lige nen. A birin xa mi na ra, e nɔe a fale nen geyaan xa, e naxa, ‘Keli be, i sa sin foxo igeni,’ na yi liga. **22** Xa e denkeleyaxi, e na sese maxodin Ala ra, e na sɔtoma nen.” **23** Yesu mɔn yi fa Ala Batu Banxini. A yi yamaan xaranma waxatin naxan yi, saraxarali kuntigine nun yamaan fonne yi fa a fema, e yi a maxodin, e naxa, “I feni itoe ligama senbe mundun na, nde i yamarixi i xa feni itoe liga?” **24** Yesu yi e yabi, a naxa, “N fan xa e maxodin fe keden ma, xa e n yabi, n feene ligama senben naxan yi, n fan na falama e xa nen. **25** Nde Yoni rafaxi a xa muxune rafu igeni e tubi xinla ma, a kelixi Ala nan ma ba, hanma muxune?” E yi falan ti folo e bode tagi, e naxa, “Xa en na a yabi fa fala a kelixi Ala nan ma, a falama nen nayi, a naxa, ‘Nanfera e mi laxi Yoni ra?’ **26** Koni xa en na a fala fa fala a kelixi muxun nan ma, en gaxu yamaan yee ra bayo e birin laxi a ra a nabiin nan yi Yoni ra.” **27** Nanara, e yi Yesu yabi, e naxa, “Nxu mi a kolon.” Awa, a yi a fala e xa, a naxa, “N tan fan feni itoe ligama senben naxan yi, n mi na falama e xa na yi.” **28** “E xaxili lu ito xon ma. Xemena nde yi na, dii xeme firin yi naxan yii. A siga a forimaan fema, a sa a fala a xa, a naxa, ‘N ma diina, siga wali kedeni n ma nakoni to.’ **29** A yi a yabi, a naxa, ‘N mi waxi siga feni.’ Koni donxen na, a bojen yi maxete, a siga. **30** A fafe yi siga a diin bonna fema, a sa na fala kedenna ti na fan xa, a yi a yabi, a naxa, ‘N fafe, n sigama nen.’ Koni a mi siga. **31** Ne firinna ye, nde a fafe sagoon ligaxi?” E yi a yabi, e naxa, “Forimana.” Yesu yi a fala e xa, a naxa, “N xa jɔndin fala e xa, mudu maxinle nun yalundene singe soma e yee ra Alaa Mangayani. **32** Amasoto Yoni bata fa, a tinxinna kiraan yita e ra, e mi la a ra. Koni mudu maxinle nun yalundene bata la a ra. Hali e to na to, e boje mi maxete, e la a ra.” **33** Yesu naxa, “E tuli mati sanda gbete ra. Nako kanna nde yi na nun naxan manpa bili nakoon sa, a yi a sansan, a yi manpa ige badeni ton, a yi gbengben ti. Na xanbi ra, a yi nakoon taxu a kantan muxune ra, a siga sigatini. **34**

Awa, a bogi waxatina a lixina, a yi a walikena ndee rasiga a nakoon kantan muxune ma, a e xa a gbeen so ne yii. **35** Nakoon kantan muxune yi nako kanna walikene suxu, e kedenna mabonbo, e bonna faxa, e bonna magolon gemene ra. **36** Na xanbi ra, nako kanna mon yi a walike gbeteye rasiga, naxanye yi wuya dangu a foloyixine ra. Nakoon kantan muxune yi ne fan liga na kii kedenni. **37** Donxen na, a yi a dii xemen nasiga e ma, a naxa, 'E danma nen n ma diin tan na.' **38** "Koni nako kantanne to a dii xemen to, e yi a fala e bode xa, e naxa, 'Nako kanna ke tongon nan ito ra, e fa be, en na a faxa alogo en xa a keen soto.' **39** Nayi, e yi a suxu, e siga a torontoronje nako xeen fari ma, e sa a faxa. **40** Awa, nako kanna na fa waxatin naxan yi, a nanfe ligama nako kantanne ra?" **41** E yi a yabi, e naxa, "A na muxu jaxine faxama nen kii jaxini, a yi nakoon taxu muxu gbeteye ra naxanye a gbeen soe a yii a xaba waxatini." **42** Yesu yi a fala e xa, a naxa, "E munma Kitabun yireni ito xaran ba? A naxa, 'Banxi tiine e me gemen naxan na, na bata findi banxin geme fisamantenna ra. Marigin nan na ligaxi, a findi kabanako feen na en yee ra yi.'" **43** Yesu naxa, "Nanara, n na a falama e xa, Alaa Mangayaan bama e yii nen, a so yama gbeten yii, naxanye kewali lanje a ma. **44** Naxan yo na bira gemeni ito fari, na yigirama nen a dungin dungin na. Koni xa a nu bira naxan yo fari, a na yilunburunma nen." **45** Saraxarali kuntigine nun Farisi muxune to Yesu a sandan me, e yi a kolon a falan tima e tan nan ma. **46** Nanara, e yi kata a suxu feen na, koni e yi gaxu yamaan yee ra naxanye yi a mirixi fa fala a nabiin nan Yesu ra.

22 Yesu mon yi sandan sa yamaan xa. **2** A yi a fala, a naxa, "Ariyanna Mangayaan luxi nen alo mangan naxan jaxalandi tiin sewa donse donna malanni ton a dii xemen xa. **3** A yi a walikene rasiga a muxu xilixine ma alogo e xa fa donse donna malanni, koni e mi tin fe. **4** Nanara, a yi a walike gbeteye rasiga e ma, a naxa, 'E sa a fala e xa, a donseen birin bata yiton iki. N bata n ma turaan nun jinge raturaxine faxa, seen birin bata yiton. E fa jaxalandi tiin donse donna malanni!' **5** Koni e mi a yate, e siga e makone ra. Nde yi siga xee ne ma, nde yi siga e wanle ra. **6** A donxene yi walikene suxu, e yi e rayarabi, e yi e faxa." **7** "Mangan yi xolo kati, a yi a sofane rasiga, e sa faxa tiine halagi, e yi e taan gan. **8** Na xanbi ra, a yi a walikene xili, a naxa, 'Jaxalandi tiin malanna bata yiton koni n

muxun naxanye xilixi, ne mi yi daxa e xa xili. **9** Awa, iki e siga kira xunne ma. E na muxu yo to, e ne xili malanni.' **10** Nanara, walikene yi siga kira xunne ma, e muxun naxanye birin to, e yi ne malan muxu jaxine nun muxu fajine birin. Nayi, jaxalandi tiin malan yiren yi rafe muxu xilixine ra." **11** "Koni mangan to so, a xa a muxu xilixine to, a yi xemena nde to menni, jaxalandi ti domain mi yi a ma. **12** A yi a maxodin, a naxa, 'Soxo, i soxi be di, anu, i mi maxidixi alo a daxa jaxalandi ti malanni kii naxan yi?' Koni xemen mi a yabi soto. **13** Mangan yi a fala a walikene xa, a naxa, 'E a xidi ken, e yi a ramini tanden ma dimini, wugan nun jin naxinna denaxan yi.'" **14** Yesu naxa, "Muxu wuyaxi xilixi koni muxu dando nan tun sugandixi." **15** Farisi muxune yi siga, e sa Yesu tajege feni ton a fala xuiin xon ma. **16** E yi e xarandiina nde nun Herode a muxuna nde rasiga Yesu fema a faladeni, e naxa, "Karamoxo, nxu a kolon fa fala jondi falan nan i tan na, i yamaan xaranma Ala jondin nan ma. Muxe mi noe i ya miriyaan maxete, amasoto i mi muxune rafisaxi e bode xa. **17** Awa, i mirixi a ma di, a fala nxu xa, a daxa mudun yi fi Romi Manga Gbeen ma ba hanma a nama fi?" **18** Koni Yesu yi e nata jaxin kolon. A yi e yabi, a naxa, "E tan nafigine! Nanfera, e katama n bunbadeni? **19** E gbeti gbananna yita n na mudun fima naxan na!" E yi gbeti gbananna yita a ra. **20** Yesu yi e maxodin, a naxa, "Nde xili nun a yetagin sawura a ma?" **21** E yi a yabi, e naxa, "Romi Manga Gbeena." Nayi, Yesu yi a fala e xa, a naxa, "Mangan gbeen xa so a yii, Ala gbeen yi so Ala yii." **22** E na me waxatin naxan yi, e kabe kati, e keli a fema, e siga. **23** Na loxon yeteni, Saduse muxune yi e maso Yesu ra naxanye a falama a faxa muxune mi kelima sayani. E yi Yesu maxodin, **24** e naxa, "Karamoxo, Musa bata yi a fala, a naxa, 'Xa xemen faxa, a mi dii lu, a ngaxakedenna xa a ke jaxanla tongo alogo a xa diina nde bari faxa muxun xa.' **25** Awa, ngaxakedenmane muxu solofere yi be nun, forimaan yi jaxanla futu, a faxa, a mi dii soto, a jaxanla yi lu a xunyen xa. **26** A yi liga na kiini a firinden fan na, a saxanden fan yi liga na kiini, na yi liga han solofere. **27** Donxen na, jaxanla fan yi faxa. **28** Awa, faxa muxune na keli waxatin naxan yi, jaxanla findima nde gbee ra na muxu soloferene ye? Bayo e birin bata yi a doxo." **29** Yesu yi e yabi, a naxa, "E bata tantan, amasoto e mi Kitabun kolon hanma Ala senbena. **30** Bayo faxa muxune na keli waxatin naxan yi, e ligama nen alo malekan naxanye ariyanna

yi. Xemen mi jaxalan fute, jaxanla mi dɔxe xemen xon. **31** Awa, naxan lanxi faxa muxune rakeli feen ma, e mi Alaa falan xaranxi ba? A naxa, **32** ‘Ibrahimaa Ala nan n tan na, e nun Isiyagaa Ala e nun Yaxubaa Ala.’ Anu, faxa muxune Ala mi a tan na fɔ niiramane.” **33** Yamaan na me waxatin naxan yi, e kabe Yesu a xaranna ma kati! **34** Farisi muxune a me waxatin naxan yi, a Yesu e yabi kiin bata a liga Saduse muxune yi e dundu, e yi e malan. **35** Sariya karamɔxo keden yi na, na yi Yesu kejaan fesefese, a yi a maxodin, **36** a naxa, “Karamɔxo, yamarin mundun gbo dangu a birin na Sariya Kitabuni?” **37** Yesu yi a yabi, a naxa, “I Marigina Ala xanu i bojen birin na e nun i niin birin na e nun i xaxinla birin na.” **38** Yamarini ito gbo dangu e birin na. **39** A firindenit ito luxi nen alo bonna, a naxa, ‘I adamadi boden xanu alo i yetena.’ **40** Sariya Kitabun nun nabine kitabune birin singanxi yamari firinni itoe nan na.” **41** Farisi muxune malanxi waxatin naxan yi, Yesu yi e maxodin, a naxa, **42** “E mirixi Alaa Muxu Sugandixin feen ma di? Nde bonson a ra?” E yi a yabi, e naxa, “Dawuda bonsonna nan a ra.” **43** Yesu yi e maxodin, a naxa, “Nanfera Dawuda a xili bama ‘N Marigina’ fata Alaa Nii Sarijanxin na? Amasoto Dawuda a falama, a naxa, **44** ‘Marigin yi a fala n marigin xa, a naxa, “Dɔxo n yiifanna ma, han n yi i yaxune sa i sanna bun ma.”” **45** Awa, xa Dawuda a xili bama, ‘N Marigina,’ na ma, Alaa Muxu Sugandixin findixi Dawuda bonsonna ra di?” **46** Muxu yo mi no a yabe fala keden peen na! Keli na waxatin ma, muxu yo mi fa susu a maxodinje fe gbete ma.

23 Na xanbi ra, Yesu yi falan ti yamaan nun a xarandiine xa, **2** a naxa, “Sariya karamɔxone nun Farisi muxune dɔxi Nabi Musa funfun nin. **3** Nayi, e e falane birin suxu, e yi e liga. Koni e nama e kewali sifane tan liga, amasoto e naxan falama, e mi na ligama. **4** E goron binyene raxidima, e yi e dɔxo muxune xun ma, koni hali e yii sonla, e tan mi waxi na din feni e ra e maxalideni. **5** E feen birin ligama nen alogo muxune xa e to. Nayi, e Kitabu falane sebema, e yi e xidi e ticine nun e yiine ra han a gbo ayi. E domane maxidixi luti denbexi kuyene ra. **6** Binye dɔxodene rafan e ma malanne yi, e dɔxo yamaan yee ra salide banxine yi. **7** Binye xontonne rafan e ma lɔxo tidene yi, muxune yi e xili ‘Karamɔxo.’” **8** “Koni muxe nama e tan xili ba fa fala, ‘Karamɔxo,’ amasoto ngaxakedenmaan nan e birin na, karamɔxo keden

pee nan e yii. **9** Awa, e nama muxu yo xili dunnya ito yi fa fala, ‘N Fafe,’ amasoto Fafe keden pee nan e yii ariyanna yi. **10** E nama tin muxune xa e xili ‘Kuntigina,’ amasoto kuntigi keden peen nan e yii. Alaa Muxu Sugandixin nan na ra. **11** Muxun naxan gbo e birin xa, na xa findi e konyin na. **12** Naxan na a yete yite, na yigodoma nen. Naxan na a yete magodo, na yitema nen.” **13** “Gbalona e xa, e tan sariya karamɔxone nun Farisi muxu nafigine! Amasoto e Ariyanna Mangayaan deen nagalin muxune yee ra, e tan yeteen mi soma, e mon mi muxune luma e so naxanye waxi so feni.” **14** “Gbalona e xa, e tan sariya karamɔxone nun Farisi muxu nafigine! Amasoto e kaja gilene yii seene bama e yii. E yi e yete mayita sali xunkuyeni. E yalagima nen na feene ma a jaxin na.” **15** “Gbalona e xa, e tan sariya karamɔxone nun Farisi muxu nafigine! E fɔxo igen nun bɔxo xonna birin yisigama alogo e xa tubi muxu keden peen soto. E na a soto e a findima nen yahannama kaan na naxan jaxu e tan xa dɔxo firin.” (Geenna g1067) **16** “Gbalona e xa, e tan danxutɔon naxanye danxutɔon yii rasuxuma. E tan naxanye a falama, e naxa, ‘Xa muxuna nde a kolo Ala Batu Banxin xinli, hali a mi a rakamali, koni naxan na a kolo Ala Batu Banxin xemani, fɔ na kanna xa a falan nakamali.’ **17** E tan danxuto xaxilitarene! Mundun gbo xemana hanma Ala Batu Banxin naxan xemaan nasarijanma? **18** E mon a falama, e naxa, ‘Xa muxuna nde a kolo saraxa ganden xinli, hali a mi a rakamali. Koni xa muxuna nde a kolo saraxan yeteni naxan saraxa ganden fari, fɔ a xa a falan nakamali.’ **19** Danxutone! Mundun gbo saraxana hanma saraxa ganden naxan saraxan nasarijanma? **20** Awa, naxan na a kolo saraxa ganden xinli, na bata a kolo saraxa ganden xinli e nun seen naxanye birin a fari. **21** Naxan na a kolo Ala Batu Banxin xinli, na bata a kolo Ala Batu Banxin nun Ala yeteni, naxan luma e ye menni. **22** Muxun naxan na a kolo ariyanna yi na bata a kolo Alaa manga gbedeni e nun naxan dɔxi a yi.” **23** “Gbalona e xa, sariya karamɔxone nun Farisi muxu nafigine, e nako yi seene yaganna bama alo sorontonna nun sabi se gbeteeye, koni e bata e me sariyana fe gbeene ra, alo kiti kenden nun kininkininna nun toɔondiyana. Anu, e lan e xa ne nan liga, e nun fe donxene. **24** E tan danxutɔon naxanye danxutone yii rasuxuma, e minseen naserendenma alogo e xa soso keden peedin ba a yi, koni e yi jɔɔɔmen geruni!” **25** “Gbalona e xa, sariya karamɔxone nun Farisi muxu

nafigine, ε igelengenna nun ε donse saseen fanna masugusuguma, koni e kuiin nafexi milan nun yete rafan fe jaxine ra. **26** I tan Farisi muxu danxutona, i ya igelengenna nun i ya donse saseen kui maxa singen, alogo a fanna fan xa sarijan.” **27** “Gbalona ε xa, sariya karamoxone nun Farisi muxu nafigine. E luxi nen alo banxi fapin naxan tixi gaburun xun ma bende fixen soxi naxan ma naxanye fari tofan, koni e kuiin nafexi faxa muxu xonne ra e nun se xosixin sifan birin. **28** E fan na kiini, ε yete findima tinxin muxun nan na muxune birin yetagi, koni ε kuiin nafexi nafigiyaan nun fe jaxine ra pen!” **29** “Gbalona ε xa, sariya karamoxone nun Farisi muxu nafigine. E banxi tofapine tima nabine gaburune xun ma, ε yi tinxin muxune gaburune ratofanɲe ayi. **30** E yi a fala, ε naxa, ‘Xa nxu yi na nun nxu benbane waxatini, nxu mi yi kafuma e ma e nabine faxa waxatin naxan yi.’ **31** Awa, ε tan yeteen sereyaan bama ε yete xili ma fa fala naxanye nabine faxa, ne nan bõnsõn ε ra. **32** Awa, ε benbane hakene defe! **33** E tan kosone, ε tan saji bõnsõnne, ε giye yahannama kitin bun ma di?” (Geenna g1067) **34** “Nanara, n nabine nun xaxilimane nun sariya karamoxone rasigama ε ma. E nde faxama nen, ε yi nde gbangban wudin ma. E yi nde bulan salide banxine kui, ε yi e sagatan keli taa ma han taa ma. **35** Na kiini, ε saranma nen na tinxin muxune birin faxa feen na, keli Habila tinxin muxun ma han Sakari, Bereƙaya dii xemena, ε naxan faxa Ala Batu Banxin nun saraxa ganden tagi. **36** N xa jõndin fala ε xa, na birin xetema nen iki muxune ma.” **37** “Yerusalen kaane! Yerusalen kaane! E tan naxanye nabine faxaxi, ε yi Alaa xerane magolon. A xonla n suxu nen sanja ma wuyaxi n xa ε malan n fema alo toxε ngana a diine malanma a gabuteen bun kii naxan yi, koni ε mi tin! **38** Awa, Ala ε konna rabɛjinma nen fefe! **39** Amasoto n xa a fala ε xa, ε mi fa n toma sɔnɔn han ε yi a fala, ε naxa, ‘Naxan fama Marigin xinli, Ala xa na baraka!’”

24 Yesu yi keli na, a siga. A to yi minima Ala Batu Banxini, a xarandiine yi fa a fema, e yi Ala Batu Banxin ti kiin yita a ra. **2** Yesu yi a fala e xa, a naxa, “E mi seni itoe birin toma ba? N xa jõndin fala ε xa, gɛmɛni ito kedenna mi luma a funfuni be. E e birin naxuyama ayi nen.” **3** Yesu yi dɔxi Oliwi Geyaan fari waxatin naxan yi, a xarandiine yi siga a fema wundoni, e yi a maxodin, e naxa, “Feni itoe birin ligan waxatin naxan yi, na fala nxu xa, e nun taxamasenna

naxanye i fa waxatin nun waxati rajanna yitama nxu ra.” (aiõn g165) **4** Yesu yi e yabi, a naxa, “E a liga ε yeren ma alogo muxe nama ε mayenden. **5** Amasoto muxu wuyaxi fama nen n xinli, e yi a fala, e naxa, ‘Alaa Muxu Sugandixin nan n tan na,’ e muxu wuyaxi mayenden. **6** E yenge feene mema nen, ε yengena ndee xinle mε. Koni ε nama gaxu. A fere mi na fo na fe sifane xa liga nen, koni waxati rajanna mi na ra singen. **7** Siyana ndee siyana ndee yengema nen, yamanana ndee yi yamanana ndee yenge. Fitina kamene yi so, bɔxɔn yi xuruxurun yirena ndee yi. **8** Na feene birin ligama nen alo jaxanla dii bari kuiin xole singena.” **9** “Na xanbi ra, e ε suxuma nen, e yi ε torɔ, e yi ε faxa. Siyane birin ε rajaxuma nen n tan ma fe ra. **10** Muxu wuyaxi birama nen tantanni na waxatini, e yi e bode yanfa, e e bode so yiini, e yi e bode rajaxu. **11** Wule nabi wuyaxi fama nen e fa muxu wuyaxi mayenden. **12** Fe jaxin gboma ayi nen dunuja yi han muxu wuyaxi a xanuntenyaan yi xurun. **13** Koni naxan na a yixodoxo han a rajanna, na kisima nen. **14** Awa, Alaa Mangayana falan Xibaru Fapin kawandin bama nen dunuja yiren birin yi, a findi seren na siyane birin xa, na xanbi ra waxati rajanna yi a li.” **15** “E na Se Haramuxin to tixi yire sarijanxini naxan halagin tima, Nabi Daniyeli naxan ma fe fala, (naxan ito xaranma, na xa a bunna kolon,) **16** nayi, naxanye Yudaya yi, ne xa e gi, e te geyane fari. **17** Muxun naxan a kore banxin kɔε ra, na nama xete, a godo banxini a yii seene tongodeni. **18** Muxun naxan xeen ma, na nama xete banxini a domaan tongodeni. **19** Gbalo gbeen fudi kanne nun diin ngane yee ra na waxatine yi! **20** E Ala maxandi alogo ε giin nama lan xunbeli waxatin ma hanma Matabu Lɔxona! **21** Amasoto na lɔxone torɔn jaxuma ayi nen dangu a birin na. A jɔxɔn munma liga singen xabu dunuja da waxatini han iki. A jɔxɔn fan mi fa ligama sɔnɔn! **22** Xa Ala mi yi nde ba na lɔxone ra nun, muxu yo mi yi kisima, koni a bata nde ba a ra a muxu sugandixine fe ra.” **23** “Awa na waxatini, xa muxuna nde a fala, a naxa, ‘A mato, Alaa Muxu Sugandixin be yi,’ hanma, ‘A sa menni,’ ε nama la na ra. **24** Amasoto muxu wulexi sugandixine nun wulen nabine kelima nen, e taxamaseri gbeene nun kabanako feene liga alogo hali Alaa muxu sugandixine, e xa ne mayenden, xa na lanɲε. **25** E a mato, n bata a fala ε xa benun a waxatin xa a li. **26** Nanara, xa muxu yo a fala ε xa, a naxa, ‘A mato, a sa burunna ra!’ E nama siga na! Hanma xa e a fala fa fala, ‘A luxunxi be yi!’ E nama

la na ra! 27 Amasoto alo kuyen na a jinna masoxon keli sogetedeni han sogegododeni, n tan Muxuna Dii Xemen fama na kii nin. 28 Binbin denaxan yi, dugane e malanma menna nin.” 29 “Na toro loxone na dangu, ‘sogeni dimima nen, kiken mi fa degema, sarene kelima nen kore e bira, kore xonna senbene yimaxama nen.’ 30 Nayi, n tan Muxuna Dii Xemena taxamasenna minima nen kenenni kore. Dunuja siyane birin yi wuga. E n tan Muxuna Dii Xemen toma fe nen kore xonna kundani senben nun binyeni. 31 Xota xui gbeen na mini, n na n ma malekane rasigama nen boxon tongon naaninne birin yi, e yi n ma muxu yebaxine malan, keli dunuja danna bonna ma sa doxo bonna ra.” 32 “E xaxili soto xode binla fe ma. A yiine na mapingi, a deene yi mini folo, e a kolonma nen nayi fa fala jemen bata maso. 33 A na kii nin, e na feni itoe birin to waxatin naxan yi, e a kolonma nen fa fala waxati saxin bata maso, a bata so de yeteen li. 34 N xa jondin fala e xa, iki muxune mi danguma fo na feene birin liga. 35 Kore xonna nun boxo xonna danguma nen, koni n ma falane mi danguma habadan!” 36 “Muxu yo mi na loxon nun waxati saxin kolon, hali malekan naxanye ariyanna yi hanma Dii Xemena, fo a Fafe Ala keden peena. 37 N tan Muxuna Dii Xemen fa feen ligama nen alo naxan liga Nuhan gbee waxatini. 38 Benun fufaan xa fa waxatin naxan yi, yamaan yi e degema, e yi e minma, e yi naxanle futuma, e yi e diine fima xemene ma futun na, han Nuhan so waxatin yi a li kunkin kui. 39 Koni feen naxan fama ligadeni, e mi yi na kolon mume han fufaan yi fa, a yi e birin xali. Muxuna Dii Xemen na fa waxatin naxan yi, a ligama na kii nin. 40 Muxu firin luma nen xeen ma na waxatini, keden xalima nen, keden yi lu na. 41 Naxalan firin luma nen se dinni, kedenna xalima nen, keden yi lu na. 42 E lu e yee ra yi, amasoto e mi e Marigin fa waxatin kolon. 43 E e xaxili lu ito xon ma. Xa banxi kannna yi mupaden fa waxatin kolonje koeen na nun, a mi yi tinje mupaden xa so a banxini, a yi luma a yee ra yi nen. 44 Nanara, e xa e yiton amasoto e xaxili mi loxon nun waxatin naxan ma, n tan Muxuna Dii Xemen fama na waxatin nin.” 45 “Walikeen mundun lannaya muxun nun xaxilimaan na? Naxan ma kuntigi a doxi walikeen bonne xun na, a e donseen taxun e ra a waxatini, a tan nan na ra. 46 Na walikeen sewama nen, xa a kuntigina a li na wanla ke! 47 N xa jondin fala e xa, a kuntigina a yii seen birin taxuma a ra nen. 48 Koni xa walike naxin na a

ra, a a falama nen a yete ma, a naxa, ‘N ma kuntigin bata buye ayi.’ 49 A yi lu walikeen bonne bonbe, a yi a dege, a yi a min e nun dolo minne. 50 Awa, walikeen yengi mi loxon naxan ma, a mi waxatin naxan kolon, a kuntigin fama na waxatin nin. 51 A kuntigina a jaxankatama nen, a yi a saran a xun yifu wanle ra, a lu yire yi wugan nun jin naxinna denaxan yi.”

25 “Ariyanna Mangayaan luxi nen alo sungutun fuun naxanye e lenpune tongo e siga jaxalandi kannna ralandeni siga jaxalandi tiine malanni. 2 Xaxilitare suulun yi e ye, xaxilimaan nan yi suulunna bonne ra. 3 Xaxilitarene yi e lenpune tongo koni e mi ture tongo. 4 Koni xaxilimane yi e lenpune tongo, e yi turena nde sa e goronne kui lenpun nadege seen na. 5 Naxalandi kannna to bu, xixonla yi sungutunne suxu, e xi.” 6 “Koe tagini sonxo xuiin yi mini, e naxa, ‘Naxalandi kannna bata fa. E fa a ralan!’ 7 Nayi, sungutunne birin yi xulun, e yi e lenpune yiton. 8 Xaxilitarene yi a fala xaxilimane xa, e naxa, ‘E nxu ki tureni, amasoto nxo lenpune tumaan ni i ra.’ 9 Xaxilimane yi e yabi, e naxa, ‘En-en, a mi en birin yiliye. E siga sare matine fema e sa nde sara e yete xa.’ 10 Nayi, sungutun xaxilitarene yi siga ture saradeni. E sa menni waxatin naxan yi, jaxalandi kannna yi fa. Sungutun suulunna naxanye yitonxi, ne yi so jaxalandi kannna foxo ra malanni. E deen nagali. 11 Na xanbi ra, sungutunna bonne yi fa, e naxa, ‘Nxu fafe, yandi, deen nabi nxu xa.’ 12 Naxalandi kannna yi e yabi, a naxa, ‘N xa jondin fala e xa, n mi e tan kolon mumel!’” 13 Yesu yi a fala, a naxa, “E lu e yee ra yi amasoto e mi loxon nun waxati saxin kolon.” 14 “Ariyanna Mangayaan ligaxi nen alo xemen naxan yi sigama sigatini, a yi a walikene xili, a yi a yii seene taxu e ra. 15 A yi xema gbanan suulun so keden yii, a yi firin so gbete yii, a yi keden so a saxanden yii, e birin nun e yilan. Na xanbi ra, a yi siga sigatini. 16 Walikeen naxan xema gbanan suulun soto, na yi siga na rayulayadeni mafuren, a yi xema gbanan suulun gbete soto. 17 Walikeen naxan xema gbanan firin soto, na fan yi firin gbete soto. 18 Koni walikeen naxan xema gbanan keden soto, na yi sa yinla ge, a yi a kuntigina xemaan luxun na.” 19 “Waxati xunkuye danguxina, walikene kuntigin yi fa alogo e xa e dentege. 20 Walikeen naxan xema gbanan suulun soto, na yi fa, a yi xema gbanan suulun gbete yita a ra. A yi a fala, a naxa, ‘N kannna, i xema gbanan suulun nan taxu n na.

N bata suulun gbetɛ sɔtɔ, a tan ni i ra.’ 21 Kuntigin yi a fala a xa, a naxa, ‘I bata i yixɔdɔxɔ, i tan walike fajin nun lannaya muxuna! I bata lannayaan liga fe xurune yi, nayi n fe gbeene taxuma i ra nɛn. Fa sewa n tan i kanna xɔn!’ 22 Na xanbi ra, a xɛma gbanan firinna so naxan yii, na yi fa, a naxa, ‘N kanna, i xɛma gbanan firin nan so n yii. N bata firin gbetɛ sɔtɔ, a tan ni i ra.’ 23 Kuntigin yi a fala a xa, a naxa, ‘I bata i yixɔdɔxɔ, i tan walike fajin nun lannaya muxuna! I bata lannayaan liga fe xurune yi, nayi n fe gbeene taxuma i ra nɛn. Fa sewa n xɔn!’ 24 Dɔnxɛn na, naxan xɛma gbanan keden sɔtɔ, na yi fa, a naxa, ‘N kanna, n na a kolon a i ya fe xɔdɔxɔ. I seen xabama yireni i mi a bixi dɛnaxan yi, i donseen malanma yireni i mi se sixi dɛnaxan yi. 25 Na nan n gaxu, n yi siga, n yi sa i ya xɛmaan luxun bɔxɔn bun. I gbeen naxan na, na ni i ra.’ 26 A kuntigin yi a yabi, a naxa, ‘I tan walike yaxi salantenna, i a kolon ba, fa fala a n seen xabama yireni i mi a bixi dɛnaxan yi, n yi donseen malan yire yi n mi a sixi dɛnaxan yi. 27 Na ma, a yi lan nun i xa sa n ma xɛmaan taxu gbeti mara banxin yulane ra, alogo n na fa waxatin naxan yi, n yi xɛmaan nun a tɔnɔdin sɔtɔ. 28 Nba, ɛ xɛma gbananna ba a yii, xɛma gbanan fu naxan yii, ɛ a so na yii. 29 Amasɔtɔ seen muxun naxan yii, nde soma nɛn na yii mɔn, a yi a gbegbe sɔtɔ. Koni se mi naxan yii hali naxan di a yii, na bama a yii nɛn. 30 Nba, tɔnɔ mi na walikɛɛn naxan na, ɛ na woli tandeni, dimini, wugan nun jin naxinna dɛnaxan yi.” 31 “N tan, muxuna Dii Xɛmɛn na fa a binyeni waxatin naxan yi, e nun malekane birin a fɔxɔ ra, a dɔxɔma nɛn a mangaya gbɛdeni binyeni. 32 Dunɔɔja siyane birin malanma nɛn a yetagi. A yi e yitaxun dɔxɔ firinna ra, alo xuruse rabaan yɛxɛɛne nun siine yitaxunma kii naxan yi. 33 A yɛxɛɛne malanma nɛn a yiifanna ma, a siine malan a kɔmɛnna ma. 34 Na xanbi ra, mangana a falama nɛn a yiifari ma muxune xa, a naxa, ‘ɛ fa be, n Fafe Ala dubaxi ɛ tan naxanye xa. ɛ fa ɛ kɛɛn sɔtɔ, mangayaan naxan yitɔnxɛ ɛ xa xabu dunɔɔja da waxatini. 35 Bayo kamɛna n suxu nɛn, ɛ yi donseen so n yii. Min xɔnla yi n suxu, ɛ yi igen so n yii. N siga nɛn xɔɔɔyɛni, ɛ yi n yigiya. 36 Marabɛnna yi n suxu, ɛ yi n marabɛri ba. N yi fura, ɛ yi n dandan. N yi sa kasoon na, ɛ yi fa n xɔntɔn.’ 37 Tinxin muxune a yabima nɛn na yi, e naxa, ‘Marigina, nxu i kamɛtɔɔn to minɛn yi, nxu yi donseen so i yii, hanma i min xɔlitɔna, nxu yi igen so i yii? 38 Nxu i to xɔɔɔyɛni waxatin mundun yi, nxu yi i yigiya, hanma

marabɛnna i ma, nxu yi i marabɛri ba? 39 Nxu i to furaxi waxatin mundun yi, hanma i kasoon na, nxu yi i xɔntɔn?” 40 Mangana e yabima nɛn, a naxa, ‘N xa jɔndin fala ɛ xa, ɛ naxan liga ngaxakɛdɛndina nde xa, naxan xurun dangu birin na, ɛ na liga n tan nan xa nayi!” 41 “Na xanbi ra, naxanye na lu a kɔmɛnna ma, a yi a fala ne xa, a naxa, ‘ɛ masiga n na, dangatɔne, ɛ siga habadan tɛɛni naxan yitɔnxɛ Yinna Manga Setana nun a malekane xa. (aiɔnios g166) 42 Bayo kamɛna n suxu nɛn, ɛ mi donseen so n yii. Min xɔnla yi n suxu, ɛ mi igen so n yii. 43 N yi lu xɔɔɔyɛni, ɛ mi n yigiya. Marabɛnna yi n suxu, ɛ mi n marabɛri ba, n fura kasoon na, ɛ mi n mali.’ 44 Ne fan yi a yabi, e naxa, ‘Marigina, nxu i kamɛtɔɔn to minɛn yi, hanma i min xɔlitɔna hanma i xɔɔɔyɛni hanma i marabɛritɔna hanma i fureɔna hanma i kasoon na, nxu mi tin i maliyɛ?’ 45 Mangana e yabima nɛn, a naxa, ‘N xa jɔndin fala ɛ xa, ɛ mi naxanye liga muxudini ito nde keden xa naxan xurun dangu birin na, ɛ mi na ligaxi n tan fan xa na yi.’ 46 Awa, ne sigama habadan tɔrɔn nin. Koni tinxin muxune sigama habadan nii rakisin nin.” (aiɔnios g166)

26 Yesu to yelin na falane birin tiyɛ, a yi a fala a xarandiine xa, a naxa, 2 “ɛ a kolon, a luxi xii firin Halagi Tiin Dangu Lɔxɔn Sanla xa a li. N tan Muxuna Dii Xɛmɛna, e n yanfama nɛn, n lu yiini, e n gbangban.” 3 Na waxatini, saraxarali kuntigine nun yamaan fonne yi e malan Saraxarali Kuntigi Singe Kayafa konni. 4 E yi a nata, e xa Yesu suxu yanfani, e yi a faxa. 5 E yi a fala, e naxa, “En nama a suxu sanla waxatini, xanam, yamaan murutɛma nen!” 6 Yesu yi Simɔn dogonfontɔna banxini waxatin naxan yi Betani taani, 7 jaxanla nde yi fa a fɛma, a fa latikɔnɔnna sare xɔdɛxɛn na a sase gɛmɛ ramaan kui, gɛmɛn naxan xili “alabasita.” A yi a sa Yesu xunna ra a binya feen na, a yi a dɛgema waxatin naxan yi. 8 Yesu a xarandiine to na to, e yi xɔlɔ, e yi mɔxɔdinna ti, e naxa, “I ito birin yikalama nanfɛra? 9 Latikɔnɔnni ito yi matiye nɛn dɛɛ xɔdɛxɛn na, a saren yi so yiigelitɔne yii.” 10 Koni Yesu yi a kolon, e yi naxan falama, a yi a fala e xa, a naxa, “ɛ jaxanli ito mafalama nanfɛra? A bata fe fajin liga n xa. 11 Amasɔtɔ yiigelitɔne ɛ fɛma waxatin birin koni n tan mi luma ɛ fɛma waxatin birin. 12 A bata latikɔnɔnna sa n fatin ma alogo n xa n yitɔn gaburuna fe ra. 13 N xa jɔndin fala ɛ xa, n ma falan Xibaru Fajini ito na rali dunɔɔja yire yo yi, jaxanli ito

kewanla falama nen, yamaan yi e miri a ma.” 14 Nayi, xarandii muxu fu nun firinna nde keden naxan yi xili Yudasi Isakariyoti, na yi siga saraxarali kuntigine fema, 15 a naxa, “Xa n Yesu so e yii, e nanse soma n yii?” Ne yi gbeti gbanan tonge saxan so a yii. 16 Folo na waxatin ma, Yudasi yi lu feren fenje, alogo a xa Yesu yanfa, a a so e yii. 17 Buru Tetaren Sanla sogen folona, xarandiine yi fa Yesu fema, e yi a maxodin, e naxa, “I waxi a xon ma nxu xa Halagi Tiin Dangu Loxon Sanla donseen nafala i xa minen?” 18 A yi a fala e xa, a naxa, “E siga xemena nde fema taani, e sa a fala a xa, e naxa, ‘Karamoxo naxa, n ma waxatin bata a li. N tan nun n ma xarandiine xa Halagi Tiin Dangu Loxon Sanla donseen don i ya banxini.’” 19 Xarandiine yi a liga alo Yesu a fala e xa kii naxan yi, e yi Halagi Tiin Dangu Loxon Sanla donsensi ton. 20 Ninbanna to so, Yesu nun a xarandii fu nun firinne yi dexo e degedeni. 21 E yi e degema waxatin naxan yi, Yesu naxa, “N xa jondin fala e xa, e tan nde keden n yanfama nen, a yi n so yiini.” 22 Xarandiine yi sunu han, e yi a maxodin folo keden keden yeen ma, e naxa, “Marigina, n tan nan na ra ba?” 23 Yesu yi e yabi, a naxa, “Nxu nun naxan nxu yiin nagodoxi lenge kedenna kui, na nan n soma yiini. 24 N tan Muxuna Dii Xemen faxama nen, alo Kitabuna a falaxi kii naxan yi, koni gbalon na kannu yee ra naxan Muxuna Dii Xemen soma yiini! A yi fisa nun hali na muxun mi yi bari nun mumel!” 25 Yudasi naxan a soma yiini, na yi falan tongo a naxa, “Karamoxo, n tan nan na ra ba?” Yesu yi a yabi, a naxa, “I bata a fala.” 26 E yi e degema waxatin naxan yi, Yesu yi burun tongo, a barikan bira Ala xa, a yi a yigira, a yi a so a xarandiine yii. A yi a fala, a naxa, “E a tongo, e yi a don, n fati benden nan ito ra.” 27 Na xanbi ra, a yi igelengenna tongo, a barikan bira Ala xa, a yi a so e yii, a yi a fala, a naxa, “E birin xa a min 28 amasoto n wunla ni ito ra n layirin xidima en tagi naxan xon, a minima muxu wuyaxi xa nen e yulubin mafeluun na. 29 N xa a fala e xa, en wudi bogi igen naxan minma ito ra, n mi fa a minma han en birin mon yi sa a min n Fafe Alaa Mangayani.” 30 Na xanbi ra, e yi betin ba, e siga Oliwi Geyaan fari. 31 Nayi, Yesu yi a fala e xa, a naxa, “E birin e mema n na nen to kosen na, amasoto a sebexi Kitabuni, fa fala, ‘N xuruse rabaan faxama nen, yexeene birin yi xuya ayi.’ 32 Koni n na keli sayani, n sigama nen e yee ra Galile yamanani.” 33 Piyeri yi Yesu yabi, a naxa, “Hali bonne birin e me i ra, n tan mi n me i ra mumel!” 34 Yesu yi a

fala Piyeri xa, a naxa, “N xa jondin fala i xa, benun dontonna xa wuga to kosen na, i a falama nen daxonja ma saxan fa fala i mi n kolon.” 35 Piyeri yi a yabi, a naxa, “Hali en birin faxa, n mi a fale mume, fa fala n mi i kolon.” Xarandiin bonne fan birin yi na fala. 36 Na xanbi ra, Yesu nun a xarandiine yi siga yirena nde yi naxan xili Getesemani. A yi a fala e xa, a naxa, “E dexo be, n tan sigan menni, n xa sa Ala maxandi.” 37 A siga Piyeri nun Sebede a dii xemee firinne ra. A boren yi raforoxi, a yi sunuxi. 38 Nanara, a yi a fala e xa, a naxa, “N boren naforoxi han n faxa, e lu be, e lu e yee ra yi n xon ma.” 39 A yi siga ndedi, a yi bira, a yetagin yi lan boxon ma, a yi Ala maxandi, a naxa, “N Fafe, xa a lanje toroya igelengenni ito masiga n na, koni n tan sagoon nama liga fo i tan sagona.” 40 Na xanbi ra, a mon yi xete, a yi a xarandiine li xixonli. A yi a fala Piyeri xa, a naxa, “E mi noxi luye e yee ra yi n xon ma hali waxatidi? 41 E lu e yee ra yi, e Ala maxandi, alogo e nama bira tantanni. E niin waxon feen fan koni e fati benden senbe mi na.” 42 Yesu mon yi siga a firindeni, a sa Ala maxandi, a naxa, “N Fafe, xa toroya igelengenni ito mi noe masige n na, fo a xa n li, i sagoon xa liga.” 43 A mon yi xete, a xarandiine li xiye, bayo xixonla bata yi e suxu. 44 A mon yi keli e fema, a siga a saxandeni, a sa Ala maxandi, a mon yi na fala kedenna ti. 45 Na xanbi ra, a xete xarandiine fema, a naxa, “E mon xima ba? E mon e matabuma ba? A mato! Waxatin bata a li! N tan, Muxuna Dii Xemen bata so hake kanne senben bun ma iki. 46 E keli, en siga, muxun naxan n yanfama, a n so yiini, na bata fa!” 47 A yi falan tima waxatin naxan yi, Yudasi a xarandii fu nun firinna nde yi fa, gali gbeen yi biraxi a foxo ra saraxarali kuntigine nun sariya karamoxone nun yamaan fonne naxanye xe. Silanfanne nun gbengbetenne yi e yii. 48 Naxan yi a yanfama, a a so yiini, na bata yi taxamasenni ito fala yamaan xa nun, a naxa, “N na muxun naxan sunbu, a tan nan na ra. E a suxu ken!” 49 Nanara, Yudasi yi a tinxin Yesu ra keden na, a naxa, “Karamoxo, i nuwali.” A yi a sunbu. 50 Yesu yi a yabi, a naxa, “N xoyina, i faxi naxan na, na liga.” Nayi, e yi Yesu suxu ken! 51 Naxanye yi Yesu foxo ra, na nde keden yi a silanfanna botin, a Saraxarali Kuntigi Singena konyin tunla sege a ma. 52 Yesu yi a fala a xa, a naxa, “I ya silanfanna raxete a funfuni, amasoto naxan birin silanfanna tongoma, ne faxama silanfanna nan na. 53 I mi a kolon ba, fa fala n noe n Fafe Ala xile nen, a yi

maleka gali gbee fu nun firin nafa n ma mafuren? 54 Koni xa na liga, Kitabun fala xuiin kamalima di nayi? Bayo a sebexi a fa a xa liga ikiini.” 55 Yesu yi falan ti ganla xa, a naxa, “E bata fa n suxudeni silanfanne nun gbengbetenne e yii alo mafu tiin nan yi n na nun. N yi xaranna tima Ala Batu Banxini loxo yo loxo, koni e mi n suxu. 56 Koni na birin ligaxi nen alogo nabine falan naxanye sebexi, ne xa kamali.” Nayi, a xarandiine birin yi a rabepin, e yi e gi. 57 Naxanye Yesu suxu, ne yi a xali Kayafa konni Saraxarali Kuntigi Singena, sariya karamoxone nun yamaan fonne yi malanxi denaxan yi. 58 Piyeri yi bira Yesu foxo ra, koni e nun ganla tagi kuya, han Saraxarali Kuntigi Singena tanden ma. A yi so tanden ma e nun kantan muxune yi dexo alogo a xa a kolon a rananma kii naxan yi. 59 Saraxarali kuntigine nun kitisa yamaan birin yi katama wule seren ba feen na Yesu xili ma, alogo e xa a faxes. 60 Koni hali muxu wuyaxi to fa wule seren ba a xili ma, e mi sese soto. Donxen na muxu firin yi ti e yetagi, 61 e naxa, “Xemeni ito naxa, a noe Ala Batu Banxin kale nen, a mon yi a ti soxe saxon bun ma.” 62 Saraxarali Kuntigi Singen yi keli, a falan ti Yesu xa, a naxa, “Muxuni itoe naxan falama i xun ma, na yabi mi i xon ba?” 63 Koni Yesu mi fala yo ti. Saraxarali Kuntigi Singen yi falan ti a xa mon, a naxa, “N na i rakoloma habadan Ala xinli, xa Alaa Muxu Sugandixin nan i tan na, Alaa Dii Xemeni, na fala nxu xa.” 64 Yesu yi a yabi, a naxa, “I bata a fala. Koni n xa a fala e birin xa, folo iki ma, e n tan Muxuna Dii Xemen toma doxi Ala Senbemaan yiifanna ma, e yi n famatdon to kore kundani.” 65 Saraxarali Kuntigi Singen na me waxatin naxan yi, a yi a domani bo, a naxa, “A bata Ala rayelefu! En mako mi fa sere yo ma sonon! E bata a fala jaxine me! 66 E mirixi a ma di?” E yi a yabi, e naxa, “A lan nen a xa faxes.” 67 Nayi, e yi e degen puru Yesu yetagi, e yi a bonbo. 68 E lu a maxodinje, e naxa, “I tan Alaa Muxu Sugandixina, a fala nxu xa fata Ala ra, nde i bonboxi?” 69 Piyeri yi doxi tanden ma waxatin naxan yi, Saraxarali Kuntigi Singena walike jaxanla nde yi fa a fema, a naxa, “I tan fan yi Yesu Galile kaan foxo ra nun.” 70 Koni a yi a tandi e birin yetagi, a naxa, “N mi a kolon i waxi naxan fala fe yi.” 71 Na xanbi ra, a yi siga tanden so deen na. Walike jaxalan gbete yi a to. Muxun naxanye yi doxi na, a yi a fala ne xa, a naxa, “Xemeni ito yi Yesu Nasareti kaan foxo ra nun.” 72 Piyeri yi a tandi, a yi a kolo, a naxa, “N mi na xemen kolon!” 73 Waxatidi danguxina,

naxanye yi tixi na, ne yi fa Piyeri fema, e naxa, “A tan nan nde i tan fan na! Amasoto i fala ti kiin bata a yita nxu ra!” 74 Nayi, Piyeri yi a kolo dangane ra, a yi a fala, a naxa, “N mi xemeni ito kolon mumel!” Na waxatin yeteni dontonna yi wuga mafuren. 75 Nayi, Yesu a falan yi rabira Piyeri ma, a naxa, “Benun dontonna xa wuga i a falama nen doxona ma saxon fa fala i mi n kolon.” Piyeri yi mini, a nimisa wugan ti!

27 Xoton xoton, saraxarali kuntigine nun yamaan fonne yi a ragidi, a e xa Yesu faxes. 2 E yi a xidi, e siga a ra yamana kanna Pilati fema. 3 Yudas naxan Yesu yanfa, a a so yiini, na to a to, e bata Yesu yalagi sayaan na, a yi nimisa, a yi gbeti gbanan tonge saxanna raxete saraxarali kuntigine nun yamaan fonne ma. 4 A yi a fala, a naxa, “N bata yulubin liga, n muxun yanfa naxan mi hake yo ligaxi alogo e xa a faxes!” E yi a yabi, e naxa, “Nxu tan ma fe mi na yi, i ya feen nan na ra!” 5 Yudas yi gbetin woli Ala Batu Banxini, a siga, a sa a yete singan. 6 Saraxarali kuntigine yi gbetin matongo, e naxa, “A mi daxa gbetini ito xa sa en ma gbeti ramarade sarjnanxini, bayo faxes tiin saren nan a ra.” 7 E yi lan a ma a e xa na gbetin tonge, e feje rafalana nde a boxon sara na gbetin na, e yi na findi xaje maluxunden na. 8 Nanara, han to, e na boxon xili bama a “Wuli Boxona.” 9 Nayi, Nabi Yereimi naxan fala, na yi kamali, a naxa, “E yi gbeti gbanan tonge saxanne tonge, Isirayila kaane a sara gbetin naxan na. 10 E feje rafalana boxon sara a ra alo Marigina n yamari kii naxan yi.” 11 Yesu yi ti yamana kanna yetagi, yamana kanna yi a maxodin, a naxa, “Yahudiyan mangan nan i tan na ba?” Yesu yi a yabi, a naxa, “I bata a fala.” 12 Koni saraxarali kuntigine nun yamaan fonne a kansun waxatin naxan yi, a mi fefe fala. 13 Nayi, Pilati yi a fala a xa, a naxa, “E i kansunma feen naxanye birin na, i mi ne me ba?” 14 Koni Yesu mi tin a yabe mume, yamana kanna yi kabe kati! 15 Nba, sanli ito na yi a li nun, yamana kanna yi darixi kasorasaan muxu keden bejinje nen, yamaan na wa naxan xon ma. 16 Na waxatini, kasorasa jaxina nde yi na naxan xili Baraba. 17 Nanara, Pilati yamana kanna yi yamaan malanxin maxodin, a naxa, “E waxi a xon ma n xa nde bejin, Baraba hanma Yesu naxan xili Alaa Muxu Sugandixina?” 18 Bayo a yi a kolon yati, fa fala e Yesu soxi a yii xoxolonayaan nan ma. 19 Pilati yi doxi kiti sadeni waxatin naxan yi, a jaxanla yi xeraan nasiga a ma, a naxa, “I nama fefe

liga tinxin muxuni ito ra amasoto n toroxi nen xiyeni a fe ra to ki faji!” 20 Saraxarali kuntigine nun yamaan fonne yi yamaan nadin, a Pilati xa Baraba bejin, a yi Yesu faxa. 21 Yamana kanna yi e maxodin, a naxa, “E waxi a xon ma muxu firinni itoe, n xa nde bejin?” E yi a yabi, e naxa, “Barabal!” 22 Pilati yi e maxodin, a naxa, “Yesu naxan xili Alaa Muxu Sugandixina, e waxi a xon ma, n xa nanfe liga a ra?” E birin yi a yabi, e naxa, “A xa gbangban wudin ma.” 23 Koni Pilati yi e maxodin, a naxa, “A fe jaxin mundun ligaxi?” Koni e sonxon yi siga gboe ayi, e naxa, “A gbangban wudin mal!” 24 Pilati a to waxatin naxan yi, a mi yi noe sese ra, sonxon yi gboma ayi, a yi igen tongo, a yi a yiin naxa yamaan yee xori, a naxa, “N gbee yo mi xemeni ito faxa feni! E feen ni ito ra!” 25 Yamaan yi a yabi, e naxa, “A wunla goronna xa lu nxu tan nun nxo diine xun ma!” 26 Awa, na xanbi ra, Pilati yi Baraba bejin, a yi a yamari a e xa Yesu bulan, a yi a so e yii alogo e xa a gbangban wudin ma. 27 Yamana kanna sofane yi Yesu xali yamana kan banxini, sofane ganla birin yi e malan a rabilinni. 28 E yi a dugine ba a ma, e yi doma gbeela ragodo a ma. 29 E yi wudi yii jali kanne denbe komotin na mangaya taxamasenna ra, e yi a so a xunna, e dunganna so a yii. E yi e xinbi sin a bun ma, e lu a magele, e naxa, “I kene Yahudiyane manganal!” 30 E yi degen puru a ma, e yi a dunganna tongo, e yi a bonbo a xunna ma. 31 E to yelin a magele, e domain ba a ma, e mon yi a maxidi a gbee dugine yi. Na xanbi ra, e yi siga a ra a gbangbandeni wudin ma. 32 E yi minima taani waxatin naxan yi, e yi lan xemena nde ra, naxan yi xili Simon Sireni kaana. E yi na karahan, a xa Yesu gbangban wudin tongo. 33 E yi fa na yireni denaxan xili Gologota, naxan bunna neen “xun xori yirena.” 34 E yi manpaan so a yii naxan yi basanxi se gbete ra naxan xolo, alogo a xa a min, koni a to a lenna ti a ma, a mi tin a minye. 35 E yi a gbangban wudin ma. Na xanbi ra, e yi masensenna ti lan a dugine yitaxun feen ma. 36 E yi dexo a kantandeni. 37 E yi a kansun kedin sebe, e yi a gbangban a xun ma, e naxa, “Yahudiyane Mangan nan Yesu ito ra.” 38 E yi mujade firin gbangban wudin ma Yesu fema, kedenna a yiifanna ma, bonna a komenna ma. 39 Yamaan yi dangu a makonbe, e lu e xunni maxe, 40 e naxa, “I tan naxan Ala Batu Banxin kalama, i mon yi a ti soge saxan, i yete rakisi! Xa Alaa Dii Xeme nan i tan na, godo, i keli wudin koe ra.” 41 Saraxarali kuntigine nun sariya karamoxone nun yamaan fonne fan yi a

magele na kii nin, 42 e naxa, “A bonne rakisi nen, koni a mi noe a yete rakise! Isirayila mangan xa mi a tan na ba? A xa keli wudin koe ra, a godo be alogo nxu xa denkeleya a ma! 43 A denkeleyaxi Ala ma, a naxa, a Alaa Dii Xemen nan a tan na. Nba, xa a rafan Ala ma, a xa a xunba!” 44 Hali mujaden naxanye yi gbangbanxi wudin ma a dexon, ne fan yi a makonbi na kiini. 45 Sogen bata yi a ratinxin nun, dimin yi so yamanan birin yi han se din waxatin yi maso. 46 Na waxatini, Yesu yi gbelegbele a kon xuini, a naxa, “Eli, Eli, lama sabakitani?” na bunna neen, “N ma Ala, n ma Ala, i n nabepinxi nanfera?” 47 Muxuna ndee yi tixi na yi, ne yi a xuiin me, e naxa, “A Nabi Eli nan xilima.” 48 E tan nde keden yi a gi mafuren, a sa dugi dungin tongo, a yi a sin minse muluxunxini, a yi a filin tamin joe ra, a yi a ti a xa, a xa a min. 49 Koni bonne naxa, “A mame, en na a mato xa Nabi Eli fa a rakise.” 50 Yesu mon yi a xui ramini fangan na, a niin yi ba. 51 Dugin naxan yi singanxi Ala Batu Banxin tagi, na yi bo firinna ra, folo a xunna ra han a sanbun na. Baxon yi xuruxurun, fanyene yi bo. 52 Gaburune yi rabi, faxa muxu sarijanxina ndee yi keli. 53 E keli gaburune kui. Yesu keli xanbini sayani, e yi siga Taa Sarijanxini, e mini kenenni muxu wuyaxi xa. 54 Sofa kemen kuntigin nun a sofaan naxanye yi Yesu kantanma, ne to baxon to xuruxurunje, e nun feen naxanye birin bata liga, e yi gaxu kati! E yi a fala, e naxa, “Alaa Dii Xemen nan yi a ra yati!” 55 Naxanla naxanye yi biraxi Yesu foxo ra keli Galile yamanani, naxanye yi a malima nun, ne wuyaxi yi na, e tixi wulani, e a matoma. 56 Mariyama Magadala kaan yi ne ye nun, e nun Mariyama, Yaki nun Yusufu nga, e nun Sebede a dii xemene nga. 57 Ninbanna to a li, nafulu kanna nde yi fa naxan yi xili Yusufu Arimate kaana, Yesu a xarandiina nde nan yi a fan na. 58 A yi siga Pilati fema, a yi a maxodin Yesu binbina fe ma. Pilati yi e yamari, a e xa Yesu binbin so Yusufu yii. 59 Nanara, Yusufu yi a binbin tongo, a yi a kasangen dugi fixeni, 60 a sa a maluxun gaburun na fanye kui gexini alo faran yili, a yi baxi naxan gedeni a yete xa nun. Na xanbi ra, a yi geme belebelen makutukutu gaburun de ra, a siga. 61 Mariyama Magadala kaan nun Mariyama bonna yi dxi na nun, e yeen lanxi gaburun ma. 62 Yuma laxon xoton bode, saraxarali kuntigine nun Farisi muxune yi siga Pilati fema, 63 e naxa, “Nxu fafe, wule falani ito yi a nii ra waxatin naxan yi, nxu xaxili dxi na xon ma, a fala nen, a naxa, ‘Soge saxan na

dangu waxatin naxan yi, n mən kelima nən sayani.’ **64** Na ma, i xa yamarin fi, gaburun xa kantan ken, han a soqe saxande ləxəni alogo a xarandiine nama fa a binbin muja, e siga a ra. E yi a fala yamaan xa fa fala ‘A bata keli sayani.’ Xa ito liga, wule dənxi ito naxuma ayi nən dangu a folən na.” **65** Pilati yi a fala e xa, a naxa, “E kantan muxune tongo, e xa sa gaburun kantan alo e nəe a ra kii naxan yi.” **66** Nanara, e yi siga, e sa gaburun deen nagali ki fani, e taxamasenna sa a ma, e yi a kantan sofane lu na yi.

28 Matabu Ləxən danguxina, xati ləxən subaxani, Mariyama Magadala kaan nun Mariyama bonna yi siga gaburu matodeni. **2** Bəxən yi xuruxurun gbeen ti. Marigina malekan yi godo keli kore, a yi gəme gbeen makutukutu, a dəxo a fari. **3** Na malekan yetagin yi luxi alo kuyen na a jinna masəxən, a dugine yi fixa alo balabalan kəsəna. **4** Kantan muxune yi gaxu han e xuruxurun, e yi fuga a ra, e lu alo faxa muxune. **5** Koni malekan yi falan ti naxanle xa, a naxa, “E nama gaxu, n na a kolon fa fala e Yesu nan fenma naxan gbangban wudin ma. **6** A mi be yi, a bata keli alo a a fala kii naxan yi. E fa a saden mato. **7** E siga mafuren, e sa a fala a xarandiine xa, e naxa, ‘A bata keli sayani, e sa a lima Galile yamanani, e a toma nən na yi!’ N bata a fala e xa iki.” **8** Nanara, e keli gaburun yireni mafuren gaxun nun sewani, e siga e giye, e sa a fala a xarandiine xa. **9** Yesu yi e ralan mafuren, a naxa, “E nuwali.” E yi fa a sanna suxu, e yi a batu. **10** Yesu yi a fala e xa, a naxa, “E nama gaxu, e siga, e sa a fala ngaxakedenne xa, a e xa siga Galile yi, e sa n toma menna nin.” **11** Naxanle mən yi kira yi waxatin naxan yi, sofaan naxanye yi gaburun kantanma, na ndee yi xete taani. Feen naxan birin ligaxi, e na fala saraxarali kuntigine xa. **12** Saraxarali kuntigine nun yamaan fonne yi e bode to, e lan fe keden ma, e gbeti gbeen so sofane yii. **13** E yi a fala e xa, e naxa, “E xa ito fala, e naxa, ‘A xarandiine bata fa kəeen na, e yi a binbin muja, nxu yi xiin waxatin naxan yi.’ **14** Xa yamana kanna na me, nxu a mafanye, nxu yi e ba kəntəfinli.” **15** Kantan muxune yi gbetin nasuxu. E naxan fala e xa, e yi na liga. Na falan yi xuya ayi na kiini Yahudiyane tagi han to. **16** Xarandii fu nun kedenna yi siga Galile yamanani geyaan fari Yesu naxan ma fe fala e xa. **17** E to a to, e yi a batu. Koni siken yi ndee yi. **18** Yesu yi a maso e ra, a naxa, “Senben birin bata fi n ma kore xənnə nun bəxo xənnə fari. **19** Nayi, e siga, e sa siyane

birin findi n ma xarandiine ra, e yi e rafu igen n Fafe Ala nun a Dii Xəmənen nun a Nii Sarijanxin xinli, **20** n na e yamarixi naxanye birin ma, e yi e xaran ne suxun ma. A mato, n luma nən e xən ma waxatin birin han dunuja rajanni.” (aiōn g165)

Maraka

1 Ningila Yesu a fe folon ni ito ra, Alaa Muxu Sugandixina, Alaa Dii Xemena. **2** A sebexi Nabi Esayi Kitabun kui, a naxa, “N nan n ma xeraan nasigama nen i yee ra, a kiraan nafala i xa. **3** Muxuna nde xuiin minima tonbonni, a naxa, ‘E kirani ton Marigin yee ra, e kirane matinxin a xa!’” **4** Nanara, Yoni yi mini kenenni tonbonni, a lu yamaan nafuye igeni e tubi feen na Ala ma, a e kawandi, a e xa e xun xanbi so e yulubine yi, e yi rafu igeni alogo e yulubine xa xafari. **5** Yudaya kaane nun Yerusalen kaane birin yi siga a fema. E yi e ti e yulubine ra. A yi e rafu igeni Yuruden baani e tubi feen na. **6** Nəgomə xabe dugin nan yi ragodoxi Yoni ma, a tagi xidixi kidin na. A yi baloma tuguminne nun kumin nan na. **7** A yi kawandin ba yamaan xa, a naxa, “Naxan fama n tan xanbi ra, na senben gbo dangu n tan na, n mi sa lan nen n xa findi a sankidin luti fulunna ra. **8** N tan e rafuma igen nin iki, koni a tan e rafuma Alaa Nii Sarijanxin nin.” **9** Na xanbi ra, Yesu yi fa sa keli Nasareti taani Galile yamanani. Yoni yi a rafu Yuruden baani. **10** Yesu yi a rakelima igeni waxatin naxan yi, a yi kore xonna to rabiye, Alaa Nii Sarijanxin yi godo a ma ganba sawurani. **11** A yi fala xuiin me keli kore, a naxa, “N nafan Dii Xemen ni i tan na. I bata n kenen ki fajii.” **12** Na waxati yeteni, Alaa Nii Sarijanxin yi a rasiga tonbonni. **13** A yi lu na yi soqe tonge naanin. Setana yi kata a xa a ratantan. Yesu nun burunna subene nan yi a ra. Malekane fan yi fa a mali. **14** E yelin xanbini Yoni se kasoon na, Yesu yi siga Galile yamanani. A sa Alaa falan Xibaru Fajin kawandin ba yamaan xa, **15** a naxa, “Waxatin bata a li, Alaa Mangayaan bata maso. E e xun xanbi so e hakene yi, e denkeleya n ma falan Xibaru Fajin ma.” **16** Awa, Yesu yi sigan tima Galile Daraan dexon ma waxatin naxan yi, a yexe suxun muxu firin to, Simon nun a ngaxakedenna Andire. E yi yexe suxu nin yalaan na darani. **17** Yesu yi a fala e xa, a naxa, “E bira n foxo ra. N xa e findi muxu fenne ra Ala xa alo e yexen suxuma kii naxan yi.” **18** E yi e yalane bira mafuren! E bira a foxo ra. **19** Yesu mon yi siga yeen na ndedi, a yi Yaki nun a ngaxakedenna Yoni to, Sebede a dii xemene. E yi e yalane yitonma kunkin kui. **20** Yesu yi e xili keden na. E yi e fafe Sebede nun walikene lu kunkin kui, e bira Yesu foxo ra. **21** E yi sa Kaperunan taan li. Yesu yi so salide banxini Matabu Loxoni, a yi lu xaranna tiye. **22** Yamaan yi kabe Yesu

xaran ti kejaan ma, amasoto a yi xaranna tima Ala senben nin. A mi yi luxi alo sariya karamoxone. **23** Na waxatin yeteni, xemena nde yi e salideni yinna jaxin yi naxan foxo ra. Yinnan yi xemen nasonxo, a yi falan ti a xon, **24** a naxa, “Yesu Nasareti kaana, i waxi nanse xon ma nxu xa? I faxi nxu halagiden nin ba? N ni i kolon, Alaa muxu sarijanxin nan i tan na.” **25** Yesu yi yinnan yamari a sobeen na, a naxa, “I dundu, xete xemeni ito foxo ra.” **26** Yinna jaxin yi xemen naxuruxurun katil! A gbelegbele, a xete a foxo ra. **27** Muxune yi kabe, e yi e bode maxodin folo, e naxa, “Nanse ito ra, xaran nenen ni ito ra ba, Ala senben naxan yi? A yinna jaxine yamarima, e yi a falan suxu.” **28** Muxune yi Yesu a fe xibarun me Galile yamanan yiren birin yi mafuren! **29** E to mini salide banxini, Yesu nun Yaki nun Yoni yi siga Simon nun Andire konni keden na. **30** Simon bitan gilen furaxin yi saxi banxini, a fatin wolonxi a ma. E yi a fe fala Yesu xa sa! **31** Yesu yi siga na jaxanla fema, a yi a suxu a yiin ma, a yi a mali, a yi a rakeli. Fati mawolonna yi a bejin, a wali folo e xa. **32** Ninbanna ra, sogen godo xanbini, yamaan yi fa furetone birin na Yesu fema e nun jinan jaxine muxun naxanye foxo ra. **33** Taan birin yi e malan deen na. **34** Yesu yi fureto wuyaxi rakendeya furen sifan birin ma, a jinan wuyaxi kedi muxune foxo ra. Koni a mi yi tinma jinnan yi falan ti hali ndedi amasoto e yi a kolon. **35** Na xoton bode subaxani, Yesu yi keli, a mini, a siga yire madunduxina nde yi Ala maxandideni. **36** Koni Simon nun a lanfane yi siga Yesu fendeni. **37** Awa, e a toxina, e yi a fala a xa, e naxa, “Muxune birin i fenma iki.” **38** Koni Yesu yi e yabi, a naxa, “En siga taa gbete ye yi be dexon ma, alogo n mon xa sa kawandin ba menne fan yi, amasoto n faxi na nan ma.” **39** Nayi, a yi siga Galile yamanan yiren birin yi, a sa kawandin ba salide banxine kui, a yi jinnan kedi. **40** Dogonfontoon yi fa Yesu fema, a yi a xinbi sin a bun ma. A yi a mafan, a naxa, “Xa i tinje, i noe n nakendeye nen.” **41** Yesu yi kininkinin a ma han, a yi a yiin sa a ma. A yi a yabi, a naxa, “N bata tin, i xa kende ya!” **42** Dogonfonna yi a bejin sa! Xemen yi kende ya. **43** Na xanbi ra, Yesu yi a maxadi ken ken, a yi a rasiga keden na, **44** a naxa, “I tuli mati, i nama a fala muxu yo xa. Koni siga saraxaraliin fema mafuren, a xa i mato. Na xanbi ra, i saraxan ba i rasarijan feen na alo Nabi Musa a yamari kii naxan yi. Na findima nen sereyaan na saraxaraline xa.” **45** Koni xemen yi siga yiren birin yi, a sa feni ito fala muxune birin

xa. A yi a fala kati, han Yesu mi yi fa nœ soe taani kenenni, a lu a danna burunna ra. Yamaan yi fa a fema sa keli yiren birin yi.

2 Waxatidi danguxina, Yesu yi xete Kaperunan taani.

Yamaan yi a me a Yesu bata fa a konni. **2** Muxu wuyaxi yi e malan na yi. E na rafe han hali tandeni, tide mi yi fa na. Yesu yi Alaa falan kawandi ba e xa. **3** Muxu naanin yi fa xeme lebutenna nde ra e yii. **4** E mi yi nœ Yesu masote amasoto yama gbeen yi na yi. Nanara, e yalenna raba banxin fari Yesu xun ma. E xemen nagodo Yesu ma na yalenna ra, a saxi a sa seni. **5** Yesu to e denkeleyaan to, a yi a fala lebutenna xa, a naxa, “N ma dii, i yulubine bata mafelu.” **6** Sariya karamoxona ndee yi doxi na yi, ne yi e miri e yete ma, e naxa, **7** “A falan tima na ki nanfera? A bata Ala rayelefu. Muxu yo mi nœ yulubine mafeluye fo Ala keden peenal!” **8** Yesu yi e miriyaan kolon mafuren! Nanara, a yi a fala e xa, a naxa, “E mirima fe sifani itoe ma nanfera?” **9** Nanse fala raxolo lebutenna xa, ‘I yulubine bata mafelu’ hanma ‘Keli, i ya sa seen tongo, i sigan ti?’ **10** N na yitama e ra nen nayi fa fala senbena n tan Muxuna Dii Xemen yii dunuja yi, n muxun mafelu a yulubine ra.” A yi a fala lebutenna xa, a naxa, **11** “N na a falama i xa, keli i i ya sa seen tongo, i siga i konni.” **12** Xemen yi keli mafuren, a yi a sa seen tongo, a sigan ti e birin yee xori. E birin yi kabe katil! E yi Ala tantun, e naxa, “Nxu munma ito joxonna to singen mumel!” **13** Yesu mon yi siga daraan de, yama gbeen yi fa a fema, a e xaran folo. **14** A yi sigama waxatin naxan yi, a mudu maxinla nde to, a xili Lewi, Alifaa dii xemena, a yi doxi mudu maxilideni. Yesu yi a fala a xa, a naxa, “Bira n foxo ra.” Lewi yi keli, a bira a foxo ra. **15** Na xanbi ra, Yesu yi siga a degedeni Lewi a banxini. Mudu maxinla nun hake kan wuyaxi yi doxo e degedeni Yesu nun a xarandiine fema, bayo na muxu sifan wuyaxi yi biraxi a foxo ra. **16** Farisi muxu sariya karamoxona ndee yi Yesu to a dege hake kanne nun mudu maxinle fema. Nanara, e yi a xarandiine maxodin, e naxa, “Nanfera Yesu a degema mudu maxinle nun hake kanne fema?” **17** Yesu yi e xuiin me, a yi e yabi, a naxa, “Muxun naxan kende na mako mi seribaana fo furetone. N mi faxi tinxin muxune xan xilideyi fo hake kanne.” **18** Yoni a xarandiine nun Farisi muxune yi sunna suxuma. Muxuna ndee yi fa Yesu fema, e yi a maxodin, e naxa, “Nanfera Yoni a xarandiine

nun Farisi muxune xarandiine sunna suxuma koni i gbeene mi sunna suxuma?” **19** Yesu yi e yabi, a naxa, “Naxalandi kanna nema jaxalandi tiine fema, e sunna suxe ba? Na mi lige, xa a e fema!” **20** Koni waxatina nde fama, jaxalandi kanna bama nen e ye. Na waxatini, e sunna suxuma nen. **21** Muxu yo mi dugi nene dungin tonge, a yi dugi fonna beteren a ra. Xa a na liga, a dugi nenen boma nen a fonna ra, a yinla yi ragbo ayi. **22** Muxun mi manpa nenen se se sase fonna kui. Xa a na liga, manpa nenen se saseen kalama nen, se saseen nun manpaan yi kala. Koni manpa nenen sama se sase nenen nan kui.” **23** Yesu nun a xarandiine yi danguma xenna nde ma Matabu Loxona nde yi, a xarandiine yi sansi tonsonne ratorondon folo. **24** Nanara, Farisi muxune yi a fala Yesu xa, e naxa, “I ya xarandiine feen naxan ligama, na mi daxa Matabu Loxoni.” **25** Yesu yi e yabi, a naxa, “E munma na xaran ba, kamen Dawuda nun a foxorabirane suxu waxatin naxan yi?” **26** A so nen Alaa banxini Saraxarali Kuntigi Singena Abiyatari waxatini, a yi Alaa buru ralixin don muxe mi daxa a xa naxan don fo saraxaraline. Dawuda mon yi ndee so a foxorabirane fan yii.” **27** Yesu mon yi a fala e xa, a naxa, “Matabu Loxon daxi muxun nan xa, muxun xa mi daxi Matabu Loxon xa. **28** Nanara, n tan Muxuna Dii Xemen nan Matabu Loxon kanna ra.”

3 Na xanbi ra, Yesu mon yi siga salide banxini. A yi xeme yii madonxina nde li menni. **2** E yi lu Yesu matoe xa a xemen nakendeye Matabu Loxoni alogo e xa a kansun na fe ra. **3** Yesu yi a fala xeme yii madonxin xa, a naxa, “Keli, i fa yamaan yetagi be.” **4** Na xanbi ra, a yi yamaan maxodin, a naxa, “Matabu Loxoni, nanse daxa a xa liga, a jaxin ba, xa a fajina? En yi muxun niin nakisi ba, xa en yi a halagi?” Koni e mi fefe fala. **5** Yesu xoloxin yi e mato. A sunu e kininkinintareyana fe ra ki fajni. A yi a fala xemen xa, a naxa, “I yiini bandun.” A yi a yiini bandun, a kendeya. **6** Nanara, Farisi muxune yi mini mafuren! E nun Herode a muxuna ndee yi sa e bode to, e Yesu faxe feni ton. **7** Yesu nun a xarandiine yi siga Galile Daraan dexon ma, yama gbeen yi bira a foxo ra keli Galile yamanani, e nun Yudaya **8** nun Yerusalen nun Idumeya nun Yuruden baan kidimaan nun Tire taan nun Sidon taan nabilinni. Yesu yi feen naxanye ligama, yamaan yi na me, e yi fa a fema. **9** A yi a fala a xarandiine xa a e xa kunkina nde fen a xa, alogo yamaan nama a yigbeten. **10** A bata yi muxu wuyaxi

rakendeya nun. Furetone birin yi kataxi alogo e xa e maso a ra, e yi e yiin din a ra. **11** Nba, yinna naxine yi muxun naxanye foxo ra, ne a to waxatin naxan yi, e bira a bun ma, yinna naxine yi lu e ragbelegbele, e falan ti e xon, e naxa, “Alaa Dii Xemen nan i tan na.”

12 Koni a yi yinnane yamari, a e nama a fe fala. **13** Awa, Yesu yi te geyaan fari. A yi waxi muxun naxanye xon ma, a yi ne xili, e yi fa a fema. **14** A yi muxu fu nun firin sugandi, a naxanye findi xerane ra alogo e xa lu a fema, **15** a yi e rasiga kawandi badeni, a fangan so e yii e jinnane kedi. **16** A muxu fu nun firinna naxanye sugandi, ne nan itoe ra, Simon, Yesu naxan xili sa Piyeri, **17** e nun Sebede a dii xemen Yaki nun a xunyen Yoni Yesu naxanye xili sa “Boyanerige.” Na bunna neen “Kuye Sarinna diine.” **18** E nun Andre nun Filipi nun Barotolome nun Matiyu nun Tomasi nun Alifaa dii xemen Yaki nun Tade nun Simon e naxan ma a “Yahudiya siya xanuna,” **19** e nun Yudas Isakariyoti naxan Yesu yanfa, a a so yiini. **20** Na xanbi ra, Yesu yi xete banxini. Yama gbeen yi e malan na yi han Yesu nun a xarandiine mi yi fa noe e dege feren sote. **21** A denbayaan na me waxatin naxan yi, e siga a tongodeni, amasoto a denbayaan yi a falama nen, e naxa, “Seen bata so a yi.” **22** Sariya karamoxon naxanye fa sa keli Yerusalen taani, ne yi a fala, e naxa, “Belesebu nan a foxo ral!” Bonne naxa, “A yinnane kedima yinna mangan Belesebu barakan nin.” **23** Nanara, Yesu yi e xili a fema, a sandana ndee sa e xa, a naxa, “Setana noe Setana kede ba? **24** Xa yamanan bata yitaxun yengeni, na yamanan mi sabatima. **25** Yengen tanden naxan kui, na tanden mi sabatima. **26** Xa Setana keli a yete xili ma, a mangayani taxunma yengeni nen. A mi sabatima, a jannma nen na yi. **27** Muxu yo mi noe soe senbemaana banxini, a yi a yii seene tongo, xa a mi senbemaan xidi singen. Na xanbi ra, a banxi kui seene tonge nen. **28** N xa jondin fala e xa, muxun yulubin naxan birin ligama, hali a na Ala rayelefu, Ala e mafeluye nen na birin na. **29** Koni

muxun naxan na Alaa Nii Sarijannxin nayeleyu, na mi mafeluye mume, habadan yulubin luma a ma nen.”

(aiōn g165, aiōnios g166) **30** Yesu ito falaxi nen amasoto muxune yi a falama nen, e naxa, “Yinna naxin nan a foxo ra.” **31** Na xanbi ra, Yesu nga nun a xunyene yi fa. E ti tandeni, e xeraan nasiga a xilideni banxini. **32** Yamaan yi dōxi Yesu rabilinni, e yi a fala a xa, e naxa, “A mato, i nga nun i xunyene tandeni e waxi i to feni.” **33** Yesu yi e yabi, a naxa, “Ndee nga nun n

xunyene ra?” **34** Muxun naxanye dōxi a rabilinni, a yi ne mato, a naxa, “N nga nun n xunyene mato be yi. **35** Amasoto muxun naxanye Ala sagoon ligama, ngaxakeden xememaan nun a naxalanmaan ne nan na e nun n nga.”

4 Na xanbi ra, Yesu mon yi xaranna folo daraan de.

Yama gbeen yi malan a fema han a yi so kunkin kui daraan xun ma. Yamaan yi lu baan xe deen xon ma. **2** A yi e xaran fe wuyaxi ma sandani. A yi a fala e xa a xaranni, a naxa, **3** “E tuli mati. Xee biina nde yi mini, a siga a sansiin wolideni. **4** A yi sansiin wolima waxatin naxan yi, ndee yi bira kiraan xon ma. Xoline yi ne don. **5** Ndee yi bira fanyen fari bende gbee mi yi denaxan yi. E yi soli mafuren, amasoto benden mi yi gbo na yi. **6** Sogen to te, e yi lisi a ra, e xara, bayo e salenne mi yi godoxi boxoni ki fapi. **7** Sansina ndee yi bira sexe jali kanne tagi, sexene yi gbo, e yi e don, e mi bogi. **8** Koni ndee yi bira boxo fajini, e soli, e sabati, e bogi, e keden kedenna birin yi tonge saxan soto hanma tonge sennin, hanma keme.” **9** Yesu yi a fala, a naxa, “Xa tunla naxan xon, a feen me, na xa a tuli mati!” **10** Yesu yi a danna waxatin naxan yi, muxun naxanye nun a xarandii fu nun firinne yi a rabilinni, ne yi a maxodin sandane fe ma. **11** Yesu yi e yabi, a naxa, “Alaa Mangayaan wundo feen bata so e tan yii. Koni muxun naxanye a fari ma, ne feen birin mema sandan nin **12** bayo, ‘E seen matoma nen han, koni e mi a yigbema. E e tuli matima nen han, koni e mi fefe famuma, alogo e nama maxete, e yulubine yi xafari.” **13** Na xanbi ra, Yesu yi e maxodin, a naxa, “E mi sandani ito bunna kolon ba? Xa e mi ito kolon, e sandan bonne bunne kolonma di?” **14** “Awa, sansi wonla Alaa falan nan wolima. **15** Muxuna ndee luxi nen alo sansiin naxanye bira kiraan xon ma. E na Alaa falan me tun, Setana yi fa, a yi a ba e yi. **16** Muxuna ndee luxi nen alo sansiin naxanye bira fanyen fari. E na Alaa falan me, e a suxuma nen sewani mafuren! **17** Koni salen mi e bun ma, e mi buma. Toron nun besenxonyaan na fa Alaa falana fe ra, e birama nen tantanni mafuren! **18** Muxuna ndee luxi nen alo sansiin naxanye bira sexe jali kanne tagi. E Alaa falan me, **19** koni dunuja xaminne nun nafunla fe kunfan nun nata gbete ye yi a liga e falan bejin, a tonon mi lu e ma. (aiōn g165) **20** Koni muxuna ndee luxi nen alo sansiin naxanye bira boxo fajini. E Alaa falan mema nen, e yi a suxu, e bogi. Ndee yi tonge saxan

namini, ndee tonge sennin, ndee keme.” 21 Yesu yi a fala e xa, a naxa, “Lenpun daxe deben bun ma hanma saden bun ma ba? A mi daxe ma seen xan fari ba? 22 Feen naxanye birin luxunxi, ne makenenma nen. Feen naxanye birin wundoni, ne minima nen kenenni. 23 Xa tunla naxan ma a feen me, na xa a tuli mati!” 24 A mon yi a fala e xa, a naxa, “E feen naxan mexi, e na fe liga e yeren ma. E ligaseen naxan yatema bonne xa, Ala fan na yatema e xa nen, a yi nde sa a fari. 25 Seen muxun naxan yii, nde mon soma nen na yii, koni se mi muxun naxan yii, hali naxan di a yii, na bama nen a yii.” 26 Yesu mon yi a fala, a naxa, “Alaa Mangayaan luxi nen alo xemen naxan a sansiin woli a xeen ma. 27 Xa a xi, xa a mi xi, kaxen ba, yanyin ba, sansi xonna solima nen, a yi gbo, koni a tan mi a liga kiin kolon. 28 Baxon nan bogi seene raminima a yete ra. A solima nen singe, na xanbi ra, a sabati, donxen na a yi bogi. 29 A na mo waxatin naxan yi, xemen yi woliten naso a ra, bayo a xaba waxatin bata a li.” 30 Yesu yi maxodinna ti, a naxa, “En na Alaa Mangayaan sama nanse ma, hanma en na e yebe sandan mundun xon? 31 A luxi nen alo sansi kexe xuridin naxan xurun dangu se kesen birin na muxune naxanye sima. 32 Koni a na si, a gboma nen han a dangu sansine birin na. A yiine yi gbo han xoline yi e tene sa a yiine yi, a nininna ra.” 33 Yesu yi Alaa falan nali e ma sanda sifani ito wuyaxi xon, e yi na naxanye famunje. 34 A mi yi falan tima e xa, xa a mi sandan sa. Koni e nun a xarandiine nema yi e danna, a yi e birin yebama nen e xa. 35 Na laxon jinbanna ra, Yesu yi a fala a xarandiine xa, a naxa, “En gidi daraan kidi ma.” 36 Nayi, e yi keli yamaan ye, e sa so kunkin kui Yesu yi dxi naxan kui. Kunki gbeteye fan yi a daxon. 37 Foye gbeen yi keli, igen moronne yi so folo kunkin kui, a yi luxi ndedi kunkin xa rafe igen na. 38 Yesu yi xima kunkin kui xanbin na, a xunna saxi xunbunsaan fari. E yi a raxulun, e yi a fala a xa, e naxa, “Karamoxo, i ya fe mi nxu faxe feni ba?” 39 Yesu yi keli, a foyen nun igen moronne yamari, a naxa, “I raxara, i sabari!” Foyen yi dxi, na yi madundu yenyen! 40 Na xanbi ra, Yesu yi a fala e xa, a naxa, “E gaxuxi nanfera? Denkeleya mi e yi singe ba?” 41 Koni e gaxu kati! E a fala e bode xa, e naxa, “Nde xemeni ito ra? Hali foyen nun igena a falan suxuma!”

5 E yi dangu Galile Daraan bode faxon na Gadara yamanani. 2 Yesu godo nen kunkin kui tun, xemena

nde yi fa sa keli bilingan yireni, yinna naxin yi naxan foxo ra. 3 Na xemen yi bilingan yiren nin, muxu yo mi yi fa na e xide sonon, hali yolonxonna ra. 4 Amasoto e bata yi a sanne balan wuren na, e a yiine xidi yolonxonne ra sanja ma wuyaxi, koni a yi a yolonxonne yibolonma nen, a wurene ba a sanne ma. Muxu yo mi yi fa a na. 5 A yi sigama bilingan yiren nin, e nun geyane fari kaxen nun yanyin birin na. A yi gbelegbelema nen waxatin birin, a yi lu a yete maxabe gemen na. 6 A to sa Yesu to fe wulani, a yi a gi, a sa a xinbi sin a bun ma. 7 A yi a xuini te, yinnan yi a ragbelegbele a falan ti a xon, a naxa, “Kore Xonna Alaa Dii Xemena, Yesu, i waxi nanse xon ma n tan xa? I kolo Ala yi, fa fala i mi n naxankatamal!” 8 A na falaxi nen, amasoto Yesu bata yi a fala, a naxa, “I tan yinna naxina, xete xemeni ito foxo ra.” 9 Yesu yi yinnan maxodin, a naxa, “I xili di?” A yi a yabi, a naxa, “N xili nen, ‘Ganla.’ Amasoto nxu wuya!” 10 Yinnan yi lu Yesu mafanje, a nama yinnane kedi yamanani. 11 Awa, xose kuru gbeen yi na daxon ma, e yi e degema geyaan ma. 12 Yinnane yi Yesu mafan, e naxa, “Nxu rasiga xose kuruni itoe ye, alogo nxu xa sa so ne yi.” 13 Nanara, a yi tin. Yinna naxine yi xete xemen foxo ra, e sa so xosene yi. Xose kurun birin yi godo e giye geyaan na, e godo darani, e faxe. Xose wuli firin naxon. 14 Muxun naxanye yi xosene kantanma, ne yi siga e giye taani, e sa na xibarun nali taani e nun xene ma. Yamaan yi siga na feen matodeni. 15 Awa, e siga Yesu fema, e na xemen to yinna ganla yi naxan foxo ra nun. A dxi, domaan nagodoxi a ma, a bata xaxili soto. Nanara, e birin yi gaxu kati! 16 Naxanye na feene birin to, e yi ne yeba yamaan xa naxan ligaxi na muxun xa yinna naxin yi naxan foxo ra e nun naxan liga xosene ra. 17 Nanara, e Yesu mafan folo, a xa keli e yamanani. 18 Awa, Yesu yi soma kunkin kui waxatin naxan yi, yinna naxin yi xemen naxan foxo ra nun, na yi Yesu mafan alogo a xa lu a fema. 19 Koni Yesu mi tin, a yi a fala a xa, a naxa, “Xete i konni i ya denbayaan fema. Marigin naxan ligaxi i xa, a kininkinixi i ma kii naxan yi, i sa na fala e xa.” 20 Awa, xemen yi siga na Taa Xun Fune birin yi. Yesu feen naxan ligaxi a xa, a sa na fala. Na muxune yi kabe kati! 21 Yesu mon yi xete daraan bode faxon na kunkin kui. Yama gbeen yi malan Yesu rabilinni daraan daxon ma. 22 Salide banxin kuntigina nde yi fa, naxan yi xili Yirusu, a yi a to, a bira Yesu san bun ma. 23 A yi a mafan kati, a naxa, “N ma dii temen faxamaan ni i ra! Yandi, fa

i yiin sa a ma alogo a xa kendeɣa, a lu a nii ra.” 24 Awa, Yesu yi siga a ɓɔɔ ra, yama gbeen fan yi siga a ɓɔɔ ra, e yi a yigbeten han! 25 Naxanla nde yi na nun naxalan furen yi naxan ma xabu jɛɛ fu nun firin. 26 A bata yi tɔrɔ seriba wuyaxi fɛma a dandandeni, a gbetin birin bata yi jan, koni a mi kendeɣa, ɓɔ a furen to yi sigan gboɛ ayi! 27 A to Yesu a fɛ mɛ, a yi fa yamaan yɛ Yesu xanbi ra, a yi a yiin din a domaan na. 28 Amasɔɔ a yi a mirima nɛn, a naxa, “Hali n na n yiin din a domaan na gbansan, n kendeɣama nɛn.” 29 Na waxatin yeteni, wunla naxan yi minima a ma, na yi dan, a yi a kolon a fatini fa fala a bata kendeɣa. 30 Yesu yi a kolon mafuren a senbena nde bata mini a yi. A yi a yɛɛ rafindi yamaan ma a yi a fala, a naxa, “Nde a yiin dinxi n ma domaan na?” 31 A xarandiine yi a fala a xa, e naxa, “I yamaan toma i yigbetɛnjɛ, i mɔn a falama, i naxa, ‘Nde a yiin dinxi n na?’” 32 Koni Yesu yi lu a rabilinna matɔɛ alogo a xa naxanla to naxan a yiin dinxi a ra. 33 Naxanla yi xuruxurunma gaxuni, a to bata a kolon naxan ligaxi a xa, a yi fa bira a san bun, a yi jɔndin fala a xa. 34 Yesu yi a fala a xa, a naxa, “N ma dii tɛmɛna, i ya denkeleyaan bata i rakisi, siga ɓɔjɛ xunbenli, i ya tɔrɔn bata jan.” 35 Yesu yi na falama waxatin naxan yi, xɛrana ndee yi fa sa keli salide banxin kuntigin Yirusu konni. Ne yi a fala Yirusu xa, e naxa, “I ya dii tɛmɛn bata faxa. I karamɔɔ tɔrɔma nanfera?” 36 Yesu mi a tuli mati e falan na, koni a yi a fala salide banxin kuntigin xa, a naxa, “I nama gaxu, i xa denkeleya tun!” 37 A mi tin muxu yo xa siga a ɓɔɔ ra, ɓɔ Piyɛri nun Yaki nun Yaki xunyen Yoni. 38 E to salide banxin kuntigin konna li, Yesu yi e to kontɔfilixi, e yi wugama han, e gbelegbelema! 39 A yi so banxini, a yi a fala e xa, a naxa, “E kontɔfilixi nanfera, ɛ yi wuga? Diin mi faxaxi, a xiin nɛn.” 40 Koni, e yi a magele ɓɔɔ. A yi e birin namini banxini, a yi diidina nga nun a fafe xili e nun a xarandii saxanna. E diidin saxi denaxan yi, e so mɛnni. 41 A yi a suxu a yiin ma, a yi a fala a xa a kon xuini, a naxa, “Talita kumi.” Na bunna nɛɛn fa fala, “Dii tɛmɛna, n na falama i xa, keli!” 42 Dii tɛmɛn yi keli mafuren, a sigan ti ɓɔɔ. A barin bata yi jɛɛ fu nun firin ti. E yi kabe na ma kati! 43 Koni Yesu yi e yamari, a muxu yo nama feni ito kolon, e mɔn xa donseen so diin yii.

6 Yesu yi keli na yi, a siga a konni, a maxuruxi taan naxan yi, a xarandiine biraxi a ɓɔɔ ra. 2 Matabu

Lɔxɔn to a li, a yi xaranna ti ɓɔɔ salide banxini. Yamaan naxan yi tuli matixi a ra, ne yi kabe, e yi a fala, e naxa, “A ito sɔtɔxi minen yi? A xaxinla sifani ito sɔtɔxi di, a to fa kabanako feni itoɛ ligama? 3 Kamudɛrɛn xa mi ito ra ba? Mariyamaa diin xa mi a ra ba? Yaki nun Yusufu nun Yudasi nun Simɔn tada xa mi ito ra ba? A xunye naxalanmane xa mi doxi be ba?” E yi e mɛ a ra. 4 Yesu yi a fala e xa, a naxa, “Nabiin binye yiren birin yi, ɓɔ a kon taan nun a xabilan nun a denbayani.” 5 A mi nɔ kabanako fe yo lige mɛnni, ɓɔ a to a yiin sa furetɔna ndee tun ma, a yi e rakendeɣa. 6 A yi kabe e denkeleyatareyaan ma han! Na xanbi ra, Yesu yi siga na taane yi, a yi yamaan xaran. 7 A yi xarandii fu nun firinna xili, a yi e rasiga firin firin yɛɛn ma. A yi senben so e yii yinna jaxine xun na. 8 A yi e yamari, a naxa, “E nama siga sese ra ɛ yii sigatini, ɓɔ dunganna. E nama siga buru ra hanma bondunla hanma gbetina ɛ tagi xidini. 9 E xa sankidin so ɛ sanni koni ɛ nama doma gbee firin xali ɛ yii.” 10 A mɔn yi a fala e xa, a naxa, “E na yigiya banxin naxan yi, ɛ xa lu mɛnni han ɛ yi keli na taani. 11 Xa ɛ yirena nde li, yamaan mi ɛ rasuxu, e mi e tuli mati ɛ ra, ɛ xa keli na yi. E yi ɛ sanne rakunkun, ɛ yi na gbangbanna ba ɛ sanne ra. Na findima nɛn sereyaan na e xal!” 12 Nayi, e yi siga, e sa kawandin ba, e naxa, a yamaan xa e xun xanbi so e hakene yi. 13 E yi jinan wuyaxi kedi, e turen sa furetɔne xunne yi misaala ra, e yi e rakendeɣa. 14 Manga Herode yi na birin mɛ amasɔɔ Yesu xinla bata yi xuya ayi yiren birin yi. Muxuna ndee naxa, “Yoni Marafu Tiin nan kelixi sayani. Nanara, senbena a yii, a kabanako feene liga.” 15 Koni ndee naxa, “Nabi Eli nan a ra.” Ndee naxa, “Nabiin nan a tan na alo waxati danguxin nabina nde.” 16 Herode a mɛ waxatin naxan yi, a yi a fala, a naxa, “Yoni nan a ra, n naxan xunna sege a de! A bata keli sayani!” 17 Herode yetɛɛn yamarin fi nɛn, a Yoni xa suxu, e yi a xidi, e yi a sa kasoon na Herodiyade a fe ra, naxan bata yi doxo Herode fafaxakedenna Filipi xɔn, Herode naxan doxo a naxanla ra. 18 Yoni bata yi a fala Herode xa, a naxa, “A mi daxa i xa i fafaxakedenna naxanla doxo!” 19 Nanara, Herodiyade yi xɔɔ Yoni ma, a yi waxi a faxa feni. Koni a mi nɔ, 20 amasɔɔ Herode yi gaxuxi Yoni yɛɛ ra, bayo a yi a kolon a muxu tinxinxi sarijanxin nan yi a ra. Nanara, a yi lu a ratange. Herode na yi a tuli mati Yoni ra waxati yo yi, a yi kuisanma nɛn, anu a yi rafan a ma a xa a tuli mati a ra. 21 Koni lɔxɔna nde, Herode yi a

bari loxōn sumunna donse donni tōn a kuntigine nun sofa mangane nun Galile yamanan muxu gbeene xa. **22** Herodiyade a dii temen yi so banxini, a yi a bodon. Na yi Herode nun a muxu xilixine kenēn. Nanara, mangan yi a fala na sungutunna xa, a naxa, “I waxi sese xōn ma, n na soē i yii.” **23** A yi a kōlō, a yi saratin tongo a xa, a naxa, “I na n xandi sese yi, n na soma i yii nen hali n ma yamanan fōxō kedenna!” **24** Nanara, sungutunna yi mini, a siga, a sa a nga maxōdin, a naxa, “N xa a xandi nanse yi?” A nga yi a yabi, a naxa, “Yoni Marafu Tiin xunna.” **25** Nayi, dii temen yi xete mangan fema mafuren, a yi a fala a xa, a naxa, “N waxi a xōn ma, i xa Yoni Marafu Tiin xunna so n yii wure lefaan ma iki sa!” **26** Na yi mangan niin nafōrō a ma, koni bayo a bata yi saratin tongo a muxu xilixine yēē xōri, a mi yi wama tondi feni. **27** A yi sofana nde yamari mafuren, a a xa sa fa Yoni xunna ra. Na yi siga, a sa Yoni xunna sege a de kasoon na, **28** a fa a ra wure lefaan ma. A yi a so sungutunna yii, na yi a so a nga yii. **29** Yoni a xarandiine to na mē, e yi fa a binbin tongo, e sa a maluxun. **30** Xerane yi e malan Yesu fema, e feen naxan birin ligaxi, e nun e yamaan xaran kii naxan yi, e yi na birin yeḅa a xa. **31** A yi a fala e xa, a naxa, “E fa ε danna yire madunduxina nde yi, ε fa ε matabu n fema.” Amasōto muxu wuyaxi yi fama, e siga, han e mi yi feren yati sōtōma, e yi e dege. **32** Nayi, e yi te kunkin kui alogo e xa siga yire madunduxina nde yi. **33** Koni muxu wuyaxi yi e to sige, e yi a kolon mafuren! Nanara, muxune yi keli taane birin yi, e yi e gi han e tan singe yi sa so. **34** Yesu to mini kunkin kui, a yi yama gbeen to na yi, a kininkinin e ma amasōto e yi luxi nen alo yēxēen naxanye kantan muxu mi na. Nanara, a e xaran fōlō fe wuyaxi ma. **35** A xarandiine yi fa a fema jninbanna ra, e naxa, “Kōēen bata so, burunna nan nun be ra. **36** Yamaan naxete alogo e xa siga be rabilinna banxidene ra e nun xēene ma, e sa donseen sara e yete xa.” **37** Yesu yi e yabi, a naxa, “E tan yetēen xa donseen so e yii.” E yi a fala a xa, e naxa, “I waxi a xōn ma, nxu xa sa walikēen kike solomasexē saranna sara burun na ba nxu yi donseen so e yii?” **38** Yesu yi e maxōdin, a naxa, “Buru xun yoli e yii? E sa a mato.” E yi a yabi, e naxa, “Buru xun suulun, yēxē firin nan be.” **39** Nayi, Yesu yi a fala, a e xa yamani taxun dōxōde yēen ma, e dōxō sexene fari. **40** Awa, yamaan yi dōxō muxu keme yēen nun muxu tonge suulun yēen ma. **41** Na xanbi ra, Yesu yi buru xun suulunne nun yēxē firinne

tongo, a yi a yēen nate kore, a barikan bira Ala xa. A na buru xun suulunni gira, a yi a so a xarandiine yii, a e xa a yitaxun yamaan na. A yēxē firinne fan yitaxun e ra. **42** E birin yi e dege, e lugo ken! **43** Xarandiine yi debe fu nun firin nafe burun nun yēxē dungi dōnxene ra. **44** Muxun naxanye na burune don, xemene gbansan, muxu wuli suulun. **45** Na waxatin yeteni, Yesu yi a xarandiine rasiga kunkin kui a yēē ra Betasada taani daraan kidi ma. A tan yi lu xanbin na yamaan naxetedeni. **46** A to keli yamaan fema, a yi te geyaan fari Ala maxandideni. **47** Ninbanna to a li, kunkin yi daraan tagini, Yesu tan kedenna bōxōni. **48** A yi a to a xarandiine tōrōma kunkin nasiga feen na bayo foye gbeen bata yi a xun sa e ma. Na nan a liga a siga e fema subaxani, a sigan tima igen fari, a yi dangu feni e ra nun. **49** Koni e to a to sigan tiyē igen fari. E yi e miri fa fala, muxun yelenna nan a ra. E gbelegbele, **50** amasōto e birin a to nen, e yi gaxu kati! Yesu yi falan ti e xa mafuren, a naxa, “E wekile, n tan nan a ra. E nama gaxu.” **51** A so kunkin kui e fema, foyen yi a raxara. Xarandiine yi kabe han! **52** Amasōto e mi buru don feen kabanako feen famuxi, bayo e bōjnen yi xōdōxō. **53** Yesu nun a xarandiine yi daraan gidi. E siga Genesareti yamanani, e kunkin xidi na yi. **54** E to mini kunkin kui tun, yamaan yi Yesu kolon. **55** Mēn kaane na yi a xinla mē denaxan yi, e birin yi fama e furetōne ra nen a fema dagine ma. **56** Yesu siga yiren naxan birin yi, banxidene nun taane nun xēene, mēn muxune yi fama e furetōne ra nen loxō tidene yi. E yi Yesu mafan, a a xa tin furetōne xa e yiin din a domaan lenben na. Naxanye birin yi e yiin dinma a ra, ne birin yi kende yama nen.

7 Awa, Farisi muxuna ndee nun sariya karamōxōna ndee yi e malan Yesu rabilinni sa keli Yerusalēn taani. **2** E yi a to fa fala a xarandiina ndee e degema, e yiine mi yi sarinjan lan Yahudiyane dinan kiin ma. Na bunna nēen fa fala e mi e yiin naxaxi. **3** Anu, Farisi muxune nun Yahudiyane birin mi yi donseen donjē xa e mi e yiin naxa lan e dinan kiin ma, amasōto e yi kankanxi e benbane namun feene ma. **4** E na keli loxō tideni, xa e mi e fatin maxa lan e dinan kiin ma, e mi e dege. Namun fe wuyaxi mōn e yii, alo igelengenna nun tunden nun sulan goronne maxana. **5** Farisi muxune nun sariya karamōxōne yi Yesu maxōdin, e naxa, “Nanfera, i ya xarandiine mi en benbane namunna suxuma? E donseen donma e yiin mi raxaxi lan en

ma dinan kiin ma!” 6 Yesu yi e yabi, a naxa, “Nabi Esayi waliyiya falan naxan ti ε fe yi, a jɔndin nan yi a ra, ε tan nafigine, bayo a sebexi, a naxa, ‘Yamani ito n binyama e deen nin, koni e bɔɲen makuya n na pon! 7 E n batuma fuyan! Amasoto e xaranna findixi adamadiyaan yamari xaraxine nan gbansan na.” 8 Yesu naxa, “E bata Alaa yamarine bejin, ε adamadiine namun feene suxu. 9 E fatan Alaa yamarine kaladeni alogo ε xa kankan ε gbee namun feene ma! 10 Amasoto Musa a fala nen, a naxa, ‘I baba nun i nga binya,’ a mɔn naxa, ‘Naxan na a baba danga hanma a nga, ε na kanna faxa.’ 11 Koni ε tan a falama, ε naxa, a naxan na a fala a fafe xa hanma a nga xa, a naxa, ‘I yi maliin naxan sotoma n yii nun, na bata findi Ala gbeen na,’ e yi na falama e kon xuini, fa fala ‘korobanna.’ 12 Xa a na fala, ε mi fa tinma a xa sese liga a fafe nun a nga xa. 13 Nayi, ε Alaa falan kalama ε namun feene xon ε yamaan xaranma naxanye ma. E na fe sifa wuyaxi gbete ye ligama.” 14 Na xanbi ra, Yesu mɔn yi yamaan xili a fema. A yi a fala e xa, a naxa, “E birin xa ε tuli mati n xuiin na, ε yi ito famu. 15 Muxun seen naxan birin donma, na mi a sarjanna kalama. Koni feen naxan kelima a bɔɲeni, na nan a sarjanna kalama. 16 Awa, xa tunla naxan xɔn, a xa feen me, na xa a tuli mati!” 17 A keli yamaan fema waxatin naxan yi, a so banxini, a xarandiine yi a maxodin na sandan bunna ma. 18 Yesu yi a fala e xa, a naxa, “E fan munma xaxili soto ba? E mi a to, muxuna sarjanna mi kalama donseen xan xɔn naxan soma a de? 19 Amasoto a mi soma a bɔɲen xan yi, fo a godo a kui, na xanbi ra, a yi mini a fatini.” Yesu to ito fala, a yi a falama nen fa fala donse yo mi haramuxi. 20 A yi a fala, a naxa, “Naxan kelima muxun bɔɲeni, na nan a sarjanna kalama. 21 Bayo feen naxanye kelima a bɔɲeni, ne nan itoe ra, miriya jaxin nun yanga suxun nun mɔɲan nun muxu faxana 22 e nun yalunyaan nun milan nun fe jaxin nun yanfantenyaan nun haramu feene nun xoxɔlɔnyaan nun muxu makonbin nun wason nun xaxilitareyana. 23 Fe jaxin sifani itoe birin kelima muxun bɔɲen nin, e yi a sarjanna kala.” 24 Yesu yi keli na yi, a siga Tire yamanani, a sa so banxina nde kui. A mi yi waxi a xɔn ma, muxu yo xa a yiren kolon. Koni a mi yi nɔe a luxunɲe. 25 Naxanla nde yi na, yinna jaxin yi naxan ma dii temen foxo ra. Na to Yesu a fe me tun, a fa bira a sanna bun ma. 26 Gireki kaan nan yi na jaxanla ra, a bari Siriya-Fenisia yamanan nin. A yi Yesu mafan, a xa yinnan

kedi a dii temen foxo ra. 27 Koni Yesu yi sandan sa a xa, a naxa, “En diidine dege singen han e lugo. A mi lan en yi diidine donseen tongo, en yi a sa e barene bun ma.” 28 Naxanla yi a yabi, a naxa, “N fafe, baren naxanye tabanla bun ma, ne donse yolonxine nan donma, diidine naxanye rayolonma bɔxoni!” 29 A yi a fala a xa, a naxa, “I bata n yabi ki fajni. Nayi, siga i konni, yinnan bata xete i ya dii temen foxo ra!” 30 Nayi, a yi xete a konni, a yi a diin to saxi a sadeni, yinnan bata xete a foxo ra fefe! 31 Na xanbi ra, Yesu yi keli Tire yamanani a dangu Sidon yamanani. A yi gidi Galile Daraan binni Taa Xun Fune yamanani. 32 Muxuna ndee yi fa xeme tuli xorina nde ra a fema fala ti feen yi xɔdɔxo naxan ma. E yi Yesu mafan, a xa a yiin sa a ma. 33 Nanara, Yesu yi a tongo a keli yamaan ye. A yi a yii sonla raso a tunle kui, a yi a degen namini, a yi a sa xemen lenna ma. 34 Na xanbi ra, Yesu yi a yeen nate kore, a yi kutun sununi! A yi a xui ramini a kon xuini, a naxa, “Epafata.” Na bunna neen “A xa rabi!” 35 Na waxatin yeteni xemen tunle yi raba ayi, a lenna yi fulun, a falan ti folo ki fajni. 36 Yesu yi e birin yamari, a e nama a fala muxu yo xa. Koni a yi danna sama na falan ma kii naxan yi, falan yi sigama ayi na kii nin. 37 Yamaan yi kabe kati, e naxa, “A feen birin ligama ki fajni! Hali tuli xorine, a ne tunla rabama ayi, bobone yi falan ti.”

8 Na waxatini, yama gbeen mɔn yi malan. Donse to mi yi na, Yesu yi a xarandiine xili a fema, a yi a fala e xa, a naxa, 2 “N bata kininkinin yamani ito ma, amasoto e bata soge saxan ti n fema. Donse yo mi fa e yii iki. 3 Xa n na e kametone rasiga e konne yi, e sa fugama a ra nen kira yi amasoto e tan ndee kelideni kuya.” 4 A xarandiine yi a yabi, e naxa, “Donseen sɔtɔn minen yi wulani ito yi naxan e luge?” 5 Yesu yi e maxodin, a naxa, “Buru xun yoli ε yii?” E yi a yabi, e naxa, “Solofere.” 6 A yi a fala yamaan xa, a e xa dɔxo bɔxoni. A yi na buru xun soloferen tongo, a barikan bira Ala xa, a yi e yigira, a yi e so a xarandiine yii, a e xa e yitaxun yamaan na. Awa, xarandiine yi a liga na kiini. 7 Yexedina ndee fan yi e yii. Yesu yi barikan bira ne fan ma fe ra. A yi a fala xarandiine xa, a naxa, a e xa ne fan yitaxun yamaan na. 8 Muxune birin yi e dege, e yi lugo ken! Xarandiine yi na dɔnxɛ dungi dungine matongo, e debe solofere rafe ne ra. 9 Xemene gbansanna, e muxu wuli naanin nan jɔxɔn yi a ra. Nayi, Yesu yi e rasiga.

10 Na waxatin yeteni, e nun a xarandiine yi so kunkin kui, e siga Dalamana yamanani. 11 Farisi muxuna ndee yi fa, e Yesu tandi folo. E yi waxi a bunba feni, e yi a maxodin, a xa taxamasenna nde liga sa keli ariyanna yi. 12 Yesu yi kutun sununi ki faji, a yi a fala e xa, a naxa, “Nanfera to muxune taxamasenna nde maxodinma? N xa jondin fala e xa, e mi taxamaseri yo toma.” 13 Na xanbi ra, a yi keli e fema, a mon yi te kunkin kui, a yi dangu daraan bode foxon na. 14 Nba, xarandiine yi jinan, e mi siga buru ra e yii fo buru xun keden pe, na nan yi kunkin kui. 15 Yesu yi e yamari, a naxa, “E a liga e yeren ma Farisi muxune nun Herode a muxune buru rate sena fe yi.” 16 E yi falan ti e bode tagi, e naxa, “A ito falan nen bayo buru mi en yii.” 17 E yi naxan falama, Yesu yi na kolon. Nanara, a yi e maxodin, a naxa, “E falan tima nanfera fa fala buru mi en yii? E mon munma a yee to e munma xaxili soto? E bonen nan xodoxo ba? 18 Yee na e ma ba, e mi sese toma? E tunla na koni e mi fefe meen ba? E bata jinan ba, 19 n to muxu wuli suulunna dege buru xun suulunna ra, e debe yoli rafe a dungi dungi donxene ra?” E yi a yabi, e naxa, “Fu nun firin.” 20 Yesu mon naxa, “N to muxu wuli naaninna dege buru xun soloferen na, e debe yoli rafe a dungi dungi donxene ra?” E yi a yabi, e naxa, “Soloferen.” 21 A yi e maxodin, a naxa, “E munma a famu ba?” 22 Nba, Yesu nun a xarandiine to sa Betasada taan li, muxuna ndee yi fa xeme danxutoon na Yesu fema. E yi a mafan, a xa a yiin sa danxutoon ma. 23 Yesu yi danxutoon yiin suxu, a yi siga a ra taa xanbin na, a yi a degen sa xemen yee ne ma, a yi a yiine sa a ma, a yi a maxodin, a naxa, “I sena nde toma ba?” 24 Xemen yi a yeen nate, a naxa, “N muxune toma, koni e luxi alo wudi binle nan sigan tima.” 25 Yesu mon yi a yiine sa xemen yee ne ma. A yee ne yi rabi, a yi seene yigbe ki faji! 26 Yesu yi a rasiga a konni, a naxa, “I nama fa xete taani sonon de!” 27 Na xanbi ra, Yesu nun a xarandiine yi siga Sesariya rabilinna taane yi Filipi yamanani. Yesu yi a xarandiine maxodin kira yi, a naxa, “Yamana a falama a nde n tan na?” 28 E yi a yabi, e naxa, “Ndee naxa, a Yoni Marafu Tiina. Bonne naxa, a Nabi Eli nan i tan na, koni ndee gbeteye fan naxa, a nabina nde nan i tan na.” 29 Yesu yi e maxodin, a naxa, “E tan go? E tan naxa a di? Nde n tan na?” Piyeri yi a yabi, a naxa, “Alaa Muxu Sugandixin nan i tan na.” 30 Awa, Yesu yi e yamari, a e nama a fe fala muxu yo xa. 31 Na xanbi ra, Yesu yi a xarandiine xaran folo, a

naxa, a fere mi na fo a tan Muxuna Dii Xemen xa towo wuyaxi soto. A naxa, a yamaan fonne nun saraxarali kuntigine nun sariya karamoxone e mema a ra nen, e yi a faxesa. A soge saxandeni, a yi keli sayani. 32 A yi ito yeba e xa ki faji. Nanara, Piyeri yi a ba bonne fema, a yi a maxadi folo. 33 Koni Yesu yi a yee rafindi e ma, a yi a xarandiine mato, a Piyeri maxadi, a naxa, “Setana, fata n ma! I mi i mirima Alaa feene ma fo adamadiine.” 34 Yesu yi yamaan xili a fema e nun a xarandiine. A yi a fala e xa, a naxa, “Xa muxu yo waxi bira feni n tan foxo ra, a xa a me a yete ra, a yi a faxesa wudin tongo, a bira n foxo ra. 35 Amasoto naxan waxi a niin nakisi feni, na bonoma a yi nen. Koni naxan na bono a niini n tan nun n ma falan Xibaru Fajina fe ra, na kisima nen. 36 Xa muxun dunuja birin soto, a bono a niini habadan, tonon mundun na ra? 37 Muxun nae nanse fiye, a mon yi a niin soto? 38 Awa, xa muxun yagi a tiye n tan nun n ma fe falana fe ra hake kanne nun nafigine yee ra iki, n tan Muxuna Dii Xemen fan yagima nen na kanna fe ra, nxu nun maleka sarijanxine na fa waxatin naxan yi n Fafe Alaa binyeni.”

9 A mon yi a fala e xa, a naxa, “N xa jondin fala e xa: Ndee be, ne mi faxes fo e Alaa Mangayaan to fe a senbeni.” 2 Xii sennin danguxina, Yesu yi Piyeri nun Yaki nun Yoni tongo, a siga e ra e danna geya gbeen fari. A kejaan yi masara e yee ra yi. 3 A dugin yi lu mayilenje, a fixa ayi fefe! Dugi xaan mi dunuja yi naxan nae dugin fixe na kiini. 4 Nabi Eli nun Nabi Musa yi mini kenenni e yetagi, e yi lu falan tiye Yesu xa. 5 Piyeri yi a fala Yesu xa, a naxa, “Karamoxo, a lanxi bayo nxu be. Nxu xa gage saxan ti be, i gbeen keden, Nabi Musa gbeen keden, Nabi Eli gbeen keden.” 6 A mi yi fa a kolon a naxan falama, amasoto gaxun bata yi e suxu han! 7 Kundaan yi godo e xun ma, fala xuiin yi keli na kundani, a naxa, “N nafan Dii Xemen nan ito ra, e tuli mati a xuiin na!” 8 E yi e yee rakopin e rabilinni mafuren, koni e mi muxu yo to e fema fo Yesu kedenna! 9 E yi godoma geyaan na waxatin naxan yi, Yesu yi e yamari, a e feen naxan toxi, e nama na fala muxu yo xa fo a tan Muxuna Dii Xemen na keli sayani. 10 E yi na falan namara, koni e yi falan ti folo e bode tagi, e naxa, “Keli fena sayani, na bunna di?” 11 E yi Yesu maxodin, e naxa, “Sariya karamoxone a falama nanfera fa fala Nabi Eli nan singe fama?” 12 A yi e yabi, a naxa, “Nabi Eli nan

singe fama yati, a yi feene birin yiton. Koni nanfera Kitabuna a falama a Muxuna Dii Xemen tɔrɔma nen kati, muxune yi e me a ra? **13** Koni n xa a fala ε xa, Nabi Eli bata yelin fε. E yi e rafan feene birin liga a ra alo Kitabuna a fe falaxi kii naxan yi.” **14** E to fa xarandiin bonne fema, e yi yama gbeen to e rabilinni. E nun sariya karamɔxɔna ndee yi e bode matandima. **15** Yamaan to Yesu to, e yi kabe kati! E siga e giye a ralandeni, e yi a xɔntɔn. **16** Yesu yi a xarandiine maxodin, a naxa, “E bode matandima nanfera?” **17** Muxu keden yi a yabi yamaan ye, a naxa, “Karamɔxɔ, n bata fa n ma dii xemen na i fema amasɔto yinnana a fɔxɔ ra. A mi nɔε falan tiye. **18** Yinnan na keli a ra waxati yo yi, a a rabirama nen bɔxɔni. A de xunfanna yi lu mine, a lu a jinna raxinjε. A xara ayi. N bata i ya xarandiine mafan, alogo e xa yinnani ito kedi, koni e mi nɔxi a kede.” **19** Yesu yi a fala e xa, a naxa, “E tan denkeleyatarene, n luma ε fema han waxatin mundun yi? N xa dija ε xa han waxatin mundun yi? E fa diin na n fema.” **20** E yi fa a ra Yesu fema. Yinnan to Yesu to, a yi banxulanna raxuruxurun keden na, a yi bira bɔxɔni, a yi lu a makutukute, a de xunfanna yi lu mine. **21** Yesu yi banxulanna fafe maxodin, a naxa, “Xabu waxatin mundun ito ligama a ra?” A fafe yi a yabi, a naxa, “Xabu a dii jɔrena. **22** Yinnan bata kata a faxa feen na sanja ma wuyaxi. A bata yi a rabira teen nun igeni. Xa i nɔε a lige, kininkinin nxu ma, i yi nxu mali.” **23** Yesu naxa, “I tan naxa, ‘Xa i nɔε.’ Naxan na denkeleya, na nɔε feen birin lige nen.” **24** Banxulanna fafe yi a xuini te sa, a naxa, “N denkeleyaxi, koni n mali n ma denkeleyatareyani.” **25** Yesu yi a to, yamaan yi masoma e ra. Nanara, a yinna jaxin yamari, a naxa, “I tan yinnan bobo tuli xɔrina, n bata i yamari, xete diidini ito fɔxɔ ra, i nama fa a tɔrɔ sɔnɔn!” **26** Yinnan yi gbelegbele. A banxulanna raxara ayi ken! A xete a fɔxɔ ra. Banxulanna yi liga alo faxa muxuna. Muxune birin yi a fala, e naxa, “A bata faxa.” **27** Koni Yesu yi banxulanna suxu a yiin ma. A yi a rakeli, a ti. **28** Yesu so banxini waxatin naxan yi, a xarandiine yi a maxodin e danna, e naxa, “Nanfera nxu tan mi nɔxi na yinnan kede?” **29** Yesu yi e yabi, a naxa, “Na sifan mi kede Ala maxandin xanbi.” **30** E yi keli menni, e dangu Galile yamanani. Yesu mi yi waxi a xɔn ma muxune xa a yire kolon, **31** amasɔto a yi a xarandiine nan xaranma. A yi a fala e xa, a naxa, “N tan Muxuna Dii Xemen yanfama nen, e yi n so muxune yii, e yi n faxa. Koni soge saxan na dangu, n mɔn kelima nen

sayani.” **32** Koni, e mi na falan bunna kolon, e mɔn yi gaxu a maxodinje. **33** E Kaperunan taan li waxatin naxan yi, e so banxini. Yesu yi a xarandiine maxodin, a naxa, “E yi ε bode matandima kira yi nanfe ma?” **34** Koni e yi dundu amasɔto e bata yi e bode matandi kira yi nun fa fala nde gbo birin xa e ye. **35** Yesu yi dɔxɔ, a yi a xarandii fu nun firinne xili, a yi a fala e xa, a naxa, “Xa muxu yo waxi findi feni xunna ra, na xa a yete lu a rajanna ra, a findi birin ma walikeen na.” **36** A yi diidina nde rakeli, a yi a ti e birin yetagi. A yi a tongo, a yi a fala e xa, a naxa, **37** “Naxan na diidini ito nde yisuxu n xinli, na bata n tan yisuxu. Naxan na n tan yisuxu, na mi n tan xan tun yisuxi, fɔ naxan n xexi.” **38** Yoni yi a fala Yesu xa, a naxa, “Karamɔxɔ, nxu bata xemena nde to jinanne kede i xinli, nxu yi a raxɔlɔ, a xa a lu amasɔto a mi yi en tan fɔxɔ ra.” **39** Yesu yi e yabi, a naxa, “E nama a raxɔlɔ amasɔto muxun naxan kabanako feen ligama n xinli, na mi nɔε n ma fe jaxin fale. **40** Amasɔto naxan mi kelixi en xili ma, na en xa nen. **41** N xa jɔndin fala ε xa, muxu yo igen so ε yii amasɔto Alaa Muxu Sugandixin gbeen nan ε tan na, na barayin sɔtɔma nen!” **42** Yesu naxa, “Diidin naxanye denkeleyaxi n ma itoe ra, muxu yo na nde keden bira yulubini, a yi fisa nun gɛme gbeen yi xidi na kanna kɔε ra, a woli tilinna ma. **43** Xa i yii nan i bire yulubini, a sege a ra. A fisa i yii keden kanna xa so habadan nii rakisini, benun i yii firin kanna xa so yahannama te tutareni, (Geenna g1067) **44** ‘kunle nun teen mi janje denaxan yi habadan!’ **45** Xa i sanna nan i bire yulubini, a sege a ra. A fisa i san keden kanna xa so ariyanna yi benun i san firin kanna xa so yahannama yi, (Geenna g1067) **46** ‘kunle nun teen mi janje denaxan yi habadan!’ **47** Xa i yeen nan i bire yulubini, a ba na. A fisa i yeε keden kanna xa so Alaa Mangayani benun i yeε firin kanna xa so yahannama yi, (Geenna g1067) **48** ‘kunle nun teen mi janje denaxan yi habadan!’ **49** Amasɔto teen sama muxun birin ma nen menni alo i na fɔxɔn so suben ma.” **50** “Fɔxɔn fan, koni xa a mɛxɛmɛxenna ba ayi, a fa ramɛxɛmɛxenna nanse ra nayi? E kewali fapine xa lu ε dunɔja yi gidini alo fɔxɔn naxan donse jaxumɛni, ε lu bɔje xunbenli ε bode xɔn.”

10 Na xanbi ra, Yesu yi keli menni, a yi siga Yudaya yamanani, a Yuruden baan gidi. Yamaan mɔn yi malan a fema. A mɔn yi e xaran alo a darixi a lige kii naxan yi. **2** Farisi muxuna ndee yi fa a fema, e yi a

maxodin alogo e xa a kepaan fefefese, e naxa, “A fala nxu xa, a daxa sariyani ba xemen xa a me a jaxanla ra?” **3** Yesu yi e yabi, a naxa, “Musa yamarin mundun so e yii?” **4** E yi a yabi, e naxa, “Musa bata tin a xemen xa futu kala kedin sebe, a yi a jaxanla bejin.” **5** Yesu yi a fala e xa, a naxa, “Musa na yamarin sebexi e xa nen bayo e bojen xodoxo. **6** Koni a foloni dunuya da waxatini, ‘Ala xemen nun jaxanla da nen,’ **7** ‘Nanara, xemena a nga nun a fafe bejinma nen, a yi a maso a jaxanla ra, **8** e findi fati bende kedenna ra.’ Nayi, muxu firin mi fa e ra koni muxu keden. **9** Nanara, Ala bata seen naxanye tugun e bode ra, muxe nama ne fata.” **10** E xete banxini waxatin naxan yi, xarandiine yi Yesu maxodin na feen ma. **11** A yi a fala e xa, a naxa, “Xemen naxan na a jaxanla bejin, a jaxalan gbete futu, a bata yalunyaan liga lan a jaxalan singen ma. **12** A na kii nin, jaxanla naxan na a me a xemen na, a lu xeme gbete xa, na jaxanla bata yalunyaan liga.” **13** Muxune yi fa diidine ra Yesu fema, alogo a xa a yiin sa e xunni, a duba e xa. Koni xarandiine yi falan ti ne ma. **14** Yesu to na to, a yi xolo, a yi a fala a xarandiine xa, a naxa, “E tin diidine xa fa n fema, e nama e raxete amasoto e tan sifane nan gbee Alaa Mangayaan na. **15** N xa jondin fala e xa, xa naxan mi Alaa Mangayaan suxu alo diidine, na mi soe Alaa Mangayani mumel!” **16** Na xanbi ra, a yi diidine doko a kanke ra, a yi a yiin sa e ma, a duba e xa. **17** Yesu sigamatona, xemena nde yi a gi Yesu foxo ra, a sa a xinbi sin a bun ma. A yi a maxodin, a naxa, “Karamoxo fajina, n nanfe lige n habadan nii rakisinsoto?” (aiōnios g166) **18** Yesu yi a maxodin, a naxa, “I n xilima nanfera fa fala muxu fajina? Muxu yo mi fan, Ala nan keden fan. **19** I yamarine kolon ba? Fa fala, ‘I nama faxan ti. I nama yalunyaan liga. I nama munan ti. I nama wule seren ba. I nama muxun yii seene kansun. I baba nun i nga binya.” **20** Xemen yi a fala, a naxa, “Karamoxo, xabu n dii joreyani waxatin naxan yi, n ne birin suxi.” **21** Yesu yi a mato, a yi a xanu, a yi a fala a xa, a naxa, “Fe keden luxi i ma. Siga, i sa i yii seene birin mati, i yiigelitone ki. I nafunla sotoma nen ariyanna yi. Na xanbi ra, i fa bira n foxo ra.” **22** Xemen na me waxatin naxan yi, a bojen yi rapaxu a ma, a sunuxin yi siga, amasoto nafulu kan gbeen nan yi a ra nun. **23** Yesu yi a xarandiine mato a rabilinni. A yi a fala e xa, a naxa, “Nafulu kanne so raxolo Alaa Mangayani han!” **24** Xarandiine yi kabe na falan ma. Koni Yesu mon yi a fala e xa, a naxa, “N ma diine, Alaa Mangayani so

raxolo han! **25** Nafulu kannu so raxolo Alaa Mangayani dangu jorgomen so feen na sagilaan yinla ra.” **26** Xarandiine yi kabe kati, e yi e bode maxodin, e naxa, “Nde noe kise nayi?” **27** Yesu mon yi e mato. A yi a fala, a naxa, “Muxun mi noe na lige koni Ala tan noe nen. Ala noe feen birin lige nen.” **28** Piyeri yi a fala a xa, a naxa, “A mato, nxu bata feen birin bejin, nxu bira i foxo ra.” **29** Yesu yi a fala e xa, a naxa, “N xa jondin fala e xa, naxan birin bata a konna lu na hanma a ngaxakeden xememane nun a jaxalanmane, hanma a nga hanma a fafe hanma a diine hanma a xene, n tan nun n ma falan Xibaru Fajina fe ra, **30** na kannu na joxon keme sotoma nen waxatini ito yi, banxine nun ngaxakeden xememane nun jaxalanmane nun ngane nun diine nun xene, besenxonyane fan yi sa ne fari, a yi habadan nii rakisinsoto waxati famatoni. (aiōn g165, aiōnios g166) **31** Koni naxanye yeen na, ne wuyaxi sa luma nen xanbin na. Naxanye xanbin na iki, ne yi sa lu yeen na.” **32** E yi kira yi waxatin naxan yi, e sigama Yerusalen taani, Yesu yi tixi a xarandiine yee ra. Xarandiine yi kuisan kati! A foxorabirane yi gaxu. Yesu mon yi a xarandii fu nun firinne tongo, a siga e ra e danna. Feen naxanye fama ligadeni a ra, a na fala e xa. **33** Yesu yi a fala e xa, a naxa, “E a mato, en sigama Yerusalen taani. N tan Muxuna Dii Xemen soma nen saraxarali kuntigine nun sariya karamoxone yii na yi. E n ma kitin bolonma nen, a lan sayaan ma. Na xanbi ra, e yi n so siya gbetene yii, **34** naxanye n magelema, e yi e degen namini n ma, e yi n bulan, e yi n faxa. Soge saxan na dangu, n mon kelima nen.” **35** Na xanbi ra, Sebede a dii xemene Yaki nun Yoni yi fa Yesu fema, e naxa, “Karamoxo, nxu waxi a xon ma, i xa fena nde liga nxu xa.” **36** Yesu yi e maxodin, a naxa, “E waxi a xon ma, n xa nanfe liga e xa?” **37** E yi a yabi, e naxa, “I na doko i ya binyeni, tin nxu xa doxoden soto i fema, keden i yiifanna ma, keden i komenna ma.” **38** Yesu yi a fala e xa, a naxa, “E n xandima naxan yi, e mi na kolon. N na n minma toroya igelengenna naxan na, e noe e minye na ra ba hanma e rafuye xoleni alo n nafuma kii naxan yi?” **39** E yi a yabi, e naxa, “On, nxu a noe.” Yesu yi a fala e xa, a naxa, “N na n minma toroya igelengenna naxan na, e fama e mindeni na ra nen yati! N nafuma xoleni kii naxan yi, e fan yi rafu na kiini. **40** Koni muxun doko fena n yiifanna ma hanma n komenna ma, n tan mi na ragidima. Ala bata yelin na yirene ragide muxune ma.” **41** Xarandii fuun

bonne na me waxatin naxan yi, e yi xolo Yaki nun Yoni ma. **42** Nanara, Yesu yi e birin xili a fema, a naxa, “E a kolon fa fala naxanye yatexi mangane ra siyane ye, ne noyaan nan ligama e xun na, e muxu gbeene fan yi kuntigiyaan dɔxo e ra. **43** Koni a mi na kiini e tan tagi. Koni xa naxan yo waxi findi feni muxu gbeen na e ye, fo na xa findi e walikeen na. **44** Xa naxan yo waxi findi feni e yeeratiin na, fo a xa findi birin ma konyin na. **45** Amasoto hali n tan Muxuna Dii Xemena, n mi faxi fa fala muxe xa wali n xa, koni alogo n tan xa wali, n yi n niin fi muxu wuyaxi xunbaan na.” **46** Awa, e yi sa Yeriko taan li. Yesu nun a xarandiine nun yama gbeen yi minima Yeriko taani waxatin naxan yi, danxutona nde yi dɔxi kiraan de xandi tideni naxan yi xili Baritime. Na bunna neen “Time a dii xemena.” **47** A to a me a Yesu Nasareti kaan nan danguma, a gbelegebele folo, a naxa, “Yesu, Dawudaa Dii Xemena, kininkinin n ma!” **48** Muxu wuyaxi yi a masabari. Koni a mon yi lu gbelegebele, a naxa, “Dawudaa Dii Xemena, kininkinin n ma!” **49** Yesu yi ti, a naxa, “E a xili.” Nayi, e danxutoon xili, e naxa, “I bojen xa xunbeli. Keli i ti, a i xilima.” **50** A yi a doma gbeen nawoli ayi, a tugan, a fa Yesu fema. **51** Yesu yi a maxodin, a naxa, “I waxi a xon ma, n xa nanfe liga i xa.” Danxutoon yi a yabi, a naxa, “Karamoxo, n waxi a xon ma, n xa seen to.” **52** Yesu yi a fala a xa, a naxa, “Siga, i ya denkeleyaan bata i rakendeya.” A yi seen to mafuren, a bira Yesu foxo ra kiraan xon ma.

11 E to maso Yerusalen taan na, e yi so Betifage nun Betani taadine yi, Oliwi Geyaan dexon ma. Yesu yi a xarandii firin nasiga e yee ra. **2** A yi a jungu e ma, a naxa, “E siga banxideen na e yee ra. E na na li tun, e sofalidina nde toma nen xidixi, muxe munma dɔxo naxan fari singen. E a fulun, e fa a ra be. **3** Xa muxuna nde e maxodin fa fala, ‘E na ligama nanfera?’ E a fala a xa, e naxa, ‘Marigin makona a ma,’ na kanna a soma e yii nen mafuren.” **4** Nanara, e yi siga, e sa sofalidin to xidixi kiraan de banxina nde de ra. E yi a fulunma waxatin naxan yi, **5** muxun naxanye yi tixi na yi, na ndee yi e maxodin, e naxa, “E sofalidini ito fulunma nanfera?” **6** E yi e yabi alo Yesu a fala e xa kii naxan yi, e yi tin e xa siga. **7** E yi fa sofalidin na Yesu fema, e yi e domane yifulun sofalidin fari, Yesu yi dɔxo a fari. **8** Muxu wuyaxi yi e domane yifulun kiraan xon ma, bonne yi joxondene magira, e yi e sa kiraan xon ma a binya feen na. **9** Naxanye yi sigama a yee ra e

nun naxanye yi biraxi a foxo ra, ne yi lu sonxoe, e naxa, “Ala tantun! Naxan fama Marigin xinli, Ala xa na baraka! **10** En benba Dawudaa mangayaan naxan fama, Ala xa na baraka! Ala tantun kore xonna ma pon!” **11** Yesu yi so Yerusalen taani, a siga Ala Batu Banxini. A yi banxin kui seene birin mato, koni a li koe bata so, a yi siga Betani taani e nun a xarandii fu nun firinne. **12** Na xoton bode, e yi kelima Betani taani waxatin naxan yi, kamen yi Yesu suxu. **13** A yi xode binla to wulani a deene jingixi a ma. A yi siga na alogo a xa sa a bogina ndee fen a koe ra. Koni a to na li, a mi a bogi yo to, fo a deene amasoto xoden bogi waxatin munma yi a li. **14** Yesu yi a fala xode binla ma, a naxa, “Muxu yo mi fa i tan bogin donma!” A xarandiine yi a fala xuiin me. (aiɔn g165) **15** E Yerusalen li waxatin naxan yi, Yesu yi siga Ala Batu Banxini. Naxanye yi sare matiin nun sare soni menni, a ne kedi folo. A yi gbeti masarane tabanle rafelen, e nun ganba matine gbedene. **16** A mi yi tinma muxu yo xa goronna radangu Ala Batu Banxin tanden ma. **17** A yi yamaan xaran, a naxa, “A sebexi Kitabun kui, Ala naxa, ‘N ma Banxin xili bama nen, Ala maxandi banxina siyane birin xa.’ Koni e tan bata a findi mujadene luxunden na!” **18** Saraxarali kuntigine nun sariya karamoxone na me waxatin naxan yi, e yi Yesu faha feren fen folo. Bayo e yi gaxuxi a yee ra nun, amasoto yamaan birin bata yi kabe a xaranna ma. **19** Ninbari soxina, Yesu nun a xarandiine yi keli taani. **20** Na xoton bode subaxani, e yi sigama kiraan xon ma waxatin naxan yi, e yi na xode binla to xaraxi han a salenne. **21** A fe yi rabira Piyer ma. A yi a fala Yesu xa, a naxa, “Karamoxo, i xode binla naxan danga, a mato, a bata xara!” **22** Yesu yi e yabi, a naxa, “E denkeleya Ala ma. **23** N xa jondin fala e xa, naxan na a fala geyani ito ma fa fala, ‘Siga, i sa bira foxo igeni,’ xa a mi sike a bojeni, a yi denkeleya, fa fala a falan nakamalima nen, a ligama a xa nen. **24** Na na a toxi, n na a falama e xa, e na Ala maxandi fena nde ma, xa e la a soto feen na, e na sotoma nen. **25** Awa, e nema Ala maxande waxatin naxan yi, xa fena nde e kui muxuna nde xili ma, e xa a mafelu na ra. Nanara, e Fafe Ala naxan ariyanna yi, na e mafeluye e hakene ra. **26** Xa e mi bonne mafelu, e Fafe Ala naxan ariyanna yi, na mi e fan mafeluye e yulubine ra.” **27** Awa, e mon yi so Yerusalen taani. Yesu yi a masiga tima Ala Batu Banxin tanden ma waxatin naxan yi, saraxarali kuntigine nun sariya karamoxone nun yamaan fonne yi fa a fema. **28** E yi a

maxōdin, e naxa, “I feni itoe ligama senben mundun yi? Nde i tixi itoe ligan na?” **29** Yesu yi e yabi, a naxa, “N xa ε maxōdin fe keden na, xa ε n yabi, naxan n tixi na feene ra, n na falama ε xa nen. **30** Awa, ε a fala n xa, nde Yoni rafaxi a xa muxune rafu igeni e tubi xinla ma, a kelixi Ala nan ma ba, hanma muxune?” **31** E yi falan ti fōlō e bode tagi, e naxa, “Xa en na a yabi fa fala a kelixi Ala nan ma, a a falama nen nayi, a naxa, ‘Nanfera ε mi la Yoni ra?’ **32** Koni xa en na a fala fa fala a kelixi muxun nan ma, na di?” Amasōto, e yi gaxuxi yamaan yεε ra bayo yamaan birin yi laxi a ra a nabiin nan yi Yoni ra. **33** Nayi, e Yesu yabi, e naxa, “Nxu mi a kolon.” Yesu yi a fala e xa, a naxa, “N tan fan feni itoe ligama senben naxan yi, n mi na falama ε xa na yi.”

12 Na xanbi ra, Yesu yi sandan sa e xa, a naxa, “Muxuna nde yi manpa bili nakōon sa. A yi a sansan, a yi manpa ige badeni tōn, a yi gbengben ti. Na xanbi ra, a nakōon taxu a kantan muxune ra, a siga sigatini. **2** A bogi waxatin to a li, a yi a walikēna nde rasiga nakō kantanne ma, a e xa a gbeen so na yii. **3** Nakō kantanne yi na walikēen suxu, e yi a bōnbō, e yi a raxete. E mi sese so a yii. **4** Na xanbi ra, nakō kanna mōn yi walikē gbete rasiga e ma, e yi na fan bōnbō a xunna ma, e yi a makonbi. **5** A yi a saxanden fan nasiga, e yi na tan faxa. Na xanbi ra, a yi ndee gbete ye rasiga, e yi na ndee bōnbō, e yi ndee faxa. **6** A lu a rafan dii xeme keden peen ma. Dōnxen na, a yi na rasiga, a naxa, ‘E yagima nen n ma diin tan yεε ra.’ **7** Koni nakō kantanne yi a fala e bode xa, e naxa, ‘Nakō kanna ke tongon nan ito ra, ε fa be, en na a faxa. Nayi, a kēen yi findi en gbeen na!’ **8** Awa, e yi a dii xemen suxu, e yi a faxa, e yi a woli ayi nakōon fari ma.” **9** Yesu yi e maxōdin, a naxa, “Nakō kanna nanfe ligama nayi? A fama nen nayi, a yi na muxune faxa. A nakōon taxu muxu gbete ye ra. **10** E munma Kitabun yireni ito xaran ba, a sebexi denaxan yi fa fala, ‘Banxi tiine e me gemen naxan na, na bata findi banxin geme fisamantenna ra. **11** Marigin nan na ligaxi, kabanako feen nan na ra en yεε ra yi.’” **12** E yi kata Yesu suxu feen na amasōto e yi a kolon fa fala Yesu na sandan saxi e tan nan xa. Koni e gaxu yamaan yεε ra. Nanara, e keli a fema, e siga. **13** E yi Farisi muxuna ndee nun Herode a muxuna ndee rasiga Yesu fema alogo e xa a suxu feni tōn a falana fe ra. **14** E yi fa a fema, e naxa, “Karamōxo, nxu a kolon fa fala

jōndi falan ni i ra. Muxu yo mi nōε i ya miriyaan maxete, amasōto i mi muxune rafisaxi e bode xa fō i yamaan xaranma Alaa kiraan ma jōndini. Awa, a daxa mudun xa fi Romi Manga Gbeen ma ba hanma a nama fi? Nxu lan nxu yi a fi, hanma nxu nama a fi?” **15** Koni Yesu yi e nafigiyaan kolon. A yi e yabi, a naxa, “E n deen bunbama nanfera? E fa gbeti gbanan keden na, n xa a mato.” **16** E yi fa gbeti gbanan keden na a xōn. A yi e maxōdin, a naxa, “Nde xili nun a yetagin sawura a ma?” E yi a yabi, e naxa, “Romi Manga Gbeena.” **17** Yesu naxa, “Mangan gbeen xa so a yii, Ala gbeen xa so Ala yii.” E kabε a ma katil! **18** Saduse muxuna ndee yi fa Yesu fema naxanye a falama fa fala a muxune mi kelima sayani. E yi a maxōdin, **19** e naxa, “Karamōxo, Musa ito nan sebexi en xa, a naxa, ‘Xa xemena nde faxa, a jaxanla lu, koni dii mi a yii, xemen na ngaxakedenna xa na ke jaxanla tongo, e diin bari faxa muxun xa.’ **20** Awa, ngaxakedenmane muxu solofere yi na nun, a forimaan yi jaxanla futu, a faxa, a mi dii lu. **21** A xunyen yi ke jaxanla tongo, na fan yi faxa, a mi dii lu. A liga na kiini a xunyen saxanden fan na. **22** Na muxu soloferene sese mi dii lu. Dōnxen na, na jaxanla fan yi faxa. **23** Awa, faxa muxune na keli sayani waxatin naxan yi, na jaxanla findima nde gbee ra nayi? Amasōto a bata yi dōxo muxu solofereni ito birin xōn ma nun!” **24** Yesu yi e yabi, a naxa, “E bata tantan, amasōto ε mi Kitabun kolon hanma Ala senbena. **25** Bayo faxa muxune na keli sayani waxatin naxan yi, e ligama nen alo malekan naxanye ariyanna yi. Xemen mi jaxalan futuma, jaxanla mi dōxōn xemen xōn ma. **26** Awa, n xa faxa muxune rakeli feen jōndin yita ε ra. E mi na xaranxi Musaa Kitabun kui ba, Ala naxan fala a xa fōtōndin yireni, a naxa, ‘Iburahimaa Ala nan n tan na, e nun Isiyagaa Ala e nun Yaxubaa Ala?’ **27** Anu, faxa muxune Ala mi a tan na, koni fō niiramane. E tantanna gbo.” **28** Sariya karamōxōna nde yi na nun naxan e fe matandi xuiin me. Na yi a to a Yesu bata Saduse muxune yabi ki fapi. Nanara, a yi a maxōdin, a naxa, “Yamarin mundun gbo dangu a birin na sariyan yamarine yε?” **29** Yesu naxa, “Naxan gbo a birin xa na nan ito ra. ‘Isirayila kaane, ε tuli mati. Marigina en ma Ala keden peen na a ra. **30** I xa i Marigina Ala xanu i bōjnen birin na, e nun i niin birin na e nun i xaxinla birin na e nun i senben birin na.’ **31** A firinden nan ito ra. ‘I adamadi boden xanu alo i yetena.’ Yamari gbete mi na naxan gbo itoe firinna xa.” **32** Sariya karamōxōn

yi a fala Yesu xa, a naxa, “Karamoxo, na lanxi. I bata jondin fala fa fala Ala keden peen nan a ra, gbete yo mi na fo a tan. 33 I na Ala xanu i bonen birin na e nun i xaxinla birin e nun i senben birin, i yi i adamadi boden xanu alo i yetena, na dangu saraxa gan daxine nun saraxane birin na.” 34 Yesu yi a to fa fala a bata a yabi xaxilimayani. Nanara, Yesu yi a fala a xa, a naxa, “I mi makuya Alaa Mangayaan na.” Na xanbi ra, muxu yo mi susu a maxodinje fe gbete ma. 35 Yesu yi yamaan xaranma Ala Batu Banxini waxatin naxan yi, a yi maxodinna ti, a naxa, “Sariya karamoxone a falama nanfera fa fala Dawudaa bonsonna nan Alaa Muxu Sugandixin na? 36 Dawuda yeteen bata a fala, fata Alaa Nii Sarijanxin na, a naxa, ‘Marigin yi a fala n marigin xa, a naxa, “Doxo n yiifanna ma han n yi i yaxune sa i sanna bun ma.”’ 37 Dawuda yetena a xili nen, a naxa, ‘N Marigina.’ Awa, Alaa Muxu Sugandixin findixi Dawuda bonsonna ra di nayi?” Yama gbeen yi Yesu xuiin name sewani. 38 A yi e xaranma waxatin naxan yi, a naxa, “E a liga e yeren ma sariya karamoxone fe yi. A rafan e ma e xa doma gbeene ragodo e ma, e yi lu e masiga tiye. A rafan e ma yamaan xa e xonton loxo tidene yi. 39 Muxu gbee doxodene rafan e ma salide banxine yi, e nun doxode fajine donse donna malanne yi. 40 E kaja gilene yii seene bama e yii. E yi e yete mayita sali xunkuyene yi! E yalagima nen na feene ma han a radangu ayi!” 41 Yesu yi doxo Ala Batu Banxin gbeti maraden yetagi yamaan yi darixi Ala kiseene se denaxan yi. A yi yamaan matoma, e gbetin sama na yi. Nafulu kan wuyaxi yi gbeti gbeen sa. 42 Koni, kaja gile yiigelitoon fan yi fa, a wure gbeeli gbanan firin sa, naxanye munanfanna xurun a birin xa. 43 Yesu yi a xarandiine xili a fema, a yi a fala e xa, a naxa, “N xa jondin fala e xa, fa fala kaja gile yiigelitoni ito naxan saxi gbeti maradeni, na gbo bonne birin gbeen xa. 44 Amasoto bonne birin naxan saxi, ne birin baxi e nafunla nde nan na, koni kaja gileni ito, hali yiigelitoon to a ra, naxan birin a yii a balon na, a na nan saxi.”

13 Yesu to yi minima Ala Batu Banxini, a xarandiina nde yi a fala a xa, a naxa, “Karamoxo, i yeen ti geme fajine nun banxi fajine ra!” 2 Yesu yi a yabi, a naxa, “I bata banxi gbeeni itoe to ba? Hali gemeni ito kedenna mi luye a bode fari. E birin naxuyama ayi.” 3 Yesu yi doxi Oliwi Geyaan fari Ala Batu Banxin yetagi waxatin naxan yi, Piyeri nun Yaki nun Yoni

nun Andire yi siga a fema e danna a maxodindeni. 4 E yi a fala, e naxa, “Na feene liga waxatin fala nxu xa. Taxamasenna mundun a yitama nxu ra fa fala a waxatin bata a li?” 5 Yesu yi a fala e xa, a naxa, “E a liga e yeren ma alogo muxe nama e mayenden. 6 Muxu wuyaxi fama nen n xinli, e yi a fala fa fala, ‘A tan nan n tan na.’ E muxu wuyaxi mayenden. 7 E na yenge feene me e nun yengena ndee xinla, e nama gaxu. A fere mi na fo na fe sifane xa liga nen. Koni waxati rajanna mi na ra singen. 8 Siya kedenna siyaan bonna yengema nen, yamana keden yi yamanan bonna yenge. Baxon xuruxurunma nen yirena ndee yi. Fitina kamene yi so. Na feene birin ligama nen alo jaxanla dii barin kui xole singena.” 9 “E a liga e yeren ma, amasoto muxune e suxuma nen, e siga e ra kiti sadeni. E e bulan salide banxine yi. E tima nen yamana kanne nun mangane yetagi n tan ma fe ra, e yi n ma fe sereyaan ba e xa. 10 A fere mi na fo n ma falan Xibaru Fajin kawandin xa ba siyane birin xa singen. 11 E na e suxu waxatin naxan yi, e siga e ra kiti sadeni, e naxan falama, e nama xamin na ra benun a waxatin xa a li. Ala na naxan so e yii na waxatini, e na fala. Amasoto e tan xa mi falan tima fo Alaa Nii Sarijanxina. 12 Muxuna a ngaxakedenna yanfama nen, a yi a faxa. Fafane na joxonna ligama nen e diine ra. Diine murutema nen e soto muxune xili ma, e yi e ti sayaan ma. 13 Muxun birin e rajaxuma nen n tan ma fe ra. Koni muxun naxan dijama han a rajanna, na kisima nen.” 14 “E na ‘Se Haramuxi Halagi Tiin’ to yirena nde yi, a mi daxa denaxan yi, nayi naxanye Yudaya yamanani, ne xa e gi, e te geyane fari. Naxan na feni ito xaran, na xa a bunna kolon! 15 Muxun naxan a kore banxin koe ra, na nama xete, a godo banxini a yii seene tongodeni. 16 Muxun naxan xeen ma, na nama xete banxini a domaan tongodeni. 17 Gbalo gbeen fudi kanne yee ra na loxoni e nun diin ngane! 18 E Ala maxandi alogo na feene nama liga xunbeli waxatini! 19 Amasoto na loxone toron joxon munma liga singen xabu Ala dunuja da waxatin naxan yi han iki. A joxon fan mi fa ligama sonon! 20 Xa Marigin mi yi nde ba na loxone ra nun, adamadi yo mi yi kisima, koni a bata nde ba e ra a muxu yebaxine fe ra.” 21 “Xa muxu yo a fala e xa na waxatini, a naxa, ‘A mato, Alaa Muxu Sugandixin be yi’ hanma, ‘A mato, a sa menni,’ e nama la ne ra. 22 Amasoto muxu wulexi sugandixine nun wule nabine kelima nen, e taxamasenne nun kabanako feene liga alogo e xa Ala muxu yebaxine mayenden, xa na lanje.

23 Koni, e xa a liga e yeren ma! N bata feene birin fala e xa benun e waxatin xa a li.” 24 “Na loxone yi, na toro loxone na dangu, ‘sogeni dimima nen, kiken mi fa degema. 25 Sarene kelima nen kore, e yolon. Kore xonna senbene yimaxama nen.’ 26 N tan Muxuna Dii Xemen minima nen kenenni kundani senbe gbeen nun binyeni. 27 N yi n ma malekane rasiga boxon tongon naaninne birin yi. E yi n ma muxu yebaxine malan keli dunuwa danna bonna ma sa dexo bonna ra.” 28 Yesu yi a fala e xa, a naxa, “E xaxili soto xode binla fe ma. A yiine na majingi, a deene yi mini folo, e a kolonma nen nayi fa fala jemen bata maso. 29 A na kiini, e na feni itoe to lige waxatin naxan yi, e a kolonma nen nayi fa fala waxati saxin bata maso, a bata a so deen yeteen li. 30 N xa jondin fala e xa, to muxune mi dangue mume fo na feene birin liga. 31 Kore xonna nun boxo xonna danguma nen. Koni n ma falane mi danguma habadan!” 32 “Muxu yo mi na loxon nun waxati saxin kolon hali malekan naxanye ariyanna yi hanma Muxuna Dii Xemena, fo Fafe Ala keden peena. 33 E a liga e yeren ma, e yi lu e yee ra yi amasoto e mi na waxatin kolon. 34 A ligama nen alo xemen naxan keli a konni, a siga sigatini, a yi a senben nadangu a walikene ma, a yi wanla so e keden kedenna birin yii. A yi a fala banxi xunna xa, a xa lu a yee ra yi. 35 Awa, e lu e yee ra yi amasoto e mi banxi kanna fa waxatin kolon, xa jinbanna na a ra ba hanma koe tagini hanma subaxani donton wugan ma hanma xotanni. 36 Xa a fa sinma, a nama e li xixonli! 37 Awa, n naxan falama e xa, n na a falama muxune birin nan xa. E lu e yee ra yi!”

14 A bata yi lu nun soge firin benun Halagi Tiin Dangu Loxon Sanla nun Buru Tetaren Sanla xa a li. Saraxarali kuntigine nun sariya karamoxone yi katama Yesu suxu feen na yanfani alogo e xa a faxa. 2 E yi a fala, e naxa, “En nama a liga sanla waxatini alogo yamaan nama sonxo sonxo.” 3 Yesu yi Simon dogonfontona banxini Betani taani waxatin naxan yi, a yi a degema, jaxanla nde yi fa, a so banxini. Alabasita gemen muranna suxi a yii latikononna sare xodexen yi naxan kui naxan xili naradi. A na muranni bo Yesu xun ma a latikononna sa a xunni. 4 Muxuna ndee yi na yi, ne yi xolo, e yi a fala e bode xa, e naxa, “Latikononni ito yikalaxi nanfera? 5 A yi sare nen dangu walikene jee keden saranna ra, na gbetin yi so yiigelitone yii.” E yi jaxanla mafala katil! 6 Koni Yesu

yi a fala, a naxa, “E fata a ma, e a mafalama nanfera? A bata fe fajin naba n tan xa. 7 Amasoto yiigelitone e fema waxatin birin, e fe fajin nabe e xa nen, xa e wa, koni n tan mi luma e fema waxatin birin yi. 8 A noe naxan lige, a bata na liga. A bata latikononna sa n fatin ma, a yi a yiton n maluxun loxona fe ra benun na waxatin xa a li. 9 N xa jondin fala e xa, n ma falan Xibaru Fajini ito na rali dunuwa yire yo yi, jaxanli ito naxan ligaxi, na fan falama nen, yamaan yi e miri a ma.” 10 Na xanbi ra, Yudas Isakariyoti, Yesu a xarandii fu nun firinna nde, na yi siga saraxarali kuntigine fema Yesu so feen na e yii. 11 E yi e tuli mati a ra sewani, e yi a nata a e xa gbetin so a yii. Nanara, Yudas yi feren fen folo, a xa Yesu so e yii. 12 Buru Tetaren Sanla loxo singena, yexee diin faxama loxon naxan yi Halagi Tiin Dangu Loxon Sanla saraxan na, xarandiine yi Yesu maxodin, e naxa, “I waxi a xon ma, nxu xa sa Halagi Tiin Dangu Loxon Sanla donseen nafala i xa minen yi?” 13 Awa, Yesu yi a jungu muxu firin ma e ye, a yi e rasiga, a naxa, “E siga taani, e xemena nde toma nen ige fejen dxi a xun ma, e bira a foxo ra. 14 A na so denaxan yi, e a fala menna banxi kanna xa, e naxa, ‘Karamoxo naxa, a xone yigiyaden minen e nun a xarandiine Halagi Tiin Dangu Loxon Sanla donse donna tiin denaxan yi?’ 15 Nayi, a banxin yire gbeena nde yitama e ra nen kore banxin koe ra, a yitonxi ki faji, e xa donseen nafala en xa menni.” 16 Xarandiine yi keli, e siga taani, e sa feene birin li na alo Yesu a fala e xa kii naxan yi. E yi Halagi Tiin Dangu Loxon Sanla donseen nafala. 17 Jinbanna to a li, Yesu nun a xarandii fu nun firinne yi fa. 18 E yi e degema waxatin naxan yi, Yesu naxa, “N xa jondin fala e xa, e tan naxanye e degema n fema, e tan nde keden n yanfama nen.” 19 Xarandiine yi sunu han, e yi e bode maxodin folo keden keden yeen ma, e naxa, “N tan nan a ra ba?” 20 Yesu yi e yabi, a naxa, “E tan muxu fu nun firinna nde keden nan a ra nxu nun naxan nxu yiin nagodoma lenge kedenna kui yati! 21 N tan Muxuna Dii Xemen faxama nen alo Kitabuna a falaxi kii naxan yi, koni gbalon na kanna yee ra naxan n tan Muxuna Dii Xemen soma yamaan yii! A yi fisa nun hali na muxun mi yi bari nun mumel!” 22 E yi e degema waxatin naxan yi, Yesu yi burun tongo, a barikan bira Ala xa, a yi a yigira, a yi a so a xarandiine yii. A yi a fala, a naxa, “E a tongo, n fati benden nan ito ra.” 23 Na xanbi ra, a yi igelengenna fan tongo, a barikan bira Ala xa, a yi a so e yii, e birin yi e min a ra.

24 Yesu naxa, “N wunla ni ito ra n layirin xidima en tagi naxan xon. A minima muxu wuyaxi nan xa. 25 N xa jondin fala e xa, en wudi bogi igen naxan minma ito ra, n mi fa a minma han n mon yi a min Alaa Mangayani.” 26 Na xanbi ra, e betin ba, e siga Oliwi Geyaan fari. 27 Yesu yi a fala e xa, a naxa, “E birin e mema n na nen, amasoto a sebexi Kitabuni, fa fala, ‘N xuruse rabaan faxama nen, yexene birin yi xuya ayi.’ 28 Koni n na keli sayani, n sigama nen e yee ra Galile yamanani.” 29 Piyeri yi a yabi, a naxa, “Hali bonne birin e me i ra, n tan mi na lige!” 30 Yesu yi a fala Piyeri xa, a naxa, “N xa jondin fala i xa. To kosen na, benun dontonna xa wuga sanja ma firin, i yetena a falama nen doxona ma saxan a i mi n kolon.” 31 Piyeri yi a yabi a sobeen na, a naxa, “Hali en birin faxesa, n mi a fale mume, fa fala n mi i kolon!” Xarandiin bonne fan birin yi na fala. 32 E yi siga yirena nde yi naxan xili Getesemani. Yesu yi a fala a xarandiine xa, a naxa, “E doxo be, n tan xa sa Ala maxandi.” 33 Na xanbi ra, a Piyeri nun Yaki nun Yoni tongo, a siga e ra, a bojen yi raforo, a yi sunu. 34 A yi a fala e xa, a naxa, “N bojen naforoxi han n faxesa. E lu be, e lu e yee ra yi.” 35 A yi a masiga ndedi, a yi bira boxoni, a yi Ala maxandi alogo a xa no na toro waxatin makuye a ra. 36 A yi Ala maxandi, a naxa, “N Fafe Ala, baba, i noe feen birin lige nen. Toroya igelengenni ito masiga n na, koni n tan sagoon nama liga fo i tan sagona.” 37 Na xanbi ra, a mon yi xete, a yi a xarandiine li xixonli. A yi a fala Piyeri xa, a naxa, “Simon, i xiin nen ba, i mi noxi luye i yee ra yi hali waxatidi? 38 E lu e yee ra yi, e yi Ala maxandi alogo e nama bira tantanni. E niin waxon feen fan koni e fati benden senben mi na.” 39 A mon yi siga, a sa Ala maxandi, a mon yi xete na falane ma. 40 A mon yi xete, a xarandiine li xiye, bayo xixonla bata yi e suxu. E mi yi fa a kolon e a yabin naxan na. 41 A mon yi xete a saxandeni a yi a fala e xa, a naxa, “E mon xima ba? E mon e matabuma ba? E a lu iki, waxatin bata a li! A mato, n tan Muxuna Dii Xemen bata so hake kanne senben bun ma iki. 42 E keli, en siga. Muxun naxan n yanfama, a n so yiini, a bata fal!” 43 A mon yi fala tiini, Yudas, Yesu a xarandii fu nun firinna nde yi fa, ganla biraxi a foxo ra saraxarali kuntigine nun sariya karamoxone nun yamaan fonne naxanye rafa. Silanfanne nun gbengbetenne e yii. 44 Naxan yi a yanfama, na bata yi taxamasenna fala nun, a naxa, “N na muxun naxan sunbu, a tan nan na ra. E yi a suxu, kantan muxune

yi siga a ra!” 45 Yudas yi a tinxin Yesu ra keden na, a naxa, “Karamoxo!” A yi a sunbu. 46 Nayi, e dutun Yesu ma, e yi a suxu! 47 Muxun naxanye yi tixi na dexon, na nde yi a silanfanna botin, a yi Saraxarali Kuntigi Singena konyin tunla sege a ma. 48 Yesu yi a fala e xa, a naxa, “E bata fa n suxudeni silanfanne nun gbengbetenne e yii alo mafu tiin nan yi n na nun. 49 N yi e fema loxo yo loxo, n yi xaranna tima Ala Batu Banxini, e mi n suxu. Koni a fere mi na fo Kitabuna falan xa kamali.” 50 Na xanbi ra, xarandiine birin yi a rabejin, e yi e gi. 51 Banxulanna nde yi biraxi Yesu foxo ra, a bitinganna nan tun yi mafilifilinx i a ma. E yi a suxu, 52 koni a yi a dugin lu e yii, a ragenla yi a gi. 53 E yi Yesu tongo, e siga a ra Saraxarali Kuntigi Singena banxini. Saraxarali kuntigine nun yamaan fonne nun sariya karamoxone yi e malan na. 54 Piyeri yi bira a foxo ra, koni e yi tagi kuya, han Saraxarali Kuntigi Singena tande ma. A doxo kantan muxune fema teen xon e maxaradeni. 55 Saraxarali kuntigine nun kitisa yamaan birin yi kata sereyana nde fendeni Yesu xili ma alogo e xa a faxesa. Koni e mi sese soto. 56 Muxu wuyaxi yi wulen seren ba Yesu xili ma, koni sereyane mi yi lanxi e bode ma. 57 Muxuna ndee mon yi keli e wule sereni ito ba Yesu xili ma, e naxa, 58 “Nxu a xuiin mexi nen a falama, a naxa, ‘N na Ala Batu Banxini ito kalama nen adamadiine naxan nafalaxi, n yi gbete ti soge saxan bun ma, adamadiine mi naxan tiye.’” 59 Koni hali ne fan, e sereyane mi lan e bode ma. 60 Saraxarali Kuntigi Singen yi ti e birin yetagi, a Yesu maxodin, a naxa, “Muxuni itoe naxan falama i xun ma, na yabi mi i xon ba?” 61 Koni Yesu mi fala yo ti. Saraxarali Kuntigi Singen mon yi a maxodin, a naxa, “Alaa Muxu Sugandixin nan i tan na ba, Duban Kanna a Diina?” 62 Yesu yi a yabi, a naxa, “A tan nan n tan na. Awa, e birin n tan Muxuna Dii Xemen toma nen doxi Ala Senbemaan yiifanna ma. E yi n famatoon to kundani keli kore.” 63 Saraxarali Kuntigi Singen yi a domani bo, a naxa, “En mako mi fa sereya yo ma sonon! 64 E bata a xuiin me a Ala rayelefuma. E mirixi a ma di?” E birin yi a yalagi, e naxa, a lan nen a xa faxesa. 65 Ndee yi e degen namini folo Yesu ma. E yi a yeen maxidi, e yi a bonbo, e naxa, “Nabiya falane til!” Kantan muxune yi a suxu, e yi a bonbo. 66 Piyeri yi doxi tanden ma waxatin naxan yi, Saraxarali Kuntigi Singena walike jaxanla nde yi fa. 67 A to Piyeri to a maxare, a yi a mato ki fapi, a naxa, “I tan fan yi Yesu Nasareti kaan foxo ra.” 68 Koni Piyeri yi a tandi, a

naxa, “N mi a kolon i waxi naxan fala fe yi,” a siga tanden so deen na. Nayi, dontonna yi wuga. **69** Walike jnaxanla to a to menni, muxun naxanye yi tixi na, a mon yi a fala ne xa, a naxa, “A tan muxuna nde nan ito ra.” **70** A mon yi a matandi. Waxatidi danguxina, muxun naxanye yi tixi na, ne mon yi a fala Piyeri xa, e naxa, “A tan nde nan i tan fan na yati, amasoto Galile kaan nan i tan fan na.” **71** Nayi, Piyeri yi a kolo dangane ra, a yi a fala e xa, a naxa, “N mi xemeni ito kolon e naxan ma.” **72** Na waxatin yeteni dontonna mon yi wuga a firindeni, Yesu falan naxan ti, na yi rabira Piyeri ma, a naxa, “Benun dontonna xa wuga sanja ma firin, i a falama nen doxona ma saxan a i mi n kolon.” Nayi, a yi wuga folo.

15 Subaxani saraxarali kuntigine nun yamaan fonne nun sariya karamoxone nun kitisa yamaan birin yi a feen nagidi. E yi Yesu xidi, e yi a xali Pilati fema. **2** Pilati yi a maxodin, a naxa, “Yahudiyane mangan nan i tan na ba?” Yesu yi a yabi, a naxa, “I bata a fala.” **3** Saraxarali kuntigine yi Yesu kansun fe wuyaxi ra. **4** Nanara, Pilati mon yi a maxodin, a naxa, “I mi e yabin ba? A mato, e bata i kansun fe wuyaxi ra.” **5** Yesu mi tin fala yo tiye. Pilati yi kabe na ma kati! **6** E yi darixi nen kasorasa keden bejinne sali loxoni, yamaan na naxan ma fe fala. **7** Na waxatini xemena nde yi na naxan yi xili Baraba, a yi kasoni e nun muxu murutexin naxanye keli mangan xili ma, e faxan ti. **8** Yamaan yi fa Pilati mafan, a xa a dari feen liga e xa. **9** Pilati yi e maxodin, a naxa, “E waxi a xon ma n xa Yahudiyane mangan bejin e xa?” **10** Amasoto a yi a kolon a saraxarali kuntigine Yesu soxi a yii xoxolonyaan nan ma. **11** Koni saraxarali kuntigine yi yamaan nadin, alogo Pilati xa Baraba nan bejin. **12** Pilati mon yi falan ti yamaan xa, a naxa, “E naxan xilima fa fala a Yahudiyane mangana, n xa nanfe liga a ra?” **13** E yi sonxo, e naxa, “A gbangban wudin ma!” **14** Koni Pilati yi e maxodin, a naxa, “A fe jnaxin mundun ligaxi?” Koni e sonxon yi siga gboe ayi, e naxa, “A gbangban!” **15** Pilati yi tin a xa yamaan nafaan feen naba. Nanara, a yi Baraba bejin e xa. A yi yamarin fi a Yesu xa bulan, e yi a gbangban wudin ma. **16** Yamana kannan sofane yi Yesu xali yamana kan banxini, sofane ganla birin yi e malan. **17** E yi doma mamiloxin nagodo a ma, e wudi yii jali kanne denbe komotin na mangaya taxamasenna ra, e yi a so a xunna. **18** E yi lu a magele, e naxa, “I xonye,

Yahudiyane mangana!” **19** E yi tamina nde tongo, e lu a bonbe a xunna ma, e yi e degen namini a ma, e yi e xinbi sin a yetagi, e a binya mageleni. **20** E to yelin a magele, e doma mamiloxin ba a ma e mon yi a maxidi a gbee dugine yi. Na xanbi ra, e yi siga a ra a gbangbandeni wudin ma. **21** E yi lan xemena nde ra naxan yi xili Simon Sireni kaana, Alesandire nun Rufu fafe. A yi kelima xeen ma siga taani. E yi a karahan a xa Yesu faxa wudin tongo. **22** E yi siga Yesu ra han na yireni denaxan xili Gologota, naxan bunna neen, “xun xori yirena.” **23** E yi mirihi nun manpaan basanxin so Yesu yii alogo a xa a min, nde yi ba toroyaan na, koni a mi tin a rasuxe. **24** Awa, e yi a gbangban wudin ma, e yi masensenna ti lan a dugine yitaxun feen ma. **25** E yi a gbangban wudin ma soge raxenxen waxatini. **26** E yi a kansun kedin sebe fa fala “Yahudiyane Mangan nan ito ra.” **27** E yi mupade firin gbangban wudine ma Yesu fema, keden a yiifanna ma, keden a komenna ma. **28** Kitabuna falan bata kamali nayi, a naxa, “A yate nen alo fe jnaxi rabane.” **29** Dangu muxune yi a makonbi e yi e xunni maxa, e naxa, “Ee! I tan naxan Ala Batu Banxin kalama, i yi a ti soge saxan bun ma, **30** awa, iki, godo i keli wudin koe ra, i yi i yete rakisi!” **31** Saraxarali kuntigine nun sariya karamoxone fan yi Yesu magele na kiini, e yi a fala e bode xa, e naxa, “A bata bonne rakisi, koni a mi noe a yete rakise! **32** Nxu xa Alaa Muxu Sugandixina, Isirayila mangan to gode iki keli wudin ma alogo nxu xa denkeleya a ma!” Muxun naxanye yi gbangbanxi wudin ma a fema, ne fan yi a makonbi han! **33** Dimin yi so yiren birin xun na yanyi tagini han se din waxatin yi maso. **34** Na waxatini, Yesu yi gbelegbele a kon xuini lengben, a naxa, “Eli, Eli, lama sabakitani?” Na bunna neen fa fala, “N ma Ala, n ma Ala, i n nabepinxi nanfera?” **35** Muxuna ndee yi tixi na yi, na ndee yi a xuiin me, e naxa, “E tuli mati, a Nabi Eli xilima!” **36** E tan nde yi dugi dungin tongo, a siga a giye, a sa a sin minse muluxunxini, a yi a so wudin xun na, a yi a ti Yesu xa. A yi a lan Yesu deen ma, a naxa, “A mame, nxu xa a to xa Nabi Eli a ragode keli wudin koe ra!” **37** Yesu yi a xuini te fangan na, a faxa. **38** Dugin naxan yi singanxi Ala Batu Banxin tagi, na yi bo firinna ra, folo a xunna ma han a labena. **39** Sofa Kuntigin naxan yi tixi wudin yetagi nun, na yi Yesu xuiin me, a yi a faxa kiin to, a naxa, “Alaa Dii Xemen nan yi a ra yati!” **40** Jnaxanla ndee yi tixi wulani, e a matoma. Mariyama Magadala kaan yi ne ye nun, e nun Mariyama, Yaki

xuri nun Yose nga e nun Salome. **41** Ne nan yi biraxi a fɔxɔ ra Galile yamanani nun a malideni. Naxalan wuyaxi gbeteƣe fan yi na naxanye fan fa a fɔxɔ ra Yerusalɛn taani. **42** Ninbanna bata yi a li. Yuma lɔxɔn nan yi a ra Matabu Lɔxɔn nan yi na xɔtɔn bode. **43** Yusufu Arimate kaan yi fa, muxu gbeen nan yi a ra kitisane malanni, naxan fan yi Alaa mangayaan mamɛma, na yi susu sigɛ Pilati fɛma a maxɔdindeni Yesu binbina fe ma. **44** Pilati na mɛ waxatin naxan yi fa fala a Yesu bata faxa, a yi tɛrena na falan na. A sofa kuntigin xili, a yi a maxɔdin xa Yesu bata faxa. **45** Pilati to sofa kuntigina falan mɛ, a yi yamarin fi, a e xa Yesu binbin so Yusufu yii. **46** Yusufu yi kasangenna sara, a yi a binbin nagodo, a yi a kasangen, a sa a maluxun gaburun na fanye kui gexini alo faran yili. Na xanbi ra, a gɛmɛ gbeen makutukutu gaburun dɛ ra. **47** Mariyama Magadala kaan nun Mariyama bonna, Yose nga, ne yi a matoma e Yesu sa dɛnaxan yi.

16 Matabu Lɔxɔn to dangu, Mariyama Magadala kaan nun Mariyama, Yaki nga nun Salome yi latikɔnɔnna sara alogo e xa sa a sa Yesu binbin ma. **2** Xatin xɔtɔnni sɔgen tɛ waxatini, e yi sigama gaburu dɛɛn na, **3** e yi e bode maxɔdin, e naxa, “Nde gɛmɛn makutukutuma, a yi a ba gaburun dɛ ra en xa?” **4** E fa e yɛɛn nakele, e yi a to a gɛmɛn bata yi makutukutu, a ba gaburun dɛ ra. Na gɛmɛn yi gbo han! **5** E yi so gaburun kui, e banxulan doma fixɛ kanna nde to dɔxi yiifanna ma, e gaxu kati! **6** A yi a fala e xa, a naxa, “Ɖ nama gaxu, ɛ Yesu Nasarɛti kaan nan fenma naxan gbangban wudin ma. A mi be, a bata keli sayani! E a sa be nin. **7** Koni ɛ siga, ɛ sa a fala a xarandiine nun Piyɛri xa, ɛ naxa, ‘A sa ɛ lima Galile yamanani, ɛ sa a toma nɛn na yi, alo a fala ɛ xa kii naxan yi.’” **8** E kui fuxin yi siga e giye keli gaburun kui, e xuruxurunma. Koni e mi sese fala muxu yo xa amasɔtɔ e yi gaxuxi han! **9** (note: The most reliable and earliest manuscripts do not include Mark 16:9-20.) Yesu to keli sayani xatin subaxani, a mini Mariyama Magadala kaan nan singe xa kɛnɛnni, a jinan soloferɛn kedi naxan fɔxɔ ra. **10** Mariyama yi sa na xibarun nali Yesu fɔxɔrabirane ma, naxanye yi wugama Yesu jian feen na. **11** Awa, e to a mɛ a Yesu niin mɔn bata bira a yi, a Mariyama bata a to, e mi la a ra. **12** Na xanbi ra, Yesu yi a yetɛ yita e tan muxu firinna nde ra kii gbɛtɛ yi kiraan xɔn ma, e yi sigan tima burunna ra waxatin naxan yi. **13** E yi xɛtɛ, e sa na fala bonne xa, koni e mi la e ra. **14** Na xanbi

ra, Yesu yi mini kɛnɛnni xarandii fu nun kɛdenne xa, e yi e dɛgema waxatin naxan yi. A yi e maxadi e dɛnkeleyatareyaan nun e bɔjɛ xɔdɛxɛyana fe ma amasɔtɔ naxanye a to a niini, e mi la ne ra. **15** A yi a fala e xa, a naxa, “Ɖ siga dunuƣa yiren birin yi, ɛ n ma falan Xibaru Fajin kawandin ba daala birin xa. **16** Naxan na dɛnkeleya, a rafu igeni, na kisima nɛn. Xa naxan mi dɛnkeleya, na yalagima nɛn. **17** Naxanye na dɛnkeleya, e taxamasenni itoe ligama nɛn n xinli: E jinanne kedima nɛn, e yi xui gbɛtɛ nɛnɛne fala, **18** e yi saɣine suxu e yiine ra, e dabarin don, sese mi liga e ra. E yiin sama nɛn furetone ma, e yi e rakɛndɛya.” **19** Marigi Yesu yelin falan tiye e xa waxatin naxan yi, a tɛ ariyanna yi a sa dɔxɔ Ala yiifanna ma. **20** E yi siga kawandin badeni yiren birin yi. Marigin yi walima e xɔn, a yi a falan sɛnbɛ so taxamasenne ra.

Luka

1 N xoyin Teyofili, Muxu wuyaxi bata seɓenla ti lan feene ma naxanye liga nxu yee xori. **2** E feene yebaxi nen alo sereya kendene a fala e xa kii naxan yi, xabu a foloni, naxanye Alaa falan nalima. **3** Awa, n xoyin Teyofili, n bata feni itoe xaran, n yi e feseɓe ki fajni xabu a foloni. N bata n miri a ma, n naxa, “A lan n xa a seɓe ki fajni, n yi a rasiga i ma.” **4** N ni ito ligaxi nen alogo i xa na feene birin jondin kolon i xaranxi naxanye ma. **5** Ito birin foloxi Herode a mangayaan waxatin nin Yudaya yamanani. Saraxaralina nde yi na, a xili Sakari naxan yi kelixi saraxarali Abiya bɓnsɓnni. A jaxanla yi xili Elisabeti. Na fan yi kelixi saraxarali Haruna bɓnsɓnna nin. **6** E firinna birin yi tinxin Ala yee ra yi, e yi Marigina yamarin nun a sariyan birin suxi. **7** Dii yo mi yi e yii nun, amasoto gbantan nan yi Elisabeti ra, e firinna birin bata yi fori han! **8** Loxona nde, Sakari a saraxarali wanla waxatin yi a li Ala xa, **9** e yi a sugandi masensenna xon alo saraxaraline darixi a ra kii naxan yi, alogo a xa so Marigin Batu Banxini wusulan gandeni. **10** Yamaan yi malanxi tandeni Ala maxandideni wusulanna gan waxatini, **11** nayi, Marigina malekan yi mini kenenni a xa, a ti wusulan ganden yiifanna ma. **12** Sakari malekan to waxatin naxan yi, a kuisan, a gaxu. **13** Koni malekan yi a fala a xa, a naxa, “Sakari, i nama gaxu! Ala bata i xuiin me, i ya jaxanla, Elisabeti dii xemɛn sɔtoma nen i xa, i yi a xili sa Yoni. **14** I sewama nen, muxu wuyaxi fan yi sewa a bari feen na. **15** Amasoto a findima nen muxu gbeen na Marigin yetagi. A nama manpaan min, a nama dolo ma se yo min. A lugoma nen Alaa Nii Sarijanxin na xabu a nga kui waxatin naxan yi. **16** A fama nen Isirayila kaan wuyaxi ra e Marigina Ala ma. **17** A sigama Marigina xerayaan na nen senbeni alo Nabi Eli a liga kii naxan yi. A yi dii fafane bɓjen nafindi e diine ma. A yi muxu murutexine masara, e miriyaan yi liga alo tinxin muxune, alogo a xa yamani ton Ala xa ki fajni.” **18** Sakari yi a fala malekan xa, a naxa, “N na a kolonma di, fa fala jondi nan ito ra? N tan bata fori, n ma jaxanla fan bata fori.” **19** Malekan yi a yabi, a naxa, “Baraka Yibirila nan n tan na, naxan fama Ala yetagi. A tan nan n xexi i ma feni ito Xibaru Fajnin nalideni i ma. **20** Koni bayo i mi laxi n ma falan na, naxan sa kamalima a waxatini, i findima nen bobon na, i mi falan tima han na yi liga.” **21** Na waxatini, yamaan yi Sakari mamema. E yi kontofili

bayo a bata yi bu Ala Batu Banxini. **22** Koni a to mini, a mi no falan tiye e xa, e yi a kolon fa fala a bata fe toon ti Ala Batu Banxini. A yi a yiin maliga e xa bayo a mi yi no falan tiye. **23** A wali loxone jannxina Ala xa, Sakari yi xete a konni. **24** Na dangi xanbini, a jaxanla Elisabeti yi fudikan. Kike suulun, a mi mini tandeni. **25** A yi a fala, a naxa, “Marigina ito nan ligaxi n xa, a bata tin a xa n ma yagin ba n ma n ma muxune tagi.” **26** Elisabeti kuiin kike senninna, Ala yi maleka Yibirila rasiga Galile taana nde yi naxan xili “Nasareti.” **27** A falan ti sungutun nasolonxin xa, xemena nde bata yi a masuxu naxan yi xili Yusufu, Manga Dawuda bɓnsɓnna muxuna nde nan yi na ra. Na sungutun nasolonxin yi xili nen Mariyama. **28** Malekan yi fa a fema, a naxa, “Sewani i xa Ala fe fajin nagidixi i tan naxan ma. Marigina i xon!” **29** Mariyama yi kuisan malekana falana fe ra, a yi a miri a xontonna bunna ma. **30** Malekan yi a fala a xa, a naxa, “Mariyama, i nama gaxu amasoto Ala bata maragidi fajin fi i ma. **31** I fudikanma nen, i dii xemɛn soto, i yi a xili sa Yesu. **32** A binyen sɔtoma nen, a xili bama nen a Kore Xonna Alaa Dii Xemena. Marigina Ala a findima nen mangan na alo a benba Dawuda yi kii naxan yi. **33** A findima nen Yaxuba bɓnsɓnna mangan na habadan. A mangayaan mi jannje mumel!” (aiɓn g165) **34** Mariyama yi a fala malekan xa, a naxa, “Sungutun nasolonxin nan n tan na, ito ligama di nayi?” **35** Malekan yi a yabi, a naxa, “Alaa Nii Sarijanxin godoma nen i ma, Kore Xonna Ala senben godoma nen i xun ma. Nanara, na dii sarijanxin xili bama nen a Alaa Dii Xemena. **36** I ngaxakedenna Elisabeti fan fudikanna nan a ra iki. Hali a to bata fori, e yi a falama naxan ma a gbantana, na kuiin kike senninden na ra iki. **37** Amasoto Ala no feen birin lige nen.” **38** Mariyama naxa, “Marigina walikeen nan n tan na, Ala xa na liga n xa alo i bata a fala kii naxan yi.” Malekan yi keli a fema. **39** Na xanbi ra, Mariyama yi a yiton mafuren, a siga taana nde yi Yuda yamanani, geya wuyaxi yi denaxan yi. **40** A siga Sakari konni Elisabeti xontondeni. **41** Elisabeti Mariyama xonton ti xuiin me waxatin naxan yi, diin yi a ramaxa Elisabeti kui. Elisabeti yi lugo Alaa Nii Sarijanxin na. **42** A yi a fala ti xuini te, a naxa, “Baraka diin nan i tan na jaxanle tagi! I diin naxan fan sɔtoma, baraka diin nan na ra! **43** N binyen sifani ito sotoxi di, n kanna nga xa fa n konni? **44** Amasoto, n na i xonton ti xuiin me waxatin naxan yi, diin yi a ramaxa n kui sewani. **45** Sewani i xa, i tan naxan laxi a ra fa fala

Marigina falan kamalima nen.” 46 Mariyama naxa, “N Marigin tantunma n bɔɲeni. 47 N sewaxi n bɔɲeni n nakisimana Alaa fe ra. 48 Amasoto a bata a xaxili lu n tan a walike magodoxin xɔn ma. Nanara, fɔlɔ iki ma han habadan, muxun birin a falama nen a baraka diin nan n tan na. 49 Amasoto Ala Senbemaan bata fe gbeen liga n xa. A xinla sarijan. 50 A kininkinin a yeeragaxu muxune ma han mayixete mayixetene. 51 Ala bata a yiini bandun, a yi waso muxune raxuya ayi e nun e fe yitɔnxine. 52 Ala bata manga senbe kanne ba e manga gbɛdene yi. Naxanye e yete magodoxi, a yi ne yite. 53 A kametone ralugo fe fajin na. A nafulu kanne yii seene jan. 54 Ala layirin naxan xidi en benbane xa, a mi jinanxi na ma. 55 A yi a xaxili lu a hinanna xɔn ma Iburahima xa e nun a bɔnsɔnna birin han habadan!” (aiɔn g165) 56 Mariyama yi kike saxon ti Elisabeti fema. Na xanbi ra, a yi xete a konni. 57 Elisabeti dii bari waxatin yi a li, a yi dii xemene soto. 58 A doxo bodene nun a xabilan muxune yi a me a Marigin bata kininkinin a ma, e yi sewa e bode xɔn ma. 59 Diin barin lɔxo xunna, e fa a ra a banxulandeni, e yi a xili sama nen Sakari alo a fafe xinla kii naxan yi. 60 Koni a nga naxa, “En-en de! A xili sama nen Yoni.” 61 E yi a fala a xa, e naxa, “Muxu yo mi i bɔnsɔnni naxan xili na kiini.” 62 Nayi, e yi e yiin maliga a fafe xa, e yi a maxodin diin xinla ma. 63 Sakari yi walaxan tongo, a yi a sebe, a naxa, “A xili nen Yoni.” E birin yi kabe kati! 64 Na waxatin yeteni, Sakari yi nɔ falan tiye, a Ala tantun fɔlɔ. 65 A doxo bodene yi gaxu kati! Muxune yi na feene falama Yudaya yamanan birin yi. 66 Naxan birin a me, ne yi e miri, e maxodinna ti, e naxa, “Diini ito sa ligama di?” Amasoto e bata yi a yigbe kati, a Marigin senbena a xun ma. 67 Yoni Fafe Sakari yi lugo Alaa Nii Sarijanxin na, a yi waliyiya falane ti, a naxa, 68 En Marigin tantun, Isirayilaa Ala! Amasoto a bata fa, a yi a yamaan mali, a yi e xɔɔya. 69 A bata Marakisi Tiin senbemaan namini a walikeen Dawuda bɔnsɔnni, 70 alo a fala a nabi sarijanxine xɔn ma kii naxan yi xabu waxati danguxine. (aiɔn g165) 71 A layirin xidi a a en xunbama nen en yaxune yii, e nun naxanye birin en napaxuxi. 72 A yi kininkinin en benbane ma, a yi a xaxili lu a layiri sarijanxin xɔn ma, 73 alo a kɔlɔ en benba Iburahima xa kii naxan yi. 74 A yi en xunba en yaxune ma. A tin, en yi a batu bɔɲe xunbenli. 75 A yi en findi a muxu sarijanxine nun tinxin muxune ra a yete ra yi en siin birin yi. 76 N ma diina, e i xilima nen a Kore Xonna Alaa nabina.

I sigama nen Marigin yete ra. I kirani tɔn a xa. 77 I yi kisi feen yita a yamaan na, e yulubine yi xafari 78 a kininkinin gbeen barakani. A tan nan a ligama en lu kenenni alo sɔgen tematona. 79 A yi muxune makenen naxanye doxi dimini sayaan yete ra. A yi bɔɲe xunbenla kiraan yita en na. 80 Awa, diin yi gboma, a yi senben sɔtoma e nun xaxinla. A yi lu wulani han a mini waxatin yi a li kenenni Isirayila muxune xa.

2 Na waxatini, Romi Manga Gbee Ogustu yi yamarin fi a yamanan muxune birin xinla xa sebe. 2 Kirinyusi yi yamana kanyani Siriya yamanani waxatin naxan yi, a sebe fɔlon nan yi na ra. 3 Awa, muxune birin yi siga e taane yi e xinle sebedeni. 4 Yusufu fan yi keli Galile Nasareti taani, a siga Yudaya taana nde yi naxan yi xili Betelemi, Manga Dawuda sotoxi denaxan yi. Yusufu yi siga na, amasoto Dawuda bɔnsɔnna nan yi a tan fan na, 5 a siga a xili sebedeni e nun Mariyama naxan yi masuxi a xɔn naxalandiyani. A fudi kanna nan yi a ra. 6 E yi Betelemi yi waxatin naxan yi, Mariyama dii bari waxatin yi a li. 7 A yi a dii xeme singen soto. A yi a mafilin dugini, a yi a sa xuruseene balon sa seen kui kulani amasoto e mi yigiya soto xɔɲe yigiyadeni. 8 Yetee kantanna ndee yi na yamanani naxanye yi xima burunna ra, e yi e yeteene kantanma kɔɛn na. 9 Marigina malekan yi mini kenenni e xa, Marigina nɔɔn yi godo e xun ma. E gaxu kati! 10 Koni malekan yi a fala e xa, a naxa, “E nama gaxu amasoto n faxi fena nde Xibaru Fajin nan nalideyi e ma, naxan findima sewa gbeen na yamaan birin xa. 11 Marakisi Tiin bata soto e xa to kɔɛn na Dawuda gbee taani. Alaa Muxu Sugandixin na a ra! Marigin na a ra! 12 Taxamasenna ni ito ra e xa, e diidin lima saxi nen xuruseene balon sa seen kui kulani, a mafilinxi dugini.” 13 Na waxatin yeteni maleka ganla yi keli kore, e fa malekan boden fema, e yi Ala tantun, e naxa, 14 “Binyen xa fi Ala ma kore xonna ma pon! Muxun naxanye bata Ala kenen, ne xa bɔɲe xunbenla soto dunuɲa yi.” 15 Malekane keli e fema waxatin naxan yi, e xete ariyanna yi, yetee kantanne yi a fala e bode xa, e naxa, “En siga Betelemi yi, en sa feni ito to naxan ligaxi, Marigin naxan falaxi en xa.” 16 Nanara, e siga mafuren, e sa Mariyama nun Yusufu li na, e diidin to saxi xuruseene balon sa seen kui kulani. 17 Yetee kantanne to diidin to, malekan falan naxan ti e xa diidina fe yi, e yi na birin yete. 18 Muxun naxanye birin e xuiin me, ne yi kabe xuruse kantanne

falan ma. **19** Mariyama yi feni itoe birin namara a xaxinla ma, a yi a miri ne ma kati! **20** Yexɛɛ kantanne yi xetɛ, e Ala tantunma, e a binya na feen na e naxan toxi alo malekana a fala e xa kii naxan yi. **21** Lɔxɔ xun keden danguxina, diidin banxulan waxatin yi a li, e yi a xili sa Yesu alo malekana a fala kii naxan yi benun a xa bari. **22** E marasarijanna waxatin to njan alo Musaa Sariya Kitabun naxan falaxi lan dii bari feen ma, Yusufu nun Mariyama yi siga diidin na Yerusalen taani, e sa a taxu Marigin na. **23** A sebexi Marigina Sariya Kitabuni, a naxa, “Dii xeme singen birin xa rasarijnan Marigin xa.” **24** E yi saraxan ba alo Marigina Sariya Kitabuna a falaxi kii naxan yi, a naxa, “ganba firin hanma kolokonde dii firin.” **25** Muxuna nde yi Yerusalen taani nun, a xili Simeyon. Tinxin muxu tɔgɔndiyaxin nan yi a ra. A yi Ala mamema Isirayila mali feen na. Alaa Nii Sarijanxin yi a yi. **26** A bata yi a kolon Alaa Nii Sarijanxin xon ma fa fala a mi faxe fɔ a Marigina Muxu Sugandixin to. **27** Alaa Nii Sarijanxin yi Simeyon nasiga Ala Batu Banxini. Yesu sɔto muxune yi fa a ra Ala Batu Banxini, e xa a liga alo Sariya Kitabuna a fala kii naxan yi. **28** Simeyon yi Yesu tongo, a yi a sa a kanke ra, a barikan bira Ala xa, a naxa, **29** “Marigina, i bata i ya layirin nakamali n xa. Iki, i ya walikɛɛn xa siga bɔɲɛ xunbenli **30** amasɔto n bata i ya kisi feen to, **31** i naxan yitɔnxi yamane birin yɛɛ ra. **32** A tan nan findima kenenna ra siyane xa, a findima nen Isirayilaa binyen na, i ya yamana.” **33** Simeyon falan naxan ti Yesu a fe yi, a nga nun a fafe yi kabe na ra. **34** Simeyon yi duba a nga Mariyama xa, a naxa, “Ala bata diini ito yeɓa, a yi Isirayila muxu wuyaxi halagi, a yi a wuyaxi rakisi. A findima nen taxamasenna ra koni muxu wuyaxi a matandima nen, **35** a yi e miriya luxunxine ramini kenenni. Tɔrɔna i bɔɲɛn sɔxɔnma nen alo dɛgema xɛnɛna.” **36** Nabi jaxalanmana nde yi na nun, a yi xili Anna, Fanuweli a dii temena. A yi kelixi Aseri bɔnsɔnna nin. Naxalan fori gbeen nan yi a ra naxan bata yi jɛɛ solofere ti futuni nun, **37** a jɛɛ tonge solomasɛɛ e nun jɛɛ naanin ti kaɲa gileyani. A yi Ala Batu Banxini waxatin birin, a yi Ala batuma kɔɛɛn nun yanyin na, a yi Ala maxande, a sunna suxu. **38** Na waxatin yeteni, a fa, a barika bira Ala xa, a lu diina fe fale muxune xa naxanye yi Yerusalen taan xunba waxatin mamema. **39** Yusufu nun Mariyama to yelin feene birin nakamale alo Marigina Sariya Kitabuna a yamarixi kii naxan yi, e xetɛ Galile yamanani e

taani Nasareti. **40** Diidin yi gboma, a senben sɔto, a fe kolonna yi defe. Alaa hinanna yi a yi. **41** Yesu sɔto muxune yi sigama Yerusalen taani jɛɛ yo jɛɛ Halagi Tiin Dangu Lɔxɔn Sanli. **42** Yesu sɔton jɛɛ fu nun firinna ti waxatin naxan yi, e siga sanla rabadeni alo e namunna kii naxan yi. **43** Sanla jnan waxatin naxan yi, e xetɛ e konni. Yesu yi lu Yerusalen taani, koni a sɔto muxune mi yi a kolon. **44** E yi e miri, a a yi yamaan ye, e ferijen sigan tiye. Na xanbi ra, e Yesu fen fɔlo e ngaxakedenne nun e xɔyine tagi. **45** Koni e mi a to. Nanara, e xetɛ a fendeni Yerusalen taani. **46** A soɛ saxandeni, e yi sa a to Ala Batu Banxini, a dɔxi Yahudiya karamɔxɔne tagi, a tuli matixi e ra, a e maxɔdinma. **47** Naxan birin a xuiin mɛ, ne yi kabe a xaxilimayaan yabine ma. **48** A sɔto muxune a to waxatin naxan yi, e kabe. A nga yi a fala a xa, a naxa, “N ma diina, i ito ligaxi nxu ra nanfera? Nxu nun i fafe bata yigitege i fendeni kati!” **49** A yi e yabi, a naxa, “E n fenma nanfera? E mi a kolon fa fala a lan nen n xa lu n Fafe a banxini?” **50** Koni a naxan fala e xa, e mi na famu. **51** Nanara, Yesu yi siga e fɔxɔ ra Nasareti yi, a yi e sagoon liga. A nga yi feni itoe birin namara a xaxinla ma. **52** Yesu yi xungbo, a xaxili sɔto, a fe yi rafan Ala nun yamaan ma.

3 Pɔnsi Pilati yi yamana kanyani Yudaya yamanani waxatin naxan yi, Romi Manga Gbeen Tiberi a mangayaan jɛɛ fu nun suulunna nan yi a ra nun. Herode fan yi kuntigiyani Galile yamanan xun na. A ngaxakedenne, Filipi fan yi kuntigiyani Iture nun Tirakoniti yamanane xun na. Lisanisa fan yi kuntigiyani Abileni yamanan xun na. **2** Anasa nun Kayafa, saraxarali kuntigi singene nan yi ne fan na. Ala falan ti Sakari a dii xemen Yoni xa na waxatin nin wulani. **3** Yoni yi sigama Yuruden baan dɛ kawandi badeni, a naxa, “E xun xanbi so e yulubine yi, e rafu igeni, e yulubine xafarima nen.” **4** Nabi Esayi a sebe nen a Kitabun kui, a naxa, “Muxuna nde xuiin minima tonbonni, a naxa, ‘E kirani tɔn Marigin yɛɛ ra, e kirane matinxin a xa! **5** E folone birin naxutu, e geyane nun yire matexine birin wuru. Kira yidɔxine birin yi tinxin. Kira jaxine birin yi malaxun. **6** Adamadiine birin kisi feen toma nen fata Ala ra!’” **7** Yamaan yi fa Yoni fema, a a xa e rafu igeni e tubi xinla ma Ala ma. A yi a fala e xa, a naxa, “E tan saɲi bɔnsɔnne! Nde e rakolonxi, e xa e gi Alaa xɔlon bun ma? **8** E kɛwanle xa a yita fa fala e bata e xun xanbi so e hakene yi. E

nama ε miri fa fala, ε benban nan Iburahima ra. N xa a fala ε xa, Ala nεe gemeni itoe maxete nen, a e findi Iburahima bōnsōnne ra! **9** Bunbin bata yitōn wudi salenne sege feen na. Wudin naxan mi bogi fajin tima, na sege ma nen, a woli teeni.” **10** Yamaan yi a maxōdin, e naxa, “Nxu nanfe ligama na yi?” **11** A yi e yabi, a naxa, “Doma firin naxan yii, a xa keden fi gbete ma se mi naxan yii, donseen muxun naxan yii, a xa a yitaxun.” **12** Mudu maxinla ndee yi fa alogo e xa rafu igeni e tubi xinla ma Ala ma, e yi a maxōdin, e naxa, “Karamōxo, nxu tan nanfe ligama?” **13** A yi e yabi, a naxa, “E nama seen maxili dangu a danna ra.” **14** Sofana ndee fan yi a maxōdin, e naxa, “Nxu tan go? Nxu nanfe ligama?” A yi a fala e xa, a naxa, “E nama gbetin ba muxune yii fangan na hanma wuleni. E wasa so ε saranni.” **15** Yamaan yi e yigin sa fōlo Yoni yi. E yi mirixi a ma fa fala Alaa Muxu Sugandixin na a ra. **16** Nanara, Yoni yi a fala e birin xa, a naxa, “N tan ε rafuma igeni nin, koni naxan senben gbo n tan gbeen xa, na fama, n tan mi sa lan nen n findi a sankidi fulunna ra. Na ε rafuma Alaa Nii Sarijanxin nun teen nin. **17** A segedenna a yii, a maali fe, a yi a sa sagan kui, koni a se dagin sama nen tee tutareni!” **18** Yoni yi Alaa falan Xibaru Fajin nali yamaan ma maxadi kii wuyaxi yi. **19** Koni Yoni yi Manga Herode sōn jaxina fe fala, amasōto a bata yi a fafaxakedenna jaxanla Herodiyade futu e nun a mōn bata yi fe jaxi wuyaxi liga. **20** Herode mōn yi fe jaxi gbete liga naxan dangu bodene ra, a Yoni sa kasoon na. **21** Yamaan birin yelin nafuye waxatin naxan yi, Yesu fan yi rafu igeni. Yesu yi Ala maxandima waxatin naxan yi, kore xōnna deen yi rabi, **22** Alaa Nii Sarijanxin yi godo a ma ganba sawurani. Fala xuiin yi keli kore, a naxa, “N nafan Dii Xemen nan i tan na. I bata n kenen ki fajni.” **23** Yesu to jεε tonge saxan soto, a yi a wanla fōlo. Yamaan yi mirixi a Yusufu a dii xemen nan a tan na. Heli nan ma dii yi Yusufu ra, **24** Mataha nan ma dii yi Heli ra, Lewi nan ma dii yi Mataha ra, Meliki nan ma dii yi Lewi ra, Yanayi nan ma dii yi Meliki ra, Yusufu nan ma dii yi Yanayi ra, **25** Matahisa nan ma dii yi Yusufu ra, Amosi nan ma dii yi Matahisa ra, Nahun nan ma dii yi Amosi ra, Esili nan ma dii yi Nahun na, Nagagi nan ma dii yi Esili ra, **26** Maati nan ma dii yi Nagagi ra, Matahisa nan ma dii yi Maati ra, Semenni nan ma dii yi Matahisa ra, Yoseke nan ma dii yi Semenni ra, Yoda nan ma dii yi Yoseke ra, **27** Yohana nan ma dii yi Yoda ra, Resa nan ma dii yi Yohana ra, Sorobabeli nan ma

dii yi Resa ra, Selatili nan ma dii yi Sorobabeli ra, Neri nan ma dii yi Selatili ra, **28** Meliki nan ma dii yi Neri ra, Adi nan ma dii yi Meliki ra, Kosan nan ma dii yi Adi ra, Elemadan nan ma dii yi Kosan na, Eri nan ma dii yi Elemadan na, **29** Yosuwe nan ma dii yi Ere ra, Elisere nan ma dii yi Yosuwe ra, Yorimi nan ma dii yi Elisere ra, Mataha nan ma dii yi Yorimi ra, Lewi nan ma dii yi Mataha ra, **30** Simeyōn nan ma dii yi Lewi ra, Yuda nan ma dii yi Simeyōn na, Yusufu nan ma dii yi Yuda ra, Yonan nan ma dii yi Yusufu ra, Eliyakimi nan ma dii yi Yonan na, **31** Meleya nan ma dii yi Eliyakimi ra, Mena nan ma dii yi Meleya ra, Matata nan ma dii yi Mena ra, Natan nan ma dii yi Matata ra, Dawuda nan ma dii yi Natan na, **32** Yese nan ma dii yi Dawuda ra, Obedi nan ma dii yi Yese ra, Boosu nan ma dii yi Obedi ra, Salimon nan ma dii yi Boosu ra, Naxason nan ma dii yi Salimon na, **33** Aminadabo nan ma dii yi Naxason na, Rami nan ma dii yi Aminadabo ra, Xesirōn nan ma dii yi Rami ra, Peresi nan ma dii yi Xesirōn na, Yuda nan ma dii yi Peresi ra, **34** Yaxuba nan ma dii yi Yuda ra, Isiyaga nan ma dii yi Yaxuba ra, Iburahima nan ma dii yi Isiyaga ra, Tera nan ma dii yi Iburahima ra, Nahori nan ma dii yi Tera ra, **35** Serugu nan ma dii yi Nahori ra, Rehu nan ma dii yi Serugu ra, Pelegi nan ma dii yi Rehu ra, Eberi nan ma dii yi Pelegi ra, Selaxa nan ma dii yi Eberi ra, **36** Kayinan nan ma dii yi Selaxa ra, Arapaxadi nan ma dii yi Kayinan na, Semi nan ma dii yi Arapaxadi ra, Nuhan nan ma dii yi Semi ra, Lameki nan ma dii yi Nuhan na, **37** Matusela nan ma dii yi Lameki ra, Xenōki nan ma dii yi Matusela ra, Yaredi nan ma dii yi Xenōki ra, Mahalaleli nan ma dii yi Yaredi ra, Kenan nan ma dii yi Mahalaleli ra, **38** Enosi nan ma dii yi Kenan na, Seti nan ma dii yi Enosi ra, N Benba Adama nan ma dii yi Seti ra, Ala nan N Benba Adama da.

4 Yesu yi keli Yuruden baani a lugoxi Alaa Nii Sarijanxin na. Alaa Nii Sarijanxin yi siga a ra tonbonni. **2** Yinna Manga Setana yi kata a xa Yesu ratantan soge tonge naanin. Yesu mi sese don na waxatini, sunna yi a suxu han! **3** Yinna Manga Setana yi a fala a xa, a naxa, “Xa Alaa Dii Xemen nan i tan na, a fala gemeni ito xa, a xa findi burun na.” **4** Yesu yi a yabi, a naxa, “A sebexi Kitabuni, a naxa ‘Muxun mi balon donseen xan gbansan na.’” **5** Na xanbi ra, Yinna Manga Setana yi a tongo, a siga a ra, a dunujra mangayane birin yita a ra mafuren. **6** Awa, Yinna

Manga Setana yi a fala a xa, a naxa, “N nōon birin fima i ma nen e nun nafunli ito birin amasoto a birin taxuxi n tan nan na, muxun naxan na n kenēn, n yi a so na yii. 7 Awa, xa i n batu, n ni ito birin fima nen i ma.” 8 Yesu yi a yabi, a naxa, “A sebexi Kitabuni, a ‘I xa i Marigina Ala binya, i yi a keden peen batu!’” 9 Na xanbi ra, Yinna Manga Setana yi Yesu tongo, a siga a ra Yerusalem taani, a yi a ti Ala Batu Banxin xun tagi, a yi a fala a xa, a naxa, “Xa Alaa Dii Xemen nan i tan na, tugan be, 10 amasoto a sebexi Kitabuni, fa fala, ‘Ala yamarin fima nen a malekane ma i ya fe yi alogo e xa i kantan,’ 11 a mōn yi a fala, a naxa, ‘e i tongoma nen alogo i nama i sanna din gēme yo ra.’” 12 Yesu yi a yabi, a naxa, “A sebexi, ‘I nama i Marigina Ala mato bunbani.’” 13 Yinna Manga Setana to yelin Yesu matoe kiin birin yi, a keli a fema han waxati gbete. 14 Na xanbi ra, Yesu yi xete Galile yi, Alaa Nii Sarijanxin senbena a xun ma. A fe xibarun yi rali na yamanan birin yi. 15 A yi e xaran e salide banxine yi, e birin yi a tantun. 16 Na xanbi ra, Yesu yi siga Nasareti taani, a maxuruxi denaxan yi. Matabu Loxoni, a yi siga salide banxini alo a darixi a lige kii naxan yi. A keli, a ti xaran feen na. 17 E yi Nabi Esayi gbee Kitabun so a yii. A yi a rabi, a na yiren to a sebexi denaxan yi, a naxa, 18 “Marigina Niina n yi. A bata n sugandi, a n xa Alaa falan Xibaru Fajin nali yiigelitone ma. A bata n nasiga, a n xa xoroya feen kawandin ba suxu muxune xa, n yi danxutone yeen nabi. Naxanye nōon bun ma, n ne xoroya. 19 N xa Marigina muxune xunba jneen nali.” 20 Yesu yi Kitabun nagali, a yi a so a suxu muxun yii, a dōxo. Muxun naxanye birin yi salide banxini, ne yi e yeen ti a ra. 21 A falan ti fōlo e xa, a naxa, “To, n bata naxan xaran, e yi a me, na bata kamali.” 22 E birin yi a sere ba, e kabe na fala fajine ma a naxanye ti e xa. E yi a fala, e naxa, “Yusufu a dii xemen xa mi ito ra ba?” 23 Yesu yi a fala e xa, a naxa, “N laxi a ra yati, fa fala e sandani ito sama n ma nen fa fala, ‘Seribana, i yete rakendeya.’ E mōn a falama n ma nen fa fala, ‘Nxu feen naxanye mexi i ya fe yi Kaperunan yi, ne fan liga i gbee taani.’” 24 Yesu mōn yi a fala e xa, a naxa, “N xa nōndin fala e xa, nabiin mi binyen sote a kon taani mum!” 25 A yi a fala, a naxa, “E tuli mati, nōndin na a ra, ke naxalan wuyaxi yi Isirayila muxune ye Nabi Eli waxatini. Na waxatini tulen mi fa jee saxan e nun a tagi, fitina kamen yi so na yamanan birin yi. 26 Koni hali na Ala mi Nabi Eli rasiga e tan nde keden yo ma, fō ke

naxalan keden peen naxan yi Sarepata taani, Sidon yamanani. 27 Dogonfonto wuyaxi yi Isirayila muxune ye Nabi Elise waxatini, koni hali na keden pe, a mi kendeya fō Naman, Siriya kaana.” 28 Muxun naxanye yi salide banxini, ne na me waxatin naxan yi, e bōjen yi te. 29 E keli, e siga a ratuntunje taan fari ma han geyaan tintinna ra taan yi geyaan naxan fari, alogo e xa a radin lanbanni. 30 Koni a dangu yamaan tagi, a siga. 31 Na xanbi ra, Yesu yi siga Galile Kaperunan taani, a yamaan xaran denaxan yi Matabu Loxoni. 32 E birin yi kabe a xaran ti kiin ma amasoto a yi falan tima Ala senben nin. 33 Xemena nde yi salide banxini yinnan yi naxan fōxo ra, yinna naxina. A yi a xuini te, a gbelegbele, a naxa 34 “Ee! Yesu Nasareti kaana, i waxi nanse xōn ma nxu yii? I faxi nxu halagiden nin ba? N na a kolon nde i ra. Alaa muxu sarijanxin nan i tan na.” 35 Yesu yi yinnan yamari a sobeen na, a naxa, “I dundu, xete xemeni ito fōxo ra.” Yinnan yi xemen nabira e birin yetagi, a xete a fōxo ra, a mi sese naxi liga a ra. 36 Muxune birin yi kabe, e yi a fala e bode xa, e naxa, “Xaran sifan mundun ito ra? Xemeni ito bata falan ti yinna naxine xa nōon nun senbeni, e xete muxune fōxo ral!” 37 Yesu a fe xibarun yi xuya ayi na yamanan birin yi. 38 Yesu yi keli salide banxini, a siga Simōn konni. A yi a li Simōn bitan gilen fatin wolonxi a ma. E yi a fe fala Yesu xa. 39 A sa a ti a saden dexōn ma, a yi falan ti fati mawolonna xili ma, naxanla yi kendeya na waxatin yeteni, a yi keli a fōlo wale e xa. 40 Sogen godo waxatin naxan yi, furemane yi muxun naxanye birin yii, furen sifa wuyaxi, ne yi fa ne ra Yesu fema. A yi a yiin sa e birin xun ma, a yi e rakendeya. 41 Ninanne fan yi muxun naxanye fōxo ra, e yi ne ragbelegbele e falan ti e xōn, e naxa, “Alaa Dii Xemen nan i tan nal!” E xete muxu wuyaxi fōxo ra. Koni, a yi jinanne yamari a e nama falan ti, amasoto e yi a kolon a Alaa Muxu Sugandixin nan a tan na. 42 Subaxani, Yesu yi keli taani, a siga a danna yirena nde yi. Yamaan yi a fen fōlo. E a to waxatin naxan yi, e kata e xa a makankan alogo a nama siga 43 koni a yi a fala e xa, a naxa, “A fere mi na fō n xa Alaa Mangayaan Xibaru Fajin nali taan bonne fan yi nen amasoto Ala n xexi na nan ma.” 44 Nanara, a yi kawandin bama Yudaya yamanani salide banxine yi.

5 Loxona nde, Yesu yi tixi Genesareti Daraan de, yamaan yi a yigbetenma Alaa falan medeni, 2 a yi kunki firin to igen de yexe suxune bata yi keli

naxanye kui e lu e yalane raxe. **3** Yesu yi so Simōn ma kunkin kui, a yi a mafan, a xa a tutin igen xun ma ndedi. Yesu yi dōxō kunkin kui, a yamaan xaran. **4** A yelin falan tiye waxatin naxan yi, a yi a fala Simōn xa, a naxa, “Kunkin nasiga tilin yireni ε nun i lanfane xa yalane ragodo igeni, ε yexen suxu.” **5** Simōn yi a yabi, a naxa, “Nxu kanna, nxu bata wali kōeen na katil! Nxu mi sese suxu. Koni xa i bata a fala na kiini, n yalane ragodoma nen igeni.” **6** E to yalane ragodo igeni, e yexe wuyaxi suxu han yalane yi lu yibōe. **7** E lanfaan naxanye yi kunkin boden kui, e ne xili e malideni. E fa, e yi kunkin firinne birin nafe yexen na han e godo fōlō igen bun ma. **8** Feen naxan liga, Simōn Piyeri na to waxatin naxan yi, a yi a xinbi sin Yesu bun ma, a naxa, “Marigina, i masiga n na amasōtō hake kanna nan n tan na!” **9** Gaxun yi a suxu a tan nun a lanfane birin na yexe suxine fe ra **10** hali Yaki nun Yoni Sebede a dii xemene. Yesu yi a fala Simōn xa, a naxa, “I nama gaxu, fōlō to ma, i fa muxune nan sōtōma Ala xa alo i yi yexen suxuma kii naxan yi.” **11** E kunkine rate xareyaan na, e seene birin lu na, e bira Yesu fōxō ra. **12** Yesu yi taana nde yi, xemena nde yi fa dogonfonna yi naxan fatin birin ma. A Yesu to waxatin naxan yi, a yi bira, a yetagin yi lan bōxōn ma, a yi a mafan, a naxa, “N kanna, xa i tin, i nōe n nakendeye nen!” **13** Yesu yi a yiin sa a ma, a naxa, “N bata tin, i xa kendeyal!” Dogonfonna yi a bejin sasal **14** Yesu yi a fala a xa, a naxa, “I nama a fala muxu yo xa, koni siga saraxaraliin fema, a xa i mato. Na xanbi ra, i saraxan ba i rasarijan feen na alo Musa a yamari kii naxan yi. Na findima seren na e xa.” **15** Koni Yesu xinla yi xuya ayi na yiren birin yi. Yama gbeen yi fa a falan namedeni e nun e rakendeya feen na. **16** Koni a yi keli, a siga a danna, a yi Ala maxandi, alo a darixi a ra kii naxan yi. **17** Lōxōna nde Yesu yi xaranna tima, Farisi muxuna ndee nun sariya karamōxōne yi dōxi na yi, naxanye yi kelixi Galile nun Yudaya taan birin yi e nun Yerusalen taani. Marigin senben yi Yesu yi a furetōne rakendeya. **18** Muxuna ndee yi fa lebutenna ra a sa seni e yii. E kata, a e xa a raso banxini, alogo e xa sa a sa Yesu bun ma. **19** Koni yamaan yi gbo, e mi kira sōtō e yi a raso. Na nan a liga e te banxin fari e yinla raba mēnni, e yi e nun a sa seen nagodo yamaan tagi Yesu yetagi. **20** Yesu e denkeleyaan to waxatin naxan yi, a yi a fala xemēn xa, a naxa, “N xōyina, i yulubine bata mafelu.” **21** Sariya karamōxōne nun Farisi muxune yi e miri, e naxa, “Nde xemēni ito

ra naxan Ala rayelefuma? Muxu yo mi nōe yulubine mafeluye fō Ala keden peena!” **22** Yesu yi e miriyaan kolon. Nanara, a fala e xa, a naxa, “E mirima fe sifani itoe ma nanfera? **23** Nanse fala raxōlō, ‘I yulubine bata mafelu’ hanma ‘Keli, i ya sa seen tongo, i sigan ti?’ **24** N na yitama ε ra nen nayi fa fala senbena n tan Muxuna Dii Xemēn yii dunuya yi, n muxun mafelu a yulubine ra.” A yi a fala lebutenna xa, a naxa, “Keli, i ya sa seen tongo, i siga i konni!” **25** Xemēn yi keli e birin yetagi, a yi a sa seen tongo, a siga a konni mafuren, a yi Ala tantun. **26** E birin yi kabe katil! E yi Ala tantun amasōtō e bata yi gaxu Ala yee ra, e naxa, “En bata kabanako feen to to!” **27** Na xanbi ra, Yesu yi mini, a siga, a sa mudu maxinla nde to, a xili Lewi, a yi dōxi mudu maxilideni. Yesu yi a fala a xa, a naxa, “Bira n fōxō ra.” **28** Lewi yi keli, a yi a seene birin lu na, a bira Yesu fōxō ra. **29** Na xanbi ra, Lewi yi jaxajaxani tōn a banxini Yesu xa. Mudu maxili wuyaxi nun muxu gbete ye fan wuyaxi yi dōxō e fema. **30** Farisi muxuna ndee nun sariya karamōxōna ndee yi falan ti Yesu a xarandiine fe yi, e yi e maxōdin, e naxa, “Nanfera ε donseen donma ε yi ε min mudu maxinle nun hake kanne fema?” **31** Yesu yi e yabi, a naxa, “Muxun naxan kende na mako mi seribaana ma fō furetōne. **32** Amasōtō n mi faxi tinxin muxune xilideni fō hake kanne, alogo e xa e xun xanbi so e hakene yi.” **33** Muxuna ndee yi a fala Yesu xa, e naxa, “Yoni a xarandiine sunna suxuma ye yo ye, e yi Ala maxandi. Farisi muxune xarandiine fan na ligama. Koni i ya xarandiine donseen donma, e yi e min.” **34** Yesu yi e yabi, a naxa, “Jaxalandi kanna nema jaxalandi tiine fema waxatin naxan yi, e sune ba? Na mi lige mumel! **35** Koni waxatina nde fama jaxalandi kanna bama nen e ye, e sunna suxuma nen na waxatini.” **36** Yesu yi sandani ito fan sa e xa, a naxa, “Muxu yo mi nōe dugi nenen tonge, a yi a yibo, a dugi fonna beteren a ra. Xa a na liga, a dugi nenen kalama nen. Dugi dungi nenen fan mi lanje a fonna ma. **37** Muxun mi manpa nenen se se sase fonna kui. Xa a na liga, manpa nenen se sase fonna kalama nen, manpaan yi bōxōn, se sase fonna yi kala. **38** Koni manpa nenen sama se sase nenen nan kui! **39** Awa, muxun na manpa fonna min waxatin naxan yi, a nenen mi fa rafan a ma sōnōn, a falama nen nayi, a naxa, ‘A fonna fan.’”

6 Yesu yi danguma xēena nde ma lōxōna nde yi, Matabu Lōxōni, a xarandiine yi sansi tōnsōnne

ratorondon föla, e yi a terexen e yiin kui, e a kesen don. 2 Farisi muxuna ndee naxa, “E ito ligama nanfera? A mi daxa Matabu Loxoni.” 3 Yesu yi e yabi, a naxa, “E mi na xaranxi ba, kamen Dawuda suxu waxatin naxan yi, e nun a foxarabirane naxan liga? 4 A so nen Alaa banxini, a yi Alaa buru ralixin don, a yi nde so a muxune fan yii. Anu, a mi daxa muxun xa a don fo saraxaraline.” 5 Yesu mon yi a fala, a naxa, “N tan Muxuna Dii Xemen nan Matabu Loxon kanna ra.” 6 Yesu yi siga salide banxini Matabu Loxo gbete yi, a sa e xaran. Xemena nde yi na naxan yiifari ma yiin yi madonxi. 7 Sariya karamoxona ndee nun Farisi muxuna ndee yi waxi a xon ma e xa Yesu tojenge. Nanara, e yi e yeen ti a ra alogo e xa a kolon xa a muxun nakendeye Matabu Loxoni. 8 Koni Yesu yi e miriyaan kolon. Nanara, a yi a fala xeme yii madonxin xa, a naxa, “Keli, i fa yamaan yetagi be.” Xemen yi keli, a ti e yetagi. 9 Yesu yi a fala e xa, a naxa, “N xa e maxodin, Matabu Loxoni, nanse daxa a xa liga, a jaxina xa a fajina? En yi muxun niin nakisi ba, xa en yi a halagi?” 10 A yi e birin mato, a yi a fala xemen xa, a naxa, “I yiini bandun.” A yi a liga na kiini, a yiin yi kendeya. 11 Koni e xolo kati, e naxan ligama Yesu ra e na fala e bode tagi. 12 Yesu yi siga geyaan fari, a sa Ala maxandi na waxatini, a xi Ala maxande. 13 Kuye ba waxatin naxan yi, a yi a xarandiine xili, a fu nun firin yebe e tagi, a yi ne xili sa xerane. 14 E xinle ni itoe ra, Simon, a naxan xili sa Piyeri, e nun a ngaxakedenna Andire, e nun Yaki nun Yoni nun Filipi nun Barotolome nun 15 Matiyu nun Tomasi e nun Alifaa dii xemen Yaki, e nun Simon e naxan ma a “Yahudiya siya xanuna,” 16 e nun Yaki a dii xemen Yudas e nun Yudas Isakariyoti naxan Yesu yanfa, a yi a so yiini. 17 Yesu yi godo keli geyaan fari e nun a xerane, a ti lanbanni, e nun a xarandii wuyaxi. Yama gbeen yi na nun sa keli Yudaya yamanan yiren birin yi, e nun keli Yerusalen taani, e nun taan naxanye tixi foxo igen dexon ma, naxanye xili Tire e nun Sidon. Men kanne yi fa a xuiin namedeni e nun e rakendeyadeni e furen sifan birin ma. 18 Yinna jaxine bata yi naxanye toro ne fan yi fa e rakendeyadeni. 19 Muxun birin yi kataxi, alogo e xa e yiin dinje a ra, amasoto senben yi minima ayi naxan yi e rakendeyama. 20 Yesu yi a xarandiine mato, a naxa, “Sewana e tan yiigelitone xa, amasoto e gbeen nan Alaa Mangayaan na! 21 Sewana e xa, kamen naxanye ma iki amasoto e lugoma nen ken!

Sewana e xa, naxanye wugama iki, amasoto e gelema nen!” 22 “Yamaan na e rajaxu waxatin naxan yi, e yi e kedi, e yi e konbi fa fala muxu jaxin nan e tan na Muxuna Dii Xemena fe ra, sewana e xa na yi. 23 Na na liga waxatin naxan yi, e xa sewa, e yi e bodon sewana fe ra amasoto barayi gbeen namaraxi e xa ariyanna yi. Bayo e benbane nabine toro na kii nin.” 24 “Koni nafulu kanne, gbalona e yee ra amasoto e bata yelin e gbee jaxunna sote e siini. 25 E tan naxanye lugoxi iki, gbalona e yee ra, amasoto kamena e suxuma nen. E tan naxanye gelema iki, gbalona e yee ra, amasoto e monema nen, e wuga.” 26 “Muxun birin na e xili fajin fala waxatin naxan yi, gbalona e yee ra amasoto e benbane a fala na kii nin wule nabine ma.” 27 “Koni, naxanye n xuiin mema, n na falama e xa nen. E e yaxune xanu, naxanye bata e rajaxu, e xa fe fajin liga ne xa. 28 E xa duba e danga muxune xa. Naxanye e toroma, e xa Ala maxandi ne xa. 29 Naxan na i deen foxo kedenna garin a ma, bode foxo fan ti a xa. Xa muxuna nde i ya doma gbeen tongo, i xa tin a xa doma bun biran fan tongo. 30 Naxan na i xandi seni, i xa na ki. Xa muxuna nde i yii seen tongo, i nama a maxodin na ra sonon. 31 I waxi muxune xa feen naxan naba i xa, na joxonna liga bonne xa.” 32 “Muxun naxanye bata e xanu, xa e ne nan tun xanu, e barayin sotoma na yi di? Hali hake kanne fan muxun xanuma naxan bata e xanu! 33 Muxun naxanye bata fe fajin liga e xa, xa e fe fajin liga ne nan tun xa, e barayin sotoma na yi di? Hali hake kanne fan na ligama. 34 Xa e muxune nan tun dolima naxanye a fima, e barayin sotoma na yi di? Hali hake kanne fan e bode dolima na kiini. 35 Koni, e tan xa e yaxune xanu, e fe fajin liga e xa. E muxune doli, e nama e miri se soto feen ma ne yi. E barayi gbee sotoma nen na yi. E ligama nen alo e Fafe, Kore Xonna Ala. Amasoto a fe fajin ligama finsiriwanle nun muxu jaxine xa. 36 E kininkinin alo e Fafe Ala kininkininxi kii naxan yi.” 37 “E nama e yete findi e lanfane kewanle makiti muxun na, alogo Ala nama e fan makiti. E nama bonne yalagi alogo Ala nama e fan yalagi. E muxune mafelu alogo Ala xa e fan mafelu. 38 E muxune ki alogo Ala xa e fan ki. E yi liga seen nafexin soto na yi, a rafexina ken, a madeten, e yi a sa e dugi deni. E ligaseen naxan yatema bonne xa, Ala fan na yatema e xa nen.” 39 Yesu yi sandani ito sa e xa, a naxa, “Danxutoon mi danxutoon yii rasuxe, xa a na liga e firinna birin birama nen yinla kui. 40 Xarandii mi gboe a karamoxo xa. Xarandii yo xarandii, a na

yelin xaranna ra waxatin naxan yi, a ligama nen alo a karamoxona.” **41** “Nanfera jamaadin naxan i adamadi boden yeen xon, i na toma, koni gbindonna naxan i tan yeen xon, i mi na toma? **42** I a falama i adamadi boden xa nanfera fa fala, ‘Yandi, tin n xa jamaadin ba i yeen xon ma.’ Koni i mi na gbindonna toma i yete yeen xon ma ba? I tan nafigina, gbindonna ba i yete yeen xon ma singen, na xanbi ra i nœ na jamaadin toœ nen, i yi a ba i adamadi boden yeen xon ma.” **43** “Wudin fajin mi bogi jaxin tima, wudi jaxin mi bogi fajin tima. **44** Wudin birin kolonma a bogin nan xon ma, i mi xœde bogin bolonye wudi majalixin kœ ra, i mi manpa bogin bolonye tansinna kœ ra. **45** Muxu fajin fe fajin nan naminima a muxu fajiyani. Muxu jaxin yi fe jaxin namini a muxu jaxiyani. Amasoto feen naxan muxun boœeni, a na nan falama.” **46** “E n xilima nanfera fa fala, ‘Marigina, Marigina,’ koni n naxan falama e xa, e mi na ligama? **47** Naxan birin fama n fema, e yi n ma falane rame, e yi e suxu, n na muxune maligan yitama e ra nen. **48** A ligaxi nen alo naxan a banxin ti, a yi yinla ge kati! Han a fanyen li a bun ma, a banxin ti fanyen fari. Tulen yi fa, foyen yi fa, koni a mi a ramaxa amasoto a tixi ki fajni. **49** Koni muxun naxan bata n ma falane me, a mi e suxu, a ligaxi nen alo muxun naxan a banxin tiin boœon fari ma, a mi boœon ge alogo a xa a beten sa. Tulen fa waxatin naxan yi, a yi bira, a kala kiin yi jaxu ayi kati!”

7 Yesu yelin na falane birin tiye yamaan xa waxatin naxan yi, a siga Kaperunan yi. **2** Romi kaa sofa kemen kuntigina nde yi na, a walikeen naxan yi rafan a ma han, na yi furaxi, a yi fa luxi ndedi a xa faxa. **3** Na kuntigin Yesu a fe me waxatin naxan yi, a Yahudiya fonna ndee rasiga Yesu ma, e yi a mafan a a xa fa a walikeen nakendeya. **4** E fa Yesu mafan, e naxa, “A lan i xa xemeni ito mali **5** amasoto a bata en kon kaane xanu, a tan nan mon nxœ salide banxin tixi.” **6** Yesu yi siga e foxœ ra. E bata yi maso banxin na, kuntigin yi a xoyina ndee rasiga a faladeni a xa, e naxa, “N kanna, i nama i yete toœ. Na binyen mi lan n ma, i so n ma banxini, **7** na nan a ligaxi, n yi n miri n yete ma fa fala a mi lan n xa fa i fema. Falan ti tun, n ma walikeen kendeyama nen! **8** N tan fan kuntigina ndee senben bun ma, koni sofane fan n bun ma. N na a falama na nde xa nen, n naxa, ‘Siga,’ a siga. N yi a fala nde gbete xa, n naxa, ‘Fa,’ a fa. N yi a fala n ma

konyin xa, n naxa, ‘Ito liga,’ a na liga.” **9** Yesu na me waxatin naxan yi, a kabe, a yi a yœe rafindi e ma, a yi a fala yamaan xa a foxœ ra, a naxa, “N xa a fala e xa, n munma denkeleyaan sifani ito to singen hali Isirayila muxune ye!” **10** Xerane yi xete kuntigin konni, e yi a li a walikeen bata kendeya. **11** Na xœton bode, Yesu yi siga taana nde yi naxan xili Nayin. A xarandiine nun yama gbeen yi siga a foxœ ra. **12** A taan so deen li waxatin naxan yi, a sa binbi tiine li. Kaja gilena dii xeme keden peen bata faxa. Muxu wuyaxi yi na jaxanla fema keli na taani. **13** Marigin na jaxanla to waxatin naxan yi, a kininkinin a ma kati, a yi a fala jaxanla xa, a naxa, “I nama wuga.” **14** A sa a yiin din binbin na, naxanye yi a xalima, ne yi ti. Yesu naxa, “Banxulanna, n na a falama i xa, keli, i ti!” **15** Faxe muxun yi keli, a falan ti folo. Yesu yi a raxete a nga ma mon. **16** Yamaan birin yi gaxu kati, e yi Ala tantun, e naxa, “Nabi gbeen bata mini kenenni nxu tagi! Ala bata fa, a yi a yamaan kisi!” **17** Muxune yi Yesu a fe xibarun me Yudaya nun a dexœn yamanan birin yi. **18** Yoni a xarandiine yi feni ito birin fala a xa. Yoni yi muxu firin xili a fema, **19** a yi e rasiga Marigin fema, e yi a maxodin, e naxa, “Yoni yi naxan ma fe falama, fa fala a muxuna nde fama, i tan nan na ra ba, hanma nxu lan nxu xa muxu gbete nan legeden?” **20** E fa Yesu fema waxatin naxan yi, e naxa, “Yoni Marafu Tiin nan nxu xœxi i ma, a nxu xa i maxodin, fa fala a yi muxun naxan fa fe falama, na nan i tan na ba, hanma nxu lan nxu xa muxu gbete nan legeden?” **21** Na waxatin yeteni, Yesu yi muxu wuyaxi rakendeya furen sifan birin ma e nun jinan jaxin yi naxanye foxœ ra. A danxuto wuyaxi yeen naba ayi. **22** Yesu yi Yoni a xerane yabi, a naxa, “E xete, e naxan toxi, e yi a me, e sa na fala Yoni xa fa fala danxutœne seen toma, lebutenne sigan tima, dogonfontœne kendeyaan sœtœma, tuli xœrine falan mema, faxe muxune kelima sayani, Alaa falan Xibaru Fajin nalima yiigelitœne ma. **23** Naxan mi biran tantanni n ma fe yi, sewan na kanna xa!” **24** Yoni a xerane siga waxatin naxan yi, Yesu yi Yoni a fe fala folo yamaan xa, a naxa, “E siga nanse matodeyi tonbonni? Foyen seœœ ramaxan ba? **25** Xa na mi a ra, e siga nanse matodeyi? Xemen naxan maraberi baxi dugi fajin na ba? Koni, naxanye maraberi baxi na kiini, ne manga banxine nin! **26** Nayi, e siga nanse matodeyi, nabiin ba? N xa a fala e xa, e bata nde to naxan gbo nabiin xa. **27** Amasoto Kitabun bata Yoni a fe fala, a naxa, ‘Ala naxa: N nan

n ma xeraan nasigama nen i yee ra, a yi kirani ton i xa.” 28 Yesu mon yi a fala, a naxa, “N xa a fala e xa, muxun naxan birin bata bari a foloni, Yoni gbo ne birin xa. Koni naxan xurun e birin xa Alaa Mangayani, na gbo Yoni xa.” 29 Yamaan nun mudu maxinle yi Yesu xuiin me, e yi Alaa tinxinyaan falan suxu, bayo Yoni bata yi ne rafu igeni e tubi xinla ma Ala ma. 30 Koni Farisi muxune nun sariya karamoxone bata yi e me Alaa fe ragidixine ra. E mi tin Yoni xa e rafu igeni. 31 “Awa, to muxune, n na e misalima nanse ra iki? E nun nanse maliga? 32 E luxi nen alo diidin naxanye sabaan soma loxo tideni. Bonne a falama bonne xa, e naxa, ‘Nxu bata xulenna fe e xa, koni e mi e bodon. Nxu yi binbi wuga sigin sa koni e mi wuga!’ 33 Yoni Marafu Tiin yi fa, a sunna suxu, a mi manpaan min, koni e naxa, ‘Ninanna a foxo ra!’ 34 N tan Muxuna Dii Xemen yi fa, n donseen don, n yi n min, koni e naxa ‘Xemeni ito mato! Fudimaan nun dolo minna nan a ra! Mudu maxinle nun hake kanne xoyin nan a ra!’ 35 Koni naxanye Alaa fe kolonna suxi, ne jondin yitama e kewanle xon ma nen.” 36 Farisi muxuna nde yi Yesu xili a konni, alogo a xa fa a dege a fema. Nanara, Yesu yi siga a banxini, a sa a dege a xon ma. 37 Naxanla nde yi na taani, yalunden nan yi a ra. A yi a me, a Yesu a degema na Farisi muxun konni. Nanara, a fa alabasita gemen muranna ra latikononna yi naxan kui. 38 A ti Yesu san xanbi ra, a wugama, a Yesu sanna makun a yee gen na. Na xanbi ra, a yi a sanna masugusugu a xun sexen na, a yi a sanna sunbu, a latikononna sugusugu a ma a binya feen na. 39 Farisi muxun naxan Yesu xili, na ito to waxatin naxan yi, a yi a miri a yete ma, a naxa, “Xa nabiin nan yati yi xemeni ito ra nun, a yi a kolonma nen nun, nde jaxanli ito ra naxan a yiin dinxi a ra. A yi a kolonma nen nun a jaxanli ito yulubin gbo!” 40 Yesu yi a fala a xa, a naxa, “Simon, n waxi a xon ma, n xa fena nde fala i xa.” A yi a yabi, a naxa, “Karamoxo, awa, a fala n xa.” 41 Yesu naxa, “Xeme firin yi na nun naxanye gbetin doli gbeti kanna ma, kedenna yi keme suulun tongo a yii, bonna yi tonge suulun tongo a yii. 42 E firinna sese mi a donla fi. Nama, a yi dija e firinna birin ma donle ma. Na muxu firinna, mundun a xanuma dangu a lanfaan na?” 43 Simon yi a yabi, a naxa, “N mirixi a ma, doli gbeen naxan ma.” Yesu naxa, “I bata a yabi ki faji.” 44 Na xanbi ra, Yesu yi a yee rafindi jaxanla ma, a yi a fala Simon xa, a naxa, “I bata jaxanli ito to? N bata fa i ya banxini, i mi

igen so n yii n yi n sanna maxa. Koni a tan bata n sanna maxa a yee gen na, a yi a masugusugu a xun sexen na. 45 N fa waxatin naxan yi, i mi n nalan, koni xabu n fa a tan mi xadan n sanna sunbue. 46 I mi turen so n yii n yi a sugusugu n xunna ra, koni a tan bata n sanna birin masugusugu latikononna ra. 47 N na a falama i xa nen nayi, fa fala jaxanli ito yulubi wuyaxine birin bata mafelu bayo a bata xanuntenya gbeen yita n na. Koni naxan bata mafelu ndedi, na a xanuntenyaan mayitama nen ndedi.” 48 Na xanbi ra, Yesu yi a fala jaxanla xa, a naxa, “I bata mafelu i yulubine ra.” 49 Muxun naxanye yi dxi na, ne yi a fala folo e bode xa, e naxa, “Nde ito ra naxan yulubin mafeluma?” 50 Koni Yesu yi a fala jaxanla xa, a naxa, “I ya denkeleyaan bata i rakisi, siga boje xunbenli.”

8 Na xanbi ra, Yesu yi siga taane nun banxidene yi, a sa Alaa Mangayaan Xibaru Fajin kawandin ba e xa. Xarandii fu nun firinne yi siga a foxo ra, 2 e nun jaxanla ndee naxanye rakendeya jinan jaxine nun furene ma, ne nan xiliye itoe ra: Mariyama naxan xili Magadala kaana jinan solofere raxete naxan foxo ra e nun 3 Yoyana Herode a tande kuntigin Kusa a jaxanla, e nun Susana e nun jaxalan gbete wuyaxi. Ne nan yi Yesu nun a xarandiine malima e yete yii seene ra. 4 Yama gbeen yi e malan a fema, taa wuyaxi muxune yi fa. A yi sandani ito sa e xa, a naxa, 5 “Xee biina nde yi mini, a siga a sansiin wolideni. A yi sansiin wolima waxatin naxan yi, ndee yi bira kiraan xon ma, yamaan yi dangu ne fari, xoline yi e don. 6 Ndee yi bira fanyen ma, bende gbee mi yi denaxan yi. E to soli, e xara mafuren amasoto igen mi yi e bun ma. 7 Sansina ndee yi bira sexe jali kanne tagi e nun sexene yi gbo e bode xon ma, sexen yi e don. 8 Sansina ndee yi bira boxo fajini, e soli, e bogi, e keden kedenna birin yi keme soto.” A yelinx na fale, a yi a fala, a naxa, “Xa tunla naxan xon, a feen me, na xa a tuli mati.” 9 Yesu a xarandiine yi a maxodin sandani ito bunna ma. 10 Yesu yi e yabi, a naxa, “Alaa Mangayaan wundo feene kolonna bata so e yii, koni a falama bonne xa sandane nin alogo e xa e yeen ti, koni e nama a yigbe, e yi e tuli mati, koni e nama a famu.” 11 Yesu naxa, “Sandani ito bunna nan ito ra. Sansina, Alaa falan nan na ra. 12 Sansiin naxanye bira kiraan xon ma, ne findixi muxune nan na naxanye Alaa falan me koni Yinna Manga Setana yi fa, a yi a ba e bojeni, alogo e nama denkeleya, e kisi. 13 Sansiin

naxanye bira fanyen fari, ne findixi muxune nan na naxanye Alaa falan me, e yi a suxu sewani, koni salen mi e bun ma. E denkeleya waxatidi tun, koni e na tɔɔ waxatin naxan yi, e bama nen denkeleyani. **14** Sansiin naxanye bira sexe jali kanne tagi, ne findixi muxune nan na naxanye Alaa falan me, koni dunuya xaminna nun nafulu feen nun yete rafan feene yi e kala, e mi bogin nayi e mo hali! **15** Sansiin naxanye bira boxo fajini, ne findixi muxune nan na naxanye Alaa falan me, a lu e bojeni sobeen na, e yi a suxu, e tunnafan han a bogi, a mo.” **16** “Muxu yo mi lenpun nadege, a deben so a xun na, hanma a yi a raso saden bun ma, fo a xa a doxo se nan fari, alogo yamaan na so banxini waxatin naxan yi, e kenenna to. **17** Feen naxanye birin luxunxi, ne makenenma nen. Wundo feen birin kolonma nen, a yi mini kenenni.” **18** “E a liga e yeren ma e fe me kiini, amasoto seen muxun naxan yii nde soma nen na yii, koni se mi muxun naxan yii hali a mirixi naxan di ma a yii, na be a yii.” **19** Yesu nga nun a xunyene yi fa a fema, koni e mi no a masote, amasoto yamaan yi gbo. **20** E yi a fala Yesu xa, e naxa, “I nga nun i xunyene tixi tandeni, e waxi i to feni.” **21** Yesu yi a fala e xa, a naxa, “Naxanye Alaa falan namema, e yi a suxu, n nga nun n xunyene ne nan na.” **22** Loxona nde Yesu nun a xarandiine yi so kunkin kui, a yi a fala e xa, a naxa, “En dangu daraan bode foxon na.” Nayi, e siga. **23** E yi sigama waxatin naxan yi, Yesu yi xi kunkin kui. Foye gbeen yi keli daraan xun ma. Kunkin yi rafe folo igen na, na yi magaxu han! **24** Xarandiine yi fa Yesu fema, e yi a raxulun, e naxa, “Nxu kannna, nxu kannna, nxu faxamaan ni i ral” Yesu yi keli, a falan ti foyen nun igen moronne xili ma, e yi e raxara. **25** A yi a fala a xarandiine xa, a naxa, “E mi denkeleyaxi ba?” Koni e kabe, e gaxu. E yi a fala e bode xa, e naxa, “Muxun sifan mundun ito ra? A bata igen nun foyen yamari, e yi a falan suxu ken!” **26** E dangu Gadara yamanani naxan Galile yamanan yetagi. **27** Yesu ti boxoni waxatin naxan yi, muxuna nde yi fa a ralan keli na taani yinna jaxin yi a foxo ra. A bata yi bu a mi domaina nagodo a ma, a mi yi tinje daxe a konni fo a doxo bilingan yireni. **28** A to Yesu to, yinnan yi a rasonxo kati, a yi a sa Yesu bun ma, yinnan yi falan ti a xon a xui yitexin na, a naxa, “Yesu, Kore Xonna Alaa Dii Xemena, i waxi nanse xon ma n tan xa? Yandi, i nama n jaxankatal!” **29** Amasoto Yesu bata yi yinna jaxin yamari a xa xete xemen foxo ra, a bata yi naxan suxu xabu waxati xunkuye. E yi a

yiine nun a sanne xidima yolonxonna nan na. Koni a yi a xidi seene bolonma nen, yinnan yi a rayaya ayi burunna ra. **30** Yesu yi yinnan maxodin, a naxa, “I xili di?” A yi a yabi, a naxa, “N xili nen ‘Ganla.’” Amasoto yinna wuyaxi bata bira a foxo ra. **31** Yinnane yi Yesu mafan a nama e rasiga yili jaxin na. (**Abyssos g12**) **32** Xose kuru gbeen yi na dexon ma nun, e yi e degema geyaan na, yinnane yi Yesu mafan, a xa tin a yi e rasiga xosene foxo ra. A tin e xa. **33** Nanara, yinnane yi xete xemen foxo ra, e siga xosene foxo ra. Xose kurun yi godo a giye geyaan na, e sa faxa darani. **34** Muxun naxanye yi xosene kantanma, ne to na feen to, e yi siga e giye, e sa na feen xibarun nali taan nun banxidene yi. **35** Muxune yi siga na feen matodeni, e yi fa Yesu fema, e xemen li dxi a fema yinnane xete naxan foxo ra, domaina nagodoxi a ma, a bata xaxinla soto. E birin yi gaxu. **36** Yinnane xete xemen foxo ra kii naxan yi, muxun naxanye na to, e na fala bonne xa. **37** Gadara kaane birin yi a fala Yesu xa, a xa siga amasoto e birin bata yi gaxu kati! Nanara, Yesu yi so kunkin kui, a siga. **38** Yinnane xete xemen naxan foxo ra, na yi Yesu mafan, a naxa, “Tin n xa siga i foxo ra.” Koni Yesu yi a raxete, a naxa, **39** “Siga i konni, Ala bata naxan liga i xa, i sa na yeba.” Yesu naxan ligaxi a xa, a sa na rali taan birin ma. **40** Yesu xete daraan bode foxon na waxatin naxan yi, yamaan yi a ralan amasoto e birin yi a legedenma. **41** Xemena nde yi fa naxan yi xili Yirusu, salide banxin kuntigin nan yi a ra. A yi bira Yesu sanna bun ma, a yi a mafan, a xa siga a konni **42** amasoto a dii teme keden peen yi faxa feni. A soton bata yi jee fu nun firin ti. Yesu sigama Yirusu foxo ra waxatin naxan yi, yamaan yi a yigbeten han! **43** Naxanla nde yi na yi, jaxalan furen yi a ma xabu jee fu nun firin. A bata yi a yii seen birin so seribane yii, koni muxu yo mi no a rakendeye. **44** A fa yamaan tagi Yesu xanbi ra, a yi a yiin din Yesu a doma lenben na, a kendeya mafuren! **45** Yesu yi maxodinna ti, a naxa, “Nde a yiin dinxi n na?” Muxun birin yi a tandi, koni Piyeri yi a fala, a naxa, “N kannna, yamaan tixi i rabilinni, e bata i yigbeten.” **46** Koni Yesu naxa, “Muxuna nde bata a yiin din n na yati, n bata a kolon amasoto senbena nde bata mini n yi.” **47** Jaxanla yi a to fa fala a bata mini kenenni. Nayi, a fa, a xuruxurunma, a yi a sa Yesu bun ma yamaan birin yetagi. A a yiin dinxi Yesu ra feen naxan ma, a na fala a xa, e nun a kendeyaxi kii naxan yi mafuren! **48** Yesu yi a fala a xa, a naxa, “N ma dii temena, i ya

denkeleyaan bata i rakendeya. Siga boŋe xunbenli.” 49 Yesu na falama waxatin naxan yi, xeraan yi fa sa keli salide banxin kuntigina banxini, a yi a fala Yirusu xa, a naxa, “I ya dii temen bata faxa, i nama Karamoxo tɔrɔ sɔnɔn.” 50 Yesu yi na me, a yi a fala Yirusu xa, a naxa, “I nama gaxu, i denkeleya tun, a kendeŋama nen.” 51 Yesu na li waxatin naxan yi, a mi tin muxu yo xa so a foxo ra fo Piyeri nun Yoni nun Yaki, e nun diidina nga nun a fafe. 52 Muxune birin yi wugama, e gbelegbelema diidina fe ra. Yesu naxa, “E nama wuga, diidin mi faxaxi, a xiin nen tun!” 53 E birin yi gele a ma amasoto e yi a kolon yati, fa fala diidin bata faxa! 54 Koni Yesu yi a suxu a yiin ma, a yi a xili, a naxa, “Diidina, keli!” 55 A niin yi xete ayi, a keli mafuren! Yesu yi a fala e xa, a naxa, “E donseen so a yii.” 56 A soto muxune yi kabe, koni Yesu yi e maxadi, a naxa, “Feen naxan ligaxi, e nama na fala muxu yo xa.”

9 Yesu yi a xarandii fu nun firinna xili, a senben so e yii alogo e xa jinnan kedi, e furetone rakendeya. 2 A yi e rasiga, a e xa sa Alaa Mangayaan kawandin ba, e furetone rakendeya. 3 A yi a fala e xa, a naxa, “E nama siga sese ra e yii sigatini. E nama siga dungari ra e yii, e nama siga bonduli ra e yii, hanma donsena hanma gbetina. E nama siga doma firin na e ma. 4 E na yigiya denaxan yi, e xa lu menni han e keli waxatini na taani. 5 Xa muxu mi e yisuxu taan naxan yi, e keli na taani, e yi e sanne rakunkun e na gbangbanna ba e sanne ra, na yi findi sereyaan na e xa.” 6 Xarandiine yi siga banxidene birin na, e sa Yesu a fe Xibaru Fajin kawandin ba, e yamaan nakendeya yiren birin yi. 7 Herode, Galile mangan yi feni itoe birin me, a kuisan kati! Amasoto ndee naxa, “Yoni Marafu Tiin bata keli sayani!” 8 Bonne naxa, a Nabi Eli bata mini kenenni. Koni bonne naxa, a nabi fonna nde nan kelixi sayani. 9 Manga Herode naxa, “N bata yi Yoni xunna sege a de nun. Koni muxun mundun ito ra, n naxan ma fe mema?” Awa, a yi kata Yesu to feen na. 10 Xerane to xete, e naxan birin liga, e na yeba Yesu xa. A siga e ra a foxo ra a danna taana nde yi naxan xili Betasada. 11 Yamaan na me waxatin naxan yi, e siga a foxo ra. A yi e yisuxu, a yi Alaa Mangayana fe fala e xa. Naxanye yi waxi kendeŋaan xon ma, a yi ne rakendeya. 12 Sogen godo foloxina, xarandii fu nun firinne yi fa a fema, e naxa, “Yamaan bejin alogo e xa no sige banxidene ra e nun xene ma naxanye en nabilinni, e yi donseen nun e yigiyaan soto menne yi, bayo en burunna nan

na be.” 13 Koni Yesu yi a fala e xa, a naxa, “E tan yeten xa donseen so e yii.” E yi a yabi, e naxa, “Naxan nxu yii, buru xun suulun e nun yexe firin. I waxi a xon ma nxu xa donseen sara yamani ito birin xa di?” 14 Xemene gbansanna, muxu wuli suulun joxon nan yi e ra. Yesu yi a fala a xarandiine xa, a naxa, “E yamaan nadoxo tonge suulun suulun yeen ma.” 15 Xarandiine yi na liga, e yi e birin nadoxo. 16 Yesu yi buru xun suulunne nun yexe firinne tongo, a yi a yeen nate kore, a barikan bira Ala xa, a yi e yigira, a yi e so a xarandiine yii, e yi e yitaxun yamaan na. 17 E birin yi e dege, e lugo ken! Xarandiine yi deben fu nun firin nafe a dungi donxene ra. 18 Loxona nde Yesu yi Ala maxandima a kedenna a xun xon ma, a xarandiine yi fa a fema, a yi e maxodin, a naxa, “Yamaan naxa, a nde n tan na?” 19 E yi a yabi, e naxa, “Ndee naxa, a Yoni Marafu Tiin nan i tan na. Ndee naxa, a Nabi Eli nan i tan na, koni ndee fan naxa, a nabi fonna nde nan kelixi sayani.” 20 Yesu mon yi e maxodin, a naxa, “E tan go, e naxa a nde n tan na?” Piyeri yi a yabi, a naxa, “Alaa Muxu Sugandixin nan i tan na!” 21 Awa, Yesu yi a xarandiine yamari, a e nama na fala muxu yo xa. 22 A mon yi falan ti, a naxa, “A fere mi na fo n tan Muxuna Dii Xemen xa tɔrɔ wuyaxi soto. Yamaan fonne nun saraxarali kuntigine nun sariya karamoxone e mema n na nen, e yi n faxa, a soge saxandeni n keli sayani.” 23 A yi a fala e birin xa, a naxa, “Xa muxu yo waxi bira feni n tan foxo ra, fo a xa a me a yete ra, a yi a faxa wudin tongo loxo yo loxo, a bira n foxo ra. 24 Amasoto naxan na wa a niin nakisi feni, a bonoma ayi nen. Koni naxan bonoma a niini n tan ma fe ra, na kisima nen. 25 Hali muxun dunuja birin soto, koni xa a bono a niini habadan, na nanse fanma a ma? 26 Xa muxun yagi a tiye n tan nun n ma fe falana fe ra, Muxuna Dii Xemen fan yagima nen na kanna fe ra a na fa a binyeni waxatin naxan yi e nun a Fafe Alaa binyena e nun maleka saripnaxine. 27 N xa jondin fala e xa, ndee be, ne mi faxe fo e Alaa Mangayaan to.” 28 Yesu yelin feni itoe fale waxatin naxan yi, loxo xun keden joxon danguxina, a Piyeri nun Yoni nun Yaki tongo, e siga a foxo ra geyaan fari Ala maxandideni. 29 A yi Ala maxandima waxatin naxan yi, a yetagin kejaan yi masara, a domaan yi fixa ayi alo kuyen na a jinna masaxon! 30 Na waxatini, muxu firin yi mini kenenni, Nabi Musa nun Nabi Eli, e falan ti a xa. 31 E yi noroxi. E yi Yesu faxe feen fala a xa naxan yi kamalima Yerusalem taani. 32 Piyeri nun a

lanfane yi xima, koni e xulun, e Yesu a nɔrɔn to e nun xeme firin yi tixi a dɛxɔn ma. **33** Na muxune kelima Yesu fɛma waxatin naxan yi, Piyɛri yi a fala a xa, a naxa, “Nxu kanna, a lanxi bayo nxu be yi. Nxu xage saxon ti be yi, i gbeen keden, Nabi Musa gbeen keden, Nabi Eli gbeen keden.” A mi yi a kolon a naxan falama. **34** A falan tima waxatin naxan yi, kundaan yi godo e xun ma, xarandiine yi gaxu. **35** Fala xuiin yi keli kundani, a naxa, “N ma Dii Xɛmɛn nan ito ra, n bata naxan sugandi, ɛ tuli mati a xuiin na!” **36** Fala xuiin dan waxatin naxan yi, Yesu keden peen yi lu na yi. Xarandiine yi e dundu feni ito birin ma, e feen naxanye toxi, e mi ne fala muxu yo xa na waxatini. **37** Na xɔtɔn bode e godo keli geyaan fari, yama gbeen yi Yesu ralan. **38** Xɛmɛn yi a xuini te yamaan tagi, a naxa, “Karamɔxɔ, n ni i mafanma, i xa n ma dii xeme keden peen mato. **39** Yinnan na keli a ra, a gbelegbelema nen mafuren, a xuruxurun, a yi a rabira, a dɛ xunfanna yi lu mine, a mi a bejinma xulen fɔ a na a tɔrɔ kati! **40** N bata i ya xarandiine mafan, alogo e xa a kedi a fɔxɔ ra, koni e mi nɔxi a kedɛ.” **41** Yesu yi a yabi, a naxa, “Ee! ɛ tan denkeleyatarene nun tinxintarene, n xa lu ɛ fɛma han waxatin mundun yi? N dijnama ɛ xa han waxatin mudun yi?” A yi a fala xɛmɛn xa, a naxa, “Fa i ya diin na be.” **42** Diidin fama waxatin naxan yi, yinnan yi a raxuruxurun, a yi a rabira bɔxɔni. Yesu yi falan ti yinna jaxin xili ma, a diidin nakɛndɛya, a yi a so a fafe yii mɔn. **43** Muxune birin yi kabɛ Ala senben ma. Yesu feen naxan birin liga, yamaan yi lu kabɛ ne ma, a yi a fala a xarandiine xa na waxatini, a naxa, **44** “N naxan falama ɛ xa, ɛ nama jinan na xɔn ma! N tan Muxuna Dii Xɛmɛn soma nen yamaan yii, n lu e senben bun ma.” **45** Koni e mi ito bunna kolon. A bata luxun e ma alogo e nama a bayen kolon. E mɔn yi gaxu a maxɔdinyɛ na feen na. **46** Falan yi keli xarandiine tagi fa fala nde gbo dangu e birin na. **47** E yi mirixi naxan ma, Yesu na kolon. Nanara, a yi diidina nde tongo, a yi a ti a dɛxɔn ma. **48** A yi a fala e xa, a naxa, “Naxan na diidini ito yisuxu n xinli, na bata n fan yisuxu. Naxan na n tan yisuxu, na bata na kanni suxu naxan n xɛxi. Amasɔtɔ naxan xurun ɛ birin tagi, na nan gbo ɛ birin xa.” **49** Yoni yi falan ti, a naxa, “Nxu kanna, nxu bata xɛmena nde to jinnan keɛ i xinli, nxu yi a raxɔlɔ, a xa a lu amasɔtɔ a mi en tan fɔxɔ ra.” **50** Yesu yi a fala e xa, a naxa, “ɛ nama a raxɔlɔ amasɔtɔ naxan mi kelixi ɛ xili ma, na ɛ xa nen.” **51** Yesu siga waxatin masoxina ariyanna yi, a yi

a ragidi a xa siga Yerusalɛn taani. **52** A xɛrane rasiga a yɛɛ ra Samariya taana nde yi, alogo e xa sa feene yitɔn a yɛɛ ra. **53** Koni muxun naxanye na yi, ne mi a yisuxu amasɔtɔ e a kolon, a a sigama Yerusalɛn taan nin. **54** A xarandiine, Yaki nun Yoni na to waxatin naxan yi, e naxa, “Marigina, i waxi a xɔn ma ba, nxu xa tɛɛn yamari keli kore xɔnna ma, a yi itoe halagɔ?” **55** Yesu yi a yɛɛ rafindi e ma, a yi e maxadi. **56** E yi siga taa gbɛtɛ yi. **57** E yi kira yi waxatin naxan yi, xɛmena nde yi a fala Yesu xa, a naxa, “I siga dɛɛɛ, n sigɛ i fɔxɔ ra.” **58** Yesu yi a fala a xa, a naxa, “Xulumaseene xima yinle nan na, xoline yi e tɛɛn sa, koni hali n na n xunna sama dɛnaxan yi, na mi n tan Muxuna Dii Xɛmɛn yii.” **59** A yi a fala xɛmena nde xa, a naxa, “Bira n fɔxɔ ra.” Koni na xɛmɛn yi a fala, a naxa, “N Marigina, tin n xa sa n fafe maluxun singen.” **60** Yesu yi a yabi, a naxa, “A lu faxa muxune xa e faxa muxune maluxun. I tan xa sa Alaa Mangayana fe Xibarun nali.” **61** Gbɛtɛ fan yi a fala, a naxa, “N kanna, n birama nen i fɔxɔ ra, koni tin n xa sa n jɔngu n kon kaane ma singen.” **62** Yesu yi a fala a xa, a naxa, “Muxu yo jinge kenna suxu, a lu a xanbi ratoɛ, na mi daxa a wali Alaa Mangayani.”

10 Na xanbi ra, Margin yi muxu tonge solofere e nun firin gbɛtɛye yeba. A yi e rasiga firin firin yɛɛn ma a yɛɛ ra taan birin yi e nun yiren birin a tan yɛtɛɛn yi lan a xa siga dɛnaxanye yi. **2** A yi a fala e xa, a naxa, “Malo xaba daxin gbo koni a xaba muxune mi wuya. ɛ xɛɛ kanna mafan, a xa walikɛna ndɛɛ rasiga e sa maala xaba. **3** ɛ siga, n bata ɛ xɛ alo yɛxɛɛne kankone tagi. **4** ɛ nama siga gbɛti ra, ɛ nama benbelidi xali, ɛ nama sankidi xali. ɛ nama bu muxune xɔntɔndeni kira yi. **5** ɛ na so banxin naxan kui, ɛ xa a fala singen, ɛ naxa, ‘Ala xa bɔɲɛ xunbenla lu banxini ito kui.’ **6** Xa bɔɲɛ xunbeli muxuna nde na, na duban xa lu a xɔn ma. Xa na mi a ra, na duban mɔn xa xɛtɛ ɛ tan ma. **7** ɛ xa yigiya banxi kedenna nan kui. E na naxan so ɛ yii, ɛ xa na don, ɛ yi e min, amasɔtɔ walikɛɛn lan nen a yi a saranna sɔtɔ. ɛ nama lu sigamatini keli banxini ito yi, siga ito yi. **8** ɛ na so taan naxan yi, xa e ɛ yisuxu, e na naxan so ɛ yii, ɛ na don. **9** ɛ xa fureɔne yiyalan na taani, ɛ yi a fala na muxune xa, ɛ naxa, ‘Alaa Mangayaan bata maso ɛ ra.’ **10** Koni ɛ na siga taan naxan yi, xa e mi ɛ yisuxu na yi, ɛ siga yamaan malandeni, ɛ yi a fala e xa, ɛ naxa, **11** ‘Hali ɛ taan gbangbanna naxan nxu sanna ra, nxu bata na rakunkun ɛ xili ma, koni ɛ xa a

kolon Alaa Mangayaan bata maso!’ 12 N xa a fala e xa, Kiti Sa Loxoni Ala xoloma nen na taan ma dangu Sodoma taan na!” 13 “Gbalon Korasin kaane yee ra! Gbalon Betasada kaane fan yee ra, bayo kabanako feen naxanye liga e tagi, xa ne yi liga Tire taan nun Sidon taani nun, na kaane yi tinxinma ayi nen nun, to mi na ra, e yi kasa benbeli dugin nagodo e ma, e yi xuben so e yete ma, e yi a yita fa fala e bata e xun xanbi so e hakene yi! 14 Ala kininkininma nen Tire taan nun Sidon taan ma Kiti Sa Loxoni dangu e tan na. 15 E tan Kaperunan kaane, e tema nen kore xonna ma ba? En-en, e godon laxira nin!” (Hadēs g86) 16 Yesu yi a fala a xarandiine xa, a naxa, “Naxan na a tuli mati e xuiin na, na kanna bata a tuli mati n fan xuiin na. Naxan na a me e ra, na kanna bata a me n fan na. Naxan na a me n tan na, na kanna bata a me n xe muxun fan na.” 17 Na muxu tonge solofere e nun firinna yi xete sewa gbeenii. E yi a fala, e naxa, “Marigina, hali jinanne nxu xuiin name nen i xinli!” 18 Yesu yi e yabi, a naxa, “N bata Setana to bire keli kore xonna ma alo galanna. 19 A mato, n bata senben fi e ma, e xa sigan ti sapine nun tanle fari e nun yaxun Setana senben fari, na sese mi e maxole. 20 Koni e nama sewa tun, fa fala jinanne bata e fala xuiin suxu, koni e sewa amasoto e xinla bata sebe ariyanna yi.” 21 Na waxatini, Yesu yi lugo sewan na Alaa Nii Sarijanxin xon ma, a naxa, “N Fafe, kore xonna nun dunuja Marigina! N barikan birama i xa bayo i feen naxanye luxunxi xaxilimane nun fekolonne ma, i bata ne yita diidine ra. N Fafe, a rafanxi i ma na kii nin.” 22 “N Fafe bata feen birin taxu n na. Muxu yo mi Dii Xemen kolon fo a fafe Ala. Muxu yo mi Fafe Ala kolon fo a Dii Xemena e nun a Dii Xemen waxi a xon ma a xa a yita naxanye ra.” 23 Na xanbi ra, Yesu yi a yee rafindi a xarandiine ma, a yi a fala e xa wundoni, a naxa, “Sewan na kanne xa naxanye yeen feen toma e naxan toma. 24 Amasoto n xa a fala e xa, nabi wuyaxi nun manga wuyaxi yi waxi a to feni e naxan toma, koni e mi a to, e mi a me e naxan mema.” 25 Awa, na waxatini Sariya karamoxona nde yi fa Yesu bunbadeni, a yi a maxodin, a naxa, “Karamoxo, n nanfe lige n habadan nii rakisin soto?” (aiōnios g166) 26 Yesu yi a yabi, a naxa, “Sariya Kitabun nanfe falaxi? I a xaranma di?” 27 Xemen yi a yabi, a naxa, “I xa i Marigina Ala xanu i bojen birin na, e nun i niin birin na e nun i senben birin na e nun i xaxinla birin na’ e nun i yi i adamadi boden xanu alo i yetena.” 28 Yesu yi a yabi, a naxa, “I ya falan

tinxin. I xa na liga, i niin kisima nen.” 29 Koni Sariya karamoxon yi waxi a xon ma nen, a xa yoon soto a yete xa. Nanara, a Yesu maxodin, a naxa, “N adamadi bodena nde ra?” 30 Yesu yi sandan sa a xa, a naxa, “Xemena nde yi keli Yerusalen taani siga Yeriko yi, muxu mafune yi a suxu, e yi a bonbo, a lu ndedi e xa a faxa. 31 A mi bu saraxaralina nde yi fa na kiraan xon ma. A na xemen to waxatin naxan yi, a dangu a ra bode foxon na. 32 Lewi bonsonna muxuna nde fan yi fa, a xemen to, a dangu a dexon ma. 33 Koni Samariya kaana nde dangumatoon na a ra, na kiraan xon ma, na yi a li na, a to a to, a kininkinin a ma kati! 34 A siga a fema, a turen nun manpaan sa a maxolodene de, a yi e maxidi. Na xanbi ra, a xemen sa a soon fari, a siga a ra xone yigiya banxini a dandandeni. 35 Na xoton bode, a gbeti gbanan firin tongo, a yi a so xone yigiya banxin kanna yii. A yi a fala a xa, a naxa, ‘A dandan, n na xete waxatin naxan yi, i naxan yo baxi a fe ra, n na a raxete i ma.’” 36 Yesu yelinxina sandan se, a yi a maxodin, a naxa, “I tan yee ra yi, na muxu saxanne ye, muxu mafune xemen naxan bonboxi, nde na adamadi bode kenden na?” 37 Sariya karamoxon yi a yabi, a naxa, “Naxan kininkininxi a ma.” Yesu yi a yabi, a naxa, “Siga, i sa na joxonna liga.” 38 Yesu nun a xarandiine yi sigama waxatin naxan yi, e taana nde li, jaxanla nde yi na yi, a xili Marata, na yi a yigiya a banxini. 39 A xunye jaxalanmaan xili Mariyama, na yi doxo Marigin dexon ma, a yi a tuli mati a xaranna ra. 40 Marata yi xaminxi wali wuyaxi ke feen na. Nanara, a fa a fala Marigin xa, a naxa, “Marigina n xunyen bata wanla birin lu n yii, i ya fe mi na yi ba? A fala a xa, a xa fa n mali!” 41 Marigin yi a yabi, a naxa, “Eel Marata, i xaminxi, i kontofilixi fe wuyaxi ra. 42 Koni adamadiin makoon se keden peen nan ma. Mariyama bata wa fe fajin xon. Na mi fa be a yiil!”

11 Loxona nde, Yesu yi Ala maxandima yirena nde yi. A yelin waxatin naxan yi, a xarandii keden yi a fala a xa, a naxa, “Marigina, nxu xaran Ala maxandin ma alo Yoni a xarandiine xaran kii naxan yi.” 2 Yesu yi a fala e xa, a naxa, “E Ala maxandima ikiini, e naxa, ‘Nxu Fafe, i xinla xa sarijan, i ya Mangayaan xa fa. 3 I xa nxo loxo yo loxo balon fi nxu ma. 4 I xa nxu mafelu nxu yulubine ra, alo nxu fan bata nxu hake tongone mafelu kii naxan yi. I nama tin nxu xa bira tantanni.’” 5 Yesu yi a fala a xarandiine xa, a naxa, “Xa e tan nde keden siga a xoyin fema ke tagini, a yi

a fala a xa, a naxa, 'N xoyina, n doli buru xun saxan yi
6 amasoto n lanfaan naxan sa sigatini, na bata fa iki
sasa, koni sese mi n yii n naxan soe a yiii! **7** Koni xa
bonna a yabi banxini, a naxa, 'I nama n tɔrɔ! Dɛɛn
balanxi, nxu nun n ma diine bata nxu sa, n mi fa nɔe
kele, n sena nde so i yii.' **8** Awa, n xa a fala e xa, hali
xa a mi keli e xoyiyana fe ra, a burun so a yii, koni
a kele, a makoon seen naxan birin ma, a na so a yii
amasoto a mi yagixi a xande. **9** Awa, n xa a fala e xa, e
seen maxodin, e a sɔtɔma nen, e seen fen, e a toma
nen, e dɛɛn kɔnkɔn, a rabima e xa nen. **10** Amasoto
naxan yo na seen maxodin, na a sɔtɔma nen. Naxan
na seen fen, na a toma nen. Naxan na dɛɛn kɔnkɔn, a
rabima a xa nen. **11** Muxuna nde e ye ba, naxan ma
diin yexen maxandima a ra, a yi saɲin so a yii? **12**
Hanma a na a xandi tɔxe xeleni, a yi tanla so a yii? **13**
Hali e to findixi muxu jaxine ra, e a kolon fa fala a
lan nen, e xa se faɲin so e diine yii. E faxi fa, e Fafe
naxan ariyanna yi, na a Nii Sarijanxin fima a maxandi
muxune ma kii naxan yi!" **14** Lɔxɔna nde Yesu yi
jinanna raxete bobon fɔxɔ ra. Ninanna xete xemɛn
fɔxɔ ra waxatin naxan yi, a falan ti fɔlɔ, yamaan
yi kabe. **15** Koni e ndee naxa, "A jinnanɛ kedima
Yinna Mangan Belesebu barakan nin." **16** Bonne yi
waxi a xɔn ma e xa a keɲaan feseɲese. Nanara, e yi a
maxodin a a xa kabanako fena nde liga, naxan kelixi
Ala ma. **17** Koni Yesu yi e miriyaan kolon, a yi a fala
e xa, a naxa, "Yamanan naxan yitaxunxi yengeni,
na yamanan kalama nen mafuren! Yengen tanden
naxan kui, na fan kalama nen. **18** Awa, xa Setanaa
mangayana a yete yenge, a sabatima nayi di? E bata a
fala, a n bata jinnanɛ kedi Belesebu barakani. **19** Xa n
jinnanɛ kedima Belesebu barakan nin, e fɔxɔrabirane
e kedima nanse xɔn nayi? Na ma, e fɔxɔrabirane a
yitama nen nayi fa fala yo mi e xa! **20** Xa n jinnanɛ
kedima Ala senben barakan nin, na a yitama nen nayi
fa fala Alaa Mangayaan bata e li." **21** "Senbemaan na a
yitɔn yenge so xinla ma, a yi a banxin kantan, a seene
birin natangama nen. **22** Koni xa senbe kannu nde
baga a ma, a yi a nɔ, a sigama a yenge so seene birin
na nen nayi, a yigi saxi naxanye fari, seen naxanye a
yii, a yi ne yitaxun." **23** "Naxan mi n tan fɔxɔ ra, na
bata keli n xili ma. Nxu nun naxanye mi malanma,
ne sigama ayi nen." **24** Yesu naxa, "Yinna jaxin na
xete muxun fɔxɔ ra, a sigama yire yixaren nin, a sa a
matabuden fen. Xa a mi yire yo to, a a mirima nen
nayi, a naxa, 'N kelixi denaxan yi, n mɔn xa xete na.'

25 Nanara, a na xete na, xa a li na makɔxi, a yitɔnxi, **26**
nayi a sigama nen, a sa fa yinna jaxi solofere gbeteɲe
ra naxanye jaxu dangu a tan na. Ne yi lu a fɛma. Na
muxuna fe rajanna jaxuma ayi nen dangu a fɔlɔn
na." **27** Yesu ito fala waxatin naxan yi, jaxanla nde
yi falan ti a xa yamaan ye, a naxa, "Naxanla naxan
i sɔtɔxi, a yi i maxuru, muxu sewaxin nan na ra!"
28 Koni Yesu yi a yabi, a naxa, "Naxan dangu na ra,
muxu sewaxin nan ne ra naxanye Alaa falan mɛma, e
yi a suxu ken!" **29** Yamaan malan Yesu fɛma waxatin
naxan yi, a yi a fala, a naxa, "Iki muxune findixi
muxu jaxine nan na, e to n maxodinma kabanako
taxamasenna ma. Koni e mi kabanako fe yo tɔe ba
Nabi Yunusaa taxamasenna ra. **30** Nabi Yunusa findi
taxamasenna ra kii naxan yi Niniwa kaane xa, n tan
Muxuna Dii Xemɛn findima taxamasenna ra na kii
nin iki muxune xa. **31** Naxalan Mangan naxan keli
sogeteden yiifanna ma, na tima nen Kiti Sa Lɔxɔni, a
yi iki muxune yalagi bayo a kelixi bɔxɔn danna nan
na, a fa a tuli mati Sulemani a fekolonna falan na.
Awa, n xa a fala e xa, naxan gbo dangu Sulemani ra,
na be yi. **32** Niniwa kaane tima nen Kiti Sa Lɔxɔni, e yi
e yalagi amasoto ne Yunusa a kawandin mɛ waxatin
naxan yi, e xun xanbi so nen e hakene yi. Koni n xa a
fala e xa, nde be naxan gbo Yunusa xa!" **33** Yesu naxa,
"Muxu yo mi lenpun nadegema, a yi a luxun hanma
a yi a raso deben bun ma, koni a dɔxɔma seen nan
fari alogo yamaan na so banxini, e xa kenenna to.
34 I yɛɛn luxi nen alo lenpuna i fati benden xa. Xa i
yɛɛn kende, i fatin birin luma nen kenenni, koni xa i
yɛɛn kala, i fatin luma nen dimini. **35** A liga i yeren
ma nayi, kenenna naxan i yi, na nama findi dimin na.
36 Xa i fatin kenenni, dimi yo mi a yi, a birin degema
nen alo lenpun degema kii naxan yi." **37** Yesu yelin
falan tiye waxatin naxan yi, Farisi muxuna nde yi a
xili, a a xa sa a dege a konni. Nanara, a so, a dɔxɔ a
degedeni. **38** Farisi muxuna a to waxatin naxan yi, a
Yesu mi a yiin naxaxi lan e dinan kiin ma benun a xa
a dege, a kabe. **39** Nanara, Marigin yi a fala a xa, a
naxa, "E tan Farisi muxune, e igelengenna nun donse
sa seen fanna maxama, koni e kuiin nafexi muxu seen
nun fe jaxin na. **40** E tan daxune! Xa Ala nan seen
fanna daxi, a tan xa mi a kuiin fan daxi ba? **41** Koni
naxan e donse don goronna kui, e xa na so yiigelitɔne
yii, seen birin sarijanma nen na yi." **42** "E tan Farisi
muxune, gbalona e yeɛ ra! Amasoto e nakɔ yi seene
yaganna bama, alo sorontonna nun sabi gbeteɲe, koni

ε bata ε με tinxinyaan nun Alaa xanuntenyana fe ra. A lan nen ε xa ne nan liga, e nun yagan baana.” 43 “Gbalona ε xa, ε tan Farisi muxune, amasoto dɔxɔde fajin nafaan ε ma salide banxine yi, binye xɔntɔnne rafan ε ma lɔxɔ tideni. 44 Gbalona ε xa! Amasoto ε ligaxi nen alo gaburu fonna. Yamaan sigan tima a fari, e mi a kolon.” 45 Sariya karamɔxɔ keden yi a fala a xa, a naxa, “Karamɔxɔ, i naxan falama ito ra, i nxu fan nafeyama nen nayi!” 46 Yesu yi a yabi, a naxa, “Gbalona ε xa, ε tan sariya karamɔxɔne! Amasoto ε goronna sama yamaan xun ma naxan binya kati, koni ε tan yeteen mi ε yii dinje a ra hali, ε yi e mali a tonge. 47 Gbalona ε xa! E bata gaburu fajine rafala nabine xa, ε benbane nabiin naxanye faxa yati! 48 E benbane naxan liga, ε yeteen bata tin, ε bata a mayita amasoto e nabine faxa nen, ε tan bata gaburune yiton mon. 49 Nanara, en bata Ala xaxinla to, a naxa, ‘N nabine nun xerane rasigama e ma nen, e ndee faxama nen, e yi ndee besenxɔnya.’ 50 Nanara, iki muxune saranma na nabine birin faxa feen nan na xabu dunuja da waxatini, 51 folo Habila saya feen ma han sa dɔxɔ Sakari saya feen ma, e naxan faxa saraxa ganden nun yire sarijanxin tagi. N xa a fala ε xa, na feene xetema nen iki muxune ma.” 52 “Gbalona ε xa, ε tan sariya karamɔxɔne, amasoto ε bata deen jinna mara naxan xaxilimaya banxin deen nabima, ε tan yeteen mi soe. Naxanye waxi so feni, ε bata ne raxete!” 53 Yesu keli na yi waxatin naxan yi, sariya karamɔxɔne nun Farisi muxune yi a yigbeten folo, e yi a ye mɔ ayi kati! E yi a maxodin fe wuyaxi ma amasoto 54 e yi waxi a xɔn ma, e xa a suxu feni tɔn a falana fe ra.

12 Muxu wuli wuyaxi e malan waxatin naxan yi han e lu tiye e bode ma, Yesu yi falan ti a xarandiine singe xa, a naxa, “E a liga ε yeren ma Farisi muxune buru rate sena fe yi, naxan findixi e nafigiyaan na. 2 Feen naxan luxunxi na minima nen kenenni, wundo feen birin kolonma nen. 3 Nanara, ε bata naxan fala dimini, na mema nen kenenni. E bata naxan birin kɔyekɔyen muxune xa konkoni, ne ralima nen taa tagini kenenni.” 4 “N xɔyine, n xa a fala ε xa, ε nama gaxu ne yee ra naxanye fati benden faxama koni e mi nɔe fefe lige dangu na ra. 5 E gaxuma naxan yee ra, n na yitama ε ra nen: ε xa gaxu Ala yee ra, senbena a yii, a na i faxa waxatin naxan yi, na xanbi ra a yi i rasiga yahannama yi. N xa jɔndin fala ε xa, ε xa gaxu na nan yee ra!” (Geenna g1067) 6 “Xɔlidi suulun mi

sare gbanan firin na ba? Koni hali na keden, Ala mi jinanyε a xɔn ma. 7 Hali ε xun sexen keden kedenne, Ala e xasabin birin kolon. Nanara, ε nama gaxu, ε dangu xɔlidi wuyaxin na!” 8 “N xa a fala ε xa, naxan yo na a ti n ma fe ra yamaan yetagi, n tan Muxuna Dii Xemen fan na jɔxɔnna ligama nen a xa Alaa malekane yetagi. 9 Koni naxan yo na a me n na yamaan yetagi, n tan Muxuna Dii Xemen fan n mema a ra nen Alaa malekane yetagi.” 10 “Naxan na n tan Muxuna Dii Xemen nayelevu, na mafeluma nen. Koni naxan na Alaa Nii Sarijanxin nayelevu, na mi mafeluye mumel!” 11 “E na siga ε ra salide banxin yetagi waxatin naxan yi, e yi ε yigbeten, hanma mangane yetagi hanma kuntigine yetagi, ε nama xamin ε xɔn ba feen na hanma ε naxan falama. 12 Amasoto ε naxan falama Alaa Nii Sarijanxina ε xaranma nen na ra na waxatin yeteni.” 13 Muxuna nde yi a fala a xa yamaan tagi, a naxa, “Karamɔxɔ, a fala ngaxakedenna xa, nxu fafe nafunla naxan lu nxu yii, a xa a yitaxun, a yi n gbeen so n yii.” 14 Yesu yi a yabi, a naxa, “Ee! I tan! Nde n findixi kiti bolonna ra hanma se taxun na muxu firinna tagi?” 15 Na xanbi ra, a yi a fala e birin xa, a naxa, “E a liga ε yeren ma milana fe yi amasoto muxun findi nafulu kanna ra ki ki, a mi nɔe luye a sii ra a nafunla fe ra.” 16 Awa, Yesu yi sandani ito sa e xa, a naxa, “Bɔxɔna nde yi nafulu kanna nde yii nun naxan sise yi sabatima kati! 17 A yi a miri a yete ma, a naxa, ‘Yire mi n yii, n na n ma sisee bogine ramare denaxan yi. N nanfe ligama nayi?’ 18 A yi a miri a yete ma, a naxa, ‘N naxan ligama na ni ito ra. N na n ma se ramara banxine kalama nen, n yi nde gbete ye ti naxanye gbo dangu a fonne ra. N yi n ma maala nun n yii seene ramara na yi. 19 Na xanbi ra, n na a fale nen n yete ma, n naxa, n makoon seen naxan birin ma jee wuyaxi bun ma, n bata ne soto. N xa n dege ki faji, n yi n min, n yi n yete rasewa.’ 20 Koni Ala yi a fala a xa, a naxa, ‘I tan daxuna, to kɔeen na ε nun i niin fatama nen, na xanbi ra i bata seen naxanye birin namara i yete xa, ne findima nde gbee ra?’” 21 Yesu naxa, “A na kii nin ε birin xa naxanye nafunla malanma e yete xa, koni nafulu kan mi e ra Ala yee ra yi.” 22 Na xanbi ra, Yesu yi a fala a xarandiine xa, a naxa, “Nanara, n na a falama ε xa, ε nama kontɔfili ε dunuja yi gidina fe ra, ε naxan donma hanma ε ε maxidima naxan yi. 23 Amasoto niin dangu donseen na, fati benden dangu dugin na pon! 24 E xoline mato, e mi sese sima, e mi sese xabama, donse ramarade mi

e yii, koni Ala e baloma. E tan dangu xoline ra pon! 25 E tan nde nɔɛ waxatidi se a yete siin fari xaminna fe ra ba? 26 Xa e mi nɔɛ fe xuridine lige, nanfera e xaminma a dɔnxene fe ra nayi? 27 E wudi fuge fajine gbo kii mato. E mi walima, e mi dugi rafalama e yete xa, koni n xa a fala e xa, hali Manga Sulemani e nun a nɔrɔn birin yi, a mi maraberi ba alo e tan nde. 28 Ala nan sexene maraberi bama naxanye be yi to, tila a ganma nen, a jan fefe! A mi e maraberi be dangu ne ra ba? E denkeleyaan xurun. 29 Nanara, e nama kontɔfili sena fe ra e naxan donma e nun e naxan minma. 30 Amasɔto dunuja denkeleyatarene seni itoe birin fenma waxatin birin. Koni e Fafe Ala e makoon kolon. 31 Koni e Alaa Mangayaan fen, na xanbi ra, a seni itoe fan soma e yii nen.” 32 Yesu naxa, “Yɛxɛɛ kurudina, e nama gaxu amasɔto a bata e Fafe Ala kenɛn, a Mangayaan so e yii. 33 E e yii seene birin sara, e gbetin so yiigelitɔne yii. E gbetin namara seene sɔto e yete xa naxanye mi kalɛ. E yi e nafunle ramara ariyanna yi a mi janma denaxan yi, mɔɔadene nun melimenle mi a kalɛ denaxan yi. 34 Bayo i ya nafunla denaxan yi, i xaxinla fan menna nin.” 35 Yesu naxa, “E e yitɔn alogo e xa wali, e yi e lenpune radɛge. 36 E xa liga alo walikɛɛn naxanye e kuntigin legedenma keli jaxalandi tiin malanni. A na fa waxatin naxan yi a deen kɔnkɔn, e a rabima a xa nen mafuren! 37 Muxu sewaxin nan ne ra naxanye kuntigina e lima e ye, e yitɔnxi! N xa jɔndin fala e xa, a a tagi xidima nen, a yi e radɔxo, a donseen so e yii. 38 Muxu sewaxin nan ne ra xa a e yitɔnxin li, hali a fa kɔɛ tagini hanma dangu na ra. 39 E xaxili lu ito xɔn ma. Xa banxi kanna mɔɔaden fa waxatin kolon, a mi tinje mɔɔaden yi so a banxini. 40 E fan xa e yitɔn amasɔto e xaxili mi waxatin naxan ma, n tan Muxuna Dii Xɛmɛn fama na waxatin nin.” 41 Piyeri yi Yesu maxɔdin, a naxa, “Marigina, i sandani ito sama nxu tan nan xa ba hanma muxun birin xa?” 42 Marigin yi a yabi, a naxa, “Walikɛɛn mundun lannaya muxun nun xaxilimaan na? Naxan ma kuntigi a dɔxi walikɛɛn bonne xun na, a donseen taxun e ra a waxatini, a tan nan na ra. 43 Na walikɛɛn sewama nen xa a kuntigina a li na wanla ke! 44 N xa a fala e xa yati, a kuntigina a yii seen birin taxuma a ra nen. 45 Koni xa a walikɛna a miri a yete ma fa fala, ‘N ma kuntigin bata buye ayi, a mi xeten xulen,’ xa a walikɛɛn bonne bɔnbɔ fɔlo, xɛmɛn nun jaxanle, a a dege, a yi a min han a yi a radangu ayi, 46 a kuntigin na fa waxatin naxan yi,

walikɛɛn na xaxili mi a xɔn ma waxatin naxan yi, a kuntigina a jaxankatama nen nayi, a yi a saranna fi alo denkeleyatarene kii naxan yi.” 47 “Walikɛɛn naxan a kuntigin sagoon kolon, koni a mi tin na lige, na bɔnbɔma nen bosaan ye wuyaxi ra kati! 48 Koni walikɛɛn naxan mi a kuntigin sagoon kolon, xa na fena nde liga, a bosaan sɔtɔma naxan ma fe ra, a bulanma nen nayi ndedi. Awa, a wuyaxi soxi naxan yii, a wuyaxi maxilima nen na ra. A gbege soxi naxan yi, a gbege maxilima nen na fan na dangu bonna ra.” 49 Yesu naxa, “N bata fa tɛɛn na dunuja yi. Xa a yi dege nun, na rafan n ma han! 50 Koni fɔ n xa mamin tɔrɔni singen. N bɔɔje mi se han a kamali! 51 E mirixi a ma fa fala a n faxi bɔɔje xunbenla nan na dunuja yi ba? N xa a fala e xa, n mi faxi bɔɔje xunbenla xan na fɔ mayitaxunna. 52 To xanbi ra, muxu suulun yitaxunna nen denbaya kedenna kui, saxan fɔxo kedenni, firin fɔxo kedenni. 53 Dii fafane kelima nen dii xɛmene xili ma, dii xɛmene fan yi keli e fafane xili ma. Dii ngane kelima nen e dii tɛmene xili ma, dii tɛmene fan yi keli e ngane xili ma. Mamene kelima nen e diine jaxanle xili ma. Diine jaxanle fan yi keli e mamene xili ma.” 54 Yesu mɔn yi a fala yamaan xa, a naxa, “E na kundaan to sogegododeni waxatin naxan yi, e a kolonma nen nayi fa fala, ‘Tulen famaani ni i ra,’ a ligama na kii nin. 55 E na foyen to kele sogetede yiifari fɔxɔni waxatin naxan yi, e a falama nen, e naxa, ‘Kuye wolonma nen to,’ anu a ligama nen. 56 E tan nafigine, e nɔɛ kore xɔnna nun bɔxo xɔnna matɔɛ nen, e yi a bunna kolon, nanfera e mi nɔɛ waxatini ito bunna kolonje?” 57 “Nanfera e mi nɔɛ kitin se e yete ma, naxan tinxin e na liga? 58 Xa i yengefaan sigama i ra i kitideni, e nema kira yi waxatin naxan yi, i xa kata i na feen jan e tagi alogo a nama siga i ra kitisaan fema, alogo kitisaan fan nama i so doma kanne yii, doma kanne fan yi i sa kasoon na. 59 N xa a fala i xa, i mi kele na fɔ i yanginna birin fi.”

13 Na waxatini, muxuna ndee yi fa Galile kaane fe fala Yesu xa, Pilati naxanye faxa e yi saraxan bama Ala xa waxatin naxan yi. 2 Yesu yi e yabi, a naxa, “Bayo Galile kaane bata faxa na kiini, e mirima na ma nen ba, fa fala hake kanna nan ne ra dangu Galile kaan bonne birin na ba? 3 En-en de! N xa a fala e xa, xa e mi e xun xanbi so e hakene yi, e birin faxama nen alo bonne. 4 Kore banxin naxan Siloyan yi, a bira muxu fu nun solomasexen naxanye fari, ne

fe di? E mirixi a ma fa fala ne jaxu dangu Yerusalen kaane birin na ba? 5 En-en de, n xa a fala e xa, xa e mi e xun xanbi so e hakene yi, e birin faxama nen alo bonne.” 6 Yesu yi sandani ito sa e xa, a naxa, “Xode binla yi xemena nde yii a nakoni. A siga a bogin fendeni koni a mi sese to a koe ra. 7 Nanara, a yi a fala a nako kantanna xa, a naxa, ‘A mato, a jee saxanna nan ito ra, n fama be yi, n fa xodeni ito bogin fen koni n mi se to a ra. A sege, i yi a woli ayi, a nama boxo fajin kala.’ 8 Koni a nako kantanna yi a yabi, a naxa, ‘N kannna, a lu na jee kedenni ito yi. N xa yinla ge a rabilinni, n yi a rafe loxon na naxan a sabatima. 9 Xa xode binli ito bogi nayi faraxi, na fan, xa a mi bogi, i yi a sege.” 10 Matabu Loxona nde yi, Yesu yi xaranna tima salide banxini. 11 Naxanla nde yi na nun jinan jaxin yi naxan foxo ra, a bata yi a rafura jee fu nun solomasexe, a bata yi a mafelen, a mi yi fa noe a ratinxinjje hali! 12 Yesu a to waxatin naxan yi, a yi a xili, a yi a fala, a naxa, “Nga jaxanla, i bata i soto i ya fureni ito ra to!” 13 A yi a yiin sa a fari, jaxanla yi ratinxin kedenna, a yi Ala tantun. 14 Salide banxin kuntigin yi xolo, bayo Yesu bata muxun nakendeya Matabu Loxoni. Nanara, a falan ti yamaan xa, a naxa, “Wanla kema xii sennin nan bun, nayi e xa fa na loxone ma, e fa kendeyaan soto, koni a mi lige Matabu Loxoni!” 15 Marigin yi a yabi, a naxa, “E tan nafigine, e tan naxanye birin be, e mi e jingena hanma e sofana fulunma ba, e sa a ramina Matabu Loxoni? 16 Awa, Ibrahima bonsonna nan jaxanli ito ra, Setana bata naxan xidi jee fu nun solomasexe. A mi lan, a xa xoro ya, a fulun Matabu Loxoni ba?” 17 Yesu a falan yi a yengefane birin nayagi. Na waxatini yamaan birin yi lu sewe a kabanako feene birin na. 18 Yesu naxa, “Alaa Mangayaan maligaxi nanse ra? N na a misalima nanse ma? 19 A luxi nen alo sansi kese xuridina, xemena naxan si a xeen ma, a gbo, a findi wudin na, xoline yi e teen sa a yi.” 20 Yesu mon yi maxodinna ti, a naxa, “N na Alaa Mangayaan misalima nanse ma? 21 A ligaxi nen alo burun nate sena jaxanla naxan tongo, a yi a sa buru fuyi benbeli keden yi, a yi a yimaxa, a birin yi te.” 22 Yesu yi siga taa gbeene nun banxidene ra, a xaranna ti a yi a tinxin Yerusalen taan na. 23 Nde yi a maxodin, a naxa, “N kannna, muxun naxan kisima, na mi wuya ba?” Yesu yi e yabi, a naxa, 24 “E yixodoxo e so de xurin na, n xa a fala e xa, muxu wuyaxi katama nen so feen na koni e mi noe soc.” 25 “Banxi kannna kelima nen, a deen balan. E ti a xanbi

ra, e deen makonkon folo, e naxa, ‘N kannna, deen nabi nxu xa,’ a e yabima nen nayi, a naxa, ‘N mi e keliden koloni!’ 26 Awa, e a yabima nen nayi, e naxa, ‘Nxu bata yi nxu dege, nxu yi nxu min i fema, i bata xaranna ti nxo taani!’ 27 A mon a falama nen, a naxa, ‘E tan tinxintarene, e keli n fema, n mi e keliden kolon.’ 28 E na Ibrahima nun Isiyaga nun Yaxuba nun nabine birin to Alaa Mangayani waxatin naxan yi, koni e tan mi so, e wugama nen nayi, e yi e jinna raxin kati! 29 Yamaan fama nen, sa keli sogeteden nun sogegododen nun yiifari foxon nun komenna ma, e doko sewa bande dondeni Alaa Mangayani. 30 Nayi, naxanye xanbin na, na ndee sa luma nen yeen na. Naxanye yeen na iki, ne yi sa lu xanbin na.” 31 Na waxatin yeteni Farisi muxuna ndee yi fa Yesu fema, e yi a fala a xa, e naxa, “Keli be yi, i siga yire gbete yi, amasoto Herode waxi i faxa feni.” 32 Yesu yi e yabi, a naxa, “E sa a fala na xulumaseen xa, e naxa, ‘N jinanne kedima nen, n muxune rakendeya to nun tila yi, a soge saxandeni, n yelinma nen n ma wanla ra.’ 33 Koni hali na, fo n xa lu sigan tiye nen to nun tila nun tila buda yi, bayo a mi lan nabiin xa faxa yire gbete yi fo Yerusalen taani.” 34 A yi a fala, a naxa, “Yerusalen kaane! Yerusalen kaane! E tan naxanye nabine faxaxi, e yi Alaa xerane magolon. A xonla n suxu nen sanja ma wuyaxi n xa e malan n fema alo toxo ngana a diine malanma a gabuteen bun ma kii naxan yi, koni e mi tin! 35 Awa, Ala e konna rabepinma nen fefe! N xa a fala e xa, e mi fa n toma han e yi a fala, e naxa, ‘Naxan fama Marigin xinli, Ala xa na baraka!’”

14 Matabu Loxona nde yi, Yesu yi siga a degedeni Farisi muxu gbeena nde konni. Awa, yamaan yi Yesu matoma kati! 2 Xemen naxan fatin yi makusinxin, na yi fa Yesu yetagi. 3 Yesu yi sariya karamoxone nun Farisi muxune maxodin, a naxa, “A daxa muxune yi rakendeya Matabu Loxoni ba, hanma na mi lan?” 4 Koni e mi a yabi hali! Yesu yi xemena tongo, a yi a rakendeya, a siga. 5 Na xanbi ra, a yi a fala e xa, a naxa, “Xa dii xemena hanma turana e tan nde yii, xa a bira xojinna kui Matabu Loxoni, i mi a ratema mafuren Matabu Loxoni ba?” 6 Koni e mi no a maxodinna yabe. 7 Yesu mon yi falan ti muxu xilixine xa sandani, amasoto a yi e rakorosima e katama dodoxeni yeen na kii naxan yi, a naxa, 8 “Muxuna nde na i xili jaxalandi ti malanni waxatin naxan yi, i nama doko yeen na, amasoto yanyina nde muxu gbete xilixi naxan dangu i

tan na. **9** Awa, naxan ε birin xilixi, na fama nen, a yi a fala i xa, a naxa, 'Dɔxɔdeni ito so a yii.' Xa na liga, i yagima nen nayi amasɔto i bata keli na dɔxɔde fajini. **10** Koni e na i xili waxatin naxan yi, siga i sa dɔxɔ xanbin na, nayi i xɔɲe yatigin fama nen i fɛma, a yi a fala i xa, a naxa, 'Sɔxɔ, fa i magodo yire fajini ito yi.' I binyama nen nayi muxu xilixin bonne birin yetagi. **11** Amasɔto naxan birin a yete yitema, na magodoma nen. Naxan na a yete magodo, na yitema nen." **12** Yesu yi a fala xɔɲe yatigin xa, a naxa, "Xa i ferijɲen seen hanma ximenna soma yamaan yii, i nama i xɔyine xili, hanma i ngaxakedenne hanma i xabilane hanma i dɔxɔ bode nafulu kanne, amasɔto ne fan i xilima nen, e yi i ya donla saran. **13** I na jaxaxanaxan ti waxatin naxan yi, i xa yiigelitɔne xili e nun madɔntɔne nun sankalatɔne nun danxutɔne. **14** Awa, i barayin sɔtɔma nen nayi amasɔto ne mi nɔe a donla saranɲe. Koni Ala a saranna fiye muxu tinxinxine rakeli waxatini sayani." **15** Donse donna nde yi a fɛma, na ito mɛ waxatin naxan yi, a yi a fala Yesu xa, a naxa, "Muxu sewaxin nan ne ra naxanye balon donma Alaa Mangayani." **16** Yesu yi a fala a xa, a naxa, "Xɛmɛna nde yi na naxan donse donna malan gbeen ti, a muxu wuyaxi xili. **17** Na malanna waxati saxini, a yi a walikeɛn nasiga, a xa sa a fala a muxu xilixine xa, a e xa fa, seene birin bata yi yelin yitɔɲɲɛ! **18** Koni e birin yi e makone fala fɔlɔ. A singe ra xiin yi a fala walikeɛn xa, a naxa, 'N bata xɛɛn sara fɔ n xa sa na mato, yandi i hake lu n xa.' **19** Bonna naxa, 'N bata jinge fu sara, n sa e matoma, yandi i xa i hake lu n xa.' **20** Bonna fan naxa, 'N baxi jaxanla futudeni nen. Nanara, n mi nɔe sige.' **21** Walikeɛn yi xɛɛ, a sa na birin fala a kuntigin xa. Awa, banxi kanna yi xɔlɔ nayi han, a yi a fala a walikeɛn xa, a naxa, 'I mafura, i siga kirane xɔn ma, i sa fa yiigelitɔne nun madɔntɔne nun danxutɔne nun sankalatɔne ra.' **22** A mi bu walikeɛn naxa, 'N kanna, i naxan fala n xa, n bata na liga koni dɔxɔdena ndee mɔn luxi.' **23** Nanara, kuntigin yi a fala walikeɛn xa, a naxa, 'Siga xɛɛn ma kirane xɔn ma e nun burunna ra, i kankan yamaan ma, e xa fa, alogo n ma banxin xa rafe. **24** N xa a fala i xa, muxun naxanye xilixi, ne sese mi fa ferijɲen seni ito donɲɛ!" **25** Yama gbeen yi Yesu fɔxɔ ra sigatini, a yi a yɛɛ rafindi e ma, a yi a fala e xa, a naxa, **26** "Muxu yo fa n tan fɛma, a mi nɔe finde n ma xarandiin na fɔ a xa a mɛ a nga nun a fafe ra e nun a jaxanla nun a diine nun a ngaxakeden xɛmɛmane nun a jaxalanmane nun a yetɛɛn na. **27**

Muxu yo mi a faxa wudin tongo, a bira n fɔxɔ ra, na mi finde n ma xarandiin na. **28** Xa ε tan nde waxi a xɔn, a xa sangansoon ti, a dɔxɔma nen singen, a yi a gbetin yate a yi a kolon naxan jɔxɔn a yii, xa na wanla janɲɛ. **29** Xa a mi na liga, a na yelin a betɛn sɛ waxatin naxan yi, a mi nɔe sangansoon nanjanɲɛ. Naxan birin na na to, e a magelema nen. **30** E a falama nen, e naxa, 'Xɛmɛni ito bata banxin ti fɔlɔ koni a mi nɔxi a rananɲɛ!" **31** Yesu naxa, "Xa mangana nde na naxan ma gali muxu wuli fu liye, a waxi a xɔn ma, a xa sa mangan bonna yenge naxan ma gali sige han muxu wuli mɔxɔɲɛ, a dɔxɔma nen singen, a yi a yate xa a senben na mangan yenge. **32** Xa senbe mi a yii, a xeraan nasigama nen benun a xa a fɛman li, a yi a mafan, alogo e nama yenge. **33** Awa, a na kii nin, ε tan nde keden mi nɔe finde n ma xarandiin na fɔ a xa a yii seen birin yiba." **34** "Fɔxɔn fan, koni xa a mɛxɛmɛxɛnna ba ayi, a fa ramɛxɛmɛxɛnna nanse ra nayi? **35** A mi lan bɔxɔn ma, a mɔn mi finde lɔxɔn na sansine xa fɔ a xa woli ayi nen. Xa tunla naxan ma a feen mɛ, na xa a tuli mati!"

15 Lɔxɔna nde mudu maxinle nun yulubito wuyaxi yi fa Yesu fɛma e tuli matideni. **2** Farisi muxune nun sariya karamɔxɔne yi falan ti fɔlɔ e dɛ bun ma, e naxa, "Xɛmɛni ito yulubitɔne yisuxuma, a yi a dɛge e fɛma." **3** Nanara, Yesu yi sandan sa e xa, a naxa, **4** "Xa yɛxɛɛ kɛmɛ ε tan nde yi, na nde keden yi lɔ ayi, a nanfe ligama? A yɛxɛɛ tonge solomanaanin e nun solomanaaninna luma nen burunna ra, a sa a tununxin fen han a yi a to. **5** A na a to waxatin naxan yi, a sewama nen, a yi a sa a kɔe ma, **6** a mɔn yi siga a ra a konni, a yi a dɔxɔ bodene nun a xɔyine xili, a yi a fala e xa, a naxa, 'En sewa amasɔto n ma yɛxɛɛn naxan yi tununxi n bata a tol' **7** N xa a fala ε xa, a na kii nin, sewan tima nen ariyanna yi hake kan keden tubixina fe ra dangu tinxin muxu tonge solomanaanin e nun solomanaaninna ra naxanye mirixi a ma fa fala e mako mi tubin ma." **8** "Awa, gbeti gbanan fu jaxanla naxan yii, xa na keden tunun a ma, a nanfe ligama? A lenpun nan nadeɲema, a yi a banxin mako mafuren, a yi a fen yiren birin yi han a yi a to. **9** A na a to waxatin naxan yi, a a xɔyine nun a dɔxɔ bodene xilima nen e bode xɔn ma, a yi a fala e xa, a naxa, 'En sewa en bode xɔn ma amasɔto n ma gbetin naxan tunun, n bata a tol' **10** Awa, n xa a fala ε xa a na kii nin, Alaa malekane sewama nen hake kan keden na fe ra naxan

bata tubi.” **11** Yesu yi lu falan tiye, a naxa, “Xemeɓa nde yi na, dii xeme firin yi a yii. **12** A xurimaan yi a fala a fafe xa, a naxa, ‘N fafe, i ya nafunla taxun, i n gbeen so n yii.’ Awa, a fafe yi nafunla taxun e nun a tada ra. **13** Waxatidi danguxina xurimaan yi a gbee seene sara, a gbetin tongo, a siga yamana makuyena nde yi, a sa a gbetin birin kala dunɗa feene yi. **14** A yii seen birin yi jan, na xanbi ra, kame gbeen yi so na yamanan birin yi, sese mi yi fa a tan yii sɓɓon. **15** Awa, a siga na yamanan dugureɓna nde fema wali kedeni, na yi a rasiga a xeen ma xose kantandeni. **16** Xosene toge dagin naxan donma, a xɓɓla yi a suxu a xa na nde don koni muxe mi na so a yii. **17** Donxɓen na, a yi a miri, a naxa, ‘N fafe a walikene donseen donma han e mi a janɗe koni kameɓa n tan faxamaan ni i ra. **18** N xa siga n fafe fema n sa a fala a xa, n naxa, N fafe, n bata haken liga i tan na, n yi Ala yulubin tongo. **19** I mi lan sɓɓon i xa n xili fa fala i ya diina, i xa n suxu alo i ya walikɛen bonne.’ **20** Awa, a keli, a xete a fafe konni.” “Benun a xa na li waxatin naxan yi, a fafe yi a to fe, a ndedi makuya. A kininkinin a ma kati, a yi a bara, a sa a ralan, a yi a yiin nabilin a dii xemen ma, a yi a sunbu. **21** A dii xemen naxa, ‘N fafe, n bata haken liga i tan na, n yi Ala yulubin tongo, a mi lan sɓɓon i xa n xili fa fala i ya diina.’ **22** Koni a fafe yi a walikene xili, a naxa, ‘E mafura, e fa doma gbeen na, e yi a ragodo a ma, e yii rasoon so a yii sonla ra, e sankidin so a sanni. **23** E sa jinge raturaxin faxa, en malanna raba, en sewa. **24** Amasoto n ma dii xemen bata yi faxa nun koni iki a niin bata bira ayi mɓn. A bata yi tunun nun koni iki, n bata a to.’ Awa, e jaxaxaxan folo.” **25** “Na waxatini, dii xemen forimaan sa xeen ma. A faxi na sa keli xeen ma, a maso banxin na waxatin naxan yi, a sumun xuiin nun bodon ti xuiin me. **26** Awa, a walike keden xili, a yi a maxodin, a naxa, ‘Nanfe ligaxi?’ **27** Walikɛen yi a yabi, a naxa, ‘I xunyen bata fa, i fafe bata jinge raturaxin faxa a xa, amasoto a mɓn bata a dii xemen to, a kende.’ **28** A tada yi xolo kati, a mi tin soe banxini. Nanara, a fafe yi fa, a yi a mafan a xa so. **29** Koni, a yi a yabi, a naxa, ‘A mato, n bata jɛeni itoe birin wanla ke i xa alo konyina, n mi i ya yamarin matandi hali sanɗa ma keden pe. I nanse soxi n yii? Hali sii diina, i mi a so n yii nxu nun n lanfane yi sewa nxu bode xɓn ma! **30** Koni i ya dii xemen naxan bata i ya nafunla birin kala yalunyani, bayo na mɓn bata fa, i bata jinge raturaxin faxa a xa!’ **31** A fafe yi a yabi, a naxa, ‘N ma diina, i tan n fema

be waxatin birin, n yii seen birin i tan nan gbee a ra. **32** Koni a lan en xa malanna ti, en sewa amasoto i xunyen bata yi faxa nun koni a niin bata bira ayi iki. A bata yi tunun nun koni iki n bata a to.”

16 Yesu yi a fala a xarandiine xa, a naxa, “Nafulu kanna nde yi na nun, walikɛen yi naxan yii a feene xun na. Muxune yi a fala nafulu kanna xa, e naxa, ‘I walike mangan naxan dɔxi, a i ya nafunla kalama.’ **2** Nafulu kanna yi na walike mangan xili banxini, a yi a fala a xa, a naxa, ‘N naxan mexi i ya fe yi ito ra, na di? N nafunla naxan soxi i yii, fa i dentege amasoto n mi i findima walike mangan na sɓɓon.’ **3** A yi a fala a yete ma, a naxa, ‘N ma kuntigina n yiibama nen n ma wanli ito ra, n nanfe ligama nayi? Senbe mi n na n xeen sa, n yagima nen xanditideni. **4** Koni n naxan ligama, n bata na kolon iki! Benun n xa n yii ba wanli waxatin naxan yi, n xoyine sɓɓoma nen naxanye n yisuxe e konne yi.’ **5** Awa, a kuntigina donla muxun naxanye birin ma, a yi ne xili. A yi a fala a singe ra xiin xa, a naxa, ‘N ma kuntigina donla yoli i ma?’ **6** A yi a yabi, a naxa, ‘Oliwi turen liga se xungbeen ye keme donla nan n ma.’ Walike mangan yi a fala, a naxa, ‘I ya doli kedin nan ito ra, dɔxo, i tonge suulun sebe.’ **7** A yi a fala bonna xa, a naxa, ‘Yoli i tan ma?’ Na yi a yabi, a naxa, ‘Malo benbeli keme nan n ma.’ Kuntigin yi a fala a xa, a naxa, ‘I ya doli kedin nan ito ra, tonge solomasexe sebe.’ **8** Na walike manga tinxintarena kuntigin yi a matoxo a to kotaxi ayi fe jaxi rabadeni, amasoto dunɗa muxune kota fe jaxi rabadeni dangu kenenna gbee muxune ra.” (aiɓn g165) **9** Yesu yi a fala, a naxa, “E xoyine fen e yete xa dunɗa nafunli alogo a na jan i yii waxatin naxan yi, naxanye ariyanna yi ne e yisuxuma nen habadan banxine yi. (aiɓnios g166) **10** Naxan lannayaan liga fedi xurini, na lannayaan ligama nen fe gbeene fan yi. Koni naxan tinxintareyaan ligama fe xurine yi, a tinxintareyaan ligama nen fe gbeene fan yi. **11** E nafunla naxan soma e yii dunɗa yi, xa e mi lannayaan liga nayi, nde lama e ra nafulu feni ariyanna yi? **12** Xa e mi lannayaan liga muxune gbeeni, nde i tan gbeen soma i yii?” **13** “Walike yo mi noe wale kuntigi firinna xa sanɗa ma kedenni. Amasoto a kedenna rajaxuma nen, a kedenna xanu, hanma a kedenna binya, a yi a me bonna ra. E mi noe wanla ke Ala nun nafunla xa sanɗa ma kedenni.” **14** Farisi muxune yi ito birin me, e yi Yesu magele amasoto e bata gbetin xanu. **15** Yesu yi a

fala e xa, a naxa, “E yete findima muxu tinxinxine ra yamaan yetagi, koni Ala tan e boŋe yi feen kolon. Amasoto muxun feen naxan yatexi, fe haramuxin nan na ra Ala yee ra yi.” 16 “Benun Yoni gbee waxatin xa a li Sariya Kitabun nun nabine kitabune nan yi ralima nun. Folo na waxatin ma Alaa Mangayana fe Xibaru Fajin yi rali, muxun birin yi e yixodoxo, e so a yi. 17 Koni kore xonna nun boxo xonna danguma nen benun Sariya Kitabun sebenla yiredi keden xa ba a ra.” 18 “Xemen naxan na a me a naxanla ra a yi nde gbete futu, na bata yalunyaan liga. Xemen naxan na naxalan namexin futu, na fan bata yalunyaan liga.” 19 Yesu naxa, “Nafulu kanna nde yi na nun naxan yi maraberi baxi dugi sare xodexene ra, a yi naxunni waxatin birin. 20 Yiigelitona nde fan yi na nun, a xili Lasarusi, koron yi a fatin birin ma. Na yi saxi nafulu kanna deen na waxatin birin. 21 A yi waxi a xon ma bande kesedin naxanye yolonma keli nafulu kanna tabanla ra, a xa ne don. Barene fan yi lu a korone de konje. 22 Xeme yiigelitona na yi faxa, malekane yi siga a ra Iburahima dexon ma yire naxumeni. Awa, nafulu kanna fan yi faxa, e yi a maluxun. 23 A toro laxira yi kati! A yi a yee rasiga, a yi Iburahima to wulani, Lasarusi a dexon ma. (Hades g86) 24 A yi gbelegbele, a naxa, ‘N Fafe Iburahima, kininkinin n ma, Lasarusi xe n ma, a xa a yii sonla sin igeni, a yi fa a dindin n lenna ma, amasoto n toroxi teeni be kati!’ 25 Koni Iburahima yi a yabi, a naxa, ‘N ma dii, i xaxili na xon ma ba, i yi kende waxatin naxan yi, i se fajin birin soto nen koni Lasarusi tan yi toron nin. Iki a tan sewaxi be, i tan toroni. 26 Mon sonon, yili gbeena en tagi alogo naxanye waxi keli feni be, siga i fema, ne nama siga. Muxe nama keli i fan fema menni fa nxu fema be.’ 27 Nafulu kanna naxa, ‘N fafe, n na i mafanma, i xa Lasarusi xe, a xa siga n fafe konni, 28 bayo ngaxakedenmaan muxu suulun na yi, a xa sa e kawandi alogo e nama fa toro yireni ito yi be.’ 29 Iburahima yi a yabi, a naxa, ‘Musa nun nabine falane e fema na, e xa ne xuiin name.’ 30 Nafulu kanna yi a yabi, a naxa, ‘N fafe Iburahima, na mi a gasel Koni xa muxun keli sayani, a siga e fema, e e xun xanbi soma e hakeni nen, e tubi.’ 31 Koni Iburahima naxa, ‘Xa e mi e tuli mati Musa nun nabine ra, hali muxun keli sayani, a siga e fema, e mi le a ra.”

17 Yesu yi a fala a xarandiine xa, a naxa, “Feen naxanye muxune birama yulubini, a fere mi na fo ne xa taran na, koni gbalona e yee ra naxanye

na findi sabun na. 2 A yi lan ne ma, geme gbeen xa xidi e koe ra, e woli baan nin benun e xa diidi xurini ito nde keden bira yulubini. 3 E a liga e yeren mal!” “Xa i ngaxakedenma haken liga, i xa a sonna yita a ra. Xa a na feen bejin, i xa a mafelu. 4 Xa a haken liga i ra sanja yi solofere soge kedenni, koni a yi fa i fema na waxatin birin yi, a naxa, ‘N bata nimisa,’ a mafelu.” 5 Xerane yi a fala Marigin xa, e naxa, “Nxo denkeleyaan fari sa.” 6 Marigin yi e yabi, a naxa, “Xa e denkeleyaan gbo ayi alo sansi kese xuridina, e noe a fale nen wudi bili gbeeni ito ma, e naxa, ‘I yete tala boxoni, i sa ti foxo igen tagi!’ A e fala xuiin suxuma nen.” 7 “Xa konyina e tan nde yii naxan xeen sama hanma a yexene kantan, a na fa waxatin naxan yi, sa keli xeen ma, i a falama a xa nen ba, fa fala, ‘Fa i dege?’ 8 En-en, koni i a falama nen, i naxa, ‘N ma ximenna rafala, i yi i ya walike domaan tongo, i wanla ke n xa. N na n dege waxatin naxan yi, n yi n min, na xanbi ra i fan yi i dege, i yi i min.’ 9 Konyi kanna mi barika bire a konyin xa bayo a bata wanla ke a tixi naxan na. 10 E tan fan na kii nin e na Alaa yamarine birin suxu waxatin naxan yi, e xa a fala, e naxa, ‘Konyin nan tun nxu tan na, nxu bata nxo wanla ke.” 11 Yesu sigama Yerusalen taani waxatin naxan yi, a dangu Samariya yamanan nun Galile yamanan tagi. 12 A soma taadina nde yi waxatin naxan yi, dogonfonto fu yi a ralan. E yi yire makuyeni. E gbelegbele, e naxa, 13 “Nxu kanna! Yesu! Kininkinin nxu ma!” 14 Yesu yi e to, a yi a fala e xa, a naxa, “E siga saraxaraline konni, e xa e mato.” Awa, e sigama kiraan xon ma waxatin naxan yi, e kendeya. 15 Muxu keden yi e tagi, na a to waxatin naxan yi, fa fala a bata kendeya, a xete Ala tantunje a xuini texin na. 16 A bira Yesu sanna bun ma, a yetagin yi lan boxon ma, a barikan bira a xa. Samariya kaan nan yi na xemen na nun. 17 Yesu yi a fala, a naxa, “Muxu fu xa mi kendeyaxi ba? A donxe muxu solomanaaninna bonne tan minen yi? 18 Muxu yo mi luxi naxan xetexi, a fa barikan bira Ala xa, fo xajeni ito ba?” 19 Yesu yi a fala a xa, a naxa, “Keli, i siga, i ya denkeleyaan bata i rakisi.” 20 Farisi muxuna ndee yi Yesu maxodin, a Alaa Mangayaan fama waxatin mundun yi. A yi e yabi, a naxa, “Alaa Mangayaan mi fama alo en seen naxan toma. 21 Muxu mi a fale fa fala, ‘A mato, a be yi,’ hanma, ‘A sa menni.’ Amasoto Alaa Mangayana e tan yi.” 22 A yi a fala xarandiine xa, a naxa, “Waxatina nde fama a xonla e suxuma nen, e xa n tan Muxuna Dii Xemen fa waxatin to koni e mi a

toe. **23** Nde taranma nen nayi naxanye a falama, e naxa, 'A sa menni,' hanma 'A be yi.' Koni e nama siga, e nama e gi a matodeni. **24** Amasoto a luma nen alo kuyen na a jinna masoxon keli bode foxon na sa ti bode foxon na. N tan Muxuna Dii Xemen fama na kii nin n fa loxon. **25** Koni fo n xa toro nen singen katil! A fere mi na fo iki muxune xa e me n na. **26** Nuhan gbee waxatin liga kii naxan yi, a ligama na kii nin n tan Muxuna Dii Xemen waxatini. **27** Muxune birin yi e degema na waxatini, e yi e minma, e yi jaxanle futuma, e yi e diine fima xemene ma futun na, han Nuhan so waxatin yi a li kunkin kui. Fufaan yi fa, a yi e birin faxa. **28** A mon ligama nen na kiini alo a liga Loti gbee waxatini kii naxan yi. Muxun birin yi lu e dege, e yi e min, e seen sara, e seen mati, e seen si, e banxin ti. **29** Awa, Loti keli Sodoma yi waxatin naxan yi, teen nun dolen ganmaton yi godo keli kore, a yi e birin faxa. **30** N tan Muxuna Dii Xemen na mini kenenni waxatin naxan yi, a ligama na kii nin." **31** "Na loxon, muxun naxan a kore banxin ko ra, na nama godo banxini a yii seene tongodeni. A mon na kii nin, muxun naxan xeen ma, na nama fa xete banxini. **32** E xaxili lu Loti a jaxanla xon ma. **33** Naxan na kata a niin nakisi feen na, na bonoma ayi nen. Naxan na bono a niini, na kisima nen. **34** N xa a fala e xa, na koen na xeme firin luma nen sade kedenna ma, keden xalima nen, keden yi lu na. **35** Naxalan firin luma nen se dinni, kedenna xalima nen, keden yi lu na. **36** Xeme firin luma nen xeen ma, kedenna xalima nen, keden yi lu na." **37** Xarandiine yi a maxodin, e naxa, "Marigina, na ligama minen yi?" Yesu yi e yabi, a naxa, "Sube faxaxin denaxan yi, dugane e malanma menna nin."

18 Na xanbi ra, Yesu yi sandani ito sa e xa, a yi e xaran, a e xa Ala maxandi waxatin birin, e nama xadan, **2** a naxa, "Kitisana nde yi taana nde yi nun naxan mi yi gaxuxi Ala yee ra, a mi danma muxe ra. **3** Kaja gilena nde yi na taani nun, na yi siga a fema, a yi a mafan, a naxa, 'Kitin sa nxu nun n yengefaan tagi.' **4** A bu han, a mi tin, koni donxen na a miri a yete ma, a naxa, 'Hali n mi gaxu Ala yee ra, n mi danje muxe ra, **5** koni bayo kaja gileni ito n yee gbama ayi, n xa kata, n xa a kitin sa, xa na mi a ra a luma fe nen waxatin birin han n tunnaxolo n ma.'" **6** Awa, Marigin mon yi siga falan ma, a naxa, "Kiti bolon tinxintaren naxan fala, e tuli mati na ra. **7** Awa, Ala mi a gbee muxune xun mafale ba, naxanye a xilima koen nun yanyin

na? A buye na yi ba? **8** N xa a fala e xa, a e xun mafala kitin bolonma nen mafuren! Koni n tan Muxuna Dii Xemen na fa waxatin naxan yi, n denkeleyaan liye dunupa yi ba?" **9** Yesu yi sandani ito fan sa na muxune xa naxanye laxi e yetena tinxinyaan na, e muxun bonne yalagi. **10** A naxa, "Muxu firin yi siga Ala Batu Banxini Ala maxandideni, Farisi muxun nan yi bonna ra, bonna mudu maxinla. **11** Farisi muxun yi ti, a yi Ala maxandi a bojeni. A Ala maxandi ikiini, a naxa, 'Ala, n barikan birama i xa amasoto kumade mi n tan na, tinxintare mi n tan na hanma yalundena alo muxun bonne birin a ligama kii naxan yi. N barikan birama i xa amasoto n tan mi ligaxi alo mudu maxinli ito. **12** Loxo xun yo loxo xun n sunna suxuma nen soge firin, n naxan birin sotoma, n ne yaganna fima.'" **13** "Koni mudu maxinla yi ti yire makuyeni, a mi tin a yeen nate kore koni a yi lu a kanken makudunje, a yi a fala, a naxa, 'Ee! Ala, kininkinin n tan hake kanna ma!'" **14** Yesu naxa, "N xa a fala e xa, xemeni ito, benun a xa siga a konni waxatin naxan yi, a tinxin nen Ala yee ra yi fefe! Amasoto muxun naxan birin a yete yitema, ne magodoma nen. Naxan birin a yete magodoma, ne yitema nen." **15** Muxuna ndee yi fa e diidine ra Yesu fema, a xa a yiin sa e xunne ma, a duba e xa. Koni a xarandiine to na to, e yi falan ti e ma amasoto e bata fa diidine ra Yesu fema. **16** Koni Yesu yi diidine xili a fema, a naxa, "E tin diidine xa fa n fema, e nama e raxete amasoto e tan sifane nan gbee Alaa Mangayaan na. **17** N xa jondin fala e xa, xa naxan mi Alaa Mangayaan suxu alo diidine, na mi soe Alaa Mangayani mum!" **18** Yahudiyan kuntigina nde yi Yesu maxodin, a naxa, "Karamoxo fajina, n nanfe lige n habadan nii rakisin soto?" (aiOnios g166) **19** Yesu yi a maxodin, a naxa, "Nanfera, i n xilima karamoxo fajina? Muxu yo mi fan fo Ala keden peenal! **20** I yamarine kolon fa fala, 'I nama yalunyaan liga, i nama faxan ti, i nama mupan ti, i nama wule seren ba, i baba nun i nga binya.'" **21** Xemen yi a yabi, a naxa, "Xabu n dii joreyani waxatin naxan yi, n ne birin suxi." **22** Yesu ito me waxatin naxan yi, a yi a fala a xa, a naxa, "Fe keden nan luxi, i xa i yii seene birin sara, i yiigelitone ki, i nafunla sotoma nen ariyanna yi. Na xanbi ra, i bira n foxo ra." **23** Koni xemen na me waxatin naxan yi, a bojen yi rajaxu a ma kati, amasoto nafunla yi a yii nun katil! **24** Yesu yi a mato, a naxa, "Nafulu kanne so raxolo Alaa Mangayani han! **25** Nafulu kanna so raxolo Alaa Mangayani dangu

jɔgɔmɛn so feen na sagilaan yinla ra.” 26 Muxun naxanye na mɛ, ne yi a maxɔdin, e naxa, “Nde nɔɛ kise nayi?” 27 Yesu yi e yabi, a naxa, “Muxun mi nɔɛ feen naxan lige, Ala nɔɛ na lige nɛn.” 28 Piyeri yi a fala a xa, a naxa, “A mato, nxu bata feen birin bejin, nxu bira i ɔɔxɔ ra.” 29 Yesu yi a fala e xa, a naxa, “N xa jɔndin fala e xa, naxan birin bata a konna lu na hanma a jɔxanla hanma a ngaxakedenne hanma a sɔtɔ muxune hanma a diine Alaa Mangayana fe ra 30 na kanna na jɔxɔn sɔtɔma nɛn dangu na ra waxatini ito yi, a habadan nii rakisin fan sɔtɔ waxati famatɔni.” (aiɔn g165, aiɔnios g166) 31 Yesu yi a xarandii fu nun firinne xili a fema e danna, a yi a fala e xa, a naxa, “E tuli matil! En sigama Yerusalɛn taani, nabine feen naxan birin seɓɛ n tan Muxuna Dii Xɛmɛna fe yi, ne kamalima nɛn na yi. 32 N tan Muxuna Dii Xɛmɛn soma nɛn siya gbetene yii, e yi n magele, e yi n nafeya, e yi e de igen namini n ma. 33 E n bulanma nɛn, e yi n faxa, koni a soge saxandeni n mɔn kelima nɛn sayani.” 34 A falan naxan birin ti, xarandiine mi ne bayen kolon, bayo falan bunna yi luxunxi e ma. Yesu yi falan tima naxan ma fe yi nun, e mi na kolon. 35 Yesu maso Yeriko ra waxatin naxan yi, danxutɔna nde yi dɔxi kiraan na xanditideni. 36 A yamaan dangu xuiin mɛ waxatin naxan yi, a maxɔdinna ti, a naxa, “Nanfe ligaxi?” 37 E yi a fala a xa, e naxa, “Yesu Nasareti kaan nan danguma.” 38 A gbelegbele, a naxa, “Dawuda a Dii Xɛmɛn Yesu, kininkinin n ma!” 39 Muxun naxanye yɛɛn na, ne yi xajɛ a ma, a xa a dundu koni a mɔn yi gbelegbele katil! A naxa, “Dawuda a Dii Xɛmɛn Yesu, kininkinin n ma!” 40 Awa, Yesu yi ti, a yi a fala, a e xa fa danxutɔn na a fema. A fa a fema waxatin naxan yi, Yesu yi a maxɔdin, a naxa, 41 “I waxi a xɔn n xa nanfe liga i xa?” A yi a yabi, a naxa, “N kanna, n waxi a xɔn ma nɛn, n mɔn xa seen to.” 42 Yesu yi a fala a xa nayi, a naxa, “I xa seen to, i ya dɛnkeleyaan bata i rakendɛya.” 43 Xɛmɛn yi seen to mafuren, a bira Yesu ɔɔxɔ ra, a Ala matɔxɔma. Yamaan na to waxatin naxan yi, e birin yi Ala tantun katil!

19 Yesu yi so Yeriko yi, a dangumatɔn nan yi a ra nun. 2 Mudu maxinle kuntigina nde yi na nun a xili Sakeye. Nafulu kanna nan yi a ra. 3 A yi kata a xa Yesu to alogo a xa a kolon muxun sifan naxan a ra, bayo a yi dungi nun, a mi yi nɔɛ Yesu toɛ amasɔtɔ yamaan yi gbo. 4 Nanara, a yi siga a giye yamaan yɛɛ ra, a sa te xɔdɛ binla kɔɛ ra alogo Yesu nɛɛn dangue

kiraan xɔn ma waxatin naxan yi, a xa a to. 5 Yesu na li waxatin naxan yi, a yi a yɛɛn nate kore, a yi a fala Sakeye xa, a naxa, “Sakeye, godo mafuren, amasɔtɔ n yigiyama i konna nin tol!” 6 Sakeye yi godo mafuren, a yi a rasene sewani. 7 Muxun naxanye birin na to, e falan ti ɔɔlɔ e dɛ bun ma, e naxa, “Xɛmɛni ito bata sa yigiya hake kanna konni.” 8 Sakeye yi keli a ti, a yi a fala Marigin xa, a naxa, “N kanna, a mato, n na n ma nafunla ɔɔxɔ kedenna soma yiigelitɔne yii nɛn. Xa n bata naxan yii se kansun, n na jɔxɔn naanin naxetema nɛn na kanna ma.” 9 Yesu yi a fala a xa, a naxa, “Muxune bata kisin sɔtɔ denbayani ito yi to. Iburahima bɔnsɔnna nan xɛmɛni ito fan na. 10 Amasɔtɔ naxanye lɔxi ayi, n tan Muxuna Dii Xɛmɛn faxi ne nan fende yi, n yi e rakisi.” 11 Muxune yi Yesu xuiin namɛma, a sandan sa e xa. Bayo a bata yi maso Yerusalɛn taan na, e yi a miri a Alaa Mangayaan yi minima nɛn kenɛnni. 12 Nanara, Yesu naxa, “Muxu gbeena nde yi na nun naxan siga yamana makuyeni, a xa findi a konna mangan na, na xanbi ra, a xɛtɛ a konni. 13 Benun a xa siga a sigatini, a yi a walikɛ fu xili, a xɛma gbananna so e keden kedenna birin yii, a naxa, ‘E kata e tɔnɔn sɔtɔ itoe fari n xanbi han n fa.’ 14 Koni a yamanan muxune bata yi a rajaxu. Nanara, e xɛrane rasiga a ɔɔxɔ ra, e naxa, ‘Nxu mi waxi a xɔn ma, xɛmɛni ito xa mangayaan sɔtɔ nxu xun na.’” 15 “Koni xɛmɛn na yi mangayaan sɔtɔ, a mɔn yi xɛtɛ a konni. A xɛma gbananne so a walikɛɛn naxanye yii, a ne xili mafuren, a e tɔnɔn naxanye sɔtɔxi, e xa na yita a ra. 16 A singe ra xiin yi fa, a naxa, ‘N kanna, i xɛma gbananna naxan so n yii, n bata fu sɔtɔ a fari.’ 17 A yi a yabi, a naxa, ‘I bata i yixɔdɔxɔ, walikɛ fajin nan i tan na, amasɔtɔ i bata lannayaan liga fe xurini, n na i findima nɛn kuntigin na taa fu xun na.’ 18 Walikɛɛn firinden yi fa, a naxa, ‘N kanna, i xɛma gbananna naxan so n yii, n bata suulun sɔtɔ a fari.’ 19 A yi a fala na fan xa, a naxa, ‘N na i dɔxɔma nɛn taa suulun xun na.’ 20 Walikɛɛn bonna fan yi fa, a naxa, ‘N kanna, i ya xɛma gbananna rasuxu. N na a ramaraxi dugi dungin nin. 21 N gaxuxi i yɛɛ ra amasɔtɔ i ya fe xɔdɔxɔ, i gbee mi seen naxan na, i na nan tongoma. I mi naxan wolixi, i na nan xabama.’ 22 A yi a fala a xa, a naxa, ‘I tan walikɛ jɔxina, n na i yalagima i yete dɛ xuiin nan ma! I a kolon fa fala n ma fe xɔdɔxɔ, n gbee mi seen naxan na, n na nan tongoma. N mi naxan sixi, n na nan xabama. 23 Awa, nanfera nayi, i mi n ma gbetin taxu gbeti mara banxin yulane ra, alogo n na

fa waxatin naxan yi, n yi gbetin nun a tɔnɔdin sɔtɔ?”
24 Naxanye yi tixi na yi, a yi a fala ne xa, a naxa, “E xemaan ba ito yii, xemaan gbanan fuun yi naxan yii, e a so na yii.” **25** E yi a fala a xa, e naxa, “Nxu kanna, koni xemaan gbanan fu a tan yii!” **26** A yi e yabi, a naxa, “N xa a fala e xa, seen muxun naxan birin yii, nde sama nen ne xun ma e xa, koni se mi naxan yii hali naxan di a yii, na be a yii. **27** Nba, n yaxuni itoe a mi rafan naxanye ma, n xa findi mangan na, e fa ne ra be yi, e yi e faxes n yetagi!” **28** Yesu ito fala xanbini, a siga e yee ra Yerusalen taani. **29** A maso Betifage taan nun Betani taan na Oliwi Geyaan dexɔn ma waxatin naxan yi, a yi a xarandii firin nasiga a yee ra, **30** a yi a jungu e ma, a naxa, “E siga banxideen na e yee ra. E nema na liye waxatin naxan yi, e sofalidin xidixin toma nen muxe munma dɔxɔ naxan fari singen. E a fulun, e fa a ra be. **31** Xa muxuna nde e maxɔdin fa fala, ‘E ito fulunma nanfera?’ e a fala e xa, e naxa ‘Marigin nan mako a ma.’” **32** Nayi, e yi siga. Marigi Yesu naxan birin fala e xa, e sa na birin li na kiini alo a a fala e xa kii naxan yi. **33** E yi sofalidin fulunma waxatin naxan yi, a kanna yi a fala e xa, a naxa, “E ito fulunma nanfera?” **34** E yi a yabi, e naxa, “Marigin makona a ma.” **35** E siga sofalidin na Yesu fema. E yi e domane yifulun sofalidin fari, e yi Yesu mali a dɔxɔ a fari. **36** A yi sigama waxatin naxan yi, yamaan yi e dugine yifulun kiraan xɔn a yee ra a binya feen na. **37** A maso Yerusalen taan na waxatin naxan yi, a na kiraan li naxan godoma Oliwi Geyaan bun ma. Xarandiin birin yi barikan bira fɔlɔ Ala xa, e yi a tantun e xui yitexin na, fata kabanako feen birin na e naxanye toxi. **38** E yi a fala, e naxa, “Mangan naxan fama Marigin xinli, Ala xa na baraka! Bɔɲe xunbenla xa lu ariyanna yi e nun binyena!” **39** Farisi muxuna ndee yi yamaan ye, na ndee yi falan ti Yesu xa, e naxa, “Karamɔxɔ, i ya xarandiine yamari, e xa e dundu.” **40** Yesu yi e yabi, a naxa, “N xa a fala e xa, xa e dundu, gemeni itoe nan sɔnxɔma.” **41** A maso taan na waxatin naxan yi, a yi a to, a wuga a fe ra, **42** a naxa, “Ee! E tan, xa e yi bɔɲe xunbenla kiraan kolon nun to, na yi lan, koni iki e mi a kolonɲe amasɔtɔ a bata luxun e ma! **43** Lɔxɔna nde a lima e ma nen, e yaxune luma e rabilingɲe nen, e yi gbingbinna rate taan nabilinni, e kiraan bolon e ma yiren birin yi. **44** E e halagima nen, e nun muxun naxanye birin taan kui. Hali geme keden pena, a mi luye a funfuni e taani ito yi, amasɔtɔ Ala fa e kisideni waxatin naxan yi, e mi yi a kolon

nun!” **45** Yesu yi so Ala Batu Banxini, a saresone kedi fɔlɔ, **46** a yi a fala e xa, a naxa, “A seɓexi Kitabun kui, Ala naxa, ‘N ma banxin xili bama nen Ala maxandi banxina.’ Koni e tan bata a findi mujadene luxunden na!” **47** Yesu yi xaranna tima Ala Batu Banxini lɔxɔ yo lɔxɔ. Saraxarali kuntigine nun sariya karamɔxɔne nun yamaan yee ratine yi kata a faxes feen na. **48** Koni e mi yi a kolon e a masote kii naxan yi, bayo yamaan birin yi tuli matixi a ra.

20 Lɔxɔna nde Yesu yi yamaan xaranma Ala Batu Banxini waxatin naxan yi, a yi Alaa falan Xibaru Fajin kawandin ba, saraxarali kuntigine nun sariya karamɔxɔne nun yamaan fonne yi fa. **2** E yi a fala a xa, e naxa, “I feni itoe ligama senben mundun na? Na fala nxu xa. Nde senben soxi i yii, i yi e liga?” **3** Yesu yi e yabi, a naxa, “N xa e maxɔdin, e a fala n xa. **4** Nde Yoni rafaxi, a xa muxune rafu igeni e tubi xinla ma, a kelixi Ala nan ma ba, hanma muxune?” **5** E yi falan ti fɔlɔ e bode xa, e naxa, “Xa en na a fala fa fala, ‘A kelixi Ala nan ma,’ a falama nen nayi fa fala, ‘Nanfera, e mi laxi Yoni ra?’” **6** Koni xa en na a fala fa fala, ‘A kelixi muxun nan ma,’ yamana en magɔlɔnma nen, amasɔtɔ e yi laxi a ra fa fala nabiin nan yi Yoni ra nun.” **7** Nanara, e yi a yabi, e naxa, “Nxu mi a keliden kolon.” **8** Yesu yi a fala e xa, a naxa, “N tan fan feni itoe ligama senben naxan na, n mi na falama e xa na yi.” **9** Na xanbi ra, Yesu yi sandani ito sa yamaan xa, a naxa, “Muxuna nde yi manpa bili nakɔɔn sa, a yi a taxu a kantan muxune ra, a keli a konni, a sa buye ayi. **10** A bogi waxatina a lixina, a yi a walike keden xe nakɔɔn kantan muxune ma, a e xa sa a gbeen so a yii, koni a kantan muxune yi na walikeen bɔnbɔ, e yi a raxete, e mi se so a yii. **11** Na xanbi ra, a walike gbete xe e ma, e yi na fan bɔnbɔ, e yi a rayagi kati, e yi a raxete, e mi sese so a yii. **12** A yi walikeen saxanden nasiga e ma. E yi na fan maxɔlɔ, e yi a kedi. **13** Awa, na xanbi ra nako kanna naxa, ‘N nanfe ligama? N xa n nafan dii xemen nasiga e ma, yanyina nde, e danma nen na ra.’ **14** Koni a kantan muxune to a to, e yi a fala e bode xa, e naxa, ‘Nako kanna ke tongon nan ito ra. En na a faxes alogo nakɔɔn xa findi en gbeen na.’ **15** E yi a torotoron nakɔɔn fari ma, e sa a faxes. Awa, nako kanna na fa waxatin naxan yi, a nanfe ligama a kantan muxune ra? **16** A na muxune faxama nen, a nakɔɔn taxu muxu gbete ye ra.” Yamaan to na me, e naxa, “Ala xa nxu tanga na ma.” **17** Yesu yi e mato, a

yi e maxodin, a naxa, “Kitabun yireni ito bunna di? A naxa, ‘Banxi tiine e me gemen naxan na, na bata findi banxin geme fisamantenna ra.’ 18 Naxan yo na bira gemeni ito fari, na yigirama nen dungi dungin na. Xa a nu bira naxan yo fari, a na yilunburunma nen.” 19 Sariya karamoxone nun saraxarali kuntigine yi kata Yesu suxu feen na na waxatini amasoto e yi a kolon a sandani ito saxi e tan nan ma fe ra koni e gaxuxi yamaan yee ra. 20 Nanara, e feren fen. E seen so muxuna nde yii naxanye e yete finde muxu tinxinxin na, e ne xe Yesu ma a suxu feen na a fala xuine xon ma alogo e xa no a rasoe yamana kanma senben nun a noon bun ma. 21 Na muxune yi a maxodin, e naxa, “Karamoxo, nxu a kolon i xaranna naxan tima e nun i falan naxan tima, e tinxin. Nxu a kolon fa fala i mi muxune rafisaxi e bode xa. I muxune xaranma Alaa kiraan nan ma jondini. 22 A fala nxu xa, xa nxu lanma nxu xa mudun so Romi Manga Gbeen yii ba?” 23 Koni Yesu yi e yanfantenyaan to, a yi a fala e xa, a naxa, 24 “E gbeti gbananna yita n na. Nde xili nun a yetagin sawura a ma?” E yi a yabi, e naxa, “Romi Manga Gbeen.” 25 Nanara, Yesu naxa, “Mangan gbeen xa so a yii, Ala gbeen xa so Ala yii.” 26 E mi no a suxun feren sote yamaan yetagi. Nanara, e yi e dunderu, e kabe a fala ti kiin ma. 27 Saduse muxune yi e maso Yesu ra naxanye a falama a faxesa muxune mi kelima sayani, e yi a maxodin, e naxa, 28 “Karamoxo, Musa sariyani ito sebe nen nxu xa, a naxa, ‘Xa xemen faxesa, a jaxanla lu, koni a mi dii lu, na xemena ngaxakedenna nde xa ke jaxanla tongo, e yi diin bari faxesa muxun xa.’ 29 Awa, ngaxakedenmane muxu solofere yi na yi nun, forimaan yi jaxanla futu, a faxesa, a mi dii soto. 30 A firinden yi na jaxanla tongo, 31 a saxanden fan yi a tongo. Awa, a liga na kiini muxu soloferene birin na, e birin yi faxesa, e mi dii soto. 32 Donexen na, jaxanla fan yi faxesa. 33 Awa, faxesa muxune na keli sayani waxatin naxan yi, a findima nde a jaxalan na nayi? Bayo e muxu soloferene birin bata yi a tongo!” 34 Yesu yi e yabi, a naxa, “Waxatini ito yi, xemene jaxanla futuma nen jaxanle fan yi doko xemen xon, (aiɔn g165) 35 koni naxanye na keli sayani waxati famatoni, na xemene mi jaxalan fute, a jaxanle mi duxe xemen xon. (aiɔn g165) 36 E luma nen nayi alo malekane. E mi faxama, e findima Alaa diine nan na amasoto e bata keli sayani. 37 Koni Musa na yita nen a faxesa muxune kelima nen sayani. Awa, Kitabun kui, fotondin gan feen sebexi denaxan yi, Musa yi falan ti Marigina fe yi, a naxa,

‘Iburahimaa Ala nun Isiyagaa Ala nun Yaxubaa Ala.’ 38 Awa, a bunna ni ito ra fa fala niiramane Ala nan a tan na, faxesa muxune gbee mi a ra, amasoto e birin niina e yi Ala yee ra yi.” 39 Sariya karamoxona ndee yi falan ti a xa, e naxa, “Karamoxo, i bata a yabi ki fapil!” 40 Na xanbi ra, e mi fa susu a maxodinfe fefe ra. 41 Yesu yi a fala e xa, a naxa, “E a falama di fa fala Dawuda bomsonna nan Alaa Muxu Sugandixin na?” 42 Amasoto Dawuda yeteen bata a fala Yaburin Kitabun kui, a naxa, ‘Marigin yi a fala n marigin xa, a naxa, “Doko n yiifanna ma 43 han n yi i yaxune sa i sanna bun ma.”’ 44 “Dawuda yi a xili, a naxa, ‘N Marigina.’ Awa, Alaa Muxu Sugandixin findixi Dawuda bomsonna ra di?” 45 Yamaan birin yi e tuli mati Yesu ra, a yi a fala a xarandiine xa, a naxa, 46 “E a liga e yeren ma sariya karamoxone fe yi. A rafan e ma e xa doma gbeene ragodo e ma, e yi lu e masiga tiye. A rafan e ma yamaan xa e binya, e yi e xonton loko tidene yi. A rafan e ma e xa muxu gbee daxonen soto salide banxini e nun doko de fapine malanni. 47 E kaja gilene yii seene bama e yii. E yi e yete mayita sali xunkuyeni. E yalagima nen na feene ra han a radangu ayil!”

21 Yesu yi a yeen nasiga, a nafulu kanne to, e kiseen sama Ala Batu Banxin gbeti maradeni. 2 A kaja gile yiigelitona nde fan to, a gbanan firin sama gbeti sa seen kui. 3 Yesu naxa, “N xa jondin fala e xa, kaja gile yiigelitoni ito bata naxan sa, na gbo bonne birin gbeen xa. 4 Amasoto bonne naxan saxi, e nafulu donxen xa mi ne ra. Koni a tan, hali yiigelitodon to a ra, naxan birin a yii a balon na, a na nan saxi.” 5 Muxune yi a falama a Ala Batu Banxin yi maxidixi geme to fapine nan na e nun muxune yi fama seen naxanye ra kiseen na Ala xa. Yesu naxa, 6 “E naxan toma ito ra, waxatina nde fama, gemen naxanye birin banxini ito yi, keden mi luye a funfuni, e e birin naxuyama ayi nen.” 7 E yi a maxodin, e naxa, “Karamoxo, na ligama waxatin mundun yi? Taxamasenna mundun a yitama nxu ra fa fala a waxatin bata a li?” 8 Yesu naxa, “E a liga e yeren ma alogo muxe nama e mayenden. Amasoto muxu wuyaxi fama nen n xinli, e yi a fala, e naxa, ‘A tan nan n tan na.’ E naxa, ‘Waxatin bata a li!’ Koni e nama bira ne foko ra. 9 E na yenge feene nun murute feene me waxatin naxan yi, e nama gaxu amasoto a fere mi na fo ne xa liga singen. Koni waxati rajanna munma maso singen.” 10 A lu falan tiye, a naxa, “Siya keden siyaan bonna yengema nen yamana

keden yi yamanan bonne yenge. **11** Bəxən xuruxurun gbeen tima nən e nun fitina kəmen nun fitina furen yi so yirena ndee yi. Gaxu fe gbeene nun taxamaseri gbeene ligama nən kore xənna ma. **12** Koni benun feni itoe birin xa liga, e e suxuma nən, e yi e bəsenxənya. E yi e raso salide banxine yi, e yi e makiti, e yi e sa kasoon na. E sigama e ra nən mangane nun kuntigine fema n tan ma fe ra. **13** Nayi, e findima nən n serene ra e xa. **14** E nama xamin, e sa e xun mafalama naxan na. **15** Amasəto n falan nun xaxinla soma e yii nən. Nanara, e yaxune mi e tandə e yi e nə. **16** E soto muxune nun e ngaxakedenne nun e xabilane nun e xəyine e soma nən e yii, e yi e tan ndee faxa. **17** Muxun birin e rapaxuma nən n tan ma fe ra. **18** Koni hali e xun sexə kedenna mi lə ayi. **19** Nayi, e tunnafan alogo e niin xa ratanga.” **20** “E na a to waxatin naxan yi, sofane bata Yerusalen taan nabilin, e a kolonma nən nayi fa fala a kala waxatin mi fa buma sənən. **21** Xa naxan Yudaya yi na waxatini ne xa e gi, e siga geyane fari. Naxanye taan kui, ne xa e gi, e keli taani. Naxanye xən ma, ne nama xetə taani. **22** Amasəto ‘Təron Ləxəne’ nan ne ra, Kitabun naxan fala, a na birin xa kamali. **23** Gbalo gbeen ligama nən fudi kanne nun dii ngane ra na ləxəne yi! Təro gbeen fama nən bəxə xənni ito ma. Alaa xolon fama nən yamani ito xili ma. **24** E faxama nən silanfanna ra, ndee sigama nən konyiyani yamanan birin yi. Yerusalen taan luma nən siya gbetene bun ma han e waxatin yi defe.” **25** “Awa, na waxatini taxamasenna sama nən sogen ma, e nun kiken nun sarene ma. Dunuja siyane birin yigitəgema nən nayi, e gaxu fəxo igen xuiin nun xunfan gbeen yəe ra. **26** Feen naxanye ligama dunuja yi, muxune nəma ne mame waxatin naxan yi, e gaxuma nən, e fuga a ra. Amasəto kore xənna senbeni maxama nən. **27** N tan Muxuna Dii Xemen minima nən kənenni, n fa kundani senbeni e nun binye gbeeni. **28** Koni feni itoe na liga fəlo waxatin naxan yi, e xa e xunna rakeli, e yi e yəen nabi amasəto e xunba waxatin bata maso.” **29** Na xanbi ra, Yesu yi sandana nde sa e xa, a naxa, “E e xaxili lu xəde binla nun wudin birin xən ma. **30** E na jingi waxatin naxan yi, e a kolonma nən nayi fa fala jəmen bata maso. **31** A na kii nin, e na feni itoe to lige waxatin naxan yi, e a kolonma nən nayi fa fala Alaa Mangayaan fa waxatin bata maso.” **32** “N xa jəndin fala e xa. Iki muxune mi danguma fə na feene birin liga. **33** Kore xənna nun bəxə xənna danguma nən koni n ma falane mi danguma habadan.” **34** “E a

liga e yeren ma! E nama e yete findi fudimane nun dolo minne ra. E nama xamin e lu kiina fe ra alogo na Ləxən nama e ratərena. **35** Amasəto a dunuja muxune birin naterənəma nən alo woson suben naterənəma kii naxan yi. **36** E lu e yəe ra yi, e yi Ala maxandi waxatin birin, e senben soto, e ratanga feni itoe birin ma naxanye ligama alogo e xa ti n tan Muxuna Dii Xemen yetagi.” **37** Yesu yi xaranna tima Ala Batu Banxini nən yanyin na, a sa kəen nadangu geyaan fari naxan xili Oliwi. **38** Yamaan birin yi sigama nən a fema xətənni Ala Batu Banxini, alogo e xa e tuli mati a ra.

22 Buru Tetaren Sanla yi maso naxan xili Halagi Tiin Dangu Ləxən Sanla. **2** Saraxarali kuntigine nun sariya karaməxəne yi kata Yesu faxan feren fendeni, koni e yi gaxuxi yamaan yəe ra. **3** Setana yi so Yudasi yi, naxan xili Isakariyoti, xarandii fu nun firinna nde nan yi a ra. **4** Awa, Yudasi yi siga, a sa a fala saraxarali kuntigine nun Ala Batu Banxin kantan muxune kuntigine xa, a nəe Yesu soe e yii kii naxan yi. **5** Na yi rafan e ma, e gbetin ba, a e xa a saren fi. **6** Yudasi yi tin na ma, a feren fen fəlo, a nəe Yesu soe e yi kii naxan yi hali yamaan mi fe kolon ayi. **7** Buru Tetaren Sanla yi a li, yexəe diin faxa waxatin yi a li Halagi Tiin Dangu Ləxən Sanla fe ra. **8** Yesu yi Piyeri nun Yoni xə, a yi a jundu e ma, a naxa, “E sa Halagi Tiin Dangu Ləxən Sanla ximenna rafala en xa.” **9** E yi a maxodin, e naxa, “I waxi a xən ma, nxu xa a rafala minen yi?” **10** A yi e yabi, a naxa, “E nəma soma taani waxatin naxan yi, e xeməna nde lima kira yi, ige fejen dəxi a xun ma. E bira a fəxo ra han a na so banxin naxan kui. **11** E yi a fala na banxin kanna xa, e naxa, ‘Karaməxo naxa, a xəje yigiyaden minen yi, a tan nun a xarandiine Halagi Tiin Dangu Ləxən Sanla donseen donma denaxan yi?’ **12** A banxin yire gbeena nde yitama e ra nən kore banxin kəe ra, naxan kui yitənxi ki fapi. E donseene rafalama mənna nin.” **13** E sa seen birin li na yi alo Yesu a fala e xa kii naxan yi. E Halagi Tiin Dangu Ləxən Sanla ximenna rafala mənni. **14** Na waxatina a lixina, Yesu yi dəxo a degedeni e nun a xera fu nun firinne. **15** A yi a fala e xa, a naxa, “A xənla n ma kati, n xa Halagi Tiin Dangu Ləxən Sanla donseen don e xən benun n xa tərə! **16** Amasəto n xa a fala e xa, n mi a donma sənən han a bunna rakamalima Alaa Mangayani waxatin naxan yi.” **17** Na xanbi ra, Yesu yi igeləngenna tongo, a barikan bira

Ala xa, a naxa, “E ito tongo, e yi a yitaxun e ra. 18 Amasoto n xa a fala e xa, en wudi bogi igen naxan minma ito ra, n mi fa a minma han Alaa Mangayaan yi fa.” 19 Na xanbi ra, a burun tongo, a barikan bira Ala xa, a yi a yigira, a yi a so e yii, a naxa, “N fati benden ni ito ra naxan fixi e fe ra, e xa ito liga naxan n ma fe rabire e ma.” 20 Ximen donna baxi na a ra, a yi igelengenna fan tongo na kiini, a naxa, “Igelengenni ito, Layiri Nenen na a ra naxan xidima en tagi n wunla xon naxan minima e fe ra.” 21 “Koni a mato! Muxun naxan n yanfama, a n so yiini, na kanna a degema n xon be yi! 22 Awa, Muxuna Dii Xemen faxama nen alo Ala bata a ragidi kii naxan yi, koni muxun naxan a yanfama, gbalon na kanna yee ra!” 23 E yi e bode maxodin folo naxan na ligama e ye. 24 Matandin yi keli xarandiine tagi fa fala muxune mirima nde ma e tagi a gbo dangu e birin na. 25 Yesu yi a fala e xa, a naxa, “Siyane mangane noyaan nan ligama e xun na. Kuntigine e xili bama nen fa fala, ‘Yamaan Yatigine.’ 26 Koni a mi na kiini e tagi. Naxan gbo e birin xa e tagi, fo na xa lu alo dii jorena. E yeeratiin xa liga alo walikena. 27 Amasoto nde gbo dangu bodene ra, naxan doxi a degedeni hanma naxan fama donseen na a xa? Naxan a degema, na nan gbo! Koni n tan e tagi alo walikena.” 28 “E bata lu n fema n ma toron birin yi. 29 Nanara, n mangayaan fima e ma alo n Fafe Ala bata a fi n ma kii naxan yi. 30 E e degema nen, e yi e min n xon ma n ma Mangayani, e doxo mangaya gbedene yi. E yi Isirayila bonson fu nun firinne makiti.” 31 Yesu naxa, “Ee! Simon, i tuli mati, Setana bata Ala mafan alogo a xa tin Setana yi e birin mato, a yi e yife alo xee biina a maali fema kii naxan yi, a yi a deela ba a yi. 32 Koni Simon, n bata Ala maxandi i xa alogo i ya denkeleyaan nama jan. I mon na xete n fema waxatin naxan yi, i yi i ngaxakedenne senbe so.” 33 Piyeri yi a yabi, a naxa, “Marigina, n bata n yiton siga feen na kasoni i foxo ra, n faxa i foxo ra!” 34 Yesu yi a yabi, a naxa, “Piyeri, n xa a fala i xa benun dontonna xa wuga, i a falama nen sanja ma saxan, i naxa, i mi n tan kolon.” 35 Na xanbi ra, Yesu yi a fala e xa, a naxa, “N na e xe waxatin naxan yi, e mi siga gbeti yo ra e yii, hanma benbelidina hanma sankidina, sena nde dasa nen e ma ba?” E yi a yabi, e naxa, “Sese mi dasa.” 36 Yesu naxa, “Koni iki xa gbeti sa seen naxan yii hanma benbelidina, a xa a tongo. Silanfan mi muxun naxan yii, na xa a domaan mati, a silanfanna sara. 37 Amasoto n xa a fala e xa, Kitabun naxan falaxi n tan

ma fe yi fo na xa kamali nen, a naxa, ‘A yate nen alo fe jaxi rabane.’” 38 Xarandiine naxa, “Marigina, a mato, degema firin be yi.” A yi e yabi, a naxa, “Na bata wasa ti.” 39 Yesu yi keli na yi, a siga Oliwi Geyaan fari alo a darixi a lige kii naxan yi. Xarandiine yi siga a foxo ra. 40 A na yiren li waxatin naxan yi, a yi a fala e xa, a naxa, “E Ala maxandi alogo e nama bira tantanni.” 41 Na xanbi ra, a keli e fema, a yi a makuya e ra ndedi, a yi a xinbi sin, a yi Ala maxandi. 42 A yi a fala, a naxa, “N fafe, xa i tinje, i xa toroya igelengenni ito masiga n na, koni n tan sagoon nama liga fo i tan sagona.” 43 Malekan yi mini kenenni a xa, keli ariyanna yi, a yi senben fi a ma. 44 A toroxi kii naxan yi, a yi a yixodoxo Ala maxandideni na kiini. Kuye wolonna yi mini a ma, a lu dindinye alo wunla. 45 A yelin Ala maxande waxatin naxan yi, a xete a xarandiine fema, a yi e sunuxin li xixonli! 46 A yi a fala e xa, a naxa, “E xima nanfera? E keli, e yi Ala maxandi alogo e nama bira tantanni.” 47 A yi fala tiini waxatin naxan yi, ganla yi fa, Yudas xarandii fu nun firinna nde tixi yamaan yee ra, a fa Yesu fema a sunbudeni. 48 Koni Yesu naxa, “Yudas, i n tan Muxuna Dii Xemen yanfama sunbun nan xon ma ba?” 49 Xarandiin naxanye yi Yesu foxo ra, feen naxan fama ligadeni Yesu ra, e na to waxatin naxan yi, e naxa, “Marigina, nxu xa nxo silanfanne tongo, nxu yengen so ba?” 50 E tan nde yi Saraxarali Kuntigi Singena konyin yiifari ma tunla sege a ma. 51 Koni Yesu yi e yabi, a naxa, “A lu.” Yesu yi a yiin sa na xemen tunla ma, a kendeaya. 52 Na xanbi ra, Yesu yi a fala saraxarali kuntigine nun Ala Batu Banxin kantan muxune kuntigine nun yamaan fonne xa naxanye faxi a suxudeni, a naxa, “E bata fa silanfanne nun gbengbetenne ra n xili ma alo gbalotcon nan n tan na ba? 53 N yi e fema Ala Batu Banxini nun loxo yo loxo, e mi kata e yi n suxu. Koni e waxatin na a ra iki e nun dimin senbena.” 54 E yi Yesu suxu, e siga a ra Saraxarali Kuntigi Singen konni, Piyeri yi bira a foxo ra koni e yi tagi kuya. 55 E yi teen sa kiti saden tanden tagi, e yi a doxo menni. Piyeri yi doxo e fema. 56 Walike jaxanla nde a to doxi teen xon xa waxatin naxan yi, a yi a mato ki faji, a naxa, “Xemeni ito fan yi a foxo ra nun yati!” 57 Piyeri yi a tandi, a naxa, “Ee! I tan jaxanla, n mi a kolon mume!” 58 A mi bu na xanbi ra xemena nde fan yi a to, a naxa, “A tan nan nde i tan fan na!” Koni Piyeri yi a yabi a naxa, “Ee! I tan xemena, a tan se mi n tan na de!” 59 Awa, waxatidi danguxina, xemena nde fan yi a fala a xa a sobeen na,

a naxa, “Sike yo mi naxan yi, xemēni ito yi a fōxo ra nun amasōto Galile kaan nan a tan fan na!” **60** Koni Piyeri yi a yabi, a naxa, “Ee! I tan xemēna, i naxan falama, n mi na kolon!” Awa, a yi falan tima waxatin naxan yi, dontonna yi wuga mafuren! **61** Marigin yi a firifiri, a Piyeri mato. Piyeri yi a miri Marigina falan ma alo a fala kii naxan yi, a naxa, “Benun dontonna xa wuga to, i a falama nen dōxo saxan a i mi n kolon.” **62** Piyeri yi mini, a soxōle wugan ti! **63** Muxun naxanye yi Yesu kantanma, ne yi Yesu magele, e yi a bōnbō. **64** E yi a yēen maxidi, e yi a maxōdin, e naxa, “Nde i bōnbōxi? Nabiya falane ti nxu xa.” **65** E yi a makonbi han! **66** Kuye yibaxina, yamaan fonne nun saraxarali kuntigine nun sariya karamōxōne yi e malan, e fa Yesu ra Kitisa Gbeene fema. **67** E yi a fala, e naxa, “Xa Alaa Muxu Sugandixin nan i tan na, a fala nxu xa.” A yi e yabi, a naxa, “Xa n na a fala ε xa, ε mi lama n na. **68** Xa n na ε maxōdin, ε mi n yabe, **69** koni fōlo iki ma, n tan Muxuna Dii Xemen dōxōma nen Ala Sēnbemaan yiifanna ma.” **70** E birin naxa, “Alaa Dii Xemen nan i tan na nayi ba?” A yi e yabi, a naxa, “E bata a fala. A tan nan n tan na.” **71** E yi a fala, e naxa, “En mako mi fa sere ma sōnon! En tan yetēen bata a xuiin me!”

23 Yamaan birin yi Yesu tongo, e siga a ra Pilati fema, 2 e a kansun fōlo na yi, e naxa, “Nxu bata xemēni ito suxu, a nxō siyani murutema. A yi a fale e xa, a e nama mudun so Manga Gbeen yii. A naxa, a tan nan Alaa Muxu Sugandixin na e nun mangana.” **3** Awa, Pilati yi a maxōdin a naxa, “Yahudiyane mangan nan i tan na ba?” Yesu yi a yabi, a naxa, “Ɔn, alo i a falaxi kii naxan yi.” **4** Na xanbi ra, Pilati yi a fala saraxarali kuntigine nun yamaan xa, a naxa, “N mi xemēni ito yalagi fe toxi hali!” **5** Koni e mōn yi kata, e naxa, “A bata yamaan tagi so a xaranna xōn ma! A fōloxi Galile nin han sa dōxo Yudaya birin na, iki a bata fa be fan yi.” **6** Pilati ito mē waxatin naxan yi, a yi maxōdinna ti, a naxa, “Galile kaan nan xemēni ito ra ba?” **7** A na kolon waxatin naxan yi fa fala Yesu kelixi na yamanan nin Herode yi kuntigiyani denaxan yi, a yi a rasiga a ma, Herode fan yi Yerusalen taani na waxatini. **8** Herode Yesu to waxatin naxan yi, na yi rafan a ma kati, amasōto a bata yi Yesu a fe mē nun! A xōnla yi a ma nun, a xa a to xabu waxati xunkuye. A yi waxi a xōn ma, a xa Yesu to kabanako fena ndee lige. **9** Nanara, Herode yi Yesu maxōdin sanja ma wuyaxi, koni Yesu mi a yabi hali fala keden peen na!

10 Saraxarali kuntigine nun sariya karamōxōne yi Yesu kansun kati! **11** Herode nun a sofane yi Yesu magele, e yi a rafeya kati! E yi doma fajnin nagodo a ma, e yi a raxete Pilati ma. **12** Na lōxōn yetēni Pilati nun Herode yi findi xōyimane ra amasōto e mi yi rafan e bode ma nun. **13** Pilati yi saraxarali kuntigine nun mangane nun yamaan maxili, a yi e malan, **14** a yi a fala e xa, a naxa, “E bata fa xemēni ito ra n fema, a a yamaan namurutema. Nba, n bata a fese fese ε yēe xōri. E a kansunxi fe jiaxin naxanye ra, n mi a sōn toxi hali keden. **15** Herode fan mi a sōn toxi. Nanara, a bata a raxete n ma, xemēni ito mi fe yo ligaxi a faxe naxan ma. **16** Awa, n xa a bōnbō, n yi a bejin.” **17** Bayo Halagi Tiin Dangu Lōxōn Sali waxatine yi, fō Pilati xa muxu keden namini nen kasoon na e xa. **18** Muxune birin yi sōnxō, e naxa, “Yesu xa faxa, i Baraba bejin nxu xa!” **19** Baraba yi kasoon na muruten nun muxu faxa feen nan ma taani. **20** A xoli yi Pilati ma a xa Yesu bejin. Nanara, a mōn yi yamaan xili. **21** Koni e mōn yi sōnxō, e naxa, “A gbangban wudin ma!” **22** Pilati yi a fala e xa sanja ma saxan, a naxa, “A fe jiaxin mundun ligaxi? N mi fe jiaxi yo toxi a ra a faxe naxan ma. N xa a bōnbō, n yi a bejin.” **23** Koni e lu sōnxōe, e yi e xuini te, e naxa, a Yesu xa gbangban wudin ma. E kui feen yi liga e sōnxō sōnxōna fe ra. **24** Nanara, Pilati yi a kitin bolon alo e a fala a xa kii naxan yi. **25** E waxi xemen naxan xōn ma, a na bejin e xa naxan sa kasoon na muruten nun muxu faxa feen na. Awa, a Yesu so e yii a e xa e rafan feen liga a ra. **26** E sigama Yesu ra a gbangbandeni wudin ma waxatin naxan yi, e lan xemēna nde ra, a xili Simōn Sireni kaana. A kelima xēen ma siga taani. E yi a suxu, e Yesu gbangban wudin sa a xun ma, e yi a bira Yesu fōxo ra. **27** Muxu wuyaxi yi bira a fōxo ra. Naxanla ndee yi e yē nun, ne yi e yiin sa e xun ma, e gbelegbele a fe ra. **28** Yesu yi a yēe rafindi e ma, a yi a fala e xa, a naxa, “Yerusalen jaxanle, ε nama wuga n tan ma fe ra, koni ε wuga ε yete nun ε diine fe ra. **29** Amasōto lōxōna nde fama, muxuna nde a falama nen fa fala, ‘Sewan gbantane xa, sewan jaxanle xa naxanye mi dii barixi, dii nga mi e ra.’ **30** Nayi, muxune a falama nen geyane xa, e naxa, ‘E bira nxu fari,’ e yi a fala yire matexine xa, e naxa, ‘E nxu yē maluxun.’ **31** Amasōto xa fe sifani itoe liga wudi xinden na, nanfe ligama wudi xaren na nayi?” **32** E fe jiaxi raba firinne fan tongo, a e xa faxa Yesu fema. **33** E na yiren li waxatin naxan yi naxan xili “xun xōri yirena,” e Yesu gbangban wudin ma na yi e nun

fe jaxi raba firinne, keden a yiifanna ma, bodena a komenna ma. **34** Yesu naxa, “N Fafe, e mafelu, amasoto e naxan ligama e mi na kolon.” Awa, e yi masensenna ti lan a dugine yitaxun feen ma. **35** Yamaan yi ti na yi, e lu Yesu matoe. Yamaan kuntigine yi a magele, e naxa, “A bata bodene rakisi, xa Alaa Muxu Sugandixin nan a tan na, a xa a yete rakisi!” **36** Sofane fan yi a magele, e fa a fema, e yi minse muluxunxin ti a xa. **37** E yi a fala, e naxa, “Xa Yahudiyane mangan nan i tan na, i yete rakisi.” **38** E falani itoe sebe a xun ma, e naxa, “Yahudiyane Mangan ni ito ra.” **39** Fe jaxi rabaan naxanye yi gbangbanxi a fema, na nde keden yi a rayelefu, a naxa, “Alaa Muxu Sugandixin xa mi i tan na ba? I yete rakisi e nun nxu tan fan!” **40** Koni bonna yi a maxadi, a naxa, “I mi gaxue Ala yee ra ba? En tan fan yalagin nan bun ma be yi. **41** Koni en gbeen lanxi, amasoto en na en ma fe jaxin saranna nan sotoma ito ra. Koni a tan mi fe jaxi yo ligaxi.” **42** A yi a fala Yesu xa, a naxa, “Yesu, i na fa i ya Mangayani waxatin naxan yi, i xa i xaxili lu n xon ma!” **43** Yesu yi a fala a xa, a naxa, “N xa jondin fala i xa, i luma n fema nen ariyanna yi to.” **44** Sogen bata yi a ratinxin, dimin yi so yamanan yiren birin yi han se din waxatin yi maso. **45** Sogen yi dimi. Awa, dugin naxan yi singanxi Ala Batu Banxin tagi, na yi bo firinna ra. **46** Yesu yi a xuini te kati, a naxa, “N Fafe, n bata n niin so i yii.” A na fala xanbini, a faxesa. **47** Feen naxan liga, sofa kemen kuntigin yi na to, a yi Ala tantun, a naxa, “Muxu tinxinxin yatin nan yi ito ra!” **48** Muxun naxanye fa fe yigbedeni, a feen naxanye ligaxi e yee xori, e ne to waxatin naxan yi, e birin yi xete e konni, e yiin saxi e xun ma, e wugama. **49** Naxanye birin yi Yesu kolon ki faji e nun jaxanla naxanye bira a foxo ra keli Galile yi, ne yi sa ti yire makuyeni, e lu feni itoe matoe. **50** Xemena nde yi na nun, a xili Yusufu. A yi yamaan fonne ye. A yi fan, a yi tinxin. **51** A mi yi tinxi bonne kiti saxin nun e kewanle ma. Arimate taan muxuna nde nan yi a ra, Yudaya yamanana. A yi Alaa Mangayaan nan mamema. **52** A siga Pilati konni, a sa a maxodin Yesu binbina fe ma. **53** A yi a binbin ba wudin koe ra, a yi a kasangen. Awa, gaburun naxan gexi fanyeni alo faran yinla, muxe munma yi sa naxan kui singen, a yi sa a maluxun menni. **54** Yuman nan yi a ra nun. Matabu Loxon bata yi maso nun. **55** Naxanla naxanye bira Yesu foxo ra keli Galile, ne yi siga Yusufu foxo ra, e sa gaburun to, aloge e xa a kolon Yesu binbin saxi kii naxan yi. **56** E

xete e konni, e sa se xiri jaxumene nun latikononna rafala a binbin xa. E yi e matabu Matabu Loxoni alo sariyana a fala kii naxan yi.

24 Xati loxon xoton xotonni, jaxanle ture xiri jaxumen naxanye rafalaxi, e yi siga ne ra gaburu deen na. **2** E yi a li gemen baxi gaburun de ra. **3** E yi so gaburun kui koni e mi Marigi Yesu binbin to na yi. **4** E kuisanxin yi lu tixi na yi, e yi e terena xeme dugi mayilenxi kan firinna e dexon ma. **5** Naxanle yi gaxu kati, e yi e xinbi sin, e e tigine sin boxon ma. Na xeme firinne yi a fala jaxanle xa, e naxa, “E niiramaan fenma faxesa muxune ye nanfera?” **6** A mi be, a bata keli sayani. A yi Galile yi waxatin naxan yi, a naxan fala e xa, e xaxili lu na xon ma. **7** A naxa, “Fo Muxuna Dii Xemen xa so hake kanne yii, e yi a gbangban wudin ma, a soqe saxandeni a keli sayani.” **8** Na xanbi ra, a falane yi rabira jaxanle ma. **9** E xete keli gaburu deen na, e sa na birin fala xarandii fu nun kedenna xa e nun a muxune birin. **10** Naxanli itoe nan a fala xerane xa, Mariyama Magadala kaan nun Yoyana nun Mariyama Yaki nga e nun jaxanla bonne, ne yi feni itoe fala xerane xa. **11** Koni e yi a miri a jaxanle daxuya falan nan tixi, e mi la e ra mume! **12** Koni Piyeri yi keli, a siga gaburu deen na, a yi a yigodo, a yi a ye masa gaburun kui, a kasangenna kui genla to saxi, a xete a konni. Feen naxan ligaxi, a kabema na ra. **13** Na loxo yeteni, muxu firin yi sigama taadina nde yi naxan yi xili Emayusi, e nun Yerusalen taan yi tagi kuya ndedi. **14** Feen naxanye bata yi liga, e batuma na feene ma. **15** E yi batuma waxatin naxan yi, Yesu yi a maso e ra, e birin yi lu sige. **16** E yi a to koni hali na, e mi a kolon. **17** Yesu yi a fala e xa, a naxa, “E sigama kiraan xon waxatin naxan yi, e yi nanfe falama?” E sunuxin yi ti. **18** Na nde keden, naxan yi xili Kelopa, na yi a yabi, a naxa, “I tan keden peen nan Yerusalen taani ba, naxan mi a kolon feen naxanye ligaxi menni waxati danguxini itoe yi?” **19** A yi a maxodin, a naxa, “Nanfe ne ra?” E yi a yabi, e naxa, “Feen naxan ligaxi Yesu Nasareti kaan na. Nabi senbe kanna nan yi a ra a falan nun kewanli Ala nun yamaan birin yetagi. **20** Saraxarali kuntigine nun en ma kuntigine yi a suxu, alogo e xa a faxesa. E yi a gbangban wudin ma. **21** Anu, nxu bata yi nxu yigi sa a yi nun fa fala a tan nan Isirayila muxune xunbaan na. A birin mi na ra, a ligan soqe saxanna nan to, **22** jaxanla ndee yi nxu tagi, ne nxu rakontofili nen. E siga nen gaburu deen na

subaxani, 23 e mi a binbin to, e xete, e fa a fala nxu xa, a malekane mini nen e ma naxanye a fala e xa, a a niin bata bira ayi! 24 Nxu lanfana ndee yi siga gaburu deen na, e sa a to alo naxanle a fala nxu xa kii naxan yi, a yatin ligaxi na kii nin, koni e mi a to.” 25 Awa, Yesu yi a fala e xa, a naxa, “E xaxili mi na. Nabine feen naxanye birin fala e xa, e mi la ne ra e bojeni xulen! 26 E mi a kolon a lanma Alaa Muxu Sugandixin xa toro feni itoe ra benun a xa so a binyeni?” 27 Na xanbi ra, feen naxan birin falaxi Yesu a fe yi Kitabun kui, folo Nabi Musaa Kitabun ma, han nabi gbeteŷe, a na birin yeŷa e xa. 28 E yi sigama taan naxan yi nun, e to maso menna ra, Yesu yi a liga alo a dangumatoon na a ra. 29 Koni e yi a raxete, e naxa, “Lu nxu fema amasoto koc soamaan ni i ra, dimin yi so.” Nayi, a yi lu e fema. 30 A doxo a degedeni e fema, a burun tongo, a barikan bira Ala xa, na xanbi ra a buruni gira, a yi a so e yii. 31 E yeen yi rabi mafuren, e yi a kolon fa fala a Yesu na a ra. Koni a tunun e yetagi. 32 E yi a fala e bode xa, e naxa, “A ligaxi nen alo teen nan yi en kuiin ganma, a Kitabun feseŷesema en xa waxatin naxan yi kiraan xon ma.” 33 E keli mafuren, e xete Yerusalen taani, e xarandii fu nun kedenna li malanxi denaxan yi e nun bonne. 34 E yi a fala, e naxa, “Marigin bata keli sayani yati! Simon bata a to!” 35 Feen naxan liga kiraan xon ma, muxu firinne yi ne yeŷa e xa, e Marigin kolon kii naxan yi, a buruni gira waxatin naxan yi. 36 E yi ito falama waxatin naxan yi, Marigin yeteen yi ti e tagi mafuren, a yi a fala e xa, a naxa, “Ala xa e bojen xunbeli.” 37 E gaxu kati, e yi e miri, e naxa, a e bata muxun yelenna to. 38 Koni a yi a fala e xa, a naxa, “E kuisanxi nanfera, sikena e bojeni nanfera? 39 E n yiine nun n sanne mato, e a kolonma nen a n tan nan a ra. E yiin din n na, e a toma nen nayi amasoto fati benden nun xonne mi muxun yelenni alo e a toma n tan yi kii naxan yi.” 40 A to yi na falama e xa, a yi a yiin nun a sanne yita e ra. 41 Sewan nun kaben yi a liga, e mi la a ra xulen. Nayi, a yi e maxodin, a naxa, “Donsena e yii be ba?” 42 E yeŷe gilinxi dungin so a yii, 43 a yi a tongo, a yi a don e yetagi. 44 Na xanbi ra, a yi a fala e xa, a naxa, “N yi e fema waxatin naxan yi, n feni itoe nan fala e xa. Feen naxan birin seŷexi n ma fe yi Musaa Sariya Kitabun kui e nun nabine kitabune nun Yaburin kui, fo ne xa kamali nen.” 45 A yi a liga e xaxili soto alogo e xa Kitabuna feene famu. 46 A yi a fala e xa, a naxa, “Ito nan seŷexi fa fala Alaa Muxu Sugandixin xa toro, a keli sayani a soŷe

saxandeni. 47 Tubi feen nun yulubi xafarin kawandin bama nen a xinli siyane birin xa, folo Yerusalen taan ma. 48 Feni itoe seren nan e tan na. 49 N Fafe Ala e tuli sa naxan na, n tan yeteen na rafama nen e ma. Koni e lu Yerusalen taani han na senben yi fa sa keli kore a godo e xun ma.” 50 Na xanbi ra, a siga e ra han Betani taani, a sa a yiini te denaxan yi, a duba e xa. 51 A yi dubama e xa waxatin naxan yi, a keli e fema, a te ariyanna yi. 52 E to yelin a batue, e seŷaxi gbeen yi xete Yerusalen taani. 53 E yi lu Ala Batu Banxini waxatin birin, e lu barikan bire Ala xa.

Yoni

1 Dunuɲa ɓɔloni, Alaa Falan yi na. Falan yi Ala fema. Falan nan mɔn yi Ala ra. **2** A yi Ala fema a ɓɔloni. **3** Ala seen birin daxi a tan nan xɔn ma. Ala mi sese daxi a tan xanbi. **4** Nii rakisin yi a tan nin. Na nii rakisin yi findi kenenna ra adamadiine xa. **5** Kenenna yi mini dimini, koni dimin mi a nɔ. **6** Ala yi muxuna nde xe naxan yi xili Yoni. **7** Na yi fa, a findi kenenna seren na, alogo muxun birin xa denkeleya a tan xɔn. **8** Kenenna mi yi a tan na, koni a fa nen, alogo a xa fa kenenna sereyaan ba. **9** Kenenna yetɛɛn nan yi na ra, naxan famato yi a ra dunuɲa muxune birin makenendeni. **10** Alaa Falan yi dunuɲa yi. Dunuɲa da a tan nan na, koni dunuɲa muxune mi a kolon. **11** A fa nen a konni, koni a kon kaane mi a rasuxu. **12** Koni naxanye a rasuxu e denkeleya a xinli, a senben fi nen ne ma e findi Alaa diine ra. **13** E mi barixi Ala diine ra adamadiyaan kiin xan xɔn ma hanma fati bendena hanma muxun sagona, koni na fataxi Ala nan na. **14** Alaa Falan yi findi fati benden na, a yi lu en ye. Nxu bata a binyen to, alo fafana dii xeme kedenna binyena, a lugoxi hinanna nun jɔndin na. **15** Yoni yi a feen fala a xuini texin na, a naxa, “N na a tan nan ma fe fala, n naxa, ‘A fama n xanbi ra, koni a gbo n tan xa amasoto benun n tan xa da, a tan yi na.’” **16** En birin bata barakan soto barakan fari a hinan kamalixin xɔn ma. **17** Amasoto Alaa sariyan falaxi yamaan xa Musa nan xɔn ma, koni hinanna nun jɔndin faxi Yesu nan xɔn ma, Alaa Muxu Sugandixina. **18** Muxu yo munma Ala to singen. Koni a Dii Xeme keden peen naxan nun a tan Ala lan, naxan a fafe fema, na nan bata Ala yita en na. **19** Yoni sereyani ito nan ba, Yahudiyane to saraxaraline nun Lewine xe a ma a maxɔdinden keli Yerusalen taani, e naxa, “Nde i tan na?” **20** Yoni mi tondi a fale, a yi a fala e birin yetagi, a naxa, “Alaa Muxu Sugandixin mi n tan na.” **21** E yi a maxɔdin, e naxa, “Nde fa i tan na? Nabi Eli nan i tan na ba?” Yoni yi e yabi, a naxa, “En-en, na mi n tan na.” E mɔn yi a maxɔdin, e naxa, “Nabiin nan i tan na ba?” A yi e yabi, a naxa, “En-en, na mi n tan na.” **22** E yi a fala, e naxa, “Nde i tan na? Amasoto naxanye nxu xexi, ɓɔ nxu xa sa nxu dentege nen ne xa. I nanse fale i yete a fe yi?” **23** Yoni yi e yabi Nabi Esayi a falane xɔn, a naxa, “N tan na a ra naxan a xuini tema tonbonni, n naxa, ‘E kira tinxinxin nafala Marigin xa.’” **24** Farisi muxun naxanye yi xexi Yoni ma, **25** ne yi a maxɔdin, e naxa,

“Xa Alaa Muxu Sugandixin mi i tan na, Nabi Eli mi i tan na, nabi mi i tan na, nanfera i fa muxune rafuma igeni e sarijan feen na?” **26** Yoni yi e yabi, a naxa, “N tan marafuun tima igen nin, koni muxuna nde e tagi e mi naxan kolon. **27** A fama nen n xanbi ra, koni n tan mi lan hali n yi findi a sankidi fulunna ra.” **28** Ito birin ligaxi Betani taan nin, Yuruden baan kidima, Yoni yi muxune rafuma igeni denaxan yi. **29** Na xɔton bode, Yoni yi Yesu to fe a fema, a naxa, “Alaa Yexɛɛ Diin nan ito ra, naxan dunuɲa birin yulubin bama. **30** N yi ito nan ma fe falama, n naxa, ‘Muxuna nde fama n xanbi ra, koni a gbo n tan xa amasoto benun n tan xa bari, a tan yi na.’ **31** N tan mi yi a kolon nun, koni n bata fa yamaan nafudeni igeni alogo n xa a yita Isirayila yamaan na.” **32** Yoni mɔn yi sereyani ito ba, a naxa, “N bata Alaa Nii Sarijanxin to gode a ma ganba sawurani, a yi lu a ma. **33** N mi yi a kolon nun, koni naxan n nafaxi yamaan nafudeni igeni, na a fala n xa nen, a naxa, ‘I na Alaa Nii Sarijanxin to gode naxan ma, a tan nan marafuun tima Nii Sarijanxin na.’ **34** N bata a to, n yi a seren ba, fa fala Alaa Dii Xemena a tan nan na.” **35** Na xɔton bode Yoni nun a xarandii firin yi tixi nun, **36** a yi Yesu to dangue, a naxa, “Alaa Yexɛɛ Diin nan ito ra!” **37** A xarandii firinna yi a xuiin me, e siga Yesu ɓɔxo ra. **38** Yesu yi a yee raxete, a yi e to biraxi a ɓɔxo ra, a yi e maxɔdin, a naxa, “E nanse fenma?” E yi a yabi, e naxa, “Rabi, i yigiyaxi minen?” Rabi bunna neen fa fala, “Karamoxo.” **39** A yi e yabi, a naxa, “E fa a mato.” Se din waxatin nan yi a ra nun. E yi siga, e sa a yigiyaden to. E jinbari raso a fema. **40** Xarandii firinna naxanye Yoni xuiin me e bira Yesu ɓɔxo ra, na keden yi xili nen Andire, Simɔn Piyeri xunyena. **41** Andire yi a tada Simɔn fen keden na, a yi a fala a xa, a naxa, “Nxu bata Mesiya to.” Mesiya bunna neen fa fala, “Alaa Muxu Sugandixina.” **42** Na xanbi ra, a fa Simɔn na Yesu fema. Yesu yi a mato, a naxa, “Simɔn nan i tan na, Yoni a dii xemena. I xili bama nen sɔnɔn, Sifasi.” Xinli ito nun Piyeri, xili kedenna nan e ra. **43** Na xɔton bode Yesu yi a ragidi, a xa siga Galile yamanani. A yi Filipi to, a yi a fala a xa, a naxa, “Bira n ɓɔxo ra!” **44** Filipi yi kelixi Betasada taan nin alo Andire nun Piyeri. **45** Filipi yi Nataniyeli to, a yi a fala a xa, a naxa, “Musa muxun naxan ma fe sebe Sariya Kitabun kui e nun nabine fan naxan ma fe sebe, nxu bata a to, Yusufu a dii xemena Yesu, Nasareti kaana.” **46** Nataniyeli yi a maxɔdin, a naxa, “Se faɓin nɔe kele Nasareti ba?” Filipi yi a yabi, a naxa, “Fa a

mato.” **47** Yesu Nataniyeli to fe a fema waxatin naxan yi, a naxa, “Isirayila kaan yeteen nan ito ra! Yanfa mi naxan ma fe yi!” **48** Nataniyeli yi a maxodin, a naxa, “I n kolonxi di?” Yesu yi a yabi a naxa, “N ni i toxi nen, i xode binla bun ma waxatin naxan yi benun Filipi xa i xili.” **49** Nataniyeli yi a yabi, a naxa, “Karamoxo, Alaa Dii Xemen nan i tan na! Isirayila Mangan nan i tan na!” **50** Yesu yi a fala, a naxa, “N to a falaxi i xa, n naxa, ‘n bata yi i to xode binla bun ma,’ i denkeleyaxi n ma na nan na ba? I feene toma nen naxanye gbo na xa!” **51** A yi a fala e xa, a naxa, “N xa jondin fala e xa, e ariyanna deen nabixin toma nen, e yi Ala malekane to, e tema, e godoma Muxuna Dii Xemen xon mal!”

2 Soge firin danguxina, e siga jaxalandi tideni Kana taani, Galile yamanani. Yesu nga yi na nun. **2** E yi Yesu nun a xarandiine fan xili na jaxalandi tiini. **3** Manpaan to dasa, Yesu nga yi a fala a xa, a naxa, “Manpaan bata jan e yii.” **4** Yesu yi a yabi, a naxa, “N na, en ma fe na yi? N ma waxatin munma a li singen.” **5** Yesu nga yi a fala walikene xa, a naxa, “A na naxan fala e xa, e na liga.” **6** Awa, ige feje sennin yi doxi na nun, naxanye yi findixi Yahudiyane marasarijan ige sa seen na, litiri ye keme nan yi sama e keden kedenna birin kui. **7** Yesu yi a fala walikene xa, a naxa, “E ige fejeni itoe rafe igen na.” E yi e rafe igen na pen! **8** Na xanbi ra, a yi a fala e xa, a naxa, “E igena nde sege, e siga a ra jaxalandi ti sumunna kuntigin fema.” E yi siga a ra a xa. **9** Naxalandi ti sumunna kuntigin yi igen mato, a bata maxete manpaan na, koni a mi yi a keliden kolon. Anu, walikene naxanye igen sege, ne yi a kolon. Nanara, kuntigin yi jaxalandi kanna xili, **10** a yi a fala a xa, a naxa, “Manpa fajin nan soma muxune yii singen, na xanbi ra, manpaan na muxune suxu waxatin naxan yi, i yi nde gbete ramini naxan mi fan jaxi ra. Koni i bata manpa fajin namara han iki!” **11** Yesu a kabanako fe singen ni ito ra, a naxan liga Kana taani Galile yamanani. A yi a binyen mayita a xarandiine ra, ne yi la a ra. **12** Na xanbi ra, Yesu nun a nga nun a xunyene nun a xarandiine yi siga Kaperunan yi, e yi sa xi dando ti na. **13** Waxatin bata yi maso Yahudiyane Halagi Tiin Dangu Loxon Sanla yi rabama waxatin naxan yi nun, Yesu yi siga Yerusalen taani. **14** A yi muxune li Ala Batu Banxin tandem ma, e jingene nun yexene nun ganbane matima na. Gbeti masarana ndee fan yi doxi na nun. **15** Nayi, a yi fosonna rafala, a yi e birin kedi

Ala Batu Banxini, jingene nun yexene, a yi gbeti masarane gbeti gbananne raxuya ayi boxoni, a yi e tabanle rafelen. **16** Muxun naxanye yi ganba matini, a yi a fala ne xa, a naxa, “E itoe birin ba be. E nama n Fafe Alaa banxin findi sare soden na!” **17** Naxan sebexi Kitabuni, na feen yi rabira a xarandiine ma, a naxa, “I ya banxina fe xaminna n na han a n ganma alo teena!” **18** Yahudiyane yi a maxodin, e naxa, “I noe taxamasenna mundun yite nxu ra fa fala senbena i yii, i yi na birin liga?” **19** Yesu yi e yabi, a naxa, “E Alaa banxini ito kala, n mon a tiye soge saxanna bun.” **20** Yahudiyane yi a fala a xa, e naxa, “Ala Batu Banxini ito tixi je tonge naanin e nun je sennin nan bun ma. I tan noe na tiye soge saxanna bun?” **21** Koni Yesu yi Ala Batu Banxin naxan ma fe falama, a yeteen fati benden nan yi na ra. **22** Nanara, Yesu to keli sayani, a falan yi rabira a xarandiine ma. E yi la Kitabun na e nun Yesu a fala tixine. **23** Yesu yi Yerusalen taani waxatin naxan yi Halagi Tiin Dangu Loxon Sanla waxatini, muxu wuyaxi yi a kabanako feene to, e denkeleya a ma. **24** Koni Yesu mi yi a lannayaan saxi e yi, bayo a yi adamadiine birin kui feene kolon. **25** A mako mi yi a ma, e xa muxu yo a fe fala a xa, bayo a tan yeteen yi adamadiin kui feene kolon.

3 Farisi muxuna nde yi na nun, a yi xili Nikodemi, Yahudiyane kuntigina nde nan yi a ra. **2** Na yi fa Yesu fema koene na, a yi a fala a xa, a naxa, “Karamoxo, nxu a kolon a karamoxon nan i ra fata Ala ra. I kabanako feen naxanye ligama, muxu yo mi noe ne lige xa Ala mi a xon ma.” **3** Yesu yi a yabi, a naxa, “N xa jondin fala i xa, xa muxun mon mi xete, a bari a nenen na, a mi noe Alaa Mangayaan toe.” **4** Nikodemi yi a maxodin, a naxa, “Muxun naxan bata fori, na mon noe bare di? A mi noe xete a nga fatini, a mon yi a bari!” **5** Yesu yi a yabi, a naxa, “N xa jondin fala i xa, muxu yo mi noe soe Alaa Mangayani fo a bari fata igen nun Alaa Nii Sarijanxin na. **6** Naxan barixi fati bendeni, fati benden nan na ra. Naxan barixi Alaa Nii Sarijanxini, niin nan na ra. **7** I nama kabe bayo n bata a fala i xa, n naxa, ‘Fo e mon xa xete, e bari a nenen na.’ **8** Foyen fama yiren nin denaxan na a kenen, i yi a xuiin me, koni i mi a keliden kolon, i mon mi a sigaden kolon. A na kii nin birin xa naxanye na bari Alaa Nii Sarijanxini.” **9** Nikodemi yi a maxodin, a naxa, “Na ligan di nayi?” **10** Yesu yi a yabi, a naxa, “Isirayila kaane karamoxon nan i tan na, i mi feni

itoe kolon ba? **11** N xa jɔndin fala i xa, nxu naxan kolon, nxu na nan falama. Nxu naxan toxi, nxu na nan sereya bama. Koni hali na, ε mi nxɔ sereya falan suxi. **12** Nba, xa n dunuɲa feene fala ε xa, ε mi la ne ra. N na kore xɔnna feene fala ε xa, ε lama ne ra di? **13** Muxu yo munma te ariyanna yi singen, fɔ naxan kelixi ariyanna yi, n tan Muxuna Dii Xɛmɛna.” **14** “Musa sɔɲini te kore kii naxan yi tonbonni wudin ma, fɔ n tan Muxuna Dii Xɛmɛn fan xa yite na kii nin **15** alogo naxan yo na denkeleya n ma, na xa habadan nii rakisin sɔtɔ. (aiɔnios g166) **16** Amasɔtɔ Ala bata dunuɲa xanu han a bata a Dii Xɛmɛ keden peen fi en ma, alogo muxu yo na denkeleya a ma, na nama halagi fɔ a habadan nii rakisin sɔtɔ. (aiɔnios g166) **17** Bayo Ala mi a Dii Xɛmɛn nafaxi dunuɲa yi alogo a xa dunuɲa muxune yalagi, koni alogo dunuɲa muxune xa kisi a xɔn ma.” **18** “Naxan yo na denkeleya a ma, na kanna mi fa yalagin sɔnɔn. Koni naxanye mi denkeleyaxi a ma, ne bata yelin yalage, bayo e mi denkeleyaxi Alaa Dii Xɛmɛ keden peen ma. **19** E yalagima ito nan na: Kenɛnna bata fa dunuɲa yi koni dimin nan nafan adamadiine ma dangu kenɛnna ra, amasɔtɔ e kewanle mi fan. **20** Naxan yo fe jaxin ligama, kenɛnna mi rafan na ma. Na mi minin kenɛnna ma, alogo a sɔnna nama mini kenɛnni. **21** Koni naxan fe tinxinxin ligama, na fama nen kenɛnna ma, alogo yamaan xa a yigbe a a walima Ala sagoon nin.” **22** Na xanbi ra, Yesu nun a xarandiine yi siga Yudaya yamanani. A waxati ti e fema. A yi yamaan nafuma igeni e tubi feen na. **23** Yoni fan yi marafuun tima Ayenon xudeni Salin taan dexɔn ma, amasɔtɔ ige gbeen yi na nun. Yamaan yi lu sigɛ mɛnni e rafudeni. **24** Yoni munma yi sa kasoon na singen. **25** Yoni a xarandiina ndee nun Yahudiyaana nde yi e bode matandi fɔlɔ lan marasarijan feen ma. **26** E yi siga Yoni fema, e yi a fala a xa, e naxa, “Karamɔxɔ, i xaxili luxi a xɔn ma ba, ε nun naxan yi Yuruden kidima, i naxan ma fe sereya ba nxu xa. Nba iki, a marafuun tima, muxune birin sigama a fema!” **27** Yoni yi e yabi, a naxa, “Muxun mi sese sɔtɔma fɔ Ala na naxan fi a ma. **28** E tan yetɛɛn nan n seren na, a n na a fala nen, n naxa, ‘Alaa Muxu Sugandixin mi n tan na, xeraan nan tun n tan na a yetɛɛ ra.’ **29** Naxalandi kanna nan gbee jaxanla ra. Koni a xɔyin naxan tixi a fema, na tuli matixi a ra. A na a xuiin mɛ waxatin naxan yi, a sewama nen. N ma sewan na kii nin, a defexi. **30** Fɔ a tan xa yite nen, n tan yi magodo.” **31** “Naxan kelixi kore xɔnna ma, na seen birin xun na.

Naxan kelixi dunuɲa yi, dunuɲa gbeen nan na ra. Na dunuɲa feene nan falama. Naxan kelixi ariyanna yi, na nan seen birin xun na. **32** A naxan toxi, a a mɛ, a na nan sereya bama koni yamaan mi a sereya falan suxi. **33** Naxan na a falan suxu, na bata a mayita a Ala nan tinxin. **34** Ala naxan xexi, na Alaa falan nan tima amasɔtɔ Alaa Nii Sarijanxin fima a ma nen dan mi naxan na! **35** Fafe Alaa Dii Xɛmɛn nafan a ma. A bata feen birin taxu a ra. **36** Naxan na denkeleya a Dii Xɛmɛn ma, na habadan nii rakisin sɔtɔma nen. Naxan mi laxi a Dii Xɛmɛn na, na mi nii rakisin sɔtɛ, bayo Alaa xɔlɔn luma nen a fari!” (aiɔnios g166)

4 Farisi muxune yi a mɛ fa fala Yesu yi xarandiine sɔtɔma dangu Yoni ra, a yi e rafu igeni. **2** Anu, Yesu yetɛɛn mi yi marafuun tima, koni a xarandiine nan yi muxune rafuma. **3** Yesu to muxune falane mɛ, a keli Yudaya yamanani, a siga Galile yamanani. **4** A yi lan nun a xa dangu Samariya yamanani. **5** A taana nde li Samariya yamanani naxan xili Sikara, naxan yi maso xɛɛn na Yaxuba naxan so a dii xɛmɛn Yusufu yii. **6** Yaxubaa xɔɲinna yi na yi. Yesu bata yi xadan siga tideni, a yi dɔxɔ na xɔɲinna dɛ ra yanyin na. **7** Samariya kaa jaxanla nde yi fa ige badeni. Yesu yi a fala a xa, a naxa, “N ki igeni, n xa n min.” **8** A xarandiine bata yi siga taani donse saradeni. **9** Samariya kaa jaxanla yi a yabi, a naxa, “Yahudiyan nan i tan na, Samariya kaan nan n tan na. I n xandima igeni nanfera?” Amasɔtɔ Yahudiyaane mako mi Samariya kaane ma. **10** Yesu yi a yabi, a naxa, “Xa i yi Alaa kiseen kolon nun e nun naxan i xandixi igeni, xa i yi na fan kolon nun, i yi a xandima nen nun, a yi siimaya igen fi i ma.” **11** Naxanla yi a fala, a naxa, “N fafe, ige rate se mi i yii, anu igen makuya. I na siimaya igen sɔtɔn minen yi? **12** Nxu benba Yaxuba nan xɔɲinni ito fixi nxu ma, a tan nun a diine nun a xuruseene birin yi e minma be nin nun. I tan gbo Yaxuba xa ba?” **13** Yesu yi a yabi, a naxa, “Muxu yo igeni ito min, min xɔnla a suxuma nen mɔn, **14** koni n tan igen naxan fima muxune ma, xa muxun na min, min xɔnla mi fa a suxuma sɔnɔn. Amasɔtɔ n ni igen naxan fima a ma, na luma nen a yi alo tigi igen naxan minima han a habadan nii rakisin sɔtɔ.” (aiɔn g165, aiɔnios g166) **15** Naxanla yi a fala, a naxa, “N fafe, na igen fi n ma alogo min xɔnla nama fa n suxu sɔnɔn, n mɔn yi fa ige badeni be.” **16** Yesu yi a fala a xa, a naxa, “Sa i ya xɛmɛn xili, ε fa be.” **17** Naxanla

yi a yabi, a naxa, “Xemen mi n yii.” Yesu yi a yabi, a naxa, “I bata jɔndin fala fa fala xeme mi i yii. 18 Koni i bata yi dɔxɔ xeme suulun xɔn ma nun. I naxan yii iki, i ya xemen yeteen mi na ra. I bata jɔndin fala n xa.” 19 Naxanla yi a fala, a naxa, “N fafe, n bata a kolon fa yati, fa fala nabiin nan i tan na. 20 Nxu tan Samariya kaane, nxu benbane Ala batu geyani ito nan fari, koni ε tan Yahudiyane naxa, a lan nen, en xa Ala batu Yerusalen nin.” 21 Yesu yi a fala jaxanla xa, a naxa, “La n na, waxatina nde fama, yamaan mi fa fama Fafe Ala batudeni geyani ito fari, e mɔn mi a batue Yerusalen taan fan yi. 22 E tan Samariya kaane, ε naxan batuma, ε mi na kolon. Nxu tan Yahudiyane naxan batuma, nxu na kolon, amasɔtɔ kisi feen fataxi Yahudiyane nan na. 23 Koni waxatina nde fama, a yeteen bata a li, Ala batu muxu kɛndene fama Fafe Ala batudeni niin nun jɔndini nen yati! Bayo Fafe Ala na muxu sifane nan fenma, e yi a batu. 24 Niin nan Ala ra. Naxanye a batuma, ne xa a batu niin nun jɔndin yatin nin.” 25 Naxanla yi a fala a xa, a naxa, “N na a kolon fa fala Mesiya fama nen, naxan xili Alaa Muxu Sugandixina. A na fa waxatin naxan yi, a feen birin yebama nxu xa nen.” 26 Yesu yi a yabi, a naxa, “A tan nan n tan na, n tan naxan falan tima i xa ito ra.” 27 Na waxatin yeteni, Yesu a xarandiine yi fa, e kabe amasɔtɔ e bata a li falan tiye jaxanla xa. Koni e sese mi jaxanla maxɔdin fa fala, “I waxi nanse xɔn?” E mi Yesu fan maxɔdin fa fala, “I nanse falama jaxanla xa?” 28 Nba, jaxanla yi ige ba fejen lu na, a xete taani. A sa a fala yamaan xa, 29 a naxa, “E fa xemena nde mato, n bata feen naxanye birin liga, a bata ne birin fala n xa. Alaa Muxu Sugandixin mi a ra ba?” 30 Na ma, yamaan yi keli taani, e siga Yesu fema. 31 Xarandiine yi Yesu mafanma na waxatini, e naxa, “Karamɔxɔ, donseen don!” 32 Koni a yi e yabi, a naxa, “Donsena n yii, ε mi naxan kolon.” 33 Nayi, xarandiine yi e bode maxɔdin fɔlɔ, e naxa, “Muxuna nde bata donseen fi a ma ba?” 34 Yesu yi a fala e xa, a naxa, “N ma donseen nan n xe muxun sagoon wanla keen na han wanla yi kamali. 35 E a falama nen, ε naxa, ‘Kike naanin luxi, malo xaba waxatin yi a li,’ koni n xa a fala ε xa, ε yeen nakeli, ε xee ne mato. Maala bata mɔ, malo xaba waxatin bata a li. 36 Malo xabane bata fɔlɔ e saranna sɔte. E naxanye malanma, ne habadan nii rakisin sɔtɔma nen. Nanara, maala bi muxun nun a xaba muxun sewama nen e bode xɔn ma. (aiōnios g166) 37 Na kui, jɔndin nan sandani ito ra, naxan a falaxi,

a naxa, ‘Muxuna nde maala bima, gbete yi a xaba.’ 38 N bata ε xe, ε sa maala xaba, ε mi naxan walixi. Muxu gbete ye nan a walixi. E tan yi tɔnɔ sɔtɔ e wanli.” 39 Samariya kaan naxanye yi na taani, ne wuyaxi yi denkeleya Yesu ma na jaxanla falana fe ra, a naxa, “N feen naxan birin ligaxi, a bata na fala n xa.” 40 Nanara, Samariya kaane to fa Yesu fema, e yi a mafan, a xa lu e fema. Yesu yi lu e fema xii firin. 41 Muxu wuyaxi gbete ye yi denkeleya Yesu ma a falane fe ra. 42 Ne yi a fala jaxanla xa, e naxa, “Nxu bata denkeleya iki koni nxu mi denkeleyaxi i ya falan gbansanna xan ma fe ra bayo nxu fan bata a xuiin me. Nxu bata a kolon yati fa fala dunuja muxune rakisimaan nan a tan na.” 43 Yesu to xii firin ti na, a yi siga Galile yamanani. 44 Yesu yeteen bata yi a fala e xa nun, a naxa, “Nabiin mi binyen sɔte a yetena yamanani.” 45 A Galile yamanan li waxatin naxan yi, na kaane yi a yisuxu ki faji, amasɔtɔ e fan bata yi a fe ligaxine to Yerusalen taani Halagi Tiin Dangu Lɔxɔn Sanla waxatini. Bayo e fan yi na nun. 46 Nayi, Yesu mɔn yi xete Kana taani Galile yamanani, a igen maxete manpaan na denaxan yi. Mangana kuntigina nde yi menni naxan ma dii xemen yi furaxi Kaperunan yi. 47 A to a me a Yesu bata fa Galile yi sa keli Yudaya yamanani, a yi siga a fema, a yi a mafan, alogo a xa siga Kaperunan yi, a sa a dii xemeni yalan. Amasɔtɔ a faxamatɔɔn nan yi fa a ra. 48 Yesu yi a fala a xa, a naxa, “E tan tondixi denkeleye fɔ ε na taxamasenne nun kabanako feene to.” 49 Mangana kuntigin yi a yabi, a naxa, “N kanna, yandi, fa en siga benun n ma diin xa faxa.” 50 Yesu yi a fala, a naxa, “Siga, i ya dii xemen mi faxama.” Xemen yi la Yesu a falan na, a siga. 51 A yi sigama a konni waxatin naxan yi, a lan a walikene ra. Ne yi a fala a xa, fa fala a a diin mɔn a nii ra. 52 A yi e maxɔdin a dii xemen fisaxi waxatin naxan yi. E yi a yabi, e naxa, “Xoro yanyi tagini, a fati mawolonna yi a bepin.” 53 Na yi rabira a fafe ma a Yesu a fala na waxatin nin, a naxa, “I ya dii xemen mi faxama.” Nanara, a tan nun a denbayaan birin yi denkeleya Yesu ma. 54 Kabanako feen firinden nan ito ra Yesu naxan liga a to keli Yudaya yamanani siga Galile yamanani.

5 Na xanbi ra, Yesu yi siga Yerusalen taani Yahudiyane sanla nde a fe ra. 2 Nba, maxadena nde yi rafalaxi Yerusalen taan yexee ne so deen dexɔn, a xili “Betesata” Heburu xuini. Gage suulun tixi na maxaden nabilinni.

3 Fureto wuyaxi yi saxi na gagene bun ma, danxutone nun sankalatone nun lebutenne. E yi igeni maxa waxatin nan legedenma 4 amasoto malekana nde yi godoma igeni waxatina nde yi, a yi a yimaxa. Furetoon naxan singe na yi godo igeni, malekana igeni maxama waxatin naxan yi, na furen yi yalanma nen, a na findi a sifa yo ra. 5 Xemen nde yi na nun naxan yi furaxi jee tonge saxan e nun solomasexe. 6 Yesu to a to saxi na yi, a yi a kolon fa fala na xemen bata yi bu furaxi, Yesu yi a fala a xa, a naxa, "I waxi a xon ma, i xa kende ya ba?" 7 Furetoon yi a yabi, a naxa, "N kanna, igeni maxan waxatin naxan yi, muxe mi n yii be naxan n nagode igeni. N na kata, n xa godo a yi, muxu gbete singe nan godoma n yee ra." 8 Yesu yi a fala a xa, a naxa, "Keli, i ya sa seen tongo, i siga." 9 Xemen yi yalan sa, a yi a sa seen tongo, a siga. Matabu Loxon nan yi a ra. 10 Na ma, xemen naxan kende yaxi, Yahudiyane yi a fala na xa, e naxa, "Sariyan mi a falaxi i xa i ya sa seen tongo Matabu Loxoni." 11 A yi e yabi, a naxa, "Muxun naxan n nakende yaxi, na nan a falaxi, a n xa n ma sa seen tongo, n siga." 12 E yi a maxodin, e naxa, "Nde na ra naxan a falaxi, a i xa i ya sa seen tongo, i siga?" 13 Koni xemen naxan yi kende yaxi, na mi yi a kolon, bayo Yesu bata yi lo ayi yamaan ye. 14 Na xanbi ra, Yesu yi sa a to Ala Batu Banxini, a naxa, "A mato, i bata kende ya. Fata yulubin ma alogo fe gbeten nama i soto naxan jaxu dangu ito ra." 15 Xemen yi siga, a sa a fala Yahudiyane xa, a naxa, a Yesu nan a rakende yaxi. 16 Nayi, e yi Yesu fen yengen na, bayo a bata yi na liga Matabu Loxoni. 17 Nanara, Yesu yi e yabi, a naxa, "N Fafe Ala walima waxatin birin, a lan nen, n fan xa wali." 18 Na ma, Yahudiya kuntigine mon yi e yixodoxo feren fendeni Yesu faxa xinla ma. Amasoto a mi yi Matabu Loxon sariyan xan gbansan kalama, koni a mon yi a falama a a Fafe nan Ala ra, a yi a fala alo e nun Ala keden. 19 Nanara, Yesu yi e yabi, a naxa, "N xa jondin fala e xa. Fafana a Dii Xemen mi fefe lige a yete ma, fo a na a Fafe to naxan lige. N Fafe Ala na naxan liga, n tan a Dii Xemen fan na nan ligama. 20 Bayo a Dii Xemen nafan a ma, a yi a yita a ra a feen naxanye birin ligama. A feene yitama a ra nen naxanye gbo itoe xa, alogo e birin xa kabe ne ma. 21 Amasoto n Fafe Ala faxa muxune rakelima sayani kii naxan yi, a nii rakisin fi e ma, a Dii Xemen fan nii rakisin fima a waxon muxune ma na kii nin. 22 Fafe Ala mi muxu yo a kiti bolonma koni a bata muxu makitin birin taxu a

Dii Xemen na, 23 alogo muxun birin xa a Dii Xemen binya, alo Fafe Ala binyaxi kii naxan yi. Muxu yo mi a Dii Xemen binya, na mi Fafan fan binyaxi naxan a xexi." 24 "N xa jondin fala e xa, naxan yo n ma falan me, a denkeleya n xe muxun ma, na habadan nii rakisin sotoma nen. Na kanna mi yalagima, koni a bata keli sayani, a so nii rakisini. (aiōnios g166) 25 N xa jondin fala e xa, waxatin fama, a bata a li, faxa muxune Alaa Dii Xemen xuiin namema nen. Naxanye na a me, ne nii rakisin sotoma nen. 26 Bayo alo habadan nii rakisin Fafe Ala yii kii naxan yi, a bata a ragidi a Dii Xemen ma na kiini. 27 A bata kiti saan senben fi a Dii Xemen ma, amasoto Muxuna Dii Xemen na a ra. 28 E nama kabe ito ra, bayo waxatin fama faxa muxune birin a xuiin namema nen, 29 e yi keli e gaburune kui. Naxanye fe fapin ligaxi, ne kelima nen, e nii rakisin soto. Naxanye fe jaxin ligaxi, ne fan kelima nen, e yalagi. 30 N mi noe fefe lige n yete ra. N kitin sama nen alo n na mema kii naxan yi. N ma kitin mon tinxin bayo n mi n yete sagoon ligama, koni fo n xe muxun sagona." 31 "Xa n tan nan n yete sereyaan bama, e mi na yatema jondin na. 32 Koni muxu gbete na naxan sereyaan bama n xa. N na a kolon, a sereyaan naxan bama n ma fe yi, jondin nan na ra. 33 E bata xerane rafa Yoni ma, a seren ba jondini. 34 N tan mako mi adamadiine sereyaan ma koni n na falama nen alogo e xa kisi. 35 Yoni luxi nen alo lenpu degena e tagi, a findi kenenna ra e xa. E bata tin sewe a kenenna ra waxatidi bun. 36 Koni sereyana n yii naxan gbo Yoni gbeen xa. N Fafe Ala wanla naxanye soxi n yii n xa e rakamali, ne a yitama nen a n Fafe nan n xexi. 37 Fafe Ala naxan n xexi, na fan bata seren ba n xa. E munma a xuiin me, e mon munma a yetagin to mumel 38 A falan mi e tan kui, amasoto e mi denkeleyaxi a xeraan ma. 39 E kitabun fesefesema amasoto e mirixi a ma, a e habadan nii rakisin sotoma a xon ma, koni na fan seren bama n tan nan xa! (aiōnios g166) 40 Hali na, e mi tinxi fe n tan ma, e nii rakisin soto." 41 "N mako mi adamadiine binyen ma. 42 Koni n na e tan kolon. Alaa xanuntenyaan mi e bojeni. 43 N bata fa n Fafe Ala xinli koni e mi n nasuxi. Xa muxu gbete fa a yete xinli, e na tan nasuxuma nen. 44 A rafan e ma, e xa binyen soto e bode ra koni e mi kataxi e yi binyen soto Ala keden peen yii. E denkeleyama na yi di? 45 Koni e nama e miri fa fala n na e magima n Fafe xa nen. Musa nan e magima, e yigi saxi naxan yi. 46 Xa e yi laxi Musa ra nun, e yi lama n tan fan na nen nun

amasoto a bata n ma fe sebe. 47 Koni xa e mi laxi a fe sebexine ra, e lama n ma falan na di nayi?"

6 Na xanbi ra, Yesu yi dangu Galile Daraan kidima, naxan mon xili Tiberiyadi Darana. 2 Yama gbeen yi biraxi a foxo ra amasoto e bata yi a kabanako wanle to. A yi furetone yiyalanma. 3 Yesu nun a xarandiine yi te गयाan fari, e sa doko na. 4 Yahudiyaane sanla, Halagi Tiin Dangu Loxon Sanla bata yi maso. 5 Yesu yi a yeen nasiga, a yama gbeen to fe a fema. A yi a fala Filipi xa, a naxa, "En donseen sarama minen yi muxuni itoe xa, e yi e dege?" 6 A na fala a xa nen alogo a xa a kejaan fefefese, bayo a yi a kolon a yi naxan ligama. 7 Filipi yi a yabi, a naxa, "Hali en gbeti gbanan keme firin sara donseen na, birin mi ndedi sote!" 8 Yesu a xarandiina nde Simon Piyeri ngaxakedenna Andire yi a fala, a naxa, 9 "Banxulanna nde be buru xun suulun nun yexe firin a yii. Koni na nanse lige muxuni itoe birin na?" 10 Yesu yi a fala e xa, a naxa, "E yamaan nadoko." Nba, sexen yi menni han. Nayi, muxune birin yi doko. Fayida xeme wuli suulun nan joxon yi e ye nun. 11 Yesu yi buru xunne tongo, a barikan bira Ala xa. Muxun naxanye yi doki na, a yi a taxun ne ra han e wasa! A yexen fan liga na kiini. 12 E birin to lugo, a yi a fala a xarandiine xa, a naxa, "E dungi dungi donxene matongo. E nama sese yikala." 13 Nanara, e ne birin matongo. E debe fu nun firin nafe buru xun suulunna dungi dungine ra, naxanye lu e dege xanbini. 14 Na muxune to a to Yesu kabanako feen naxan liga, e yi a fala, e naxa, "Nabiin nan yati xemeni ito ra naxan yi lanma a fa dunuja yi." 15 Yesu yi a kolon, a e yi fama a karahanden nin, a xa findi mangan na. Nayi, a mon yi keli na, a kedenna yi siga गयाan fari. 16 Ninbanna a lixina, a xarandiine yi godo daraan de, 17 e te kunkin kui siga daraan kidima Kaperunan binni. Koe yi so, Yesu mi fa e fema. 18 Foye gbeen yi fa, igen yi walanje ayi katil! 19 Na waxatini, xarandiine bata yi siga kilo suulun hanma sennin igen xun ma. E yi Yesu to a masoe kunkin na, a sigan tima igen fari. E yi gaxu. 20 Yesu yi a fala e xa, a naxa, "E nama gaxu, n tan nan a ra." 21 Xarandiine yi tin a so kunkin kui, kunkin yi a sigaden li mafuren. 22 Na xoton bode yamaan naxan lu daraan de, ne yi a to a kunki keden peen nan yi na yi, anu Yesu mi te na kunkin kui. A xarandiine nan gbansan siga. 23 Marigi Yesu barikan bira Ala xa denaxan yi, yamaan yi burun don, kunki gbete ye yi fa menni sa keli Tiberiyadi taani. 24 Nanara, yamana a

to waxatin naxan yi, a Yesu nun a xarandiine mi yi na, e te kunkine kui, siga Yesu fendeni Kaperunan yi. 25 E Yesu to daraan xanbi ra waxatin naxan yi, e yi a fala a xa, e naxa, "Karamoxo, i faxi be waxatin mundun yi?" 26 Yesu yi e yabi, a naxa, "N xa jondin fala e xa, e mi n fenma amasoto e bata kabanako feene to, koni bayo e bata burun don, e lugo. 27 E nama wali donsena fe ra naxan kalama, fo naxan habadan nii rakisin fima e ma n tan Muxuna Dii Xemen naxan soma e yii. Amasoto Fafe Ala bata a taxamasenna sa n ma." (aiōnios g166) 28 E yi a maxodin, e naxa, "Nxu tan nanfe ligama alogo nxu yi Alaa wanle ke." 29 Yesu yi e yabi, a naxa, "E walima Ala xa ikiini: E xa la a xeraan na." 30 E yi a yabi, e naxa, "I kabanako feen mundun ligama, nxu a to, nxu denkeleya i ma? I nanfe ligama na yi? 31 Nxu benbane donseen don nen tonbonni naxan xili 'Manna donsena' alo a sebexi Kitabun kui kii naxan yi, a naxa, 'A burun so e yii sa keli kore, e yi a don.'" 32 Yesu naxa, "N xa jondin fala e xa. Musa xa mi burun so e yii de sa keli kore, koni n Fafe Ala nan buru kenden so e yii, sa keli kore. 33 Amasoto Ala burun naxan fima e ma, sa keli kore, na nan nii rakisin fi dunuja muxune ma." 34 Nayi, e yi a fala a xa, e naxa, "Nxu kanna, lu na burun soe nxu yii tun." 35 Yesu yi a fala e xa, a naxa, "N tan nan nii rakisin balon na. Muxu yo fa n tan ma, kamen mi na suxe mume! Muxu yo denkeleya n tan ma, min xonla mi na suxe mume! 36 Koni n na a fala e xa nen, a e bata yi n to nun koni e mi denkeleya. 37 N Fafe Ala muxun naxanye fi n ma, ne fama nen n fema. Naxan na fa n fema, n mi na kede mume! 38 Amasoto n godoxi nen sa keli ariyanna yi alogo n xa fa n xe muxun sagoon liga koni n tan sagoon mi a ra. 39 N xe muxun sagoon ni i ra: a bata muxun naxanye fi n ma, n nama ne sese ralo ayi, koni fo n xa e rakeli sayani loko donxeni. 40 Amasoto n Fafe Ala sagoon nan ito ra, a naxan yo na a Dii Xemen to, e denkeleya a ma, n yi e rakeli sayani loko donxeni, ne habadan nii rakisin sotoma nen." (aiōnios g166) 41 Yahudiyaane yi Yesu mafala folo bayo a bata a fala, a naxa, "N tan nan balon na naxan sa kelixi ariyanna yi." 42 Na ma, e naxa, "Yusufu a dii xemen Yesu xa mi ito ra ba? Nxu a fafe nun a nga kolon. A tan a falama di nayi, a godoxi nen sa keli ariyanna yi?" 43 Yesu yi e yabi, a naxa, "E ba n mafale e bode tagi. 44 Muxu yo mi fe n fema fo n Fafe Ala na naxan mabandun, n xe muxuna. Awa, n na a rakelima nen sayani loko donxeni. 45 Nabine bata a sebe, e

naxa, ‘Ala e birin xaranma nen.’ Naxan yo na n Fafe Ala xuiin name, a yi a xaranna suxu, na fama nen n fema. **46** Muxu yo munma Fafe Ala to, fo naxan kelixi Ala yi, na nan tun bata Fafe Ala to. **47** N xa jɔndin fala ε xa, muxu yo na denkeleya, na bata habadan nii rakisin sɔtɔ. (aiōnios g166) **48** N tan nan nii rakisin balon na. **49** E benbane burun don nen tonbonni, naxan xili Manna donsena, koni e faxa nen. **50** Koni na balon ni i ra naxan sa kelixi ariyanna yi, muxu yo na a don, na mi faxama. **51** N tan nan nii rakisin balon na sa keli ariyanna yi. Muxu yo na baloni ito don, a nii rakisin sɔtɔma nen habadan. N fati benden nan findixi baloni ito ra, n naxan fima alogo dunuɲa muxune birin xa nii rakisin sɔtɔ.” (aiōn g165) **52** Yahudiyane xɔlɔxin yi e bode matandi fɔlɔ, e naxa, “Xɛmeni ito nɔɛ a fati benden fiye en ma di, en yi a don?” **53** Yesu yi a fala e xa, a naxa, “N xa jɔndin fala ε xa, xa ε mi Muxuna Dii Xɛmen fati benden don, ε yi a wunla min, nii rakisin mi luma ε xa mume! **54** Muxu yo n fati benden don, a yi n wunla min, habadan nii rakisina a xa. N na a rakelima nen sayani lɔxɔ dɔnxɛni. (aiōnios g166) **55** Amasɔtɔ donse kenden nan n fati benden na. Min se kenden nan n wunla ra. **56** Naxan na n fati benden don, a yi n wunla min, na bata lu n tan yi, n fan bata lu na kanni. **57** Habadan Fafe, na nan n xexi. Nii rakisina n tan yii a barakani. Na kiini, naxan na balo n tan xɔn, na fan nii rakisin sɔtɔma nen n barakani. **58** Baloni ito nan godoxi sa keli ariyanna yi. E benbane burun don nen naxan xili Manna donsena, e faxa. Koni, naxan na baloni ito don, na nii rakisin sɔtɔma nen habadan.” (aiōn g165) **59** Yesu na birin falaxi waxatin naxan yi, a yi xaranna tima salide banxini Kaperunan taani. **60** E to na me, a xarandii wuyaxi yi a fala, e naxa, “Xaranni ito xɔdɔxɔ de! Nde tinɲɛ a ma?” **61** Yesu yi a kolon a yete ma fa fala a xarandiine a mafalama a falana fe ra. Nanara, a yi a fala e xa, a naxa, “Na falan bata ε magaxu ba? **62** Xa ε fa Muxuna Dii Xɛmen to tɛ a kelideni go? **63** Alaa Nii Sarijanxin nan nii rakisin fima. Sese mi fati benden na. N falan naxanye tixi ε xa, niin nun nii rakisin nan ne ra. **64** Koni hali na, ε tan ndee mi denkeleyaxi.” Amasɔtɔ xabu a fɔlɔni, Yesu yi ne kolon naxanye mi yi denkeleyaxi a ma e nun naxan sa a yanfama. **65** A mɔn yi a fala, a naxa, “Na feen ma, n bata a fala ε xa, n naxa, ‘Muxu yo mi nɔɛ fe n fema fo n Fafe Ala na naxan mali.’” **66** A xarandii wuyaxi yi xete a fɔxɔ ra na waxatini, e mi fa siga a fɔxɔ ra sɔnɔn. **67** Nanara, Yesu yi a fala a xarandii fu nun firinne xa,

a naxa, “E tan go, ε fan waxi xete feni ba?” **68** Simɔn Piyeri yi a yabi, a naxa, “Marigina, nxu sigama nde fema? Habadan nii rakisi falane i tan nan yii. (aiōnios g166) **69** Nxu bata denkeleya, nxu bata a kolon fa fala i tan nan Alaa Muxu Sarijanxin na.” **70** Yesu yi e yabi, a naxa, “N tan xa mi ε tan muxu fu nun firinne sugandixi ba? Koni hali na, muxu keden ε ye, se jaxin nan na ra!” **71** A yi na falama Simɔn Isakariyoti a dii xemen Yudasi nan ma. Na yi a xarandii fu nun firinne nan ye, koni na nan yi a yanfama.

7 Na xanbi ra, Yesu yi Galile yamanani siga. A mi tin sigɛ Yudaya yamanani amasɔtɔ Yahudiyen naxanye yi na, ne yi waxi a faxa feni. **2** Yahudiyane Bubu Kui Sanla bata yi maso. **3** Nanara, Yesu ngaxakedenne yi a fala a xa, e naxa, “I lan nen i xa keli be, i siga Yudaya yamanani, alogo i ya xarandiine xa i ya kabanako fe wanle to. **4** Muxun wanla naxan kema, a mi na luxunɲɛ xa a waxi findi feni xili kanni ra. Bayo i feni itoe ligama, i yete yita dunuɲa birin na.” **5** Amasɔtɔ hali a ngaxakedenne mi yi laxi a ra. **6** Yesu yi a fala e xa, a naxa, “N ma waxatin munma a li singen. Koni waxatin birin lan ε tan xa. **7** Dunuɲa mi nɔɛ ε tan napaxuɛ. Koni a bata n tan napaxu, amasɔtɔ n bata a fala a a kewanle jaxu. **8** E siga sanli. N tan mi sigama iki, amasɔtɔ n ma waxatin munma a li singen.” **9** A yi na fala e xa, a lu Galile yamanani. **10** Yesu ngaxakedenne sigaxin sanli, na xanbi ra a fan yi siga. Koni a mi a yete makenen, a yi a yeɛ raluxunɲɛ ayi. **11** Yahudiyane yi a fen malanni, e naxa, “A minen yi?” **12** Yamaan yi kɔyɛkɔyɛnma a fe yi han! Nde naxa, “Muxu fajin nan a ra.” Nde fan naxa, “En-en, a yamaan mayendenma.” **13** Koni muxu yo mi falan ti kenenni a fe ma, amasɔtɔ e yi gaxuxi Yahudiyane yeɛ ra. **14** Malanna bata yi siga han a tagi, Yesu yi siga Ala Batu Banxini, a yamaan xaran fɔlɔ. **15** Yahudiyane yi kabɛ kati! E yi a fala, e naxa, “Xɛmeni ito Kitabun kolonxi di? A mi xaranxi.” **16** Yesu yi e yabi, a naxa, “N xaranna naxan tima, na mi kelixi n tan ma, koni a kelixi n xɛ muxun nan ma. **17** Naxan waxi Ala sagoon liga feni, na a kolonma nen, xa xaranni ito kelixi Ala nan ma, hanma xa a kelixi n tan nan ma. **18** Muxun naxan a yete a fe falama, na binyen nan fenma a yete xa. Koni naxan binyen fenma a xɛ muxun xa, na jɔndin nan falama, tinxintareya mi na kanni. **19** Musa xa mi Alaa sariyan so ε yii ba? Koni ε sese mi sariyan suxi! Nanfera ε kataxi n faxa feen na?” **20**

Yamaan yi a yabi, e naxa, “Yinnani i fəxo ra! Nde kataxi i tan faxa feen na?” **21** Yesu yi e yabi, a naxa, “N bata yi kabanako fe gbee keden liga, ε birin kabe nen na ma. **22** Musa gaan tiin yamarin so nen ε yii. Nanara, ε ε dii xeme ne dugi soma Matabu Ləxoni. Anu, Musa xa mi a fəlo koni xabu ε benbane. **23** Xa ε ε dii xeme ne dugi soma Matabu Ləxoni, alogo Musaa sariyan nama kala, ε xələma n tan ma nanfera, a n bata xemen gbindin birin nakendeya Matabu Ləxoni? **24** E nama kitin bolon benun ε xa feen fese fese. E kitin sa tinxinna nin.” **25** Yerusalen taan muxuna ndee yi a fala, e naxa, “Na xemen xa mi ito ra ba, e kataxi naxan faxa fe ra? **26** A mato, a falan tima kenenni, e mi a mafalama! Kuntigine bata a kolon ba, fa fala Alaa Muxu Sugandixin nan ito ra? **27** Koni Alaa Muxu Sugandixin na fa waxatin naxan yi, muxu yo mi a keliden kolonje. Koni en birin xemeni ito keliden kolon.” **28** Yesu yi xaranna tima Ala Batu Banxini waxatin naxan yi, a yi a xuini te, a naxa, “E n kolon ba e nun n keliden yetena? N mi faxi n yete ma. Naxan n xexi, jondin nan na kanna ra. E mi a tan kolon, **29** koni n tan a kolon, amasoto n kelixi a tan nan fema. A tan nan n xexi.” **30** Na xanbi ra, e kata a suxu feen na. Koni muxu yo mi a yiin din a ra, amasoto a waxatin munma yi a li singen. **31** Koni muxu wuyaxi yi denkeleya a ma yamaan ye, e naxa, “Alaa Muxu Sugandixin na fa waxatin naxan yi, a kabanako feene lige nen naxanye gbo muxuni ito gbeene xa ba?” **32** Farisi muxune yi yamaan koyekoyen xuiin me Yesu a fe ma. Saraxarali kuntigine nun Farisi muxune yi kantan muxune rasiga a suxudeni. **33** Yesu naxa, “N na ε fema han waxatidi mon, na xanbi ra n siga n xe muxun fema. **34** E n fenma nen, koni ε mi fa n toε sonon, amasoto n sigan denaxan yi, ε mi noε sigε na yi.” **35** Yahudiyane yi a fala e bode tagi, e naxa, “A sigan minen yi, en mi a toε denaxan yi? A sigama Girekine yamanani ba, en kon kaane xuyaxi ayi denaxan yi, a yi Girekine xaran? **36** A falani ito bunna di? Fa fala, ε n fenma nen, koni ε mi n toε? Fa fala, n sigan denaxan yi, ε mi sigε menni?” **37** Sanla ləxo dən xeni, sanla ləxo gbeena, Yesu yi ti, a yi a xuini te, a naxa, “Xa min xonla naxan ma, a xa fa n ma, a fa a min. **38** Naxan na denkeleya n tan ma, siimaya igene minima nen na kanni alo baana, alo Kitabuna a falaxi kii naxan yi.” **39** Yesu yi Alaa Nii Sarijanxin nan ma fe falama. Naxanye yi denkeleyama Yesu ma, ne yi a sotoma nen. Na waxatini, Nii Sarijanxin

munma yi fi, amasoto Yesu munma yi keli a binyeni. **40** Muxuna ndee yi Yesu xuiin me yamaan ye, e naxa, “Nabi yeteen nan xemeni ito ra yati!” **41** Nde gbete ye fan naxa, “Alaa Muxu Sugandixin nan a ra.” Koni nde gbete ye naxa, “Alaa Muxu Sugandixin minima Galile yamanani di? **42** Kitabun xa mi a falaxi ba fa fala Alaa Muxu Sugandixin minima Dawuda bonsonna nin keli Betele mi taani, Dawuda dəxodena?” **43** Nanara, yamaan yi yitaxunxi a fe ra. **44** Ndee yi waxi a suxu feni koni muxu yo mi a yiin din a ra. **45** Kantan muxune yi xete saraxarali kuntigine nun Farisi muxune fema, naxanye e maxodin, e naxa, “Nanfera ε mi faxi Yesu ra?” **46** Kantan muxune yi e yabi, e naxa, “Muxu yo munma falan ti singen alo xemeni ito falan tima kii naxan yi.” **47** Farisi muxune yi e maxodin, e naxa, “A bata ε fan mayenden n je? **48** E yamaan kuntigina nde kolon hanma Farisi muxuna nde naxan laxi a ra? **49** Yamani ito mi Musaa sariyan kolon. Nanara, Ala dangana e fəxo ra!” **50** Nikodemi naxan bata yi fa Yesu fema a fəloni nun, na yi e ye, a yi a fala e xa, a naxa, **51** “En ma sariyan na a ra ba, en xa muxun yalagi benun en xa a xuiin me, en yi a kolon a naxan ligama?” **52** E yi a yabi, e naxa, “Galile kaan nan i tan fan na ba? Kitabun xaran. I a kolonma nen nayi a nabiin mi kele Galile yamanani mumel!” **53** Nayi, birin yi siga a konni.

8 Yesu yi siga Oliwi geyaan fari. **2** Na xoton bode subaxani, a mon yi xete Ala Batu Banxini. Yamaan birin yi fa a fema, a dəxo, a yi e xaran fəlo. **3** Sariya karamoxone nun Farisi muxune yi jaxanla nde suxu yalunyaan ligadeni, e fa a ra, e yi a ti e tagi. **4** E yi a fala Yesu xa, e naxa, “Karamoxo, nxu jaxanli ito suxi yalunyaan nan lige. **5** Musa a yamari nen Sariya Kitabuni, a na jaxalan sifan xa magolon gemen na han a faxa. Nba, i tan naxa a di?” **6** E yi na falama a bunba feen nan ma, alogo e xa a suxu. Koni Yesu yi a yigodo, a lu sebenla tiye a yii sonla ra bəxon ma. **7** E yi tixi a dəxon ma na waxatini, e lu a maxodinje. Yesu yi a rakeli, a yi a fala e xa, a naxa, “Naxan munma yulubin liga ε tagi singen, na singe xa gemen woli a ma.” **8** A mon yi a yigodo, a lu sebenla tiye bəxon ma. **9** E ito me waxatin naxan yi, e birin yi keli na yi keden keden yeen ma fəlo xeme fonne ma. Yesu kedenna yi lu na yi, jaxanla fan yi lu tixi na yi. **10** Yesu yi keli, a yi a fala jaxanla xa, a naxa, “Nga jaxanla, e minen yi? Muxe mi lu be, e yi i yalagi?” **11** A yi a yabi, a naxa, “N fafe, muxu yo.” Yesu naxa, “Nba, n tan fan mi i

yalagima. Siga, koni i nama fa yulubin liga sɔnɔn.” 12 Yesu mɔn yi falan ti e xa, a naxa, “N tan nan dunuɲa kenenna ra. Naxan na bira n tan fɔxɔ ra, na nii rakisın kenenna sɔtɔma nɛn, a mi sikan tiye dimini mumel!” 13 Farisi muxune yi a fala a xa, e naxa, “I yete seren nan bama iki, ɲɔndi mi i ya sereyaan na!” 14 Yesu yi e yabi, a naxa, “Hali n nan n yete seren ba, n ɲɔndin nan falama. Amasɔtɔ n na n keliden nun n sigaden kolon. Koni e tan mi n keliden nun n sigaden kolon. 15 E kitin sama adamadiyaan nin. N mi muxu yo a kiti bolonma. 16 Koni xa n tan na kitin sa, n ma kitisaan findima ɲɔndin nan na, amasɔtɔ n keden mi a ra. Nxu nun n fafe na a ra naxan n xexi. 17 A seɓexi e sariyan kui, a naxa, ‘Xa sere firinna falan naxan ti, ɲɔndin nan na ra.’ 18 N seren bama n yete xa, n Fafe naxan n xexi, na fan seren bama n xa.” 19 E yi a fala a xa, e naxa, “I fafe minen yi?” Yesu yi e yabi, a naxa, “E mi n kolon, e mi n Fafe fan kolon. Xa e yi n tan kolon nun, e yi n Fafe fan kolonma nɛn.” 20 Yesu yi na falane birin tima, a lu xaranna tiye Ala Batu Banxini, Alaa kiseene rasuxuma denaxan yi. Hali na, muxu yo mi a suxu, amasɔtɔ a waxatin munma yi a li singen. 21 Yesu mɔn yi a fala e xa, a naxa, “N bata siga. E n fenma nɛn, koni e faxama nɛn e yulubine yi. N sigama denaxan yi, e mi nɔe sigɛ menni.” 22 Nanara, Yahudiyane yi maxɔdinna ti, e naxa, “A waxi a yete faxes feen nin ba, bayo a falama, a naxa, ‘N sigama denaxan yi, e mi nɔe fe menni?’” 23 Yesu yi a fala e xa, a naxa, “Dunuɲa gbeen nan e tan na, koni n tan kelixi kore xonna nan ma. E tan fataxi dunuɲa ito nan na, koni n tan mi kelixi dunuɲa ito yi. 24 Nanara, n na a falaxi e xa fa fala, e faxama nɛn e yulubine yi. Nba, xa e mi laxi a ra fa fala ‘N tan nan a ra, naxan na yi,’ e faxama nɛn e yulubine yi yatil!” 25 E yi a maxɔdin, e naxa, “Nde i tan na?” Yesu yi e yabi, a naxa, “N naxan falama e xa xabu a fɔloni, na nan n tan na. 26 Fala wuyaxi n xɔn e kitideni, koni naxan n nafaxi, ɲɔndin nan a tan na. N naxan mexi a ra, n na falama nɛn dunuɲa muxune xa.” 27 E mi yi a famuma fa fala a Fafe Ala nan ma fe falama e xa. 28 Nanara, Yesu yi a fala e xa, a naxa, “E na Muxuna Dii Xemeni te waxatin naxan yi, e a kolonma nɛn na yi fa fala ‘N tan nan a ra, naxan na yi.’ E a kolonma nɛn na waxatini, n mi fefe ligama n yete ma fɔ n Fafe Ala n xaranxi naxan ma. 29 Naxan n xexi, na n fɔxɔ ra, a mi n kedenna luxi, amasɔtɔ n na a rafan feen ligama waxatin birin.” 30 Muxu wuyaxi yi a falane mɛ, e denkeleya a ma. 31 Na ma, Yahudiyān

naxanye yi denkeleyaxi a ma, Yesu yi a fala ne xa, a naxa, “Xa e n ma xaranna suxu, n ma xarandiin yeteɛn nan e tan na na yi. 32 E ɲɔndin kolonma nɛn, ɲɔndin yi e xɔrɔya.” 33 E yi a yabi, e naxa, “Ibrahimia bɔnsɔnna nan nxu tan na. Han to, nxu mi yi muxɛ konyiya bun. Fa fala, e xɔrɔyama nɛn, na bunna di?” 34 Yesu yi a fala e xa, a naxa, “N xa ɲɔndin fala e xa, naxanye yulubin ligama, yulubina konyin nan ne ra. 35 Konyin mi luma denbayani waxatin birin, koni dii xemen luma nɛn denbayani habadan. (aiɔn g165) 36 Xa Dii Xemena e xɔrɔya, e bata xɔrɔya nayi yatil! 37 N na a kolon Ibrahimia bɔnsɔnna nan e tan na. Anu, e kataxi n faxes feen na amasɔtɔ n ma falan mi xanma e ma. 38 N naxan toxi n Fafe Ala fema, n na nan falama e xa, koni e naxan mexi e fafe ra, e na nan ligama.” 39 E yi a yabi, e naxa, “Nxu fafe nan Ibrahimia ra.” Yesu yi e yabi, a naxa, “Xa Ibrahimiaa diine nan yi e ra nun, e yi a liga feene ligama nɛn. 40 N ɲɔndin naxan mexi Ala ra, n na nan falama e xa, koni hali na, e kataxi n faxes feen na. Ibrahimia mi ito ɲɔxɔnna lige! 41 E fafe liga feene nan ligama.” E yi a yabi, e naxa, “Nxu mi barixi futun fari ma. Ala nan keden peen nxu Fafe ra.” 42 Yesu yi a fala e xa, a naxa, “Xa e fafe nan yi Ala ra nun yatil, e yi n xanuma nɛn nun, amasɔtɔ n fataxi Ala nan na, n be nin iki. N mi faxi n yete ra, Ala nan n xexi. 43 N naxan falama, nanfera e mi na yɛɛ toma? Amasɔtɔ e mi nɔe n fala xuiin mɛ. 44 E fafe nan Yinna Manga Setana ra, e waxi a xɔn ma, e xa a rafan feene liga. Xabu a fɔloni muxu faxan nan a tan na. A mi tin ɲɔndin ma amasɔtɔ ɲɔndi mi a tan yi mume! A nɛn wulen falama, a minima a yete gbee keɲaan nan ma amasɔtɔ wule xelen nan a ra. Wulene birin fafe nan a tan na. 45 Koni e mi laxi n na bayo n ɲɔndin nan falama e xa. 46 Nde e yɛ be naxan a yite a n bata yulubin liga? Xa n ɲɔndin fala e xa, nanfera e mi lama n na? 47 Naxan fataxi Ala ra, na a tuli matima nɛn Alaa falan na. E mi e tuli matima bayo Ala gbee mi e tan na.” 48 Yahudiyane yi Yesu yabi, e naxa, “Nxu mi ɲɔndin xan falan ba, fa fala Samariya kaan nan i tan na jinan ɲaxin naxan fɔxɔ ra?” 49 Yesu yi e yabi, a naxa, “Yinnan mi n tan fɔxɔ ra. N na n Fafe Ala nan tun binyama, koni e tan n yeɓefuma. 50 N mi binyen fenma n yete xa. Ala naxan kitin sama, na nan binyen fenma n tan xa. 51 N xa ɲɔndin fala e xa, naxan na n ma falan suxu, na kanna mi sayaan sɔte habadan!” (aiɔn g165) 52 Yahudiyane yi a fala a xa, e naxa, “Nxu bata a kolon yatil, fa fala yinnana i tan

fɔxɔ ra! Iburahima bata faxa, nabine fan bata faxa, koni i tan naxa, 'Naxan na n ma falan suxu, na kanna mi sayaan sɔtɛ habadan.' (aiɔn g165) 53 I tan gbo nxu fafe Iburahima xa ba, naxan bata faxa? Nabine fan bata faxa. I ya fe mirixi di?" 54 Yesu yi e yabi, a naxa, "Xa n yi n yete binya nun, n ma binyen mi findima sese ra. N Fafe nan n binyama, ε a falaxi naxan ma fa fala ε Ala nan a ra. 55 E mi a tan kolon, koni n tan a kolon. Xa n na a fala fa fala n mi a kolon, n bata findi wule xelen na nayi alo ε tan. Koni n na a kolon, n na a falan suxuma. 56 E fafe Iburahima yengi yi tixi n fa waxatin na sewani. A bata a to, a yi sewa." 57 Yahudiyane yi a fala a xa, e naxa, "I munma jɛɛ tonge suulun sɔtɔ singen, i yi Iburahima to nun ba?" 58 Yesu yi e yabi, a naxa, "N xa jɔndin fala ε xa, Iburahima barixi nen, n tan na yi." 59 Na ma, e yi gemene tongo a magolon xinla ma, koni Yesu yi a luxun, a mini Ala Batu Banxini.

9 Yesu yi a masiga tima waxatin naxan yi, a yi xemena nde to naxan barixi danxutɔyani. 2 A xarandiine yi a maxodin, e naxa, "Karamɔxɔ, nanfera xemeni ito barixi danxutɔyani, a yeteen nan yulubin ligaxi ba hanma a sɔtɔ muxune?" 3 Yesu yi e yabi, a naxa, "A yetena yulubin xa mi a danxuxi, a sɔtɔ muxune fan gbeen mi a danxuxi. A danxuxi nen alogo Ala senben wanla xa mayita yamaan na a tan xɔn ma. 4 Fanni sogen texi fɔ en xa n xɛ muxuna wanle kɛ nen. Amasɔtɔ kɔɛen somaan ni i ra, muxɛ mi nɔɛ wale waxatin naxan yi. 5 N dunɔɔa yi waxatin naxan yi, dunɔɔa kenenna nan n tan na." 6 Yesu to na fala, a degen namini bɔxɔni, a benden namulan a ra, a boron boli danxutɔɔn yeene ma. 7 A yi a fala xemen xa, a naxa, "Sa i yeen naxa ige ramaradeni naxan xili Siloyan." Siloyan bunna nɛɛn, "Xerana." Na ma, xemen yi siga, a sa a yeen naxa. A xɛmatɔna, a seen to. 8 Na xanbi ra, a dɔxɔ bodene nun muxun naxanye yi a toma xandi tideni a fɔloni, ne yi maxodinna ti, e naxa, "Xemen naxan yi dɔxi xandi tideni nun, na xa mi ito ra ba?" 9 Nde naxa, "A tan nan a ra." Koni bonne naxa, "En-en, e maliga nen tun!" Koni xemen yeteen yi a fala, a naxa, "N tan nan yati a ra." 10 E yi a maxodin, e naxa, "I yeen nabixi di?" 11 A yi e yabi, a naxa, "Xemen naxan xili Yesu, na nan benden namulanxi a yi boron boli n yeene ma. A yi a fala n xa, a naxa, 'Siga Siloyan yi, i sa i yeen naxa.' Nayi, n sa n yeen naxa, n yi seen to." 12 E yi a maxodin, e naxa, "Na

xemen minen yi?" A yi e yabi, a naxa, "N mi a kolon." 13 Nba, xemen naxan yi danxuxi nun, e yi siga na ra Farisi muxune fema. 14 Anu, Yesu benden namulan waxatin naxan yi, a xemen yeene rabi, Matabu Lɔxɔn nan yi a ra. 15 Nanara, Farisi muxune mɔn yi xemen maxodin a yeen nabi kiin ma. A yi a fala e xa, a naxa, "A benden nan namulanxi, a yi a boli n yeene ma, n yi n yeen naxa, iki n bata seen to." 16 Farisi muxuna nde naxa, "Xemen naxan ito ligaxi, na mi fataxi Ala xan na, amasɔtɔ a mi Matabu Lɔxɔn tɔnna suxi." Koni nde gbete naxa, "Yulubi kanna nɔɛ kabanako fe sifani itoe lige ba?" Na ma, e yitaxun. 17 Nba, Farisi muxune mɔn yi xemen maxodin, e naxa, "I tan naxa a di a fe yi, a i tan naxan yeeye rabixi?" A yi e yabi, a naxa, "Nabiin nan a ra." 18 Benun e xa xemen sɔtɔ muxune xili, Yahudiyane mɔn mi yi laxi a ra a danxutɔɔn nan yi a ra, a bata seen to. 19 E yi e maxodin, e naxa, "E diin nan ito ra ba, ε naxan ma a a sɔtɔxi danxutɔyaan nin? Nanfe ligaxi a to fa seen toma iki?" 20 A sɔtɔ muxune yi e yabi, e naxa, "Nxu a kolon fa fala a nxɔ diin na a ra. Nxu mɔn a kolon a sɔtɔxi danxutɔyaan nin. 21 Koni nxu mi a kolon naxan a ligaxi a fa seen toma iki. Naxan a yeen nabixi, nxu mi na fan kolon. E a maxodin, bayo dii jɔɔre mi fa a ra sɔnɔn. A yeteen xa ε yabi!" 22 A sɔtɔ muxune ito fala nen, amasɔtɔ e yi gaxuxi Yahudiyane yeɛ ra, bayo Yahudiyane bata yi lan a ma fa fala naxan na a tiye a ra, a Alaa Muxu Sugandixin nan Yesu ra, e na kanna kedima nen salide banxini. 23 Na nan a liga, a sɔtɔ muxune naxa, "E a maxodin, amasɔtɔ dii jɔɔre mi fa a ra sɔnɔn!" 24 E mɔn yi na xemen xili naxan yi danxuxi, e yi a fala a xa, e naxa, "Jɔndin fala, i binyen fi Ala ma! Nxu a kolon fa fala yulubi kanna nan na xemen na." 25 Xemen yi e yabi, a naxa, "N tan mi a kolon xa yulubi kanna nan a ra. N naxan kolon, danxutɔɔn nan yi n na, koni iki n seen tomal" 26 E yi a maxodin, e naxa, "A nanfe ligaxi i ra? A i yeen nabixi di?" 27 A yi e yabi, a naxa, "N bata yelin na fale ε xa, koni ε mi ε tuli mati. Nanfera ε mɔn waxi a mɛ feni? E fan waxi findi feni a xarandiine nan na ba?" 28 E yi a makonbi, e yi a fala a xa, e naxa, "A xarandiina i tan nan na, Musa gbee xarandiine nan nxu tan na. 29 Nxu a kolon fa fala Ala falan ti nen Musa xa, koni nxu mi xemeni ito kelide kolon!" 30 Xemen yi e yabi, a naxa, "Ee! Nba, kabanako feen nan na ra, ε mi a keliden kolon, koni a bata n tan yeen nabi. 31 En na a kolon fa fala Ala mi a tuli matima yulubi kanne ra. A tuli matima a binya muxu nan

xui ra naxan a sagoon ligama. **32** Xabu dunuƙa da, muxe munma a me singen fa fala muxuna nde bata danxutɔɔn yeen nabi naxan sɔtɔxi danxutɔyani. (aïñ g165) **33** Xa xemeni ito mi fataxi Ala xan na nun, a mi yi nɔɛ fefe lige nun.” **34** E yi a yabi, e naxa, “I sɔtɔxi yulubin yetɛɛn nin, i kataxi nxu xaran feen nan na ba?” E yi a kedi tanden ma. **35** Yesu yi a me fa fala a e bata xemen kedi. A yi a to, a naxa, “I bata denkeleya Muxuna Dii Xemen ma ba?” **36** Xemen yi a yabi, a naxa, “N kanna, nde na ra alogo n xa denkeleya a ma?” **37** Yesu yi a fala a xa, a naxa, “I bata yelin a toɛ, a tan nan falan tima i xa iki.” **38** Xemen yi a fala, a naxa, “N Marigina, n bata denkeleya i ma.” A yi a xinbi sin Yesu bun ma. **39** Yesu naxa, “N faxi dunuƙa makitiden nin alogo danxutɔne xa seen to, yɛɛ kanne yi danxu.” **40** Farisi muxuna ndee yi a fema na yi, ne yi a xuiin me. E yi a maxɔdin, e naxa, “I yengi a ma danxutɔɔn nan nxu tan fan na ba?” **41** Yesu yi e yabi, a naxa, “Xa danxutɔɔn nan yi ɛ ra nun, ɛ mi yi yatema yulubi kanna ra na yi. Koni bayo ɛ naxa, ‘Nxu seen toma,’ ɛ yulubin luma nen ɛ ma na yi.”

10 Yesu naxa, “N xa jɔndin fala ɛ xa, muxun naxan mi soma xuruse sansanni fata a so deɛn na, koni a te sansanna ra, muƙaden nun mafu tiin nan na kanna ra. **2** Muxun naxan soma xuruse sansanni fata a deɛn na, xuruse rabaan nan na kanna ra. **3** De kantanna deɛn nabima a xa nen. A na a yɛxɛɛne xili waxatin naxan yi, e a xuiin mema nen, a yi e ramini. **4** A na a gbeene ramini waxatin naxan yi, a ti e yɛɛ ra, a yɛxɛɛne birama a fɔxɔ ra nen, amasɔtɔ e a xuiin kolon. **5** E mi birama muxu gbete fɔxɔ ra, e gima muxu gbete yɛɛ ra nen, amasɔtɔ e mi a xuiin kolon.” **6** Yesu yi sandani ito sa e xa, koni a feen naxan falama e xa, e mi na famu. **7** Nayi, Yesu mɔn yi a fala e xa, a naxa, “N xa jɔndin fala ɛ xa, n tan nan sansanna so deɛn na yɛxɛɛne xa. **8** Naxanye birin faxi n yɛɛ ra, muƙadene nun mafu tiine nan yi ne ra. Koni yɛxɛɛne mi e tuli mati ne xuine ra. **9** N tan nan sansanna so deɛn na. Muxu yo so n tan xɔn ma, na kisima nen. Na nɔɛ mine nen a so, a yi balon sɔtɔ. **10** Muƙaden mi fama fefe ra fɔ muƙan nun faxa tiin nun kalan xili ma. N tan faxi nen alogo e xa dunuƙa yi gidi defexin sɔtɔ.” **11** “N tan nan xuruse raba faɗin na. Xuru se raba faɗin tinɗe nen, a faxa yɛxɛɛne fe ra. **12** Koni walikɛɛn tan mi luxi alo xuruse rabana bayo a gbee mi yɛxɛɛne ra. Xa a kankon to fe, a yɛxɛɛne rabɛɗinma nen, a yi a gi.

Kankon yi wuru yɛxɛɛ kuruni a yi e raxuya ayi. **13** Walikɛɛn nan na ra, yɛxɛɛne fe kɔntɔfili mi a ma. **14** N tan nan xuruse raba faɗin na. N na n ma xuruseene kolon, e fan n kolon **15** alo Fafana n kolon kii naxan yi, alo n fan Fafan kolon kii naxan yi. N nan n niin fima nen n ma xuruseene fe ra. **16** Yɛxɛɛ gbeteɛye n yii naxanye mi kulani ito yi fɔ n xa fa ne fan na. E tuli matima nen n xuiin na. E findi kuru kedenna ra xuruse raba kedenna xa. **17** N Fafe Ala bata n xanu amasɔtɔ n bata n niin fi, alogo n mɔn xa sa a sɔtɔ. **18** Muxu yo mi n niin be n yi, koni n na a fima nen n yete ra. Senbena n yii, n yi a fi, a senben mɔn n yii, n yi a tongo. N yamarini ito nan sɔtɔxi n Fafe Ala ra.” **19** Yahudiyane mɔn yi yitaxun na falane fe ra. **20** E wuyaxi yi a fala, e naxa, “Yinna jaxin nan ito fɔxɔ ra. Seen bata so a yi! ɛ tuli matima a ra nanfera?” **21** Koni bonne naxa, “Yinna jaxin naxan fɔxɔ ra, na mi falan tima na kiini. Yinnan nɔɛ danxutɔɔn yeen nabiye ba?” **22** Ala Batu Banxin nabi waxatin sanla sewan nan yi a ra Yerusalen taani, xunbeli waxatini. **23** Yesu yi a masiga tima Ala Batu Banxin tanden ma Sulemani a Gagene bun ma. **24** Yahudiyane yi a rabilin, e yi a fala a xa, e naxa, “I siken i to bama nxu ma waxatin mundun yi? Xa Alaa Muxu Sugandixin nan i tan na, a fala nxu xa kenenni.” **25** Yesu yi e yabi, a naxa, “N bata yelin a fale ɛ xa, koni ɛ mi laxi a ra. N kabanako fe wanla naxanye kema n Fafe Ala senbeni, ne nan n seren na. **26** Koni ɛ mi laxi n na, amasɔtɔ n ma yɛxɛɛne mi ɛ tan na. **27** N ma yɛxɛɛne n xuiin mema nen. N na e kolon, e birama nen n fɔxɔ ra. **28** N habadan nii rakisin fima e ma nen, e mi faxɛ habadan. Muxu yo mi nɔɛ e be n yii. (aïñ g165, aïñios g166) **29** N Fafe Ala naxan e soxi n yii, na gbo birin xa. Muxu yo mi nɔɛ e be n Fafe Ala yii. **30** N tan nun n Fafe, keden nan nxu ra.” **31** Yahudiyane mɔn yi gemene tongo a magolɔn xinla ma. **32** Yesu yi a fala e xa, a naxa, “N bata wali faɗi wuyaxi ke ɛ yetagi n Fafe Ala barakani. ɛ n magolonma wanla mundun ma fe ra ne ye nayi?” **33** Yahudiyane yi a yabi, e naxa, “Nxu mi i magolonma wali faɗine xan ma fe ra fɔ i Ala rayelefun naxan tima! Bayo muxun nan tun i tan na, koni i kataxi i xa i yete findi Ala ra!” **34** Yesu yi e yabi, a naxa, “A mi sebexi ɛ sariyani ba, a Ala naxa, ‘Alane nan ɛ tan na?’ **35** Kitabun naxan falaxi jɔndin nan na ra habadan. Alaa falan tixi muxun naxanye xa, xa a yi a fala ne ma, a ‘alane’ nan ne ra, **36** nanfera ɛ tan naxa, a n tan bata Ala rayelefu n to a falaxi a Alaa Dii Xemen

nan n tan na? N Fafe Ala nan n sugandixi, a yi n nafa dunuƴa yi. 37 Awa, xa n mi Fafe Alaa wanla kema hali ε mi la n na. 38 Koni xa n na e kema, xa ε mi la n na, ε la n ma wanle ra alogo ε xa a kolon fa, a Fafana n yi e nun n tan fafani.” 39 Yahudiyane mɔn yi kata Yesu suxu feen na, koni a yi a ba e yii. 40 Yesu mɔn yi xete Yuruden kidi ma, Yoni yi marafuun tima denaxan yi igeni a foloni. A sa lu na. 41 Muxu wuyaxi yi fa a fema, e naxa, “Yoni mi kabanako fe liga, koni a falan naxanye birin tixi xemeni ito a fe yi, nɔndin nan ne ra.” 42 Muxu wuyaxi yi denkeleya a ma menni.

11 Xemena nde yi furaxi, naxan yi xili Lasarusi Betani kaana, Mariyama nun a tada jaxalanmana, Marata yi dɔxi taan naxan yi. 2 Mariyama findi jaxanla nan na naxan latikɔnɔnna sa Marigin sanne ma, a yi e masugusugu a xun sexene ra, na ngaxakedenna Lasarusi nan yi furaxi. 3 Nanara, a tadane yi xeraan nasiga Yesu ma, e naxa, “Marigina, i xɔyin bata fura.” 4 Yesu to na mɛ, a naxa, “Saya fure mi a ra. Ito ligaxi nen alogo Ala xa binya. Alaa Dii Xemen binyama nen fureni ito xɔn ma.” 5 Marata nun a xunyen jaxalanmaan nun Lasarusi yi rafan Yesu ma han! 6 Anu, a to a mɛ fa fala a Lasarusi furaxi, a yi denaxan yi, a mɔn yi xii firin ti menni. 7 Na xanbi ra, a yi a fala a xarandiine xa, a naxa, “En xete Yudaya yamanani.” 8 A xarandiine yi a fala a xa, e naxa, “Karamɔxo, a munma bu singen Yahudiyane yi waxi i magolɔn feni, i mɔn waxi xete feni menna nin ba?” 9 Yesu yi e yabi, a naxa, “Yanyin birin na, kenenna mi na ba? Naxan na sigan ti yanyin na, na mi dagalanma ayi amasoto a dunuƴa kenenna toma. 10 Koni xa muxun sigan ti kɛɛn na, a dagalanma ayi nen amasoto kenenna mi na.” 11 Yesu to na fala, a naxa, “En xɔyin Lasarusi xiin nen, koni n xa sa a raxulun.” 12 A xarandiine yi a fala a xa, e naxa, “Marigina, xa a xiin nen, a kendeyama nen.” 13 Koni Yesu yi Lasarusi faxe feen nan ma fe falama nun. A xarandiine yi mirixi a ma, a xixɔnla nan tun yi a ma. 14 Nanara, Yesu yi falan makenen e xa, a naxa, “Lasarusi faxaxin nan a ra. 15 Koni n bata sewa ε tan ma fe ra bayo n mi yi a fema nun, alogo ε xa denkeleya. En siga a fema.” 16 Nayi, Tomasi, naxan yi xili a “Gulunna,” na yi a fala xarandiin bonne xa, a naxa, “En fan xa siga, alogo en birin xa sa faxa!” 17 Yesu to fa, a yi a kolon a Lasarusi maluxunna bata yi xii naanin ti. 18 Betani nun Yerusalen taan yi tagi so, fo kilo saxan jɔxɔn. 19 Yahudiya wuyaxi bata yi fa

nun Marata nun Mariyama xunye xememaan saya xɔntɔnna tideni e ma. 20 Marata to a mɛ, a Yesu fama, a yi siga a ralandeni koni Mariyama yi lu banxini. 21 Marata yi a fala Yesu xa, a naxa, “N Marigina, xa i yi be nun, n xunyen mi yi faxe nun! 22 Koni n na a kolon, hali iki, i na Ala maxandi fefe ra, a na ligama i xa nen.” 23 Yesu yi a fala a xa, a naxa, “I xunyen mɔn kelima nen sayani.” 24 Marata yi a yabi, a naxa, “N na a kolon a kelima nen sayani dunuƴa rajanni.” 25 Yesu yi a fala a xa, a naxa, “N tan nan marakeli tiin na sayani e nun nii rakisin na. Naxan na denkeleya n tan ma, hali a faxe, a nii rakisin sɔtɔma nen. 26 Naxan na lu a nii ra a denkeleya n ma, na mi faxe mume! I laxi ito ra ba?” (aiɔn g165) 27 Marata yi a yabi, a naxa, “Ɔn Marigina, n laxi a ra fa fala Alaa Muxu Sugandixin nan i tan na, Alaa Dii Xemena, naxan yi fama dunuƴa yi nun.” 28 Marata na fala xanbini, a xete, a yi a xunyen Mariyama xili wundoni, a yi a fala a xa, a naxa, “Karamɔxo be yi, a i xilima.” 29 Mariyama na mɛ waxatin naxan yi, a yi keli mafuren, a sa a ralan. 30 Yesu munma yi taan li nun, Marata a li denaxan yi, a yi menna nin nun. 31 Yahudiyen naxanye siga Mariyama xɔntɔndeni, ne a to waxatin naxan yi Mariyama bata keli mafuren, a mini, e yi bira a foxo ra. E yengi yi a ma, a sigan gaburun deen nan na wugadeni. 32 Mariyama Yesu feman li waxatin naxan yi, a yi a to, a yi a xinbi sin a bun ma, a naxa, “Marigina, xa i yi be nun, n xunyen mi yi faxe nun!” 33 Yesu yi a to, a wugama, Yahudiyen naxanye fan yi a foxo ra, ne fan yi wugama, na yi a niin sunu han! 34 A yi e maxodin, a naxa, “E a maluxunxi minen yi?” E yi a yabi, e naxa, “Marigina, fa a mato.” 35 Yesu yi wuga. 36 Na ma, Yahudiyane naxa, “A bata a xanu kii naxan yi, ε na mato!” 37 Koni nde naxa, “Ito xa mi danxutɔɔn yɛɛn nabi ba? A mi yi a lige nun, Lasarusi nama faxe ba?” 38 Yesu bɔjnen yi sunuxi, a siga gaburun deen na. Faranna nan yi a ra nun, gemen saxi a deen na. 39 Yesu yi e yamari, a naxa, “E gemen ba a de ra!” Faxe muxun tadan jaxalanmaan Marata yi a fala a xa, a naxa, “Marigina, a xirin nan fa minima iki amasoto a maluxunna bata soge naanin ti.” 40 Yesu yi a fala a xa, a naxa, “N mi yi a fala i xa nun fa fala xa i denkeleyaxi, i Alaa binyen toma nen?” 41 Nayi, e gemen ba na. Yesu yi a yɛɛ rate kore, a yi Ala maxandi, a naxa, “N Fafe, n barikan birama i xa amasoto i bata n xuiin mɛ. 42 N na a kolon fa fala i n xuiin mema waxatin birin. Koni n ni ito falama muxuni itoe nan ma fe ra naxanye tixi

be, alogo e xa la a ra fa fala a i tan nan n xexi.” **43** A to na fala, a yi a xuini te, a naxa, “Lasarusi, mini!” **44** Faxe muxun yi keli gaburun kui, a sanna nun a yiine raxidixi kasangenna ra, a xunna fan mafilixi kasangenni. Yesu yi a fala e xa, a naxa, “E a mafulun, e a lu, a xa siga.” **45** Nanara, Yahudiyan naxanye yi na Mariyama xontondeni, Yesu feen naxan liga, e to na to, e wuyaxi yi denkeleya a ma. **46** Koni nde yi siga Farisi muxune fema. Yesu feen naxan ligaxi, e sa na fala e xa. **47** Nanara, saraxarali kuntigine nun Farisi muxune yi kitisa yamaan xili bode toni, e naxa, “En nanfe ligama? Xemeni ito kabanako fe wuyaxi ligama!” **48** Xa en na a lu iki, muxune birin denkeleyama a ma nen. Romi kuntigine kelima nen, e yi en ma yire sarixanxin kala e nun en siyaan birin!” **49** E tan nde keden nan yi xili Kayafa, naxan yi Saraxarali Kuntigi Singen na nun na jeeen na, a yi a fala, a naxa, “E mi fefe kolon!” **50** E mi a kolon ba, fa fala a fisa muxu kedenna xa faxe yamaan xa benun siyaan birin xa halagi?” **51** Anu, a mi na falaxi a yete ma. Kayafa to yi saraxarali kuntigiyani nun na jeeen na, a waliyiya falan nan tixi na ra fa fala Yesu xa faxe Yahudiyan siyaan xa. **52** Koni na siyaan gbansanna xa mi a ra fo Ala diin naxanye xuyaxi ayi, a yi ne findi yama kedenna ra. **53** Nba, folo na waxatin ma, Yahudiya kuntigine yi Yesu faxe feni ton. **54** Nanara, Yesu mi fa a masiga ti Yudaya yamanani kenenni sonon koni a keli, a siga taana nde yi tonbonna dexon ma, denaxan xili Efirami. E nun a xarandiine yi lu na yi. **55** Yahudiyan sanla, Halagi Tiin Dangu Loxon Sanla bata yi maso. Muxu wuyaxi yi keli na yamanani siga Yerusalen taani alogo e xa sa e yete rasarijan benun sanla xa a li. **56** E yi lu Yesu fenje. E yi malanxi Ala Batu Banxini waxatin naxan yi, e yi lu e bode maxodinje, e naxa, “E mirixi nanse ma? A mi fe sanli ba?” **57** Saraxarali kuntigine nun Farisi muxune bata yi yamarin fi, e naxa, xa naxan Yesu yire kolon, a xa a yire ba alogo e xa sa a suxu.

12 A bata yi lu soge sennin benun Halagi Tiin Dangu Loxon Sanla xa a li, Yesu yi siga Betani taani, Lasarusi yi doxi denaxan yi, Yesu naxan nakeli sayani. **2** E yi donseen nafala a xa na yi. Lasarusi yi doxi Yesu fema a degedeni, Marata yi walima e xa. **3** Nba, Mariyama yi latikononna sare xodexen litiri tagi tongo, naxan xili naradi, a yi a sa Yesu sanne ma. A yi e masugusugu a xunsexen na. Latikononna xirin yi

banxin suxu. **4** Yudasi Isakariyoti, Yesu a xarandiina nde naxan yi a yanfama, a a so yiini, na yi a fala, a naxa, **5** “Nanfera latikononni ito mi matixi gbeti gbanan keme saxan na, a so yiigelitone yii?” **6** A mi na falaxi fa fala a xaminxi yiigelitone fe ra, koni bayo munaden nan yi a tan na nun. Gbeti benbenla yi ramaraxi a tan nan yii. A yi na gbetina nde donma nun. **7** Koni Yesu naxa, “Fata a ra! A ito maraxi n binbin maluxun loxon nan yee ra. **8** Yiigelitone e fema waxatin birin koni n tan mi luma e fema waxatin birin.” **9** Yahudiya wuyaxi yi a me, a Yesu na yi. E yi siga Yesu nun Lasarusi fan matodeni Yesu naxan nakeli sayani. **10** Na ma, saraxarali kuntigine yi Lasarusi fan faxe feni ton. **11** Amasoto Yahudiya wuyaxi yi xetema e foxo ra, e yi denkeleya Yesu ma Lasarusi a fe ra. **12** Na xoton bode, yama gbeen naxan yi faxi sanli, ne yi a me, a Yesu fama Yerusalen taani. **13** Nanara, e sa tugu yiine masege, e sa a ralan, e sonxo, e naxa, “Ala tantun! Naxan fama Marigin xinli, Ala xa na baraka! Ala xa Isirayila Mangan baraka!” **14** Yesu yi sofanla to, a doxo a fari alo a sebexi Kitabuni kii naxan yi, a naxa, **15** “Siyon kaane, e nama gaxu! A mato, e mangan fama. A doxi sofali diin fari.” **16** A xarandiine mi yi na birin famuxi singen, koni Yesu binya waxatin naxan yi, nayi e yi a kolon a na feene yi sebexi a tan nan ma fe ra, a e tan yeteen bata yi na liga a xa. **17** Yamaan naxan yi Yesu fema a Lasarusi xili gaburun na waxatin naxan yi, a yi a rakeli sayani, ne birin yi lu na seren be. **18** Nanara, yamaan yi siga a ralandeni amasoto e bata a me Yesu kabanako feen naxan ligaxi. **19** Farisi muxune yi a fala e bode xa, e naxa, “E mi a to, en katan naxan tima, a munanfan yo mi en ma! A mato, dunuja muxune birin biraxi a foxo ra!” **20** Girekina ndee bata yi siga sanli Ala batudeni. **21** E fa Filipi fema naxan yi kelixi Betasada taani Galile yamanani, e yi maxodinna ti, e naxa, “Nxu Fafe, nxu waxi a xon ma, nxu xa Yesu to.” **22** Filipi yi sa a fala Andire xa, e firinna birin yi siga, e sa a fala Yesu xa. **23** Yesu yi e yabi, a naxa, “Muxuna Dii Xemen binya waxatin bata a li. **24** N xa jondin fala e xa, fanni sansi kesen mi bira boxoni a yee maluxun, a mi wuye ayi. Koni xa a yee maluxun, a solima nen, a wuya ayi. **25** Muxu yo niin nafan a ma, a bonoma a yi nen, koni muxu yo a me a niin na dunuja ito yi, na a ramarama nen habadan nii rakisini. (aiōnios g166) **26** Muxu yo waxi a xon ma, a xa wanla ke n xa fo a xa bira n foxo ra nen. Nayi, n denaxan yi, n ma walikeen fan luma

nen menni. Muxu yo wanla kema n xa, n Fafe Ala na binyama nen.” 27 Yesu naxa, “N bɔɲen tɔrɔxi na a ra iki. N nanfe falama? N xa a fala ba, fa fala, ‘N Fafe, i nama tin waxatini ito xa n li?’ Anu, n faxi na nan ma. 28 N Fafe, i xinla binya!” Nayi, fala xuiin yi keli kore naxan a fala, a naxa, “N bata a binya, n mɔn a binyama nen.” 29 Yamaan naxan yi tixi na, ne yi fala xuiin me, e naxa, “Galanna bata a xui ramini!” Ndee naxa, “Malekan bata falan ti a xa!” 30 Yesu yi a fala e xa, a naxa, “Fala xuini ito mi minixi n tan ma fe ra, fɔ e tan ma fe ra. 31 Dunuɲa kitin bolon waxatin bata a li iki. Ala dunuɲani ito kuntigi ɲaxin kedima nen iki. 32 N na yite bɔxɔn ma waxatin naxan yi, n muxune birin mabandunma nen n ma.” 33 A ito falaxi nen alogo a xa a faxa kiin yita e ra. 34 Yamaan yi a yabi, e naxa, “Nxu bata a kolon Sariya Kitabun xɔn, a Alaa Muxu Sugandixin luma nen habadan. I tan a falama nanfera fa fala a Muxuna Dii Xemeni tema nen? Nde Muxuna Dii Xemeni ito ra?” (aiɔn g165) 35 Yesu yi e yabi, a naxa, “Kenenna kanna mɔn e ye singen waxatidi tun. Kenenna e tagi waxatin naxan yi e sigan ti, alogo dimin nama so e ma. Bayo naxan dimini, na mi a sigaden kolon. 36 Kenenna kanna e tagi waxatin naxan yi, e denkeleya a ma, alogo e xa findi kenenna muxune ra.” Yesu ito fala e xa waxatin naxan yi, a yi siga, a a luxun e ma. 37 Hali a to kabanako fe wuyaxi liga e yeɛ xori, e mi la a ra. 38 Na liga nen alogo Nabi Esayi fala xuiin xa kamali, a naxa, “Marigina, nde laxi nɔx falan na? Marigina a senben makenen nde xa?” 39 Nanara, e mi yi nɔe denkeleye bayo Esayi mɔn naxa, 40 “A bata e yeɛn danxu, a yi e bɔɲen xɔdɔxɔ ayi, alogo e yeɛne nama toon ti, e xaxinla nama feene famu, a e nama maxete, Ala yi e rakendeya.” 41 Esayi na falaxi nen, bayo a bata yi Yesu a binyen to, a yi a tan nan ma fe falama. 42 Anu, hali yamaan kuntigine ye, muxu wuyaxi denkeleya nen Yesu ma. Koni e mi yi tinma a fale Farisi muxune fe ra alogo e nama e ramini salideni. 43 A rafan e ma muxune xa e binya benun Ala xa e binya. 44 Yesu yi a xuini te, a naxa, “Naxan na denkeleya n ma, a mi denkeleyaxi n tan xan tun ma fɔ naxan n xexi. 45 Muxu yo n to, na bata n xe muxun fan to. 46 N bata fa dunuɲa yi alo kenenna kanna. Naxan na denkeleya n ma, na mi luye dimini. 47 Muxu yo n ma falan me, a mi a suxu, n tan xa mi a yalagima. Amasɔtɔ n mi faxi dunuɲa muxune yalagideni, fɔ e rakisideni. 48 Naxan na a me n na, a mi tin n ma falane suxe. N ma falan na kanna yalagima

nen lɔxɔ dɔnxeni. 49 Amasɔtɔ n mi falan tima n yete xan ma fe ra fɔ n Fafe Ala naxan n xexi. Na nan n ma fala tixine yamarima n ma. 50 N na a kolon fa fala a yamarin findima nen habadan nii rakisin na. N falan tiin nen alo n Fafe Ala a yamarixi n ma kii naxan yi.” (aiɔnios g166)

13 Nba, na xɔtɔn bode, Halagi Tiin Dangu Lɔxɔn Sanla nan yi a ra. Yesu yi a kolon fa fala a keli waxatin bata a li dunuɲa yi, siga a Fafe Ala konni. A gbee muxun naxanye yi dunuɲa yi, a yi ne xanu waxatin birin, a yi e xanu han a raɲanna. 2 E yi e degema waxatin naxan yi, Yinna Manga Setana bata yi yelin soe Simɔn ma dii xemem Yudasi Isakariyoti bɔɲeni a xa Yesu yanfa, a a so yiini. 3 Yesu yi a kolon fa fala Fafe Ala bata feen birin sa a senbeni. A yi a kolon fa fala a fataxi Ala nan na, a mɔn sigama Ala nan ma. 4 Nanara, e to yi e degema, a yi keli, a yi a doma gbeen ba a ma, a dugin xidi a tagi. 5 Na xanbi ra, a yi igen sa ige sa seen kui, a yi fɔlɔ a xarandiine sanne maxe. Dugin naxan yi xidixi a tagi, a yi e sanne masugusugu na ra. 6 A yi fa Simɔn Piyeri fema, na yi a fala a xa, a naxa, “Marigina, i tan nan n sanna maxama ba?” 7 Yesu yi a yabi, a naxa, “I mi a kolon n naxan ligama iki, koni i fama a kolonden n n.” 8 Piyeri yi a fala, a naxa, “I tan mi n sanna maxe mumel!” Yesu yi a yabi a naxa, “Xa n mi i sanna maxa, i mi finde n ma xarandiin na.” (aiɔn g165) 9 Simɔn Piyeri yi a yabi, a naxa, “Marigina, i nama n sanna gbansanna maxa nayi, koni e nun n yiine nun n xunna!” 10 Yesu yi a yabi, a naxa, “Naxan bata a gbindin maxa, na mako mi fa a maxan ma fɔ a sanne, bayo a sarijan. E fan sarijan, koni e birin mi a ra.” 11 Yesu yi a yanfa muxun kolon. Nanara, a yi a fala, a naxa, “E birin mi sarijan.” 12 Yesu yelin e sanne maxe waxatin naxan yi, a yi a doma gbeen nagodo a ma, a mɔn yi sa dɔxɔ a funfuni. A yi e maxodin, a naxa, “N naxan ligaxi ito ra, e na famunxi ba? 13 E n tan xilima fa fala ‘Karamɔxɔ’ e nun ‘Marigina.’ Na falan lanxi amasɔtɔ na nan n tan na. 14 Xa n tan e Marigin nun e karamɔxɔn bata e sanne maxa, e tan fan xa e bode sanne maxa. 15 N misaala yitaxi e ra nen, alogo e xa a liga alo n na a ligaxi kii naxan yi. 16 N xa ɲɔndin fala e xa, konyin mi gbo a kanna xa, xeraan mi gbo a xe muxun xa. 17 E bata feni itoe kolon iki, sewana e xa, xa e lu na lige!” 18 “N mi falan tima e birin ma fe ra. N bata naxanye sugandi, n ne kolon. Koni fɔ Kitabun fala xuiin xa

rakamali nen, a naxa, 'Nxu nun naxan donseen donma nxu bode xɔn, na bata keli n xili ma.' 19 N ni ito falama ε xa iki benun a xa liga. Nayi, a na liga waxatin naxan yi, ε lama a ra nen, fa fala, 'N tan nan a ra, naxan na yi.'" 20 "N xa jɔndin fala ε xa. Naxan na n ma xerani suxu, na bata n fan yisuxu. Naxan na n tan yisuxu, na kanna bata Ala yisuxu naxan n xexi." 21 Yesu ito fala waxatin naxan yi, a niin yi sunu! A yi sereya falani ito ti, a naxa, "N xa jɔndin fala ε xa, ε tan nde keden n yanfama nen, a n so yiini yati!" 22 A xarandiine yi e bode mato, e mi yi a kolon a yi muxun naxan ma. 23 Yesu a xarandii keden yi na, a yi naxan xanuxi kati, na yi dɔxi a dexɔn ma. 24 Simɔn Piyeri yi a yiin maliga na xa, a naxa, "A maxɔdin, a nde a fe falama." 25 Na xarandiin yi a maso Yesu ra, a yi a maxɔdin, a naxa, "N Marigina, nde na ra?" 26 Yesu yi a yabi, a naxa, "N na donseen sin sabini, n na a so naxan yii, na kanna nan a ra." Awa, a donseen sin sabini, a yi a so Simɔn ma dii xɛmɛn Yudasi Isakariyoti yii. 27 Yudasi donseen nasuxina, Setana yi so a yi sa! Yesu yi a fala a xa, a naxa, "I naxan ligama, na liga mafuren." 28 Yesu naxan fala a xa, bonna naxanye yi dɔxi e degedeni, ne sese mi yi na famunxi. 29 Bayo Yudasi nan yi e gbetin marama, ndee yengi yi lu a ma, a Yesu bata a fala a xa, a xa sa sena ndee sara sanla fe ra. Hanma a xa sa sena nde so yiigelitɔne yii. 30 Yudasi yi na donseen nasuxu, a mini na sa! Kɛɛn nan yi a ra. 31 Yudasi siga waxatin naxan yi, Yesu naxa, "Iki, n tan Muxuna Dii Xɛmena binyen bata makenen, Alaa binyen fan bata makenen n barakani. 32 Xa Alaa binyen bata makenen n tan barakani, Ala yetena n tan Muxuna Dii Xɛmena binyen makenenma nen mafuren!" 33 "N ma diine, n mi buma ε fema sɔnɔn. E n fenma nen, koni n naxan fala Yahudiyaane xa, n na nan falama ε fan xa, n naxa, 'N sigama yiren naxan yi, ε mi nɔɛ sigɛ na yi.' 34 N yamari nenen nan soma ε yi, ε bode xanu. E ε bode xanu alo n na ε xanuxi kii naxan yi. 35 E na ε bode xanu, muxune birin ε kolonma n ma xarandiine ra na nan xɔn." 36 Simɔn Piyeri yi a maxɔdin, a naxa, "Marigina, i sigan minen yi?" Yesu yi a yabi, a naxa, "N sigama denaxan yi, i mi nɔɛ sigɛ n fɔxɔ ra menni iki, koni i sigama n fɔxɔ ra nen waxati famatɔni." 37 Piyeri yi a maxɔdin, a naxa, "Marigina, nanfera, n mi nɔɛ birɛ i fɔxɔ ra iki? N faxɛ nen i ya fe ra!" 38 Yesu yi a yabi, a naxa, "I faxɛ n ma fe ra ba? N xa jɔndin fala i xa, benun dontonne xa wuga waxatin naxan yi, i ya falama nen dɔxɔɔna ma saxon fa fala i mi n kolon."

14 Yesu yi a fala e xa, a naxa, "E bɔɔɔn nama tɔɔɔ, ε denkeleya Ala ma, ε denkeleya n tan fan ma. 2 Banxi wuyaxi n Fafe Ala konni. Xa a mi yi na kiini, n yi a falama ε xa nen nun. N sigama n xa sa yirena nde yitɔn ε xa na yi. 3 N na sa yirena nde yitɔn ε xa, n mɔn fama nen, n yi sigɛ ra n yii alogo n denaxan yi, ε fan yi sa lu menni. 4 N sigan denaxan yi, ε mɛn kiraan kolon." 5 Tomasi yi a fala a xa, a naxa, "Marigina, nxu mi i sigaden kolon, nxu na kiraan kolonma di?" 6 Yesu yi a yabi, a naxa, "Kiraan nan n tan na, e nun jɔndina e nun nii rakisina. Muxu yo mi sigɛ n Fafe Ala ma n tan ma sabuyaane xanbi. 7 Xa ε n tan kolon, ε n Fafe fan kolonma nen. To xanbi ra, ε bata a kolon, ε bata a to." 8 Filipi yi a fala a xa, a naxa, "Marigina, Fafe Ala yita nxu ra, na nan nxu wasama." 9 Yesu yi a yabi, a naxa, "Filipi, en bata bu en bode fema kati! Han to, i mi n kolon? Muxu yo na n to, na kanna bata Fafe Ala to. I tan a falama nanfera fa fala a n xa Fafe Ala yita ε ra? 10 Filipi, i mi laxi a ra ba, fa fala n Fafe Ala yi, Fafe Ala n fan yi? N falan naxanye tima ε xa, n gbee mi ne ra. Koni n Fafe Ala naxan luma n tan yi, na nan a wanla kɛma. 11 E denkeleya a ma fa fala n Fafe Ala yi, Fafe Ala n fan yi. Hanma ε denkeleya kabanako fe wanli itoe xɔn." 12 "N xa jɔndin fala ε xa, naxan na denkeleya n ma, na feene ligama nen alo n naxanye ligama. A yetɛɛn feene ligama nen naxanye gbo itoe xa, amasɔtɔ n sigama n Fafe Ala fema. 13 E na Ala maxandi fefe ra n tan xinli, n na ligama ε xa nen alogo n Fafe Alaa binyen xa mayita a Dii Xɛmɛn barakani. 14 Xa ε n xandi fefe ra n xinli, n na ligama ε xa nen." 15 "Xa ε n xanuxi, ε n ma yamarine suxu. 16 N Fafe Ala maxandima nen, a yi Mali Ti gbete so ε yii naxan luma ε fema habadan. (aiɔn g165) 17 Alaa Nii Sarijanxin nan a ra, jɔndin kanna. Dunuɔna muxune mi nɔɛ na sɔte amasɔtɔ e mi nɔɛ a tɔɛ, e mi a kolonɔɔ. Koni ε tan a kolon amasɔtɔ a luma nen ε fema, a mɔn yi lu ε yi. 18 N mi ε luye alo kiridine, n mɔn fama nen ε fema. 19 Ndedi nan fa luxi, dunuɔna muxune mi fa n toma sɔnɔn koni ε tan n toma nen. Bayo n tan bata niin kisin sɔtɔ, ε fan nii rakisinsɔtɔma nen. 20 Na waxatin na a li, ε a kolonma nen, a n Fafe Ala yi, ε tan fan n tan yi alo n tan ε yi kii naxan yi. 21 Muxu yo n ma yamarine sɔtɔ, a yi e suxu, na nan bata n xanu. Muxu yo n xanu, n Fafe Ala fan na kanna xanuma nen, n tan fan yi a xanu, n yi n yete yita a ra." 22 Yudasi bonna, Yudasi Isakariyoti mi naxan na, na yi a fala, a naxa, "Marigina, nanfera i lan i xa i yete yita nxu ra, koni i

mi i yete yite dunuƚa muxune ra?” **23** Yesu yi a yabi, a naxa, “Muxu yo n xanu, na n ma falan suxuma nen. N Fafe Ala fan yi a xanu, n tan nun n Fafe Ala yi siga a fema, nxu yi nxu konni tɔn a fema. **24** Muxu yo mi n xanu, na mi n ma falan suxe. E bata falan naxan me, n gbee fala mi na ra. N Fafe Ala naxan n xexi, na nan gbee na ra.” **25** “N to yi e fema, nanara, n falani itoe ti e xa. **26** Koni Mali Tiina, Alaa Nii Sarijanxina, Fafe Ala naxan nafama e ma n xinli, na e xaranma nen feen birin ma. N feen naxan birin falaxi e xa, a ne birin nabirama nen e ma.” **27** “N bata boƚe xunbenla lu e yi. N bata n ma boƚe xunbenla fi e ma. N mi a fixi e ma alo dunuƚa kiin tima kii naxan yi. E boƚen nama tɔrɔ, e nama gaxu. **28** E bata n ma falan me, n naxa, ‘N sigama koni n mɔn fama e fema nen.’ Xa e yi n xanuxi, e yi sewama nen n siga feen na n Fafe Ala konni amasɔa a gbo n tan xa. **29** N feni itoe falama e xa nen iki benun a xa liga. Nanara, a na liga waxatin naxan yi, e denkeleyama nen. **30** N mi fa buma falan tiye e fema sɔnɔn, amasɔa dunuƚa ito kuntigi naxin fama. Sese mi a ra n tan yi. **31** Koni dunuƚa xa a kolon fa fala n bata n Fafe Ala xanu. Nanara, n feen birin ligama alo a n yamarixi kii naxan yi. E keli, e fa, en siga.”

15 Yesu yi a fala, a naxa, “N tan nan ƚɔndin binla ra alo wudin binla. N Fafe Ala nan nakɔɔn kanna ra. **2** Wudi yiin naxanye birin n tan wudi binla ma, xa na naxanye mi bogi, Fafe Ala ne bama nen n ma. Naxanye birin bogima, a ne rasarijanma nen alogo e mɔn xa bogi dangu a singen na. **3** N falan naxan tixi e xa, na bata e sarijan iki. **4** E lu n tan yi, n fan yi lu e yi. Wudi yiin mi nɔe boge a yete ra, xa a mi a binla ma. E fan na kii nin, xa e mi lu n tan yi. **5** N tan nan wudin binla ra, a yiine nan e tan na. Naxan na lu n tan yi, n tan fan luma nen na kanni, a yi bogi wuyaxi ti a kewanli. Amasɔa e mi nɔe sese lige n tan xanbi. **6** Xa muxun naxan mi lu n tan yi, na rawolima ayi nen alo wudi yiina, a xara. Na wudi yii sifane malanma nen, e sa tɛeni, e gan. **7** Xa e lu n tan yi, n ma falan yi lu e yi, e na n xandi sese yi, e na sɔtɔma nen. **8** E na findi n ma xarandine ra, e yi bogi wuyaxi ti e kewanli, na nan n Fafe Alaa binyen makenenma.” **9** “N Fafe Ala n xanuxi kii naxan yi, n fan bata e xanu na kiini. E lu n ma xanuntenyani. **10** Xa e n ma yamarine suxu, e luma nen n ma xanuntenyani alo n fan n Fafe Alaa yamarin suxi kii naxan yi, n lu a xanuntenyani.

11 N ni ito falaxi e xa nen alogo n ma sewan xa lu e yi, e sewan yi defe.” **12** “N ma yamarin nan ito ra, e bode xanu alo n na e xanuxi kii naxan yi. **13** Xanuntenyaan mi muxu yo yi dangu ito ra fa fala a xa faxa a xoyine fe ra. **14** Xa e n ma yamarine suxu, n xoyine nan e tan na. **15** N mi fa a falama e ma sɔnɔn fa fala walikene amasɔa walikɛen mi a kolon a kuntigin naxan ligama. Koni n fa e xili bama nen, ‘n xoyine’ amasɔa n naxan birin mexi n Fafe Ala ra, n bata na yɛba e xa. **16** E tan mi n sugandixi koni n tan bata e sugandi, n yi e ti a ra a e xa siga, e sa bogi wuyaxi ti e kewanle xɔn, bogin naxanye luma a ra habadan alogo e na fefe maxandi n xinli, n Fafe Ala xa na fi e ma. **17** N ma yamarin nan ito ra, e bode xanu.” **18** “Xa dunuƚa muxune e rapaxu, e xaxili lu a xɔn ma fa fala a e n singe nan rapaxu. **19** Xa dunuƚa muxun nan yi e tan na nun, dunuƚa muxune yi e xanuma nen alo e kon kaane. Koni n bata e sugandi keli dunuƚa muxune tagi. E gbee mi fa e tan na. Na nan a ligaxi dunuƚa muxune e rapaxuxi. **20** N naxan falaxi e xa, e xaxili lu na xɔn ma, n naxa, ‘Konyin mi gbo a kanna xa.’ Xa e bata n tan besɛnxɔnya, e e fan besɛnxɔnyama nen. Xa e bata n ma falan suxu, e e fan gbeen suxuma nen. **21** Koni e ito birin ligama e ra nen amasɔa n gbeen nan e tan na, bayo e mi n xe muxun kolon. **22** Xa n mi yi fa nun, n fa falan ti e xa, e mi yi yatɛma yulubi tongone ra nun. Koni iki, mawuga yo mi fa e xa yulubina fe ra sɔnɔn. **23** Muxu yo n tan rapaxu, na kanna bata n Fafe Ala fan rapaxu. **24** Xa n mi yi kabanako fe wanle ke e tagi nun, muxu gbete munma yi naxanye liga singen, e mi yi yaten yulubi tongone ra nun. Koni iki, n naxan ligaxi, e bata na to. Hali na, e n tan nun n Fafe Ala rapaxuxi. **25** Koni naxan seɓexi e Sariya Kitabun kui, fo na xa kamali nen, a naxa, ‘E bata n tan rapaxu fuuni.’” **26** “Mali Tiin na fa, n naxan nafama sa keli Fafe Ala fema, Alaa Nii Sarijanxina, ƚɔndin kanna, na n ma fe sereyaan bama nen. **27** E tan fan n ma fe sereyaan bama nen amasɔa e yi n fɔxɔ ra nun xabu a foloni.”

16 “N ni ito birin falaxi e xa nen alogo e nama bira tantanni. **2** E e kedima nen salide banxine yi. Nba, waxatina nde fama, xa muxu yo e faxa, na kanna a mirima nen fa fala a bata Alaa wanla ke. **3** E feni itoe ligama e ra nen amasɔa e mi n tan kolon, e mi n Fafe Ala fan kolon. **4** Koni n bata feni itoe fala e xa. Nanara, e nɛma feni itoe lige e ra waxatin naxan

yi, n ma falane rabirama ε ma nen. N munma yi feni itoe fala ε xa nun a singeni amasoto n yi ε fema.” 5 “Koni iki, n sigama n xe muxun fema koni ε tan sese mi n maxodinma fa fala, ‘I sigan minen yi?’ 6 Koni xabu n na a fala ε xa, ε bojen bata raforo. 7 Hali na, n xa jondin fala ε xa, a fisa ε ma n siga. Amasoto xa n mi siga, Mali Tiin mi fama ε fema. Koni xa n siga, n Mali Tiin nafama ε ma nen. 8 A na fa, a dunuja muxune tantanna yitama e ra nen lan yulubin nun tinxinyaan nun Ala kiti bolonna ma. 9 Yulubina, amasoto e mi denkeleyaxi n tan ma. 10 Tinxinyana, amasoto n sigama n Fafe Ala konni, ε mi fa n toma sonon. 11 Kiti bolonna, amasoto dunuja kuntigi jaxin bata yelin yalage.” 12 “Fe wuyaxi n kui, n naxanye fale ε xa, koni e mi xanxe ε ma iki. 13 Koni Alaa Nii Sarijanxina, jondin kanna na fa, a ε tima nen jondin birin kiraan xon. A mi a yete sagoon xan falama. Koni a naxan mema, a na nan falama ε xa. A yi fe famatone rali ε ma. 14 A n tan binyama nen amasoto a na naxan soto n tan yii, a na nan nalima ε ma. 15 N gbeen nan n Fafe Ala yii seene birin na. Nanara, n naxa, ‘Alaa Niin na naxan soto n yii, a na nan nalima ε ma.’” 16 Awa, Yesu yi a fala, a naxa, “Ndedi mon luxi, ε mi fa n toma, koni na waxatidin na dangu ε mon n toma nen.” 17 A xarandiina ndee yi a fala e bode tagi, e naxa, “Ito bunna di? Fa fala, ‘Ndedi mon luxi, ε mi fa n toma, koni na waxatidin na dangu, ε mon n toma nen?’ A mon naxa, a sigama a Fafe fema.” 18 E yi a falama, e naxa, “A nanse falama ito ra, a naxa, ‘Waxatidi?’ En mi a kolon a naxan falama.” 19 Yesu to a kolon fa fala e yi waxi a maxodin feni, a yi a fala e xa, a naxa, “N naxan falaxi ε xa fa fala, ‘Ndedi mon luxi, ε mi fa n toma, koni na waxatidin na dangu, ε mon n toma nen’ ε ε bode maxodinma na nan ma ba? 20 N xa jondin fala ε xa, ε wugama nen, ε sunu koni dunuja muxune sewama nen. E bojen naforoma nen koni ε boje raforon findima nen sewan na. 21 Xa jaxanla diin barima waxatin naxan yi, a niini suxuma a ma nen kati, amasoto a waxatin nan na ra. Koni a na diin soto waxatin naxan yi, a jinanma nen a toron birin na, a sewa amasoto a bata diin soto dunuja yi. 22 E tan fan na kii nin. E bojen naforoxi iki koni n mon ε toma nen. E bojen yi rafe sewan na. Muxu yo mi noε ε sewan be ε yii. 23 Na waxatin na a li, ε mi n maxodinje fefe ra. N xa jondin fala ε xa, ε na n Fafe Ala maxandi fefe ra n tan xinli, a na fima ε ma nen. 24 Han iki, ε munma Ala maxandi fefe ra n xinli singen.

E xandin ti, ε a sotoma nen alogo ε sewan xa defe.” 25 “N bata yi feni itoe fala ε xa sandani. Koni waxatina nde fama, n mi fa falan tima ε xa na kiini, koni n nan n Fafe a fe makenenma ε xa nen na waxatini. 26 Na waxatin na a li, ε Ala maxandima nen n xinli. N mi a falama a n tan nan n Fafe maxodinma ε xa. 27 Na mi a ra. Amasoto Fafe Ala bata ε xanu bayo ε bata n tan xanu, ε bata la a ra fa fala n kelixi Ala nan ma. 28 N kelixi n Fafe Ala nan fema, n fa dunuja ito yi. Iki n kelima dunuja yi, n siga n Fafe Ala fema.” 29 A xarandiine yi a fala, e naxa, “A mato, i falan tima nxu xa kenenna nin iki, i mi fa sanda sama sonon. 30 Nxu bata a kolon iki fa fala i feen birin kolon. Nanara, i mako mi a ma a muxe xa maxodinna ti. Nayi, nxu bata la a ra fa fala i kelixi Ala nan fema.” 31 Yesu yi e yabi, a naxa, “E bata la a ra iki ba? 32 Waxatina a limaan ni i ra, a bata a li, ε birin xuyama ayi nen na waxatini, ε birin yi siga ε konne yi. E yi n keden peen lu. Koni n keden mi a ra amasoto n Fafe Ala n fema. 33 N feni itoe falaxi ε xa nen alogo ε xa boje xunbenla soto n tan barakani. E toroma nen dunujani ito yi, koni ε wekile! N tan bata dunuja no.”

17 Yesu yelin na fale waxatin naxan yi, a yi a yee rate kore, a naxa, “N Fafe, waxatin bata a li. I ya Dii Xemena binyen makenen alogo i ya Dii Xemen xa i binya. 2 I bata senben fi n tan ma adamadiine birin xun na, a n xa habadan nii rakisin fi muxune ma i naxanye soxi n yii. (aiōnios g166) 3 Habadan nii rakisin nan ito ra, a e xa i tan Ala keden peen nan kolon e nun Yesu Alaa Muxu Sugandixina i naxan xexi. (aiōnios g166) 4 N bata i ya binyen makenen dunuja yi. I wanla naxan soxi n yii, n bata yelin na ra. 5 N Fafe, iki n ma binyen makenen i yetagi, binyen naxan yi n yii i fema nun benun dunuja xa da.” 6 “I muxun naxanye fixi n ma dunuja yi, n bata i makenen ne xa. I gbeen nan yi e tan na. I bata e so n tan yii, e yi i ya falan suxu. 7 E bata a kolon iki fa fala i seen naxan birin fixi n ma, ne kelixi i tan nan yii. 8 I falan naxan tixi n xa, n bata na fala e xa, e yi a suxu. E bata a kolon yati, fa fala n kelixi i tan nin. E bata la a ra fa fala i tan nan n xexi.” 9 “N ni i tan Ala maxandima e xa. N mi i maxandima dunuja muxune birin xan xa fo i muxun naxanye soxi n yii amasoto i gbeen nan ne ra. 10 Naxanye birin n yii, i gbeen nan ne ra. I gbeen naxanye birin na, n gbeen nan ne ra. N binyaxi e tan xon. 11 Iki n sigama i fema, n mi fa luma dunuja yi sonon koni e tan mon

dunuja yi. N Fafe sarijanxina, i xinla naxan fixi n ma, e ratanga na xinla senbeni alogo e xa findi kedenna ra, alo en tan findixi kedenna ra kii naxan yi. **12** N yi e fema waxatin naxan yi, i xinla naxan so n yii, n na e ratanga na xinla senben nan xon, n yi e kantan. Hali keden mi lo ayi, fo halagin yi ragidixi naxan ma, alogo Kitabun sebenla xa kamali. **13** Iki n sigama i fema, n bata feni itoe fala dunuja muxune xa alogo e xa n ma sewa defexin soto e bojneni. **14** N bata i ya falan nali e ma koni dunuja muxune bata e rajaxu amasoto dunuja gbee mi e tan na alo dunuja gbee to mi n tan na. **15** N mi i mafanma fa fala i xa e ba dunuja yi koni n ni i mafanma nen, i xa e ratanga Fe Naxin Kanna ma. **16** Dunuja gbee mi e ra alo dunuja gbee to mi n tan na. **17** E rasarijan jondin xon. I ya falan nan jondin na. **18** I n xexi dunuja yi kii naxan yi, n fan bata e xe dunuja yi na kiini. **19** N bata n yete rasarijan e fe ra alogo e fan xa rasarijan jondin xon.” **20** “N mi i maxandima e tan xan tun ma fe ra, koni fo e nun muxun naxanye fan denkeleyama n ma e fala xuiin xon ma **21** alogo e birin xa findi muxu kedenna ra, alo i tan n tan yi kii naxan yi, e nun n fan i tan yi kii naxan yi. N Fafe, e fan xa findi kedenna ra en tan yi alogo dunuja muxune xa la a ra fa fala i tan nan n xexi. **22** I binyen naxan soxi n yii, n fan bata na so e yii, alogo e fan xa findi kedenna ra alo n tan nun i tan kedenna ra kii naxan yi, **23** n tan e tan yi, i tan fan n tan yi. E xa findi kedenna ra ngaxakedenya kamalixini alogo dunuja muxune xa a kolon fa fala i tan nan n xexi, a i bata e xanu alo i n xanuxi kii naxan yi. **24** N Fafe, i bata e so n yii. N denaxan yi, n waxi a xon ma, e fan xa siga n foxo ra menna nin, alogo e xa n ma binyen to, i binyen naxan fixi n ma, bayo i n xanuxi nen benun dunuja xa da. **25** N Fafe tinxinxina, dunuja muxune mi yi i kolon, koni n tan i kolon, e fan bata a kolon a i tan nan n xexi. **26** N bata a liga, e yi i kolon. N na ligama nen, alogo i n xanuxi xanuntenyaan naxan na, na xa lu e tan fan yi, n tan fan yi lu e yi.”

18 Yesu yelin Ala maxande waxatin naxan yi, e nun a xarandiine yi siga, e sa dangu Kediron lanbanna foxo kedenni, oliwi wudi bili nakoon yireni, e nun a xarandiine sa so denaxan yi. **2** Yudas naxan Yesu yanfa, a a so yiini, na yi menna kolon amasoto Yesu nun a xarandiine yi darixi e malanje menna nin. **3** Yudas yi fa nakoni, e nun Romi sofa ganla

nun Yahudiyane kantan muxune, saraxarali kuntigine nun Farisi muxune naxanye xexi. Xaye degene nun lenpune nun yenge so seene yi e yii. **4** Feen naxanye fama ligadeni Yesu ra, a yi ne birin kolon. Yesu yi fa e fema, a yi e maxodin, a naxa, “E nde fenma?” **5** E yi a yabi, e naxa, “Nxu Yesu Nasareti kaan nan fenma.” Yesu naxa, “N tan ni i ra.” Yudas naxan a yanfama, a a so yiini, na fan yi tixi e tagi. **6** Yesu to a fala, a naxa, “N tan ni i ra,” e xete e xanbi ra, e bira. **7** Yesu mon yi e maxodin, a naxa, “E nde fenma?” E yi a fala, e naxa, “Yesu Nasareti kaana.” **8** Yesu yi a fala, a naxa, “N bata yi a fala e xa, a n tan ni i ra. Xa e n tan nan fenma, e bonni itoe yiiba, e xa siga.” **9** A na liga nen alogo a fala tixin xa kamali, a naxa, “N Fafe Ala naxan birin fixi n ma hali na keden mi loxi ayi.” **10** Silanfanna yi Simon Piyeri yii. Piyeri yi a botinye ayi, a Saraxarali Kuntigi Singena konyin yiifari ma tunla sege a ma. Na konyin yi xili nen “Malikusi.” **11** Yesu yi a fala Piyeri xa, a naxa, “I ya silanfanna soti a teeni! N Fafe toro igelengenna naxan nagidixi n ma, n mi n minje na ra ba?” **12** Sofa ganla nun e mangan nun Yahudiyane kantan muxune yi Yesu suxu, e yi a xidi. **13** E siga Yesu ra Anasa singe fema amasoto Kayafa bitan xememaan nan yi na ra. Kayafa nan yi Saraxarali Kuntigi Singen na na jeen na. **14** Kayafa nan bata yi Yahudiyane rakolon nun, a naxa, a fisa muxu kedenna xa faza yamaan xa. **15** Simon Piyeri nun xarandiina nde yi biraxi Yesu foxo ra. Saraxarali Kuntigi Singen yi xarandiin bonna kolon ki fapi. Nanara, a so Yesu foxo ra Saraxarali Kuntigi Singena tanden ma kiti sadeni. **16** Koni Piyeri yi tixi sansanna so deen dexon. Xarandiin bonna, Saraxarali Kuntigi Singen yi naxan kolon, na yi mini, a falan ti walike jaxanla xa, naxan tixi deen na, na yi Piyeri raso. **17** Walike jaxanla naxan yi tixi deen na, na yi a fala a xa, a naxa, “Xemeni ito a xarandiina nde xa mi i fan na ba?” Piyeri yi a yabi, a naxa, “N tan mi a ra.” **18** Xunbenla yi fama na waxatini. Nanara, walikene nun de kantanne yi teen sa a ra, e yi tixi naxan xon e maxaradeni. Piyeri fan yi tixi e ye a maxaradeni. **19** Saraxarali Kuntigi Singen yi Yesu maxodin a xarandiine nun a xaranna fe ma. **20** Yesu yi a yabi, a naxa, “N bata falan ti yamaan birin xa kenenni, n yi darixi xaranna tiye salide banxine nin hanma Ala Batu Banxini, Yahudiyane birin e malanma denaxan yi. N mi sese falaxi wundoni. **21** I n maxodinma na ma nanfera? Muxun naxanye n xuiin mexi, ne maxodin. E n ma fala tixine kolon ki

fajni!” 22 Yesu ito fala waxatin naxan yi, de kantanna naxanye yi na yi, na nde yi a deen garin, a naxa, “I Saraxarali Kuntigi Singen yabima na kii nin?” 23 Yesu yi a yabi, a naxa, “Xa n fala jaxin tixi, na sereyaan ba. Koni xa n jɔndin nan falaxi, nanfera i n garinxi?” 24 Nayi, Anasa yi a xidixin nasiga Kayafa ma, Saraxarali Kuntigi Singena. 25 Simɔn Piyeri yi lu tixi na yi a maxaradeni. E yi a fala a xa, e naxa, “A xarandiina nde xa mi i fan na ba?” Koni Piyeri yi a tandi, a naxa, “N tan mi a ra.” 26 Piyeri Saraxarali Kuntigi Singena konyin naxan tuli sege a ma, na kon kaana nde yi a maxodin, a naxa, “N mi i tan xa to a fema oliwi bili nakoni?” 27 Piyeri mɔn yi a tandi. Dontonna yi wuga keden na! 28 E yi Yesu tongo Kayafa konni siga yamana kanna banxini. Xɔtɔn xɔtonna nan yi a ra nun. Yahudiyane yeteen mi so yamana kanna banxini alogo Romi kaane nama e sarijanna kala, bayo e yi sigama Halagi Tiin Dangu Lɔxɔn Sanla donse donden nin. 29 Pilati yi mini tandeni e fema, a yi a fala e xa, a naxa, “E xemeni ito kansunma feen mundun ma?” 30 E yi a yabi, e naxa, “Xa xemeni ito mi fe jaxi rabaxi, nxu mi yi fama a ra i fema nun.” 31 Pilati yi a fala e xa, a naxa, “E a tongo, e yeteen xa a makiti e sariyan na.” Yahudiyane yi a yabi, e naxa, “Koni e sariyan mi a ra, nxu xa muxun faxa.” 32 Ito ligaxi nen alogo Yesu naxan fala lan a faxa kiin ma, na xa kamali. 33 Pilati yi xete yamana kanna banxini, a sa Yesu xili, a yi a maxodin, a naxa, “Yahudiyane Mangan nan i tan na ba?” 34 Yesu yi a yabi, a naxa, “I yetena maxodinna ni ito ra ba hanma muxune nan a falaxi i xa?” 35 Pilati yi a yabi, a naxa, “I mirixi a ma fa fala Yahudiyannan i tan na ba? I kon kaane nun i ya saraxarali kuntigine nan i soxi n yii. I nanfe ligaxi?” 36 Yesu yi a fala a xa, a naxa, “Dunujani ito gbee mi n ma mangayaan na. Xa dunujana ito gbeen nan yi n ma mangayaan na nun, n ma walikene yi yengen soma n xa nen nun alogo Yahudiyane nama n suxu. Koni iki, n ma mangayaan mi be xan yi.” 37 Nanara, Pilati yi a maxodin, a naxa, “Mangana nde nan i tan na nayi ba?” Yesu yi a yabi, a naxa, “I tan nan a falaxi fa fala a mangan nan i tan na. N barixi dunuja yi na nan ma, a n xa jɔndin seren ba. Naxan yo jɔndin xa, ne e tuli matima n xuiin na nen.” 38 Pilati yi a maxodin, a naxa, “Nanse jɔndin na?” A to na fala, Pilati yi mini banxini, a mɔn yi siga Yahudiyane fema, a sa a fala e xa, a naxa, “N mi a yalagi xun toxi hali ndedi! 39 Koni e namunna nan a ra, n muxu keden yiiba e xa Halagi Tiin Dangu Lɔxɔn

Sanla waxatini. E waxi a xɔn ma, n xa Yahudiyane mangan yiiba e xa ba?” 40 E sɔnxɔ sɔnxɔ, e yi a yabi, e naxa, “En-en, a tan mi a ra. Nxu waxi Baraba nan xɔn!” Anu, mafu tiin nan yi Baraba ra.

19 Nayi, Pilati yi Yesu tongo, e yi a bulan. 2 Sofane yi kɔmɔtin jali kanna rafala mangaya taxamasenna ra, e yi a so a xunna, e yi doma mamiloxin nagodo a ma. 3 E yi lu fe a fema, e yi a fala a xa, e naxa, “Yahudiyane Mangana, i kene.” E yi a garin. 4 Pilati mɔn yi mini, a yi a fala Yahudiya yamaan xa, a naxa, “E a mato, n xa a ramini e ma tandeni, alogo e xa a kolon a n mi a yalagi xun toxi mume!” 5 Nayi, Yesu yi mini tandeni, mangaya kɔmɔti jali kanna soxi a xun na, doma mamiloxin fan yi ragodoxi a ma. Pilati yi a fala e xa, a naxa, “A tan xemeni ni i ra!” 6 Saraxarali kuntigine nun de kantanne to a to, e sɔnxɔ sɔnxɔ, e lu a fale, e naxa, “A xa gbangban, a xa gbangban!” Pilati yi a fala e xa, a naxa, “E tan xa a tongo, e sa a gbangban. N tan mi a yalagi xun toxi mume!” 7 Yahudiyane yi a yabi, e naxa, “Sariyana nxu yii, fata na sariyan na a daxa a xa faxa amasɔto a bata a yete findi Alaa Dii Xemena.” 8 Pilati to na me, a yi gaxu kati! 9 A mɔn yi xete yamana kanna banxini, a yi a fala Yesu xa, a naxa, “I tan kelixi minen yi?” Koni Yesu mi a yabi. 10 Pilati yi a fala a xa, a naxa, “I mi n yabima? I mi a kolon fa fala senbena n yii, n ni i bejin hanma n ni i gbangban?” 11 Yesu yi a yabi, a naxa, “No yo mi i yii n tan fari fo Ala naxan soxi i yii. Nanara, xemeni naxan n soxi i yii na bata findi yulubi tongon na dangu i tan na.” 12 Pilati na me waxatin naxan yi, a bejin xɔnla yi a suxu kati! Koni Yahudiyane yi lu sɔnxɔ sɔnxɔe, e naxa, “Xa i xemeni ito bejin, Romi Manga Gbeen Sesare xoyi mi i tan na. Naxan yo a yete findi mangan na, na bata keli Romi Manga Gbeen xili ma.” 13 Pilati to falani ito me, a Yesu ramini, a dɔxɔ a kiti sa gbɛdeni, denaxan xili “Geme Kirana” denaxan xili Heburu xuini, “Gabata.” 14 Halagi Tiin Dangu Lɔxɔn Sanla nan yi na xɔtɔn bode. Pilati yi a fala Yahudiyane xa, a naxa, “E mangan ni i ra, e hɔn!” 15 E lu sɔnxɔe, e naxa, “A xa faxa! A xa faxa! A xa gbangban!” Pilati yi e maxodin, a naxa, “E waxi a xɔn ma, n xa e mangan gbangban wudin ma ba?” Saraxarali kuntigine yi a yabi, e naxa, “Manga yo mi nxu tan yii, ba Romi Manga Sesare ra.” 16 Na xanbi ra, Pilati yi Yesu so e yii, a e xa a gbangban wudin ma. Nayi, sofane yi siga Yesu ra. 17 A yeteen yi a faxa

wudin tongo, e siga yirena nde yi denaxan xili “Xun Xori Yirena” denaxan xili Heburu xuini, “Gologota.” **18** E yi sa a gbangban wudin ma menni. E yi muxu firin fan gbangban wudin ma a fema, bonna a foxo kedenni, bonna fan a foxo kedenni. Yesu yi lu e tagi. **19** Pilati yi yamarin fi, e sebenla ti, e sa a singan a faza wudin na, a naxa, “Yesu Nasareti kaana, Yahudiyane Mangana.” **20** Yahudiya wuyaxi yi na xaran amasoto Yesu yi gbangbanxi wudin ma denaxan yi, men yi taan dexon ma nen, na yi sebexi Heburu xuiin nun Latin xuiin nun Gireki xuiin nin. **21** Yahudiyane saraxarali kuntigine yi a fala Pilati xa, e naxa, “I nama a sebe fa fala ‘Yahudiyane Mangana,’ koni fa fala xemeni ito naxa, a Yahudiyane Mangan nan a tan na.” **22** Pilati yi e yabi, a naxa, “N naxan sebexi, n mi fa na kalama sonon.” **23** Sofane to yelin Yesu gbangbanje wudin ma, e yi a dugine tongo, e yi a yitaxun doxode naanin sofa keden doxode keden. A doma bun biran naxan mi yi degexi bayo dugi kedenna nan yi a ra, na yi lu. **24** Sofane yi a fala e bode xa, e naxa, “En nama a yibo, en masensenna ti, a na naxan suxu, na yi a soto.” Ito ligaxi nen alogo Kitabuna falan xa kamali, a naxa, “E bata masensenna ti n ma dugine fe ra, e xa e yitaxun e bode tagi.” Nayi, sofane yi na liga. **25** Yesu nga yi tixi a faza wudin fema nun, e nun a ngaxakeden jaxalanmana, Mariyama, Kilofasi a jaxanla, e nun Mariyama Magadala kaana. **26** Yesu yi a nga tixin to na yi e nun a xarandiina, a yi naxan maxanuxi han! A yi a fala a nga xa, a naxa, “Nga, i ya dii xemen nan ito ra.” **27** A yi a fala na xarandiin xa, a naxa, “I nga ni ito ra.” Na waxatin yeteni, na xarandiin yi a nga tongo, a siga a ra a konni. **28** Yesu yi a kolon fa fala feen birin bata yelin lige, a naxa, “N koe yinla bata raxara.” A na fala nen alogo naxan sebexi Kitabuni na xa kamali. **29** Ige sasena nde yi doxi na, na yi rafexi manpa muluxunxin na. E dugi dungina nde ragodo manpa muluxunxini, e yi a filin wudin ma naxan xili hisopi wudina. E yi a lan Yesu deen ma a gbangban wudin koe ra. **30** Yesu to manpa muluxunna min, a yi a fala, a naxa, “A birin bata kamali.” Na danguxina, a yi a xun sin, a niin yi ba. **31** Yuman nan yi a ra, na xoton bode yi findima lxo binyen nan na Matabu Loxone ye. Yahudiyane kuntigine mi yi waxi e xa faza muxune lu wudin koe ra Matabu Loxoni. E yi a fala Pilati xa a e xa e sanne yigira alogo e xa e ragodo sinma. **32** Nanara, sofane yi siga, e yi xemen bonna sanne yigira naxan yi gbangbanxi Yesu dexon e nun

bonna. **33** Koni e Yesu li waxatin naxan yi, e yi a to, a bata faza. Nanara, e mi a sanne yigira. **34** Koni sofana nde yi Yesu saxon a jensenni tanban na. Wunla nun igen yi mini a ma mafuren. **35** Naxan na toxi, na bata a seren ba. Nondin nan a sereyaan na. A tan yatigi a kolon a nondin nan falaxi. Nayi, e fan xa denkeleya. **36** Na ligaxi nen alogo Kitabun sebenla xa kamali, a naxa, “Hali a xori kedenna mi yigire.” **37** A sebexi yire gbete yi Kitabun kui, a naxa, “E muxun naxan yisoxonxi, e e yeen tima nen na ra.” **38** Na xanbi ra, Yusufu Arimate kaan yi Pilati mafan, a xa Yesu binbin tongo. Nba, Yesu a xarandiina nde nan yi Yusufu ra, koni wundoni, amasoto a yi gaxuxi Yahudiyane yee ra. Pilati yi tin. Nanara, a yi fa Yesu binbin tongodeni. **39** Nikodemu naxan siga Yesu fema koeen na a foloni, na fan yi bira Yusufu foxo ra. Ture xiri jaxumen kilo tonge saxan, mirihi latikononna nun latikonon gbete basanxin nan yi a yii. **40** E yi Yesu binbin kasangen dugi fixen nun ture xiri jaxumen na amasoto Yahudiyane namunna nan yi na ra. **41** Yesu gbangban wudin ma denaxan yi, nako yiren nan yi na dexon. Bilinganna nde yi na nun, muxe munma yi maluxun denaxan yi. **42** Na xoton bode Yahudiyane Matabu Loxon nan yi a ra, gaburun faranna to mi yi makuya, e sa Yesu maluxun menni.

20 Xatin subaxani benun kuye xa yiba, Mariyama Magadala kaan yi siga gaburu deen na, a yi a li, gemen bata ba gaburun de ra. **2** A gimaton yi siga Simon Piyeri nun a xarandiin boden fema, Yesu yi naxan maxanuxi han, a yi a fala e xa, a naxa, “E bata Marigin ba gaburun kui, e a saxi dede, nxu mi na kolon!” **3** Piyeri nun xarandiin bonna yi mini, siga gaburu deen na. **4** E firinna birin yi siga e giye koni xarandiin bonna yi dangu Piyeri ra, a singe yi sa gaburu deen li. **5** A yi a felen, a yi a yee masa, a yi kasangenna to gaburun faranna kui koni a mi so na. **6** Na xanbi ra, Simon Piyeri yi fa, a yi so gaburu faranna ra kedenna, a fan yi kasangenna to saxi na yi. **7** Yesu xunna yi mafilinxin dugin naxan yi, na mafilinxin yi saxi a danna, a mi yi kasangenna dexon ma. **8** Nayi, xarandiin naxan singe sa gaburu deen li, na fan yi so a kui. A yi na yito, a yi denkeleya. **9** Amasoto e munma yi a famu naxan sebexi Kitabuni, naxan yi a falaxi a Yesu kelima nen sayani. **10** Na xanbi ra, xarandine yi xete e konni. **11** Mariyama tan tixin yi lu wuge gaburu deen na. A wugama, a yi a felen a yee masadeni gaburun kui. **12** Yesu binbin yi saxi

denaxan yi nun, a yi maleka dugi fixe kan firin to doxi menni. Kedenna doxi a xun saden binna ra. Bonna doxi a san saden binna ra. **13** E yi a maxodin, e naxa, “I wugan nanfera, nga jaxanla?” A yi e yabi, a naxa, “E bata n Marigin ba be yi, n mi a kolon e a saxi dede.” **14** A ito fala waxatin naxan yi, a yi a firifiri, a Yesu to tixi na yi. Koni a mi yi a kolon, xa Yesu nan yi a ra. **15** Yesu yi a maxodin, a naxa, “I wugan nanfera, nga jaxanla? I nde fenma?” Naxanla yengi yi a ma, a nako kantanna nan yi a ra. A yi a fala a xa, a naxa, “N fafe, xa i tan nan a baxi be, i sigaxi a ra denaxan yi, na fala n xa, n xa sa a tongo na.” **16** Yesu yi a fala a xa, a naxa, “Mariyama.” A yi a firifiri, a falan ti Yesu xa Heburu xuini, a naxa, “Raboni.” Na bunna neen, “Karamxo.” **17** Yesu yi a fala a xa, a naxa, “I nama kankan n ma, amasoto n munma siga n Fafe Ala fema singen. Koni siga, i sa a fala ngaxakedenne xa, i naxa, a n tema n Fafe nun e Fafe fema, n ma Ala nun e Ala.” **18** Nayi, Mariyama Magadala kaan yi siga a faladeni xarandiine xa fa fala a bata Marigin to, a bata falani itoe ti a xa. **19** Na xati kedenna jinbanna ra, xarandiine yi malanxi banxina nde kui, deen balanxi e ma amasoto e yi gaxuxi Yahudiyaane yee ra. Yesu yi fa, a ti e tagi, a naxa, “E bojen xa xunbeli.” **20** A yelinxini ito fale, a yi a yiine nun a jensenna yita e ra. Xarandiine Marigin toxina, e sewa kati! **21** Yesu mon yi a fala e xa, a naxa, “E bojen xa xunbeli! N Fafe Ala n xexi kii naxan yi, n fan bata e xe na kiini.” **22** A ito fala waxatin naxan yi, a yi a de foyen fe e ma, a naxa, “E Alaa Nii Sarijanxin soto. **23** E na dija naxanye yulubiye ma, ne mafeluun sotoma nen, e na naxanye gbeeye ramara, ne gbeene ramarama nen.” **24** Muxu keden yi a xarandii fu nun firinne ye, Tomasi, naxan mon yi xili “Gulunna,” na mi yi e fema Yesu fa waxatin naxan yi. **25** Nanara, xarandiin bonne yi a fala a xa, e naxa, “Nxu bata Marigin to!” Tomasi yi a fala e xa, a naxa, “Xa n mi a gbangban funfun to a yiine kui, n yi n yii sonla raso a soxondene ra, n yi n yiin naso a jensenna soxonden na, n mi le a ra mumel!” **26** Loxo xun keden danguxina, xarandiine mon yi e malan banxini, Tomasi yi e fema, deene yi balanxi. Koni Yesu yi fa, a ti e tagi, a naxa, “E bojen xa xunbeli.” **27** Na xanbi ra, a yi a fala Tomasi xa, a naxa, “I yii sonla rafa, i yi n yiine mato. I yiini bandun, i yi a raso n jensenni, alogo i nama denkeleyatareyaan liga, denkeleya.” **28** Tomasi yi a yabi, a naxa, “N Marigina, n ma Ala!” **29** Yesu yi a fala a xa, a naxa, “Bayo i bata n

to, i bata denkeleya ba? Muxun naxanye denkeleyaxi hali e munma n to, sewan ne xa!” **30** Yesu kabanako fe gbete wuyaxi liga nen a xarandiine yee xori naxan mi sebexi Kitabuni ito kui. **31** Koni itoe sebexi nen alogo e xa la a ra fa fala Alaa Muxu Sugandixin nan Yesu ra, Alaa Dii Xemena. E na denkeleya a ma, e nii rakisin sotoma nen a xinli.

21 Na xanbi ra, Yesu mon yi a yete makenen a xarandiine xa Tiberiyadi daraan dexon ma. A a yete makenen kii naxan yi, na nan ito ra. **2** Simon Piyeri nun Tomasi naxan xili Gulunna, e nun Nataniyeli naxan kelixi Kana taani Galile yamanani e nun Sebede a dii xemene nun xarandii firin gbete, ne yi malanxi. **3** Simon Piyeri yi a fala bonne xa, a naxa, “N sigama yexe suxudeni.” E yi a yabi, e naxa, “Nxu fan sigama i foxo ra nen.” Nayi, e siga, e sa doxo kunkin kui. Koni e mi sese suxu na kosen na. **4** Kuye yibaxina, Yesu yi fa ti daraan de. Koni a xarandiine mi yi a kolon a Yesu nan yi a ra. **5** A yi a fala e xa, a naxa, “Banxulanne, e bata yexena nde suxu ba?” E yi a yabi, e naxa, “En-en.” **6** A yi a fala e xa, a naxa, “E yalaan nagodo kunkin yiifanna ma, e nde suxuma nen na yi.” E to yalaan nagodo menni, e mi no a bandunje amasoto yexe wuyaxi bata yi e suxu yalaan na. **7** Yesu yi xarandiin naxan maxanuxi, na yi a fala Piyeri xa, a naxa, “Marigin nan a ra!” Simon Piyeri to na me tun, fa fala Marigin nan a ra, a yi a domain xidi a ra, amasoto a ragenla nan yi a ra. A tугan, a sin igeni. **8** Xarandiin bonne yi bira a foxo ra kunkin kui, e fa yalaan bandunje, a rafexi yexen na ken! Amasoto, e nun xaren mi yi tagi kuya, fo nongonna ye keme firin joxon. **9** E to xaren li, e yi teen to na, yexene yi ganma denaxan yi e nun buruna. **10** Yesu yi a fala e xa, a naxa, “E baxi yexen naxan suxude, e fa na nde ra.” **11** Simon Piyeri yi so kunkin kui, a yalaan bandun xareyaan na, a rafexi yexe xungbene ra. Keme tonge suulun e nun saxan nan yi a birin na. Hali e to a wuyaxi suxu, koni yalaan mi yibo. **12** Yesu yi a fala e xa, a naxa, “E fa e dege.” Xarandiine sese mi susu a maxodinje fa fala, “Nde i tan na?” Amasoto e yi a kolon, a Marigin nan yi a ra. **13** Nanara, Yesu yi a maso, a burun tongo, a yi a so e yii. A yexen fan liga na kiini. **14** A saxanden nan yi na ra Yesu xa a makenen a xarandiine xa, xabu a keli sayani. **15** E yelin xanbini e dege, Yesu yi a fala Simon Piyeri xa, a naxa, “Simon, Yoni a dii xemena, i n xanuxi dangu itoe ra

ba?" Piyeri yi a yabi, a naxa, "Ɔn, n Marigina, i a kolon, i rafan n ma." Yesu yi a fala a xa, a naxa, "I yengi dɔxo n ma yexɛɛ diine xɔn." **16** Yesu mɔn yi a fala a xa a firindeni, a naxa, "Simɔn, Yoni a dii xɛmɛna, i n xanuxi ba?" Piyeri yi a yabi, a naxa, "Ɔn, n Marigina, i a kolon, i rafan n ma." Yesu yi a fala a xa, a naxa, "I yengi lu n ma yexɛɛne xɔn." **17** Yesu mɔn yi a fala a xa a saxandeni, a naxa, "Simɔn, Yoni a dii xɛmɛna, n nafan i ma ba?" Piyeri bɔɲɛn yi yifu amasɔto Yesu bata a maxɔdin dɔxɔɲa ma saxan fa fala, "I n xanuxi ba?" Piyeri yi a fala a xa, a naxa, "N Marigina, i feen birin kolon, i a kolon, i rafan n ma." Yesu yi a fala a xa, a naxa, "I yengi dɔxo n ma yexɛɛne xɔn. **18** N xa ɲɔndin fala i xa. I yi banxulanyani waxatin naxan yi, i yi darixi i yetɛ maxidɛ nɛn, i yi siga dɛnaxan na i kɛnɛn. Koni i na fori waxatin naxan yi, i yiine yibandunma nɛn muxu gbɛtɛ yi i maxidi, a siga i ra yire yi dɛnaxan mi rafan i ma." **19** Yesu yi na falama nɛn alogo a xa Piyeri faxa kiin yita, a yi Ala binyama naxan xɔn. A yi a fala a xa, a naxa, "Bira n fɔxo ra." **20** Piyeri yi a firifiri, a yi xarandiin bonna to e fɔxo ra, Yesu yi naxan maxanuxi. A tan nan yi dɔxi Yesu fɛma e dɛgedeni, a Yesu maxɔdin waxatin naxan yi, a naxa, "Marigina, nde i yanfama, a i so yiini?" **21** Awa, Piyeri a toxina, a yi a fala Yesu xa, a naxa, "Marigina, nanfe ligama xɛmɛni ito ra?" **22** Yesu yi a yabi, a naxa, "Xa n waxi a xɔn ma, a tan xa lu a nii ra han n fa, na nanfe ligama i tan na? I tan xa bira n fɔxo ra tun." **23** Nayi, falani ito yi xuya ayi Yesu a xarandiine tagi fa fala xarandiini ito mi faxama. Koni Yesu mi a falaxi fa fala a mi faxama, koni a a fala a xa nɛn, a naxa, "Xa n waxi a xɔn ma a tan xa lu a nii ra han n fa, na nanfe ligama i tan na?" **24** Na xarandiin nan feni itoe seren bama. A tan nan mɔn itoe seɓɛxi. En na a kolon fa fala ɲɔndin nan a sereyaan na. **25** Yesu mɔn fe gbɛtɛ wuyaxi liga nɛn. Xa ne birin yi seɓɛ nun, n ma miriyani, a kitabune mi yi xanɲɛ dununani ito yi.

Kɛwanle

1 N xoyin Teyofili, N bata Yesu a feene seɓe i xa n ma seɓe singen kui a wanla fɔlɔ feen naxanye birin ma e nun a xaranna naxan birin ti xabu a fɔloni **2** han a te kore waxatin naxan yi a yelin xanbini yamarine fiye a xera sugandixine ma Alaa Nii Sarijanxin barakani. **3** A jaxankata xanbini, a yi a niiramaan yita e ra taxamaseri wuyaxi xɔn ma xii tonge naanin bun, a mɔn yi Alaa Mangayana fe fala e xa. **4** A yi e fema waxatin naxan yi, a yi e yamari, a naxa, “Ɛ nama keli Yerusalen taani singen. N Fafe Ala ɛ tuli saxi naxan na, ɛ na mame be, n bata yi naxan ma fe fala ɛ xa. **5** Amasoto Yoni muxune rafuxi igen nin koni a mi fa buma, ɛ rafu Alaa Nii Sarijanxini.” **6** Nba, xerane yi malanxi Yesu fema waxatin naxan yi, e yi a maxodin, e naxa, “Marigina, i mɔn Isirayila mangayani tɔnma waxatini ito nin ba?” **7** Yesu yi a fala xerane xa, a naxa, “N Fafe Ala bata waxatin naxanye ragidi a senben bun, a mi lan ɛ xa ne liga waxatine kolon. **8** Koni Alaa Nii Sarijanxin na godo ɛ ma waxatin naxan yi, ɛ senben sɔtoma nɛn, ɛ yi findi n serene ra Yerusalen taani, e nun Yudaya yamanan nun Samariya yamanan birin siga han bɔxɔn danne ra.” **9** A yelinxini ito fale, Ala yi a rate kore e yɛɛ xori, a yi lɔ ayi e ma kundani. **10** E yeen mɔn yi xelɛxi ayi a fɔxɔ ra waxatin naxan yi, xeme dugi fixe kan firin yi ti xerane fema. **11** E yi a fala, e naxa, “Galile kaane, ɛ tixi be nanfera, ɛ koren matoma? Yesu ito naxan bata tongo ɛ tagi, a te kore xɔnna ma, a mɔn fama nɛn alo ɛ a toxi te kii naxan yi.” **12** E yi xete Yerusalen taani sa keli Oliwi geyaan na. Na geyaan nun taa tagina, kilo keden jɔxɔndɔn na a ra. **13** E soxina taani, e te kore banxin kui e yigiyaan na. Naxanye yi na yi, ne nan xili itoe ra, Piyeri nun Yoni nun Yaki nun Andire nun Filipi nun Tomasi nun Barotolome nun Matiyu nun Alifaa dii xemena Yaki nun Simɔn e naxan ma a “Yahudiya siya xanuna,” e nun Yaki a dii xemena, Yudas. **14** Itoe birin yi e malanma yire kedenni Ala maxandideni waxatin birin e nun jaxanla ndee nun Yesu nga, Mariyama e nun Yesu xunyeɛne. **15** Na waxatini, Piyeri yi keli, a falan ti denkeleya muxune yɛ. Muxu keme muxu mɔxɔɲɛ nan yi na yi. **16** A yi a fala, a naxa, “Ngaxakedenne, Alaa Nii Sarijanxin naxan falaxi Kitabun kui Dawuda xɔn ma Yudas a fe yi, naxan yi Yesu suxu muxune yɛɛ ra fɔ na xa kamali nɛn. **17** Yudas, en tan nde nan yi a ra nun. A fan yi wanli ito ligama en xɔn ma.” **18** Nba,

Yudas gbetin naxan sɔtɔ a saranna ra tinxintareyaan xɔn ma, a bɔxɔn sara na ra. A bira na bɔxɔn fari, a faxa, a kuiin yi rabo ayi. A kui seene birin yi mini. **19** Yerusalen kaane birin yi na feen kolon. Nanara, e na bɔxɔn xili sa e kon xuini, Hakeladama. Na bunna nɛɛn, “Wuli bɔxɔna.” **20** Piyeri mɔn yi a fala, a naxa, “Amasoto a seɓexi Yaburin kui, fa fala, ‘A yireni genla xa lu, muxu yo nama lu na yi.’ A mɔn seɓexi, ‘Muxu gbete xa a tiden tongo.’ **21** Nanara, fɔ muxuna nde xa sugandi, naxan yi en fema waxatin birin yi, en Marigi Yesu yi sigan tima en xɔn ma waxatin naxan yi **22** fɔlɔ Yesu rafu waxatin ma Yoni xɔn, han sa ti Yesu rate lɔxɔn ma kore. Fɔ na kanna xa kafu en ma, a fan yi findi seren na a Yesu bata keli sayani.” **23** Nanara, e muxu firin yeɓa, Yusufu naxan yi xili Barasaba, a mɔn yi xili Yusutu e nun Matiyasi. **24** E yi Ala maxandi, e naxa, “Marigina, i tan muxun birin bɔɲɛ yi feen kolon. Nanara, a yita nxu ra, itoe firinna, i bata naxan sugandi **25** alogo a xa wali xerayani Yudas jɔxɔni, Yudas wanla naxan bejin, a siga a sigadeni.” **26** Na danguxina, e masensenna ti, a yi Matiyasi suxu, a sa Yesu a xera fu nun kedenna fari.

2 Se Xaba Singen Sali lɔxɔna a liye, denkeleya muxune birin yi malanxi yirena nde yi, **2** sanja ma kedenni, e yi xui gbeena nde mɛ keli kore naxan yi ligaxi alo foye gbeen xuina. E yi dɔxi banxin naxan kui, a yi na rafe. **3** Tɛɛ degene yi siga gode e keden kedenna birin xun ma alo tɛɛn lenna. **4** E birin yi lugo Alaa Nii Sarijanxin na. E falan ti fɔlɔ xui gbetene yi, alo Nii Sarijanxina a fixi e ma kii naxan yi. **5** Yahudiya tɔgɔndiyaxina ndee yi yigiyaxi Yerusalen taani na waxatini, naxanye sa kelixi dunuja siyane birin ye. **6** E to xui gbeeni ito mɛ, yamaan yi e malan. Na yi e birin naterɛna amasoto e keden kedenna birin yi e yete kon xuiin nan mema denkeleya muxune falani. **7** E yi kabɛ han, e naxa, “Naxanye falan tima itoe ra, Galile kaane xa mi e birin na ba? **8** Nanfera nayi, en keden kedenna birin fa e xuiin mema en yete bari xuine yi? **9** Parate kaane, Mede kaane, Elan kaane, naxanye dɔxi Mesopotamiya nun Yudaya nun Kapadose nun Pontu nun Asi yi **10** e nun Firigi nun Panfiliya nun Misiran nun Libiya bɔxɔn naxan Sireni yamanan dɔxɔn e nun naxanye kelixi Romi taani **11** Yahudiyane ba, Yahudiyataren naxanye so Yahudiya dinani ba, Kireti kaane ba, Arabi kaane ba, en birin e xuiin mema, e Alaa kabanako feene ralima en ma, en

ma xuine yi!” 12 E birin yi kabe, e yifu, e lu a fale e bode xa, e naxa, “Ito bunna di?” 13 Koni ndee yi lu denkeleya muxune magele, e naxa, “Itoe minxin nan a ra.” 14 Nba, Piyeri nun xarandii fu nun kedenna bonne yi keli, e ti, Piyeri yi falan ti yamaan xa a xuini texin na, a naxa, “E tan Yahudiyane nun Yerusalen kaane, e tuli mati n xuiin na, alogo e xa a kolon, 15 fa fala muxuni itoe mi minxi alo e yengi a ma kii naxan yi, soqe raxenxen waxatin na a ra iki. 16 Koni Ala naxan fala Nabi Yoweli a Kitabun kui, na nan ito ra. A naxa, 17 ‘Waxati rajanni, n na n ma Nii Sarijanxin nagodoma nen adamadiin birin ma. E dii xemene nun e dii temene nabiya falane tima nen. E banxulanne yi fe toon ti alo xiyena. E xemc fonne yi xiyen sa. 18 Na loxone yi, n na n ma Nii Sarijanxin nagodoma nen hali n ma konyi xemene nun n ma konyi gilene xun ma, e yi nabiya falane ti. 19 N kabanako feene yitama nen kore xonna ma e nun taxamasenne boxo xonna ma, wunla nun teen nun tee tuti gbeen minima nen. 20 Sogeni dimima nen, kiken yi gbeeli alo wunla, benun Marigina loxo binye gbeen xa a li. 21 Nba, muxu yo na Marigin maxandi a xinla ra, na kisima nen.” 22 “Isirayila xemene, e tuli mati falani ito ra. Ala nan Yesu Nasareti kaan xexi. Ala bata na yita e ra kabanako feene nun fe magaxuxine nun taxamasenne xon a naxanye liga e tagi alo e tan yetena a kolon kii naxan yi. 23 Ala bata yi a ragidi alo a yi a kolon kii naxan yi, a Yesu xa so e yii. E yi kafu gbalotone ma, e yi a gbangban wudin ma, e yi a faxesa. 24 Koni Ala mon yi a rakeli, a yi a ba sayaan xoleni amasoto sayaan mi yi noe a ramare. 25 Bayo Dawuda a fala nen a fe yi, a naxa, ‘N xaxili Marigin xon ma waxatin birin, bayo a n dexon ma, sese mi n mamaxe. 26 Nanara, n bojen sewaxi, n yi falan ti sewani. N fati benden fan luma nen yigini. 27 Amasoto, i mi i me n na, n siga laxira yi. I mi tinje i ya muxu togondiyaxin yi kun gaburun na.

(Hades g86) 28 I bata kiraan yita n na nii rakisin sotoma naxan xon. I n nalugoma nen sewan na i yetagi.” 29 “Awa, ngaxakedenne, n xa en benba Dawudaa fe fala e xa sike mi naxan yi. A faxesa nen, a maluxun, a gaburun mon na han to. 30 Koni nabiin nan yi a ra, a a kolon nen a Ala bata a tuli sa, a yi a kolo, a Dawuda bonsonna nde findima nen Mangan na a tan funfuni. 31 Ala yi feen naxan ligama, Dawuda to na to, a yi Alaa Muxu Sugandixin nakeli feen fala, a naxa, a mi a me a ra, a siga laxira yi. A fati benden mon mi kunma. (Hades g86) 32 Ala na Yesu nan nakelixa sayani. En birin

bata findi na seren na. 33 A bata te Ala yiifanna ma. A yi Alaa Nii Sarijanxin soto, Fafe Ala bata en tuli sa naxan na, a yi a ragodo en ma iki. E na nan toma. E na nan mema iki. 34 Amasoto Dawuda yeteen mi te ariyanna yi. Anu, a yeteen bata a fala, a naxa, ‘Marigin yi a fala n marigin xa, a naxa, “Doxo n yiifanna ma 35 han n yi i yaxune sa i sanna bun ma.”” 36 “Nayi, Isirayila muxune xa ito kolon yati, a e Yesu naxan gbangbanxi wudin ma, Ala bata na findi Marigin na e nun a Muxu Sugandixin na.” 37 Nba, yamaan to na me, na yi e bojen kala. E yi a fala Piyeri nun xeraan bonne xa, e naxa, “Nxu ngaxakedenne, nxu nanfe ligama?” 38 Piyeri yi a fala e xa, a naxa, “E keden kedenna birin xa e xun xanbi so e hakeni, e rafu igeni Yesu Alaa Muxu Sugandixin xinli, alogo e yulubine xa xafari, e yi Alaa kiseen soto, a Nii Sarijanxina. 39 Amasoto Ala bata e tan nun e diine tuli sa na ra e nun naxanye birin yire makuyene yi en Marigina Ala naxanye xilima a fema.” 40 Piyeri yi sereyaan ba, a yi e rawekile fala wuyaxi ra, a naxa, “E yete ratanga waxatini ito tinxintareyaan ma.” 41 Naxanye tin a falan ma, ne yi rafu igeni. Muxu wuli saxan loxon yi sa denkeleya muxune fari na loxoni. 42 E yi bira xerane xaranna foxo ra, e yi lu ngaxakedenyani, e lu e dega e bode xon ma, e lu Ala maxande. 43 Xerane yi kabanako fe wuyaxi liga e nun taxamasenne han birin yi gaxu. 44 Denkeleya muxune birin yi lu e bode fema, e yii seene birin yi findi e bode gbee ra. 45 E yi e boxone nun e yii seene matima nen, e yi na gbetine yitaxun e bode ra alo e keden kedenna birin makona a ma kii naxan yi. 46 E yi lu e malanje Ala Batu Banxini loxo yo loxo, e yi e degema e bode xon ma e konne yi, sewan nun boje xunbenli. 47 E yi lu Ala tantunje, e yi rafan yamaan birin ma. Marigin yi nde sama kisi muxune fari nen loxo yo loxo.

3 Loxona nde, Piyeri nun Yoni yi siga Ala Batu Banxini Ala maxandi waxatini, benun se din waxatin xa a li. 2 Nba, muxune yi fama xemena nde ra Ala Batu Banxin nabilinna yinna so deen na xandi tideni loxo yo loxo naxan yi barixi lebutenyani. Na so deen yi xili nen, “De Tofapina.” 3 A to Piyeri nun Yoni to soe, a yi e xandi gbetini. 4 E yi e yeen ti a ra. Piyeri yi a fala a xa, a naxa, “Nxu mato.” 5 A yi e mato. A yengi yi a ma, a e yii sena nde nan fima a ma. 6 Koni Piyeri yi a fala a xa, a naxa, “Gbeti mi n yii! Xema mi n yii! Koni seen naxan n yii, n na soma nen i yii. Yesu Alaa

Muxu Sugandixin Nasareti kaan xinli, keli, i sigan ti.” 7 Piyeri yi a suxu a yiifanna ma, a yi a rakeli. Xemen sanne nun a wosəxəne yi senben soto. 8 A yi tujan, a ti a sanne xun na, a sigan ti fəlo. E nun xarandiine yi so Ala Batu Banxini, a sigan tima, a tujanma, a Ala tantunma. 9 Yamaan birin yi a to sigan tiye, a Ala tantunma. 10 E yi a kolon a a tan nan yi xandi tiini Ala Batu Banxin nabilinna yinna so deen na, naxan yi xili “De Tofajina.” Feen naxan liga xemen xa, e birin yi e terena na ra, e kabe kati! 11 Bayo a mi yi fa xetema Piyeri nun Yoni fəxo ra, yamaan kuisanxin yi fa e giye, e yi e malan Sulemani a Gagene bun ma. 12 Piyeri yamaan to waxatin naxan yi, a yi falan ti e xa, a naxa, “Isirayila xemene, nanfera e kabema feni ito ma? Nanfera e nxu matoma alo nxu tan nan a ligaxi xemeni ito yi sigan ti nxu senben nun nxə Ala kolonna barakani? 13 Iburahimaa Ala nun Isiyagaa Ala nun Yaxubaa Ala nun en benbane Ala nan a walikeen Yesu a binyen mayitaxi, e naxan yanfa, e yi e me a ra Pilati yetagi, naxan yi wama a bejin feni. 14 E e mexi muxu sarijanxin nun muxu tinxinxin na, e Pilati mafan, a xa muxu faxan bejin e xa. 15 E nii rakisin kannna faxa nen, koni Ala yi a rakeli sayani. Na seren nan nxu tan na. 16 Nxu to denkeleyaxi Yesu xinla ma, na nan fangan fixi xemeni ito ma, e naxan toma, e a kolon. Denkeleyana Yesu xinla ma na nan a rakendeyaxi e yee xori.” 17 “Nba, ngaxakedenne, n na a kolon e tan nun e mangane feen naxan liga Yesu ra, e a ligaxi a kolontareyaan nan ma. 18 Ala bata yi naxan fala a nabine birin xon ma, a na nan nakamali, a fo a Muxu Sugandixin xa toro. 19 Nanara, e xun xanbi so e hakeni, e tubi Ala ma alogo e yulubine xa xafari 20 Marigin yi matabu waxatine fi e ma, a mon yi a Muxu Sugandixin nafa e ma Yesu, a naxan nagidi e ma. 21 Koni fo a xa lu nen kore xonna ma singen han a waxati saxin na a li Ala feen birin yitonma waxatin naxan yi alo a bata a fala a nabi sarijanxine xon ma kii naxan yi waxati danguxine yi. (aiŋon g165) 22 Musa a fala nen, a naxa, ‘Marigina e Ala nabina nde raminima nen e ye alo n tan, e tuli mati a falane birin na. 23 Xa naxan yo mi a tuli mati na nabiin na, a kedima nen yamaan ye.’ 24 Nabiin naxanye birin bata falan ti xabu Nabi Samuyeli waxatini, ne birin bata yi loxoni itoe fe fala. 25 E findixi nabine diine nan na. Ala layirin xidixi e nun e benbane tagi nen, a yi a fala Iburahima xa, a naxa, ‘Dunujia siyane birin duban soto ma nen i tan bonsonna barakani.’ 26 Ala to a walikeen nafa, a a

xe e singe nan ma alogo e xa duban soto a xon, a yi e birin naxete e fe naxine fəxo ra.”

4 Piyeri nun Yoni yi fala tiini waxatin naxan yi yamaan xa, saraxaraline nun Ala Batu Banxin kantan muxune mangan nun Saduse muxune yi fa. 2 E yi xoloxi han, bayo xerane yi yamaan xaranma. E yi a falama a faxa muxune kelima nen sayani alo Yesu. 3 E yi e suxu, e yi e sa kasoon na han xotonni bayo kəeen bata yi so. 4 Koni muxun naxanye e falan me, na wuyaxi yi la a ra. Denkeleya muxune yi wuya ayi han muxu wuli suulun jəxəon xemene gbansanna. 5 Na xoton bode, yamaan mangane nun fonne nun sariya karaməxəne yi e malan Yerusalen taani. 6 Saraxarali Kuntigi Singena Anasa yi na e nun Kayafa nun Yoni nun Alesandire nun Saraxarali Kuntigi Singena denbayaan muxu gbete. 7 E yi Piyeri nun Yoni ti e yetagi, e yi e maxodin, e naxa, “E ito ligaxi nde senbe bun hanma xinla mundun yi?” 8 Piyeri yi lugoxi Alaa Nii Sarijanxin na, a yi e yabi, a naxa, “Yamaan mangane nun fonne, 9 xa e nxu makitima wali fajina fe ra to naxan ligaxi lebutenna xa, e nun a rakendeyaxi kii naxan yi, 10 nayi e xa a kolon, e tan nun Isirayila yamaan birin, fa fala xemeni ito tixi e yetagi kendeyani Yesu Nasareti kaan xinla barakan nin, Alaa Muxu Sugandixina, e naxan gbangban wudin ma, Ala yi a rakeli sayani. 11 Kitabun Yesu ito nan ma fe falaxi, a naxa, ‘E tan banxi tiine e me gemen naxan na, na bata findi banxin geme fisamantenna ra.’ 12 Kisin mi sote muxu gbete yo xon, bayo xili gbete yo mi dunuja yi, naxan fixi muxune fe ra en kisin sote naxan sabu ra.” 13 E yi kabe Piyeri nun Yoni a xaxili ragidin ma, amasoto xarantarene nan tun yi e ra naxanye mi fe kolon. Na yi a yita e ra a e yi Yesu nan fəxo ra. 14 Koni bayo e yi xemen kendeyaxin toma tixi e dexon ma, e mi yi nœ sese fale. 15 Koni e yi xarandiine yamari, a e xa mini kitisa yamaan malanni, e yi falan ti fəlo e bode xa, e naxa, 16 “En nanfe ligama muxuni itoe ra? Amasoto Yerusalen kaane birin a kolon a e bata kabanako fe gbeen liga. En mi nœ a matande. 17 Koni en xa tonna sa e ra, a e nama fa falan ti muxu yo xa Yesu xinli alogo feni ito nama xuya ayi yamaan tagi.” 18 E yi Piyeri nun Yoni xili, e yi e yamari a e nama fa fala yo ti hanma e xaranna ti Yesu xinli. 19 Koni Piyeri nun Yoni yi e yabi, e naxa, “E tan yeteen xa a mato xa nxu lan nxu xa e tan nan xui suxu hanma Ala. 20 Nxu

naxan toxi nxu yi a me, nxu mi nœ tonde na fale.” 21 E mœn yi e kœnkœ e ma kati, na xanbi ra, e yi e bejin. E mi yi nœ e jaxankate, amasœto yamaan birin yi Ala tantunma fe ligaxini ito a fe ra. 22 Amasœto xœmen naxan nakendeya findi kabanako feen na, na barin bata yi dangu jœe tonge naanin na. 23 E to e bejin, Piyeri nun Yoni yi siga e lanfane fema. Saraxarali kuntigine nun yamaan fonne feen naxan falaxi e xa, e na birin yebe e xa. 24 E na me waxatin naxan yi, e birin yi e xui ramini Ala ma jœnige kedenni, e naxa, “Nxu kanna, i tan naxan kore xœnna nun bœxo xœnna nun fœxo igen nun e yi seene birin daxi, 25 i tan naxan falan ti Alaa Nii Sarijanxin nun nxu benba Dawuda xœn ma, i ya walikena, i naxa, ‘Nanfera siyane murutema? Nanfera yamanane muxune yanfa fuune soma? 26 Dunuja mangane bata tondi, kuntigine bata e malan Marigin nun a Muxu Sugandixin xili ma.” 27 “Bayo jœndin na a ra yati, Herode nun Pœnsi Pilati nun Yahudiyatarene nun Isirayila yamaan birin e malan nen taani ito kui i ya walike sarijanxin Yesu xili ma i naxan sugandixi. 28 I senben nun i sagoon bata yi feen naxanye ragidi, e yi ne birin liga. 29 Awa iki, Marigina, i tuli mati e fala xœlene ra, i tin i ya walikene xa i ya falan nali xaxili ragidi gbeeni. 30 I yiini bandun alogo muxune xa kendeya, taxamasenne nun kabanako feene yi liga i ya walike sarijanxin Yesu xinli.” 31 E yelixina Ala maxande, e yi malanxi denaxan yi, mœna yi xuruxurun. E birin yi lugo Alaa Nii Sarijanxin na. E yi Alaa falan nali xaxili ragidini. 32 Xaxili kedenna nun nii kedenna yi lu denkeleya yamaan muxune birin ma. Muxu yo mi yi a falama, a naxa, n gbeen ni ito ra, bayo e birin malanna nan yi e yii seene ra. 33 Xœrane yi lu Marigi Yesu keli feen sereyaan bœ senbœ gbeeni. Baraka gbeen yi lu e birin xœn! 34 Bayo sese mi yi dasaxi muxu yo ma e ye. Xœe bœxœn nun banxine yi naxanye yii, e yi e matima nen, e yi e saren xali, 35 e sa e sa xœrane bun. Xœrane yi gbetin taxun muxune ra alo e makona a ma kii naxan yi. 36 Awa, Lewi bœnsœnna xœmena nde yi na, naxan bari Sipiri yamanani, a yi xili Yusufu. Xœrane yi a xili sa Baranabasi. Na bunna nœen, “Muxu Ralimaniyana.” 37 Xœe bœxœna nde yi a yii, a na mati, a yi fa a sara gbetin sa xœrane bun.

5 Xœmena nde yi na naxan yi xili Ananiyasi, a jaxanla fan yi xili Safira. Na fan yi e bœxœna nde mati, 2 a yi a saren fœxo kedenna ramara a yete xa. A jaxanla fan

yi na kolon. A siga a dœnxœn na xœrane yœe ra. 3 Piyeri yi a fala a xa, a naxa, “Ananiyasi, nanfera i tinxi Setana yi so i bœjœni, han i wulen fala Alaa Nii Sarijanxin xa? Nanfera i bœxœn saren fœxo kedenna ramaraxi i yii? 4 Benun i xa na xœe bœxœn mati waxatin naxan yi, i gbeen xa mi yi a ra ba? I to a mati i sagoon xa mi yi a gbetin na ba? Nanfera nayi, i fe sifani ito ligaxi? I mi wulen falaxi muxune xan xa de, fœ Ala.” 5 Ananiyasi ito me waxatin naxan yi, a bira, a faxa. Naxanye birin na me, ne yi gaxu. 6 Banxulanne yi keli, e yi a kasangen, e sa a maluxun. 7 Awa waxatidi danguxina, a jaxanla fan yi fa, koni feen naxan ligaxi, a munma yi na me singen. 8 Piyeri yi a fala a xa, a naxa, “A fala n xa, œ bœxœn saraxi xasabini ito nan na ba?” Naxanla yi a yabi, a naxa, “œn, a saren yatin nan ito ra.” 9 Nayi, Piyeri yi a fala a xa, a naxa, “Nanfera œ nun i ya xœmen lanxi a ma œ xa Marigina Nii Sarijanxin bunba? I ya xœmen maluxun muxune san xuiin ni i ra dœen na, e i fan xalima nen iki sa!” 10 A yi bira Piyeri bun ma, a faxa keden na! Banxulanne yi fa, e yi jaxanla fan li faxaxi, e yi a tongo, e sa a maluxun a xœmen dœxœn ma. 11 Denkeleya yamaan nun muxun naxanye birin na feen me, gaxu gbeen yi ne suxu. 12 Xœrane yi taxamaseri wuyaxi nun kabanako fe wuyaxi liga yamaan tagi. Denkeleya muxune birin yi e malanma Sulemani a Gagene nan bun ma. 13 Muxu yo mi susu a masœ e ra. Hali na, yamaan yi e xili fajœn falama. 14 Koni muxu wuyaxi yi lu sœ e fari, xœmen nun jaxanla naxanye denkeleya Marigin ma. 15 Nayi, muxune yi lu fe furetœne ra, e yi e sa e sa seene nun dagine ma kirane xœn ma alogo Piyeri dangumatœœn nininna xa e li. 16 Yama gbeen yi malan, sa keli Yerusalem rabilinna taane yi. E fa e furetœne ra e nun jœnan jaxine naxanye tœrœma. E keden kedenna birin yi kendeya. 17 Saraxarali Kuntigi Singen nun a muxun naxanye yi findixi Saduse muxune ra, ne yi xœrane maxœxœlœn han e yi keli e xili ma. 18 E yi xœrane suxu, e yi e sa kasoon na. 19 Koni Marigina malekan yi fa kaso banxin dœen nabi kœœen na. A yi e ramini, a yi a fala e xa, 20 a naxa, “œ siga, œ sa ti Ala Batu Banxini, Yesu dunuja yi gidi kiin naxan yitaxi œ ra, œ na feene birin yebe yamaan xa.” 21 E to na me, e yi so Ala Batu Banxini subaxani, e xaranna ti fœlo. Nba, Saraxarali Kuntigi Singen nun a muxune to fa, e yi kitisa yamaan birin xili, Isirayila yamaan fonne birin. E muxun nasiga kaso banxini, a e xa sa fa xœrane ra e yetagi. 22 Koni e na lixina, kantan muxune mi

xerane to. E yi xete, e sa a fala bonne xa, e naxa, **23** “Nxu kasoon lixi balanxi nen ken, kantan muxune tixi deen na, koni nxu to deen nabi, muxu yo mi yi na kui!” **24** Ala Batu Banxin kantan muxune kuntigin nun saraxarali kuntigine ito mexina, e yi kui fu xerane fe yi, e naxa, “Nanfe ligaxi e ra?” **25** Nba, xemena nde yi so, a yi a fala e xa, a naxa, “E fa a mato, e xemen naxanye saxi kasoon na, e sa tixi Ala Batu Banxin kui, yamaan xarandenil!” **26** Kantan muxune kuntigin nun a muxune yi keli, e sa fa xerane ra. Koni e mi fa xerane karahan, amasoto e yi gaxuxi e magolon feen na yamaan xon. **27** E faxina xerane ra, e yi e ti kitisa yamaan yetagi. Saraxarali Kuntigi Singen yi e maxodin, **28** a naxa, “Nxu mi yi e yamari nun, a e nama fa yamaan xaran xemeni ito xinli ba? Koni a mato, e bata Yerusalen taan birin nafe e xaranni ito ra. E waxi a xon ma, e xa xemeni ito faxa feen sa nxu xun ma!” **29** Piyeri nun xeraan bonne yi e yabi, e naxa, “A fere mi na fo nxu xa Alaa falan nan suxu dangu muxune gbee falan na. **30** En benbane Ala bata Yesu rakeli sayani, e naxan gbangban wudin ma, e yi a faxa. **31** Ala mon yi a rate kore, a yi a doko a yiifanna ma, a yi a findi Mangan na e nun Marakisi Tiin na alogo Isirayila kaane xa no e xun xanbi soe e hakene yi, e yulubine yi xafari. **32** Feni itoe serene nan nxu tan na. Ala bata a Nii Sarijanxin naxan fi a falan suxu muxune ma, na feene seren nan na fan na.” **33** E ito mexina, e bojen yi te kati, han xerane faxa xonla yi e suxu! **34** Koni Gamaliyeli naxan findixi Farisi muxuna nde ra, na yi na yi. Sariya karamoxon nan yi a ra naxan yi binyaxi yamaan birin xon. Na yi keli, a ti kitisa yamaan tagi, a yi yamarin fi, a xerane xa ramini singe. **35** Na danguxina, a yi a fala kitisane xa, a naxa, “Isirayila kaane, e muxuni itoe fe liga e yeren ma. **36** Waxati danguxina nde yi, xemena nde yi xili Tudasi, na a yete findi nen muxu gbeena nde ra, muxu keme naanin joxon yi bira a foxo ra. Koni muxune a faxa nen. A foxorabirane birin yi xuya ayi, a fe yi lu fuu. **37** Na danguxina, Yudas Galile kaan fan yi keli muxune birin xili sebe waxatini, a yi ti ganla nde yee ra murute xinla ma. Koni muxune yi a fan faxa, a foxorabirane fan yi xuya ayi. **38** Nanara, n xa a fala e xa iki, e muxuni itoe lu na, e e bejin, e xa siga. Amasoto xa e feene nun e wanle fataxi muxune nan na, e kalama nen. **39** Koni xa a fataxi Ala nan na, e mi e noe mume! Na ma, e a liga ki fapi alogo a nama liga alo e Ala nan yengema.” E yi tin a maxadi xuiin

ma. **40** E yi xerane xili banxini, e yi e bulan, e yi tonna doko a e nama fa falan ti Yesu xinla ra. E yi e bejin. **41** Xerane sewaxin yi keli kitisa yamaan fema bayo Ala bata na binyen fi e ma a e xa jaxankata Yesu xinla fe ra. **42** E yi lu yamaan xaranye, e Yesu Alaa Muxu Sugandixina fe xibarun nali Ala Batu Banxin nun muxune konne yi loko yo loko.

6 Na waxatini, Yesu foxorabirane to yi wuyama ayi, Yahudiyan naxanye yi Gireki xuiin falama, ne yi e mawuga Yahudiyan bonne fari naxanye yi Heburu xuiin falama bayo e kaja gilene mi yi loko yo loko balon sotoma a kiini a taxun waxatini. Yahudiya Gireki xui falane naxa, “Gbetin naxan yitaxunma loko yo loko balon na, nxo kaja gilene mi na se sotoma.” **2** Nayi, xarandii fu nun firinne yi Yesu foxorabirane birin malan, e yi a fala e xa, e naxa, “A mi lan nxu yi Alaa falan nabepin donse feen na. **3** Na ma, ngaxakedenne, e muxu binyaxi solofere sugandi e ye naxanye lugoxi Alaa Nii Sarijanxin na, xaxinla e ma, en yi e ti na wanla ra. **4** Nayi, en noe en sobe soe nen Ala maxandin nun a falan wanli.” **5** Na falan yi yamaan birin kenan. Nayi, e yi Etiyen sugandi, naxan yi lugoxi denkeleyaan nun Alaa Nii Sarijanxin na, e nun Filipi nun Pirokoru nun Nikanoro nun Timon nun Paramenasi e nun Nikolasi Antiyoki kaan naxan so Yahudiya dinani. **6** E yi ne yita xerane ra. Xerane yi e yiin sa e ma, e yi Ala maxandi e xa. **7** Na ma, Alaa falan yi lu xuyee ayi. Yesu foxorabirane yi wuya ayi Yerusalen taani kati! Saraxarali wuyaxi yi denkeleya. **8** Nba, Etiyen yi lugoxi Alaa hinanna nun a senben na. A yi kabanako fe gbeene nun taxamasenne liga yamaan tagi. **9** Koni salide banxina nde muxune yi keli Etiyen xili ma naxan yi xili “Muxu Xoroyaxine Salide Banxina” naxanye yi kelixi Sireni nun Alesandire taan nun Silisi nun Asi yamanani, e yi Etiyen matandi folo. **10** Koni e mi yi noe tiye Etiyen ma fe kolonna yee ra e nun a yi falan tima Nii Sarijanxin naxan baraka yi. **11** Awa, e muxuna ndee saranna fi alogo e xa a fala, e naxa, “Nxu a xuiin namexi nen Musa nun Ala rayelefu!” **12** Nayi, e yi yamaan nun yamaan fonne nun sariya karamoxone radin Etiyen xili ma. E yi Etiyen suxu, e siga a ra kitisa yamaan fema. **13** E yi fa wule sere baane ra. Ne yi a fala, e naxa, “Xemeni ito luma fala jaxine tiye Yire Sarijanxini ito nun Musaa sariyan xili ma. **14** Amasoto nxu bata a me a ra, a a falama, a naxa, a Yesu Nasarcti kaan yire sarijanxin kalama nen, a yi

en ma namun fonne maxete en naxanye sotoxi Musa ra.” 15 Naxanye birin yi doxi kitisa yamaan malanni, ne birin yeen yi lu tixi Etiyen na, e yi a yetagin to alo malekan yetagin na a ra.

7 Saraxarali Kuntigi Singen yi a fala, a naxa, “Feen naxan falaxi i xun ma, jondin na a ra ba?” 2 Etiyen yi a yabi, a naxa, “N fafane nun ngaxakedenne, e tuli mati n xuiin na. En benba Iburahima yi Mesopotamiya yamanani waxatin naxan yi benun a xa doxo Xarani taani, Ala Binyen Kanna a yete makenen nen a xa. 3 Ala yi a fala a xa, a naxa, ‘Keli i ya yamanan nun i xabilani. Siga na yamanani, n naxan yitama i ra.’ 4 Nayi, a keli Kalidi kaane yamanani, a sa doxo Xarani taani. A fafe to faxesa, Ala yi a rafa yamanani ito yi, e doxi denaxan yi iki. 5 Ala mi boxo yo fi Iburahima ma yamanani ito yi na waxatini hali san tide keden joxon. Koni Ala a tuli sa nen, a yamanani ito findima nen a tan nun a bomsonna gbeen na. Anu, dii yo mi yi a yii na waxatini. 6 Ala ito nan falaxi, a naxa, ‘I bomsonna doxoma nen yamana gbete yi, e konna mi denaxan yi, e yi toxo jee keme naanin konyiyani. 7 Koni e na lu siyaan naxan bun konyiyani, n na makitima nen. Na xanbi ra, e minima nen na yamanani, e yi fa n batu be.’ 8 Na xanbi ra, Ala yi banxulan tiin layirin xidi e nun Iburahima tagi. Na xanbi ra, a yi Isiyaga bari, a yi a banxulan a xii solomasexede loxoni. Isiyaga fan yi Yaxuba banxulan. Yaxuba fan yi en benba fu nun firinne banxulan.” 9 “Awa, Yusufu a fe xaxolonyaan ma, en benbane yi a mati Misiran kaane ma. Koni Ala yi a xon. 10 Ala yi a xunba a toron birin yi. A yi xaxilimayaan fi Yusufu ma, a yi a rafan Misiran mangan ma. A yi Yusufu doxo Misiran yamanan xun na e nun a banxi yi feene birin. 11 Nba, fitina kamen yi so Misiran yamanan nun Kanan yamanani, toron yi gbo ayi. Donse yo mi yi fa en benbane yii. 12 Koni Yaxuba a me waxatin naxan yi, a murutun yi Misiran yi, a yi en benbane rasiga a singeni. 13 E sigan firinden, Yusufu yi a yete yita a ngaxakedenne ra. Misiran mangan Yusufu kon kaane fe kolon na waxatin nin. 14 Na xanbi ra, Yusufu yi xeraan nasiga a fafe Yaxuba nun a denbayaan birin tongodeni, muxu tonge solofere e nun suulun nan yi e birin malanxin na. 15 Yaxuba yi siga Misiran yi, a faxesa denaxan yi e nun en benbane. 16 Yamaan yi siga e binbine ra Siken taani. Iburahima gaburun naxan sara Hamori a diine ma Siken taani gbetin na, yamaan yi sa e

maluxun menni.” 17 “Ala Iburahima tuli sa naxan na, na rakamali waxatin yi maso, en ma yamaan yi wuya ayi Misiran yi. 18 Na danguxina, Manga gbete yi doxo Misiran yi naxan mi yi Yusufu kolon. 19 Na Mangan yi en ma yamaan yanfa, e yi en benbane toxo, a yi e karahan alogo e xa e diine rabepin, e faxesa. 20 Musa bari na waxatin nin, a yi Ala kenen han! A lu nen a fafe konni han kike saxan. 21 A ba a fafe konni waxatin naxan yi, Misiran mangana dii temen yi sa a tongo, a yi a maxuru, a yi a findi a dii xemen na. 22 E yi Musa xaran Misiran kaane fe kolonna birin ma, a yi senben soto a falan nun a kewanli.” 23 “Musa barin to jee tonge naanin soto, a ngaxakeden Isirayila kaan bonne xonton xonla yi a suxu. 24 A yi Misiran kaana nde to a ngaxakeden na nde toxe, a yi a xun mayenge, a yi a gbeen joxo, a Misiran kaan faxesa. 25 A yengi yi a ma a a kon kaane yi a famuma nen a Ala yi waxi e xunba feni a tan nan xon. Koni e mi a famu mume! 26 Na xoton bode a yi Isirayila kaan muxu firin to yenge, a kata e tagini tondeni. A yi a fala e xa, a naxa, ‘Ngaxakedenmane nan e ra, nanfera e e bode toroma?’ 27 Koni naxan yi a boden jaxankatama, na yi Musa radinje ayi, a yi a fala, a naxa, ‘Nde i findixi mangan nun kitisaan na nxu xun na? 28 I waxi n fan faxesa feen nin ba alo i Misiran kaan faxesa kii naxan yi xoro?’ 29 Musa to na me, a yi a gi, a siga Midiyan yamanani. A dii xeme firin soto menni.” 30 “Awa, jee tonge naanin danguxina, malekan yi mini kenenni Musa xa teen yiyani fotondin tagi Sinayi गयाan dexon ma burunna ra. 31 Musa na to waxatin naxan yi, a kabe. A to yi a masoma a ra alogo a xa a yigbe, Marigin xuiin yi mini, a naxa, 32 ‘I benbane Ala nan n tan na, Iburahimaa Ala nun Isiyagaa Ala nun Yaxubaa Ala.’ Musa yi gaxu, a xuruxurun, a mi fa susu a matoe. 33 Marigin yi a fala a xa, a naxa, ‘I ya sankidine ba i sanni amasoto i tixi denaxan yi, boxo sarijanxin na a ra. 34 N bata n ma yamana toron to Misiran yamanani, n bata e kutun xuiin me, n bata fa e xunbadeni. Fa iki, n xa i xe Misiran yamanani.’” 35 “Na Musa kedenna nan yi a ra Isirayila kaane bata yi e me naxan na nun, e yi a fala, e naxa, ‘Nde i findixi mangan nun kitisaan na?’ Ala a tan nan nasiga e mangan nun e xunbaan na fata malekan fala xuiin na naxan mini kenenni a xa fotondini. 36 Musa e ramini nen na yi, a kabanako feene nun taxamasenne liga Misiran yi e nun Baa Gbeeli, e nun tonbonni jee tonge naanin. 37 Na Musa nan ito ra naxan a fala Isirayila kaane xa, a naxa,

'Ala nabina nde raminima nen e ye, naxan luma alo n tan.' 38 A tan nan yi yamaan ye tonbonni, e nun malekan nan yi a ra naxan yi falan tima a xa Sinayi geyaari fari, a yi falane soto naxanye nii rakisin fima muxune ma alogo a xa ne radangu en ma." 39 "Koni en benbane mi tin a falan suxe, e yi e me a ra, xete xonla yi e suxu Misiran yi. 40 E yi a fala Haruna xa, e naxa, 'Ala gbetene rafala en xa naxan tima en yee ra amasoto Musa naxan en naminixi Misiran yamanani, en mi a kolon naxan a sotoxi.' 41 Nayi, e jinge dii sawuran nafala e suxuren na, e saraxan ba na xa, e yi sewa e yetena se rafalaxina fe ra. 42 Na ma, Ala yi xete e foxo ra, a yi e lu kore xonna yanban seene batue alo a sebexi nabine kitabune kui kii naxan yi, a naxa, 'E tan Isirayila yamaan to yi tonbon yireni jee tonge naanin, e saraxane ba nen n tan xa ba? 43 E Molo ko suxuren batu bubun nan xali, e nun Ramafan saren suxurena, e suxuren naxanye rafalaxi e batu seene ra. Nanara, n na e xalima nen koniyani Babilon xanbi ra.'" 44 "Layiri sereyaan bubun yi en benbane yii tonbonni. A yi tixi alo Ala a ye ba Musa xa kii naxan yi a yi a misaala yita a ra. 45 E to na soto, en benbane yi a xali e yii Yosuwe a mangayaan bun ma, e yi en ma boxon tongoma siyane yii waxatin naxan yi, Ala yi siyaan naxanye kedima e yee ra. A yi lu en ma boxoni han Dawuda waxatini. 46 Dawuda yi Alaa hinanna soto, a yi a maxodin alogo a xa no Yaxubaa Ala Batu Banxin tiye. 47 Koni Sulemani nan banxin ti a xa." 48 "Koni Kore Xonna Ala mi doxoma muxune banxi tixine kui, alo nabina a falaxi kii naxan yi, a naxa, 49 'Marigin naxa: Kore xonna nan n ma manga gbeden na, boxon yi findi n san tiden na. E banxin sifan mundun tiye n tan xa? N ma matabuden finde minen na? 50 N tan xa mi seni itoe birin nafalaxi ba?'" 51 "E tan yama murutexina, e bojene nun e tunle luxi alo Ala kolontarene. E Alaa Nii Sarijanxin matandima alo e benbane! 52 E benbane mi nabiin mundun besenxonya? E nabine faxe nen, naxanye Tinxinna Kanna fa feen fala. Iki e fan bata a tan yeteen yanfa, e yi a faxe. 53 E tan bata Alaa sariyan soto fata malekane ra, koni e mi a suxi!" 54 E to na me, e bojen yi te, han e yi e jinne raxin! 55 Koni Etiyen yi lugoxi Alaa Nii Sarijanxin na, a koren mato, a yi Ala noron to, Yesu yi tixi Ala yiifanna ma. 56 A yi a fala, a naxa, "A mato! N kore xonna rabixin toma, Muxuna Dii Xemen tixi Ala yiifanna ma!" 57 E yi sonxo gbeeni te. E yi e yiine sa e tunle de ra. E birin yi gbin sa xili ma.

58 E yi a bubu, e a ramini taani, e sa a magolon han a faxe. Na feen serene yi e dagine taxuma banxulanna nde ra, naxan yi xili Soli. 59 E yi Etiyen magolonma waxatin naxan yi, Etiyen yi lu Ala maxande, a naxa, "Marigi Yesu, n niin nasuxu!" 60 A yi a xinbi sin, a yi gbelegbele, a naxa, "Marigina, i nama e suxu e yulubini ito ra." A yelin xanbin na fale, sayaan yi a li.

8 Soli yi tinxi Etiyen faxe feen ma. Nba, na loxoni, besenxonya gbeen yi keli denkeleya yamaan xili ma Yerusalen taani. E birin yi xuya ayi Yudaya yamanan nun Samariya yamanani, fo xerane. 2 Muxu togondiyaxina ndee yi Etiyen binbin maluxun, e wuga a fe ra kati! 3 Koni Soli tan yi kataxi denkeleya yamaan kala feen nan na. A yi soma banxine kui, a denkeleya xemene nun jaxanle suxu, a yi e sa kasoon na. 4 Denkeleya muxun naxanye xuya ayi, ne yi lu Alaa falan naliye yiren birin yi. 5 Filipi yi siga Samariya yamanan taana nde yi, a sa Alaa Muxu Sugandixina fe kawandin ba na yi. 6 Yamaan birin yi e tuli mati Filipi a falane ra ki fani, e mon yi lu a kabanako feene matoe a yi naxanye ligama. 7 Yinna jaxine yi muxun naxanye foxo ra, ne yi e ragbelegbele, e xete e foxo ra. Fati mafaxatone nun lebuten wuyaxi fan yi kende ya. 8 Sewa gbeen yi so na taani. 9 Xemena nde yi na taani naxan yi xili Simon. Na yi woyimeyaan ligama. Samariya kaane birin yi kabema a ma. A yi a yete yigboma. 10 Taan muxune birin yi biraxi a foxo ra, fonna nun dii jorena, e lu a fale, e naxa, "Xemeni ito, Ala senben ni ito ra, yamaan naxan xili sa a 'Fanga Gbee Kanna.'" 11 E yi biraxi a foxo ra, bayo e yi kabema a ma xabu to mi na ra a woyimeyana fe ra. 12 Koni Filipi Alaa Mangayaan nun Yesu Alaa Muxu Sugandixina a fe xibarun nali e ma waxatin naxan yi, e yi denkeleya. Xemene nun jaxanle, e birin yi rafu igeni e tubi xinla ma. 13 Simon fan yeteen yi denkeleya. A yi rafu igeni, a lu biraxi Filipi foxo ra yiren birin yi. A yi taxamaseri gbeene nun kabanako feene to, a kabe kati! 14 Xeraan naxanye yi Yerusalen taani, ne a me waxatin naxan yi a Samariya kaane bata Alaa falan suxu, e Piyeri nun Yoni rasiga e ma. 15 E to so na, e yi Ala maxandi e xa alogo e xa Alaa Nii Sarijanxin soto. 16 Amasoto Alaa Nii Sarijanxin munma yi godo e tan sese fari singen. E bata yi rafu igeni Marigi Yesu xinla nan tun yi gbansan! 17 Nayi, Piyeri nun Yoni yi e yiin sa e ma, e yi Alaa Nii Sarijanxin soto. 18 Simon a to waxatin naxan yi, a Nii Sarijanxin yi soto ma xerane

yiine xɔn, a yi fa gbetin na e xɔn, 19 a naxa, “E senbeni ito fi n fan ma alogo n na n yiin sa muxu yo ma, na kanna fan xa Alaa Nii Sarijanxin sɔto.” 20 Koni Piyeri yi a yabi, a naxa, “E nun i ya gbetin xa halagi yire kedenni, amasɔto i mirixi a ma fa fala a i Alaa kiseen sɔtɔn gbetin nan xɔn! 21 I gbee yo mi nxɔ wanle yi amasɔto i bɔɲen mi tinxinxi Ala yɛ ra yi. 22 Nayi, xetɛ i ya miriya ɲaxin fɔxɔ ra, i yi Marigin maxandi alogo a xa i mafelu i ya miriya ɲaxin na, xa a sa tin. 23 Amasɔto n bata a to, i lugoxi xɔxɔlɔnyaan nan na, i kankan tinxintareyaan ma.” 24 Simɔn yi a fala Piyeri nun Yoni xa, a naxa, “Yandi, ɛ Marigin maxandi n xa, alogo, ɛ feen naxanye falaxi, ne sese nama n li.” 25 Piyeri nun Yoni seren baxina, e Marigina falan nali, e xetɛ Yerusalen taani, e dangu Yesu a fe Xibaru Fajin naliyɛ Samariya taa wuyaxi yi. 26 Marigina malekan yi falan ti Filipi xa, a naxa, “Keli, i siga sogeteden yiifanna ma, kiraan naxan kelima Yerusalen taani siga Gasa taani naxan dangun burunna ra, i siga na xɔn.” 27 Filipi yi keli, a siga, a Etiyopi kaa xɛmɛ tɛgɛnxina nde li kira yi. Kuntigi gbeen nan yi na xɛmɛn na nun. A tan nan yi Etiyopi ɲaxalan Mangan Kandasi a nafunle birin xun na. A bata yi siga Yerusalen taani Ala batudeni. 28 A xetɛmatɔna a konni, a yi dɔxi a wontoron kui, a yi lu Nabi Esayi a Kitabun xaranɲɛ. 29 Alaa Nii Sarijanxin yi a fala Filipi xa, a naxa, “Siga, i sa i maso na wontoron na.” 30 Filipi yi siga a giye, a yi Etiyopi kaan xuiin mɛ Nabi Esayi a Kitabun xaranɲɛ. Na ma, Filipi yi a maxɔdin, a naxa, “I naxan xaranma, i a bunna kolon ba?” 31 A yi a yabi, a naxa, “N na a kolonma di, xa muxɛ mi a ye ba n xa?” A Filipi xili alogo a xa te, a dɔxɔ a fema wontoroni. 32 A yi denaxan xaranma Kitabun kui, na ni ito ra, a naxa, “E a xali nɛn alo yɛxɛɛn faxa daxina. A mi fala yo ti, alo yɛxɛɛn naxan a dunduma a fati ma xaben xaba muxun bun. 33 E a rayagi nɛn, e mi tin a kitin bolonɲɛ tinxinni. Nde nɔɛ a yixetɛna fe fale? Amasɔto e bata a siimayaan dan dunuɲa yi.” 34 Kuntigin yi a fala Filipi xa, a naxa, “Yandi, a fala n xa, nabini ito nde a fe falama, a yetɛ fe ba, hanma muxu gbɛtɛ a fe?” 35 Filipi yi falan tongo, a yi a fɔlɔ na Kitabun yiren ma, a Yesu a fe xibaru nali a ma. 36 E yi sigan tima kiraan xɔn ma waxatin naxan yi, e xudena nde li. Kuntigin yi a fala a xa, a naxa, “Igen mato, nanfera n mi rafuyɛ?” 37 Filipi yi a fala a xa, a naxa, “Xa i bata denkeleya i bɔɲeni, i nɔɛ rafuyɛ nɛn.” Kuntigin yi a yabi, a naxa, “N bata denkeleya a ma, a Yesu Alaa Muxu Sugandixin

nan Alaa Dii Xɛmɛn na.” 38 A yi yamarin fi a e xa wontoron nati. E nun Filipi yi godo igeni, a yi rafu. 39 E to te igeni, Marigina Nii Sarijanxin yi Filipi tongo, a siga a ra. Kuntigin mi fa a to sɔnɔn, koni a sɛwaxin yi siga a sigatini. 40 Filipi yi sa mini Asotu taani, a yi Yesu a fe Xibaru Fajin nalima a dangu taane birin yi, han a sa so Sesariya taani waxatin naxan yi.

9 Nba, Sɔli naxan yi kɔnkɔxi Marigin fɔxɔrabirane ma e faxa feen na, na yi siga Saraxarali Kuntigi Singen fema, 2 a yi kedine maxɔdin a ra, a naxanye seɓɛ Damasi taan salide banxine muxune ma, alogo xa a sa naxanye li na, xɛmɛn nun ɲaxanla, e biraxi Yesu a Kiraan fɔxɔ ra, a xa fa e xidixin na Yerusalen taani. 3 A yi kira yi, a bata yi maso Damasi taan na, tɛɛ dege gbeen yi keli kore mafuren, a lu dege a rabilinni. 4 A yi bira bɔxɔni, a fala xuiin mɛ, naxan yi a falama, a naxa, “Sɔli, Sɔli i n besɛnxɔnyama nanfera?” 5 Sɔli yi maxɔdinna ti, a naxa, “Marigina, nde i tan na?” Na xuiin yi a yabi a naxa, “N tan, Yesu na a ra, i naxan besɛnxɔnyama. 6 Koni keli, i siga taani. I lan i xa naxan liga, e sa na falama i xa nɛn.” 7 Muxun naxanye yi Sɔli fɔxɔ ra nun, ne dunduxin yi lu tixi. E yi fala xuiin mɛma koni e mi yi muxu yo toma. 8 Sɔli yi keli, a ti, a yi a yɛɛn nabi, koni a mi yi sese toma. E yi a yii rasuxu, e siga a ra Damasi taani. 9 A lu danxutɔyani han soge saxan. A mi yi donse donma, a mi yi a minma. 10 Nba, Yesu fɔxɔrabirana nde yi Damasi taani nun, a xili Ananiyasi. Marigin yi falan ti na xa fe tooni alo xiyena, a naxa, “Ananiyasi.” Ananiyasi yi a yabi, a naxa, “Marigina, n tan ni i ra.” 11 Marigin yi a fala a xa, a naxa, “Keli, i siga kiraan xɔn ma, naxan xili Kira Tinxinxina, i sa muxuna nde maxɔdin Yudasɛ a banxini naxan kelixi Tarise taani naxan xili Sɔli bayo a n maxandima. 12 A bata fe toon ti alo xiyena, a xɛmɛna nde to fe naxan xili Ananiyasi, a yi a yiin sa a ma, alogo a mɔn xa nɔ seen toɛ.” 13 Ananiyasi yi a yabi, a naxa, “Marigina, muxu wuyaxi bata na xɛmɛna fe fala n xa, a fe ɲaxin naxanye birin ligaxi i ya yama sarijanxin na Yerusalen taani. 14 A bata senben sɔto saraxarali kuntigine yii, a xa fa Damasi taani alogo muxun naxanye birin i xinla falama, a xa ne suxu.” 15 Marigin yi a fala Ananiyasi xa, a naxa, “Siga tun, amasɔto n bata Sɔli sugandi n ma walikɛɛn na, a xa n xinla rali siya gbɛtɛne nun e mangane nun Isirayila muxune ma. 16 N na yitama a ra nɛn a tɔrɔn yatɛn naxan sɔtɔma n ma fe ra.”

17 Nayi, Ananiyasi yi siga na banxini, a sa a yiin sa Soli ma. A yi a fala a xa, a naxa, “Ngaxakedenna Soli, Marigi Yesu naxan mini i xa kenenni kira yi, i to yi fama be, na nan n nafaxi i ma alogo i mɔn xa seen to, i lugo Alaa Nii Sarijanxin na.” 18 Mafuren sena nde yi ba Soli yeen ma alo se xanla, a mɔn yi seen to. A yi keli, a rafu igeni. 19 A yi a dege, a mɔn yi senben sɔto. Soli yi xii dando raba Yesu fɔxɔrabirane fema Damasi taani. 20 A yi kawandin ba fɔlɔ salide banxine kui keden na, a Alaa Dii Xemen nan Yesu ra. 21 Naxanye birin na me, ne yi kabe, e maxadinna ti, e naxa, “Xemeni ito xa mi yi muxune njaxankatama Yerusalen taani naxan yi Ala maxandima xinli ito yi ba? A mi faxi ne xan suxudeyi be ba, alogo a xa siga e ra saraxarali kuntigine fema?” 22 Koni Soli senben yi gboma ayi kati! A yi a mayitama, a Yesu nan Alaa Muxu Sugandixin na han Damasi taan Yahudiyane yifu. 23 Xii wuyaxi danguxina, Yahudiyane yi e bode to Soli faxes feen ma. 24 Koni Soli yi e wundon kolon. E yi lu taan so deene kantanje kɔeen nun yanyin na, alogo e xa a faxes. 25 Koni Soli a xarandiine yi sa a ragodo sagan kui taan nabilinna yinna xanbi ra. 26 Soli yi siga Yerusalen taani, a kata sigadeni Yesu fɔxɔrabirane fema. Koni e gaxu a yee ra, bayo e mi yi laxi a ra xa Yesu fɔxɔrabiran nan yi a ra nun. 27 Koni Baranabasi yi a xali xerane fema. Soli Marigin to kii naxan yi kira yi, a mɔn yi a xuiin me, a na yeba e xa e nun Soli kawandin ba kii naxan yi Damasi taani Marigi Yesu xinli. 28 Nayi, Soli yi lu e fema. A lu sigɛ kawandi badeni xaxili ragidini Marigi Yesu xinli Yerusalen taan birin yi. 29 Yahudiyen naxanye yi Gireki xuiin falama, Soli yi lu ne matande, koni ne fan yi kata a faxes feen na. 30 A ngaxakedenne to na me, e yi siga a ra Sesariya taani, e yi a rasiga Tarise taani. 31 Nayi, denkeleya yamaan yi waxati ti boje xunbenli Yudaya yamanan nun Galile yamanan nun Samariya yamanani, e lu e bode senbe soe. Alaa Nii Sarijanxin yi lu e ralimaniye Marigin yee ragaxuni, e wuya ayi. 32 Piyeri yi a masigan tima na yirene birin yi. Lɔxɔna nde, a yi siga Lida taan yama sarijanxin xɔntɔnden. 33 A xemena nde li na naxan yi xili Ene, lebutenna nan yi a ra. Na yi saxi xabu jee solomasexe. 34 Piyeri yi a fala a xa, a naxa, “Ene, Yesu Alaa Muxu Sugandixin bata i rakendeya. Keli, i sadeni tɔn.” Ene yi keli mafuren! 35 Lida kaane nun Sarɔn kaane birin yi xemen to, e tubi Marigin ma. 36 Naxanla nde yi Yafa taani naxan findixi Yesu fɔxɔrabirana nde ra, a

xili Tabita, naxan mɔn yi xili Dɔrakasi Gireki xuini. A yi fe fajin ligama waxatin birin, a yi yiigelitɔne malima. 37 Na waxatini, a yi fura, a faxes. E to yelin a binbin maxe, e yi sa a sa kore banxina nde kui. 38 Awa, Yesu fɔxɔrabiran naxanye Yafa taani, ne bata yi a me a Piyeri Lida taani Yafa taan dexɔn ma. E yi xeraan muxu firin nasiga, e naxa, “Yandi, fa nxu fema keden na.” 39 Piyeri yi keli, e nun na xemene yi siga. E to so, e yi siga a ra kore banxin kui. Kaja gilene birin wugamatɔn yi fa a fema. Dɔrakasi domain nun gubaan naxanye rafala a to yi jeje, e yi ne yita a ra. 40 Piyeri yi e birin namini banxini, a yi a xinbi sin, a Ala maxandi. Na xanbi ra, a yi a yee rafindi a binbin ma, a yi a fala, a naxa, “Tabita, keli.” A yi a yeen nabi, a Piyeri to, a keli, a dɔxo. 41 Piyeri yi a suxu a yiin ma, a yi a rakeli. Na xanbi ra, a yama sarijanxin nun kaja gilene xili, a yi a jejen yita e ra. 42 Feni ito xibarun yi xuya ayi Yafa yiren birin yi. Muxu wuyaxi yi denkeleya Marigin ma. 43 Piyeri yi xii wuyaxi ti Yafa yi xemena nde fema naxan yi xili Simɔn. Garangen nan yi a ra.

10 Xemena nde yi Sesariya taani a xili Kɔroneyi, sofa kemen kuntigin nan yi a ra, a yi Itali yamanan ganla nin. 2 Dina muxun nan yi a ra. A tan nun a denbayaan birin yi gaxuxi Ala yee ra. A yi Yahudiya yiigelitɔne kima han! A yi Ala maxandima waxatin birin. 3 Lɔxɔna nde, se din waxatin bata yi maso, a yi fe toon ti alo xiyena, a yi Alaa malekana nde to, a a yigbe ki fajin. Malekan yi so a konni, a yi a fala a xa, a naxa, “Kɔroneyi!” 4 A yi malekan mato gaxuni, a yi a yabi, a naxa, “N kannna, nanfe ligaxi?” Malekan yi a yabi, a naxa, “I ya maxandi xuiin nun i ya yiigelito kiseene bata Ala kenɛn. Na nan a ligaxi a bata a yengi lu i xɔn. 5 Muxuna ndee rasiga Yafa taani iki, e xa sa fa muxun na naxan xili Simɔn, naxan mɔn xili Piyeri. 6 A yigiyaxi Simɔn garangen konna nin, fɔxo igen de.” 7 Na xanbi ra, malekan naxan yi falan tima Kɔroneyi xa, na yi siga. Kɔroneyi yi a walikeen muxu firin xili e nun sofa dinaxina nde naxan yi walima a fema. 8 Feen naxan ligaxi, a na birin yeba e xa, a yi e rasiga Yafa taani. 9 Na xɔtɔn bode, e yi kira yi, e bata yi maso Yafa taan na, Piyeri yi te kore banxin xuntagi yanyi tagini Ala maxandideni. 10 Kamen yi a suxu, a yi waxi a dege feni. E yi donseen nafalama a xa waxatin naxan yi, a yi fe toon ti alo xiyena. 11 A yi kore xonna rabixin to, a sena nde to gode, a ligaxi

alo dugi yigbeena. A singanxi a tongon naaninne ma godo bɔxɔni. **12** Subene nun bubu seene nun xɔliin siyaan birin yi na kui. **13** Piyeri yi fala xuiin me a fe tooni, a naxa, “Piyeri, keli i yi nde faxesa, i yi a don!” **14** Koni Piyeri yi a yabi, a naxa, “En-en de Marigina! Han iki, n munma se haramuxin hanma se sarjantaren don singen.” **15** Na fala xuiin mɔn yi mini, a naxa, “Ala bata naxan nasarijan, i tan nama na yate se sarjantaren na.” **16** Na yi liga dɔxɔna ma saxan. Na seen mɔn yi te kore keden na. **17** Piyeri fe toon naxan ti alo xiyena, a yi a mirima na bunna ma waxatin naxan yi, Kɔrɔneyi a xerane bata yi Simɔn ma banxin to, e tixi a de ra. **18** E yi muxune xili, e maxɔdinna ti, xa Simɔn yi yigiyaxi menni naxan mɔn xili Piyeri. **19** Piyeri mɔn yi a mirima a fe toon bunna ma waxatin naxan yi, Alaa Nii Sarijanxin yi a fala a xa, a naxa, “Simɔn, a mato, xeme saxan i fenma. **20** Keli i siga e fɔxɔ ra hali i mi sike, amasɔto n tan nan e rafaxi.” **21** Nayi, Piyeri yi siga na muxune fema, a yi a fala e xa, a naxa, “N tan ni i ra, e naxan fenma. E faxi nanfera?” **22** E yi a yabi, e naxa, “Kɔrɔneyi, sofa kemen kuntigin nan nxu xexi. Muxu tinxinxin nan a ra, a gaxu Ala yee ra, Yahudiyane birin a seren bama! Maleka sarjantaren bata a fala a xa, a xa i xili a konni a yi i ya falane rame.” **23** Nayi, Piyeri yi e yigiya banxini. Na xɔtɔn bode, a yi keli, e birin yi siga. Yafa taan denkeleya muxuna ndee yi siga e fɔxɔ ra. **24** Na xɔtɔn bode mɔn, e Sesariya taan li. Kɔrɔneyi yi e legedenma, a bata yi a kon kaane nun a xoyine birin malan nun. **25** Piyeri to so banxini, Kɔrɔneyi yi a ralan, a yi a xinbi sin Piyeri bun ma a binya feen na. **26** Koni Piyeri yi a rakeli, a naxa, “Keli, amasɔto muxun nan tun n fan na.” **27** E yi lu fala tiini han Piyeri yi so, a yi muxu wuyaxi li malanxi na yi. **28** A yi a fala e xa, a naxa, “E a kolon yati fa fala a Yahudiyane dinan mi tinje e nun siya gbeten xa lu e bode xɔn hanma a so a konni. Koni Ala bata a yita n na, a n nama a fala muxu yo ma fa fala a mi sarjan hanma a haramuxi. **29** Nanara, i ya xerane to n xili, n mi tondixi fe. Nba, e n xilixi nanfera?” **30** Kɔrɔneyi yi a fala, a naxa, “A soge naaninna nan i ra, n yi salima n ma banxini alo waxati sifani ito yi, benun se din waxatin xa a li, nba, xemena nde yi mini kenenni n xa, a ti n yetagi, a domaan mayilenma. **31** A yi a fala, a naxa, ‘Kɔrɔneyi, Ala bata i ya maxandin xuiin me. I ya yiigelito kiseene bata a liga Ala yi a yengi lu i xɔn ma. **32** Nayi, muxuna nde rasiga Yafa taani Simɔn xilideni naxan mɔn xili Piyeri. A yigiyaxi

Simɔn garangen konna nin fɔxɔ igen de.’ **33** Nanara, n xeraan nasigaxi i fɔxɔ ra keden na, i fan bata tin fe. Awa, iki nxu birin Ala yetagi be alogo nxu xa na falan me Marigina i yamarixi naxan na.” **34** Piyeri yi falan ti fɔlɔ, a naxa, “Iki, n bata a kolon, a jɔndin na a ra, fa fala Ala mi muxune rafisaxi e bode xa. **35** Naxan na gaxu a yee ra, a tinxinyaan naba, a na yisuxuma nen, a na findi muxun siya yo ra. **36** Ala bata a falan nasiga Isirayila kaane ma, a yi Yesu a fe Xibaru Fajin nali e ma fa fala a bɔje xunbenla sɔtɔma Yesu Alaa Muxu Sugandixin barakan nin, muxun birin Marigina. **37** E a kolon naxan liga Yudaya yamanan birin yi, naxan bata yi fɔlɔ Galile yamanani Yoni kawandin ba xanbini a yamaan xa rafu igeni e tubi xinla ma. **38** E mɔn a kolon, a Alaa Nii Sarijanxin nagodo nen Yesu Nasareti kaan xun ma alo masusan turena, a yi senben fi a ma. E mɔn a kolon Yesu siga kii naxan yi yiren birin yi, a yi lu fe fajine lige, a muxune rakendeya, naxanye birin yi Yinna Manga Setana senben bun ma, amasɔto Ala yi a xɔn ma. **39** A feen naxanye birin liga Yahudiya yamanan nun Yerusalen taani, ne serene nan nxu tan na. E yi a gbangban wudin ma, e yi a faxesa. **40** Koni Ala yi a rakeli sayani a soge saxande lɔxɔni, a yi a yita yamaan na. **41** Yamaan birin mi a to, koni fɔ Ala sereyaan naxanye sugandixi, nxu tan naxanye nxu dege a xɔn, nxu yi nxu min a dexɔn a keli xanbini sayani. **42** A bata nxu yamari, a nxu xa kawandin ba yamaan xa, nxu yi a seren ba fa fala Ala bata a ragidi Yesu ma, a xa faxesa muxune nun jeje muxune makiti. **43** Nabine birin a seren ba nen, a muxu yo na denkeleya a ma, na kanna yulubine xafarima nen Yesu xinla barakani.” **44** Piyeri yi falan tima waxatin naxan yi, naxanye birin yi tuli matixi a falan na, Alaa Nii Sarijanxin yi godo ne birin ma. **45** Yahudiyan denkeleya muxun naxanye fa Piyeri fɔxɔ ra, ne yi kabe bayo Ala a Nii Sarijanxin nagodo nen siya gbetene fan ma. **46** Amasɔto e yi na muxune fala xuine mema e Ala matɔxɔma xui gbetene yi. Nayi, Piyeri yi a fala, **47** a naxa, “Tondi tiye muxuni itoe rafuye igeni ba, naxanye bata Alaa Nii Sarijanxin sɔto alo en tan a sɔtɔxi kii naxan yi?” **48** Nanara, a yi e yamari a e xa rafu Yesu Alaa Muxu Sugandixin xinli. Na xanbi ra, e yi Piyeri mafan, a xa lu na xi dando.

11 Xerane nun denkeleya muxun naxanye yi Yudaya yamanan birin yi, ne yi a me, a siya gbetene fan bata Alaa falan suxu. **2** Piyeri to siga Yerusalen taani,

Yahudiya denkeleya muxune yi a mafala fōlo, e naxa, 3 “I bata siga banxulantarene konni, ε birin yi ε dege ε bode xōn mal” 4 Piyeri yi na feene yebe e xa ki faji a danguxi kii naxan yi, 5 a naxa, “N yi Ala maxandima Yafa taani waxatin naxan yi, n fe toon ti nen alo xiyena. N sena nde to gode, a ligaxi alo dugi yigbeena. A singanxi a tongon naaninne ma, a ti n dexōn ma. 6 N yi a kui to, n yi fa subene nun burunna subene nun bubu seene nun xōline to. 7 Na xanbi ra, n fala xuiin me, a naxa, ‘Piyeri, keli, i nde faxa, i yi a don!’ 8 Koni n yi a yabi, n naxa, ‘En-en de, Marigina, n munma donse haramuxin don singen hanma donse sarjantarena.’ 9 Fala xuiin mōn yi keli kore, a naxa, ‘Ala bata naxan nasarjan, i nama na yate se sarjantaren nal’ 10 Na yi liga dōxōna ma saxan. Dōnxen na, na seen mōn yi te kore. 11 Na waxatin yeteni xeme saxan yi fa n ma banxini nxu yi yigiyaxi denaxan yi keli Sesariya taani. 12 Alaa Nii Sarjanxin yi a fala n xa, a n nama sike sigε e fōxō ra. Denkeleya muxu senninni itoe naxanye be, ne fan yi n mati, nxu birin yi so Kōrōneyi a banxini. 13 Kōrōneyi malekan to tixi a banxini kii naxan yi, a yi na yebe nxu xa. Malekan yi a fala a xa, a naxa, ‘Muxuna nde rasiga Yafa taani, e xa sa Simōn xili, naxan mōn xili Piyeri. 14 A falane tima i xa nen, naxanye ε nun i ya denbayaan birin nakisima.’ 15 N to falan fōlo, Alaa Nii Sarjanxin yi godo e ma alo a godo nxu fan ma kii naxan yi a fōlōni. 16 Nayi, Marigin falan naxan ti n xa, na yi rabira n ma, a naxa, ‘Yoni marafuun tixi igen nin, koni ε tan nafuma Alaa Nii Sarjanxin nin.’ 17 Awa, Ala to e kixi alo a en fan kixi kii naxan yi, en tan naxanye denkeleyaxi Marigi Yesu Alaa Muxu Sugandixin ma, n tan yi lan nun n xa Ala matandi ba?” 18 E na falane me waxatin naxan yi, e birin yi e dundu, e yi Ala tantun, e naxa, “Ala bata tin siya gbetene fan xa tubi, e nii rakisin sōtō!” 19 Awa, tōrō lōxōn naxanye fa Etiyen faxa waxatini, na yi a liga denkeleya muxune yi xuya ayi. Ndee yi siga han Fenisa nun Sipiri nun Antiyōki taani. E yi Alaa falan nalima Yahudiyane nan tun ma. 20 Koni xemen naxanye denkeleya Sipiri yamanan nun Sireni taani, na ndee yi siga Antiyōki taani, e Marigi Yesu a fe Xibaru Fajin nali Girekine fan ma. 21 Marigin senben yi lu e fōxō ra, muxu wuyaxi yi denkeleya, e tubi Marigin ma. 22 Awa, na fe xibarun yi Yerusalen denkeleya yamaan li, e Baranabasi rasiga Antiyōki taani. 23 A to na li, Ala hinanxi e ra kii naxan yi, a na to, a sewa. A yi e birin nalimaniya, a e xa lu Marigin fōxō ra e bojen birin

na! 24 Muxu fajin nan yi Baranabasi ra, a yi lugoxi Alaa Nii Sarjanxin na, a denkeleyaxi. Muxu wuyaxi yi bira Marigin fōxō ra. 25 Na xanbi ra, Baranabasi yi siga Tarise taani Sōli fendeni. 26 A a to waxatin naxan yi, a yi fa a ra Antiyōki yi. Baranabasi nun Sōli yi lu denkeleya yamaan xōn, e muxu wuyaxi xaran han jee keden. Antiyōki kaane nan singe Yesu fōxōrabirane xili sa a Yesu mantonne. 27 Awa, na waxatini, nabina ndee yi keli Yerusalen taani, e siga Antiyōki taani. 28 E tan nde yi xili Agabusi, na yi keli, a yi a fala Alaa Nii Sarjanxin barakani, a fitina kamen soma nen dunuja birin yi. Na feen kamali nen Manga Kilodi waxatini. 29 Men kaan naxanye yi Yesu fōxō ra, ne yi lan a ma, a e birin xa e fanga beren liga alogo e xa mali seen nasiga e ngaxakedenne ma naxanye yi Yudaya yamanani. 30 E yi na liga, e yi na so Baranabasi nun Sōli yii siga Yudaya denkeleya yamaan fonne ma.

12 Na waxatini, Manga Herode yi denkeleya yamaan muxuna ndee suxu, a xa e jaxankata. 2 A yi yamarin fi, a e xa Yoni tada Yaki faxa silanfanna ra. 3 A to a to, a na rafan Yahudiyane ma, a mōn yi Piyeri fan suxu. Na liga Buru Ratetaren Sali lōxōne nin. 4 Herode to Piyeri suxu, a yi a sa kasoon na, a yi sofa naanin dōxōde naanin ti a kantandeni. A xōli yi Herode ma, Halagi Tiin Dangu Lōxōn Sanla na ba a ra, a yi a makiti yamaan yetagi. 5 Nanara, e yi Piyeri ramara kasoon na, koni denkeleya yamaan yi Ala maxandima a xa kati! 6 Na kōeen na, benun Herode xa Piyeri makiti, Piyeri yi xidixi yōlōnxōnne ra, a xima sofa firin tagi. Kaso banxin kantan muxune tixi deen na. 7 Marigina malekan yi mini kenenni a xa, kaso banxin kuiin yi yalan. Malekan yi Piyeri jensenna magarin, a yi a raxulun, a yi a fala a xa, a naxa, “Keli mafuren!” Yōlōnxōnne yi ba a yiine ra, e yolon. 8 Malekan yi a fala a xa, a naxa, “I maxidi, i ya sankidine so.” Piyeri yi na liga. Malekan yi a fala a xa, a naxa, “I ya domaan nagodo i ma, i bira n fōxō ra.” 9 Piyeri yi bira malekan fōxō ra mini kasoon na. Koni malekan yi naxan ligama, Piyeri mi yi a kolon xa jōndin nan yi a ra. A yengi yi a ma a a yi fe toon nan tima alo xiyena. 10 E yi dangu kantan ti singen na, e nun a firindena, e yi sa tande yi deε wure daxin li siga taani. Na yi rabi a yete ra, e yi mini. E sigaxin kiraan xōn ndedi, malekan yi tunun Piyeri ma. 11 Piyeri to xaxili sōtō, a yi a fala, a naxa, “N bata a kolon yati, a Marigin nan a malekan xexi, a n nakisi Herode

senben ma e nun Yahudiya yamaan yi waxi naxan birin liga fe yi n na.” 12 A yelinxina a mire, a yi siga Yoni Maraka nga Mariyama konni. Muxu wuyaxi yi malanxi na yi nun, e Ala maxandima. 13 Piyeri to deen kankon, walike jaxanla nde yi na nun naxan yi xili Roda. Na yi siga, a sa a tuli mati. 14 A Piyeri xuiin kolonxina, a sewa han a yi jinan deen nabi feen xon, a xete a giye. A sa a fala, a naxa, “Piyeri tixi deen na!” 15 E yi a fala a xa, e naxa, “I xunna bata keli!” Koni a kankan a ma a jondin na a ra. E yi a yabi, e naxa, “Piyeri yelenna nan na ra.” 16 Koni na waxatin birin, Piyeri yi deen kankoma tun. Donxen na e deen nabi. E Piyeri to waxatin naxan yi, e kabe. 17 Koni a yi a yiin maliga e xa, a e xa e dundu. Marigina a raminixi kasoon na kii naxan yi, a yi na yebe e xa, a naxa, “E na fala Yaki nun en ngaxakedenne birin xa.” Na xanbi ra, a yi mini, a siga yire gbete yi. 18 Kuye to yiba, sofane yi kuisan kati, e naxa, “Nanfe ligaxi Piyeri ra?” 19 Herode yi e yamari, a e xa a fen koni e mi a to. Nayi, a yi kaso kantanne makiti, a yi a yamari, a e xa faxa. Na xanbi ra, Herode yi keli Yudaya yamanani, a sa waxati ti Sesariya taani. 20 Herode yi xoloxi Tire kaane nun Sidon kaane ma nun. Nanara, ne yi e malan, siga Herode fema. E yi mangana muxu gbeena nde singe masoto, Bilasati. Na xanbi ra, e yi kata yengen jian feen na e nun mangan tagi, amasoto e yamanan muxune yi donseen sotoma Manga Herode a yamanan nin. 21 E loxon naxan saxi, Herode yi a mangaya domaan nagodo a ma, a dexo a mangaya gbedeni, a falan ti yamaan xa. 22 Yamaan yi sonxo, e naxa, “alana nde nan xui ito ra, adama mi a ra.” 23 Na waxatin yeteni, Marigina malekan yi furen nadin Herode ma, amasoto a mi yi Ala binyaxi. Kunle yi a don, a faxa. 24 Alaa falan yi xuya ayi, a senben soto. 25 Baranabasi nun Soli yi yelin e xerayaan na, e keli Yerusalen taani, e xete Antiyoki taani. E siga Yoni Maraka ra e foxo ra.

13 Nabina ndee nun karamoxona ndee yi Antiyoki denkeleya yamaan ye nun, Baranabasi nun Simeyon, e yi naxan xilima a fati forena, e nun Lusiyusu Sireni kaan nun Manahen naxan nun Manga Herode maxuruxi e bode xon ma, e nun Soli. 2 Loxona nde, e yi sunni, e Marigin batuma, Alaa Nii Sarijanxin yi a fala e xa, a naxa, “E Baranabasi nun Soli lu e danna n xa n ma wanla ra, n na e xilixi naxan ma.” 3 Nayi, e to yelin sun suxun nun Ala maxandin na, e

yi e yiin sa Baranabasi nun Soli ma e taxu feen na Ala ra, e yi e rasiga. 4 Nba, Alaa Nii Sarijanxin to Baranabasi nun Soli rasiga, e yi siga Silusi taani, e dexo kunkin kui foxo igen xun ma, e siga han Sipiri yamanani. 5 E to so Salamin taani, e sa Alaa falan nali Yahudiyane salide banxine yi. Yoni Maraka yi e foxo ra e mali feen na. 6 E dangu na yamanan birin yi, han e sa Pafosi taan li. E yi woyimena nde li na, a xili Barayisa. Wule nabiin nan yi a ra Yudaya yamanani. 7 Kuntigina nde nan yi a ra yamana kanna Seriyu Poli fema. Xaxilimaan nan yi na yamana kanna ra. A yi Baranabasi nun Soli xili a konni amasoto a yi waxi a xon ma a xa Alaa falan name. 8 Koni Barayisa na woyimeen naxan mon yi xili Gireki xuini, Elimasi, na yi e matandi. A yi kata a yamana kanna xa tondi denkeleya feen ma. 9 Awa, Soli naxan mon xili Poli, na yi lugoxi Alaa Nii Sarijanxin na, a yi woyimeen mato kati! 10 A yi a fala, a naxa, “I tan lugoxi yanfan nun kote jaxin siyaan birin na! Yinna Manga Setanaa diina! Tinxinyaan birin yaxun nan i tan na. I mi be Marigina kira tinxinxine matande ba? 11 A mato, Marigin bata a yiini te i xili ma iki, i danxuma nen. I waxati tima nen i mi sogan to.” Na waxatin yeteni, kundaan nun dimin yi Elimasi yeen suxu. A lu a masiga tiye, a muxune fenma naxan a yii rasuxe. 12 Yamana kanna na to waxatin naxan yi, a denkeleya, a kabe Marigina xaranna ma. 13 Poli nun a foxorabirane yi dexo kunkin kui Pafosi taani siga Periga taani Panfiliya yamanani. Koni Yoni Maraka yi xete e foxo ra na yi, a siga Yerusalen taani. 14 E yi keli Periga taani siga Antiyoki taani naxan Pisidiya yamanani. Matabu Loxoni, e sa so Yahudiyane salide banxini, e dexo. 15 E yelin Musaa Sariya Kitabun nun nabine kitabune xaranye waxatin naxan yi, salide banxin kuntigine yi a fala e xa, e naxa, “Ngaxakedenne, xa kawandi falana nde e xon lan yamaan ma, e a fala.” 16 Poli yi keli, a yi e masabari a yiin na, a falan folo, a naxa, “E tan Isirayila kaane nun siya gbeten naxanye gaxuxi Ala yee ra, e tuli mati n xuiin na! 17 Isirayila kaane Ala bata en benbane sugandi, a yi e rawuya ayi, e yi Misiran yamanani waxatin naxan yi. Na xanbi ra, a yi e ramini na yamanani a senbe gbeeni. 18 A yi ti e bun ma tonbonni jee tonge naanin, 19 a yi siya solofere halagi Kanan boxoni, a yi a yamaan findi na boxon kanna ra. 20 Na birin danguxi jee keme naanin e nun jee tonge suulun joxon nan bun.” “Na xanbi ra, a kitisane fi e ma han Nabi Samuyeli a

waxatini. **21** Na xanbi ra, e yi mangan maxodin Ala ra, Ala yi Bunyamin bõnsõnna Kisu a dii xemen Soli findi e mangan na jɛɛ tonge naanin. **22** Ala Soli ba mangayani waxatin naxan yi, a yi Dawuda findi e mangan na. Ala a fala nen Dawuda fe yi, a naxa, ‘N bata a to, a muxun nan Yese a dii xemen Dawuda ra naxan bõjen luxi alo n bõjena.’” **23** “Ala yi Yesu Marakisi Tiin namini Dawuda bõnsõnni Isirayila xa, a bata yi e tuli sa naxan na. **24** Benun Yesu xa fa waxatin naxan yi, Yoni yi Isirayila yamaan birin kawandi, a e xa e kejaan maxete, e rafu igeni e tubi xinla ma. **25** Yoni yi yelinma a wanla ra waxatin naxan yi, a yi a fala yamaan xa, a naxa, ‘E mirixi a ma, a nde n tan na? E naxan mamema, na mi n tan na. Koni na fama nen n tan xanbi ra. N yeteen mi lan n yi a sankidin fulun.’” **26** Põli mɔn yi a fala, a naxa, “Ngaxakedenne, Ibrahima bõnsõnne nun siya gbeten naxanye gaxuma Ala yee ra, kisi feen Xibaru Fajini ito faxi en tan nan ma. **27** Amasoto Yerusalen kaane nun e kuntigine mi Yesu kolon. E mɔn mi nabine falane famuxi naxanye xaranma Matabu Lõxone birin yi. Koni, e na falane rakamali nen, e to Yesu yalagi. **28** Hali e to mi a yalagi xun yo to a ra, a yi lan a xa faxa naxan ma. Koni e Pilati mafan nen, alogo a xa a faxa. **29** Kitabun naxan falaxi a fe yi, e na birin nakamali waxatin naxan yi, e yi a ragodo a gbangan wudin ma, e yi a maluxun. **30** Koni Ala yi a rakeli sayani. **31** Naxanye yi biraxi a fõxɔ ra Yerusalen taani nun keli Galile yi, ne yi a to xi wuyaxi bun. Ne nan a serene ra en ma yamaan xa iki.” **32** “Nxu bata fa Yesu a fe Xibaru Fajini ito ralideni e ma. Ala bata yi en benbane tuli sa naxan na, **33** a bata na rakamali en tan xa, e bõnsõnne, a Marigi Yesu rakeli sayani, alo a sebexi kii naxan yi Yaburin sora firinden kui, a naxa, ‘N ma dii xemen nan i tan na. N bata findi i fafe ra to.’” **34** “Ala naxan fala Yesu rakeli feni sayani, alogo a nama fa faxa sɔnɔn, a ito nan fala, a naxa, ‘N Dawuda tuli sa duba sarijanxanxi kenden naxanye ra, n na fima nen e ma.’ **35** Nanara, a sebexi yire gbete yi, a naxa, ‘I mi tinje i ya muxu sarijanxin yi kun gaburun kui.’ **36** Anu, Dawuda yelin xanbini wale Ala xa a waxatini, a faxa nen, e yi a maluxun a benbane fema, a binbin yi kun. **37** Koni Ala naxan nakeli sayani, na mi kunma.” **38** “Nanara, ngaxakedenne, nxu bata a rali e ma, e xa a kolon, a yulubine xafarima Yesu barakan nin. Musaa sariyan mi yi nɔe e ratinxinje Ala yee ra yi yulubine fe ra, **39** koni naxanye na denkeleya Yesu ma, ne tinxinma nen

Ala yee ra yi a barakani. **40** Nanara, e a liga e yeren ma, nabine naxan fala, na nama fa e soto, **41** e naxa, ‘E tan muxu de jaxine, e kabe, e xuya ayi. Bayo n fena nde ligama nen e waxatini ito yi e mi yi le naxan na, hali xa a fala e xa.’” **42** Põli nun Baranabasi yi minima salide banxini waxatin naxan yi, yamaan yi e mafan, a e mɔn xa falani ito ti e xa Matabu Lõxɔ famatoni. **43** Awa, yamaan keli malanni waxatin naxan yi, Yahudiya wuyaxi nun siya gbeten naxanye yi tubixi Yahudiyane dinan ma, ne yi bira Põli nun Baranabasi fõxɔ ra. Nanara, ne yi e kawandi, a e xa lu Alaa hinanna bun ma. **44** Na Matabu Lõxon xunsagin ma, fayida taan muxune birin yi e malan Marigina falan name xinla ma. **45** Yahudiyan bonne yamaan to waxatin naxan yi, e xɔxɔlɔnyaan yi keli e ra kati! E yi Põli a falane matandi, e yi a rayelefu. **46** Koni Põli nun Baranabasi yi falan ti xaxili ragidini, e naxa, “A fere mi na fɔ Alaa falan xa ti e tan nan singe xa. Koni bayo e bata e me Alaa falan na, e mi e yete yatexi habadan nii rakisin muxune ra, nxu kelima e fema nen, nxu siga siyane fema. (aiðnios g166) **47** Amasoto Marigina a yamarixi en ma na kii nin, a naxa, ‘N bata i findi kenenna ra siyane xa, alogo i xa siga kisi feen na han bõxɔn danne.’” **48** Siya gbete ito me waxatin naxan yi, e sewa, e Marigina falan binya. Naxanye birin yi yebaxi nun habadan nii rakisin soto feen na, ne yi denkeleya. (aiðnios g166) **49** Marigina falan yi xuya ayi na yamanan yiren birin yi. **50** Koni taan muxu gbeene nun siya gbeten jaxalan xili kanna naxanye yi gaxuma Ala yee ra, Yahudiyane yi ne radin. E besenxɔnyaan nakeli Põli nun Baranabasi xili ma, e yi e kedi e yamanani. **51** Xerane yi e sanne rakunkun e rame feen na, e siga Ikoniyon taani. **52** Yesu fõxɔrabirane tan bõjen yi rafe sewan nun Alaa Nii Sarijanxin na.

14 Põli nun Baranabasi yi so Yahudiyane salide banxini Ikoniyon taani alo e darixi a ra kii naxan yi, e yi falan ti a fajin na han Yahudiyane nun siya gbete wuyaxiye yi denkeleya. **2** Koni Yahudiyan naxanye mi tin denkeleye, ne yi siyaan bonne radin denkeleya muxune xili ma. **3** Põli nun Baranabasi yi bu Ikoniyon taani. E yi falan ti xaxili ragidini Marigina fe yi, naxan yi taxamasenne nun kabanako feene liga senben fima e ma alogo na xa findi a hinanna xibarun sereyaan na. **4** Taa kui kaane yi yitaxun firinna ra, ndee yi lu Yahudiyane mabinni, bonne yi lu xerane fari. **5** Yahudiyane nun siya gbete ito me waxatin naxan yi, e sewa, e Marigina falan binya. Naxanye birin yi yebaxi nun habadan nii rakisin soto feen na, ne yi denkeleya. (aiðnios g166) **49** Marigina falan yi xuya ayi na yamanan yiren birin yi. **50** Koni taan muxu gbeene nun siya gbeten jaxalan xili kanna naxanye yi gaxuma Ala yee ra, Yahudiyane yi ne radin. E besenxɔnyaan nakeli Põli nun Baranabasi xili ma, e yi e kedi e yamanani. **51** Xerane yi e sanne rakunkun e rame feen na, e siga Ikoniyon taani. **52** Yesu fõxɔrabirane tan bõjen yi rafe sewan nun Alaa Nii Sarijanxin na.

e yiton Pōli nun Baranabasi rayarabi feen na, e nun e magolōn feen na e fāxa xinla ma. **6** Xerane na mēxina, e yi e gi. E siga taana ndee yi naxanye xili Lisitire nun Deribe, Likayoni yamanani, e nun na rabilinna birin. **7** E yi lu Yesu a fe Xibaru Fajin naliye na yi. **8** Xēmēna nde yi dōxi Lisitire taani, lebutenna nan yi a ra. Xabu a bari, a lebutenxi. A munma yi sigan ti mumē! **9** A yi a tuli mati Pōli a falane ra. Pōli to a yēen ti xēmēn na, a yi a kolon a na xēmēna denkeleyaan yi nōe a rakendeye nēn. **10** Nayi, Pōli yi a fala xuini te, a naxa, “Keli, i ti i sanne xun na!” Xēmēn yi tugan, a sigan ti fōlō. **11** Yamaan Pōli a fe ligaxin to waxatin naxan yi, e yi sōnxō Likayoni xuini, e naxa, “Alane nan bata godo en tagi adamadiine maligan na!” **12** E yi Baranabasi xili sa, a “Seyusi,” e Pōli fan xili sa, “Herēmē” amasōto Pōli nan yi fala tiin na. **13** Seyusi batuden naxan yi taa dēen na, na saraxaraliin yi fa turane nun jōxōnde kōmōtine ra taan so dēen na. E yi waxi nēn, a yamaan xa saraxane ba Pōli nun Baranabasi xa. **14** Xerane, Baranabasi nun Pōli to na kolon, e yi e domane yibō e ma. E siga e giye yamaan tagi, e gbelegbelema, e naxa, **15** “E ito ligama nanfera? Muxun nan tun nxu tan na alo e tan! Nxu faxi Yesu a fe Xibaru Fajin nan nalideyi e ma, alogo nxu xa a fala e xa, a e xa xetē fe fuuni itoe fōxō ra, e yi bira habadan Ala fōxō ra, naxan kore xōnna nun bōxō xōnna nun igen daxi e nun e yi seene birin. **16** Waxati danguxine yi, Ala tin nēn siyane birin yi sigan ti e gbee kiraan xōn. **17** Koni a yi wali fajine ligama a fe sereyane ra. A yi tulen nafama kore, sansine yi bogima e waxatini, a yi e ralugo balon nun sewan na.” **18** Hali Pōli nun Baranabasi to falani itoe ti, a yi luxi ndedi yamaan xa saraxan ba e xa. **19** Yahudiyana ndee yi keli Antiyōki taan nun Ikoniyon taani. E yi yamaan nadin. E yi Pōli magolōn, e yi a bubu siga taan fari ma. E yengi yi a ma, a a bata fāxa. **20** Koni Yesu fōxōrabirane to a rabilin, a yi keli, a mōn yi xetē taani. Na xōtōn bode e nun Baranabasi yi siga Deribe taani. **21** Pōli nun Baranabasi yi Yesu a fe Xibaru Fajin kawandin ba Deribe taani, e xarandii wuyaxi sōtō na yi. Na xanbi ra, e xetē Lisitire taan nun Ikoniyon taan nun Antiyōki taani. **22** E yi Yesu fōxōrabirane sēnbe so, e yi e ralimaniya, a e xa lu denkeleyaan kiraan xōn ma. E yi e xaran, e naxa, “A fere mi na fō en xa tōrō nēn han, en yi fa lu soe Alaa Mangayani.” **23** E yi fonne dōxō e xunna denkeleya yamaan keden kedenna birin yi. E sunna suxu, e yi Ala maxandi, e ne taxu Marigin na e denkeleyaxi naxan

ma. **24** E yi dangu Pisidiya yamanani, siga Panfiliya. **25** E to Yesu a fe Xibaru Fajin nali Periga taani, e yi godo Atali taani. **26** E kelixin mēnni, e dōxō kunkin kui, e xetē Antiyōki taani, e yi taxuxi Ala hinantenna ra denaxan yi a wanla fe ra, e naxan nakamali. **27** Pōli nun Baranabasi Antiyōki lixina, e yi denkeleya yamaan malan. Ala feen naxan birin ligaxi e xōn, e yi na birin yebe, e nun Ala tinxi kii naxan yi siya gbetene yi findi denkeleya muxune ra. **28** E yi waxati xunkuye ti Yesu fōxōrabirane fema Antiyōki yi.

15 Xēmēna ndee yi keli Yudaya yamanani, siga Antiyōki taani, e denkeleya muxune xaran fōlō, e naxa, “E mi nōe kise fō e banxulan alo Musaa sariyana a falaxi kii naxan yi.” **2** Fe matandi gbeen yi keli e nun Pōli nun Baranabasi tagi han e yi lan a ma, a Pōli nun Baranabasi nun Antiyōki denkeleya muxuna ndee xa siga Yerusalen taani, e sa xerane nun fonne to falani ito ma. **3** Nayi, denkeleya yamaan yi e mali e siga. E yi dangu a fale Fenisa yamanan nun Samariya yamanani, siya gbetene tubixi kii naxan yi Ala ma. Xibaruni ito yi e ngaxakedenne birin nasewa katil! **4** E Yerusalen taan lixina, denkeleya yamaan nun xerane nun fonne yi e rasene. Ala feen naxan liga e xōn ma, e na birin yebe e xa. **5** Farisi muxun naxanye bata yi denkeleya, na ndee yi keli, e naxa, “Fō siya gbetene xa banxulan nēn, e yi yamari, a e xa Musaa sariyan suxu.” **6** Xerane nun fonne yi e malan, e feni ito fese fese. **7** Matandin janxina, Piyeri yi keli, a yi a fala e xa, a naxa, “Ngaxakedenne, e a kolon a Ala bata n sugandi e tagi to mi na ra, alogo n tan xa Yesu a fe Xibaru Fajin nali siya gbetene ma, e yi a mē, e denkeleya. **8** Ala naxan muxun birin bōne yi feene kolon, na bata e fan nasuxu, a a Nii Sarijanxin so e yii alo a liga en fan xa kii naxan yi. **9** A mi tagi raba yo saxi en tan nun e tan tagi. Amasōto a bata e bōnen nasarijan denkeleyaan xōn. **10** Awa, nanfera e Ala bunbama, e goronna sa Yesu fōxōrabirane xun ma, en benbane nun en tan yetēen mi nōe goronna naxan tonge? **11** Anu, en laxi a ra a en kisixi en Marigi Yesu a hinanna nan xōn alo e tan.” **12** Yamaan birin yi e sabari, e yi e tuli mati Baranabasi nun Pōli a falan na. Ala taxamasenne nun kabanako feen naxanye liga e xōn ma siya gbetene tagi, e yi ne birin yebe yamaan xa. **13** E yelin falan tiye waxatin naxan yi, Yaki yi keli, a naxa, “Ngaxakedenne, e tuli mati n xuiin na! **14** Ala siya gbeten muxune findi a yamaan na kii naxan yi a

singeni, Simōn bata na yebe en xa. **15** Awa, nabine falan bata lan ito ma yati! Alaa falan sebexi Kitabuni na kii nin, a naxa, **16** ‘Na xanbi ra, n mōn fama nen, n Dawudaa banxi kalaxini tōn. N na rafalama nen, n yi a nenen ti **17** alogo muxu dōnxen naxanye luxi yamaan ye, ne xa Marigin fen, e nun siyane birin naxanye n xinla batuma,’ Marigina ito nan falaxi, naxan feni itoe birin ligama **18** naxanye kolonxi xabu a fōlōni.” (aiōn q165) **19** Yaki mōn yi a fala, a naxa, “N gbee miriyani, siya gbeten naxanye tubima Ala ma, en nama ne tōrō. **20** Koni fō en xa kedin sebe, en yi a fala e xa, a e xa e yete ratanga donseen donna ma naxan bata rali suxure kideni, e nun yanga suxun nun sube yifaxi donna nun sube wuli donna. **21** Amasoto xabu en benbane waxatine yi, Musaa sariyana fe kawandin bama taane birin yi, a xaranma salide banxine kui Matabu Lōxōne birin yi.” **22** Xerane nun fonne nun denkeleya yamaan birin yi lan a ma, a e xa muxuna ndee sugandi e ye, e yi e rasiga Antiyoki yi Pōli nun Baranabasi fōxō ra. E yi Yudasi sugandi naxan mōn xili Barasaba e nun Silasi, naxanye findixi yeeratine ra denkeleya muxune ye. **23** E yi na xerane rasiga kedini ito ra e yii, a sebexi, e naxa, “Xerane nun fonne, e ngaxakedenne bata kedini ito sebe denkeleya muxune ma naxanye siya gbetene ye Antiyoki nun Siriya nun Silisi yi. Nxu e xōntōn.” **24** “Nxu bata a mē, a muxuna ndee bata keli nxu konni, nxu mi naxanye xexi, e sa e tōrō, e yi e rakontofili e falane ra. **25** Nanara, nxu birin bata lan a ma, a nxu xa muxuna ndee rasiga e ma sa en xanuntenne Baranabasi nun Pōli fari, **26** naxanye bata e niin gerun en Marigi Yesu Alaa Muxu Sugandixina wanla fe ra. **27** Nanara, nxu Yudasi nun Silasi rafaxi e ma feni ito yebadeni alogo e xuiin fan xa lan kedina falan ma. **28** Amasoto Alaa Nii Sarijanxin nun nxu tan bata tin, a nxu nama goron gbete sa e xun ma ba sariyani itoe ra: **29** E xa e yete ratanga donseen donna ma naxan bata rali suxurene ma, e nun sube wuli donna nun sube yifaxi donna nun yanga suxuna. A lan e nama na feene liga. Ala xa e ratanga.” **30** Nayi, e yi keli, e yi siga Antiyoki yi. E yi denkeleya yamaan birin malan, e yi kedin so e yii. **31** Yamaan to kedin xaran, e birin yi sewa na kawandi falana fe ra. **32** Yudasi nun Silasi naxanye findixi nabine ra, ne fan yi denkeleya muxune ralimaniya, e yi e senbe so fala wuyaxi ra. **33** E to waxati ti e fema, denkeleya muxune yi tin e siga bōjne xunbenli, e yi xete e xe muxune fema. **34** Koni Silasi yi lu na. **35** Pōli nun Baranabasi yi

lu Antiyoki yi. E nun bonne yi lu xaranna tiye, e lu Marigina falan kawandin be. **36** Na dangu xanbini, Pōli yi a fala Baranabasi xa, a naxa, “En Marigina falan kawandin baxi taan naxanye birin yi, en mōn xa xete menne yi en ngaxakedenne xōntōndeni, alogo en xa sa a kolon e kii naxan yi.” **37** A xōli yi Baranabasi ma, Yoni Maraka xa siga e fōxō ra, **38** koni Pōli yi a miri, a na mi daxa, amasoto a xete nen e fōxō ra Panfiliya yi benun e xa yelin e wanla ra. **39** E yi e bode matandi han, e fata. Baranabasi yi Yoni Maraka tongo, e so kunkin kui, siga Sipiri bōxōni fōxō igen tagi. **40** Koni Pōli tan yi Silasi tongo e yi siga, denkeleya muxune yelin xanbini e luye Marigina hinantenyaan bun. **41** A yi dangu Siriya nun Silisi yamanane yi, a denkeleya yamane senbe so.

16 Pōli yi siga Deribe nun Lisitire yi. Denkeleya muxuna nde yi na, a xili Timote. Yahudiyan nan yi a nga ra e nun denkeleya muxuna. Koni Gireki kaan nan yi a fafe ra. **2** Denkeleya muxun naxanye yi dōxi Lisitire taan nun Ikoniyon taani, ne birin yi a xili fajin falama. **3** A xōnla yi Pōli suxu, a xa siga a ra a fōxō ra. Nayi, a yi a rabanxulan Yahudiyan fe ra naxanye yi na yamanani, bayo e birin yi a kolon a Gireki kaan nan yi a fafe ra. **4** E dangu taan naxanye birin yi, xerane nun fonne lanxi sariyan naxan ma Yerusalēn taani, e yi na fala na kaane xa, alogo e xa a suxu. **5** Awa, denkeleya yamane yi senben soto denkeleyani. Lōxō yo lōxō, muxune yi xun masama nen. **6** Alaa Nii Sarijanxin mi yi tinxi e Alaa falan nali Asi yamanani. Nayi, e yi siga Firigi nun Galati yamanane yi. **7** E Misi yamanan li waxatin naxan yi, e yi kata siga feen na Bitini yamanani, koni Yesu a Nii Sarijanxin mi tin e xa. **8** Nayi, e dangu Misi yamanani, siga Tirowasi taani. **9** Kōēēn na, Pōli yi fe toon ti alo xiyena, a yi Masedoniya kaana nde to tixi, naxan yi a mafanma, a naxa, “Fa Masedoniya yamanani, i fa nxu malil!” **10** Na fe toon danguxina, nxu yi kata siga feen na Masedoniya yamanani mafuren, amasoto nxu yi laxi a ra a Ala nan nxu xilixi Yesu a fe Xibaru Fajin nalideni e ma. **11** Awa, nxu yi so kunkin kui Tirowasi taani, nxu siga nxu tinxinni Samatirosi bōxōni fōxō igen tagi. Na xōtōn bode, nxu siga Neyapoli taani. **12** Nxu yi keli na yi, nxu siga Filipi taani, na rabilinna taa singena Masedoniya bōxōni Romi kaane yi dōxi denaxan yi. Nxu yi xi dando ti na taani. **13** Matabu Lōxōni, nxu yi mini na taan so dēēn na, nxu siga ba dēēn na. Nxu

yengi yi a ma, a nxu yi Yahudiyane salidena nde to'e menni. Naxanla naxanye yi malanxi na yi, nxu yi dɔxo ne fɛma, nxu falan ti ne xa. **14** Na naxanle yɛ, keden yi na naxan yi xili Lidi, na yi kelixi Tiya-tire taan nin. Dugi mamiloxi yulan nan yi a ra. A yi gaxu Ala yɛɛ ra. A yi a tuli mati. Marigin yi a bɔɲɛn nabi alogo Pɔli yi naxan falama a xa na suxu. **15** E nun a kon kaane birin yi rafu igeni e tubi xinla ma. Na xanbi ra, a yi nxu mafan, a naxa, "Xa ɛ laxi a ra, a n denkeleyaxi Marigin ma, ɛ fa yigiya n ma banxini." A yi nxu karahan, a nxu xa so a banxini. **16** Lɔxɔna nde, nxu yi sigama salideni, nxu lan konyi sungutunna nde ra, yinnan yi naxan fɔxo ra alo ninginangana, a yi fe famatɔne falama naxan baraka yi. A yi gbeti gbeen nan sɔtɔma na xɔn so a kanne yii. **17** A yi bira nxu nun Pɔli fɔxo ra, yinnana a rasɔnxɔma, a falan ti a xɔn, a naxa, "Kore Xɔnna Alaa walikɛɛn nan itoe ra! E kisi feen kiraan nan yitama ɛ ra!" **18** A yi lu na lige xii wuyaxi han a yi gba Pɔli ra. Dɔnxɛn na, a yi a yɛɛ rafindi a ma, a yi falan ti yinnan xa, a naxa, "N bata i yamari Yesu Alaa Muxu Sugandixin xinli, xete sungutunni ito fɔxo ra!" Yinnan yi xete a fɔxo ra na waxatin yeteni! **19** Awa, a kanne a kolon waxatin naxan yi, a e mi fa gbeti sɔtɔma a ra sɔnɔn, e Pɔli nun Silasi suxu, e yi e bubu, e siga e ra kuntigine fɛma lɔxo tideni. **20** E siga e ra kitisane yetagi. E yi a fala e xa, e naxa, "Yahudiyann xɛmɛni itoe ra, e en ma taan basanma kati! **21** E yamaan xaranma namunna naxanye ma, en tan Romi kaane mi daxa en xa tin ne ma en yi e liga." **22** Ganla yi keli e xili ma, kitisane yi Pɔli nun Silasi a domane ba e ma, e yi yamarin fi, a e xa e bulan. **23** E to e bulan kati, e yi e raso kaso banxini, e yi a fala kaso kantanna xa, a a xa e mara ki fajil! **24** Kaso kantanna yamarin sɔto waxatin naxan yi, a yi sa e sa kutun na kaso banxin tagi konkoni. **25** Kɔɛ tagini, Pɔli nun Silasi yi Ala maxandima, e betin bama Ala xa, kasorasaan bonne yi tuli matixi e ra. **26** Sanja ma kedenni, bɔxɔn yi xuruxurun gbeen ti, han kaso banxin yi xuruxurun han! Banxin kaso yirene dɛɛne birin yi rabi, yɔlɔnxɔnne yi ba kasorasane birin ma. **27** Kaso kantanna xulun waxatin naxan yi, a dɛɛne rabixin to, a yi a silanfanna botinɲɛ ayi, alogo a xa a yete faxa, bayo a yengi yi a ma, a kasorasane bata e gi. **28** Koni Pɔli yi sɔnxɔ, a naxa, "I nama i yete maxɔlo! Nxu birin be!" **29** Nayi, kaso kantanna yi lenpun maxili, a so kaso banxini mafuren, a xuruxurunma, a yi a bira Pɔli nun Silasi bun ma. **30** Na xanbi ra, a

yi e ramini, a yi e maxɔdin, a naxa, "N nanfe lige, n kisi?" **31** E yi a yabi, e naxa, "Denkeleya Marigi Yesu ma, i yi kisi, ɛ nun i ya denbayana." **32** E yi Marigina falan kawandin ba e nun a denbayaan birin xa. **33** Na kɔɛɛn yetɛɛn na, kaso kantanna yi e tongo, a e maxɔlodene dɛ fitan. E nun a muxune birin yi rafu igeni e tubi xinla ma mafuren! **34** A siga Pɔli nun Silasi ra a banxini, a donseen so e yii. E nun a denbayaan birin yi sewa amasɔto e bata denkeleya Ala ma. **35** Kuye yibaxina, kitisane yi doma kanne rasiga kaso kantanna ma, e naxa, "Na xɛmene bejin." **36** Nayi, kaso kantanna yi a fala Pɔli xa, a naxa, "Kitisane bata yamarin fi, a n xa i tan nun Silasi bejin, ɛ siga bɔɲɛ xunbenli." **37** Koni Pɔli yi a fala doma kanne xa, a naxa, "E bata nxu tan Romi dugurenne bɔnbɔ kɛnɛnna ma, e mi sa nxu makitixi nɛn, e yi nxu sa kasoon na. Koni iki, e fa waxi nxu bejin feen nin wundoni ba? Na mi lanɲɛ mume! Fɔ e yetɛɛn xa fa be, e fa nxu bejin." **38** Doma kanne yi sa falani ito ti kitisane xa. E a mɛ waxatin naxan yi, a Romi dugurenna nan Pɔli nun Silasi ra, e gaxu kati! **39** Nanara, e yi Pɔli nun Silasi mafan. Na xanbi ra, e yi e ramini kasoon na, e yi e mafan, a e xa keli na taani. **40** Pɔli nun Silasi to mini kasoon na, e yi siga Lidi a banxini, e sa e ngaxakedenne li na, e yi ne ralimaniya, e siga.

17 E yi dangu Anfipoli nun Apoloni taane yi, e fa Tesaloniki taani, Yahudiyane salide banxina nde yi denaxan yi. **2** Pɔli yi so e salide banxini alo a yi darixi a ra kii naxan yi. A yi xunsagi saxan ti na, Yahudiyane nun Pɔli yi Kitabuna fe falama Matabu Lɔxɔne yi. **3** A yi a yɛba e xa, a a yita e ra fa fala a Alaa Muxu Sugandixin yi daxa a tɔrɔ, a yi keli sayani. A yi a fala e xa, a naxa, "N Yesu naxan ma fe kawandi bama ɛ xa, Alaa Muxu Sugandixin nan na ra." **4** Yahudiyana ndee yi la a ra, e yi sa Pɔli nun Silasi fari. Gireki kaan naxanye yi gaxuxi Ala yɛɛ ra, ne wuyaxi yi na liga e nun naxalan xili kan wuyaxi. **5** Koni xɔxɔlɔnyaan yi keli Yahudiyane ra, e fuyantenna ndee malan lɔxo tideni a e xa yamaan nadin, taan birin yi maxa. E siga Yason ma banxini Pɔli nun Silasi fendeni alogo e xa sa e ti yamaan yetagi. **6** Koni e to mi e to, e yi Yason nun denkeleya muxuna ndee bubu, e siga e ra taan kitisane fɛma. E sɔnxɔ sɔnxɔ, e naxa, "Muxuni itoe dunuɲa birin yifuma, iki e bata fa be, **7** Yason yi e yigiya a banxini. Muxuni itoe birin tondixi Romi Manga Gbeena sariyan suxɛ, amasɔto

e a falama a manga gbete na naxan xili Yesu.” **8** Na falane yi taan kitisane nun yamaan nakontofili, **9** e mi Yason nun bodene bejin fo e to e xunba gbetin fi. **10** Koe to so, denkeleya muxune yi Poli nun Silasi rasiga Beere yi. E na li waxatin naxan yi, e siga Yahudiyane salide banxini. **11** Beere kaane yugon yi fan Tesaloniki kaane xa, bayo Alaa falan nasuxun kunfan yi ne yi. Loxo yo loxo e yi Kitabun fesefesema nen alogo e xa Poli a falane jondin kolon. **12** Yahudiya wuyaxi yi denkeleya e ye, e nun Gireki jaxalan xili kan wuyaxi nun Gireki xeme wuyaxi. **13** Koni Yahudiyannaxanye yi Tesaloniki taani, ne to a me a Poli Alaa falan nalima Beere taani, e fan yi fa na yi, e yamaan nadin, a yi maxa. **14** Mafuren denkeleya muxune yi Poli rasiga foxo igen binni, koni Silasi nun Timote yi lu Beere taani. **15** Muxun naxanye sa Poli mati, ne yi siga a ra han Atena taani. Na xanbi ra, e mon yi xete Beere taani Poli a jungu xuiin na, a Silasi nun Timote xa fa a fema sinma. **16** Poli yi e legedenma waxatin naxan yi Atena taani, a niin yi rapaxu a ma, bayo a bata yi a to, a suxure yiren nan yi na taan na. **17** Nanara, e nun Yahudiyane yi batuma feene ma salide banxini e nun Girekin naxanye yi gaxuma Ala yee ra, e nun a yi naralanma muxun naxanye ra loxo tideni loxo yo loxo. **18** Lonnilana ndee yi na yi, e yi xili Epikuri muxune nun Sitoyisi muxune, ne yi falan ti folo a xa. Nde yi lu e bode maxodinje e naxa, “Fala tiini ito waxi nanse fala fe yi?” Bonne naxa, “A ligaxi alo a ala xojene nan ma fe ralima.” Amasoto Poli yi Yesu a fe xibarun kawandin bama e nun a keli fena sayani. **19** Nayi, e yi Poli tongo, e siga a ra Areyopagi malan yireni, e yi a fala a xa, e naxa, “Nxu wama a kolon feni nanse xaran neneni ito ra i naxan ma fe falama? **20** Amasoto nxu fe nenene nan mema, nxu waxi e bunna kolon feni.” **21** Atena kaane nun xojen naxanye yi e ye, ne yi e waxatin birin nadanguma fala nenene nan tun nameideyi. **22** Poli yi ti yamaan tagi Areyopagi fala tideni, a naxa, “Atena kaane, n bata a to a e dinaxi feen birin yi. **23** Amasoto n yi e taani sigama waxatin naxan yi, n yi e batu seene toma. N mon bata saraxa gandena nde fan to, a sebexi denaxan ma fa fala, ‘En mi ala naxan kolon.’ Awa, e naxan batuma e mi a kolon n faxi na nan ma fe ralideyi e ma. **24** Ala naxan dunuƴa nun a yi seene birin daxi, na nan kore xonna nun boxo xonna Marigin na. Na mi doxoma seene batu banxine kui muxune naxanye tixi. **25** A mako mi muxun yii foxon ma. Amasoto a tan nan siimayaan

fima yamaan ma, e nun niiraxinla nun seen birin. **26** A siyane birin da nen mini muxu kedenni. A yi e doxo dunuƴa yiren birin yi. A yeteen yi e gbee waxatine nun e doxodene danne ragidi. **27** Ala na ligaxi nen alogo muxune xa a fen, e yi kata a kolon feen na, xa e noe. Anu, a mi makuya en sese ra. **28** Amasoto, e gbee fala jaxume tiina ndee a falama, e naxa, ‘En dunuƴa yi gidin ligama a tan nin, en na en masigama a tan nin, en luma dunuƴa yi a tan nin.’ E mon naxa, ‘Ala bonsonna nan en fan na.’ **29** Xa Ala bonsonna nan en tan na, en nama en miri, a Ala maliga xemaan na hanma gbetina hanma geme sawuran naxan nafalaxi adamane kotene nun miriyane xon. **30** Ala mi na fe kolontareya waxatine yatexi, koni iki, a muxun birin xilima yiren birin yi, a e xa e kejaan maxete. **31** Amasoto a bata loxo keden nagidi a dunuƴa birin kitin bolonma naxan yi tinxinni a muxu yebaxin xon. A bata na kanna mataxamaseri muxun birin xa, a to a rakeli sayani.” **32** E to Poli xuiin me a muxune kelima sayani, nde yi a magele, koni bonne naxa, “Nxu mon waxi i ya falan name feni waxati gbete.” **33** Nanara, Poli yi keli e tagi. **34** Koni muxuna ndee yi sa a fari, e denkeleya alo Denisi Areyopagi muxuna nde, e nun jaxanla nde naxan yi xili Damarisi e nun ndee gbeteƴe.

18 Na xanbi ra, Poli yi keli Atena taani, a siga Korenti taani. **2** A Yahudiyana nde li na, naxan yi xili Akila Pontu kaana. E nun a jaxanla Pirisila yi baxi fade nen sa keli Itali yamanani. Amasoto Manga Kilodi bata yi a yamari a Yahudiyane birin xa keli Romi taani. Poli yi kafu e ma, **3** bayo e birin yi fatan wali siya kedenni ito ra, kidi degena bubun na. A yi lu e fema walideni. **4** Matabu Loxon birin, a yi falan tima nen Yahudiyane salide banxini, a yi kata Yahudiyane nun Girekine masotodeni. **5** Silasi nun Timote na li waxatin naxan yi keli Masedoniya yi, Poli yi lu kawandin be waxatin birin. A sereyaan ba Yahudiyane xa, a Yesu nan Alaa Muxu Sugandixin na. **6** Koni Yahudiyane to a matandi, e a rayelefu, a yi a domani kunkun taxamasenna ra, a yi a fala e xa, a naxa, “Xa e halagi, e yeteen nan funfu na ra. Na goronna mi fa n tan xun ma. Iki n sigama siya gbetene nan fema.” **7** Awa, a yi keli na, a siga, a sa so muxuna nde a banxini naxan yi xili Titi-Yusutu. Ala yeeragaxu muxun nan yi na ra. A banxin yi salide banxin dexon ma. **8** Salide banxin kuntigin naxan yi xili Kirisipu, na nun a denbayaan

birin yi denkeleya Marigin ma. Kōrenti kaa wuyaxi yi a falan mē, e denkeleya, e rafu igeni e tubi xinla ma. **9** Lōxōna nde, Pōli yi fe toon ti kōēen na alo xiyena. Marigin yi a fala a xa, a naxa, “I nama gaxu, koni falan ti! I nama i dundul!” **10** Amasōtō n na i fōxō ra. Muxu yo yii mi i liye, a fe naxin naba i ra, bayo n ma muxu wuyaxi taani ito yi!” **11** Nanara, Pōli yi lu na yi j̄eē keden kike sennin, a yamaan xaran Alaa falan ma. **12** Galiyon yi Akaya yamana kanna ra waxatin naxan yi, Yahudiyane birin yi e malan Pōli xili ma, e siga a ra kiti sadeni. **13** E yi a kansun, e naxa, “Xemeni ito yamaan mabandunma Ala batu kiina nde nin naxan mi daxa sariyani.” **14** Benun Pōli xa falan ti, Galiyon yi a fala Yahudiyane xa, a naxa, “Xa ε tan Yahudiyane yi ε mawugama tinxintareyana fe yi nun hanma gbalona nde, a yi lan nun nayi n xa n tuli mati ε falan na. **15** Koni ε to ε bode matandima ε falane yi, e nun xinle nun ε gbee sariyane, na ε tan nan ma. N tan mi waxi findi feni na feen kitisaan na.” **16** A yi e kedi kiti sadeni. **17** Awa, e birin yi salide banxin kuntigi Sosaten suxu, e yi a mabōnbō kitisa banxin yetagi. Koni Galiyon ma fe mi taran na yi hali!” **18** Pōli yi soge wuyaxi ti a ngaxakedenne fēma Kōrenti taani. Na xanbi ra, a yi keli e fēma. E nun Pirisila nun Akila yi so kunkin kui siga Siriya yamanani. Koni a bata yi a xunna bi Sankire taani a de tiina nde a fe ra. **19** E to sa Efesi li, Pōli yi Pirisila nun Akila lu na yi. Koni Pōli yetēen yi siga Yahudiyane salide banxini, e falan ti e bode tagi. **20** E yi a mafan, a a xa bu e fēma, koni a mi tin. **21** A yi sigama waxatin naxan yi, a yi a fala e xa, a naxa, “Xa Ala tin, n mōn fama nēn ε fēma.” A yi dōxō kunkin kui, a siga Efesi taani. **22** A Sesariya taan li waxatin naxan yi, a yi siga Yerusalen taani, a sa na denkeleya yamaan xōntōn. Na xanbi ra, a yi siga Antiyōki taani. **23** A yi waxatidi ti, a yi siga. A yi a masiga ti Galati yamanan nun Firigi yamanan birin yi, a yi Yesu fōxōrabirane kawandi, e senben sōtō. **24** Na waxatini, Yahudiyana nde yi siga Efesi taani, a xili Apolosi naxan bari Alesandire taani. A yi falan kolon kati, a yi Kitabun kolon ki faj̄ni. **25** A yi xaranxi Marigina Kirana fe ma. A yi Yesu a fe xaranna tima a sōbeen nun tinxinna nin. Koni a yi Yoni a xaranna nan gbansan kolon marafu feen na igeni. **26** A yi falan ti fōlō xaxili ragidini Yahudiyane salide banxini. Pirisila nun Akila a xuiin mē waxatin naxan yi, e yi a tongo, e yi Alaa Kirana fe yeḅa a xa a kiin yetēni. **27** Siga xōnla bata yi Apolosi suxu Akaya yamanani. Nanara,

denkeleya muxun naxanye yi Efesi taani, ne yi a mali, e kedin sēbe Yesu fōxōrabirane ma Akaya yi, a e xa a yisuxu na yi. A na li waxatin naxan yi, naxanye yi denkeleyaxi Ala hinanna barakani, a yi ne mali kati! **28** Amasōtō a yi Yahudiyane falan matandima senbeni kenenni, a yi a yita Kitabun kui, a Yesu nan Alaa Muxu Sugandixin na.

19 Apolosi yi Kōrenti taani waxatin naxan yi, Pōli yi geya yamanani siga, a yi fa Efesi taani. A yi Yesu fōxōrabirana ndee li na yi. **2** A yi e maxōdin, a naxa, “E denkeleya waxatin naxan yi, ε yi Alaa Nii Sarijanxin sōtō ba?” E yi a yabi, e naxa, “Nxu munma sa Alaa Nii Sarijanxina fe mē nēn.” **3** Pōli yi e maxōdin, a naxa, “E rafuxi igeni xaranna mundun xōn?” E yi a yabi, e naxa, “Yoni gbee marafuun xaranna.” **4** Pōli yi a fala e xa, a naxa, “Yoni yi muxune rafuma igen nin alogo e xa e keḅaan maxetē. A yi a falama yamaan xa nēn, a e xa denkeleya na kanna ma naxan fama a tan xanbi ra. Na nan Yesu ra.” **5** E na mē waxatin naxan yi, e rafu igeni Marigi Yesu xinli. **6** Pōli yi a yiin sa e ma, Alaa Nii Sarijanxin yi godo e ma, e yi falan ti xui gbētene yi, e yi nabiya falane ti. **7** E tan naxanye birin yi na, muxu fu nun firin j̄ōxōndōn. **8** Pōli yi siga Yahudiyane salide banxini, a falan ti yamaan xa xaxili ragidini kike saxan. A yi kata a xa e mabandun Alaa Mangayaan ma. **9** Koni ndee yi tengbesen, e mi tin denkeleye, e yi lu Yesu a Kirana fe yibese yamaan yetagi. Nanara, Pōli yi a masiga e ra, a Yesu fōxōrabirane xali e danna. E yi lu falan tiye lōxō yo lōxō Tiranusi a xarande banxini. **10** Na yi lu lige han j̄eē firin. Nanara, muxun naxanye birin yi dōxi Asi yamanani, Yahudiyane nun Girekine, ne birin yi Marigina falan mē. **11** Ala yi kabanako fe gbeene liga Pōli xōn ma. **12** Nanara, dugi dungin nun wali domaan naxanye bata yi din a fatin na, e yi ne tongoma nēn, e yi e sa furemane fatin ma. E yi kēndeya, yinnane fan yi xetē e fōxō ra. **13** Yahudiyān naxanye yi sigama yirene yi yinnane kedideni, ne fan yi kata Marigi Yesu xinla rawalideni e yinnan naxine kedi. E yi a falama yinnane xa nēn, e naxa, “N bata ε yamari Yesu xinli, Pōli naxan ma fe kawandi bama, ε xetē muxuni ito fōxō ra!” **14** Yahudiyane saraxarali kuntigina nde Sebaa dii xēmē soloferene yi na nan ligama. **15** Koni lōxōna nde yinnan yi e yabi, a naxa, “N Yesu kolon, n Pōli fan ma fe kolon, koni nde ε tan na?” **16** Yinnan yi xemen naxan fōxō ra, na yi dutun e ma senben na, han a yi e birin nō. A yi e mabōnbō

han e ragenle yi e gi, e maxoloxin yi mini banxini. 17 Yahudiyane nun Girekin naxanye yi dɔxi Efesi taani, ne to ito me, e birin yi gaxu kati! Marigi Yesu xinli binya han! 18 Muxun naxanye denkeleya, na wuyaxi yi fa, e yi e ti e fe naxine ra kenenna ma. 19 Naxanye yi woyimeyaan ligama, ne yi e kedine malan, e fa e ra, e yi e gan birin yetagi. E yi kedine saren yate, a birin malanxina, gbeti gbanan wuli tonge suulun. 20 Alaa falan yi xuyama ayi na kii nin, Margin senben barakani. 21 Na feene danguxina, Poli yi a miri, a xa siga Masedoniya nun Akaya yamanani, siga han Yerusalen taani. A yi a fala, a naxa, “N na siga na waxatin naxan yi, fo n xa sa Romi fan to.” 22 Nanara, a yi a mali muxu firin nasiga Masedoniya yamanani, Timote nun Erasite. A tan yi lu Asi yamanani ndedi. 23 Na waxatini, sonxo gbeen yi te Efesi taani masoto Yesu a Kirana fe ma. 24 Xabuna nde yi na, a xili Demetiri. A tan nan yi e gbee ala jaxalanmana nde Aritemi batu banxin sawura xunxurine rafalama gbeti bonboxin na. Na yi tonɔ gbeen nan sotoma a tan nun a walike bodene xa. 25 Nanara, a yi a walike bodene birin xili, e nun naxanye yi na wali sifan ligama, a yi a fala e xa, a naxa, “N fafane, e a kolon en nafunla sotoma wanli ito nin. 26 Poli ito feen naxan ligama, e bata na me, e yi a to. A naxa, a muxune suxuren naxanye rafalama e ala ra, Ala mi ne ra mume! A bata muxu wuyaxi mayenden, a yi e maxete Efesi taani be e nun fayida Asi yamanan birin. 27 Fe xodexen nan na ra. En ma wanli ito fama xili jaxin sotodeni nen! En ma ala Aritemi batu banxin fan yi xunna kala. Aritemi naxan batuma Asi yamanan nun dunuja yiren birin yi, na binyen bama a ma nen.” 28 Yamaan falani itoe me waxatin naxan yi, e bonen yi te, e sonxo sonxo, e naxa, “Efesi kaane gbee ala Aritemi gbol!” 29 Sonxo sonxon yi te taan yiren birin yi. Yamaan yi Poli sigati bodene suxu, Gayi nun Arisitaraki, Masedoniya kaane. E birin gimaton yi siga ne ra yamaan malandeni. 30 A xonla yi Poli suxu, a xa siga yamaan yetagi koni Yesu foxorabirane mi tin a siga. 31 Yamanan muxu gbeena ndee naxanye yi Poli xoyine ra, na ndee yi xeraan nasiga a ma, e yi a mafan a nama so yamaan ye. 32 Malanden tan yi basanxi han! Ndee yi sonxoma fena nde ra, bonne yi sonxoma fe gbete ra, amasoto e yi malanxi na feen naxanye ma, a wuyaxi mi yi sa ne kolon nen. 33 Yahudiyane yi muxuna nde radinma yeen na alogo a xa falan ti naxan yi xili Alesandire. Muxuna ndee yi a yebama a xa naxan ligaxi, nayi,

a yi yamaan masabari a yiin na alogo a xa falan ti. 34 Koni e a kolon waxatin naxan yi, a Yahudiya nan yi a ra, e birin yi sonxo e bode xon ma han waxati xunkuye, e naxa, “Efesi kaane gbee ala Aritemi gbol!” 35 Donxen na, taan sebeli tiin yi yamaan masabari, a naxa, “Efesi kaane, dunuja muxune birin a kolon, a Efesi taan nan Aritemi batu banxin kantanma e nun a sawuran naxan godo keli kore! 36 Muxu yo mi noe feni itoe matande. Nanara, e lan nen e yi e sabari. E nama fefe liga a wolonni. 37 E bata fa muxuni itoe ra be koni e mi se mujaxi alane batu banxine yi, e mi en ma suxuren jaxalanmaan nayelexuxi hali! 38 Xa mawugana nde Demetiri nun a walikeen bodene kui lan muxu yo ma, kiti banxine nun kitisane na. E xa sa e mawuga menni. 39 Xa e mon wama fe gbete xon ma fo e xa a fala taan dugurenne malanni. 40 E nama sa en kansun murute feen na to sonxo sonxona fe ra. 41 Bayo en mi noe dentegge yo se malanni ito ti xunna ma.” A yelinxini ito fale, a yamaan nasiga.

20 Sonxo sonxon baxina a ra, Poli yi Yesu foxorabirane malan. A yi e ralimaniya, a yi a jundu e ma. Na xanbi ra, a siga Masedoniya yamanani. 2 A dangu na yamanan birin yi, a yamaan nalimaniya fala wuyaxi ra. Na danguxina, a siga Gireki yamanani, 3 a kike saxan ti na yi. A yi waxi siga feni Siriya yamanani kunkin kui, koni a to a kolon a Yahudiyane bata yanfan so a ma, a yi a miri, a xa xete Masedoniya kiraan xon ma. 4 Pirusi a dii xemen Sopateri Beere kaan yi siga a matideni, e nun Arisitaraki nun Sekondu Tesaloniki kaane nun Gayi Deribe kaan nun Timote e nun Tikiko nun Tirofime naxanye kelixi Asi yamanani. 5 Ne yi siga yeen na, e sa nxu legeden Tirowasi taani. 6 Buru Tetaren Sanla danguxina, nxu yi dɔxo kunkin kui keli Filipi taani. Xii suulun danguxina, nxu yi sa bonne li Tirowasi taani, nxu yi loxo xun keden ti na yi. 7 Simitin jinbanna ra, nxu yi malanxi buruni gira feen na nxu bode xon ma. Poli yi falan ti yamaan xa, a lu falan tiye han koe tagini amasoto a yi sigama nen na xoton bode. 8 Nxu yi malanxi kore banxin naxan koe ra, lenpu wuyaxi yi menni. 9 Banxulanna nde yi na yi a xili Eyutiki, na yi dɔxi kore banxin foye soden nan na. Poli to yi falan xunkuyama ayi, na banxulanna yi xi han! Xixonla yi gbo ayi han, a yi bira keli kore banxin saxandeni. E yi sa a faxaxin li. 10 Awa, Poli yi godo, a yi a felen a xun ma mafuren, a yi a tongo, a naxa, “E nama xamin, a niin mon a yi.” 11 Na xanbi

ra, Pôli mōn yi te sangansoon kœ ra. A yi buruni gira, a yi a don. Pôli yi falan ti e xa han xōtōnni, na xanbi ra a yi siga. **12** E siga banxulanna kenden na, na yi e ralimaniya ki fajni. **13** Nxu yi siga Pôli yœ ra kunkin kui Asosi taani, nxu yi Pôli tongoma kunkin kui denaxan yi. Amasōto, a yi sigama a sanna nan ma. **14** A to nxu li Asosi taani, nxu yi a tongo kunkin kui, nxu yi siga taana nde yi, naxan yi xili Mitilene. **15** Na xōtōn bode, nxu yi keli na yi, siga igen xun ma han Kiyo taani. A soge firindeni, nxu yi fa Samosi yi, a soge saxandena, nxu sa Mileti li. **16** Pôli yi a ragidi, a xa dangu Efesi taan dexōn kunkin kui amasōto a mi yi waxi ti feni, alogo a nama bu Asi yamanani. A yi mafuraxi alogo Se Xaba Singen Sanla xa a li Yerusalen taani, xa na lanje. **17** Pôli yi xeraan nasiga Efesi taani keli Mileti yi, a denkeleya yamaan fonne xa fa. **18** E to fa, a yi a fala e xa, a naxa, “Xabu n faan soge singena Asi yamanani ε tagi, ε n kewanle kolon. **19** N bata wali Marigin xa yete magodon nun yeegeni. N mōn yi tōrōma Yahudiyane yanfantenyaan bun. **20** E a kolon a n mi ε munanfan fe yo luxunxi ε ma. N bata xaranna ti ε xa yamani e nun ε banxine yi. **21** N bata a rali Yahudiyane nun Girekine birin ma a e xa e kejaan maxete, e tubi Ala ma, e denkeleya en Marigi Yesu ma.” **22** “Nba, Alaa Niin nan sigama n na Yerusalen taani iki. Feen naxanye sa ligama n na na yi, n mi ne kolon. **23** N naxan tun kolon fō n nema danguma taa yo taa, Alaa Nii Sarijanxina n nakolonma a kasorasaan nun tōrō wuyaxi n mameen yeen na. **24** Koni n mi n niin yatexi sese ra fō n bata kiraan naxan de suxu, n xa na rakamali. Marigi Yesu wanla naxan soxi n yii, n xa na rajan. Na ni ito ra, a n xa Alaa hinanna fe Xibaru Fajin seren ba.” **25** “Iki n na a kolon, fa fala n bata sigan ti ε tan naxanye birin tagi, n yi Alaa Mangayaan kawandin ba ε xa, ε tan sese mi fa n toma sōnōn. **26** Nanara, n na a falama ε xa to yeteni, xa ε tan nde yo halagi, na goronna mi fa n tan xun ma. **27** Amasōto n bata Ala sagoon birin nali ε ma, a sese mi fa luxi. **28** E jōxō lu e yete xōn e nun Alaa Nii Sarijanxina ε findixi yamaan naxan birin masuxu muxuye ra. E Alaa yamaan masuxu alo xuruse rabaan nun a kuruna bayo a bata a sara a yete wunla ra. **29** Amasōto n na kolon, n na keli ε tagi waxatin naxan yi, muxu jaxine fama nen sodeni ε tagi, e kata ε yamaan kaladeni alo kankone xuruse kurun tagi. **30** Muxuna ndee kelima nen ε tagi, e yi fala tinxintarene ti alogo Yesu fōxōrabirane xa bira e fōxō ra. **31** Nanara, ε lu e

yœ ra yi! N na ε keden kedenna birin nakolonxi feen naxanye ma jœε saxan kœεn nun yanyina yœgeni, ε nama jinan ne xōn!” **32** “Awa, iki n bata ε taxu Ala ra e nun a hinan falan naxan nœ senben fiye ε ma, a yi na kœen fi ε ma naxan maraxi muxu sarijanxine birin xa. **33** N mi kunfahi muxu yo a gbeti xōn, hanma xemana, hanma dugine. **34** E yetena a kolon, n yeteen yii fōxōne nan nxu nun n lanfane makone fanxi. **35** A lan en xa fangatarene mali kii naxan yi, n bata na birin yita ε ra wali xōdexε sifani ito xōn ma. Marigi Yesu falan naxan ti, ε xaxili lu ne xōn ma. A naxa, ‘Naxan seen fima, na barayin gbo dangu a sōto muxun na.”” **36** Pôli to yelin falan tiye e xa, a yi a xinbi sin e fēma, e birin yi Ala maxandi. **37** E birin yi wuga, e yi e yiin nabilin Pôli ma, e yi a sunbu. **38** A to a fala e xa, a naxa, a e mi fa a toma sōnōn, na yi e sunu kati. E sa a mati han kunki dēen na.

21 Nxu fata xanbini, nxu yi nxu tinxin Kosi bōxōn na kunkin kui. Na xōtōn bode, nxu sa so Rōde bōxōni, nxu yi keli mēnni nxu fa Patara taani. **2** Nxu yi kunkina nde li mēn naxan yi fōxō igeni gidima siga Fenisa yamanan binni, nxu yi te na kui. **3** Nxu Sipiri bōxōn toxina, nxu yi dangu a ra, a lu kōmēn fōxōn binni. Nxu yi siga Siriya yamanan binni. Nxu sa Tire taan li, kunkin yi lanma a xa goronne ragodo denaxan yi. **4** Nxu yi Yesu fōxōrabirana ndee li mēn. Nxu yi lōxō xun keden ti ne fēma. E yi a fala Pôli xa Alaa Nii Sarijanxin senbeni, e naxa, a a nama siga Yerusalen taani. **5** Koni na xunsagin janxina, nxu yi keli, nxu siga. Yesu fōxōrabirane birin yi sa nxu mati, e nun e jaxanle nun e diine han taan fari ma. Nxu yi nxu xinbi sin baan de, nxu yi Ala maxandi mēnni. **6** Na xanbi ra, nxu yi nxu jūngu nxu bode ma, nxu so kunkin kui, e tan yi xete e konni. **7** Nxu yi sigama kunkin kui, keli Tire taani siga Pitolome taani, nxu yi denkeleya muxune xōtōn na yi, nxu feripen e fēma. **8** Na xōtōn bode nxu yi keli mēn, nxu yi siga Sesariya taani. Nxu yi sa so Filipi Xibaru Fajni Raliin konni naxan yi na muxu sugandixi soloferene ye. **9** Dii teme fututare rasōlōnxi naanin yi Filipi yii, ne yi nabiya falane tima. **10** Nxu xi dando tixin na, nabiin naxan yi xili Agabusi, na yi fa sa keli Yudaya yi. **11** A yi fa nxu fēma, a yi Pôli a tagi xidin tongo, a yi a yete sanne nun a yiine xidi na ra, a naxa, “Alaa Nii Sarijanxin naxa, ‘Yahudiyane tagi xidini ito kanna xidima ikiini Yerusalen taani, e a so siya gbetene yii.”” **12** Nxu na me

waxatin naxan yi, nxu birin yi Pöli mafan, a a nama siga Yerusalen taani. **13** Koni a yi nxu yabi, a naxa, “Nanfera ε wugama han ε n bəjən kala? Amasoto n yitənxi na a ra e xa n xidi Yerusalen taani, e yi n faxa Marigi Yesu xinla fe ra.” **14** A to mi tin nxo falan suxe, nxu mi kankan a ma, nxu yi a fala, nxu naxa, “Margin sagoon xa liga.” **15** Na loxone to dangu, nxu yi nxu yitən, nxu yi siga Yerusalen taani. **16** Yesu foxorabirana ndee yi nxu mati keli Sesariya taani. E yi nxu xali Menason Sipiri kaan konni, nxu yi lan nxu xa yigiya denaxan yi. Yesu foxorabiran nan yi a ra xabu waxati xunkuye. **17** Nxu Yerusalen taan li waxatin naxan yi, denkeleya muxune yi nxu yisuxu sewani. **18** Na xətən bode, nxu nun Poli yi siga Yaki xəntəndeni. Denkeleya yamaan fonne birin yi malanxi na yi. **19** Poli yi e xəntən, a yi a wanla birin dentegen sa e xa Ala feen naxanye ligaxi siya gbətene tagi. **20** E na me waxatin naxan yi, e birin yi Ala tantun. E a fala Poli xa, e naxa, “Nxu ngaxakedenna, a mato, Yahudiyan wuli wuyaxi bata denkeleya, e birin mən tunnafanxi Musaa sariyan suxudeni. **21** Anu, muxune ito nan falaxi e xa, e naxa, a Yahudiyan naxanye birin siya gbətene ye, a i ne xaranma e xa xete Musaa sariyan foxo ra, a e mən nama e diine banxulan, a e nama en ma namunne suxu. **22** En fa nanfe ligan nayi? Amasoto sike yo mi na, e a mema nən, a i bata fa. **23** Nanara, nxu naxan falama i xa, i xa na liga. Awa, xeme naanin be naxanye bata e de ti Ala xa. **24** Siga e foxo ra, ε sa ε rasarijan ε bode xən ma. I mən xa e saren fi, alogo e xa e xunne bi. Nayi, birin a kolonma nən, a e feen naxanye falaxi i ya fe yi, a pəndi mi e sese ra, koni a i fan yeteen Musaa sariyane suxi. **25** Koni siya gbəten naxanye tan bata denkeleya, nxu bata nxo miriyane sebe, nxu yi a rasiga ne ma. Nxu naxa, e xa e yete ratanga donseen donna ma naxan bata rali suxurene ma, e nun sube wunli donna nun suben yifaxi donna nun yanga suxuna.” **26** Na xətən bode, Poli yi na xemene tongo e yi rasarijan e bode xən ma. Na xanbi ra, a so Ala Batu Banxini alogo a xa a fala e xa e sarijan loxone rakamalima waxatin naxan yi, e yi saraxan ba e keden kedenna birin xa. **27** Soge solofereden janmatəna, Yahudiyan naxanye keli Asi yamanani, ne yi Poli to Ala Batu Banxini. E yi yamaan birin nadin a xili ma, e yi a suxu. **28** E sənxo sənxo, e naxa, “Isirayila muxune, ε nxu mali. Xemeni ito nan sigama yiren birin yi, a xaranna ti en ma yamaan nun Musaa sariyan nun yireni ito xili ma. A yeteen bata Girekine raso Ala

Batu Banxini, e yi na sarijanna kala.” **29** E ito falaxi nən bayo e bata yi Tirofime Efesi kaan to a foxo ra taani, e yengi yi a ma a Poli bata yi a raso Ala Batu Banxini. **30** Taan birin yi maxa, yamaan yi e gi sa keli yiren birin yi. E yi Poli suxu, e yi mini a bubue Ala Batu Banxini tande ma. E yi a so deene ragali keden na. **31** Yamaan yi waxi Poli faxa feni. Muxuna nde yi fa a fala Romi kaane sofa ganla mangan xa, a sənxo sənxo Yerusalen taan yiren birin yi. **32** Sofa mangan yi sofane nun sofa kəmen kuntigine xili, e siga e giye yama gbeen fema. Na muxune sofane to waxatin naxan yi, e ba Poli bənbə. **33** Sofa mangan yi sa Poli suxu, a yi e yamari, a e xa a xidi yəlxənxən firin na. Na xanbi ra, a yi maxədinna ti a nde a ra, e nun a naxan ligaxi. **34** Koni muxuna ndee yi sənxo ma fena nde ra, bonne sənxo ma fe gbete ma. Sofa mangan mi yi sese yee toma sənxo sənxo. Nayi, a yi yamarin fi a e xa siga Poli ra yire makantanxini. **35** Poli to e banxin te deen li, fo sofane xa yi fa a tongo nən, e siga a ra amasoto yamaan yi japaraxi. **36** Yamaan birin yi biraxi a foxo ra, e sənxo ma, e naxa, “A xa faxa!” **37** E yi sigama Poli ra yire makantanxini waxatin naxan yi, a falan ti sofa mangan xa, a naxa, “I tinje ba n xa falana nde ti i xa?” Sofa mangan yi a maxədin a naxa, “I Gireki xuiin mema? **38** Na Misiran kaan xa mi i tan na ba, naxan baxi yamaan namurutedeni, a siga yenge so muxu wuli naaninna ra tonbonni?” **39** Poli yi a yabi, a naxa, “Yahudiyan nan n tan na, n barixi Tarise taan nin Silisi yamanani, na taa suturaxin dugurena nan n tan na. Yandi, tin n xa falan ti yamaan xa.” **40** Sofa mangan yi tin. Nanara, Poli yi keli a ti banxin te deen na, a yamaan masabari a yiin na. Awa, e dunduxina, Poli yi falan ti e xa Heburu xuiini.

22 A naxa, “Ngaxakedenne nun n fafane, ε tuli mati, n xa n xənba ε xa!” **2** E to a me a Heburu xuiin falama, e yi e raxara. Awa, Poli yi siga falan ma, a naxa, **3** “Yahudiyan nan n tan na, n barixi Tarise taan nin, Silisi yamanani. Koni n maxuruxi be nin. Gamaliyeli nan n xaranxi en benbane sariyan suxu kiin ma. Alaa fe kunfan yi n fan yi alo ε tan birin kii naxan yi to. **4** N fan yi Yesu a Kiraan muxune besənxo nyama han n yi e faxa. N yi xemene nun jaxanle suxuma, n yi e sa kasoon na. **5** Saraxarali Kuntigi Singen nun yamaan fonne birin n seren be nən na ma, amasoto n kədin soto e ra nən, siga en ngaxakeden Yahudiyan ma Damasi taani. Nanara, n yi siga na yi muxuni itoe

suxu xinla ma, n yi e xidi, n xete e ra Yerusalen taani e jaxankatadeni.” 6 “Awa, n yi kira yi waxatin naxan yi, yanyi tagini, n bata yi maso Damasi taan na, tee dege gbeen yi ti n ma mafuren keli kore! 7 N bira bōxoni. N fala xuiin me, a naxa, ‘Soli, Soli, i n besenxonyama nanfera?’ 8 N yi a maxodin, n naxa, ‘Marigina, nde i tan na?’ A yi n yabi, a naxa, ‘Yesu Nasareti kaan nan n tan na, i naxan besenxonyama iki!’ 9 Muxun naxanye yi n fōxō ra, ne fan yi na tee degen to. Koni naxan yi falan tima n xa, e mi na xuiin me. 10 N yi maxodinna ti, n naxa, ‘Marigina, n xa nanfe liga?’ Awa, Marigin yi a fala n xa, a naxa, ‘Keli, i siga Damasi taani! Ala i yamarixi naxan birin liga fe ra, ne birin sa falama i xa nen menni.’ 11 Na tee dege gbeen yi n danxu, na ma, n lanfane yi n yii rasuxu e siga n na Damasi taani.” 12 “Awa, xemena nde yi na yi, naxan yi xili Ananiyasi. Muxu tōgondiyaxin nan yi a ra, a yi Alaa sariyan suxi, Yahudiyān naxanye birin yi dōxi menni, ne yi a binyaxi kati! 13 Na yi fa, a ti n dēxōn, a naxa, ‘Ngaxakedenna Soli, seen to fa!’ N yi toon ti keden na, n yi a tan to. 14 A yi a fala, a naxa, ‘Nxu benbane Ala bata i sugandi alogo i xa a sagoon kolon, i yi Tinxin Muxun Yesu to, i yi a xuiin yeteen me. 15 Amasoto i bata feen naxanye to, i yi a me, i findima nen na seren na muxune birin xa. 16 Awa, i fa nanse mamema iki? Keli, i rafu igeni, i yulubine birin xa ba i ma, i yi a maxandi a xinli.” 17 “N xetexina Yerusalen taani, n yi Ala maxandima Ala Batu Banxini waxatin naxan yi, n yi fe toon ti alo xiyena. 18 N yi Marigin to, a yi a fala n xa, a naxa, ‘I mafura, i keli Yerusalen taani keden na, amasoto i sereyaan naxan bama n ma fe yi, e mi na suxuma.’ 19 N yi a yabi, n naxa, ‘Marigina, e a kolon yati a n yi sigama salide banxine yi, naxanye denkeleyaxi i ma, n yi ne sa kasoon na, n yi e bōnbō. 20 E to yi i serena Etiyen faxama, n tan yeteen yi na, n tin nen. Naxanye yi a faxama, n tan nan yi ne dagine kantanma.’ 21 Awa, Marigin yi a fala n xa, a naxa, ‘Siga, amasoto n na i rasigama nen siya gbetene ma yire makuyene yi.” 22 Yamaan yi e tuli mati Pōli xuiin na han a yi na fala. E yi sōnxō fōlō kati, e naxa, “A xa faxa! Muxu sifani ito lu daxi mi a ra a nii ra!” 23 E yi sōnxōma, e e domane wolima kore, e gbangbanni te. 24 Romi sofa mangan yi yamarin fi, a e xa so Pōli ra yire makantanxini. A naxa, a e xa a bulan, e yi a maxodin alogo a xa a kolon yamaan sōnxōma a ma feen naxan ma. 25 Koni e to a xidi a bulan xinla ma, sofa kemen kuntigin naxan yi tixi na, Pōli yi na

maxodin, a naxa, “A daxa e xa Romi dugureнна nde bulan hali e munma naxan makiti singen?” 26 Sofa kemen kuntigin na me waxatin naxan yi, a yi siga sofa mangan fema, a yi na fala, a yi a maxodin, a naxa, “I nanfe lige? Romi dugureнна nde nan xemeni ito ra!” 27 Nanara, sofa mangan yi siga, a yi Pōli maxodin, a naxa, “A fala n xa, xa Romi dugureнна nde nan i tan na?” Pōli yi a yabi, a naxa, “Ōn, a tan nan nde n na.” 28 Sofa mangan yi a fala, a naxa, “N gbeti gbeen nan baxi, n findi Romi dugureнна ra.” Pōli yi a yabi, a naxa, “Koni n tan barixi Romi dugurenyaan nin.” 29 Muxun naxanye yi a bulanma nun alogo a xa falan ti, ne yi keli a fema keden na. Sofa mangana a kolon waxatin naxan yi, a bata yi Romi dugureнна nde xidi yōlōnxōnna ra nun, na fan yi gaxu. 30 Yahudiyane yi Pōli kansunma feen naxan na, sofa mangan yi waxi na kolon feni. Nanara, na xōtōn bode, e yi Pōli fulun. Sofa mangan yi saraxarali kuntigine nun kitisa yamaan yamari, e yi e malan. Na xanbi ra, a yi Pōli ti e yetagi.

23 Pōli yi kitisa yamaan mato kati, a naxa, “Ngaxakedenne, n feen naxanye ligaxi Ala yee xori han to, n mi n yete yalagima ne ra.” 2 Muxun naxanye yi tixi Pōli fema, Saraxarali Kuntigi Singena Ananiyasi yi ne yamari, a e xa Pōli dēen garin. 3 Pōli yi a fala a xa, a naxa, “Ala i fan bōnbōma nen, i tan naxan luxi alo banxin naxan fari mafixa, koni a kuiin lōxi. I dōxi n makitideni sariyan xōn. Koni i tan sariyan kalama amasoto i bata yamarin fi, a e xa n bōnbō!” 4 Muxun naxanye yi Pōli fema, ne yi a fala a xa, e naxa, “I Alaa Saraxarali Kuntigi Singen nan konbima na ra.” 5 Pōli yi a yabi, a naxa, “Ngaxakedenne, n mi yi a kolon a Saraxarali Kuntigi Singen nan a ra. Amasoto a sebexi Kitabun kui, a naxa, ‘I nama fala jaxin ti i ya yamaan mangan ma.” 6 Pōli yi a kolon, a Saduse muxune nun Farisi muxune nan yi na yamaan na. A yi keli, a yi a fala a xuiini texin na kitisa yamaan tagi, a naxa, “Ngaxakedenne, Farisi muxun nan n na. N fafe fan Farisi muxun na a ra. E n makitima bayo n laxi a ra a faxa muxune kelima nen sayani!” 7 A na falaxina, Saduse muxune nun Farisi muxune yi fōlō e bode matande, yamaan yi taxun. 8 Saduse muxune yi a falama, e naxa, a muxune mi kelima sayani, e mōn naxa, a malekane mi na hanma senbe totarene. Koni Farisi muxune tan yi laxi ne birin na. 9 Nanara, sōnxō sōnxō gbeen yi keli. Awa, sariya karamōxōna ndee yi keli Farisi muxune ye, e ti, e matandin ti kati! E naxa,

“Nxu mi fe naxi yo toxi xemēni ito a fe yi. Yanyina nde, senbe totarena nde hanma malekan falan ti a xanēn yatil!” **10** Matandin yi gbo ayi han sofa mangan yi gaxu, a e nama Pōli yibō dungi dungi na. Nanara, a sofane yamari, a e xa sa Pōli tongo yamaan tagi, e siga a ra yire makantanxini. **11** Na kōēn na, Marigin yi mini Pōli xa, a naxa, “I wekile! I sereyaan bama n xa nēn Romi taani alo i a liga Yerusalem taani kii naxan yi.” **12** Na xōtōn bode, Yahudiyane yi e malan e lan a ma, e yi e kōlō, a e mi donseen donma, e mi igen minma fō e Pōli fāxa. **13** Naxanye na feni tōn, e dangu muxu tonge naanin na. **14** Na xanbi ra, e siga saraxarali kuntigine nun fonne fema, e naxa, “Nxu bata nxu kōlō, a nxu nama sese don fō nxu Pōli fāxa. **15** Awa, nayi ε tan nun kitisa yamaan xa xeraan nasiga Romi sofa mangan ma, a a xa Pōli rafa ε ma alogo ε xa a fe fēsefese. Nxu yitōnxi nxu xa a fāxa benun a xa be li.” **16** Koni Pōli magilena dii xemen na yanfan mexina, a yi siga yire makantanxini, a sa feni ito fala Pōli xa. **17** Na xanbi ra, Pōli yi sofa kemen kuntigina nde xili, a yi a fala a xa, a naxa, “Banxulanni ito tongo, i siga a ra sofa mangan fema, a waxi falana nde ti feni a xa.” **18** A yi a tongo, a siga a ra sofa mangan fema, a yi a fala a xa, a naxa, “Pōli naxan kasoon na, na nan n xilixi, a yi a fala n xa, a naxa, a n xa fa banxulanni ito ra i fema amasōtō a waxi fena nde fala feni i xa.” **19** Sofa mangan yi banxulanna yii rasuxu, a siga a ra a danna, a sa a maxōdin, a naxa, “I nanfe falama n xa?” **20** Banxulanna yi a fala a xa, a naxa, “Yahudiyane bata lan a ma a tila e xa i mafan, a i xa Pōli rasiga kitisa yamaan ma alogo e xa a fe fēsefese. **21** Koni i nama i tuli mati ne ra amasōtō e dangu muxu tonge naanin na naxanye luxunxi Pōli yēē ra. E birin bata e kōlō, a e nama sese don, e nama e min, han e yi a fāxa. E yitōnxi na nan ma iki. E i ya yamarin nan tun legedenma.” **22** Sofa mangan yi a fala, a naxa, “I nama a fala muxu yo xa fa fala i bata na yebe n xa.” A banxulanna yiba, a yi siga. **23** Sofa mangan yi sofa kemen kuntigi firin xili, a naxa, “E sofa keme firin tongo, e nun soo kan tonge solofere nun tanba kan keme firin. E ne yitōn, siga Sesariya taani to kōēn na dege waxatin na dangu. **24** E fa soona ndee ra Pōli tongo xinla ma, alogo a xa sa yamana kanna Felisi konna li bōje xunbenli.” **25** Na xanbi ra, a kedin sebe, a naxa, **26** “N tan Kilodi Lisiyasa bata i tan Felisi yamana kan fajin xōtōn. **27** Yahudiyane xemēni ito suxi, a yi luxi ndedi, e xa a fāxa. N to a kolon a Romi

dugureнна nan a ra, nxu nun n ma sofane yi siga, nxu sa a rakisi. **28** E a kansunma feen naxan na, n yi waxi na kolon feni. Nanara, n siga a ra e kitisa yamaan fema. **29** N yi a to, a e a kansunma e sariya kala feen nan na, koni a mi fe yo ligaxi, a faxe feen naxan ma hanma e a se kasoon na feen naxan ma. **30** Koni n to a me a Yahudiyane bata yanfan so a ma, n yi a rasiga i ma keden na. N mōn yi a kansun muxune yamari a e xa sa e mawuga i tan fema.” **31** Yamarin naxan fi sofane ma e yi na liga. E yi Pōli tongo, e siga a ra Antipatiri taani. **32** Na xōtōn bode sofaan naxanye siga e sannu, ne yi xete yire makantanxini. Soo kanne yi Pōli tongo. **33** E yi siga Pōli ra Sesariya taani, e yi a so yamana kanna yii, e kedin fan so a yii. **34** Yamana kanna yi kedin xaran, a Pōli maxōdin a kelixi yamanan naxan yi. A a kolon waxatin naxan yi, a a kelixi Silisi yamanan nin, **35** a naxa, “I kansun muxune na be li waxatin naxan yi, n na n tuli matima nēn i ya fe ra na waxatini.” Na xanbi ra, a yamarin fi a kantan muxune xa Pōli mara yamana kan banxini.

24 Soge suulun danguxina, Saraxarali Kuntigi Singena Ananiyasi yi siga Sesariya taani e nun yamaan fonna ndee nun muxu xun mayengen naxan xili Teritule. Ne yi e mawuga Pōli fari yamana kanna yetagi. **2** E to Pōli maxili, Teritule yi Pōli kansun fōlō falani itoe yi, a naxa, “Felisi manga fajina, nxu bōje xunbeli gbeen naxan sōtōma i barakani, e nun i feen naxanye yitōnxi i ya xaxilimayani, nxu siyaan sabati feen na, **3** nxu fe fajin naxanye birin sōtōma i yii waxatin birin e nun yiren birin yi, nxu barikan birama i xa na ra, manga Felisi. **4** Koni hali na, nxu nama i ya waxatin tongo. Nanara, n na i mafanma, yandi i tuli mati nxu dentēge xuiin na ndedi. **5** Nxu bata xemēni ito to, muxu tōrō gbeen na a ra naxan sōnō sōnōn nakelima Yahudiya yamaan ye dunūja yiren birin yi. A tan nan Yesu Nasareti kaana dinan yēeratiin na. **6** A mōn bata kata a xa Ala Batu Banxina sarjannna kala. Nanara, nxu a suxi. A xōnla yi nxu ma, nxu xa a makiti alo nxō sariyan kii naxan yi. **7** Koni sofa mangana, Lisiya yi fa a tongo nxu yii karahanni. **8** Na xanbi ra, a yi yamarin fi, a a kansun muxune xa fa i fema. Xa i xemēni ito maxōdin, i yetena a kolonma nēn nxu a kansunma feen naxan birin na.” **9** Yahudiyane fan yi tin na falan ma, e naxa, a jōndi nan na birin na. **10** Yamana kanna yi Pōli yamari, a a xa falan ti. Pōli yi a fala, a naxa, “N na a kolon, a i bata findi kitisaan

na siyani ito xun na xabu jɛɛ wuyaxi. Nanara, n na n xɔnbama i yetagi xaxili ragidini. **11** I yetɛɛn nɔɛ a kolonjɛ nɛn yati, a munma dangu xi fu nun firin na singen xabu n siga Yerusalɛn taani Ala batudeni. **12** E mi n lixi Ala Batu Banxini muxɛ matandide yi, hanma yamaan kui sodeni salide banxine yi hanma yire gbɛtɛ yi taani. **13** E n kansunma feen naxanye ra iki, e mi nɔɛ na jɔndin yitɛ i ra. **14** N na n tiyɛ na ra i yetagi fa fala a n na n benbane Ala nan batuma Yesu a Kiraan xɔn e a falan naxan ma a wule dinan nan a ra. Anu, feen naxan birin sebɛxi Sariya Kitabun kui e nun nabine kitabune kui, n laxi ne birin na. **15** Nxu nun itoe birin yigi saxi Ala yi kii kedenna nin, a faxa muxune kelima nɛn sayani, tinxin muxune nun tinxintarene birin. **16** Nanara, n na n fanga bɛrɛn ligama waxatin birin, alogo n nama n yetɛ yalagi Ala yetagi e nun muxune yetagi.” **17** “N bata yi jɛɛ dando ti n mi Yerusalɛn taan li. Koni iki, n sigaxi Yerusalɛn taani nɛn alogo n xa siga kiseene ra n kon kaa yiigelitɔne xa. N mɔn yi saraxane ba Ala xa. **18** N bata yi n yetɛ rasarijan, e n li Ala Batu Banxini na ligadeni waxatin naxan yi. Gali mi yi n fɛma, sɔnxɔ sɔnxɔn mi yi na. **19** Koni Yahudiyɛn naxanye kelixi Asi yamanani, ne nan yi lanma e xa fa i yetagi n kansundeni, xa fena nde e kui n xili ma. **20** Xanamɛ, muxun naxanye be, ne xa a fala n kalan naxan tixi, n yi tixi kitisa yamaan yetagi waxatin naxan yi. **21** Fɔ n falan naxan tixi e tagi n xuini texin na, n naxa, “ɛ n makitima to bayo n laxi a ra a faxa muxune kelima nɛn sayani!” **22** Felisi naxan yi Yesu a Kiraan kolon ki fapi, na yi falani so, a yi a fala e xa, a naxa, “Sofa mangan Lisiyasa na fa waxatin naxan yi, n yi i ya kitin bolon.” **23** A yi a fala sofa kemen kuntigin xa, a xa Pɔli kantan kasoon na, a yi a xɔnbɛpiɛn ndedi, a e mɔn nama tondi a xɔyine xa a mali a makone ra. **24** Xi dando danguxina, Felisi nun a jaxanla Dirusila yi fa, Yahudiya jaxanla nan yi na ra. Felisi yi xeraan nasiga Pɔli xilideni, a yi a tuli mati a falan na lan denkeleyaan ma Alaa Muxu Sugandixin ma Yesu. **25** Koni Pɔli yi falan tima waxatin naxan yi lan tinxinna nun yetɛ suxun nun kiti famatɔna fe ma, gaxun yi Felisi suxu. A yi a fala a xa, a naxa, “Siga singen, xa waxati sa lu n yii, n na i xile.” **26** A mɔn yi waxi a xɔn a Pɔli xa gbetin so a yii. Na nan yi a ra a yi a xilima waxatin birin alogo e xa batu. **27** Nɛɛ firin danguxina, Pɔrusu Fesitu yi dɔxɔ yamana kanyani Felisi funfuni. Felisi yi waxi a xɔn ma, a xa Yahudiyane rafan feen liga. Nanara, a yi Pɔli lu kasoon na.

25 A faan xii saxanna yamanani, Fesitu yi keli Sesariya taani siga Yerusalɛn taani. **2** Saraxarali kuntigine nun Yahudiya fonne yi e mawuga Pɔli fari. **3** E yi Fesitu mafan a a xa e rafan feen liga, a yi fa Pɔli ra Yerusalɛn taani. E bata yi yanfan so a ma nun, e yi wama a faxa feni kira yi. **4** Fesitu yi e yabi, a naxa, “Pɔli maraxi kasoon na Sesariya taani, n tan fan yetɛɛn mi buma, n siga na yi. **5** Xa a fe jaxi ligaxi, ɛ yɛɛratina ndee xa siga n fɔxɔ ra Sesariya taani, e sa a kansun.” **6** Fesitu yi lu e fɛma xii solomasɛɛɛ han fu yatɛ, na xanbi ra, a siga Sesariya taani. Na xɔtɔn bode, a yi dɔxɔ kiti sadeni, a yi e yamari, a e xa Pɔli raso. **7** Pɔli na li waxatin naxan yi, Yahudiyɛn naxanye yi kelixi Yerusalɛn taani, ne yi ti a rabilinni, e fe jaxi wuyaxi sa a xun ma, e mi yi nɔɛ naxanye jɔndin mayitɛ. **8** Koni Pɔli yi a yetɛ xɔnba, a naxa, “N mi kala yo tixi Yahudiyane sariyan ma hanma Ala Batu Banxin ma hanma Romi Manga Gbeen ma.” **9** Fesitu yi waxi a xɔn ma, a xa Yahudiyane rafan feen liga. Nanara, a yi Pɔli maxɔdin, a naxa, “I waxi a xɔn ma, i xa siga Yerusalɛn taani, i sa makiti feni itoe ma n yetagi na yi ba?” **10** Pɔli yi a fala, a naxa, “N tixi Romi Manga Gbeena kiti saden ni ito ra, a lan n xa makiti be. N mi tinxintareya ligaxi Yahudiyane ra hali alo i yetena a kolon kii naxan yi. **11** Xa n bata tinxintareyaan liga hanma fe gbɛtɛ, n faxɛ naxan ma, n mi tondima n xa faxa. Koni itoe wulen nan sama n xun ma. A mi daxa muxu yo xa n so e yii. Nba, Manga Gbeen xa n makiti Romi taani!” **12** Fesitu yelin falan tiyɛ a maxadi muxune xa waxatin naxan yi, a yi Pɔli yabi, a naxa, “I bata Romi Manga Gbeena fe fala, na ma, i sigama nɛn Manga Gbeen yetagi!” **13** Xii dando to dangu, Manga Agiripa nun Berinisi yi siga Fesitu xɔntɔndeni Sesariya taani. **14** E to yi xii wuyaxi radanguma na, Fesitu yi Pɔli a fe yɛba Mangan xa, a naxa, “Muxuna nde be, Felisi naxan luxi kasoon na. **15** N siga Yerusalɛn taani waxatin naxan yi, Yahudiyane saraxarali kuntigine nun yamaan fonne mawugan sa nɛn a fari, a n xa a yalagi. **16** Koni n yi a fala e xa, n naxa, Romi kaane mi darixi muxun faxɛ benun e nun a kansun muxune xa ti kitisaan yetagi a yi a yɛba. **17** Nanara, e birin yi fa n fɔxɔ ra be. N mi bu tixi n yi a makiti fɔlɔ na xɔtɔn bode, n yamarin fi a e xa fa xɛmɛn na. **18** A kansun muxune yi ti koni n yi mirixi feen jaxin naxanye ma, e mi a kansun ne sese ra **19** fɔ e to lu e bode matandɛ e dinana fe ra e nun Yesu a fe, naxan bata faxa, koni Pɔli naxan ma fe falama a a

bata keli sayani. **20** N tan mi yi a kolon n naxan lige matandi sifani ito yi. Nanara, n yi Pöli maxədin, xa a yi wama siga feen nin Yerusalen taani alogo a xa sa makiti feni ito ra menni. **21** Koni Pöli yi wa a feen xali feni Manga Gbeen yetagi Romi taani. Nanara, n yi yamarin fi a e xa a ramara han n yi a rasiga Romi Manga Gbeen ma.” **22** Agiripa yi a fala Fesitu xa, a naxa, “N fan waxi xemeni ito xuiin name feni.” Fesitu yi a yabi, a naxa, “I a xuiin namema nen tila.” **23** Na xətən bode Agiripa nun Berinisi yi fa, yama gbeen biraxi e fəxə ra binyeni. E tan nun sofa kuntigine nun taan muxu gbeene yi siga malan banxini. Fesitu yi yamarin fi, a e xa fa Pöli ra. **24** Fesitu yi a fala, a naxa, “Manga Agiripa nun muxun naxanye birin nxu dəxən ma be, ε bata xemeni ito to Yahudiya yamaan birin mawugan saxi naxan fari Sesariya taan nun Yerusalen taani. E birin yi lu sənə sənxe, e naxa, a a mi lan a xa lu a nii ra sənən. **25** Koni n mi fefe toxi a faxe naxan ma. Koni a yeteen bata Romi Manga Gbeena fe fala. Na nan a toxi, n yi a ragidi n xa a rasiga. **26** Koni fala kende yo mi n yii n naxan sebema Manga Gbeen ma. Nanara, n bata fa a ra ε yetagi katarabi i tan Manga Agiripa ma, alogo en na yelin a fəfəfəsedeni, n nə fena nde sebe nən. **27** Amasəto n tan yee ra yi, a mi lan n kasorasaan nasiga Manga Gbeen ma, fə n na a yeba a kalan naxan tixi.”

26 Agiripa yi a fala Pöli xa, a naxa, “Waxatini i yii i falan ti i yete a fe yi.” Pöli yi a yiini te, a yi a yete xənba iki: **2** A naxa, “Manga Agiripa, Yahudiyane n kansunma feen naxanye ra, n səwaxi to, n xa ti i yetagi n xənbadeni i xa lan ne birin ma. **3** Amasəto i Yahudiyane namunne nun matandine birin kolon ki fajni. Awa yandi, n bata i mafan, i tuli mati n na ki fajni.” **4** “Yahudiyane birin n sənna kolon xabu n dii jəreyani. Xabu a fəloni, n na n ma siimayaan maxalixi n siyaan nun Yerusalen taan nin. **5** E n kolon xabu to mi a ra. E nə sereyaan be nən, xa e sa wa, fa fala n yi Farisi muxune nan ye, naxanye findixi nxə dinan dina xənəxənne ra. **6** Ala en benbane tuli sa naxan na, n yigi saxi na nin. Na nan a ligaxi, e n makitima iki. **7** En bənsən fu nun firinne birin yigi saxi na tuli sa rakamalixin nan to fe yi, e nēma Ala batue kəeen nun yanyin na e səbēen birin na. Mangana, Yahudiyane n kansunma na yigin nan ma fe ra. **8** Nanfera ε tan mi laxi a ra a Ala faxa muxune rakelima nən sayani?” **9** “N tan fan ma miriyani, n bata yi a ragidi nun n

xa Yesu Nasareti kaan xinla yenge. **10** N na nan liga Yerusalen taani. N nəon sətə saraxarali kuntigine ra, n yi muxu sarjənanxi wuyaxi sa kasoon na. E na yi e faxa feen nata, n yi n xuiin fi. **11** N yi e jəxənkətamə salide banxine birin yi sanja ma wuyaxi. N yi e karahanma e xa e Marigin nayeľefu. N ma xələn yi gbo ayi e xili ma han n yi e bəsenxənya yamana gbetene taane yi.” **12** “Na ma, ləxəna nde, n yi siga Damasi taani saraxarali kuntigine nəon nun e tinna ma. **13** Mangana, n yi kira yi waxatin naxan yi, yanyi tagini, tēe dege gbeen yi ti nxu nun n fəxərabirane ma keli kore, a degen yi gbo sogen xa. **14** Nxu birin yi bira bəxəni. N yi xuina nde mē Heburu xuini naxan yi a falama n xa, a naxa, ‘Səli, Səli, i n bəsenxənyama nanfera? A xədəxə i tan ma, i tondi i gbengben muxun bun alo turana.’ **15** N yi maxədinna ti, n naxa, ‘Marigina, nde i tan na?’ A yi n yabi, a naxa, ‘Yesu nan n tan na, i naxan bəsenxənyama. **16** Koni keli, i ti. N minixi kənenni i xa nən alogo i xa findi n ma walikēen na, i feen naxanye toxi n ma fe yi to, i findi ne seren na e nun n naxanye yitama i ra. **17** N ni i ratangama nən i ya yamaan ma e nun siya gbetene, n na i xēma naxanye ma **18** alogo i xa sa e yēene rabi, i yi e ba dimin nun Setana nəon bun ma, i fa e ra Alaa kənenna ma. Xa e denkeleya n ma, e yulubi xafarin sətəma nən, e lu Ala muxu sarjənanxine ye.” **19** “Nanara, Manga Agiripa, n fe toon naxan ti keli kore, n mi na matandi. **20** N yi kawandin ba Damasi kaane nun Yerusalen kaane nun Yudaya kaane birin nun siya gbetene fan tagi. N yi a fala e xa, n naxa, e xa e xun xanbi so e hakene yi, e fa Ala ma, e kewanle yi a yita fa fala a e bata tubi. **21** Yahudiyane n suxi Ala Batu Banxini na nan ma, e kata n faxa feen na. **22** Koni Ala n malima nən han to, n mən be alogo n xa sereyaan ba birin xa, muxudin nun muxu gbeena. N mi sese falama fə nabine nun Musa bata yi naxan fala nun lan fe famatəne ma. **23** E naxa, a Alaa Muxu Sugandixin yi tərəma nən, a findi muxu singen na naxan kelima sayani, a yi kənenna rali a yamaan nun siya gbetene ma.” **24** Awa, Pöli to yi a yete xənbama na kiini, Fesitu yi a fala a xuini texin na, a naxa, “Pöli, seen nan soxi i yi! I ya xaran gbeen bata seen naso i yi!” **25** Pöli yi a yabi, a naxa, “Fesitu, muxu fajina, se mi soxi n yi. N jəndin nun lənnin nan falama i xa. **26** Amasəto Manga Agiripa feni ito kolon, nayi n nəe falan tiye a xa nən xaxili ragidini. N laxi a ra, a a feni itoe kolon ki fajni, bayo e mi rabaxi luxunni. **27** Manga Agiripa, i laxi nabine falane ra ba?

N na a kolon a i bata la e ra!” 28 Agiripa yi Pöli yabi, a naxa, “I n finde Yesu mantonna ra waxatidini ito yi ba?” 29 Pöli yi a yabi, a naxa, “Xa waxatin xunkuya ayi ba, xa a dungi ayi ba, n na Ala maxandima nen i tan xa e nun naxanye birin tuli matixi n na to, alogo e xa lu alo n tan kii naxan yi to, ba yölönxönni itoe ra!” 30 Na xanbi ra, mangan nun yamana kanna nun Berinisi nun muxun bonne birin yi keli, 31 e to yi minima, e yi lu a fale e bode xa, e naxa, “Xemeni ito mi fefe ligaxi a faxe naxan ma hanma a sama kasoon na naxan ma.” 32 Agiripa yi a fala Fesitu xa, a naxa, “Xa xemeni ito mi yi maxandin ti nun a Romi Manga Gbeen xa a makiti, en yi a bepinma nen nun.”

27 E lan a ma waxatin naxan yi, a nxu xa siga kunkin kui Itali yamanani, e yi Pöli nun kaso ra muxuna ndee so sofa kēmen kuntigina nde yii naxan yi xili Yuliyusi, Romi Manga Gbeena sofane yē. 2 Nxu so kunkina nde kui naxan keli Adiramiti taani. A yi danguma Asi yamanan fōxo igen taa dēene nan na. Arisitaraki yi nxu fōxo ra, Masedoniya kaan naxan keli Tesaloniki yi. 3 Na xōtōn bode nxu yi sa so Sidōn taani. Awa, Yuliyusi yi fe fajin naba Pöli xa, a tin a xa siga a xōyine fēma fanda fendeni. 4 Nxu to keli na yi, nxu siga igen tagini denaxan xili Sipiri, bayo foyen bata yi a xun sa nxu ma. 5 Nxu yi fōxo igeni gidi Silisi nun Panfiliya yamanan dēxōn ma, nxu yi sa Mira taan li Lisi yamanani. 6 Sofa kēmen kuntigin yi kunkina nde li na naxan yi kelixi Alesandire taani, a sigama Itali yamanani. A yi nxu raso na kunkin kui. 7 Nxu yi siga ndedi ndedi han xii wuyaxi, han nxu sa Sinidi bōxōn li fōxo igen tagi tōrōni. Bayo foyen mi yi tinma nxu xa siga mēn binni, na yi a liga nxu siga Kireti bōxōn bode fōxōn na fōxo igen tagi, nxu yi dangu Salemonē gemen yetagi. 8 Nxu yi dangu xareyaan dēxōn tōrōni, nxu yi yirena nde li denaxan yi xili Tide Fajina Lase taan dēxōn ma. 9 Nxu bata yi bu sigatini han igen xun ma sigatiin yi magaxu ayi nxu ma. Yahudiyane sun suxu waxatin bata yi dangu nun. Na nan a liga Pöli yi e rakolon, 10 a naxa, “Ngaxakedenne, n bata a to, en ma ige xun ma sigatiin findima gbalon nan na. Xa en siga, a findima kala nan na kunkin nun a kui seene ma e nun en tan yetēen ma.” 11 Koni sofa kēmen kuntigin yi laxi kunki ragine kuntigin nun kunki kanna xuiin na dangu Pöli a falan na. 12 Bayo na bōxōni, kunki tiden mi yi fan jēmen nadanguden na, muxu wuyaxi yi waxi kata feni, a nxu xa siga Kireti bōxōn kunki

ratideni jēmen nadangudeni denaxan xili Fenixi, denaxan yē rafindixi sogegododen ma. 13 Foyedin yi fōlo fē keli yiifanna ma. E yi e miri, a e waxōn feen bata liga e xa. Nanara, e yi kunkin nati seen ba igeni, e lu sigē Kireti bōxōn dē. 14 Koni mafuren, foye gbeen yi keli xareyaan mabinni, naxan xili, “Kōmen ma foyena.” 15 Na foyen yi kunkin tuntun. E mi yi nōe kunkin natiye. Nxu yi a lu foyen yi siga nxu ra. 16 Nxu yi dangu bōxōna nde dēxōn, naxan xili Kawuda. Nde yi ba foyen na mēnni. Nxu yi kata gbeen ti nxu xa marakantan kunkidin nate kunkin fari. 17 E a rate waxatin naxan yi, e yi lutine xidi kunkin na a rabilinni alogo a nama kala. E yi gaxuxi a foyen nama kunkin xali a sa bōnbo Sirite jēmēnsin gbiligbinle ra. Nanara, e yi kunkin nati seen nagodo, foyen yi lu sigē nxu ra. 18 Foyen yi nxu bōnbo ki fajni. Na xōtōn bode, e yi goronne ramini fōlo kunki gbeen kui, e yi e rawoli ayi igeni. 19 A soge saxandeni, kunki ragine yetēen yi kunkin nagi seene rawoli ayi igeni. 20 Xii wuyaxi nxu mi sogen to hanma sarene. Koni foyen tan yi gboma ayi nen tun. Dōnxēn na nxu yi yigitege, a nxu mi fa kisima. 21 A bata yi xii wuyaxi ti e mi e dēge. Pöli yi keli, a ti muxune tagi, a naxa, “Ngaxakedenne, e yi lanma nun e yi n xuiin suxu e mi keli Kireti bōxōni. E mi yi kalan nun bōnō gbeeni itoe sōtōma nun. 22 Nba, iki n na e mafanma nen, e xa e wēkile. Muxu yo mi faxama, kunkin nan tun kalama. 23 Amasōtō n Marigina Ala, n naxan batuma, na malekana nde bata a maso n na to kōēen na. 24 A yi a fala n xa, a naxa, ‘Pöli, i nama gaxu! A fere mi na fō i xa ti Romi Manga Gbeen yetagi. Ala bata i sigati bodene birin fan niin fi i ma a hinanni.’ 25 Nanara, ngaxakedenne, e wēkile amasōtō n bata denkeleya Ala ma, a a ligama nen alo a falaxi n xa kii naxan yi. 26 Koni en sa dinma nen bōxōna nde ra igen tagi.” 27 Awa, foyen yi nxu rasigama Adiriyatike fōxo igen xun ma a xi fu nun naaninden, kōe tagini, kunki ragine yi sike a nxu bata maso xareyaan na. 28 E se maliga seen sinxina igeni, e yi a to a igen yi tilin kanke ye tonge naanin. E sigaxina ndedi, e mōn yi a maliga, e yi a to a tilinna kanke ye tonge saxan nan lixi. 29 E yi gaxu, a kunkin nama a din gemene ra. Nanara, e kunkin nati wure naanin nagodo igeni kunkin xanbi ra. E digi kuye baan na. 30 Kunki ragine yi waxi keli feni kunkin kui. E maratanga kunkidin nagodo igen xun ma. E a liga alo e yi kunkin nati sena ndee nan nagodoma kunkin yēe ra igeni. 31 Koni Pöli yi a fala sofa kēmen kuntigi

gbeen nun sofane xa, a naxa, “Xa kunki ragini itoe mi lu kunkin kui, ε mi kisima.” **32** Nanara, sofane yi maratanga kunkidin xidi lutine rasege ayi, a sin igeni. **33** Kuye baan masoxina, Pōli yi e birin mafan a e xa donseen don, a naxa, “A xii fu nun naaninna nan to, ε legeden tiini han iki ε munma donse don. **34** Nanara, n na ε mafanma, alogo ε xa donseen don, bayo ε makona a ma ε kisi. Hali xun sexe kedenna ε tan sese mi bōnoma a yi.” **35** Pōli yelin falan tiye waxatin naxan yi, a buruna nde tongo, a barikan bira Ala xa e birin yεε xōri, a buruni gira, a a don fōlo. **36** Bonne fan yi e wekile, e birin yi donseen don. **37** Nxu tan naxanye birin yi kunkin kui, muxu keme firin muxu tonge solofere muxu sennin. **38** E birin lugo waxatin naxan yi, e donseen nawoli ayi igeni alogo kunkin xa yelefu ayi. **39** Kuye to yiba, kunki ragine yi bōxōn naxan toma, e mi yi na kolon, koni e sa igen to soxi bōxōn kui mejnensin yirena nde yi. E yi lan a ma a e xa kunkin nasiga mejnensinna ma, xa e nōε. **40** E yi kunkin nati wurene fulun, e yi e lu fōxo igeni. E mōn yi kunki matinxin seene xidi lutine fulun. E yi kunkin nasiga dugin nate kunkin yεε ra. Foyen yi lu kunkin nasige xareyaan binni. **41** Koni kunkin yi sa jemensinna gbiligbinla li igen bun. Kunkin xunna yi digi, a mi yi fa nōε sigε. Walanna senben yi a xanbin kala. **42** Sofane yi lan a ma, a e xa kaso ra muxune birin faxa alogo muxu yo nama a futuxulu, a siga igen xun ma. **43** Koni sofa kemen kuntigin yi waxi a xōn ma nen, a xa Pōli rakisi. Nanara, a yi e raxōlo, a e nama na liga. Koni naxanye birin yi nōε baan gide, a yi ne yamari, a ne singe xa e bōxōn igen ma siga xareyaan na. **44** Awa, a dōnxen naxanye yi luxi, a ne xa farinne suxu hanma kunkin wudi dungina ndee, e bira bodene fōxo ra. Nxu birin yi xareyaan li herini.

28 Nba, nxu to xareyaan li herini, nxu yi a me a na bōxōn yi xili nen Malita. **2** Nxu yi rafan na dugurenne ma kati! Tulen yi fa, xunbenla yi mini. Nayi, e yi tēen sa nxu xa, e nxu yisuxu ki fajni. **3** Pōli yi yegene malan, a yi e sa tēeni, tēen wuyenna to gbo ayi, sajin yi mini, a yi a singan Pōli yiin na. **4** Na dugurenne yi sajin to singanxi Pōli yiin na, e yi a fala e bode xa, e naxa, “Muxu faxan nan xemeni ito ra, hali a to bata tanga fōxo igen ma, haken mi tinma a xa lu a nii ra.” **5** Koni Pōli yi a yiin lisan, sajin yi bira tēeni, sese mi a to. **6** E birin yengi yi a ma, a a yiin yi xungboma nen hanma a yi bira a faxa sa! Koni

e bu a legedenye, e mi fefe to lige a ra. Nanara, e yi e miri fe gbete ma, a alana nde nan yi Pōli ra. **7** Bōxōna nde yi na dēxōn ma naxan yi Pubiliyusi gbeen na, mēnna mangana. Na yi nxu yigiya binyeni xii saxan. **8** Pubiliyusi fafe furaxin yi saxi saden ma, fati mawolonna nun wulixōnden nan yi a ma. Pōli yi so a konni, a sa a yiin sa a ma, a yi Ala maxandi a xa, a yi a rakendeya. **9** Na liga waxatin naxan yi, furemaan naxanye birin yi na bōxōni, ne yi fa, e rakendeya. **10** E yi nxu binya kii wuyaxi. Nxu to yi kelima na, e yi nxu fanda se wuyaxi ra. **11** Kike saxan to dangu, nxu mōn yi siga kunki gbete kui naxan yi kelixi Alesandire yi. Na bata yi jemēn nadangu na bōxōni. E alane, gulun sawura firin yi tixi na kunkin xunna ma. **12** Nxu yi Sirakusi taan li, nxu xii saxan ti mēnni. **13** Nxu yi keli na yi, nxu sa Regiyo taan li. Na xōtōn bode foyen yi fa fōlo keli sogeteden yiifanna ma, nxu xii firin ti kunkin kui nxu sa Pusole taan li. **14** Nxu yi denkeleya muxuna ndee li mēnni. Ne yi nxu mafan, a nxu xa lōxo xun keden ti e fēma. Nxu sa Romi taan li na kii nin. **15** Denkeleya muxun naxanye yi Romi taani, ne yi nxu fa feen mē. E yi fa nxu ralandeni han Apiyusi Lōxōtiden nun yiren naxan xili “Xōye Yigiya Banxi Saxanna.” Pōli ne to waxatin naxan yi, a yi barikan bira Ala xa, a yi senben sōto. **16** Nxu Romi taan li waxatin naxan yi, e yi tin a Pōli xa lu a danna mēnni, sofana nde yi lu a sanna. **17** Xi saxan danguxina, Pōli yi Yahudiya muxu gbeene xili. E malan waxatin naxan yi, a yi a fala e xa, a naxa, “Ngaxakedenne, hali n to mi sese ligaxi en ma yamaan na hanma n yi en benbane namun fena nde kala, e bata n suxu Yerusalen taani, e yi n so Romi kaane yii. **18** Ne yelin xanbini maxōdinne tiye n ma, e yi lan a ma e xa n bejin amasoto e mi fefe toxi n faxe feen naxan ma. **19** Koni Yahudiyane mi tin. Na yi a liga, n yi a fala a Romi Manga Gbeen xa fa n makiti, hali n to mi yi waxi n siyaan xun maxidi feni. **20** Na nan a liga, n yi a fala, n naxa, fō n xa ε to, n yi falan ti ε xa. N xidixi yōlōnxōnni itoe ra Isirayila kaane yigin nan ma fe ra.” **21** E yi a fala a xa, e naxa, “Nxu mi kedi yo sōtōxi i ya fe yi sa keli Yudaya yamanani. Nxu ngaxakeden yo mi kelixi na yi naxan fa i xili jnaxin falaxi. **22** Koni nxu waxi i kui feen kolon feni amasoto nxu a kolon, muxune dinani ito mafalama yiren birin.” **23** Nanara, e yi waxatina nde sa Pōli xa. Muxu wuyaxi yi siga Pōli yigiyaan na, Pōli yi Alaa Mangayana fe yebe e xa, keli xōtōnni han jinbanna. A mōn yi kata Yesu a fe yitadeni e ra Musaa Sariya

Kitabun nun nabine kitabune xɔn alogo e xa la Yesu ra. **24** Ndee yi la a falan na, koni ndee mi tin denkeleye. **25** Koni bayo e yi xuyama ayi lantareyani, Pɔli yi ito fala e xa, a naxa, “Alaa Nii Sarijanxin bata jɔndin fala ε benbane xa Nabi Esayi xɔn. **26** A naxa, ‘Siga, i sa a fala yamani ito xa, i naxa: Ε tuli matima nen han, koni ε mi fefe famuma. Ε seen matoma nen han, koni ε mi a yigbema. **27** Amasoto yamani ito bɔjɛn xɔdɔxɔ, e bata e tunla dutun, e yi e yeɛn naxi. Xa na mi yi a ra nun, e yeɛne yi toon tima nen, e tunle yi falan mɛ, e xaxinla yi feen famu, e yi xɛtɛ n ma, n yi e rakendeɣa.’ **28** Nanara, ε xa a kolon Alaa kisi feen falan bata siga siya gbetene ma. Ne tan e tuli matima nen.” **29** Pɔli yelin ito fale waxatin naxan yi, Yahudiyane yi xɛtɛ e bode matandɛ. **30** Pɔli yi jɛɛ firin ti na, a banxi saren fima. Naxanye birin yi fama a fema, a yi ne birin nasɛnema. **31** A yi Alaa Mangayaan kawandin ba, a yamaan xaran Marigi Yesu Alaa Muxu Sugandixina fe ma xaxili ragidin birin yi. Muxu yo mi a raxɔlɔ.

Romi Kaane

1 N tan Pöli, Alaa Muxu Sugandixina Yesu a walikena, Alaa bata naxan xili alogo n xa findi a xeraan na, a yi n yebe alogo n xa Alaa falan Xibaru Fajin nali, n bata ito sebe e ma. **2** Alaa yamaan tuli sa Yesu a fe Xibaru Fajini ito nan na a nabine falane xon e Kitabu Sarijanxine kui. **3** A dii xemena fe nan yi a ra, naxan barixi Dawuda bonsonni fati benden mabinni, **4** Alaa Nii Sarijanxin mon yi a mayita senbeni fa fala a Alaa Dii Xemena nan a ra, bayo en Marigi Yesu Alaa Muxu Sugandixin bata keli sayani. **5** Alaa bata nxu findi xerane ra a hinanni Yesu xinla barakani alogo siyane birin xa a xuiin suxu denkeleyani. **6** E tan fan na muxune ye, Alaa Muxu Sugandixin Yesu bata naxanye xili. **7** Awa, e tan naxanye birin Romi taani, Alaa xanuntenne, a mon naxanye xili, e yi findi a yama sarijanxin na, n bata ito sebe e birin ma. En Fafe Alaa nun Marigi Yesu, a Muxu Sugandixin xa hinanna nun boje xunbenla fi e ma. **8** N barikan nan singe birama Alaa xa e birin ma fe ra, Alaa Muxu Sugandixin Yesu barakani. Amasoto muxune e denkeleyana fe falama dununa yiren birin yi. **9** Alaa nan n seren na, n walima naxan xa a Dii Xemena fe Xibaru Fajin nalini n niin birin na. A a kolon a n miriyana e xon ma waxatin birin **10** n nema Alaa maxande waxati yo yi. N na Alaa maxandima, xa a sagoon na a ra, a xa feren fi n ma n siga e konni. **11** Amasoto e to xonla n ma kati, alogo Alaa Nii Sarijanxin bata naxan fi n ma, n yi na nde radangu e ma, e yi senben soto **12** alogo en yi en bode ralimaniya en ma denkeleyani. **13** Ngaxakedenne, n waxi a xon ma e xa a kolon, n bata yi kata nun sanja ma wuyaxi, n xa sa e xonton koni n mi fere soto. N yi waxi a xon ma, n xa denkeleya muxuna ndee soto e konni alo n na a soto siya gbetene ye kii naxan yi. **14** Goronna n xun ma n xa wali birin fema, Girekine nun xuluntarene e nun xaxilimane nun xaxilitarene. **15** Nanara, a xonla n ma han, n xa Yesu a fe Xibaru Fajin nali e tan Romi kaane fan ma. **16** N mi yagin Yesu a fe Xibaru Fajin naliye, bayo Alaa senben na a ra alogo naxan yo na la a ra, na xa kisi, folo Yahudiyaane ma siga siya gbetene ma. **17** Yesu a fe Xibaru Fajin bata tinxinyaan makenen, Alaa naxan fima muxune ma. Na foloxi denkeleyaan nan ma a rajan denkeleyaan ma, alo a sebexi kii naxan yi Kitabuni, a naxa, "Naxan na tinxin denkeleyaan xon, na nii rakisin sotoma nen." **18** Alaa bata a xolon makenen sa keli ariyanna yi lan

muxune Alaa kolontareyaan nun e tinxintareyaan ma naxanye jondin luxunma tinxintareyani. **19** Amasoto muxune noe naxan kolonje Alaa fe yi, e bata na yigbe, bayo Alaa bata yi na makenen e xa. **20** Bayo xabu dununa da, Alaa kejaan naxanye mi toma yeen na alo a habadan senben nun a Alayana, ne yigbema ki fani, bayo muxune e famuma a daala xon. Nanara, e mi noe e yete xun mafale. (aidios g126) **21** Hali e to Alaa kolon, e mi a binyama, e mon mi barikan birama a xa. Koni e miriyane bata lu fuyan. E xaxilitareyaan yi e bojene lu dimini. **22** E bata e yete yate xaxilimane ra, koni e findi daxune ra. **23** E bata habadan Alaa binyen masara suxurene ra naxanye rafalaxi muxune nun xoline nun subene nun bubu seene maligan na naxanye faxama. **24** Nanara, Alaa bata e rabegin e xosi feene yi e bojene kunfaxi naxanye xon, e yi lu e bode fati rayelefu. **25** E yi Alaa jondin masara wulen na, e wali dali seene xa, e yi e batu, benun e xa daala kanna Alaa yeteen batu naxan lan a batu han habadan. Amina. (aion g165) **26** Na feene ma, Alaa yi e lu e kunfa fe rayelefuxi xosixine yi. Amasoto hali e jaxanle fan bata e me e da kiin na, e kafu joxoya gbeteye liga naxanye mi daxa. **27** Xemene fan na kii nin, e yi e me e jaxanle kafu joxoyaan na, e yi e bode rakunfa. Xemena nun xemena yi e bode rayagi e kafu. E yi e fe jaxin saranna soto. **28** Bayo e to bata tondi Alaa kolonje, a bata e rabegin e xaxilitareyani, e yi lu fe haramuxine lige. **29** E lugoxi tinxintareyaan sifan birin na, fe jaxin nun milen nun jaxuna. E lugoxi xoxolonyaan nun faxa ti xonla nun lantareyaan nun yanfantenyaaan nun marajaxun nun muxu mafalan na. **30** E bata findi muxu xili kalane nun Alaa yaxune nun yanda muxune nun wasodene nun muxu kanbaxine ra, e fe jaxi kote nenene raminima, e murute e bari muxune ma. **31** Xaxilitarene nun lannayatarene nun hinantarene nun kininkinintarene nan e ra. **32** Anu, e Alaa sariya tinxinxin kolon, a muxun naxanye feni itoe ligama, ne lan nen, e faxa. Hali na, e luma na feene nan lige tun, a mon nafan e ma muxu gbeteye fan yi ne liga.

2 I findi ndenden na, i tan naxan bodene yalagima, i mi noe e yete xun mafale. Amasoto i bodene yalagin feen naxanye ma, i tan fan yeteen ne ligama. Nayi, i bata i yeteen fan yalagi. **2** En na a kolon Alaa kiti tinxinxin sama nen muxune ma, naxanye fe sifani itoe ligama. **3** Koni i laxi a ra a i tan mine Alaa kitin bun ba, i tan naxan bodene yalagima feene ma i tan

yetēen naxanye ligama? **4** Hanma i yoxi Alaa nema fisamanten gbeen ma ba, e nun a dijana? I mi a kolon a Alaa fanna lan nen a yi i sigati kiin maxete ba? **5** Koni i ya tengbesenyaan ma, i mi waxi i bɔɔnen maxete feni. Nanara, i luma Alaa xolon fari se naxan namaraxi i xili ma, a yi i li Alaa kiti tinxinxin na mini kenenni waxatin naxan yi. **6** Amasoto na waxatini, Ala “muxun birin saranma nen a kewanle ra.” **7** A habadan nii rakisin fima nen muxune ma naxanye na e tunnafan fe fajin ligadeni e yi binyen nun xunnayerenna nun faxatareyaan fen. (aiōnios g166) **8** Koni a xolon nun a bɔɔne teen kelima nen muxune xili ma naxanye e yete yigboma, e tondi jɔndin ma, e lu tinxintareyaan bun. **9** Awa, tɔɔɔn nun kɔntɔfinle sama nen fe jaxi rabane birin fari, fɔlo Yahudiyane ma siga siya gbetene ma. **10** Koni Ala binyen nun xunna kenla nun bɔɔne xunbenla fima nen fe fajin rabane ma, fɔlo Yahudiyane ma siga siya gbetene ma. **11** Amasoto Ala mi muxune rafisama e bode xa. **12** Naxanye birin yulubin ligama, e mi Musaa sariyan bun, ne halagima nen hali ba na sariyan na. Koni naxanye birin yulubin ligama Musaa sariyan bun, ne yalagima nen sariyan xɔn. **13** Amasoto naxan na a tuli mati sariyan na, na xa mi Ala kenexi koni naxan na sariyan suxu, Ala na nan yatexi tinxin muxun na. **14** Awa, siya gbeten naxanye mi Musaa sariyan kolon ne na fena nde liga naxan daxa sariyani e gbee muxuyaana xɔn, ne bata e gbee sariyan namini hali Musaa sariyan to mi yi e yii. **15** Na a yitama nen a sariyan yamarin naxan fixi, na yi sebexi e bɔɔnen nin. E yete xaxinla fan luma e kawande, a yi e fe kalan yita e ra waxatina nde, a mɔn yi e kewanle xun mayenge waxati gbete. **16** A ligama na kii nin Ala na mini muxune wundo feene makitideni lɔxɔn naxan yi a Muxu Sugandixin Yesu barakani, alo n Yesu a fe Xibaru Fajin naxan nalima, na a falan kii naxan yi. **17** Koni i tan naxan a falama a Yahudiyana i ra, i yengi saxi sariyan ma, i yete matɔxɔma Ala yi, **18** i a sagoon kolon, sariyan bata i xaran fe fisamantenna sugandin ma. **19** I laxi a ra fa fala a danxutɔne yii rasuxun nan i tan na, e nun kenenna naxan muxune malima dimini, **20** naxan xaxilitarene xaranma e nun diidine karamɔxɔna, bayo i laxi a ra a i bata fe kolonna nun jɔndin yetēen soto sariyani. **21** Nayi, i tan naxan bonne xaranma, i yete xaranma ba? I tan naxan kawandin bama a muxun nama mujan ti, i tan mi mujan tiin ba? **22** I tan naxan tɔnna dɔxɔma yalunyaana na, i tan mi yalunyaana ligan ba? Suxurene

rajaxu i tan naxan ma, i mi e batu banxine kui seene tongon ba? **23** I i yete matɔxɔma sariyani, koni i Ala matandima sariya kalan xɔn! **24** Amasoto, Kitabun naxa, “Ala xinla rayelefuxi siya gbetene ye e tan nan ma fe ra.” **25** Yahudiyane banxulan na lan, xa i sariyan suxu. Koni xa sariya kalan nan i ra, hali i banxulanxi, i fa yatexi nen alo siya gbete banxulantarena. **26** Siya gbeten naxanye mi banxulanxi, xa ne sariyan suxu, Ala mi na yate alo Yahudiya sariya suxune ba? **27** Xa banxulantarena Alaa sariyan suxu, a mi i tan Yahudiya banxulan na yalage ba? Amasoto i sariyan kalama, hali a sebexin to i yii. **28** Yahudiya dinan maligan muxun naxan yi, na mi findixi Yahudiya kende yetēen na. Banxulan feen mi findixi fati bendena fe gbansanna ra. **29** Koni muxun findima Yahudiya kenden na a kui feene nan xɔn. Banxulanya kenden luma muxun bɔɔnen nin fata Alaa Nii Sarijanxin na. Sariya sebexi mi a ra. Na muxu sifan mi tantunna soto ma adamadiine ra fo Ala yetena.

3 Nanse Yahudiyane rafisaxi muxun bonne xa nayi? Banxulan na tɔnɔn nanse ra? **2** Tɔnɔ wuyaxi a ra kiin birin yi. A singen naxan na, Ala bata a falane birin taxu Yahudiyane ra. **3** Awa, na di, xa denkeleyaana mi muxuna ndee yi, na Alaa tinxinna kale ba? **4** En-en de! Nɔndin kanna nan Ala ra hali muxune birin findi wule falane ra. A sebexi Kitabuni, a naxa, “Nanara, i na falan ti, i tan nan tinxin. I na kitin sa, i yoon soto.” **5** Koni xa en ma tinxintareyana Alaa tinxinna raminima kenenni, en nanse falama lan na feen ma? Ala mi tinxintareyaana xan ligama nayi, a na a xolon nagodo en ma? N falan tima alo muxune. **6** En-en de! Xa a yi na kii nin nun, Ala nɔe dunuɔna makite di? **7** Koni na di? Xa Alaa jɔndin makenenna n ma wulen nan xɔn, a binyen yi fari sa, nanfera n tan mɔn yalage nayi alo yulubi kanna? **8** Nayi, nanfera en mi a falama, en naxa, “En fe jaxin liga alogo a xa yate fe fajin na?” Wule falana ndee na falan sama nxu xun ma. Na kanne yalagi daxon na a ra. **9** A di nayi? Nxu tan fisa bonne xa ba? En-en de! En bata yi a yigbe nun fa fala Yahudiyane nun siya gbetene birin yulubin senben bun ma, **10** alo a sebexi Kitabuni kii naxan yi, a naxa, “Tinxin muxu yo mi na hali keden pe! **11** Muxu yo mi na naxan fe kolon. Muxu yo mi na naxan Ala fenma. **12** Muxun birin bata kiraan fata. E birin bata lu fufafu. Muxu yo mi a fajin nabama hali muxu keden pe! **13** E kɔe yinle rabixi alo gaburuna, yanfa

falane nan e lenne ma. E fala xuine xolo alo koson xolena. **14** E deen nafexi dangane nun fala xui xolene nan na. **15** E mafura wuli raminideni. **16** Gbalon nun kalan nan e kirane xon. **17** E mi boɲe xunbenla kiraan kolon! **18** E mi gaxuma Ala yee ra mumel!” **19** Anu, en na a kolon a sariyan naxan birin falama, a falama muxune nan xa naxanye sariyan bun, alogo birin deen xa suxu, dunuɲa muxune birin yi kolon fe kalane ra Ala yetagi. **20** Nanara, adamadi yo mi yatexi tinxin muxun na Ala yee ra yi sariya suxun xon, bayo sariyan yulubin nan tun yitama en na. **21** Koni iki, ba sariyan na, tinxinna nde bata mini kenenni Ala naxan fima muxune ma, Sariya Kitabun nun nabine kitabune bata yi naxan seren ba. **22** Naxanye birin na denkeleya, Ala ne ratinxinna a yee ra yi nen denkeleyaan xon Yesu yi, Alaa Muxu Sugandixina. Amasoto tagi raba mi na. **23** Muxun birin bata yulubin liga. Nanara, e mi Alaa binyen sotoxi. **24** Koni Ala muxune kima tinxinni a hinanna nan xon, a yi e xunba a Muxu Sugandixin Yesu barakani. **25** Ala a tan nan findixi a solona saan na e nun yulubi xafari saraxana, na muxune xa naxanye na denkeleya a wunla ma. Na bata a gbee tinxinna yita. Bayo yulubin naxanye liga benun iki, a mi yi muxune yulubine saranma e ra a diɲan waxatini, **26** koni a bata wa a tinxinna yita feni waxatini ito yi, alogo a xa tinxin feu, a mon yi muxune ratinxinɲe ayi a yee ra yi naxanye bata denkeleya Yesu ma. **27** Nayi, muxune lan e xa e yete matoxo nanfe ma? Sese! Nanfera? E to sariyan suxi, e yete matoxoma na nan na ba? En-en, na mi a ra, fo e denkeleyana. **28** Amasoto en bata a to muxun tinxinna Ala yee ra yi denkeleyaan nan xon, hali ba sariya suxun na. **29** Yahudiyane nan tun gbee Ala ra ba? Siya gbetene fan ma Ala xa mi a tan na ba? Siya gbetene fan ma Ala na a ra yati! **30** Ala kedenna na a ra naxan Yahudiyane ratinxinna a yee ra yi denkeleyaan xon e nun siya gbetene fan na denkeleya kedenna xon. **31** Na bunna neen a en xa sariyan beɲin denkeleyani ba? En-en de! En lan nen en yi sariyan yate.

4 En nanse falama en siyaan benba Iburahima a fe yi nayi? A nanse kolonxi feni ito yi? **2** Xa Iburahima tinxinɲe ayi nen Ala yee ra yi a kewanla xon, a yi a yete matoxe nen na yi. Koni a mi noe na lige Ala yetagi! **3** Kitabun nanse falaxi lan na fe ma? A naxa, “Iburahima yi denkeleya Ala ma, Ala yi na yate tinxinna ra a xa.” **4** Muxun naxan na wali, a yi a

saranna soto, na mi yatema kiseen na a xa, bayo a wali saranna na a ra. **5** Koni muxun naxan mi walima, koni a laxi Ala ra naxan Ala kolontarene matinxinna, Ala na kanna denkeleyaan yatema nen tinxinna ra. **6** Dawuda fan muxuna sewana fe falaxi na kii nin, Ala naxan yatexi tinxin muxun na, ba kewanle ra, a naxa, **7** “Sewan na kanna xa, naxan ma sariya kalane bata mafelu naxan yulubine bata xafari. **8** Sewan na adaman xa, Marigin bata diɲa naxan haken ma.” **9** Na sewan findixi Yahudiya banxulanxine nan gbansan gbee ra ba hanma siya gbetene fan? Awa, en baxi a faladeni, en naxa, a Ala Iburahimaa denkeleyaan yate nen tinxinna ra a xa. **10** Koni na liga waxatin mundun yi? A bata yi banxulan hanma a munma yi banxulan? A munma yi banxulan. **11** A banxulanyaan soto nen a tinxinyaan taxamasenna ra a naxan sotoxi a denkeleyaan xon benun a xa banxulan waxatin naxan yi. Nanara, Iburahima yi findi muxune birin benban na naxanye denkeleyaxi Ala ma, na yi yate e xa tinxinna ra hali e mi banxulanxi. **12** Naxanye banxulanxi, e mon biraxi nxu benba Iburahima denkeleyaan foxo ra Iburahima yi naxan yi nun benun a xa banxulan, ne fan benban nan Iburahima ra. **13** Ala yi Iburahima nun a bonsonna tuli sa, a naxa, dunuɲa findima nen e keen na. Koni a mi na tuli saan sotoxi sariyan xan xon fo a tinxinna denkeleyaan barakani. **14** Xa muxune yi na keen sotoxi sariya suxun nan xon nun, nayi denkeleyaan tonɔ mi na. Ala en tuli saxi nen nayi fuyan! **15** Amasoto sariyan nan fama Alaa xolon na, bayo xa sariya mi na, sariya kalan fan mi na. **16** Nayi, Ala en tuli saxi denkeleyaan nan baraka yi, alogo a xa findi Alaa hinanna ra Iburahima yixetene birin xa naxanye sariyan sotoxi e nun naxanye fan denkeleya alo Iburahima. Iburahima nan en birin benban na, **17** alo a sebexi Kitabun kui kii naxan yi, a naxa, “N na i findima nen siya wuyaxine benban na.” A tan nan en benban na Ala yee ra yi, Iburahima denkeleya Ala naxan ma, Ala naxan faxa muxune niin birama e yi, Ala naxan seen yamarima naxan mi na, a yi taran na. **18** Iburahima denkeleya nen a yigin ma, hali a yigin xunna to mi yi toma. Na kiini, a yi findi “siya wuyaxine benban na,” alo Ala a fala a xa kii naxan yi, a naxa, “I yixetene luma na kii nin.” **19** A bata yi jee keme joxondon soto nun, fayida a fati benden yi faxa feni, a jaxanla Saran fan yi findixi gbantan na koni a denkeleyaan tan yi kende. **20** Ala a tuli sa naxan na, a mi sike na ma denkeleyatareyani, koni a denkeleyana

a senbe so nen, a yi Ala binya. 21 A yi laxi a ra yati, fa fala Ala a tuli saxi naxan na, a senben na rakamalima nen. 22 Nanara, Ala na yate nen tinxinna ra a xa. 23 Koni na falan mi sebexi a tan keden ma fe ra, fa fala, “A yatexi tinxinna ra a xa.” 24 A mon sebexi en tan nan xa bayo na yatema tinxinna ra en tan fan xa, en na denkeleya Ala ma naxan en Marigi Yesu rakelixi sayani. 25 Yesu faxaxi en hakene nan ma fe ra, a yi keli sayani, a en natinxin Ala yee ra yi.

5 Bayo en bata tinxinje ayi Ala yee ra yi denkeleyaan xon, lanna bata taran en nun Ala tagi Marigi Yesu barakani, Alaa Muxu Sugandixina. 2 A bata en nafa a hinanni denkeleyaan xon en naxan yi iki. En yi sewa Alaa binyen soto feen yigin na. 3 En mon sewaxi en ma torone ra amasoto en na a kolon a toron fama tunnafanna nan na. 4 Tunnafanna yi fa lannayaan na. Lannayaan yi fa yigin na. 5 Na yigin mi en yanfama, amasoto Ala bata a xanuntenyaan sa en bojeni a Nii Sarijanxin xon ma, a bata naxan fi en ma. 6 Amasoto senbe mi yi en na waxatin naxan yi, Alaa Muxu Sugandixin faxa nen Ala kolontarene fe ra a waxati ragidixini. 7 Fayida muxe mi yi tinje faxe tinxin muxuna fe ra, koni yanyina nde, muxuna nde suse nen faxe muxu fajina fe ra. 8 Koni Ala a xanuntenyaan yitaxi en na na kii nin, en mon yi yulubi kanne ra waxatin naxan yi, Alaa Muxu Sugandixin yi faxa en xa. 9 Iki xa en bata tinxinje ayi Ala yee ra yi Yesu wunla xon ma, a mi sa taganje en kise Alaa xolon ma a barakani. 10 Bayo xa Ala yaxun yi en na waxatin naxan yi, en nun Ala tagin yi yiton a Dii Xemena sayaan xon, xa en tagin bata yiton nayi, a tagan xun mi na nayi en nakise Yesu a nii rakisin barakani. 11 Koni a birin mi na ra, en mon sewaxi Ala ra en Marigi Yesu Alaa Muxu Sugandixina fe ra naxan bata en nun Ala tagini ton iki. 12 Nanara, yulubin soxi dunuja yi muxu keden peen nan xon ma, sayaan fan yi fa yulubin xon. Nanara, sayaan bata fa muxun birin ma, amasoto muxun birin bata yulubin liga. 13 Yulubin yi dunuja yi nun benun sariyan xa fa, anu xa sariyan mi na, yulubin fan mi yatema. 14 Koni folo En Benba Adama waxatin ma han sa dexo Musa waxatin na, sayaan mangayaan ligama muxun birin xun na, hali naxanye mi En Benba Adamaa yulubin sifan liga naxan Alaa sariyan kala. En Benba Adama yi findixi muxu famatoon misaala nan na. 15 Koni Alaa kiseen mi maligaxi Adama haken na. Hali muxu

wuyaxi to bata sayaan soto a tan kedenna haken xon, Alaa hinanna nun a kiin hinanna gbo na xa, a naxan fixi muxu wuyaxi ma muxu keden peen barakan xon, Yesu, a Muxu Sugandixina. 16 Alaa kiseen nun muxu kedenni ito yulubin mon mi rajanma fe kedenna ma. Bayo yulubi keden peen kitin bata a liga adamadiine yi yalagi, koni Alaa kiseen faxi yulubi wuyaxin liga xanbin nin, a yi tinxinyaan nafa. 17 Xa sayaan bata noon soto muxu kedenna haken xon, na muxu kedenna fe ra, na muxune fan mi taganje noon sote Alaa Muxu Sugandixin Yesu kedenna dunuja yi gidin xon, naxanye Alaa hinan jantaren sotoma e nun a kiseen naxan findixi tinxinna ra. 18 Nanara, birin yalagixi kii naxan yi hake kedenna xon, kewali tinxinxi kedenni ito fan bata findi tinxinna ra na kiini naxan nii rakisin nafama muxune birin ma. 19 Amasoto muxu wuyaxi findixi hake kanne ra kii naxan yi muxu kedenna fala suxutareyaan xon ma, muxu wuyaxi fan natinxinma ayi na kii nin Ala yee ra yi muxu kedenna a fala suxun barakani. 20 Sariyan bata fa alogo hakene xa wuya ayi, koni yulubin gboxi ayi denaxan yi, Alaa hinanna fan bata gbo ayi menni mon. 21 Nanara, yulubin mangayaan ligaxi kii naxan yi sayani, Alaa hinanna fan mangayaan ligama tinxinyaan xon ma na kii nin, a yi en naso habadan nii rakisini, en Marigi Yesu Alaa Muxu Sugandixin barakani. (aiōnios g166)

6 En nanfe falama? En luye yulubine lige ba alogo Alaa hinanna xa gbo ayi? 2 En-en de! En luxi nen alo en bata faxa yulubin mabinni, en mon luye en ma dunuja yi gidin lige yulubini di nayi? 3 E mi a kolon ba, a en tan naxanye bata rafu igeni Alaa Muxu Sugandixin Yesu xinli, a en bata rafu a xon ma a sayani? 4 Nayi, en nun Yesu bata maluxun en bode xon ma a sayani en nafuxi igeni waxatin naxan yi, alogo Alaa Muxu Sugandixin kelixi sayani kii naxan yi a fafe a binyeni, en fan xa sigan ti dunuja yi gidi neneni na kiini. 5 Amasoto xa en birin bata findi kedenna ra a sayani, en fan kelima nen sayani alo a tan. 6 En xa ito kolon: en ma muxuya fonna bata faxa Yesu xon wudin ma, alogo en ma muxuya naxan yulubini, na xa jian, en yi ba yulubina koniyani. 7 Amasoto muxun na faxa, a xoroyama nen yulubin ma. 8 Xa en nun Alaa Muxu Sugandixin bata faxa en bode xon ma, en mon laxi a ra nayi fa fala en nii rakisin sotoma nen en bode xon ma. 9 Amasoto en na a kolon fa fala Alaa Muxu Sugandixin bata keli sayani, a mi fa

faxama sɔnɔn, senbe mi fa sayaan na a fari sɔnɔn. 10 Amasɔtɔ a faxa nɛn, a faxa yulubin nan ma fe ra sarɔɔa ma keden han habadan. Iki a a nii ra, a siimayani Ala nan xa. 11 A na kii nin, ε fan xa ε yete yate muxu faxaxine ra yulubin ma, koni ε luxi ε siimayani Ala xa Alaa Muxu Sugandixin Yesu nin. 12 Nanara, yulubin nama fa mangayaan liga ε fati bendeni sɔnɔn naxan faxama, ε lu a waxɔn feene lige. 13 E nama ε fatin yire yo lu yulubini alo yenge so sena tinxintareyaan xa, koni ε yete so Ala yii, alo a bata muxun naxanye rakeli sayani. E fatin yiren birin so Ala nan yii yenge so seen na tinxinyaan xa. 14 Na ma, yulubin nama mangayaan liga ε xun na, bayo ε mi fa sariyan bun ma sɔnɔn, fɔ Alaa hinanna. 15 Na di nayi? A lan en xa lu yulubin lige ba, bayo en mi fa sariyan bun ma sɔnɔn, fɔ Alaa hinanna? En-en de! 16 E mi a kolon ba, ε na ε yete so muxuna nde yii ε findi a xui suxu konyin na, ε findima na kanna konyin nan na ε naxan xui suxuma? A finde yulubin na, i yi faxa, hanma a finde Ala xuiin suxun na, i yi yate tinxin muxun na. 17 Koni tantunna Ala xa, bayo yulubina konyin nan yi ε ra nun, koni xaranna naxan taxu ε ra, ε bata na suxu ε bɔɔɔni. 18 E bata xɔrɔya yulubin ma, ε findi tinxinyana konyine ra. 19 N dunɔɔa misaali ito falama ε xa nɛn alogo ε xa a yete to hali senbe to mi ε yi. A fɔlɔni nun ε bata yi ε fatin birin findi xɔsi feene konyin na, ε kɛwali paxine yi siga gbɔe ayi. Koni iki, ε fatin birin xa findi tinxinyana konyin na, ε yi sarɔɔan. 20 E yi yulubina konyiyani waxatin naxan yi, ε mi yi tinxinyaan bun ma nun. 21 E feen naxanye liga na waxatini, ε yagixi naxanye ra iki, ε tɔnɔn mundun sɔtɔxi ne yi? Ne rapanna findixi sayaan nan na. 22 Koni iki, ε bata xɔrɔya yulubin ma, ε findi Alaa konyine ra. E marasarijanna nan findixi na tɔnɔn na, naxan najan findixi habadan nii rakisin na. (aiɔnios g166) 23 Bayo yulubin saranna nan sayaan na koni Alaa kisena, habadan nii rakisin nan na ra en Marigi Yesu Alaa Muxu Sugandixini. (aiɔnios g166)

7 Ngaxakedenne, ε tan naxanye sariyan kolon, ε a kolon fa fala a sariyan muxun yamarima fanni a daxi. 2 A misaala findixi paxanla nan na naxan dɔxi xɛmɛn xɔn. Na nun a xɛmɛna e bode ra fanni a daxi, koni xa a xɛmɛn faxa, a bata mini sariyan bun naxan yi e xidixi e bode ra. 3 Nanara, xa a dɔxɔ xɛmɛ gbete xɔn, a xɛmɛ singen mɔn a nii ra, a bata yalunyaan liga na yi. Koni xa a xɛmɛn faxa, nayi a bata mini na sariyan bun. Nayi, a nɔe dɔxe gbete xɔn nɛn, na

mi findixi yalunyaan na. 4 Ngaxakedenne, ε tan fan bata faxa sariyan mabinni Alaa Muxu Sugandixin fati benden xɔn ma. Nayi, ε bata findi na gbeen na, naxan kelixi sayani alogo en xa wali fajine ke Ala xa. 5 Amasɔtɔ fati benden nafan feene yi en yamarima waxatin naxan yi, yulubin nafan fe paxine yi walima en fatine yi sariyan xɔn alogo naxan en faxama en yi na liga. 6 Koni iki, en bata mini sariyan bun, amasɔtɔ en bata faxa sariyan bun, naxan yi en suxi. En fa Alaa Nii Sarijanxina a kira nenen nan xɔn, en mi fa fe fori sebexine bun. 7 En nanfe falama nayi? Sariyan yetɛɛn nan yulubin na ba? En-en de! Sariyan nan a ligaxi n yulubin kolon. Xa sariyan mi yi a fala n xa nun, i nama mila ayi, n mi yi milan kolonma nun. 8 Na ma, yulubin yi feren sɔtɔ, a milan sifan birin naso n tan yi sariyan xɔn ma. Amasɔtɔ xa sariyan mi yi na nun, yulubin faxaxin nan yi a ra. 9 Sariyan mi yi na waxatin naxan yi, n yi kende, koni yamarin to fa, yulubin yi fa, n yi faxa. 10 Yamarin naxan faxi siimayana fe ra, na faxi sayaan nan na n tan ma. 11 Bayo, yulubin bata feren sɔtɔ yamarin xɔn, a yi n yanfa, a n faxa. 12 Nanara, sariyan sarɔɔan, yamarin sarɔɔan, a tinxin, a fan. 13 Na bunna di? Fa fala naxan fan, na bata findi sayaan na n tan xa? En-en de! Yulubin nan bata n faxa na se fajin xɔn, alogo a xa kolon yulubin na. Nayi, yulubin senbe gbeen yi makenen yamarin xɔn. 14 En na a kolon fa fala a sariyan fataxi Alaa Nii Sarijanxin nan na, koni fati benden nan n tan na, naxan bata mati a findi yulubina konyin na. 15 N naxan ligama, n mi na bayen kolon. Amasɔtɔ n waxi naxan liga feni, n mi na xan ligama, koni fɔ naxan mi rafan n ma n na nan ligama. 16 N mi waxi naxan liga feni, n na nan ligama. Na a yitama nɛn fa fala a n bata tin a sariyan fan. 17 Nayi, n tan xa mi na ligama, koni yulubin nan na ra naxan n yi. 18 Amasɔtɔ n na a kolon a fe fajin mi n tan yi fata n fati benden nafan feene ra, bayo hali fe fajin liga xɔnla n ma, n mi nɔe a lige. 19 N waxi fe fajin naxan liga feni, n mi na xan ligama, koni n mi waxi fe paxin naxan liga feni, n luma na nan lige. 20 Feen naxan liga xɔli mi n ma, xa n na liga, na bunna nɛn, fa fala n tan xa mi a ligaxi, koni yulubin naxan n yi. 21 Nanara, sariyan naxan walima n tan yi, na ni ito ra. Fe fajin liga xɔnla n ma waxatin naxan yi, a fere mi na bayo fe paxina n yi. 22 Anu, n sewaxi Alaa sariyan na n sondonni. 23 Koni n sariya gbete nan toma n fati bendeni naxan n xaxinla sariyan yengema, na yi n findi kasorasaan a yulubina sariyan xɔn ma,

naxan walima n fati bendeni. **24** Tɔrɔ muxun nan n na! Nde n xunbama fati bendeni ito nun a rafan feene yi naxanye n xalima sayani? **25** Tantunna Ala xa en Marigi Yesu Alaa Muxu Sugandixin barakani! Nayi, n bata findi Alaa sariyan konyin na n xaxinli, koni n fati benden nafan feene bata n findi yulubina sariyana konyin na.

8 Nanara, muxun naxanye Alaa Muxu Sugandixin Yesu yi, Ala mi fa ne yalagima. **2** Amasɔtɔ, Alaa Nii Sarijanxina nii rakisin sariyan bata n xɔrɔya yulubin nun sayaan sariyan ma Alaa Muxu Sugandixin Yesu barakani. **3** Amasɔtɔ sariyan mi yi nɔɛ na lige, bayo fati benden nafan feene bata a senben jan. Ala nan na liga, a yi a yetena Dii Xemen nafa adamadi yulubi kanne sawurani, a yulubin yalagi fati bendeni. **4** Ala na ligaxi nen alogo sariyan tinxinna xa kamali en yi, en tan naxanye mi fa en fati benden nafan feene ligama, koni fɔ Alaa Nii Sarijanxinxin nafan feene. **5** Awa, naxanye e fati benden nafan feene ligama, ne luma e mire na fe sifane nan ma, koni naxanye Alaa Nii Sarijanxinxin nafan feene ligama, ne luma e mire Alaa Nii Sarijanxina feene nan ma. **6** Fati benden natan miriyane na lu i yi, sayaan nan na ra, koni xa i miriyane keli Alaa Nii Sarijanxinxin nin, siimayaan nan na ra e nun bɔɲɛ xunbenla. **7** Amasɔtɔ fati benden natan miriyane findixi Ala yaxun nan na, bayo e mi nɔɛ i xurɛ Alaa sariyan bun mumɛ! **8** Naxanye e fati benden nafan feene ligama, ne mi Ala kenɛɲɲɛ mumɛ! **9** Koni ɛ tan mi fa ɛ fati benden nafan feene ligama fɔ Alaa Nii Sarijanxinxin nafan feene, Alaa Nii Sarijanxinxin to ɛ yi. Amasɔtɔ xa Alaa Muxu Sugandixina Niin mi muxun naxan yi, Alaa Muxu Sugandixin gbee mi na kanna ra. **10** Koni xa Alaa Muxu Sugandixina ɛ tan yi, ɛ fati benden bata faxa yulubina fe ra, koni ɛ niina ɛ yi, amasɔtɔ ɛ bata ratinxinɲɛ ayi Ala yetagi. **11** Anu, Alaa Niin naxan Yesu rakelixi sayani, xa na lu ɛ yi, a tan naxan Alaa Muxu Sugandixin nakelixi sayani, na mɔn nii rakisin fima nen ɛ fati bendene ma a Nii Sarijanxinxin barakani naxan luma ɛ yi. **12** Na ma, ngaxakedenne, goronna en xun ma. Koni fati benden tan goronna mi en xun ma en yi a rafan feene liga. **13** Amasɔtɔ xa ɛ lu ɛ fati benden nafan feene lige, ɛ faxama nen. Koni xa ɛ fati benden natane faxa Alaa Nii Sarijanxinxin xɔn, ɛ nii rakisin sɔtɔma nen. **14** Alaa Nii Sarijanxinxin muxun naxanye yii rasuxi, Alaa diin nan ne ra. **15** Amasɔtɔ ɛ Niin naxan sɔtɔxi, na mi ɛ

findixi gaxun konyin na. Koni a bata ɛ findi Alaa diine ra. En xinla tima na nan baraka yi, en naxa, “Baba, n fafel!” **16** Alaa Nii Sarijanxinxin yetɛn sereyaan bama en niin xa, a Alaa diin nan en tan na. **17** En to findixi Alaa diine ra, en fama nen keen sɔtɔdeni alo a diine bayo Ala barayin naxan namaraxi a Muxu Sugandixin nun a muxune xa, en na sɔtɔma nen. Xa en nun Yesu tɔrɔ en bode xɔn ma, en birin nan a binyen sɔtɔma nayi. **18** N bata a kolon a en tɔrɔn naxan sɔtɔma iki, e nun binyen naxan fama, ne tagi kuya kati! **19** Bayo daala birin luxi nen alo a Ala legedenma, a digima na waxatin na han Alaa diine nɔrɔn sa minima kenɛnni waxatin naxan yi. **20** Amasɔtɔ daala lu nen kobiyaan bun. A sago mi yi a ra, koni Ala sagoon nan a luxi na kiini alogo yigin xa sɔtɔ, **21** fa fala daala xɔrɔyama nen kalana konyiyaan ma, a yi fa Alaa diine xɔrɔya kendeni. **22** Amasɔtɔ en na a kolon, xabu a fɔloni han waxatini ito yi, a luxi alo daala birin kutunma xɔleni alo ɲaxanla naxan dii barini. **23** Koni daala xa mi keden a ra, koni en tan naxanye fan singe Alaa Nii Sarijanxinxin sɔtɔxi, en fan sɔxɔlexi en bɔɲɛni, en Ala mamɛma waxatin naxan yi a en findi a diine ra, a yi en gbindin xunba. **24** Amasɔtɔ en bata kisi na yigin xɔn. Anu, i yigin saxi feen naxan yi, xa i bata na to, na mi fa xile yigina. En bata yelin naxan sɔtɛ, en fa en xaxili tima na ra di? **25** Koni en munma naxan sɔtɔ, xa en na en yigin sa na fari, en na a mamɛma nen tunnafanni. **26** Alaa Nii Sarijanxinxina en tan senbetare kanne malima na kii kedenna nin. Amasɔtɔ en mi a kolon en lan en xa Ala maxandi naxan ma. Koni Nii Sarijanxinxin yetena Ala mafanma en xa kutunni naxan mi nɔɛ fale. **27** Ala naxan muxune bɔɲɛ yi feene toma, na a Nii Sarijanxinxina miriyaan kolon, amasɔtɔ Alaa Nii Sarijanxinxina Ala mafanma a yama sarijanxinxin xa alo Ala sagoon kii naxan yi. **28** En na a kolon a Ala feene birin naɲanma a fajin nan ma a xanu muxune xa, a naxanye xilixi a maragidini. **29** Amasɔtɔ Ala naxanye sugandi a fɔloni, a mɔn bata a ragidi a xa ne findi a Dii Xemen maligane ra, alogo Yesu xa lu alo dii singena a xunyene ye. **30** Ala bata yi na ragidi naxanye xa, a mɔn bata ne xili. A naxanye xilixi, a mɔn bata ne ratinxinɲɛ ayi a yetagi, a mɔn yi a binyen fi e ma. **31** Nayi, en nanse falama na fe ra? Xa Ala en xɔn, nde fa kele en xili ma nayi? **32** A tan naxan mi a yetena dii xemen natanga, koni a yi a fi en birin xa, nanfera nayi a mi seen birin sɔɛ en yii a Dii Xemen xɔn? **33** Ala bata muxun naxanye sugandi,

nde ne kansunje? Ala nan yoon fiin kanna ra. **34** Nde nœ en yalage? Muxu yo, bayo Alaa Muxu Sugandixin Yesu bata faxesa, a mœn yi keli sayani, a mœn tixi Ala yiifanna ma, a Ala mafanma en xa. **35** Nanse en be Alaa Muxu Sugandixina xanuntenyani? Tœron nun kontofinla ba, hanma besenxœnyana hanma kamœna hanma marabœnna hanma gbalona hanma sayana silanfanna ra? Ne sese mi nœ a ligœ. **36** Bayo a sebexi Kitabuni, a naxa, “E nxu faxama i tan nan ma fe ra ferijen gbœn! E nxu ligama alo yœxœœn naxan faxesa daxi a ra!” **37** Koni naxan en xanuxi, en nœœn sœtœma nen na xœn fœni itœe birin yi fefe. **38** Amasœtœ n na a kolon yati, sayana hanma dunuƣa yi gidina hanma malekane hanma jinanne hanma waxatini itœe hanma waxati famatœne hanma senbe kanne. **39** hanma naxanye kore xœnna ma hanma naxanye bœxœn bun ma, dalise yo mi na yi naxan en be Alaa xanuntenyani en naxan sœtœxi en Marigi Yesu Alaa Muxu Sugandixin barakani.

9 N xa jœndin fala ε xa Alaa Muxu Sugandixin barakani, n mi wulen falama, n xaxinla mi n yalagima. N seren bama Alaa Nii Sarijanxini: **2** N sunuxi, n bœjœn mœn sœxœlexi waxatin birin. **3** Amasœtœ, n yi waxi nen n tan yetœœn nan xa Alaa dangan sœtœ, n yi masiga a Muxu Sugandixin na ngaxakedenne funfuni, n kon kaane, **4** Isirayila kaane, e tan naxanye findi Alaa diine ra, e a binyen nun a layirine nun a sariyan nun a batu kiine nun a tulisane sœtœ. **5** E fataxi Nabi singene bœnsœnne nan na, Alaa Muxu Sugandixin yi mini e tan yi adamadiyaan kii ma. Ala naxan seen birin xun na, na xa tantun habadan! Amina. (aïœn g165) **6** Anu, na xa mi na ra de fa fala a Alaa tuli saan tœœœ mi fa na, bayo Isirayila kaane birin mi findixi Alaa yamana Isirayila xan na. **7** E to barixi Iburahima bœnsœnni, na mi a ra fa fala e birin findixi Iburahimaa dii kendene nan na. Amasœtœ Ala a fala nen a xa, a naxa, “Naxanye yatema i bœnsœnna ra, ne minima Isiyaga bœnsœnna nin.” **8** Na nan na ra, diin naxanye barixi adamadiyaan kii ma, Alaa dii mi ne ra, koni fœ Ala Iburahima tuli sa diin naxanye ra, ne nan findixi a dii kendene ra. **9** Amasœtœ Ala Iburahima tuli sa na kii nin, a naxa, “N fama nen waxati saxini, Saran yi dii xœmen bari.” **10** A birin mi na ra, Rebeka a dii firinne birin fafe keden nan yi a ra, en benba Isiyaga. **11** Anu, benun gulunni itœe xa bari, benun e xa fe fajin liga hanma a jaxina, Ala bata yi a ragidi na nde keden xa sugandi **12** hali ba e kewanle ra koni fœ a naxan

xilixi. A yi a fala Rebeka xa, a naxa, “Tadan luma nen xunyœna nœœn bun ma.” **13** A sebexi Kitabun kui ikiini, a naxa, “N bata Yaxuba xanu koni n bata Esayu rapaxu.” **14** En nanfe falama nayi? Ala tinxintareyaan nan ligaxi nayi ba? En-en de! **15** Amasœtœ a bata a fala Musa xa, a naxa, “N hinanye naxan na, n hinanma nen na ra, n kininkininje naxan ma, n kininkininma nen na ma.” **16** Na mi fataxi muxun waxœn feene xan na hanma a kewanle, koni fœ Alaa kininkininna. **17** Amasœtœ a sebexi Kitabuni, Ala a falama Firawona xa denaxan yi, a naxa, “N na i findixi mangan na nen alogo n xa n senben mayita i tan xœn, n xinla yi rali dunuƣa yiren birin yi.” **18** Nayi, Ala na wa kininkinin fœni naxan ma a kininkinin na ma, a na wa naxan natengbesen fe yi ayi, a na ratengbesenma ayi nen. **19** Muxuna nde a falama n xa nen, a naxa, “Nanfera Ala mœn nxu yalagima? Amasœtœ nde Alaa fe ragidixin matande?” **20** Nde i tan na naxan Ala matandima? Fejœn nœ a fale a rafala muxun ma ba fa fala nanfera i n nafalaxi iki? **21** Awa, nœœn mi feje rafalan yii ba, a feje firin nafala feje bende kedenni, keden binye wanle xa, boden fe fune xa? **22** Nayi, Ala yi wa a xœœœn nun a senben mayita fœni, a yi dija kati, a ti na muxune bun a xœœœ naxanye ma, naxanye yi halage. **23** A na liga nen alogo a xa a binye gbeen yita na muxune ra, a kininkinin naxanye ma, a bata yi naxanye yitœn a binyen sœtœ xinla ma. **24** Na nan en tan na, a naxanye xilixi, keli Yahudiyaane yœ e nun siya gbetene fan ye. **25** Amasœtœ a fala nen Nabi Hose xa, a naxa, “Naxanye mi yi n ma yamaan na, n ne xilima nen n ma yamana, n mi yi naxanye xanuxi, n ne xilima nen n xanuntenne.” **26** A mœn sebexi menni, a naxa, “A yi falama e ma denaxan yi, ‘N ma yamaan mi ε ra,’ e fa xili bama nen menni ‘Habadan Alaa diine.’” **27** Nabi Esayi yi a xuini te Isirayila muxune fe ra, a naxa, “Hali Isirayila muxune yi wuya ayi alo mejœnsinna naxan fœxœ igen de, hali na, e dœnxœdin nan tun kisima. **28** Amasœtœ Marigina a fe ragidixine rakamalima nen dunuƣa ma a kiini sa!” **29** A na kii nin, alo Nabi Esayi a fala kii naxan yi a fœœœni, a naxa, “Xa Marigina Senben Birin Kanna mi yi en yixetœna ndœœ lu nun, en yi luma nen nun alo Sodoma taana, en liga alo Gomora taana.” **30** En nanfe falama nayi? Siya gbetœn naxanye mi yi tinxinna fenma, ne bata a sœtœ denkeleyaan barakani. **31** Koni Isirayila kaan naxanye yi sariyan tinxinna fenma, ne mi a sœtœma. **32** Na di? Bayo e mi a fenxi denkeleyaan xœn fœ e kewanle. E yi e

sanna radin gemen na naxan xili, “San nadin gemenā”
33 Kitabun naxan ma fe fala, a naxa, “A mato, n bata gemen sa Siyon yi, yamana e sanna radinma gemen naxan na, e bira. Koni naxan na denkeleya a ma, na kanna mi nimisama.”

10 Ngaxakedenne, n waxi a xon ma n boɓɓen birin yi, n kon kaane xa kisi. N na Ala maxandima e xa na ra kati! **2** N findima nen e tan seren na fa fala Alaa fe kunfana e yi, koni e kolontareyani. **3** Ala muxune ratinxinma kii naxan yi a yete yee ra yi, e mi na kolon. Nayi, e bata kata, e yi e gbee kiraan sa, e mi xuruxi Alaa tinxinyaan bun. **4** Amasoto Alaa Muxu Sugandixin bata sariyan nakamali. Nanara, naxan na denkeleya a ma, na kanna bata tinxin Ala yee ra yi. **5** Muxune tinxinyaan naxan sotoma sariyan xon, Musa bata na fe sebe, a naxa, “Naxan na e suxu, na kanna nii rakisin sotoma nen e xon.” **6** Koni tinxinyaan naxan sotoma Ala yee ra yi denkeleyaan xon, na sebexi Kitabun kui ikiini, a naxa, “I nama a fala i yete ma fa fala nde noe te kore?” Na bunna neen, alogo a xa sa Alaa Muxu Sugandixin nagodo. **7** Hanma “Nde sigama laxira yi?” A xa sa Alaa Muxu Sugandixin nakeli sayani. (Abyssos g12) **8** Koni a nanse falaxi? A naxa, “Alaa falana i dexon ma, a i deen kui, a i boɓɓeni,” na nan denkeleyaan falan na, en naxan nalima iki. **9** Xa i i tiye a ra i deni fa fala Yesu nan Marigin na, i denkeleya i boɓɓeni, a Ala a rakeli nen sayani, i kisima nen. **10** Amasoto muxun denkeleyama a boɓɓen nin, Ala yi a ratinxinpe ayi a yee ra yi. A yi a ti a ra a deni, a kisi. **11** Amasoto Kitabun naxa, “Naxan yo na denkeleya a ma, na mi nimisama.” **12** Amasoto tagi raba mi Yahudiyane nun siya gbetene tagi. Marigi keden peen nan e birin xun na naxan a maxandi muxune birin kima a fonisireyani. **13** Amasoto Kitabun naxa, “Naxan yo na Marigin xili, na kisima nen.” **14** Koni e a xilima di, xa e mi denkeleya a ma? E denkeleyama di, xa e munma a fe me? E na mema di, xa muxu mi kawandin ba e xa? **15** Na kawandin bama di, xa xerane mi rasiga? A sebexi Kitabun kui na kii nin, a naxa, “Xera fajni yibane faan lanxi han!” **16** Koni Isirayila kaane birin mi na fe Xibaru Fajin suxi. Amasoto, Nabi Esayi a fala nen, a naxa, “Marigina, nde laxi nxo falan na?” **17** Anu, denkeleyaan fama Alaa falan meen nan xon ma. Alaa falan fan mema Alaa Muxu Sugandixina fe kawandin nan xon. **18** Koni n xa maxodinna ti: E mi a fe mexi ba? En-en, e bata a me! Kitabun naxa, “E fala

xuiin boxon birin li nen. E falane yi siga han dunuja danna.” **19** Awa, n mon xa maxodinna ti, “Isirayila muxune mi a famu ba?” Musa nan singe ito yabi. A naxa, “N na e raxoxolonma ayi nen muxune xon yama fajin mi naxanye ra. N yi e raxolo siya xaxilitaren xon.” **20** Esayi yi susu Alaa falani ito tiye, a naxa, “Naxanye mi yi n fenma, ne bata n to. Naxanye mi yi n maxodinma, n bata n yete yita ne ra.” **21** Koni a yi a fala Isirayila a fe ra, a naxa, “N na n yiini bandunma yama fala suxutare murutexine ma ferijen gben!”

11 N xa maxodinni ito ti: Ala bata a me a yamaan na ba? En-en de! Amasoto Isirayila kaan nan n tan yeteen na, Iburahima yixetena nde Bunyamin bonsonni. **2** Ala yamaan naxan sugandi a yete xa a foloni a mi ne rabepinxi. Nabi Eli a mawugama Ala xa Isirayila kaane fe ra Kitabun kui denaxan yi, e mi menna kolon ba? A naxa, **3** “Marigina, e bata i ya nabine faxes, e yi i ya saraxa gandene kala, n keden peen nan fa luxi, e mon kataxi n fan faxes feen na.” **4** Ala a yabi di? A naxa, “N bata muxu wuli solofere ramara n yete xa naxanye mi e xinbi sinxi Baali suxuren bun ma.” **5** A mon na kii nin iki, Alaa yama donxen luxi naxanye sugandixi hinanna xon waxatini ito yi. **6** Xa a ligaxi hinanna nan xon, muxune kewanla mi fa a ra. Xanamu Alaa hinanna mi yi findima hinanna ra. **7** Nanfe ligaxi nayi? Isirayila kaane yi naxan fenma nun e sebeen na, e mi na sotoxi. Koni fo Ala naxanye sugandixi ne nan a sotoxi. A donxene tondixi nen **8** alo a sebexi kii naxan yi Kitabuni, a naxa, “Ala bata xaxili xodexen fi e ma, e nun yeen naxanye mi seen toma e nun tunla naxanye mi falan mema han to.” **9** Dawuda yi a fala, a naxa, “Ala xa e jaxajaxane findi e suxu feren na e nun luti ratixin na e yee ra naxan e rabirama, e hakene yi saran e ra. **10** E yeene xa raforo ayi, e yi danxu! E fanna xa ba a ra waxatin birin!” **11** N na e maxodinma, Yahudiyane tantan waxatin naxan yi, e bira nen ba habadan? En-en de! Koni e to sin hakeni, siya gbetene yi kisi feen soto alogo xoxolonnyaan xa Isirayila kaane suxu. **12** Anu, xa Yahudiyane haken findi heri gbeen na dunuja muxune xa, xa e bonon findi herin na siya gbetene xa, e na a rakamali waxatin naxan yi, na fan mi herin nafe nayi ba? **13** N falan tima e tan siya gbetene nan xa iki. N bata findi xeraan na siya gbetene xa. N sewaxi na wanla ra bayo, **14** yanyina nde, n xoxolonnyaan nasoma nen n bonsonna muxuna ndee yi alogo e fan ndee

xa kisi. **15** Amasoto Isirayila kaane ramexi waxatin naxan yi, xa Ala nun dunuɲa muxune tagini tɔn, nanse fa ligama nayi, xa e mɔn so a lannayani? Na findima kenla nan na sayani siga nii rakisini. **16** Anu, xa buru keden nali Ala ma, e nun naxanye bɔnbɔxi e bode xɔn, ne fan sarijan. Xa wudin salenna sarijan, a yiine fan luma na kii nin. **17** Koni xa a yiina ndee sege wudi binla ma, i tan siya gbeten naxan luxi alo burunna Oliwi bili yiina, i tan yi xidi wudin binla ma e funfuni, i yi lu na wudin salenna igen sɔte, **18** i nama i yete yite na wudi yii segexine ma. Xa i na liga, i nama jiinan fa fala i tan xa mi salenna baloma de, salenna nan i tan baloma. **19** Koni waxatina nde i tan a falama nen, i naxa, “Wudi yiine segexi nen alogo n tan xa ti e funfuni.” **20** Nɔndin na a ra, e segexi nen masoto e denkeleyatareyaan ma, i tan yi ti e funfuni denkeleyaan xɔn. Nayi, i nama yanda ayi na feen na de, koni a liga i yeren ma. **21** Amasoto, xa Ala mi Yahudiyane ratangaxi, naxanye luxi alo wudi yii singene, a mi i fan natangama. **22** Nayi, en na en miri Alaa nemaan nun a ye xɔdexen ma. Naxanye tantanxi, a xɔdɔxɔ ne ma, koni a nemaan fan i tan na, koni fɔ i xa lu a nemaan bun nen, xanam, a i fan segema a binla ma nen alo wudi yiina. **23** Xa Yahudiyane mi lu e denkeleyatareyani, e mɔn tugunma nen e tiden na. Amasoto Ala nɔe e raxete nen e funfuni. **24** Bayo, xa i tan siya gbeten ligaxi nen alo burunna Oliwi wudi yiin naxan yi segexi a binla ma, i yi tugun taa kui Oliwi wudi kenden na hali i da kii mi yi a ra, nayi Yahudiyane yeteen naxanye ligaxi alo taa kui Oliwi wudi kenden yiine, Ala taganɲe ne tiye e yete binla ma e funfune yi ba? **25** Ngaxakedenne, n waxi Alaa wundo feni ito yita feni e ra, alogo e nama e yete yate fekolonne ra: Isirayila yamaan fɔxɔ kedenna tondixi han siyaan bonne xasabi defexin yi so. **26** Nanara, Isirayila birin kisima nen alo a sebexi Kitabun kui kii naxan yi, a naxa, “Xunbaan kelima nen Siyon yi, a Ala kolontareyaan birin ɲan Yaxuba bɔnsɔnni. **27** N na e yulubin ba e ma waxatin naxan yi, n layirin xidima na nan na e xa.” **28** Yahudiyane bata findi Ala yaxune ra alogo e tan xa Yesu a fe Xibaru Fajin soto. Koni Ala rafan yama sugandixin mɔn e ra e benba nabi singene fe ra. **29** Amasoto Alaa kiseene nun maragidin mi kalama. **30** E tan siya gbetene, e munma yi Alaa falan suxu a singeni, koni e bata Ala kininkininna soto iki amasoto Yahudiyane mi Alaa falan suxi. **31** Na kiini, iki Yahudiyane mi fa Ala xuiin suxuma alogo e tan

siya gbetene kininkininna naxan sotoxi, e fan xa na soto e tan siya gbetene sabun na. **32** Ala bata muxun birin findi kasorasane ra e fala suxutareyaan xɔn alogo a xa kininkinin e birin ma. (eleese g1653) **33** Alaa fonisireyaan nun a xaxilimayaan nun a fe kolonna tilin de! Nde nɔe Alaa fe ragidixine famunɲe? Nde nɔe a feene famunɲe? **34** A sebexi Kitabuni, a naxa, “Nde Marigina miriyane kolon? Nde nɔe finde a kawandi muxun na? **35** Nde nɔe Ala dɔle, alogo a mɔn xa a raxete a ma?” **36** Amasoto feen birin kelixi a tan yii a tan nan baraka yi a tan xa. Binyena a tan nan xa habadan. Amina! (aiɔn g165)

12 Ngaxakedenne, Ala to kininkininxi e ma, n na e mafanma e e fati benden fi Ala ma saraxan na e dunuɲa yi gidini, a sarijan, a rafan Ala ma. Na nan findixi batu fajin na e naxan ligama Ala xa. **2** E nama e yete lu dunuɲa feene yi, koni e xa e keɲaan masara xaxilimaya nenen xɔn, alogo e xa Ala sagoon kolon naxan fan, a rayabu, a kamalixi. (aiɔn g165) **3** N na a falama e birin xa Alaa maragidini a naxan fixi n ma, n naxa, e nama a miri xaxilitareyani a e dangu bonne ra, koni e miri e yete ma xaxilimayaan nun yete suxuni alo Ala denkeleyaan yatɔn naxan fixi e ma. **4** En fatin yirene wuya, koni e birin nun e wali. **5** A na kii nin, hali en to wuya, en bata findi fati bende kedenna ra Alaa Muxu Sugandixini, en lu en bode yi alo fatin yirene. **6** Ala en kixi seen sifa wuyaxi nan na, alo a ragidixi en ma kii naxan yi. Xa muxuna nde kixi nabiya falane yi, a falane xa lan denkeleyaan ma. **7** Xa wanla na a ra yamaan xa, a xa wanla ke. Naxan nɔe xaranna tiye, na xa xaranna ti. **8** Xa naxan nɔe muxune ralimaniye, na xa e ralimaniya. Naxan kiin tima, na xa a liga fonisireyani. Xa yeeratiin na a ra, na xa a sɔbe so na ma. Xa naxan kininkininma muxune ma, a xa a liga sewani. **9** E xanuntenyaan nama findi nafigiyaan na. E e me fe naxin na. Naxan fan, e na suxu ken! **10** E e bode rafan ngaxakedenyaan xanuntenyani, e yi e bode binya ki fajani. **11** E tunnafanna nama findi salayaan na. Koni e wali Marigin xa wekileni. **12** E sewa e yigina fe ra, e diɲa tɔroni, e lu Ala maxandini tun. **13** E muxu sarijanxine goronna tongo e makone yi. E fatan muxune yisuxe. **14** E duba e besenxɔnya muxune xa, e duba, e nama dangan ti. **15** Naxanye sewaxi, e sewa ne xɔn ma. Naxanye wugama, e wuga ne xɔn ma. **16** E kui feene xa findi kedenna ra e bode xa. E nama e waso, koni naxan yo magodoxi e tin na

ma. E nama e yete yate fekolonne ra. **17** E nama fe jnaxin jnaxo fe jnaxin na. E kata fe fajin liga feen na muxune birin yee ra yi. **18** Xa a lanje, fanni na fate e tan na, lanna xa lu e nun muxune birin tagi. **19** N xanuntenne, e nama e gbeen jnaxo, koni e a lu Alaa xolon ma, amasoto a sebexi Kitabuni, Marigin naxa, “N tan nan gbeenjnaxo tiin na. N feene saranma nen e jnaxonne ra.” **20** Koni e tan xa a liga na kiini: Kitabun naxa, “Xa kamena i yaxun ma, donseen so a yii. Xa min xonla a ma, igen so a yii, amasoto xa i na liga a xa, na luma a xa nen alo i tee wolonne nan malanma a xunna ma.” **21** I nama tin fe jnaxin xa i no. Koni fo i xa fe jnaxin no fe fajin xon.

13 Muxun birin xa xuru mangane ma. Amasoto mangaya yo mi na, naxan mi kelixi Ala ma. Mangan naxanye doxi, a tan nan ne doxi. **2** Nanara, naxan na murute mangane ma, na murutexi Alaa yamarin nan ma. Naxanye na ligama, ne kitin nan tima e yete ma. **3** Fe fajni rabaan mi gaxuma mangane yee ra, koni fo fe jnaxi rabana. I waxi i nama gaxu mangan yee ra ba? Nayi, fe fajin liga alogo a xa i matoxo. **4** Amasoto a findixi Alaa walikeen nan na alogo a xa fe fajin liga i xa. Koni xa i fe jnaxin liga, gaxu a yee ra! Bayo silanfanna mi a yii naxi fuu. Alaa walikeen nan a ra naxan a xolon nagodoma fe jnaxi rabaan ma, a a fe jnaxin saran a ra. **5** Nanara, fo e xa xuru nen mangane ma, fa fala e nama i toro, na mi a ra, koni alogo i nama i yete yalagi i xaxinli. **6** Nanara, e mudun fima, bayo naxanye e rasuxuma, ne Alaa wanla nan na. **7** E muxune donle fi. E lan e xa mudun sifa yo fi, e na fi. Xa e yii seene mudun na a ra, e na fi, xa binyen na a ra, e na fi, xa xunnayerenna na a ra, e na fi. **8** Muxu yo a doli nama lu e ma, fo xanuntenyana e lan e xa naxan namara e bode xa. Naxan na a boden xanu na bata sariyan defe. **9** Bayo yamarine naxa, “I nama yalunyaan liga. I nama faxan ti. I nama munan ti. I nama mila ayi.” E nun yamarin donxen bonne birin fala yisoxin ni i ra, “I adamadi boden xanu alo i yetena.” **10** Xanuntenyaan mi tinje fe jnaxin ma i boden xa mume! Xanuntenyaan nan sariyan nakamalima. **11** E na suxu bayo e waxatini ito kolon. Waxatini ito bata fa e raxulundeni e xixonli, bayo en kisi waxatini so iki dangu en ma denkeleyaan folo waxatin na. **12** Koon bata yanfan, kuye baan bata maso. Nayi, en xete feene foxo ra naxanye ligama dimini, en yi kenen ma yenge so seene tongo. **13** En xa

sgan ti alo naxan daxa, alo a lan kenenni kii naxan yi. En nama haramu sumunne liga, hanma dolon minna hanma yanga suxuna hanma haramu feene hanma lantareyana hanma xoxolonyana. **14** Koni e xa Marigi Yesu, Alaa Muxu Sugandixin tongo alo e domana. E nama lu e mire e fati benden nafa feene liga feen ma.

14 Muxun naxan ma denkeleya xurun e ye, e xa na yisuxu, e nama a miriyane matandi. **2** Muxuna ndee seen birin donma e denkeleyani, koni ndee tan bogi seene nan tun donma e denkeleyaan senbetareyani. **3** Muxun naxan seen birin donma, na nama muxun najaxu naxan bata a deen gele sa. Naxan a deen gele saxi, na nama muxun yalagi naxan seen birin donma, amasoto Ala bata a fan yisuxu. **4** Nde i tan na, i tan naxan muxu gbetena konyin makitima? Xa a bira, hanma xa a ti, na a kannan na. Koni a kelima nen, a ti amasoto a rati senben Marigin yii. **5** Muxuna ndee mirixi nen, a laxon na nde dangu nde ra. Gbeteye mirixi a ma, a laxon birin keden. Fo birin xa la a miriyaan na nen. **6** Naxan mirixi a ma, a laxon na nde dangu nde ra, na a ligama Marigin binya feen nan na. Naxan seen birin donma, na fan na ligama Marigin binya feen nan na, amasoto a barikan birama Ala xa na donsena fe ra. Naxanye gele donsena nde ra, ne na ligama Marigin binya fe nan na. Ne fan barikan birama Ala xa. **7** Amasoto en sese mi en nii ra en yete xa. En sese mi faxama en yete xa. **8** Xa en lu en nii ra, en luxi en nii ra Marigin nan xa. Xa en faxesa, en faxaxi Marigin nan xa. Nanara, xa en lu en nii ra, hanma xa en faxesa, Marigin nan gbee en na. **9** Amasoto Alaa Muxu Sugandixin faxaxi nen, a keli sayani alogo a xa findi faxesa muxune nun niiramane Marigin na. **10** Koni i tan, nanfera i i ngaxakedenna yalagima? Nanfera i a rajaxuma? En birin tima nen kiti sadeni Ala yetagi. **11** Amasoto a sebexi Kitabuni, a naxa, “Marigin naxa, ‘Habadan Ala nan n na, n bata n kolo n yete yi, xinbin birin sinma nen n bun ma, lenna birin yi Alaa binyena fe fala.’” **12** En keden kedenna birin en yete dentegema nen Ala xa. **13** Nanara, en xa fata en bode yalagin ma. Koni e kata alogo e nama fefe liga naxan e ngaxakedenna ratantanye hanma a yi a bira yulubini. **14** Bayo n na a kolon, n bata a famu Marigi Yesu barakani fa fala donse yo mi haramuxi a yete ma, koni xa muxuna a miri fa fala a haramuxi, nayi a haramuxi a tan xa. **15**

Xa i ngaxakedenna xoloxi i ya donsena nde a fe ra, i mi fa xanuntenya kira xon. Alaa Muxu Sugandixin faxaxi muxun naxan ma fe ra, i nama a liga, na yi halagin soto i ya donseen xon. **16** Feen naxan fan e tan xa, na nama findi e mafala xunna ra. **17** Amasoto Alaa Mangayaan mi findixi donseen nun minseen xan na, koni fo tinxinna nun boje xunbenla nun sewana, fata Alaa Nii Sarijanxin na. **18** Amasoto muxun naxanye birin walima Alaa Muxu Sugandixin xa na kiini, ne rafan Ala ma e nun muxune. **19** Nanara, feen naxanye findixi boje xunbenla nun en senbe soon na fo en xa ne nan liga. **20** I nama Ala kewanla kala donseen xon. Donseen birin donna daxa, koni donseen naxan muxu gbeten birama yulubini, na donseen donna mi daxa. **21** A fisa, i nama suben don, i nama manpaan min, i nama fefe liga xa a i ngaxakedenna bire hakeni. **22** I laxi naxan na feni itoe yi, na mara i yete xa Ala yetagi. Sewan na kanna xa naxan mi a yete yalagima a fe raba kiini. **23** Koni xa naxan sike donsena nde dondeni, na kanna yalagixin na ra Ala xon, amasoto a mi feen ligama denkeleyani. Anu, feen naxan mi ligama denkeleyani, yulubin nan na ra.

15 En tan naxanye senbe gbo denkeleyani, a lan en xa dija senbetare kanne bun e denkeleya xuriyani. En nama en yete rafan feen liga, **2** fo en xa en boden napan feen nan naba, en yi fan e ra. Nanara, e sabate denkeleyani. **3** Amasoto Alaa Muxu Sugandixin mi a rafan feene xan liga, koni alo a sebexi Kitabuni kii naxan yi, a naxa, “E i konbin naxanye tima, ne n tan nan lima.” **4** Amasoto naxan birin sebexi waxati danguxine yi, ne sebexi en xaran feen nan ma, alogo Kitabun xuiin xa tunnafanna nun limaniyaan fi en ma, en yi yigin soto. **5** Ala naxan tunnafanna nun limaniyaan fima, na xa e mali, e miriyane yi findi kedenna ra e bode xa, ne yi lan Alaa Muxu Sugandixin Yesu kepaan ma, **6** alogo e xa Ala binya miriya kedenna nun xui kedenni, en Marigi Yesu Alaa Muxu Sugandixin fafe. **7** E bode yisuxu Alaa binyena fe ra, alo Alaa Muxu Sugandixina e yisuxi kii naxan yi. **8** N xa a fala e xa, Alaa Muxu Sugandixin bata findi Yahudiyane walikeen na Alaa jondina fe ra alogo Ala bata en benba nabi singene tuli sa naxan na, a xa na rakamali, **9** siya gbetene fan yi Ala binya a kininkininna fe ra, alo a sebexi Kitabun kui kii naxan yi, a naxa, “Nanara, n ni i tantunma siyane tagi, n yi i xinla binya betini.” **10** A mon yi a fala, a naxa,

“Siyane, e nun Alaa yamaan xa sewa e bode xon.” **11** A mon yi a fala, a naxa, “Siyane birin xa Marigin tantun! Yamane birin xa a batu!” **12** Awa, Esayi fan yi a fala, a naxa, “Yese bonsonna mon kelima nen alo wudi salenna naxan a majingima, a mon soto siyane xun na. Siyane yi e yigi sa a yi.” **13** Nba, Ala naxan yigin kanna ra, na xa e ralugo sewan nun boje xunbenla birin na e denkeleyani alogo e yigin xa lu fari se Alaa Nii Sarijanxin barakani. **14** Ngaxakedenne, n na a kolon fa fala e lugoxi fanna nun fe kolonna birin na. E noe e bode xaranye nen. **15** Koni n bata susu, n yi fena ndee sebe e ma, alogo n mon xa a rabira e ma bayo Ala bata a ragidi n ma, **16** n yi findi Alaa Muxu Sugandixin Yesu a walikeen na siya gbetene xa. N lan n xa wali alo saraxaraliin naxan Alaa falan Xibaru Fajin nalima alogo siya gbetene xa findi saraxa se fajin na Ala xa, e rasarijan Alaa Nii Sarijanxin xon. **17** Nayi, n noe n kanbe nen Alaa Muxu Sugandixin Yesu yi n ma wanla fe ra Ala xa. **18** N mi suse falan tiye sese ma fo Alaa Muxu Sugandixin bata naxan liga n tan xon, a yi siya gbetene findi Alaa fala suxune ra n kewanle nun n ma falane xon, **19** e nun senben taxamasenne nun kabanako feene Alaa Nii Sarijanxin senben barakani. Nanara, folo Yerusalen taan ma han sa dexo Iliri yamanan na, n bata Alaa Muxu Sugandixina fe Xibaru Fajin nali na yiren birin yi han a kamali. **20** Na ma, xunnayerenna na a ra n tan xa, n xa Yesu a fe Xibaru Fajin nali na yirene yi Alaa Muxu Sugandixina fe munma kolon denaxanye yi, alogo n nama banxin ti muxu gbete a banxin beten saxin fari. **21** A sebexi Kitabuni na kii nin, a naxa, “A fe munma fala naxanye xa singen, ne a toma nen. Naxanye munma a fe me singen, ne a famuma nen.” **22** Na nan n yikalaxi sigadeni e konni. **23** Koni iki, n ma wanla bata jan yamanani itoe yi. Nanara, xabu jee wuyaxi n to waxi siga feni e xontondeni, **24** n yi a miri n xa na liga n nema sigde Sapan yamanani waxatin naxan yi. N yi waxi e to feni n nema dangue, e yi n mali n ma sigatini, n waxatidi ti e fema, n siga na yamanani. **25** Koni iki, n sigama Yerusalen taani, n sa yama sarijanxin mali na. **26** Amasoto a bata Masedoniya kaane nun Akaya kaane kenene, e xa e yii malan yiigelitone fe ra yama sarijanxin ye Yerusalen taani. **27** A e kenene n n e xa na liga, koni a donla mon yi e ma. Bayo xa siya gbetene bata Yahudiyane dinan tone soto, siya gbetene fan lan nen e yi Yahudiyane mali e yii

seene ra. 28 N na yelin feni ito ra waxatin yi, n yi a tɔnɔn so e yii, n danguma nen ε konni n nema sige Sapen yamanani. 29 N na a kolon yati, fa fala n nema sige ε konni waxatin naxan yi, n sigama Alaa Muxu Sugandixin duba kamalixin nin. 30 Ngaxakedenne, n na ε mafanma en Marigi Yesu Alaa Muxu Sugandixin xinli e nun Alaa Nii Sarijanxina xanuntenyani, ε xa ε yixɔdɔxɔ, ε yi Ala maxandi n xa. 31 E Ala maxandi n xa alogo a xa n xunba Yudaya denkeleyatarene yii, e nun n wanla naxan kema Yerusalen taani, na xa rafan yama sarijanxin ma na yi. 32 Nayi, xa Ala tin, n fama sewani nen ε fema, en birin yi matabun sɔtɔ en bode xɔn ma. 33 Bɔɲɛ xunbenla Ala xa lu ε birin xɔn. Amina.

16 E en ngaxakeden jaxalanmaan Foyibe yate muxu fajin na, naxan walima Sankire denkeleya yamaan xa. 2 E a yisuxu Marigin xinli alo a lan yama sarijanxin tagi kii naxan yi, ε a mali kiin birin yi a makoon na lu a ma denaxan yi. A tan yeteen bata muxu wuyaxi mali a gbengbenna n tan. 3 E Pisisila nun Akila xɔntɔn, n walike bodene Alaa Muxu Sugandixin Yesu xa. 4 E bata susu sayaan na n tan niina fe ra. N keden xa mi barikan birama e xa, siya gbete denkeleya yamane birin barikan birama e xa. 5 Denkeleya muxun naxanye e malanma e banxini, ε ne fan xɔntɔn. E n xanuntenna Epayinete xɔntɔn, naxan singe denkeleya Alaa Muxu Sugandixin ma Asi yamanani. 6 E Mariyama xɔntɔn naxan walixi ε xa kati! 7 E Andironiki nun Yuniyasi xɔntɔn n kon kaane, nxu nun naxanye sa kasoon na. E yatexi xerane yε. E singe denkeleya Alaa Muxu Sugandixin ma n tan yε ra. 8 E Anpiliyati xɔntɔn n xa, n xanuntenna Marigini. 9 E Yurubani xɔntɔn n xa, en walike bodena Alaa Muxu Sugandixin xa, e nun n xanuntenna Satakisi. 10 E Apelesi xɔntɔn naxan a yete yita Alaa Muxu Sugandixin gbeen na matoon xɔn. E Arisitobulaa denbayaan xɔntɔn. 11 E Herodiyon xɔntɔn, n kon kaana. E Narisisaa denbayaan muxune xɔntɔn naxanye laxi Marigin na. 12 E Tirifina nun Tirifosa xɔntɔn, jaxanla naxanye walima Marigin xa han! E nun n xanuntenna Perasi jaxalan gbeten naxan walixi Marigin xa han! 13 E Rufu xɔntɔn, Marigin naxan sugandixi, e nun a nga, naxan lu alo nga. 14 E Asinkirite nun Filegon nun Hereme nun Patirobasi nun Herimasi xɔntɔn e nun en ngaxakeden na naxanye e fema. 15 E Filologe nun Yuliye xɔntɔn e nun Nere

nun a magilena, e nun Olinpasi nun yama sarijanxin naxanye birin e fema. 16 E bode xɔntɔn ngaxakedenya xɔntɔn sunbuni. Alaa Muxu Sugandixin yamane birin ε xɔntɔnma. 17 Ngaxakedenne, n na ε mafanma, ε a liga ε yeren ma muxune fe yi naxanye muxune tagi taxunma, e yi e bira tantanni. E xaranna naxan sɔtɔxi, e na matandima. E masiga ne ra. 18 Amasɔtɔ na muxu sifane mi walima en Marigina Alaa Muxu Sugandixin xan xa mume, koni e yete rafan feen! E sɔntarene mayendenma e fala fajine nun e wule matɔxɔ falane ra. 19 Muxun birin bata a mε a ε Alaa falan suxuma. Nayi, n sewaxi ε fe ra han, koni n wama nen ε xa findi xaxilimane ra ε fe fajin kolon, ε yi fe jaxin matanga sɔntareyani. 20 Bɔɲɛ xunbenla Ala Setana halagima nen ε sanna bun. En Marigi Yesu xa hinan ε ra. 21 N walike boden Timote ε xɔntɔn e nun Lusiyusu nun Yason nun Sosipateri, n kon kaane. 22 N tan, Teritiyusi nan kedini ito seɓexi Pɔli xa, n fan bata ε xɔntɔn Marigin xinli. 23 Gayi ε xɔntɔn, nxu nun denkeleya yamaan birin yatigina. Erasite, taan gbeti ramarana e nun en ngaxakeden na Kuwaratusi ε xɔntɔn. 24 En Marigi Yesu Alaa Muxu Sugandixin xa hinan ε ra. Amina. 25 Ala naxan nɔε ε senbe soε n ma Xibaru Fajni raliin xɔn, e nun Yesu Alaa Muxu Sugandixin fe kawandi baan xɔn, fata na wundo feen kolonna ra naxan yi luxunxi to mi na ra, (aiōnios g166) 26 naxan bata mini kenenni iki nabine kitabune xɔn, fata habadan Ala yamarin na fa fala a xa rali siyane birin ma e yi denkeleya a ma, e yi a xuiin suxu, (aiōnios g166) 27 Ala naxan keden pe fe kolonna ra, en xa na Ala binya Yesu Alaa Muxu Sugandixin barakani habadan! Amina. (aiōn g165)

Kōrenti Singena

1 N tan Pōli, Ala naxan xilixi a sagoni, a yi n findi Yesu Alaa Muxu Sugandixina xeraan na, nxu nun en ngaxakedenma Sosaten nan ito sebema ε ma. **2** Nxu yi a rasiga Alaa denkeleya yamaan ma Kōrenti taani, muxun naxanye bata rasarijan Yesu Alaa Muxu Sugandixin barakani, naxanye xilixi alogo e xa findi yama sarijanxin na, e nun muxun naxanye birin Ala maxandima yiren birin yi en Marigi Yesu Alaa Muxu Sugandixin xinli, e Marigina, e nun nxu fan gbeena. **3** En Fafe Ala nun en Marigin Yesu Alaa Muxu Sugandixin xa hinanna nun bɔɲε xunbenla fi ε ma. **4** N barikan birama Ala xa ε fe ra waxatin birin amasoto a bata hinanna fi ε ma Yesu Alaa Muxu Sugandixin barakani. **5** Amasoto ε feene birin bata sabati Yesu barakani, a yi ε mali falan nun ε fe kolonni. **6** Amasoto nxo sereyaan bata rakamali ε yi Alaa Muxu Sugandixina fe ra. **7** Nayi, Alaa kise yo mi dasaxi ε ma ε nɛma en Marigi Yesu Alaa Muxu Sugandixin mame han a mini kenenni. **8** A mɔn ε marama nen ken, han waxati rapanna alogo en Marigi Yesu Alaa Muxu Sugandixin nama fe yo li ε ra a Fa Lɔxoni. **9** Ala naxan ε xilixi alogo ε nun en Marigi Yesu Alaa Muxu Sugandixin xa lan ε bode ma, na tinxin. **10** Ngaxakedenne, n na ε mafanma en Marigi Yesu Alaa Muxu Sugandixin xinli, ε birin xa lan ε bode ma, alogo ε nama yitaxun. E findi muxu kedenna ra, ε miriyane nun ε kui feene yi findi kedenna ra. **11** Amasoto ngaxakedenne, n bata a kolon Kilowe kon kaane xɔn, a lantareyana ε tagi. **12** N waxi naxan fala feni, na ni i ra: muxuna ndee a falama ε yε, e naxa, “N tan Pōli nan fɔxɔ ra.” Bonna naxa, “N tan Apolosi nan fɔxɔ ra.” Bonna fan naxa, “N tan Piyeri nan fɔxɔ ra.” Nde gbete fan naxa, “N tan Alaa Muxu Sugandixin nan fɔxɔ ra.” **13** Alaa Muxu Sugandixini taxunxin na a ra ba? Pōli nan gbangban wudin ma ε xa ba? E rafuxi igeni Pōli nan xili yi ba? **14** N barikan birama Ala xa fa fala n mi ε sese rafuxi igeni ε tubi xinla ma fɔ Kirisipu nun Gayi **15** alogo muxu yo nama a fala fa fala ε rafuxi n xinla nin. **16** N bata yi Esitefana nun a kon kaane fan nafu. Koni n mi fa a kolon xa n bata muxu gbete rafu. **17** Alaa Muxu Sugandixin mi n xexi, a n xa marafuun ti. A n xexi nen, a n xa sa Yesu a fe Xibaru Fajin nali, anu, n mi na ligama adamadiine lɔnni falane xɔn alogo Alaa Muxu Sugandixin faxa wudin senben nama ba a ra na yi. **18** Yesu faxa fena wudin

ma, na findixi xaxilitareyaan nan na muxune xa naxanye halagima. Koni Ala en tan naxanye rakisima, a findixi Ala senben nan na en tan xa. **19** Ito nan sebexi Kitabun kui: “N fe kolonne fe kolonna kalama nen, n yi xaxilimane xaxilimayani fu.” **20** Fe kolonna minen yi? Sariya karamɔxɔn minen yi? Waxatini ito muxu lɔnnixin minen yi? Dunuja muxune nun e fe kolonna mi Ala kolonxi a fe kolonni. Ala mi dunuja fe kolonna findixi daxuyaana na ba? (aiɔn g165) **21** Amasoto Alaa fe kolonna mi tinxu dunuja muxune xa Ala kolon e fe kolonni. A Ala kenɛnxi nen a xa muxu denkeleyaxine rakisi kawandini ito xɔn naxan luxi alo daxuyana yamaan xa. **22** Yahudiyane taxamasenne maxɔdinma, Girekine fe kolonna fenma. **23** Koni Alaa Muxu Sugandixin gbangban feen wudin ma, en na nan ma fe kawandi bama. Yahudiyane mi tinma na nan mε, e nun daxuyaana na a ra siya gbetene xa. **24** Koni Ala bata naxanye xili, xa a findi Yahudiyana na hanma Girekina, Alaa Muxu Sugandixin findixi Ala senben nun a fe kolonna nan na, na kanne xa. **25** Amasoto hali Alaa fena ndee nun daxuyaana maliga, na daxuyaana dangu muxune fe kolonna ra. Hali Alaa fena ndee nun senbetareyaana maliga, na senbetareyaana gbo muxune senben xa. **26** Ngaxakedenne, ε miri a ma, ε yi findixi muxun sifan naxanye ra Ala ε xilixi waxatin naxan yi. Fe kolon wuyaxi mi yi ε yε adamadiine yεε ra yi. Senbema wuyaxi mi yi ε yε, denbaya barakaxi wuyaxi mi yi ε yε. **27** Koni naxan ma fe findixi daxuyaana na dunuja muxune xa, Ala na nan sugandixi a xa fe kolonne rayagi. Naxan findixi senbetaren na dunuja muxune xa, a na nan sugandixi alogo a xa senbemane rayagi. **28** Dunuja muxune yoxi naxan ma, e yi a rapaxu, e yi a bɔte raba, e mi naxan yatexi se ra, Ala na nan sugandixi a xa dunuja se yatexine halagi. **29** Nayi, adamadi yo mi nɔε a yete matɔxe Ala yetagi. **30** Koni Ala bata ε kafu a Muxu Sugandixin Yesu ma, a yi a findi en ma fe kolonna ra fata Ala ra, e nun en ma tinxinna nun sarijanna nun xunbana. **31** Nanara, a sebexi Kitabun kui, a naxa, “Xa muxun naxan a yete matɔxoma, a xa a yete matɔxɔ Marigina fe ra.”

2 Ngaxakedenne, n to fa ε fema n xa fa Alaa fe sereyaana ba ε xa, n mi fala tilinxi ti ε xa fe kolonni. **2** Amasoto n na a ragidi nen fa fala n nama fefe kolon ε tagi, fɔ Yesu Alaa Muxu Sugandixina fe, naxan gbangban wudin ma. **3** Nanara, n yi ε fema senbetareyani, n yi xuruxurunma gaxuni. **4** N yi

xaranna nun kawandin naxan tima, n mi yi katama muxune mabandundeni adamadiine fe kolonna xan xɔn, fɔ Alaa Nii Sarijanxin senbena, **5** alogo ε nama denkeleya adamadiine fe kolonna ma, fɔ Ala senbena. **6** Anu, naxanye denkeleyaan bata kɔxɔ, nxu ne xaranna fe kolonna nde ma. Koni dunuja ito fe kolonna mi a ra, hanma dunuja kuntigine gbeena, naxanye halagima. (aiɔn g165) **7** Nxu tan Alaa fe kolonna wundo feen nan yebama, naxan yi luxunxi, koni Ala bata yi naxan nagidi en ma en ma binyena fe ra, benun dunuja xa da. (aiɔn g165) **8** Dunuja kuntigi yo mi na fe kolonna kolonxi. Xa e yi a kolon, e mi yi Marigin binyen kanna gbangbanje wudin ma nun. (aiɔn g165) **9** Koni alo a sebexi Kitabun kui kii naxan yi, a naxa, “Ala feen naxan yitɔnxi a xanu muxune yee ra, yeen munma na to, tunla munma na me, muxun xaxinla munma na yee to.” **10** Koni Ala bata a makenen en tan xa a Nii Sarijanxin barakani. Alaa Nii Sarijanxin feen birin bunna fenma hali Alaa fe tilinxine. **11** Amasoto nde muxune ye naxan noε muxun kui feen kolonje, ba a yete nii yi feen na naxan na kanna fatini. Na kiini, Alaa Nii Sarijanxin nan fan Alaa feene birin kolon. **12** En mi dunuja ito xaxinla xan sotɔxi, koni fɔ Alaa Nii Sarijanxina, Ala naxan nafaxi, alogo Ala seen naxanye birin fixi en ma, en xa ne kolon. **13** Nxu na feene nan falama, naxanye mi findixi muxune fe kolonne xaranne ra, koni fɔ Alaa Nii Sarijanxina xaranna. Nxu Alaa Niina feene yebama na kanna nan xa, na niin naxan yi. **14** Koni Alaa Nii Sarijanxin mi muxun naxan yi, na kanna mi Alaa Niina feene suxe mume. Daxuya feene nan ne ra a yee ra yi, a mi noε e famunje. Amasoto Alaa feene kolonma a Nii Sarijanxin nan xɔn. **15** Alaa Nii Sarijanxin muxun naxan boje yi, na kanna noε feene birin tagi rabe nen, koni muxu yo mi noε na kanna feene kolonje. **16** Amasoto, a sebexi Kitabuni, a naxa, “Nde noε Marigina miriyane kolonje alogo a xa a kawandi a yi a rakota?” Koni en tan, Alaa Muxu Sugandixina miriyana en yi.

3 Ngaxakedenne, n mi yi noε falan tiye ε xa alo muxun naxanye kɔxɔxi Alaa feene yi, koni alo dunuja muxune alo muxun naxanye dii jɔreyani Alaa Muxu Sugandixina feene yi. **2** N bata xaranna fi e ma naxan luxi alo xijne igena, donse xɔdexen mi yi a ra, bayo ε mi yi noε a rasuxe. Koni hali iki, ε mi a noε singen. **3** Amasoto ε mon luxi nen alo dunuja muxune. Bayo xɔxɔlonyaan nun lantareyana ε tagi.

Na mi a yitaxi ba fa fala a dunuja muxune nan ε tan na naxanye sigan tima alo adamadiin bonne? **4** E tan nde keden na a fala, a naxa, “N tan, Poli nan gbee n na,” boden yi a fala, a naxa, “N tan, Apolosi nan gbee n na,” adamadiyaan feene xa mi ne ra ba? **5** Nde Apolosi ra? Nde Poli ra? Alaa walikeen nan tun nxu tan na, naxanye ε malixi ε denkeleya. Birin a wanla rakamalima nen Marigin naxan soxi a yii. **6** N sansiin si nen, Apolosi nan yi a ige sama, koni Ala nan a rasabati. **7** Na kiini, sese mi sansiin si muxun nun a ige sa muxun na fɔ Ala naxan a rasabatima. **8** Sansiin si muxun nun a ige sa muxun birin lan, Ala ne keden kedenna birin saranma nen lan e wanla yaten ma. **9** Amasoto nxu findixi walikene nan na, naxanye nun Ala walima. E tan findixi Alaa xeen nan na, xanamui, Alaa banxina. **10** Ala bata a ragidi n ma a hinanni, n yi wali a xa alo banxi tiin naxan fatan, n yi banxin beten sa. Iki, muxu gbete bata banxin ti na fari. Koni fɔ birin xa a liga a yeren ma na banxin ti feni. **11** Amasoto banxi tiin mi noε banxi beten saxin maxete, bayo a bata yelin beten se. Alaa Muxu Sugandixin Yesu nan a beten saxin na. **12** Koni, xa muxu yo banxin ti na beten saxin fari, a xema banxin ti, hanma gbeti daxina, hanma bɔxɔ bun nafunle, hanma wudina, hanma sexena, **13** birin wali xɔnna makenenma nen Yesu Fa Lɔxoni. Amasoto teen nan fama, na yi muxun birin wali funfun mayita, xa a fan, xa a mi fan. **14** Xa muxun wanla nde ke teen mi naxan halage, na kanna na saranna sotoma nen. **15** Koni xa muxun wali xɔnna gan, a bata bono na yi. A yeteen kisima nen, koni a luma nen alo muxun na dangu teen xun ma. **16** E mi a kolon ba, fa fala a ε findixi Ala Batu Banxin nan na, Alaa Nii Sarijanxin doxodena? **17** Nanara, xa muxu yo Ala Batu Banxin kala, Ala na kanna halagima nen. Amasoto Ala Batu Banxin sarijan, ε tan yeteen nan Ala Batu Banxin na. **18** Nanara, muxu yo nama a yete mayenden. Xa muxuna nde ε tagi naxan a mirima fa fala a fe kolonna nan a tan na dunuja muxune yee ra yi, a yi lan nen, na kanna xa a yete yate xaxilitaren na, alogo a xa findi fe kolonna yatin na. (aiɔn g165) **19** Amasoto dunuja fe kolonna findixi daxuyaana nan na Ala yee ra yi, alo a sebexi Kitabun kui kii naxan yi, a naxa, “Ala xaxilimane suxuma e yetena kotene nan xɔn.” **20** A mon naxa yire gbete yi, “Marigin fe kolonne miriyane kolon fe fuune nan na.” **21** Nanara, muxu yo nama a kanba adamadiine yi sɔnon! Amasoto ε tan nan gbee itoe birin na: **22** Poli yo, Apolosi yo,

Piyeri yo, dunuja ito yo, siimayana hanma faxana, waxatini ito hanma naxan fama, ε gbeen nan e birin na, **23** koni Alaa Muxu Sugandixin nan fan gbee ε tan na, Ala nan fan gbee Yesu ra.

4 Na kui, muxune xa nxu yate Alaa Muxu Sugandixina walikene nan na, Alaa wundo feene taxuxi naxanye ra. **2** Nba, tinxinna nan maxadinxi walikeen ma. **3** Na mi fefe ra n tan xa, xa ε tan n yalagi hanma adamadiine kiti sadena nde. N tan yeteen mi nɔε n yete yalage, **4** bayo n xaxinla mi n yalagixi. Koni na mi a lige a n tinxin, bayo Marigin nan n makitima. **5** Nanara, ε nama kitin sa benun a waxati saxin xa a li, benun Marigin xa fa, naxan dimin fe luxunxine raminima kenenni, a yi bɔɲe yi feene makenen. Nayi, birin a binyen sɔte Ala yii. **6** Ngaxakedenne, n na feene birin falaxi n yete nun Apolosi ma ε tan nan ma fe ra alogo nxɔ misaala xa sandani ito bunna yita ε ra fa fala “E nama dangu fe sebexine ra.” E yi waso ayi, ε muxune rafisa e bode xa. **7** Nanse i tan danguxi bodene ra? Nanse i yii, naxan mi soxi i yii? Xa a soxi i yii nen, nanfera i fa i yete matɔxɔma alo i tan yeteen nan a sɔtɔxi? **8** E bata wasa sinma! E bata findi nafulu kanne ra sinma! E bata findi mangane ra, hali nxu tan mi naxan sɔtɔxi. A yi rafanɲe n ma ε xa findi mangane ra yati alogo nxu fan xa findi a ra ε xɔn. **9** Amasɔto n yengi yi a ma fa fala Ala bata nxu tan xerane lu xanbin na alo muxu suxin naxanye yalagixi e xa faxa yamaan yee ramaxa seen na, nxu to bata findi mato seen na dunuja muxune birin yetagi e nun malekane. **10** Daxun nan nxu tan na Alaa Muxu Sugandixina fe ra. Koni xaxilimaan nan ε tan na Alaa Muxu Sugandixini. Senbe mi nxu tan na, koni ε tan, senbena ε tan na. E tan binyaxi, koni nxu tan yarabixi. **11** Kamena nxu suxuma han iki yeteni e nun min xɔnla nun marabenna. Nxu njaxankataxi, sigatiin nan fa nxu ra. **12** Nxu taganma wale nxu yiine ra. E na nxu danga, nxu duba e xa. E na nxu besenxɔnya, nxu limaniya. **13** E na nxu mafala, nxu tan yi e ralimaniya. Nxu bata findi dunuja njama bɔxɔn daxin na alo se xɔsixinne han iki. **14** N mi ito sebexi ε ma alogo n xa ε rayagi, koni alogo n xa ε rakolon alo n xanunten diine. **15** Amasɔto hali karamɔxɔ wuli fu yi tixi ε yee ra nun naxanye ε xaranma Alaa Muxu Sugandixina fe ma, fafe keden peen nan ε xa. Amasɔto n bata findi ε fafe ra Alaa Muxu Sugandixin Yesu a fe yi, n Yesu a fe Xibaru Fajin nali ε ma. **16** Nanara, n na ε mafanma, ε

xa n naliga. **17** N Timote rasigama ε ma na nan ma. N nafan diin nan a tan na e nun tɔgɔndiya muxuna Marigina fe yi. A n ma kirane rabirama ε ma nen Alaa Muxu Sugandixin Yesu yi, n denkeleya yamane birin xaranma naxanye ma yiren birin yi. **18** E tan ndee ε yete yigboma, a n mi fa fama ε fema sɔnɔn. **19** Koni xa Marigin tin, n fama nen ε fema iki sa. Nayi, n fama nen na muxu wasoxine senben kolondeni, hali e falan gbansanna mi a ra. **20** Amasɔto falan xa mi Alaa Mangayaan na, fɔ senbena. **21** Nanse rafan ε ma? N xa fa bosaan na ε yee ra? Hanma xanuntenyaan nun limaniyana?

5 Nba, e a falama fa fala a muxuna ndee yanga suxuni ε tagi. Na yanga suxu kiin njaxu kati, hali denkeleyatarene mi na njɔxɔnna ligama. Muxuna nde bata a nga xuri tongo. **2** Hali na, ε mɔn ε wasoma! A yi lan nun, ε xa sunu na ma, muxun naxan na fe sifan ligaxi, ε yi na ba ε tagi. **3** Hali n gbindin mi ε fema koni n xaxili ε xɔn. Muxun naxan bata na fe sifan liga, n bata yelin na kanna yalage alo n nema yi ε fema. **4** E na ε malan Marigi Yesu xinli, n fan xaxili ε xɔn ma, Marigi Yesu senben fan ε xɔn ma, **5** na waxatini, ε na kanna kedi ε tagi, a lu Setana yii, alogo a fati benden nafan feene xa kala, a niin yi kisi Marigin Fa Lɔxɔni. **6** E yete matɔxɔn mi fan mume! E mi a kolon ba, fa fala a “Buru rate sena ndedi nan buru fupin birin natema?” **7** Nayi, ε yete rasarijan! E haken ba ε tagi naxan luxi ε ye alo buru rate se fonna buru xunni. E lu alo buru nenen naxan mi basanxi se gbete ra. Amasɔto Alaa Muxu Sugandixin bata faxa en xa alo Halagi Tiin Dangu Lɔxɔn saraxa yexɛena. **8** Nayi, en xa na sanla raba a kiini. En nama a liga buru rate se fonna ra naxan luxi alo marajaxun nun fe njaxina. Koni en xa a liga alo buru rate seen mi basanxi burun naxan na, sarijanna nun njɔndini. **9** N na a sebe nen ε ma n ma kedindin kui, a ε nama ε nun yanga suxune malan. **10** Koni n mi a falaxi dunuja ito muxune xan ma fe ra, naxanye yanga suxuni, hanma milantenne hanma kansun tiine hanma suxure batune. Xa a yi na kii nin nun, fɔ ε mini dunuja yi feu! **11** Iki, n na a sebema ε ma fa fala, muxun naxanye bata e yete findi denkeleya muxune ra, koni e lu yanga suxuni, hanma milantenyaan, hanma suxure batuna, hanma nafiyyana, hanma dolo minna hanma kansun tina. Hali ε nun ne nama ε yii malan donse dondeni. **12** Anu, n tan ma wali mi a ra, n yi denkeleyatarene

makiti. Koni ε tan xa mi lan ε yi denkeleya yamaan muxune makiti ba? 13 Ala nan denkeleyatarene kitine bolonma. A sebexi Kitabuni, a naxa, “E xa muxu jaxin kedi ε tagi.”

6 Xa yengen muxu firinna tagi denkeleya yamani, nanfera ε tinma na kitin xa sa tinxintarene tagi, benun a xa sa yama sarijanxin tagi? 2 E mi a kolon ba, fa fala yama sarijanxin dunujaa kitin sama nen? Nba, xa ε dunuja kitine sama nen, nanfera ε mi nœ fe xuridine kitin se? 3 E mi a kolon ba fa fala a en tan nan malekane makitima? En fa taganje dunuja ito feene ma nayi ba? 4 Nba, xa yengene ε tagi dunuja feene ma, ε muxune dœxe kitisane ra nayi naxanye mi binyaxi denkeleya yamaan tagi ba? 5 N na ε yagi feen nan falama nayi. Na bunna neen ba, fa fala fe kolon yo mi ε tagi naxan nœ denkeleya muxu firinna tagi kitin se? 6 Koni denkeleya muxuna nde bata a ngaxakedenna nde xili kitini denkeleyatarene konni denkeleyatarene yee xœri! 7 Xa kitine ε tagi, bœnœn nan na ra. Benun na xa liga, a mi yi lan ba, ε xa tin tinxintareyaan yi liga ε ra nayi? Nayi, ε mi yi lan ba, ε tin kansunna ma? 8 Koni ε tan yeteen nan tinxintareyaan ligama, ε yi ε ngaxakedenmane yii seene kansun. 9 E mi a kolon ba fa fala tinxintarene mi keen sœtœma Alaa Mangayani? E nama ε yete mayenden. Yanga suxune hanma suxure batune hanma yalundene hanma xemen naxanye kafuma e bode ma, 10 hanma mujadene hanma milantenne hanma dœlo minne, hanma nafigine, hanma kansun tiine, ne sese mi keen sœtœma Alaa Mangayani. 11 E tan ndee yi na kii nin nun, koni ε yulubine bata xafari, ε rasarijan, ε yi findi muxu tinxinxine ra en Marigi Yesu Alaa Muxu Sugandixin xinli a Nii Sarijanxin barakani. 12 E a falama nen, ε naxa, “Feen birin daxa n tan xa.” Koni tœnœ mi feen birin na. E naxa, “Feen birin daxa n tan xa.” Koni n tan mi tinje luye sese a konyiya bun. 13 E mœn a falama, ε naxa, “Kuiin nan gbee donseen na, donseen nan fan gbee kuiin na.” Koni Ala e firinna birin halagima nen. Muxun fati benden mi rafalaxi yanga suxun xan xili yi bayo Marigin nan gbee fati benden na, e nun Marigin fan fati benden nan xa. 14 Ala bata Marigin nakeli sayani, a en tan fan nakelima nen a senbeni. 15 E mi a kolon ba fa fala a ε fati benden findixi Alaa Muxu Sugandixin fati benden yirena nde nan na? Nayi, n lan n xa Marigin fati benden din yalunden fatin na ba? En-en de! 16 E mi a kolon ba fa

fala xemen naxan nun jaxalan yalunden kafuma, a ne bata findi fati bende kedenna ra? Na ma, a sebexi Kitabuni: Ne firinna bata findi fati bende kedenna ra. 17 Koni naxan a yete tugunma Marigin na, na nun Marigin findima nen kedenna ra. 18 E gi yanga suxun bun. Muxun yulubi gbetœn naxanye ligama ne mi a fati bendeni, koni muxun naxan yangan suxuma na yulubin ligama a yete fati benden nan xili ma. 19 E mi a kolon ba fa fala Alaa Nii Sarijanxin Batu Banxin nan ε fati benden na, Niin naxan ε yi, Ala naxan fixi ε ma? E gbee mi ε fati benden na. 20 Amasœtœ a ε xunbaxi sare xœdœœn nan na. Nayi, ε Ala binya ε fati bendeni.

7 E naxan falaxi ε kedin kui, en fa na ma fa fala xa a lan xemen nama jaxanla tongo. 2 Anu, yanga suxun to bata gbo ayi, a lan xemen birin xa jaxalan keden futu a yete xa. Xemen birin ma jaxalan xa lu a yii, jaxanla birin ma xeme yi lu a yii. 3 Xemen lan a xa naxan liga a jaxanla xa, a xa na liga a xa. Naxanla fan na kii nin a xemen xa. 4 Naxanla sago mi a yete fati bendeni fœ a xemena. Na kiini, xemen fan sago mi a yete fati bendeni fœ a jaxanla. 5 E nama tondi ε bode ra fœ xa ε firinna bata waxatina nde sa lan na fe ma alogo ε xa lu Ala maxandœ. Na xanbi ra, ε mœn yi lu ε bode ra alogo Setana nama ε ratantan ε yete suxutareyaan xœn. 6 N tinxi naxan ma n na nan falama na ra. A mi findixi yamarin xan na. 7 N yi wama nen, birin xa findi jaxalan dœxœtœren na alo n tan, koni birin nun a kiseen na a ra Ala xœn. Nde na ito sœtœ, nde fan yi nde gbete sœtœ. 8 Nba, naxanye mi futun bun e nun kaja gilene, n ni ito nan falama ne fe yi. A lan e xa lu e danna alo n tan. 9 Koni xa e mi nœ e yete suxe, a lan nen e xa lu futun bun, amasœtœ na fisa benun e xa lu kunfa gbeeni. 10 Nba, naxanye futun bun, n yamarini ito fima ne nan ma fe ra. N tan mi a ra fœ Marigina. Naxanla nama a me a xemen na. 11 Xa a a me a xemen na, a nama dœxœ xeme gbete xœn. Xanamu, e nun a xemen tagin xa yitœn. Xemen fan nama a jaxanla rame. 12 N ni ito nan falama muxun bonne xa. N tan nan a falama, Marigina falan mi a ra. Xa jaxalan denkeleyatarena nde xeme denkeleyaxina nde yii, xa jaxanla tin a e xa lu e bode ra, a mi lan xemen yi a me a ra. 13 Xa jaxalan denkeleyaxina nde dœxi xeme denkeleyatarena nde xœn, xa xemen tin a e xa lu e bode ra, a mi lan jaxanla yi a me a ra. 14 Amasœtœ xeme denkeleyataren bata rasarijan a jaxanla xœn. Na kiini jaxalan denkeleyataren fan bata rasarijan a

xeme denkeleyaxin xon. Xa na mi yi a ra nun, e diine yi findima nen muxu sarijantarene ra, anu jondin naxan na e rasarijanxi. **15** Koni xa denkeleyataren waxi a me feni a xemen na hanma a jaxanla ra, a lu a xa siga. Denkeleya muxun mi fa xidixi nayi a na findi xemen na hanma jaxanla. Amasoto Ala en xilixi boje xunbenla nin. **16** Amasoto i tan jaxanla, i a kolonma di, xa i noe i ya xemen nakise? I tan xemena, i a kolonma di, xa i noe i ya jaxanla rakise? **17** Ba na ra, birin xa lu a kiini alo Marigina a ragidixi a ma kii naxan yi Ala a xili waxatin naxan yi. N yamarini ito nan soxi denkeleya yamane birin yii. **18** Alo misaali itoe: Xa xemena nde yi banxulanxi Ala a xili waxatin naxan yi, a nama a banxulanya luxun. Koni xa nde gbete mi yi banxulanxi benun Ala xa a xili, a nama tin sonon, a xa banxulan. **19** Amasoto xa i banxulanxi, xa i mi banxulanxi, fefe mi na ra fo i xa Alaa yamarine nan suxu. **20** Birin xa lu a kiini alo a yi kii naxan yi benun Ala xa a xili. **21** Ala i xili waxatin naxan yi, xa konyin nan yi i tan na, i nama xamin na ra. Koni xa i noe feren sote i xoroya, na liga. **22** Amasoto Marigin bata konyin naxan xili, Marigina xoron nan na ra. Ala bata xoron naxan xili, na fan bata findi a Muxu Sugandixina konyin na. **23** Ala e saraxi sare xodexen nan na. E nama findi adamadiine konyine ra. **24** Ngaxakedenne, e keden kedenna birin xa lu e kiini Ala yetagi alo e yi kii naxan yi benun Ala xa e xili. **25** Muxun naxanye mi futun bun, e naxan sebexi ne fe ra, en fa na ma. Marigina yamarin xa mi ito ra, koni Ala to bata n findi tinxin muxun na a kininkininni, n na n ma miriyaan nan falama. **26** Toro waxatini ito yi, a lan nen muxun xa lu alo a kii naxan yi. **27** Xa jaxanla i yii, i nama kata fa fala i xa a bepin. Xa jaxalantare kanna nan i ra, i nama jaxanla fen. **28** Koni xa i futun ti, yulubin mi na ra. Xa sungutunna doto xeme taa ra, yulubin mi na ra. Koni naxanye futun tixi, ne toro wuyaxi sotoma nen e dunuja yi gidini, n waxi n xa ne masiga e ra. **29** Ngaxakedenne, n naxan ma, na ni ito ra. Waxatin mi fa xunkuya sonon. Folo iki ma, jaxalan kanne xa lu alo jaxalan mi e yii. **30** Muxun naxanye wugama, e xa liga alo e mi yi wugama. Muxun naxanye sewaxi, e xa liga alo e mi yi sewaxi. Naxanye bata saren so, ne xa liga alo e mi se ramarama. **31** Muxun naxanye dunuja seene rawalima, e xa liga alo e mi tono sotoma e yi. Amasoto dunuja ito danguma nen. **32** Nba, a xoli n ma nen e xa xoroya xaminna birin ma. Naxalantare kanna a

joto luma Marigina wanla nan tun xon alogo a xa Marigin nan kenene. **33** Koni jaxalan kanna a joto luma dunuja feene nan xon alogo a xa a jaxanla kenene. **34** Nayi, a feene yitaxunxin na a ra. Naxanla naxan fan mi futuxi hanma sungutunna, ne joto luma Marigina wanle nan tun xon alogo e xa findi Ala gbeen na fati benden nun niini. Koni jaxanla xeme kanna, na a joto luma dunuja feene nan xon, alogo a xa a xemen kenene. **35** N na falama e xa e mali feen nan na. N mi kataxi, n xa e raxolo. Koni n waxi a xon ma nen e xa lu fe fajine nan fari naxanye lanxi, alogo e xa lu biraxi Marigin nan tun foto ra. **36** Xa banxulanla bata jaxanla masuxu, a yi a miri a a sungutunna toroma nen, xa a fa fori, a mi a doto. Xa a waxi a doto feni, nayi a xa a waxon feen liga, a mi yulubi ligaxi na yi. **37** Koni xa xemena a ragidi a bojeni, karahan mi naxan na, a a nama sungutunna doto, a mon noe a yete suxe, fe fajin nan na fan na. **38** Na ma, naxan bata a gbeen futu, na bata fe fajin liga, koni naxan mi a gbeen futuxi, na bata fe fajin liga dangu bonna ra. **39** Jaxanla xa doto a xemen xon han a xemen yi faha. Koni xa a xemen faha, a bata xoroya nayi, a noe dote nen gbete xon ma naxan nafan a ma. Koni a xa findi Marigin gbeen nan na. **40** Koni n ma miriyani, sewana a xa, xa a lu a kiini. N laxi a ra mon, fa fala Alaa Niina n fan yi.

8 E naxan sebexi subena fe yi naxan bata rali suxurene ma, en fa na ma. Fe kolonna en birin yi. Fe kolonna muxun findima wasoden nan na, koni xanuntenyaan maliin nan tima. **2** Muxun naxan a mirima fa fala a fe kolon, na mi fe kolon alo a lan a xa a kolon kii naxan yi. **3** Koni muxun naxan bata Ala xanu, Ala na kanna kolon. **4** Nanara, donseen naxan bata rali suxurene ma, en fa na nan ma fe falama. En na a kolon fa fala suxuren mi findixi sese ra dunuja yi. Ala keden peen na a ra. **5** Hali batu se wuyaxi to boto xonna nun kore xonna fari, muxun naxanye ma a “alane,” hali “ala” wuyaxi nun “marigi” wuyaxi yi na nun, **6** koni en tan mabinni, Ala keden peen na a ra. A tan nan en fafe ra naxan seen birin daxi. En na en ma dunuja yi gidin ligama a tan nan xa. Marigi keden peen na a ra, Yesu Alaa Muxu Sugandixina. Seen birin daxi a tan nan baraka yi. En na en ma dunuja yi gidin ligama a tan nan baraka yi. **7** Koni muxun birin mi ito kolon. Muxuna ndee bata dari suxure kii feene ra. Hali iki, e nema donse sifani ito donje, e yengi luma a

xōn ma nēn a e suxuren kiseen nan donma. E xaxili kobin fan e yalagima, a e xōsi. **8** Koni donseen mi en masoma Ala ra. Xa en na a don, en mi bōnōma sese yi. Xa en mi a don, en mōn mi tōnō yo sōtōma. **9** Koni hali feene liga feen xōrōyaan to ε yi, ε a liga ε yeren ma, ε nama na muxune bira yulubini naxanye munma senbe sōtō denkeleyani. **10** Amasōtō muxun naxan senbe mi gbo denkeleyani feni ito yi naxan xaxinla kobi, xa na i tan fekolonna li i dege suxure banxini, na mi na fan nawekile a fan yi suxure kii donseen don ba? **11** Nba, na muxun naxan munma senbe sōtō denkeleyani, Alaa Muxu Sugandixin faxaxi naxan xa, na halagima nēn i tan fekolonna xōn ma na yi. **12** Nba, ε na haken liga i ngaxakedenna ra na kiini, i yi a xaxili kobin natantan, i mōn yulubin ligama Alaa Muxu Sugandixin na na haken nan xōn. **13** Nanara, xa donsena a lige ngaxakedenna yi bira yulubini, n tan fan mi fa na suben donje sōnōn mume, alogo n nama a bira yulubini! (aiōn g165)

9 Xōrō mi n tan na ba? Xera mi n tan na ba? N tan mi en Marigi Yesu toxi ba? N wali xōnna xa mi ε tan na Marigini ba? **2** Hali bonne mi n kolon xeraan na, koni fō ε tan xa a kolon nēn! Bayo ε tan to bata denkeleya, na findixi n ma xerayaan taxamasenna nan na Marigini. **3** N na n xōnbama falani itoe ra n tōnjege muxune nan xa. **4** N naxa, nxu mi daxa nxu xa nxu dege nxu yi nxu min? **5** Nxu mi daxa, nxu fan yi denkeleya naxanla nde futu ba, a yi siga nxu fōxō ra sigatini alo xeraan bonne nun Marigin xunyene nun Piyeri a ligan kii naxan yi? **6** Nxu nun Baranabasi nan tun daxa ba, nxu wali donse feen na? **7** Sofaan mundun a yete goronna tonge a sofa wanli? Nde wudin siye, a mi a bogine don? Nde xuruseene rabe a mi e nōnōn min? **8** N ma falani ito findixi adamadiine miriyaan gbansanna nan na ba? Sariya Kitabun fan mi na fe kedenna xan falaxi ba? **9** Amasōtō, a sebexi Musaa Sariya Kitabun kui, a naxa, “I na jingen ti malo bodonna ra, i nama a dēen xidi.” Ala a jōxō luxi jingene nan gbansan xōn ma ba? **10** A mi ito falaxi en tan xan ma fe ra ba? Di, ito sebexi en tan nan ma fe ra yati. Xēe biin nēen xēen bima, malo xaban nēen maala xabama, e yigi saxi se xabaxine yitaxunna nan ma. **11** Nxu tan to bata sansiin woli ε tagi naxan findixi Alaa feene ra, xa nxu fati benden mali seen sōtō ε yii, na naxu ba? **12** Xa a daxa ε xa bonne mali seni itoe ra, a mi daxa nxu tan xa dangu ne ra ba? Anu, nxu

tan mi sariyani ito rawalixi. A makuya na ra. Nxu bata dija feen birin ma alogo sese nama Alaa Muxu Sugandixina fe Xibaru Fajin madigan. **13** E mi a kolon ba, fa fala a muxun naxan walima Ala Batu Banxini, na a donseen sōtōma Ala Batu Banxin nin? Naxanye saraxane bama, ne e gbeen sōtōma saraxan nin. **14** Marigina en yamarixi na kii nin fa fala naxan Yesu a fe Xibaru Fajin nalima, na xa a balon sōtō na xōn ma. **15** Koni n tan mi sariyani ito sese rawalixi. N mōn mi ito sebexi ε ma ε xandi feen xan ma iki. A rafanjē n ma n xa faxa benun n kanba xunni ito xa ba n yii. **16** Anu, n na Yesu a fe Xibaru Fajin nali, na mi finde kanba xunna ra n xa bayo Ala bata na goronna dōxō n xun ma. Gbalona n tan xa, xa n mi Xibaru Fajin nali! **17** Xa n yi wanli ito kēma n jēnige fajin nin, n yi saranna sōtōma nēn, koni bayo n karahanxi nēn, n goronna nan tun bama n ma. **18** N saranna nanse ra na yi? Na ni ito ra: n xa Yesu a fe Xibaru Fajin nali hali n sare mi fi alogo n nama na sariyan nawali n yi seen sōtō Xibaru Fajin xōn. **19** Xōrōn nan n tan na, muxu yo a konyi mi n tan na koni n bata n yete findi muxun birin ma konyin na alogo n xa muxu wuyaxi sōtō n nōe naxan na. **20** N nēma Yahudiyane tagi, n na n yete lu alo Yahudiyane alogo n xa e masōtō. Naxanye sariyan bun ma, n nēma ne tagi, n yi n yete lu alo n sariyan nan bun ma alogo n xa ne masōtō, hali n to mi sariyan bun ma. **21** Naxanye mi sariyan sōtōxi, n yi n yete lu ne ye alo e tan, naxanye mi sariyan kolon alogo n xa ne masōtō hali n to mi xōrōyaxi Alaa sariyan ma amasōtō n fa Alaa Muxu Sugandixina sariyan nan bun. **22** Muxun naxanye munma senben sōtō denkeleyani, n yi lu ne tagi alo naxan senben xurun denkeleyani, alogo n xa e masōtō. N bata n yete findi muxun sifan birin na muxun birin xa alogo n xa ndee rakisi kiin birin yi. **23** N ni ito birin ligama Alaa falan Xibaru Fajin nan ma fe ra alogo n fan xa n gbeen sōtō a yi. **24** E mi a kolon ba fa fala naxanye e malanma e gideni xatājōxōya giini alogo xulunden xa to, a e birin e gima nēn koni keden nan gbansan yēerati kontōnna sōtōma. Nayi, ε gi alogo ε xa kontōnna sōtō. **25** Muxun naxan katama a boden lu feni fe sifani itoe yi fō na kanna xa a yixōdōxō, a a yitōn yete suxuni. A na ligama nēn alogo nō sōtōn taxamasenna xa so a xunna naxan mi buma. Koni en tan a ligama nēn alogo mangaya taxamasenna xa so en xun na naxan luma habadan. **26** Nanara, n mi n gima n xunna yi. N mi yenge soma alo muxun naxan a yiin wolima

foyeri tun. 27 A makuya na ra. N na n fatin suxuma a xodexen nan na alo konyina, alogo n na kawandin ba bonne xa, n tan yeteen nama fula a tonon na.

10 Ngaxakedenne, n waxi a xon ma e xa a kolon fa fala en benbane bira nen Musa foxo ra kundaan bun han e birin yi baani gidi. 2 A yi luxi alo e rafu nen e tubi xinla ma Musa xon kundaan nun baa igeni. 3 E birin yi na niin donse kedenna don, 4 e yi na siimaya ige kedenna min, bayo e igen min nen keli Alaa gemeni gemen naxan findixi a Muxu Sugandixin na naxan yi biraxi e foxo ra. 5 Koni hali na, e wuyaxi mi Ala kenon, e binbine yi lu burunna ra. 6 Nba, misaala nan ne birin na en tan xa alogo en nama en miri fe jaxin ma alo ne a liga kii naxan yi. 7 En nama suxuren batu alo na ndee a liga kii naxan yi. Bayo a sebexi Kitabuni, a naxa, “Yamaan yi doxo e degedeni e nun e mindeni, e lu kele, e sabaan so.” 8 En nama yangan suxu alo na ndee a liga kii naxan yi, e muxu wuli maxonon nun saxan yi faxa soqe kedenni. 9 En nama Alaa Muxu Sugandixin mato bunbani alo na ndee a liga kii naxan yi, sajine yi e faxa. 10 E nama e mawuga alo na ndee a liga kii naxan yi, Ala yi Halagi Tiin nafa, a yi e faxa. 11 Feni itoe birin liga nen e ra, e findi misaale ra, e yi sebe en nakolon seen na, waxati rajanna bata a li en tan naxanye ma. (aiōn g165) 12 Nayi, naxan na a miri fa fala a a tixi ki fajni, na xa a liga a yeren ma alogo a nama bira. 13 E ratantan feen naxanye bata e soto, ne darixi adamadiine liye nen. Koni bayo Ala tinxin, a mi tinje tantan feen xa e soto dangu e senben yaten na. Na ma, tantan feen nema e foxo ra, Ala yi na yi mini feren fi e ma, alogo e xa lu tinxinni. 14 Nanara, n xanuntenne, e e gi suxure batun bun. 15 N falan tima e xa alo xaxilimane, e yeteen xa n ma falan mato. 16 En na barikan bira Ala xa Marigina igelengenna xon, en yi en min, na mi en nun Alaa Muxu Sugandixin wunla malanma ba? En burun naxan donma na waxatini, na mi en nun Marigin fati benden malanma ba? 17 Buru xun keden to a ra, en birin bata malan en lu alo fati bende keden peena, hali en to wuya, bayo en birin nde sotoma na buru kedenna nin. 18 E Isirayila kaane mato, naxanye saraxa subene donma, lanna mi ne nun saraxa ganden tagi ba? 19 N waxi nanse fala fe yi nayi? Suxure kiin findixi senbena nde ra ba hanma suxuren findixi se kenden nan na ba? 20 Na mi a ra, koni suxure batune saraxan naxanye bama, e ne ralima Setana malekane nan ma, Alaa fe mi na ra feul

Anu, n mi waxi lanna xa lu e nun yinnane tagi. 21 E mi nce e minje Marigina igelengenna ra, e mon yi e min suxurene igelengenna ra. E mi nce Marigina ximenna donje e nun jinnane don seene. 22 En waxi Marigina xoxolonna nan nakeli fe yi ba? En senben gbo a xa ba? 23 E naxa, “Feen birin daxa nxu tan xa.” Koni tonon mi feen birin yi. E naxa, “Feen birin daxa nxu tan xa,” koni feen birin xa mi en malima. 24 Muxu yo nama herin fen a yete xa tun, fo muxu gbete ye fan xa. 25 Seen naxan birin sarama lxo tideni, e na don. E nama maxodinna ti xa e gelen mi a ra. 26 Bayo Kitabun naxa, a Marigin nan gbee boxon nun ayi seene birin na. 27 Xa denkeleyatarena nde e xili donse dondeni, xa siga xonla e ma, a na donseen naxan so e yii, e na don. E nama maxodinna ti xa e gelen mi a ra. 28 Koni xa muxuna nde a fala e xa, a naxa, “Donseni ito bata rali suxuren ma,” nayi, e nama na donseen don masoto na muxuna fe ra naxan e rakolonxi lan xaxinla yaten ma. 29 E tan xaxinla yaten mi a ra koni fo bonna xaxinla. Anu, nanfera n tan ma xoxo yaan finde yalagin na muxu gbete xaxinli? 30 Xa n barikan bira Ala xa n ma donsena fe ra, nanfera muxuna nde n nayelefuma lan na donsena fe ma, n bata barikan bira Ala xa naxan ma fe ra? 31 Na kui, xa e donseen donma hanma e e minma, e nema fefe lige, e a liga Alaa binyena fe ra. 32 E kewanle nama Yahudiyane ratantan, hanma Girekine hanma Alaa denkeleya yamana, 33 alo n tan fan katama n xa muxun birin kenon kii naxan yi. N mi fe fajin fenma n yete xan tun xa, fo muxu wuyaxi xa alogo ne fan xa kisi.

11 E findi n naliga muxune ra, bayo n tan fan Alaa Muxu Sugandixin naligama. 2 N bata e tantun, n ma fe to rabiraxi e ma feen birin yi, e nun e to n ma xaranne suxi alo n na a falaxi e xa kii naxan yi. 3 Koni, n waxi a xon ma e xa a kolon a Alaa Muxu Sugandixin nan xemene birin xun na. Xemen nan jaxanla xun na. Ala nan a Muxu Sugandixin xun na. 4 Nanara, xemen naxan Ala maxandima, hanma naxan nabiya falane tima yamaan tagi, xa komotina a xun na, a bata a kuntigin nafeya. 5 Naxanla naxan Ala maxandima, hanma a nabiya falane tima yamaan tagi, a xunna magenla a ra, na a kuntigin nan nayagima. Na luxi nen alo a na a xunna gbanan. 6 Xa jaxanla mi a xunna maxidi, a mon lan nen a yi a xunna gbanan. Koni jaxanla xunna gbananxina, e nun a maxabaxina, na birin to mayagi nen, a lan nen nayi a yi a xunna

maxidi. 7 Xemen tan mi lan a yi a xunna maxidi bayo a findixi Ala maligan nun a binyen nan na. Koni jaxanla nan a xemena binyen na. 8 Amasoto Ala mi xemen xan baxi jaxanli, koni jaxanla nan baxi xemeni. 9 Xemen mi daxi jaxanla fe ra, koni jaxanla nan daxi xemena fe ra. 10 Nanara, jaxanla xa a xunna maxidi a xemena senben taxamasenna ra e nun malekane fe ra. 11 Koni Marigini, jaxanla mi fataxi xemen na, xemen fan mi fataxi jaxanla ra. 12 Bayo alo jaxanla kelixi xemeni kii naxan yi, jaxanla fan xemen barixi na kii nin. Koni feen birin kelixi Ala nan ma. 13 E tan yeteen xa na feen makiti: Xa jaxanla lan a yi Ala maxandi a xunna mi maxidixi. 14 Nba, Adamadiin kejaan mi e xaranye ba, fa fala xa xemen xunsexen kuya ayi, a yagima nen nayi? 15 Koni binyen nan na ra jaxanla xa xa a xunsexen kuya ayi. Bayo a xunsexen kuyan bata findi a maxidi seen na. 16 Koni xa muxu yo waxi a xon ma, a xa tandin ti feni ito ma, n naxan falama nayi, na ni ito ra. Namunni itoe nan nxu nun denkeleya yamaan birin yii nxu nema Ala batue waxatin naxan yi. 17 N falan naxan tima e xa iki, n mi e tantunma na ra amasoto e malanna mi fe fajin ligama fo a jaxina. 18 Fe singena, e bata yi a fala n xa a e na e malan denkeleya yamaan kiin ma, mayitaxun feene e tagi. N laxi na ra han yirena nde. 19 A fere mi na fo mayitaxunna nde xa lu e tagi, alogo naxanye Ala kenengi, ne xa kolon. 20 E na e malan waxatin naxan yi, e mi Marigina ximenna xan donma, 21 bayo e nema e degema, birin a mafurama nen a gbee donseen dondeni. Nanara, kamena ndee ma, koni ndee minxin na a ra. 22 Banxi mi e yii ba, e donseen donje denaxan yi, e yi e min? E Alaa denkeleya yamaan najaxuma ba, e to yiigelitone biran lanbaranni? N nanse falama e xa? N na e tantunje nayi ba? Nayi, n mi e tantunje mumel! 23 Amasoto Marigina n xaranxi naxan ma, n fan bata e xaran na ma fa fala Marigi Yesu yanfasi, a so yiini koeen naxan na, a burun tongo nen. 24 A barikan bira Ala xa, a yi a yigira, a naxa, “N fati benden ni ito ra naxan fixi e fe ra. E ito liga naxan n ma fe rabire e ma.” 25 E yelinxina ximenna donje, a yi igelengenna fan tongo, a naxa, “Layirin nenen naxan xidixi en tagi n wunla xon, na ni ito ra. E nema ito minje waxati yo yi, n ma fe xa rabira e ma.” 26 Amasoto e nema buruni ito donje waxatin naxan yi, e yi e min igelengenni ito ra, e Marigina saya feen nan nalima han a fa. 27 Nanara, xa muxu yo Marigina a burun don, hanma a yi a min Marigina igelengenna ra daxatareyani, na

kanna yulubin nan tongoma Marigin fati benden nun a wunla fe yi. 28 Nanara, birin xa a yete korosi, a yi Marigina burun don, a yi a min Marigina igelengenna fan na na kiini. 29 Amasoto naxan na burun don, a yi a min igelengenna ra, e nun Marigin fati benden mi lanxi e bode ma, a kitin nan xilima a yete ma na ra. 30 Nanara, e wuyaxi furama, senbe mi e ra, ndee bata faxa. 31 Koni xa en na en yete rakorosi, en tangama nen Alaa kitin ma. 32 Koni Marigin na en kiti, a en maxuruma nen alogo en nun dunuja muxune nama yalagi en bode xon. 33 Nanara, ngaxakedenne, e na e malan waxatin naxan yi e degedeni, e xa e bode legeden. 34 Xa kamena nde ma, a xa a dege a konni alogo e malanna nama kitin xili e ma. N na fa waxatin naxan yi, n fe gbete ye yebama nen.

12 E naxan sebexi Alaa Nii Sarijanxina kiseene fe ra, en fa na ma. Ngaxakedenne, n mi waxi e xa lu fe kolontareyani. 2 E a kolon fa fala e yi denkeleyatareyani waxatin naxan yi, e yi biraxi suxurene nan foxo ra e nun naxanye mi falan tima, e lo ayi. 3 Nanara, n na a falama e xa fa fala, naxan yo falan tima Alaa Nii Sarijanxin barakani, na mi noe a fale, a naxa, “Yesu dangaxi.” Muxe mon mi noe a fale, a naxa, “Marigin nan Yesu ra,” Alaa Nii Sarijanxin xanbi. 4 Alaa Nii Sarijanxi keden peen na a ra, koni a kiseen sifan wuya. 5 Marigi keden peen na a ra, koni muxune walima a xa kii wuyaxi. 6 Wanla sifan wuya, koni Ala kedenna nan ne birin nakamalima muxune birin yi. 7 Alaa Nii Sarijanxina fena ndee minima kenenni muxu keden kedenna birin xon alogo yamaan birin xa sabati. 8 Alaa Nii Sarijanxin muxuna nde kima xaxilimaya falan nan na. Na Nii Sarijanxi kedenna nan mon muxu gbete fan kima fe kolonna falan na. 9 Na Nii Sarijanxi kedenna nan mon muxu gbete kima denkeleyani. Na Nii Sarijanxi kedenna mon yi muxu gbete ki muxu rakendeya kiseni. 10 Muxu gbete yi ki kabanako fe liga senbeni, muxu gbete yi ki nabiya falane ra, gbete yi senbe jaxine nun Ala senben tagi raba, gbete yi falan ti xui sifa gbete ye, gbete mon xui gbete ye madanguma. 11 Koni a tan Alaa Nii Sarijanxin kedenna nan na birin ligama. A tan nan muxun birin kima alo a waxi a xon ma kii naxan yi. 12 Nba, Alaa Muxu Sugandixin luxi nen alo gbindi kedenna koni yire wuyaxi a ma. Koni hali a yirene to wuya, gbindi kedenna nan a ra. 13 Amasoto en birin nafuxi igeni Alaa Nii Sarijanxin kedenna nan baraka

yi, en so fati bende kedenni, Yahudiyane nun Girekine, konyine nun xərəne, Ala bata a Nii Sarijanxin fi en birin ma. **14** Fati benden mi findixi yire kedenna xan na koni yire wuyaxi. **15** Xa sanna a fala, a naxa, “N tan mi fati bendeni, bayo n mi findixi yiin na,” na mi a bε fatin na. **16** Xa tunla a fala, a naxa, “N tan mi fati bendeni, bayo n mi findixi yeen na,” na mi a bε fatin na. **17** Xa fati benden birin yi findi yeen nan tun na, feen yi mēma di nayi? Xa fati benden birin yi findi tunla nan tun na, seen xirin yi mēma di nayi? **18** Koni Ala bata fati benden yirene birin yeβa alo a waxi a xən ma kii naxan yi. **19** Xa a birin yi findi se keden peen na, fati benden yi luma minen? **20** A kii naxan yi iki, fatin yire wuyaxi na koni fati bende kedenna na a ra. **21** Nanara, yeen mi nεε a fale yiin ma, a naxa, “N mako mi i ma.” Xunna mi a fale sanne ma, a naxa, “N mako mi ε ma.” **22** A makuya na ra. Hali senbe mi fati benden yiren naxanye ra, e tiden na. **23** Hali fatin yiren naxanye mayagi dangu fatin yirene birin na, en ne maxidima binyeni ki fapi. Fatin yiren naxanye mi lan e to, en menne suturama bonne xa. **24** Koni fati benden yiren naxanye mi mayagi, ne mako mi na ma. Ala yeteen bata en fati benden yirene yeβa, a binyen fi fati benden yirene ma a yi dasaxi naxanye ma, **25** alogo fati benden nama yitaxun, koni fatin yirene birin xa e jəxə lu e boden xən ma. **26** Xa fati benden yirena nde xoleni, fatin yire dənxen birin səxələma nən a xən. Xa yire keden binyen sətə, bonne birin sewama nən a xən. **27** Nba, ε tan nan Alaa Muxu Sugandixin fati benden na. A fati benden yirena nde nan ε keden kedenna birin na. **28** Ala xerane nan singe luxi denkeleya yamani, a firindena, nabine, a saxandena karaməxəne, e nun kabanako feene raba muxune, e nun naxanye kixi muxu rakendeya kiseen nun mali ti kiseen nun yεerati kiseni e nun naxanye falan tima xui gbetene yi. **29** Birin mi finde xeraan na, hanma nabine hanma karaməxəne hanma kabanako feene raba muxune **30** hanma muxun naxan kixi muxu rakendeya kiseni hanma xui gbete falana hanma xui radanguna. **31** Koni, ε səbe so kise fisamantenne ma. Iki n xa kira fisamantenna yita ε ra. Na ni i ra:

13 Hali n falan ti adamadiine xuine nun malekane xuine yi, koni xa xanuntenyaan mi n bəjəni, n fala xuiin luxi nən nayi alo talan xuiin nun karijan xuiina. **2** Hali nabiya falane n dε, e nun lənnina han n wundo feene birin kolonna sətə, hali denkeleyana n

yi, n geyane ba e funfuni, koni xa xanuntenyaan mi n bəjəni, sese mi n tan na na yi. **3** Hali n na n yii seen birin fi yiigelitəne ma, hali n na n fati benden fi, a gan, koni xa xanuntenyaan mi n bəjəni, na mi fefe fanje n ma. **4** Dijnan xanuntenyani. A fe fapiin nan ligama. Xəxələnyaan mi xanuntenyani. A mi a yete yigboma. Waso mi xanuntenyani. **5** Marayagi mi a yi. A mi a yete a herin xan tun kataxi. A bəjən mi tema fefe ma. A mi xələn namarama. **6** A mi sewama tinxintareyaan na fə jəndina. **7** A mafeluun tima feen birin yi. A təgəndiyaxi waxatin birin. Yigina a yi feen birin yi. A tunnafan feen birin yi. **8** Xanuntenyaan mi janje habadan. Nabiya falane danguma nən, xuine yi jan, fe kolonna yi dangu. **9** Amasətə en fe kolon ndedi, en nabiya falane tima ndedi, **10** koni a kamalixin na fa waxatin naxan yi, a kamalitaren janma nən na yi. **11** N to yi dii jəreyani waxatin naxan yi, n yi falan tima alo dii jərəna, n yi n mirima alo dii jərəna, n yi feene famuma alo dii jərəna. Koni n to findi fonna ra, n mi fa dii jərə fe rabama sənən. **12** Iki, en sawura yidimixin nan toma alo matoon kiken, koni waxati famatəni, en toon tima nən yεε nun yεε. Iki, danna n ma fe kolonna ma, na waxatini n feene kolonma nən alo Ala n kolon kii naxan yi. **13** Iki fe saxanni itoe luma nən, denkeleyaan nun yigin nun xanuntenyana, koni xanuntenyaan nan gbo e birin xa.

14 ε yixədəxə ε lu xanuntenyani. Nii Sarijanxina a kiseene xənla xa ε suxu, a gbengbenna ε yi nabiya falane ti. **2** Amasətə muxun naxan xui gbeten falama, na mi falan tima muxune xan xa, fə Ala, amasətə muxu yo mi a xuiin mema. A wundo feene falama Alaa Nii Sarijanxin barakan nin. **3** Koni naxan nabiya falane tima yamaan xa, na falan tima e sabati feen nan na, a yi e ralimaniya, a yi e bəjən xunbeli. **4** Koni muxun naxan falan tima xui gbeteni, na a yeten nan tun malima, koni naxan nabiya falane tima, na denkeleya yamaan birin nan malima. **5** Xa e birin xui gbetene falama, na rafan n ma. Koni naxan naxan n ma dangu na ra, ε birin xa nabiya falane ti. Amasətə muxun naxan nabiya falane tima, na dangu xui gbete falan na, fə xa muxuna nde na naxan a xuiin nadangue alogo denkeleya yamaan birin maliye kii naxan yi. **6** Ngaxakedenne, xa n siga ε fəma, n sa falan ti ε xa xui gbetene yi, n nanfe fanxi ε ma nayi, xa n mi Alaa fena nde makenen ε xa, hanma fe kolonna nde hanma nabiya falana hanma xaranna? **7** Hali maxa seene fan

na kii nin, alo xulenna nun kondenna. E betin naxan bama, muxun na kolonma di xa ε mi e xuine ramini ki fajni? **8** Xa xɔtaan xui fajni mi mini, a rafixa, nde a yitɔnjɛ yenge so xinla ma? **9** A na kii nin ε konni, ε na falan ti xui gbetene yi, xa a mi findi fala yigbexin na, na bunna kolonma di nayi? Fala fuun nan tun na ra. **10** Xui wuyaxi nan dunuya yi, koni ne sese mi na naxan bun mi na. **11** Koni xuiin naxan falama, xa n mi na mɛma, naxan a falama, xɔjɛn nan n tan na na yɛɛ ra yi. Xɔjɛn nan a fan na n yɛɛ ra yi. **12** A na kii nin ε fan xa, ε to waxi Alaa Nii Sarijanxina a kiseene xɔn ma, naxanye denkeleya yamaan malima, ε yixɔdɔxo ne nan ma. **13** Nanara, muxun naxan falan tima xui gbeteni, a xa Ala maxandi alogo a xa nɔ a bunna fale. **14** Amasɔto xa n na Ala maxandima xui gbeteni, n niin nan Ala maxandima nayi, koni n xaxinla mi walima. **15** N nanfe ligama nayi? N xa Ala maxandi n niini e nun n xaxinla fan yi. N xa betin ba n niini e nun n xaxinli. **16** I na barikan bira Ala xa i niini, muxun naxan mi na bunna kolon, na a falama di fa fala “Amina?” Amasɔto i naxan falama, a mi na kolon. **17** Hali i barikan birama Ala xa ki fajni, muxu gbetɛ mi maliin sɔtɛ nayi mumɛ! **18** N barikan birama Ala xa amasɔto n tan xui gbetene falama dangu ε birin na. **19** Koni en nɛma denkeleya yamaan malanni hali n fala xui suulun nan tun ti, naxanye bunna kolonjɛ, alogo n xa muxune xaran, na fisa benun n xa falan wuli wuyaxi ti xui gbeteni. **20** Ngaxakedenne, ε miriyaan nama liga alo diidine. E xa liga alo dii jɔrene fe njaxine fe yi, koni ε findi fonne ra ε xaxinli. **21** A sɛbɛxi Sariya Kitabun kui: “Marigin naxa, ‘N falan tima yamani ito xa ne xɔn naxanye xɔjɛ xuine falama e nun xɔjɛne dɛ xuiin xɔn koni hali na, e mi e tuli matima n na.’” **22** Na ma, xui gbetene findixi taxamasenne ra denkeleyatarene nan xa. A mi ligama denkeleya muxune fe ra. Nabiya falane fan mi findixi taxamasenne ra denkeleyatarene xa fɔ denkeleya muxune. **23** Nba, xa denkeleya yamaan birin e malan, e falan ti fɔlɔ xui gbetene yi, xa muxuna ndee fa, naxanye e tuli matima gbansan hanma e mi denkeleyaxi, ne mi a fale ba, fa fala a seen nan soxi ε yi? **24** Koni xa ε birin nabiya falane tima, denkeleyatarena nde yi so ε fema, hanma naxan a tuli matima gbansan, na falane birin a sɔnne yitama a ra nɛn, birin yi a kiti. **25** A miriya wundone minima nɛn kɛnɛnni. Nayi, a xinbi sinma nɛn, a yetagin yi lan bɔxɔn ma, a yi Ala batu, a yi a fala, a naxa, “Nɔndin na a ra, Ala ε tagi.” **26** Ngaxakedenne, ε xa nanse liga ε

na ε malan waxatin naxan yi? Birin xa fa e nun betina nde, hanma xaranna, hanma Alaa fe makɛnɛnna, hanma xui gbetɛna nde, hanma xui madanguna. Na birin xa findi denkeleya yamaan sɔbɛ so feen na. **27** Xa muxuna ndee falan tima xui gbeteni, muxu firin hanma saxan, ne birin xa falan ti keden keden yɛɛn ma. Koni e naxan falama fɔ muxu gbetɛ xa na radangu. **28** Xa muxɛ mi na naxan a bunna fale, na kannna xa a dundu denkeleya yamani nayi, koni a xa falan ti e nun Ala tagi. **29** Nabine tan, muxu firin hanma saxan naxanye nabiya falane tima, ne xa falan ti, bonne yi e falan fɛsɛfɛsɛ. **30** Koni xa muxuna nde dɔxi ε tagi malanni, Ala yi fena nde makenɛn a xa, a lan nɛn, fala ti singen xa a dundu singen. **31** Amasɔto a lan nɛn, ε xa nabiya falane ti keden keden yɛɛn ma alogo ε birin yi xaranna sɔto, ε yi ralimaniya. **32** Nabine kisena e nɔɔn nan bun, **33** bayo Ala mi findixi fe yibasanna Ala ra, koni fɔ bɔjɛ xunbenla. Alo a ligan kii naxan yi denkeleya yama sarijanxine birin yi, **34** njaxanle xa e dundu malanni, amasɔto e mi lan e falan ti, koni e xa e yete magodo alo sariyana a falaxi kii naxan yi. **35** Xa e waxi a xɔn ma, e xa yirena nde yɛɛ to, e xa e xɛmɛne maxɔdin e konni. Naxanla na falan ti malanni, yagi feen nan na ra. **36** Alaa falan minixi ε konna nin ba? Hanma a faxi ε tan nan keden ma ba? **37** Xa muxu yo a mirima fa fala nabiin nan a tan na hanma Alaa Nii Sarijanxina kisena a yii, n feen naxanye sɛbɛma ε ma, a lan nɛn a xa ne kolon fa fala Marigina yamarine nan ne ra. **38** Xa a mi falani ito yatɛ, a fan mi yatɛma. **39** Nanara, ngaxakedenne, nabiya falane ti xɔnla xa ε suxu. E mɔn nama tɔnna dɔxo xui gbetɛ fala feen na. **40** Koni feen birin xa yɛba ki fajni a kiraan xɔn ma.

15 Nba, ngaxakedenne, n xa Yesu a fe Xibaru Fajina fe rabira ε ma, n naxan nali ε ma, ε yi a rasuxu, ε sɔbɛ soxi naxan yi, **2** ε kisixi naxan xɔn, xa ε a suxu alo n na a ralixi ε ma kii naxan yi. Xa na mi a ra, ε bata la a ra fuuni na yi. **3** A singen naxan na, n naxan sɔtɔxi, n bata na rali ε ma: Alaa Muxu Sugandixin faxaxi en yulubine nan ma fe ra, alo Kitabuna a falaxi kii naxan yi. **4** A maluxun nɛn, a sayaan soge saxande lɔxɔni a keli sayani, alo Kitabuna a falaxi kii naxan yi. **5** A yi a yetɛ yita Piyɛri ra, na xanbi ra a xɛra fu nun firinne. **6** Na xanbi ra, denkeleya muxun kɛmɛ suulun e nun nde yi a to waxati kedenni. Na wuyaxi mɔn e nii ra, koni nde bata faxa. **7** Na xanbi ra, Yaki yi a to, a xɛrane birin yi a to mɔn. **8** Dɔnxɛn na a yi a yetɛ yita

n tan fan na, n tan naxan luxi alo diin naxan mi bari a waxatini. **9** Amasoto xeraan birin gbo n tan xa. N tan mi sa lan nen, a fala n ma a “xerana,” amasoto n bata yi Alaa denkeleya yamaan besenxonya. **10** Koni Alaa hinanni, a yi n kejaan masara iki. A hinanna naxan nagidixi n ma na mi luxi fuuni, bayo n wali nen dangu xeraan bonne birin na. N tan mi a ra koni Alaa hinanna nan yi n bojeni. **11** Nayi, xa a findi n tan na, xa a findi e tan na, nxu ito nan kawandi bama. E fan bata la na nan na. **12** Nba, nxu to kawandin bama fa fala Alaa Muxu Sugandixin bata keli sayani, nanfera e tan ndee a falama fa fala faxa muxune mi kelima sayani? **13** Xa faxa muxune mi kelima, na bunna neen fa fala Alaa Muxu Sugandixin yeteen mi yi kelixi sayani na yi nun. **14** Nba, xa Alaa Muxu Sugandixin mi yi kelixi sayani nun, kawandin ba xun mi yi na nxu xon ma nayi, e denkeleyaan fan bata lu fuyan. **15** Naxan dangu na ra, en bata wule seren ba Alaa fe ma nayi amasoto en bata a fala a a bata a Muxu Sugandixin nakeli sayani. Koni xa faxa muxune mi kelima sayani, na bunna neen fa fala, Ala mi a fan nakeliki sayani. **16** Amasoto xa faxa muxune mi kelima sayani, Alaa Muxu Sugandixin fan mi kelixi sayani na yi. **17** Nba, xa Alaa Muxu Sugandixin mi yi keli sayani nun, e denkeleyaan bata findi fe fuun na, e mon e yulubine yi na yi. **18** Na bunna neen fa fala, naxan bata yi denkeleya Alaa Muxu Sugandixin ma, e faxa, ne bata lo ayi na yi. **19** Xa en na en yigin saxi Alaa Muxu Sugandixini dunuja yi gidini ito nan tun yi, nayi en tan makininkin dangu muxune birin na. **20** Koni Alaa Muxu Sugandixin bata keli sayani yati! Muxu singe kelixin na a ra sayani faxa muxune ye. **21** Bayo sayaan to faxi muxu kedenna nan xon, na kiini mon, muxune fan kelima sayani muxu keden peen nan fan xon. **22** Muxun birin to faxama nen adamadiyani, na kiini mon, e birin mon kelima nen sayani Alaa Muxu Sugandixini. **23** Koni muxun birin nun a waxati saxin na a ra, Alaa Muxu Sugandixin nan muxu singen na naxan keli sayani. Na xanbi ra, a muxune fan kelima nen sayani a fa waxatini. **24** Na na dangu, a rajanna na a li, Yesu fama mangayane nun noyane nun senbene birin kaladeni nen, a yi mangayaan naxete a Fafe Ala ma. **25** Amasoto a fere mi na fo Yesu xa mangayaan liga nen han Ala yi a yaxune birin sa a sanna bun ma. **26** Yaxun naxan halagima donxen na, na nan sayaan na. **27** Amasoto Kitabun bata a fala, a naxa, “A bata seen birin lu a sanna bun.” Koni a to a fala a seen

birin bata lu a bun ma, na fixa fa fala Ala mi na ye ma naxan seen birin luxi a tan bun ma. **28** Seen birin na lu a bun ma, nayi a tan yetena, Alaa Dii Xemen fan luma nen Ala bun ma naxan seen birin saxi a bun ma, alogo Ala xa lu seen birin xun na feen birin yi. **29** Xa na kii mi a ra, muxun naxanye rafuxi igeni faxa muxune fe ra ne nanse fenma? Xa faxa muxune mi kelima, nanfera muxune rafuma igeni ne fe ra? **30** Nxu tan fan, nanfera nxu tan gbalon de be waxatin birin? **31** Ngaxakedenne, n sayaan de lxo yo lxo. N binyen naxan sotoxi e to lu Marigi Yesu Alaa Muxu Sugandixini, n bata n kolo na nin, nondin nan na ra. **32** Xa n dalise xajene yengexi Efesi taani adamadiine feene nan tun yi, na munanfanna mundun yi n ma nayi? Xa faxa muxune mi yi rakele sayani nun, nayi en yi sandani ito suxuma nen nun, “En na en dege, en yi en min bayo en faxan nen tila.” **33** E nama e mayenden amasoto, “Xoyi jaxine son fajin kalama nen.” **34** E mon xa xaxili soto alo a daxa kii naxan yi. E fata yulubi feene ra. E tan nde mi Ala kolon, n na ito falama e yagin nan ma. **35** Ndee maxodinna tima nen, e naxa, “Faxa muxune kelima sayani di? E fama fati benden sifan mundun yi?” **36** Xaxilitarena! I na sansiin woli i ya xeen ma waxatin naxan yi, a mi sole fo a lu faxan yiyani singen. **37** I mi sii se binla xan wolima koni fo a sansi kesedin tun, maala hanma sansi gbete. **38** Koni Ala nan sansiin nasolima a binli gbo ayi alo a rafan a ma kii naxan yi. A tan nan sansiin siyaan birin binla kejaan nagidima a ma. **39** Niimaseen birin fatin keden mi a ra. Muxun fatina a danna, suben fatina a danna, xoliin fatina a danna, yexen fatina a danna. **40** Kore xonna fatine na yi, dunuja fatine na yi. Kore xonna fatine norona a danna, dunuja fatine norona a danna. **41** Sogen gbee norona a danna, kiken gbee norona a danna, sarene fan gbee norona e danna, saren keden kedenna birin ma norona a danna. **42** Faxe muxune na keli, a ligama na kii nin. Fati benden naxan maluxunma, a noe kale. Koni a na keli faxe muxune tagi, a mi noe kale. **43** A maluxunma waxatin naxan yi, a mi fan, senbe mi a ra. Koni a na keli, a noroxi, senbena a yi kati! **44** A maluxunma waxatin naxan yi, fati benden nan yi a ra, a na keli, ariyanna fatin nan na ra. Xa fati bendena en yi be, ariyanna fatin fan na yi. **45** Amasoto a sebexi Kitabun kui iki, a naxa, “Adama, Alaa Muxu daxi singen yi findi dajoxon na.” Koni Adama donxe ra xina, Yesu, na yi nii rakisin fi yamaan ma. **46** En mi ariyanna fatini ito

singe sɔtɔma fɔ fati bendena, na xanbi ra, en ariyanna fatin sɔtɔma nɛn na yi. **47** Adama singe ra xina, Ala na daxi bɔxɔni ito benden nan na. Adaman firindena, na kelixi ariyanna nin. **48** Naxan daxi bendeni ito yi, dunɔɔna muxune na nan maliga yi. Muxun naxan sa kelixi ariyanna yi, ariyanna gbee muxune nun na nan maliga. **49** En to bata maliga adama ra naxan minixi bendeni, en mɔn fama maligadeni na kiini ariyanna gbee muxun na. **50** Ngaxakedenne, n naxan ma, na ni ito ra fa fala naxan daxi fati benden nun wunla ra, e mi nɔɛ Alaa Mangayaan sɔtɛ. Seen naxan kunma, na mi luma habadan. **51** E tuli mati, n wundo feen nan falama. En birin mi faxɛ, koni en birin maxetɛma nɛn. **52** Amasɔtɔ xɔta dɔnxɛn na fe waxatin naxan yi, faxa muxune kelima nɛn, e habadan nii rakisin sɔtɔ, en birin yi maxetɛ mafuren benun yɛ magira. **53** Amasɔtɔ en fati benden naxan kalama, a fɛrɛ mi na fɔ a xa maxetɛ fatin na naxan mi kalɛ. A faxa daxin yi maxetɛ a faxataren na. **54** Nanara, en fatin naxan kalama, a na maxetɛ fati kalataren na waxatin naxan yi, a faxa daxin yi maxetɛ faxataren na. Na na liga, Kitabuna falan bata kamali nayi, a naxa, “Sayaan bata halagi nɔ sɔtɔn bun.” **55** “Sayana, i ya nɔɔn minen yi? Sayana, i faxa ti senben minen yi?” (Hadɛs g86) **56** Sayaan faxa ti senben nan yulubin na, yulubin fan senben nan sariyan na. **57** Koni barikan xa bira Ala xa naxan nɔɔn fima en ma a Muxu Sugandixin barakani en Marigi Yesu. **58** Nanara, n nafen ngaxakedenne, ɛ sɔbɛ so ki fajil! E nama yimaxa. E lu wale Marigin xa waxatin birin amasɔtɔ ɛ a kolon fa fala ɛ wanla naxan kema Marigin xa, fe fuu mi na ra mume!

16 E naxan sebɛxi yiimalanna fe yi lan yama sarijanxina fe ma Yerusalen taani, en fa na ma. E liga alo n yamarin naxan fi Galati yamanan denkeleya yamaan malanne ma. **2** Xati yo xati, ɛ keden kedenna birin xa gbetina nde ramara a danna ɛ konne yi, lan ɛ fɛrɛn yatɛn ma, alogo ɛ nama n faan mame ɛ yii malan feen na. **3** N na fa waxatin naxan yi, ɛ na muxun naxanye sugandi, n ne rasigama nɛn kedina e yii, e yi ɛ kiseene xali Yerusalen taani. **4** Koni xa a lan n tan yetɛn xa siga, fɔ nxu birin xa siga na yi. **5** N na dangu Masedoniya yamanani waxatin naxan yi, n sigama nɛn ɛ konni, bayo n danguma nɛn na. **6** N waxati dando tima nɛn ɛ konni, hanma xunbeli waxatin birin. Nayi, ɛ yi n fanda n ma sigatini. **7** Amasɔtɔ n mi waxi a xɔn ma, n xa ɛ to gbansan,

n dangu. N wama nɛn n xa waxatidi ti ɛ konni, xa Marigin tin. **8** Koni n luma nɛn Efesi taani han Se Xaba Singen Sali lɔxɔna. **9** Bayo dɛɛn bata rabi n xa n yi n ma wanla kɛ, anu n yɛnge faane wuya. **10** Xa Timɔtɛ fa, ɛ a yisuxu alogo xamin yo nama a suxu, amasɔtɔ a walima Marigin nan xa alo n tan. **11** Nayi, muxu yo nama a rapaxu. Koni ɛ a fanda a sigatini bɔɔtɛ xunbenli, alogo a mɔn xa xetɛ n fɛma, amasɔtɔ nxu nun denkeleya muxun bonne a mamema be. **12** E naxan sebɛxi en ngaxakedenne Apolosi a fe ra, en fa na ma. N bata a mafan han alogo a xa siga ɛ konni e nun denkeleya muxun bonne, koni a jɛnige ma fe mi yi a ra a xa na liga singen. Xa a fɛrɛn sɔtɔ, a sigama nɛn. **13** E lu ɛ yɛɛ ra yi, ɛ lu denkeleyani. E wekile, ɛ senben sɔtɔ. **14** E feen birin liga xanuntenyaan nin. **15** E a kolon a Esitefana nun a denbayaan nan singe tubi Yesu ma Akaya yamanani, e yi e yetɛ lu yama sarijanxina wanla ra. Ngaxakedenne, n na ɛ mafanma, **16** ɛ xuru na muxu sifane ma naxanye birin e yixɔdɔxɔma wanli ito yi. **17** N bata sewa Esitefana fa feen na, e nun Fortunatusi nun Axayikusu. E to mi yi be, naxan yi dasaxi n ma e na so nɛn n yii ɛ funfuni. **18** E bata n nii yifan n ma alo e ɛ nii yifan ɛ ma kii naxan yi. E na muxu sifane wali fajil kolon. **19** Asi yamanan denkeleya yamane ɛ xɔntɔn. Akila nun Pisisila nun denkeleya yamaan naxanye e malanma e banxini, ne ɛ xɔntɔnma Marigin xinli ki fajil! **20** Denkeleya muxun naxanye birin be, ne ɛ xɔntɔnma. E bode xɔntɔn ngaxakedenya xɔntɔn sunbuni. **21** N tan Pɔli nan xɔntɔn xuini itoe sebɛma n yiin na. **22** Naxan mi Marigin xanuma, dangatɔɔn nan na ra. N naxa, “Nxu Marigina, fa xulen!” **23** En Marigi Yesu a hinanna xa lu ɛ xɔn. **24** N ma xanuntenyana ɛ birin xa Alaa Muxu Sugandixin Yesu barakani.

Kōrenti Firindena

1 N tan Poli naxan findixi Yesu Alaa Muxu Sugandixina xeraan na Ala sagoni, n tan nan kedini ito sebema ε ma, nxu nun en ngaxakedenna Timote, siga denkeleya yamaan ma Kōrenti taani e nun muxu sarijanxine birin Akaya yamanani. **2** En Fafe Ala nun en Marigin Yesu Alaa Muxu Sugandixin xa hinanna nun bɔɲe xunbenla fi ε ma. **3** En barikan bira en Marigi Yesu a Alaa Muxu Sugandixin Fafe Ala xa, en Fafe kininkininna kanna, Ala naxan muxune ralimaniyama. **4** A en nalimaniyama en ma tɔrɔne birin yi nɛn alogo en xa nɔ tɔrɔ muxune ralimaniye na limaniyaan xɔn Ala naxan fixi en ma. **5** En nun Alaa Muxu Sugandixin tɔrɔma en bode xɔn kii naxan yi, en ma limaniyaan gboma ayi Alaa Muxu Sugandixin barakani na kii nin. **6** Xa nxu tɔrɔ, na findixi ε ralimaniya feren nun ε rakisi feren nan na. Xa nxu limaniyaan sɔtɔ, ε fan limaniyaan sɔtɔma nɛn, alogo ε xa senben sɔtɔ tɔrɔne bun, en na tɔrɔ en bode xɔn ma waxatin naxan yi. **7** Nxu mɔn laxi ε ra ki fapi, bayo nxu a kolon fa fala en to tɔrɔma en bode xɔn, en limaniyaan sɔtɔma nɛn en bode xɔn. **8** Nba, ngaxakedenne, nxu tɔrɔn naxanye sɔtɔ Asi yamanani, nxu waxi ε rakolon feni ne ra. Goronna naxan sa nxu xun ma, na yi binya han! Nxu mi yi a nɔɛ! Nxu yigitege nɛn, a nxu mi yi kisima sayaan ma. **9** Nxu yi nxu mirixi nun fa fala sayaan bata ragidi nxu ma. Koni na ligaxi nɛn alogo nxu nama la nxu yete ra fɔ Ala naxan faxa muxune rakelima sayani. **10** A bata nxu xunba sayaan gbalon ma, a mɔn fama nxu xunbadeni nɛn. Nxu bata nxu yigi ti Ala ra yati fa fala a mɔn luma nxu xunbe, **11** ε nɛma nxu malima Ala maxandideni. Nayi, Ala hinanma nɛn nxu ra masɔtɔ muxu wuyaxi a Ala maxandin xɔn, nanara muxu wuyaxi fan mɔn nɔɛ nɛn barikan birɛ Ala xa nxɔ fe yi. **12** Nxɔ binyen ni ito ra: Nxu xaxinla sereyaan bama, nxu bata sigan ti dunupa yi Alaa sarijanna nun tinxinni, a gbengbenna ε mabinni. Muxune fe kolonna mi yi a ra, koni Alaa hinanni. **13** Nxu mi sese sebema ε ma ε mi naxan xaranɲe, ε yi a kolon. A xɔnla n na ε xa a kolon a fajin na, **14** alo ε to a kolonxi ndedi fa fala nxu findixi ε binyen nan na en Marigi Yesu fa waxatini alo ε fan findixi nxu gbeen na kii naxan yi. **15** N to laxi ito ra, n yi a miri, fa fala n xa siga ε tan nan fema singen alogo ε xa a tɔnɔn sɔtɔ sanja ma firin. **16** Amasɔtɔ n bata yi a miri, n xa dangu ε xɔntɔɲɛ n nɛma sigɛ Masedoniya yi waxatin naxan

yi. Na xanbi ra, n xetematɔn mɔn yi dangu ε konni keli Masedoniya yi, ε yi n mali siga feen na Yudaya yi. **17** N feni ito ragidi waxatin naxan yi, n na ligaxi fuun nin ba? Hanma, n ma feene ligɛ alo adamadiin bonne ba? N yi “ɔn” e nun “ɛn-ɛn” falan sanja yi kedenni? **18** Koni Ala to tinxin, nxu falan naxan tixi ε xa, na mi findixi wulen nun ɲɔndin na sanja ma kedenni. **19** Amasɔtɔ Yesu Alaa Muxu Sugandixina, Alaa Dii Xɛmena, Silasi nun Timote nun n tan yetɛɛn naxan ma fe kawandi ba ε tagi, na falan mi findixi fala firinna ra, alo “ɔn” e nun “ɛn-ɛn.” Fala gbete mi a tan yi, fɔ “ɔn!” **20** Amasɔtɔ Ala bata en tuli sa feen naxan birin na, ne kamalixi Yesu a falani ito xɔn fa fala “ɔn.” Nanara, nxu fan a falama Yesu barakani fa fala, “amina,” Ala binya feni. **21** Amasɔtɔ Ala yetɛɛn nan nxu tan nun ε tan senbe soxi a Muxu Sugandixini. A bata en masusan turen na en sugandi feen na, **22** a yi a taxamasenna sa en ma, a a Nii Sarijanxin nasɔ en bɔɲeni a lu alo se singen naxan soxi en yii taxamasenna ra alogo en xa la fe famatɔne ra. **23** Ala nan n seren na, n bata n kolɔ n niini: Xa n mi xetexi Kōrenti yi na ligaxi nɛn alogo n nama ε raxɔlɔ. **24** Fa fala nxu nɔɔn sɔtɔxi ε denkeleyaan xun na, na mi a ra. Koni en walima nɛn en bode xɔn ma ε sewana fe ra amasɔtɔ ε senbe soxi denkeleyani.

2 Nanara, n bata a ragidi fa fala n nama xete ε konni xɔloni. **2** Amasɔtɔ xa n na a liga ε xɔlɔ, nde n tan nasewama ba ε tan na, n naxanye raxɔlɔxi? **3** Nanara, n kedin sebexi ε ma fa fala n mi yi sigama ε konni, alogo n nama na muxune raxɔlɔ naxanye finde n sewa xunna ra. N yi laxi a ra, a n ma sewan finde en birin ma sewan na. **4** N kedin sebexi ε ma tɔrɔ gbeen nun bɔɲe rafɔrɔn nun yeegen nin. N mi yi waxi ε raxɔlɔ feni, koni n yi ε rakolonma nɛn, a n na ε xanuxi han! **5** Xa ε tan nde findi yamaan naxɔlɔ feren na, a mi n tan xan naxɔlɔxi, koni fɔ ε tan yamaan birin, anu ɲɔndin naxan na, a nde nan tun naxɔlɔxi. **6** E wuyaxi to bata a haken saran a ra, na bata a li. **7** Nba, iki, fɔ ε xa na kanna mafelu nɛn, ε yi a ralimaniya, alogo a bɔɲen nama fɔrɔ gbeen ti han a yigitege. **8** Nayi, n bata ε mafan, ε mɔn xa ε xanuntenyaan yita a ra. **9** Bayo n na a sebexi ε ma nɛn alogo n xa ε sɔnna kolon, xa ε xuruxi feen birin yi. **10** E na muxun naxan mafelu, n fan na mafeluma nɛn. N tan na naxan mafelu, xa n bata na mafelu, n na ligama ε tan nan ma fe ra Alaa Muxu Sugandixin yɛɛ xɔri, **11** alogo Setana nama

en mayenden, bayo en na a waxon feene kolon. **12** Nba, n siga Tirowasi taani Alaa Muxu Sugandixina fe Xibaru Fajin nalideni waxatin naxan yi, n yi a to fa fala Marigin bata deen nabi n xa menni. **13** Koni n xaxili mi yi saxi, amasoto n mi ngaxakedenno Tito lixi na. Nanara, n yi n jungu men kaane ma, n siga Masedoniya yi. **14** Koni Ala tantun, amasoto a Muxu Sugandixina en nasoma a fangan bun ma nen, a ti en yee ra siga yiren birin yi, a kolonna yi xuya ayi en xon ma alo se xiri fajin naxan xuyama ayi. **15** Amasoto en luxi nen alo wusulanna xirina Alaa Muxu Sugandixin naxan ganma, a rali Ala ma yamaan birin tagi, kisi muxune nun kisitarene. **16** A findixi sayaan xirin nan na muxuna ndee xa naxanye xalima sayani. A findi nii rakisin xirin na ndee gbete ye xa naxanye xalima nii rakisini. Nde noe wanli ito ke? **17** Anu, nxu tan mi luxi alo muxun naxanye Alaa falan findima yulaya seen na. Koni nxu tan falan tima Alaa Muxu Sugandixin barakan nin fata Ala ra nxu boje fixen na Ala yetagi.

3 Nxu mon bata nxu yete matxo folo ba? Hanma nxu makoon mon nxu dentege kedine ma ba naxanye nxu tonon falama e xa hanma e naxanye sebema bonne ma nxo fe yi alo muxuna ndee kii naxan yi? **2** E tan yeteen findixi nxu dentege kedin nan na, naxan sebexi nxu bojene yi, muxune birin noe naxan kolonje, e a xaran. **3** E bata findi kedin na Alaa Muxu Sugandixin naxan sebexi nxo wanla xon, naxan mi sebexi duba igen na hanma geme walaxan fari, koni habadan Alaa Nii Sarijanxin nan na sebexi fati walaxane ma e bojene yi. **4** Na yigin nan en yi Ala yetagi a Muxu Sugandixin barakani. **5** Anu, na mi na ra fa fala senbena nxu ra nxu na wanla ke, koni nxu senben kelixi Ala nan yii. **6** A tan nan senben fixi nxu ma, a nxu xa layiri nenen wanla ke, naxan mi fataxi sariya sebexin na fo Alaa Nii Sarijanxina. Amasoto sariya sebexin sayaan nan nafama, koni Alaa Nii Sarijanxin nii rakisin nan fima. **7** Nba, sariyan naxan sayaan nafaxi, naxan yi kerendenxi geme walaxan ma, xa na faxi binyeni han Musa yetagin yi mayilen a noroni, Isirayila kaane mi no e yeen tiye a ra hali a yetagin noron to yi sigama janje, xa na fa na binyen sifani, **8** Alaa Nii Sarijanxin wanla binyen mi gboma ayi dangu na ra ba? **9** Wanla naxan muxune yalagima, xa na findi binyen na, wanla naxan muxune ratinxinma Ala yee ra yi, na binyen gboma ayi nen han dangu na ra. **10** Naxan yi findixi binyen na nun, na mi fa a ra iki

binye fisamantenni ito a fe ra. **11** Awa, noron naxan yi janma, xa na faxi binyena nde yi, nayi naxan luma habadan, na tan ma binyen danma minen? **12** Nanara, na yigin to en yii, en xaxili ragidixi han! **13** En tan mi ligaxi alo Musa, naxan yi dugin soma a yetagin xun na alogo Isirayila kaane nama a mayilenna to, naxan yi sigama janje. **14** Koni e bojen bata yi xodxo ayi. Bayo han to, e nema Layiri Fonna Kitabun xaranye, a luxi alo na dugin mon na yi, e mi a yee to. A munma ba singen, bayo a mi be fo Alaa Muxu Sugandixini. **15** Hali to, e nema Musaa Kitabu yirene xaranye, dugin soxi e bojen xun na. **16** Koni muxun na a yee rafindi Marigin ma, dugin bama nen na yi. **17** Bayo Marigin nan Nii Sarijanxin na. Marigina Nii Sarijanxin denaxan yi, xorayaan nan menni. **18** En tan birin, Alaa binyen nan mayilenma en yetagine ma, anu en mi dugin soma en yetagin xun na. En luma maxete a tan maligan nan na, en ma binyen yi siga gboe ayi, fata Marigin na, naxan findixi Alaa Nii Sarijanxin na.

4 Nanara, wanli ito to en yi Alaa kininkininni, nxu mi tunna xoloma nxu ma. **2** Nxu bata nxu me yagi fe luxunxine birin na, nxu mi fefe ligama yanfani, nxu mi Alaa falan maxetema. Koni nxu jondin nan mayitama, alogo muxune birin xa nxo lannayaan nakorosi e xaxinle yi Ala yetagi. **3** Nxu Yesu a fe Xibaru Fajin naxan nalima, xa na mon luxunxi, a luxunxi muxune nan ma naxanye halagima. **4** Dunujani ito mangan Setana bata denkelcyatarene xaxinle yidimi alogo e nama Alaa Muxu Sugandixina fe Xibaru Fajin noron to dege. Alaa Muxu Sugandixin nan Ala sawuran na. (aiön g165) **5** Nxu mi nxu yete a fe kawandi xan bama, fo nxu a falama Alaa Muxu Sugandixin Yesu nan Marigin na, e nun nxu bata findi e walikene nan na Yesu a fe ra. **6** Amasoto Ala naxan a falaxi, a naxa, “Kenenna xa mini dimini,” na Ala nan a ligaxi kenenna yi lu en bojeni, alogo en xa Alaa binyen kenenna kolon, naxan a Muxu Sugandixin yetagin ma. **7** Koni en na nafulu kenden namaraxi bende fejene nan kui naxanye findixi en fati bendene ra, naxan a yitama a senbe fisamantenni ito findixi Ala gbeen nan na, a mi kelixi en tan ma. **8** Nxu yigbetenxi kiin birin yi, koni nxu mi yilunburunxi! Nxu xaminxi koni nxu mi yigitegexi! **9** Nxu besenxonyaxi, koni nxu mi rabexinxi! Nxu rabiraxi koni nxu mi halagixi! **10** Nxu Yesu a sayaan toron tongoma nxu fatini waxatin birin, alogo Yesu a dunuja yi gidin fan xa makenen nxu

fatin xɔn. **11** Hali nxu to nxu nii ra, nxu sayaan de waxatin birin Yesu a fe ra, alogo a dunuɗa yi gidin xa makenen nxu fati benden xɔn. **12** Na bunna neen fa fala sayaan walima nxu tan yi koni nii rakisin nan walima e tan yi. **13** A sebexi Kitabun kui, a naxa, “N denkeleyaxi, nanara n yi falan ti.” Nxu tan nan fan falan tima denkeleyani na xaxili kedenni amasoto nxu bata denkeleya. **14** Bayo nxu a kolon fa fala Ala naxan Marigi Yesu rakeliki sayani, na nan en fan nakelima sayani Yesu xɔn, a yi en birin malan en bode xɔn a yetagi. **15** Na birin ligama e tan nan ma fe ra alogo Alaa hinanna xa siga ware, a yi muxu wuyaxi li, e barika biran yi gbo ayi, na yi findi Alaa binyen na. **16** Nanara, nxu mi tunnaɗoloma nxu ma. Hali nxu fati benden to danguma, koni niin naxan nxu yi, na findima nen a nenen na loxo yo loxo. **17** Bayo, en torodin naxan yi waxatidini ito bun ma dunuɗa yi, na mi gbo xa a sa habadan barayi gbeen ma, en naxan sɔtoma e xɔn. (aiɗnios g166) **18** Nxu bata nxu yigin sa se totarene fari. Bayo seen naxanye toma, ne mi buma, koni seen naxanye mi toma, ne luma nen habadan! (aiɗnios g166)

5 Amasoto en na a kolon fa fala en niin fati benden nin naxan luxi alo en doxo bubuna dunuɗa yi. Xa na kala, habadan banxina en yii naxan findixi ariyanna fatin na Ala wali xonna, muxune mi naxan nafalaxi. (aiɗnios g166) **2** Nba, iki en kutunma bubuni ito yi, en fati bendena, bayo en ma habadan doxoden xonla en suxuma ki fapi, alogo ariyanna fatin xa sa en ma alo dugina. **3** Bayo en na na dugin so en mi fa luma alo en nagenla na a ra. **4** Amasoto en nema bubuni ito kui, en kutunma, en toroxi. En mi waxi dugi fonna ba feni en ma, koni a xonla en na, ariyanna fatin xa sa en ma alo dugina, alogo seen naxan faxama, nii rakisin xa findi na rajanna ra. **5** Ala en daxi na feen nan ma. A bata a Nii Sarijanxin fi en ma, a lu alo se singen naxan soxi en yii taxamasenna ra alogo en xa la fe famatone ra. **6** Nanara, en xaxili ragidixi waxatin birin. En mon a kolon fa fala fanni en na en konni fati bendeni ito yi, en nun Marigin doxoden tagi kuya. **7** Amasoto en sigan tima denkeleyaan nan xon ma, koni se toxin mi a ra. **8** Anu, en xaxili ragidixi. A rafanye en ma, en keli fati bendeni ito yi, en sa doxo Marigin konni. **9** Naxan xunna kenla ra en xa, en yi Ala kenan, xa en lu en fati bendeni hanma en faxesa. **10** Amasoto a fere mi na fo en birin xa ti kenenni Alaa Muxu Sugandixina kiti

saden yetagi nen. Muxune birin e kewanle saranna sɔtoma nen keden keden yeen ma, a naxan nabaxi a dunuɗa yi gidini, a fajina hanma a jaxina. **11** Nxu to Marigin yee ragaxun kolon, nanara, nxu kataxi, nxu xa muxune soto. Ala nxu kolon ki fapi. N ma miriyani, e fan nxu kolon e xaxinli. **12** Nxu mi kataxi nxu mon xa nxu yete matoxo e xa. Koni nxu feren nan fima e ma, e yi e kanba nɔ fe yi, alogo e xa nɔ na muxune yabe naxanye e kanbama e tofanni benun e xa e kanba e boɗe yi feene yi. **13** Xa xaxilitaren nan nxu tan na, na Ala nan ma. Koni xa xaxilimaan nan nxu ra, na e tan nan xa. **14** Amasoto Alaa Muxu Sugandixina xanuntenyaan nan nxu karahanma, nxu tan to laxi a ra fa fala a muxu keden peen nan faxaxi birin xa, nayi, birin bata faxesa a tan yi. **15** A bata faxesa muxun birin xa. Nanara, muxun naxanye e nii ra, ne mi fa e nii ra e yete xa sonon, koni fo naxan faxaxi, a keli sayani e tan xa. **16** Nba, iki en mi fa muxu yo yatema adamadiyaan kiraan xon. Hali en to yi Alaa Muxu Sugandixin yatema na kiini nun, en mi fa na ligama. **17** Nayi, xa muxu yo Alaa Muxu Sugandixini, na kanna bata findi dali nenen na. A keɗa fonne bata dangu, a nenene bata fa! **18** Na birin keliki Ala nan ma, naxan en nun a tan tagini tonxi a Muxu Sugandixin xon, a yi wanla so en yii a en fan xa a tan nun bonne tagini ton. **19** Bayo, Ala a yeteen nun dunuɗa muxune tagini tonma a Muxu Sugandixin nan xon, a mi fa e sonna yatema. A mon bata na tagi ton feren xibarun taxu nxu ra. **20** Nayi, Alaa Muxu Sugandixina xerane nan en na. Ala yeteen nan muxune rawekilema en ma falan xon. En naxa, “Nxu bata e mafan Alaa Muxu Sugandixin xinli, e a lu e nun Ala tagin xa yiton.” **21** Naxan mi yulubi yo ligaxi, Ala en yulubin saxi na nan ma alogo Ala gbee tinxinna xa lu en yi Yesu barakani.

6 En to walima en bode xon, nxu bata e mafan, e Alaa hinanna naxan sotoxi, e nama na tongo fe fuun na. **2** Bayo a falaxi nen, a naxa, “N bata i yabi n ma marafanna waxatini, n yi i mali marakisi loxon.” A mato, Ala rafan waxatin ni i ra, marakisi loxon ni i ra. **3** Nxu mi sese luye naxan muxun bire tantanni, alogo fe yo nama to nɔ wanla ra. **4** Koni nxu kataxi kiin birin yi nxu xa findi Alaa walike fajine ra: tunnafan gbeen nun toron nun fe xodexene nun kontofinle yi. **5** Xa e nxu bonbo, nxu nema kasoon na, xa e yamaan nadin nxu ma, xa nxu wali xodexene nun xixolitareyaan nun kamani. **6** Nxu kataxi sarijanna

nun fe kolonna nun dijan nun jɛnige fajin nun Alaa Nii Sarijanxin nun xanuntenya kɛndeni, 7 e nun jɔndi falan nun Ala sɛnbeni. Nxu tinxinna rawali yenge so seen nun nxu makantan seen na. 8 Nxu nɛen binyeni, hanma yagini, nxu nɛen xili kalani hanma xili fajina, nxu tinxin hali nxu to yatɛxi yanfantenne ra. 9 Nxu suxi alo muxun naxanye mi kolonxi, anu nxu kolonxi ki fajɪ. Nxu yatɛxi alo nxu faxamatɔɔn nan yi a ra nun, anu ɛ mato nxu jɛjɛ mi a ra iki ba? Nxu jaxankataxi, koni e munma nxu faxa. 10 Nxu yatɛxi muxu sunuxine ra, anu nxu sewaxi waxatin birin. Nxu suxi alo yiigelitɔne koni nxu bata muxu wuyaxi findi se kanne ra. Sese mi nxu yii, koni nxu gbeen nan seen birin na. 11 Kɔrenti kaane, nxu bata falan ti ɛ xa kɛnɛnni, nxu yi nxu kui feen birin fala ɛ xa. 12 Nxu mi nxɔ xanuntenyaan luxunxi ɛ ma, koni ɛ tan bata ɛ gbeen luxun nxu ma. 13 N bata falan ti ɛ xa alo n ma diine. A daxa, ɛ fan xa ɛ kui feene yita nxu ra! 14 ɛ nun denkeleyatarene nama xun xidi wudi kedenna tongo ɛ malan fe kedenna ma. Amasɔtɔ tinxinyaan nun tinxintareyaan lanjɛ e bode ma feen mundun yi? Kɛnɛnna nun dimin lanjɛ e bode ma ba? 15 Alaa Muxu Sugandixin nun Setana nɔɛ lanjɛ di? Denkeleya muxun lanxi denkeleyataren ma kiin mundun yi? 16 Layirin mundun xidixi Ala Batu Banxin nun suxurene tagi? Amasɔtɔ habadan Ala Batu Banxin nan en na, alo Ala a falaxi kii naxan yi, a naxa, “N luma nɛn e yɛ. N yi n masiga ti e tagi, n findi e Ala ra. E yi findi n ma yamaan na.” 17 Nanara, Marigin naxa, “ɛ mini ne yɛ, ɛ ɛ masiga e ra. ɛ nama din se sarijantare yo ra, nayi n tan ɛ rasuxuma nɛn.” 18 Marigina Sɛnben Birin Kanna ito nan falaxi, a naxa, “N findima nɛn ɛ fafe ra, ɛ findi n ma dii xɛmene nun n ma dii tɛmɛne ra.”

7 Bayo Ala to bata en tuli sa feni itoe birin na, ngaxakedenne, en ba feen birin ma naxan fati bendɛn nun niin xɔsima, en yi lu en ma sarijanxa rakamale Ala yɛɛragaxuni. 2 ɛ bɔjɛni tɔn nxu xa. Nxu mi tinxintareya ligaxi muxɛ ra, nxu mi e ratantan, nxu mi e yii se kansun. 3 N mi ito falaxi ɛ yalagɪ feen xan na, amasɔtɔ n bata yi a fala a singeni, n naxa, “ɛ fe nxu bɔjɛni kii naxan yi, en birin na a ra siimayaan nun sayani.” 4 N laxi ɛ tan na kati! N na n kanbama ɛ tan nin. ɛ fe n nalimaniyama han n defe. Hali nxu to tɔrɔn birin yi, n ma sewan dan mi na! 5 Amasɔtɔ, nxu Masedoniya li waxatin naxan yi, nxu mi matabu yo sɔtɔ. Nxu yi tɔrɔxi kiin birin yi. Matandi tiine yi nxu

rabilinni, gaxun yi nxu yi. 6 Koni Ala naxan muxu magodoxine ralimaniyama, na yi nxu ralimaniya Tito a faan xɔn ma. 7 A fa feen gbansanna xa mi yi a ra, fɔ a limaniyaan naxan sɔtɔ ɛ xɔn. A yi a fala nxu xa, n xɔnla ɛ suxu kii naxan yi, ɛ sunu, n ma fe kunfan yi lu ɛ yi. Nanara, n ma sewan yi gbo ayi. 8 Hali n to ɛ raxɔlɔxi n ma falan xɔn kedin kui, n tan mi nimisaxi a sɛbɛn na. N nimisa nɛn waxatidi, n to a kolon a na kedin bata yi ɛ raxɔlɔ. 9 Koni iki, n sewaxi, ɛ to nimisaxi na mi a ra, koni na nimisan to ɛ fe raba kiine masaraxi. Ala nan na nimisan nagidixi. Nanara, ɛ mi tɔrɔ yo sɔtɔxi nxu yii. 10 Amasɔtɔ nimisan naxan kelixi Ala ma, na a ligan nɛn muxune yi e xun xanbi so e hakɛni, e kisi. Nanara, mɔnɛ yo mi na yi. Koni nimisan naxan kelixi dunuɲa feene yi, na rajanma sayaan nan ma. 11 Nimisani ito naxan kelixi Ala ma, ɛ na mato. A bata ɛ findi sɔbɛ ralanɛ ra. ɛ kunfaxi ɛ sɔntareyaan mayita feen na. ɛ xɔlɔxi fe jɔxin ma, ɛ bɔjɛn bata te, fe fajin xɔnla bata ɛ suxu ken! ɛ fe jɔxi rabane hakɛne saranma e ra. Na bata a yita fa fala fe yo mi ɛ ra fefe yi. 12 Xa n na kedin sɛbɛxi, n mi a sɛbɛxi fe kalane xan ma fe ra hanma e muxun naxanye tɔrɔxi. Koni alogo ɛ sɔbɛ soxi nxu xa kii naxan yi, na xa mini kɛnɛnni ɛ yetɛɛn xa Ala yetagi. 13 Ne nan birin nxu ralimaniyaxi. E nun mɔn, ba nxu ralimaniya feen na, ɛ Tito rasewaxi kii naxan yi, nxu sewaxi na fan na han! Bayo ɛ birin bata a nii yifan a ma. 14 N bata yi ɛ matɔxɔ Tito xa nun. ɛ mi n nayagixi. Bayo nxu bata jɔndin fala ɛ xa waxatin birin, nxu ɛ matɔxɔn naxan tixi Tito xa, na fan bata findi jɔndin na. 15 A marafanna luma gboɛ ayi ɛ tan ma fe yi, a na rabira a ma ɛ birin xuruxi feen birin yi kii naxan yi, e nun ɛ a rasɛnɛxi kii naxan yi binye gbeeni han ɛ xuruxurun. 16 N sewaxi bayo n laxi ɛ ra feen birin yi.

8 Ngaxakedenne, Alaa hinanna walima Masedoniya denkeleya muxune tagi kii naxan yi, nxu waxi a xɔn ɛ xa na kolon. 2 Hali e to yi tɔrɔya jaxini, e sewaxi gbeen sa nɛn e yiigelitɔya xɔdɛxɛn fari, e yi kiin ti fonisireya gbeeni. 3 N na e seren bama fa fala e kiin tixi nɛn alo e fanga berɛna, a mɔn yi dangu na ra e jɛnige fajini. 4 E nxu mafan nɛn kati, a e xa na binyen sɔtɔ, e fan yi yama sarijanxin mali Yerusalɛn taani. 5 E dangu nɛn nxu gbee miriyaan na. E yi e yete fi Marigin ma singen. Na xanbi ra, e yi e yete fi nxu fan ma Ala sagoni. 6 Nayi, Tito naxan hinan wanli ito fɔlɔxi ɛ konni, nxu bata na mafan, a xa sa a

rakamali e tagi. 7 Koni e to e senbe soma feen birin yi, denkeleyaan nun falan nun fe kolonna nun wekilen nun xanuntenyaan na nxu xa, nayi e senbe so hinanna fan yi. 8 N mi yamarin sama e ma, koni n nema bonne wanla a fe fale, n feren fima e ma nen alogo e xa e xanuntenyaan mayita. 9 Amasoto e en Marigi Yesu Alaa Muxu Sugandixina hinanna kolon. Se kanna nan yi a ra, koni a yi a yete findi yiigelitoon na e fe ra, alogo e xa findi se kanne ra a yiigelitoyaan xon. 10 Nayi, n nan n ma miriyaan nan yitama e ra feni ito yi: e tan nan singeye e yii malan yala, ba na ra mon, e tan nan singe a jenigexi. 11 Awa, e na wanla rajan alogo e lanxi jenige fajin naxan ma a foloni, e xa na rakamali na kiini, fata e ferene ra. 12 Amasoto xa e jenigen fan, Ala e kiseen yatema nen e yii seene xasabin ma, seen naxan mi e yii, na mi a ra. 13 Nxu mi waxi a xon ma, nxu xa goronna ba bonne xun ma, a doxo e tan xun ma, koni nxu waxi nen birin xa ye lan. 14 Koni bayo se wuyaxi e yii waxatini ito yi, a lan nen, e xa ne mali naxanye mako e yii seene ma iki. Nayi, e yii seene na dasa waxatin naxan yi, e fan e malima nen e yii seene ra alogo e birin yi ye lan. 15 A sebexi Kitabuni, a naxa, "Naxanye a gbegbe matongo, ne mi a gboxi ayi. Naxanye ndedi matongo, a mi dasa ne fan ma." 16 Nxu barikan birama Ala xa, amasoto a bata a liga Tito xa a sobe so e xa alo n tan. 17 Nxu naxan maxadinxu Tito ra, a bata tin na ma, a mon bata a sobe so, a yi a jenige a xa siga e fema. 18 Nxu e nun nxu ngaxakedenna nde rasigama e ma, denkeleya yamane birin naxan matoxoma a wanla fe ra Yesu a fe Xibaru Fajin nali feen na. 19 Naxan mon dangu na ra, denkeleya yamaan birin bata a tan sugandi, a xa siga nxu matideni, nxu nema kiseni itoe xale waxatin naxan yi, naxanye goron saxi nxu xun ma Marigin yeteen binya feen na e nun nxu jenige fajin seren na. 20 Nxu a ligama nxu yeren ma alogo muxe nama nxu mafala nxu kise gbeeni itoe masuxu kiina fe ra. 21 Naxan daxa Marigin yetagi e nun muxune yetagi, nxu katama na nan ligadeyi. 22 Nxu naxan sama na muxu firinne fari, nxu nxu ngaxakedenna nde rasigama e matideni. Nxu bata a mato sanja ma wuyaxi, nxu yi a kolon, a sobe soxi waxatin birin. A mon bata na sobeen yita iki a to laxi e ra han! 23 Tito tan, na findixi n xoyin nun n walike boden nan na. Nxu ngaxakedenna naxanye rasigaxi, denkeleya yamana xerane nan ne ra Alaa Muxu Sugandixina binyena fe ra. 24 Nanara, e xa

xanuntenyaan yita e ra alogo denkeleya yamane xa nxu kanba xunna kolon e yi, e yi a to.

9 E maliin naxan nabama lan yama sarijanxin ma, a tonon mi na n xa kedin sebe e ma lan na ma. 2 Bayo, n na a kolon fa fala e jenigen fan. N luma e matoxe Masedoniya kaane xa, n naxa, "Xabu yala, Akaya kaane yitonxi mali ti feen na." E bata muxu wuyaxi rakunfa e sobe soon xon. 3 Nayi, n na ngaxakedenna ndee rasigama e ma alogo nxu e matoxoxi kii naxan yi, na nama findi fe fuun na. Koni a xa a li e yitonxi alo n na a falaxi kii naxan yi. 4 Xa Masedoniya kaana nde fa n foxo ra e fema, e yi a li e mi yitonxi, nxu yi yagima nen nayi nxu to laxi e ra, koni katarabi e tan nan ma. 5 Nanara, n bata a miri, fa fala, a lan n xa ngaxakedenna ndee mafan, e siga e fema n yee ra, e yi na fonisireya kiseni ton, e bata yi nxu tuli sa naxan na alogo a xa fi fonisireyani benun a xa findi karahanna ra. 6 E xaxili lu ito xon ma. Naxan na sansina ndedi woli, na ndedi nan xabama. Koni naxan na sansi gbeen woli, na a gbegbe xabama nen. 7 Birin xa Ala ki alo a bata a ragidi a bopeni kii naxan yi. A nama findi monen na hanma karahanna. Amasoto naxan kiin tima sewani, na kanna rafan Ala ma. 8 Ala noe e kiye nen a hinan defexini alogo a xa e makone fan feen birin yi waxatin birin, nde mon yi lu e yii wali fajine birin kedeni. 9 A sebexi Kitabuni, a naxa, "A bata tonon muxune ki fonisireyani. A tinxinyaan luma nen habadan!" (aiōn g165) 10 Nba, Ala naxan sansiin fima xee biin ma e nun donsena, na sansiin fima e ma nen, a a rawuya ayi, a yi e tinxinyaan wali xonne ragbo ayi. 11 E findima nen se kanne ra kiin birin yi, alogo e xa lu fonisireyani waxatin birin. Nayi, muxu wuyaxi barikan birama nen Ala xa, nxu na e kiseen xali e xon. 12 Amasoto e wanla naxan nabama ito ra, na mi yama sarijanxin makone xan gbansan fanma, koni a mon wali fajni kolonna rayiriwama Ala xa. 13 Muxu wuyaxi Ala binyama nen e wanli ito tonon xon, e to yamari suxun saxi e tubi feen fari Alaa Muxu Sugandixina fe Xibaru Fajini. E mon Ala binyama nen e fonisireyana fe ra e to e kima e seene yi e nun muxun bonne. 14 Nanara, e Ala maxande e xa xanuntenyani Alaa hinan gbeena fe ra a naxan nagidixi e ma. 15 En barikan bira Ala xa a kiseni fe ra naxan joxon mi na.

10 N tan Poli, n bata e mafan Alaa Muxu Sugandixina limaniyaan nun dipani, hali ndee to a falama a n falan tima e yee xori yete magodon nin, koni a n na

keli ε fema, n jaxu ε ra. 2 N bata ε mafan, n na fa ε fema, ε nama n karahan a n xa jaxu ε ra sɔbɛɛn na, amasɔtɔ n laxi a ra, n susue nɛn na lige ndee ra yati, naxanye e mirixi a nxu nxɔ dunupa yi gidin ligama adamadiyaan kiraan nan xɔn. 3 Amasɔtɔ, nxu dunupa yi gidin ligama adamadiyaan nin, koni nxu mi yengen soma adamadiyaan kiraan xɔn. 4 Bayo nxɔ yenge so seene mi luxi alo adamadiine gbeene: Alaa yenge so se senbɛmane nan e ra, naxanye nɔɛ yire makantanxine kale. Nxu wule miriyane kalama ne nan na, 5 e nun wason naxan birin kelima Alaa kolonna xili ma. Nxu yi xaxinle birin yɛɛ rafindi Ala ma alogo e xa xuru a Muxu Sugandixin ma. 6 E na Alaa fala suxun nakamali waxatin naxan yi, nxu tinma nɛn fala suxutarene hakene saranyɛ e ra. 7 E feene fanna nan tun toma. Xa muxuna ndee bata la a yete ra fa fala a Alaa Muxu Sugandixini, a mɔn xa a miri ito ma: a Alaa Muxu Sugandixin nan gbee en fan na alo a tan. 8 Marigin nɔɔn soxi n yii ε senbɛ so feen nan na, ε kala feen mi a ra. Hali n nan n yete matɔxɔma na ra jaxi ra, n mi yagixi na feen na. 9 N mi waxi a xɔn ma, a xa liga alo n na ε magaxuma n ma kedine ra nɛn. 10 Bayo, ndee a falama, e naxa, “Pɔli a kedine xɔdɔxɔ, e senben gbo, koni xa a yetɛna en fema, senbɛ mi a ra, sese mi a falan na.” 11 Na kanna xa a miri nɛn fa fala nxu kii naxan yi nxu nɛma kedin sebe, nxu kewanle luma na kii nin nxu nɛma ε yɛ. 12 Muxuna ndee na yi naxanye e yete matɔxɔma, anu nxu mi susue nxu yete se ne ma hanma nxu nun ne yi yate nxu bode xɔn. E na misaala tongo e yete ma, e yi e yete sa e yete ma, xaxilitaren nan ne ra. 13 Koni nxu tan mi nxu yete matɔxɛ jaxi ra. Ala bata wanla naxan so nxu yii, nxu mi nxu yete matɔxɔma dangi na ra, naxan a ligama nxu fa han ε fema. 14 Bayo nxɔ yete matɔxɔn mi danguxi nxu danna ra, alo nxu yi naxan ligama nun xa nxu mi yi fa ε konni, anu nxu singe nan faxi han ε fema Alaa Muxu Sugandixina fe Xibaru Fajin nalideni. 15 Nxu mi nxu yete matɔxɛ bonne wanla fe ra, nxu a radangu ayi. Koni nxu laxi a ra fa fala ε denkeleyaan gboma ayi nɛn, nxu yi nɔ wali kende gbete rakamale ε tagi hali nxu mi dangi nxu danne ra 16 bayo taan naxanye ε konna xanbi ra, nxu nɔɛ Yesu a fe Xibaru Fajin naliyɛ nɛn ne ma, benun nxu xa nxu yete matɔxɔ bonne wanli naxan kexi muxu gbetene walideni. 17 Koni, a seɓexi Kitabun kui, a naxa, “Xa naxan a yete matɔxɔma, a xa a yete matɔxɔ Marigina

fe ra.” 18 Amasɔtɔ muxun naxan a yete matɔxɔma, Ala mi na rasuxe fɔ Marigin na naxan matɔxɔ.

11 E diɲɛ ba, xa n fatɔyana ndedi fala ε xa? Koni ε diɲaxi xe! 2 Bayo xɔxɔlɔnyaan nan n yi ε fe ra, xɔxɔlɔnyaan naxan kelixi Ala ma. Amasɔtɔ a luxi alo n na ε masuxi futun nin xɛmɛ keden peen xa, Alaa Muxu Sugandixina, alogo n xa ε yita a ra alo sungutun nasɔlɔnxina. 3 Koni alo saɲina Nmahawa mayenden kii naxan yi, n gaxuxi nɛn ε fan miriyane nama ε yifu ε yi ε masiga ε lannaya kenden nun ε sariɲanna ra Alaa Muxu Sugandixin xa. 4 Bayo xa muxuna nde fa Yesu gbete a fe kawandi ba ε xa, nxu mi naxan ma fe kawandin ba, hanma xa ε nii gbete sɔtɔ ε mi naxan sɔtɔ nxu ra, hanma xa ε Xibaru Fajin gbete mɛ, ε mi naxan nasuxu a singeni, ε tinma nɛn na birin ma ki fajin! 5 Koni muxuni itoe naxanye e yete yatema xera fisamantenne ra, n mi laxi a ra xa ne dangi n tan na kii yo yi. 6 Yanyina nde, n mi fatan falan na, koni n fe kolon. Bayo nxu bata na rafixa ε xa kiin birin yi. 7 N na Alaa fe Xibaru Fajin nali ε ma waxatin naxan yi, n mi sese rasuxu ε ra, n yi n yete magodo alogo n xa ε tan yite, n haken nan ligaxi ε ra nayi ba? 8 N seen nasuxu nɛn denkeleya yama gbeteɛyɛ ra, e yi n saranna fi, alogo n xa wali ε xa. 9 N yi ε fema waxatin naxan yi, n hayu ramaan yi lu, koni n mi muxu yo tɔrɔ, bayo denkeleya muxun naxanye keli Masedoniya yi, ne n makone fan nɛn. N mi tin n xa findi goronna ra ε xun ma, n mɔn n yete suxuma nɛn na ma. 10 N bata n kɔlɔ Alaa Muxu Sugandixina jɔndini naxan n yi, muxu yo mi n kumɛ binyeni ito yi Akaya yamanani. 11 N na falaxi nanfera? N to mi ε xanuxi ba? Ala a kolon, a n na ε xanuxi! 12 N naxan ligama, n mɔn na ligama nɛn alogo nxu mafala xunna nama taran na naxanye a lige na muxune yi e yete matɔxɔ a nxu nun ne birin lan. 13 Ne findixi wule xɛrane nun mafu tiine nan na, naxanye e yete findixi Alaa Muxu Sugandixina xɛrane maligan na. 14 Nba, kabanako fe mi na ra, bayo hali Setana nɔɛ a yete finde nɛn kenenna malekan maligan na. 15 Nayi, na mi finde tɛrɛna fe ra xa Setanaa walikene fan e yete findi tinxinyaan walikene maligan na. Ne rapanna lanma nɛn e kewanle saranna ma. 16 N mɔn xa a fala, muxu yo nama n yate xaxilitaren na. Hanma xa ε a mirixi na kiini, ε tin n xa findi xaxilitaren maligan na alogo n fan xa n yete matɔxɔ ndedi. 17 N falan naxan tima iki, n mi na falama Marigina kiraan xɔn,

koni n na a falama xaxilitareyaan nin. **18** Bayo muxu wuyaxi to e yete matoxoma adamadiyaan kiraan xon, nanara, n fan n yete matoxoma nen. **19** E tan to findixi xaxilimane ra, e mafura dije xaxilitarene bun ba? **20** E tinxi e xa e findi konyine ra, e yi e rawali, e yi e yii seene kansun, e yi e yete yite e ma, e yi e yetagi garin! **21** N xa a fala e xa, yagin nan na ra, koni nxu mi susue na lige. Nayi, muxu gbete noe a yete matoxe denaxan yi, n xa falan ti alo xaxilitarena, n fan susue nen n yete matoxe menni. **22** Heburun nan e ra ba? A tan nan n fan na. Isirayila kaan nan e ra ba? A tan nan n fan na. Ibrahima bonsonna nan e ra ba? A tan nan n fan na. **23** Alaa Muxu Sugandixina walikeen nan e ra ba? N falan tima alo xaxilitaren yetena, koni n dangu e tan na! N bata toro walideni dangu e tan na pon! N bata sa kason na dangu e tan na pon! Muxune yi n bulan dangu e tan na, n yi lu sayaan de waxati wuyaxi. **24** Yahudiyane yi n bulan doxoja ma suulun bosaan ye tonge saxon e nun solomanaanin. **25** Romi kaane yi n mabonbo gbelemene ra doxoja ma saxon. E n magolon n faxa feen na sanja ma keden. Kunkin yi kala n na foxo igen tagi doxoja ma saxon, n lu fufani yanyi keden koe keden, na waxatina nde yi. **26** N yi sigatini waxati wuyaxi gbalon de, baane nun mafu tiine nun n kon kaa Yahudiyane nun siya gbetene gbalone. N yi taan nun burunna nun foxo igene nun wule denkeleya muxune gbalone de. **27** N toro nen waliden nun waxati xodexene yi, n lu xii xolitareyani waxati wuyaxi, n lu kamen nun min xonla ra. Donseen mumeen yi dasa n ma waxati wuyaxi, n lu xunbenla ra marabenni. **28** Naxan saxi na birin fari, n goronna naxan tongoma loxo yo loxo, n kontofilixi denkeleya yamane birin na. **29** Xa muxuna nde senben xurun, n fan senben xurunma nen. Xa muxuna nde bira yulubini, na n bonen ganma nen. **30** Xa n yi daxa nun n xa n yete matoxo, n yi n yete matoxoma n ma senbetareyaan nan na. **31** En Marigi Yesu Fafe Ala a kolon fa fala n mi wulen falama. Tantunna xa fi a ma habadan! (aiön g165)

32 N yi Damasi taani waxatin naxan yi, Yamana Kanna naxan Manga Aretasi bun ma, na yi muxune ti taan so deen na n suxu xinla ma. **33** Koni muxune yi n doxo sagan kui, e yi n nagodo taan nabilin yinna xanbi ra, n nan n futuxulu a yii na kii nin.

12 A daxa n xa lu n yete matoxe, hali tono yo mi a yi. Koni fe toon naxanye tixi alo xiyena, e nun Marigin bata feen naxanye makenen, n xa ne fan fala.

2 N muxuna nde kolon naxan Alaa Muxu Sugandixini. Na rate nen han kore xonna saxandena. Na jee fu nun naaninna ni i ra. A gbengbenna, n mi a kolon xa a fatin nan te kore, hanma xa a fe toon nan ti alo xiyena. Ala nan na kolon. **3** N na a kolon xemeni ito te nen, koni xa a fatin nan te, hanma xa a fe toon nan ti alo xiyena, n mi na tan kolon. Ala nan na kolon. **4** A tongo nen a rate ariyanna yi. A yi falane me naxanye mi noe fale, e nun muxu yo mi noe xete naxanye ma. **5** N na muxu sifan matoxoma nen, koni n tan, n mi n yete matoxe fo n ma senbetareyani. **6** Xa n yi waxi n yete matoxo feni nun, n mi yi findin xaxilitaren na nun, bayo n yi jondin nan falama. Koni n na n yete suxuma alogo muxu yo nama n yate dangu n kewanle ra e naxanye toxi e nun e naxanye fe mexi. **7** Na ma, Ala toro fena nde ragidi nen n ma alo janla na lu fati bendeni, naxan yi findixi Setana xerana nde ra. Na yi n jaxankata alogo n nama lugo wason na, n to fe makenenxi gbeeni itoe toxi. **8** N bata Marigin maxandi sanja ma saxon alogo a xa na toro feen ba n ma. **9** A yi n yabi, a naxa, “N ma hinanna bata i wasa. N senben nakamalima muxuna senbetareyaan nin.” Nayi, n mafura n yete matoxe n ma senbetareyani, alogo Alaa Muxu Sugandixin senben xa lu n xon ma. **10** N na n yete kenexi senbetareyaan nun konbine nun fe xodexene nun besenxonyaan nun kontofinle yi Alaa Muxu Sugandixina fe ra. Amasoto xa n senben jan waxatin naxan yi, n senben soto ma na waxatin nin. **11** N falan tima alo xaxilitarena, koni e n karahanxi nen. E tan yi lan nun e yi n xun mafala, bayo naxanye e yete yatema xera fisamantenne ra, ne mi dangu n na sese yi, hali se mi n na. **12** Taxamasenna naxanye a yitaxi a xeraan nan n tan na, nxu bata ne liga e tagi tunnafanni, e findi taxamasenne nun kabanako feene nun fe magaxuxine ra. **13** Nxu denkeleya yamaan bonne rafisaxi e xa kiin mundun yi? Fo n goronna to mi luxi e xun ma tun. E mi dije na haken ma ba? **14** N yitonna saxanden ni ito ra siga feen na e konni. N goronna mon mi luma e xun ma. Amasoto n mi e yii seene xan foxo ra, koni fo e yetena. Na ma, diine xa mi gbetin malanma e soto muxune xa, koni denbaya kanne nan gbetin malanma e diine xa. **15** Nayi, a finde sewan nan na, n yi n yii seene birin fi, n yi n yete fi e niine fe ra. Xa n na n ma xanuntenyaan fari sa e xa, e xanuntenyaan xurunje ayi n tan xa ba? **16** A xa lu na ki. N mi findixi goron na e xun ma. Koni muxune a falama, a n to findixi yanfantenna ra, n na

ε suxi kōten nan na. **17** N xeraan naxanye rasiga ε ma, n na ε rawali nen na nde xōn ba? **18** N Tito mafan nen alogo a xa siga ε konni, n yi denkeleya muxuna nde rasiga a fōxō ra. Tito ε rawali nen ba? Nxu birin kui fe keden kejna keden xa mi yi a ra nxu sigati kiini ba? **19** Yanyina nde, ε mirixi fa fala a to mi na ra a nxu kataxi nxu xun mayenge feen nan na ε fema. En-en. Nxu falan tima Ala nan yee xōri a Muxu Sugandixin barakani. N xanuntenne, nxu na birin ligama ε yee rasiga feen nan ma. **20** N gaxuxi nen, n na fa waxatin naxan yi, n na ε liye kii naxan yi, na mi rafanjne n ma, e nun ε fan n liye kii naxan yi, na mi rafanjne ε ma. N gaxuxi nen lantareyaan nun xōxōlōnyaan nun bōjne teen nun yete yigboon nun fala jaxin nun muxu mafalan nun wason nun fe yibasanna nama lu ε tagi. **21** N gaxuxi nen a n na fa, n ma Ala nama n nayagi ε fe yi, n yi wuga muxu wuyaxi a fe ra naxanye bata yi yulubin liga koni han to e mi e xun xanbi soxi e fe xōsixinē nun e yanga suxun nun e haramu feene yi, e yi naxanye ligama.

13 A saxanden ni i ra n fama ε konni. A sebexi Kitabuni, a naxa, “Feen birin makitima sereya firin hanma saxan fala xuiin nan xōn.” **2** N bata yi ε rakolon n faan firindeni ε fema. N to mi ε fema iki, n mōn xa a fala na muxune xa naxanye bata yi yulubin liga a fōlōni e nun bonne birin, n naxa, n na fa ε fema sōnōn, n mi ε xun mafalama ε yulubine fe ra, **3** bayo ε waxi a xōn n xa sereyane yita ε ra fa fala n na Alaa Muxu Sugandixina falane nan tima. A tan mi ε masuxe senbetareyani, bayo senbe kanna nan a tan na ε tagi. **4** Amasoto a gbangban nen wudin ma a senbetareyani, koni a luxi a nii ra Ala senben barakan nin. Nxu fan bata findi senbetarene ra a tan yi, koni nxu nii rakisin sōtōma ε tan ma fe ra, alo a tan kii naxan yi, Ala senben barakani. **5** E ε yete rakōrōsi, alogo ε xa a kolon xa ε denkeleyaxi. E ε yete feselese. E mi a kolon ba fa fala a Yesu Alaa Muxu Sugandixina ε yi? Fō xa a li de, ε bata fula feselesen na. **6** N laxi a ra, ε a kolonma nen a nxu mi fulaxi feselesen. **7** Nxu Ala maxandima a ε nama fe jaxi yo liga. Nxu mi waxi na xōn ma alogo yamaan xa a kolon a nxu bata nōn soto feselesen, koni alogo ε xa fe fajin liga, hali a luxi alo nxu fa fulama feselesen. **8** Bayo nxu mi nōe sese lige Alaa jōndin xili ma, koni nxu nōe wale a xa nen. **9** Nxu sewama nen xa senbe mi nxu ra, ε tan senben yi gbo ayi. Na ma, nxu Ala maxandima nen a

ε xa kamali. **10** Nanara, n feni itoe sebema ε ma, n to mi ε fema, alogo n na fa ε fema, n nama ε suxu a xōdexen na n ma senbemayani, Marigin senben naxan soxi n yii ε rawekile feen na benun a xa ε halagi. **11** Awa, ngaxakedenne, Ala xa sewan fi ε ma. E kata ε xa defe, ε yi ε bode ralimaniya, ε lu xaxili kedenna nun bōjne xunbenli. Nayi, xanuntenyaan kanna nun bōjne xunbenla kanna Ala luma nen ε xōn. **12** E bode xōntōn ngaxakedenya xōntōn sunbuni. **13** Yama sarijanxin birin ε xōntōnma. **14** Marigi Yesu, Alaa Muxu Sugandixina hinanna nun Alaa xanuntenyaan nun Alaa Nii Sarijanxin lanna xa lu ε birin xōn.

Galati Kaane

1 N tan Pöli, Alaa Muxu Sugandixina xerana, n bata kedini ito sebe Galati denkeleya muxune ma. Adama mi n xexi fo Yesu nun Fafe Ala naxan a rakelixi sayani. **2** N tan nun ngaxakedenna naxanye birin be, nxu Galati denkeleya yamaan xontonna: **3** En Fafe Ala nun a Muxu Sugandixin Marigi Yesu xa hinanna nun bope xunbenla fi e ma. **4** Yesu nan a yete fixi en yulubine fe ra, a yi en xunba waxati jaxini ito yi alo en Fafe Ala waxi a xon ma kii naxan yi. (aiõn g165) **5** En xa binyen fi a ma habadan han habadan! Amina. (aiõn g165) **6** N bata kabe e ma amasoto e bata e xun xanbi so Ala yi mafuren naxan e xilixi a Muxu Sugandixina hinanna xon. E yi xibaru gbete suxu. **7** Koni Xibaru Fajni gbete yo mi na yi mume! Muxune nan tun e toroma, e waxi Alaa Muxu Sugandixina fe Xibaru Fajin maxete feni. **8** Koni hali nxu tan hanma malekana nde yi fa sa keli ariyanna yi, a xibaru gbete kawandin ba e xa, nxu tan mi naxan baxi e xa, Ala xa na kanna halagi habadan! **9** Nxu bata yi a fala. Iki, n mon xa a fala e xa. Xa muxu yo xibaru gbete kawandin bama e xa, ba Yesu a Fe Xibaru Fajin na, e naxan singe suxi, Ala xa na kanna halagi habadan! **10** Iki n yamaan nan mafanma ba? Hanma Ala? N katama n xa rafan adamadiine nan ma ba? Xa n mon yi katama n xa yamaan nan kenen nun, nayi n mi finde Alaa Muxu Sugandixina walikeen al **11** Ngaxakedenne, n xa a fala e xa, n Yesu a fe Xibaru Fajin naxan nalixi e ma, a mi fataxi adamadiine ra. **12** N mi a sotoxi muxu yo ra. Muxu yo mi n xaranxi a ma. Yesu Alaa Muxu Sugandixin nan a makenenxi n xa. **13** Amasoto e bata n kewanle fe me, n naxan naba n yi Yahudiya dinani waxatin naxan yi. N bata denkeleya yamaan jaxankata han a radangu ayi. N yi a kalama nen. **14** N yi danguma nen n lanfa wuyaxi ra Yahudiya dinani n siyaan muxune ye. Dinan muxu gbee nan yi n tan na n benbane namunne xon. **15** Koni xabu n bari waxatin naxan yi, Ala yi n sugandi, a n xili a hinanni. Bayo a a kenen nen **16** a xa a Dii Xemen makenen n xa, alogo n xa a fe Xibaru Fajin nali siya gbetene ma. Nayi, n mi sigaxi adamadi yo fema, a xa n kawandi. **17** N mi sigaxi Yerusalen taani ne fema naxanye singe yi xerane ra. Koni n siga nen Arabu yamanani mafuren! N mon yi xete Damasi yi. **18** Nee saxan dangu xanbini, n yi siga Yerusalen taani alogo nxu nun Piyeri xa nxu bode kolon, n xii fu nun suulun ti a fema. **19** N mi xera gbete to na yi fo Marigi Yesu xunyen Yaki. **20** N naxan

sebexi, Ala nan seren na, jondin na a ra. **21** Na xanbi ra, n yi siga Siriya yi e nun Silisi yi, **22** koni muxemi yi n kolon Yudaya denkeleya yamane ye naxanye Alaa Muxu Sugandixin xon. **23** E ito nan gbansan me: “Xemen naxan yi en jaxankatama a foloni, na nan fa denkeleyaan kirana fe kawandin bama iki, a yi naxan kalama.” **24** Nanara, e yi Ala tantun n tan ma fe ra.

2 Nee fu nun naanin dangu xanbini, n tan nun Baranabasi yi siga Yerusalen taani. N Tito fan xali. **2** N siga nen bayo Ala bata a makenen n xa. N darixi Yesu a fe Xibaru Fajin naliye siya gbetene ma kii naxan yi, n yi na yeba e muxu gbeene xa wundoni, alogo n ma wanle birin nama lu fufafu! **3** Koni hali Tito Gireki kaan naxan yi n fema, e mi a karahan a banxulan feen ma. **4** Koni nafigina ndee yi basanxi nxu ra alogo e xa nxo feene rakorosi, e yi nxo xoroyani gbe Yesu Alaa Muxu Sugandixin naxan fixi nxu ma, e yi nxu findi konyin na. **5** Nxu mi tin e xa hali ndedi, alogo nxu xa Yesu a fe Xibaru Fajin jondin mara e xa. **6** Naxanye yi luxi alo e muxu gbeene, e yi findixi naxan yo ra, n ma kolon, bayo Ala mi muxune rafisama e bode xa. Na muxu gbeene mi sese saxi n ma xaranna fari. **7** A makuya na ra! E a toxi nen a Ala bata Yesu a fe Xibaru Fajin kawandi baan wanla taxu n tan na siya gbetene xa alo a bata a taxu Piyeri ra kii naxan yi Yahudiyane xa. **8** Amasoto naxan Piyeri findixi xeraan na Yahudiyane xa, na nan n fan xexi siya gbetene ma. **9** Yaki nun Piyeri nun Yoni, naxanye yi luxi alo e yeeratine, e to Alaa maragidin kolon a naxan fixi n ma, e yi n tan nun Baranabasi yisuxu ngaxakedenyani alogo nxu xa wali siya gbetene tagi, e tan yi wali Yahudiyane tagi. **10** E yi nxu mafan, a nxu xa nxu xaxili lu yiigelitone xon ma. N fan yi n sobe soxi na nan ma. **11** Piyeri fa Antiyoki yi waxatin naxan yi, n yi a matandi amasoto a yi tantanxi. **12** Benun muxuna ndee xa fa keli Yaki fema, Piyeri yi a degema siya gbete denkeleya muxune nan xon ma nun. Koni ne to fa, a yi keli e fema, a a makuya e ra amasoto a gaxuxi Yahudiyane yee ra naxanye yi waxi siya gbetene banxulan feni. **13** Yahudiya denkeleya muxun bonne fan yi so a tantanni. Hali Baranabasi fan yi so a yi. **14** N to a to a e mi sigan tima Yesu a fe Xibaru Fajin jondin kira tinxinxin xon ma, n yi a fala Piyeri xa e birin yee xori, n naxa, “Yahudiyani nan i tan na koni i ya kewanle ligaxi alo siya gbetene, e mi luxi alo Yahudiyane! Nayi, i siya gbetene karahanma

di, a e xa Yahudiyane namunne suxu?" **15** En tan naxan barixi Yahudiyayani, siya gbete mi en tan na, naxan findixi yulubi kanne ra. **16** En na a kolon a muxun mi tinxinma ayi Ala yee ra yi sariya suxun xan xon ma, fo a na denkeleya Yesu Alaa Muxu Sugandixin ma. Nanara, en bata la Alaa Muxu Sugandixin Yesu ra alogo en xa tinxin denkeleyaan xon Alaa Muxu Sugandixin ma. Sariya suxun mi a ra bayo adamadi yo mi noe tinxinje sariya suxun xon. **17** Koni en na kata en xa tinxin Alaa Muxu Sugandixin barakani, xa a li yulubi kanna nan en fan na, nanara ba fa fala Alaa Muxu Sugandixin walima yulubi nan xa nayi? En-en de! **18** N bata n me sariyan naxanye ra, xa n mon tin ne ma, na bunna neen, n bata findi sariya kalan na. **19** N luxi nen alo n bata faxa sariyan bun, n mi fa sariyan bun sonon. Nanara, Ala nan gbee n ma dunupa yi gidin na. N bata gbangban wudin ma Alaa Muxu Sugandixin xon ma, **20** nanara, n tan mi fa n nii ra sonon koni Alaa Muxu Sugandixin niin nan fa n yi. N dunupa yi gidin naxan nabama n fati bendeni sonon, n na rabama denkeleyaan nin Alaa Dii Xemeni, naxan bata n xanu, a faxa n ma fe ra. **21** N mi n mema Alaa hinanna ra. Amasoto xa muxun yi tinxinma sariyan nan xon ma nun, Alaa Muxu Sugandixin bata faxa nayi fufafu!

3 Ee! Galati kaa xaxilitarene! Nde e tirinxi? E tan bata yi Yesu Alaa Muxu Sugandixin faxa feni gbe wudin ma ki faji! **2** E xa maxodin keden yabi n xa: E Alaa Niin sotoxi sariya suxun nan xon ma ba hanma denkeleyaan xon ma e naxan ma fe mexi? **3** E bata yi a folo Alaa Niin barakani, koni iki e xaxilitareyaan bata radangu ayi, han e fa waxi a xon e xa a rapan e yete senben na iki ba? **4** E toroxi nen fufafu ba? Fufafu mi yi a ra ba? **5** Ala a Nii Sarijanxin fima e ma, a kabanako feene ligama e tagi sariya suxun nan xon ma ba, hanma denkeleyaan xon ma ba, e naxan ma fe mexi? **6** A luxi nen alo naxan sebexi: "Iburahima yi denkeleya Ala ma, Ala fan yi na yate tinxinna ra a xa." **7** E xa a kolon fa fala muxun naxanye denkeleyaxi, Iburahima bonsonna muxune nan ne ra. **8** Kitabun bata yi a fala nun, a Ala siya gbetene ratinxinma nen a yete yee ra yi denkeleyaan barakani, a yi Yesu a fe Xibaru Fajin nali Iburahima ma benun a waxatin xa a li, a naxa, "Dunupa siyane birin duban sotoma nen i tan barakani." **9** Naxanye denkeleyaxi, ne duban sotoma nen alo denkeleya muxuna Iburahima. **10** Naxanye

xaxili tixi sariya suxun na, dangan ne xa. Amasoto a sebexi, "Feen naxanye birin sebexi Sariya Kitabuni, naxan mi ne suxuma, Ala xa na kanna danga." **11** Nba, a bata yigbe feu, fa fala muxu yo mi tinxinje Ala yee ra yi sariyan xon ma. Amasoto Kitabun naxa, "Naxan na tinxin denkeleyaan xon, na nii rakisin sotoma nen." **12** Koni sariyan mi minixi denkeleyani, bayo a mon naxa, "Naxan na itoe suxu, na kanna nii rakisin sotoma nen e xon." **13** Alaa Muxu Sugandixin findixi danga muxun nan na en tan ma fe ra, a en xunba sariyan dangan bun ma, bayo a sebexi, "Naxan yo na singan wudin ma, dangan na kanna xa." **14** A na liga nen en xa alogo Ala duban naxan nagidixi Iburahima ma, siya gbetene fan xa na soto Yesu Alaa Muxu Sugandixin barakani. En mon yi Alaa Niin soto denkeleyaan xon ma, a en tuli saxi naxan na. **15** Ngaxakedenne, n xa misaala yita e ra fata dunupa yi gidin na. Awa, xa muxu firinna lan fena nde ma, e layirin xidi, muxu yo mi na layirin kale hanma a nde sa a fari. **16** Na ma, Ala bata Iburahima tuli sa e nun a yixetena. Kitabun mi a falaxi fa fala "a yixetene," naxan yi findima muxu wuyaxi ra. Koni a naxa, "i yixetena," na bunna neen muxu kedenna na a ra, Alaa Muxu Sugandixina. **17** N naxan ma, na ni ito ra: Ala bata yi layirin naxan xidi ken, Musaa sariyan mi na kale naxan falaxi jee keme naanin jee tonge saxan dangu xanbini. Na mi Alaa tuli saan kalama. **18** Amasoto xa Alaa keen fima sariyan nan xon ma, a mi findixi tuli saan na na yi. Koni Ala hinan nen Iburahima ra, a a tuli sa. **19** Sariyan fa fixi nanfera nayi? A fixi hakene nan ma fe ra han Iburahima yixeten fa waxatin yi a li, Ala en tuli sa naxan na. Sariyan fixi malekane nan xon muxuna nde sabun na. **20** Sabu wuyaxi na yi, koni Ala keden peen na a ra! **21** Awa, sariyan saxi Alaa tuli saan nan xili ma ba? En-en de! Bayo xa sariyan yi fixi nun naxan yi noe nii rakisin fiye, nayi yamaan yi tinxinma ayi nen Ala yee ra yi sariyan xon. **22** Koni Kitabun naxa, a dunupa birin yulubin senben bun ma. Nanara, naxanye denkeleyaxi, ne xa Alaa tuli saan soto Yesu a togondiyaan barakani, Alaa Muxu Sugandixina. **23** Koni benun denkeleyani ito xa fa waxatin naxan yi, sariyan yi en birin maraxi nen alo kaso ra saane han denkeleyaan yi lankenemaya. **24** Nanara, sariyan findixi en xuru seen nan na, a en xali Alaa Muxu Sugandixin ma alogo en xa tinxin Ala yee ra yi denkeleyaan xon ma. **25** Koni denkeleyaan bata fa. Nanara, en mi fa na sariyan bun ma sonon naxan

yi findixi en xuru seen na. **26** Amasoto ε birin bata findi Alaa diine ra denkeleyaan xon ma Alaa Muxu Sugandixin Yesu yi. **27** Amasoto ε bata rafu igeni ε tubi xinla ma Alaa Muxu Sugandixin ma. Nayi, Alaa Muxu Sugandixina muxuyaana bata ragodo ε ma alo domana. **28** Nanara, tagi raba mi fa Girekine nun Yahudiyane tagi. Tagi raba mi fa konyine nun xorone tagi. Tagi raba mi fa xemen nun jaxanla tagi, ε birin bata findi kedenna ra Alaa Muxu Sugandixin Yesu yi. **29** Xa Alaa Muxu Sugandixin gbeen nan ε tan na, ε bata findi Ibrahima bonsonna ra e nun a keε tongone alo Ala a tuli saxi kii naxan yi.

4 Koni n na ito nan falama: Fanni keε tongon mon dii joreyani, a mi fisa konyin xa hali seen birin kannna to a ra. **2** E diin taxuma a kantan muxune ra naxanye a feene yebama a xa han na waxatin yi a li a fafe naxan saxi. **3** Na kiini, benun en xa koxo denkeleyani, en fan yi konyiyani dunuja gele ma feene yi. **4** Koni a fa waxatin to a li, Ala yi a Dii Xemen nafa. Jaxanla yi a bari. A barixi sariyan nan bun ma, **5** alogo a xa ne xoroya naxanye sariyan bun ma, a en xa findi Alaa diine ra. **6** Bayo ε bata findi a diine ra, Ala bata a Dii Xemena Nii Sarijanxin nagodo, a so en bojneni. Na Nii Sarijanxin nan Ala xilima en bojneni, a naxa, “Baba! N fafe!” **7** Nayi, konyi mi fa i tan na fo a diina. Xa i bata findi a diin na, Ala mon i findima keε tongon na nen. **8** A foloni ε mi yi Ala kolon nun, ε yi batu seene nan ma konyiya yi. Ala mi yi ne ra mumel! **9** Koni iki, ε Ala kolon. Ala fan ε kolon. Nanfera ε birama dunuja gele ma feene foxo ra sonon, naxanye senbe mi na? E waxi a xon ma nen ba, ε mon xa findi ne konyine ra? **10** E sali laxone binyama, e nun kikene nun waxatine nun jenenel! **11** N gaxuxi xa n mi toroxi ε fe ra fuu! **12** Ngaxakedenne, n na ε mafanma, ε xa lu alo n tan. Bayo n tan luxi nen alo ε tan. E mi tinxintareya yo doxi n na. **13** E a kolon fa fala n ma furen nan a ligaxi, n Yesu a fe Xibaru Fajin kawandin ba ε xa a foloni. **14** Koni hali n ma furen to ε toroxi, ε mi n najaxuxi, ε mi ε mexi n na. Koni ε n yisuxi alo Alaa malekan nan yi n na nun, alo Alaa Muxu Sugandixin Yesu yetena. **15** E yi sewaxi nun kati! Nanfe ligaxi? N sereyaan bama ε fe ra, xa ε yi noε a lige nun, ε yi ε yeene bama nen nun, ε yi e so n yii! **16** Koni iki, n mi findixi ε yaxun na jondi falan xon ba? **17** Muxuni itoe kunfasi ε xon, koni fe fajni mi a ra! E kataxi ε ba feen nan na nxu fema alogo ε fan xa kunfa e xon. **18** Kunfan fan, xa ε fe

fajin nan foxo ra, e nun xa ε luye a fari waxatin birin. Hali n ye xonna mi a ra. **19** N ma diine, n mon toroni ε fe ra alo jaxanla kuiin na a ramaxa a ma, han Alaa Muxu Sugandixina muxuyaana yi sabati ε bojneni. **20** Koni a yi rafanma n ma nun, iki n lu ε fema, alogo n xa n fala ti kiin maxete. E fe n yifuxi kati! **21** E xa a fala n xa, ε tan naxanye waxi a xon ma ε xa lu sariyan bun ma, ε mi na sariyan kolon ba? **22** Bayo a sebexi a Ibrahima dii xeme firin soto nen. A keden soto konyi gilen ma, a bonna soto xoron gilen ma. **23** A naxan soto konyi gilen xon ma, na sotoxi nen alo adaman birin sotoma kii naxan yi. Koni a diin naxan sotoxi xoro jaxanla xon ma, Ala nan a tuli sa na tan na. **24** Feni itoe luxi nen alo misaala. Layiri firinna misaala nan jaxalan firinni itoe ra. Kedenna kelixi Sinayi Geyaan nan fari, naxan diine barima konyiyani. Hagara nan na ra. **25** Sinayi Geyaan naxan Arabu yamanani, na misaala nan Hagara ra. E nun Yerusalen taan naxan na yi iki, ne keden. Bayo, Yerusalen nun men kaane birin konyiyaan nin. **26** Koni Yerusalen taan naxan kore, xoron nan na ra. En nga nan na ra. **27** Bayo Kitabun naxa, “Gbantana, i xa sewa, i tan naxan mi dii barixi! Naxan, i sonxo sewani, naxan mi diin soto xolen kolon. Bayo jaxalan nabepinxina diine wuyama ayi nen dangu xeme taa ra doxon gbeene ra.” **28** Nba, ngaxakedenne, ε fan bata sa Isiyaga fari, Ala e tuli sa naxan na. **29** Na waxatini diin naxan soto alo adaman birin sotoma kii naxan yi, na yi bonna jaxankata naxan sotoxi Alaa Niin barakani. Han iki, a mon na kiini. **30** Koni Kitabun nanfe falaxi? A naxa, “Konyi jaxanli ito nun a diin kedi. Amasoto konyi jaxanla diin nun xoro jaxanla diin mi keen tonge e bode xon ma mumel!” **31** Nanara, ngaxakedenne, konyi gile dii mi en tan na fo xoro diine.

5 Alaa Muxu Sugandixin bata xoroya fi en ma alogo en xa xoroya. Nanara, ε kankan na ma, ε nama so konyiyaan bun ma sonon. **2** E tuli mati. N tan Poli nan ito falama ε xa. Xa ε tin, e yi ε banxulan, Alaa Muxu Sugandixin tonon mi fa ε ma sonon. **3** N mon ito nan falama muxun birin xa, naxan na tin e xa a banxulan: sariyan birin suxu goronna na xun ma. **4** E tan naxanye katama ε xa tinxin Ala yee ra yi sariyan xon, ε nun Alaa Muxu Sugandixin bata taxun. E bata keli Alaa hinanna bun ma. **5** Bayo en xaxili tixi en ma yigin nan na Alaa Niin barakani denkeleyaan xon ma, a en natinxinna nen. **6** Amasoto

xa ε Yesu Alaa Muxu Sugandixini, banxulanna nun banxulantareyaan tōnōn mi na, fō denkeleyaan naxan walima xanuntenyani. 7 Ε yi a ligama ki fajni! Nde ε jōndin suxuni kalaxi? 8 Ala naxan ε xilixi, a tan mi na ligaxi. 9 “Hali buru rate se xurudin nōe burun birin nagboe ayi nen.” 10 Koni n laxi ε ra Marigin barakani fa fala ε mi miriya gbete tonge. Nba, muxun naxan ε yifuma, a findi muxu yo ra, Ala na yalagima nen. 11 Koni, ngaxakedenne, xa n mōn yi banxulan feen kawandin nan bama nun, nanfera e mōn n besenxōnyama? Nayi, Yesu faxa wudin mi finde e xa tereña feen na. 12 Nayi, naxanye ε yifuma banxulan feen na, ne yi lan e xa e gbeena ngaan ba na! 13 Amasōto ε tan, ngaxakedenne, ε xilixi xōrōyaan nan ma. Anu, ε nama xōrōyaan findi fati benden nafan feene ra. Koni ε xa wali ε bode xa xanuntenyani. 14 Amasōto sariyan birin fala yisoxin ni i ra: “I adamadi boden xanu alo i yetēna.” 15 Koni xa ε liga alo subene, ε ε bode yenge, ε yi ε balo ε bode ra, ε xa a liga ε yeren ma, xa na mi a ra, ε ε bode janma nen feul! 16 Koni n tan naxa, ε xa sigan ti Alaa Niin barakani. Nanara, ε mi fati benden nafan feene rakamale sōnōn. 17 Amasōto fati benden nafan feene mi tinjε Alaa Niina feene ma. Alaa Niin fan mi tinjε fati benden wanle ma. Ne firinne yaxun nan e bode ra. Nanara, ε mi ε yete waxōn feene ligama. 18 Xa ε biraxi Alaa Nii Sarijanxin fōxō ra, ε mi fa sariyan bun sōnōn. 19 Fatī benden nafan feene kolon mi raxōlo: yanga suxuna, xōsi fena, haramu feene, 20 suxure batuna, kōerayana, xōnnanten yana, lantareyana, xōxōlōnyana, bōjε teena, yete yigbona, mayitaxunna, 21 milēna, dōlo minna, haramu sumunne, e nun na fe sifane. N na ε rakolonma alo n bata yi a fala kii naxan yi: Naxanye fe sifani itoe ligama, ne mi Alaa Mangayaan toma. 22 Muxun na lugo Alaa Nii Sarijanxin na, kewanli itoe nan findima a bogin na: xanuntenyana, sewana, bōjε xunbenla, dijana, jεnige fajina, fanna, tōgōndiyana, 23 limaniyana, yete suxuna. Tōn mi dōxε na feene ra. 24 Naxanye bata findi Yesu Alaa Muxu Sugandixin gbeen na, ne bata e fati benden wanle gbangban a faxa wudin ma e nun e waxōn feene nun e rafan feene. 25 Xa en dunuƣa yi gidin nabama Alaa Nii Sarijanxin xōn, fō en kewanle xa lan Alaa Nii Sarijanxin ma. 26 En nama waso, en yi en bode rafen, en yi en bode maxōxōlōn.

6 Ngaxakedenne, xa muxuna nde bira hakeni, ε tan naxanye Alaa Nii Sarijanxin, ε xa a matinxin limaniyani. Koni ε ε yete rakōrōsi alogo Setana nama ε fan natantan. 2 Ε ε bode goron tongo, nayi ε bata Alaa Muxu Sugandixina sariyan nakamali. 3 Xa muxuna nde a miri a ma a a tan se ra koni sese mi a ra, a a yete nan tun mayendenma. 4 Muxun birin xa a yete kewanle rakōrōsi. Xa ne fan, a kanba xunna taranma nen na nayi, a nama a sa muxu gbete ma. 5 Muxun birin xa a yete goronna tongo. 6 Naxan xaranma Alaa falan ma, na xa a karamōxō ki a se fajin birin yi. 7 Ε nama ε yete mayenden bayo Ala mi mayendenjε. Muxun sansiin naxan sifa wolima, a na nan sifa xabama. 8 Nayi, naxan na a fati benden wanle kε, na halagin sōtōma nen ne xōn. Koni, naxan na Alaa Nii Sarijanxin wanle kε, a habadan nii rakisin sōtōma nen Alaa Nii Sarijanxin xōn. (aiōnios g166) 9 Nanara, en nama xadan fe fajī rabadeni. Amasōto xa en lu na fari, en na a tōnōn sōtōma nen waxati famani. 10 Nanara, xa a fereña en xa, en xa fe fajin liga muxune birin xa, koni katarabi en ngaxakeden denkeleya muxune nan ma. 11 Ε mi a to, n sebeli xungbeen naxanye sebema n yete yiin na iki! 12 Naxanye waxi a xōn ma, e xa yamaan kenen fati benden kiraan xōn ma, ne nan katama e xa ε karahan a ε xa banxulan. E na ligama nen alogo yamaan nama e besenxōnya Alaa Muxu Sugandixin faxana fe ra wudin ma. 13 Hali naxanye banxulanxi, e mi sariyan suxuma. Koni, e waxi a xōn ma nen, ε xa banxulan alogo e xa e kanba a ε fan bata tin banxulanna ma. 14 Koni n tan, n na n kanbama en Marigi Yesu Alaa Muxu Sugandixin faxa wudin nan tun yi. N faxaxi dunuƣa feene yi na wudin nan xōn, dunuƣa feene fan bata faxa n yi. 15 Xa muxun banxulanxi hanma xa a mi banxulanxi, na mi fe ra, fō a xa findi dali nenen na. 16 Nba, naxan na falani ito suxu, Ala xa bōjε xunbenla nun kininkininna fi na kannna ma, e nun Ala gbee Isirayila! 17 Dōnxen na, muxu yo nama n tōrō, amasōto larun naxanye n fatin ma, ne a yitama a Yesu gbeen nan n na. 18 Nba, ngaxakedenne, en Marigi Yesu Alaa Muxu Sugandixina hinanna xa lu ε niini. Amina.

Efesi Kaane

1 N tan Poli naxan findixi Yesu Alaa Muxu Sugandixina xeraan na Ala sagoon xon ma, n tan nan ito sebema yama sarijanxin ma Efesi taani, tɔgondiya muxun naxanye Yesu Alaa Muxu Sugandixini. **2** En Fafe Ala nun en Marigi Yesu Alaa Muxu Sugandixin xa hinanna nun bɔɲɛ xunbenla fi ɛ ma. **3** En barikan bira en Marigi Yesu Alaa Muxu Sugandixin Fafe Ala xa naxan niin duban birin nagidixi en ma ariyanna yi a Muxu Sugandixini. **4** Benun dunuɲa xa da waxatin naxan yi, Ala bata yi en sugandi nun alogo en xa sarijan, en lu fetareyani a yɛɛ ra yi. Ala bata yi a ragidi a xanuntenyani, **5** a xa en findi a diine ra Yesu Alaa Muxu Sugandixin barakani alo a rafan a ma a yetɛɛn sagoni kii naxan yi. **6** Na yi findi Ala hinan gbeen kanna tantun xunna ra a naxan fixi en ma a xanuntenna xon. **7** Amasoto en bata xunba Yesu wunla xon ma, en yulubine yi xafari, a yi a hinan defexi gbeen mayita, **8** Ala bata naxan nagidi en ma a fajin na a fekolonna nun a xaxilimayaan birin yi. **9** A bata a sagoon wundo feen makenen en xa, a rafan feen naxan nagidi Yesu barakani **10** alogo a xa na rakamali a waxatin na a li. Na sagoon ni i ra fa fala a xa seen birin malan, naxanye kore xonna nun bɔxɔ xonna ma, a yi a Muxu Sugandixin findi ne birin xunna ra. **11** En mon sugandixi en xa lu Yesu yi, alo Ala bata yi a ragidi en ma kii naxan yi nun, Ala naxan feen birin nakamalima a yete a maragidin nun a sagoon xon. **12** Na ligaxi nen alogo en tan naxanye singe bata en yigi sa Alaa Muxu Sugandixini, en xa findi tantun seen na Ala binyen kanna xa. **13** ɛ tan fan bata lu Yesu yi, ɛ to nɔndin falan mexi, ɛ rakisi fe Xibaru Fajina, ɛ yi la Yesu ra, Ala yi a Nii Sarijanxin lu ɛ yi a taxamasenna ra, a bata yi en tuli sa naxan na. **14** Alaa Nii Sarijanxin luxi nen alo Ala se singen naxan soxi en yii taxamasenna ra alogo en xa a kolon en sa keɛn sɔtoma nen Alaa yamaan na xunba waxatin naxan yi, en yi Ala tantun a binyeni. **15** Nanara, xabu n na ɛ denkeleyana fe me Marigi Yesu ma e nun ɛ xanuntenyana yama sarijanxin birin xa, **16** n barikan birama Ala xa ɛ fe yi waxatin birin, n nema Ala maxande ɛ xa. **17** N Fafe Ala, binyen kanna maxandima ɛ xa, en Marigi Yesu Alaa Muxu Sugandixina Ala alogo a xa a Nii Sarijanxin nagodo ɛ ma naxan fe kolonna fima, a feene makenen alogo ɛ Ala kolonna xa fari sa. **18** N na Ala maxandima ɛ xa

alogo ɛ xa feene yɛɛ to ɛ bɔɲeni, a fixa, alogo a ɛ xilixi yigin naxan ma, ɛ xa na kolon, a bata keɛ nɔrɔxin binyen naxan lu a yama sarijanxin xa, **19** e nun a senbe fisamantenna en tan denkeleya muxune xa. Na findixi a senbe yetɛɛn nan na a naxan nawalixi a fanga gbeen **20** a to a Muxu Sugandixin nakeli sayani, a yi a lu a yiifanna ma ariyanna yi. **21** A yi a lu mangayane nun nɔyane nun senbene nun kuntigiyane birin xun na e nun xinla naxanye birin nɔɛ fale dunuɲani ito yi e nun waxati famatoni. (aiɔn g165) **22** Ala bata seen birin lu Yesu sanna bun ma, a yi a findi e xunna ra denkeleya yamaan xa. **23** Denkeleya yamaan luxi nen alo Yesu fati bendena. Denkeleya yamaan Yesu a feene birin nakamalima, Yesu naxan feen birin nakamalima kiin birin yi.

2 ɛ tan fan, ɛ faxaxin nan yi a ra ɛ hakene nun ɛ yulubine fe ra, **2** ɛ yi sigan tima naxanye yi nun ɛ yi dunuɲa muxune fɔxɔ ra waxatin naxan yi, e nun bɔxɔn nun kuyen lan tagin yinnane mangana, na nii jaxin naxan walima Ala matandi muxune yi iki. (aiɔn g165) **3** A fɔlɔni nun, en fan birin yi en ma dunuɲa yi gidin ligama nen alo ne, en yi biraxi en fati benden sagoon nan fɔxɔ ra, en yi en fati benden nun en yugo jaxine natane liga. Nayi, fata en keɲaan na, Alaa xolon nan yi ragidixi en ma alo bodene. **4** Koni Alaa kininkininna gbo, a bata en xanu xanuntenya tilinxin na. **5** En tan naxanye yi faxaxi en hakene fe ra, Ala bata en niin bira en yi a Muxu Sugandixin barakani. ɛ kisixi Alaa hinanna nan xon ma. **6** Ala bata en tan nun Yesu rakeli en bode xon ma sayani, en yi doxɔden soto Yesu Alaa Muxu Sugandixin fema ariyanna yi, **7** alogo a xa a hinan tilinxi fisamantenna mayita waxati famatone yi a fanna xon a naxan yitaxi en na Yesu Alaa Muxu Sugandixin barakani. (aiɔn g165) **8** Amasoto ɛ kisixi Alaa hinanna nan xon denkeleyaan barakani. Na mi fataxi ɛ tan xan na, Alaa kiseen na a ra. **9** ɛ katan tɔnɔn xa mi a ra, nayi muxu yo mi nɔɛ a yete matɔxe. **10** Ala wali xonna nan en na. A bata en da Yesu Alaa Muxu Sugandixin barakani, alogo en xa wali fajine raba, Ala bata yi naxanye yiton en yɛɛ ra, alogo en xa sigan ti ne xon ma. **11** ɛ tan naxanye barixi siyaan bonne ye, Yahudiyane naxanye yatexi banxulantarene ra fati benden kiraan xon, n xa a rabira ɛ ma ɛ yi kii naxan yi a fɔlɔni nun: **12** ɛ mi yi Alaa Muxu Sugandixini na waxatini. ɛ mi yi lan nun ɛ Isirayila tɔnɔne soto, Alaa yamana. Xɔɲene

nan yi ε ra. Layiri yo mi yi ε nun Ala tagi. A mi yi ε tuli saxi sese ra. Yigi yo mi yi ε ma, Ala mi yi ε yi dununya yi. **13** Koni iki Yesu Alaa Muxu Sugandixini, ε tan naxanye yi makuya nun, iki ε bata maso a ra Alaa Muxu Sugandixin wunla xon ma. **14** A tan nan lanna rasoxi en birin tagi. A bata Yahudiyane nun siya gbetene findi yama kedenna ra, a to a fati benden fi, alogo a xa na danna kala naxan yi en tagi taxunxi yaxuyani. **15** A tan nan sariyan nun a yamarine nun tonne jnan, a yi na yama firinne birin findi muxu nene kedenna ra a yete xa, a boje xunbenla rafa e tagi, **16** a e nun Ala tagini ton a sayaan xon a faxa wudin ma, e yi lan e bode ma alo gbindi kedenna, a e yaxuyaana kala. **17** Yesu yi fa, a boje xunbenla Xibaru Fajin nali ε tan ma, naxanye yi makuya Ala ra nun e nun Yahudiyana naxanye yi maso a ra. **18** Yesu nan kiraan nabama en tan yama firinna birin xa, siga Fafe Ala yetagi a Nii Sarijanxin barakani. **19** Nanara, ε tan naxanye mi yi Alaa yamani, xoje mi fa ε ra. E bata findi dugurenne ra yama sarijanxini. E bata so Alaa denbayani. **20** E bata lu alo banxin naxan beten saxi gemene ra. Na gemene findixi xerane nun nabine nan na. Yesu Alaa Muxu Sugandixin yeteen nan banxin tongon geme kenden na. **21** Banxin yiren birin tugunxi e bode ra, a te a tan barakani, a yi findi Ala Batu Banxi sarijanxin na Marigin xa. **22** A ε nun bonne tugunma nen ε bode ra a tan barakani, ε lu alo banxina Ala doxoma naxan yi a Nii Sarijanxini.

3 Nanara, n tan Poli Ala maxandima ε tan siya gbetene xa, n tan kasorasana Yesu Alaa Muxu Sugandixina fe ra. **2** N laxi a ra, ε bata a me Ala hinanna naxan nagidixi n ma alogo n xa ε mali. **3** Ala bata a wundo feen kolonna makenen n xa, alo n bata a fena nde sebe ε ma kii naxan yi. **4** E na n ma sebenla xaran, n xaxinla naxan sotoxi Alaa Muxu Sugandixina wundo feni, ε na yee toma nen. **5** Wundo feni ito mi makenenxi singe ra muxune xa, koni Ala bata a makenen a xera sarijanxine nun nabi sarijanxine xa a Nii Sarijanxin barakani. **6** Na wundo feen nan ito ra fa fala siya gbetene nun Yahudiyane kee kedenna sotoma nen Yesu a fe Xibaru Fajin barakani. E birin bata findi yama kedenna ra alo fati bende keden. Ala en tuli sa naxan na, e firinna birin na sotoma nen a Muxu Sugandixin Yesu barakani. **7** Ala bata a senben nawali, a n ki a hinanni, alogo n xa findi Yesu a walikeen na naxan a falan Xibaru Fajin nalima. **8** Hali

n to xurun muxu sarijanxine birin xa, anu Ala bata a hinanna ragidi n ma, a n xa Alaa Muxu Sugandixina fe Xibaru Fajin nora tilinxin nali siya gbetene ma. **9** N mon xa a makenen wundo feni ito rakamalima kii naxan yi. Xabu waxati singene, wundoni ito yi luxunxi Daala Mangana Ala xon (aiōn g165) **10** alogo iki kuntigine nun no kanna naxanye boxon nun koren lan tagini, denkeleya yamaan xa Alaa fe kolonna kejaan birin yita ne ra. **11** Na birin findixi a habadan fe ragidixin nan na, a naxan nakamalixi en Marigi Yesu Alaa Muxu Sugandixin barakani. (aiōn g165) **12** Nayi, en noe en masoe Ala ra nen en ma denkeleyani Yesu barakani xaxili ragidini, sike yo mi na. **13** Nanara, n na ε mafanma, ε nama yigitege n ma torone fe ra ε tan xa amasoto ε binyen nan ne ra. **14** Na nan a ligaxi, n nan n xinbi sinma n Fafe Ala bun ma **15** bonsonna birin xinla fataxi naxan na naxanye kore xonna nun boxo xonna ma. **16** N na a maxandima fa fala a xa tin a binyen noroni, a ε sobe so senbeni ε muxuyaana feene yi a Nii Sarijanxin barakani, **17** alogo Alaa Muxu Sugandixin xa lu ε bojeni denkeleyaan barakani. N na Ala maxandima ε xa, ε xa sabati, ε bitin xanuntenyani alo salenna **18** alogo ε nun yama sarijanxin birin xa senben soto ε Alaa Muxu Sugandixina xanuntenyaan gboon nun a tilinna nun a tiden famu, **19** ε yi a xanuntenyaan kolon naxan dangu kolonna birin na, alogo ε xa defe Alaa fe kamalixin birin na. **20** Nba, senbena Ala naxan na, a feen birin liga en xa fata senben na naxan walima en yi, en na naxan maxodin hali en noe en mire naxan ma, mon hali dangu en ma miriyane ra pon, **21** binyen xa fi na ma denkeleya yamani, e nun Yesu Alaa Muxu Sugandixini, waxatin birin habadan han habadan. Amin! (aiōn g165)

4 N tan naxan findixi kasorasaan na Marigina fe ra, n na ε mafanma, Ala bata ε xili naxan liga fe ma, ε sigati kiin xa lan na ma. **2** E xa ε yete magodo, ε limaniya feen birin yi, ε yi dija. E dija ε bode xa xanuntenyani, **3** ε yi kata kiin birin yi alogo Alaa Nii Sarijanxin lanna naxan fixi ε ma, na xa lu ε tagi, boje xunbenla yi ε tugun ε bode ra. **4** Denkeleya yamaan luxi nen alo fati bende kedenna. Alaa Nii Sarijanxi kedenna na a ra alo ε xilixi yigi kedenna ma kii naxan yi. **5** Marigi kedenna na a ra e nun denkeleya kedenna e nun marafu kedenna igeni tubi xinla ma. **6** Ala kedenna na a ra, muxun birin Fafe naxan seen birin xunna, naxan walima feen birin xon, naxan feen

birin kui. 7 Ala bata kisenā nde fi en keden kedenna birin ma alo a Muxu Sugandixina en kixi kiseen sifan naxan na. 8 Nanara, Kitabun naxa, “A te kore waxatin naxan yi, a yi siga suxu muxune ra a yii. A yi kiseene fi adamadiine ma.” 9 Nba, fa fala, “A bata te kore,” na bunna nanse ra? Na bunna neen fa fala a godo nen dunuṇa yi bōxōn ma. 10 Naxan godo dunuṇa yi, na nan mōn te kore xōnna ma pon, alogo a xa feen birin nakamali. 11 A tan nan kiseene yitaxunxi, a yi muxuna ndee findi xerane ra, a yi ndee findi nabine ra, a yi ndee findi Xibaru Fajin nali muxune ra, a yi ndee findi yēeratine ra, a yi ndee findi karamōxōne ra. 12 A en kixi na kii nin alogo muxu sarijanxine birin xa nō a wanla kē, alogo a yamaan xa sabati naxan luxi alo Alaa Muxu Sugandixin fati bendena. 13 Na ligama nen han en birin yi findi kedenna ra denkeleyani Alaa Dii Xemen kolonni. En findi muxu kamalixine ra alo Alaa Muxu Sugandixin kamalixi kii naxan yi. 14 Nayi, en mi finde dii jōrene ra sōnōn, alo foyen nun ige walanna kunkin xalin kii naxan yi, en yi bira xaranne birin fōxō ra, muxune yi en mayenden e kōtene nun wulene xōn. 15 Koni xa en jōndin fala xanuntenyani, en kōxōma nen, en yi findi Alaa Muxu Sugandixin maligane ra feen birin yi, a tan naxan findixi en xunna ra. 16 A tan nan a ligaxi denkeleya yamaan xa findi fati bende kedenna ra, a muxune yi lu e bode yi alo fati benden yirene to tugunxi e bode ra fasane xōn. Nayi, xa fatin yirene birin a wanla kē, a gboma nen, a kōxō xanuntenyani. 17 Nba, n xa maxadi falani ito ti e xa Marigin xinli: E nama fa sigan ti alo denkeleyatarene. E miriyane biraxi fufafu feene nan fōxō ra. 18 E xaxinle yidimixi. E fe mi Alaa nii rakisina fe yi masōto e fe kolontareyaan nun e bōṇe xōdexeyaan xōn. 19 E mi fa yagima sōnōn. E yi e yetē findi haramu fe rabane ra alogo e xa fe xōsixin sifan birin naba han e lu kunfe ayi. 20 Koni e tan mi Alaa Muxu Sugandixina fe xaranxi na kiini. 21 E bata a fe mē, e yi xaran Yesu gbee jōndin ma yati. 22 Fa fala e xa xetē e dari fe fonne fōxō ra, e nun e muxuya fonna naxan luma e rakunfe a e ratantan. 23 Koni e niin nun e xaxinla xa findi a nenen na. 24 E mōn xa muxuya nenen tongo, Ala muxuya naxan daxi a yetē maligan na, tinxinna nun sarijanni. 25 Nanara, e wulen lu, birin yi jōndin fala a muxu bodene xa amasōto en findixi gbindi kedenna yirene nan na. 26 Xa e xōlō, e nama haken liga. E nama lu xōlōxi han sogen bira waxatina. 27 E mōn nama fēren fi Yinna

Manga Setana ma. 28 Xa naxan darixi muṇan tiye, a xa a lu. A xa wali kendena nde kē, alogo a xa seen sōto a yiigelitōne maliye naxan na. 29 E nama fala kobi yo ti fō fala fajin tun naxan muxune maliye e hayun naxan ma, alogo na xa findi hinanna ra a ramē muxune xa. 30 E nama Alaa Nii Sarijanxin nasunu, Ala naxan findixi taxamasenna ra e yi han a sa fama e xunbadeni lōxōn naxan yi. 31 E ba xōnnantenyaan nun bōṇe teen nun xōlōn nun sōnxō sōnxōn nun muxu mafalan nun jaxuyaan ma e tagi. 32 E fanna nun kininkininna yita e bode ra. E yi e bode mafelu alo Ala bata e mafelu Alaa Muxu Sugandixin barakani kii naxan yi.

5 Nanara, e to findixi Ala xanuntenne nan na, e Ala raliga, 2 e sigan ti xanuntenyani alo Alaa Muxu Sugandixina en xanuxi kii naxan yi, a yi a yetē fi en ma fe ra, a liga alo saraxa baxina Ala xa, naxan gan xiri rafan a ma. 3 Koni yanga suxun nun fe xōsixine nun milan nama lu e ye, e fe yetēen nama fala mume, alo a lan yama sarijanxini kii naxan yi. 4 E mōn nama fe xōsixine nun xaxilitareya falane nun yagitareya falane ti. Ne mi daxa koni fō barika birana. 5 Amasōto e xa ito kolon yati, fa fala muxun naxan yanga suxun nun fe xōsixine nun mile feene ligama, na sese mi kēen sōtōma Ala nun a Muxu Sugandixina mangayani. Amasōto milen findixi se batun nan na alo suxure kiina. 6 E nama tin muxu yo xa e mayenden fala fuune xōn, amasōto Alaa xōlōn fama fala suxutarene xili ma na fe sifane nan ma fe ra. 7 Nanara, e nama basan ne ra. 8 Amasōto e tan fan yi luxi nen alo dimina koni iki e bata lu alo kenenna Marigin barakani. Nayi, e sigan ti alo kenenna muxune. 9 Amasōto fe fajin sifan birin nun tinxinyaan nun jōndin fama kenenna nan xōn. 10 E feene fēsefese e Marigin nafan feen kolon. 11 E fefe nun dimin kewanla fe fuune nama malan, koni fō e xa e ramini kenenna nin. 12 Amasōto muxune feen naxanye ligama wundoni, hali ne falan gbansanna mayagi. 13 Koni kenenna na sōnna naxan birinye makenen, ne yigbema nen. 14 Amasōto naxan birin na yigbe, na bata lu kenenni. A falaxi na nan ma, a naxa, “E tan naxanye xima, e xulun, e keli faxa muxune tagi, nayi Alaa Muxu Sugandixina e luma nen kenenni.” 15 Nayi, e a liga e yeren ma e sigati kiini, e nama lu alo fe kolontarene, koni alo fe kolonne. 16 E fēren fen waxatine ma, amasōto waxatini itoe mi fan. 17 Nanara, e nama findi xaxilitarene ra, koni e kata Marigin sagoon kolon feen na. 18 E nama lugo dōlōn

na, amasoto xurutareyaan nan na ra, koni e lugo Alaa Nii Sarijanxin na. **19** Nba, e falan ti e bode xa Yaburi falane nun betine nun Ala tantun sigi sarijanxine yi, e betin ba Marigin xa, e yi a tantun e bojen birin na! **20** E barikan bira Fafe Ala xa seen birin ma fe yi waxatin birin en Marigi Yesu Alaa Muxu Sugandixin xinli. **21** E xuru e bode ma Alaa Muxu Sugandixin yeeragaxuni. **22** Naxanle, e xuru e xemene ma alo e a ligama Marigin xa kii naxan yi. **23** Amasoto xemene nan jaxanla xunna ra, alo Alaa Muxu Sugandixin denkeleya yamaan xunna ra kii naxan yi, naxan luxi alo a fati bendena, a naxan nakisixi. **24** Naxanle lanma nen e yi xuru e xemene ma feen birin yi alo denkeleya yamaan xuruxi Alaa Muxu Sugandixin ma kii naxan yi. **25** Xemene, e fan xa e jaxanle xanu alo Alaa Muxu Sugandixin bata denkeleya yamaan xanu kii naxan yi, a yi a yete fi e fe ra, **26** alogo a xa e rasarijan, a yi e rafixa igen nun fala xuiin xon, **27** alogo a xa e ti a yetagi yama noroxin na, alo loto yo mi dugin naxan na, a mi yijoromnonxi, fe yo mi a ra koni yama sarijanxin na a ra fetareyani. **28** Xemene lan e xa e jaxanle xanu na kii nin alo e yete gbindina. Xemene naxan a jaxanla xanuma, na bata a yete xanu. **29** Muxu yo munma a yete fati benden najaxu singen. Koni a a degema nen ki faji, a yi a masuxu alo Alaa Muxu Sugandixin denkeleya yamaan masuxuma kii naxan yi **30** amasoto a fati benden yirene nan en tan na. **31** Kitabun naxa, “Nanara, xemena a nga nun a fafe bejinma, a yi a maso a jaxanla ra, e findi fati bende kedenna ra.” **32** Wundo gbeen nan ito ra, koni n na Alaa Muxu Sugandixin nun denkeleya yamaan nan ma fe falama. **33** Koni e fan birin xa e jaxanla xanu alo e yetena, jaxanla fan yi a xemene binya.

6 Diine, e e soto muxune fala xuiin suxu Marigina fe ra, amasoto na nan tinxin. **2** Yamari singen nan ito ra tuli saan saxi naxan fari, a naxa, “I baba nun i nga binya **3** alogo i xa herin nun siimaya xunkuyen soto dunuja yi.” **4** Dii fafane, e nama e diine raxolo. Koni e e xuru, e yi e maxadi Marigina kiraan xon. **5** Konyine, e kanne fala xuiin suxu naxanye e xun na dunuja yi, e yi e binya, e gaxu e yee ra. E e sagoon liga e boje fajin na alo e a ligama Alaa Muxu Sugandixin xa kii naxan yi. **6** E nama a liga e ye xonna gbansan xan yi, alogo e xa rafan e ma, koni alo Alaa Muxu Sugandixin yetena konyine, e Ala sagoon liga e bojen birin na. **7** E wali e xa jeniye fajini, alo e walima

Marigin nan xa, muxune mi a ra. **8** Bayo e a kolon fa fala Marigin muxun birin saranma nen a wali fajin na, xa a findi konyin na hanma xorona. **9** Konyi kanne, e fan xa a liga e konyine xa na kiini. E nama e konko e ma. E xa a kolon, a e nun e konyine birin kari keden peen sa ariyanna yi, naxan mi muxune rafisama a bode xa. **10** Falani soxin naxan na, e sobe so Marigina fe yi a senben barakaxini. **11** E Alaa yenge so seene birin tongo alogo e xa no tiye Yinna Manga Setanaa kotene birin yee ra. **12** Amasoto en mi adamadiine xan yengema, koni kuntigine nun no kanne nun senbe kanna naxanye dunuja yidimixini ito xun na, e nun yinna jaxin naxanye koren nun boxon lan tagini. (aiŋon g165) **13** Nanara, iki e xa Alaa yenge so seene birin tongo alogo waxati jaxin na a li, e xa no tiye na yaxune yee ra, e yi noon ti feen birin yi, e yi lu e funfuni ken! **14** Nanara, e xa ti ken! Nondin yi findi e tagi xidin na, tinxinyaan yi findi e kanke ye masansanna ra. **15** E mayitonna nun e wekilen xa lu alo e sankidina e sanni Yesu a fe Xibaru Fajin nalideni naxan boje xunbenla fima. **16** E denkeleyaan xa lu e yi alo e ye masansan wure lefana e yii e Fe Naxin Kanna xalimakuli radegeixine birin natuun naxan na. **17** E xa kisi feen nasuxu alo xunna makantan wure komotina, e Alaa falan lu e yii Alaa Nii Sarijanxina silanfanna ra. **18** E Ala maxandi waxatin birin Alaa Nii Sarijanxin barakani Ala maxandin sifan birin yi. E lu e yee ra yi na ma, e tunnafan Ala maxandin ma yama sarijanxin birin ma fe ra waxatin birin. **19** E Ala maxandi n fan xa, alogo n na keli fala tideni waxatin naxan yi, Ala xa falan so n yii, n yi n wekile Xibaru Fajin wundo feen makenendeni yamaan xa, **20** n findixi xeraan na naxan ma fe ra hali n to xidixi yolonxonna ra iki. E Ala maxandi, alogo n xa n wekile falan tideni alo n daxa kii naxan yi. **21** En nafan ngaxakedenna nun en walike bode togondiyaxin Tikiko naxan walima Marigin xa, na n ma fe birin yebama nen e xa, alogo e fan xa n ma fe xibarune kolon e nun n feen naxanye ligama. **22** N na a rasigama e ma na nan ma alogo e xa nxo fe kolon, a yi e ralimaniya. **23** Fafe Ala nun Marigi Yesu a Muxu Sugandixin xa boje xunbenla nun xanuntenyaan nun denkeleyaan fi en ngaxakedenne birin ma. **24** Naxanye xanuntenyaan mi janma en Marigi Yesu Alaa Muxu Sugandixin xa, Ala xa hinan ne ra.

Filipi Kaane

1 N tan Pōli nun Timōte, Alaa Muxu Sugandixin Yesu a walikene, nxu bata ε tan Alaa Muxu Sugandixina yama sarijanxin xontōn naxanye sa Filipi taani e nun denkeleya yamaan xunmatone nun mali tiine. **2** En Fafe Ala nun en Marigi Yesu Alaa Muxu Sugandixin xa hinanna nun bōje xunbenla fi ε ma. **3** ε fe na rabira n ma waxati yo yi, n barikan birama nen Ala xa. **4** N na Ala maxandima ε xa sewan nin waxatin birin! **5** Amasōto ε bata n mali Yesu a fe Xibaru Fajin nalideni keli lōxo singen ma han to. **6** N laxi a ra yati, Ala naxan wali fajini ito fōlōxi ε tagi, a a rakamalima nen han a Muxu Sugandixin Yesu fa lōxōni. **7** A lan xaxinli ito xa lu n ma ε fe yi, amasōto ε fe ramaraxi n bōjeni. Bayo xa n xidixi yolonxōnna ra, hanma xa n Yesu a fe Xibaru Fajin xun mayengema, n yi a yebe, en birin Alaa hinanni. **8** Ala nan n seren na a ε rafan n ma xanuntenya kendeni naxan kelixi Yesu Alaa Muxu Sugandixin yeteen ma. **9** N ma Ala maxandin ni ito ra: Ala xa lu ε xanuntenyaan fari se fe kolonna nun famun kenden na han, **10** alogo ε xa nō fe fajin kolonje, ε yi lu fetareyaan nun sōntareyani han Alaa Muxu Sugandixin fa lōxōna. **11** ε xa defe kēwali tinxinxine yi naxanye kelima Yesu Alaa Muxu Sugandixin ma, Ala binye feen nun a batu feen na. **12** Ngaxakedenne, n waxi a xōn ma nen, ε xa a kolon feen naxanye liga n na, ne bata Yesu a fe Xibaru Fajin mali, a siga yeen na. **13** Amasōto a bata makenen mangana sofane birin nun muxune birin xa, fa fala a n kasoon na Alaa Muxu Sugandixin nan ma fe ra. **14** Ngaxakedenne naxanye e lannayaan saxi Marigini, n to saxi kasoon na, ne bata wekilen sōto Alaa falan nalideni ki fajni, e mi gaxu. **15** Nōndin na a ra, e tan ndee Alaa Muxu Sugandixina fe kawandi bama milen nun lantareyaan nin, koni ndee a ligama jēnige fajiyaan nin. **16** Ne a ligama xanuntenyaan nin, amasōto e a kolon a n ma wanla findixi Yesu a fe Xibaru Fajin xun mayenge feen nan na. **17** Bodene tan Alaa Muxu Sugandixina fe kawandin bama yete yigboon nin. E miriyane mi fan. E waxi nde sa feni n ma tōrōn fari kasoon na. **18** Fefe mi na ra. Xa e miriyaan findi a fajin na, xa a findi a jaxin na, Alaa Muxu Sugandixina fe bata rali kiin birin yi. Na bata n sewa, n mōn luma nen sewani. **19** Amasōto n na a kolon fa fala na birin findima n ma kisin nan na ε Ala maxandine nun Yesu Alaa Muxu Sugandixina Niin barakan nin. **20** Bayo n naxan mamema e nun

naxan xōli n ma, n nama yagi fe yo yi mumε. Koni n xa limaniya iki alo waxati danguxine yi alogo yamaan xa Alaa Muxu Sugandixin binya n fati bendena fe ra, xa n lu n nii ra, hanma xa n faxa. **21** Amasōto Alaa Muxu Sugandixin nan findixi n tan ma dunupa yi gidin na, sayaan yi findi tōnōn na n xa. **22** Koni xa n lu dunupa yi, n nōε wali fajina nde ke nen. N lan n xa nanse liga? N mi a kolon. **23** Fe firinni itoe birin xōnla n ma: N waxi keli feni dunupani ito yi, n sa lu Alaa Muxu Sugandixin fema, na nan fan ki fajni. **24** Koni ε tan ma fe ra, a lan n lu n nii ra fati bendeni. **25** N to laxi na ra, n bata a kolon a n luma nen ε ye alogo ε xa siga yeen na, ε sewa ε denkeleyani. **26** N mōn na xete ε fema, ε Alaa Muxu Sugandixin Yesu matōxōn xun masama nen n ma fe ra. **27** Koni, ε siga ti kiin xa lan Alaa Muxu Sugandixina Xibaru Fajin ma, alogo xa n fa ε fema, hanma xa n be, n xa a me nen fa fala ε xaxili kedenni, ε sōbe soxi ε bode xōn ma denkeleyani Xibaru Fajina fe ra kii kedenni. **28** ε nama gaxu ε yengefane yee ra mumε! Na a yitama e ra nen fa fala e halagima nen, a ε tan kisin kiraan nan xōn Ala barakani. **29** Bayo a bata a ragidi a hinanni a ε xa la Alaa Muxu Sugandixin na, ε mōn yi tōrō a fe ra, **30** ε lu na yenge kedenna soε, ε n to naxan soε, alo ε mōn bata a me kii naxan yi, han iki n na fari.

2 Xa Alaa Muxu Sugandixin senbe yo fima ε ma, xa a xanuntenyaan limaniya yo fi ε ma, xa lanbodeya yo ε nun Alaa Nii Sarijanxin tagi, xa xanuntenyaan nun kininkinin yo ε yi, **2** nba, ε xa n ma sewan nakamali, ε yi lan ε bode ma, xanuntenya kedenna yi lu ε tagi, e nun xaxili keden. **3** ε nama fefe liga yete yigboni hanma wasoni, koni ε yete magodo, ε yi bonne yate dangu ε yeteen na. **4** ε nama ε miri ε makone gbansanna ma fō bonne fan gbeena. **5** ε kejaan xa lu ε bode tagi alo Alaa Muxu Sugandixina, Yesu. **6** Alayaan yi a tan naxan yi a mi na ramara a yete yi. **7** Koni a yi a me a yete ra, a yi a yete findi konyin na, a lu adamadiyaan kiini. A to adamadiyaan sōto, **8** a yi xuru Alaa falan bun han a tin sayaan ma a faxa wudin ma. **9** Na nan a ligaxi, Ala a ratexi binyeni kore xōnna ma, a yi xinla fi a ma naxan gbo xinla birin xa, **10** alogo naxanye birin kore xōnna ma naxanye bōxo xōnna ma e nun a bun ma, e na Yesu xinla me waxatin naxan yi, xinbin birin sinma nen a bun ma, **11** lenna birin yi a fala fa fala Alaa Muxu Sugandixin Yesu nan Marigin na, Fafe Ala binya feen na. **12** Nayi, n xanuntenne, ε

darixi n ma falan suxe kii naxan yi n yee xori, e mon xa a suxu n xanbi dangu na ra iki, e yi lu e kisi feen nakamale gaxun nun xuruxurunni. **13** Amasoto Ala nan walima e yi, alogo e jnenigen nun e kewanle xalan a waxon feen ma. **14** E feen birin liga hali e nama a findi mawugan nun fe matandin na, **15** alogo e xa findi sontarene ra, e sarijan. E findi Alaa diine ra, fe mi naxanye ra naxanye degema alo sarene kore xonna ma waxatini ito muxu tinxintare sarijantarene ye, **16** e nema nii rakisin falan naliye. Xa e na liga, n nan n kanbama e yi nen Alaa Muxu Sugandixin fa loxoni fa fala n ma dunuja yi gidin nun n ma wanla mi findixi fe fuun na. **17** Hali n faxa e xa, n lu alo minse saraxan naxan naboxonma e fe ra, sa e denkeleyaan fari Ala yetagi naxan fan luxi alo saraxana, na n nasewama nen, en birin yi sewa. **18** E fan xa sewa na kiini, en lu en bode yi sewani. **19** N xaxili tixi Marigi Yesu ra, a xa n mali Timote rasige e ma xulen, alogo n tan yeteen boje xunbele kii naxan yi e xibarune fe yi. **20** Muxu gbete mi n dexon naxan xaminxi e fe ra alo a tan. **21** Bonne tonon nan tun fenma e yete xa. E mi Yesu Alaa Muxu Sugandixin gbeen fenma. **22** Koni e yetena a kolon a Timote bata a kejaan mayita toroni, a yi a yete findi Xibaru Fajina walikeen na n dexon alo diin nun a fafe. **23** N waxi a rasiga feni e ma, n na n ma feene to fixaxi waxatin naxan yi. **24** N laxi a ra Marigin barakani fa fala n fan yeteen sigama nen e fema. **25** N bata a miri fa fala a fere mi na fo n mon xa ngaxakedenne Epaforodite raxete e ma, n wali ke boden nun n yenge so bodena, e naxan nafa n ma, e seene so a yii n mali feen na. **26** E birin to xonla a ma ki faji! A bata kontofili bayo e bata a furena fe me. **27** Nondin nan a ra, a fura nen yati! A yi luxi ndedi a xa faxa. Koni Ala yi kininkinin a ma. A mi kininkininxi a kedenna xan ma, koni n tan fan, alogo na sunun nama sa n ma toron fari. **28** Nanara, n waxi a rasiga feni e ma mafuren alogo e na a to waxatin naxan yi, e mon yi sewa, n bojen yi sa ndedi. **29** E a rasene sewa gbeeni Marigin xinli. E na muxu sifan binya, **30** bayo a yi faxama nen nun Alaa Muxu Sugandixin wanla fe ra. A yi tinxi a niin fi feen ma alogo a xa n mali e tan yeteen mi yi noe naxan lige.

3 Iki, ngaxakedenne, e sewa Marigini. Na mi n tore xa n xete na feene ma n bata yi naxanye sebe e ma nun alogo na xa e ratanga. **2** E e masiga fe xosixi rabane nun fe jaxi rabane ra, e nun muxun

naxanye a falama fa fala xa muxun mi banxulan a mi kisima. **3** Anu, nondin naxan na, en tan nan muxu banxulanxine yeteen na, en tan naxanye Ala batuma a Nii Sarijanxin barakani, en tan naxanye en kanbama Alaa Muxu Sugandixin Yesu a fe yi, en tan naxanye mi laxi en yete ra. **4** Xa n wa, n fan noe le n yete ra nen. Xa bonne e mirixi nen a e noe e yete rakise nen, n dangu ne ra pon! **5** Amasoto n banxulan n barin xii solomasexede loxon nin. Isirayila kaan nan n na, keli Bunyamin bonsonni, Heburune Heburu nan n tan na. N yi biraxi sariyan foxo ra Farisi muxune kiin ma nun. **6** Yahudiya dina xonxonna nan yi n na nun han n yi denkeleya yamaan jaxankatama. Fe yo mi yi n ma tinxinna ra sariyan mabinni. **7** Koni n yi seen naxanye yatema tonon na, iki n bata ne yate bonon na Alaa Muxu Sugandixin fe ra. **8** Koni n feene birin yatexi bonon nan na fe fisamantenni ito a fe ra naxan findixi Alaa Muxu Sugandixin kolon feen na, Yesu n Marigina. Amasoto n bata bono feen birin yi a fe ra. N bata seen birin yate fe fuune ra alogo n xa Alaa Muxu Sugandixin soto, **9** n yi lu a tan xa. N mi n yete findima tinxin muxun na n ma sariya suxun xon, koni fo denkeleyaan barakani Alaa Muxu Sugandixin ma. Tinxinyaan na a ra naxan kelixi Ala ma a soto denkeleyaan barakani. **10** N fa waxi Yesu kolon feni, e nun senben naxan a rakelixi sayani, nxu nun a tan yi toroya kedenna kolon, n yi lu alo a tan a sayani **11** alogo n fan xa keli sayani. **12** N munma yelin na birin sote singen, hanma n yi kamali. Koni n yixadoxoxi a fendeni alogo n xa n kontonna rasuxu bayo Alaa Muxu Sugandixin Yesu nan n fan nasuxi. **13** Nba, ngaxakedenne, n na a kolon, n munma a soto singen. Koni n fe keden nan nabama iki: feen naxanye n xanbi ra, n bata jinan ne xon. Naxan n yee ra, n kataxi na nan li fe ra iki. **14** N na n gima, alogo n xa sa a danna li, n yi ariyanna soto, Ala n xilixi naxan ma a Muxu Sugandixin barakani, Yesu. **15** Nanara, en tan naxanye bata koxo denkeleyani, a lan en birin xa na to na kii nin. Koni xa fe gbete e tan nde kui, Ala na fan nafxama nen na kanna xa. **16** Na ma, en xun tixi denaxan na, en xa siga yeen na na kii nin. **17** Ngaxakedenne, e birin xa n tan naliga. Muxun naxanye sigati ki luxi alo nxu gbeena, ne nan xa findi misaala ra e xa. **18** N bata yi ito fala e xa nun sanja ma wuyaxi, n wugamatxon mon xa a fala e xa iki. Muxu wuyaxi sigati kiina e findixi Alaa Muxu Sugandixin faxa wudin xaranna fe yaxune ra. **19** Na

muxune e rajanma yahannama nin. E ala nan e fati benden sagone ra. E rafeya feene nan nafan e ma. Dunuja feene nan tun nafan e ma. **20** Koni ariyanna dugurenne nan en tan na. En na en nakisimaan nan mamema keli ariyanna yi, en Marigina Yesu Alaa Muxu Sugandixina. **21** A en fati benden senbetaren maxetema nen, a lu noroni alo a gbeena, a yi a liga senben na naxan feen birin saxi a noon bun ma.

4 Nanara, ngaxakedenne, n xanuntenne nun n nafan muxune, naxanye findixi sewan nun xunnayerenna ra n xa, e lu Marigini gben gben, n xanuntenne. **2** Ewodi nun Sintiki, n na e mafanma, e lan e bode ma Marigini. **3** I tan, n lanfana, lannaya muxuna, n bata i maxandi, i xa na paxanle mali amasoto e bata wali n dexon Yesu a fe Xibaru Fajina fe ra, e nun Kilementi e nun n lanfane birin naxanye xinle sebexi Nii Rakisin Kitabun kui. **4** E sewa Marigini waxatin birin. N mon xa a fala, e sewa. **5** Muxun birin xa a kolon fa fala e dijnaxi. Marigin famatoun ni i ra! **6** E nama xamin fefe ra, koni e makone fala Ala maxandideni e nun barika birani waxatin birin. **7** Nba, Ala boje xunbenla naxan fima, xaxinla mi noe naxan famunje, na e bojen nun e xaxinla kantanma nen Marigini, Alaa Muxu Sugandixina Yesu. **8** Nba, donxen na, ngaxakedenne, feen naxan yo finde jondin na, fe kendena, tinxinna, sarijanna, marafanna, binyen feen naxan yo yi, xa son fajin na a ra, naxan finde tantunna ra, ne xa findi e miriyane ra. **9** E bata xaranna naxanye soto n na, e bata naxan me e nun n kewanle, e xa ne liga. Nayi, boje xunbenla Ala luma nen e xon ma. **10** N sewaxi Marigini ki faji bayo e mon bata e joxo lu n xon. E xaxili yi n xon nun yati koni e mi fere soto e xa a yita n na. **11** N mi ito falama e xa n makoon xan ma fe ra, bayo n bata dari a ra n xa n wasa so n kiini. **12** N yiigelitoyaan kolon, n nafulu kanyaan kolon. N bata wundo feni ito kolon fa fala xa n lugoxi hanma xa n kamexi, xa se gbegbe n yii hanma ndedi, n wasa soxi na yi yiren birin e nun waxatin birin bayo **13** n noe feen birin lige nen Yesu barakani naxan senben fima n ma. **14** Koni hali na, e bata fe fajin liga e n mali n ma torone yi. **15** E tan Filipi kaane fan yatina a kolon, e Yesu a fe Xibaru Fajina fe me waxatin naxan yi, n kelimatona Masedoniya yi, e tan nan tun n mali denkeleya yamane ye, e se fajina ndee fi, e ndee rasuxu. **16** N yi Tesaloniki taani waxatin naxan yi, sanja ma firin, e seene rafama n ma n

makoon yi naxanye ma. **17** N mi kiseene xan fenma n yete xa, koni n waxi nen e xa barayin nan soto. **18** E seen naxanye birin soxi Epaforodite yii, n bata e birin masoto, ne bata n makone birin li, e n wasa. A ligaxi nen alo wusulanna naxan ganma saraxa fajin na, naxan Ala kenexi. **19** Nba, n ma Ala e malima e makoon birin na nen a nafulu kanyaan xon Alaa Muxu Sugandixin Yesu barakani. **20** En xa binyen fi en Fafe Ala ma habadan han habadan. Amina. (aiɔn g165) **21** E yama sarijanxin birin xonton naxanye Yesu Alaa Muxu Sugandixini. En ngaxakedenna naxanye n fema be, ne fan e xontonma. **22** Yama sarijanxin naxan birin be, ne e xontonma, katarabi Romi Manga Gbeena muxune ma. **23** Marigi Yesu Alaa Muxu Sugandixina hinanna xa lu e yi.

Kolosi Kaane

1 N tan Poli, naxan findixi Yesu Alaa Muxu Sugandixina xeraan na Ala sagoon xon ma, n tan nun en ngaxakedenna Timote nan kedini ito sebexi, 2 siga ngaxakeden sarijanxine ma naxanye togondiyaxi Alaa Muxu Sugandixin ma Kolosi taani. En Fafe Ala xa hinanna nun boje xunbenla fi e ma. 3 Nxu nema Ala maxandima e xa, nxu barikan birama Ala xa e fe ra waxatin birin, en Marigi Yesu Alaa Muxu Sugandixin fafe. 4 Amasoto nxu bata e denkeleyana fe me lan Alaa Muxu Sugandixina Yesu a fe ma e nun e a yama sarijanxin xanuxi kii naxan yi. 5 Nanara, e denkeleyaan nun e xanuntenyaan xunna tixi na yigin nan na naxan namaraxi e xa ariyanna yi. E bata na yigin kolon Xibaru Fajin gbee jondi falana e li waxatin naxan yi. 6 Xibaru Fajini ito bata fa e ma alo a fama dunuwa birin ma kii naxan yi. A fama nen barakan na, a yiriwa. A na kiin fan yi e tagi xabu e jondin me loxoni, e yi Ala hinanna kolon. 7 Epafirasi nan e tan xaranxi, en nafan walike bodena, naxan findixi e tan xa Alaa Muxu Sugandixina xera togondiyaxin na. 8 A tan nan a falaxi nxu xa, Alaa Nii Sarijanxin xanuntenyaan fixi e ma kii naxan yi. 9 Na nan a toxi, xabu nxu na me loxoni, nxu Ala maxandima e xa tun! Nxu mafanna tima alogo e xa kamali Ala sagoon kolonni e nun fekolonna nun xaxilimayaan birin Alaa Nii Sarijanxin naxan fima. 10 Nayi, e noe sigan tiye nen alo Marigin waxi a xon ma kii naxan yi, e yi a kenen kiin birin yi. E sabati e kewali fajine xon e yiriwa Ala kolonni. 11 Nxu mon Ala maxandima alogo e xa senbe gbeen soto Ala gbee senbe noroxin xon ma, e no e tunnafanje, e mon yi limaniya. 12 E xa barikan bira Fafe Ala xa sewani bayo a tan nan a ligaxi e yi e gbee keen soto naxan kenenna mangayani yama sarijanxin xa. 13 A tan bata en xunba dimin noon bun ma, a en xali a rafan dii xemena mangayani 14 naxan en xunba, a yi en yulubine xafari. 15 Ala totaren maligan nan a Muxu Sugandixin na. A tan nan dii singen na daala birin ye. 16 Amasoto Ala bata seen birin da a tan barakani kore xonna nun boxon ma, seen naxanye toma e nun naxanye mi toma, mangayane, kuntigine, no kanne, e nun senbe kanne. Seen birin daxi a tan nan baraka yi a tan xa. 17 A yi na benun seen birin xa da. Sena ngaan masuxi a tan nan xon. 18 A tan nan denkeleya yamaan xunna ra naxan luxi alo a fatina. A tan nan

habadan muxu singe kelixin na sayani, alogo a xa findi yecратиn na feen birin yi. 19 Amasoto a bata rafan Ala ma a xa a keja kamalixin birin lu Yesu yi. 20 A mon bata tin, a xa e nun seen birin tagini ton naxan boxon nun kore xonna ma a Muxu Sugandixin barakani. A wunla yi mini a faxe wudin ma alogo a xa boje xunbenla fi en ma. 21 A foloni nun, e yi makuya Ala ra pon! E yi e yete findi a yaxune ra e miriyane nun e kewali jaxine xon. 22 Koni iki, a bata e tagini ton a fati bendena sayaan xon ma, alogo a xa fa e rasarijanxin na a yetagi. Fe mi fa e tan yi, a mi fa e magima. 23 Koni, fo e xa lu denkeleyaan fari ken, alogo e nama makuya Xibaru Fajin yigin na e naxan mexi naxan nalixi daala birin ma e nun n tan Poli findi naxan wali muxu ra. 24 Iki, n sewaxi n ma torone yi e fe ra, bayo na toroya donxen naxanye luxi Alaa Muxu Sugandixina toron na, n na defema nen n fati bendeni denkeleya yamaan xa naxan findixi a fatin na. 25 Ala nan n findixi denkeleya yamana walikeen na, a n xa Alaa fala kamalixin nali e ma. 26 Wundon na a ra naxan yi luxunxi waxati danguxine yi muxun birin ma, koni iki a bata a ye makenen a yama sarijanxin xa. (aiōn g165) 27 Ala bata tin a siyane birin yi a wundo fe tilinxi maminxin kolon. Na wundon ni i ra: Alaa Muxu Sugandixin luma e tan yi. Yigin na a ra, a e xa noro. 28 Nxu Muxu Sugandixina fe ralima muxun birin ma, nxu e kawandi, nxu yi e xaran fekolonna birin na alogo nxu xa fa muxun birin defexin na Alaa Muxu Sugandixin ma. 29 N walima a xodexen na na feen nan ma. N na n sobe so a senbe gbeen naxan walima n yi fangan na.

2 N wama nen e xa a kolon a n yenge gbee sifan naxan yi e xa e nun Layodise kaane e nun naxanye birin munma n gbindin to. 2 N yengen soma e xa nen alogo e bojen xa limaniya, e findi gbindi kedenna ra xanuntenyani, e yi fekolonna kamalixin soto xaxilimayani alogo e yi Alaa wundo feen kolon, Alaa Muxu Sugandixina, 3 dahamun fekolonna nun xaxinla birin luxunxi naxan yi. 4 Nba, n na a falama e xa, alogo muxu yo nama e mayenden fala jaxumene ra. 5 Bayo hali n gbindin mi e fema koni n xaxili e xon. N sewaxi, n na a to sariyan naxan e tagi e nun e denkeleya kendena Alaa Muxu Sugandixin ma! 6 Nayi, bayo e bata Marigi Yesu Alaa Muxu Sugandixin soto, e lu a tan yi. 7 E xa e salenna bitin, e sabati a tan yi. E senbe so denkeleyani alo e e xaranxi kii naxan yi.

Ɛ xa barikan bira Ala xa waxatin birin. 8 Ɛ a liga Ɛ yeren ma. Nanara, muxu yo nama Ɛ findi konyin na dunuƙa fala jaxumene nun mayanfa feene xon, fata adamane namunne nun dunuƙa gele ma feene ra, naxanye mi kelixi Alaa Muxu Sugandixini. 9 Amasoto alaya kamalixin birin luxi Yesu fati benden nin. 10 Ɛ fan bata kamali a tan yi. A tan nan senbene nun ncone birin xunna ra. 11 Ɛ bata banxulan Yesu xon, muxune banxulan tiin mi naxan na, koni naxan muxune xoroyama fati benden nafa feene senben bun, Alaa Muxu Sugandixin naxan ligama. 12 Amasoto Ɛ rafu igeni waxatin naxan yi, Ɛ nun Yesu bata maluxun Ɛ bode xon ma. Ɛ mon bata keli sayani Ɛ bode xon ma denkeleyaan barakani Ala senben ma naxan a raketixi sayani. 13 Ɛ faxaxin nan yi a ra nun Ɛ hakene fe ra e nun Ɛ fati benden banxulantareyaan ma. Koni iki, Ala bata en hakene mafelu, a Ɛ nun Yesu niin bira Ɛ yi Ɛ bode xon ma. 14 Doli kedin naxan yitonxi en xili ma e nun tonna naxanye yi en halagima, a bata ne ba, a e jian, a e gbangban a faha wudin fari. 15 Na kiini, Ala bata no kanne nun senbe kanne yenge so seene ba e yii, a ti e yee ra dunuƙa yetagi alo muxu suxine yengeni, a ncon soto e ma a sayaan barakani a faha wudin ma. 16 Nanara, Ɛ nama tin muxu yo xa Ɛ kiti Ɛ donsena fe ra hanma Ɛ minsena hanma sali loxona nde, hanma kike nenen malanne, hanma Matabu Loxona fe ra. 17 Ne birin findixi fe famatone nininna nan na naxanye yi fama, koni jondin yeteen findixi Alaa Muxu Sugandixin nan na. 18 Ɛ nama tin, muxu yo xa Ɛ yalagi wulen yete magodoni e nun maleka batun xon. Na muxu sifana a kanbama a xiye toxine nan ma fe ra. A lugoxi waso fuun nan na a munadabayaan miriyani, 19 a ba Yesu yi. Anu, a tan nan luxi alo fati benden xunna. Yesu barakani fatin birin baloxi, a findi kedenna ra salen seene nun fasane xon, a yi gbo alo Ala waxi a xon ma kii naxan yi. 20 Xa Ɛ nun Alaa Muxu Sugandixin bata faha Ɛ bode xon, a yi Ɛ xoroya dunuƙa gele ma feene ma, nanfera nayi Ɛ sigan tima alo dunuƙa gbee muxun nan Ɛ tan na? Nanfera Ɛ tinma e xa ton sifani itoe sa Ɛ ma? 21 Ɛ nama a tongo! Ɛ nama a mato Ɛ lenna ra! Yiin nama din a ra! 22 Ne findixi seene nan na naxanye loma ayi e na rawali waxatin naxan yi. Ne findixi yamarine nun xaranne nan na fata muxune ra. 23 Na yamarine maligaxi fekolonna nan na, fata e karahan batu kiin ma, e nun e yete magodona, e nun e fati benden suxu

kii xodexena, koni senbe mi ne yi, e yi fati benden natane xuru.

3 Bayo Ɛ nun Alaa Muxu Sugandixin bata rakeli sayani, nayi Ɛ xa ariyanna feene fen, Alaa Muxu Sugandixin doxi Ala yiifanna ma denaxan yi. 2 Ɛ xa Ɛ miri ariyanna feene ma, Ɛ nama Ɛ miri dunuƙa feene ma. 3 Amasoto Ɛ bata faha, Ɛ dunuƙa yi gidin luxunxi Alaa Muxu Sugandixini Ala xon. 4 Alaa Muxu Sugandixin na mini kenenni, a tan naxan Ɛ rakisixi, Ɛ fan minima nen a fema a binyeni. 5 Nanara, dunuƙa fe kobin naxanye Ɛ yi, Ɛ xa ne yiiba: yanga suxuna, xosi feene, kunfa jaxine, waxon fe jaxine, e nun milentenyana, naxan findixi se batun na. 6 Sonna sifani itoe nan Ala xolon nafama fala suxutarene ma. 7 Ɛ tan fan yeteen yi sigan tima na kii nin nun Ɛ to yi Ɛ dunuƙa yi gidin ligama e yi. 8 Koni iki, Ɛ xa na feene birin yiiba: xolona, boje teena, jaxuna, konbina, e nun fala jaxin naxan minima Ɛ de. 9 Ɛ nama wulen fala Ɛ bode xa amasoto Ɛ bata muxuya fonna yiiba e nun a kewanle. 10 Ɛ mon bata muxuya nenen soto naxan luma yitonje Ala kolonni han a findi a da muxun maligan na. 11 Na dali nenen, Girekine nun Yahudiyane, banxulanne nun banxulantarene, xojene nun xuluntarene, konyine nun xorone, ne birin keden Alaa Muxu Sugandixini, fangan naxan yi feen birin yi. 12 Nanara, bayo Ala bata Ɛ yebe, a Ɛ findi a rafan yama sarijanxin na, Ɛ xa kininkininna nun fanna nun yete magodon nun limaniyaan nun dijan tongo. 13 Ɛ xa dija Ɛ bode xa, Ɛ Ɛ bode mafelu. Xa nde feen liga a lanfaan na, Ɛ xa Ɛ bode mafelu alo Marigin bata Ɛ mafelu kii naxan yi. 14 Ɛ xa xanuntenyaan sa ne fari, naxan e birin defema. 15 Alaa Muxu Sugandixina boje xunbenla xa yiriwa Ɛ bojeni. Bayo Ala Ɛ xilixi na nan xon, Ɛ findi fati bende kedenna ra. Ɛ findi wali faji kolonna ra. 16 Alaa Muxu Sugandixina falan xa lu Ɛ yi, a jaxunna birin yi, Ɛ yi Ɛ bode xaran, Ɛ yi Ɛ bode kawandi fekolonna birin yi, e nun Yaburi falane nun betine nun Ala tantun sigi sarijanxine ra. Ɛ barikan bira Ala xa Ɛ bojeni. 17 Ɛ naxan birin ligama hanma Ɛ a fala, Ɛ xa na birin liga Marigi Yesu xinli Ɛ yi barikan bira Fafe Ala xa a barakani. 18 Jaxanle, Ɛ xuru Ɛ xemene ma alo a lan jaxanle ma kii naxan yi Marigin yetagi. 19 Xemene, Ɛ jaxanle xanu, Ɛ nama jaxu e ra. 20 Diine, Ɛ soto muxune fala xuiin suxu feen birin yi, amasoto na nan nafa Marigin ma. 21 Dii fafane, Ɛ nama Ɛ diine raxolo alogo e nama

tunnaxɔlɔ. **22** Konyine, ε kanne fala xuiin suxu feen birin yi naxanye ε xun na dunɔɔya yi. E nama wali e ye xɔnna gbansan xan yi, alogo ε xa rafan e ma, koni ε wali bɔɲɛ fajin na Marigin binya feen na. **23** E nema fefe lige, ε xa a liga ε bɔɲɛn birin na alo ε a ligama Marigin xa kii naxan yi koni muxune mi a ra. **24** Bayo ε a kolon, fa fala ε ε saranna sɔtɔma nen Marigin yii, a keen naxan namaraxi a yamaan xa. E kanna nan Alaa Muxu Sugandixin na ε walin naxan xa. **25** Naxan na wali tinxintareyani, a tinxintareyaan saranna sɔtɔma nen, bayo Ala mi muxune rafisama e bode xa.

4 Konyi kanne, feen naxan lan, naxan tinxin, ε xa na liga ε konyine xa. E a kolon fa fala ε fan kanna ariyanna yi. **2** E xa lu Ala maxande waxatin birin, ε yi lu ε yɛɛ ra yi, ε barikan bira a xa. **3** E mɔn xa Ala maxandi nxu xa. Nanara, Ala xa nxɔ falan nasɔnɔya alogo n xa nɔ Alaa Muxu Sugandixina wundo feen nalideni, n kasoon na naxan ma fe ra. **4** E xa a mafan, n xa a fala a fixen na alo n lan kii naxan yi. **5** E sigan ti xaxilimayani denkeleyatarene mabinni, ε fere fen waxatine ma. **6** E falan xa findi hinan fala kenden nan na. E xa a kolon ε muxun birin yabima a fajin na kii naxan yi. **7** Nxu rafan ngaxakedenna Tikiko nan n ma feen birin fale ε xa. Marigina walike tɔgɔndiyaxin na a ra naxan walima Marigin xa alo n tan. **8** N na a rasigama ε ma alogo ε xa nxu kiin kolon, a yi ε ralimaniya. **9** En nafan ngaxakedenna, tɔgɔndiya muxuna, Onesimo sigama a fɔxɔ ra. E muxuna nde na a ra. Feen naxan danguxi be yi, e na birin yebama ε xa nen. **10** N kasorasa bodena Arisitaraki ε xɔntɔnma e nun Maraka, Baranabasi dunbode. E bata yi yamarine me naxan ma fe ra, xa a fa ε konni, ε xa a rasene ki fajni. **11** Yisa, naxan xili sa Yusutu, na fan ε xɔntɔnma. Yahudiyane tagi ne nan tun walima n xɔn ma Alaa Mangayana fe ra, ne nan findixi n niini fan muxune ra. **12** Epafirasi, ε muxuna nde ε xɔntɔn Yesu a walikena, Alaa Muxu Sugandixina. A yengen soma ε xa Ala maxandini waxatin birin, alogo ε xa defe, ε yi ε yixɔdɔxɔ, ε kamali Ala sagoon birin yi. **13** N na seren bama a xa, a tɔrɔxi ε fe ra ki fajni e nun Layodise kaane nun Herapolisi kaane. **14** En nafan muxuna, Luka dandan tiina, e nun Demasi ε xɔntɔn. **15** E ngaxakedenne xɔntɔn nxu xa naxanye Layodise yi, e nun Nimifa nun denkeleya yamaan naxan malanna tima a banxini. **16** E na kedini ito xaran ε konni, ε a liga a xa xaran Layodise kaane denkeleya yamaan xa.

Naxan fan kelima Layodise yi, ε na fan xaran. **17** E xa a fala Arikipe xa, ε naxa, “I wanla naxan sɔtɔxi Marigin na, a liga i yeren ma, i yi a rakamali.” **18** N tan Poli nan xɔntɔn dɔnxɛni ito sebexi n yiin na: E nama jinan n ma kasorasaan xɔn ma. Ala hinanna xa lu ε xɔn.

Tesaloniki Singena

1 Poli nun Silasi nun Timote nan ito sebexi siga Fafe Ala nun a Muxu Sugandixin Marigi Yesu a denkeleya yamaan ma Tesaloniki taani. Ala xa hinanna nun boje xunbenla fi e ma. **2** Nxu barikan birama Ala xa e birin ma fe yi waxatin birin, nxu nema Ala maxande e xa. **3** Nxu nema Ala maxande, nxu xaxili e feene xon: e denkeleyaan wanle nun e xanuntenya wanle nun e tunnafanna nun e yigina Marigi Yesu Alaa Muxu Sugandixini en Fafe Ala yetagi. **4** Ngaxakedenne, e tan Ala xanuntenne, nxu a kolon fa fala Ala bata e sugandi. **5** Amasoto nxu to Yesu a fe Xibaru Fajin nali e ma, na mi findi falan xan tun na, koni fo senben nun Alaa Nii Sarijanxin nun xaxili ragidi kamalixina. Nxu yi sigan tima e fe ra kii naxan yi e tagi, e na kolon. **6** E findi nen nxu tan nun Marigin naliga muxune ra. Hali e to toro gbeen soto, e falan nasuxu nen sewani Alaa Nii Sarijanxin naxan fixi e ma. **7** Na kui, e bata findi misaala ra denkeleya muxune birin xa Masedoniya yamanan nun Akaya yamanani. **8** Amasoto Marigina falan xuyaxi ayi e barakan nin, a mi dan Masedoniya yamanan nun Akaya yamanan xan gbansan yi. Koni e denkeleyana Ala ma, na feen bata kolon yiren birin yi. Nayi, nxu tan mako mi fa a fala feen ma. **9** E nxu yisuxu kii naxan yi, muxune na falama e nun e xete suxurene foxo ra kii naxan yi, e tubi Ala ma, e habadan Ala jondin kannu batu. **10** E yi a Dii Xemen fa feen mame keli kore, Ala bata naxan nakeli sayani, Yesu naxan en xunbama Ala xolo famatoon ma.

2 Ngaxakedenne, e yetena a kolon fa fala nxu fa fena e konni, na mi luxi fuu. **2** Nxu bata yi toron nun jaxankatan soto Filipi taani, alo e a kolon kii naxan yi, nxu yi nxu wekile Ala yi, nxu yi Yesu a fe Xibaru Fajin nali e ma hali muxu wuyaxin to nxu yenge e konni. **3** Amasoto nxo kawandi xuine mi fataxi tantanna ra hanma jienige sarijantarena hanma yanfantenyana. **4** Koni Ala to bata nxu kejaan fesefese, a yi a falan Xibaru Fajin taxu nxu ra. Nxu falan tima na kii nin. Nxu mi waxi muxune xan kenen fe yi, koni Ala naxan muxune bojen fesefesema. **5** Bayo e a kolon yati, fa fala nxu mi e rawalixi wulen matoxo xuiin xon hanma nxu mila e seene xon luxunni. Ala nan nxu seren na. **6** Nxu mi binyen fenma muxu yo ra, e tan hanma ndee gbete. **7** Alaa Muxu Sugandixina xerane to nxu ra, nxu yi nae nxo goronna se nen e xun ma nun. Koni,

nxu findi nen muxu sabarixine ra e ye, alo dii ngana a diin masuxuma kii naxan yi. **8** Nayi, nxu yi tinxi nxo sabarini nxu xa Alaa falan Xibaru Fajin nali e ma, nxu yi nxu yete niin fi e fe ra amasoto nxu yi e xanuxi han! **9** Nxu ngaxakedenne, e xaxili lu nxo yanyin nun nxo koon wanla nun yegbaan xon. Nxu na wanla ke nen alogo goronna nama lu muxu yo xun ma, nxu nema Yesu a fe Xibaru Fajin nalima e ma waxatin naxan yi. **10** Nxu seren nan e ra, e nun Ala fa fala nxu yi sarijanna nun tinxinna nun fetareyaan nin e tan denkeleya muxune tagi. **11** E a kolon fa fala nxu luxi e keden kedenna birin xa nen alo fapan nun a diine kii naxan yi. **12** Nxu yi e ralimaniya, nxu yi e masabari, nxu yi e mafan a e sigati kiin xa lan Ala ma, a tan naxan e xilixi alogo e xa so a mangayaan nun a binyeni. **13** Na nan a ligaxi, nxu luma barikan bire Ala xa waxatin birin. Bayo e to Alaa falan me nxu ra, e a rasuxu nen Alaa jondi falan yeteen na, alo a lan kii naxan yi, naxan walima e tan denkeleya muxune tagi. E mi a suxu alo muxune falana. **14** Ngaxakedenne, e bata Alaa denkeleya yamane raliga, naxanye Yudaya yamanani, Yesu Alaa Muxu Sugandixina muxune. E kon kaane e toro kii naxan yi, Yahudiyane ne fan toro nen na kiini. **15** E tan Yahudiyane nan Marigi Yesu faza e nun nabine, e yi nxu fan kedi. E mi Ala kenenje mume! E muxune birin matandima. **16** E mi tinma nxu xa falan ti siya gbetene xa, alogo e xa kisi. Nayi, e luma e yulubin nan tun fari se han a defe. Koni Alaa xolon bata yelin e liye. **17** Nxu ngaxakedenne, wulana nxu masigaxi e ra waxatidi, koni nxu bojen mi masigaxi e ra. Nxu katan birin tima alogo nxu xa fa e fema bayo e to xonla bata nxu suxu han! **18** Nxu waxi fa feni e fema, a gbenbenna n tan Poli bata kata sanja ma firin. Koni Setana yi nxu yikala. **19** Amasoto nde finde nxu yigin nun nxu sewa xunna nun nxo xunna kenla ra alogo nxu xa matoxon soto en Marigi Yesu yetagi a na fa waxatin naxan yi, xa e tan mi a ra? **20** E tan nan nxo binyen nun nxu sewa xunna ra yati!

3 Nxu to mi yi fa nae legedenna tiye sonon, nayi, nxu yi lan a ma a nxu xa lu Atena taani, **2** nxu yi en ngaxakedenna Timote rasiga e ma, naxan walima Ala xa a Muxu Sugandixina fe Xibaru Fajin nalideni alogo a xa sa e senbe so, a e ralimaniya e denkeleyani. **3** Nayi, e tan muxu yo nama kuisan jaxankatani itoe fe ra. Bayo e tan a kolon a na nan nagidixi en ma. **4** Amasoto nxu yi e fema waxatin naxan yi, nxu yi

a falama ε xa fa fala a en njaxankatama nen. E na kolon, na nan ligaxi. **5** Nanara, n to mi yi fa mame tiye, n yi Timote rasiga ε ma alogo a xa sa xibarun soto lan ε denkeleyaan ma. Bayo n yi gaxuxi fa fala maratantan tiin nama ε ratantan, nxo wanla yi lu ε ma fuuni. **6** Koni Timote baxi fadeni nxu fema, sa keli ε fema. A bata ε denkeleyaan nun ε xanuntenyana fe xibarun nali nxu ma. A naxa, a ε mirixi nxo a fe ma sewani waxatin birin, a nxu to xonla ε ma ki fapi alo ε fan to xonla nxu ma kii naxan yi. **7** Nanara, nxu ngaxakedenne, hali nxu to toron nun njaxankatani, ε denkeleyana nxu ralimaniyaxi. **8** Iki ε bata nxu nii yifan nxu ma, bayo ε mon Marigina kiraan xon gben! **9** Nba, nxu lan nxu xa barika biran dan minen yi Ala xa ε fe ra, naxan lanje na sewan yaten ma naxan nxu yi ε fe ra Ala yetagi? **10** Nxu Ala maxandima koeen nun yanyin na han a gbo ayi fa fala a nxu xa ε to, alogo naxan dasaxi ε denkeleyani, nxu yi na rakamali. **11** En Fafe Ala yeteen nun en Marigi Yesu xa kirani ton nxu xa, siga ε fema. **12** Xanuntenyaan naxan ε tagi e nun naxan ε nun muxun birin tagi, Marigin xa na fari sa, a ragbo ayi alo nxu gbeen kii naxan yi ε tan xa. **13** A xa ε bonen senbe so alogo fe yo nama lu ε sarjanni en Fafe Ala yetagi, en Marigi Yesu nun a sarjantone birin fa waxatini.

4 Donxen na, ngaxakedenne, nxu ε mafanma, nxu yi ε kawandi Marigi Yesu barakani. E bata a kolon nxu xon ma ε lan ε xa sigan ti kii naxan yi, ε yi Ala kenen, ε yeteen na ligama koni ε mon xa yanfan na kui. **2** Bayo ε a kolon nxu yamarin naxan soxi ε yii Marigi Yesu xinli. **3** Ala sagoon ni i ra, ε xa sarijan, ε fata yanga suxun ma. **4** E keden kedenna birin xa ε yete fati benden suxu kiin kolon sarjannan nun xunna kenli. **5** E nama kunfa fe yalunxine xon alo denkeleyatarene, naxanye mi Ala kolon. **6** Muxu yo nama haken liga, a yi a denkeleya adamadi boden yanfa feni ito nde yi. Nxu bata yi a fala ε xa nun, nxu yi a makoxo ε xa ken, naxan na ito ndee liga, Marigin na feen saranma na kannu ra nen. **7** Amasoto, Ala mi en xilixi a en xa fe sarjantaren liga, koni a en xa sarijan. **8** Nanara, naxan na tondi falani itoe suxe, na mi tondixi muxune xan xa, koni a tondixi Ala nan xa naxan a Nii Sarijanxin fixi ε ma. **9** Hali nxu mi se sebe ε ma denkeleya muxun bonne xanu feen ma, amasoto ε ε bode xanuma kii naxan yi, Ala bata ε xaran na ma. **10** E na nan ligama ngaxakedenne birin

xa Masedoniya yamanan yiren birin yi. Koni nxu ε mafanma ngaxakedenne, fa fala ε siga yeen na na kui. **11** Na xa findi xunna kenla ra ε xa ε lu sabarini, ε yi ε xaxili lu ε feene xon, ε wali, alo nxu ε yamarixi kii naxan yi, **12** alogo ε sigati kiin xa findi binyen na denkeleyatarene ye, ε goronna nama lu muxu yo xun ma. **13** Ngaxakedenne, nxu mi waxi ε lu feni kolontareyani muxune fe ra naxanye bata laxiraya, alogo ε nama lu sunuxi alo bonne, yigi mi naxanye ma. **14** En laxi a ra a Yesu bata faxa, a mon yi keli sayani. Na ma, en mon laxi a ra, a Ala faxa muxune rakelima nen Yesu xon, naxanye yi denkeleyaxi a ma. **15** Awa, nxu Marigina falani ito nan tima ε xa: Marigin fa waxatina en tan naxanye lima en nii ra, en tan singe mi tema faxa muxune yee ra. **16** Amasoto, yamarin na fi xui yitexi gbeeni, maleka kuntigin xuiin na mini, Alaa xotaan na fe, Marigin yeteen godoma nen keli kore. Nayi, muxun naxanye faxaxi ε biraxi Alaa Muxu Sugandixin foxo ra, ne nan singe kelima sayani. **17** Na xanbi ra, en tan naxanye na lu en nii ra na waxatini, en birin natema nen ne fema kundani kore mafuren, en sa Marigin nalan kore. En mon yi lu Marigin fema habadan. **18** Nayi, ε bode ralimaniya falani itoe ra.

5 Nba, ngaxakedenne, hali nxu mi se sebe ε ma feni itoe liga waxatine fe ra, **2** amasoto ε yetena a kolon yati, Marigin Fa Loxon ligama nen alo mujaden fama koeen na kii naxan yi. **3** Muxune bonje xunbenla nun maratangana fe falama waxatin naxan yi, halagin godoma ε xun ma na waxatin yeteen nin, e raterena alo naxanla dii bari kuiin na keli a ra. E mi tange na ma mume! **4** Koni ngaxakedenne, ε mi fa dimin xan yi sonon, na loxon yi ε raterena alo mujadena. **5** E birin findixi kenenna nun yanyin muxune nan na. Koeen nun dimin gbee mi en tan na. **6** Nayi, en nama xi alo bonne, koni en lu en yee ra yi, en yi en yete suxu! **7** Xi xolitone xima koeen nan na, dolo minne fan e minma koeen nan na. **8** Koni en tan naxanye findixi yanyin muxune ra, en na en yete suxu, en yi xanuntenyaan nun denkeleyaan findi en kanke ye masansanna ra, en yi en kisi feen yigin findi en xunna makantan yenge so komotin na. **9** Ala mi en sugandixi a xolon xan xili yi, koni a en xa kisin soto en Marigi Yesu barakani, Alaa Muxu Sugandixina. **10** A faxaxi en xa nen, alogo xa en faxa, xa en lu en nii ra, en xa lu a fema. **11** Nayi, ε lu ε bode ralimaniye, ε lu ε

bode senbe soe, alo e a ligama kii naxan yi iki. **12** Nba, ngaxakedenne, nxu e mafanma e xa ne binya naxanye walima a xodexen na e tagi, naxanye tixi e yee ra Marigini naxanye e rakolonma feene ma. **13** E e yate muxu binyene ra xanuntenyani e wanla fe ra. Lanna xa lu e tagi. **14** Ngaxakedenne, nxu e mafanma e salantenne maxadi, naxanye tunnaxoloxi e ma, e yi ne ralimaniya, e senbetarene mali, e dija muxun birin xa. **15** E a liga e yeren ma muxu yo nama fe nxin saran fe nxin na, koni e kata fe fajin ligadeni e bode xa e nun muxun birin xa waxatin birin yi. **16** E lu sewaxi waxatin birin. **17** E Ala maxandi waxatin birin. **18** E barikan bira Ala xa feen birin yi. Ala sagoon nan na ra e xa, e to Alaa Muxu Sugandixin Yesu yi. **19** E nama Alaa Nii Sarijanxini kala a wanli. **20** E nama nabiya falane rapaxu. **21** Koni e feen birin feselese, e a fajin namara. **22** E makuya fe nxin sifan birin na. **23** Baje xunbenla Ala xa e rasarijan e kejaan birin yi. Ala xa e xaxinla nun e niin nun e fati benden lu fetareyani en Marigi Yesu fa waxatini, Alaa Muxu Sugandixina. **24** Ala naxan e xilixi, na tinxin, a tan nan na ligama. **25** Ngaxakedenne, e Ala maxandi nxu fan xa. **26** E ngaxakedenne birin xonton menni ngaxakedenyaan xontonna sunbuni. **27** N bata e yamari Marigin xinli, e kedini ito xaran denkeleya muxune birin xa. **28** En Marigi Yesu Alaa Muxu Sugandixina hinanna xa lu e birin xon ma.

Tesaloniki Firindena

1 Pöli nun Silasi nun Timöte nan ito sebexi Tesaloniki denkeleya yamaan ma naxanye bata findi en Fafe Ala nun Marigi Yesu Alaa Muxu Sugandixin gbeen na. **2** Fafe Ala nun Marigi Yesu Alaa Muxu Sugandixin xa hinanna nun böñe xunbenla fi e ma. **3** Ngaxakedenne, a lan nen nxu xa barikan bira Ala xa e fe ra waxatin birin. Na nan daxa amasöto e birin ma denkeleyaan gboma ayi kati, e nun e xanuntenyaan fan e bode xa. **4** Nanara, nxu yetena e matöxöma Alaa denkeleya yamane tagi e tunnafanna nun e denkeleyana fe ra hali e to töroxí besenxönyani. **5** Na feene a yitama nen a Alaa kiti sa kiin tinxin naxan a ligama e xa yate muxu kamalixine ra naxanye soma Alaa Mangayani, e jaxankatani naxan ma fe ra. **6** Ala to tinxin, naxanye e jaxankatama, a ne saren fima jaxankatan na nen, **7** e tan naxanye jaxankataxi, a yi matabun fi e ma e nun nxu fan. Na ligama nen Marigi Yesu na makenen waxatin naxan yi, keli kore e nun a maleka senbemane **8** tée dege gbeeni. A yi Ala kolontarene saran e fe jaxine ra naxanye mi Marigin Yesu a fe Xibaru Fajin falan suxi. **9** Ne jaxankatama habadan halagin nan na, e ba Marigin yetagi e nun a binye magaxuxina. (aiōnios g166) **10** Na ligama nen a na fa löxön naxan yi e tagi, a yama sarijanxin birin yi a binya, e yi kabe a ma naxanye birin denkeleyaxi. E fan taranma nen ne ye amasöto nxu seren naxan ba e xa, e la nen na ra. **11** Na kui, nxu Ala maxandima e xa waxatin birin, alogo, a bata e xili feen naxan ma, e xa kamali, e yi lan na ma. Nxu mön a xandima alogo, e bata fe fajin naxan birin jeníge, e nun e na wanla naxan ke e denkeleyani, Ala xa na birin nakamali a senben xön ma. **12** Nxu na maxandin tima alogo en Marigi Yesu xinla xa binya e xön, e fan yi binyen söto a tan yi, en ma Ala nun Marigi Yesu Alaa Muxu Sugandixina hinanna barakani.

2 Ngaxakedenne, en faan Marigi Yesu Alaa Muxu Sugandixin fa feen nan ma iki e nun en malan fena a fema. Nxu e mafanma, **2** xa e nabiya falana ndee fe me hanma xibaruna hanma kedina naxan a falama Marigin fa löxön bata a li, e xaxinla nama mafura yifuye, e böñen yi mini, hali e naxa a fataxi nxu tan nan na. **3** E nama tin muxu yo xa e mayenden kii yo yi, amasöto na löxön mi a liye fö na murute dönxena a li singen, Xeme Sariyataren yi makenen, halagin

nagidixi naxan ma. **4** Muxune seen naxanye birin yatexi “alane” ra, e yi e batu, a a yete yitema nen, a yi keli ne xili ma. Na kui, a döxöma nen Ala Batu Banxini, a yi a yete findi ala ra. **5** N yi e fema waxatin naxan yi, n yi naxan falama e xa, e mi e yengi döxi ne xön ba? **6** Anu, iki e a kolon ki fajni, naxan na xemen makankanxi, alogo a nama mini han a waxatin yi a li. **7** Amasöto iki, sariyatareyaan bata wali fölö wundoni. A luma na kii nin han naxan a makankanxi, na yi ba na singen. **8** Na waxatini, Xeme Sariyataren makenenma nen, Marigi Yesu naxan halagima a de foyen na, a yi a jan a fa feen nöron na. **9** Xeme Sariyataren fama Setana senben barakan nin e nun wule kabanako feene nun wule taxamasenne nun wule fe magaxuxin sifan birin, **10** e nun tinxintareyaan sifan birin naxanye halagi muxune mayendenma, amasöto e mi tinxi jöndin nasuxe, a yi rafan e ma, e kisi. **11** Nanara, Ala tantanna senben nafama nen, naxan a lige e la wulen na. **12** Na birin ligama nen alogo naxanye mi denkeleyaxi jöndin ma, tinxintareyaan nafanxi naxanye ma, ne xa makiti. **13** Koni ngaxakedenne, Marigin xanuntenne, fö nxu xa barikan bira Ala xa e fe ra waxatin birin, amasöto xabu a fölöni Ala e sugandixi e kisi feen na nen a Nii Sarijanxin xön naxan e rasarijanma e nun denkeleyaan xön jöndin ma. **14** A mön e xilixi na nan ma Yesu a fe Xibaru Fajin barakani, nxu naxan nalixi e ma, alogo e xa binyen söto naxan kelima en Marigi Yesu Alaa Muxu Sugandixini. **15** Nayi, ngaxakedenne, nxu xaranna naxanye radanguxi e ma, a na findi kawandi xuiin na hanma sebenla, e ne suxu, e lu e yi ken! **16** En Marigi Yesu Alaa Muxu Sugandixin yeteen nun en Fafe Ala naxan en xanuxi, a habadan böñe xunbenla nun yigi fajin fi en ma a hinanni, (aiōnios g166) **17** na Ala xa e ralimaniya e böñeni, a e senbe so wali fajin nun fala fajini.

3 Dönxen na, nxu ngaxakedenne, e Ala maxandi nxu xa alogo Marigina falan xa xuya ayi, a yi binya alo a e konni kii naxan yi, **2** alogo nxu xa xunba muxu kobine nun muxu jaxine ma, bayo e birin mi denkeleyaxi. **3** Koni Marigin tinxin, a e senbe soma nen, a yi e ratanga Fe Jaxin Kanna ma. **4** Nxu laxi e ra Marigini, fa fala nxu e yamarixi naxan na, e na ligama iki, e mön luma nen a lige. **5** Marigin xa e böñen ti Alaa xanuntenyaan nun a Muxu Sugandixina tunnafanna ra. **6** Ngaxakedenne, nxu e yamarima Marigi Yesu xinli, Alaa Muxu Sugandixina, e makuya

ε ngaxakedenne birin na naxanye bata e yete lu
 salayani, e mi sigan tima xaranne xon ε naxanye
 sotoxi nxu yii. 7 E yetena a kolon a lan ε xa nxu
 raliga kii naxan yi. Amasoto nxu mi yi salayaan xan
 yi ε konni. 8 Nxu mi muxu yo a donse don nxu mi
 a saren fi, koni nxu tin nen tɔrɔn nun xadanna ma,
 nxu wali kɔɛɛn nun yanyin na, alogo nxu goronna
 nama lu ndenden xun ma. 9 Na mi na ra fa fala nxu
 mi nɔɛ na sɔtɛ ε yii, koni alogo ε xa misaala tongo
 nxu ma. 10 Amasoto, nxu yi ε fema waxatin naxan
 yi, nxu ε yamari nen fa fala naxan yo mi tinɲɛ wale,
 na nama a dege. 11 Anu, nxu bata a mɛ a muxuna
 ndee ε yɛ, salantenne nan ne ra, e mi walima fɔ e to
 fe yibasanni. 12 Nxu bata na muxune yamari, nxu yi e
 ralimaniya Marigi Yesu xinli, Alaa Muxu Sugandixina,
 a e xa e raxara, e wali alogo e xa e balon soto. 13 E
 tan, ngaxakedenne, ε nama tagan fe fajin nabɛ. 14
 Xa muxuna nde mi tin falani itoe suxɛ nxu naxanye
 sebexi, ε na kanna rakɔrɔsi, fefe nama lu ε tan nun na
 kanna tagi, alogo a xa yagi. 15 Koni ε nama a yate ε
 yaxun na, koni ε a rakolon alo ε ngaxakedenna. 16 Ala
 xa Marigin bɔɲɛ xunbenla kanna xa bɔɲɛ xunbenla fi
 ε ma waxatin birin nun kiin birin yi. Marigin yi lu ε
 birin xon. 17 N tan Pɔli yetɛɛn nan xɔntɔn xuini itoe
 sebexi. N ma taxamasenna nan ito ra n ma kedine
 birin yi, n yii funfun ni ito ra. 18 En Marigi Yesu Alaa
 Muxu Sugandixina hinanna xa lu ε birin xon.

Timote Singena

1 N tan Pöli, Yesu, Alaa Muxu Sugandixina xeraan nan ito sebexi, fata en nakisimana Alaa yamarin na, e nun Yesu, Alaa Muxu Sugandixina, en yigina. **2** N na a sebema Timote ma, n ma diin yetena denkeleyani. Fafe Ala nun en Marigi Yesu Alaa Muxu Sugandixin xa hinanna nun kininkininna nun boŋe xunbenla fi i ma. **3** N yi i mafanma kii naxan yi, n kelimatona siga Masedoniya yamanani, n mon waxi a xon, i xa lu Efesi taani alogo i xa men kaana ndee yamari e nama fa xaran gbeteŋe ti yamaan xa. **4** A e xa ba kankanŋe taline ma, e nun e benbane xinle feseŋeŋe naxan mi janma. Na fe matandine nan nakelima. E mi Alaa wanla kema denkeleyani. **5** N yamarini ito fi nen alogo xanuntenyaan xa gbo ayi naxan kelima boŋe sarijanxin nun nii fajin nun denkeleya kendeni. **6** Muxuna ndee bata masara, kiraan yi lo ayi e ma e bira fala fuune foxo ra. **7** E waxi a xon ma, e xa findi sariya karamoxone ra, koni e naxan falama, e a rali e sobeen yeteen na, e mi na kolon mume! **8** En na a kolon fa fala sariyan fan, xa a rawalima a sariya kiin ma. **9** En mon a kolon fa fala sariyan mi saxi tinxin muxune xan ma fe ra, koni sariya kalane nun muxu murutexine nun Ala kolontarene nun yulubi kanne nun sarijantarene nun dina suxutarene nun fafa faxane nun nga faxane nun faxa tiine **10** e nun yanga suxune nun xemen naxanye kafuma xemene xon e nun konyi matine nun wule falane nun wule sere baane e nun feen naxanye birin xaran kenden matandima. **11** Xaranni ito lanxi Ala barakan kanna falan Xibaru Fajin noron nan ma, a naxan taxu n na. **12** N barikan birama en Marigi Yesu Alaa Muxu Sugandixin xa naxan n senbe soxi amasoto a bata n yate tinxin muxun na, a yi n tongo a walikeen na. **13** Hali n to bata yi a rayelefu, n yi a jaxankata, n yi a rafeya. Koni a bata kininkinin n ma amasoto n ne ligaxi kolontareyaan nun denkeleyatareyaan nin. **14** En Marigin yi a hinan gbeen nagodo n ma han a yi denkeleyaan nun xanuntenyaan fi n ma, naxan kelixi Yesu Alaa Muxu Sugandixin ma. **15** Nondin nan falani ito ra, en birin xa la naxan na, fa fala Yesu Alaa Muxu Sugandixin faxi dunuja yi yulubi kanne nan nakisi fe ra. N tan jaxu dangu e birin na. **16** Koni a yi kininkinin n ma, alogo Alaa Muxu Sugandixin Yesu xa a dija gbeen yita n tan yulubi kan jaxin xon, a findi misaala ra denkeleya muxune xa, naxanye habadan nii rakisin sotoma. (aiōnios g166) **17** Nba, habadan mangana,

niin kanna nun totarena, Ala keden peena, gboon nun binyen xa fi na ma habadan han habadan! Amina. (aiōn g165) **18** N ma diin Timote, n bata na yamarin fi i ma, naxan fataxi nabiya falane ra naxanye fala lan i ya fe ma, alogo i xa na suxu, i yi no yenge fajin soe. **19** I xa lu denkeleyaan nun nii fajiyani. Muxuna ndee bata ne rabepin, e denkeleyaan yi jan alo kunkin na godo igen bun. **20** Humeneyo nun Alesandire na muxune ye. N bata ne lu Setana xa, alogo e xa xaran fa fala e nama Ala rayelefu.

2 N na e mafanma fe singen naxan ma, e Ala mafan, e yi a maxandi, e Ala maxandi muxune xa, e barikan bira a xa muxun birin ma fe ra, **2** mangane nun yeeratine birin, alogo en ma dunuja yi gidin xa findi boŋe xunbenla nun xaxili saan na en xa, Ala kolonna nun binyeni. **3** Fe fajin nan na ra naxan lan Ala yeŋe ra yi, en nakisimana, **4** naxan waxi a xon ma muxune birin xa kisi, e yi jondin kolon. **5** Bayo Ala keden peen na a ra, e nun tagi yiton keden peena Ala nun muxune tagi, naxan findixi adamadiin na Yesu Alaa Muxu Sugandixina, **6** naxan a yete fi muxune birin xunba seen na, naxan findi sere joxoyaan na a waxatini. **7** Nanara, n tan yeteen findixi xeraan nun kawandi baan na e nun karamoxon naxan siyane xaranma denkeleyaan nun jondin ma. N jondin nan falama, wulen mi naxan na. **8** Nanara, n waxi a xon ma muxune xa Ala maxandi yiren birin yi, e yi e yii sarijanxine ti Ala xa. Xolon nun matandin yi ba e tagi. **9** Na kiini, jaxanle xa e maxidi ki fajini xurun nun yete suturani. E nama e yete rayabu e xunna denbexin nun xemaan nun geme tofajine nun dugi sare xodexene ra. **10** Koni e xa rayabu e kewali fajine nan xon, alo a lan jaxanle ma kii naxan yi naxanye a falama e Ala binyaxi. **11** Naxanle xa xaran sabarin nun xuru kendeni. **12** N mi tinje jaxanla xa xaranna ti, a yi noon soto xemen fari. A xa sabari. **13** Amasoto N Benba Adama nan singe daxi, na xanbi ra Nmahawa. **14** Setana mi n benba Adama xan nakunfa, fo a jaxanla, a yi findi yulubitoon na. **15** Koni Ala jaxanle ratangama e dii barini, xa e lu denkeleyaan nun xanuntenyaan nun sarijanna nun xuruni.

3 Nondin nan falani ito ra: Xa muxuna nde waxi findi feni denkeleya yamaan xunmatoon na, a waxi wali fajin nan xon. **2** Nayi, denkeleya yamaan xunmatoon xa findi sontaren na, jaxalan keden kanna, a xa findi yete suxun nun muxu xuruxin nun muxu suturaxin

nun xɔŋe yisuxun nun xaran tiin na. **3** A nama findi dɔlɔ minna ra, hanma naxan bɔŋe mafura tɛ, koni a xa findi muxu dijaxin nun fe yitɔnna ra, a nama findi gbeti xɔnxɔnna ra. **4** A xa a yengi dɔxɔ a denbayaan xɔn ki fajɪ, a yi a diine suxu xurun nun binyen birin yi. **5** Bayo xa muxun mi fatan a yetena denbayaan suxe a fajin na, na a yengi dɔxɔma Alaa denkeleya yamaan xɔn ma di? **6** A nama findi muxu tubixi nenen na, alogo a nama a waso ayi, e nun Yinna Manga Setana yi yalagi na fe kedenna ra. **7** A mɔn xa findi xili fajɪ kanna ra denkeleyatarene tagi alogo muxune nama a mafala, a suxu Yinna Manga Setana luti ratixin na. **8** Muxun naxanye findima denkeleya yamaan mali tiine ra, ne fan lan na kiini. E xa findi muxu binyen na. E nama findi nafigine ra hanma dɔlɔ minne. E nama tɔnɔn fen mayifuni. **9** E xa denkeleyaan wundon namara e sɔndɔmɛ fixeni. **10** Fɔ e kejaan xa fɛsɛfɛsɛ nen singen. Na xanbi ra, xa fɛ mi e ra, e nɔɛ findɛ nen denkeleya yamaan mali tiine ra. **11** Mali ti jaxanle fan lan na kiini. E xa findi jaxalan binyaxine ra, e nama dari fala jaxine tiye, e xa e yetɛ suxu, e tɔgɔndiya feen birin yi. **12** Denkeleya yamaan mali tiine xa findi jaxalan keden kanne ra, e yi e yengi dɔxɔ e diine nun e tanden xɔn a fajin na. **13** Amasɔtɔ naxanye denkeleya yamaan malima ki fajɪ, ne nan xunna kenla tiden sɔtɔma, e nun yigi gbeena denkeleyani Yesu Alaa Muxu Sugandixin ma. **14** N kedini ito sebɛxi i ma xaxili ragidin nin fa fala a mi fa buma n fa i konni. **15** Koni xa n bu, i mɔn a kolonjɛ nen i lan i xa sigan ti kii naxan yi Alaa denbayani, naxan findixi habadan Ala denkeleya yamaan na, naxan findixi jɔndin senbetenna nun a beten saxon na. **16** Nɔndin naxan na, Ala kolonna wundo feen gbo, na ni i ra: A bata makenen fati bendeni, Alaa Nii Sarijanxin yi a tinxinyaan mayita, malekane yi a to, a fe kawandin yi ba siyane tagi muxune yi denkeleya a ma dunupa yi, a yi rate binyeni.

4 Alaa Nii Sarijanxin bata a fala a fixen na, a muxuna ndee xetema nen denkeleyaan fɔxɔ ra waxati rajanne yi, e bira Setanaa jinan yanfantenne nun e xaranne fɔxɔ ra. **2** E tinma nen e yi mayenden wulen kawandi baane filankafuyaan xɔn, naxanye sɔndɔmɛ xɔdɔxɔ alo tɛɛ laruna. **3** Na muxu sifane tɔnna dɔxɔma futu xidi feen na nen e nun donseen sifana ndee, Ala naxanye da alogo denkeleya muxune xa e rasuxu barika birani, naxanye jɔndin kolon. **4** Amasɔtɔ Ala

seen naxanye birin daxi, e birin fan. A mi lan muxu yo xa a mɛ ne ra, xa e birin nasuxu barika birani. **5** Amasɔtɔ Alaa falan nun en ma Ala maxandin ne rasarijanma nen. **6** Xa i ngaxakedenne kawandi na feene ma, i findima nen Yesu Alaa Muxu Sugandixina walikɛ fajin na, denkeleya falan nun xaran fajin yi findi i balon na i biraxi naxanye fɔxɔ ra. **7** Koni xɛtɛ dina suxutare falane nun jaxalan fonne taline fɔxɔ ra, i yi i xaran Ala kolonna ma. **8** Fati maxɔdɔxɔn tɔnɔn na ndedi, koni Ala kolonna tɔnɔn gbo waxatin birin. Amasɔtɔ a iki nun habadan nii rakisin sɔtɔma nen. **9** Nɔndin nan falani ito ra, en birin xa la naxan na: **10** En tɔrɔma, en yi en yixɔdɔxɔ, bayo en to bata en yigin sa habadan Ala yi, adamadiine birin nakisimana, a gbengbenna denkeleya muxune. **11** I lan i xa yamaan yamari na feene nan ma, i yi e xaran ne ma. **12** I nama tin muxu yo yi yo i ma i ya foningeyani, koni findi misali fajin na denkeleya muxune xa i fala ti kiin nun i fe raba kiini xanuntenyaan nun denkeleyaan nun sarijanni. **13** I lu Alaa falan xaranjɛ muxune xa, i kawandin ba, i xaranna ti han n fa. **14** Ala i kixi kiseen naxan yi fata nabiya falana nde ra, denkeleya yamaan fonne to e yiine sa i xunni, i nama i tunnaxɔlɔ na bun ma. **15** I yengi dɔxɔ feni itoe xɔn, i lu e fari alogo birin xa i sigati kiin to. **16** I yetɛ rakɔrɔsi, e nun i ya xaranna. I tunnafan feni itoe yi amasɔtɔ xa i na liga, i kisin sɔtɔma nen i yetɛen xa e nun naxanye na e tuli mati i ra.

5 I nama xɛmɛ fonna maxadi a xɔdɛxɛn na, koni a ralimaniya alo i baba na a ra, e nun banxulanne fan alo i xunyene nan e ra. **2** E nun jaxalan fonne fan alo i nga. E nun sungutunne fan alo i xunyene sarijanna birin yi. **3** I xa kaja gilene binya a gbengbenna naxanye luma kedenyani. **4** Koni xa diine hanma mamandenne kaja gilen naxanye yii, fɔ ne xa e Ala kolonna yita na kaja gilene nan singe ra, e yi e jɔxɔ lu e xɔn, e yi e fonne saran e wali fajɪ fonne ra, bayo na nan nafan Ala ma. **5** Kaja gilen naxan keden a ra, a yigin saxi Ala yi, na luma Ala maxandɛ nen kɔɛɛn nun yanyin na. **6** Koni kaja gilen naxan biraxi a yetɛ rafan feene fɔxɔ ra, hali a to a nii ra, a faxaxin na a ra. **7** I xa e yamari na ra alogo e xa findi sɔntarene ra. **8** Xa muxun mi a kon kaane mali katarabi a denbayaan ma, na bata a mɛ denkeleyaan na. Na kanna jaxu denkeleyataren xa. **9** Kaja gilen naxan xinle lan a sebe denkeleya yamaan kaja gilene xinle ye fɔ naxan

bata ɲɛ tonge senninna sɔtɔ, e nun naxan yi dɔxi xɛmɛ kedenna xɔn. **10** naxan kolonxi a wali fajine xɔn dii xuru feen kui hanma xɔɲɛ yigiyana a konni hanma yama sarijanxin sanne maxa fena hanma tɔrɔ muxune mali fena hanma bira fena wali fajin birin fɔxɔ ra. **11** Koni kaja gilen naxanye munma fori i nama ne xinle seɓɛ bayo e waxɔn feene nɔɛ e raxɛtɛ nɛn Alaa Muxu Sugandixin fɔxɔ ra, futu xɔnla yi e suxu. **12** Nayi, e finde yulubi tongon na nɛn bayo e bata e layiri tongoxi singen kala. **13** Na mɔn xanbi ra, bayo wali mi e ma, e luma nɛn sigɛ banxine dɛ ra. E nafigiyaan sa walitarefaan fari, e lu muxune mafalɛ, e feen fala naxanye mi daxa. **14** Nanara, a xɔli n ma kaja gile sungutunne mɔn xa dɔxɔ xɛmɛ taa yi, e diine bari, e yi e yengi dɔxɔ e denbayaan xɔn, alogo e nama fɛrɛ yo fi en yaxun ma a fala naxin ti. **15** Amasɔtɔ kaja gilɛna ndee bata kiraan fata, e bira Setana fɔxɔ ra. **16** Koni xa kaja gilɛna ndee denkeleya naxanla nde a denbayani, a xa ne goronna tongo. E nama findi denkeleya yamaan goronna ra, alogo denkeleya yamaan xa nɔ kaja gilɛne maliyɛ naxanye luxi kedenyani. **17** Denkeleya yamaan fonna naxanye tixi yamaan yɛɛ ra ki fajni, ne lan e xa xunna kenla dɔxɔdɛ firin nan sɔtɔ, a gbɛngbenna naxanye kawandin bama, e nun naxanye xaranna tima. **18** Amasɔtɔ Kitabun naxa, “I na jingen ti malo bodonna ra, i nama a dɛɛn xidi.” A mɔn naxa, “Walikɛɛn lan nɛn a yi a saranna sɔtɔ.” **19** Xa muxune denkeleya yamaan fonna nde tɔɲɛgɛma, i nama i tuli mati fɔ xa sereya firin hanma saxan bata mini a ma. **20** Naxanye bata yulubin liga, ne sɔnna xa fala birin yetagi, alogo bonne fan xa gaxu. **21** N bata i yamari Ala nun Yesu a Muxu Sugandixin nun maleka sugandixine yetagi, a i xa kawandini itoe suxu. I nama muxu yo rafisa e bode xa i kewanle yi. **22** I nama kɛɲɛn i yiin sɛ muxune xunna ma Ala maxandini e ti feen na Alaa wanla ra, i yi i yetɛ findi yulubi tongo fɛrɛn na muxune xa. Lu i ya sarijanni. **23** I nama lu igen gbansanna minjɛ, koni i xa manpana ndedi basan a ra alogo i kuiin xa bɔrɔxɔ, bayo i furama waxatin birin. **24** Muxuna ndee yulubine makenenma nɛn benun e xa kiti yiren li. Ndee gbeene kolonma e xanbi nɛn. **25** A na kii nin, wali fajine makenenma nɛn hali naxanye mi ligaxi kenenna ma, ne mi nɔɛ luxunjɛ.

6 Denkeleya muxun naxanye konyiyaan bun ma, ne lan e xa e kanne binya kiin birin yi alogo Ala xinla

nama rayelefu e nun nɔxɔ xaranna. **2** Konyin naxanye kariye findixi denkeleya muxune ra, na konyine nama e kanne rayelefu e to findixi denkeleya muxune ra. Koni fɔ e xa wali nɛn e xa dangu bonne ra bayo denkeleya muxune nan e wanla tɔnɔn sɔtɔma, e xanuntenne. I xa muxune xaran feni itoe ma, i yi e ralimaniya. **3** Xa muxu yo xaran gbɛtɛ tima, a mi bira en Marigi Yesu Alaa Muxu Sugandixina fala kendene fɔxɔ ra, e nun Ala kolonna xaranna, **4** na kanna rafexi wason nan na, a mi sese kolon. Fe matandine rafan a ma ɲaxi ra e nun sɔnɔxɔ sɔnɔxɔne falane bunne ma. Na nan fama milɛn nun lantarefaan nun marayelefun nun sike ɲaxine ra, **5** e nun yɛngɛ ɲantarene muxu xaxili yifuxine tagi, ɲɔndin mi naxanye yi, naxanye yengi a ma fa fala a Ala kolonna findixi nafulu sɔtɔ fɛrɛn nan na. **6** Anu, tɔnɔ gbeɛn nan Ala kolonna ra, xa en na en wasa so en yii seene yi. **7** Amasɔtɔ en mi faxi sese ra en yii dunɲani ito yi, en mɔn mi sigan sese ra en yii. **8** Nayi, xa donseen nun dugina en yii, en na en wasa so ne yi. **9** Koni naxanye waxi findi feni nafulu kanne ra, ne birama nɛn tantan feene yi, e suxu luti ratixin na e nun kunfa xaxilitare ɲaxi wuyaxin naxanye muxune rasinma halagin nun bɔnɔni. **10** Amasɔtɔ gbɛti xɔnɔxɔnna nan fe ɲaxine birin binla ra. Ndee bata mila gbɛtin xɔn, e masiga denkeleyaan na, e kɔntɔfili fe wuyaxi ti e yetɛ ma. **11** Koni i tan Alaa muxuna, i gi na feene ma. I tinxinna nun Ala kolonna nun denkeleyaan nun xanuntenyaan nun tunnafanna nun limaniyaan fen. **12** I denkeleyaan geren fajin so. I habadan nii rakisin suxu, i xilixi naxan ma, i i tixi sereya fajin naxan na sere wuyaxi yetagi. (aiōnios g166) **13** N na i yamarima Ala yetagi naxan niin fima niimaseen birin ma, e nun Yesu Alaa Muxu Sugandixin yetagi naxan sere fajin ba Pɔnsi Pilati yetagi, **14** i xa yamarini ito suxu sɔntarefaan nun fetareyani, han en Marigi Yesu Alaa Muxu Sugandixin yi mini kenɛnni waxatin naxan yi. **15** Na rabama a waxatin nin Ala naxan saxi, Ala Barakan Kanna, Kuntigi Keden Pena, Mangane Mangana, Marigine Marigina. **16** Niin Kan Keden Pena naxan konna kenɛn gbeɛni muxɛ mi e masoɛ kenɛnna naxan na, muxɛ munma naxan to, a mɔn mi nɔɛ toɛ. Binyen nun senben xa fi a ma habadan! Amina. (aiōnios g166) **17** Yamarini ito fi waxatini ito nafulu kanne ma, a e nama waso ayi, a e mɔn nama e yigi sa nafunli naxan ɲanma, koni e xa a sa Ala yi naxan en kima seen birin yi fonisireyani alogo en xa lu sewani. (aiōn g165) **18** E xa

fe fajin naba, e kawali fajine yi findi e nafunla ra, e bodene ki fonisireyani. **19** Na kiini, e nafulu kenden namarama nen e yete xa yeen na, e nii rakisi yeteen soto. **20** Timote, seen naxan taxuxi i ra, na kantan ki faji. Fala fuune nun dina suxutare falane, i ne lu na, e nun wulen naxan yatexi fe kolonna ra naxan en matandima. **21** Ndee bata tubi na ma, e masiga denkeleyaan na. Alaa hinanna xa lu e xon.

Timote Firindena

1 N tan Poli, naxan findixi Yesu Alaa Muxu Sugandixina xeraan na Ala sagoon xon ma alogo Ala en tuli saxi nii rakisin naxan na Yesu Alaa Muxu Sugandixini, n xa na rali, n tan nan ito sebexi, 2 n yi a rasiga n nafan dii xemen Timote ma. Fafe Ala nun en Marigi Yesu Alaa Muxu Sugandixin xa hinanna nun kininkininna nun boɲe xunbenla fi i ma. 3 N walima Ala naxan xa boɲe rafixeni alo n benbane a liga kii naxan yi, n barikan birama na xa, n nema a maxande i xa koɛen nun yanyin na waxatin birin. 4 Amasoto, n nan n miri i ya wugan ma, a xonla n suxuma nen n xa i to alogo n xa lugo sewan na. 5 N xaxili mon i ya denkeleya kenden xon, naxan yi i mame Lowisi nun i nga Ewunise yi. N laxi a ra, fa fala a i fan yi. 6 Nanara, n na a rabirama i ma, Ala kiseen naxan fixi i ma, i xa na rawali i sobeen na, i naxan sotoxi n na n yiin sa i xunni waxatin naxan yi Ala maxandini. 7 Amasoto Ala mi Nii gaxuxin xan fixi en ma koni a Nii Sarijanxina naxan senben nun xanuntenyaan nun son fajin fima en ma. 8 Nba, i nama yagi sereyaan be en Marigin xa, hanma i yagi n tan ma fe ra hali n to kason na a fe ra. Koni en firinna xa tin toroyaan ma en bode xon lan Yesu a fe Xibaru Fajina fe ma Ala senben barakani. 9 A tan nan en nakisixi, a yi en xili a en xa sarijan. En kewanle fe mi a ra de, koni a yetena fe ragidixina, e nun a hinanna, a naxan fi en ma Yesu Alaa Muxu Sugandixin barakani benun dunuɲa xa da. (aiɔnios g166) 10 Koni iki a bata a yita en na en nakisimaan Yesu Alaa Muxu Sugandixin minin xon ma kenenni, naxan faxan senben noxi, a yi nii rakisin nun faxatareyaan makenen Yesu a fe Xibaru Fajin xon ma. 11 Ala bata n findi kawandi baan nun xeraan nun karamoxon na Yesu a fe Xibaru Fajina fe ra. 12 Nanara, n toroma feni itoe ra, koni n mi yagixi e fe ra amasoto n denkeleyaxi naxan ma, n na kolon. N laxi a ra, a noe n gbeen namare nen han na loxoni. 13 I fala kenden naxanye mexi n yii, ne ramara misaala ra xanuntenyaan nun denkeleyani Alaa Muxu Sugandixin Yesu xon. 14 Se fajin naxanye taxuxi i ra, ne mara Alaa Nii Sarijanxin senben barakani naxan en yi. 15 I a kolon fa fala naxanye birin Asi yamanani, ne bata n nabepin, hali Figelo nun Heremogene. 16 Ala xa Marigin kininkinin Onesiforo a denbayaan ma amasoto a n nii yifan nen n ma sanja ma wuyaxi. A mi yagi n ma fe ra hali n to kason na. 17 A Romi taan

li waxatin naxan yi, a yi a tunnafan n fenje han a yi n to. 18 Ala xa Marigin kininkinin a ma na loxoni. A feen naxanye liga n xa Efesi taani, i ne kolon yati!

2 Nba, i tan n ma diina, i senbe so na hinanni naxan Yesu Alaa Muxu Sugandixini. 2 I feen naxanye mexi, n naxanye rali sereya wuyaxi yee xori, ne taxu lannaya muxune ra, naxanye fan noe muxu gbeteɲe xaranɲe. 3 En na en wekile toroni en bode xon ma bayo en luxi nen alo Yesu Alaa Muxu Sugandixina sofa fajine. 4 Muxun naxan sofa wanli, na mi basanɲe dunuɲa fe gbete ra xa a waxi a kuntigin kenen feni. 5 Muxun naxan fan a gima xataɲoxoyani, xa na mi a yixodoxo a gideni giin sariyani, a mi noon tiye mume. 6 Xee biin naxan wali xodexen kema, na singe xa a gbee xee ma seen soto. 7 N naxan falama i xa, i miri na ma, amasoto Marigin famun fima nen i ma ne birin yi. 8 I xaxili lu Yesu Alaa Muxu Sugandixin xon ma naxan kelixi Dawuda bonsonni, naxan keli sayani, alo n na a ralima kii naxan yi Yesu a fe Xibaru Fajini, 9 n toroma naxan ma fe ra han n xidi alo fe ɲaxi rabana. Koni Alaa falan tan mi xide mume. 10 Nanara, n dijaxi torone birin bun ma yama sugandixina fe ra, alogo e fan xa kisin soto naxan Yesu Alaa Muxu Sugandixini, e yi lu habadan binyeni. (aiɔnios g166) 11 Nondin nan falani ito ra: Xa en nun a tan bata faxa en bode xon, en nun a tan nii rakisin sotoma nen. 12 Xa en na en tunnafan, en nun a tan luma nen mangayani. Xa en na en me a ra, a fan a mema nen en na. 13 Xa en mi tinxinɲe ayi, a tan tinxinma nen ayi, amasoto a mi noe a me a yete ra. 14 Na feene rabira muxune ma, i yi e yamari Ala yetagi, a e xa e yete ratanga matandine ma lan falane bunne ma, matandin naxanye tonɔ yo mi na. A e rame muxune nan halagima tun! 15 I kata, i yi i yete yita Ala ra walike kenden na, naxan wali xonne mi mayagi, naxan Alaa nondi falan nalima a kiini. 16 Xete dina suxutare fala fuune foxo ra, amasoto naxanye e falama, ne luma e masige Ala kolonna ra nen tun. 17 E falan luxi nen alo furen naxan de gboma ayi fatin ma. Humeneyo nun Fileto na muxune nan ye, 18 naxanye bata e masiga nondin na. E naxa, a muxune rakelima sayani waxatin naxan yi, na bata dangu. E muxuna ndee denkeleyaan kala. 19 Anu, Alaa banxin beten saxi sandoxo kenden naxan fari, na doxi ken, falani itoe kerendenxi a ma, a naxa, “Marigin gbeen muxun naxanye ra, a ne kolon. Xa naxan yo Marigin xinla falama, na xa a xun xanbi so

tinxintareyani.” **20** Waliseen sifa wuyaxi nan banxi gbeeni, gbeti daxin nun xema daxin na koni a wudi daxin nun a bende ganxin fan na. Ndee rawalima binya feene yi, ndee rawalima binyatare feene yi. **21** Xa muxu yo a yete rasarijan na binyatareya feene ma, a luma nen alo walise binyaxina. A to sarijan, a kanna noe a rawale wali fajin birin yi. **22** I gi foningeyaan waxatin kunfa feene ma. E nun naxanye Marigin batuma boje fixen na, e bira tinxinyaan nun denkeleyaan nun xanuntenyaan nun boje xunbenla nan foxo ra e bode xon. **23** I me xaxilitareyaan nun daxuyaan fe matandine ra, i yi a kolon fa fala a ne fama yengen nan na. **24** Anu, Marigina walikeen mi lan a yengen so. Koni a lan nen a fan birin na, a findi karamoxo fajin nun muxu dijaxin na. **25** A lan nen a xa fe matandine matinxin limaniyani alogo Ala xa a liga e yi e kewanle maxete, e yi jondin kolon. **26** E yi xaxili soto, e e yete ba Yinna Manga Setanaa luti ratixine ra, e suxi naxanye ra alogo e xa lu a sagoni.

3 A kolon fa fala a waxati donxene xodoxoma ayi nen.

2 Amasoto muxune findima nen wasodene nun gbeti xonxonne nun yete matoxone nun yandadene nun konbi tiine ra. E murute e soto muxune ma, e findi wali fajni kolontarene nun dina kolontarene ra, **3** e nun hinantarene nun kininkintarene nun muxu xili kalane nun yete suxutarene nun muxu yee xodexene nun fe fajni rabane yaxune **4** e nun yanfantenne nun kunfadene nun yete yigboon naxanye waxon feene rafan e ma dangu Ala ra. **5** E e yete findi Ala kolonne ra, koni e e mema nen a senben na. I makuya na muxune ra. **6** Ndee e ye, ne e yete rasoma nen banxine kui muxu rakunfa feen na, jaxanla naxanye senbe mi gbo dinani, e yi ne masoto yulubin goron binyen naxanye xun ma naxanye mabandunxi kunfan sifan birin xon. **7** Na jaxanle katama nen e xa xaran, koni e mi jondin kolonje mume! **8** Na xemene luxi nen alo Yannesi nun Yanberesi naxanye Musa matandi. Xemeni itoe fan jondin matandima na kii nin. E xaxinli fuxi, e denkeleyaan bata findi bonon na. **9** Koni ne mi sige yeen na mume amasoto muxun birin e xaxilitareyaan kolonma nen, alo Yannesi nun Yanberesi liga kii naxan yi. **10** Koni i tan bata n ma xaranna kolon, e nun n kewanle nun n jienigen nun n ma denkeleyaan nun n ma dijan nun n ma xanuntenyaan nun n ma tunnafanna **11** e nun n ma besenxonyaan nun n ma toroyana. Toron sifan mundun na, n mi naxan

toxi Antiyoki nun Ikoniyon nun Lisitire taane yi? Besenxonyaan sifan mundun na n mi naxan to? Koni Marigin yi n xunba ne birin yi. **12** Naxanye birin waxi a xon ma, e xa sigan ti Ala kolonni Yesu Alaa Muxu Sugandixin barakani, ne besenxonyama nen. **13** Koni muxu jaxine nun naxanye e yete findima dina muxune ra, ne yanfanma jaxuyaan nin tun, e bonne mayenden, e fan yi mayenden. **14** Koni i tan, i xaranxi feen naxan ma, i denkeleyaxi naxan ma yati, lu na yi amasoto i i karamoxone kolon. **15** Xabu i dii jore waxatini, i Kitabu Sarijanxin yire sebexine kolon naxan noe xaxinla fiye i ma lan kisi feen ma denkeleyaan xon Yesu Alaa Muxu Sugandixin ma. **16** Amasoto Kitabun sebenla birin fataxi Ala nan na. A fan xaran ti seen nun tantanna yabi seen nun fe matinxin seen nun muxu xuru seen na tinxinna ma **17** alogo Alaa muxun xa kamali, waliseen yi lu a yii wali fajin birin ke xinla ma.

4 N na i yamarima Ala yetagi e nun Yesu Alaa

Muxu Sugandixin naxan faxa muxune nun muxu niiramane birin makitima, naxan makenenma a mangayani. **2** Alaa falana fe kawandin ba, xa a fala waxatin fan, xa a mi fan, i wekile. I muxune sonna fala, i e maxadi, i e ralimaniya, i yi e xaran dijan birin yi. **3** Amasoto waxatin fama nen, muxune mi tinma xaran kenden ma. E birama e yete waxon feene nan foxo ra, e lu karamoxone malanje e yete xa, naxanye e xaranma e tunla rafan feene ma. **4** E yi e tunla ba jondi falane ra, e yi e tuli mati taline ra. **5** Koni i tan, i xa i yete suxu feen birin yi, i tunnafan torone bun ma, i Yesu a fe Xibaru Fajin nali, i yi i ya wanla birin nakamali. **6** Amasoto, n tan bata lu alo minse saraxa boxonxina, n siga waxatin bata maso. **7** N bata yenge fajin so, n nan n ma giin danna li, n lu denkeleyani. **8** To xanbi ra, n tinxinyaan no soton kontonna sotoma nen Marigin naxan namaraxi n xa, a naxan fima n ma na loxoni, a tan naxan findixi kiti sa tinxinxin na. N tan kedenna mi a ra koni a fa feen xonla naxanye birin ma. **9** Kata, i fa n fema mafuren! **10** Dunujani ito to rafan Demasi ma, a bata n nabepin a siga Tesaloniki taani. Kiresen yi siga Galati yamanani. Tito yi siga Dalamatiya yamanani. (aiön g165) **11** Luka nan keden pe fa n fema. E nun Maraka birin xa fa amasoto a noe n maliye nen walideni. **12** N bata Tikiko rasiga Efesi taani. **13** I nema fe waxatin naxan yi, n bata n ma gubaan nun n ma kedine lu Karapo konni Tirowasi

taani, i fa e xele n xa a gbengbenna naxanye sebexi kidine ma. **14** Siyakin Alesandire bata fe xolen liga n na han! Marigina a saranye a wanla ra. **15** I fan xa a fe liga i yeren ma, amasoto a nxo falane matandi nen a jaxin na! **16** N nan n yete xun mafala singen naxan ti kitisadeni, muxu yo mi n mali, birin yi n nabepin. Koni Ala nama e suxu na ra. **17** Marigin nan n mali, a yi n senbe so alogo n xa kawandi kamalixin ba, siyane birin yi a me, n yi xunba yatane de. **18** Marigina n xunbama nen fe jaxin wanle birin ma, a yi n nakisi alogo n xa so a mangayani ariyanna yi. Binyen xa fi a tan ma habadan han habadan, amina. **(aiōn g165)** **19** N xa Pirisila nun Akila xontōn e nun Onesiforo a denbayana. **20** Erasite bata lu Korenti taani, n bata Tirofime furaxin fan lu Mileti taani. **21** Kata, i xa fa benun xunbeli waxatin xa a li. Ewubulo i xontōn, e nun Pudēn nun Linosi nun Kelodiya e nun en ngaxakedenne birin. **22** Marigin xa lu i niini. Ala xa hinan e ra.

Tito

1 N tan Poli nan ito sebexi naxan findixi Alaa walikeen na, e nun Yesu a Muxu Sugandixina xerana alogo a muxu sugandixine xa denkeleya, e jɔndin kolon, e lu Ala kolonni. **2** Na denkeleyaan nun na jɔndin fataxi habadan nii rakisin sɔtɔn yigin nan na, Ala en tuli sa naxan na xabu waxatine fɔloni, Ala naxan mi nɔɛ wulen fale. (aiōnios g166) **3** A bata a falan makenen a waxatini kawandin xɔn ma a naxan taxu n na Alaa yamarin xɔn ma, en nakisimana. **4** N ni ito sebexi Tito nan ma, n ma diin yetena en ma denkeleyani. Fafe Ala nun Yesu Alaa Muxu Sugandixina en nakisimaan xa hinanna nun bɔɲe xunbenla fi i ma. **5** N bata i lu Kireti yamanani alogo feen naxan yitɔn daxi luxi, i xa na yeɓa, i yi denkeleya yamaan fonne dɔxɔ taan birin yi fata n ma yamarine ra. **6** Denkeleya yamaan fonne xa findi muxune ra fe mi naxanye ra, jaxalan keden kanne, e diine denkeleyaxi, muxune nama e diine yate yete suxutarene ra hanma xurutarene. **7** Denkeleya yamaan xunmatoon xa findi muxun na fe mi naxan na, amasɔtɔ Alaa wanla taxuxi a tan nan na, a nama findi yete yigboon na, hanma bɔɲe maxɔlɔna, hanma dɔlo minna, hanma naxan bɔɲen mafura tɛ, hanma gbeti xɔnxɔnna tinxintareyani. **8** Koni a xa xɔɲene yisuxu ki fajɲi, fe fajɲin xa rafan a ma, a xuruxi, a tinxin, a sarijan, a yete suxi. **9** A xa a sɔɓe so jɔndin falan ma alo a xaranxi a ma kii naxan yi, alogo a xa nɔ bonne ralimaniye xaran kendeni, a yi fe matandine tantanna yita e ra. **10** Muxu wuyaxi na, a gbengbenna Yahudiya denkeleya muxun naxanye banxulanyaalan falan tima, naxanye findixi murutedene ra naxanye fala fuune tima, e bodene rakunfa. **11** I xa ne dɛɛne suxu, amasɔtɔ denbaya kalane nan ne ra, fata e xaranne ra naxanye mi daxa, e na ligama yagitareyaan nin nafulu feen na. **12** E yeteen kon kaa nabina nde nan a fala, a naxa, “Wule falan nan Kireti kaane ra waxatin birin, alo sube xɔɲene, fudi jaxintan salayaxine.” **13** Nɔndin nan na falan na. Nanara, e sɔnna fala e xa kati alogo e xa denkeleya kenden sɔtɔ, **14** e yi ba e tuli matiye Yahudiyane taline ra, e nun yamarin naxanye fata na muxune ra naxanye e mexi jɔndin na. **15** Seen birin sarijan muxu sarijanxine yii, koni sese mi sarijan muxu xɔsɔxine nun denkeleyatarene yii. E xaxinla nun e sɔndɔmɛn birin xɔsɔxi. **16** Ne a falama nɛn a e Ala kolon, koni e e mexi Ala ra e kewanle yi. E haramuxi, e mi fala suxe, e mi nɔɛ wali fajɲi yo rabe.

2 Koni i tan ma falane xa lan xaran kenden nan ma.

2 A fala xɛmɛ fonne xa, a e xa e yete suxu, e findi muxu binyene ra, e nun muxu xuruxine. E yi e sɔɓe so denkeleyaan nun xanuntenyaan nun tunnafanna ma. **3** A fala jaxalan fonne fan xa, a e keɲaan xa lan Ala batun ma. E nama findi muxu xili kalane nun dɔlo minne ra. E xa muxune xaran fe fajɲin ma **4** alogo e xa nɔ sungutunne maxaranɲe e xɛmɛne nun e diine xanun kiin ma, **5** e findi jaxalan xuruxine ra, naxanye luma sarijanɲi, naxanye walima denbayani, e jɛnigen fan, e xuru e xɛmɛne ma alogo muxu yo nama Alaa falan nayeɓefu. **6** I mɔn xa banxulanne fan nalimaniya na kiini, a e xa xuru feen birin yi. **7** I tan yeteen xa findi misali fajɲin na i kɛwali fajɲine yi. I ya xaranna xa findi jɔndin na binyeni. **8** I fala kendene ti, yalagi mi naxanye yi, alogo i yengefane xa yagi amasɔtɔ e mi fe yo toxi en tan na e naxan fale. **9** A fala konyine xa, a e xa xuru e kanne ma, e yi e kɛnɛn feen birin yi. E nama e tandi, **10** e nama e muɲa, koni e xa e lannayaan yita e ra waxatin birin alogo en nakisimana Alaa xaranna xa xunnayerenna sɔtɔ feen birin yi. **11** Ala bata a hinanna makenen muxun birin xa kisin sɔtɔma naxan xɔn. **12** Na en xaranma nɛn, a en xa xete Ala kolontareyaan fɔxɔ ra e nun dunuɲa rafan feene, en yi en xuru tinxinna nun Ala kolonna ma dunuɲani ito yi, (aiōn g165) **13** en nema herin mame en yengi naxan ma, en ma Ala senɓe kanna nun en nakisimaan Yesu a Muxu Sugandixina binyen makenenma lɔxɔn naxan yi. **14** A bata a yete fi en ma fe ra alogo a xa en xunba en ma sariya suxutareyaan birin yi, a yi yama rasarijanxin sɔtɔ a yete xa, naxanye sɔɓe soxi wali fajɲine rabaan ma. **15** I lan i xa falan ti muxune xa na kii nin, i yi e ralimaniya, i yi e sɔnna fala i senɓen birin na. Muxu yo nama i rajaxu.

3 A fala denkeleya muxune xa a e xa xuru mangane nun kuntigine ma, e yi e falane suxu. E xa e yitɔn kɛwali fajɲin sifan birin xili ma. **2** E nama muxu yo rayeɓefu, e xa findi fe yitɔnne nun muxu diɲaxine ra, e limaniya muxune birin xa. **3** Amasɔtɔ a fɔloni, xaxilitarene nun murutede tununxine nan yi en na. En yi en ma kunfan nun en waxɔn feene birin ma konyiyaan nan bun. En yi en ma dunuɲa yi gidin nabama jaxun nun xɔxɔlɔnyaan nin. Xɔnnantenyaan yi lu en nun bodene tagi. **4** Koni en nakisimana Ala to a fanna nun a xanuntenyaan makenen en xa, **5** a yi en nakisi. Anu, a mi yi na ligaxi nun a en bata

fe tinxinxine liga, koni fɔ a kininkininna fe ra. A bata en nakisi fata en ma marafuna igeni, en yi xete, en bari. En yi dunuɗa yi gidi nenɛn sɔtɔ Alaa Nii Sarijanxin barakani, **6** a naxan defexin nagodo en ma, en nakisimaan Yesu Alaa Muxu Sugandixin barakani, **7** alogo en xa tinxin a yee ra yi a hinanna barakani, en yengi yi lu habadan nii rakisin sɔtɔ feen ma en keɛn na. (aiōnios g166) **8** Nɔndin nan na falan na. A xoli n ma i xa kankan a falan ma, alogo naxanye na la Ala ra, ne xa e sɔbe so wali faɗin ma. Na feene nan lan, ne nan tɔnɔ gbo muxune birin ma. **9** Koni i yete ratanga fe matandi xaxilitarene ma e nun muxune benbane xinle feseɓeseɓen nun lantareyaan nun sɔnxɔ sɔnxɔn naxanye fataxi sariyan na, amasɔtɔ ne tɔnɔ mi na, e ligama fuyan. **10** Muxun naxan mayitaxunna rasoma yamani, i na a rakolon waxatin naxan yi sanɗa ma keden han firin, i masiga na ra. **11** A kolon a na kanna xaxinli fuxi. A nema yulubin ligama, a yete yalagima. **12** N na Aritema rasiga i fema waxatin naxan yi hanma Tikiko, kata i fa n fema Nikopoli taani, bayo n waxi a xɔn ma, n xa xunbeli waxatin ti mɛnni. **13** I xa sariya karamɔxɔ Senasi nun Apolosi mali e fanda feen na e sigatini alogo sese nama dasa e ma. **14** Fɔ en ma muxune fan xa e xaran nen fe faɗi rabaan ma e yi e tunnafan, alogo e xa nɔ e mako xɔdɛxene gase, e mɔn nama lu dɔxi fuu. **15** N fɔxɔ ra muxune birin i xɔntɔn. Nxu denkeleya muxune xɔyine birin xɔntɔn. Ala xa hinan ɛ birin na.

Filemōn

1 N tan Pōli naxan findixi kasorasaan na Yesu Alaa Muxu Sugandixina fe ra, nxu nun ngaxakedenna Timōte nan ito sebexi nxu xanuntenna nun nxu walike boden Filemōn ma, **2** e nun Apiya nxu magilena e nun Arikipe nxu yenge so bodena e nun denkeleya yamaan naxanye e malanma i konni. **3** En Fafe Ala nun Marigi Yesu Alaa Muxu Sugandixin xa hinanna nun bōɲe xunbenla fi ε ma. **4** Filemōn, n nēma n ma Ala maxande waxati yo yi, n barikan birama a xa nēn i ya fe ra, **5** amasoto n bata a mē i denkeleyaxi Marigi Yesu ma kii naxan yi, i mōn a yama sarijanxin birin xanuxi. **6** N na Ala maxandima alogo ngaxakedenyaan naxan fataxi i ya denkeleyaan na, na xa a liga i fe fajin birin kolon ki fajni, en naxanye sotoxi Alaa Muxu Sugandixin barakani. **7** Ngaxakedenna, i ya xanuntenyaan bata sewa gbeen fi n ma, a yi n nalimaniya, bayo i bata yama sarijanxin birin nii yifan e ma. **8** Nanara, hali n to nōe susue i yamare Alaa Muxu Sugandixini fa fala a i xa feen naba naxan daxa, **9** koni n ni i mafanma xanuntenyaan nin, n tan Pōli xeme fonna, e nun iki kasorasana Yesu Alaa Muxu Sugandixina fe ra. **10** Nayi, n na i mafanma n ma dii Onesimo a fe ra, n findixi naxan baba ra kasoni. **11** A tōnō mi yi i ma waxati danguxini, koni iki, a tōnōn luma en birin ma nēn. **12** N bata a raxete i ma iki, a tan naxan nafan n ma alo n niina. **13** A yi rafan n ma nun, a lu n fema be, alogo a xa wali n xa i funfuni, n kasoon na waxatin naxan yi Yesu a fe Xibaru Fajina fe ra. **14** Koni n mi waxi fefe liga feni, ba i sagoon na, alogo i ya wali fajin nama findi karahanna ra, koni a xa findi i jēnige ma feen na. **15** Yanyina nde, Onesimo masigaxi i ra nēn waxatidi tun, alogo i mōn xa a soto habadan, (aiōnios g166) **16** anu konyi gbansan mi fa a ra sōnōn, koni a bata dangu konyin na, a bata findi i rafan ngaxakedenna ra. A rafan n tan ma, koni a xa rafan i tan ma dangu n tan na adamadiyani e nun Marigini. **17** Nayi, xa i n yatexi i xōyin nan na, i xa Onesimo fan yisuxu alo i n yisuxuma kii naxan yi. **18** Xa a tinxintareyaan ligaxi i ra, hanma xa a lan a xa sena nde raxete i ma, na goronna sa n tan xun ma. **19** N tan yetēen nan ito sebexi n yiin na, n tan Pōli. N na i yii raxetema nēn, koni n mi waxi a fala feni i xa fa fala i tan lan i xa i niin so n yii. **20** Ngaxakedenna, yandi na fe fajin liga n xa Marigina fe ra, n nii yifan n ma Alaa Muxu Sugandixin barakani. **21** N to laxi i

ra a i n xuiin suxuma nēn, n xa ito sebe i ma. N na a kolon i nde ligama nēn dangu n ma falan na. **22** I mōn xa yigiya banxina nde yitōn n yēe ra amasoto n laxi a ra, n mōn xetema nēn ε ma ε Ala maxandin barakani. **23** Epafirasi naxan n fema kasoon na Yesu Alaa Muxu Sugandixina fe ra, na i xōntōnma. **24** N walike bodene Maraka nun Arisitaraki nun Demasi nun Luka, ne birin i xōntōn. **25** Ala xa Marigi Yesu Alaa Muxu Sugandixina hinanna xa lu ε niini.

Heburune

1 Waxati danguxini, Ala falan ti nen en benbane xa nabine xon sanja ma wuyaxi nun ki wuyaxi yi. **2** Koni a falan tixi en tan xa waxati rananni ito nin a Dii Xemen xon. A bata daala birin sa a Dii Xemen sagoni alo a keena. A dunuja daxi a tan nan baraka yi. (aiōn g165) **3** Alaa Dii Xemen findixi a binyen nōron nan na. Ala maligan yeteen nan a ra. A dunuja yisuxi a falan senben nan na. A to yelin yulubi xafarin nakamale, a yi dōxo Ala Senben Birin Kanna yiifanna ma ariyanna yi. **4** Alaa Dii Xemen tiden yi gbo ayi dangu malekane ra, a yi xinla fi a ma naxan dangu e xinle ra. **5** Bayo, Ala mi a falaxi a maleka yo xa, a naxa, “N ma dii xemen nan i tan na, n bata findi i fafe ra to.” A mōn mi a fala maleka yo xa, a naxa, “N findima nen i fafe ra, i fan yi findi n ma dii xemen na.” **6** Ala to a diin nafa dunuja yi alo dii singena, a mōn naxa, “Alaa malekane birin xa a batu.” **7** A mōn yi a fala malekane fe yi, a naxa, “Alaa malekane luma nen alo foyena, a walikene yi lu alo tee degena.” **8** Koni a mōn yi a fala a dii xemena fe yi, a naxa, “Ala, i luma nen i ya mangaya gbedeni habadan! I ya manga dunganna yi findi tinxinyaan taxamasenna ra. (aiōn g165) **9** Tinxinna rafan i ma, fe nxacin mi rafan i ma. Nanara, Ala, i ya Ala bata i rafisa i bodene xa a sewa turen sa i xunni i sugandi feen na.” **10** A mōn naxa, “Marigina, i bōxo xonna da nen xabu a fōlōni. I yii fōxon nan kore xonna ra. **11** Ne birin danguma nen, koni i tan luma nen na. Ne birin forima nen e kala alo dugina. **12** I yi e yisa alo domana, e yi masara alo dugina, koni i tan luma nen i kiini, i siin fan dan mi na mume!” **13** Ala mōn mi a fala a maleka yo xa, a naxa, “Dōxo n yiifanna ma, han n yi i yaxune sa i sanna bun.” **14** Malekane mi findixi Alaa walike totarene xan na ba, a naxanye rasigama kisi muxune malideni?

2 Nanara, en bata feen naxanye me, fō en xa en jōxo lu nen ne xon alogo en nama kiraan bejin. **2** Amasoto, malekane fa xerayaan naxanye rali en benbane ma lan sariyan ma, ne birin suxutareyaan saranma nen a kala muxune ra alo a daxa kii naxan yi. **3** Nayi, en fa ratangama di, xa en na en me kisi gbee sifani ito ra, Marigin yeteen singe naxan nali, na xanbi ra, a rame muxune fan yi a jōndin yita en na? **4** Ala fan e sereya baan fari sa nen taxamasenne nun kabanako feene nun senbe fe sifa wuyaxi ra, a

yi a Nii Sarijanxin kewanle yitaxun e ra a sagoni. **5** Awa, en yire famatōon naxan ma fe falama, Ala mi na luma malekane xan sago yi. **6** Koni sereyani ito sebexi Kitabun yirena nde yi, a naxa, “Nanse dajōxon na, i to i yengi dōxi a xon. Nanfera i jōxo luxi adamadiin xon? **7** I a daxi nen, a nōron yi maso malekane ra. I binyen nun xunnayerenna fi a ma. **8** I bata seen birin lu a bun.” A to seen birin luxi adamadina nōon bun, Ala mi sese lu naxan mi xuru a nōon bun. Hali na, iki en mi a toma fa fala seen birin muxuna nōon bun ma. **9** Koni en na a toma fa fala, Ala Yesu magodo nen waxati dungidi dangu malekane ra, alogo a xa faxa masoto Alaa hinanna xon muxune birin xa. Iki en na a mangayaan binyen nun a xunna kenla toma a faxana fe ra a tin naxan ma. **10** Ala naxan seen birin da a yete xa, a yi waxi adamadi wuyaxi raso feni a binyeni. Na yi lanxi, a to en nakisimana fe rakamali a tōron xon. **11** Bayo Yesu naxan muxune rasarijanma e nun a naxanye rasarijanxi, ne birin fafe keden. Nanara, Yesu mi yagima a fale ne ma, “Ngaxakedenne.” **12** A naxa Kitabuni, “N na i xinla ralima nen ngaxakedenne ma. N ni i matōxōma nen yamaan ye.” **13** Kitabun mōn naxa, “N nan n yigi sama Ala nin.” A mōn naxa, “Nxu nun n ma diine nan ito ra, Ala naxanye fixi n ma.” **14** Nayi, bayo Yesu a muxune findixi adamadiine nan na fati benden nun wunli, Yesu fan yeteen bata lu alo e tan. Na ma, a yi Yinna Manga Setana halagi a yetena sayaan xon ma senben yi naxan yii sayaan xun na. **15** A na ligaxi nen alogo naxanye yi sayaan gaxun konyiyani e dunuja yi gidini, a xa ne xōrya. **16** Amasoto a mi faxi malekane xan malideyi, koni fō Iburahima bōnsōnne. **17** Na nan a liga, a yi lu alo a ngaxakedenne feen birin yi, alogo a xa nō saraxarali kuntigiyaan wanla ke Ala xa kininkininna nun tōgondiyani, a yi Ala solona yamaan yulubine xafari feen na. **18** Bayo Setana kataxi a xa a fan natantan, a tan yeteen yi tōro na feni, nayi, a ferena a xa, a yi muxune mali e nema e ratantan feene de waxatin naxan yi.

3 Nanara, ngaxakeden muxu rasarijanxine, Ala bata e tan naxanye xili, e xaxili lu Yesu a fe xon, Alaa Xeraan nun Saraxarali Kuntigi Singena, en naxan ma fe falama yamani. **2** Muxu tōgondiyaxin nan yi a ra Ala xa, naxan a sugandixi alo Musa yi kii naxan yi Alaa banxin birin yi. **3** Banxi tiina xunna kenla gbo dangu banxin yeteen na. Nanara, Yesu a xunna

kenla gbo Musaa xunna kenla xa. 4 Awa, muxune nan banxine tima, koni Ala nan seen birin daxi. 5 Musa tan tɔgɔndiya nen wali kedeni Ala xa a banxin mumeni, a sereyaan ba lan na feene ma Ala yi fama naxanye ligadeni. 6 Koni Alaa Muxu Sugandixin tan luxi na alo Alaa Dii Xemen naxan a banxin xun na. En findixi a banxin nan na, xa en na en wekile, en yi en ma yigin namara en naxan matɔxɔma. 7 Nayi, alo Alaa Nii Sarijanxina a falaxi kii naxan yi, a naxa, “Xa ɛ Ala fala xuiin me to, 8 ɛ nama ɛ bɔɣeni xɔdɔxɔ alo ɛ yi murutexi Ala ma waxatin naxan yi, ɛ yi matoon xun ti Ala ra tonbonni. 9 ɛ benbane n bunba nen mɛnni, e yi n matandi, hali e to n kewanle birin to jɛɛ tonge naanin. 10 Nayi, n xɔlɔ nen na waxatin muxune ma, n naxa, ‘E bɔɣen makuya n na waxatin birin, e mi n ma kiraan xɔn.’ 11 N yi n kɔlɔ n ma xɔlɔni, n naxa, ‘E mi soe n ma matabudeni mume!’” 12 Ngaxakedenne, ɛ a liga ɛ yeren ma, bɔɣe jaxin nun denkeleyatareyaan nama lu ɛ sese yi naxan a lige ɛ xete habadan Ala fɔxɔ ra. 13 Koni ɛ bode ralimaniya lɔxɔ yo lɔxɔ, fanni en mɔn na waxatini Kitabun naxan ma fa fala “To” alogo ɛ tan nde nama tantan yulubin xɔn, ɛ tengbesenye ayi. 14 Amasɔtɔ en bata findi Alaa Muxu Sugandixin gbeene ra, xa en lu en ma tɔgɔndiyaan singeni, han a rajanna. 15 Kitabun naxa, “Xa ɛ Ala fala xuiin me to, ɛ nama ɛ bɔɣeni xɔdɔxɔ alo ɛ yi murutexi Ala ma waxatin naxan yi.” 16 Awa, ndee yi ne ra, naxanye Alaa falan me, e murute a xili ma? Ne findixi muxune nan na Musa naxanye ramini Misiran yamanani. 17 Ala xɔlɔ ndee ma jɛɛ tonge naanin? Naxanye yulubin liga, e faxa tonbonni. 18 Ala a kɔlɔ ndee a fe ra, a e mi soe a matabu yireni? Naxanye tondi a falan suxe, a yi falan tima ne nan ma fe yi. 19 En bata a to nayi, fa fala e mi yi nɔe soe matabudeni lan e denkeleyatareyaan ma.

4 Nayi, Ala to en tuli sa, a en nɔe soe nen a matabudeni, en na a liga en yeren ma nayi alogo ɛ tan nde nama lu alo ɛ fulaxi na ra. 2 Bayo Alaa falan Xibaru Fajin nali nen en fan ma alo na waxati danguxin muxune. Koni e falan naxan me, na tɔnɔ yo mi lu e tan ma, amasɔtɔ naxanye a rame, ne mi a suxu denkeleyani. 3 En tan naxanye denkeleyaxi, en tan soma nen na matabudeni alo Ala a fala kii naxan yi, a naxa, “N bata n kɔlɔ n ma xɔlɔni, n naxa, ‘E mi soe n ma matabudeni mume!’” Anu, Alaa wanla bata yi kamali xabu dunuya da waxatini. 4 Amasɔtɔ ito falaxi

Kitabun yirena nde yi xii soloferedena fe yi, a naxa, “Ala yi a matabu a wali kɛɛn xii soloferede lɔxɔni.” 5 A mɔn naxa Kitabun yireni ito yi, “E mi soe n ma matabudeni mume!” 6 Na bunna nɛɛn fa fala ndee gbete ye soe nen, ba muxune ra naxanye singe Alaa falan Xibaru Fajin me, e mi so lan e fala suxutareyaan ma. 7 Nanara, waxati xunkuye to dangu, Ala mɔn yi lɔxɔ nenen sa, a yi na feen fala Dawuda a Kitabun kui, a yi na lɔxɔ nenen xili sa fa fala “To.” A naxa, “Xa ɛ Ala fala xuiin me to, ɛ nama ɛ bɔɣeni xɔdɔxɔ.” 8 Awa, xa Yosuwe bata yi yamaan nasɔ Alaa matabudeni nun, Ala mi yi lɔxɔ gbete a fe fale na xanbi ra. 9 Na bunna nɛɛn fa fala matabuden mɔn Alaa yamaan xa yeɛn na. 10 Amasɔtɔ muxu yo so Alaa matabudeni, na fan a matabuma nen alo Ala a matabuxi kii naxan yi. 11 Na ma, en kata en so matabudeni, alogo muxu yo nama findi fala suxutaren na alo en benbane. 12 Amasɔtɔ Alaa falana, niiramaan na a ra, a senben gbo, a deen xanxan dangu silanfanna de firin kanna ra. A soma nen han a sɔndɔmen nun niin yeteen fata, e nun fatin nadɔxɔdene nun fasane. A muxun miriyane nun a natane makitima nen. 13 Ala dali se yo mi luxunxi a ma. Ala feen birin toma. En birin en dentegema nen a xa. 14 Nanara, bayo saraxarali kuntigi gbeena en yii naxan kelixi kore, Yesu Alaa Dii Xemena, nayi en na en sɔbe so en ma denkeleyani, en naxan ma fe falama yamani. 15 Amasɔtɔ en ma saraxarali kuntigina en ma fangatareyaan kolon, bayo Setana kata nen a fan natantandeni kiin birin yi alo en tan, anu, a mi yulubi yo liga. 16 Nanara, en na en maso Ala hinantenna manga gbeden na xaxili ragidini alogo en xa kininkininna nun hinanna sɔto en makoon naxanye ma.

5 Saraxarali kuntigine birin sugandima nen adamadiine ye, alogo e xa wali Ala xa, e yi kise ralixine nun saraxane ba yulubi xafarin na. 2 E nɔe xaxilitarene nun muxu tantanxine famunye nen, bayo e tan fan yeteen tantanma. 3 E yulubi xafari saraxane bama e tan yetena fe ra na nan ma, e nun yamaan xa. 4 Muxu yo mi saraxarali kuntigiyaan xunna kenla fenje a yete xa. Ala nan a xilixi alo a Haruna xili kii naxan yi. 5 A na kii nin, Alaa Muxu Sugandixin mi saraxarali kuntigi binyen sɔto a yete ra, koni Ala a fala nen a xa, a naxa, “N ma dii xemen nan i tan na, n bata findi i fafe ra to.” 6 A mɔn yi a fala Kitabun yire gbete yi, a naxa, “Saraxaraliin nan i ra habadan,

alo Melikisedeki yi kii naxan yi.” (aiōn g165) 7 Yesu yi dunuɲa yi waxatin naxan yi, a yi Ala maxandima, a xuini te, a yeeɣen yi mini, a yi Ala mafan naxan yi nɔɛ a rakise sayaan ma. Ala yi a xuiin name bayo a yi xuruxi a ma. 8 Koni hali Alaa Dii Xemen to a ra, a a xaran nɛn fala suxun ma a tɔrɔne yi. 9 Yesu a fe kamali waxatin naxan yi, a yi findi habadan Marakisi Tiin na muxune xa naxanye birin a xuiin suxuma. (aiōnios g166) 10 Ala yi a findi saraxarali kuntigin na alo Melikisedeki yi kii naxan yi. 11 Fe wuyaxi nxu kui a fala daxin na ɛ xa lan feni ito ma, koni a yeɓa raxɔlo ɛ xa, bayo ɛ mi a famuma xulen. 12 A yi lan nun ɛ yi findi karamɔxɔne ra waxatini ito yi, anu han iki ɛ makoon mɔn ɛ xaran muxun ma lan Alaa falan fe singene ma. ɛ luxi alo dii jɔren naxan mɔn xijɛn na bayo ɛ mi donse xɔdɛxɛn donjɛ singen. 13 Muxun naxan mɔn xijɛ minni, dii jɔren nan na ra. A mi xaranna kolon lan tinxinyaan ma. 14 Koni fonne nan gbee donse xɔdɛxɛn na. Naxanye denkeleya bata kɔxɔ, ne bata e yete xaran fe fajin nun a jaxin tagi rabaan ma.

6 Nanara, en dangu Alaa Muxu Sugandixina xaranna fe singene ra, en siga yeeɣ na, hali en nama fa xete fe fɔlɔne ma sɔnɔn alo itoe: en na en xun xanbi so fena wali jaxine yi naxanye muxun xalima yahannama, e nun denkeleyana Ala ma, 2 e nun xaranna muxu rafu feene ma igeni e tubi xinla ma e nun yii saan muxune ma Ala maxandini e nun faxa muxune rakenla sayani e nun habadan kitina. (aiōnios g166) 3 Xa Ala tin, en sigɛ nɛn yeeɣ na. 4 Amasɔto naxanye bata yi kenenna sɔto sanɲa ma keden, e Ala kisin sɔto, e yi Alaa Nii Sarijanxin sɔto, 5 naxanye bata yi Alaa falan jaxunna kolon e nun waxati famatɔɔn sɛnbene, (aiōn g165) 6 ne na ba denkeleyani, e mi fa nɔɛ raxete sɔnɔn, e mɔn yi tubi. Amasɔto ne luxi nɛn alo e mɔn Alaa Dii Xemen nan gbangbanma wudin ma, e yi a rayarabi yamaan yetagi. 7 A misaala, bɔxɔn naxan tule igen sɔtɔma waxatin birin, a si seene sabati a kanna xa, Alaa barakan nan na ra. 8 Koni bɔxɔn naxan janle nun tansinne tunna raminima, na tɔnɔ mi na, a masoxi Alaa dangan nan na. A rajanni, teeɣ yi a gan. 9 Koni n xanuntenne, hali nxu falan tima na kiini, nxu laxi a ra, a fe gbete nan ɛ tan yee ra lan ɛ kisi feen ma. 10 Bayo tinxintare mi Ala ra. A mi jiinanma ɛ wanle xɔn, e nun ɛ xanuntenyaan naxan yitaxi a ra ɛ to a yama sarijanxin malima han iki. 11 Nxu waxi a xɔn

ma, ɛ keden kedenna birin xa lu na tunnafanni han a rajanna alogo ɛ yengi seen naxanye ma, ɛ ne sɔto. 12 Nxu mi waxi, ɛ xa tunnaxɔlo ayi. Koni fɔ ɛ xa na denkeleya muxune raliga naxanye diɲa alogo Ala ɛ tuli saxi naxan na, ɛ na sɔto. 13 Ala Iburahima tuli sa waxatin naxan yi, a yi a kɔlo a yete yi, bayo muxɛ mi na a kolɔɛ naxan yi naxan gbo a tan xa. 14 A yi a fala, a naxa, “N na i barakama nɛn han! I bɔnsɔnna wuyama ayi nɛn.” 15 Iburahima yi diɲa, a yi a legeden, Ala a tuli sa naxan na, a yi na sɔto. 16 Adamadiine e kolɔma fena nde yi naxan gbo e tan xa, e kolɔn yi e falan sɛnbɛ so alogo muxune nama e matandi. 17 Nanara, Ala yi Iburahima tuli sa, a yi a kɔlo alogo naxanye yi lan e na feen sɔto, ne xa a kolon a na fe ragidixin mi masarama. 18 Ala na liga nɛn alogo en tan naxanye a falan findixi en yigin na en xaxili tixi naxan na, en xa limaniya ki fajɲi, a to na yitaxi en na fe firinna xɔn, naxanye mi maxete, Ala mɔn mi wulen fale. 19 Na yigina en yii alo kunkin balana a rati seen na igen bun ma naxan sigama han yire sarijanxin yɛ masansan dugin xanbi ra en niin nasuxu seen na barakani 20 Yesu singe soxi en xa denaxan yi, bayo a bata findi habadan saraxarali kuntigin na, a lu alo Melikisedeki. (aiōn g165)

7 Melikisedeki nan yi Salemi mangan na e nun Kore Xɔnna Alaa saraxaralina. Iburahima yi kelima yengeni waxatin naxan yi, a mangane nɔ naxan yi, Melikisedeki yi siga a ralandeni, a yi duba a xa. 2 Iburahima yi a se tongoxine birin yaganna so a yii. Melikisedeki xinla bunna nɛɛn “Tinxin Mangana.” Salemi mangan nan mɔn yi a ra nun, na fan bunna nɛɛn “Bɔjɛ Xunbeli Mangana.” 3 A baba mi kolon, a nga mi kolon, a xabila mi kolon, a siimayaan fɔlɔn nun a rajanna mi kolon. A luxi nɛn alo Alaa Dii Xemena naxan luma saraxaraliyani habadan. 4 ɛ a gbo kii mato, hali en benba Iburahima yeteeɣ seen naxanye tongo yengeni, a ne yaganna so a tan nan yii. 5 Sariyan naxa, a Isirayila yamaan bɔnsɔnne lan e xa yaganna so Lewi bɔnsɔnna muxune nan yii, saraxaraline. Anu, ngaxakedenmane nan e ra, e birin minixi Iburahima bɔnsɔnna nin. 6 Melikisedeki tan mi yi findixi Lewi bɔnsɔnna muxu ra, koni a yaganna sɔto nɛn Iburahima ra, Ala naxan tuli sa. Melikisedeki yi duba a xa. 7 Anu, matandi mi naxan na, naxan duban tima, na dangu duba sɔtɔn na. 8 Lewi muxun naxanye yaganne rasuxu, ne faxama nɛn, koni Melikisedeki tan mabinni,

Kitabun naxa a na mi faxaxi. **9** Na kui a luxi alo Lewi bõnsõnna muxun naxanye yaganna rasuxuma, hali ne fan yaganna ba nen Melikisedeki xa Iburahima sabun na. **10** Bayo Lewi bõnsõnna muxune mōn yi e benba Iburahima fatini, a naralan Melikisedeki ra waxatin naxan yi. **11** Xa feene yi nōe rakamale Lewi bõnsõnna saraxaraliyaan barakani nun, yamaan sariyan soto naxan xōn, e makoon mi yi birama saraxaraliya gbete ma na xanbi ra nun naxan luxi alo Melikisedeki hali ba Haruna bõnsõnne ra. **12** Bayo saraxaraliyaan na masara, fō sariyan fan xa masara. **13** Feni itoe fala Yesu naxan ma fe ra, na barixi bõnsōn gbeteni, saraxaraliin munma yi mini bõnsõnna naxan yi. **14** A kolonxi nayi fa fala en Marigin barixi Yuda bõnsõnna nin. Awa, Musa saraxarali feen fala waxatin naxan yi, a mi na bõnsõnna fe fala. **15** Feni ito fixama nen dangu na ra xa saraxarali gbete fa naxan luxi alo Melikisedeki **16** naxan mi findixi saraxaraliin na sariyan xōn a benbane fe ra, koni a findixi saraxaraliin na a faxatareyaan nan senbe xōn. **17** Amasoto Kitabun bata a fala, a naxa, “Saraxaraliin nan i ra habadan, alo Melikisedeki yi kii naxan yi.” (aiōn g165) **18** Awa, yamari fonna bata ba na a senbetareyana fe ra, a tōnō to mi yi na. **19** Bayo sariyan mi sese rakamalixi. Koni yigi fisamantenna bata mini, en na en masoma Ala ra naxan baraka yi. **20** Na fe nenen mi tixi kōlōn xanbi. Bonne findi saraxaraline ra waxatin naxan yi, na kōlō sifan mi ti. **21** Koni Yesu findixi saraxaraliin na kōlōn nan xōn, Ala a fala a xa waxatin naxan yi, a naxa, “Marigin bata a kōlō, a mi a xuiin maxetema, a naxa, ‘Saraxaraliin nan i ra habadan.’” (aiōn g165) **22** Kōlōni ito bata Yesu findi layirin xui kenden na en tan xa. **23** Saraxarali singene yi wuya bayo e yi faxama, **24** koni Yesu tan luun nen habadan. A saraxaraliyaan fan luma nen habadan. (aiōn g165) **25** Nayi, a nōe muxune rakise nen yati naxanye fama Ala ma Yesu barakani amasoto a tan luma nen habadan Ala solona fe nan na. **26** En makoon yi na saraxarali kuntigi sifan nan ma: naxan sarijan, a mi fe jnaxi rabama, fe mi naxan na, naxan mi yulubi kanne ye, naxan yitexi kore xōnna ma. **27** A tan mi ligaxi alo saraxarali kuntigin bonne, amasoto ne saraxan bama lōxō yo lōxō e yete yulubine fe ra e nun yamaan yulubine fe ra. Koni Yesu tan a yete ba nen saraxan na yamaan yulubine fe ra sanja ma keden pe han habadan. **28** Musaa sariyan yi adamadi senbetarene nan dōxōma saraxarali kuntigine ra, koni Ala a kōlō falan naxan ma sariyan xanbi ra, na a Dii

Xemen nan dōxōma naxan bata yelin kamale han habadan. (aiōn g165)

8 En ma falan birin xunna nan ito ra: En ma Saraxarali Kuntigin dōxi Alaa Mangaya gbēden yiifanna ma ariyanna yi. **2** A walima yire sarijanxin yeteni, Marigina a yete batuden naxan tixi, adamadiine mi naxan ti. **3** Saraxarali kuntigin birin dōxi nen alogo e xa kiseene nun saraxane rali Ala ma, nayi fō sena nde xa lu a fan yii a naxan be saraxan na. **4** Xa a yi dunupani nun, a mi yi findima saraxaraliin na nun, amasoto gbete ye na naxanye Ala kiseene ralima alo sariyana a falaxi kii naxan yi. **5** Na saraxaraline walima yire sarijanxin naxan yi, men findixi ariyanna fe misaala nun a nininna nan na. Nanara, Ala Musa rakolon na ki, a to yi Ala Batu Bubun tima, a naxa, “A liga i yeren ma, i yi e rafala alo n na a misaala yitaxi i ra geyaan fari kii naxan yi.” **6** Koni iki, Yesu bata wanla soto naxan fisa saraxaraliin bonne wanla xa bayo a bata fa layirin na naxan fan Layiri Fonna xa, bayo na en tuli sa feen naxanye ra, ne fan a fonna xa. **7** Xa fe yo mi yi layiri singen na nun, en mako mi yi fa a firinden ma nun. **8** Koni Ala yi feen to a muxune ra, a yi a fala, a naxa, “Marigin naxa, ‘Na waxatin fama, n layiri nenen xidima nxu nun Isirayila nun Yuda yamane tagi waxatin naxan yi. **9** A mi ligama alo n layirin naxan xidi nxu nun e benbane tagi, n to e yii rasuxu n yi e ramini Misiran yamanani. Amasoto e mi n ma layirin suxu, n fan yi e rabegin.’ Marigin naxa na kiini. **10** Layirin ni i ra, n naxan xidima nxu nun Isirayila yamaan tagi. Marigin naxa iki: Na waxatin na dangu, n na n ma sariyane sama nen e xaxinli, n yi e sebe e bōjēni. N findima nen e Ala ra, e yi findi n ma yamaan na. **11** Muxu yo mi fa a boden maxaranma, muxu yo mi a fale a ngaxakedenna xa, a naxa, ‘I xa Marigin kolon,’ bayo e birin n kolonma nen, keli muxudin ma han muxu gbeena. **12** N dijama nen e tinxintareyaan ma, n yi e yulubine xafari.” **13** Ala to na layirin xili sa a nenena, na bunna neen a nenen bata lu a fonna jōxōni. Seen naxan bata fori, na tununma nen.

9 Layiri singen kui, yamarina ndee yi na nun lan Ala batu feen nun a yire sarijanxina fe ma dunupa muxune naxan tixi a xa. **2** E Ala batu bubun ti nen nayi. Na bubun kui singen yi xili Yire Sarijanxina. Lenpune dōxō seen yi na, e nun tabanla nun burun naxanye ralixi Ala ma. **3** Ye masansan dugin firinden

xanbi ra, bubu kui gbete yi na naxan yi xili Yire Sarijanxi Fisamantenna, 4 e nun a wusulan saraxa gande xema daxina, e nun a Layiri Kankirana. Xemaan yi saxi na kankiraan birin ma. Xema kundidin yi na kui, Manna donseen fan yi na kui. Haruna dunganna fan yi kankiraan kui naxan bata yi a mapingi e nun geme walaxane layirin yi sebexi naxanye ma. 5 Na Layiri Kankiraan xun ma, maleka gubugubu kan noroxine sawuran yi na. E gubugubune yi bandunxi kankiraan deraganla xun ma, Ala solonaden na. Koni en nama na feene birin yebe iki. 6 Feene birin to yiton na kiini, saraxaraline yi soma nen na yire singeni waxatin birin alogo e xa e wanla rakamali. 7 Koni yiren firindeni, saraxarali kuntigin nan tun keden yi soma na sanja ma keden jeen bun ma. Anu, fo a saraxan wunla xali, a yi a rali a yete yulubine nun yamaan yulubine xafari seen na. 8 Alaa Nii Sarijanxin munma yi a kiraan makenen yamaan yi soma yire sarijanxi fisamantenni naxan xon Ala batu bubu singen yi tixi waxatin naxan yi. 9 Misaala nan na ra waxatini ito xa. Nanara, kiseene nun saraxan naxanye yi ralima Ala ma, ne mi yi noe Ala batu muxune sondomene sarijanje. 10 Tonna nan tun yi ne ra lan donseene nun min seene ma e nun fati maxana e dinan kiine ma, naxanye yi daxa han waxati nenen yi a li. 11 Koni Alaa Muxu Sugandixin to fa alo saraxarali kuntigin naxan fe fajine rafa, a danguxi Ala Batu Banxi fisamantenna nin naxan kamalixi, muxune mi naxan tixi, dunuja gbee mi naxan na. 12 Yesu to so Yire Sarijanxi Fisamantenni, a mi koton wunla xan ba saraxan na de hanma tura dina, a yete wunla nan ba sanja ma keden pe, a yi en xunba habadan. (aiōnios g166) 13 Amasoto koton wunla hanma turana, e nun jinge gile ganxin xubena, xa ne xuya muxu xosixine ma, na yi e fati benden nasarijan, 14 nayi, Alaa Muxu Sugandixin wunla senben gbo dangu na ra! Amasoto, a bata a yete ba saraxa fetaren na Ala xa, Alaa habadan Nii Sarijanxin barakani. Na wunla en sondomene sarijanma nen kwali jaxine ma naxanye en faxama, en yi no habadan Ala batue. (aiōnios g166) 15 Na nan a ligaxi Yesu findixi layiri nenen sabun na alogo Ala naxanye xilixi, ne xa no habadan keen sote, a e tuli sa naxan na. A faxesa na nan ma, a findi e xunba seen na yulubine yi naxanye ligaxi na layiri singen waxatini. (aiōnios g166) 16 Amasoto xa layirin xidixi lan muxuna nde kee yitaxunna ma, na mi kamale fo na kanna na faxesa. 17 Keen mi taxunma fanni a

kanna mon jeje fo a na faxesa, a layirin yi rakamali. 18 Nanara, hali layiri singen yetena, a mi folo benun wunla xa mini. 19 Musa to yelin yamarine birin fale yamaan birin xa fata sariyan na, a yi turadine nun kotone wunla tongo, e nun igena, e nun yexee xabe gbeela, a yi wunla xuya Sariya Kitabun nun yamaan birin ma joxonden na naxan xili hisopina. 20 A yi a fala, a naxa, “Wunli ito nan layiri xidi seen na, Ala e yamarixi naxan suxu feen ma.” 21 Musa mon yi wunla xuya Ala Batu Bubun nun a rawali seene birin ma. 22 Sariyan kui, fayida seen birin nasarijanxi wunla nan xon, anu, xa wunla mi mini, yulubin mi xafare. 23 A yi daxa na seene xa rasarijan na kii nin, bayo e findixi ariyanna seene misaale nan na. Koni ariyanna seene yeteen yi daxa e rasarijan saraxan na naxan dangu ne ra. 24 Amasoto Alaa Muxu Sugandixin mi soxi yire sarijanxini, muxune naxan tixi, denaxan findixi ariyanna misaala gbansanna ra, koni a soxi ariyanna yeteen nin, alogo a xa ti Ala yetagi en xa iki. 25 A mi soxi a yete badeni saraxan na sanja ma wuyaxi alo saraxarali kuntigin soma kii naxan yi yire sarijanxi fisamantenni jee yo jee sube wunla ra a yii. 26 Bayo xa na nan yi a ra nun, Yesu yi toroma nen nun sanja ma wuyaxi xabu dunuja da waxatina. Koni iki, waxati rajanni, a bata mini kenenni sanja ma keden han habadan, a a yete ba saraxan na, a yi yulubine birin jan. (aiōn g165) 27 Adamadiine birin faxesa nen sanja ma keden pe, na xanbi ra kitin yi a li. 28 Alaa Muxu Sugandixin fan findixi saraxan na na kii nin sanja ma keden pe, a muxu wuyaxi yulubin jan. A mon fama nen, koni a mi fama yulubi xafari feen na. A fama a legeden muxune nan nakisideyi.

10 Musaa sariyan findixi fe famatone maligan nan na, e tan yeteen mi a ra. Nanara, saraxan naxanye bama waxatin birin jee yo jee, ne mi noe Ala batu muxune rakamale. 2 Xa e yi noe na ra nun, muxune mi yi luye e be waxatin birin. Bayo Ala batu muxune yi sarijanma nen nun sanja ma keden han habadan, e mi yi fa e yete kolonye yulubi tongon na nun. 3 Koni na jee yo jee saraxane muxune yulubine rabirama e ma nen. 4 Amasoto turaan wunla nun siin wunla mi noe yulubin janyje mume! 5 Na nan a ligaxi, Yesu fa dunuja yi waxatin naxan yi, a yi a fala Ala xa, a naxa, “I mi waxi saraxane nun kiseene xon, koni i bata n fati bendeni ton n xa. 6 Saraxa gan daxine nun yulubi xafari saraxane mi rafan i ma. 7 Nayi,

n yi a fala, n naxa, ‘N tan ni i ra. N ma fe sebxi Kitabuni. Ala, n bata fa i tan sagoon ligadeni.’” 8 Awa, a naxan singe fala, a naxa, “Saraxane nun kiseene nun saraxa gan daxine nun yulubi xafari saraxane mi rafan i ma.” Anu, sariyana e ba feen yamarixi. 9 Na xanbi ra, a mɔn yi a fala, a naxa, “N tan ni i ra, n bata fa i sagoon ligadeni.” Nayi, a yi saraxa singene ba na, a yi a masara a nenen na. 10 Yesu Alaa Muxu Sugandixina a sagoon naxan ligaxi, a yi a fati benden ba saraxan na, na en sarijanma nen sanja ma keden pe han habadan. 11 Saraxaraline birin e wanla kema lɔxɔ yo lɔxɔ. E saraxane bama yeye, naxanye mi nɔe yulubin xafare mum! 12 Koni Yesu tan, na saraxa keden peen nan ba yulubine fe ra, a yi dɔxɔ Ala yiifanna ma han habadan. 13 Iki a Ala mamema alogo a xa a yaxune lu a sanna bun ma. 14 Amasɔtɔ muxun naxanye rasarijanma, a bata ne rakamali saraxa keden peen xɔn han habadan. 15 Alaa Nii Sarijanxin fan na feen seren bama en xa. A fala singen naxan ti, a naxa, 16 “Layirin ni i ra nxu nun Isirayila kaane naxan xidima: Na waxatin na dangu, n nan n ma sariyane sama nen e bɔjɛni, n yi e seɓe e xaxinla ma.” Marigin naxa na kiini. 17 A mɔn naxa, “N mi fa n xaxili luma e yulubine nun e sariya kala feene xɔn sɔnɔn.” 18 Anu, ne na mafelu, saraxa mi fa bama yulubina fe ra. 19 Nayi, ngaxakedenne, en xaxili ragidixi so feen na yire sarijanxi fisamantenna nin Yesu wunla barakani. 20 A so deen naxan nabixi en xa, kira nenen nan na ra naxan tixi nii rakisin ma, en nɔe sige ye masansan dugin xanbi ra naxan xɔn, kiraan naxan findixi a fati benden na. 21 En ma saraxarali kuntigin nan Ala Batu Banxin xunna, 22 nayi, en xa en maso Ala ra bɔjɛ sarijanxin nun denkeleya defexini, en bɔjɛn to sarijanxi feene birin ma, en xaxinla en yalagima naxanye ma, en fati benden to maxaxi ige sarijanxin na. 23 En lu en tiye en yigina fe ra yamani, amasɔtɔ naxan en tuli saxi, na tinxin. 24 En na en jɔxɔ lu en bode xɔn ma, en yi en bode rawekile xanuntenyaan nun wali fajɔ rabaan ma. 25 En nama en mɛ en ma malanne ra alo muxuna ndee darixi a lige kii naxan yi. Koni en na en bode ralimaniya waxatin birin, alo en to Marigina lɔxɔn toon masɔe. 26 En yelin xanbini jɔndin kolonna sɔtɛ, xa en na a rakeli a ma, en lu yulubin lige, saraxa mi fa en yii sɔnɔn yulubin mafelu feen na, 27 fɔ kiti famatɔɔn nun tɛɛ gbeen gaxuna naxan Ala matandi muxune halagima. 28 Ala sariyan naxan so Musa yii, naxan yo

na yi na kala, na kanna yi faxama kininkinintareyaan nin, xa muxu keden hanma firin bata sereyaan ba. 29 Awa, na kanna mi saranyɛ a kewanle ra ba, naxan na Alaa Dii Xɛmɛna fe rayeľefu, hanma naxan na Alaa layirin xidi wunla rafeya naxan a sarijanma, hanma naxan na Ala hinantenna Nii Sarijanxin nasɔto? 30 Bayo en tan a kolon naxan a falaxi, a naxa, “N tan nan gbeɛjɔxɔ tiin na, n tan nan donle saranma e yatene ra.” E nun mɔn, a naxa, “Marigina a yamaan makitima nen.” 31 Gbalon na a ra xa muxun bira habadan Ala ra. 32 Na lɔxɔ singene fe xa rabira ɛ ma, ɛ Alaa kenenna sɔto waxatin naxan yi. ɛ tunnafan nen yenge xɔdɛxen nun tɔrɔyani na waxatini. 33 E yi ɛ konbima yamaan yetagi waxatina nde yi, e ɛ tɔrɔ. Waxati gbete, naxanye na fe sifan sɔto, ɛ kafu nen ne ma. 34 E yi kininkinin kasorasane ma, ɛ yi tin sewani muxune yi ɛ yii seene tongo, bayo ɛ yi a kolon fa fala ɛ yii se fisamantenne ramaraxi habadan. 35 Nayi, ɛ xaxili ragidixi naxan ma, ɛ nama na rabɛjin, bayo a findima nen kɔntɔn gbeen na ɛ xa. 36 ɛ makoon tunnafanna ma, alogo ɛ na Ala sagoon liga, a ɛ tuli sa naxan na, ɛ yi na sɔto. 37 Amasɔtɔ Kitabuna a falaxi kii naxan yi, a naxa, “A bata lu ndedi, siya di, naxan fama, na yi fa, a mi fa buma. 38 Koni n ma tinxin muxun nii rakisin sɔtɔma nen a denkeleyaan xɔn. Anu, xa naxan xɛtɛ a xanbi ra, na kanna mi n kenɛnyɛ.” 39 En tan mi xetema en xanbi ra, en yi halagi, koni en luma denkeleyani nen, en niin yi kisi.

11 En na la en yigin na, en yi xaxili ragidi feen ma en mi naxan toma, na nan denkeleyaan na. 2 A singe ra muxune sereya fajɔn sɔto e denkeleyaan nan xɔn. 3 Denkeleyaan xɔn, en na a kolon fa fala dunuɔna daxi Ala fala xuiin nan ma. Nanara, en seen naxanye toma ne mi fataxi fe toxine ra. (aiɔn g165) 4 Denkeleyaan xɔn, Habila yi saraxan ba Ala xa naxan yi fisa Kayini gbeen xa. Ala yetɛen yi sereyaan ba a saraxana fe ma, fa fala, a tinxin muxun nan a ra. Denkeleyaan xɔn, hali Habila to bata faxa, koni a mɔn falan tima. 5 Denkeleyaan xɔn, Xenɔki yi te kore xɔnna ma, a mi faxa, a mi fa to sɔnɔn. Amasɔtɔ Ala bata yi a xali. Benun a xa xali kore, a bata yi na serejɔxɔyaan sɔto nun fa fala a bata Ala kenɛn. 6 Muxu yo mi Ala kenɛnyɛ denkeleyaan xanbi, bayo naxan fama Ala ma, fɔ na xa la a ra nen fa fala Ala na yi, e nun muxun naxanye a fenma, Ala ne kɔntɔnna fima nen. 7 Denkeleyaan xɔn, Nuhan to rakolon fe

famatone fe yi, a munma yi naxanye to, a yi kunkin nafala Ala yeeragaxun ma a tan nun a denbayaan nakise naxan kui. A denkeleyaan yi findi dunuja muxun bonne yalagi xunna ra, a tan yi tinxinyaan soto a keen na denkeleyaan xon. 8 Denkeleyaan xon, Ala to Ibrahima xili, a yi a falan suxu, a siga na yamanani, a yi naxan sotoma a keen na, hali a to mi yi a kolon a sigan denaxan yi. 9 Denkeleyaan xon, Ala a tuli sa yamanan naxan na, a dɔɔ mɛnni xɔneyani. A yi lu bubune kui, alo Isiyaga nun Yaxuba fan a liga kii naxan yi, Ala naxanye fan tuli sa na kee kedenna ra. 10 Amasoto Ibrahima yi taan nan mamema nun naxan beten sa kii kende, Ala naxan ma fe yiton, a yi a ti. 11 Denkeleyaan xon, Ibrahima fan yi senben soto a no diin sote hali a to bata yi fori, hali gbantan to yi Saran fan na, amasoto naxan bata yi a tuli sa, a yi laxi na kanna tinxinyaan na. 12 Nanara, hali faxan to bata yi maso a ra, a bonson wuyaxi bari nen, naxanye yi wuya alo sarene hanma baan xon jemensinna naxanye xasabin mi noe yate. 13 Na muxune birin faha denkeleyaan nin. Ala e tuli sa naxanye ra, e mi ne soto, koni e e to nen wulani, e sewa e fe ra. E yi e ti a ra fa fala a xɔnen nun sigatiin nan tun e tan na dunujani ito yi. 14 Naxanye falan tima na kiini, ne a yitama nen fa fala a e dɔxoden nan fenma e yete xa. 15 E keli yamanan naxan yi, xa na xonla yi e suxu nun, waxatina nde e yi feren sotoma nen e xete na. 16 Koni e yi taa fisamantenna nan fenma, naxan findixi ariyanna ra. Nanara, na yagin mi Ala ma, e na a xili a e Ala, amasoto a bata taani ton e xa. 17 Denkeleyaan xon, Ala to wa Ibrahima kejaan fesefese feni, Ibrahima mi tondi Isiyaga be saraxan na a xa. Ala naxan tuli saxi, na yi tin a dii xeme kedenna be saraxan na, 18 hali Ala to bata yi a fala a xa nun, a naxa, "Naxanye yatema i bonsonna ra, ne minima Isiyaga bonsonna nin." 19 Ibrahima yi laxi a ra nun fa fala a Ala noe Isiyaga rakele nen sayani. A dii xemen mon yi raxete a ma, na feen yi findi taxamasenna ra. 20 Denkeleyaan xon, Isiyaga yi duba Yaxuba nun Esayu xa lan waxati famatone ma. 21 Denkeleyaan xon, benun Yaxuba xa faha, a duba nen Yusufu a dii xeme keden kedenne birin xa. A yi a tingilimati a dunganna xunna, a yi Ala batu. 22 Denkeleyaan xon, benun Yusufu xa faha waxatin naxan yi a Isirayila kaane ramini feen fala nen Misiran yamanani, a yamarin fi lan a binbina fe ma. 23 Denkeleyaan xon, Musa bari waxatin naxan yi, a soto muxune yi a luxun kike saxon, bayo e bata yi a

to, a dii fajin nan yi a ra, e mi gaxu mangana tonna yee ra. 24 Denkeleyaan xon, Musa to gbo, a mi tin e xa a xili fa fala Misiran Mangana dii temena dii xemena. 25 A yi tin a ma a e nun Alaa yamaan xa jaxankata e bode xon, benun a xa lu yulubini jaxunni naxan mi buma. 26 A yi rafan a ma, a xa jaxankata Alaa Muxu Sugandixina fe ra benun a xa Misiran yamanan nafunle soto bayo a yeen yi tixi a konton famatoo na. 27 Denkeleyaan xon, Musa yi keli Misiran yamanani, a mi gaxu mangan xolo feen na. A yi a tunnafan alo a yi Ala totaren toma nun. 28 Denkeleyaan xon, a yi Halagi Tiin Dangu Loxon Sanla yamarine suxu, a wunla xuya banxine deene ma alogo Halagi Ti Malekan nama Isirayila dii singene faha. 29 Denkeleyaan xon, Isirayila kaane yi Baa Gbeela gidi, alo e yi xaren nan na, koni Misiran kaane to kata gidideni e birin yi mamin igeni. 30 Denkeleyaan xon, Yeriko taan nabilinna yinna yi bira, e yelin xanbini a rabilinje xii solofere. 31 Denkeleyaan xon, yalunde jaxanla Raxabi mi halagi denkeleyatarene xon, amasoto a xerane yisuxu nen ki fajni naxanye yi taan nakorosima wundoni. 32 N mon nanse fale? Waxati mi n yii, n Gedeyon ma fe fala, hanma Baraki hanma Samison hanma Yefite hanma Dawuda hanma Samuyeli hanma nabine. 33 Ne yamanane no denkeleyaan nan xon. E tinxinyaan liga. Ala e tuli sa naxan na, e yi na soto. E yi yatane de xidi. 34 E teen senben natu. E tanga silanfanna ma, e senbetareyaan yi masara senben na, e fangan soto yengeni, e sofa xɔjene kedi. 35 Naxanla ndee faha muxune yi xete e ma keli sayani. Muxu gbete yi jaxankataxi, koni e tondi e xunbe alogo e xa marakeli fisamantenna soto sayani. 36 E yi ndee magele, e yi ndee bulan. E yi ndee xidi, e yi e sa kasoon na. 37 E yi e magolon. E yi ndee yixaba seraan na. E yi ndee faha silanfanna ra. Ndee yi maraberi baxi yexee xabe dagine nun sii xabe dagine nan na, e yii gelixi, e besenxonyaxi, e jaxankataxi. 38 E yi xuyaxi ayi burunna xun xon geyane fari. E dɔɔ faranne nun yinle ra. Anu, e tan noron mi lan dunuja muxune ye. 39 Na muxune birin sereya fajin soto e denkeleyaan nan xon, anu, Ala e tuli sa naxan na, e mi na soto. 40 Koni Ala bata a ragidi a xa fe fajini ton en xa alogo na muxune fe nama kamali en xanbi.

12 Bayo en nabilinxi yama gbee sifani ito nan na en serene ra, nayi, en na en me en yulubine nun en hake goronne ra naxanye en madiganma, en yi en

tunnafan xatajoxoya giini naxan nagidixi en ma. 2 En na en yeen ti Yesu ra, naxan denkeleyaan kiraan nabixi en xa e nun naxan mon a rakamalima. A tan naxan a me sewan na naxan yi finde a gbeen na, a yi a wekile faxan ma wudin fari, a mi na yagin yate. Na xanbi ra, a yi dexo Alaa manga gbeden yiifanna ma. 3 E miri Yesu ma naxan dija yulubi kanne besenxonya gbee sifani ito bun ma alogo e niin nama raforo, e yigitege. 4 Amasoto e munma yulubin yenge singe han e wunla yi mini. 5 E bata jinan na falan na, Ala e ralimaniya naxan na, a e xili fa fala "A diine." A naxa, "N ma diina, Marigin nema i xure, i nama yo na ma. A nema i sonna yite i ra, i bojen nama kala. 6 Amasoto Marigina a xanuntenne xuruma nen. A naxanye birin yatexi a diine ra a ne fe jaxine saranma e ra nen." 7 E torone yisuxu e yi, bayo Ala e xuruma nen alo a diine. Diin mundun na naxan fafe mi a xuruma? 8 Xa Ala mi e xuruma alo a lan birin ma kii naxan yi, na luxi nen alo e mi findixi a diine ra fo muxu gbetena diine. 9 En birin fafane en xuruma dunuja yi, en yi e binya. A mi lanje nayi ba, en xuru en niin kanna ma dangu ne ra, en yi nii rakisinsoto? 10 En fafane en xuruma waxatidi tun, alo a lanxi e miriyani kii naxan yi. Koni Ala en xuruma en munanfanna nan ma, alogo en xa a sarjannasoto. 11 Muxun nema xure, a mi sewe na ra bayo a xolo. Koni donxen na, naxanye xuruxi, ne a tonon sotoma nen boje xunbenla nun tinxinyani. 12 Nanara, e xa e xadan yiine yixodexo, e yi e xinbine senbe so ken! 13 E sigan ti kira tinxinxine nan xon, alogo naxanye godoma e sanna ma, ne sanna nama kala, fo e kendeya. 14 E yixodexo, lanna xa lu e nun muxune birin tagi, e mon yi sarjannan. Amasoto muxu yo mi Marigin toe sarjannan xanbi. 15 E a liga e yeren ma, muxu yo nama fula Alaa hinanna ra. E sese nama liga alo sansi salen xolen naxan solima, a yengene rakeli e tagi, a e wuyaxi dabari. 16 E a liga e yeren ma, muxu yo nama findi yanga suxun na hanma dina rabatutarena alo Esayu naxan a foriya tiden masara donseen na. 17 E a kolon fa fala donxen na, a wa nen keen duban xon a baba yii, koni a mi a soto. A yi feen birin liga, koni na mi feene maxete mume, hali a to wuga. 18 E mi luxi alo Isirayila kaan naxanye e maso geyaan na yiin dinje naxan na e nun teen nun dimin nun kunda yidimixin nun foyena. 19 E mi xota xuiin nun Ala fala xui magaxuxin mexi alo ne. E fala xuiin me waxatin naxan yi, e yi Musa mafan, a e nama fa fala gbete me sonon. 20 Amasoto e

yi gaxuxi Ala yamarin yee ra, naxan a fala, a naxa, "Naxan na a sanna ti geyaan ma, a xa magolon han a faxa hali subena." 21 Na feen yi magaxu ayi han Musa yi a fala, a naxa, "N bata gaxu han n xuruxurunma." 22 Koni e e masoxi Siyon geyaan nan na, habadan Alaa taana, Yerusalem ariyanna yi. A maleka wuli wuyaxi malanxi jaxanaxani. 23 E bata maso denkeleya yamaan na, Alaa dii singene, naxanye xili sebexi ariyanna yi. E bata maso Ala ra, muxune birin ma kitisana. E bata maso tinxin muxune ra naxanye niin sarjannan. 24 E bata maso Yesu ra naxan layiri neneni tonxi, a wunla yi mini, a fala ti kiin yi fisa Habila wunla gbeen xa. 25 E a liga e yeren ma naxan falan tima e xa, e nama tondi na xuiin name. Amasoto Ala to Isirayila kaane rakolon dunuja yi, e tondi nen, e yi jaxankata. Nba, en tan kisima nayi di, xa en tondi na falan me naxan fataxi ariyanna ra? 26 Na waxatini, a fala xuiin boxon naxuruxurun nen, koni iki a bata en tuli sa, a naxa, "N mon boxoni maxama nen sanja ma keden e nun kore xonna fan." 27 Fa fala, "sanja ma keden" na bunna neen, naxan yo yimaxama dunuja yi, a na bama nen alo dali seene. Naxanye mi mamaxe, ne yi lu. 28 Nanara, en to mangayaan sotoma naxan mi mamaxe, en barikan bira Ala xa, en na Ala batu a tinna kui binyen nun gaxuni. 29 Amasoto en ma Ala mon luxi nen alo halagi ti teena.

13 E lu ngaxakedenyaan xanuntenyani. 2 E nama jinan xaje yisuxun xon ma amasoto ndee malekane yisuxu na kii nin, hali e to mi yi a kolon. 3 E joxo lu kasorasane xon, a xa liga alo e birin nan kasoon na. E joxo lu muxu jaxankataxine xon, a xa liga alo e birin nan toroxi. 4 Muxun birin xa futun binya, yalunyaan nama a xosi. Ala yanga suxune nun yalundene kitima nen. 5 E dunuja yi gidin nama findi gbete xonxonna ra. Seen naxan e yii, na xa e wasa amasoto Ala bata a fala, a naxa, "N mi kele i dexon mume, n mi e rabepinje fefe ma." 6 Nayi, en xa xaxili ragidi fa fala, "Marigin nan n mali muxun na, n mi gaxun sese yee ra! Adamadiin noe nanfe lige n na?" 7 E xaxili lu e yecrati singene xon, naxanye Alaa falan ti e xa. E miri e dunuja rananna kiin ma, e yi e raliga e denkeleyani. 8 Yesu Alaa Muxu Sugandixin yi kii naxan yi xoro, a mon na kii nin to, a luma na kii nin habadan. (aiɔn g165) 9 E nama tin xaran xaje sifa yo ma naxan e ratantanma. Amasoto a lan en niin xa senben soto Alaa hinanni, koni don seene

yamarine fe mi a ra, naxanye tɔnɔ mi na. **10** Saraxa gandena nde en tan yii, Ala Batu Bubuna saraxaraline mi daxa e yi na saraxa seen don. **11** Amasɔtɔ saraxarali kuntigin suben naxan ba yulubi xafari saraxan na, a ne wunla xalima yire sarijanxi fisamantenna nin. Koni e gbindin tan ganma yamaan daaxaden fari ma nen. **12** Nanara, Yesu fan faxa taan xanbi ra, alogo a xa yamaan nasarijan a yeteen wunla xɔn. **13** Nayi, en siga a fɔxɔ ra yamaan dɔxɔden fari ma, en sa a yagin jɔxɔnna sɔtɔ. **14** Amasɔtɔ taa mi en yii dunɔɔnani ito yi naxan buye. Taan naxan fama, en na nan fenma. **15** Nayi, en ma tantunna xa findi saraxan na naxan nalima Ala ma waxatin birin, en yi lu en tiye a xinla ra. **16** E nama jinan e fe fajin naba, e yi e bode mali ngaxakedenyani, amasɔtɔ na saraxa sifan nan nafan Ala ma. **17** E e yeeratine fala xuiin suxu e xuru e sariyan bun. Amasɔtɔ e e niin nakantanma, bayo e fan e dentegema nen. Nayi, e liga e xa wanla ke sewani benun a xa e tɔrɔ, bayo na tɔnɔ mi e tan ma. **18** E lu Ala maxande nxu xa. Amasɔtɔ nxu laxi a ra a nxu bata xaxili sɔtɔ, e nun nxu waxi a xɔn ma nxu xa sigan ti fe fajin nin. **19** N na e mafanma e Ala maxandi alogo n xa xete e ma mafuren! **20** Bɔɲe xunbenla Ala, naxan en Marigi Yesu rakeli sayani habadan layirin xidi wunla barakani, Yesu naxan a jɔxɔ luma en xɔn alo xuruse rabana, (aiōnios g166) **21** na Ala xa fe fajin birin fi e ma, alogo e nɔ a sagoon lige, naxan a kenɛnɲe. Ala xa na liga Alaa Muxu Sugandixin Yesu xɔn, binyen fiin naxan ma habadan. Amina. (aiōn g165) **22** Ngaxakedenne, n na e mafanma, e tuli mati maxadi falani ito ra diɲani amasɔtɔ n kedin naxan sebexi e ma ito ra, a mi gbo. **23** E xa a kolon a en ngaxakedenne Timote bata mini kasoon na. Xa a fa sinma, nxu birin fe e fema. **24** Nxu xa e yeeratine nun e yama sarijanxin birin xɔntɔn. Itali kaane fan e xɔntɔn. **25** Ala xa hinan e birin na.

Yaki

1 N tan Yaki, Ala nun Marigi Yesu a Muxu Sugandixina walikɛna, n ni ito sebexi Isirayila bɔnsɔn fu nun firinne nan ma naxanye xuyaxi ayi siyane tagi. N bata ɛ xɔntɔn. **2** Ngaxakedenne, mantɔrɔn sifa wuyaxi na ɛ li, ɛ xa na yate sewan defexin na, **3** bayo ɛ a kolon, ɛ denkeleyaan na tɔrɔyane raxan, na a ligama nen ɛ tunnafanna sɔtɔ. **4** Koni fɔ tunnafanna xa wali kamalixin nan kɛ, alogo ɛ xa kamali ɛ yi defe. Sese nama dasa ɛ ma. **5** Xa fe kolonna dasaxi ɛ tan nde ma, a xa a maxɔdin Ala ma, naxan muxune birin kima a fonisireyani, a mɔn mi na kanna yalagima. A soma nen a yii. **6** Koni a xa a maxɔdin denkeleyaan nin, a nama sike. Bayo naxan na sike, na luxi nen alo fɔxɔ igen walanna, foyen naxan nasigama, a a raxetɛ. **7** Na muxu sifan nama a miri fa fala a seen sɔtɛ Marigin yii nen. **8** Amasɔtɔ xaxili firin kanna nan na ra, a mi raxaraxi a feene yi. **9** Denkeleya muxu yiigelitɔɔn xa sewa amasɔtɔ Ala bata a yite. **10** Nafulu kanna fan xa sewa amasɔtɔ Ala bata a ragodo, bayo nafulu kanna fe danguma nen alo sexɛ fuge fajina. **11** Sogen na xɔlɔ, a wuyenna yi sexen xara, a jingine yi lisi a ra, a fugene yi yolon, a tofanna yi dangu. Nafulu kanna fan ma binyen lɔma ayi na kii nin a nɛma a feene rawalima. **12** Sewan na kanna xa naxan a tunnafanma tɔrɔni, amasɔtɔ Ala na yelin a keɲaan fɛsefɛsɛ, a nii rakisin taxamaseri kɔmɔtin soma nen a xun na, Ala bata a xanu muxune tuli sa naxan na. **13** Naxan na bira tantan feni waxatin naxan yi, na kanna nama a fala, a naxa, “Ala nan n natantanma.” Amasɔtɔ Ala mi ratantanɲɛ fe ɲaxini, a fan mi muxɛ ratantanma. **14** Koni muxun birin tantanma a yetɛna kunfa feene nan xɔn ma naxanye a mabandunma, e yi a kenen. **15** Na xanbi ra, kunfa ɲaxin sa findima yulubin nan na. Yulubin na kɔxɔ waxatin naxan yi, a rapanma sayaan nan ma. **16** Ngaxakeden xanuntenne, ɛ nama ɛ yetɛ mayenden. **17** Kise fajin birin, fe mi naxan na, na fataxi kore xɔnna nan na, keli Fafe Ala yii naxan kore xɔnna yanban seene daxi. A mi maxɛtɛma alo nininna! **18** A bata a ragidi a en xa balo a ɲɔndi falan xɔn ma alogo en xa findi a dali fisamantenne ra. **19** Ngaxakeden xanuntenne, ɛ xa a kolon, fa fala muxun birin xa mafura falan name, koni ɛ nama mafura falan tiye. ɛ nama xɔlɔ sinma. **20** Amasɔtɔ muxu xɔlɔxin mi fe Ala tinxinyaan na. **21** Nayi, ɛ xa fe xɔsixinɛ birin yiba e nun fe ɲaxin naxanye waraxi ayi. ɛ yi na falan

suxu limaniyani, a naxan saxi ɛ bɔɲɛni, naxan nɔɛ ɛ niin nakisc. **22** ɛ nama ɛ tuli mati Alaa falan na tun, ɛ yi ɛ yetɛ mayenden, fɔ ɛ xa a liga nen. **23** Amasɔtɔ naxan a tuli matima Alaa falan na, a mi a liga, na luxi nen alo muxun naxan a yetɛ matoma kikenɛ, **24** a na yelin a yetɛ matɔɛ, a siga, a ɲinan a yetagin kiin xɔn sa! **25** Koni naxan na sariya kamalixin tilinna fɛsefɛsɛ, sariyan naxan muxun xɔrɔyama, a lu a fari, a mi a tuli mati a ra tun a yi ɲinan a xɔn, koni a yi a liga, na kanna sewan sɔtɔma nen a kewanla xɔn. **26** Xa muxuna nde a yetɛ yatɛxi dina muxun na, koni a mi a lenna mara, a bata a yetɛ mayenden, a dinan findima fe fuun nan na. **27** Dinan naxan sariɲan, fe mi naxan na Fafe Ala yɛɛ ra yi, na ni ito ra: ɛ ɲɔxɔ lu kiridine nun kaɲa gilene xɔn e tɔrɔne yi. ɛ yi ɛ yetɛ ratanga dunuɲa fe xɔsixinɛ ma.

2 Ngaxakedenne, ɛ tɔ denkeleyaxi en Marigin binyen kanna Yesu ma, Alaa Muxu Sugandixina, ɛ nama muxune rafisa e bode xa. **2** Xa muxuna nde so ɛ malanni xɛmaan yiisolirasoon soxi a yiin na, doma fajin nagodoxi a ma, na xanbi ra yiigelitɔɔn fan yi so, dunkobine ragodoxi a ma, **3** ɛ yi ɛ yengi dɔxɔ dugi fajin kanna xɔn, ɛ yi a fala a xa, ɛ naxa, “Fa i magodo gbɛdɛ fajini,” koni ɛ a fala yiigelitɔɔn ma fa fala “Ti mɛnni,” hanma “Dɔxɔ n sanna dɛxɔn ma bɔxɔni,” **4** xa ɛ na liga, ɛ mi muxune rafisaxi e bode xa ba? ɛ mi tagi rabaan xan tima ɛ miriya ɲaxine yi nayi ba? **5** Ngaxakeden xanuntenne, ɛ tuli mati. Ala mi yiigelitɔne xan sugandi dunuɲa yi, alogo e denkeleyaan xa findi e bannayaan na, e yi mangayaan sɔtɔ e kɛɛn na, Ala bata a xanu muxune tuli sa naxan na? **6** Koni ɛ tan yiigelitɔne rafeyama! Nafulu kanne xa mi ɛ rawalima ba, e yi ɛ xali kitisadeni? **7** Ne xa mi ɛ kanna xili fajin kalama ba? **8** Xa ɛ Manga Alaa sariyan nakamalima yati, naxan Kitabun kui, ɛ bata fe fajin liga nayi, a naxa, “I adamadi boden xanu alo i yetɛna.” **9** Koni xa ɛ muxune rafisa e bode xa, nayi ɛ bata yulubin liga. Na ma, sariyan fan ɛ sɔnna yitama ɛ ra nen bayo ɛ mi a suxi. **10** Bayo xa muxun sariyan birin suxu, a yi keden peen kala, a bata e birin kala na yi. **11** Bayo naxan a falaxi fa fala i nama yalunyaan liga, na nan mɔn a falaxi, a i nama faxan ti. Nayi, xa i mi yalunyaan liga koni i muxun faxa, i bata findi sariya kalan na na yi. **12** ɛ sigati kiin nun ɛ falati kiin xa lan na sariyan ma naxan xɔrɔyaan fima bayo ɛ makitima na nan xɔn. **13** Amasɔtɔ Ala kininkinintarene

makitima kininkinintareyaan nin. Anu, kininkininna nan kitin noma. **14** Ngaxakedenne, tōnōn mundun na ra xa muxuna nde a fala a denkeleyaxi, xa a kewanle mi a yitama? Na denkeleyana a rakise ba? **15** A luxi nen alo marabenna nema ngaxakedenna nde ma, xemena hanma paxanla, a balon mi a yii. **16** Awa, xa ε tan nde a fala na nde ma, ε naxa, “ε siga bōje xunbenli. ε sa ε maxara, ε yi lugo.” Xa ε mi e ki e fatin mako ma seene yi, na tōnōn nanse ra? **17** Denkeleyaan fan na kii nin, xa wali fajni mi denkeleyani a faxaxin na ra na yi. **18** Koni muxuna nde a falama nen, a naxa, “Denkeleyana i tan yi, koni kewanle nan n tan yi.” N na a yabima nen, n naxa, i ya denkeleyaan yitama n na di, ba i kewanle ra? N tan xa denkeleyaan yita i ra n kewanle xōn. **19** ε laxi a ra ba fa fala Ala keden peen na a ra? Na lanxi. Hali jinanne fan laxi na ra, e xuruxurun gaxuni. **20** I tan xaxilitarena, i mi a kolon ba, fa fala kewali fajni mi denkeleyaan naxan yi, na neen fuu? **21** En benba Iburahima mi yate tinxin muxun na Ala yee ra yi a kewanle xan xōn ba, a to a dii xemena Isiyaga ba saraxan na saraxa ganden fari? **22** I bata a to? A denkeleyaan nun a kewanle nan walixi e bode xōn ma. A kewanla nan a denkeleyaan nakamalixi. **23** Kitabuna falan nakamali na nin, a naxa, “Iburahima yi denkeleya Ala ma, Ala fan yi na yate tinxinna ra a xa.” Nanara, e yi a fala a ma fa fala “Ala xōyina.” **24** Awa, ε bata a to, fa fala muxun natinxinma Ala yee ra yi a kewanle nan fan xōn, a denkeleyaan gbansan mi a ra. **25** Na kiini, hali yalunde paxanla, Raxabi fan tinxin nen Ala yee ra yi a kewanle xōn ma, a to Yahudiyane xerane yisuxu ki fajni, a yi kira gbete yita e ra. **26** Fati benden nun niin na fata, fatin bata faxa na yi. Na kiini, denkeleyaan fan faxaxi na a ra xa kewanle mi a yi.

3 Ngaxakedenne, ε wuyaxi nama findi karamoxōne ra, amasoto ε a kolon fa fala nxu tan karamoxōne gbee kitin xodoxōma ayi nen bonne gbeen xa. **2** En birin tantanma kii wuyaxi. Muxun naxan mi tantanma fala tideni mume, muxu kamalixin nan na ra, a nōe a yete xure nen. **3** A luxi nen alo en na karafen bira soon deen ma, a a xa en sagoon liga. Nayi, a gbindin birin birama na nan fōxo ra. **4** Kunkin fan na kii nin. Hali a to gbo, foye gbeen mōn a rasigama, koni se xurudin nan a matinxinma kunki ragiin sagoon ma. **5** Lenna fan na kii nin, a xurun fatin yirene ye koni a kanba fala gbeene nan tima. Teedin fan nōe burun gbeen ganje nen. **6** Awa, lenna fan luxi nen alo teena.

En fati yirene ye, tinxintareyaan birin en lenna nin. A tan nan muxun gbindin birin birama xōsini, alo a yi teen nan soma a dunuja yi gidin mumeeen na! Na teen yeteen kelixi yahannama nin. (Geenna g1067)

7 Adamadiine nōe burunna suben sifane birin xure nen, xoline nun bubu seene nun yexene. **8** Koni muxu yo munma lenna xuru. Se paxin nan a ra naxan mi raxaraxi. A rafexi dabarin nan na, muxu faxa xinla ma. **9** En barikan birama en Marigin nun en Fafe Ala xa lenna nan na, en mōn muxune dangama a ra Ala naxanye daxi a maligan na. **10** Barika biran nun dangan minima de kedenna nin. Ngaxakedenne, na mi daxa mume! **11** Ige bexin nun fōxo igen nōe mine tigin mundun kedenna? **12** Ngaxakedenne, xode binla nōe oliwi bogin namine nen ba? Manpa bogi binla nōe xode bogin namine ba? Ige bexin mōn mi sōtōma fōxo igen de. **13** Xaxilimaan nun fekolonna nde ra ε ye? A xa na mayita fata a sigati ki fajin na, e nun a kewanla naxanye fataxi limaniyaan nun xaxilimayaan na. **14** Koni xa xoxolonna nun yete yigboon nan ε bōjeni, ε ba ε yete matōxe, ε nama wulen fala jōndin fari. **15** Na xaxili sifan mi kelixi ariyanna xan yi. Na fataxi dunuja nun fati benden nun Yinna Manga Setana nan na. **16** Amasoto xoxolonyaan nun yete yigboon denaxan yi, fe yibasanna nun fe paxin sifan birin nan menni. **17** Koni fe kolonna naxan sa kelixi ariyanna yi, a singen naxan na, a sarijan, a mōn bōje xunbenla fima, a dijaxi, a mafan mi raxolo, a lugoxi kininkininna nun kewali fajin nan na. A mi muxune rafisama e bode xa. A mi nafigiyaan ligama. **18** Fe yitōnna naxanye walima bōje xunbenli, ne tinxinna nan sōtōma.

4 Yengene nun matandin naxanye ε tagi, ne kelixi minen yi? Ne mi kelixi ε rafan fe paxine xan yi ba naxanye ε fati benden nakunfama? **2** Sena nde xōnla ε ma, koni ε mi a sōtōma. Nanara, ε faxan tima, ε mila, koni ε mi nōe a sote. ε yengene so, ε matandine ti. Se mi ε yii bayo ε mi Ala maxandima. **3** ε Na Ala xandi seen naxan yi, ε mi a sōtōma, bayo ε Ala maxandi xunna kobi, amasoto ε yete rafan feene nan tun fōxo ra. **4** ε tan tinxintarene! ε mi a kolon ba, fa fala a dunuja xanuntenyaan findixi Alaa fe xōnnantenyaan nan na? Muxun naxan na a yete findi dunuja xōyin na, na bata a yete findi Ala yaxun na. **5** ε laxi a ra ba, a Kitabun falan tixi nen tun? A naxa, “Ala bata Niin naxan sa en yi, na rafan a ma han!” **6** Koni Alaa

hinanna luma fari se nen en xa, amasoto a mon a falaxi, a naxa, “Ala wasodene yikalama e feene yi, koni a hinanma nen yete magodone ra.” 7 Nanara, e xuru Ala ma, e e kankan Yinna Manga Setana yee ra, a gima nen e bun. 8 E maso Ala ra, a masoma e ra nen. Yulubitone, e e yulubi yiine raxa. E tan nafigine, e bojene rasarijan! 9 E nimisa e hakene fe ra, e sunu, e wuga! E gelen xa maxete wugan na. E sewan yi findi nii yiforeen na. 10 E magodo Marigin xa, a e yitema nen. 11 Ngaxakedenne, e nama e bode mafala. Muxu yo a ngaxakedenna mafala hanma a yi a yalagi, na kanna bata Alaa sariyan mafala, a yi a yalagi. Xa i sariyan yalagi, sariya suxu mi fa i ra nayi sonon, i to a yalagima. 12 Sariyasa keden peen nun kitisa keden peen nan na, naxan noe marakisin nun halagin tiye. Koni i tan, nde i tan na, i to i adamadi boden yalagima? 13 E tuli mati, e tan naxanye a falama, e naxa, “To hanma tila nxu sigama taana nde yi, nxu sa jeeen nadangu na, nxu sa yulayaan naba na, nxu tonona nde soto.” 14 Anu, e mi a kolon naxan ligama e dunuja yi gidini tila! Amasoto e luxi nen alo kundaan naxan godoma, a waxatidi ti, na xanbi ra a tunun. 15 A lanma nen e xa ito nan fala, e naxa, “Xa Marigin tin, nxu luma nxu nii ra nen, nxu feni ito liga hanma na.” 16 Koni iki e wasoma, e yete matoxoma. Na yete matoxon sifan birin jaxu. 17 Nanara, xa muxun mi fe fajin liga, anu a kolon a lanma a xa naxan liga, na kanna bata yulubin soto.

5 E tan nafulu kanne, e tuli mati. E wuga, e gbelegbele toroyana fe ra naxan fama e lideni. 2 E nafunle bata kala. Xiine bata e dugine don. 3 Xorinxorinna bata e xemane nun gbeti gbananne suxu. Xorinxorinni ito findima nen sereyaan na e xili ma. A yi e fati benden don alo teena, bayo e nafunla malanxi waxati donxen nin. 4 Walikeen naxanye e xee ma seene xabaxi, e mi naxanye saranna fixi, e mi ne mawuga xuiin mema e xili ma ba? Naxanye e se xabaxine malanxi, ne wuga xuiin bata Marigin li, Senben Birin Kanna. 5 E bata lu dunuja yi jaxunna nun yete rafan feene yi. E bata e yete rajaxun alo xuruse faxa daxine. 6 E bata tinxin muxune yalagi, e yi e faxa, naxanye mi yi tixi e kanke. 7 Nanara, ngaxakedenne, e dija han Marigin yi fa. E miri xee biina dijan ma, a a xeen mamema waxatin naxan yi, a yi a tonone soto. A dijanma nen han tule singene nun a rajanne yi fa. 8 E fan xa dija na kiini, e yi e wekile amasoto Marigin fa waxatin

bata maso. 9 Ngaxakedenne, e nama e bode mafala, xanamu Ala e makitima nen. Kitisaan famatoon ni i ra. 10 Ngaxakedenne, nabiin naxanye falan ti Marigina fe yi, naxanye dija toroni, ne fe xa findi misaala ra e xa. 11 En na a falama ne ma nen a sewana e xa amasoto e e tunnafan nen. E bata Yuba a tunnafanna fe me, e mon bata a me Marigin naxan liga a xa a rajanni. Amasoto kininkininna nun fanna kanna nan Marigin na. 12 Ngaxakedenne, na birin yi, e nama e kolo ariyanna yi hanma dunuja boxo xonna hanma sese. Koni i ya “on” xa findi onna ra, i ya “en-en,” na yi findi enenna ra alogo i nama bira Alaa kitini. 13 Toro muxuna nde e ye ba? Na kanna xa Ala maxandi. Muxuna nde sewaxi e ye ba? Na kanna xa betin ba. 14 Furetona nde e ye ba? A xa denkeleya yamaan fonne xili, e yi Ala maxandi a xa, e a masusan turen na Marigin xinli. 15 Ala maxandina denkeleyani, na furetoni yalanma nen. Marigin furetoon nakelima nen. Xa a bata yulubin naxanye liga, Ala a mafeluma nen ne ra. 16 Nanara, e ti e yulubine ra e bode xa, e yi Ala maxandi e bode xa, alogo e xa yiyalan. Tinxin muxuna Ala maxandin senben gbo, a feene gasama. 17 Adamadiin nan yi Nabi Eli ra alo en tan. A yi Ala maxandi han, a tulen nama fa. Tulen mi fa yamanani han jee saxan e nun a tagi. 18 A mon yi Ala maxandi, tulen yi fa, bogi seene yi bogi. 19 Ngaxakedenne, xa muxuna nde a me jondin na e ye, muxu gbete yi a raxete jondin kiraan xon, 20 e xa a kolon a muxun naxan yulubi kanna bama a tantanna kiraan xon, na bata a niin nakisi faxan ma, a yulubi wuyaxi xafarin soto.

Piyeri Singena

1 N tan Piyeri, Yesu Alaa Muxu Sugandixina xerana, n tan nan ito sebema Alaa muxu sugandixine ma, naxanye xuyaxi ayi xəpeyani Pontu nun Galati nun Kapadose nun Asi nun Bitini yamanane yi. **2** E sugandixi nen alo Fafe Ala xaxinla yi a ma kii naxan yi nun. A bata e rasarijan a Nii Sarijanxin barakani alogo e xa xuru a Muxu Sugandixin Yesu ma, a wunla yi xuya e ma e rasarijandeni. Ala xa hinanna nun bəpe xunbenla fi e ma han! **3** En barikan bira Alaa Muxu Sugandixina en Marigi Yesu Fafe Ala xa. A bata a liga a kininkinin gbeeni, en yi xete, en yi bari a nenen na, en so nii rakisin yigini Yesu a Muxu Sugandixin nakenla xən sayani. **4** Keen naxan mi kalama, a mi xərxərxinma, a mi loma ayi, na nan namaraxi e xa ariyanna yi, **5** e tan naxanye kantanxi a senbeni denkeleyaan xən alogo e xa kisin sətə, naxan minima kenenni waxati rajanne yi. **6** Na ma, e sewa, hali e to tərəxi e bunba feen sifan birin yi waxatidini ito yi **7** alogo e denkeleyaan xa rasensen. Hali xəmaan naxan nəe kale, na raxulunma tēen nan na, a rasensen. Nayi, e denkeleyaan naxan tənən gbo xəmaan xa, na fan lan a rasensen bunbaan xən, e yi tantunna nun binyen nun xunna kenla sətə Yesu Alaa Muxu Sugandixin mini waxatini kenenni. **8** E munma Marigin to singen koni e a xanuxi. E mi a toma iki, koni e denkeleyaxi a ma, e lu sewa gbeeni naxan mi nəe yebe. **9** Amasətə e e denkeleyaan xunna sətəma nen, naxan findixi e niin kisi feen na. **10** Nabiin naxanye hinanna fe fala, naxan yi ragidixi e ma, naxan findixi kisi feen na, na findi nen ne fe ye fenna nun fe fəsefese xunna ra. **11** E yi katama waxatine nun taxamasenne kolon feen na Yesu a Nii Sarijanxin yi naxanye makenenma e xa, a to yi e yi, a yi Alaa Muxu Sugandixina tərən nun a binye famatəna fe fala benun a waxatin xa a li. **12** Ala a makenen nen nabine xa, a e mi yi walima e yete xa koni e tan, e to yi feene falama e naxanye fe mexi na muxune ra naxanye Yesu a fe Xibaru Fajin nali e ma Nii Sarijanxin barakani naxan kelixi ariyanna yi. Hali malekane fan kunfahi na feen fəsefese feni. **13** Nanara, e xaxinli tən wanla fe ra, e yete suxu, e yi e yigi sa na hinanni e naxan sətəma Yesu Alaa Muxu Sugandixin mini ləxəni kenenni. **14** E lu alo Alaa dii xuruxine, e nama tin luye e kunfa jaxine yi, e yi naxanye yi nun e to yi xaxilitareyani. **15** Koni Ala sarijanxi to e xilixi, e fan xa sarijan e kewanle birin yi alo a tan. **16** Amasətə

a sebexi, “E xa sarijan, amasətə n tan sarijan.” **17** E to e Fafe Ala maxandima, naxan muxune birin kewanle makitima kii kedenni, e lu alo xəpeye dunupani ito yi waxatidi, e gaxu Ala yee ra. **18** E a kolon a e mi xunbaxi e fafane namun fe fuune ma se kala daxine xan na alo gbetina hanma xəmana, **19** koni e xunbaxi Alaa Muxu Sugandixin wuli fisamantenna nan xən, naxan baxi saraxan na alo yexee diina, fe mi naxan na. **20** Ala bata yi na sugandi benun dunupa xa da, a yi a ramini kenenni e tan ma fe ra waxati dənxeeni itoe yi. **21** E denkeleyaxi Ala ma a tan nan baraka yi, Ala naxan a rakelixi sayani, a binyen fi na ma, alogo e denkeleyaan nun yigin xa lu Ala yi. **22** Bayo e bata e yete niin nasarijan jəndi suxun xən ma, e yi xanuntənya kenden sətə e ngaxakedenne xa, nayi, e bode xanu e senben birin na sarijanni. **23** Amasətə e bata xete, e mən yi bari a nenen na, naxan mi fata adamadiin na naxan faxama, koni fata Alaa falan na naxan niima, a luma habadan. (aiōn g165) **24** Bayo a sebexi Kitabuni, a naxa, “Adamadiine birin luxi nen alo sexena, e binyen birin yi lu alo se fugena. Sexene xarama nen, e fugene yi yolon. **25** Koni Marigina falan luma nen habadan.” Na falan findixi Yesu a fe Xibaru Fajin nan na naxan nalixi e ma. (aiōn g165)

2 Na ma, e ba fe jaxin sifan birin ma e nun yanfantənyaan nun nafiğiyaan nun milən nun fala jaxin birin. **2** Niin balo kenden xənla xa e suxu alo xipe xənla dii futen suxuma kii naxan yi, alogo e fan xa sabati e kisi feni a xən, **3** e to bata a mato, e yi a kolon a Marigin fan. **4** E maso a ra, naxan findixi siimaya gəmen na, adamadiine e mexi naxan na, koni Ala naxan sugandixi, a mən yi a xunna keli. **5** E tan fan bata findi Alaa banxin ti seene ra alo gəme niiramane, e yi findi saraxarali yama sarijanxin na, e yi siimaya saraxane ba Ala tinxi naxanye ra fata a Muxu Sugandixin Yesu ra. **6** Amasətə Kitabuni ito nan falaxi, a naxa, “N bata gəmena nde dəxə Siyon taani alo banxin tongon gəme fajı yəbaxina. Naxan na denkeleya a ma, yagin mi na kanna liye.” **7** Gəmeni ito xunna kenla e tan denkeleya muxune nan xa, koni Kitabun yireni ito nan lanxi denkeleyatərene tan ma, a naxa, “Banxi tiine e me gəmen naxan na, na bata findi banxi gəme fisamantenna ra.” **8** A mən sebexi Kitabun kui, a naxa, “Yamana e sanna radinma gəmen naxan na, a findi e rabira gəmen na.” E e dinma a ra nen amasətə e mi tinxi falan suxe, anu na nan yi

ragidixi e ma. **9** Koni e tan bata findi yama sugandixin na. Mangane nun saraxaraline nan e tan na, siya sarijanxina, Ala gbeen yamaan naxan na, alogo e xa a wali fajni gbeene fe rali, a tan naxan e xilixi, a yi e ba dimini, siga a kabanako kenenyani. **10** A foloni, Alaa yama mi yi e ra nun koni iki, e bata findi a yamaan na. E tan naxan mi yi Alaa kininkininna sotoxi, koni iki, e bata a kininkininna soto. **11** Nba, ngaxakedenne, e tan naxanye luxi alo xojene nun sigatine dunuja yi, n na e mafanma, e yete suxu fati benden kunfa feene ma naxanye e niin yengema. **12** E kewanle xa fanje ayi nen denkeleyatarene ye, alogo, e na e mafala fe jiaxi rabaan na, e xa e kewali fajine to, e yi Ala binya a fa loxoni. **13** E xuru adamadiyaan mangayane birin bun Marigina fe ra, a na findi manga gbeen na. **14** hanma yamana kanne, a naxanye rasigaxi wali kobine sarandeni fe jiaxi rabane ra, e yi fe fajni rabane tantun e wali fajine ra. **15** Amasoto Ala sagoon na a ra, a e fe fajni rabaan xa xaxilitarene radundun e xaxilitareyani. **16** E findi muxu xoroyaxine ra, koni e nama e xoroyaan findi fe jaxin luxun seen na, e findi Alaa konyi fajine ra. **17** E muxun birin binya, e yi e denkeleya muxun bonne xanu, e yi gaxu Ala yee ra, e yamana kannna binya. **18** Walikene, e xuru e kuntigine ma, e yi kuntigi jaxine binya feen birin yi alo a fajine nun a dipaxine. **19** Amasoto, na findixi fe fajin nan na, xa muxun limaniya jaxankatan bun ma Ala kolonna fe ra, a a li na jaxankatan mi lanxi a kewanle ma. **20** Koni na finde binyen na e xa di, xa e jaxankata e kala tixine fe ra, e yi limaniya? Anu, xa e toro e kewali fajine fe ra, e yi limaniya, fe fajin nan na ra Ala yee ra yi. **21** Ala e xilixi na nan ma, bayo Alaa Muxu Sugandixin yeteen toro nen e xa, a yi misaala lu e yii alogo e xa bira a foxo ra. **22** Kitabun naxa, "A mi yulubi yo liga, a mi yanfa fala yo ti." **23** E a konbi waxatin naxan yi, a tan mi konbi ti. A toro waxatin naxan yi, a mi xaje e ma koni a a yete lu kitisa tinxinxina Ala nan yii. **24** Yesu yeteen bata en yulubine goronna tongo a fati bendeni, a to gbangban wudin ma, alogo en xa lu alo faxa muxune yulubine mabinni, en yi lu en nii ra tinxinni. E kendeyaan sotoxi a maxolone nan xon. **25** E yi luxi nen alo yexeen naxanye loxi ayi, koni iki e mon bata xete xuruse rabaan fema naxan e niin kantanma.

3 E tan jaxanle, e xuru e xemene ma, alogo xa e tan ndee mi laxi Alaa falan na, e xa findi denkeleya muxune ra, fata e jaxanle sigati kiin na, hali ba falan

na, **2** e na fa e sigati kiin nakorosi waxatin naxan yi e sarijanna nun binyen naxan yi. **3** E marayabun nama fata e maxidi kii yo ra, alo e yi e xunna denbe, hanma e yi xemaan so hanma e yi dugi de xodexene so, **4** koni e boje yi feen xa fanje ayi naxan luxunxi, a mi forima, a xa findi nii limaniyaxin nun nii sabarixin nan na, Ala naxan yatema han! **5** Na nan yi findixi a folon jaxalan sarijanxine rayabu seen na, naxanye yi e yigi saxi Ala yi. E yi xuruxi e xemene ma **6** alo Ibrahimaax jaxanla Saran yi xuruxi a ma kii naxan yi, a yi a xilima nen, a naxa, "N kannna." Na dii temene nan e ra, xa e fe fajin liga, e mi gaxun sese yee ra. **7** E fan xemene na kii nin, e a liga xaxinla ra e nun e jaxanla nema e dunuja yi gidin ligama e bode xon ma, e yi e binya e fati benden senben to mi e gbeen lixi, bayo e nun ne birin nii rakisin hinanna sotoma e keen na nen. Na ma, sese mi e Ala maxandini kale. **8** Nba, e birin xa lu xaxili kedenni, e kininkinin, e yi e bode xanu ngaxakedenyani, e fan e bode ra, e yete magodo. **9** E nama fe jaxin joxo fe jaxin na, e yi konbin joxo konbin na, koni e xa duban ti, amasoto Ala e xilixi na nan ma alogo e xa barakan soto e keen na. **10** Bayo Kitabun naxa, "Siimayaan naxan naxan ma, naxan waxi siimaya fajin xon, na kannna xa a lenna suxu fala jaxine ma, a deen suxu wulen ma. **11** A yi a xun xanbi so fe jaxini, a fe fajin liga. A boje xunbenla fen, a bira a foxo ra. **12** Marigin yeen tinxin muxune ra, a tuli matixi e maxandi xuiin na. Koni Marigin xun xanbi soxi fe jiaxi rabane yi." **13** Xa fe fajin kunfana e yi, nde noe fe jaxin lige e ra? **14** Koni hali e toro e wali fajine fe ra, sewan nan na ra e xa. E gaxu naxan yee ra, e nama gaxu na yee ra, e nama kuisan. **15** Koni e Alaa Muxu Sugandixin binya e Marigin na e bojeni. E lu yitonxi e xun mafala feen na lan e yigin ma, e na e maxodin waxatin naxan yi. **16** Koni e a liga limaniyaan nun binyeni. E bojen xa sarijan waxatin birin alogo e nema wali fajine kema Alaa Muxu Sugandixina fe ra, muxun naxanye e mafalama, ne xa yagi e falane ra. **17** Amasoto xa Ala sagoon na a ra, a fisa muxun yi toro fe fajin nabadeni benun a xa toro a jaxin nabadeni. **18** Bayo Alaa Muxu Sugandixin faxa nen en yulubine fe ra sanja ma keden han habadan, a tan tinxin muxuna tinxintarene xa, alogo a xa fa e ra Ala ma. A faxa nen fati bendeni, koni Alaa Nii Sarijanxin yi a niin naxete a yi. **19** Na Nii Sarijanxin xon, a yi siga kawandi badeni niin kasorasane xa, **20** naxanye bata yi murute Ala ma a foloni, Ala yi Nuhan legedenma a dijani, a yi

kunkin nafalama waxatin naxan yi. Muxu dando nan tun kisi igen ma na kui, muxu solomasexe gbansan. **21** Na igen findixi marafuun misaala nan na igeni e tubi xinla ma naxan e fan nakisima iki. A mi findixi fati benden xosine ba seen xan na, koni de xui tongona Ala xa xaxili sarjannxini. Na marafuun nan e rakisima iki Yesu, Alaa Muxu Sugandixin nakenla xon sayani, **22** naxan sigaxi ariyanna yi, a dɔxo Ala yiifanna ma malekane nun noyane nun senbe kanne birin xun na.

4 Nanara, Alaa Muxu Sugandixin to tɔrɔxi a fati bendeni, e fan xa e yiton na xaxili kedenni, amasoto naxan bata tɔrɔ fati bendeni, na nun yulubin bata fata. **2** Na kanna mi fa a siimayaan ligama adamadiine kunfa feene xon fo Ala sagona. **3** Amasoto e bata yi bu denkeleyatarene rafan feene lige waxati danguxini, e yi e sobe so haramu feene nun kunfa jaxine nun dolo minna nun haramu sumunne nun dolo min sumunne nun suxure batu xosixin ma. **4** Na ma, a bata findi e raterena feen na e to mi fa e gima e fɔxo ra xaxilitare fe tilinxi wuyaxini itoe yi, e yi e rayelefu. **5** Koni e e dentege ma nen Ala xa na feen ma, naxan yitonxi faxa muxune nun niiramane makiti feen na. **6** Nanara, Alaa falan Xibaru Fajin nali nen hali faxa muxune ma, alogo hali e fati bendena feene to bata yelin makite alo adamadiine birin, e xa lu nii rakisini Ala xon ma a Nii Sarjannxin barakani. **7** Feene birin najanna bata maso. Nayi, e a liga xaxinla ra, e yi e yete suxu alogo e xa no Ala maxande. **8** Na birin yi, e sobe so xanuntenyaan ma e bode xa, amasoto xanuntenyaan nan yulubi wuyaxi janma. **9** E bode yigiya hali e mi e mawuga. **10** Ala kiseen naxan fixi e keden kedenna birin ma, e bode mali na ra. Nayi, e findima nen Alaa walike fajine ra naxanye a hinanna sifane birin nawalima. **11** Xa naxan falan tongo, na xa falan ti alo a Alaa falane nan yete tima. Xa muxuna nde walima bonne xa, a xa wali alo Ala a kixi senbeni kii naxan yi, alogo binyen xa fi Ala ma feen birin yi a Muxu Sugandixin Yesu barakani. Binyen nun senben xa fi a tan nan ma habadan han habadan. Amina. (aiɔn g165) **12** Ngaxakedenne, e tɔrɔ xɔdɔxen nama e raterena naxan e lima e mato feen na, alo fe daxatarena nde na e li. **13** Koni xa e nun Alaa Muxu Sugandixin tɔrɔ e bode xon, e xa sewa na ra han, alogo a binyen na mini kenenni e sewan xa gbo ayi. **14** Xa e e konbi Alaa Muxu Sugandixin xinla fe ra, sewana e xa nayi, amasoto Alaa Nii Sarjannxi binyaxina e yi. **15** Anu, e

tan nde yo nama tɔrɔ bayo e bata findi muxu faxan na hanma mujadana, hanma fe jaxi rabana, hanma nafigina. **16** Koni xa e tɔrɔ bayo Yesu mantonne nan e ra, yagi mi na ra, fo e Ala binya, bayo a xinla bata lu e xun ma. **17** Amasoto kiti sa waxatin bata a li, a foloma Alaa yamaan nan ma. Anu, xa a foloma en tan nan ma, naxanye tondima Alaa falan Xibaru Fajin suxe ne tan najanna di? **18** “Xa tinxin muxun kisi raxolo, Ala kolontarene nun yulubi kanne tan luma di?” **19** Nayi, naxanye tɔrɔma Ala sagoni, ne xa e yete lu e Dali Marigin yii naxan tinxin, e yi lu fe fajin lige.

5 N xa denkeleya yamaan fonne fan nalimaniya e ye amasoto n fan findixi yamaan fonna nde nan na alo e tan, e nun Alaa Muxu Sugandixina tɔrɔn serena nde. Binyen naxan fama minideni kenenni, n fan na nde sɔtɔma nen. **2** E yengi dɔxo Alaa xuruse kurun xon, a naxan taxuxi e ra. E karahanxin nama e xun mato a ra de, koni jɛnige fajini Ala sagoni. E nama a liga yagitareya feene tɔno sɔton ma koni fo e sobeni. **3** Naxanye taxuxi e ra, e nama noyaan liga ne xunna alo kuntigine, koni e findi misaala ra kurun xa. **4** Xuruse Raba Kuntigin na mini kenenni waxatin naxan yi, e mangayaan taxamasenna komotin sɔtɔma nen binyeni naxan mi kale mumɛ! **5** Banxulanne, e fan xa xuru fonne ma. E birin xa yete magodon lu e ma alo dugina e nema e bode xon ma. Amasoto Kitabun naxa, “Ala wasodene yikalama e feene yi, koni a hinanma nen yete magodone ra.” **6** E e magodo Ala senben bun, alogo a xa e yite a waxon waxatini. **7** E e xaminna feene birin lu a ma, amasoto a yengi e xon. **8** E yete suxu, e lu e yete ra yi, amasoto e yaxun Yinna Manga Setana sigan tima alo yatan naxan wurundunma. A muxune fenma a naxanye donma. **9** E kankan a yete ra denkeleyani ken! E xa a kolon a na tɔrɔ sifane e ngaxakedenne fan fari dunuja yiren birin yi. **10** E na tɔrɔ waxatina nde yi, Ala hinanna birin kanna naxan e xilixi a habadan binyeni a Muxu Sugandixini, na yetena e rakelima nen, a yi e senbe so, a e maxɔdɔxo, e mi mamaxe. (aiɔnios g166) **11** Senben xa lu a tan nan xa habadan! Amina. (aiɔn g165) **12** Silasi, n naxan yate ngaxakeden tɔgondiyaxin na, na nan n malixi n kedi dungini ito sebe e ma, alogo n xa e ralimaniya, n yi sereyaan ba e xa, a Alaa hinanna jɔndin nan ito ra, e naxan yi ken! **13** Denkeleya yamaan naxan Babilon taani, Ala naxanye sugandixi alo e tan, ne e xɔntɔnma. N ma dii xemem Maraka fan e xɔntɔnma. **14** E bode

xəntən ngaxakedenya sunbuni. Ala xa bəne xunbenla
fi ɛ birin ma ɛ tan naxanye a Muxu Sugandixini.

Piyeri Firindena

1 N tan Simōn Piyeri Yesu Alaa Muxu Sugandixina walikeen nun a xerana, n tan nan ito sebexi, siga e ma, e tan naxanye fan bata denkeleyaan soto naxan nun nxu gbee binyen lan e naxan soto nxo Ala nun nxu rakisimana tinxinyaan xon ma, Yesu Alaa Muxu Sugandixina. **2** Ala xa hinanna nun boɲe xunbenla fi e ma, a gbo ayi Ala kolonna nun en Marigi Yesu kolonna xon ma. **3** Ala senben naxan Yesu yi, na bata feren birin fi en ma alogo en xa en ma dunuja yi gidin naba Ala kolonni naxan en xilixi a binyen nun a fanni. **4** Na ma, a bata en tuli sa feene ra, naxanye xunnayerenna nun e gboyaan dangu a birin na, alogo e xa e yete soto xosi feene ra kunfan naxanye tima muxune ma dunujani ito yi, e fan yi Ala keɲaan soto. **5** Na ma, e kata e senben birin na, e son fajin sa e denkeleyaan fari, e kolonna sa son fajin fari. **6** E yete suxun sa e kolonna fari. E tunnafanna sa yete suxun fari. E Ala kolonna sa tunnafanna fari. **7** E ngaxakedenyaan marafanna sa Ala kolonna fari. E xanuntenyaan sa ngaxakedenyaan marafanna fari. **8** Xa keɲani itoe lu e yi, e yi sabati, e mi e luye tunnaɲolen nun walitareyani en Marigi Yesu kolonni mume, Alaa Muxu Sugandixina. **9** Koni xa ne mi muxun naxan yi, na kanna yeen mi feni gbema, a luma nen alo danxutona, a jinan fa fala a Ala bata a yulubi fonne xafari. **10** Nanara, ngaxakedenne, e mon xa e yixodoxo dangu iki ra Alaa xinla ratinden e nun a e sugandi naxan tixi, amasoto xa e na liga, e mi bir e mume! **11** Nayi, Yesu Alaa Muxu Sugandixin habadan mangayani so fere gbeen fima e ma nen en Marigin nun en nakisimana. (aiōnios g166) **12** Na nan a ligaxi, n feni itoe rabirama e ma waxatin birin, hali e to e kolon, e mon yi na jondi feen suxu ken e naxan sotoxi. **13** N ma miriyani, fanni n na n niini fati bendeni, n lan n na feene rabira e ma alogo e xa lu e yee ra yi. **14** Amasoto n na a kolon, n niin bamatoon ni i ra fati bendeni, alo en Marigina Alaa Muxu Sugandixin Yesu yetena n nakolon kii naxan yi. **15** Nayi, n katama nen feren birin na, alogo n na faxa, feni itoe xa no rabire e ma waxatin birin. **16** Nba, Marigi Yesu Alaa Muxu Sugandixin fa feen senbeni, nxu mi muxune tali yitonxine xan falaxi e xa lan na feene ma, bayo nxu tan yeteen nan a binyen toxi nxu yeene ra. **17** Amasoto a xunnayerenna nun binyen sotoxi nen Fafe Ala yii, a to na xuiin me fata binye gbee yiren na, a naxa, “N nafan Dii Xemeni ito ra, a bata n kenen ki

fajil!” **18** Nxu yeteen yi na fala xuiin me, sa keli kore, nxu yi a fema geya sarijanxin fari waxatin naxan yi. **19** Nxu laxi nabine fala tixine ra iki dangu waxati danguxine ra. E lan e xa e xaxili ti ne ra alo lenpun naxan degema dimini han kuye yi yiba, tagalan saren fan yi dege folo e boɲeni. **20** Naxan dangu a birin na, e na kolon, a Kitabun nabiya fala yo mi fataxi nabina fe yebe kiin na. **21** Amasoto nabiya fala yo mi yi kelima adamadiine sagoon ma, koni Alaa Nii Sarijanxin nan yi adamadiine malima, e yi falan ti fata Ala ra.

2 Koni wule nabine yi yamaan ye a foloni. A mon na kii nin to, wule karamoxone fan e ye iki. E wule xaranne rasoma e tagi naxanye muxune halagima han e yi e me e kanna ra naxan e xunbaxi. Ne halagin nan xilima e yete ma xulen! **2** Muxu wuyaxi birama nen e haramu feene foxo ra, na muxune yi a liga jondi dinan kiraan yi rayelefu. **3** Karamoxoni itoe e rawalima nen mayendenni e fala yitonxine xon e milani. Koni e makiti feen bata folo to mi na ra, e halagi feen mi fa buma. **4** Malekan naxanye yulubin liga a foloni, Ala mi ne ratanga, koni a e rawoli ayi nen yahannama yi. E maraxi yolonxonna ra dimini e kiti sa loxon yee ra. (Tartaro g5020) **5** Muxu singene dunuja yi, a mi ne fan natanga, a yi fufa gbeen nafa Ala kolontarene ma, koni a muxu solofere nan tun nakisi e nun Nuhan naxan yi tinxinyana fe kawandin bama. **6** Ala mon Sodoma nun Gomora taane fan halagi nen teen na, e findi xuben na. A yi e findi misaala ra Ala kolontarene xa, feen naxan fama ligadeni e ra. **7** Ala mon Loti tinxin muxun xunba nen, naxan boɲe toxo na sariyatar kanne haramu feene fe ra. **8** Bayo na tinxin muxun to yi doxi e tagi, a niin yi lu toxe loxo yo loxo e fe jaxine fe ra, a yi naxanye toma, a e me. **9** Na feene birin nan a yitama fa fala Marigin noe dina muxune xunbe nen maratantan feene yi, a yi tinxintarene mara jaxankatan yee ra kiti sa loxoni, **10** katarabi na muxune ma, naxanye biraxi fe xosixine foxo ra, e fati benden nafan feene, e yi murute Marigina noon bun. Wule karamoxoni itoe wekilexi, e wasoxi. E mi gaxuma binye kanne rayelefu. **11** Hali malekan naxanye senben nun fangan gbo wule karamoxoni itoe xa, ne mi na sifane rayelefuma kitini Marigin yetagi. **12** Koni muxuni itoe feene rayelefuma e mi naxanye kolon, e lu alo sube xaxilitare suxu daxin naxanye halagima. Na muxune halagima nen alo subene, **13** e tinxintareyaan birin yi saran e ra. A rafan e ma,

e yi wasa e waxɔn fe kobine birin na yanyin na. E nɛma e dɛge ɛ fɛma, yagin nun xunnagodon nan a ra, e sɛwa e to ɛ yanfama. **14** E yalunyaan fɛnma e yɛɛn na. E mi wasan yulubin na mumɛ! E fangatarene mabandunma. E darixi milɛ feene nan na. Dangatɔnɛ nan e ra. **15** E bata kira tinxinxin yiba, e yi bira Beyori a dii xɛmɛ Balami a kiraan fɔxɔ ra tantanni naxan ma tinxintareyaan saranna yi rafan a ma. **16** Koni a sofanla naxan mi nɔɛ falan tiyɛ, na a muxu xuiin namini nɛn, a yi nabiin danna sa a xaxilitareya wanli. **17** Wule karamɔxɔni itoe luxi nɛn alo tigi yili raxarena, alo foyen kundaan naxan tuntunma kore, dimi tilinxi gbeen nan namaraxi e yɛɛ ra. **18** E waso fala fuune tima, e yi muxune rakunfa fati bendɛn nafan haramu feene xɔn, naxanye baxi e sɔtɔdeni muxu tantanxine ra. **19** E muxune tuli sama xɔrɔyaan na, anu, e tan yetɛɛn xɔsi feene konyiyani. Amasɔtɔ sese muxun nɔ, a bata findi na konyin na. **20** Xa e bata futuxulu dunuɲa xɔsi feene ma en Marigin nun en nakisimaan Yesu Alaa Muxu Sugandixin kolon feen xɔn, e mɔn yi tin na feene yi e nɔ, e rapanna ɲaxuma ayi nɛn dangu e fɔlɔn na. **21** Bayo a yi fisa nun na kanne nama tinxinyaan kiraan kolon, benun e xa a kolon e mɔn yi e xun xanbi so yamari sariɲanxini e naxan sɔtɔxi. **22** Naxan ligaxi e ra, na bata sandani itoe ɲɔndin yita fa fala, “Baren xɛtɛma a baxunna ma.” E nun “I nɛɛn fa xɔsɛn maxa tun, a mɔn bata sa a makutukutu boroni.”

3 Ngaxakedenne, n ma kedin firinden ni ito ra, n bata naxan sɛbɛ ɛ ma. N na e firinna sɛbɛxi ɛ ma nɛn alogo n xa feene rabira ɛ ma, ɛ yi xaxili sariɲanxin sɔtɔ, **2** alogo, nabi sariɲanxine bata yi falan naxanye ti, ne xa rabira ɛ ma e nun en Marigin nun en nakisimana yamarine, xɛrane naxanye rali ɛ ma. **3** ɛ xa a kolon singen fa fala waxati rapanne yi, magele tiine fama nɛn ɛ mageledeni naxanye birama e kunfa fe ɲaxine fɔxɔ ra. **4** E a falama nɛn, e naxa, “Yesu ɛ tuli sa a fa feen naxan na, na minen? Xabu en benbane faxa waxatin naxan yi feene birin mɔn kii kedenni keli dunuɲa da waxatin ma han to.” **5** Amasɔtɔ, e a rakelima a ma nɛn e ɲinan ito ra fa fala, to mi na ra Ala yi kore xɔnna da a fala xuiin na, a bɔxɔn ba igen na a lu igen tagi. **6** Na igen nan na waxatin dunuɲa birin halagi fufaan na. **7** Koni to kore xɔnna nun bɔxɔ xɔnna ramaraxi tɛɛn nan xili yi na fala kedenna xɔn, kiti sa lɔxɔn nun Ala kolontarene halagin yɛɛ ra. **8** Koni, ngaxakedenne, ɛ

nama ɲinan fe kedenni ito xɔn ma, soɛ kedenna luxi nɛn Marigin yɛɛ ra yi alo ɲɛɛ wuli kedenna, ɲɛɛ wuli kedenna fan alo soɛ kedenna. **9** Marigin mi buma a tuli saan nakamalideni, alo muxuna ndee a mirima kii naxan yi. Koni a diɲaxi ɛ xa nɛn amasɔtɔ a mi waxi muxɛ xa halagi, koni fɔ muxune birin xa e xun xanbi so nɛn e hakene yi. **10** Anu, Marigin fa lɔxɔna a lima nɛn, a muxune ratereɛna alo muɲadɛna. Na lɔxɔni, kore xɔnna danguma nɛn halagi xui gbeen, a yi seene fan yi gan. Bɔxɔn nun a feene birin yi makenɛn kitin xili yi. **11** Ne birin to halagima na kii nin, ɛ lan ɛ xa findi muxun sifan mundunye ra? ɛ dunuɲa yi gidin xa sariɲan Ala kolonni, **12** ɛ yi gbɛtɛn Ala fa lɔxɔn na, ɛ kɛwanle yi a faani fura, dunuɲa nun a yi seene halagima tɛɛn na lɔxɔn naxan yi. **13** Anu, Ala bata en tuli sa kore xɔri nɛnɛn nun bɔxɔ xɔri nɛnɛn na, tinxinyaan luma dɛnaxan yi. En na nan mamɛma. **14** Nanara, ngaxakedenne, ɛ to na feen mamɛma, ɛ fɛrɛn birin naba alogo a xa ɛ li fetareyaan nun sɔntareyani, bɔɲɛ xunbenla yi lu ɛ nun Ala tagi. **15** ɛ xa a kolon a en Marigina diɲan nan muxune rakisima alo en nafan ngaxakedenna Pɔli a sɛbɛxi ɛ ma kii naxan yi fe kolonna xɔn Ala naxan fixi a ma. **16** A na nan sɛbɛxi a kɛdine birin kui lan feni itoe ma. A kɛdine yirena ndee famu raxɔlɔ, xaxilitarene nun xarantarene yi ne bunne yifu, alo e Kitabun yire gbɛtɛne fan ligama kii naxan yi, e yi e yɛtɛ rahalagi. **17** Nanara, ngaxakedenne, ɛ tan to rakolonxi, ɛ a liga ɛ yeren ma, alogo sariyatara kanne tantanna nama ɛ li, ɛ yi bɔnɔ ɛ tide barakaxini. **18** Koni ɛ lu sigɛ yɛɛn na en Marigin nun en nakisimaan Yesu Alaa Muxu Sugandixina hinanna nun a kolonni. Binyen xa fi a tan nan ma iki han habadan. Amina. (aïon g165)

Yoni Singena

1 Siimaya falan naxan yi na nun xabu dunuja fɔlɔni, nxu bata na mɛ, nxu yi a to, nxu yi a yigbe, nxu bata nxu yiin din a ra, nxu na nan ma fe ralima ε ma. **2** Na siimayaan bata mini kenenni, nxu yi a to. Nxu na nan ma fe sere bama. Nxu yi habadan nii rakisina fe rali ε ma naxan yi Fafe Ala fema, naxan minixi kenenni nxu xa. (aiōnios g166) **3** Nxu naxan mexi, nxu yi a to, nxu na nan ma fe falama ε fan xa, alogo ε xa sa nxu fari ngaxakedenyani, naxan Fafe Ala nun a Dii Xɛmena Yesu Alaa Muxu Sugandixini. **4** Nxu ito sebexi ε ma nen alogo en ma sewan xa defe. **5** Nxu falan naxan mexi Yesu ra, nxu na nan nalima ε ma fa fala kenenna nan Ala ra, dimi yo mi a yi! **6** Xa en na a fala a en ngaxakedenyaan ligama a tan xɔn ma, koni en sigan tima dimin, en bata wulen fala na yi. Nɔndin mi en kewanle yi. **7** Xa en sigan ti kenenni alo a tan yetɛen kenenni kii naxan yi, en bata lu en bode xɔn ngaxakedenyani nayi, Alaa diin Yesu wunla yi en sarijan en yulubine birin ma. **8** Xa en na a fala fa fala yulubi mi en ma, en bata en yetɛ mayenden nayi, nɔndi mi en xa nayi! **9** Koni xa en na en ti en yulubin na, a tan lannayaan nabama nen, a tinxin, a en mafeluma nen en yulubine birin na, a yi en sarijan tinxintareyaan birin ma. **10** Xa en na a fala fa fala en mi yulubi ligaxi, en bata Ala findi wule falan na nayi. Nayi, a falan mi en yi mume!

2 N ma diine, n ni ito sebema ε ma nen alogo ε nama yulubin liga. Koni xa muxuna nde yulubin liga, Fafe Ala solona tiina en yii naxan findixi Alaa Muxu Sugandixin Yesu ra, Tinxindena. **2** Amasɔtɔ Yesu bata findi en yulubine xafari saraxan na. En tan gbansanna mi a ra, koni en nun dunuja muxune birin. **3** En na a kolonma ito nan xɔn a en bata Ala kolon, xa en bata a yamarine suxu. **4** Naxan na a fala, a naxa, “N bata Ala kolon” koni a mi a yamarine suxi, wule falan nan na kanna ra, nɔndi mi a tan yi. **5** Koni naxan Alaa falan suxuma, Alaa xanuntenyaan kamalixi na kanni. En na a kolonma na kii nin fa fala en na Ala yi: **6** Naxan na a fala a a tan Ala nin, fɔ na kanna xa sigan ti nen alo Yesu. **7** N xanuntenne, n mi yamari nenen xan sebema ε ma fɔ a fonna naxan yi ε yii xabu a fɔlɔni. Yamari fonni ito, falan na a ra, ε bata yi naxan mɛ. **8** Anu, n yamari nenen sebema ε ma, naxan nɔndin makenenxi fata Yesu ra e nun ε tan.

Amasɔtɔ dimin danguma. Nɔndin kenenna nan bata dege fɔlɔ. **9** Muxun naxan a falama a a tan kenenna nin, koni a a ngaxakedenna rajaxuxi, na kanna mɔn dimin singen. **10** Naxan a ngaxakedenna xanuma, na kanna kenenna nin. Muxu ratantan fere yo mi na kanni. **11** Koni naxan a ngaxakedenna rajaxuma, na kanna dimin nin, a sigan tima dimin nin. A mi a sigaden kolon amasɔtɔ dimin bata a yɛen danxu. **12** N ma diine, n na a sebema ε ma fa fala ε bata mafelu ε yulubine ra Yesu xinla fe ra. **13** Fafane, n na a sebema ε ma fa fala naxan yi na xabu a fɔlɔni, ε bata na kolon. Banxulanne, n na a sebema ε ma fa fala ε bata Fe Naxin Kanna nɔ. **14** N ma diine, n na a sebema ε ma fa fala ε bata Fafe Ala kolon. Fafane, n na a sebema ε ma fa fala naxan yi na nun xabu a fɔlɔni, ε na kolon. Banxulanne, n na a sebema ε ma fa fala, ε senben gbo. Alaa falana ε yi, ε mɔn bata Fe Naxin Kanna nɔ. **15** E nama dunuja nun a yi seene xanu. Naxan na dunuja xanu, Fafe Alaa xanuntenyaan mi na kanni. **16** Amasɔtɔ feen naxan birin dunuja yi, alo fati bendena kunfa njaxine e nun yɛen kunfama seen naxanye xɔn e nun nafunla naxan muxun wasoma ayi, ne mi fataxi Ala xan na, fɔ dunuja. **17** Dunuja nun a kunfane birin danguma nen. Koni naxan Ala sagoon ligama, na kanna luma nen han habadan. (aiōn g165) **18** N ma diine, waxati rajanna bata a li. E bata yi a mɛ nun fa fala Alaa Muxu Sugandixin yaxun fama. Nba, iki Alaa Muxu Sugandixin yaxu wuyaxi bata mini kenenni. Nanara, en na a kolonxi fa fala a waxati rajanna bata a li. **19** Na muxune minixi en tan nan yɛ, koni en gbee mi yi e ra, bayo xa en gbeen nan yi e ra nun e yi luma nen en yɛ. Koni e bata keli en yɛ. Na nan a yitaxi fa fala en gbee mi yi ne sese ra nun. **20** Koni Sarijantɔɔn bata a Niin nagodo ε xun ma, ε birin a fe kolon. **21** N mi ito sebexi ε ma nayi fa fala a ε mi nɔndin kolon, koni bayo ε a kolon, e nun wule yo mi kelixi nɔndini. **22** Wule falana nde ra? Naxan a falama, a naxa, Alaa Muxu Sugandixin mi Yesu ra. Alaa Muxu Sugandixin yaxun nan na ra. Na kanna bata a mɛ Alaa Diin nun Fafe Ala ra sanja ma kedenni. **23** Bayo naxan yo na a mɛ Alaa Diin na, Fafe Ala fan mi na kanni. Naxan na a ti Alaa Diina fe ra, Fafe Ala fan na kanni. **24** E a liga ε yeren ma ε falan naxan mɛ a singeni, na xa lu ε yi ken! Xa na liga, ε fan luma nen Dii Xɛmen nun Fafe Ala yi. **25** Yesu yetɛen bata en tuli sa naxan na, habadan nii rakisina nan na ra. (aiōnios g166) **26** N feni itoe sebexi ε ma muxune nan ma fe ra naxanye kataxi

ε mayenden feen na. 27 Ε tan fan, ε Nii Sarijanxin naxan sɔtɔxi a ra, fanni na ε yi ε mako mi fa xaranna ma sɔnɔn. A Nii Sarijanxina ε xaranma nen feen birin ma. Na to findixi jɔndin nan na wule mi naxan yi, nayi ε lu a tan nin alo a ε xaranxi kii naxan yi. 28 N ma diine, iki, ε xa lu a tan yi, alogo a na mini kenenni waxatin naxan yi, en yi lu xaxili ragidini, alogo en nama yagi a yee ra a fa lɔxɔni. 29 Xa ε a kolon fa fala Yesu tinxin, ε mɔn xa a kolon fa fala muxun naxan tinxinyaan ligama, na bata bari Ala yi.

3 A mato Fafe Ala xanuntenya sifa gbeen naxan fixi en ma a yi a fala en ma a a diine. Na nan en na yati! Na nan a ligaxi dunuɲa mi en kolon amasɔtɔ e mi Ala kolon. 2 N xanuntenne, Alaa diine nan en na iki, koni en sa findima naxan na, na munma mini kenenni singen, koni en na a kolon fa fala a Yesu na mini kenenni waxatin naxan yi, en ligama nen alo a tan amasɔtɔ en na a toma nen alo a kii naxan yi. 3 Muxu yo a yigin saxi Yesu yi, na a yete rasarijanma nen alo Yesu sarijan kii naxan yi. 4 Naxan yo yulubin ligama, na bata sariyan kala. Yulubin nan sariya kalan na. 5 Anu, ε a kolon fa fala a Yesu bata mini kenenni alogo a xa en ma yulubine xafari. Yulubi yo mi a tan yi. 6 Muxu yo luma Yesu yi, na kanna mi luye yulubin lige. Naxan luma yulubin lige, na mi Yesu toxi singen, a mɔn munma a kolon. 7 N ma diine, muxu yo nama ε mayenden. Naxan fe tinxinxin ligama, tinxin muxun nan na ra alo Yesu tinxinxi kii naxan yi. 8 Naxan luma yulubin lige, na fataxi Yinna Manga Setana nan na amasɔtɔ Yinna Manga Setana bata yulubin liga xabu a fɔloni. Alaa Dii Xemen minixi kenenni ito nan ma fe ra yati, a Yinna Manga Setana wanle kala. 9 Naxan barixi Ala yi, na mi luye yulubin lige amasɔtɔ Ala senben bata lu a tan yi, a mi nɔε luye yulubin lige, bayo a barixi Ala nin. 10 Alaa Diine nun Yinna Manga Setana a diine tagi rabaan na kii nin. Naxan mi fe tinxinxin ligama na mi fataxi Ala ra hanma naxan mi a ngaxakedenna xanuxi. 11 Ε falani ito nan mexi xabu a fɔloni, a en xa en bode xanu. 12 En nama liga alo Kayini naxan yi fataxi Fe Naxin Kanna ra, a a xunyen faxesa. Kayini a xunyen faxesa nanfera? Amasɔtɔ a tan kewanle yi jaxu, koni a xunyen yi tinxin. 13 Ngaxakedenne, na nama findi ε terena feen na, xa dunuɲa muxune ε rapaxu. 14 En tan a kolon, a en bata keli sayani, en so nii rakisini bayo en bata en ngaxakedenne xanu. Xanuntenyaan mi muxun

naxan yi, na mɔn sayani singen. 15 Muxun naxan a ngaxakedenna rapaxuma, faxesa tiin nan na kanna ra. Ε a kolon fa fala habadan nii rakisin mi luxi faxesa ti yo yi! (aiɔnios g166) 16 En xanuntenyaan kolonma ito nan xɔn ma fa fala Yesu bata a niin fi en ma fe ra. En fan daxe en yi en niin fi en ngaxakedenne fe ra. 17 Xa dunuɲa nafunla muxuna nde yii, a yi a ngaxakedenna to, a makoon sena nde ma, koni a mi kininkinin na kanna ma, Alaa xanuntenyaan luxi a yi di nayi? 18 N ma diine, en ma xanuntenyaan nama findi de yi falan na tun, fɔ en kewanle xa a yita jɔndini. 19 En na a kolonma na nan ma, fa fala en jɔndini, en bɔɲen yi sa Ala yetagi. 20 Amasɔtɔ xa en bɔɲena en yalagi, en na a kolon fa fala Ala gbo en bɔɲen xa, a feen birin kolon. 21 Nanara, n xanuntenne, xa en bɔɲen mi en yalagi, en xaxili ragidini Ala yetagi. 22 En na sese maxɔdin a ra, en na sɔtɔma nen bayo en na a yamarine suxuma, en yi a keney feene liga. 23 A yamarin nan ito ra, a en xa denkeleya a Dii Xemen xinla ma, Yesu Alaa Muxu Sugandixina, en yi en bode xanu alo a en yamarixi kii naxan yi. 24 Muxu yo a yamarine suxu, na kanna Ala yi, Ala fan na kanni. En na a kolon fa fala Ala en yi, a to bata a Nii Sarijanxin fi en ma.

4 N xanuntenne, ε nama la muxune birin na a Alaa Nii Sarijanxina e yi, koni ε e keɲaan feseɲese singen, ε yi a kolon, niin naxan e tan yi, xa na kelixi Ala nan ma. Amasɔtɔ wule nabi wuyaxi bata mini dunuɲa xun xɔn. 2 Ε Alaa Niin kolonma ikii nin: Nii yo a ti a ra fa fala Yesu Alaa Muxu Sugandixin bata fa fati bendeni, ne kelixi Ala nan ma. 3 Koni nii yo mi a ti Yesu a fe ra, na mi kelixi Ala ma. Alaa Muxu Sugandixin yaxun niin nan na ra, ε naxan fa fe mexi, anu, a dunuɲa yi iki. 4 Ε tan, n ma diine, ε fataxi Ala nan na, ε bata ne nɔ. Amasɔtɔ senben naxan ε tan yi, na gbo dunuɲa gbeen xa. 5 Dunuɲa muxune nan e tan na. Nanara, e dunuɲa feene falama, dunuɲa muxune yi e tuli mati e ra. 6 Koni en fataxi Ala nan na. Naxan Ala kolon, na a tuli matima en xuiin na nen. Koni naxan mi fataxi Ala ra, na mi a tuli matima en xuiin na. En na a kolonma na kii nin, niin naxan findixi jɔndin kanna ra e nun tantanna niina. 7 N xanuntenne, en na en bode xanu, amasɔtɔ xanuntenyaan kelixi Ala nan ma, anu naxan yo muxun xanu, na barixi Ala nin, na kanna mɔn Ala kolon. 8 Naxan mi a boden xanuma, na mi Ala kolon, amasɔtɔ Ala nan xanuntenyaan na. 9 Ala a xanuntenyaan yitaxi en na ikii nin: Ala bata a

Dii Xeme keden peen nafa dunuja yi, alogo en xa nii rakisin soto a xon ma. **10** Xanuntenyani ito, fa fala en bata Ala xanu, na xa mi a ra, koni a tan bata en xanu, a yi a Dii Xemen nafa en yulubi xafari saraxan na. **11** N xanuntenne, xa Ala bata en xanu na kiini, a lan nen en fan xa en bode xanu. **12** Muxu yo munma Ala to singen. Koni, xa en na en bode xanu, nayi Ala bata lu en yi, a xanuntenyaan fan bata kamali en yi nayi. **13** En na a kolonma ito nan xon ma fa fala en Ala yi, a fan en yi: a to bata a Nii Sarijanxin fi en ma. **14** Nxu bata a to, nxu yi a seren ba bonne xa, nxu naxa, “Fafe Ala bata a Dii Xemen nafa, a findi dunuja rakisimaan na.” **15** Naxan na a tiye a ra fa fala Yesu Alaa Dii Xemen nan a ra, na kanna bata lu Ala yi, Ala fan na kanni. **16** Alaa xanuntenyana en xa, en bata na kolon, en mon bata denkeleya a ma. Ala nan xanuntenyaan na. Muxu yo lu xanuntenyani, na kanna bata lu Ala yi, Ala fan na kanni. **17** Xanuntenyaan kamalixi en tan yi na nan ma, alogo en xa xaxili ragidin soto lan Kiti Sa Loxona fe ma. Amasoto en fan luxi nen alo a tan dunujani ito yi. **18** Gaxu mi xanuntenyani. Xanuntenya defexin gaxun kedima nen, bayo muxun gaxuma a fe jaxin saranna nan yee ra. Nayi, naxan gaxuma, na mi kamalixi xanuntenyani. **19** En bata Ala xanu bayo a singe en xanuxi. **20** Xa muxuna a fala, a naxa, “N bata Ala xanu,” koni a ngaxakedenna rajaxu a ma, wule falan nan na kanna ra. Amasoto a a ngaxakedenna naxan toma, xa a mi na xanu, a mi noe Ala xanue nayi a mi naxan toma. **21** Anu, a bata yamarini ito so en yii, a naxa, “Naxan Ala xanuxi, a lan nen na kanna xa a ngaxakedenna fan xanu.”

5 Naxan yo denkeleyaxi a ma, a Alaa Muxu Sugandixin nan Yesu ra, a Alaa Diin nan a ra, na barixi Ala nin. Naxan na Fafe Ala xanu, na bata a Diin fan xanu. **2** En na a kolonma ikii nin a en bata Alaa diine xanu: en na Ala xanu, en yi a yamarine suxu. **3** Amasoto Ala xanu feen findixi a yamarine suxu feen nan na. Anu, a yamarine mi goron xan na en tan xa, **4** amasoto naxanye birin barixi Ala yi, ne bata dunuja feene no, anu dunuja feene no feren findixi en ma denkeleyaan nan na. **5** Nde dunuja feene noe? Fo naxan na denkeleya Yesu ma fa fala a Alaa Dii Xemen nan a ra. **6** Yesu Alaa Muxu Sugandixin nan faxi igen nun wunla ra. A mi faxi igen xan gbansan na, koni e nun a wunla. Alaa Nii Sarijanxin nan na sereyaan bama bayo Nii Sarijanxin nan jondin na. **7** Amasoto

sere saxon na Yesu a fe yi: **8** Alaa Nii Sarijanxina, igena, e nun wunla, ne birin sereya kedenna nan bama. **9** Xa en muxune sereyaan name, Ala sereyaan gbo na xa, amasoto Ala sereyaan bama a Dii Xemen nan ma fe yi. **10** Naxan na denkeleya Alaa Dii Xemen ma, sereyani ito nan na kanna boneni. Koni xa naxan mi denkeleya Ala ma, na bata Ala yate wule falan na amasoto a mi denkeleyaxi Alaa sereya baxin ma a Dii Xemena fe yi. **11** Awa, na sereyaan ni ito ra fa fala Ala bata habadan nii rakisin fi en ma. Habadan nii rakisini ito a Dii Xemen nin. (aiōnios g166) **12** Dii Xemeni ito nema muxu yo yi, nii rakisin fan na kanni. Alaa Dii Xemen mi muxun naxan yi, nii rakisin mi na kanna fan yi. **13** E tan naxanye bata denkeleya Alaa Dii Xemen xinla ma, n feni itoe sebexi e ma nen alogo e xa a kolon fa fala habadan nii rakisina e xa. (aiōnios g166) **14** Xaxili ragidini ito en yi Ala yetagi fa fala xa en na a maxodin fefe ra lan a sagoon ma, a en xuiin namema nen. **15** Xa en na a kolon a a en xuiin namema nen, nayi en mon a kolon a en na a maxodin fefe ra, en bata na soto. **16** Xa muxu yo a ngaxakedenna to yulubin lige naxan mi rajanma sayaan ma, a xa Ala maxandi a xa, a nii rakisin fima a ma nen. N naxan ma, naxan yulubin mi rajanma sayaan ma. Koni yulubina nde na naxan najanma sayaan ma, n mi a fale e xa fa fala e xa Ala maxandi na feen na. **17** Tinxintareyaan birin findixi yulubin nan na, koni yulubin birin mi rajanma sayaan ma. **18** En na a kolon fa fala naxan yo bata bari Ala yi, na mi luye yulubin nabe. Amasoto Alaa Dii Xemena a kantanma. Nanara, Fe Jaxin Kanna mi noe sese ra a xili ma. **19** En na a kolon fa fala en fataxi Ala nan na, en mon a kolon a dunuja birin Fe Jaxin Kanna senben nan bun ma. **20** En na a kolon fa fala Alaa Dii Xemen bata fa, a yi xaxinla fi en ma alogo en xa Jondin Kanna kolon. En fan luxi Jondin Kanna Ala yi a Dii Xemen Yesu Alaa Muxu Sugandixin barakan nin. A tan nan Jondin Kanna Ala ra, e nun habadan nii rakisina. (aiōnios g166) **21** N ma diine, e masiga suxure feene ra.

Yoni Firindena

1 N tan denkeleya yamaan fonna nan kedini ito sebexi jaxalan sugandixin ma e nun a diine, n xanuntenne jondini. Naxanye birin jondin kolon, ne fan e xanuxi **2** jondina fe ra naxan luma en yi a mon luma en xon nen habadan. (aion g165) **3** Fafe Ala e nun Yesu Alaa Muxu Sugandixina, Fafe Alaa Dii Xemen, na xa hinan en na, a kininkinin en ma, a boje xunbenla fi en ma jondin nun xanuntenyani. **4** N sewa nen kati, n to e diina ndee to sigan tiye jondin kiraan xon ma alo Fafe Ala a yamari en ma kii naxan yi. **5** Iki, i tan jaxalan son fajina, n naxan maxodinma i ma sebeni ito yi, na mi findixi yamari nenen xan na fo naxan yi en yi xabu a foloni fa fala en xa en bode xanu. **6** Xanuntenyaan ni ito ra fa fala en xa sigan ti a yamarine bun. A yamarin ni ito ra a en xa sigan ti xanuntenyani alo e bata a me kii naxan yi xabu a foloni. **7** Muxu mayenden wuyaxiye bata mini dunuɲa yi, naxanye mi e tima a ra fa fala a Yesu, Alaa Muxu Sugandixin fa nen fati benden kiini. Muxu mayendenne nun Alaa Muxu Sugandixin yaxune nan na muxu sifane ra. **8** E a liga e yeren ma, e nama en ma wanla tonon kala, alogo e xa e konton kamalixin soto. **9** Naxan mi luma Alaa Muxu Sugandixina xaranni fo a dangu a ra, Ala mi na kanni. Naxan na lu Yesu a xaranni, Fafe Ala nun a Dii Xemen fan luma nen na kanni. **10** Xa muxu yo fa xaranna ra e konni naxan mi findixi xaranni ito ra, e nama a yigiya e konni, e nama a xonton. **11** Amasoto naxan a xontonma, na bata kafu a ma a wali jaxine yi. **12** Fe wuyaxi n kui n naxan fale e xa, koni n mi waxi a sebe feni kedini. Koni a xonla n ma, n xa sa falan ti e xa yee nun yee alogo en ma sewan xa defe. **13** Ala i magilen naxan sugandixi, na diine i xonton.

Yoni Saxandena

1 N tan denkeleya yamaan fonna nan ito sebexi n xanuntenna Gayi ma, naxan nafan n ma jɔndini. **2** N xanuntenna, n na Ala maxandima alogo feen birin xa siga yeen na i tan xa, i fatin yi kendeɣa alo i niin fan kii naxan yi. **3** N sewaxi kati, amasoto ngaxakedennda ndee bata fa, e yi sereyaan ba lan i ya jɔndi suxun ma, a i sigan tima jɔndini. **4** Naxan findixi n ma sewa gbeen na, n to a me fa fala a n ma diine sigan tima jɔndin nin. **5** N xanuntenna, i wanla kema en ngaxakedenne xa lannayani hali i to mi yi e kolon. **6** E bata i ya xanuntenyana fe fala denkeleya yamani be. Nayi, i lan i xa e mali fanda feen na e xeraya sigatini alo Ala wama a xon kii naxan yi. **7** Amasoto e sigatiin de suxuma Yesu xinla nan ma fe ra. E mi sese sotoma denkeleyatarene yii. **8** Nayi, en lan en yi muxu sifani itoe mali alogo en xa wali en bode xon jɔndini. **9** N fena nde sebe nen denkeleya yamaan ma, koni a xonla Diyotirefi ra a xa findi e yexratiin na, na mi n ma falan yatexi sese ra. **10** Nanara, xa n fa, a feen naxanye birin ligama, a yi fala jaxine raxuya ayi nxo fe yi, nxu ne birin falama nen. A mi a luxi na ma fo a tondi en ngaxakedenne yisuxe. Naxanye fan yi waxi e yisuxu feni, a yi tonna sa ne fan na, a yi ne kedi denkeleya yamani. **11** N xanuntenna, i nama fe jaxin naliga fo fe fajina. Naxan fe fajin ligama, na fataxi Ala nan na. Naxan na fe jaxin liga, na mi Ala kolon. **12** Muxun birin Demetiri xili fajin falama alo a lan jɔndin ma kii naxan yi. Nxu fan a fe fajin sereyaan bama. Anu, e a kolon a jɔndin nan nxo sereyaan na. **13** Fe wuyaxi n kui, n xa a fala i xa, koni n mi waxi a sebe feni. **14** Koni a xonla n ma n xa i to sinma alogo en xa falan ti yee nun yee. Ala xa boje xunbenla fi i ma. I xoyine birin i xonton. En xoyine birin xonton nxu xa menni ki faji.

Yudi

1 N tan Yudi nan ito sebexi, Yesu Alaa Muxu Sugandixina walikena, Yaki ngaxakedenna. N yi a rasiga Fafe Alaa muxu xilixine ma, a naxanye xanuxi, Yesu Alaa Muxu Sugandixin naxanye kantanma. **2** Ala xa kininkininna nun boŋe xunbenla nun xanuntenyaan sabati ε yi. **3** Ngaxakedenne, a xonla yi n ma nun ki faŋi n xa ito sebe ε ma lan en kisi feen ma, koni n na a toxi nen fo n xa a sebe nen lan ε senbe so feen ma denkeleyaan xun mayengedeni Ala bata naxan fi a yama sarijanxin ma sanja ma keden han habadan. **4** Amasoto muxuna ndee bata so ε ye wundoni naxanye yalagi feen bata yi sebe nun xabu a rakuya. Ala kolontarene nan ne ra, naxanye Alaa hinanna findima haramu feene liga xunna ra, e yi e me Yesu ra, Alaa Muxu Sugandixina, en kari keden peena, en Marigina. **5** Koni hali ε to feni ito kolon, n mon waxi a rabira feen nin ε ma fa fala Marigina Isirayila yamaan nakisi nen Misiran yamanani, koni a mon yi denkeleyatarene fan halagi na xanbi ra. **6** Malekana ndee fan to e yete lu binyetareyani, e e me e tiden na, Ala yi ne balan dimi tilinxin xore ra, e xidixi habadan yoloxonne ra han kiti sa loxo gbeena. (aiḡnios g126) **7** A mon na kii nin, Sodoma nun Gomora nun e rabilinna taane fan yi yalunyaan ligama e kafu e bode ma kiina nde yi naxan mi lan adamadiine ye. Ala ne fan findi nen misaala ra, a yi e naxankata habadan teeni. (aiḡnios g166) **8** Na muxun naxanye soxi ε tagi, ne fan xiyene sama naxanye a ligama e haramu feene raba e fatine yi, e murute sariya kanne ma, e malekane rayelefu. **9** Bayo, hali maleka kuntigin Mikeli mi susu Yinna Manga Setana yalagi konbin tiye. E yi fe matandini waxatin naxan yi lan Musa binbina fe ma, a fala nen gbansan, a naxa, “Marigina Ala xa falan ti i xili ma.” **10** Koni muxuni itoe tan senbe kanna naxanye rayelefuma, e mi ne kolon. E na ndee kolon e xaxilitareyani alo subene xaxili mi naxanye ma, anu, na nan yati e birama halagini. **11** Gbalona e xa bayo e bata bira Kayini misaala foxo ra. E bata e gi tonone foxo ra tantanni alo Balami. E bata halagi amasoto e bata murute alo Kora. **12** Na muxune bata ε ngaxakedenyaan malanne raharamu, e e dege ε xon han! E mi yagima, e e yete nan tun katama. E luxi nen alo tulen na te ayi, foyen yi a tuntun, a dangu. E mon luxi nen alo wudin naxanye mi bogima e waxatini, e yi tala, e raxori. **13** E luxi nen alo foxo

igen mon gbeene, e yagitareya feene raxuyama ayi alo baan xunfanna, alo sare tununxin naxanye sa sinma habadan tilin dimi gbeen xore ra. (aiḡn g165) **14** N benba Adama bonsonna yixeten solofereden Xenoki nabiya falane ti e tan nan ma fe ra, a naxa, “Marigin fama nen e nun a maleka sarijanxi wuli wuli wuyaxi, **15** alogo a xa fa birin makiti, a yi Ala kolontarene birin sonna yita e ra e Ala kolontare wanle fe ra, e nun Ala kolontare yulubi kanne fala xodexen naxanye birin tixi Ala ma.” **16** Na muxune luma e mawuge, e mi wasama. E biraxi e kunfa feene nan tun foxo ra, e lu waso falane tiye, e muxune matoxo se feen na. **17** Koni ngaxakedenne, en Marigi Yesu Alaa Muxu Sugandixina xerane fe famatxon naxanye fe falaxi, na xa rabira ε ma. **18** E a fala nen ε xa, e naxa, “Muxu magelene fama nen waxati rapanne yi, naxanye biraxi e kunfa feene foxo ra Ala kolontareyani.” **19** Na fe naxi rabane nan ε yitaxunma, naxanye luxi alo subene, Alaa Nii Sarijanxin mi naxanye yi. **20** Koni ε tan, n xanuntenne, ε lu sabate ε denkeleya sarijanxini. E Ala maxandi a Nii Sarijanxini. **21** E lu Alaa xanuntenyani, ε nema Marigi Yesu Alaa Muxu Sugandixina hinanna mame waxatin naxan yi, a xa ε xali habadan nii rakisini. (aiḡnios g166) **22** Siken naxanye yi, ε kininkinin ne ma. **23** E e xasun teeni, ε yi e rakisi. E kininkinin bonne fan ma Alaa yecragaxuni, hali e dugin naxanye xosixi e fati benden nafan feene xon, ε yi ε masiga ne ra. **24** Naxan noε ε ratange tantan feene birin ma, a yi ε ti fetareyani a binyeni a yetagi sewani, **25** binyen nun mangayaan nun senben nun noon xa fi na Ala keden peen ma, en nakisimana, Yesu Alaa Muxu Sugandixin barakani en Marigina, xabu a foloni han to han habadan. Amina. (aiḡn g165)

Lankenemayana

1 Yesu Alaa Muxu Sugandixin nan fe famatoni itoe makenenxi a walikene xa fata Ala ra. A a malekan nan xe a walikene Yoni ma a rakolondeni. **2** Na Yoni nan na feene seren bama fa fala a a feen naxanye birin toxi, Alaa falan nan ne ra e nun Yesu Alaa Muxu Sugandixin sereyana. **3** Sewan na kanna xa naxan na nabiya falani itoe xaran e nun naxanye na e tuli mati e ra, e yi a falane suxu naxanye sebexi a kui, amasoto waxatin bata maso. **4** N tan Yoni nan bata ito sebe denkeleya yama soloferene ma Asi yamanani. Ala naxan na, naxan yi na, naxan fama, na Ala xa hinanna nun boje xunbenla fi e ma, fata nii soloferene ra naxanye a manga gbeden yetagi, **5** e nun fata Yesu Alaa Muxu Sugandixin na, sere tinxinxin nun habadan muxu singe kelixin sayani e nun dunuja mangane mangana. Naxan bata en xanu, a yi en xoroja en yulubine ma a wunla xon, **6** a mon yi en findi a mangayaan muxune nun saraxaraline ra a Fafe Ala xa, binyen nun senben xa lu na nan xa habadan han habadan. Amina. (aiōn g165) **7** E a mato, a fama kundani! Muxune birin a toma nen hali naxanye a soxoñxi. Bōxon bōsōñne birin wugama nen a fe ra. A xa liga na kiini yati! Amina. **8** Marigina Ala naxa, “N tan nan a folon na e nun a rajanna, naxan na, naxan yi na e nun naxan fama, Senben Birin Kanna.” **9** N tan Yoni, e ngaxakedenna, naxan findixi e boden na en ma torojaan nun mangayaan nun tunnafanni Yesu yi, e bata yi n nasiga Patimosi bōxon ma foxo igen tagi Alaa falana fe ra, n to yi Yesu seren bama. **10** Marigin batu loxona nde yi, n yi Alaa Nii Sarijanxini, n fala xui gbeena nde me n xanbi ra, a gbo alo xota xuina. **11** A naxa, “I feen naxanye toma, e sebe, i yi e rasiga denkeleya yama soloferene ma Efesi taan nun Simirini taan nun Peragama taan nun Tiyatire taan nun Saridesi taan nun Filadelifi taan nun Layodise taani.” **12** N yi n yee raxete na kanni gbedeni. N to n yee raxete, n yi xema lenpun dōxo se soloferere to na. **13** Na lenpu dōxo seene tagi, n yi adamadi maligana nde to. Doma gbeen nagodoxi a ma, xema tagi xidin yi xidixi a kanken ma. **14** A xunna nun a xun sexene yi fixa alo yexee xabe dugi fixena hanma balabalan kesena, a yeene luxi alo tee degena, **15** a sanne mayilenma alo sulan teen na, a xuiin yi gbo alo walan gbeen xuina. **16** Sare soloferere yi a yiifanni, silanfan xenxen de firin kanna yi minima a de, a

yetagin yi mayilenma alo soge xolena yanyi tagini. **17** N to a to, n yi bira a san bun ma alo faxa muxuna. A yi a yiifanna sa n fari, a naxa, “I nama gaxu. N tan nan a folon nun a rajanna ra. **18** Nii rakisina n tan nan yii. N bata yi faxa nun, koni iki n na n niini han habadan. Sayaan nun laxira dejinna n tan nan yii. (aiōn g165, Hadēs g86) **19** Awa, i naxan toxi, na sebe, naxan ligama iki e nun naxan fama ligadeni. **20** I sare soloferen naxanye toxi n yiifanni, e nun xema lenpu dōxo se soloferene, ne bunna ni ito ra: Sare soloferene findixi denkeleya yama soloferene malekane nan na, xema lenpu dōxo se soloferene, denkeleya yama soloferene nan yi ne ra.”

2 “A sebe Efesi denkeleya yamaan malekan ma, i naxa: Sare soloferene suxi naxan yiifanni, naxan sigan tima xema lenpu dōxo se soloferene tagi, na ito nan falaxi. **2** N na i kewanle kolon, i ya wanla nun i ya tunnafanna. N na a kolon yati, a muxu jaxine mi rafan i ma. I bata muxune kejaan feselese naxanye a falaxi a xeraan nan e tan na, koni jondi mi a ra, i yi e kolon wule falane ra. **3** I tunnafanxi, i bata toro n ma fe ra, koni i mi tunnaxoloxi i ma. **4** Koni mawugana nde n yii e xili ma, i bata i me i ya xanuntenya singen na. **5** Nayi, i biraxi sa keli yire matexin naxan yi, na yirena fe xa rabira i ma, i yi i kejaan maxete, i mon yi i ya wali singene de suxu. Xa i mi tin xete, n fama nen i ma, n yi i ya lenpu xema dōxo seen ba na. **6** Koni i fe fajini ito ligama: na Nikolayiti muxune kewanle rajaxu i ma, naxanye rajaxu n fan ma.” **7** “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me. Naxan na nōon soto, n tinma nen a yi siimaya wudi bogin don naxan tixi Alaa nakoni ariyanna yi.” **8** “A sebe Simirini denkeleya yamaan malekan ma, i naxa: Naxan a folon nun a rajanna ra, naxan faxa, a mon yi keli sayani, na ito nan falaxi. **9** N na i ya toron nun i ya yiigelitoyaan kolon, anu nafulu kanna nan yati e ra. Naxanye a falama a Yahudiyen nan e ra, koni a tan mi e ra, n na a kolon ne e rayelefuma kii naxan yi. E findixi Setana salide banxin yamaan nan na. **10** I nama gaxu i toro fe famatone ra sese ma. Yinna Manga Setana e tan nde se nen kasoon na, alogo a xa e mato, e yi xi fu toron soto. E togondiya han e sayana, n yi nii rakisin mangaya taxamaseri komotin so e xun na.” **11** “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me. Naxan na

nooñ soto, sayaan firinden mi na kanna liye mume.”

12 “A sebe Peragama denkeleya yamaan malekan ma, i naxa: Silanfan xenxen de firin kanna naxan yii, na naxa iki: **13** N na i doxođen kolon, Setanaa manga gbēden denaxan yi. I kankanxi n xinla ma, i mi i mexi n ma denkeleyaan na, hali e n ma sere toğondiyaxi Antipasi faxa loxon naxan yi e konni Setana doxođeni.

14 Koni mawugana ndee n yii e xili ma, muxuna ndee i konni naxanye Balami a xaranna suxi, naxan Balaki xaranxi Isirayila kaane rabira kiin ma yulubini sube donna xon naxan bata ba saraxan na suxurene xa e nun yalunyaan xon. **15** Na kiini, muxuna ndee i konna fan yi naxanye fan Nikolayiti muxune xaranna suxi.

16 Nayi, i xun xanbi so i hakeni, xanamu, n fama nen i ma sasa, n yi na muxune yenge n de silanfanna ra.”

17 “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me. Naxan na nooñ soto, n Manna donse luxunxina nde soma nen a yii e nun geme fixena xili nenen sebexi naxan ma, muxu yo mi naxan kolon, fo naxan a soto ma.”

18 “A sebe Tiyatire denkeleya yamaan malekan ma, i naxa: Alaa Dii Xemen naxan yeen luxi alo tee degena, a sanne mayilenma alo sula xuruxina, a tan naxa: **19** N na i kewanle nun i ya xanuntenyaan nun i ya denkeleyaan kolon i walima muxune xa kii naxan yi e nun i ya tunnafanna. N na a kolon i ya wali donxene wuya dangu a singene ra. **20** Koni mawugani ito n yii i xili ma, Yesabele, naxanla naxan a falama a nabiin nan a tan na, i bata tin na xa n ma walikene mayenden, a yi e xaran yalunyaan nun suben donna ma naxan baxi saraxan na suxurene xa. **21** N bata waxatin fi a ma alogo a xa a xun xanbi so a hakeni, koni a mi tin xete a yalunyaan foxo ra. **22** Nanara, n na a rasama nen jaxankatani. E nun naxanye yalunyaan ligama e bode xon, e toro kati, xa e mi xete e wali jaxine foxo ra. **23** N na a diine faxama nen. Denkeleya yamaan birin yi a kolon a n tan nan muxune miriyane nun boje yi feene fesefesema. N na e tan birin saranma nen e kewanle ra.”

24 “Koni e tan muxu donxen naxanye birin Tiyatire taani, e tan naxanye mi biraxi xaran jaxini ito foxo ra, naxanye mi Setana ‘wundo fe tilinxine’ kolonxi, e naxan ma fe falama, n mi goron gbete doxo ma e xun ma. **25** Naxan e yii, e na suxu tun, han n yi fa. **26** Naxan na nooñ soto, a n sagoon liga han a rajanna, n senben fima nen na ma siyane xun na. Kitabun naxa, **27** a mangaya xodexen ligama nen e xun na a mangaya wure dunganna ra, a yi e rayensenje

ayi alo fejena. **28** N senben fima a ma nen alo n na a sotoxi n Fafe ra kii naxan yi, n yi tagalan saren fan so a yii.”

29 “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me.”

3 “A sebe Saridesi denkeleya yamaan malekan ma, i naxa: Alaa Nii soloferene nun a sare soloferene naxan yii, na ito nan falaxi: N na i kewanle kolon, yamaan laxi a ra a i bata nii rakisin soto, koni faxa muxun nan i ra. **2** Xulun! Senbe donxen naxan luxi i yi, i na masuxu benun a xa jan, amasoto n mi i kewali defexin toxi n ma Ala yetagi. **3** Nba, i xaranna naxan mexi, i yi a soto, na feen xa rabira i ma, i yi a suxu, i yi i xun xanbi so i hakeni. Xa i mi lu i yee ra yi, n na i raterenama nen alo mujadena, i mi n fa waxatin kolonje. **4** Anu, muxuna ndee i konni Saridesi taani naxanye mi e dugine raxosixi. Ne sigan tima nen n xon dugi fixene yi, amasoto e sarijan. **5** Naxan na nooñ soto, na dugi fixen soma nen, n mi a xinla be Nii Rakisin Kitabun kui mume. N na n tima a xinla ra nen n Fafe Ala nun a malekane yetagi.”

6 “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me.”

7 “A sebe Filadelifi denkeleya yamaan malekan ma, i naxa: Sarijanna nun Nondin Kanna nan ito falaxi, Dawudaa dejinna naxan yii, naxan deen nabima, muxu yo mi noe a ragale, naxan deen nagalima, muxu yo mi noe a rabiye, na naxa: **8** N na i kewanle kolon. A mato, n bata deen nabi i yee ra, muxu yo mi noe a ragale, bayo n na a kolon a i senben mi gbo, anu i n ma falan suxu nen, i mi i me n xinla ra. **9** Nba, a mato n naxan ligama Setana salide yamaan muxune ra, na wule falan naxanye e yete yatexi Yahudiyane ra, koni a tan mi e ra. N ne rafama nen e yi e xinbi sin i bun ma, e yi a kolon a n bata i xanu. **10** Amasoto i to bata n ma yamari falan suxu i yi i tunnafan, n fan yetena i kantanma nen maratantan waxatini, naxan fama dunuja muxune birin kepaan fesefesedeni boxon yiren birin yi. **11** N famatooñ ni i ra! Naxan i yii, na suxu ken alogo muxu yo nama i ya no soton taxamaseri komotin ba i xunna ma. **12** Naxan na nooñ soto, n na kanna findima nen senbetenna ra Ala Batu Banxini. A mi fa mine na mume! N yi n ma Ala nun a taan xinla sebe a ma, Yerusalem nenen naxan godoma keli ariyanna yi n ma Ala fema. N na n xili nenen fan sebema nen a ma.”

13 “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me.”

14 “A sebe

Layodise denkeleya yamaan malekan ma, i naxa: N tan nan xili ‘Amina,’ sere tinxinxin nun jɔndina, Alaa daala birin xun na, n naxa: **15** N na i kewanle kolon. I mi xunbeli, i mi wolon. A yi lan nun, i wolon hanma i xunbeli. **16** Koni bayo i tɔxɔfilɔxin nan a ra, i mi wolonxi, i mi xunbelixi, n na i ya fe baxunma nen! **17** Bayo i a falama, i naxa, ‘Nafulu kanna nan n na, n ma nafunla bata gbo ayi, n mako mi fa sese ma.’ Koni i mi a kolon a i tɔrɔxi, a i makininkinin, se mi i yii, danxutɔɔn nan i ra, marabenna i ma. **18** Nba, n na i kawandima, i xa xema fajin sara n ma naxan nasensenxi teen na, alogo i xa findi nafulu kanna ra jɔndini. E nun dugi fixene alogo i ragenla nama lu, i yagi. E nun i yeen dandan senna alogo i xa seen to. **19** N na n xanuntenne sɔnna yitama e ra, n yi e xuru. Nayi, i sɔbe so, i yi i xun xanbi so i hakene yi. **20** I tuli mati, n tixi deen na, n na a makɔnkɔnma, naxan na n xuiin me, a yi na rabi, n soma nen na kanna konni, nxu yi nxu dege nxu bode xɔn. **21** Naxan na nɔɔn sɔto, n tinma nen na yi dɔxɔ n fema n ma mangaya gbedeni alo n tan fan nɔɔn tixi kii naxan yi, n dɔxɔ n Fafe Ala fema a mangaya gbedeni.” **22** “Nba, xa naxan tuli na, Alaa Nii Sarijanxin naxan falama denkeleya yamane xa, a xa na me.”

4 Na xanbi ra, n yi fe gbete to, n yi dena nde to rabixi ariyanna yi. N fala xui singen naxan me, naxan yi gbo alo xɔta xuina, na yi a fala, a naxa, “Te be, feen naxanye fama ligadeni to xanbi ra, n xa ne yita i ra.” **2** Alaa Nii Sarijanxin yi so n yi mafuren! N yi muxuna nde to dɔxi manga gbedeni ariyanna yi. **3** A yetagin yi mayilenma alo yasipi gemen nun karineliya gemena. Manga gbeden yi rabilinxi sengunna ra naxan yi mayilenma alo emerodi gemena. **4** Manga gbede mɔxɔɔn nun naanin gbete yi manga gbeden nabilinni, fori muxu mɔxɔɔn nun naanin yi dɔxi naxanye ma e maxidixi dugi fixene yi, xema mangaya kɔmɔti taxamasenne soxi e xun na. **5** Kuyen jin masɔxɔnna nun xuine nun galan xuiin yi minima manga gbedeni. Lenpu dege gbeen solofere yi degema mangaya gbeden yetagi. Alaa Nii soloferene nan yi ne ra. **6** Lonna nde yi mangaya gbeden yetagi naxan gbo alo fɔxɔ igena, a fixa alo mato kiken a alo kilasina. Dalise naanin yi mangaya gbeden yireni, e nun a rabilinni, naxanye yee yi e yetagi nun e xun xanbin ma. **7** Dalise singen yi maliga yatan nan na. A firinden tan yi luxi alo turana. Muxun yetagin yi a saxanden

ma. A naaninden yi luxi alo singbinna tуганmatɔna. **8** Gubugubu sennin nan yi na daliseene keden kedenna birin ma, e yee yi e fatin yiren birin ma, e yi betin bama kɔɛn nun yanyin birin na, e naxa, “Marigina Ala Senben Birin Kanna sarijan, a sarijan, a sarijan, naxan yi na, naxan na, e nun naxan fama.” **9** Naxan dɔxi mangaya gbedeni naxan luma habadan, dalise naaninne nema yi binyen nun xunna kenla nun barikan bire na xa waxatin naxan yi, (aiɔn g165) **10** na fori muxu mɔxɔɔn nun naaninne yi e xinbi sinma nen a yetagi, e yi a batu, e yi e manga kɔmɔtine woli mangaya gbeden yetagi, e yi a fala na kanna xa naxan dɔxi manga gbeden ma naxan luma habadan, e naxa, (aiɔn g165) **11** “Nxu Marigina, nxɔ Ala, binyen nun xunna kenla nun senben daxa a fi i ma, amasɔto i tan nan seen birin daxi, e taranxi na i sagoon nin, e daxi i sagoon nin.”

5 Naxan yi dɔxi mangaya gbedeni, n yi kedi mafilinxi na nde to suxi na yiifanni sebenla yi tixi naxan fɔxɔ firinna birin ma. A yi balanxi taxamaseri solofere nan na. **2** N yi maleka senbɛmana nde to naxan yi falan tima a xuini texin na, a naxa, “Nde daxa a kedini ito taxamasenne kala alogo a xa kedi mafilinxi nabi?” **3** Koni muxu yo mi sɔto ariyanna nun bɔxɔ xɔnna ma, hanma bɔxɔn bun ma naxan yi nɔɛ a kedin nabiye, hanma a yi a mato. **4** N yi wuga kati, amasɔto muxu yo mi sɔto naxan yi daxa a na kedin nabi, hanma a yi a mato. **5** Nayi, na fonna nde yi a fala n xa, a naxa, “I nama wuga. A matol! Yuda bɔnsɔnna yatan naxan luxi alo salenna naxan majingi kelixi Dawuda xabilani, na bata senben sɔto a xa kedin nabi e nun a taxamaseri soloferene.” **6** Nba, n yi yexɛɛ diina nde to tixi manga gbeden nun dalise naaninne nun fonne tagi. Na Yexɛɛ Diin yi luxi alo a kɔɛ raxabaxin nan yi a ra nun. Feri solofere, yee solofere nan yi a ma, naxanye yi findixi Alaa Nii soloferene ra a naxanye rafa dunuɔa yiren birin yi. **7** Naxan yi dɔxi manga gbedeni, Yexɛɛ Diin yi sa kedi mafilinxi nasuxu na yiifanni. **8** A to na rasuxu, dalise naaninne nun fori mɔxɔɔn nun naaninne yi e xinbi sin Yexɛɛ Diin bun, kondenna yi e keden kedenna birin yii e nun xema wuren naxanye yi rafexi wusulanna ra naxan yi findixi yama sarijanxina Ala maxandi xuine ra. **9** E yi beti nenen ba, e naxa, “I daxa i yi kedi mafilinxi tongo, i yi a taxamasenne ba a ma, alogo a xa rabi. Amasɔto i bata yi faxa nun, i yi

muxune xunba Ala xa i wunla xon ma, keli bõnsõnne birin nun xuine birin nun yamane birin nun siyane birin yi. **10** I yi e findi en ma Alaa mangayaan muxune nun a saraxaraline ra, e mangayaan ligama nen bõxõn xun na.” **11** N yi a matoma waxatin naxan yi, n maleka wuyaxi xuiin mɛ daliseene nun fonne nun manga gbɛden nabilinni, e xasabin yi sigɛ han wuli wuli wuyaxi naxan mi yi yatɛ. **12** E yi betin bama, e yi e xuini te, e naxa, “Yɛxɛɛ Diin naxan bata yi faxa nun, na daxa a xa sɛnben nun nafunla nun xaxinla nun fangan nun xunna kenla nun binyen nun tantunna sɔto!” **13** Daliseene birin kore xõnna nun bõxõ xõnna ma e nun bõxõn bunni, e nun naxanye birin fõxõ igeni, n yi daala birin xuiin mɛma, e betin bama, e naxa, “Naxan dõxi manga gbɛdeni e nun Yɛxɛɛ Diina, tantunna nun xunna kenla nun binyen nun sɛnben xa fi ne nan ma habadan!” (aiõn g165) **14** Dalise naaninne yi a fala, e naxa, “Amina.” Fonne yi e xinbi sin, e yi Ala batu.

6 Na xanbi ra, n yi Yɛxɛɛ Diin to na taxamaseri soloferena nde keden nabiye, n yi dalise naaninna nde keden xuiin mɛ, a xuiin luxi alo kuye sarinna, a naxa, “Fa bel!” **2** N yi soo fixen to. Naxan yii dõxi a fari, xanla yi suxi na yii. E yi mangaya kɔmõti taxamasenna so a xun na. A siga nɔ sɔtõn xunna kenli, alogo a xa sa nɔõn ti. **3** A to taxamasenna firinden nabi, n yi daliseen firinden xuiin mɛ, a naxa, “Fa bel!” **4** Soo gbɛtɛ yi mini naxan yi gbeeli alo tɛɛna. Naxan yi dõxi a fari, dunuja muxune bɔpɛ xunbenla kala sɛnben yi so na yii alogo muxune xa e bode faxa, silanfan kuye gbeen yi so a yii. **5** A to taxamaseri saxanden nabi, n yi daliseen saxanden xuiin mɛ a fale, a naxa, “Fa bel!” N yi soo fɔren to. Naxan yi dõxi a fari, sikeela yi suxi na yii. **6** N yi xuina nde mɛ dalise naaninne tagi alo fala xuina, a naxa, “Ligaseen yɛ keden maala ra soge keden saranna ra. Ligaseen yɛ saxan fundenna ra soge keden saranna ra. Koni i nama turen nun manpaan tan kala.” **7** A to a taxamaseri naaninden nabi, n yi dalise naaninden xuiin mɛ a fale, a naxa, “Fa bel!” **8** N yi soo fati jɔxõndɛdɛ ramaan to. Naxan yi dõxi a fari, na yi xili nen sayana. Laxira yi biraxi a fõxõ ra. Bõxõni taxunxin dõxode naaninna ra, na kedenna halagi sɛnben yi so e yii silanfanna nun fitina kamen nun fitina furen nun burunna sube xapɛne xõn. (Hadɛs g86) **9** A to taxamasenna suulunden nabi, muxun naxanye bata yi faxa Alaa falan nun a sereyana

fe ra, n yi ne niine yelenne to saraxa ganden bun ma. **10** E yi gbelegbele, e naxa, “Marigi sarijanxina, jɔndin kanna, i mɔn buma han waxatin mundun yi benun i xa kitin sa, i yi nxu faxa feen saran dunuja muxune ra?” **11** Doma fixen yi so e keden kedenna birin yii. A yi fala e xa, a e xa e matabu waxatidi singen han e walikɛ bodene nun e ngaxakedenne birin xasabin yi defɛ naxanye faxama alo e tan. **12** A to taxamasenna senninden nabi, n ni ito nan to: Bõxõn yi xuruxurun kati! Sogen yi fɔrɔ alo kasa dugina. Kiken fan yi gbeeli alo wunla, **13** kore xõnna sarene yi yolon bõxõni, alo foye gbeen na xõden binla yigisan a bogine yi yolon. **14** Kore xõnna yi tunun alo kɛdin na mafilin, geyane nun fõxõ ige tagi bõxõne birin yi ba e funfuni. **15** Na xanbi ra, dunuja mangane nun a kuntigine nun sofa kuntigine nun nafulu kanne nun sɛnbɛ kanne nun muxun birin, konyine nun xɔrõne birin, ne yi sa e luxun faranne nun geya yinle ra. **16** E lu a fale geyane nun gemene xa, e naxa, “ɛ bira nxu fari! Naxan manga gbɛdeni, ɛ nxu luxun na nun Yɛxɛɛ Diina xõlõn bun. **17** Amasɔtɔ e xõlõ lõxõ gbeen bata a li, nde nɔɛ tiyɛ a yetagi?”

7 Na xanbi ra, n yi maleka naanin to tixi dunuja tongon naaninne ma. Bõxõ xõnna foye naaninne yi suxi e yii, alogo foye yo nama mini bõxõ xõnna xun ma, hanma fõxõ igena hanma wudine xun ma. **2** N yi maleka gbɛtɛ to fɛ, keli sogeteden binni, habadan Alaa taxamasenna yi suxi naxan yii. Bõxõ xõnna nun fõxõ igen tɔrɔ sɛnben so maleka naaninna naxanye yii, a yi sɔnxõ ne ma, a naxa, **3** “ɛ nama fe jɔxin liga bõxõ xõnna ra singen hanma fõxõ igena hanma wudine han en yi taxamasenna sa en ma Alaa walikene tigi ra.” **4** Nba, Alaa taxamasenna sa naxanye tigi ra, n yi na xasabin mɛ, muxu wuli kemɛ muxu wuli tonge naanin e nun naanin keli Isirayila bõnsõnne birin yi: **5** Taxamasenna yi sa muxu wuli fu nun firin ma Yuda bõnsõnni, Ruben bõnsõnna, muxu wuli fu nun firin, Gadi bõnsõnna, muxu wuli fu nun firin, **6** Aseri bõnsõnna, muxu wuli fu nun firin, Nafatali bõnsõnna, muxu wuli fu nun firin, Manase bõnsõnna, muxu wuli fu nun firin, **7** Simeyõn bõnsõnna, muxu wuli fu nun firin, Lewi bõnsõnna, muxu wuli fu nun firin, Isakari bõnsõnna, muxu wuli fu nun firin, **8** Sabulon bõnsõnna, muxu wuli fu nun firin, Yusufu bõnsõnna, muxu wuli fu nun firin, Bunyamin bõnsõnna, muxu wuli fu nun firin taxamasenna yi naxanye ma. **9** Na

xanbi ra, n yi yama gbeen to naxan xasabin mi yi yate, sa keli siyane birin nun bônsonne birin nun yamane birin nun xuine birin yi. E yi tixi manga gbeden nun Yexee Diin yetagi, doma fixen nagodoxi e ma, tugu deene suxi e yii. **10** E yi e xuini te, e naxa, “Kisina en ma Ala nan yii naxan dōxi manga gbedeni e nun Yexee Diina.” **11** Malekane birin yi tixi manga gbeden nun fonne nun dalise naaninne rabilinni, ne yi bira manga gbeden yetagi, e yetagine yi lan bōxon ma, e yi Ala batu, **12** e naxa, “Amina! Tantunna nun binyen nun fe kolonna nun barika biran nun xunna kenla nun senben nun fangan xa lu en ma Ala xa habadan han habadan! Amina.” (aiōn g165) **13** Na fonna nde yi n maxodin, a naxa, “Doma fixen nagodoxi ndee ma itoe ra? E kelixi minen yi?” **14** N yi a yabi, n naxa, “N fafe, i tan nan na kolon.” A yi a fala n xa, a naxa, “Muxune nan e ra naxanye bata dangu jaxankata waxati gbeeni. E bata e domane xa, e yi e rafixa Yexee Diin wunli.” **15** Nanara, e tixi Alaa manga gbeden yetagi, e a batu yanyin nun kōeen na a Batu Banxini. Naxan dōxi manga gbedeni, na e yigiyama nen a konni. **16** Kamen mi fa e suxe sōnōn, min xōnla mi fa e suxe sōnōn, sogen mi fa e ganjɛ sōnōn, kuye wolon yo mi mine e ma, **17** amasoto Yexee Diin naxan manga gbedeni, na e masuxuma nen alo xuruse rabana, a yi ti e yee ra, siga siimaya tigi igene yi, Ala yi e yeezene birin fitan e yee ra yi.

8 Yexee Diin to taxamasenna solofereden nabi, kore xōnna yi madundu han waxatidi. **2** N yi maleka solofere to tixi Ala yetagi, xota solofere yi so ne yii. **3** Maleka gbete yi fa saraxa ganden yetagi, wusulan gan se xema daxin suxi a yii. E wusulan gbegbe so a yii a gan daxin na, sa yama sarijanxine birin ma maxandi xuine fari, a yi ne gan saraxa ganden xema daxin fari manga gbeden yetagi. **4** Wusulanna tutin nun yama sarijanxina Ala maxandi xuine yi te, keli malekan yii siga Ala yetagi. **5** Na xanbi ra, malekan yi wusulan gan seen tongo, a yi a rafe saraxa ganden teen na, a yi a woli bōxōni. Galan xuiin nun xuine nun kuyen jin masōxōnna yi mini, bōxōn yi xuruxurun. **6** Nayi, xota soloferene yi maleka soloferen naxanye yii, ne yi keli xotane fedeni. **7** Maleka singen yi a gbee xōtaan fe. Balabalan kesen nun teen nun wunla basanxin yi fa bōxō xōnna fari. Bōxōni taxunxin dōxode saxanna ra, na kedenna yi gan, e nun a wudine nun a sexē xindene birin. **8** Malekan firinden yi a xōtaan fe. Geme

gbeena nde yi sin fōxo igeni naxan yi gbo alo geyaan ganmatōna. Fōxo igene yitaxunxin dōxode saxanna ra, na kedenna yi findi wunla ra, **9** daliseen naxanye birin yi jɛɛ na fōxo igeni, ne yi faxa, menna kunkine fan yi kala. **10** Malekan saxanden yi a gbee xōtaan fe. Sare gbeen ganmatōn yi keli kore, a ganma alo xaye raxidi degena. Baane nun tigine birin yitaxunxin dōxode saxanna ra, saren yi bira na keden yi. **11** Na saren yi xili nen, “Se Xōlena.” Na igene yi xolo ayi, muxu wuyaxi yi faxa na ige xōlen mindeni. **12** Malekan naaninden yi a gbee xōtaan fe. Sogen nun kiken nun sarene yitaxunxin dōxode saxanna ra, na kedenna yi yidimi, alogo na yaten jōxōn xa ba e degen na. Na kenenna jōxōn yi ba yanyin nun kōeen kenenna ra. **13** Nba, n yi fe gbete to, n singbinna nde fala ti xuiin me, a yi foyeni kore, a naxa, “Gbalona, gbalona, gbalon bōxō xōnna muxune xa, maleka saxanna bonne na e xotane fe waxatin naxan yi.”

9 Malekan suulunden yi a xōtaan fe. N yi saren to kele kore, a bira bōxōni, yili jaxi tilinxin dejinna yi so a yii. (Abyssos g12) **2** A yi yili jaxin deen nabi, tutin yi te a kui alo sulun gbeen teen tutina. Na yi sogen nun kuyeni fōxo. (Abyssos g12) **3** Tuguminne yi mini teen tutini e xuya ayi bōxōn ma, senben yi so ne yii alo tanle bōxōn ma. **4** A yi fala e xa a e nama sexene halagi bōxōn ma, hanma se xinde yo hanma wudine fō adamadiine tun, Alaa taxamasenna mi naxanye tigi ra. **5** E mi yi daxe e muxune faxe koni e xa e jaxankata kike suulun. E yi sōxōlen naxan tima muxune ma, na yi luxi nen alo tanla na muxun xin. **6** Na lōxōne yi, muxune sayaan fenma nen koni e mi a toma. Sayaan xōnla e suxuma nen han, koni sayana a gima nen e ma. **7** Na tuguminne yi luxi nen alo soon naxanye yitonxi yenge so xinla ma. Mangaya kōmōti taxamasenna e xunna alo xēmana, e yetagine luxi alo muxun yetagina. **8** E xun sexene luxi alo jaxanle xun sexena. E pinne luxi alo yatan jinna. **9** E xanle yi e kanken ma alo yenge so seen kanke masaan wure daxina. E gabutene xuiin luxi alo soo wuyaxin na xidi wontorone ra, e yi e gi siga yengeni. **10** E xunle luxi alo tali xunla. Xirinna yi e xunla nan na naxan muxune sōxōlema han kike suulun. **11** Yili Jaxin Malekan nan yi e xun na e mangan na, naxan xili Heburu xuini, Abadōn. Gireki xuiin tan yi, a xili nen, Apoliyon. Na bunna neen, “Halagi Tiina.” (Abyssos g12) **12** Gbalo singen bata dangu. Gbalo firin mōn

luxi. **13** Malekan senninden yi a xōtaan fe. N yi xuina nde me keli saraxa gande xēma daxin feri naaninne binni naxan yi Ala yetagi. **14** Xōtaan senninden yi malekan naxan yii, a yi a fala na xa, a naxa, “Malekan naaninna naxanye xidixi Yufareti baa gbeen de, ne fulun.” **15** Na maleka naaninna naxanye yi yitonxi na waxatin nun lōxon nun kiken nun jēen ma, ne yi fulun alogo dunuja muxune yitaxunxin dōxode saxanna ra, e xa na kedenna faxa. **16** Yenge soon naxanye yi soone fari, muxu wuli mōxōjen dōxode wuli fu. N na xasabin nan mexi. **17** Na fe toon kui, n soone nun soo ragine to na kiini: E kanke masane yi gbeeli alo tēena, e mamiloxi alo safiri gemēna, e neri fujiramana alo dole tēe fujina. Soone xunne luxi alo yata xunna, tēen nun tutin nun dole tēen yi minima e de. **18** Dunuja muxune birin yitaxunxin dōxode saxanna ra, na kedenna yi faxa na jaxankata saxanne xon, tēen nun tutin nun dole tēen naxanye yi minima e de. **19** Amasōto soone senben yi e dēen nun e xunla nin. E xunle yi luxi alo sajiine. E xunne na, e muxune maxōlōma naxanye ra. **20** Na gbalone mi muxun naxanye faxa, ne mi xete e yii fōxon batu feen fōxo ra e mi jinanne kiin yiba hanma suxure xēma daxina hanma a sula daxina hanma a gemē daxina hanma a wudi daxina naxanye mi seen toma, e mi fe mēma, e mi nōe sigan tiye. **21** E mi xete e muxu faxan nun e kōerayaan nun e yanga suxun nun e mupan fōxo ra.

10 N yi maleka senbema gbete to gode keli ariyanna yi, kundaan filinxi a ma alo dugina, sengunna rabilinxi a xunna ma. A yetagin mayilenma alo sogena, a sanne yi tēen yiyani alo tēe senbetenne. **2** Kedi mafilinxi xuridin nabixin yi suxi a yii. A yi a yiifari ma sanna ti fōxo igeni, a kōmenna xaren na. **3** A sōnxō xuini te alo yatan wurundun xuina. A to a xuini te, kuye sarin soloferene yi e xui ramini. **4** E yi naxan falama, n yi nōe na sebe nen nun, koni n yi fala xuina nde me keli kore, a naxa, “Kuye sarin soloferene naxan falama, na ramara wundoni, i nama a sebe!” **5** Na xanbi ra, n malekan naxan to tixi fōxo igen nun xaren ma, na yi a yiifanni te kore xōnna ma. **6** A yi a kōlo habadan Ala xinli, naxan kore xōnna nun bōxo xōnna nun fōxo igen daxi e nun e yi seene birin. Malekan yi a fala, a naxa, “A mi fa buma sōnōn! (aiōn g165) **7** Koni maleka solofereden na a xōtaan fe waxatin naxan yi, Alaa wundo fe ragidixin kamalima nen nayi

alo a rali a nabine ma kii naxan yi, a walikene.” **8** Nba, n fala xuiin naxan me a singeni keli kore, na mōn yi falan ti n xa, a naxa, “Siga, i sa kedi rabixin tongo na malekan yii naxan tixi fōxo igen nun xaren ma.” **9** N yi n maso malekan na, n yi a fala a xa, a xa kedi mafilinxi xuridin so n yii. A yi a fala n xa, a naxa, “A tongo, i yi a ragerun, a jaxunma ayi nen i de alo kumina, koni a i kuiin nafema nen xōlen na.” **10** N yi kedi mafilinxi xuridin tongo malekan yii, n to a raso n dēe, a yi jaxun n dēe alo kumina, koni n to a ragodo n kuini, n kuiin yi rafe xōlen na. **11** Na xanbi ra, e yi a fala n xa, a n mōn xa nabiya falane ti lan yamane nun siyane nun xuine nun mangane ma.

11 Awa, e yi xayen so n yii naxan yi luxi alo tamina se maliga seen na, a naxa, “Keli, i yi Ala Batu Banxin nun saraxa ganden maliga e nun muxun naxanye Ala batuma a kui. **2** Koni hali i mi Ala Batu Banxin sansan kuiin tan maliga, na lu na. Amasōto na bata so siyane yii naxanye Taa Sarijanxini bodonma han kike tonge naanin e nun firin. **3** N nan n sere firinne rasigama nen nabiya falane ralideni kasa dugine ragodoxi naxanye ma sununa fe ra, xi wuli keden xi kemē firin xi tonge sennin.” **4** Na sere firinne findixi oliwi wudi firinne nun lenpune dōxo se firinne nan na naxanye tixi bōxon birin Marigin yetagi. **5** Muxu yo wa fe jaxin naba feni e ra, tēen minima nen e de, a yi e yaxune halagi. Muxu yo wa fe jaxin naba feni e ra, fō na kanna xa faxa na kii nin. **6** Kore xōnna balan senbena e ra alogo tulen nama fa e nēma nabiya falane tiye waxatin naxan yi. Igene maxete senben fan e ra wunla ra, e mōn yi fitinan sifan birin nadin dunuja muxune ma, e na wa a xon waxati yo yi. **7** E nēma yelin e sereyaan be waxatin naxan yi, sube magaxuxin naxan tema yili jaxin kui, na e yengēma nen, a yi e nō, a yi e faxa. (Abyssos g12) **8** E binbine yi lu saxi taa gbeen yama malandeni, muxune e Marigin gbangban wudin ma taan naxan yi. Na taan luxi nen alo Sodoma hanma Misiran. **9** Yamane nun bōsōnne nun xuine nun siyane birin e binbine toma nen han soge saxan e nun a tagi. E mi tinje ne xa maluxun. **10** Dunuja muxune sewama nen muxu firinni itoe faxa feen na, e jaxan, e sanbane rasiga e bode ma amasōto na nabi firinne bata yi muxune jaxankata bōxo xōnna fari. **11** Koni na soge saxan e nun a tagiin na dangu, niin soma nen e yi fata Ala ra, e yi keli. Naxanye birin e toma, ne gaxuma nen kati. **12** E yi xui

gbeena nde me kore naxan yi a falama, a naxa, “E te be.” E yi te kore kundani, e yaxune yee xori. **13** Na waxatin yeteni, boxon yi xuruxurun gbeen ti. Taani taxunxin dɔxode fuun na, na keden yi kala. Muxu wuli solofere yi faxa na boxo xuruxurunni. Muxun donxene yi gaxu, e yi Ala tantun naxan kore. **14** Gbalon firinden bata dangu, koni a saxanden famatɔon ni i ra. **15** Maleka solofereden yi a xɔtaan fe. Fala xui gbeene yi keli kore, e naxa, “Dunuya mangayaan bata findi en Marigin nun a Muxu Sugandixin gbeen na, a mangayaan ligama a xun na nen habadan han habadan!” (aiɔn g165) **16** Fori mɔxɔɲien nun naaninna naxanye yi dɔxi e manga gbɛdene yi Ala yetagi, ne yi e xinbi sin a bun ma, e yetagine yi lan boxon ma, e yi a batu. **17** E naxa, “Marigina Ala Senben Birin Kanna, naxan na, naxan yi na a fɔloni! Nxu bata barikan bira i xa bayo i bata i senbe gbeen nawali, i ya mangayaan tixi naxan na. **18** Siyane bata yi xolo, koni i ya xolon yi fa, faxa muxune makiti waxatin yi a li, i yi i ya walikene saranna fi, i ya nabine, muxu sarijnanxine, e nun naxanye gaxuxi i xinla yee ra, muxudin nun muxu gbeena, i yi ne halagi naxanye boxon halagima.” **19** Ala Batu Banxin naxan ariyanna yi, na yi rabi. N yi a Layiri Kankiraan to Ala Batu Banxini. Na xanbi ra, kuyen jin masɔxonna nun xuine nun galan xuiin yi mini, boxon yi xuruxurun, balabalan kesene yi yolon han!

12 Taxamaseri gbeena nde yi mini kore: jaxanla maxidixin sogeni, kiken a sanna bun ma, mangaya komoti taxamasenna soxi a xun na sare fu nun firin yi naxan ma. **2** A fudikanna nan yi a ra, a gbelegbelema dii barin sɔxɔleni. **3** Taxamaseri gbete yi mini kore: Ninginanga gbeeli gbeen nan yi na ra, xun solofere yi a ma e nun feri fu, mangaya komoti taxamasenna yi soxi a xun soloferene birin na. **4** Sarene yitaxunxin dɔxode saxanna ra, a yi na keden bandun kore a xunla ra, a yi e rayolon boxoni. Naxanla naxan yi diin barima, ninginangan yi sa ti na yetagi alogo a xa a diin don a na a bari waxatin naxan yi. **5** Naxanla yi dii xemem bari, naxan mangaya xɔdexen ligama siyane birin xun na a manga wure dunganna ra. Koni a dii xemem yi rate kore Ala nun a manga gbɛden fema. **6** Naxanla yi a gi, a siga tonbonni Ala denaxan yitɔnxi a xa, alogo a xa sa balo na han xi wuli keden kemɛ firin xi tonge sennin. **7** Nayi, yenge gbeen yi keli kore xonna ma. Malekan Mikeli nun

a malekane yi na ninginangan yenge. Ninginangan nun a malekane fan yi yengen soma. **8** Koni a mi no sɔto, dɔxode mi fa lu e xa kore xonna ma. **9** E yi ninginanga gbeen woli boxoni, saɲi fonna, naxan xili Yinna Mangana hanma Setana, naxan dunuya muxune birin mayendenma. E nun a malekane birin yi rawoli ayi boxo xonna ma. **10** Nayi, n yi fala xui gbeena nde me keli kore, a naxa, “Iki, en ma Alaa kisin nun a senben nun a mangayaan waxatin bata a li, e nun a Muxu Sugandixina senbena. Amasoto en ngaxakedenne kansun muxun bata woli boxoni, naxan yi e kansunma kɛɛn nun yanyin na en ma Ala xa. **11** E yi a no Yɛxɛɛ Diin wunla nun e sereya falan xon, e mi e yete niin natanga, e tin sayaan ma. **12** Nanara, e tan naxanye kore xonna ma, e sɛwa. Koni gbalon boxo xonna nun fɔxo igen xa, bayo Yinna Manga Setana xajɛxin bata godo e fema, amasoto a kolon a waxati xunkuye mi a xa.” **13** Ninginangan to a to, a bata rawoli ayi boxon ma, jaxanla naxan dii xemem bari, a yi na sagatan fɔlo. **14** Nayi, gubugubune yi so jaxanla yii alo singbin gbeen gubugubune alogo a xa tuga a siga han denaxan sa yitɔnxi a xa tonbonni, a sa baloma denaxan yi jɛɛ saxan e nun a tagi, a yi tanga saɲin ma. **15** Nayi, saɲin yi igen baxun jaxanla fɔxo ra alo baana, alogo baan walanna xa a xali. **16** Koni boxo xonna yi jaxanla mali, a yi rabi, a yi igen min ninginangan naxan baxun jaxanla fɔxo ra. **17** Ninginangan yi xolo jaxanla ma kati! A yi siga jaxanla bonson donxene yengedeni, naxanye Alaa yamarine suxuma, e nun naxanye Yesu a fe sereyaan bama.

13 Ninginangan yi sa ti fɔxo igen de. Nba, n yi sube magaxuxina nde to te fɔxo igen xore ra, xun solofere, feri fu a ma. Mangaya komoti taxamasenne soxi a feri fune ra, Ala rayelefu xinla nde sebexi a xunne birin ma. **2** N sube magaxuxin naxan to, na yi maliga burunna jarin nan na, a sanne yi luxi alo kanko gbeen sanne. A deen luxi alo yatan dena. Ninginangan yi a senben nun a manga gbɛden nun no gbeen so a yii. **3** N yi a xunna nde to, na yi luxi alo e na a maxolo gbeen ti naxan a faxe, koni na yiren bata yi bari. Dunuya muxune birin yi kabe gbeen ti sube magaxuxini ito ma, e bira a fɔxo ra. **4** Muxun birin yi ninginangan batu amasoto a bata yi senben so sube magaxuxin yii. E yi sube magaxuxin batu, e naxa, “Nde luxi alo sube magaxuxini ito, nde nɔɛ a yenge?” **5** Waso falan nun marayelefu falan ti fena

Ala ma, na senben yi sa sube magaxuxin de, fe jaxin naba senben yi so a yii kike tonge naanin e nun firin. **6** A yi Ala rayelefu folo, a lu a xili kale e nun Ala dɔxɔdena e nun naxanye birin ariyanna yi. **7** Yama sarijanxin yenge senben yi so a yii, alogo a xa e nɔ. Senben yi so a yii bɔnsɔnna birin nun yamane birin nun xuine birin nun siyane birin xun na. **8** Dunuɗa muxune birin e xinbi sinma nen a bun ma, naxanye birin xili mi sebexi Yexee Diina Nii Rakisin Kitabun kui xabu dunuɗa da waxatini, naxan bata yi faxa nun e fe ra. **9** Nba, xa naxan tuli na, a xa a tuli mati. **10** Xa kasorasaan nagidixi naxan ma, na sama nen kasoon na yati. Xa sayaan nagidixi naxan ma silanfanna ra, na faxama nen silanfanna ra yati. Nanara, yama sarijanxin lan e xa e tunnafan e tɔgɔndiya. **11** Nba, n yi sube magaxuxi gbete to mine bɔxɔni. Feri firin yi a ma, ne luxi alo Yexee Diin fenne, koni a yi falan tima alo ninginangana. **12** A yi sube magaxuxi singena nɔɔn birin nawalima a jɔxɔni, a yi a liga bɔxɔn nun a muxune birin yi e xinbi sin na sube magaxuxi singen bun ma, naxan maxɔlɔde jaxin bata yi bari. **13** Sube magaxuxi firinden i to yi kabanako taxamasenne ligama, a yi teen nagodo bɔxɔn ma muxune yetagi keli kore. **14** Senben naxan so a yii a xa kabanako taxamasenne raba sube magaxuxi singen jɔxɔni, na yi dunuɗa muxune mayenden, a yi a fala dunuɗa muxune xa a e xa sube magaxuxi singen sawuran nafala e suxuren na suben naxan bata yi maxɔlo silanfanna ra, a yi bari. **15** Senben yi so sube magaxuxi firinden yii alogo a xa niin bira sawurani, alogo na sawuran xa falan ti, a mɔn xa muxune faxa naxanye mi e xinbi sinma sawuran bun ma. **16** A yi a liga a muxune birin xa karahan taxamasenna yi lu e birin yiifanna ma hanma e tigi ra, muxudin nun muxu gbeena, nafulu kannna nun yiigelitɔna, xɔrɔn nun konyina. **17** Muxu yo mi nɔe seen sare hanma e seen mati xa na taxamasenna mi a ma, sube magaxuxin xinla hanma a xinla taxamasenna xasabina. **18** Fo xaxinla xa sɔto nen feni i to yi. Xa naxan xaxili na, na kannna xa sube magaxuxin xinla taxamasenna xasabini i to yate ki faɗi, a yi a bunna fala, amasɔto xemena nde xinla nan a bunna ra, a tan ni i ra: keme sennin tonge sennin e nun sennin.

14 Nba, n mɔn yi Yexee Diin to tixi Siyon Geyaan fari, e nun muxu wuli keme wuli tonge naanin wuli naanin nan yi a ra a xinla nun a Fafe xinla yi

sebexi naxanye tigi ra. **2** N yi fala xuina nde me keli kore, naxan yi luxi alo ige walan gbeen xuina alo kuyen sarin xui gbeena. N fala xuiin naxan me, na yi luxi nen alo konden maxane nan yi konden maxani. **3** E yi beti nenen bama manga gbɛden nun dalise naaninne nun fonne yetagi. Muxu yo mi yi nɔe a maxaranye na betin ma fo na muxu wuli keme wuli tonge naanin wuli naaninna naxanye yi xunbaxi bɔxɔ xɔnna fari. **4** Ne nan mi e yete raxɔsi jaxanle xɔn, e sarijan. E yi biraxi Yexee Diin fɔxɔ ra a na yi siga dede. E bata yi xunba muxune tagi e lu alo bɔxɔn bogise singe faɗiin naxanye fima Ala nun Yexee Diin ma. **5** Wule falan mi yi minima e de mume! Fe yo mi yi e ra. **6** Nba, n yi maleka gbete to tuganye kore xɔnna ma. Habadan Xibaru Faɗin falana a yii, a a ralima dunuɗa muxune ma, e nun siyane nun bɔnsɔnne nun xuine nun yamane birin. (aiɔnios g166) **7** A yi a falama a xuini texin na, a naxa, “E gaxu Ala yee ra, e yi binyen fi a ma, amasɔto a kiti sa waxatin bata a li. E a batu, a tan naxan kore xɔnna nun bɔxɔ xɔnna nun fɔxɔ igen nun ticine daxi.” **8** Malekan firinden yi fa a fɔxɔ ra, a naxa, “Babilɔn taa gbeen bata kala! A bata kala, a tan naxan a tinxintareyaan dɔlɔn fixi siyane birin ma.” **9** Malekan saxanden yi fa e fɔxɔ ra, a yi a xuini te, a naxa, “Xa muxu yo sube magaxuxin nun a sawuran batu, a yi tin a taxamasenna xa sa a tigi ra hanma a yiin ma, **10** na kannna fan Alaa xɔlɔn manpaan minma nen naxan saxi xɔlo igelengenna kui, a yi jaxankata teen nun dole teeni maleka sarijanxine nun Yexee Diin yetagi. **11** E jaxankata teen tutin tema nen habadan han habadan, matabu mi e xa kɔeen nun yanyin na e tan naxanye sube magaxuxin nun a sawuran batuma e tan naxanye tinma a xinla taxamasenna yi sa e ma.” (aiɔn g165) **12** Nanara, yama sarijanxin lanma nen e yi e tunnafan, naxanye Ala yamarine suxuma e denkeleya Yesu ma. **13** Na danguxina, n yi fala xuiin me keli kore, a naxa, “I to sebe: Sewan na kanne xa naxanye faxama Marigini folo iki ma.” Alaa Nii Sarijanxin naxa, “Jɔndin nan na ra, e e matabuma nen e wanli, amasɔto e wanle biraxi e fɔxɔ ra.” **14** Nba, n yi kunda fixen to. Adamadi maligana nde yi dɔxi na kundaan fari, mangaya taxamaseri kɔmɔtin xema daxin soxi a xun na, wolite xenxena a yii. **15** Maleka gbete yi keli Ala Batu Banxini, naxan yi dɔxi kundaan fari, a yi a xui ramini na ma, a naxa, “I ya woliten tongo, i seen xaba, amasɔto se xaba waxatin bata a li bɔxɔni,

a bata mō.” 16 Nayi, naxan yi dōxi kundaan fari, na yi a woliten nadangu bōxo xōnna fari, a bōxo xōnna se xaba daxin jian fefe! 17 Awa, n yi maleka gbete to kele Ala Batu Banxini ariyanna yi, wolite xēnxēna nde na fan yii. 18 N mōn yi maleka gbete to mine ariyanna saraxa badeni, naxan yi tēen xun na. Wolite xēnxēn yi suxi naxan yii, a yi falan ti na xa a xuini texin na, a naxa, “I ya wolite xēnxēn naso bōxo xōnna manpa bogine ra, i yi e xaba amasoto e bata mō!” 19 Malekan yi a woliten nadangu bōxōn fari, a manpa bogine xaba. A yi e rawoli Alaa xōlo gbeen manpa igen badeni. 20 E sa manpa bogine bodon manpa bogi ige badeni taa xanbin na. Wunla yi mini manpa bogi ige badeni, a te han soone dēni lanna, a bōxōn manpa ige baden ma han fayida kilo kēmē saxan jōxōn.

15 Nba, n mōn yi taxamaseri gbee magaxuxi gbete to kore xōnna ma, maleka soloferene nan yi a ra fitina fe soloferene yi naxanye yii. Fitina fe dōnxēne nan ne ra, amasoto Alaa xōlōn kamalima ne nan xōn ma. 2 Na xanbi ra, n yi lonna nde to, a gbo alo fōxo igena naxan mayilenma alo kilasi fixēna, a basanxi tēen na. N yi muxuna ndee fan to tixi na lonna ma naxanye sube magaxuxin nō e nun a sawuran nun a xinla xasabina, Alaa kondenne yi suxi e yii. 3 E yi Alaa walikēen Musaa betin bama e nun Yēxēē Diina betina, e naxa, “Marigina, Ala Senben Birin Kanna, I ya wanle gbo, e magaxu! Siyane birin ma mangana, i ya kiraan tinxin. Nōndin nan a ra. 4 Marigina, nde mi gaxuē i tan yēē ra, a tondi i xinla binyē? Amasoto i tan nan keden pe sarijan. Siyane birin fama nēn, e yi i batu. Amasoto i ya tinxinyaan bata makēnen.” 5 Na xanbi ra, n yi Ala Batu Banxin dēen nabixin to kore, Alaa sereya bubuna. 6 Fitina fe soloferene yi maleka soloferen naxanye yii, ne yi mini Ala Batu Banxini, e maxidixi taa dugi sarijanxine yi naxanye yi mayilenma, e kanke yi xidixi xēma tagi xidine ra. 7 Awa, na dalise naaninna nde keden yi xēma lenge soloferene so maleka soloferene yii naxanye yi rafexi habadan Alaa xōlōn na. (aiōn g165) 8 Ala Batu Banxin yi rafe tēē tutin na fata Alaa binyen nun a senben na. Muxu yo mi yi nōē soē Ala Batu Banxini han maleka soloferene fitina fe soloferene yi kamali.

16 Nba, n yi fala xui gbeen mē keli Ala Batu Banxini. A yi a falama maleka soloferene xa, a naxa, “E siga, ē sa Alaa xōlo lengen solofereni itoe yixelē bōxo xōnna mal!” 2 Maleka singen yi siga, a sa

a gbee lengenni xelē bōxōn ma. Sube magaxuxin taxamasenna yi muxun naxanye ma, e nun naxanye yi a sawuran batuma, fure jaxin yi mini ne fatin ma. 3 Malekan firinden yi a gbee lengenni xelē fōxo igeni. Igen yi liga alo muxu faxaxin wunla. Daliseen naxanye birin yi fōxo igeni, ne birin yi faxa. 4 Malekan saxanden yi a gbee lengenni xelē baane nun tigine yi, e birin yi findi wunla ra. 5 Malekan naxan yi igene xun na, n yi na xuiin mē, a naxa, “I tinxin, i tan naxan na, i tan naxan yi na a fōlōni, i tan sarijandena, i bata kitin sa tinxinni, 6 bayo e bata i ya yama sarijanxinxin nun nabine wunla ramini. Nayi, i bata wunla so e yii, e yi a min. Na nan lan e ma.” 7 Awa, n yi fala xuiin mē keli saraxa gandeni, a naxa, “Nōndin na a ra, Marigina, Ala Senbe Birin Kanna, i kitine sama tinxinna nun jōndin nin.” 8 Malekan naaninden yi a gbee lengenni xelē sogen fari. Ala yi tin, sogen xa yamaan magan a yilinga gbeen na. 9 A yilinga gbeen yi muxune magan, e yi Ala xinla rayelefu, senben naxan yii a fitina feni itoe rafa. E mi e xun xanbi so e yulubine yi, e yi Ala binya. 10 Malekan suulunden yi a gbee lengenni xelē na sube magaxuxina manga gbēden ma, a yamanan yi lu dimini, muxune yi lu e lenne xinjē xōlēni. 11 Ala Naxan Kore, e yi na rayelefu e xōlēn nun e fure dē jaxine fe ra. Koni e mi xetē e kēwali jaxine fōxo ra. 12 Malekan senninden yi a gbee lengenni xelē Yufareti baa gbeeni. Baan yi xara alogo mangan naxanye fama sa keli sogeteden binni, ne xa kiraan soto. 13 Nba, n yi yinna saxan to mine ninginangan nun sube magaxuxin nun wule nabiin dē, e luxi alo xunjnene. 14 Yinnane nan yi ne ra naxanye kabanako feene ligama. E siga dunuja mangane birin fema alogo e xa e malan yenge so xinla ma Senbe Birin Kanna, Alaa lōxo gbeena fe ra. 15 Marigin naxa, “A mato, n fa feen muxune ratērenama nēn alo mujadana. Sewan na kanna xa naxan luma a yēē ra yi, a yi a dugine kantan alogo a ragenla nama mini, a yagi.” 16 Nba, yinnane yi mangane malan yirena nde yi denaxan xili Heburu xuini Haramagedon. 17 Malekan solofereden yi a gbee lengenni xelē foyeni. Fala xui gbeen yi keli manga gbēdeni Ala Batu Banxini, a yi a fala, a naxa, “A bata jan!” 18 Kuyen jīn masōxōnna nun xuine nun galan xuiin yi mini, bōxōn yi xuruxurun gbeen ti naxan jōxōn munma yi liga xabu muxune da! 19 Taa gbeen yi taxun saxanna ra. Siyane taane yi kala. Ala mi jinan Taa gbeen Babilōn xōn, a yi a xōlo gbeen manpa lengenna so mēn kaane yii, alogo e xa Alaa

xolɔn min. 20 Ige tagi bɔxɔne birin yi tunun. Geyane fan mi yi fa toma. 21 Balabalan kɛsɛ binyene yi lu yolonɲɛ muxune ma naxanye yi kilo tonge naaninna liyɛ. Muxune yi Ala rayelefu na fitina balabalan kɛsɛna fe ra, amasɔto na yi magaxu kati!

17 Na xanbi ra, lenge soloferene yi suxi maleka soloferen naxanye yii, na nde keden yi fa n fɛma, a naxa, “Fa be, yalunde jaxalan gbeena fe kitin sama kii naxan yi, n xa na yita i ra, naxan findixi taa gbeen misaala ra naxan tixi baa wuyaxi longonna ra. 2 Dunuɲa mangane yalunyaan liga a tan nan xɔn, dunuɲa muxune birin yi e min a yalunyaan dɔlɔn na han e xunne yi keli.” 3 Alaa Nii Sarijanxin yi so n yi, malekan yi n tongo, a siga n na tonbonni. N yi sa jaxanla nde to, a dɔxi sube magaxuxi gbeela nde fari, Ala rayelefu falane yi sebɛxi naxan yiren birin ma a xinle ra. Xun solofere nun feri fu nan yi a ma. 4 Na jaxanla yi maxidixi dugi mamiloxin nun a gbeela nan na e nun xɛmaan nun bɔxɔ bun nafunle nun gɛmɛ tofajine. Xɛma igelengenna a yii, na rafexi fe haramuxine nun a yalunya fe xɔsixin birin na. 5 Xinla nde yi sebɛxi a tigi ra, wundo feen nan yi na ra, a naxa, “Babilɔn Taa Gbeena, Yalunde jaxanle nun dunuɲa fe haramuxine birin nga.” 6 Awa, n yi na jaxanla to, a minxin nan yi a ra yama sarijanxin wunla nun Yesu a sere tɔgɔndiyaxine wunla ra. N to a to, n yi kabe kati. 7 Malekan yi n maxɔdin, a naxa, “I kaben nanfera? N jaxanla fe wundo feen bunna falama i xa nen e nun sube magaxuxin naxan a xalima, xun solofere nun feri fu naxan ma. 8 I sube magaxuxin naxan toxi, na yi na nun, koni iki, a mi fa na. Anu, a mɔn tema nen yili jaxin na, a sa halagi. Dunuɲa muxun naxanye birin xili mi sebɛxi habadan Nii Rakisin Kitabun kui benun dunuɲa xa da waxatin naxan yi, ne na sube magaxuxin to waxatin naxan yi, e kabema nen, amasɔto a yi na nun, koni a mi fa na iki, anu a mɔn fama nen.” (Abyssos g12) 9 “Na ma, fɔ xaxinla nun fe kolonna nan xa lu en yi: Xun soloferene findixi na taan geyaan soloferene nan na, jaxanla dɔxi naxanye fari. E mɔn findixi manga soloferene nan na. 10 Suulun bata kala. Keden mangayani iki, boden munma fa singen. A na fa waxatin naxan yi, a waxatidi nan tun nabama. 11 Sube magaxuxin naxan yi na nun, koni a mi fa na, na yetɛɛn findixi mangan solomasɛxɛden nan na, a mɔn manga soloferene yɛ, a sigan halagin nan ma.” 12 “I feri fuun naxanye toxi,

ne findixi manga fuuna ndee nan na, naxanye munma mangayaan fɔlɔ singen, koni e mangayaan ligama nen waxatidi bun ma sube magaxuxin waxatini. 13 E birin miriyaan keden: e e senben nun e fangan birin soma nen sube magaxuxin yii. 14 E Yɛxɛɛ Diin yɛngema nen, koni Yɛxɛɛ Diina e nɔma nen, amasɔto Marigine Marigin nan a ra, e nun Mangane Mangana. E nun a muxu xilixine nun a muxu sugandixine nun a muxu tɔgɔndiyaxine fan yi nɔɔn sɔto.” 15 Malekan yi a fala n xa, a naxa, “I igen naxanye toxi, yalunde jaxanla yi dɔxi denaxan yi, bɔnsɔnne nun yamane nun siyane nun xuine nan ne ra. 16 I feri fuune nun sube magaxuxin naxanye toxi, ne yalunde jaxanla rajaxuma nen, e yi a yii seene birin ba a yii, e yi a rageli. E yi a fati benden don, e yi a gan. 17 Amasɔto Ala nan na saxi e bɔɲɛni, e xa a sagoon liga. E birin yi lan a ma, e yi e senben nawali sube magaxuxina mangayani han Alaa falan yi kamali.” 18 “I jaxanla naxan toxi, na findixi taa gbeen nan na naxan mangayaan ligama dunuɲa mangane birin xun na.”

18 Na danguxina, n mɔn yi maleka gbɛtɛ to gode keli kore naxan senbɛ yi gbo, a nɔrɔn dɛgen yi bɔxɔn birin yiyalan. 2 A yi a xuini te, a naxa, “Babilɔn taa gbeen bata bira, a bata kala! A bata findi jinanne nun yinna jaxine birin dɔxɔden na e nun xɔli jaxin nun sube haramuxi xɔsixin sifan birin konna. 3 Amasɔto siyane birin bata a yalunyaan dɔlɔ xɔlɛn min. Dunuɲa mangane birin bata yalunyaan liga a xɔn. Dunuɲa yulane bata findi nafulu kanne ra a nafulu kanya gbeen xɔn.” 4 Na xanbi ra, n yi fala xui gbɛtɛ mɛ keli kore, a naxa, “N ma yamana, ɛ keli a yi, alogo ɛ nama basan a yulubine ra, ɛ nun ne yi fitina fena ndee sɔto ɛ bode xɔn. 5 Amasɔto a yulubine bata e malan e bode fari te han kore xɔnna. Ala mi jinanxi a fe jaxine xɔn ma. 6 ɛ a saranna fi alo a bonne saranxi kii naxan yi, ɛ a saranna fi a kɛwanle ra dɔxɔde firin. A dɔlɔn saxi igelengenna naxan kui, ɛ na rafe dɔxɔde firin. 7 A binyen nun yetɛ yijnaxunna naxan nagidi a yetɛ ma, ɛ na tɔrɔn nun a sɔxɔlɛn jɔxɔnna ragidi a ma. Amasɔto a fala nen a yetɛ ma, a naxa, ‘A mato, n bata findi jaxalan mangan na, kaja gile mi n na, n mi sune mume!’ 8 Na ma, fitina feni itoe birin fama a ma nen lɔxɔ kedenni: furen nun sunun nun fitina kamena, a mɔn yi woli tɛɛni, a gan. Amasɔto Marigina Ala senben gbo naxan a kitin saxi.” 9 Dunuɲa mangan naxanye luxi yalunyaan

nun yete yijnaxunni a xon, ne na a ganmatoon tutin to te waxatin naxan yi, e sunuma nen, e wuga a fe ra. **10** E gaxuxin yi sa ti wulani a jaxankatana fe ra, e yi a fala, e naxa, “Gbalona, gbalona, Babilon taa gbeena, taa senbe kanna, i ya kitin bata fa i ma sanja ma kedenni!” **11** Dunuya yulane fan sunuma nen, e wuga a fe ra, amasoto muxu yo mi fa e sare seene sarama sonon: **12** naxanye findixi xemaan nun gbeti fixen nun boxo bun nafunle nun perili geme tofajin nun taa dugi fajine nun dugi mamiloxine nun dugi faji gbete nun dugi gbeele nun wudi faji sifane birin na e nun se fajin sifan birin naxanye rafalaxi sama jinna ra, e nun wudi fajine nun sulan nun wuren nun geme faji fixene, **13** e nun sinamon wudi xiri jaxumen nun se xiri jaxumene nun latikononna nun mirihi latikononna nun wusulanna nun dolon nun turen nun murutu fujin nun murutun nun jingene nun yexene nun soone nun wontorone nun konyine nun muxune niine. **14** Yulane yi a fala taan muxune xa, e naxa, “Sare seen naxanye birin xoli i ma, ne bata tunun, i ya nafunle nun i ya noron bata jan. E mi fa toma sonon!” **15** Yulan naxanye nafunla soto na taani yulayani, ne sa tima nen wulani, amasoto e bata gaxu a jaxankatan yee ra, e wugama nen, e sunu. **16** E yi a fala, e naxa, “Gbalona. Gbalon taa gbeeni ito xa. Na kaane yi maxidixi taa dugi fajin nin, e nun dugi mamiloxin nun a gbeela e nun xemaan nun geme tofajine. **17** Nafulu gbee sifani ito bata raxori sanja ma kedenni!” Kunki ragine nun kunki kui muxune nun kunkin walikene birin yi sa ti wulani. **18** E gbelegbelema, e yeen tixi a ganmatoon tutin tematoon na, e naxa, “Taa mundun yi maliga taa gbeeni ito ra?” **19** E lu gbangbanna se e xunne yi sununi, e yi lu wuge, e sunu, e naxa, “Gbalona, gbalon taa gbeeni ito xa! Kunki kanne birin findixi nafulu kanne ra taani ito nin. A bata raxori sanja ma kedenni!” **20** E sewa a halagi feen na, e tan naxanye kore xonna ma, e tan yama sarijanxin nun a nabine nun a xerane, e fan xa sewa. Amasoto Ala bata a makiti, a yi e xun mafala kitin bolon. **21** Nba, maleka senbemana nde yi geme gbeen tongo alo se din gemena a yi a woli foxo igeni, a naxa, “Babilon taa gbeen nawolima ayi kala senbe sifani ito nin, a mi fa to sonon. **22** Konden xuiin nun yenla xuiin nun xulen xuiin nun xota xuiin mi fa mema ayi sonon! Walike kesuxi sifa yo mi fa toma ayi sonon. Se din xuiin mi fa mema ayi sonon! **23** Lenpu degen mi fa toma ayi sonon. Naxalandin nun

jaxalandi kanna xuiin mi fa mema ayi sonon. Na birin bayo e yulane yi findixi dunuya senbe kanne nan na. Na birin bayo e dunuya muxune birin mayenden nen e woyimeya feene xon. **24** Alaa nabine nun a yama sarijanxin wunla minixi Babilon taan nin muxun naxanye birin faxa boxoni, ne wunla goronna a tan nan ma.”

19 Na danguxina, n yi fala xui gbeen me kore naxan yi luxi alo gali gbeen xuina, a naxa, “Tantunna Ala xa! Kisin nun binyen nun senbena en ma Ala nan yii! **2** Amasoto a kitine sama jondin nun tinxinna nin. A bata jaxalan yalunxi gbeen makiti naxan yi dunuya kalama a yalunyaan na. A mon yi a walikene faxa feen saran a ra.” **3** E mon yi a fala, e naxa, “Tantunna Ala xa! Taan gan tutin luma nen te habadan.” (aiŋn g165) **4** Fori moxonen nun naaninne nun dalise naaninne yi e xinbi sin, e yi Ala batu, a doxi a manga gbedeni, e naxa, “Amina! Tantunna Ala xa!” **5** Na xanbi ra, fala xuiin yi keli manga gbedeni naxan a fala, a naxa, “E en ma Ala tantun, e tan a walikene birin, e tan naxanye gaxuxi a yee ra, muxudin nun muxu gbeena.” **6** Nba, n yi fala xuiin me, naxan yi luxi alo gali gbeen xuina, a mon yi luxi alo ige walan gbeen xuina, e nun kuye sarin gbeen xuina. A naxa, “Tantunna Ala xa! Amasoto en Marigina, Ala senben birin kanna nan mangayaan nabama! **7** En sewa, en jaxan. En yi binyen fi a ma! Bayo Yexee Diina jaxalandi tiin waxatin bata a li, a jaxalandin bata a yiton. **8** Dugi faji sarijanxin mayilenxin bata so a yii a maxidi seen na.” Dugi fajin findixi yama sarijanxina tinxinyaan misaala nan na. **9** Na xanbi ra, malekan yi a fala n xa, a naxa, “Ito sebe: ‘Sewan na kanne xa naxanye xilixi Yexee Diina jaxalandi tiin sewa bande donni.’” A mon yi a fala n xa, a naxa, “Alaa jondi falane nan itoe ra.” **10** N yi n xinbi sin a bun ma a batu feen na, koni a yi a fala n xa, a naxa, “I nama na liga! I walike boden nan n tan na e nun i ngaxakedenna naxanye birin na Yesu a fe seren ba. Ala nan xa batu!” Bayo Yesu a fe sereya falan findixi Alaa Nii Sarijanxin nabiya falane nan na. **11** Nba, n yi kore xonna to rabixi, n yi soo fixen to. Naxan yi doxi a fari, na yi xili nen Tinxinna nun Jondina. A kitin nun yengen nabama tinxinna nin. **12** A yee yi luxi alo tee degena. Mangaya taxamaseri wuyaxi yi soxi a xun na. Xinla yi sebexi a ma, muxu yo mi naxan kolon, fo a tan. **13** Damaan naxan yi ragodoxi a ma, na bata yi sin wunli. A xili nen, “Alaa Falana.” **14**

Ariyanna ganle yi biraxi a fəxo ra, e yi dəxi soo fixene fari. E maxidixi taa dugi fixe sarijanxini. **15** Silanfan xənən yi minima a de, a yi siyane noma naxan na. A tan nan mangaya xədexen ligama siyane birin xun na a manga wure dunganna ra. A tan nan manpa bogine bodonma Ala Senben Birin Kanna xolo gbeen manpa ige badeni. **16** Xinla sebexi a domain nun a danban ma, a naxa, “Mangane Mangana, Marigine Marigina.” **17** Nba, n yi malekan to tixi sogen tagi. Xonla naxanye birin yi kore foyeni, a yi falan ti ne xa a xuini texin na, a naxa, “E fa be, e fa e malan Alaa donse donna malan gbeena fe ra, **18** alogo e xa fa mangane suben don e nun sofa kuntigine nun senbemanen nun soone nun soo ragine e nun muxune birin, xərone nun konyine, muxu gbeen nun muxudina.” **19** N yi na sube magaxuxin to, e nun dunuɲa mangane nun e ganle. E yi malanxi alogo e xa na kanna yenge naxan dəxi soo fixen fari, e nun a ganla. **20** E yi sube magaxuxin suxu, e nun wule nabiin naxan yi kabanako feene ligama a yetagi a muxune mayenden naxanye xon e yi tin sube magaxuxin taxamasenna xa sa e ma, e yi a sawuran batu. E firinna birin neɲen yi woli ayi tɛɛ darani naxan degema dole tɛɛn na. (Limnɛ Pyr g3041 g4442) **21** Naxan yi dəxi soo fixen fari, silanfanna naxan yi minima na de, na yi a dənɣene faxa, xoline yi lugo e binbine ra.

20 Nba, n yi malekan to gode keli kore, yili jaxin deɲinna a yii e nun yolonxon kuye gbeena.

(Abyssos g12) **2** A yi ninginangan suxu, sari fonna, Yinna Mangana, Setana, a yi a xidi, a lu na han jɛɛ wuli keden. **3** Malekan yi a woli yili jaxin na, a yi na səxon a ma, a taxamasenna sa a ma, alogo a nama fa siyane mayenden han jɛɛ wuli kedenna yi kamali. Na na dangu, fə a mən xa fulun nən han waxatidi. (Abyssos g12) **4** N yi manga gbedene to. Naxanye yi dəxi e yi, kiti sa senben yi so ne yii. Naxanye xunne bata yi sege e de Yesu a fe sereyaan nun Alaa falana fe ra, naxanye mi sube magaxuxin nun a sawuran batu, naxanye mi tin a taxamasenna xa sa e tigi ra hanma e yiin ma, n yi ne niine to. E niin mən yi bira e yi e nun Alaa Muxu Sugandixin yi mangayaan liga han jɛɛ wuli keden. **5** Faxe muxun dənɣene niin mi birama e yi han jɛɛ wuli kedenna yi defe. Faxe muxune kenla sayani, a folon nan na ra. **6** Sewan muxune xa naxanye na lu na keli singeni sayani. Sayaan firinden mi senbe sətoma e tan ma, e findima nən Ala nun a Muxu

Sugandixina saraxaraline ra, e yi mangayaan liga a xon han jɛɛ wuli keden. **7** Na jɛɛ wuli kedenna na dangu waxatin naxan yi, Setana raminima nən kasoon na. **8** A minima nən a siyane birin mayenden bəxon tongon naaninne birin yi alogo a xa e malan yengen xili ma, na yi xili sa “Gogo nun Magogo.” E wuya ayi alo fəxo igen meɲensinna. **9** E fama nən e bəxon yiren birin li, e sa yama sarijanxin daaxaden nabilin e nun Alaa taa rafanxina. Koni tɛɛn yi godo keli kore, a yi e halagi. **10** Na Yinna Mangana, Setana naxan e mayenden, na yi woli tɛɛ darani naxan degema dole tɛɛn na, sube magaxuxin nun wule nabiin dənaxan yi. E lu jaxankataxi yanyin nun kəɛɛn na habadan han habadan. (aiōn g165, Limnɛ Pyr g3041 g4442) **11** Nba, n yi manga gbede fixe gbeen to, e nun naxan yi dəxi a yi. Bəxo xonna nun kore xonna e gima a yɛɛ ra, e mi fa to sənən. **12** Na xanbi ra, n yi faxe muxune to, muxu gbeene nun muxudine, e tixi manga gbeden yetagi. Kitabune yi rabi, Kitabu gbete fan yi rabi. Nii Rakisin Kitabun nan yi na ra. Faxe muxune yi makiti alo a yi sebexi kii naxan yi kitabune kui, lan e kewanle ma. **13** Fəxo igen yi a gbee faxe muxune ramini, sayaan nun laxira fan yi e gbee faxe muxune ramini, e birin yi makiti e kewanle ma. (Hadɛs g86) **14** Nayi, sayaan nun laxira yi woli tɛɛ darani. Na findin sayaan firinden nan na, tɛɛ darani. (Hadɛs g86, Limnɛ Pyr g3041 g4442) **15** Naxan yo xili mi to sebexi Nii Rakisin Kitabun kui, na wolima ayi nən tɛɛ darani. (Limnɛ Pyr g3041 g4442)


21 Na xanbi ra, n yi kore xəri nenen nun bəxo xəri nenen to. Amasəto kore xəri singen nun bəxo xəri singen bata yi tunun, fəxo igen mi yi fa na sənən. **2** Awa, n yi Alaa Taa Sarijanxin to gode keli ariyanna yi Ala fema, Yerusalən nənena, a yitonxi alo jaxalandin naxan a yitonxi siga a xemen nalandeni. **3** N yi fala xui gbeen me manga gbedeni, a naxa, “Ala dəxoden bata lu adamadiine tagi! A luma nən e fema, e findi a yamaan na. Ala yetɛɛn luma nən e fema, a findi e Ala ra. **4** A yi e yɛɛgen birin fitan e yɛɛ ra yi, sayaan mi fa luma na sənən hanma sununa hanma wugana hanma xolena. Amasəto fe fonne bata jan.” **5** Na xanbi ra, naxan yi dəxi manga gbedeni, na yi a fala, a naxa, “N bata feen birin findi a nenen na!” A mən yi a fala, a naxa, “Itə sebe, amasəto fe ragidixin nun jəndin nan falani itoe ra.” **6** A mən yi a fala n xa, a naxa, “N tan nan Alifa nun Omega ra. Na nan na ra, a folon nun a rajanna. Xa min xonla naxan

ma, n siimaya tigi igena nde soma nen a yii, a sare mi na. 7 Na nan findima nɔ sɔtɔ muxun kɛɛn na. N findima nen a Ala ra, a yi findi n ma diin na. 8 Koni nafiɣine nun denkeleyatarene nun muxu xɔsixinɛ nun faxa tiine nun yanga suxune nun kɔɛramuxune nun suxure batune nun wule falane birin, ne tan gbeen tɛɛ daraan nan na naxan dɛgɛma dole tɛɛn na. Sayaan firinden nan na ra.” (Limnɛ Pyr g3041 g4442) 9 Lenge soloferen yi suxi maleka soloferen naxanye yii, naxanye yi rafexi fitina fe dɔnxɛ soloferene ra, na nde keden yi fa n fɛma, a naxa, “Fa be, n xa njaxalandin yita i ra, Yɛxɛɛ Diina njaxanla.” 10 Alaa Nii Sarijanxin yi so n yi, malekan yi siga n na geya gbeen fari pon, a sa Taa Sarijanxin yita n na, Yerusalɛn naxan godo keli ariyanna yi Ala fɛma. 11 Alaa nɔrɔn yi a ma, a mayilenma alo yasipi gɛmɛna alo gɛmɛ fixɛna. 12 Yinna yi taan nabilinxi, a mate, a gbo. So dɛ fu nun firin yi a ma. Maleka fu nun firin tixi na dɛɛne ra. Isirayila bɔnson fu nun firinne xinle sebɛxi dɛɛne ma. 13 Sogeteden binni dɛ saxan, kɔmɛnna ma dɛ saxan, yiifanna ma dɛ saxan, sogegododen binni dɛ saxan. 14 Bɛtɛn sade fu nun firin nan yi taan yinna bun, Yɛxɛɛ Diina xɛra fu nun firinne xinle sebɛxi e ma. 15 Malekan naxan yi falan tima n xa, se maliga tamin yi suxi na yii naxan yi rafalaxi xɛmaan na, alogo a xa taan maliga e nun a dɛɛne nun a yinna. 16 Tongon naanin nan yi taan ma. A kuyan nun a yigboon yi lan. Malekan yi taan maliga se maliga tamin na: kilo wuli firin. A kuyan nun a yigboon nun a yiteen birin yi lan. 17 Malekan yi yinna maliga adamadiine se maliga kiini, nɔngɔnna yɛ kɛmɛ tonge naanin e nun naanin. 18 Na yinna yi tixi yasipi gɛmɛn nan na, taan yi tixi xɛma fɛpin nan na. A fixa alo kilasina. 19 Taan nabilinna yinna bɛtɛn sadene yi rayabuxi gɛmɛ fɛpin sifan birin na: yasipi gɛmɛn nan yi a bɛtɛn sade singen ma, a firindena safiri gɛmɛna, a saxandena agati gɛmɛna, a naanindena emeroɗi gɛmɛna, 20 a suulundena onixi gɛmɛna, a sennindena karinɛliya gɛmɛna, a soloferedena kirisoliti gɛmɛna, a solomasɛxedena berili gɛmɛna, a solomanaanindena topasi gɛmɛna, a fudena kirisopirasi gɛmɛna, a fu nun kedendena yasinti gɛmɛna, a fu nun firindena ametisi gɛmɛna. 21 A so dɛ fu nun firinne birin yi rafalaxi gɛmɛ fɛpine nan na. Dɛ keden kedenna birin yi rafalaxi perili gɛmɛ tofɛpi keden nan na. Taan kira gbeen yi rafalaxi xɛma fɛpin nan na, a fixa alo kilasina. 22 Koni n mi Ala Batu Banxin se to na taani,

amasɔtɔ Marigina, Ala Senben Birin Kanna nun Yɛxɛɛ Diin nan findixi Ala Batu Banxin na. 23 Taan mako mi yi sɔgen nun kike dɛgen ma, amasɔtɔ Alaa nɔrɔn yi a yiyaalanma. Yɛxɛɛ Diin nan a lɛnpun na. 24 Dunɔɔna siyane sigan tima a dɛgen nan ma, dunɔɔna mangane fama nen e binyen na a xɔn. 25 Taan dɛɛne mi ragalin mume, amasɔtɔ kɛɛn mi soma na yi mume! 26 Siyane birin fama nen e binyene nun e xunnayerenne ra a xɔn. 27 Koni se sarijantare yo mi soɛ na taani, hanma fe xɔsixi rabana hanma wule falana, koni fɔ naxanye xili sebɛxi Yɛxɛɛ Diina Nii Rakisin Kitabun kui.

22 Malekan yi siimaya baa igen fan yita n na. A fixa alo kilasina, keli Ala nun Yɛxɛɛ Diina manga gbɛdeni. 2 Siimaya wudin yi tixi taan yama malanden tagi, e nun baan fɔxɔ firinne ra, naxan yi bogima sanja ma fu nun firin jɛɛn bun ma. A yi bogima nen kike yo kike. Siyane rakendɛya seen nan yi a dɛɛne ra. 3 Danga mi fa na sɔnɔn. Ala nun Yɛxɛɛ Diina manga gbɛden luma nen na taani. A walikene yi a batu. 4 E yi a yetagin to, a xinla yi lu e tigi ra. 5 Kɛɛn mi fa soɛ mume, e mako mi fa luma lɛnpu dɛgen ma hanma sogena, amasɔtɔ Marigina, Ala nan e luma kɛnɛnni. E luma nen mangayani habadan han habadan. (aiɔn g165) 6 Na xanbi ra, malekan yi a fala n xa, a naxa, “Fe ragidixin nun nɔndin nan falani itoe ra. Marigina, Ala naxan xaxinla fima nabine ma, na nan a malekan nafaxi alogo a xa sa a yita a walikene ra naxan fama ligadeni.” 7 Yesu naxa, “N famatɔɔn ni i ra. Sɛwan na kanna xa naxan na nabiya fala sebɛxini itoe suxu.” 8 N tan Yoni nan feni itoe mexi, n yi e to. Nba, n to e mɛ, n yi e to, malekan naxan yi e yitama n na, n yi bira na san bun ma, alogo n xa a batu. 9 Koni a yi a fala n xa, a naxa, “I nama na liga de! I walikɛ bodɛn nan n na, e nun i ngaxakɛden nabine e nun naxanye birin fala sebɛxini itoe suxuma. Ala nan batu!” 10 A yi a fala n xa, a naxa, “I nama nabiya fala sebɛxini itoe findi wundo feene ra de. Amasɔtɔ waxatin bata maso. 11 Xa tinxintaren naxan na, na xa lu tinxintareyani. Xa xɔsiden naxan na, na xa lu xɔsi fe rabani. Xa naxan tinxin, na xa lu tinxinyaan fari. Xa naxan sarijan, na xa lu sarijanni.” 12 Yesu naxa, “N famaɛn ni i ra. N fama nen birin kewanla saranna ra n yii. 13 N tan nan Alifa nun Omega ra, na bunna nɛɛn fa fala a singen nun a dɔnxɛna, a fɔlɔn nun a rajanna.” 14 “Sewan na kanne xa naxanye e domane xama alogo e xa siimayaan wudin sɔtɔ, e so taan so dɛɛne ra. 15 Koni

fe xosixi rabane nun kɔeramuxune nun yalundene
nun faxa tiine nun suxure batune nun wule falan
nafan naxanye birin ma, ne luma nen taan fari ma.”
16 “N tan Yesu bata n ma malekan xε ε ma alogo a
xa sa sereyani ito ba denkeleya yamane xa. Dawuda
bonsɔnna nan n na, keli a denbayani. Tagalan saren
nan n tan na, naxan tema xɔtɔnni.” **17** Awa, Alaa Nii
Sarijanxin nun jaxalandin yi a fala, e naxa, “Fa be!”
Naxan yo na a mε, na fan xa a fala, a naxa, “Fa be!”
Xa min xɔnla naxan ma, na xa fa. Xa naxan wama
siimaya igen xɔn, na xa a rasuxu, a mi sarama. **18** N
muxune nan maxadima naxanye birin nabiya fala
sebexini itoe mɛma, xa naxan nde sa e fari, Ala fitina
feene sama nen na kanna fari naxanye sebexi kitabuni
ito kui. **19** Xa naxan yo nde ba nabiya fala sebexini itoe
ra, Ala na kanna gbee bama nen siimaya wudin nun
taa sarijanxina fe yi, naxanye fe falaxi kitabuni ito
kui. **20** Naxan feni itoe seren bama, na naxa, “Nɔndin
na a ra, n famaan ni i ra.” Amina! Marigi Yesu fa! **21**
Marigi Yesu xa hinan ε birin na.



*Awa, n yi Alaa Taa Sarijanxin to gode keli ariyanna yi Ala fema, Yerusalen nenena, a yitonxi
alo jaxalandin naxan a yitonxi siga a xemen nalandeni. N yi fala xui gbeen me manga
gbedeni, a naxa, "Ala dɔɔden bata lu adamadiine tagi! A luma nen e fema,
e findi a yamaan na. Ala yetɛn luma nen e fema, a findi e Ala ra.*

Revelation 21:2-3

Reader's Guide

Jalonke at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Jalonke at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Yalunka---Yalunka-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Luka 8:31
Romi Kaane 10:7
Lankenemayana 9:1
Lankenemayana 9:2
Lankenemayana 9:11
Lankenemayana 11:7
Lankenemayana 17:8
Lankenemayana 20:1
Lankenemayana 20:3

aidios

Romi Kaane 1:20
Yudi 1:6

aiōn

Matiyu 12:32
Matiyu 13:22
Matiyu 13:39
Matiyu 13:40
Matiyu 13:49
Matiyu 21:19
Matiyu 24:3
Matiyu 28:20
Maraka 3:29
Maraka 4:19
Maraka 10:30
Maraka 11:14
Luka 1:33
Luka 1:55
Luka 1:70
Luka 16:8
Luka 18:30
Luka 20:34
Luka 20:35
Yoni 4:14
Yoni 6:51
Yoni 6:58
Yoni 8:35
Yoni 8:51
Yoni 8:52
Yoni 9:32
Yoni 10:28
Yoni 11:26
Yoni 12:34
Yoni 13:8
Yoni 14:16

Kewanle 3:21
Kewanle 15:18
Romi Kaane 1:25
Romi Kaane 9:5
Romi Kaane 11:36
Romi Kaane 12:2
Romi Kaane 16:27
Korenti Singena 1:20
Korenti Singena 2:6
Korenti Singena 2:7
Korenti Singena 2:8
Korenti Singena 3:18
Korenti Singena 8:13
Korenti Singena 10:11
Korenti Firindena 4:4
Korenti Firindena 9:9
Korenti Firindena 11:31
Galati Kaane 1:4
Galati Kaane 1:5
Efesi Kaane 1:21
Efesi Kaane 2:2
Efesi Kaane 2:7
Efesi Kaane 3:9
Efesi Kaane 3:11
Efesi Kaane 3:21
Efesi Kaane 6:12
Filipi Kaane 4:20
Kolosi Kaane 1:26
Timote Singena 1:17
Timote Singena 6:17
Timote Firindena 4:10
Timote Firindena 4:18
Tito 2:12
Heburune 1:2
Heburune 1:8
Heburune 5:6
Heburune 6:5
Heburune 6:20
Heburune 7:17
Heburune 7:21
Heburune 7:24
Heburune 7:28
Heburune 9:26
Heburune 11:3
Heburune 13:8
Heburune 13:21
Piyeri Singena 1:23

Piyeri Singena 1:25
Piyeri Singena 4:11
Piyeri Singena 5:11
Piyeri Firindena 3:18
Yoni Singena 2:17
Yoni Firindena 1:2
Yudi 1:13
Yudi 1:25
Lankenemayana 1:6
Lankenemayana 1:18
Lankenemayana 4:9
Lankenemayana 4:10
Lankenemayana 5:13
Lankenemayana 7:12
Lankenemayana 10:6
Lankenemayana 11:15
Lankenemayana 14:11
Lankenemayana 15:7
Lankenemayana 19:3
Lankenemayana 20:10
Lankenemayana 22:5

aiōnios

Matiyu 18:8
Matiyu 19:16
Matiyu 19:29
Matiyu 25:41
Matiyu 25:46
Maraka 3:29
Maraka 10:17
Maraka 10:30
Luka 10:25
Luka 16:9
Luka 18:18
Luka 18:30
Yoni 3:15
Yoni 3:16
Yoni 3:36
Yoni 4:14
Yoni 4:36
Yoni 5:24
Yoni 5:39
Yoni 6:27
Yoni 6:40
Yoni 6:47
Yoni 6:54
Yoni 6:68

Yoni 10:28
Yoni 12:25
Yoni 12:50
Yoni 17:2
Yoni 17:3
Kewanle 13:46
Kewanle 13:48
Romi Kaane 2:7
Romi Kaane 5:21
Romi Kaane 6:22
Romi Kaane 6:23
Romi Kaane 16:25
Romi Kaane 16:26
Korenti Firindena 4:17
Korenti Firindena 4:18
Korenti Firindena 5:1
Galati Kaane 6:8
Tesaloniki Firindena 1:9
Tesaloniki Firindena 2:16
Timote Singena 1:16
Timote Singena 6:12
Timote Singena 6:16
Timote Firindena 1:9
Timote Firindena 2:10
Tito 1:2
Tito 3:7
Filemon 1:15
Heburune 5:9
Heburune 6:2
Heburune 9:12
Heburune 9:14
Heburune 9:15
Heburune 13:20
Piyeri Singena 5:10
Piyeri Firindena 1:11
Yoni Singena 1:2
Yoni Singena 2:25
Yoni Singena 3:15
Yoni Singena 5:11
Yoni Singena 5:13
Yoni Singena 5:20
Yudi 1:7
Yudi 1:21
Lankenemayana 14:6

eleēsē

Romi Kaane 11:32

Geenna

Matiyu 5:22
Matiyu 5:29
Matiyu 5:30
Matiyu 10:28
Matiyu 18:9
Matiyu 23:15
Matiyu 23:33
Maraka 9:43

Maraka 9:45
Maraka 9:47
Luka 12:5
Yaki 3:6

Hadēs

Matiyu 11:23
Matiyu 16:18
Luka 10:15
Luka 16:23
Kewanle 2:27
Kewanle 2:31
Korenti Singena 15:55
Lankenemayana 1:18
Lankenemayana 6:8
Lankenemayana 20:13
Lankenemayana 20:14

Limnē Pyr

Lankenemayana 19:20
Lankenemayana 20:10
Lankenemayana 20:14
Lankenemayana 20:15
Lankenemayana 21:8

Sheol

Dunujna Følona 37:35
Dunujna Følona 42:38
Dunujna Følona 44:29
Dunujna Følona 44:31
Yatēne 16:30
Yatēne 16:33
Sariyane 32:22
Samuyeli Singena 2:6
Samuyeli Firindena 22:6
Mangane Singena 2:6
Mangane Singena 2:9
Yuba 7:9
Yuba 11:8
Yuba 14:13
Yuba 17:13
Yuba 17:16
Yuba 21:13
Yuba 24:19
Yuba 26:6
Yaburina 6:5
Yaburina 9:17
Yaburina 16:10
Yaburina 18:5
Yaburina 30:3
Yaburina 31:17
Yaburina 49:14
Yaburina 49:15
Yaburina 55:15
Yaburina 86:13
Yaburina 88:3
Yaburina 89:48


Yaburina 116:3
Yaburina 139:8
Yaburina 141:7
Sandane 1:12
Sandane 5:5
Sandane 7:27
Sandane 9:18
Sandane 15:11
Sandane 15:24
Sandane 23:14
Sandane 27:20
Sandane 30:16
Karaməxəna 9:10
Marafanna Falane 8:6
Esayi 5:14
Esayi 7:11
Esayi 14:9
Esayi 14:11
Esayi 14:15
Esayi 28:15
Esayi 28:18
Esayi 38:10
Esayi 38:18
Esayi 57:9
Esekiyeli 31:15
Esekiyeli 31:16
Esekiyeli 31:17
Esekiyeli 32:21
Esekiyeli 32:27
Hose 13:14
Amosi 9:2
Yunusa 2:2
Xabakuki 2:5

Tartaroō

Piyeri Firindena 2:4

Questioned


None yet noted



Denkeleyaan x̱ən, Ala to Iburahima xili, a yi a falan suxu, a siga na yamanani, a yi naxan s̱əṭoma a keən na, hali a to mi yi a kolon a sigan denaxan yi. - Hebrews 11:8



*Firawona to tin yamaan xa siga, Ala mi e ramini Filisistine yamanan kira yisoxin xon, bayo Ala a fala nen, a naxa,
 "E na yengen to, e nœ e miriyane maxete nen, e xete Misiran yi." - Exodus 13:17*





N tan Poli, Alaa Muxu Sugandixina Yesu a walikena, Ala bata naxan xili alogo n xa findi a xeraan na, a yi n yebe alogo n xa Alaa falan Xibaru Fajnin nali, n bata ito sebe e ma.

- Romans 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

Where?			When?							
			Innocence		Fallen			Glory		
			Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth
Who?	God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16			God's Perfectly Restored Fellowship with All Mankind in the Holy City	All Restored Acts 3:21	
		Son			Pre-Incarnate, John 8:58		Incarnate, John 1:14			Paradise, Luke 23:43
		Holy Spirit			Everywhere, Psalm 139:7		Indwelling Believers, John 14:17			
	Mankind	Living Mankind	No Creation	No Fall No Death Gen 1:31	Serving the Savior or Satan on Earth, Ephesians 2:1-5			No Hades No Dead Rev 20:3		
		Deceased Believing Mankind			Blessed in Paradise, Luke 16:22					
		Deceased Unbelieving Mankind			Punished in Hades until the final judgment, Luke 16:23 and Rev 20:13					
	Angels	Holy Angels	No people Gen 1:1	No Unholy Angels Gen 1:31	Serving Mankind at God's Command, Hebrews 1:14			Lake of Fire Prepared for the Devil and his Angels Mat 25:41 Rev 20:10	Fallen Angels Forgiven? Col 1:20 Yes? Heb 2:16 No?	
		Imprisoned Angels			Imprisoned in Tartarus, 2 Peter 2:4 and Jude 6					
		Fugitive Angels	Rebelling Against Christ Thalaasa, Rev 20:13							
		First Beast Demon	Accusing Mankind			Lake of Fire Revelation 19:20				
		False Prophet Demon	1 Peter 5:8 and Revelation 12:10			Abyss Revelation 20:2				
		Satan								

Destiny

Jalonke at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the whole*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Disciple All Nations

Nayi, ɛ siga, ɛ sa siyane birin findi n ma xarandiine ra, ɛ yi e rafu igeni n Fafe Ala nun a Dii Xemen nun a Nii Sarijanxin xinli. - Matthew 28:19